

Tĩrtũm kapẽr ã kagà
nyw



New Testament in Apinayé (BR:apn:Apinayé)

Tĩrtũm kapēr ã kagà nyw

New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files dated 29 Jan 2022
383a4e22-34cd-505f-9cc2-2f9921e7aa9f

Contents

Matêwre	1
Makre	100
Rukre	156
Juãw	259
Atre	332
Rômãn	419
Wam Korît	470
Sikũn Korît	516
Karatas	545
Epes	563
Piripos	579
Korosẽ	589
Wam Tesarõn	600
Sikũn Tesarõn	609
Wam Ximotre	614
Sikũn Ximotre	627
Xitre	636
Piremõ	642
Eprêw	644
Xiakre	679
Wam Pêtre	691
Sikũn Pêtre	704
Wam Juãw	711
Sikũn Juãw	721
Hapuhã Juãw	723
Jutre	725
Apokarip	730

Matêwre
Matêwre kot tanhmã
Jejus kot amnhĩ nhĩpêx
to ho pa hã kagà

Matêwre na pre kagàja nhĩpêx. Kêp Jejus nhỹ hã hkrajê jahkre xwýnh na pre. Nê kêp Ijaew. Hixi hõ pê na Rewi. Tã na pre mē pamã kagàja nhĩpêx nê kamã Jejus kot pika hwýr wrýk nê kator nê tanhmã ri amnhĩ nhĩpêx to ho pa hã harê nê hã kagà. Nê kêp mē panhõ pahihiti mex o mex ã harê nê hã kagà. Æ na pre Matêwre mē pamã Jejus jarê nê hã kagà anê.

Apraãw kanrêhã hkra nê htãmnhwýjé nhĩxi

Rukre 3.23-38

¹ Amnepêm Jejus Kris kormã pika hwýr wrýk kêt ri hkukamã higêtjê nhĩxi na jajaja.

Wýj ri higêtjê hõ nhĩxi na pre kêp Tawi.

Nê Tawi xwýj ri higêt nhĩxi pê na pre Apraãw.

² Nê Apraãw kra na pre kêp Ijak.

Nê Ijak kra na pre kêp Jako.

Nê Jako hkra na pre kêp Juta mē htõjaja.

³ Nê Juta hkra na pre wa kêp Pere nê Jera.

Nê Pere mē Jera wa katorxà na pre kêp Tama.

Nê Pere hkra na pre kêp Erõ.

Nê Erõ hkra na pre kêp Ari.

⁴ Nê Ari hkra na pre kêp Amĩnatap.

Nê Amĩnatap kra na pre kêp Nasõ.

Nê Nasõ hkra na pre kêp Samõ.

⁵ Nê Samõ hkra na pre kêp Poas.

Nê Poas katorxà na pre kêp Raap.

Nê Poas kra na pre kêp Opex.

Nê Opex katorxà na pre kêp Rutre.

Nê Opex kra na pre kêp Jese.

⁶ Nê Jese hkra na pre kêp Pahihiti Tawija.

Nê Tawi hkra na pre kêp Sarumãw.

Sarumãw katorxàja Uristi hprõ na pre. Tã nhũm pre Uristi ty nhũm Tawija hãmri mýrpê Uristi hprõ ho hprõ nê kamã hkra. Nhũm wa hkraja kêp Sarumãw.

⁷ Nê Sarumãw kra na pre kêp Ropã.

Nê Ropã hkra na pre kêp Apiasti. Nê Apiasti kra na pre kêp Asti.

⁸ Nê Asti hkra na pre kêp Josapa.

Nê Josapa hkra na pre kêp Jorã.

Nê Jorã hkra na pre kêp Ojis.

⁹ Nê Ojis kra na pre kêp Jotã.

Nê Jotã hkra na pre kêp Akaj.

Nê Akaj kra na pre kêp Ejekis.

¹⁰ Nê Ejekis kra na pre kêp Manase.

Nê Manase hkra na pre kêp Amõ.

Nê Amõ hkra na pre kêp Josis.

¹¹⁻¹² Nê Josis kra na pre kêp Jekonĩs mē htõjaja.

Kormã mē htõr ri na pre Papirõn nhõ xwýnhjaja kot mē hkurê kaxàr kaxyw mē hwýr hprõt nê mē unê. Ijaew piitã unênh pa nê ma akupým mē õ pyka hwýr mē ho hapêx nhũm mē hpãnhã Papirõn kamã pa ho pa. Jakamã nhũm Josis mē hkra Jekonĩs mē htõjaja mē hipêêxã pyrã nê Papirõn kamã pa ho pa.

Nê Jekonĩs kra na pre kêp Saraxi.

Nê Saraxi hkra na pre kêp Joropape.

¹³ Nê Joropape hkra na pre kêp Apiux.

Nê Apiux kra na pre kêp Eriakĩ.

Nê Eriakĩ hkra na pre kêp Ajo.

¹⁴ Nê Ajo hkra na pre kêp Satok.

Nê Satok kra na pre kêp Akĩ.

Nê Akĩ hkra na pre kêp Eriux.

¹⁵ Nê Eriux kra na pre kêp Eresa.

Nê Eresa hkra na pre kêp Matã.

Nê Matã hkra na pre kêp Jako.

¹⁶ Nê Jako hkra na pre kêp Juje.

Nê Juje hprõ na pre kêp Marir.

Nê Marir Kra na pre kêp Jejus.

Mê kot kãm: “Tirtûm kot mê pakaxyw âm xwÿnh” anhÿr xwÿnhnta na pre.

17 Nhûm Apraãw kanrêhã axte axpên kanrêhã mê àptâr nywjaja Tawija wÿr kêp 14. Nê Tawi nhîrô pê Papirôn hwÿr mê hapêx kêt ri axpên kanrêhã mê àptâr nywjaja mãânên kêp 14. Nê ra Papirôn kamã mê pa nhîrô pê axpên kanrêhã Jejus pê Tirtûm kot mê pakaxyw âm xwÿnhnta wÿr mãânên kêp 14. Â na pre Jejus Kris xwÿj ri higêtjê nhîxi anê.

Jejus Kris kator

Rukre 1.26-38, 2.1-7

18 Tã ã mê hixi jarênh kot anhÿr kanrêhã na pre ã Jejus Kris kator anê. Nhûm pre kormã Jujeja Marir o hprô kaxyw. Nom kormã ho hprô hkêt ri nhûm htujarô. Kormã hkukrit tã nhûm Tirtûm Karô tanhmã ho nhûm htujarô. 19 Hãmri nhûm Jujeja harênh ma nê tee ri hamaxpêr nê htÿx nhãm mêhõ kot kêp htu hã hkamnhîx. Juje kot tãm amnhî nhîpêx nê tãm hamaxpêr jakamã tee ri kot ho hprô hkukamã hamaxpêr. Nê hamaxpêr o:

—Nã pa mãn ixte htute hã. Nhãm mêhõ ra kot ã hipêx anhÿr kênã. Nã kot paj ho ixprô hkêt nê. Nom kot paj ixkwÿjê mã ã kot amnhî nhîpêx anhÿr o amnhîrit kêt nê. Kot paj anê nhûm mê kuma nê ho kapêr punuj nhûm amnhî kamã hpijaãm tÿx nê. Ja pymaj kot paj ixkatàt kôt hkaga kuré kumrêx. Nom ixkwÿjê hkàx ã hkaga. Anê.

20 Nê ã hamaxpêr anhÿrja o ra gôr nê nô. Nhûm Tirtûm kapêr o mê wrÿk xwÿnhjê hõ hwÿr wrÿ nê hwÿr axàn kuri xa. Hãmri nê kãm:

—Pa Juje? E ot pa awÿr tê. Kwa tee ri Marir o aprô hkukamã ajamaxpêr punuj kêt nê. Mãmrî ho aprô. Mêhõ kot apê tanhmã ho hkêt. Tirtûm Karô na pre ã hipêx anê. Jakamã kwa tee ri ajamaxpêr kêt nê mãmrî ho aprô nê war apa.

21 Koja hkrare kato nê myre nê hprêk. Hãmri nê mê kot hkôt amnhî xunhwÿr xwÿnhjaja mê kot amnhî tomnuj piitã pê mê utâr pa. Jakamã koja kato ka wa hã hixi mê nhûm kêp Jejus. Anê.

Nhûm pre ã Tirtûm kapêr o mê wrÿk xwÿnhja kãm kapêr anê. Ijaew kapêr kãm Jejus jarênhja te kêp “Tirtûm kêp mê papytâr xwÿnh” anhÿr pyrãk. Jakamã nhûm Tirtûm kapêr o mê wrÿk xwÿnhja Juje ôt kãm ã kãm Marir jarênh anê. 22-23 Nom kormã ã kãm kapêr anhÿr xwÿj ri na pre ra Tirtûm nhÿ hã kapêr xwÿnhjê hõja kukamã tanhmã harênh to nê hã kagã. Nê hã kagã ho:

E mê inhma nê inhmar tÿx nê ho apa. Koja nhÿrmã pyka já kamã mêhõ kormã hkukrit tã htujarô. Nê hkra kato nê myre. Nhûm mê omu nê hã hixi mê nhûm kêp Emanuew. Anê.

Ijaew kapêr kãm “Emanuew” jarênhja te kêp “Ota ra Tirtûm mê pahkôt pa ho pa” anhÿr jarênhnta pyrãk. Jakamã nhûm pre Tirtûm nhÿ hã kapêr xwÿnhja Jejus kukamã ã harênh anê nê hã kagã.

24 Jakamã nhûm Tirtûm kapêr o mê wrÿk xwÿnhja Juje mã kapêr par mê nhûm hkrãkato. Hãmri nê kot kãm ujarênh xá hkôt Marir o hprô. 25 Nom kormã tanhmã ho hkêt nê ri o pa rãhã nhûm hkrareja kato. Hãmri nhûm wa hã hixi mê nhûm kêp Jejus nê mãânên kêp Emanuew.

2

Kanhêti ho studa xwÿnhjê jarênh

1 Nhûm pre Jejus Perêj kamã kato. Pika pê Jutej kamã. Pahi Eroxo kormã kot Jutej nhõ xwÿnhjê ho amnhîptâr o pa ri nhûm õ pika kamã kato. Hãmri nhûm Tirtûmja kaxkwa kamã Kra kator jarênh xá hã kanhêti raxta õ nhõ nhûm pika hõ kamã kanhêti ho studa

xwýnhjaja omu. Kanhêtiya pumu nê hkînh nê axpên mã:

—Kwa ga mē kanhêti raxti mûj pumu. Mân ra Ijaew nhô pahi nywta kato nhûm kanhêti mûj kêp ho amnhîrit xà hâ ajêt. Kwa pu mē ma hapêr o mō nê nhÿri tokyx omu nà.

Anê hāmri nê amnhî to pikuprōnh pa nê ma hapêr o pa. Ma myt gjêx xà hwÿr hapêr o pa hâ apkati xohtô nê. Hāmri nê ra Ijaew nhô pika hwÿr pōj nê krî pē Jerujarê hwÿr hapêr o mō. Pahi Erox nhô krîja wÿr nhûm mē hapêr o mō hāmri nê nhÿri pōj nê mē hkrare nywta ã krî nhô xwýnhjê kukjêr o mō ² nê mē kām:

—Pa? Ot pa mē apê Ijaew nhô pahi nywreta pumunh kaxyw mō. Ham kator xwýnhhta. Mē inhô pika kamã na pa prem kaxkwa hkrax rûm kot ho amnhîrit xà hâ kanhêti raxta pumu. Hāmri nê nhÿri pahi nywre pumunh nê kutã mē ixkôn krã ho ixtêm nê ixkrî nê kām mex o mex ã harênh kaxyw nêtân mē inhô krî rûm hapêr o mō. Kwa mē inhmã harê. Nhÿri na? Na pa mē inhmã omunh prãm tÿx kumrêx.

Anhÿr o hâ mē hkukjêr o mōr jakamã nhûm mē piitã pahi nywja jarênh ma nê axpên mã harênh o hprôt. ³ Nhûm pahi Eroxja harênh ma nê tee ri amnhî kukamã hamaxpêr. Pahi nyw kot mē ho amnhîptâr ã hkamnhix nhûm já kêp omnuj tÿx nê. Nhûm krî nhô xwýnhjaja ã hamaxpêr anhÿr ã omu nê tee ri amnhî kukamã hamaxpêr o ra kām ma nê. ⁴ Hāmri nhûm pahi Eroxja amnhî wÿr hkwyjê hâ karô. Mē õ patre krãhtûmjaja nê Tirtûm kapêr tûm o mē ahkre ho mē pa xwýnhjaja nhûm amnhî wÿr mē hâ karô nê Tirtûm kot nhÿrmã mē hwÿr mênh mã xwýnhhta ã mē hkukjêr kaxyw. Nê mē kām:

—E Tirtûm kot nhÿrmã mē pahwÿr mênh mã xwýnhhta ã na pa mē akukjêr kaxyw mē ato akuprô.

Kwa mē atô inhmã harê. Koja nhÿrmã kator kaxyw nê nhÿri koja we kato? Xà jar mē panhō krî kamã nà? Xà nhÿri krî hō kamã? Anê.

⁵ Hāmri nhûm mē kuma nê kām:

—Nà mē panhō pika pē Jutej kamã koja xep kato. Krî pē Perêj kamãã. Na pre Tirtûm nhÿ hâ kapêr o mē pa xwýnhja ra hkukamã mē panhîgêtyê mã tanhmã harênh to nê hâ kagã. Nê hâ kagã ho:

⁶ Pa Perêj nhô xwýnhjaja? E mē anhō krî grire htã kamã koja nhÿrmã mē panhō Pahi Maatija kato. Koja mē pahpê Ijaewjê piitã mē pahto amnhîptâr mex o pa. Jakamã mē anhō krî grire htã koja Ijaew piitã axpên mã mex ã harênh o pa.

Ã na pre Tirtûm kot mē pahwÿr mênh mã xwýnhhta kukamã mē kām harê nê hâ kagã anê. Anê.

⁷ Hāmri nhûm pahi Erox tee ri ã harênh anhÿrja ma hāmri nê amnhî wÿr mē kot hâ àhkukjêr o mōr xwýnhjê hâ karô. Nom nhÿri Ijaew kax ã. Hāmri nhûm mē ma hwÿr mra nê agjê nhûm mē omu nê pahi nywta ã mē hkukja nê mē kām:

—E mē aprî hâ inhmã pahi kator nywta jarê. Tanhmã na pre ra mē ate kanhêti pumunh ã mytwrÿ kute? Xà ham na ka prem omu nà amnepê mã? E mē aprî hâ tanhmã inhmã harênh to. Anê.

Hāmri nhûm mē ihōja kām:

—Nà na ra hâ amgrã axkrut kaxyw. Na pa prem omu hāmri nê inhnojarêt nê man ixpa ho ixpa ry rax nê mē awÿr pōj. Anê.

⁸ Nhûm mē kuma nê mē kām:

—Tÿ. Nom jar amrakati. Perêj kamã na xep kato. E mē māmri ma hwÿr mō nê kamã hapêr. Hāmri nê nhÿri omu nê akupÿn ixwÿr mō nê inhmã harê. Pa ijaxwÿja ma hwÿr mō nê omu nê mē apyrã nê kām mex o mex ã harê. Ijaxwÿja inhmã omunh prãm tÿx kumrêx. Anê.

Nom hêx rom ã ri mē kām kapēr anē. Kot nhÿri harēnh mar nē hã àmnēnh nhūm mē kot hpīr kaxyw nhūm hêx rom ã kām omunh prām tÿx ã amnhī jarēnh anē. ⁹⁻¹⁰ Jakamã nhūm mē kuma hāmri nē kato nē ma Perēj wÿr mōr kurē kumrēx. Hāmri nē kormã mē ò pika kamã mē pa ri kanhêti ho studa xwÿnhnta nhūm mē axte amnhī kukamã omu nē hkīnh nē. Nhūm ma Perēj wÿr mē hkukamã mō nhūm mē omunh pē ma hkôt pa rãhã hwÿr pōj. Nhūm kanhêtija pahi nywre nhōrkwÿ mÿri ajêt. ¹¹ Jakamã nhūm mē ma hkôt mra nē ixkreja wÿr pōj nē kapem xa. Hāmri nē mē kām kapēr nē mē hwÿr agjê nē Jesus mē katorxãja wa omu. Hāmri nē Jesus kutã hkōn krã ho hkrī hpa nē kām kapēr nē kām:

—Pa Xugitre. Hêxta waa nē. Nà amex o amex. Kot kaj nhÿrmã axaptãr hāmri nē apē mē inhō Pahi Maati. Nà ãm hāmri na pa mē apumu nē ixkīnh nē. Anē.

Hāmri nē ahpÿnhã kām hkīnh xà gō. Kām ôr kwÿ gō nē kām mēhkuxwa xà hkwy gō nē kām te kot rãmre kuxware pyrãk pē mīraja nhūm mē kām hkwy gō. Mē hkīnh xà hã kãxpore sohtë nhūm prem kām ôr pa. ¹² Hāmri nē ra akupÿm Jerujarē kamã pahi Eroxx wÿr nojarêt. Nhūm kamãt nhūm mē gōr nē hikwÿ hāmri nē ra amÿti. Nhūm Tirtūm mē hpimtir kām mē kām kapēr nē mē kām:

—Pa? E mē inhma. Kêr ka mē akupÿm pahi Eroxx wÿr amrar nē kām mē hkrata jarēnh kêt nē. ãm kwarī ho kwarī. Nē kêr ka mē pry hō hã mãn ma mē anhō pika hwÿr akupÿm apa ho apa.

Anhÿr o mē kām kapēr jakamã nhūm apkati nhūm mē kãnhmã hkrī hāmri nē Tirtūm kot mē kām hã karō xà hkôt ma akupÿm mē ò pika hwÿr pa kurē kumrēx nē akupÿm pahi Eroxx wÿr mrar kêt nē.

Juje mē hprō wa kot Eroxx pymaj ma Jejus o mōr

Apokariip 12.1-6, 12.13-18

¹³ Tã nhūm kanhêti ho studa xwÿnhjaja ma akupÿm hapêx hāmri nhūm Tirtūm axte Marir mjên Juje hwÿr kapēr o mē wrÿk xwÿnhjê hō mē. Nhūm kê axte hpimtir kām hwÿr wrÿ nē kām kapēr nē kām:

—Pa Juje. E kwa kãnhmã nhÿ. Na ra pahi Eroxxja aprō pē hkrata ã amÿnê. Kojã tokyx pôristi hkwyjaja mē anhō krī hwÿr pōj nē war apē hpīr kaxyw ri hapêr. Jakamã kwa wa tokyx akato nē ma pika pē Ejit wÿr amōr kurē kumrēx. Nē Ejit kamã apa rãhã pa nhÿrmã akupÿn amnē war amē. E kwa tokyx. Anē.

¹⁴ Hāmri nhūm kuma nē kãnhmã nhÿ nē Marir mra nē war amnhī to akuprō nē ra nojarêt. Hāmri nē krīja pē Jejus o kato nē ma o mōr kurē kumrēx. Wa mōr ryy nē hāmri nē Ejit wÿr pōj nē kamã pa ho pa.

¹⁵⁻²⁰ Rôm nhūm pahi Eroxx tee ri amnhī wÿr kanhêti ho studa xwÿnhjê kamã hamak o pa nom nhūm mē akupÿm hwÿr mrar kêt nē. Jakamã nhūm mē kamã gryk nē hamaxpēr o:

—Tk. Kwa nà. Na mē ãm inhmã hêx nē akupÿn ixwÿr mrar nē nhÿri inhmã pahi nywta jarēnh kêt nē. Nà kwãr mē mãmri ã inhÿpêx anē. Mē kot ixpê ho hpimxuure kaxyw ã. Nà kot paj mē kêp kupī nhūm mē rī amnhī pumu. Na xep prem kanhêti kot harēnh xaja pumunh ã ra hã amgrã pyxi nē hkôt mytwrÿ kêp 6. Jakamã mãn mē hkrata ra hã amgrã axkrut kaxyw. Nà na pa ra ijamaxpēr. Kot paj Perēj kamã mē hkra myjaja ra mē hã amgrã axkrut xwÿnhjaja nē kormã mē hã amgrã axkrut kêt xwÿnh pitã mē himex pa. Jao ra mē kamã pahi nywta pī. Nà ixte hpīr mã kênã. Kojã hprêk nē ixpãnhã Ijaew o amnhiptãr kêt nē.

Anhÿr o hamaxpēr hāmri nē amnhī wÿr ò pôristi hkwyjê hã karō

nê mê kãm mê hkrajê hã amÿnê nê mê kãm:

—E kêr ka mê ma Perěj wÿr mra nê kamã mê kêp mê hkra myrejaja ra mê hã amgrà axkrut xwÿnhjê nhîmex pa. Nê kormã mê hã amgrà axkrut kêt xwÿnhjaja mãânên mê himex par kumrêx. Nê Perěj pu hã ri krî hkryre hkôt mãânên ri ajapôj nê ã mê himex par anê. Anê.

Hãmri nhÿm mê kuma nê ma mê hwÿr mrar kurê kumrêx. Hãmri nê Perěj wÿr pôj nê mê kêp mê hkra myre piitã mê himex pa. Jakamã nhÿm mê katorxã nê mê hipêêxajaja tee ri mê hkra htyk xwÿnhjê pumu nê hkaprî htÿx nê mÿr rÿnh nê. Nom na pre Tîrtÿm nhÿ hã kapêr jarênh o mê pa xwÿnh finat Jeremîstija ra amnepê m ã mê kot amnhî nhîpêx anhÿrja kukamã mê panhîgêjtê mã mê harê nê hã kagã. Na pre mê kãm Ijaew kurê xwÿnhjê pynênh nê ma mê ò pika hwÿr mê ho hapêx par kaxyw. Hãmri nhÿm mê panã Rrakewja te ra kot tee ri ja hã mê omunh nê tanhmã amnhî nhîpêx to pyrãk nhÿm Jeremîstija tanhmã Ijaewjê jarênh to nê hã kagã. Nê hã kagã ho:

Amnepê m Perěj kamã na pre mê panã Rrakewja hpijagri ho nôrja ã ra htyk kaxyw nê tee ri hkra kator mã xwÿnhhta kukamã hamaxpêr nê mÿr o nô. Nhÿm hkwyjajaja tee ri akupÿm tam hamaxpêr kaxyw kãm kapêr. Tã jarãhã Rrakew kanrêhã hkra nê htãmnhwÿ nijaja ra urãk nê tee ri mê hkrare ho hamak xaj mÿr o pa. Mê kot mê kêp utar nê mê himex par jakamã nhÿm mê tee ri mê ho hamak xaj mÿr o pa. Anê.

Nhÿm pre finat Jeremîsja mê hkukamã ã mê harê nê mê hã kagã anê. Tã ra jarãhã mêni piitã Rrakew pyrã nê hkrajê o hamak xaj mÿr o pa.

Wa kot akupÿm wa ò pika hwÿr Jejus o môr

Juãw 7.41-42

Tã nhÿm mytwrÿ grêre nê hapêx nhÿm pahi Erox ty. Jakamã nhÿm kamãt nhÿm Jujeja gôr nê nô. Nê kê òt kãm axte amÿti. Nhÿm Tîrtÿm kapêr o mê wrÿk xwÿnhja axte hwÿr wrÿ nê kãm:

—Pa Juje? E na ra Marir pê hkra pîr mã xwÿnhhta ty. Jakamã kwa wa mãmrî ma akupÿm mô. Ma akupÿm mê apê Ijaewjê nhô pika hwÿr axãmnhîx aprô mê hkrata wa o mô.

Anhÿr o kãm kapêr. Na pre ra amnepê m Tîrtÿm nhÿ hã kapêr o mê pa xwÿnhjê hõja ja kukamã mê panhîgêjtê mã ja jarê nê hã kagã. Nê hã kagã kot: “Ixpê Tîrtÿm kot paj nhÿrmã Ejit rÿm ma akupÿm ò pika hwÿr ixkrata wa mê kumê.” Anhÿr o kot hkukamã harênh nê hã kagã.

²¹ Jakamã nhÿm Tîrtÿm kapêr o mê wrÿk xwÿnhja ã Juje mã karô anê hãmri nhÿm kuma nê ma akupÿm wa o mô. Ma akupÿm mê ò pika hwÿr wa o mô.

²² Tã ra akupÿm hpôx kaxyw htêp o mô. Hãmri nê pahi Erox kra Akêrawja ra hipêêxã mÿr pê kot Jutej kamã mê ho amnhîptar hã harênh ma. Hãmri nê tee ri mê amnhî kukamã hamaxpêr nê kãm mê hwÿr wa o môr puma nê.

Tã nhÿm kamãt nhÿm Juje ra gôr nê nô nê kê axte amÿti. Nhÿm kê axte Tîrtÿm kapêr o mê wrÿk xwÿnhja hwÿr wrÿ nê akupÿm ò pika hkwy pê Jutej wÿr môr nê wa mê hkurê nê kãm:

—Pa Juje? E kêr ka Jutej wÿr wa mê amôr kêt nê. Pãnhã nhãm mê anhô pika hõ hwÿr mãn mô nê kamã ri apa.

Anê nhÿm kuma nê hpãnhã wa mê ma mê ò pika hkwy pê Garirej wÿr wa mê juk nê ma mô. ²³ Nê kamã pôj nê krî pê Najare hwÿr mô nê kamã amnhÿm ôrkwÿ nhîpêx nê

kamã wa mẽ pa ho pa. Nhũm pre ra annepêm Tirtũm nhỹ hã kapêr o mẽ pa xwýnhjê hõja ra ã mẽ kot amnhĩ nhĩpêx anhỹrja kukamã mẽ panhĩgêjtjê mã mẽ harê nê hã kagã. Nê hã kagã kot:

Tirtũm kot mẽ pahwýr mẽnh mã xwýnhhta koja kêp Najare nhõ xwýnh. Anê.

3

Juãw Paxis kot Tirtũm kapêr jarênh o pa

Makre 1.1-6; Rukre 3.1-14; Juãw 1.19-23

¹Nhũm pre Juãw Paxisja ã amnhĩ nhĩpêx anê. Nê pika pê Jutej kamã mẽ kãm Tirtũm kapêr jarênh o pa. No ãm krĩm pa hkêr nê. ãm mẽ hpu hã krĩ pê amỹm ri kapôt ã ri mẽ kãm Tirtũm kapêr jarênh o pa. ²⁻³Tirtũm nhỹ hã kapêr o pa xwýnh finat Ijais ra kot Juãw kukamã mẽ panhĩgêjtjê mã tanhmã harênh to nê hã kagã xá hkôt. Na pre hkukamã hã kagã ho:

Koja nhỹrmã mẽhõ mõn pøj. Kapôt ã mõn pøj nê mẽ kãm tanhmã mẽmoj tã karõ hto ho ri pa. Nê mẽ kãm: “Koja Tirtũm tokyx mẽ pahwýr mẽ panhõ Pahihtija mẽ nhũm wrý nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o ri apa. Te mẽ kot mẽhõ kutêp pry ho mexta pyra nê amnhĩ nhĩ ho tãm amnhĩ nhĩpêx nê tãm ajamaxpêr mex o ri apa. Kêr ka mẽ Pahihti kutêp ã amnhĩ nhĩpêx anhỹr o ri apa.” Anhỹr o koja mẽ kãm ujarênh o pa. Anê.

Na pre finat Ijaisja Juãw Paxis kukamã ã mẽ kãm harênh anê nê hã kagã. Tã nhũm hã kagã xãja kôt nhũm Juãw Paxisja mõn pøj. Hãmri nê Ijais kot hkukamã harênh xã hkôt kapôt ã ri mẽ kãm ujarênh o pa nhũm mẽ kãm mar prãm xwýnhjaja

ma hwýr mra. Nhũm mẽ kãm kapêr nê mẽ kãm:

—E koja Tirtũm tokyx kot mẽ pakaxyw ãm xwýnhja o amnhĩrit. Jakamã kwa mẽ tokyx kutêp amã amnhĩ tomnuj kaga hprãm xãj tãm amnhĩ nhĩpêx o apa.

Anhỹr o Jejus kutêp mẽ kãm kapêr o pa.

⁴Juãw Paxisja hikãxpore hkêr jakamã na pre ê mex kêt nê pa. ãm mẽmo mry pê kamer kĩ ho amnhĩm ê nhĩpêx nê hagjê nê hã pa. Nê mẽmo mry hkã ho amnhĩ pre nê ri pa. Nê mẽõ mex kur kêt nê ãm krit ku nê menh ôr o ri pa.

⁵Jakamã nhũm kapôt ã ri mẽ kãm Tirtũm kapêr jarênh o pa nhũm mẽ kot mar kaxyw ma hwýr mra. Pika pê Jutej kamã ri mẽ pa xwýnhjaja. Nê Jutej kamã krĩ pê Jerujarê nhõ xwýnhjaja. Nê pyhti pê Jotãw mýri mẽ pa xwýnhjaja. Nhũm prem piitã harênh ma nê kot mar kaxyw ma hwýr mra. ⁶Hãmri nê kapêr ma nê Tirtũm noo mã mẽ kot amnhĩ tomnuj xwýnh ã kãm amnhĩ jarê. Mẽ kot amnhĩ tomnuj kaga nê tam amnhĩ nhĩpêx o pa hprãm xãj ã kãm amnhĩ jarênh anê. Nhũm Tirtũm kaxkwa kamã hkrĩhtã mẽ kuma nê amnhĩ katut kôt mẽ kot amnhĩ tomnuj rênh pa nê axte kãm hamaxpêr kêt nê. Jakamã nhũm pre Juãw Paxisja Tirtũm mã gôx kãm mẽ hkrã kumrãr pa. Pyhti pê Jotãw kamã mẽ hkrã kumrã.

⁷Tã nhũm Parijew mẽ Satusew nhõ xwýnhjaja mããnên mẽ hkôt ma Juãw Paxis wýr mra. Mẽ urak nê mẽ kêp Ijaew jakamã haxwýja Juãw Paxis kot mẽ hkrã kumrãr kaxyw ma hwýr mra. No ãm hkwyjê hkĩnhã mẽ kot amnhĩ tomnuj kaga hprãm xãj kãm amnhĩ jarênh kêt nê. ãm amnhĩ krã hkôt hkwyjê hkôt hwýr mra nê amnhĩ to kuma. Nom nhũm Juãw Paxisja ra hprĩ hã ã mẽ hamaxpêr anhỹrja kôt mẽ omunh mex nê. Jakamã mẽ kãm:

—Tk kwa nà. Kormã mẽ ate amnhĩ tomnuj pix o ri apa kênã. Xà kot paj mẽ ate amnhĩ tomnuj o apa rãhã mẽ akrã kumrã nhũm Tĩrtũm ja hã mẽ apumu nhũm ja kãm mex nê? Nà koja já kãm mex kêt nê. Koja ja mýrapê nhýrmã tanhmã mẽ atomnuj týx to ka mẽ tee ri umaj apimxur prãm kaprý. ⁸ Na htem amnhĩ tomnuj kaga nê tãm amnhĩ nhĩpêx nê tam axpên nhĩpêx. Jakamã e kwa mẽ ã amnhĩ nhĩpêx o apa anê pa rĩ kormã mẽ akrã kumrã. ⁹ Na ka htem atýx ri ajamexpêr o: “Mê ixpê finat Apraãw kanrêhã htãmnhwý hkwý na pa mẽ. Jakamã koja Tĩrtũm ja hã mẽ ixpumu hãmri nê mẽ ixte amnhĩ tomnuj o ixpa tã nhũm ja hã tanhmã mẽ ixto hkêt nê. Koja mẽ ixto mex nê.” Anhýr o atýx ri amnhĩ kukamã ajamexpêr. Nom ja kot anhýr kêt. Mẽ apê Apraãw kanrêhã htãmnhwý htã mẽ ate urãk nê tãm amnhĩ nhĩpêxre hã. Kot kaj mẽ apê htãmnhwý htã amnhĩ tomnuj o ri apa hãmri nê Tĩrtũm noo mã te mẽ apê pikap kênre nhĩkwý pix pyrãk. ¹⁰ Na ra Tĩrtũm mẽ ate amnhĩ tomnuj mýrapê tanhmã mẽ ato kaxyw. Te ho mēhõ nhõ mēmo hpàr ô hkêt nhũm kot tee ri omunh nê krãhyr nê kuwy kamã mēnh nê ho kaxàr par pyrãk o koja mẽ anhĩpêx. Jao amnhĩ nê kuwy hwýr mẽ arê ka mẽ kamã amnhĩ xà htýx kamã ajamak rãhã ho ri apa. Anê.

Nhũm pre ã Juãw Paxisja Parijew mẽ Satusew nhõ xwýnhjê mã kapêr anê. ¹¹ Hãmri nê hpãnhã axte mẽ kot mar kaxyw hwýr mẽ mrar xwýnhjê mã kapêr nê mẽ kãm:

—E ra mẽ ate amnhĩ tomnuj kaga xwýnhjaja. Na pa Tĩrtũm mã mẽ akrã kumrãr kaxyw gô pix o mẽ akrã kumrã. Nom koja tokyx ixpãnhã Tĩrtũm kot mẽ pakaxyw ãm mã xwýnhta tãm mẽ pahwýr pój. àhpumunh týx o kot ijakrenh par jakamã na pa hte ãm kukwak ri

ixpa nê amnhĩ tã hã ixpijaãm o ri ixpa. Koja mẽ awýr Tĩrtũm Karõ rē nhũm mẽ akarõ mã agjê. Ka mẽ ý hã tam amnhĩ nhĩpêx o ri apa. Nom kormã mẽ kot tãm amnhĩ nhĩpêx kêt xwýnhjaja koja Tĩrtũm kot mẽ pahwýr mēnh xwýnhja ja hã mẽ omu nê mẽ hipêx o te kuwy kot mēmoj to kaxàr par pyrãk o mẽ hipêx.

¹² —Na htem pur kãm harøj nhĩkê nê ho grã nê hpãnhã kahtwý. Nê kahuk pa hãmri nê hkapĩ nhũm kôk apê nê prýhkã ho htor pa. Nhũm mẽ hpãnhã hy ho pa nê ixkre kamã gôj kãm unhwý. Ja pyrã nê koja tokyx Tĩrtũmja mẽ piitã mẽ kot tanhmã amnhĩ nhĩpêx to ho pa hã mẽ omunh xà hkôt mẽ ho axkjê. Jakamã mẽ kot tãm amnhĩ nhĩpêx o mẽ pa xwýnhjaja koja ma amnhĩ wýr mẽ ho api nhũm mẽ kuri mex rãhã nê pa ho pa. No mẽ kot amnhĩ tomnuj rãhã ho mẽ pa xwýnhjaja koja jajê hkĩnhã tanhmã mẽ homnuj to. Nhũm mẽ ma kuwy raxja wýr pa nê kamã amnhĩ xà htýx kamã hamak rãhã nê pa ho pa.

Anhýr o mẽ kãm kapêr.

Juãw Paxis kot Jejus krã kumrãr Makre 1.9-11; Rukre 3.21-22; Juãw 1.32-34

¹³ Tã nhũm Jejus pika pê Garirej rũm kato nê ma Juãw Paxis wýr mō. Juãw kot pyhti pê Jotãw kamã hkrã kumrãr kaxyw ma hwýr mō. Hãmri nê omu nê kãm:

—Pa. E ot pa awýr amnhĩ to tẽ. Ate mẽ kuxwar ixkrã kumrãr kaxyw. Anê.

¹⁴ Hãmri nhũm tee ri kuma nê kãm:

—Kwa nà. Aa ate amnhĩ tomnure hã kot pa kêt ri akrã kumrã. Nà ka kot kaj ixkrã kumrã. Anê.

¹⁵ Hãmri nhũm kãm:

—Kwa nà. Mãmri ixkrã kumrã Juãw Paxis. Tĩrtũm kãm ja prãm kênã kot ka kêt ri axtem nê ixkaga. Kot puj mẽ Tĩrtũm kãm hprãm xà

hkôt tanhmã amnhĩ nhĩpêx to ho ri papa. Anê.

Hãmri nhũm kuma nê kãm:

—Tôe. Nà kot paj akrã kumrã. Anê.

¹⁶ Hãmri nê pyhti hwÿr o wrÿ nê kamã hkrã kumrã. Hãmri nê wa akupÿm api nê gô mÿ ri âm rãhã nhũm kaxkwa axkjê. Hãmri nhũm kurũm Tirtũm Karõja Jejus wÿr te tuuti pyrã nê ahpãr mã hwÿr wrÿk o tẽ nê ìkre hã xa. Nhũm Jejus arĩ amnhĩ wÿr wrÿk o htẽm kãm omunh o xa. ¹⁷ Hãmri nhũm Tirtũm kaxkwa rũm kãm kapêr nê kãm:

Pa? E apê ixkra mex na ka. Âm hãmri na ka hte ixkanrêhã ã amnhĩ nhĩpêx mex anê. Inhmã ajapê kamã na ka ri apa ho apa. Anê.

4

Satanasti tee kot amnhĩ tã Jejus kamã hamak

Makre 1.12-13; Rukre 4.1-13; mãânên Eprêw 2.18, 4.15

¹ Tã nhũm Jejus Tirtũm Karõ nhÿ hã ma kapôt ã ri pa. Satanasti kot amnhĩ tã kamã hamak kaxyw nhũm ma kapôt ã ri pa. ² Ri pa hã apkati xohtô nê. Ra hã arĩgro pê 40. Nê kormã apkur kêt jakamã ra kãm prãm tÿx kumrêx nê ri pa. ³ Hãmri nhũm Satanastija nhÿhÿnh hwÿr tẽ nê hêx rom kãm kapêr nê kãm:

—Pa. E kwa mãn ka ra amã prãm tÿx nê nã? Nom xep apê Tirtũm Kra jakamã apê mêmoj hihitÿx kêt. Tirtũm pyrã nê axãhpumunh o axãhpumunh kênã. Jakamã kwa kên nhĩkwÿ mÿj mã anê kê amã pãwti hã amnhĩ jahkre ka aku nê tokyx ho amnhĩ xihtÿx. E kwa tokyx kãm akapêr. Anê.

⁴ Hãmri nhũm kuma nê kãm:

—Tk. Nà kot paj amar xã hkôt ã ri amnhĩ nhĩpêx anhÿr kêt nê. Kojã Tirtũm kãm inhmã mêmoj nhõr prãm nê inhmã mêmoj gô pa rĩ kormã kukrê. Kapêr ã kagã htũm kot ja jarênh kot:

Na htem mẽ apkur xã pix kukwak ri htĩr nê pa hkêt nê. Na htem mãânên Tirtũm kapêr ma nê hkôt amnhĩ nhĩpêx nê htĩr nê pa. Anê.

—Ã kapêr ã kagã kamã kot harênh kot anhÿr jakamã kot paj akapêr kôt ri ã amnhĩ nhĩpêx anhÿr kêt nê. Âm kwarĩ ho kwarĩ. Anê.

⁵ Hãmri nhũm Satanastija tee ri kuma hãmri nê hpãnhã ma Jerujarê hwÿr o mõ. Nê Tirtũm mã amnhĩ jarênh xã hã ixkre hprêk nhĩmõk wÿr ho api nê kÿxpê hatur xã hã âm nhũm xa. Hãmri nê amnhĩ parpê kên rũnh nhĩkwÿ xwÿnhja pumunh o xa nhũm Satanasti kãm:

⁶—E apê Tirtũm Kra jakamã kwa ja rũm ahpãr mã ajarĩ nê ma tẽ nê pikap tẽm. Kojã Anhĩpêxãja apumunh mex nê ka tanhmã amnhĩ to hkêt nê. Kapêr ã kagã htũm kot harênh kot:

Tirtũm koga kapêr o wrÿk xwÿnh kwÿjê mã ajarê ka ajarĩ nê ahpãr mã tẽ nhũm mẽ kÿx pê amÿ nhũm mêmoj akã hyr kêt nê. Anê.

—Ã kapêr ã kagã htũm kot ajarênh anhÿr jakamã e tokyx ajarĩ. Anê.

⁷ Hãmri nhũm Jejus kuma nê kãm:

—Tk kot paj ri ate inhmã karõ xãja kôt ã amnhĩ nhĩpêx anhÿr kêt nê. Kojã Tirtũm tãm inhmã ijarĩ hã karõ pa rĩ mar xã hkôt ijarĩ. No kot pa ri amar xã hkôt ijarĩ hkêt nê. Tirtũm kapêr ã kagã htũm kot ja jarênh kot:

Kêr ka mẽ amnhĩ krã hkôt amnhĩ tã ixkamã ajamak kaxyw inhÿxi jarênh kôt tanhmã amnhĩ nhĩpêx to hkêt nê. Anê.

—Ã kot ja nê kapêr kot anhÿr jakamã kwarĩ ho kwarĩ. Kot paj ri amar xã hkôt ijarĩ hkêt kumrêx. Tirtũm tãm kot inhmã ã ixte amnhĩ nhĩpêx anhÿr ã karõre hã. Anê.

⁸ Hãmri nhũm Satanasti tee ri kuma nê hpãnhã ma nhÿri kên prêeti hwÿr o tẽ nê himõk ã axte o

xa. Hâmri nê kãm pika piitã ahkre hpa. Nê mê hikukrêx piitã nhùm kãm ahkre ho xa. Kãxpore nê mêmoj mex piitã nhùm kãm ahkre nhùm Jejus piitã omunh o xa. ⁹ Hâmri nhùm kê Satanasti axte kãm:

—E mãn ka kam ri mêmoj mex mÿj piitã omunh pa. Piitã inhõ na. Nom kot kaj ixkutã tẽm nê inhmã inhmex o inhmex ã ijarẽ pa ama nê amã piitã õr pa. Ka kam mêmoj piitã ho anhõ nê ho amnhĩptãr o apa. Jakamã e kwa tokyx. Anẽ.

¹⁰ Hâmri nhùm kuma nê axte kãm kapẽr nê kãm:

—Tk kwa ma nhÿhÿm tẽ Satanasti. Kot paj ri amã amex o amex ã ajarẽnh kêt kumrêx. Tirtùm kapẽr ã kagã htùm kot ja nê kapẽr kãm hihtÿx kẽnã. Kapẽr kot:

Kër ka mê ixkapẽr pix ma nê ixkutã pix mã akõnkrã ho akrĩ nê inhmã inhmex o inhmex ã ijarẽ. Kër ka mê ã amnhĩ nhĩpêx anhÿr o ri apa.

—Anhÿr o kot hã karõ jakamã kot paj amã amex o amex ã ajarẽnh kêt kumrêx. Anẽ.

¹¹ Hâmri nhùm tee ri amnhĩ tã kuma hãmri nê ma tẽ. Tee ri kãm kapẽr kaprÿja ã amnhĩ pumu hãmri nê hkaga nê ma tẽ. Hâmri nhùm Tirtùm kapẽr o mê wrÿk xwÿnhjaja Jejus wÿr wrÿ nê tanhmã ho mex to nê kãm õ nhùm kukrẽ nê akupÿm hihtÿx.

Jejus kot Garirej kamã kapẽr o pa Makre 1.14-15; Rukre 4.14-15

¹² Tã nhùm Juãw Paxisja mêmoj tã pahi Eroxo mã akir nhùm amnhĩ tã kuma nê gryk xàj haxã nhùm hkrĩ ho hkrĩ. Hâmri nhùm Jejusja harẽnh ma nê ma akupÿm Garirej kamã krĩ pẽ Najare hwÿr ma akupÿm tẽ. ¹³ Hâmri nê ra pøj nom kamã ri pa hkêt nê. Nê hpãnhã kurùm kato nê ma krĩ pẽ Kapanaũ hwÿr tẽ. Gõ rax pẽ Garirej mÿri na pre. Pika hkwy pẽ Jepurõ mê Natari wa mê kamã na pre nhùm Jejus wa hwÿr tẽ. Hâmri nê kamã

pa. ¹⁴ Nhùm ra amnepẽm Tirtùm nhÿ hã kapẽr jarẽnh o mê pa xwÿnh finat Ijaisja Jejus kukamã ra mê panhĩgêtjẽ mã ã kot amnhĩ nhĩpêx anhÿr ã harẽ nê hã kagã. Jejus kot ã mê hwÿr mõr anhÿrja kukamã nhùm pre harẽ nê hã kagã. ¹⁵ Pika hkwy kamã mê pa xwÿnhjaja nhùm pre mê hkukamã mê harẽnh mex nê. Nê pika pẽ Garirej kamã mê pa xwÿnhjaja nhùm pre mããnhẽn mê hkukamã mê harẽ. Nê pyhti pẽ Jotãw mê gõ xujanãr wa hkaêx kãm pika piitã kamã mê pa xwÿnhjaja. Nê krĩ pẽ Garirej kamã mê kęp Ijaew kêt xwÿnhjaja nhùm pre mããnhẽn mê harẽ. Á na pre finat Ijaisja mê hkukamã Tirtùm nhÿ hã mê piitã mê harẽ nê hã kagã anẽ. Jejus kot ma mê hwÿr mõrja kukamã nhùm ra hprĩ hã harẽ nê hã kagã. Nê hã kagãja o:

¹⁶ E. Kot paj mê amã mêmoj mex jarẽ ka mê inhma. Mê ate Tirtùm pumunh kêt jakamã te mê ate kamãt kô kamã ri apa pyrãk. Tã koja Tirtùm mê amã amnhĩ to amnhĩrĩt ka mê hpãnhã te mê ate hirã kamã ri apa pyrãk o amnhĩ nhĩpêx nê ra hkõt amnhĩ xunhwÿ.

Anhÿr o mê hkukamã mê harẽ nê hã kagã. ¹⁷ Tã nhùm ra kot hkukamã mê kãm ujarẽnh xã hkõt nhùm Jejusja mê hwÿr mõ nê mê kãm Tirtùm kapẽr jarẽnh o ri mê hkõt pa. Nê mê kãm tanhmã amnhĩ jarẽnh to ho pa. Nom kormã hprĩ hã mê kãm amnhĩ jarẽnh kêt nê. Te ho nhãm mẽhõ jarẽnh pyrãk o mê kãm amnhĩ jarẽ nê mê kãm:

—E na ra Tirtumja kot mê akaxyw ãm xwÿnhhta mê nhùm mê awÿr wrÿ. Jakamã kwa mê tokyx tee ri ate amnhĩ tomnuj ã amnhĩ pumu nê ã ate amnhĩ nhĩpêx anhÿr kaga nê hpãnhã Tirtùm kõt mãn amnhĩ nhĩpêx o ri apa.

Anhÿr o mê kãm kapẽr o pa pẽ mê

ahkre ho ri mẽ hkôt pa.

Jejus kot amnhĩ wỳr tep pynênh xwỳnhjê hwỳr

Makre 1.16-20; Rukre 5.1-11

¹⁸ Tã nhũm Jejus ma gô rax pê Garirej mỳ ri pa nê gôx kãm ja wa omu. Simãw Pêtre mẽ htô Andreja nhũm wa gôx kãm kryhti rênh o wa xa. Hãmri nhũm Jejus wa hwỳr tẽ nê wa omu nê amnhĩ kôt wa kuwỳ nê wa kãm:

¹⁹—Pa. E kwa ma ixkôt mãn war apa. Kot paj tanhmã war ajahkre hto ka wa ma mẽ kãm ijarênh o ri apa. Mẽ kot war amar nê ra ixkôt amnhĩ xunhwỳr kaxyw. Anê.

²⁰ Hãmri nhũm wa kuma nê kryhti re nê wa ma hkôt htêm kurê kumrêx. ²¹ Hãmri nhũm mẽ ma nhãm axte mỗ nê ra jajê hwỳr kato. Jepetew mẽ hkra Xiakre mẽ Juãwja nhũm wa mẽ hwỳr kato. Nhũm mẽ ô pàr kãm kryhti ho mex o wa mẽ nhỹ. Hãmri nhũm mẽ hwỳr mra nhũm Jejus amnhĩ kôt ja wa kuwỳ nê wa kãm:

—Pa Xiakre mẽ Juãw. E wa ma ixkôt mãn wa apa. Anê.

²² Hãmri nhũm wa kuma nê hipêêxã mã amnhĩ jarê nê ma hkôt pa ho pa kurê kumrêx.

Jejus kot tanhmã amnhĩ nhĩpêx to

Rukre 6.17-19

²³ Tã nhũm Jejus Garirej kamã Ijaew mã Tirtũm kapêr jarênh o pa. Na pre hte Tirtũm kapêr o mẽ ahkre xã mã ixkre hwỳr agjê nê kamã mẽ kãm Tirtũm kapêr jarênh o hkrĩ nê mẽ kãm:

—E mẽ tee ri ate amnhĩ tomnuj ã amnhĩ pumu nê hpãnhã Tirtũm kôt mãn amnhĩ nhĩpêx o ri apa. Kot kaj mẽ ã amnhĩ nhĩpêx anê nhũm ja mã mẽ apumu nê mẽ ato hkra kurê kumrêx. Anê.

Hãmri nê akupỳm mẽ kãm mẽ à xwỳnhjê ho mex. Ahpỳnhã tanhmã mẽ à kute xwỳnhjaja nhũm akupỳm mẽ ho mex o pa. ²⁴ Jakamã nhũm mẽ piitã pikaja kamã ri axpên mã

harênh o hprôt. Nê pika pê Sir kôt mãânên ma ri axpên mã harênh o hprôt. Nhũm mẽ piitã harênh ma nê ma hwỳr mẽ à xwỳnhjê ho mra. Ahpỳnhã ri tanhmã mẽ à kute xwỳnhjaja. Mẽ à htỳx xwỳnhjaja. Nê mẽ ã kamã mẽ htyk xwỳnhjaja. Nê mẽ hkrã pipãnh xwỳnhjaja. Nê mẽkarõmnuti kot Satanasti nhỹ mã tanhmã ri mẽ ho xwỳnhjaja. Nhũm prem mẽ hamỳ nê ma Jejus wỳr mẽ o mra nhũm mẽ omu nê akupỳm mẽ ho mex pa. ²⁵ Jakamã nhũm mẽ ohtô nê ma hkôt pa. Krĩ pê Garirej rũm nê Tekap rũm nê Jerujarê rũm nê pika pê Jutej rũm. Nê pyhti pê Jotãw nhĩkjê rũm mẽ pa xwỳnhjaja. Nhũm mẽ ã ohtô nê ma Jejus kôt omunh o pa anê.

5

Jejus kot tanhmã mẽ ahkre hto

Rukre 6.20-23

¹ Nhũm Jejus amnhĩ kôt ri mẽ kot omunh o mẽ pa xwỳnhjê pumu hãmri nê mẽ ahkre kaxyw ma tẽ nê hixêx ã api nê himõk ã nhỹ. Hãmri nhũm mẽ ma hkôt mra nê pu mã hkrĩ pa. ² Hãmri nhũm mẽ ahkre nê mẽ kãm:

³ E mẽ inhma. Kot kaj mẽ atô amnhĩ kaxyw tanhmã Tirtũm mẽ wa inhmã ajamaxpêr to nê ajamaxpêr o: “Koja Tirtũm inhĩhkô mã pa hkêt pa ixtỳx ri tanhmã amnhĩ tomnuj to ho ri ixpa rãhã ho ri ixpa.” Anhỳr o ajamaxpêr. Hãmri nhũm Tirtũm ã ajamaxpêr anhỳr ã apumu nhũm ja kãm mex nê. Hãmri nhũm apê hkra mã ato mex nê atãnopxar o akôt pa ho pa ka ajamakêtkati nê axãmnhĩx akĩnh nê ri apa.

⁴ Nê kot ka mẽ atô tanhmã amnhĩ tomnuj to. Hãmri nê tee ri ja mã amnhĩ pumu nê apijaãm nê akapri nê. Nê akapri xãj amỳr o nhỹ. Amỳr rax nê. Hãmri nhũm Tirtũm

- ja hã apumu nhũm ja kãm mex nê. Jakamã nhũm anê akaprĩ hta nê ato mex nê ka ajamakêtkati nê axàmnhĩx akĩnh nê ri apa.
- 5 Nê kot ka mẽ atõ agryk tokyx anhÿr kêt nê. Nê kritpêm amnhĩ tã amã mẽ hkaprĩ ho ri apa. Hãmri nhũm Tĩrtũm ja hã apumu nhũm ja kãm mex nê. Hãmri nhũm ato mex nê ka ajamakêtkati nê axàmnhĩx akĩnh nê ri apa.
- 6 Nê kot ka mẽ atõ amã Tĩrtũm kãm hprãm xã hkõt amnhĩ nhĩpêx o ri apa hprãm nê. Nhũm amnhĩ tã apumu nhũm ja kãm mex nê. Hãmri nhũm ato mex nê tanhmã akrã hto ka hkõt pix mã amnhĩ nhĩpêx o ri apa. Jao ajamakêtkati nê axàmnhĩx akĩnh nê ri apa.
- 7 Nê mẽ kamã mẽ axukaprĩ ho ri apa xwÿnhjaja na hte Tĩrtũm ja hã mẽ apumu nhũm ja kãm mex nê. Jakamã na hte mẽ hã mẽ apyrã nê mẽ akamã ukaprĩ ho pa. Jao mẽ ato mex nê ka mẽ ajamakêtkati nê axàmnhĩx akĩnh nê ri apa.
- 8 Nê kot ka mẽ atõ ã ajamaxpêr anê nê ajamaxpêr o: “Nà kot paj ãm Tĩrtũm kapêr kõt pix mã ri amnhĩ nhĩpêx o ri ixpa. ãm ja pix na inhmã hprãm.” Anhÿr o ajamaxpêr. Hãmri nhũm Tĩrtũm amnhĩ tã mẽ apumu nê mẽ ato mex nê. Ka mẽ ajamakêtkati nê axàmnhĩx akĩnh nê ri apa. Nê nhÿrmã Tĩrtũm wÿr api nê kuri amex rãhã apa ho apa.
- 9 Nê kot ka mẽ atõ mẽhõ wa kot xepên kutã amnhĩ xãm xwÿnhhta xepên tã wa omu nê wa kot tanhmã xepên nhĩpêx tota nê tanhmã wa kãm akapêr to nê akupÿm tãm wa ãm. Hãmri nhũm Tĩrtũm ja hã apumu nhũm

ja kãm mex nê. Nê apê hkra hã ajarê ka ajamakêtkati nê axàmnhĩx akĩnh nê ri apa.

10 Nê koja mẽhõ mẽ ate Tĩrtũm kapêr mar xã hkõt amnhĩ nhĩpêx o apa hã mẽ apumu nê hã tanhmã mẽ anhĩpêx kati hto. Tã nom koja Tĩrtũm arĩ mẽ ato mex nê. Mẽ apê hkra jakamã mẽ kot tanhmã mẽ anhĩpêx hto htã ka mẽ ajamakêtkati nê axàmnhĩx akĩnh nê ri apa.

11-12 —Kwãr mẽ mãmri ixtã mẽ ato kapêr rÿ mẽ ato hêx rÿ tanhmã ri mẽ atomnuj to. Kwãr mẽ mãmri ã mẽ anhĩpêx anê. Nom kêr ka mẽ arĩ amnhĩ kaxyw inhmã ajamaxpêr tÿx rãhã pẽ ajamakêtkati nê axàmnhĩx akĩnh nê ri apa. Kwãr mẽ mãmri ixtã ã mẽ anhĩpêx anê nê mẽ amex kêt ã mẽ ajarê. Amnepêm na prem ã Tĩrtũm nhÿ hã kapêr jarênh xwÿnhjê nhĩpêx anê. Jakamã koja mẽ urak nê ã mẽ anhĩpêx anê. Hãmri nhũm Tĩrtũm ja hã mẽ apumu nê amnhĩm mẽ amex ã mẽ ajarê. Hãmri nê nhÿrmã kaxkwa kamã wa inhõ krĩ kamã mẽ ato mex nê. Jakamã kêr ka mẽ ã amnhĩ kukamã ajamaxpêr anhÿr pẽ mãmri akĩnh nê ajamakêtkati nê axàmnhĩx ri apa. Kwãr mẽ mãmri ã wa ixtã mẽ anhĩpêx anê. Anê.

Jejus krajaja te kot kaxwa mẽ kané hpòk wa urak

Makre 9.49-50; Rukre 13.34-35

13 Nhũm Jejus arĩ mẽ kãm kapêr nê mẽ kãm:

—Nê mẽ ate ixkõt amnhĩ xunhwÿr xwÿnhjaja te mẽ ate kaxwa pyrak. Kaxwaja mẽ apkur xã ho ành mã mex. No koja mẽhõ tẽn kamã pika hkwy mẽ nê ho ahkã. Hãmri tanhmã kot wem ho nê akupÿm ho mex? Nà koja akupÿm mex kêt nê. ãm mẽ kot hkapir pix kaxyw koja mex. Ja pyrã nê kot ka mẽ atõ ate inhmã tanhmã amnhĩ nhĩpêx to ho apa hã amnhĩ jarênh tã gaa nê rĩ amã ixkõt amnhĩ

nhîpêx prâm kêt nê. Hâmri nê ra te apê kaxwa mê pika pihkâta pyrâk. Kwa mê ixujarênh ma nê kâm ajamaxpêr tÿx rãhã ho ri apa.

¹⁴⁻¹⁶ —Nê te mê ate kanê hpôk pyrâk. Nê te mê ate hixêt prêk nhîmôk ã krî xãm pyrâk. Kojã krîja hixêt prêeti nhîmôk ã xa nhûm mê piitã omu. Nê kanêja. Xà na htem kanê hpôk nê poti ho hpro? Nà na htem hpôk nê kÿx pê mêmoj nhîmôk ã unhwÿ nhûm mê piitã mê kãm hirã nhûm mê hirã kamã mêmoj pumunh mex nê. Ja pyrã nê kot kaj mê tãm amnhî nhîpêx o ri apa nhûm mê piitã ja hã mê apumunh kôt ra kaxkwa kamã Tirtûm mex ã harênh o pa. Anê.

Jejus kot tanhmã Mojes kapêr jarênh to

Rukre 16.16-17

¹⁷ Nhûm Jejus arî mê kãm kapêr nê mê kãm:

—Nê amnepêm Mojes kot Tirtûm nhÿ hã Ijaewjê mã tanhmã mê kot amnhî nhîpêx to hã mê kãm karôja. Nê amnepêm Tirtûm nhÿ hã kapêr jarênh o mê pa xwÿnhjê kapêrja. Ixte mê kapêr o ijapêx kaxyw na pa pre mê awÿr ixwÿrÿk kêt nê. Jakamã kwa mê ri ã axpên mã ijarênh anhÿr kêt nê. Kêt ixprî hã ixte mê amã mê kapêr jarênh nhûm mê ate mar mex kaxyw na pa pre kaxkwa rûm mê awÿr wÿ.

¹⁸ —Tirtûm kapêr ã kagã htûm kot mêmoj jarênhja. Kojã ujarênh xà hkôt mêmoj tanhmã amnhî to hpar mê nhûm rî kormã kaxkwa mê pika wa hapêx pa nhûm kapêr ã kagãja mãânênh hapêx. Nom nhûm Tirtûm kapêr kojã mêmojja pyrã nê aa hapêx kêt nê. Kojã rãhã ho rãhã nê aa ihkjê ho tanhmã mênh to hkêt nê. Âm hãmri na pa ã mê amã harênh anê.

¹⁹ —Nê kot ka mê atô Tirtûm kapêr o pixire nê hirôp xa. Hãmri nê ra amnhî pyrã nê anhîo mã ja hã amÿnê. Apyrã nê kot hirôp âm kaxyw ka kãm hã amÿnê. Kot

kaj ã amnhî nhîpêx anê hãmri nê apê Tirtûm kra hkêt ã amnhî to amnhîrit. Nom kot ka kêt mê tãm amnhî nhîpêx o ri apa. Nê amnhî pyrã nê tãm mê kot amnhî nhîpêx kaxyw mê kãm akapêr o ri apa hãmri nhûm Tirtûm ja hã apumu nê ato hkra nê ato mex nê.

²⁰ —No Parijew nhô xwÿnhjaja nê Tirtûm kapêr tûm o mê ahkre ho mê pa xwÿnhjaja. Mê kot Tirtûm kapêr kôt amnhî nhîpêx mex ã amnhî jarênh tâ no âm hkôt ã amnhî nhîpêx anhÿr kêt nê. Jakamã kot kaj mê hkôt amnhî nhîpêx o ri apa hãmri nê mê urâk nê nhÿrmã Tirtûm mê wa inhô krî kamã apa hkêt nê. Anê.

Mê gryk o mê pa xwÿnhjê jarênh Rukre 12.58-59; mãânênh Rômãn 12.19; Epes 4.26; Wam Ximotre 2.8; Xiakre 1.19-20

²¹ Nhûm Jejus arî mê kãm kapêr nê mê kãm:

—Nê amnepêm na prem mê panhîgêjtjê mã Tirtûm kapêr kwÿ jarênh o pa nê mê kãm:

Kêr ka mê axpên par kêt nê. Kot kaj mê mêhox pî nhûm mê ja mÿrapê atomnuj nê. Nê ma mê anhô pahihiti hwÿr ato tẽ nhûm mÿrapê tanhmã ato rÿ hkôt apî. Anê.

Âm hãmri na prem mê kãm ja jarê.

²² Tã kot paj ixprî hã mê amã tanhmã harênh to ka mê inhma. Kot kaj mê mêmoj tâ anhîo kamã agryk. Hãmri nhûm Tirtûm tee ri ja hã apumu nhûm ja kãm mex kêt nê. Jakamã kojã mê anhô pahihiti tanhmã ja hã mê ato japêr hã kojã ja mex nê. Rÿ kot kaj mê tanhmã mêhõ japyrÿ hto. Ho hagrô rÿ ho rop. Mÿrapê kop apu akwÿ kot apynênh nê anhô pahihiti hwÿr ato htêm nê îhkram ajaxâr ronhÿx ja inhmã mex nê. Rÿ kot kaj mê tanhmã anhîo mã akapêr punuj to nê kãm; “Tk. Ate ho warêhti hã. Te apê hagrô pyrâk kênã.” Anhÿr o kãm akapêr. Tã kot apu Tirtûm

ra ã akapêr anhÿrja mÿrapê mê kot amnhÿ xà htÿx kamã hamak tÿm xàta wÿr amênh ronhÿx ja inhmã mex nê. Ja pumaj kwa kêr ka mê ã axpên mã akapêr anhÿr kêt nê. Kêt mê axpên mã tãm akapêr pix o ri axpên kôt apa.

²³ —Nê kêr ka mê tanhmã ate anhÿo nhÿpêx hto kamã Tÿrtÿm mã mex o mex ã harênh kêt nê. Kêr ka mê kãm amnhÿ jarênh o akrÿ hãmri nê ra mêhõ kot mêmoj tâ akamã gryk xwÿnh mã ajamaxpêr japêr. ²⁴ Hãmri nê akato nê ma hwÿr atêm kurê kumrêx nê wa tãm axpên mã akapêr nê tãm akupÿm axpên xãm. Hãmri nê rÿ kormã ma akupÿm tê nê Tÿrtÿm mã amnhÿ jarênh jatur xãm amê nê kãm mex o mex ã harê. Kêr ka mê ã amnhÿ nhÿpêx anhÿr o ri apa.

²⁵⁻²⁶ —Na htem tanhmã axpên nhÿpêx to hãmri nê kot tanhmã war axpên to xwÿnhjê hõja ma õ pahi hwÿr tê nê kãm tanhmã kot ho xwÿnhnta jarênh kaxyw nojarê. Hãmri nhÿm ra kamã gryk xwÿnhnta kot pahi mã harênh kaxyw nojarê ã harênh ma nê tee ri amnhÿ kukamã hamaxpêr nê ma hwÿr tê nê wa akupÿm tãm axpên xãm. Na htem ã amnhÿ nhÿpêx anê. Pahi kot wa harênh mar nê tanhmã axpên tâ wa ho pymaj na htem ã amnhÿ nhÿpêx anê nê tokyx tãm akupÿm axpên xunhwÿ. No koja mê anhÿr kêt nhÿm pahija wa harênh ma nê wa kot tanhmã axpên to xwÿnhnta õ jaxà nhÿm tee ri kãm kator prãm. Hãmri nê tanhmã amnhÿ to nê ra amnhÿ pãnhã kãm amnhÿrer pa nhÿm pahiltija rÿ kormã pòristi mã anê nhÿm kãm ure nhÿm kato. Ja pyrà nê kêr ka mê Tÿrtÿm tanhmã kot mê anhÿpêx to pymaj tokyx mê ate amnhÿ tomnuj kaga nê hkôt amnhÿ nhÿpêx rãhã ho ri apa. Anê.

Tanhmã mê pahte mê pahprõjê nhÿpêx to

Matêwre 19.3-9; Makre 9.43-47, 10.2-9; mãânên Rukre 16.18

²⁷ Nhÿm Jejus arÿ mê kãm kapêr nê mê kãm:

—Nê na pre finat Mojesja mê panhÿgêjtê mã Tÿrtÿm kapêr tÿm kwÿ jarê nê mê kãm: “Kêr ka mê amnhÿ prõ pix tânopxar o ri apa. No mê kuhpa hã nhãm mêhõ ho amnhÿkati ho ri apa hkê. Anê. Am hãmri na pre mê kãm ja hã karõ. ²⁸ Tã kot paj ixprÿ hã mê amã tanhmã harênh to ka mê inhma. Kot kaj mê nhãm mêhõ pumu nê amã ho amnhÿkati hprãm mã ajamaxpêr. Jao te ra ate ho amnhÿkati pyràk o amnhÿ nhÿpêx. Kormã ate ho amnhÿkati hkê. Tã ra hkukamã ajamaxpêr jakamã te ra ate ho amnhÿkati pyràk o amnhÿ nhÿpêx. ²⁹ ã mê hamaxpêr punuj anhÿr xwÿnhjaja koja mê nhÿrmã ma mê kot amnhÿ xà htÿx kamã hamak tÿm xàta wÿr ma mra nê kamã pa rãhã ho pa. Jakamã kêr ka mê nhãm mêhõ pumu nê amã hkÿnh japêr hãmri nê te ate ano kaxàr nê mênh nê axte ate omunh kêt pyràk o amnhÿ nhÿpêx. Jao hkàx ã rÿt nê ma nhÿhÿm atêm kurê kumrêx.

³⁰ —Nê kot kaj mê anhÿhkra ho tanhmã amnhÿ tomnuj to kaxyw. Hãmri nê tee ri ja hã amnhÿ pumu nê te ate amnhÿ nhÿhkra krãhyr nê mênh pyràk o amnhÿ nhÿpêx nê tanhmã amnhÿ tomnuj to hkê. Mê ÿhkra ho mê kot tanhmã amnhÿ tomnuj to ho mê pa xwÿnhjaja koja mê nhÿrmã ma mê kot amnhÿ xà htÿx kamã hamak tÿm xàta wÿr ma mra nê kamã pa rãhã ho pa. Anê.

Mê pahte axpên kaga hkê

³¹ Nhÿm Jejus arÿ mê kãm kapêr nê mê kãm:

—Nê na pre finat Mojes mê panhÿgêjtê mã Tÿrtÿm kapêr tÿm kwÿ jarê nê mê kãm: “Kot kaj mê atõ aprõ kaga kaxyw hãmri nê ate hkaga hã amnhÿ jarênh ã kaga nhÿpêx nê kãm agõ nê rÿ kormã hkaga.” Anê. Am hãmri na pre ã mê kãm Tÿrtÿm kapêr tÿm jarênh

anê. ³² Tã kot paj ixprî hã mẽ amã tanhmã harênh to ka mẽ inhma. Kêr ka mẽ atýx ri amã hprãm xã hkôt aprõ kaga hkêt nê. Nom koja aprõ akuhpa hã nhãm mêhõ ho amnhĩkati ka harênh ma hãmri nê amã ja hã hkaga hprãm nê mãmri kam nê hkaga. Ja tanhmã kute hkêt. Nom koja ã amnhĩ nhĩpêx anhÿr kêt tã ka amnhĩ krã hkôt hkaga. Hãmri nhũm mêhõ apãnhã ho hprõ nê o pa. Hãmri nê ra kot apê aprõ ho amnhĩkati ho pa pyrãk o hipêx. Nê nija haxwýja. Te arĩ kêp aprõ htã akuhpa hã nhãm myja o amnhĩkati o pa pyrãk o amnhĩ nhĩpêx. Anê.

Tãm mẽ pakapêr ã Jejus kot mẽ pamã karõ

Xiakre 5.12

³³ Nhũm Jejus arĩ mẽ kãm kapêr nê mẽ kãm:

—Nê na pre finat Mojes mẽ panhĩgêt nê pahpãmjê mã Tirtũm kapêr tũm jarênh o: “Kêr ka mẽ Tirtũm mã mẽmoj to anhÿr ã amnhĩ jarê hãmri nê amnhĩ jarênh xã hkôt kãm tanhmã amnhĩ nhĩpêx to. Nom kêr ka mẽ atýx ri kãm tanhmã amnhĩ jarênh to ho amnhĩ to axêx kêt nê. ãm akatãt kôt mẽ ate amnhĩ jarênh to xã hkôt kãm tanhmã mẽmoj to.” Anê. ãm hãmri na pre mẽ kãm ja jarê. ³⁴ Tã kot paj ixprî hã mẽ amã tanhmã harênh to ka mẽ inhma. Kêr ka mẽhõ mã tanhmã amnhĩ jarênh to. Tirtũm mã pix mã amnhĩ jarênh kêt nhãm mêhõ mã mããnên tanhmã amnhĩ jarênh to. Nê akatãt kôt kãm amnhĩ jarê. Na ka htem mẽ kot mẽ axêx kêt kôt mẽ apumunh kaxyw mẽmoj nhĩxi jarênh kôt amnhĩ jarê. Nom kêr ka mẽ axte ã mẽmo nhĩxi hã amnhĩ jarênh anhÿr kêt nê. Mẽmoj tã amnhĩ jarê nê akatãt kôt amnhĩ jarênh kurê kumrêx. No mẽ kot axêx kêt kôt apumunh kaxyw mẽmoj nhĩxi hkôt amnhĩ jarênh kêt nê. Tanhmãn kaxkwa nhĩxi jarênh kôt mẽmoj tã amnhĩ jarênh kêt nê.

Kaxkwa kêp Tirtũm krĩ xã maati kênã kot ka kêt mẽ axtem nê atýx ri amnhĩ kaxyw hixi jarê. ³⁵ Rỳ mẽ kot axêx kêt kôt apumunh kaxyw pika nhĩxi jarênh kêt nê. Pika kêp Tirtũm par xãm xã kênã kot ka kêt mẽ atýx ri amnhĩ kaxyw tanhmã hixi jarênh to. Nê krĩ pê Jerujarêja mããnên kêr ka mẽ ri amnhĩ kaxyw tanhmã hixi jarênh to hkêt nê. Koja nhÿrmã Tirtũm mẽ awÿr Jerujarê hwÿr ixpê pahĩ maati hã inhmẽ pa kamã mẽ ato amnhĩptãr o ixkrĩ. Jakamã kêr ka mẽ ri atýx amnhĩ kaxyw tanhmã hixi jarênh to ho ri apa hkêt nê.

³⁶ —Nê kêr ka mẽ kot axêx kêt kôt apumunh kaxyw mẽ ri tanhmã amnhĩ krã hkĩ jarênh to hkêt nê. Kot kaj mẽ anê nê ãm tanhmã hã harênh to kaprÿ. Xã kot kaj mẽ ajamaxpêr pix o tanhmã amnhĩ krã hkĩ hto? Nã kot kaj mẽ ho anhÿr kêt nê. Jakamã mẽ ri atýx tanhmã harênh to hkêt nê.

Nê mẽ atýx ri mẽmo nhĩxi jarênh kôt mẽmoj tã amnhĩ jarênh o apa hkêt nê. ³⁷ ãm akatãt kôt tãm amnhĩ jarênh kurê kumrêx. Jao mẽ kãm: “Tÿ. Nã kot paj ho anê.” Anhÿr o mẽmoj tanhmã ho. Rỳ mẽ kãm: “Nã kot paj ho anhÿr kêt nê.” Anhÿr o mẽmoj tanhmã ho hkêt nê. ãm akatãt kôt tanhmã mẽmoj tã amnhĩ jarênh to xã hkôt ho anhÿr kurê kumrêx. Mẽ kot Satanãsti hkôt amnhĩ nhĩpêx o mẽ pa xwÿnh pix-jaja na htem hêx rom mẽmoj nhĩxi jarênh kôt tanhmã amnhĩ jarênh to ho pa. Anê.

Mẽ pahte tanhmã axpên nhĩpêx to hã Jejus kot mẽ pamã karõ

Rukre 6.27-30, 23.34; mããnên Atre 7.60; Rõmãn 12.14

³⁸ Nhũm Jejusja arĩ mẽ kãm kapêr nê mẽ kãm:

—Na prem amnepêm mẽ panhĩgêtjê mã Tirtũm kapêr tũm jarênh o: “Koja mẽhõ apê ano katõk nê hkapa hã koja mẽ anhõ pahija atã mã ho anê nê kêp no kapa.

Rÿ koja mēhō apē axwa hō hkwȳr hā koja atā mā ho anē nē atā kēp wa hō hkwȳr.” Anhÿr o mē kām hā karō. Ām hāmri na prem ā ja jarēnh anē. ³⁹ Tā kot paj ixprī hā mē amā tanhmā ja jarēnh to ka mē inhma. Kojā mēhō tanhmā mē anhīpēx to ka mē ām amnhī tā omu nē tanhmā amnhī tā ho hkēt nē. Kojā anhīnep akura ka ām omu nē tanhmā amnhī tā ho hkēt nē. Te ate kām hkjē hpēr nhūm kot ihkjē kamā hkuranh pyrāk o amnhī nhīpēx nhūm ja amā mex nē. No amnhī tā tanhmā ho hkēt nē.

⁴⁰ —Nē koja mēhō anhīnōhkā hā awȳ nhūm mē anhō pahija amā anē ka māmri kām agō nē tanhmā hā kām nē hkēt nē. Te ate hkōt kry pē kām anhīnōhkā hpakā ry jagjēnh xwŷnhhta nhōr pyrāk o amnhī nhīpēx. Nom kēr ka mē kamā agryk kamā kām ōr kēt nē.

⁴¹ —Nē koja mēhō ate kām jēnh tur nē hkōt ho amōr ryy kaxyw amā kapēr ka māmri kām ho anē. Nē kot amā nhÿri hā karō xāja wÿr o pōj nom kamā kām ōr kēt nē. Kām ho hakrenh ryy nē rī kormā akupÿm kām agō.

⁴² —Nē koja mēhō ō mēmoj kēt nē awÿr tē nē mēmoj tā awȳ ka māmri kām agō. Rÿ nhūm awÿr tē nē apē mēmoj to ĩpresta kaxyw ka māmri kām ho ĩpresta. Kēr ka mē ā axpēn nhīpēx anhÿr o ri apa. Anē.

Mē pamā axpēn kīnh ā Jēsus kot mē pamā karō

Rukre 6.32-36; mǎānēn Rōmān 12.14

⁴³ Nhūm Jēsus arī mē kām kapēr nē mē kām:

—Nē na prem amnhī krā hkōt axtēn nē tanhmā mē panhīgētjē mā mēmoj jarēnh to nē mē kām: “Kēr ka mē amā mē akrāmnhwÿjē pix kīnh nē tanhmā mē ho mex to. No kēt mē kot tanhmā mē ato xwŷnhjaja kēr ka mē māmri mē kamā axāhkurē ho ri apa.” Anhÿr

o mē kām karō. ⁴⁴ Nom pa kot paj mē amā Tirtūm kot tanhmā ja hā karō hto hā harē ka mē inhma. Kēr ka mē kot tanhmā ri mē atomnuj to xwŷnhjaja amnhī tā tanhmā mē ho hkēt nē. Ām tanhmā mē ho mex to pix hkukamā mǎn ajamāxpēr. Nē mē ho Tirtūm wÿr pix kukamā mǎn ajamāxpēr. ⁴⁵ Na hte ā kaxkwa kamā Mēpahpām Tirtūmja amnhī nhīpēx anhÿr o pa. Mē kot amnhī tomnuj xwŷnhjaja nē mē kot amnhī to mex xwŷnhjaja nhūm hte mē ho hpimrāātā mē ho mex o axpēn pyrāk. Jao hamē wa hwÿr na rē nē hamē wa hwÿr myyti rē nhūm hamē wa kām hirā ho pa. Jakamā kēr ka mē urāk nē mē piitā tām mē hipēx o axpēn pyrāk. Mē kot amnhī tomnuj xwŷnhjē mē mē kot amnhī to mex xwŷnhjē mē ho apimrāātā mē ho mex o axpēn pyrāk.

⁴⁶ —Nē xāt kaj mē amā mē piitā mē ho mex prām kēt nē ām mē kot mē ato mex xwŷnh pixjaja ka mē amā mē ho mex prām nhūm Tirtūm ja hā mē apumu nhūm ja kām mex nē nā? Nā koja kām mex kēt nē. Kojā mēhō ato mex kēt tā kēr ka ām amnhī rom ho mex nē. Nhūm Tirtūm ja hā apumu nē amnhīm amex ā ajarē. Mē kot amnhī tomnuj xwŷnhjaja na htem ām mē kot mē ho mex xwŷnh pixjaja nhūm mē amnhī xwar mē ho mex. No tām mē kot amnhī nhīpēx xwŷnhjaja na htem mē piitā mē ho mex o axpēn pyrāk. Mē kot tām amnhī nhīpēx xwŷnhjaja nē mē kot amnhī tomnuj xwŷnhjaja nhūm mē ho hpimrāātā mē ho mex o axpēn pyrāk.

⁴⁷ —Nē na hte mē hkwȳjaja ām amnhī kwÿjē pix mā kapēr mex o pa. Nom mē piitā tām mē hipēx kēt nē. Nom kēr ka mē ā amnhī nhīpēx anhÿr kēt nē. Kēr ka mē kurom mē piitā tām mē hipēx o axpēn pyrāk. Mē akwÿjē mē mē akwÿ hkēt xwŷnhjaja ka mē hipēx o axpēn pyrāk. Nē tām mē kām akapēr o axpēn pyrāk. ⁴⁸ Kaxkwa

kamã Měpahpãm Tirtũm pyrã nẽ mẽ kot amnhĩ tomnuj xwýnhjẽ mẽ mẽ kot amnhĩ to mex xwýnhjaja mẽ ho apimràatã mẽ ho mex o axpẽn pyrãk. Na hte ã Tirtũmja mẽ panhĩpêx anẽ. Anẽ.

6

Mẽ pahte mẽ kęp amrakati xwýnhjẽ ho mex rãhã hã mẽ pamã karõ

¹⁻² Nhũm Jejus arĩ mẽ kãm kapěr nẽ mẽ kãm:

—Nẽ na htem mẽ piitã hkwýjẽ noo mã tanhmã mẽ kęp amrakati xwýnhjẽ ho mex to. Nom kãm mẽ hkaprĩ kamã tanhmã mẽ ho mex to hkêt nẽ. ãm hkwýjaja kot ja hã mẽ omunh nẽ mẽ mex ã mẽ harẽn pix kaxyw na htem krĩ hkõt ri mẽ kęp amrakati xwýnh piitã mẽ ho mex o pa. Nẽ mẽ pikuprõnh xã hã ixkre kamã kuhê nẽ tanhmã mẽ ho mex to. Mẽ hkwýjaja kot ja hã mẽ omunh nẽ amnhĩm mẽ mex ã mẽ harẽn kênã. Jakamã koja nhỹrmã Tirtũmja axte ja hã mẽ kãm mẽmoj mex nhõr kêt nẽ. Ra jar mẽ hkwýjaja kot ja hã mẽ omunh nẽ amnhĩm mẽ mex ã mẽ harẽn kênã. Jakamã kwa kêt ka mẽ ho mẽ urãk kêt nẽ. Nẽ tanhmã mẽhõ ho mex to kaxyw nẽ akwýjẽ no kuhpa hã mẽ hkàx ã tanhmã mẽ ho mex to. No kot kaj mẽ noo mã tanhmã mẽ ho mex to. Mẽ kot hã apumunh nẽ ato jarkrar kaxyw tanhmã mẽ ho mex to nhũm kaxkwa kamã Měpahpãmja ja hã apumu nẽ mẽ hã tanhmã ato mex to hkêt nẽ. Kojã ãm hã apumu.

³ —Ja pymaj kêt ka mẽ mẽ kęp amrakati xwýnhjẽ mã mẽmoj nhõr kaxyw hãmri nẽ mẽ piitã mẽ no hkàx ã tanhmã mẽ ho mex to. Hãmri nẽ nhãm ri ja hã mẽ kãm amnhĩ to jarkrar kêt nẽ. Aprõ mã rý akrajẽ mã rý akrãmnhwý mã hã amnhĩ jarẽn kêt nẽ. ⁴ Kot kaj mẽ no hkàx ã tanhmã ho mex to no nhũm Tirtũm tapxipix apumunh o

nhỹ. Hãmri nẽ ja hã ato mex rax nẽ ka amex nẽ apa. Anẽ.

Tanhmã mẽ pahte Tirtũm mã amnhĩ jarẽn to hã mẽ pamã karõ Rukre 11.1-13, 18.9-14

⁵ Nhũm Jejus arĩ mẽ kãm kapěr nẽ mẽ kãm:

—Nẽ mãñnẽn ja. Na htem hakwa pix o amnhĩ mex ã amnhĩ jarẽn xwýnhjaja Tirtũm mã amnhĩ jarẽn kaxyw nẽ mẽ kot Tirtũm kapěr o mẽ ahkre xã hã ixkreja wýr agjẽ. Nẽ mẽ piitã mẽ noo mã kãm tanhmã amnhĩ jarẽn to. Rý gáp kuhê nẽ mẽ piitã mẽ noo mã kãm amnhĩ jarẽ. Tã mẽmo kaxyw na htem mẽ noo mã Tirtũm mã amnhĩ jarẽ? Nã ãm mẽ kot ja hã mẽ omunh nẽ mẽ mex ã mẽ ho jarkrar pix kaxyw. Nẽ mẽ harẽn o: “E mũjti pumu. Na hte apkati mẽ ã Tirtũm mã amnhĩ jarẽn anẽ. Kot amnhĩ to mex xwýnh mãn.” Anhỹr ã harẽn kaxyw. Tã ra mẽ piitã mẽ kot ja hã omunh nẽ amnhĩm mex ã ho jarkrar jakamã koja Tirtũm axte ja hã tanhmã ho mex to hkêt nẽ. Ra pika ja kamã mẽ kot mẽ omunh nẽ mẽ mex ã mẽ harẽn kênã. ⁶ No mẽ kajaja. Kêt ka mẽ urãk nẽ ã amnhĩ nhĩpêx anhỹr kêt nẽ. ãm Tirtũm mã amnhĩ jarẽn kaxyw nẽ akwýjẽ no hkàx ã hitom wýr agjẽ nẽ hitom kãm ahte kãm amnhĩ jarẽ. Hãmri nhũm Tirtũm tapxipix ja hã mẽ apumu. Mẽ amã amnhĩ to amnhĩrit kêt tã mẽ apumu. Hãmri nẽ mẽ ato mex nẽ.

⁷ —Nẽ mẽ kęp Tirtũm kra hkêt xwýnhjaja na htem sãnti mã amnhĩ jarẽn kaxyw nẽ xatã kãm amnhĩ jarẽ. Nẽ xatã kàx pẽê kãm amnhĩ jarẽ. Nẽ hamaxpěr o: “Kot paj xatã sãnti mã amnhĩ jarẽ nhũm inhmar japěr.” Anhỹr o hamaxpěr jakamã xatã kãm amnhĩ jarẽ. No ãm htýx ã hamaxpěr anhỹr kaprý. ⁸ Jakamã kwa kêt ka mẽ ho mẽ urãk kêt nẽ. Tirtũm ra kot mẽ ate mẽmoj tã hwýr xata ra ja kukamã kot omunh mex

kênâ kot ka kêt mê xatâ hã hwÿr o akuhê.

⁹ —Nê kêr ka mê kãm amnhî jarênh kaxyw nê amnhî krâ hkôt tanhmã kãm amnhî jarênh to rÿ kãm amnhî jarênh o:

Pa Mëinhîpêêxâ maati pê kaxkwa kamã ri apa xwÿnh? Amex o amex Tîrtûm.

¹⁰ Apê mê ijamâr mex xwÿnh maati na ka.

Na hte kaxkwa kamã mê kot ri amã tanhmã amnhî nhîpêx to ho mê pa xwÿnhjaja akôt pix mã amnhî nhîpêx o ri pa. Tã ijaxwÿja inhmã mê urâk nê akôt pix mã amnhî nhîpêx o ri i xpa hprâm.

¹¹ Nê kwa jarâhã mê inhmã mëmoj gô pa mê akukwak ri ho apku.

¹² Na pa hte tōhã amnhî tomnuj nê Tîrtûm. Nom mê kot tanhmã ixtomnuj to xwÿnhjaja na pa hte âm mê omu nê amnhî tã tanhmã mê ho hkêt nê. Nê ja ho ijamakêtkati nê axte kãm ijamaxpêr kêt nê. Â ixte amnhî nhîpêx anhÿr jakamã kwa ja hã ixpumu nê ixpyrà nê ixte tanhmã amnhî tomnuj to hã ixpumu nê hã tanhmã ixto hkêt nê. Âm ho ajamakêtkati kurê kumrêx nê axte kãm ajamaxpêr kêt nê.

¹³ Nê kot paj nhÿrmã tanhmã amnhî tomnuj to kaxyw ka ja hã ixpumu nê ixte â amnhî nhîpêx anhÿrja nê ixto htÿx nê pa tanhmã amnhî tomnuj to hkêt nê. Âm mëmoj punuj pê ixpytâr rãhã ho apa Tîrtûm. Tã âm ja pix na hapêx. Anê.

—E kêr ka mê â Tîrtûm mã amnhî jarênh anê. Anê.

¹⁴ —Nê koja mëhō tanhmã anhîpêx to htã ka ho ajamakêtkati nê axte kãm ajamaxpêr pix o ri apa hkêt nê. Hã koja kaxkwa kamã Mëpahpâm maati ja hã apumu

nê apyrà nê tanhmã ate amnhî tomnuj to ho hamakêtkati nê axte kãm hamaxpêr kêt nê. ¹⁵ Nom kot kaj mê â amnhî nhîpêx anhÿr kêt nê. Nê tanhmã mê kot mê atota â anohtÿx rãhã ho apa hãmri nhÿm Mëpahpâm maati ja mê apyrà nê mê ate tanhmã amnhî tomnuj to ho hamakêtkati hkêt nê. Âm hã nohtÿx rãhã ho pa ho pa. Anê.

Tanhmã mê pahte Tîrtûm mã mex o mex â harênh to

Rukre 18.11-12

¹⁶ Nhÿm Jejus arî mê kãm kapêr nê mê kãm:

—Nê mê kot amnhî to jarkrar xwÿnhjaja na htem Tîrtûm mã amnhî jarênh kaxyw hãmri nê tōhã ho apkur kêt rãhã kãm amnhî jarênh jakamã hkuk kaprî nê hkwyjê hkôt pa. Tã mo kaxyw na htem â mê noo mã amnhî nhîpêx anê? âm mê apkur kêt rãhã Tîrtûm mã amnhî jarênh â mê omunh pix kaxyw. Tã ra jar pika ja kamã mê kot ja hã mê omunh jakamã koja Tîrtûm nhÿrmã ja hã tanhmã mê ho mex to hkêt nê. Jakamã kwa kêr ka mê ho mê urâk kêt nê. ¹⁷ Kêr ka mê tōhã Tîrtûm mã amnhî jarênh rÿy kaxyw axâpkur kaga hãmri nê amnhî krâ kahō nê amnhî jaxwÿr mux nê akukkînh nê ri akwÿjê hkôt apa. ¹⁸ Hãmri nê nhÿri mê hkàx â ahte kãm amnhî jarê nê kãm mex o mex â harê. Kot kaj mê â mê hkàx â amnhî nhîpêx anê nhÿm mê akwÿjaja mê axâpkur kaga hã mê apumunh kêt nê. Nhÿm Tîrtûm pix ja hã mê apumu. Hãmri nê nhÿrmã ja hã mê ato mex nê. Anê.

Kaxkwa kamã mëmoj mex

Rukre 12.33-34; mãânên Sikûn Ximotre 4.8; Wam Pêtre 1.4; Eprêw 10.34

¹⁹ Nhÿm Jejus arî mê kãm kapêr nê mê kãm:

—Nê mãânên ja. Kêr ka mê jar pika ja kamã akukrêx rÿnh o apa hkêt nê. Kêt jar mê hikukrêx koja kritpêr mex kêt nê. Kot kaj mê ho

akuprô nhũm amnhôre apê homnu rý paratre apê homnu. Nê kàx o mē akukrêx nhũm haxwýja apê omnu rý nhũm mēhō apê hkwy ho ahkī. ²⁰ Jakamā kēr ka mē akukrêx rūnh o apa hkêt nē. Kaxkwa kamā Tirtũm kot mē akutêp mē akukrêx o pikuprōnhja na kêt mex kumrêx o jar mē hikukrêx jakrenh par. Jakamā kēr ka mē amā nhỹrmā kaxkwa kamā akukrêx mex prām xàj tām mē piitā tām mē hipêx nē mē ho mex o ri apa. Nē mē kamā axukaprī nē. Nē Tirtũm kôt ri amnhī nhīpêx mex nē. Hāmri nhũm ā mē ate amnhī nhīpêx anhỹr ā mē apumu nē mē akutêp mē amā mēmoj mex kwý jaxwý. Kaxkwa kamā mo amnhôre nē mo paratre? Nē kamā mo mē ahkīnh xwýnh? ām kamā amrakati kumrêx. ²¹ Kot kaj mē jar akukrêx rūnh hāmri nē ām tanhmā apê homnu hto pix kukamā ajamaxpēr. Nom kot kaj mē apê Tirtũm kra hā kaxkwa kamā akukrêx mā ajamaxpēr rāhā ho ra akīnh nē ri apa.

²² —Nē kot kaj mē ixkapēr ma nē ixkôt amnhī nhīpêx hāmri nē tām amnhī nhīpêx. Nē tām axpēn hipêx. Jao te hirā kamā arīt mex pyrāk o amnhī nhīpêx. ²³ No koja mēhō ixkapēr ma nē ām kuma nē ixkwým ri amnhī nhīpêx o pa. Hāmri nē te kamāt kō kamā mēhō rīt mex kêt kot amnhī nhīpêx pyrāk o amnhī nhīpêx. E kēr ka mē ā amnhī nhīpêx anhỹr pymaj ixkapēr ma nē kām ajamaxpēr tỳx rāhā ho ri apa.

²⁴ —Nē kot kaj apyxi nē anhō patrāw hamēxkrut hāmri nē arīgro pyxi hā hamē wa kām axàpēnh o amỹkry hkêt nē. Kot kaj anē nē hō gryk ā ihō kaga. Ja pyrā nē kot kaj mē jar akàxpore nē akukrêx pix mā ajamaxpēr nē amā hapê ho akwýjê pē ho anhōxý ho ri apa. Nē gryk ā Tirtũm kām hprām xà hkôt tanhmā ho mē ho mex to hkêt nē. Jakamā kwa kēr ka mē Tirtũm pix mā mām ajamaxpēr rāhā nē. Jao akàxpore nē

akukrêx pix kukamā ajamaxpēr o ri apa hkêt nē. Anē.

Mē pahte tee ri amnhī kukamā pajamaxpēr kêt ā mē pamā karō

Rukre 12.22-31; määnēn Piripos 4.6; Wam Pêtre 5.7

²⁵ Nhũm Jejus arī mē kām kapēr nē mē kām:

—E. Kwa kēr ka mē tee ri mēmoj tā amnhī kukamā ajamaxpēr kêt nē. Tanhmān axàpkur xà rý axê ka mē tee ri hkukamā ajamaxpēr kêt nē. Mēmoj piitā hkukamā tee ri ajamaxpēr o ri apa hkêt nē. Tirtũmja àhpumunh tỳx o àhpumunh tỳx xwýnh na. Na pre àhpumunh tỳx o mē anhīpêx ka mē kukwak ri atīr nē apa. Jakamā xà kot mē amā mē anhō ho pa kaxyw àhpumunh kêt? Nà ja kaxyw àhpumunh tỳx kēnā. Kêp mē anhīpêx xwýnh jakamā määnēn kēp mē amā mē anhō xwýnh. Nē kēp mē amā mē axê nhōr xwýnh.

²⁶ —Mām ka htem kuwēnhre pumu. Na hte tee ri amnhī xàpkur xà hkukamā hamaxpēr o hkaprī nē ri pa hkêt nē. Mē anhīpêxà maati tām na hte kām ō ho pa. Tā kām mē ajapê htỳx o kot kuwēnhre jakrenh jakamā koja urāk nē mē amā mē anhō rāhā ho pa.

²⁷ —Nē xà kot kaj mē kritpēm atīr prām xàj ja pix kukamā ajamaxpēr rāhā nē ra ajamaxpēr kôt kritpēm atīr nē apa? Nà kot kaj mē anhỹr kêt nē.

²⁸ —Mām ka htem akunī kamā pixōrā pumu. Na hte tee ri tanhmā kute hkukamā hamaxpēr o ra hkaprī nē harir kêt nē. ²⁹ Tā nom muxre nē harir ka mē omu. Te ho amnepēm pahihti Sarumāw xê mex pyrāk nom mex o hakre.

³⁰ Pixōrāreja koja mēmo arīgro hā htīr nē mux nē harir tā mēmo arīgro hā ra grā pa nē hapêx. Kêp pixōrā pix nē hapêx tokyx anhỹr tā nhũm Tirtũm ho mex nē nhũm mux nē harir. No mē kajaja na hte mē ato mex o pixōrā ho mexta jakre.

Jakamã kwa mẽmo kaxyw kot ka kêt mẽ tee ri amnhĩ xê hkukamã ajamaxpêr o ri akaprĩ nê apa? Kot kaj mẽ ã ajamaxpêr anhÿr jao kormã amnhĩ kaxyw Tirtũm mã ajamaxpêr tÿx kêt nê.

³¹ —Kwa mẽ tee ri axàpkur xà hkukamã ajamaxpêr o ri akaprĩ hkêt nê. Nê tee ri amnhĩ kukamã tanhmã ajamaxpêr to ho ri akaprĩ hkêt nê. ³² Mẽ kot Tirtũm kôt amnhĩ xunhwÿr kêt xwÿnhjaja na htem ã ri hamaxpêr anhÿr o pa. Tã nom kêr ka mẽ ho mẽ uràk kêt nê. Tirtũm ra kot mẽ panhõ mẽmoj kêt kôt mẽ pahpumunh mex kênã. ³³ Jakamã kêr ka mẽ hkôt ri tanhmã amnhĩ nhĩpêx to rãhã ho ri apa. Nê amã ja pix tânopxar prãm. Hãmri nhũm Tirtũm amnhĩ tã mẽ apumu nê apkati mẽ mẽ amã mẽmoj nhõr o pa.

³⁴ —Jakamã kwa kêr ka mẽ tee ri amnhĩ kukamã ajamaxpêr o akaprĩ nê apa hkêt nê. Tirtũm kot apkati mẽ mẽ pajamãr mex jakamã kêr ka mẽ jarãhã amnhĩ kukamã apkati mẽ ajamaxpêr kêt nê. Kêr apkati mãn. ãm jarãhã pix mã mãn mẽ ate tanhmã amnhĩ nhĩpêx tota kukamã ajamaxpêr. Tirtũm kot mẽ pahpumunh mex o pa rãhã kênã. Anê.

7

Mẽ pahte axpên to pakapêr punuj kêt ã kot mẽ pamã karõ

Rukre 6.37-38, 6.41-42; mãänên Rômãn 2.1-3; Wam Korĩt 4.5; Xiakre 4.11-12

¹ Nhũm Jejus arĩ mẽ kãm kapêr nê mẽ kãm:

—Nê kêr ka mẽ atÿx ri amnhĩ krã hkôt tanhmã akwÿjê hõ kot amnhĩ tomnuj to hã harênh kêt nê. Kot kaj mẽ ã harênh anê nhũm Tirtũm ja hã mẽ apumu nê mẽ kajaja ã mẽ ajarênh anê. ² Na hte tanhmã mẽ pahte axpên nhĩpêx to hã mẽ pahpumunh kôt tanhmã mẽ panhĩpêx to. ³⁻⁵ Jakamã kwa kêr ka mẽ mẽhõ kot tanhmã amnhĩ tomnuj to hã omu hãmri nê hã kãm kapêr tokyx

anhÿr kêt nê. Akumrêx ate tanhmã amnhĩ tomnuj to hã amnhĩ pumu nê hkaga hãmri nê rĩ kormã ate mẽmoj tã omunh xwÿnhhta wÿr tẽ nê hã tanhmã kãm akapêr to. Kêr ka mẽ ã amnhĩ nhĩpêx anhÿr o ri apa.

—Nê xà koja mẽ akwÿjê hõ tanhmã amnhĩ tomnuj to grire. Ka ate amnhĩ tomnuj tÿx o hakrenh tã ã kot amnhĩ nhĩpêx anhÿr ã omu nê hã kãm akir nhũm amã ja mex nê nã? Nã koja amã ja mex kêt nê. Kot ka akumrêx ate tanhmã amnhĩ tomnuj tota kaga hãmri nê rĩ kormã anhĩõ tanhmã kot amnhĩ tomnuj to grireta nê kãm akapêr nhũm ja amã mex nê.

⁶ —Nê xà na htem mẽ apkur xà mex jamÿ nê rop mã kurê? Nã na htem anhÿr kêt nê. Ja pyrà nê kêr ka mẽ kot Tirtũm kaga xwÿnhjê mã kapêr jarênh o ri apa hkêt nê. Anê.

Mẽ pahte mẽmoj to presija hã amnhĩ to Tirtũm wÿr

Makre 11.24; Rukre 11.5-13; Juãw 14.13-14; mãänên Wam Tesarõn 5.17; Xiakre 1.5-8, 4.1-3

⁷⁻¹¹ Nhũm Jejus arĩ mẽ kãm kapêr nê mẽ kãm:

—Nê xà kot we akraja kãm prãm nê tep ã awÿ ka axtem nê kagã hõ py nê kãm agõ? Rÿ nhũm krãhyre gre hã awÿ ka axtem nê makre hõ py nê kãm agõ? Nã na ka htem ã mẽ hipêx anhÿr kêt. Na ka htem kot mẽmoj tã mẽ awÿr xà hkôt kãm mẽmoj gõ. Mẽ ate amnhĩ tomnuj tã na ka htem akrajê ho mex o ri apa. Tã kaxkwa kamã Tirtũmja na hte mẽ ato mex o mẽ ate mẽ akrajê ho mex jakrenh. Kãm mẽ ajapê htÿx kôt na hte mẽ amã mẽmoj mex nhõr o pa. Jakamã kot ka mẽ mẽmoj tã awÿ nhũm mẽ ama nê mẽ ate mẽmoj tã hwÿr xàta kôt amã kugõ. ãm xatã mẽ ate hã axàhwÿr o ri apaja nhũm mẽ amã hprãm xwÿnhhta gõ. ãm mẽmoj tã hwÿr rãhã ho ri apa nhũm mẽ ama nê mẽ amã mẽmoj tanhmã hipêx to. Te ho

mêhō kām tep xành nê teprênhxà hpyr nê xatã gôx kām rênh o âm pyrà nê xatã mêmoj tâ awy. Hâmri nhùm mê ama nê mê amã hprãm xwýnhta gô. Te tep kanhêr xwýnhta jatã kot tep kanhêr pyràk. Jao mê amã mêmoj prãm xwýnhta gô.

¹² —Nê mê piitã mê kot tãm mê anhîpêxja na mê amã hprãm. Tã kêr ka mê amnhî pyrà nê tãm mê piitã mê hipêx o ri apa. Mê kot tãm mê anhîpêx kêt tâ kêr ka mê axãmnhîx mê kêp anhôxy hkêt nê tãm mê hipêx. Kot kaj mê ã axpên nhîpêx anê nê finat Mojes mê Tîrtûm nhỹ hã mê kapêr o mê pa xwýnhjê xujarênh xà hkôt axpên nhîpêx mex o ri apa. Anê.

Pry pijakrut jarênh

Rukre 13.24; mãânên Piripos 3.19-21

¹³⁻¹⁴ Nhùm Jejus arî mê kãm kapêr nê mê kãm:

—Tîrtûm kapêrja mê kêp hihtýx jakamã na htem ohtô nê hkôt amnhî xunhwýr kêt nê. Na htem âm hpýnhre nê hkôt amnhî xunhwýr nê hkôt amnhî nhîpêx. Jakamã te Tîrtûm nhô krî hwýr pry grireta ã hpýnhre nê pa pyràk. No nhùm Satanasti hkôt mê kot amnhî xunhwýr xwýnhjaja na htem Satanasti kôt pix mã tanhmã amnhî tomnuj to hprãm. Mê kãm mex jakamã nhùm mê amnhî nhîpêx o te pry krepak rax ã axpên kôt mê ohtô nê pa pyràk o amnhî nhîpêx. Axtem kuwy hwýr pry krepakja nôr tâ nhùm mê htýx kuwyja wýr amnhî to pa. Jakamã Tîrtûm kapêrja mê apê hihtýx tâ kêr ka mê mãmrî hkôt amnhî xunhwý. Jao Tîrtûm nhô krî hwýr pry grireta ã mãn apa. Anê.

Mê kot amnhî to hêx xwýnhjê jarênh

Rukre 6.43-44; mãânên Xiakre 3.9-12; Wam Juãw 3.10, 4.4-6

¹⁵ Nhùm Jejus arî mê kãm kapêr nê mê kãm:

—E kwa mê o kora. Mê akwýjaja kot kêp Tîrtûm nhỹ hã kapêr jarênh xwýnh ã amnhî jarênh tâ na htem ja hã amnhî to hêx. Nhùm htem kãm mê kapêr mar prãm nê. Te mê kapêr mex pyràk tâ no nhùm htem âm mê kãm amnhî to hêx pix o ri mê hkôt pa. Mê kot mar nê axtem nê Tîrtûm kapêr kwým tanhmã amnhî nhîpêx to kaxyw nhùm htem hêx rom tanhmã mê kãm kapêr to. Jakamã kwa mê o kora. Mê axkãm ajamak rom nê amnhî nê mê omunh mex nê. ¹⁶ Kêr ka aprî hã mê piitã mê kot tanhmã amnhî nhîpêx to hã mê omu nê rî kormã tanhmã mê harênh to. Mê hamaxpêr punuj xwýnhjaja kêp Tîrtûm nhỹ hã kapêr jarênh xwýnh kêt. No koja mê tãm hamaxpêr nê tãm amnhî nhîpêx ka ja hã mê omu nê mê kêp Tîrtûm nhỹ hã kapêr jarênh xwýnh ã mê omunh kurê kumrêx. Na htem hprî hã mê kot tanhmã amnhî nhîpêx to ho pa hã mê omu nê rî kormã tanhmã mê harênh to. ¹⁷ Na htem hamaxpêr punuj hãmri nê hkôt tanhmã amnhî tomnuj to. Nom koja mêhō hamaxpêr mex nê hãmri nê hkôt tãm amnhî nhîpêx mex o pa. ¹⁸ Na htem tanhmã hamaxpêr to xà hkôt tanhmã amnhî nhîpêx to ho pa.

¹⁹ —Nê koja mêhō ô pî hpàr ô hkêt japêr nhùm tee ri omu hãmri nê krãhta nê kuwym kumê. Ja pyrà nê koja mêhō tanhmã amnhî tomnuj to ho pa nhùm Tîrtûm tee ri ja hã omu hãmri nê ã kot amnhî nhîpêx anhýr o paja myrapê kuwy hwýr kumê. ²⁰ Jakamã kot kaj mê tanhmã mê kot amnhî nhîpêx to ho pa hã akwýjê pumu nê ra aprî hã tanhmã mê kute hã mê omunh kurê kumrêx. Mê kêp Tîrtûm nhỹ hã kapêr xwýnh ã mê omu rý mê kêp hkwym ri kapêr xwýnh ã mê omu. Anê.

Mê kot Tîrtûm nhô krî hwýr gjêx

mã xwýnhjê jarênh

Rukre 13.25-27; mãânên Sikûn Korit 13.5; Wam Juãw 2.3-6

21-23 Nhũm Jejus arĩ mẽ kãm kapêr nê mẽ kãm:

—Nê Inhĩpêêxã Tĩrtũm mẽ wa inhõ krĩja wýr koja mẽ piitã gjêx kêt nê. Âm mẽ kot kapêr kôt amnhĩ nhĩpêx o mẽ pa xwýnh pixjaja koja mẽ nhỹrmã ma hwýr agjê. Na hte mẽ hkwýjaja ixto “Pahihti” anhỹr ã ijarênh tã no âm ixkôt ri amnhĩ nhĩpêx kêt nê. Jakamã koja mẽ nhỹrmã wa inhõ krĩ hwýr àpir kêt nê. Kot paj nhỹrmã mẽ piitã mẽ htĩr ri tanhmã mẽ kot amnhĩ nhĩpêx to ho pa hã mẽ omunh xã hkôt tanhmã mẽ harênh to. Mẽ mex ã mẽ hkwýjê jarê nê mẽ kot amnhĩ tomnuj ã mẽ hkwýjê jarê. Hãmri nhũm mẽ hkwý kot ixkôt amnhĩ nhĩpêx o pa hkêt xwýnhjaja kuwyta wýr ma pa pymaj tee ri amnhĩ kukamã hamaxpêr hãmri nê tanhmã inhmã amnhĩ jarênh to nê inhmã: “Kwa Jejus. Xã ate ixpumunh kêt? Na pa pre amnepêm ixtĩr ri pikap ixpare ri anhỹ hã aa mẽ kot mẽmoj pumunh kêt kwý ho anhỹr rax nê. Nê ixkwýjê nê mẽkarõmnuti jano nê mẽ kãm akapêr jarênh o ri ixpa. Kwa xã ate ja hã ixpumunh kêt?” Anhỹr o inhmã amnhĩ jarê.

—Nom mẽ htĩr ri ã mẽ kot amnhĩ nhĩpêx anhỹr o pa htã ixkapêr kôt amnhĩ nhĩpêx kêt jakamã kot paj mẽ kuma nê âm mẽ kuma nê amnhĩ nê mẽ hano nê mẽ kãm: “Tk kwa mẽ ma mra. Mẽ apê ixkwý hkêt. Mẽ ate ixkôt amnhĩ nhĩpêx o apare hã. Âm mẽ ate amnhĩ tomnuj xwýnh na ka mẽ. E mẽ ma kuwy hwýr amrar kurê kumrêx.” Anhỹr o kot paj amnhĩ nê mẽ hano. Hãmri nhũm mẽ kot ixkôt amnhĩ nhĩpêx o mẽ pa xwýnh pixjaja ma Tĩrtũm mẽ wa inhõ krĩ hwýr gjêx pa. Anê.

Ixkre pijakrut jarênh

Rukre 6.46-49; mãânên Xiakre 1.22-25; Wam Juãw 2.3-6

24 Nhũm Jejus arĩ mẽ kãm kapêr nê mẽ kãm:

—E kot paj mẽ amã awjarê ka mẽ ixujarênh ma. Nã mẽ kot ixkapêr mar nê hkôt amnhĩ nhĩpêx o mẽ pa xwýnhjaja te mẽ kot ixujarênh ja pyrãk. Mẽ kot amnhĩ nhĩpêx o te mēhõ kot amnhĩ kukamã hamaxpêr mex nê aptýx kãm amnhĩm õrkwý nhĩpêxja pyrãk. 25 Koja mēhõ aptýx kãm amnhĩm hipêx nhũm mẽmo arĩgro hã na wrýk rax nê gô htãm rax nê hanhi no nhũm arĩ âm týx nê xa. Tã kot kaj mẽ ixkôt amnhĩ nhĩpêx o ri apa hã kot kaj mẽ te ixkre ja pyrãk. Jao amex nê ajamakêtkati nê ri apa. Te ho gô htãm kot ixkre janhir nhũm arĩ âm týxta pyrãk.

26-27 —No mẽ kot ixkapêr mar nê âm mar xwýnhjaja. Te mẽ kot mēhõ kot amnhĩ kukamã hamaxpêr mex kêt nê htýx mõi nê gô mýri gyw rerek kãm amnhĩm õrkwý nhĩpêx pyrãk. Koja mẽmo arĩgro hã õrkwý hã kók xapêr týx nê na wrýk rax nê. Nê gô htãm nê hanhi nê kêp grãnh pa. Jakamã koja mēhõ ixkôt amnhĩ nhĩpêx kêt nê te kot ã kot amnhĩ nhĩpêx anhỹr xwýnhnta pyrãk. Jakamã kwa mẽ ixkapêr mar týx nê hkôt amnhĩ nhĩpêx rãhã ho ri apa. Te mēhõ aptýx kãm õrkwý xãm xwýnhnta pyrãk. Anê.

28 Nhũm pre Jejusja ã mẽ kãm ujarênh ry anê nhũm mẽ amnhĩ jaêr pê kot tanhmã mẽ ahkre htoja mar o hkrĩ. 29 Hãmri nê xapên mã harênh o:

—Hêxta waa nê. Âm hãmri na ã mẽ pamã kapêr anê. àhpumunh týx kôt na hte âm hãmri tanhmã mẽ pamã ujarênh to. Pêr âm Tĩrtũm kapêr tũm o mẽ ahkre xwýnhjê kurom àhpumunh týx kumrêx. Anê.

8

Kà nhy hkro xapêr o pa xwýnh jarênh

Makre 1.40-45; Rukre 5.12-16

¹ Tã nhũm Jejus mē kãm kapēr pa hãmri nē hixét prêeta rũm akupÿn wrÿ nē ma tē nhũm mē ohtô nē ma hkôt mra. ² Hãmri nhũm mēhō my hkà nhy hkro xapêr o pa xwÿnhja omu nē hwÿr tē. Hãmri nē kutã hkõnkrã ho tēm nē hipô nē nhÿ nē amnhĩ to kuwÿ nē kãm:

—Pa Pahihti. E ot pa awÿr amnhĩ to tē. Akupÿm ate mē ixto mex kaxyw axãhpumunh tÿx jakamã kot ka amã akupÿm ixto mex prãm nē mãmri ixto mex. Anē.

³ Hãmri nhũm Jejus kuma nē hkà punuti hã ìhkra xi. Amnhĩ kamã kahak kêt nē hã ìhkra xi nē kãm:

—Nà kot paj ato mex. E akupÿm akà mex. Anē.

Hãmri nhũm hkà akupÿm mex kurê kumrêx. ⁴ Hãmri nhũm Jejus kãm:

—E kêr ka amnhĩ tã mē kãm tanhmã ijarēnh to hkêt rãhã ma patre hwÿr tē kē akupÿm akà mex ã apumu. Hãmri ka hpãnhã annepēm finat Mojes kot mē ate akupÿm amex ã Tirtũm mã tanhmã amnhĩ nhĩpêx to hã karõta ka kãm ho anē. Kē mē piitã akupÿm akà mex ã apumu. Anē.

Pôristi krãhtũm mã àpēnh xwÿnh jarēnh

Rukre 7.1-10

⁵ Tã nhũm Jejus ma krĩ pē Kapanau hwÿr mō. Hãmri nē hwÿr pōj nhũm Rõm nhõ xwÿnh pē pôristi krãhtũmja omu nē hwÿr tē. Kêp Ijaew kêt tã hwÿr tē. Na pre kãm àpēnh xwÿnh kēp à htÿx nē nō nhũm omu nē tee ri hkukamã hamaxpēr. Hãmri nē Jejus ra õ krĩ hwÿr hpôx ã omu nē hwÿr tē nē kãm harē nē kãm:

⁶ —Pa Jejus? E ot pa awÿr tē. Inhmã àpēnh xwÿnhja na ixpê à htÿx nē. Ra ì kamã htyk pa nē nō. O mÿj inhõrkwÿ kamã nō. Anē.

⁷ Nhũm Jejus kuma nē kãm:

—Tÿ? Tôe. Nà pa ma akôt tē nē akupÿm amã ho mex. Anē.

⁸⁻⁹ Hãmri nhũm tee ri kuma nē kãm:

—Kwa akĩnhã ixpê Ijaew kêt jakamã ixte amnhĩ kuk ã ixpijaam. ãm ja rũm mãn akapēr pix o akupÿm inhmã ho mex nà? Ixpê mē hkrãhtũm na pa hte inhõ pôristi mã mēmoj tã karõ nhũm mē inhmar xà hkôt inhmã mēmoj tanhmã ho. Na pa hte mē kãm: “E mē ma mra nē ã amnhĩ nhĩpêx anē.” Anē nhũm htem inhma nē ma mrar kurê kumrêx. Rÿ pa mē kãm: “E mē amnē ixwÿr mra nē ã amnhĩ nhĩpêx anē.” Anē nhũm mē inhma nē ixwÿr mra. No kêt ixrom axãhpumunh tÿx kôt na ka hte mē àja mã akapēr nhũm ama nē mē kēp hapôx nē ma mrar kurê kumrêx. Jakamã kwa ãm ja rũm akapēr pix o akupÿm inhmã ho mex nà? Anē.

¹⁰ Hãmri nhũm Jejus amnhĩ jaēr pē kot kãm ã kapēr anhÿrta ma nē hkĩnh nē. Hãmri nē hã hkôt ri mē mōr xwÿnhjē mã kãm:

—Kwa xà na ka mēmyja kapēr ma? Mē pahkĩnh ã kēp Ijaew kêt tã mē arom amnhĩ kaxyw inhmã hamaxpēr tÿx nē. Aa mē atõ urak nē ã amnhĩ kaxyw inhmã ajamaxpēr tÿx anhÿr kêt tã nhũm mē arom kãm àpēnh xwÿnh kaxyw ã inhmã hamaxpēr tÿx anē. ¹¹ Nà koja nhÿrmã mē hkwyjaja kēp Ijaew kêt tã ohtô nē pika piitã kurũm ma Tirtũm mē wa inhõ krĩ hwÿr api nē hwÿr agjē. Nē wa ixkuri wa inhõ krĩ kamã Ijaew pãr krax pē Apraãw nē Ijak nē Jako mē pimràatã pa ho pa. Mē kēp Ijaew kêt tã mē ìhkô hã apkur mex o hkrĩ nhũm Tirtũm mē ho mex rax o pa. ¹² No pēr mē apē Ijaew kwÿjaja kot kaj mē hkôt hwÿr agjêx kêt nē. Tirtũm kãm hwÿr mē agjêx prãm tã ka mē axtem nē hkaga. Jakamã kot kaj mē ma kamãt kô xihtÿx rax wÿr ajapêx nē mē kēp awry rax nē mē kot amnhĩ xà htÿx kamã hamak tũm xata kamã apa ho apa. Hãmri nē tee ri mē ixwÿr agjêx prãm kaprÿ nē akapri

xàj mur nê amnhĩ kamã agryk tỳx nê. No ãm tee ri amnhĩ kamã agryk kaprỳ. Mẽ ate Tĩrtũm kapêr kaga nê hkõt amnhĩ xunhwỳr kêt jakamã kot kaj mẽ nhỹrmã ã amnhĩ nhĩpêx anê. Anê.

¹³ Nhũm pre ã Jejusja mẽ kãm kapêr anê. Hãmri nê pòristi krãhtũmta mã kãm:

—E mãmrĩ ma akupỹm tẽ nê amã àpênh xwỳnhhta pumu. Ra ate kaxyw inhmã ajamaxpêr tỳx jakamã na pa ra akupỹm amã ho mex. E akupỹm tẽ nê omu.

Anhỹr o kãm kapêr rôm nhũm ra akupỹm kãm mex kurê kumrêx.

Jejus kot ahpỹnhã mẽ à xwỳnhjê ho mex

Makre 1.29-31; Rukre 4.38-41

¹⁴ Tã nhũm Jejus ma Simãw Pêtre nhõrkwỹ hwỳr tẽ nê hwỳr axã. Nhũm Simãw Pêtre xupãnhgêx ra à nê hkà kagro htỳx nê nõ. ¹⁵ Hãmri nhũm Jejus hwỳr axã nê omu nê ìhkra hã kupy nhũm hkà hakry nê akupỹm hihtỳx kurê kumrêx. Jakamã kànhmã nhỹ nê mẽ kãm mẽõ hã àpênh o ri mra.

¹⁶ Tã nhũm ra awjakry. Ra kamãtre ho mẽ nhũm mẽ piitã Jejus wỳr mẽ à xwỳnhjê ho mra. Nê mẽkarõmnuti kot mẽ hwỳr gjêx xwỳnhjaja nhũm mẽ hwỳr mẽ o mra. Hãmri nhũm mẽ omu nê akupỹm mẽ piitã mẽ ho mex. Mẽ à xwỳnhjê ho mex nê mẽ hkwỳjê nê mẽkarõmnuti jano. ãm kapêr pix o mẽ nê mẽ hano nhũm mẽ kêp hapôj nê ma hapêx. ¹⁷ Na pre ra Tĩrtũm nhỹ hã kapêr xwỳnh finat Ijaisja ã amnhĩ nhĩpêx anhỹrja kukamã amnepêm mẽ kãm harênh o:

Tĩrtũm kot mẽ pahwỳr mẽnh mã xwỳnhja koja nhỹrmã wrỳ nê mẽ panê mẽ paxã piitã rênh pa nê akupỹm mẽ pahto mex pa. Anê.

Na pre ã finat Ijaisja Jejus kukamã harênh anê. Tã nhũm wrỳ nê kot harênh xã hkõt ã amnhĩ nhĩpêx anhỹr o pa.

Wa kãm Jejus kõt amnhĩ xãm prãm xwỳnh wa harênh

Rukre 9.57-62

¹⁸ Tã nhũm Jejus amnhĩ pu hã rĩt nê tee ri hwỳr mẽ mrar xwỳnhjê pumu hãmri nê hkõt mẽ pa ho mẽ pa xwỳnhjê mã kãm:

—E ma pu mẽ pàr mã agjê nê ma xarmã mẽ. Anê.

¹⁹ Hãmri nhũm mẽ nojarêt rôm nhũm Tĩrtũm kapêr tũm o mẽ ahkre xwỳnhjê hõ Jejus wỳr tẽ nê kãm:

—Pa mẽ ijahkre xwỳnh? E pa ma akõt ri ixpa ho ixpa nã. Anê.

²⁰ Hãmri nhũm kuma nê kãm:

—Ko ka mã. Kam nê rĩ ma ixkõt ri apa. Nom kêr ka inhmar kumrêx. Xore na hte pika hkre kamã hikwỹ. Nê kuwênhre pĩ nhĩmõk ã hikwỹ. No pa ixpê Tĩrtũm kot mẽ awỳr inhmênh xwỳnh tã mry hkĩnhã inhõrkwỹ hkêt. Na pa hte amarĩ nhãm krĩ hwỳr ixpa nê nhãm hõ hwỳr ixpa. Tã xã kot ka ixpyrà nê ã amnhĩ nhĩpêx anhỹr o ri apa nã? Anê.

²¹ Hãmri nhũm pãnhã hõja hwỳr tẽ. Ra mẽ kot hkõt amnhĩ xunhwỳr xwỳnhjê hõja hwỳr tẽ nê kãm:

—Pa Pahĩti. E pa amã amnhĩ jarê ka inhma. Kot paj ma akõt ixpa ho ixpa no ãm kormã. Koja nhỹrmã inhĩpêxã tanhmã amnhĩ to nê ty mãn. Pa haxã hãmri nê rĩ kormã ma akõt ixpa ho ixpa. Anê.

²² Hãmri nhũm kuma nê kãm:

—Kwa nã ri ã ajamaxpêr anhỹr kêt nê. Ma ixkõt apa ho apa kurê kumrêx. Kê mẽmoj inhnê ano kupy rỳ apê àmnàr kêt nê. Kwãr mẽ htĩr tũm nê mẽ pa hkêt mã xwỳnhjaja mãn axwakre kamã amã anhĩpêxã jamãr o pa nê haxã. Anê.

Jejus kot kõt o pinhkrênh jarênh

Makre 4.35-41; Rukre 8.22-25

²³ Tã nhũm mẽ ra xarmã nojarêt nhũm Jejus mẽ hkõt mẽ pa ho mẽ pa xwỳnhjaja pàr wỳr agjê hãmri nê himõ raxja ã ma xarmã mẽ.

²⁴ Hãmri nhũm Jejus ra õtxwa nê ra gõr nê nõ. Puh nhũm naja hkoko

ho mō nê kôk xàpêr tỳx kumrêx. Nhũm gô kànhmã harĩ nê axpên tak tỳx nê. Xatã axpên tak nê pàr kre kamã axkapĩ nhũm ra àr o mō. Hãmri nhũm mẽ tee ri omu nê kãm ma htỳx kumrêx. Nê tee ri amnhĩ nhĩpêx. No nhũm Jejusja htỳx gôr nê nō. ²⁵ Hãmri nhũm mẽ hwỳr hprôt nê kumra nê kãm:

—Kwa Pahihti. Kot puj mẽ jarãhã pahtyk pa. Kwa tokyx kànhmã nhỹ nê ri tanhmã amnhĩ nhĩpêx to wehe. Anê.

²⁶ Hãmri nhũm hkrākato nê kànhmã nhỹ nê kôk mã kapêr nê kãm:

—E kwa hãmri anhĩkrê. Anê.

Puh nhũm hpinhkrênh pa nhũm gôja tãm nôr kurê kumrêx. Hãmri nhũm Jejusja hkôt mẽ pa ho mẽ pa xwỳnhjê hwỳr apkjê nê mẽ kãm:

—Hêxta waa nê. Kwa pêr ãm kor-mã te mẽ ate amnhĩ kaxyw Tĩrtũm mẽ wa inhmã ajamexpêr tỳx kêt pyrãk. Hã na ka mẽ amã ma xàj tee ri amnhĩ kukamã ajamexpêr. Anê.

²⁷ Hãmri nhũm mẽ amnhĩ jaêr pê ã kot amnhĩ nhĩpêx anhỳrja ã omu nê tee ri hamaxpêr nê axpên pumunh pê omunh o kuhê. Hãmri nê axpên mã:

—Kokỳy. Pêr Jejus kêp mẽ panhĩ hkêt. Mẽ pahtô kot pu we te kot amnhĩ nhĩpêx pyrã nê kôk mã pakapêr nhũm hpinhkrênh kurê kumrêx? Nã Jejusja mẽ pakurom àhpumunh tỳx o àhpumunh tỳx. Anê.

Jejus kot wa nê mẽkarômnuti janor

Makre 5.1-20; Rukre 8.26-39

²⁸ Tã nhũm mẽ ra himô rax pê Garirejja ã rê nê pika pê Geras wỳr pój nê kamã mō. Hãmri nhũm ra mẽhō myja wa hamêxkrut nê mẽ kutã tẽ. Ra mẽkarômnuti kot hamê wa hwỳr gjêx xwỳnhja wa. Mẽkarômnuti xohtô kot tanhmã wa ho jakamã nhũm wa oprê htỳx nê hihitỳx rax nê wa pa. Jakamã nhũm mẽ piitã kãm wa uma nê amnhĩ nê mẽ htykjê jagjênh xà hã kên kre

kaêx kãm wa kumê nhũm wa kamã pa ho pa. Jakamã nhũm wa Jejus kutã tẽ nê amnhĩ wỳr omu hãmri nê amnhĩ nê tanhmã kãm kapêr to. Nom mẽkarômnuti nhỹ hã àmra kamã kãm kapêr nê kãm:

²⁹ —Pa Tĩrtũm Kra Jejus? Mo kaxyw na ka mẽ ixwỳr tẽ? Kwa tanhmã mẽ ixto hkêt nê. Ate tanhmã mẽ ixtomnu hto hã arĩgrota kormã katoore hã. Anê.

³⁰ Nhũm ra krĩ nhō xwỳnhjê hkrit hagrô ohtô nê ri mẽ hpum pa. ³¹ Nhũm mẽkarômnuti mẽ omu hãmri nê amnhĩ to Jejus wỳ nê kãm:

—Kwa kot ka jahti wa nê mẽ ijapôx japêr nê mẽ kot amnhĩ xà htỳx kamã hamak tũm xàta wỳr mẽ ixrênh kêt nê. Hagrô hkwỳ mũj wỳr mãn mẽ ixrê pa mẽ hpãnhã hwỳr mãn hagjê nã? Anê.

³² Hãmri nhũm mẽ kuma nê mẽ kãm:

—Tôe mẽ tãm mẽ hwỳr mãn mra. Anê.

Hãmri nhũm mẽ kuma nê myta wa kêp hapôj nê hagrô hwỳr mrar kurê kumrêx nê hpãnhã kãm gjêx pa. Hãmri nhũm hagrôta mẽkarômnuti pymaj amỳra nê ma hprôt nê himô hã hixêt prêk ã axpum rôrôk nê gôx kãm mrô nê pikaprãr pa. ³³ Hãmri nhũm hagrô jamãr o ri mẽ pa xwỳnhjaja tee ri omu hãmri nê ma akupỳm krĩm hprôt nê mẽ kãm awjarê. Nê myta wa akupỳm tãm hkrã hã harênh o hprôt. ³⁴ Hãmri nhũm krĩ nhō xwỳnhjaja tee ri mẽ hkrit jarênh ma nê ma piitã Jejus wỳr mra nê hkaxpa. Hãmri nê amnhĩ nê kãm:

—E kwa mẽ ma amrar kurê kumrêx. Anê.

Hãmri nhũm mẽ kuma nê awjanã nê ma akupỳm pan rê.

9

ĩ kamã htyk xwỳnh jarênh

Makre 2.1-12; Rukre 5.17-26; Juãw 10.37-38

¹ Nhũm Jejus mẽ hkôt mẽ pa ho mẽ pa xwỳnhjaja awjanã nê ma

akupÿm pàr wÿr mra nê gjêx pa nê akupÿm xarmã rê nê akupÿm Jejus nhô krî hwÿr mô. ² Hâmri nê hwÿr pøj nhùm krî nhô xwÿnh kwÿjaja mē omu nê ï kamã htyk xwÿnhja mÿ nê Jejus wÿr o tē. Nôr xà kamã nôr rãhã nhùm mē hã hije nê kumÿ nê hwÿr o tē. Hâmri nhùm amnhÿ tã mē omu. Ra mē kot hkrãmnhwÿta kaxyw kãm hamaxpêr tÿx ã mē omu nê ï kamã htyk xwÿnhnta mã kapêr nê kãm:

—Pa? Kwa tee ri amnhÿ kukamã ajamaxpêr kêt nê. Na pa ra apê tanhmã ate amnhÿ tomnuj to ho ijapêx pa. Kot paj axte kãm ijamaxpêr kêt nê. Anê.

³ Hâmri nhùm Tÿrtÿm kapêr tÿm o mē ahkre xwÿnhjaja tee ri ã kot kãm kapêr anhÿrja ã kuma nê axpên mã:

—Tk. Kwa mēhō myti mÿj kêp Tÿrtÿm kêt tã te ri kot amnhÿ nhÿpêx pyrãk ã amnhÿ nhÿpêx. Tÿrtÿm pix na kot mē nê mē kot amnhÿ tomnuj o hapêx xwÿnh. Anê.

⁴ Hâmri nhùm Jejus amnhÿ tã mē kuma nê mē kãm:

—Kwa mē ã ajamaxpêr anhÿr kêt nê. ⁵ Ixte mē nê mē kot amnhÿ tomnuj o ijapêx par ã amnhÿ jarênh tã mē ate ja kôt ixpumunh kêt jakamã na ka mē ja kaxyw ixkôt ajamaxpêr kêt nê. Nom kot paj mē anoo mã akupÿm ï kamã htyk xwÿnhnta o mex ka mē apiitã hã ixpumu hãmri nê ixkôt ajamaxpêr kurê kumrêx. Ixpê Tÿrtÿm kot mē awÿr inhmênh xwÿnhnta na pa. Ixte mē anê mē ate amnhÿ tomnuj rênh kaxyw na pre mē awÿr inhmê na mē awÿr wrÿ. ⁶ Tã mē ate ja hã ixpumunh kaxyw kot paj mē anoo mã ja ho mex.

Anhÿr o mē kãm amnhÿ jarê hãmri nê ï kamã htyk xwÿnhnta mã kãm:

—E kãnhmã xa nê anôr xàta py nê ma akupÿm anhôrkwÿ hwÿr tē. Anê.

⁷ Puh nhùm kãnhmã ãm kurê kumrêx nê nôr xà py nê mē noo mã kato nê ma akupÿm ôrkwÿ hwÿr

tē. ⁸ Hâmri nhùm mē piitã no hapôx rÿnh nê omunh o kuhê nê kamã no pyma htÿx nê. Nê tee ri omu nê axpên mã:

—Kokÿÿ. Kwa aa mē pahte ã mēhō kot amnhÿ nhÿpêx anhÿr ã omunh kêt tã jarãhã ja pumu.

Anhÿr o Jejus jarê hãmri nê ÿ hã Tÿrtÿm mã mex o mex ã harê.

Jejus kot amnhÿ kôt Matêwre hwÿr

Makre 2.13-17; Rukre 5.27-32

⁹ Tã nhùm Jejus mē kêp kato nê hkôt mē pa xwÿnhjê mē nhùm mē ma mô. Hâmri nê pa ixpê Matêwre ixpumu. Ixte Rôm kãm mē ho amnhÿtãr xwÿnh mã krî nhô xwÿnhjê pê kãxpore hkwÿ jamÿnh xwÿnh na pa pre. Nom mē kot ho tewên kryre htã ixte amnhÿm hkwÿ ho ixãrÿk prãm xãj na pa pre hte mē kãm ho rÿnh nê harê. Jakamã nhùm mē piitã kãm ixkÿnh kêt nê. Tã pa pre mē kêp kãxpore jamÿnh xà hã ixkre kamã mē kêp hamÿnh o nhÿ nhùm Jejus mē hkwÿjaja ijãnh mra nê ixpumu nê amnhÿ kôt ixwÿ nê inhmã:

—Pa? E axãpênnta kaga nê hpãnhã amnê mē ixkôt mãn tē nê ixkôt mãn ri apa ho apa. Anê.

Hãmri pa kuma nê ixãpênnta kaga nê ma hkôt tē. Nê hpãnhã hkôt ixpa ho ixpa.

¹⁰ Hãmri nê mēmo arÿgro hã amnhÿ nhôrkwÿ hwÿr Jejus nê hkôt mē pa ho pa xwÿnhjaja mē ixkrãmnhwÿ hkwÿjê hwÿ. Nhùm mē piitã mra nê inhôrkwÿ hwÿr agjê nê ixkutã apkur o hkrÿ. Nê ixpyrã nê Rôm nhô pahi mã mē kêp kãxpore hkwÿ jamÿnh xwÿnh kwÿ haxwÿja ixwÿr mra nê mē ixkutã apkur o hkrÿ. ¹¹ Hãmri nhùm Parijew nhô xwÿnhjaja mra nê inhôrkwÿ kapem mē ixãpkur ã mē ixpumu. Nê tee ri mē ixkaêx ã Jejus pumu hãmri nê hkôt mē pa ho mē pa xwÿnhjê hwÿr agjê nê mē ixtã mē kãm akir nê mē kãm:

—Kwa mẽ kot jajê kutã apkur kêt tâ mẽ akrãhtũmja axtem nẽ mẽ kutã apkur o nhỹ. Kwa na mẽ kot amnhĩ tomnuj xwỹnh kẽnã. Jejus kot amnhĩ to mex ronhỹx mẽ kutã apkur kêt nẽ. Anẽ.

¹² Hãmri nhũm Jejus amnhĩ tâ ã mẽ kapër anhỹrja ma nẽ mẽ kãm:

—Tk. Nã ixte tãm mẽ unhwỹr kaxyw na pa mẽ kutã ixãpkur o nhỹ. Xã na hte tõtôja mẽ mex xwỹnhjê hwỹr mra nẽ mẽ hkane? Nã ãm mẽ à xwỹnhjê pix wỹr na hte mra nẽ tanhmã mẽ hkane hto. Ra mẽ ate ja pumunh mex. Tã ja pyrà nẽ na pa pre mẽ kot amnhĩ to mex xwỹnhjê hwỹr ixwrỹk kêt nẽ. Mẽ kot amnhĩ tomnuj xwỹnhjê pix wỹr na pa pre wrỹ. Ixte tãm mẽ unhwỹr kaxyw mẽ hwỹr wrỹ nẽ ã jajê kutã ixãpkur o inhỹr anẽ. ¹³ Ga mẽ ma mra nẽ Tĩrtũm kapër ã kagã htũm kot ja jarẽnhja kamã harẽ nẽ ama. Harẽnh kot:

Na ka htem inhmã tanhmã amnhĩ jarẽnh to kaxyw hãmri nẽ inhmã mẽmoj gõ nẽ tanhmã ixto mex to. Nom kêt ka mẽ ãm ja pix ho anhỹr kêt nẽ. Mẽ mããnẽn mẽ piitã tanhmã mẽ ho mex to ho ri apa. Anẽ.

—Ã Tĩrtũm kapër ã kagã htũm kot ja jarẽnh kot anhỹr. Tã ja pyrà nẽ na pa pre mẽ kot amnhĩ tomnuj xwỹnhjê hwỹr wrỹ nẽ mẽ kamã ixukapřĩ ho ixpa. Mẽ kot amnhĩ tomnuj kaga nẽ hpãnhã tãm amnhĩ nhĩpêx kaxyw na pa pre ã mẽ hwỹr ixwrỹk anẽ. Tã ka mẽ ri atỹx amnhĩ krã hkõt ã ixto akapër anẽ. Anẽ.

*Mẽ kot mẽmoj tâ Jejus kukjêr
Makre 2.18-20; Rukre 5.33-35*

¹⁴ Tã nhũm Juãw Paxis kõt mẽ pa xwỹnhjaja Jejus wỹr mra nẽ mẽmoj tâ hkukja nẽ kãm:

—Pa? E ot pa mẽ awỹr mra. Kwa mẽ inhmã mẽmoj jarẽ. Na pa htem tũhã Parijew nhõ xwỹnhjê pyrà nẽ ixãpkur kêt kãm Tĩrtũm mẽ ho amnhĩ jarẽ. Tã nom akõt mẽ pa ho mẽ pa xwỹnhjaja na htem ãmnhĩx apkur o

pa kamã kãm amnhĩ jarẽnh o pa. Kwa mo na htem mẽ ixpyrà nẽ tũhã apkur kêt kamã kãm amnhĩ jarẽnh kêt nẽ? Anẽ.

¹⁵ Hãmri nhũm mẽ kuma nẽ mẽ kãm:

—Nã mo kaxyw kot kêt mẽ apkur kêt rãhã kãm amnhĩ jarẽ? Mẽ hkapřĩre hã. Mẽ kot ixkõt pa ho pa hã amnhĩ pumunh jakamã na htem hkĩnh nẽ ixkõt pa. Kormã ixte mẽ kamã ixpa kẽnã kot kêt mẽ apkur kêt rãhã Tĩrtũm mã tanhmã amnhĩ jarẽnh to. Xã na htem hkrãmnhwỹ hã hkĩnh kaxyw hã akupřõ nẽ hkapřĩ nẽ apkur kêt o kamãt nẽ mỳr o hkrĩ? Nã na htem anhỹr kêt nẽ. Na htem hã akupřõ nẽ hkĩnh nẽ hã apkur rũnh nẽ. Ja pyrà nẽ na hte ixkõt mẽ pa ho mẽ pa xwỹnhjaja ixkõt kormã ãmnhĩx hkĩnh nẽ apkati mẽ apkur o pa. Nom koja mẽ kãm ixkurẽ xwỹnhjaja nhỹrmã tanhmã ixto hãmri nhũm mẽ hkapřĩ htỹx nẽ řĩ kormã tũhã apkur kêt rãhã Tĩrtũm mã amnhĩ jarẽ. Anẽ.

*Mẽ pahte Jejus kõt amnhĩ nhĩpêx
Makre 2.21-22; Rukre 5.36-39*

¹⁶ Nhũm Jejus mẽ piitã mẽ kãm kapër nẽ mẽ kãm:

—Mẽ kot amnhĩ tomnuj xwỹnhjaja ra mẽ kot amnhĩ nhĩpêx tũm o amnhĩ pyràk jakamã na htem tanhmã mẽ kot amnhĩ nhĩpêx nyw tota kaga. ¹⁷ Tã ixte amnhĩ nhĩpêx nywja te kot mẽ ate amnhĩ nhĩpêx tũm pyràk kêt jakamã na ka htem ixkapër ma nẽ ãm ama. Kwa mẽ inhma nẽ mẽ ate amnhĩ nhĩpêx tũmja gryk ã ixkaga hkêt nẽ. Anẽ.

*Mẽ hkra htyk nẽ mẽhõ ni kamrõ
wa harẽnh
Makre 5.21-43; Rukre 8.40-56*

¹⁸ Nhũm pre ã Jejus mẽ kãm kapër anhỹr o xa. Rõm nhũm mẽõ pahĩhtija tẽ nẽ mar o xa. Hãmri nẽ hamaxpër o:

—Kokỹy. Jejusja ãm hãmri kęp pahĩ maati kumrêx. Hã na ri ã

kapêr mex anê. E pa hwÿr tē nē ixkrare ho kuwÿ. Anê.

Hāmri nē hwÿr tē nē kutā hkōnkrā ho nhÿ nē kām:

—Pa akupÿm mē ixto mex xwÿnh? E ot pa awÿr tē. Kwa ma ixkôt tē nē inhmā ixkra nire pumu nē tanhmā inhmā ho kê akupÿm inhmā htîr. Na ham ixpê ty pa kaxyw amā ijamaxpêr nē man awÿr tē. Anê.

¹⁹Hāmri nhÿm kuma nē kām:

—Tôe. Nà kot paj ma akôt tē. Anê.

Hāmri nē ma hkôt tē. Mē ixpê hkôt ixpa ho ixpa xwÿnhjê mē pa mē ma hkôt mō. ²⁰⁻²¹Nhÿm mēhō ni kamrô rāhā ho pa xwÿnhja ma mē ixkôt tē. Na pre hte hkamrô hkryre rāhā ho pa hā amgrā pê 12 nē tee ri kām amnhî mex prām o pa. Jakamā Jejus jarēnh ma nē amnhî kaxyw kām hamaxpêr kurê kumrêx nē hamaxpêr o:

—Ma pa kop ma hwÿr tē nē kēp ê nhîrê pix kupēnh tā akupÿm inhmex japêr. Anê.

Hāmri nē ma mē ohtôjê kaêx kôt hwÿr tē. Nē katut kôt tē nē kēp ê nhîrê kupê. ²²Hāmri nhÿm Jejus ho hakêx nē amnhî tā omu nē kām:

—Pa? Kwa tee ri amnhî kukamā ajamaxpêr kêt nē. Ate amnhî kaxyw inhmā ajamaxpêr tÿx jakamā na ka ra akupÿm amex. E māmri ajamakêtkati nē ri apa. Anê.

Hāmri nhÿm akupÿm mex nē hkînh tÿx nē ma akupÿm tē. ²³Hāmri pa mē ma htyk xwÿnh nhîpêxà hkôt mra nē ôrkwÿ hwÿr agjê nē mē pikuprōnh xwÿnhjê pumu. Nhÿm mē ra mē hā htu rax nē. Nē omÿj ri kapri xàj pifti kakôr o hkrî nē omÿj ri mur. Kâx pê mur nē amnhî tak o hkrî. ²⁴Hāmri nhÿm Jejus mē hwÿr axà nē mē omu. Nē ra kot my hkrata htyk ā omunh tā kuri mē mÿr o mē hkrî xwÿnhjê mā kapêr nē mē kām âm ôt nē nôr ā harê nē mē kām:

—Pa? Kwa mon ka mē ri akapri nē amÿr o akrî? E mē ma mra. Na

wa hkrata wa kēp htyk kêt nē. Na âm gôr nē nō. Anê.

Hāmri nhÿm mē kot ra htyk ā omunh mex jakamā kuma nē âm kuma. Nhÿm mē hkwÿja axtem nē ri axpēn mā hā hpêr o pikēnh o hkrî. ²⁵Hāmri nhÿm kapôt mā mē hano nhÿm mē hapôj nē kapôt ā kuhê. Hāmri nhÿm Jejusja htyk xwÿnhhta wÿr axà nē hpa hā kupy nē kânhmā âm nhÿm akupÿm htîr nē kânhmā âm kurê kumrêx. ²⁶Hāmri nhÿm mē piitā akupÿm htîr kām omu nē ma ri krî piitā hkôt ri mē kām harēnh o hprôt.

Wa nohkre xwÿnh wa harēnh

Matêwre 20.29-34

²⁷Tā nhÿm Jejus kato nē ma tē. Pa mē hkôt ixpa ho ixpa xwÿnhjaja ma hkôt mō. Hāmri nhÿm wa myja wa hamêxkrut. Hamê wa nohkre xwÿnh wa Jejus jarēnh ma nē hā ajêt nē hkôt rôrôk o mō. Nē xatā amnhî to hwÿr o hkôt rôrôk o mō nē kām:

—Pa Jejus? E Tirtûm kot mē ixkaxyw axâm jakamā kwa wa ix-pumu nē wa ixkamā axukapri kêt wehe. Anê.

²⁸Hāmri nhÿm wa kuma nē wa hkukamā nhÿri ixkrem axà nhÿm wa hkôt axà nē xa nhÿm wa omu nē wa kām:

—Pa? E xàn ka wa ra amnhî kaxyw inhmā ajamaxpêr tÿx nē nà? Anê.

Hāmri nhÿm wa kām:

—Tÿ. Wa ixte amnhî kaxyw amā ijamaxpêr tÿx kênâ. Anê.

²⁹Hāmri nhÿm wa kuma nē hamê wa no hā îhkra xi nē wa kām:

—Tôe. Nà war ate tanhmā amnhî kaxyw inhmā ajamaxpêr to xà hkôt kot paj war anhîpêx. Anê.

³⁰Hāmri nhÿm wa akupÿm rit mex kurê kumrêx. Hāmri nē akupÿm kato nē ma htēm kaxyw nhÿm wa kām:

—E kêr ka wa nhām mē kām ixte war ato mex ā ijarēnh kêt nē. Âm kwarî ho kwarî.

³¹Anhÿr tā no nhÿm wa kuma nē âm kuma nē wa ma tē nē krî pu hā

mê piitã mê kãm ri war amnhĩ tã harênh o mra.

Kapêr kêt xwýnh jarênh

³²Tã nhũm Jejus ma axte nhýhým mê ixto mō. Hãmri nhũm mēhō my mēkarōmnuti kot hwýr àr nē tanhmã ho nhũm kapêr kêt nē pa xwýnhja nhũm mê Jejus wýr o tē. ³³Hãmri nhũm omu nē nē mēkarōmnuti jano nē kãm:

—E kēp akato nē ma tē. Anē.

Hãmri nhũm kuma nē kurũm kato nhũm akupým kapêr mex kurē kumrēx. Hãmri nhũm mê kot hã omunh xwýnhjaja tee ri kot mēkarōmnuti janor ã omu nē kamã no puma nē. Nē axpēn mã:

—Kokýy. Aa mê pahte ã mēhō kot anhýr pumunh kêt kumrēx tã na pu mê jarãhã ja pumu. Anē.

³⁴Nom nhũm mê hkwy pē Parijew nhō xwýnhjaja axtem nē hã mê kãm kapêr o:

—Tk. Kot amnhĩ krã hkôt mê hanor kêt kēnã. Mēkarōmnuti nhō pahĩ nhý hã kot mē nē mê hanor kēnã. Anē.

Jejus kēp mê pakamã ukapri xwýnh

Makre 6.34; Rukre 10.2-3; Juãw 4.35

³⁵Tã nhũm Jejusja krĩ ho ohtō nē hkôt ri mê kãm Tirtũm kapêr jarênh o pa. Pa mê hkôt ixpa. Na pre hte nhýri krĩ hwýr pōj nē mê kot Tirtũm kapêr o mê ahkre xà hã ixkre hwýr mra nē hwýr agjē nē mê pikuprōnh xwýnhjē jahkre. Nē mê kãm:

—E mê inhma. Tirtũm kãm mê apiitã mê ato hkra hprãm. Jakamã kwa mê ate amnhĩ tomnuj kaga hprãm xàj hkôt amnhĩ xunhwý nē kapêr kôt amnhĩ nhĩpēx. Jao amnhĩ nhĩpēx nyw o amnhĩ nhĩpēx o ri apa.

Anhýr o mê kãm kapêr. Hãmri nē ahpýnhã ri tanhmã mê à kute xwýnhjē ho mex. Nhũm mê ohtō nē hkôt mar o pa. ³⁶Hãmri nhũm mê omu nē kãm mê hkapri nē. Na prem tee ri amnhĩ kukamã

hamaxpêr o pa jao ra hkapri nē. Nhũm Jejus ja hã mê omu nē hamaxpêr o:

—Héxta waa nē. Na mê mex kêt nē pa. Te mê kēp ôwēhti jamār xwýnh kêt kot amnhĩ nhĩpēx pyrāk o htýx ri pa. Mēhō koja kãm mê hkapri nē tanhmã mê ho mex to ho pa? Anē.

Hãmri nē mê kamã ukapri nē. ³⁷Hãmri nē mê hã mê ixpē hkôt ixpa ho ixpa xwýnhjē mã kapêr nē mê inhmã:

—Na na mê kormã ohtō rax nē Tirtũm kapêr mar kêt nē. No âm kormã mê ate mê kãm kapêr jarênh o apa kaxyw mê agrêre. Te pur rax kãm ra harôj kamrêk par nē âm tã no âm kaxyw hikēnh xwýnhjaja grêre pyrāk. ³⁸Jakamã kwa mê ho Tirtũm wý kē axte mê kaxyw mê akwýjē rê kē mê apyrã nē ma mê hkôt ri mê kãm kapêr jarênh o pa. Anē.

10

Jejus kot mê ho 12 nē mê rênh

Makre 3.13-19; Rukre 6.12-16

¹⁻⁴Tã nhũm Jejusja hkôt mê ixpa ho mê ixpa xwýnhjē ho 12 nē mê ixrê. Mê ixte ma krĩ piitã hwýr inhmarr nē ý hã mê ahkre nē tanhmã mê à kute xwýnhjē ho mex o ixpa kaxyw. Nē ý hã mê nē mēkarōmnuti janor o ixpa kaxyw nhũm mê ixrê. Na pre mê ixto 12 nē mê ixrê. ã mê inhĩxi kot anhýr.

Pêtre kumrēx na pre kuta. Hixi hō pē Simãw.

Nē hkôt htō Andreja ta.

Nē hkôt Jepetew kra Xiakreja ta.

Nē hkôt Xiakre htō Juãwja ta.

Nē hkôt Firiptija ta.

Nē hkôt Patoromewja ta.

Nē hkôt Tomasja ta.

Nē hkôt pa ixpē Matêwre nhũm pre mê hkôt ixta.

Ixpē pahĩ nhý hã kãm mê kēp ixujamýnh xwýnh tã nhũm pre jajē hkôt ixta.

Nē ixkôt Apew kra Xiakre hōja ta.

Nê hkôt Tatewja ta.
Nê hkôt Simâw Jeroxja ta.
Nê hkôt Jut Kariotja ta.

Kormâ kot mê kãm Jejus
kurê xwÿnhjê nhîhkram ôr
mã nhũm Jejus kot amnhî
kukamã omunh mex tâ mê
hkôt amnhî kaxyw kuta.

Ã mê ixte ÿ hã mê ahkre o ixpa
kaxyw mê ixrênh xwÿnhjê nhîxi kot
anhÿr.

*Jejus kot mê kêp 12jê mã mê
âpênh ã karô*

*Makre 6.7-13; Rukre 9.1-6, 10.1-
12, 10.14; mãânên Atre 13.50-51,
18.6*

⁵ Hãmri nhũm Jejus mê ixrênh pa
nê ma mê hwÿr mê ixrênh kaxyw
tanhmã mê inhmã kapêr to nê mê
inhmã:

—E. Kêr ka mê ma mê piitã mê
kãm ri ijarênh o apa. No âm kormã
mê kêp Ijaew kêt xwÿnhjê nhô pika
hwÿr apa hkêt nê. Rÿ mê kêp Samar
nhô krî hwÿr ka mê apa hkêt nê.
⁶ Âm mê pahpê Ijaew nhô krî kôt
pix mã mân ri apa. Mê kot tee
ri amnhî kukamã hamaxpêr o pa
jakamã te mê kêp ôwêhti pikunor
nê htÿx ri mex kêt nê pa pyrâk.
⁷ Jakamã kêr ka mê ma mê hwÿr
apa nê ã mê hkôt ri mê kãm akapêr
o apa anê nê mê kãm: “E kot kaj mê
ate amnhî tomnuj kaga nê Tirtûm
kôt amnhî xunhwÿ hãmri nhũm
amnhî tâ mê apumu nê mê ato
hkra. Jakamã e kwa mê tokyx hkôt
amnhî xunhwÿ.” Anê. Kêr ka mê
ã mê kãm akapêr anhÿr o ri mê
hkôt apa. ⁸ Hãmri nê akupÿm mê à
xwÿnhjê ho mex o ri apa. Nê mê
htÿk xwÿnhjaja ka mê akupÿm mê
ho htÿr o ri apa. Nê mê hkànhy
rũnh xwÿnhjaja ka mê akupÿm mê
ho mex o ri apa. Nê mê kamã
mêkarômnuti xwÿnhjaja ka mê nê
mê hano. E kêr ka mê ã inhÿ hã
mê ho mex o ri apa anê. Na pa
amarî tanhmã mê ato ka mê inhmã
amnhîrer kêt tâ ra mê ate tanhmã
mê ho mex to mã tâm. Tã kêr ka mê

amnhî xwar amarî ri mê ho mex o
ri mê hkôt apa. No ri mê ho mex
pãnhã kàxpore hã axàhwÿr kêt nê.

⁹⁻¹⁰ —Nê kêr ka mê ma mê
hwÿr apa kaxyw anojarêt hãmri
nê amnhî kôt akukrêx rũnh o apa
hkêt nê. Âm anhÿ kamã mê hwÿr
apa. Nê kàxpore ho rax nê ho apa
hkêt nê. Rÿ akawà kamã axê hkwy
rÿ aparkà hõ xàr nê ho amôr kêt
nê. Rÿ kô hõ py nê ri ho apa hkêt
nê. Âm anhô mrykà pix jamÿ nê
ma ho apa. Kêr kê mê ate Tirtûm
kapêr o mê ahkre nê mê ho mex
xwÿnhjaja mân amnhî pãnhã mê
amã mê axâpkur xà gô ka mê kutã
axâpkur o ri mê hkôt apa.

¹¹ —Nê kêr ka mê nhÿri krî hwÿr
ajapôj nê kamã mêhõ kot amnhî to
mex xwÿnh japêr. Nê ra omu hãmri
nê kuri mân pôj nê hkôt apikamênh
tãmtã kurûm akupÿm ajapôj nê ma
nhãm krî hõ hwÿr mra.

¹² —Nê kêr ka mê mêhõ nhôrkwÿ
hwÿr pôj nê mê kãm: “E ot pa mê
awÿr mô. Nà koja Tirtûmja mê ato
mex nê.” Anhÿr o mê kãm akapêr.
¹³ Koja mê ama nê amnhî wÿr awÿ
ka mê amnhî tâ mê omu nê mê
kãm: “E koja Tirtûm mê ato mex nê
ka mê ajamakêtkati nê ri axàmnhîx
apa.” Anhÿr o mê kãm akapêr.
No koja mê amnhî nhôrkwÿ nê mê
akuré nhũm Tirtûm ja hã mê omu
nê mê ho mex kêt nê.

¹⁴ —Nê koja nhÿri krî hõ kamã
mê akaga nê akapêr mar kêt japêr.
Ka mê tee ri amnhî tâ mê kamã
ama hãmri nê tokyx mê kurûm
ajapôj nê ma akupÿm apa. Nê
akupÿm anojarêt nê mê noo mã
akuhê nê amnhî par ã awjagrô
kapî nê ma apa. Mê kot Tirtûm
kaga hã amnhî pumunh kaxyw ka
mê ã mê noo mã amnhî nhîpêx
anê. Hãmri nê ma nhÿhÿm hpãnhã
apa. ¹⁵ Koja nhÿrmã Tirtûm mê
kot amnhî tomnuj mÿrapê tanhmã
mê ho. Na pre ã Sotô mê Komo
nhô xwÿnhjê nhîpêx anê. Na prem
amnhî tomnuj tÿx nê nhũm Tirtûm

tee ri ja hã mẽ omu nê tanhmã hã mẽ homnuj tỳx to. Tã jar mẽ kãm ixkapêr mar prãm kêt nê mẽ kot ixkaga xwỳnhjaja koja ja hã mẽ omu nê mẽ kot Sotô mẽ Komo nhõ xwỳnhjê nhĩpêx o mẽ hipêx. No ãm tanhmã mẽ ho htỳx o mẽ hakre. Anê.

Nhũm pre Jejus ã mẽ inhmã mẽ ixãpênh ã karõ anê.

Jejus kot mẽ kêp 12jê hkukamã mẽ harênh

Makre 13.9-13; Rukre 12.11-12, mãânênh Rukre 21.12-17; Wam Pêtre 3.13-17, 4.12-19; Rukre 6.40; Juãw 15.20; Rukre 12.2-9

¹⁶ Nhũm Jejus arĩ kot mẽ ixrênh xwỳnhjê mã kapêr nê mẽ inhmã:

—E kot paj ma mẽ hwỳr mẽ arê. Ma mẽ ate Tĩrtũm kapêr o mẽ ahkre ho ri mẽ hkõt apa kaxyw. Jakamã kot kaj mẽ te ôwênti kot mry xoprê hwỳr amnhĩ to mrar nhũm kot hkwy hpar pyrãk o amnhĩ nhĩpêx. Koja mẽ hkwyjaja mẽ ate mẽ ahkre ma nhũm ja mẽ kêp omnuj nê nhũm mẽ hã tanhmã mẽ anhĩpêx to. Tã nom kêr ka mẽ tee ri amnhĩ kukamã ajamaxpêr nê amã mẽ uma hkêt nê.

¹⁷ —E kwa mẽ o kora. Kêr ka mẽ ma mẽ hwỳr mra nê amnhĩ nê mẽ htãnopxar o ri apa. Koja mẽ hkwyjaja mẽ akapêr ma nê kêp mẽ aprãm nõkati. Nê mẽ apynê nê ma mẽ utar xwỳnhjê hwỳr mẽ ato mra nê mẽ kãm tanhmã mẽ ato hêx to. Hãmri nhũm mẽ mar xã hkõt mẽ atak. Tĩrtũm kapêr o mẽ ahkre xã hã ixkre kamã koja mẽ ã mẽ anhĩpêx anê.

¹⁸ —Nê koja mẽ ixtã tanhmã mẽ ato kaxyw mẽ apynê nê ma mẽ õ pahi hwỳr mẽ ato mra nê tanhmã kãm mẽ ato hêx to. Nom kwãr mẽ mamrĩ ã mẽ anhĩpêx anê. Koja mẽ ato anê ka mẽ kutã akrĩ nê mẽ kãm Tĩrtũm kapêr jarê. Ijaewjê mã nê mẽ kêp Ijaew kêt xwỳnhjê mã.

¹⁹ —Nê koja mẽ ma mẽ õ pahi hwỳr mẽ ato mra nê ã mẽ anhĩpêx anê nom kêr ka mẽ tee ri tanhmã

mẽ kãm amnhĩ jarênh to hkukamã ajamaxpêr kêt nê. Koja Tĩrtũm Karõ tãm tanhmã mẽ akrã hto ka mẽ ô ri mẽ kãm akapêr mex nê. ²⁰ Nê kot kaj mẽ amnhĩ krã hkõt ri mẽ kãm akapêr kêt nê. Tĩrtũm Karõ nhỹ hã kot kaj mẽ ô ri mẽ kãm tanhmã axujarênh to.

²¹⁻²² —Nê koja mẽ hkwyjaja ixtã mẽ akamã gryk nê. Nê mẽ atã ãmnênh pix o pa. Nê mẽ kot mẽ apar kaxyw mẽ akwyjê hã amỳnê. Koja mẽ anhĩpêxã hkwyjaja mẽ apê mẽ hkra hã amỳnê. Nhũm mẽ akra hkwyjaja mẽ apê mẽ hipêxã hã amỳnê. Nhũm mẽ atõ hkwyjaja mẽ apê mẽ htõ hã amỳnê. Nhũm mẽ akatorxãjaja mẽ atã amỳnê. Hãmri nhũm mẽ apa. No ãm kwãr mẽ mãmrĩ ã mẽ anhĩpêx anê. ã mẽ kot mẽ anhĩpêx anhỹr tã kêr ka mẽ tee ri amnhĩ kukamã ajamaxpêr pê ixkaga hkêt nê. Mẽ ãm amnhĩ to htỳx rãhã ty. Hãmri nê akaxwỳnhja ma Tĩrtũm mẽ wa inhõ krĩ hwỳr axãpir kurê kumrêx nê wa ixkuri akupỳm amex nê atĩr tũm nê apa ho apa.

²³ —Nê koja mẽ nhỹri krĩ hkwy kamã ixtã tanhmã mẽ anhĩpêx hto ka mẽ mãmrĩ mẽ kurũm ajapõj nê ma nhỹhỹm krĩ hõ hwỳr apa. Nê hpãnhã kamã mẽ kãm ri ijarênh o mẽ hkõt apa. Kot kaj mẽ kormã Ijaewjê nhõ krĩ piitã hwỳr apa hkêt ri pa akupỳn mẽ awỳr wrỳ. Kwa kêr ka mẽ ixkapêr mã ajamaxpêr tỳx rãhã ri apa.

²⁴⁻²⁵ —Mẽ ate ixkõt apa ho apa xwỳnh na ka mẽ. No pa na ixpê mẽ ajahkre xwỳnh. Jakamã koja mẽ kot tanhmã inhĩpêx to ho mãânênh mẽ anhĩpêx. Koja mẽ nhỹrmã tanhmã inhĩpêx to nê mã ixkõt mẽ ato anê nê. Mẽ pahte amnhĩ nhĩpêxja kot axpên pyrãk. Jakamã koja mẽ ixpê Satanasti hã ijarê nê mãânênh tanhmã mẽ ajarênh punuj to ho pa. Mẽ pahte amnhĩ nhĩpêxja kot axpên pyrãk jakamã koja mẽ

panhîpêx o axpên pyrâk.

26 —Tâ nom kêr ka mê tee ri amnhî kukamâ ajamaxpêr pê amâ mê uma ho apa hkêt nê. Na htem piitâ axpên pê tanhmâ hamaxpêr punuj to ho hpimxur o pa nom tee ri ho pimxur prâm kaprÿ. Koja nhÿrmâ mê hamaxpêr piitâ amnhîrît pa. Nê mêmoj piitâ ra hpimxur mex tâ koja nhÿrmâ amnhîrît par kumrêx.

27 —Nê koja nhÿrmâ mê piitâ ixte amnhî nhîpêx kôt ixpumu. Na pa ra mê hkàx ã mê amâ ixujarênh rax nê. Tâ kêr ka mê ma mê piitâ mê kâm harênh o ri apa. Nê ra ixte mê hkàx ã ahte ixte mê amâ mêmoj jarênh ta ka mê hpânâ ma mê kâm harênh o ri apa kê mê apyrâ nê harênh ma.

28 —E kêr ka mê amâ mê kot tanhmâ mê ato mâ xwÿnhjê puma ho apa hkêt nê. Mê kot mê apar mâ tâ koja mê ãm mê akrâhkâ pix pa nom tanhmâ mê akaxwÿnh to hkêt nê. Tîrtûmja tapxipix na hte mê hkrâhkâ nê mê hkaxwÿnh mê ho pimràatâ kot amnhî xà htÿx kamâ hamak tûm xâta wÿr mê rênh pumunh. Tâ kot hwÿr mê arênh pymaj kêr ka mê amâ kapêr kwÿm ri tanhmâ amnhî nhîpêx to puma ho ri apa.

29-31 —Nê Tîrtûm kot mê pahto hapêx par pumunh tâ mãânên kot mê pajamâr mex. Mân ka htem kuwênhre pumu. Na hte Tîrtûm kuwênhre jamâr mex o pa. Mê piitâ mê kot ãm omunh tâ nom nhÿm Tîrtûm mê kurom hamâr mex pê mê htânopxar râhâ ho pa. Tâ kâm mê pajapê htÿx o kot kuwênhre jakrenh jakamâ kwa mê tee ri amnhî kukamâ ajamaxpêr o ri akaprî nê apa hkêt nê. Koja Tîrtûm mê pahtânopxar râhâ ho pa. Kot mê panhî piitâ omunh par. Nê ahpÿnhâ tanhmâ mê pahkrâ hkî kute hkôt mê pahpumunh par. Tâ kot mê pahtânopxar râhâ jakamâ

mo kaxyw kot kaj kêt mê ri amâ mê uma ho apa? Anê.

Mê pahte Jejus kôt amnhî xunhwÿr rÿ mê pahte hkaga jarênh

32 Nhÿm Jejus arî kot mê hwÿr mê ixrênh xwÿnhjê mã kapêr nê mê inhmâ:

—E kwa mê māmri akwÿjê mã mê apê ixkwÿ hâ amnhî jarênh o ri apa nê amâ mê uma xâj tee ri amnhî nhîpêx kêt nê. Kot kaj mê kâm ra ate ixkôt amnhî xunhwÿr ã amnhî jarê. Pa ja hâ mê apumu hāmri nê mê apyrâ nê kaxkwa kamâ Inhîpêêxâ mã ra ate ixkôt amnhî xunhwÿr ã mê ajarê. 33 Nom kot kaj mê kot ixtâ tanhmâ mê ato pymaj apê ixkwÿ hâ amnhî jarênh kêt nê. Pa ja hâ mê apumu hāmri nê nhÿrmâ amnhî xwar Inhîpêêxâ mã mê apê ixkwÿ hkêt ã mê ajarê. Jakamâ kwa mê māmri mê kâm apê ixkwÿ hâ amnhî jarênh o ri mê hkôt apa kê mê ama nê amnhî kaxyw inhmâ hamaxpêr japêr. Anê.

Mê kâm Jejus ã hkwÿjê kurê xwÿnhjaja

Makre 8.34-35; Rukre 9.24, mãânên Rukre 12.51-53, 14.26-27; Apokarip 12.11

34 Nhÿm Jejus arî kot mê hwÿr mê ixrênh xwÿnhjê mã kapêr nê mê inhmâ:

—Ra mê awÿr ixwrÿk tâ koja mê piitâ ixkukwak ri hamakêtkati nê ãmnhîx ri pa hkêt nê. Kormâ. Koja mê akwÿjaja ixkapêr ma nê mê apyrâ nê amnhî kaxyw ixkôt hamaxpêr. Nhÿm mê akwÿjaja axtem nê kuma nê ãm kuma. Hāmri nê ixtâ tanhmâ mê atomnuj to ho pa ka mê amnhî xà htÿx kamâ ajamak o ri apa.

35 —Koja mê akrajaja ixtâ mê apê mê hipêêxâ nê mê katorxâ kutâ amnhî xunhwÿ. Nhÿm mê wÿjjaja ixtâ mê umregêxjê kutâ amnhî xunhwÿ.

36 —Koja mê ã mê akwÿjaja ixtâ mê akutâ amnhî xunhwÿr anê. Mê

anhörkwý kamã mē akukwak ri pa htã ixtã mē akutã amnhĩ xunhwý.

³⁷—Nē mē amã mē anhĩpêxã nē mē akatorxã japêê. Nē mē amã mē akrajê japêê. Tã nom kot kaj mē gryk ã ixkôt amnhĩ nhĩpêx mex o ri apa hkêt hãmri nē apê ixkwý mã tãm kêt. ³⁸Rý nhũm mē nhỹrmã ixtã mē apar kaxyw ka mē tee ri amnhĩ kukamã ajamaxpêr nē mē kot mē apar pymaj ixkaga hã kot kaj apê ixkwý mã tãm kêt nē. ³⁹Koja mē nhỹrmã ixpĩ pa mē anê ty. Tã mē ate ixkôt amnhĩ nhĩpêx o apa xwýnhjaja. Koja mē ixpyrà nē ixtã mē apar mã tã kwa kêt ka mē amã atyk pymaj ixkaga hkêt nē. Kwãr mē mãmrĩ tanhmã ixtã mē ato. Kot kaj mē nhỹrmã Tirtũm mē wa ixri axte amnhĩ xã kamã ajamak kêt nē atĩr tũm nē amex rãhã apa ho apa. Nom kot kaj mē jar amã amex nē apa hprãm xaj ixkaga hãmri nē nhỹrmã wa ixri atĩr tũm nē apa ho apa hkêt nē. Anê.

Mē kot Jejus krajê ho mex xwýnhjê jarênh

Matêwre 25.34-40; Makre 9.41; Juãw 13.20

⁴⁰ Nhũm Jejus arĩ kot mē hwýr mē ixrênh xwýnhjê mã kapêr nē mē inhmã:

—E koja mēhõ nhỹri mē apumu nē mē apê ixkra hã tanhmã mē ato mex to nē te pa kot ixto mex pyrãk. Nē kot kaj mē tanhmã pa ixto mex to nē te Tirtũm o mex pyrãk.

⁴¹ —Nē kot ka mē nhỹri Tirtũm nhỹ hã mē kãm kapêr jarênh xwýnhjê hõ tanhmã ho mex to nhũm Tirtũm hã apumu nē nhỹrmã hã ato mex nē. Rý ka mē mēhõ kot Tirtũm kôt amnhĩ nhĩpêx xwýnhjê hõ pumu nē tanhmã ho mex to. Nhũm Tirtũm hã apumu nē mãânên hã ato mex nē. Te ate mēhõ ho mexta pyrã nē mãânên ato mex nē.

⁴² Nhũm mēhõ nhỹri mē kot ixkôt kormã amnhĩ xãm nyw nē kormã àhpumunh tohtuj anhỹr xwýnhjê

hõ pumu. Nē kãm kôr ã omu nē hamaxpêr o: “Kwa Jejus kôt ri pa xwýnh mũj kãm kôr. Kormã kot Jejus kôt amnhĩ xãm týx kêt tã kêp hkwyý. E kot paj kãm gô hkwyý kê ho ixkô.” Anê hãmri nē kãm hkwyý nhũm ho ixkô. Hãmri nhũm Tirtũm hã omu nhũm kot kãm gô pix nhôr nhũm kot ho hkôm tã nhũm ja hã ho mex rax nē. Anê.

Nhũm pre ã Jejus kot mē hwýr mē ixrênh xwýnhjê mã kapêr ry rax anê. Mē ixpê 12jê mã ã kapêr anê.

11

Juãw Paxis kot Jejus jarênh mar Rukre 7.18-23, 7.5, mãânên Rukre 4.16-21

¹ Tã nhũm Jejus ra kot mē hwýr mē ixrênh xwýnhjê mã kapêr pa hãmri nē kato nē ma krĩ pu hã krĩ hkwyýjê hkôt ri pa. Nē mē kãm Tirtũm kapêr jarênh o ri mē hkôt pa.

² Nhũm Juãw Paxisja arĩ kêp prês nē mē hagiênh xã kamã hkrĩ. Nhũm pre hte hkôt mē pa ho mē pa xwýnhjaja hwýr mra nē kãm Jejus kot tanhmã amnhĩ nhĩpêx to ho pa hã harê. Hãmri nhũm harênh ma nē tee ri hkukamã hamaxpêr. Hãmri nē hkôt mē pa xwýnh wa ho axkrut nē wa kuta ³ nē hwýr wa kumê nē wa kãm:

—Kwa wa ma Jejus wýr tē nē hkukja nē kãm: “Xã ka na pre Tirtũm mē ixwýr amê nã? Xã kormã axtem mēhõ na pa mē ri hamãr o ri ixpa?” Anhỹr o hkukja hãmri nē tanhmã kot amnhĩ jarênh to hã ama nē man akupýn ixwýr tē nē inhmã harê. Anê.

⁴ Hãmri nhũm wa kuma nē ma hwýr tē. Nhũm Jejus kormã tanhmã mē ã kute xwýnhjê ho mex o xa. Mē nohkre xwýnhjaja nhũm akupým mē ho mex. Nē mēkarõmnuti kot mē hwýr gjêx xwýnhjaja nhũm mē nē mē hanor o ãm rãhã nhũm Juãw kôt wa pa xwýnhta wa hwýr tēn pøj. Nē kormã mē hã omunh o wa xa.

Hâmri nê kãm Juãw Paxis kapêr jarê nhũm wa kuma nê wa kãm:

—Tÿ. Nà ãm hãmri na ja hã ijarê. Ixpê mê ate ixkamã ajamak o apa xwÿnhhta na pa. Na ka wa kam ã ixte amnhĩ nhĩpêx anhÿr ã ixpumu. Jakamã wa ma akupÿm tẽ nê aprĩ hã kãm ijarê. ⁵ Na pa hte akupÿm mê nohkre xwÿnhjê ho mex. Nê mê hkànhy xwÿnhjaja pa akupÿm mê hkà ho mex. Nê mê hyk o mê pa xwÿnhjaja pa akupÿm mê hte ho mex. Nê mê htyk xwÿnhjaja pa akupÿm mê ho mê htür. Nê mê kêp amrakati nê ri mê pa xwÿnhjaja pa mê kãm mëmoj mex jarênh o ri mê hkôt ixpa. Æ na pa hte mê hipêx anhÿr o ri ixpa. Jakamã e wa ma akupÿm Juãw wÿr tẽ nê ã kãm ijarênh anê. ⁶ Kê ijarênh ma nê ixkôt hamaxpêr tÿx nê tee ri ixkukamã hamaxpêr kêt nê. Koja ã amnhĩ nhĩpêx anê nê hamakêtkati nê ri pa. E wa tokyx ma akupÿm tẽ nê kãm ã ijarênh anê. Anê.

Jejus kot tanhmã Juãw Paxis jarênh to

Rukre 7.24-35

⁷⁻⁹ Nhũm pre ã Jejus Juãw Paxis kôt wa pa ho wa pa xwÿnhja wa kãm amnhĩ jarênh anê nê akupÿm hwÿr wa kumê nhũm wa ma akupÿm hwÿr tẽ. Hãmri nhũm Jejus mê kot mar o kuhê xwÿnhjê mã tanhmã Juãw Paxisja jarênh to nê mê kãm:

—Na ka pre htem kapôt ã Juãw Paxis mar kaxyw ma hwÿr mra. Nom ê mex ã omunh kaxyw rÿ hpijaam kãm tanhmã kapêr to hã mar kaxyw na ka prem hwÿr amrar kêt nê. Tirtüm nhÿ hã kapêr o pa jakamã na ka prem ate mar kaxyw ma hwÿr mra. Tirtüm nhÿ hã ixkukamã ijarênh o pa xwÿnh na. Ixpê Tirtüm kot mê akaxyw ixãm xwÿnh ã na hte ijarênh o pa. Nê hprĩ hã tanhmã mê amã ijarênh to. Jakamã kapêrja mex o kot wam Tirtüm nhÿ hã kapêr jarênh

xwÿnhjê kapêr piitã hakrenh par. ¹⁰ Tirtüm kapêr ã kagã htüm kot Juãw kukamã tanhmã harênh to nê harênh kot:

Kot paj Ixkra hkukamã ma mê hwÿr harênh xwÿnhja mê nhũm ma ri kutêp mê kãm harênh o pa. Mê kot mar nê kutêp tãm amnhĩ nhĩpêx o pa kaxyw.

—Anhÿr o Tirtüm Juãw Paxis kukamã harê nhũm prem hã kagã. Tã nhũm ixkukamã mê awÿr kumê. ¹¹ Juãw Paxisja na mex kumrêx. Na pre hprĩ hã ixkukamã tanhmã ijarênh to ho pa. Tã nom ixkôt mê pa ho mê pa xwÿnhjê hkínhã na pre ixkôt pa ho pa hkêt nê. Jakamã ixkôt mê pa ho mê pa xwÿnhjaja kot ixkôt hprĩ hã ixkapêr mar o pa jakamã na mê mex o mê kot Juãw Paxisja jakrenh. Anê.

¹²⁻¹³—Na pre finat Mojes kumrêx mê kãm Tirtüm kapêr kwÿ hã kagã. Tã nhũm hpãnhã Tirtüm nhÿ hã kapêr jarênh xwÿnhjaja Mojes mÿr pê hkwy hã kagã. Nhũm prem kamã harê nê kuma nê hkôt amnhĩ nhĩpêx o pa. Hãmri nhũm Juãw Paxisja mê mÿrpê kato nê tãm Tirtüm kapêr o mê ahkre ho ri pa. Tã pa hpãnhã ho mê ajahkre ho ri mê akôt ixpa nhũm mê ohtô nê inhma nê ixkôt amnhĩ xunhwÿ nê kãm ixkapêr kôt pix mã amnhĩ nhĩpêx o ri pa hprãm nê.

¹⁴—Amnepêm na pre Tirtüm nhÿ hã kapêr jarênh xwÿnhjaja mëhõja kukamã tanhmã harênh to ho pa. Nê mê kãm harênh o: “Koja nhÿrmã mëhõ te Eris kot amnhĩ nhĩpêx pyrãk o amnhĩ nhĩpêx nê mê awÿr mõ. Nê mê amã Tirtüm kot mê awÿr mënh mã xwÿnhja jarênh o pa ka mê ama.” Anhÿr o mê kãm mëhõ jarê. Tã kot paj mê amã kot hkukamã harênh xwÿnhhta nhÿxi jarê ka mê inhma. Nà Juãw Paxisja kukamã na prem ã harênh anhÿr o pa.

15 —E kot pa mẽ amã mẽ piitã htỳx ri tanhmã mẽ hamaxpêr to ho mẽ pa hã mẽ amã mẽ harê ka mẽ harênh ma. 16 Te mẽhprĩre kot amnhĩ nhĩpêx pyrãk o na htem amnhĩ nhĩpêx. Mẽhprĩrejaja na htem mẽ òrkwỳ kapem mẽmoj to amnhĩkati nê tee ri hkwyjê kot amnhĩ nhĩpêx pumu nê mẽ kãm:

17 Kwa na pa mẽ amã gre htã ka mẽ ixkutã anhòkrepòx kêt nê. Pa mẽ ja hã mẽ apumu nê hpãnhã mẽ amã mẽ htyk jarê htã ka mẽ akapri nê amỳr kêt nê. Kwa mẽ ri ã amnhĩ nhĩpêx anhỳr kêt nê. Anê.

—Mẽhprĩjaja na htem ã axpên mã kapêr anê. Tã te mẽ ate mẽ urãk. Tĩrtũm kot mẽ awỳr y hã kapêr jarênh xwỳnhjê rênh tã ka mẽ te mẽhprĩre kot amnhĩ nhĩpêx pyrã nê mẽ ama nê ãm mẽ ama nê mẽ hkòt amnhĩ nhĩpêx kêt nê.

18 —Juãw Paxis na pre mẽ awỳr mō nê ixkĩnhã apkur mex o ri pa hkêt nê. Nê ixkĩnh ã wĩhti ho hkòm kêt nê. Ka mẽ ja hã omu nê hkaga nê atỳx ri Satanasti nhỹ hã tanhmã kot amnhĩ nhĩpêx to hã hkamnhĩx. Hãmri nê mẽhprĩre kot amnhĩ nhĩpêxta pyrã nê hkòt amnhĩ nhĩpêx kêt nê.

19 Tã hãmri pa hpãnhã mẽ awỳr mō nê Juãw Paxis rom apkati mẽ ixàpkur mex o ri mẽ akòt ixpa. Nê kurom mẽ akutã wĩhti hkwy ho ixkòm o ri ixpa. Tã ka mẽ ja hã ixpumu nê atỳx ri ixàpkur rũnh nê ixpipãnh o ri ixpa hã ixkamnhĩx nê ã axpên mã ixto akapêr anê. Nê mẽ kot amnhĩ tomnuj xwỳnhjê hkòt ri ixpa xwỳnh ã axpên mã ijarê. ã na ka htem axpên mã ijarênh anê. Jao te mẽ ate Juãw Paxis nhĩpêx pyrã nê ixkaga nê ixkòt amnhĩ nhĩpêx kêt nê. Na hte ã htỳx ri tanhmã mẽ hamaxpêr to ho mẽ pa xwỳnhjaja amnhĩ nhĩpêx anê. No tãm ri mẽ hamaxpêr xwỳnhjaja na htem ahpỳnhã wa ixte amnhĩ

nhĩpêx ã wa ixpumu nê axpên mã wa ijarênh o: “Nà ahpỳnhã wa kot amnhĩ nhĩpêx tã no ãm hamê Tĩrtũm nhỹ hã kapêr mex o pa. E pu mẽ wa urãk nê Tĩrtũm kòt amnhĩ xunhwỳ.” Anhỳr o axpên mã wa ijarê. Anê.

Mẽ kot Tĩrtũm kòt mẽ hamaxpêr kêt xwỳnhjê jarênh

Rukre 10.13-15

20 Na pre hte Jejus krĩ piitã hkòt pa nê krĩ nhõ xwỳnhjê mã kapêr nê mẽ kot amnhĩ tomnuj ã mẽ kãm kapêr. Korajĩ mẽ Pese nhõ xwỳnhjê kumrêx mã kapêr nê mẽ kãm:

21-22 —E mẽ inhma. Amnepêm krĩ pê Sitō mẽ Xir wa kamã mẽ pa xwỳnhjaja na prem tanhmã amnhĩ tomnuj tỳx to ho pa nhũm Tĩrtũm tee ri ja hã mẽ omu nê mẽ kot amnhĩ tomnujta ã tanhmã mẽ ho. Tã kwa mẽ o kora Korajĩ mẽ Pesêj nhõ xwỳnhjaja. Ra ixte mẽ amã aa mẽ ate mẽmoj pumunh kêt kwỳ ho anhỳr rax tã ka mẽ omu nê ãm omu nê amnhĩ tomnuj kaga hkêt nê. Arĩ tanhmã amnhĩ tomnuj to ho ri apa. Mỳrapê kot kaj mẽ amex kêt nê. Kopy apu Sitō rỳ Xir kamã mãn ixte mẽ kãm aa mẽ kot mẽmoj pumunh kêt kwỳ ho anhỳr o ri ixpa ronhỹx mẽ omu nê mẽ arom amnhĩ kaxyw ixkòt hamaxpêr tỳx kurê kumrêx. Nê tee ri kot tanhmã kot amnhĩ tomnuj to hã amnhĩ pumu nê hkapri nê hkaga hpa. No mẽ kajaja na pa hte tee ri mẽ amã aa mẽ ate mẽmoj punuj kêt kwỳ ho anhỳr o ixpa kaprỳ. Ka mẽ ja hã ixpumu nê ãm ixpumu nê amnhĩ tomnuj kaga hkêt nê. Jakamã koja nhỹrmã Tĩrtũm tanhmã mẽ atomnuj tỳx to. Nê tanhmã Sitō mẽ Xir wa kamã mẽ pa xwỳnhjê jarênh to nhũm mẽ kot amnhĩ tomnuj mỳrapê amnhĩ xà htỳx kamã hamak rãhã ho pa. No mẽ kajaja mẽ ate amnhĩ tomnuj tỳx o mẽ hakrenh jakamã koja Tĩrtũm mẽ hkĩnhã mẽ atomnuj tỳx kumrêx. Ka mẽ amnhĩ xà htỳx

kamã ajamak rãhã ho ri apa kãm ga. Anê.

23-24 Nhũm pre ã Jejus mẽ kãm kapêr anê. Nê hpãnhã Kapanaũ nhõ xwýnhjê mã kapêr nê mẽ kãm:

—No mẽ apê Kapanaũ nhõ xwýnhjaja. Kot kaj mẽ ajaxwýja mẽ urák nê amex kêt nê. Ra ixte mẽ amã aa mẽ ate mẽmoj pumunh kêt kwý ho anhýr rax nhũm mẽ ate hã ixpumunh tã amnhĩ tomnuj kaga hkêt tã Tirtũm mẽ wa inhõ krĩ hwýr akrà. No ãm hwýr akrà kaprý. Kot kaj mẽ atõ hwýr axàpir kêt nê. Kop apu Sotõ nhõ xwýnhjaja mãn kot ã ixte amnhĩ nhĩpêx anhýr ã ixpumunh ronhýx mẽ ra kot amnhĩ tomnuj kaga nê ixkõt amnhĩ xunhwýr kurê kumrêx. No mẽ kajaja na ka mẽ ã amnhĩ nhĩpêx anhýr kêt nê. Jakamã kot kaj mẽ nhýrmã ma kuwy maatita wýr ajapêx pa kãm ga. Anê.

Jejus kot õ Papaj mã amnhĩ jarênh

Rukre 10.21-22

25-26 Tã nhũm Jejus Tirtũm mã amnhĩ jarê nê kãm:

—Pa Papaj? Nã apê mẽ inhõ Pahi Maati na ka. Pikap ri mẽ pa xwýnhjaja nê kaxkwa kamã mẽ pa xwýnhjaja apê mẽ ixpiitã mẽ inhõ Pahi Maati na ka. ãm hãmri na ka hte amnhĩ nhĩpêx mex o ri apa. Na ka hte mẽ àhpumunh tỳx ã mẽ kot amnhĩ to jarkrar xwýnhjê mã axàhpumunh tỳx o amnhĩrĩt kêt nê. ãm mẽ àhpumunh kêt ã mẽ kot amnhĩ jarênh xwýnhjê pix mã na ka hte axàhpumunh tỳx o amnhĩrĩt nhũm mẽ tapxipixjaja ja hã apumu. Nã ãm hãmri. ãm hãmri na ka hte amã hprãm xà hkõt ã mẽ piitã mẽ hipêx anhýr o ri apa Papaj. Jakamã mẽ kot amnhĩ to hkryre xwýnh pixjaja na htem hprĩ hã ate amnhĩ nhĩpêx kõt apumunh o pa. Anê.

Nhũm pre ã Jejus Tirtũm mã amnhĩ jarênh anê. ²⁷ Hãmri nê

hpãnhã mẽ kot mar o kuhê xwýnhjê mã kapêr nê mẽ kãm:

—Nã na pre ra Inhĩpêêxaja inhĩkra kamã mẽmoj piitã hagjênh pa. Ixte kãm ho amnhĩtãr o ixpa kaxyw. Jakamã tapxipix na kot ixpê Kra hã ixpumunh par. No jar pika ja kamã mẽ pa xwýnhjaja na mẽ kot ja hã ixpumunh kêt. Nê papxipix na ixte Inhĩpêêxã kot tanhmã amnhĩ nhĩpêx to hã omunh par. Jakamã na pa hte ã amnhĩ nhĩpêx o ri ixpa anê nê inhãm hprãm xà hkõt mẽ hkwýjê mã ho amnhĩrĩt o ri ixpa. Jakamã nhũm mẽ ixpyrà nê Inhĩpêêxã kot tanhmã amnhĩ nhĩpêx to ho pa hkõt omu.

²⁸⁻³⁰ —Nê tee ri amnhĩ kukamã mẽ ajamxpêr o ri apa xwýnhjaja te mẽ ate mẽmoj pytĩ rax tur nê ahte ho apa pyrãk. Kwa mẽ ixkõt amnhĩ xunhwý nê ixte amnhĩ nhĩpêx ã ixpumu. Ixte mẽ akamã ixukapri xwýnh na pa. Na pa hte mẽ akutã inhnojarêr rãhã ho ixpa. Jakamã kot kaj mẽ ixkõt amnhĩ xunhwý pa te ixte mẽ anê mẽmoj pytĩ ho ixwryk pyrãk o mẽ anhĩpêx nê tãm mẽ axunhwý ka mẽ tãm ajamxpêr nê tãm amnhĩ nhĩpêx o ri apa. Mo kaxyw koja ixkõt mẽ kot amnhĩ nhĩpêx o pa xwýnhjaja tee ri amnhĩ kukamã hamxpêr o pa? Nã na htem ixkamnãr rom hamakêtkati nê àmnhĩx ri pa ho pa. Anê.

12

Jejus kêp arĩgromnu hpãm

Makre 2.23-28; Rukre 6.1-5

¹ Tã nhũm Ijaew nhõ arĩgromnu pê sapja kato. Hãmri nhũm Jejus mẽ hkõt ri mẽ ixpa ho mẽ ixpa xwýnhjê mẽ pa mẽ ma mẽ hpur kõt ri nhýhým ri ixpa. Hãmri nê ra mẽ inhãm prãm nê mẽmo hy te kot harõj pyrãk xwýnhja kwý rê nê ku-grã nê ma Jejus kõt hkanhar o mõ. Mẽ ixpê Ijaew na pa htem axpên pur kãm ã amnhĩ nhĩpêx anhýr o ixpa. ² Hãmri nhũm mẽ ixkwý pê

Parijew nhõ xwýnhjaja kãm mëmoj tâ Jejus o kapër prãm jakamã ã më ixte amnhĩ nhĩpêx anhÿr ã më ix-pumu nê më ixtã Jejus kukjêr kurê kumrêx nê kãm:

—Kwa Tirtùm kapër tùm kot më panhõ arĩgromnu hã më pahte më hpur kãm mëmoj nhĩkênh nê më pahkurê htã nhũm ri akôt më pa ho më pa xwýnhjaja axtem nê ã amnhĩ nhĩpêx anhÿr o ri akôt pa. Mëmo hyta rê nê akôt hkanhar o pa. Kwa më kãm anê kê më ã amnhĩ nhĩpêx anhÿr kêt nê. Na htem arĩgromnu hã mëmoj tâ àpênh kêt kênã. Anê.

³⁻⁴ Hãmri nhũm më kuma nê hprĩ hã më kãm Tirtùm kapër jarê nê më kãm:

—Tk. Xàn ka htem Tirtùm kapër ã kagã htùm kot pahi Tawi kot tanhmã amnhĩ nhĩpêx tota kamã harênh nê mar kêt nê? Na pre hkôt ri më pa xwýnhjê më nhũm më prãm xãj Tirtùm mã amnhĩ jarênh xã hã ixkre hwÿr agjê. Hãmri nhũm më õ patre maatija më kãm prãm tÿx ã më omu nê kãm më hkaprĩ nê më kãm mëmoj gõ. Më kot Tirtùm noo mã pãwti jaxwÿr xwýnhnta gõ nhũm më kuku. Tirtùm kapër ã kagã htùm kot ja nê më hkurê htã nhũm më kãm prãm tÿx ã më omu nê më kamã ukaprĩ xãj më kãm kugõ. ãm më õ patre pix kot ja hkur kaxyw tã nhũm më kãm kugõ nhũm më kuku. Tã nom nhũm Tirtùm ja hã më omu nhũm ja kêp omnuj kêt nê. Kot më kamã ukaprĩ nê më kãm õr ã omu nhũm ja kãm mex nê.

⁵ —Më panhõ arĩgromnu htã na hte patrejaja arĩ hã Tirtùm mã amnhĩ jarênh xã hã ixkre kamã àpênh o pa. Tirtùm kapër ã kagã htùm kôt na htem arĩgromnu htã nhũm më arĩ hã apê nhũm Tirtùm pè jamnuj kêt nê. Kumã më àpênh xwýnh kênã. ⁶ ãm hãmri na pa më amã ja jarê. Tirtùm mã amnhĩ jarênh xã hã ixkreta mex tã nom ixpê Tirtùm Kra jakamã inhmex o

ixte ixkreta jakrenh. ⁷ Tirtùm kapër ã kagã htùm kot ja harênh kot:

Kêr ka më inhmã amnhĩ jarênh kaxyw nê ãm inhmã mëmoj nhõr pix pè inhmã amnhĩ jarênh kêt nê. Më mãânên më kamã axukaprĩ o ri apa pè inhmã amnhĩ jarê. Ja na kêt inhmã hprãm.

—ã harênh kot anhÿr. Tã më ate aprĩ hã ja mar ronhÿx ka më ixkôt më pa xwýnhjê kot mëmo hy rênh nê hkanhar o mör ã më omu nê ri tanhmã më ho akapër to hkêt nê. ãm më kãm prãm ã më omu nê më kamã axukaprĩ nê.

⁸ —Kêt pa na pre Tirtùm më akaxyw ixãm nê më awÿr inhmê. Jakamã papxipix na pa hte arĩgromnu hã tanhmã më kot amnhĩ nhĩpêx to hã më kãm karõ. Kwa më jajê pumu nê më kamã axukaprĩ kêt wehe. Kwãr më mãmrĩ mëmo hyta rê nê hkanhar o ixkôt mõ. Anê.

ĩhkra grã xwýnh jarênh

Makre 3.1-6; Rukre 6.6-11

⁹ Nhũm pre ã Jejus Parijew nhõ xwýnhjê mã kapër anê hãmri nê Tirtùm kapër o më ahkre xã hã ixkre hwÿr tẽ nê axã. ¹⁰ Nhũm Parijew nhõ xwýnhjaja tanhmã ho kapër to kaxyw htãnopxar o kuhê. Jakamã nhũm ixkre kamã mëhõ my ĩhkra grã xwýnhja më pikuprõnh xwýnhjê nhĩhkó hã nhÿ nhũm Parijew nhõ xwýnhjaja omu nê axpên mã:

—Kwa pu më jar pakuhê nê Jejus kot tanhmã amnhĩ nhĩpêx to hã omu. Xã koja arĩgromnu hã mũjti ho mex nã? Koja ho anê nê Tirtùm kapër tùm kuhpa hã amnhĩ nhĩpêx. E pu më kop xa nê hã omu. Anê.

Hãmri nê hã Jejus kukja nê kãm:

—E më inhmã mëmojarê. Xã na htem arĩgromnu hã akupÿm më ho mex nhũm Tirtùm kãm ja mex nê nã? Anê.

11 Hāmri nhūm mē hamaxpēr kôt mē omunh mex nē mē kām:

—Kwa tanhmā na htem arīgromnu hā amnhī nhīpêx to ho pa wehe? Xà koja we mē akrit ôwêhti ahkrehti kamā tēm ka omu nē âm omu nē arīgro mex jamār pê ho axàpir kêt nē? Nà kot kaj mē tee ri omu nē ho axàpir kuré kumrêx. 12 Arīgromnu hā mē ho mexja ja mex kênã. Tirtūm mā mē pahpê panhīja na mē pamex o mē hkrit jakrenh jakamā kēr pu mē tee arīgromnu htã pu mē hā tanhmā axpên to mex to ho papa. Ja na Tirtūm kām hprãm.

Anhÿr o mē kām kapêr. 13 Hāmri nē hpãnhã myta mã:

—E anhīkra katåt. Anê.

Hāmri nhūm ihkra katåt nē mex kuré kumrêx. 14 Hāmri nhūm Parijew nhō xwÿnhjaja tee ri ja hā omu nē Jesus kamā gryk nē. Arīgromnu pê sap ã kot ho mex jakamā nhūm mē kamā gryk tÿx nē. Hāmri nē ma mra nē hapôj nē hā axpên kukjêr o kuhê nē axpên mã:

—Kwa ã kot amnhī nhīpêx anhÿrja mÿrapê tanhmā kot puj wem ho? ã kapêr anhÿrja o te mē papamjaja mē pahte hkīnhã mē kamā paxukaprī kêt pyrãk ã mē pajarê. Koja mē pahkwÿjaja kuma hāmri nē mē pahte amnhī nhīpêx kaga nē amnhī kaxyw hkôt pix mã hamaxpêr. Kwa tanhmā kot puj wem ja nê ho?

Anhÿr o axpên kukjêr o kuhê.

Jesus kêp Tirtūm kot mē pahwÿr mênh xwÿnh ã harênh

Makre 3.7-12

15 Hāmri nhūm Jesus amnhī tã Parijew nhō xwÿnhjê jamaxpêr kôt mē omu hāmri nē mē kêp kato nē hpãnhã ma nhÿhÿm krī hō hwÿr ma tē. Nhūm mē ohtô nē omu nē ma hkôt mra nhūm mē omu nē akupÿm mē kām mē ã xwÿnh piitã ho mex.

16 Hāmri nē mē kām:

—E na pa akupÿm mē ato mex. Nom kēr ka mē amnhī tã ixto axãmra ho ri apa hkêt nē. Ixpê

Tirtūm Kra hā mē kām ijarênh kêt nē. Âm kwarī kumrêx.

Anhÿr o mē kām kapêr. 17 Na pre ra amnepêm Tirtūm nhÿ hā kapêr xwÿnh finat Ijaisja Jesus kukamã mē kām tanhmã harênh to nē hā kagã. Te Tirtūm tãm kapêr pyrãk o harê nē hā kagã. Nê hā kagã ho:

18 Ota ixkôt amnhī nhīpêx o pa xwÿnhhta xa. Pa na pa amnhī kaxyw âm. Inhmã hapêê. Na pa hte tanhmã kot amnhī nhīpêx to ho pa hā omu nē ixkīnh tÿx nē. Kot paj hwÿr amnhī karō mē nhūm hwÿr axà nhūm ma ÿ hā pika piitã hkôt mē piitã mē kām ijarênh o ri mē hkôt pa. Mē kot hprī hā ixte tanhmã amnhī nhīpêx to nē tanhmã ijamaxpêr to hā ixpumunh kaxyw.

19 Nom koja ri amnhī to àmra o pa hkêt nē. Rÿ kām amnhī to rax prãm o mē kām tanhmã amnhī nhīpêx to ho pa hkêt nē.

20 âm kapêr xukaprī pix o koja mē hirerek xwÿnhjê mã kapêr o pa. Nê mē kot tee ri amnhī nhīpêx ã amnhī pumunh xwÿnhjê kamã ukaprī o pa. Nê mē kot htÿx ri amnhī nhīpêx o mē pa xwÿnhjê kutã nojarêr rãhã ho pa jakamã nhūm mē hpãnhã tãm amnhī nhīpêx o pa. Koja ã amnhī nhīpêx anhÿr o ri mē hkôt pa rãhã ra akupÿm mēmoj piitã tãm haxwÿr pa.

21 ã kot amnhī nhīpêx anhÿr o pa jakamã koja pika piitã hkôt mē pa xwÿnh kwÿjaja kukwak ri amnhī kaxyw Tirtūm kôt hamaxpêr nē hkôt amnhī xunhwÿ. Anê.

Na pre ã finat Ijaisja Tirtūm nhÿ hā kormã Jesus wrÿk nê kator kêt ri tanhmã kot amnhī nhīpêx to ho pa hkukamã harênh nê hā kagã anê.

Tã nhũm mẽ hwÿr wrÿn nê ã mẽ hkôt amnhĩ nhĩpêx anhÿr o pa.

Jejus mẽ mẽkarõmnuti wa harênh Makre 3.20-30; Rukre 11.14-23, 11.31-32, 12.10

²² Tã nhũm prem Jejus wÿr mẽhõ myja o mō. Mẽkarõmnuti kot hwÿr àr nê ho nohkre nê ho kapêr kêt xwÿnhnta nhũm mẽ hwÿr o mō. Hãmri nhũm omu nê nê mẽkarõmnuti jano nê akupÿm ho mex kurê kumrêx nhũm akupÿm rît mex nê akupÿm kapêr mex nê. ²³ Hãmri nhũm mẽ amnhĩ jaêr pê omu nê kamã no puma nê hã axpên kukjêr o:

—Kokÿÿ. Jejus na hte ãm mẽ ho mex o mẽ ho mex o pa. Mãn kêp Tirtũm kot mẽ pahwÿr mẽnh mã xwÿnhnta na nà? ã na hte ã amnhĩ nhĩpêx anhÿr o pa. Mãn kêp pahi finat Tawi kanrêhã tãmnhwÿta na nà? Anê.

²⁴ Nom nhũm Parijew nhõ xwÿnhjaja ã Jejus kot amnhĩ nhĩpêx anhÿr ã omu nê kêp mẽkarõmnuti hkwȳ hã hkamnhĩx. Jakamã mẽ kot hã axpêr kukjêr ã mẽ kuma nê mẽ kãm:

—Tk pêr hinhu nhĩkõoti nhÿ hã na hte mẽ nê amnhĩ kwÿjê japõx o pa. Anê.

Hinhu nhĩkõoti nhĩxi hõ pê Satanasti nhũm prem ã Satanasti nhÿ hã Jejus kot amnhĩ nhĩpêx ã hkamnhĩx anê. ²⁵ Nhũm ra mẽ hamaxpêr kôt mẽ omunh mex jakamã mẽ kãm:

—Kwa mẽ inhma mẽ ate ixpê Satanasti hkwȳ hã ixkamnhĩx xwÿnhjaja. Koja pika nhõ xwÿnhjaja axpên kutã amnhĩ xunhwÿ nê axpu hãmri nê angrã nê ma ahpÿnhã ri pa. Hãmri nê amnhĩ krã hkôt ri tanhmã amnhĩ nhĩpêx to ho pa. Jakamã nhũm mẽ õ pahija mẽ hamãr kêt nê. Nê koja krĩ nhõ xwÿnhjaja. Rÿ mẽ kot axpên to hkwȳ xwÿnhjaja mẽmoj tã axpên kãm gryk nê axpên kutã amnhĩ xunhwÿ. Hãmri nê ahpÿnhã awry

hã pa nhũm mẽ õ pahija tee ri kãm mẽ hamãr prãm kaprÿ. Mo mẽ hkwȳjaja kot ri mẽ hamãr o pa? No koja pahija tãm amnhĩ nê amnhĩ kwÿjê janor kêt nê. ²⁶ Tã ja pyrà nê ixte Satanasti nhÿ hã tanhmã amnhĩ nhĩpêx to ho ri ixpa ronhÿx pa ri mẽ nê amnhĩ kwÿjê janor kêt nê.

²⁷ —No mẽ akwȳjaja? Xà Satanasti nhÿ hã na htem mẽ nê mẽkarõmnuti japõx o pa? Kêp apu pa ixte ÿ hã mẽ nê amnhĩ kwÿjê japõx ronhÿx mẽ akwȳjaja ixpyrà nê ÿ hã mẽ nê amnhĩ kwÿjê japõx o pa. Nà Tirtũm nhÿ hã mẽ ixte mẽ nê mẽ hapõx o ixpa kênã. Jakamã mẽ ate ã ijarênh anhÿrja mex kêt. ²⁸ Tirtũm Karõ nhÿ hã ixte mẽ nê mẽ hapõx jakamã kwa mẽ ja hã ixpumu nê ixte mẽ ato amnhĩptãr kaxyw Tirtũm kot mẽ awÿr inhmênh kôt ixpumu kêt wehe. Pa na ka htem ijamãr o apa.

²⁹ —Satanastija àhpumunh tÿx jakamã na htem tee ri kêp hkôt mẽ kot amnhĩ xunhwÿr xwÿnhjê pytãr kaxyw nhũm mẽ nê mẽ omunh mex nê. Tã nom ixàhpumunh tÿx o ixte Satanasti jakrenh par jakamã na pa hte kêp mẽ utã nhũm mẽ hpãnhã ixkôt ri amnhĩ nhĩpêx.

³⁰ —Ra mẽ amã ixkapêr mar prãm tã nom kormã ixkôt amnhĩ xunhwÿr kêt nê. Kwa wem ma amnhĩ to amõr gri nê tokyx ixkôt amnhĩ xunhwÿ kêt wehe. Kot kaj mẽ anhÿr kêt hãmri nê mẽ apê ixkutã amnhĩ xunhwÿr xwÿnhjê pyràk o amnhĩ nhĩpêx.

³¹⁻³² —Nê koja mẽhõ ixkapêr ma nê kãm ixprãm kêt nhũm Tirtũm ixtã omu nom tokyx tanhmã ixtã ho hkêt nê. Koja kormã amnhĩ tã hamã. Karõ kot axte kãm ijarênh o amnhĩrît nhũm jatã kot mar nê kãm ixprãm nê ixkôt amnhĩ xãm prãm xàj nhũm kormã amnhĩ tã hamã. Nom koja Karõ xatã mẽ kãm tanhmã ixto amnhĩrît to htã nhũm mẽ kuma nê ãm kuma nê te mẽ

kêp amnhî jamak pro pyrâk. Jao ra Karô hâ hpijaam kêt o amnhî nhîpêx. Mýrapê koja Tirtûm nhÿrmã amnhî xwar te kêp amnhî jamak pro pyrâk o mê hipêx nhûm mê tee kãm amnhî kaprî kaprÿ. Hâmri nê amnhî xà htÿx kamã hamak o pa xàta wÿr ma pa nê kamã pa rãhã nê pa ho pa. Anê.

Mê pajamaxpêr xà hkôt tanhmã ri mê pakapêr to

Rukre 6.43-45

³³ Nhûm Jejus arî Parijew nhô xwÿnhjê mã kapêr nê mê kãm:

—Nê kot kaj mê atô anhô mêmo pâr nhûm amã ô mex nê. Ô rax nê. Ka omu nê akînh nê amnhîm mex â harê. No koja apê ô hkêt ka tee ri omu nê mex kêt â harê. Na htem â amnhîm mêmo xô hpâr pumunh kôt tanhmã kute hã harênh anê. Ja pyrã nê na htem tanhmã mê kot amnhî nhîpêx to hã mê omunh kôt tanhmã mê harênh to. Mê kot amnhî tomnuj xwÿnh â mê harê rÿ mê kot amnhî to mex xwÿnh â mê harê.

³⁴⁻³⁵ —Nê koja mêhõ hamaxpêr mex nê hãmri nê kapêr mex o pa. Nom koja hamaxpêr punuj nê kapêr punuj pix o pa. Nê htÿx ri tanhmã amnhî tomnuj to ho pa. Na htem ahpÿnhã amnhî jamaxpêr xà hkôt tanhmã kapêr to ho pa. No mê kajaja na ka htem kagã xoprê jamaxpêr pyrâk o ajamaxpêr punuj pix o ri apa. Jao akapêr punuj nê. No tãm ajamaxpêr o tãm akapêr o ri apa hkêt nê. Na htem tanhmã hamaxpêr to xà hkôt tanhmã ri kapêr to ho pa. ³⁶⁻³⁷ Koja nhÿrmã Tirtûm mê piitã tanhmã mê kapêr to hã mê mar xà hkôt tanhmã mê harênh to. Jakamã mê akapêr mex o mê apa xwÿnhjaja koja mê amex â mê ajarê. Nom mê atÿx ri akapêr punuj o mê apa xwÿnhjaja koja mê amex kêt â mê ajarê. Hâmri nê mê akapêr punuj o apaja mýrapê mê atomnuj tÿx nê. Anê.

Jejus kot Jôhti jarênh

Makre 8.11-12; Rukre 11.29-32

³⁸ Hâmri nhûm Tirtûm kapêr tûm o mê ahkre xwÿnh mê Parijew nhô xwÿnh kwÿjaja mêmoj tâ Jejus wÿ nê kãm:

—Kwa Pahihti. Mê inhmã aa mê ixte mêmoj pumunh kêt ô ho anê. Kot paj mê omu hãmri nê Tirtûm kot mê ixwÿr amênh â apumunh kurê kumrêx. Jakamã e mê inhmã mêmoj to anê nã. Anê.

³⁹ Hâmri nhûm mê kuma nê mê kãm:

—Tk. Pêr âm mê ajamaxpêr punuj pix o na ka htem apa. Ixpê Tirtûm kot mê awÿr inhmênh xwÿnh tâ mê ate ja hã ixpumunh kêt. Nê mê ate ja hã axpên mã ijarênh kêt tâ ixte mê amã aa mêmoj pumunh kêt ô ho anhÿr kaxyw hã ixwÿ. Nã pa mê amã ho anhÿr kêt nê. Kormã. Âm amnepêm Jôhti kot tanhmã amnhî nhîpêx toja pix kot paj mê amã harê.

⁴⁰ —Tirtûm nhÿ hã kapêr xwÿnh Jôhtija amnepêm na pre tep rax kumrêxja htîr rãhã kukrê. Nhûm ôxàhkre kamã htîr nê hkrî hã apkati axkrunêpxi hãmri nê htîr rãhã ôxàhkre rûm kato. Tã ixpê Tirtûm kot mê awÿr inhmênh xwÿnh kot paj nhÿrmã kên kre kamã ixyk nê inhnôr â apkati axkrunêpxi. Jôhti hkînhã ixyk kumrêx nê inhnôr â apkati axkrunêpxi hãmri nhûm Tirtûm akupÿm ixto ixtîr.

⁴¹ —Nê koja nhÿrmã Tirtûm akupÿm mê htyk nê mê hikwÿ xwÿnh piitã akupÿm mê ho htîr hãmri nhûm mê piitã Inhîpêêxã mê wa ixkutã hkrî pa wa tanhmã mê harênh to. Tirtûm mê wa ixkuri mê htîr tûm nê mê pa ho mê pa mã xwÿnhjê hã mê hkwÿjê jarê nê wa ixkuri mê pa ho mê pa hkêt xwÿnhjê jarê. Mê piitã â ahpÿnhã mê harênh anê. Amarî mê pa xwÿnhjaja nê mê ô pahijaja. Jakamã nhûm Nîniwe nhô xwÿnhjaja tanhmã wa inhmã mê

ajarênh to. Jôhti kot mē hwÿr mōr nē mē kām Tirtūm kapēr jarênh o pa xwÿnhjaja nhūm mē tanhmā wa inhmā mē ajarênh to nē wa inhmā: “Na pre Jôhtija man mē inhō krī hwÿr mō nē mē inhmā akapēr jarênh o ri mē ixkôt pa. Pa prem kuma nē mē ixte amnhī tomnuj kaga nē akôt amnhī xunhwÿr kurē kumrêx Tirtūm. No or war akutā mē hkrī xwÿnh kwÿ ata mē na pre Akra Jejus tām mē hwÿr mō nē mē kām kapēr o ri mē hkôt pa nhūm prem mar tā mē ixkīnhā mē kot amnhī tomnuj kaga nē hkôt amnhī xunhwÿr kêt nē. Mē ixkurom mē kot Akra mar tā amnhī kaxyw kām hamaxpēr kêt nē.” Anhÿr o koja mē wa inhmā mē ajarē ka mē tee ri mē ama nē ra mē amā ma nē. Nom ām mē amā ma kaprÿ.

⁴²—Nē sur kām mē ò pahi nitita koja mē hpānhā tanhmā wa inhmā mē ajarênh to nē wa inhmā: “Na pa pre inhmā pahi Sarumāw kot war anhÿ hā àhpumunh tÿx ā harênh ma hāmri nē inhmā mar prām xàj ma awry hā ò pika hwÿr mō nē omu nē kapēr ma. Hāmri nē ma akupÿm inhō pika hwÿr mō nē ixkwÿjê mā àhpumunh tÿx ā harênh o ri ixpa. Tā Akra Jejus na kot àhpumunh tÿx o pahi Sarumāw jakrenh tā or war akutā mē hkrī xwÿnh kwÿ ata mē. Mē kot kapēr mar tā ixkīnhā kām mar prām kêt. Na prem kuma nē ām kuma.” Anhÿr o koja wa inhmā mē ajarē. Hāmri nē ja hā mē amā akir ka mē tee ri mar o akrī nē amnhī kamā agryk o akrī. Nom ām amnhī kamā agryk kaprÿ. Anē.

Mēkarōmnuti kot tanhmā mēhō hto hā harênh
Rukre 11.24-26

⁴³ Nhūm Jejus arī Parijew nhō xwÿnhjê mē Tirtūm kapēr tūm o mē ahkre xwÿnhjê mā kapēr nē mē kām:

—Te mē ate ixte mēhō nē mēkarōmnuti japōx xwÿnhhta pyrāk. Nhūm te kēp kator nē ma htēm

pyrāk. Nē nhÿri amgrā kamā ri pa pyrāk. Koja ja kēp omnuj nhūm tee ri kamā nhÿri hkôt xà japēr o pa. Nom tee ri hapēr o pa kaprÿ. ⁴⁴Hāmri nē tanhmā amnhī kukamā hamaxpēr to nē hamaxpēr o: “E kot paj ma akupÿm mē kot nē ixkator xwÿnhhta wÿr tē nē axà nē kamā mām ri ixpa.” ⁴⁵ Anhÿr o hamaxpēr hāmri nē ma akupÿm hwÿr tē. Nom kormā akupÿm hwÿr àr kêt ri nhūm kamā amrakati nē ri pa. Jakamā nhūm akupÿm hwÿr axà. Nom ahte hwÿr àr kêt nē. Amnhī kôt hkwyjê ho 7 nē hwÿr mē ho gjêx pa. Mē kēp 7jaja nē wamta mē nhūm mē piitā hwÿr gjêx pa. No mē kēp 7jaja na omnuj tÿx o kot wamta jakrenh jakamā nhūm mē kot hwÿr gjêx xwÿnhhta mē ŷ hā ra amnhī tomnuj tÿx nē oprē htÿx o pa. Wam pyxire kot hwÿr àrta nhÿ hā nhūm amnhī tomnuj o ri pa nom kawax pē oprē. Tā nhūm ra axte hwÿr mē ohtō nē gjêxta nhÿ hā hāmri oprē htÿx kumrêx. Ja pyrā nē kot kaj mē tokyx ixkôt amnhī xunhwÿr kêt nē hāmri nē amnhī tomnuj tÿx pix o ri apa. Anē.

Jejus kot tanhmā hkwyjê jarênh to hā harênh

⁴⁶ Nhūm Jejus arī mē ahkre ho nhÿ. Rôm nhūm katorxà nē htōjaja nhÿhÿnh hwÿr mōn pōj. Nom kormā hwÿr gjêx kêt nē. Mē kot hā hturax jakamā nhūm mē tee ri hwÿr gjêx kaxyw kormā kapôt ā hā mē omunh o kuhê. ⁴⁷ Hāmri nhūm mēhōja kapôt ā mē omu nē Jejus mā mē harē nē kām:

—Kwa Pahihti. Ota akatorxà mē atōjaja awÿr mōn pōj nē tee àr kaxyw. O mÿj mē kapôt ā kuhê. Anē.

⁴⁸⁻⁵⁰ Hāmri nhūm kuma nē kām:
—Tōe. Nà kot pa ixkato nē mē omu. Inhmā mē hapêe. Nom kot kaj mē atō Tirtūm kapēr ma nē hkôt amnhī xām nē hkôt amnhī nhÿpêx. Hā kot kaj te apē ixtō rÿ ixkatorxà pyrāk o pu mē axpēn nhÿpêx o ri

papa. Pa inhmã ixkatorxã në ixtôjê japê pyrã në mãânên inhmã më ajapê në. Anê.

13

Mêmo hy hkre xwÿnh jarênh

Matêwre 13.18-23; Makre 4.1-9; Rukre 8.4-8

¹Hãmri nhũm Jejus më kãm kapêr pa në ixkre rũm kato në ma himô rax wÿr tẽ në gô mÿri më kãm ujarênh kaxyw nhÿ. Pa më ixpê hkôt më ixpa ho ixpa xwÿnhjaja ma hkôt mra. ²⁻³Hãmri në gôta wÿr pój në mÿri ixkrĩ. Nhũm më Jejus ã hturu rax në nhũm tee ri më omunh o nhÿ. Hãmri në hamaxpêr në kãnhmã xa në tẽ në pãr krem axã në pãr kre kamã mütũm awry rũm më ahkre ho nhÿ nhũm më piitã omunh në mar mex o hkrĩ. Nhũm më kãm ujarênh o më ahkre ho nhÿ. Nom më kãm tãm ujarênh kêt në. Mẽ kot Tirtũm kapêr mar në tanhmã hkôt amnhĩ nhĩpêx to ho paja nhũm hã kuxi në më kãm harênh o nhÿ nhũm më amgrã kamã kÿx pê mar o hkrĩ. Nhũm më kãm:

⁴—E më inhma. Kojã mẽhõ ma pur mã mõ në pur kãm mêmo hy ho ukapêr o ri pa. Nom nhũm hy piitã amex kãm rôrõk kêt në. Kojã hkwyja ahpÿnhã nhÿri rôrõk. Kwÿ aptÿx kãm rôrõk nhũm kuwênhre omu në hwÿr mra në hkrêr pa.

⁵—Nê kojã kên kãm hkwy rôrõk në ra higrõt kutã nojarêr në higrõt pa. Nom nhũm kamã aptÿx në kêp pika hkryre. ⁶Jakamã nhũm higrõt nhũm hã myt ahpã në arĩgro htÿx më nhũm grã pa. Harê hkryre jakamã grã pa.

⁷—Nê kojã mrõnhĩ kamã hkwy rôrõk në higrõt tã no nhũm utĩja kêp amÿtã nhũm ô hkêt në.

⁸—No kêt hirã kamã pika mex kãm rôrõk xwÿnhja hirã kamã rôrõk jakamã higrõt mex në piitã ô rũnh në. Kamã ô hkwy kêp 30 në kamã hkwy kêp 60 në kamã hkwy kêp

100. Æ më ujarênh kot anhÿr. ⁹Kwa kêr ka më ixujarênhja ma në kãm ajamaxpêr tÿx rãhã ho apa. Anê.

Mêmo kaxyw Jejus kot më ujarênh o më ahkre

Makre 4.10-25; Rukre 8.9-15

¹⁰Hãmri pa më ixpê Jejus kôt më ixpa ho ixpa xwÿnhjaja Jejus kot më kãm ã ujarênh anhÿrja ã kuma në tee ri hkukamã ijamaxpêr. Hãmri në hã hkukja në kãm:

—Kwa axujarênhhta na pa më ixprĩ hã hkôt mêmoj pumunh kêt në. Mon ka hte ãm më ujarênh pix o më ahkre? Anê.

¹¹Hãmri nhũm më inhmã:

—Tõe. Nã kot paj më amã harê. Tirtũm kãm më ate aprĩ hã mar prãm jakamã kot paj ixprĩ hã më amã harê. Mẽ kot amnhĩ tomnuj kaga nhũm Tirtũm kot ja hã më omunh në më ho hkra. Ja na pa harê. No mÿjjaja më akĩnhã kãm ja mar prãm kêt jakamã na htem ixujarênhja ma në ãm kuma në htÿx ri pa.

¹²—No kêt më kajaja na ka më ixkõt ri apa ho apa. Nê xatã ixkapêr mar o apa jakamã na ka më aprĩ hã ixkapêr ma. Tã më ate ixkõt amnhĩ nhĩpêx o apa jakamã na pa tanhmã më akrã hto ka më aprĩ hã mar mex o mõ. No më kot ixkapêr mar në ãm mar xwÿnhjaja na më akĩnhã inhmar tÿx kêt në. Jakamã nhũm Tirtũm tanhmã më hkrã hto nhũm më hã no hkêt tokyx anê htÿx ri pa.

¹³—Ixte më kãm aa më kot mêmoj pumunh kêt kwÿ ho anhÿr rax tã nhũm më omu në ãm omu. Nê ixte amnhĩ nhĩpêxja nhũm më kãm hkĩnh kêt në. Nê më kot ixkapêr mar tã ãm inhma në kãm hprĩ hã inhmar prãm kêt në.”

—Jakamã na pa hte ã më kãm mêmoj te ho tãm pyrã në harê no ãm hã haxwÿ në më kãm ixujarênh anê.

14-15 —Na pre ra Tirtûm nhÿ hã kapêr o pa xwÿnh Ijaisja amnepê m mē hkukamã tanhmã mē harēnh to nē hã kagã. Mē kot inhmar nē ãm inhmar xwÿnhjê jarē nē tanhmã mē hkukamã mē harēnh to nē mē harēnh o:

Koja mē ujarēnh mex mar pymaj amnhÿ jamak pro nē amnhÿ no hpro nē hkôt hamaxpêr kêt nē. Jakamã koja mē kãm mē kot amnhÿ nhÿpêx mex prãm kêt nē harēnhja ma nē ãm kuma. Nē omu nē ãm omu. Mē kãm hprãm kêt jakamã koja mē ã amnhÿ nhÿpêx anē. Æ mē kot amnhÿ nhÿpêx anhÿr kêt ronhÿx mē ra Tirtûm kapêr ma nē hkôt amnhÿ xunhwÿ. Hãmri nhÿm amnhÿ tã mē omu nē mē nē mē kot amnhÿ tomnuj rēnh pa. Hãmri nhÿm mē hkôt amnhÿ nhÿpêx mex nē kapêr mar mex o pa. Tã no nhÿm mē Æ amnhÿ nhÿpêx anhÿr kêt nē. Anē.

—Æ Ijaisja mē hkukamã mē harē nē mē hã kagã anē.

16 —No kêt mē kajaja na ka htem ano ho ixte tanhmã amnhÿ nhÿpêx to ho ixpa hã ixpumunh o ixkôt apa. Nē mē ajamak o ixkapêr mar o ri ixkôt apa. 17 Amnepê m mē akukamã pahijaja nē Tirtûm nhÿ hã mē kãm kapêr o ri mē pa xwÿnhjaja na prem kãm ixpumunh prãm tÿx o pa. Nē mē kãm ixkapêr mar prãm tÿx o pa. No ãm mē akÿnhã ixpumunh nē ixkapêr mar kêt rãhã htyk pa. Kormã ixwrÿk nē jar ixkator kêt jakamã na prem arÿ htÿr nē pa ri ixpumunh kêt rãhã ra htyk pa. Æm mē kapxipixjaja na ka mē mÿr pē ixte amnhÿ nhÿpêx ã ixpumunh nē ixkapêr mar o ixkôt apa. Tã mē kurom mē ate ano ho ixpumunh nē ajamak o ixkapêr mar o ixkôt apa jakamã kwa mē ja hã amnhÿ pumu nē tãm amnhÿ

nhÿpêx o ri apa pē akÿnh nē ri apa. Anē.

Nhÿm pre ã Jejus mē ixpê hkôt ixpa ho ixpa xwÿnhjê mã kapêr anē.

Jejus kot hprÿ hã mēmo hy jarēnh Makre 4.13-20; Rukre 8.11-15

18 Hãmri nhÿm Jejus mē ixpê hkôt ixpa ho ixpa xwÿnhjê mã hprÿ hã mē ujarēnhja jarē nē mē inhmã:

—E kot paj ixprÿ hã mē amã mēmo hy ho ukapêr xwÿnh ã ixujarēnhja jarē ka mē inhma. Nã mēmo hyta te kēp Tirtûm kapêr pyrãk. Nē ahpÿnhã mēmo hy rôrôk ã pikata te kēp mē apē panhÿ ahpÿnhã mē ate Tirtûm kapêr mar nē ahpÿnhã hkôt tanhmã amnhÿ nhÿpêx tota pyrãk. 19 Jakamã mē kot mar xwÿnh kwÿjaja te mē kot aptÿx kãm hy rôrôk nhÿm kuwēnh kot hwÿr mrar nē hkrêr par xwÿnhja pyrãk. Jao Tirtûm kapêr ma no nhÿm Satanasti te kuwēnh kot hy krêr parta pyrã nē mē kot mar nē amnhÿ kaxyw hkôt hamaxpêr nē hkôt amnhÿ xunhwÿr pymaj hãmri ra tanhmã kapêrja nē mē hkrã hto. Jakamã nhÿm mē kuma nom ho hamakêtkati tokyx anē nē axte kãm hamaxpêr kêt nē pa.

20 —Nē mē kot mar xwÿnh kwÿjaja te mē kot kēnre kamã hy hkwÿ rôrôk nē higrôt nē grã par tokyx anhÿr xwÿnhja pyrãk. Jao Tirtûm kapêr ma nē hkÿnh nē. Nē kãm mar prãm nē. 21 Tã nhÿm mēhō Tirtûm nē tanhmã mē kãm kapêr to nhÿm mē kuma nē Tirtûm kaga. Te mēmo hy higrôt nom ra grã par tokyx anhÿrta pyrãk.

22 —Nē mē kot mar xwÿnh kwÿjaja te mrônhi kamã hy hkwÿ rôrôk nē higrôt nhÿm mrônhi kot kēp ãmnãr xwÿnhja pyrãk. Jao mē kãm Tirtûm kapêr mar prãm tã mããnen kãm mē hikukrêx rÿnh nē mē hikãxpore rÿnh prãm. Hãmri nē ãm ja pix kukamã hamaxpêr o pa. Nē ja gryk ã axte Tirtûm kapêr mã

hamaxpêr nê hkôt amnhî nhîpêx kêt nê.

²³ —Nê mē kot mar xwÿnh kwÿjaja te hirā kamā pika mex kām hy hkwÿ rôrôk nê higrôt nê ô rûnhta pyrāk. Jao ixkapêr ma nê amnhî krā him hagdênh tÿx nê. Nê ixkôt ri amnhî nhîpêx mex rāhā ho pa. Jakamā te mēmo hy ô rûnh nê ô mex pyrāk o amnhî nhîpêx. E ā ixujarênhja kot anhÿr. Anê.

Harôj kaàkre jarênh

Matêwre 13.36-43; Makre 4.26-29

²⁴ Nhûm Jejus axte mē kot mar o hkrî xwÿnhjê mā awjarê nom hpri hā mē kām ujarênh kêt nê. Axte mē kām mēmoj tā kuxi nê awjarê nê mē kām:

—Nā nhÿrmā Tirtûm mē kot kormā htîr ri tanhmā amnhî nhîpêx to ho pa hā mē omunh xā hkôt ahpÿnhā tanhmā mē harênh toja te mē ujarênh ja pyrāk. Koja mēhō harôj y mex o ukapêr kaxyw ma hpur mā mō. Hāmri nê hkre hpa nê ma akupÿm mō. ²⁵ Tā nhûm kamāt nhûm ra gôr nê nō. Hāmri nhûm kām hkurê xwÿnhja ma kêp ihpur wÿr tē nê harôj mexta nhÿpy axtem nê kêp harôj kaàkre hkre. Harôj kaàkreja te kot harôj mex pyrāk nom mē kot hkur kêt. Tā nhûm kêp harôj y mex nhÿpy hkre hpa hāmri nê ma akupÿm tē.

²⁶ —Tā nhûm hamē higrôt nê anhîpê ô. ²⁷ Nhûm kām mē àpênh xwÿnhjaja tee ri harôj mex kaêx ā harôj kaàkreta pumu nê hpur nhō dôn wÿr tē nê kām harê nê kām: “Kwa ate harôj mex pix kre htā pêr hkaêx ā harôj kaàkre määnênh kato. Kwa tanhmā na pre amnhî to nê hkaêx ā kato?” Anê. ²⁸ Hāmri nhûm tee ri mē kuma nê mē kām: “Nā mēhō kām ixkurê xwÿnh na pre ā inhîpêx anê.” Anê hāmri nhûm kām mē àpênh xwÿnhnta kām: “Kwa xā kot paj mē tokyx ma hwÿr mra nê nê harênh pa nê kurê nā?” Anê. ²⁹ Nhûm mē kām: “Nā kot kaj mē anê nê harôj mexta mē ho

apimràatā ixpê harênh pa. ³⁰ Kwār māmri harôj mex mē hpimràatā ô hpa mân. Ka mē rî ma hwÿr mra nê harôj kaàkre kumrêx jarênh pa nê axpên tā harê ho ê nê ma o mra nê hpôk. Hāmri nê rî kormā hpānhā harôj mex jakā nê ho akuprô nê ô ho mra nê ixkre kamā haxwÿ.” Anê. Ā mē ujarênh kot anhÿr.

Anhÿr o mē kām kapêr.

Jejus te kot mēmo hy hkryre pyrāk ā harênh

Makre 4.30-32; Rukre 13.18-19

³¹⁻³² Hāmri nhûm Jejus arî mē kām amnhî tā kuxi nê ujarênh o nhÿ. Nê tanhmā mē kām amnhî tā ujarênh to nê mē kām:

—Nā Tirtûm kot mē awÿr ixte mē ato amnhîptār kaxyw inhmênh ā ijarênhja. Te ixte mēmo hy pixire nhûm mē kot hkre nhûm higrôt pyrāk. Koja gaa nê hprêk. Hāmri nê hpa anhrā nhûm kuwênhre hwÿr mra nê hôptî kamā amnhîm haê nhîpêx nê kamā hikwÿ. Tā kot paj nhÿrmā mēmo hy jarênhnta pyrā nê ixpyxi htā pika piitā hkôt mē ho amnhîptā nê mē omunh mex rāhā ho ixpa. Anê.

Jejus te kot pāwti kaxkrit xā pyrāk ā harênh

Rukre 13.20-21

³³ Nhûm Jejus arî mē kām amnhî tā kuxi nê ujarênh o nhÿ nê mē kām:

—E kot pa hpānhā mē amā tanhmā pāwti kaxkrit xā jarênh to ka mē inhma. Na hte mēnijaja pāwti nhîpêx kaxyw hāmri nê kaxkrit xā hkwÿ ho grire nê kupy nê trik xôm mē ho ahkà. Hāmri nê ho pāwti nhîpêx. Kaxkrit xāja grire htā pāwti piitā ho kaxkrit mex nê. Tā ja pyrā nê ixpyxi htā koja mē nhÿrmā pika piitā hkôt ixkôt amnhî nhîpêx mex o pa.

Anhÿr o mē kām amnhî jarê.

Jejus kot mē ujarênh pix kām mē ahkre hā harênh

Makre 4.33-34

34 Na pre ã Jesusja mẽ ujarênh o mẽ ahkre ho pa anê. Âm mẽ ujarênh pix o mẽ ahkre ho pa. Te tãm ujarênh pyrâk no âm mẽmoj tâ haxwý rý amnhĩ tâ haxwý nõ mẽ kãm tanhmã amnhĩ jarênh to. 35 ã kot mẽ ahkre ho pa anhÿr kukamã na pre ra amnepêm Tĩrtũm nhÿ hã kapêr o mẽ pa xwýnhjê hõja harê nõ hã kagã. Te Jejus tãm tanhmã amnhĩ jarênh to pyrâk o hkukamã harê nõ hã kagã nõ hã hkagã ho:

Kot paj mẽ kãm ixujarênh pix kãm mẽ ahkre ho ri ixpa. Mẽmoj te ho tãm pyrã nõ harê nom mẽmoj tâ haxwý nõ tanhmã mẽ kãm ixujarênh to. Nê aa mẽ kot mẽmoj mar kêt xwýnh kwý kot paj mẽ kãm harê kè mẽ kuma. Anê.

Jejus kot hprĩ hã harõj kaàkre jarênh

Matêwre 13.24-30, 13.47-50

36 Tã nhũm Jejus mẽ kãm ujarênh pa nõ mẽ kure nõ ma tẽn ixkrem axã. Hãmri pa mẽ ixpê hkõt ixpa ho ixpa xwýnhjaja ma hkõt mra nõ ixkrem agjê. Hãmri nõ harõj kaàkre hã ujarênhã ã hkukja nõ kãm:

—Kwa aprĩ hã mẽ inhmã harõj kaàkre jarênhã jarê nã. Na pa mẽ kormã ixprĩ hã mar mex kêt nõ. Anê.

37 Hãmri nhũm mẽ inhmã:

—Tõe pa ixprĩ hã mẽ amã harê. Âm paa.

Ixpê Tĩrtũm kot mẽ awÿr inhmênh xwýnh te ixte mẽmo hy mex o ukapêr xwýnhã pyrâk.

38 Nê purta te kêp pika piitã pyrâk.

Nê harõj mexta te ra mẽ ate ixkõt amnhĩ xunhwÿr nõ ixkõt amnhĩ nhĩpêx o apa xwýnhjê pyrâk.

Nê harõj kaàkreta te mẽ kot Satanasti hkõt amnhĩ nhĩpêx o mẽ pa xwýnhjê pyrâk.

39 Nê kot harõj kaàkre hkre xwýnhã te Satanasti pyrâk.

Nê harõj jakãr xã hã arĩgrota te Tĩrtũm kot ahpÿnhã tanhmã mẽ harênh to xã hã arĩgrota pyrâk.

Nê mẽ kot harõj jakãr xwýnhjaja te Tĩrtũm kapêr o wrÿk xwýnhjê pyrâk.

40 Mẽ ujarênhja kamã na prem harõj kaàkre kumrêx jarê nõ hã hpõk jarê. Ja pyrã nõ koja nhÿrmã Tĩrtũm kot ahpÿnhã tanhmã mẽ harênh to xã hã arĩgrota ã hãmri ã mẽ kot amnhĩ tomnuj o mẽ pa xwýnhjê nhĩpêx anê.

41 —Kot paj nhÿrmã kãm mẽ pitã mẽ ho amnhĩptãr kaxyw hãmri nõ kapêr o mẽ wrÿk xwýnhjê mã anê nhũm mẽ ma mran wrÿ nõ mẽ kot amnhĩ tomnuj xwýnhjê pix o akuprõ. Nê mẽ kot nhãm mẽ hkwÿjê kot mẽ urãk nõ tanhmã amnhĩ tomnuj to ho pa kaxyw mẽ kãm anhÿr xwýnhjaja nhũm mẽ mããnênh mẽ ho akuprõ. 42 Hãmri nõ mẽ ho pikuprõnh pa nõ te mẽ kot harõj kaàkreta nhĩpêx pyrã nõ kuwy kamã mẽ rênh pa. Hãmri nhũm mẽ kamã amnhĩ xã htÿx kamã hamak rãhã nõ pa ho pa. Nê amnhĩ xã htÿx ã maj tee ri mÿr rãhã ho pa. Nê tee ri amnhĩ xã hã maj amnhĩ nham o axpên kamnhar tÿx kaprÿ.

43 —No ixkõt mẽ kot amnhĩ nhĩpêx xwýnhjaja koja mẽ mẽ kurom mex kumrêx nõ pa. Kot paj mẽ ho mex rax nõ nhũm mẽ mex rãhã nõ pa ho pa. Tĩrtũm kot kormã pika nyw nhĩpêx mã xwýnhã kamã nhũm mẽ mex kumrêx nõ pa ho pa. E kêr ka mẽ ixujarênhja ma nõ kãm ajamaxpêr tÿx rãhã ho apa. Anê.

Mẽ hikukrêx mex o hpimxur jarênh

Piripos 3.7

44 Nhũm Jejus arĩ mẽ ixpiitã mẽ inhmã tanhmã ujarênh to. Nom hprĩ hã ujarênh kêt nõ. Kê

axte mêmoy tâ kuxi nê mê inhmã tanhmã ujarênh to nê mê inhmã:

—Mê ate ixkôt amnhî xunhwÿr xwÿnhjaja te mê apê mê hikukrêx mex â pika japrôr xwÿnhhta pyrâk. Koja mêhõ mê hikukrêx mex jamÿ nê o tẽ nê nhÿri amnhîm ho amũxu. Kaxyw kakwÿ nê kamã hagjê nê hity hpa nê ma akupÿm tẽ. Hâmri nhũm jãã nhũm mêhõ tẽn kãm kato. Hã pikata kakwÿ nê kãm kato nê omu nê hkĩnh nê. Nê hamaxpêr o: “E pa ma tẽ nê inhörkwÿ kamã ixkukrêx piitã ho wênê hpa nê hpãnhã kãxpore jamÿ nê ho amnhîm mê hikukrêx mex â pika japrô nê amnhîm mêmoy mexta o ixârík pa.” Anhÿr o hamaxpêr nê akupÿm hity hpa nê ma akupÿm tẽ. Hâmri nê mêmoy mexta gryk â õ mêmoy piitã ho wênê hpa. Hikukrêx nê örkwÿ nhũm piitã ho wênê hpa. Hâmri nê hpãnhã kãxpore jamÿ nê ma o tẽ nê amnhîm pikata japrô. Hâmri nê ma akupÿm hwÿr tẽ nê kamã mê hikukrêx mexta kwÿnh pa nê ho õ kumrêx.

—Tã te mê ate mêhõ kot â amnhî nhîpêx anhÿr xwÿnhhta pyrâk. Na ka mê urâk nê inhgryk â amnhî tomnuj kaga hpa nê hpãnhã ixkôt amnhî nhîpêx. Te mêhõ kot mêmoy mê hikukrêx mex gryk â hikukrêx tũm piitã kaga hpar nê mê hikukrêx mex o hpimxur xã hã pikata japrôr pyrâk. Anê.

Mêhõ kot kênjaxênhjaprôrjarênh

⁴⁵ Nhũm Jejus arĩ mê inhmã awjarê nê mê inhmã:

—Nê ja. Na htem kãm hkĩnh nê hamakêtkati nê ri hpa hprãm xãj Tirtũm kôt amnhî xunhwÿ nê hkôt ri amnhî nhîpêx rãhã ho pa. Te mêhõ my kãm kên jaxênh mex prãm nê ma ri hapêr o pa xwÿnhhta pyrâk. ⁴⁶ Nê ra nhÿri omu nê ma tẽ nê prês â mê hkukja. Nhũm mê kãm hã ho ohtô nê harê nhũm ma akupÿm tẽ nê kãm ho õ hprãm xãj hikukrêx piitã ho wênê hpa. Hâmri

nê kãxpore jamÿ nê o tẽ nê amnhîm ho haprô. Kên jaxênh mexta pix gryk â hikukrêx piitã ho wênê hpa nê hpãnhã ho amnhîm haprô.

—Tã ja pyrã nê na ka htem amex nê ajamakêtkati nê axãmnhîx ri apa hprãm xãj ixkôt amnhî xunhwÿ nê ixkôt pix mã amnhî nhîpêx o apa. Anê.

Kryhti jarênh

Matêwre 13.24-30, 13.36-43

⁴⁷⁻⁴⁸ Nhũm Jejus arĩ mê inhmã awjarê nê mê inhmã:

—E Tirtũm kot nhÿrmã tanhmã mê harênh to xã hã arĩgro kot paj ixprĩ hã tanhmã mê amã harênh to. Te ho mêmoyjaja kot himô kamã kryhti rênh pyrâk. Koja mê gôx kãm kumê nê akupÿm ho api nhũm kamã tep ohtô nê. Nhũm omu nê kÿx pê amgrã kamã hkapi nê ahpÿnhã ri tanhmã kamã kute kawrà. Nê kamã mex kawrà nê kawã kamã kugjê nê mê kot hkur kêtja nhũm nhãm kurê. ⁴⁹ Ja pyrã nê Tirtũm kot ahpÿnhã ri tanhmã mê kot amnhî nhîpêx to hã mê omunh xã hkôt tanhmã mê hipêx to kaxyw arĩgrota â â mê hipêx anê. Koja kapêr o mê wrÿk xwÿnhjaja mê kot hkôt amnhî xunhwÿr xwÿnhjê nê mê kot amnhî tomnuj o mê pa xwÿnhjê kawrà hpa. ⁵⁰ Nê te mê kot tep mex nê tep punu kawrà nê nhãm rênhta pyrâk o mê hipêx nê ma kuwy hwÿr mê o mra nê kamã mê kurê. Nhũm mê tee ri amnhî xã htÿx â maj amÿra nê tee ri amnhî nhîpêx kaprÿ. Anê.

Nhũm pre â Jejusja axte mê ixpê hkôt mê ixpa ho mê ixpa xwÿnhjê mã ujarênh anê. ⁵¹ Hâmri nê mê inhmã:

—E xãn ka mê atã aprĩ hã ixu-jarênhhta ma nã?

Anê pa mê kãm:

—Tÿ. Nã na pa mê atã ixprĩ hã mar mex nê. Anê.

⁵² Hâmri nhũm mê inhmã:

—Tõe. Nã ãm hãmri. Na ka xep mê ra ixte mê ahkre nywta mar

mex nê. Nê mē akwỳjaja mǎānēn Tirtūm kapēr tūm mar mex nê. Te mē apē mēhō apkur xà rax pyrà nê ma ho mē piitā mē hipèx o ri mē hkôt paja pyrāk. Ja pyrà nê kēr ka mē ma mē piitā mē hkôt Tirtūm mē wa ixkapēr o mē ahkre ho ri mē hkôt apa. Anê.

Najare nhō xwỳnhjaja kot Jejus kaga hã mē harēnh

Makre 6.1-6; Rukre 4.16-30; Juãw 1.11

⁵³ ã Jejus mē inhmã ujarēnh par anê. ⁵⁴ Hāmri nē ma akupým Najare hwýr mō nê Tirtūm kapēr o mē ahkre xà hã ixkre hwýr tē nê axà nê mē ahkre ho nhỹ. Nhũm mē amnhĩ jaēr pē tanhmã kot mē ahkre hto hã kuma nê tee ri hkukamã hamaxpēr nê axpēn mǎ:

—Tk. Kwa kēp mē panhĩ hta tanhmã kot we amnhĩ to nê ã ãhpumunh tỳx kôt mē pamã kapēr anê nê ri mē kām aa mē kot mēmoj pumunh kēt kwý ho anhỹr o pa? ⁵⁵⁻⁵⁶ Na pre mē panoo mǎ hprêk nhũm mē pahte pahprĩ hã hkwỳjê pumunh. Kēp pĩ kuprār xwỳnh Juje mē hprō Marir wa hkraa. Nê kēp Xiakre nê Juje nê Simãw nê Jut mē htōō. Nê htōxjaja jar mē pakamã pa nhũm mē pahte mē piitā mē omunh mex kēnã kot kēt we mē kurom ã ãhpumunh tỳx anê. Anê.

⁵⁷ Hāmri nê kamã gryk nê hkaga. Hāmri nhũm tee ri amnhĩ tã mē omu nê mē kām:

—Nà Tirtūm nhỹ hã kapēr jarēnh o mē pa xwỳnhjaja na htem krĩ hkwy kamã kām mē mar prām nê. Nom ò krĩ kamã mē kot karàre rùm hprêk kām omunh xwỳnhjaja na htem kuma nê ãm kuma. Anê.

⁵⁸ Tã mē kot amnhĩ kaxyw hkôt hamaxpēr kēt jakamã nhũm tee ri mē kām aa mē kot mēmoj pumunh kēt kwý ho anhỹr rax prām. No ãm mē kām mēmoj to grêre nê ho anê.

14

Mē kot Juãw Paxis pĩr ã mē harēnh

Makre 6.14-29; Rukre 9.7-9

¹ Tã nhũm pika pē Garirej kamã mēō pahiht Erox Jejus jarēnh ma ² nê tee ri hkukamã hamaxpēr nê hã ò pōristi mǎ kapēr nê mē kām:

—Kwa pēr Juãw Paxis na nà? Ra ixte hã ixàmnēnh nhũm mē kot hpĩr tã mǎn tanhmã amnhĩ to nê akupým htĩr. Nà pēr tãm kēnã. Jakamã na hte aa mē kot mēmoj pumunh kēt kwý ho anhỹr o pa. Anê.

³⁻⁵ Na pre ra Erox htō pē hprōptàn ho hprō. Tō arĩ htĩr tã nhũm axtem nê kēp utà nê ho hprō. Hāmri nhũm Juãw Paxisja harēnh ma nê hã kām akir nê kām:

—Kwa Eroxis kēp atō hprō kēnã na ka kēt axtem nê kēp utà nê ho aprō. Kwa ja omnuj tỳx o omnuj tỳx. Anê.

Hāmri nhũm amnhĩ tã kuma nê kamã gryk nê kot hpĩr kaxyw. Tã nom nhũm Ijaew kot axpēn mǎ kēp Tirtūm nhỹ hã kapēr jarēnh xwỳnh ã harēnh jakamã nhũm mē umaj hpĩr kēt nê. ãm ho prēs nê haxà nhũm hkrĩ ho hkrĩ.

⁶ Tã nhũm jãã nhũm Erox kator ã arĩgro kato nhũm mē hã akuprō nê hã hkĩnh. Hāmri nhũm hprō nyw kra niti mē hwýr axà nê ahte mē hipòk ri mē kām gre. Mē kot omunh nê kamã hkurē kaxyw nhũm mē noo mǎ hpijaam kēt nê mē kām grer o xa. Hāmri nhũm pahĩ Erox omu nhũm ja kām mex nê nhũm hkĩnh nê kamã nopyma nê. ⁷ Hāmri nê kām:

—Nà ãm hāmri na ka ã mē inhmã amnhĩ nhĩpèx anê. Jakamã kwa māmri mēmoj tã ixwý. Amã mēmoj prām xà hkôt hã ixwý kot paj amã kugō. ãm hāmri na pa amã anê. E mēmoj na amã hprām? Anê.

⁸ Hāmri nhũm kuma nê kām:

—Ma Juãw Paxis krã na pa inhmã hprãm. Inhmã hkrã krãhta nê pasiiti kamã axà nê ixwÿr o tẽ nê inhmã agõ. Anê.

Ra katorxà kot kaxyw kãm karõ jakamã nhùm ã hã hwÿr anê. ⁹ Hãmri nhùm Eroxa tee ri kuma nhùm ja kêp omnuj nê. Nom ra mē pikuprõnh rax xwÿnhjê nhîpõk ri mē noo mã kot kãm: “E mãmrĩ amã mēmoj prãm xà hkõt hã ixwÿ pa amã kugõ.” Anhÿr jakamã kãm kot kêp nê hprãm kêt nê. Hãmri nê Juãw Paxis wÿr õ pôristi hkwy rē ¹⁰ nhùm mē ma mē hagjênh xata wÿr mra nê unê nê mut krãhta. ¹¹ Hãmri nê hkrã mÿ nê pasiiti kamã kuxà nê ma akupÿm nita wÿr o tẽ nê kãm kugõ nhùm kumÿ nê ma katorxà hwÿr o tẽ nê kãm kugõ.

¹² Hãmri nhùm Juãw Paxis kõt mē pa xwÿnhjaja tee ri mē kot hpĩr ã harênh ma nê ma hwÿr mra nê kumÿ nê ma o mõn haxà. Hãmri nê ma Jejus wÿr mra nê kãm harê.

Jejus kot mē ho ohtõ nê mē kãm mē õ hã harênh
Makre 6.30-44; Rukre 9.10-17;
Juãw 6.1-14

¹³ Hãmri nhùm Jejus Juãw Paxis jarênh ma nê hkaprĩ nê. Nê ma himõ nhîkjê hwÿr kapõt ã mõr kaxyw pãr krem axà nê ma mõ. Pa mē hkõt ixpa ho ixpa xwÿnhjaja ma hkõt mra. Hãmri nhùm krĩ hkwy kamã mē pa xwÿnhjaja harênh ma nê ohtõ nê ma mē inhîkrep pikap mra. Nê ra amnhĩ to wa nê mē inhmõr xaja wÿr põj nê mē ixkutêp hkrĩ. ¹⁴ Jakamã pa mē mõ nê mē hwÿr põj nê mē omu. Hãmri nhùm Jejus mē omu nê kãm mē hkaprĩ nê mē kãm mē à xwÿnhjê ho mex pa.

¹⁵ Tã nhùm ra myt àr kaxyw pa mē hkõt ixpa ho ixpa xwÿnhjaja tee ri mē omu nê Jejus wÿr mra nê kãm:

—Kwa na ra amÿkry htÿx nê. Amnhĩ nê mē hano kê mē ma nhÿri krĩ hkwy hwÿr mra nê tokyx amnhũm mēmoj japrõ nê kuku. Mo

jar mē apkur xà hã mēõ? Jar akunĩ pix kênã. Anê.

¹⁶ Hãmri nhùm mē inhma nê mē inhmã:

—Nà kot paj mē hanor kêt nê. Mē kajaja kot kaj mē kãm õ nhùm mē apku. Anê.

¹⁷⁻²¹ No nhùm mē ohtõ rax kumrêx. Mēmyjaja kêp 5.000. Nê kaxyw mē hprõ nê mē hkrajaja. Jakamã nhùm Jejus ã mē inhmã kapêr anê pa mē tee ri mē hkukamã ijamaxpêr nê kãm:

—Kwa nà mē panhõja raxti hã. Mē panhõ pãwti kêp sîk pix. Nê kaxyw tep grãja pijakrutre kênã kot kêt mē piitã mē hipêx. Nà xà kot paj mē ma mra nê nhÿri mē kãm mē mēmoj japrõ nhùm mē kuku? Anê.

Hãmri nhùm mē inhmã:

—Nà pu mē kãm mēmoj japrõr kêt nê. Kot puj mē kãm mē panhõta o anhgrã. E mē kãm anê kê mē ahpÿnhã ri hije nê hkrĩ hpa. Anê.

Hãmri pa mē kuma nê mē kãm anê nhùm mē piitã hkrĩ hpa. Hãmri nhùm Jejus pãwti mē tepja jamÿ nê kaxkwa hwÿr rĩt nê ho Tirtũm wÿ nê kãm:

—Pa Papaj? Nà apê mē inhmã mē inhõ ho apa xwÿnh jakamã amex o amex. Anê.

Hãmri nê mē kãm ho hkry hpa nê hkõt mē ixpa ho mē ixpa xwÿnhjê mã kugõ pa mē õ ri ho mē hipêx pa. Nhùm mē piitã apkur o hkrĩ. Mēõja grire htã nhùm Jejus tanhmã mē kãm ho rax to nhùm mē ohtõ rax kumrêx tã piitã kuku nê ho õhy htu hpa nhùm arĩ mēõ jakrêx prã. Hãmri pa mē akupÿm hakrêx o akuprõ nê ho kawà ho 12 nê ho nyt pa.

Jejus kot gõ krãhkã hã ãm nê htẽm ã harênh

Makre 6.45-52; Juãw 6.15-21

²²⁻²³ Tã nhùm Jejus mē ixpê hkõt ixpa ho ixpa xwÿnhjê mã anê pa mē akupÿm pãr mã agjê nê ma xarmã hkukamã mõ. Hãmri nhùm mē kot mar o kuhê xwÿnhjê jano nhùm mē ma akupÿm hapêx. Hãmri nhùm

Jejus kot Tirtûm mã amnhî jarênh kaxyw ahte tê nê hixêt ã api nê nhîmôk ã kãm amnhî jarênh o nhÿ.

Gaa nhûm ra kamàt nhûm arî ahte hixêt nhîmôk ã nhÿ.

²⁴Rôm pa mẽ pàr kãm mẽ inhmôr xwÿnhjaja kormã himô nhîpôk ri mō. Pu nhûm kôk xàpêr tÿx mẽ ixkaxpa. Nê gô axpên tak tÿx nê pa mẽ tee ri rrêmti ho gô rênh nhîpêx nê tee ri axpên pumu.

²⁵Tã nhûm krãhyre kà nhûm Jejus man mẽ ixkôt gô krãhkà hã xan tê ²⁶pa mẽ amnhî wÿr omu. No nhûm kormã hirã mex kêt jakamã pa mẽ ixprî hã omunh mex kêt nê. Hãmri nê tee ri omu nê mẽkarô hã hkamnhîx nê umaj ixãmra rax nê. ²⁷Hãmri nhûm mẽ inhmã kapêr nê mẽ inhmã:

—Tk. Kwa mẽ amã ma hkêt nê. Pa na pa mẽ akôt tê. Anê.

²⁸Hãmri nhûm Simãw Pêtre kuma nê kãm:

—Kwa xa ka na ka tê? Tôe apê mẽ inhô Pahihtî jakamã kwa amnhî wÿr ixwÿ pa apyrã nê gô krãhkà hã xa nê awÿr tê nã? Anê.

²⁹Hãmri nhûm kãm:

—Tôe mamrî amnê ixwÿr tê. Anê.

Hãmri nhûm kuma nê pàr rûm kato nê hwÿr tê. Urak nê gô krãhkà hã hwÿr tê. ³⁰Hãmri nê kormã htêp o htêm mẽ kôk xàpêrta kamã ama nê tee ri amnhî kukamã hamaxpêr pê ra àr o mō. Hãmri nê àmra kamã Jejus mã amnhî to akir nê kãm:

—Kwa tokyx ixto api Pahihtî. Anê.

³¹Hãmri nhûm hpa hã kupy nê ho àpir kurê kumrêx nê kãm:

—Kwa pêr ãm kormã ate amnhî kaxyw inhmã ajamxpêr tÿx kêt. Mon ka we ixkamnàr rom mãmrî man ixwÿr atêmre hkêt nê? Anê.

³²Hãmri nhûm wa akupÿn mẽ ixwÿr tê nê wa axã. Hãmri nhûm kôk katat kôt pinhkrênh pa nhûm gô tãm nôr kurê kumrêx. ³³Hãmri pa mẽ Jejus kot ã amnhî nhîpêx

anhÿrja ã omu hãmri nê kãm mex o mex ã harê nê kãm:

—Kwa ãm hãmri na hte amnhî pê Tirtûm Kra hã amnhî jarê. Nà apê Kra kênã. Anê.

Jenêjare kamã Jejus kot akupÿm mẽ ho mex ã harênh

Makre 6.53-56

³⁴Tã pa mẽ ra himô hã rê nê Jenêjare hwÿr pøj. ³⁵Hãmri nê ma kapê hã ri ixpa. Hãmri nhûm pika nhô xwÿnh kwÿjaja Jejus pumu nê mẽ piitã mẽ kãm harênh o hprôt nê ahpÿnhã hwÿr nhÿhÿnh mẽ à xwÿnhjê hã karô. Nhûm mẽ man mẽ ixwÿr mẽ o mra ³⁶nê mẽ ho Jejus wÿr nê kãm:

—Pa? Kwa kê mẽ à xwÿnhjaja akupÿm mex kaxyw apê axê kupê nã? Anê.

Hãmri nhûm mẽ kãm:

—Tôe. Kwâr mẽ mãmrî mran hkupê. Anê.

Hãmri nhûm mẽ kuma nê axpên pãnhã hwÿr mra nê kêp ê pix kupênh tã ra akupÿm mex nê ma akupÿm mra.

15

Parijew nhô xwÿnh mẽ Tirtûm kapêr tûm o mẽ ahkre xwÿnhjê jarênh

Makre 7.1-13

¹Tã nhûm Parijew nhô xwÿnh mẽ Tirtûm kapêr tûm o mẽ ahkre ho mẽ pa xwÿnhjaja Jerujarê rûm ma Jejus wÿr mra. Na htem mẽ ixkukamã mẽ inhîgêtpÿr pyrà nê apkur kaxyw nê amnhî nhîhkra kuhônñ ryy nê. Amnhî nhîhkra htyk pix kuhônñ nê hkrî hkêt nê ãm amnhî nhîhkra kuhônñ japjêê nê. Nê ô prat kuhônñ japjêê nê kormã apkur kaxyw hkrî. Tirtûm kot ja hã mẽ omunh nê mẽ mex ã mẽ harênh ã amnhî kamnhîx jakamã na pre ã amnhî nhîpêx anhÿr o pa. Jakamã nhûm mẽ ma Jejus wÿr mra. ²Hãmri nê omu nê kãm:

—Pa Jejus? E kwa mẽ inhmã mẽmoj jarê. Annepêm mẽ panhîgêtpÿrja na prem apkur kaxyw nê amnhî nhîhkra kuhônñ japjê nê

rî kormã apku. Tã pa htem arî ijaxwýja ã amnhî nhîpêx anê. No akôt mê pa ho mê pa xwýnhjaja na htem mê ixpyrà nê ã amnhî nhîpêx anhÿr kêt nê. Kwa mo na htem amnhî nhîhkra tyk kuhõnh tokyx anê nê hkrî nê apku? Anê.

³ Hãmri nhùm mê kuma nê mê kãm:

—Tk. Na ka htem ãm mê panhîgêjtê hkôt pix mã amnhî nhîpêx o apa no Tîrtûm kapêr kôt amnhî nhîpêx kêt nê. ⁴ Tîrtûm na pre mëmoj tã mê pamã karõ ho:

Kêr ka mê anhîpêêxã nê mê akatorxã wa hã apijaãm nê mê ho ajuta rãhã ho ri apa. Kot kaj mê ã amnhî nhîpêx anhÿr kêt nê tanhmã mê kãm akapêr punuj to ho ri apa. Hã koja mê akwýjaja ja myrapê mê apa. Anê.

—Na pre ã Tîrtûmja mê pamã karõ anê. ⁵ No mê kajaja na ka htem ã akwýjê mã karõ anhÿr kêt nê. ãm kapêrja kwým na ka htem mê kãm karõ nê mê kãm:

Kot kaj mê mëmo arîgro hã akàxpore japêr nom kêr ka mê ho tanhmã akatorxã rÿ anhîpêêxã ho ajuta hto kaxyw wa kãm hkwy nhõr kêt nê. ãm ho ate wa ho ajuta hkêt ã wa kãm amnhî jarê hãmri nê Tîrtûm mã amnhî jarênh xã hã ixkre hwÿr o tẽ nê mê ixte tanhmã ixkreta ho mex to kaxyw mê inhmã agõ. Kot kaj mê ã amnhî nhîpêx anê nhùm Tîrtûm ja hã mê apumu nhùm ja kãm mex nê. Kêr ka mê ã amnhî nhîpêx anhÿr o ri apa.

—Anhÿr o na ka htem mê kãm karõ ho ri apa. ⁶ Nom Tîrtûm kapêr tùm kot ã ja jarênh anhÿr kêt. ãm amnhî krã hkôt na ka htem ã mê kãm karõ punuj o ri apa anê. Te mê akapêrja mex o kot Tîrtûm kapêr jakrenh pyrãk. ⁷ Mê ate Tîrtûm kôt amnhî nhîpêx ã amnhî jarênh tã ãm amnhî to axêx nê hkôt amnhî

nhîpêx kêt nê. Na pre Tîrtûm amnepêm mê akukamã tanhmã mê ajarênh to. Nhùm ÿ hã mê kãm kapêr jarênh xwýnh Ijaisja ô ri mê kãm mê ajarê nê hã kagã. Te Tîrtûm tãm kot mê ajarênh pyrãk. ⁸ Na pre mê akukamã mê ajarênh o:

Mê kãm ixkînh ã mê kot amnhî jarênh tã mê kãm ixkînh kêt. Na htem kãm ixprãm ã amnhî jarênh kaprÿ.

⁹ Mê kot ixkuhpa hã amnhî krã hkôt mëmoj tã hkwyjê mã karõ ho pa jakamã na htem kot ixkôt amnhî nhîpêx o pa hã amnhî jarênh kaprÿ. Anê.

—Na pre ã Ijaisja Tîrtûm nhÿ hã mê akukamã mê ajarê nê mê atã kagã anê. Anê.

Nhùm pre ã Jejus Parijew nhõ xwýnhjê mê Tîrtûm kapêr tùm o mê ahkre xwýnhjê mã kapêr anê.

Mëmoj kot mê pahtomnu hã harênh

Makre 7.14-23

¹⁰ Tã nhùm Jejus amnhî wÿr mê kot mar o kuhê xwýnhjê hwÿ nê axte mê kãm kapêr nê mê kãm:

—E mê inhma nê inhmar tÿx nê.

¹¹ Na hte Tîrtûm kapêr tùm o mê ahkre xwýnhjaja amnhî krã hkôt mê ate amnhî nhîhkra kuhõnh japjê hã mê amã karõ ho pa. Nê amnhî krã hkôt mê axàpkur xã hã tanhmã mê amã karõ hto ho pa. Tîrtûm kot ja hã mê apumunh kôt mê amex ã mê ajarênh kaxyw ã mëmoj tã mê amã karõ anê. Nom na hte Tîrtûm tanhmã mê kot amnhî nhîhkra kuhõnh to hã mê omunh xã hkôt tanhmã mê harênh to hkêt nê. Rÿ mê axàpkur xã pumunh kôt mê mex ã mê ajarênh kêt nê. Ja tanhmã kãm kute hkêt. Na hte ã mê kot amnhî nhîpêx anhÿr ã mê omunh xã hkôt mê mex ã mê harênh rÿ mê mex kêt ã mê harênh kêt nê. Na hte mëmoj kur ã mê omu nê ãm mê omu nê hã tanhmã mê harênh to hkêt nê. ãm mê kapêr punuj rÿ mê kapêr mex ã mê

mar kôt pix mã na hte tanhmã mẽ harênh to. Anê.

¹² Nhũm pre ã Jejus mẽ kãm kapêr anê pa mẽ hkôt mẽ ixpa ho mẽ ixpa xwýnhjaja kuma hãmri nê hwýr mra nê kãm:

—Kwa na ka ã mẽ kãm akapêr anê nhũm Parijew nhõ xwýnhjaja tee ri ama nhũm ja mẽ kêp omnuj nê. Anê.

¹³⁻¹⁴ Hãmri nhũm mẽ inhma nê tanhmã mẽ inhmã Parijew nhõ xwýnhjê jarênh to nê hprĩ hã mẽ hkukamã mẽ harênh o:

—Tk. Kwâr mãmri mẽ kêp omnuj. Mẽ kot Tirtũm kapêr tũm o mẽ ahkre ho pa htã na htem hkôt amnhĩ nhĩpêx kêt. Jakamã te mẽ nohkre xwýnh kot amnhĩ nhĩpêx pyrãk. Koja mēhõ nohkre htã amnhĩ kôt nhỹhỹm nohkre hõ ho mẽ hãmri nê wa hamê pry pumunh kêt nê htýx mẽ hãmri nê nhỹri ahkrehti kamã tēm. Tã Parijew nhõ xwýnhjaja te kot wam htēm xwýnhhta pyrãk nhũm mẽ kot mẽ mar xwýnhjaja te kot wam htēm xwýnh kôt hõ htēmta pyrãk. Jakamã Parijew nhõ xwýnhjaja mẽ kot mẽ mar o pa xwýnhjê mẽ koja mẽ hpimràatã nhỹrmã te ahkrehti kamã rôrôk par pyrãk o amnhĩ nhĩpêx nê mex kêt nê pa ho pa. Koja kaxkwa kamã inhõ Papaj nhỹrmã amnhĩ nê mẽ hanor pa.

—Inhõ Papaj te kêp mẽmo hy hkre ho pa xwýnhhta pyrãk. Na htem mẽmo hy hkre nhũm higrõt hapôj nê higrõt mex nê. Hãmri nhũm mẽ hwýr mra nê omu nê nê mẽmoj nhigrõt punuj jarê nê kurê. Ja pyrã nê koja nhỹrmã inhõ Papaj amnhĩ nê Parijew nhõ xwýnhjê janor pa nhũm mẽ mex kêt nê pa ho pa. Jakamã kwa kêr ka mẽ hkôt ri amnhĩ nhĩpêx kêt nê. Anê.

Nhũm pre ã Jejus mẽ ixte hkôt ixpa ho ixpa xwýnhjê mã hprĩ hã Parijew nhõ xwýnhjê hkukamã ã mẽ harênh anê pa mẽ mar o ixkrĩ. ¹⁵ Hãmri nhũm Simãw Pêtre tee ri

Tirtũm kot mẽ apkur xà hã mẽ omunh xà hkôt tanhmã mẽ harênh to hkêt ã harênh ma. Nê ãm tanhmã mẽ kapêr to pix ã mẽ mar kôt tanhmã mẽ harênh toja ma hãmri nê hã Jejus kukja nê kãm:

—Kwa mon ka ri ã ja jarênh anê Pahihti? Anê.

¹⁶ Hãmri nhũm kuma nê hprĩ hã mẽ inhmã awjarê nê mẽ inhmã:

—Kwa xàn ka mẽ kormã aprĩ hã ja mar kêt nê? ¹⁷ E pa ixprĩ hã mẽ amã harê ka mẽ inhma. Nà na htem mẽmoj ku nhũm hte mẽ hkrã hi hwýr gjêx kêt nê. Na hte mẽ ôhy pix wýr agjê nê gaa nê nhãm hapôj nê hapêx. Na htem mẽ apkur xàja ku nê ý hã tanhmã amnhĩ tomnu hto hkêt nê. Jakamã na hte Tirtũm ja hã mẽ omunh xà hkôt tanhmã mẽ harênh to hkêt nê. ¹⁸ ãm mẽ hkrã kamã mẽ hamaxpêr punuj pix nhỹ hã mẽ kot tanhmã amnhĩ tomnuj to jakamã na hte Tirtũm mẽ hamaxpêr ã mẽ omunh xà hkôt tanhmã mẽ harênh to. ¹⁹ Koja mēhõ tanhmã hamaxpêr punuj to nê ra hkôt amnhĩ tomnuj pix o pa. Na htem nhãm mẽ hpar o pa nê mẽ kêp ahkĩ nê amnhĩ to hêx nê mẽ hakwa kamã nhãm axpên mã mẽ hixi jarênh o pa. Nê nhãm mẽ kêp mẽ hprõ ho amnhĩkati nê mẽ hkuprý hwýr mra nê mẽ ho amnhĩkati. Nê tanhmã ri axpên tomnuj to ho pa. ²⁰ Mẽ hamaxpêr punuj nhỹ hã na htem ã amnhĩ nhĩpêx anhýr o pa. No na hte Tirtũm mẽ kot amnhĩ nhĩkra kuhõnh japijê hkêt ã mẽ omunh xà hkôt mẽ kot amnhĩ to mex xwýnh ã mẽ harênh kêt nê. Ja tanhmã kãm kute hkêt. Anê.

Jejus kot Ijaew kêt xwýnh ni kamã ukapri hã harênh

Makre 7.24-30

²¹ Tã nhũm Jejus mẽ inhmã kapêr pa hãmri nê mẽ inhmã anê pa mẽ ma hkôt mẽ. Ma Xir mẽ Sitõja wa pu hã ri ixpa. ²² Nhũm mēhõ nija omu nê hwýr tē. Mẽ ixkĩnhã kêp Ijaew kêt tã hwýr tē. Kanaã nhõ

xwÿnh na pre. Tã Jejus wÿr tẽ nẽ kãm:

—Ka Pahihti Jejus? Apê Tirtũm kot mẽ ixwÿr amẽn̄h xwÿnh jakamã xê ixujarẽn̄h ma nẽ ixkamã axukapri hkêt wehe. Na mẽkarõmnutija tanhmã ixpê ixkra ho nhũm ixpê omnuj tÿx kumrẽx. Anẽ.

²³ Hãmri nhũm Jejus kuma nẽ ãm kuma nẽ kãm tanhmã nẽ hkêt nẽ. Jakamã pa mẽ ixpê hkõt ixpa ho ixpa xwÿnhjaja kãm:

—Kwa hano kê ma akupÿm tẽẽ ri. Na ãm ri mẽ pahkõt xatã hkrata jarẽn̄h pix o ri pa. Anẽ.

²⁴ Nom nhũm kot amnhĩ tã kamã hamak kaxyw tanhmã mẽ inhmã hã kapêr to nẽ mẽ inhmã:

—Nà ãm Ijaewjê pix wÿr na pre Tirtũm inhmẽ. Te mẽ kêp ôwêhti pikunor pyrak o na htem htÿx ri amnhĩ nhĩpêx o pa. Jakamã ãm mẽ hwÿr pix mã na pre inhmẽ. Na kormã inhmã tanhmã nhãm mẽ hkwyjê jarẽn̄h to hkêt nẽ. Anẽ.

²⁵ Hãmri nhũm nitita tee ri amnhĩ tã kuma nẽ hwÿr tẽ nẽ kutã hkõnkrã ho htem nẽ nhÿ nẽ kãm:

—Xê ma we ixkamã axukapri hkêt wehe. Anẽ.

²⁶ Hãmri nhũm kãm:

—Nà kormã. Na pre Tirtũm mẽ kêp Ijaewjê pix wÿr inhmẽ. Jakamã na pa kormã nhãm tanhmã mẽ akwyjê ho mex to hkêt nẽ. Anẽ.

²⁷ Hãmri nhũm kãm:

—Ma ãm hãmri na ka akapêr. Nom ixpê Ijaew kê tã mẽ kuxwar ãm ixto mex grire kêt wehe. Anẽ.

²⁸ Hãmri nhũm kuma nẽ kãm:

—Nà ãm hãmri na ka ã akra kaxyw inhmã ajamxpêr tÿx anẽ. Jakamã kot paj nẽ mẽkarõmnutita jano. Koja axte tanhmã apê ho hkêt kumrẽx.

Anhÿr o kãm kapêrja rôm nhũm hkraja akupÿm mex kurê kumrẽx.

Jejus kot mẽ à xwÿnhjê ho ohtô nẽ mẽ ho mex ã harẽn̄h
Makre 7.31-37

²⁹ Tã nhũm Jejus mẽ inhmã anẽ pa mẽ ixrohã krĩja pẽ ixkato nẽ ma himô rax pẽ Garirej wÿr mō. Nẽ nhÿri gō mÿri hixêt wÿr mō nẽ hã api nẽ ixkrĩ. ³⁰ Hãmri nhũm mẽ ohtô nẽ ma mẽ ixkõt mra. Nẽ mẽ à xwÿnhjaja nhũm mẽ hamÿ nẽ Jejus wÿr mẽ o mra. Na prem ohtô rax kumrẽx. Ra ri mẽ pa hkêt xwÿnhjaja nẽ mẽ nohkre xwÿnhjaja nẽ mẽ hyk o mẽ pa xwÿnhjaja. Nẽ mẽ kapêr kêt xwÿnhjaja nẽ ahpÿnhã ri tanhmã mẽ à kute xwÿnhjaja nhũm mẽ hamÿ nẽ ma Jejus wÿr mẽ o mra nẽ kutã mẽ haxwÿ. Hãmri nhũm mẽ omu nẽ ahpÿnhã akupÿm mẽ ho mex pa. ³¹ Jakamã na pre mẽ kapêr kêt xwÿnhjaja akupÿm kapêr mex nẽ. Nẽ ri mẽ pa hkêt xwÿnhjaja akupÿm mrar mex nẽ. Nẽ mẽ hyk o mẽ pa xwÿnhjaja akupÿm tãm ri mra. Nẽ mẽ nohkre xwÿnhjaja akupÿm rit mex nẽ. ã ahpÿnhã akupÿm mex par anẽ. Hãmri nhũm mẽ kot hwÿr mẽ hamÿnh nẽ Jejus wÿr mẽ o mrar xwÿnhjaja amnhĩ jaêr pẽ akupÿm mẽ mex ã mẽ omu nẽ mẽ kamã no puma nẽ hkĩnh nẽ. Hãmri nẽ Tirtũm mã mex o mex ã harê nẽ xepên mã harẽn̄h o:

—Nà ãm hãmri mẽ panhõ Tirtũmja ãm mex o mex. Anẽ.

Jejus kot mẽ ho 4.000 nẽ mẽ kãm mẽ õ hã harẽn̄h

Makre 8.1-10

³² Tã nhũm Jejus mẽ ixte hkõt ixpa ho ixpa xwÿnhjaja amnhĩ wÿr mẽ ixwÿ nẽ mẽ ixkõt mẽ mrar xwÿnhjê jahkre nẽ mẽ inhmã:

—E. Ka mẽ ri kam jajê pumu. Na pa ra inhmã mẽ hkapri nẽ. Na mẽ pahkõt ri pa hã apkati axkrunêpxi nhũm ra mẽ kêp mẽõja hapêx pa. Koja mẽ apkur kêt rãhã ma akupÿm mẽ õ krĩ hwÿr pa hãmri nẽ pry hã hirot nẽ rôrök o pa. Mẽ õ krĩ hwÿr awryy. Anẽ.

³³ Nhũm pre ã mẽ inhmã mẽ harẽn̄h anẽ pa mẽ tee ri kuma hãmri nẽ kãm:

—Kwa nom nhÿri kot pu mē kām mēmoj japró nhÿm mē tokyx kuku? Ja kapôt pix kēnā. Nē mē ohtô griiā. Anē.

³⁴ Hāmri nhÿm mē inhmā:

—No mē panhō pāwtita? Tanhmā na arī kute nē hikwÿ? Anē.

Hāmri pa mē kām:

—Nā ām kēp 7 pix. Nē kaxyw tep kwÿ no ām grēre. Kot mē ho dare kaxyw ā. Anē.

³⁵ Hāmri nhÿm mē inhma nē mē ixkôt mē mra xwÿnhjē mā anē nhÿm mē hkrī pa. ³⁶ Hāmri nhÿm pāwti mē tep grēreta jamÿ nē ho Tirtūm wÿ nē kām:

—Pa Papaj. Nā apē mē inhmā mē inhō ho apa xwÿnh jakamā amex o amex. Ām amex kumrēx. Anē.

Hāmri nē mē kām mēmojta o hkry hpa nē mē inhmā kugō pa mē ô ri ho xa nē ho mē hipēx pa. ³⁷⁻³⁸ Hāmri nhÿm mē piitā apku nē ôhy htu hpa. Nhÿm prem mēmyjaja kēp 4.000 nē kaxyw mēnijaja nē mēhprījaja. Mē ohtô rax kumrēx tā nhÿm Jejus mēō ho mē hipēx pa. Hāmri pa mē hakrēx o akuprō nē ho kawā ho 7 nē ho nÿt. ³⁹ Hāmri nhÿm Jejus ma akupÿm mē ô krī hwÿr mē hano pa mē pâr krem agjē hāmri nē ma ijaxwÿja mō. Ma pika pē Makatā hwÿr mō.

16

Parijew nhō xwÿnh kwÿ kot aa mē kot mēmoj pumunh kêt ô ho anhÿr ā Jejus wÿr ā mē harēnh

¹ Tā pa mē ra hwÿr pōj nhÿm Parijew mē Satusew nhō xwÿnhjaja Jejus pumu nē hwÿr mra. Nē hēx rom kot kamā hamak kaxyw hwÿr mra nē kām:

—Pa Jejus? E kwa mē inhmā aa mē ixte mēmoj pumunh kêt ô ho anē nā? Pa mē ate ho anhÿr ā apumu nē Tirtūm kot mē ixwÿr amēnh ā akôt ijamaxpēr kurē kumrēx. E kwa tokyx. Anē.

²⁻³ Hāmri nhÿm mē kuma nē mē kām:

—Tk. Nā kot paj mē amā ho anhÿr kêt nē. Mē ate hā ixpumunh nē ixkôt ajamaxpēre kaxyw ā. Na ka htem kaxkwa kamā kakrā pumu nē axpēn mā na wÿk ā harē. Nē kaxkwa mex pumu nē axpēn mā amgrā hā harē. Tā ixte tanhmā mē amā mēmoj nhīpēx to hā ixpumu nom Tirtūm kot mē awÿr inhmēnh xwÿnh ā ixkôt ajamaxpēr kêt nē. ⁴ ām mē ajamaxpēr punuj pix o na ka htem ri ajamaxpēr o apa. Ixpē Tirtūm kot mē awÿr inhmēnh xwÿnh tā ka mē ja hā ixkôt ajamaxpēr kêt nē. Tā mē ate aa mēmoj pumunh kêt kwÿ ixte mē amā ho anhÿr kaxyw ka mē inhmā hā karō. Nā kot paj mē amā ho anhÿr kêt nē. Kormā. Kot paj ām nhÿrmā te amnepēm Jōhti kot amnhī nhīpēx pyrāk o amnhī nhīpēx. E ja pix kot paj mē amā harē. Nom kot paj mē amā aa mē ate mēmoj pumunh kêt ô ho anhÿr kêt nē. Anē.

Nhÿm pre ā Jejus mē kām kapēr anē hāmri pa mē ixrohā mē kēp ixkato nē ma ixpa.

Jejus kot hkôt mē pa xwÿnhjē jahkre hā harēnh

Makre 8.14-21

⁵ Tā pa mē Jejus mē ixrohā ma mō nē pâr mā agjē nē ma xarmā akupÿm rē nē hikjē hā mō. Hāmri nē tee ri mē ixàpkur xà japēr nē axpēn mā:

—Kwa na pu mē panhō pāwti ho pajamakētkati nē kure. Anē.

⁶ Hāmri nhÿm Jejus mē inhma nē tanhmā mē inhmā Parijew mē Satusew nhō xwÿnhjē jarēnh to. Nom pāwti hā kuxi nē mē inhmā mē harē nē mē inhmā:

—Kwa mē o kora. Kêr ka mē Parijew mē Satusew nhō xwÿnhjē mē kēp pāw kaxkrit xā hkwy hpyr kêt nē. Anē.

⁷ Hāmri pa mē tee ri kuma nē ixprī hā mar mex kêt nē. Nē arī kapēta ā axpēn kukjēr o hkôt mō nē axpēn mā:

—Kwa mẽ pahte mẽ panhõ pãwti rer jakamã mãn mẽ pahte mẽ õ pãw kaxkrit xà kwý hpyr nẽ mẽ pahkurẽ nà? Anẽ.

⁸ Hãmri nhũm mẽ inhma nẽ mẽ inhmã:

—Hẽxta waa nẽ. Mon ka mẽ ãm axpẽn mã mẽ panhõ pãwti hkêt pix jarẽn h o mõ? Pêr kormã mẽ ate amnhĩ kaxyw inhmã ajamaxpêr týx kêt. ⁹ Jãã ixte mẽ anoo mã pãwti kêp 5 pix tã nhũm ixte ho mẽ kêp 5.000tajẽ nhĩpêx par. Nhũm mẽ kot hkur nẽ ho õhy htu hpar nhũm mẽ ate mẽõ jakrêx o apikuprõnh par nẽ ho kawà ho 12 nẽ ho hipu. ¹⁰ Nẽ ham pãwti kêp 7 o mẽ kêp 4.000 nhĩpêx par nhũm mẽ kot hkur nẽ ho õhy htu hpar nhũm mẽ ate mẽõ jakrêx o apikuprõnh raxja. ¹¹ Ra ixte mẽ anoo mã ja ho anhÿr o axkrut tã ka mẽ ra hã ano hkêt nẽ arĩ axpẽn mã mẽ paxàpkur xà pix jarẽn h o ixkõt mõ. Nà mẽ paxàpkur xàja na pa harẽn h kêt nẽ. Parijew mẽ Satusew nhõ xwýnhjẽ nhõ pãwti kaxkrit xà pix na pa hã kuxi nẽ mẽ amã tanhmã harẽn h to. Anẽ.

¹² Nhũm pre ã mẽ inhmã kapêr anẽ hãmri pa mẽ atã kuma nẽ kãm:

—Nà na pa xep mẽ hãmri tã ama. Xep mẽ ixte Parijew mẽ Satusew nhõ xwýnhjẽ kapêr kõt amnhĩ nhĩpêx nẽ na ka mẽ ixkurẽ nẽ ã mẽ harẽn h anẽ. Anẽ.

Jejus kot amnhĩ tã hkõt mẽ pa xwýnhjẽ kukjêr ã harẽn h

Makre 8.27-30; Rukre 9.18-21

¹³ Tã pa mẽ axte Jejus kõt mõ nẽ pika pẽ Sejarej Piripos kamã kormã mõ nhũm Jejus amnhĩ tã mẽ ixkukja nẽ mẽ inhmã:

—E mẽ inhmã mẽmoj jarẽ. Tanhmã na hte mẽ akwýjaja axpẽn mã ijarẽn h to wehe? Anẽ.

¹⁴ Hãmri pa mẽ kãm:

—Nà na htem ahpÿnhã tanhmã ajarẽn h to. Na hte kamã mẽ hkwyjaja ajarẽn h o finat Juãw Paxis ã ajarẽ. Nhũm kamã mẽ hkwyjaja ato finat Eris ã ajarẽ

nhũm mẽ hkwyjaja tõiã apẽ Tirtũm nhÿ hã akapêr o apa xwýnhjẽ hõ akupÿm atĩr ã ajarẽ. Nẽ tõiã finat Jeremistija rÿ xtem hõ hã ajarẽ. Æ na htem ahpÿnhã axpẽn mã ajarẽn h anẽ. Anẽ.

¹⁵ Hãmri nhũm mẽ inhma nẽ mẽ inhmã:

—No mẽ kajaja? Ixpê mẽhõ hã na ka htem axpẽn mã ijarẽ? Anẽ.

¹⁶ Hãmri nhũm Simãw Pêtre kãm:

—Nà apẽ Tirtũm kot mẽ ixkaxyw axãm nẽ mẽ ixwÿr amẽn h xwýnh na ka. Nẽ apẽ mẽ ixpiitã mẽ inhõ Pahi Maati na ka. Æ na pa htem axpẽn mã ajarẽn h anẽ. Anẽ.

¹⁷ Hãmri nhũm kuma nẽ kãm:

—Nà ãm hãmri na ka ã ijarẽn h anẽ Simãw Pêtre. Nom amnhĩ krã hkõt na ka ã ijarẽn h anhÿr kêt nẽ. Tirtũm tãm kot amã ixto amnhĩrit xà hkõt na ka ã ijarẽn h anẽ. ¹⁸ Nà akumrêx na ka ã ijarẽn h anẽ. Tã koja mẽ apyrã nẽ nhÿrmã mẽ kot ixkõt amnhĩ xunhwÿr xwýnhjaja ma hkwyjẽ mã ja hã ijarẽn h o ri krĩ piitã hkõt pa. Hãmri nhũm mẽ hkwyjaja mẽ kuma nẽ mẽ apyrã nẽ ixkõt amnhĩ xunhwÿ. Hãmri nhũm mẽ kêp ixprãm nõkati xwýnhjaja tee ri tanhmã mẽ kot ijarẽn h toja ma nẽ ã ijarẽn h anhÿrja nẽ mẽ kãm kapêr tã nom ho hkapyrẽ. Æ koja ixkõt mẽ kot amnhĩ xunhwÿr xwýnhjaja mẽ kãm ijarẽn h o pa anẽ.

Jao te mẽ apẽ kên nhũm ixte mẽ ato amnhĩm inhõrkwÿ nhĩpêx pyràk. Tã akumrêx ate ã ijarẽn h kot anhÿr jakamã kot paj te ixte akumrêx amÿnh nẽ ato ixtẽm nẽ inhõrkwÿ nhĩpêx kaxyw amnhĩm akumrêx axãm pyràk o anhĩpêx Simãw Pêtre.

¹⁹ —E kër ka ma inhÿ hã tanhmã mẽ piitã mẽ kãm ijarẽn h to ho ri apa. Mẽ kot hprĩ hã amar kaxyw. Koja mẽ hkwyjaja ama nẽ amnhĩ kaxyw ixkõt hamaxpêr nẽ ixkõt amnhĩ xunhwÿ. Ka ja hã mẽ omu nẽ mẽ kãm: “E ra mẽ ate Jejus kõt amnhĩ xunhwÿr jakamã kot ka mẽ nhÿrmã ty nẽ ma kaxkwa

hwÿr api nê Tirtûm mê wa kuri amex kumrêx nê atîr tûm nê apa ho apa.” Anhÿr o mê kâm ijarênh o apa. No mê kot akapêr mar nê âm mar nê ixkôt amnhî xunhwÿr kêt xwÿnhjaja ka mê kâm: “No mê kajaja mê ate Jejus kôt amnhî xunhwÿr kêt jakamâ kot kaj mê nhÿrmâ Tirtûm mê Krata wa kuri atîr tûm nê apa ho apa hkêt nê.” Anhÿr o â inhÿ hâ mê kâm akapêr anhÿr o ri mê hkôt apa. Jao te ate kaxkwa hwÿr saf pyr nê Tirtûm krajê mâ kahê xâ rênh nê Tirtûm kra hkêt xwÿnhjê pê kahê pyrâk o amnhî nhîpêx o apa. Anê.

Nhûm pre â Jejus Simâw Pêtre mâ kapêr anê. ²⁰ Hâmri nê hpânhâ mê ixpiitâ mê inhmâ kapêr nê mê inhmâ:

—E. Kwa kêr ka mê kormâ mê piitâ mê kâm Tirtûm kot mê awÿr inhmênh â mê kâm ijarênh o ri apa hkêt nê. Kormâ. Anê.

Jejus kot amnhî kukamâ amnhî jarênh â harênh

Makre 8.31-33; Rukre 9.22

²¹ Hâmri nhûm Jejus hprî hâ amnhî kukamâ tanhmâ mê inhmâ amnhî jarênh to nê mê inhmâ:

—Nâ mê kajaja mê ate aprî hâ ixpumunh mex. No mê pahkwÿjaja kâm hprî hâ ijarênh mar nê ixpumunh prâm kêt. Ijaew krâhtûmjaja nê Tirtûm kapêr tûm o mê ahkre xwÿnhjaja nê patre krâhtûmjaja. Mê kâm hprî hâ ixpumunh nê kâm ixkapêr mar prâm kêt jakamâ kot paj kopyx ma Jerujarê hwÿr mō nhûm mê kamâ ixpynê nê ixtak rax nê ixpî. Nom kot paj ixtyk â apkati axkrunêpxi nhûm Tirtûm akupÿm ixto ixtîr. Anê.

²² Hâmri nhûm Simâw Pêtre tee ri kot â mê kâm amnhî jarênh anhÿrja â kuma nê hwÿr tê nê hpa hâ kupy nê mê ixpê ho kato nê mê ixkâx â o xa. Nê â kot amnhî jarênh anhÿrja nê kâm kapêr nê kâm:

—Kwa nâ Pahihti. Ri â amnhî jarênh anhÿr kêt nê. Mo kot kêt mê ri axtem nê â anhîpêx anê? Anê.

²³ Hâmri nhûm kuma nê hwÿr apkjê nê omu nê kâm:

—Tk. Te apê Satanasti kapêr pyrâk o na ka â inhmâ akapêr anê. Kot kaj â akapêr anê hâmri nê ixkôt apa hkêt nê. Tirtûm kâm hprâm xâ hkôt na â mê kot inhîpêx anhÿr kaxyw kênâ. Tâ ka Tirtûm jamaxpêr o ajamaxpêr kêt nê amnhî jamaxpêr o â inhmâ akapêr anê. Te apê ixpê axâmnâr xwÿnh pyrâk o amnhî nhîpêx. Anê.

Jejus krajaja kot tanhmâ amnhî nhîpêx to hâ mê harênh

Makre 8.34-9.1; Rukre 9.23-27; Juâw 12.24-26; määnên Rômân 15.1; Wam Korît 10.23-24; Karatas 5.24; Piripos 2.4; Wam Pêtre 4.1; Apokarip 2.10, 12.11

²⁴ Nhûm pre â Jejus Simâw Pêtre mâ kapêr anê hâmri nê hpânhâ mê ixpê hkôt ixpa ho ixpa xwÿnh piitâ mê inhmâ kapêr nê mê inhmâ:

—E kot kaj mê ixkôt amnhî xunhwÿr â amnhî jarê hâmri nê määnên amnhî jarênh o: “Jejus kêp inhô Pahihti jakamâ kot paj kapêr kôt pix mâ amnhî nhîpêx rähâ ho ri ixpa. Kwâr ixkwÿjaja tanhmâ hâ inhîpêx hto.” Anhÿr o amnhî jarê.

²⁵ —Koja mê ixtâ mê atōx pî rÿ tanhmâ mê atō hto ka ty. Tâ nom koja akaxwÿnh ma ixwÿr âpir kurê kumrêx. Hâmri ka ixkuri atîr tûm nê amex rähâ nê apa ho apa. Nom kot kaj mê jar atîr prâm xâj ixkaga hâmri nê inhô krî hwÿr axâpir kêt nê.

²⁶ —Nê koja mēhō hikukrêx rax gryk â Tirtûm kaga. Tâ nhÿrmâ ty hâmri nê amnhî kôt hikukrêx ô hpyr nê o mōr kêt nê. Kojaa tee ri kuwy hwÿr mōr pymaj amnhî nê hikukrêx rax o amnhî pânâ amnhîrer prâm kaprÿ. Tanhmâ koja amnhî to nê Tirtûm mâ amnhîre nê ma ô krî hwÿr api? Kojaa â amnhî nhîpêx anhÿr kêt nê.

27—Nê ixpê Tirtûm kot mē awÿr inhmēnh xwÿnh kot paj nhÿrmā kaxkwa rûm akupÿn mē awÿr wrÿ nhûm Tirtûm kapêr o mē wrÿk xwÿnhjaja man ixkôt wrÿ. Hāmri pa inhô Papaj nhÿ hā ixte mē pitā tanhmā mē kot amnhÿ nhÿpêx to hā mē omunh xà hkôt ahpÿnhā tanhmā mē harēnh to. 28 ām hāmri na pa ā mē amā amnhÿ jarēnh anē. Kot paj nhÿrmā akupÿn ixte mē ato amnhÿptār kaxyw man mē awÿr wrÿ. Tā kot kaj mē akwÿjaja akupÿn ixwrÿÿta kukamā tokyx ixte tanhmā ixte amnhÿ nhÿpêx to hā ixpumu. Anē.

17

Jejus kot hixêt prêk nhÿmōk ā hirā kamā ām ā harēnh

Makre 9.2-13; Rukre 9.28-36; mātānēn Sikûn Pêtre 1.16-18

1 Tā nhûm semānja hapêx nhûm Jejus ma nhÿri hixêt prêk wÿr mō. Nê kaxyw Simāw Pêtre nê Xiakre nê Xiakre htō Juāwja nhûm ma amnhÿ kôt wa mē o mō. Nhûm wa mē mō nê hixêt prêk ā api nê himōk ā kuhê. 2 Hāmri nhûm Jejus xep ra axtem nê xa. Axtem hkuk nhÿrā htÿx nê xa. Te myyti nhÿrā htÿx pyrāk. Nê ê haka htÿx kumrêx. 3 Hāmri nhûm xep ja wa kaxkwa rûm hwÿr wrÿ nê kuri kām kapêr o xa. Mojes mē Erisja wa nhûm hwÿr wrÿ nê kuri xa. Tirtûm amnepēm amnhÿ wÿr wa ho àpir tā wa akupÿn wrÿ nê Jejus mā kapêr o xa. 4 Hāmri nhûm Jejus kôt mē mōr xwÿnhjaja wa mē omu nhûm Simāw Pêtre tanhmā hamaxpêr to nê Jejus wÿr tē nê kām:

—Kwa Pahÿhti. Nā ām hāmri na pu mē amnē mō. Kwa pu mē kritpēm jar axkamē nê tokyx panojarêt kêt nê. Pa mē amā pō nhÿrōnh o axkrunēpxi nê hipêx. Amā hō nhÿpêx nê Mojes mā hō nhÿpêx nê Eris mā hō nhÿpêx ka mē kamā akrÿ. E kwa pa mē amā ho anē nà?

Anhÿr o kām kapêr. Nom amnhÿ krā hkôt ā kapêr anē. 5 Hāmri nê kormā ā kām kapêr anhÿr rôm nhûm ra kakrā jaka htÿxja wrÿ nê wa mē hkunor pa nhûm wa mē kamā kuhê. Nhûm kakrā kamā Tirtûm mē kām kapêr nê mē kām:

—E ota Ixkra xa. Inhmā hapê ho inhmā hapê. E kēr ka mē kapêr mar tÿx rāhā ho ri apa. Anē.

6 Hāmri nhûm mē tee ri kuma nê kām wa htÿx nê umaj pikap rōrōk nê htu mÿrpê hikwÿ. 7 Hāmri nhûm Jejus mē hwÿr tē nê mē hā ïhkra jaxwÿ nê mē kām:

—E mē kānhmā akuhê nê amā ma hkêt nê. Anē.

8 Hāmri nhûm mē kuma nê kānhmā rÿt nê Jejus pix pumu nhûm ahte xa nhûm kuri wa ām xwÿnhhta wa ra ma akupÿm api. 9 Hāmri nhûm mē kormā akupÿm hixêt nhÿmōk rûm mē ixwÿr wrÿk o mō nhûm Jejus mē kām:

—E kēr ka mē ham ate mēmoj pumunh xwÿnhhta kormā nhām mē kām harēnh kêt nê. Kot paj nhÿrmā ty nê akupÿm ixtÿr ka mē rÿ kormā mē kām ja hā ijarēnh o ri apa. Anē.

10 Hāmri nhûm mē kormā akupÿn mē ixwÿr wrÿk o mō nhûm mē Jejus mā:

—Kwa mē inhmā mēmoj jarē. Na htem Tirtûm kapêr tûm o mē ijahkre xwÿnhjaja mē inhmā: “Eris kumrêx koja Tirtûm mē pahwÿr kumē nhûm Krisja kormā hapu hā wrÿ.” Anē. Na htem ā mē inhmā war ajarēnh anē. Tā ka ra wrÿ nom kormā akukamā Erisja wrÿk kêt. Anē.

11 Hāmri nhûm mē kām:

—Nā ām hāmri na prem ā wa ijarēnh anē. Na pre ra ixkukamā te Eris kot amnhÿ nhÿpêx pyrāk xwÿnhhta tē nê ixkutêp mē kām ijarēnh o pa. 12 Tā nom nhûm mē ja hā omunh kêt nê. Na prem axtem nê kām hprām xà hkôt tanhmā hipêx to nê kupÿ. Tā koja mē nhÿrmā ā hipêx anhÿr pyrāk o inhÿpêx. Anē.

13 Hāmri nhũm mẽ ra hprĩ hã kuma nê axpên mã:

—Kwa Juãw Paxis pimràata na ã mẽ pamã harênh anê. Tapxipix na pre te Eris kot amnhĩ nhĩpêx pyrãk o amnhĩ nhĩpêx o pa. Tã tãm na mẽ pamã harê. Anê.

Jejus kot mēhō hkra nē mēkarōmnuti kator ã harēnh

Makre 9.14-29; Rukre 9.37-43

14 Tã nhũm mẽ ra akupỹm ahpar mã man mẽ ixwýr hpôx o mō nhũm mẽ ohtô rax nê Jejus kutêp kuhê. Hāmri nhũm mēhō myja mẽ omu nê mẽ kutã tẽ nê mẽ hkaxpa nê Jejus kutã hkõn krã ho tēm nê nhỹ nê hkra ho kuwý nê kãm:

15 —Pa Jejus. Kwa inhmã ixkra kamã axukaprĩ nê. Na hte mēkarōmnutija xatã tanhmã ixpê ho nhũm hte ý hã mra nê rôrôk nê tōhã kuwy kamã rôrôk nê tōhã gôx kãm mran mrõ nê ixpê homnuj tỳx nê. 16 Tã pa akôt mẽ pa ho mẽ pa xwýnhjê hwýr o tẽ nom nhũm mẽ kot inhmã ho mex kaxyw tee ri tanhmã ho hkaprý. Kwa xà kot kaj akupỹm inhmã ho mex nã? Anê.

17 Hāmri nhũm kuma nê mẽ ixte hkôt ixpa ho ixpa xwýnhjê mã kapêr nê mẽ inhmã:

—Hêxta waa nê. Ra mẽ ate ixte Tirtũm nhỹ hã mẽ ho mex ã ixpumunh o ixkôt apa ryy htã kormã ixpyrà nê ã mẽ hipêx anhýr kêt nê. Nã kormã mẽ kaxyw Tirtũm kôt mẽ ajamxpêr tỳx kêt jakamã na ka mẽ tee mẽ ho mex kaxyw. Anê.

Hāmri nê myta mã kãm:

—E amnê ixwýr akrata o tẽ pa omu. Anê.

18 Hāmri nhũm kuma nê hwýr o tẽ nhũm omu nê nê mēkarōmnutija kator nhũm akupỹm mex kurê kumrêx. 19 Hāmri pa mẽ ixte Jejus kôt ixpa ho ixpa xwýnhjaja ja hã omu mẽ hkãx ã amnhĩ tã hkukja nê kãm:

—Kwa na pa mẽ axwakre kamã tee ri nê hanor prãm kaprý. Kwa mon pa mẽ apyrã nê nê hanor

nhũm kator nê ma htēm kêt nê? Anê.

20-21 Hāmri nhũm mẽ inhmã:

—Nã kormã mẽ ate mẽ kaxyw Tirtũm kôt ajamxpêr tỳx kêt. Nom kot ka mẽ kaxyw hkôt ajamxpêr tỳx hāmri nê hkôt amnhĩ nhĩpêx kukwak ri mẽmoj tã awý nhũm mẽ ama nê mẽ ate mẽmoj tã axàhwýr xà hkôt mẽ amã tanhmã mẽmoj nhĩpêx to. Te mẽ ate pĩ hpar mũj mã akapêr nê kãm: “Kwa amnhĩ jarê nê ma tẽ nê gô xujanãr kãm mãn mrõ.” Anhýr nhũm kot amar nê amar xà hkôt ã amnhĩ nhĩpêx anhýr kurê kumrêx pyrãk. Ja pyrà nê kot kaj mẽ amnhĩ kaxyw Tirtũm kôt ajamxpêr tỳx kukwak ri mẽmoj tã awý nhũm mẽ ama nê mẽ amã mẽmoj tanhmã ho rý mẽ amã mẽmoj gô. Anê.

Jejus kot htyk kukamã amnhĩ jarēnh ã harēnh

Makre 9.30-32; Rukre 9.43-45

22-23 Tã hāmri pa mẽ Jejus kôt ma mō nê nhýri pika pẽ Garirej kamã kormã ixpa. Hāmri nhũm Jejus axte amnhĩ kukamã mẽ inhmã tanhmã htyk ã amnhĩ jarēnh to nê mẽ inhmã:

—Nã koja mẽ tokyx mẽ kãm ixtã amýnê nhũm mẽ ixpĩ. Mẽ kot ixpĩr tã kot paj ixtyk ã apkati axkrunêpxi nhũm Tirtũm akupỹm ixto ixťr. Anê.

Hāmri pa mẽ tee ri ã kot amnhĩ jarēnh anhýrja ã kuma nê ixkaprĩ htỳx kumrêx.

Jejus kot Tirtũm nhōrkwy hwýr àr Rōmãn 13.5-7; Wam Korĩt 10.32-11.1

24 Tã pa mẽ Jejus kôt ma mō nê ra Kapanau hwýr pøj. Hāmri nhũm mẽ kot Tirtũm mã amnhĩ jarēnh xà hã ixkre ho mex kaxyw mẽ kêp kãxpore hkwý jamýnh xwýnhjaja mẽ ixpumu nê mẽ ixwýr mra nê Simãw Pêtre mã kãm:

—Pa. Kwa xà na hte mẽ ajahkre xwýnhja mẽ pahpê hkwýjê pyrà nê Tirtũm mã amnhĩ jarēnh xà hã

ixkre ho mex kaxyw kàxpore hkwy nhõr kêt nê nà? Anê.

²⁵ Hāmri nhūm mẽ kuma nê mẽ kām:

—Tỳ kot mẽ kām òr o pa kênã. Anê.

Hāmri nê ma mẽ ixkõt tẽ nê mẽ ixkõt mẽhõ nhõrkwy hwỳr axà. Hāmri nê kot Jejus mã mẽ harênh mã tã nhūm ra hamaxpêr ã omu nê kumrêx kām kapêr nê kām:

—Kwa inhmã mẽmoj jarê Simãw Pêtre. Xà na hte pahi hkrajaja ò papaj mã kàxpore hkwy nhõr o pa nà? Xà na hte âm hkra hkêt xwỳnh pixjaja kām hkwy nhõr o pa? Anê.

²⁶ Hāmri nhūm kuma nê kām:

—Nà mẽ kêp hkra hkêt xwỳnh pixjaja na hte kām òr o pa. Anê.

Hāmri nhūm Jejus kām:

—Tỳ. Nà âm hāmri na ka ja jarê. Na hte pahi hkrajaja ò papaj mã kàxpore nhõr kêt nê. Mẽ kêp hkra kênã. Tã ixpê Tirtũm Kra jakamã mo kaxyw kot pa kêt òrkwy hwỳr inhgêx kaxyw kām kàxpore hkwy gõ? ²⁷ Tã nom kot paj òr kêt nhūm kàxpore hkwy jamỳnh xwỳnhjaja tee ri ja hã ixpumu nê axpên mã ixte amnhĩ tomnuj xwỳnh ã ijarê. Jakamã e ma gõnhmã tẽ nê tep ò kanhê. Hāmri nê ho api nê apy nê hakwa jakjê nê kamã kàxpore htỳxre pumu. Nê apy nê man o tẽ nê pahpãnhã kàxpore jamỳnh xwỳnhhta mã agõ. Anê.

Nhūm pre ã Jejus Simãw Pêtre mã karõ anê nhūm kuma nê ma hwỳr tẽ nê kot kām karõ xà hkõt ã amnhĩ nhĩpêx anê.

18

Mẽ kot amnhĩ to rũnh xwỳnhjê jarênh

Makre 9.33-37; Rukre 9.46-48; mããnhẽn Piripos 2.3-7; Wam Pêtre 3.4, 5.5-6

¹ Tã mẽ ixte Jejus kõt ixpa ho ixpa xwỳnhjaja amnhĩ kukamã ijamaxpêr nê amnhĩ tã Jejus kukja nê kām:

—Kwa mẽ inhmã mẽmoj jarê Pahihti. Nhỹrmã mẽ ixpê pahi nê anhĩhkõ hã mẽ ho amnhĩptàr o ri ixpata ã mẽ ixtõ kot paj we mẽ ho amnhĩptàr rax o ixkwỳjê jakre? Anê.

² Hāmri nhūm mẽ inhma nê amnhĩ wỳr mẽhprĩre hõ mã hpa ho apê nhūm hwỳr tẽ nê mẽ ixkuri xa.

³ Hāmri nhūm Jejus omu nê hã mẽ inhmã:

—E mẽ inhma. Kêr ka mẽ apê pahi pyrãk o tanhmã amnhĩ jarênh to ho ri apa hkêt nê. Âm te amarĩ ri mẽ apa pyrãk o amnhĩ nhĩpêx. Te mẽhprĩre kot amnhĩ nhĩpêx pyrãk. Kot kaj mẽ ã amnhĩ nhĩpêx anhỹr o apa hkêt hāmri nê nhỹrmã inhĩhkõ hã mẽ ho amnhĩptàr kêt nê. ⁴ Jakamã kot kaj mẽ amã nhỹrmã inhĩhkõ hã mẽ ho amnhĩptàr o apa hprãm. Hã kot kaj mẽ te mẽhprĩre kot amnhĩ nhĩpêx pyrã nê amã amnhĩ to rũnh prãm kêt nê apa.

⁵ —Nê kêr ka mẽ apê pahi kot amnhĩ nhĩpêx pyrãk o tanhmã amnhĩ jarênh to ho apa hkêt nê. Âm te amarĩ ri mẽ apa pyrãk o amnhĩ nhĩpêx. Jao nhỹri mẽhprĩjê hõ pumu nê kamã axukapri nê kām mẽmoj tanhmã ho rỳ kām mẽmoj gõ. Hāmri nê te pa ate tanhmã ixto mex to pyrãk o amnhĩ nhĩpêx. Kot kaj mẽ ã amnhĩ nhĩpêx anhỹr o apa hāmri nhūm Tirtũm ja hã mẽ apumu nê mẽ ate amnhĩ to rũnh kêt tã mẽ ate amnhĩ to rũnh xwỳnh ã mẽ ajarê. E kot kaj mẽ amã amnhĩ to rũnh prãm hã kot kaj mẽ ã amnhĩ nhĩpêx anhỹr o ri apa. Anê.

Mẽ kot amnhĩ tomnuj xwỳnhjê hkukamã mẽ harênh

⁶ Nhūm Jejus arĩ mẽ inhmã mẽhprĩ jarê nê mẽ inhmã:

—Nê mẽhprĩre na htem amnhĩ kaxyw ixkõt hamaxpêr o pa. Tã koja mẽhõ inhnẽ tanhmã mẽ kām kapêr to. Mẽ kot tanhmã amnhĩ tomnuj to hprãm xãj tanhmã mẽ kām kapêr to ho pa. Hāmri nhūm

mê kuma nê mê kapêr xà hkôt tanhmã amnhî tomnuj to. Hã koja Tîrtûm ja hã omu hãmri nê kot inhnê tanhmã kãm kapêr to xwÿnhnta pumu nê homnuj tÿx nê. Te mê kot mēhō pynēnh nê mut ã kēn pytî hō nhōr nê ma o htēm nê gō xupÿm kãm mēnh pyrāk o hipēx. Te ho ja pyrāk no ãm homnuj tÿx o hakre.

⁷—Nê koja mēhō inhnê tanhmã mê kot ixkôt amnhî xunhwÿr xwÿnhjê hō mã kapêr to. Kot tanhmã amnhî tomnuj to hprãm xaj tanhmã kãm kapêr to. Rÿ kot ixkaga hprãm xaj tanhmã kãm kapêr to. Hãmri nhũm kuma nê mar xà hkôt ixkapêr kwÿm tanhmã amnhî tomnuj to. Tã koja Tîrtûmja ja hã omu nê mãânēn kot inhnê kēp ãnnār xwÿnhnta pumu nê ã inhnê kãm kapêr anhÿrja mÿrapê homnuj tÿx kumrēx.

⁸⁻⁹—E kwa mê okora. Kot kaj mê anhîhkra ho tanhmã amnhî tomnuj to rÿ apar o tanhmã amnhî tomnuj to. Hã kêr ka mê axte ã amnhî nhîpēx anhÿr pymaj te mê ate amnhî pê krāhyr nê mēnh pyrāk o amnhî nhîpēx nê axte ã amnhî tomnuj anhÿr kêt nê. Rÿ ka mê ano ho mēmoj punuj pumu. Hã kêr ka kãm ajamaxpêr pix o apa pymaj te mê ate amnhî pê ano katōk nê kaxār nê mēnh pyrāk o amnhî nhîpēx nê nhām arît kurê kumrēx. Kêr ka mê ã amnhî nhîpēx anhÿr o ri apa. Hãmri nê nhÿrmã ty nê ma Tîrtûm nhō krî hwÿr api. No kot ka mê arî akutã ano nê arî akutã apar nê arî akutã anhîhkra rāhã ri apa htã ho amnhî tomnuj o apa. Hãmri nê nhÿrmã ty nê ate amnhî tomnuj mÿrapê ma mê kot amnhî xà htÿx kamã hamak tûm xà hwÿr ma mō.

¹⁰⁻¹¹—Nê kêr ka mê mēhprîrejê kamã axukapri rāhã ho apa. Na hte kaxkwa kamã Tîrtûm kapêr o mê wrÿk xwÿnh kwÿjaja Tîrtûm mã mê hamār mex o pa. Tã koja mēhō tanhmã kēp hō hto nhũm mê hã

omu nê ma tē nê Tîrtûm mã harēnh kurê kumrēx. Anē.

ôwēhti pikunor jarēnh

Rukre 15.3-7

¹² Nhũm Jejus arî mê inhmã kapêr nê mê inhmã:

—E pa mê amã awjarê ka mê ixu-jarēnh ma. Nà koja mēhō my hkrit ôwēhti xohtō nê. Nê apkati mê ma hamār o pa. Hãmri nhũm pyxire nê tanhmã amnhî to nê kēp akunok. Kwÿ kaga nê ma nhÿhÿm ahte tē nê kēp akunok. Hãmri nhũm mytita ma akupÿm o mōr kaxyw hkwy ho pikuprōnh pa hãmri nê tee ri hkwy kaēx ã pikunor xwÿnhnta japêr nom nhÿri omunh kêt nê. Hãmri nê tee ri hkukamã hamaxpêr nê ma hkwy ho mō nê nhÿri kure. Kutêp apkur kaxyw nhÿri kure hãmri nê ma akupÿm pikunor xwÿnhnta japêr o tē. ¹³ Hãmri nê hapêr ryy nê nhÿri hwÿr kato nê omu nê hkînh nê. Hãmri nê kutu nê ma akupÿm o tē. Na hte pikunor kêt xwÿnhjê nhÿ hã hkînh tã pikunor xwÿnhnta mã kato nê hkînh tÿx nê. Krit xohtō htã nom ãm kãm ho pixi nê ho hpikunor prãm kêt. ã mê ujarēnh kot anhÿr. ¹⁴ Ja pyra nê Tîrtûm kãm mēhō pyxi nê nhÿrmã ma kuwy wÿr mōr prãm kêt kumrēx. Mê piitã mê kot hkôt amnhî xunhwÿrja na kãm hprãm. Anē.

Jejus kôt mê pahtojê hō kot mê pahtomnuj jarēnh

¹⁵ Nhũm Jejus arî mê inhmã kapêr nê mê inhmã:

—Nê ja. Koja ixkôt mê atō rÿ mê atōx tanhmã atomnuj to. Hã kêr ka ma hwÿr tē nê kot tanhmã anhîpēx to hã amnhî tã kãm akapêr. Nom kêr ka mê nhām mēhō mã harēnh kêt nê. ãm tanhmã kot ato xwÿnhnta pix wÿr tē nê kumē war axpēn mã akapêr nê war axpēn ma. Nhũm ama nê akupÿm tãm anhîpēx hã kêr ka akupÿm te ixkôt kēp atō rÿ atōx pyrāk o ka wa axpēn nhîpēx nê axte jam ajamaxpêr kêt nê. ¹⁶ Nom koja

ama nê âm ama rý tanhmã ato hkêt ã amnhî jarênh japêr. Hã kêr ka mã akupým tê nê akupým amnhî kôt Kris kôt atô rý atôx o axkrut rý mẽ ho axkrunêpxi nê amnhî kôt hwýr mẽ o mra kê mẽ axpên tâ war ama. Amnepêrn Tirtüm kapêr ã kagà htüm kot ja jarênh o:

Kêr ka mẽ atô tanhmã axpên nhîpêx to. Hãmri nê hã axpên mã akapêr kaxyw nê amnhî kôt akwýjê ho axkrut rý ho axkrunêpxi nê akupým hwýr mẽ o mra kê mẽ axpên tâ war ama. Anê.

—Ã Tirtüm kapêr ã kagà htüm kot ja jarênh kot anhýr. ¹⁷ Jakamã kêr ka mẽ amnhî kôt akupým kot tanhmã ato xwýnhnta wýr mẽ o mra kê mẽ atã kuma. Hãmri nhüm arî mẽ kãm kot tanhmã ato hkêt ã amnhî jarê ka tee ri amnhî tâ omu nê ikrêsti hwýr tê nê Kris kwý hã mẽ pikuprôn h xwýnhjê mã harê. Kê mẽ ama hãmri nê ja hã axte kot tanhmã ato xwýnhnta mã kapêr. Nhüm mẽ mar kêt nê arî kot tanhmã ato hkêt ã amnhî jarê ka mẽ amnhî nê hanor kurê kumrêx. Hãmri nê te kêp Kris kôt mẽ atô rý mẽ atôx kêt pyrãk o hipêx.

¹⁸ —Nê koja mêmhõ ixkôt amnhî xãm nê Inhîpêxã Tirtüm kôt ri amnhî nhîpêx o pa. Ka mẽ ja hã omu nê inhý hã tanhmã kãm akapêr to nê kãm: “E ra ate Jesus kôt amnhî xãm jakamã kot kaj nhýrmã Tirtüm mẽ wa kuri amex kumrêx nê atîr tùm nê apa ho apa.” Anhýr o kãm akapêr. Nom mẽ kot ixkôt amnhî xunhwýr kêt xwýnhjaja ka mẽ ã mẽ kãm akapêr anhýr kêt nê. Âm inhý hã mẽ kãm: “No mẽ kajaja mẽ ate Jesus kôt amnhî xunhwýr kêt jakamã kot kaj mẽ Tirtüm mẽ Krata wa kuri atîr tùm nê amex nê apa hkêt nê.” Anê. Kêr ka mẽ inhý hã ã ahpýnhã tanhmã mẽ kãm akapêr to ho apa anê.

¹⁹⁻²⁰ —Nê kot kaj mẽ Tirtüm mã amnhî jarênh kaxyw te axkrutre

rý axkrunêpxire htã axpên wýr akuprô nom mẽ kapxipixjaja apikuprôn h kêt nê. Kot paj mẽ akaêx ã mẽ anhîhkô hã mẽ amar o xa. Mẽ ate ano ho ixpumunh kêt tâ pa wa mẽ anhîhkô hã mẽ amar o xa. Jakamã kot kaj mẽ axpên wýr akuprô nê mêmoj tâ Tirtüm wý nhüm kaxkwa kamã ja hã mẽ ama. Nê mẽ ate hã axãhwýr xwýnhnta nhüm mẽ amã tanhmã ho. Kêr ka mẽ ã ixkamnâr rom axãmnhix amnhî to Inhîpêxã hwýr anê. Anê.

Nhüm pre ã Jesus mẽ inhmã kapêr anê.

Mẽ pahte tanhmã axpên nhîpêx to hã mẽ pamã karô

Matêwre 6.14-15; Rukre 17.3-4; mãânên Epes 4.32; Korosê 3.13

²¹ Tã nhüm Simãw Pêtre Jesus wýr tê nê mêmoj tâ hkukja nê kãm:

—Kwa inhmã mêmoj jarê Pahihti. Xã koja akôt ixtô rý ixtôx tanhmã inhîpêx to pa amnhî tâ omu nê âm omu nê amnhî tâ tanhmã ho hkêt nê. Nhüm axte tanhmã ixto nê axte tanhmã ixto ho 6 tâ pa âm amnhî tâ omu nê amnhî tâ tanhmã ho hkêt nê. Âm ho ijamakêtkati nê axte kãm ijamaxpêr kêt nê. ã amnhî tâ hipêx anhýr o 7 nhüm ja amã mex nê nã? Anê.

²² Hãmri nhüm kãm:

—Nã kot kaj ã amnhî tâ hipêx anhýr o 7 pix kêt nê. Koja mêmhõ xatã tanhmã ato rãhã nê ka amnhî tâ omu nê ajaxwýja amnhî tâ xatã tanhmã ho hkêt nê. Âm amnhî tâ omu nê âm omu nê tam hipêx rãhã ho ri apa. Mãmri ho anhýr o apa rãhã nê aa jam anhürer kêt nê.

²³ —E kot paj ixprî hã mẽ amã tanhmã ja jarênh to ka mẽ inhma. Tirtüm na hte xatã mẽ ate tanhmã amnhî tomnuj to hã mẽ apumu nê mẽ anê rên h o pa. Te kot pahi kot ã hkwýjê nhîpêx anhýr pyrãk. Koja mẽ õ pahija kãm mẽ ápênh xwýnhjaja kot kêp kãxpore ho Ìpresta hã mẽ omunh kaxyw nhý. ²⁴ Hãmri nhüm mẽ hwýr ja ho tê nê kutã âm.

Ra kot kêp hikàxpore ho ìpresta rax xwýnhja. ²⁵ Tã no ãm aa akupým kãm ôr kêt nê ra kêp ho hapêx pa. Hãmri nhùm pahija tee ri amnhî tâ omu nê hkwýjê mã hã amýnê nê mẽ kãm: “E. Mẽ ma o tẽ nê hprô nê hkrajaja nê ôrkwý nê hikukrêx mẽrohã ho wênê hpa nê hpãnhã kàxpore py nê man inhmã o tẽ. Kot ixpê ixkàxpore ho ìpresta nê akupým inhmã ôr kêt mýrapê.” Anê.

²⁶ —Hãmri nhùm kot ho ìpresta xwýnhta tee ri amnhî tâ kuma nê kutã hkônkrã ho nhý nê amnhî to hwýr kãm hihtýx nê kãm: “Kwa nã ri ixto anhýr kêt nê pahiti. Ixkamã axukapri nê hkêt wehe. Nã kot paj akupým amã kugô kãm ga.” Anê.

²⁷ —Hãmri nhùm amnhî tâ kuma nê kãm hkapri nê. Hãmri nê kãm: “Tõe. Nã kot paj ã anhîpêx anhýr kêt nê. Kot paj anhô kôt kaxônh pa nê kumê ka mãmri ma ajamakêtkati nê axãmnhix apa.” Anê. ²⁸ Nhùm ã kãm kapêr anê nhùm kuma nê hkính nê. Hãmri nê ma tẽ nê kato nê ixkre kapem pôristi hô pumu. Na pre ra kêp kàxpore hkwý ho grire nê ho ìpresta nhùm kato nê omu. Hãmri nê hwýr tẽ nê amnhî kínhã ôkre hã kumý nê kãm: “Kwa tokyx akupým ate ixpê kàxpore ho ìpresta pãnhã inhmã agô.” Anê. ²⁹ Hãmri nhùm tee ri amnhî tâ omu nê ra ham kot pahi kutã amnhî nhîpêxta pyrà nê kutã hkônkrã ho nhý nê kãm: “Kwa nã. Kwa ri ixto anhýr kêt nê. Nã kot paj hpãnhã amã kugô. Kwa ixkamã axukapri nê hkêt wehe.” ³⁰ Anhýr tâ nom nhùm kuma nê ãm kuma nê hã amýnê. Hã hkwýjê mã amýnê nê mẽ kãm: “E mẽ ma jahti ho tẽ nê haxã. Kojã kot ixpê kàxpore ho ìpresta pãnhã inhmã kugô nê rî kormã kato nê rî amnhî pumu.” Anê. Hãmri nhùm mẽ kuma nê ma o tẽ nê haxã.

³¹ —Hãmri nhùm hkwýjaja tee ri mar o kuhê nhùm mẽ kêp ja omnuj nê nhùm mẽ pahi hwýr agjê nê kãm

harê. ³² Hãmri nhùm tee ri harênh ma nê kamã gryk týt nê akupým amnhî wýr hã karô nhùm akupým hwýr axã nhùm kãm: “Tk. Kwa na ka pre amnhî tomnuj týt nê. Ate amnhî to ixwýr nhùm inhmã akapri nê ixte anhô kôt kaxônh nê mênh tâ ³³ ka amnhî kínhã anhîôta kamã axukapri hkêt nê ri ã hipêx anê.” Anê. ³⁴ Hãmri nê kamã gryk nê hã ô pôristi mã amýnê nhùm mẽ ma o tẽ nê haxã. Mẽ kot mẽ hagiênh xã hã ixkre kamã apkati mẽ tanhmã mẽ kot hipêx to kaxyw nhùm mẽ kãm hã amýnê. Tanhmã mẽ kot hipêx to rãhã nhùm kot akupým kàxpore raxta nhôr par nê rî kormã kator kaxyw nhùm mẽ ma o tẽn haxã. ã mẽ ujarênh kot anhýr. Anê.

³⁵ Nhùm pre ã Jejus mẽ ixte hkôt ixpa ho ixpa xwýnhjê mã kapêr anê. Hãmri nê mẽ inhmã:

—Ja pyrà nê koja ixkôt mẽ atô rý mẽ atôx tanhmã mẽ atomnuj to ka mẽ amnhî tâ omu nê ãm omu nê ho ajamakêtkati kurê kumrêx nê axte kãm ajamaxpêr kêt nê. Te pahi kot mẽhõ nhô kôt kaxônh par nê axte kãm hamaxpêr kêeta pyràk. No kot kaj mẽ ã amnhî nhîpêx anhýr kêt nhùm kaxkwa kamã inhô Paj ja hã mẽ apumu nê te ho pahi tee ri kot amnhî tomnuj xwýnhta kot amnhî nhîpêx ã omunh nê hã àmnênh nhùm mẽ kot apkati mẽ tanhmã omnuj tota pyràk o mẽ anhîpêx. Anê.

19

Jejus kot mẽ pahte axpên kaga nê mẽ pahkurê

Matêwre 5.31-32; Makre 10.1-12; Rukre 16.18; mãânên Wam Korit 7.10-16

¹ Tã nhùm Jejus mẽ inhmã kapêr pa nê mẽ inhmã anê pa mẽ ixrohã Garirej rúm ixkato nê pyhti pê Jotãw hã rê nê hpãnhã ihkjê hã ri ixpa. Pika pê Jutej kamã. ² Hãmri nhùm mẽ ohtô nê Jejus pumu nê man mẽ ixwýr mra nhùm mẽ omu

nê mê kām akupým mê à xwýnhjê ho mex. ³ Hāmri nhūm Parijew nhō xwýnh kwýjaja hwýr mra. Héx rom kot kamā hamak nê tanhmā ho kapêr punuj to kaxyw hwýr mra nê kām:

—Pa? Kwa mê inhmā mēmoj jarê. Tanhmā na pre amnepê m finat Mojesja mê pahte mê pahprō kaga hā mê panhīgêjtê mā karō hto? Xà kot mê pahprō pahkwým ri tanhmā amnhī nhīpêx to pu mê hkaga nhūm ja Tirtūm mā mex nê nà? Anê.

⁴ Hāmri nhūm mê kām:

—Nà na ka mê aprī hā Mojes kot tanhmā ja jarênh to mar mex kêt nê. Ja kot anhýr kêt. Amnepê mēmoj piitā hkra x kām na pre Tirtūm my nê nija wa hipêx. Axpên kaxyw wa hipêx. ⁵ Hāmri nê wa hkukamā tanhmā wa kot amnhī nhīpêx to hā wa harê nê wa harênh o:

Koja mēmyjaja hprō kaxyw hāmri nê gryk ā katorxà mê hipêxà wa hkaga nê âm hprō kôt pix mā pa ho pa. Te wa tipxi nê ri wa pa pyrāk o amnhī nhīpêx. Anê.

—Na pre ā Mojes Tirtūm nhý hā mê kām ja jarênh anê. ⁶ Jakamā koja te wa tipxi nê ri wa pa pyrāk o axpên nhīpêx o pa. Tirtūm tām kot axpên mā wa ōr kênā kot kêt wa axtem nê ri htýx ri hamaxpêr nê axpên kaga. Anê.

⁷ Hāmri nhūm mê kuma nê kām:

—Tý. Nom finat Mojes na pre mê pakukamā mê panhīgêjtê mā ā ja hā karō anê nê mê kām:

Kot kaj mê aprō kaga kaxyw hāmri nê ra kêp aprō hkêt ā hā kagā nhīpêx nê kām agō nê amnhī nê hano kê ma tē.

—Anhýr o na pre mê kām hā karō. Tā ka na ka mê ixte axpên kaga hkêt ā mê inhmā karō. Anê.

⁸ Hāmri nhūm mê kuma nê mê kām:

—Tý no âm mê kām Tirtūm kapêr kôt amnhī nhīpêx prām kêt jakamā

na pre ā mê kām ja jarênh anê. No amnepê mēmoj piitā hkra x kām na prem ā amnhī nhīpêx anhýr o pa hkêt nê. ⁹ Jakamā kêr ka mê aprō kaga hkêt nê apa. Kot kaj mê hkaga nê hpānhā nhām mēhō ho aprō nhūm Tirtūm noo mā te ate wam aprō kamā nhām aprō nyw o amnhīkati pyrāk. Tirtūm pê ja omnuj týx nê. Rý koja mēhō hprō kaga ka hpānhā ho aprō nhūm Tirtūm noo mā te ate wam mjên pê ho amnhīkati pyrāk. Ja määnên Tirtūm pê omnuj týx nê. Anê.

Nhūm pre ā Parijew nhō xwýnhjê mā kapêr anê. ¹⁰ Hāmri pa mê ixte hkôt ixpa ho ixpa xwýnhjaja ā kapêr anhýrja ā kuma nê kām:

—Xà na hte mê mjên ra kām mê hprō hkính kêt tā hkaga hkêt nê arī hkôt pa ho pa nhūm hte Tirtūm mā ja mex nê nà? Jakamā kwa xà kot paj mê nhýrmā ixprō kaga pymaj ixprō hkêt kumrêx nê ixpa ho ixpa nhūm ja mê inhmā mex nê nà? Anê.

¹¹ Hāmri nhūm mê inhmā:

—Nà âm hāmri na ka mê ja jarê. No mê ate harênhja na mê piitā mê kām mex kêt. Koja Tirtūm tām amā aprō hkêt ā ajarê ka rī aprō hkêt nê ahte ajamakêtkati nê ri apa. ¹² Na htem piitā hprō nê pa hkêt nê.

Na hte kamā tanhmā mê kute xwýnhjaja kormā hprīre ri tanhmā kute mýrapê kām hprō hprām kêt nê pa.

Nê kamā tanhmā mê ho mýrapê nhūm mê hkurê hkêt nê hprō hkêt nê pa.

Nê kamā mê kām Tirtūm mā tanhmā amnhī to ho pa pix prām xaj kām hprō hprām kêt nê pa.

Tā kot kaj mê jajê pyra nê ā amnhī nhīpêx anhýr prām nê rī kam nê aprō hkêt nê apa. Anê.

*Jejus kot amnhī nê mēhprījê janor kêt ā harênh
Makre 10.13-16; Rukre 18.15-17*

13 Tã nhũm Ijaew kwỳjaja Jejus pumu nê hwỳr mē hkrarejê jamỳ nē mē o mra. Kot mē hã ìhkra jaxwỳr nē mē ho Tìrtũm wỳr kaxyw hwỳr mē o mra. Hãmri pa mē ixte hkôt ixpa ho ixpa xwỳnhjaja tee ri mē omu nē tanhmã nē mē kãm ixkapēr to nē mē kãm:

—Tk. Mo kaxyw na ka mē Jejus wỳr mē o mra? Kormã mē raxre kênã. Kwa mē ma akupỳm mē o mra nã? Anē.

14 Hãmri nhũm Jejus mē inhma nē mē inhmã:

—Kwa nã mē ri inhnê mēhprìjê kurê hkêt nē. Kwār mē mãmri ixwỳr mē o mra. Anē.

Hãmri nē amnhĩ wỳr mē mē kãm hpa ho apê nhũm mē hwỳr mē o mra nhũm mē kuri kuhê nhũm mē omu nē mē hã mē inhmã:

—E mē jarejê pumu. Na htem hamakêtkati nē hkĩnh nē ri pa. Nē mē kãm amnhĩ to rũnh prãm kêt nē. Tã Tìrtũm kôt mē kot amnhĩ nhĩpêx o mē pa xwỳnhjaja te mē kot jajê pyràã nē kãm amnhĩ to rũnh prãm kêt nē pa. Anē.

15 Hãmri nē mē hã ìhkra jaxwỳr nē mē ho Tìrtũm wỳr hãmri nē mē inhmã anē pa mē ma axte mē kurũm mō.

Kàxpore rũnh xwỳnh jarēnh

Makre 10.17-22; Rukre 18.18-23; mãânēn Rômãn 3.19-20; Wam Xi-motre 6.6; Xiakre 2.10

16 Tã nhũm Ijaew òja Jejus wỳr tē nē kãm:

—Pa mē ijahkre xwỳnh? Kwa inhmã mēmoj jarē. Tanhmã kot pa nhỹrmã Tìrtũm ri ixtĩr tũm nē ixpa ho ixpa kaxyw amnhĩ nhĩpêx to wehe? Anē.

17 Hãmri nhũm kãm:

—Tk. Ra Tìrtũm kot nhỹrmã mē atĩr tũm nē apa kaxyw mēmoj tã mē amã karō nhũm ate mar mex kênã kot ka kêt ri axte ja hã ixkukja. Nã Tìrtũmja mex o mex jakamã kot kaj amã kuri atĩr tũm nē apa hprãm hã kot kaj kapēr kôt amnhĩ nhĩpêx no ri apa. Anē.

18 Hãmri nhũm kãm:

—No nhỹ kapēr kôt kot paj amnhĩ nhĩpêx o ri ixpa wehe? Anē.

Hãmri nhũm kãm:

—Na pre mē amã mēmoj tã karō ho:

Kêr ka mē axpēn par kêt nē.

Nē nhãm mē hprō ho amnhĩkati hkêt nē.

Nē mē kēp axàhkĩnh kêt nē.

Nē tanhmã mē ho axêx to hkêt nē.

19 Nē anhipeêxã mē akatorxã wa hã apijaãm nē wa ho mex pē wa kutã anojarêt o ri apa.

Nē amã akwỳjê hã ma ho te ka amã amnhĩ tã ma pyràk o mē hipêx. Jao tãm mē hipêx o ri apa.

E kot kaj amã nhỹrmã Tìrtũm kuri atĩr tũm nē apa hprãm hã kêr ka ã amnhĩ nhĩpêx anhiy o ri apa. Anē.

20 Hãmri nhũm kuma nē kãm:

—Ku nhũm. Ra ã ixte amnhĩ nhĩpêx anhiy o ri ixpa kênã. Nom te kormã ixtĩr tũm nē ixpa kaxyw ixte tãm kêt pyràk. Kwa axte inhmã mēmoj jarē nã? Anē.

21 Hãmri nhũm kãm:

—Nã kormã mēmoj pyxi nē arĩk.

Na ka amã akukrêx rax prãm tỳx o amã Tìrtũm prãm jakre. Jakamã ma akupỳm tē nē akukrêx rax o wēnê hpa nē hpãnhã kàxpore jamỳ nē ma mē kēp amrakati xwỳnhjê mã òr pa. Hãmri nē rĩ akupỳn ixwỳr tē nē rĩ ixkôt apa ho apa. Anē.

22 Hãmri nhũm kuma nē tee ri amnhĩ kukamã hamaxpēr. Kãm hikukrêx rax japê nē kãm kamã ìhkra karo hprãm kêt nē. Hãmri nē tee ri Jejus kot ã kãm hã karō anhiyja ma nhũm ja kēp omnuj nē nhũm ma akupỳm htēm kurê kumrêx. 23 Hãmri nhũm Jejus tee ri omu nē mē inhmã:

—Hêxta waa nē. Kojã mē hikukrêx rũnh xwỳnhjaja ohtô nē kãm mē hikukrêx japê xãj Tìrtũm mē wa ixri htĩr tũm nē pa ho pa hkêt nē. Wa ixte amnhĩ nhĩpêxja mē kēp hihtỳx. 24 Mē kãm hikukrêx

rũnh mã ĩhkra karo hprãm kêr rãhã tee ri kãm Tĩrtũm kôt amnhĩ nhĩpêx prãm kaprý. Te ho mēhō kot menh kagō hã hkre nē kãm kagō katōk prãm kêr rãhã kãm guhkrax kãm àr prãm kaprýta pyræk. Anē.

Nhũm pre ã Jejus mē inhmã kapêr anē. ²⁵ Hãmri pa mē kuma nē tee ri amnhĩ kukamã ijamaxpêr nē kãm:

—Kwa mē ixpiitã mē inhmã mē ixkukrêx japê kênã. Jakamã xà kot paj mē ixpiitã nhỹrmã war ari ixtĩr tũm nē ixpa ho ixpa hkêt nē nà? Anē.

²⁶ Hãmri nhũm mē inhmã:

—Nà kot kaj mē amnhĩ krã hkôt mē amã mē akukrêx japêja mã anhũrer kêr nē. ãm Tĩrtũm pix na hte ja kaxyw tanhmã mē akrã hto ka mē amã akukrêx japê hkêt nē. Jao ra mē apê Tĩrtũm mē wa ixri atĩr tũm nē mē apa ho mē apa mã xwýnh. Anē.

²⁷ Hãmri nhũm Simãw Pêtre kãm:

—Kwa no we mē pajaja Pahihti? Na pa prem agryk ã mēmoj piitã hkaga hpa nē akôt ixpa ho ixpa. Jakamã kot paj mē nhỹrmã war ari ixtĩr tũm nē ixpa ho ixpa nà? Anē.

²⁸ Hãmri nhũm kuma nē mē ixpiitã mē inhmã:

—Tý. Kot paj nhỹrmã mēmoj piitã ho nyw pa hãmri nē ixte mē ho amnhĩptãr o ixkrĩ xà maati kamã nhỹ nē mē piitã mē kot tanhmã amnhĩ nhĩpêx to hã mē omunh xà hkôt tanhmã mē harênh to. Tã mē kajaja mē ate ixkôt apa ho apa xwýnhjaja kot kaj mē inhmã Ijaew kot amnhĩ nhĩpêx ã mē omunh xà hkôt ahpýnhã tanhmã inhmã mē harênh to. Mē mex ã mē harê rý mē mex kêr ã mē harê. Kot kaj mē ã inhmã mē harênh anē. ãm hãmri na pa mē amã ixkapêr anē.

²⁹—Nē ka mē atō inhmã tanhmã amnhĩ nhĩpêx to ho apa kaxyw akwýjê re nē ma inhmã mēmoj to anhýr o ri apa. Tanhmãn anhōrkwý rý atō rý atōx re. Rý aprō nē akrajê

re. Rý akatorxà mē anhĩpêxà war are. Rý akukrêx piitã rer pa hãmri nē ma mē piitã mē kãm ixkapêr o mē ahkre ho ri mē hkôt apa. Hã kot paj mē apumu nē mē ato mex rax nē. Hãmri ka mē ma mē hkôt apa nē mē kãm ixkapêr jarênh o apa nhũm mē kot mē amar xwýnh kwýjaja mē ama nē kãm mē akĩnh nē. Nē ra mē ate akwýjê rer par tã mē tãmjaja te mē apê mē hkra rý mē htō rý mē htōx pyræk o mē anhĩpêx nē mē ato mex o pa. Hãmri ka mē nhỹrmã ty nē ma Tĩrtũm mē wa inhō krĩ hwýr api nē wa ixkuri amex kumrêx nē atĩr tũm nē apa ho apa. ³⁰ Nom kwa kêr ka mē amnhĩ tã ja ma nē amnhĩ to rũnh xwýnh ã amnhĩ kamnhĩx kêr nē. Jar mē kot amnhĩ to rũnh ã amnhĩ to jarkrar xwýnhjaja koja mē nhỹrmã amnhĩ to hkryre hã amnhĩ pumu. No jar mē kot amnhĩ to hkryre xwýnh ã amnhĩ jarênh xwýnhjaja koja mē nhỹrmã amnhĩ to rũnh ã amnhĩ pumu. Anē.

20

Jejus kot nhỹrmã hkrajê ho mex ã harênh

Rômãn 9.14-16

¹ Nhũm Jejus arĩ mē ixte hkôt ixpa ho ixpa xwýnhjê mã awjarê nē mē inhmã:

—Nē kot paj nhỹrmã tanhmã mē ato mex to. Te ixpê hpur nhō dõn kot amnhĩ nhĩpêx pyræk o mē anhĩpêx. Koja pur nhō dõnja ihpur kãm mēmo xō ra hkã hpa nhũm omu hãmri nē kaxyw mē àpênh xwýnhjê japêr kaxyw ma gãm tē. Nē gáp xa nē mē kãm akir nhũm mē hã akuprō. ² Hãmri nhũm mē kãm: “E. Kot kaj mē jarãhã inhmã ixpur kãm apê. Kot kaj mē inhmã axápênh o amýkry pa hpãnhã mē kot apkati pixi hã mē àpênh pãnhã mē kãm amnhĩrer xaja kôt mē amã amnhĩre.” Anē hãmri nhũm mē kuma nē kãm: “Tõe. Nà kot paj mē amã apê.” Anē nhũm pur wýr mē

kurê nhùm mē ma kām àpēnh mā mra.

³—Tā nhùm arī kỳx mā myt tē nhùm pur nhō dōn akupỹm gām tē nhùm mē hkwȳja arī kuhê. ⁴Nhùm tee ri mē omu nē mē kām: “Kwa mon ka mē axàpēnh kêt nē arī akuhê? E. Mē ma wamtajê hkôt mra nē inhmā apê pa hpānhā mē amā amnhīrer mex nē.” Anē. ⁵Hāmri nhùm mē kuma nē ma mē hkôt mra. Tā nhùm ra myt kaxkwa nhīpōk ri ajēt nhùm hpur nhō dōnja mā hkwȳjê ho anē nē. Kê axte mē hkôt jajê jano nhùm mē ma mē hkôt mra. Tā nhùm ra myt ahpanh grire nhùm ma akupỹm kêwe gām tē nē mā mē ho anē nē axte mē hkôt jajê rē.

⁶—Tā nhùm ra myt grire nhùm ma akupỹm kêwe gām tē nē jajê pumu nhùm kê wem arī gáp kuhê. Hāmri nhùm tee ri mē omu nē mē kām: “Kwa mon ka mē axàpēnh kêt nē atỳx gáp akuhê ho akuhê?” Anē. ⁷Hāmri nhùm mē kām: “Nà mēhō kot mē inhmā mē ixàpēnh ā karōre hā.” Anē. Hāmri nhùm mē kām: “Tōe. Mē ma mē hkôt xpur wỳr mra nē inhmā mǎn apê.” Anē hāmri nhùm mē kuma nē ma hkwȳjê hkôt mra.

⁸—Tā nhùm ra kamāt. Hāmri nhùm hpur nhō dōnja kām àpēnh xwỳnhjê krāhtũm wỳr tē nē kām: “E. Ma mē hwỳr tē nē mē kām anē kê mē àpēnh kaga nē man akôt mra ka inhmā mē kām amnhīre. Nom kêr ka hapu hā mē mōr xwỳnhjê kumrēx mā amnhīre nē wam mē mōr xwỳnhjê ho hapu nē mē kām amnhīre.” Anē. Hāmri nhùm kām: “Tōe. Nà kot paj mē ho anē.” Anē. ⁹Hāmri nē ā mē kām amnhīrer anē. Hapu hā mē mrar xwỳnhjê kumrēx mā amnhīre. Te mē kot kwỳhtā àpēnh o amỳkry pyrāk o nhùm hpānhā mē kām amnhīre. ¹⁰Hāmri nhùm wam mē mrar xwỳnhjaja ja hā mē omu nē hkīnh nē. Hāmri nē htỳx hamaxpēr o: “Nà kot paj xep kàxpore jamỳnh rax o mē hakre. Ixàpēnh rax o ixte

mē hakrenh kēnā.” Anhỳr tā no nhùm mē piitā mē kām amnhīrer o axpēn pyrāk. Ra pur nhō dōn kot kām hā karō xà hkôt. ¹¹Hāmri nhùm mē hamỳ nē tee ri hkre kamā omu nē we ra hpur nhō dōnja kamā gryk nē. ¹²Hāmri nē hwỳr mra nē kām: “Kwa jajaja na mē amā àpēnh o ore pyxi nē. No kêt mē pajaja na pa mē kwỳhtā ixàpēnh rax o kamāt. Arīgro htỳx kām ixàpēnh o ixām o ixtā kamāt tā ka pēr ām mē inhmā amnhīrer o axpēn pyrāk. Kwa na ka mē ixtomnuj nē.” Anē. ¹³Hāmri nhùm mē kuma nē mē kām: “Tk. Nà na pa mē atomnuj kêt nē. Na pa kwỳhtā tanhmā mē amā amnhīrer to xà jarē ka mē inhma nhùm ja mē amā mex nē ka mē ma hwỳr axàpēnh mā mra. ¹⁴Kwa mē akàxpore jamỳ nē ma mra. Ām pa inhmā hprām xà hkôt na pa ā mē amā amnhīrer anē. ¹⁵Ixkàxpore jakamā kot paj nhām inhmā mēhō mā ōr prām xà hkôt kām kugō. Tā ka mē ā mē hā ixkamā agryk anē. E mē akàxporeja mỳ nē ma mra.” Anē. Nhùm ā hpur nhō dōn mē kām kapēr anē. Ā mē ujarēnh kot anhỳr. Anē.

¹⁶Nhùm pre ā Jejus mē inhmā ujarēnh anē nē mē inhmā:

—Ja pyrā nē wam mē ate ixkôt amnhī xunhwỳr xwỳnhjaja nē hapu hā mē kot kormā ixkôt amnhī xunhwỳr mā xwỳnhjaja kot paj nhỹrmā mē apiitā mē ato mex kumrēx o axpēn pyrāk. Anē.

Jejus kot htyk kukamā amnhī jarēnh

Makre 10.32-34; Rukre 18.31-34

¹⁷Tā nhùm Jejus mē inhmā anē pa mē ixrohā ma Jerujarē hwỳr mō. Mē ohtōjê hkôt mō. Hāmri nhùm Jejus mē xipê 12jê mā anē nē mē ixkwỳjê hkāx ā mē inhmā kapēr kaxyw ahte hapu hā mē ixto mō. ¹⁸Hāmri nē mē inhmā amnhī kukamā tanhmā amnhī jarēnh to nē mē inhmā:

—E na pu mē ra Jerujarē hwÿr mō. Kamā koja mē pahkwÿjaja inhîpêx kati nē. Koja mē patre krähtümjê mē Mojes kapêr o mē ahkre xwÿnhjê nhîhkram ijaxà nhÿm mē kot ixpîr kaxyw ixtâ amÿnê. ¹⁹ Koja mē kām ixkurê xwÿnhjaja ixpynê nē Rôm nhō xwÿnhjê nhō pôristijê hwÿr ixto tē nē mē kām tanhmā ixto hêx to. Hāmri nhÿm mē kuma nē mē mar xà hkôt tanhmā inhîpêx to. Nhÿm mē hkwÿjaja ixtâ hpêr o axkê nē ixtâ akunha nhÿm mē hkwÿjaja ixto kapêr punuj nē tanhmā ijaarÿ hto nē ixtak. Hāmri nē ma ixto tē nē pî kahpa hâ inhō nē ixpî. Á koja mē inhîpêx anê. Nom kot paj ixtyk ã ixtâ apkati axkrunêpxi nhÿm Tîrtüm akupÿm ixto ixtîr. Anê.

Xiakre mē Juāw wa katorxà kot wa ho Jesus wÿr ã harênh

Makre 10.35-45; määnen Römân 12.3, 12.10, 12.16; Epes 4.2; Piripos 2.3-8; Xiakre 4.6; Wam Pêtre 5.3

²⁰ Tã nhÿm Jepetew prōja amnhî kôt Jesus wÿr hkra Xiakre mē Juāwja wa o tē. Kot wa ho Jesus wÿr kaxyw hwÿr wa o tē. Mē ixpyrà nē wa kot Jesus kôt pa ho pa xwÿnhjê hō na pre wa nhÿm wa katorxàja Jesus wÿr wa o tē. Hāmri nē kutã hkônkrã ho tēm nē nhÿ ²¹ nhÿm kām:

—Pa mo na? Anê.

Hāmri nhÿm kām:

—Ma ixkrata na pa ixte wa ho awÿr kaxyw awÿr wa o tē. Xê kot kaj nhÿrmã ate mē piitã mē ho amnhîptâr kaxyw nhÿ nhÿm ixkrata wa akutã anhîjê nē wa kêp anhō kôwenatō nē akutã anhîjê nē wa ato nhÿ. Ja prãm xà na pa ã wa ho awÿr anê. Anê.

²² Hāmri nhÿm kuma nē Xiakre mē Juāw wa omu nē wa kām:

—Nà na war akatorxàja htÿx ã war ato ixwÿr anê. Koja mē tokyx ixpî kot paj amnhî xà htÿx kām ijamak kām ty. Tã xà koja mē ixpyrà nē ã war anhîpêx anê ka wa ixpyrà

nē amnhî xà htÿx kamã ajamak rax kām ty nà? Anê.

Hāmri nhÿm wa kām:

—Tÿ. Nà kot pa wa ijaxwÿja anê nē apyrã nē amnhî xà htÿx kām ijamak kām ty. Anê.

²³ Hāmri nhÿm wa kām:

—Nà ãm hāmri na ka wa amnhî jarê. War ate ixpyrà nē ixkôt amnhî xà htÿx kām ajamak kām atyk mã kênã. Tã nom war akatorxà kot war ato ixwÿrta ã kot paj tanhmã war amã nē hkêr nē. Kêr inhō Papaj tãm koja ixkaxyw mēhō japêr nhÿm inhîkô hâ nhÿ. No pa kot paj amnhî kaxyw mēhō jarênh kêt nê.

Anhÿr o wa kām kapêr. ²⁴ Hāmri pa mē ixte wa uräk nē Jesus kôt ixpa ho ixpa xwÿnhjaja wa katorxà kot ã wa ho Jesus wÿr anhÿrja ã kuma nē wa kamã inhgryk nē. Hāmri nē axpên mã ixkapêr o:

—Tk. Nà koja Juāw mē Xiakre wa nhÿrmã kêp ò kôwenatō nē mē pahto amnhîptâr kêt kumrêx. Anê.

²⁵ Nhÿm Jesus mē inhma nē amnhî wÿr mē ixpiitã mē inhmã hpa ho apê nē mē inhmã:

—E mē amnê ixwÿr axkamê pa mē amã awjarê mân. Anê.

Hāmri pa mē hwÿr axkamê nhÿm mē inhmã:

—E mē inhma. Na hte Ijaew kêt xwÿnhjê nhō pahijaja ã amnhî nhîpêx anhÿr o ri pa nē amarî hkrî xà kamã hkrî ho hkrî. ãhpumunh tÿx jakamã amarî ixkre hkre jakry kamã hkrî ho hkrî nē kām mē ãpênh xwÿnhjê pix mã mēmo mē ãpênh ã karô. Na htem ã amnhî nhîpêx anhÿr o hkrî. Nē mē kot mex ã harênh kaxyw tanhmã mē ho mex to ho pa. ²⁶⁻²⁷ Tã no mē kajaja. Kêr ka mē ho mē uräk kêt nê. ãm te amarî ri mē apa pyrãk o axpên nhîpêx o ri apa. Nē te mē apê mē kām axãpênh xwÿnh pyrãk o amnhî nhîpêx o ri mē hkôt apa. No kêr ka mē ho amnhîptâr mã ajamaxpêr o ri apa hkêr nê. ²⁸ Mē ate mēmoj tã pa ixkutã anojarêr ho apa kaxyw

na pa pre mẽ awỳr ixwryk kêt nê. Ixte amarĩ mêmoj to mẽ kamjaja mẽ akutã inhnojarêt o ixpa kaxyw na pa pre mẽ awỳr wry. Nê mẽ ate ixkôt amnhĩ xunhwỳr xwỳnhjê nê ixytyk kaxyw na pa pre wry. Anê.

Jejus kot no hkre xwỳnh wa ho mex ã harênh

Matêwre 9.27-31; Makre 10.46-52; Rukre 18.35-43

²⁹ Tã pa mẽ Jejus kôt kormã Jerujarê hwỳr ra Jeriko htêp o mō. Hãmri nê kurũm ixkaton mō nhũm mẽ ohtô nê mẽ ixkôt mra. ³⁰ Nhũm pry nhĩhkjê hã no hkre xwỳnh wa ahwỳr o hkrĩ xwỳnhja wa amnhĩ wỳr mẽ inhmrar mar o nhỹ. Mẽ ohtô nê Jejus kôt mẽ mrar xwỳnhjê mrar ma nê mẽ kãm:

—Kwa mo na? Mêmoj wỳr na ka mẽ axohtô nê mra? Anê.

Hãmri nhũm mẽ wa kãm:

—Nã Jejus pê Najare nhõ xwỳnhhta kôt na pa mẽ mra. Anê.

Hãmri nhũm wa mẽ kuma hãmri nê kax pê Jejus mã kapêr nê kãm:

—Pa Pahihti? E apê mẽ inhõ Pahihti mex na ka. Te apê amnepêm anhĩgêt pahihti Tawita pyrãk. Jakamã kwa wa ixkamã axukapri nê akupỹm wa ixto mex. Anê.

³¹ Hãmri nhũm Jejus kôt mẽ mōr xwỳnhjaja wa kuma nê wa kãm:

—Tk. Kwa war akapêr kêt nê nhỹ nã. Anê.

Tã no nhũm wa ãm mẽ kuma nê xatã amnhĩ to kuwỳ. Kax pê amnhĩ to kuwỳ. ³² Hãmri nhũm Jejus wa kuma nê xa nê wa omu nê wa kãm:

—Pa mo na? Tanhmã kot pa wa ato? Anê.

³³ Hãmri nhũm wa kãm:

—Nã akupỹm wa inhmã wa ixrit mex prãm. Anê.

³⁴ Hãmri nhũm kãm wa hkapri nê wa no htok nhũm wa akupỹm rit mex kurê kumrêx. Hãmri nê rit mex ã amnhĩ pumu nê hkĩnh tyx nê ma Jejus kôt hkwyjê hkôt mō.

21

Jejus kot Jerujarê hwỳr ãr ã harênh

Makre 11.1-11; Rukre 19.28-40; Juãw 12.12-19

¹ Tã nhũm Jejus kormã Jerujarê hwỳr kormã mō. Pa mẽ hkôt mō nê ra Petake hwỳr ixãhtêp o mō. Hixêt pê Oriwêhti kahti ri na pre krĩja xa. Jakamã pa mẽ wa hwỳr ixãhtêp o mō nhũm Jejus mẽ ixte hkôt ixpa ho ixpa xwỳnhjê wa ho axkrut nê amnhĩ kukamã wa kumê. ² Nê wa kãm:

—E wa ma krĩ mũj wỳr mẽ ixkukamã wa tẽ. Nê wa hwỳr axã nê nhỹri jumênre mẽ hkra wa kãm ê nê wa ãm xwỳnh wa omu hãmri nê kãm ê xã hpôt nê man akupỹn amnê hamê wa o tẽ. ³ Koja mēhõ ja hã war apumu nê hã tanhmã war amã kapêr to ka wa kãm ã ijarênh anê nê kãm: “Nã mẽ panhõ Pahihti na hã karõ pa wa hwỳr tẽ.” Anhỹr o wa kãm ijarê. Hãmri nhũm war ama nê war amã òr kurê kumrêx. E wa ma hwỳr tẽ. Anê.

⁴ Tirtũm kapêr ã kagã htũm ra kot ja kukamã harênh. Na pre ra Tirtũm nhỹ hã kapêr xwỳnhjê hõ ja jarê nê hã kagã ho:

⁵ Pa Jerujarê nhõ xwỳnhjaja. Kwa mẽ tee ri amnhĩ kukamã ajamaxpêr ho amã ma hkêt nê. Ota mẽ anhõ pahi nywta ra jumênre hã nhỹ nê mẽ awỳr hpõx o tẽ. Te kot amnhĩ to grire xwỳnh pyrãk o amnhĩ nhĩpêx nê tẽ.

⁶ Anhỹr o kot hkukamã harênh jakamã nhũm Jejus amnhĩ kukamã ja wa kumê hãmri nhũm wa ma hwỳr htêm kurê kumrêx. ⁷ Nê krĩta wỳr pøj nhũm Jejus kot wa kãm harênh xã hkôt nhũm wa jumênreta pumu. Hãmri nê hamê wa kãm ê xã hpôt nê ma Jejus wỳr wa o tẽ. Hãmri nê kaxyw amnhĩ xê hkwy hkwrỹ nê kãm ho jumênre nywta kô kahty. Nê kãm ho htỹx nê o xa nhũm Jejus hã nhỹ nê hã mō. ⁸ Kormã Jerujarê

hwÿr hixêť ã àpir o mō. Nhũm mẽ kot omunh o kuhê xwÿnhjaja hkĩnh nẽ ma hkukamã pry ho mex kaxyw amnhĩ xê hkwÿptyr ho mō. Nẽ pō hkwyjakà nẽ utyr o mō. ⁹Nhũm mẽ hkwyjaja Jejus kukamã mra nhũm mẽ hkwyjaja hapu hã hkôt mra. Nẽ piitã kax pê Tirtũm mex o mex ã harênh o hkôt mō nẽ harênh o:
Ota Tirtũm kot mẽ pahwÿr mẽnh

xwÿnhhta ra pōj. ãm hãmri na mẽ pahwÿr wrÿ. Ja na mex kumrêx. Kêp mẽ panhō Pahihti mex na. ãm hãmri na pre Tirtũm mẽ pahwÿr kumê. Tirtũm mex kumrêx. ãm mex o mex.

Anhÿr o Jejus kôt Jerujarê hwÿr harênh o mō. Kot mẽ ho amnhĩptâr kurê kumrêx ã hkamnhĩx jakamã hkĩnh nẽ hkôt ã harênh anhÿr o mō. ¹⁰Hãmri nhũm krĩ nhō xwÿnhjaja tee ri mẽ kuma nẽ axpên mã:

—Kwa mẽhō na we hpōx o mō nhũm mẽ ã hkôt harênh anhÿr o mō? Anẽ.

¹¹Hãmri nhũm Jejus kôt mẽ mrar xwÿnhjaja mẽ kuma nẽ mẽ kãm:

—Nã Tirtũm nhÿ hã kapêr jarênh xwÿnh pê Jejus na. Kêp Garirej kamã krĩ pê Najare nhō xwÿnhhta na. Anẽ.

Jejus kot Tirtũm nhōrkwy hwÿr àr ã harênh

Makre 11.15-19; Rukre 19.45-48; Juãw 2.13-22

¹²⁻¹³Tã hãmri nhũm Jejus Jerujarê wÿr axà nẽ jumênre rũm wrÿ nẽ ma Tirtũm mã amnhĩ jarênh xà hã ixkre hwÿr tẽ nẽ axà. Hãmri nẽ tee ri mẽ kot tanhmã ixkre kamã amnhĩ nhĩpêx to hã mẽ omunh o xa. Nhũm mẽ axtem nẽ môx nẽ ôwêhti nẽ tuuti ho wênê ho kuhê. Mẽ kot haprôr nẽ Tirtũm mã amnhĩ jarênh kaxyw kãm hpar nẽ ôr kaxyw mẽ kãm ho wênê ho kuhê. Nom axtem nẽ mẽ kãm hã ohtô rax kãm mẽ kãm ho wênê. Hãmri nhũm Jejus mẽ hwÿr axà nẽ tee ri mẽ omu nhũm ja kêp omnuj tÿx kumrêx. Hãmri nhũm mẽ hwÿr tẽ nẽ mẽ kot

kaxpore ho pinhpanh xwÿnhjê pê mẽ ô mẽsti rênh pa. Nẽ mẽ kot tuuti ho wênê xwÿnhjê pê hkrĩ xà hkujate nẽ rênh pa. Hãmri nẽ mẽ kãm:

—Tk. Kwa Tirtũm kapêr ã kagà htũm kot ixkreja jarênh kot:

Inhōrkwyja ãm mẽ ate inhmã amnhĩ jarênh xà hã ixkre pix kaxyw na.

Anhÿr o kot harênh tã ka mẽ axtem nẽ kamã ã amnhĩ nhĩpêx anẽ. E kwa mẽ ajapôx tokyx anẽ. Anẽ.

Hãmri nẽ mẽ kator pa nhũm mẽ ma hapêx. ¹⁴Hãmri nhũm mẽ no hkre xwÿnhjaja nẽ mẽ hyk o mẽ pa xwÿnhjaja mra nẽ agjê nẽ Jejus kutã kuhê nhũm mẽ omu nẽ akupÿm mẽ ho mex. ¹⁵⁻¹⁶Hãmri nhũm mẽhprĩ hkwyjaja hwÿr mra nẽ kuri kãm mex o mex ã gre nẽ kãm grer o:

Amex kumrêx Pahihti.

Tirtũm na pre mẽ ixwÿr amẽ.

Kot kaj te anhÿgêt Tawi pyrã nẽ mẽ ixta amnhĩptâr o apa.

Anhÿr o kãm grer o kuhê. Hãmri nhũm patre krãhtũm mẽ Tirtũm kapêr tũm o mẽ ahkre ho mẽ pa xwÿnhjaja tee ri ã mẽ grer anhÿr ã mẽ kuma. Nẽ tee ri Jejus kot mẽ no hkre xwÿnhjê mẽ mẽ hyk o mẽ pa xwÿnhjê ho mex ã omunh o kuhê nẽ gryk nẽ Jejus wÿr tẽ nẽ kãm:

—Kwa na mẽhprĩjaja mẽ grer kãm ã ajarênh anẽ ka mẽ mar kêt nẽ? Mẽ grerja mexti hã. Anẽ.

Hãmri nhũm mẽ kãm:

—Tÿ ixte mẽ mar kênã. Tirtũm kãm hprãm xà hkôt na mẽ ã inhmã inhmex o inhmex ã ixtã grer anẽ. Tirtũm kapêr ã kagà htũm kot ã mẽ hkukamã harênh kot anhÿr. Mẽ harênh kot:

Koja mẽhprĩjaja Pahihti mã mex o mex ã grer o kuhê.

Anhÿr o kot mẽ hkukamã harênh kênã. Tã mãn ka mẽ kormã kamã harênh kêt jakamã na ka mẽ ja jarênh mar kêt nẽ. Kwâr mẽ mãmri ã inhmex ã grer anẽ.

17 Anhÿr o mē kām kapēr hāmri nē mē inhmā anē pa mē ixkreta rūm ijapōj nē ma akupÿm Petān wÿr mra nē kamā amnhūm hikra.

Jejus kot mēmo hpār mā kapēr ā harēnh

Makre 11.12-14; mǎānēn Xiakre 1.6

18 Tā nhūm kwÿhtā nhūm Jejus kànhmā nhÿ nē mē inhmā anē pa mē ixrohā ma akupÿm Jerujarē hwÿr mra. Hāmri nē kormā mō nhūm Jejus pry kahti ri ra kām prām nē. 19 Hāmri nē mēmo pī pē fikēhti jarēnhja pumu nē kot ô hkwy rênh nē hkrēr kaxyw hwÿr māt. Hāmri nē tee ri ô japēr nhūm ô hkēt nē ām hô hpix harir. Hāmri nhūm tee ri omu nē kām:

—E kot kaj axte axô hkēt kumrēx.

Anhÿrja o nhūm grā par kurē kumrēx. 20 Hāmri pa mē ixte hkôt ixpa ho ixpa xwÿnhjaja omu nē Jejus mā:

—Kokÿÿ. Kwa tanhmā na we amnhī nhīpēx to nē grā kurē kumrēx? Anē.

21 Nhūm mē inhmā:

—Nā kot kaj mē ixpyrā nē fikēhti kot tanhmā amnhī nhīpēx to kaxyw Tirtūm mā ajamaxpēr tÿx nē nhūm amā hprām xā hkôt amā tanhmā hipēx to. Nom kēr ka mē ajamaxpēr kati ho tee ri hkukamā ajamaxpēr kēt nē. Ām kaxyw Tirtūm kôt ajamaxpēr tÿx nē nhūm mē amā tanhmā mēmoj nhīpēx to. Ām hāmri na pa mē amā ja jarē. No ām ja pix kēt. Kot kaj mē mǎānēn hixēt mÿj mā akapēr nē kām: “E anhÿr xāta rūm akato nē ma tē nē gō rax kām mrō.” Anē nhūm amar xā hkôt ā amnhī nhīpēx anē.

22 —Nē kot kaj mē mēmoj tā Tirtūm wÿ nē kaxyw kām ajamaxpēr tÿx kām hā awÿ nhūm amā mēmoj prām xwÿnhnta gō. Anē.

Mēhō nhÿ hā Jejus kot mē ahkre hā harēnh

Makre 11.27-33; Rukre 20.1-8

23 Nhūm arīgro hō hā nhūm Jejus kēwe axte Tirtūm mā amnhī jarēnh xā hā ixkreja wÿr axā nē kamā mē ahkre ho nhÿ. Mē kām tanhmā mē kot amnhī nhīpēx to nē nhÿrmā Tirtūm mē wa kuri htir tūm nē pa kaxyw tanhmā mē kām kapēr to ho nhÿ. Hāmri nhūm Ijaew krāhtūmjē mē mē ô patre krāhtūmjaja hāmri hwÿr mra nē hēx rom mēmoj tā hkukja nē kām:

—Kwa mē inhmā amnhī jarē. Mēhō nhÿ hā na ka hte ā amnhī nhīpēx anhÿr o apa? Na ka hte akupÿm mē ho mex o apa nē tanhmā mē ahkre hto ho apa. Xā amnhī krā hkôt na ka hte ā amnhī nhīpēx anē nā? Anē.

24 Hāmri nhūm mē kām:

—Nā kot pa ixkumrēx mēmoj tā mē akukja. Ka mē inhma nē tanhmā inhmā harēnh to pa rī kormā mē amā amnhī jarē. 25-26 Finat Juāw Paxis ā kot paj mē akukja. Mēhō nhÿ hā na pre hte mē hkrā kumrār o pa? Xā amnhī krā hkôt nā? Xā Tirtūm nhÿ hā? E mē atō inhmā ja jarē. Anē.

Hāmri nhūm mē kuma nē tee ri kot tanhmā kutā kām harēnh to hkukamā hamaxpēr pē axpēn pumunh o kuhē nē axpēn mā:

—Kwa tanhmā kot puj wem kām ja jarēnh to? Or mē kot mar o kuhē xwÿnhjaja na htem kēp Tirtūm nhÿ hā kapēr jarēnh xwÿnh ā harē. Tā kot puj mē kām kot amnhī krā hkôt kot mē hkrā kumrār ā harē nhūm mē tee ri mē pama nē mē pakamā gryk tÿx nē. Nē mē paxēx rom ā mē pahte kām pakapēr anhÿr ā mē pahpumu nē kēn o mē pahtak o mē panhūmex. No kot puj mē kām Tirtūm nhÿ hā kot mē hkrā kumrār ā harē hāmri nhūm mē pamā: “Kwa ā kot anhÿr kēnā na ka prem kapēr ma nē hkôt ajamaxpēr kēt nē?” Anē. Jakamā kot puj mē ja pymaj tanhmā kām harēnh to hkēt nē. Kot puj mē ām kām aa te mē pahte ja jarēnh mar kēt pyrāk o harē. Anē.

Mê kot tanhmã Jejus mã nê nhũm kot ta pãnhã tanhmã mẽ kãm nê pymaj nhũm mẽ tee ri kãm tanhmã nê hprãm kaprý o kuhê. ²⁷ Hãmri nê kãm:

—Konên. Mẽ ixte mēhō nhỹ hã kapēr o pa hã omunhre hã. Anê.

Hãmri nhũm mẽ kuma nê mẽ kãm:

—Tk. Tõe kot pa xep ijaxwýja mẽ amã tanhmã amnhĩ jarēnh to hkēt nê. Ijaxwýja ixte mēhō nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anê.

Mēhō my mẽ hkra wa pijakrut ã wa harēnh

Matêwre 7.21-23; Rukre 7.29-30

²⁸ Hãmri nhũm Jejus axte Ijaew krãhtũmjê mẽ mẽ õ patre krãhtũmjê mã kapēr nê mẽmoj tã kuxi nê tanhmã mẽ kãm ujarēnh to nê mẽ kãm:

—E pa mẽ amã awjarē ka mẽ inhma. Koja mēhō hkra my hamêxkrut. Hãmri nê hkra kot waja mã tanhmã kapēr to nê kãm: “E kēr ka jarãhã ma tẽ nê inhmã pur kãm apê.” Anê. ²⁹ Hãmri nhũm kuma nê pur mã htēm kaga nê hitõt nê. Tãã no ãm hã ahtũmre nê tanhmã hamaxpēr to hãmri nê ma hwýr tẽ nê kamã àpēnh o xa. ³⁰ Hãmri nhũm wa hipêêxãja hpãnhã hkra kot hapu hwýr tẽ nê mã kãm kapēr anê nê kãm: “E kēr ka ajaxwýja atõ hkõt tẽ nê wa inhmã apê.” Anê nhũm kuma nê kãm: “Tõe. Nà kot paj ma tẽ.” Anhỹr tã no ãm hõta kĩnhã htēm kêt nê.

³¹ —Jakamã e. Nhỹ hkra na pre hipêêxã kapēr ma nê hkõt amnhĩ nhĩpêx nê kapēr nhĩrõp ãm kêt nê? Xà kot waja nà? Xà kot haputa? E mẽ atõ tanhmã inhmã wa harēnh to. Anê.

Hãmri nhũm mẽ kuma nê kãm:

—Nà kot wata. Kot wata na hitõt tã tanhmã hamaxpēr to nê ma tẽ nê kãm apê. Anê.

Hãmri nhũm mẽ kãm:

—Tý ãm hãmri na ka harē. No mẽ kajaja te mẽ ate hkra kot haputa

kot amnhĩ nhĩpêx pyrãk. Mẽ ate Tĩrtũm kapēr kõt amnhĩ nhĩpêx o apa hã amnhĩ jarēnh tã hkwým ri amnhĩ nhĩpêx o apa. Te mẽ ate kot hapu kot hipêêxã mã àpēnh ã amnhĩ jarēnh tã kãm àpēnh kêeta pyrãk. No kêt mẽ kot amnhĩ tomnuj o mẽ pa xwýnh kwýjaja na mẽ arom Tĩrtũm kapēr ma nê hkõt amnhĩ nhĩpêx. Jao ra tãm amnhĩ nhĩpêx o pa. Jakamã mẽ arom ma kaxkwa hwýr pa kaxyw ra tãm nê. ãm hãmri na pa mẽ amã ixkapēr. ³² Na ka mẽ finat Juãw Paxis ã ixkukja. Juãw Paxisja na pre hte mẽ ate tãm amnhĩ nhĩpêx ã mẽ amã karõ ho pa. Tã no ka mẽ ãm ama nê ãm ama nê aa kapēr kõt amnhĩ nhĩpêx kêt nê. Nom mẽ kot amnhĩ tomnuj o mẽ pa xwýnh kwýjaja mẽ arom kuma nê Tĩrtũm kõt amnhĩ nhĩpêx. Ka mẽ ja hã mẽ omu nê ãm mẽ omu nê mẽ urãk nê ã amnhĩ nhĩpêx anhỹr kêt nê. Anê.

Mẽ àpēnh punu xwýnhjê jarēnh

Makre 12.1-12; Rukre 20.9-18

³³ Nhũm Jejus arĩ Ijaew krãhtũmjê mẽ mẽ õ patre krãhtũmjê mã kapēr. Nê mẽ kot tanhmã hipêx to hkukamã mẽ kãm tanhmã amnhĩ jarēnh to. No ãm amnhĩ tã kuxi nê mẽ kãm awjarē nê mẽ kãm:

—Koja mēhō mẽ kot kãm pur kãm àpēnh kaxyw hkwyjê mã karõ nhũm mẽ ma hwýr mra nê kamã mẽmo hy hkre nê hkre pa. Hãmri nhũm hpur nhõ dõn nhỹhým no-jarêt nê kãm mẽ àpēnh xwýnhjê mã tanhmã hpur jarēnh to nê mẽ kãm: “E or ixpur nõ. Kê kamã mẽmoj kà hpa ka mẽ mãmri kamã axujamýnh pa nê ho axkjê. Nê ixkutêp inhmã inhõ jaxwý nê mãmri anhõ tanhmã ho hprãm xã hkõt tanhmã ho.”

—Anhỹr o mẽ kãm kapēr hãmri nê ma nhỹhým mõ. ³⁴ Tã nhũm ra pur kãm mẽmoj hkã pa nom nhũm hpur nhõ dõn arĩ krĩ hõ kamã hã ujahkre ho ri pa htã kuri kãm àpēnh xwýnhjê ho axkrunêpxi nê akupým

mê hwÿr mê kurê. Mê kot mê kãm hkwy nhôr nhùm mê ma kot kãm o môr kaxyw nhùm ma mê hwÿr mê kurê. ³⁵ Nhùm mê ma hwÿr mô. Môo nê ra hwÿr pôj nhùm mê amnhî wÿr mê omu nê axtem nê mê homnuj nê. Nê mê unê nê ja tak nê ja pî nê hôja nhùm mê kên o htak hãmri nê amnhî nê wa hano nhùm wa ma akupÿm ý kamã mô. ³⁶ Hãmri nhùm mê ô patrãwja tee ri wa omu nê hamaxpêr o: “Kwa na na mê ixpê inhmã mê àpênh xwÿnhjê homnuj tÿx nê. Na kot paj axte mê hwÿr mê hkwyjê rê. Nom hpãnhã mê ho ohtô nê mê kurê. Kê mê ohtô nê mê hwÿr mô nê tâ inhmã inhô hkwy jamÿ nê man ixwÿr o mô.”

—Anhÿr o hamaxpêr hãmri nê mê hwÿr jajê rê nhùm mê ma akupÿm mê hwÿr mô. Nhùm mê amnhî wÿr mê ohtô hã nê mã mê ho anê nê mê hipêx kati nê nhùm mê ý kamã ma ô patrãwja wÿr akupÿm mô. ³⁷ Hãmri nhùm tee ri mê omu nê hamaxpêr o: “Hêxta waa nê. Tanhmã kot paj amnhî nhîpêx to? Na kot paj pêr mê hwÿr ixkraja mãn mê. Inhmã hapê htÿx tâ kot paj mê hwÿr kumê kê ma mê hwÿr mô. Hãmri nhùm mê kêp ixkra hã omu nê tanhmã ixpê ho hkêr nê. Nê tâ inhmã kãm inhôja kwÿgô.” Anê.

—Hãmri nê mê hwÿr kumê nhùm ma mô. ³⁸ Tã hãmri ra mê hwÿr hpôx o mô nhùm mê amÿm amnhî wÿr omu nê kêp hkra hã omu nê axtem nê hã axpên mã amÿnê nê axpên mã: “E onêj hpur nhô dôn krata tê. Koja nhÿrmã ô papaj mÿr pê amnhîm hpur ã pykata pytà nê ho ô. Jakamã kwa pu mê hpîr kurê kumrêx nê kêp hpur ho arîk nê ho panhõ. E tokyj pu mê kupî ri.” Anê.

³⁹ —Hãmri nhùm ra tê nê mê hwÿr pôj nhùm mê unê nê hpur nê ho kato nê mã ho anê nê kupî. ã mê ujarênh kot anhÿr. Anê.

⁴⁰ Nhùm pre ã Jejus mê kãm ujarênh anê. Hãmri nê hã mê hkukja nê mê kãm:

—E koja pur nhô dônja hkra jarênh ma hãmri nê tãm mê hwÿr mô hãmri nê tanhmã mê hipêx to wehe? Anê.

⁴¹ Hãmri nhùm mê kãm:

—Na koja ma akupÿm mê hwÿr mô hãmri nê mê homnuj tÿx nê mê himex pa. Hãmri nê hpãnhã nhãm hpur ã mêmojê rê nhùm mê tâ katat kôt kãm àpênh o pa. Anê.

⁴² Hãmri nhùm Jejus mê kãm:

—Tÿ ãm hãmri na ka ã mê harênh anê. Kot mê ho anhÿr mã tãm kênã. Mãn ka prem ra Tirtùm kapêr ã kagã htùm kot tanhmã ja jarênh toja ma? Harênh kot:

Mê kot kên o amnhîm ôrkwy nhîpêx kaxyw nê kên maati pumu nê htÿx omnuj ã hkamnhîx nê hkagata. Mê kot hkaga htã nhùm Tirtùm mê kurom mex o kot kên piitã hakrenh par ã omunh kurê kumrêx. Tirtùm kot kên maati mex ã harênh xwÿnhhta mê pamã mex o mex.

ã Tirtùm kapêr ã kagã htùm kot ja jarênh kot anhÿr. ⁴³ Ja pyrà nê na pre ra Tirtùm amnhî kaxyw mê apê Ijaew xunhwÿ. Mê apê hkra nê hkôt mê ate amnhî nhîpêx kaxyw amnhî kaxyw mê axunhwÿ. Tã ka mê axtem nê hkaga. Te mê kot kên maati pumunh nê mex kêt ã hkamnhîx nê hkagata pyrãk. Jakamã koja mê apãnhã Ijaew kêt xwÿnh kwÿjê xunhwÿ nhùm mê arom hkôt amnhî nhîpêx mex o pa. Jao ra mê kêp hkra nê. Anê.

⁴⁴ Nhùm pre ã Jejus mê kãm te kêp kên maati pyrãk o mê kãm amnhî jarênh anê. Hãmri nê axte amnhî tâ kuxi nê mê kãm axte kên jarênh pyrãk ã amnhî jarê nê mê kãm:

—Na kot kaj mê atõ ixkaga hãmri nê te mêmõ htÿx htêm nê kên pumunh kêt nê hã htêk nê têm pyrãk o amnhî nhîpêx. Jao

ixkutâ amnhî xãm. Rỳ ka tanhmã ajamxpêr to nê ixkaga nhũm te kên maati kot anhîpy tēm nê axôm par pyrãk o anhîpêx ka mē amex kêt kumrêx. Anê.

⁴⁵ Nhũm pre ã mē kãm ujarênh kãm mē harênh anê. Hãmri nhũm patre krãhtũmjê mē Parijew nhõ xwỳnhjaja tee ri amnhî tã kuma ⁴⁶ nhũm ja mē kêp omnuj tỳx jakamã nhũm mē kãm unênh nê haxãr prãm nê. No mē ãm amnhî tã kãm mē kot mar o kuhê xwỳnhjê puma nê. Mē kurom Jejus kêp Tĩrtũm nhỹ hã kapêr xwỳnh ã hkamnhĩx jakamã nhũm mē kãm mē uma nê. Hãmri nê kormã tanhmã ho hkêt nê.

22

Pahi kot hkra hprõ kaxyw hkwỳjê hwỳr ã harênh

Rukre 14.15-24; mããnêh Wam Korĩt 6.9-11; Epes 5.5-6; Apokarip 19.7-8

¹⁻² Tã nhũm Jejus axte mē kãm awjarê. Ijaew kot Tĩrtũm kaga hã mē kãm hã kuxi nê awjarê nê mē kãm:

—E pa mē amã ahpỳnhã mē kot Tĩrtũm kapêr mar nê tanhmã amnhî nhĩpêx to xwỳnhjê jarê ka mē inhma. Te mē kot pahihti kot hkra hprõ kaxyw nhũm kot amnhî wỳr hkwỳjê hwỳr nhũm mē kot harênh mar nê ahpỳnhã tanhmã amnhî nhĩpêx to xwỳnhjaja kot amnhî nhĩpêx pyrãk. Kojã pahihti hã hã hĩnh nê hã apkur mex kaxyw amnhî wỳr hkwỳjê hã karõ. ³ Hãmri nhũm kãm mē ãpênh xwỳnhjaja ra kot amnhî wỳr mē hã karõ xwỳnhjê hwỳr mra nê mē kãm nojarêt nhũm mē kuma nê ãm mē kuma nê axtem nê mē kêp hitõt nê. Hãmri nhũm mē tee ri mē kuma nê akupỳm tē nê pahihti mã mē harê.

⁴ —Hãmri nhũm tee ri amnhî tã mē harênh ma nê hpãnhã mē hwỳr axtem kãm ãpênh xwỳnh kwỳjê rē nhũm mē ma mē hwỳr mra nê mē kãm: “Pa. E kwa mē tokyx. Na ra

pahihti mē akutêp mēõ nhĩpêx pa. Na mē moux kwỳ hpa nê ho ãr mex nê. Nê mē akutêp mēmõj nhĩpêx par jakamã e kwa mē tokyx nã.” Anê. ⁵ ã mē kãm kapêr anhỹr tã nhũm mē kuma nê ãm mē kuma nê ma ahpỳnhã nhỹhỹm mra. Nhũm ja ma ãpênh mã mra nhũm ja ma ihpur kãm ãpênh mã ma tē nhũm ja ma nhỹhỹm mēmõ to wênê ho tē. ⁶ Nhũm mē hkwỳjaja mē kãm ujarênh xwỳnhjê pynê nê mē htak o mē kupa.

⁷ —Hãmri nhũm pahihtija mē harênh ma nê ãhkurê nê. Hãmri nê mē hwỳr pōristi hkwỳr rē nhũm mē ma mē hwỳr mra nê mē unê nê mē kupa nê mē õ krĩ hã hpõk pa. ⁸ Hãmri nhũm pahihti kãm mē ãpênh xwỳnh kwỳjê mã kãm: “Kwa ra ixte mē kutêp mēõ mex kwỳ xunhwỳr tã nhũm mē ixwỳr mrar kêt nê. Ixtỳx ho mē mex ã mē hkamnhĩx nê amnhî wỳr mē hã karõ no mē mex kêt. Mē kot mē ixkutã apkur mã tãm kêt. ⁹ E kwa mē ma krĩ hkõt axtem mē hkwỳjê japêr o mra. Nê nhỹri mēhõ pumu nê kãm awjarê kê man ixwỳr tē nê ixkra hã hĩnh nê mē ixkutã apku. Mē ã mē kãm axujarênh o amrar anê.” Anê.

¹⁰ —Hãmri nhũm mē kuma nê ma mē hapêr o mra nê mē piitã mē kãm anhỹr o mra. Nhũm mē kuma nê wam tajê rom ma mē hkõt mrar kurê kumrêx. Mē kot amnhî to mex xwỳnhjaja nê mē kot amnhî tomnuj xwỳnhjaja hãmri piitã ma mē hkõt mra. Hãmri nê ixkreja wỳr mra nê hwỳr gjêx kaxyw nhũm mē kãm mē ê mex gõ nhũm mē hagjê hãmri nê kormã mē apkur xã hã ixkre hwỳr agjê nê ho nýt pa. ¹¹ Hãmri nhũm pahihtija mē hwỳr axã nê mē piitã mē omu. Nhũm ja pixi nê axtem nê hkwỳjê hĩnhã mē kot kãm ê mex nhõrja jaxãr kêt rãhã axã nê apkur o nhỹ. ¹² Hãmri nhũm tee ri ja hã omu nê hwỳr tē nê kãm: “Pa. Tk. Kwa na htem ixkrem gjêx

kaxyw nê mē kot mē kām mē ê mex nhôr jagjê nê rî kormā hwÿr agjê nê apku. Tā mon ka akwÿjê hkînhā haxâr kaga? Kwa na htem ā amnhî nhîpêx anhÿr kêt nê.” Anhÿr o kām kapêr nom nhûm kuma nê ām kuma nê tanhmā kutā kām nê hkêt nê. Ām htÿx apkur o nhÿ. ¹³ Jakamā nhûm tee ri omu hāmri nê hā mē kot kām âpênh xwÿnhjê mā amÿnê nê mē kām: “E mē hwÿr tē nê unê nê hpa nê hte hpre nê ma o tē nê kamât kô kamā amê. Kê tee ri mur nê amnhî xā htÿx kamā hamak o amnhî nham o xepên kamnhar tÿx kaprÿ ho nō nê rî amnhî pumu.” Anê. Hāmri nhûm mē kuma nê kām ho anê. Ā mē ujarênh kot anhÿr. Anê.

¹⁴ Nhûm pre Jejus ā mē kām ujarênh anê hāmri nê mē kām:

—Nā Tîrtûm kot pahihita pyrà nê amnhî wÿr mē ho ohtô nê mē hwÿr tã na hte mē piitã hkôt amnhî xunhwÿr kêt nê. Jakamā na hte ām mē ho grêre nê amnhî wÿr mē ho api. Anê.

Parijew nhô xwÿnh kot Jejus kamā hamak ā mē harênh

Makre 12.13-17; Rukre 20.20-26; määnên Rômân 12.1, 13.7

¹⁵⁻¹⁶ Tã nhûm Parijew nhô xwÿnhjaja ā Jejus kot mē kām ujarênh anhÿrja ma hāmri nê kurûm kato nê tanhmā hkukamā xepên mā hā âmnênh to. Hāmri nê hwÿr mē hkwyjê mē Erox kôt mē pa xwÿnh kwÿjê rê. Hêx rom mē kot mēmoj tã hkukjêr kaxyw hwÿr mē kurê nhûm mē ma hwÿr mra nê omu nê kām:

—Kwa Jejus. Nā ām hāmri na ka hte Tîrtûm kapêr o mē ahkre mex o ri apa nê mē kamā akahak o apa hkêt nê. Mē kot tanhmā ato kapêr punuj to htã ka aprî hā mē ahkre mex o ri apa. ¹⁷ E kwa mē inhmā mēmoj jarê. Rôm nhô pahihiti kot mē pahpê Ijaew mē pahte kām kâxpore hkwy nhôr ā mē pamā karôta. Kwa xà ja amā mex nà? Xà

kot pu mē kām hkwy gô? Nā xà kot pu mē kām ôr kêt nê? E kwa mē inhmā tanhmā ja jarênh to. Anê.

¹⁸ Nhûm prem ā hêx rom âhkukjêr anhÿr tã no nhûm ra mē hamaxpêr ā mē omu nê mē kām:

—Tk. Kwa mon ka mē ā axêx rom ja hā ixkukjêr anê? ¹⁹⁻²⁰ E mē atô inhmā kâxpore htÿxre hō gô pa omu. Anê.

Hāmri nhûm mē kām ja gô nhûm kupy nê kânhmā mē kām kupê nê mē kām:

—E mēhō nhîxi nê mēhō karô na ja hā? Anê.

²¹ Hāmri nhûm mē kām:

—Pahi Sesti karô nê hixi na hā. Anê.

Hāmri nhûm mē kuma nê mē kām:

—Tÿ. Tô kêr ka mē māmri kām hkwy nhôr o apa. Hā hkarô nê hā hixi. Tãm kot hipêx xwÿnh jakamā ô na. No mē kajaja na pre Tîrtûm mē anhîpêx nhûm mē apê ô jakamā kwa kêr ka mē kapêr kôt pix mā ri amnhî nhîpêx o ri apa. Anê.

²² Hāmri nhûm mē amnhî jaêr pê ā kot kâxpore jarênh anhÿrja ma nê axte kām tanhmā nê hkêt nê. Hāmri nê akryk omu hāmri nê ma akupÿm mra.

Akupÿm mē htîr ā mē harênh

Makre 12.18-27; Rukre 20.27-40; Juãw 5.21, 6.39-40; määnên Wam Korî 6.14, 15.12-28; Wam Tesarôn 4.13-18

²³ Tã nhûm Satusew nhô xwÿnh kwÿjaja mē kot akupÿm mē htîr kêt ā mē hkamnhîx kêt xwÿnhjaja na pre mē. Na pre htem mē htyk nê mē hapêx kumrêx ā mē hkamnhîx jakamā xepên mā tanhmā Jejus jarênh to nê xepên mā:

—E kwa pu mē hwÿr mra nê mēmoj xihtÿx ā hkukja. Kê mē pama nê tee ri tanhmā mē pamā kapêr to hkukamā hamaxpêr kaprÿ. Kê mē piitã ja hā omu nê âhpumunh kêt ā omunh kurê kumrêx. E tokyx pu mē hwÿr.

Anhÿr jakamã Parijew nhõ xwÿnhjê pyrà nê hêx rom ma hwÿr mra nê hkukja nê kãm:

24 —Pa Jejus? Kwa mẽ inhmã mẽmoj jarê. Na pre finat Mojesja Tirtùm nhÿ hã ã mẽ panhîgêjtjê mã karõ anê. Mẽ hkra hkêt rãhã mẽ pa nê mẽ htyk xwÿnhjaja nhũm mẽ harênh o:

Koja mẽhõ hprõ nê kamã hkra hkêt rãhã pan ty. Hã koja hkôt htõja hpãnhã hprõ ho hprõ nê kamã hkra. Hãmri nhũm kato nê te kêp htõ htyk xwÿnhta hkra pyràk. Anê.

Ã na pre Mojesja Tirtùm nhÿ hã mẽ kãm karõ anê. ²⁵ Jakamã kwa ga mẽ ixujarênh ma. Koja mẽ kot axpên to htõ xwÿnhjaja kêp 7. Nhũm kot waja hãmri hprõ nê wa pa nhũm kamã hkra hkêt rãhã ty. Nhũm hkôt htõja hpãnhã ho hprõ ²⁶ nê wa axpên to pa. Nhũm mãânên kamã hkra hkêt rãhã ty. Nhũm htõ hõta haxwÿja hpãnhã tãm o hprõ nê we wa axpên to pa grire nhũm haxwÿja kamã hkra hkêt rãhã ty. Hãmri nhũm htõ hkwÿjaja ni pyxi nê axpên pãnhã ho hprõ hpa no mẽhõ kamã hkra hkêt rãhã htyk pa. ²⁷ Hãmri nhũm mẽ hprõta mẽ hkôt amnhî to hitep nê ty. ²⁸ Tã Tirtùm kot akupÿm nhÿrmã mẽ ho htÿr ronhÿx nhÿ nhÿx kêp nija mjên kumrêx? Ra piitã kot ho hprõ kênã. E mẽ inhmã ja jarê. Anê.

²⁹⁻³⁰ Hãmri nhũm Jejus mẽ kuma nê mẽ kãm:

—Nã kaxkwa kamã mẽ kot amnhî nhîpêxja axtem na. Mẽ htÿr ri mẽ kot Tirtùm kôt amnhî xunhwÿr xwÿnhjaja na htem ty hãmri nê Tirtùm nhõ krî kamã axte kãm hprõ hprãm kêt nê pa. Jakamã hprõ hkêt nê pa. Rÿ ni japêr nê mjên kêt nê pa. Nom ri kãm mjên rÿ hprõ hprãm kêt nê pa. Hãmri nê Tirtùm kapêr o mẽ wrÿk xwÿnhjê pyrà nê axte htyk kêt nê. Am htÿr tùm rãhã nê pa ho pa. Pêr mẽ ate Tirtùm kapêr ã kagã htũm mar

mex kêt jakamã na ka mẽ ã ja hã ixkukjêr anê. Tirtùm àhpumunh tÿx o àhpumunh tÿx jakamã kumã mẽ ate mẽmoj tã ixkukjêr xwÿnhta na tanhmã kêp kute hkêt. Ra ja kukamã àhpumunh tÿx kênã.

³¹⁻³² —Nom mẽ ate akupÿm mẽ htÿr kêt ã mẽ hkamnhÿxja kot paj ix-prÿ hã mẽ amã harê. Amnepêm na pre Tirtùm pÿ hpôkja kamã tanhmã Mojes mã kapêr to. Mãn ra mẽ ate mar. Na pre kãm:

Ixpê Apraãw nhõ Tirtùm na pa. Nê mãânên ixpê Apraãw kra Ijak mẽ htãmnhwÿ Jako wa õ Tirtùm na pa.

Anhÿr o Mojes mã amnhî jarê nhũm kuma nê hã kagã. Kêp apu arÿ mẽ htyk rãhã nhÿx pre ã mẽ harênh anhÿr kêt nê. Nhÿx pre mẽ harênh o: “Amnepêm Apraãw nê hkra nê htãmnhwÿ mẽ htÿr ri ixpê mẽ õ Tirtùm na pa pre.” Anhÿr o nhÿx pre mẽ harê. Nom na pre ã amnhî jarênh anhÿr kêt nê. Mẽ pamã te Apraãwja mẽ htyk nê mẽ hapêx pyràk. Nom nhũm prem ra Tirtùm ri ra akupÿm htÿr nê mex nê pa ho pa. Tã ka htem Tirtùm kapêr kwÿm ri akupÿm mẽ htÿr kêt ã mẽ harênh o apa.

Anhÿr o Satusew nhõ xwÿnhjê mã kapêr. ³³ Hãmri nhũm mẽ kot mar o kuhê xwÿnhjaja amnhî jaêr pê kot mẽ ahkreja ma.

Tirtùm kapêr maati jarênh

Matêwre 10.37; Makre 12.28-34; Rukre 10.25-28; mãânên Wam Juãw 5.3

³⁴ Tã nhũm Parijew nhõ xwÿnhjaja Satusew nhõ xwÿnhjê jarênh ma. Mẽ kot tee ri kãm hamaxpêr o Jejus jakrenh prãm kaprÿ hã mẽ harênhja ma hãmri nê axpên wÿr akuprõ nê Jejus wÿr mra. Kot mẽ urãk nê hêx rom àhkukjêr nê hamaxpêr o hakrenh kaxyw hwÿr mra. ³⁵ Hõja kêp Tirtùm kapêr tùm o mẽ ahkre o mẽ

pa xwýnh jakamã hêx rom kamã hamak kaxyw kãm kapêr nê kãm:

³⁶ —Kwa Jejus. Ot pa mē awýr mra. Kwa mē inhmã mēmoj jarê. Na pre Tirtüm ahpýnhã mēmoj to 10 nê hã mē pamã karô. Mē pahte hkôt amnhĩ nhĩpêx kaxyw hã mē pamã karô. Tã nhỹ kapêr na mex o kot hkwy jakrenh wehe? Anê.

³⁷ Hãmri nhũm kuma nê mē kãm: —Nà kot mē pamã hã karô kot:

Kêr ka mē anhĩ piitã ho amã Tirtüm kĩnh týx o apa. Mē amã hkĩnh týx o mēmoj piitã hakrenh par o apa.

³⁸ E Tirtüm kot mē pamã hã karô ja na mex o piitã hakrenh par. ³⁹ Nê hkôt ja:

Kêr ka mē amã akwýjê hã ma ho te ka amã amnhĩ tã ma pyrãk. Jao ra tãm mē hipêx.

⁴⁰ ã Tirtüm kapêr ã kagã htüm kot mē pamã hã karô kot anhýr. ã mē pahte amnhĩ nhĩpêx anhýr o papaja na Tirtüm kãm hprãm týx kumrêx. Kot kaj mē ja wa hkôt amnhĩ nhĩpêx rãhã ho ri apa nê mãânên ra Tirtüm kot mē pamã mēmoj tã karô xwýnh piitã hkôt amnhĩ nhĩpêx. Ja na pre Mojes mē Tirtüm nhỹ hã kapêr xwýnhjaja amnepêem Tirtüm nhỹ hã mē panhígêjtê mã hã karô ho pa. Anê.

Jesus kot amnhĩ tã mē hkukjêr ã harênh

Makre 12.35-37; Rukre 20.41-44; mãânên Rôman 1.3-4

⁴¹ Nhũm Parijew nhõ xwýnhjaja arĩ Jejus mar o kuhê nhũm amnhĩ tã tanhmã mē hkukjêr to. Nom te nhãm mēhõ hã mē hkukjêr pyrãk o mē hkukja nê mē kãm:

⁴² —E mē inhmã mēmoj jarê. Tanhmã na ka htem axpên mã Tirtüm kot mē akaxyw ãm mã xwýnhhta jarênh to? Kêp mēhõ kanrêhã htãmnhwý koja wehe? Anê.

Hãmri nhũm mē kãm:

—Nà koja kato nê kêp pahi finat Tawi kanrêhã htãmnhwý koja.

⁴³ Anê nhũm Jejus mē kuma nê mē kãm:

—Tý. ãm hãmri na ka mē harê. No mo na htem axpên mã kêp pahi Tawi hkanrêhã htãmnhwý pix ã harê nê mãânên kêp õ pahihti hã harênh kêt nê? Tawi na pre Tirtüm Karô nhỹ hã tanhmã harênh to nê harênh o:

⁴⁴ Na pre Tirtüm inhõ Pahihti mã ã kapêr anê nê kãm: “E amnê ixwýr tē nē inhĩkhõ hã nhỹ nē inhmã mē ho amnhĩptãr o akrĩ. Kot paj mē kot kãm akurê xwýnh piitã mē unênh pa nê awýr mē o mra nê anhĩhkram mē haxãr pa.” Anhýr o pre kãm kapêr.

⁴⁵ ã Tawija Tirtüm kot Kris mã kapêr jarênh nê kêp õ pahi hã kagã anê. Mē kajaja na ka htem ãm kêp Tawi tãmnhwý pix ã axpên mã harênh o ri apa. No kêt Tawija na pre kêp õ Pahihti hã harênh o pa. Anê.

⁴⁶ Hãmri nhũm mē kuma nê tee ri kot tanhmã kutã kãm kapêr to hkukamã hamaxpêr nê axte mēmoj tã hkukjêr kêt nê. Tanhmã kot mē amnhĩ to nê hamaxpêr o hakre? Na prem tee ri kãm hamaxpêr o hakrenh prãm kaprý. Jejus mēmoj piitã hkukamã ãhpumunh týx o ãhpumunh týx.

23

Jesus kot tanhmã Parijew nhõ xwýnhjê jarênh to

Makre 12.38-40; Rukre 11.43-46, 20.45-47

¹ Tã nhũm Jejus mē ixte hkôt ixpa ho ixpa xwýnhjê mē mē kot mar o kuhê xwýnhjê mã kapêr nê mē inhmã tanhmã Parijew nhõ xwýnh mē Mojes kapêr o mē ahkre xwýnhjê jarênh to nê mē inhmã:

² —Nà Parijew nhõ xwýnh mē Tirtüm kapêr tùm o mē ahkre xwýnhjaja na htem hprĩ hã Tirtüm

kapêr ã kagà htùm mar mex nê.
³ Jakamã kêr ka mê mar tỳx nê
 mê kot ho mê ajahkre kôt amnhĩ
 nhĩpêx. No mê kot amnhĩ nhĩpêxja
 kêr ka mê hkôt amnhĩ nhĩpêx kêt
 nê. Mê kot Tĩrtùm kapêr tùm o mê
 ajahkre htã hkôt amnhĩ nhĩpêx kêt
 nê. ⁴ Te mê kot mēhō kot mê katut
 ã mê kãm mê jênh pytĩ janhōr tã
 no ãm mê kuxwar hkwȳ htur kêt
 kot amnhĩ nhĩpêx pyrãk o na htem
 amnhĩ nhĩpêx o pa. Jao mê amã
 mēmoj tã karō nê mê amã: “E kêr ka
 mê ã amnhĩ nhĩpêx anê ã amnhĩ
 nhĩpêx anê.” Anhỹr pix o mê amã
 kapêr o pa. Nom mê tãmjaja amnhĩ
 kapêr kôt amnhĩ nhĩpêx kêt nê.

⁵ —Na htem hkwȳjê kot mê
 omunh nê mê kot amnhĩ to mex
 ã mê harênh kaxyw mê noo mã
 tanhmã amnhĩ nhĩpêx to. Nê mê
 mê noo mã mê ê mex pix kãm
 pa. Nê amnhĩm Tĩrtùm kapêr ã
 kagà htùm kwý hã kagà nê amnhĩ
 nhōkrã hã hanhō nê amnhĩ pa hã
 hanhō nê hã pa. Mê kot hã nohtỳx
 rãhã hã mê hkamnhĩx kaxyw nhũm
 htem ã amnhĩ nhĩpêx anhỹr o
 pa. Nê mê kãm mê piitã mê kot
 amnhĩm mê rũnh ã mê harênh o
 paja nhũm htem kãm hprãm.

⁶ —Nê mê pahpê Ijaewjê nhō
 Tĩrtùm kapêr o mê ahkre xà hã
 ixkre kamã mê kot amnhĩ to rũnh
 xwýnhjê hkrĩ xà mex pix kamã
 kãm hkrĩ hprãm. Nê mēmoj tã
 mê apkur xà mex ã arĩgro hã
 nhũm htem ma mê apkur xà hã
 ixkre hwýr akuprō nhũm mê kot
 amnhĩ to rũnh xwýnhjê hkrĩ xà mex
 pix kamã kãm hkrĩ hprãm. ⁷ Nê
 nhỹri pry hã mra nhũm mê kot
 mê omunh nê mê kêp mê ahkre
 xwýnh maati hã mê hã hpijaàm
 kãm tanhmã mê kãm kapêr mex
 toja nhũm htem kãm hprãm. ã na
 hte Parijew nhō xwýnh mê Tĩrtùm
 kapêr tùm o mê ajahkre xwýnhjaja
 hêx rom mê anoo mã amnhĩ nhĩpêx
 anhỹr o pa.

⁸⁻¹⁰ —No mê kajaja. Kêr ka mê ho

mê uràk kêt nê. Kê mê axpên mã
 mê ajarênh o: “Pahi Maati” anhỹr o
 mê ajarênh kêt nê. Rý mê ajarênh o:
 “mê ajahkre xwýnh maati” anhỹr o
 axpên mã mê ajarênh hkêt nê. Kêt
 paxipix na pre Tĩrtùm mê akaxyw
 ixãm jakamã paxipix na ixpê mê
 anhō Pahi Maati. Nê paxipix na
 ixpê mê ajahkre xwýnh maati. No
 mê kajaja ixkôt mê apê axpên to
 atōx nê atō na ka mê.

—Nê kêr ka mê ri axpên jarênh
 o: “Mêpahpãm” anhỹr kêt nê. Kêt
 kaxkwa kamã na Mêpahpãmja.

¹¹⁻¹² —Nê kot ka mê amnhĩ to rax
 prãm xàj tanhmã amnhĩ to jarkrar
 to ho apa htã no nhũm akwýjaja
 ama nê ãm ama nê akôt hamaxpêr
 kêt nê. No kot kaj mê piitã mê kutã
 tanhmã anojarêt to ho apa nhũm
 mê amnhĩ tã mê apumu nê axpên
 mã mê amex ã mê ajarê. Jakamã
 kot kaj mê amã mê piitã mê kot mê
 amex ã mê ajarênh prãm hãmri nê
 ri mê piitã mê kãm tanhmã amnhĩ
 nhĩpêx to pè mê kutã anojarêt rãhã
 ho ri apa. Anê.

*Jejus kot mê hkwȳjê mã kapêr tỳx
 ã harênh*

*Makre 12.40; Rukre 11.39-52,
 20.45-47*

¹³⁻¹⁴ Tã nhũm Jejus hpãnhã Par-
 ijew nhō xwýnh mê Tĩrtùm kapêr
 tùm o mê ahkre ho mê pa xwýnhjê
 mã kapêr. Nê mê kãm kapêr kãm
 hihtỳx nê mê kãm:

—E mê apê Parijew nhō xwýnh
 mê Tĩrtùm kapêr tùm o mê ahkre
 xwýnhjaja. E mê inhma. Kot kaj
 mê amex kêt nê. Mê apê mê no
 kupyw xwýnh na ka mê. Nê mê amã
 Tĩrtùm kôt amnhĩ nhĩpêx prãm kêt.
 Nê nhỹrmã atyk nê mê amã õ krĩ
 hwýr axàpir prãm kêt. Nê akwýjaja
 kot hwýr àpir pymaj na ka htem
 akwýjê nê tanhmã mê kãm axêx to
 ho apa. Mê kot mê apyrã nê Tĩrtùm
 kapêr kwým amnhĩ nhĩpêx prãm
 xàj na ka htem amnhĩ mê tanhmã
 mê kãm axêx to ho ri apa. Jao te

mê ate mê kêp Tirtûm nhô krî hwÿr kahêxà kahê htÿx pyrâk o apa.

¹⁵—Nê mê akwÿjaja kot mê akôt amnhî xunhwÿr nê mê akôt amnhî nhîpêx prâm xà na htem ma awryr hâ nhÿhÿm tanhmâ mê kâm ri axujarênh to ho ri apa. Jakamâ nhûm mêhō mê ama nê mê akôt amnhî xâm hāmri nê ra amnhî tomnuj tÿx o mê ajakre. Jakamâ koja mê nhÿrmâ mê apyrâ nê ma mê kot amnhî xà htÿx kamâ hamak tûm xàta wÿr pa. Jakamâ kwa mê o kora. Kot kaj mê amex kêt nê.

¹⁶—Hêxta waa nê. Mê apê Parijew nhô xwÿnhjê mê mê apê Tirtûm kapêr tûm o mê ahkre xwÿnhjaja kot kaj mê amex kêt kumrêx. Na ka htem mê kêp mê hikâxpore jamÿnh prâm xàj atÿx ri tanhmâ mê ahkre hto ho apa nê mê kâm: “Kot kaj mê âm hāmri mêmōj tâ amnhî jarênh kaxyw hāmri nê Tirtûm mã amnhî jarênh xà hâ ixkre nhîxi jarênh kôt mêhō mã amnhî jarê nhûm ama nê hamaxpêr o: ‘Ko. Apu âm hāmri na inhmâ amnhî jarê rÿ ko na apu âm amnhî to hêx.’ Anhÿr o hamaxpêr. Nom kot kaj mê ixkreta ho mex kaxyw mê kâm kâxpore hkwy gō hāmri nê ate mê kâm ôr xàta jarênh kôt âm hāmri mêmōj tâ mêhō mã amnhî jarê. Hāmri nhûm ama nê hamaxpêr o: ‘Nà âm hāmri na âm inhmâ amnhî jarênh anê. Kot ixkre ho mex kaxyw kâxpore hkwy nhôr kôt âm amnhî jarênh anê. Jakamâ na amnhî to hêx kêt nê.’” Anhÿr o hamaxpêr. Na ka htem âm mêmōj tâ mêmōj mê ahkre ho apa anê. ¹⁷Nom mê ate mê ahkreta mex kêt. Pêr mê ajamaxpêr mexti hâ. Tirtûm mã amnhî jarênh xà hâ ixkreta mex o ixkre ho mex kaxyw kâxpore nhôrta jakrenh. Tâ ka htem axtem nê mê kot kâm kâxpore nhôrta mex o ixkre jakrenh âm harê. No mê pahte âm hāmri mêmōj tâ amnhî jarênh nê aa paxêx kêt rāhâ ho papaja na Tirtûm kâm hprâm.

¹⁸—Nê na ka htem mê kêp mê

hikukrêx jamÿnh prâm xàj âm atÿx ri mê ahkre anê nê mê kâm: “Kot kaj mê âm hāmri mêmōj tâ amnhî jarênh kaxyw nê Tirtûm mã mêmōj nhôr xà hâ mêtija jarênh kôt mêhō mã tanhmâ amnhî jarênh to. Hāmri nhûm mê ama nê hamaxpêr o: ‘Nà âm hāmri na inhmâ amnhî jarê rÿ ko na apu âm inhmâ amnhî to hêx.’ Anhÿr o hamaxpêr. Nom kot kaj mê Tirtûm mã mêmōj nhôr xà hâ mêtija âm kâm mêmōj xi. Hāmri nê ra mê ate kâm ôr xàta jarênh kôt âm hāmri mêmōj tâ mêhō mã amnhî jarê. Hāmri nhûm ama nê hamaxpêr o: ‘Nà âm hāmri na âm inhmâ amnhî jarênh anê. Kot Tirtûm mã mêmōj nhôr âm amnhî jarênh kôt kot amnhî jarênh anhÿr jakamâ na amnhî to hêx kêt nê.’ Anhÿr o hamaxpêr.” Anê. Na ka htem âm mêmōj tâ mêmōj mê ahkre anê. ¹⁹Mê ajamaxpêr kêt xwÿnh na ka mê. Tirtûm mã mêmōj nhôr xà hâ mêtija na mex o mê kot hâ kâm mêmōj nhôrta jakrenh. Tâ na ka htem axtem nê mê kot hâ kâm mêmōj nhôrta mex o mêtija jakrenh âm harê. ²⁰Nom Tirtûm mã mêtija mê mê kot hâ kâm mêmōj nhôrta te kot axpên pyrâk jakamâ kot kaj mê mêtija jarênh kôt mêmōj tâ amnhî jarê nê määnen mê ate hâ Tirtûm mã mêmōj xirja jarênh kôt amnhî jarê. Hamê wa kot axpên pyrâk jakamâ hamê wa harênh pê amnhî to axêx kêt nê. Jakamâ kêr ka mê mêmōj tâ amnhî jarênh kaxyw nê hamê wa harênh kôt âm hāmri mêmōj tâ amnhî jarê nê ho axêx kêt nê. ²¹Tâ kot kaj mê âm hāmri amnhî jarênh âm mêmōj tâ amnhî jarênh kaxyw nê Tirtûm mã amnhî jarênh xà hâ ixkre hkôt hâ amnhî jarê nê määnen Tirtûm kêp ixkre hpâm kôt hâ amnhî jarê. Jakamâ kêr ka mê hamê wa harênh pê amnhî to axêx kêt nê.

²²—Nê kot kaj mê âm hāmri amnhî jarênh âm mêmōj tâ amnhî jarênh kaxyw nê kaxkwa jarênh kôt

amnhî jarênhja o määñen kaxyw kaxkwa kamã Tirtüm krî xà maati hkôt amnhî jarê. Nê määñen Tirtüm kôt amnhî jarê. Jakamã kwa hamê wa harênh pê amnhî to axêx kêt nê.

23 —Hêxta waa nê. Mê apê Parijew nhõ xwýnh mê mê apê Tirtüm kapêr tùm o mê ahkre xwýnhjaja kot kaj mê amex kêt nê. Mê ate mê no kupyw xwýnh na ka mê. Na ka htem Tirtüm kapêr piitã hkôt amnhî nhîpêx kêt nê ãm hkwy kôt pix mã amnhî nhîpêx o ri apa. Na ka htem ãm kapêr o hpýnhre nê hkôt amnhî nhîpêx ã amnhî pumu nê ate amnhî to mex xwýnh ã amnhî jarênh o apa. No Tirtüm kãm hprãm xà piitã hkôt amnhî nhîpêx kêt nê. Mê ate tãm mê hipêx nê mê ho mex nê mê kamã axukaprî hã kot mê amã karôja. Nê mê amã Tirtüm kînh ã kapêr kôt amnhî nhîpêx hã karôja ra mê ate mar tã hkôt amnhî nhîpêx kêt nê. Mê ate kapêr piitã hkôt amnhî nhîpêx ronhÿx ja mê amã mex o mex. 24 Mê ate ãm kapêr o hpýnh nê hkôt amnhî nhîpêx jakamã te mê ate atÿx ri tanhmã axàpkur to ho mê akrî pyrãk. Jao te mê axàpkur xà hã mêõ kamã pure pumunh nê nê hanhir nê rênh tã määñen kamã kên rax pumunh tã nê hanhir nê rênh kêt rãhã hkur pyrãk. Jao Tirtüm kapêr o hpýnhre nê hkôt amnhî nhîpêx no piitã hkôt amnhî nhîpêx kêt nê. Pêr mê ajamaxpêr kêt tã na ka htem atÿx mê ahkre ho ri apa.

25 —Hêxta waa nê. Mê apê Parijew nhõ xwýnh mê mê apê Tirtüm kapêr tùm o mê ahkre xwýnhjaja kot kaj mê amex kêt nê. Mê ate mê no kupyw xwýnh na ka mê. Nã mê apê Parijew nhõ xwýnhjaja te mê ate mê kot apkur kaxyw prat kre kuhõnh punuj tã mex ã harênh nê kamã apkur pyrãk o na ka mê. Jao ãm mê akrãhkã rùm pix mã mê amex. Nê mê noo mã te mê amex

pyrãk no mê anhõxãhkre kaxwýnh kãm mê ajamaxpêrja mex kêt. Mê akapêr prãm nê mê axãhkurê nê mê anhõxÿÿ. 26 Mê ajamaxpêr mex kêt kênã. Kwa kêr ka mê tãm ajamaxpêr o tãm akwÿjê nhîpêx o ri apa. Nê axãmnhîx ri mê kêp amrakati xwýnhjê mã mêmoj nhõr o ri apa. Kot kaj mê ã amnhî nhîpêx anê nhùm Tirtüm ja hã mê apumu nê amnhîm mê amex ã mê ajarê. No na ka htem amã mê amnhî to mex prãm xaj ãm tee ri amnhî kuhõnh japjê kaprÿ.

27 —Hêxta waa nê. Mê apê Parijew nhõ xwýnhjê mê mê apê Tirtüm kapêr tùm o mê ahkre ho mê apa xwýnhjaja kot kaj mê amex kêt nê. Te mê ate mê htykjê jagjênh xà pyrãk. Na htem mê hagjênh xà ho mex o pa nom kamã mê hi nê ahpunuj pix. 28 Ja pyrã nê ã mê ate amnhî nhîpêx anhÿr. Kapôt rùm mê anhîja na mex. Te mê ate mê ho mex o apa pyrãk o na ka htem amnhî nhîpêx nhùm mê ãm akrãhkã pix pumu nom ãm mê akrã hi kaxwýnh kãm mê ajamaxpêr punuj rãhã hã mê apumunh kêt nê. Mê ate tanhmã mê no kupyw to pix kukamã ajamaxpêr jakamã te mê ate mê htykjê jagjênh xà pyrãk.

29-30 —Hêxta waa nê. Mê apê Parijew nhõ xwýnh mê mê apê Tirtüm kapêr tùm o mê ahkre xwýnhjaja kot kaj mê amex kêt nê. Mê ate mê no kupyw xwýnh na ka mê. Na ka htem ma mê hã pika hwÿr apa nê Tirtüm nhÿ hã kapêr o mê pa xwýnhjê hã pika ho mex. Nê mê kot amnhî to mex xwýnhjê hã pika ho mex. Nê axpên mã mê harênh o: “Hêxta waa nê. Na pre amnepêm mê pakukamã mê panhîgêjtaja Tirtüm nhÿ hã mê kãm kapêr xwýnhjê homnuj nê mê kupa. No kêt mê papajaja mê kamã ri papa ronhÿx pu prem mê urãk nê ã mê hipêx anhÿr kêt nê.” Anhÿr o axpên mã mê hkaprî ho ri apa.

31-32 Nom ãm amnhĩ to axêx. Mê ate ã amnhĩ nhĩpêx anhÿr o apa kênã. ã mê ate amnhĩ nhĩpêx anhÿr jao ra apê mê hkanrêhã mê hkra kumrêx ã amnhĩ to amnhĩrĩt mex o apa. ³³ Te mê ate kagã xoprê kot mê hkamnhar nê mê homnuj tÿx pyrãk jakamã koja Tĩrtũm nhÿrmã ma mê kot amnhĩ xã htÿx kamã hamak tũm xãta wÿr mê ajano ka mê ma hwÿr ajapêx. Hãmri nê tee ri amã ajapôx prãm kaprÿ nê rĩ amnhĩ pumu.

³⁴—Kot paj nhÿrmã ma mê awÿr inhÿ hã ixkapêr jarênh o mê pa xwÿnh kwÿ rê. Nê inhÿ hã mê ãhpumunh xwÿnh kwÿ rê. Nê ixkapêr o mê ahkre xwÿnh kwÿ rê. Nom kot kaj mê ãm mê kapêr ma nê apê mê hprãm nõkati nê tanhmã mê homnuj tÿx to ho apa. Nê ixpê mê hkwyjê hpar o apa. Jao pĩ kahpa hã mê hanhôr o mê hkwyjê hpa. Nhũm mê hkwyjêja Tĩrtũm kapêr o mê ahkre xã hã ixkre kamã mê ahkre ho hkrĩ ka mê omu nê mê unê nê ixkreja kamã mê htak. Hãmri nhũm mê apymaj nhãm ahpÿnhã krĩ hkwy hwÿr hprôt nê mra. ã kot kaj mê inhÿ hã ixkapêr jarênh xwÿnhjê nhĩpêx anhÿr o apa. ³⁵⁻³⁶ Na prem ra mê himex rax nê. Amnepem panhĩ kator krax rũm Atãw kra Apewta na pre Tĩrtũm nhÿ hã kapêr o pa nhũm htôja kãm mar prãm kêt nê kupĩ. Tã nhũm Tĩrtũm axte mê hwÿr ÿ hã kapêr o mê pa xwÿnh kwÿjê rê nhũm prem mã mê ho anê nê mê hkwyjê nhĩmex. Nhũm pre xatã mê hwÿr mê hkwyjê rê nhũm mê xatã mê kupa. Apew rũm Parakis kra Jakaris wÿr na prem mê himex rũnh nê. Hãmri nhũm prem Tĩrtũm mã amnhĩ jarênh xã hã ixkre kamã Jakarisja pĩ. Tã mê kajaja mê ate mê urãk nê mê amã Tĩrtũm kapêr mar prãm kêt nê mê urãk nê amã Tĩrtũm nhÿ hã kapêr xwÿnhjê nhĩmex prãm nê. ã mê ate mê anhĩgêjtê pyra

nê mê hipêx anhÿr mÿrapê koja Tĩrtũm mê apê mê hkanrêhã mê hkra nê mê htãmnhwÿjaja mê ato hpimràatã tanhmã mê ato htÿx to ka mê amnhĩ xã htÿx kamã ajamak rãhã ho ri apa. Anê.

Jejus kãm Jerujarê nhõ xwÿnhjê japê htÿx ã harênh

Rukre 13.34-35; mããnen Rõmãn 11.25-27

³⁷ Hãmri nhũm Jejus te ra kot Jerujarê nhõ xwÿnhjê pumunh nê mê kãm kapêr pyrãk o tanhmã kapêr to ho xa. Nê mê kãm:

—Hêxta waa nê Jerujarê nhõ xwÿnhjaja. Tĩrtũm kot xatã mê awÿr ÿ hã kapêr jarênh xwÿnhjê rênh nhũm mê kot mê akôt mê amã kapêr jarênh o pa htã ka mê kapêr mar kêt kumrêx. Nê axtem nê kên o mê htak o mê himex o apa. ã na ka htem amnhĩ tomnuj o apa anê. Tã nom arĩ inhmã mê ajamãr o ri ixpa hprãm. Te ho krãhyre kot nore hpro nê ho hikwÿ pyrãk o na pa inhmã mê anhĩpêx prãm nê. Nom mê amã ixprãm nõkati nê mê ate ixkaga kumrêx. ³⁸ Mÿrapê koja Tĩrtũm mê anhõ krĩ jamãr kêt nê. ³⁹ Kot paj tokyx ty nê mê api-itã mê are nê ma akupÿm api ka mê axte ixpumunh kêt nê. ãm akupÿn ixwrÿk xã hã arĩgrotã pix ã koja mê akwÿjaja mê amÿrpê krĩ ja kamã ixpôx ã ixpumu. Hãmri nê mê akurom ixpumu nê hkĩnh tÿx nê. Nê tã ixkôt amnhĩ xunhwÿr kurê kumrêx. Hãmri nê axpên mã ijarênh o:

Ota Tĩrtũm kot mê pahwÿr mênh xwÿnhnta wrÿ. Nã ãm hãmri na mê pahwÿr wrÿ. Ja mex o mex.

Koja mê ã axpên mã ijarênh anê. Anê.

24

Jejus kot mê pakukamã mẽmoj jarênh

Makre 13.1-13; Rukre 21.5-19; mããnen Wam Ximotre 4.1-3; Sikũn

Ximotre 3.1-9; Apokarip 6.1-17

¹ Tã nhũm Jejus Tirtũm mã amnhĩ jarênh xà hã ixkre rùm kato nê ma tê. Pa mê ixte hkôt ixpa ho ixpa xwýnhjaja kormã ixkreja pumunh o ixkuhé nê kãm harê nê kãm:

—Kwa Pahihti. Hêxta waa nê. Ixkreja âm mex kumrêx. Anê.

Hãmri nhũm mê inhmã:

² —Tý mex nom koja nhýrmã mê kãm Tirtũm kurê xwýnhjaja grãnh pa. Koja arĩ kên õ axkrut্রে nê axpên mýnh nê nôr kêt nê. Koja piitã anhrã nê ahpýnhã ri hikwý. Anê.

³ Hãmri pa mê kuma nê tee ri hkukamã ijamexpêr. Hãmri nhũm Jejus ma tê nê hixêt pê Oriwêhti hã api nê hã nhý pa mê ma hkôt mra nê mê kot ã ixkre nhípêx anhýrta ã hkukja nê kãm:

—Kwa xà âm hãmri koja mê ã ixkreta nhípêx anê? Kwa mê inhmã aprĩ hã harê. Xà koja mê nhýrmã ho anê nã? Xà koja mê tokyx ho anê? Nê akupýn mê ixwýr awrýk nhũm mêmoj piitã hapêxja. Kwa mêmo koja we wýj ri tanhmã amnhĩ nhípêx to wehe? Anê.

⁴ Hãmri nhũm mê inhmã hprĩ hã tanhmã mêmoj kot amnhĩ nhípêx to hkukamã ujarênh o nhý nê mê inhmã:

—Nã nhýrmã mêmoj piitã hapêx kaxyw tanhmã amnhĩ nhípêx toja kumrêx kot paj mê amã harê ka mê inhma. Nã koja mê ohtô nê mê awýr mra nê hêx rom te pa ixte amnhĩ nhípêx pyrãk o amnhĩ nhípêx o mê akôt pa. ⁵ Nê mê amã amnhĩ jarênh o: “E Tirtũm na pre mê awýr inhmê. Ixpê kaxkwa rùm ixwrýk xwýnhhta na pa.” Anhýr o mê akôt mê amã amnhĩ to hêx o pa. Jao ohtô nê mê nokupyr o pa.

⁶ —Nê koja mê nhýri awry hã axpên par o pa nê mê atã axpên par o pa. Nom kêr ka mê harênh ma nê ri tokyx mêmoj piitã hapêx ã hkamnhix kêt nê. Kormã mêmoj piitã hapêx xà hã arĩgroja kormã.

⁷ Koja mêmoj piitã hapêx kaxyw nhũm ahpýnhã ri pika piitã hkôt mê pa xwýnhjaja pika hõ nhõ xwýnhjê kutã kuhê nê pijapu ho kuhê. Jao ra axpên par o pa. Hãmri nhũm nhýri pika hkwy htertet týx kumrêx. Nê mê hpur kãm mêmoj hapêx nhũm mê kãm prãm týx nê pa. Jakamã nhũm mê ohtô nê prãm xaj axkaprã. ⁸ Nom ja kormã mêmoj hapêx kaxyw krax pix na. Te ho mênijê hõ hpijagri kaxyw nê kormã kawax pê õhy xà pyrãk.

⁹ —Nê koja mê piitã ixkôt mê akamã gryk nê kãm mê akurê htýx o pa. Nê mê awýr mra nê ixtã mê apynê nê mê atomnuj týx nê mê apa. ¹⁰ Jakamã koja mê kot ixkôt amnhĩ xunhwýr xwýnh kwýjaja mê umaj tee ri amnhĩ kukamã hamaxpêr hãmri nê ixkaga. Nê ixkôt mê kãm axpên tã amýnê nê axpên kãm gryk o pa. ¹¹ Nhũm nhýri mê hkwyjaja Tirtũm nhý hã kapêr jarênh xwýnh ã amnhĩ to hêx o pa. Jao mê ohtô nê mê nokupyr o pa. ¹² Koja mê ã amnhĩ nhípêx anhýrja o ra piitã kãm axpên kamã ukaprĩ hkêt o pa. ¹³ Koja mê ã ixtã mê atomnuj o pa anê. Tã nom kêr ka mê amnhĩ to htýx nê ixkaga hkêt nê. Mê kot mê apar tã ka mê kaxkwa kamã akupým atır kurê kumrêx.

¹⁴ —Nê kot kaj mê apê ixkwýjaja ma krĩ piitã hkôt Tirtũm kapêr o mê ahkre ho apa. Mê kot amnhĩ tomnuj kaga nê ixkôt amnhĩ xunhwýr nhũm Tirtũm kot ja hã mê omunh nê mê ho hkra hã mê kãm harênh o ri mê piitã mê hkôt apa. Kot kaj mê piitã mê kãm ijarênh pa pa rĩ kormã akupýn mê awýr wrý. Anê.

Mê pahtomnuj týx xwýnh maati hã harênh

Makre 13.14-23; Rukre 21.20-24; määnên Sikün Tesarôn 2.3-4

¹⁵ Nhũm Jejus arĩ mêmoj kukamã mê inhmã kapêr nê mê inhmã:

—Amnepêm Tirtũm nhý hã kapêr xwýnh finat Tãñewja na pre

tanhmã mẽ atomnuj tỳx xwỳnh maati ja jarênh to. Tã koja nhỹrmã ra kot harênh xà hkôt axtem nê Tĩrtũm mã amnhĩ jarênh xà hã ixkre hwỳr axà nê Tĩrtũm xãm xà kamã xa. Ka mẽ ja hã omu hãmri nê mẽ kot krĩ grãnh par ã hkamnhĩx kurê kumrêx. ¹⁶ Koja ã amnhĩ nhĩpêx anê ka mẽ amỳm amnhĩ wỳr mẽ omu hãmri nê ajapôj nê ma aprôt nê amrar kurê kumrêx. Mẽ apê jar pika pê Jutej kamã mẽ apa xwỳnhjaja kaj mẽ omu hãmri nê mẽ kot mẽ apar pymaj aprôt nê ma amrar kurê kumrêx. ¹⁷ Rỳ ka mẽ anhõrkwỹ hkrãmnhênh o akrĩ japêr nê amỳm amnhĩ wỳr mẽ omu nê akukrêx wỳr axàr nê hõ hpyr mã ajamaxpêr kêt nê. ãm wry nê aprôt nê ma atêm kurê kumrêx. ¹⁸ Rỳ ka mẽ apur kãm axàpênh o apa japêr nê amỳm mẽ omu hãmri nê akupỳm anhõrkwỹ hwỳr axê jamỳnh kaxyw atêm kêt nê. ãm mẽ umaj aprôt nê ma atêm kurê kumrêx.

¹⁹ —No mẽ htujarô nê mẽ hkra karàre xwỳnhjaja koja mẽ kêp mẽmoj omnuj tỳx nê. Tanhmã kot mẽ amnhĩ to nê mẽ umaj hprôt tỳx? Nà pika ja kamã koja mẽ mex kêt o mex kêt. Mẽ kot amnhĩ tomnuj mỳrapê koja Tĩrtũm tanhmã mẽ homnuj tỳx to.

²⁰ —Nê kwa kêt ka mẽ amnhĩ to Tĩrtũm wỳ kê ã mẽ kot amnhĩ nhĩpêx anhỹr xà hã arĩgroja na wryk pê ã amnhĩ nhĩpêx anhỹr kêt nê. Rỳ mẽ hkôt xà hã arĩgro pê sap ã ã amnhĩ nhĩpêx anhỹr kêt nê.

²¹ —Nê ã mẽ kot amnhĩ nhĩpêx anhỹr ã arĩgroja ã koja mẽ piitã amnhĩ xà htỳx kãm hamak tỳx kumrêx. Amnepêm Tĩrtũm kot pika ho kator krax rũm amnê mẽ pa xwỳnhjaja kormã aa kot ã amnhĩ xà htỳx kamã hamak anhỹr kêt tã arĩgroja ã koja mẽ amnhĩ xà htỳx kumrêx kamã ama. Hãmri nê axte pika ja kamã ã amnhĩ xà htỳx kumrêx kamã hamak anhỹr kêt nê. ²² Kop apu Tĩrtũm kot mẽ kot amnhĩ

xà htỳx kamã hamak xà hã arĩgro hkwy ho gri hkêt ronhỹx ka mẽ api-itã apikaprãr pa. Ja pymaj koja mẽ amã ho gri. Kot ra amnhĩ kaxyw mẽ arênh xwỳnhjê japê xàj mẽ amã ho gri.

²³⁻²⁴ —Tã ã mẽmoj kot amnhĩ nhĩpêx anhỹr jakamã koja mẽmojaja tanhmã mẽ amã ixto hêx to nê mẽ amã: “Ota ra Kris akupỳn wry. Kwa mẽ hwỳr mra nê omu.” Anê. Rỳ mẽ amã: “Krisja krĩ mũj kamã na raa. Kwa mẽ ma hwỳr mra nê omu.” Anhỹr o mẽ amã ixto hêx o pa. Rỳ mẽ awỳr mra nê mẽ amã amnhĩ to hêx nê mẽ amã: “E. Ot pa ixpê Kris ã mẽ awỳr wry. Tĩrtũm na mẽ awỳr inhmê pa wry.” Anê. Rỳ mẽ amã: “E ixpê Tĩrtũm nhỹ hã ixkapêr xwỳnh na pa mẽ awỳr mõn pôj.” Anhỹr o mẽ amã amnhĩ to hêx. Hãmri nê mẽ anokupyr kaxyw mẽ amã aa mẽ kot mẽmoj pumunh kêt kwỳ ho anhỹr o pa. Tĩrtũm kot amnhĩ kôt mẽ arênh xwỳnhjaja kãm mẽ ate ja hã mẽ omunh nê mẽ gryk ã ixkaga hprãm xàj koja mẽ ã mẽ anoo mã amnhĩ nhĩpêx anhỹr o pa. Nom ãm ã amnhĩ nhĩpêx anhỹr kaprỳ ka mẽ ixkaga hkêt nê.

²⁵ —E kwa mẽ inhmar tỳx nê. Na pa ra ixprĩ hã ã mẽ kot amnhĩ nhĩpêx anhỹrja kukamã ã mẽ amã mẽmoj jarênh anê. Tã kêt ka mẽ amnhĩ nê ã mẽ kot amnhĩ to hêx anhỹr o mẽ pa xwỳnhjê pumunh mex o apa nê axkãm ajamak rom. ²⁶ Rỳ koja mẽ tanhmã mẽ amã ixto hêx to nê mẽ amã: “Ota Tĩrtũm kot mẽ pahwỳr mênh xwỳnhhta kapôt ã mõn pôj. E mẽ tokyx ma hwỳr mra nê omu.” Anhỹr o mẽ amã ijarê ka mẽ ama nê ãm mẽ ama nê hwỳr amrar kêt nê. Rỳ nhũm mẽ amã: “Ota hitom kãm xa. E mẽ mamrĩ hwỳr agjê nê omu.” Anê no ka mẽ ãm mẽ ama nê ãm mẽ ama nê hwỳr agjê kêt nê. ²⁷ Kot paj nhỹrmã akupỳn mẽ awỳr ixwryk kaxyw hãmri nê ixpimxur

kâm ixwryk kêt nê. Koja pika pi-itâ hkôt mê pa xwÿnhjaja anhîpê ixwryk kâm ixpumu. Te mê piitâ anhîpê mê kot na haxênh pumunh pyrâk o kot kaj mê anhîpê apiitâ ixpumu. ²⁸ Te nhÿri mêmoj kro nê nôr nhÿm nhônhti kot omunh nê hã htor nê hpinhpanh nhÿm mê piitâ hã omunh pyrâk o kot paj amnhî nhîpêx. Anê.

Jejus akupÿn wryk xwÿj ri mêmoj kukamã harênh

Makre 13.24-31; Rukre 21.25-33; määnên Wam Tesarôn 4.16-17

²⁹ Nhÿm Jejus arî mê ixte hkôt ixpa ho ixpa xwÿnhjê mã kapêr nê mê inhmã:

—Nê kot paj akupÿn mê awÿr inhnojarêt nhÿm rî Tirtÿm kaxkwa kamã tanhmã mêmoj nhîpêx to. Kapêr ã kagã htÿm kot tanhmã ja kukamã harênh to nê harênh kot: Koja Tirtÿm kaxkwa ho ãk nhÿm

kanhêti piitâ rôrôk pa nhÿm myyti ahtyk nhÿm mytwryre urâk nê axte hpôk kêt nê. Anê.

³⁰ Koja ã mêmoj amnhî nhîpêx anhÿr pa hãmri pa kaxkwa hã mê amã mêmoj nhô. Hãmri nhÿm pika piitâ hkôt ri mê pa xwÿnhjaja piitâ omu nê tee ri amnhî kukamã hamaxpêr o hkaprî nê mÿr rax kumrêx. No mê kajaja kot kaj mê omu hãmri nê akupÿn mê awÿr ixwryk nê mê ato amnhîptâr mã ajamaxpêr kurê kumrêx. Kot paj kakrã kamã hirã htÿx kâm akupÿn ixihtÿx kâm mê awÿr wry. ³¹ Hãmri nê Tirtÿm kapêr o mê wryk xwÿnh maati mã anê nhÿm pifti kakô hãmri nhÿm hkwyjaja kuma nê ma mê awÿr pika piitâ hkôt anhgrã nê ma mra nê inhmã mê ato akuprô. Ixte amnhî kaxyw mê axunhwÿr xwÿnhjê o akuprô nê man akupÿn ixwÿr mê ato hapêx. Anê.

Jejus kot mêmo pâr o ejêp jarênh

Makre 13.28-31; Rukre 21.29-33

³² Nhÿm Jejus arî mê inhmã kapêr nê mê inhmã:

—E ka mê pî hpâr mÿj pumu. Na hte mêmo mytwry hã rã nhÿm mê omu nê ô hkukamã hamaxpêr kurê kumrêx. ³³ Ja pyrã nê koja ã ixte mêmoj jarênh anhÿr xwÿnhjaja amnhî nhîpêx par mê ka mê omu nê akupÿn mê awÿr ixwryk mã ajamaxpêr kurê kumrêx. Kot paj te ra mê anhôrkwÿ kapem ixãm pyrâk o amnhî nhîpêx. ³⁴ Nom akupÿn ixwryk kêt ri koja ã mê kot mêmoj kot amnhî nhîpêx anhÿr pumunh xwÿnhjaja kormã piitâ htyk kêt ri pa akupÿn wry.

³⁵ —Nê koja nhÿrmã pika nê kaxkwa wa hapêx pa. Tã no ãm ixkapêrja koja wa urâk nê aa hapêx kêt nê. Koja ãm rãhã ho rãhã. Kot paj aa ihkjê ho tanhmã mênh to hkêt nê. Anê.

Mê pahte akupÿn Jejus wryk xã hã arÿgro pumunh kêt ã mê pajarênh

Makre 13.32-37; Rukre 12.37, 17.26-30, 17.34-36; määnên Wam Tesarôn 5.2

³⁶ Nhÿm Jejus arî mê inhmã kapêr nê mê inhmã:

—Nê ixte akupÿn mê awÿr ixwryk xã hã arÿgroja mê ate omunh kêt. Nê kaxkwa kamã Tirtÿm kapêr o mê wryk xwÿnhjaja haxwÿja kot ja pumunh kêt. Nê ijaxwÿja ixpê Tirtÿm Kra htã ixte ja hã amnhî pumunh kêt. ãm inhô Papaj pix na kot ja pumunh.

³⁷ —Nê kot paj nhÿrmã man akupÿn mê awÿr wry. Akupÿn mê awÿr ixwryk xã hã arÿgrota ã koja mê htÿx ri amnhî tomnuj o pa. Te amnepêm Noehti kormã htÿr ri mê pa xwÿnhjaja kot htÿx ri amnhî tomnuj o pata pyrâk. ³⁸ Na pre htem amnhî kaxyw Tirtÿm mã hamaxpêr kêt nê. ãm jar mê kot amnhî nhîpêx pix kukamã hamaxpêr kôt pix mã amnhî nhîpêx o pa. Rôm nhÿm Noehtija gô htãm pymaj pâr rax nhîpêxta mã axã. ³⁹ Nhÿm mê ja hã omu nê ãm omu nê tanhmã ri amnhî kukamã hamaxpêr to hkêt nê. Hãmri nhÿm

naja mẽ haêr pê wrÿ nê wrÿk rax o mẽ hanhir pa. Tã akupÿn ixwrÿk xà hã arÿgroja ã koja mẽ htÿx ri ã amnhÿ nhÿpêx anhÿr o paja o pa mẽ haêr pê naja pyrã nê akupÿn wrÿ.

⁴⁰ —E kot paj mẽ amã nhÿrmã akupÿn ixwrÿk nê tanhmã mẽ anhÿpêx to hã amnhÿ jarê. Te kot ja pyrãk. Koja mẽmyjê hõ wa hamêxkrut nê hpur kãm àpênh o xa. Nhũm hõja ra ixkõt amnhÿ xãm nhũm hõja ixkõt amnhÿ xãm kêt japêr. Hãmri pa amnhÿ wÿr ra kot ixkõt amnhÿ xãm xwÿnhnta o api nhũm kot ixkõt amnhÿ xãm kêt xwÿnhnta hpur kãm ahte arÿ xa. Hãmri nê tee ri hkrãmnhwÿ japêr rÿt o xa. ⁴¹ Rÿ nhũm mênijê wa hamêxkrut nê harôj kahuk o xa. Nhũm hõja ra ixkõt amnhÿ xãm nhũm hõja ixkõt amnhÿ xãm kêt japêr. Hãmri pa amnhÿ wÿr kot ixkõt amnhÿ xãm xwÿnhnta ho api nhũm kot ixkõt amnhÿ xãm kêt xwÿnhnta tee ri hkrãmnhwÿ japêr rÿt o xa hãmri nê hamaxpêr rax kumrêx. Kot paj nhÿrmã akupÿn wrÿ nê ã mẽ anhÿpêx anê. ⁴² Tã mẽ ate akupÿn ixpõx xà hã arÿgro pumunh kêt jakamã kwa kêr ka mẽ ijamãr rãhã ho ri apa. ⁴³ Na htem htÿx ri nhÿri tanhmã amnhÿ nhÿpêx to ho pa nhũm mẽ kêp àhkÿnh xwÿnh mẽ òrkwÿ hwÿr agjê nê mẽ kêp ahkÿ. ⁴⁴ Tã mẽ ate akupÿn ixwrÿk xà hã arÿgro pumunh kêt jakamã kwa kêr ka mẽ ixwakre kamã te mẽ apê mẽ òrkwÿ nhõ dõn kot amnhÿ nhÿpêx pyrã nê atÿx ri tanhmã amnhÿ tomnuj to ho apa hkêt nê. Ixkutêp axkãm ajamak rom nê ri apa. Jao tãm ixkutêp amnhÿ nhÿpêx rãhã ho ri apa. Anê.

Mẽ kãm mẽ àpênh mex xwÿnhjê jarênh

Rukre 12.41-48

⁴⁵ Nhũm Jejus arÿ mẽ inhmã kapêr nê mẽ inhmã:

—E koja mẽ kãm àpênh xwÿnhjê hõ àpênh mex o pa hãmri nhũm

õ patrãw àpênh ã omu hãmri nê ma nhÿhÿm mõi kaxyw nê ìhkram mẽmoj piitã haxàr pa nê kãm: “E kêr ka ixwakre kamã inhmã inhõrkwÿ tãnopxar mex nê. Nê inhmã mẽ àpênh xwÿnhjê mã mẽ apkur xà nhõr o apa.” Anhÿr o kãm mẽmoj tã karõ hãmri nê kato nê ma nhÿhÿm mõi. ⁴⁶ Hãmri nhũm kot kãm àpênh mex xwÿnhnta wakre kamã kãm àpênh mex o pa. Jakamã nhũm õ patrãw akupÿn hpõx o mõi nhũm amnhÿ wÿr harênh ma nê hkÿnh nê. Nê tee ri amnhÿ kukamã hamaxpêr o kãm uma hkêt nê. Kot wakre kamã kutêp kãm àpênh mex jakamã tee ri tanhmã amnhÿ kukamã hamaxpêr to hkêt nê. ⁴⁷ Jakamã nhũm õ patrãwja akupÿn pøj nê kot kãm àpênh mex ã omu nê hkÿnh nê. Hãmri nê kot kãm õ mẽmoj piitã hamãr o pa kaxyw ìhkram haxàr pa. ⁴⁸ No koja axtem nê wakre kamã kãm àpênh mex kêt japêr. Nê hamaxpêr o: “Tk. Nã koja tokyx akupÿn mõi kêt nê.” Anhÿr o hkamnhÿx. ⁴⁹ Hãmri nê wakre kamã kãm mẽ àpênh xwÿnhjê htak nê pipãnh pix o pa. Nê kãm kagõxÿhti xành xwÿnhjê kõt pix mã pa. ⁵⁰ Hãmri nhũm õ patrãwja haêr pê akupÿn pøj nê tee ri ja hã omu. ⁵¹ Hãmri nê kamã gryk tÿx nê tanhmã homnuj htÿx to nê kãm mẽ àpênh punuj xwÿnhjê mẽ mẽ ho hpimràatã amnhÿ nê mẽ kator pa. Hãmri nê mẽ kot kapêr kwÿm amnhÿ nhÿpêx xwÿnhjê mẽ mẽ ho hpimràatã tanhmã mẽ homnuj to nê amnhÿ nê mẽ kator. Hãmri nhũm mẽ tee ri amnhÿ kukamã hamaxpêr nê mur nê tee ri amnhÿ nhÿpêx. Tã kêr ka mẽ ixwakre kamã ho mẽ uràk kêt nê. Mẽ kurom ixwakre kamã ixkapêr kõt amnhÿ nhÿpêx mex rãhã ho ri apa. Anê.

25

Kormã mẽ mjên kêt xwÿnhjê ho 10 nê mẽ harênh
Wam Tesarõn 5.1-3

¹ Nhũm Jejus arĩ mẽ inhmã kapêr nê mẽ inhmã:

—Nê mẽ ate Tirtũm kôt amnhĩ nhĩpêx o mẽ apa xwỳnhjaja kêr ka mẽ akupỹn amnhĩ wỳr ixkãm ajamak rom nê ri apa. Nom mẽ kêp Tirtũm prãm nõkati xwỳnhjaja koja mẽ akĩnhã ãm htỳx tanhmã amnhĩ to pix kukamã hamaxpêr o pa. Te kormã mẽ mjên kêt xwỳnhjaja kot amnhĩ nhĩpêxta pyrãk. E pa mẽ amã tanhmã mẽ harênh to ka mẽ inhma. Koja kormã mẽ mjên kêt xwỳnh kêp 10jaja ma hkrãmnhwỳ mjên mã xwỳnh kutã pry hã mra. Amnhĩ kôt kanê jamỳ nê o mra nê kutêp pry nhĩkrep hkrĩ. ²⁻⁴ Nhũm mẽ kêp 5jaja hkwyjê rom amnhĩ kukamã hamaxpêr mex nê kanê kaxyw amnhĩ kôt orti hkwy ho mỗ. No nhũm mẽ kêp 5 nê mẽ hkĩnhã ãm htỳx kanê pix jamỳ nê o mra. ⁵ Hãmri nê mẽ mjên mã xwỳnhja kutêp axpên mã kapêr o hkrĩ. Nhũm tokyx htêm kêt nhũm mẽ kutêp hkrĩ nê gaa nê ra õtxwa nê gaa nê hikwỳ nê ra õt pa.

⁶ —Tã nhũm kôt ã kamãt hãmri nhũm mjên mã xwỳnhhta hpõx o tẽ. Hãmri nhũm kot hkukamã harênh xwỳnhja mẽ õt o mẽ hikwỳ xwỳnhjê mã amỹra nê mẽ kãm: “Kwa mẽ hãmri. Ota mjên mã xwỳnhhta tẽ. Mẽ tokyx kãnhmã akri pu mẽ kutã mra.” Anê. ⁷ Hãmri nhũm mẽ hkrã hapôj nê kanê hpõk. ⁸ Nom nhũm mẽ hkwyjê hkĩnhã õ kanê kaxyw orti ho pa hkêt xwỳnhjaja ra mẽ kêp mẽ kanêja hkaprỳ hpa nhũm mẽ tee ri kot hpõk kaxyw. Hãmri nê orti hkwy hã hkwyjê hwỳ nê mẽ kãm: “Xê mẽ inhmã orti ho inhõ kanê go.” Anê. ⁹ Nom nhũm mẽ kêp nê nê mẽ kãm: “Ma mẽ inhõ kanê kamã orti grire kênã kot pa kêt mẽ amã ho go. Xê mẽ tokyx ma mra nê nhỹri amnhĩm hkwy japrõ mẽ.” Anê. ¹⁰ Hãmri nhũm mẽ tee ri mẽ kuma nê ma amnhĩm hkwy japrõr mã ma mra.

—Rõm nhũm mjên mã xwỳnhhta mẽ hãnh tẽ nhũm kanê kamã arĩ mẽ

orti xwỳnhjaja omu nê hã jêt kurê kumrêx. Hãmri nê ma hkôt mõn mẽ pikuprõnh xã hã ixkreja wỳr wa hã hkĩnh nê apkur kaxyw gjêx pa nhũm mẽ hã kahê. Mẽ gjêx xã hã oreja ra hwỳr hpõx jakamã nhũm mẽ hã kahê.

¹¹ —Tã nhũm ma mẽ kot orti japrõr mã mrar xwỳnhjaja hãmri amnhĩ to hapu nê mra nê tee ri mẽ hã hakwakre kupê nê htatak nê tee ri mẽ kãm akir nê mẽ kãm: “Xê mẽ inhmã kahê xã mẽ pa mẽ awỳr agjê.” Anê. ¹² Hãmri nhũm hprõ mã xwỳnhhta mẽ kuma nê mẽ kãm: “Tk. Nã ixte mẽ apumunhre hã kot pa kêt mẽ amã kahê xã mẽ. Kwa mẽ ma akupỹm mra.” Anê. ã mẽ ujarênh kot anhỹr. Anê.

¹³ Nhũm pre ã Jejus mẽ inhmã ujarênh anê. Hãmri nê mẽ inhmã:

—E kêr ka mẽ te kot amnhĩ kôt orti hkwy ho mõr xwỳnhjaja kot amnhĩ nhĩpêx pyrãk. Mẽ ate akupỹn ixwrỳk xã hã arĩgro pumunh kêt jakamã kêr ka mẽ apkati mẽ ixkamã ajamak rãhã ho apa. Anê.

Mẽ kãm mẽ àpênh xwỳnhjê jarênh Rukre 19.11-27

¹⁴ Nhũm Jejus arĩ mẽ inhmã kapêr nê mẽ inhmã:

—E kêr ka mẽ ixwakre kamã inhmã tanhmã amnhĩ nhĩpêx mex to ho ri apa pa hpãnhã mẽ amã amnhĩrer mex nê. Mẽ ate tanhmã inhmã amnhĩ nhĩpêx to ho apa xã hkôt kot paj mẽ amã amnhĩre. Te mễhõ my kot kãm mẽ àpênh xwỳnhjê nhĩpêx pyrãk. Koja nhỹhỹm nojarêr nê kãm mẽ àpênh xwỳnhjê mã hikukrêx piitã hkaga hpa. Õrkwỳ nê hpur nê hkrit. ãm mẽmoj piitã mẽ kot wakre kamã kãm hamãr o pa kaxyw mẽ kãm hkaga hpa. ¹⁵ Hãmri nê ahpỹnhã mẽ kãm kãxpore hkwy gõ. Mẽ kot kutêp kãm tanhmã ho rũnh to kaxyw ahpỹnhã mẽ kãm õr pa. Kot kãxpore pumunh mex xwỳnhja mã nhũm ho 5.000 nê kugõ. Nê kot hkôt

kax pê omunh xwÿnhja mã nhũm ho 2.000 nê kugô. Nê kormã kot omunh tÿx kêt xwÿnhja mã nhũm âm ho 1.000 pix nê kugô. Hâmri nê mẽ kãm amnhĩ jarê nê ma nhÿhÿm mō. ¹⁶ Hâmri nhũm kot ho 5.000 nê hamÿnh xwÿnhja kàxporeta py nê ma o mōr kurê kumrêx nê tanhmã ho àpênh to ho mōr kãm ra hipy axte ho 5.000 nê kumê. ¹⁷ Nhũm kot ho 2.000 nê hamÿnh xwÿnhja mãânên tanhmã ho àpênh to ho mōr kamã ra hipy axte ho 2.000 nê kumê. ¹⁸ Nom nhũm kot ho 1.000 pix nê hpyr xwÿnhja wa hkĩnh ã axtem nê ma o tẽ nê kãm kakwÿ nê kamã haxà nê hity hpa nê ma akupÿm tẽ.

¹⁹ —Tã nhũm mẽ õ patrãwja akupÿn mōn pōj nê mẽ kãm: “E mẽ amnê ixwÿr mra nê ixte mẽ amã kàxpore ho ixpigrãnh xwÿnhhta jarê. Tanhmã na ka prem ixkutêp inhmã hipêx to?” Anê. ²⁰ Hâmri nhũm kot ho 5.000 nê hpyr xwÿnhhta kumrêx hwÿr tẽ nê kãm: “E ota akàxporeta. Ate inhmã ho 5.000 pix nê òr tã pa amã ho rax nê amã hipy axte ho 5.000 nê kumê nhũm ho axkamur nê ra ho 10.000. Tã ota.” Anhÿr o kãm kapêr hãmri nê kãm kugô ²¹ nhũm amnhĩm hamÿ nê omu nê hkĩnh nê. Hâmri nê kãm: “Nà âm hãmri na ka inhmã ho anê. Ixte amã ho 5.000 pix nê òr tã ka ra inhmã ho rax jakamã kot kaj apê inhmã mẽ àpênh xwÿnhjê hkrãhtũm. E amnê ixwÿr axà pu mẽ apku nê pahkĩnh.” Anê.

²² —Hâmri nhũm hpãnhã kot ho 2.000 nê hpyr xwÿnhhta hwÿr tẽ nê õ patrãwta mã kãm: “E ota akàxporeta. Ate inhmã ho 2.000 pix nê òr tã pa amã ho rax nê amã hipy axte ho 2.000 nê kumê. Tã ota.” Anê.

²³ Hâmri nhũm kuma nê amnhĩm hamÿ nê omu nê hkĩnh nê. Hâmri nê kãm: “Nà âm hãmri na ka ã inhmã ho rax anê. Ixte amã ho 2.000 pix nê òr tã ka inhmã ho rax jakamã kot kaj apê inhmã mẽ

àpênh xwÿnhjê hkrãhtũm. E amnê ajaxwÿja ixwÿr axà pu mẽ apku nê pahkĩnh.” Anê.

²⁴ —Tã nhũm kot ho 1.000 pix nê hpyr xwÿnhhta hapu hã wa hkôt tẽ. Hâmri nê õ patrãw mã tanhmã kapêr to nê kãm: “Nà ra ixte apumunh tũm. Pêr axàhkurê pix kãm na ka hte apa. Nê amã akàxpore ho rax nê anhõ ho rax pix kukamã ajamaxpêr o ri apa. Nom mẽ pajaja mẽ ixàpênh rax pix kukwak ri na ka hte akàxpore rax nê apa. ²⁵ Jakamã na pa inhmã apyima nê. Nê akàxporeta py nê ma o tẽ nê kaxyw kre nê kamã haxà. Tã ka akupÿn mōn pōj pa ajarênh ma hãmri nê hkapa nê man akupÿn amã o tẽ. Tã ota anhõ 1.000ta.” Anê. ²⁶⁻²⁷ Hâmri nhũm tee ri kuma nê kãm: “Tk. Kwa amã ixpyima nê ate ixpumunh mex anhÿr tã na ka ixte amã kàxpore nhõrta pyr nê ma ho atêm. Nê mẽ kot mẽ kêp kàxpore jamÿnh o kuhê xà kamã mẽ kãm òr nhũm mẽ ixkutêp tanhmã inhmã ho rax to hkêt nê? Pêr âm amã kaga nê ate amnhĩ tomnu pix o ri apa xwÿnh.” Anê. ²⁸⁻³⁰ Hâmri nê kêp kàxporeta py nê nhãm jam kugô nê kãm: “E amÿ nê o tẽ nê kot inhmã ho 10.000 nê òr xwÿnhhta mã agô. Hâmri nê jahti pynê nê ma o tẽ nê kamàt kô kamã amê. Apênh nexti hã. Koja tee amÿra nê amnhĩ xà htÿx kamã hamak xàj tee ri amnhĩ nham o axpên kamnhar tÿx kaprÿ nê rĩ amnhĩ pumu.” Anhÿr o kãm kapêr nhũm kuma nê hpa hã kupy nê ma o tẽ. Hâmri nhũm mẽ õ patrãwja mẽ àpênh xwÿnhjê mã kãm: “E mẽ ate ixwakre kamã mẽ axàpênh mex xwÿnhjaja kot paj ã mẽ ato mex rax anê ka mẽ akĩnh nê. Nom mẽ kot inhmã mẽ àpênh mex kêt xwÿnhjaja kot paj mẽ kêp mẽõ mẽmojta jamÿ nê nhãm mẽhõm kugô nhũm hkaprĩ nê.” Anê. ã mẽ ujarênh kot anhÿr. Anê.

Jejus kot nhÿrmã mẽ piitã

tanhmã mẽ harênh to hã harênh
Matêwre 13.35-43, 13.47-50;
mãänêh Apokarip 20.11-15

³¹ Nhũm Jejus arĩ mẽ inhmã kapêr nê mẽ inhmã:

—Nê kot paj nhỹrmã akupỹn mẽ awỹr wrỹ nhũm Tĩrtũm kapêr o mẽ wrỹk xwỹnh piitã man ixkõt wrỹ. Kot paj wrỹ nê ixpê pahi maati hã ixkrĩ xã maati kamã inhmex nê nhỹ. ³²⁻³³ Hãmri nê Tĩrtũm kapêr o mẽ wrỹk xwỹnhjê mã anê nhũm mẽ ma krĩ piitã hkõt mẽ apiitã mẽ ato pikuprõnh pa nê akupỹn ixwỹr mẽ ato hapêx. Pa mẽ apumu nê tanhmã mẽ axunhwỹr to. Te ôwêhti jamãr o pa xwỹnh kot ôwêhti kaêx ã motre pununh nê nhãm nê motre xunhwỹr parta pyrãk. ³⁴ Hãmri nê ixupõk rũm mẽ ate ixkõt amnhĩ xunhwỹr xwỹnhjê mã ixkapêr nê mẽ amã: “E mẽ kajaja kot kaj mẽ amex kumrêx nê ri apa ho apa. Amnepêm kormã mẽmoj piitã hkêt ri na pa pre Inhĩpêêxã mẽ wa mẽ akukamã tanhmã ijamaxpêr to nê mẽ amã mẽmoj mex xunhwỹr rũnh nê. ³⁵ Tã ka prem ajapõj hãmri nê ixkõt amnhĩ xunhwỹ nê tanhmã ixto mex to ho ri apa.

Na pa pre inhmã prãm nê ixpa ka prem ixpumu nê ixkamã axukapri nê inhmã mẽmoj gõ pa kuku.

Nê na pa pre inhmã kôr nê ixpa ka prem ja hã ixpumu nê inhmã gõ pa ho ixkõ nê akupỹm ixihtyx.

Nê aa mẽ ate ixpumunh kêt tã ka prem nhỹri ixpumu nê amnhĩ nhõrkwỹ hwỹr ixwỹ.

³⁶ Nê na pa pre ixê pynajti nê ri ixpa ka prem ja hã ixpumu nê inhmã axê gõ pa haxã nê ri hã ixpa.

Nê na pa pre ixã nê inhĩkwỹ ka prem ixwỹr mra nê ixkane nê tanhmã ixto mex to pa akupỹm inhmex.

Nhũm prem ijaxã pa mẽ hagiênh xã kamã ixkrĩ ka prem ixwỹr mra nê tanhmã ixto mex to.

Ã mẽ ate ixto mex anhỹr o ri apa jakamã nhũm inhõ Papajja ixtã mẽ apumu. Tã koja ixtã mẽ ato mex rax nê.” Anê.

³⁷ —Kot paj ã mẽ ate tãm amnhĩ nhĩpêx xwỹnhjê mã ixkapêr anê. Hãmri ka mẽ tee ri inhma nê amnhĩ tã ixkukja nê inhmã: “Kwa xã mẽ pajaja na pa prem ã ato mex anê? Nã mẽ ixte ã anhĩpêx anhỹr kãm amnhĩ pununh kêt tã na ka ã mẽ ijarênh anê. Kwa nhỹri na ka pre amã prãm nê apa pa prem apumu nê amã mẽmoj gõ ka aku? Nê nhỹri na ka pre amã kôr nê apa pa prem amã gõ hkwỹ ka ho ixkõ? ³⁸ Nê nhỹri na pa prem apumu nê amnhĩ nhõrkwỹ hwỹr awỹ? Rỳ ka pre axê pynajti nê apa pa prem amã inhĩnhkã gõ ka hagiê? ³⁹ Nê nhỹri na ka pre axã nê anhĩkwỹ pa prem apumu nê akane? Nê nhỹri na prem ajaxã pa mẽ hagiênh xãja wỹr mra nê kamã tanhmã ato mex to? Nã mẽ pa hkêt.” Anhỹr o amnhĩ tã ixkukja. ⁴⁰ Hãmri pa mẽ amã: “Nã mẽ kêp amrakati xwỹnhjaja na pre htem pa pyrãk. Tã ka prem mẽ kamã axukapri hã tanhmã mẽ kutã anojarêt to ho ri apa jao te pa tanhmã ixto mex to ho apa pyrãk. ãm hãmri na ka prem ã mẽ ho mex anhỹr o ri apa.” Anê. Kot paj ã mẽ ate amnhĩ to mex xwỹnhjê mã ixkapêr anê.

⁴¹ —Hãmri nê hpãnhã apke rũm mẽ kot ixkõt amnhĩ xunhwỹr kêt xwỹnhjê mã tanhmã ixkapêr to nê mẽ kãm: “No mẽ kajaja kot paj ixupõk rũm mẽ unhwỹr xwỹnhhtajê hkĩnhã mẽ ato mex kêt nê. Amnepêm na pre Tĩrtũmja Satanasti mẽ mẽ kot tanhmã kãm amnhĩ nhĩpêx to ho mẽ pa xwỹnhjê mẽ mẽ ho hpimràatã mẽ kaxyw kuwy rax kumrêxja nhĩpêx. Mê kot amnhĩ tomnuj tỳx mỳrapê nhỹrmã kamã amnhĩ xã htỳx kamã hamak rãhã

nê pa ho pa kaxyw. Tã kot kaj mē ajaxwýja ma mē hkôt hwýr ajapêx. Mē apê Satanasti hkôt mē ate amnhî nhîpêx o apa xwýnh jakamã kot kaj mē uràn ma hwýr ajapêx pa. ⁴² Aa mē ate tanhmã ixto mex to hkêt. Na ka pre htem inhmã prãm nê ixpa hã ixpumu nom inhmã mēmoj nhôr kêt nê. Nê inhmã kôr nê ixpa hã ixpumu nom inhmã gô hkwý hkêt nê. ⁴³ Nê nhýri ahte ixpa hã ixpumu nom amnhî nhôrkwý hwýr ixwýr kêt nê. Nê ixê pynajre nê ixpa hã ixpumu nom inhmã axê nhôr kêt nê. Nê ixã nê inhîkwý hã ixpumu nom ixkane hkêt nê. Nê mē kot ijaxàr nhùm arî ixkrî hã ixpumu nom ixwýr amrar nê tanhmã ixto mex to hkêt nê. Á mē ate inhîpêx anhýr o apa jakamã e mē ma kuwy hwýr apa kurê kumrêx.” Anê. Kot paj á mē kãm ixkapêr anê. ⁴⁴ Hãmri nhùm mē tee ri inhma nê amnhî tá ixkukja nê inhmã: “Kwa ná á mē ijarênh anhýr kêt nê. Aa mē ixte á anhîpêx anhýre hã. Nhýri na pa prem tanhmã akute hã apumu? Ná aa mē ixte nhýri á ate amnhî nhîpêx anhýr á apumunhre hã.” Anê.

⁴⁵ —Koja mē á inhmã amnhî tá aprâr anhýr kaprý. Kot paj mē kãm: “Ná na ka pre htem mē kêp amrakati xwýnhjê pumu nê ám mē omunh o ri apa nê mē kamã axukaprí hkêt nê. Á mē hipêx anhýr jao te pa á inhîpêx anhýr pyrãk. Jakamã kwa mē tokyx ma kuwy hwýr ajapêx kurê kumrêx.” Anê. Kot paj á kuwy hwýr mē hanor anê. ⁴⁶ Hãmri nê hwýr mē rênh pa nhùm mē ma hwýr hapêx nê kamã amnhî xà htýx kãm hamak ráhã nê pa ho pa nê aa kator kêt kumrêx. No kêt mē ate tãm amnhî nhîpêx o mē apa xwýnhjaja kot kaj mē kurom ma Tirtüm mē wa inhô krî hwýr api nê kamã amex nê atîr tùm nê apa ho pa. Kot paj á ahpýnhã mē apiitã mē anhîpêx anê. Anê.

Nhùm pre á Jejus akupýn wrýk á amnhî kukamã mē inhmã ujarênh anê. Hãmri nê mē inhmã ujarênh pa.

26

Mê kot Jejus á àmnênh á amnhî jarênh

Makre 14.1-2; Rukre 22.1-2; Juãw 11.45-53

¹ Tã nhùm Jejus mē ixte hkôt ixpa ho ixpa xwýnhjê mã ujarênh pa nê mē inhmã:

² —E kot puj mē axte pahã apkati axkrut hãmri nhùm arîgro pê Pas kato. Jakamã koja mē piitã amnepêm Tirtüm kot Ejit nhô xwýnhjê pê mē pakukamã mē panhîgêjtê kator mã hamaxpêr nê hã hkînh kaxyw Jerujarê hwýr akuprô. Kamã koja mē ixpynê nê pî kahpa hã inhô nê ixpî. Koja mē tokyx á inhîpêx anê. Anê.

Nhùm pre á amnhî kukamã mē inhmã amnhî jarênh anê. ³ Rôm nhùm Jerujarê kamã patre krãhtümjê mē Ijaew pigêjtaja patre maati Kajpasja nhôrkwý kamã axpên wýr akuprô. ⁴⁻⁵ Ra mē kãm Jejus pîr prãm tá mē kãm mē kot hkôt kapêr mar o pa xwýnhjê pyma nê. Hãmri nê tee ri hamaxpêr nê axpên mã:

—Hêxta waa nê. Tanhmã kot puj wem ho nê kupîi? Kot puj mē pahkînh kãm tanhmã ho nhùm mē hkînh xwýnhjaja hã mē pakamã gryk týx nê. Pu mē hã axpu nê hã tanhmã axpên to. Jakamã kwa pu mē kormã tanhmã ho hkêt nê.

Anhýr o axpên ma.

Mêhõ ni kot Jejus krã gregrer á harênh

Makre 14.3-9; Rukre 7.36-50; Juãw 12.1-8

⁶ Tã nhùm Jejus kormã krî pê Petãn kamã Simãw nhôrkwý kamã apkur o nhý. Simãwja na pre hkã kro xápêr týx o pa nhùm Jejus ra arîgro hõ hã akupým hkã ho mex. Hãmri nê akupým ô krî hwýr pôj

nê òrkwý hwýr tē nē kuri apkur o nhý. ⁷ Hāmri nhūm mēhō nija hpôx ā omu nē hamaxpēr o:

—Ma koja pēr Jejusja pa hā apkati grēre hāmri nē ty. An pa ma hwýr tē nē mēhkuxwa xā ho hkuxwa.

Anē hāmri nē kēn jaka ho kàx kām mēhkuxwa xāja nhūm kumý nē ma hwýr o tē. Hāmri nē ho hkrā gregrer nē hā hkapīr pa nē ho hkuxwa hpa. Mēhkuxwa xā hā kàxpore xohtō rax tā nhūm ā hā hkapīr par anē. ⁸ Hāmri pa mē ixte Jejus kôt ixpa ho ixpa xwýnhjaja tee ri ā kot hipêx anhýr ā omu nē axpēn mā:

—Tk. Kwa na hā mēhkuxwa xàta kapīr pa. ⁹ Kop apu ma kot o htēm nē ho wēnē nē hpānhā kàxpore ho rax kumrēx nē hamýnh nē ho mē kēp amrakati xwýnhjē nhīpēx par o nhýx ja kām mex nē. Kwa mo na we ā amnhī nhīpēx anhýr kēt nē? Anē.

¹⁰ Hāmri nhūm Jejus amnhī tā mē inhma nē mē inhmā:

—Kwa kot ixto mex kaxyw kēnā na ka mē axtem nē ixtā kām akir. ¹¹ Mē kēp amrakati xwýnhjaja koja mē arī mē akot pa rāhā nē. Ka mē amā mēmo arīgro hā tanhmā mē ho ajuta hto hprām nē tanhmā mē ho ajuta hto nē mē kām mēmoj gō. No pa kot paj ri mē akôt ixpa ka mē ixto mex ry ho apa hkēt nē. Kot paj tokyx mē apiitā mē are. ¹² Ixtyk nhūm mē kot ijaxār kukamā na ā ixkuxwa anē. Ām hāmri na ā inhīpēx anē. ¹³ Ām hāmri na pa mē amā kot ā inhīpēx anhýrja jarē. Koja mē krī piitā hkôt axpēn mā ijarēnh ā kagā kamā ijarēnh o pa nē kamā nija kot ā inhīpēx anhýr kamā harē nē kuma. Anē.

Jut Kariot kot mē kām Jejus ā amnēnh

Makre 14.10-11; Rukre 22.3-6

¹⁴ Tā nhūm Jut Kariotja. Kēp mē ixpē Jejus kôt ixpa ho ixpa xwýnhjē pē 12 hō htā ra tanhmā hamaxpēr to nē axtem nē Satanasti nhýhā ma

patre krāhtūmjē hwýr tē nē tanhmā Jejus o mē mar to nē mē kām:

¹⁵ —E ot pa mē amā Jejus jarēnh o tē. Xā kot paj mē amā hā amýnē ka mē hpānhā inhmā amnhīre nā? Anē.

Hāmri nhūm mē kuma nē hkīnh nē. Hāmri nē kām:

—Nā kot paj mē amā amnhīre.

Anē hāmri nē kām kàxpore ho 30 nē òr kurē kumrēx nhūm hamý nē hkīnh nē kato nē ma tē. ¹⁶ Hāmri nē mē kām Jejus pynēnh kaxyw tānopxar o ri hkôt ri pa. Mē kot mar o ri pa xwýnhjē hkàx ā unēnh nē ma mē hwýr o htēm kaxyw.

Jejus kot hkôt mē pa xwýnhjē kutā apkur

Makre 14.12-21; Rukre 22.7-13; Juāw 13.21-30

¹⁷ Tā nhūm mē hkīnh pē Pasja kato. Amnepēm kormā Ejit kām mē pa ri na pre mē inhīgētjaja ôwēhti hkrare hkwy hpa nē ho anē nē kuku. Tīrtūm kot ja hā mē omunh nē Ejit nhō xwýnhjē nē mē kator kaxyw nhūm prem ā amnhī nhīpēx anē. Tā mē ixpē mē hkanrēhā mē htāmnhwýjaja na pa htem arī amgrā mē arīgro pē Pasja ā axpēn wýr akuprō nē jam ijamaxpēr pē mē urāk nē ôwēhti hkrare hkwy pa nē pāwti kaxkrit kēt kām kuku. Jakamā pa mē ixte Jejus kôt ixpa ho ixpa xwýnhja wa axkrut nē Jejus wýr tē nē amnhī tā hkukja nē kām:

—Kwa nhýri kot paj we wa tē nē mē akutēp Pas ā mē panhō hā apē? Anē.

¹⁸ Hāmri nhūm wa kām:

—Nā wa māmri ma Jerujarēja wýr wa tē. Nē krīm axā nē mēhō myti pumunh kurē kumrēx nē kām: “E Jejus na wa inhmē pa wa awýr tē. Na awýr hpēr mēnh o: ‘E na pa ra inhnojarēt. Jakamā nhýri kot paj we ixkôt ri mē pa ho mē pa xwýnhjē mē Pas ā axpēn kutā apku?’ Anhýr o awýr hpēr mē.” Anē. E wa ā kām akapēr anē kē war ama nē war amā òrkwý nhūmōk ā

ixkre rax ô jahkre. Kamā ra kaxyw mẽ paxàpkur xà hā mẽmoj piitāā. Ka wa omu hāmri nē māmri mẽ ixkutêp kamā mẽmoj tã apê. Anê.

¹⁹ Hāmri nhũm wa kuma nē ma Jerujarē hwyr tē. Nē hwyr axà hāmri nē ra kot wa kām mẽmoj jarēnh xà hkôt mẽmoj piitā omu hāmri nē mẽ ixkutêp mẽo hā àpēnh o wa xa.

²⁰ Tã nhũm kamàt pa mẽ Jejusja kôt ixkreta wyr ixpôx pa nē hwyr agjê nē ixàpkur kaxyw ixkrī. Mẽ ixte Jejus kôt ixpa ho ixpa xwýnhjê pé 12jaja pa mẽ ixpiitã Jejus kutã ixàpkur o ixkrī. ²¹ Hāmri nhũm Jejus tanhmã mẽ inhĩo jarēnh to nē mẽ inhmã:

—E pa mẽ amã mẽmoj jarē ka mẽ inhma. Kot kaj mẽ atô mẽ kām ixkurê xwýnhjê nhĩhkram ijaxà. Anê.

²² Hāmri pa mẽ tee ri kuma nē ixkaprĩ htýx nē. Hāmri nē axpēn pãnhã amnhĩ tã hkukja nē kãm:

—Kwa xà pa? Nà pa hkêt. Kot paj ã anhĩpêx anhỹr kêt kumrêx Pahiti.

Anhỹr o axpēn pãnhã kãm amnhĩ tã aprã. ²³ Hāmri nhũm mẽ inhmã:

—Nà ãm hāmri na pa mẽ amã ixkapêr. Mẽ ate ixkutã guhkrax kãm anhõ pãwti ho mry kagô nhek o akrĩ xwýnhjê hõ kot kaj mẽ kãm ixtã amýnê. ²⁴ Tĩrtũm kapêr ã kagà htũm ra kot ixkukamã harēnh xà hkôt koja mẽ tanhmã ixto rax nē xpi. Nom kot mẽ kãm ixtã àmnēnh mã xwýnhta hêxta waa nē. ã kot amnhĩ nhĩpêx anhỹrja mýrapê koja amnhĩ xà htýx kãm hamak rax kumrêx. Kop apu aa ô mãmãj nhõxà hkre rũm kator kêt ronhỹx ja kãm mex nē. Anê.

²⁵ Hāmri nhũm Jut Kariot kot mẽ kãm hā àmnēnh mã xwýnhta hāmri amnhĩ tã kuma nē kãm:

—Kwa xà we pa Jejus? Xà pa kot paj ã anhĩpêx anê? Kwa nà pa hkêt. Anê.

Hāmri nhũm kãm:

—Tý. Ka ã ate inhĩpêx anhỹr mã kēnã. Anê.

Jejus kot amnhĩ kamrô pikapĩr kukamã harēnh

Makre 14.22-26; Rukre 22.14-23; mãānēn Wam Korĩt 11.23-26

²⁶ Tã nhũm Jejus pãwti hõ py nē Tĩrtũm mã harē nē mẽ inhmã ho hkry nē ho mẽ inhĩpêx pa nē mẽ inhmã:

—E na pa ã mẽ amã pãwti ho hkry nē mẽ amã ôr anê. Ja pyrà nē koja mẽ ã inhĩpêx anê nē te ixto hkry hpar pyràk o inhĩpêx pa amnhĩ xà htýx kamã ijamak kãm ty. Nom mẽ anê kot paj ty. E mẽ māmri aku.

Anhỹr o mẽ inhmã amnhĩ jarē pa mẽ kuma nē kot mẽ inhmã ho hkry xwýnhja ku. ²⁷⁻²⁸ Hāmri nhũm hpãnhã kop py nē mã ho anê nē Tĩrtũm mã harē nē mẽ inhmã kugô nē mẽ inhmã:

—Mẽ kot ixpĩr xà hā arĩgroja ã koja ixkamrô axkapĩ. Nom koja mẽ amarĩ ixpĩr nhũm amarĩ ixkamrô hpikapĩr kêt nē. ãm paa. Pa kot paj mẽ anê mẽ ìhkram amnhĩ jaxà nhũm mẽ ã inhĩpêx anê nē xpi. Koja ixkamrô axkapĩ nhũm Tĩrtũm omu nē ixkukwak ri mẽ ate ixkôt amnhĩ xunhwyr xwýnhjê nē mẽ ate amnhĩ tomnuj piitã te amnhĩ katut kôt rēnh par pyràk o hipêx nē mẽ ato hkra. Ra amnepêm kot ã amnhĩ jarēnh anhỹr xà hkôt. Jakamã e mẽ ixkamrô pikapĩr mã ajamaxpêr pé wĩhti ho akôm o axpēn nhĩpêx. ²⁹ ãm hāmri na pa ã mẽ amã amnhĩ jarēnh anê. Kot paj axte wĩhti ho ixkôm kêt rãhã nhũm nhỹrmã inhõ Papaj akupýn mẽ awyr inhmê. Hāmri pu mẽ akupýn ixwryk xà hā arĩgrota ã pahkĩnh rax kumrêx. No ãm axtem tanhmã hā pahkĩnh to. Anê.

Nhũm pre ã Jejus mẽ inhmã amnhĩ jarēnh anê. Pa mẽ axpēn pãnhã kopta py nē wĩta kwý ho ixkô. ³⁰ Hāmri nē mẽ ixpiitã ho ixkôm pa nē Tĩrtũm mã mex ã gre.

Hāmri nê ijapôj nê hixêt prêk pê Oriwêhti hwÿr ma mra.

Jejus kot Simâw Pêtre mã kapêr ã harênh

Makre 14.27-31; Rukre 22.31-34; Juâw 13.36-38

³¹ Tã nhũm Jejus tanhmã mẽ ixte hkôt ixpa ho ixpa xwÿnhjê jarênh to nê mẽ inhmã:

—E Tirtũm kapêr ã kagà htũmta kot tanhmã mẽ akukamã mẽ ajarênh to nê mẽ ajarênh kot:

Kot paj ôwêhti jamâr o pa xwÿnhja pĩ hāmri nhũm ôwêhti hpi-grành pa nê ma anhgrà nê ri mra.

Anhÿr o kot mẽ ajarênh. Te ho mẽ apê ôwêhti pyrã nê ã mẽ ajarênh anê. Tã kamàt ja kamã koja mẽ tanhmã inhĩpêx to ka mẽ ixtã mẽ omu nê mẽ umaj ôwêhti pyrã nê apiitã ixkaga hpa nê ma aprôt nê mra. ³² Nê mẽ kot ixpĩr tã kot paj akupÿm ixtĩr. Hāmri nê ma akupÿm mẽ akukamã pika pê Garirej wÿr mō. Kamã kot puj mẽ axte xepên pumu. Anê.

³³ Hāmri nhũm Simâw Pêtre tee ri tanhmã mẽ kot amnhĩ nhĩpêx to hkukamã amnhĩ jarênhja ma nê hkaprĩ nê kãm:

—Tk. Nà kot paj ã amnhĩ nhĩpêx anhÿr kêt nê Pahihti. Koja pahkwÿja akaga japêr no pa kot paj aa akaga hkêt nê. Kot paj akôt ixpa rãhã nê. Anê.

³⁴ Hāmri nhũm Jejus kãm:

—Nà ra ixte akukamã ixãhpumunh mex. Koja apkati hkôt krãhyre hkâr kêt ri ka ra mẽ umaj ate ixkôt apa hkêt ã mẽ kãm amnhĩ tã axãprãr o axkrunêpxi kãm ga. Kwa jam ajamxpêr tÿx nê. Anê.

³⁵ Hāmri nhũm tee ri kuma nê axte kãm:

—Kwa nã. Mẽ kot ajaxâr nê apĩr tã kot paj arĩ akôt ri ixpa nhũm mẽ pahto amÿrà nê tanhmã panhĩpêx to. Nà kot paj aa akaga hkêt nê.

Anhÿr o kãm amnhĩ jarê. Pa mẽ ijaxwÿja ã kãm amnhĩ jarênh anê.

Jejus kot Tirtũm mã amnhĩ jarênh Makre 14.32-42; Rukre 22.39-46

³⁶ Tã nhũm Jejus mẽ inhmã anê pa mẽ ma nhÿri mẽ kot kãm “Gesêm” anhÿr xwÿnhja wÿr mra. Hāmri nhũm mẽ inhmã:

—E mẽ jar ixkutêp akrĩ. Pa ma mütũm tẽ nê Tirtũm mã amnhĩ jarê mãn. Anê.

³⁷ Hāmri nê mẽ ixkwÿjê ho axkrunêpxi nê amnhĩ kôt mẽ kuwÿ. Simâw Pêtre nê Jepetew kra pijakrut pê Xiakre nê Juâwja wa nhũm amnhĩ kôt mẽ kuwÿ nhũm mẽ ma hkôt mra. Hāmri nhũm Jejus tee ri mẽ kot tanhmã hipêx tota kukamã hamaxpêr o hkaprĩ nê amnhĩ kamã kahak tÿx nê. ³⁸ Hāmri nê mẽ kãm:

—Hêxta waa nê. Na pa tee ri amnhĩ xã htÿx kamã ijamakja kukamã ijamxpêr nê amnhĩ kamã ixkahak tÿx o ra ixkaprĩ nê. Te ixkaprĩ kot ixpĩr o mōr pyrãk. Jakamã e mẽ jar anohtÿx nê ixto Tirtũm wÿr o akrĩ kê tanhmã ixto pa mẽ kot tanhmã ixtoja kutã ixihtÿx nê. Anê.

³⁹ Hāmri nê mẽ kurũm htêm grire nê Tirtũm mã amnhĩ jarênh kaxyw htu mÿr pê tẽm nê pikap nõ nê kãm:

—Kwa Papaj. Hêxta waa nê. Inhmã amnhĩ xã htÿx kãm ijamak prãm kêt kumrêx. Na pa tee ri amnhĩ kukamã ijamxpêr nê amnhĩ kamã ixkahak tÿx nê. Jakamã kot kaj amã inhnê ja ho ajapêx prãm nê mãmri inhnê ho ajapêx nhũm mẽ kãm ixkurê xwÿnhjaja tanhmã ixto hkêt nê. Rÿ ko. Kot kaj amã mẽ kot tanhmã ixto hprãm kê mẽ mãmri tanhmã inhĩpêx to. Nom pam inhmã hprãm xã hkôt kêt. Anê.

⁴⁰ Hāmri nê kãnhmã xa nê akupÿm Simâw Pêtreja mẽ hwÿr tẽ nê tee ri mẽ omu nhũm mẽ ra ôt pa nê hikwÿ. Nhũm mẽ omu nê Simâw Pêtre mã kãm:

—Kwa Simâw Pêtre. E mẽ hāmri akrã hapôj. Kwa wem anohtÿx grire ⁴¹ nê ixkutêp amnhĩ to Inhō

Papaj wÿr o akrî kê mê ixkôt tanhmã mê ato htã ka mê amã mê uma xaj ixkaga hkêt nê arî mê kutã amnhî to htÿx nê akuhê. Æ mê amã mê ate amnhî nhîpêx anhÿr prãm nom kormã mê amã maa.

⁴² Anhÿr o mê kãm kapêr hãmri nê akupÿm tẽ nê axte Tirtûm mã amnhî jarẽ nê kãm:

—Kwa Papaj. Nà inhmã amnhî xà htÿx kãm ijamak prãm kêt. Na pa amnhî kukamã ijamaxpêr nê amnhî kamã ixkahak tÿx kumrêx. Jakamã kot kaj amã inhnê ja ho ajapêx prãm nê mãmri inhnê ho ajapêx kê mê kãm ixkurê xwÿnhjaja tanhmã ixto hkêt nê. Nom ko. Kot kaj amã mê kot tanhmã ixto hprãm kê mê mãmri tanhmã inhîpêx to. Nom pam inhmã ja prãm xà hkôt kêt. Anê.

⁴³ Hãmri nê kànhmã xa nê Simãw Pêtreja mê hwÿr akupÿm tẽ. Nê mê omu nhũm kê mê axte gôr nê hikwÿ. Ra mê ôtixa htÿx nê axte gôr nê hikwÿ. Nhũm Jesus tẽ nê tee ri mê omunh o xa ⁴⁴ nom axte tanhmã mê kãm nê hkêt nê. Æm awjanã nê akupÿm tẽ nê kê wam kot Tirtûm mã amnhî jarênh xà hkôt axte kãm amnhî jarẽ. ⁴⁵⁻⁴⁶ Hãmri nê akupÿm mê hwÿr tẽ nê mê kãm:

—Kwa xàn ka mê arî gôr nê anhîkwÿ? E mê tokyx akrã hapôj. Na mê ra mê kot ixwÿr mrar nê ixpynênh mã. Koja mê tokyx ixkutã mê kot amnhî xunhwÿr xwÿnhjaja mê kãm ixtã amÿnê. Ota ra kot ixtã mê kãm àmnênh xwÿnhhta tẽ. E mê tokyx kànhmã akrî pu mê kutã mra. Anê.

Mê kot Jesus pynênh ã harênh

Makre 14.43-50; Rukre 22.47-53; Juãw 18.2-11

⁴⁷ Nhũm Jesus mê kãm kapêr o ãm rãhã nhũm Jut Kariot pẽ mê inhîõja hwÿr tẽ. Nê amnhî kôt mê ohtô nê hwÿr mê o tẽ nhũm mê wapohti nê kô jamÿ nê hkôt o mra. Patre krãhtûm mê Ijaew krãhtûmjaja kot Jesus wÿr mê rênh xwÿnhjaja nhũm

mê man hkôt Jesus wÿr mra. ⁴⁸ Na pre ra Jut Kariot amnhî kukamã mê kãm amnhî jarênh o:

—Kot paj ixkumrêx hwÿr tẽ ka mê ixkôt hapu hã mra. Kot paj hwÿr tẽ nê kãm ixkapêr nê kahti hkôt kumÿ. Ka mê hã ixpumu nê hwÿr mra nê unênh kurê kumrêx. Ixte kahti hkôt mÿnh xwÿnhhta kot kaj mê unê. Anê.

⁴⁹ Hãmri nê Jesus wÿr tẽ nê kãm:

—Pa Jesus? Xàn ka kormã anhôt kêt nê xa?

Anê nê kahti hkôt kumÿ. ⁵⁰ Hãmri nhũm amnhî tã omu nê kãm:

—Kwa Jut. Ate tanhmã ixto kaxyw mã xwÿnh jakamã e kam nê mãmri tanhmã ixto. Anê.

Hãmri nhũm Jut kôt mê mrar xwÿnhjaja Jut kot kahti hkôt mÿnh ã omu nê hwÿr mra nê unênh kurê kumrêx. ⁵¹ Hãmri nhũm mê inhîõja tee ri ja hã mê omu nê õ wapo kapa nê patre maati mã àpênh xwÿnh kot mê hkôt htêm xwÿnhhta mã ho apê. Nê kot ho hkrã nhîpônã mã tã kuh-paw nê upôk rûm hamak nhîkjê pix krãhta. ⁵² Hãmri nhũm Jesus omu nê nê kãm kapêr nê kãm:

—Kwa akupÿm awapota hkãm haxà nê amarî xa. Na htem wapo ho mê oprê ho pa nhũm mê amnhî xwar wapo ho mê kupa. ⁵³ Xà kot paj amnhî to Tirtûm wÿ nhũm ãm inhma nê tanhmã jajê pẽ ixpytãr to hkêt nê? Nà kot paj amnhî to kuwÿ nhũm ixwÿr kapêr o mê wÿk xwÿnhjê rênh kurê kumrêx nhũm mê ohtô rax kumrêx nê wÿr nê mê kêp ixpytã. ⁵⁴ Nom kot paj ã amnhî to hwÿr anhÿr kêt nê. Tirtûm kapêr ã kagã htûm kot amnepêm ixkukamã ã mê kot inhîpêx anhÿr ã mê harênh jakamã kwãr mê mãmri Tirtûm kãm hprãm xà hkôt ã inhîpêx anê. Anê.

⁵⁵ Hãmri nê hpãnhã mê kot unênh xwÿnhjê mã kapêr nê mê kãm:

—Kwa na pa pre apkati mê Tirtûm mã amnhî jarênh xà hã ixkre kamã mê kãm ixujarênh o

ixpa. Ka prem tokyx ixpynênh kêt tâ jarâhâ te ixte amnhî tomnuj xwÿnh pyrâk o inhîpêx nê ixwÿr wapohti nê kô hâ akapên nê ixwÿr tē. ⁵⁶ Tâ nom ra Tîrtûm kapêr â kagâ htûm kamâ Tîrtûm nhÿ hâ mē kapêr xwÿnh kot mē akukamâ mē ajarênh nê mē atâ kagâ xâ hkôt na ka mē ri â inhîpêx anê. Anê.

Nhûm pre â Jejusja amnhî tâ mē kâm kapêr anê. Hâmri pa mē ixte hkôt ixpa ho ixpa xwÿnhjaja mē omu nê tee ri amnhî kukamâ ijamaxpêr nê mē umaj ixprôt nê angrâ nê ma inhmarr kurê kumrêx.

Mê kot patre maati hwÿr Jejus o môr â harênh

Makre 14.53-65; Rukre 22.54-55, 22.63-71; Juâw 18.12-14, 18.19-24

⁵⁷ Nhûm pre Ijaew krâhtûmjê mē Tîrtûm kapêr tûm o mē ahkre xwÿnhjaja ra patre maati Kajpas nhôrkwÿ hwÿr akuprô nê Jejus kutêp hkrî. Hâmri nhûm mē kot unênh xwÿnhjaja ma mē hwÿr o tē. ⁵⁸ Hâmri nê mē hwÿr ho axâ nê hkôt gjêx pa. Nhûm Simâw Pêtre mē hkôt hapu hâ mē htânopxar o tē nê kîtare hwÿr axâ nê pôristi nhîhkô hâ nhÿ. Hâmri nê tee ri Jejus kukamâ hamaxpêr o nhÿ nê hamaxpêr o:

—Kwa tanhmâ koja mē ixpê mē inhô Pahihti nhîpêx to? E pa jar amÿm tanhmâ mē kot hipêx to hâ mē omunh o nhÿ. Anê.

⁵⁹ Hâmri nhûm patre krâhtûmjê mē juistijaja kâm Jejus pîr prâm tÿx nê. Jakamâ na prem Ijaew wa ho hamêxkrut nê axpên kôt tanhmâ mē kâm ho hêx to nhûm mē kot hâ wa mar nê ra hpîr kaxyw mē pikuprônê xwÿnhjê kapi. ⁶⁰ Jakamâ nhûm prem axpên pânâhâ mē hwÿr mra nê tanhmâ ho hêx to. Nom axpên kôt harênh kêt nê. Âm ahpÿnhâ tanhmâ ri harênh to nom wahô wa axkrut nê axpên kôt harênh kêt nê. Jakamâ nhûm mē tee ri hâ mē kuma.

Tâ nhûm ja wa mē hwÿr tē nê axpên kôt harê nê mē kâm:

⁶¹—Nâ na pre tanhmâ Tîrtûm mâ amnhî jarênh xâ hâ ixkre jarênh to nê harênh o: “Kot paj nhÿrmâ inhmâ ixkreja grânh par prâm nê kugrà hâmri nê âm ixtâ apkati axkrunêpxi pix nê akupÿm hipêx pa. Ja kaxyw ixâhpumunh tÿx.” Anhÿr o na amnhî jarê pa wa kuma.

⁶² Anhÿr o mē kâm ho hêx. Hâmri nhûm patre maati pa wa kuma nê kânhmâ xa nê Jejus mâ kapêr nê kâm:

—Kwa xâ âm hâmri na wa â ajarênh anê nâ? Xân ka pre â amnhî jarênh anê? E mē inhmâ tanhmâ amnhî jarênh to. Anê.

⁶³ Nom nhûm amarî mē kâm xa nê mē kâm tanhmâ nê hkêt nê. Hâmri nhûm patre maati pa tee ri omu nê axte kâm kapêr nê kâm:

—Kwa aprî hâ mē inhmâ tanhmâ amnhî jarênh to. Tîrtûm noo mâ amâ ixkapêr jakamâ kêr ka akatât kôt mē inhmâ amnhî jarê nê amnhî to axêx kêt nê. Xâ apê Tîrtûm Kra? Xâ ka na pre Tîrtûm mē ixkaxyw axâm? Kwa akatât kôt mē inhmâ amnhî jarê. Anê.

⁶⁴ Hâmri nhûm tâ hprî hâ mē kâm amnhî jarê nê mē kâm:

—Tÿ. Nâ âm hâmri na ka â ijarênh anê. Ixpê Tîrtûm kot mē akaxyw ixâm xwÿnhnta na pa. Na pre mē awÿr inhmê pa mē awÿr wrÿ. Tâ kot paj nhÿrmâ axte kaxkwa rûm amnê akupÿn kakrâ kamâ mē awÿr wrÿ. Hâmri nê Tîrtûm xâhpumunh o âhpumunh xwÿnhnta nhîhkô hâ nhÿ hâmri nê pam tanhmâ mē ajarênh to ka mē amnhî tâ ixpumu nê inhma. Anê.

⁶⁵ Hâmri nhûm patre maati pa tee ri â kot amnhî jarênh anhÿr â kuma nê kamâ gryk tÿx nê. Hâmri nê gryk xâj kêp patre maati hâ ê kapa nê hkaxônê pa nê kumê nê hkwyjê mâ kâm:

—Tk. Kwa mo kaxyw kot puj mē axte ri tanhmâ kot amnhî tomnuj to hâ harênh xwÿnh ô japêr? Tâm kot amnhî pé Tîrtûm Kra hâ amnhî

jarênh ã amnhĩ to hêx nhũm mẽ pahte mar kênã. ⁶⁶ Jakamã e kwa tanhmã kot puj mẽ hipêx to? Anê.

Hãmri nhũm mẽ kãm:

—Nã ã kot amnhĩ jarênh anhÿr mÿrapê koja ty. Ra htyk mã tãm kênã. Anê.

⁶⁷ Hãmri nê tanhmã hipêx kati hto. Mẽ hkwyjaja hkuk kuhtô nê ïhkra ho htak nhũm mẽ hkwyjaja ïhkra hpo ho htak nê hã hpêr o axkê nê kãm:

⁶⁸ —E apê Tirtũm Kra hã ate amnhĩ jarênh jakamã mãn urak nê axahpumunh tÿx. Jakamã e mẽ kot atak xwÿnhnta nhĩxi jarê pa mẽ ama. Anê.

Simãw Pêtre kot Jejus kôt pa hkêt ã amnhĩ jarênh

Makre 14.66-72; Rukre 22.56-62; Juãw 18.15-18, 18.25-27

⁶⁹ Rôm nhũm Simãw Pêtre arĩ kítare kamã nhÿ. Hãmri nhũm mẽ kãm apênh xwÿnh nitita omu nê hpri hã omunh kurê kumrêx. Hãmri nê kãm:

—Xê pêr apê Jejus kôt mẽ pa xwÿnhjê hõ na ka. Anê.

⁷⁰ Hãmri nhũm tee ri amnhĩ tã kuma nê kãm mẽ uma xàj mẽ kãm amnhĩ tã aprã nê kãm:

—Tk. Kokÿ. Ixte mēhõ my ata pumunhre hã. Anê.

⁷¹ Hãmri nê mẽ umaj kãnhmã xa nê tẽ nê kítare hwÿr hakwakrem ahte mẽ hkàx ã xa. Tã nhũm hpãnhã hõja omu nê hã mẽ kãm:

—Xê ma pêr ãm hãmri na mẽ harê. Kêp Jejus kôt ri mẽ pa xwÿnhjê hõ na pẽr. Anê.

⁷² Hãmri nhũm amnhĩ tã kuma nê kãm:

—Tk. Nã mẽ ri ã amnhĩ krã hkôt ri ixto axêx anhÿr kêt nê. Ixte aa mēhõta pumunh kêt kumrêx. Anê.

⁷³ Tã nhũm mẽ hkwyjaja hwÿr mra nê kãm kapêr nhũm tanhmã mẽ kãm kapêr to nhũm mẽ kuma nê kãm:

—Kwa pêr ãm hãmri na mẽ ajarê. Apê Jejus kwÿ na ka. War akapêr kot axpên pyrak kênã. Anê.

⁷⁴ Hãmri nhũm tee ri mẽ kuma mẽ kãm amnhĩ tã aprãr kãm hihtÿx nê mẽ kãm:

—Kwa nã. Na pa Tirtũm noo mã mẽ amã amnhĩ jarê. Kot paj amnhĩ to ixêx japêr nhũm inhma nê hã tanhmã ixto. Nã urak ixpê Garirej nhõ xwÿnhre hã. Ixte mēhõ mÿj pumunh kêt kumrêx tã ka mẽ xatã axpên kôt ixte hkôt ixpa ho ixpa xwÿnh ã ixkamnhĩx o xa.

Anhÿrja o ra mẽ kãm amnhĩ tã aprãr o axkrunêpxi nhũm krãhyre hkàr kurê kumrêx. ⁷⁵ Hãmri nhũm Simãw Pêtre kuma nê ra Jejus kot hkukamã krãhyre hkàr kêt ri kot hã amnhĩ aprãr o axkrunêpxi hã harênhnta mã hamaxpêr kurê kumrêx. Hãmri nê kãnhmã hakry hpar o tẽ nê hkaprĩ htÿx kumrêx nê kítare pê kato nê tẽ nê awry hã xa nê mÿr rax nê.

27

Mẽ kot pahшти Pirat wÿr Jejus o htêm ã mẽ harênh

Makre 15.1; Rukre 23.1-2; Juãw 18.28-32

¹ Tã nhũm ra myt kator o mõi mẽ nhũm mẽ hkrãhtũmjê mẽ patre krãhtũmjaja axpên wÿr pikuprõnh pa. Hãmri nê Jejus ã axpên mar o hkrĩ nê axpên mã:

—Nã kot puj mẽ hã amÿnê kê mẽ kupĩ. Kêp Tirtũm Kra hã kot amnhĩ jarênh o amnhĩ to hêx kênã. Anê.

² Hãmri nê mẽõ pôristijê mã anê nhũm mẽ hpa hpre hpa nê ma pahшти Pirat wÿr o tẽ. Pirat kêp Rôm nhõ pahшти nhÿ hã mẽ ixpê Ijaewjê ho amnhĩptar jakamã nhũm mẽ ma hwÿr o tẽ nê ïhkram haxà.

Jut Kariot kot amnhĩ pÿr ã harênh Atre 1.15-19

³ Rôm nhũm Jut Kariot tee ri mẽ kot Jejus pÿr kaxyw mẽ harênh ma nê hkaprĩ nê. Ra kot mẽ kãm hã àmnênh tã mẽ kot hpÿr kaxyw ã mẽ harênh ma nê tee ri amnhĩ kukamã hamaxpêr o hkaprĩ htÿx nê. Hãmri nê hamaxpêr o:

—Hêxta waa nê. Mo na pa pre ri axtem nê ã amnhî nhîpêx anê? Nà na pa pre amnhî tomnuj tỳx kumrêx. Anê.

Hāmri nê ra mē kot kām kàxpore ho 30 nê òrta jamỳ nê ma akupỳm patre krāhtùmjê mē Ijaew pigêtjê hwỳr o tē. Hāmri nê mē kot Tirtùm mǎ amnhî jarēnh xà hǎ ixkreja wỳr mē hwỳr axà ⁴ nê nhỳri mē omu nê mē hwỳr tē nê mē kām:

—E ota mē akàxporeta. Na pa ã mē amǎ Jejus ã ixàmnēnh anhỳrja o amnhî tomnuj tỳx nê. Kot tām amnhî nhîpêx o pa htǎ pa axtem nê ã mē amǎ hǎ ixàmnēnh anê. Jakamǎ e mī. Mē akupỳm akàxporeta jamỳ. Kot paj amnhīm hamỳnh kêt nê. Anê.

Hāmri nhùm mē tee ri kuma nê kām:

—Kokỳ. Nom ka na ka pre mē ixwỳr tē nê ho mē inhmar kēnǎ. Anê.

⁵⁻⁷ Hāmri nhùm tee ri mē kuma hāmri nê pikap kàxpore rēnh pa nê ma tē nê kato. Hāmri nê hkaprī htỳx kumrêx nê hamaxpēr o:

—Kwa tanhmǎ kot pa we amnhî to? Nà kot paj amnhî pī. Anê.

Hāmri nê krī pē kato nê ma mē kot pika kakwỳnh nê ho amnhīm poti nhîpêx xà hǎ pika hwỳr tē hāmri nê amnhî mut mǎ ê nê ho amnhî pī. Hāmri nhùm patre krāhtùmjaja harēnh ma nê tee ri kot kàxpore rēnh ta kawrà nê hǎ axpēn kukja nê axpēn mǎ:

—Kwa tanhmǎ kot puj wem ja ho? Jut kot mē pamǎ Jejus ã àmnēnh nhùm mē pahte hpīr xà hǎ kàxpore na. Jakamǎ kot puj mē ho Tirtùm mǎ amnhî jarēnh xà hǎ ixkre ho mex kêt nê. Finat Mojes kot ja nê mē panhīgêtjê kurê jakamǎ na htem mē hpar xà hǎ kàxpore ho ixkreta ho mex kêt nê. Jakamǎ kwa tanhmǎ kot puj mē ho? Anê.

Hāmri nhùm ja mē kām:

—E na pa ra ijamaxpēr. Pu mē ho jut kot amnhî pīr xà hǎ pikata japrô hāmri nê kamǎ jar mē kēp mē

pahkwỳ hkêt htyk xwỳnhjê jagjēnh o papa. Anê.

Hāmri nhùm mē kuma nhùm ja mē kām mex nê. Jakamǎ nhùm arīgro hō hǎ nhùm mē ma hwỳr mra nê haprô. ⁸ Hāmri nê hǎ hixi mē nhùm kēp “mē hkamrô pikapīr xà kamǎ pika”. Mē kot Jejus pīr xà hǎ kàxpore ho haprô jakamǎ nhùm prem ã hǎ hixi mēnh anê. Nhùm htem arī axpēn mǎ ã hixi jarēnh anhỳr o pa. ⁹⁻¹⁰ Nhùm pre ra amnepēm Tirtùm nhỳ hǎ kapēr o pa xwỳnh finat Jeremīsti mē hkukamǎ hprī hǎ ja jarē nê hǎ kagǎ. Nê hǎ kagǎ o:

Koja Ijaew nhō patrejaja mēhō kot mē kām mēhō my hǎ àmnēnh pānhǎ kām kàxpore ho 30 nê òr xwỳnhja jamỳ. Hāmri nê ma o tē nê nhỳri mē kot amnhīm pika kakwỳnh nê ho poti nhîpêx o pa xà hǎ pika hkwy japrô. Ra Tirtùm kot inhmǎ mē harēnh xà hkôt koja mē ã amnhî nhîpêx anê. Anê.

ã finat Jeremīsti kot Tirtùm nhỳ hǎ mē hkukamǎ mē harēnh nê hǎ kagǎ anhỳr xàja kôt nhùm prem ã amnhî nhîpêx anê.

Pahihti Pirat kot Jejus kukjêr ã harēnh

Makre 15.2-5; Rukre 23.3-5; Juǎw 18.33-38

¹¹ Rôm nhùm mē pahihti Pirat wỳr Jejus o tē nê hwỳr ho axà nê kutǎ ãm nhùm xa nhùm Piratja omu nê kām:

—E. Kwa inhmǎ amnhî jarē. Xà apē Ijaew nhō pahi na ka nà? Xà ka na htem amnhî wỳr ajamār o pa? Anê.

Hāmri nhùm kām:

—Tỳ. Nà ãm hāmri na ka ijarē. Anê.

¹² Hāmri nhùm mē hkrāhtùmjê mē patre krāhtùmjaja pahihti Pirat mǎ tanhmǎ ho kapēr punuj to. Nhùm amnhî tǎ mē kuma nom tanhmǎ kām amnhî tǎ àprār to hkêt

nê. ¹³ Jakamã nhũm pahihiti Pirat tee ri ja hã omu nê kãm:

—Kwa xà na ka ã mẽ kot ato kapêr anhÿrja mar kêt nê nà?

¹⁴ Anhÿr tã nom nhũm Jejus akryk xa nê axte tanhmã kãm nê hkêt nê. Hãmri nhũm Pirat tee ri kot ã amnhĩ nhípêx anhÿr ã omu nê hamaxpêr o:

—Kokÿÿ. Mẽ kot ho kapêr punuj tã nhũm ãm mẽ kuma nê te kãm mẽ uma hkêt pyrà nê tanhmã inhmã amnhĩ tã ãprâr to hkêt nê. Anê.

Pirat kot Jejus pÿr kaxyw hã ãmnênh ã harênh

Makre 15.6-15; Rukre 23.13-26; Juãw 18.39-19.16

¹⁵⁻²¹ Tã nhũm Pirat kormã mẽ kot axpên mar xà hã ixkre kamã ÿr rãhã nhũm hprôja hwÿr hpêr mẽ nê kãm:

—Xê tanhmã mẽ kãm Jejusja ã axãmnênh to hkêt nê. Na pa kamãt ja kamã hkôt amÿti nê tee ri hkukamã ijamaxpêr. Kot amnhĩ to mex xwÿnh na. Aa tanhmã kot amnhĩ tomnuj to hkêt jakamã xê tanhmã mẽ kãm hã axãmnênh to hkêt nê. Kwarĩ. Anê.

Hãmri nhũm Piratja kuma nê hamaxpêr o:

—Nà ixte Ijaew krãhtũmjê pumunh tũm. Ijaew kwÿjaja kãm Jejus kÿnh nhũm mẽ hkrãhtũmjaja kot mẽ hã Jejus kamã gryk nê. Jakamã ixte tanhmã mẽ kãm hã ixãmnênh to kaxyw na mẽ ã ixwÿr o htêm anê. Anê.

Na htem Pas nhô arĩgrota hapôx mẽ nhũm pre htem Ijaew o amnhĩptâr xwÿnhja mẽ kãm mẽ hagjênh xà kamã hkrĩ xwÿnhjê ho hpÿnh nê mẽ hapôj. Mẽ kãm hprãm xà hkôt nhũm mẽ kãm mẽ hapôj nhũm mẽ akupÿm kapôt ã hamakêtkati nê amnhĩx pa. Jakamã nhũm ra mẽ hagjênh xà kamã mẽhõ my pê Parapasja hkrĩ. Na pre tanhmã amnhĩ tomnuj to nhũm mẽ mÿrapê unê nê haxà. Jakamã nhũm Ijaewjaja mẽ ho amnhĩptâr xwÿnh

Pirat wÿr akuprô nê kuhê nhũm mẽ kãm:

—E kot paj jarãhã mẽ amã mẽ hagjênh xà kamã mẽ hkrĩ xwÿnhjê hõ mã inhũre kê ãmnhĩx kato nê ri pa. Nhÿ kot paj mẽ amã kãm inhũre? Xà Parapas nà? Xà mẽ akwÿ kot amnhĩm ho mẽ anhõ pahihiti Jejus pê Tÿrtũm kot mẽ akaxyw ãm xwÿnhnta kot paj mẽ amã kãm inhũre? Nhÿ wehe? E mẽ inhmã nhÿ jarê. Anê.

Pirat na pre mẽ inhõ patre krãhtũmjê pumunh mex nê. Ijaew kãm Jejus kapêr mar prãm tÿx ã nhũm mẽ hã kamã gryk tÿx nê hwÿr o mrarja kôt nhũm mẽ omunh mex nê. Jakamã ã hã mẽ hkukjêr anê. Hãmri nhũm mẽhpigêt mẽ patre krãhtũmjaja kuma hãmri nê mẽ pikuprõnh nê mẽ kuhê xwÿnhjê mã kãm:

—Kwa mẽ kãm anê kê mẽ pamã Parapas mã mãn ure nê mãmri Jejus Kris pĩ. E kwa mẽ tokyx kãm anê kê Parapas mã ure. Anê.

Hãmri nhũm mẽ mẽ kuma nê pahihiti Pirat mã kãm:

—Nà mẽ inhmã Parapas mã mãn anhũre. Anê.

²² Hãmri nhũm tee ri mẽ kuma nê mẽ kãm:

—Kwa no mẽ ate Jejus pê Tÿrtũm kot mẽ akaxyw ãm xwÿnh ã harênh xwÿnhnta? Tanhmã kot paj hipêx to? Anê.

Hãmri nhũm mẽ kãm:

—Apĩ ri. Tokyx pĩ kahpa hã anhõ kê ty. Anê.

²³ Hãmri nhũm tee ri mẽ kuma nê mẽ kãm:

—Tk. Kwa nà. Tanhmã kot amnhĩ tomnuj tore hã kot pa kêt ri pĩ kahpa kunhõ nhũm ty. Anê.

Hãmri nhũm mẽ xatã ãmra kamã kãm:

—Kwa pĩ kahpa hã mãn anhõ kê ty. Kwa tokyx ã mẽ inhmã hipêx anê. Anê.

²⁴ Hãmri nhũm tee ri ja nê tanhmã mẽ kãm kapêr to no nhũm mẽ mar kêt nê. Nhũm tee ri mẽ ãmra mar o xa. Hãmri nê kãm Jejus

pîr prâm kêt jakamã amnhîm gô hkwý janhi nê mê piitã mê noo mã amnhî nhîhkra kuhôn h o xa. Mê kot hã omunh xà hkôt kãm hpîr prâm kêt ã omunh kaxyw. Hãmri nê mê kãm:

—E na pa mê anoo mã ã amnhî nhîhkra kuhôn anê ka mê ja hã ixpumu. Nà inhmã hpîr prâm kêt. Tanhmã kot amnhî tomnuj tore hã. Mê kaxipixjaja mê amã hpîr hprâm jakamã mê kam nê tanhmã ho. No pa kot paj tanhmã ho hkêt nê. Âm kwarî ho kwarî. Anê.

²⁵ Hãmri nhùm mê kuma nê kãm: —Tôe. Nà âm hãmri. Kot paj mê pamjaja amnhî tâ htykja nhô. Nê mê ixkra nê mê ixtãmnhwýjê mê amnhî to ixpimràatã amnhî tâ kunhò. Kê Tirtùm kãm tanhmã hã mê ixtô hto hprâm nê mamri tanhmã hã mê ixtô hto. Anê.

²⁶ Hãmri nhùm mê kuma nê mê kãm hprâm xà hkôt mê kãm Jesus ã amýnê nê mê kãm Parapas mã ure. Ra Parapas kot pahi Pirat pê ô pôristi kutã amnhî xãm nê kêp hõxpîrja mýrapê nhùm mê kot unênh nê haxã tâ Ijaew kãm hprâm xà hkôt akupým kãm ure. Hãmri nê ô pôristijê mã anê nhùm mê Jesus tak. Nê htak rax nê hãmri nhùm Pirat mê kãm hã amýnê nhùm mê kot pî kahpa hã nhôr h pîr kaxyw ma o tê.

Pôristi kot Jesus ã hpêr o pikênh ã harênh

Makre 15.16-20; Juãw 19.2-3

²⁷ Tã nhùm pôristijaja mê kot pî kahpa hã Jesus nhôr kaxyw ma o tê nê pahiti Pirat nhôrkwý kamã ixkre hõ hwýr ho axã. Nhùm pôristi ohtô nê hwýr akuprô nê hã pêr o pikênh kaxyw axpên mã:

—E kwa tokyj pu mê kãm pahi xê jaxã ri. Kêp pahi hã kot amnhî jarênh kênã. Anê.

²⁸ Hãmri nê kêp ê kapa nê hpãnhã kêp pahi hã mê ê kamrêk mexja py nê kãm haxã. ²⁹ Nê kãm pahi hã mê ahkã nhîpêx nê hkrãm haxã. Nom

axtem akunî kamã mêmô mrô nhî te kot ronh kanêre pyrãk xwýnhja nhùm mê hikãx nê hkrãm haxã. Nê kãm pahi hã kô gô nhùm kupy nê o xa. Hãmri nhùm mê ho anhýr pa nê kutã hkôn krã ho rôrôk nê hkrî hpa nê hã pêr o pikênh kamã kãm:

—E âm hãmri. Apê Ijaew nhô pahi punuti na ka. Anê.

³⁰ Hãmri nê kãnhmã kuhê nê hkuk kuhtô nê kêp kô pytã nê xatã ho hkrãx pê htak. Nhùm prem ã pêr o pikênh kãm hipêx anê. ³¹ Hãmri nê kêp pahi hã ê kapa nê akupým kãm ê jaxã nê mê kot pî kahpa hã nhôr kaxyw ho kato nê ma o tê.

Pôristi kot pî kahpa hã Jesus nhôr ã harênh

Makre 15.22-32; Rukre 23.27-43; Juãw 19.17-25

³² Nhùm pôristijaja Jesus o kato nê ma kapôt mã o tê. Nê kãm pî kahpa pytîja gô nhùm kumý nê mê hkôt o hkwý. Nom ra hirok týt nê nhùm mê tee ri ja hã omu nê mêmô kot ho ajuta kaxyw mê kot omunh xwýnhjê kapi ho xa. Hãmri nê Sirên nhô xwýnh Simãw kã htyk pumu nê unê nê kãm kot Jesus o ajuta kaxyw hã karô nhùm hwýr tê nê kêp pî kahpata mý nê hkôt kãm kumý nê o tê. ³³ Hãmri nhùm mê kên nhîxêt te kot mê hkrã hi pyrãk xwýnhhta wýr mê o pój. Mê kapêr kãm na prem hixêtja jarênh o: “Korkot.” No mê pakapêr kãm Korkot jarênhja kêp “mê hkrã hi xã” nhùm mê ma hwýr Jesus o pój.

³⁴ Hãmri nê mê kot pî kahpa hã nhôr kaxyw nhùm ã htyx kumrêx kamã hamak pymaj kãm mêmô mê hkanexàja gô. Wîhti mê mêmô mry ma xã ho pihkãr nhùm mê kãm hkwý gô. Nom nhùm hkaki nê mê kot amnhî xã htyx kamã hamak kêt xã hã omunh kurê kumrêx nê hkaga. Nhùm mê tee ri ja hã omu hãmri nê kêp ê kapa nê kumê nê pî kahpa hã kuxi nê prek o îhkra nê hpar o htyx pa. Hãmri nê kãnhmã pî jarî nê ahkre kamã âm nê ho htyx

nhũm kÿxpê ajêt. ³⁵ Hãmri nhũm pòristi hkwyjaja xypên mã ê hkwy ho pigrành kaxyw hã kênre ho jôka. ³⁶ Hãmri nê ho anhÿr pa nê pikap Jejus jamâr o hkrî.

³⁷ Na htem mẽ hpar kaxyw nê tanhmã mẽ kot amnhĩ tomnuj to hã kagà nê mẽ mÿri pĩ kahpa hã hanhô. Jakamã na prem tapti hõ py nê tanhmã Jejus ã kagà hto nê hã kagà ho:

IJAEW NHÕ PAHI NA JA

HIXI PÊ JEJUS

Hãmri nê hwÿr ho api nê mÿri kunhõ. ã Jejus kot amnhĩ jarênh anhÿrja mÿrapê na prem kupi.

³⁸ Hãmri nhũm mẽ hpãnã wa àhkĩnh xwÿnh wa ho axkrut nê mãânên pĩ kahpa hã wa kunhõ. Nê akutã ho Jejus nhÿjê nhũm war ajêt.

³⁹ Tã nhũm pry hã mẽ mrar xwÿnhjaja Jejus pumu nê hã hpêr o pikênh o mra nê kãm:

⁴⁰ —Kwa ka na ka pre ate Tirtũm mã amnhĩ jarênh xà hã ixkre grành par nê atã apkati axkrunêpxi nê akupÿm hipêx par ã amnhĩ jarê. Nê apê Tirtũm Kra hã amnhĩ jarê. Nê axàhpumunh o axàhpumunh jakamã e kwa amnhĩ kapa nê wrÿ pa mẽ ja hã apumu. Kwa tokyx. Anê.

⁴¹ Nê patre krãhtũmjê mẽ Tirtũm kapêr tũm o mẽ ahkre o mẽ pa xwÿnh mẽ mẽ hkrãhtũmjaja piitã hwÿr mra nê hã hpêr o axkê. ⁴² Nê xypên mã harênh o:

—E jahti na xep pre mẽ kamã ukapri ho pa nê tanhmã mẽ ho ajuta hto ho pa. Tã nom tãm tanhmã amnhĩ to nê wrÿk kêt nê. Kwa pu mẽ arĩ pakuhê nê kot amnhĩ kaxàr nê wrÿk kãm omu. Koja wrÿ pu mẽ omu nê kêp mẽ panhõ pahшти hã hkôt pajamaxpêr kurê kumrêx. E tokyx wrÿ Jejus. Pa mẽ awrÿk kãm apumu. Nà kot kaj awrÿk rax nê. ⁴³ Na hte amnhĩ kaxyw Tirtũm mã hamaxpêr o pa. Nê kêp Kra hã amnhĩ jarênh o pa. Jakamã e. Kê Tirtũm tãm hwÿr tẽ nê

kêp Kra hã akupÿm mẽ pahpê utã. Anê.

⁴⁴ Hãmri nhũm wa kot akutã hijê nê jêt xwÿnhnta wa haxwÿja mẽ mar xà hkôt mã ho kapêr anê.

Jejus tyk ã harênh

Makre 15.33-41; Rukre 23.44-49; Juãw 19.28-30; mãânên Eprêw 10.19-20

⁴⁵ Tã nhũm kaxkwa nhÿpòk ri myt ÿr mẽ nhũm te kamàt pyrãk nhũm kamàt kô rax kumrêx. Jao hã awry mẽ nhũm ra akupÿm myt katêr o mō. ⁴⁶ Hãmri nhũm Jejus kapêr kãm hihtÿx nê àmra htÿx kãm Tirtũm mã kapêr nê kãm:

—Inhõ Tirtũm inhõ Tirtũm. Kwa mon ka ixkaga? Anê.

Nom kapêr kamã kãm kapêr o:

—Eri Eri. Rãmã sapatani. Anê.

⁴⁷ Hãmri nhũm mẽ kot mar xwÿnhjaja kot Eri jarênh ã kuma nê htÿx ho finat Eris mã kapêr ã hkamnhix. ⁴⁸ Nhũm Jejus par pê guhkrax kãm wĩhti punure xa. Jakamã nhũm mẽ ã kapêr anhÿr ã kuma nhũm mẽhõ kãm hkapri nê. Hãmri nê mẽmo rerek py nê o tẽ nê kaxyw pĩ rytija py nê ho hkanhwÿ. Nê akupÿn o tẽ nê ho wĩhti nhek nê Jejus kot hkaôr kaxyw kãm kupê.

⁴⁹ Hãmri nhũm hkwyjaja tee ri ja hã omu nê nê kãm kapêr nê kãm:

—Tk. Kwa nhãm xa. Pu mẽ kop Eris jamã mãn. Koja hwÿr tẽ nê ho wrÿk japêr. Anê.

⁵⁰ Hãmri nhũm kamàt kô mẽ nhũm Jejus ra htyk kaxyw nê axte àmra htÿx nê hãmri nê ty. ⁵¹ Tykja kôt nhũm Tirtũm mã amnhĩ jarênh xà hã ixkre kamã hakwakre hã kupêxêja kÿj rũm ahpar mã axkjê nê amnhĩ kahê xà mẽnh kurê kumrêx. Utĩ rax tã axkjê nê amnhĩ kahê xà mẽ. Te Jejus htyk o te kot mẽ pahte hkôt amnhĩ xunhwÿr xwÿnhjê mã Tirtũm wÿr pry jakwa kre kahê xà mẽnh pyrãk o ã amnhĩ nhÿpêx anê. Nhũm pika httert tÿx kumrêx o kên rũnh kwÿ ohô nê hkrakrak pa. ⁵² Hãmri nhũm

mê htyk ã pika kamã mê htykjê nhôrkwȳ ho ohtô nê mê hã axkjê nhũm mê hikwý xwýnhjaja akupým htír nê hapôj nê kuhê. Na prem kormã htyk kêt ri amnhĩ kaxyw Tĩrtũm kôt hamaxpêr. Tã nhũm Jejus ty nhũm mê ohtô nê akupým htír nê hapôj nê kuhê. ⁵³ Nom kormã nhýhým mrar kêt nê. Arĩ mê hã pika nhĩpy Jejus akupým htír ã hamãr o kuhê. Tã nhũm Jejus apkati hõ hã akupým htír ã arĩgrota ã nhũm mê rĩ kormã ma Jerujarê hwýr mra nê hwýr agjê nhũm mê ohtô nê akupým mê htír ã mê omu.

⁵⁴ Nhũm kormã Jejus htyk o môrta ã nhũm pôristi krãhtũm mê pôristi hkwȳjaja hãmri hparpê hamãr o kuhê nê htyk kãm omu. Nê pika htertet kamã ama nê mêmoj kot tanhmã amnhĩ nhĩpêx toja pumu nê tee ri hamaxpêr nê kãm ma htýx kumrêx. Hãmri nê axpên mã:

—Hêxta waa nê. Pêr ãm hãmri na pre htyk xwýnhta amnhĩ jarê. Kêp Tĩrtũm Kra kênã. Tã pu mê amarī pahtýx kupĩ. Anê.

⁵⁵⁻⁵⁶ Nhũm pre mênijaja ohtô nê amým Jejus tyk kãm omunh o kuhê. Marir Matarên nê Xiakre mê Juje wa katorxà Marir nê Xiakre hõ mê Juãw wa katorxàja nhũm mê kormã htyk kãm omunh o kuhê. Na prem Garirej rùm hkôt tanhmã ho ajuta hto ho hkôt Jerujarê wýr mô.

Mê kot Jejus jaxàr ã harênh

Makre 15.42-47; Rukre 23.50-56; Juãw 19.38-42

⁵⁷ Tã nhũm ra myt grire nhũm krĩ pê Arimatej rùm hikãxpore rax xwýnh pê Jujeja tẽ. Nom axtem Juje hõ na pre. Ra kot Jejus kôt amnhĩ xãm jakamã kãm ho wrýk nê haxàr prãm nê. ⁵⁸ Hãmri nê ma pahi Pirat wýr tẽ nê ì hã kuwý nê kãm:

—E ot pa awýr tẽ. Kwa inhmã htyk xwýnhta gô pa ma o tẽ nê haxà nã? Anê.

Hãmri nhũm kuma nê kãm harê nhũm ma o tẽ nê haxà. ⁵⁹ Kaxyw

kupêxê mex ô py nê ho hkupu pa ⁶⁰ nê ma o tẽ nê ô kên kre kamã haxà. Na pre htyk kukamã kên kre kakwý nhũm mê kot kormã kamã mêhõ jaxàr kêt tã kamã na pre Jejus jaxà. Hãmri nê hã kên rax ô xãm nê ho hitom nê ma akupým tẽ. ⁶¹ Nhũm Marir Matarên mê Marir ôja wa kên kreta kapem omunh o wa nhý.

Pôristi kot kên kre jamãr o kuhê ã harênh

⁶² Tã nhũm apkati nhũm mê inhõ arĩgromnu pê sap kato. Hãmri nhũm Parijew nhõ xwýnhjê mê patre krãhtũmjaja ma pahi Pirat wýr mra nê kãm:

⁶³ —Kwa pahihti. Nà amnhĩ to hêx o pa xwýnhta na pre kormã htír nê pa ri tanhmã amnhĩ jarênh to ho pa. Nê nhýrmã ty nê htyk ã apkati axkrunêpxi pix nê akupým htír ã amnhĩ jarê. ⁶⁴ Jakamã kwa hwýr anhõ pôristi hkwȳ rê kê mê ma hwýr mra nê hamãr mex o apkati axkrunêpxi. Kot ka anhýr kêt nhũm hkôt mê pa ho mê pa xwýnhjaja ma hwýr mra nê ho ahkĩ nê ma o mra nê nhýri haxà nê mê piitã mê kãm ra akupým htír ã harênh o hêx o pa. Te tãm kot amnhĩ kukamã amnhĩ jarênh pyrãk. Nom mê kot axte ã harênh anhýrja koja omnuj týx o tãm kot ã amnhĩ jarênh anhýrja jakre. Anê.

⁶⁵ Hãmri nhũm mê kuma nê mê kãm:

—Tõe. Nà koja mê ho anê. E mê ma hwýr amnhĩ kôt pôristi hkwȳ ho mra kê mê hakwakre kahê xà jamãr mex o kuhê. Anê.

⁶⁶ Hãmri nhũm mê kuma nê ma hwýr mra nê hakwakre hã kên raxta o htýx pa. Nê mêhõ kot omunh nê kahê mênh pymaj menh ê ho hkukõ. Hãmri nê ho anhýr pa nê pôristi mã kãm:

—E Kêr ka mê jar kuri hamãr mex o akuhê. Kê mêhõ tẽ nê tanhmã ho hkêt nê. Anê.

28

Jejus akupÿm htîr ã harênh

Makre 16.1-8; Rukre 24.1-12; Juãw 20.1-10

¹ Tã nhÿm apkati nhÿm tòmîk. Hãmri nhÿm Marir Matarên mê Marir ôja kwÿhtã kãnhmã nhÿ nê ma akupÿm kên kreta wÿr wa tẽ. ² Puh nhÿm pika htetet tÿx nê nhÿm Tirtÿm kapêr o mê wrÿk xwÿnhja kên kre wÿr wÿr nê nhãm hakwakre nê kên raxta mê nê hã nhÿ. ³ Hirã htÿx kãm nhÿ. Te na jaxênh pyrãk. Nê ê haka htÿx kumrêx. ⁴ Nhÿm pôristijaja tee ri omu nê kãm ma htÿx nê htetet nê umaj pikap rôrôk pa nê te htyk pyrã nê hikwÿ. ⁵ Hãmri nhÿm wa nita kên kre hwÿr pøj nê tee ri Tirtÿm kapêr o mê wrÿk xwÿnhta pumu. Nhÿm wa kãm:

—Kwa wa amã ma hkê nê. War ate Jejus pumunh kaxyw na ka wa tẽ. Mê kot pÿ kahpa hã nhôr xwÿnhta. ⁶ Nom jar amrakati. Na ra akupÿm htîr nê kato nê ma tẽ. E wa kam nê amnê axã nê nôr xã kaprÿ pumu. Anê.

Hãmri nhÿm wa kuma nê tee ri kên kre kamã Jejus japêr nhÿm kamã amrakati. ⁷ Hãmri nhÿm Tirtÿm kapêr o wrÿk xwÿnh wa kãm:

—E wa tokyx ma akupÿm tẽ nê hkôt mê pa ho mê pa xwÿnhjê mã harê. Kojã ma Jejus mê akukamã akupÿm Garirej wÿr mō. Garirej kamã kot kaj mê axte axpên pumu. Ra kot mê amã amnhÿ jarênh xã hkôt. E kwa wa tokyx ma akupÿm mê hwÿr tẽ. Anê.

⁸ Hãmri nhÿm wa kuma nê ma akupÿm hprôt nê htêm kurê kumrêx. Kãm ma htã hkÿnh nê. Nê ma Jejus kôt mê pa ho mê pa xwÿnhjê mã ujarênh kaxyw ma mê hwÿr hprôt nê wa tẽ. ⁹ Pu nhÿm ra Jejus tãm wa kutã tẽ nê wa hkaxpa. Hãmri nê wa haêr pê wa kãm kapêr nê wa kãm:

—Pa? Nhÿhÿm na ka wa tẽ? Anê.

Hãmri nhÿm wa omu nê hkÿnh tÿx kumrêx nê hwÿr hprôt nê hpar pê hkôn krã ho têm nê akutã hpar ã kumÿ nê kãm mex o mex ã harê nê kãm:

—Hêxta gãã nê. Ma amex kumrêx. Amex o amex. Anê.

¹⁰ Hãmri nhÿm wa kãm:

—E war amã ma hkê nê. Mamrÿ ma tẽ nê ixkôt mê pa ho mê pa xwÿnhjê mã ijarê kê mê ma Garirej wÿr mra. Kamã kot paj mê axte axpên pumu. Anê.

Pôristi kot kãxpore hprãm xãj Jejus o hêx ã harênh

¹¹ Rôm nhÿm pôristi hkwyjaja akupÿm tãm hkrã hãmri nê ma kên kreta rÿm akupÿm krÿm mra. Hãmri nê patre krãhtÿmjê hwÿr mra nê mê kãm ujarênh pa. ¹² Hãmri nhÿm mê tee ri mê kuma nê mēhpigêjtê ho akuprô nê mê hã axpên mar o hkrÿ. Hãmri nê axpên mar pa nê pôristi mã amnhÿrer rax nê mê kãm:

¹³ —E mê amnhÿm kãxpore jamÿ nê ma ri ã mê kãm amnhÿ jarênh anhÿr o apa. Nom kêr ka mê kãm amnhÿ to axêx nê mê kãm: “Na pa prem kên kre kapem ixtÿx gôr nê inhÿkwÿ nhÿm Jejus kôt mê pa ho mê pa xwÿnhjaja mra nê mê ixpê ï ho ahkÿ nê ma o mra.” Anhÿr o mê kãm amnhÿ to axêx o apa. Mê ixte kãxpore ho mê amã amnhÿrerta pãnhã. ¹⁴ Kojã pahihiti Piratja mê anhôt ã mê ajarênh ma nê hã tanhmã mê ato kaxyw hã kot paj mê axy pê tanhmã kãm ixkapêr to nhÿm tanhmã mê ato hkê nê. Jakamã e. Mê tee ri amnhÿ kukamã ajamaxpêr kêt nê. Mê mãmri ma mra nê ã mê kãm axujarênh anhÿr o ri apa. Anê.

¹⁵ Hãmri nhÿm mê kuma nê mê kot amnhÿ to hêxta pãnhã kãxpore jamÿ nê ma mê mar xã hkôt mê pitã mê kãm Jejus kôt mê pa xwÿnhjê ho hêx o pa. Tã na htem arÿ jarãhã Ijaewjaja ã axpên mã mê harênh anhÿr rãhã ho pa.

*Jejus kot hkôt mē pa ho mē pa
xwÿnhjê mã mē àpênh ã karõ*

*Makre 16.14-18; Rukre 24.36-49;
Juãw 20.19-23; Atre 1.6-8*

¹⁶ Tã pa mē ixte Jejus kôt ixpa
ho ixpa xwÿnh pé 11jaja hãmri
akupÿm Jejus htîr ã harênh ma
hãmri nê ma Garirej wÿr mra.
Nhÿri Jejus kot mē inhmã mēmo
hixêt prêk jarênhja wÿr.

¹⁷ Nê ra hwÿr ixpôx o mrar mē
Jejus pumu. Tã nom nhùm mē
ixkwÿjaja tee ri omu nê htÿx ho
nhãm mēhõ hã hkamnhîx. No kêt
mē pajaja na pa prem ixprî hã
omunh kurê kumrêx nê ixkînh tÿx
nê. Nê ixkînh nê hwÿr ixprôt nê
kãm:

—Pa Jejus? Héxta waa nê. Amex
o amex. Anê.

¹⁸ Hãmri nhùm mē inhmã:
—E na pre Tîrtùm ã inhmã kapêr
anê nê inhmã: “E kêr ka amnhî
nhÿ hã mēmoj piitã tanhmã ho ho
apa. Kaxkwa kamã nê pika kamã.
Mamrî nhÿhÿm amnhî krã hkôt
amã tanhmã amnhî to hprãm xà
hkôt tanhmã amnhî nhîpêx to ho ri
apa.” Anê. Na pre mē akaxyw ã
inhmã kapêr anê.

¹⁹ —Jakamã e. Kêr ka mē ma
pika piitã hkôt ri mē kãm ijarênh o
ri apa. Kê mē ixte mē nê tanhmã
amnhî nhîpêx to hã ijarênh ma
hãmri nê ixkôt amnhî xunhwÿ nê
ixkôt ri amnhî nhîpêx o pa. Nê
kêr ka mē ja hã mē omu nê Tîrtùm
mē wa inhmã mē hkrã kumrã. Wa
ixkarõ nhÿ hã mē hkrã kumrã. Mē
kot wa inhÿ hã pix mã tanhmã
amnhî nhîpêx to ho pa kaxyw.

²⁰ —Nê mē kãm anê kê mē
ixkapêr piitã hkôt amnhî nhîpêx
rãhã ho pa. E kêr ka mē ma mē
kãm ã ijarênh anhÿr o ri mē hkôt
apa. Kot paj mē anhîhkô hã ri ixpa
rãhã nhùm nhÿrmã pikaja hapêx o
hapêx. Anê.

Na pre ã Jejus mē inhmã mē
ixàpênh ã karõ anê.

Matêwre kot Jejus jarênh nê hã
kagàja ja kôt na hapêx.

Makre Makre kot tanhmã Jejus kot amnhĩ nhĩpêx to ho pa hã kagà

Juãw Makre na pre kagàja nhĩpêx. Na pre hte ma hkwyjê hkôt mẽ kãm Jejus kot tanhmã amnhĩ nhĩpêx to hã harênh o ri pa. Na pre ra Simãw Pêtreja hprĩ hã Tirtũm kapêr o ahkre nhũm kuma nê mar tỳx nê. Hãmri nê mẽ pamã tanhmã Jejus ã kagà hto. Simãw Pêtre xô ri tanhmã kot amnhĩ nhĩpêx to hã kagà. Jejus kêp Tirtũm Kra hã hihtỳx o hihtỳx nê àhpumunh o àhpumunh ã nhũm pre harê nê hã kagà. Nê kêp mẽ pakutã nojarêt xwỳnh ã harê nê hã kagà. ã Juãw Makreja mẽ pamã Jejus jarê nê hã kagà anê.

Matêwre 3.1-10; Rukre 3.1-9; Juãw 1.6-8, 1.19-23

¹ Pa Kris kôt ixkrãmnhwỳjaja. E kot paj mẽ amã tanhmã Jejus kot amnhĩ nhĩpêx to ho pa hã kagà ka mẽ kamã harê nê ama. Kêp Tirtũm Kra na. Tãm na pre mẽ pakaxyw ãm nê mẽ pahwỳr kumê. Tã tãm kot mẽ pahwỳr wrỳk nê tanhmã amnhĩ nhĩpêx to ho paja kot paj mẽ amã ixprĩ hã harê nê hã kagà ka mẽ kamã harê nê ama.

Juãw Paxis kot Jejus kukamã harênh

² Kormã Jejus mẽ pahwỳr wrỳk xwỳj ri na pre Tirtũm nhỹ hã kapêr o pa xwỳnhjê hõ pê Ijaisja kukamã tanhmã harênh to nê hã kagà. Nê Jejus kukamã harênh o mõi xwỳnh Juãw Paxisja nhũm pre mãânên hkukamã tanhmã harênh to nê hã kagà. Te Tirtũm tãm hamaxpêr pyrãk o harê nê harênh o:

E kot paj Ixkra hkukamã ma mẽ hwỳr kot harênh xwỳnhjê hõmê kê ma kutêp mẽ kãm harênh o ri pa. Kê mẽ kuma

nê kutêp tãm amnhĩ nhĩpêx mex o pa.

³ Koja kukamã harênh xwỳnhja ma kapôt ã ri hwỳr mẽ mrar xwỳnhjê mã harênh o ri pa. Nê kỳx pê mẽ kãm kapêr nê mẽ kãm: “E mẽ inhma. Koja Tirtũm tokyx mẽ pahwỳr mẽ panhõ Pahihti mẽ nhũm wrỳ pu mẽ pahpiitã omu. Jakamã kwa mẽ tokyx kutêp tãm amnhĩ nhĩpêx. Te ho mẽ kot mễhõ kutêp pry ho mex pyrãk o amnhĩ nhĩpêx. Nom pry kumrêx o mex kêt nê. ãm amnhĩ nhĩ o tãm amnhĩ nhĩpêx nê tãm axpên nhĩpêx. Pahihtita kutêp. Mễ pahte amnhĩ nhĩpêx tũmja te kot pry nhĩnur nê krã hakỳx nê pry juk nhũm mẽ tee ri kot kãm hã mrar mex prãm kaprỳ pyrãk. Jakamã kot kaj mẽ Pahihti nyw kutêp ate amnhĩ tomnuj kaga nê tãm amnhĩ nhĩpêx nê tãm axpên nhĩpêx. Hãmri nê te mẽ kot pry nhĩnur o mex nê ho katàt nhũm ra katàt mux nê nõi pyrãk o amnhĩ nhĩpêx. E kwa kêr ka mẽ ã kutêp amnhĩ nhĩpêx anê.” Anhỳr o koja mẽ kãm harênh o pa. Anê.

Na pre ã Tirtũm Juãw Paxis kukamã harênh anê nhũm ỹ hã kapêr xwỳnh pê Ijaisja mẽ pamã hã kagà.

⁴ Tã ra kot harênh xà hkôt nhũm Juãw Paxisja tẽ. Hãmri nê kapôt ã ri mẽ kãm Tirtũm kapêr jarênh o pa nê mẽ kãm:

—Kwa mẽ tokyx amnhĩ tomnuj kaga nê tãm ri amnhĩ nhĩpêx. Kê Tirtũm ja hã mẽ apumu nê mẽ anê mẽ ate amnhĩ tomnuj rênh pa nê mẽ ato hkra. Pa mẽ piitã mẽ kot ra mẽ apê hkra hã mẽ apumunh kaxyw mẽ akrã kumrã. Anê.

⁵ Hãmri nhũm mẽ ohtô nê kot kapêr mar kaxyw ma nhỹhỹnh hwỳr kapôt mã mra. Pyka pê Jutej rũm nê Jutej kamã krĩ pê Jerujarê

rũm nhũm mẽ ohtô nê hwÿr mra. Hãmri nê nhÿri omu nê kãm:

—E ixte amnhĩ tomnuj kaga hprãm xäj na pa awÿr amnhĩ to tẽ. Na pa hte amnhĩ tomnuj pix o ri ixpa. Tã tee ri ja hã amnhĩ pumu nê ixkaprĩ nê. Hãmri nê ra inhmã amnhĩ tomnuj kaga nê tãm amnhĩ nhĩpêx prãm nê.

Anhÿr ã amnhĩ jarẽ. Hãmri nhũm Tĩrtũmja kaxkwa kamã hkrĩ htã mẽ kuma nê amnhĩ katut kôt mẽ kot amnhĩ tomnuj piitã rênh pa nê axte kãm hamaxpêr kêt nê. Jakamã nhũm Juãw Paxis gôx kãm mẽ hkrã kumrã. Pyhti pẽ Jotãw kamã. ⁶Juãw Paxisja hikàxpore hkêt jakamã na pre ê mex kêt nê pa. ãm mẽmo mry pẽ kamer kĩ ho amnhĩm ê nhĩpêx nê hagjê nê hã pa. Nê mẽmo mry hkã ho amnhĩ pre nê ri pa. Nê mẽõ mex kur kêt nê ãm krit ku nê menh ôr o ri pa. ⁷Hãmri nê mẽ kãm tanhmã Jejus jarênh to ho pa nê mẽ kãm:

—E mẽ inhma. Koja tokyx Tĩrtũm kot mẽ pakaxyw ãm xwÿnhhta mẽ pahwÿr wrÿ. Ahpũmnh tÿx o kot ijakrenh jakamã na pa hte ãm kukwak ri ixpa nê amnhĩ tã hã ixpijaãm rãhã ho ri ixpa. Te ixkrãm ã ixpijaãm o amnhĩ nhĩpêx pyrãk. ⁸Na pa hte gô pix o Tĩrtũm mã mẽ akrã kumrãr o ri ixpa. Nom mẽ pahwÿr wrÿk mã xwÿnhja koja mẽ awÿr Tĩrtũm Karõ rẽ nhũm mẽ akaxwÿnh mã agjê. Ka mẽ ÿ hã tãm ri amnhĩ nhĩpêx rãhã ho ri apa. Anê.

Juãw Paxis kot Jejus krã kumrãr ã harênh

Matêwre 3.13-17; Rukre 3.21-22; Juãw 1.32-34

⁹Tã nhũm Jejusja tãm Juãw Paxis wÿr tẽ. Garirej kamã krĩ pẽ Najare rũm ma hwÿr tẽn pøj. Hãmri nhũm Juãwja hkrã hkumrã. Pyhti pẽ Jotãw kamã hkrã kumrã. ¹⁰Hãmri nê wa gôj rũm api nê mÿr ri kaxkwa pumunh o xa. Nhũm kaxkwa axkjê nhũm kurũm Tĩrtũm Karõ te tuuti pyrã nê Jejus wÿr wrÿk o tẽ nê ìkre

hã xa nhũm amnhĩ tã omunh o xa. ¹¹Hãmri nhũm Tĩrtũm kaxkwa rũm kãm kapêr nê kãm:

E apê Ixkra mex na ka. ãm hãmri na ka hte ixkanrêhã amnhĩ nhĩpêx mex o apa. Inhmã ajapê kamã na ka ri apa ho apa. Anê.

Jejus kot Satanasti kaga hã harênh

Matêwre 4.1-11; Rukre 4.1-13; mããñên Eprêw 2.18, 4.15

¹²Tã nhũm Tĩrtũm Karõja ma kapôt mã Jejus o mõ ¹³nhũm kapôt ã mry xoprê kaêx ã ri mrar o hã arĩgro pẽ 40. Hãmri nhũm Satanasti omu nê ma hwÿr tẽ nê ri hkôt pa. Kapôt ã ri hkôt hêx rom tanhmã kãm kapêr to nhũm kot mar nê hkôt amnhĩ xãm prãm xäj ma hkôt pa. Nom nhũm Jejus hkaga kumrêx nhũm tee ri ho anhÿr kaprÿ nê ma akupÿm tẽ. Hãmri nhũm Tĩrtũm kapêr o mẽ wrÿk xwÿnhjaja Jejus wÿr wrÿ nê tanhmã ho mex to.

Jejus kot Tĩrtũm mã àpênh krax ã harênh

Matêwre 4.12-17; Rukre 4.14-15

¹⁴Nhũm pre ra mẽ ixpê Ijaew o amnhĩptãr xwÿnh pẽ Eroxxja Juãw Paxis kot mẽmoj tã kãm àkjêr mÿrapê nhũm pre ra unê nê haxã. Tã kot haxãr jakãnh pẽ nhũm Jejus ma akupÿm pyka pẽ Garirej wÿr mõ nê kamã mẽ kãm Tĩrtũm kapêr jarênh o pa. Nê Tĩrtũm kot mẽ hwÿr mẽnh ã amnhĩ jarênh o pa. Nom te nhãm mẽhõ jarênh pyrãk o amnhĩ jarẽ ¹⁵nê mẽ kãm:

—E na Tĩrtũm kãm mẽ ato hkra hprãm nê. Jakamã na ra kot mẽ awÿr ãm xwÿnhhta mẽ nhũm mẽ awÿr wrÿ. Kwa mẽ tokyx kapêrja ma nê amnhĩ kaxyw hkôt ajamaxpêr. Hãmri nê ate amnhĩ tomnuj kaga nê Tĩrtũm kôt mãn amnhĩ nhĩpêx o ri apa. Kot kaj mẽ ã amnhĩ nhĩpêx anê nhũm Tĩrtũm amnhĩ tã mẽ apumu nê mẽ ato hkra. Anê.

Jejus kot amnhĩ kôt tep pynênh xwýnh wa hwýr ã harênh

Matêwre 4.18-22; Rukre 5.1-11

¹⁶ Tã nhũm Jejus ma Garirej kamã gô rax pê Garirej mýri mō. Hãmri nê Simãw mẽ htō Andreja wa hwýr kato nê wa omu. Wa kot tep pynênh xwýnh jakamã na pre wa gôx kãm kryhti rênh o xa nhũm Jejus wa hãnh tē nê wa omu. ¹⁷ Hãmri nê amnhĩ kôt wa kuwý nê wa kãm:

—E war amnê ixkôt tē nê ixkôt mãn apa. War apê tep kanhêr rax o ri apa xwýnh tã kêr ka war axápênhta kaga nê hpãnhã ixkôt apa ho apa. Kot paj tanhmã war akrã hto ka wa tep pynênh pãnhã ma ri mẽ hkôt mẽ kãm ixkapêr jarênh o ri apa. Mẽ ohtō nê mẽ kot war amar nê Tirtũm kôt amnhĩ xunhwýr kaxyw. Jao kot kaj te war ate tep kanhêr rax nê Tirtũm mã ôr pyrãk o amnhĩ nhĩpêx.

Anhýr o wa kãm kapêr. ¹⁸ Hãmri nhũm wa kuma nê kryhti kaga nê ma hkôt pa ho pa kurê kumrêx. ¹⁹ Hãmri nê mẽ gô mýri mō nê Jepetew kra Xiakre mẽ htō Juãw wa hwýr kato nê wa omu. Nhũm wa kormã hipêêxã nhĩhkô hã pãr kãm kryhti ho mex o wa nhỹ nhũm Jejus wa mẽ hwýr kato nê wa omu nê amnhĩ kôt wa kuwý. ²⁰ Hãmri nhũm wa kuma nê ma hkôt pa ho pa. Pãr kre kamã mẽ kãm àpênh xwýnhjê ri hipêêxã re nê ma Jejus kôt pa ho pa.

Jejus kot mēhō nē mēkarōmnuti janor ã harênh

Rukre 4.31-37

²¹ Hãmri nhũm Jejus mẽ hkôt mẽ pa ho mẽ pa xwýnhjaja ma krĩ pê Kapanau hwýr mō hãmri nê hwýr pøj. Hãmri nhũm mẽ ixpê Ijaewjê nhō arĩgromnu pê sap kato nhũm Jejus ma Tirtũm kapêr o mẽ ahkre xã hã ixkre hwýr tē nê hwýr axã. Hãmri nê kamã mẽ kot Tirtũm kapêr mar kaxyw axpên wýr mẽ pikuprõnh xwýnhjê jahkre ho nhỹ. ²² Nê mẽ ahkre mex nhũm mẽ

kuma nê tee ri hamaxpêr nê axpên mã:

—Hêxta waa nê. Pêr ãm hãmri na ã mẽ pamã mēmoj jarênh anê. Tirtũm kapêr tũm o mẽ ahkre xwýnhjê rom àhpumunh tỳx kôt na hpri hã mẽ pajahkre mex nê. Anê.

²³ Hãmri nhũm mēhō myja mẽ hwýr axã. Na pre ra mēkarōmnuti hwýr axã nhũm ý hã amnhĩ tomnuj o pa. Hãmri nê mẽ hwýr axã nê Jejus pumu nê kãm kapêr. Nom tã nê Jejus kapêr kêt nê. Mēkarōmnuti nhỹ hã kãm kapêr. Kax pê kãm kapêr nê kãm:

²⁴ —Pa Jejus? Kwa tanhmã mẽ ixto hkêt nê. Ixte apumunh mex. Apê Najare nhō xwýnh tã mãânênh apê Tirtũm kot mẽ ixwýr amênh xwýnh maati na ka. Tirtũm rũm na ka pre mẽ ixwýr wrý. Kwa xã kot kaj mẽ ixto ajapêx nã? Anê.

²⁵ Hãmri nhũm kãm:

—Tk. Kwa anhĩkrê nê myta kurũm akator kurê kumrêx. Anê.

²⁶ Hãmri nhũm kuma nê àmra htỳx kãm myja o àk tỳx nê kêp kato nê ma tē nhũm akupým mex.

²⁷ Hãmri nhũm mẽ piitã omu nê kamã no pyma nê. Hãmri nê xatã axpên mã harênh o pa nê axpên mã:

—Kokýy. Jejus na pre àhpumunh tỳx kôt mēkarōmnuti jano nhũm kuma nê mẽ kurũm hapõx kurê kumrêx. Anê.

²⁸ Hãmri nhũm Garirej kamã mẽ piitã ri axpên mã harênh o pa.

Jejus kot akupým Simãw xupãnhgêx o mex ã harênh

Matêwre 8.14-15; Rukre 4.38-39

²⁹ Tã nhũm Jejus Xiakre mẽ Juãw mērohã Tirtũm kapêr o mẽ ahkre xã hã ixkre rũm kato nê ma Simãw mẽ Andre wa ôrkwý hwýr mō. ³⁰ Hãmri nê mẽ hwýr agjê. Nhũm Simãw xupãnhgêxja ra ã nê hkã kagro htỳx nê nõ nhũm Jejus mẽ hwýr axã nhũm mẽ kãm harê. ³¹ Hãmri nhũm mẽ kuma nê hwýr axã nê omu nê hpa hã kupy nê kãnhmã ýr nhũm hkã hakry nê akupým mex kurê kumrêx. Hãmri nê kãnhmã xa nê tē

ně mẽ kãm mẽmoj nhĩpêx nhũm mẽ hkur o hkrĩ.

Jejus kot akupỹm mẽ hkwyjê ho mex ã harênh

Matêwre 8.16-17; Rukre 4.40-41

³²⁻³³ Tã nhũm myt axà nhũm mẽ ohtô nê Simãw mẽ Andre wa òrkwỹ hwỳr mra nê hakwakrem Jejus ã akuprô. Nê amnhĩ kôt mẽ à xwỳnhjê ho mra. Nê mẽkarômnuti kot mẽ hwỳr gĩêx xwỳnhjaja nhũm mẽ hwỳr mẽ o mra. ³⁴ Hãmri nhũm Jejus mẽ omu nê akupỹm ahpỹnhã mẽ piitã mẽ ho mex pa. Nê mẽkarômnutija nhũm mẽ kurũm mẽ hapôj. Mẽkarômnuti kot kêp Tĩrtũm Kra hã omunh tã no nhũm kapêr nê mẽ hkurê nê mẽ hano nhũm mẽ kapêr kêt rãhã mẽ kurũm hapôj nê ma mra.

Jejus kot Tĩrtũm mã amnhĩ jarênh ã harênh

Rukre 4.42-44

³⁵ Tã nhũm apkati nhũm kormã myt kator kêt ri nhũm Jejus kãnhmã nhỹ nê tẽ nê kato. Hãmri nê ma kapôt ã ahte nhỹhỹm tẽ nê nhỹri Tĩrtũm mã amnhĩ jarênh o nhỹ.

³⁶ Hãmri nhũm Simãw Pêtre mẽ hkwyjaja hkrã hapôj nê tee ri ixkre kamã hapêr. Hãmri nê hapôj nê ma hpri jakop o mō. ³⁷ Hãmri nê hwỳr kato nê omu nê kãm:

—Pa. Kwa na mẽ piitã tee ri ajapêr. Anê.

³⁸ Hãmri nhũm mẽ kãm:

—Tô ma pu mẽ mō. Nom kot puj mẽ akupỹm mẽ hwỳr pamōr kêt nê. Kot puj mẽ hpãnhã nhãm krĩ hkwy hkôt mãn ri pajapôj. Pa kamã mẽ kãm Tĩrtũm kapêr jarê mãn. Ja kaxyw na pre mẽ awỳr inhmê. Krĩ piitã hkôt mẽ pa xwỳnhjaja kot kapêr mar kaxyw. Anê.

³⁹ Hãmri nê mẽ ma axte Garirej kamã krĩ hkwy hkôt pa. Nê krĩ piitã hkôt Tĩrtũm kapêr o mẽ ahkre xà hã ixkre kamã mẽ kãm Tĩrtũm kapêr jarênh o pa. Nê mẽ kurũm mẽkarômnuti japôx o pa.

Jejus kot akupỹm mẽhō hkãmnu ho mex ã harênh

Matêwre 8.1-4; Rukre 5.12-16

⁴⁰ Tã nhũm mẽhō hkà hkrô xàpêr tỳx xwỳnhja Jejus wỳr tẽ. Hãmri nê hã hpiaaam kaxyw kutã hkônkrã ho tẽm nê nhỹ nê kãm:

—Pa Pahihti. E ot pa awỳr amnhĩ to tẽ. Akupỹm ate mẽ ixto mex kaxyw axãhpumunh tỳx jakamã kot ka akupỹm amã ixto mex prãm nê mãmri akupỹm ixto mex. Anê.

⁴¹ Hãmri nhũm kuma nê kamã ukapri nê hã ìhkra xi nê kãm:

—Nà kot paj ato mex. E akupỹm akà mex.

⁴² Anhỹrja kôt nhũm akupỹm hkà mex kurê kumrêx. ⁴³⁻⁴⁴ Hãmri nhũm Jejus kãm kapêr kãm hihtỳx nê hano nê kãm:

—E kêr ka amnhĩ tã akwyjê mã tanhmã ijarênh to hkêt rãhã ma patre hwỳr tẽ kê akupỹm akà mex ã apumu. Hãmri ka amnepêm Mojes kot mẽ ate akupỹm mẽ amex ã Tĩrtũm mã tanhmã amnhĩ nhĩpêx to hã karô xwỳnhhta ka kãm ho anê. Kê mẽ piitã akupỹm akà mex ã apumu. Anê.

⁴⁵ Hãmri nhũm kuma nê ma tẽ. Nom axtem nê ma mẽ piitã mẽ kãm amnhĩ jarênh o ri mra. Jejus kot kãm karô xà kuhpa hã ma mẽ kãm amnhĩ jarênh o ri mra. Jakamã nhũm mẽ kuma nê piitã nhỹhỹnh Jejus wỳr mra. Mẽ ohtô rax kumrêx nê hwỳr mra nhũm tee ri mẽ noo mã nhỹri krĩm pa mã. Hãmri nê ãm krĩ pu hã ri pa htã nom nhũm mẽ arĩ ohtô nê hwỳr mra.

2

Jejus kot akupỹm ì kamã htyk xwỳnh o mex ã harênh

Matêwre 9.1-8; Rukre 5.17-26; Juãw 10.37-38

¹ Tã nhũm Jejus hã apkati grêre nê hkôt mẽ pa ho mẽ pa xwỳnhjê mẽrohã ma akupỹm Kapanau wỳr mō. Hãmri nê hwỳr pōj nhũm mẽ piitã nhỹri mẽhō nhòrkwỹ kamã

hpôx kôt harênh ma nê hã akuprô.
² Ra hã pikuprônh rax nê ixkre nhîtom pa. Nhûm mē hkwyjaja kapôt â kuhê nhûm Jejus Tirtûm kapêr o mē ahkre ho nhÿ. ³ Hãmri nhûm mēmyjaja kêp kwat nê ï kamã htyk xwÿnhja mÿ nê Jejus kot ho mex kaxyw hwÿr o tē. ⁴ Hãmri nê tee ri hã mē pikuprônh rax xwÿnhjê pumu nê nhÿhÿnh kot hwÿr o àr kaxyw tee ri amnhî kukamã ho ukapi ho pa. Hãmri nê hamaxpêr nê ixkre nhîmök po hwÿr ho api nê himök kwÿ grã nê hkôt ï kamã htyk xwÿnhhta nôr xà mērohã hkôt Jejus wÿr haxã. ⁵ Hãmri nhûm mē kot kaxyw kãm hamaxpêr tÿx ã mē omu nê ï kamã htyk xwÿnhhta mã kapêr nê kãm:

—Pa? Kwa tee ri amnhî kukamã ajamaxpêr kêt nê. Na pa ra anê ate amnhî tomnuj piitã ho ijapêx. Kot paj axte kãm ijamaxpêr kêt nê. Anê.

⁶ Hãmri nhûm Tirtûm kapêr tûm o mē ahkre xwÿnhjaja tee ri ã kapêr anhÿrja ã kuma nê hamaxpêr o:

⁷ —Tk. Kwa pêr mēhō myti mÿj kêp Tirtûm kêt tã te kapêr pyrãk o amnhî nhîpêx nê mē nê mē kot amnhî tomnuj o hapêx ã amnhî jarê. Tirtûm pix kot mē nê mē kot amnhî tomnuj o hapêx kênã. Anê.

⁸ Nom nhûm Jejus mē hamaxpêr kôt mē omunh mex nê. Mē kot Tirtûm pix kot mē nê mē kot amnhî tomnuj rênh nê akupÿm mē à xwÿnhjê ho mex kôt mē hamaxpêrja nhûm mē omunh mex nê mē kãm:

—Kwa mē ã ajamaxpêr anhÿr kêt nê. ⁹ Ixte mē nê mē kot amnhî tomnuj o ijapêx par ã amnhî jarênh tã mē ate mē ano ho ja kôt ixpumunh kêt jakamã na ka htem ja hã ixkôt ajamaxpêr kêt nê. Nom kot paj mē anoo mã akupÿm myja o mex. Ka mē ja hã ixpumu hãmri nê ixkôt ajamaxpêr kurê kumrêx. ¹⁰ Ixpê Tirtûm kot mē awÿr inhmênh xwÿnh na pa. Ixte mē anê mē ate amnhî tomnuj rênh

kaxyw na pre mē awÿr inhmê pa wrÿ. Tã mē ate ja kôt ixpumunh kaxyw kot paj mē anoo mã mytija ho mex.

¹¹ Anhÿr o mē kãm kapêr hãmri nê ï kamã htyk xwÿnhhta mã kapêr nê kãm:

—E kãnhmã xa nê anôr xà mÿ nê ma akupÿm anhôrkwÿ hwÿr tē. Anê.

¹² Hãmri nhûm kuma nê kãnhmã ãm kurê kumrêx. Hãmri nê akupÿm mex ã amnhî pumu nê hkÿnh tÿx nê nôr xà mÿ nê mē noo mã kato nê ma akupÿm ôrkwÿ hwÿr tē. Hãmri nhûm mē kot omunh xwÿnhjaja amnhî jaêr pê omu nê no hapôx kaxyw nê hkôt omunh o kuhê nê kamã no puma htÿx nê. Nê tee ri omu nê axpên mã:

—Hêxta waa nê. Aa mē pahte ã mēhō kot amnhî nhîpêx anhÿr ã omunh kêt kumrêx tã jarãhã ja pumu. Nã Tirtûmja ãm mex o mex. Anê.

Jejus kot amnhî wÿr Rewi hwÿr ã harênh

Matêwre 9.9-13; Rukre 5.27-32

¹³ Hãmri nhûm Jejus mē ma mra nê akupÿm gô rax pê Garirej wÿr mra nê gô mÿ ri pa. Hãmri nhûm mē piitã omu nê hwÿr mra nê hã akuprô nhûm Tirtûm kapêr o mē ahkre ho nhÿ. ¹⁴ Hãmri nê mē kure nê axte hkôt mē pa ho mē pa xwÿnhjê mērohã ma axte mra nê nhÿri Apew kra Rewija pumu. Rôm kãm mē ô pahihtã mã amnhî kwÿjê pê kãxpore hkwy jamÿnh xwÿnh na pre. Jakamã nhûm àpênh o nhÿ nhûm Jejus hãnh tē nê omu nê amnhî kôt kuwÿ nê kãm:

—Pa? E kwa axápênhhta kaga nê hpãnhã amnê mē ixkôt mãn ri apa ho apa. Anê.

Hãmri nhûm kuma nê àpênh kaga nê ma hkôt mō nê hkôt pa ho pa.

¹⁵ Hãmri nhûm mēmo arïgro hã nhûm Rewi nhô mē apkur xà hã mēō rax nê. Jakamã nhûm amnhî nhôrkwÿ hwÿr hkrãmnhwÿjaja nê

Jejus mē hkôt mē pa ho mē pa xwýnhjê hwý. Hāmri nhūm mē ma hkôt mra nē ōrkwý hwýr agjê nē kuri apkur o hkrī. Nē māānēn mē kēp Rōm nhō pahi mā mē kēp kàxpore hkwy jamýnh xwýnh kwý nē mē ohtô nē mē kutā apkur o hkrī. ¹⁶ Hāmri nhūm Tīrtūm kapēr tūm o mē ahkre xwýnh kwý pē Parijew nhō xwýnhjaja mra nē mē apkur ā mē omu. Nē tee ri mē hkaēx ā Jejus pumu nē hkôt mē pa ho mē pa xwýnhjê hwýr agjê nē hā mē kām akir nē mē kām:

—Kwa na htem mē kot amnhī tomnuj xwýnhjê kutā apkur kêt tā ka mē Jejus mē apimraātā axtem nē mē kutā axāpkur o akrī. Mē ate amnhī to mex ronhýx ka mē kutā axāpkur kêt nē. Anē.

¹⁷ Hāmri nhūm Jejus amnhī tā mē kapēr ma nē mē kām:

—Tk. Ixte tām mē unhwýr kaxyw ixte mē kutā ixāpkur o inhýr kēnā. Xà na hte tōtô mē mex xwýnhjê hwýr mra nē mē hkane? Nà na hte ām mē à xwýnhjê pix kane ho pa. Ra mē ate ja pumunh mex. Ja pyrā nē na pa pre mē kot amnhī to mex xwýnhjê hwýr ixwryk kêt nē. Ām mē kot amnhī tomnuj xwýnhjê pix wýr na pa pre wrý. Ixte tām mē unhwýr kaxyw mē hwýr wrý nē jajê kutā ixāpkur o nhý. Mē ate amnhī tomnuj mā anhūrer nē hpānhā tām amnhī nhīpēx o apa kaxyw na pa pre mē awýr wrý nē mē akamā ixukapri ho ri mē akôt ixpa. Tā ka mē atýx ā ixte mē kutā ixāpkur anhýrja ā ixto akapēr anē. Anē.

Mē kot Tīrtūm mā amnhī jarēnh kaxyw mēō kaga hā mē harēnh

Matēwre 9.14-17; Rukre 5.33-39

¹⁸ Juāw Paxis kôt mē pa xwýnhjê mē Parijew nhō xwýnhjaja na prem tōhā Tīrtūm mā amnhī jarēnh kaxyw nē apkur kêt rāhā kamā kām amnhī jarē. Nom nhūm Jejus kôt mē pa ho mē pa xwýnhjaja na prem kām amnhī jarēnh prām nē

apkur kām amnhīx kām amnhī jarēnh o pa. Jakamā nhūm Ijaew kwýjaja tee ri ja hā mē omu nē Jejus wýr mra nē mē hā hkukja nē kām:

—Pa? Kwa aprī hā mē inhmā mēmoj jarē. Na hte Parijew nhō xwýnhjê mē Juāw Paxis kôt mē pa xwýnhjaja tōhā Tīrtūm mā amnhī jarēnh kaxyw nē apkur kêt rāhā kām amnhī jarē. No akôt mē pa ho mē pa xwýnhjaja na htem àmnhīx apkur o pa kamā kām amnhī jarēnh o pa. Kwa mo na htem mē urāk nē tōhā apkur kêt rāhā kām amnhī jarēnh kêt nē? Anē.

¹⁹ Hāmri nhūm Jejus mē kām:

—Tk. Mo kaxyw kot mē ā amnhī nhīpēx anē? Mē hkapri hkēt kēnā. Mē kot ixkôt pa ho pa hā amnhī pumunh jakamā na htem hkīnh nē pa. Kormā ixte mē hkôt ixpa kēnā kot kêt mē Tīrtūm mā kapēr kaxyw nē ho apkur kêt kamā kām amnhī jarē. Xà na htem hkrāmnhwý hā hkīnh kaxyw hā akuprō nē hkapri nē apkur kêt nē mýr o hkrī? Nà na htem hā akuprō nē hkīnh nē apkur rūnh nē. Ja pyrā nē na hte ixkôt mē pa ho mē pa xwýnhjaja ixkôt kormā àmnhīx hkīnh nē apkati mē apkur kām kām amnhī jarēnh o pa. ²⁰ Nom koja mē kām ixkuré xwýnhjaja nhýrmā tanhmā ixto hāmri nhūm mē rī kormā hkapri htýx kām ho apkur kêt rāhā Tīrtūm mā amnhī jarē. Anē.

Nhūm pre ā Jejus mē kām hkôt ri mē pa ho mē pa xwýnhjê jarēnh anē hāmri nē axte mē kām kapēr nē mē kām:

²¹⁻²² —Mē kot amnhī tomnuj xwýnhjaja mē kot amnhī nhīpēx tūm o amnhī pyrāk jakamā na htem mē kot amnhī nhīpēx nyw kaga. Tā ixte amnhī nhīpēx nywja te kot mē ate amnhī nhīpēx tūm pyrāk kêt jakamā na ka htem inhma nē ām inhma. Kwa mē inhma nē mē ate amnhī nhīpēx tūm gryk ā ixkaga hkēt nē. Anē.

Jejus kêp arïgromnu hpãm ã kot amnhï jarênh

Matêwre 12.1-8; Rukre 6.1-5

²³ Tã nhùm mē ixpê Ijaew nhō arïgromnu pê sap kato nhùm Jejus mē hkôt mē pa ho mē pa xwÿnhjaja ma nhÿhÿm mō. Ma mē hpur kahti hkôt nhÿhÿm mō nhùm hkôt mē pa ho mē pa xwÿnhjaja ra kãm prãm nê. Hãmri nê prãm xäj purta kamã amnhïm mēmo hy te kot harôj pyræk xwÿnhhta kwÿ rê nê ma Jejus kôt hkanhar o mō. Mē ixpê Ijaewjaja na pa htem axpên pur kãm ixpa nê ã amnhï nhïpêx anê. ²⁴ Hãmri nhùm Parijew nhō xwÿnhjaja mē hkôt mra nê tee ri ja hã mē omu nê Jejus wÿr mra nê mē hã kãm akir nê kãm:

—Kwa jarãhã sap tã akôt mē pa ho mē pa xwÿnhjaja mēmo hy hkwy rê nê akôt hkanhar o pa. Tirtùm kapêr ã kagã htùm kot mē panhō arïgromnu hã mē pahte mēmoj nhïkênh nê mē pahkurê kênã. Kwa mē kãm anê kê mē ã amnhï nhïpêx anhÿr kêt nê. Anê.

²⁵⁻²⁶ Hãmri nhùm Jejus mē kuma nê hprï hã mē kãm Tirtùm kapêr tùm jarê nê mē kãm:

—Kwa xàn ka mē kormã Tirtùm kapêr ã kagã htùm kamã pahi Tawi kot tanhmã amnhï nhïpêx to kamã harênh nê mar kêt nê? Kormã Apiatar kêp patre maati ri na pre Tawi hkôt ri mē pa xwÿnhjê mē prãm xäj Tirtùm mã amnhï jarênh xã hã ixkre hwÿr agjê. Hãmri nhùm Apiatar mē kãm prãm tÿx ã mē omu nê mē kamã ukapri nê mē kãm mēmoj gō. Mē kot Tirtùm noo mã pãwti jaxwÿr xwÿnhhta nhùm mē kãm kugō nhùm mē kuku. Tirtùm kapêr ã kagã htùm kot ja nê mē kurê htã nhùm mē kãm prãm tÿx ã mē omu nê mē kamã ukapri xäj mē kãm kugō. Patre pix kot ja hkur kaxyw tã nhùm mē kãm kugō nhùm mē kuku. Tã nom nhùm Tirtùm ja hã mē omu nhùm ja kêp omnuj kêt nê. Patre kot mē kamã ukapri nê

mē kãm ôr nhùm ja hã omu nhùm ja kãm mex nê. Anê.

Hãmri nê mē kãm:

²⁷—Na pre Tirtùm panhï kumrêx o kato nê kormã mē hkôkôt nê Tirtùm mã hamaxpêr o hkrï kaxyw arïgromnu ho kato. No na pre arïgromnu kumrêx o kato nê hpãnhã kaxyw panhï ho kator kêt nê. ²⁸ Tã pa na pre Tirtùm mē akaxyw ixãm nê mē awÿr inhmê. Jakamã papxpix na pa hte arïgromnu hã tanhmã mē kot amnhï nhïpêx to hã mē kãm karô ho ri ixpa. Jakamã kwâr mē mãmri mēmojta rê nê ixkôt hkanhar o mō. Anê.

3

Jejus kot akupÿm ïhkra grã xwÿnh o mex ã harênh

Matêwre 12.9-14; Rukre 6.6-11

¹ Tã nhùm mē ixpê Ijaewjê nhō arïgromnu pê sapja axte kato. Hãmri nhùm Jejus Tirtùm kapêr o mē ahkre xã hã ixkreja wÿr tē nê axã nê kamã Tirtùm kapêr o mē ahkre ho nhÿ. Nhùm mēhō myïhkra grã xwÿnhja mē ïhkô hã mar o nhÿ. ² Nhùm Parijew nhō xwÿnhjaja kãm mē hkrãhtÿmjê mã Jejus o kapêr prãm jakamã htãnopxar o kuhê nê axpên mã:

—E kwa pu mē jar pakuhê nê kot tanhmã amnhï nhïpêx to hã omu. Xã koja jarãhã ïhkra grã xwÿnh mÿj o mex nã? Jarãhã arïgromnu kênã kot kêt kãm ïhkra ho mex. Koja ho anê nê ra Tirtùm kapêr tùm nhïrôp xa. E pu mē xa nê hã omu. Anê.

³ Hãmri nhùm Jejus ïhkra grã xwÿnhhta pumu nê kãm:

—Pa? E kãnhmã xa nê amnê ixwÿr tē. Anê.

Hãmri nhùm kãnhmã xa nê hwÿr tē nê mē piitã mē noo mã xa. ⁴ Hãmri nhùm Jejus mē kot omunh o hkrï xwÿnhjê hwÿr rit nê arïgromnu hã tanhmã mē kot amnhï nhïpêx to hã mē hkukja nê mē kãm:

—E mẽ inhma. Tanhmã na htem arĩgromnu hã axpën nhĩpêx to wehe? Xà kot ka mẽ arĩgromnu hã axà htỳx nẽ amex prãm xàj ma mẽhõ hwỳr amnhĩ to tẽ nhũm apumu nẽ apkatim arĩgro mex jamãr pẽ akane hkêt ka ty nhũm ja amã mex nẽ? Rỳ nhũm apumu nẽ tanhmã atomnuj to nẽ akupỹm amnhĩ nẽ ajano nhũm ja amã mex nẽ? Nà koja ã anhĩpêx anẽ nhũm ja amã mex kêt nẽ. E mẽ inhmã mẽmoj jarẽ. Tanhmã na pre finat Mojesja Tĩrtũm nhỹ hã arĩgromnu hã mẽ pahte axpën nhĩpêx ã mẽ pamã karõ hto? Xà kot puj mẽ hã axpën kãm paxukapřĩ rỳ hã mẽ pamã axpën kurẽ ho papa? Xà kot puj mẽ hã mẽmoj punuj pẽ mẽ utà rỳ kot puj mẽ ãm arĩgro mex pix ã mẽ utàr kaxyw arĩgro mex jamã? E mẽ atõ inhmã ja jarẽ. Anẽ.

Ra kot hprĩ hã mẽ hamaxpěr ã mẽ omunh mex nẽ ã hẽx rom mẽ hkukjêr anẽ. Nom nhũm mẽhõ tanhmã kutã kãm nẽ hkêt nẽ. Mẽ ãm piitã akryk mar pẽ omunh o hkrĩ. Mẽ kot tanhmã kãm nẽ nhũm ta pãnhã tanhmã mẽ kãm nẽ pymaj nhũm mẽ tee ri kãm tanhmã nẽ hprãm nom akryk mar o hkrĩ. ⁵Hãmri nhũm Jejus tee ri mẽ ukapřĩ hkêt ã mẽ omu nẽ hkapřĩ nẽ mẽ kamã gryk nẽ. Hãmri nẽ ãhkra grã xwỳnhja mã kãm:

—Tk. Mẽ kot tanhmã inhmã ujarẽnh tore hã. E anhũhkra katàt. Anẽ.

Hãmri nhũm ãhkra katàt nẽ akupỹm mex kurẽ kumrẽx. ⁶Hãmri nhũm Parijew nhõ xwỳnhjaja tee ri ã Jejus kapěr anhỹrja ã kuma nẽ kot sap ã akupỹm myta o mex ã omu nẽ kamã gryk tỳx nẽ. Nẽ hapõj nẽ ma pahi Erox kõt mẽ pa xwỳnhjê hwỳr mra nẽ mẽ kãm harẽ nẽ tanhmã hã axpën kukjêr to nẽ axpën mã:

—Kwa tanhmã kot puj mẽ ho? Na ã kapěr anhỹrja o mẽ pahto kapěr punuj nẽ. Te hkĩnhã mẽ papamjaja mẽ kamã paxukapřĩ hkêt pryak ã mẽ pajarẽ. Koja mẽ

pahkwỳjaja kuma hãmri nẽ mẽ pahte amnhĩ nhĩpêx kaga nẽ amnhĩ kaxyw hkõt pix mã hamaxpěr o pa. Ja pymaj kwa tanhmã kot puj mẽ ho? Anẽ.

Mẽ ohtõ nẽ kot Jejus kapěr mar kaxyw hwỳr mra ã mẽ harẽnh

Matêwre 4.23-25; Rukre 6.17-19

⁷⁻⁸ Tã nhũm Jejus mẽ hkõt mẽ pa ho mẽ pa xwỳnhjê mẽrohã ma akupỹm gõ rax wỳr mõ nhũm mẽ ohtõ nẽ omu nẽ ma hkõt mra. Pyka pẽ Garirej mẽ Jutej wa kurũm nẽ krĩ pẽ Jerujarẽ rũm nẽ pyka pẽ Itumêj rũm nẽ pyhti pẽ Jotãw nhĩkjê hã krĩ hkwy rũm nẽ krĩ hkwy pẽ Xir mẽ Sitõ wa pu hã krĩ hkwy rũm ohtõ nẽ ma hwỳr mra. Na prem ra harẽnh ma nẽ nhỹhỹm mõi ã omu nẽ axpën mã harẽnh o:

—E kwa tokyj pu mẽ ma hwỳr mẽ ã xwỳnhjê o mõi kẽ akupỹm mẽ ho mex. Anẽ.

Hãmri nẽ hwỳr mẽ o mra nẽ hã pikuprõnh rax nẽ. ⁹⁻¹⁰ Hãmri nhũm Jejus akupỹm mẽ ã xwỳnhjê ho mex. Gõ mỳri xa nẽ tanhmã mẽ ho mex to. Jakamã nhũm mẽ axte ohtõ nẽ hwỳr mra nẽ piitã kot htok nẽ akupỹm mex kaxyw hwỳr axpën nhĩgã. Hãmri nhũm tee ri amnhĩ wỳr mẽ omu nẽ hkõt mẽ pa ho mẽ pa xwỳnhjê mã:

—Kwa mẽ ma mra nẽ amnẽ kanõre jêt mũj kjẽnh o tẽ nẽ jar inhmã anhõ. Kẽ mẽ ixtã axpën nhĩgãnh o ijanẽnh japêr pa hwỳr axà nẽ amỹm mẽ ho hpỹnh nẽ akupỹm mẽ ho mex. Anẽ.

Hãmri nhũm mẽ kuma nẽ ma mra nẽ kãm ja o tẽ nẽ kunhõ. ¹¹ Na pre mẽkarõmnnuti hkwyjja mẽ hkwyjê hwỳr agjê. Jakamã nhũm mẽ Jejus pumu nẽ mẽkarõmnnuti nhỹ hã kęp Tĩrtũm Kra hã omunh kurẽ kumrẽx. Hãmri nẽ hã hpijaam kaxyw kutã hkõnkrã ho hkrĩ nẽ mẽkarõmnnuti nhỹ hã kãm kapěr nẽ kãm:

—Kwa apê Tĩrtũm Kra na ka. Anẽ.

¹² Hāmri nhūm tee ri amnhī tā mẽ kuma. Kām mẽkarōmnuti ā kot harēnh anhÿr prām kêt nē. Ām mẽ piitā mẽ kot kapēr mar nē kot amnhī nhīpēx ā omunh pē kēp Tirtūm Kra hā omunhja na kām hprām. Jakamā nhūm mẽkarōmnuti ā harēnh anē nhūm ja nē mẽ kām kapēr nē mẽ kām:

—Tk kwa nà kēr ka mẽ tanhmā ijarēnh to hkēt nē. Anē.

Jejus kot amnhī kaxyw mẽ kēp 12 rēnh ā harēnh

Matēwre 10.1-4; Rukre 6.12-16

¹³ Tā nhūm Jejus hkôt mẽ pa ho mẽ pa xwÿnh kwÿjê mã kām:

—E pu mẽ ma mō nē krāhakÿx mÿj ā api. Anē.

Hāmri nē mẽ ma hwÿr mō nē hā api ¹⁴ nhūm Jejus amnhī kaxyw mẽ ho 12 nē mẽ kurē. Mē kot ma ŷ hā Tirtūm kapēr o mẽ ahkre ¹⁵ nē ŷ hā mẽ nē mẽkarōmnuti janor o pa kaxyw. ¹⁶ ā mẽ hixi kot anhÿr.

Na pre ja kēp Simāw no nhūm Jejus hpānhā hā hixi hō mẽ nhūm hpānhā mãānēn kēp Pête.

¹⁷ Nē hkôt Jepetew kra Xiakre mẽ htō Juāwja wa kuta.

Hāmri nē kot Simāw nhīpēx pyrā nē wa hā hixi hō mẽ nhūm wa hpānhā mãānēn kēp Poanes. Wa kot amnhī prēprēk jakamā nhūm ā wa hā hixi mēnh anē.

¹⁸ Nē hō pē Andreja ta.

Nē hkôt Andre htō Firiptija ta.

Nē hkôt Patoromewja ta.

Nē hkôt Matēwreja ta.

Nē hkôt Tomasja ta.

Nē hkôt Arpēw kra Xiakreja ta.

Nē hkôt Tatewja ta.

Nē hkôt Simāw ōja ta.

Simāwja na pre kām mẽ ixpē Ijaewjê nhō pika pē Ijaew kīnh tÿx nē. Jakamā na pre kām nhām pika hō nhō pahi kot mẽ ho amnhīptār prām kêt nē pa.

¹⁹ Nē hkôt jut Kariotja ta.

Kormā kot mẽ kām Jejus kurē xwÿnhjê nhīhkram ōr mã nhūm Jejus kot amnhī kukamā omunh mex tā mẽ hkôt amnhī kaxyw kuta.

Ā mẽ kot ŷ hā mẽ ahkre o pa kaxyw mẽ rēnh xwÿnhjê nhīxi kot anhÿr.

Jejus mẽ mẽkarōmnuti wa harēnh

Matēwre 12.22-32; Rukre 11.14-23, 12.10; Juāw 10.19-21

²⁰ Hāmri nhūm Jejus hkôt mẽ pa ho mẽ pa xwÿnh kwÿjê rēnh pa nē ma amnhī kôt mēhō nhōrkwÿ hwÿr mẽ o mō. Na prem apkur kêt ry rax nē ra kām prām tÿx nē nhūm ma mẽ apkur kaxyw amnhī kôt mẽ o mō. Hāmri nhūm axte mẽ ā xwÿnhjaja mẽ omu nē Jejus wÿr pikuprōnh rax nhūm mẽ tokyx apkur kêt nē. ²¹ Hāmri nhūm Jejus katorxā nē htōjaja tee ri mẽ apkur kêt ā mẽ harēnh ma nē axpēn mã:

—Kwa mǎn ām ra tanhmā hkrā amnhī to nà? Hā na mẽ kot omunh kaxyw hā hpikuprōnh rax jakamā nhūm kormā apkur kêt nē. E tokyx pu mẽ ma hwÿr mra nē omu nē mẽ kēp utā nē akupÿn amnhī kôt o mō. Anē.

²² Rôm nhūm Tirtūm kapēr tūm o mẽ ahkre xwÿnhjaja Jerujarē rūm Jejus wÿr mōn pōj. Hāmri nē tanhmā ho kapēr punuj to. Kēp mẽkarōmnuti hkwy hā hkamnhīx jakamā harēnh o:

—Tk pēr hinhu nhīkōōti nhÿ hā na hte mẽ nē amnhī kwÿjê japōx o pa. Anē.

Hinhu nhīkōōti nhīxi hō pē Satanasti nhūm prem ŷ hā Jejus kot amnhī nhīpēx o pa hā hkamnhīx. ²³ Hāmri nhūm amnhī tā mẽ omu nē amnhī wÿr mẽ kām hpa ho apē nē mẽ kām amnhī jarē. Nom amnhī tā kuxi nē mẽ kām mẽmoj jarē nē mẽ kām:

—Kwa mẽ inhma mẽ ate ixpē Satanasti hkwy hā ixkamnhīx xwÿnhjaja. Xā na hte Satanasti mẽ nē amnhī kwÿjê janor o pa? Nà na hte ā amnhī nhīpēx anhÿr kêt nē.

24 Na hte pika nhõ xwýnhjaja axpën kutã amnhĩ xunhwý nê axpu hãmri nê anhrã nê ma ahpýnhã ri pa nê amnhĩ krã hkõt ri tanhmã amnhĩ to ho ri pa. Jakamã nhũm mē õ pahija mē hamār o pa hkêt nê. 25 Nê krĩ nhõ xwýnhjaja haxwýja. Mē kot axpën to hkwý xwýnhjaja koja mēmoj tã axpën kãm gryk nê axpën kutã amnhĩ xunhwý hãmri nê anhrã nê ahpýnhã pa hãmri nhũm mē õ pahi tee ri kãm mē hamār o pa hprãm. Mo hkwýjaja kot kêt ri mē hamār o pa? Nom tãm kot amnhĩ nê mē hanoore hã. Mē tãmjaja na prem axpën kãm gryk nê anhrã nê ahpýnhã pa. 26 Tã ja pyrà nê ixte Satanasti nhỹ hã tanhmã amnhĩ nhĩpêx to ho ixpa ronhỹx pa ri mē kurũm amnhĩ kwýjê japõx o ri ixpa hkêt nê. Mēkarõmnutijaja kêp Satanasti hkwý kênã. Koja Satanasti ixte mē kurũm mē hapõx kaxyw tanhmã inhmã nê hkêt nê. 27 ãhpumunh tỹx jakamã na hte mē kot hkõt amnhĩ xunhwýr xwýnhjê pumunh tỹx o pa nhũm mēhõ tee ri kêp mē utãr kaxyw. Tã ixãhpumunh tỹx o ixte hakrenh jakamã ixte kêp mē utãrja inhmã tanhmã kute hkêt. Na pa hte kêp mē utã nhũm mē hpãnhã ixkõt amnhĩ nhĩpêx o pa nhũm Satanasti tee ri mē hã ixpumunh o pa kaprỹ.

28 —Ãm hãmri na pa mē amã ixkapêr. Kot kaj mē tanhmã amnhĩ tomnuj to ho apa. Nê amnhĩ tomnuj tỹx kumrêx rãhã ho apa. Rỹ tanhmã akapêr punuj to ho apa. Rỹ tanhmã Tĩrtũm o akapêr punuj to ho apa. Tã tee ri ja hã amnhĩ pumu nê akapĩ nê ã ate amnhĩ nhĩpêx anhỹrja kaga nê Tĩrtũm kõt amnhĩ xunhwý. Hãmri nhũm amnhĩ tã mē apumu nê amnhĩ katut kõt mē ate amnhĩ tomnuj nê mē akapêr punuj rênh pa nê axte kãm hamaxpêr kêt nê. Koja ho hapêx par kumrêx. 29 Nom koja Tĩrtũm Karõ xatã mē amã ixto amnhĩrĩt tã ka mē ama nê ãm ama nê te kêp amnhĩ ja-

mak pro pyrãk o amnhĩ nhĩpêx. Jao Tĩrtũm Karõ hã apijaãm kêt ã amnhĩ to amnhĩrĩt. Ja mýrapê koja Tĩrtũm nhỹrmã amnhĩ xwar te mē apê amnhĩ jamak pro pyrãk o mē anhĩpêx ka mē tee ri kãm amnhĩ kaprĩ kaprỹ. Hãmri nê mē kot amnhĩ xã htỹx kamã hamak o pa htũm xã wýr ma apa nê kamã apa rãhã apa ho apa. Anê.

30 Mē kot Satanasti nhỹ hã mē nê mēkarõmnuti janor o pa hã hkamnhĩx jakamã nhũm pre Jejus ã mē kãm kapêr anê.

Jejus katorxã mē htõjê jarênh

Matêwre 12.46-50; Rukre 8.19-21; mããnhên Eprêw 2.11-12

31 Rõm nhũm Jejus katorxã mē htõjaja hwýr mra no ãm kormã hwýr gjêx kêt nê. Mē kot hã htu rax jakamã nhũm mē tee ri hwýr gjêx kaxyw kormã kapõt ã kuhê. Hãmri nê mē kot mar o kuhê xwýnhjê hõ mã kapêr nê kãm:

—Kwa ma tẽn Jejus mã mē ijarê kê mē ixwýr kato. Anê.

32 Rõm nhũm ixkre kamã mē hkrĩ xwýnhjaja mē omu nê Jejus mã mē harê nê kãm:

—Kwa Pahihti. Ota akatorxã mē atõjaja awýr mra nê pøj nê tee ri awýr gjêx mã nê kormã kapõt ã kuhê nê atã karõ. Anê.

33-35 Hãmri nhũm mē kuma nê mē kãm:

—Tõe pa ixkato nê mē omu. Inhmã mē hapêê. Nom kot kaj mē atõ Tĩrtũm kapêr ma nê hkõt amnhĩ xãm nê hkõt amnhĩ nhĩpêx. Hã kot kaj te apê ixtõ rỹ ixkatorxã kot amnhĩ nhĩpêx pyrãk o pu mē axpën nhĩpêx. Pa te inhmã mē hapê pyrà nê inhmã mē ajapê nê. Anê.

4

Mêmo hy hkre xwýnh jarênh

Matêwre 13.1-9; Rukre 8.4-8

1 Tã nhũm Jejus axte gõ jakãx ã mē ahkre ho nhỹ. Hãmri nhũm mē axte hã htu rax jakamã nhũm tee ri mē omu hãmri nê par krem axã

ně gôx kãm amým mẽ ahkre ho nhỹ. Nhũm mẽ piitã kÿxpê omunh nẽ mar mex o kuhê. ² Hãmri nhũm mẽ ahkre ho nhỹ. Nom mẽ ujarênh pix kãm mẽ ahkre. Mẽ kot Tirtũm kapêr mar nẽ tanhmã hkôt amnhĩ nhĩpêx to ho paja nhũm hã kuxi nẽ mẽ kãm hã ujarênh o nhỹ nẽ mẽ kãm:

³ —E mẽ inhma. Kojã mēhõ ma pur mã mõ nẽ pur kãm mẽmo hy ho ukapêr o pa nom nhũm hy piitã amex kãm rôrôk kêt nẽ. Kojã ahpÿnhã rôrôk. ⁴ Kojã hkwy aptÿx kãm rôrôk nhũm kuwênhre omu nẽ hwÿr mra nẽ hkrêr pa. ⁵⁻⁶ Nẽ kojã kên kãm hkwy rôrôk hãmri nẽ higrôt kutã nojarêt nẽ higrôt pa. Nom nhũm kamã aptÿx nẽ kamã kêp pika hkryre jakamã nhũm higrôt nhũm hã myt apha nẽ arĩgro htÿx mẽ nhũm grã pa. Harê hkryre jakamã grã pa. ⁷ Nẽ kojã hkwy mrônhi kamã rôrôk nẽ higrôt tã no nhũm utija kêp amÿtã nhũm ô hkêt nẽ.

⁸ —No kojã hirã kamã pika mex kãm hkwy rôrôk. Hãmri nẽ hirã kamã rôrôk jakamã higrôt mex nẽ piitã ô rax nẽ. Kamã ô hkwy kêp 30 nẽ kamã hkwy kêp 60 nẽ kamã hkwy kêp 100. Á mẽ ujarênh kot anhÿr. ⁹ Kwa mẽ ama nẽ kãm aja-maxpêr tÿx rãhã ho ri apa. Anẽ.

Jejus kot hprĩ hã mẽmo hy jarênh Matêwre 13.10-23; Rukre 8.9-15

¹⁰ Hãmri nhũm mẽ Jejus xujarênh mar pa nẽ angrã nẽ ma akupÿm mra nhũm hkôt mẽ pa ho pa xwÿnh pẽ 12 mẽ hkwyjaja pix Jejus ri arĩk. Hãmri nẽ ujarênhã ã hkukja nẽ kãm:

—Kwa mon ka hte ã mẽ kãm axujarênh anẽ Pahihti? Na pa mẽ ixprĩ hã amar mex kêt nẽ. Anẽ.

¹¹⁻¹² Hãmri nhũm mẽ kãm:

—Nã kot paj ixprĩ hã mẽ amã harê. Tirtũm kãm mẽ ate aprĩ hã mar prãm jakamã kot paj ixprĩ hã tanhmã mẽ amã harênh to. Nã mẽ kot amnhĩ tomnu kaga nhũm Tirtũm kot ja hã mẽ omunh xã hkôt

mẽ ho hkra hã harênhja na pa hte mẽ kãm harê. No mũjjaja mẽ akĩnhã mẽ kãm mar prãm kêt jakamã na pa hte mẽ kãm mẽmoj tã haxwy nẽ awjarê nhũm mẽ ãm ixujarênh pix ma.

Na htem kuma nẽ ãm kuma nẽ htÿx ri hã pa. No kêp apu mẽ kãm hprĩ hã mar prãm ronhÿx mẽ ra hprĩ hã kuma nẽ Tirtũm kôt amnhĩ xunhwÿ nhũm amnhĩ tã mẽ omu nẽ mẽ kot amnhĩ tomnuj o hapêx. Nom mẽ kãm mar prãm kêt. Anẽ.

¹³ Tã mẽ ate aprĩ hã ixujarênhja mar mex kêt jakamã tanhmã kot kaj mẽ amnhĩ to nẽ ixujarênh piitã ama? E kot paj ixprĩ hã mẽ amã mẽmo hyta jarê ka mẽ inhma.

¹⁴ —Nã mẽmo hyta te kêp Tirtũm kapêr pyrãk. Nẽ ahpÿnhã rôrôk xã hã pikata te kêp ahpÿnhã mẽ kot Tirtũm kapêr mar xwÿnhjê kot mar nẽ ahpÿnhã tanhmã amnhĩ nhĩpêx to pyrãk. ¹⁵ Jakamã mẽ kot mar xwÿnh kwÿjaja hte kot aptÿx kãm hkwy rôrôk nhũm kuwênh kot hwÿr mra nẽ hkrêr par xwÿnhã pyrãk. Jakamã na htem Tirtũm kapêr ma nom nhũm Satanasti te kuwênh kot hy hkrêr parta pyrãk o mẽ hipêx. Nẽ mẽ kot amnhĩ kaxyw hkôt hamaxpêr nẽ hkôt amnhĩ xunhwÿr pymaj tanhmã nẽ mẽ hkrã hto. Jakamã nhũm mẽ Tirtũm kapêr ma nom ho hamakêtkati tokyx anẽ nẽ axte kãm hamaxpêr kêt nẽ.

¹⁶ —Nẽ mẽ kot mar xwÿnh kwÿjaja te kot kênre kamã hkwy rôrôk nẽ higrôt nhũm te hã myt apha nhũm grã par tokyx anhÿr xwÿnhã pyrãk. Na htem Tirtũm kapêr ma nẽ hkĩnh nẽ. Nẽ kãm mar prãm nẽ. Te hy higrôt tokyx anhÿrta pyrãk. ¹⁷ Tã nhũm mẽhõ tẽ nẽ Tirtũm nẽ tanhmã mẽ kãm kapêr to nhũm mẽ kuma nẽ hkaga. Rÿ nhũm mẽ Tirtũm ã tanhmã mẽ homnuj to nhũm mẽ tee ri amnhĩ

tã mẽ omu nẽ hkaga. Te mẽmo hy higrõt nẽ grã par tokyx anhÿrta pyrãk.

¹⁸ —Nẽ mẽ kot mar xwÿnh kwÿjaja te kot mrõnhĩ kamã hkwÿ rôrõk nẽ higrõt nhũm mrõnhĩ kot kęp ãmnãr xwÿnhhta pyrãk. Nẽ mẽ kãm Tirtũm kapër mar prãm nẽ. ¹⁹ Nom mããnen kãm hikukrêx rax nẽ hikãxpore rax prãm jakamã ãm ja pix kukamã hamaxpër o ri pa. Jao ra gryk ã axte Tirtũm kapër mã hamaxpër nẽ hkõt amnhĩ nhĩpêx kêt nẽ. Te mrõnhĩ kot higrõt pẽ ãmnãr nhũm ô hkêeta pyrãk.

²⁰ —No mẽ kot mar xwÿnh kwÿjaja te hirã kamã pika mex kãm hy hkwÿ rôrõk nẽ higrõt nẽ ô raxta pyrãk. Na htem ixkapër ma nẽ amnhĩ krã him hagjênh tÿx nẽ. Nẽ ixkõt ri amnhĩ nhĩpêx mex rãhã ho ri pa. Te mẽmo hy hkre kamã ô hkwÿja kęp 30 nẽ kamã kęp 60 nẽ kamã kęp 100ta pyrã nẽ Tirtũm kapër kõt amnhĩ nhĩpêx mex rãhã ho pa. E ã ixujarênhja kot anhÿr. Anẽ.

Kanê hpimxur ã harênh

Rukre 8.16-18, 8.24-25; Matêwre 13.10-15, 25.14-30

²¹ Nhũm Jejus arĩ hkõt mẽ pa ho pa xwÿnhjê jahkre nẽ mẽ kãm:

—Xã na htem kanê hpõk nẽ poti ho hpro rÿ hitom kãm par krak ri unhwÿ? Nã na htem hpõk hãmri nẽ kÿx pẽ mẽmoj nhĩmõk ã unhwÿ. ²² Ja pyrã nẽ mẽ piitã kot hkwÿjê pẽ tanhmã hamaxpër punuj to ho hpimxur prãm tã tee ri kot ho hpimxur prãm kaprÿ. Koja nhÿrmã mẽ hamaxpër piitã amnhĩ to amnhĩrit pa. Nẽ mẽmoj piitã ra hpimxur mex tã koja nhÿrmã amnhĩ to amnhĩrit pa. Te mẽ kot kanê hpõk nẽ kÿx pẽ unhwÿr nhũm amnhĩrit mex pyrãk. Ja pyrã nẽ na pa hte Tirtũm kapër o ri ixpimxur o ixpa hkêt nẽ. Na pa hte ixprĩ hã mẽ amã harênh mex o ixpa. ²³ Kwa mẽ

ixujarênhja ma nẽ kãm ajamaxpër tÿx rãhã ho ri apa. Anẽ.

Nhũm pre ã Jejus mẽ kãm kapër anẽ. ²⁴ Hãmri nẽ mẽ kãm:

—Nẽ kêr ka mẽ axpên kãm axukapri ho ri tanhmã axpên to mex to ho ri apa. Kêr kê Tirtũm ja hã mẽ apumu nẽ mẽ apyrã nẽ mẽ akamã ukapri pẽ mẽ ato mex o pa. ²⁵ Koja mẽhõ inhmã tanhmã amnhĩ nhĩpêx mex to pa ja hã omu nẽ kot inhmã ãpênh mexta pãnhã ho mex nẽ. No koja inhmã ãpênh mex kêt pa ja hã omu nẽ hã ho mex kêt nẽ.

—Nẽ koja mẽhõ kãm ixkapër mar prãm nom kormã hprĩ hã mar mex kêt tã arĩ mar o pa nẽ gaa nẽ mar tÿx o mõ. No koja kuma nẽ ãm kuma hãmri nẽ gaa nẽ hã no hkêt. Anẽ.

Pur kãm mẽmo hy hkre xwÿnh jarênh

Matêwre 13.24-30

²⁶ Nhũm Jejus arĩ hkõt mẽ pa ho mẽ pa xwÿnhjê jahkre ho nhÿ nẽ mẽ kãm:

—E pa mẽ amã tanhmã mẽ kot ixkapër mar tÿx xwÿnhjê jarênh to ka mẽ inhma. Koja mẽhõ ixkapër mar tÿx nẽ ra hkõt ri amnhĩ nhĩpêx o pa. Hãmri nẽ hamaxpër nyw o hamaxpër o pa nẽ amnhĩ nhĩpêx nyw o amnhĩ nhĩpêx o pa. Te mẽ hpur kãm mẽhõ kot mẽmo hy hkre xwÿnh kot amnhĩ nhĩpêx pyrãk. Na hte hyja kre ho pa. ²⁷ Hãmri nẽ hkre hpa nẽ kamãt mẽ õt o hikwÿ nẽ arĩgro mẽ mẽmoj tã ãpênh o pa. Rãhã nhũm mẽmo hyja arĩ hikwÿ ho hikwÿ hkêt nẽ. Koja amnhĩ nhĩpêx õ ho amnhĩ nhĩpêx nẽ higrõt kato nẽ hprêk. Kre xwÿnh kot tanhmã kot amnhĩ nhĩpêx to hã omunh kêt tã nhũm kãm hprêk.

²⁸ —Na hte hpõm hapõx o pa nẽ higrõt o pyka kahte. Hãmri nẽ hprêk nẽ hõ axpõt nẽ gaa nẽ hpãnhã ô. Hãmri nẽ hkamrêk pa nẽ xa. ²⁹ Hãmri nẽ mẽ kot hikênh mã mex nẽ nhũm kot hkre xwÿnhhta omu nẽ amnhũm hamÿnh pa. Tã mẽ

kot ixkapêr mar mex xwýnhjaja te mêmō hy ra higrôt kator nê hprêk nê hô pipôt nê ô xwýnhhta pyrâk. Nê urâk nê amnhî nhîpêx ô ho amnhî nhîpêx o pa. Anê.

Jejus te kot mêmō hy pyrâk ã kot amnhî jarênh

Matêwre 13.31-32; Rukre 13.18-19

³⁰⁻³² Nhũm Jejus arĩ mē ahkre ho nhỹ nê mē kām:

—Tirtũm kot mē awýr ixte mē ato amnhîptâr kaxyw inhmēnh ã ijarênhja. Te ixte mêmō hy pixire pyrâk. Koja mēhō mêmō hy hō pixire nê hkre nhũm ra higrôt. Nê gaa nê hprêk. Hãmri nê hpa angrà nhũm kuwênhre hwýr mra nê hōptĩ kamã amnhĩm haê nhîpêx. Mêmō hyta grire htã nhũm hkre nhũm higrôt nê ã amnhî nhîpêx anê. Tã kot paj nhỹrmã urã nê ixpyxi htã kot paj pika piitã hkôt mē ho amnhîptã nê mē omunh mex rãhã ho ri ixpa. Anê.

Á na pre Jejusja hkôt mē pa ho mē pa xwýnhjê mã amnhî tã kuxi nê ujarênh anê. ³³ Mē kām ujarênh kām mē ahkre ho pa. Te nhãm mêmōj jarênh pyrã nê amnhî tã haxwý nê harê. Mē kot tanhmã mar to hã mē omunh xã hkôt tanhmã mē kām ujarênh to. ³⁴ Na pre ãm ujarênh pix kām mē kām kapêr mar prãm kêt xwýnhjê mã amnhî jarênh rãhã ho pa. No mē kot hkôt pa ho pa xwýnhjê mã nhũm hprĩ hã ujarênh jarê nhũm mēhprĩ hã mar mex nê.

Jejus kot kôk o pinhkrênh ã harênh

Matêwre 8.23-27; Rukre 8.22-25

³⁵ Tã nhũm amýkry nhũm Jejus arĩ pâr kre kamã nhỹ. Hãmri nê hkôt mē pa ho mē pa xwýnhjê mã kām: “E pu mē ma xarmã mō.” ³⁶ Anê hãmri nê mē kot mar o hkrĩ xwýnhjê re nê pâr mã agjê nê ma xarmã mō. Garirej rũm kato nê ma xarmã pika hō hwýr mō. Nhũm pâr kwýja ma mē hkôt mō. ³⁷⁻³⁸ Nhũm

Jejus ra ôt xwa nê tē nê pâr kre kamã hkrã japar xã hã hkrã xi nê ra ôt týx nê nõ. Nhũm kôk àpêr týx nê nhũm gô kãnhmã harĩ nê axpên tak. Ra ri xatã axpên tak nê pâr kre kamã axkapĩ nhũm ra mē kêp àr o mō. Hãmri nhũm mē tee ri amnhî nhîpêx nê tee ri amnhî kukamã hamaxpêr nê Jejus wýr hprôt nê kumra nê kām:

—Kwa kãnhmã nhỹ Pahihti. Kot puj mē jarãhã pahtyk pa. Anê.

³⁹ Hãmri nhũm hkrãkato nê kãnhmã nhỹ nê kôk mē gôta pumu nê wa kãm kapêr o:

—E kwa wa anhîkrê. Anê.
Hãmri nhũm gô mē kôk hpinhkrênh kurê kumrêx.

⁴⁰ Hãmri nhũm Jejus hkôt mē pa ho mē pa xwýnhjê mã kām:

—Hêxta waa nê. Kormã mē ate amnhî kaxyw Tirtũm mē wa inhmã ajamaxpêr týx kêt. Hã na ka mē ri amã ma nê tee ri amnhî kukamã ajamaxpêr. Anê.

⁴¹ Hãmri nhũm mē amnhî jaêr pê ã kot amnhî nhîpêx anhýr ã omu nê tee ri axpên pumunh pê omunh o kuhê. Hãmri nê axpên mã:

—Kokýy. Jejus kêp mē panhĩõ hkêt. Mē pahtõ kot pu te kot amnhî nhîpêx pyrã nê kôk mã pakapêr nhũm anhîkrê? Nã mē pakuròm àhpumunh týx o àhpumunh týx. Anê.

5

Jejus kot mēhō nê mēkarõmnuti janor ã jarênh

Matêwre 8.28-33; Rukre 8.26-34

¹ Tã nhũm Jejus mē hkôt mē pa ho mē pa xwýnhjê mērohã mō nê xarmã Geras wýr pøj. ²⁻⁴ Hãmri nê pâr rũm hapøj nhũm mēhō myja Jejus pumu nê hwýr tē. Mēkarõmnuti kot hwýr àr nhũm ý hã oprê htýx kumrêx. Hãmri nê hkwyjê hkãx ã kapôt ã mē hã pika kamã ri hkênh nê pa ho pa. Nhũm mē xatã kãx o hte hpre nê hpa hpre htã no nhũm kurê. ⁵ Nê kamãt kãm nê arĩgro hã àmra htýx o mrap pê kên o amnhî

tak o mra. Mě hã pyka kamã nê kapôt ã hixêt ã amnhî tak tỳx rãhã ho mra. ⁶ Tã amỳm Jejus pumu nê hwỳr hprôt nê hã hpijaàm kaxyw kutã hkõn krã ho tẽm nê hparpê nhỹ. ⁷⁻⁸ Hãmri nhũm omu nê nê mẽkarõmnuti mã kapêr nê kãm:

—Kwa kurũm akato nê ma tẽ. Anẽ.

Hãmri nhũm kuma nê tanhmã myta o nhũm tãm mẽkarõmnuti nhỹ hã Jejus mã kapêr nê ãmra kamã kãm:

—Pa Tirtũm Kra Jejus? Mo kaxyw na ka ixwỳr tẽ? Kwa tanhmã ixto hkêt nê nà?

⁹⁻¹⁰ Anẽ nhũm kãm:

—Tanhmã na anhĩxi te? Anẽ.

Nhũm kãm:

—Nà ixpê Mẽohtõhti. Mẽkarõmnuti ohtõ nê kot ixwỳr gjẽx jakamã na htem ã inhĩxi jarẽnh anẽ. Kwa nê mẽ ijanor kêt nê nà? Anẽ.

¹¹⁻¹² Hãmri nhũm mẽkarõmnuti tãm amnhĩ to kuwỳ nê kãm:

—Kwa kër ka jahti nê mẽ ijapõx japêr nê mẽ kot amnhĩ xà htỳx kamã hamak o mẽ pa htũm xàta wỳr mẽ ixrẽnh kêt nê. Hagrõ hkwỳ mũj wỳr mãn mẽ ixrẽ pa mẽ hpãnhã hwỳr mãn hagjê? Anẽ.

¹³ Hãmri nhũm mẽ kãm:

—Tõe. Mẽ tãm hwỳr mra. Anẽ.

Hãmri nhũm mẽmyta pẽ hapõx pa nê ma hagrõ hwỳr mrrar kurẽ kumrẽx nê mẽ kãm gjẽx pa nhũm myja akupỳm tãm hkrã. No nhũm hagrõja mẽkarõmnuti pymaj amỳra nê axkahkũm nê hprôt nê himõ hã krã hixêt ã axpum rõrõk nê gõx kãm mro nê hpikaprãr pa. Ohtõ rax kumrẽx. Kêp 2.000 tã hpikaprãr pa. ¹⁴ Hãmri nhũm hagrõ jamãr o ri mẽ pa xwỳnhjaja tee ri ja hã omu nê ma mẽ õ patrãw wỳr akupỳm mẽ piitã mẽ kãm harẽnh o hprôt nê mra. Hãmri nê mẽ kãm ujarẽnh pa. ¹⁵⁻¹⁶ Nhũm mẽ tee ri mẽ kuma nê ma Jejus wỳr mra nê hkaxpa nê kuri myta pumu. Nhũm ra akupỳm tãm hkrã nê ê kamã tãm amnhĩ nhĩpẽx nê nhỹ. Nhũm mẽ kot hã

omunh xwỳnhjaja mẽ kãm ujarẽnh pa nhũm mẽ kuma nê myta pumu hãmri nê tee ri amnhĩ kukamã hamaxpêr o kãm Jejus puma nê. ¹⁷ Hãmri nê amnhĩ nê kãm kapêr nê kãm:

—Kwa mẽmo kaxyw na ka mẽ ixwỳr rê? Mẽ ma akupỳm amrar tokyx anẽ. Anẽ.

¹⁸ Hãmri nhũm mẽ kuma nê akupỳm pàr wỳr agjê nhũm akupỳm mex xwỳnhta tee ri ja hã mẽ omu nê mẽ hkõt hkrã. ¹⁹ No nhũm Jejus kãm:

—Nà kot kaj mẽ ixkõt amõr kêt nê. Ma akupỳm anhõ krĩ hwỳr mãn tẽ nê mẽ kãm Tirtũm kot akupỳm ato mex ã amnhĩ jarẽnh o ri mẽ hkõt apa. Anẽ.

²⁰ Hãmri nhũm kuma nê ma akupỳm tẽ. Hãmri nê õ pyka pẽ Tekap kãm mẽ kãm Jejus kot tanhmã ho mex to hã harẽnh ri mẽ hkõt pa nhũm mẽ amnhĩ jaêr pẽ kuma nê tee ri hkukamã hamaxpêr.

Jejus kot akupỳm mẽhõ ho mex nê akupỳm mẽhõ ho htĩr ã harẽnh

Matêwre 9.18-26; Rukre 8.40-56

²¹ Tã nhũm Jejus mẽ hkõt mẽ pa ho pa xwỳnhjê mẽrohã akupỳm xarmã mõ nê rê. Hãmri nê pàr nhõ nê api nê gõ mỳri kuhê nhũm pika nhõ xwỳnhjaja Jejus pumu nê hã pikuprõnh rax nê. ²²⁻²³ Hãmri nhũm mẽhõ my pẽ Jajtija hwỳr tẽ nê kutã hkõnkrã ho htẽm nê nhỹ. Kêp Tirtũm kapêr o mẽ ahkre xà hã ixkre jamãr xwỳnh maati na pre. Nhũm hkra nija kêp à htỳx nê htyk kaxyw nê nõ. Kormã nyw. Kormã hã amgrã pẽ 12 pix tã ra kêp htyk kaxyw. Hãmri nhũm Jajtija tee ri hkukamã hamaxpêr nê ma Jejus wỳr tẽ nê hpar pẽ hkõn krã ho tẽm nê ho hwỳr kãm hihtỳx nê kãm:

—Pa akupỳm mẽ ixto mex xwỳnh maati. E awỳr na pa tẽ. Na ra ixkra ixpê htyk kaxyw. Pa tee ri omu nê kaxyw amã ijamaxpêr nê awỳr tẽ. Jakamã kwa ma ixkõt

inhörkwý hwýr tē nē inhmā omu nē hā anhíkra xi nē akupým inhmā ho mex. Anē.

²⁴ Hāmri nhūm kuma nē ma hkôt tē. Nhūm mē ohtō nē axpēn nhīgānh nē axpēn kujahēk o wa hkôt mra. ²⁵ Nhūm mēhō nija haxwýja wa hkôt tē. Na pre hte hkamrō hkryre rāhā ho pa hā ra hā amgrā kēp 12. ²⁶ Nē tōtō mā amnhīrer rax nē nhūm mē tee ri kot ho mex kaxyw nom xatā hkane kaprý. Hāmri nhūm ra hikāxpore kēp hapēx nhūm arī ām rāhā nē pa. ²⁷⁻²⁸ Hāmri nē tee ri amnhī kukamā hamaxpēr nē Jejus jarēnh ma nē hamaxpēr o:

—Ma kot paj ma hwýr tē nē kēp é pix kupēnh tā akupým inhmex japēr. Ma kot paj ho anē.

Anhýr o hamaxpēr hāmri nē ma mē hkôt hwýr htēm kuré kumrēx. Nhūm mē ohtō raxja kaēx ā mē hkôt hwýr tē. Hāmri nē katut kôt kēp é nhīrē kupē. ²⁹ ām é pix kupēnh tā akupým mex ā amnhī pumunh kuré kumrēx. ³⁰ Hāmri nhūm Jejus kot kēp é kupēnh ā amnhī tā omu nē hēx rom xa nē mē ho hakēx nē amnhī tā mē kām kapēr nē mē kām:

—Kwa mē atō na ka ri amnhī kaxyw inhmā ajamaxpēr týx pé ixpé ixē kupé? Anē.

Hāmri nhūm mē piitā kuma nē tee ri axpēn pumu nē kām amnhī tā aprā. ³¹ Hāmri nhūm hkôt mē pa ho pa xwýnhjaja kām:

—Mē kot apē amnār griā kot ka kēt ri mēhō kot apē hkupēnh xwýnh ā ri mē hkukja. Kwa mán ām mēhō amarī apē hkupé. Anē.

³² Hāmri nhūm mē kām:

—Nā na amarī ixpé hkupēnh kēt nē. Na amnhī kaxyw inhmā hamaxpēr týx pé ixpé hkupé. Tā na ixāhpumunh týx xā ho akupým mex. Nom ra ixte mēhō kot ixpé hkupēnh xwýnhhta pumunh jakamā na pa ixēx rom ā amnhī tā ri mē hkukjēr anē. E kwa mē atō inhmā amnhī jarē. Anē.

³³ Hāmri nhūm nija kuma nē tee ri kēp kot amnhī to hpimxur prām. Hāmri nē hpijaam nē hwýr htetert o tē nē kutā hkōn krā ho tēm nē nhý nē kām amnhī jarē nē kām:

—Ma pa na pa inhmā inhmex prām xāj apē axē kupé. Tā na pa akupým inhmex. Anē.

³⁴ Hāmri nhūm kuma nē kām:

—Tý. Nā ate amnhī kaxyw inhmā ajamaxpēr týx kôt ā ate amnhī nhīpēx anhýr jakamā na ka akupým amex. Kot kaj axte akamrō rāhā ho ri apa hkēt nē. E māmri ajamakētati nē ma akupým anhörkwý hwýr tē. Anē.

Hāmri nhūm kuma nē hkñnh nē ma akupým tē.

³⁵ Rôm nhūm Jajti mā mē àpēnh xwýnhjaja örkwý rûm ma õ patrāw kutā mra nē wa hkaxpa nē Jajti mā kām:

—Kwa na ra akra apē ty. Mo kaxyw kot ka kēt amnhī kôt Jejus o mō? Kwār māmri ma akupým awjanā nē tē. Anē.

³⁶ Hāmri nhūm Jejus mē kuma nē Jajti mā kām:

—Kwa tee ri akra hkukamā ajamaxpēr kēt nē. Ām kaxyw inhmā mán ajamaxpēr týx rāhā nē. Anē.

³⁷⁻⁴⁰ Hāmri nhūm mē axte mō nē mē örkwý hwýr pōj nē mē omu. Nhūm mē ra hā htu rax nē mýr o hkrī. Hāmri nhūm Jejus mē hwýr axā nē mē omu nē kot mē hkra htyk kumrēx ā omunh tā mē kām:

—Kwa mē hāmri amýr kēt nē. Na nireta htyk kēt nē. Na ām gōr nē nō. Anē.

Hāmri nhūm mē kot ra htyk ā omunh mex jakamā kuma nē ām kuma nē axtem nē ri axpēn mā hā hpēr o axkē. Hāmri nhūm Jejus mē hanor pa nē hitom kām htyk xwýnh wýr àr kaxyw nē amnhī kôt Juāw nē Xiakre nē Simāw Pētre nē kaxyw htyk xwýnh katorxā nē hipéêxā pix amnhī kôt mē ho axā. ⁴¹ Hāmri nē htyk xwýnhhta wýr tē nē hpa hā kupy nē kām kapēr nē kām:

—Pa? E kwa kànhmã nhỹ. Anẽ.

Nom amnhĩ kapër kãm harẽ nẽ kãm:

—Tarit kũm. Anẽ.

⁴² Hãmri nhũm kànhmã ỹr kurẽ kumrẽx nẽ kànhmã xa nẽ ri mra. Na pre ra hprêk nẽ ty. Na ra hã amgrà kęp 12 tã ty nhũm Jejus akupỹm ho htĩr nẽ kànhmã ỹr nhũm kànhmã xa nẽ ri mra. ⁴³ Hãmri nhũm kuri omunh xwỹnhjaja amnhĩ jaer pẽ omu nẽ kamã no puma nẽ hkĩnh tỹx kumrẽx. Hãmri nhũm Jejus katorxã mẽ hipêexãja wa kãm:

—E mãn ra kãm prãm nẽ. Wa tokyx kãm mẽmoj japêr kê kukrẽ. Nom kêr ka wa inhmar kumrẽx. Kêr ka wa akupỹm ixte ho htĩr ã ri mẽ kãm ijarênh o ri apa hkêt nẽ. Âm kwarĩ ho kwarĩ. Anẽ.

6

Najare nhõ xwỹnhjaja kot Jejus kaga hã mẽ harênh

Matêwre 13.53-58; Rukre 4.16-30; Juãw 1.11

¹ Tã nhũm Jejus ma õ krĩ pẽ Najare hwỹr ma akupỹm mõ nhũm hkôt mẽ pa ho mẽ pa xwỹnhjaja ma hkôt mõ. ² Hãmri nẽ hwỹr põj. Nhũm mẽ õ arĩgromnu pẽ sap kator jakamã nhũm Jejus ma Tĩrtũm kapër o mẽ ahkre xã hã ixkre hwỹr tẽ. Hãmri nẽ kamã mẽ ahkre ho nhỹ nhũm mẽ amnhĩ jaer pẽ kapër mex ã kuma nẽ tee ri axpên pumunh pẽ hamaxpêr o hkrĩ. Jejus kęp mẽ hkwy hã hkamnhĩx nom nhũm mẽ kurom àhpumunh tỹx nẽ kapër mex jakamã nhũm mẽ kuma nẽ tee ri hamaxpêr o hkrĩ. Hãmri nẽ axpên mã:

³ —Kwa kęp mẽ panhĩõ htã tanhmã kot we amnhĩ to nẽ ã àhpumunh tỹx kôt mẽ pamã kapër anẽ nẽ ri mẽ kãm aa mẽ kot mẽmoj pumunh kêt kwỹ ho anhỹr o pa? Mẽ panoo mã na pre hprêk. Kęp pĩ kuprãr xwỹnh Juje mẽ hprõ Marir wa hkra na. Nẽ htõ Xiakre nẽ Juje nẽ Simãw nẽ Jutja ra mẽ pahte mẽ kęp htõ hã omunh mex. Nẽ htõxjaja

jar mẽ pakamã pa nhũm mẽ pahte mẽ omunh mex kênã kot kêt we mẽ kurom ã àhpumunh tỹx anẽ. Anẽ.

Anhỹr o axpên mã harẽ. Hãmri nẽ kamã gryk nẽ hkaga ⁴⁻⁶ nhũm tee ri amnhĩ tã mẽ omu nẽ hamaxpêr o:

—Hêxta waa nẽ. Mẽ kãm amnhĩ kaxyw ixkôt hamaxpêr prãm kêt kumrẽx. Anẽ.

Hãmri nẽ mẽ kãm:

—Nã Tĩrtũm nhỹ hã kapër jarênh o mẽ pa xwỹnhjaja na htem krĩ hkwy kamã kãm mẽ mar prãm nẽ. Nom õ krĩ kamã mẽ kot karãre rũm hprêk o mõi kãm omunh xwỹnhjaja na htem kuma nẽ âm kuma. Anẽ.

Hãmri nhũm mẽ kot amnhĩ kaxyw hkôt hamaxpêr kêt jakamã nhũm tee ri mẽ kãm aa mẽ kot mẽmoj pumunh kêt kwỹ ho anhỹr rax prãm kaprỹ. Nẽ âm mẽ à xwỹnhjê ho grêre nẽ mẽ hã ãhkra jaxwỹ nẽ akupỹm mẽ ho mex. Hãmri nẽ mẽ kurũm kato nẽ ma krĩ hkwy hkôt ri Tĩrtũm kapër o mẽ ahkre ho pa.

Jejus kot mẽmoj tã mẽ kęp 12jê mã karõ hã harênh

Matêwre 10.5-15; Rukre 9.1-6, 10.1-12; mããnên Atre 13.50-51, 18.6

⁷ Tã nhũm Jejus amnhĩ wỹr mẽ kot ỹ hã mẽ ahkre ho pa xwỹnh pẽ 12jê hwỹ. Ra kot amnhĩ kaxyw mẽ rênh xwỹnhhtaja nhũm amnhĩ wỹr mẽ kuwỹ. Hãmri nẽ axpên kaxyw mẽ ho axkrut nẽ mẽ kurẽ nẽ mẽ kãm mẽ àpênh ã karõ nẽ ma mẽ hkwyjê hwỹr mẽ kurẽ. Nẽ mẽ kãm:

—E kêr ka mẽ ma mẽ pahkwỹjê hwỹr mra nẽ inhỹ hã Tĩrtũm kapër jarênh o ri mẽ hkôt apa. Nẽ mẽ kurũm mẽkarõmnuti japõx o ri mẽ hkôt apa. ⁸⁻⁹ Nom kêr ka mẽ amnhĩ kôt akukrẽx rax nẽ ri apa hkêt nẽ. Nẽ kawã htu nẽ ho ri apa hkêt nẽ. Nẽ amnhĩ kôt axãpkur xã ho ri apa hkêt nẽ. Rỹ akãxpore rax nẽ ri ho apa hkêt nẽ. Âm mẽ anhõ kamis nẽ mẽ apar kã ho pixire nẽ agjê nẽ ri hã apa. Nẽ mẽ amnhĩ kaxpar xã hã

mê anhõ kô pix o apa. Mẽ ã anhỹ kamã mẽ hkôt ri apa anê.

¹⁰ —Nê kër ka mẽ nhỹri krĩ hõ hwỳr pøj. Nê apõx xà kamã mẽhõ nhõrkwỹ kamã hkôt ri apikamênh tãmtã kurũm akupỹm ajapøj nê ma hpãnhã nhãm krĩ hõ hwỳr apa. Nom atỳx ri nhãm mẽ hwỳr amrar nê nhãm mẽ hwỳr amrar kêt nê.

¹¹ —Nê koja mẽ nhỹri mẽ akapêr kaga ka mẽ tee ri amnhĩ tã mẽ kamã ama hãmri nê tokyx mẽ kurũm ajapøj nê ma apa. Nê anojarêt nê mẽ noo mã akuhê nê amnhĩ par ã awjagrô kapĩ. Mẽ kot Tĩrtũm kaga hã amnhĩ pumunh nhũm kot amnhĩ pyrà nê mẽ hkaga hã omunh kaxyw ka mẽ ã mẽ noo mã amnhĩ nhĩpêx anê. Hãmri nê hpãnhã ma nhỹhỹm apa.

¹² Anhỹr o mẽ kãm mẽ àpênh ã karõ. Nhũm mẽ kuma nê hapøj nê ma mẽ hkwyjê hkôt pa. Ma krĩ piitã hkôt Tĩrtũm kapêr o mẽ ahkre ho ri mẽ hkôt pa nê mẽ kãm:

—E kwa mẽ tokyx amã ate amnhĩ tomnuj kaga hprãm xàj Tĩrtũm kôt mãn amnhĩ xunhwỹ. Anê.

¹³ Hãmri nê mẽ nê mẽkarõmnuti jano. Nê akupỹm mẽ ã xwỳnhjê ho mex kaxyw mẽmo htwỹm o mẽ hkrã gregrer nê Jejus nhỹ hã akupỹm mẽ ho mex.

Mẽ kot Juãw Paxis pĩr ã mẽ harênh

Matêwre 14.1-12; Rukre 9.7-9

¹⁴ Tã nhũm mẽ piitã Jejus jarênh ma nê axpên mã tanhmã harênh to ho pa. Nom ahpỹnhã tanhmã harênh to. Na prem kamã harênh o:

—Nà Juãw Paxis pimrààta na. Pêr akupỹm htĩr jakamã na hte ã mẽ kot aa mẽmoj pumunh kêt kwỹ ho anhỹr o pa. Anê.

¹⁵ Nê kamã axtem harênh o:

—Nà tãm kêt. Pêr finat Eris na. Anê.

Nê kamã axtem harênh o:

—Nà tãm kêt. Pêr Tĩrtũm nhỹ hã kapêr jarênh xwỳnhjê hõ na.

Te kot amnepê mã mẽ kot Tĩrtũm nhỹ hã tanhmã amnhĩ nhĩpêx to xwỳnhjê kot amnhĩ nhĩpêx pyràk o kot amnhĩ nhĩpêx kênã.

Anhỹr o ahpỹnhã harê. ¹⁶ Hãmri nhũm Ijaew o amnhĩptàr xwỳnh pê Eroxo ãxipasja mẽ kot ã harênh anhỹr ã mẽ kuma nê Juãw Paxis mã hamaxpêr kurê kumrêx. Hãmri nê mẽ kãm:

—Nà pêr Juãw Paxista na. Ixte mẽ kãm hã ixãmnhênh nhũm mẽ kot inhmã mut krãhyr xwỳnhhta mãn ra tanhmã amnhĩ to nê akupỹm htĩr. Anê.

¹⁷⁻²⁰ Na pre ra pahi Eroxo ãxipasja htõ Pirip pê hprõ Eroxis pytà nê ho hprõ nhũm hkra niti mẽ wa hwỳr ahpã. Hãmri nhũm Juãw Paxisja tee ri ja hã pahihtĩ Eroxo ãxipasja pumu nê hã kãm akir nê kãm:

—Tk. Kwa Tĩrtũm kêp ja omnuj. Ra kot ja nê mẽ pahkurê htã ka axtem nê ã amnhĩ nhĩpêx anê.

Anhỹr jakamã nhũm hprõ Eroxisja amnhĩ tã kuma nê kamã gryk tỳx nê. Nê kãm hpĩr prãm nê. No nhũm pahi Eroxo ãxipas kãm hpĩr prãm kêt nê. Juãw Paxis kot Tĩrtũm kôt amnhĩ nhĩpêx nhũm kot hã omunh mex jakamã kãm hpĩr prãm kêt nê. Juãw na pre hte xatã kãm Tĩrtũm kapêr jarênh o pa. Nhũm pahihtĩ Eroxo ãxipasja kormã hprĩ hã mar mex kêt tã hã hpijaàm nê kãm mar prãm nê. Nom nhũm hprõ kãm hpĩr prãm jakamã nhũm kêp mẽ kãm hã amỹnê nhũm mẽ ma o tẽ nê haxà nhũm mex nê mẽ hagiênh xà kamã hkrĩ ho krĩ.

²¹⁻²⁴ Tã nhũm jãã nhũm pahi Eroxo ãxipas kator ã arĩgro kato nhũm mẽ piitã hwỳr mra nê hã akuprõ nê hã hkĩnh nê hã apkur o hkrĩ. Õ kôwenatôjaja nê hkrãmnhwỹjaja nê krĩ hkwyjê kamã mẽõ pahijaja nhũm mẽ ohtõ nê hã akuprõ nê hã hkĩnh. Hãmri nhũm hprõ Eroxis kra nitija mẽ hwỳr axà nê mẽ kãm gre. Mẽ kot omunh nê kamã hkurê pix kaxyw mẽ noo mã hpijaàm kêt nê

ã mẽ kãm grer anê. Hãmri nhũm pahi Eroxo omu nhũm ja kãm mex nê nhũm mẽ piitã hkĩnh nê kamã nopyma nê. Nê grer kãm hpijaam kêt nê tanhmã mẽ kãm grer to nhũm mẽ omu nê kamã no pyma nê. Hãmri nhũm pahi Eroxo ãxipasja kãm:

—Nà ãm hãmri. Na ka mẽ inhmã agrer mex nê. Jakamã kwa mãmri mẽmoj tã ixwỳ. Amã mẽmoj prãm xà hkôt inhmã mẽmoj jarê pa amã kugõ. ãm hãmri na pa amã amnhĩ jarê. Na pa Tirtũm noo mã ã amã amnhĩ jarênh anê. Ka mamrĩ ixkukrêx mex kwỳ hã ixwỳ pu axpên mã ho axkjê. E mẽmo na amã hprãm? Anê.

Hãmri nhũm kuma nê ma katorxã hwỳr tẽ nê kãm harê nê kãm:

—Xê mẽmoj tã kot paj we kuwỳ? Anê.

Hãmri nhũm kuma nê hamaxpêr o:

—Ma ãm hãmri koja mẽ tã jarãhã inhmã Juãw Paxis pí. Anê.

Hãmri nê hkrata mã kãm:

—Ma Juãw Paxis krã hã kot kaj awỳ kê mẽ amã kugõ ka man ixwỳr o tẽ. Anê.

²⁵ Hãmri nhũm kuma nê akupỹm pahi hwỳr axà nê kãm:

—Ma Juãw Paxis krã kot kaj inhmã agõ. Pasiiti kamã axà nê inhmã agõ pa ma amnhĩm o ixtêm kurê kumrêx. ãm ja pix na inhmã hprãm. Anê.

²⁶ Hãmri nhũm tee ri kuma nê hkaprĩ nê. Nê hamaxpêr o:

—Hêxta waa nê. Inhmã hpĩr prãm kêt. Nom ra ixte ixkutã mẽ hkrĩ xwỳnhjê noo mã inhmã kãm mẽmoj prãm xwỳnh nhõr ã amnhĩ jarênh nhũm ixte kãm õr ã amnhĩ jarênh nhũm mẽ piitã mẽ kot inhmãr jakamã tanhmã kot pa we amnhĩ to nê kêp nê? Nà pa nê hkêt nê. Anê.

²⁷ Hãmri nê õ pòristijê mã kãm:

—E mẽ ma Juãw Paxis wỳr mra nê mut krãhta nê pasiiti kamã hkrã xà nê akupỹn o tẽ nê kãm agõ. Anê.

Hãmri nhũm mẽ kuma nê ma mẽ hagjênh xà hwỳr mra nê Juãw wỳr axà hãmri nê mut krãhta. ²⁸ Hãmri nê pasiiti kamã hkrã xà nê akupỹm o tẽ nê kot hã hwỳr xwỳnh mã kugõ nhũm kumỳ nê ma katorxã hwỳr o tẽ nê kãm kugõ.

²⁹ Hãmri nhũm Juãw Paxis kôt mẽ pa ho mẽ pa xwỳnhjaja tee ri harênh ma nê hkaprĩ htỳx nê. Hãmri nê pahi Eroxo ãxipas wỳr mra nê ì hã kuwỳ nhũm mẽ kãm kugõ nhũm mẽ kumỳ nê ma o mra nê kên kre kamã haxã.

Jejus kot mẽ ho 5.000 nê mẽ kãm õ hã harênh

Matêwre 14.13-21; Rukre 9.10-17; Juãw 6.1-14

³⁰ Tã hãmri nhũm mẽ kot Jesus nhỹ hã mẽ ahkre ho mẽ pa xwỳnhjaja akupỹn Jejus wỳr mõi pøj nê kãm amnhĩ jarê. Tanhmã mẽ kot mẽ ahkre hto ho pa nê tanhmã mẽ ho mex to ho pa hã kãm amnhĩ jarênh pa.

³¹ Tã nhũm mẽ piitã axpên pãnhã kot Jesus mar kaxyw mẽ hwỳr mra nhũm mẽ kormã apkur kêt nê. Jakamã nhũm Jejus hkôt mẽ pa ho mẽ pa xwỳnhjê mã:

—E ma pu mẽ awrã kaprỳ hwỳr mõi nê nhỹri pahkrĩ nê pakókôt nê apku.

³² Anê hãmri nhũm mẽ gõx kãm kanõre wỳr agjê nê ma ahte xarmã awrã kaprỳ hwỳr mõi. ³³ Nhũm krĩ hkwy nhõ xwỳnhjaja mẽ omu hãmri nê nhỹhỹm mẽ mõi xà hã mẽ omunh kurê kumrêx. Hãmri nê krĩ hkwy rùm ma mẽ ìhkrepa mra nê mẽ kãm amnhĩ to wa nê pøj nê mẽ kutêp hkrĩ. ³⁴ Hãmri nhũm mẽ mõi nê mẽ hwỳr pøj nê kre kura nê kanõre nhõ. Hãmri nhũm Jejus mẽ hwỳr api nê mẽ omu nê hamaxpêr o:

—Hêxta waa nê. Na mẽ omnu nê pa. Te mẽ kêp õwêhti jamãr xwỳnh kêt nê htỳx ri pa xwỳnh kot amnhĩ nhĩpêx pyrãk. Mêhõ kot mẽ kamã

ukapri nê tanhmã mẽ ho mex to ho pa? Anê.

Hãmri nê mẽ kamã ukapri nê xa nê Tirtùm kapêr o mẽ ahkre rax nê.

³⁵⁻³⁶ Tã nhùm myt àr kaxyw nhùm hkôt mẽ kot pa ho pa xwýnhjaja hwýr mra nê kãm:

—Kwa hãmri na ra amýkry htýx nê. Mẽ hano kê mẽ ma nhýri krĩ hkwy hwýr mra nê tokyx amnhĩm mẽmoj japrô nê kuku nê hikwý nê gôr. Mo jar kapôt ã mẽ apkur xà? Anê.

³⁷ Hãmri nhùm mẽ kuma nê mẽ kãm:

—Kwa nà mẽ kamjaja mẽ kãm mẽmoj gô kê mẽ kuku. Anê.

Hãmri nhùm mẽ kuma nê tee ri hamaxpêr nê kãm:

—Kwa mo mẽ kaxyw mẽ pakàxpore rax? Kot pu mẽ pakàxpore ho 200 nê ho mẽ kãm mẽmoj japrôr tã nom nhùm mẽ ãm ho hkrye nê kuku nê ho ôhy htu hkêt nê. Mẽ ohtô rax kumrêx kênã. Anê.

³⁸ Hãmri nhùm mẽ kãm:

—Nà kot puj mẽ kãm mẽmoj japrôr kêt nê. No mẽ panhõ pãwtita? Tanhmã na arĩ kute? E mẽ atô tẽ nê omu nê akupýn tẽ nê inhmã harê. Anê.

Hãmri nhùm ja ma tẽ nê omu nê akupýn tẽ nê kãm:

—Nà pãwti ãm kêp 5 pix. Nê kaxyw tep ãm pijakrutre. Anê.

³⁹ Hãmri nhùm Jejus kuma nê mẽ kãm:

—Tõe. Mẽ kãm anê kê mẽ ahpýnhã ri hije nê hkrĩ. Anê.

⁴⁰ Hãmri nhùm mẽ piitã ahpýnhã kêp 50 nê hije nê hkrĩ hpa.

⁴¹ Nhùm Jejus pãwti mẽ tepta jamý nê kãnhmã kaxkwa hwýr rĩt nê Tirtùm mã kupê nê kãm harê nê kãm:

—Pa Papaj? Nà ka na apê mẽ inhmã mẽ inhõ ho apa xwýnh jakamã amex o amex. Anê.

Hãmri nê mẽ kãm ho hkry hpa nê hkôt mẽ pa ho mẽ pa xwýnhjê mã kugô nhùm mẽ ô ri ho mra nê ho

mẽ hipêx pa. Pãwti mẽ tepta nhùm mẽ ho mẽ hipêx pa. ⁴²⁻⁴⁴ Nhùm mẽ piitã apkur mex nê. Mẽõja mẽ kêp grire htã nhùm Jejus tanhmã mẽ kãm ho rax to nhùm mẽ ohtô rax tã piitã kuku nê ho ôhy htu hpa. Mẽmyjaja kêp 5.000 nê kaxyw mẽ hprô nê mẽ hkrajaja nhùm mẽõja ho mẽ hipêx pa nhùm arĩ hakrêx prã. Jakamã nhùm Jejus kôt mẽ pa ho mẽ pa xwýnhjaja akupým hakrêx o pikuprônh pa nê ho kawà o 12 nê ho nýt.

Jejus kot gô krãhkà hã htẽm ã harênh

Matêwre 14.22-33; Juãw 6.15-21

⁴⁵⁻⁴⁶ Tã nhùm Jejus hkôt mẽ pa ho mẽ pa xwýnhjê mã kãm:

—E mẽ kanôre mã axà nê ma akupým ixkukamã krĩ pê Petséj wýr rê. Pa jajê jano hãmri nê ma tẽ nê nhýri Tirtùm mã amnhĩ jarê nê rĩ ma mẽ akôt tẽ. Anê.

Hãmri nhùm mẽ kuma nê kanôre mã gjêx pa nê ma mẽ nhùm Jejus mẽ kot mar xwýnhjê janor pa nê ma hixêt prêk ã api nê Tirtùm mã amnhĩ jarênh o nhý.

⁴⁷ Tã nhùm kamãt nhùm arĩ ahte kýxpê nhý. Nhùm hkôt mẽ pa ho mẽ pa xwýnhjaja kormã kanôre kamã mõi. ⁴⁸ Hãmri nhùm Jejus amým mẽ omu nhùm kôk ra mẽ kutã àpêr týx kumrêx nhùm mẽ tee ri amnhĩ nhípêx nê tee ri rrẽmti ho gô rênh nhípêx o hkrĩ.

Tã nhùm ra krãhyre kà nhùm Jejus Tirtùm mã amnhĩ jarênh pa nê kãnhmã xa nê ma mẽ hkôt tẽ. Nom kanôre kamã htẽm kêt nê gô krãhkà hã xa nê mẽ hwýr hpar o tẽ. ⁴⁹⁻⁵⁰ Hãmri nê mẽ hwýr kato nê mẽ kamã hamak kaxyw hêx rom kot mẽ hakrenh mã. Nhùm mẽ amnhĩ wýr omu nê mẽkarô hã hkamnhĩx nê tee ri amnhĩ kukamã hamaxpêr nê umaj htertet nê ãmra rax nê. Hãmri nhùm mẽ kãm:

—Tk. Kwa mẽ amã ma hkêt nê. Pa na pa mẽ akôt tẽ. Anê.

⁵¹ Hãmri nê mẽ hwýr kanôre hkrem axà nhùm kôk xàpêr týxta

hapêx. Hāmri nhūm mē Jejus kamā no puma nē tee ri hamaxpēr nē axpên mā:

—Kokýý. Tanhmā na we amnhī to nē gō krāhkā hā hpar o man mē pahkôt tē mē pahwýr àr mē nhūm kōk hapêx par kurē kumrêx. Anē.

Hāmri nē tee ri kot ā amnhī nhīpêx anhýrja kukamā hamaxpēr o hkrī. ⁵² Kormā mē kot hprī hā Jejus tanhmā kute hā omunh kêt jakamā. Tirtūm pyrā nē àhpumunh o àhpumunh ā omunh mex kêt jakamā tee ri pāwti grēre ho mē hipêx par nē gō krāhkā hā htēm nē kōk o pinhkrēnh ā omu nē tee ri ā kot amnhī nhīpêx anhýrja kukamā hamaxpēr.

Kenējare kamā Jejus kot akupým mē ho mex ā harēnh
Matêwre 14.34-36

⁵³ Tā nhūm mē xarmā rê nē krī pē Jenējare hwýr pōj. Hāmri nē kanôre nhō ⁵⁴ nē api nē kuhê nhūm krī nhō xwýnhjaja Jejus pumunh kurē kumrêx nē axpên mā:

—Kwa pēr Jejusta na mō. Nà tām kēnā. Anē.

⁵⁵ Hāmri nē hkīnh nē ma kape hā mē à xwýnhjê hkôt mrrar kurē kumrêx nē mē harir xā rāhā mē hamý nē akupým Jejus wýr mē o mra. Nhýri hpōx xā kamā omu nē hwýr mē o mra.

⁵⁶ Na pre htem ā Jejus nhīpêx anē. Jakamā nhūm hte ma nhýhým mra. Krī rūnh kôt mra nē krī hkryre hkôt mra nhūm mē omu nē hwýr mē à xwýnhjê ho mra nē mē ho kuwý nē kām:

—Pa? Kwa kê jajaja akupým mex kaxyw apê axê pix kupê nà? Anē.

Hāmri nhūm mē kām:

—Tōe. Nà kwār mē māmri hkupê. Anē.

Hāmri nē mē kot kēp ê kupênh xwýnh piitā akupým mex pa.

7

Mē higêt hkôt mē kot amnhī nhīpêx xwýnhjê jarēnh

Matêwre 5.21-48, 15.1-20

¹⁻⁴ Tā nhūm Mojes kapēr o mē ahkre o mē pa xwýnh kwýjaja Jerujarē rūm Jejus wýr mō. Hāmri nē hā akuprō nē hkôt mē pa ho mē pa xwýnhjê kot amnhī nhīpêx ā mē omunh o kuhê. Ijaew na prem mē hkukamā mē higêtjê kapēr kôt ri tanhmā amnhī nhīpêx to ho pa. Jakamā mē urāk nē apkur kaxyw nē xatā amnhī nhīhkra kuhōnh japjê nē rī kormā apku. No mē amnhī nhīhkra grā pix kuhōnh nē hkrī nē apkur kêt nē. Kuhōnh japjê nē kormā hkrī nē apku. Tirtūm kot ja hā mē omunh nē amnhīm mē mex ā mē harēnh ā amnhī kamnhix jakamā na prem ā amnhī nhīpêx anhýr o pa. Nē nhýri amnhīm mēō hkwý japrō nē akupým ôrkwý hwýr o mra nē haxwý nē mē higêt pyrā nē wýr japjê rūnh kumrêx nē rī kormā apku. Nē mē urāk nē poti nē gōj nē papêre hkre kahōnh japjê rūnh nē rī kormā kamā ô nhīpêx. Mē higêt pyrā nē ā amnhī nhīpêx anhýr o pa. Tirtūm kot ja hā mē omunh nē amnhīm mē mex ā mē harēnh prām xāj. Nom nhūm Jejus kôt mē pa xwýnhjaja na prem ā amnhī nhīpêx anhýr kêt nē. Na prem apkur kaxyw nē katāt kôt amnhī nhīhkra kuhō nē àmnhix apkur o hkrī. Jakamā nhūm Parijew nhō xwýnh mē Tirtūm kapēr tūm o mē ahkre xwýnhjaja tee ri ā mē kot amnhī nhīpêx anhýr ā mē omu nē mē hā Jejus kukja nē kām:

⁵ —Pa Jejus? Kwa mē inhmā mēmoj jarē. Amnepēm mē panhigêtjaja na pre htem apkur kaxyw nē amnhī nhīhkra kuhōnh japjê rūnh kumrêx nē arī kormā hkrīn apku. Jakamā na pa htem mē urāk nē ā amnhī nhīpêx anē. No akôt mē pa ho mē pa xwýnhjaja na htem ho mē ixpyrà kêt nē. Kwa

mo na htem ã amnhĩ nhĩpêx anhÿr kêt nê? Anê.

⁶ Hãmri nhũm mẽ kuma nê mẽ kãm amnepêm Tĩrtũm nhÿ hã kapêr xwÿnh pê Ijais kapêr jarê nê mẽ kãm:

—Nã ãm hãmri na pre finat Ijaisja amnepêm tanhmã mẽ ajarênh to. Te Tĩrtũm tãm kapêr pyrãk o mẽ ajarê nê mẽ ajarênh o:

Mẽ kãm ixkĩnh ã amnhĩ jarênh tã mẽ kãm ixkĩnh kêt. Na htem ãm kãm ixprãm ã amnhĩ jarênh kaprÿ.

⁷ Mẽ kot ixkapêr kuhpa hã amnhĩ krã hkôt mẽmoj tã hkwÿjê mã karõ ho pa jakamã na htem ãm kot ixkôt amnhĩ nhĩpêx ã amnhĩ jarênh kaprÿ. Anê.

Ã na pre mẽ ajarênh anê. ⁸⁻⁹ ãm hãmri na pre mẽ ajarê. Na ka htem mẽ panhĩgêt kapêr kôt pix mã amnhĩ nhĩpêx o apaja gryk ã ra Tĩrtũm kapêr kaga hpa. Te mẽ akapêr o kot Tĩrtũm kapêr jakrenh pyrãk. ¹⁰ Na pre finat Mojes Tĩrtũm nhÿ hã mẽmoj tã mẽ pamã karõ ho:

Ker ka mẽ anhĩpêxã nê mẽ akatorxã wa hã apijaãm o ri apa. Jao wa kutã anojarêt rãhã nê. Nom kot kaj mẽ ho mex hkêt nê tanhmã mẽ kãm akapêr punuj to hãmri nhũm mẽ akwÿjaja ja mÿrapê mẽ apa. Anê.

Na pre ã finat Mojesja Tĩrtũm nhÿ hã mẽ pamã karõ anê. ¹¹ No mẽ kajaja na ka mẽ axtem nê tanhmã akwÿjê mã ja hã karõ hto nê mẽ kãm: “Kot kaj mẽ mẽmo arĩgro hã akãxpore hkwÿ nom anhĩpêxã ho ajuta kaxyw kãm hkwÿ nhõr kêt nê. ãm wa kãm ate ho ajuta kêt ã amnhĩ jarê hãmri nê Tĩrtũm mã amnhĩ jarênh xã hã ixkre hwÿr mãn o tẽ nê mẽ ixte ixkre ho mex kaxyw mẽ inhãm agõ. Kot kaj mẽ ã amnhĩ nhĩpêx anê nhũm Tĩrtũm ja hã mẽ apumu nhũm ja kãm mex

nê. E kêr ka mẽ ã amnhĩ nhĩpêx anhÿr o ri apa.” Anhÿr o na ka htem akwÿjê mã karõ. ¹² Jao mẽ kot mẽ hipêxã nê mẽ katorxã ho ajuta nê mẽ hkurê. ¹³ Te mẽ amã mẽ panhĩgêt kapêr mex o kot Tĩrtũm kapêr jakrenh pyrãk o na ka htem amnhĩ nhĩpêx. Jao te Tĩrtũm kapêr mex kêt pyrãk o hipêx nê mar kêt nê apa. ã na ka htem Tĩrtũm kapêr kuhpa hã amnhĩ nhĩpêx anhÿr o ri apa. Anê.

Mẽ pajamaxpêr punuj kôt mẽ pahtomnu hã harênh

Matêwre 15.10-20

¹⁴ Tã nhũm Jejus Parijew nhõ xwÿnhjê mẽ hkwÿjê mã kapêr pa hãmri nê amnhĩ wÿr ra mẽ kot mar o kuhê xwÿnhjê mã hpa ho apê nê mẽ kãm:

—E pa mẽ amã mẽmoj jarê ka mẽ inhma nê inhmar mex nê. ¹⁵⁻¹⁶ Na hte Tĩrtũm kapêr tũm o mẽ ahkre xwÿnhjaja amnhĩ krã hkôt mẽ ate amnhĩ nhĩhkra kuhõnh japjê hã mẽ amã karõ ho pa. Nê amnhĩ krã hkôt mẽ axãpkur xã hã tanhmã mẽ amã karõ hto ho pa. Mẽ ate ã amnhĩ nhĩpêx anhÿr nhũm Tĩrtũm kot ja hã mẽ apumunh kôt amnhĩm mẽ amex ã mẽ ajarênh kaxyw nhũm htem ã mẽmoj tã mẽ amã karõ anê. Nom na hte Tĩrtũm tanhmã mẽ panhĩhkra kuhõnh to hã mẽ pahpumu nê ãm hã mẽ pa hpumu. Nê mẽmo mẽ paxãpkur xã hã mẽ pahpumu nê ãm hã mẽ pahpumu. Ja kãm tanhmã kute hkêt. Na hte ja hã mẽ omunh xã hkôt amnhĩm mẽ mex ã mẽ harênh rÿ mẽ mex kêt ã mẽ harênh kêt nê. Rÿ mẽ hakwa ho mẽmoj kur ã mẽ omunh xã hkôt tanhmã mẽ harênh to hkêt nê. ãm mẽ hakwa ho tanhmã kapêr to pix ã mẽ mar kôt na hte tanhmã mẽ harênh to.

Anhÿr o mẽ kãm kapêr. ¹⁷ Hãmri nê mẽ kot mar o kuhê xwÿnhjê re nê hkôt mẽ pa ho mẽ pa xwÿnhjê mẽ mẽ amnhĩm hikranh xã hã ixkre hwÿr agjê. Hãmri nhũm hkôt

mě pa ho mẽ pa xwýnhjaja tee ri Jejus kot tanhmã mẽ hakwa jarēnh to hã kuma nē hã hkukja nē kãm:

—Kwa mon ka ri mẽ inhmã ã ja jarēnh anē? Anē.

¹⁸ Hãmri nhũm mẽ kãm:

—Kwa xàn ka mẽ kormã aprĩ hã ja mar mex kêt nē? E pa ixprĩ hã mẽ amã harē ka mẽ inhma. Nã mẽ apkur xà na hte mẽ hkrã hi kamã mẽ hamaxpēr wýr gjêx kêt nē. ¹⁹ Na hte ãm mẽ ôhy pix wýr agjê nē gaa nē nhãm hapôj nē hapêx. Na htem mẽ apkur xà nhỹ hã tanhmã amnhĩ tomnu to hkêt nē. Jakamã na hte Tĩrtũm mẽ apkur xà hã mẽ omunh xà hkôt tanhmã mẽ harēnh to hkêt nē. Anē.

Nhũm pre ã mẽ kãm kapēr anhỹr o mẽ paxàpkur xà piitã mex ã harē. Jakamã na hte Tĩrtũm kra-jaja ãmnhĩx mẽmoj piitã hkur o pa nē kãm mẽmoj kur pyrna hkêt nē. Jakamã nhũm Jejus ã mẽ kãm kapēr anē nē mẽ kãm:

²⁰ —Mẽ hkrã hi kamã mẽ hamaxpēr punuj pix nhỹ hã na htem tanhmã amnhĩ tomnuj to. Jakamã na hte Tĩrtũm tanhmã mẽ hamaxpēr to ho pa hã mẽ omunh xà hkôt tanhmã mẽ harēnh to. Nom mẽ kot mẽmoj kur ã mẽ omunh xà hkôt rý mẽ ãhkra kuhõnh japjê hã mẽ omunh xà hkôt tanhmã mẽ harēnh to hkêt nē. Ja tanhmã kêp kute hkêt. ²¹⁻²² Nom koja mẽhõ hamaxpēr punuj nē ra hkôt tanhmã amnhĩ tomnuj to.

Jao axpēn kamã hpijaam kêt nē.

Rý mẽhõx pĩ rý mẽ kêp ahkĩ.

Rý mẽ kêp mẽ hprõ rý mẽhkuprý ho amnhĩkati.

Rý ri axpēn pē õxy.

Rý tanhmã hkwýjê homnuj to.

Rý tanhmã mẽ ho kapēr punuj to.

Rý hêx rom mẽ no kupyr o ri pa.

Rý mẽmoj tã amnhĩ to jarkrar o pa.

Rý axpēn kukrêx pumu nē kãm ho õ hprãm xaj hã õ xwýnhhta kamã gryk.

Rý htýx ri tanhmã amnhĩ nhĩpêx to.

Mẽ hamaxpēr punuj jakamã na htem ã ri amnhĩ nhĩpêx anhỹr o pa. ²³ Tã ã mẽ kot amnhĩ nhĩpêx anhỹr ã mẽ omunh xà hkôt na hte Tĩrtũm mẽ kot amnhĩ tomnuj xwýnh hã mẽ harē. Anē.

Mẽhõ kot hkra kaxyw Jejus mã hamaxpēr ã harēnh

Matêwre 5.21-28

²⁴ Tã nhũm Jejus mẽ hkôt mẽ pa ho mẽ pa xwýnhjaja nhỹhỹm no-jarêh hãmri nē krĩ rùm hapôj nē ma krĩ pē Xir pu hã ri pa. Hãmri nhũm Jejus hkwýjê mã:

—E kwa pu mẽ tokyx ixkre mũj wýr mō mẽ kuri pój nē kamã amnhũm hikra. Pu mẽ pahpõx tokyx anē kē krĩ nhõ xwýnhjaja mẽ pahpõx ã mẽ pahpumunh kêt nē.

Anhỹr tã nom nhũm mẽ piitã mẽ harēnh ma nē mẽ hã akuprõ. ²⁵⁻²⁶ Nhũm mẽhõ ni haxwýja Jejus hpõx ã harēnh ma nē ma hwýr tē. Nom kêp Ijaew kêt axtem Gres nhõ xwýnh na pre. Pika pē Sir kamã krĩ mẽ kot kãm “Wēnĩs” anhỹr xwýnh kamã na pre kato. Nhũm pre mẽkarõmnuti kêp hkra ni mã axà. Hãmri nhũm õ mãmãj tee ri omu nē ra Jejus hpõx ã harēnh ma nē ma hwýr tē. Hãmri nē hwýr axà nē hparpê hkõnkrã ho htēm nē nhỹ nē kãm:

—Xê Pahihti. Inhmã ixkra nē mẽkarõmnuti jano kē ma tē kē akupým inhmã mex. Anē.

²⁷ Hãmri nhũm kãm:

—Nã kormã. Na pre Tĩrtũm taxy kormã Ijaewjê pix wýr inhmẽ. Jakamã na pa kormã nhãm mẽ akwýjê hõ tanhmã mẽ ato mex to hkêt nē. Anē.

²⁸ Hãmri nhũm tee ri amnhĩ tã kuma nē kãm:

—Ma ãm hãmri na ka ja jarē. Ixpê Ijaew kêt tã nom mẽ kuxwar we ixto mex gire kêt wehe. Anē.

²⁹ Hãmri nhũm kãm:

—Nã ãm hãmri na ka ã akra kaxyw inhmã ajamaxpēr týx anē.

Jakamã kot paj nê mēkarōmnutita jano. Koja axte tanhmã apê ho hkêt nê. E ma akupÿm hwÿr tē nê omu. Anê.

³⁰ Hāmri nhūm kuma nê ma akupÿm ōrkwÿ hwÿr tē nê omu. Nhūm ra mēkarōmnutija kēp kato nê ma tē nhūm akupÿm tām hkrã nê hkĩnh nê par kãm hkókôt o nō.

Hamak kro nê kapēr krok xwÿnh jarēnh

Matêwre 15.29-31

³¹ Tã nhūm Jejus mē hkôt mē pa ho mē pa xwÿnhjaja krī pē Xir rūm hapôj nê akupÿm gô rax pē Garirej wÿr ma mra. Pyka pē Sitō jakre nê mō nê pyka pē Tekap jakre. ³² Hāmri nê kormã hpôx o mōr rōm nhūm mē amnhī wÿr Jejus pumu nê hwÿr mēhō myja o tē. Kapēr krok nê umar kêt xwÿnhhta nhūm mē wÿr o tē nê kãm:

—Pa? Ot pa mē awÿr ixkrãmnhwÿta o tē. Kwa hã anhĩhkra xi kê akupÿm mē inhmã mex. Anê.

³³ Hāmri nhūm omu nê hpa hã kupy nê mē kēp o kato nê nhÿri mē hkãx ã o xa. Nê akutã hamak kre kupê nê argôx mē nê ho ōhto htok. ³⁴ Hāmri nê kaxkwa hwÿr rīt nê htyk xà mēnh tÿx nê kãm kapēr. Mē pakapēr kãm kãm: “E ajamak katēr nê anhōhto kaxkrit.” Anê. Nom kapēr kãm kãm: “Epata.” Anê. ³⁵ Hāmri nhūm hamak katēr nê ōhto kaxkrit kurē kumrēx nê tām kapēr nê tām ama. ³⁶⁻³⁷ Hāmri nhūm mē kot omunh xwÿnhjaja amnhī jaēr pē Jejus kot ho mex ã omu nê kamã no pyma nê. Hāmri nhūm mē kãm:

—Kwa kêr ka mē akwÿjê mã ja hã ijarēnh kêt nê.

Anhÿr tã no nhūm mē kuma nê ãm kuma nê ma mē piitã mē kãm harēnh o ri hprôt nê mē kãm:

—Kwa Jejus na mex o mex. Na hte mē ho mex o pa nhūm mē umar kêt xwÿnhjaja akupÿm tām ama nhūm mē kapēr kêt xwÿnhjaja akupÿm tām kapēr. ãm hāmri na hte

ã mē hipêx anhÿr o pa. Nã ãm mex o mex. Anê.

8

Jejus kot mē ho 4.000 nê mē kãm mē ō hã harēnh

Matêwre 15.32-39

¹⁻² Tã nhūm arīgro hō hã nhūm mē ohtō nê nhÿri kapôt ã Jejus ã htu rax nê kot mē ahkre mar o kuhê hã apkati axkrunēpxi. Nhūm mē apkur xà hã mēōja ra mē kēp hapêx. Hāmri nhūm Jejus ja hã mē omu hāmri nê hkôt mē pa ho mē pa xwÿnhjê mã akir nê mē kãm hpa ho apê nê mē kãm:

—E mē amnê ixwÿr mra nê ixkapēr ma. Anê.

Nhūm mē hwÿr mra nê kuhê nhūm mē kãm:

—Kwa na pa inhmã mē kot inhmar o kuhê xwÿnhjê kaprī nê. Na mē ra mē pahkôt ri pa hã apkati axkrunēpxi nhūm mē apkur xà hã mēōja mē kēp hapêx. ³ Mē ō krī hwÿr awry jakamã koja mē mēmoj kur kêt rãhã ma akupÿm pa hāmri nê pry hã hirot nê rōrôk o pa. Hāmri pa inhmã mē hkaprī nê. Anê

⁴ Hāmri nhūm mē kuma nê axte tee ri hamaxpēr nê kãm:

—Kwa nã nhÿhÿnh kot puj kêt mē kãm mēmoj to mra? Jar ãm kapôt pix kēnã. Anê.

Hāmri nhūm mē kãm:

⁵ —Nã tanhmã na mē anhō pãwtija kute? Anê.

Nhūm mē kãm:

—ãm kēp 7 pix. Nê kaxyw tep kwÿ no ãm grêre. Anê.

⁶ Hāmri nhūm mē kuma nê mē kot mar o kuhê xwÿnhjê mã anê nhūm mē kuma nê hkrī pa. Hāmri nhūm pãwti jamÿ nê ho Tirtūm wÿ nê kãm:

—Pa Papaj. Nã ka na apê mē inhmã mē inhō ho apa xwÿnh. Jakamã amex o amex. ãm amex kumrēx. Anê.

Hāmri nê mē kãm ho hkry pa nê hkôt mē pa ho mē pa xwÿnhjê mã kugō nhūm mē ho mē hipêx

pa. ⁷ Nhũm hpānhã tepta py nē mã ho anē nē ho Tĩrtũm wỳ. Hāmri nē hkôt mē pa ho mē pa xwỳnhjê mã kugò nhũm mē mã ho anē nē hamỳ nē ho mē hipêx pa. ⁸⁻⁹ Hāmri nhũm mē ohtô rax kumrêx tã pitã apku nē ôhy htu pa. Měmyjaja kêp 4.000 nē kaxyw mē hprôjaja nē mē hkrajaja. Tã nhũm Jejus mē apkur xãja o mē hipêx pa. Nhũm hkôt mē pa ho mē pa xwỳnhjaja hakrêx o akuprô nē ho kawà ho ⁷ nē ho nỳt. Hāmri nhũm Jejus ma akupỳm mē ô krĩ hwỳr mē kot mar xwỳnhjê jano nhũm mē ma akupỳm hapêx. ¹⁰ Hāmri nhũm Jejus hkôt mē pa ho mē pa xwỳnhjê mē ro hã kanôre hkrem agjê nē mē hkwym ma Tamanut wỳr mō.

Parijew nhõ xwỳnh kwỳ kot mějõj tã Jejus kamã hamak ã mějõ harênh

Matêwre 12.38-42, 16.1-4; Rukre 12.54-59

¹¹ Tã nhũm mē Tamanut wỳr pøj nhũm Parijew nhõ xwỳnh kwỳjaja Jejus pumu nē ma hwỳr mra nē mějõj tã kuwỳ nē kãm:

—Pa. Ot pa mějõ awỳr mra. Kwa mějõ inhmã aa mějõ ixte mějõj pumunh kêt ô ho anē. Pa mějõ ja hã apumu nē Tĩrtũm kot mějõ ixwỳr amênh ã akôt ijamaxpêr kurê kumrêx. E tokyx. Anē.

Kot tee ri mějõ kãm mějõj to anhỳr kaxyw nē ho anhỳr kêt nhũm mějõ kot hã omunh nē ma hkwỳjê mã ho kapêr punuj kaxyw nhũm mějõ ã hêx rom kãm kapêr anē. ¹² Nhũm ra kãm mějõ kot amnhĩ kaxyw hkôt hamaxpêr kêt kãm ã kapêr anhỳr mar kaga nē. Hāmri nē tee ri amnhĩ tã mějõ hamaxpêr ã mějõ omu nējõ htyk xã mějõnh tỳx nējõ mějõ kãm:

—Hêxta waa nējõ. Mějõ ajamaxpêr punuj pix o na ka htem ri ajamaxpêr o apa. Ixpê Tĩrtũm kot mějõ awỳr inhmênh xwỳnh tã ka mějõ ja hã ixkôt ajamaxpêr kêt nējõ. Nã mo kaxyw kot pa kêt mějõ amã mějõj to

anējõ? Kot paj ho anējõ ka mějõ omu nējõ ãm omu nējõ ixkôt ajamaxpêr kêt nējõ. Nã kot paj mějõ amã mějõj to anhỳr kêt nējõ. Anējõ.

¹³ Hāmri nējõ mějõ kure nējõ hkôt mějõ pa ho mějõ pa xwỳnhjê mějõhã ma mra nējõ akupỳm kanôre hkrem agjê nējõ ma xarmã mō.

Jejus kôt mějõ pa xwỳnhjaja kot hprĩ hã omunh kêt ã mějõ harênh

Matêwre 16.5-12; mãânênh Makre 6.52

¹⁴ Tã nhũm mějõ kormã kanôre kamã xarmã mějõr rôm nhũm Jejus kôt mějõ pa ho mějõ pa xwỳnhjaja tee ri mějõ apkur xã japêr nējõ axpên mã:

—Kwa hêxta waa nējõ. Na pu mějõ panhõ pãwti re nējõ amnhĩ kôt o pamôr kêt nējõ. Nējõ ãm pixire nējõ o mō. Anējõ.

¹⁵ Hāmri nhũm Jejus tee ri mějõ kuma nējõ tanhmã hã mějõ kãm kapêr to. Nom mějõj tã kuxi nējõ mějõ kãm awjarê nējõ mějõ kãm:

—Kwa oko kêt ka mějõ amnhĩ nējõ Parijew nhõ xwỳnh mějõ Pahi Erox nhõ pãw kaxkrit xã pumunh mex nējõ. Anējõ.

¹⁶ Hāmri nhũm mějõ kuma nējõ tee ri kapêrja kukamã hamaxpêr pějõ hã axpên kukjêr o hkri nējõ axpên mã:

—Kwa mo na ri ã mějõ pamã pãw kaxkrit xã jarênh anējõ? Mãn mějõ panhõ pãwti hkêt ã mějõ pahpumu hã na ri ã harênh anējõ nã? Anējõ.

¹⁷ Hāmri nhũm Jejus mějõ kapêr ã mějõ kuma nējõ mějõ kãm:

—Kwa moñ ka wem ãm xatã axpên mã mějõ panhõ pãwti hkêt jarênh pix o mō? Xàn pa hte mějõ apyrã nējõ tee ri mějõ paxàpkur xã hkêt kukamã ijamaxpêr o ixpa? Nã inhmã ja tanhmã kute hkêt. ¹⁸ Ra mějõ ano ho mějõ ate ixpumunh mex tã kormã aprĩ hã tanhmã ixkute hã ixpumunh mex kêt. Nējõ mějõ ajamak o ixkapêr mar mex tã aprĩ hã mar tỳx kêt. Kwa wem ixte amnhĩ nhĩpêx mã ajamaxpêr tỳx nējõ. E mějõ inhmã mějõj jarê. ¹⁹ Jãã ixte mějõ kêp 5.000 mã pãwti kêp 5 nhĩrênhã. Tanhmã na ka prem

hagrêx o akuprô nê ho kawà ho nýt to? E mē atō inhmā harē. Anē

Hāmri nhūm ja kām: “Na pa prem ho kawà ho 12 nê ho nýt.” Anē.
²⁰ Nhūm kuma nê mē kām:

—Tỳ na pre hagrêx ã kawà kêp 12. Tã ham ixte mē kêp 4.000 mã pãwti kêp 7 nhîrênhta. Tanhmã na ka prem hagrêx ho akuprô nê ho kawà ho nýt to? Anē.

Nhūm ja kām: “Na pa prem ho 7.” Anē. ²¹ Hāmri nhūm kuma nê mē kām:

—Tỳ ra ixte mē anoo mã ã ja ho anhÿr o axkrut tã ka mē ra hã ano hkêt nê arî axpên mã mē panhō pãwti hkêt pix jarênh o ixkôt mō. Kormã mē ate ixãhpumunh tÿx ã ixpumunh kêt. Anē.

Jejus kot akupÿm nohkre xwÿnh o mex ã harênh
Juãw 9.1-7

²² Tã nhūm mē ma krî pē Pesêj wÿr mō nê ra hwÿr pōj. Hāmri nhūm krî nhō xwÿnh kwÿjaja mē omu nê Jejus wÿr mēhō myja o tē. Ra nohkre nê rît kêt nê pa xwÿnhja nhūm mē hpa hã kupyn hwÿr o tē. Hāmri nê ho kuwÿ nê kām:

—Pa Pahihti? Ot pa mē awÿr ja ho tē. Kwa hã anhîhkra xi nê akupÿm mē inhmã no ho mex. Anē.

²³ Hāmri nhūm mē kuma nê nohkre xwÿnhhta pumu nê hpa hã kupy nê o tē nê krî pē ho kato nê nhÿri mē hkãx ã o xa. Hāmri nê no hã argôx mē nê hã îhkra xi nê kām:

—E mãn ka mēmoj pumu nà? Anē.

²⁴ Hāmri nhūm kuma nê hkrãkato nê ri rît hāmri nê kām:

—Tỳ na pa mēmoj pumu. Nom ixprî hã omunh mex kêt nê. Te mēmo pî hpār kwÿ ri mrar pyrãk. Anē.

²⁵ Hāmri nhūm axte no hã îhkra xi nhūm tã rît mex nê. Ri hprî hã mēmoj piitã omunh mex nê.

²⁶ Hāmri nhūm Jejus akupÿm ôrkwÿ hwÿr kumē nê kām:

—E kêr ka kape hã ri amrar kêt nê. Âm ma ma akupÿm anhôrkwÿ hwÿr atēm kurê kumrêx. Anē.

Jejus kot amnhî tã hkôt mē pa xwÿnhjê kukjêr ã harênh

Matêwre 16.13-20; Rukre 9.18-21

²⁷ Tã hāmri nhūm Jejus ma hkôt mē pa ho mē pa xwÿnhjê mē mē ma mō. Ma krî pē Sejarej Piripos pu hã krî hkwy hkôt mō. Nê kormã pry hã mō nhūm Jejus amnhî tã hkôt mē pa ho mē pa xwÿnhjê kukja nê mē kām:

—Kwa mē inhmã mēmoj jarē. Tanhmã na htem ahpÿnhã ri axpên mã ijarênh to wehe? Anē.

²⁸ Hāmri nhūm mē kām:

—Nã na htem ahpÿnhã tanhmã ajarênh to. Na hte kamã mē hkwyjaja axpên mã ato finat Juãw Paxis ã ajarē. Nê kamã mē hkwyjaja ato finat Eris ã ajarē nê mē hkwyjaja apê Tirtûm nhÿ hã kapêr o pa xwÿnh ra htyk xwÿnhjê hō hã ajarē. Æ na htem ahpÿnhã axpên mã ajarênh anhÿr o pa. Anē.

²⁹ Hāmri nhūm mē kuma nê mē kām:

—No we mē kajaja? Ixpê mēhō hã na ka htem axpên mã ijarê? Anē.

Hāmri nhūm Simãw Pêtre kām:

—Nã mē pajaja na pa htem apê Tirtûm kot mē ixkaxyw axãm nê mē ixwÿr amênh xwÿnh ã ajarē. Nê apê mē ixpiitã mē inhō Pahi Maati hã ajarē. Æ na pa htem axpên mã ajarênh anē. Anē.

³⁰ Hāmri nhūm kuma nê mē kām:

—Nã âm hāmri na ka htem ã ijarênh anē. Æ ixte anhÿr. Kwa nom kwa kêr ka mē inhma. Kêr ka mē kormã ã akwÿjê mã ijarênh anhÿr kêt nê. Anē.

Jejus kot amnhî kukamã amnhî jarênh ã harênh

Matêwre 16.21-23; Rukre 9.22

³¹ Tã nhūm Jejus amnhî kukamã hkôt mē pa ho mē pa xwÿnhjê mã tanhmã amnhî jarênh to nê mē kām:

—Nà ra mẽ ate Tirtùm kot mẽ akaxyw ixâm ã ixpumunh mex. No mẽ pahkwỳjaja kãm ja hã ijarënh mar nẽ ixpumunh prãm kêt. Ijaew krãhtùmjẽ mẽ Tirtùm kapër tùm o mẽ ahkre o mẽ pa xwỳnhjẽ mẽ pa-tre krãhtùmjaja na mẽ kãm ja hã ixpumunh prãm kêt. Jakamã koja mẽ nhỹrmã ixpynẽ nẽ ixtak rax nẽ ixpĩ. Nom kot paj ixtyk ã ixtã ap-kati axkrunẽpxi hãmri nhùm Tirtùm akupỹm ixto ixtĩr. Anẽ.

³² Hãmri nhùm mẽ kot hpĩr ã amnhĩ jarënh ma nẽ tee ri hkukamã hamaxpër. Hãmri nhùm Simãw Pêtreja hwỳr tẽ nẽ hkwỳjẽ pẽ ho kato nẽ mẽ hkàx ã o xa nẽ kãm:

—Kwa nà Pahihti. Koja Tirtùm anẽ mẽ omunh mex nẽ nhùm mẽ ã anhĩpêx anhỹr kêt nẽ. Kwa ri ã kapër anhỹr kêt nẽ. Anẽ.

³³ Hãmri nhùm kuma nẽ hwỳr apkjẽ nẽ pu hã hkõt mẽ pa ho mẽ pa xwỳnh piitã omu. Hãmri nẽ mẽ hamak mã Simãw Pêtre mã kapër nẽ kãm:

—Tk. Kwa na ka ã inhmã akapër anhỹrja o te Satanasti nhỹ hã akapër pyrãk. Tirtùm nhỹ hã na ka ã inhmã akapër anhỹr kêt nẽ. Æm jar mẽ kãm Tirtùm kapër mar prãm kêt xwỳnhjẽ jamaxpër o na ka ajamaxpër nẽ ã inhmã akapër anẽ. No Tirtùm jamaxpër o ajamaxpër kêt nẽ. Anẽ.

Jejus krajaja tanhmã kot amnhĩ nhĩpêx hto hã mẽ harënh

Matêwre 6.24-28; Rukre 9.23-27; Juãw 12.24-26; mãânën Apokarip 2.10, 12.11

³⁴ Tã nhùm Jejus amnhĩ wỳr mẽ kot mar o kuhẽ xwỳnhjẽ mẽ hkõt mẽ pa ho mẽ pa xwỳnhjẽ mã anẽ nhùm mẽ hwỳr axkamẽ nẽ kuhẽ. Hãmri nhùm tanhmã mẽ ahkre hto nẽ mẽ kãm:

—E mẽ inhma. Kot kaj mẽ ixkõt amnhĩ xunhwỳr ã amnhĩ jarẽ hã kot kaj mẽ mãânën amnhĩ jarënh o: “Jejus kęp inhõ Pahihti jakamã kot paj ãm kapër kõt pix mã amnhĩ

nhĩpêx rãhã ho ri ixpa. Kwãr ixkwỳjaja tanhmã hã inhĩpêx to pa arĩ hkõt amnhĩ nhĩpêx rãhã ho ixpa.” Anhỹr o amnhĩ jarẽ.

³⁵ —Koja mẽ ixtã mẽ atõx pĩ rỳ ixtã tanhmã mẽ ato ka ty. Ate tanhmã ijarënh to ho apa hã nhùm mẽ apĩ. Tã nom koja akaxwỳnh ma inhõ krĩ hwỳr àpir kurẽ kumrêx nẽ kamã atĩr tùm nẽ amex rãhã nẽ apa ho apa. Nom kot kaj mẽ jar atĩr prãm xãj ixkaga hãmri nẽ hwỳr axàpir kêt nẽ.

³⁶⁻³⁷ —Nẽ koja mẽhõ hikukrêx gryk ã Tirtùm kaga. Hãmri nẽ nhỹrmã ty nẽ ý kamã kuwy hwỳr ma mõ nẽ amnhĩ kõt kukrêx õ hpyr nẽ o mõi kêt nẽ. Koja tee ri kuwy hwỳr mõi pymaj amnhĩ nẽ hikukrêx rax o amnhĩ pãnhã amnhĩrer prãm kaprỳ. Tanhmã koja amnhĩ to nẽ Tirtùm mã amnhĩre nẽ ma õ krĩ hwỳr api? Koja ã amnhĩ nhĩpêx anhỹr kêt nẽ.

³⁸ —Nẽ koja mẽhõ ixte mẽ ahkre hã inhma nhùm ja kęp omnuj japër. Nhùm kot mẽ kãm ixprãm nõkati xwỳnhjẽ hkõt pa gryk ã ixkaga. Hã kot paj nhỹrmã mẽ ato amnhĩptãr kaxyw akupỹn wrỳ nẽ amnhĩ xwar kot ixkaga xwỳnhhta kaga. Æm hãmri na pa mẽ amã ja hã amnhĩ jarẽ. Kot paj nhỹrmã inhõ Papaj nhỹ hã ixte mẽ ho amnhĩptãr kaxyw akupỹn wrỳ nhùm kapër o mẽ wrỳk xwỳnhjaja man ixkõt wrỳ. Pa mẽ wrỳ hãmri nẽ ra mẽ kot ixkaga xwỳnhjaja pa amnhĩ pyrã nẽ amnhĩ xwar mẽ hkaga hpa. Anẽ.

9

¹ Nhùm Jejus arĩ mẽ kãm kapër nẽ mẽ kãm:

—Æm hãmri na pa mẽ amã amnhĩ jarẽ. Kot paj nhỹrmã akupỹn ixte mẽ ato amnhĩptãr kaxyw mẽ awỳr wrỳ kãm ga. Tã kot kaj mẽ akwỳjaja kormã atĩr ri ja kukamã tanhmã ixte amnhĩ nhĩpêx to hã ixpumu. Anẽ.

Jejus hirã htÿx kãm ãm ã harënh

Matêwre 17.1-9; Rukre 9.28-36; mãânënh Sikün Pêtre 1.16-18

² Tã nhùm arÿgro kêp 6 nê hapêx nhùm Jejus ma nhÿri hixêt prêk wÿr tê. Nê Simãw Pêtre nê Xiakre nê Juãwja nhùm ma amnhî kôt wa mẽ o mō. Nhùm wa mẽ ahte mō nê hixêt prêk ã api nê himök ã kuhê. Hãmri nhùm Jejus axtem nê xa. ³ Ra ê haka htÿx kumrêx nê xa. ⁴ Hãmri nhùm ja wa kaxkwa rùm hwÿr wrÿ nê kuri kãm kapêr. Finat Mojes mẽ finat Erisja wa wrÿ nê kuri kãm kapêr o xa. Tirtüm amnepêm amnhî wÿr wa ho àpir tã nhùm wa akupÿm wrÿ nê kãm kapêr. ⁵⁻⁶ Nhùm wa mẽ mex kumrêx nê hirã htÿx kãm kuhê nhùm Jejus kôt mẽ mōr xwÿnhjaja wa mẽ omu nê mẽ kamã no puma nê. Nê tee ri mẽ kãm tanhmã kapêr to hkukamã hamaxpêr. Hãmri nhùm Simãw Pêtre hamaxpêr nê Jejus mã kãm:

—Kwa Pahihti. Nã ãm hãmri na pu mẽ amnê mō. Kwa pu mẽ kritpêm jar axkamê nê tokyx panojarêt kêt nê. Pa mẽ amã pō nhÿrōnh o axkrunêpxi nê hipêx. Amã nê Mojes mã nê Eris mã hō nhÿpêx ka mẽ kamã akrî. Kwa xat pa mẽ amã ho anê nã? Anê.

⁷ Hãmri nhùm kakrã jaka htÿx wrÿ nê wa mẽ hkunor pa nhùm wa mẽ kamã kuhê. Hãmri nhùm kakrã kamã Tirtüm mẽ kãm kapêr nê mẽ kãm:

—Ota Ixkra xa. Inhmã hapê ho inhmã hapê. Kêr ka mẽ kapêr mar tÿx rãhã ho ri apa. Anê.

⁸ Hãmri nhùm mẽ kuma nê amnhî pu hã rÿt nhùm ãm Jejus pix mẽ kuri xa nhùm Mojes mẽ Erisja wa ra ma akupÿm api nhùm mẽ ãm Jejus pix pumu.

⁹ Hãmri nhùm mẽ ma akupÿm hkwÿjê hwÿr wrÿk o mō nhùm Jejus mẽ kãm:

—Kwa kêr ka mẽ ham mẽ ate mẽmoj pumunh xwÿnhhta kormã nhãm mẽ kãm harënh kêt nê. Koja

mê mẽmo arÿgro hã ixpî hãmri nhùm Tirtüm akupÿm ixtō ixtÿr ka mẽ ri kormã mẽ kãm ja hã ijarënh o ri apa.

¹⁰ Anê hãmri nhùm mẽ kuma nê mẽ kãm harënh kêt nê. ãm axpên mã pix mã harê nê kot akupÿm htÿr ã amnhî jarënhja ã axpên kukjêr o pa nê axpên mã:

—Kwa mo na ri ã akupÿm htÿr ã amnhî jarënh anê? Tanhmã kot we amnhî to nê htyk tã akupÿm htÿr? Anê.

Hãmri nê tee ri hkukamã hamaxpêr o hkôt pa.

Juãw Paxis te kot Eris pyrãk ã harënh

Matêwre 11.13-15, 17.10-13

¹¹ Hãmri nhùm mẽ kormã ahpar mã wrÿk o mōr mẽ nhùm Jejus kôt mẽ mōr xwÿnhjaja mẽmoj tã hkukja nê kãm:

—Kwa mẽ inhmã mẽmoj jarê. Na hte Tirtüm kapêr tùm o mẽ ahkre xwÿnhjaja mẽ inhmã: “Eris kumrêx koja Tirtüm mẽ pahwÿr kumê nhùm Krisja hapu hã wrÿ.” Anê. Na htem ã mẽ inhmã war ajarënh anê. Tã ka na ka ra wrÿ nom nhùm kormã Erisja akukamã wrÿk kêt nê. Anê.

¹²⁻¹³ Hãmri nhùm mẽ kãm:

—Nã ãm hãmri na htem mẽ amã ã ja jarënh anê. Na pre ra ixkukamã te kot Eris kot amnhî nhÿpêx pyrãk xwÿnhhta tê nê ixkutêp mẽ kãm ijarënh o pa. Nom mẽ kot ixkukamã ijarënh xwÿnh ã omunh kêt jakamã na prem axtem nê kãm tanhmã hipêx to hprãm xã hkôt tanhmã hipêx kati hton kupî. Tã koja mẽ ã hipêx anhÿr pyrã nê mã ixtō anê nê inhÿpêx kati nê tokyx mẽ kãm ixprãm kêt xwÿnhjaja ixpynê nê ixpî pa amnhî xã htÿx kamã ijamak kãm ty. Tirtüm kapêr ã kagã htüm kot wa ijamê wa ixkukamã wa ijarënh xã hkôt. Anê.

Jejus kot mẽhō hkra nê mẽkarōmnuti janor ã harënh

Matêwre 17.14-21; Rukre 9.37-43

14 Hāmri nhūm Jejus nē Simāw Pêtre nē Xiakre nē Juāwja mē akupŷm hkwyjê hwŷr hpôx o mra nē amnhī kukamā hkwyjê pumu nhūm mē ohtô nē mē hā akuprô nē mē kām kapēr. Nhūm Tirtūm kapēr tūm o mē ahkre ho mē pa xwŷnhjaja mēmoj tā mē hkukjêr o kuhê. 15 Jakamā nhūm Jejus mē hwŷr hpôx o tē nhūm mē pikuprônh xwŷnhjaja amnhī wŷr omu nē hkīnh nē. Hāmri nē kutā hprôt nē kām:

—Pa. Nā ām hāmri na ka akupŷn mē ixwŷr tē. Anē.

16 Hāmri nhūm mē kām:

—Kwa mēmoj tā na ka mē axpēn mā axàkjêr o akuhê? Anē.

17-18 Hāmri nhūm mēhō myja kām:

—Nā ixkra hā na pa mē axpēn mā ixkapēr. Na pre mēkarômnuti ixpê hwŷr axà nē tanhmā ixpê ho nhūm kapēr kêt nē pa. Nhūm hte xatā tanhmā ixpê ho nhūm pykap amnhī rē nē hakwa jamrô ho hikwŷ. Hāmri nē à htŷx kamā ama nē amnhī nham o axpēn kamnhar tŷx kumrêx pē htŷx pa nē hikwŷ nē ixpê omnuj tŷx nē. Na hte ā mēkarômnuti nhŷ hā amnhī nhîpêx anhŷr o pa. Jakamā na pa ate inhmā ho mex kaxyw man o tē nē tee ri ajapêr. Hāmri nē ho akôt mē pa ho mē pa xwŷnhjê hwŷ nhūm mē kot inhmā ho mex kaxyw tee ri tanhmā ho hkaprŷ. Anē.

19 Hāmri nhūm Jejus kuma nē hkôt mē pa ho mē pa xwŷnhjê mā kām:

—Hêxta waa nē. Ra mē ate Tirtūm nhŷ hā ixte mē ho mex ā ixpumunh ryy htā ixpyrà nē ā amnhī nhîpêx anhŷr kêt nē. Mān ka mē kormā kaxyw Tirtūm kôt ajamaxpēr tŷx kêt nē. E amnē ixwŷr akra ho tē pa omu. Anē.

20 Hāmri nhūm mē hwŷr o tē nhūm mēkarômnuti Jejus pumu nē tanhmā hkrata o htŷx to nhūm pykap tēm nē hakwa jamrô nē

amnhī rēnh o nō. 21 Nhūm Jejus omu nē hipêêxā mā:

—Kwa tanhmā na ra kot amnhī nhîpêx ā mytwrŷ kute? Anē.

Nhūm kām:

—Nā hprîre rūm na hte ā amnhī nhîpêx anhŷr o pa. 22 Na hte mēkarômnuti xatā ixpê hpîr kaxyw kuwy kamā kurê nē gôx kām kurê. Kwa kot ka ate ho mex kukamā axâhpumunh japêr nē wa ixkamā axukapri nē akupŷm inhmā ho mex. Anē.

23 Hāmri nhūm Jejus kām:

—Xān ka tee ri ixte ho mex kaxyw ixkukamā ajamaxpēr? Nā ixte mēmoj piitā ho anhŷr kaxyw ixâhpumunh tŷx kēnā. Kot ka mē atô mēmoj tā amnhī kaxyw ixkôt ajamaxpēr tŷx hā kot paj amā ho anē. Anē.

24 Hāmri nhūm kuma nē kām hkra mex prām tŷx xaj kapēr tŷx nē kām:

—Nā na pa amnhī kaxyw akôt ijamaxpēr. Nom kot kaj tanhmā ixkrā hto pa akôt ijamaxpēr tŷx rāhā ho ri ixpa Pahihti. Anē.

25 Rôm nhūm mē ohtô rax nē hwŷr kormā mra nhūm Jejus amnhī wŷr mē omu hāmri nē mēkarômnutija mā kapēr kurê kumrêx. Nē kām kapēr kām hihtŷx nē kām:

—Pa mēkarômnuti. E apê mē ho mē kapēr kêt nē mē umar kêt o apa xwŷnh ā pa amā ixkapēr ka inhma. Kêr ka mē hkrata pē akato nē ma amôr o mō nē axte tanhmā ho hkêt nē. Anē.

26 Hāmri nhūm tee ri kot kām karôja ma nē gryk xaj xatā amŷra nē mē hkrata o htŷx kumrêx nhūm htertet tŷx o nō. Hāmri nhūm kēp kato nē ma tē nhūm te htyk pyrà nē nō nhūm mē tee ri omu nē ra htyk ā hkamnhīx. 27 Hāmri nhūm Jejus hpa hā kupy nē kânhmā ām nhūm akupŷm mex nē kânhmā xa nē ri mra. Nē tām kapēr o mra nē umar mex nē.

28 Tā nhūm Jejus hkôt mē pa ho mē pa xwŷnhjê mērohā ma akupŷm

amnhĩm hikranh xà hã ixkreja wýr mra nê hwýr agjê nê hkrĩ. Hãmri nhũm Jejus kôt mē pa ho mē pa xwýnhjaja amnhĩ tā hkukja nē kām:

—Kwa mē inhmã mēmoj jarē Pahihiti. Na pa mē tee ri axwakre kamã mē hkrata nê mēkarõmnuti janor kaprý. Kwa mon pa mē apyrã nē ja ho anhýr mex kêt nē? Anē.

²⁹ Hãmri nhũm mē kām:

—Nà axtem na mēkarõmnuti ja. Na htem mē nê hanor tokyx anhýr kêt nē. Na htem ho Tirtũm wýr týx nē rĩ kormã hano. Anē.

Jejus kot htyk kukamã amnhĩ jarēnh

Matêwre 17.22-23; Rukre 9.44-45

³⁰⁻³¹ Tã nhũm Jejus mē hkôt ri mē pa ho pa xwýnhjê mē krĩja rũm hapõj nē ma nhãm mō. Nē ma pyka pē Garirej kahti hkôt mō. Nom mē piitã mē hkàx ã mō. Jejus kormã kot amnhĩ tā tanhmã hkôt mē pa ho mē pa xwýnhjê jahkre hto ho pa jakamã kām mē hkàx ã mē o pa hprãm nē. Hãmri nē amnhĩ kukamã mē kām tanhmã amnhĩ jarēnh to nē mē kām:

—E kot paj mē amã tanhmã amnhĩ jarēnh to ka mē inhma nē inhmar týx nē. Kojã mē kām ixprãm kêt xwýnhjaja tokyx mē kām ixtã amýnê nhũm mē ixpĩ. Kot paj ixtýk ã ixtã apkati axkrunēpxi hãmri nhũm Tirtũm akupým ixto ixtĩr. Kwa kēr ka mē ja ma nē hã anohtýx nē ho apa. Anē.

³² Hãmri nhũm mē tee ri ã kot amnhĩ jarēnh anhýrja ma nē axpēn mã:

—Kwa mo na ri ã mē pamã amnhĩ jarēnh anē? Nà kēp mē panhõ Pahi Maati hã kot amnhĩ jarēnh kēnã kot kêt mēhõ kupĩ.

Anhýr o axpēn mã harēnh o hkôt mō. Hãmri nē ã kot amnhĩ jarēnh anhýr mar prãm kêt jakamã hprĩ hã tanhmã hkukjêr to hkêt nē. ãm akryk hkôt mar o mō.

Mē kot amnhĩ to rũnh xwýnh jarēnh

Matêwre 18.1-5; Rukre 9.46-48

³³⁻³⁴ Tã nhũm Jejus mē hkôt mē pa ho pa xwýnhjaja kormã ma krĩ pē Kapanaũ hwýr mō nhũm hkôt mē pa ho mē pa xwýnh pē 12jaja tanhmã amnhĩ kukamã hamaxpēr to hãmri nē axpēn mã:

—Kwa mē pahtõ kot puj we nhýrmã pahpé pahi nē mē ho amnhĩptār rax o ri pahkwýjê jakre?

Anhýr o axpēn kukjêr o Jejus kôt mō. Nē axpēn mã: “Nà pa.” Nhũm mē hkwyjaja: “Nà kêt pa.” Anhýr o hkôt mō. Hãmri nhũm Jejus mē mar o mō. Hãmri nhũm mē mō nē nhýri amnhĩm hikranh xà hã ixkre hwýr põj nē hwýr agjê nhũm mē kām:

—Kwa mēmoj tā na ka mē pry hã amnhĩ jarēnh o mō? Anē.

Hãmri nhũm mē tee ri kuma nē hpijaãm nē. Nē kām tanhmã amnhĩ jarēnh to hkêt nē. ³⁵ Jakamã nhũm Jejus nhý nē mē kām anē nhũm mē kuri hkrĩ pa nhũm mē kot mē kām mē ho amnhĩptār rax prãmta ã mē kām kapēr nē mē kām:

—E mē inhma. Ka mē atõ amã mē ho amnhĩptār rax prãm. Hã kēr ka te apē mē piitã mē kām amarĩ axápēnh xwýnh pyrãk o amnhĩ nhĩpēx o mē hkôt apa. Jao mēmoj to mē kutã anojarèt rãhã nē. Anē.

³⁶ Hãmri nē amnhĩ wýr mēhprĩre hõ mã hpa ho apē nhũm hwýr tē nhũm kumý nē o nhý nē hã mē kām kapēr nē mē kām:

³⁷ —E mē inhma. Kēr ka mē apē pahi pyrãk o tanhmã amnhĩ jarēnh to ho ri apa hkêt nē. ãm te amarĩ ri mē apa pyrãk o amnhĩ nhĩpēx o ri apa. Jao nhýri mēhprĩre hõ pumu nē kamã axukapri nē kām mēmoj tanhmã ho rý kām mēmoj gõ. Hãmri nē ã amnhĩ nhĩpēx anhýr o te pa ate tanhmã ixto mex to pyrãk o amnhĩ nhĩpēx. Nē kot ka mē atõ pa tanhmã ixto mex to nē te ate Tirtũm o mex pyrãk o amnhĩ nhĩpēx. E kēr

ka mẽ amã amnhĩ to rũnh prãm nẽ
ã amnhĩ nhĩpêx anhÿr o ri apa. Anẽ.

³⁸ Hãmri nhũm Juãw nhÿhÿnh tẽn
mẽ hwÿr axã nẽ Jejus mã:

—Kwa Pahihti. O mũj mẽhõ
kêp mẽ pahkwÿ hkêt tã anhÿ hã
mẽ nẽ mẽkarõmnuti janor o pa.
Pa mẽ tee ri ja hã omu nẽ kêp
mẽ pahkwÿ hkêt jakamã pa mẽ ã
kot amnhĩ nhĩpêx anhÿrja nẽ kãm
ixkapêr. Anẽ.

³⁹⁻⁴⁰ Hãmri nhũm kuma nẽ kãm:

—Kwa nã nẽ tanhmã kãm nẽ
hkêt nẽ. Koja mẽhõ inhÿ hã aa
mẽ kot mẽmoj pumunh kêt kwÿ ho
anẽ hãmri nẽ kêp mẽ panhiõ nẽ
ri mẽ pahkwÿm tanhmã mẽ ahkre
hto ho pa hkêt nẽ. Ra mẽ pahkõt
kot amnhĩ nhĩpêx mã kênã. Jakamã
kwa mẽ ja nẽ tanhmã kãm nẽ hkêt
nẽ. Kwãr mãmrĩ ã amnhĩ nhĩpêx
anẽ. Ja mex kênã.

⁴¹ —Koja mẽhõ nhÿri mẽ atõ amã
kõr ã apumu nẽ hamaxpêr o: “Kwa
Jejus kõt ri pa xwÿnh mũj kãm kõt. E
pa kãm gõ hkwyê ho ixkõ.” Anhÿr
o hamaxpêr nẽ apẽ ixkwÿ hã amã
gõ hkwyê ka ho ixkõ. Nhũm ãm kot
amã gõ pix nhõr nhũm ate ho akõm
tã nhũm Tirtũm atã omu nẽ ho mex
rax nẽ. Anẽ.

*Mẽ pahte amnhĩ tomnuj pymaj
tanhmã amnhĩ nhĩpêx to hã mẽ pa-
jarênh*

Matêwre 18.6-9; Rukre 17.1-2

⁴² Nhũm Jejus arĩ hkõt mẽ pa ho
mẽ pa xwÿnhjê mã kapêr nẽ mẽ
kãm:

—Nẽ mẽ kot ixkõt amnhĩ xun-
hwÿr tohtuj anhÿr xwÿnhjaja. Koja
mẽhõ ma mẽ hwÿr tẽn nẽ inhnẽ mẽ
kãm kapêr. Mẽ kot mẽ mar nẽ
tanhmã amnhĩ tomnuj to hprãm
xàj hêx rom mẽ kãm kapêr nhũm
mẽ mar xã hkõt tanhmã amnhĩ
tomnuj to. Hã koja Tirtũm ja hã
omu nẽ kot inhnẽ tanhmã kãm nẽ
xwÿnhhta pumu nẽ homnuj tÿx nẽ.
Te mẽ kot mẽhõ pynênh nẽ mut ã
kên pytĩĩ hõ nhõr nẽ ma o htêm nẽ
gõ xupÿm rax kãm mẽnh pyrãk o

hipêx. Te ho ja pyrãk no ãm homnuj
tÿx o hakre.

⁴³⁻⁴⁷ —E kwa mẽ o kora. Kot
kaj mẽ anhĩkra rÿ apar o tanhmã
amnhĩ tomnuj to. Hã kêr ka mẽ
axte ã amnhĩ nhĩpêx anhÿr pymaj
te ate amnhĩ pẽ anhĩkra rÿ apar
krãhyr nẽ mẽnh pyrãk o amnhĩ
nhĩpêx nẽ axte ã amnhĩ tomnuj
anhÿr kêt nẽ. Rÿ ka mẽ ano ho
mẽmoj punuj pumu. Hãmri nẽ
kãm ajamaxpêr pix o apa pymaj te
ate amnhĩ pẽ ano katõk nẽ mẽnh
pyrãk o amnhĩ nhĩpêx nẽ nhãm arĩt
kurẽ kumrêx. Kêr ka mẽ ã amnhĩ
nhĩpêx o apa rãhã nẽ. Hãmri nẽ
nhÿrmã ty nẽ ma Tirtũm mẽ wa
inhõ krĩ hwÿr api. No kot ka mẽ
arĩ akutã ano nẽ arĩ akutã apar nẽ
arĩ akutã anhĩkra rãhã ri mrar tã
tõhã tanhmã ho amnhĩ tomnuj to.
Hãmri nẽ nhÿrmã ty nẽ ma mẽ kot
amnhĩ xã htÿx kamã hamak tũm xã
pẽ kuwy maatita wÿr ma apa.

⁴⁸ Kuwyja kamã na htem mẽ
kot amnhĩ tomnuj mÿrapê
amnhĩ xã htÿx kamã hamak
rãhã ho pa ho pa hãmri nẽ aa
hapõx kêt nẽ.

⁴⁹ ã koja mẽ kot amnhĩ tomnuj o mẽ
pa xwÿnh piitã amnhĩ nhĩpêx anhÿr
rãhã nẽ pa ho pa. ⁵⁰ Jakamã kwa
kêr ka mẽ axpên to mex rãhã ho
ri apa. Nom axpên kãm agryk nẽ
tanhmã axpên nhĩpêx to ho ri apa
hkêt nẽ. Anẽ.

Nhũm pre ã Jejus hkõt ri mẽ pa
ho mẽ pa xwÿnhjê jahkre anẽ.

10

*Mẽ pahte axpên kaga nẽ Jejus kot
mẽ pahkurê*

*Matêwre 5.31-32, 19.1-12; Rukre
16.18; mãânên Wam Korĩt 7.10-16*

¹ Tã nhũm Jejus mẽ hkõt mẽ pa ho
pa xwÿnh mẽrohã ma pyka pẽ Jutej
wÿr mõ. Hãmri nẽ pyhti pẽ Jotãw ã
rẽ nẽ hpãnhã ma xarmã mõ. Nhũm
mẽ axte mẽ hã akuprõ nhũm kê
Jejus axte mẽ ahkre ho xa. ² Hãmri
nhũm Parijew nhõ xwÿnh kwÿjaja

hwÿr mra. Mē kot hēx rom kamā hamak nē mar nē tanhmā ho kapēr punuj to kaxyw hwÿr mra nē kām:

—Pa. Ot pa mē mēmoj tā akujjēr kaxyw awÿr mra. Kwa tanhmā na pre amnepēm finat Mojesja mē pahte mē pahprō kaga hā mē panhīgētjē mā karō hto? Xà koja mē pahprō mē pakapēr hkwȳm tanhmā amnhī nhīpēx to pu mē mÿrapē hkaga nhūm Tirtūm ja hā mē pahpumu nhūm ja kām mex nē nà? Anē.

³ Hāmri nhūm mē kām:

—Tanhmā na pre Mojes Tirtūm nhÿ hā ja hā mē amā karō hto? Anē.

⁴ Nhūm mē kām:

—Nà na pre harēnh o:

Kēr ka mē aprō kaga kaxyw hāmri nē ate hkaga hā amnhī jarēnh ā kagā nē kām agō nē rī kormā hkaga. Anē.

Na pre ā mē inhmā ja hā karō anē. Anē.

⁵ Hāmri nhūm mē kām:

—Tÿ nom mē kām Tirtūm kapēr kōt amnhī nhīpēx prām kēt jakamā na pre ā mē kām ja jarēnh anē.

⁶ Amnepēm mēmoj piitā hkrax kām na prem axpēn kaga hkēt nē. Na pre Tirtūm wam myja nhīpēx nē hpānhā kām hprō nhīpēx. Axpēn kaxyw wa hipēx. ⁷ Jakamā na hte mēmyjaja hprō kaxyw nē gryk ā katorxā nē hipēxā wa hkaga nē am hprō kōt pix mā pa ho pa. ⁸ Te wa tipxi nē ri wa pa pyrāk o axpēn nhīpēx o pa. ⁹ Tirtūm tām kot axpēn mā wa ōr kēnā kot kēt mēhō wa kot axpēn kaga kaxyw tanhmā wa hipēx to rÿ tanhmā wa kām kapēr to. Anē.

Nhūm pre ā Jejus mē kām kapēr anē. ¹⁰ Hāmri nē hkōt mē pa ho mē pa xwÿnhjē mē akupÿm ixkrem agjē nhūm mē kām:

—Kwa aprī hā mē inhmā mē kot axpēn kaga hā mē harēnhhta jarē pa mē ixprī hā kuma nà. Anē.

Hāmri nhūm mē kām:

¹¹ —Nà kot kaj mē aprō kaga nē hpānhā nhām mēhō ho aprō nhūm Tirtūm noo mā te ate wam aprō kamā nhām aprō nyw o amnhīkati pyrāk. Tirtūm pē ja omnuj tÿx nē. Rÿ koja mēhō hprō kaga ka hpānhā ho aprō nhūm Tirtūm noo mā te ate wam mjēn pē ho amnhīkati pyrāk. Ja määnēn Tirtūm pē omnuj tÿx nē.

¹² —Nē mēnijaja. Koja mēhō ni ra mjēn kaga nē hpānhā nhām mēhō ho mjēn. Ja mex kēt. Mjēn krax kēp mjēn kumrēx kēnā kot kēt hkaga nē hpānhā nhām hō ho mjēn. Koja anē nhūm Tirtūm noo mā te kot wam mjēn kamā nhām hō ho amnhīkati pyrāk nhūm Tirtūm pē ja omnuj tÿx nē. Anē.

Jejus kot amnhī nē mēhprjē janor kēt ā harēnh

Matēwre 19.13-15; Rukre 18.15-17

¹³ Tā nhūm Ijaew kwÿjaja Jejus wÿr mē hkrarejē jamÿ nē mē o mra. Kot mē hā ĩhkra jaxwÿr nē mē ho Tirtūm wÿr kaxyw hwÿr mē o mra. Hāmri nhūm hkōt mē pa ho pa xwÿnhjaja tee ri ja hā mē omu nē mē kām:

—Kwa mo kaxyw na ka mē Jejus wÿr mē o mra? Kormā mē rāxre kēnā. Mē ma akupÿm mē o mra nà? Anē.

¹⁴ Hāmri nhūm Jejus ja hā mē kuma nē mē kām:

—Kwa nà kwār mē māmri ixwÿr mē o mra. Mē ri inhnē mēhprjē kurē hkēt nē. Anē.

Hāmri nē mē kām hpa ho apē nhūm mē hwÿr mē o mra nhūm mē kuri kuhē. Hāmri nhūm mē hā hkōt mē pa ho mē pa xwÿnhjē mā kām:

—E mē jarejē pumu. Na htem hamakētcati nē hkīnh nē ri pare. Mē kām amnhī to rūnh prām kēt nē ri pare. Tā Tirtūm kōt mē kot amnhī nhīpēx o ri mē pa xwÿnhjaja na htem mē urāk nē kām amnhī to rūnh prām kēt nē ri pa.

¹⁵ —Na hte jarejaja hipēxā nē katorxā wa kapēr ma nē wa hkōt ri amnhī nhīpēx o ri pare. Tā

ixpê Tirtûm kot mẽ awÿr inhmênh xwÿnh na pa. Kot ka mẽ amâ ixkôt amnhî xunhwÿr prâm hã kot kaj mẽ jarejê kot amnhî nhîpêx pyrâk o amnhî nhîpêx. Jao ixkapêr ma mẽ ixkôt ri amnhî nhîpêx mex o ri apa. Anê.

¹⁶ Hâmri mẽ mēhprîrejê jamÿ mẽ mẽ hã ìhkra jaxwÿ mẽ mẽ ho Tirtûm wÿ mẽ kãm:

—Pa Papaj. E kêr ka jarejê ho mex rãhã mẽ kê mẽ mex mẽ pa. Anê.

Hikàxpore rax xwÿnh jarênh

Matêwre 19.16-22; Rukre 18.18-23; mãânên Wam Ximotre 6.6-10; Xiakre 5.1-6

¹⁷ Tã nhũm Jejus mẽ hkôt mẽ pa ho pa xwÿnhjaja nhÿri pry hã mō nhũm Ijaew krãhtũmja omu mẽ hwÿr tē mẽ mẽmoj tã hkukja mẽ kãm:

—Pa mẽ ijahkre xwÿnh maati? E kwa inhmã mẽmoj jarê. Nhÿrmã Tirtûm ri ixtîr tũm mẽ ixpa hprãm xàj mẽmo kot pa we ho anhÿr o ri ixpa? Ate amnhî to mex pix o ri apa xwÿnh jakamã kwa inhmã tanhmã ja jarênh to. Anê.

¹⁸ Hâmri nhũm kãm:

—Xà ate ixpê Tirtûm kwÿ hã ixpumunh kôt na ka ixte urâk mẽ amnhî to mex xwÿnh ã ijarê? Tirtûm pix na kot amnhî to mex rãhã xwÿnh jakamã kot kaj ã ijarênh anê mẽ ixpê Tirtûm Kra hã ijarê. Jao urâk mẽ ixte amnhî to mex xwÿnh ã ijarê. Nà xàn ka âm atÿx ri amnhî krã hkôt ã ijarênh anê?

¹⁹ —Tirtûm mex o mex jakamã kot kaj amâ nhÿrmã kuri atîr tũm mẽ apa hprãm hãmri mẽ ra kot mẽmoj tã mẽ amâ karō xà hkôt amnhî nhîpêx o ri apa. Ra ate mar mex kênã. Na pre mẽ amã:

Kêr ka mẽ axàhkînh o ri apa hkêt mẽ.

Nê mẽ hpar kêt mẽ.

Nê tanhmã axêx kêt mẽ.

Nê axêx rom tanhmã mẽ nokupyr to hkêt mẽ.

Nê mẽ kêp mẽ hprō ho amnhîkati hkêt mẽ.

Nê anhîpêxà mẽ akatorxà wa hã apijaãm mẽ wa ho mex pê wa kutã anojarêt rãhã ho ri apa.

E kot kaj amâ nhÿrmã Tirtûm kuri atîr tũm mẽ apa hprãm hã kot kaj ã amnhî nhîpêx anhÿr o ri apa. Anê.

²⁰ Hâmri nhũm kuma mẽ kãm:

—Kwa ixprîre ri ra ã ixte amnhî nhîpêx anhÿr o ri ixpa kênã. Nom te ixtîr tũm mẽ ixpa kaxyw ixte kormã tãm kêt pyrâk. Anê.

²¹ Hâmri nhũm kuma mẽ hprî hã omu mẽ mẽmoj hapê mẽ. Hâmri mẽ kãm:

—Nà kormã mẽmoj pyxire mẽ arîk. Na ka amâ akukrêx rax kînh tÿx o Tirtûm jakre. Jakamã kêr ka ma akupÿm anhōrkwy hwÿr tē mẽ akukrêx rax o wênê hpa. Nê kàxpore jamÿ hãmri mẽ ma mẽ kêp amrakati xwÿnhjê mã ôr o ri apa. Hãmri mẽ akupÿn tē mẽ arî ri ixkôt apa ho apa. Anê.

²² Hâmri nhũm kuma mẽ tee ri hikukrêx rax kukamã hamaxpêr. Kãm hapê jakamã kãm kãm ìhkra karo hprãm kêt mẽ. Hâmri mẽ tee ri Jejus kot ã kãm hã karō anhÿrja ma nhũm ja kãm mex kêt nhũm awjanã mẽ hkaprî mẽ ma akupÿm tē. ²³ Hâmri nhũm Jejus tee ri omu mẽ hkôt mẽ pa ho mẽ pa xwÿnhjê mã kãm:

—Hêxta waa mẽ. Koja mẽ hikukrêx rûnh xwÿnhjaja ohtō mẽ kãm mẽ hikukrêx japê xàj Tirtûm mẽ wa ixri hÿr tũm mẽ pa ho pa hkêt mẽ. Wa ixte amnhî nhîpêxja mẽ kêp hihtÿx. Anê.

²⁴ Hâmri nhũm mẽ tee ri kapêrja ma nhũm Jejus mẽ hamaxpêr kôt mẽ omunh mex jakamã axte tanhmã mẽ kãm harênh to mẽ mẽ kãm:

—Nà Tirtûm mẽ wa ixte amnhî nhîpêxja na mẽ hikàxpore rûnh xwÿnhjaja pê ja hihtÿx. ²⁵ Mẽ kãm hikukrêx rax mã ìhkra karo hprãm kêt rãhã tee kãm Tirtûm kôt amnhî nhîpêx prãm kaprÿ. Te ho mẽhō kot

menh kagô hã hkre nê kãm kagô katôk prãm kêt rãhã kãm guhkrax kãm år prãm kapryta pyrãk. Anê.

²⁶ Hãmri nhũm mē kuma nē tee ri amnhĩ kukamã hamaxpēr nē kãm:

—Kwa no mē ixpiitã mē inhmã mē ixkukrêx japê kênã. Jakamã xà kot paj mē ixpiitã nhỹrmã war ari ixtĩr tũm nē ixa ho ixa hkêt nê? Anê.

²⁷ Hãmri nhũm mē kãm:

—Nã kot kaj mē amnhĩ krã hkôt mē amã mē akukrêx japê mã anhũrer kêt nê. ãm Tĩrtũm pix na hte ja kaxyw tanhmã mē akrã hto ka mē amã akukrêx japê hkêt nê. Jao ra mē apê Tĩrtũm mē wa ixri atĩr tũm nē mē apa ho mē apa mã xwỹnh. Anê.

²⁸ Hãmri nhũm Simãw Pêtre kãm:

—Kwa Pahihti na pa prem agryk ã mēmoj piitã hkaga hpa nē akôt ixa ho ixa. Jakamã xà kot paj mē nhỹrmã war ari ixtĩr tũm nē ixa ho ixa kêt nê nã? Anê.

²⁹ Hãmri nhũm kuma nē hkôt mē pa ho pa xwỹnh piitã mē kãm:

—Nã ka mē atô inhmã tanhmã amnhĩ to ho apa kaxyw akwỹjê re nē ma inhmã tanhmã amnhĩ nhĩpêx to ho ri apa. Anhõrkwỹ re rý atô rý atõx rý aprõ nē akrajê re. Rý akatorxà nē anhĩpêxà wa are. Rý akukrêx piitã rer pa hãmri nē ma ixkapêr o mē piitã mē ahkre ho ri mē hkôt apa. ³⁰ Hã kot paj amnhĩ tã mē apumu nē mē ato mex rax nê. Hãmri ka mē ma mē kãm ixkapêr jarênh o mē hkôt apa nhũm mē kot mē amar xwỹnh kwỹjaja mē ama nē kãm mē akĩnh nê. Nê ra mē ate akwỹjê rer par tã mē tãmjaja te mē apê mē hkra rý mē htõ rý mē htõx pyrãk o mē anhĩpêx. Jao tanhmã mē ato mex to ho pa.

—Nê koja mē kãm ixprãm kêt xwỹnhjaja ixtã tanhmã mē atomnuj to hã ka mē nhỹrmã ma Tĩrtũm mē wa inhõ krĩ hwỹr api nê wa ixkuri amex nê atĩr tũm nē apa ho apa. ³¹ Nom kêt ka mē ja hã amnhĩ pumunh kôt amnhĩ to rax

xwỹnh ã amnhĩ to jarkrar kêt nê. Mē kot amnhĩ to rũnh xwỹnh ã amnhĩ jarênh xwỹnhjaja koja mē nhỹrmã amnhĩ to rũnh kêt ã amnhĩ pumu. Nê mē kot amnhĩ to hkryre xwỹnhjaja koja mē nhỹrmã amnhĩ to rũnh ã amnhĩ pumu. Anê.

Jejus kot amnhĩ kukamã axte amnhĩ jarênh

Matêwre 20.17-19; Rukre 18.31-34

³² Tã nhũm Jejus hkôt ri mē pa ho mē pa xwỹnhjê mã kapêr pa hãmri nê ma Jerujarê hwỹr mē o mō. Ra kamã kãm hkurê xwỹnhjaja kot hpĩr ã amnhĩ jarênh tã ma hwỹr mē o mō. Jakamã nhũm mē tee ri hkukamã hamaxpēr o hkôt mō. Nhũm mē amarĩ mē hkôt mrrar xwỹnhjaja haxwỹja kãm ma nê. Hãmri nhũm Jejus mē kêp 12ta o mō nê hkwyjê hkãx ã amnhĩ kukamã tanhmã mē kãm amnhĩ jarênh to ho mō nê mē kãm:

³³ —E na pu mē ra Jerujarê hwỹr mō. Kot puj mē hwỹr pøj nhũm mē kãm ixkurê xwỹnhjaja patre krãhtũmjê mē Tĩrtũm kapêr tũm o mē ahkre xwỹnhjê nhĩhkram ijaxà. Hãmri nhũm mē kãm Tĩrtũm kapêr kôt amnhĩ nhĩpêx prãm kêt xwỹnhjaja ixpĩr kaxyw mē kãm ixtã amỹnê ³⁴ nhũm mē mar xà hkôt tanhmã inhĩpêx kati hto. Nê mē hkwyjaja ixtã hpêr o axkê nê ixtã akunha. Nê mē hkwyjaja tanhmã ijapry hto nê ixtã argõx rê nê ixtak hãmri nê ixpĩ. Kaja mē ã inhĩpêx anê. Nom kot paj ixytk ã ixtã apkati axkrunêpxi nhũm Tĩrtũm akupỹm ixto ixtĩr. Anê.

Xiakre mē Juãw wa kot amnhĩ to Jejus wýr ã wa harênh

Matêwre 20.20-28; Rukre 22.24-30; mããñên Piripos 2.3-8; Wam Pêtre 5.3

³⁵ Tã nhũm Jepetew kra Xiakre mē Juãw wa tanhmã hamaxpêr to nê Jejus mã kãm:

—Kwa mẽ ijahkre xwỳnh. Pa wa amã mẽmoj jarẽ ka wa inhmã “y” anẽ nà? Anẽ.

Hãmri nhũm wa kãm:

³⁶—Ko wa mamrĩ inhmã mẽmoj jarẽ pa wa ama mãn. Anẽ.

³⁷Hãmri nhũm wa kãm:

—Nà kot kaj nhỹrmã ate mẽ piitã mẽ ho amnhĩptar kaxyw nhỹ pa wa akutã anhĩjẽ. Nẽ wa papxipix ixpẽ anhõ kowenatõ nẽ akutã anhĩjẽ nẽ ato nhỹ. Ja na pa wa inhmã hprãm. Anẽ.

³⁸Hãmri nhũm wa kãm:

—Nà na ka wa am atỳx ri ã amnhĩ to ixwỳr anẽ. Koja mẽ tokyx ixpĩ pa amnhĩ xà htỳx kamã ijamak rax nẽ ty. Tã xà koja mẽ ixpyrà nẽ ã war anhĩpẽx anẽ ka wa ixpyrà nẽ amnhĩ xà htỳx kamã ajamak rax kãm ty nà? Anẽ.

³⁹Hãmri nhũm wa kãm:

—Tỳ. Nà kot pa wa ijaxwỳja anẽ nẽ apyrã nẽ amnhĩ xà htỳx kamã ijamak kãm ty. Anẽ.

Hãmri nhũm wa kãm:

—Nà am hãmri na ka wa ja hã amnhĩ jarẽ. War ate ixpyrà nẽ ixkõt amnhĩ xà htỳx kãm ajamak kãm atyk mã kẽnã. ⁴⁰Tã nom war ate amnhĩ to ixwỳrta ã kot paj tanhmã war amã nẽ hkêt nẽ. Inhõ Papaj tãm koja ja kaxyw mẽhõ japẽr nhũm inhĩhkõ hã nhỹ. No pa kot paj ri ja kaxyw mẽ atõ rẽn h kêt nẽ. Anẽ.

⁴¹Hãmri nhũm wa urak nẽ Jesus kõt mẽ pa ho mẽ pa xwỳnh kwỳjaja ã wa kot amnhĩ to hwỳr anhỹr ã wa kuma nẽ wa kamã gryk nẽ.

⁴²Jakamã nhũm Jesus mẽ piitã mẽ ho akuprõ nẽ mẽ kãm:

—E mẽ inhma. Na hte Ijaew kêt xwỳnhjẽ nhõ pahihtijaja ã amnhĩ nhĩpẽx anhỹr o ri pa nẽ amarĩ hkrĩ xà kamã hkrĩ ho hkrĩ. ahpumunh jakamã amarĩ ixkre kre jakry kamã hkrĩ ho hkrĩ nẽ kãm mẽ apẽn h xwỳnhjẽ pix mã mẽmo mẽ apẽn h karõ ho hkrĩ. Na htem ã amnhĩ nhĩpẽx anẽ. Nẽ mẽ kot amnhĩm mex ã harẽn h prãm

xà tanhmã mẽ ho mex to ho pa. ⁴³⁻⁴⁵Tã no mẽ kajaja kër ka mẽ atõ amã amnhĩ to rax prãm hãmri nẽ ho mẽ kot amnhĩ nhĩpẽx pyràk kêt nẽ. Mẽ piitã mẽ kutã anojarêt rãhã ho ri apa. Kêt paa. Mẽ ate inhmã axapẽn h o apa kaxyw na pa pre mẽ awỳr ixwỳr kêt nẽ. Am pa ixte tanhmã mẽ amã amnhĩ nhĩpẽx to ho ixpa kaxyw na pa pre mẽ awỳr wrỳ. Mẽ ate nhỹrmã kuwy wỳr apa pymaj mẽ anẽ ixtyk kaxyw na pa pre mẽ awỳr wrỳ. Jakamã kot kaj mẽ atõ amã amnhĩ to rax prãm hã kër ka ixpyrà nẽ akwỳjẽ kutã anojarêt rãhã ho ri apa. Hãmri nẽ inhmã te ate amnhĩ to rax o amnhĩ nhĩpẽx pyràk o amnhĩ nhĩpẽx. Anẽ.

Jesus kot akupỳm Paximew o mex ã harẽn h

Matẽwre 20.29-34; Rukre 18.35

⁴⁶Tã nhũm Jesus mẽ hkõt mẽ pa ho mẽ pa xwỳnhjaja kormã Jerujarẽ hwỳr mõi ri ra krĩ pẽ Jeriko hkõt mõi. Hãmri nhũm mẽ ohtõ nẽ mẽ hã ajêt nẽ mẽ hkõt mõi. Nhũm mẽhõ myja pry nhĩhkrep nhỹ. Ximew kra Paximew nohkre xwỳnhja pry kamã ahwỳr o hkrĩ. ⁴⁷Hãmri nhũm Jesus mẽ hkwỳjaja hwỳr htep o mõi nhũm amnhĩ wỳr mẽ kuma nẽ mẽ kot Jesus nhĩxi jarẽn h o mõi ã kuma hãmri nẽ kax pẽ kãm kapẽr nẽ amnhĩ to kuwy nẽ kãm:

—Pa Jesus? Nà apẽ mẽ inhõ Pahihti mex kumrẽx na ka. Te apẽ amnepẽm anhĩgêt pahihiti Tawi kot amnhĩ nhĩpẽx pyràk. Jakamã kwa we ixkamã axukaprĩ nẽ akupỳm ixto mex kêt wehe. Ixte amnhĩ kaxyw akõt ijamaxpẽr xwỳnh na pa. Anẽ.

⁴⁸Hãmri nhũm Jesus kukamã mẽ mrar xwỳnhjaja kuma nẽ kãm:

—Tk. Kwa akapẽr kêt nẽ nhỹ nã. Anẽ.

Tã nom nhũm am mẽ kuma nẽ xatã amnhĩ to kuwy. Kỳx pẽ amnhĩ to kuwy nẽ axte kãm:

—Kwa ixkamã axukaprĩ nẽ akupỳm ixto mex Pahihti. Anẽ.

⁴⁹ Hāmri nhūm Jejus kuma nē xa nē hkôt mē pa ho mē pa xwýnhjē mā kām:

—E mē atō hwýr tē nē hpa hā apy nē amnē ixwýr o tē. Anē.

Hāmri nhūm mē kuma nē nohkre xwýnhta mā kapēr nē kām:

—E tee ri amnhī kukamā ajamaxpēr kēt nē. Na atā karō. E tokyx kànhmā xa. Anē.

⁵⁰ Hāmri nhūm mē kuma nē hkīnh týx nē. Nē kànhmā harī nē amnhī nē ō kajaati mē nē hwýr htēm kurē kumrēx. ⁵¹ Hāmri nhūm Jejus kām:

—Pa mo na? Tanhmā kot pa ato? Anē.

Hāmri nhūm kām:

—Nā akupým inhmā ixrīt mex prām Pahihti.

⁵² Anē nhūm kām:

—Tōe. Nā ra ate amnhī kaxyw inhmā ajamaxpēr týx jakamā kot kaj akupým arīt mex kurē kumrēx. E māmri ma akupým tē. Anē.

Nhūm akupým rīt mex ā amnhī pumu nē hkīnh o hkīnh. Hāmri nē Jejus ā ajēt nē ma hkôt hkīnh nē tē.

11

Jejus kot Jerujarē hwýr ar ā harēnh

Matêwre 21.1-11; Rukre 10.28-40; Juāw 12.12-19

¹ Tā nhūm Jejus mē hkôt mē pa ho mē pa xwýnhjē mē kormā Jerujarē hwýr mō. Hāmri nē krī pē Petake mē hō pē Petān wýr ahtēp o mō. Hixēt pē Oriwēhti kahti ri na pre krīja wa xa. Jakamā nhūm Jejus hkôt mē pa ho mē pa xwýnh wa ho axkrut nē mē amnhī kukamā wa kumē ² nē wa kām:

—E wa ma krī mūj wýr mē ixkukamā wa tē. Hāmri nē hwýr pōj nē nhýri jumēnre nyw mā é nē ām xwýnhta pumu. Kormā mē kot hā hkrī hkēt kumrēx xwýnhta.

³ Ka wa omu nē kām é xa hpôt nē man akupýn ixwýr o tē. Koja mēhō war apumu nē hā tanhmā war amā kapēr to ka wa ā kām ijarēnh anē nē

kām: “Nā mē panhō Pahihti na hā karō pa wa hwýr tē.” Anhýr o kām ijarē. E wa ma hwýr tē. Anē.

⁴ Hāmri nhūm wa kuma nē ma hwýr htēm kurē kumrēx nē hwýr pōj. Nhūm Jejus kot wa kām hā karō xa hkôt jumēnre nywreta pumu.

⁵ Hāmri nē kām é xa hpôt o xa nhūm kuri mē kuhē xwýnhjaja tee ri hā wa omu nē wa kām:

—Kwa mo kaxyw na ka wa kām é xa hpôt o xa? Kwa kot ka wa mē ixpē ho ahkī nā? Anē.

⁶ Hāmri nhūm wa mē kām:

—Nā mē panhō Pahihti na wa inhmā hā karō pa wa hwýr tē. Wa ixte ma hwýr o ixtēm kaxyw. Anē.

Hāmri nhūm mē wa kām:

—Tý? Tōe wa māmri ma kām o tē. Anē.

⁷ Hāmri nhūm wa ma akupým Jejus wýr o tē. Hāmri nē kaxyw amnhī xē hkwy hkwrý nē kām ho hkô kahty hpa nē kām ho htýx nē o xa nhūm Jejus hā nhý nē mō. ⁸ Nē kormā Jerujarē hwýr hixēt ā àpir o mō. Nhūm mē kot omunh o kuhē xwýnhjaja hkīnh nē ma hkukamā pry ho mex kaxyw amnhī xē hkwy hkwrý nē ho kām uty. Nhūm mē hkwyjaja nhýri pō hkwy jakā nē o mra nē hkukamā kām uty.

⁹⁻¹⁰ Nhūm mē hixēt ā api nē ahpar mā wrýk o mō nhūm mē piitā kàx pē Tirtüm mex o mex ā harēnh o hkôt mō. Nhūm mē hkwyjaja kukamā mra nhūm mē hkwyjaja hapu hā mra nhūm prem piitā hkôt Tirtüm mex o mex ā harēnh o mō. Nē harēnh o:

E ota Tirtüm kot mē pahwýr mēnh xwýnhta ra pōj. Nā ām hāmri na mē pahwýr wrý. Ja mex kumrēx.

Kēp mē panhō Pahihti mex na. Koja mē panhīgēt pahi Tawi pyrā nē mē pahto amnhīptā nē mē pahto mex o pa.

Ām hāmri na Tirtüm mē pahwýr kumē.

Tirtüm mex kumrēx. Ām mex o mex. Kukwak ri pix mā

na pu htem pajamakêtkati nê paxâmnhîx papa râhã ho papa.

Anhÿr o Jejus kôt harênh o mô. Kot mẽ ho amnhîptâr kurê kumrêx ã hkamnhîx nê hkînh nê ã hkôt kapêr anhÿr o mô. ¹¹ Jao ra Jerujarê hwÿr pôj nhÿm Jejus Tîrtûm mã amnhî jarênh xà hã ixkre hwÿr tên axà. Nom nhÿm ra amÿkry htÿx jakamã nhÿm hwÿr axà nê ãm hkre pumunh o xa hãmri nê akupÿm kato nê hkôt mẽ pa ho mẽ pa xwÿnh pê 12jê mẽ nhÿm mẽ ma akupÿm Petãn wÿr mra.

Jejus kot pî hpâr pê fikêhti mã kapêr ã harênh

Matêwre 21.18-22

¹² Tã nhÿm apkati nhÿm Jejus mẽ hkôt mẽ pa ho pa xwÿnhjê mẽrohã Petãn rÿm hapôj nê ma akupÿm Jerujarê hwÿr mra. Nhÿm Jejus ra kãm prãm nê mô. ¹³ Hãmri nê amÿm mẽmo pî hpâr hôptî rax pê fikêhti pumu nê hamaxpêr o:

—E pa hwÿr tẽ nê ô hkwy rê nê kuwô mân. Anê.

Hãmri nê hwÿr tẽ. Nhÿm kormã ô kaxyw ô mytwrÿ kator kêt jakamã nhÿm ô hkêt nê ãm hô pix nê xa. ¹⁴ Hãmri nhÿm hwÿr tẽ nê tee ri ô japêr nê ãm hô pix pumu. Hãmri nê tee ri omu nê kãm:

—E kot kaj axte axô hkêt kumrêx.

Anhÿr o kãm kapêr nhÿm hkôt mẽ pa ho mẽ pa xwÿnhjaja hã kuma.

Jejus kot Tîrtûm nhôrkwÿ hwÿr àr ã harênh

Matêwre 21.12-17; Rukre 19.45-46; Juãw 3.13-22

¹⁵⁻¹⁷ Tã nhÿm Jejus mẽ hkôt mẽ pa ho mẽ pa xwÿnhjaja Jerujarê hwÿr agjê nê Tîrtûm mã amnhî jarênh xà hã ixkre hwÿr agjê. Nhÿm Jejus tee ri kamã mẽ kuhê xwÿnhjê pumu. Nhÿm mẽ ra ixkre kamã axtem nê môx nê ôwêhti nê tuuti ho wênê ho kuhê. Ixkre hwÿr mrar xwÿnhjaja kot haprôr nê Tîrtûm mã amnhî jarênh kaxyw

kãm hpar nê ôr kaxyw mẽ kãm ho wênê. Nom axtem nê hã ohtô rax kãm mẽ kãm ho wênê nhÿm mẽ hkwyjaja mẽ kãm mẽ hikâxpore ho anhîpa. Hãmri nhÿm Jejus mẽ hwÿr axà nê tee ri mẽ kot ã amnhî nhîpêx anhÿr ã mẽ omu nê mẽ kãm akir nê mẽ kãm:

—Tk. Kwa Tîrtûm kapêr ã kagà htùm kot ôrkwy jarênh kot:

Inhôrkwÿja ãm pika piitã hkôt mẽ piitã kot inhmã amnhî jarênh xà hã ixkre pix kaxyw na.

Anhÿr o kot harênh tã ka mẽ axtem nê kamã ã amnhî nhîpêx anhÿr o akuhê. E kwa mẽ ma mra nê ajapôx tokyx anê. Anê.

Nhÿm pre ã mẽ kãm kapêr anhÿr pê mẽ ahkre hãmri nê ixkreja nê mẽ kator pa. ¹⁸ Hãmri nhÿm patre krãhtÿmjê mẽ Tîrtûm kapêr tÿm o mẽ ahkre xwÿnhjaja tee ri ã mẽ hipêx anhÿr ã omu nê kapêr ma nê kamã gryk tÿx nê. Hãmri nê mẽ kot hã ãnnênh kaxyw tanhmã axpên mar to nê axpên mã:

—Tk. Kwa na mẽ ohtô nê kãm mar prãm nê. Koja mẽ anê nê gryk ã mẽ pahkaga nê axte mẽ pakapêr mar kêt nê. Kwa pu mẽ kupî ri. E tanhmã kot puj mẽ ho nê kupî? Anê.

¹⁹ Tã nhÿm myt axà nhÿm Jejus mẽ hkôt mẽ pa ho pa xwÿnhjaja Jerujarê rÿm hapôj nê ma nhÿri amnhîm hikranh kaxyw mra.

Mê pahte tanhmã mẽmoj tã Tîrtûm wÿr to hã mẽ pamã karô

Matêwre 6.14-15, 17.20; Makre 11.13; Juãw 14.13; mãânên Xiakre 1.6; Wam Juãw 3.22

²⁰ Tã nhÿm apkati nhÿm Jejus mẽ hkôt mẽ pa ho mẽ pa xwÿnhjaja Jerujarê hwÿr akupÿm mra. Hãmri nê axte pî hpâr pê fikêhtita pumu. Jejus ra kot kãm kapêr xwÿnhnta pumu nhÿm ra grã pa nê xa. ²¹ Hãmri nhÿm Simãw Pêtre Jejus kot tanhmã pî mã kapêr toja mã hamaxpêr nê hã kãm:

—Kwa mẽ ijahkre xwýnh. Ga mẽmoj mũj pumu. Jãã ate fikêhti mã akapêr xwýnhata na grà par kumrêx nê xa. Anê.

²²⁻²³ Hãmri nhũm kuma nê mẽ piitã mẽ kãm:

—Tỳ nà ãm hãmri na pa mẽ amã ixkapêr. Kot kaj mẽ mẽmo kaxyw Tirtũm mã ajamxpêr tỳx pẽ mẽmoj tã awỳ nhũm ama nê amã hprãm xà hkôt tanhmã amã hipêx to. Ka mẽ amnhĩ kaxyw Tirtũm mã ajamxpêr tỳx pẽ hixêt mũj mã akapêr nê kãm: “E xa nê ma tẽ nê gô xujanãr kãm mrõ.” Anhỳr o kãm akapêr nhũm amar xà hkôt ã amnhĩ nhĩpêx anê nê tẽn kamã mrõ. ²⁴ Kot kaj mẽ mẽmoj tã Tirtũm wỳ nê kaxyw ãm pix mã ajamxpêr tỳx nê nhũm amã ho anê.

²⁵⁻²⁶ —Nê kot kaj mẽ Tirtũm mã amnhĩ jarênh kaxyw nê ra mẽhõ kot tanhmã ato mã ajamxpêr. Hãmri nê ja ho ajamakêtkati kurê kumrêx nê axte kãm ajamxpêr kêt nê. ãm mẽmoj nyw pix mã ajamxpêr o tãm amnhĩ nhĩpêx o apa. Hãmri nhũm Tirtũm kaxkwa rũm ja hã apumu nê apyrã nê ate tanhmã amnhĩ tomnuj to ho hamakêtkati nê axte kãm hamxpêr kêt nê. Anê.

Mêhõ kapêr kôt Jejus kot mẽ ahkre hã mẽ kot hkukjêr

Matêwre 21.23-27; Rukre 20.1-8

²⁷ Nhũm mẽ akupỹm Jerujarê hwỳr agjê nhũm Jejus kê axte Tirtũm mã amnhĩ jarênh xà hã ixkre hwỳr axà. Nhũm hkôt mẽ pa ho mẽ pa xwýnhjaja hkôt hwỳr mra nê hkôt agjê nê kormã kamã kuhê. Hãmri nhũm Ijaew krãhtũmjê mẽ mẽ kot Tirtũm kapêr tũm o mẽ ahkre xwýnh mẽ mẽ õ patre krãhtũmjaja Jejus pumu nê hwỳr mra nê hêx rom tanhmã kãm kapêr to. Na pre ra Jejus ixkreja nê mẽmoj to wẽnê xwýnh mẽ kãxpore o mẽ hpinhpanh xwýnhjê jano nhũm mẽ tee ri ja hã omu nê kamã gryk tỳx nê. Jakamã nhũm akupỹn mẽ hwỳr

axà nhũm mẽ axte omu nê hwỳr mra kurê kumrêx ²⁸ nê kãm:

—Kwa mẽ inhmã amnhĩ jarê. Mêhõ nhỹ hã na ka hte ã amnhĩ nhĩpêx anhỳr o ri apa? Mêhõ na pre mẽ ixwỳr amê ka pre mõi? Nà xà amnhĩ krã hkôt na ka hte ã amnhĩ nhĩpêx anhỳr o ri apahti? E kwa mẽ inhmã amnhĩ jarê. Anê.

²⁹ Nhũm Jejus kot tanhmã mẽ hamxpêr to hkôt mẽ omunh mex jakamã mẽ kãm:

—Nà kot pa ixkumrêx mẽmoj tã mẽ akukja. Ka mẽ inhmã harê pa ri kormã mẽ amã tanhmã amnhĩ jarênh to. ³⁰ Finat Juãw Paxisja ã kot paj mẽ akukja. Mêhõ nhỹ hã na pre hte mẽ hkrã kumrãr o pa? Xà amnhĩ krã hkôt nà xà Tirtũm nhỹ hã? E mẽ atõ inhmã harê. Anê.

³¹⁻³² Hãmri nhũm mẽ kuma nê tee ri kot tanhmã kutã kãm harênh to hkukamã hamxpêr nê axpẽn mã:

—Kwa tanhmã kot puj mẽ kãm ja jarênh to? Mẽ kot mar o kuhê xwýnhjaja na htem Juãw Paxis kêp Tirtũm nhỹ hã kapêr jarênh xwýnh ã axpẽn mã harênh o pa. Jakamã kot puj mẽ kãm kot amnhĩ krã hkôt mẽ hkrã kumrãr o pa hã harê nhũm mẽ tee ri mẽ pama nê mẽ pakamã gryk nê. Nê mẽ paxêx rom ã kãm mẽ pakapêr anhỳr ã mẽ pahpumu nê kẽn o mẽ pahtak o mẽ panhĩmex. No kot puj mẽ kãm Tirtũm nhỹ hã mẽ hkrã kumrãr ã harê nhũm mẽ pama nê mẽ pamã: “Kwa ã kot anhỳr kênã na ka prem kapêr mar tã ixkôt amnhĩ xunhwỳr kêt nê?” Anê. Nà kot puj pẽr mẽ kãm tanhmã harênh to hkêt nê. Kot puj mẽ ãm kãm aa te mẽ pahte ja jarênh mar kêt pyrãk o harê. Anê.

Mẽ kot tanhmã kãm nê nhũm kot ta pãnhã tanhmã mẽ kãm nê pymaj nhũm mẽ tee ri tanhmã kãm nê hprãm kaprỹ ho kuhê.

³³ Hãmri nê Jejus mã kãm:

—Konên. Mẽ ixte mẽhõ nhỹ hã kapêr o pa hã omunhre hã. Anê.

Hãmri nhũm mẽ kuma nê mẽ kãm:

—Tk. Tôe kot pa xep ijaxwýja mē amā tanhmā amnhī jarēnh to hkēt nē. Ijaxwýja ixte mēhō nhý hā ā ixte amnhī nhīpēx anhýr o ri ixpa hā amnhī pumunhre hā. Anē.

12

*Mē àpēnh punuj xwýnhjē jarēnh
Matēwre 21.33-46; Rukre 20.9-18*

¹ Nhūm Jejus arī Ijaew krāhtūm mē mēō patre krāhtūm mē Tirtūm kapēr tūm o mē ahkre xwýnhjē mā kapēr o xa. Nē mē kām mē kot tanhmā hipēx to hkukamā mē kām tanhmā amnhī jarēnh to. No ām hā kuxi nē mē kām awjarē nē mē kām:

—Koja mēhō hpur ā hkwyjē mā karō. Mē kot kamā kām àpēnh kaxyw mē kām karō. Hāmri nhūm mē ma hwýr mra nē kamā mēmo hy hkre nē hkre pa. Hāmri nē pu hā kahē hpa nē pur kaēx kām ixkre hprēk nhīpēx. Mē kot himōk ā mē kot kēp àhkīnh pymaj mē hapēr o hkrī kaxyw. Hāmri nē hipēx pa nhūm mēō patrāwja awry hā krī hō hwýr nojarēt nē mē kām tanhmā hpur jarēnh to nē mē kām: “E or ixpurta nō. Kē kamā mēmoj kà hpa ka mē māmri kamā awjamý nē ho axkjē. Hāmri nē ixkutēp inhō jaxwý nē māmri anhō tanhmā ho hprām xā hkōt tanhmā ho.”

—Anhýr o mē kām kapēr hāmri nē ma mō. ² Tā nhūm ra pur kām mēmoj hkà pa. Nhūm hpur nhō dōn arī krī hō kamā hā ujahkre ho pa htā kuri kām àpēnh xwýnhjē hōja nhūm akupým mē hwýr kumē. Mē kot kām o hkwy nhōr nhūm ma kot kām o mōr kaxyw ma mē hwýr kumē nhūm ma akupým mē hwýr mō. Mōō nē ra mē hwýr pōj.

³ Hāmri nhūm mē omu nē axtem nē homnuj nē. Nē unē nē htak nē akupým hano nhūm ý kamā ma akupým mō. ⁴ Hāmri nhūm o patrāwja tee ri omu nē hpānhā ja mē nhūm ma mē hwýr mō. Mōō nē mē hwýr pōj. Hāmri nhūm kē wem omu nē mā ho anē nē. Unē nē htak

nē hkrāx pē htak nē akupým hano nhūm wamta pyrā nē ma akupým ý kamā mō. ⁵ Hāmri nhūm axpēn pānhā kām mē àpēnh xwýnh kwýjē rē nhūm mē axpēn pānhā ma mē hwýr pa. Ma mē hwýr pa nē pōj nhūm mē te ho wamtajē mē hipēx pyrā nē mē hkwyjē pynē nē htak rax nē mē hano nē mē hkwyjē pa. ⁶ Nhūm mē o patrāw mē harēnh ma nē tee ri amnhī kukamā hamaxpēr nē hamaxpēr o: “Hēxta waa nē. Tanhmā kot paj we amnhī nhīpēx to nē inhōta kwý jamý? Nà kot paj mē hwýr ixkraja mē. Inhmā hapē htā kot paj mē hwýr kumē kē ma mē hwýr mō. Hāmri nhūm mē kēp ixkra hā omu nē tanhmā ixpē ho hkēt nē. Nē jatā inhmā kām inhōja kwý gō nhūm man ixwýr o tē. Nà kot paj anē.”

—Anhýr o hamaxpēr hāmri nē ma mē hwýr hkraja mē nhūm ma mē hwýr mō.

⁷ —Tā mē hwýr hpōx o mō nhūm mē amým amnhī wýr omu nē kēp hkra hā omunh kurē kumrēx nē hā axpēn mā amýnē nē axpēn mā: “E. Nà onēj hpur nhō dōn krata tē. Koja nhýrmā o papaj mýrpē amnhūm pur ā pyka pytā nē ho o. Jakamā e pu mē kupi nē kēp hpur ho arīk nē ho panhō. E kwa tokyj pu mē kupi ri.” Anē.

⁸ —Rôm nhūm ra mē hwýr hpōx o tē nē ra pōj nhūm mē unē nē pur nē ho kato nē ahkà kamā kupi. Ā mē ujarēnh kot anhýr. Anē.

⁹ Nhūm pre ā Jejus Ijaew krāhtūmjē mā ujarēnh anē. Hāmri nē hā tanhmā mē hkukjēr to nē mē kām:

—E mē inhmā mēmoj jarē. Koja pur nhō dōnja tee ri mē kot hkra hpīr ā harēnh ma hāmri nē tām mē hwýr mō hāmri nē tanhmā mē hipēx to wehe? Nà koja ma mē hwýr mō nē mē himex pa hāmri nē hpānhā nhām hpurta ā mēmojē rē. ¹⁰ Mān ka prem ra Tirtūm kapēr

ã kagà htùm kot ja jarēnh ma nà? Harēnh kot:

Na prem kēn o amnhīm ōrkwỹ nhĩpēx kaxyw hāmri nē kēn maati pumu nē htỹx omnuj ã hkamnhĩx nē hkaga. Mē kot hkaga htã nom nhũm Tĩrtũm mē kurom mex o kot kēn piitã hakrenh par ã omunh kurē kumrēx.

¹¹ ãm hāmri na pre ã mex ã omunh anē. Anē.

Ã Tĩrtũm kapēr ã kagà htùm kot harēnh kot anhỹr. Anē.

¹² Nhũm pre ã Jejus mē kãm ujarēnh kãm mē harēnh anē nhũm mē amnhĩ tã kuma. Tĩrtũm kapēr tũm o mē ahkre xwỹnh mē mē ō pa-tre krãhtũm mē Ijaew krãhtũmjaja nhũm mē kot mē kãm kēn maati kaga xwỹnhjē jarēnh o te mē tãm harēnh pyrãkja ma nhũm ja mē kēp omnuj nē. Jakamã nhũm mē kãm unēnh nē haxàr prãm nē. Nom amnhĩ tã kãm mē kōt mar o kuhē xwỹnhjē puma nē. ¹³ Jakamã na prem ma mra nē hapój hāmri nē Jejus wỹr Parijew nhõ xwỹnh mē pahi Erox kōt mē pa xwỹnh kwỹjē rē. Mē kot hēx rom mēmoj tã hkukjēr nhũm kot mē mar nē tanhmã Rõm nhõ xwỹnhjē nhõ pahi Sesti kapēr kuhpa hã ri tanhmã mē kãm nē nhũm mē kot mar kaxyw. ¹⁴ Jakamã nhũm mē ma hwỹr mra nē hēx rom kãm kapēr nē kãm:

—Kwa Jejus? Nà ãm hāmri na ka hte Tĩrtũm kapēr o mē ahkre mex nē. Na ka hte mē kamã akahak o apa hkēt nē. Nē mē kot tee ri mē kot tanhmã ato kapēr punuj to htã ka hte arĩ aprĩ hã mē ahkre mex o ri apa. E kwa mē inhmã mēmoj jarē. Rõm nhõ pahihiti kot mē pahpē Ijaew mē pahte kãm kãxpore hkwy nhõr ã mē pamã karõta. Kwa xà ja amã mex nà? Xà kot pu mē kãm kugõ? Xà kot pu mē kãm ōr kēt nē? E kwa mē inhmã harē. Anē.

¹⁵ Nhũm prem ã hēx rom ja hã hkukjēr anhỹr tã no nhũm Jejus mē

hamaxpēr ã mē omunh mex mē mē kãm:

—Tk. Kwa mon ka mē axēx rom ja hã ixkukja? E mē atõ inhmã kãxpore htỹxre hõ gõ pa omu. Anē.

¹⁶ Hāmri nhũm ja kãm ja gõ nhũm kupy nē kãnhmã kupē nē mē kãm:

—E mēhõ nhĩxi nē mēhõ karõ na hã? Anē.

Anē nhũm mē kãm:

—Pahi Sesti karõ nē hixi na hã.

¹⁷ Anē nhũm mē kãm:

—Tỹ. Tõ kēr ka mē mãmri kãm hkwy nhõr o apa. Hã hkarõ nē hã hixi. Tãm kot hipēx xwỹnh jakamã õ na. No mē kajaja na pre Tĩrtũm mē anhĩpēx nhũm mē apē õ jakamã kwa kēr ka mē kapēr kōt pix mã ri amnhĩ nhĩpēx o ri apa. Anē.

Nhũm pre ã mē kãm kapēr anē nhũm mē piitã mar o kuhē. Nhũm mē kot hēx rom hkukjēr xwỹnhjaja amnhĩ jaēr pē ã kãxpore jarēnh anhỹrja ã kuma nē axpēn mã:

—Kwa mē paxēx rom mē pahte hã hkukjēr tã nhũm ãm hāmri mē pakutã mē pamã harē. Kwa tanhmã kot puj wem hkukjēr to nhũm pahi Sesti kapēr kwỹm ri mē pamã mēmoj jarē? Anē.

Hāmri nē tee ri tanhmã hkukjēr to hkukamã hamaxpēr o kuhē.

Akupỹm mē htĩr xwỹnhjē jarēnh

Matēwre 22.23-33; Rukre 20.27-40; Juãw 6.21, 6.38-40; mããnēn Wam Korĩt 6.14, 15.12-28; Wam Tesarõn 4.13-18

¹⁸ Tã nhũm Satusew nhõ xwỹnh kwỹjaja. Mē kot akupỹm mē htĩr mã hamaxpēr kēt xwỹnhjaja na pre mē. Tã mē kot mē htyk nē mē hapēx ã mē hkamnhĩx jakamã na prem axpēn mã Jejus jarēnh o:

—E kwa pu mē ma hwỹr mra nē mēmoj xihitỹx ã hkukja kē mē pama nē tee ri tanhmã mē pamã kapēr to hkukamã hamaxpēr. Hāmri nhũm mē piitã ja hã omu nē àhpumunh kēt ã omunh kurē kumrēx. E tokyx ma pu mē hwỹr. Anē.

Hāmri nē ma hwÿr mra nē Pari-jew nhō xwÿnhjē pyrā nē hēx rom kām:

¹⁹ —Pa Jejus? Kwa mē inhmā mēmoj jarē. Na pre finat Mojesja Tirtūm nhÿ hā ā mē panhîgētjē mā karō anē. Mē hkra hkēt rāhā mē pa nē mē htyk xwÿnhjaja nhūm mē harēnh o:

Koja mēhō hprō hāmri nē kamā hkra hkēt rāhā pa nē ty. Hā koja hkôt htōja hpānhā hprō o hprō nē kamā hkra. Hāmri nhūm kato nē te kēp htō htyk xwÿnhta hkra pyrāk. Anē.

Na pre ā Mojes Tirtūm nhÿ hā ja hā mē kām karō anē. ²⁰ Jakamā kwa ga mē ixujarēnh ma. Koja mēmojjaja mē kot axpēn to htō xwÿnhjaja kēp 7. Nhūm kot waja hprō. Nē wa pa nhūm myja kormā hprō kamā hkra hkēt rāhā ty. ²¹ Nhūm hkôt htō hōta hpānhā hprō ho hprō nē wa axpēn to pa. Nhūm haxwÿja kamā hkra hkēt rāhā ty. Nhūm hkôt htō hōta haxwÿja ho hprō nē wa axpēn to pa grire nhūm wamta wa urāk nē kamā hkra hkēt rāhā ty. ²² Hāmri nhūm htō hkwyÿjaja piitā nija pyxi nē axpēn pānhā ho hprō nom mēhō kamā hkra hkēt rāhā htyk pa. Hāmri nhūm mē hprōta mē hkôt amnhÿ to hitep nē ty. ²³ Tā Tirtūm kot akupÿm nhÿrmā mē ho htÿr ronhÿx nhÿ nhÿx kēp nija mjēn kumrēx? Ra piitā kot ho hprō kēnā. E kwa mē inhmā ja jarē. Anē.

²⁴ Hāmri nhūm Jejus ā mē ujarēnh anhÿrja ma nē mē kām:

—Tk. Nà mē ate Tirtūm kapēr ā kagā htūm mar mex kēt. Nē mē aprÿ hā tanhmā Tirtūm kute hā omunh kēt jakamā na ka mē ā atÿx ja hā ixkukjēr anē. ²⁵ Kormā mē htÿr ri mē kot Tirtūm kôt amnhÿ xunhwÿr xwÿnhjaja na htem ty hāmri nē Tirtūm nhō krÿ kamā axte kām hprō hprām kēt pa. Rÿ ni japēr nē kām mjēn prām kēt nē pa. Hāmri nē Tirtūm kapēr o mē wryk xwÿnhjē

pyrā nē axte htyk kēt nē. Ām htÿr tūm rāhā nē pa ho pa.

²⁶ —Nom mē ate akupÿm mē htÿr kēt ā mē hkamnhÿxja kot paj ixprÿ hā mē amā harē. Amnepēm na pre Tirtūm pÿ hpōk kamā tanhmā Mojes mā kapēr to. Mān ra mē ate mar. Na pre kām:

Ixpē Apraāw nhō Tirtūm na pa. Nē määnēn ixpē Apraāw kra Ijak mē htāmnhwÿ Jako wa ō Tirtūm na pa.

Anhÿr o Mojes mā amnhÿ jarē nhūm kuma nē hā kagā. ²⁷ Kēp apu arÿ mē htyk rāhā nhÿx pre ā mē harēnh anhÿr kēt nē. Nhÿx pre mē harēnh o: “Amnepēm Apraāw nē hkra nē htāmnhwÿ mē htÿr ri ixpē mē ō Tirtūm na pa pre.” Anhÿr o nhÿx pre mē harē. Nom na pre ā amnhÿ jarēnh anhÿr kēt nē. Mē pamā te Apraāwja mē htyk nē mē hapēx pyrāk. Nom nhūm prem ra Tirtūm ri akupÿm htÿr nē mex nē pa ho pa. Tā ka htem Tirtūm kapēr kwÿm ri akupÿm mē htÿr kēt ā mē harēnh o apa. Anē.

*Tirtūm kapēr maati jarēnh
Matêwre 10.37, 22.34-40; Rukre
10.25-27; määnēn Wam Juāw 2.15,
5.3; Apokarip 2.4*

²⁸ Tā nhūm Tirtūm kapēr tūm o mē ahkre xwÿnhjē hō mē hwÿr tē nē mē kot axpēn mā kapēr ā mē omunh o xa. Hāmri nē Jejus kot tanhmā Satusew nhō xwÿnhjē mā kapēr mex toja ma nē kām:

—Nà ām hāmri na ka ā mē kām ja jarēnh anē Pahihti. Kwa inhmā mēmoj jarē. Na pre Tirtūm ahpÿnhā mēmoj to 10 nē mē pamā hā karō. Mē pahte hkôt amnhÿ nhÿpēx o ri papa kaxyw hā mē pamā karō. Tā nhÿ kapēr na mex o kot hkwyÿjē jahkrenh wehe? Anē.

²⁹ Hāmri nhūm kām:
—Nà Tirtūm kapēr xohtōō. Kapēr piitā hkôt mē pahte amnhÿ nhÿpēx o papaja na kām hprām. No pixi na mē pahte hkôt amnhÿ nhÿpēx o

papaja nhũm kãm hprãm tỳx o kot hkwy jakrenh. Kapër mex maati na ja. Na pre kapër o:

E mẽ apê Ijaew nhõ xwỳnhjaja. Ixpê mẽ anhõ Tirtũm ã ixpìxi mex na pa.

³⁰ Jakamã kêr ka mẽ amã ixkĩnh tỳx o mẽmoj piitã hakrenh pa. Jao mẽ anhĩ piitã ho amã ixkĩnh tỳx kumrêx o ri apa.

³¹ Anhỹr o na pre mẽ pamã karõ. Nê hkõt ja:

Kêr ka mẽ nhãm mẽ hipêx o te ka amã amnhĩ tã ma pyrãk o mẽ hipêx o ri apa. Jao tãm mẽ hipêx rãhã ho ri apa. Anê.

E ja wa kumrêx na Tirtũm kãm mẽ pahte hkõt amnhĩ nhĩpêx o ri papa hprãm tỳx nê. Anê.

³² Hãmri nhũm kuma nê kãm:

—Nà ãm hãmri na ka ja jarê Mějiahkre xwỳnh. Tirtũm pyxi mex kênã. ³³ Amnepêm na pre htem kãm amnhĩ jarênh kaxyw nê kãm mẽmoj gõ nê rĩ kormã tanhmã kãm amnhĩ jarênh to. Tã nom kot puj mẽ ã ate harênhta kõt amnhĩ nhĩpêx anhỹr o papa jao mẽ panhĩ piitã pamã Tirtũm kĩnh. Nê mẽ pamã hkĩnh o mẽmoj piitã hakrenh pa. Nê nhãm mẽ hipêx o te mẽ papamjaja pamã amnhĩ tã ma pyrãk o mẽ hipêx. Jao tãm mẽ hipêx rãhã ho ri papa. Kot puj mẽ ã amnhĩ nhĩpêx anê nhũm Tirtũm kãm ja mex o mẽ pahte kãm mẽmoj nhõrta jakre.

Anhỹr o kãm kapër. ³⁴ Hamaxpêr mex pê ã Jejus mã kapër anê nhũm kuma nê kãm:

—Nà ãm hãmri na ka ja jarê. Na ka ra mẽ kot Tirtũm kõt amnhĩ nhĩpêx o amnhĩ nhĩpêx nyw pumunh mex o mō. Nà te ate tokyx hkõt amnhĩ xãm kaxyw pyrãk. Anê.

Hãmri nhũm mẽ kãm hkurê xwỳnhjaja tee ri wa kot axpên mã kapër mar o kuhê nê axte kãm mẽmoj tã hkukjêr pyma nê. Ra tee ri mẽ kot hêx rom mẽmoj tã hkukjêr kapry jakamã axte tanhmã hkukjêr to hkêt nê.

Jejus kêp pahi finat Tawi nhõ Pahihti hã harênh

Matêwre 22.41-46; Rukre 20.41-44; mãânên Rômãn 1.3-4

³⁵ Hãmri nhũm Jejus arĩ Tirtũm mã amnhĩ jarênh xà hã ixkre kamã amnhĩ tã mẽ ahkre. Nom te nhãm mẽhõ hã mẽ hkukjêr pyrãk amnhĩ tã mẽ hkukja nê mẽ kãm:

—E mẽ inhmã mẽmoj jarê. Tirtũm kapêr tũm o mẽ ajakre xwỳnhjaja na htem tanhmã mẽ amã Tirtũm kot mẽ akaxyw ãm mã xwỳnh jarênh to nê mẽ amã harênh o: “Koja kêp pahi finat Tawi kanrêhã htãmnhwỳ koja.” Anhỹr o kot mẽ amã harê. ãm kêp kanrêhã htãmnhwỳ pix ã mẽ amã harênh o pa. No na pre pahi Tawija kêp kanrêhã htãmnhwỳ hã harê nê mãânên kêp õ pahihti hã harê. Tã nom nhũm Tirtũm kapêr tũm o mẽ ajahkre xwỳnhjaja na htem urã nê kêp pahihti hã mẽ amã harênh kêt nê. ãm kêp kanrêhã htãmnhwỳ pix ã harê. Kwa mo na htem Tawi pyrã nê kêp õ pahi hã harênh kêt nê?

³⁶ Na pre Tawi tãm Tirtũm kapêr tũm kwỳ hã kagã nê tanhmã Tirtũm kot mẽ akaxyw ãm mã xwỳnhta jarênh to. Tirtũm Karõ nhỹ hã tanhmã harênh to. Tirtũm mex ã mẽ grer xàja kwỳ hã kagã nê hã kagã ho:

Tirtũm na pre inhõ Pahihti mã ã kapêr anê nê kãm: “E amnê ixwỳr tẽ nê inhĩhkõ hã nhỹ nê inhmã mẽ ho amnhĩptar o akrĩ. Kot paj mẽ kot kãm akurê xwỳnh piitã mẽ unênh pa nê awỳr mẽ o mra nê anhĩhkram mẽ haxar pa.”

Anhỹr o pre kãm kapêr. Anê.

³⁷ —Na pre ã Tawi Tirtũm kot Kris mã kapêr jarênh nê kêp õ pahi hã kagã anê. Tã nom Tirtũm kapêr tũm o mẽ ajahkre xwỳnhjaja na htem kêp Tawi htãmnhwỳ pix ã ri axpên mã harênh o ri pa. No kêt Tawija na pre kêp õ Pahihti hã harênh o pa. Anê.

Nhũm pre ã Jejus mẽ kãm amnhĩ jarẽnh anẽ nhũm mẽ mar o kuhẽ xwýnhjaja kuma nẽ hkĩnh nẽ. Nẽ kãm axte mar prãm nẽ.

³⁸ Hãmri nhũm arĩ mẽ ahkre ho nhỹ nẽ mẽ kãm:

—Kwa mẽ o kora. Kêr ka mẽ Tĩrtũm kapêr tũm o mẽ ahkre ho mẽ pa xwýnhjê kot amnhĩ nhĩpêx o amnhĩ nhĩpêx kêt nẽ. Mẽ omu nẽ ãm mẽ omu nẽ mẽ kot amnhĩ nhĩpêx kôt amnhĩ nhĩpêx kêt nẽ. Na htem piitã mẽ hã hpijaam kaxyw ê mex pix kãm ri pa. Nẽ mẽ kot amnhĩm mẽ rũnh ã mẽ harẽnh nhũm mẽ kot amnhĩ jarẽnh marja na htem kãm hprãm. ³⁹ Nẽ Tĩrtũm kapêr o mẽ ahkre xã hã ixkre kamã mẽ kãm amnhĩ to rũnh xwýnhjê hkrĩ xã mex pix kamã na mẽ kãm hkrĩ hprãm. Nẽ mẽmoj tã mẽ apkur xã hã arĩgro hã ma hkwýjê hkôt mẽ apkur xã hã ixkre hwýr akuprõ nẽ kãm mẽ kot amnhĩ to rũnh xwýnhjê hkrĩ xã mex pix kamã hkrĩ hprãm.

⁴⁰ —Nẽ mẽ kot mẽ mjên htyk xwýnhjê ho mex o pa hã amnhĩ jarẽnh tã amnhĩ to hêx. Nẽ na htem axtem nẽ mẽ nokupyr kaxyw mẽ hwýr mra nẽ mẽ kãm: “E ot pa awýr ato ajuta kaxyw tẽ. Ra amjên apê htyk jakamã kot paj pam amã akukrêx jamãr o ixpa.” Anẽ hãmri nẽ mẽ kêp mẽ òrkwý pytã nẽ amnhĩm mẽ kêp mẽ hikukrêx piitã ho hapêx. Te tãm kot mẽ hipêx o pa pyrãk nom tãm mẽ hipêx kêt nẽ. Nẽ te tãm amnhĩ nhĩpêx pyrã nẽ Tĩrtũm mã amnhĩ jarẽnh japjêê ho kuhẽ. Te mẽ kot Tĩrtũm mã ãm hãmri amnhĩ jarẽnh pyrãk tã hkwýjaja kot ja hã mẽ omunh pix kaxyw nhũm mẽ ã kãm amnhĩ jarẽnh anẽ. Mýrapê koja mẽ mex kêt nẽ. Koja Tĩrtũm tanhmã mẽ hipêx kati hto. Jakamã kwa kêr ka mẽ ã mẽ kot amnhĩ nhĩpêx anhỹr o mẽ pa xwýnhjê kôt amnhĩ nhĩpêx o ri apa hkêt nẽ. ãm kwarĩ ho kwarĩ. Anẽ.

Kêp mjên htyk xwýnh jarẽnh

Rukre 21.1-4

⁴¹ Nhũm Jejus arĩ Tĩrtũm mã amnhĩ jarẽnh xã hã ixkre kamã mẽ omunh o xa. Na pre hte Ijaew ixkreja o mex kaxyw ixkre jamãr xwýnhjê mã hikãxpore hkwý nhõr o pa. Nhũm mẽ hikãxpore rũnh xwýnhjaja hwýr agjê nẽ kãxpore gjênh xã kamã hkwý ho rax nẽ hagjê nẽ ma akupým mra. ⁴² Tã nhũm mẽhõ ni pê mjên htyk xwýnhja haxwýja hwýr axã. Kêp amrakati kumrêx. Nẽ hikãxpore tỳxre ãm pijakrutre htã kãxpore rũnh xwýnhjê hpãnhã ixkreta wýr tẽ. Nẽ kãm Tĩrtũm kĩnh xãj kãxpore gjênh xã kamã hamẽ kumẽ hãmri nẽ kato nẽ ma akupým tẽ. ⁴³ Hãmri nhũm Jejus amým ã kot amnhĩ nhĩpêx anhỹr ã omunh o xa nhũm ja kãm mex nẽ. Hãmri nẽ hkôt mẽ pa ho mẽ pa xwýnhjê mã harẽ nẽ mẽ kãm:

—E mãn ka mênire htêm mũj pumu. Na pre mjên kêp ty nhũm kêp amrakati nẽ hikãxpore grire htã amnhĩ pê òr pa. Kwýjê rom kãm Tĩrtũm kĩnh xãj amnhĩ pê òr pa. Apkur xã hã hikãxpore na. ⁴⁴ Kêt mẽ hkwýjaja na hte hikãxpore hkwý pix o mra nẽ gjênh xã kamã hagjê nom arĩ mẽ hikãxpore rũnh. No nija na mẽ urãk nẽ kãm hikãxpore japê hkêt nẽ. Nẽ ho òxy hkêt nẽ ãmnhix piitã o tẽ nẽ òr pa. Anẽ.

13

Jejus kot nhỹrmã mẽmoj piitã ho hapêx ã harẽnh

Matêwre 24.1-14; Rukre 21.5-9, 21.17-19; mããnên Wam Ximotre 4.1; Sikũn Ximotre 3.1

¹ Tã hãmri nhũm Jejus kôt mẽ pa ho mẽ pa xwýnhjaja arĩ Tĩrtũm mã amnhĩ jarẽnh xã hã ixkre kaxwýnh pumunh o kuhẽ nẽ hã Jejus mã:

—Hêxta waa nẽ. Ixkreja mex kumrêx Pahihti. Kên rũnh o mẽ kot hipêx jakamã mex o mex. Nẽ mẽ

kot ri Tirtüm mã hkĩnh xà nhõr nêj haxwýja piitã mex kumrêx. Anê.

² Hãmri nhũm mẽ kãm:

—Nà mex tã koja nhỹrmã mẽ kãm Tirtüm kurê xwýnhjaja grành pa. Koja arĩ kên axkrutê axpên mýnh nê nõr kêt kumrêx. Koja piitã anhgrã nê ahpýnhã ri hikwỹ.

Anhỹr o mẽ kãm kapêr. ³ Hãmri nê ixkreja rũm kato nê ma tẽ nê hixêti pê Oriwêhti hã api nê hã nhỹ. Tirtüm nhõrkwỹ kutã hixêti ja nhũm hã api nê hã nhỹ. Hãmri nhũm Simãw Pêtre mẽ Xiakre mẽ Juãw mẽ Andreja ma hkôt mra. Ahte hkôt mra nê mẽ kot Tirtüm mã amnhĩ jarênh xà hã ixkre grành par ã hkukja nê kãm:

⁴ —Kwa xà ãm hãmri koja mẽ ã ixkreja nhĩpêx anê? E aprĩ hã mẽ inhmã harê. Xà koja mẽ nhỹrmã kugrã nà xà koja mẽ tokyx ho anê? Kwa mẽmo koja we wýj ri tanhmã amnhĩ nhĩpêx to? Anê.

⁵⁻⁶ Hãmri nhũm mẽ kãm:

—Nà kot paj mẽ amã harê. Nom nhỹrmã mẽmoj piitã hapêx kaxyw tanhmã amnhĩ nhĩpêx to kumrêx kot paj mẽ amã harê ka mẽ inhma. Koja mẽ ohtõ nê mẽ apê ixkwýjê hwýr mra nê hêx rom te pa ixte amnhĩ nhĩpêx pyrãk o amnhĩ nhĩpêx o pa. Nê tanhmã mẽ amã amnhĩ jarênh to nê mẽ amã: “E pa na pre Tirtüm mẽ awýr inhmê. Ixpê kaxkwa rũm ixwrýk xwýnhta na pa.” Anhỹr o mẽ akôt mẽ amã amnhĩ to hêx o pa. Nê mẽ amã: “E na pa mẽ ato amnhĩptãr kaxyw mẽ awýr wrý.” Anhỹr o mẽ amã amnhĩ jarê. Nom kêr ka mẽ ama nê ãm mẽ ama. Mẽ kot amnhĩ to hêx xwýnh na mẽ. Kormã akupyñ ixpõx xà hã arĩgroja kormã.

⁷ —Nê koja mẽ nhỹri awry hã axpên par o pa. Nê mẽ atãã axpên par o pa. Nom kêr ka mẽ harênh ma nê ri tee ri tokyx mẽmoj piitã hapêx ã hkamnhix kêt nê. Mẽmoj piitã hapêx xà hã arĩgroja kormã.

⁸ —Nê koja mẽmoj piitã hapêx kaxyw nhũm ahpýnhã ri pika piitã hkôt mẽ pa xwýnh piitã pika hõ nhõ xwýnhjê kutã amnhĩ xunhwý nê axpu nê axpên pa.

—Nê koja pika piitã hkôt tanhmã mẽ à kuteja mẽ hamý nhũm mẽ amnhĩ xà htýx kãm hamak o pa. Nhũm nhỹri pika htertet týx nê. Nê nhỹhýnh pika hkwy kamã mẽ pa xwýnhjaja prãm xaj pikaprãr pa. Tã nom kormã mẽ kot amnhĩ xà htýx kãm hamak xà hkrax pix na ja. Te mênijaja pijagri kaxyw nê kormã õhy xà hpýnh pyrãk. Koja mẽmoj piitã hapêx kaxyw nê ã amnhĩ nhĩpêx anê.

⁹ —E pa hpãnhã mẽ kot Tirtüm mã amnhĩ jarênh xà hã ixkre grành par xwýj ri mẽmoj tanhmã kot hkukamã amnhĩ nhĩpêx to hã hã harê. Mẽ ate hã ixkukjêr xwýnhta kot paj mẽ amã harê. Nà koja mẽ kãm ixkurê xwýnhjaja mẽ awýr mra nê ixtã mẽ apynê nê mẽ atomnuj nê. Nê ma mẽ pikuprõnh xà hã ixkre hwýr mẽ ato mra nê kamã mẽ kãm mẽ ato kapêr punuj nê nhũm mẽ kuma nê ma mẽ ato mra nê mẽ ajagjê. Mẽ ate ixkôt apa ho apa xwýnh ã ã mẽ anhiêpêx anê. Nê mẽ õ pahiti hwýr mẽ ato mra nê mẽ kãm tanhmã mẽ ato kapêr punuj to. ¹⁰ Tã nom kwa kêr ka mẽ kutã akuhê nê mãmrĩ tãm mẽ kãm ijarênh o akuhê. ¹¹ Nom kêr ka mẽ kãm amnhĩ jarênh kukamã tee ri ajamaxpêr o ri amã mẽ uma hkêt nê akuhê. Rý mẽ ajamaxpêr o: “Hêxta waa nê. Mẽ kot ixkukjêr ã arĩgrota ã tanhmã kot pa we ri mẽ kãm amnhĩ jarênh to?” Anhỹr o tee ri amnhĩ kukamã ajamaxpêr kêt nê. Koja Tirtüm Karõ tanhmã mẽ akrã hto ka mẽ ý hã akatãt kôt tanhmã mẽ kãm amnhĩ jarênh to.

¹² —Nê mẽ atõ nê mẽ anhiêpêxã nê mẽ akrajaja koja mẽ ixtã mẽ atã amýnê nê ma pahĩ hwýr mẽ ato mra nê kãm mẽ ajarê nhũm mẽ kuma nê mẽ ajagjê nê mẽ akwýjê

pa. ¹³ Koja mẽ piitã ixkôt mẽ akamã gryk nê ã kãm mẽ akurê ho pa anê. Nom mẽ kot ã mẽ anhîpêx anhÿr mã tâ kêr ka mẽ amnhî to htÿx nê ixkaga hkêt nê. Mẽ kot mẽ apar tâ ka mẽ kaxkwa kamã akupÿm atÿr kurê kumrêx. Hãmri nê mẽ kurom Tirtÿm mẽ wa ixri atÿr tÿm nê amex rãhã nê apa ho apa. Mẽ kot tanhmã mẽ ato htã mẽ apê akupÿm kaxkwa kamã atÿr tÿm nê apa mã xwÿnh jakamã kwa tee ri amnhî kukamã ajamaxpêr o ri apa hkêt nê. Anê.

Mẽ pahptomnuj tÿx xwÿnh maati hã harênh

Matêwre 24.15-28; Rukre 21.20-24; mãânên Sikÿn Tesarôn 2.3-4; Apokarip 13.11-17

¹⁴⁻¹⁶ Nhÿm Jejus arÿ mẽ kãm kapêr nê mẽ kãm:

—Nê koja nhÿrmã kot mẽ atomnuj tÿx kumrêx xwÿnh maati axtem nê Tirtÿm mã amnhî jarênh xã hã ixkreja kamã amnhî xãm. Hãmri ka mẽ ja hã omu nê mẽ kot krÿ grãnh par mã ajamaxpêr kurê kumrêx. Koja ã amnhî nhîpêx anê ka mẽ amÿm amnhî wÿr mẽ omu hãmri nê ajapôj nê ma aprôt nê amrar kurê kumrêx. Mẽ apê jar pika pê Jutej kamã mẽ apa xwÿnhjaja mẽ omu hãmri nê mẽ kot mẽ apar pymaj ma aprôt nê amrar kurê kumrêx. Hixêt prêk wÿr ajapôj nê aprôt nê ma mra. Nê jar Jerujarê nhô xwÿnhjaja kê mẽ umaj haxwÿja hapôj nê ma hprôt nê ma mra o mra. Nê kapôt ã ri mẽ pa xwÿnhjaja kê mẽ ê jamÿnh kaxyw akupÿm krÿ hwÿr gjêx kêr nê. ãm ma mẽ umaj hprôt nê mra o mra kurê kumrêx.

¹⁷ —Nê mẽ htujarô xwÿnhjaja nê mẽ hkra karàre xwÿnhjaja. Jajê pê koja mẽmoj omnuj tÿx nê. Tanhmã kot wem amnhî to nê hprôt tÿx? Nã pika ja kamã koja mẽ mex kêr nê. Mẽ kot amnhî tomnuj mÿrapê koja Tirtÿm tanhmã mẽ homnuj tÿx to.

¹⁸⁻¹⁹ —Koja ã mẽmoj amnhî nhîpêx anê hãmri nhÿm mẽ piitã

amnhî xã htÿx kãm hamak rÿnh o pa. Tirtÿm kot mẽ piitã mẽ ho kator krax rÿm amnê mẽ pa xwÿnhjaja na mẽ kormã à htÿx kamã hamak rÿnh kêr nê. Kormã amnhî xã kamã hamak kryre. No nhÿrmã mẽ hprôt xã hã arÿgrota ã koja mẽ amnhî xã htÿx kamã hamak rax kumrêx.

—Tã akupÿn ixte mẽ awÿr ixwÿrÿk xã hã arÿgrota ã kot pa mẽmoj punuj o ijapêx pa ka mẽ axte ã mẽmoj kot anhÿr pumunh kêr nê. Nom kormã akupÿn ixwÿrÿk xwÿj ri kot kaj mẽ amnhî xã htÿx kamã ajamak o apa. Jakamã kêr ka mẽ ã amnhî nhîpêx anhÿrja kukamã amnhî to Tirtÿm wÿ nê kãm: “Pa Tirtÿm. Kwa kê mẽmoj ã amnhî nhîpêx anhÿr kaxyw hãmri kê amgrã pê ã amnhî nhîpêx anê. Koja na pê ã amnhî nhîpêx anê nhÿm omnuj tÿx nê.” Anhÿr o amnhî to awÿ.

²⁰ —Mẽ hprôt xã hã arÿgrota ã koja Tirtÿm kãm mẽ apê hkrajaja mẽ atyk par pymaj mẽ anê mẽmo punuta ã arÿgro hkwy grã nê mẽ akukamã mẽ amã ho grêre. Koja mẽ akamã ukapri xãj ã mẽ anê hipêx anê.

²¹ —Nê koja ã mẽmoj amnhî nhîpêx anhÿr kaxyw hãmri nhÿm mẽ hêx o mẽ pa xwÿnhjaja ma mẽ awÿr mra nê hêx rom tanhmã mẽ amã kapêr to nê mẽ amã: “E ota ra Tirtÿm kot mẽ pakaxyw ãm xwÿnhhta pôj. Kwa mẽ tokyx hwÿr mra nê omu nê hkôt ri apa.” Anhÿr o mẽ amã hêx. Hãmri nhÿm mẽ hkwyjaja tee ri mẽ kuma nê mẽ amã: “Nã tãm kêr. Jar mẽ ixkamã na. E mẽ tokyx amnê hwÿr mãn mra nê omu.” Anhÿr o mẽ amã hêx o pa. Nom kêr ka mẽ ama nê ãm mẽ ama nê mẽ hkôt amrar kêr nê.

²²⁻²³ —E kwa mẽ inhma. Na pa ra ixpri hã mẽmoj kot ã amnhî nhîpêx anhÿrja kukamã mẽ amã tanhmã harênh to. Tã kêr ka mẽ axkãm ajamak rom nê ri apa. Koja mẽ kot amnhî to hêx xwÿnhjaja axpên

pānhā mẽ awÿr mra nē mẽ amā kēp Tirtūm kot mẽ akaxyw ām xwÿnh ā amnhī to hêx. Nē mẽ hkwyjaja kēp Tirtūm nhÿ hā kapēr jarēnh xwÿnh ā amnhī to hêx. Hāmri nē aa mẽ kot mẽmoj pumunh kêt kwÿ ho anhÿr o pa. Te Tirtūm nhÿ hā kot ho anhÿr pyrāk nom hêx rom mẽ apê Tirtūm kot amnhīm mẽ arēnh xwÿnhjê nokupyr kaxyw ā amnhī nhÿpêx anhÿr o pa. Anē.

Akupÿn Jejus wrÿk xà hā arÿgro jarēnh

Matêwre 24.29-31; Rukre 21.25-28; määnēn Sikūn Pêtre 3.10; Apokarip 1.7, 19.11-16

²⁴⁻²⁵ Nhūm Jejus arī mẽ kām kapēr nē mẽ kām:

—Tā koja mẽ kot amnhī xà htÿx kamā hamak xà hā arÿgrota hapêx nhūm Tirtūm ā mẽmoj nhÿpêx anē. Koja kaxkwa ho àk tÿx nē nhūm myyti ahtÿk.

Nhūm mytwrÿre axte hirā hkêt nē. Nhūm kanhêti piitā axrê nē rôrôk pa.

²⁶ Hāmri pa man akupÿn pika hwÿr wrÿ nhūm mẽ piitā ixwrÿk kām ix-pumu. Kakrā kamā kot paj ixihtÿx o inhÿrā rax kām akupÿn mẽ awÿr wrÿ. ²⁷ Hāmri nē ma krī piitā hwÿr Tirtūm kapēr o mẽ wrÿk xwÿnhjê rē nhūm mẽ ma mra nē amnepēm ixte amnhī kaxyw mẽ axunhwÿr xwÿnh piitā ho akuprō nē akupÿn ixwÿr mẽ ho mra. Anē.

Jejus kot mẽmo pÿ hpàr ā ejêp jarēnh

²⁸ Nhūm Jejus arī mẽ kām kapēr nē mẽ kām:

—E ka mẽ pÿ hpàr mÿj pumu. Na hte mẽmo mytwrÿ hā rā nhūm mẽ omu nē ô hkukamā hamaxpēr kurê kumrêx. ²⁹ Ja pyrā nē koja mẽmoj ā amnhī nhÿpêx anhÿr mẽ ka mẽ akupÿn mẽ awÿr ixwrÿk mā ajamaxpēr kurê kumrêx. ³⁰ Koja akupÿn ixpôx kêt ri ā mẽ kot mẽmoj kot amnhī nhÿpêx anhÿr pumunh

xwÿnhjaja kormā piitā htyk par kêt ri pa akupÿn mẽ awÿr wrÿ.

³¹ —Nē koja nhÿrmā pika nē kaxkwa wa hapêx pa. Tā no ām ixkapēr koja wa urāk nē aa hapêx kêt nē. Koja ām rāhā ho rāhā. Kot paj aa ihkê ho tanhmā mēnh to hkêt nē. Anē.

Mẽ pahte akupÿn Jejus wrÿk xà hā arÿgro pumunh kêt ā mẽ pajarēnh

Matêwre 24.36-44; Rukre 12.37-40; määnēn Atre 1.9-11; Wam Tesarôn 5.2; Sikūn Pêtre 3

³² Nhūm Jejus arī mẽ kām kapēr nē mẽ kām:

—Nom akupÿn ixwrÿk xà hā arÿgroja mẽ ate omunh kêt. Nē kaxkwa kamā Tirtūm kapēr o mẽ wrÿk xwÿnhjaja kot ja pumunh kêt. Nē pa ixpê Tirtūm Kra htā ijaxwÿja ixte ja hā amnhī pumunh kêt. Ām Mēpahpām maatiya tapxipix kot ja pumunh.

³³ —Tā mẽ ate akupÿn ixwrÿk xà hā arÿgro pumunh kêt jakamā kwa kêr ka mẽ axkām ajamak rom nē ri apa. Nē apkati mẽ amnhī wÿr ijapêr arīt rāhā ho ri apa.

³⁴⁻³⁵ —E pa tanhmā mẽ amā akupÿn ixwrÿk xà hā arÿgro jarēnh to ka mẽ inhma. Koja mēhō nhÿhÿm nojarêt hāmri nē kām mẽ àpēnh xwÿnhjê mā mẽ àpēnh ā karō nē ôrkwÿ jamār xwÿnh mā tanhmā kām karō hto. Hāmri nē ôrkwÿ kahê xà jamār xwÿnh mā kām: “E kêr ka ixwakre kamā ijapêr arīt rāhā ho ri apa.” Anē hāmri nē ma nhÿhÿm mō. Tā mẽ kot ijapêr rīt rāhā ho mẽ pa xwÿnhjaja te kot ixkre kahê xà jamār xwÿnh kot amnhī nhÿpêx pyrāk. Ô patrāwja akupÿn hpôx xà hā arÿgro hā omunh kêt jakamā na hte kahê xà jamār rāhā ho pa. Koja apu axpêr kamāt nhūm akupÿn hpôx japêr. Rÿ kôt ā kamāt rÿ krāhyre kà nhūm akupÿn hpôx japêr. Rÿ kwÿhtÿk nhūm akupÿn hpôx japêr. Tā urāk nē mẽ ate akupÿn ixwrÿk xà hā arÿgro

pumunh kêt jakamã kêt ka mẽ
ijamãr rãhã ho ri apa. Jao ixkutêp
inhmã tanhmã amnhĩ nhĩpêx to
rãhã nê. Ra ixte mẽ amã hã karõ
xà hkôt. ³⁶Kop ixkre kahê xà jamãr
xwýnhja tee ri õ patrãw kamã ama
hãmri nê ra õtxwa nê htýx õt o
ýr rôm nhũm haêr pê hwýr hpõx
ronhýx ja kêp mex kêt nê. Ja pyrã
nê kêt ka mẽ ixkutêp ixkôt amnhĩ
nhĩpêx rãhã ho ri apa. Nom tee ri
amnhĩ wýr ixkãm ama hãmri nê
axte inhmã ajamaxpêr kêt pê atýx
ri tanhmã amnhĩ tomnuj to ho apa
hkêt nê.

³⁷—E ixte mẽ amã mẽmoj
jarênhja na pa hte ixkwýjê piitã mẽ
kãm harê. Jakamã kwa kêt ka mẽ
akupýn ixwryk ã ijapêr arít rãhã ho
ri apa. Anê.

Nhũm pre ã Jejus amnhĩ kukamã
mê kãm ujarênh anê.

14

*Mê kot Jejus pír kukamã
hamaxpêr ã mẽ harênh*

*Matêwre 26.1-5; Rukre 22.1-2;
Juãw 11.45-53*

¹Tã nhũm Ijaew hkĩnhã ã arĩgro
pê Pas wýr apkati axkrut. Pas
ã na hte mẽ ixpê Ijaewjaja am-
nepêm Tirtũm kot pika pê Ejit pê mẽ
inhĩgêt nê mẽ ixpãmjê kator mã ija-
maxpêr kaxyw axpên wýr akuprõ
nê hã ixkĩnh. Na pa htem arĩgroja
mã: “Pas” anê. Nê harênh o: “Mê
pahte pãw kaxkrit kêt kur ã arĩgro”
anê. ²Jakamã nhũm mẽ inhõ patre
krãhtũmjê mẽ Tirtũm kapêr tũm o
mê ahkre xwýnhjaja kãm Jejus pír
prãm nê. Nom mẽ kãm hkôt kapêr
mar o mẽ pa xwýnhjê pyma nê. Nê
tee ri hã amnhĩ jahkre nê axpên
mã:

—Hêxta waa nê. Tanhmã kot
puj wem ho nê kupiĩ? Kot puj mẽ
pahkĩnh kãm tanhmã ho nhũm mẽ
hkĩnh xwýnhjaja hã mẽ pahpumu
nê mẽ pakamã gryk týx nê. Pu mẽ
hã axpu nê hã tanhmã axpên to.

Jakamã kwa pu mẽ kormã tanhmã
ho hkêt nê. Anê.

*Mêhõ ni kot Jejus krã gregrer ã
harênh*

*Matêwre 26.6-13; Rukre 7.36-50;
Juãw 12.1-8*

³Rôm nhũm Jejus Simãw nhõrkwý
kamã kormã apkur o nhý. Krĩ
pê Petãn kamã. Simãwja na pre
hkã kro xapêr týx o pa nhũm Jejus
akupýn ho mex. Jakamã akupým õ
krĩ hwýr pøj nê kutã apkur o nhý.
Hãmri nhũm mẽhõ nija harênh ma
nê mẽ hkuxwa xà hã kãx õ py nê
ma hwýr o tẽ. Nê mẽ hwýr axã nê
nhýhýnh kãx kahte nê mẽ hkuxwa
xã ho hkrã gregrer pa. ⁴Hãmri
nhũm mẽ apkur o hkrĩ xwýnhjaja
tee ri ã kot amnhĩ nhĩpêx anhýr ã
omu nê kamã gryk nê. Nê axpên
mã:

—Tk. Kwa nã na hã mẽ hkuxwa
xãta kapír par kumrêx. ⁵Kop apu
ma o htêm nê ho wênê nê hpãnhã
kãxpore ho rax kumrêx nê hamýnh
nê ho mẽ kêp amrakati xwýnhjê
nhĩpêx par nhýx ja kãm mex nê. Mo
na ri ã amnhĩ nhĩpêx anhýr kêt nê?

Anê nê hã kãm akir. ⁶Hãmri
nhũm Jejus mẽ kuma nê mẽ kãm:

—Tk. Kwa mẽ kãm axakjêr kêt nê.
ãm hãmri na ã inhĩpêx anê. ⁷Mê
kêp amrakati xwýnhjaja koja mẽ arĩ
mê akõt pa rãhã nê. Ka mẽ amã
mêmo arĩgro hã mẽ ho ajuta hprãm
nê tanhmã mẽ ho ajuta hto nê mẽ
kãm mẽmoj gõ. No pa kot paj ri
mê akõt ixpa ka mẽ ixto mex ry ho
apa hkêt nê. Kot paj tokyx mẽ are.
⁸Ixyk nhũm mẽ kot ijaxãr kukamã
na ã ixkrã gregrer anê. ãm hãmri
na ã inhĩpêx anê. ⁹ãm hãmri na pa
mê amã ja jarê. Koja mẽ krĩ piitã
hkôt axpên mã ixte tanhmã mẽ anê
amnhĩ nhĩpêx to hã ijarênh o pa
nê mãânên kot ã inhĩpêx anhýrja
mãânên harênh o pa. Nhũm mẽ
piitã kot tanhmã ixto mex to hã
harênh ma. Anê.

Jut Kariot kot mẽ kãm Jejus ã àmnênh kaxyw ã harênh

Matêwre 26.14-16; Rukre 22.3-6; Juãw 13.21-30

¹⁰ Tã nhũm Jut Kariotja. Jejus kôt mẽ pa ho mẽ pa xwýnh pê 12 hõ na pre. Tã axtem nê Satanasti nhỹ hã ma patre krãhtũmjê hwýr tẽ nê axtem nê tanhmã Jejus o mẽ mar to nê mẽ kãm:

—E ot pa mẽ amã Jejus jarênh o tẽ. Xà kot paj mẽ amã hã amýnê ka mẽ hpãnhã inhmã amnhĩre nà? Anê.

¹¹ Hãmri nhũm mẽ kuma nê hkĩnh nê. Hãmri nê kãm:

—Nà kot paj mẽ amã amnhĩre. Anê.

Hãmri nhũm mẽ kuma nê kato nê ma tẽ nê Jejus pynênh kaxyw htãnopxar o hkôt ri pa.

Jejus kot ý hã kapêr o mẽ pa xwýnhjê kutã apkur ã harênh

Matêwre 26.17-19; Rukre 22.7-13

¹² Tã nhũm arĩgro pê Pas kato. Amnepêm mẽ inhĩgêtjaja na prem ôwêhti hkrare hkwy pa. Tĩrtũm kot ja hã mẽ omunh nê Ejit kãm mẽ kãm mẽ hkurê xwýnhjê nhĩhkra nê mẽ kator kaxyw na prem ã amnhĩ nhĩpêx anê. Jakamã na pa htem arĩ mẽ ixpê mẽ hkanrêhã mẽ htãmnhwýjaja Pas ã axpên wýr akuprõ nê jam ijamaxpêr pê mẽ urak nê ôwêhti hkrare hkwy hpa nê pãwti kaxkrit kêt kãm kuku.

Jakamã nhũm Jejus kôt mẽ pa ho pa xwýnh pê 12jaja Pas ã mẽ apkur xà hã Jejus kukja nê kãm:

—Kwa nhỹri kot paj mẽ akutêp Pas ã mẽ panhõ hã apê? Anê.

¹³ Hãmri nhũm mẽ kuma nê ja wa ho axkrut nê mẽ amnhĩ kukamã wa kumê nê wa kãm:

—E wa ma Jerujarê hwýr wa tẽ. Nê hwýr axà nê mēhõ myja pumunh kurê kumrêx. Nhũm amnhĩm gõ ru nê amnhĩ kre hã poti xãm nê o tẽ ka wa omu nê hã ajêt nê ma òrkwy hwýr hkôt tẽ. ¹⁴ Hãmri nê ixkre nhõ dõn pumu nê kãm: “E Jejus na wa inhmẽ pa wa awýr tẽ.

Na awýr pēr mēnh o: ‘Nhỹri kot paj we ixkôt ri mẽ pa ho pa xwýnhjê mẽ Pas ã axpên kutã apku?’ Anhỹr o na awýr pēr mẽ.”

¹⁵ —Wa ã kãm akapêr anê kê war ama nê war amã òrkwy nhĩmõk ã ixkre rax ò jahkre. Ra kamã kaxyw mẽ paxàpkur xà hã mẽmoj piitãã. Ka wa omu nê mãmri kamã mẽ ixkutêp mẽ panhõ hã apê. Anê.

¹⁶ Hãmri nhũm wa kuma nê ma hwýr tẽ. Nê krĩm axà nê ra kot wa kãm mẽmoj jarênh xà hkôt mẽmoj piitã omu nê mẽ kutêp mẽ kãm mẽõ hã ãpênh o wa xa.

Jejus kot mẽhõ kot mẽ kãm hã àmnênh ã harênh

Matêwre 26.20-25; Rukre 22.21-23; Juãw 13.21-30

¹⁷ Tã nhũm kamàtre nhũm Jejus mẽ hkôt mẽ pa ho pa xwýnhjaja wa hkôt mõ. ¹⁸ Hãmri nê kýxpê ixkreja wýr api nê hwýr agjê nê apkur kaxyw hkrĩ hpa nê kormã apkur o hkrĩ nhũm Jejus mẽ kãm:

—E pa mẽ amã mẽmoj jarê ka mẽ inhma nê amnhĩ krãm haxàr týx nê. Kot kaj mẽ ixkutã axàpkur o akrĩ xwýnhjê hõ mẽ kãm ixkurê xwýnhjê mã ixtã amýnê. Anê.

¹⁹ Hãmri nhũm mẽ tee ri kuma nê hkaprĩ htýx nê. Nê axpên pãnhã amnhĩ tã hkukja nê kãm:

—Kwa xà pa kot paj ã anhĩpêx anê? Nà pa hkêt. Anê.

²⁰ Hãmri nhũm mẽ kãm:

—Nà mẽ apê 12jê hõ kot kaj ã inhĩpêx anê. Mẽ ate ixkutã guhkrax kãm anhõ pãwti ho mry kagõ nhek o akrĩ xwýnhjê hõ kot kaj ixtã amýnê. ²¹ Tĩrtũm kapêr ã kagã htũm kot ixkukamã harênh xà hkôt koja mẽ tanhmã ixto rax nê ixpĩ. Nom kot mẽ kãm ixtã àmnênh mã xwýnhhta hêxta waa nê. ã kot amnhĩ nhĩpêx anhỹrja mýrapê koja amnhĩ xà htýx kãm hamak rax kumrêx. Kop apu aa ò mãmãj nhõxà hkre rũm kator kêt ronhỹx ja kãm mex nê.

22 Anê nê kormã mẽ apkur o hkri rôm nhùm pãwti hõ py nê ho Tirtùm wý. Hãmri nê mẽ kãm ho hkry nê mẽ piitã mẽ kãm ôr pa nê mẽ kãm:

—E na pa mẽ amã pãwti ho hkry nê mẽ amã kugõ. Ja pyrã nê koja mẽ ã inhîpêx anê nê te ixto hkry hpar pyrãk o inhîpêx pa amnhî xã htýx kamã ijamak kãm ty. Nom mẽ anê kot paj ty. E mẽ mãmrî aku. Anê.

23-24 Nê hpãnhã wîhti hã kop py nê mã ho anê nê Tirtùm mã harê. Hãmri nê mẽ kãm kugõ nê mẽ kãm:

—E mẽ kot ixpîr xã hã arîgrota ã koja ixkamrõ axkapî. Nom koja mẽ amarî ixpîr nhùm amarî hpikapîr kêt nê. Âm paa. Pa kot paj mẽ anê mẽ ìhkram amnhî jaxã nhùm mẽ ã inhîpêx anê. Koja ixkamrõ axkapî nhùm Tirtùm omu nê ixkukwak ri mẽ anê mẽ ate amnhî tomnuj piitã amnhî katut kõt rênh pa nê mẽ ato hkra. Ra amnepêm kot ja hã amnhî jarênh xã hkõt. Jakamã e. Mẽ axpên pãnhã ixkamrõ pikapîr mã ajamaxpêr pê ixte mẽ amã kop kãm wîhti nhõrta o akõm o axpên nhîpêx. Anê.

Nhùm pre ã mẽ kãm amnhî jarênh anê nhùm mẽ piitã ho hkõm o axpên nhîpêx. 25 Hãmri nhùm mẽ kãm:

—Âm hãmri na pa mẽ amã amnhî jarê. Kot paj axte wîhti ho ixkõm kêt rãhã nhÿrmã Inhõ Papaj akupÿn mẽ awÿr inhmẽ. Hãmri pu mẽ rî kormã akupÿn ixpõx xã hã arîgrota ã pahkînh nê. Nom axtem tanhmã hã pahkînh to. Anê.

26 Nhùm pre ã mẽ kãm kapêr anê hãmri nhùm mẽ Tirtùm mã mex o mex ã gre hãmri nê hapõx pa nê ma hixêt pê Oriwêhti hwÿr mra.

Jejus kot Simãw Pêtre hkukamã tanhmã harênh to

Matêwre 26.31-35; Rukre 22.31-34; Juãw 13.36-38

27 Tã nhùm Jejus hkõt mẽ pa ho pa xwÿnhjê hkukamã tanhmã mẽ kãm ujarênh to nê mẽ kãm:

—E mẽ inhmã. Tirtùm kapêr ã kagã htùm kot ã mẽ pajarênh kot anhÿr.

Kot paj ôwêhti jamãr o pa xwÿnhja pî hãmri nhùm ôwêhti hpi-gràn pa nê ma anhgrã nê ri mra.

Anhÿr o te ixpê ôwêhti jamãr xwÿnh nhùm mẽ apê ôwêhti pyrãk ã mẽ pajarênh. Tã kot paj mẽ ã amnhî nhîpêx anê. 28 Mẽ kot ixpîr tã koja Tirtùm akupÿm ixto ixfür. Pa akupÿm ixfür nê ma mẽ akukamã pika pê Garirej wÿr mõ. Kamã kot paj mẽ axte axpên pumu. Anê.

29 Hãmri nhùm Simãw Pêtre tee ri mẽ amnhî tã kuma nê kãm:

—Kwa nã. Ri ã mẽ ijarênh anhÿr kêt nê Pahihti. Kot paj akaga hkêt nê. Jajaja koja anhgrã nê hprõt nê ma mrar japêr no pa kot paj anhÿr kêt nê. Anê.

30 Hãmri nhùm kãm:

—Nã kot kaj anê Simãw Pêtre. Koja apkati hkõt krãhyre hkãr kêt ri ka ra mẽ umaj ate ixkõt apa hkêt ã mẽ kãm amnhî tã axaprãr o axkrunêpxi kãm ga. Kwa jam ajamaxpêr tÿx nê. Anê.

31 Hãmri nhùm tee ri amnhî tã kuma kãm amnhî tã aprãr kãm hihtýx nê kãm:

—Tk. Kwa nã. Kot paj ã amnhî nhîpêx anhÿr kêt nê. Koja mẽ tee akõt ixpîr mã tã no pa âm aa akaga hkêt kumrêx. Kot paj akõt ixpa ho ixpa rãhã nê. Anê.

Hãmri nhùm hkõt mẽ pa ho mẽ pa xwÿnh kwÿjê piitã ã kãm amnhî jarênh anê.

Jejus kot Tirtùm mã amnhî jarênh Matêwre 26.36-46; Rukre 22.39-46

32 Tã nhùm Jejus ma nhÿri mẽ kot kãm “Gesêm” anhÿr xwÿnhja wÿr hkõt mẽ pa ho pa xwÿnhjê ho mõ. Hãmri nê mẽ kãm:

—E mẽ jar ixkutêp akrî. Pa ma mütùm tẽ nê Tirtùm mã amnhî jarê mãn. Anê.

33 Hãmri nê amnhî kõt mẽ ho axkrunêpxi nê mẽ o mõ. Simãw

Pêtre mē Jepetew kra pijakrut pē Xiakre nē Juāwja nhūm amnhī kôt mē o mō. ³⁴ Hāmri nē amnhī kukamā mē kām hkurê xwýnhjaja kot tanhmā hipêx tota kukamā hamaxpēr o ra amnhī kamā kahak tỳx o ra hkaprī nē. Hāmri nē hkôt mē mrar xwýnhjē mā kām:

—Hêxta waa nē. Na pa tee ri amnhī xā htỳx kamā ijamakja kukamā ijamaxpēr nē amnhī kamā ixkahak tỳx o ixkaprī nē. Te ra ixkaprīja kot ixpīr o mōr pyrāk. Jakamā e mē jar anohtỳx nē ixto Tirtūm wỳr o akrī kē tanhmā ixto pa mē kot tanhmā ixtoja kutā ixihtỳx nē. Anē.

³⁵ Hāmri nē mē kurūm htēm grire nē amnhī kamā kahak o Tirtūm mā amnhī jarēnh kaxyw htu mỳr pē htēm nē pikap nō nē kām:

³⁶ —Kwa Papaj. Hêxta waa nē. Inhmā amnhī xā htỳx kām ijamak prām kêt kumrêx. Na pa tee ri amnhī kukamā ijamaxpēr nē amnhī kamā ixkahak tỳx nē. Jakamā kot kaj amā inhnē ja ho ajapêx prām nē māmri ho ajapêx nhūm mē kām ixkurê xwýnhjaja tanhmā ixto hkêt nē. Rỳ ko. Kot kaj amā mē kot tanhmā ixto hprām kē mē māmri tanhmā inhīpêx to. Nom pam inhmā hprām xā hkôt kêt.

³⁷ Anhỳr o Tirtūm mā amnhī jarē hāmri nē kànhmā xa nē akupỳm Simāw Pêtreja mē hwỳr tē nē mē omu nhūm mē ra htỳx gōr nē hikwỳ. Hāmri nhūm tee ri mē omu nē Simāw Pêtre mā kām:

—Kwa Simāw Pêtre. E mē hāmri akrā hapōj. Kwa wem anohtỳx grire nē ixkutêp amnhī to Inhō Papaj wỳr o akrī ³⁸ kē mē ixkôt tanhmā mē ato htā ka mē amā mē uma xāj ixkaga hkêt nē arī mē kutā amnhī to htỳx nē akuhē. Ā mē amā mē ate amnhī nhīpêx anhỳr prām nom kormā mē amā maa. Anē.

³⁹ Hāmri nē akupỳm tē nē axte Tirtūm mā tanhmā amnhī jarēnh to.

⁴⁰ Nē akupỳm mē hwỳr tē nē mē omu nhūm mē axte ôt pa nē hikwỳ. Nhūm tē nē tee ri mē omu hāmri nē tanhmā mē kām nē hkêt nē. Ām awjanā nē ma akupỳm tē nē axte Tirtūm mā amnhī jarē. ⁴¹⁻⁴² Hāmri nē akupỳm mē hwỳr tē nē mē kām:

—Kwa xān ka mē arī gōr nē anhīkwỳ? E mē tokyx akrā hapōj. Na mē ra ixwỳr mrar nē kot ixpynēnh mā. Koja mē tokyx ixkutā mē kot amnhī xunhwỳr xwýnhjaja mē kām ixtā amỳnē. Ota ra kot ixtā mē kām àmnēnh xwýnhta tē. E mē tokyx kànhmā akrī pu mē kutā mra. Anē.

Mē kot Jejus pynēnh ā mē harēnh Matêwre 26.47-56; Rukre 22.47-53; Juāw 18.1-11

⁴³ Nhūm Jejus kormā mē kām kapēr o ām rāhā nhūm Jut Kariotja tē. Mē hkôt mē pa ho mē pa xwýnhjē hō htā nhūm ra amnhī kôt mē ohtō nē Jejus wỳr mē o tē nhūm mē wapohti nē kō jamỳ nē hkôt o mra. Patre krāhtūm mē Ijaew krāhtūmjē mē Tirtūm kapēr tūm o mē ahkre xwýnhjaja ra Jut kôt mē kurē nhūm mē man hkôt Jejusja wỳr mra. ⁴⁴ Na pre ra Jut Kariotja mē kām tanhmā amnhī jarēnh to nē mē kām:

—E kot paj nhỳri mē pahte unēnh mā xwýnhta pumu nē hwỳr tē nē kahti hkôt kumỳ nē tanhmā kām ixkapēr to. Ka mē ixpumu nē hwỳr tē nē unē nē ma akupỳm o tē.

Anē hāmri nē ma hwỳr mē o tē. ⁴⁵ Nē Jejusja pumu nē hwỳr tē nē kām: “Pa mē ijahkre xwýnh.” Anē hāmri nē kahti hkôt kumỳ. ⁴⁶ Hāmri nhūm hkôt mē mrar xwýnhjaja omu nē Jejus wỳr mra nē unēnh kurē kumrêx. ⁴⁷ Hāmri nhūm Jejus kôt mē pa ho mē pa xwýnhjaja tee ri ja hā mē omu nhūm hōja ō wapo kapa nē patre maati mā àpēnh xwýnh kot mē hkôt htēm xwýnhta mā wapo ho apē. Nē kot ho hkrā nhīpōnh mā tā kuhpaw nē upōk rūm hamak

nhĩkjê krãhta. ⁴⁸⁻⁴⁹ Hãmri nhũm Je-
jus amnhĩ tã mẽ kot unênh xwỳnhjê
mã kãm:

—Kwa na pa pre apkati mẽ
Tĩrtũm mã amnhĩ jarênh xà hã
ixkre kamã mẽ kãm ixujarênh o
ixpa ka prem tokyx ixpynênh kêt
nê. Tã jarãhã te ixte amnhĩ tomnuj
xwỳnh pyrã nê ixwỳr wapohiti nê
kô hã akapên nê ixwỳr atêm rax
nê. Nom ra mẽ ate tanhmã ixto
kaxyw arĩgro kator jakamã mẽ
mãmri tanhmã amã ixto hprãm xà
hkôt tanhmã ixto. Tĩrtũm kapêr ã
kagã htũm kot mẽ akukamã ã mẽ
ate inhĩpêx anhỳr ã mẽ ajarênh xà
hkôt. Anê.

⁵⁰ Hãmri nhũm hkôt mẽ pa ho mẽ
pa xwỳnhjaja tee ri mẽ kot unênh
ã mẽ omu hãmri nê mẽ umaj Je-
jus kaga nê ma hprôt pa nhũm ahte
mê kuri xa. ⁵¹⁻⁵² Hãmri nhũm mẽ
ma o tê. Nhũm kormã mẽhõ nyw
xwỳnhja tee ri ja hã mẽ omu nê ma
Jejus kôt tê. Nhũm mẽ amnhĩ kôt
omu nê kot unênh kaxyw kahty xà
hã kupy nhũm mẽ umaj mẽ ãhkra
kamã kahty xaja re nê ma hkênh nê
hprôt nê tèn akunok.

*Ijaew nhõ patre maati kot Je-
jus kukjêr ã harênh*

*Matêwre 26.57-68; Rukre 22.63-
71; Juãw 18.12-14, 18.19-24*

⁵³ Tã nhũm mẽ ma mẽ õ pa-
tre maati nhõrkwỹ hwỳr Je-
jus o tê. Hãmri nhũm patre krãhtũmjê mẽ
Ijaew krãhtũmjê mẽ Tĩrtũm kapêr
tũm o mẽ ahkre xwỳnhjaja õrkwỹ
hwỳr Je-
jus ã akuprõ. ⁵⁴ Hãmri
nhũm Simãw Pêtre mẽ hkôt tê nê
mê hkôt patre maati nhõ kítare
hwỳr axà nê amỳm hã mẽ omunh o
xa. Nhũm ra pòristijaja kítare kamã
amnhĩm kuto nê hã ànhunh o hkrĩ
nhũm mẽ hwỳr tê nê mẽ ãhkõ hã
ànhunh o nhỹ.

⁵⁵⁻⁵⁶ Rõm nhũm ixkre kamã mẽ
pikuprõnh xwỳnhjaja tee ri Je-
jus ã krĩ nhõ xwỳnhjê kukja nê mẽ kãm:

—E mẽ atõ na ka pre Je-
jus kot tanhmã amnhĩ tomnuj to hã omu?

Mê atõ mẽ inhmã harê pa mẽ
ama nê Rõm nhõ xwỳnhjê nhĩhkram
haxà kê mẽ pamã kupĩ. Anê.

Hãmri nhũm mẽ axpên pãnhã
tanhmã harênh to. Tanhmã kot
amnhĩ tomnuj to hã harênh to htã
nom ri ho hêx jakamã axpên kwỳm
ri tanhmã ri harênh to nhũm mẽ tee
ri mẽ kuma nê mẽ kãm:

—Tk. Kwa mẽ axpên kwỳm ri
tanhmã harênh to hkêt nê. Axpên
kôt mãn ri tanhmã mẽ inhmã
harênh to. Anê.

⁵⁷ Hãmri nhũm mẽ hkwỳjaja
kãnhmã kuhê nê axpên kôt tanhmã
ho hêx to nê mẽ kãm:

⁵⁸ —Nà kot paj mẽ amã tanhmã
kot amnhĩ nhĩpêx to hã harê. Na pa
prem ã kapêr anhỳr ã kuma. Na pre
tanhmã Tĩrtũm mã amnhĩ jarênh
xà hã ixkreta jarênh to nê harênh o:
“Kot paj ixkreja grãnh pa hãmri nê
ixtã apkati axkrunêpxi nê akupỳm
hipêx. Nom kot paj amnhĩ nhĩhkra
ho hipêx kêt nê.” Anhỳr ã ã amnhĩ
jarênh anê pa mẽ kuma.

⁵⁹ Anhỳr o harênh tã nom axpên
kôt harênh kêt nê. Arĩ axpên kwỳm
ri harê. ⁶⁰ Hãmri nhũm mẽõ pa-
tre maati tee ri mẽ kot tanhmã ho
kapêr toja ma nê mẽ aptãr tũmjê
noo mã kãnhmã xa nê Je-
jus mã kãm:

—E na ka ra mẽ kot ã ajarênh
anhỳrja ma. Xà kot kaj tanhmã mẽ
inhmã amnhĩ tã axãprãr to hkêt nê?
Xà ãm hãmri na mẽ ajarê? E kwa
mê inhmã tanhmã amnhĩ jarênh
to. Anê.

⁶¹ Nõ nhũm akryk xa nê tanhmã
kãm nê hkêt nê. Hãmri nhũm tee ri
ã kot amnhĩ nhĩpêx anhỳr ã omu nê
axte kãm:

—Kwa mẽ inhmã amnhĩ jarê. Xà
apê Tĩrtũm Kra na ka? Xà ka na apê
Tĩrtũm kot mẽ ixwỳr amênh xwỳnh
na ka? Anê.

⁶² Hãmri nhũm tã kãm amnhĩ jarê
nê kãm:

—Tỹ. Ixpê tãmta na pa. Ra mẽ ate
jarãhã tanhmã ijarênh to kaxyw
apikuprõnh tã nom kot paj nhỹrmã
mê kamjaja tanhmã mẽ ajarênh to
ka mẽ amnhĩ tã ixpumu. Kot kaj

mě Tirtūm kot mě ato amnhīptār xà kutā akrī hāmri pa hwýr tē nē ĭhkô hā nhý. Kakrā kamā kot paj hwýr tē nē ĭhkô hā nhý hāmri nē ý hā tanhmā mě ajarēnh to ka mě amnhī tā ixpumu. Anē.

⁶³⁻⁶⁴ Hāmri nhūm tee ri ā kot amnhī jarēnh anhýrja ā kuma nē gryk xàj amnhī xē kaxô nē mě àptār tūmjē mā kām:

—Kwa mo kaxyw kot puj mě axte ri ho tanhmā kot amnhī tomnuj to hā harēnh xwýnhjē hō japêr? Ra tām kot amnhī pé Tirtūm Kra hā amnhī to hēx nhūm mě pahte paja-mak o mar kēnā. E tanhmā kot puj mě ho? Anē.

Hāmri nhūm mě kām:

—Nà kot puj mě kupī. Ra htyk mā tām kēnā. E kwa tokyx pu mě ma Rôm nhō pahihtī hwýr o tē kē mě pamā hā amýnē kē mě kupī. Anē.

⁶⁵ Hāmri nhūm mě hipêx kati rax nē. Nē hkuk kuhtō nē hpānhā no hpro nē htak nē kām:

—E mě kot atak xwýnhjē nhīxi jarē. Apē Tirtūm Kra hā ate amnhī jarēnh jakamā mǎn uràk nē axàhpumunh týx. Jakamā e mě hixi jarē. Anē.

Nhūm prem ā hipêx anē hāmri nē pôristijē nhīhkram haxà nhūm mě htak rax o kuhê.

Simāw Pêtre kot Jejus kôt pa hkêt ā kot amnhī jarēnh

Matêwre 26.60-75; Rukre 22.54-62; Juāw 18.15-18, 18.25-27

⁶⁶⁻⁶⁷ Rôm nhūm Simāw Pêtre arī kītare kamā mě ĭhkô hā ànhunh o nhý. Hāmri nhūm mēō patre maati mā àpēnh xwýnh nitita mě hwýr kato nē xa. Hāmri nē hirā kamā hprī hā Simāw Pêtre pumu nē omunh mex kurē kumrêx nē kām:

—Xē pēr apē Najare nhō xwýnh Jejus kôt mě pa ho mě pa xwýnhjē hō na ka. Anē.

⁶⁸ Hāmri nhūm tee ri kuma nē ra kām ma nē. Nē kām amnhī tā aprā nē kām:

—Tk. Koký. Ixte mēhō my ata pumunhre hā. Anē.

Hāmri nē kànhmā xa nē ma tē nē kītare hwýr kahē hkôt ā mě hkàx ā ahte xa nhūm krāhyre kà. ⁶⁹ Nē gaa nhūm hpānhā mě kām àpēnh xwýnhjē hōja omu nē hā mě kām:

—Xē ma ām hāmri na harē. Kôt ri mě pa xwýnhjē hō na pēr. Anē.

⁷⁰ Hāmri nhūm amnhī tā kuma nē kām:

—Tk. Kwa nà. Mē ri ā amnhī krā hkôt ri ixto axêx anhýr kêt nē. Aa ixte mēhō ata pumunh kêt kumrêx. Anē.

Hāmri nhūm mě hkwýja gaa nē kē axte hprī hā omu nē kām:

—Kwa ām hāmri na mě ajarē. Apē Jejus hkwý na ka. Ajaxwýja apē Garirej nhō xwýnh kēnā. Anē.

⁷¹ Hāmri nhūm tee ri mě kuma nē kām ma htýx nē. Hāmri nē mě kām:

—Kwa nà. Na pa Tirtūm noo mā mě amā amnhī jarē. Kot paj amnhī to ixêx japêr nhūm inhma nē hā tanhmā ixto. Nà uràn ixpé Garirej nhō xwýnhre hā. Ixte mēhō mǔj pumunh kêt kumrêx tā ka mě xatā axpēn kôt ixte hkôt ixpa ho ixpa xwýnh ā ixkamnhīx o xa.

Anhýr o ra mě kām amnhī tā aprār o axkrunêpxi. ⁷² Hāmri nhūm axte krāhyre kà. Jao ra hkàr o axkrut. Hāmri nhūm Simāw Pêtre kuma nē Jejus kot ra hkukamā ā amnhī nhīpêx anhýr ā harēnhja mā hamaxpēr kurē kumrêx. Krāhyre kormā hkàr o axkrut kêt ri kot mě kām amnhī tā aprār o axkrunêpxi hā harēnhja mā hamaxpēr. Hāmri nē ra kànhmā hakry hpar o tē nē hkaprī htýx kumrêx. Hāmri nē tee ri amnhī kukamā hamaxpēr nē amnhī mā:

—Hêxta waa nē. Ām hāmri na pre Jejus ijarē. Tā pa kot ijarēnh xà hkôt ā amnhī nhīpêx anē. Kwa mo na pa axtem nē ā mě kām amnhī to ixêx anê?

Anē hāmri nē hkaprī xàj mýr rax nē.

15

Pirat kot Jejus kukjêr ã harênh
Matêwre 27.1-2, 27.11-14; Rukre
23.1-5; Juãw 18.28-38

¹ Tã nhũm myt kato nhũm mẽ axte Jejus ã axpên wýr akuprô. Patre krãhtũmjê mẽ Ijaew krãhtũmjê mẽ Tĩrtũm kapêr tũm o mẽ ahkre xwýnhjê mẽ Ijaew nhõ juistijaja nhũm mẽ piitã hã akuprô. Hãmri nê pôristi mã anê nhũm mẽ Jejus pa hpre nhũm mẽ ma Rôm nhõ xwýnhjê nhõ pahi Pirat wýr o tẽ. Piratja na pre hte Rôm nhõ xwýnhjê nhõ pahi Sesti nhỹ hã Ijaew o amnhĩptar o pa nhũm prem ma hwýr o tẽ. ² Hãmri nê kutã ãm nê tanhmã kãm harênh to nê kãm:

—E ot pa mẽ awýr jahti ho tẽ. Na hte mẽ inhmã hêx rũnh o pa. Mẽ ixte Pahihti Sesti kapêr kwým ri amnhĩ nhĩpêx prãm xãj tanhmã mẽ inhmã hêx to. Nê axtem nê mẽ ixte Sesti mã kãxpore hkwy nhõr kêt ã mẽ inhmã karô. Nê Tĩrtũm kot mẽ ixkaxyw kêp mẽ inhõ pahi hã ãm ã amnhĩ jarênh o pa. Na hte ã mẽ inhmã amnhĩ to hêx anhýr o pa. Anê.

Hãmri nhũm Pirat mẽ kuma nê Jejus pumu nê tanhmã hkukjêr to nê kãm:

—E inhmã amnhĩ jarê. Xã ãm hãmri na mẽ ã ajarênh anê nã? Xã apê Ijaew nhõ pahi na ka? Xã ka na htem amnhĩ wýr akãm hamak o pa? Anê.

Hãmri nhũm kãm:

—Tý. Nã ãm hãmri na ka ã ijarênh anê. Anê.

³ Hãmri nhũm patre krãhtũmjaja tanhmã kãm ho kapêr to. ⁴ Nhũm mẽ kuma nê axte hkukja nê kãm:

—Kwa na mẽ ã ajarênh anê ka mẽ ama nê ãm mẽ ama nê inhmã tanhmã amnhĩ tã axãprãr to hkêt nê. Anê.

⁵ Nom nhũm Jejus ãm akryk xa nê tanhmã axte kãm nê hkêt nê. Jakamã nhũm Pirat tee ri omunh pẽ hamaxpêr o nhỹ.

Pirat kot Jejus pĩr ã àmnênh ã harênh

Matêwre 27.15-26; Rukre 23.13-25; Juãw 18.39–19.16

⁶ Na pre hte pahi Pirat arĩgro pẽ Pasja ã Ijaewjaja kãm hprãm xã hkôt mẽ hagjênh xwýnhjê ho hpýnh nê mẽ kãm ure. ⁷⁻¹⁰ Jakamã nhũm Ijaew kwýjaja hwýr mra nê kãm:

—Pa. Kwa xã kot kaj jarãhã mẽ inhmã mẽ hagjênh xwýnhjê hõ mã anhũre nã? Anê.

Hãmri nhũm mẽ kuma nê hamaxpêr o:

—E paj Jejus ã mẽ kuma nê kãm inhũre. Mẽ piitã mẽ kãm kapêr mar prãm nhũm mẽõ patre krãhtũmjaja pix kot mẽ hkôt kamã gryk nê ã ixwýr o mrrar anhýr kênã. Anê.

Hãmri nê mẽ kãm:

—Tý. Nã kot paj mẽ amã hõm inhũre. Kwa xã kot pa mẽ amã mẽ anhõ “pahihti” jarênhja mã inhũre nã? Anê.

¹¹ Hãmri nhũm patre krãhtũmjaja tee ri kuma nê mẽ kãm:

—Kwa mẽ kãm anê kê Parapas mã mãn ure. Anê.

Hãmri nhũm mẽ kuma nê Pirat mã kãm:

—Nã Jejus mã anhũrer kêt nê. Parapas mã mãn anhũre. Anê.

¹² Hãmri nhũm mẽ kãm:

—No mẽ ate mẽ anhõ pahi hã harênh xwýnhhta? Tanhmã kot paj ho? Anê.

¹³ Hãmri nhũm mẽ àmra kamã kãm hã amýnê nê kãm:

—Kwa pĩ kahpa hã anhõ kê ty. Anê.

¹⁴ Hãmri nhũm tee ri mẽ kuma nê mẽ kãm:

—Tk. Kwa nã. Tanhmã kot amnhĩ tomnuj tore hã kot pa ã hipêx anê.

Anhýr tã nhũm mẽ xatã anhĩpê kãm kapêr kãm hihtýx nê kãm:

—Kwa pĩ kahpa hã mãn anhõ kê ty. Tokyx ã mẽ inhmã hipêx anê.

Anhýr o kuhê. Kãx pẽ kãm anhýr o kuhê. ¹⁵ Nhũm tee ri mẽ kuma hãmri nê mẽ kãm hprãm xã hkôt mẽ kãm Parapas mã ure. Nê pôristi

hkwýjê mã Jejus ã amýnê nê mẽ kãm:

—Tôe. Mẽ mamrĩ hwýr tẽ nê htak hãmri nê kapôt ã mẽ hpar xà hã pika hwýr o tẽ nê pĩ kahpa hã anhô. Anê.

Mẽ kot Jejus tak ã mẽ harênh

Matêwre 27.27-32; Juãw 19.2-3

¹⁶ Tã nhũm pòristijaja akupým ixkreja wýr Jejus o axà nê amnhĩ wýr hkwýjê hã karô nhũm mẽ hwýr agjê nê Jejus ã akuprô. ¹⁷ Hãmri nê kệp pahi hã hpêr o pikênh kaxyw kãm pahi hã mẽ ahkà nhĩpêx nê hkrãm haxà. Nom axtem nê akunĩ kamã mẽmo mrô nhĩ te kot ronh kanêre pyrãk xwýnhja nhũm mẽ kãm hikãx nê hkrãm haxà. Hãmri nê kệp ê kapa nê pahi hã mẽ ê kamrêk ô py nê kãm haxà. ¹⁸ Hãmri nê kãm:

—E apê Ijaewjê nhô pahi na ka. Anê.

¹⁹ Hãmri nê xatã axpên pãnhã hwýr mra nê pĩ ho hkrãx pê htak nê hkuk kuhtô nê hã hpêr o pikênh pê hã hpijaam pyrã nê kutã hkôn krã ho hkrĩ. ²⁰ Hãmri nê kệp pahi xê kapa nê akupým kãm ê jaxà nê pĩ kahpa hã nhôr kaxyw ma o kato nê o tẽ.

²¹ Nom nhũm ra hiro týt nê nhũm mẽ tee ri omu hãmri nê mẽhõ kot ho ajuta kaxyw mẽ kot hkôt omunh o môr xwýnhjê kapi ho xa. Hãmri nê Sirên nhô xwýnh Simãw hkà htykreja pumu. Aresãn mẽ Rupti wa hipêêxà na pre. Nhũm htýx hamakêtkati nê mẽ kutã krĩm tẽ. Hãmri nhũm mẽ haê nê unê nê kãm Jejus o ajuta kaxyw hã karô nhũm kãm pĩ kahpaja mý nê mẽ hkôt o tẽ.

Mẽ kot pĩ kahpa hã Jejus nhôr ã mẽ harênh

Matêwre 27.33-44; Rukre 23.33-43; Juãw 19.17-27

²² Nhũm mẽ ra kên nhĩxêt te kot mẽ hkrã hi pyrãk xwýnhja wýr Jejus o pój. Mẽ kot kãm “Korkot” anhýr xwýnhja wýr. Mẽ pakapêr kãm na htem Korkotja jarênh o: “Mẽ hkrã

hi xà” anê. Jakamã nhũm mẽ ra hwýr o pój. ²³ Hãmri nê kot pĩ kahpa hã nhôr kaxyw wĩhti hkwý ho mẽ mẽmo mẽhkanexà pê mĩra ho ahkà. Kot ho kôm nê amnhĩ xà htýx kãm hamak kêt kaxyw hipêx nê kãm kugô nom nhũm hkaga nê ho hkôm kêt nê. ²⁴⁻²⁶ Hãmri nhũm myt kaxkwa nhĩpók wýr tẽ nhũm mẽ pĩ kahpata ã Jejus xi nê prek o ãhkra ho htýx nê hpar o htýx. Nê hpãnhã kaxyw kakwý nê kãnhmã pĩ kahpa jarĩ nê kre kamã ãm nê hity hpa. Nhũm Jejus kýt pê amnhĩ xà htýx kumrêx kamã hamak o ajêt. Nhũm pòristi hõja tẽ nê tapti hõ py nê hã kaga ho:

IJAEWJÊ NHÔ PAHI NA JA

Hãmri nê Jejus wýr ho api nê mý ri kunhõ. Hãmri nhũm hparpê pòristi hkwýja axpên mã ê hkwý ho hpi-gràn h kaxyw hã kênre ho jôka ho hkrĩ.

²⁷⁻²⁸ Tã nhũm mẽ wa kot amnhĩ tomnuj xwýnh wa ho axkrut nê mã wa ho anê nê. Nê pĩ kahpa hã prek o wa ãhkra ho htýx nê wa hpar o htýx hãmri nê akutã ho Jejus nhĩjê nhũm wa ajêt.

²⁹ Hãmri nhũm mẽ kot omunh mã mrrar xwýnhjaja Jejus pumu nê hã hpêr o pikênh punuj nê hkrã ho apê nê kãm:

—Kwa na ka pre ate Tirtũm mã amnhĩ jarênh xà hã ixkre gràn h par nê atã apkati axkrunêpxi nê akupým hipêx par ã amnhĩ jarênh o apa. Nê axãhpumunh o axãhpumunh ã amnhĩ jarênh o apa. ³⁰ Jakamã e kwa amnhĩ kapa nê wrý pa mẽ ja hã apumu. E kwa tokyx. Anê.

³¹ Nê patre krãhtũmjê mẽ Tirtũm kapêr tũm o mẽ ahkre xwýnhjaja piitã hwýr mra nê hã hpêr o pikênh o kuhê. Nê axpên mã kapêr o:

—E jahti na xep pre mẽ kamã ukapri ho pa nê tanhmã mẽ ho ajuta hto ho pa. Tã tãm tanhmã amnhĩ to nê wrýk kêt nê. ³² Kwa pa mẽ arĩ pakuhê nê kot amnhĩ kaxãr nê wrýk kãm omu. Kojã wrý pu mẽ

omu në kêp mē panhō pahihiti hā hkôt pajamaxpêr kurê kumrêx. E tokyx wrÿ Jejus pa mē awrÿk kām apumu. Nā kot kaj awrÿk rax në. Anê.

Hāmri nhūm akutā wa kot hijê në jêt xwÿnh wa haxwÿja kām kapêr punuj o ajêt.

Jejus htyk ā harênh

Matêwre 27.45-46; Rukre 23.44-49; Juāw 19.28-30

³³ Tā nhūm ra kaxkwa nhÿpôk ri myt nhÿr mē nhūm te kamāt pyrāk. Nhūm kamāt kô rax kumrêx o ra hā awry mē nhūm akupÿm myt katêr o mō. ³⁴ Hāmri nhūm Jejus âmra kamā Tirtūm mā kapêr në kām:

—Inhō Tirtūm inhō Tirtūm. Kwa mon ka ixkaga? Anê.

Nom kapêr kām kapêr o:

—Eri Eri rāmā sapatani. Anê.

³⁵ Hāmri nhūm mē kot mar o kuhê xwÿnhjaja kot Eri hā harênh ma në htÿx ho finat Eris mā kapêr ā hkamnhÿx. ³⁶ Hāmri nhūm ja hprôt në mēmo rereeti py në pÿ ho hkanhwÿ në o tē në ho wÿhti nhek në Jejus wÿr o tē në kot hkaôr kaxyw kām kupê. Hāmri në hkwyjê mā kām:

—E hāmri pu mē jar hkàx ā pakuhê në Eris jamā măn. Kojā kuma në hwÿr tē në o wrÿ nā? Anê.

³⁷ Nom nhūm Jejus ra htyk kaxyw në âmra htÿx në ty.

³⁸ Hāmri nhūm Tirtūm mā amnhÿ jarênh xā hā ixkre kamā hakwakre hā kupêxêja axkjê në amnhÿ kahê xā mēnh kurê kumrêx. Utÿ rax tā kÿj rûm ahpār mā axkjê në amnhÿ kahê xā mē. Te Jejus htyk o mē pahte hkôt amnhÿ xunhwÿr xwÿnhjê mā Tirtūm wÿr pry jakwa kre kahê xā mēnh pyrāk o ā amnhÿ kaxôn anê. ³⁹ Nhūm pôristi krāhtūmjê hōja Jejus parpê kutā htyk kām omunh o xa. Hāmri në tee ri omu në hamaxpêr o:

—Hêxta waa në. Ām hāmri na pre hte kêp Tirtūm Kra hā amnhÿ jarênh o pa. Tā pa mē amarÿ kupÿ. Anê.

⁴⁰⁻⁴¹ Rôm nhūm mēni kwÿjaja amÿm htyk kām omunh o kuhê. Na pre htem Garirej kamā Jejus mē hkôt mē pa ho mē pa xwÿnhjê mā mē apkur xā hā àpênh o mē hkôt pa në mē hkôt Jerujarê hwÿr mō. Marir Matarênh në Xiakre mē Jojes wa katorxā Marirja. Nê Sarome. Nê määnênh mēni hkwyjaja nhūm mē amÿm Jejus htyk kām omunh o kuhê.

Mê kot Jejus jaxâr ā harênh

Matêwre 27.57-61; Rukre 23.50-56; Juāw 19.38-42

⁴² Nhūm prem arÿgro pê sêsta hā Jejus pÿ nhūm ra amÿkry htÿx në. Sap kukamā na pre htem Ijaewjaja amnhÿm apkur xā hā mēo nhÿpêx pa nhūm sap kato nhūm mēmoj to anhÿr kêt në. ⁴³ Jakamā nhūm Juje hō pê Arimatej nhō xwÿnhja. Kêp Ijaewjê nhō juisti hō na pre. Nhūm mē piitā kām hkÿnh në axpên mā mex o mex ā harênh o pa. Na pre Tirtūm kot mē pahwÿr Jejus mēnh kôt hamaxpêr o pa. Tā Jejus htyk ā omu hāmri në hamaxpêr o:

—E pa ma pahi Pirat wÿr tē në Jejus nhÿ hā kuwÿ. Inhmā uma htā kot paj ma hwÿr tē në hā kuwÿ kê inhmā kugō pa ma o tē në tokyx haxā. Kot paj ho anhÿr tokyx anhÿr kêt nhūm mē panhō arÿgromnu pê sapja wÿr ra myt axā hāmri pa haxâr kêt në.

Anhÿr o hamaxpêr në ma Pirat wÿr tē në hā kuwÿ. ⁴⁴ Hāmri nhūm amnhÿ jaêr pê ra htyk ā harênh ma në amnhÿ wÿr pôristi krāhtūmjê hō hā karō në hā hkukja në kām:

—Kwa xā na ra Jejus ty? Anê.

Hāmri nhūm kām:

—Tÿ na ra ty. Anê.

⁴⁵ Hāmri nhūm kuma në Juje mā kām:

—Tôe. Mamrÿ ma o tē në haxā. Anê.

⁴⁶ Hāmri nhūm kuma në akupÿm Jejus wÿr tē në pôristi mā anê nhūm mē kām ho wrÿ. Nhūm kumÿ në kupêxê ho hkupu hpa në o tē në kên

kre kakwŷnh kām haxà. Hāmri nē kēn rax o hitom mex nē ma akupŷm krīm tē. ⁴⁷ Nhūm Marir Matarēn mē Juje katorxà Marir ōja wa ma hkôt tē nē kot haxàr kām omunh o xa. Kot mē hkuxwa xà ho gregrer kēt rāhā haxàr kām omu.

16

Jejus akupŷm htīr ā harēnh

Matēwre 28.1-10; Rukre 24.1-12; Juāw 20.1-10

¹⁻² Tā nhūm apkati. Nom nhūm ra mē inhō arīgromnu pē sap kator jakamā nhūm mē kormā akupŷm kēnkreta wŷr mrrar kēt nē. Hāmri arīgro mex jamār pē kōkôt o hkrī. Hāmri nhūm axte apkati nhūm tōmīk nhūm ra mē inhō arīgromnu hapēx nhūm Marir Matarēn mē Sarome mē Xiakre katorxà Marirja mē ma akupŷm kēnkreta wŷr mra. Kormā kwŷhtāā. Kormā myt kator o mōr mē nhūm mē kànhmā hkrī hāmri nē mē kot Jejus gregrer kaxyw mē hkuxwa xà hkwy jamŷ nē ma hwŷr o mra. ³ Hāmri nē kormā mōr ri tee ri amnhī kukamā hamaxpēr nē axpēn mā:

—Xē gāā nē. Mēhō koja mē pamā nhām kēnkre nē hitom raxta xām pu mē Jejus wŷr agjē nē gregrer? Utī rax kumrēx kēnā. Anē.

⁴ Hāmri nē hwŷr pōj nē omu nhūm ra hitom xàja kàx ā nō nhūm mē tee ri omu. Utī rax tā ra kàx ā nō. ⁵ Hāmri nhūm mē kēnkre hwŷr agjē nē upōk rūm mēhō nyw pumu. Nhūm ē jakajre kamā nhŷ nhūm mē amnhī jaēr pē omu nē tee ri hamaxpēr. ⁶ Hāmri nhūm mē kām:

—Kwa mē amā ma hkēt nē. Mē ate Najare nhō xwŷnh pē Jejus pumunh kaxyw na ka mē mra. Mē kot pī kahpa hā nhōr xwŷnh. Nom jar amrakati. Na ra Tīrtūm akupŷm ho htīr. E mē kam nē amnē agjē nē ano ho nōr xà kaprŷ pumu ⁷ nē tokyx ma akupŷm mra nē hkôt mē pa ho pa xwŷnhjē mā harē. Koja ma Jejus mē akukamā akupŷm Garirej wŷr mō. Garirej

kamā kot kaj mē axte axpēn pumu. Ra kot mē amā amnhī jarēnh xà hkôt. Kwa mē tokyx ma akupŷm mē hwŷr mra. Nē kwa kē Simāw Pētreja harēnh mar mex nē. Anē.

⁸ Hāmri nhūm mē kuma nē awjanā nē ma akupŷm hprôt. Nē tee ri hamaxpēr nē kām ma xāj htertet tŷx jakamā kormā nhām mēhō mā harēnh kēt nē.

Jejus kot Marir Matarēn wŷr kator ā harēnh

Juāw 20.11-18

⁹ Nhūm semān nyw mā àr xà hā arīgro pē tōmīkja ā nhūm Jejus akupŷm htīr. Hāmri nē Marir Matarēn kumrēx wŷr kato. Kot nē mēkarōmnuti ho ⁷ nē nē hanor xwŷnh. ¹⁰ Hāmri nhūm akupŷm htīr kām omu nē hkīnh tŷx kumrēx. Nē ma akupŷm tē nē Jejus krāmnhwŷjē mā harē. Nhūm mē hkaprī nē mŷr o hkrī nhūm mē hwŷr axà nē mē omu nē mē kām:

¹¹ —Xē mē amŷr kēt nē. Na ra Jejus akupŷm htīr nē ham ixwŷr kato pa inhno ho omu. Xē mē hāmri axte amŷr kēt nē.

Anhŷr tā nom nhūm mē htŷx ho amnhī krā hkôt kot ri ā harēnh anhŷr ā hkamnhix jakamā kuma nē ām kuma.

Jejus kot hkwyjē hwŷr kator ā harēnh

Rukre 24.13-35

¹² Tā nhūm Jejus axte ja wa hwŷr kato. Kōt mē pa ho pa xwŷnh wa ho axkrut nē wa hwŷr kato. Na pre wa Jerujarē rūm kato nē akupŷm wa ō krī hwŷr mōr mē nhūm wa hwŷr kato. Nom axtem tanhmā amnhī nhīpēx to nē wa hwŷr kator jakamā nhūm wa tokyx hprī hā kēp Jejus ā omunh kēt nē. ¹³ Tā kēp Jejus ā omu hāmri nē akupŷm Jerujarē hwŷr mō nē hkwyjē mā harēnh kurē kumrēx. Nom nhūm mē wa kuma nē ām wa kuma nē akupŷm htīr kōt hamaxpēr kēt nē.

Jejus kot hkwỳjê mã mẽmoj tã karõ hã harênh

Matêwre 28.18-20; Rukre 24.44-49; Juãw 20.19-23; mããnên Atre 1.6-8

¹⁴Tã nhũm Jejus tã hkôt mẽ pa ho mẽ pa xwỳnh pê 11 wỳr kato nhũm mẽ kamã no pyma nê hkĩnh tỳx nê omunh o kuhê. Hãmri nhũm mẽ kãm:

—Kwa hêxta waa nê. Marir Matarên mẽ akwỳta mẽ kot akupỳm ixtĩr kãm ixpumunh nê mẽ amã ijarênh tã ka mẽ ama nê ãm mẽ ama. Pêr ãm mẽ akrã hihtỳx jakamã na ka mẽ ama nê mẽ hkôt ajamaxpêr kêt nê. Anê.

¹⁵Hãmri nê mẽ kot tanhmã kãm amnhĩ nhĩpêx to ho pa hã mẽ kãm karõ nê mẽ kãm:

—E kêr ka mẽ ma krĩ piitã hkôt mẽ kãm ijarênh o ri mẽ hkôt apa. Ixte tanhmã mẽ nê amnhĩ nhĩpêx toja ka mẽ aprĩ hã mẽ kãm ijarênh o ri mẽ hkôt apa. ¹⁶Nê mẽ kot mẽ akapêr mar nê amnhĩ kaxyw ixkôt hamaxpêr xwỳnhjaja kêr ka mẽ hkrã kumrã nhũm mẽ nhỹrmã Tĩrtũm mẽ wa ixri htĩr tũm nê mex rãhã nê pa ho pa. No mẽ kot amnhĩ kaxyw ixkôt hamaxpêr kêt xwỳnhjaja koja Tĩrtũm nhỹrmã amnhĩ nê mẽ hano nhũm mẽ ma kuwy hwỳr pa.

¹⁷—Nê amnhĩ kaxyw ixkôt mẽ ajamaxpêr xwỳnhjaja kot kaj mẽ inhỹ hã tanhmã amnhĩ nhĩpêx to ho ri apa. Aa mẽ kot mẽmoj pumunh kêt kwỳ ho anê nê inhỹ hã inhĩxi jarênh kôt mẽ nê mẽkarõmnuti janor o ri mẽ hkôt apa. Nê mẽ ate nhãm mẽ kapêr mar kêt tã inhỹ hã ho akapêr mex o apa. Mẽ ate mar kêt tã ra ho akapêr nhũm mẽ kot mẽ kapêrta mar xwỳnhjaja hprĩ hã mẽ amar mex nê. ¹⁸Nê kot kaj mẽ nhỹri atỳx kagã xoprê hõ hpyr tã no nhũm tanhmã mẽ ato hkêt nê. Rỳ atỳx mẽmoj to mẽ hpar xà hkwỳ ho akõm tã no nhũm tanhmã mẽ ato hkêt nê. Nê inhỹ hã mẽ à xwỳnhjê hã mẽ

anhĩhkra jaxwỳ nhũm mẽ akupỳm mex. Kot kaj mẽ amnhĩ kaxyw ixkôt mẽ ajamaxpêr xwỳnhjaja ã inhỹ hã amnhĩ nhĩpêx anhỹr o ri apa. Anê.

Jejus kot akupỳm kaxkwa hwỳr àpir ã harênh

Rukre 24.50-53; mããnên Atre 1.6-11

¹⁹Tã nhũm mẽ panhõ Pahihti Jejusja hkôt mẽ pa ho mẽ pa xwỳnhjê mã kapêr pa hãmri nhũm Tĩrtũm ma akupỳm amnhĩ wỳr kaxkwa hwỳr ho api. Hãmri nhũm kaxkwa kamã Tĩrtũm nhĩhkô hã upòk rũm nhỹ. Kot ìhkô hã mẽmoj piitã ho amnhĩptàr kaxyw hkrĩ ho hkrĩ. ²⁰Hãmri nhũm hkôt mẽ pa ho pa xwỳnhjaja ma akupỳm àpir kãm omu hãmri nê angrã nê ma krĩ piitã hkôt mẽ kãm Tĩrtũm kapêr jarênh o pa nhũm Pahihti Jejus mẽ ìhkô hã pa ho pa. Nhũm mẽ ma ã hã hkwỳjê mã aa mẽ kot mẽmoj pumunh kêt kwỳ ho anhỹr o ri mẽ hkôt pa nhũm mẽ ja hã mẽ omu nê axpên mã mẽ harênh o:

—Nà ãm hãmri na mẽ pamã Tĩrtũm kapêr jarênh o pa nê ho hêx kêt nê. ã hã mẽ kot aa mẽ pahte mẽmoj pumunh kêt kwỳ ho anhỹr o pa kênã. Nà ãm hãmri na ã mẽ pamã kapêr jarênh anhỹr o pa. Anê.

Ja kôt na Makre kot Jejus jarênhja hapêx.

Rukre Rukre tanhmã Jejus kot amnhĩ nhĩpêx to ho pa hã kagà

Rukre na pre kagàja nhĩpêx. Kêp Ijaew kêt xwýnh na pre. Tã amnhĩ kaxyw Jejus kôt hamaxpêr. Na pre kêp tôtô nê mē hkane ho pa. Nê Jejus nhỹ hã kapêr o pa xwýnhjê hõ pē Pawreja kôt pa ho pa. Tã tanhmã hamaxpêr to nê hkrãmnhwý Teopre mã kagàja nhĩpêx nê kamã tanhmã Jejus kot amnhĩ nhĩpêx to ho pa hã harê nê hã kagà.

Nê Jejus kêp Tirtũm nhỹ hã kapêr o pa xwýnh ã harê. Nê mē pahpyrà nê í ho í hã harê. Nê kêp mē pakamã ukapřĩ xwýnh ã harê. Nê kêp mē pahte amnhĩ tomnuj o hapêx xwýnh ã harê. ã na pre Rukreja hkrãmnhwý Teopre mã Jejus jarê nê hã kagà anê. Nê mãânên mē pahpiitã mē pakaxyw harê nê hã kagà.

Rukre kot Teopre mã amnhĩ jarênh

Atre 1.1-2

¹ Pa pahi Teopre. Xà amex? E ot pa awýr kagà nhĩpêx nê awýr kumê. Ixte amã Jejus jarênh kaxyw. Na prem ra ohtô nê jar mē pahkôt Jejus kot amnhĩ nhĩpêx o pa hã kagà rax nê. ² Jejus nhỹ hã Tirtũm kapêr jahkre ho mē pa xwýnhjaja na prem Jejus kot tanhmã amnhĩ nhĩpêx to hkrax kãm kot amnhĩ nhĩpêx o pa hã omunh o hkôt pa. Hãmri nê hprĩ hã mē inhmã harê nê hã kagà nhũm mē ohtô nê mē mar xà hkôt mē urà nê kot tanhmã amnhĩ nhĩpêx to ho pa hã kagà. ³ Tã pa mē harênh ma nê ijamaxpêr o:

—E kot paj ijaxwýja Jejus kot amnhĩ nhĩpêx kwý hã kagà. Nà kot paj ho anê.

Anhýr o ijamaxpêr jakamã ot pa ra ixte amã hã kagà kaxyw.

⁴ Tã kêr ka kamã harê nê ixpyrà nê ama nê aprĩ hã harênh mar týx nê mē kot amã harênh xwýnhjê hkôt ajamaxpêr týx o apa. ãm hãmri na prem mē amã harê. E kot paj amã hkwy hã kagà. Ixpê akrãmnhwý Rukre kot paj ixprĩ hã amã harê nê hã kagà.

Tirtũm kapêr o wrýk xwýnh kot Juãw Paxis jarênh

⁵ Juãw Paxis nhĩpêxã finat Jakarisja kumrêx kot paj amã harê. Kêp finat Apiasti kanrêhã htãmnhwý jakamã urak nê kêp mē apê Ijaew nhõ patre na pre. Pahihti Eroxa kormã kot mē anhõ pika kamã mē ho amnhĩptar ri nhũm Jakaris kêp patre nê pa. Nê hprõ Ijapew mē wa kêp Parãw kanrêhã htãmnhwý. ⁶ Nê wa hamê na pre Tirtũm kôt tãm amnhĩ nhĩpêx o wa pa. ãm Tirtũm kapêr kôt pix mã ri amnhĩ nhĩpêx rãhã ho wa pa.

⁷ Nom Ijapewja tanhmã hkra xà kute jakamã nhũm wa hkra hkêt nê wa pa rãhã wa ra hpigêx týx nê.

⁸ Jakamã nhũm Jakaris ma mē kot Tirtũm mã amnhĩ jarênh xà hã ixkre hwýr tē. Kwýjê pyrà nê kot Tirtũm mã tanhmã amnhĩ nhĩpêx to kaxyw ma mē hpãnhã hwýr tē nê axà. ⁹⁻¹⁰ Hãmri nê kamã Tirtũm mã amnhĩ jarênh pē kãm mē hkuxwaxà ho xêt o xa. Nhũm Ijaew kwýjaja ixkreta wýr akuprõ nê kapem kutêp Tirtũm mã amnhĩ jarênh o kuhê. ¹¹ Pu nhũm kaxkwa rũm Tirtũm kapêr o mē wrýk xwýnhja wrý nê Jakaris kutã xa. Mē hkuxwa xà ho xêt xà hã mēs kunĩhti xupók rũm xa. ¹² Hãmri nhũm amnhĩ jaêr pē amnhĩ kutã omu nê akryk omunh o xa. ¹³ Hãmri nhũm kãm:

—Pa Jakaris? Kwa tee ri ajamaxpêr o amã ma hkêt nê. Na pre Tirtũm ate akra hã hwýr o apa hã ama nê hã apumu. Jakamã

koja tanhmã aprõ hkra xà ho ka kamã akra. Nhũm nõ nẽ rax nẽ kato nẽ myre. Ka wa hã hixi nẽ nhũm kęp Juãw. ¹⁴ Koja kato ka wa omu nẽ akĩnh tỳx kumrẽx. Nhũm akwỳjaja haxwỳja ohtõ nẽ war akra jarẽnh ma nẽ war anhỹ hã hkĩnh nẽ. ¹⁵ Koja kormã akra kator kêt ri nhũm Tĩrtũm Karõja hkarõ hwỳr axà. Hãmri nhũm kato nẽ gaa nẽ hprêk nẽ Tĩrtũm mã tanhmã amnhĩ nhĩpêx to ho pa. Tĩrtũm kãm hprãm xà hkõt pix mã tanhmã amnhĩ nhĩpêx to ho pa. Nom kêr ka inhmar kumrẽx. Kê mẽmoj to wĩhti ho hkõm kêt nẽ pa. Nẽ kagõxyhti ho hkõm kêt nẽ pa. ãm kwarĩ ho kwarĩ. ¹⁶ Koja hprêk hãmri nẽ mẽ apê Ijaew mã Tĩrtũm kapêr jarẽnh o mẽ hkõt pa. Nhũm mẽ ohtõ nẽ kuma nẽ kot amnhĩ tomnuj kaga nẽ Tĩrtũm kõt amnhĩ xunhwỳ nẽ hkõt amnhĩ nhĩpêx mex o pa.

¹⁷ —Tĩrtũm kot mẽ awỳr mẽ apytàr xwỳnh maati mẽnh mã xwỳnh kukamã koja mẽ kãm harẽnh o pa. Te Tĩrtũm nhỹ hã kapêr jarẽnh xwỳnh finat Eris kot amnhĩ nhĩpêx pyrak o koja amnhĩ nhĩpêx. Nẽ urak nẽ Tĩrtũm Karõ nhỹ hã mẽ amã Tĩrtũm kapêr jarẽnh o mẽ akõt pa. Jakamã nhũm mẽ akwỳjaja kuma hãmri nẽ amnhĩ tomnuj kaga hpa nẽ Tĩrtũm kõt pix mã amnhĩ nhĩpêx o pa. Nẽ tãm mẽ hkrajê nhĩpêx o pa. Koja mẽ ã akra Juãwja kõt amnhĩ nhĩpêx anẽ. Jao Tĩrtũm kot mẽ awỳr mẽnh mã xwỳnhhta kutêp tãm amnhĩ nhĩpêx o pa. Anẽ.

¹⁸ Nhũm pre ã Tĩrtũm kapêr o wrỳk xwỳnh Jakaris mã hkrata jarẽnh anẽ. Hãmri nhũm tee ri kuma nẽ kãm:

—Kwa xà wẽ ãm hãmri na ka ã inhmã ixkra jarẽnh anẽ nà? Ra ixprõ mẽ wa ijamẽ wa ixpigêx tỳx kênã kot pa kêt wa ixkra. Anẽ.

¹⁹ Hãmri nhũm kãm:

—Nà ãm hãmri na pa ã amã harẽnh anẽ. Ixpê Gapriew na pa ã

awỳr ixwrỳk nẽ Tĩrtũm nhỹ hã amã harẽnh anẽ. Ixte Tĩrtũm nhĩhkõ hã ixkuhê xwỳnhjê hõ na pa. Tãm na awỳr inhmẽ pa awỳr wrỳ nẽ ã amã akra jarẽnh anẽ. ²⁰ Tã ate ixkõt ajamaxpêr kêt jakamã kot kaj axte axumar kêt nẽ akapêr kêt rãhã nhũm akra kato. Koja kato ka rĩ kormã akupỳm akapêr nẽ akupỳm ama. Ate ixkõt ajamaxpêr kêt jakamã kot kaj ã amnhĩ nhĩpêx anẽ nẽ rĩ amnhĩ pumu. ãm hãmri na pa ã amã ixkapêr anẽ. Anẽ.

Nhũm pre ã Tĩrtũm kapêr o wrỳk xwỳnhja Jakaris mã kapêr anẽ. Jakamã nhũm tokyx ixkre rũm kator kêt nẽ.

²¹ Hãmri nhũm ixkre kapem mẽ kuhê xwỳnhjaja tee ri kamã ama nẽ axpẽn mã:

—Tk. Kwa mo na we ri hitom kãm ho anhỹr kãm unê nẽ tokyx kator kêt? Anẽ.

²² Tã nhũm akupỳn mẽ hwỳr kato. Nẽ tee ri kot mẽ kãm kapêr kaxyw no ãm ãhkra pix o ri mẽ kãm tanhmã ujahkre hto. Hãmri nhũm mẽ amnhĩ jaer pè kot ã amnhĩ nhĩpêx anhỹr ã omu nẽ tee ri hkukamã hamaxpêr nẽ axpẽn mã:

—Kwa tanhmã na we amnhĩ to? Mãn hitom kãm mẽmoj tanhmã kute hã omu hã na ri ã amnhĩ nhĩpêx anẽ nà? Anẽ.

²³ Hãmri nhũm Jakaris ixkre kamã mẽmoj tã ãpênh pa hãmri nẽ ma akupỳm òrkwỹ hwỳr tẽ.

²⁴⁻²⁵ Tã nhũm hprõ Ijapewja htujarõ. Hãmri nẽ amnhĩ tujarõ hã amnhĩ pumu nẽ hkĩnh tỳx nẽ. Nẽ hamaxpêr o:

—Hêxta gàa nẽ. Ma ãm hãmri na pa pre ixkra hkêt nẽ amnhĩ kamã ixpijaam o ri ixpa. Tã ra ixtujarõ. Kot paj wa axte ri amnhĩ kamã ixpijaam kêt nẽ. Ma ãm hãmri na Tĩrtũm ã wa inhĩpêx anẽ. Na pa wa ixkĩnh tỳx kumrẽx. Anẽ.

Nhũm pre ã hamaxpêr anẽ hãmri nẽ arĩ òrkwỹ kamã hkrĩ ho hkrĩ. Aa

nhÿhÿm kator nê môr kêt rãhã hã mytwrÿ kêp 5.

Tÿrtÿm kapêr o wrÿk xwÿnh kot Marir mã hkra jarênh

Matêwre 1.18-21

²⁶ Tã nhÿm Ijapew ra htujarô hã mytwrÿ kêp 6 nhÿm Tÿrtÿm axte kapêr o wrÿk xwÿnh pê Gapriewja mẽ. Nhÿri Garirej kamã krÿ pê Najare hwÿr kumê nhÿm ma hwÿr wrÿ. ²⁷ Mêhõ pê Marir wÿr wrÿ. Nhÿm ra Juje ho mjên kaxyw. No ãm kormã hkukrit rãhã ho mjên kaxyw. Jujeja Marir pyrã nê kêp pahi finat Tawi kanrêhã htãmnhwÿ na pre. ²⁸ Jakamã nhÿm Gapriew Marir wÿr wrÿ nê kãm:

—Pa Marir? E ot pa amã Tÿrtÿm kapêr jarênh kaxyw awÿr wrÿ. Kot akôt pa ho pa jakamã koja ato mex rax kumrêx. Anê.

²⁹ Hãmri nhÿm amnhÿ tã kuma nê tee ri hamaxpêr nê hamaxpêr o:

—Xê mẽmo na we ri ã inhmã kapêr anê? Tanhmã koja we Tÿrtÿmja ixto mex rax to? Anê.

³⁰ Hãmri nhÿm Gapriew kãm:

—Kwa tee ri amnhÿ kukamã ajamaxpêr kêt nê. Tÿrtÿm kãm ajapêê. ³¹ Kot kaj atujarô nhÿm akra kato nê myre. Ka hã hixi mẽ nhÿm kêp Jejus. ³²⁻³³ Koja Tÿrtÿm amã ho mex rax nê. Nê koja mẽ piitã mẽ kãm kêp amnhÿ Kra hã ho amnhÿrit. Nê mẽ apê Ijaew o amnhÿptâr kaxyw koja mẽ akaxyw ãm nhÿm higêt pahi Tawi pyrã nê mẽ ato amnhÿptâr o pa. Mẽ ate amnhÿ wÿr kamã ajamak o apa xwÿnhhta koja. Tÿrtÿm kãm hprãm xã hkôt koja mẽ ato amnhÿptâr rãhã ho pa. Anê.

³⁴ Nhÿm pre ã kãm kapêr anê nhÿm amnhÿ tã kuma nê tee ri amnhÿ kukamã hamaxpêr hãmri nê kãm:

—Xê gàa nê. Tanhmã kot pa kêt we amnhÿ to nê ixtujarô? Kormã ixkukrit nê mo kormã inhmjên? Mê. Xã Juje kot ixkamã hkra

hkukamã na ka ã ri inhmã axujarênh anê? Anê.

³⁵ Hãmri nhÿm kãm:

—Nã koja Tÿrtÿm Karô tãm tanhmã ato ka ÿ hã tanhmã amnhÿ to hkêt tã atujarô. Jakamã koja akra kêp Tÿrtÿm Kraa. ³⁶⁻³⁷ Na ra haxwÿja anã Ijapewja htujarô. Ra hpigêx tÿx nê aa hkra hkêt nhÿm hkwyjaja kot axpên mã ôhy kamã hkra hkêt kumrêx ã harênh o pa htã ra htujarô. Tÿrtÿm kot tanhmã mẽ ho nhÿm mẽ htujarô tanhmã kêp kute hkêt. Jakamã nhÿm tanhmã ho nhÿm mjên tãm htu nhÿm ra htujarô hã mytwrÿ kêp 6. Tÿrtÿm tãm kot mẽmoj piitã tanhmã ho kaxyw ãhpumunh xihtÿx. Jakamã koja urak nê mã ato anê nê ka kormã akukrit tã atujarô. Anê.

³⁸ Nhÿm pre ã Gapriew Marir mã kapêr anê nhÿm amnhÿ tã kuma nê kãm:

—Ko. Kê mãmrÿ kãm tanhmã ixto hprãm xã hkôt mãmrÿ tanhmã inhÿpêx to. Inhmã Tÿrtÿm kapêr kôt amnhÿ nhÿpêx prãm. Kê mãmrÿ kãm tanhmã ixto hprãm xã hkôt tanhmã inhÿpêx to.

Anê nhÿm kuma nê ma akupÿm api.

Marir kot Ijapew wÿr môr ã harênh

Rukre 11.27

³⁹⁻⁴⁰ Tã nhÿm Marir amnhÿ tujarô hã amnhÿ pumu nê nã Ijapew wÿr hkra kurê kumrêx. Hãmri nê nojarêt nê ô krÿ rùm kato nê ma hwÿr mõi. Ma Ijapew papxã hwÿr mõi. Ijapew nhõ krÿja pika pê Jutej kamã nhÿri hixêt kamã na pre. Nhÿm ma hwÿr mõi hãmri nê hwÿr pøj nê Ijapew wÿr axã nê omu nê kãm:

—Ka? Xã wa amex? Anê.

⁴¹ Hãmri nhÿm kuma nê kãm:

—ÿ ma wa inhmex na pa wa ixpa.

Anhÿrja kôt nhÿm ôhy kamã hkraja haxwÿja te kot Marir kapêr mar nê amnhÿ nhÿpêx pyrãk o htu kamã ãxõnh tÿx o nõ. Hãmri nhÿm

Ijapew Tirtūm Karō nhỹ hã tanhmã Marir mã kapēr to. ⁴² Kàx pè kãm kapēr nẽ kãm:

—Xê gàà nẽ. Ra Tirtūm kot ato mex jakamã na ka akĩnh rax o mẽ inhni hkwỳjê jakrenh pa. Anhõhy kamã akraja koja Tirtūm amã ho mex rax nẽ. ⁴³ Xê mon ka ã ixto mex nẽ ixwỳr amõr anẽ? Apê inhõ Pahihti katorxà htã ixto mex nẽ ã ixwỳr amõr anẽ. Hẽxta gàà nẽ. Âm hãmri na ka ixwỳr mõ Marir. ⁴⁴ Na ka ixwỳr mõn pøj nẽ inhmã akapēr hãmri nhũm ixtu kamã ixkrare akapēr ma nẽ hkĩnh xàj ixtu kamã ixkamnãr tỳx o nõ. ⁴⁵ Na ka pre Tirtūm kapēr o wrỳk xwỳnh kot amã kapērja ma nẽ hkõt ajamxpēr tỳx nẽ. Jakamã kot kaj Tirtūm nhỹ hã akĩnh nẽ ajamakêtcati nẽ amex nẽ ri apa. Anẽ.

Marir kot Tirtūm mã mex o mex ã grer ã harẽnh

Rukre 6.20-26

⁴⁶ Hãmri nhũm Marir Ijapew kot ã kãm kapēr anhỹrja ma nẽ kãm Tirtūm mex o mex ã gre nẽ grer o: Tirtūm na mex o mex.

⁴⁷ Kêp ixkaprĩ xwỳnh na.

Kêp ixkaprĩ xwỳnh jakamã na pa inhmex nẽ ixkĩnh nẽ ri ixa.

⁴⁸⁻⁴⁹ Ixte amnhĩ to grire nhũm ja hã ixpumu nẽ ixkamã ukaprĩ nẽ ixto mex rax kumrẽx.

Jakamã koja mẽ piitã axpẽn kanrẽhã axpẽn mã ijarẽnh rãhã ho pa. Tirtūm kot tanhmã ixto mex to hã ijarẽnh rãhã ho pa.

Tirtūm na mex o mex nẽ hihtỳx o hihtỳx. Tã na ã inhĩpêx anẽ.

⁵⁰ Ma na hte ã amnhĩ nhĩpêx anẽ nẽ axpẽn kanrẽhã mẽ kot hã hpijaam xwỳnhjê pumu nẽ mẽ kutã nojarêt rãhã ho pa.

Nẽ mẽ kamã ukaprĩ rãhã ho pa. ã na hte mẽ hipêx mex anhỹr o pa.

⁵¹ Nẽ hihtỳx o hihtỳx jakamã na hte mẽ kot amnhĩ to jarkrar o ri

mẽ pa xwỳnhjaja tanhmã mẽ ho nhũm mẽ axkaprã.

⁵² Nẽ pahihti hkwỳ kot kapēr mar nẽ âm mar xwỳnhjaja.

Na hte amnhĩ tã mẽ omu nẽ mẽ ãpênh nẽ mẽ hapøj nẽ mẽ hpãnhã mẽ kot amnhĩ to hkryre xwỳnh kwỳ jagjê.

⁵³ Na hte mẽ kãm kapēr kõt amnhĩ nhĩpêx prãm xwỳnhjê ho mex o pa nhũm mẽ mex nẽ pa.

No mẽ kãm hprãm kêt xwỳnhjaja nhũm tanhmã mẽ ho mex to hkêt nẽ.

⁵⁴⁻⁵⁵ Âm hãmri na pre amnepê mã mẽ panhĩgêt mã amnhĩ jarẽnh xà hkõt mẽ pahpê Apraaw rũm axpẽn kanrẽhã hkrajaja mẽ pahto mex o pa.

Mẽ pahpê Ijaew mẽ pahte kãm tanhmã amnhĩ nhĩpêx to ho papa nhũm kãm mẽ pajapê xàj mẽ pahto mex rãhã ho pa.

Nẽ mẽ pakamã ukaprĩ rãhã ho pa. Anẽ.

Nhũm pre ã Marir Ijapew mã Tirtūm mex o mex ã grer anẽ.

⁵⁶ Hãmri nẽ ri hkõt pa hã mytwrỳ axkrunêpxi nẽ ma akupỳm õ krĩ hwỳr mõ.

Juãw Paxis kator ã harẽnh

⁵⁷ Tã nhũm Ijapew hpijagri kaxyw õhy xà nhũm hkrare kato nẽ myre. ⁵⁸ Hãmri nhũm omu nẽ hkĩnh tỳx nẽ. Hãmri nhũm hkwỳjaja Tirtūm kot wa kamã ukaprĩ hã wa kãm wa hkra myre nhõr ã harẽnh ma nẽ wa ÿ hã hkĩnh nẽ.

⁵⁹ Tã nhũm wa hkraja ra hã arĩgro pè 8 nhũm mẽ hkwỳjaja kot my kwrýt kà krãhyr kaxyw hwỳr akuprõ. Tirtūm kot mẽ kãm hã karõ xà hkõt nhũm mẽ kot kãm õr ã amnhĩ to amnhĩrĩt kaxyw ã hipêx anhỹr kaxyw. Na htem ã mẽ kêp Ijaew krajê piitã mẽ hipêx anẽ. Jakamã nhũm prem ã hipêx anẽ hãmri nẽ hpãnhã tanhmã kot hã hixi mẽnh to kaxyw ri hã axpẽn

kukja. Hāmri nē hipêêxà hkôt kot hā Jakaris mēnh kaxyw. ⁶⁰ Hāmri nhūm katorxà tee ri axpēn tā mē kuma nē mē kām:

—Ma koja kēp Jakaris kēt nē. Koja kēp Juāw. Anē.

⁶¹ Hāmri nhūm mē tee ri kuma nē kām:

—Kokỹ. Mo jar mē pahtō pē Juāw kot kēt ri kēp Juāw? Jar amrakati kēnā kot ka kēt wa ri ā hā hixi rēnh anē. Anē.

⁶² Hāmri nē hixi hā hipêêxà kukja. Nom nhūm arī umar kēt nē kapēr kēt jakamā nhūm mē tanhmā ri kām mē ĩhkra nhīpēx to.

⁶³ Hāmri nhūm ĩhkra ho kagà hā ahwỳ nhūm mē kām ja gō nhūm kupy nē hā mē kām hixi nhīpēx. Nhūm mē kupy nē omu hāmri nē hixi pē Juāw kôt omu. Hāmri nē tee ri hixija kukamā hamaxpēr.

⁶⁴ Rôm nhūm Jakaris akupỹm ama nē kapēr mex kurê kumrēx nē Tirtūm mā mex o mex ā harēnh o xa. ⁶⁵⁻⁶⁶ Hāmri nhūm mē omu nē ma mē piitā mē kām wa hkra jarēnh o ri axpēn kôt hprôt. Pika pē Jutej kamā hixēt kape hā krī hkôt nhūm mē ri mē piitā mē kām harēnh o hprôt. Tirtūm kot wa hkra kôt tânopxar o pa nē ho mex ā harēnh o hprôt. Hāmri nhūm mē kuma nē tee ri hkukamā hamaxpēr nē axpēn mā:

—Hêxta waa nē. Tirtūm tām na xep hte jare hkôt ri pa ho pa. Jakamā koja nhỹrmā hprêk hāmri nē tanhmā koja we amnhī nhīpēx to ho pa wehee? Anē.

Jakaris kot Tirtūm nhỹ hā kapēr ā harēnh

⁶⁷ Hāmri nhūm Jakaris Tirtūm Karō nhỹ hā Tirtūm mex o mex ā harēnh o xa. Tirtūm kot mē kēp Ijaew o mex ā harē nē mē kām:

⁶⁸ Hêxta waa nē. Nà Tirtūmjaja mex o mex. Na pre hte mē pahpāmjaja ām hkôt pix mā amnhī nhīpēx o pa. Jakamā nhūm hte Tirtūm mē pahpē

hkrajē kamā ukaprī nē mē pahto mex o pa.

E kwa pu mē kām mex o mex ā harēnh rāhā nē.

⁶⁹ Ra kot mē pahwỳr mē pahkaprī xwỳnh pē mē panhō pahihiti mēnh mā. Ja kaxyw āhpumunh xihtỳx o hihtỳx jakamā na pre ra mē pahwỳr mēnh ā amnhī jarē.

Koja kēp amnepēm Tirtūm mā tanhmā amnhī nhīpēx to ho pa xwỳnh Tawija hkanrēhā htāmnhwỳ.

⁷⁰ Amnepēm Tirtūm nhỹ hā kapēr xwỳnhjaja na prem mē kām Tirtūm kapēr jarēnh o pa nē mē kām:

⁷¹ “Koja Tirtūm mē panē mē kām mē pahkuré xwỳnhjē pumunh mex o pa.” Anē.

⁷² Tirtūm ra kot mē pahpāmjē mā amnhī jarēnh xà hkôt kām mē pakamā ukaprī rāhā ho pa hprām.

Koja aa ja ho anhỹr o hamakêtkati hkēt nē.

⁷³⁻⁷⁵ Na pre ra mē pahpām Apraāw mā mē pakukamā ā mē pahtā amnhī jarēnh anē nē kām: “Kot paj mē anē mē kām mē akuré xwỳnhjē pumunh mex nē mē ĩhkra nē mē ato ixkato. Jakamā kot kaj mē amnhī kamā amā mē uma hkēt nē axāmnhīx ri ajamakêtkati nē mē kamā apa. Nē kot kaj mē māmri axāmnhīx ri inhmā tanhmā amnhī nhīpēx to ho ri apa rāhā nē. Nē ixkôt amnhī nhīpēx o ri apa rāhā ty.” Anhỹr o na pre Tirtūm mē pakukamā mē pahtā amnhī jarē. Anē.

Nhūm pre ā Jakaris mē kām Tirtūm kapēr jarēnh anē. Hāmri nē hkrareja mỳ nē o xa nē kām:

⁷⁶ —No ka Xugitre. Kot kaj aprêk hāmri nē apē Tirtūm maati nhỹ hā kapēr jarēnh o apa xwỳnh. Jakamā

kot kaj Pahihti hkukamã mẽ piitã mẽ kãm harênh o ri mẽ hkôt apa. Mẽ kot amar nẽ kutêp tãm amnhĩ nhĩpêx kaxyw.

⁷⁷ —Tĩrtũm kot mẽ nẽ mẽ kot amnhĩ tomnuj rênh nẽ mẽ ho hkra hã harênhja kot kaj mẽ hkôt mẽ kãm harênh o ri apa.

⁷⁸ —Na hte Tĩrtũm mẽ pakamã ukaprĩ ho pa nẽ mẽ pakamã gryk tokyx anhỹr kêt nẽ. Jakamã koja mẽ pahwỹr mẽ pahkaprĩ xwỹnhja mẽ. Kormã mẽ pahwỹr wrỹk kêt jakamã te mẽ pahte kamãt kô kamã tee ri mẽ paxãhkupênh o ri papa xwỹnh pyrãk.

—Nom koja mẽ pahwỹr wrỹkja o te ra myt kator nẽ mẽ pamã hirã nẽ mẽmoj to amnhĩrĩt mex pyrãk o mẽ panhĩpêx. Ja kaxyw koja Tĩrtũm mẽ pahwỹr mẽ pahkaprĩ xwỹnhja mẽ nhũm man mẽ pahwỹr wrỹ nẽ mẽ pamã mẽ pahtyk pyma xwỹnhjẽ mã Tĩrtũm kapêr o amnhĩrĩt o pa. Mẽ pahte mar nẽ ra pajamakêtkati nẽ paxãmnhĩx ri papa nẽ pahtyk kaxyw.

⁷⁹ —Mẽ kãm mẽ htyk pyma xwỹnhjaja te kamãt kô kamã ri pa pyrãk. Tã koja mẽ pahkaprĩ xwỹnhja wrỹ hãmri nẽ tanhmã mẽ hkrã hto nhũm mẽ te arĩgro hã ri mẽ pa xwỹnh kot amnhĩ nhĩpêx pyrãk o amnhĩ nhĩpêx. Jao hamakêtkati nẽ axte kãm htyk pyma hkêt nẽ ri pa. Anẽ.

Nhũm pre ã Jakaris Tĩrtũm Karõ nhỹ hã hkrare mã kapêr anẽ.

⁸⁰ Tã nhũm Juãwja gaa nẽ aptãr. Nẽ Tĩrtũm kôt amnhĩ nhĩpêx o pa. Nom kormã kot Ijaew jahkre ho pa hkêt ri kapôt ã ri mẽ puhã pa.

Ã na pre Juãw kator nẽ amnhĩ nhĩpêx anhỹr o pa anẽ. Na pre kato nẽ hã mytwrỹ grêre hãmri nhũm Jejusja hkôt kato.

2

*Jejus kator ã harênh
Matêwre 1.18-25*

¹⁻² Na pre ã Jejus kator anẽ. Nhũm pre Rôm nhõ xwỹnhjẽ nhõ pahi Sesti Akusja õ pika piitã hkôt mẽ ho kôta kaxyw. Aa kot mẽ ho kôta hkêt tã ra kot mẽ ho kôta kaxyw. Kormã pahi Sirên haxwỹja kot pika pê Sir kamã mẽ ho amnhĩptãr ri nhũm pahi Sesti Akus kot mẽ ho kôta kaxyw. Jakamã kãm ãpênh xwỹnhjẽ mã kapêr nẽ mẽ kãm:

—E kêr ka mẽ ho kôta kaxyw nẽ mẽ piitã mẽ hixi hã kagã hpa. Anẽ.

³ Hãmri nhũm mẽ piitã ã kot mẽ hipêx anhỹr ã amnhĩ tã harênh ma hãmri nẽ mẽ kot mẽ hixi hã kagã kaxyw piitã akupỹm papxã hwỹr ma hapêx. ⁴ Nhũm pre Marir mjên Juje haxwỹja ma krĩ pê Perěj wrỹ mõ. Garirej kamã õ krĩ pê Najare rũm kato nẽ ma hwỹr mõ. Pika pê Jutej kamã na Perějja. Kamã na pre Juje nhĩgêt Tawija kato. ⁵ Nhũm Juje kêp kanrêhã htãmnhwỹ jakamã na pre ma akupỹm hwỹr mẽ hkwỹjẽ hkôt mõ. Nẽ ma amnhĩ kôt kot ho hprõ mã xwỹnh Marir o mõ. Arĩ htujarõ rax rãhã nhũm mã amnhĩ kôt o mõ. ⁶ Nhũm wa mõõ hãmri nẽ hwỹr pøj. Nhũm Marir hpijagri xã hã mytwrỹ mã àr jakamã nhũm kamãt nhũm õhy xã. ⁷ Nom nhũm Perěj wrỹ mẽ hpõx nyw xwỹnhjaja ra ixkre piitã ho nýt pa nhũm wa tee ri hpijagri kaxyw amnhĩ to ukapi ho pa. Hãmri nẽ nhỹri môx nhõrkwỹ punajre hwỹr axã nhũm Marir kamã hpijagri. Nhũm hkra kato nẽ myre. Kra kot wa na pre. Hãmri nhũm kumy nẽ kupêxê ho hkupu hpa nẽ môx xãpkur xã hã kôsti kaprỹ kamã kuxi nhũm hamakêtkati nẽ gõr nẽ nõ.

ôwêhti jamãr xwỹnhjẽ jarênh

⁸ Rôm nhũm ôwêhti jamãr o mẽ pa xwỹnhjaja kapôt ã ri hkrit ôwêhti jamãr o pa. Nhũm ra kamãt nhũm mẽ hamãr o hkrĩ. ⁹ Pu nhũm kaxkwa rũm Tĩrtũm kapêr o wrỹk

xwýnhja wrý nê mē mýri ajêt. Hāmri nê tanhmā amnhī to nê mē hpuhā ho hirā rax kumrêx. Nom nhūm Tirtūm tām ā mē hipêx anê. Hāmri nhūm mē tee ri jawý Tirtūm kapêr o wrýk xwýnhja pumu nê kām ma htýx nê akryk omunh o hkrī. ¹⁰ Hāmri nhūm mē kām:

—Pa? Kwa mē amā xpyma hkêt nê. Ixte mē amā mēmoj mex jarênh kaxyw na pa mē awýr wrý. Kot kaj mē harênh ma nê akīnh nê. Nom mē kapxipixjaja kaj mē akīnh kêt nê. Koja mē piitā ja jarênh ma nê mē apyrā nê hkīnh nê pa. ¹¹ Na ra ham mē akamā ukaprī xwýnhnta kato. Pahi Tawī nhō krī mē mē anhō krī pē Perêj kamā. Kêp mē apiitā mē anhō pahihti na. Mē ate amnhī wýr kamā ajamak o apa xwýnh pē Kris na. Tām na ham kato. ¹² E pa ixprī hā mē amā tanhmā harênh to ka mē inhma. Na kato nhūm katorxā kupêxê ho kupu hpa nê kōsti kamā kuxi nhūm nō. Kwa mē tokyx ma hwýr mra nê kêp mē anhō pahihti hā omu. Anê.

¹³ Nhūm pre ā mē kām ujarênh anê. Hāmri nhūm hkwyjaja wamta kôt ohtōō nê mē hwýr wrý nê puhā harir. Hāmri nê Tirtūm mā mex o mex ā grer o harir. ¹⁴ Nê hā grer o: Tirtūm maati na mex o mex.

Jakamā mē kām hprām xā kôt pix mā amnhī nhīpêx o mē pa xwýnhjaja koja amnhī tā mē omu nê tanhmā mē ho nhūm mē hamakêtkati nê amnhix hkīnh nê pa ho pa.

¹⁵ Anhýr o grer o harir hāmri nê ma akupým kaxkwa hwýr àpir pa nê akunok. Hāmri nhūm ôwêhti jamār xwýnhjaja mē kapêr ma nê ma akupým àpir ā mē omu nê xypên mā:

—E tokyx pu mē krīm nê Tirtūm kot mē pamā ho amnhīrit xwýnhnta japêr nê tokyx nhýri omu. Kwa ma pu mē tokyx hwýr nê omu. Anê.

¹⁶ Hāmri nhūm mē ma hwýr mra. Hāmri nê krīm agjê nê môx nhōrkwy wýr agjê nê mē hkrareta pumu.

Nhūm kōsti kamā nō nhūm mē omu nê kuri Marir mē juje wa omu. ¹⁷ Hāmri nê akupým hapôj nê ma mē piitā mē hkôt ri mē kām harênh o pa. Ra Tirtūm kapêr o wrýk xwýnh kot mē kām harênh xāja kôt nhūm mē ma mē kām harênh o ri mē hkôt pa. ¹⁸ Nhūm mē amnhī jaêr pē mē kot harênh ma nê tee ri hkukamā hamaxpêr. ¹⁹ Nom nhūm Marir mē kot kām hkrax rûm tanhmā hkra jarênh to xāta kukamā pix mā hamaxpêr rāhā ho pa.

²⁰ Jakamā nhūm ôwêhti jamār xwýnhjaja ma akupým hkrit wýr mra. Tirtūm kapêr o wrýk xwýnh ra kot mē kām ujarênh xā hkôt nhūm mē kot Jejus pumunh jakamā ma akupým hkīnh nê Tirtūm mā mex o mex ā harênh pē hā grer o akupým mra.

Mē kot Jejus ā hixi mēnh ā harênh Matêwre 1.21; Rukre 1.31

²¹ Tā nhūm wa hkrareta ra hā arīgro pē 8 nhūm mē hwýr akuprō nê kām my kwryt kà krāhta. Na hte Ijaew mē hkra myre piitā ā mē hipêx anê. Mē piitā mē kot Tirtūm mā ôr ā mē omunh kaxyw. Jakamā nhūm mē kām ho anê nê hpānhā hā hixi mē. Marir kormā kot ho htujarō hkêt ri Tirtūm kapêr o wrýk xwýnh kot hkukamā kām hixi jarênh xāja kôt nhūm mē hā hixi mē nhūm hixi kêp Jejus.

Mē kot Tirtūm mā Jejus nhōr pyrāk o hipêx

²²⁻²⁴ Tā nhūm Marir hpijagri ho hapêx. Jakamā nhūm juje ma krī pē Jerujarê hwýr mē kot Tirtūm mā amnhī jarênh xā hā ixkre hwýr amnhī kôt o mō. Na pre ra finat Mojes amnepêm Tirtūm nhý hā mē hkukamā mē hpāmje mā ja hā karō. Nê mē kām hā karō ho:

Koja mē aprō hpijagri. Hāmri nê hpijagri ho hapêx ka mē ma Tirtūm mā amnhī jarênh xā hā ixkre hwýr o mra nê hpānhā Tirtūm mā mēmoj

gõ. Kām tutre ho gõ rý kām tuuti hõ ho axkrut nē agõ kê patre hamý nē kām kupa. Kot ja hã omunh nē hpjagri xwýnhta akupým mex ã harēnh kaxyw.

Anhÿr o kot mē kām ja hã karõ jakamã nhũm wa ma ã amnhĩ nhĩpêx anhÿr kaxyw hwÿr mō. Nē amnhĩ kôt Jejus mý nē o mō. Tirtũm kot mē kām ja hã karõ nhũm mē kot hã kagà xà hkôt. Na pre ra finat Mojes mē kām ja jarē nē mē kām:

Kot kaj mē akra my kot wa hãmri nē te mē ate Tirtũm mã òr kaxyw hipêx pyrãk o hipêx. Kê tãm amnhĩ nhĩpêx o pa nē ý hã tanhmã kãm amnhĩ nhĩpêx to ho pa.

Anhÿr jakamã nhũm wa ra Jerujarē hwÿr nojarēt nē amnhĩ kôt Jejus mý nē ma amnhĩ kôt o mō.

Simeãw kot Jejus kukamã harēnh

25-26 Rõm nhũm Jerujarē kamã Simeãwja. Tirtũm Karõ nhÿ hã kot tanhmã amnhĩ to mex to ho pa xwýnh na pre. Na pre hte Tirtũm kapêr kôt pix mã tãm amnhĩ nhĩpêx o pa. Jakamã nhũm pre ra Tirtũm Karõ ã kãm kapêr anē nē kãm:

—E inhma Simeãw. Kot kaj atÿr rãhã nhÿrmã Tirtũm kot mē akaxyw ãm mã xwýnhja ka ano ho omu nē rĩ kormã ty.

Anhÿr o kãm kapêr jakamã nhũm kuma nē hkĩnh nē ãm pix kamã hamak o pa. Mē kêp Ijaew wÿr wrÿk nē mē ho mex mã xwýnhta pix kamã hamak rãhã ho pa.²⁷ Jakamã nhũm Jejus katorxà mē hipêxà purota wa Tirtũm mã amnhĩ jarēnh xà hã ixkreja wÿr Jejus o axà nē kormã o xa. Finat Mojes kot mē kãm hã karõ xà hkôt. Hãmri nhũm Tirtũm Karõ mē hwÿr Simeãwja mē nhũm ma mē hwÿr tē nē axà.²⁸ Hãmri nē wa hkrata pumu nē hkĩnh tÿx nē. Hãmri nē wa kêp kumý nē o xa nē hã Tirtũm mã mex o mex ã harē nē kãm:

29-32 Pa Pahi Maati. E ot pa ixte amã tanhmã amnhĩ nhĩpêx to ho ixpa xwýnh ã amnhĩ jarē.

Nà ãm hãmri na ka pre ã inhmã jare hkukamã harēnh anē. Tã ate inhmã harēnh xà hkôt pa ra inhno ho omu. Kêp mē ixkamã ukapri xwýnh ã omu. Nē kêp ate mē ixwÿr mēnh xwýnh ã omu.

Nà koja te arÿgro hã myt hirã nē mēmoj piitã ho amnhĩrit mex pyrãk o koja mē inhĩpêx o pa. Jakamã koja hprêk hãmri nē ma Ijaew kêt xwýnhjē mã apē Tirtũm ã akapêr o amnhĩrit o pa nhũm mēhprĩ hã ajarēnh ma. Nē mē ixpē Ijaew kot paj mē ijaxwÿja kuma nē hã ixpijaãm o ri ixpa.

Jakamã kot paj ixãmnhĩx ri tanhmã amnhĩ nhĩpêx to ho ri ixpa nē ixãmnhĩx ty. Ra ixte inhno ho ate inhmã harēnh xwýnhta pumunh kēnã. Anē.

33 Nhũm pre ã Simeãw Jejus jarēnh anē. Nhũm katorxà mē hipêxà purota wa amnhĩ jaer pē kot ã harēnh anhÿrja mar o xa.³⁴⁻³⁵ Hãmri nhũm Simeãw wa ho Tirtũm wÿ nē kãm:

—E Tirtũm. Kêr ka ja wa ho mex nē. Wa ho mex o wa ho mex rãhã ho apa. Anē.

Hãmri nē Marir mã kapêr nē kãm:

—Nà ãm hãmri na pre Tirtũm mē pakaxyw akrata xãm. Mē pahpē Ijaew kaxyw ãm. Jakamã koja hprêk nē ma Tirtũm kapêr o mē piitã mē ahkre ho ri mē hkôt pa. Nhũm mē kuma hãmri nē ahpÿnhã tanhmã hamaxpêr to xà hkôt tanhmã hipêx to. Jakamã nhũm mē hkwÿjaja kuma nē hkôt amnhĩ xunhwÿ nē hkôt amnhĩ nhĩpêx o pa. Jao tãm hipêx o pa. No nhũm mē hkwÿjaja kuma nē axtem nē kãm hkĩnh kêt nē. Hãmri nē tanhmã hipêx to. Jakamã kot kaj tee ri ja hã mē omu nē akapri htÿx

ně. Te mě kot wapo ho akanhwÿr nē akamā ho kaxkep nhūm apē omnuj tÿx pyrāk o kot kaj amnhī kamā ama nē mě omu. Anē.

*ānti kot Jejus pumunh ā harēnh
Wam Ximotre 5.5*

³⁶⁻³⁸ Rôm nhūm mēhō ni pē āntija mē hwÿr axà nē Jejus pumu. Āntija Panuew kra na pre. Nē Ase hkwy na pre. Ni htā kēp Tirtūm nhÿ hā kapēr jarēnh o pa xwÿnh. Na pre ra mjēn no ām kormā mjēn nē pa hā amgrā pē 7 pix nhūm pre kēp ty. Hāmri nhūm axte mjēn kēt nē pa rāhā ra hpigēx tÿx nē. Ra hā amgrā pē 84. Na pre hte Tirtūm mā amnhī jarēnh xà hā ixkre hwÿr pa nē kām amnhī jarēnh rāhā ho pa. Nē kot kām amnhī jarēnh kaxyw nē apkur kēt rāhā kām amnhī jarē. Nē arīgro hā hwÿr pa nē kamāt kām hwÿr pa. Ā na pre hte amnhī nhīpēx anhÿr rāhā ho pa anē. Jakamā mē hwÿr axà nē Jejus pumu nē hkīnh nē. Hāmri nē hā Tirtūm mā mex o mex ā harē nē kām:

—Hēxta gāà nē Tirtūm. Ām hāmri na ka mē ixwÿr Jejus mē. Ma amex o amex. Anē.

Hāmri nē Ijaew kot amnhī wÿr mē kamā ukapri xwÿnh kamā hamak xwÿnhjē mā ra Jejus kator ā harēnh o ri mē hkōt pa.

*Marir mē Juje wa kot akupÿm
Najare hwÿr mōr ā wa harēnh*

Matēwre 2.19-23

³⁹ Tā nhūm Marir mē Juje wa Tirtūm kapēr ā kagā htūm kōt Tirtūm mā amnhī jarēnh xà hā ixkre kamā tanhmā amnhī nhīpēx to hpa hāmri nē kato nē ma akupÿm mō. Ma Garirej kamā ō krī pē Najare hwÿr wa ma akupÿm mō.

⁴⁰ Tā nhūm wa hkrata ra wa kām hprēkre ho mō. Nē mex nē āhpumunh tÿx nē. Tirtūm kot tānopxar nē mēmoj to kutā nojarēt rāhā ho pa jakamā nhūm mex nē hkīnh nē pa.

*Marir mē Juje wa kot tee ri Jejus
japēr ā wa harēnh*

Rukre 4.22

⁴¹ Nhūm pre hte Marir mē Juje wa amgrā mē hkwyjē hkōt ma Jerujarē hwÿr pa. Mē kot arīgro pē Pas ā hkīnh kaxyw. Pas ā na hte mē kēp Ijaew amnepēm Tirtūm kot pika pē Ejit rūm mē hpāmjē katorja mā hamaxpēr kaxyw axpēn wÿr akuprō nē hā hkīnh. Jakamā nhūm wa ma mē hkōt hā hkīnh kaxyw Jerujarē hwÿr hkwyjē hkōt mō. ⁴² Nhūm ra Jejus hprēk o mō. Ra hā amgrā pē 12 jakamā nhūm wa ma amnhī kōt o mō. ⁴³⁻⁴⁴ Tā nhūm mē hkīnh pa hāmri nē akupÿm nojarēt nhūm Marir mē Juje wa ma hkwyjē hkōt akupÿm mō. Nhūm Jejus Jerujarē kamā ahte arīk nē akupÿm wa hkōt mōr kēt nē. Nhūm wa htÿx wam ma hkwyjē hkōt htēm ā hkamnhīx jakamā wa hapēr kēt nē. Hāmri nē wa hapu hā hamakētkati nē mē hkōt mōr o mōr ā ra hā kamāt. Hāmri nē mē kot amnhīm hikranh xāja wÿr mē hkōt pōj nē tee ri mē hkaēx ā hkra japēr o ri mra nom omunh kēt nē. ⁴⁵ Jakamā nhūm apkati nhūm wa awjanā nē ma akupÿm Jerujarē hwÿr mō nē kamā hapēr o ri pa. ⁴⁶ Nom tokyx kām kator kēt nē. Mē hkaēx ā tee ri hapēr o pa hā apkati axkrut. Nē nō nhūm apkati nhūm wa tā Tirtūm mā amnhī jarēnh xà hā ixkreja wÿr hapēr o mō nē hwÿr axà. Hāmri nē omunh kurē kumrēx. Nhūm arī mē kot Tirtūm kapēr tūm o mē ahkre xwÿnhjē mar o mē kutā nhÿ. Nē mēmoj tā ri mē hkukja nē tanhmā mē kām ujarēnh to. ⁴⁷ Nhūm mē kot mar xwÿnhjaja tee ri kapēr ā kuma nē āhpumunh tÿx ā omu hāmri nē akryk mar o hkrī. ⁴⁸ Hāmri nhūm Marir mē Juje mē hwÿr axà nē mē kuri wa hkraja pumunh kurē kumrēx. Hāmri nhūm katorxāja hwÿr tē nē kām:

—Xē Jejus. Mon ka axtem nē ā ri amnhī nhīpēx anē nē akupÿm wa

ixkôt amõr kêt nê? Na pa wa mõi nê mē pahkwỳjê hkôt pøj nê tee ri mē hkaêx ã ajapêr nê tee ri akukamã ijamaxpêr. Anê.

⁴⁹ Hãmri nhũm amnhĩ tã wa kuma nê wa kãm:

—Tỳ. Nom Inhĩpêêxã nhõrkwỹ kamã ixàrik kênã na ka wa tee ri ixkukamã ajamaxpêr nê ijapêr o ri apa. Anê.

⁵⁰ Hãmri nhũm wa kuma nê ã kot amnhĩ jarênh anhỹrja kukamã tee ri hamaxpêr. ⁵¹ Hãmri nê mē ma akupỹm mõi nê Najare hwỹr pøj nê kamã pa. Nhũm pre Jejus wa kapêr kôt ri amnhĩ nhĩpêx rãhã ho pa. Hãmri nhũm katorxãja hkrax rũm mē kot kãm tanhmã hkra kot amnhĩ nhĩpêx to hkukamã harênhja pix kukamã hamaxpêr rãhã ho pa.

⁵² Gaa nhũm Jejus ra àptàr o mõi. Nê àhpumunh tỳx nê. Nhũm mē piitã ã kot amnhĩ nhĩpêx anhỹr ã omu nê kãm hkĩnh nê. Nhũm Tĩrtũm haxwỹja kãm hapê nê.

3

Juãw Paxis kot Tĩrtũm kapêr jarênh o pa hã harênh

Matêwre 3.1-10; Makre 1.1-8; Juãw 1.19-28

¹⁻² Tã nhũm kormã pahihiti Tipeja mē ho amnhĩptàr o pa. Na pre ra mē ho amnhĩptàr ã amgrã pê 15. Nhũm Põn Piratja pahihiti Xipe mã pika pê Ijaew nhõ xwỹnhjê ho amnhĩptã. Nhũm Eroxja kãm pika pê Garirej nhõ xwỹnhjê ho amnhĩptã. Nhũm Erox tõi Firipja kãm pika pê Iturej nê hõ pê Takonĩt wa kamã mē pa xwỹnhjê ho amnhĩptã. Nhũm Risãnja kãm pika pê Apirên kamã mē ho amnhĩptã. Nhũm Anas mē Kajpasja wa kêp Ijaew nhõ patre maati.

Rõm nhũm Jejus mē Jakaris kra Juãwja wa ra hamê anhĩpê àptàr. Jakamã nhũm Tĩrtũm tanhmã Juãw mã kapêr to. Kormã kapõt ã ri pa ri nhũm kãm kapêr nê kãm tanhmã

kot amnhĩ nhĩpêx to ho pa hã kãm karõ nê kãm:

—Pa Juãw. E inhma. Kêr ka ma mē kãm ixkapêr jarênh rãhã ho ri apa. Anê.

³ Hãmri nhũm kuma nê ma ri mē kãm kapêr jarênh o pa. Pyhti pê Jotãw mỹri mē piitã mē kãm harênh o ri pa nê hpãnhã ihkjê hã ri mē pa xwỹnhjê mã harênh o ri pa. Nê mē kãm:

—E kwa mē tokyx amã amnhĩ tomnuj kaga hprãm xaj tãm ri amnhĩ nhĩpêx. Kê Tĩrtũm ja hã mē apumu nê mē anê mē ate amnhĩ tomnuj o hapêx pa. Pa mē piitã mē kot mē apê Tĩrtũm kra hã mē apumunh kaxyw mē akrã kumrã.

Anhỹr o mē kãm kapêr o ri pa. ⁴⁻⁵ Na pre ra amnepê mē hkukamã Tĩrtũm nhỹ hã kapêr o pa xwỹnh Ijais ra Juãw kukamã kot tanhmã amnhĩ nhĩpêx to hã harê nê hã kagã. Nê hã kagã ho:

Koja nhỹrmã mēhõ mõn pøj. Kapõt ã mõn pøj nê mē kãm ujarênh o ri pa. Nê mē kãm ujarênh o: “E mē inhma. Koja Tĩrtũm tokyx mē pahwỹr mē panhõ pahihiti mē nhũm wrỹ nhũm mē piitã omu. Jakamã kwa mē tokyx kutêp tãm amnhĩ nhĩpêx o apa. Te ho mē kot mēhõ kutêp pry ho mex pyrãk o amnhĩ nhĩpêx. Jao tãm amnhĩ nhĩpêx. Nê tãm axpên nhĩpêx. Pahihtita kutêp. Mē pahte amnhĩ nhĩpêx te kot pry nhĩnur pyrãk nhũm mē tee ri kot kãm hã mrar mex prãm kaprỹ pyrãk. Hinur nê krã hakỳx nê pry juk pyrãk o na mē pahte amnhĩ nhĩpêxja. Jakamã kot kaj mē ate amnhĩ tomnuj kaga nê tãm amnhĩ nhĩpêx. Nê tãm axpên nhĩpêx. Hãmri nê te mē kot pry nhĩnur o mex nê ho katãt nhũm katãt muux nê nõr pyrãk o kot kaj mē amnhĩ

nhîpêx. Pahihti nywta kutêp. Kwa kêr ka mê ã amnhî nhîpêx anê.

⁶ Kot kaj mê anê nhûm mê ohtô nê ja hã mê apumu hãmri nê mê apyrà Tirtûm kot mê ho hkra kaxyw amnhî to kuwÿ.” Anhÿr o mê kãm ujarênh o pa. Anê.

Nhûm pre ã finat Ijaisja Juãw Paxis kukamã mê kãm ujarênh anhÿr o pa. ⁷ Jakamã nhûm àptàr nê Ijais kot ra hkukamã harênh xà hkôt ma Tirtûm kapêr o mê ahkre ho pa. Nhûm prem kuma hãmri nê kot mê hkrã kumrãr kaxyw hwÿr amnhî to mra. Nhûm mê omu nê tanhmã mê ahkre hto. Nê mê kãm kapêr kãm hihtÿx nê mê kãm:

—Tk. Kwa kormã. Mê ate amnhî tomnuj pix o ri apa xwÿnh kênã. Xà kot paj mê ate amnhî tomnuj rãhã mê akrà kumrã nhûm Tirtûm ja hã mê apumu nhûm ja kãm mex nà? Nà koja ja kãm mex kêt nê. Koja ja mÿrapê nhÿrmã tanhmã mê anhîpêx to ka mê tee ri umaj apimxur prãm kaprÿ.

⁸ —Na htem amnhî tomnuj kaga nê hpãnhã tãm amnhî nhîpêx. Nê tãm ri axpên nhîpêx. Jakamã e kwa mê ã amnhî nhîpêx anhÿr o apa. No na ka htem atÿx ri ajamaxpêr o: “Mê ixpê finat Apraãw kanrêhã htãmnhwÿ jakamã koja Tirtûm ja hã mê ixpumu hãmri nê mê ixte amnhî tomnuj mÿrapê tanhmã mê ixto hkêt nê. Koja ãm mê ixto mex rãhã nê.” Anhÿr o atÿx ri amnhî kukamã ajamaxpêr o apa. Nom ja kot anhÿr kêt. Mê apê Apraãw kanrêhã htãmnhwÿ htã urak nê tãm amnhî nhîpêx o apare hã. Kot ka mê apê kanrêhã htãmnhwÿ htã amnhî tomnuj o ri apa hãmri nê Tirtûm noo mã te mê apê pikap kênre nhîkwÿ pix pyrãk.

⁹ —Na ra Tirtûm kot mê ate amnhî tomnuj mÿrapê tanhmã mê ato kaxyw. Koja mê anhîpêx o te mēhō nhō mēmoj pàr ô hkêt nhûm

kot tee ri omunh hãmri nê krãhyr nê kuwy kamã mēnh nê ho xêt par pyrãk o mê anhîpêx. Jao amnhî nê kuwy hwÿr mê arênh pa ka mê kamã amnhî xà htÿx kamã ajamak rãhã ho ri apa. Anê.

Nhûm pre ã Juãw Paxisja mê kãm kapêr anê. ¹⁰ Hãmri nhûm mê kuma nê tee ri amnhî kukamã hamaxpêr nê kãm:

—Kwa xô wehe? Xà koja ã mê inhîpêx anê? Kwa tanhmã kot paj mê kot ã mê inhîpêx anhÿr pymaj amnhî nhîpêx to wehe? Anê.

¹¹ Hãmri nhûm mê kãm:

—Nà kêr ka mê axpên kãm axukapri ho ri apa. Nê mê kêp amrakati xwÿnhjê mã amnhî kutã mēmoj nhōr o ri apa. Nê mê anhînhōkã axkrut nê mēhō hinōkã hkêt xwÿnhjê mã ho pyxi nê agō nê pyxi nê ho arik. Nê mê axàpkur xà ho anhōxÿ ho apa hkêt nê. ãm axãmnhîx ri mê kêp amrakati xwÿnhjê mã amnhî kutã mê kãm mēmoj to hkryre nê agō. E kêr ka mê ã axpên nhîpêx anhÿr o ri apa. Anê.

¹² Hãmri nhûm Rôm kãm mê ò pahihti mã mê piitã mê kêp kàxpore hkwy jamÿnh xwÿnhjaja mê urak nê hwÿr mra. Kot mê urak nê mê hkrã kumrãr kaxyw hwÿr mra nê kãm:

—No we mê pajaja? Tanhmã kot paj wem amnhî nhîpêx to? Anê.

¹³ Hãmri nhûm mê kãm:

—Nà mê kajaja kêr ka mê Rôm nhō pahi kot mê amã mê ate mê kêp kàxpore hkwy jamÿnh jarênh xà hkôt pix mã hamÿnh o ri apa. No mê atÿx ri amnhî krã hkôt amnhîm hkwy jamÿnh prãm xaj mê kãm hkre kamã ho rûnh nê mê kãm harênh o ri apa hkêt nê. Anê.

¹⁴ Hãmri nhûm hpãnhã pōristi hkwyjaja hwÿr mra nê kãm:

—Kwa no we mê pajaja? Tanhmã kot paj wem ri amnhî nhîpêx to ho ixpa? Anê.

Hãmri nhûm mê kãm:

—Nà kêr ka mê anhō pahihti kot mê axàpên pãnhã mê amã kàxpore

nhôrta pix jamý nê ajamakêtkati nê axâmnhîx ri ho amnhîm axujaprôr o ri apa. No mê akwýjaja kãm apyama nê mê amã kãxpore nhôr prãm xàj ri mê kãm tanhmã amnhî pyma hto ho ri apa hkêtnê. E kêr ka mê ã amnhî nhîpêx anhÿr o ri apa. Anê.

Juãw Paxis kot tanhmã Jejus jarênh to hã harênh

Matêwre 3.11-12; Makre 1.7-8; Juãw 1.19-28; määnên Atre 19.4

¹⁵ Nhùm pre ã Juãw Paxisja mê kãm kapêr anê. Nhùm mê kuma nê htýx kêp Tirtùm kot mê pakaxyw ãm mã xwýnhhta ã hkamnhîx.

¹⁶ Hãmri nhùm amnhî tâ ã mê hamaxpêr anhÿr ã mê omu hãmri nê mê kãm amnhî tâ aprã nê mê kãm:
—Nà pa hkêtnê. Na pa hte ãm Tirtùm mã gô pix o mê hkrã kumrãr o ri ixpa. No koja tokyx ixpãnhã Tirtùm kot mê pakaxyw ãm xwýnhhta tâm mê pahwÿr pøj. àhpumunh tÿx o kot ijakrenh jakamã na pa hte ãm kukwak ri ixpa nê hã ixpijaãm o ri ixpa. Tirtùm kot mê pakaxyw ãm xwýnhhta koja mê awÿr Karô rê nhùm mê akaxwýnh mã agjê ka mê ý hã tâm ri amnhî nhîpêx rãhã ho ri apa. Nom kormã mê kot tâm amnhî nhîpêx hkêtnê xwýnhhaja koja ja hã mê omu hãmri nê mê hipêx o te kuwy kot mëmoj to kaxàr par pyrãk o mê hipêx.

¹⁷ —Na htem pur kãm harôj nhîkê nê ho grã nê hpãnhã kahtwý. Nê kahuk pa hãmri nê hkapî nhùm kôk apê nê prÿhkã ho htor nê ho hapêx pa. Nhùm mê hy ho pa nê ixkre kamã gôj kãm unhwý. Ja pyrã nê koja tokyx Tirtùm mê piitã mê kot tanhmã amnhî nhîpêx to ho pa hã mê omunh xà hkôt mê ho axkjê. Mê kot tâm amnhî nhîpêx o mê pa xwýnhhaja koja mã amnhî wÿr mê ho api nhùm mê kuri mex nê hkînh rãhã nê pa ho pa. No mê kot amnhî tomnuj xwýnhhaja koja mê hkînhã

tanhmã mê hipêx to nhùm mê ma kuwy raxja wÿr pa nê kamã amnhî xà htýx kamã hamak rãhã nê pa ho pa. Anê.

¹⁸ Nhùm pre ã Juãw Paxis Tirtùm kapêr o mê ahkre anhÿr o pa.

Juãw Paxis kot Jejus krã kumrãr ã harênh

Matêwre 3.13-17; Makre 1.9-11

¹⁹ Tã nhùm Ijaew nhô pahi Eroxa ra htô hprô pé Eroxis pytà nê ho hprô nhùm Juãw Paxisja harênh ma nê ma hwÿr tê nê hã kãm akir. No ãm ja pix ã kãm àkjêr kêt nê. Määnên tanhmã kot amnhî tomnuj tÿx to ho pa hã kãm akir.

²⁰ Nhùm amnhî tâ kuma nê kamã gryk tÿx nê amnhî tâ mê kãm hã amÿnê nhùm prem unê nê haxà. Jao amnhî tomnuj tÿx nê.

²¹ Nom kormã mê kot haxàr kêt ri nhùm Juãw Paxis Ijaew kwÿjê krã kumrãr o xa. Rôm nhùm Jejusja hãmri tâm nhÿhÿnh hwÿr tê nê kot hkrã kumrãr kaxyw kãm anê nhùm kuma nê hkrã kumrã. Hãmri nhùm Jejus gôj rûm api nê kormã gô mÿ ri Tirtùm mã amnhî jarênh o xa.

²² Pu nhùm kaxkwa axkjê nhùm kurùm Tirtùm Karô te tuuti pyrã nê hwÿr wrÿk o tê nê ìkre hã xa. Hãmri nhùm kaxkwa rûm Tirtùm kãm kapêr nê kãm:

Pa? E apê Ixkra mex na ka. ãm hãmri na ka hte ixkanrêhã amnhî nhîpêx o apa. Inhmã ajapê kamã na ka ri apa ho apa. Anê.

Jejus kukamã higêt nê hpãmjê nhîxi hã harênh

Matêwre 1.1-17

²³ Tã nhùm Jejus Tirtùm mã kapêr o mê ahkre ho pa hkrax. Na pre ra hã amgrã pé 30 hãmri nê kãm ho hkrax.

E kot paj hpãnhã amã Jejus kukamã hpãmjê nhîxi jarê Teopre. Ijaewjaja na prem htýx ho Juje kêp Jejus nhîpêêxã kumrêx ã hkamnhîx nom kêp hipêêxã kumrêx kêt ãm kêp hipêêxã puro na pre.

Jejus kêp Eri htâmnhwý na pre.
²⁴ Nê Eri kêp Matat kra na pre.
 Nê Matat kêp Rewi hkra na pre.
 Nê Rewi kêp Mewki hkra na pre.
 Nê Mewki kêp Jânaj kra na pre.
 Nê Jânaj kêp axtem Juje hõ hkra na pre.
²⁵ Nê Juje kêp Matatis kra na pre.
 Nê Matatis kêp Amõs kra na pre.
 Nê Amõs kêp Naũ hkra na pre.
 Nê Naũ kêp Eri hkra na pre.
 Nê Eri kêp Nakai hkra na pre.
²⁶ Nê Nakai kêp Mate hkra na pre.
 Nê Mate kêp axtem Matatis õ hkra na pre.
 Nê Matatis kêp Semeĩ hkra na pre.
 Nê Semeĩ kêp Juje hõ hkra na pre.
 Nê Juje kêp Jotre hkra na pre.
²⁷ Nê Jotre kêp Joanãn kra na pre.
 Nê Joanãn kêp Rej kra na pre.
 Nê Rej kêp Joropape hkra na pre.
 Nê Joropape kêp Saraxi kra na pre.
 Nê Saraxi kêp Neri hkra na pre.
²⁸ Nê Neri kêp axtem Mewki hõ hkra na pre.
 Nê Mewki kêp Axi hkra na pre.
 Nê Axi kêp Kojã hkra na pre.
 Nê Kojã kêp Ematã hkra na pre.
 Nê Ematã kêp Erti hkra na pre.
²⁹ Nê Erti kêp Jojue hkra na pre.
 Nê Jojue kêp Eries kra na pre.
 Nê Eries kêp Jorĩ hkra na pre.
 Nê Jorĩ kêp Matat hkra na pre.
 Nê Matat kêp axtem Rewi hõ hkra na pre.
³⁰ Nê Rewi kêp Simeãw kra na pre.
 Nê Simeãw kêp Juta hkra na pre.
 Nê Juta kêp axtem Juje hõ hkra na pre.
 Nê Juje kêp Janã hkra na pre.
 Nê Janã kêp Eriakĩ hkra na pre.
³¹ Nê Eriakĩ kêp Merea hkra na pre.
 Nê Merea kêp Mena hkra na pre.
 Nê Mena kêp Matata hkra na pre.
 Nê Matata kêp Natã hkra na pre.
 Nê Natã kêp Tawi hkra na pre.
³² Nê Tawi kêp Jese hkra na pre.

Nê Jese kêp Opex kra na pre.
 Nê Opex kêp Poas kra na pre.
 Nê Poas kêp Sarã hkra na pre.
 Nê Sarã kêp Nasõ hkra na pre.
³³ Nê Nasõ kêp Amĩnatap kra na pre.
 Nê Amĩnatap kêp Amĩ hkra na pre.
 Nê Amĩ kêp Ari hkra na pre.
 Nê Ari kêp Erõ hkra na pre.
 Nê Erõ kêp Pere hkra na pre.
 Nê Pere kêp Juta hkra na pre.
³⁴ Nê Juta kêp Jako hkra na pre.
 Nê Jako kêp Ijak kra na pre.
 Nê Ijak kêp Apraãw kra na pre.
 Nê Apraãw kêp Tera hkra na pre.
 Nê Tera kêp Nako hkra na pre.
³⁵ Nê Nako kêp Jeruk kra na pre.
 Nê Jeruk kêp Rakau hkra na pre.
 Nê Rakau kêp Parek kra na pre.
 Nê Parek kêp Epti hkra na pre.
 Nê Epti kêp axtem Sara hõ hkra na pre.
³⁶ Nê Sara kêp Kajnã hkra na pre.
 Nê Kajnã kêp Apaxat kra na pre.
 Nê Apaxat kêp Sêre hkra na pre.
 Nê Sêre kêp Noehti hkra na pre.
 Nê Noehti kêp Ramek kra na pre.
³⁷ Nê Ramek kêp Metujarẽ hkra na pre.
 Nê Metujarẽ kêp Enok kra na pre.
 Nê Enok kêp Jarate hkra na pre.
 Nê Jarate kêp Marerer kra na pre.
 Nê Marerer kêp axtem Kajnã hõ hkra na pre.
 Nê Kajnã kêp Enos kra na pre.
³⁸ Nê Enos kêp Set kra na pre.
 Nê Set kêp Atãw kra na pre.
 Nê Atãw kêp Tirtũm kra na pre.
 Tirtũm kot wam my pê Atãwja pika ho hipêx jakamã te kêp hkra pyrãk.
 ã Jejus kukamã hpãmjê nhĩxi kot anhÿr.

4

*Satanasti kot amnhĩ tã Jejus kamã hamak ã harēnh
 Matêwre 4.1-11, 16.23; Makre 1.12-13, 8.33; määnēn Eprêw 2.18,*

4.15

¹ Tã nhũm Jejus pyhti pê Jotãw rũm akupỹm ma mō. Hãmri nê Tĩrtũm Karō nhỹ hã mēmoj kutã amnhĩ to htỹx nê. Jakamã nhũm nhỹhỹm ma kapôt wỳr o mō ² nhũm Satanasti omu nê ma hwỳr tẽ nê ri hkôt pa. Kapôt ã ri hkôt hêx rom tanhmã kãm nê ho pa. Kot mar nê Tĩrtũm kapêr nhĩrôp ãm prãm xài ma hkôt tanhmã kãm kapêr to ho pa. Hãmri nê hkôt pa o hã arĩgro pê 40 nhũm Jejus kormã apkur kêt o hã arĩgro pê 40 nê hapêx nhũm ra kãm prãm tỹx nê. ³ Hãmri nhũm Satanasti kãm:

—Kwa mãn ka ra amã prãm tỹx kumrêx nà? Nom xep apê Tĩrtũm Kra jakamã mēmoj tanhmã apê kute hkêt. Kwa kên nhĩkwỹ mũj mã anê kê amã pãwti hã amnhĩ jahkre ka aku nê tokyx ho amnhĩ xihtỹx. E kwa tokyx kãm anê. Anê.

⁴ Hãmri nhũm kuma nê kãm:

—Tk. Nà kot paj akapêr mar xà hkôt tanhmã amnhĩ nhĩpêx to hkêt nê. Kojã Tĩrtũm kãm inhmã mēmoj nhõr prãm nê inhmã mēmoj gõ pa arĩ kormã kukrê. Kapêr ã kagã htũm kot ja jarênh kot:

Na htem mē apkur xà pix kukwak ri htĩr nê pa hkêt nê. Na htem mãânên Tĩrtũm kapêr mar xà hkôt tanhmã ri amnhĩ nhĩpêx to ho pa ho htĩr nê mex nê pa. Anê.

Ã kapêr ã kagã kot ja jarênh kot anhỹr jakamã kot paj amar xà hkôt ã ri amnhĩ nhĩpêx anhỹr kêt nê. ãm kwarĩ ho kwarĩ. Anê.

⁵ Nhũm pre ã Jejus Satanasti mã kapêr anê nhũm tee ri kuma hãmri nê hpãnhã ma nhỹhỹm o mō nê nhỹri kỳx pê mēmoj prêêti nhĩmõk ã o xa. Hãmri nê kãm pika piitã ahkre ho xa. Nê kãm mē hikukrêx piitã ahkre. Kàxpore nê mēmoj piitã nhũm kãm ahkre hpa nhũm anhĩpê omunh o xa. ⁶ Hãmri nhũm Satanasti kãm:

—E mãn ka kam ri mēmoj mũj piitã omu. Piitã inhõ na. Inhmã na pre Tĩrtũm piitã õr pa. Kot paj inhmã mēhõ mã õr prãm nê kãm kugõ. ⁷ Tã amã kot paj kugõ. Jakamã e. Kwa tokyx ixkutã tẽm nê inhmã inhmex o inhmex ã ijarê pa ama nê rĩ amã piitã õr pa. E tokyx. Anê.

⁸ Hãmri nhũm kuma nê kãm:

—Tk. Kot paj amã amex o amex ã ajarênh kêt kumrêx. ãm kwarĩ ho kwarĩ. Amexti hã. Tĩrtũm kapêr ã kagã htũm kot ja nê kapêr kãm hihtỹx kênã. Kapêr kot:

Kêr ka mē ixkapêr pix ma. Nê ixkutã pix mã mãn akõnkrã ho akrĩ nê inhmã inhmex o inhmex ã ijarênh o ri apa. Kêr ka mē ã amnhĩ nhĩpêx anhỹr o ri apa.

Anhỹr o kot harênh jakamã kot paj ri amã amex o amex ã ajarênh kêt nê Satanasti. Anê.

⁹ Nhũm pre ã Jejus amnhĩ nê kãm kapêr anê. Hãmri nhũm tee ri kuma nê hpãnhã ma krĩ pê Jerujarê hwỳr o mō. Nê mē kot Tĩrtũm mã amnhĩ jarênh xà hã ixkre hprêk nhĩmõk wỳr ho api nê kỳxpê hatur xà hã ãm nhũm xa. Nhũm amnhĩ parpê kên rũnh nhĩkwỹ pumunh o xa. Hãmri nhũm Satanasti kãm:

—E apê Tĩrtũm Kra jakamã kwa ja rũm ahpar mã ajarĩ nê ma tẽ nê pikap tẽm. Kojã Anhĩpêêxã apumunh mex nê ka tanhmã amnhĩ to hkêt nê. ¹⁰⁻¹¹ Kapêr ã kagã htũm kot ja jarênh kot:

Tĩrtũm kojã kapêr o wrỳk xwỳnh mã ajarê ka ajarĩ nê ahpar mã tẽ nhũm mē kỳx pê amỹ nhũm mēmoj akã hyr kêt nê.

Ã kapêr ã kagã kamã ajarênh kot anhỹr jakamã e tokyx ajarĩ nê ma tẽn pikap ahto. Anê.

¹² Hãmri nhũm kuma nê kê axte amnhĩ tã kãm kapêr nê kãm:

—Tk. Kwa nã. Kot pa ri amar xà hkôt ã amnhĩ nhĩpêx anhỹr kêt nê. Kojã Tĩrtũm tãm inhmã ijarĩ

hã karõ pa rĩ mar xà hkõt ijarĩ no kot pa ri amar xà hkõt ijarĩ hkêt nê. Tĩrtũm kapêr ã kagà htũm kot ja jarênh kot:

Kêr ka mê amnhĩ krã hkõt amnhĩ tã ixkamã ajamak kaxyw inhĩxi jarênh kôt tanhmã amnhĩ nhĩpêx to hkêt nê.

Ã ja nê kapêr kot anhỹr jakamã ãm kwarĩ ho kwarĩ. Kot paj ri amar xà hkõt ã amnhĩ nhĩpêx anhỹr kêt nê. Tãm kot inhmã ijarĩ hã karõre hã. Anê.

¹³ Nhũm pre ã Jejus Satanasti mã kapêr anê hãmri nhũm tee ri mêmoj piitã ho mar kaprỹ hãmri nê hk-aga nê ma nhỹhỹm tẽ. Hãmri nê kot nhỹrmã axte hwỹr htẽm nê kot mêmoj punuj o mar kaxyw kormã amnhũm hamãr o ri pa.

Jejus kot Tĩrtũm kapêr o mê ahkre ho hkrax ã harênh

Matêwre 4.12-17; Makre 4.14-15

¹⁴ Tã nhũm Jejus ma akupỹm Garirej wỹr mō. Nê Tĩrtũm Karõ nhỹ hã ãhpumunh tỹx nê hkwyjẽ mã kapêr jarênh o ri pa. Nhũm mê kuma nê piitã pikaja kamã axpẽn mã tanhmã harênh to. ¹⁵ Na pre hte mê kot Tĩrtũm kapêr o mê ahkre xà hã ixkre hwỹr agjẽ nê kamã mê ahkre ho hkrĩ. Nhũm mê piitã kuma nê kãm mar prãm nê. Hãmri nê axpẽn mã mex ã harênh o ri pa.

Najare kamã mê kot Jejus kaga hã mê harênh

Matêwre 13.53-58; Makre 6.1-6; Juãw 1.11

¹⁶ Tã nhũm Jejus ma akupỹm krĩ kamã ãptãr xãja wỹr ma mō. Najare hwỹr. Hãmri nê kamã pōj.

Nhũm Ijaew nhõ arĩgromnu pẽ sap kato nhũm Jejus ma mê hkõt Tĩrtũm kapêr o mê ahkre xà hã ixkre hwỹr tẽ. Hãmri nê hwỹr axà nê mê kuri nhỹ. Hãmri nê kamã mê kãm Tĩrtũm kapêr ã kagà htũm kamã harênh kaxyw kãnhmã xa ¹⁷ nhũm mê omu nê kãm ja gō. Finat Ijais pẽ Tĩrtũm nhỹ hã kapêr

xwỹnh kot Tĩrtũm kapêr kwỹ hã kagãja nhũm mê kãm kugō. Hãmri nhũm kupy nê kamã kormã Tĩrtũm kot tanhmã mêmoj jarênh to hõ japêr o xa. Nê kãm kato hãmri nê mê kãm kamã harẽ. Nom amnhĩ tã kamã mê kãm harênh o xa nê mê kãm:

¹⁸ Na pre ra Tĩrtũm Karõja ixto ixãhpumunh tỹx nê mê kęp amrakati xwỹnhjẽ hwỹr inhmẽ pa ra mō. Ixte mê kãm mêmoj mex jarênh o ixpa kaxyw. Nê Satanasti kot amnhĩ kôt mê unhwỹr xwỹnhjẽ hwỹr nhũm pre mããnẽn inhmẽ. Ixte mê nê Satanasti japõx o ixpa kaxyw. Nê mê kot hprĩ hã Tĩrtũm kapêr mar kêt xwỹnhjẽ hwỹr nhũm pre mããnẽn inhmẽ. Ixprĩ hã ixte mê kãm kapêr jarênh o ri mê hkõt ixpa kaxyw. Nê mê kot amnhĩ tomnuj o mê pa xwỹnhjẽ hwỹr nhũm pre mããnẽn inhmẽ. Ixte mê nê mê kot amnhĩ tomnuj rênh pa nhũm mê hamakêtkati nê ãmnhĩx ri pa kaxyw. Á na pre Tĩrtũm jajẽ piitã hwỹr inhmẽn anê pa ra man mōn pōj.

¹⁹ Nê amgrã ja kęp Tĩrtũm kot mê ato mex xà hã amgrãja nhũm ixte mê amã harênh o ixpa kaxyw na pre inhmẽ pa mōn pōj. Anê.

²⁰ Nhũm pre ã Jejus Tĩrtũm kapêr ã kagà htũm kamã mê kãm amnhĩ jarênh anê. Hãmri nê akupỹm mê kãm kagãja gō nê ho mê ahkre kaxyw akupỹm nhỹ nhũm mê piitã omunh pẽ mar o hkrĩ. ²¹ Hãmri nhũm mê kãm tanhmã amnhĩ jarênh to nê mê kãm:

—E ra Ijais kot ã ixkukamã ijarênh anhỹr xà hkõt na pa mê awỹr wrỹ nê mê anoo mã ã amnhĩ nhĩpêx anhỹr o hkrax. Anê.

²² Hāmri nhūm mē amnhī jaēr pē ã kot amnhī jarēnh anhÿr ã kuma. Nē tee ri kuma nē axpēn pumunh pē hamaxpēr o hkri. Jėjus mē kurom àhpumunh tÿx nē kapēr mex tā nhūm mē ãm kēp amnhī kwÿ pix ã hkamnhix kām hihtÿx nē. Hāmri nē axpēn mā:

—Tk. Kwa kēp Juje hkra pix kēnã koja we ri ã amnhī jarēnh anē. Anē.

²³ Hāmri nhūm amnhī tā mē kuma nē mē kām:

—Nà na ka mē ixte amnhī jarēnh ma nom ixkôt ajamaxpēr kēt nē. Jakamã axpēn mā ijarēnh o: “Tk. Kēp mē pahkapri xwÿnh ro nhÿx jar mē panhō krī kamã aa mē pahte mēmoj pumunh kēt kwÿ tanhmã mē pamã hipêx to pu mē hã omu. Te ra kot krī pē Kapanau kamã mē kām mēmoj kwÿ ho anhÿrta pyrãk. Pu mē omu nē hkôt pajamaxpēr kurē kumrêx.” Anhÿr o ri axpēn mā ijarē. ²⁴ Kojã nhãm krī hō kamã mēhō kēp Tirtūm kapēr jarēnh xwÿnh ã amnhī jarē ka mē harēnh ma nē amã ma hwÿr amarar nē mar prãm nē. No kēt jar mē panhō krī kamã ixpē mē anhïõ hã ã amnhī jarēnh anē ka mē amã inhmar prãm kēt nē.

²⁵ —Kwa mē inhma. Amnepēm kormã finat Eris htir ri na pre mē hã na wrÿk kēt ry rax nē. Jao hã amgrã axkrunēpxi nē hkôt mytwrÿ pē 6. Nhūm mē õ hkēt nē pa. Ra mē kēp mēmoj grã pa nē hapêx nhūm mē kām prãm tÿx kumrêx nē pa. Nhūm mē kēp mē mjên tyk xwÿnhjaja kām prãm xàj hiroto pa.

²⁶ Tã nom Tirtūm mē ho mex kaxyw mē hwÿr Eris mēnh kēt nē. Erisja mē urãk nē kēp Ijaew tā nhūm Tirtūm kot mē ho ajuta kaxyw mē hwÿr mēnh kēt nē. Mē kot amnhī kaxyw Tirtūm kôt hamaxpēr kēt jakamã nhūm mē hwÿr mēnh kēt nē. Axtem Ijaew kēt xwÿnhjê hō hwÿr na pre kumē. Nhãm Sitõ kamã krī pē Sarep kamã mjên htyk xwÿnhhta wÿr. Tokyx kot tanhmã

ho mex to kaxyw. Jakamã nhūm ma hwÿr mō nē tanhmã kãm kapēr to nhūm kuma nē amnhī kaxyw Tirtūm kôt hamaxpēr kurē kumrêx.

²⁷ —Nē finat Eriasti haxwÿja. Eris pyrã nē kēp Tirtūm nhÿ hã kapēr o pa xwÿnh tā amnhī kwÿ pē Ijaew tanhmã mē ho ajuta hto hkēt nē. Na prem ohtõ nē hkã nhy nē hkro xapēr o pa. Jao ra omnuj tÿx nē. Tã nhūm Tirtūm kot akupÿm mē ho mex kaxyw mē hwÿr Eriasti mēnh kēt nē. Amnhī kaxyw mē kot hkôt hamaxpēere hã. ãm Sir nhõ xwÿnh Namãja pix na pre Tirtūm Eriasti mã anē nhūm akupÿm ho mex. Kēp Ijaew kēt tā nhūm akupÿm ho mex. Tã ja pyrã nē na pa ãm mē kot amnhī kaxyw ixkôt hamaxpēr pix xwÿnhjê mã tanhmã amnhī nhïpêx to ho ri ixpa. No mē ate amnhī kaxyw ixkôt ajamaxpēr kēt xwÿnhjê mã tanhmã ri amnhī nhïpêx to hkēt nē. Anē.

Nhūm pre ã Jėjus mē kãm amnhī jarēnh anē.

²⁸ Hāmri nhūm mē kuma nē kamã gryk tÿx nē axpēn mã hã amÿnē nē axpēn mã:

—Tk. Kwa pu mē ixkre nē kator nē ma o tē nē kupi ri. Anē.

²⁹ Hāmri nē kaxyw kãnhmã kuhê hpa nē hwÿr hprõt nē unē. Mē kot ma o htēm nē hixêt prêk jatur xà hã hkujaêk nhūm ahpar mã tēn htēm nē htyk kaxyw. Mē õ krïja hixêt prêk nhïmõk ã na pre. Jakamã nhūm prem unē nē hatur xàta wÿr o tē. ³⁰ Tã nom nhūm tanhmã amnhī nhïpêx to nē mē kēp akunok nē hpãnhã nhãm ma tē nhūm mē tee ri hapēr nom nhÿri omunh kēt nē.

Jėjus kot mēhõ nē mēkarõmnuti kator ã harēnh

Makre 1.21-28

³¹ Tã nhūm Jėjus ma akupÿm Garirej kamã krī pē Kapanau hwÿr mō. Nhūm mē õ arïgromnu pē sap kato nhūm ma mē kot Tirtūm kapēr o mē ahkre xà hã ixkre hwÿr tē nē

mě ahkre ho nhỹ. ³² Hāmri nhũm mẽ kot mar o hkrĩ xwỳnhjaja kuma nẽ kãm mar prãm nẽ. Nẽ axpẽn mã:

—Hẽxta waa nẽ. Ầm hāmri na ầ mẽ pamã kapẽr anẽ. Ầhpumunh tỳx xà hkõt na hte ầm hāmri mẽ pamã awjarẽ. Anẽ.

³³ Nhũm mẽhõ myja mẽ ãhkõ hã haxwỳja mar o nhỹ. Mẽkarõmnuti na pre ra hwỳr axà nhũm ỹ hã tanhmã amnhĩ tomnuj to ho pa. Hāmri nẽ mẽ ãhkõ hã Jesus mar o nhỹ nẽ ra àmra kamã tanhmã kãm kapẽr to. Nom nhũm tãm kãm kapẽr kêt ầm kamã mẽkarõmnutija kãm kapẽr. ³⁴ Nẽ kãm:

—Pa? Jesus pẽ Najare nhõ xwỳnh? Nà ate mẽ ixto ajapẽx par kaxyw na ka mẽ ixwỳr mõ. Ra ixte apumunh mex kẽnã. Apẽ Tĩrtũm kot mẽ ixwỳr amẽnh xwỳnh maatita na ka. Jakamã kwa tanhmã kot kaj mẽ ixto? Mo kaxyw na ka pre mẽ ixwỳr mõ? Anẽ.

³⁵ Hāmri nhũm kuma nẽ mẽkarõmnuti kot kãm ầ kapẽr anhỹr ầ omunh kurẽ kumrẽx. Jakamã kutã kãm kapẽr nẽ kãm:

—Tk. Kwa anhĩkrẽ nẽ kęp akato. Anẽ.

Hāmri nhũm kuma nẽ myta o pika kura nẽ kęp kato nẽ ma tẽ. Ầm ho pika kuranh pix nhũm nõ. Hāmri nẽ akupỹm kãnhmã nhỹ nẽ akupỹm mex. ³⁶ Hāmri nhũm mẽ piitã omu nẽ kamã no pyma nẽ. Hāmri nẽ axpẽn mã:

—Kokỹỹ. Na hte Jesus amnhĩ krã hkõt ầhpumunh tỳx xà hkõt mẽkarõmnuti mã kapẽr nẽ mẽ hano nhũm htem kuma nẽ mẽ kęp hapõx kurẽ kumrẽx. Anẽ.

³⁷ Hāmri nhũm mẽ mẽõ pika kamã piitã ri axpẽn mã harẽnh o pa.

Jesus kot Simãw Pẽtre xupãnhgêx o mex ầ harẽnh

Matẽwre 8.14-15; Makre 1.29-31

³⁸ Tã nhũm Jesus Tĩrtũm kapẽr o mẽ ahkre xaja rũm kato nẽ ma Simãw Pẽtre nhõrkwỹ hwỳr tẽ. Nẽ

mẽ hwỳr axà nhũm Simãw Pẽtre omu nẽ kãm upãnhgêx tanhmã kute hã harẽ nẽ kãm:

—Kwa Pahihti. Tẽ nẽ inhmã ix-upãnhgêx pumu. Na hkà kagro htỳx nẽ amnhĩ to ầpẽr o nõ. Kwa tẽn inhmã omu. Anẽ.

Hāmri nhũm kãm:

—Tõe. Nà kot paj amã omu. Anẽ.

³⁹ Hāmri nẽ hwỳr tẽn kuri xa nẽ kãm:

—Pa? E kwa akà hakry. Anẽ.

Hāmri nhũm kuma nẽ hkà hakry nẽ akupỹm hihtỳx kurẽ kumrẽx. Hāmri nẽ kãnhmã nhỹ nẽ mẽ kãm mẽõ hã ầpẽnh o ri mra.

Jesus kot mẽ ho ohtõ nẽ mẽ ho mex ầ harẽnh

Matẽwre 8.16-17; Makre 1.32-34

⁴⁰ Tã nhũm ra amỹkry htỳx mẽ nhũm mẽ Jesus wỳr ahpỳnhã ri mẽ ầ xwỳnhjẽ ho mra. Nhũm amnhĩ wỳr mẽ omu hāmri nẽ mẽ piitã ri mẽ hã ãhkra jaxwỳ nẽ akupỹm mẽ ho mex pa. ⁴¹ Nhũm ra mẽkarõmnuti mẽ hkwỳjẽ hwỳr agjẽ nhũm mẽ kurũm mẽ hano nhũm mẽ tee ri amnhĩ tã omu nẽ mẽ kęp hapõx kurẽ kumrẽx. Hāmri nẽ mẽ kęp hapõx kaxyw nẽ àmra kamã kãm kapẽr nẽ kãm:

—Kwa tanhmã kot pa wem amnhĩ nẽ ato? Hẽxta waa nẽ. Apẽ Tĩrtũm Kra hã axàhpumunh tỳx kẽnã.

Anhỹr o kãm kapẽr. Ầm hāmri na prem ầ harẽnh anẽ. Kęp Tĩrtũm kot mẽ pakaxyw ầm xwỳnh kẽnã. No nhũm Ijaew nhõ pahijaja kot mẽ kapẽr mar nẽ kęp mẽkarõmnuti hkwy hã hkamnhĩx pymaj nhũm Jesus amnhĩ nẽ mẽ kãm kapẽr nẽ mẽ kãm:

—Kwa mẽ ri ầ ijarẽnh anhỹr kêt nẽ.

Anhỹr o mẽ kãm kapẽr hāmri nẽ mẽ hano nhũm mẽ hapõj nẽ ma mra.

Mẽmo kaxyw Tĩrtũm kot mẽ pahwỳr Jesus mẽnh ầ harẽnh

Makre 1.35-39

42 Tã nhũm apkati nẽ myt kator grire nhũm Jejus kot Tirtũm mã amnhĩ jarẽnh kaxyw kãnhmã nhỹ nẽ kato nẽ ma nhỹhỹm kapõt mã tẽ. Hãmri nhũm krĩ nhõ xwýnhjaja hkrã hapõj nẽ tee ri hapêr nẽ ma hkõt hpri jakop o mõi. Nẽ nhỹri hwýr kato nẽ omu hãmri nẽ ma nhỹhỹm mõi nẽ kurê nẽ kãm:

—Kwa Jejus. Kêr ka tokyx ma nhỹhỹm amõi kêt nẽ. Kritpêm mẽ ixkõt axkamẽ mãn. Anẽ.

43 Hãmri nhũm mẽ kuma nẽ amnhĩ tã mẽ kãm:

—Nà kot paj kritpêm mẽ akõt ixpikamẽnh kêt nẽ. Kot paj ma krĩ piitã hkõt ri Tirtũm kapêr o mẽ ahkre ho ri mẽ hkõt ixpa. Tirtũm kot tanhmã mẽ ho hkra hto hã harẽnhja kot paj mẽ hkõt ri mẽ kãm harẽnh o ri ixpa. Ja kaxyw na pre Tirtũm mẽ awýr inhmẽ. Anẽ.

44 Nhũm pre ã mẽ kãm amnhĩ jarẽnh anẽ. Hãmri nẽ mẽ kêp kato nẽ ma Ijaew nhõ pika piitã hkõt Tirtũm kapêr o mẽ ahkre ho ri pa. Ijaew nhõ Tirtũm kapêr o mẽ ahkre xã hã ixkre kamã mẽ piitã ho mẽ ahkre ho ri pa.

5

Jejus kot amnhĩ kõt mẽ hkwýjê hwýr ã harẽnh

Matêwre 4.18-22; Makre 1.16-20

1 Tã nhũm Jejus ma gõi rax pẽ Jenẽjare hwýr mõi. Hãmri nẽ hwýr põi nẽ gõi mýri Tirtũm kapêr o mẽ ahkre ho xa nhũm mẽ ohtõ nẽ pu hã mar o kuhê. Nẽ kot hpri hã mar nẽ hkõt omunh kaxyw hã axpẽn nhĩgãnh o kuhê. 2 Hãmri nhũm tee ri amnhĩ tã mẽ omu nẽ amnhĩ pu hã hakẽx nẽ rĩt nẽ gõi kãm pãr kaprý hamẽxkrut nẽ jêtja wa omu. Nhũm õ dõn wa gõi kãm kryhti kuhõnh o xa. Nhũm pãr hamẽ hkaprý nẽ ajêt nhũm Jejus omu. 3 Hãmri nẽ hwýr tẽ nẽ hõm axã nẽ õ dõn pẽ Simãwja mã anẽ nhũm hkõt axã nẽ kii mẽ kêp pãrja amým kunhõ nhũm ajêt. Hãmri nhũm pãr kre rũm amým mẽ

ahkre ho nhỹ nhũm mẽ piitã omu nẽ mar mex o kuhê.

4 Tã nhũm mẽ ahkre hpa nẽ Simãw mã kãm:

—E gõi xupým wýr anhõ pãr o axkamẽ nẽ axte anhõ kryhti mẽ nẽ ho amnhĩm tep kwýmnê. Anẽ.

5 Hãmri nhũm tee ri kuma nẽ kãm:

—Kwa na pa mẽ ra kamãt kãm tee rẽnh o apkati nẽ ho hõmnẽnh kêt tã ka ri inhmã anẽ. Nom kot paj amar xã hkõt kop kumẽ. Anẽ.

6 Hãmri nẽ upým wýr pãr o axkamẽ nẽ htõ Andre mẽ wa axte kryhti mẽ. Nẽ ãm mẽnũ tipxi htã ho tep pynẽnũ rax kumrẽx. Jakamã nhũm kryhtija ra pikaxõnh kaxyw.

7 Hãmri nhũm wa tee ri ho anẽ nẽ amnhĩ wýr pãr õ ho mrrar xwýnhta wa kãm akir. Jepetew kra Juãw mẽ Xiakreja wa nhũm wa amnhĩ wýr wa kãm akir nhũm wa hwýr pãr õ ho tẽ hãmri nẽ mẽ kryhti hã hije nẽ pãr wýr ho api. Hãmri nẽ pãrta hamẽ tep o ho nýt pa nẽ hamẽ ho hipu mex nẽ. Jao nhỹx gõnh mã wa axã. 8-10 Hãmri nhũm mẽ amnhĩ jaêr pẽ tep xohtõ raxta pumu nẽ kamã no puma nẽ. Hãmri nhũm Simãwja Jejus kutã hkõn krã ho tẽm nẽ hipõ nẽ nhỹ nẽ hã hpijaãm kamã kãm kapêr nẽ kãm:

—Kwa Pahĩti. Kii tamũ axkamẽ. Akĩnhã ixte amnhĩ tomnuy tỳx xwýnh na pa. Anẽ.

Hãmri nhũm kuma nẽ ãm kuma nẽ kãm:

—Kwa nã tee ri amnhĩ kukamã ajamaxpêr kêt nẽ. Kot kaj jarãhã hpãnhã tãm amnhĩ nhĩpêx o apa. Na ka ra tep pynẽnũ rũnh o apa. Tã kot kaj ja kaga nẽ hpãnhã ma ri mẽ hkõt Tirtũm kapêr o mẽ ahkre ho ri apa. Koja mẽ ohtõ nẽ ama nẽ Tirtũm kõt amnhĩ xunhwý nẽ hkõt amnhĩ nhĩpêx o pa. Jakamã kot kaj te ate tep pynẽnũ rũnh nẽ Tirtũm mã õr pyrãk o amnhĩ nhĩpêx o apa. Anẽ.

Nhũm pre ã Jejus Simãw mã kapêr anẽ. 11 Hãmri nhũm mẽ gõi jakãx ã pãr janhõr tỳx nẽ kamã

hikukrêx piitâ hkaga hpa nê ma Jejus kôt pa ho pa.

Jejus kot hkà nhy kro tỳx xwỳnh o mex ã harênh

Matêwre 8.1-4; Makre 1.40-45

¹² Tã nhũm Jejus ma krĩ hõ hwỳr mō. Hãmri nhũm mēhō my hkà nhy hkro htỳx xwỳnhja omu nê hwỳr tē nê hã hpijaàm kaxyw kutã hkōnkrã ho nhỹ nê kãm:

—Pa Pahihti. E ot pa awỳr amnhĩ to tē. Kwa akupỳm ate mē ixto mex kaxyw axãhpumunh tỳx jakamã kot ka akupỳm amã ixto mex prãm nê mãmri akupỳm ixto mex. Anê.

¹³ Hãmri nhũm kuma nê hkà punuti hã ãhkra xi. Amnhĩ kamã kahak kêt nê hã ãhkra xi nê kãm:

—Nã kot paj ato mex. E akupỳm akã mex kurê kumrêx.

Anhỹrja kôt hãmri nhũm hkàja akupỳm mex pa. ¹⁴ Hãmri nhũm Jejus kãm:

—E kër ka amnhĩ tã akwỳjê mã tanhmã ijarênh to hkêt rãhã ma patre hwỳr tē kē akupỳm akã mex ã apumu. Hãmri ka amnepêm Mojes kot mē ate akupỳm amex ã Tĩrtũm mã tanhmã amnhĩ nhĩpêx to hã karōta ka kãm ho anê. Kê mē mē piitã akupỳm akã mex ã apumu. Anê.

Hãmri nhũm kuma nê kãm:

—Tōe. Nã kot paj anê. Anê.

Hãmri nê ma hwỳr htēm kurê kumrêx.

¹⁵ Hãmri nhũm mē piitã axpên mã Jejus jarênh o ri hprôt nhũm mē kot kapêr mar kaxyw ma hwỳr mra. Nê mē ã xwỳnhjaja nhũm kot mē ho mex kaxyw nhũm mē hwỳr amnhĩ to mra. ¹⁶ Jakamã nhũm pre hte Jejus tōhã mē kêp hapôj nê ahte ma kapôt ã Tĩrtũm mã amnhĩ jarênh kaxyw mra. Nê kãm amnhĩ jarênh pa hãmri nê ma akupỳm mē hwỳr mra.

Jejus kot ã kamã htyk xwỳnh o mex ã harênh

Matêwre 9.1-8; Makre 2.1-12; Juãw 10.37-38

¹⁷ Tã nhũm Jejus ma Tĩrtũm kapêr o Ijaew jahkre ho pa. Jakamã nhỹri mēhō nhōrkwỳ kamã ho mē ahkre ho xa nhũm Parijew nhō xwỳnhjê mē Tĩrtũm kapêr tũm o mē ahkre ho mē pa xwỳnhjaja kot mar kaxyw ma hwỳr mra. Na pre ra Garirej rũm mē hkwỳjaja ma hwỳr mra. Nê pika pē Jutej rũm mē hkwỳ haxwỳja ma hwỳr mra. Nê krĩ pē Jerujarê rũm. ã na prem ohtō nê krĩ piitã kurũm kot mar kaxyw hwỳr akuprō nhũm mē ahkre anê. Nê Tĩrtũm kot ho ãhpumunh tỳx jakamã nhũm ã hã akupỳm mē ã xwỳnhjê ho mex. ¹⁸ Hãmri nhũm hkwỳjaja ã kamã htyk xwỳnh mỳ nê Jejus wỳr o tē. Nōr xã kamã nōr rãhã nhũm mē hã hije nê hwỳr o tē. Hãmri nê tee ri kot hwỳr ho ãr kaxyw ri mē hkupu ho pa. ¹⁹ Nom nhũm mē ra ixkre ho nýt rax jakamã nhũm mē tee ri amnhĩ kukamã ho ukapi ho ri pa. Hãmri nê ra hamaxpêr nê ixkre nhĩmōk po hwỳr ho api nê ixkre nhĩmōk kwỳ grã nê hkôt ã kamã htyk xwỳnhhta jaxã. Nōr xã kamã nōr rãhã Jejus wỳr haxã nê mē hipōk ri ho wrỳ nê kutã kuxi nhũm nō. ²⁰ Hãmri nhũm Jejus amnhĩ tã mē kot kaxyw kãm hamaxpêr tỳx ã mē omunh mex nê. Hãmri nê ã kamã htyk xwỳnhhta mã kapêr nê kãm:

—Pa? E na pa ra anê tanhmã ate amnhĩ tomnuj to ho apaja o ijapêx pa. Kot paj axte kãm ijamaxpêr kêt nê. Anê.

²¹ Hãmri nhũm Parijew nhō xwỳnhjê mē Tĩrtũm kapêr tũm o mē ahkre ho mē pa xwỳnhjaja tee ri kot ã kãm kapêr anhỹrja ã kuma nê axpên mã:

—Tk. Kwa kêp Tĩrtũm kêt tã te ri kot amnhĩ nhĩpêx pyrãk o ri mē nê mē kot amnhĩ tomnuj o hapêx ã amnhĩ jarênh o kuhê. Tĩrtũm pix na kot mē nê mē kot amnhĩ tomnuj o hapêx xwỳnh kênã. Anê.

²² Nhũm mē ã axpên mã Jejus jarênh anê nhũm amnhĩ tã mē

kuma nê mẽ hamaxpêr kôt mẽ omunh mex nê. Jakamã mẽ kãm:

—Kwa mẽ ã ajamaxpêr anhÿr kêt nê. ²³ Ixte mẽ nê mẽ kot amnhĩ tomnuj o ijapêx par ã amnhĩ jarênh tâ mẽ ate ja kôt ixpumunh kêt jakamã na ka mẽ ixkôt ajamaxpêr kêt nê. Nom kot paj mẽ anoo mã akupÿm i kamã htyk xwÿnhnta o mex ka mẽ apiitã ja hã ixpumu hãmri nê ixkôt ajamaxpêr kurê kumrêx. ²⁴ Ixpê Tĩrtũm kot mẽ awÿr inhmênh xwÿnhnta na pa. Ixte mẽ anê mẽ ate amnhĩ tomnuj rênh kaxyw na pre mẽ awÿr inhmê pa mẽ awÿr wrÿ. Tã mẽ ate ja kôt ixpumunh kaxyw kot paj mẽ anoo mã myja o mex. Anê.

Hãmri nê hpãnhã i kamã htyk xwÿnhja mã kapêr nê kãm:

—E kãnhmã xa nê anôr xà py nê ma akupÿm anhôrkwÿ hwÿr tẽ. Anê.

²⁵ Nhũm kãnhmã ãm kurê kumrêx. Hãmri nê amnhĩ pumu nê hkĩnh tÿx nê nôr xà py nê mẽ noo mã kato nê akupÿm ôrkwÿ hwÿr ma Tĩrtũm mã mex o mex ã harênh o tẽ. ²⁶ Hãmri nhũm mẽ amnhĩ jaêr pê omu. Nê no hapôx kaxyw hkôt omunh o kuhê nê kamã no puma nê. Nê tee ri omu hãmri nê axpên mã:

—Kokÿÿ. Aa mẽ pahte ã mẽhõ kot amnhĩ nhĩpêx anhÿr ã omunh kêt tâ na pu mẽ jarãhã ja pumu. Anê.

Hãmri nê Tĩrtũm mã mex o mex ã harênh o kuhê.

Jejus kot amnhĩ kôt Rewi hwÿr ã harênh

Matêwre 9.9-13; Makre 2.15-17; Rukre 15.1-2

²⁷ Tã nhũm Jejus ma hkôt mẽ pa ho mẽ pa xwÿnhjê mẽrohã ma nhÿhÿm mõi. Hãmri nê nhÿri Rewi pumu. Rewi nhĩxi hõ pê na Matêwre. Rõm kãm mẽ õ pahihiti mã amnhĩ kwÿjê pê kãxpore hkwy jamÿnh xwÿnh na pre. Jakamã nhũm ujamÿnh xà hã ixkre kamã mẽ kêp hkwy jamÿnh o nhÿ nhũm

Jejus mẽ hkôt mẽ pa o mẽ pa xwÿnhjaja hãnh mra. Hãmri nhũm Jejus àpênh ã omu nê amnhĩ kôt kuwÿ nê kãm:

—Pa? E kwa axàpênhnta kaga nê hpãnhã amnê mẽ ixkôt mãn tẽ. Nê ixkôt mãn ri apa ho apa. Anê.

²⁸ Hãmri nhũm kuma nê àpênh kaga hpa nê ma hkôt mõi nê hkôt pa ho pa.

²⁹ Hãmri nhũm mẽmo arĩgro hã nhũm Rewi nhõ mẽ apkur xà hã mẽõ rax nê. Jakamã nhũm amnhĩ nhõrkwÿ hwÿr hkrãmnhwÿjaja nê Jejus mẽ hkôt mẽ pa ho mẽ pa xwÿnhjê hwÿ. Mẽ kot kutã apkur kaxyw nhũm amnhĩ kôt mẽ kuwÿ nhũm mẽ ma hkôt mra nê ôrkwÿ hwÿr agjê nê apkur o hkrĩ. Nê mẽ kêp Rõm nhõ pahi mã mẽ kêp kãxpore hkwy jamÿnh xwÿnh kwÿjaja nê mẽ ohtõ nê hwÿr akuprõ nê axpên kutã apkur o hkrĩ. ³⁰ Hãmri nhũm Parijew nhõ xwÿnhjê mẽ Tĩrtũm kapêr tũm o mẽ ahkre ho mẽ pa xwÿnh kwÿjaja mra nê mẽ apkur ã mẽ omu nê tee ri mẽ hkaêx ã Jejus pumu hãmri nê Jejus kôt mẽ pa ho mẽ pa xwÿnhjê hwÿr agjê nê hã mẽ kãm akir nê mẽ kãm:

—Kwa mẽ kot amnhĩ tomnuj ho mẽ pa xwÿnhjê kutã mẽ apkur kêt tâ ka mẽ apytãr xwÿnhja mẽ apim-rãatã axtem nê mẽ kutã axãpkur o akrĩ. Kwa mẽ ate amnhĩ to mex ronhÿx ka mẽ kutã axãpkur kêt nê. Anê.

³¹ Hãmri nhũm Jejus amnhĩ tâ mẽ kapêr ã mẽ kuma nê mẽ kãm:

—Tk. Nà ixte tãm mẽ unhwÿr kaxyw na pa mẽ kutã ixãpkur o nhÿ. Xà na hte tõtõja mẽ mex xwÿnhjê hwÿr mra nê mẽ hkane? Nà ãm mẽ à xwÿnhjê pix wÿr na htem mra. Ra mẽ ate ja pumunh mex kênã. Ja pyrã nê na pa pre mẽ kot amnhĩ to mex xwÿnhjê hwÿr ixwrÿk kêt nê. Mẽ kot amnhĩ tomnuj xwÿnhjê pix wÿr na pa pre wrÿ. Ixte tãm mẽ unhwÿr kaxyw na pa pre mẽ hwÿr wrÿ nê ã jajê kutã ixãpkur o inhÿr

anë. ³² ãm mẽ kot amnhĩ tomnuj xwýnhjê hwýr na pa pre wrý nê mẽ kamã ixkaprĩ ho ri ixpa. Mẽ kot amnhĩ tomnuj mã urer nê hpãnhã tãm amnhĩ nhĩpêx o pa kaxyw na pa pre mẽ hwýr wrý. Tã ka mẽ atýx ã ri mẽ ixto akapêr anë. Anë.

Mẽ hpãmjaja kot amnhĩ nhĩpêx gryk ã Jejus kaga hã mẽ harênh

Matêwre 9.14-17; Makre 2.18-22

³³ Tã nhũm Ijaew kwýjaja Jejus wýr mra nê kãm:

—Pa? E ot pa mẽ awýr mra. Kwa aprĩ hã mẽ inhmã mẽmoj jarê. Na hte Parijew nhõ xwýnhjê mẽ Juãw kôt mẽ pa xwýnhjaja tõhã Tĩrtũm mã amnhĩ jarênh kaxyw nê apkur kêt rãhã kãm amnhĩ jarê. No akôt mẽ pa ho mẽ pa xwýnhjaja na htem ãmnhĩx apkur o pa kamã kãm amnhĩ jarê. Kwa mo na htem mẽ urak nê tõhã apkur kêt ri kãm amnhĩ jarênh hkêt nê? Anë.

³⁴ Hãmri nhũm mẽ kuma nê mẽ kãm:

—Tk. Nà mo kaxyw koja mẽ apkur kêt rãhã kãm amnhĩ jarê? Mẽ kot ixkôt pa ho pa hã amnhĩ pumunh jakamã hkĩnh nê pa. Kormã ixte mẽ kamã ixpa kênã kot kêt mẽ Tĩrtũm mã amnhĩ jarênh kaxyw nê apkur kêt rãhã kãm amnhĩ jarê. Xà na htem hkrãmnhwý hã hkĩnh kaxyw hã akuprõ nê hkaprĩ nê apkur kêt nê mýr o hkrĩ? Na htem hã akuprõ nê hkĩnh nê hã apkur rũnh nê. Ja pyrã nê na hte ixkôt mẽ pa ho mẽ pa xwýnhjaja ixkôt kormã ãmnhĩx ri hkĩnh nê apkati mẽ apkur o pa. ³⁵ Nom koja mẽ kãm ixkurê xwýnhjaja nhýrmã tanhmã ixto hãmri nhũm mẽ rĩ kormã ixtã hkaprĩ htýx kãm apkur kêt ri tanhmã amnhĩ nhĩpêx to. Anë.

³⁶ Nhũm pre ã Jejus mẽ kãm hkôt ri mẽ pa ho mẽ pa xwýnhjê jarênh anë hãmri nê mẽ kãm:

—Nà mẽ kot amnhĩ tomnuj xwýnhjaja mẽ kot amnhĩ nhĩpêx tũm o amnhĩ pyrãk jakamã na htem

mẽ kot amnhĩ nhĩpêx nyw kaga. ³⁷⁻³⁹ Ixte amnhĩ nhĩpêx nywja te kot mẽ ate amnhĩ nhĩpêx tũm pyrãk kêt jakamã ka htem inhma nê ãm inhma. Kwa mẽ ixkapêr ma nê mẽ ate amnhĩ nhĩpêx tũm gryk ã ixkaga hkêt nê. Anë.

6

Jejus kêp arĩgromnu hpãm ã harênh

Matêwre 12.1-8; Makre 2.23-28

¹ Tã nhũm Ijaew nhõ arĩgromnu pê sapja axte kato. Hãmri nhũm Jejus mẽ hkôt ri mẽ pa ho mẽ pa xwýnhjê mẽ ma mẽ hpur kôt ri nhýhým ri pa. Hãmri nhũm hkôt mẽ pa ho mẽ pa xwýnhjaja ra kãm prãm nê mra hãmri nê prãm xaj mẽmo hy te kot harõj pyrãk xwýnhta kwý rê nê kugrã nê ma Jejus kôt hkanhar o mõ. Ijaew kot amnhĩ nhĩpêx xà hkôt. ² Hãmri nhũm Parijew nhõ xwýnhjaja kãm mẽmoj tã Jejus o kapêr prãm jakamã ã mẽ kot amnhĩ nhĩpêx anhýr ã mẽ omu nê mẽ hã Jejus kujjêr kurê kumrêx nê kãm:

—Kwa Tĩrtũm kapêr tũm kot mẽ panhõ arĩgromnu hã mẽ pahte mẽ pahpur kãm mẽmoj nhĩkênh nê mẽ pahkurê htã nhũm ri akôt mẽ pa ho mẽ pa xwýnhjaja axtem nê mẽmo hyta kwý rê nê akôt hkanhar o mõ. Kwa mẽ kãm anë kê mẽ ã amnhĩ nhĩpêx anhýr kêt nê. Na htem arĩgromnu hã ã amnhĩ nhĩpêx anhýr kêt nê. Anë.

³⁻⁴ Hãmri nhũm Jejus mẽ kuma nê hprĩ hã mẽ kãm Tĩrtũm kapêr tũm jarê nê mẽ kãm:

—Kwa xà na ka mẽ Tĩrtũm kapêr ã kagã htũm kamã pahi Tawi kot tanhmã amnhĩ nhĩpêx tota kamã harênh nê mar kêt nê? Na pre Tawija hkôt ri mẽ pa xwýnhjê mẽ nhũm mẽ prãm xaj Tĩrtũm mã amnhĩ jarênh xà hã ixkre wýr agjê nhũm patre maatija mẽ kãm prãm týx ã mẽ omu nê mẽ kãm mẽmoj gõ. Mẽ kot Tĩrtũm noo mã pãwti jaxwýr

xwÿnhhta nhũm mē kām kugō nhũm mē kuku. Tĩrtũm kapēr ā kagā htũm kot ja nē mē kurē htā nhũm mē kām prām tÿx ā mē omu nē mē kamā ukaprī xàj mē kām kugō. Patre pix kot ja kur kaxyw tā nhũm mē kām kugō nhũm mē kuku. Tā nhũm Tĩrtũm ja hā mē omu nhũm ja kēp omnuj kēt nē. Kot mē kamā ukaprī nē mē kām ōr nhũm mē hā omu nhũm ja kām mex nē. ⁵ Tā pa na pre Tĩrtũm mē akaxyw ixām nē mē awÿr inhmēnh jakamā papxipix na pa hte arĩgromnu hā tanhmā mē kot amnhĩ nhĩpēx to hā mē kām karō ho ri ixpa. Ixpē arĩgromnu hpām na pa. Anē.

Jejus kot ĩhkra grā xwÿnh o mex ā harēnh

Matēwre 12.9-14; Makre 3.1-6

⁶ Tā nhũm Ijaew nhō arĩgromnu pē sapja axte kato. Hāmri nhũm Jejus Tĩrtũm kapēr o mē ahkre xā hā ixkre hwÿr tē nē axā nē Tĩrtũm kapēr o mē ahkre ho nhÿ. Nhũm mēhō myja upōk rūm ĩhkra grā xwÿnhja mē ĩhkō hā mar o nhÿ. ⁷ Nhũm Parijew nhō xwÿnhjē mē Tĩrtũm kapēr tũm o mē ahkre ho mē pa xwÿnhjaja mē kām mē hkrāhtũmjē mā Jejus o kapēr prām xàj htānopxar o kuhē. Nē ĩhkra grā xwÿnhhta pumu nē hā axpēn mā:

—Kwa pu mē jar pakuhē nē Jejus tanhmā kot amnhĩ nhĩpēx to hā omu. Xà koja jarāhā mũjti ho mex nā? Jarāhā arĩgromnu kēnā kot kēt kām ĩhkra ho mex. Koja anē nē Tĩrtũm kapēr kwÿm ri amnhĩ nhĩpēx. E pu mē kop pakuhē nē hā omu. Anē.

⁸ Nhũm Jejus ra kot mē hamaxpēr kōt mē omunh mex jakamā amnhĩ wÿr myta mā hpa ho apē nē kām:

—Pa? E kànhmā xa nē amnē ixwÿr tē. Anē.

Hāmri nhũm kuma nē kànhmā xa nē hwÿr tē. ⁹ Hāmri nhũm Jejus amnhĩ pu hā ri mē ho hakēx nē mē kot mar o hkrī xwÿnhjē pumu nē mē kām:

—E mē inhmā mēmoj jarē. Tanhmā na htem arĩgromnu hā axpēn nhĩpēx to ho pa wehe? Xà kot ka arĩgromnu hā axā htÿx nē nō hāmri nē amnhĩ mex prām xàj ma mēhō hwÿr amnhĩ to tē. Hāmri nhũm ām apumu nē apkatim arĩgro mex jamār pē akane hkēt ka ty nhũm ja amā mex nē nā? Rÿ nhũm tanhmā atomnuj to nē akupÿm amnhĩ nē ajano nhũm ja amā mex nē nā? Nā koja ā anhihpēx anē nhũm ja amā mex kēt nē. Na ka htem ā amnhĩ nhĩpēx anhÿr o apa hkēt nē. E mē inhmā mēmoj jarē. Tanhmā na pre finat Mojesja Tĩrtũm nhÿ hā mē pamā arĩgromnu hā mē pahte axpēn nhĩpēx ā karō hto? Xà kot puj mē axpēn kām paxukaprī ho papa nā? Kot puj mē pamā axpēn kurē ho papa? Xà kot puj mē hā mēmoj punuj pē axpēn pytā nā? Xà kot puj mē hā axpēn pytār pymaj arĩgro mex jamā? E mē atō inhmā ja jarē. Anē.

Nhũm pre ā mē hkukjēr anē. ¹⁰ Mē hamaxpēr ā mē omunh mex pē ā mē hkukjēr anhÿr o xa. Nom nhũm arī mēhō tanhmā kutā kām nē hkēt nē. Ām akryk mar pē omunh o hkrī. Mē kot tanhmā kām nē nhũm ta pānhā tanhmā kot mē kām nē pymaj nhũm mē tee ri kām tanhmā nē hprām nom akryk mar o hkrī. Hāmri nhũm Jejus tee ri mē omu hāmri nē myta mā kām:

—Tk. Mē kot tanhmā inhmā kapēr tore hā. E anhihkra katāt. Anē.

Hāmri nhũm ĩhkra katāt nē akupÿm mex kurē kumrēx.

¹¹ Hāmri nhũm mē kām Jejus kurē xwÿnhjaja tee ri ja hā omu nē kamā gryk tÿx nē. Arĩgromnu hā kot ho mex jakamā nhũm mē kamā gryk tÿx nē. Nē hā axpēn kukjēr o kuhē nē axpēn mā:

—Kwa ā kot amnhĩ nhĩpēx anhÿr mÿrapē tanhmā kot puj wem ho? Na ā kapēr anhÿrja o tanhmā mē pahto kapēr punuj to. Te

mê papamjaja mẽ pahte hkĩnhã pahkwýjê kamã paxukaprĩ hkêt pyrãk ã mẽ pajarê. Koja mẽ pahkwýjaja kuma hãmri nê mẽ pahte amnhĩ nhĩpêx kaga nê amnhĩ kaxyw ãm hkôt pix mã hamaxpêr o pa. Jakamã kwa tanhmã kot puj mẽ ja nê ho? Anê.

Jejus kot amnhĩ kaxyw mẽ ho 12 nê mẽ rênh ã harênh

Matêwre 10.1-4; Makre 3.13-19

¹² Tã nhũm arĩgro hõ hã nhũm Jejus ma kot Tĩrtũm mã amnhĩ jarênh kaxyw ma hixêt prêk wýr tẽ nê hã api. Hãmri nê kãm amnhĩ jarênh o apkati.

¹³ Tã nhũm kwýhtã nhũm amnhĩ kôt kot ri mẽ o pa xwýnhjê hwý nê amnhĩ kaxyw mẽ ho 12 nê mẽ kurê. Nê mẽ kãm:

—E mẽ kajaja kot paj ma mẽ pahkwýjê hwýr mẽ arê ka mẽ ma inhý hã Tĩrtũm kapêr o mẽ ahkre ho ri mẽ hkôt apa. Kot kaj mẽ apê inhý hã mẽ ahkre ho apa xwýnh. Anê.

¹⁴ Kot amnhĩ kaxyw mẽ rênh xwýnhjê nhĩxi na jajaja:

Simãw kumrêx na pre kuta nê axte hã hixi mẽ nhũm kêp Pêtre.

Nê Simãw Pêtre hkôt htõ Andreja ta.

Nê hkôt Xiakre hta.

Nê hkôt Juãw ta.

Nê hkôt Firiptija ta.

Nê hkôt Patoromew ta.

¹⁵ Nê hkôt Matêwreja ta.

Nê hkôt Tomasja ta.

Nê hkôt Apew kra axtem Xiakre hõja ta.

Nê hkôt Simãw Jeroxja ta.

¹⁶ Nê hkôt Xiakre hõ hkra Jutja ta.

Nê hkôt Jut Kariot ta.

Jut Kariotja na pre kormã kot mẽ kãm Jejus kurê xwýnhjê nhĩhkram õr mã. Nhũm kot amnhĩ kukamã omunh mex tã mẽ hkôt amnhĩ kaxyw kuta.

Ã mẽ kot Jejus nhý hã mẽ ahkre o pa kaxyw mẽ rênh xwýnhjê nhĩxi kot anhýr.

Jejus xapênh ã harênh

Matêwre 4.23-25

¹⁷ Tã nhũm Jejus akupým ý hã mẽ ahkre ho pa xwýnhjê mẽ hãmri hixêt prêêta kurũm wrý nê nhýri hinur kãm kuhê. Hãmri nhũm nhýhýnh mẽ kot mar mã xwýnhjaja hã akuprõ. Kôt mẽ pa ho mẽ pa xwýnh kwýjaja nê nhýhýnh krĩ hkwy rũm mẽ hkwyjaja. Pika pê Jutej kurũm mẽ hkwyjaja. Nê krĩ pê Jerujarê kurũm mẽ hkwyjaja. Nê gô mý ri Xir mẽ Sitõja wa kamã mẽ pa xwýnh kwýjaja. ãm ahpýnhã ri nhýhýnh krĩ hkwy rũm mẽ kot mar mã xwýnhjaja hã pikuprõnh rax nê. ¹⁸⁻¹⁹ Mẽ kot kapêr mar nhũm kot akupým mẽ ho mex kaxyw nhũm prem ma hwýr amnhĩ to pa. Mẽ hkwyjaja tanhmã ri à kute. Nhũm mẽ hkwyjaja mẽkarõmnuti kot mẽ hwýr gjêx xwýnhjaja nhũm mẽ piitã ma hwýr amnhĩ to pa. Na prem ra amnhĩ kaxyw kãm hamaxpêr o:

—E pa ma hwýr tẽ nê ãm hkupênh pix tã akupým inhmex japêr. Anê.

Hãmri nê ma hwýr mra nhũm mẽ omu nê Tĩrtũm xãhpumunh týx o akupým mẽ ho mex pa.

Jejus kot hkôt mẽ pa ho mẽ pa xwýnhjê jahkre hã harênh

Matêwre 5.1-12

²⁰ Tã nhũm Jejus hkôt mẽ pa ho mẽ pa xwýnhjê jahkre nê mẽ kãm:

E kot kaj mẽ atõ amnhĩ kaxyw tanhmã inhmã ajamaxpêr to nê ajamaxpêr o: “Nã ixkukrêx rax kêt tã na hte Tĩrtũm ixkõt pa ho pa. Koja ixkõt pa hkêt pa ixtýx ri tanhmã amnhĩ nhĩpêx to ho ri ixpa rãhã nê. Tĩrtũmja mex kumrêx o kot mẽ hikukrêx raxta jakrenh par.” Anhýr o ajamaxpêr. Hãmri nhũm Tĩrtũm ã ajamaxpêr anhýr ã apumu nhũm ja kãm mex nê. Hãmri nhũm apê hkra hã ato mex nê atãnopxar o akôt pa

- ka ajamakêtkati nê akînh nê axâmnhîx ri apa.
- 21 Nê kot kaj mê atô amâ Tîrtûm kâm hprâm xâ hkôt tanhmâ amnhî nhîpêx to ho ri apa hprâm tỳx nê. Nhûm amnhî tâ apumu nhûm ja kâm mex nê nhûm ato mex nê. Nê tanhmâ ato ka hkôt pix mâ amnhî to mex o ri apa nê ajamakêtkati nê akînh nê axâmnhîx ri apa.
- Nê kot kaj mê tanhmâ amnhî tomnuj to. Hâmri nê tee ri ja hâ amnhî pumu nê ajamaxpêr. Nê apijaam nê akaprî xàj amỳr o nhỹ. Amỳr rax nê. Hâmri nhûm Tîrtûm ja hâ apumu nhûm ja kâm mex nê. Jakamâ nhûm anê akaprî hta nê ato mex nê. Ka ajamakêtkati nê akînh nê axâmnhîx ri apa.
- 22-23 Nê kwâr mê māmri ixtâ tanhmâ mê ato kapêr punuj to nê tanhmâ mê ato hêx to nê tanhmâ ri mê atomnuj to ho pa. Kwâr mê māmri â mê anhîpêx anhỹr o pa. Ka mê âm inhmâ pix mâ ajamaxpêr rāhā ho apa pê ajamakêtkati nê axâmnhîx ri apa. Kwâr mê māmri â mê anhîpêx anê nê mê amex kêt â mê ajarênh o pa. Amnepê m na pre Tîrtûm nhỹ hâ kapêr xwỳnhjaja nhûm prem â mê hipêx anê. Jakamâ koja mê urak nê â mê anhîpêx anhỹr o pa. Nhûm Tîrtûm ja hâ mê apumu nê amnhîm mê amex â mê ajarê. Hâmri nê nhỹrmā kaxkwa kamā wa inhō krī kamā mê ato mex rax nê. Ka mê akînh nê ajamakêtkati nê axâmnhîx ri apa. Jakamā kwâr mê māmri pika jakamā â ixtâ mê anhîpêx anê. Anê.

*Jejus kot arī mê kot mar xwỳnhjê jahkre hā harênh
Xiakre 5.1-5*

24 Nhûm Jejus nhâm hkôt mê pa ho mê pa xwỳnhjê nhîhkô hā mê kot Tîrtûm kôt amnhî nhîpêx o pa hkêt xwỳnhjê hwỳr apkjê. Nê mê omu nê tanhmâ mê kâm kapêr to. Mê hikukrêx rûnh xwỳnhjê kumrêx mâ kapêr nê mê kâm:

E kwa mê o kora mê akukrêx rûnh xwỳnhjaja. Na ka htem âm akukrêx rûnh pix mâ ajamaxpêr o ri apa nê gryk ā Tîrtûm mâ ajamaxpêr o apa hkêt nê. Jao mê amā kapêr mar prām kêt nê. Nê âm akukrêx rûnh mâ ajamaxpêr pê akînh nê ri apikunhar o ri apa. Tâ kot ka mê nhỹrmā ty hāmri nhûm akînh xāja apê hapêx.

25 Nê mê amā Tîrtûm kôt ri amnhî nhîpêx prām kêt xwỳnhjaja. Kot kaj mê nhỹrmā akaprî htỳx kâm tee ri amnhî to hwỳr kaprỳ kâm ga. Koja mê amar kêt nê.

Nê mê atỳx ri mê ate tanhmâ amnhî tomnuj to hkukamā ajamaxpêr nê apikunhar pê amnhî tomnuj o apa xwỳnhjaja. Kot kaj mê nhỹrmā â mê ate amnhî nhîpêx anhỹrja mỳrapê mê kot amnhî xâ htỳx kamā hamak o pa htûm xâ hwỳr ma apa. Hâmri nê kamā akaprî xàj amỳr rāhā ho ri apa. Jakamā kwa mê o kora mê amā Tîrtûm prām kêt xwỳnhjaja. Kêr ka mê ixkapêr ma nê axkâm ajamak rom nê ri apa.

26 Amnepê m mê pakukamā mê pa xwỳnhjaja na prem Tîrtûm kapêr o hkwyjê jahkre ho pa. Nom axtem nê hkwym ri tanhmâ mê kâm ho hêx to nhûm mê kuma nhûm ja mê kâm mex nê nhûm mê amnhîm mê mex â mê harê. Nô âm mê mex kêt. Tâ mê kajaja. Mê kot mê urak nê axpên mâ mê amex ā

mě ajarēnh tā Tirtūm mā mẽ
amex kêt. Jakamā kot kaj mẽ
amex kêt nê. Anê.

*Mě kām mẽ pahkurê xwýnhjê
jarēnh*

*Matêwre 5.38-48; Rukre 23.34;
māânēn Atre 7.60; Rômân 12.14*

²⁷ Hāmri nhūm Jejus hpānhā mẽ
piitā mẽ ahkre nê mẽ kām:

—E mẽ ate inhmar xwýnhjaja.
Kêr ka mẽ kot mẽ atomnuj
xwýnhjaja amnhĩ tā tanhmā mẽ ho
hkêt nê. Ām mẽ ho mex pix o ri apa
hkukamā mǎn ajamaxpêr.

²⁸ —Nê mẽ kot mẽ ato kapêr
punuj xwýnhjaja. Kêr ka mẽ amnhĩ
xwar amnhĩ tā tanhmā mẽ ho
akapêr punuj to hkêt nê. Ām tām
mẽ kām akapêr pè mẽ kām akapêr
mex o ri apa. Nê mẽ kot tanhmā
ri mẽ ato ho pa xwýnhjaja ka mẽ ho
mex pix o ri apa. Nê mẽ ho Tirtūm
wýr pix kukamā mǎn ajamaxpêr.

²⁹ —Nê koja mēhō anhīnep akura
ka ām omu nê tanhmā amnhĩ tā ho
hkêt nê. Te ate kām ihkjê pêr nhūm
kot ihkjê kamā akuranh pyrāk o
amnhĩ nhīpêx nhūm ja amā mex
nê. No kêr ka mẽ amnhĩ tā tanhmā
mẽ ho hkêt nê.

—Nê koja mēhō apê anhīnôhkà
py ka tanhmā hā kām nê hkêt nê.
Kwār māmri apê kupy. Ka māânēn
te ate kry pè anhīnôhkà hpakà
ry jagjēnh xwýnhhta anhīnôhkà hkôt
kām ôr pyrāk o hipêx. Nom kamā
agryk kām kām ôr kêt nê.

³⁰ —Nê koja mēhō kêp amrakati
kumrêx nê awýr tē nê mẽmoj tā
awý. Ka anhō mẽmoj japêr nê
māmri kām mẽmoj gō. Kêp anhōxý
hkêt kamā kām mẽmoj gō. Rý
koja mēhō apê mẽmoj to ahkĩ ka
axàhkurê hkêt nê. Nê tanhmā hā ho
hkêt nê. ³¹ Mě piitā mẽ kot tām mẽ
anhīpêxja na mẽ amā hprām. Tā kêr
ka mẽ amnhĩ pyrā nê tām mẽ piitā
mẽ hipêx o ri apa. Mě kot tām mẽ
anhīpêx kêt tā kêr ka mẽ axàmnhĩx
ri anhōxý hkêt nê tām mẽ hipêx o ri
apa.

³² —Nom kot kaj mẽ amā mẽ pi-
itā mẽ ho mex o apa hprām kêt
japêr. Nê ām mẽ kot mẽ ato mex
xwýnhjê pix ka mẽ amā mẽ ho mex
prām. Xà koja Tirtūm ja hā mẽ
apumu nhūm ja kām mex nê? Nà
koja kām mex kêt nê. Koja mēhō
mẽ ato mex kêt tā ka mẽ amnhĩ
rom ho mex nê nhūm Tirtūm ja hā
mẽ apumu hāmri nê mẽ amex ā mẽ
ajarê. Mě kot amnhĩ tomnuj o mẽ
pa xwýnhjaja na htem ām mẽ kot
mẽ ho mex xwýnhjê pixjaja nhūm
htem amnhĩ xwar mẽ ho mex o
pa. No tām mẽ kot amnhĩ nhīpêx
o mẽ pa xwýnhjaja na htem mẽ pi-
itā mẽ ho mex o pa. Mě kot tām
amnhĩ nhīpêx xwýnhjaja nê mẽ kot
amnhĩ tomnuj xwýnhjaja nhūm mẽ
ho hpimràatā mẽ ho mex o axpēn
pyrāk o pa.

³³⁻³⁶ —Nê mẽ kot amnhĩ tomnuj
xwýnhjaja na htem ām mẽ kot mẽ
ho mex xwýnh pixjaja nhūm htem
amnhĩ xwar mẽ ho mex o pa. No
mẽ kajaja. Kêr ka mẽ māmri mẽ
piitā mẽ kamā axukapri pix nê. Jao
axàmnhĩx ri mẽ piitā mẽ kām mẽmoj
nhōr o ri apa. Nhūm Tirtūm ja hā
mẽ apumu nê ja hā mẽ ato mex nê.

—Jakamā kêr ka mẽ amarĩ mẽ
kām akurê xwýnhjê ho mex nê.
Nê mẽ kamā axukapri nê. Nê
mẽ piitā mẽ kām mẽmoj nhōr o ri
apa. Kê nhýrmā Tirtūm maati mẽ
hā mẽ amā mẽmoj nhōr rax nê.
Nê mẽ ate kot amnhĩ nhīpêx kôt
amnhĩ nhīpêx xwýnh ā mẽ ajarê.
Tirtūm na hte mẽ kot amnhĩ tom-
nuj xwýnhjê kamā ukapri ho pa.
Jakamā kêr ka mẽ urāk nê ā mẽ
hipêx anhýr o ri apa. E kêr ka mẽ
ā axpēn nhīpêx anhýr rāhā nê. Anê.

*Mě pahte axpēn to pakapêr punuj
kêt ā mẽ pamā karō*

*Matêwre 7.1-5; māânēn Rômân
2.1-3, 14.1; Wam Korit 4.5; Xiakre
4.11-12*

³⁷ Nhūm Jejus arĩ mẽ ahkre nê mẽ
kām:

—Nê kêr ka mē atỳx ri amnhĩ krā hkôt tanhmā mē kot amnhĩ tomnuj to hā tanhmā axpēn jarēnh to ho ri apa hkēt nē. Kêr kê Tirtūm mē apyrà nē ã mē ajarēnh anhỹr kêt nē.

—Nê kêr ka mē tanhmā mēhō kot ra atomnuj tota mǎ ajamaxpēr rāhā hkēt nē. Ām ho ajamakêtkati tokyx anē nē axte kām ajamaxpēr kêt nē. Kêr kê Tirtūm ja hā mē apumu nē mē apyrà nē axte tanhmā mē ate amnhĩ tomnuj to mǎ hamaxpēr kêt nē.

38 —Nê kêr ka mē axpēn kamā axukaprĩ pē tanhmā axpēn to mex to ho ri apa. Kêr kê Tirtūm ja hā mē apumu nē mē apyrà nē mē akamā ukaprĩ pē tanhmā mē ato mex to ho pa. Na hte mē pahte axpēn kamā paxukaprĩ hā mē pahpumunh xā hkôt tanhmā mē pakamā ukaprĩ to.

39 —Nom kêr ka mē atỳx ri tanhmā axpēn to akapēr to hkēt nē. Mē ate aprĩ hā axpēn jamaxpēr kôt axpēn pumunhre hā. Jakamā kot kaj mē atỳx ri mēhō ho akapēr punuj hāmri nē te mē nohkre xwỳnhjê hō kot mēmoj pumunh kêt tǎa te kot no ho omunh nē tanhmā harēnh to pyrāk o amnhĩ nhĩpêx.

40 Tirtūmja tapxipix na kot mē pajamaxpēr kôt mē pahpumunh par. Mē axāhpumunh tỳx o mē pahte hakrenh kêt jakamā kwa kêr ka mē ãm hkôt pix mǎ amnhĩ nhĩpêx o ri apa. Kot kaj mē ã amnhĩ nhĩpêx anē hāmri nē gaa nē urāk nē mē piitā mē kamā axukaprĩ pix o ri apa. 41-42 Jao mēhō kot tanhmā amnhĩ tomnuj to hā omu hāmri nē tanhmā hā kām nē tokyx anhỹr kêt nē. Akumrēx ate tanhmā amnhĩ tomnuj to hā amnhĩ pumu nē hkaga hāmri nē rĩ kormā mēhōta hwỳr tē nē kot tanhmā amnhĩ tomnuj to hā kām akapēr to. Anē.

Mē pajamaxpēr xā hkôt mē pakapēr ã mē pajarēnh
Matêwre 7.16-20, 12.33-37

43-45 Nhũm Jejus arĩ mē ahkre nē mē kām:

—Nê koja mēmo pĩ hpār mex nē ô mex nē. Nom koja pār punuj hāmri nē ômnuj nē.

—Nê na htem mēmo xō pumu nē hkôt tanhmā pār kute hā omu. No na htem rārāj pumu nē kêp akunĩ kamā mrônhĩ xō hā hkamnhĩx kêt nē. Na htem mēmo xy hpār pumu nē ô xānhre hā hkamnhĩx kêt nē. Ja pyrà nē koja mēhō hamaxpēr punuj nē mǎānēn hakwa ho kapēr punuj pix nē. Nê htỳx tanhmā amnhĩ tomnuj to ho ri pa. Nom koja hamaxpēr mex nē hāmri nē mǎānēn hakwa ho kapēr mex o pa. Na htem ahpỳnhā amnhĩ jamaxpēr xā hkôt tanhmā hakwa ho kapēr to ho ri pa. Anē.

Ixkre pijakrut jarēnh

Matêwre 7.24-27; mǎānēn Xiakre 1.22-25; Wam Juǎw 2.3-6

46 Nhũm Jejus arĩ mē hkôt mē pa ho pa xwỳnhjê jahkre ho nhỹ nē mē kām:

—Nê kot kaj mē ixpê mē anhō pahihiti hā ijarē hā kot kaj mē ixkapēr kôt amnhĩ nhĩpêx rāhā ho ri apa.

47—E pa mē amā ixprĩ hā mē kot ixkôt amnhĩ nhĩpêx xwỳnhjê kot amnhĩ nhĩpêx jarē ka mē aprĩ hā inhma. 48 Mē kot amnhĩ nhĩpêxja te mēhō hamaxpēr mex pē aptỳx kām amnhĩm ôrkwỹ nhĩpêx pyrāk. Koja aptỳx kām ôrkwỹ nhĩpêx nhũm mēmo arĩgro hā na wrỳk rax nē. Nē gô htām rax nē hanhi nom nhũm arĩ ãm tỳx nē xa. Tǎ kot kaj mē ixkôt amnhĩ nhĩpêx ã kot kaj mē te ixkre jarēnhja pyrāk. Jao amex nē ajamakêtkati nē ri apa. Te gô htām kot ixkre janhir tǎ nhũm ãm tỳxta pyrāk. 49 Nom koja mēhō hamaxpēr mex kêt nē htỳx mō nē gô mỳri gyw rerek kām amnhĩm ôrkwỹ nhĩpêx. Hāmri nhũm mēmo arĩgro hā na wrỳk rax nē. Nē hā gô htām rax nē ôrkwỹ janhi nē kêp grānh pa. Tǎ koja mēhō ixkôt

amnhĩ nhĩpêx kêt nê te ho mēhō kot gō m̄yri gyw rerek kām ixkre nhĩpêxta pyrāk. Jao mex kêt nê pa. Jakamā kwa mē ixkapêr mar t̄yx nê te gō htām kot ixkre janhir nê grānh parta pyrāk o amnhĩ nhĩpêx o apa hkêt nê. Anē.

7

Jejus kot mēhō mā àpēnh xw̄ynh o mex ā harēnh

Matêwre 8.5-13

¹ Tā nhũm Jejus mē kām ujarēnh pa hāmri nê ma akup̄ym Kapanau hw̄yr mō. ² Nê mōō nê ra hw̄yr pōj. Nhũm krī kamā pōristi krāhtũm mā àpēnh xw̄ynhja à ht̄yx nê nō. Ra htyk kaxyw nê nō nhũm ō patrāw tee ri omu nê kām hapê jakamā tee ri hkukamā hamaxpêr o hkaprī nê. ³ Hāmri nê Jejus pōx ā harēnh ma nê hw̄yr Ijaew pigêt kw̄yjê rē nê mē kām:

—Kwa mē ma Jejus w̄yr mra nê kām ijarê kē tokyx man ixw̄yr tē nê inhmā àpēnh xw̄ynhta o mex. Anē.

⁴⁻⁵ Hāmri nhũm mē kuma nê ma hw̄yr mra nê omu nê kām:

—Pa. Na pōristi krāhtũm na aw̄yr mē inhmē pa mē mra. Mē pahkīnhā kēp Ijaew kêt tā kām mē pahkīnh nê. Tām na pre mē inhō krī kamā mē inhmā Tirtũm kapêr o mē ahkre xà hā ixkreja nhĩpêx. Tā na kām àpēnh xw̄ynhta kēp à ht̄yx nê nō nhũm apōx hā ajarēnh ma nê man aw̄yr mē inhmē. Kwa ma hw̄yr tē nê kām ho mex nà? Anē.

⁶ Hāmri nhũm mē kuma nê mē kām:

—Tōe. Ma pu mē hw̄yr. Anē.

Hāmri nê ma mē hkôt tē. Hāmri nê kormā ōrkw̄y htêp o htēm mē nhũm axte kutā hkrāmnhw̄y hkwȳ rē nhũm mē ma kutā mra. Hāmri nê mra nê mē hkaxpa nê Jejus pumu nê kām:

—Pa? Kwa na pōristi krāhtũmta ā aw̄yr karō anē. Na mē inhmā: “E kēr ka mē mra nê nh̄yri Jejus kaxpa nê kām awjarê kē ām ata rūm kapêr pix o inhmā à xw̄ynhta o mex. Kīnh

ā ixpê Ijaew kêt jakamā ixte amnhĩ kuk ā ixpijaam t̄yx. Jakamā kot paj pam hw̄yr ixtēm kêt nê. Kwa kām anē kē ata rūm kapêr pix o inhmā akup̄ym ho mex. ⁷⁻⁸ Ixpê mē hkrāhtũm jakamā na pa hte inhō pōristi mā mēmoj tā karō nhũm mē inhmar xà hkôt inhmā mēmoj tanhmā hipêx to. Na pa hte mē kām: ‘E mē ma mra nê ā amnhĩ nhĩpêx anē.’ Anē nhũm mē inhma nê ma mrar kurê kumrêx. R̄y pa mē kām: ‘E mē amnē ixw̄yr mra nê ā amnhĩ nhĩpêx anē.’ Anē nhũm mē inhma nê ixw̄yr mra. No kêt Jejus na hte ixrom tanhmā mē à kuteja mā kapêr nhũm kuma nê mē kēp hapōj nê ma mrar kurê kumrêx. Jakamā koja ata rūm kapêr pix o inhmā ho mex.” Anh̄yr o aw̄yr karō. Jakamā na pa mē akutā mra nê akaxpa nê ā amā kapêr jarēnh anē. Anē.

⁹ Hāmri nhũm Jejus amnhĩ jaêr pē mē kapêr ma nê hkīnh nê. Hāmri nê hkôt mē kot mar o pa xw̄ynhjê mā kām:

—Kwa xà na ka mē ā kot ixw̄yr karō xw̄ynh jamaxpêr anh̄yrtā ā ama? Mē pahkīnhā kēp Ijaew kêt tā mē arom amnhĩ kaxyw inhmā hamaxpêr t̄yx nê. Aa mē atō urāk nê ate amnhĩ kaxyw ā inhmā ajamaxpêr t̄yx anh̄yr kêt tā nhũm mē arom kām àpēnh xw̄ynh kaxyw inhmā hamaxpêr t̄yx nê. Anē.

¹⁰ Nhũm pre ā mē kām kapêr anē hāmri nhũm pōristi krāhtũm krāmnhw̄yjaja kuma nê awjanā nê ma akup̄ym hkrāhtũm nhōrkw̄yja w̄yr mra. Nhũm ra Jejus kām àpēnh xw̄ynhta akup̄ym ho mex nhũm mex nê ri mra. Hāmri nhũm mē akup̄ym pōj nê akup̄ym mex ā omu.

Jejus kot akup̄ym mēhō hkra ho ht̄r ā harēnh

Juāw 11.1-46

¹¹ Tā nhũm Jejus ma krī pē Naĩ hw̄yr hkôt mē pa ho mē pa xw̄ynhjê mērohā mō nhũm mē ohtō nê mē hkôt mra. ¹² Nhũm mē ra Naĩ hw̄yr

hpôx o mō. Nē hwÿr agjê. Axpêr kām agjê nē mō nhũm kêp mjên htyk xwÿnhja mē kutā tē. Nhũm hkra myja ham kêp ty. Kra pyxi htā kêp ty nhũm mē kasāw kamā kuxà nē kumÿ nē kot haxàr kaxyw o mō nhũm katorxà mē hkôt mÿr o mō. Nhũm krī nhō xwÿnh kwÿjaja ma hkôt mō. Piitā hkaprī nē hkôt mÿr o mō. ¹³Tā nhũm Jejus mē hkwÿjaja mē mō nē mē hkaxpa nē katorxà mÿr ã omu nhũm Jejus kām hkaprī nē. Hāmri nē xa nē kām:

—Pa? Kwa amÿr kêt nē. Anē.

¹⁴Hāmri nē kasāwta wÿr tē nē hā ĩhkra xi nhũm mē kot mÿnh xwÿnhjaja omu nē amarī kām o xa. Hāmri nhũm htyk xwÿnhhta mā kapêr nē kām:

—E kwa kànhmā nhÿ. Anē.

¹⁵Pu nhũm kànhmā ÿr kurê kumrêx. Nē kapêr o nhÿ. Hāmri nhũm Jejus nita mā kām:

—E ota akrata. Na akupÿm amā htîr. Anē.

Hāmri nhũm akupÿm htîr ã omu nē hkĩnh tÿx kumrêx. ¹⁶Hāmri nhũm mē kot omunh xwÿnhjaja amnhĩ jaêr pê akupÿm hkra htîr kām omu nē ÿ hā haxwÿja hkĩnh nē. Nē Tirtũm mā mex o mex ã harê nē axpên mā:

—Kwa ãm hāmri na Tirtũm ã mē panhîpêx anē nē mē pahwÿr ÿ hā kapêr jarênh xwÿnhhta mē nhũm mē pahwÿr mō. Tirtũm mē pakamā ukaprī jakamā na ã mē panhîpêx anē. Nà ãm hāmri na ã mē panhîpêx anē. Anē.

¹⁷Hāmri nē piitā ma pikaja rũm mē kām harênh o hprôt nhũm mē piitā harênh ma.

Juāw Paxis tee ri Jejus kukamā hamaxpêr ã harênh

Matêwre 11.2-6, 11.22; Rukre 4.16-21

¹⁸Rôm nhũm Juāw Paxisja kêp près nē hkrī nhũm hte hkôt mē pa xwÿnhjaja hwÿr mra nē kām Jejus kot tanhmā amnhĩ nhîpêx to ho pa hā harê. Hāmri nhũm harênh ma nē

tee ri hkukamā hamaxpêr. Hāmri nē hkôt mē pa xwÿnh wa ho axkrut nē wa kuta ¹⁹nē Jejus wÿr wa kumê nē wa kām:

—Kwa wa ma hwÿr tē nē hkukja. Nē kām: “Xà ka na pre Tirtũm mē ixwÿr amê nà? Nà xà kormā axtem hō na pa mē kormā amnhĩ wÿr hamār o ri ixpa?” Anē. E wa ma hwÿr tē nē ã hkukjêr anē nē tanhmā kot amnhĩ jarênh to hā ama hāmri nē man akupÿn tē nē inhmā harê. Anē.

²⁰⁻²¹Hāmri nhũm wa kuma nē ma hwÿr tē. Nhũm Jejus kormā mē ho mex o xa. Mē nohkre xwÿnhjaja nhũm akupÿm mē no ho mex. Nē mēkarōmnuti kot mē hwÿr gjêx xwÿnhjaja nhũm mē nē mē hapôx o ãm rāhā nhũm wa ra hwÿr tē nē kormā hā mē omunh o xa. Hāmri nē kām Juāw Paxis kapêr jarê. ²²Hāmri nhũm wa kuma nē wa kām:

—Tÿ. Nà ãm hāmri na ja hā ijarê. Ixpê mē ate ixkamā ajamak o apa xwÿnhhta na pa. Jakamā e. Wa kam nē tanhmā ixte amnhĩ nhîpêx to hā ixpumu hāmri nē ma akupÿm hwÿr tē nē aprī hā kām ijarê. Mē nohkre xwÿnhjaja na pa akupÿm mē no ho mex. Nē mē hkānhy xwÿnhjaja pa akupÿm mē hkà ho mex. Nē mē hyk o mē pa xwÿnhjaja pa akupÿm mē ho mex. Nē mē htyk xwÿnhjaja pa akupÿm mē ho htîr. Nē mē kêp amrakati nē ri mē pa xwÿnhjê mā mēmoj mex jarênh o ri ixpa. Na pa hte ã mē ho mex o ri mē hkôt ixpa anē. Jakamā e kwa wa ma akupÿm hwÿr tē nē ã kām ijarênh anē. ²³Kê ijarênh ma nē arī amnhĩ kaxyw ixkôt hamaxpêr tÿx rāhā nē. Koja ã amnhĩ nhîpêx anē nē hamakêtkati nē ri pa. Nē tee ri ijarênh kukamā hamaxpêr kêt nē. E wa tokyx ma akupÿm hwÿr tē nē ã kām ijarênh anē. Anē.

Jejus kot Juāw Paxis mex ã harênh

Matêwre 11.7-19

24-25 Nhũm pre ã Jejus wa kãm amnhĩ jarẽnh anẽ nhũm wa kuma nẽ ma akupỹm Juãw Paxis wỳr tẽ. Hãmri nhũm Jejus mẽ kot mar o kuhẽ xwỳnhjẽ mã tanhmã Juãw Paxis jarẽnh to nẽ mẽ kãm:

—Na ka prem kapõt ã mar kaxyw ma hwỳr mra. Nom ê mex ã omunh kaxyw rỳ hpijaàm kãm tanhmã kapẽr to hã mar kaxyw hwỳr amrar kêt nẽ. ²⁶ Kêp Tĩrtũm nhỹ hã kapẽr xwỳnh jakamã na ka prem mar kaxyw ma hwỳr mra. Tĩrtũm nhỹ hã kot ixkukamã ijarẽnh o pa xwỳnh na. Ixpê Tĩrtũm kot mẽ akaxyw ixãm xwỳnh ã na pre mẽ amã ijarẽnh o pa. Nẽ hprĩ hã tanhmã mẽ amã ijarẽnh to. Jakamã na kapẽr mex o kot wam Tĩrtũm nhỹ hã kapẽr jarẽnh o mẽ pa xwỳnhjẽ kapẽr jakrenh. ²⁷ Tĩrtũm kapẽr ã kagà htũm kot Juãw kukamã tanhmã harẽnh to nẽ harẽnh kot:

Kot paj Ixkra hkukamã ma mẽ hwỳr harẽnh o pa xwỳnh mẽ kê ma ri hkukamã mẽ kãm harẽnh o ri pa. Kê mẽ kuma nẽ kutêp tãm amnhĩ nhĩpêx.

Anhỹr o Tĩrtũm Juãw Paxis kukamã harẽ nhũm mẽ hã kagà. Tã nhũm mẽ awỳr kumẽ. ²⁸ Juãwja mex kumrêx. Na pre hprĩ hã ixkukamã tanhmã ijarẽnh to ho pa. Nom ixkõt mẽ pa ho mẽ pa xwỳnhjẽ hkĩnhã ixkõt pa ho pa hkêt ãm ixkukamã ijarẽnh o pa. Jakamã ixkõt mẽ pa ho mẽ pa xwỳnhjaja na mex o kot Juãw Paxisja jakrenh. Mẽ kot ixkõt hprĩ hã inhmar o pa jakamã mẽ mex o kot hakrenh. Anẽ.

²⁹ Nhũm pre ã Jejus mẽ kãm Juãw Paxis jarẽnh anẽ. Mẽ kot Juãw mar o kuhẽ xwỳnh kwỳjaja na pre htem tanhmã amnhĩ tomnuj to ho pa. Tã Juãw kot mẽ kãm Tĩrtũm kapẽr jarẽnh ma nẽ axpẽn mã Tĩrtũm mex ã harẽ. Nẽ axpẽn mã:

—Nã ãm hãmri. Tĩrtũm kapẽr na mex kumrêx. Anẽ.

Hãmri nẽ amnhĩ tomnuj kaga nẽ Tĩrtũm kõt amnhĩ xunhwỳ. Jakamã nhũm Juãw Paxis Tĩrtũm mã mẽ hkrã kumrã.

³⁰ No nhũm Parijew nhõ xwỳnhjẽ mẽ Tĩrtũm kapẽr tũm o mẽ ahkre ho mẽ pa xwỳnhjaja jajê hkĩnhã Juãw Paxis kaga kumrêx. Jakamã nhũm mẽ hkrã kumrãr kêt nẽ. Mẽ kot Tĩrtũm kapẽr kaga jakamã na pre htem Jejus kapẽr ma nẽ ãm kuma. ³¹ Hãmri nhũm Jejus mẽ kãm:

—E pa mẽ amã mẽ piitã htỳx ri hamaxpêr ã tanhmã mẽ harẽnh to ka mẽ kot amnhĩ nhĩpêx ã mẽ harẽnh ma. ³² Te mẽ kot mẽhprĩre kot amnhĩ nhĩpêx pyrãk. Mẽhprĩrejaja na htem òrkwỳ kapem hije nẽ mẽmoj to amnhĩkati ho hkrĩ. Nẽ tee ri hkwỳjẽ kot amnhĩ nhĩpêx pumu nẽ mẽ kãm:

Kwa na pa mẽ amã gre htã ka mẽ ixkutã anhõkrepõx kêt nẽ. Pa mẽ ja hã mẽ apumu nẽ hpãnhã mẽ amã mẽ htyk jarẽ htã ka mẽ akapri nẽ amỳr kêt nẽ. Kwa mẽ ri ã amnhĩ nhĩpêx anhỹr kêt nẽ.

Anhỹr o axpẽn mã kapẽr. Tã te mẽ ate mẽ urãk. Tĩrtũm kot mẽ awỳr y hã kapẽr xwỳnhjẽ rẽnh tã ka mẽ te mẽhprĩre kot amnhĩ nhĩpêxta pyrã nẽ mẽ ama ãm mẽ ama nẽ mẽ hkõt amnhĩ nhĩpêx kêt nẽ.

³³ —Juãw Paxis na pre mẽ awỳr mō nẽ ixpyrà nẽ apkur mex o ri pa hkêt nẽ. Nẽ ixpyrà nẽ wĩhti ho hkõm kêt nẽ pa. Tã ka mẽ ja hã omu nẽ hkaga nẽ atỳx ri Satanasti nhỹ hã kot tanhmã amnhĩ nhĩpêx to ho pa hã hkamnhĩx nẽ ri harẽnh o ri apa. Hãmri nẽ mẽhprĩre kot amnhĩ nhĩpêx pyrã nẽ hkõt amnhĩ nhĩpêx kêt nẽ. ³⁴ Tã pa Juãw pãnhã mẽ awỳr mō. Nẽ kurom apkati mẽ ixàpkur mex o ri ixpa. Nẽ kurom wĩhti hkwỳ ho ixkõm o ri ixpa. Ka mẽ ja hã ixpumu nẽ atỳx ri ixàpkur rũnh nẽ ixpipãnh o ri ixpa hã ixkamnhĩx nẽ ã axpẽn mã ixto akapêr anhỹr o ri apa. Nẽ mẽ kot

amnhĩ tomnuj xwỳnhjê hkôt ri ixpa hã axpên mã ijarênh o ri apa. A na ka htem axpên mã ijarênh anê. Jao te mê ate Juãw Paxis nhĩpêx pyrã nê ixkaga nê ixkôt amnhĩ nhĩpêx kêt nê. Na hte ã htỳx ri tanhmã mê hamaxpêr to ho mê pa xwỳnhjaja amnhĩ nhĩpêx anhỳr o ri pa.

³⁵ —No tãm ri mê hamaxpêr o mê pa xwỳnhjaja na htem ahpỳnhã Juãw mê wa ixte amnhĩ nhĩpêx ã wa ixpumu nê axpên mã wa ijarênh o: “Nà ahpỳnhã wa kot amnhĩ nhĩpêx tã wa hamê ãm hãmri Tĩrtũm nhỹ hã kapêr jarênh mex o pa. E pu mê wa urak nê Tĩrtũm kôt amnhĩ xunhwỳ.” Anhỳr o axpên mã wa ijarênh o pa. Anê.

Parijew nhõ xwỳnh pê Simãwre jarênh

Matêwre 26.6-13; Makre 14.3-9; Juãw 12.1-8

³⁶ Tã nhũm Parijew nhõ xwỳnh pê Simãwreja amnhĩ nhõrkwỹ hwỳr Jejus mê hkôt mê pa ho pa xwỳnhjê mê kuwỳ. Mê kot kutã apkur kaxyw amnhĩ wỳr mê kuwỳ nhũm mê õrkwỹ hwỳr mra nê mê hwỳr agjê nê apkur kaxyw hkrĩ. ³⁷ Hãmri nhũm mēhõ nija mê hwỳr axà. Na pre hte amnhĩ tomnuj pix o pa. Hãmri nê Jejus õ krĩ hwỳr hpõx nê Simãwre nhõrkwỹ kamã apkur ã harênh ma nê ma hwỳr tē. Mê hkuxwaxà hã à py nê ma hwỳr o tē. ³⁸ Hãmri nê hwỳr axà nê Jejus pumu nê hwỳr tē nê pum xa. Nê tee ri tanhmã kot amnhĩ tomnuj to ho paja mã hamaxpêr nê hpijaam nê hkaprĩ nê mỳr o xa. Hãmri nê Jejus kutã hkõn krã ho tēm nê nhỹ nê no kagô ho hpar go. Hãmri nê amnhĩ krã kĩ ho hpar grã nê kupã hãmri nê hpãnhã mê hkuxwa xà ho kuxwa. Kãm hkĩnh xàj ã hipêx anê. ³⁹ Hãmri nhũm Simãwre tee ri ja hã omu nê hamaxpêr o:

—Tk. Kwa jahti kot amnhĩ tomnuj pix o pa xwỳnh tã mê ixwỳr axà nê ã Jejus nhĩpêx anê nhũm amnhĩ

nê hanor kêt nê. Kêp ãm hãmri Tĩrtũm nhỹ hã kapêr jarênh o pa xwỳnh ronhỹx ja hã omu nê amnhĩ nê hanor kurê kumrêx. Anê.

⁴⁰ Hãmri nhũm Jejus amnhĩ tã hamaxpêr ã omu nê hêx rom kãm kapêr nê kãm:

—E Simãwre. Pa amã awjarê ka inhma. Anê.

Hãmri nhũm kãm:

—Tõe. Mex. Mãmri inhma awjarê pa ama. Anê.

⁴¹ Hãmri nhũm kãm:

—Nà koja mēhõ my wa hamêxkrut. Nhũm hõja mēhõ pê kàxpore ho rax kumrêx nê ho ìpresta. Nhũm hõja ãm kêp ho grire nê ho ìpresta. Hãmri nê wa hamê kàxpore ho hapêx pa. ⁴² Hãmri nê akupỳm kot kêp ho ìpresta xwỳnhnta mã hpãnhã õr kaxyw tee ri amnhĩ kukamã hamaxpêr. Ra kot ho hapêx par jakamã tee ri amnhĩ kukamã hamaxpêr. Tã nhũm kot wa kãm ho ìpresta xwỳnhnta wa hwỳr tē nê wa kãm: “Kwa wa tee ri amnhĩ kukamã ajamaxpêr kêt nê. Na pa ra war ate ixto tewēn ã kagàta kaxõnh pa nhũm ja hapêx. Kot paj axte kãm ijamaxpêr kêt nê. Jakamã wa mãmri ajamakêtkati nê axãmnhĩx ri apa.” Anhỳr o wa kãm kapêr. ã mê ujarênh kot anhỳr. Anê.

Nhũm pre ã Jejus Simãwre mã ujarênh anê. Hãmri nê hã hkukja nê kãm:

—E nhỹ myja koja we kãm ho tewēn xwỳnhnta kĩnh tỳx nê wehe? Anê.

⁴³ Hãmri nhũm kãm:

—Nà kot kêp ho rax nê ho ìpresta xwỳnhnta koja kãm hkĩnh tỳx o hõta jakre. Anê.

Hãmri nhũm kãm:

—Tỳ. Nà ãm hãmri na ka ã harênh anê. ⁴⁴ Tã mãn ka ni kot ã inhĩpêx anhỳr xwỳnhnta pumu. Na ka amnhĩ nhõrkwỹ hwỳr ixwỳ pa axà nom ka inhmã gô hkwỳ pa ho amnhĩ par kuhõnh kêt nê. Tã nhũm nija arom ã inhĩpêx anê nê no kagô ho ixpar

kuhõ nê amnhĩ krã kí ho grà ho nhỹ.

⁴⁵—Nê anhõrkwỹ hwỳr ixarta ã ka ixkahti hkõt inhmýnh nê ixpâr kêt nê. Tã kêt nija arom xatã ixpar pâr o nhỹ. ⁴⁶Nê ate orti ho ixkrã gregrer kêt tã nhũm arom mẽ hkuxwaxà ho ixpar kuxwa ho nhỹ. Mẽhkukwaxà hã kàxpore xohtõ htã nhũm àmnhĩx ho ixpar kuxwa ho nhỹ. ⁴⁷ãm hãmri na pa amã ja jarẽ. Nija kot amnhĩ tomnuj tỳx tã pa ra nê kot amnhĩ tomnuj o ijapêx pa. Ra kot amnhĩ tomnuj tỳx xwýnh ã amnhĩ pumunh jakamã na amnhĩ kaxyw inhmã hamaxpêr pê kãm ixkĩnh nê ã inhĩpêx anê. No ka na ka hte uràk nê amnhĩ tomnuj tỳx o apa htã uràk nê tee ri ja hã amnhĩ pumunh kêt nê. Tã nita kĩnhã ate amnhĩ tomnuj kaga hkêt jakamã na ka ãm amã ixkĩnh greire. Anê.

Nhũm pre ã Jejus Simãwre mã kapêr anê. ⁴⁸⁻⁵⁰Hãmri nê nija mã kapêr nê kãm:

—E kànhmã xa. Ra ate amnhĩ kaxyw inhmã ajamaxpêr jakamã na pa ra ate amnhĩ tomnuj piitã amnhĩ katut kõt rênh pa. Kot paj axte kãm ijamaxpêr kêt nê. Jakamã mãmri ma ajamakêtkati nê axãmnhĩx anhõrkwỹ hwỳr tẽ. Anê.

Hãmri nhũm mẽ kot axpên kutã apkur xwýnhjaja tee ri kot kãm kapêr anhỹrja ã kuma nhũm ja mẽ kãm mex kêt nê. Jakamã nhũm mẽ ri axpên mã harênh o:

—Tk. Kwa mẽhõ na hte ri kot Tirtũm kot amnhĩ nhĩpêx pyràk o amnhĩ nhĩpêx nê mẽ kot amnhĩ tomnuj o hapêx ã amnhĩ jarênh o we ri pahti? Anê.

8

Mênijê hkwý kot Jejus kõt pa hã mẽ harênh

Makre 15.40-41, 16.9

¹Tã nhũm Jejus ma mẽ piitã mẽ kãm Tirtũm kapêr o mẽ ahkre ho ri mẽ hkõt pa. Krĩ rũnh kamã nê krĩ hkryre kamã. Mẽ kot amnhĩ

tomnuj kaga nê Tirtũm kõt amnhĩ xunhwỳr nhũm kot amnhĩ tã mẽ omunh nê mẽ ho hkra kaxyw nhũm ri mẽ hkõt mẽ kãm harênh o pa. Nhũm ý hã mẽ ahkre ho mẽ pa xwýnh pê 12jaja ma hkõt ri pa. ²Nê mẽni hkwýjaja. Na pre ra Jejus mẽ hkwýjê nê mẽkarõmnuti japôj. Nê mẽ hkwýjaja tanhmã mẽ à kute xwýnhjaja nhũm akupým mẽ ho mex. Xwýnhjaja nhũm prem haxwýja ma hkõt ri pa. Hõ pê na pre Marir Matarên nhũm pre ra Jejus nê mẽkarõmnuti ho 7 nê hapôj. ³Nê Joanã. Joanã mjên Kujahti na pre kêp pahikti Eroxo mã mẽ àpênh xwýnhjê krãhtũm. Nê Sujãre. Nê kaxyw mênijê ohtõ nê Jejus kõt tanhmã mẽ ho ajuta hto ho mẽ hkõt pa. Jao mẽ hikàxpore ho mẽmoj japrõ nê ho mẽ kãm mẽ õ nhĩpêx o ri mẽ hkõt pa.

Mẽmo hy hkre xwýnh

Matêwre 13.1-9; Makre 4.1-9

⁴Tã nhũm mẽ ra krĩ piitã rũm Jejus wỳr akuprõ. Jakamã nhũm mẽ ohtõ raxkumrêx nhũm Jejus mẽ kãm ujarênh o nhỹ. No ãm hprĩ hã ujarênh kêt nê. Mẽ kot Tirtũm kapêr mar nê tanhmã hkõt amnhĩ nhĩpêx to nhũm hã kuxi nê mẽ kãm hã ujarênh o nhỹ. ⁵Nê mẽ kãm:

—E mẽ inhma. Koja mẽhõ ma pur mã mõ nê pur kãm mẽmo hy ho ukapêr o ri pa. Nom nhũm piitã amex kãm rôrõk kêt nê. Kwý ahpýnhã nhỹri rôrõk. Hãmri nhũm hkwý aptỳx kãm rôrõk nhũm kuwênhre omu nê hwỳr mra nê hkrêr pa.

⁶—Nê kên kãm hy hkwý rôrõk nê higrõt kutã nojarét nê higrõt pa. No nhũm kamã aptỳx nê kamã kêp pika hkryre jakamã nhũm higrõt nhũm hã myt ahpa nê arĩgro htỳx mẽ nhũm grà pa. Kamã kên nhũm amgo mex kêt jakamã nhũm grà pa.

⁷—Nê mrõnhĩ kamã rôrõk xwýnhja haxwýja higrõt tã no nhũm utĩ kêp amýtã nhũm ô hkêt nê.

⁸ —No hirã kamã pika mex kãm rôrôk xwýnhja. Hãmri hirã kamã rôrôk nê higrôt mex nê piitã ô rax nê. Piitã kamã ô kêp 100. Æ mẽ ujarênh kot anhÿr. E kwa mẽ ix-ujarênh ma nê kãm ajamaxpêr týx rãhã ho ri apa. Anê.

⁹ Nhũm pre ã Jejus mẽ kãm ujarênh anê. Hãmri nhũm hkôt mẽ pa ho mẽ pa xwýnhjaja kuma nê tee ri hkukamã hamaxpêr nê kãm:

—Kwa na pa mẽ ixprĩ hã axu-jarênh kôt mẽmoj pumunh kêt nê. Aprĩ hã mẽ inhmã tanhmã harênh to pa mẽ ixprĩ hã kuma nã? Anê.

¹⁰ Hãmri nhũm mẽ kãm:

—Tõe. Nã kot paj mẽ amã harê. Tĩrtũm kãm mẽ ate aprĩ hã mar prãm jakamã kot paj ixprĩ hã mẽ amã harê. Mẽ kot amnhĩ tomnuj kaga nhũm Tĩrtũm kot ja hã mẽ omunh nê mẽ ho hkra. Ja na pa harê.

—No mũjjaja na mẽ akĩnhã kãm mar prãm nõkati. Jakamã na htem ixujarênh ma nê ãm kuma nê htýx ri pa. Anê.

*Jejus kot prĩ hã mẽmo hy jarênh
Matêwre 13.18-23; Makre 4.13-20*

¹¹ Hãmri nhũm Jejus hkôt mẽ pa ho mẽ pa xwýnhjê mã:

—E kot paj ixprĩ hã mẽ amã mẽmo hy ho ukapêr ã mẽ ujarênh ta jarê ka mẽ inhma.

—Nã mẽmo hyta te kêp Tĩrtũm kapêr pyrãk. Nê ahpÿnhã hy rôrôk ã pikata te kêp ahpÿnhã mẽ kot Tĩrtũm kapêr mar xwýnhjê kot amnhĩ nhĩpêx pyrãk. ¹² Mẽ kot mar xwýnh kwýjaja te kot aptýx kãm hy rôrôk nhũm kuwênh kot hwýr mrar nê hkrêr par xwýnh ta pyrãk. Jao Tĩrtũm kapêr ma nhũm Satanasti te kuwênh kot hy hkrêr parta pyrã nê mẽ kot amnhĩ kaxyw Tĩrtũm kapêr kôt hamaxpêr nê hkôt amnhĩ xunhwýr pymaj tanhmã nê mẽ hkrã hto. Jakamã nhũm mẽ kapêr ma nom ho hamakêtkati tokyx anê

nê axte kãm hamaxpêr nê hkôt amnhĩ nhĩpêx kêt nê.

¹³ —Nê mẽ kot mar xwýnh kwýjaja te kot kênre kamã hkwy rôrôk nê higrôt nê grã par tokyx anhÿr xwýnh ta pyrãk. Jao Tĩrtũm kapêr ma nê hkĩnh nê. Nê kãm mar prãm nê. Tã nhũm mēhō tē nê Tĩrtũm nê tanhmã kãm kapêr to nhũm mẽ kuma nê Tĩrtũm kaga. Te mẽmo hy higrôt nê grã par tokyx anhÿr ta pyrãk.

¹⁴ —Nê mẽ kot mar xwýnh kwýjaja te kot mrônhi kamã hkwy rôrôk nê higrôt nhũm mrônhi kot kêp ãmnãr xwýnh ta pyrãk. Jao kãm Tĩrtũm kapêr mar prãm nê. No ãm mãânên kãm hikukrêx rax nê hikãxpore rax prãm xaj ãm ja pix mã hamaxpêr o pa. Nê gaa nê ra gryk ã axte Tĩrtũm kapêr mã hamaxpêr nê hkôt amnhĩ nhĩpêx kêt nê.

¹⁵ —Nê mẽ kot mar xwýnh kwýjaja te hirã kamã pika mex kãm hy hkwy rôrôk nê higrôt nê ô raxta pyrãk. Nê ixkapêr ma nê amnhĩ krã him hagjênh týx nê ixkôt ri amnhĩ nhĩpêx mex rãhã ho ri pa. Jakamã te ra mẽmo hy hkreta ô rax mex pyrãk. E. Æ ixujarênh kot anhÿr. Anê.

Kanê mẽ guhkrax wa harênh

Makre 4.21-25

¹⁶ Nhũm Jejus arĩ mẽ kãm ujarênh o nhÿ nê mẽ kãm:

—E mẽ inhma. Xã na htem kanê hpôk hãmri nê guhkrax o hpro rý par krak ri unhwý? Nã na htem ã hipêx anhÿr kêt nê. Na htem hpôk nê kýxpê kuhê xã kamã unhwý nhũm hirã mex o kuhê. Nhũm htem ixkrem agjê nê hirã kamã mẽmoj pumunh mex nê. Ja pyrã nê na pa hte mẽ ate inhmar týx kaxyw ixprĩ hã mẽ amã awjarê. ¹⁷ Kormã mẽ ate mẽmoj pumunh nê aprĩ hã mar kêt tã kot kaj mẽ tokyx aprĩ hã omu nê ama. Te mẽmoj kot mẽ apê hpimxur pyrãk tã koja tokyx mẽ amã amnhĩ to amnhĩrit ka mẽ aprĩ hã omunh pa. Te mẽ ate kanê

hpôk kãm aprî hã mêmôj pumunh mexta pyrâk. ¹⁸ Jakamã kêr ka mêmê ixkapêr mar tÿx nê hkôt ajamaxpêr rãhã ho ri apa. Jao ixkapêr piitã mar tÿx nê. Nom kot ka mêmê mar tÿx kêt nê hã ano hkêt pa nê axte kãm ajamaxpêr o apa hkêt nê. Anê.

Jejus kot tanhmã katorxã mêmê htôjê jarênh to hã harênh

Matêwre 12.46-50; Makre 3.31-35; mãânên Eprêw 2.11-12

¹⁹ Nhũm Jejus arî mêmê ahkre ho nhÿ. Rôm nhũm katorxã nê htôjaja nhÿhÿnh hwÿr môn pôj. No nhũm mêmê kot mêmê hã htu rax jakamã nhũm mêmê tee ri hwÿr gjêx kaxyw nê kormã kapôt ã kuhê. ²⁰ Hãmri nhũm mêmêhõja mêmê omu nê Jejus mã mêmê harê nê kãm:

—Kwa Pahihti. Ota ra akatorxã mêmê atôjaja awÿr pôj nê tee ri awÿr gjêx mã. O mÿj mêmê kormã kapôt ã kuhê. Anê.

²¹ Hãmri nhũm mêmê kuma nê mêmê kãm:

—Tõe pa ixkato nê mêmê omu. Inhmã mêmê hapêê. Nom kot kaj mêmê atô Tirtũm kapêr ma nê hkôt amnhÿ xãm nê hkôt amnhÿ nhÿpêx. Hã kot kaj te apê ixtô rÿ ixkatorxã kot amnhÿ nhÿpêx pyrâk o pu mêmê axpên nhÿpêx. Pa te inhmã mêmê hapê pyra nê inhmã mêmê ajapê nê. Anê.

Jejus kot kôk mã kapêr ã harênh

Matêwre 8.23-27; Makre 4.35-41

²² Tã nhũm apkati hõ hã nhũm Jejus himô rax ã rêr kaxyw nojarêr nê hkôt mêmê pa ho mêmê pa xwÿnhjê mã kãm:

—E kot puj mêmê jarãhã ma xarmã mō. Anê.

Hãmri nê mêmê pãr mã gjêx pa nê ma xarmã mō. Garirej rũm kato nê ma xarmã pika hõ hwÿr kormã mō. ²³ Nhũm ra Jejus õtxwa nê pãr kre kamã gõr nê nõ. Pu nhũm kôk apêr tÿx nê nhũm gô axpên tak tÿx nê kãnhmã harî. Nê pãr kre kamã pikapîr rax nhũm pãrta mêmê kãm àr o mō nhũm mêmê tee ri amnhÿ nhÿpêx. No nhũm Jejus arî htÿx gõr nê nõ.

²⁴ Hãmri nhũm mêmê tee ri amnhÿ kukamã hamaxpêr nê kumra nê kãm:

—Kwa Pahihti kãnhmã nhÿ. Kot puj mêmê jarãhã pahtyk pa. Anê.

Hãmri nhũm kãnhmã nhÿ nê kôk mã kapêr nê kãm:

—E. Kwa hãmri anhÿkrê. Anê.

Hãmri nhũm hpinhkrênh par mêmê nhũm gô tãm nõr kurê kumrêx.

²⁵ Hãmri nhũm Jejus hkwyjê hwÿr apkjê nê mêmê kãm:

—Kwa kormã te mêmê ate amnhÿ kaxyw Tirtũm mêmê wa inhmã ajamaxpêr tÿx kêt pyrâk. Anê.

Hãmri nhũm mêmê amnhÿ jaêr pê kot ã amnhÿ nhÿpêx anhÿr ã omu nê no hawênh rũnh nê tee ri axpên pumunh pê hamaxpêr o kuhê nê axpên mã:

—Kokÿÿ. Jejus kêp mêmê panhÿo hkêt. Mêmê pahtô kot pu we te kot amnhÿ nhÿpêx pyra nê we kôk mã pakapêr nhũm we pama anhÿkrê? Nã Jejus mêmê parom àhpumunh tÿx o àhpumunh tÿx. Jakamã na ã anê. Anê.

Jejus kot mêmêhõ nê mêmêkarõmnuti kator ã harênh

Matêwre 8.28-34; Makre 5.1-20

²⁶ Tã nhũm mêmê ra himô nhÿhkjê hã krî pê Geras wÿr rê. Himô nhÿkjê hã na pre pika pê Garirej. Nê Garirej nhÿkjê hã na Gerasja. Jakamã nhũm mêmê ra hwÿr rê. ²⁷⁻²⁹ Hãmri nê pãr kre rũm hapôj nê api nê mra nhũm mêmêhõ myja mêmê kutã tẽ. Na pre ra hwÿr mêmêkarõmnuti hkwyjê agjê nhũm mêmê ÿ hã oprê htÿx nê hkênh nê ri mra. Nê õrkwÿ kamã hkrî hkêt nê. Âm ri kapôt ã pa ho pa. Mêmê htykjê hã pika kamã kên kre kaêx kôt ri pa. Na pre ra krî nhõ xwÿnhjaja xatã tee ri unê nê hkaxpre. Tee ri kãx o ri hkaxpre htã no nhũm amnhÿ nê rênh pa. Nhũm mêmêkarõmnutija tanhmã hkrã hto nhũm kapôt pix ã ri mra. Jakamã nhũm Jejus mêmê pãr rũm hapôj nê api nhũm mêmê omu nê mêmê kutã tẽ nê Jejus kaxpa. Nhũm

amnhĩ wỳr omu nē nē tanhmã mēkarōmnuti mǎ kapēr to. Hāmri nhũm my xoprēja hwỳr tē nē kutã hkõn krã ho tēm nē nhỹ. Hāmri nē kàxpêê amnhĩ tã kãm kapēr. Nom tãm kapēr kêt nē. Mēkarōmnuti nhỹ hã kãm kapēr nē kãm:

—Pa Tirtũm Kra Jejus? Kwa mo kaxyw na ka mē ixwỳr tē? Kwa tanhmã mē ixto hkêt nē. Anē.

³⁰ Hāmri nhũm mē kãm:

—Kwa tanhmã na mē anhĩxi kute? Anē.

Nhũm mē kãm:

—Nà mē ixpê Mēohtôhti. Anē.

Mēkarōmnuti ra kot hwỳr ohtô nē gjêx jakamã na prem ã kãm amnhĩ nhĩxi jarēnh anē. ³¹⁻³² Hāmri nē Jejus mǎ:

—Kwa jahti nē mē ijapôj nē mē kot amnhĩ xà htỳx kamã hamak tũm xà hwỳr mē ixrēnh kêt nē. Hagrô hkwy mũj wỳr mǎn mē ixrê pa mē hpãnhã hwỳr mǎn hagjê nà? Anē.

Hagrôja kii mē kêp amỳm hixêt ã ri apkur o pa nhũm mē ã Jejus mǎ mē hwỳr amnhĩ to hwỳr anē. Hāmri nhũm mē kãm:

—Tôe. Tô mē tãm hwỳr mǎn mra. Anē.

³³ Hāmri nhũm mē kuma nē myta pē hapôj nē ma hagrôja wỳr mrrar kurê kumrêx nē mē kãm gjêx pa. Hāmri nhũm myja akupỳm tãm hkrã. No nhũm hagrôja mēkarōmnuti pymaj amỹra nē axkakhũm nē hprôt nē himô hã krã hixêt ã axpum rôrôk nē gôx kãm mrô nē pikaprãr pa. ³⁴ Hāmri nhũm hagrô jamãr xwỳnhjaja tee ri omu hāmri nē ma mē ô patrãw wỳr akupỳm mē piitã mē kãm harēnh o hprôt nē mra. ³⁵⁻³⁶ Nhũm mē tee ri mē kuma hāmri nē ma kot Jejus pumunh mǎ hwỳr mra nē hkaxpa. Nē kuri myta pumu nhũm ra akupỳm tãm hkrã nē tãm amnhĩ nhĩpêx nē ê kamã mex nē nhỹ. Nhũm mē kot hã omunh xwỳnhjaja mē kãm ujarēnh pa. Nhũm mē kuma nē tee ri amnhĩ

kukamã hamaxpēr o ra kãm ma nē. ³⁷⁻³⁹ Hāmri nē amnhĩ nē Jejus mǎ kapēr nē kãm:

—E kwa mē tokyj ma akupỳm amrar kurê kumrêx. Anē.

Hāmri nhũm mē kuma nē awjanã nē ma akupỳm pàr wỳr mra nē agjê. Nhũm akupỳm mex xwỳnhnta mē hkôt hkrã nom nhũm Jejus kãm:

—Nà kot kaj mē ixkôt amôr kêt nē. Ma akupỳm anhõ krĩ hwỳr mǎn tē nē Tirtũm kot tanhmã akupỳm ato mex to hã mē kãm amnhĩ jarēnh o ri mē hkôt apa. Anē.

Hāmri nhũm kuma nē ma akupỳm krĩm tē nē ri mē kãm Jejus kot tanhmã ho mex to hã harēnh ri mē hkôt pa.

Jejus kot wa ho axkrut nē wa ho mex ã harēnh

Matêwre 9.18-26; Makre 5.21-43

⁴⁰ Tã nhũm Jejus mē ma akupỳm xarmã mō nē rê nē mē kutêp mē pikuprõnh xwỳnhjê pumu. Nhũm mē ra amnhĩ wỳr mē omu nē mē kutêp gô jakãx ã pikuprõnh rax nē. Jakamã nhũm mē mē hwỳr pøj nhũm mē amnhĩ wỳr Jejus pumu nē hkĩnh nē. ⁴¹⁻⁴² Hāmri nhũm Jajti ma hwỳr tē. Ijaew nhõ Tirtũm kapēr o mē ahkre xà hã ixkre jamãr xwỳnh na pre. Nhũm pre hkra ni pyxire. Hã amgrà pē 12. Tã ra kêp à htỳx nē htyk kaxyw nē nō. Hāmri nhũm hipêêxaja tee ri omu hāmri nē Jejus wỳr tē nē kutã hkõnkrã ho tēm nē nhỹ nē ho kuwỳ nē kãm:

—Pa akupỳm mē ixto mex xwỳnh maati. E awỳr na pa tē. Na ra ixkra ixpê htyk kaxyw. Pa tee ri omu nē kaxyw amã ijamaxpēr nē awỳr tē. Kwa ma ixkôt inhõrkwy hwỳr tē nē inhmã omu nē tokyx inhmã ho mex nà? Anē.

Hāmri nhũm kuma nē ma hkôt tē. Nhũm mē ohtô nē wa hkôt pry hã mra nē axpēn nhĩgã nē axpēn kujahêk o hkôt mra. ⁴³ Hāmri nhũm mēhõ nija haxwỳja wa hkôt tē. Na pre hte hkamrô hkryre rãhã ho pa hã ra amgrà kêp 12. Nhũm tôtô tee

ri kot ho mex kaxyw hkane kaprý ho pa. ⁴⁴Jakamã nhũm tee ri amnhĩ kukamã hamaxpër hãmri nê Jejus jarênh ma nê ma mẽ hkôt hwýr htêm kurê kumrêx. Nom nhũm mẽ ohtô rax nê hkôt mör jakamã nhũm mẽ hkaêx kôt hwýr tẽ nê hkatut kôt kêp ê nhîrê kupê. Hãmri nê ãm kêp ê pix kupênh tã akupým mex. ⁴⁵Hãmri nhũm Jejus kot kêp ê kupênh ã amnhĩ tã omunh tã hêx rom mẽ ho hakêx nê mẽ omu nê mẽ kãm:

—Kwa mẽ atô na ka ri amnhĩ kaxyw inhmã ajamaxpër tỳx pẽ ixpê ixê kupê? Anê.

Hãmri nhũm mẽ piitã tee ri axpẽn pumu nê kãm amnhĩ tã aprã. Hãmri nhũm Simãw Pêtre kãm:

—Mẽ kot apê amnrã griã kot ka kêt ri mẽhõ kot apê hkupênh xwýnh ã ri mẽ hkukja. Kwa mãn ãm mẽhõ amarĩ apê hkupê. Anê.

⁴⁶Hãmri nhũm kãm:

—Nã mẽhõja amarĩ hkupênh kêt nê. Na amnhĩ kaxyw inhmã hamaxpër tỳx pẽ ixpê hkupê. Tã ixãhpumunh tỳx xàja kôt na akupým mex. Nom ixte mẽhõ kot ixpê hkupênh xwýnhja pumunh jakamã na pa ixêx rom ã amnhĩ tã ri mẽ hkukjêr anê. Kwa mẽ atô inhmã amnhĩ jarê. Anê.

⁴⁷Hãmri nhũm mẽhõ nita kuma nê tee ri kêp kot amnhĩ to hpimxur prãm kaprý. Hãmri nê hpijaãm kãm hwýr httertet o tẽ nê kutã hkôn krã ho tẽm nê nhỹ nê kãm amnhĩ jarê nê kãm:

—Ma pa na pa inhmã inhmex prãm xàj apê axê kupê. Tã na pa akupým inhmex. Anê.

⁴⁸Hãmri nhũm Jejus kuma nê kãm:

—Tõe. Nà ra ate amnhĩ kaxyw inhmã ajamaxpër tỳx kôt ate ã amnhĩ nhîpêx anhýr jakamã na ka akupým amex. E mãmri aja-makêtkati nê ma akupým tẽ. Anê.

Hãmri nhũm kuma nê hkĩnh nê ma akupým tẽ. ⁴⁹Rôm nhũm Jajti mã àpênh xwýnhjê hõ òrkwý rùm

ma ò patrãw kutã tẽ nê wa hkaxpa nê Jajti mã kãm:

—Kwa na ra apê akra ty. Jakamã mo kaxyw kot ka kêt amnhĩ kôt hwýr Jejus o mō? Kwãr mãmri ma akupým tẽ. Anê.

⁵⁰Hãmri nhũm Jejus kuma nê Jajti mã kãm:

—Kwa tee ri akra hkukamã ajamaxpër kêt nê. Kaxyw inhmã mãn ajamaxpër tỳx nê. Koja te ra apê htyk tã koja akupým amã htír. Anê.

⁵¹⁻⁵³Hãmri nhũm mẽ mō nê òrkwý hwýr pøj nê hwýr axà nê mẽ omu nhũm mẽ ra htyk xwýnhhta ã htu rax nê. Nê omũj ri mur. Hãmri nhũm Jejus mẽ hwýr axà nê mẽ mýr ã mẽ omu nê mẽ kãm:

—Kwa mẽ hãmri amýr kêt nê. Na nireta mẽ apê htyk kêt na ãm gõr nê nõ. Anê.

Hãmri nhũm ra mẽ kot htyk ã omunh mex jakamã kuma nê ãm kuma nê axtem nê ri axpẽn mã hã hpër o axkê. Hãmri nhũm Jejus htyk xwýnhhta wýr hitom wýr àr kaxyw nê amnhĩ kôt Juãw nê Xi-akre nê Pêtre nê kaxyw htyk xwýnh katorxà nê hipêêxàja. Jajê pix na pre amnhĩ kôt mẽ ho agjê. ⁵⁴Hãmri nê htyk xwýnhhta wýr tẽ nê hpa hã kupy nê kãm:

—Pa? Kwa tokyx kãnhmã nhỹ. Anê.

⁵⁵Hãmri nhũm akupým htír nê kãnhmã ýr kurê kumrêx. Hãmri nhũm Jejus mẽ kãm:

—E kwa mẽ tokyx kãm mẽmoj japêr kê kukrê. Mãn ra kãm prãm nê. Anê.

⁵⁶Hãmri nhũm katorxà mẽ hipêêxà wa amnhĩ jaêr pẽ akupým htír kãm omu nê kamã no pyma ho hkĩnh tỳx nê. Hãmri nhũm Jejus wa kãm:

—E wa inhma. Kêr ka wa akupým ixte war amã ho htír ã ri mẽ kãm ijarênh o ri apa hkêt nê. ãm kwarĩ ho kwarĩ. Anê.

9

Jejus kot mẽ ho 12 nẽ ahpÿnhã mẽ rẽnẽ ã harẽnẽ

Matêwre 10.1, 10.5-15; Makre 6.7-13; Rukre 10.1-12; mãânẽn Atre 13.49-50, 18.6

¹⁻² Tã nhũm Jejus hkõt mẽ pa ho mẽ pa xwÿnh pẽ 12jẽ mã kapẽr nẽ mẽ kãm:

—E mẽ amnẽ ixwÿr mra nẽ ixkapẽr ma. Na pa ra mẽ amã ixãhpumunh tÿx xã hkwy gõ. Jakamã kër ka mẽ inhÿ hã ma ri akwÿjẽ hkõt tanhmã mẽ ho mex to ho ri mẽ hkõt apa. Mẽ à xwÿnhjẽ ho mex o ri mẽ hkõt apa. Nẽ mẽ hkwyjẽ nẽ mẽkarõmnuti japõj. Nẽ mẽ piitã mẽ kãm anẽ kẽ mẽ tokyx Tirtũm kõt amnhĩ xunhwÿ kẽ mẽ ho hkra. ³ Nom kër ka mẽ amnhĩ kõt akukrêx ho ohtõ nẽ ri ho apa hkõt nẽ. Nẽ amnhĩ kaxpar xã hã kô ho apa hkõt nẽ. Nẽ kawã htur nẽ ho apa hkõt nẽ. Nẽ amnhĩ kõt axãpkur xã hã anhõ ho apa hkõt nẽ. Rÿ akãxpore rax nẽ ho apa hkõt nẽ. ãm mẽ anhõ kamıs ho pixi nẽ haxã nẽ ri hã apa. Nẽ anhÿ kamã ã ri mẽ hkõt apa anẽ. Kẽ mẽ kot mẽ akapẽr mar xwÿnhjaja tãm mãn mẽ amã mẽ anhõ ho pa.

⁴ —Nẽ kër ka mẽ nhÿri krĩ hõ hwÿr põj nẽ apõx xã kamã mẽhõ nhõrkwÿ kamã hkõt ri apikamẽnẽ tãmtã kurũm akupÿm ajapõj nẽ ma hpãnhã nhãm krĩ hõ hwÿr apa. Nom atÿx ri nhãm mẽ hwÿr amrar nẽ nhãm mẽ hwÿr amrar kêt nẽ.

⁵ —Nẽ koja mẽ nhÿri mẽ akapẽr kaga ka mẽ amnhĩ tã mẽ kamã ama nẽ tokyx mẽ kurũm ajapõj nẽ ma nhãm apa. Nẽ anojarêt nẽ mẽ noo mã akuhẽ nẽ amnhĩ par ã awjagrõ kapĩ. Mẽ kot Tirtũm kaga hã amnhĩ pumunh nhũm Tirtũm kot amnhĩ pyrã nẽ mẽ hkaga hã mẽ kot omunh kaxyw ka mẽ ã mẽ noo mã amnhĩ nhĩpẽx anẽ. Hãmri nẽ ma hpãnhã krĩ hõ hwÿr apa. Anẽ.

⁶ Nhũm pre ã Jejus mẽ kãm mẽ àpẽnẽ ã karõ anẽ. Nhũm mẽ kuma

hãmri nẽ hapõj nẽ ma mẽ hkõt pa. Ma krĩ piitã hkõt akupÿm mẽ à xwÿnhjẽ ho mex nẽ Tirtũm kapẽr o tanhmã mẽ ahkre hto ho ri mẽ hkõt pa.

Pahi Eroxt ee ri kot Jejus kukamã hamaxpẽr ã harẽnẽ

Matêwre 14.1-12; Makre 6.14-29

⁷⁻⁸ Hãmri nhũm pika pẽ Garirej kamã mẽ piitã Jejus jarẽnẽ ma nẽ ahpÿnhã ri tanhmã axpẽn mã harẽnẽ to. Mẽ hkwyjaja kęp finat Juãw Paxis akupÿm htĩr ã ri harẽ. Nhũm mẽ hkwyjaja amnepêm mẽ hkukamã Tirtũm nhÿ hã kapẽr jarẽnẽ xwÿnhjẽ hõ ra akupÿm htĩr ã harẽ. Nhũm mẽ hkwyjaja kęp finat Eris ã axpẽn mã harẽ. Jakamã nhũm pahĩhti Eroxta mẽ kot ahpÿnhã tanhmã ri harẽnẽ toja ma nẽ tee ri hkukamã hamaxpẽr. ⁹ Nẽ hamaxpẽr o:

—Kwa mẽhõ ña hte we ri ã amnhĩ nhĩpẽx anhÿr o pa wehe? Nã finat Juãw Paxis kêt. Ra ixte amnepêm hã ixãmnenh nhũm mẽ kot inhmã mut krãhyr nẽ hpĩr kẽnã. Kwa mẽhõ na hte we ri ã amnhĩ nhĩpẽx anẽ?

Anhÿr o hamaxpẽr hãmri nẽ kãm omunh prãm nẽ.

Jejus kot mẽ ho ohtõ nẽ mẽ kãm mẽ õ hã harẽnẽ

Matêwre 14.13-21; Makre 6.30-44; Juãw 6.1-14

¹⁰ Tã nhũm Jejus nhÿ hã kapẽr o mẽ pa xwÿnhjaja akupÿn hwÿr mran põj nẽ mẽ kot ri tanhmã amnhĩ nhĩpẽx to ho pa hã kãm amnhĩ jarẽ. Hãmri nhũm mẽ kuma nẽ ma krĩ pẽ Pesěj wÿr kormã mẽ o mõ. ¹¹ Hãmri nhũm krĩ hkwy nhõ xwÿnhjaja ra ma mẽ mõr ã mẽ harẽnẽ ma nẽ ohtõ nẽ ma mẽ hkõt mra nẽ nhÿri mẽ hkõt põj. Nhũm Jejus amnhĩ kõt mẽ omu hãmri nẽ tanhmã mẽ ho mex to ho xa. Kõt mẽ à nẽ mẽ pa xwÿnhjaja nhũm akupÿm mẽ ho mex. Hãmri nẽ Tirtũm kapẽr o mẽ ahkre nẽ mẽ kãm:

—E kot kaj mẽ atõ amã amnhĩ tomnuj kaga hprãm xaj Tĩrtũm kõt amnhĩ xãm nhũm amnhĩ tã apumu nẽ ato hkra. Hãmri ka ajamakẽtkati nẽ amex nẽ axãmnhĩx ri apa.

Anhỹr o mẽ kãm kapẽr pẽ mẽ ahkre ho xa.

¹² Tã nhũm myt àr kaxyw nhũm Jejus nhỹ hã mẽ ahkre ho mẽ pa xwỹnhjẽ pẽ 12jaja hwỹr mra nẽ kãm:

—Kwa na ra kamàt o mõ. Mẽ hano kê mẽ amnhĩ to krĩ hõ japẽr nẽ tokyx amnhĩm mẽmoj japrõ nẽ kuku nẽ hikwỹ nẽ gõr. Mo mẽ panhõ? ãm jar kapõt pix kẽnã. Anẽ.

¹³⁻¹⁴ Hãmri nhũm mẽ kuma nẽ mẽ kãm:

—Kwa ka mẽ kamjaja mẽ kãm mẽmoj gõ kê mẽ kuku. Anẽ.

Nhũm mẽ ohtõ rax nẽ mẽ hkõt mra. Mẽmyjaja kęp 5.000 nẽ kaxyw mẽ hprõ nẽ mẽ hkrajaja. Jakamã nhũm mẽ kęp 12jaja Jejus kot ã mẽ kãm kapẽr anhỹrja ma nẽ tee ri mẽ hkukamã hamaxpẽr nẽ kãm:

—Kwa na mo mẽ panhõ rax? Mẽ panhõ pãwti kęp sĩk nẽ kaxyw tep grã axkrutre kẽnã kot kêt we mẽ piitã mẽ hipẽx pa. Xà kot paj mẽ ma mra nẽ nhỹri mẽ kãm mẽ apkur xà japrõ nhũm mẽ kuku? Anẽ.

Hãmri nhũm mẽ kãm:

—Nã pu mẽ kãm mẽmoj japrõr kêt nẽ. Mẽ panhõta kot puj mẽ kãm ho anhrã. E mẽ kãm anẽ kê mẽ ahpỹnhã ri hije nẽ hkrĩ nẽ apku. Anẽ.

¹⁵ Hãmri nhũm mẽ kuma nẽ mẽ kãm anẽ nhũm mẽ piitã hkrĩ pa.

¹⁶ Hãmri nhũm Jejus pãwti mẽ tepta jamỹ nẽ kãnhmã kaxkwa hwỹr rĩt nẽ kãnhmã kupẽ nẽ Tĩrtũm mã harẽ nẽ kãm:

—Pa Papaj? Apẽ mẽ inhmã mẽ inhõ xwỹnh jakamã amex o amex. Anẽ.

Hãmri nẽ mẽ kãm ho hkry hpa nẽ hkõt mẽ pa ho mẽ pa xwỹnhjẽ mã kugõ nhũm mẽ ô ri ho xa nẽ ho mẽ hipẽx par kumrẽx. ¹⁷ Nhũm mẽ piitã apkur mex o hkrĩ. Mẽõja mẽ kęp grĩre htã nhũm Jejus tanhmã

mẽ kãm ho rax to nhũm mẽ ohtõ rax tã piitã kuku nẽ ho õhy htu hpa. Nhũm arĩ mẽõ jakrẽx prã nhũm Jejus kõt mẽ pa ho mẽ pa xwỹnhjaja akupỹm hakrẽx o pikuprõnh pa nẽ ho kawà ho 12 nẽ ho nýt pa.

Jejus kot amnhĩ tã hkõt mẽ pa xwỹnhjẽ kukjẽr ã harẽnh

Matẽwre 16.13-19; Makre 8.27-29

¹⁸ Tã nhũm arĩgro hõ hã nhũm Jejus nhỹri ahte Tĩrtũm mã amnhĩ jarẽnh o nhỹ nhũm hkõt ri mẽ pa ho mẽ pa xwỹnhjaja ma hwỹr mra. Hãmri nhũm amnhĩ wỹr mẽ omu nẽ amnhĩ tã tanhmã mẽ hkukjẽr to nẽ mẽ kãm:

—Kwa mẽ inhmã mẽmoj jarẽ. Tanhmã na htem ahpỹnhã axpẽn mã ijarẽnh to wehe? Anẽ.

¹⁹ Hãmri nhũm mẽ kãm:

—Nã na htem ahpỹnhã tanhmã ajarẽnh to. Na hte kamã mẽ hkwyjaja ato finat Juãw Paxis ã ajarẽ. Nhũm kamã mẽ hkwyjaja ato finat Eris ã ajarẽ nhũm mẽ hkwyjaja tõhã apẽ Tĩrtũm nhỹ hã kapẽr jarẽnh xwỹnhjẽ hõ ra akupỹm htũr ã ajarẽ. ã na htem ahpỹnhã ajarẽnh anẽ. Anẽ.

²⁰ Hãmri nhũm mẽ kuma nẽ mẽ kãm:

—No mẽ kajaja? Ixpẽ mẽhõ hã na ka htem ixkamnhĩx? Anẽ.

Hãmri nhũm Simãw Pẽtre kãm:

—Nã mẽ pajaja na pa htem apẽ Tĩrtũm kot mẽ ixkaxyw axãm nẽ mẽ ixwỹr amẽn xwỹnh ã ajarẽ. Nẽ apẽ mẽ ixpiitã mẽ inhõ Pahi Maati hã ajarẽ. ã na pa htem ajarẽnh anẽ. Anẽ.

²¹ Hãmri nhũm kuma nẽ mẽ kãm:

—Tỹ. Nã ãm hãmri na ka htem ã ijarẽnh anẽ. ã ixte anhỹr kẽnã. Nom kêr ka mẽ inhmã kumrẽx. Kêr ka mẽ kormã ã akwỹjẽ mã ijarẽnh anhỹr o ri apa hkêt nẽ. Anẽ.

Jejus kot amnhĩ kukamã amnhĩ jarẽnh

Matẽwre 16.21; Makre 8.31-33

²² Nhũm Jejus arĩ hkõt mẽ pa ho pa xwỹnhjẽ mã kapẽr nẽ hprĩ hã

tanhmã mẽ kãm amnhĩ jarênh to nê mẽ kãm:

—Nà ãm hãmri na Simãw Pêtre ijarê. Mẽ kajaja ra mẽ ate ja hã ixpumunh mex. No mẽ pahkwýjaja na mẽ akĩnhã mẽ kãm ja hã ijarênh mar nê ja hã ixpumunh prãm kêt. Ijaew pigêtjaja nê Tirtùm kapêr tùm o mẽ ahkre o mẽ pa xwýnhjaja nê patre krãhtùmjaja mẽ kãm ja hã ixpumunh prãm kêt. Jakamã koja mẽ nhýrmã ixpynê nê ixtak rax nê. Hãmri nê xpi. Nom kot paj ixyk ã apkati axkrunêpxi nhùm Tirtùm akupým ixto ixtir. Anê.

Jeus krajaja tanhmã kot amnhĩ nhĩpêx to hã mẽ harênh

Matêwre 10.31, 16.24-28; Makre 8.34-9.1; Rukre 14.25-33; Juãw 12.24-26; mããnên Karatas 5.24; Piripos 2.4; Wam Pêtre 4.1-2; Apokarip 2.10-12

²³ Nhùm pre ã Jeus amnhĩ kukamã hkôt mẽ pa ho mẽ pa xwýnhjê mã amnhĩ jarênh anê hãmri nê hpãnhã mẽ kot mar o kuhê xwýnh piitã mẽ kãm kapêr nê mẽ kãm:

—E kot ka mẽ atõ ate ixkôt amnhĩ xãm ã amnhĩ jarê hãmri nê mããnên ã amnhĩ jarênh anê nê amnhĩ jarênh o: “Jeus kêp inhõ Pahihti jakamã kot paj kapêr kôt pix mã amnhĩ nhĩpêx rãhã ho ri ixa. Kwãr ixkwýjaja tanhmã hã inhĩpêx to.” Anhýr o apkati mẽ ã amnhĩ jarênh anê.

²⁴ —Koja mẽ ixtã mẽ atõx pĩ rý tanhmã mẽ atõ hto ka ty. Tã koja akaxwýnh ma inhõ krĩ mex wýr àpir kurê kumrêx. Hãmri nê kamã atir tùm nê amex rãhã apa ho apa. Nom kot kaj mẽ jar atir prãm xaj ixkaga hãmri nê hwýr axàpir kêt nê.

²⁵ —Nê koja mēhõ hikukrêx rax gryk ã Tirtùm kaga. Hã koja nhýrmã ty nê ý kamã kuwy hwýr ma mō nê amnhĩ kôt hikukrêx õ hpyr nê o mōr kêt nê. Koja tee ri kuwy hwýr mōr pymaj amnhĩ

nê hikukrêx rax o amnhĩ pãnhã amnhĩrer prãm kaprý.

²⁶ —Nê koja mēhõ ixte mẽ ahkre hã inhma nhùm ja kêp omnuy nhùm ixkaga jarê. Hã kot paj nhýrmã akupýn mẽ ato amnhĩptar kaxyw akupýn wrý nê amnhĩ xwar kot ixkaga xwýnhhta kaga. ãm hãmri na pa ã mẽ amã amnhĩ jarênh anê. Kot paj nhýrmã man akupýn inhõ Papaj nhý hã ixte mẽ ho amnhĩptar kaxyw akupýn wrý. Nhùm kapêr o mẽ wrýk xwýnhjaja man ixkôt wrý. Pa mẽ wrý hãmri nê mẽ kot ixkaga xwýnhjaja pa amnhĩ pyrã nê mẽ hkaga. ²⁷ ãm hãmri na pa ã mẽ amã amnhĩ jarênh anê. Kot paj nhýrmã akupýn ixte mẽ ato amnhĩptar kaxyw mẽ awýr wrý. Tã kot kaj mẽ akwýjaja kormã atir ri ja kukamã tanhmã ixte amnhĩ nhĩpêx to hã ixpumu. Anê.

Jeus kot kên prêk nhũmõk ã hirã kamã ãm ã harênh

Matêwre 17.1-8; Makre 9.2-8; mããnên Sikũn Pêtre 1.16-18

²⁸ Tã nhùm semãnja hapêx nhùm Jeus Simãw Pêtre nê Xiakre nê Juãw wa mẽ kãm kapêr nê mẽ kãm:

—E pu mẽ ma hixêt prêk mũj wýr mō nê hwýr api nê himõk ã Tirtùm mã amnhĩ jarê. Anê.

Hãmri nê ma amnhĩ kôt hwýr mẽ o mō nê hwýr mẽ ho api. ²⁹⁻³² Hãmri nhùm Jeus Tirtùm mã amnhĩ jarênh o xa. Nom nhùm hkôt hixêt wýr mẽ mōr xwýnhjaja õtxwa htýx nê ra gõr nê hikwý. Pu nhùm Jeus axtem hkuk nê xa. Nê ê haka htýx nê xa. Hãmri nhùm ja wa kaxkwa rùm wrý nê kuri kãm kapêr o xa. Finat Mojes mẽ finat Erisja wa kuri kãm kapêr o xa. Na pre ra annepêm Tirtùm amnhĩ wýr wa ho api. Tã nhùm wa ra akupýn wrý nê Jeus mã kapêr o xa. Mẽ hpimràatã hirã htýx kãm axpên mã kapêr o kuhê. Jeus kormã krĩ pè Jerujarê kapem mẽ kot hpĩr kêt ri nhùm wa mẽ axpên mã

htyk kukamã harênh o kuhê. Nhũm wa kãm:

—Nã Tirtũm jamaxpêr xã hkôt kot kaj ã amnhĩ nhĩpêx anê.

Anhỹr o Jejus tyk kukamã kãm hamaxpêr o hihtỹx o wa xa.

Rôm nhũm mẽ ôt xwỹnhjaja hkrã hapôj nê tee ri Jejus pumu. Nhũm mex kumrêx nê hirã htỹx kãm xa nhũm mẽ omu nê kuri wa ãm xwỹnhta wa omu. ³³ Hãmri nhũm Mojes mẽ Eris wa ra akupỹm no-jarêr nhũm Simãw Pêtre tee ri ja hã wa omu nê Jejus mã kãm:

—Kwa Pahĩhti. Nã ãm hãmri na pu mẽ amnê mō. Kwa pu mẽ kritpêm jar axkamê nê tokyx pano-jarêr kêt nê. Pa mẽ amã pô nhĩrõnh o axkrunêpxi nê hipêx. Amã hõ nhĩpêx nê Mojes mã hõ nhĩpêx nê Eris mã hõ nhĩpêx ka mẽ kamã akrĩ. E kwa pa mẽ amã ho anê nã? Anê.

Nhũm amnhĩ krã hkôt ã kãm kapêr anê. ³⁴ Hãmri nê kormã kãm kapêr rôm nhũm kakrã jaka tỹxja wrỹ nê mẽ hkunor nhũm wa mẽ kamã kuhê. Hãmri nhũm Simãw Pêtre mẽ Juãw mẽ Xiakreja mẽ tee ri kakrã kot amnhĩ nhĩpêx ã omu nê kãm ma nê. ³⁵ Hãmri nhũm kakrã kamã Tirtũm mẽ kãm kapêr nê mẽ kãm:

—E ota Ixkra xa. Mẽ ate kamã ajamak o apa xwỹnhta na. Inhmã hapêê. Kêr ka mẽ ãm tapxipix kapêr mar tỹx o ri apa. Anê.

³⁶ Hãmri nhũm mẽ kuma nê kãnhmã rĩt nê ãm Jejus pix pumu nhũm ahte xa. Nhũm kuri wa ãm xwỹnhta wa ra ma akupỹm api nhũm mẽ Jejus pix pumu.

Mẽ tapxipixjaja na prem ã Jejus kot amnhĩ nhĩpêx anhỹr ã omu nom taxy kormã nhãm hkwỹjê mã harênh kêt nê. ãm axpên pix mã harênh pê hkukamã hamaxpêr o ri Jejus kôt pa.

Jejus kot mẽhõ nê mẽkarõmnuti janor ã harênh

Matêwre 17.14-21; Makre 9.14-29

³⁷ Tã nhũm apkati nhũm mẽ ma akupỹm ahparmã hkwỹjê hwỹr

wrỹk o mō. Nê mẽ hwỹr hpôx o mō nhũm mẽ ra mẽ kutêp pikuprõnh rax nê kuhê. ³⁸ Hãmri nhũm mẽhõ myja amnhĩ wỹr mẽ omu nê mẽ kutã tẽ nê mẽ hkaxpa nê Jejus pumu nê kãm:

—Pa Jejus. Kwa ixkamã axukapri nê inhmã ixkra ho mex. ãm ixpê pyxire. ³⁹ Na hte mẽkarõmnuti xatã ixpê tanhmã ho nhũm y hã amỹra nê mra nê rôrôk nê hakwa jamrô ho hikwỹ nhũm tokyx kãm urer kêt nê. Nhũm ra ixpê homnuj tỹx nê. ⁴⁰ Hãmri pa akôt mẽ pa ho mẽ pa xwỹnhjê hwỹr o tẽ nhũm mẽ kot inhmã ho mex kaxyw tee ri tanhmã ho hkapry. Anê.

⁴¹ Hãmri nhũm kuma nê hkôt mẽ pa ho pa xwỹnhjê mã kãm:

—Hêxta waa nê. Na ka mẽ ra ixte Tirtũm nhỹ hã mẽ ho mex ã ixpumunh o ixkôt apa ryy tã kormã ixpyrã nê ã mẽ hipêx anhỹr kêt nê. Mãn ka mẽ kormã mẽ kaxyw Tirtũm kôt ajamaxpêr tỹx kêt nê. Anê.

Hãmri nê myta mã kãm:

—E amnê ixwỹr akra ho tẽ pa inhno ho omu. Anê.

⁴² Hãmri nhũm hwỹr o tẽ nhũm mẽkarõmnuti axte kêp ho pika kura nhũm amỹra nê tẽm nê nō. Hãmri nhũm Jejus omu nê nê mẽkarõmnuti kator nhũm akupỹm mex nê kãnhmã nhỹ. Hãmri nhũm akupỹm hipêêxã mã kugō. ⁴³ Hãmri nhũm mẽ amnhĩ jaêr pê Jejus kot ã hipêx anhỹrja ã omu nê ri axpên mã harênh o:

—Kokỹy. Hêxta waa nê. Pêr ãm Tirtũmja ãm ahpumunh o ahpumunh. Anê.

Jejus kot htyk kukamã amnhĩ jarênh

Matêwre 17.22-23; Makre 9.30-32

⁴⁴ Hãmri nhũm Jejus hkôt mẽ pa ho mẽ pa xwỹnhjê mã kãm:

—E kot paj mẽ amã tanhmã amnhĩ jarênh to ka mẽ inhar tỹx nê. Na pa pre mẽ ate aa mẽmoj pumunh kêt kwỹ ho anhỹr o ixpa

pix kaxyw mẽ awỳr ixwryk kêt nê. Koja mẽ tokyx mẽ kãm ixtã amỳnê nhũm mẽ ixpĩ. E kwa kêr ka mẽ ja ma na nê hã anohỳx nê ho apa. Anê.

⁴⁵ Hãmri nhũm mẽ tee ri kot ã amnhĩ jarênh anhỳrja ma nê axpên mã:

—Kwa mo na pêr ri ã amnhĩ jarênh anê? Kêp mẽ panhõ Pahi Maati hã kot amnhĩ jarênh kênã kot kêt mẽhõ kupĩ.

Anhỳr o axpên mã ri harênh o kuhê. Hãmri nê mẽ kãm ã kot amnhĩ jarênh anhỳrja mar prãm kêt jakamã hprĩ hã tanhmã hã hkukjêr to hkêt nê. Âm akryk mar o kuhê.

Mẽ kot amnhĩ to rũnh xwỳnhjê jarênh

Matêwre 18.1-5; Makre 9.33-37; Rukre 22.24-27; määnên Piriapos 2.3-9; Wam Pêtre 5.5

⁴⁶ Tã nhũm Jejus kôt mẽ pa ho mẽ pa xwỳnhjaja tanhmã amnhĩ kukamã hamaxpêr to hãmri nê axpên mã:

—Kwa mẽ pahtõ kot puj we nhỹrmã pahpê pahi nê mẽ ho amnhĩptàr rax o pahkwỳ jakre? Anê.

Hãmri nê ja hã axpên kukjêr o Jejus kôt mỗ nê axpên mã: “Nà pa.” Nhũm mẽ hkwỳja: “Nà kêt pa.” Anhỳr o hkôt mỗ. ⁴⁷ Hãmri nhũm Jejus mẽ kuma nê mẽ hamaxpêr kôt mẽ omu. Hãmri nê xa nê amnhĩ wỳr mẽhprĩjê mã hpa ho apê nhũm hwỳr tẽ nê kuri xa. ⁴⁸ Hãmri nhũm Jejus hkôt mẽ pa ho pa xwỳnhjê mã tanhmã harênh to nê mẽ kãm:

—E mẽ inhma. Kêr ka mẽ apê pahi pyrãk o tanhmã amnhĩ jarênh to ho ri apa hkêt nê. Âm te amarĩ ri mẽ apa pyrãk o amnhĩ nhĩpêx o ri apa. Jao nhỹri mẽhprĩre hõ pumu nê kamã axukaprĩ ho kãm mẽmoj tanhmã ho rỳ kãm mẽmoj gõ. Hãmri nê te pa ate tanhmã ixto mex to pyrãk o amnhĩ nhĩpêx. Nê kot ka mẽ atõ pa tanhmã ixto mex to nê te ate Tirtũm tanhmã ho mex to pyrãk o amnhĩ nhĩpêx. Kot kaj

mẽ ã amnhĩ nhĩpêx anhỳr o ri apa nhũm Tirtũm ja hã mẽ apumu nê mẽ ate amnhĩ to rũnh kêt tã nhũm tãm mẽ ate amnhĩ to rũnh xwỳnh ã mẽ ajarê. E kot kaj mẽ amã amnhĩ to rũnh prãm nê ã amnhĩ nhĩpêx anhỳr o ri apa. Anê.

Mêhõ kot Jejus nhỹ hã tanhmã amnhĩ nhĩpêx to hã harênh

Makre 9.38-41

⁴⁹ Hãmri nhũm Jejus kôt mẽ pa ho pa xwỳnhjê hõ pê Juãwja nhỹhỹnh hwỳr hpõx o tẽ nê kãm:

—Kwa Pahihti. O mỳj mẽhõ kêp mẽ pahkwỳ hkêt tã anhĩxi jarênh kôt mẽ nê mẽkarõmnuti janor o pa. Pa mẽ tee ri kot ã amnhĩ nhĩpêx anhỳr ã omu nê nê kãm ixkapêr. Kêp mẽ pahkwỳ hkêt kênã kot kêt ã mẽ hanor anhỳr o pa. Anê.

⁵⁰ Hãmri nhũm kuma nê kãm:

—Kwa nà ja nê tanhmã kãm nê hkêt nê. Koja mẽhõ mẽ pahkwỳm ri tanhmã mẽ ahkre hto hkêt nê hãmri nê kêp mẽ panhĩõõ. Ra mẽ pahkôt kot amnhĩ nhĩpêx o pa mã kênã. Jakamã kwa mẽ ja nê tanhmã kãm akapêr to hkêt nê. Kwãr mãmri ã amnhĩ nhĩpêx anhỳr o ri pa. Ja mex kênã. Anê.

Samar nhõ xwỳnhjaja kot Jejus kaga hã mẽ harênh

Atre 8.14-15

⁵¹ Hãmri nhũm Jejus akupỳm kaxkwa hwỳr àpir kaxyw ra hwỳr apkati grêre ho mõi jakamã nhũm hamaxpêr o:

—E pa ma akupỳm Jerujarê hwỳr mỗ. Nà kot paj anê. Mẽ kot kamã tanhmã ixto mã tã kot paj ma akupỳm mẽ hwỳr mỗ. Anê.

⁵² Hãmri nê amnhĩ kukamã mẽ hkwỳjê rê nhũm mẽ ma mẽ hkukamã Samar nhõ krĩ kamã nhỹri mẽ kot amnhĩm hikranh xà japêr o mỗ. ⁵³ Nom nhũm Samar nhõ xwỳnhjaja kêp Jerujarê nhõ xwỳnhjê hprãm nõkati jakamã Jerujarê hwỳr mõi ã mẽ harênh ma nê amnhĩ nê mẽ hkurê. ⁵⁴ Hãmri nhũm mẽ tee ri amnhĩ tã mẽ kuma

ně awjanā ně akupŷm Jejus wŷr mra ně kām mẽ harĕ. Hāmri nhŷm Juāw mẽ Xiakre wa mẽ harĕnh ma ně mẽ kamā gryk ně ně Jejus mā:

—Kwa Pahihti. Nà na mẽ axtem ně amnhĩ ně mẽ pahkurĕ. Jakamā e kwa pu mẽ kaxkwa rūm mẽ hipy kuwy hpòk kwŷ rĕ kĕ mẽ hkaxàr pa nà? Anĕ.

⁵⁵ Hāmri nhŷm wa kuma ně wa kām:

—Tk. Kwa nà wa ajamaxpĕrja mex kĕt. Pu mẽ ā ri mẽ hipĕx anhŷr kĕt ně. Koja Tirtŷm kām ja ho anhŷr prām ně rĭ tām tanhmā mẽ ho. No mẽ papajaja pu mẽ ri mẽ kamā pagryk xà tanhmā mẽ hipĕx to hkĕt ně. Pu mẽ ā mẽ hipĕx anĕ ně ra amnhĩ tomnuj tŷx ně. Kwa wa ri ā ajamaxpĕr anhŷr kĕt ně. Anĕ.

⁵⁶ Hāmri ně mẽ ma Samar rūm hapòj ně hpānhā nhām krĭ hō hwŷr pa.

Mĕ hkwyjaja kām Jejus kòt pa hprām ā mẽ harĕnh

Matĕwre 8.18-22

⁵⁷ Tā nhŷm Jejus mẽ kormā mōr ri nhŷm mẽhōja hwŷr tĕ ně kām:

—Pa Jejus? E kot paj ma akòt ixpa ho ixpa. Anĕ.

⁵⁸ Hāmri nhŷm kuma ně kām:

—Ko ka mā. Kam ně rĭ ma ixkòt ri apa ho apa. Nom kĕr ka inhmar kumrĕx ně rĭ kormā ixkòt apa. Na hte xore pika hkre kamā hikwŷ xà. Nĕ kuwĕnhre pĭ nhĭmòk ā hikwŷ xà. No pa na Tirtŷm kot mẽ awŷr inhmĕnh xwŷnh tā jajĕ hkĭnhā inhòrkwyĭ hkĕt. Na pa hte ām nhām krĭ hō hwŷr ixpa ně nhām ixpa. Tā xà kot kaj ixpyrà ně ā amnhĩ nhĭpĕx anhŷr o ri apa nà? Anĕ.

⁵⁹ Nhŷm pre ā kām kapĕr anĕ hāmri ně nhām mẽhōja wŷr apkjĕ ně kām:

—Pa? No ka? Xà kot ka ma ixkòt apa ho apa nà? Anĕ.

Hāmri nhŷm kām:

—Tŷ no ām kormā. Koja nhŷrmā inhĭpĕxàja tanhmā amnhĩ to ně ty mām. Pa haxà hāmri ně rĭ kormā ma akòt ixpa ho ixpa. Anĕ.

⁶⁰ Hāmri nhŷm Jejus kuma ně kām:

—Kwa nà ri ā ajamaxpĕr anhŷr kĕt ně. Ma ixkòt apa ho apa kurĕ kumrĕx. Kĕ mẽmoj ano kupyr rŷ inhnĕ apĕ amnàr kĕt ně. Kwār mẽ htĭr tŷm ně mẽ pa hkĕt mā xwŷnhjaja mām axwakre kamā amā anhĭpĕxà jamār o pa nhŷm nhŷrmā ty kĕ mẽ amā haxà. Ka māmri ma Tirtŷm kapĕr o mẽ ahkre ho ri mẽ hkòt apa. Kĕ mẽ ama ně mẽ hkwyjaja hkòt amnhĩ xunhwŷ nhŷm mẽ ho hkra. Anĕ.

⁶¹ Nhŷm pre ā kām kapĕr anĕ hāmri nhŷm nhām mẽhō myja haxwŷja hwŷr tĕ ně kām:

—E. Pa kot pa ma akòt ri ixpa ho ixpa. Nom kormā. Pa ma akupŷm tĕ ně ixkwŷjĕ mā amnhĩ jarĕ ně tanhmā amnhĩ to hpa mām. Hāmri ně mẽmo arĭgro hā rĭ kormā ma akòt ixpa ho ixpa. Anĕ.

⁶² Hāmri nhŷm tee ri kuma ně kām:

—Kwa nà. Kot kaj ā ajamaxpĕr anĕ hāmri ně ixkòt apa htā te amnhĩ katut kòt arĭt rāhā ho ri apa pyràk o amnhĩ nhĭpĕx. Kwa ā ajamaxpĕr anhŷr kĕt ně ma ixkòt apa kurĕ kumrĕx. Anĕ.

10

Jejus kot mẽ hwŷr mẽ kĕp 72 rĕnh ā harĕnh

Matĕwre 10.1, 10.5-15; Makre 6.7-13; Rukre 9.1-6, 9.10-11; māmĕn Atre 13.50-51, 18.6

¹ Tā nhŷm Jejus axte amnhĩ kaxyw mẽ ho 72 ně mẽ kurĕ. Hāmri ně mẽ ho axkrut kapĕn ně ma nhŷhŷm krĭ hkwyĭ hkòt amnhĩ kukamā mẽ kurĕ. Mĕ kot mẽ hkòt ri Tirtŷm kapĕr o mẽ ahkre ho pa kaxyw. ² Hāmri ně mẽ kām:

—Na mẽ ohtò rax ně kormā Tirtŷm kapĕr mar kĕt ně. No ām kormā mẽ ate mẽ kām harĕnh o apa kaxyw mẽ agrĕre. Te pur kām haròj kamrĕk pa ně ām tā no ām kaxyw hikĕnh xwŷnh grĕre pyràk. Jakamā

kwa mẽ ho Tirtũm wỳ kê axte mẽ kaxyw mẽ hkwỳjê rê.

³—E kot paj ma mẽ hwỳr mẽ arẽ. Ma mẽ hkõt mẽ ate Tirtũm kapẽr o mẽ ahkre ho ri apa kaxyw. Jakamã kot kaj mẽ te ate ôwêhti kot mry xoprẽ hwỳr amnhĩ to mrrar nhũm kot hkwỳ hpar pyræk o amnhĩ nhĩpêx. Koja mẽ hkwỳjaja mẽ ate mẽ ahkre ma nhũm ja mẽ kêp omnuj nẽ nhũm mẽ hã tanhmã mẽ anhĩpêx to. Tã kêr ka mẽ tee ri amnhĩ kukamã ajamaxpẽr nẽ amã mẽ uma hkêt nẽ.

⁴—Nẽ kêr ka mẽ hwỳr anojarêt nẽ amnhĩ kõt amrykà rỳ akawà rỳ aparkà hõ ho apa hkêt nẽ. Âm anhỹ kamã ma mẽ hwỳr apa. Nẽ mẽ hwỳr mra nhũm mẽ nhỹri pry hã mẽ atõ kaxpa nẽ amã kapẽr o xa ka wa axpẽn mã akapẽr ry hkêt nẽ. Anojarêt kãm kãm akapẽr krãnre nẽ mẽ hakre nẽ ma krĩm apa.

⁵—Nẽ kêr ka mẽ hwỳr pøj nẽ nhỹri mẽ ôrkwỹ hwỳr agjê nẽ mẽ kãm: “Xà kot paj mẽ ato Tirtũm wỳ kê mẽ ato mex nẽ ka mẽ ajamakêtkati nẽ ri apa?” Anẽ. ⁶Hãmri nhũm mẽ ama nhũm ja mẽ kãm mex japêr nhũm mẽ hkĩnh nẽ amã: “y kam nẽ mãmrĩ mẽ ixto awỳ.” Anẽ. Hãmri ka mẽ ama nẽ tanhmã mẽ ho Tirtũm wỳr to. No koja mẽ apê ja kaga ka mẽ ho hwỳr kêt nẽ.

⁷—Nẽ kêr ka mẽ nhỹri mẽ ôrkwỹ kamã mẽ hwỳr pøj hãmri nẽ mẽ hkõt ri apikamênh tãmtã nẽ akupỹm mẽ kurũm ajapøj nẽ ma hpãnhã krĩ hõ hwỳr apa. Nẽ mẽ axãmnhĩx mẽ kuri axàpkur o ri apa. Mẽmoj to akõm o ri apa. Ra mẽ ate mẽ ho mex pê mẽ kãm Tirtũm kapẽr o mẽ ahkre ho apa kênã. Jakamã kwâr mẽ mãmrĩ amnhĩ pãnhã mẽ amã mẽ axàpkur xà gõ ka mẽ kuri mẽ apku.

⁸—Nẽ kêr ka mẽ nhỹri mẽ hwỳr pøj nhũm mẽ ato mex nẽ. Nẽ mẽ amã mẽmo mẽ apkur xà gõ ka mẽ mãmrĩ axãmnhĩx aku. Aa kormã mẽ

ate mẽmojta kur kêt tã mãmrĩ ajamakêtkati nẽ aku. No tee ri amnhĩ kukamã tanhmã ajamaxpẽr to hkêt nẽ.

⁹—Nẽ kêr ka mẽ ã mẽ kãm akapẽr anẽ nẽ mẽ kãm: “Tirtũm kãm mẽ ato hkra hprãm. Na hte amnhĩ wỳr mẽ awỳ.” Anẽ hãmri nẽ akupỹm mẽ kãm mẽ à xwỳnhjê ho mex. ã kot kaj mẽ mẽ kãm amnhĩ nhĩpêx anhỹr o ri mẽ hkõt apa.

¹⁰—Nẽ kêr ka mẽ nhỹri mẽ hwỳr pøj nhũm mẽ âm mẽ apumu nẽ amnhĩ nhõrkwỹ hwỳr mẽ awỳr kêt japêr. Hãmri ka mẽ tee ri amnhĩ tã mẽ omu hãmri nẽ ra ma nhãm apa kaxyw. ¹¹Hãmri nẽ anojarêt nẽ mẽ kãm: “E mẽ inhma, Tirtũm kot mẽ pahwỳr mênh xwỳnhhta na mẽ awỳr wa inhmẽ pa wa mẽ awỳr mõ. Wa ixte Tirtũm kapẽr o mẽ ajahkre kaxyw. Kãm mẽ ato hkra hprãm nhũm wa ixte mẽ amã harênh kaxyw na pa pre wa ã mẽ awỳr inhmõr anẽ. Tã ka mẽ harênh ma nẽ wa ixkaga. Jakamã kot paj wa jar mẽ anhõ krĩ kamã amnhĩ par kà hã awjagrõ kapĩ. Mẽ ate Tirtũm kaga hã amnhĩ pumunh nhũm Tirtũm kot amnhĩ pyrà nẽ mẽ akaga hã mẽ ate omunh kaxyw kot paj wa mẽ anoo mã ã amnhĩ par kà hã awjagrõ kapĩr anẽ. Kot kaj mẽ nhỹrmã tee ri ã amnhĩ nhĩpêx anhỹrja mã ajamaxpẽr nẽ akapĩr htỳx kumrêx kãm ga. Âm hãmri na pa wa mẽ amã ja jarẽ.” Anhỹr o mẽ kãm akapẽr nẽ mẽ kêp ajapøj nẽ ma hpãnhã nhãm krĩ hõ hwỳr apa kurê kumrêx.

¹²—Koja nhỹrmã Tirtũm mẽ kot amnhĩ tomnuj mýrapê tanhmã mẽ ho. Na pre ra ã krĩ pê Sotõ nhõ xwỳnhjê nhĩpêx anẽ. Na prem amnhĩ tomnuj tỳx o pa nhũm Tirtũm tanhmã mẽ kot amnhĩ tomnuj tỳx ã tanhmã mẽ ho. Tã jar mẽ kot kãm ixkapẽr mar prãm kêt nẽ mẽ kot ixkaga xwỳnhjaja. Koja Tirtũm ixtã mẽ omu nẽ kot Sotõ nhõ xwỳnhjê nhĩpêx pyræk o mẽ

hipêx nom tanhmã mẽ ho htỳx o mẽ hakre.

—E kêr ka mẽ ma krĩ hkwỹ hkôt apa nê ã mẽ kãm akapêr anhỹr o ri apa. Anê.

Mẽ kot Tĩrtũm kôt hamaxpêr kêt xwỳnhjê jarênh

Matêwre 11.20-24

¹³⁻¹⁴ Tã nhũm Jejus krĩ hkwỹ nhõ xwỳnhjê mã kapêr o xa nê mẽ kot amnhĩ tomnuj ã mẽ kãm akir. Krĩ pê Korajĩ mẽ Pesêj nhõ xwỳnhjê kumrêx mã kapêr nê mẽ kãm:

—E mẽ inhma. Amnepêm krĩ pê Sitõ mẽ Xir wa kamã mẽ pa xwỳnhjaja na prem tanhmã amnhĩ tomnuj tỳx to ho pa nhũm Tĩrtũm mẽ omu nê hã mẽ homnuj tỳx nê. Tã kwa mẽ o kora Korajĩ mẽ Pesêj wa kamã mẽ apa xwỳnhjaja. Ra ixte mẽ amã mẽ ate mẽmoj pumunh kêt o anhỹr rax o ixpa htã ka mẽ omu nê arĩ amnhĩ tomnuj o ri apa nê tokyx amnhĩ tomnuj kaga hkêt nê. Jakamã kot kaj mẽ amex kêt nê. Kop apu Sitõ rỳ Xir kamã mãn ixte mẽ mẽ kãm aa mẽ kot mẽmoj pumunh kêt kwỳ ho anhỹr o ri ixpa ronhỹx mẽ omu nê mẽ arom amnhĩ kaxyw ixkôt hamaxpêr kurê kumrêx. Nê tee ri tanhmã amnhĩ tomnuj to ho pa hã amnhĩ pumu nê hkaprĩ nê ã amnhĩ nhĩpêx anhỹr kaga hpa. No mẽ kajaja na pa tee ri mẽ amã tanhmã amnhĩ nhĩpêx to ho ri ixpa kaprỳ. Ka mẽ ja hã ixpumu nê ãm ixpumu nê amnhĩ tomnuj kaga hkêt nê. Tã koja nhỹrmã Tĩrtũm mẽ piitã mẽ kot amnhĩ tomnuj mỳrapê tanhmã mẽ hipêx to. Hãmri nê tanhmã Sitõ mẽ Xir wa kamã mẽ pa xwỳnhjê jarênh to nhũm mẽ kot amnhĩ tomnuj mỳrapê amnhĩ xà htỳx kamã hamak o ri pa. No mẽ kajaja mẽ ate amnhĩ tomnuj tỳx o mẽ hakrenh jakamã koja Tĩrtũm mẽ hkĩnhã mẽ atomnuj tỳx o mẽ atomnuj tỳx. Ka mẽ amnhĩ xà htỳx kamã ajamak rãhã ho ri apa ho apa. Anê.

¹⁵ Nhũm pre ã Jejus mẽ kãm kapêr anê. Hãmri nê hpãnhã Kapanau nhõ xwỳnhjê mã kapêr nê mẽ kãm:

—No mẽ apê Kapanau nhõ xwỳnhjaja. Kot kaj mẽ ajaxwỳja mẽ amex kêt nê. Mẽ ate amnhĩ tomnuj kagare pyrà nê Tĩrtũm nhõ krĩ hwỳr akrà ho apa. Nom kot kaj mẽ atõ hwỳr axàpir kêt nê. Kot kaj mẽ ma kuwy maati hwỳr ajapêx pa kãm ga.

¹⁶ Anhỹr o mẽ kãm kapêr hãmri nê hpãnhã hkôt mẽ pa ho mẽ pa xwỳnhjê mã kapêr nê mẽ kãm:

—Kot kaj mẽ Tĩrtũm kapêr o mẽ ahkre ho ri apa nhũm mẽhõ ama nê akapêr kôt amnhĩ nhĩpêx. Hã koja te pa kot ixkôt amnhĩ nhĩpêx pyràk o amnhĩ nhĩpêx. No koja amar kêt nê akaga hãmri nê te pa kot inhmar kêt nê ixkaga pyràk o amnhĩ nhĩpêx. Jao mãânên Tĩrtũm kaga.

Anê hãmri nhũm mẽ kuma hãmri nê anhgrã nê axkrut kapên nê ma ahpỳnhã krĩ hkôt anhgrã.

Mẽ hkĩnh nê ri mẽ pa xwỳnhjê jarênh

Apokarip 3.5

¹⁷ Tã nhũm mẽ kêp 72jaja krĩ hkwỹ rũm akupỳn Jejus wỳr pøj. Piitã hkĩnh nê hpõx pa. Hãmri nê kãm:

—Kwa Pahihti. Na pa prem anhỹ hã mẽ nê mẽkarõmnuti japõx rax nê. Na pa prem mẽ nê mẽ hano nhũm mẽ ãm mẽ kurũm hapõx kurê kumrêx. Anê.

¹⁸ Hãmri nhũm mẽ kuma nê mẽ kãm:

—Tõe. Ixàhpumunh tỳx o ixte Sattanasti jakrenh jakamã na ka htem inhỹ hã mẽ hano nhũm mẽ tee ri mẽ akutã hihtỳx prãm. Hãmri nê te na haxênh prêprêk pyràk o amnhĩ nhĩpêx nê mẽ kurũm hapõx kurê kumrêx pa ja hã mẽ omu. ¹⁹⁻²⁰ Mẽkarõmnuti te kot makre pyràk. Tã ra ixte mẽ amã ixàhpumunh tỳx xà hkwỹ nhõr jakamã na ka prem mẽ

kām akapēr nhūm mẽ tee ri akutā tanhmā amnhĩ tỳx to hprām. Tā koja Satanasti tee ri mẽ ate nhỹrmā Tĩrtũm mẽ wa ixri atĩr tũm nẽ apa pymaj tanhmā mẽ ano kupyw to kaprỹ. Ra Tĩrtũm kot õ kagā kamā mẽ atĩr tũm nẽ mẽ apa kaxyw mẽ anhĩxi hā kagā kēnā. Jakamā kwa mẽ jam ajamexpēr o akĩnh nẽ ajamakētkati nẽ ri apa. No kêt mẽkarõmnuti kot mẽ akapēr mar nẽ mẽ kurũm hapõxta ã mẽ omunh xà hkõt pix mã akĩnh nẽ ri apa hkêt nẽ. Anẽ.

Jejus kĩnh kām kot Hipêêxà mã amnhĩ jarēnh

Matêwre 11.25-27

²¹ Tā nhũm Tĩrtũm Karõ tanhmā Jesus to nhũm ý hā hkĩnh nẽ xa. Hāmri nẽ Tĩrtũm mã kapēr nẽ kām:

—Pa Papaj? Nà apê mẽ ixpiitā mẽ inhõ Pahi Maati na ka. Pikap ri mẽ pa xwýnhjaja nẽ kaxkwa kamā mẽ pa xwýnhjaja apê mẽ ixpiitā mẽ inhõ Pahi Maati na ka. Âm hāmri na ka hte amnhĩ nhĩpêx mex o ri apa. Na ka hte mẽ àhpumunh tỳx ã mẽ kot amnhĩ jarēnh xwýnhjê mã axàhpumunh tỳx o amnhĩrĩt kêt nẽ. Âm mẽ àhpumunh kêt ã mẽ kot amnhĩ jarēnh xwýnhjê pix mã na ka hte ja ho amnhĩrĩt nhũm mẽ tapxipixjaja ja hā apumu. Âm hāmri na ka hte amā hprām xà hkõt ã mẽ piitā mẽ hipêx anhỹr o ri apa. Jakamā mẽ kot amnhĩ to hkryre xwýnhpixjaja na htem ate amnhĩ nhĩpêx ã apumunh o pa.

²² —Na ka pre inhĩhkra kamā mẽmoj piitā haxàr pa. Ixte ho amnhĩptàr o ri ixpa kaxyw. Jakamā kapxipix na ka hte ixpê akra hā ixpumunh par. No jar ri mẽ pa xwýnhjaja na mẽ kot ja hā ixpumunh kêt. Nẽ mãânẽn papxipix na ixte ate tanhmā amnhĩ nhĩpêx to hā apumunh par. Jakamā na pa hte ã amnhĩ nhĩpêx anẽ nẽ inhmā hprām xà hkõt mẽ hkwýjê mã ato amnhĩrĩt o ri ixpa nhũm mẽ ixpyrà

nẽ ate tanhmā amnhĩ nhĩpêx to ho apa hkõt apumu. Anẽ.

Jejus kõt mẽ pa xwýnhjaja kot hkõt omunh o pa hā mẽ harēnh

Matêwre 13.16-17

²³⁻²⁴ Nhũm pre Jesus ã Tĩrtũm mã amnhĩ jarēnh anẽ hāmri nẽ hpānhā hkõt mẽ pa ho mẽ pa xwýnhjê mã kapēr nẽ mẽ kām:

—E na ka htem ixkõt mẽ ano ho ixte tanhmā amnhĩ nhĩpêx to hā ixpumunh o ri apa. Nẽ mẽ ajamak o ixkapēr mar o ri ixkõt apa. No amnepēm mẽ akukamā pahijaja nẽ Tĩrtũm nhỹ hā kapēr jarēnh o ri mẽ pa xwýnhjaja kām ixpumunh prām tỳx o pa htā mẽ akĩnhā ixpumunh kêt rāhā htyk pa. Kormā ixwryk nẽ jar ixkator kêt jakamā na prem ixpumunh kêt rāhā ty. Nẽ mẽ kām ixkapēr mar prām tā mẽ akĩnhā ixkapēr mar kêt nẽ. Âm mẽ kapxipixjaja na ka mẽ mỳr pẽ ixte amnhĩ nhĩpêx ã ixpumunh nẽ ixkapēr mar o ixkõt apa. Tā mẽ kurom mẽ ate ano ho ixpumunh nẽ ajamak o ixkapēr mar jakamā kwa mẽ ja hā amnhĩ pumu nẽ tām amnhĩ nhĩpêx o akĩnh nẽ ri apa. Anẽ.

Samar nhõ xwýnh jarēnh

Matêwre 22.34-40; Makre 12.28-34; mãânẽn Wam Juáw 3.17-18

²⁵ Tā nhũm Tĩrtũm kapēr tũm o mẽ ahkre o mẽ pa xwýnhja Jesus wýr tẽ nẽ hêx rom kot kamā hamak kaxyw kām:

—Pa? E kwa inhmā mẽmoj jarẽ. Tanhmā kot paj we nhỹrmā Tĩrtũm ri ixtĩr tũm nẽ ixpa kaxyw amnhĩ nhĩpêx to wehe? Anẽ.

²⁶ Hāmri nhũm kām:

—Tanhmā na ka hte Tĩrtũm kapēr ã kagā htũm kot mẽ htĩr tũm nẽ pa hā kagā kamā harēnh nẽ mar to? Anẽ.

²⁷ Hāmri nhũm kām:

—Nà harēnh kot:
Kêr ka mẽ anhĩ piitā ho amā Tĩrtũm kĩnh o ri apa. Mẽ amā hkĩnh tỳx o mẽmoj piitā hakrenh par o ri apa.

Ně kěr ka mẽ amã mẽ piitã hã ma
ho te ka amã amnhĩ tã ma
pyràk o mẽ hipêx o ri apa.
Jao tãm mẽ hipêx o ri apa.
Aně.

Ã Tirtũm kapêr ã kagã htũm kamã
ja jarênh kot anhÿr. Aně.

²⁸ Hãmri nhũm Jejus kuma nẽ
kãm:

—Tỳ. Nà ãm hãmri na ka harẽ.
Kot kaj ã mẽ hipêx anhÿr o ri apa nẽ
nhÿrmã Tirtũm mẽ wa ixri atĩr tũm
nẽ apa ho apa. Aně.

²⁹ Hãmri nhũm kuma nom kãm
mẽ piitã mẽ ho mex prãm kêt nẽ.
Ãm amnhĩ kwỳ pixjaja nhũm kãm
mẽ ho mex o pa hprãm. Jakamã hẽx
rom kãm:

—Kwa no mẽmojaja kot pa we ri
ã mẽ hipêx anhÿr o ri ixpa? Xà mẽ
pahkwỳ pẽ Ijaew pixjaja nã? Aně.

³⁰ Hãmri nhũm kuma nẽ tanhmã
kãm ujarênh to. Nom hã kuxi nẽ
kãm awjarẽ nẽ kãm:

—E pa amã awjarẽ ka inhma.
Koja Ijaew nhõ xwỳnhja ma Jeru-
jarẽ rũm Jeriko hwỳr ahpar mã
ma mõ. Mõõ nhũm ra mẽ ahkĩnh
xwỳnhja kutã mra. Hãmri nẽ pry
kahti ri hwỳr kato nẽ unẽ nẽ htak
rax nẽ. Nẽ kệp ê hkwrỳnh pa nẽ
ma kurũm hprõt nẽ mra nẽ akunok
nhũm mẽ kot htak o hkà rênh rãhã
ra htyk kaxyw nẽ nõ. ³¹ Hãmri
nhũm patreja tẽ nẽ omu. No ãm
omunh o hãnh tẽ nẽ hkupu nẽ ma
tẽ. Uràk nẽ kệp Ijaew tã ãm omu
nẽ tanhmã ho ajuta hto hkêt nẽ
hãnh omunh o tẽ nẽ hkupu nẽ ma
tẽ. ³² Hãmri nhũm patre ho ajuta
xwỳnhja mãânẽn tẽ. Nẽ patre pyrà
nẽ omu nẽ ãm omu nẽ hkupu nẽ ma
tẽ. Uràk nẽ kệp Ijaew tã omu nẽ ãm
omu nẽ hkupu nẽ ma tẽ.

³³—Tã nhũm Samar nhõ xwỳnhja
mãânẽn mõ. Samar nhõ xwỳnhjẽ
mẽ Ijaew na prem kãm axpẽn kĩnh
kêt tã nhũm mõ nẽ omu nẽ kamã
ukapřĩ nẽ. Kệp Ijaew ã omunh
tã tee ri omu nẽ kamã ukapřĩ nẽ.
³⁴ Hãmri nẽ hwỳr tẽ nẽ omu nẽ kãm
mẽ kot htak o hkà rênh xà kane nẽ

kãm hkupu pa. Hãmri nẽ kãnhmã
ãm nẽ hkrit jumẽnre hã kumẽ nẽ
ma nhÿri mẽ kot amnhĩm hikranh
xà hã ixkre hwỳr o mõ nẽ hwỳr
o pøj. Hãmri nẽ omunh mex o
apkati. ³⁵ Hãmri nẽ akupỳm no-
jarêt nẽ kàxpore hkwy jamỳ nẽ o
tẽ nẽ kot mẽ kãm õ xwỳnhja mã
kugõ nẽ kãm: “E kot paj hãmri
ma mõ. Ota ixkàxporeta. Kěr ka
inhmã à xwỳnhta tânopxar mex nẽ.
Nẽ inhmã omunh mex kê akupỳm
mex. Kojã kàxporeja apẽ grire hã
kot paj nhÿrmã akupỳn mõ nẽ axte
hkôt amã hkwy gõ.” Anhÿr o kãm
kapêr nẽ ma akupỳm mõ. Æ mẽ
ujarênh kot anhÿr. Aně.

³⁶ Nhũm pre ã Jejus kãm ujarênh
aně. Hãmri nẽ kãm:

—E nhÿ na pre kãm mẽ kot htak
xwỳnhta kapřĩ ho te tãm kãm amnhĩ
tã ma pyràk wehe? Aně.

Hãmri nhũm Tirtũm kapêr tũm o
mẽ ahkre xwỳnhta kãm:

—Nà kot kamã ukapřĩ xwỳnhta
na pre omu nẽ kamã ukapřĩ nẽ ho
mex o te tãm kãm amnhĩ tã ma
pyràk o hipêx. Aně.

³⁷ Hãmri nhũm Jejus kãm:

—Tỳ. Nà ãm hãmri na ka harẽ.
Uràk nẽ kệp Ijaew kêt tã kamã
ukapřĩ nẽ ho mex nẽ. Tã kěr ka
uràk nẽ ã mẽ piitã mẽ hipêx anhÿr o
ri apa. Uràk nẽ mẽ kệp akwỳ hkêt tã
mẽ kamã axukapřĩ ho ri apa. Aně.

*Jejus kot Matre mẽ Marir wa
hwỳr mõr ã harênh*

Rukre 12.29-31

³⁸ Tã nhũm Jejus krĩ rũm kato
hãmri nẽ hkôt mẽ pa ho mẽ pa
xwỳnhjẽ mẽ mẽ ma nhãm krĩ hõ
hwỳr mõ. Mõõ nẽ hwỳr pøj. Hãmri
nhũm Matre mẽ omu nẽ amnhĩ
nhõrkwỳ hwỳr mẽ kuwỳ nhũm mẽ
ma hwỳr mõ nẽ õrkwỳ hwỳr pøj.
³⁹ Hãmri nhũm Jejus mẽ ahkre ho
nhÿ nhũm Matre htõx Marirja arĩ
hpar pẽ mar o nhÿ. ⁴⁰ Hãmri nhũm
Matre mẽ hwỳr axà nẽ omu. Nẽ tee

ri àpênh rax kukamã hamaxpêr nê Jejus wÿr tē nê kãm:

—Xê ma Pahihti. Kormã ixàpênh rax tã nhùm Marir ixto ajuta hkêt nê. Âm akapêr pix mar gryk ã ixkôt htêm nê ixto ajuta hkêt nê. Pa ahte mē panhõ hã ixàpênh o xa. Xà amã ja mex? Xê kãm anê kê tokyx ixkôt tē pa wa hã axkrut nê mē panhõ hã ixàpênh tokyx anê. Anê.

⁴¹ Hãmri nhùm tee ri kuma nê kãm:

—Kwa Matre. Na ka âm mē panhõ pix kukamã ri ajamaxpêr nê gryk ã tee ri amnhĩ nhĩpêx. ⁴² Âm hãmri na Marir kãm ixkapêr mar prãm nê. Jakamã kot paj ri amnhĩ nê akôt hanor kêt nê. Anê.

11

Mē pahte tanhmã Tirtùm mã amnhĩ jarênh to hã mē pamã karõ

Matêwre 6.9-13, 7.7-11

¹ Tã nhùm apkati hõ hã nhùm Jejus nhÿri Tirtùm mã amnhĩ jarênh o nhÿ. Nê kãm amnhĩ jarênh pa nhùm hkôt mē pa ho mē pa xwÿnhjaja kot kãm amnhĩ jarênh ã omu nê hwÿr mra nê kãm:

—Kwa Pahihti. Amnhĩ pyrà nê mē ixte Tirtùm mã amnhĩ jarênh kaxyw tanhmã mē ijahkre hto. Kêr pa mē apyrã nê tanhmã kãm amnhĩ jarênh to ho ri ixpa. Na pre finat Juãw Paxisja hkôt mē pa ho mē pa xwÿnhjê mã ja jahkre nhùm mē kuma nê tãm kãm amnhĩ jarê. E kwa mē inhmã tanhmã ja jahkre hto na? Anê.

² Hãmri nhùm mē kãm:

—Tõe. Nã kêr ka mē kãm amnhĩ jarênh kaxyw nê mãmri amnhĩ krã hkôt tanhmã kãm amnhĩ jarênh to. Rÿ kãm amnhĩ jarênh o:

Pa Mëinhĩpêêxã maati? Nã amex o amex Tirtùm.

Apê mē ijamãr mex xwÿnh maati na ka.

³ Nê kwa kêr ka apkati mē mē inhmã mêmogõ pa mē akukwak ri ho ixàpkur o ri ixpa.

⁴ Nê na pa hte tõiã amnhĩ tomnuj nê Tirtùm. Nom mē kot tanhmã ixtomnuj to xwÿnhjaja na pa hte âm mē omu nê amnhĩ tã tanhmã mē ho hkêt nê. Nê ja ho ijamakêtkati kurê kumrêx. Æ na pa hte amnhĩ nhĩpêx anhÿr o ri ixpa.

Jakamã kwa kêr ka ja hã ixpumu nê ixpyrà nê ixte tanhmã amnhĩ tomnuj to hã ixpumu nê hã tanhmã ixto hkêt nê. Âm ho ajamakêtkati kurê kumrêx nê axte kãm ajamaxpêr kêt nê.

Nê kot paj tanhmã amnhĩ tomnuj to kaxyw japêr ka ja hã ixpumu nê ixte ã amnhĩ nhĩpêx anhÿrja nê ixto htÿx nê pa ja ho anhÿr kêt nê.

E âm ja pix na hapêx. Anê.

E kêr ka mē ã Tirtùm mã amnhĩ jarênh anhÿr o ri apa. Anê.

Mē pahte amnhĩ to Tirtùm wÿr rãhã hã mē pamã karõ

Matêwre 7.7, 15.21-28; Makre 11.24; Rukre 18.1-8; Juãw 14.13-14; mããnên Rõmãn 12.12; Epes 6.18; Wam Tesarõn 5.17-18

⁵⁻⁶ Nhùm Jejus arĩ hkôt mē pa ho pa xwÿnhjê jahkre ho nhÿ nê mē kãm:

—Nê ja. Kojã mē akrãmnhwÿjê hõ. Nhùm kôt ã kamãt nhùm nhÿhÿnh awÿr mõn pøj. Ka anhõ mêmoj kêt hãmri nê anhÿjuk ri akrãmnhwÿ hwÿr tē. Hãmri nhùm ra amnhĩ tã kahê nê nõ. Ka tee ri omu hãmri nê hakwa krem xa nê kãm akapêr nê kãm: “Pa ixkrãmnhwÿ. Na ka mē ra gõr? Kwa kãnhmã nhÿ nê inhmã anhõ mêmoj japêr. Na ra ham ixkrãmnhwÿta mõn pøj. Nê kãm prãm tÿx nê mõ nom kaxyw inhõ hkêt. Kwa kãnhmã nhÿ nê inhmã anhõ mêmoj japêr nê inhmã hkwy pa ma o tē kê kukrê. Âm inhõ hkêt kumrêx. Âm hãmri na pa amã amnhĩ jarê. Kwa tokyj kãnhmã nhÿ nê inhmã

měmoj japêr nà?" Anhÿr o kãm akapêr. ⁷ Hãmri nhũm ama nom kãm kànhmã ÿr prãm kêt nê. Nê amã: "Tk. Nà ra mê ixte amnhĩ tã kahê hpar nê inhĩkwÿ kênã kot pa kêt kànhmã nhÿ nê amã mẽmoj japêr." Anê. ⁸ Ka tee ri ama nê xatã kãm: "Kwa ã inhĩpêx anhÿr kêt nê ixkrãmnhwÿ. Kwa tokyx." Anhÿr o xa. Nê xatã kãm anojarêt o xa. Hãmri nhũm ra kãm amar kaga hãmri nê tã kànhmã nhÿ nê amã ate ho presija xwÿnhnta gô. No ãm kêp akrãmnhwÿ hã ate hã axãhwÿr tipxi hã amã ôr kêt nê. ãm xatã ate ho presija htÿx xwÿnhnta mã hamaxpêr nê tã kànhmã nhÿ nê amã kugô. ã mẽ ujarênh kot anhÿr.

⁹⁻¹⁰ —Tã kêt ka mẽ ja pyrã nê amnhĩ to Tĩrtũm wÿr rãhã ho ri apa nhũm ama nê ate mẽmoj tã hwÿrta amã kugô. ãm xatã ate hã axãhwÿr o ri apa nhũm amã kugô. ãm mẽmoj to hwÿr rãhã ho ri apa nhũm ama hãmri nê amã mẽmoj tanhmã hipêx to. Te ho mēhō kãm tep xành nê gôx kãm xatã tep rēnh xà rēnh o ãm pyrã nê xatã mẽmoj tã hwÿr o ri apa. Hãmri nhũm ama nê amã hprãm xwÿnhnta gô. Te ho tep kanhêr xwÿnhnta tã kot tep ô kanhêr pyrãk o anhĩpêx nê amã mẽmoj prãm xwÿnhnta gô. Anê.

Tĩrtũm kot hkrajê mã mẽmoj mex nhõr ã harênh

Makre 7.9-11

¹¹ Nhũm Jejus arĩ hkôt mẽ pa ho mẽ pa xwÿnhjê jahkre nê mẽ kãm:

—Nê xà koja akra kãm tep xành nê hã awÿ ka ama nê axtem nê kãm kagã xoprê hõ py nê agô? ¹² Rÿ nhũm krãhyre gre hã awÿ ka axtem nê kãm makre hõ py nê agô? Nà na ka htem ã akrajê nhĩpêx anhÿr kêt nê. Na ka htem mẽ kot mẽmoj tã ãhwÿr xà hkôt kãm mẽmoj gô. ¹³ Mẽ kamjaja mẽ ate amnhĩ tomnuj o ri apa htã ka htem akrajê ho mex o ri apa. Tã kaxkwa kamã Tĩrtũmja na hte mẽ pahto mex o mẽ

ate mẽ akrajê ho mexta jakrenh. Kãm mẽ pajapê htÿx kôt na hte mẽ pamã mẽmoj mex nhõr o pa. Nê mãânên amnhĩ Karôja na hte mẽ pamã kugô. Jakamã kot kaj mẽ atô Karô hã awÿ nhũm ama nê awÿr kumê nhũm wrÿ nê akarô mã axã. ã na hte Tĩrtũm kãm mẽ pajapê xaj mẽ pamã mẽmoj mex nhõr o pa anê. Anê.

Jejus mẽ Satanasti wa harênh

Matêwre 12.22-32; Makre 3.20-30

¹⁴ Tã nhũm Jejus nhÿri axte mēhō nê mẽkarōmnuti kator. Na pre ra mẽkarōmnuti tanhmã ho nhũm kapêr kêt nê pa. Hãmri nhũm Jejus omu nê nê kator nhũm akupÿm kapêr mex nê. Nhũm mẽ pũitã amnhĩ jaêr pê omu nê no hawênh rũnh nê omunh o kuhê. ¹⁵ Nom nhũm mẽ hkwÿjaja Jejus kot ã hipêx anhÿr ã omu nê htÿx ho kêp mẽkarōmnuti hkwy hã hkamnhĩx nê axpên mã harênh o:

—Tk pêr hinhu nhĩkôôti nhÿ hã na hte mẽ nê amnhĩ kwÿjê japôx o pa. Anê.

Hinhu nhĩkôôti nhĩxi hõ pê Satanasti nhũm prem Satanasti nhÿ hã Jejus kot ã amnhĩ nhĩpêx anhÿr o pa hã hkamnhĩx. ¹⁶ Jakamã nhũm mẽ hkwÿjaja hwÿr mra nê kãm:

—Kwa mẽ inhmã aa mẽ ixte mẽmoj pumunh kêt ô ho anê. Pa mẽ omu nê ate Tĩrtũm nhÿ hã tanhmã amnhĩ nhĩpêx to ho apa hã apumunh kurê kumrêx. Anê.

Nom hêx rom mẽ kot kamã hamak kaxyw ã kãm kapêr anê. ¹⁷ Nhũm ra Jejus mẽ hamaxpêr kôt mẽ omunh mex jakamã mẽ kapêr ma nê mẽ kãm:

—Kwa mẽ inhma mẽ ate ixpê Satanasti hkwy hã ixkamnhĩx xwÿnhjaja. Koja pika nhõ xwÿnhjaja axpên kutã amnhĩ xunhwÿ nê axpu hãmri nê anhgrã nê ma ahpÿnhã ri pa. Hãmri nê amnhĩ krã hkôt ri tanhmã amnhĩ to ho ri pa. Jakamã nhũm mẽ ô pahĩ mẽ hamãr o pa hkêt nê. Rÿ koja krĩ

nhõ xwýnhjaja. Mě kot axpën to hkwy xwýnhjaja mëmoj tä axpën kãm gryk nẽ axpën kutã amnhĩ xunhwý hãmri nẽ axpën pẽ anhrã nẽ ahpýnhã pa hãmri nhũm mẽ õ pahi tee ri kãm mẽ hamãr o pa hprãm. Mo õ krĩ kamã mẽ hkwy kot ri mẽ hamãr o pa? No na pre mẽ õ pahi tãm amnhĩ nẽ mẽ hanor kêt nẽ.

¹⁸—Tã ja pyrã nẽ ixte Satanasti nhỹ hã tanhmã amnhĩ nhĩpêx to ho ixpa ronhỹx pa mẽ nẽ amnhĩ kwýjê janor o ri ixpa hkêt nẽ. Nhỹx Satanasti ixte mẽ nẽ mẽ hanor kaxyw tanhmã inhmã nẽ hkêt nẽ.

¹⁹—No kêt mẽ akwýjaja? Xã Satanasti nhỹ hã na htem mẽ nẽ mẽ hapõx o pa nã? Kêp apu pa ixte ý hã mẽ nẽ mẽ hapõx ronhỹx mẽ akwýjaja ixpyrã nẽ ý hã mẽ nẽ mẽ hapõx o pa. Nã Tĩrtũm nhỹ hã mẽ ixte mẽ nẽ mẽ hapõx o mẽ ixpa kênã. Jakamã ã mẽ ate ijarënh anhỹr o apaja mex kêt. ²⁰Tĩrtũm Karõ nhỹ hã ixte mẽ nẽ mẽ hapõx o ri ixpa kênã. Jakamã kwa mẽ ja hã ixpumu nẽ Tĩrtũm kot ixte mẽ ato amnhĩptãr kaxyw mẽ awýr inhmẽnh kôt ixpumunh kurê kumrêx kêt wehe. Pa na ka htem ixkamã ajamak o apa.

²¹⁻²²—Satanastija àhpumunh tỳx jakamã na htem tee ri kêp mẽ kot hkôt amnhĩ xunhwýr xwýnhjê pytãr kaxyw nhũm mẽ nẽ mẽ omunh mex nẽ. Nom ixàhpumunh tỳx o ixte Satanasti jakrenh jakamã pa na pa hte kêp mẽ utã nhũm mẽ hpãnhã ixkôt ri amnhĩ nhĩpêx.

²³—Mẽ amã ixkapër mar prãm tã na ka mẽ kormã ixkôt amnhĩ xunhwýr kêt nẽ. Kwa wem ma amnhĩ to amõr gri nẽ tokyx ixkôt amnhĩ xunhwý kêt wehe. Kot kaj mẽ anhỹr kêt nẽ hãmri nẽ te mẽ ate ixkutã amnhĩ xunhwýr xwýnh pyrãk o amnhĩ nhĩpêx. ²⁴Mẽ ate ixkôt amnhĩ xunhwýr kêt xwýnhjaja te mẽ ate mẽhõ nẽ mẽkarõmnuti japõx xwýnh pyrãk.

Nhũm te kêp kator nẽ ma mõ nẽ nhỹri amgrã kamã ri pa. Nhũm ja kêp omnuj nhũm tee ri kamã nhỹri hkòkôt xã japër o pa. Nom tee ri hapër o pa nẽ hamaxpër o: “E kot paj ma akupým mẽ kot nẽ ixkator xwýnhhta wýr tẽ nẽ hwýr axã nẽ hkôt mãn ixpa.” Anẽ. ²⁵Hãmri nẽ ma akupým hwýr tẽ. Nom kormã akupým hwýr àr kêt ri nhũm kamã amrakati nẽ pa. ²⁶Jakamã nhũm ma akupým hwýr tẽn axã. Nom ahte àr kêt nẽ. Ra amnhĩ kôt amnhĩ kwýjê ho 7 nẽ hwýr mẽ ho agjê. Nẽ hwýr gjêx pa. Mẽ kêp 7jaja nẽ wamta mẽ nhũm mẽ piitã hwýr gjêx pa. No mẽ kêp 7jaja omnuj tỳx o kot wamta jakrenh jakamã nhũm mẽ kot hwýr gjêx xwýnhhta mẽ ý hã amnhĩ tomnuj tỳx o pa. Oprê htỳx nẽ. Wam pyxire nẽ kot hwýr àr nhỹ hã amnhĩ tomnuj o ri pa nom ãm kawax pẽ oprê. Tã axte hwýr mẽ ohtõ nẽ gjêxta nhỹ hã oprê htỳx kumrêx. Ja pyrã nẽ kot kaj mẽ tokyx ixkôt amnhĩ xunhwýr kêt nẽ hãmri nẽ ãm amnhĩ tomnuj tỳx pix o ri apa. Anẽ.

Mẽ hkĩnh nẽ mẽ pa xwýnhjê jarënh Rukre 8.19-21

²⁷Nhũm pre ã Jejus mẽ ahkre anẽ nhũm mẽhõ nija kuma nẽ kãm:

—Hêxta gãã nẽ. Mãn akatorxã ã ate amnhĩ nhĩpêx anhỹr o apa hã apumu nẽ hkĩnh nẽ. Anẽ.

²⁸Hãmri nhũm kãm:

—Tỳ. Nã kot anhỹr kênã. Nom kot ka mẽ atõ Tĩrtũm kapër ma nẽ hkôt amnhĩ nhĩpêx hãmri nẽ akĩnh rax o ixkatorxã kot ixpumunh nẽ hkĩnhhta jakre. Anẽ.

Jesus kot tanhmã Jõhti jarënh to Matêwre 12.38-42; Makre 8.12

²⁹Tã nhũm mẽ ohtõ nẽ Jejus ã akuprõ nẽ mẽmoj tã kuwý nẽ kãm:

—Pa. Kwa mẽ inhmã aa mẽ ixte mẽmoj pumunh kêt õ ho anẽ pa mẽ omu. Anẽ.

Hãmri nhũm mẽ kuma nẽ mẽ kãm:

—Tk. Kwa mẽ ajamaxpër punuj pix o na ka htem ri ajamaxpër o apa. Ixpê Tirtüm kot mẽ awÿr inhmënh xwÿnh tã ka mẽ ja hã ixkôt ajamaxpër kêt nê. Tã mẽ ate aa mẽmoj pumunh kêt kwÿ ixte mẽ amã ho anhÿr kaxyw hã inhmã karõ. Nà kot paj kormã mẽ amã ho anhÿr kêt nê. Kot paj nhÿrmã te amnepëm finat Jõhti kot amnhÿ nhÿpêx pyrãk o amnhÿ nhÿpêx ka mẽ hã ijarënh ma nê kormã ja hã ixpumu. ³⁰ Tirtüm nhÿ hã kapër xwÿnh pê Jõhtija amnepëm na pre tep rax kukrê. Tã nom nhÿm htÿr rãhã õxãhkre rÿm kato nhÿm mẽ omu nê Tirtüm kot mẽ hwÿr mẽnh ã omu. Tã kot paj nhÿrmã Jõhti pyrã nê tanhmã amnhÿ nhÿpêx to nhÿm mẽ ja hã ixpumu nê Tirtüm kot mẽ awÿr inhmënh xwÿnh ã ixpumunh kurê kumrêx.

³¹ —Nê koja nhÿrmã Tirtüm akupÿm mẽ htyk nê mẽ hikwÿ xwÿnh piitã akupÿm mẽ ho htÿr hãmri nhÿm mẽ piitã Inhÿpêêxã mẽ wa ixkutã hkrÿ. Pa wa mẽ piitã tanhmã mẽ harënh to. Tirtüm mẽ wa ixkuri mẽ htÿr tÿm nê mẽ pa ho mẽ pa mã xwÿnh ã mẽ hkwyÿjê jarê. Nê wa ixkuri mẽ pa ho mẽ pa hkêt xwÿnhjê jarê. Mẽ piitã ã mẽ harënh anê. Amarÿ mẽ pa xwÿnhjaja nê mẽ õ pahijaja. Hãmri nhÿm sur kãm mẽ õ pahi niti Tirtüm mã tanhmã amnhÿ jarënh to hãmri nê hpãnhã tanhmã mẽ ajarënh to nê kãm mẽ ajarënh o: “Na pa pre inhmã pahi Sarumãw kot anhÿ hã àhpumunh tÿx ã harënh ma hãmri nê inhmã mar prãm xaj ma awry hã õ pika hwÿr ixpa nê omu nê kapër ma. Hãmri nê ma akupÿm inhõ pika hwÿr ixpa nê ixkwÿjê mã àhpumunh tÿx ã harënh o ixpa. Tã Akra Jejus na àhpumunh tÿx o pahi Sarumãw jakrenh tã or war akutã mẽ hkrÿ xwÿnh kwÿ mÿj na prem kapër ma no ãm ixkÿnhã kãm mar prãm kêt nê. Na prem kuma nê ãm kuma.” Anhÿr o wa inhmã mẽ

ajarê. Hãmri nê ja hã mẽ amã akir ka mẽ tee ri mar o akrÿ nê amnhÿ kamã agryk o akrÿ.

³² —Hãmri nhÿm hpãnhã Nĩnÿwe nhõ xwÿnhjaja wa inhmã tanhmã amnhÿ jarënh to. Jõhti kot mẽ hwÿr mör nê mẽ kãm Tirtüm kapër jarënh o pa xwÿnhjaja nhÿm mẽ tanhmã wa inhmã amnhÿ jarënh to. Hãmri nê pahi nita pyrã nê wa inhmã tanhmã mẽ ajarënh to nê wa inhmã: “Na pre Jõhti man mẽ inhõ krÿ hwÿr mō nê mẽ inhmã akapër jarënh o ri mẽ ixkôt pa. Pa prem kuma nê mẽ ixte amnhÿ tomnuj kaga nê akôt amnhÿ xunhwÿr kurê kumrêx Tirtüm. Nom or war akutã mẽ hkrÿ xwÿnh kwÿ mÿj na pre Akra Jejus tãm mẽ hwÿr mō nê mẽ kãm kapër o ri mẽ hkôt pa nhÿm prem kuma no ãm mẽ ixkÿnhã amnhÿ tomnuj kaga nê hkôt amnhÿ xunhwÿr kêt nê. Mẽ kot Akra mar tã amnhÿ kaxyw kãm hamaxpër kêt nê.” Anhÿr o koja mẽ wa inhmã mẽ ajarê ka mẽ tee ri mẽ ama nê amnhÿ kamã agryk tÿx nê. Jakamã e kwa ixte mẽ amã ã ixkapër anhÿrja ma nê kãm ajamaxpër tÿx rãhã ho ri apa. Anê.

Mẽ pajamaxpër mex te kot kanê hpôk mex pyrãk ã harënh

Matêwre 5.15, 6.22-23

³³ Nhÿm Jejus arÿ mẽ ahkre ho nhÿ nê mẽ kãm:

—Xà na htem kanê hpôk nê poti ho hpro? Nà na htem ho anhÿr kêt nê. Na htem hpôk nê kÿx pê mẽmoj nhÿmök ã unhwÿ nhÿm mẽ piitã mẽ kãm hirã mex nhÿm htem ixkrem agjê nê hirã kamã mẽmoj pumunh mex o mra. ³⁴ Ja pyrã nê kot ka mẽ atõ ixkapër ma nê ixkôt amnhÿ nhÿpêx nê tãm amnhÿ nhÿpêx o ri apa. Nê tãm mẽ hipêx o ri apa. Jao te hirã kamã mẽ rÿt mex xwÿnhjaja kot amnhÿ nhÿpêx pyrãk. Nom koja mẽhõ inhma nê ãm inhma nê ixkwÿm ri tanhmã amnhÿ nhÿpêx to ho pa. Jao te kamãt kô kamã mẽ rÿt

mex kêt xwÿnhjaja kot htÿx amnhĩ nhĩpêx o pa pyrāk o amnhĩ nhĩpêx.

³⁵—E kêt ka mē ā amnhĩ nhĩpêx anhÿr pymaj ixkapêr ma nē kām ajamaxpêr tÿx rāhā ho ri apa. ³⁶Kot kaj mē ixkapêr ma nē ixkôt amnhĩ nhĩpêx. Hāmri nē te mē ate kanê hpôk mex nhĩrā kamā ri apa pyrāk o amnhĩ nhĩpêx. Jao aprĩ hā ixkapêr ma nē aprĩ hā ixte tanhmā amnhĩ nhĩpêx to hā ixpumunh mex nē. Anē.

Jejus kot tanhmā Parijew nhō xwÿnhjê jarēnh to

Matêwre 23.25-26

³⁷Tā nhūm Jejus ra mē ahkre pa. Hāmri nhūm Parijew nhō xwÿnhja hwÿr tē nē kām:

—Pa. E kwa ma ixkôt tē nē mē ixkutā apku. Anē.

Hāmri nhūm kuma nē kām:

—Tōe. Nā kot paj ma akôt tē. Anē

Hāmri nē ma hkôt tē nē ōrkwÿ hwÿr axā nē apkur kaxyw mē ĩhkō hā nhÿ. ³⁸No ām mē hkukamā mē hpāmjê pyrā nē amnhĩ nhĩhkra kuhōnh ryy hkêt nē. Ām amnhĩ nhĩhkra htyk pix kuhōnh tokyx anē nē nhÿ. Nē ō prat kuhōnh ryy hkêt rāhā apkur kaxyw nhÿ. Jakamā nhūm kot amnhĩ kôt hwÿr xwÿnhnta tee ri ja hā omu nē hamaxpêr o:

—Tk. Kwa na hte mē ixte amnhĩ nhĩpêx kôt amnhĩ nhĩpêx mex kêt nē.

³⁹Anē nhūm Jejus amnhĩ tā hamaxpêr ā omu nē kām:

—Nā mē apê Parijew nhō xwÿnhjaja te mē ate mē kot apkur kaxyw prat kre kuhōnh punuj tā mex ā harēnh pyrāk o amnhĩ nhĩpêx. Nē ām mē akrā hkā rūm pix mā na mē amex. Nē mē noo mā te mē amex pyrāk no ām mē anhōxāhkre kaxwÿnh kām mē ajamaxpêr mex kêt. Ām mē akapêr prām. Nē mē axāhkurêê. Nē mē anhōxÿÿ. ⁴⁰Mē ate atÿx ri amnhĩ nhĩpêx o ri mē apa xwÿnh kēnā. Kwa kêt ka mē ām akrāhkā pix rūm amex nē ri apa hkêt nē. Mē

māānēn anhōxāhkre kaxwÿnh kām ajamaxpêr mex o ri apa. Nē tām mē piitā mē hipêx o ri apa. ⁴¹Kêt ka mē tām ajamaxpêr o tām mē hipêx o ri apa. Nē axāmnhÿx ri mē kēp amrakati xwÿnhjê mā mēmoj nhōr o ri apa. Kot kaj mē ā amnhĩ nhĩpêx anē hāmri nhūm Tirtūm ja hā mē apumu nē amnhīm mē amex ā mē ajarē. No na ka htem mē amā mē amnhĩ to mex prām xāj tee ri amnhĩ kuhōnh japjê kaprÿ. Anē.

Jejus kot Parijew nhō xwÿnhjaja mex kêt kukamā mē harēnh

Matêwre 23.4, 23.7, 23.13-24, 23.27-38; Makre 12.38-39

⁴²Nhūm Jejus arĩ Parijew nhō xwÿnhjê jahkre nē mē kām:

—Kwa mē okora Parijew nhō xwÿnhjaja. Kot kaj mē amex kêt nē. Na ka htem Tirtūm kapêr piitā hkôt amnhĩ nhĩpêx o apa hkêt nē ām hkwy kôt pix mā amnhĩ nhĩpêx o ri apa. Nē ām kapêr o hpÿnhre nē hkôt amnhĩ nhĩpêx hāmri nē hā amnhĩ pumu nē ate amnhĩ to mex xwÿnh ā amnhĩ to jarkrar o ri apa. Nom Tirtūm kām hprām xā piitā hkôt amnhĩ nhĩpêx hkêt nē. Mē ate tām mē piitā mē hipêx o ri apa hā kot mē amā karōja. Nē mē amā Tirtūm kÿnh ā kapêr kôt amnhĩ nhĩpêx o ri apa hā karōja mē ate mar mex tā hkôt amnhĩ nhĩpêx kêt nē. Mē ate kapêr piitā hkôt amnhĩ nhĩpêx ronhÿx ja mē amā mex kumrêx.

⁴³—Kwa mē o kora. Mē piitā mē kot amnhīm mē ate amnhĩ to rūnh xwÿnh ā amnhīm mē ajarēnhja na mē amā hprām. Nē mē piitā mē kot amnhīm mē apê mē ahkre mex xwÿnh maati hā mē ajarēnhja na mē amā hprām.

⁴⁴—Kwa mē o kora. Kot ka mē amex kêt nē. Mē kot mē akapêr mar nē mē akôt amnhĩ nhĩpêx xwÿnhjaja te mē kot htÿx ri mē hā pika nhīmōk ā ri mē pa xwÿnh kot amnhĩ nhĩpêx pyrāk. Jao mē ate amnhĩ to mex ā amnhĩ kamnhÿx nom mē ate amnhĩ to mex kêt. Te

mě kot pika mex ã hkamnhĩx nẽ htỳx ri mẽ hã pika nhĩmõk ã ri mẽ pata pyrãk o na htem amnhĩ nhĩpêx. Anẽ.

Nhũm pre ã Jejus Parijew nhõ xwỳnhjẽ mã mẽ kot amnhĩ nhĩpêx jarẽnh anẽ.

Jejus kot Tĩrtũm kapêr tũm o mẽ ahkre xwỳnhjẽ mã kapêr

Matêwre 23.1-4, 23.13, 23.29-36

⁴⁵ Hãmri nhũm Tĩrtũm kapêr tũm o mẽ ahkre ho pa xwỳnhja kuma nẽ kãnhmã xa nẽ kãm:

—Kwa na ka ã Parijew nhõ xwỳnhjẽ jarẽnh punuj anhỹr jao mããnẽn ã mẽ paja jarẽnh anẽ nà? Mẽ ixte amnhĩ nhĩpêxja ãm tipxi kẽnã. Anẽ.

⁴⁶ Hãmri nhũm kãm:

—Tỳ. Mããnẽn mẽ kajaja. Kwa o kora mẽ apê Tĩrtũm kapêr tũm o mẽ ahkre xwỳnhjaja. Kot kaj mẽ urãk nẽ amex kêt nẽ. Na ka htem mẽ kãm mẽmoj tã karõ ho ri apa nẽ mẽ kãm: “E kër ka mẽ ã amnhĩ nhĩpêx anẽ nẽ ã amnhĩ nhĩpêx anẽ.” Anhỹr tã no ãm mẽ kajaja amnhĩ kapêrja kõt amnhĩ nhĩpêx kêt nẽ. Te mẽ ate mẽhõ kot mẽ katut ã mẽ kãm mẽ jẽn h pytĩ janhõr tã mẽ ho ajuta nẽ hkwỳ htur kêêta pyrãk o na ka htem amnhĩ nhĩpêx o ri apa.

⁴⁷⁻⁴⁹ —Na pre Tĩrtũm amnepêm mẽ pahpãmjẽ hkukamã tanhmã mẽ harẽnh to. àhpumunh tỳx xà hkõt tanhmã mẽ hkukamã mẽ harẽnh to nẽ mẽ harẽnh o: “Kot paj ma mẽ hwỳr inhỹ hã ixkapêr jarẽnh xwỳnhjẽ rẽ. Nom koja mẽ omu nẽ ãm mẽ omu nẽ kệp mẽ hprãm nõkati nẽ tanhmã mẽ hipêx to ho pa. Nẽ ixpê mẽ hkwỳjẽ hpar o pa. Æ koja mẽ inhỹ hã ixkapêr jarẽnh xwỳnhjẽ nhĩpêx anẽ.” Anhỹr o mẽ hkukamã mẽ harẽ. Tã ã mẽ harẽnh anhỹr xà hkõt nhũm prem ã mẽ hipêx anẽ nẽ mẽ hkwỳjẽ hpa nẽ mẽ hkwỳjẽ pynẽ nẽ mẽ hãjẽ.

—Amnepêm mẽ akukamã mẽ kot ã mẽ hipêx anhỹr nhũm mẽ ate mẽ ano ho ja hã mẽ omunh kêt tã

ka htem arĩ mẽ hã pika ho mex o ri apa. Te mẽ amã mẽ hapê nẽ mẽ ho ajamak pyrã nẽ mẽ hã pika ho mex o ri apa. Nom mẽ amã mẽ hapê hã ho mex hkêt nẽ. Æm ra mẽ htyk nẽ hapêx nẽ mẽ amã Tĩrtũm kapêr jarẽnh o pa hkêtja ã na ka htem akĩnh nẽ ã axêx rom mẽ hã pika ho mex anhỹr o ri apa.

⁵⁰⁻⁵¹ —Na prem Tĩrtũm nhỹ hã kapêr jarẽnh o mẽ pa xwỳnhjẽ nhĩmex rax nẽ. Amnepêm panhĩ kator krax rũm finat Atãw kra finat Apewja na pre Tĩrtũm nhỹ hã kapêr o pa nhũm htõ kãm mar prãm kêt nẽ kupĩ. Tã nhũm Tĩrtũm axte mẽ hwỳr ý hã kapêr jarẽnh o mẽ pa xwỳnh kwỳjẽ rẽ nhũm prem mã mẽ ho anẽ nẽ mẽ hkwỳjẽ nhĩmex. Nhũm pre xatã mẽ hwỳr mẽ hkwỳjẽ rẽ nhũm mẽ xatã mẽ kupa. Æ Apew rũm finat Jakaris wỳr na prem mẽ himex rax anẽ. Nẽ hpãnhã Jakarisja nhũm prem Tĩrtũm mã amnhĩ jarẽnh xà hã ixkre kamã kupĩ. Tã ka mẽ ajaxwỳja amã Tĩrtũm kapêr mar prãm kêt nẽ mẽ urãk nẽ amã ý hã kapêr jarẽnh o mẽ pa xwỳnhjẽ nhĩmex prãm. Tã ã mẽ pahpãmjẽ mẽ ato hpimràatã mẽ ate mẽ hipêx anhỹrja mỳrapê koja Tĩrtũm ja hã mẽ apê mẽ hkanrêhã mẽ htãmnhwỳjaja tanhmã mẽ ato htỳx to ka mẽ amnhĩ xà htỳx kamã ajamak o ri apa rãhã nẽ kãm ga.

⁵² —Jakamã kwa mẽ o kora mẽ apê Tĩrtũm kapêr tũm o mẽ ahkre xwỳnhjaja. Mẽ ajaxwỳja na ka htem Parijew nhõ xwỳnhjẽ pyrã nẽ Tĩrtũm kapêr o mẽ ahkre ho apa. Nẽ aprĩ hã mar mex tã no ãm amnhĩ kaxyw hkõt ajamaxpêr nẽ hkõt amnhĩ nhĩpêx kêt nẽ. Hãmri nẽ mẽ kot mẽ amar o pa xwỳnhjẽ mã atỳx ri tanhmã mẽ ahkre hto nhũm htem mẽ ama nẽ mẽ apyrã nẽ amnhĩ kaxyw Tĩrtũm kõt hamaxpêr nẽ hkõt amnhĩ nhĩpêx kêt nẽ. Mẽ kãm hprĩ hã kapêr mar mex prãm tã mẽ amar xà hkõt mẽ

ate amnhĩ nhĩpêx pyrâk o amnhĩ nhĩpêx o pa. Nom mẽ kajaja na ka htem mẽ kãm mẽ hamaxpêr mex nhôr kêtja mýrapê nhũm htem ã amnhĩ nhĩpêx anhÿr o pa. Jakamã kwa mẽ o kora kot kaj mẽ amex kêt nê. Anê.

Nhũm pre ã Jejus mẽ kãm kapêr anê, ⁵³⁻⁵⁴ Hãmri nê kato nê ma tẽ. Nhũm Tirtũm kapêr tũm o mẽ ahkre ho mẽ pa xwÿnhjê mẽ Parijew nhô xwÿnhjaja hãmri kot tanhmã mẽ kãm kapêr toja ma nê kamã gryk tÿx nê. Jakamã ma hkôt mra. Hêx rom mẽmoj tã hkukjêr o hkôt mra. Nê hã hkukjêr kãm hihtÿx o hkôt mra. Kot tanhmã mẽ kãm ujarênh to nhũm mẽ kot mar nê ra hã ãnnênh kaxyw ma hkôt ãhkukjêr o mra.

12

Mẽ pahte Tirtũm pê mẽ pajamaxpêr punuj o pahpimxur kêt

Matêwre 10.26-33

¹⁻³ Tã nhũm mẽ Jejus ã htu rax kumrêx nê hã axpên nhĩgãnh o kuhê. No nhũm kormã mẽ kãm tanhmã kapêr to hkêt nê. ãm kormã hkôt mẽ pa ho mẽ pa xwÿnhjê kumrêx mã kapêr nê mẽ kãm:

—Mẽ piitã kãm amnhĩ kwÿjê pê hamaxpêr punuj o hpimxur hprãm tã koja nhÿrmã mẽ hamaxpêr piitã amnhĩrît pa. Nê mẽmoj piitã ra hpimxur mex tã koja nhÿrmã piitã amnhĩrît pa. Nê mẽ kot kamãt kô kamã hpimxur pê mẽmoj jarênh tã koja mẽ piitã nhÿrmã kot mẽmoj jarênh ta ma. Nê mẽ kot hitom kãm kawax pê axpên mã mẽmoj punuj jarênh tã koja nhÿrmã mẽ piitã mẽmoj jarênh ta ma. Jakamã kwa kêr ka mẽ tanhmã Parijew nhô xwÿnhjaja kot amnhĩ nhĩpêx to ho pa hã mẽ omu nê ãm mẽ omu nê mẽ hkôt amnhĩ nhĩpêx kêt nê. Te mẽ kot tãm amnhĩ nhĩpêx pyrâk o amnhĩ nhĩpêx tã no ãm tãm amnhĩ nhĩpêx o pa hkêt. Na htem ãm htÿx ri tanhmã amnhĩ to hêx to ho pa. Tã

kêr ka mẽ urâk nê ã amnhĩ nhĩpêx anhÿr kêt nê. Anê.

Mẽ pahte pahkwÿjê pumaj Tirtũm kaga hkêt ã mẽ pamã karô

Matêwre 10.28-31

⁴ Nhũm Jejus arĩ hkôt mẽ pa ho mẽ pa xwÿnhjê mã kapêr nê mẽ kãm:

—E ixkrãmnhwÿjaja. Kêr ka mẽ amã akwÿjê puma rÿ nhãm mẽ hkwÿjê puma ho ri apa hkêt nê. Koja mẽ apar tã ãm mẽ anhĩ pix pa nom tanhmã mẽ akarô hto hkêt nê. ⁵ Tirtũmja tapxipix na hte mẽ ã nê mẽ hkarô ho hpimràatã mẽ kot amnhĩ xã htÿx kamã hamak tũm xã hawÿr mẽ kurê. Tã kêr ka mẽ ja pumaj Tirtũm kapêr kwÿm tanhmã ri amnhĩ nhĩpêx to ho apa hkêt nê.

⁶⁻⁷ —Nê Tirtũm kot mẽ pahto hapêx par pumunh tã mããnnên kot mẽ pajamãr pumunh mex. Mãñ ka htem kuwênhre pumu. Na hte Tirtũm hamãr mex o pa. Mẽ piitã mẽ kot ãm kuwênhre pumunh o pa htã nhũm Tirtũm mẽ kurom hamãr mex o pa. Nê htãnopxar rãhã ho pa. Nom kãm mẽ pajapê htÿx o kuwênhre jakrenh jakamã kwa mẽ tee ri amnhĩ kukamã ajamaxpêr o ri akapri nê apa hkêt nê. Koja Tirtũm mẽ pahãnopxar rãhã ho pa. Ra kot tanhmã mẽ pakute hã mẽ pahpumunh par. Nê ahpÿnhã tanhmã mẽ pahkrã hkĩ kute hkôt mẽ pahpumunh par. Tã kot mẽ pahãnopxar rãhã jakamã mo kaxyw kot kaj kêt mẽ ri amã mẽhõ puma ho ri apa?

⁸ —Jakamã kwa mẽ mãmri mẽ kãm mẽ apê ixkra hã amnhĩ jarênh o ri apa nê amã mẽ uma xàj tee ri amnhĩ nhĩpêx o ri apa hkêt nê. Kot ka mẽ kãm ra mẽ ate ixkôt amnhĩ xunhwÿr ã amnhĩ jarê. Pa ja hã mẽ apumu hãmri nê mẽ apyrã nê kaxkwa kamã Tirtũm kapêr o mẽ wrÿk xwÿnhjê mã ra mẽ ate ixkôt amnhĩ xunhwÿr ã mẽ ajarê. ⁹ Nom kot ka mẽ kot ixtã tanhmã mẽ ato pymaj apê ixkwÿ hã amnhĩ jarênh

kêt japêr. Pa ja hã mẽ apumu hãmri nê nhÿrmã amnhĩ xwar mẽ kãm mẽ apê ixkwÿ hkêt ã mẽ ajarê. Jakamã kwa mẽ mãmri mẽ kãm apê ixkwÿ hã amnhĩ jarênh o ri mẽ hkôt apa kê mẽ ama nê tanhmã inhmã hamaxpêr to. ¹⁰ Koja mẽ ama nê ãm ama nê kãm ixprãm kêt japêr. Hãmri nhũm Tirtũm ixtã mẽ omu nom tokyx ixtã tanhmã mẽ ho hkêt nê. Koja kormã amnhĩ tã mẽ hamãr o pa. Karõ kot axte mẽ kãm ijarênh o amnhĩrit nhũm mẽ hkwyjaja kot mar nê kãm ixprãm nê ixkôt amnhĩ xunhwÿr kaxyw nhũm kormã amnhĩ tã mẽ hamãr o pa. Nom koja Karõ xatã mẽ kãm ixtõ amnhĩrit tã nhũm mẽ kuma nê ãm kuma nê te mẽ kot kêp amnhĩ jamak pro pyrãk o amnhĩ nhĩpêx o pa. Jao Karõ hã hpijaam kêt mÿrapê koja Tirtũm nhÿrmã amnhĩ xwar te kot mẽ kêp amnhĩ jamak pro pyrãk o mẽ hipêx nhũm mẽ tee kãm amnhĩ kaprĩ kaprÿ. Hãmri nê amnhĩ xà htÿx kamã hamak tũm xàta wÿr ma pa nê kamã pa ho pa. Jakamã kwa mẽ mãmri mẽ kãm mẽ apê ixkra hã amnhĩ jarênh o ri mẽ hkôt apa nê tanhmã mẽ kãm ijarênh to ho ri apa. ¹¹ Koja mẽ ama nê kãm mẽ amar prãm kêt japêr hãmri nê ixtã mẽ apynê nê tanhmã mẽ anhĩpêx to kaxyw. Nê Ijaew nhõ Tirtũm kapêr o mẽ ahkre xà hã ixkre hwÿr mẽ ato mrar japêr. Rÿ mẽ õ pahi hwÿr mẽ ato mrar nê tanhmã kãm mẽ ato hêx to. Nom kêr ka mẽ mẽ kãm amnhĩ jarênh kaxyw nê tee ri amnhĩ kukamã ajamxpêr o amã mẽ uma kêt nê. ¹² Koja Tirtũm Karõ ja kaxyw mẽ amã mẽ ajamxpêr mex gõ hãmri ka mẽ õ ri mẽ kãm amnhĩ jarê. Jakamã kwa mẽ tee ri mẽ kãm amnhĩ jarênh kukamã ajamxpêr o ri mẽ amã mẽ uma ho apa hkêt nê. Anê.

*Mê hikukrêx rũnh pix kukamã hamaxpêr xwÿnhjê jarênh
Wam Ximotre 6.9-10; Xiakre*

4.13-17, 5.1-6

¹³ Nhũm Jejus arĩ mẽ ahkre o xa nhũm mẽ mar o kuhê. Rôm nhũm mẽhõ myja hwÿr tẽ nê kãm kapêr nê kãm:

—Pa? Kwa ot pa awÿr amã mẽmoj jarênh mã tẽ. Na pre inhĩpêxã ty nhũm ixtõ ixrom amnhĩm õ mẽmoj piitã ho arĩk pa. Õ pika nê hkrit nê hikukrêx nê ãm mẽmoj piitã ho arĩk par kumrêx. Kwa ma ixkôt tẽ nê kãm anê pa wa amnhĩm ho axkjê nà? Anê.

¹⁴ Hãmri nhũm kuma nê kãm:

—Tk. Kokÿ. Na pa pre mẽ amã mẽ mẽmoj to ixpikjêr kaxyw mẽ awÿr ixwryk kêt nê. Anê.

¹⁵ Hãmri nê mẽ kot mar o kuhê xwÿnh piitã mẽ kãm kapêr nê mẽ kãm:

—Kwa kêr ka mẽ amã anhõ mẽmoj rũnh prãm o ri apa hkêt nê. Na htem mẽmoj rũnh kukwak ri Tirtũm wÿr apir kêt nê. Mẽmojta kêp pika pix nhõ xwÿnh na.

¹⁶ Anhÿr o mẽ kãm kapêr hãmri nê mẽ kãm awjarê. Mẽ hkukrêx rax ã kuxi nê mẽ kãm awjarê nê mẽ kãm:

—Nà koja mẽhõ õ mẽmoj rax nê. Nê hpur kãm õ rax nê. No ãm õ jaxwÿr xà hã ixkre kêp grire. ¹⁷ Hãmri nhũm tee ri hpur kãm õ rax kukamã hamaxpêr nê hamaxpêr o: “Kwa tanhmã kot pa amnhĩ to nê ja piitã nhÿri haxwÿ wehe? Inhmã amarĩ mẽ kêp amrakati xwÿnhjê mã hkwy nhõr prãm kêt. Kot paj ãm amnhĩm piitã ir pa nê kritpêh hkur o ixpa. Nom ixpê haxwÿr xà hã ixkreja ixpê grire.” Anê.

¹⁸ —Hãmri nê hamaxpêr o: “Nà na pa ra ijamxpêr. Kot paj ixkre grireta grã nê hpãnhã rax õ nhĩpêx. Hãmri nê ixpur kãm inhõta jamÿ nê kamã ir pa. Nê ixãpênh xà hã ixkukrêx piitã kamã haxwÿr pa. Nà kot paj ho anê.” Anê.

¹⁹ —Hãmri nê ra ixkreja grãnh pa nê hpãnhã rax õ nhĩpêx. Nê hipêx pa hãmri nê kamã hpur kãm õta

xir pa. Nē àpênh xà hã hikukrêx piitã kamã unhwý. Hãmri nē omu nē hkĩnh nē. Nē hamaxpêr o: “Nà hãmri. Kot paj tokyx axte mēmoj tã ixàpênh kêt nē. Ra inhõ rax kumrêx kênã. Kot paj kritpêh ho ixàpkur mex o ixpa. Nà ãm hãmri na pa amnhĩ kukamã ijamaxpêr mex pê ixkre rax nhĩpêx.” Anê. ²⁰ Tã nhũm Tirtũm tee ri ã kot amnhĩ nhĩpêx anhÿr ã omu nhũm ja kãm mex kêt nē. Hãmri nhũm hã kãm kapêr nē kãm: “Nà na ka atÿx ri anhõ rax mē akukrêx rax o apikuprõnh kaprÿ. Na ka ãm amnhĩ pix kukamã ajamaxpêr o apa pê ã amnhĩ nhĩpêx anê. Nom kot kaj kamàt ja kamã ty nē anhÿ kamã ma mō nē amnhĩ kôt anhõ mēmoj rax õ ho amõr kêt nē. Koja hpãnhã mēhõ amÿr pê ho amnhĩptar pa ka rĩ amnhĩ pumu.” Anê. Nhũm ã Tirtũm kãm kapêr anê. ã mē ujarênh kot anhÿr.

²¹ —Mē kot amnhĩ nhõ nē amnhĩ kukamã pix mã hamaxpêr o mē pa xwÿnhjaja na htem myja pyrã nē Tirtũm mã hamaxpêr o pa hkêt nē. Jakamã koja mē nhÿrmã ty hãmri nē hkukrêx pix kukamã hamaxpêr nē amnhĩ mã pix mã hamaxpêr o paja mÿrapê Tirtũm mē wa ixri htĩr tũm nē mex nē pa ho pa hkêt nē. Mē kot amnhĩ nhõ pix kukamã hamaxpêr xwÿnhjaja nē amnhĩ kukamã pix mã mē hamaxpêr xwÿnhjaja nē mē kamã ukapri hkêt xwÿnhjaja mē õ mēmoj rũnh tã koja mē nhÿrmã ty hãmri nē amnhĩ kôt hõ ho pixi nē o mōr kêt nē. Koja mē mēmoj piitã rer pa nē ma ÿ kamã ma mō. Jakamã kwa kêt ka mē jajê pyrã nē anhõ mēmoj to anhõxy ho ri apa hkêt nē. Anê.

Mē pahte tee ri amnhĩ kukamã pajamaxpêr kêt ã mē pamã karõ

Matêwre 6.25-34; mãññen Wam Pêtre 1.3-9

²² Tã nhũm Jejus hpãnhã tanhmã hkôt mē pa ho mē pa xwÿnhjê jahkre hto nē mē kãm:

—Kwa kêt ka mē tee ri amnhĩ kukamã ajamaxpêr o ri apa hkêt nē. Amnhĩ xàpkur xà rÿ axê ka mē tee ri hkukamã ajamaxpêr kêt nē. Nē mē ãm mēmoj piitã hkukamã tee ri ajamaxpêr kêt nē. ²³ Tirtũm àhpumunh tÿx o àhpumunh tÿx xwÿnh na. Na pre àhpumunh tÿx o mē anhĩpêx ka mē kukwak ri atĩr nē apa. Tã xà kot mē amã mē anhõ ho pa hkukamã àhpumunh kêt? Nà ja kukamã àhpumunh xihtÿx kênã. Kêp mē anhĩpêx xwÿnh jakamã mãññen kêp mē amã mē anhõ ho pa xwÿnh. Nē kêp mē amã mē axê nhõr o pa xwÿnh.

²⁴ —Mãn ka htem kuwênhre pumu. Na hte tee ri amnhĩ xàpkur xà hkukamã hamaxpêr o hkapri nē ri pa hkêt nē. Na hte Tirtũm tãm kot kãm õ ho pa. Tã kãm mē pajapê htÿx o kuwênhre jakrenh jakamã koja urak nē mē pamã mē panhõ mex o pa rãhã nē. ²⁵⁻²⁶ Jakamã kwa kêt ka mē mēmo arĩgro hã axàpkur xà hkryre pumu nē ate amnhĩ pê hkrÿr par nē amã prãm o akapri nē apa hkukamã tee ri ajamaxpêr kêt nē. ãm Tirtũm kamnàr rom axamnhix anhõ hkryreta ku nē akĩnh kãm tanhmã amnhĩ nhĩpêx to ho ri apa. Xà kot ka anhõ mry gire pumu nē akaprire nhũm ra tanhmã amã amnhĩ to rax to? Na htem ãm tee ri mēmo hkukamã hamaxpêr o hkapri nē pa kaprÿ. Jakamã kêt ka mē ã ri ajamaxpêr anhÿr o akapri nē apa hkêt nē.

²⁷ —Mãn ka htem akunĩ kamã pixõrãre pumu. Na hte tee ri tanhmã amnhĩ kute hkukamã hamaxpêr o hkapri nē harir kêt tã muxre nē harir ka mē omu. Te ho annepêh finat pahihiti Sarumãw xê mex pyrak nom ãm mex o kot hakrenh.

²⁸ —Pixõrãreja arĩgro ja hã htĩr nē muxre nē harir tã koja mēmo arĩgro hã grã pa nē hapêx. Kêp pixõrã pix nē hapêx tokyx anhÿr tã na hte Tirtũm ho mex nē nhũm mux nē harir. Nom mē pajaja na hte

mě pahto mex o pixôräre ho mexja jakrenh. Jakamã kwa mẽmo kaxyw kot ka mẽ tee ri amnhĩ xê hkukamã ajamaxpêr o akapri nê apa? Nã kot kaj mẽ anê nê amnhĩ kaxyw Tirtũm mã ajamaxpêr tỳx kêt nê.

²⁹—Kwa mẽ tee ri amnhĩ xàpkur xà hkukamã ajamaxpêr rãhã o ri akapri nê apa hkêt nê. Nê mẽ tee ri amnhĩ kukamã tanhmã ajamaxpêr to ho ri akapri nê apa hkêt nê. ³⁰Mẽ kot Tirtũm kôt amnhĩ xunhwýr kêt xwýnhjaja na htem ã ri hamaxpêr anhýr o hkapri nê pa. Tã kër ka mẽ ho mẽ urák kêt nê. Tirtũm kot mẽ panhõ mẽmoj kêt kôt mẽ pahpumunh mex kênã. ³¹Jakamã kër ka mẽ ãm hkôt ri amnhĩ nhĩpêx rãhã nê. Nê amã ja pix kukamã ajamaxpêr o ri apa hprãm. Hãmri nhũm amnhĩ tã mẽ apumu hãmri nê apkati mẽ tãm mẽ amã mẽmoj nhõr o pa. Anê.

Kaxkwa kamã mẽ pakukrêx rax jarênh

Matêwre 6.19-21; mãânên Sikũn Ximotre 4.8; Eprêw 10.34; Wam Pêtre 1.4

³²Nhũm Jejus arĩ mẽ kãm kapêr nê mẽ kãm:

—E mẽ ate ixkôt amnhĩ xunhwýr xwýnhjaja. Ra Tirtũm kot mẽ ato hkra jakamã kwa mẽ axãmnhĩx hkamnâr rom ri tanhmã amnhĩ nhĩpêx to ho ri apa. Na hte mẽ apê hkra hã mẽ apumu nê hkĩnh nê. Kojã nhýrmã kaxkwa kamã õ krĩ hwýr mẽ ato api ka mẽ kamã wa ixkuri amex nê atĩr tũm nê apa ho apa. Ja na mex o kot jar pika ja kôt mẽ õ mẽmoj rũnh nê pa xwýnhhta jakrenh. ³³Jakamã kër ka mẽ axãmnhĩx ri akukrêx kwý ho wênê nê hpãnhã kàxpore jamý nê mẽ kêp amrakati xwýnhjê mã ho apigrãnh o ri mẽ hkôt apa. Kot kaj mẽ ã amnhĩ nhĩpêx anê hãmri nê kaxkwa kamã akukrêx rax nê. Mo kaxkwa kamã mẽ ãhkĩnh xwýnh kojã mẽ apê ho ahkĩ? Nê kamã mo amnhõre kot mẽ apê homnu?

Kaxkwa kamã ja amrakati kumrêx. Jakamã Tirtũm kot mẽ amã mẽ akukrêx nhõr mã xwýnhhta kojã aa apê omnuj nê hapêx kêt kumrêx. ³⁴Kot kaj mẽ jar pika ja kamã akukrêx rax hãmri nê tanhmã apê omnu hto pix kukamã ajamaxpêr rãhã ho ri apa. Nom kot kaj mẽ apê Tirtũm kra hã kot kaj mẽ jar akukrêx rax kêt tã kaxkwa kamã akukrêx pix kukamã ajamaxpêr rãhã ho ra akĩnh nê ri apa. Anê.

Mẽ pahte Jejus kutêp tanhmã amnhĩ nhĩpêx to hã mẽ pamã karõ

Matêwre 24.42-43; Makre 13.32-37; Rukre 21.34-36; mãânên Wam Tesarõn 5.4-8

³⁵Nhũm pre Jejus arĩ mẽ ahkre nê mẽ kãm:

—E na pa pre ra mẽ apê ixkôt mẽ apa ho apa xwýnhjê mã tanhmã amnhĩ kukamã amnhĩ jarênh to. Ixtyk nê akupým ixtĩr nê ma akupým ixãpir hãmri nê mẽmo arĩgro hã akupým mẽ awýr ixwrykja na pa pre ra mẽ amã ja hã amnhĩ jarê. Tã kwa kër ka mẽ ixwakre kamã ixte mẽ amã ã amnhĩ jarênh anhýrja mã ajamaxpêr tỳx pê ixkôt amnhĩ nhĩpêx rãhã ho ri apa.

³⁶⁻³⁸—Te mẽ õ patrãw mã mẽ àpênh mex xwýnhjaja kot amnhĩ nhĩpêx pyrãk o amnhĩ nhĩpêx o ri apa. Kojã mẽ õ patrãw ma mẽ kot xapên mã wa rer mã xwýnh pumunh mã ma nhýhým tẽ. Hãmri nhũm kãm mẽ àpênh xwýnhjaja arĩ kutêp òrkwý kamã hkrĩ. Axkãm hamak rom nê kutêp hkrĩ. Akupým htêm nhũm mẽ kot amnhĩ wýr mar nê kãm kahê xà mẽnh tokyx anhýr kaxyw arĩ kutêp òt kêt nê hkrĩ. Kôt ã kamãt nhũm akupým hpõx o htêm rý arĩgro hwýr hpõx o htêm nhũm mẽ kot amnhĩ wýr mar nê kãm kahê xà mẽnh tokyx anhýr kaxyw kutêp òt kêt nê hkrĩ. Akupým hpõx ã omunh hãmri nê tokyx apkur kaxyw kãm õ nhĩpêx kaxyw. Kër kê akupým põj nê ã mẽ kot amnhĩ nhĩpêx anhýr ã mẽ omu nê

hkĩnh nē. Tã kêr ka mē àpēnh xwýnhhtajē pyrã nē ixwakre kamã inhmã ajamaxpēr rãhã ho ri apa. Jao ixkamã ajamak o apa ho ixkôt amnhĩ nhĩpēx mex rãhã nē. No kot paj akupýn mē awýr wrý hãmri ka mē àpēnh xwýnhjē pyrã nē inhmã mēmoj nhõr kêt nē. Kêt pa kot paj mē õ patrãwta kurom mē amã mēmoj mex gõ.

³⁹ —Na htem mē kēp àhkĩnh py-maj amnhĩ nhõrkwý jamãr rãhã ho pa. ⁴⁰ Ja pyrã nē mē ate akupýn ixwrýk xã hã arĩgro pumunh kêt jakamã kêr ka mē õrkwý nhõ dõnta pyrã nē ixkutēp axkãm ajamak rom rãhã nē ri apa. Jao tãm amnhĩ nhĩpēx rãhã nē. Anē.

Mē õ patrãw mã mē àpēnh mex xwýnhjē jarēnh

Matēwre 24.45

⁴¹ Nhũm pre ã Jejus hkôt mē pa ho pa xwýnhjē jahkre anē. Hãmri nhũm Simãw Pētre kuma nē kãm:

—Kwa Pahĩti. Xãn ka mē piitã mē kãm ã akapēr anē nã? Xã ãm mē papxipixjē mã? Anē.

⁴² Hãmri nhũm kãm:

—Nã ãm ixwakre kamã mē ate ixkôt tanhmã inhmã amnhĩ nhĩpēx to ho mē apa xwýnh piitã mē amã na pa ã ixkapēr anē. Koja mē àpēnh xwýnhjē hõ õ patrãw mã àpēnh mex o pa nhũm amnhĩ tã omu nē ma nhýhým mõr kaxyw nē ìhkram mēmoj piitã haxàr pa. Hãmri nē kãm: “E kêr ka ixwakre kamã inhmã inhõrkwý htãnopxa. Nē mē àpēnh xwýnhjē mã õ mex kê mē apkur mex o pa.” Anē. Koja ã kãm mēmoj tã karõ anē hãmri nē kato nē ma nhýhým mõ.

⁴³ Hãmri nhũm kãm àpēnh mex xwýnhhta wakre kamã kãm àpēnh mex o pa. Jakamã nhũm õ patrãw akupýn hpõx o mõ nhũm amnhĩ wýr harēnh ma nē hkĩnh nē. Nē mēmoj tã amnhĩ tã kamã kahak kêt nē. Rý tee ri wakre kamã kãm àpēnh punuj ã amnhĩ pumu nē tee amnhĩ kukamã hamaxpēr kêt nē.

Kot wakre kamã kutēp àpēnh mex jakamã akupýn hpõx ã harēnh ma nē hkĩnh nē.

⁴⁴ —Jakamã nhũm õ patrãwja akupýn põj nē kot kãm àpēnh mex ã omu nē haxwýja hkĩnh nē. Hãmri nē kot kãm hamãr o pa kaxyw kãm mēmoj piitã ìhkram haxàr pa. ⁴⁵ Nom koja kãm àpēnh xwýnhhta axtem nē wakre kamã kãm àpēnh mex kêt nē. Nē tokyx akupýn mõr kêt ã hkamnhĩx nē wakre kamã kãm mē àpēnh xwýnhjē htak nē pipãnh pix nē mē kãm gõ xành xwýnhjē kôt pix mã pa japēr. ⁴⁶ Hãmri nhũm õ patrãw haēr pē akupýn põj nē tee ri ã amnhĩ nhĩpēx anhýr ã omu. Hãmri nē gryk týt nē tanhmã homnuj to. Hãmri nē kãm mē àpēnh punuj xwýnhjē mē mē ho pimràatã amnhĩ nē mē hanor pa. Tã kêr ka mē ixwakre kamã ho mē urak kêt nē. Mē kurom ixkapēr kôt tãm amnhĩ nhĩpēx mex rãhã ho ri apa.

⁴⁷⁻⁴⁸ —Nē koja mēhõ kormã Tirtũm kapēr mar kêt nē htýt ri tanhmã amnhĩ tomnuj to ho pa. Hã koja Tirtũm ja hã omu nē nhýrmã kot amnhĩ tomnuj o pata mýrapē tanhmã ho nhũm amnhĩ xã htýt kamã hamak tũm xã kamã pa. Nom akrãnhmã amnhĩ xã kamã hamak o pa. Aa kot Tirtũm kapēr mar kêt jakamã koja ãm akrãnhmã amnhĩ xã kamã hamak o pa. Nom koja mēhõ kapēr mar mex tã ãm kuma nē hkôt amnhĩ nhĩpēx kêt nē. Nē xatã hirõp kuhē nē tanhmã amnhĩ tomnuj to. Hã koja Tirtũm tee ri ja hã omu nē nhýrmã tanhmã homnuj týt to. Hãmri nhũm wamtajē pyrã nē amnhĩ xã htýt kamã hamak tũm xãta kamã pa ho pa nom mē kĩnhã amnhĩ xã htýt kamã hamak rãhã ho pa. Anē.

Jejus kot nhýrmã mē kot amnhĩ tomnuj xã ho hapēx ã harēnh

Matēwre 10.34-36

⁴⁹ Nhũm Jejus arĩ hkôt mē pa ho mē pa xwýnhjē jahkre nē mē kãm:

—Nà ixte mē omnu xà piità ho ijapêx par nē mē kot tanhmā amnhī tomnuj to piità ho ijapêx par kaxyw na pa pre wrÿ. Tã ra ixte piità ho ijapêx par o inhmōr ronhÿx ja inhmā mex kumrêx. Nom kormã. ⁵⁰ Kot paj amnhī xà htÿx kãm ijamak rax o mē kot amnhī tomnuj o ijapêx o hkra. Hãmri nē nhÿrmã ho ijapêx pa. Na pa ra ixtyk kaxyw ixte amnhī kà xà kamã ijamak kukamã ijamaxpêr o ra amnhī kamã ixkahak nē ri ixpa. Tã kot paj ja ho ijapêx pa nē ixkĩnh tÿx kumrêx. Anē.

Mē kot Jejus ã axpên kutã amnhī xunhwÿr ã mē harênh
Matêwre 10.21, 10.34-35

⁵¹ Nhÿm Jejus arĩ mē ahkre nē mē kãm:

—Nē ra mē awÿr ixwrÿk tã koja mē piità ixkukwak ri hamakêtkati nē ãmnhĩ ri pa hkêt nē. Kormã. Koja mē akwÿjaja ixkapêr ma nē mē apyrã nē amnhī kaxyw ixkôt hamaxpêr. No nhÿm mē akwÿjaja mē akĩnhã kuma nē ãm kuma. Hãmri nē ixtã tanhmã mē anhĩpêx to ka mē ixpyrã nē amnhī xà htÿx kamã ajamak o ri apa.

⁵² —Nē koja tanhmã ixkre pyxi kamã mēmojaja ohtôn pa. Nhÿm war axkrutre nē ixkôt amnhī xunhwÿ nhÿm mē axkrunêpxi nē ixkwÿm ri amnhī nhĩpêx nē ixkutã amnhī xunhwÿ. ⁵³ Nhÿm mē hipêêxã hkra my mē wa ixtã axpên kutã amnhī xunhwÿ. Nhÿm mē katorxã hkra ni mē wa ixtã axpên kutã amnhī xunhwÿ. Nhÿm mē wÿj umregêx mē wa haxwÿja ixtã axpên kutã amnhī xunhwÿ. Koja mē ã ixtã axpên nhĩpêx anhÿr o pa. Anē.

Mē pahte amnhī tomnuj kaga nē Tĩrtũm kôt amnhī nhĩpêx ã mē pamã karõ

Matêwre 5.25-26, 16.2-4

⁵⁴ Nhÿm Jejus hpãnhã mē kot hkôt amnhī xunhwÿr kêt xwÿnhjê mã kapêr nē mē kãm:

—Kwa mē inhma mē ate ixkôt amnhī xunhwÿr kêt xwÿnhjaja. Na htem kaxkwa kamã na htyk rax pumu nē na wrÿk mã hamaxpêr kurê kumrêx. Hãmri nhÿm na wrÿ. ⁵⁵ Nē amgrã pê kôk krihkritja nhÿm htem kuma nē arĩgro htÿx mã hamaxpêr kurê kumrêx. Hãmri nhÿm arĩgro htÿx nē. ⁵⁶⁻⁵⁷ ã na ka htem aprĩ hã mēmoj pumunh kôt mēmoj kukamã ajamaxpêr mex o ri apa anē. Nom nhÿm Tĩrtũmja mē ate tanhmã amnhī tomnuj to mÿrapê tanhmã mē ato kaxyw nhÿm mē ate ja hã amnhī pumunh tã tokyx amnhī tomnuj kaga hkêt nē.

⁵⁸⁻⁵⁹ —Na htem tanhmã axpên tomnuj to. Hãmri nhÿm kot tanhmã war axpên to xwÿnhhta pahĩ hwÿr htêm nē kãm tanhmã kot ho xwÿnhhta jarênh kaxyw. Hãmri nhÿm kamã gryk xwÿnhhta kot pahĩ mã harênh kaxyw ã harênh ma nē hãmri tokyx hwÿr tē nē wa tãm akupÿm axpên xãm. Na htem ã amnhī nhĩpêx anē. Pahi kot ja mar nē tanhmã mē ho pymaj na htem ã amnhī nhĩpêx anē nē tokyx akupÿm tãm axpên xunhwÿ. No koja mē ã amnhī nhĩpêx anhÿr kêt nē nhÿm pahija mē harênh ma hãmri nē tanhmã kot hõ ho xwÿnhhta pynê nē haxã nhÿm tee kãm kator prãm o hkrĩ kaprÿ. Hãmri nē tanhmã amnhī to nē amnhī pãnhã kãm amnhī rer pa nhÿm pahihitija kormã mē kãm anē nhÿm mē kãm ure nhÿm kato. Ja pyrã nē kêt ka mē Tĩrtũm tanhmã kot mē anhĩpêx to pymaj tokyx mē ate amnhī tomnuj kaga nē hkôt amnhī nhĩpêx rãhã ho ri apa. Anē.

13

¹ Tã nhÿm axtem mē hkwÿjaja Jejus wÿr mra nē kãm:

—Pa? Kwa xãn ka ra Garirej nhõ xwÿnh kwÿjê jarênh ma nã? Na xep

prem Jerujarê hwÿr mra nê ham mē kot Tirtūm mā amnhī jarēnh xà hā ixkre kamā kām amnhī jarēnh kaxyw kormā kām mry hpar o kuhé nhūm xep pahiht Piratja mē harēnh ma nē mē hā amÿnê nhūm mē ma mē hwÿr mra nē mē himex pa. Kwa mǎn mē kot amnhī tomnuj tÿx o mē pajakrenh ā na prem mē himex nà? Anē.

²⁻³ Hāmri nhūm mē kām:

—Nà mē kot amnhī tomnuj tÿx mÿrapê mē kot mē himex kêt. Mē apiitā mē ate amnhī tomnuj o axpēn pyrāk kēnā. Tā kot ka mē amnhī tomnuj kaga nē Tirtūm kôt amnhī xunhwÿr kêt hā kot ka mē nhÿrmā ty hāmri nē ô krī hwÿr axàpir kêt nē. ⁴ No Jerujarê kamā ixkre prêkja mē kot kām “Siroe” anhÿr xwÿnhhta mē ho 18 nē mē hipy htem nē mē himex par xwÿnhjaja. Xà mē kot amnhī tomnuj tÿx mÿrapê na prem ty? Xà mē kot amnhī tomnuj tÿx o Jerujarê kamā aŕi mē htir xwÿnhjê jakrenh? ⁵ Nà kot anhÿr kêt. Mē apiitā mē ate amnhī tomnuj o axpēn pyrāk. Jakamā kot kaj mē ā amnhī nhÿpêx anhÿr kaga nē Tirtūm kôt amnhī nhÿpêx kêt nē hāmri nē mē urāk nē nhÿrmā ty hāmri nē Tirtūm nhô krī hwÿr axàpir kêt nē. Jakamā kwa mē ixkapêr ma nē kām ajamaxpêr tÿx rāhā ho ri apa. Anē.

Tirtūm kot mē pakamā gryk tokyx anhÿr kêt ā harēnh

Rômān 2.4; Sikūn Pêtre 3.8-9

⁶ Tā nhūm Jejus kê axte tanhmā mē ahkre hto. Nē Tirtūm kot tanhmā mē panhÿpêx to hā kuxi nē mē kām awjarê nē mē kām:

—Koja hpur nhô dôn mēmo pâr kre nhūm ra hprêk mex nē ô mā tām nē. Tā aa ô hkêt ā ra hā amgrā axkrunêpxi. ⁷ Hāmri nhūm kot hkre xwÿnhja tee ri omu nē kām àpēnh xwÿnh wÿr tē nē kām: “E kwa ma tē nē mēmo pâr mÿj krāhta nē amē. Mexti hā. Ra ô hkêt ā amgrā axkrunêpxi kēnā. Koja pêr aa ô hkêt

nē. Mo kaxyw kot kêt ô hkêt tā ô mex xwÿnh kaêx ā mē kēp àmnār o kuhê? E hwÿr tē nē krāhta nē amē.” Anē. ⁸⁻⁹ Hāmri nhūm tee ri kot kām hā karôja ma nē kām: “Kwa nà kormā. Pa kop ixàmnhÿx pâr krax ā mēmo japôk kwÿ kapī nē kop hamā mǎn. Kê axte hā amgrā pyxi nē hapêx nē ô hkêt pa kormā krāhta nē kumē. Koja amgrā ja kamā amā ô japêr ka omu nē akīnh nē.” Anē. Ā mē ujarēnh kot anhÿr. Anē.

Nhūm Jejus ā mē kām ujarēnh anē. Mē kot amnhī tomnuj tÿx o pa htā nhūm Tirtūm kot pur nhô dôn mā àpēnh xwÿnhhta pyrā nē mē kamā gryk tokyx anhÿr kêt ā nhūm ā hā kuxi nē mē kām ujarēnh anē.

Jejus kot arĭgromnu hā mēhō ho mex ā harēnh

Rukre 14.1-6; Juāw 5.16-17

¹⁰ Tā nhūm mē ô arĭgromnu pē sap kato nhūm Jejus Ijaew pikuprōnh xà hā ixkre hwÿr axà nē kamā Tirtūm kapêr o mē ahkre ho nhÿ. ¹¹ Nhūm kamā mēhō ni hikôt rāhā nē pa xwÿnhja nhÿ. Na pre ra amnepēm mēkarōmnuti tanhmā ho nhūm katāt nē ri mŕar kêt kumrêx. Ām hikôt rāhā nē ri pa hā ra hā amgrā pē 18. ¹²⁻¹³ Hāmri nhūm Jejus omu nē amnhī wÿr kām hpa ho apē nhūm hwÿr tē nhūm hā ĩhkra xi nē kām:

—E na ka ra akupÿm amex.

Anē nhūm akupÿm katāt nē mex kurê kumrêx. Hāmri nē amnhī pumu nē hkīnh tÿx nē Tirtūm mā mex o mex ā harēnh o xa. ¹⁴ Nom nhūm mē pikuprōnh xà hā ixkre jamār xwÿnh maatija tee ri ja hā omu hāmri nē Jejus kamā gryk tÿx nē. Mē ô arĭgromnu hā akupÿm kot ho mex jakamā nhūm kamā gryk tÿx nē. Hāmri nē mē pikuprōnh xwÿnhjê mā kām:

—Tk. Kwa semān ā mē àpēnh xà hā arĭgro xohtôô. Kêp 6. Kot kaj mē māmri tōmĭk nē sikūn nē tēs nē kwata nē kĭta nē sēsta ja ā ka mē apê rÿ māmri Jejus wÿr amnhī

to mra kê akupÿm tanhmã mê ato mex to. No sap ã kwarĩ. Sap kêp mê pahpê Ijaew nhõ arĩgromnu kênã. Na pu htem hã paxâpênh kêt nê. Jakamã arĩgro ja hã kot akupÿm mê ato mexja mex kêt. Anê.

¹⁵ Hãmri nhũm Jejus kuma nê kãm:

—Kwa xà mê kajaja na ka htem sap ã axâpênh kêt nê apa? Nà mê ate hã axâpênh kênã. Xàn ka htem sap ã akrit kawar nê akrit môx ma mê ho apa nê mê hkôm kêt nê? Nà na ka htem ma mê ho apa nhũm htem ixkõ. Mot ka kêt mê ri axtem nê mê kot sap ã tanhmã amnhĩ toja nê mê kãm akapêr? ¹⁶ Ixte ni ho mex xwÿnhnta mê pahpyrà nê kêp finat Apraãw kagrõt nyw õ na. Nhũm pre Satanasti te kot kãm ê nê ri o pa pyrãk o hipêx jakamã nhũm ÿ hã hikõt nê ri paja ã ra hã amgrã kêp 18. Tã pa nê te ixte Satanasti ho ixkrihkrit nê ixte kêp utar pyrãk o hipêx nê akupÿm ho mex. Mo kot pa kêt ri omu nê ãm omu nê arĩgromnu hã ho mex kêt nê? Nà ixte arĩgro piitã hã akupÿm mê ho mex o ixpa xwÿnh kênã. Anê.

¹⁷ Hãmri nhũm mê kot kãm kapêr mar prãm kêt xwÿnhjaja kuma nê kamã gryk nê. Te ho mēhprĩjê mã mê hamaxpêr nhõr pyrãk o mê hipêx pyrãk jakamã nhũm mê amnhĩ tã kuma nê kamã gryk nê. No nhũm mê kot ra ã amnhĩ nhĩpêx anhÿr o pa hã omunh xwÿnhjaja ja hã omu nê kãm hkĩnh nê.

Jejus te kot mēmo hy pyrãk ã harênh

Matêwre 13.31-33; Makre 4.30-32
¹⁸⁻¹⁹ Nhũm Jejus arĩ mê ahkre nê tanhmã mê kãm amnhĩ tã ujarênh to nê mê kãm:

—Nê Tirtũm kot mê awÿr ixte mê ato amnhĩptar kaxyw inhmēnh ã ijarênhja. Te ixte mēmo hy pixire pyrãk. Na htem hkre nhũm higrõt. Nê gaa nê rĩ hprêk. Hãmri nê pa anhrã nhũm kuwēnhre hwÿr mra nê hó pytĩ kamã amnhũm haê

nhĩpêx. Tã kot paj nhÿrmã mēmo hy jarênhnta pyrã nê ixpaxi htã kot paj pika piitã hkõt mê ho amnhĩptã nê mê omunh mex rãhã ho ri ixpa. Anê.

Jejus te kot pãwti kaxkrit xà pyrãk ã harênh

Matêwre 13.33-35

²⁰⁻²¹ Nhũm Jejus arĩ mê ahkre ho xa. Nom hprĩ hã amnhĩ jarênh kêt nê. ãm amnhĩ tã kuxi nê mê kãm awjarê nê mê kãm:

—E kot pa hpãnhã tanhmã mê amã pãwti kaxkrit xà jarênh to. Koja mēnijê hõ ãm hkwy ho grire nê kupy nê kaxyw mēmo xõm kãm kumê nê ho pihkãr pa nê ho pãwti nhĩpêx. Nhũm kaxkrit xaja grire htã pãwti piitã ho kaxkrit mex nê. Ja pyrã nê kot paj ixpyxi htã koja mê nhÿrmã pika piitã hkõt ixkõt amnhĩ nhĩpêx mex o pa. Anê.

Nhũm pre ã Jejus mê kãm amnhĩ tã pãw kaxkrit xaja xi nê harênh anê.

Kaxkwa hwÿr hakwa kre kahê xà jarênh

Matêwre 7.13-14, 7.21-23; Juãw 10.7-10

²² Tã nhũm Jejus arĩ krĩ pē Jeru-jarē hwÿr krĩ hkõt ri mê ahkre ho mê hkõt ri pa. ²³ Hãmri nhũm mēhõ myja hwÿr tē nê mēmoj tã hkukja nê kãm:

—Pa. Kwa inhmã mēmoj jarē. Xà koja mê ohtõ nê nhÿrmã Tirtũm ri htĩr tũm nê papa ho nà koja mê grêre? Anê.

²⁴ Hãmri nhũm kuma nê mê kot mar o kuhê xwÿnh piitã kãm:

—Nà mê kot Tirtũm kõt amnhĩ xunhwÿr xwÿnhjê pix koja mê õ krĩ hwÿr agjê. Wÿr mê gjêx xaja ãm pixii nom koja mê ohtõ nê kãm hkõt wÿr gjêx prãm kêt nê. Na htem te hwÿr mê gjêx xà hõ japêr o pa pyrãk. Nom pa na te ixpê hwÿr mê gjêx xà pixita pyrãk. Jakamã kwa kêr ka mê tokyx ixkõt amnhĩ xunhwÿr tÿx nê ixkõt ri amnhĩ nhĩpêx o ri apa. Na htem ohtõ nê kãm

ixkôt amnhĩ xunhwÿr prãm kêt nê. Ixte amnhĩ nhĩpêxja mẽ kêp hihtÿx jakamã nhũm htem ixkaga.

25 —Tã koja mẽ nhÿrmã ty nê tee ri kãm Tirtũm wÿr gjêx prãm kaprÿ. Kot paj te mẽ kêp kahê pyrãk o mẽ hipêx nhũm mẽ kapôt ã kuhê nê tee ri amnhĩ tã ixpumu nê inhmã: “Kwa mẽ inhmã kahê xà mẽ pa mẽ awÿr agjê Pahihti.” Anê. Hãmri pa mẽ kãm: “Nà ixte mẽ apumunhre hã kot pa kêt ri mẽ amã kurê.” Anê.

26 —Hãmri nhũm mẽ tee ri inhma nê inhmã: “Kwa nà ra ate mẽ ixpumunh mex kênã. Na ka pre mẽ inhõ krĩ kamã mẽ ijahkre ho ri apa nê mẽ ixkutã axàpkur o ri apa.” Anê. 27 Hãmri pa mẽ kãm: “Tk. Ixte mẽ akutã ixàpkur tã mẽ ate ixkôt amnhĩ xunhwÿÿre hã. Jakamã e mẽ ma mra. Mẽ ate amnhĩ tomnuj pix o mẽ apa xwÿnh jakamã kot kaj mẽ ixwÿr agjêx kêt nê.” Anê. Kot paj ã mẽ kãm ixkapêr anê.

28 —Hãmri nhũm mẽ amÿm ri mẽ inhmex ã mẽ ixpumunh o kuhê. Kaxkwa kamã mẽ ixkĩnh nê ri mẽ inhmex nê ixpa hã amÿm mẽ ixpumunh o kuhê. Apraãw nê Ijak nê Jako nê Tirtũm kapêr jarênh o mẽ pa xwÿnh piitã nhũm mẽ amÿm mẽ ixkĩnh nê mẽ ixàpkur mex ã mẽ ixpumunh o kuhê. Hãmri nê tee ri mẽ ixwÿr kãm gjêx prãm kaprÿ nê hkaprĩ nê mur nê amnhĩ krã hkĩ jarê nê amnhĩ kã nhê nê amnhĩ kamã gryk tÿx nê. Nõ ãm tee ri amnhĩ kamã gryk kaprÿ. ã koja mẽ amnhĩ nhĩpêx anê. 29 Nom Tirtũm kôt mẽ kot amnhĩ xunhwÿr xwÿnhjaja koja mẽ kurom pika piitã kurũm axpên wÿr akuprõ nê Tirtũm wÿr agjê nê kuri hkĩnh nê apkur mex o hkrĩ. Mẽ akwÿjaja nê pika piitã kurũm hohtõ rax nê axpên wÿr akuprõ nê hwÿr agjê nê kuri apkur mex nê hkĩnh nê pa ho pa.

30 —Mẽ apê Ijaewjaja mẽ amã Ijaew kêt xwÿnhjê hprãm nõkati htã koja mẽ hkwÿjaja mẽ akwÿjê

rom Tirtũm ri axpên wÿr akuprõ nê hkĩnh nê axpên kutã apkur mex o hkrĩ. Jakamã kwa kot kaj mẽ urak nê amã Tirtũm mẽ wa ixwÿr agjêx prãm hã kot kaj mẽ ixkôt amnhĩ xunhwÿ nê ixkapêr kôt amnhĩ nhĩpêx mex o ri apa. Anê.

Jejus kãm Jerujarê nhõ xwÿnhjê japê hã harênh

Matêwre 23.37-39

31 Hãmri nhũm Parijew nhõ xwÿnh kwÿjaja Jejus wÿr mra nê kãm:

—Pa. E ot pa mẽ awÿr mra. Kwa kêt ka ma Jerujarê hwÿr amõr kêt nê. Na ra mẽ hkĩnh wÿr pahi Eroxja pøj nê kot tanhmã ato kaxyw atã amnhĩ jarê pa mẽ kuma. Jakamã kwa mẽ hwÿr amõr kêt nê. Nhãm krĩ hõ hwÿr mãn mõi. Anê.

32 Hãmri nhũm mẽ kuma nê mẽ kãm:

—Tk. Nà kot pa umaj nhãm krĩ hõ hwÿr inhmõr kêt nê. Kot paj ma mẽ hkwÿjê nê mẽkarõmnuti japõx pê mẽ hkwÿjê ho mex o ma hwÿr mõi. Pahi Erox kãm mẽ hpar pix prãm. E mẽ mãmri ma akupÿm hwÿr mra nê ã kãm ixkapêr jarênh anê. No kot paj umaj nhÿhÿm ixprõt nê ixtêm nê kêp ixpimxur kêt nê. Ra ixte õ krĩ hwÿr inhnojaret kênã. Anê.

33 Hãmri nê mẽ kot mar xwÿnhjê mã amnhĩ jarê nê mẽ kãm:

—Kot paj tanhmã amnhĩ nhĩpêx to ho ri ixpa rãhã Jerujarê hwÿr mõi pøj nê kamã ty. Kamã na htem mẽ kot Tirtũm nhÿ hã kapêr jarênh xwÿnhjê nhĩmex. Tã hwÿr kot paj mõi. Anê.

Nhũm pre ã Jejus mẽ kãm amnhĩ jarênh anê. 34 Hãmri nê te ra kot Jerujarê nhõ xwÿnhjê pumunh o ãm nê mẽ kãm kapêr pyrãk o kapêr nê mẽ kãm:

—Hêxta waa nê mẽ apê Jerujarê nhõ xwÿnhjaja. Tirtũmja xatã mẽ awÿr ÿ hã kapêr jarênh o mẽ pa xwÿnhjê rênh tã ka mẽ kapêr mar kêt nê. Nê axtem nê kên o mẽ

htak o mē himex o apa. Na ka htem ā amnhī tomnuj o apa anē. Tā arī inhmā mē ajamār o ri ixpa hprām. Te ho krāhyre kot nore hpro nē ho hikwỹ pyrāk o na pa inhmā mē anhīpēx prām tā ka mē apē ixprām nōkati nē ixkaga. ³⁵ Mýrapē koja Tirtūm mē anhō krī jamār kēt nē. Kot paj tokyx ty nē mē apiitā mē are nē ma akupỹm api ka mē axte ixpumunh kēt nē. Ām akupỹn ixwryk xā hā arīgrota pix ā koja mē akwỹjaja mē amýr pē krī ja hwýr ixwryk kām ixpumu. Hāmri nē mē akurom ixpumu nē hkīnh tỳx nē. Nē tā ixkōt amnhī xunhwý nē axpēn mā ijarēnh o:

E ota Tirtūm kot mē pahwýr mēnh xwýnhta pōj. Nā ām hāmri na mē pahwýr wrý. Na mex kumrēx. Anē.

14

Jejus kot axte arīgromnu hā mēhō ho mex ā harēnh
Rukre 13.10-17

¹ Tā nhūm sap nhūm Jejus ma Parijew nhō xwýnhjē krāhtūm kutā apkur kaxyw ōrkwỹ hwýr tē. Hāmri nhūm mē wa hā htu rax nē Jejus apkur ā tānopxar o kuhē. Mē kot amnhī nhīpēx kwým ri tanhmā amnhī nhīpēx to nhūm mē kot hā omunh nē ra hā āmnēnh kaxyw nhūm mē kuri htānopxar o kuhē. ² Nhūm ixkreja kamā mēhō my hte hikot xwýnh mē kuri xa. ³ Hāmri nhūm Jejus omu nē hā Parijew nhō xwýnhjē mē Tirtūm kapēr tūm o mē ahkre xwýnhjē kukja nē mē kām:

—Kwa mē inhmā mēmoj jarē. Jarāhā na mē panhō arīgromnu pē sap. Tanhmā na pre finat Mojesja Tirtūm nhỹ hā mē pahte sap ā tanhmā amnhī nhīpēx to hā mē pamā karō hto? Xā kot puj mē akupỹm mē ho mex nā? Kot puj mē ām mē omu nē akupỹm mē ho mex kēt nē? E mē atō inhmā ja jarē. Anē.

⁴ Hāmri nhūm mē kuma nē tanhmā kutā kām nē hkēt nē. Ām akryk mar o kuhē. Mē kot tanhmā kām nē nhūm kot ta pānhā mē kām tanhmā nē pymaj nhūm mē akryk mar o kuhē nē tanhmā kutā kām nē hkēt nē. Hāmri nhūm tee ri mē omu hāmri nē myja ā ĩhkra xi nē akupỹm ho mex. Hāmri nē hano nhūm ma akupỹm mex nē hkīnh nē ma tē. ⁵ Hāmri nhūm Jejus mē kām:

—E mē inhma. Xā koja mē akra sap ā mē apē ahkrehti xupỹm kām tēm ka mē ām omu nē arīgro mex jamār pē tokyx ho axāpir kēt nē? Nā kot kaj mē ho axāpir kurē kumrēx. Rý koja akrit mōx gyw mā axā xāt ka mē omu nē ām omu nē arīgro mex jamār pē tokyx hkaxār kēt nē? Nā kot kaj mē hkaxār kurē kumrēx. Na htem sap ā tanhmā mē ho mex to ho pa. Mē panhō arīgromnu htā pu htem hā tanhmā mē ho mex to. Jakamā na pa ā hā myta ho mex kurē kumrēx anē nē ri arīgro mex jamār kēt nē. Anē.

⁶ Nhūm pre ā Jejus mē kām amnhī jarēnh anē nhūm mē kuma nom kutā kām mēmoj jarēnh kēt nē. Ra kot akupỹm ho mex jakamā nhūm mē tanhmā hā kām nē hkēt nē kuhē.

Mē pahte amnhī to hkryre hā mē pajarēnh

Matēwre 23.6-14; Rukre 6.32-36; mǎānēn Xiakre 4.10; Wam Pētre 5.5-6

⁷ Hāmri nhūm mē apkur kaxyw mē hkrī xā hā hkrī hpa. Nhūm mē hkwyjaja hkwyjē pē amnhī to wa nē mē hkrī xā mex kām hkrī hpa. Hāmri nhūm Jejus ja hā mē omunh o xa nē axte mē kām mēmoj jarē. No ām mēmoj tā kuxi nē mē kām awjarē nē mē kām:

⁸ —Nā koja mē axpēn mā mēhō rer kaxyw nē amnhī wýr mē atā karō. Mē ate kutā axāpkur kaxyw. Hāmri kēr ka mē hwýr mra nē axāpkur kaxyw nē kupip kām akrī kurē kumrēx. No kot kaj mē kēp

amnhĩ to wa nê mẽ hkrĩ xà mex pytã nê hã akrĩ nhũm ra kot amnhĩ to rax xwýnhjê hõja hapu hã mẽ akõt tẽn axà. ⁹ Hãmri nhũm ixkre nhõ dõn kot amnhĩ wýr mẽ awýr xwýnhhta mẽ hkrĩ xà mexta ã mẽ awý nê mẽ amã: “Kwa mẽ atõ kãnhmã xa nê kãm mẽ hkrĩ xà kaprã.” Anê. Hãmri ka nhãm xa nê kãm anhýr xata gõ. Hãmri nê api-jaam kãm hpãnhã kupĩp kãm nhý. ¹⁰ Ja pymaj kêr ka mẽ kupĩp kãm akrĩ kurê kumrêx. Kê ixkre nhõ dõnja tee ri ja hã mẽ apumu nê mẽ amã: “Tk. Kwa ixkrãmnhwýjaja. Mẽ kupĩp kãm akrĩ hkêt nê. Kwa mẽ mra nê jar mẽ hkrĩ xà mex ã mãn akrĩ.” Anê hãmri nhũm ja mẽ amã mex nê. Nhũm mẽ piitã kot mẽ ato mex ã mẽ atã omu ka mẽ ajaxwýja amnhĩ tã omu nê akĩnh nê ajamakêtkati nê akrĩ.

¹¹ —Nê koja mēhõ te amnhĩ to rax o hkwyjê jakrenh pyrãk o amnhĩ nhĩpêx o ri pa hãmri nhũm Tirtũm ja hã omu nê tanhmã hã ho. Hãmri nhũm ra amnhĩ to grire hã amnhĩ pumunh o ri pa nê rĩ amnhĩ pumu. Nom koja mēhõ amnhĩ to rax o hkwyjê jakrenh pyrãk o amnhĩ nhĩpêx o ri pa hkêt nhũm Tirtũm ja hã omu hãmri nê tãm amnhũm kot amnhĩ to rax xwýnh ã harê. Anê.

Mẽ pahte mẽ kêp amrakati xwýnhjê ho mex ã mẽ pamã karõ

¹² Nhũm pre ã Jejus mẽ ahkre anê hãmri nê hpãnhã mẽ apkur xà hã ixkre nhõ dõnja mã kapêr nê kãm:

—Nà na ka hte amnhĩ wýr akwýjê pix wý. Atõjê hwý nê akrãmnhwýjê hwý. Nê mẽ hikãxpore rũnh xwýnhjê hwý. Nom nhýrmã mẽ kot amnhĩ xwar amnhĩ nhõrkwý hwýr awýr pix kaxyw na ka hte ã amnhĩ wýr mẽ hwýr anê.

¹³ No kêt amnhĩ wýr mẽ no kre xwýnhjê mãn wý. Nê mẽ hyk o mẽ pa xwýnhjê mãn wý. Nê mẽ hkrã pipãnh puro xwýnhjê mãn wý. Nê mẽ hpigêx tỳx xwýnhjê

mãn wý. Nê mẽ hirot nê àpênh kêt xwýnhjê mãn wý. Kêr ka amnhĩ wýr jajê mãn wý kê mẽ awýr mra nê akutã apku. ¹⁴ Mo mẽ kot amnhĩ xwar awýr kaxyw mẽ õ mẽmoj? Mẽ kêp amrakati. Tã kot kaj mãmri amnhĩ wýr mẽ awý nhũm Tirtũm mẽ hã apumu hãmri nê nhýrmã kot akupým mẽ ho htĩr xà hã arĩgrota ã mẽ hã amã mẽmoj mex gõ nê ato mex nê. Hãmri ka akĩnh nê. Anê.

Tirtũm kutã mẽ paxãpkur xà maati jarênh

Matêwre 8.11, 25.1-10, 26.29; mããnênh Apokarip 19.9

¹⁵ Hãmri nhũm mẽ apkur kaxyw hkrĩ pa nhũm Jejus nhĩhkõ hã mẽ apkur o mẽ krĩ xwýnhjê hõja tanhmã Jejus mã kapêr to nê kãm:

—Hêxta waa nê. Kot puj mẽ nhýrmã Tirtũm nhõ krĩ hwýr api nê kutã paxãpkur o pahkrĩ nê pahkĩnh tỳx kumrêx. Anê.

¹⁶ Hãmri nhũm kuma nê kê axte mẽ ahkre. Mẽ kot Tirtũm kutã apkur kaxyw kot amnhĩ wýr mẽ hwýrta ã nhũm mẽ ahkre. No ãm hã kuxi nê tanhmã mẽ kãm ujarênh to nê mẽ kãm:

—Koja mēhõ amnhĩ wýr mẽ ho ohtõ nê mẽ kot kutã mẽ apkur mex kaxyw mẽ kuwý. ¹⁷ Hãmri nê mẽ hwýr kãm àpênh xwýnh mẽ nê kãm: “E ma tẽ nê mẽ kãm awjarê kê mẽ tokyx mra pa mẽ apku.” Anê.

¹⁸ Hãmri nhũm kuma nê mã mẽ hwýr mẽ kãm ujarênh o tẽ. Hãmri nê wamta mã anê nhũm kuma hãmri nê hitõt nê kãm: “Nà kot paj hwýr ixtêm kêt nê. Na pa ham amnhĩm pika hkwyjê japrõ. Jakamã kot paj ma hwýr tẽ nê ixprĩ hã omu mãn. Kwa kêr ka kãm ijarê kê ixte tanhmã hã nê xà hkõt ã ixte amnhĩ nhĩpêx anhýrja mã hamaxpêr kêt nê.” Anê.

¹⁹ —Hãmri nhũm kuma nê hpãnhã nhãm ja wýr tẽ nê kãm awjarê nhũm kuma nê haxwýja hitõt nê kãm: “Nà kot paj hwýr ixtêm kêt nê. Na pa ham amnhĩm môx o 10 nê haprõ. Jakamã kot

paj ma hwÿr tē nē ixprī hā ri omu mān. Kwa kēr ka kām ijarē kē tee ri tanhmā hamaxpēr to hkēt nē. Ixte tanhmā hā nē xā hkôt ā ixte amnhī nhīpēx anhÿr kēt.” Anē.

²⁰ —Hāmri nhūm kuma nē hpānhā ma ihōta wÿr tē nē kām awjarē nhūm kuma nē haxwÿja hitōt nē kām: “Nà kot pa hwÿr ixtēm kēt nē. Na pa kormā ham ixprō. Kormā ixprō nyw nē inhmā rer prām kēt jakamā kot paj ma hwÿr ixtēm kēt nē.” Anē.

²¹ —Hāmri nhūm kām àpēnh xwÿnhnta tee ri mē kuma nē awjanā nē ma akupÿm tē. Kot ma mē hwÿr mēnh xwÿnhnta wÿr ma akupÿm tē nē kām mē harē. Hāmri nhūm tee ri mē harēnh ma nē mē kamā gryk nē. Hāmri nē hpānhā mē kēp amrakati xwÿnhjē hwÿr kām àpēnh xwÿnhnta mē. Mē hkrā pipānh puro xwÿnhjē hwÿr kumē. Nē mē hpigēx tÿx xwÿnhjē hwÿr kumē. Nē mē hirot nē àpēnh hkēt xwÿnhjē hwÿr kumē nhūm ma mē kām ujarēnh o tē. Hāmri nē amnhī kōt mē kuwÿ nhūm mē kuma nē wamtajē rom hkôt mrar kurē kumrēx. Hāmri nē agjē nē apkur kaxyw mē hkrī xā kamā hkrī hpa. ²² Hāmri nhūm kām àpēnh xwÿnhja ō patrāw wÿr tē nē kām mē harē nē kām: “E ate mē hā karō xāta kōt na mē ra hkrī hpa htā arī mē hkrī xā hkwy hkapyr.” Anē.

²³ —Hāmri nhūm kuma nē kām: “Hēxta waa nē. Kēt ām mē hkrī xāta hipu mex ronhÿx pa omu nē ixkīnh nē. No ām kormā piitā hipu hkēt. Kwa ma krī pu hā ri mē hapēr o mra. Nē nhÿri mē hkwyjē pumu nē mē haprō nē man amnhī kōt mē o mra kē mē hkrīxā ho hipu hpa. ²⁴ No kēt wam ixte amnhī wÿr mē hwÿr xwÿnhntaja. Mē hitōt xwÿnhjaja kot paj axte amnhī wÿr mē hwÿr kēt nē.” Anē. Ā mē ujarēnh kot anhÿr. Na hte ā Tirtūm amnhī wÿr mē piitā mē hwÿr anē. Anē.

Mē pamā Jejus kīnh tÿx ā mē

pamā karō

Matêwre 10.37-38; Makre 8.34; Rukre 9.23-25; Juāw 12.26

²⁵ Tā nhūm Jejus mē ōrkwÿ rūm kato nē kormā Jerujarē hwÿr mō nhūm mē hohtō rax nē hkôt mō. Hāmri nhūm Jejus xa nē mē ho hakēx nē mē omu nē mē kām:

²⁶ —E kot ka mē atō amā ixkōt amnhī xām prām nē ā amnhī nhīpēx anē. Nē amā atō nē atōx nē anhīpēēxā nē akatorxā japē htÿx tā kēr ka amā ixkīnh tÿx o wa mē hakrenh pa. Nē amā aprō nē akrajē japē htÿx tā kēr ka amā ixkīnh tÿx o wa mē piitā mē hakrenh pa. Nē amā ixkīnh tÿx o amā amnhī japē jakre. Kēr ka mē atō ixkōt amnhī xām kaxyw nē ā amnhī nhīpēx anē.

²⁷ —Koja mē ixpī pa mē anē ty. Tā mē ate ixkōt amnhī nhīpēx o mē apa xwÿnhjaja. Koja mē ixtā mē apar mā tā kēr ka mē amā ixkīnh tÿx o mē umaj ixkaga hkēt nē. Kwār mē māmri tanhmā ixtā mē ato. Kot kaj mē nhÿrmā Tirtūm mē wa ixri axte amnhī xā kamā ajamak kēt nē atīr tūm nē amex rāhā apa ho apa. Nom kot kaj mē ixkīnhā jar pika ja kamā amā amex nē apa hprām xāj ixkaga hāmri nē nhÿrmā wa ixri atīr tūm nē apa hkēt nē. Anē.

Mē pahte amnhī kukamā paja-maxpēr mex ā mē pamā karō

²⁸ Nhūm Jejus arī mē kām kapēr nē mē kām:

—Kwa kēr ka mē ixkōt amnhī xunhwÿr kaxyw nē amnhī kukamā ajamaxpēr mex nē. Na htem amnhīm ōrkwÿ rūnh nhīpēx kaxyw hāmri nē hkukamā hamaxpēr mex nē. Nē kaxyw krax mā kuhē xā hkukamā hamaxpēr. Nē kaxyw kÿx pē kām hikwÿ xāja kukamā hamaxpēr. Nē ōkwaēja kukamā hamaxpēr. Nē hā pōja kukamā hamaxpēr. Ā na htem amnhīm ōrkwÿ rūnh nhīpēx kaxyw hkukamā hamaxpēr mex anē.

²⁹ Nom kot kaj mē hkukamā

ajamexpēr mex kêt nē ām kaxyw pī ho grēre nē hakā. Rỳ ra hā axāpēnh rax kurē ra amā ho anhÿr kaga nē hkaga hpa nē hatur xām mēnh kêt nē. Hāmri nhūm mē hkwyjaja hānh mra nē omu nē atā hpēr o axkē. ³⁰ Nē axpēn mā ri ajarēnh o: “E ga mē ixkre mūj pumu. Na pre hipēx xwÿnhja hkurē kām kaga nē hipēx par kêt nē.” Anhÿr o axpēn mā ajarē. Ja pyrā nē kêt ka mē ixkôt amnhī xunhwÿr kaxyw nē amnhī kukamā ajamexpēr mex nē. Nē ajamexpēr o: “Nā mē kot Jejus ā tanhmā ixto htÿx tā kot paj hkaga hkêt nē. Kot paj hkôt amnhī nhīpēx rāhā ho ri ixpa.” Anhÿr o amnhī kukamā ajamexpēr. Hāmri nē rī kormā ixkôt amnhī xām. No kot ka mē umaj ixkaga hkukamā ajamexpēr hāmri nē ixkôt amnhī xām kêt kurē kumrēx.

³¹ —Nē koja krī hō kamā pahihiti nhō pōristi xohtō nē. Nē kutā nhām krī hō kamā pahihiti nhō pōristija grēre. Tā nhūm wa hpijapu kaxyw nhūm krī hō rūm pahihiti nhō pōristi xohtōja mē grēreta wÿr mra. Hāmri nhūm kutā krī hō kamā mē ō pōristi grēre nhō pahi nhÿ nē tee ri mē amnhī kukamā hamaxpēr nē hamaxpēr o: “Kwa koja apu krī hō rūm pōristi xohtō raxja nhūm inhō pōristi grēreja mē axpēn kutā kuhē nē axpu nhūm mē inhnē mē himex. Nā inhō pōristi grēre kēnā.” Anhÿr o hamaxpēr.

³² —Hāmri nē pahi hōta wÿr ō kōwenatō mē. Kormā krī hō rūm mē hōnotōja mē htēp kêt nhūm mē kutā kumē nhūm ma mē kutā tē. Hāmri nē awry hā mē hkaxpa nē mē ō pahihiti mā kām: “E na mē inhō pahihiti akutā inhmē pa tē. Na inhmā: ‘Ma tē nē mē kām awjarē. Kot puj pēr mē papijapu hkêt nē. Kwarī. Kot puj mē tām axpēn xunhwÿ.’” Anhÿr o kapēr nē mē akutā inhmē pa tē.” ā mē ujarēnh kot anhÿr. Ja pyrā nē na htem mēmoj kukamā hamaxpēr mex nē rī ko-

rmā tanhmā amnhī nhīpēx to.

³³ —Tā kêt ka mē atō amā ixkôt amnhī xām prām hāmri nē pahita pyrā nē amnhī kukamā ajamexpēr tÿx nē rī kormā tanhmā amnhī nhīpēx to. Kêt ka ate inhmā tanhmā amnhī nhīpēx to ho apa kaxyw hāmri nē inhgryk ā te ate amā amnhī japē hkêt pyrāk o mēmoj piitā mā anhīhkra karo pyrāk o amnhī nhīpēx. Hāmri nē rī kormā ixkôt amnhī xām. ³⁴⁻³⁵ No kot kaj mē amnhī kukamā ajamexpēr kêt nē atÿx ri ixkôt amnhī xunhwÿr japēr. Hāmri nē mēmo arīgro hā mē kot ixtā tanhmā mē ato xwÿnhjē pymaj ra ixkaga mā. Hā kot kaj mē te mē ate kaxwa punu pyrāk o amnhī nhīpēx. Kaxwaja mē apkur xā kamā mex. Na htem amnhīm ho ō xānh nē kuku. Nom koja mēhō kamā pika hkwy mē nē ho ahkā hāmri tanhmā kot mē ho nē akupÿm ho mex? ām mē kot hkapīr pix kaxyw koja mex. Ja pyrā nē kot ka mē atō ate inhmā tanhmā amnhī nhīpēx to ho apa hā amnhī jarēnh tā gaa nē amā ixkôt amnhī nhīpēx prām nōkati. Hāmri nē ra te ate kaxwa punu kapīr mā tāmta pyrāk. E kwa mē mēmoj tā ixujarēnhja ma nē mē urāk nē amnhī kukamā ajamexpēr mex nē. Anē.

15

Ōwēhti pikunor jarēnh

Matēwre 18.12-14

¹ Tā nhūm mē kot pahihiti mā hkwyjē pē kàxpore hkwy jamÿnh xwÿnhjē mē mē kot amnhī tomnuj xwÿnhjaja Jejus kapēr mar kaxyw hwÿr mra. ² Hāmri nhūm Parijew nhō xwÿnhjē mē mē kot Tirtūm kapēr tūm o mē ahkre xwÿnhjaja mē hā Jejus pumu. Hāmri nē kē wem axte axpēn mā tanhmā ho kapēr punuj to nē axpēn mā:

—Tk. Kwa na hte mÿjti axtem nē mē kot amnhī tomnuj xwÿnhjaja amnhī wÿr mē kuwÿ nē tōhā mē

kutã apku. Kwa mẽ kot amnhĩ tomnuj xwýnh kênã kot kêt mẽ kutã apkur o pa. Anê.

³ Hãmri nhũm Jejus amnhĩ tã mẽ kuma nê tanhmã mẽ kãm kapêr to. Nom hprĩ hã mẽ kãm kapêr kêt nê. Kê ãm amnhĩ tã kuxi nê mẽ kãm ôwêhti pikunor jarê nê mẽ kãm:

⁴ —Koja mēhō ò ôwêhti xohtô nê. Nê ma nhÿri hamãr o pa. Hãmri nhũm pyxire nê hkwý kaga nê ma nhÿhÿm ahte tē nê akunok. Hãmri nhũm ò dōnja ma kot akupÿm piitã o mōr kaxyw hkwý ho pikuprōnh pa hãmri nê tee ri hkwý kaêx ã pikunor xwýnhhta japêr. Hãmri nê ma hkwý ho mō nê nhÿri kure. Kot nhÿri kutêp apkur o ri pa kaxyw kure hãmri nê ma akupÿm pikunor xwýnhhta japêr o tē. Hãmri nê hapêr ryy nê nhÿri hwÿr kato. ⁵ Nê omu nê hkĩnh tÿx nê. Hãmri nê amnhĩ kre hã kumê nê ma akupÿm hkwý hwÿr o tē. ⁶ Hãmri nê mẽ ìhkô hã kumê nê hkĩnh nê hkrãmnhwÿjê ho akuprō nê òrkwÿ htã mẽ òrkwÿ xwýnhjê ho akuprō nê mẽ kãm: “Kwa na pre ixpê ixkriita ò akunok. Pa pre hapêr kãm ixihtÿx nê kãm ixkato nê omu nê ixkĩnh nê. Jakamã kwa wem mãânēn inhÿ hã akĩnh.” Anê.

—Ã mẽ ujarēnh kot anhÿr. ⁷ Ja pyrã nê koja mẽ kot amnhĩ tomnuj tÿx xwýnhjê hō tee ri amnhĩ pumu nê kot amnhĩ tomnuj kaga nê Tirtũm kôt amnhĩ xãm. Hãmri nhũm kaxkwa kamã mẽ piitã ja hã omu nê hkĩnh tÿx nê. Te ho my kot ôwêhti hpikunor xwýnh mã kator nê hkĩnh tÿxta pyrãk. Na hte Tirtũm tãm mẽ kot amnhĩ nhípêx o mẽ pa xwýnhjê pumu nê hkĩnh nê. Tã koja mēhō kot amnhĩ tomnuj tÿx tã ã amnhĩ nhípêx anhÿrja kaga nê Tirtũm kôt amnhĩ xãm hãmri nhũm amnhĩ tã omu nê hkĩnh tÿx nê. Jakamã na pa hte mẽ akurom ã mẽ kot amnhĩ tomnuj xwýnhjê hkôt Tirtũm kapêr o mẽ ahkre rãhã ho ri ixpa. Anê.

Nhũm pre ã Jejus mẽ kot tanhmã ho kapêr punuj to xwýnhjê mã amnhĩ jarēnh anê.

Kàxpore pikunor jarēnh

⁸ Nhũm Jejus arĩ mẽ kãm awjarê nê mẽ kãm:

—Nê ja. Kojã mēhō ni hikàxpore kêp 10. àpēnh o arĩgro pê 10 pãnhã kàxpore kêp 10. Tã ho pyxi nê ho akunok. Hãmri nê tee ri hapêr nê hkaprĩ nê. Hãmri nê kanê hpòk nê hitom kapōnh pē hprĩ hã hapêr o ri pa nê kãm kato. ⁹ Hãmri nê kupy nê hkĩnh nê hkrãmnhwÿjê ho akuprō nê òrkwÿ htã mẽ òrkwÿ xwýnhjê ho akuprō nê mẽ kãm amnhĩ jarê nê mẽ kãm: “Xê na pre ixpê ixkàxpore hōta akunok pa tee ri hapêr tã akupÿm kãm ixkato nê kupy nê ixkĩnh nê. Jakamã xê wem inhÿ hã mãânēn akĩnh.” ã mẽ ujarēnh kot anhÿr.

¹⁰ —Ja pyrã nê koja mẽ kot amnhĩ tomnuj xwýnhjê hō pyxire nê amnhĩ tomnuj kaga nê ixkôt amnhĩ xãm. Hãmri nhũm kaxkwa kamã mẽ piitã ja hã omu nê hkĩnh nê. Te mēhō ni kot kàxpore pikunor xwýnh mã kator nê hkĩnhhta pyrãk. Anê.

Mê hkra pikunor jarēnh

¹¹ Nhũm Jejus arĩ mẽ ahkre ho xa. Tirtũm kãm mẽ piitã mẽ hapê htÿx ã mẽ ahkre ho xa. No kê ãm hã kuxi nê kê we tanhmã mẽ kãm ujarēnh to nê mẽ kãm:

—Nê koja mēhō hkra my wa axkrut. ¹² Hãmri nhũm kot hapu ò papaj wÿr tē nê kãm: “E papaj. Ot pa awÿr tē. Kot kaj nhÿrmã ty pa wa amÿr pê akukrêx o ixârĩk. Jakamã e kwa tokyx atĩr ri amnhĩ kamã wa inhmã ho axkjê pa inhō ho amnhĩptãr kurê kumrêx nã?” Anê. Hãmri nhũm kuma nê wa kãm hikukrêx o axkjê. Kot wa mã hkwý gō nê kot hapu mã hkwý gō. ¹³ Hãmri nhũm kot haputa ãm ri hipêêxã hkôt pa hkrãre hãmri nê kot kãm hikukrêx nhōr jamÿnh pa

ně ma nhÿhÿm o mō ně ho wēnē hpa. Hāmri ně hpānhā kàxpore jamÿ ně ma nhÿhÿm mō. Nhÿhÿm awry hā pika hō hwÿr ma mō. Mōō hāmri ně krī hō kamā htÿx ri tanhmā amnhī tomnuj to ho ri pa. Hāmri ně gaa ně ra mē hkuprÿjē hā kàxpore ho hapēx pa. Nē kagōxÿhti hā ho hapēx pa. Nē gaa hāmri ně hikàxpore hkēt ně ri pa.

¹⁴—Rōm nhūm pikaja kamā mē hā na wrÿk kēt ry rax ně. Nē gaa nhūm mē hpur kām mē kēp mē apkur xà hā mēōja hapēx pa. Jakamā nhūm mē hkra kot haputa kēp amrakati ně kām prām tÿx ně ri pa. Hāmri ně tee ri amnhī kukamā hamaxpēr. ¹⁵Hāmri ně amnhī to krī nhō xwÿnhjē mar o ri pa. Kot mē kām tanhmā àpēnh to ně hpānhā apkur kaxyw. Hāmri nhūm mēhō kot kām hkrit hagrō jamār kaxyw hā kumē nhūm ma hwÿr tē ně kām hamār o pa. Nom kot kām hamār o pata pānhā ām kām mēmoj nhōr kryre nhūm arī kām prām tÿx kumrēx.

¹⁶Nē tee ri kot hagrō kutā ōta kur prām ně tee ri omunh o pa. ¹⁷—Nē gaa hāmri ně tanhmā hamaxpēr to. Nē tee ri kot tanhmā amnhī tomnuj toja ā amnhī pumu ně hamaxpēr o: “Hēxta waa ně. Mān mūtār inhō krī kamā inhō papaj mā mē àpēnh xwÿnhjaja ixrom apkur mex o pa. àpkur mex ně nhūm mēō jakrēx prār rūnh tā pa jar mē hkīnhā prām xà ra ixtyk o mō. ¹⁸Nà kot paj ma akupÿm mō. Hāmri ně inhō papaj pumu ně ā kām amnhī jarēnh anē ně kām: ‘Kwa Papaj. Na pa pre ixpē akra hā amnhī tomnuj tÿx kumrēx nhūm ja apē omnuj ně. Nhūm Tirtūm pē ja omnuj ně. ¹⁹Jakamā na pa ixpē akra hā amā amnhī jarēnh ā xpijaàm ně. Ixte tām kēt kumrēx. Jakamā kwa xà kot pa amā mēmoj tā ixàpēnh o ri ixpa ka hpānhā inhā inhō pa apku nà?’ Anhÿr o kot pa kām amnhī jarē. Nà kot paj anē.”

²⁰—Anhÿr o amnhī kukamā hamaxpēr hāmri ně ma akupÿm mō. Mōō ně ra hpōx o mō. Nē kormā amÿm mōr ri nhūm ō papaj hwÿr rīt ně omu ně amnhī kra hā omunh kurē kumrēx ně hkīnh ně ma kutā hprōt ně tē. Omu ně kām hkaprī ně. Nē hwÿr hprōt ně hkaxpa ně kahti hkōt kumÿ. ²¹Hāmri nhūm kām amnhī jarē ně kām: “Kwa papaj. Na pa pre amnhī tomnuj ně nhūm ja apē omnuj ně. Nē Tirtūm pē ja omnuj ně. Jakamā ixte ixpē akra hā amā amnhī jarēnh ā xpijaàm. Ixte tām kēt kumrēx.” Anē. ²²Nom kormā kām amnhī jarēnh par kēt ri nhūm hipēēxā kām mē àpēnh xwÿnhjē mā akir ně mē kām: “E kwa mē atō ma tē ně kām ē mex ō py ně akupÿn ixkrata wÿr ho aprōt ně kām haxà. Nē hpar kà ně ĩhka kamā kàx ně amnē kām hamÿ ně ho aprōt. ²³Nē akupÿm aprōt ně mōx kra htwÿm mexta ō pumu ně unē ně apī. Nē mē ho anē pu mē ixkra hā pahkīnh ně apku. E mē amnhī prēprēk ně tokÿx ā amnhī nhīpēx anē. ²⁴Na pre ma ixpē mōr o te ixpē htyk pyrāk. Tā akupÿn mō ně ixwÿr pōj ně te akupÿm inhā htÿr pyrāk. Jakamā e mē tokÿj.” Anhÿr jakamā nhūm mē hā mōx kra pī ně ho anē ně hkīnh ně hā apkur o hkrī.

²⁵—Rōm nhūm hkra kot wata kormā pur kām htÿx àpēnh o xa. àpēnh o ām tā akupÿn hpōx o tē. Hāmri ně amnhī kukamā mē kot ri mēmoj tatak ně mē grer ma. ²⁶Hāmri ně tee ri hamaxpēr o tē ně ōrkwÿ hwÿr pōj ně kormā kapem xa ně mē hā mē àpēnh xwÿnhjē hō kukja ně kām: “Kwa mēmoj tā na ka wem ā akīnh rax anē?” ²⁷Anē nhūm kām: “Nā mēhō hkēt. Atō na akupÿn pōj nhūm anhīpēēxā omu ně hkīnh tÿx ně. Nē mē inhā anē pa mē hā mōx kra htwÿm mexja pī ně hā ho anē ně hā ixkīnh ně hkur o ixkrī.” Anē. ²⁸Hāmri nhūm tee ri htō jarēnh ma ně gryk tÿx ně. Hāmri ně gryk xàj kapem hkuk punuj o

mě omunh o xa nē mẽ hwỳr àr kêt nē. Hāmri nhũm hipéêxàja tee ri omu nē hwỳr kato nē tee ri kot mẽ hwỳr ho àr kaxyw ho anhỳr kaprỳ. ²⁹ Hāmri nhũm kām: “Tk. Kwa na pa hte amā ixápênh rũnh rāhā ho ri ixpa hā ra ixtā amgrà sohtô nē. Nē aa akapêr nhĩrôp tanhmā ixām to hkêt. Tā ka hte ixpumunh nē akĩnh nē ixtā mẽmoj tōx pĩr kêt nē. ³⁰ Tā nhũm akra kot haputa apê akukrêx kwỳ jamýnh pa nē ma o mō nē axtem nē mẽ hkuprỳjê mã òr par tā akupýn mō nē pōj. Ka omu nē akĩnh nē hā mōx kra twýmta pĩ. Nà kot paj mẽ awỳr ixàr kêt nē.” Anē.

—Hāmri nē gryk tỳx nē xa. ³¹ Hāmri nhũm ò papaj tee ri kuma nē kām: “Kwa nà ri ã akapêr anhỳr kêt nē. Inhmā ajapê kênā. Na ka hte ixkôt apa ho apa rāhā nē. Nē ixkukrêx piitā kêp anhōō. ³² No atōja na pre te ixpê htyk pyrāk tā arĩ htĩr. Nē te pikunor pyrāk tā te ra akupým kator pyrāk jakamā na pa omu nē ixkĩnh nē. Nē inhmā hapê ho te mãânên inhmā ajapê pyrāk.” Anē.

—Ă mẽ ujarênh kot anhỳr. Ja pyrā nē koja mēhō te kot amnhĩ tomnuj tỳx o ri pa htā amnhĩ kaxyw Tĩrtũm mã hamaxpêr nē amnhĩ to kuwỳ nē hkôt amnhĩ xām. Hāmri nhũm amnhĩ tā omu nē hkĩnh nē. Nē kām hprām nē. No mẽ kajaja. Mē apê Parijew nhō xwýnhjê mẽ Tĩrtũm kapêr tũm o mẽ ahkre xwýnhjaja. Na ka htem mẽ kot amnhĩ tomnuj xwýnhjaja kot Tĩrtũm kapêr mar o kuhê hā mẽ omu nē Tĩrtũm kĩnhā akĩnh kêt nē. Nē te hkra kot wata jamaxpêr pyrāk o ajamaxpêr nē tee ri ja hā mẽ omu nē mẽ kamā agryk nē. Nē mẽ amā mẽ hprām nōkati. Anē.

16

Mě panhōxỳ nē Jejus kot mẽ pamā karō

¹ Tā nhũm kê Jejus axte hkôt ri mẽ pa ho mẽ pa xwýnhjê jahkre. No âm mẽmoj tā kuxi nē mẽ kām tanhmā ujarênh to nē mẽ kām:

—Nà koja mēhō hikàxpore rax xwýnhja kām àpênh xwýnh mã mẽmoj to wênê ho pa kaxyw âm. No nhũm kām ho mex kêt nē. Axtem nē kêp amarĩ mẽ kām mẽmoj to fiat par o mō. Hāmri nhũm ra mēhō kot ã amnhĩ nhĩpêx anhỳr ã omu nē ma ò patrāw wỳr tē nē kām harê. ² Hāmri nhũm tee ri harênh ma nē amnhĩ wỳr hā karō. Hāmri nhũm hwỳr tē nē axà nhũm kām: “Pa. Kwa xà âm hāmri na mẽ inhmā ajarê? Kwa nà mon ka ri axtem nē ã ixpê inhō mẽmoj nhĩpêx anê? E inhmā ate mẽ kām ho fiat par xwýnhjê nhĩxi hā kagà nē inhmā agō hāmri nē ma tē. Kot ka axte inhmā axápênh kêt nē rĩ amnhĩ pumu.” Anē.

³ —Hāmri nhũm kuma nē tee ri amnhĩ kukamā hamaxpêr nē hamaxpêr o: “Hêxta waa nē. Tanhmā kot paj amnhĩ to? Ixihtỳxre hā kot pa mēhō mã pur ã apê. Nom inhmā amarĩ ri ixàhwỳr o ri ixpa hprām kêt. Ixte amnhĩ kuk ã xpijaàm.” Anē. ⁴ Hāmri nē tanhmā amnhĩ kukamā hamaxpêr to nē hamaxpêr o: “Nà kot paj amnhĩ wỳr ixte mẽ kām ho fiat xwýnhjê hā karō. Nē mẽ kām mẽ ò kōōta ahpar mã hkamê kê mẽ âm inhō patrāw mã hkwỳ pix gō. Kêr kê mẽ amnhĩ tā ixpumu nē kām ixkĩnh nē. Hāmri nē inhō patrāw kot ixkaga hā ixtā harênh ma nē ixkamā ukaprĩ japêr. Hāmri nē amnhĩ wỳr ixwỳ pa ahpýnhā mẽ kutā ixàpkur o ri ixpa nhũm prām ixpĩr kêt nē. Nà kot paj anē.” Anē.

⁵ Hāmri nē amnhĩ wỳr mẽ hā karō nhũm mẽ hwỳr mra. Nhũm mẽ omu nē ja mã kām: “E tanhmā na ka pre inhō patrāw pē mẽmoj to fiat to? E inhmā harê.” Anē. ⁶ Hāmri nhũm kām: “Na pa pre kêp orti hā à ho 100 nē ho fiat. Ota hā kagàta. Tā pa kormā kām amnhĩrer kêt nē.” Anē nhũm kuma nē kām: “Tôe ka

inhma. Kot paj amã anhõ köt o gri ka ãm kãm ho 50 pix nẽ agõ pa ixte anhõ köt ho ijapêx par pyrãk o anhîpêx.” Anẽ. ⁷ Hãmri nẽ hpãnhã nhãm ja mã kãm: “No ka. Tanhmã na ka pre kêp mẽmoj to fiat to?” Anẽ nhũm kãm: “Na pa pre kêp pãy hã xak o 1.000 nẽ ho fiat. Tã pa kormã hpãnhã kãm amnhîrer kêt nẽ.” Anẽ nhũm kãm: “Tõe. Kot paj hãmri amã anhõ köt o gri ka ãm kãm ho 800 pix nẽ agõ pa ixte anhõ köt ho ijapêx par pyrãk o anhîpêx.” Anẽ. Nhũm ã mẽ hipêx anẽ. Hãmri nẽ hamaxpêr o: “E. Na pa mẽ kãm mẽ õ köt o hkry pa. Kojã mẽ amnhî tã kãm ixkĩnh japêr.” Anẽ.

⁸ —Hãmri nhũm õ patrãwja ã kot mẽ hipêx anhÿr ã harênh ma nẽ kãm: “Tk. Kwa ate pa ixkukamã ajamaxpêr nẽ inhãm mẽmoj to anhÿr mex kêt tã ka amnhî kukamã ajamaxpêr mex pẽ ã mẽ hipêx mex anẽ.” Anẽ. Æ mẽ ujarênh kot anhÿr. Anẽ.

Nhũm pre ã Jejus mẽ kãm ujarênh anẽ. Hãmri nẽ mẽ kãm:

—Tã ja pyrã nẽ na hte mẽ kot Tĩrtũm köt amnhî xunhwÿr kêt xwÿnhjaja ãm amnhî pix kukamã hamaxpêr mex o pa. Jao amnhî kaxyw pix mã mẽ piitã tanhmã mẽ ho mex to ho pa. Mẽ kot amnhî tã mẽ omunh nẽ mẽ kãm mẽ hkĩnh nẽ amnhî xwar tanhmã mẽ ho mex to kaxyw nhũm htem ã amnhî nhîpêx anhÿr o pa. Tã mẽ ate ixkõt amnhî xunhwÿr xwÿnhjaja. Tĩrtũm kot tanhmã mẽ ate amnhî kwÿjê ho mex to hã amnhĩm mẽ ajarênh kaxyw kêr ka mẽ amnhî mẽ mẽ piitã mẽ hkukamã ajamaxpêr mex nẽ. Pẽ tanhmã mẽ ho mex to ho ri apa. Æ mẽ ate amnhî nhîpêx anhÿrja na mex. Nom kormã mẽ ate ã amnhî nhîpêx anhÿr kêt.

⁹ —Hêxta waa nẽ. Mon ka htem mẽ urãk nẽ ã axpên to mex anhÿr kêt nẽ? Kwa mẽ ãpênh xwÿnhnta kot amnhî nhîpêx pyrã nẽ tanhmã axpên to mex to o ri apa hkêt wehe.

Jao akukrêx nẽ akãxpore ho anhõxÿ hkêt nẽ. Kêr ka nhÿrmã ty nẽ Tĩrtũm wÿr api nhũm ja hã mẽ ato mex rax nẽ. Te ho kot õ patrãw mã ãpênh xwÿnhnta kot tanhmã mẽ ho mex to xwÿnhjê hwÿr mrrar nhũm mẽ kot amnhî xwar tanhmã ho mex tota pyrãk.

¹⁰⁻¹¹ —Na hte Tĩrtũm tanhmã mẽ pakute hã mẽ pahpumunh mex nẽ. Kojã mẽ amã mẽmoj gõ ka mẽ kãm hprãm xà hkõt ho anhõxÿ hkêt nhũm ja hã mẽ apumu nẽ axte mẽ amã mẽmoj gõ. Nom hpãnhã mẽ amã õr rax o wamta jakre nẽ kugõ. Nom kot ka mẽ ri mẽmojta o anhõxÿ ho ri apa nhũm tee ri ja hã mẽ apumu nẽ axte mẽ amã mẽmoj nhõr kêt nẽ. Kojã mẽ amã mẽmoj gõ ka mẽ ho anhõxÿ ho ri apa nhũm ja kêp homnuj nẽ.

¹² —Nẽ kot kaj mẽ jar Tĩrtũm kot mẽ amã mẽmoj nhõr xwÿnhja ho anhõxÿ ho ri apa. Hã kojã nhÿrmã kaxkwa kamã mẽ amã mẽmoj mex nhõr kêt nẽ.

¹³ —Nẽ kot kaj apyxi nẽ anhõ patrãw hamêxkrut nẽ arĩgro pyxi hã hamê wa kãm axãpênh o amÿkry hkêt nẽ. Kot kaj anẽ nẽ hõ gryk ã hõ kaga. Ja pyrã nẽ kot kaj mẽ jar pika ja kamã akãxpore nẽ akukrêx pix kukamã ajamaxpêr o ri apa hã kot kaj mẽ amã hapê htÿx nẽ mẽ kêp ho anhõxÿ ho ri apa. Nẽ akukrêx rax gryk ã Tĩrtũm kãm hprãm xà hkõt akukrêx o tanhmã axpên to ajuta hto ho ri apa hkêt nẽ. Ja pymaj kwa kêr ka mẽ ãm Tĩrtũm pix mã mãn ajamaxpêr rãhã ho ri apa. Jao te akukrêx nẽ akãxpore mã axãmnhix ri anhĩkra karo ho ri apa pyrãk. Anẽ.

Nhũm pre ã Jejus mẽ ahkre anẽ. ¹⁴ Hãmri nhũm Parijew nhõ xwÿnhjaja mar o kuhê. Na prem ra mẽ hikãxpore rax gryk ã Jejus kaga. Jakamã Æ kot mẽ kãm kãxpore jarênh anhÿrja ma nhũm ja mẽ kêp omnuij nẽ nhũm mẽ hã hpêr

o pikênh o kuhê. ¹⁵ Hâmri nhùm amnhĩ tã mẽ kuma nê mẽ kãm:

—Nã na ka htem te mẽ ate tãm mẽ kot amnhĩ nhĩpêx xwýnh pyrãk o amnhĩ nhĩpêx nom ri mẽ kãm amnhĩ to axêx o ri apa. No nhùm Tĩrtũmja kot tanhmã mẽ ate amnhĩ nhĩpêx to nê tanhmã mẽ ajamaxpêr to hkôt mẽ apumunh par. Nê hprĩ hã mẽ anhõxy hã mẽ apumu. Te mẽ ate tãm amnhĩ nhĩpêx pyrãk nom mẽ anhõxy kamã na ka htem apa. Mẽmoj te mex pyrãk nhùm htem omu nê mex ã hkamnhĩx. No nhùm Tĩrtũm ãhpumunh tỳx xã hkôt hprĩ hã mẽmojta pumu nhùm kêp omnuj nê. Mẽ akurom omnuj ã omunh kurê kumrêx. Na hte hprĩ hã mẽ ate amnhĩ nhĩpêx ã mẽ apumu. Anê.

Tĩrtũm kapêr aa hapêx kêt ã harênh

Matêwre 5.17-18

¹⁶ Nhùm Jejus arĩ mẽ ahkre nê mẽ kãm:

—Nê na pre finat Mojesja kumrêx mẽ kãm Tĩrtũm kapêr kwý hã kagã. Tã nhùm hpãnhã Tĩrtũm nhỹ hã kapêr jarênh xwýnh kwýjaja mãânên mẽ kãm hkwy hã kagã. Nhùm prem kuma nê mẽ hkôt amnhĩ nhĩpêx o ri pa. Tã nhùm finat Juãw Paxisja mẽ hpãnhã kato nê Tĩrtũm kapêr o mẽ ahkre ho ri pa. Tã pa hpãnhã ho mẽ ajahkre ho ri ixpa nhùm mẽ ohtô nê ixkôt amnhĩ xunhwý nê kãm ixkapêr kôt pix mã amnhĩ nhĩpêx o ri pa hprãm nê.

¹⁷ —Tĩrtũm kapêr tũmja mex o mex. Koja aa hapêx kêt nê. Koja nhỹrmã kaxkwa nê pika wa hapêx pa no nhùm Tĩrtũm kapêr tũmja aa hapêx kêt nê. Koja rãhã ho rãhã nê aa ãhkjê ho mênh kêt nê. Anê.

Mẽ pahte xapên kaga hkêt ã mẽ pamã karô

Matêwre 5.31-32, 19.9-12; Makre 10.2-12

¹⁸ Nhùm Jejus arĩ mẽ ahkre nê mẽ kãm:

—Nê kêt ka mẽ aprô kaga hkêt nê apa. Kot kaj mẽ hkaga nê hpãnhã nhãm hõ ho aprô nhùm Tĩrtũm noo mã te ate wam aprô kamã nhãm ho amnhĩkati pyrãk. Nhùm ja kêp omnuj nê. Rý ka ra mẽhõ kot hprô kaga xwýnhhta ka hpãnhã ho aprô. Nhùm Tĩrtũm noo mã te ate wam mjên pê ho amnhĩkati pyrãk. Nhùm Tĩrtũm pê ja omnuj nê. Anê.

Hikàxpore rax xwýnh mẽ kêp amrakati xwýnh wa harênh

Rukre 6.20-26

¹⁹ Nhùm Jejus arĩ mẽ ahkre kamã mẽ kãm awjarê nê mẽ kãm:

—Koja mẽhõ kàxpore rax xwýnh ê mex pix kãm ri pa. Nê apkati mẽ apkur mex o pa. ²⁰ Nhùm amrakati xwýnh pê Rajareja hkã nhyre nê arĩ pry kamã ãhwýr o hkrĩ. Nhùm htem hamý nê ma o pa nê hikàxpore rax xwýnh nhõrkwy jakwakrem haxwý. ²¹ Nhùm õ jakrêx kwý hkrêr prãm xãj hakwa krem ãhwýr o hkrĩ. Nhùm rop hwýr mra nê hkã nhy kunhnwýnh o kuhê.

²² —Tã nhùm Rajare ty nhùm Tĩrtũm kapêr o mẽ wrýk xwýnhjaja hwýr wrý nê ma akupým kaxkwa hwýr hkarô ho mō nê ho api. Hâmri nhùm kaxkwa kamã mẽ pahpãm Apraãw nhĩhkô hã hkĩnh nê apkur mex o hkrĩ.

—Tã nhùm hikàxpore rax xwýnhhta mãânên hkôt ty. Nhùm hkwyjaja hã akuprô nê hã mur nê ma o tẽ nê haxã. ²³ Hâmri nhùm hkarô ma mẽ kot amnhĩ xã htýx kamã hamak tũm xã pê kuwy maatita wýr ma mō. Nê kamã amnhĩ xã htýx kãm hamak rãhã ho pa. Hâmri nê amnhĩ xã hã maj kãnhmã rít nê kaxkwa kamã Apraãw pumu. Nhùm Rajare ra kuri mex nê nhỹ. ²⁴ Hâmri nhùm tee ri wa omu nê Apraãw mã akapêr nê kãm: “Kwa Apraãw. Kwa we ixkamã axukapri nê ixwýr Rajare mẽ kê ixwýr tẽ nê ãhkrakrã ho gô htok nê ho inhõhto jakry. Na pa

kuwy kamā amnhī xà htỳx kām ijamak tỳx kumrēx.” Anē. ²⁵ Hāmri nhūm kuma nē kām: “Tk. Nà kot pa awỳr mēnh kēt nē. Nà ka pre atīr ri amex nē akīnh nē ri apa. No nhūm Rajare akīnhā hkà nhy rax nē amnhī xà htỳx kām hamak rāhā ho ri pa. Tā ra jar inhīhkō hā hkīnh nē pa. Ka pre kurom amex nē apa htā kot kaj hpānhā amnhī xà htỳx kām ajamak rāhā ho ri apa. ²⁶ Nē pahkaēx kām ahkaprỳ griā. Jakamā nhỳhnh kot kēt awỳr rē? Ka ajaxwỳja nhỳhnh kot ka kēt mē ixwỳr rē?” Anē.

²⁷—Nhūm ā kām kapēr anē nhūm tee ri kuma nē kām: “Kwa tō ma inhō krī hwỳr mǎn amē kē ma ixkwỳjē hwỳr wrỳ. ²⁸ O mǔj arī inhō krī kamā ixtō kēp 5 nē arī htīr nē pa. Kē wa mē kām awjarē kē mē amnē kuwy hwỳr pa pymaj tokyx amnhī tomnuj kaga nē Tīrtūm kōt mǎn amnhī xunhwỳ nē hkōt ri amnhī nhīpēx o pa.” Anē.

²⁹—Hāmri nhūm Apraāw kām: “Nà pa mē hwỳr mēnh kēt nē. Ra mē kuri Tīrtūm kapēr jarēnh xwỳnhjē mē Mojes kot Tīrtūm kapēr ā kagā kēnā. Kē mē kamā harē nē ja ma nē rī tām tanhmā amnhī nhīpēx to.” Anē. ³⁰ Hāmri nhūm tee ri kuma nē kām: “Kwa nà. Koja mē kagāja mar kēt nē. No kēt Rajare na pre ra htyk tā akupỳm htīr jakamā koja mē hwỳr wrỳ nē mē kām awjarē nhūm mē akupỳm htīr ā omu nē kapēr ma hāmri nē amnhī tomnuj kaga kurē kumrēx. Kwa nà ā ri anhỳr kēt nē mē hwỳr amē hēxta waa nē.” Anē.

³¹—No nhūm kām: “Nà koja mē Tīrtūm kapēr ā kagā mar kēt ā koja mē mǎānēn Rajare tyk nē akupỳm htīr nē mē hwỳr wrỳk nē kot mē kām tanhmā ujarēnh to hā mar kēt nē. Jakamā kwarī pa mē hwỳr mēnh kēt nē. Kot paj ho anē nē ām ixte mē hwỳr mēnh kaprỳ pyrāk o amnhī nhīpēx.” Anē. Ā mē ujarēnh kot anhỳr. Anē.

17

Mē kot Jejus nē mē no kupyř ā mē harēnh

Matēwre 18.6; Makre 9.42; mǎānēn Rōmān 1.32; Sikūn Pētre 2.1, 2.18

¹⁻² Tā nhūm Jejus hkōt mē pa ho mē pa xwỳnhjē jahkre ho nhỳ nē mē kām:

—E kot paj mē kot ixkōt amnhī xunhwỳr tohtuj anhỳr xwỳnhjē jarē ka mē inhma. Nà koja mēhō mē hwỳr tē nē inhnē mē kām kapēr. Mē kot mē mar nē amnhī tomnuj prām xàj tanhmā mē kām kapēr to. Hāmri nhūm mē mar xà hkōt tanhmā amnhī tomnuj to. Hā koja Tīrtūm ja hā omu nē kot inhnē tanhmā kām nē xwỳnhta pumu nē ja hā homnuj tỳx nē. Te mē kot mēhō pynēnh nē mut ā kēn pytī hō nhōr nē ma o htēm nē gō rax kām mēnh pyrāk o koja hipēx. Te ho ja pyrāk no ām homnuj tỳx o ja jakre. Jakamā kwa mē ixkapēr ma nē kām ajamaxpēr tỳx rāhā ho ri apa. Anē.

Mē pahte amnhī tā tanhmā mēhō hto hkēt ā mē pamā karō

Matēwre 18.21; Makre 11.25-26; mǎānēn Epes 4.32; Korosē 3.13

³ Nhūm Jejus arī mē ahkre nē mē kām:

—Nē koja ixkōt atōjē hō tanhmā atomnuj to. Ka amnhī tā omu hāmri nē ma hwỳr tē nē ja hā kām akapēr nē kām: “Kwa mon ka axtem nē ri ā inhīpēx anē ixtō? Kwa nà ri ā inhīpēx anhỳr kēt nē.” Anē hāmri nhūm amnhī tā ama nē amā: “Nà na pa tee ri ixte tanhmā atota ā amnhī pumu nē ixkaprī nē. Nà kot paj axte ā ri anhīpēx anhỳr kēt nē. Kwa kēr ka axte tanhmā ja mǎ ajamaxpēr to hkēt nē. Te ate amnhī katut kōt mēnh pyrāk o hipēx pu akupỳm tām axpēn nhīpēx o papa.” Anē. Koja ā amā kapēr anē ka amnhī tā ama hāmri nē axte tanhmā kot atoja mǎ ajamaxpēr kēt nē.

⁴—Koja arīgro pyxi hā xatā tanhmā atomnuj to japēr. Hāmri

nē xatā tee ri ja hā amnhī pumu nē awȳr mra nē xatā amnhī tā amā kapēr nē amā: “Pa ot pa awȳr tē. Na pa ra ixkaprī nē. Kwa ixte ā anhīpēx anhỹrja pumu nē ām omu. Kot paj axte hkēt nē.” Anhỹr o xatā amā kapēr. Nē ra axte tanhmā atomnuj to nē kē axte awȳr tē nē ā amnhī tā amā kapēr anē. Nom kēr ka ama nē kamā agryk kēt nē. Ām xatā kām: “Nà kot puj anē nē akupỹm tām axpēn nhīpēx. Kot paj axte tanhmā ate ixtota mā ijamaxpēr kēt nē. Kot puj ja ho pajapēx nē tām axpēn nhīpēx o akupỹm papa.” Anhỹr o kēr ka mē xatā axpēn nhīpēx anhỹr rāhā ho ri apa nē aa jam anhürer kēt nē. Anē.

Mē pahte mēmoj tā Tirtüm wỳr hā mē pajarēnh

Matēwre 17.20-21, 21.21-22; Makre 11.23

⁵Tā nhūm Jejus nhỹ hā mē ahkre ho mē pa xwỳnhjaja hāmri kām:

—Kwa Pahihti. Tanhmā mē ixta pa mē amnhī kaxyw Tirtüm kōt ijaxmaxpēr tỳx rāhā ho ri ixpa. Anē.

⁶Hāmri nhūm mē kām:

—Nà ra mē ate amnhī kaxyw hkōt ajamaxpēr jakamā na ra amnhī tā mē apumu. Jakamā mē ate hkōt amnhī nhīpēx kukwak ri na ka htem mēmoj tā awȳ nhūm mē ate mēmoj tā hwỳr xà hkōt mē amā tanhmā mēmoj nhīpēx to. Te mē ate pī hpār mūj mā akapēr nē kām: “E amnhī jarē nē ma tē nē gō xujanār kām mār mrō.” Anē nhūm kot amar nē amar xà hkōt ā kot amnhī nhīpēx anhỹrta pyrāk. Ja pyrā nē kot kaj mē ate Tirtüm kōt amnhī nhīpēx o apa kukwak ri mēmoj tā awȳ nhūm mē ama nē mē amā mēmoj tanhmā ho. Rỳ mē amā mēmoj gō. Anē.

Te mē pahpē Tirtüm mā paxàpēnh xwỳnh pyrāk

⁷Nhūm Jejus arī mē ahkre nē mē kām:

—Nē ja. Kot kaj mē amā mē àpēnh xwỳnh kwỳjaja nhūm hō amā mēmoj tā àpēnh o pa ē ho anhỹr pa. Hāmri tanhmā kot kaj kām akapēr to wehe? Xà kot kaj kām: “E hāmri axàpēnhta kaga nē tē nē nhỹ nē apku.” Anhỹr o kām akapēr?⁸ Nà kot kaj kām anhỹr kēt nē. Kot kaj kām: “E kwa tokyx tē nē hpānhā inhmā inhō hā apē. Kot pa ixàpkur pa ka ixpānhā nhỹ nē apku.” Anhỹr kām akapēr. Kēp amā àpēnh xwỳnh jakamā ka ā kām akapēr anē.⁹ Ja pyrā nē kot puj mē Tirtüm kot mē pamā mēmoj tā karō xà hkōt tanhmā kām amnhī nhīpēx to ho ri papa. Mē ō patrāwta pyrā nē kot tanhmā mē pamā karō hto xà hkōt pu mē amnhī nhīpēx.

—Xà na htem mē ō patrāw mā mēmoj tā àpēnh pa hāmri nē hkwȳjē mā amnhī to jarkrar o ri pa nē mē kām: “E ka mē ixpumu. Na pa hte inhō patrāw mā ixàpēnh mex o mē hakre ka mē ja hā ixpumu. Hēxta waa nē. Mon pa hte ri axtem ā amnhī nhīpēx anē?” Anhỹr o xà kot kaj mē kām amnhī to jarkrar o ri apa? Nà na ka htem ā amnhī nhīpēx anhỹr kēt nē.

¹⁰—Tā pa hte mē ō patrāwta pyrā nē tanhmā mē amā mēmoj tā karō hto ho ixpa. Jakamā kēr ka mē inhma nē ixte mē amā mēmoj tā karō xà hkōt tanhmā inhmā amnhī nhīpēx to ho ri apa. Hāmri nē hā amnhī to jarkrar pē amnhī jarēnh o: “Ām hāmri na pa ā Jejus mā amnhī nhīpēx anē. Hēxta waa nē. Ixpē Jejus mā tanhmā ixte amnhī nhīpēx to mex xwỳnh na pa.” Anhỹr o amnhī to jarkrar kēt nē. Kēt ām amnhī jarēnh o: “Nà ixte kām tanhmā amnhī nhīpēx to ho ixpa xwỳnh pix na pa. Na hte mēmoj tā inhmā karō pa kuma nē ȳ hā tanhmā kām amnhī nhīpēx to.” Anhỹr o amnhī jarēnh o ri apa. No ri amnhī krā hkōt atỳx tanhmā amnhī to jarkrar to ho ri apa hkēt

ně. Aně.

Jejus kot mẽ ho 10 nẽ akupỹm mẽ ho mex ã harẽnh

Matêwre 8.1-4

¹¹ Tã nhũm Jejus arĩ Garirej rũm pika pê Samar hkàx ã Jerujarẽ hwỳr kormã mỗ. ¹² Nẽ nhỹri krĩ hõ htêp o mỗr mẽ nhũm krĩ pu hã ri mẽ pa xwỳnhjaja kêp 10 nẽ kutã mra. Mẽ hkànhy hkro htỳx xwỳnhjaja kutã mra nẽ hkaxpa nẽ amỹm kuhê nẽ omu. ¹³ Hãmri nẽ kãm:

—Pa Pahihti. Kwa mẽ ixpumu nẽ mẽ ixkamã axukaprĩ nẽ tanhmã mẽ ixto mex to. Anẽ.

¹⁴ Hãmri nhũm mẽ kãm:

—Tõe. Nà kot paj mẽ ato mex. E mẽ mãmri awjanã nẽ ma akupỹm mẽ anhõ patrejê hwỳr mra kê mẽ akupỹm mẽ akã mex ã mẽ apumu. Anẽ.

Hãmri nhũm mẽ kuma nẽ kapêr mar xà hkôt awjanã. Kà nhy rãhã awjanã nẽ ma akupỹm patre hwỳr mra. Nẽ kormã akupỹm hwỳr pry hã mrar rãhã piitã hkà mex pa. ¹⁵ Hãmri nhũm ãm pyxi nẽ hkwỳjê rom awjanã nẽ akupỹm Jejus wỳr Tĩrtũm mã mex o mex ã harẽnh o hwỳr tẽ. ¹⁶ Hãmri nẽ Jejus kaxpa nẽ kutã hkõnkrã ho tẽm nẽ nhỹ nẽ amnhĩ tã kãm kot ho mex ã kãm amnhĩ jarẽ. Kwỳjê hkĩnhã kêp Ijaew kêt axtem kêp Samar nhõ xwỳnh tã mẽ kurom akupỹn hwỳr tẽ nẽ kãm mex o mex ã harẽ. ¹⁷⁻¹⁹ Hãmri nhũm amnhĩ tã kuma nẽ kãm:

—No mẽ akwỳjaja? Ixte mẽ ato 10 nẽ mẽ ato mex tã ka ãm kapxipix awjanã nẽ akupỹn ixwỳr tẽ. Akwỳjê hkĩnhã apê Ijaew kêt tã akupỹm amnhĩ mex ã amnhĩ pumu hãmri nẽ mẽ kurom awjanã nẽ Tĩrtũm mã mex o mex ã harẽnh o ixwỳr tẽ. Hêxta waa nẽ. Mo na hte ixkwỳjaja apyrã nẽ amnhĩ kaxyw ixkôt hamaxpêr kêt nẽ? E kãnhmã xa nẽ mãmri ma ajamakêtkati nẽ akĩnh nẽ ma akupỹm tẽ. Anẽ.

Jejus akupỹn wrỳk xà hã arĩgro jarẽnh

Matêwre 24.23-24, 24.37-44; Makre 13.32-37; mãñnẽn Wam Tesarõn 5.2-8; Sikũn Pêtre 3.3-10

²⁰⁻²¹ Tã nhũm Parijew nhõ xwỳnh kwỳjaja Jejus wỳr mra nẽ omu nẽ kãm:

—Kwa mẽ inhmã mẽmoj jarẽ. Xà koja apu Tĩrtũm tokyx kot mẽ pahwỳr mẽnh mã xwỳnhnta mẽ nhũm mẽ pahwỳr wrỳ nẽ mẽ pahto amnhĩptar kurê kumrêx nã kormã? Anẽ.

Hãmri nhũm mẽ kuma nẽ mẽ kãm amnhĩ jarẽ. Te ho nhãm mẽhõ jarẽnh pyrã nẽ mẽ kãm:

—Nà ra kot mẽ ho amnhĩptar o pa kênã. Nom nhỹri hkrĩ xà kamã mẽ ho amnhĩptar o hkrĩ hkêt nẽ. Na htem amnhĩ kaxyw hkôt hamaxpêr nẽ hkôt amnhĩ xunhwỳ hãmri nhũm kêp mẽ õ pahihti hã mẽ ho amnhĩptar o pa. Nẽ mẽ kãm mẽ hamaxpêr mex gõ nhũm htem hkôt ri hamaxpêr mex o pa. Anẽ.

²² Hãmri nẽ hpãnhã hkôt mẽ pa ho mẽ pa xwỳnhjê mã kapêr. Mẽ kot nhỹrmã tee ri kamã hamak o pa hã mẽ kãm kapêr nẽ mẽ kãm:

—Kot kaj mẽ nhỹrmã tee ri amã tokyx akupỹn ixwrỳk nẽ ixte mẽ ato amnhĩptar prãm xaj tee ri inhmã anojarêr kaprỹ ho ri apa. Nẽ axpẽn mã ri ijarẽnh o: “Hêxta waa nẽ. Mo na we Pahihti tokyx akupỹn mẽ pahwỳr wrỳk kêt nẽ?” Anhỹr o inhmã anojarêr o ri apa pê ixkamã ajamak rãhã ho apa.

²³ —Nẽ koja mẽ ra akupỹn ixwrỳk ã tanhmã mẽ amã ixto hêx to ho pa. Nhỹri ixkuhê nhũm mẽ kot ixpumunh ã mẽ amã ixto hêx o pa. Nom kêr ka mẽ ama nẽ ãm mẽ ama. ²⁴ Kot paj nhỹrmã akupỹn mẽ awỳr ixwrỳk kaxyw nhũm mẽ pika piitã hkôt akupỹn ixwrỳk kãm anhĩpê ixpumu. Te mẽ piitã mẽ kot anhĩpê na jaxênh pumunh pyrãk o kot kaj mẽ apiitã ixpumu. ²⁵ Nom kormã jar pika ja kamã

ixpa ri koja mẽ ohtô nê ixkaga pa amnhĩ xà htỳx kamã ijamak kãm ty. Hãmri nê mẽmo arĩgro hã ma akupỳm kaxkwa hwỳr api. Hãmri nê nhỳrmã akupỳn mẽ awỳr wrỳ.

26 —Nà kot paj nhỳrmã man akupỳn mẽ awỳr wrỳ. Akupỳn ixwrỳk xà hã arĩgrota ã koja jar pika ja kamã mẽ pa xwỳnhjaja htỳx ri tanhmã amnhĩ tomnuj to ho pa. Te amnepêm finat Noehti htĩr ri mẽ kot htỳx ri tanhmã amnhĩ tomnuj to ho pa pyràk o koja mẽ amnhĩ nhĩpêx o pa. 27 Na prem amnhĩ kaxyw Tĩrtũm mã hamaxpêr o pa hkêt nê. Nê ãm jar pika ja kamã mẽ kot amnhĩ nhĩpêx pix kukamã hamaxpêr o ri paja o ãm kôt pix mã tanhmã ri amnhĩ nhĩpêx to ho pa. Rôm nhũm Noehti gô htàm pymaj pàr raxja nhĩpêx nê kãm axà. Nhũm prem hã omu nê ãm omunh o pa nê tanhmã ri amnhĩ kukamã hamaxpêr to hkêt nê. Tã nhũm nata mẽ haêr pê wrỳ. Hãmri nê wrỳk rax o ra pika piitã hanhi nhũm mẽ piitã pikaprãr pa.

28 —Akupỳn ixwrỳk xà hã arĩgrota ã koja mẽ mãânên te amnepêm Sotô nhõ xwỳnhjaja kot htỳx ri tanhmã amnhĩ tomnuj to pyràk o amnhĩ nhĩpêx. Finat Rohti kormã htĩr ri mẽ kot htỳx ri tanhmã amnhĩ tomnuj to ho pata pyràk o koja mẽ amnhĩ nhĩpêx. Na pre hte Sotô nhõ xwỳnhjaja ãm pika ja kamã mẽ kot amnhĩ nhĩpêx pix kukamã hamaxpêr o ri pa. Nê ãm kôt pix mã ri amnhĩ nhĩpêx o pa. Nê htỳx ri amnhĩ xàpkur xà pix kukamã hamaxpêr. Nê mẽ hpur kãm ri àpênh pix kukamã hamaxpêr. Nê ri amnhĩ xujaprôr pix kukamã hamaxpêr nê xapên mã mẽmoj to wênê pix kukamã hamaxpêr. Nê amnhĩm òrkwỳ nhĩpêx pix kukamã hamaxpêr. Æ na prem pika ja kamã mẽ kot amnhĩ nhĩpêx pix kukamã hamaxpêr o ri pa anhỳrja o amnhĩ

kaxyw Tĩrtũm mã hamaxpêr o pa hkêt nê.

29 —Tã nhũm Rohti mẽ ò krĩ rũm kator mẽ nhũm Tĩrtũm krĩ nhõ xwỳnhjaja kot amnhĩ tomnuj tỳx o paja mỳrapê mẽ himex pa. Jao kaxkwa rũm mẽ hipy mẽmo hpòk kwỳ rê nhũm mẽ hkaxàr pa. 30 Tã akupỳn mẽ awỳr ixwrỳkja mẽ koja mẽ te Rohti nhõ krĩ kamã mẽ kot amnhĩ nhĩpêx pyrã nê htỳx ri amnhĩ tomnuj pix o pa.

31 —Nê akupỳn ixwrỳta ã ka mẽ anhòrkwỳ nhĩmòk ã hkrãmnhên o akrĩ japêr nê akupỳn ixwrỳk kãm ixpumu. Hãmri nê akukrêx wỳr axàr nê hõ hpyr mã ajamaxpêr kêt nê. Rỳ ka mẽ apur kãm axàpênh o akuhê japêr nê akupỳn ixwrỳk kãm ixpumu. Hãmri nê akupỳm anhòrkwỳ hwỳr atêm mã ajamaxpêr kêt nê. Mo kaxyw kot ka kêt hwỳr tê? Kêt ãm inhmã mẽ ajapê hã akupỳn mẽ awỳr ixwrỳk mã ajamaxpêr o akĩnh nê ixpumunh o akuhê.

32 —Nê kêr ka mẽ Rohti prõ kot tanhmã amnhĩ nhĩpêx toja mã ajamaxpêr rãhã ho ri apa. Na pre Tĩrtũm kapêr nhĩròp xa nê amnhĩ katut kôt Sotôta wỳr rĩt hãmri nê ã amnhĩ nhĩpêx anhỳrja mỳrapê htyk kurê kumrêx. Tã kêr ka mẽ ho uràk nê amã akukrêx rax japê xaj ixkôt amòr kaxyw anhĩtôt kêt nê.

33 —Nê kwa kêr ka mẽ jar pika ja kamã tanhmã mẽ ate amnhĩ nhĩpêx to pix kukamã ajamaxpêr o ri apa hkêt nê. Nê mẽ akukrêx rax pix kukamã ajamaxpêr kêt nê. Koja nhỳrmã ja piitã mẽ apê hapêx pa. Mẽ ate kãm anhĩhkra karo hpar pyràk o piitã hipêx hãmri nhũm Tĩrtũm ja hã mẽ apumu nê hpãnhã nhỳrmã mẽ amã mẽmoj mex nhõr rax nê.

34 —Nê kot paj kamàt kãm akupỳn ixwrỳk japêr nhũm nhỳri mẽhõ ra ixkôt amnhĩ xãm xwỳnh mẽ mẽhõ kot ixkôt amnhĩ xãm kêt xwỳnh wa par kãm nòr japêr.

Hāmri pa amnhī wŷr ra ixkôt kot amnhī xām xwŷnh̄ta o api nhūm kot ixkôt amnhī xām kêt xwŷnh̄ta arī gôr nê nô. ³⁵ Rŷ pa arīgro hā akupŷn ixwŷrk japêr nhūm mēnijê hō wa hamēxkrut nê harôj kahuk o âm japêr. Hāmri pa ra kot ixkôt amnhī xām xwŷnh̄ja ho api nhūm kot ixkôt amnhī xām kêt xwŷnh̄ja ahte arī harôj kahuk o xa. Hāmri nê hamaxpêr mex kêt kumrêx o xa. ³⁶ Rŷ koja mēmyjê hō wa axkrut nê hpur kām apênh o âm japêr. Pu pa amnhī wŷr kot ixkôt amnhī xām xwŷnh̄ta o api nhūm kot ixkôt amnhī xām kêt xwŷnh̄ta pur kām ahte arī apênh o xa. Hāmri nê tee ri hkràmnhwŷ hkukamā hamaxpêr o xa. Anê.

Nhūm pre ā Jejus hkôt mē pa ho mē pa xwŷnh̄jê mā amnhī jarênh anê. ³⁷ Hāmri nhūm mē kuma nê kām:

—Kwa nhŷri koja mēmoj ā amnhī nhîpêx anê? Anê.

Hāmri nhūm mē kām:

—Nà koja nhŷri mēmojja ā amnhī nhîpêx anê ka mē omunh kurê kumrêx. Te nhŷri mēmoj kro nê nōr nhūm nhônhti kot omunh nê hā htor nê hpinh̄panh nhūm mē kot hā omunh kurê kumrêxta pyrāk. Anê.

18

Mē pahte Tirtūm mā amnhī jarênh rāhā ho papa hā mē pamā karō

Rukre 11.5-8; määnēn Wam Tesarōn 5.17

¹ Tā nhūm Jejus hkôt mē pa ho mē pa xwŷnh̄jê mā mēmoj tā karō. Mē kot tanhmā Tirtūm mā amnhī jarênh to hā mē kām karō. Mē kot xatā kām amnhī jarênh o pa nê amnhī kaxyw kām hamaxpêr rāhā ho pa kaxyw. No âm hā kuxi nê tanhmā mē kām hā ujarênh to nê mē kām:

² —Koja nhŷri krī hō kamā juis-tija kām Tirtūm prām nōkati. Nê määnēn kām amnhī kwŷjê hprām nōkati htā kêp juisti nê tanhmā mē

kām kapêr to ho hkrī. ³ Jakamā nhūm mēhō ni pê mjên htyk xwŷnh. Nhūm hte mēhō xatā tanhmā kêp ô mēmoj to ho pa. Hāmri nhūm tee ri amnhī tā omu nê xatā juistita wŷr mra nê kām harê nê kām: “Xê gāa nê. Na hte pahkwŷjê hōja ixtomnuj rāhā ho pa. Xê ixtā tanhmā kām akapêr to kê tām inhîpêx.” Anê. Nê xatā hwŷr mra nê amnhī to kuwŷ nê xatā hwŷr mra nê amnhī to kuwŷ. ⁴⁻⁵ No nhūm kuma nê âm kuma. Kām hkwyjê ho ajuta hprām kêt jakamā âm kuma. Tā nhūm xatā hwŷr mra. Gaa nhūm rī kām mar kaga nê. Hāmri nê hamaxpêr o: “Tk. Hêxta waa nê. Jahti na hte xatā ixwŷr mra nê tanhmā inhmā amnhī jarênh to. Nê âm xatā ixwŷr mra. Nà na pa ra inhmā mar kagyk nê. E pa tokyx tanhmā nê kot tanhmā ho xwŷnh̄ta mā ixkapêr to. Inhmā Tirtūm pyma kamā rŷ inhmā ixkwŷjê kaprī kamā pa tanhmā nê kām nê hkêt tā kot pa anhŷr kêt nhūm amnhī tā inhmā harênh pix nê pa ra mar kurê ixkrā tātāk nê.” Anhŷr o hamaxpêr. Ā mē ujarênh kot anhŷr.

⁶ —Juisti tām hamaxpêr kêt tā nhūm nija xatā hwŷr mrar nê amnhī to hwŷr jakamā nhūm jatā tanhmā ho ajuta hto. ⁷⁻⁸ No kêt Tirtūmja. Xàn ka htem mēmoj tā awŷ nhūm juisti punutita pyrā nê mē ama nê âm mē ama? Nà koja ā amnhī nhîpêx anhŷr kêt nê. Kot ka mēmoj tā kām amnhī jarê nhūm ama nê tanhmā amā mēmoj to rŷ tanhmā amā amnhī nhîpêx to. Juistita rom mē pakamā ukaprī xwŷnh na. Tā kot paj nhŷrmā akupŷn wrŷ nê mē apumu ka mē arī amnhī kaxyw hkôt ajamaxpêr mex pê kām amnhī jarênh rāhā ho ri apa pa ja hā mē apumu nê ixkīnh tŷx nê. Ja na inhmā hprām. Anê.

Tanhmā mē kot Tirtūm mā amnhī jarênh to hā mē harênh

Matêwre 6.5-8; määnēn Wam

Pêtre 5.5-6

⁹ Tã nhũm Jejus mẽ kot amnhĩ to mex o hkwyjê jakrenh ã amnhĩ to jarkrar o ri mẽ pa xwýnhjê pumu mẽ tanhmã mẽ kãm kapêr to. Nom mẽ kot amnhĩ to jarkrarta ã kuxi mẽ mẽ kãm awjarê mẽ mẽ kãm:

¹⁰ —Koja mēhō wa hamēxkrut nē Tirtūm mā amnhĩ jarēnh kaxyw wa tē. Ja kēp Parijew nhō xwýnh nhũm hōja kēp mẽ ò pahĩ mā hkwyjê pē kàxpore hkwy jamýnh xwýnh. Nhũm wa Tirtūm mā amnhĩ jarēnh xà hã ixkre hwýr wa tēn axà. ¹¹⁻¹² Hāmri nhũm Parijew nhō xwýnhnta kumrēx tē nē nhýri mẽ piitã mẽ noo mã Tirtūm mã amnhĩ jarē. Nē amnhĩ to jarkrar pē kãm amnhĩ jarēnh o: “Pa Tirtūm. Era ate ixpumunh mex. Na pa hte amnhĩ to mex pix o ri ixpa. Ra ate ja hã ixpumunh mex. Na pa hte kàxpore hkwy jamýnh xwýnh nēj rom tãm amnhĩ nhípēx. Nē semãn piitã hã ixàpkur kêt rãhã amã amnhĩ jarēnh rãhã ho ixtã apkati axkrut. Nom ja pix kêt. Na pa hte mãânēn ixàpēnh pãnhã kàxpore jamý nē mẽ kot amã tanhmã amnhĩ nhípēx to ho pa xwýnhjê mã hkwy nhōr o ixpa. Nē na pa hte ri ixàhkĩnh o ri ixpa hkêt nē. Nē nhãm mẽ kēp mẽ hprō ho amnhĩkati ho ri ixpa hkêt nē. Na pa hte mẽ piitã mẽ kurom tãm amnhĩ nhípēx ã amnhĩ pumu nē ixkĩnh tỳx kumrēx. Hēxta waa nē. Mon pa hte ri ã amnhĩ to mex o ixpa anē?” Anhýr o Tirtūm mã amnhĩ to jarkrar pē kãm amnhĩ jarēnh o xa.

¹³ —Hāmri nhũm hpãnhã mẽ kēp kàxpore hkwy jamýnh xwýnhnta haxwýja Tirtūm mã amnhĩ jarē. No ãm Parijew nhō xwýnhnta rom ki hkwyjê pē awry nē ahte hipō nē kãm amnhĩ jarē. Nē kãm amnhĩ jarēnh pē amnhĩ tak nē mur nē kãm: “Kwa Tirtūm. Na pa hte amnhĩ tomnuj tỳx o ri ixpa. Nē ixtỳx ri amã prãm xà kuhpa hã tanhmã amnhĩ nhípēx to. Na pa

tee ri ja hã amnhĩ pumu nē ixkaprĩ htỳx nē. ã inhmã amnhĩ nhípēx anhýr o ri ixpa hprãm kêt tã pa hte ã amnhĩ nhípēx anhýr o ri ixpa. Kwa xà kot ka ixkamã axukaprĩ nē amnhĩ katut kôt ixte amnhĩ tomnuj rēnh pa Tirtūm?” Anhýr o kãm amnhĩ jarē.

¹⁴ —Hāmri nhũm Tirtūm hamē wa kot kãm amnhĩ jarēnh ma no ãm wamta ma nē ãm kuma. No kêt hkôt hōja ma hāmri nē kot kãm amnhĩ tã àhwýr xà hkôt amnhĩ katut kôt kot amnhĩ tomnuj rēnh pa nē ho hkra. Jakamã nhũm mex nē hkĩnh nē pa. Ra tãm hkrã hāmri nē hkĩnh nē ma htēm kurē kumrēx. ã mẽ ujarēnh kot anhýr. ãm hāmri na pa mẽ amã ja jarē. Koja mēhō Parijew nhō xwýnhnta pyrã nē kot amnhĩ to mex xwýnh ã amnhĩ kamnhĩx hāmri nē Tirtūm kot amnhĩ katut kôt kot amnhĩ tomnuj rēnh kaxyw amnhĩ to hwýr kêt nē. Koja ãm kãm amnhĩ to jarkrar pix nē. Jakamã koja Tirtūm te kot mar nē ãm mar pyrãk o hipēx. No koja mēhō kot kàxpore hkwy jamýnh xwýnhnta pyrã nē tee ri tanhmã amnhĩ tomnuj to hã amnhĩ pumu nē hkaprĩ nē. Hāmri nē amnhĩ to Tirtūm wý nhũm kuma nē tanhmã ho mex to. Anē.

Jejus kot amnhĩ wýr mēhprĩrejê hwýr ã harēnh

Matêwre 19.13-15; Makre 10.13-16

¹⁵ Tã nhũm Jejus mẽ hkôt mẽ pa ho mẽ pa xwýnhjaja arĩ pry hã Jerujarē hwýr mō nhũm Ijaew kwýjaja mẽ omu nē mẽ hkrare jamý nē Jejus wýr mẽ o mra. Kot mẽ hã ãhkra jaxwýr nē mẽ ho Tirtūm wýr kaxyw. Hāmri nhũm hkôt mẽ pa ho mẽ pa xwýnhjaja tee ri ja hã mẽ omu nē nē mẽ kãm kapêr nē mẽ kãm:

—Tk. Kwa mẽ ma akupým mẽ akrata o mra nã? Mo kaxyw na ka mẽ Jejus wýr mẽ o mra? Kormã mẽ ràxre kēnã. Anē.

16 Hāmri nhũm amnhĩ tā mẽ kuma nẽ mẽ kām:

—Tk. Kwa nà mẽ ri inhnẽ mèhprĩjẽ kurẽ hkêt nẽ. Kwār mẽ māmri ixwỳr mẽ o mra. Anẽ.

Hāmri nẽ amnhĩ wỳr mẽ kām hpa ho apê nhũm mẽ hwỳr mẽ o mra nhũm mẽ kuri kuhê. Hāmri nhũm hkôt mẽ pa ho mẽ pa xwỳnhjẽ mã kām:

—E mẽ jareja mẽ omu. Na htem hamakêtkati nẽ hkĩnh nẽ ri pare. Nẽ kām amnhĩ to rũnh prām kêt nẽ ri pa. Tã Tĩrtũm kôt mẽ kot amnhĩ nhĩpêx xwỳnhjaja na htem mẽ uràk nẽ kām amnhĩ to rũnh prām kêt nẽ ri pa.

17—Jarejaja na htem hipêêxà nẽ katorxà wa kapêr ma nẽ wa hkôt ri amnhĩ nhĩpêx mex o ri pa. Tã ixpê Tĩrtũm kot mẽ awỳr inhmẽnh xwỳnh kot ka mẽ amã ixkôt amnhĩ xunhwỳr prām. Hã kot kaj mẽ te ho jarejẽ kot amnhĩ nhĩpêx pyràk o amnhĩ nhĩpêx. Jao ixkapêr ma nẽ ixkôt ri tanhmã amnhĩ nhĩpêx mex to ho ri apa. Anẽ.

Kàxpore rax xwỳnh jarẽnh

Matêwre 19.16-30; Makre 10.17-31; mãânẽn Wam Ximotre 6.6

18 Tã nhũm Ijaew nhõ pahihiti hõja Jejus wỳr tẽ nẽ kām kapêr nẽ kām:

—Pa? Mẽ ijahkre xwỳnh maati? Kwa inhmã mẽmoj jarẽ. Tanhmã kot pa we nhỹrmã Tĩrtũm ri ixtĩr tũm nẽ ixpa kaxyw amnhĩ nhĩpêx mex to ho ri ixpa wehe? Anẽ.

19 Hāmri nhũm kām:

—Xà ate ixpê Tĩrtũm kwỳ hã ixpumunh kôt na ka ixte uràk nẽ amnhĩ to mex xwỳnh ã ijarẽ? Tĩrtũm pix na kot amnhĩ to mex rãhã xwỳnh jakamã kot kaj ã ijarẽnh anhỹr jao ixpê Kra hã ijarẽ. Nẽ uràk nẽ ixte amnhĩ to mex xwỳnh ã ijarẽ. Nà xàn ka ãm atỳx ri amnhĩ krã hkôt ã ijarẽnh anẽ?

20—Tĩrtũmja mex o mex xwỳnh jakamã kot kaj amã nhỹrmã kuri atĩr tũm nẽ apa hprãm hāmri nẽ ra

kot mẽmoj tã mẽ amã karõ xà hkôt amnhĩ nhĩpêx o ri apa. Ra ate mar mex kênã. Na pre mẽ amã:

Kêr ka mẽ axpên pẽ axàhkĩnh hkêt nẽ.

Nẽ mẽ axpên par kêt nẽ.

Nẽ mẽ axpên to axêx o ri apa hkêt nẽ.

Nẽ mẽ axpên pẽ aprõ ho amnhĩkati hkêt nẽ.

Nẽ mẽ anhĩpêêxà mẽ akatorxà wa hã apijaam pẽ wa kutã ano-jarêt pix o ri apa.

E kot kaj amã nhỹrmã Tĩrtũm kuri atĩr tũm nẽ apa hprãm hã kêr ka ã amnhĩ nhĩpêx anhỹr o ri apa. Anẽ.

21 Nhũm pre ã Jejus kām kapêr anẽ nhũm kuma nẽ kām:

—Kwa ixprĩre ri ra ã ixte amnhĩ nhĩpêx anhỹr o ri ixpa kênã. Nom ixte ixtĩr tũm nẽ ixpa kaxyw kormã ixte tãm kêt pyràk. Anẽ.

22 Hāmri nhũm Jejus kām:

—Nà kormã mẽmoj pyxire nẽ arĩk. Na ka amã akukrêx rax japê htỳx o Tĩrtũm jakre. Jakamã kêr ka ma akupỳm tẽ nẽ akukrêx o wênẽ hpa nẽ hpãnhã kàxpore jamỳ hāmri nẽ ma mẽ kêp amrakati xwỳnhjẽ mã õr pa. Hāmri nẽ rĩ akupỳn ixwỳr tẽ nẽ ixkôt apa ho apa. Anẽ.

23 Hāmri nhũm kuma nẽ tee ri amnhĩ kukamã hamaxpêr. Kām kukrêx rax japê nẽ kām ìhkra karo hprãm kêt nẽ. Jakamã tee ri Jejus kot ã kām hã karõ anhỹrja ma nẽ awjanã nẽ ma akupỳm tẽ. 24 Hāmri nhũm tee ri ja hã omu nẽ hã mẽ kot mar xwỳnhjẽ mã kapêr nẽ mẽ kām:

—Hêxta waa nẽ. Koja mẽ hikukrêx rũnh xwỳnhjaja ohtõ nẽ kām mẽ hikukrêx japê xaj Tĩrtũm mẽ wa ixri htĩr tũm nẽ pa ho papa hkêt nẽ. Wa ixte amnhĩ nhĩpêxja mẽ kêp hihtỳx. 25 Na htem kām hikukrêx rax mã ìhkra karo hprãm kêt rãhã tee ri kām Tĩrtũm kôt amnhĩ nhĩpêx prãm kaprỳ. Te ho mẽhõ kot menh kagõ hã hkre nẽ kām kagõ katõk prãm kêt rãhã

kām guhkrax kām àr prām kaprÿta pyràk. Anē.

Nhūm pre ā Jejus mē kām kapēr anē. ²⁶ Hāmri nhūm mē kuma nē tee ri amnhī kukamā hamaxpēr nē kām:

—Kwa nom mē xpiitā mē inhmā mē ixkukrēx japē kēnā. Jakamā xà kot paj mē xpiitā nhÿrmā war ari ixtīr tūm nē ixpa ho ixpa hkēt nē nà? Anē.

²⁷ Hāmri nhūm mē kām:

—Nà kot kaj mē amnhī krā hkôt mē amā mē akukrēx japēja mā anhūrer kēt nē. Tīrtūm pix na hte ā mē kot amnhī nhīpēx anhÿr kaxyw tanhmā mē hkrā hto nhūm mē kām mē hikukrēx japē htÿx kēt nē. Jao mē kēp Tīrtūm mē wa ixri htīr tūm nē mē pa ho pa mā xwÿnh. Anē.

²⁸ Hāmri nhūm Simāw Pētre kām:

—Kwa Pahihti no mē pajaja? Na pa prem agryk ā mēmoj piitā hkaga hpa nē akôt ixpa ho ixpa. Jakamā kot paj mē nhÿrmā war ari ixtīr tūm nē ixpa ho ixpa nà? Anē.

²⁹ Hāmri nhūm kām:

—Tÿ. Nà ka mē atō inhmā tanhmā amnhī nhīpēx to ho apa kaxyw akwÿjē re nē ma inhmā tanhmā amnhī nhīpēx to ho ri apa. Anhōrkwÿ re rÿ atō rÿ atōx rÿ aprō nē akrajē re. Rÿ akatorxà nē anhīpēxà war are. Rÿ akukrēx piitā rer pa hāmri nē ma ixkapēr o mē piitā mē ahkre ho ri mē hkôt apa. ³⁰ Hā kot paj ja hā mē apumu nē mē ato mex rax nē. Hāmri ka mē ma nhÿhÿm apa nē nhÿri mē kām ixkapēr jarēnh o ri mē hkôt apa nhūm mē kot mē amar xwÿnh kwÿjaja mē ama nē ra kām mē akīnh nē. Nē ra mē ate akwÿjē rer par tā nhūm mē tāmjaja te mē apē mē hkra rÿ mē htō rÿ mē htōx pyràk o mē anhīpēx nē tanhmā mē ato mex to ho pa. Hāmri ka mē nhÿrmā ty nē ma Tīrtūm mē wa inhō krī hwÿr api hāmri nē wa ixkuri amex kumrēx nē atīr tūm nē apa ho apa. Anē.

Nhūm pre ā Jejus Simāw Pētre mē hkwyjē mā kapēr anē.

Jejus kot axte htyk kukamā amnhī jarēnh

Matēwre 20.17-19; Makre 10.32-34

³¹ Tā nhūm Jejus mē kot ŷ hā kapēr jarēnh o mē pa xwÿnh pē 12jaja mē hkwyjē pē mē ho kato. Nē nhÿri mē hkàx ā mē o xa nē tanhmā mē kām amnhī jarēnh to nē mē kām:

—Amnepēm Tīrtūm nhÿ hā kapēr jarēnh xwÿnhjaja na prem ixkukamā tanhmā mē kot inhīpēx to hā ijarē nē ixtā kagà. Tā pu mē ra Jerujarē hwÿr mō. Kamā koja mē tanhmā ixtō rax nē. Ra mē kot ixkukamā ijarēnh nē ixtā kagà xà hkôt koja mē ixtō anē. ³²⁻³³ Kōja mē kām ixkurē xwÿnhjaja ixpynē nē Rōm nhō xwÿnhjē nhō pōristi hwÿr ixtō tē nē mē kām ixtō hēx nhūm mē kuma nē mē mar xà hkôt tanhmā inhīpēx to. Nē mē hkwyjaja ixtā hpēr o axkē nē akunha. Nē mē hkwyjaja ixtō kapēr punuj nē ijapry nē ixtā argōx rē nē ixtak. Hāmri nē ixpī. Ā koja mē inhīpēx anē. Nom kot paj ām ixtyk ā apkati axkrunēpxi nhūm Tīrtūmja akupÿm ixtō ixtīr. Anē.

³⁴ Hāmri nhūm mē kuma nē tee ri htyk nē akupÿm htīrja kukamā hamaxpēr no ām hprī hā hkôt hamaxpēr kēt nē.

Jejus kot no hkre xwÿnh o mex ā harēnh

Matēwre 20.29-34; Makre 10.46-52

³⁵ Tā nhūm Jejus mē kormā Jerujarē hwÿr Jerikoja tēp o mō. Hāmri nhūm pry nhīhkjē hā no hkre xwÿnhja àhwÿr o nhÿ. ³⁶ Hāmri nē amnhī wÿr mē mrrar ma. Mē ohtō nē Jejus kōt mē mrrar xwÿnhjē mrrar ma nē mē kām:

—Kwa mēmo ri? Mēmoj wÿr na ka mē axohtō nē mra? Anē.

³⁷ Hāmri nhūm mē kām:

—Nà Jejus pē Najare nhō xwÿnh kōt na pa mē mō. Anē.

³⁸ Hāmri nhūm mē kuma nē kàx pē Jejus mā kapēr nē kām:

—Pa Jejus? Apê mē inhō Pahihiti mex na ka. Te apê amnepēm anhīgēt pahihiti Tawī kot amnhī nhīpēx pyrāk. Jakamā kwa ixkamā axukapří nē akupým ixto mex kêt wehe. Ixte amnhī kaxyw akôt ija-maxpēr xwýnhjê hō na pa. Anē.

³⁹ Hāmri nhūm Jejus kukamā mē mrar xwýnhjaja tee ri kuma nē kām:

—Tk. Kwa akapēr kêt nē nhý nà. Anē.

Tā no nhūm ām mē kuma nē xatā amnhī to hwýr o nhý. Kàx pē kām kapēr o nhý. ⁴⁰ Hāmri nhūm Jejus kuma nē xa nē amnhī wýr hā karō nhūm mē hpa hā kupy nē hwýr o tē nhūm kām:

⁴¹ —Pa mo na? Tanhmā kot pa ato? Anē.

Nhūm kām:

—Nà akupým inhmā ixrīt mex prām. Anē.

⁴² Hāmri nhūm kām:

—Tōe. Nà ra ate amnhī kaxyw inhmā ajamaxpēr týx jakamā kot kaj akupým ri rīt. Anē.

⁴³ Hāmri nhūm akupým rīt mex kurê kumrêx nē ja hā amnhī pumu nē hkính týx nē. Hāmri nē ma Jejus kôt Tirtūm mā mex o mex ā harēnh o mē hkôt tē. Hāmri nhūm mē kot hā omunh xwýnhjaja haxwýja Tirtūm mā mex o mex ā harēnh o Jejus kôt mō.

19

Jakew kām Jejus pumunh prām ā harēnh

Rukre 3.8, 3.12-13

¹ Tā nhūm Jejus arī Jerujarē hwýr mō nē Jeriko hwýr pōj. Hāmri nē krī kahti hkôt pry hā mō. ² Nhūm mē ra hkôt htu rax nē hkôt omunh o mō. Jakamā nhūm Jakew pē Rōm nhō pahī mā kwýjê pē kàxpore hkwy jamýnh xwýnhjê krāhtūm xwýnhja. Na pre hikàxpore rax nē. ³ Tā haxwýja kām Jejus pumunh prām nē. Nom ām hakooti nē hprīhti jakamā tee ri kot omunh kaxyw amnhī nhīpēx nhūm mē kēp āmnār rax nē. ⁴ Hāmri nhūm ra hamaxpēr

nē ma kukamā hprôt nē tē nē nhýri pry mýri pī xām pumu nē hā api nē kutēp ajēt. Hāmri nhūm Jejus mō nē hapa. ⁵ Nē kànhmā rīt nē omu nē kām:

—Pa Jakew. E kwa tokyx tēn wrý pa ma akôt anhōrkwy hwýr tē nē ari amnhīm hikra. Anē.

⁶ Hāmri nhūm kuma nē hkính nē. Nē wrýk kurê kumrêx nē ma amnhī kôt nē o tē. ⁷ Hāmri nhūm mē kot omunh o kuhê xwýnhjaja tee ri ja hā omu nhūm ja mē kēp omnuj nē nhūm mē axpēn mā harēnh o:

—Tk. Kwa nà. Jakew kot amnhī tomnuj xwýnh tā nhūm Jejus ma hkôt tē nē kuri pōj. Anē.

⁸ Hāmri nhūm wa ōrkwy hwýr axà nē nhý nhūm Jakew Jejus mā amnhī jarēnh o:

—E. Nà ra ixte pahihiti mā kàxpore jamýnh xwýnhhta na pa pre hte ho prês jakre nē amnhīm hamýnh rax nē. Tā kot paj akupým mē kām ōr pa. Na pa pre hte mē hkwyjê pē ho 10 nē hamý. Tā kot paj hipy ho 40 nē kurê nē akupým mē kām ho ixpigrành pa. Ā kot paj mē hipēx anē. Nē ixkàxpore jakrêx kot paj ho axkjê nē mē kēp amrakati xwýnhjê mā ho ixpigrành pa. Anē.

⁹ Hāmri nhūm kuma nhūm ja kām mex nē. Jakamā nhūm kām:

—Nà ām hāmri. Ate pahkukamā panhīgēt Apraāw pyrā nē jarāhā ate amnhī tomnuj kaga jakamā na ra jarāhā anhōrkwy hwýr mē mex xà axà. Kōja Tirtūm jarāhā amnhī katut kôt ate amnhī tomnuj rēnh pa nē axte kām hamaxpēr kêt nē. ¹⁰⁻¹¹ Mē ate amnhī tomnuj xwýnhjê hwýr na pre Tirtūm inhmē pa wrý. Te nhýri mē apikunor nhūm ixte mē ajapēr o ixpa kaxyw Tirtūm kot mē awýr inhmēnh nhūm ixwrýk nē nhýri ixte mē ajapēr o ixpa nē mē amā ixkator nē ixkính nē ma akupým hwýr mē ato inhmōrta pyrāk. Anē.

Mě pahte Tirtüm mã tanhmã amnhĩ nhĩpêx to

Matêwre 25.14-30

Hãmri nhũm mẽ ohtô nê Jejus mar o hkôt Jerujarê hwÿr mra. Na prem htÿx tanhmã kot amnhĩ nhĩpêx to hã hkamnhĩx o hkôt mō nê axpên mã:

—E ma pu mẽ hkôt. Koja Jerujarê hwÿr pōj hãmri nê kêp mẽ pahpê Ijaew nhō pahi nê mẽ pahto amnhĩptâr kurê kumrêx. E kwa ma pu mẽ hkôt. Anê.

¹² Nhũm Jejus mẽ hamaxpêr kôt mẽ omunh mex nê. Jakamã kot mẽ piitã mẽ ho amnhĩptâr xà hã arĩgro hã mẽ kãm amnhĩ jarênh kaxyw. Kormã Jerujarê hwÿr ahtêp kêt ri mẽ kãm amnhĩ jarênh kaxyw. Nom hprĩ hã mẽ kãm hã amnhĩ jarênh kêt nê. ãm amnhĩ tã kuxi nê mẽ kãm awjarê nê mẽ kãm:

—Koja nhÿri krĩ hō kamã mēhō myja. Kot amnhĩ to rax o hkwyjê jakrenh xwÿnhja. Nê krĩ hō kamã krĩ piitã hkôt pahi nhō pahihtija hãmri harênh ma nê amnhĩ wÿr kuwÿ. Kot ma hwÿr mōr nhũm ò krĩ kamã nê mãânên krĩ hkwy kamã kêp mẽ ò pahi kaxyw kot ãm kaxyw nhũm hwÿr nojarêt. ¹³ Hãmri nê amnhĩ wÿr kãm mẽ ãpênh xwÿnhjê ho 10 nê tanhmã mẽ hã karō hto. Nhũm mẽ hwÿr mra nhũm mẽ kãm amnhĩ jarê nê mẽ piitã mẽ kãm kàxpore hkwy gō. Ahpÿnhã mẽ kãm hpÿnh nê kugō nê mẽ kãm: “E ota ixkàxpore hkwyta. Kot kaj mẽ ixkutêp tanhmã ri inhmã ho rax to. Kêr pa mẽmo arĩgro hã akupÿn mō kê ra ixahã inhmã ho ohtô nê pa hamÿ.” Anhÿr o mẽ kãm kapêr hãmri nê ma mō. ¹⁴ Hãmri nhũm ò krĩ nhō xwÿnhjaja ra kêp mẽ ò pahi kaxyw harênh ma nhũm ja mẽ kêp omnuj nê. Nê mẽ kãm hkĩnh kêt jakamã ma krĩ hō kamã kot mẽ kaxyw ãm xwÿnhta wÿr hkwy rê nhũm mẽ ma hwÿr mra nê hwÿr pōj. Hãmri nê kot mẽ kaxyw ãm mã xwÿnhta punu nê kãm: “Pa. E

ot pa mẽ awÿr mra. Kwa na ka xep ra mẽ ixkaxyw mẽ inhĩōja xãm kaxyw. Kwa na mẽ inhmã jahti hkĩnhiti hã. Kwa mẽ ixkaxyw ãm kêt nê nã?” Anhÿr o kãm kapêr.

¹⁵ —Tã no nhũm ãm mẽ kuma nê ãm mẽ kuma nhũm mẽ awjanã nê mã akupÿm mra. Hãmri nhũm pahija mẽ kaxyw mẽ kãm hkĩnh kêt xwÿnhta xãm nhũm ma akupÿm ò krĩ hwÿr mō. Mōō nê ra pōj hãmri nê amnhĩ wÿr kãm mẽ ãpênh xwÿnhjê hã karō nê mẽ kãm: “E no ixte mẽ amã kàxpore nhōr xwÿnhta? Tanhmã na ka prem ixkutêp inhmã ho rax to? E mẽ inhmã agō pa omu.” Anê.

¹⁶ —Hãmri nhũm wamta kãm: “Ota akàxpore ate inhmã òr xwÿnhta. Na ka pre inhmã ho pyxi nê agō pa kupy nê ho mẽmo hy hkwy japrô nê hkre. Nhũm ò pa mẽ kãm ho wênê ho ri ixpa nê hpãnhã kàxpore jamÿ nê hipy amã kurê nhũm ra kêp 10. Ota. E amÿ.” Anê.

¹⁷ —Hãmri nhũm kuma nê hkĩnh nê. Hãmri nê kãm: “Nã ãm hãmri na ka ã inhmã ho rax anê. Ixte amã ho pyxi nê òr tã ka pre inhmã hamâr mex nê nhũm kãnhmã axkamê nê ra kêp 10. Tã ra ixpê krĩ hkwy kamã mẽ ò pahi jakamã kot ka inhmã krĩ ho 10 nê inhmã hamâr o ri apa. Jakamã kwa mãmrĩ amnhĩm kàxporeta o arĩk.” Anê.

¹⁸ —Hãmri nhũm hpãnhã hōja hwÿr tē nê kãm: “E ota akàxporeta. Na pa pre ho mẽmo hy hkwy japrô nê hkre nhũm ò pa mẽ kãm ho wênê nê hpãnhã kàxpore jamÿ nê hipy amã kurê nhũm ra kêp 5. Tã ota. E amÿ.” Anê. ¹⁹ Hãmri nhũm kuma nê kãm: “Nã ãm hãmri. Hãmri na ka ã inhmã ho rax anê. Jakamã kot kaj hpãnhã inhmã krĩ ho 5 nê ho amnhĩptâr o apa. E mãmrĩ amnhĩm kàxporeta o arĩk.” Anê.

²⁰⁻²¹ —Hãmri nhũm hpãnhã hkôt hōta tē. Nom hkwyjê hkĩnhã ò pa-trãw mã tanhmã kàxpore ho rax to hkêt nê. ãm tanhmã hamaxpêr punuj to nê htÿx ri kot kêp ho

õxý nê amnhĩm piitã hamýnh par nê akupým kãm hkwỹ nhõr kêt ã hkamnhĩx. Jakamã tanhmã kãm ho rax to hkêt nê. Âm hkupu nê o tẽ nê nhỹri kutêp kuxi. Hãmri nhũm õ patrãw amnhĩ wýr hã karõ nhũm hwýr tẽ nê amnhĩ nê kãm kapêr punuj nê kãm: “Tk. Ota akàxporeta. Ixte amã tanhmã ho rax tore hã. Ixte amã ho rax ronhỹx ka amnhĩm piitã hamýnh pa nê akupýn inhmã hkwỹ nhõr kêt nê. Rý ixte tanhmã apê homnuj to ronhỹx ka hã inhmã akir. Jakamã na pa tanhmã amã ho rax to hkêt nê. Âm hkupu nê o tẽ nê ho amũxu nhũm arĩ akutêp hikwý. Tã ota.” Anhýr o amnhĩ nê õ patrãw mã kapêr punuj nê. ²²⁻²³ Hãmri nhũm tee ri amnhĩ tã kuma. Kot amnhĩ to mex xwýnh nê kãm mẽ àpênh xwýnhjê ho mex o pa xwýnh tã ã kãm àpênh xwýnh kot kãm kapêr anhýrja ma nê amnhĩ tã kamã gryk nê. Hãmri nê kãm: “Tk. Kwa xà ã ixte amnhĩ nhĩpêx anhýr? Nà ixte ã amnhĩ nhĩpêx anhýr kêt. Æ ixte amnhĩ nhĩpêx anhýr nhũm amã ixpuma ronhỹx ka pre amã ixpuma xaj ixkàxporeta py nê ixwakre kamã amnhĩ krã hkôt tanhmã inhmã ho rax to. Tã nhỹx pa pre ra akupýn awýr tẽ nê hamý. Nà na ka ã ijarênh anhýr o axêx nê amnhĩ krã hkôt tanhmã inhmã ho rax to hkêt nê. Mýrapê kot paj atomnuj týx nê ka rĩ amnhĩ pumu. Pêr ãm ajamaxpêr punuj.”

²⁴ —Nhũm pre ã kãm kapêr anê hãmri nê mẽ kot mar o kuhê xwýnhjê mã kãm: “E mẽ atõ kêp kàxpore py nê wam kot ho 10 nê hamýnh xwýnhhta mã agõ.” Anê. ²⁵ Hãmri nhũm mẽ tee ri kuma nhũm ja mẽ kêp omnuj nhũm mẽ kãm: “Kwa nà ra hikàxpore rax kênã. Ra ate kãm ho 10 nê õr kênã.” Anê. ²⁶ Hãmri nhũm mẽ kãm: “ýy nom tãã. Mãmrĩ kãm agõ. Koja mẽhõ inhmã àpênh mex pa amnhĩ tã omu nê kot inhmã àpênh mexta pãnhã ho mex nê. No koja

inhmã àpênh mex kêt nê pa tee ri ja hã omu nê ho mex kêt nê. E mãmrĩ kãm agõ.” Anê. ²⁷ Hãmri nê hpãnhã mẽ kãm: “E hpãnhã mẽ kãm ixprãm nõkati xwýnhjaja. Ixte mẽ ho amnhĩptar mã tã mẽ kãm ixprãm nõkati xwýnhjaja. Mẽ ma mẽ hwýr mra nê mẽ ho akuprõ nê akupýn amnê ixwýr mẽ o mra nê inhnoo mã mẽ himex pa.” Anê. Æ mẽ ujarênh kot anhýr. Anê.

Nhũm pre Jejus ã mẽ kãm ujarênh anê. Tẽ tãm kêp patrãwta pyrã nê ã amnhĩ jarênh anê. Mẽ kot tanhmã amnhĩ nhĩpêx to ho pa hã mẽ omunh xà hkôt tanhmã mẽ hipêx to hã amnhĩ jarê.

Jejus kot Jerujarê hwýr àr ã harênh

Matêwre 12.1-11; Makre 11.1-11; Juãw 12.12-19

²⁸ Nhũm Jejus kormã Jerujarê hwýr mõ. ²⁹ Hãmri nê ra Petake mẽ Petãn wa htêp o mõ. Hixêt pê Oriwêhti kahti ri na krĩ wa xa. Jakamã nhũm Jejus hkôt mẽ pa ho mẽ pa xwýnh wa ho axkrut nê amnhĩ kukamã wa kumê. ³⁰ Nê wa kãm:

—E. Wa ma krĩ mũj wýr mẽ ixkukamã wa tẽ. Nê wa hwýr pøj nê nhỹri jumênre nyw mã ê nê ãm ata pumu. Kormã mẽ kot hã hkrĩ hkêt xwýnhhta. Ka wa omu nê kãm ê xà hpôt nê man akupýn ixwýr o tẽ. ³¹ Nhũm mẽhõ ja hã war apumu nê hã tanhmã war amã kapêr to ka wa kãm ã ijarênh anê nê kãm: “Mẽ panhõ Pahihti na hã karõ pa wa hwýr tẽ.” Anhýr o wa kãm ijarê. E wa ma hwýr tẽ. Anê.

³² Hãmri nhũm wa kuma nê ma hwýr htêm kurê kumrêx. Nê wa krĩm pøj nhũm Jejus kot wa kãm harênh xà hkôt jumênreta pumu. ³³ Hãmri nê kãm ê xà hpôt o xa nhũm õ dõnjaja mra nê hã wa omu nê wa kãm:

—Tk. Kwa mo kaxyw na ka wa ri mẽ ixpê mẽ ixkrit mã ê xà pôt o wa

xa? Kwa xà kot kaj wa mẽ ixpê ho ahkĩ nà? Anê.

³⁴ Hāmri nhũm wa mẽ kām:

—Nà mẽ panhõ Pahihti na wa inhmã anê pa wa tẽ. Wa ixte ma akupỹm kutã ho inhmõr kaxyw. Anê.

Hāmri nhũm mẽ wa kuma nẽ wa kām:

—Tõe. Nà wa māmri ma kām o tẽ. Anê.

³⁵ Hāmri nhũm wa ma akupỹm Jejus wýr o tẽ. Hāmri nẽ kaxyw amnhĩ xê hkwý hopôj nẽ kām ho hkô kahty nẽ kām ho htýx nẽ o xa nhũm hã nhỹ nẽ mõi. ³⁶ Kormã Jerujarẽ hwýr hixêt ã àpir o mõi. Nhũm mẽ kot omunh o mram xwýnhjaja hkĩnh nẽ ma hkukamã kot pry ho mex kaxyw amnhĩ xê hkwýptyr o mõi. ³⁷ Hāmri nhũm mẽ hixêt ã api nẽ kormã ahpar mã wrýk o mõi. Hāmri nhũm Jejus kôt mẽ pa ho pa xwýnhjaja kàx pẽ Tirtũm mex o mex ã harẽnh o hkôt mõi. Ra mẽ kot hkôt pikamẽnh ry nẽ kot mẽ kām aa mẽmoj pumunh kêt kwý ho anhýr rax ã omunh jakamã hkĩnh nẽ nẽ Tirtũm mex o mex ã harẽnh o hkôt mõi. ³⁸ Nẽ harẽnh o:

E ota Tirtũm kot mẽ pahwýr mẽnh xwýnhhta na ra pøj.

ãm hāmri na mẽ pahwýr wrý. Na mex kumrẽx.

Kêp mẽ panhõ Pahihti mex na. ãm hāmri na pre Tirtũm mẽ pahwýr kumẽ.

Tirtũmja mex kumrẽx. Mex o mex. Kukwak ri pix mã na pu htem pajamakêtkati nẽ paxãmnhĩx ri papa rãhã ho papa.

Anhýr o Jejus kôt harẽnh o mõi. Ra kot mẽ ho amnhĩptar kurẽ kumrẽx ã hkamnhĩx jakamã hkĩnh nẽ hkôt ã kapêr o mõi anê. ³⁹ Hāmri nhũm Parijew nhõ xwýnh kwýjaja mẽ hkôt mra nẽ tee ri mẽ kuma hāmri nẽ Jejus mã kām:

—Kwa Jejus. Mẽ kām anê kê mẽ anhĩkrẽ nà? Anê.

⁴⁰ Hāmri nhũm mẽ kām:

—Tk. Nà kot paj mẽ kām anhýr kêt nẽ. ã mẽ kapêr anhýrja na inhmã mar hprãm. Kwãr mẽ māmri Tirtũm mã mex o mex ã harẽnh o ixkôt mõi. Kot mẽ anhýr kêt nhũm ra pikap kên nhĩkwý xwýnhja tee ri ja hã mẽ omu hāmri nẽ tãm tanhmã amnhĩ nhĩpêx to nẽ mẽ hpãnhã tãm Tirtũm mã mex o mex ã harẽnh o hikwý. Jakamã kwãr mẽ māmri kapêr anê. Anê.

Jejus tee ri kot Jerujarẽ hkukamã hamaxpêr ã harẽnh

Rukre 23.27-31

⁴¹ Nhũm mẽ kormã Jerujarẽ hwýr hpôx o mõi. Kormã hixêt rũm ahpar mã hwýr wrýk o mõi. Hāmri nhũm Jejus amỹm amnhĩ hkukamã Jerujarẽ nhõ xwýnhjê pumunh o mõi nẽ mẽ hkukamã hamaxpêr o hkapri nẽ. Hāmri nẽ hkapri xàj mýr o mõi. ⁴² Hāmri nẽ te kot mẽ kuri mẽ omunh o ri pa pẽ mẽ kām kapêr pyrãk o mẽ kām kapêr nẽ mẽ kām:

—Hêxta waa nẽ Jerujarẽ nhõ xwýnhjaja. Kot kaj mẽ amex kêt nẽ. Mẽ ate amnhĩ kukamã axãhpumunh mex ronhýx ka mẽ ra mẽ kām mẽ akurẽ xwýnhjê pumaj ixkôt amnhĩ xunhwýr kurẽ kumrẽx nhũm mẽ tee ri tanhmã mẽ ato mã. Ka mẽ ra ixkukwak ri amex nẽ ajamakêtkati nẽ akĩnh nẽ ri apa ho apa. ⁴³⁻⁴⁴ Tirtũm tãm kot mẽ awýr inhmẽnh tã ka mẽ amã ixprãm kêt nẽ. Jakamã koja nhỹrmã mẽ kām mẽ akurẽ xwýnhjaja mẽ awýr mra nẽ mẽ anhõ krĩm hipòk pa. Hāmri ka mẽ amnhĩ wýr mẽ omu nẽ tee ri ajapòx kaxyw nhũm mẽ awýr agjẽ nẽ mẽ anhĩmex pa nẽ mẽ anhõ krĩa grãnh pa. Nẽ ahpýnhã ri mẽ anhõrkwý grãnh pa. ã koja mẽ mẽmoj piitã grãnh par anê. Anê.

Jejus kot Tirtũm nhõrkwý hwýr àr ã harẽnh

Matêwre 21.12-17; Makre 11.15-19; Juãw 2.13-22

⁴⁵⁻⁴⁶ Tã nhũm Jejus Jerujarẽ hwýr axà nẽ jumẽnre rũm wrý hāmri nẽ

ma Tirtūm mā amnhī jarēnh xà hā ixkreja wýr tē. Hāmri nē hwýr axà nē tee ri kamā mē pa xwýnhjē pumunh o xa. Nhūm mē ra axtem nē mōx nē ôwēhti nē tuuti ho wēnē ho kuhê. Mē kot haprōr nē Tirtūm mā hpar nē kām ōr pē kām amnhī jarēnh kaxyw mē kām ho wēnē ho kuhê. Nē axtem nē mē kām hā ohtō rax kām mē kām ho wēnē. Hāmri nhūm Jejus mē hwýr axà nē tee ri mē omu mē kām akir nē mē kām:

—Tk. Kwa nà. Tirtūm kapēr ā kagà htūm kot ōrkwý jarēnh kot: Inhōrkwýja ām mē ate inhmā amnhī jarēnh xà hā ixkre pix kaxyw na.

Anhýr o kot harēnh tā ka mē axtem nē kamā ā amnhī nhīpēx anhýr o apa. E mē ajapōj nē ma ajapēx tokyx anē.

Anhýr o mē kām kapēr hāmri nē ixkre nē mē kator nhūm mē ma hapēx pa.

⁴⁷ Tā nhūm Jejus apkati mē Tirtūm mā amnhī jarēnh xà hā ixkreja wýr mra nē kamā mē ahkre ho hkrī. Hāmri nhūm mē ō patre krāhtūm mē Tirtūm kapēr tūm o mē ahkre xwýnhjē mē mē kot amnhī to rūnh xwýnhjaja kot mē ahkre ma nhūm ja mē kēp omnuj nē nhūm mē kām hpīr prām nē. ⁴⁸ Nom nhūm amarī mē pa xwýnhjaja mē kurom kām mar prām nē akryk mar o kuhê. Jakamā nhūm mē tee ri ja hā mē omu nē tanhmā mē kot hpīr to hkukamā hā xpēn ma.

20

Mēhō nhý hā Jejus kot mē ahkre hā harēnh

Matēwre 21.23-27; Makre 11.27-33

¹ Nhūm arīgro hō hā nhūm Jejus kē axte Tirtūm mā amnhī jarēnh xà hā ixkreja wýr axà nē mē ahkre ho nhý. Tanhmā mē kot amnhī nhīpēx to nē nhýrmā Tirtūm mē wa kuri htīr tūm nē pa hā mē kām kapēr o nhý. Hāmri nhūm Ijaew nhō pahijē mē mē kot Tirtūm kapēr

tūm o mē ahkre xwýnhjē mē mē ō patre krāhtūmjaja hēx rom mar o kuhê. ² Hāmri nē kām:

—Kwa mē inhmā amnhī jarē. Mēhō nhý hā na ka hte ā amnhī nhīpēx anhýr o ri apa? Na ka hte akupým mē ho mex o apa nē tanhmā mē ahkre hto ho apa. Xà amnhī krā hkôt na ka hte ā amnhī nhīpēx anē nà? Anē.

³ Hāmri nhūm mē kām:

—Nà ixkumrēx kot paj mēmoj tā mē akukja. Ka mē inhma nē inhmā harē pa rī kormā tanhmā mē amā amnhī jarēnh to. ⁴ Finat Juāw Paxisja ā kot paj mē akukja. Mēhō nhý hā na pre mē hkrā kumrār o pa? Xà amnhī krā hkôt nà xà Tirtūm nhý hā? E mē atō inhmā harē. Anē.

⁵⁻⁶ Hāmri nhūm mē kuma nē tee ri kot tanhmā kutā kām harēnh to hkukamā hamaxpēr nē xpēn mā:

—Kwa tanhmā kot puj mē kām harēnh to? Jar mē kot mar xwýnhjaja na htem kēp Tirtūm nhý hā kapēr jarēnh o pa xwýnhjē ā harēnh o pa. Tā kot puj mē kām kot amnhī krā hkôt mē hkrā kumrār o pa hā harē nhūm mē tee ri mē pama nē mē pakamā gryk týx nē. Nē mē paxēx rom mē pahte kām pakapēr ā mē pahpumunh kurē kumrēx nē kēn o mē pahtak o mē panhīmex. Nom kot puj mē kām Tirtūm nhý hā mē hkrā kumrār ā harē nhūm mē pamā kapēr o: “ā kot anhýr kēnā na ka prem kapēr ma nē ra ixkôt amnhī xunhwýr kēt nē?” Anē. Nà kot puj mē kām tanhmā harēnh to hkēt nē. Kot puj mē ām kām aa te mē pahte ja jarēnh mar kēt pyrāk o harē. Anē.

Mē kot tanhmā kām nē nhūm kot ta pānhā tanhmā mē kām nē pymaj nhūm mē ām tee ri kām tanhmā nē hprām kaprý o kuhê.

⁷ Hāmri nē kām:

—Konēn. Mē ixte mēhō nhý hā kapēr o pa hā omunhre hā. Anē.

⁸ Hāmri nhūm mē kuma nē mē kām:

—Tk. Tôe kot pa xep ijaxwýja mẽ amã tanhmã amnhĩ jarēnh to hkêt nē. Ijaxwýja ixte mēhō nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anē.

Mẽ àpēnh punuj xwýnhjê jarēnh

Matêwre 21.33-46; Makre 12.1-12

⁹Nhũm Jejus arĩ Ijaew nhõ pahijê mã kapêr. Nē mẽ kot tanhmã hipêx to hkukamã mẽ kãm tanhmã amnhĩ jarēnh to. No ãm amnhĩ tã kuxi nē mẽ kãm awjarē nē mẽ kãm:

—Koja mēhō hpur ã hkwyjê kot kamã kãm àpēnh kaxyw mẽ kãm karō. Hãmri nhũm mẽ ma hwýr mra nē kamã mẽmo hy hkre nē hkre pa. Hãmri nhũm ra hpur nhõ dōnja nhỹhỹm nojarêt nē kãm mẽ àpēnh xwýnhjê mã tanhmã hpur jarēnh to nē mẽ kãm: “E or ixpur nō. Kê kamã mẽmoj hkã hpa ka mẽ mãmri kamã axujamýnh pa nē ho axkjê. Nē ixkutêp inhõ jaxwý nē mãmri mẽ anhõ tanhmã ho hprãm xã hkôt tanhmã ho.” Anē.

—Nhũm ã mẽ kãm kapêr anē hãmri nē ma nhỹhỹm mō.

¹⁰—Tã nhũm ra hkã hpa. Nom nhũm hpur nhõ dōnja kormã krĩ hõ kamã ri hã ujahkre ho ri pa. Tã kuri kãm àpēnh xwýnhjê hõja nhũm akupým mẽ hwýr kumê. Mẽ kot kãm kwý nhõr nhũm ma kot kãm o mõi kaxyw ma mẽ hwýr kumê nhũm ma mẽ hwýr mō. Mõi nē mẽ hwýr pøj nhũm mẽ omu nē axtem nē unē nē htak nē akupým hano nhũm ma akupým ý kamã mō. ¹¹Hãmri nē pøj nhũm õ patrãwja tee ri omu nē hpãnhã ja mẽ nhũm ma mẽ hwýr mō. Mõi nē mẽ hwýr pøj nhũm kê wem mã ho anē nē unē nē htak nē akupým hano nhũm wamta pyrà nē ma akupým ý kamã mō.

¹²—Hãmri nhũm kê axte hkôt ja mẽ nhũm ma mẽ hwýr mããnen mō. Ma mẽ hwýr mō nē pøj nhũm mẽ te ho wamta wa hipêx pyràk o hipêx nē unē nē htak rax nē amnhĩ nē hano nē pur nē kapôt ã kumê.

Hãmri nhũm ma akupým mããnen ý kamã mō. ¹³Nhũm mẽ õ patrãw tee ri mẽ omu nē hamaxpêr o: “Hêxta waa nē. Tanhmã kot paj amnhĩ nhĩpêx to? Nã kot paj mẽ hwýr ixkra mãn mẽ. Inhmã hapê htã kot paj mẽ hwýr kumê kê ma mẽ hwýr mō. Hãmri nhũm mẽ kêp ixkra hã omu nē tanhmã ixpê ho hkêt nē. Nē tã inhmã kãm inhõja kwý gō.” Anhỹr o hamaxpêr hãmri nē ma mẽ hwýr kumê nhũm ma mẽ hwýr mō.

¹⁴—Tã ra mẽ hwýr hpõx o mõi nhũm mẽ amým amnhĩ wýr omu nē kêp hkra hã omu nē hã axpēn mã amýnē nē axpēn mã: “E onēj hpur nhõ dõn krata tē. Koja nhỹrmã õ papaj mýr pē amnhũm pur ã pyka pytà nē ho õ. Kwa pu mẽ hpĩr kurê kumrêx nē kêp hpurja o panhõ. E tokyj pu mẽ kupĩ ri.” Anē.

¹⁵—Hãmri nhũm tē nē mẽ hwýr pøj nhũm mẽ unē nē pur nē ho kato nē ma o tē nē kupĩ. Æ mẽ ujarēnh kot anhỹr. Anē.

Nhũm pre ã Jejus mẽ kãm ujarēnh anē nē hã tanhmã mẽ hkukjêr to nē mẽ kãm:

—E koja hpur nhõ dōnja hkra jarēnh ma hãmri nē tãm mẽ hwýr mō nē tanhmã mẽ hipêx to wehe? ¹⁶Koja ma mẽ hwýr mõi hãmri nē mẽ himex pa. Hãmri nē hpãnhã hpur ã nhãm mẽmojê rē nhũm mẽ tã kãm hamãr mex o pa. Anē.

Nhũm pre ã Jejus mẽ kãm ujarēnh anē hãmri nhũm mẽ kot mar xwýnhtaja ujarēnh kamã amnhĩ jarēnh mar kurê kumrêx. Mẽ kot Tirtũm kot mẽ hwýr rēnh xwýnhjê kapêr mar kêt nhũm mýrapê mẽ kãm mẽ hkurê xwýnhjaja kot mẽ kêp mẽ õ pika pytàr nē mẽ himex par ã amnhĩ jarēnh ma nhũm ja mẽ kêp omnuj týx nē. Hãmri nē hêx rom Jejus mã kãm:

—Tk. Kwa nã nhỹx pre kêt pur nhõ dōnja ã mẽ hipêx anhỹr kêt nē. Anē.

¹⁷Hãmri nhũm mẽ kuma nē mẽ omunh o xa. Nē mẽ omunh pē mẽ

no kagâr mã mẽ kãm kapêr nê mẽ kãm:

—Nà ã mẽ hipêx anhÿr mã mẽ tãm kênã. Mãn ka prem ra Tirtùm kapêr ã kagà htùm kot ja jarênh ma. Harênh kot:

Mê kot kên o amnhĩm òrkwÿ nhĩpêx kaxyw nê kên maati pumu nê htÿx omnuj ã hkamnhĩx nê hkaga.

Mê kot hkaga htã Tirtùm mẽ kurom mex o kot kên piitã hakrenh par ã omunh kurê kumrêx. Anê.

Ã Tirtùm kapêr ã kagà htùm kot mẽ ajarênh te mẽ kot kên maati punuj ã hkamnhĩx nê hkaga xwÿnhjê jarênh pyrãk o ã mẽ ajarênh kot anhÿr. Anê.

¹⁸ Nhũm pre ã Jejus mẽ kãm te kêp kên maati pyrãk o mẽ kãm amnhĩ jarênh anê. Hãmri nê axte amnhĩ tã kuxi nê mẽ kãm axte kên jarênh ta pyrã nê mẽ kãm:

—Nà kot kaj mẽ atõ ixkaga hãmri nê te mēhō htÿx htēm nê kên pumunh kêt nê hã htêk nê tēm pyrãk o amnhĩ nhĩpêx. Jao ixkutã amnhĩ xãm. Rÿ ka tanhmã amnhĩ to nê ixkaga nhũm te kên maati hō htēm nê kot anhĩpy htēm nê axôm par pyrãk o anhĩpêx ka amex kêt nê. Anê.

¹⁹ Nhũm pre ã Jejus mẽ kãm ujarênh kãm mẽ harênh anê. Hãmri nhũm Tirtùm kapêr tùm o mẽ ahkre xwÿnhjê mẽ mẽ õ patre krãhtũmjaja kot mẽ kãm kên jarênh o te mẽ tãm harênh pyrãkja ma nhũm ja mẽ kêp omnuj tÿx nê. Jakamã nhũm mẽ kãm Jejus pynênh nê haxàr prãm nê. Nom amnhĩ tã kãm mẽ kot mar o kuhê xwÿnhjê puma nê.

Mê kot hêx rom Jejus kukjêr ã mẽ harênh

Matêwre 22.15-22; Makre 12.13-17; mãânên Rômãn 12.1, 13.6-7

²⁰ Hãmri nhũm Tirtùm kapêr tùm o mẽ ahkre xwÿnhjê mẽ mẽ õ patre krãhtũmjaja Jejus tãnopxar o

kuhê. Hãmri nê ra amnhĩ wÿr mẽmy hkwy hã karõ nê mẽ kãm:

—E. Mẽ ma Jejus wÿr mra nê te mẽ ate hkõt amnhĩ xunhwÿr kaxyw pyrãk o amnhĩ nhĩpêx nê mẽmoj tã ri hkukja. Mẽmoj tã hkukjêr rax nê. Kêr kê Rôm nhõ pahi Sesti kapêr kwÿm ri tanhmã mẽ amã kapêr to ka mẽ ama nê man akupÿn mra nê mẽ inhmã harênh kurê kumrêx. Pa mẽ ama nê ma hwÿr mra nê hã unê nê ma Sesti nhÿ hã mẽ pahto amnhĩptar xwÿnh ta wÿr o tẽ nê ìhkram haxã. Anê.

²¹ Hãmri nhũm mẽ kuma nê mẽ kãm:

—Tõe. Nà kot paj mẽ anê. Anê.

Hãmri nê ma hwÿr mra nê hêx rom kãm kapêr nê kãm:

—Pa Jejus? Nà ãm hãmri na ka hte Tirtùm kapêr o mẽ ahkre mex o ri apa. Na ka hte mẽ kamã akahak kêt nê. Nê mẽ kot tee ri tanhmã ato kapêr punuj to htã ka aprĩ hã mẽ ahkre mex o ri apa. ²² Kwa mẽ inhmã mẽmoj jarê. Rôm nhõ pahihti kot mẽ pahte kãm kãxpore hkwy nhõr ã mẽ pahpê Ijaew mã karõta. Kwa xã we ja amã mex nã? Xà kot pu mẽ kãm kugõ nã xã kot pu mẽ kãm òr kêt nê? E kwa mẽ inhmã tanhmã harênh to. Anê.

²³ Nhũm prem ã hêx rom kãm kapêr anhÿr tã nhũm ra mẽ hamaxpêr ã mẽ omu nê mẽ kãm:

²⁴ —E mẽ atõ anhõ kãxpore htÿxre japêr nê inhmã hõ gõ pa omu. Anê.

Hãmri nhũm mẽ kãm ja gõ nhũm kupy nê omu nê kãnhmã mẽ kãm kupê nê mẽ kãm:

—E mẽhõ nhĩxi nê mẽhõ karõ na ja hã? Anê.

Hãmri nhũm mẽ kãm:

—Pahi Sesti karõ nê hixi na hã kênã. Anê.

²⁵ Hãmri nhũm mẽ kuma nê mẽ kãm:

—Tÿ. Tô kêr ka mẽ mãmrĩ kãm hkwy nhõr o apa. Hã hkarõ nê hã hixi. Tãm kot hipêx xwÿnh jakamã õ na. No mẽ kajaja na pre Tirtùm mẽ anhĩpêx nhũm mẽ apê õ jakamã

kwa kêr ka mē kapēr kôt pix mā ri amnhĩ nhĩpêx o ri apa. Anē.

²⁶ Nhũm pre ã Jejus mē kām kapēr anē nhũm mē piitã mar o kuhê. Nhũm mē kot hêx rom kām kapēr mã xwýnhjaja amnhĩ jaêr pê ã kot kàxpore jarênh anhỹrja ma. Hãmri nē tee ri axte mēmoj tã hkukjêr nhũm kot pahi Sesti kwým ri kot tanhmã harênh to kaxyw ãm tee ri tanhmã hkukjêr to kaprý. Hãmri nē axte tanhmã kām nē hkêt nē ãm akryk omunh pê mar o kuhê.

Akupým mē htír jarênh

Matêwre 22.23-33; Makre 12.18-27; Juãw 5.21, 6.39; mãânên Wam Korit 6.14, 15.12-28; Wam Tesarôn 4.13-18; Apokarip 20.4

²⁷ Tã nhũm Satusew nhõ xwýnh kwýjaja. Mē kot akupým mē htír mã hamaxpêr kêt jakamã mē htyk nē mē hapêx ã mē hkamnhĩx. Jakamã na prem tanhmã axpên mã Jejus jarênh to nē axpên mã:

—E kwa pu mē ma hwýr mra nē mēmoj xihtýx ã hkukja kê mē pama nē tee ri tanhmã mē pamã harênh to hkukamã hamaxpêr. Hãmri nhũm mē piitã ja hã omu nē ãhpumunh týx kêt ã omunh kurê kumrêx. E ma pu mē hwýr.

Anē nē ma hwýr mra nē Parijew nhõ xwýnhjê pyrã nē hêx rom ahkukja nē kām:

²⁸ —Pa Jejus? Kwa mē inhmã mēmoj jarê. Na pre finat Mojesja Tirtúm nhỹ hã mē panhigêt mã ã karõ anē. Mē hkra hkêt rãhã mē pa nē mē htyk xwýnhjaja nhũm mē harênh o:

Koja mēhõ hprõ nē kormã kamã hkra hkêt rãhã pa nē ty. Hã koja hkôt htõja hpãnhã hprõta o hprõ nē kamã hkra. Hãmri nhũm kato nē te kêp htõ htyk xwýnhhta hkra pyrãk. Anē.

Na pre ã Mojes mē kām karõ anē. ²⁹ Jakamã kwa ga mē ixujarênh ma. Koja mē kot axpên to htõ xwýnhjaja kêp 7. Nhũm kot waja mēhõ ho

hprõ nē wa pa nhũm kamã hkra hkêt rãhã ty. Nhũm hkôt htõ hõta hpãnhã hprõ ho hprõ ³⁰ nē wa axpên to pa. Nhũm mãânên ty. Kamã hkra hkêt rãhã ty.

³¹ —Nhũm htõ hõta. Haxwýja hpãnhã tãm o hprõ nē wa axpên to pa grire nhũm haxwýja kamã hkra hkêt rãhã ty. Hãmri nhũm htõ hkwyjaja piitã nija pyxi nē axpên pãnhã ho hprõ hpa. No ãm mēhõ kamã hkra hkêt rãhã ra htyk pa. ³² Hãmri nhũm mē hprõta mē hkôt amnhĩ to hapu nē ty. ³³ Tã Tirtúm kot akupým nhỹrmã mē ho htír ronhýx nhỹ nhỹx kêp nija mjên kumrêx? Ra piitã kot ho hprõ kênã. E mē inhmã ja jarê. Anē.

³⁴ Hãmri nhũm Jejus mē kām:

—Nã kaxkwa kamã mē kot amnhĩ nhĩpêxja axtem na. Pika ja kamã na htem pa nē ãptar nhũm mē axpên mã mē kure. Ja mex. ³⁵ No mē kot Tirtúm kôt amnhĩ xunhwýr xwýnhjaja na htem ty hãmri nē Tirtúm nhõ kri kamã kuri axte kām hprõ hprãm kêt nē ri pa. Rý ni japêr nē kām mjên prãm kêt nē ri pa. ³⁶ Hãmri nē Tirtúm kapêr o mē wrýk xwýnhjê pyrã nē axte htyk kêt nē. ãm htír tũm rãhã nē pa ho pa. Tirtúm ra akupým kot mē ho htír jakamã koja mē kêp hkra nē kuri htír tũm nē mex nē pa ho pa nē axte kām hprõ rý mjên prãm kêt nē ri pa.

³⁷ —Nom mē ate akupým mē htír mã ajamaxpêr kêt ã harênhja kot paj mē amã harê. Amnepêm na pre Tirtúmja pĩ hpõk kamã Mojes mã kapêr nē kām:

Ixpê Apraãw nhõ Tirtúm na pa. Nē mãânên ixpê Apraãw kra Ijak mē htãmnhwý Jako wa õ Tirtúm na pa.

Anhỹr o Mojes mã amnhĩ jarê nhũm kuma nē hã kagã. ³⁸ Kêp apu arĩ mē htyk rãhã nhỹx pre ã mē harênh anhỹr kêt nē. Nhỹx pre mē harênh o: “Amnepêm Apraãw nē hkra nē htãmnhwý mē htír ri ixpê

mê õ Tirtũm na pa pre.” Anhÿr o nhÿx pre mê harê. Nom na pre ã amnhĩ jarênh anhÿr kêt nê. Mê pamã te Apraãwja mê htyk nê mê hapêx pyrãk. Nom nhũm prem ra Tirtũm ri akupÿm htĩr nê mex nê pa ho pa. Tã ka htem Tirtũm kapêr kwÿm ri akupÿm mê htĩr kêt ã mê harênh o apa. Anê.

³⁹Nhũm pre ã Jejus mê kãm kapêr anê. Hãmri nhũm Tirtũm kapêr tũm o mê ahkre ho mê pa xwÿnh kwÿjaja kuma nê tee ri axte tanhmã kãm nê hprãm kaprÿ nê kãm:

—Tÿ. Nã ãm hãmri na ka ã ja jarênh anê. Anê.

⁴⁰Hãmri nhũm mê axte mẽmoj tã hkukjêr kêt nê. Tanhmã kot wem amnhĩ to nê hamaxpêr o hakre? Na prem ãm tee ri kãm hamaxpêr o hakrenh prãm kaprÿ ho kuhê. Jejus kot mẽmoj piitã hkukamã ãhpumunh tÿx o ãhpumunh tÿx.

Jejus kêp pahi finat Tawi nhõ Pahihti hã kot amnhĩ jarênh

Matêwre 22.41-46; Makre 12.35-37; mããnên Rômãn 1.3-4

⁴¹Tã nhũm Jejus kãnhmã xa nê amnhĩ tã tanhmã mê kot mar o kuhê xwÿnhjê hkukjêr to. Nom te nhãm mẽhõ hã mê hkukjêr pyrã nê mẽ kãm:

—E kwa mê inhmã mẽmoj jarê. Tirtũm kot mê akaxyw ãm mã xwÿnhhta ã na pa mê akukja. Mo na htem axpên mã kêp finat pahi Tawi kanrêhã htãmnhwÿ pix ã harê nê mããnên kêp õ pahihti hã harênh kêt nê? ⁴²Na pre Tawi Tirtũm kapêr kwÿ hã kagã nê tanhmã harênh to. Tirtũm mex ã mê grer xãja kwÿ kamã harê nê hã kagã nê hã kagã ho:

Na pre Tirtũm inhõ Pahihti mã ã kapêr anê nê kãm: “E amnê ixwÿr tẽ nê inhĩhkõ hã nhÿ nê inhmã mê ho amnhĩptãr o akrĩ.

⁴³Kot paj mê kot kãm akurê xwÿnh piitã mê unênh pa nê awÿr mẽ o mra nê anhĩhkram mẽ

haxãr pa.” Anhÿr o pre kãm kapêr. Anê.

⁴⁴Na pre ã Tawija Tirtũm kot Kris mã kapêr jarênh anê. Mê kajaja na ka htem ãm kêp Tawi kanrêhã tãmnhwÿ pix ã ri axpên mã harênh o ri apa. No kêt Tawi na pre kêp õ Pahihti hã harênh o pa. Anê.

Jejus kot tanhmã Tirtũm kapêr tũm o mẽ ahkre xwÿnhjê jarênh to

Matêwre 23.1-12; Makre 12.38-40

⁴⁵Nhũm pre ã Jejus mê kãm kapêr anê nhũm mẽ piitã mar o kuhê. Hãmri nhũm hpãnhã hkõt mẽ pa ho mẽ pa xwÿnhjê mã kapêr nê mẽ kãm:

—Kwa mẽ o kora. Kêr ka mẽ Tirtũm kapêr tũm o mẽ ahkre xwÿnhjê kot amnhĩ nhĩpêx o amnhĩ nhĩpêx kêt nê. ãm mẽ omu nê ãm mẽ omu nê mẽ kot amnhĩ nhĩpêx kõt amnhĩ nhĩpêx o ri apa hkêt nê. ⁴⁶Na htem mẽ piitã mẽ kot mẽ hã hpijaãm kaxyw mẽ ê mex pix kãm ri pa. Nê mẽ kãm mẽ piitã mẽ kot amnhĩm mẽ rũnh xwÿnh ã mẽ harênh o mẽ paja na mẽ kãm hprãm. Nê mẽ panhõ Tirtũm kapêr o mẽ ahkre xã hã ixkre kamã mẽ kãm amnhĩ to rũnh xwÿnhjê hkrĩ xã mex pix ã na mẽ kãm mẽ hkrĩ hprãm. Nê mẽmoj tã mẽ hkĩnh ã arĩgro hã nhũm htem mẽ apkur xã hã ixkre hwÿr akuprõ nê mẽ kãm mẽ kot amnhĩ to rũnh xwÿnhjê hkrĩ xã mex pix ã mẽ kãm mẽ hkrĩ hprãm. ã na htem amnhĩ nhĩpêx anhÿr o pa.

⁴⁷—Nê mẽ kêp mẽ mjên htyk xwÿnhjê ho ajuta ho pa hã amnhĩ jarênh tã ãm amnhĩ to hêx nê axtem nê mẽ nokupyr pê mẽ kêp mẽ hikukrêx piitã ho hapêx par o pa. Nê mẽ kêp mẽ òrkwÿ pytà. Nê mẽ hêx rom te tãm mẽ kot amnhĩ nhĩpêx pyrã nê Tirtũm mã amnhĩ jarênh japjêê ho kuhê. Mÿrapê koja mẽ mex kêt nê. Koja Tirtũm tanhmã ja hã mẽ hipêx to rax nê. Jakamã kwa kêr ka mẽ ã mẽ kot

amnhĩ nhĩpêx anhÿr xwÿnhjê hkôt
amnhĩ nhĩpêx o apa hkêt nê. Âm
kwarĩ ho kwarĩ. Anê.

21

*Kêp mjên htyk xwÿnh jarênh
Makre 12.41-44*

¹ Nhũm Jejus kormã Tĩrtũm mã
amnhĩ jarênh xà hã ixkre kamã mẽ
omunh o xa. Na pre hte Ijaew pi-
itã ixkreta ho mex kaxyw kãm mẽ
hikàxpore hkwy nhõr o pa. Jakamã
nhũm mẽ hikàxpore rũnh xwÿnhjaja
hwÿr agjê nê kamã kàxpore gjênh
xà kamã hkwy gjê nê ma akupÿm
mra. ² Jakamã nhũm mẽhõ ni pê
mjên htyk xwÿnh haxwÿja hwÿr
axà. Kêp amrakati kumrêx nê
hikàxpore tÿxre âm axkrut্রে htã mẽ
hpãnhã hwÿr axà. Nê kãm Tĩrtũm
kĩnh xàj hamê kamã kuxà hãmri nê
kato nê ma akupÿm tê. ³⁻⁴ Hãmri
nhũm Jejus arĩ omunh o xa. Kot
ã amnhĩ nhĩpêx anhÿr ã omunh o
xa nhũm ja kãm mex nê. Hãmri nê
hkôt mẽ pa ho pa xwÿnhjê mã harê
nê mẽ kãm:

—E măn ka mênire htêm mũj
pumu. Kêp amrakati nê hikàxpore
âm kêp grire htã amnhĩ pê òr pa.
Kwÿjê rom kãm Tĩrtũm kĩnh xàj
amnhĩ pê òr par kumrêx. Apkur
xà hã hikàxpore na. Mẽ hkwyjaja
na htem hikàxpore hkwy ho mra
nê kugjê nom arĩ mẽ hikàxpore rax.
No nhũm nire nêj mẽ kurom kãm
hikàxpore japê hkêt nê. Nê ho òxÿ
hkêt nê àmnhĩx piitã Tĩrtũm mã òr
pa. Anê.

*Mẽ kot amnhĩ tomnuj xwÿnhjê
hkukamã mẽ harênh*

Matêwre 24.1-2; Makre 13.1-2

⁵ Tã hãmri nhũm Jejus kôt mẽ
pa ho mẽ pa xwÿnhjaja kormã
Tĩrtũm mã amnhĩ jarênh xà hã
ixkre kaxwÿnh pumunh o kuhê
nê axpên mã harê nê axpên mã
harênh o:

—Hêxta waa nê. Ixkreja mex
kumrêx. Kên rũnh o mẽ kot hipêx
jakamã mex o mex. Nê mẽ kot

ri Tĩrtũm mã hkĩnh xà nhõr nêj
haxwÿja piitã mex. Anê.

Hãmri nhũm Jejus mẽ kuma nê
mẽ kãm:

⁶ —Nà mex tã koja nhÿrmã mẽ
kãm Tĩrtũm kurê xwÿnhjaja grành
pa. Koja arĩ kên ò axkrut্রে nê
axpên mÿnh nê nõr kêt nê. Koja
piitã anghrà nê ahpÿnhã ri hikwy.
Anê.

⁷ Nhũm pre ã mẽ kot hipêx
anhÿrja kukamã mẽ kãm mẽ
harênh anê nhũm mẽ tee ri
hkukamã hamaxpêr nê kãm:

—Kwa xà koja mẽ ã hipêx anê?
Kwa mẽ inhmã aprĩ hã mẽ kot
ixkre grành parta jarê. Xà koja mẽ
tokyx ho anê nà xà kormã? Kwa
mêmo koja wÿj ri tanhmã amnhĩ
nhĩpêx to? Anê.

⁸ Hãmri nhũm mẽ kãm:

—Nà nhÿrmã mẽmoj piitã hapêx
kaxyw tanhmã amnhĩ nhĩpêx to
kumrêx kot paj mẽ amã harê ka mẽ
inhma. Koja mẽ ohtõ nê mẽ apê
ixkrajê hwÿr mra nê hêx rom te pa
ixte amnhĩ nhĩpêx pyrak o amnhĩ
nhĩpêx o pa. Nê tanhmã mẽ amã
amnhĩ jarênh to nê amnhĩ jarênh o:
“E mẽ ixpumu. Pa na pre Tĩrtũm
mẽ awÿr inhmê. Ixpê kaxkwa rũm
ixwÿk xwÿnh na pa.” Anhÿr o
mẽ akôt mẽ amã amnhĩ to hêx o
pa. Hãmri nê mẽ amã: “E ot pa ra
mẽ ato amnhĩptar kaxyw mẽ awÿr
wrÿ.” Anhÿr o amnhĩ jarênh o mẽ
akôt pa. Nom kêr ka mẽ âm mẽ ama
nê âm mẽ ama. Âm mẽ kot mẽ amã
amnhĩ to hêx o pa kênã. Kormã
akupÿn ixpôx xà hã arĩgrota kormã.

⁹ —Nê koja mẽ nhÿri awry hã
axpên par o pa. Nê mẽ atãã axpên
par o pa. Nom kêr ka mẽ harênh ma
nê ri tee ri tokyx mẽmoj piitã hapêx
kukamã ajamaxpêr kêt nê. Mẽmoj
piitã hapêx xà hã arĩgrota kormã.

¹⁰ Koja mẽmoj piitã hapêx kaxyw
nhũm ahpÿnhã ri pika piitã
hkôt mẽ pa xwÿnhjaja axpên
kutã amnhĩ xunhwÿ nê pi-
japu nê axpên pa.

11 Nē koja pika piitā hkôt tanhmā ahpÿnhā mē à kute mē hamÿ nhūm mē amnhī xā htÿx kamā hamak o pa.

Nē koja pikaja tertet tÿx nē.

Nē koja mē nhÿri pika hkwy kamā prām xāj hpikaprar pa.

Nē koja kaxkwa kamā mēmoj tanhmā amnhī anhīpêx to nhūm pika nhō xwÿnhjaja tee ri omu nē kām ma htÿx kumrêx nē htertet o kuhê.

Koja mēmoj ā amnhī nhīpêx anē pa rī kormā akupÿn mē awÿr wrÿ nhūm mēmoj piitā hapêx pa. Koja mēmoj ā amnhī nhīpêx anē.

12 —E Tirtūm mā amnhī jarēnh xā hā ixkre grānh par xwÿj ri mēmoj tanhmā hkukamā kot amnhī nhīpêx to hā mē ate ixkukjêr xwÿnhhta kot paj hpānhā mē amā harē ka mē inhma. Koja mē kām ixkurê xwÿnhjaja mē awÿr mra nē ixtā mē apynē nē tanhmā ixtā mē anhīpêx to. Nē ma mē pikuprōnh xā hā ixkreja wÿr mē ato mra nē kamā mē kām tanhmā mē ato kapêr punuj to. Nhūm mē kuma hāmri nē ma mē ato mra nē mē ajagjê. Mē ate ixkôt apa ho apa jakamā koja mē ā mē anhīpêx anē. Nē mē ō pahihiti hwÿr mē ato mra nē mē kām tanhmā mē ato kapêr punuj to. 13 Tā kêr ka mē kutā akrī nē axāmnhīx māmrī tanhmā mē kām ijarēnh to ho akrī.

14 —Nom kwa kêr ka mē kām tanhmā amnhī jarēnh to hkukamā tee ri ajamaxpêr o ri mē amā mē uma hkêt nē. Rÿ mē ajamaxpêr o: “Hêxta waa nē. Tanhmā koja we mē kot ixkukjêr ā arīgrota ā pa we ri mē kām ixkapêr to?” Anhÿr o tee ri amnhī kukamā ajamaxpêr kêt nē. Ām amnhī kaxyw inhmā pix mā ajamaxpêr tÿx rāhā nē. 15 Tanhmā mē kot mē anhīpêx to hā arīgrota ā kot paj tanhmā mē akrā hto ka mē inhÿ hā tanhmā mē kām amnhī jarēnh to. Hāmri nhūm mē amnhī tā mē ama nē axte tanhmā mē ato

kapêr to hkukamā tee ri hamaxpêr o kuhê.

16 —Nē koja mē anhīpêêxā nē mē akatorxā nē mē atō nē mē akrāmnhwÿjaja. Nē kaxyw krī hkôt mē akwÿjaja ixtā mē atā amÿnē nē ma mē ō pahi hwÿr mē ato mra nhūm mē ajagjê nē mē akwÿjê pa. 17 Koja mē piitā ixtā mē akamā gryk nē kām mē akurê nē. 18-19 Nom mē kot ā mē anhīpêx anhÿr mā tā kêr ka mē amnhī to htÿx nē ixkaga hkêt nē. Mē kot mē apar tā ka mē kaxkwa kamā akupÿm atir kurê kumrêx. Hāmri nē ā mē kot mē anhīpêx anhÿr xwÿnhjê rom Tirtūm mē wa ixri atir tūm nē amex rāhā apa ho apa. Mē kot tanhmā mē ato htā mē ate kaxkwa kamā atir tūm nē apa mā xwÿnh jakamā kwa kêr ka mē tee ri amnhī kukamā ajamaxpêr o ri apa hkêt nē.

20 —Koja nhÿrmā nhÿhÿnh pōristi ohtō nē mra nē Jerujarē hwÿr pōj hāmri nē mē kām hipōk pa nē kuhê. Ka mē ja hā mē omu nē mē kot krīja grānh par mā ajamaxpêr kurê kumrêx. 21 Koja mē ā amnhī nhīpêx anē ka mē amÿm amnhī wÿr mē omu hāmri nē ajapōj nē ma aprōt nē amrar kurê kumrêx. Mē apê jar pika pē Jutej kamā mē apa xwÿnhjaja ka mē omu nē mē kot mē apar pymaj ma aprōt nē amrar kurê kumrêx. Hixêt prêk wÿr ajapōj nē aprōt nē ma mra.

—Nē kê Jerujarē nhō xwÿnhjaja mē umaj haxwÿja hapōj nē ma hprōt nē ma mrar o mra.

—Nē jar kapôt ā ri mē pa xwÿnhjaja kê mē akupÿm krī hwÿr gjêx kêt nē. Ām ma mē umaj hprōt nē mrar kurê kumrêx.

22 —Mē kot amnhī tomnuj mÿrapê koja Tirtūm ā mē hwÿr mē kām mē hkurê xwÿnhjê rēnh anē. Kapêr ā kagā htūm ra kot mē hkukamā ja jarēnh kot anhÿr. Jakamā koja mē nhÿrmā mē

hkukamã mẽ harênh xàja kôt ã mẽ hipêx anê.

²³ —No mẽ htujarô xwýnhjaja nê mẽ hkra karàre xwýnhjaja koja mẽ kêp mẽmoj omnuj tỳx nê. Tanhmã kot mẽ amnhĩ to nê hprôt tỳx? Nà pika ja kamã koja mẽ piitã mex kêt nê. Mẽ kot amnhĩ tomnuj mỳrapê koja Tirtũm ã mẽ hipêx anê. ²⁴ Koja mẽ nhỹhỹnh krĩ hõ rũm mẽ hwỳr mra nê mẽ unê nê mẽ hkamnhwỳr o mẽ kupa. Nê mẽ hkwyjê pynê nê ma nhỹhỹm ahpỳnhã mẽ õ pika hwỳr amnhĩ kôt mẽ o pa nhũm mẽ kamã mẽ hkôt pa ho pa. Koja mẽ kêp Ijaew kêt xwýnhjaja Jerujarê o amnhĩptã nê ã mẽ hipêx anê. Nê kamã pa ho pa rãhã nhũm Tirtũm nhỹrmã akupỳm nê mẽ kator pa. Tã koja mẽ nê mẽ kator parja o pa ra akupỳn mẽ awỳr inhnojarê. Anê.

Nhũm pre ã Jejus mẽ kãm mẽ kot Jerujarê grãnh par xwýnhjê hkukamã harênh anê.

Akupỳn Jejus wrỳk xwỳj ri mẽmoj kot tanhmã amnhĩ nhĩpêx to

Matêwre 24.29-35; Makre 13.24-31; mããnên Sikũn Pêtre 3.10; Apokarip 1.7

²⁵ Nhũm Jejus arĩ hkôt mẽ pa ho pa xwýnhjê mã kapêr nê mẽ kãm:

—Nê kot paj nhỹrmã akupỳn mẽ awỳr inhnojarê nhũm kaxkwa kamã kanhêti nê myyti nê mytwrỳre axtem tanhmã ri amnhĩ nhĩpêx to. Nhũm gô xujanãr haxwỳja hkoko htỳx jao axpên tak tỳx nê. Hãmri nhũm pika piitã hkôt mẽ pa xwýnhjaja kuma nê omu nê nê kãm ma htỳx nê mur nê httert nê tee ri amnhĩ kukamã hamaxpêr.

²⁶ —Nê koja Tirtũm tanhmã kaxkwa ho ãk to nhũm kanhêti piitã pikarêr pa. Hãmri nhũm pika hkôt ri mẽ pa xwýnhjaja omu nê tee ri amnhĩ kukamã hamaxpêr o amnhĩ japrãr pa nê hikwỳ. ²⁷⁻²⁸ Koja ã mẽmoj amnhĩ nhĩpêx anê ka mẽ ja hã omu nê akupỳn mẽ awỳr inhnojarê mã ajamaxpêr

kurê kumrêx. Hãmri nê mẽ kot ixkôt amnhĩ xunhwỳr kêt xwýnhjê rom akĩnh kãm ijapêr arĩt o akuhê.

—Nà kot paj akupỳn mẽ awỳr wrỳ. Kakra kamã hirã htỳx kãm akupỳn ixihitỳx kãm mẽ awỳr wrỳ. Hãmri ka mẽ apiitã pika piitã hkôt ano ho ixpumu. Kot paj ã ixwrỳk anê hãmri nê mẽmoj punuj piitã pê mẽ apytãr pa. Jakamã ka mẽ ã mẽmoj kot amnhĩ nhĩpêx anhỹrja ã omu hãmri nê tokyx ixkôt axãpirta mã ajamaxpêr nê akĩnh tỳx nê. Anê.

²⁹ —E ga mẽ pĩ hpàr mũj pumu.

³⁰ Na hte mẽmo mytwrỳ hã rã nhũm mẽ omu nê ò hkukamã hamaxpêr.

³¹ Ja pyrà nê koja ã mẽmoj amnhĩ nhĩpêx par anhỹr mẽ ka mẽ omu nê akupỳn mẽ awỳr ixwrỳkja mã ajamaxpêr kurê kumrêx. ³² Koja akupỳn ixpôx kêt ri mẽ kot ã mẽmoj kot amnhĩ nhĩpêx anhỹr pumunh xwýnhjaja kormã piitã htyk kêt ri pa ra akupỳn wrỳ.

³³ —Nê koja nhỹrmã pika nê kaxkwa wa hapêx pa. Tã no ãm ixkapêr koja wa urãk nê aa hapêx kêt nê. Koja ãm rãhã ho rãhã. Kot paj aa ihkjê ho tanhmã mênh to hkêt nê.

³⁴⁻³⁵ —Nê kwa mẽ o kora. Mẽ axkãm ajamak rom. Mẽ kot ixkôt amnhĩ xunhwỳr kêt xwýnhjaja na htem kãm tanhmã amnhĩ nhĩpêx to hprãm xà hkôt pix mã tanhmã amnhĩ nhĩpêx to ho ri pa. Jao ãm amnhĩ xãpkur xà nê amnhĩ to mex xà nê kãxpore pix kukamã hamaxpêr o pa. Nê htỳx ri tanhmã amnhĩ tomnuj to ho pa. Nê pipãnh kãm tanhmã amnhĩ to ho pa. Tã koja mẽ ã amnhĩ nhĩpêx anhỹr o pa rãhã pa ra mẽ haêr pê akupỳn wrỳ nhũm mẽ tee ri ixpumu nê kãm ma htỳx kumrêx. Te tutre htỳx ri harôj kajyr o pa nê rapuuti hwỳr àr nhũm kot haê nê unênh nhũm tee kãm kator prãm pyràk. Koja mẽ ã amnhĩ nhĩpêx anê. Nom kêr ka mẽ ho mẽ urãk kêt nê. ãm pa inh mã hprãm xà

hkôt pix mã tanhmã inhmã amnhĩ nhĩpêx to rãhã ho ri apa.

³⁶ —Tã kêr ka mẽ ã mẽ kot amnhĩ tomnuj o pa anhỹrja kot amnhĩ nhĩpêx o apa pymaj amnhĩ to Tĩrtũm wỳr rãhã ho apa. Kê tanhmã mẽ ato hihtỳx to ka mẽ ỹ hã ho mẽ uràk kêt nê. Kêr pa nhỹrmã akupỳn wrỳ ka mẽ ixpumu nê mẽ kurom amnhĩ kamã akahak kêt nê akĩnh tỳx nê man ixwỳr mra. Anê.

Nhũm pre ã Jejus hkôt mẽ pa ho mẽ pa xwỳnhjê jahkre anê.

³⁷ Hãmri nê apkati mẽ Tĩrtũm mã amnhĩ jarênh xà hã ixkre kamã mẽ pikuprõnh xwỳnhjê jahkre ho hkrĩ. Nhũm kamàt nhũm hkôt mẽ pa ho mẽ pa xwỳnhjê mẽ mẽ krĩ rũm hapôj nê ma hixêr prêk pê Oriwêhti hwỳr mra nê kamã amnhĩm hikra nê hikwỳ. ³⁸ Nhũm kwỳhtã nhũm mẽ kãnhmã hkrĩ nê ma akupỳm krĩm mra nê ixkreja wỳr agjê. Hãmri nhũm mẽ piitã hã akuprõ nê kot mẽ ahkre hã mar o hkrĩ.

22

Mẽ kot Jejus ã àmnênh ã mẽ harênh

Matêwre 26.14-16; Makre 14.1-2; Juãw 11.47-57

¹ Tã nhũm Ijaew kĩnhã arĩgro pê Pasja àhtêp o mō. Pas ã na htem amnepêr Tĩrtũm kot pika pê Ejit pê mẽ hpãmjê kator mã hamaxpêr kaxyw axpên wỳr akuprõ nê hã hkĩnh. Na htem arĩgroja jarênh o: “Pas” anhỹr ã harê. Nê mãânênh harênh o: “Mẽ pahte pãw kaxkrit kêt kur ã arĩgro.” Anhỹr o harê. ² Jakamã nhũm mẽ õ patre krãhtũmjê mẽ Tĩrtũm kapêr tũm o mẽ ahkre xwỳnhjaja ra kãm Jejus pĩr prãm nê. No mẽ kãm hkôt mẽ kot kapêr mar xwỳnhjê pyma nê. Nê tee ri kot tanhmã ho hkukamã hamaxpêr nê axpên mã:

—Hêxta waa nê. Kwa tanhmã kot puj wem ho nê mẽ kêp kupi? Kot puj mẽ noo mã tanhmã ho

nhũm mẽ hã mẽ pakamã gryk tỳx kumrêx. Anê.

Jut Kariot kot Jejus ã àmnênh ã harênh

Matêwre 26.14-16; Makre 14.10-11; Juãw 13.21-30

³⁻⁴ Tã nhũm Jut Kariotja. Jejus nhỹ hã mẽ ahkre ho pa xwỳnh pê 12 hō na pre. Tã axtem nê tanhmã hamaxpêr to nê Satanasti nhỹ hã ma mẽ õ patre krãhtũm mẽ Tĩrtũm mã amnhĩ jarênh xà hã ixkre jamãr xwỳnh krãhtũmjê hwỳr tẽ. Hãmri nê tanhmã Jejus o mẽ mar to nê mẽ kãm:

—E ot pa mẽ amã Jejus jarênh o tẽ. Xà kot paj mẽ amã hã amỹnê ka mẽ hpãnhã inhmã amnhĩre nà? Anê.

⁵ Hãmri nhũm mẽ kuma nê hkĩnh nê. Hãmri nê kãm:

—Nà kot paj mẽ amã amnhĩre.

⁶ Hãmri nhũm mẽ kot kãm amnhĩrer ã harênh ma nê hkĩnh nê mẽ kãm:

—Tõe. Nà kot paj mẽ amã ho anê. Anê.

Hãmri nê ma tẽ nê kato. Nê Jejus pynênh kaxyw htãnopxar o ri hkôt pa. Mẽ kot mar o pa xwỳnhjê hkàx ã nhỹri unênh nê ma mẽ hwỳr o htêm kaxyw.

Jejus kot ỹ hã mẽ ahkre xwỳnhjê kutã apkur ã harênh

Matêwre 26.17-25; Makre 14.12-21; Juãw 13.21-30

⁷ Tã nhũm Pasja kato. Amnepêr Ijaewjê nhĩgêjtaja na prem ôwêhti hkrare hkwy hpar o pa. Tĩrtũm kot ja hã mẽ omunh nê Ejit kãm mẽ kãm mẽ hkurê xwỳnhjê nhĩhkra nê mẽ kator kaxyw nhũm prem ã amnhĩ nhĩpêx anê. Jakamã na htem arĩ mẽ kêp mẽ hkanrêhã mẽ htãmnhwỳjaja arĩgro pê Pas ã axpên wỳr akuprõ nê mẽ kãm hamaxpêr pê mẽ uràk nê ôwêhti hkrare hkwy hpa. Hãmri nê pãwti kaxkrit kêt kãm kuku. ⁸ Jakamã nhũm Jejus ỹ hã mẽ ahkre ho mẽ pa xwỳnhjê wa ho axkrut nê mẽ amnhĩ kukamã wa kumê. Simãw Pêtre mẽ Juãwja

nhũm wa mẽ amnhĩ kukamã wa kumẽ nẽ wa kãm:

—E wa ma mẽ ixkukamã tẽ nẽ mẽ ixkutêp Pas ã mẽ panhõ hã apê. Anê.

⁹Hãmri nhũm wa kuma hãmri nẽ kãm:

—Tõe. Nhỹri kot paj we wa tẽ nẽ mẽ akutêp hã apê? Anê.

¹⁰Hãmri nhũm wa kãm:

—Nã wa mãmri ma Jerujarẽ hwỳr wa tẽ. Nẽ hwỳr axà nẽ mẽhõ mytita pumunh kurê kumrẽx. Nhũm amnhĩm gô ru nẽ amnhĩ kre hã poti xãm nẽ o tẽ. Ka wa omu nẽ hã ajêt nẽ ma hkôt ôrkwỹ hwỳr tẽ.

¹¹Hãmri nẽ ixkre nhõ dôn pumu nẽ kãm: “E jar na pa wa awỳr tẽ. Jejus na wa inhmẽ pa wa awỳr tẽ. Na awỳr pẽr mẽnh o: ‘Nhỹri kot paj ixkôt ri mẽ pa ho mẽ pa xwỳnhjẽ mẽ axpẽn kutã Pas ã apku?” Anê. Na ã awỳr hpẽr mẽnh anê.” Anê.

¹²—E ã kãm akapêr anê kê war ama nẽ ra war amã ôrkwỹ nhĩmõk ã ixkre rax ô jahkre. Kamã ra kaxyw mẽ paxàpkur xà hã mẽmoj piitãã. Ka wa omu hãmri nẽ mãmri mẽ ixkutêp kamã mẽmoj tã apê. Anê.

¹³Hãmri nhũm wa kuma nẽ ma krĩm tẽ. Ma tẽ nẽ hwỳr axà hãmri nẽ ra kot wa kãm mẽmoj jarẽnh xà hkôt mẽmoj piitã omu hãmri nẽ mẽ kutêp mẽõ hã àpẽn h o wa xa.

¹⁴Tã nhũm myt axà nhũm mẽ wa hkôt mõ nẽ ixkreta wỳr àpir pa. Hãmri nẽ apkur kaxyw hkrĩ hpa nhũm Jejus mẽ ìhkõ hã nhỹ.

¹⁵Hãmri nẽ mẽ kãm tanhmã amnhĩ jarẽnh to nẽ mẽ kãm:

—E na pa inhmã Pas ã mẽ anhĩhkõ hã ixàpkur prãm nẽ. Kormã ixte amnhĩ xà htỳx kãm ijamak xwỳj ri. ¹⁶Kwa mẽ inhma. Kot paj axte mẽ akutã Pas ã ixàpkur kêt ry rax nẽ. Nom koja nhỹrmã Tĩrtũm akupỳn ixte mẽ ato amnhĩptar kaxyw inhmẽ hãmri pu mẽ rĩ kormã axte arĩgro mex maatija ã pahkĩnh kãm axpẽn kutã paxàpkur rax nẽ. Anê.

¹⁷Nhũm ã mẽ kãm amnhĩ jarẽnh anẽ nẽ hpãnhã wĩhti py nẽ o xa nẽ Tĩrtũm mã harẽ nẽ kãm:

—Pa Papaj. Nã ãm hãmri na ka hte mẽ inhnẽ mẽ kãm mẽ ixkurê xwỳnhjẽ pumunh mex nẽ mẽ ìhkra pẽ mẽ ijapõj. Amex o amex. Anê.

Hãmri nẽ hpãnhã hkôt mẽ pa ho mẽ pa xwỳnhjẽ hõ mã kugõ nẽ kãm:

—E mĩ. Apy nẽ mẽ axpẽn pãnhã hkwỳ ho ixkõ. ¹⁸ãm hãmri na pa mẽ amã amnhĩ jarẽ. Kot paj axte wĩhti ho ixkõm kêt rãhã nhũm nhỹrmã Inhõ Papaj akupỳn mẽ awỳr inhmẽ. Hãmri pu mẽ rĩ kormã akupỳn ixpõx xà hã arĩgrota ã pahkĩnh rax nẽ. No ãm ra axtem tanhmã hã mẽ pahkĩnh to. Anê.

¹⁹Hãmri nẽ hpãnhã pãwti py nẽ mã ho anẽ nẽ Tĩrtũm mã harẽ. Hãmri nẽ ho hkry hpa nẽ mẽ piitã mẽ kãm ôr pa nẽ mẽ kãm:

—E na pa ã pãwti ho hkry nẽ mẽ amã ôr anẽ. Koja mẽ ã inhĩpêx anẽ nẽ te mẽ kot ixto hkry hpar pyrãk o inhĩpêx pa amnhĩ xà htỳx kamã ijamak kãm ty. Nom mẽ anê kot paj ty. Jakamã kër ka mẽ ixwakre kamã tõhã axpẽn wỳr akuprõ nẽ ixte mẽ ate amnhĩ tomnuj pãnhã amnhĩrer kaxyw mẽ anê ixtykja mã ajamaxpêr pẽ akĩnh nẽ pãwti hkur o akrĩ. E mẽ mãmri axãmnhĩx aku. Anê.

Nhũm pre ã mẽ kãm amnhĩ jarẽnh anẽ nhũm mẽ mar pẽ pãwtita hkur o hkrĩ. ²⁰Hãmri nẽ ra hkur pa. Hãmri nhũm Jejus axte kopta py nẽ mẽ kãm:

—Mẽ kot ixpĩr xà hã arĩgro hã koja ixkamrõ axkapĩ. Nom koja mẽ amarĩ ixpĩr nhũm ixkamrõ amarĩ hpikapĩr kêt nẽ. ãm paa. Pa kot paj mẽ anê mẽ ìhkram amnhĩ jaxà nhũm mẽ ã inhĩpêx anẽ. Koja ixkamrõ axkapĩ nhũm Tĩrtũm omu nẽ ixkukwak ri mẽ anê mẽ ate amnhĩ tomnuj piitã te amnhĩ katut kôt rẽn h par pyrãk o hipêx nẽ mẽ ato hkra. Amnepêm kot ja hã amnhĩ jarẽnh xà hkôt. Jakamã e mẽ

ixkamrô pikapîrta mã ajamaxpêr pê wîhti hkwy ho ixkô. Anê.

Jejus ã mẽ kãm àmnênh xwýnh jarênh

Matêwre 26.21-25; Makre 14.18-21; Juãw 13.18-19

²¹ Nhũm Jejus arĩ mẽ kãm kapêr nê mẽ kãm:

—Nê kot mẽ kãm ixtã àmnênh mã xwýnhhta na jar mẽ pahkaêx ã mẽ pakutã apkur o nhỹ. ²² Tirtũm kãm hprãm xã hkôt koja mẽ tanhmã ixto rax nê xipĩ. Nom kot mẽ kãm ixtã àmnênh mã xwýnhhta hêxta waa nê. ã kot inhĩpêx anhỹrja mýrapê koja amnhĩ xã htỹx kãm hamak rax kumrêx. Anê.

²³ Nhũm pre ã Jejus mẽ kãm amnhĩ jarênh anê. Nhũm mẽ kuma nê tee ri xapên pumunh o hkrĩ. Hãmri nê ri xapên kukja nê xapên mã:

—Kwa nã mẽ pahtô kot pu we ã ri hipêx anê? Nã pa hkêt.

Anhỹr o tee ri xapên kukjêr o hkrĩ.

Mẽ pamã amnhĩ to rũnh prãm kêt ã mẽ pamã karô

Matêwre 20.20-28; Makre 10.35-45; mãânên Rômãn 12.3-5, 12.10, 12.16; Epes 4.2-4; Piripos 2.3-8; Xiakre 4.1-10; Wam Pêtre 5.3

²⁴ Tã nhũm Jejus nhỹ hã mẽ ahkre ho mẽ pa xwýnhjaja xapên mã tanhmã kapêr to ho hkrĩ nê xapên mã:

—Kwa mẽ pahtô kot puj wem nhỹrmã pahpê pahi nê mẽ ho amnhĩptãr rax o ri papa? Anê.

Hãmri nê mẽ xapên mã: “Nã pa.” Anê nê nhãnh xapên mã: “Nã kêt paa.” Anê. Hãmri nhũm mẽ nêtãnh xapên mã: “Nã kêt pa kênã.”

²⁵ Anhỹr o xapên mã kapêr o hkrĩ. Hãmri nhũm Jejus tee ri xapên tã mẽ kuma nhũm mẽ ã hamaxpêr anhỹrja kêp omnuj nê nhũm mẽ kãm tanhmã hã kapêr to nê mẽ kãm:

—E mẽ inhma. Na hte Ijaew kêt xwýnhjê nhõ pahijaja ã amnhĩ

nhĩpêx anhỹr o ri pa nê amarĩ hkrĩ xã kamã hkrĩ ho hkrĩ. àhpumunh tỹx jakamã na htem amarĩ ixkre hkre jakry kamã kãm mẽ àpênh xwýnhjê mã mẽmo mẽ àpênh ã karô ho hkrĩ. Na htem ã amnhĩ nhĩpêx anhỹr o pa. Nê mẽ kot amnhĩm mex ã harênh kaxyw tanhmã mẽ ho mex to ho pa. ²⁶⁻²⁷ Tã kêr ka mẽ ho mẽ urak kêt nê. Kêt ãm te amarĩ ri mẽ apa xwýnh pyrãk o xapên nhĩpêx. Ixpyrà nê amarĩ mẽmoj to mẽ kutã anojarêt rãhã ho ri apa. No mẽ ate mẽ ho amnhĩptãr rax kukamã ajamaxpêr kêt nê. ²⁸ Na prem xapên mã ixto hêx nê tanhmã ixto kapêr punuj to htã ka mẽ ama nê ãm mẽ ama nê arĩ ixkôt ri apa rãhã nê. ãm hãmri na ka htem arĩ ixkôt ri apa anê. ²⁹⁻³⁰ Kot paj amnhĩ tã mẽ ato mex rax nê. Na pre ra Tirtũm nhỹrmã ixte mẽ ato amnhĩptãr o ixkrĩ kaxyw ixãm. Tã ot pa amnhĩ pyrã nê mẽ pahkwỹ Ijaew kaxyw mẽ axunhwỹ ka mẽ nhỹrmã mẽ piitã mẽ ho amnhĩptãr o apa. Nê mẽ apê ixkrãmnhwỹ hã nhỹrmã ixkutã axãpkur o apa. Anê.

Jejus kot Simãw Pêtre mã kapêr ã harênh

Matêwre 26.31-35; Makre 14.27-31; Juãw 13.36-38

³¹ Tã nhũm Jejus Simãw Pêtre mã kapêr nê kãm:

—Kwa Simãw. Na Satanasti kãm hprĩ hã ixtã mẽ apiitã mẽ kamã hamak prãm nê. Tanhmã kot mẽ akrã hto nhũm mẽ ate mẽ kãm ixkurê xwýnhjê pumaj ixkaga hã kãm mẽ akamã hamak prãm tỹx nê. Jakamã ã kot mẽ anhĩpêx anhỹr kaxyw na pre ra amnhĩ to Inhõ Papaj ma nhũm kãm: “Tõe. Kam nê mãmri tanhmã mẽ kamã ajamak to.” Anê.

³² —Tã ate mẽ umaj ixkaga nê axte ate amnhĩ kaxyw inhmã ajamaxpêr kêt pymaj na pa ra ato Inhõ Papaj wýr kãm ixihitỹx nê Simãw Pêtre. Jakamã kêr ka mẽmo arĩgro hã tee ri ixkaga hã amnhĩ

pumu hāmri nē tokyx tām akupým ixkôt amnhĩ xām tỳx nē. Kêr kê nhỹrmã akwýjê hõ tanhmã amnhĩ tomnuj to nē tee ri amnhĩ kukamã hamaxpêr ka ja hã omu hāmri nē kãm ate tanhmã amnhĩ tomnuj tota jarê. Kê mê ã ate amnhĩ nhĩpêx anhỹr ã ajarênh ma nē apyrã nē tokyx akupým tām ixkôt amnhĩ xām tỳx kurê kumrêx. E kêr ka ã akupým ixkôt mê piitã mê hipêx anhỹr o ri apa Simãw Pêtre. Anê.

Nhũm pre ã Simãw Pêtre kot tanhmã amnhĩ nhĩpêx to hkukamã kãm ujarênh anê. ³³ Hāmri nhũm tee ri amnhĩ tã kuma nē kãm:

—Kwa nã Pahihti. Kot paj ri akwým tanhmã amnhĩ tomnuj to hkêt nē. Koja mê te ajaxã nē apĩ htã kot paj arĩ akôt ri ixpa ho ixpa nhũm mê pahto amỹrã nē tanhmã pahto. Anê.

³⁴ Hāmri nhũm kuma nē kãm:

—Nã koja apkati hkôt krãhyre hkâr kêr ri ka ra mê umaj ate ixkôt apa hkêt ã mê kãm amnhĩ tã axàprãr o axkrunêpxi kãm ga. Anê.

Jejus kot hkwyjê mã mẽmoj tã karõ

Matêwre 10.5-15; Rukre 9.1-3

³⁵ Hāmri nhũm Jejus arĩ hkôt mê pa ho pa xwýnhjê mã kapêr nē mê kãm:

—E wam ixte mê hwýr mê arênhã ã na ka prem amnhĩ kôt aparkã hkwy ho apa hkêt nē. Nê kawã jamãnh nê ho apa hkêt nē. Nê mrykã jamãnh nê amnhĩ kôt ho apa hkêt nē. ãm mê anhỹ kamã mê hwýr apa hã na pa pre mê amã karõ. Tã xãn ka prem ã mê hwýr apa anê nhũm mê amnhĩ wýr awýr kêt nê? Nã xã na prem amnhĩ wýr mê awý? Anê.

Hāmri nhũm mê kãm:

—Tý na prem amnhĩ wýr mê ixwý. Mê ixte amnhĩ kôt mẽmoj to ixpa hkêt tã na pa prem amarĩ mẽ kutã ixãpkur mex o ri mẽ hkôt ixpa. Anê.

³⁶⁻³⁷ Hāmri nhũm mê kãm:

—Tôe. Nã mê kot mê ato mex tã nom koja mê hpãnhã axtem hõ ho mê anhĩpêx. Jakamã kêr ka mê akupým mê kãm ijarênh o apa kaxyw anojarêt hāmri nê anhõ mrykã rý akawã htu nê ma amnhĩ kôt ho apa. Nê awapo. Kot kaj mê awapo hkêt japêr hāmri nê apipro xã ho wênê nê amnhĩm hõ japrõ nê ma amnhĩ kôt ho apa. E kêr ka mê ã amnhĩ nhĩpêx anê.

—Nê Tĩrtũm kapêr ã kagã htũm kot ra ixkukamã tanhmã ijarênh to nê kot ijarênh kot:

Koja mê hipêx o te mê kot amnhĩ tomnuj tỳx xwýnh nhĩpêx pyrãk. Anê.

ã mê kot inhĩpêx anhỹr kukamã ijarênh kot anhỹr. Tã na mê ra ã inhĩpêx anhỹr kaxyw. Anê.

³⁸ Nhũm pre ã Jejus mê kãm kapêr anê nhũm mê kuma nē kãm:

—Ota mê panhõ wapohti hamêxkrut Pahihti. Anê.

Hāmri nhũm mê kãm:

—Tôe. Nã hāmri. Mê amnhĩm axi nê ho amnhĩm mẽmoj to anê. Anê.

Jejus kot Tĩrtũm mã amnhĩ jarênh Matêwre 26.36-46; Makre 14.32-42

³⁹ Tã nhũm Jejus kê axte krĩja rũm kato nê hixêt pê Oriwêhti hwýr tẽ nê api nhũm hkôt mê pa ho mê pa xwýnhjaja ma hkôt mra. ⁴⁰ Hāmri nê nhỹri hixêt kahti ri hkrĩ nhũm Jejus mê kãm:

—E kwa kêr ka mê ixkutêp amnhĩ to Inhõ Papaj wýr o akrĩ. Kê mê ixkôt tanhmã mê ato htã ka mê amã mê uma xãj ixkaga hkêt nê. Arĩ mẽ kutã amnhĩ to htỳx nê akuhê. Anê.

⁴¹ Hāmri nê mẽ kurũm htêm griere nê Tĩrtũm mã amnhĩ jarênh kaxyw hkõn krã ho tẽm nê nhỹ. ⁴² Hāmri nê kãm:

—Kwa Papaj. Nã na pa ra amnhĩ xã htỳx kukamã ijamaxpêr nê amnhĩ kamã ixkahak tỳx kumrêx. Inhmã amnhĩ xã kamã ijamak prãm kêt o ijamak prãm kêt. Jakamã kot kaj amã inhnê

ho ajapêx prām nê māmri inhnê ho ajapêx nhũm mē kām ixkurê xwýnhja tanhmã ixto hkêt nê. Rý ko. Kot kaj amã mē kot tanhmã ixto hprãm hã kê mē māmri tanhmã inhîpêx to. Nom pam inhmã hprãm xà hkôt kêt. Anê.

Nhũm pre ã Jejus amnhî to Hipêêxã Tirtũm wýr anê. ⁴³ Hãmri nhũm kuma nê hwýr kapêr o wrýk xwýnhja mē nhũm hwýr wrý nê kuri xa. Hãmri nê òxàhkre kaxwýnh kãm tanhmã ho hihtýx to. ⁴⁴ Nhũm kê axte amnhî to Hipêêxã hwýr kãm hihtýx nê. Tee ri amnhî kukamã hamaxpêr pê amnhî kamã kahak týx kumrêx. Jao hã gô rax nê te hkamrô xàhàr pyræk o pikap ahà. ⁴⁵ Hãmri nê kànhmã xa nê akupým hkôt mē pa ho mē pa xwýnhjê hwýr tē nê mē omu nhũm mē ra ôt pa nê hikwý. Mē kot tee ri Jejus kot mē kãm amnhî jarênhja kukamã hamaxpêr o hkaprî nê ôt pa nê hikwý. ⁴⁶ Hãmri nhũm Jejus tē nê tee ri mē omu nê mē kumra nê mē kãm:

—Kwa nà. Mē ri ã amnhî nhîpêx anhýr kêt nê. Kwa mē kànhmã akrî nê amnhî to Inhõ Papaj wý kê mē ato mē axihtýx. Hãmri nhũm mē tanhmã ixkôt mē ato ka mē inhý hã mē kutã amnhî to htýx nê akuhê. Anê.

*Mē kot Jejus pynênh ã mē harênh
Matêwre 26.47-56; Makre 14.43-50; Juãw 18.1-11*

⁴⁷ Nhũm pre ã Jejus mē kãm kapêr anhýr rôm nhũm hkôt pa ho pa xwýnh pê Jut Kariotja amnhî kôt mē kot Jejus pynênh xwýnhjê ho tē. Mē ho htêm rax nê. Hãmri nê kot Jejus kahti hkôt mýnh kaxyw hwýr tē ⁴⁸ nhũm amnhî tã omu nê kãm:

—Kwa Jut. Xà mē kahti hkôt mē hamýnh nê mē hpâr o na htem mē kãm mē hã amýnê? Anê.

⁴⁹ Hãmri nhũm hkôt mē pa ho mē pa xwýnhjê hõja tee ri mē kot amnhî nhîpêx ã mē omu hãmri

mē ò wapota mã hamaxpêr kurê kumrêx nê Jejus mã:

—Kwa Pahihti. Xà kot paj mē panhõ wapohti py nê ho mē panê mē hkwy hpa? Anê.

⁵⁰ Hãmri nhũm hõta kuma nê mē kaxyw ja kapa. Nhũm mē ò patre maati mã àpênh xwýnhja mē hkôt tē nhũm omu nê kãm wapo ho apê. Nê kot ho hkrã nhîpônã mã tã kuhpaw nê ho upòk rũm hamak nhîkjê pix krãhta. ⁵¹ Hãmri nhũm Jejus omu nê nê kãm kapêr nê kãm:

—Kwa nà ri ã amnhî nhîpêx anhýr kêt nê. Amarî xa. Anê.

Hãmri nê hamakja py nê akupým kãm hamak ã kuxi nê ho mex. ⁵²⁻⁵³ Hãmri nê mē kot unênh mã xwýnhjê mã tanhmã kapêr to. Mē ò patre krãhtũmjê mē Tirtũm mã amnhî jarênh xà hã ixkre jamãr xwýnhjê krãhtũm mē Ijaew nhõ pahijê mē nhũm mē ho pimràatã mē kãm kapêr nê mē kãm:

—Kwa na pa pre apkati mē Tirtũm nhõrkwy kamã mē kãm ixkapêr o ixpa ka prem tokyx ixpynênh kêt tã jarãhã te ixte amnhî tomnuj xwýnh pyræk o inhîpêx nê ixwýr wapo nê kô hã akapên nê ixwýr ã atêm rax anê. No ãm ra mē ate tanhmã ixto kaxyw arîgro kator kênã. Jakamã kot kaj mē māmri tanhmã amã ixto hprãm xà hkôt māmri tanhmã ixto. Satanasti nhý hã ã mē ate inhîpêx anhýr mã kênã. Anê.

Simãw Pêtre kot Jejus kôt pa hkêt ã kot amnhî jarênh

Matêwre 26.69-75; Makre 14.66-72; Juãw 18.15-18, 18.25-27

⁵⁴ Tã nhũm mē Jejus pynê nê ma o tē. Ma mē ò patre maati nhõrkwy hwýr o tē. Nhũm Simãw Pêtre ma hapu hã mē hkôt hã mē omunh o tē. ⁵⁵ Nhũm mē patre maati nhõrkwy hwýr Jejus o axà nê hkôt gjêx pa hãmri nhũm Simãw Pêtre kîtare hwýr axà nê mē kuri xa. Nhũm mē kîtare kamã amnhîm kuto nê hã ànhunh o hkrî nhũm

⁵⁶ mē ihkô hã ànhunh o nhỹ. Hãmri nhũm mē kãm àpênh xwýnh niti hirã kamã hprĩ hã omunh kurê kumrêx nē mē kãm:

—Xê pēr myti ja kêp Jejus kôt mē pa ho mē pa xwýnhjê hõ na. Anê.

⁵⁷ Hãmri nhũm tee ri amnhĩ tã kuma nē kãm mē uma nē mē kãm amnhĩ tã aprã nē kãm:

—Tk. Kokỹ. Ixte mēhõ my ata pumunhre hã. Anê.

⁵⁸ Tã nhũm hpãnhã mēhõ myja kãm:

—Kwa nà. ãm hãmri na ajarê. Apê Jejus kôt ri mē pa xwýnhjê hõ na ka.

Anê nhũm kuma nē kê axte kãm: —Kwa mē ri ã amnhĩ krã hkôt ri ixto axêx anhỹr kêt nē. ãm ixte aa mēhõta pumunh kêt kumrêx. Anê.

⁵⁹ Tã nhũm ja haxwýja axte omu nē kãm:

—Kwa ãm hãmri na mē ajarê. Apê Jejus kwý hõ na ka. Uràk nē te apê Garirej nhõ xwýnh pyràk kênã. Anê.

⁶⁰ Hãmri nhũm tee ri kuma nē mē kãm amnhĩ tã aprãr kãm hihtýx nē mē kãm:

—Tk. Ixpê Garirej nhõ xwýnh kêt. ãm ixte mēhõ mũj pumunh kêt kumrêx tã ka mē ãm xatã hkôt ixpa ho ixpa xwýnh ã ixkamnhĩx o akuhê.

Anhỹrja o ra mē kãm amnhĩ tã aprãr o axkrunêpxi mē nhũm krãhyre kã. ⁶¹ Hãmri nhũm Jejus arĩ ixkre kamã ãm tã Simãw Pêtre ho hakêx nē omu. Hãmri nhũm amnhĩ tã no pumu nē kot hkukamã kãm ã amnhĩ nhĩpêx anhỹr jarênhja mã hamaxpêr kurê kumrêx. Krãhyre hkàr kêt ri kot mē kãm amnhĩ tã aprãr o axkrunêpxi hã harênhja mã hamaxpêr nē kãnhmã hakry hpar o tē nē hkaprĩ htýx nē. ⁶² Hãmri nē hkaprĩ xaj kítare pē kato nē tē nē awry hã xa nē mýr rax kumrêx.

Mē kot Jejus tak ã mē harênh

Matêwre 26.67-68; Makre 14.65

⁶³ Hãmri nhũm mē kot Jejus pumunh o kuhê xwýnhjaja hã hpêr

o axkê nē htak o kuhê. ⁶⁴ Nē no hpro nē htak nē kãm:

—E atak xwýnh nhĩxi jarê. Apê Tirtũm Kra hã ate amnhĩ jarênh jakamã mãn uràk nē axàhpumunh týt. Jakamã e hixi jarê. Anê.

⁶⁵ Hãmri nē xatã hapry nē kãm kapêr punuj nē.

Mē kot mē hkrãhtũm wýr Jejus o htēm ã mē harênh

Matêwre 26.57-68; Makre 14.53-65; Juãw 18.19-24

⁶⁶ Tã nhũm myt kator o mōr mē nhũm Ijaew nhõ pahijê mē patre krãhtũmjê mē Tirtũm kapêr tũm o mē ahkre xwýnhjaja axpên wýr pikuprõnh pa. Hãmri nhũm mē ma mē hwýr Jejus o tē. ⁶⁷⁻⁶⁸ Nhũm mē omu nē tanhmã kot amnhĩ jarênh to hã hkukja nē kãm:

—Kwa mē inhmã amnhĩ jarê. Xà ka na apê Tirtũm kot mē ixkaxyw axãm xwýnhnta? Xà ka kot kaj Rõm nhõ xwýnhjê pē mē ixpytã nē mē ixto amnhĩptàr o apa? Anê.

Hãmri nhũm mē kãm:

—Nà kot paj tanhmã mē amã amnhĩ jarênh to ka mē ixkôt ajamaxpêr kêt nē. Ixte ãm hãmri mē amã amnhĩ jarênh tã ka mē inhma nē ãm inhma. Nē kot pa amnhĩ xwar mēmoj tã mē akukja ka mē amnhĩ xwar inhmã tanhmã harênh to hkêt nē. ãm mē axêx rom mē ate ã ixkukjêr anhỹr kênã. ⁶⁹ Tã nom kot paj tokyx ma akupým Inhĩpêxã Tirtũm wýr api. Hihtýx o hihtýx rãhã nē pa ho pa xwýnh na. Jakamã kot paj hwýr api nhũm amnhĩ nhĩhkô hã inhỹr pa upòk rũm mē apiitã mē ato amnhĩptàr o ixkrĩ. Hãmri nē nhỹrmã paa tanhmã mē ajarênh to. Anê.

⁷⁰ Hãmri nhũm mē tee ri kot ã amnhĩ jarênh anhỹrja ma nē kãm:

—Tk. Kwa akatàt kôt mē inhmã amnhĩ jarê nã. Xà apê Tirtũm Kra na ka? Anê.

Hãmri nhũm mē kãm:

—Tý ixpê Kra na pa. Anê.

71 Hāmri nhūm mē tee ri ā amnhī jarēnh anhÿrja ā kuma nē xypēn mā:

—Kwa mo kaxyw kot puj mē axte mē hkwÿjē japēr nhūm mē tanhmā kot amnhī tomnuj to hā harē? Tām kēp Tirtūm Kra hā amnhī to hēx nhūm mē pahte pahÿitā mar kēnā. E kwa tokyx pu mē ma Rōm nhō pahÿhti hwÿr o tē kē mē pamā hā amÿnē nē mē pamā kupī. Anē.

23

Mē kot pahi Pirat wÿr Jejus o htēm ā mē harēnh

Matēwre 27.1-2, 27.11-26; Makre 15.1-5; Juāw 18.28-38

¹ Tā nhūm mē Jejus o kato nē nhām Pahihti Pirat wÿr o tē. ² Hāmri nē kutā ām nē tanhmā kām ho hēx to nē kām:

—E ot pa mē awÿr jahti ho tē. Na hte mē inhmā hēx rūnh o pa. Mē ixte Pahihti Sesti kapēr kwÿm ri amnhī nhÿpēx prām xāj tanhmā mē inhmā mēmoj tā karō hto ho pa. Nē axtem nē mē ixte Sesti mā kàxpore hkwÿ nhōr kēt ā mē inhmā karō. Nē Tirtūm kot mē pakaxyw kēp mē panhō pahi hā ām xwÿnh ā amnhī jarē. Ā na hte mē inhmā amnhī to hēx anhÿr o pa. Anē.

³ Hāmri nhūm Pirat mē kuma nē Jejus pumu nē kām:

—E kwa inhmā amnhī jarē. Xà apē Ijaew nhō pahi na ka? Xà ka na htem amnhī wÿr akām hamak o pa? Anē.

Hāmri nhūm kām:

—Nā ām hāmri na ka ā ijarēnh anē. Anē.

⁴ Hāmri nhūm Pirat tanhmā hkukjēr to nē tee ri kot amnhī jarēnh ā kuma hāmri nē patre krāhtūmjē mā kām:

—Kwa mēmo mÿrapē kot pa tanhmā mē amā hā ixāmnēnh to? Kot tanhmā amnhī tomnuj tore hā. Nā kot pa kām inhÿre. Anē.

⁵ Hāmri nhūm mē tee ri kuma nē kot mē kām hā āmnēnh prām xāj hā kām kapēr kām hihtÿx nē. Nē kām:

—Kwa nà. Na pre hte pika pé Jutej kamā tanhmā mē kām hēx to ho pa. Hāmri nhūm mē ra hā xypēn kutā amnhī xunhwÿr nē hā pijapu rūnh o pa. Tā mēānēn Garirej kamā ā amnhī nhÿpēx anhÿr o hkrax nē hpānhā amnē mē pahwÿr ā amnhī nhÿpēx anhÿr kaxyw mōr anē. Anē.

Mē kot Eroxo wÿr Jejus o htēm ā mē harēnh

Rukre 9.7-9

⁶ Hāmri nhūm Pahi Pirat mē kuma nē mē kām:

—Kwa xà kēp Garirej nhō xwÿnh na? Anē.

Hāmri nhūm mē kām:

—Tÿ. Kēp Garirej nhō xwÿnh kēnā.

⁷ Anē nhūm mē kām:

—Tō mē ma pahihti Eroxo āxipas wÿr mām o tē. Kēp Garirej nhō xwÿnhjē nhō pahi na. Tā ra jar Jerujarē kamā ham pōj. No axtem ixpē Jutej kamā mē pa xwÿnhjē nhō pahi jakamā kwa mē ma ō pahita wÿr mām o tē kē tām tanhmā mē amā ho. Anē.

⁸ Hāmri nhūm mē kuma nē ma pahi Eroxo āxipas wÿr o tē. Na pre ra Eroxo āxipasja xatā Jejus jarēnh ma nē kām omunh prām nē. Kām aa kot mēmoj pumunh kēt ō ho anhÿr ā omunh prām tÿx jakamā nhūm mē ma hwÿr o tē nhūm omu nē hkÿnh nē. ⁹ Hāmri nē tee ri mēmoj tā hkukja no nhūm akryk xa nē tanhmā kām nē hkēt nē. ¹⁰ Hāmri nhūm mē ō patre krāhtūmjē mē Tirtūm kapēr tūm o mē ahkre xwÿnhjaja kām ho kapēr punuj nē ho hēx kām hihtÿx nē.

¹¹ Hāmri nhūm pahi Eroxo āxipas mē kuma hāmri nē ō pōristi mē wa kām kapēr punuj nē hā hpēr o axkē nē tanhmā ri haprÿ to. Hāmri nē hā hpēr o pikēnh kām kēp pahi hā mē ê mexja py nē kām haxà nē akupÿm pahi Pirat wÿr kumē.

¹² Na pre Pahi Pirat mē Pahi Eroxo āxipasja wa kām axpēn kÿnh kēt nē. Tā hāmri nhūm Eroxo āxipasja tee ri Jejus kot kām tanhmā amnhī jarēnh

to hã mar prãm xàj tee ri hkukamã hamaxpêr hãmri nê Pirat ã hpijaam kaxyw akupÿm hwÿr kumê. Hãmri nhũm amnhĩ tâ omu hãmri nê wa ra akupÿm kãm axpên kĩnh nê. Nê akupÿm axpên mã hpêr o axkê nê pikunhar o pa pê akupÿm axpên to hkrãmnhwÿ.

Pirat kot Jejus pÿr ã àmnênh

Matêwre 27.15-26; Makre 15.6-15; Juãw 18.39-19.16; mãânên Atre 3.13-14

¹³ Tã nhũm Pirat akupÿm amnhĩ wÿr mē hã karō. Ijaew kwÿjaja nē mē ō pahijaja nē mē ō patre krãhtũmjaja nhũm akupÿm amnhĩ wÿr mē piitã mē hã karō. ¹⁴ Hãmri nhũm mē akupÿm hwÿr gjêx pa nê kuhê nhũm mē kãm:

—E na ka mē ixwÿr mytita o tē nē tanhmã inhmã harēnh to. Kot mē akwÿjê mã tanhmã hêx to ho pa hã harē. Tã pa ra jar mē anoo mã tanhmã hkukjêr to nē tee ri kot inhmã tanhmã amnhĩ jarēnh to hã kuma. Te kot amnhĩ to mex xwÿnh pyrãk. Mē ate tanhmã ho akapêr to htã nom kot anhÿr kêt. Kot amnhĩ to mex xwÿnh na. ¹⁵ Pahi Eroxja ra ixpyrà nē tee ri tanhmã hkukjêr to nom nhũm tanhmã kãm nē hkêt nê. Nhũm tee ri ja hã omu nê akupÿn ixwÿr kumê. Jakamã kwa mēmo mÿrapê kot paj mē amã hã amÿnê nhũm mē amã kupĩ? Tanhmã kot amnhĩ tomnuj tore hã. ¹⁶ Kot paj ãm mē kãm anê kê mē htak nê kãm ure kê mãmri ma tē. Anê.

¹⁷ Arĩgro pê Pas ã na pre hte mē ō pahi mē kot mē ho prês nhũm mē hkrĩ xwÿnhjaja nhũm pre htem mē ho hpÿnh nē mē kãm ure. Jakamã na pre ã mē kãm kapêr anê nē kot Jejus tak nê kãm urer mã. ¹⁸⁻¹⁹ Nom nhũm mē kuma nhũm ja mē kêp omnuj nē nhũm mē kãm:

—Kwa nã. Apĩ ri. Apĩ nē mē inhmã Parapas mã mãn anhũre. Anê.

Parapas na pre mē ō krĩ kamã ō pôristi mē pahi Piratja mē kutã amnhĩ xãm nē kêp ō pôristi hõxpĩ.

Mÿrapê na prem ra haxã nhũm hkrĩ ho hkrĩ. Jakamã nhũm mē Pirat kot kãm urer kaxyw ã kãm kapêr anê. ²⁰ Nom nhũm kãm Jejus mã urer prãm jakamã axte hã mē hkukja nē mē kãm:

—Kwa nom mēmoj mÿrapê kot paj mē kãm hã amÿnê nhũm mē amã kupĩ?

²¹ Anhÿr tâ nhũm mē kuma nē ãm kuma. Nê xatã kãm:

—Kwa tokyx pĩ kahpa hã anhô kê ty. Anê.

²² Hãmri nhũm tee ri mē kuma nē mē kãm:

—Tk. Kwa nã. Tanhmã kot amnhĩ tomnuj tore hã kot pa kêt hã kunhō nhũm ty. Nã kot paj ãm mē kãm anê kê mē htak nê kãm ure kê ma tē. Anê.

²³ Hãmri nhũm mē xatã hã kãm kapêr kãm hihtÿx nê kãm:

—Kwa nã. Pĩ kahpa hã mãn anhô kê ty.

Anhÿr o ãm xatã kàx pê àmra kamã kãm hã amÿnê. ²⁴ Hãmri nhũm Pirat tee ri mē kuma hãmri nê tâ mē kãm hprãm xã hkôt mē kãm ã amÿnê. ²⁵ Hãmri nē mē kãm Parapas mã ure. Ra kot pahi Pirat pê ō pôristi kutã amnhĩ xãm nē kêp hõx pĩr tâ nhũm mē kãm hprãm xã hkôt akupÿm kãm ure. Hãmri nē mē ïhkram Jejus jaxã. Mē kãm hprãm xã hkôt ri mē kot tanhmã hipêx to kaxyw.

Mē kot pĩ kahpa hã Jejus nhôr ã mē harēnh

Matêwre 27.31-43; Makre 15.21-32; Juãw 19.17-20, 19.27-31; mãânên Atre 7.59-8.1

²⁶ Tã nhũm pôristijaja Jejus o kato nē ma kapôt mã o tē. Nē kãm ō pĩ kahpa gō nhũm amnhĩ kaxyw kumÿ nē o tē. Nom mē kot htak rax kurê nhũm hirot tÿx nē nhũm mē ja hã omu nē mēhō kot ho ajuta kaxyw mē hkapi ho xa. Hãmri nē Sirēn nhō xwÿnh Simãw hkà htyk pumu. Nhũm pre htÿx hamakêtkati nē mē kutã krĩm tē. Hãmri nhũm mē haêr pê unê nē kãm Jejus o ajuta

kaxyw hã karõ nhũm kãm õ pĩ kah-paja mỳ nẽ mẽ hkõt o tẽ.

²⁷ Hãmri nhũm mẽ ohtõ nẽ Jeru-jarẽ rũm Jejus kõt mõ. Nhũm mēni hkwyjaja omu nẽ kãm hkaprĩ xaj mỳr o hkõt mõ. ²⁸ Hãmri nhũm mẽ mỳr ã mẽ kuma nẽ mẽ ho hakẽx nẽ mẽ omu nẽ mẽ kãm:

—Kwa nà Jerujarẽ nhõ xwýnhjaja. Mẽ amã ixkaprĩ xaj amỳr kêt nẽ. Kêt mẽ kamjaja amã amnhĩ kaprĩ xaj mãn mur. Nẽ mẽ akrajẽ kamã axukaprĩ xaj mãn mur. ²⁹ Koja mẽ nhỹrmã mẽ apẽ mẽ anhõ krĩ granh pa ka mẽ apunuj nẽ amnhĩ xà htỳx kamã ajamak o ri apa. Nẽ tee ri mẽ akrajẽ hkukamã tanhmã ajamaxpēr to nẽ ajamaxpēr o: “Hẽxta gaa nẽ. Na ixkrajaja ixpẽ amnhĩ xà htỳx kãm hamak o pa. Kẽp apu mẽ hkra hkêt xwýnhjẽ pyrã nẽ ixkra hkêt nẽ ixpa ro nhỹx inhmã mex nẽ. Nhỹx pa ixkĩnh nẽ.” Anhỹr o kot kaj mẽ nhỹrmã ajamaxpēr nom ã ajamaxpēr anhỹr kaprỹ.

³⁰ —Nẽ kot kaj mẽ apiitã mēmo punujta pymaj tee ri amã tokyx atyk nẽ ajapẽx par prãm kaprỹ nẽ axpẽn mã akapēr o: “Hẽxta gaa nẽ. Kot kẽn prẽk mỳj mẽ panhĩpy rôrõk nẽ tokyx mẽ panhĩmex par ronhỹx mẽ pamã ja mex.” Anhỹr tã no ãm tee ri ã ajamaxpēr anhỹr kaprỹ. ³¹ Nom kêt pa. Aa ixte tanhmã amnhĩ tomnuj to hkêt tã nhũm mẽ ã inhĩpẽx anẽ. Nom mẽ ate amnhĩ tomnuj mỳrapẽ koja mẽ nhỹrmã tanhmã mẽ ato rax o ã mẽ kot inhĩpẽx anhỹrja jakrenh pa. Hẽxta waa nẽ. Na pa mẽ akukamã ijamaxpēr nẽ ixkaprĩ htỳx nẽ. Anẽ.

³² Tã nhũm mẽ ja wa ho hamẽxkrut nẽ tanhmã wa kot amnhĩ tomnuj toja mỳrapẽ Jejus kõt wa hpĩr kaxyw hkõt mãanẽn wa o tẽ. ³³ Jakamã nhũm mẽ ra kẽn nhĩxet te kot mẽ hkrã hi pyrãk xwýnhta wỳr mẽ o pøj. Mẽ kot kãm “mẽ hkrã hi xà” anhỹr jarẽnhja

wỳr mẽ o pøj. Hãmri nẽ Jejus pẽ ê kapa nẽ pĩ kahpa hã kuxi nẽ prek o ãhkra nẽ hpar o htỳx pa. Hãmri nẽ kãnhmã pĩ kahpa xãm nẽ ho htỳx nhũm xa. Hãmri nhũm mẽ hpãnhã wa kot amnhĩ tomnuj xwýnhta mã wa ho anẽ nẽ. Nẽ prek o wa ãhkra nẽ wa hpar o htỳx pa hãmri nẽ akutã ho Jejus nhĩjẽ nẽ wa ãm nhũm wa ajêt. ³⁴ Hãmri nhũm Jejus kỳx pẽ amnhĩ xà htỳx kumrẽx kamã hamak o jêt rãhã mẽ ho Tĩrtũm wỳ nẽ kãm:

—Kwa Papaj. ãm ixtã jajẽ pumu. Mẽ kot mēmoj mex pumunh kêt jakamã na mẽ ã inhĩpẽx anẽ. Jakamã ãm ixtã mẽ omu nẽ mẽ kamã axukaprĩ nẽ. Anẽ.

Hãmri nhũm hparpẽ pôristi hkwyjaja axpẽn mã ê hkwy ho pigranh kaxyw hã kẽnre ho jõka ho hkrĩ. ³⁵ Nhũm mẽ ohtõ rax nẽ Jejus parpẽ omunh o kuhẽ. Nhũm mẽ õ pahijaja mẽ noo mã hã hpēr o axkẽ nẽ mẽ kãm:

—E jahti na pre te kęp mẽ pakaprĩ xwýnh ã amnhĩ jarẽn o ri pa. Nẽ Tĩrtũm kot mẽ pakaxyw ãm xwýnh ã amnhĩ jarẽn o ri pa. Jakamã e kwa pu mẽ xa nẽ kot amnhĩ kaxar nẽ wrỳk kãm omu. Anẽ.

³⁶ Nhũm pôristi mãanẽn tanhmã hã hpēr o pikẽn to. Nẽ hparpẽ kãm wĩhti punuti jahkre nẽ kãm:

—Kwa wrỳ nẽ mẽ ixkutã ja hkwy ho ixkõ nã. Anẽ.

³⁷ Hãmri nẽ kãm:

—E apẽ Ijaew nhõ pahi hã kot kaj amnhĩ kapa nẽ akupýn wrỳ. Kwa tokyx pa mẽ ja hã apumu. Anẽ.

³⁸ Nhũm pôristija tapti hõ py nẽ tanhmã hã kagã hto. Nẽ hã kagã ho:

IJA EW NHÕ PAHI NA JA

Anhỹr o hã kagã hãmri nẽ Jejus wỳr api nẽ mỳ ri kunhõ.

Wa kot Jejus nhĩjẽ nẽ wa jêt xwýnh wa harẽn

Matêwre 27.44; Makre 15.32

³⁹ Hāmri nhūm wa kot ĩhkō hā jēt xwýnh̄ta ō haxwýja kām kapēr punuj nē kām:

—Kwa kot kaj apē Tirtūm kot mē ixkaxyw axām xwýnh̄ hā kot kaj amnhī kapa nē wrý. Nē mǎānēn amnhī kōt wa ixto wrý. Anē.

⁴⁰⁻⁴¹ Hāmri nhūm ihōta kuma nē hā kām akir nē kām:

—Tk. Kwa amarī ajēt. Xà amā Tirtūm pyma hkēt ā na ka ā kēp Krata mā akapēr anē? Nà koja kām wrýk prām nē kot wrý. No pajamē pahte amnhī tomnuj mýrapē koja mē pahpī. No tām kot tanhmā amnhī tomnuj to hkēt tā nhūm mē amarī ā hipēx anē.

⁴² Anhýr o kām kapēr hāmri nē Jejus mā kām:

—Kwa Jejus. Kēr ka nhýrmā mē ixto amnhīptā hāmri nē inhmā ajamaxpēr nē ixkamā axukapri nē ixto mex nē. Anē.

⁴³ Hāmri nhūm kām:

—Nà kot kaj jarāhā ma ixkōt kaxkwa hwýr api nē hpānhā ixkuri amex nē atír tūm nē apa ho apa. Ām hāmri na pa ā amā ixkapēr anē. Anē.

Jejus tyk ā harēnh

Matêwre 27.45-56; Makre 15.33-41; Juāw 19.28-30

⁴⁴ Tā nhūm kaxkwa nhīpōk ri myt nhýr mē nhūm te ra kamāt pyrāk nhūm kamāt kō rax kumrēx. Nē kamāt kō ho ra hā awry nē. Ja mē nhūm akupým myt katēr o mō. ⁴⁵⁻⁴⁶ Nom nhūm kormā kamāt kōta ā nhūm Jejus ra htyk kaxyw nē āmra kamā Tirtūm mā kapēr nē kām:

—E Papaj. Māmri ixkarō ho amnhīptā.

Anhýrja kōt hāmri ty. Pu nhūm Tirtūm mā amnhī jarēnh xā hā ixkre kamā hakwakre hā kupēxēja axkjē nē amnhī kahē xā mēnh kurē kumrēx. Utí rax tā kōt ā axkjē nē amnhī kahē xā mē. Te Jejus htyk o kot mē pahte hkōt amnhī xunhwýr xwýnhjē mā Tirtūm wýr pry jakwa kre kahē xā mēnh pyrāk o ā amnhī

nhīpēx anē. ⁴⁷⁻⁴⁹ Hāmri nhūm mē piitā mēmoj ā kot amnhī nhīpēx anhýr ā omunh o kuhē xwýnhjaja. Nē kaxyw Jejus krāmnhwýjaja nhūm mē amým omunh o kuhē. Nē Garirej rūm mēni kot Jejus kōt mē pa ho mē pa xwýnhjaja mǎānēn mē kuri amým hkapri nē omunh o kuhē. Nhūm pōristi krāhtūmjē hōja ā mēmoj kot amnhī nhīpēx anhýr ā omu nē tee ri hamaxpēr o:

—Hēxta waa nē. Pēr ām hāmri na pre hte tām amnhī nhīpēx o pa. Tā pa mē amarī mē mar xā hkōt ixtýx kupi. Anē.

Nhūm ā hamaxpēr anhýrja kōt Tirtūm mā mex o mex ā harēnh o xa. Nhūm amarī mē kuhē xwýnhjaja mǎānēn mēmoj ā kot amnhī nhīpēx anhýrta pumu nē tee ri hkukamā hamaxpēr o ra kām ma htýx nē. Hāmri nē awjanā nē ma akupým krīm mrar kurē kumrēx.

Mē kot Jejus jaxār ā mē harēnh

Matêwre 27.57-61; Makre 15.42-47; Juāw 19.38-42

⁵⁰⁻⁵¹ Tā nhūm axtem Juje pē Arimatej nhō xwýnhja. Arimatejja pika pē Ijaew kamā na. Nhūm Jujeja kot amnhī to mex jakamā Tirtūm kōt amnhī nhīpēx o pa. Jakamā na pre hkwyjē rom Tirtūm kot mē pahwýr Jejus mēnh xwýnh̄ ā omu nē hkōt hamaxpēr. Kēp Ijaew nhō pahi hō htā hkwyjē hkōt hamaxpēr kēt nē. Jakamā nhūm prem kot Jejus pīr ā amýnē nhūm tee ri harēnh ma nhūm ja kēp omnuj nē. ⁵² Jakamā nhūm Jejus ty nhūm Juje ma pahi Pirat wýr tē nē ĩ hā kuwý nē kām:

—Pa? E ot pa awýr tē. Kwa inhmā htyk xwýnh̄ta gō pa ma o tē nē haxà. Anē.

⁵³ Hāmri nhūm kuma nē kām kugō nhūm ma o tē nē haxà. Kaxyw kupēxē hō py nē ho hkupu nē ma o tē nē kēn kre kapry kamā haxà. Mē kot kormā kamā mēhō jaxār kēt nhūm mē kamā Jejus jaxà. ⁵⁴ Arigro pē sēsta hā nhūm prem kupi nhūm

myt xàr o mōr mẽ nhũm Juje ma o tẽ nẽ haxà. Ijaew kôt xà hã arĩgromnuja wỳr haxà. ⁵⁵ Nhũm Garirej rùm mẽni hkwȳ kot Jejus kôt pa xwỳnhjaja ma hkôt mra nẽ kot haxàr kãm omu. Mẽ hkuxwaxà ho gregrer kêt rãhã haxàr kãm omu. ⁵⁶ Hãmri nẽ ma akupỳm krĩm mra nẽ kaxyw mẽ hkuxwaxà hkwȳ ho anẽ.

Tã nhũm apkati nhũm mẽ õ arĩgromnu pẽ sap kator jakamã nhũm mẽ kormã akupỳm hwỳr mrrar kêt nẽ. Hãmri arĩgro mex jamãr pẽ arĩ hkôkôt o hkrĩ.

24

Jejus akupỳm htĩr jarẽnh

Matêwre 28.1-10; Makre 16.1-8; Juãw 20.1-10

¹ Tã nhũm apkati nhũm tòmĩk. Hãmri nhũm mẽnijaja kwỳhtã kãnhmã hkrĩ nẽ ma akupỳm kẽn kreta wỳr mẽ hkuxwaxà ho mra. ² Hãmri nẽ hwỳr àhtêp o mra nhũm ra hakwakre kahê xà raxta kahê xà hkàx ã xà nhũm mẽ tee ri omu. ³ Hãmri nẽ kẽn kre wỳr agjê nẽ kamã tee ri Jejus japêr no nhũm kamã amrakati. ⁴ Nhũm mẽ tee ri axpẽn pumunh pẽ hkukamã hamaxpêr.

Hãmri nhũm Tĩrtũm kapêr o wryk xwỳnh wa axkrut nẽ mẽ haêr pẽ mẽ hwỳr kato nẽ wa xa. Wa ê jaka nẽ hirã htỳx kãm wa xa. ⁵ Nhũm mẽ tee ri wa omu nẽ kãm wa uma htỳx nẽ. Nẽ wa umaj hkõn krã ho rôrôk nẽ hkrĩ hpa. Nhũm wa mẽ omu nẽ mẽ kãm:

—Kwa mon ka mẽ ri mẽ htykjê kamã ra akupỳm htĩr xwỳnhnta japêr o ri apa? ⁶ Jar amrakati. Na ra akupỳm htĩr. Kormã Garirej kamã pa ri kot mẽ amã amnhĩ jarẽnh xà hkôt na ra akupỳm htĩr. Mãn ka mẽ arĩ kot ã mẽ amã amnhĩ jarẽnh anhỳrja ã anohtỳx japêr. ⁷ Mẽ kot unênh nẽ pĩ kahpa hã nhôr nhũm htyk nẽ htyk ã apkati axkrunêpxi hãmri nẽ akupỳm htĩr ã kot mẽ amã

amnhĩ jarẽnhnta mãn ka mẽ arĩ hã anohtỳx japêr.

⁸ Anhỳr o mẽ kãm kapêr nhũm mẽ kuma hãmri nẽ ra Jejus kot mẽ kãm ã amnhĩ jarẽnh anhỳrja mã hamaxpêr kurê kumrêx. ⁹ Hãmri nẽ awjanã nẽ ma akupỳm krĩm hkĩnh nẽ mra. Nẽ hwỳr pôj nẽ mẽ kot Jejus nhỹ hã mẽ ahkre ho mẽ pa xwỳnhjê mã awjarê. Mẽ kêp 11 xwỳnhntajê mẽ kaxyw hkwȳjê mã awjarê. ¹⁰ Mẽni kot mẽ kãm ujarẽnh xwỳnhntajê nhĩxi na pre Marir Matarên nhũm ja kêp Joanã. Nẽ Xiakre katorxà Marir ôta. Nẽ kaxyw mẽni hõja. Jakamã nhũm mẽ ma akupỳm Jejus nhỹ hã mẽ ahkre ho mẽ pa xwỳnhjê hwỳr mra nẽ mẽ kãm awjarê. ¹¹ Nom nhũm mẽ kuma nẽ ãm mẽ kuma nẽ htỳx ho amnhĩ krã hkôt mẽ kot ri ã harẽnh anhỳr ã mẽ hkamnhĩx nẽ ãm mẽ kuma. ¹² Nhũm Simãw Pêtre hamaxpêr hãmri nẽ kãnhmã xa nẽ ma kẽn kreta wỳr hprôt nẽ htêm kurê kumrêx. Hãmri nẽ tee ri kẽn kre kaprỳ kamunh o xa nẽ kamã Jejus kupu xà pix pumu nẽ tee ri hkukamã hamaxpêr hãmri nẽ ma akupỳm tẽ.

Jejus kot Emau hwỳr wa mōr xwỳnh wa hwỳr kator ã harẽnh

Makre 16.12-13

¹³ Tã nhũm ra amỹkry ho mō nhũm Jejus kwỳjê hõ wa hamêxkrut nẽ Jerujarê rùm kato nẽ ma akupỳm wa õ krĩ pẽ Emau hwỳr wa mō. Jerujarê rùm Emau hwỳr ahkrãre. ¹⁴ Jakamã nhũm wa hwỳr pry hã axpẽn mã tanhmã Jejus jarẽnh to ho mō. Kẽn kre kamã mẽ kot haxàr nhũm ra ã pikunorja nhũm wa axpẽn mã harẽnh o wa mō. Nẽ tee ri hkukamã hamaxpêr o wa mō. ¹⁵ Hãmri nhũm Jejus tãm tẽ nẽ wa hã ajêt nẽ wa hkôt tẽ. ¹⁶ Nom nhũm wa hprĩ hã omunh kêt nẽ. Tỳx ho nhãm mẽhõ hã hkamnhĩx nẽ wa arĩ axpẽn mã harẽnh o wa mō. ¹⁷ Hãmri nhũm Jejus hêx rom wa kãm:

—Kwa mēmon ka wa axpēn mā harēnh o wa mō? Anē.

Hāmri nhūm wa hkaprī kamā kām harē. ¹⁸ Ihō pē Kroptija kām:

—Kwa xà na ka Jerujarē kamā ri apa htā kamā mē kot tanhmā amnhī nhīpēx toja jarēnh mar kēt nē? Kurūm amōr kēnā na ka ri mēmoj mar kēt nē ri apa. Anē.

¹⁹ Hāmri nhūm wa kām:

—Nā amrakati ixte mēmoj maare hā. Kwa mo na wehe? Kwa war aprī hā inhmā harē pa kuma. Anē.

Hāmri nhūm wa kām:

—Nā mē kot mē ixpē tanhmā Jejus pē Najare nhō xwýnhhta to kēnā. Kēp Tirtūm nhý hā kapēr jarēnh o pa xwýnh na pre. Nē Tirtūm nhý hā tanhmā amnhī nhīpēx to ho pa nhūm prem piitā amnhīm mex ā harē. ²⁰ Tā nhūm mē panhō patre krāhtūmjē mē mē panhō pahijaja axtem nē mē kām hā amýnē. Mē kot pī kahpa hā nhōr nhūm htyk kaxyw mē kām hā amýnē. ²¹ Pa prem ixtýx ho kēp Tirtūm kot mē pahwýr mēnh xwýnh ā hkamnhīx nē kot Rōm nhō xwýnhjē pē mē ixpytār ā hkamnhīx tā nhūm prem mē ixpē kupī. Jāā na prem ā hipēx anē nē kupī. Na ra htyk ā apkati axkrunēpxi.

²²⁻²³ —Nē jarāhā kwýhtā mēni hkwyjaja ma haxār xà hā kēn kre hwýr mra nē xep tee kamā hapēr nē omunh kēt nē. Xep ām Tirtūm kapēr o wrýk xwýnhja wa ho axkrut nē wa omu nhūm wa xa. Nhūm mē kām ra akupým htír ā harē nhūm mē akupýn mē ixwýr mra nē mē ijaēr pē mē inhmā harē. ²⁴ Hāmri nhūm mē ixkwýjaja ma mē hpānhā kēn kreta wýr mra nhūm ra mē kot harēnh xà hkôt tee ri kamā hapēr nom nhūm kamā amrakati kumrēx. Anē.

²⁵ Hāmri nhūm Jejus amnhī tā wa kuma nē wa kām tanhmā amnhī jarēnh to nē wa kām:

—Hēxta waa nē. Pēr ām mē ate mēmoj mā ajamaxpēr týx mex kēt kumrēx. Na pre ra Tirtūm nhý

hā kapēr jarēnh xwýnhjaja Tirtūm kapēr ā kagà htūm kamā ā kot amnhī nhīpēx anhýrja kukamā hprī hā harē nē hā kagà. Mē akukamā mē anhīgētjē mā harē nē hā kagà. Tā ka mē kormā aprī hā mar týx kēt nē. ²⁶ Kēt mē anē na Tirtūm kot ām xwýnhhta ty. Tā ra akupým htír nē akupým kaxkwa hwýr àpir kaxyw. Kot mē ato amnhīptār kaxyw ra akupým hwýr àpir mā. ²⁷ Amnepēm na pre finat Mojesja tanhmā hkukamā mē anhīgētjē mā harēnh to nē hā kagà. Nē hprī hā harēnh o pa. Nhūm hpānhā Tirtūm nhý hā kapēr jarēnh o mē pa xwýnhjaja ma anē nē mē kām harēnh o pa. Anē.

Nhūm pre ā Jejus wa hkôt hprī hā wa kām amnhī jarēnh anhýr o tē. Te ho nhām mēhō jarēnh pyrāk nom tām wa kām amnhī jarēnh o wa hkôt tē. No nhūm kormā wa hprī hā kēp Jejus ā omunh kēt nē.

²⁸⁻²⁹ Nhūm ā wa kām amnhī jarēnh anhýr o mōr rāhā nhūm mē ra wa ō krī hwýr hpōx o mō. Nhūm ra kamātre nhūm Jejus te kot wa rer nē nhýhým ma htēm kaxyw pyrāk o amnhī nhīpēx nhūm wa tee ri omu nē kām:

—Kwa xà kot kaj wa ixre nē ma tē? Ra kamāt o mōr kēnā. Kwa ma wa ixkôt tē nē wa inhōrkwý kamā mán wa ixri pōj. Anē.

Hāmri nhūm wa kuma nē ma wa hkôt tē. ³⁰ Nē mē wa ōrkwý hwýr pōj nē hwýr agjē. Hāmri nē apkur kaxyw hkrī nhūm Jejus tām pāwti py nē Tirtūm mā harē nē hpānhā ho axkjē nē wa kām kugō. ³¹ Hāmri nhūm wa atā kēp Jejus ā omunh kurē kumrēx. Jao nhūm wa kēp akunok nhūm wa tee ýr xà kamā hapēr nhūm hkaprý mex nē xa. ³² Hāmri nhūm wa tee ri axpēn pumu nē ri hkukamā hamaxpēr nē axpēn mā:

—Hēxta waa nē. Xep tām na. Tām na pahkôt mō nē pry hā hprī hā pamā Tirtūm kapēr ā kagà jarē pu

hkôt pahkĩnh nê mar o mô. Hêxta waa nê. Xep tãm na. Anê.

³³⁻³⁵ Hãmri nê wa kànhmã xa nê kato nê ujanãr kurê kumrêx. Hãmri nê ma akupÿm Jerujarê hwÿr wa hkwyjê hwÿr tẽ. Nê mẽ hwÿr pøj nê axà. Nhũm Jejus nhÿ hã mẽ ahkre ho mẽ pa xwÿnh pê 11jaja ra axpên wÿr akuprô nê hkrĩ. Mẽ hkwyjê mẽ axpên wÿr akuprô nê axpên mã tanhmã Jejus jarênh to ho hkrĩ. Hãmri nhũm wa mẽ hwÿr axà nhũm mẽ wa omu nê wa kãm:

—Kwa na xep ra Jejus akupÿm htĩr nê Simãw Pêtre hwÿr kato. Anê.

Hãmri nhũm wa mẽ kuma nê mẽ kãm:

—Tÿ na akupÿm htĩr kênã. Na pa wa ijaxwÿja ham omu. Na pry hã wa ixtã ajêt nê ma wa ixkôt mô nê wa inhõrkwÿ kamã pøj. Hãmri pa mẽ ixàpkur kaxyw ixkrĩ nhũm pãwti py nê Tirtũm mã harê nê ho axkjê nê wa inhmã kugõ pa wa ixprĩ hã kèp Jejus ã omunh kurê kumrêx. Ixprĩ hã omunh jao nhũm wa ixpê hapêx. Anê.

Jejus kot hkwyjê piitã hwÿr kator ã harênh

Matêwre 28.16-17; Makre 16.14; Juãw 20.19-23

³⁶ Nhũm mẽ kormã axpên mã Jejus jarênh o hkrĩ rôm nhũm tãm nhÿhÿnh mẽ hwÿr axà nê xa. Mẽ haêr pê mẽ hwÿr nhÿhÿnh axà nê mẽ kãm:

—Pa? Xàn ka mẽ arĩ akrĩ? Anê.

³⁷ Hãmri nhũm mẽ amnhĩ jaêr pê omunh jao kànhmã hakry hpar o mra. Jao hakryk kãm ma htÿx kãm omunh o hkrĩ. ³⁸ Hãmri nhũm mẽ kãm:

—Kwa mon ka mẽ amã ixpyma kamã tee ri ixpumunh o akrĩ? Kwa mẽ ixkarõ hã ixkamnhix nê amã ixpyma hkêt nê. ³⁹ Na pa akupÿn inhĩ ho mẽ awÿr ixkato nê xa. Ga mẽ inhĩhkra kamã prek tatak xàja pumu. Nê ixpar kãm omu. Kwa mẽ amã ixpyma hkêt nê. E mẽ mãmrĩ mra nê anhĩhkra ho ixkupê. Kèp apu ixkarõ hpix ronhÿx ka mẽ inhĩ

kupênh kêt nê. Mo mẽhkarõja ï? Nà na pa akupÿm ixtĩr nê inhĩ ho mẽ awÿr ixkato. Anê.

⁴⁰ Hãmri nê mẽ kãm amnhĩ nhĩhkra hpê nê mẽ kãm amnhĩ par pê. ⁴¹ Tã nom nhũm mẽ arĩ akryk omunh o hkrĩ. Mẽ kot omunh nê hkĩnh tã tee ri omunh o hkrĩ. Hãmri nhũm tee ri ja hã mẽ omu nê mẽ kãm:

—E kwa mẽ inhmã mêmoy japêr pa kukrê. Anê.

⁴² Hãmri nhũm mẽ kãm tep gøj kãm ãmta gõ ⁴³ nhũm kupy nê hkur o nhÿ nhũm mẽ arĩ hã omunh o hkrĩ. Jao ra akupÿm htĩr ã omunh kurê kumrêx.

Jejus akupÿm nojarêt nê hkwyjê mã mêmoy tã karõ

Matêwre 28.18-20; Makre 16.15-18; mãânên Atre 1.6-8

⁴⁴⁻⁴⁵ Hãmri nhũm Jejus hprĩ hã mẽ kãm Tirtũm kapêr ã kagã htũm kot hkukamã harênh ã amnhĩ jarê nê mẽ kãm:

—Nà kormã ixtyk kêt ri na pa pre ixprĩ hã mẽ amã amnhĩ kukamã amnhĩ jarê. Tirtũm kapêr ã kagã htũm kot tanhmã mẽ kot inhĩpêx to hkukamã ijarênhja. Na pre finat Mojes Tirtũm nhÿ hã ixkukamã tanhmã ijarênh to. Nê Tirtũm nhÿ hã kapêr jarênh o mẽ pa xwÿnhjaja Mojes mÿr pê haxwÿja ixkukamã tanhmã ijarênh to. Nê Tirtũm mex o mex ã mẽ grer ã kagã xwÿnhjaja haxwÿja ixkukamã tanhmã ijarênh to. Jajê piitã na prem Tirtũm kapêr ã kagã htũm kamã ixkukamã ijarê. ⁴⁶ Nê ijarênh o:

Tirtũm kot mẽ pakaxyw ãm xwÿnh pê Krisja koja nhÿrmã ty. Nê htÿk o apkati axkrunêpxi nê akupÿm htĩr.

Anhÿr o mẽ kot ijarênh. Tã pa ra mẽ kot ixkukamã ijarênh xà hkôt ã mẽ anê amnhĩ nhĩpêx anê.

⁴⁷ —No ãm Tirtũm kapêr ã kagã htũm kot papxipix ixkukamã ijarênh kêt. Kamã mãânên mẽ kajaja tanhmã mẽ akukamã mẽ

ajarēnh kute. Mē apē ixkôt amnhī xunhwÿr xwÿnhjaja ixwakre kamā tanhmā mē ate inhmā amnhī nhīpêx to ho apa hkukamā tanhmā mē ajarēnh kute. Nē mē ajarēnh kot:

E mē ate ixkôt amnhī xunhwÿr xwÿnhjaja. Kêr ka mē ma pika piitā hkôt mē kām Tirtūm kot mē awÿr mēnh xwÿnhhta jarēnh o ri mē hkôt apa. Mē kot mē amar nē amnhī tomnuj kaga nē Tirtūm kôt amnhī xunhwÿr kaxyw. Kêr kê Tirtūm ja hā mē omu nē amnhī katut kôt mē kot amnhī tomnuj rēnh pa. E kêr ka mē ma krī piitā hkôt mē kām ā ja jarēnh anhÿr o ri mē hkôt apa. Krī pē Jerujarē kumrêx kām hāmri nē rī kormā pu hā krī kuhê xwÿnh piitā hkôt ajapôj nē mē kām harēnh o ri apa. Anē.

Ā Tirtūm kapêr ā kagà htūm kot mē akukamā mē ajarēnh kot anhÿr. ⁴⁸ Tā kêr ka mē ā mē kām tanhmā ijarēnh to ho ri apa anē. ⁴⁹ No ām kormā. Kêr paj ma akupÿm kaxkwa hwÿr api hāmri nē amnhī pānhā mē awÿr Tirtūm Karō rē mǎn. Tirtūm kot ixte amnhī nhīpêx ā ijarēnh xà hkôt kot paj amnhī pānhā mē awÿr kurē. Tā kêr ka mē kormā krī ja kamā kutêp apa. Kêr kê mē awÿr wrÿ nē mē amā agjê ka mē rī kormā anhgrà nē ma ŷ hā mē kām ijarēnh o ri mē hkôt apa. Anē.

Jejus kot akupÿm kaxkwa hwÿr àpir ā harēnh

Makre 16.19-20; mǎānēn Atre 1.9-11

⁵⁰ Tā nhūm Jejus Jerujarē rūm hkôt mē pa ho pa xwÿnhjê kator nē ma krī pē Petān wÿr mē o mō. Nē kormā hwÿr mē o mōr ri nhÿri mē o xa nē kànhmā ïhkra pē nē mē ho Tirtūm wÿ. ⁵¹ ā mē ho hwÿr anhÿrja rōm nhūm Tirtūm amnhī wÿr ho àpir o mō nhūm mē noo mǎ

ma akupÿm tēn api. ⁵² Hāmri nhūm mē kām mex o mex ā harēnh pē ma akupÿm àpir kām omunh o kuhê. Nhūm ma tē nē mē kêp kakrām axà nē mē kêp akunok. Hāmri nhūm mē awjanā nē ma akupÿm Jerujarē hwÿr hkīnh nē pa. ⁵³ Hāmri nē apkati mē Tirtūm mǎ amnhī jarēnh xà hā ixkre hwÿr agjê nē kamā Tirtūm mǎ mex o mex ā harēnh o hkrī rāhā nē.

Tā ām ja pix ixkrāmnhwÿ Teopre. Ixpê Rukre na pa awÿr kagàja nhīpêx nē kamā Jejus kot tanhmā amnhī nhīpêx to hā harē nē hā kagà nē awÿr kumē.

Juãw Juãw kot tanhmã Jesus kot amnhĩ nhĩpêx to ho pa hã kagà

Juãw na pre kagàja nhĩpêx. Na pre mãânên Wam Juãw nê Sikũn Juãw nê Hapuhã Juãw nê Apokarip nhĩpêx. Juãw Paxis kêt axtem Juãw õ. Nê Jesus kôt mẽ pa ho mẽ pa xwýnhjê hõ na pre. Nê ý hã mẽ ahkre ho pa xwýnhjê hõ na pre. Nom kormã ã amnhĩ nhĩpêx anhýr o pa hkêt ri na pre kêp tep kanhêr xwýnh. Nê kêp Jesus kràmnhwý mex na pre. Jakamã na pre kagàja nhĩpêx nê kamã Jesus kot tanhmã amnhĩ nhĩpêx hã harê nê hã kagà. Nê tanhmã kapêr to hã kagà.

Na pre Jesus kêp Tĩrtũm Kra hã harê nê hã kagà. Nê ãm pix kukwak ri Tĩrtũm wa kuri mẽ pahťir tũm nê mẽ papa ho mẽ papa hã harê nê hã kagà. ã na pre Juãwja mẽ pamã Jesus jarê nê hã kagà anê.

*Jesus te kot Tĩrtũm pyrãk ã harênh
Matêwre 1.23; Juãw 8.12, 8.58,
10.30, 20.28; mãânên Atre 10.36;
Sikũn Korũt 4.4; Pĩrĩpos 2.6-11;
Korõsê 1.13-17, 2.9; Xĩtre 2.13;
Eprêw 1.1-4; Wam Juãw 1.1-4, 5.20;
Apokarip 1.17-18*

¹ Amnepê mã kormã mẽmoj kêt ri nhũm kot Tĩrtũm kapêr o amnhĩrĩt xwýnhja Tĩrtũm kôt pa ho pa. Te kêp urãk nê pa. Wa kot amnhĩ nhĩpêxja ãm tipxi. Nê wa ãhpumunh ãm tipxi. Nê wa hkarõ mãânên ãm tipxi. ãm wa tipxi rãhã nê pa ho pa. ² Kormã mẽmoj kêt ri na pre Tĩrtũm kapêr o amnhĩrĩt xwýnhhta Tĩrtũm kôt ri pa ho pa. ³ Nê Tĩrtũm nhỹ hã na pre mẽmoj piitã hã apê nê ho kato. Jao pyka ho kato nê kaxkwa ho kato nê gõ xujanãr o kato. Nê kamã mẽmoj piitã Tĩrtũm nhỹ hã ho kator pa.

Kop apu mẽmoj to kator kêt ronhỹx mẽmoj amrakati kumrêx.

⁴ Nê Tĩrtũm o amnhĩrĩt xwýnhhta pix kukwak ri na hte mẽmoj piitã hťir nê pa. Nê ãm pix kukwak ri na htem Tĩrtũm ri hťir tũm nê pa ho pa. Nê te myyti kot mẽ pamã mẽmoj piitã hirã ho pa pu mẽ kukwak ri mẽmoj piitã omunh mexja pyrã nê na pre hte mẽ pahpiitã mẽ pamã mẽ pahte amnhĩ nhĩpêx nyw nê mẽ pajamaxpêr nyw o amnhĩrĩt pu mẽ pahprĩ hã mar mex nê. ⁵ Ja kaxyw na pre wrý nê ri mẽ kãm Tĩrtũm kapêr jarênh o ri mẽ hkôt pa. Jao mẽ kot amnhĩ nhĩpêx nyw jarê nhũm mẽ kot amnhĩ tomnuj xwýnhjaja tee ri kuma nê kãm mar prãm kêt nê. Nê tee ri kãm kapêr o hapêx prãm kaprý.

*Juãw Paxis kumrêx kot tanhmã
Jesus jarênh to hã harênh*

*Matêwre 3.1-3; Makre 1.1-4;
Rukre 3.2-6*

⁶ Tã nhũm kormã Jesus mẽ kãm kapêr o pa hkêt ri nhũm Juãw Paxis kumrêx mõ nê hkukamã Tĩrtũm nhỹ hã mẽ kãm tanhmã harênh to ho pa. ⁷ Mẽ kãm mẽ kot amnhĩ nhĩpêx nyw nhõr xwýnh pê Jesus Kĩs kukamã mẽ kãm harênh o ri mẽ hkôt pa. Mẽ kot mar nê amnhĩ kaxyw Jesus kôt hamaxpêr kaxyw. ⁸ No Juãw Paxisja na pre hte mẽ kãm mẽ kot amnhĩ nhĩpêx nyw nhõr o pa hkêt nê. Na pre ãm kot mẽ kãm õr xwýnhhta kukamã mẽ kãm harênh o pa. ⁹ Jakamã na pre hte mẽ kãm harênh o ri pa nê mẽ kãm harênh o:

—E ot pa mẽ amã mẽhõ jarênh o ri ixpa. Kot mẽ pamã mẽ pahte amnhĩ nhĩpêx nyw nhõr xwýnhhta. Koja tokyx mẽ pakamã põj pu mẽ omu. Koja põj nê mẽ piitã mẽ kãm Tĩrtũm kapêr jarênh o ri pa. Mẽ pahte pahprĩ hã mar mex kaxyw. Anê.

*Tirtūm kot mē ho hkra hprām
xwýnhjê jarēnh*

*Rômān 8.14; Karatas 3.26; Epes
1.5*

¹⁰ Tā nhūm Jejus man kot mēmoj piitā ho kator xwýnhhta wýr wrý nē mē hkôt ri pa. No nhūm mē kot kēp mēmoj piitā ho kator xwýnh ā omunh kēt jakamā na prem kapēr ma nē ām kuma nē amnhī kaxyw hkôt hamaxpēr kēt nē. ¹¹ Na pre wrý nē mē pakamā ī ho kato. Kēp mē pahpiitā mē pahto kator xwýnh tā nhūm mē ohtō nē omu nē ām omu nē hkôt amnhī nhīpēx kēt nē. ¹² Na prem ām grēre nē kuma nē amnhī kaxyw hkôt hamaxpēr nē hkôt amnhī xunhwý. Hāmri nhūm amnhī tā mē omu nē mē kām:

—E nā ām hāmri. Ra mē ate amnhī kaxyw ixkôt ajamaxpēr nē ixkôt amnhī xunhwýr jakamā na ka mē ixkukwak ri apē Tirtūm kraa. Anē.

¹³ Na htem ā kēp Tirtūm kra hprām xāj Jejus kôt amnhī xunhwýr anē. No na htem mē katorxā nhōxā hkre rūm hapōx kôt kēp Tirtūm kra hkēt nē. Rý amnhī krā hkôt tanhmā amnhī nhīpēx to kukwak ri kēp hkra hkēt nē. Ām Tirtūm tām kot mē ho hkra pix kukwak ri na htem kēp hkra.

*Jejus wrýk nē ī ho kator ā harēnh
Matēwre 1.20; mǎānēn Rômān 1.2-4;
Piripos 2.6-7; Eprēw 2.9, 4.15;
Wam Juāw 4.2*

¹⁴ Jakamā na pre Tirtūm o amnhīrit xwýnhhta mē pahwýr wrý nē mē pakamā ī ho kato nē mē pakamā pa. Kēp Tirtūm Kra hā pixi mex na pre. Nē kot amnhī nhīpēxja te Tirtūm kot amnhī nhīpēx pyrāk. Urāk nē mex o mex. Nē urāk nē mē pakutā nojarēt xwýnh. Na pre hte katāt kôt Tirtūm kapēr jarēnh o ri mē hkôt pa. Pa prem kuma nē mex o mex ā omu.

¹⁵ Nhūm Juāw Paxis na pre hkukamā mē kām harēnh o ri pa nē mē kām:

—E ra ixte mē amā harēnh o ri ixpa xwýnhhta na ra pōj. Te pa ixte wa nē ixkator pyrāk nom amnepē mā kormā ixkēt ri nhūm htír rāhā nē pa ho pa. Ham ī ho kator tā kēp Tirtūm Kra jakamā urāk nē rāhā ho rāhā hā pa xwýnh na. Jakamā kot amnhī to rax o kot ijakrenh par. Anē.

¹⁶ Nē kēp mē pakutā nojarēt rāhā nē pa ho pa xwýnh jakamā na hte mē pahto mex rāhā pu mē kukwak ri pamex nē ri papa ho papa.

¹⁷ Na pre finat Mojesja mē panhīgētjē mā Tirtūm kapēr jarēnh o ri mē hkôt pa nē mē kām:

—Na pre Tirtūm mē pahte tām amnhī nhīpēx o papa hā mē pamā karō. Jakamā kot puj mē kot mē pamā mēmoj tā karō xā hkôt ā amnhī nhīpēx anhýr o papa nē ra tām amnhī nhīpēx o papa. Anē.

Nhūm pre Mojesja ā mē kām kapēr o pa anē. Hāmri nhūm mē kuma no ām tee ri kām Tirtūm kôt tām amnhī nhīpēx o pa hprām kaprý. Jakamā nhūm hpānhā Jejus Krisja wrý nē mē pamā kapēr o ho kapēr o pa nē mē pamā:

—E mē ate Tirtūm kôt amnhī nhīpēx o apa hkēt tā nhūm arī kām mē ajapē nē. Nē kām mē ato mex prām. Jakamā kot kaj mē amnhī to awý nhūm tanhmā mē akrā hto ka mē ra tām ri amnhī nhīpēx o apa. Ām hāmri na pa ā mē amā ja jarēnh anē.

Anhýr o mē pamā Tirtūm kapēr jarēnh o pa. Tirtūm kapēr na mex o mex.

¹⁸ Nē aa mē pahtō mē pahte pano ho Tirtūm pumunh kēt. Ām Kraja pix na kot no ho omunh. Kaxkwa kamā kuri ri pa ho pa jakamā kot omunh mex. Nē te kot Hipēêxāja pyrāk jakamā na pre wrý nē hprī hā tanhmā kute hā mē pamā harēnh o pa. Jakamā na pu mē ra pahpiitā Tirtūm kot amnhī nhīpēx ā omu nē mar mex nē.

Juāw Paxis kot mẽ kām Jesus jarēnh o pa hã harēnh

Matêwre 3.1-12; Makre 1.1-8; Rukre 3.15-17; määnēn Atre 19.4

19-28 Na pre Juāw Paxis ma hkwyjê hkôt mẽ kām Jesus jarēnh o pa nhũm mẽ hkwyjaja kuma nê amnhĩ kaxyw Jesus kôt hamaxpêr nê hkôt amnhĩ xunhwý. Hãmri nhũm Juāw Paxis ja hã mẽ omu nê Tirtũm mã mẽ hkrã kumrã. Pyhti pê Jotãw nhĩkjê hã krĩ pê Petãn tã ri mẽ hkrã kumrãr o pa. Hãmri nhũm krĩ pê Jerujarê kamã Ijaew krãhtũmjaja harēnh ma nê ma hwýr hkwyjê rê. Mẽ kot tanhmã hkukjêr to nhũm kot mẽ kām tanhmã amnhĩ jarēnh to kaxyw. Jakamã nhũm mẽõ patre hkwyjê mẽ Tirtũm mã amnhĩ jarēnh xã hã ixkre kamã mẽ ho ajuta xwýnh kwýjê mẽ Parijew nhõ xwýnh kwýjê mẽ nhũm mẽ ma hwýr mra. Juāw Paxis wýr mra nê omu nê kãm:

—Pa. E ot pa mẽ awýr mra. Kwa mẽ inhmã amnhĩ jarê. Apê mẽ atõ na ka we? Xã ka na apê Tirtũm kot mẽ ixkaxyw axãm mã xwýnhnta na ka nã? Xã ka na pa htem amnhĩ wýr akamã ijamak o ixpa? Anê.

Hãmri nhũm mẽ kuma nê mẽ kãm: “Nã pa hkêt.” Anê hãmri nhũm mẽ kãm:

—Tõ mãn xep apê amnepê mã Tirtũm nhý hã kapêr jarēnh xwýnh pê finat Erisja. Hã na ka tanhmã amnhĩ to nê akupým atĩr nê mẽ ixkôt apa nã? Anê.

Hãmri nhũm mẽ kãm:

—Nã ixpê Eris kêt. Anê.

Hãmri nhũm mẽ kãm:

—Tõ mãn xep apê finat Mojes kot mẽ kãm harēnh o pa xwýnhnta na ka nã? Anê.

Hãmri nhũm mẽ kuma nê mẽ kãm:

—Nã ixpê tãm kêt. Anê.

Hãmri nhũm mẽ tee ri kot ã amnhĩ tã aprãr anhýrja ma nê kãm:

—Kwa apê jajê hõ hkêt tã na ka hte mẽ hkrã kumrãr o ri apa. Kwa nã akatãt kôt mẽ inhmã amnhĩ

jarê. Pa mẽ ama nê ma akupým mra nê mẽ kot awýr mẽ ixrēnh xwýnhjê mã tanhmã ajarēnh to. Tanhmã na ka hte mẽ kãm amnhĩ jarēnh to ho ri apa? E kwa mẽ inhmã amnhĩ jarê pa mẽ ama. Anê.

Hãmri nhũm tã hprĩ hã mẽ kãm amnhĩ jarê. Amnepê mã mẽ hkukamã Tirtũm nhý hã kapêr jarēnh xwýnh pê finat Ijais kot hkukamã tanhmã harēnh to nê hã kagã xã hkôt nhũm mẽ kãm amnhĩ jarê nê mẽ kãm:

—Tõe. Nã kot paj ixprĩ hã mẽ amã amnhĩ jarê ka mẽ inhma. Amnepêm Tirtũm kapêr jarēnh xwýnhjê hõ pê finat Ijaisja na pre hte mẽ kãm mẽhõ hkukamã harēnh o ri pa. Mẽhõ kot mẽ panhõ Pahihti hkukamã htēm nê kapôt ã kutêp mẽ kãm harēnh o pa xwýnhnta nhũm pre hkukamã harēnh o ri pa. Nê mẽ kãm harēnh o:

Koja nhýrmã mẽhõja kapôt ã mõn pøj nê mẽ kãm tanhmã ujarēnh to ho ri pa. Nê mẽ kãm ujarēnh o: “E mẽ inhma. Koja Tirtũm tokyx mẽ pahwýr mẽ panhõ Pahihti mẽ nhũm wrý nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o ri apa. Te ho mẽ kot mẽhõ kutêp pry ho mex pyrãk o amnhĩ nhĩpêx o ri pa. Jao amnhĩ nhĩ ho tãm amnhĩ nhĩpêx nê tãm axpên nhĩpêx o ri apa. Pahihtita kutêp.”

—Anhýr o na pre hte finat Ijaisja kot Pahihti hkukamã harēnh o ri pa xwýnhnta kukamã harēnh anê. Tã paa. Pa na pre Ijaisja ã ixkukamã ijarēnh anhýr o pa. Pa na pa hte ã Pahihti kutêp mẽ kãm harēnh o ri ixpa anê. Tã ã ixte harēnh anhýr xwýnhnta na ra mẽ pakamã pa ka mẽ kormã ja hã omunh kêt nê. Kukamã na pa hte mẽ piitã mẽ kot hkôt amnhĩ xunhwýr ã mẽ omunh kaxyw gõ pix o mẽ hkrã kumrãr o ri mẽ hkôt ixpa. Nom

na pre ra mē pahwÿr Tirtūm kot mē pakaxyw ām xwÿnh̄ta tām mē pahwÿr wrÿ. Āhpumunh tÿx o kot ijakrenh jakamā na pa hte ām kukwak ri ixpa nē amnhī tā hā xpi-jaām o ri ixpa. Anē.

Juāw Paxis kot mē kām Jejus jahkre hā harēnh

Matêwre 3.11; Makre 1.10; Rukre 3.22

²⁹ Tā nhūm apkati nhūm Juāw Paxis amnhī wÿr Jejus pumu nē mē kot mar o kuhē xwÿnh̄jē mā ĩhkra ho ahkre nē mē kām:

—E. Onēj Tirtūm kot mē pakaxyw ām xwÿnh̄ta tē. Mē pahpē Ijaew na pu htem xatā pahte amnhī tomnuj pānhā amnhīrer kaxyw Tirtūm mā pahkrit ōwēhti hkra nyw kwÿ hpa nē ho amnhī pānhā kām amnhīrer o papa. No kēt htēm nēj koja nhÿrmā kām mē pahpiitā mē pahte amnhī tomnuj pānhā amnhīrer pa. ³⁰ Na pa pre ra mē amā harēnh o: “Te pa ixte wa nē ixkator nē ixťir nē ixpa pyrāk. Nom amnepēm kormā ixkēt ri na pre htĭr rāhā nē pa ho pa. Nē ĩ ho wrÿk nē jar kator tā kēp Tirtūm Kra jakamā urāk nē rāhā nē pa ho pa xwÿnh̄ na. Jakamā kot amnhī to rax o kot ijakrenh par.” Anhÿr o pa pre mē amā harēnh o ri ixpa ka prem inhma.

³¹ —Ixte mē amā ā harēnh anhÿr tā ijaxwÿja kormā ixte kēp Tirtūm Kra hā omunh kēt nē ām hkukamā Tirtūm nhÿ hā mē amā ā harēnh anhÿr o ri ixpa. Nē hkukamā Tirtūm mā mē akrā kumrār o ri ixpa. Tā na pa kēp Tirtūm Kra hā omu nē ā mē amā ahkre anē ka mē omu. Anē.

³²⁻³³ Nhūm pre ā Juāw Paxis mē kām Jejus jahkre anē nē mē kām:

—Nā Tirtūm na pre ixte mē akrā kumrār o ixpa kaxyw inh̄mā hā karō. Tā na inh̄mā kot mē pakaxyw ām xwÿnh̄ta o amnhīrĭt nē inh̄mā harēnh o: “Koja nhÿrmā Ixkarōja mēhō hwÿr wrÿ nē kuri arĭk. Ka ja hā omu nē kēp Ixkra hā omunh

kurē kumrēx. Koja amnhī xō ri amnhī pyrā nē mē kām Ixkarō nhōr o pa nhūm mē hkarō mā agjē.” Anhÿr o inh̄mā harē. Tā na pa ra omu. Na pre Tirtūm Karō kaxkwa rūm te tuuti pyrā nē hwÿr wrÿk o tē nē ĩkre hā xa. ³⁴ Pa ā kot hipēx anhÿr ā omu nē kēp Tirtūm Kra hā omunh kurē kumrēx. Jakamā na pa ā mē amā ahkre nē mē amā harēnh anē. Anē.

Juāw Paxis kōt pa xwÿnh̄ wa kot Jejus kōt pa hā wa harēnh

Atre 19.4

³⁵ Tā nhūm apkati nhūm Juāw Paxis axte Jejus pumu. Kot hkōt ri pa ho pa xwÿnh̄ mē wa nhÿri xa nē omunh o xa. ³⁶ Nhūm ra mē hānh tē nhūm Juāw Paxis omu nē hkōt ri pa xwÿnh̄ wa kām:

—E onēj Tirtūm kot mē pakaxyw ām xwÿnh̄ta tē. Nēj koja mē pahte amnhī tomnuj pānhā amnhīre. Anē.

³⁷ Hāmri nhūm wa kuma nē omu nē ma hkōt tē nē hā ajēt. ³⁸ Nhūm wa omu nē wa kām: “Pa mo na?” Anē nhūm wa kot kēp mē ahkre xwÿnh̄ ā omunh jakamā kām:

—Nā wa ixte ma akōt ixtēm nē nhÿri anhōrkwÿ pumunh mā na pa wa akōt tē. Anē.

³⁹ Hāmri nhūm wa kām:

—Tōe. Nā wa kam nē rĭ ma ixkōt tē. Anē.

Hāmri nhūm wa kuma nē ma hkōt wa tē nē ōrkwÿ hwÿr pōj nhūm ra amÿkry nhūm wa hkōt axā nē kuri ŷr o kamāt hāmri nē kato nē ma akupÿm tē. ⁴⁰ Kōt htēm xwÿnh̄jē hōta na pre kēp Andre. Simāw Pētre htō na pre. Nē kaxyw hōja. Wa kumā na pre Juāw Paxis Jejus jahkre nē harē nhūm wa ma hkōt tē. Tā wa ra akupÿm wa tē. ⁴¹ Hāmri nhūm Andreja htō Simāw wÿr tē nē kām:

—Kwa na pa wa jarāhā Tirtūm kot mē pakaxyw ām xwÿnh̄ta pumu. Ma pu hwÿr ka wa ixwar ano ho omu nā. Anē.

Ijaew kapēr kām “Tirtūm kot mē pakaxyw ām xwýnh” anhýrja te kot Gres kapēr kām “Kris” anhýr jarēnh pyrāk. Ijaew na prem ā Jejus jarēnh anē nē harēnh o: “Tirtūm kot mē pakaxyw ām xwýnh.” Anhýr o harē. ⁴² Jakamā nhūm ā Andreja htō mā harēnh anē nē ma akupým hwýr o tē. Nē wa hwýr pōj nhūm wa omu. Wa kēp Juāw kra hā wa omu hāmri nē Simāw mā kapēr nē kām:

—Pa Simāw. Nā apē Simāw tā kot paj axte atā anhīxi hō mē. Kot kaj määnēn apē Septi. Anē.

Mē pakapēr kām Septija te kēp “kēn” jarēnh pyrāk. No Gres kapēr kām te kēp “Pētre” jarēnh pyrāk. No Ijaew kapēr kām kēp “Septi.” Jakamā nhūm pre Jejus ā Simāw Pētre hā hixi mēnh anē.

Jejus kot amnhī kôt Firipti mē Natānaew wa hwýr ā harēnh

⁴³⁻⁴⁴ Tā nhūm apkati nhūm ra Jejus pyka pē Garirej wýr nojarēt nē nhýri Firipti pumu. Firiptija Andre mē Simāw Pētre wa urāk nē krī pē Pesēj nhō xwýnh na pre. Jakamā nhūm Jejus nhýri omu nē amnhī kôt kuwý nē kām:

—E kwa ma ri ixkôt apa ho apa. Anē.

⁴⁵ Hāmri nhūm kuma nē ma tē nē nhýri Natānaew pumu nhūm nhýri pī hpar parpē nhý nhūm omu nē kām:

—Kwa na pa jarāhā finat Mojes kot amnepēm mēhō hā kagā xwýnhhta pumu. Tirtūm kot mē pakaxyw ām xwýnhhta na. Tirtūm nhý hā kapēr jarēnh o mē pa xwýnhhaja kot hkukamā harēnh nē hā kagā xwýnhhta. Kēp Najare nhō xwýnh nē määnēn kēp finat Juje hkra. E kwa tokyx pu hwýr ka ixkuxwar ano ho omu. Anē.

⁴⁶ Hāmri nhūm tee ri kot tanhmā harēnh toja ma nē kām:

—Tk. Koký. Najare nhō xwýnh piitā kot amnhī to mexti hā kot kēt we hō kēp Tirtūm kot mē pakaxyw ām xwýnh. Anē.

Hāmri nhūm kām:

—Kwa nā ā akapēr anhýr kēt nē. Ma ixkôt tē nē ixpyrà nē ano ho omu măn. Nē rī ā ri akapēr anē. Anē.

Hāmri nhūm kuma nē ma hkôt tē. ⁴⁷ Hāmri nhūm Jejus amnhī wýr wa omu nē kuri mē kuhē xwýnhjē mā Natānaew jarēnh kurē kumrēx nē harēnh o:

—E onēj Ijaew ōja mē pahwýr hpôx o tē. Ām hāmri na hte tām amnhī nhípēx o pa. Na hte higēt finat Jako kurom hēx rom ri tanhmā mē kām amnhī to hēx to ho pa hkēt nē. Na hte ām kapēr mex pix o ri kapēr o pa. Anē.

⁴⁸ Hāmri nhūm tee ri amnhī tā kuma nē kām:

—Kwa mēhō na pre ā amā ijarēnh anē? Aa ixte nhýri apumunh kēt kumrēx tā ka ri ām hāmri ā ijarēnh anē. Anē.

Hāmri nhūm kām:

—Nā mēhō kot tanhmā inhmā ajarēnh to hkēt. Ām pa na pa hte inhno ho apumunh o ixpa. Kormā Firipti kot awýr htēm nē amā ijarēnh kēt ri pa ra ixprī hā inhno ho apumu. Na ka kormā pīta parpē nhý pa apumu. Anē.

⁴⁹ Hāmri nhūm tee ri kot hprī hā harēnh ā amnhī tā kuma nē kām:

—Kwa mē ijahkre xwýnh. Pēr ām hāmri apē Tirtūm Kra kumrēx jakamā na ka ā ijarēnh anē. Xep ka na mē ixte amnhī wýr akām ijamak o ixpa xwýnhhta na ka. Nā ka na apē mē ixpē Ijaew nhō Pahihti. Anē.

⁵⁰ Hāmri nhūm Jejus kuma nē kām:

—Nā ām hāmri na ka ixte pī hpar pē apumunh ā ajarēnhja ma nē hkôt pix mā ixpē Tirtūm Kra hā ixpumu. Tā kot kaj ja nhīrō pē axte mēmoj mex o kot ja jakrenh pumu. ⁵¹ Koja nhýrmā kaxkwa axkjē nhūm Tirtūm kapēr o mē wrýk xwýnhhaja kurūm axpēn japa ka mē omu. Finat Jako pyrà nē mē omu. Ixte Tirtūm kot mē akaxyw ixām xwýnh wýr koja mē ā wrýk

nê amnhĩ nhĩpêx anê ka ja hã mẽ omu. Kwa jam ajamxpêr tỳx rãhã ho apa. Anê.

2

Jejus kot gô ho mẽ kãm wĩhti nhĩpêx ã harênh

¹ Tã nhũm apkati axkrut nê hapêx nhũm Jejus arĩ Garirej kamã pa. Nhũm krĩ pê Kanã kamã axpên mã wahôj wa rer kaxyw nhũm Jejus katorxà ma mẽ hwỳr mō. ² Hãmri nhũm mẽ amnhĩ wỳr Jejus mẽ hkôt ri mẽ ixpa xwỳnhjê wỳ pa mẽ ijaxwỳja ma mẽ hwỳr mō nê ra mẽ hwỳr pôj. ³ Hãmri nê mẽ hkôt wa hã ixkĩnh nê apku nê wĩhti hkwỳ ho ixkôm o ixkrĩ. Tã nhũm ra wĩhti mẽ kêp hapêx nhũm Jejus katorxàja harênh ma nê Jejus mã harê nê kãm:

—Xê Jejus. Na xep ra mẽ kêp wĩhti hapêx pa. Xàt ka tanhmã mẽ ho ajuta hto mê? Anê.

⁴ Hãmri nhũm kãm:

—Tôe. Kwa tee ri ajamxpêr kêt nê. Kot paj tanhmã mẽ kãm ho. Nom kot paj kormã ixpê Tĩrtũm kot mẽ akaxyw ixãm xwỳnh ã pa kormã amnhĩ to amnhĩrit kêt nê. Anê.

⁵ Hãmri nhũm katorxà kuma nê mẽ kãm mẽ àpênh xwỳnhjê hwỳr tẽ nê mẽ kãm:

—An koja Jejus mẽ awỳr tẽ nê tanhmã mẽ amã mẽmoj tã karõ hto ka mẽ ama nê kãm ho anhỳr kurê kumrêx. Anê.

⁶ Nhũm mẽ kuri kên o poti kêp 6 nê kuhê. Piitã umpỳm rũnh kumrêx. Koja hõ pyxi nê nỳt nê kamã gô kêp 80 rit nê hkwỳ kamã kêp 100 rit. Ijaew na htem apkur kaxyw nê amnhĩ nhĩhkra kuhõnh japjê rũnh nê kormã apku. Nê apkur pa nê axte amnhĩ nhĩhkra kuhõ. Á mẽ kot xatã amnhĩ nhĩhkra kuhõnh jakamã nhũm pre htem amnhĩ ri ã poti rũnh kwỳ xunhwỳr anê. No nhũm ra hkapyr nê kuhê. ⁷ Hãmri nhũm Jejus tẽ nê omu mẽ àpênh xwỳnhjê mã kãm:

—E mẽ ma mra nê gô ru nê ho poti kuhê mỳj piitã ho nỳt pa. Anê.

Nhũm mẽ kuma nê ma mra nê ho nỳt pa. ⁸ Hãmri nhũm mẽ kãm:

—Nà hãmri. Pãnhã hõ kamã gô hkwy janhi nê o tẽ nê mẽ anhõ patrãw mã agô kê hkwy ho ixkô nê kamã ama. Anê.

Hãmri nhũm mẽ mar xà hkôt kãm hkwy janhi nê hwỳr o tẽ nê kãm kugô. ⁹⁻¹⁰ Nom nhũm gôja arĩ kêp gô kumrêx kêt nê. Jejus kot tanhmã ho jakamã nhũm ra hpãnhã kêp wĩhti. Jakamã nhũm mẽo patrãw wỳr hkwy ho tẽ nê kãm kugô nhũm hkaki nê kamã ama. Nom Jejus kot gô ho hipêx ã omunh kêt nê. Âm htỳx ho wĩhti kumrêx ã hkamnhix nê mex kumrêx ã hkaki. Hãmri nê amnhĩ wỳr mjên nyw xwỳnh mã hpa ho apê nhũm hwỳr tẽ nhũm kãm:

—Kwa na htem wĩhti mex o wa nê mẽ kãm kugô hãmri nhũm mẽ hpenh pa nhũm mẽ rĩ kormã hkôt omnu ho hapu nê mẽ kãm kugô. Tã ka pêr mẽ axtem nê wam mẽ kãm omnu nhõr pa hãmri nê kormã mex kumrêxja o hapu nê mẽ kãm agô. Kêt wĩhti ja na mex kumrêx. Âm mex o mex. Anê.

Jejus kot gô ho hipêx ã omunh kêt jakamã nhũm ã kãm kapêr anê. Âm mẽ àpênh xwỳnh pixjaja na prem ja hã omu. ¹¹ Nhũm Jejus kormã mẽ kãm aa mẽ kot mẽmoj pumunh kêt õ ho anhỳr kêt tã krĩ pê Kanã kamã ã mẽ kãm amnhĩ nhĩpêx anhỳr o hkrax. Jao amnhĩ to rax o amnhĩ to rax ã mẽ inhãm amnhĩ to amnhĩrit. Pa mẽ ixpê hkôt ri ixpa xwỳnhjaja ã kot amnhĩ nhĩpêx anhỳr ã omu hãmri nê kêp Tĩrtũm kot mẽ pakaxyw âm xwỳnh ã omunh kurê kumrêx.

¹² Tã nhũm Jejus hpãnhã ma krĩ pê Kapanaũ hwỳr mō. Pa mẽ hkôt ri ixpa xwỳnhjaja nê katorxà nê htõjaja pa mẽ ma ixpiitã hkôt mō. Hãmri nê hwỳr pôj nê kamã mẽ hkôt ixpa hã ixtã apkati grêre nê ma hpãnhã krĩ hõ hwỳr ixpa.

Jejus kot Tirtùm nhõrkwỹ hwýr àr ã harênh

Matêwre 21.12-13; Makre 11.15-19; Rukre 19.45-46

¹³ Tã nhũm ra arĩgro pè Pas ahtêp o mō. Pasja ã mē ixpè Ijaew na pa htem amnepêm Tirtùm kot pika pè Ejit rũm mē inhĩgêtjê kator mã ijamaxpêr kaxyw axpên wýr akuprõ nê hã ixkĩnh. Jakamã nhũm Jejus ma hkwýjê hkôt krĩ pè Jerujarê hwýr mō. Pa mē ixpè hkôt ri ixpa xwýnhjaja pa mē ma hkôt ixpa. Hãmri nê hwýr pøj ¹⁴ nê Tirtùm mã amnhĩ jarênh xà hã ixkre hwýr mra nê ixkre puhã kahêja wýr agjê. Nhũm mē kamã axtem nê mēmoj to wênê ho kuhê. Mõx o wênê nê ôwêhti ho wênê nê tutre ho wênê ho kuhê. Mē kot haprôr nê ho Tirtùm mã hkĩnh xà kaxyw mē kãm ho wênê. Nê kãxpore ho pinhpanh xwýnhjaja haxwýja mē kuri hkrĩ. ¹⁵ Hãmri pa mē Jejus kôt mē hwýr agjê nê ja hã mē omu hãmri nhũm Jejus pè ja omnuj tỳx nê. Jakamã nhũm tee ri mē omu hãmri nê amnhĩm mry hkã ho mē htak xà nhĩpêx nê ho ixkreja nê mē piitã mē kator pa. Nê mōx nê ôwêhti nê mēmoj piitã kator pa. Nê kãxpore ho pinhĩpanh xwýnhjaja nhũm mē kêp mē õ mēsti rênh pa nhũm mē hikãxpore pykap rôrõk pa nê angrã nê hikwỹ. ¹⁶ Hãmri nhũm Jejus tutre ho wênê xwýnhjê mã kãm:

—Kwa mē anhõ tutre jamý nê tokyx ma mra. Na htem Inhĩpêêxã nhõrkwỹ kamã mēmoj to wênê hkêt nê. Kêp mē ujaaprôr xà hã ixkre hkêt. E kwa mē tokyx ma mra. Anê.

Nhũm pre ã mē kãm kapêr anê nhũm mē tee ri kuma hãmri nê ma mra kurê kumrêx. ¹⁷ Pa mē hkôt mē ixpa ho ixpa xwýnhjaja ã kot mē hipêx anhýr ã omu hãmri nê ra Tirtùm kapêr ã kagã htũm kot ã amnhĩ nhĩpêx anhýrja kukamã hã kagãta mã ijamaxpêr kurê kumrêx. Kagã kot amnepêm Jejus kukamã

te ra ã kapêr anhýr pyrãk o harênh. Nê harênh kot:

Na pa hte Tirtùm nhõrkwỹ ho mex rãhã ho ixpa. Nhũm mēmoj punuj hwýr axà pa omu nhũm ja inhmã mex kêt nê.

Anhýr o kot hkukamã harênh jakamã na pa mē ã Jejus kot mē hipêx anhýrja ã omu hãmri nê ra hkukamã hã kagãta mã ijamaxpêr kurê kumrêx.

Ijaew krãhtũmjaja kot Jejus kukjêr ã mē harênh

¹⁸ Tã nhũm Ijaew krãhtũmjaja tee ri Jejus kot ixkreja nê mē kator ã omu hãmri nê hwýr mra nê kãm:

—Pa. Kwa mon ka ri ã Tirtùm mã amnhĩ jarênh xà hã ixkreja nê mē kator anê? Mêhõ na we mē ixwýr amê ka ý hã ã mē hipêx anêhti? Nà xà Tirtùm na mē ixwýr amê? E mē inhmã aa mē ixte mēmoj pumunh kêt õ ho anê. Pa mē ja hã apumu hãmri nê Tirtùm kot mē ixwýr amênh xwýnh ã apumunh kurê kumrêx. E kwa tokyx mē inhmã ho anê. Anê.

¹⁹ Hãmri nhũm mē kuma nê mē kãm amnhĩ jarê. Nom amnhĩ tã kuxi nê mē kãm awjarê nê mē kãm:

—Nà kot paj aa mē ate mēmoj pumunh kêt õ ho pixi nê mē amã ho anê ka mē omu. Tirtùm nhõrkwỹ jaa. Kot kaj mē agrã pa ixtã apkati axkrunêpxi nê akupým hipêx ka mē ja hã ixpumu.

²⁰⁻²² Anhýr o mē kãm kapêr. No ãm ixkreja jarênh kêt nê. Na pre ãm amnhĩ tã kuxi nê ã mē kãm kapêr anê. Mē kot hpĩr nhũm htyk ã apkati axkrunêpxi nê akupým htĩr ã mē kãm ã amnhĩ jarênh anê. Te mē kot Tirtùm mã amnhĩ jarênh xà hã ixkreta grãnh nhũm hã apkati axkrunêpxi nê akupým kot hipêx parta pyrãk ã hã kuxi nê ã mē kãm amnhĩ jarênh anê. Jakamã nhũm mēhprĩ hã mar mex kêt nê. ãm tee ri kuma nê kãm:

—Tk. Kwa ixkre ja na prem hipêx kaxyw nê hã amgrã xohtõ

rax nê hipêx. Hã amgrà pê 46 nê hipêx par kênã kot ka kêt atã apkati axkrunêpxi pix nê akupÿm hipêx. Anê.

Mê kot hprĩ hã mar kêt jakamã na prem ã kãm kapêr anê. Pa mê hkôt mê ixpa ho ixpa xwÿnhjaja ã mê kãm kapêr anhÿrja ã kuma nê hã inhnohtÿx rãhã ho ri ixpa. Tã nhũm mê kot Jejus pĩr nhũm hã apkati axkrunêpxi nê akupÿm htĩr nhõ arĩgrota ã pa mê kot ã amnhĩ jarênh anhÿrja mã ijamaxpêr kurê kumrêx. Nê axpên mã:

—Hêxta waa nê. Xep ãm hãmri na pre Pahihti amnhĩ kukamã ã amnhĩ jarênh anê. Mê kot hpĩr nhũm htyk ã apkati axkrunêpxi nê akupÿm htĩr ã amnhĩ kukamã amnhĩ jarênh mex nê. Te mê kot Tĩrtũm nhõrkwÿ grãnh par nhũm hã apkati axkrunêpxi nê akupÿm hipêx ã amnhĩ jarênh pyrãk. ãm hãmri na pre amnhĩ kukamã ã amnhĩ jarênh anê. Anê.

Jejus kot mê pajamaxpêr kôt mê pahpumunh ã harênh

²³ Tã nhũm Jejus mê hkôt mê ixpa ho ixpa xwÿnhjaja arĩ Jerujarê kamã ri ixpa ho ixpa. Nhũm ra arĩgro pê Pasja kato nhũm mê piitã hkũnh kaxyw axpên wÿr akuprõ. Nhũm Jejus mê kãm aa mê kot mêmoj pumunh kêt kwÿ ho anhÿr o ri mê hkôt pa. Nhũm mê omu nhũm mê hkwÿjaja Tĩrtũm kot mê pakaxyw ãm xwÿnh ã hkôt hamaxpêr tã no ãm hkôt hamaxpêr tÿx kêt nê. ²⁴ Jakamã nhũm Jejus amnhĩ tã mê hamaxpêr ã mê omu nê hamaxpêr o:

—Nà mê kot ixkôt hamaxpêr kryre xwÿnhjaja koja mê hã apkati grêre nê ixto hamakêtkati nê htÿx ri pa. Anê.

²⁵ Jejus kot mê pahte pahtÿx ri amnhĩ tomnuj o papa hã mê pahpumunh par. Nê pahtÿx ri pajamaxpêr punuj o papa hã mê pah-

pumunh par. Jakamã na pre ã mê harênh anê.

3

Jejus mê Nĩkotê wa kot axpên mã kapêr ã wa harênh

Juãw 1.12-13; mããnên Wam Pêtre 1.23

¹ Tã nhũm Parijew nhõ xwÿnhjê õ pê Nĩkotê. Mããnên kêp Ijaew krãhtũmjê hõ. ² Jakamã na pre Jejus jarênh ma nê kãm omunh prãm nê. Hãmri nê hkwÿ pymaj kamãt kãm hwÿr tê nê omu nê kãm:

—Pa mê ijahkre xwÿnh. E ot pa awÿr tê. Ra mê ixte apumunh mex. Tĩrtũm na pre ate mê ijahkre ho apa kaxyw mê ixwÿr amê ka mê ixwÿr wrÿ. Mêhõ koja apyrã nê aa mê inhmã mê kot mêmoj pumunh kêt kwÿ ho anhÿr o pa? Nã amrakati kumrêx. Kop apu Tĩrtũm kot mê ixwÿr amênh kêt ronhÿx ka ã amnhĩ nhĩpêx anhÿr kêt nê. Anê.

³ Hãmri nhũm kuma nê tanhmã kãm kapêr to. No ãm amnhĩ tã kuxi nê kãm awjarê nê kãm:

—Na htem piitã mê katorxã nhõxã hkre rũm hapôj. Tã Tĩrtũm kãm mê piitã axte mê hapôx prãm. Jakamã kot kaj mê akator o axkrut kêt nê hãmri nê nhÿrmã Tĩrtũm ri atĩr tũm nê apa ho apa hkêt nê. ãm hkrajê pix na htem kuri htĩr tũm nê pa ho pa. Jakamã kwa jam ajamaxpêr tÿx nê ri ho apa. Anê.

⁴ Hãmri nhũm Nĩkotêja kuma nê tee ri ã kot kãm kapêr anhÿrja kukamã hamaxpêr nê kãm:

—Kwa ra ixãptãr kênã kot pa kêt tanhmã amnhĩ to nê akupÿm ixkatorxã nhõxã hkre hwÿr axã nê axte kurũm ixkato. Anê.

⁵⁻⁷ Hãmri nhũm Jejus kãm:

—Nà na hte mê hkrarejaja mê katorxã nhõxã hkre rũm kagõ hkôt hapôj hãmri nê kêp katorxã mê hipêêxã wa hkwÿÿ. Jao wa kot amnhĩ nhĩpêx kôt amnhĩ nhĩpêx o pa. Ja pyrã nê ka mê atõ amã apê Tĩrtũm kra hprãm hã kot kaj amnhĩ

to awý nhùm wa Ixkarōja akarō mā axā hāmri ka ra apē hkraa. Te ra axte akator pyrāk o amnhī nhīpêx. Nē te mē hkra kot katorxā nē hipêêxā wa kot amnhī nhīpêx kôt amnhī nhīpêx o pata pyrā nē apām Tīrtūm kot amnhī nhīpêx kôt amnhī nhīpêx o ri apa. Nom koja Tīrtūm mē wa Ixkarōja akarō mā ār kêt nē ka apē hkra hkêt nē. Jao te axte akator kêt pyrāk o amnhī nhīpêx. Jakamā na pa amā te ate akator pijakrut o amnhī nhīpêx pyrāk o amā ā ja jarēnh anē. Kwa jam ajamxpēr tỳx rāhā ho ri apa. No ama nē tee ri amnhī kukamā ajamxpēr kêt nē.

⁸ —E pa ixprī hā amā ja jarē ka inhma. Na hte kōk kām nhỹhỹm àpêr prām xā hkôt àpêr o pa. Pu mē kamā ama no ām pano ho nhỹhỹnh mōr xā hkôt omunh kêt nē. Nē nhỹhỹm ma mōr xā hkôt omunh kêt nē. Ja pyrā nē na hte Tīrtūm mē wa Ixkarōja mē hkaxwýnh mā agjê nē mē ho Tīrtūm kra nom nhùm mēhprī hā kot tanhmā mē ho hā amnhī tā omunh kêt nē. Anē.

⁹ Hāmri nhùm Nikotē ā Jejus kot kām kapêr anhỹr ā kuma nē tee ri hamaxpēr nē kām:

—Kwa na pa ixprī hā amar kêt nē. Anē.

¹⁰ Hāmri nhùm kām:

—Kwa mon ka hte Tīrtūm kapêr tūm o Ijaew jahkre ho apa tā aprī hā ixkapêr mar kêt nē? ¹¹ Ixte mēmoj pumunh xā hkôt ixte mē amā harēnh o ixpa htā ka mē apē Ijaew krāhtūmjaja mē amā ixkapêr mar prām kêt nē. Ā mē ate anhỹr kumrêx. Kwa jam ajamxpēr tỳx nē. ¹² Na pa ra Tīrtūm kot jar tanhmā amnhī nhīpêx to hā harēnh o ixpa htā ka mē ām ama nē ixkôt ajamxpēr kêt nē. Jakamā xā kot pa hpānhā mē amā kaxkwa kamā tanhmā kot amnhī nhīpêx to hā harē ka mē ama nē mar tỳx nē? Nā kot ka mē ama nē ām ama nē hkôt ajamxpēr kêt nē. ¹³ Mēhō

na we ra ma kaxkwa hwýr api nē kamā mēmoj mex pumu nē man akupýn mē awýr wrý nē mē amā tanhmā harēnh to? Nā amrakati kumrêx. Ām paxipix ixpê Tīrtūm kot mē akaxyw ixām xwýnh na pa pre amnē kurūm mē awýr wrý hāmri nē ixprī hā mē amā tanhmā harēnh to ho ri ixpa.

¹⁴ —Amnepêm finat Mojesja kormā kapôt ā mē o pa ri na pre mē kām kax o kagā karōja nhīpêx nē kýxpê mē kām kunhō. Kagā kot mē hkamnhar xwýnhjaja kot hwýr rīt nē omunh nē akupým mex kaxyw mē kām kunhō. Tā ixpê Tīrtūm kot mē akaxyw ixām xwýnh kot paj nhỹrmā kagā karōta pyrā nē kýx pē pī kahpa hā ajêt. ¹⁵ Ka mē te mē kot kagā karō pumunh nē akupým mexta pyrā nē amnhī kaxyw inhmā ajamxpēr nē ixkôt amnhī xunhwý hāmri nē nhỹrmā Tīrtūm mē wa ixri atīr tūm nē amex rāhā nē apa ho apa.

¹⁶ —Tīrtūm kām pika piitā hkôt mē apiitā mē ajapê htỳx. Nē mē ajapê xāj na pre ixpê Kra hā ixpyxi hā mē awýr inhmē. Ka mē atō amnhī kaxyw ixkôt ajamxpēr nē ixkôt amnhī xām. Hāmri nē nhỹrmā atyk tā nhùm Tīrtūm akupým ato atīr ka wa ixkuri atīr tūm nē amex rāhā nē apa ho apa. Hāmri nhùm Tīrtūm aa amnhī nē nhỹhỹm amēnh kêt kumrêx. ¹⁷ No mē ate amnhī tomnuj mýrapê tanhmā ixte mē anhīpêx to kaxyw na pre mē awýr inhmēnh kêt nē. Ām ixkukwak ri mē atīr tūm nē mē amex rāhā apa ho apa hprām xāj na pre mē awýr inhmē pa mē awýr wrý. ¹⁸ Jakamā kot ka mē atō amnhī kaxyw ixpê Tīrtūm Kra hā ixkôt ajamxpēr nē ixkôt amnhī xām nhùm Tīrtūm ixtā apumu nē ate amnhī tomnuj mýrapê tanhmā anhīpêx to hkêt nē. No kêt mē kot ixkôt amnhī xunhwýr kêt xwýnhjaja na Tīrtūm ma mē kot amnhī xā htỳx kamā hamak tūm xā hwýr mē pa mā xwýnhjê

hã mẽ harê. Mẽ kot ixkôt amnhĩ xunhwÿr kêt mÿrapê. Anê.

Mẽ kot amnhĩ tomnuj o hpimxur prãm kaprÿ ã mẽ harênh

¹⁹ Nhũm Jejus arĩ Nĩkotê mã kapêr nê kãm:

—Na pre Tĩrtũm amnê pika hwÿr mẽ awÿr inhmê. Mẽ ate amnhĩ tomnuj xwÿnh ã amnhĩ pumunh kaxyw mẽ awÿr inhmê. Tã nhũm mẽ ohtõ nê amnhĩ tomnuj gryk ã kãm kapêr mar prãm kêt nê. Jao ixkaga nê kãm ixkapêr mar prãm kêt nê. ²⁰ Ra ixprĩ hã ixte mẽ kot tanhmã amnhĩ tomnuj to ho pa hã mẽ omunh mex jakamã mẽ kãm ixkapêr mar prãm kêt. Nê ixte mẽ kot tanhmã amnhĩ tomnuj to ho pa hã mẽ harênh pymaj ixkôt kãm pa hprãm hkêt nê. ²¹ No kêt mẽ kot ixkôt amnhĩ xunhwÿr xwÿnhjaja na mẽ kot amnhĩ nhĩpêx o pa hã hpijaam kêt. Na htem amnhĩx ixkôt amnhĩ nhĩpêx o pa. Jakamã koja mẽ piitã ja hã mẽ omu nê Tĩrtũm kot tanhmã mẽ hkrã hto nhũm mẽ ra kãm hkôt pix mã amnhĩ nhĩpêx ho pa hprãm ã mẽ omunh kurê kumrêx. Anê.

Nhũm pre ã Jejus Nĩkotêja mã kapêr anê.

Juãw Paxis kot Jejus jarênh o pa hã harênh

Juãw 1.19-28

²² Tã pa mẽ ixpê Jejus kôt ri ixpa ho ixpa xwÿnhjaja Jejus kôt Jerujarê rũm ijapôj nê pika pê Jutej kwÿ kamã ixpa. Jejus nhÿ hã Tĩrtũm mã mẽ hkrã kumrãr o ri mẽ hkôt ixpa. ²³ Nhũm finat Juãw Paxis haxwÿja mẽ ixpyrà nê mẽ hkrã kumrãr o pa. Krĩ pê Sarĩ htã krĩ pê Enõ mÿri pyhti rax jakamã nhũm pre htem hwÿr mra nhũm kamã mẽ hkrã kumrã. ²⁴ Kormã mẽ kot haxãr kêt ri nhũm kamã mẽ hkrã kumrãr o pa.

²⁵ Rôm nhũm Ijaew hõja Juãw Paxis kôt mẽ pa ho mẽ pa xwÿnhjê hwÿr tẽ nê Juãw Paxis kot mẽ hkrã

kumrãr ã tanhmã mẽ hkukjêr to nhũm mẽ kuma nê tee ri hã axpên kukjêr o kuhê. ²⁶ Hãmri nê akupÿm Juãw Paxis wÿr tẽ nê kãm:

—Kwa mẽ ijahkre xwÿnh. Pyhti pê Jotãw nhĩkê hã ate mēhõ pumunh nê tanhmã mẽ inhmã harênh to xwÿnhnta kôt mẽ pa ho mẽ pa xwÿnhjaja na xep htem apyrã nê mẽ hkrã kumrãr o pa nhũm xep mẽ ra ohtõ nê mẽ pahkaga nê mẽ hkôt pa. Kwa xà ja amã mex nà? Anê.

²⁷ Hãmri nhũm mẽ kuma nê mẽ kãm:

—Tÿ ja mex kênã. Tĩrtũm kãm hprãm xà hkôt na htem mẽ hwÿr mra nhũm mẽ ixpãnhã mẽ hkrã kumrã. Nà ja mex. ²⁸ Ixpê Tĩrtũm kot mẽ pakaxyw ãm xwÿnh kêt. Na pa pre ra mẽ amã ja hã amnhĩ jarê ka prem inhma. Æm hkukamã na pre Tĩrtũm amnê inhmê pa mō nê ã jar ri ixpa anê.

²⁹ —Te ixte mẽ umre kot amnhĩ nhĩpêx pyrãk. Na htem axpên mã mẽ rer kaxyw nhũm mẽ umreja myta wÿr tẽ nê hpa hã kupy nê ma ni hwÿr o tẽ nê axpên mã wa kure. Hãmri nhũm hpãnhã mēhõja axpên tã wa hakre. Nhũm umreja wã kuri hkĩnh nê mar o xa. Tã te ixte mẽ umre kot amnhĩ nhĩpêx pyrãk jakamã koja mẽ ma Tĩrtũm kot mẽ pakaxyw ãm xwÿnhnta wÿr mra nê kapêr ma pa mẽ harênh ma nê ixkĩnh nê. ³⁰ Na htem mẽ umre hã hkĩnh kêt nê. Mjên nyw xwÿnhja ã na htem hkĩnh. Tã ja pyrã nê koja mẽ axte ixte mẽ kãm Jejus jarênh mar kaxyw ixwÿr mra kêt nê. Æm hwÿr koja mẽ hpãnhã mra nê tãm mar o kuhê. Ja mex kumrêx. ³¹ Jejus kêp kaxkwa rũm amnê mẽ pahwÿr wrÿk xwÿnh jakamã kot amnhĩ to rax o kot mẽ pahpiitã mẽ pajakrenh par. Mẽ papajaja mẽ pahpê pika nhõ xwÿnh jakamã Jejus kĩnhã mẽ pahte mēmoj piitã omunh tohtuj anhÿr. Nê pika nhõ xwÿnhjê jamaxpêr pix o paja-maxpêr o ri papa.

³²—Na hte Jejus mẽ kām kaxkwa kamã kot mẽmoj pumunh xwýnh kwýjê jarênh o pa. Nê kamã kot mẽmoj mar xwýnh kwý jarênh tâ nhũm mẽ ohtô nê kuma nê ãm kuma. ³³No mẽ kot mar nê amnhĩ kaxyw hkôt hamaxpêr xwýnhjaja na htem kuma nê axpên mã harênh o: “Nà ãm hãmri na ã Tirtũm kapêr jarênh anê. Nà Tirtũm kapêr mex kumrêx.” Anhÿr o axpên mã harê.

³⁴—Tirtũm na pre mẽ pahwÿr Jejus mẽ nhũm amnê mẽ pahwÿr wrÿ nê Tirtũm Karô nhÿ hã mẽ pamã kapêr jarênh o ri mẽ pahkôt pa. ³⁵Tirtũm kãm Krata japê htÿx kumrêx jakamã na pre ãhkram mẽmoj piitã haxâr pa nhũm uràk nê hihtÿx o hihtÿx nê mẽmoj piitã ho amnhĩptâr o pa. ³⁶Jakamã mẽ kot amnhĩ kaxyw hkôt hamaxpêr nê hkôt amnhĩ xunhwÿr xwýnhjaja koja mẽ nhÿrmã wa kuri htÿr tũm nê mex rãhã nê pa ho pa. No mẽ kot hkaga xwýnhjaja koja mẽ ã amnhĩ nhÿpêx anhÿr kêt nê. Koja Tirtũm mẽ kot amnhĩ xà htÿx kamã hamak tũm xàta wÿr mẽ rênh pa. Anê.

4

¹Tã nhũm Parijew nhô xwýnhjaja Jejus jarênh ma. Nê hkôt mẽ pa xwýnhjaja ohtô rax o Juāw Paxis kôt mẽ pa xwýnhjê jakrenh ã mẽ harênh ma. Nê Jejus kot mẽ hkrã kumrâr rax o Juāw Paxis jakrenh ã harênh ma. ²Nom Jejus na pre mẽ hkrã kumrâr kêt nê. ãm mẽ ixte hkôt ri mẽ ixpa ho mẽ ixpa xwýnhjaja na pa prem kãm mẽ hkrã kumrâr o ri ixpa. ³Jakamã nhũm Jejus amnhĩ tâ Parijew nhô xwýnhjê jarênh ma hãmri nê mẽ kêp kato nê hpãnhã ma akupÿm Garirej wÿr mẽ pa mẽ ma hkôt ixpa.

Mêhõ ni kot amnhĩ nhÿpêx nyw o amnhĩ nhÿpêx ã harênh

Juāw 7.37-39; mãânên Apokarip 22.1, 22.17

⁴Tã pa mẽ mẽ nê kormã pyka pê Samar mã axã nê hkôt ixpa. ⁵Hãmri nê krÿ pê Sika hwÿr ixpôx o mẽ. Amnepêm finat Jako kot hkra Juje mã pyka nhôr xwýnh tâ krÿja xa pa mẽ ra hwÿr ixpôx o mẽ. ⁶Nê amnepêm Jako kot gôm kakwÿnhnta wÿr pøj. Nhũm ra kaxkwa nhÿpök ri myt nhÿr mẽ nhũm Jejus ra mrar rÿy kurê hkêngrã nê. Hãmri nê gôm kakwÿnh my ri tẽm nê hkökôt o nhÿ. ⁷⁻⁸Hãmri pa mẽ kure nê mẽ ixãpkur xà japrôr kaxyw ma krÿm ijapêx.

Rôm nhũm Samar nhô xwýnh nija amnhĩm gô runh mã tẽ nhũm Jejus omu nê kãm:

—Kwa inhmã anhô gôta kwÿ pa ho ixkô. Anê.

⁹Nhũm amnhĩ jaêr pê amnhĩ tâ kuma. Ijaew na pre htem Samar nhô xwýnhjê kutã apkur rÿ mẽ hkôt ri pa rÿ mẽ ho mjên kêt nê. Rÿ mẽ kutã hkôm kêt nê. Tã nhũm Jejus ã gô hã nija wÿr anê nhũm tee ri amnhĩ tâ kuma nê kãm:

—Xê pêr apê Ijaew tâ axtem nê ri gô hã ixwÿ. Xà ate ixpê Samar nhô xwýnh ã ixpumunh kêt? Hãn ka ri hã ixwÿ. Anê.

¹⁰Hãmri nhũm kuma nê kãm amnhĩ jarê. No ãm amnhĩ tâ kuxi nê kãm kapêr nê kãm:

—Nà aprÿ hã ate ixpumunh ro nhÿx ka kam gô hã ixwÿ pa amã hkwy. Inhô gô na axte mã. Tirtũm kãm amarÿ mẽ amã ôr prãm. Na htem ho ixkô hãmri nê mex nê htÿr tũm nê pa ho pa. Anê.

¹¹Hãmri nhũm tee ri kot ã õ gô jarênh anhÿja ã kuma nê htÿx ho gôm kakwÿnh kamã gô hã hkamnhÿx nê tee ri hkukamã hamaxpêr nê kãm:

—Xê tanhmã kot ka kêt amnhĩ to nê inhmã gôta kwÿ janhi? Mo kaxyw anhô gô janhir xà? Gôm kakwÿnhnta upÿm rax kênã kot ka kêt tanhmã amnhĩ to nê hkwy janhi. Nhÿhÿnh kot ka anhô gô jarênh xwýnhnta kwÿ janhi pa ho

ixkō hāmri nē ixtīr tūm nē ixpa ho ixpa? ¹² Mē inhō gōm kakwýnhja amnepē mā mē panhīgēt finat Jako nhō gōm kakwýnh na pre. Jako hkwýjaja na prem hkakwý nhūm kamā gō kato nhūm pre htem hanhi nē ho hkōm o pa. Nē hkrajaja nē hkrit piitā ho hkōm o pa. Jakamā na pre mē ixpē hkanrēhā htāmnhwýjē mā hkaga. Tā xep axtem anhō gō. Mē kot ho hkōm nē htīr tūm kaxyw na xep. Jakamā xē xā ate amnhī to rax o mē panhīgēt Jako jakrenh mē? Anē.

¹³ Hāmri nhūm Jejus kām:

—Nā mē anhō gōta na htem ho ixkō nē arī kām kōr o pa. ¹⁴ No ixte amā gō jarēnh xwýnhhta kot ka hkwy ho ixkō hāmri nē axte amā kōr kēt kumrēx nē apa. Nhūm te akaxwýnh kām hinore hprōt pyrāk o ka amnhī nhīpēx. Hāmri nē te hinore kamā gōja aa grā hkēt pyrā nē aa ajapēx kēt kumrēx. Nhýrmā atyk tā akupým atīr nē atīr tūm nē amex rāhā apa ho apa. Anē.

¹⁵ Nhūm nija kuma hāmri nē kām:

—Xōwehe? Xē tō tokyx inhmā anhō gōta kwý. Pa ho ixkō nē axte inhmā kōr kēt nē ixpa. Nē axte amnē amnhīm gō janhīr mā inhm-rar kēt nē. Xē tokyx inhmā hkwy mē? Anē.

Týx gō kumrēx ā hkamnhīx nē ā hā àhwýr anē. ¹⁶ Hāmri nhūm kām:

—Tō ma akupým krīm tē nē amjēn japró nē man akupýn ixwýr wa tē. Anē.

¹⁷ Hāmri nhūm tee ri kuma nē kām:

—Ma mo inhmjēn? Inhmjēn kēt na pa hte ri ixpa. Anē.

Hāmri nhūm kām:

—Tý. Nā am hāmri na ka ā amnhī jarēnh anē. ¹⁸ Na ka pre ra amjēn kēp 5. Nē my mē ri war apa xwýnh ata te kēp amjēn pyrāk nom kēp amjēn kumrēx kēt. Anē.

¹⁹ Hāmri nhūm amnhī jaēr pē kot ā kām kapēr anhýrja ma hāmri nē kām:

—Xē pēr aprī hā ate ixpumunh par pyrāk. Mān apē Tīrtūm nhý hā kapēr jarēnh o mē pa xwýnhjē hō mán ka mē? ²⁰ Xē inhmā mēmoj jarē. Nhýhým kot paj wem axpēn kōt mra nē Tīrtūm mā mex o mex ā harē? Amnepē mā mē panhīgētjaja na prem hixēt mūj nhīmōk ā api nē hā kām amnhī jarē nē kām mex o mex ā harē. No mē apē Ijaew na ka htem krī pē Jerujarē pix kām mē ixte axpēn kōt mrrar nē ā amnhī nhīpēx anhýr ā mē inhmā karō. Xā hixēt nhīmōk ā mē ixte kām amnhī jarēnhja xā apē omnuj mē? Ma xā apē omnuj kēt? Anē.

²¹ Hāmri nhūm Jejus kām:

—Nā kot kaj mē nhýrmā am Jerujarē pix kām rý hixēt mūj nhīmōk pix ā axpēn wýr akupró nē Tīrtūm mā amnhī jarēnh kēt nē. ²² Mē apē Samar nhō xwýnhjaja mē ate Tīrtūm mā mex o mex ā harēnh o apa htā aprī hā kot amnhī nhīpēx ā omunh kēt. Nē tanhmā hamaxpēr to ho pa hā omunh kēt. No mē ixpē Ijaew na pa mē arom kot tanhmā amnhī nhīpēx to nē tanhmā hamaxpēr to hā omunh mex. Mē inhīō kukwak ri koja Tīrtūm mē kot hkōt amnhī xunhwýr xwýnh piitā nē mē kot amnhī tomnuj rēnh pa. ²³ Tā koja mē piitā Mēpahpām Tīrtūm mā mex o mex ā harēnh kaxyw nhýhým pa hkēt nē. Koja mē nhýri pa xā kamā mē ōpinh xā kaxwýnh kām ā kām amnhī jarēnh anhýr o pa. Ja na Tīrtūm kām hprām. No nhýhým mrrar nē nhýri kuhē xā pix kamā kām amnhī jarēnhja nhūm kām hprām kēt nē.

²⁴ —Nē Tīrtūmja mē pahpyrā nē ī hkēt jakamā na te kaxkwa nē pika piitā hkōt pa ho pa. Jakamā na htem nhýri pa nē ōpinh xā kaxwýnh kām amnhī kaxyw kām hamaxpēr nē kām mex o mex ā harē nhūm ra amnhī tā mē kuma. Á mē kot amnhī nhīpēx anhýrja na kām hprām. Anē.

²⁵ Nhũm pre ã Jejus nija mã kapër anê nhũm kuma nê kãm:

—Ma koja xep nhỹrmã Tĩrtũm kot mẽ pakaxyw ãm mã xwỹnh pê Krisja mẽ pahwỳr wrỳ hãmri nê hprĩ hã mẽ pamã mẽmoj piitã ho amnhĩrit pu mẽ kuma. Anê.

²⁶ Hãmri nhũm kãm:

—Kwa nhũm paa. Ixte amã ixkapër xwỹnhja ixpê Kris na pa. Jakamã na pa ixprĩ hã amã ã ixkapër anê. Anê.

²⁷ Nhũm pre ã kãm amnhĩ jarênh anhỹrja rôm pa mẽ ixte hkôt ri mẽ ixpa ho ixpa xwỹnhjaja ra ixujaprôr pa nê akupỹn hwỳr ixpôx o mra. Hãmri nê amnhĩ jaêr pê kot Samar nhõ xwỹnh nita mã kapër ã omu nê tee ri hkukamã ijamaxpër nom tanhmã hã hkukjêr to hkêt nê. Nija kêp Samar nhõ xwỹnh tâ nhũm ànnhĩx kãm kapër o nhỹ. Pa mẽ omu nê ãm omu nê tanhmã hã kãm nê hkêt nê. ²⁸ Hãmri nhũm nita gôm kakwỹnh mỳr ri õ poti re nê ma akupỹm krĩm tẽ nê hkwỳjê mã awjarê. ²⁹ Nê mẽ kãm:

—Xê mẽ tokyx ma ixkôt gôm kakwỹnh wỳr mra nê mỳ ri mẽhõ my mũj pumu. Tĩrtũm kot mẽ pahwỳr mẽnh mã xwỹnhnta na. Aa kot nhỹri ixpumunh kêt tâ kot hprĩ hã ixpumunh par. Ixte tanhmã amnhĩ nhĩpêx to hã ixpumunh par. Xê mẽ ma ixkôt mra nê ixpyrà nê kapër ã ama. Anê.

³⁰ Hãmri nhũm mẽ kuma nê ma hkôt Jejus wỳr mra kurê kumrêx.

³¹ Rôm pa mẽ ixte Jejus kôt ri ixpa ho ixpa xwỹnhjaja tee ri mẽ ixàpkur xà ho Jejus ma nê kãm:

—E ota mẽ panhõta. Kwa mẽmoj py nê aku mãn.

³² Anhỹr tâ nhũm mẽ inhma nê tanhmã mẽ inhmã amnhĩ jarênh to. Nom amnhĩ tâ kuxi nê amnhĩ jarê nê mẽ inhmã:

—Nà kormã. Inhõja axtem na. Mẽ ate inhõja pumunh kêt. Anê.

³³ Hãmri pa mẽ kuma nê tee ri hã axpên kukja nê axpên mã:

—Kwa mãn ra mẽhõ mẽ paxwakre kamã kãm mẽmoj to tẽ nhũm kukrê nà? Anê.

³⁴ Hãmri nhũm mẽ inhma nê mẽ inhmã:

—Nà mẽhõ kot kêt ri inhmã mẽmoj to mra pa kuku? Kot paj kot mẽ awỳr inhmênh xwỹnhnta mã tanhmã amnhĩ nhĩpêx to hãmri nê te ra ixàpkur mex nê hã ixihitỳx mex pyrãk o amnhĩ nhĩpêx. Tã kot paj ã kãm amnhĩ nhĩpêx anhỹr o ri ixpa rãhã ho ijapêx pa. Jao te ixàpkur rax pyrãk.

³⁵ Anhỹr o mẽ inhmã amnhĩ jarê. Hãmri nê ra Samar nhõ xwỹnhjaja mẽ ixwỳr mra ã mẽ omu nê mẽ inhmã tanhmã mẽ harênh to nom mẽ hã kuxi nê mẽ harê nê mẽ harênh o:

—Kot kaj mẽ axte mẽ atã mytwrỳ kêp 4 hãmri nhũm ra mẽ apur kãm mẽ anhõja hamỹnh mã tãm nê. Nom kormã. E ka mẽ pahwỳr mẽ mra xwỹnh nêj pumu. Ra mẽ kot amnhĩ kaxyw ixkôt hamaxpër nê ixkôt amnhĩ xunhwỳr mã tãm jakamã te mẽ apur kãm ra mẽ anhõ jamỹnh mã tãm pyrãk. Jakamã ka mẽ atõ ma mẽ hwỳr mõ nê mẽ kot amnhĩ kaxyw ixkôt hamaxpër nê ixkôt amnhĩ xunhwỳr kaxyw mẽ kãm ijarê. Hãmri nê te ate ixpur kãm inhmã inhõ jamỹnh xwỹnh pyrãk o amnhĩ nhĩpêx.

³⁶ —Jakamã koja mẽhõ kumrêx mẽ hwỳr tẽ nê mẽ kãm Tĩrtũm kapër jarê hãmri nê te kêp õ pahi mã hpur kãm ahkre ho pa pyrãk. Nhũm mẽ kot mar xwỹnhjaja kuma nom kormã hprĩ hã mar tỳx kêt nê. Tã kot kaj mẽ atõ wamta kôt mẽ hwỳr tẽ nê mẽ kot ixkôt amnhĩ xunhwỳr kaxyw aprĩ hã mẽ kãm ijarênh o mẽ hkôt apa hãmri nê te apê mẽ anhõ pahi mã hpur kãm axujamỹnh xwỹnh pyrãk. Hãmri nhũm mẽ hkwỳjaja mẽ ama nê ixkôt amnhĩ xunhwỳ nê ixkôt ri amnhĩ nhĩpêx o pa. Hã koja nhỹrmã mẽ apyrã nê Tĩrtũm mẽ wa ixri mex rãhã nê htĩr tũm nê pa ho pa.

Ka mē amnhī tā mē omu nē akīnh nē apa. Te mē kot mē hpur kām ahkre xwýnhjaja nē mē kot hamýnh xwýnhjaja mēō rūnh pumunh nē hkīnhhta pyrāk.

³⁷ —Na htem tōhā ā mē pur kām mē àpēnh xwýnhjē jarēnh anē nē mē harēnh o: “Axtem mē ahkre xwýnhjaja nē axtem mē kot hamýnh xwýnhjaja.” Anē. Tā te mē ate mē ujarēnh ja pyrāk. ³⁸ Na pa pre ra ma mē hwýr mē arē. Mē ate aprī hā mē kām ijarēnh nhūm mē kot mē amar nē amnhī kaxyw ixkôt hamaxpēr nē ixkôt amnhī xunhwýr kaxyw. Nom mē kajaja na ka prem akumrēx mē hwýr amrar nē mē kām ijarēnh kēt nē. Tirtūm kapēr jarēnh o mē pa xwýnhjaja na prem kumrēx mē hwýr mra nē ixkukamā mē kām ijarēnh o ri mē hkôt pa. Te mē kot hpur kām ahkre ho pata pyrāk. Tā kot kaj mē hpānhā mē kot amnhī kaxyw ixkôt amnhī xunhwýr kaxyw aprī hā mē kām ijarēnh o apa. Jakamā te mē ate mē hpur kām mēō jamýnh xwýnh kot amnhī nhīpēxta pyrāk. Anē.

Mē hkwy kot amnhī nhīpēx nyw o amnhī nhīpēx ā mē harēnh

Sikūn Korīt 5.17; Wam Juāw 4.14

³⁹ Rōm nhūm Samar nhō xwýnh kwýjaja nija kot mē kām amnhī jarēnh ma hāmri nē urāk nē amnhī kaxyw Jejus kôt hamaxpēr. Na pre ra amnhī tā tanhmā mē kām Jejus jarēnh to nē mē kām harēnh o:

—Ma aa kot nhýri ixpumunh kēt tā ra kot hprī hā ixpumunh par. Ixte tanhmā amnhī nhīpēx to hā ixpumunh par.

Anhýr jakamā nhūm mē kuma nē urāk nē amnhī kaxyw hkôt hamaxpēr kurē kumrēx.

⁴⁰ Hāmri nē man mē ixwýr mra nē Jejus pumu nē amnhī wýr kuwý nē kām:

—Pa. E kwa mē tokyx anojarēt kēt nē. Mē ma mē ixkôt mē inhō krī

hwýr mō nē mē ixkôt ri apa grire nē arī ma mō. Anē.

Hāmri nhūm mē kuma nē mē kām:

—Tōe. Nà kot paj mē anē. Anē.

Hāmri pa mē ma mē hkôt mō nē mē ō krī kamā mē hkôt ri ixpa hā apkati axkrut. ⁴¹ Nhūm Jejus mē kām Tirtūm kapēr jarēnh o ri mē hkôt pa nhūm mē axte ohtō nē kuma nē nita pyrā nē hkôt amnhī xunhwý. ⁴² Hāmri nē nita wýr mra nē kām:

—E nā ām hāmri. Akumrēx na ka mē inhmā Jejus o amnhīrit. Pa mē akôt ma hwýr mra nē mē pam omu nē kapēr ā kuma. Jao apyrā nē amnhī kaxyw hkôt ijamaxpēr nē hkôt amnhī xunhwý. Pēr ām hāmri kēp pyka piitā hkôt mē pahte amnhī tomnuj pānhā amnhīrer mā xwýnhhta na. Anē.

Garirej nhō xwýnhjaja kot Jejus pumunh ā mē harēnh

Matēwre 13.57

⁴³ Tā pa mē Jejus kôt Samar rūm ixkato nē ma pika pē Garirej wýr mō. Kamā Jejus nhō krī pē Najare htā pa mē hwýr inhmōr kēt nē. ⁴⁴ Na pre ra Jejus mē inhmā tanhmā ō krī nhō xwýnhjē jarēnh to nē mē harēnh o:

—Tirtūm nhý hā kapēr jarēnh o mē pa xwýnhjaja na htem amnhī nhō krī kamā mē kām Tirtūm kapēr jarēnh o pa nhūm mē kuma nē ām kuma. Jakamā kot paj Najare hwýr inhmōr kēt nē. Mē kām ixkapēr mar prāmre hā.

⁴⁵ Anhýr jakamā na pa prem hwýr inhmōr kēt nē. Pānhā nhām krī hō hwýr mō nē hwýr pōj hāmri nhūm mē amnhī wýr Jejus pumu nē hkīnh nē. Na prem ra krī pē Jerujarē kamā arīgro pē Pas ā mē hkīnh kām tanhmā kot amnhī nhīpēx to ho pa hā omu. Jakamā amnhī wýr omu nē hkīnh nē.

Jejus kot mēhō hkra ho mex ā harēnh

46 Tã pa mẽ kormã Garirej kamã ixpa nẽ akupỹm krĩ pẽ Kanã hwỳr mō. Kamã na pre Jejus mẽ kãm gō ho wĩhti nhĩpêx. Jakamã pa mẽ akupỹm mẽ hwỳr mō. Nhũm mẽō pahĩ nhõ kōwenatôjê hõ hkra myja kêp à htỳx nẽ nõ. Nom Kanã kamã hkêt axtem krĩ hõ pẽ Kapanau kamã. 47 Jakamã nhũm hipêêxàja tee ri hkra pumu hãmri nẽ ra Jejus kot Jutej rũm Kanã hwỳr hpôx ã harênh ma nẽ hkra kaxyw kãm hamaxpêr nẽ ma hwỳr mōr kurê kumrêx. Hãmri nẽ nhỹri omu nẽ hwỳr tẽ nẽ kãm kapêr kãm hihtỳx nẽ kãm:

—Pa. E ot pa awỳr tẽ. Na ra ixkra ixpê htyk kaxyw. Kwa ixkamã axukapri nẽ ma ixkôt mō nẽ akupỹm inhmã ho mex. Anẽ.

48 Hãmri nhũm kuma nẽ kãm:
—Kwa pêr ãm ixte mẽ amã aa mẽ ate mẽmoj pumunh kêt kwỳ ho anhỹr ã ixpumunh kêt pix mã na ka htem amnhĩ kaxyw ixkôt ajamaxpêr. Nom amarĩ amnhĩ kaxyw ixkôt ajamaxpêr kêt nẽ. Anẽ.

49 Hãmri nhũm tee ri kuma nẽ kãm:

—Kwa tokyx. Kot kaj tokyx ixkôt amōr kêt koja ixpê ty. Anẽ.

50 Hãmri nhũm kãm:

—Nà koja apê htyk kêt nẽ. Ra ixte akupỹm amã ho mex kênã. Mãmri ma akupỹm mō nẽ tokyx omu. Na ra akupỹm amã mex. Anẽ.

Hãmri nhũm kuma nẽ kaxyw hkôt hamaxpêr kurê kumrêx nẽ ma akupỹm hwỳr mō. Nẽ mōr o apkati. 51 Nẽ kormã õ krĩ hwỳr hpôx o mōr ri nhũm ra kãm mẽ àpênh xwỳnhjaja kutã mra nẽ nhỹri pry hã hkaxpa nẽ kãm:

—Pa. Kwa na ra akra hkà hakry nẽ akupỹm amã mex. Anẽ.

52 Hãmri nhũm mẽ kuma nẽ hkĩnh tỳx nẽ. Nẽ mẽ kãm:

—Kwa xō wehe? Mẽmo ore hã na pre we ra hkà hakry? Anẽ.

Nhũm mẽ kãm:

—Nã jãã na pre kaxkwa nhĩpòk ri myt nhỹ nhũm hkà hakry nẽ

akupỹm amã mex kurê kumrêx. Anẽ.

53 Hãmri nhũm mẽ kuma nẽ mẽ kãm:

—Hêxta waa nẽ. Kwa pêr ãm hãmri Jejus kot inhmã akupỹm mex ã harênh xà hã ore kamã na pre akupỹm inhmã mex. Nã ãm hãmri. Anẽ.

Hãmri nẽ amnhĩ kaxyw Jejus kôt hamaxpêr kurê kumrêx. Nhũm òrkwỳ kamã ri mẽ pa xwỳnhjaja urak nẽ amnhĩ kaxyw hkôt hamaxpêr.

54 Nhũm Jejus ã kãm hkra ho mex anẽ. Na pre ra pika pẽ Garirej kamã mẽ kot mẽmoj pumunh kêt õ ho anhỹr o tipxi nẽ mẽ kãm gō pix o wĩhti nhĩpêx. Tã ra pyka pẽ Jutej rũm akupỹm mẽ hwỳr mō nẽ ã akupỹm mẽ hkrata o mex anẽ.

5

Jejus kot himô mỳ ri akupỹm mẽhõ ho mex ã harênh
Juãw 7.23, 10.30-33

1 Tã mẽ ixpê Ijaew mẽ ixte Tirtũm ã ixkĩnh kaxyw Jerujarê hwỳr akuprõ nhũm Jejus haxwỳja ma hwỳr mō. Pa mẽ hkôt mẽ ixpa ho mẽ ixpa xwỳnhjaja ma hkôt mō.

2 Jerujarê kamã na himôja hikwỳ. Nhỹhỹnh mẽ kot krĩ hwỳr ôwêhti ho giêx xà htã hikwỳ. Himôja nhĩxi pẽ na Petes. Nẽ pu hã mẽ à xwỳnhjê nhĩkwỳ xà hã ixkre kêp 5. 3 Piitã kamã na pre hte tanhmã mẽ à kute xwỳnhjaja hikwỳ. Mẽ nohkre xwỳnhjaja nẽ mẽ hyk o mẽ pa xwỳnhjaja nẽ mẽ i kamã mẽ htyk xwỳnhjaja. ãm ahpỹnhã tanhmã mẽ à kute xwỳnhjaja ixkre hkwyja kamã akupỹm mex prãm xà hikwỳ. 4 Na pre hte Tirtũm kapêr o mẽ wrỳk xwỳnhja tōhã himô hwỳr wrỳ nẽ gō xok. Hãmri nhũm mẽ à xwỳnhjê hõ kot amnhĩ to wa nẽ kumrêx hwỳr wrỳk nẽ kamã mrõr xwỳnhja akupỹm mex.

Kwỳjê rom akupỹm mex kurê kumrêx. Jakamã nhũm pre hte mẽ

à xwýnhjaja akupým mex prām xàj gô xok jamār o hikwý. ⁵ Jakamā nhūm mēhō myja ixkre hō kamā hikwý. Te omnuj nē arī hikwý hā amgrà xohtō rax nē. Ra hā amgrà kēp 38. ⁶ Jakamā nhūm Jejus mē hwýr tē nē omu. Nē hprī hā omu nē hamaxpēr o:

—Kwa mūj na hte omnuj nē ri pa hkēt ā amgrà xohtō rax nē. E pa akupým ho mex.

Anhýr o hamaxpēr hāmri nē kām:

—Pa. E kwa inhmā amnhī jarē. Xà amā akupým amex prām? Anē.

⁷ Hāmri nhūm kuma nē kām:

—Ku nhūm. Inhmā tokyx akupým inhmex prām tỳx kumrēx kēnā. No mēhō kot tokyx inhmý nē mē kēp ixto wa nē ixkumrēx gô xok kamā inhmōr? Na pa tee ri ixkumrēx hwýr ixtēm nē inhmā inhmōr prām nhūm mē xatā ixpē amnhī to wa nē mra nē kamā mrō. Anē.

⁸ Hāmri nhūm Jejus kām:

—Tý? Tōe. E na ka akupým amex. E kànhmā xa nē akupīp py nē ma akupým anhōrkwý hwýr tē. Anē.

⁹ Hāmri nhūm kuma nē ra akupým mex nē kànhmā xa nē ri mra. Nē hkính tỳx nē hikupīp py nē ma akupým ōrkwý hwýr tē. Ijaew nhō arīgromnu pē sap ā nhūm Jejus kot akupým ho mex ¹⁰ nhūm ma akupým pry hā hikupīp py nē o tē. Nhūm Ijaew nhō pahī hkwyja nhýhýnh mra nē tee ri kot sap ā hpyr nē o htēm ā omu nē kām:

—Tk. Kwa mē pahpē Ijaew na pu htem mē panhō arīgromnu hā paxápēnh kēt nē. Finat Mojex kot ja nē mē pahkurē htā ka axtem nē akupīpta py nē nhýhým o tē. Anē.

¹¹ Hāmri nhūm mē kuma nē mē kām:

—Tý. Kot anhýr tā kot ixto mex xwýnhta na ā inhmā kapēr anē pa mar xà hkôt kupy nē akupým inhōrkwý hwýr tē. Anē.

¹² Hāmri nhūm mē tee ri kuma nē kām:

—Kwa mēhō na we ā ri amā karō anē? Anē.

¹³ Nhūm kormā kot Jejus nhīxi mar kēt jakamā kot mē kām ahkre kaxyw hakēx nē tee ri hkwyjē kaēx ā hapēr rīt o xa. Nom nhūm mē ohtō nē pry hā mrar jakamā nhūm tee ri hapēr nhūm Jejus ra ma nhýhým tē.

¹⁴ Tā nhūm hā ahtümre nhūm Jejus Tirtüm mā amnhī jarēnh xà hā ixkre hwýr tē nē axà nē kot ho mex xwýnhta pumu nē kām:

—Pa. E na ka ra akupým amex. Nom kwa kēr ka axte tanhmā amnhī tomnuj to ho ri apa hkēt nē. Kot kaj axte ā amnhī nhípēx anē hāmri nē apunuj tỳx o wam ate apunujta jakre kām ga. Anē.

¹⁵ Hāmri nhūm kuma nē ma tē nē kato. Nē ma mē ō pahijē hwýr tē nē mē kām:

—E na pa ra kot ixto mex xwýnhta nhīxi ma. Xep kēp Jejus. Anē.

¹⁶ Hāmri nhūm mē hixi ma nē hā tanhmā axpēn mā ho kapēr punuj to. Mē ō arīgromnu hā kot mē ho mex o pa jakamā nhūm mē axpēn jakwa kamā ri hixi ho rē nē nhýri omu nē tanhmā hā kām àkjēr to. ¹⁷ Hāmri nhūm amnhī tā mē kuma nē mē kām:

—Ku nhūm. Inhípêxà Tirtüm na hte apkati mē tanhmā mē pahto mex to ho pa. Jakamā pa hte urāk nē ā mē ho mex rāhā ho ri ixpa anē nē aa mēmo arīgro hā ja ho anhýr kaga hkēt nē.

¹⁸ Anhýr o mē kām amnhī jarē nhūm mē kuma nē kamā gryk tỳx nē. Nom mē ō arīgromnu hā kot mē ho mexja pix mýrapē kamā gryk kēt. Māānēn Tirtüm kēp hipêxà hā harēnhja mýrapē nhūm prem kamā gryk tỳx kumrēx nē axpēn mā:

—Tk. Kwa na ā amnhī jarēnh anhýr jao te kēp Tirtüm pyrāk ā amnhī jarē. E kwa pu mē kupī ri. Anē.

Tirtùm Kra kot Hipêêxà nhÿ hã amnhĩ nhÿpêx ã harênh
Juãw 14.10-13

¹⁹ Hãmri nhÿm Jejus axte mẽ kêp Ijaew nhô pahijê mã kapêr nê mẽ kãm:

—Na pa hte amnhĩ krã hkôt tanhmã amnhĩ nhÿpêx to ho ri ixpa hkêt nê. Na pa hte Inhÿpêêxà kot tanhmã amnhĩ nhÿpêx to hã omunh xà hkôt uràk nê mẽ ho mex o ri ixpa. Kwa mẽ amnhĩ krã him ja jaxà nê kãm ajamaxpêr tÿx nê ho apa.

²⁰ —Inhÿpêêxàja kãm ijapêê. Na hte inhmã kot tanhmã mẽ ho mex to piitã ho amnhÿrît. Ixte omunh nê uràk nê ÿ hã tanhmã mẽ ho mex to ho ri ixpa kaxyw. Jakamã kot paj ãm akupÿm mẽ à xwÿnhjê ho mex pix o ri ixpa hkêt nê. Kot paj mãânênh mẽ kãm mẽmoj mex o ja jakrenh o anhÿr o ri ixpa ka mẽ hã ixpumu nê ixkamã ano puma ho apa.

²¹ —Nê Inhÿpêêxà kot akupÿm mẽ htyk xwÿnhjê ho htÿr jakamã kot paj uràk nê akupÿm mẽ htyk xwÿnhjê ho htÿr o ri ixpa. Anê.

Mê htÿr tÿm nê mẽ pa mã xwÿnhjê jarênh

Juãw 3.16-17, 3.36, 6.27, 6.40, 6.60, 10.28, 17.2-3; Rômãn 6.23; Karatas 6.8; Xitre 1.2; Wam Juãw 2.25, 5.11-13

²² Nhÿm Jejus arÿ mẽ kêp Ijaew nhô pahijê mã kapêr nê mẽ kãm:

—Koja nhÿrmã Inhÿpêêxàja mẽ htÿr tÿm nê mẽ pa ho mẽ pa mã xwÿnhjê jarênh kêt nê. Ja kaxyw na pre pa ixãm. ²³ Tã mẽ piitã mẽ kot ja hã ixpumunh nê ixtã hpijaãm o ri pa kaxyw na pre mẽ kaxyw ixãm. Te mẽ kot Inhÿpêêxà hã hpijaãmta pyrã nê pa ixtã hpijaãm o pa kaxyw. Jakamã koja mẽhõ ixtã hpijaãm kêt nê hãmri nê mãânênh Inhÿpêêxà hã hpijaãm kêt ã amnhĩ to amnhÿrît. Tãm kot mẽ awÿr inhmênh kênã. ²⁴ Jakamã koja mẽhõ ixkapêr ma nê amnhĩ kaxyw

kot mẽ awÿr inhmênh xwÿnhnta kôt hamaxpêr nê ixkôt amnhĩ xãm. Hã koja nhÿrmã htyk tã ma mẽ kot amnhĩ xà htÿx kamã hamak o pa htÿm xàta wÿr mör kêt nê. Koja Inhÿpêêxà akupÿm ho htÿr nhÿm wa ixri htÿr tÿm nê mẽ mex kumrêx nê pa ho pa. Jakamã koja mẽhõ ixkôt amnhĩ xãm hãmri nê ra kêp wa ixri htÿr tÿm nê pa ho pa mã xwÿnh. Kwa mẽ jam ajamaxpêr tÿx rãhã ho apa.

²⁵ —No mẽ kãm ixkapêr mar prãm kêt xwÿnhjaja kêp Inhÿpêêxà mẽ wa ixri mẽ htÿr tÿm nê mẽ pa mã xwÿnh kêt. Tã ixpê Tirtùm Kra jakamã koja mẽ ixkapêr ma nê ixkôt amnhĩ xunhwÿ. Hã kot paj amnhĩ tã mẽ omu nê mẽ htÿr tÿm nê mẽ pa mã xwÿnh ã mẽ harê nhÿm mẽ ãmnhÿx ri hkÿnh nê pa ho pa. Kwa mẽ jam ajamaxpêr tÿx rãhã ho apa.

²⁶ —Nê Inhÿpêêxà tãm kêp mẽ ho mẽ htÿr xwÿnh. Tã ixpê Kra jakamã na pre amnhĩ pyrã nê ja kaxyw ixãm.

²⁷ —Ra kot mẽ akaxyw ixãm jakamã na pre mãânênh ixte tanhmã mẽ ajarênh to kaxyw ixãm. Wa ixri mẽ atÿr tÿm nê apa ho apa mã xwÿnhjê hã mẽ ajarênh rÿ wa ixri mẽ atÿr tÿm nê apa hkêt mã xwÿnhjê hã mẽ ajarênh kaxyw. ²⁸⁻³⁰ Jakamã kot paj nhÿrmã ra mẽ htyk nê mẽ hikwÿ xwÿnh piitã mẽ kãm ixkapêr nhÿm mẽ inhma. Koja mẽ ixkapêr ma hãmri nê akupÿm htÿr nê pika rÿm hapôx pa. Hãmri nhÿm mẽ kot kormã htÿr ri Tirtùm kapêr kôt amnhĩ nhÿpêx hkêt xwÿnhjaja mẽ kot amnhĩ tomnuj mÿrapê ma mẽ kot amnhĩ xà htÿx kamã hamak tÿm xàta wÿr ma hapêx pa. Nom nhÿm mẽ kot amnhĩ to mẽ xwÿnhjaja. Ra mẽ kot Tirtùm kôt amnhĩ nhÿpêx jakamã koja mẽ ma Tirtùm mẽ wa ixwÿr api nê wa ixri mẽ nê hkÿnh rãhã htÿr tÿm nê pa ho pa.

—Kot paj ja kaxyw tanhmā mē apiitā mē ajarēnh to. Nom kot paj amnhī krā hkôt inhmā hprām xā hkôt tanhmā mē ajarēnh to hkêt nē. Kot paj Inhīpêêxā kot mē awÿr inhmēnh xwÿnhhta nhÿ hā àhpumunh tÿx xā hkôt tanhmā mē ajarēnh to. Jao ām hāmri mē ajarē. Kwa mē jam ajamaxpēr tÿx nē. No ā ixte mē amā amnhī jarēnh anhÿrja ma nē tee ri ajamaxpēr kêt nē. Anē.

Mē kot Jejus kēp Tirtūm Kra hā harēnh xwÿnhjê jarēnh

Juāw 8.18; Wam Juāw 5.6-8

³¹ Nhūm Jejus arī mē kēp Ijaew nhō pahijē mā kapēr nē mē kām:

—E na pa ra tanhmā mē amā amnhī jarēnh to. Nom kop ām papxipix ixte ā amnhī jarēnh anhÿr ronhÿx ka mē inhma nē ajamaxpēr o: “Ko. Na apu ām hāmri ā mē inhmā amnhī jarēnh anē rÿ apu ām amnhī to hêx.” Anhÿr o ajamaxpēr. ³² Nom papxipix na pa hte ā amnhī jarēnh anhÿr kêt nē. Inhīpêêxā haxwÿja na hte ā ijarēnh anē. Nē ām hāmri na hte tanhmā ijarēnh to ho pa. Tirtūmja hêx kêt. ³³ No mē amā pika nhō xwÿnhjê pix kapēr mar prām jakamā na ka prem finat Juāw Paxisja wÿr akwÿjê rē nhūm mē ma hwÿr mra nē ixtā hukukja nhūm mē kām tanhmā ijarēnh to. Nē hprī hā mē kām ijarē. ³⁴ No mē apē pika nhō xwÿnhjaja mē ate axpēn mā tanhmā ijarēnh toja na ixpê tanhmā kute hkêt. Koja mēhō tanhmā ixto kapēr punuj to rÿ tanhmā ijarēnh mex to pa amnhī jarēnh ma nē tee ri amnhī kukamā ijamaxpēr o ixkaprī hkêt nē. Tā nom Juāw Paxis kapērja mē amā mex jakamā na pa ā mē amā harēnh anē. Ka mē ra kot tanhmā ijarēnh toja ma nē amnhī kaxyw ixkôt ajamaxpēr nē ixkôt amnhī xunhwÿ nē nhÿrmā ty nē ma mē kot amnhī xā htÿx kamā hamak tūm xāta wÿr apa hkêt nē.

³⁵ —Juāw Paxis na pre te kanē hpôk mex nē mēmoj to amnhīrīt mex pyrā nē mē amā Tirtūm kapēr o amnhīrīt mex o pa. Ka prem te maripôtre kot kanē hā htu pyrā nē hwÿr akuprō nē mar o akuhê. Nom hkôt ajamaxpēr tÿx kêt nē. ³⁶ Na pre hprī hā mē amā ijarēnh o ri pa.

—Tā pa pam mē awÿr wrÿ nē Inhīpêêxā nhÿ hā mē akamā aa mē ate mēmoj pumunh kêt kwÿ ho anhÿr o ri ixpa. Mē ate ja hā ixpumunh nē Inhīpêêxā tām kot mē awÿr inhmēnh kôt ixpumunh kaxyw.

³⁷ —Nē Inhīpêêxāja määnēn ixpê Kra hā mē amā ixto amnhīrīt. Ra mē anhōpinh xā kaxwÿnh kām kot mē amā ixto amnhīrīt tā ka mē ama nē ām ama nē ixkôt ajamaxpēr kêt nē. ³⁸ Mē amā mē ate hkôt amnhī nhīpêx o apa hprām kêt. Mē ate kapēr mar tÿx ronhÿx ka mē ixkapēr ma nē amnhī kaxyw ixkôt ajamaxpēr kurê kumrêx. Ixpê Tirtūm kot mē awÿr inhmēnh xwÿnh kēnā.

³⁹ —Nē Tirtūm kapēr ā kagā htūm haxwÿja kot tanhmā ijarēnh to. Ka htem wa ixri atīr tūm nē apa ho apa hprām xāj kamā harēnh rāhā ho ri apa. Nē kot tanhmā pa ijarēnh to htā ka mē ixkapēr ma nē amnhī kaxyw ixkôt ajamaxpēr kêt nē. Anē.

Ijaew nhō pahijaja kot Jejus kaga hā mē harēnh

⁴⁰ Nhūm Jejus arī mē kēp Ijaew nhō pahijē mā kapēr nē mē kām:

—Nē pa na ixte Inhīpêêxā mē wa ixri ixte mē ho mē htīr tūm nē mē pa mā xwÿnh ā mē harēnh tā ka mē amnhī kaxyw ixkôt ajamaxpēr kêt nē. ⁴¹ Nom mē ate inhmex ā ijarēnh kêt tā ja ixpê tanhmā kute hkêt. Ām Inhīpêêxā pix kot inhmex ā ijarēnhja na inhmā hprām. ⁴² Ra ixte mē apumunh mex. Mē amā Tirtūm kīnh kêt. ⁴³ Tām kot mē awÿr inhmēnh tā ka mē ixpumu nē ixk-aga nē ixkôt amnhī nhīpêx kêt nē.

Nom koja mēhō amnhī krā hkôt mē awȳr tē nē tanhmā mē ajahkre hto ka mē ama nē hkôt amnhī nhīpēx kurē kumrēx.

⁴⁴—Ām pika nhō xwýnh pixjaja kot mē amex ā mē ajarēnhja na mē amā hprām. No Tirtūm kot amnhīm mē amex ā mē ajarēnhja mē amā hprām ā mē ate amnhī jarēnh tā mē amā ja prām kêt. Jakamā na ka htem ixkaga kumrēx. ⁴⁵⁻⁴⁶Tā nom kot paj pam nhỹrmā Tirtūm mā mē apē ixkwý hkêt ā mē ajarēnh kêt nē. Mo kaxyw kot pa kêt ri ā kām mē ajarēnh anē? Finat Mojes tām koja ja hā kām mē ajarē. Na ka htem tanhmā ajamaxpēr to nē ajamaxpēr o: “Kot paj finat Mojes kot mē inhmā tanhmā kapēr to hkôt amnhī nhīpēx o ri ixpa hāmri nē nhỹrmā Tirtūm ri ichtīr tūm nē inhmex nē ixpa ho ixpa.” Anhỹr o ajamaxpēr nom hkôt amnhī nhīpēx kêt nē. Mojes na pre hte pa ijarēnh o pa. Tā mē ate kapēr kôt amnhī nhīpēx ronhỹx ka mē amnhī kaxyw ixkôt ajamaxpēr nē ixkôt amnhī xunhwý. No mē ate ixkaga jakamā koja Mojes tām Tirtūm mā mē apē ixkwý hkêt ā mē ajarē. ⁴⁷Mē ate Mojes kapēr kôt amnhī nhīpēx kêt jakamā kot kaj mē määnēn ixkôt amnhī nhīpēx hkêt nē. Anē.

Nhūm pre ā Jejus Ijaew nhō pahijē mā kapēr anē.

6

Jejus kot mē ho 5.000 nē mē kām mē ō hā harēnh

Matēwre 14.13-21; Makre 6.30-44; Rukre 9.10-17

¹⁻⁴Tā nhūm ra arīgro pē Pas ahtēp o mō. Pasja ā mē ixpē Ijaewjaja na pa htem axpēn wýr akuprō nē hā ōwēhti hkra nyw kwý pa nē ī hkur o ixkrī. Amnepēm Tirtūm kot pika pē Ejit rūm mē inhīgētjē kator kaxyw nhūm prem nojarēt nē ā hkwy hpar nē ī hkur anē. Tā arī mē ixpē mē hkanrēhā mē htāmnhwýjaja jam ijamaxpēr pē

ixkīnh kaxyw ā amnhī nhīpēx anē. Jakamā nhūm Jejus pàr krem axà nē ma himō pē Garirej ā rēr kaxyw ma xarmā mō nē rē. Himōja nhīxi hō pē na Tipe nhūm hā xarmā mō nē rē. Pa mē hkôt ixpa ho ixpa xwýnhjaja ma hkôt ixpa.

Hāmri nhūm pika nhō xwýnh kwýjaja Jejus ma mōr kām omu hāmri nē ma gō kape hā pikap mē inhīhkrep mra. Na pre ra Jejus mē kamā mē à xwýnhjē ohtō nē akupým mē ho mex nhūm mē axte omu hāmri nē ma mē inhīhkrep gō mý ri hpar o pa.

Tā pa mē xarmā rē nē pàr rūm ijapōj nē gō mý ri kýxpē ixkrī hpa.

⁵Hāmri nhūm mē inhīhkrep mē mrar xwýnhjaja mē ixwýr hpōx o mra nhūm Jejus amnhī wýr mē omu nē mē inhīō pē Firipti mā kapēr nē kām:

—Kwa Firip. Mēmoj kot puj mē pahwýr mē mōr nējje mā ho anē nhūm mē kuku? Tanhmā kot puj mē amnhī to nē nhỹri mē kām mēmoj japrō nhūm mē kuku? Anē.

⁶Ra tām kot tanhmā mē kām ō hto hā amnhī pumunh mex tā ā mē hā Firipti kamā hamak kaxyw mē hā hkukjēr anē. ⁷Hāmri nhūm kuma nē tee ri mē hkukamā hamaxpēr nē kām:

—Konēn. Mē ohtō rax kumrēx kēnā. Mo mē kaxyw mē pakāxpore rax? Kot pu mē pakāxpore ho 200 nē ho mē kām mēmoj japrōr tā nhūm mē ām ho hkryre nē kuku nē ho ōhy htu hkêt nē. Mē ohtō rax o mē ohtō rax kēnā. Anē.

⁸⁻⁹Hāmri nhūm mē inhīōja kuma nē Jejus wýr tē nē kām kapēr. Simāw Pētre htō Andreja hwýr tē nē kām:

—E ota mēhō hkrata amnhī kôt ō hkwy ho mō. No ām grire. Na pāwti kēp 5 nē kaxyw ō tep axkrutre. No mē ohtō gri ā kot kêt mē hipēx pa. Anē.

¹⁰Hāmri nhūm kuma nē hkôt mē ixpa ho mē ixpa xwýnhjē mā kapēr nē mē inhmā:

—Tôe. Nà hāmri. E mẽ kām anê kêm mẽ hkrĩ pa. Anê.

Hāmri pa mẽ kām anê nhũm mẽ pò kamā hkrĩ hpa. Na prem ohtô kumrêx. Měmyjê pixjaja kêp 5.000. Nê kaxyw mẽ hprô nê mẽ hkrajaja. Na prem ohtô ho ohtô. Tã piitã hkrĩ pa. ¹¹⁻¹² Hāmri nhũm Jejus mẽhõ hkrata pê õ pãwti jamy nê o xa nê Tĩrtũm mã harê nê kãm:

—Pa Papaj. Na ka hte mẽ inhmã mẽ inhõ ho apa. Âm kapxipix amex o amex. Anê.

Hāmri nê mẽ inhmã pãwtija gõ pa mẽ ô ri mẽ hkrĩ xwýnhjê mã õr o mra nê ho mẽ piitã mẽ hipêx pa. Pãwtija âm hkryre htã nhũm Jejus tanhmã ho nhũm ra ohtô rax kumrêx. Jakamã pa mẽ ô ri mẽ kãm õr o mra nê ho mẽ piitã mẽ hipêx pa. Nhũm Jejus hpãnhã tep axkrutreta py nê mã ho anê nê Tĩrtũm mã harê hāmri nê amnhĩ xô ri mẽ inhmã kugõ pa mẽ mã ho anê nê. Te ho pãwti nhĩpêx pyrã nê ho mẽ piitã mẽ hipêx. Hāmri pa mẽ ixpiitã apku nê inhõhy htu nhũm arĩ mẽõ jakrêx kwý hprã. Hāmri nhũm Jejus mẽ inhmã:

—E kwa mẽ hkõt mra nê mẽõ jakrêx o akuprõ kê omnu hkêt nê. Anê.

¹³ Hāmri pa mẽ kuma nê ho akuprõ nê kawà o 12 nê ho nýt. Pãwti hkryreja âm kêp 5 pix tã nhũm Jejus tanhmã ho nhũm rũnh kumrêx. Jakamã pa mẽ hakrêx prãr o kawà ho 12 nê ho nýt pa. ¹⁴ Hāmri nhũm mẽ inhĩhkrep mẽ mõr xwýnhjaja amnhĩ jaer pê Jejus kot mẽ kãm mẽõ ho rax ã omu nê ri axpên mã harênh o:

—Kokýy. Tãm mãn pre finat Mojesja amnepêm mẽ panhĩgêjtê mã harênh o ri pa. Tã ra mẽ pahwýr wrý nà? ¹⁵ Kwa pu mẽ kãm pakapêr kãm paxihtýx nê ma akupým amnhĩ kõt o mõ nê amnhĩ kaxyw âm kê mẽ pahto amnhĩptãr o pa. Anê.

Hāmri nhũm Jejus amnhĩ tã mẽ kapêr ma nhũm ja kêp omnuj nê. Jakamã nhũm mẽ kêp kato nê ma hpãnhã ahte nhýri hixêt õ hwýr tẽ.

Jejus kot gõ krãhkã hã htêm ã harênh

Matêwre 14.22-27; Makre 6.45-52

¹⁶ Tã nhũm ra kamãtre pa mẽ Jejus kõt ri ixpa ho ixpa xwýnhjaja ma akupým himõ hwýr mra. ¹⁷ Nhũm kormã Jejus mẽ ixwýr akupýn htêm kêt jakamã pa mẽ tee ri kamã ama hāmri nê akupým pãr mã axà nê ma akupým Kapanau hwýr xarmã ixrêr o mõ.

¹⁸ Pu nhũm ra kòk àpêr týt nhũm gõ xatã kãnhmã harĩ nê axpên wýr mra nê axpên tak týt nê. ¹⁹ Pa mẽ kormã gõ nhĩpòk ri mõ. Nê tee ri rrêmti ho gõ rênh nhĩpêx kaprý nom kormã ixrêr kêt nê. Nê kormã inhmõr o ixtã 5 kirõm pix nê. Hāmri nhũm ra Jejus gõ krãhkã hã hpar o mẽ ixkõt tẽ. Pa mẽ ixprĩ hã amnhĩ wýr omunh mex kêt nê ixtýt mẽkarõ hã hkamnhix nê mẽ inhmã uma htýx kumrêx. ²⁰ Tã nhũm mẽ inhmã ixkapêr nê mẽ inhmã:

—Tk. Kwa mẽ amã ma hkêt nê. Pa na pa mẽ akõt tẽ. Anê.

²¹ Hāmri pa mẽ kapêr ma mẽ ixkĩnh nê. Nê amnhĩ wýr pãr kre hwýr ho api nhũm axà pa mẽ xarmã ixrêr kurê kumrêx nê pãr kre rùm ijapõx pa.

Mẽ kot Jejus japêr mra ã mẽ harênh

²² Tã nhũm apkati nhũm xarpê mẽ kot Jejus wýr mra nhũm kot mẽ kãm õ xwýnhjaja tee ri hapêr o pa nê axpên mã:

—Kwa nhýhým mãn pre we tẽe? Na pre hkõt ri mẽ pa xwýnhjaja pix mẽ õ pãr kãm ma akupým xarmã mõ nom nhũm Jejusja mẽ hkõt htêm kêt nê. Nà mãn kormã jar nhýhým ri mra jakamã pu mẽ kormã omunh kêt nê. Anê.

²³ Rõm nhũm Tĩpe rùm pãr kwýja mẽ hwýr pøj. Jejus kot mẽ apkur xà ho Tĩrtũm wýr nê mẽ kãm ho

rax xà hã pikata wÿr nhùm mōn pōj. ²⁴ Hãmri nhùm mē amnhĩ wÿr omu nē tee ri pàr kãm Jejus mē hkôt mē ixpa ho mē ixpa xwÿnhjê japêr hãmri nē axpên mã:

—E kwa pu mē ma mē hkôt xarmã mō nē Kapanaũ kamã mē hapêr. Anê.

Hãmri nē mē kãm amnhĩ jarê nē mē ò pàr kwÿ hwÿr agiê nē ma mē hkôt xarmã mōn rê. ²⁵ Hãmri nē ra mē ixwÿr rê nē mē ixkôt pōj nē mē ixkaêx ã Jejus pumu nē hwÿr mra nē kãm:

—Pa mē ijahkre xwÿnh. Kwa na pa prem tee ri xarpê ajapêr hãmri nē man akôt mōn rê. Kwa tanhmã na ka pre we amnhĩ to nē man tēn rê? Anê.

²⁶ Hãmri nhùm mē kãm:

—Nà mēmo kaxyw na ka wem ri ijapêr o ri ixkôt apa? ãm jãã mē ate ixkutã axàpkur nē anhōhy htu jakamã na ka mē axte ixkutã axàpkur pix kaxyw ijapêr o ri apa. No ixte ã mē amã amnhĩ nhĩpêx anhÿr ã ixpumu nē ixpê Tirtùm Kra hã ixkôt ajamaxpêr kêt nē. Kwa mē ixpê Kra hã inhmã ajamaxpêr tÿx nē kêt wehe. Anê.

Jejus te kêp kaxkwa rùm mē paxàpkur xà maati pyrãk ã kot amnhĩ jarênh

²⁷ Nhùm Jejus arĩ hwÿr mē mrar xwÿnhjê mã kapêr nē mē kãm:

—Kwa kêr ka mē ri axàpkur xà pix kukamã ajamaxpêr o ri apa hkêt nē. Na htem mē apkur xà kukwak ri Tirtùm mē wa ixri htĩr tùm nē pa ho pa hkêt nē. No kot kaj mē amnhĩ kaxyw pa ixkôt ajamaxpêr nē ixkôt amnhĩ xunhwÿ. Hã kot kaj mē ixkukwak ri nhÿrmã atĩr tùm nē wa ixri amex nē apa ho apa. Te ixpê mē kot mē apkur xà hkur nē ÿ hã htĩr tùm nē pa ho pa xwÿnh pyrãk. Ja kaxyw na pre Inhĩpêxã Tirtùm mē awÿr paxipix inhmê pa mē awÿr wrÿ. Anê.

²⁸ Hãmri nhùm mē kuma nē kãm:

—Kwa tanhmã kot paj wem amnhĩ nhĩpêx to nhùm Tirtùm hã mē ixpumu nē mē ixto mex nē? Anê.

²⁹ Hãmri nhùm mē kuma nē axte mē kãm amnhĩ jarê nē mē kãm:

—Nà kot kaj mē amnhĩ kaxyw pa Tirtùm kot mē awÿr inhmēnh xwÿnh kôt ajamaxpêr hãmri nhùm ixtã mē apumu nē tanhmã mē akra hto ka mē ajamakêtkati nē axãmnhix akĩnh nē tanhmã amnhĩ nhĩpêx to ho ri apa. Anê.

³⁰ Hãmri nhùm mē kuma nē kãm:

—Tõe. Kwa axte mē inhmã aa mē ixte mēmoj pumunh kêt ò ho anê. Pa mē ja hã apumu nē amnhĩ kaxyw akôt ijamaxpêr kurê kumrêx. E mēmo kot ka mē inhmã ho anê? Kwa tokyx mē inhmã axte mēmoj tanhmã ho pa mē omu.

³¹ Amnepêm finat Mojes pyrã kot kapôt ã mē panhĩgêtjê ho pa ri na pre hte apkati mē mē kãm mēo mē kot kãm “manã” anhÿr xwÿnhhta gō nhùm pre htem hkur o pa. Tirtùm kapêr ã kagã htùm kot ja jarênh kot: Na pre kaxkwa rùm mē hwÿr mē apkur xà rê nhùm mē hkur o pa.

Anhÿr o kot harênh. Tã kot kaj Mojes nē apkati mē mē inhmã mē inhō ho ri apa pa mē ja hã apumu nē rĩ kormã amnhĩ kaxyw akôt ijamaxpêr japêr. Anê.

³² Hãmri nhùm mē kãm:

—Xã Mojes na pre hte mē kãm kaxkwa rùm mē apkur xà rēnh o pa? Nã tãm kêt. Inhĩpêxã na pre hte mē hwÿr kurê nhùm mē hkawrà nē kuku nē kukwak ri hihtÿx nē htĩr nē pa. Tã nhùm ra mē awÿr hpãnhã pa ixpê Kra hã inhmê. Kwa mē ixkapêr ma nē amnhĩkrãm haxàr tÿx nē. ³³ Na pre Tirtùm inhĩpêx o te amnepêm kot mē hwÿr kaxkwa rùm mē apkur xà rēnhhta pyrã nē amnê pika hwÿr inhmê. Jakamã te ixpê kaxkwa rùm mē apkur xà maati wrÿk xwÿnhhta pyrãk. Mē ate amnhĩ kaxyw ixkôt ajamaxpêr nē ixkôt amnhĩ xunhwÿr

hãMRI nê ixkukwak ri wa ixri atír tùm nê apa ho apa kaxyw. Anê.

³⁴ Nhùm pre ã JeJus mẽ kãm amnhĩ jarênh anê nhùm mẽ kuma nom hprĩ hã mar mex kêt nê. ãm htýx ho axtem mẽ apkur xà mex pix ã harênh ã hkamnhĩx nê kãm:

—Kwa tô mẽ inhmã mẽ apkur xà maatita kwý gõ pa mẽ apkati mẽ hkur o ri ixpa. Anê.

³⁵ HãMRI nhùm mẽ kuma nê amnhĩ tã mẽ kãm:

—Nà mẽ apkur xà kumrêxja ãm paa. Te ixpê mẽ apkur xà maati pyrãk. Jakamã kot kaj mẽ atõ amnhĩ kaxyw ixkõt ajamãxpêr nê ixkõt amnhĩ nhĩpêx o apa hã kot kaj mẽ akĩnh nê apa. Te ra axãpkur nê anhõhy htu nê akĩnh o ri apa pyrãk. Jao amnhĩ tã ixpumu nê akĩnh nê ajamakêtkati nê ri apa.

³⁶ —Ra mẽ ate ixpumunh mex tã kormã amnhĩ kaxyw ixkõt ajamãxpêr kêt nê. Kwa mẽ ixkapêr ma nê amnhĩ krãm haxàr týt nê. ³⁷ Tirtùm kot inhmã mẽ õr mã xwýnhjaja koja mẽ ixpumu nê amnhĩ kaxyw ixkõt hamãxpêr mex kurê kumrêx. ã mẽ kot amnhĩ nhĩpêx anhýr xwýnhjaja kot paj aa amnhĩ nê mẽ hanor kêt nê.

³⁸ —Nê ixte amnhĩ krã hkõt kaxkwa rùm ixwryk nê inhmã hprãm xà hkõt tanhmã amnhĩ nhĩpêx to ho ixpa kaxyw na pa pre ixwryk kêt nê. Inhĩpêxã kot mẽ awýr inhmênh jakamã kãm hprãm xà hkõt pix mã na pa hte tanhmã amnhĩ nhĩpêx to ho ri ixpa.

³⁹ —Tã mo na hte Inhĩpêxã kãm hprãm? Nà kot inhmã mẽ õr mã xwýnh piitã nhýrmã wa ixkuri htír tùm nê mex nê pa ho paja na kãm hprãm. Jakamã nhýrmã akupým mẽ htír ã arĩgrota ã ixte akupým mẽ ho htír nhùm ixte ãm pixire nê ho ixpikunor kêtja na kãm hprãm.

⁴⁰ —Tã kot ka mẽ atõ ixpê Tirtùm Kra hã ixpumu nê amnhĩ kaxyw ixkõt ajamãxpêr nê ixkõt amnhĩ xãm. Hã kot kaj nhýrmã atyk tã

pa akupým mẽ atír xà hã arĩgrota ã akupým ato atír ka wa ixkuri atír tùm nê amex nê apa ho apa. Ja na Inhĩpêxãja kãm hprãm. Anê.

Nhùm pre ã JeJus mẽ kãm amnhĩ jarênh anê. ⁴¹ HãMRI nhùm Ijaew nhõ pahijaja mẽ kuri mar o kuhê nê tee ri kêp kaxkwa rùm mẽ apkur xà maati pyrãk ã amnhĩ jarênh ma nhùm ja mẽ kãm mex kêt nhùm mẽ kamã gryk nê. ⁴² Jakamã axpên mã ri harênh o:

—Tk. Kwa mo na ri ã amnhĩ jarênh anê? Kêp mẽ panhĩõ kênã kot kêt ri kêp kaxkwa nhõ xwýnh ã amnhĩ jarê. Kêp Juje mẽ Marir wa hkra na. Mẽ pahte katorxã mẽ hipêxã wa omunh mex kênã kot kêt axtem nê kêp kaxkwa nhõ xwýnh ã amnhĩ jarê. Anê.

⁴³ HãMRI nhùm amnhĩ tã mẽ kuma nê mẽ kãm:

—Kwa mẽ ã ijarênh anhýr kêt nê. ⁴⁴ Koja Inhĩpêxã kot mẽ awýr inhmênh xwýnhã tanhmã mẽ hkrã hto nhùm mẽ rĩ kormã amnhĩ tã ja hã ixpumu nê amnhĩ kaxyw ixkõt hamãxpêr. Tã ã mẽ kot amnhĩ nhĩpêx anhýr xwýnhjaja koja mẽ nhýrmã htyk tã pa akupým mẽ ho mẽ htír nhùm mẽ wa ixri htír tùm nê mex kumrêx nê pa ho pa.

⁴⁵ —Amnepêm Tirtùm kapêr jarênh o mẽ pa xwýnhjaja na prem ã ja jarênh anhýr o:

Koja Tirtùm mẽ hkrã kaxwýnh kãm tanhmã mẽ kãm kapêr o amnhĩrit to ho pa.

Anhýr o harênh. Jakamã mẽ kot Tirtùm kapêr mar nê hkõt amnhĩ nhĩpêx xwýnhjaja koja mẽ mããnên amnhĩ kaxyw pa ixkõt hamãxpêr nê ixkõt ri amnhĩ nhĩpêx o pa.

⁴⁶ —Nê mẽ apê pika nhõ xwýnhjê hõ aa mẽ ate ixkĩnhã ano ho Inhĩpêxã pumunh kêt. ãm papxipix na ixte omunh. Kurùm na pa pre mẽ awýr wry. ⁴⁷ Tã kot ka mẽ atõ amnhĩ kaxyw ixkõt ajamãxpêr. Hã kot kaj nhýrmã wa ixkuri atír tùm nê amex nê apa ho

apa. Kwa mẽ jam ajamaxpër tỳx nē.

⁴⁸—Nē ixpê mẽ axàpkurxà maati jakamā pa na ixpê akupỳm mẽ ho mẽ htír xwỳnh. ⁴⁹ Amnepêm mẽ panhīgétjaja kormā kapôt ā mẽ pa ri mẽ kot “manā” anhỳr xwỳnh ta kur o ri pata ā na prem kukwak ri htír tùm nē pa ho pa hkêt nē. Na prem ri pa nē gaa nē rī hpigêt nē htyk pa. ⁵⁰ Axtem kaxkwa rùm mẽ apkur xà maati jarēnh xwỳnh ta pix kukwak ri na htem nhỳrmā htyk tā akupỳm htír nē wa ixri htír tùm nē mex nē pa ho pa. ⁵¹ Ām paa. Pa na htem inhī hkwy hkrē hāmri nē wa ixri htír tùm nē mex nē pa ho pa. Na pa pre ra amnhī grōnh kôt mẽ awỳr wrỳ. Jakamā ka mẽ atō inhī hkwy hkrē hāmri nē nhỳrmā atyk tā pa akupỳm ato atír ka Tirtùm mẽ wa ixri atír tùm nē amex nē apa ho apa. Anē.

⁵² Nhũm pre ā Jejus Ijaew mā amnhī jarēnh anē. No ām mẽ kām amnhī tā kuxi nē amnhī jarē. Jakamā nhũm mẽ tee ri kuma hāmri nē tanhmā hā axpēn mā kapēr to. Mē kot hprī hā mar kêt nē ām mẽ kot ĩ hkwy hkrērja pix jarēnh mar jakamā tee ri hamaxpēr nē axpēn mā:

—Kwa tanhmā kot kêt we amnhī to nē mẽ pamā amnhī nhī hkwy gō pu mẽ kuku? Anē.

⁵³⁻⁵⁴ Hāmri nhũm amnhī tā mẽ kuma nē mẽ kām:

—Nà mẽ kot inhī hkwy hkrēr nē ixkamrō hkwy ho hkōm xwỳnh pixjaja koja mẽ nhỳrmā Tirtùm mẽ wa ixri htír tùm nē pa ho pa. Ixte akupỳm mẽ ho mẽ htír xà hā arīgrotā ā kot paj mẽ ho mẽ htír nhũm mẽ wa ixri htír tùm nē mex nē pa ho pa. No kot kaj mẽ inhī hkwy hkrēr kêt nē ixkamrō hkwy ho akōm kêt hāmri nē wa ixri atír tùm nē amex nē apa ho apa hkêt nē. Kwa mẽ jam ajamaxpër tỳx rāhā nē. ⁵⁵ Kêt inhīja kēp mẽ apkur xà maati na. Nē ixkamrōja kēp mẽ

hkōm xà maati na. Jakamā na htem inhī hkwy hkrē nē ixkamrō hkwy ho ixkō nē ra kēp wa ixri mẽ htír tùm nē mẽ pa ho mẽ pa mā xwỳnh. ⁵⁶ Jakamā kot ka mẽ atō inhī hkwy hkrē nē ixkamrō hkwy ho ixkō. Hāmri pa amnhī tā apumu nē akarō mā axā ka te apē pa pyrāk o amnhī nhīpēx o apa. ⁵⁷ Inhīpēxā kot mẽ awỳr inhmēnh xwỳnh ta kukwak ri na pa hte ixtır tùm nē ixpa ho ixpa. Tā ja pyrā nē kot kaj mẽ inhī hkwy hkrē hāmri nē ixkukwak ri wa ixri atír tùm nē apa ho apa mā xwỳnh.

⁵⁸—Jakamā na pa ā mẽ amā ixpê kaxkwa rùm mẽ axàpkur xà maati hā amnhī jarēnh anē. Amnepêm mẽ panhīgétjaja na pre htem kapôt ā mẽōta kur o pa hāmri nē gaa nē hpigêt nē htyk pa. No kêt pa koja mẽ inhī hkwy hkrē hāmri nē mẽ kurom wa ixri htír tùm nē mex nē pa ho pa. Anē.

⁵⁹ Nhũm pre ā Jejus mẽ kām amnhī jarēnh anē. Kormā Kapanāu kamā Tirtùm kapēr o mẽ ahkre xà hā ixkre kamā ā mẽ ahkre anhỳr o xa.

Mē ohtō nē mẽ kot Jejus kaga hā mẽ harēnh

Sikūn Korīt 3.6; Sikūn Pētre 3.16

⁶⁰ Hāmri nhũm mẽ kot Jejus kôt mar o mẽ pa xwỳnhjaja ohtō nē ā kapēr anhỳrja ma nē tee ri amnhī kukamā hamaxpēr nē hā axpēn mā:

—Tk. Kwa pēr kapērja ām ri katii. Mēhō koja we kuma nē hkôt hamaxpēr nē hkamrō nē ĩ kur o ri hkôt pa? Nà mẽ piitā mẽ kām ja mexti hā. Anē.

⁶¹ Hāmri nhũm amnhī tā mẽ kuma nē mẽ kām:

—Kwa xà ixkapērja mẽ apē omnuj? ⁶² Nà kot paj nhỳrmā ma akupỳm kaxkwa hwỳr api. Ixpê Tirtùm kot mẽ akaxyw ixām xwỳnh ā ma akupỳm hwỳr api. Hāmri ka mẽ ā ixte amnhī nhīpēx anhỳr ā ixpumu nē rī kormā ixkôt amnhī xunhwỳr japēr. ⁶³ Na htem mẽmoj

kur kukwak ri kêp Tirtùm mē wa ixri htír tùm nē pa ho pa xwýnh kêt nē. Rý amnhĩ krã hkôt tanhmã amnhĩ nhĩpêx to ho kêp wa ixri htír tùm nē pa ho pa mã xwýnh kêt nē. Tirtùm mē wa Ixkarõ tãm na hte mē hkarõ mã agjê nē mē ho Tirtùm wa ixkuri mē htír tùm nē mē pa ho mē pa mã xwýnh. Tã y hã na pa ã mē amã ixkapêr anē. Nom mē amã amnhĩ tã kuxi nē amnhĩ jarê. Tã kot kaj mē ixkapêr ma nē ixkôt amnhĩ nhĩpêx. Hã kot kaj mē nhỹrmã wa ixri atír tùm nē amex nē apa ho apa. ⁶⁴⁻⁶⁵ No mē akwýjaja na ka mē ixkapêr ma nē ãm ama nē ixkôt ajamaxpêr kêt nē. Jakamã na pa ã mē amã ixkapêr anē nē mē amã: “Koja Inhĩpêêxãja tanhmã mē akrã hto ka mē rĩ kormã amnhĩ tã xpumu nē amnhĩ kaxyw ixkôt ajamaxpêr.” Anhÿr o mē amã ixkapêr. Anē.

Nhũm ã Jejus mē kãm kapêr anē. Ra kot mē hkukamã mē omunh mex. Ra kot amnhĩ kaxyw mē kot hkôt hamaxpêr mã xwýnhjê pumunh nē mãânên mē kamã kot mēõ pahi nhĩhkram haxàr mã xwýnhja nhũm mãânên ra kot amnhĩ kukamã omunh mex. Jakamã nhũm ã mē kãm kapêr anē. ⁶⁶ Hãmri nhũm mē kot hkôt kapêr mar o mē pa xwýnh kwýjaja tee ri kuma hãmri nē hkaga nē axte hkôt pa hkêt nē. ⁶⁷ Hãmri nhũm tee ri mē kot hkaga nē ma mē mrar ã mē omu nē mē ixpê hkôt ixpa ho ixpa xwýnh pê 12jê mã kapêr nē mē inhmã:

—Pa? No mē kajaja. Xà kot kaj mē urak nē ixkaga nē ma akupým mra nã? Anē.

⁶⁸ Hãmri nhũm Simãw Pêtre kãm:

—Nã kot paj mē akaga hkêt nē. Kapxipix na htem amnhĩ kaxyw akôt hamaxpêr jao kêp Tirtùm mē war akuri htír tùm nē pa ho pa mã xwýnh. ⁶⁹ Ka na pre Tirtùm mē ixwýr amē. Jakamã na pa mē amnhĩ kaxyw akôt ijamaxpêr o ri

ixpa. Nã kot paj mē aa akaga hkêt nē. Anē.

⁷⁰ Hãmri nhũm kuma nē kãm:

—Nã ixte amnhĩ kaxyw mē apê 12jê rênh tã na ka mē atõ akwýjê hkĩnhã axtem nē Satanasti hkôt amnhĩ xãm. Anē.

⁷¹ Nhũm pre ã finat Jut Kariot kot mē inhõ pahijê nhĩhkram haxàrja kukamã mē inhmã harênh anē. Mē inhĩ õ na pre. Nē kêp Simãw Kariot kra na pre. Tã ra kot mē ãhkram haxàr kaxyw nhũm Jejus kot amnhĩ kukamã omunh jakamã ã mē inhmã harênh anē.

7

Jejus tøjaja kot mē hkĩnh wýr amnhĩ kôt hwýr ã mē harênh

Matêwre 10.36, 13.57-58

¹ Tã nhũm Jejus arĩ Garirej kamã ri pa nē kormã akupým Jutej wýr mör kêt nē. Jutej kamã Ijaew nhõ pahijaja ra kot hã ãmnênh nhũm mē kot hpír ã harênh jakamã nhũm mē umaj kormã hwýr mör kêt nē.

² Tã mē ixpê Ijaew mē ixte ixkre hkryre nhĩpêx nē hã ixkĩnh ã arĩgroja ra ahtêp o mō. Mē ixkĩnhã ã na pa pre htem xpiitã Jutej wýr axpên wýr akuprõ nē ahpýnhã ri amnhĩm ixkre hkryre nhĩpêx nē kamã ixkrĩ. ³ Jakamã nhũm Jejus tøjaja hwýr mra nē kãm nojarêt nē amnhĩ kôt kuwý nē kãm:

—E kwa tokyx pu mē pahkwýjê hkôt. Ka mē kãm aa mē kot mēmoj pumunh kêt kwý ho anhÿr o ri mē hkôt apa kê mē kãm akapêr mar prãm xwýnhjaja ja hã apumu. ⁴ Na ka hte jar te apimxur pyrãk o amnhĩ nhĩpêx. E kwa tokyx ma pu mē hkôt. Anē.

⁵ Katorxã hkôt mē kêp Jejus tõi htã kormã amnhĩ kaxyw hkôt hamaxpêr kêt jakamã na prem ã kãm kapêr anē. ⁶ Hãmri nhũm mē kãm:

—Nã kormã. Kormã ixte mē kãm amnhĩ to amnhĩrit xã hã arĩgro kormã kator kêt. Jakamã kot ka mē amã mē hkôt amrar prãm nē mãmrĩ

ma mē hkôt mra. ⁷ Koja mē apumu nē kām mē akurē hkêt nē. Nē mē akamā gryk kêt ka mē ri tanhmā amnhī nhîpêx to ho mē hkôt apa. No pa kot paj mē hwÿr mō nē mē kām mē kot amnhī tomnuj o pa hā mē harēnh o ri mē hkôt ixpa nhūm mē tee ri amnhī tā inhma nē ixkamā gryk nē. ⁸ Jakamā mē māmri ma mē hkôt mō. Kot paj kormā. Kormā ixte mē kām amnhī to amnhīrit xā hā arīgroja kormā kator kêt.

⁹ Anē nhūm mē tee ri kuma hāmri nē kure nē ma mē hkwÿjê hkôt Jutej wÿr mō. Nhūm Jejus kormā Garirej kamā ri pa hā apkati grēre. ¹⁰ Hāmri nē kormā ma hapu hā mē hkôt mō. Pa mē hkôt ri ixpa ho ixpa xwÿnhjaja ma hkôt ixpa.

Mē kot ahpÿnhā tanhmā Jejus jarēnh to hā mē harēnh

Juāw 7.37-44, 9.22, 10.19-21, 12.42-43

¹¹ Rôm nhūm ra mē ixpê Ijaew nhō pahijaja mē hkînhja kamā mē pikuprônĥ xwÿnhjê kaêx ā Jejus japêr o ri mra. Nē hā axpēn kukjêr o mra nē axpēn mā:

—Kwa nok? Nhÿri mǎn we? Anē.

¹² Nhūm Ijaew piitā tanhmā axpēn mā Jejus jarēnh to ho pa. Nē kamā mē hkwÿjaja harēnh o:

—Nā kot amnhī to mex o pa xwÿnh na.

Anhÿr o harēnh o pa. Nē kamā mē hkwÿjaja axtem nē harē nē harēnh o:

—Tk. Kot mē no kupyri o pa xwÿnh kēnā. Anē.

¹³ Nom mē ō pahi pymaj mē piitā mē nom tanhmā harēnh to hkêt nē. Ām axpēn mā pix mā tanhmā harēnh to ho pa.

Jejus kot mē hkînh xwÿnhjê jahkre hā harēnh

Makre 3.22; Juāw 5.16

¹⁴ Tā pa mē mē hwÿr pōj. Jejus mē pa mē hkôt ixpa ho ixpa xwÿnhjaja mē hwÿr pōj. Kormā mē hkînhja hapêx kêt ri. Hāmri

pa mē Jejus kôt Tirtūm mā amnhī jarēnh xā hā ixkreja wÿr mra nē agjê nhūm Jejus mē ahkre ho nhÿ. ¹⁵ Hāmri nhūm mē inhō pahijaja tee ri kot tanhmā mē ahkre hto hā kuma nē hā axpēn kukja nē axpēn mā:

—Kwa mē pahkînhā kot Tirtūm kapêr o istuda hkêt tā ā mē ahkre anē. Anē.

¹⁶ Hāmri nhūm amnhī tā mē kuma nē mē kām:

—Nā na pa hte amnhī krā hkôt tanhmā ri mē ajahkre hto hkêt nē.

Ām kot mē awÿr inhmēnh xwÿnhnta nhÿ hā na pa hte ā mē ajahkre anhÿr o ri mē akôt ixpa. ¹⁷ Tā kot kaj mē amā Tirtūm kām hprām xā hkôt amnhī nhîpêx prām hā kot kaj mē ixte ŷ hā ixkapêr ā ixpumunĥ

kurê kumrêx. ¹⁸ Amnhī krā hkôt mē kām kapêr o ri mē pa xwÿnhjaja na htem mē kot mē mar nē mē hā hpijaam pix kaxyw tanhmā mē kām kapêr to ho ri pa. No kêt pa na mē ate ixkapêr mar nē kot mē awÿr inhmēnh xwÿnhnta ā apijaam

pix kaxyw na pa hte tanhmā mē amā ixkapêr to ho ri ixpa. Jakamā ām hāmri na pa hte mē amā ixkapêr o ri ixpa.

¹⁹ —Finat Mojes na pre mē panhîgêttjaja kot tanhmā amnhī nhîpêx to ho pa nhūm Tirtūm kot mē kām hā karō jarēnh o ri mē hkôt pa htā ka mē hkôt amnhī nhîpêx kêt nē. Tā ixte hkôt amnhī nhîpêx kêt ā ixto axêx nē mē ate ixpîr kaxyw ixtā amnhī jarēnh ri apa. Anē.

²⁰ Hāmri nhūm mē ā Jejus kot mē kām kapêr anhÿrja ma nē hêx rom kām:

—Kwa mē ixtō na pa apîr mā ka ri ā mē ijarēnh anē? Amrakati kēnā. Kwa mǎn ka akrā xpā nā? Hā na ka ā ri akapêr anē. Anē.

²¹ Hāmri nhūm mē kām:

—Nā ixte mē pahkôt xā hā arīgro hā akupÿm mēhō myta ho mex jakamā na ka prem ja hā ixpumu nhūm ja mē apê omnuj nē. Nē te ixte mē pahkôt xā hā arīgro

hã ixpijaam kêt xwÿnh pyrāk ã ijarē. ²² Nom na ka htem ixpyrã nē mē panhō arġromnu hã mēmoj tã axàpēnh o ri apa. E pa mē amã mēmoj jarē ka mē inhma. Na pre finat Mojes mē pamã mē pahte mē pahkra myre pé my kwyrÿt kà jakàr ã mē pamã karō. Kukamã higêtjaja kot kãm ja hã karō xà hkôt. Jakamã na htem mē hkra myre hapôj nē hã semãn pyxi nē hapêx nhùm mē kêp mēmy hkwrÿt kà jakà. ²³ Mē pahkôt xà hã arġgro hã hō kator tãã nhùm mē hã semãn pyxi nē mē panhō arġromnu hō hã kêp my kwyrÿt kà hkwy krãhta. Mojes kot Tirtùm nhÿ hã ja hã mē pamã karō xà hkôt. Jao mē panhō arġromnu hã apê. Tã pa pre mē apyrã nē arġromnu hã ixàpēnh pé akupÿm mēhō myta ho mex ka mē ja hã ixpumu nē axtem nē ixtÿx ri ixtē amnhÿ nhÿpêx o ixa xwÿnh ã ijarē nē mē ate ixpÿr kaxyw ã amnhÿ jarē. ²⁴ Kwa mē amnhÿ krã hkôt tanhmã mē harēnh to ho ri apa hkêt nē. ãm mē kot tanhmã amnhÿ nhÿpêx to ho pa hã mē omu nē ajamaxpêr o: “Kwa xà we Tirtùm kãm ja mex nà?” Anhÿr o mãn kêt mē ajamaxpêr nē rĭ kormã tanhmã mē harēnh to. Anē.

²⁵ Hãmri nhùm Jerujarē nhō xwÿnh kwÿjaja ja hã kuma nē tee ri hkukamã hamaxpêr. Hãmri nē hã axpēn kukja nē axpēn mã:

—Kwa xà tãm na mē panhō pahijaja mē kot hpÿr kaxyw hã amÿnê? ²⁶ Ota jar mē pakamã ri pa htã nhùm mē ãm omu nē kãm tanhmã nē hkêt nē. Mãn mē ãm hãmri kêp Kris ã hkamnhÿx jakamã kapêr ma nē ãm kuma nē kêp Kris ã tanhmã ho hkêt nē. Anē.

²⁷ Hãmri nhùm mēhōja kuma nē kãm:

—Tk. Nà kêp Tirtùm kot mē pahwÿr mēnh xwÿnhre hã. Kêp Najare nhō xwÿnh kênã. Mē pahte hipêxã mē katorxã wa omunh mex. No kêt Tirtùm kot mē pahwÿr mēnh mã xwÿnhre koja xep mē

pahwÿr kato pu mē nhÿhÿnh htēm xà hkôt omunh kêt nē. Anē.

²⁸ Rôm nhùm Jejus arĭ Tirtùm mã amnhÿ jarēnh xà hã ixkreja kamã mē ahkre ho nhÿ. Jakamã mē kot axpēn mã harēnh ã amnhÿ tã mē kuma nē mē kãm:

—Xà mē ate aprĭ hã ixpumunh nē nhÿhÿnh ixtēm xà hkôt ixpumunh? Nà mē ate ja hã ixpumunh kêt. Na pa pre amnhÿ hkrã hkôt mē awÿr inhmōr kêt nē. Na pre mēhō mē awÿr inhmē. Nom kot mē awÿr inhmēnh xwÿnhja kormã mē ate omunh kêt. ²⁹ ãm papxipix na ixtē omunh. Kurùm ixwÿrÿk xwÿnh na pa. Kot mē awÿr inhmēnh nhùm kurùm ixwÿrÿk jakamã ixtē ixprĭ hã omunh par. Anē.

³⁰ Hãmri nhùm mē hkwyjaja tee ri ã kot amnhÿ jarēnh anhÿrja ma nē ri axpēn mã harēnh o:

—Kwa Tirtùm kot mē pahwÿr mēnh ã kot amnhÿ to hêx kênã. E kwa pu mē ã kot amnhÿ to hêx anhÿr ja ã unê nē haxà nà?

Anhÿr o axpēn mã hã amÿnê. Nom kormã mē kot unēnh nē haxàr xà hã arġgroja kormã kator kêt jakamã nhùm Tirtùmja nē mē omunh mex nē nhùm mē ãm kãm unēnh prãm kaprÿ. ³¹ No nhùm mē hkwyjaja mē kurom kuma nē kêp Tirtùm kot mē pakaxyw ãm xwÿnh ã omunh kurê kumrêx nē amnhÿ kaxyw hkôt hamaxpêr. Hãmri nē axpēn mã harēnh o:

—Kwa mãn kêp Tirtùm kot mē pahwÿr mēnh mã xwÿnhre mãn nà? Mē pahtō kot pu urāk nē aa mē kãm mē kot mēmoj pumunh kêt o anhÿr rax o ri papa? Amrakati kumrêx. Nà pêr tãm kênã. Anē.

Pôristi hkwy kot Jejus pynēnh kaxyw ã mē harēnh

³² Nhùm prem ã axpēn mã Jejus jarēnh anhÿr o kuhê hãmri nhùm Parijew nhō xwÿnhjaja hã mē kuma. Hãmri nē patre krãhtümjê

mē mē ma Jejus wỳr mēō pōristi hkwỳ rē nē mē kām:

—E mē ma Jejus wỳr mra nē unē nē man akupỳn o tē. Anē.

³³ Hāmri nhũm mē kuma nē ma hwỳr mra nē omu nom tokyx unēnh kēt nē. Kormā kapēr ā mar o kuhē. Nhũm Jejus arī mē kām kapēr o xa nē mē kām:

—Nà kot paj jar mē akôt ri ixpa hā mytwrỳ grēre hāmri nē ma akupỳm kot mē awỳr inhmēnh xwỳnhhta wỳr api. ³⁴ Ka mē tee ri jar ijarēr o ri apa nom nhỳri ixpumunh kēt nē. Nē ma inhmōr xàta wỳr kot kaj mē atō ma ixkôt amōr kēt nē. Anē.

³⁵ Hāmri nhũm mē tee ri ā kot amnhī jarēnh anhyrja ma nē axpēn mā:

—Kwa nhỹhỹm koja we ma mō pu mē hkôt papa hkēt nē? Mān mē pahkwỳjaja kot Gresjē kamā mē pa xwỳnhjē hwỳr koja ma mō nē hpānhā mē hkôt mē ahkre ho pa nà? Hā na ā mē pamā amnhī jarēnh anē? ³⁶ Mo na ri mē pahte tee ri hapēr o papa hā mē pajarē nē mē pahte hkôt pamrar kēt ā mē pajarē? Anē.

Tirtũm Karō te kēp gō nyw pyrāk ā harēnh

Juāw 4.13-14; Apokarip 22.1, 22.17

³⁷ Tā nhũm ra mē hkĩnhja hapēx kaxyw hitep xà hā arīgro maatija kato. Jakamā nhũm Jejus kànhmā xa nē kỳxpē mē hpikuprōnh xwỳnhjē mā kapēr nē mē kām:

—E te mē amā kōr o apa pyrāk xwỳnhjaja. Mē amnē ixwỳr akuprō. Kot kaj mē amnhī kaxyw ixkôt ajamaxpēr pa tanhmā mē ato ka mē apē Tirtũm mē wa ixri atīr tũm nē apa ho apa mā xwỳnh.

³⁸ —Kot kaj mē ja hā amnhī pumu hāmri nē ma mē kām ixkapēr jarēnh o ri mē hkôt apa. Te mē kām kōr nhũm mē ate mē kām gō hkwỳ nhũm mē kot ho hkōm pyrāk o mē hipēx o ri mē hkôt apa.

Hāmri nhũm mē ama nē mē apyrā nē amnhī kaxyw ixkôt hamaxpēr. Pa ixte tanhmā mē atoja pyrā nē tanhmā mē ho nhũm mē apyrā nē kēp wa ixri htīr tũm nē pa ho pa mā xwỳnh. Anē.

³⁹ Nhũm pre ā Jejus mē kām kapēr anē. No ām hā kuxi nē mē kām kapēr nē hprī hā harēnh kēt nē. Tirtũm Karō kot nhỹrmā mē kot amnhī kaxyw Jejus mā hamaxpēr xwỳnhjē karō mā gjēxja nhũm ā mē kām hā kuxi nē harēnh anē. No kormā akupỳm kaxkwa hwỳr àpir nē mex o mex nē hkrī hkēt jakamā kormā mē hwỳr Karō rēnh kēt nē.

Mē kot ahpỳnhā tanhmā Jejus jarēnh to hā mē harēnh

Juāw 7.11-13, 7.25, 10.19-21

⁴⁰ Hāmri nhũm mē kot Jejus mar o hkrī xwỳnhjaja ā kapēr anhyrja ā kuma nē ahpỳnhā tanhmā harēnh to nē harēnh o:

—Kwa finat Mojes pyrā nē kēp Tirtũm nhỹ hā kapēr jarēnh o pa xwỳnh na nà? Anē.

⁴¹ Nhũm kamā mē hkwỳjaja mē kām:

—Nà Tirtũm kot mē pakaxyw ām xwỳnhhta na. Anē.

Nhũm kamā mē hkwỳjaja ja hā mē kuma nē mē kām:

—Tk. Nà kēp Garirej nhō xwỳnh kēnā kot kēt Tirtũm mē pakaxyw ām. ⁴² Tirtũm kapēr ā kagà htũm kot kēp Garirej nhō xwỳnh ā harēnh kēt. Kēp Pahi Tawi hkanrēhā hka-grōt nyw jakamā koja urāk nē Jutej kamā krī pē Perēj kamā kato. Jao koja urāk nē kēp Jutej nhō xwỳnh.

Anhyr o ri axpēn mā harē. Mē kot htỳx Jejus pika pē Garirej kamā kator ā hkamnhix jakamā ā axpēn mā harēnh anē. Nom pika pē Jutej kamā na pre kato. Krī pē Perēj kamā. Tā no nhũm mē hkwỳjaja ja hā mar kēt jakamā kēp Tirtũm kot mē pahwỳr mēnh xwỳnh kēt ā hkamnhix.

⁴³ Jakamā nhũm mē ā ahpỳnhā axpēn mā harēnh anē. ⁴⁴ Nhũm

mê hkwýjaja ra kot unênh kaxyw tâ tokyx unênh kêt nê.

Pôristi kot Jejus pynênh kêt ã mê harênh

Matêwre 7.28-29

⁴⁵ Tã nhùm patre nhõ pôristijaja. Mê kot Jejus pynênh mã hwýr mrar tâ hãmri ã kapêr anhýrja ã kuma nê tee ri hamaxpêr nê unênh kêt nê. Nê awjanã nê ahte ý kamã ma akupým patre krãhtümjê mê Parijew nhõ xwýnhjê hwýr mra. Hãmri nhùm mê omu nê mê kãm:

—Pa nok? Tanhmã na ka mê amnhĩ to nê unênh nê ho amõr kêt nê? Anê.

⁴⁶ Hãmri nhùm mê kãm:

—Nã na pa mê unênh kêt nê. Kapêr mex kênã. Te kot mê pakapêr pyrãk kêt jakamã pa mê tee ri kapêr ã kuma nê unênh kêt nê. Anê.

⁴⁷ Hãmri nhùm Parijew nhõ xwýnhjaja mê kuma nê mê kãm:

—Tk. Kwa mãn ka mê ra mê urãk nê tanhmã kot amnhĩ to hêx toja ma nê hkõt ajamaxpêr nã?

⁴⁸ Mê ixpê Parijew nhõ xwýnhjaja nê mê panhõ pahijaja na pa htem hkõt ijamaxpêr kêt nê. ⁴⁹ No kêt mê kot mar nê hkõt hamaxpêr xwýnhjtijaja na htem mê ixkĩnhã finat Mojes kapêr mar kêt nê. ãm Jejus kapêr pix na htem kuma nê hkõt hamaxpêr. Mýrapê koja Tirtüm tanhmã mê homnuj týx to nhùm mê rĩ amnhĩ pumu. Anê.

Nĩkotê kot Jejus xyr pê kapêr ã harênh

Juãw 3.1-21

⁵⁰ Hãmri nhùm Nĩkotêja mê mar o xa. Mê urãk nê kêp Parijew nhõ xwýnh tâ na pre ra kamãt õ mã Jejus wýr tê nê kãm kapêr. Jakamã tee ri mã mê kapêr ma hãmri nê yr pê mê kãm kapêr nê mê kãm:

⁵¹ —Tk. Kwa kormã mê pahte pahprĩ mã kapêr mar nê tanhmã kot amnhĩ nhĩpêx to mã omunhê mã. Na pre finat Mojesja Tirtüm nhý mã mê panhĩgêjtê mã ja jarênh o:

Kêr ka mê aprĩ mã mê kapêr ã mê ama nê mê kot amnhĩ nhĩpêx ã mê omu nê rĩ kormã tanhmã mê harênh to.

Anhýr tâ ka mê kormã aprĩ mã Jejus kot amnhĩ nhĩpêx ã omunh kêt tâ ra kot amnhĩ tomnuj xwýnh ã harê. Anê.

⁵² Hãmri nhùm mê tee ri kuma nê kãm:

—Tk. Kwa xà we urãk nê apê Garirej nhõ xwýnh mã na ka ã yr pê akapêr anê? Xã Tirtüm kapêr ã kagã htüm kot Garirej nhõ xwýnhjê hõ kêp ý mã kapêr jarênh o pa xwýnh ã harênh? Nã ã kot harênh anhýr kêt. Anê.

⁵³ Nhùm mê ã Nĩkotê mã kapêr anê hãmri nê anhgrã nê Tirtüm nhõrkwý rüm hapõj nê ma akupým õrkwý hwýr àhkurê ho mra.

8

Mêhõ ni kot nhãm mê mjên o amnhĩkati mã harênh

Xiakre 2.10-13

¹ Tã nhùm Jejus Tirtüm nhõrkwý kamã mê ahkre hpa hãmri nê kato nê ma hixêt prêk pê Oriwêhti hwýr tê. Hãmri nê mã api nê nhýri nõ nê ra gõr.

² Tã nhùm apkati nê myt kator o mõi mê nhùm kãnhmã nhý nê akupým wrý nê Tirtüm mã amnhĩ jarênh xà mã ixkre hwýr tê. No ãm kormã ixkre pu mã kahê hkre kamã nhý. Nhùm krĩ nhõ xwýnhjaja omu nê mã htu rax nê nhùm tanhmã mê ahkre hto ho nhý. ³ Hãmri nhùm Parijew nhõ xwýnhjê mê Tirtüm kapêr tüm o mê ahkre ho mê pa xwýnhjaja hwýr mêhõ nija o tê. Na ra ham mêhõ pê mjên o amnhĩkati ho nõ nhùm mê ja mã omu nê unê nê hpa mã kupy nê ma Jejus wýr hkjênh o mõi. Hãmri nê mê kot mar o kuhê xwýnhjê kutã ãm nhùm xa. ⁴ Hãmri nhùm mê Jejus mã:

—E ot pa mê awýr jahti ho tê ka omu. Na ham mêhõ pê mjên o amnhĩkati ho nõ. Pa mã ja mã omu nê unê nê man awýr o tê. ⁵ E

tanhmã kot puj mē hipêx to? Na pre finat Mojes Tirtüm nhÿ hã mē panhîgêtjê mã ja jarênh o:

Koja mēnijê hō axtem nē nhãm mēhō pē mjên o amnhîkati ho nō ka mē ja hã omu nē apiitã ahpÿnhã kēn rÿnh jamÿ nē ho htak o apÿ.

Anhÿr o kot harênh. No ka? Tanhmã kot kaj mē inhmã ja jarênh to? Tanhmã kot paj mē hipêx to nhÿm amã mex nê? E mē inhmã tanhmã mē ixte hipêx to jarê. Anê.

⁶ Nhÿm mē ã hêx rom nija ã Jejus kukjêr anê. Kot mē kot hpÿr nē mē kãm kapêr nhÿm mē kot hã mar nē mē hkrãhtÿmjê hwÿr mōr nē kãm kot Mojes kapêr kwÿm ri mē ahkre hã harênh kaxyw nhÿm mē hêx rom ã hkukjêr anê. Hãmri nhÿm mē kuma nē tanhmã hã mē kãm nē hkêt nê. ãm htÿx hikôt nê ïhkrakrã ho pyka kagã ho nhÿ. ⁷ Nhÿm mē tee ri omu nē axte hã hkukja nhÿm kãnhmã xa nē mē kãm:

—Tôe. Nã kot ka mē atō aa tanhmã amnhÿ tomnuj to hkêt kumrêx ã amnhÿ pumu hãmri nē kam nê rÿ kaxyw kēn ò py nē akumrêx ho hkura. Kê akwÿjaja rÿ kormã akôt hkwy jamÿ nē ho htak. Anê.

⁸ Hãmri nē akupÿm hikôt nē pyka kagã ho nhÿ. ⁹ Hãmri nhÿm mē tee ri kapêrja kôt kuma hãmri nē mē kot mar o kuhê xwÿnhjê rÿm anhrã nē ma mra. Mē piitã mē kot amnhÿ tomnuj xwÿnh ã amnhÿ pumunh mex jakamã tee ri ã kot mē kãm kapêr anhÿrja ma nē anhrã nē ma akupÿm hpÿnh nē axpên kôt mrrar o xa. Mēhpigêt kumrêx nē hpãnhã mē nywjaja nhÿm mē hpÿnh nē ma axpên kôt mrrar o ãm kãm hapêx. Nhÿm Jejus mēnija pix wa ahte mē kot mar xwÿnhjê kutã wa arÿk. ¹⁰ Hãmri nhÿm Jejus kãnhmã xa nē nita mã kapêr nē kãm:

—Pa? No mē kot ato kapêr xwÿnhhta mē? Xã na mēhō kēn o

akuranh kêt nê? Anê.

¹¹ Nhÿm kãm: “Ma amrakati.” Anê nhÿm kãm:

—Tôe. Nã kot paj ijaxwÿja tanhmã ato hkêt nê. E mamrÿ ma akupÿm anhōrkwy hwÿr tē. No ãm kër ka axte ã amnhÿ nhÿpêx anhÿr kêt nê. ãm kwarÿ ho kwarÿ. Anê.

Jejus kot hprÿ hã amnhÿ jarênh
Juãw 1.4; Rômãn 13.12-14; Epes 5.8-14; Wam Tesarôn 5.5-8

¹² Tã nhÿm arÿgro hō hã nhÿm Jejus axte Tirtüm nhōrkwy hwÿr tē nē kamã mē ahkre ho nhÿ nē mē kãm:

—Nã te ixpê mē piitã mē ò kanê pyrãk. Na hte kanêja mē kãm hirã mex nē nhÿm mē kamã rÿt mex o pa. Jao kamãt kô kamã ri pa hkêt nê. Ja pyrã nê na pa hte Tirtüm kot amnhÿ nhÿpêx o amnhÿrÿt mex o ri ixpa. Kot ka mē atō amnhÿ kaxyw inhmã ajamaxpêr nē ixkôt amnhÿ xãm hãmri nē tanhmã amnhÿ tomnuj to ho apa hkêt nê. ãm Tirtüm kãm hprãm xã kôt pix mã tanhmã ri amnhÿ nhÿpêx to ho ri apa. Jao te ate kanê hpôk nhÿrã kamã arÿt mex pyrã nê apê wa ixri atÿr tÿm nē apa ho apa mã xwÿnh. Anê.

¹³ Hãmri nhÿm Parijew nhō xwÿnhjaja tee ri ã kapêr anhÿr ã kuma nē kãm:

—Tk. Kapxipix na ka ã amnhÿ jarênh anê. Mēhō kot ã ate amnhÿ jarênh anhÿrja kôt kot mē inhmã ajarênhre hã. Jakamã kot paj mē ama nê ãm ama. Anê.

¹⁴ Hãmri nhÿm mē kãm:

—Nã mēhō kot ã ijarênh anhÿr kêt tã no ãm hãmri na pa mē amã amnhÿ jarê. Ixêx kêt. Mē arom ixte nhÿhÿnh ixwryk xã hã amnhÿ pumunh mex. Nê mē arom ma akupÿm nhÿhÿm ixãpir xã hã amnhÿ pumunh mex. Jakamã ãm hãmri na pa ã mē amã amnhÿ jarênh anê. ¹⁵ Na ka htem amnhÿ krã hkôt tanhmã ri ijarênh to. No pa na pa kormã amnhÿ xwar tanhmã mē ajarênh to hkêt nê. ¹⁶ Ixte tanhmã mē ajarênh to

ronh̄ȳx pa ām hāmri mē ajarē. Nh̄ȳx pa ām papxipix amnh̄i krā hkôt tanhmā mē ajarēnh to hkêt nē. Nh̄ȳx mǎānēn Inh̄ipēêxà pē kot mē aw̄ȳr inhmēnh xw̄ynhta inh̄h̄kô hā pa wa ām hāmri axpēn kôt tanhmā mē ajarēnh to. Mē ate amnh̄i to mex ā mē ajarē r̄y mē ate amnh̄i tomnuj ā mē ajarē. ¹⁷ Tirtūm kapēr ā kagà htūm kot ja jarēnh kot:

Koja mēhō wa hamēxkrut nē tanhmā mēmoj jarēnh to nē ām axpēn kôt harēnh o htipxi. Hā kot kaj mē wa ama nē ām hāmri wa kot harēnh kôt ajamaxpēr kurē kumrēx.

¹⁸ Anh̄ȳr o kot harēnh. Tā pa ā amnh̄i jarēnh anē nh̄um Inh̄ipēêxà kot mē aw̄ȳr inhmēnh xw̄ynhta mǎānēn ā ijarēnh anē. Wa ixpi-jakrut tā ā wa ixte axpēn kôt amnh̄i jarēnh anh̄ȳr jakamā kwa mē ixte tanhmā amnh̄i jarēnh toja ma nē ixkôt ajamaxpēr kêt wehe. Anē.

¹⁹ Nh̄um pre ā Jejus mē kām kapēr anē. Hāmri nh̄um mē kuma nē kām: —No nh̄ȳri na we anh̄ipēêxà ja? Anē.

Hāmri nh̄um mē kām:

—Nà mē ate Inh̄ipēêxà pumunhre hā. Mē ate apr̄i hā ixpumunh ronh̄ȳx ka mē mǎānēn apr̄i hā Inh̄ipēêxà pumunh mex kurē kumrēx. Nom mē ate ixpumunh mex kêt jakamā na ka mē mǎānēn omunh mex kêt nē. Anē.

²⁰ Nh̄um pre ā Jejus mē kām kapēr anē. Ar̄i Tirtūm mǎ amnh̄i jarēnh xà hā ixkreja kamā mē ahkre ho xa. Mē kot kàxpore ḡēnh xà kuri mē ahkre ho xa. Nh̄um mē kām hkurē xw̄ynhjaja tee ri kot tanhmā mē ahkre htoja ma nē kām unēnh nē haxàr prām nē. Nom kormā mē kot ā hipēx anh̄ȳr ā ar̄igro kormā kator kêt jakamā nh̄um Tirtūmja nē mē omunh mex nē nh̄um mē ām kām unēnh prām kapr̄ȳ.

²¹ Hāmri nh̄um Jejus ar̄i mē kām kapēr o xa nē mē kām:

—Nà kot paj nh̄ȳrmā mē arūm ixkato nē ma akup̄ym api. Ka mē tee ri ijarēn nom nh̄ȳri ixpumunh kêt nē. Hāmri nē mē ate amnh̄i tomnuj o apa rāhā ty nē mē atō ixw̄ȳr axāpir kêt nē. Anē.

²² Hāmri nh̄um Ijaew nhō pahijaja tee ri ā kapēr anh̄ȳrja ā kuma nē axpēn mǎ hā hpēr o pikēnh o kuhê nē axpēn mǎ:

—Kwa mǎn ra kot amnh̄i p̄r kaxyw ā na ri hkôt mē paxāpir kêt ā mē pajarēnh anē na? Anē.

²³ Hāmri nh̄um amnh̄i tā mē kuma nē mē kām:

—Nà mē kajaja mē apē pyka nhō xw̄ynh na ka mē. No pa na mē arom ixpē kaxkwa nhō xw̄ynh jakamā mē pajamaxpēr kot axpēn pyrāk kêt. ²⁴ Kot kaj mē ixpē kaxkwa rūm ixw̄r̄yk xw̄ynh ā ixpumu nē amnh̄i kaxyw inhmā ajamaxpēr nē ixkôt amnh̄i xunhw̄ȳr kêt hā kot kaj mē ate amnh̄i tomnuj o apa rāhā nh̄ȳrmā atyk o mē kamjaja Tirtūm mǎ amnh̄i pānhā amnh̄ire. Anē.

²⁵ Nh̄um Jejus ā mē inhō pahijē hkukamā mē kot amnh̄i nh̄ipēx jarēnh anē nh̄um mē tee ri amnh̄i tā kuma nē kām:

—Kwa mē atō na ka we ri ā mē inhmā akapēr anē? Anē.

Hāmri nh̄um mē kām:

—Nà ra ixte mē amā amnh̄i jarēnh kēnā. Xàn ka mē kormā apr̄i hā inhmar kêt nē? ²⁶ Kot paj nh̄ȳrmā mē amā mē ate amnh̄i tomnuj piitā ho amnh̄ir̄it pa. Na pa kot mē aw̄ȳr inhmēnh xw̄ynhta pix xō ri tanhmā mē amā ixkapēr to ho ri ixpa. Ām hāmri na hte tanhmā mēmoj jarēnh to. Na hte hēx kêt nē. Anē.

²⁷ Nh̄um pre ā Jejus mē kām Hipēêxà kot mē hw̄ȳr mēnh ā harēnh anh̄ȳr tā no nh̄um mē Hipēêxà kēp Tirtūm ā hkôt hamaxpēr kêt nē. ²⁸ Jakamā nh̄um mē kām:

—Nà koja mē nh̄ȳrmā p̄i kahpa hā inhō ka mē r̄i kormā apr̄i hā

ixpê Tirtūm rūm mē awȳr ixwrȳk xw̄ynh ā xipumu. Nē ixte amnhī krā hkôt ixkapēr o ri ixpa hkēt ā xipumu. Nē ām Inhīpêxà xō ri ixprī hā ixkapēr o ri ixpa hā xipumu. ²⁹ Ixte kām hprām xà hkôt pix mā tanhmā ri amnhī nhīpêx to ho ri ixpa jakamā na hte ixtānopxar mex o ixkôt pa ho pa. Kojā aa ixkaga hkēt nē. Anē.

³⁰ Hāmri nhūm mē hkwȳja kuma nē hkwȳjê rom kapēr kôt hamaxpēr ³¹ nhūm amnhī tā mē omu nē mē kām:

—Nā ām hāmri na ka mē tā ixkôt ajamaxpēr. Tā kêr ka mē ixkôt amnhī xunhw̄y nē ixkapēr kôt pix mā ri amnhī nhīpêx mex o ri apa. Hāmri pa ja hā mē apumu nē mē apê ixkw̄y kumrêx ā mē ajarê. ³² Ām hāmri na pa hte ā ixkapēr anh̄ȳr o ri ixpa. Tā kot kaj mē ixkôt ri amnhī nhīpêx o ri apa hāmri nē aprī hā inhmar t̄yx nē. Nom na hte kormā mēmoj kot amnhī tā mē ato ht̄yx pyrāk o mē anhīpêx ka mē tee ri amnhī krā hkôt kām anh̄urer prām kapr̄y. Tā kot kaj mē ixkôt amnhī xunhw̄y nē ixkôt ri amnhī nhīpêx hāmri nē Tirtūm nh̄y hā tām amnhī nhīpêx. Jao ŷ hā ate amnhī tomnuj mā anh̄ure. Anē.

³³ Nhūm pre ā Jejus mē kām kapēr anē hāmri nhūm mē tee ri kuma nē kām:

—Kwa mē ixpê mē pahpār krax finat Apraāw kanrêhā htāmnhw̄y kênā. Na pre mēmoj te kot amnhī tā ho ht̄yx pyrāk o hipêx kêt nē. Jakamā mēmo kot we mē ixpê hkanrêhā htāmnhw̄yjê ho ht̄yx ka we ri ā mē ijarênh anē? Nā am-rakati kênā. Tā kwa mon ka ā mē ijarênh anē? Anē.

³⁴ Hāmri nhūm Jejus hprī hā mē kām awjarê nē mē kām:

—Kwa mē ixkapēr ma nē amnhī krām haxār t̄yx nē. Nā mē kot amnhī tomnuj o mē pa xw̄ynhjaja te mē kot amnhī tomnuj tām ri kot amnhī tā mē ho ht̄yx pyrāk o mē

hipêx. Jakamā nhūm mē urer kêt rāhā nē pa ho pa. Nē ā amnhī nhīpêx anh̄ȳr rāhā ho pa. ³⁵ Jakamā ixkīnhā mē kêp Tirtūm kw̄y hkēt. No pa na ixpê Tirtūm Kra jakamā määnēn ixpê hkwȳ na pa. ³⁶ Tā mē kajaja. Kot kaj mē ixpê Tirtūm Kra hā ixkôt amnhī xunhw̄y hā kot pa tanhmā mē ato ka mē ixpyrā nē apê wa ixkw̄ȳy. Hāmri nhūm mē ate amnhī tomnuj te kot mē amā urer pyrāk o mē anhīpêx ka mē ra wa ixkôt amnhī nhīpêx o ri apa. Anē.

Mē kêp Tirtūm kra hkēt xw̄ynhjê jarênh

³⁷ Nhūm Jejus arī mē kām kapēr nē mē kām:

—Nā ām hāmri na ka mē apê finat Apraāw kanrêhā htāmnhw̄yhā amnhī jarê. Nom mē apê hkanrêhā htāmnhw̄y htā urāk nē amnhī kaxyw Tirtūm kôt ajamaxpēr kêt nē. Jakamā na ka htem ixkapēr ma nē ām ama nē ixkaga. Nē axtem nē ixpīr mā. Kop apu Apraāw arī mē akamā pa ronh̄ȳx ā inhīpêx anh̄ȳr kêt nē. ³⁸ Na pa hte Inhīpêxà hkôt pix mā ri amnhī nhīpêx o ri ixpa. No mē kajaja axtem nē mē ate nhām mē kapēr kôt amnhī nhīpêx jakamā na ka htem ixkīnhā Inhīpêxà hkôt amnhī nhīpêx kêt nē. Anē.

³⁹ Hāmri nhūm mē tee ri amnhī tā kuma nē kām:

—Tk. Kwa mon ka ā mē ijarênh anē? Mē ixte Apraāw kôt amnhī nhīpêx o ri ixpa kênā. Anē.

Hāmri nhūm mē kām:

—Nā. Mē ate hkôt ri amnhī nhīpêx o apa ronh̄ȳx ka mē urāk nē Inhīpêxà kapēr kôt amnhī nhīpêx.

⁴⁰ No na ka mē ra axtem nē ixpīr mā. Ām hāmri na pre Tirtūm inh̄mā awjarê pa ô ri tanhmā mē amā mēmoj jarênh to ho ri ixpa htā ka mē ra axtem nē ixpīr mā. Kwa xà na pre Apraāwja ā mē hipêx anh̄ȳr o pa? Nā na pre ā mē hipêx anh̄ȳr kêt nē. ⁴¹ Mē ate hkôt amnhī nhīpêx

xwýnhta axtem na. Kêp Apraãw kêt. Nê mãânên kêp Tirtùm kêt. Anê.

Hãmri nhùm mē tee ri kuma nê kām:

—Tk. Kwa nà ã mē ijarēnh anhÿr kêt nê. Mē ixte Apraãw kôt amnhĩ nhĩpêx xwýnh kênã. Tã ka ri axtem nê ã mē ijarēnh anê. Mēhō hkôt kot pa kêt wem ri axtem amnhĩ nhĩpêx o ri ixpa? Anê.

⁴² Hãmri nhùm mē kām:

—Nà mē ate Apraãw kôt amnhĩ nhĩpêx ronhÿx ka mē ixpumu nê uràk nê amã ixprãm nê. Apraãw kot hkôt amnhĩ nhĩpêx o pa xwýnhta tãm kot mē awÿr inhmēnh nhùm mē awÿr ixwrÿk kênã. Na pa pre amnhĩ krã hkôt man mē awÿr ixwrÿk kêt nê. Tãm na pre mē awÿr inhmē pa wrÿ. ⁴³ Kwa mon ka mē aprĩ hã ixkapêr mar mex kêt nê? Nà mē amã ixkôt amnhĩ nhĩpêx prãm kêt jakamã na ka mē tee ri ixkapêr ma nê aprĩ hã mar mex kêt nê. ⁴⁴ Mē ate hkôt amnhĩ nhĩpêx xwýnhta Satanasti na. Aa tãm kot amnhĩ nhĩpêx kêt kumrêx. Kêp mē hpar o pa xwýnhjê hpãm maati na. Nê kêp mē kām hêx o pa xwýnhjê pãm maati na. ã kot amnhĩ nhĩpêx kot anhÿr. Nê kām mē kapêr mex mar prãm kêt o pa. Nê ãm hêx pix o pa jakamã kêp mē hêx xwýnhjê pãm. ã kot amnhĩ nhĩpêx anhÿr xwýnh tã ka htem hkôt amnhĩ nhĩpêx o ri apa.

⁴⁵ —Na pa hte kurom ãm hãmri ixkapêr o ri ixpa. No mē kajaja mē apê hêx nhi xwýnh maatiãa hkra jakamã mē amã ixkapêr mar prãm kêt. ⁴⁶ Xà na ka pre mē atō ixte tanhmã amnhĩ tomnuj to hã ixpumu? Nà amrakati. Ixte amnhĩ to mex o ri ixpa xwýnh na pa. Nê tãm ixkapêr o ri ixpa xwýnh tã ka mē inhma nê ãm inhma nê ixkôt ajamaxpêr kêt nê. Kwa mon ka mē ja hã ixpumunh nê ixkôt ajamaxpêr nê ixkôt amnhĩ xunhwÿr kêt nê? ⁴⁷ Tirtùm krajaja na htem kapêr mar tÿx nê hkôt amnhĩ nhĩpêx o pa.

No mē apê hkra hkêt jakamã mē amã kapêr mar prãm kêt. Anê.

Mē kot Jejus kêp Satanasti hkwy hã harēnh

⁴⁸ Hãmri nhùm mē ã Jejus kot mē harēnh anhÿrja ma nê kamã gryk tÿx kumrêx. Hãmri nê kām:

—Tk. Kwa ate amnhĩ tomnuj o apa xwýnhiti kênã. Ra Satanasti hkwy pē mēkarōmnuti tanhmã kot akra hto jakamã na ka ã mē inhmã akapêr anê. Anê.

⁴⁹ Hãmri nhùm mē kām:

—Nà mēkarōmnuti kot tanhmã ixto hkêt. Na pa hte Inhipeêxã hã ixpijaam pix o ri ixpa. Tã mē ate ixkĩnhã hã apijaam kêt jakamã mãânên pa ixtã apijaam kêt nê. ⁵⁰ Na pa hte amnhĩ krã hkôt mē piitã mē kot ixtã hpijaam prãm xaj tanhmã mē kām ixkapêr to hkêt nê. No mē piitã mē kot ixtã hpijaam o paja na Inhipeêxã kām hprãm. Tã koja nhÿrmã amnhĩ nê ixtã mē hpijaam kêt xwýnhjaja mē kot amnhĩ xà htÿx kamã hamak tùm xàta wÿr mē rēnh pa.

⁵¹ —Nê kot ka mē atō wa ixkapêr ma nê ixkôt amnhĩ nhĩpêx. Hã kot kaj wa ixri atĩr tùm nê apa ho apa. Kwa mē ixkapêr ma nê amnhĩ krãm haxàr tÿx nê. Anê.

Nhùm pre ã Jejus Ijaew nhō pahijê mã kapêr anê. ⁵² Nhùm mē kuma nê kām:

—Kwa pēr ãm hãmri na ka hte Satanasti nhÿ hã ã mē htĩr tùm nê mē pa ho pa hã mē harēnh anhÿr o ri axêx o ri apa. Finat Apraãw na pre ri paa nê ty. Tã mē kot Tirtùm nhÿ hã kapêr jarēnh o mē pa xwýnhjaja na prem uràk nê ri paa nê mãânên htyk pa. Tã ka axtem nê mē kot akapêr kôt amnhĩ nhĩpêx o mē pa xwýnhjaja ari htĩr tùm nê pa ho pa hã mē harê. Nà na ka ãm mē inhmã mē ho axêx o xa. ⁵³ Na pre mē pahpãm Apraãwja kot amnhĩ to rax tã ty nê hapêx. Nhùm mē kot Tirtùm nhÿ hã kapêr jarēnh xwýnhjaja mãânên mē kot

amnhĩ to rūnh tã htyk pa nẽ hapêx. Mẽ kot amnhĩ to rūnh tã htyk pa nẽ hapêx kênã kot kêt mẽ tanhmã amnhĩ to nẽ ari htĩr tũm nẽ pa. Âm mẽ ixte akapêr mar nẽ atã ixpijaam pix prãm xaj na ka ã mẽ inhmã mẽ htĩr tũm nẽ pa hã mẽ harênh anẽ. Nom na ka ã mẽ harênh anhỹr kaprỹ. Kot paj mẽ ri akapêr mar kêt nẽ. Anẽ.

⁵⁴ Hãmri nhũm mẽ kuma nẽ mẽ kãm:

—Nà na pa hte amnhĩ krã hkôt mẽ ate ixtã apijaam hprãm xaj tanhmã mẽ amã ixkapêr to hkêt nẽ. Kot paj anẽ nẽ âm ixtỹx ã amnhĩ nhĩpêx anhỹr kaprỹ. No Inhĩpêêxã tãm kãm mẽ apiitã mẽ ate ixtã apijaam o apaja nhũm kãm hprãm. Mẽ ate Tĩrtũm kôt amnhĩ nhĩpêx o apa hã amnhĩ to axêx xwỹnhnta tãm na kãm mẽ ate ixtã apijaamja nhũm kãm hprãm. Tã ka htem ã amnhĩ nhĩpêx anhỹr kêt nẽ. Na ka htem ixkuk pumu nẽ axtem nẽ ixte Satanasti nhỹ hã mẽ amã ixêx o ri ixpa hã ijarẽ. ⁵⁵ Mẽ ate Inhĩpêêxã hkôt amnhĩ nhĩpêx ã amnhĩ jarênh tã âm amnhĩ to axêx o ri apa. No pa na pa hte mẽ arom âm hãmri hkôt amnhĩ nhĩpêx mex o ri ixpa. ⁵⁶ Amnepêm mẽ pahpãr krax Apraãwja na pre mẽ awỹr ixwryk kukamã ijarênh ma nẽ mẽ arom inhỹ hã hkĩnh tỹx nẽ pa. Anẽ.

Nhũm pre ã Jejus mẽ kãm amnhĩ jarênh anẽ. ⁵⁷ Hãmri nhũm mẽ kuma nẽ tee ri kot mẽ kãm tanhmã Apraãw jarênh toja ma nẽ kãm:

—Tk. Xà na ka pre finat Apraãwja ano ho omu? Nà kormã anyw kênã. Apraãw amnepêm htyk nẽ hapêx kênã kot ka kêt kot akukamã ajarênh mar nẽ hkĩnh tỹx ã harẽ. Xan ka pre ano ho omu? Kormã akator kêt ri na pre amnepêm htyk nhũm mẽ haxãr kênã. Nà na ka âm mẽ inhmã amnhĩ to axêx. Te amnepêm mẽ hkukamã apa nẽ ate mẽ omunh nẽ mẽ harênh pyrãk.

Kwa akatãt kôt mẽ inhmã awjarẽ. Anẽ.

Jejus kêp rãhã ho rãhã xwỹnh ã harênh

⁵⁸ Hãmri nhũm Jejus mẽ kãm:

—Nà ixêx kêt. Âm hãmri na pa ã mẽ amã amnhĩ jarênh anẽ. Amnepêm kormã Apraãw kator kêt ri na pa pre ixrãhã ho ixrãhã ixpa na pa. Ixrãhã ho ixrãhã ixpa xwỹnh jakamã na pa pre hte inhno ho Apraãw pumunh mex o ri ixpa. Kwa mẽ ixkapêr ma nẽ amnhĩ krã him haxãr tỹx nẽ. Anẽ.

⁵⁹ Hãmri nhũm mẽ tee ri kot ã amnhĩ jarênh anhỹrja ã kuma nẽ kamã gryk tỹx nẽ. Nẽ axpên mã:

—Kwa tanhmã kot we amnhĩ to nẽ amnepêm rãhã nẽ pa ho pa xwỹnh ã amnhĩ jarẽ? Tĩrtũm pix na rãhã ho rãhã pa xwỹnh. Anẽ.

Hãmri nẽ kamã gryk xaj kên rūnh kwỹ kawrà ho ri hprôt nẽ kot ho htak o hpĩr kaxyw. Nom nhũm ra amnhĩ tã mẽ omu nẽ mẽ kêp akunok nẽ Tĩrtũm mã amnhĩ jarênh xà hã ixkreja rũm kato nẽ ma tẽ.

9

Jejus kot no hkre xwỹnh o mex ã harênh

Makre 8.22-26

¹ Hãmri nhũm Jejus ma tẽ pa mẽ hkôt ri mẽ ixpa ho mẽ ixpa xwỹnhjaja ma hkôt mra. Hãmri nẽ nhỹri no hkre xwỹnh pumu. Katorxã nhõxã hkre rũm na pre no hkre nẽ kato. Hãmri nẽ ra hprêk nẽ hpri kamã àhwỹr o hkrĩ. ² Tã hãmri pa mẽ mra nẽ omu nẽ hã Jejus kukja nẽ kãm:

—Kwa mẽmoj mýrapê na pre we myti něj no hkre nẽ kato? Xà tãm kot tanhmã amnhĩ tomnuj to mýrapê nã? Xà katorxã rỹ hipêêxã kot amnhĩ tomnuj mýrapê na pre ã no hkre nẽ kator anẽ? Anẽ.

³ Hãmri nhũm mẽ inhmã:

—Nà mẽhõ kot tanhmã amnhĩ tomnuj to mýrapê no hkre nẽ kator kêt. Âm Tĩrtũm kot ho mex nhũm

mě kot ja hã omunh kaxyw na pre ã no hkren kator aně. Tã kot paj Tirtũm nhỹ hã no ho mex ka mẽ ja hã ixpumu. Na pa hte kormã jar pikap ri ixpa ri Tirtũm mã tanhmã amnhĩ nhĩpêx mex to ho ri ixpa. ⁴ Na htem arĩgro hã mẽmoj tã apê nhũm kamãt nhũm mẽ kãm ure nê ãpênh kêt nê. Ja pyrã nê na pu htem kormã pahĩr ri jar pikap ri papa ri Tirtũm mã tanhmã amnhĩ nhĩpêx to ho ri papa. Tã kot puj mẽ nhỹrmã ty hãmri nê axte jar ã amnhĩ nhĩpêx anhỹr kêt nê. Jakamã kwa kër pu mẽ ri jar pikap ri papa ri kãm tanhmã amnhĩ nhĩpêx mex to ho ri papa. ⁵ Na pa hte ã kãm amnhĩ nhĩpêx anhỹr jao te kanê hirã mex pyrã nê ixprĩ hã mẽ kãm Tirtũm kot amnhĩ nhĩpêx o amnhĩrĩt mex o ri ixpa. Aně.

⁶ Nhũm pre ã Jejus mẽ inhmã amnhĩ jarênh aně. Hãmri nê kot nohkre xwỹnhhta no o mex kaxyw hikõt nê argõx mẽ nê ho gyw kwỹ nhĩpêx nê kãnhmã xa nê ho no kukõ. ⁷ Hãmri nê kãm:

—E ma gõ gjênh xà pê Siroe hwỹr tẽ nê kamã amnhĩ no kuhõ. Aně.

Mě pakapêr kãm Siroeja mẽ kot kãm: “Nhỹhỹm mẽnh xwỹnh” anhỹr jarênh pyrãk. Tã nhũm Jejus hwỹr kumẽ nhũm ma hwỹr tẽ. Hãmri nê kamã amnhĩ no hã gyw kuhõnh pa jao rĩt mex kurê kumrêx. Hãmri nê rĩt mex ã amnhĩ pumu nê hkĩnh tỹx nê ma akupỹm õrkwỹ hwỹr tẽ. ⁸ Hãmri nhũm õrkwỹ kuri mẽ õrkwỹ xwỹnhjaja nê mẽ kot pry kamã ahwỹr o hkrĩ hã omunh xwỹnhjaja amnhĩ jaêr pê ra rĩt mex ã omu nê tee ri hã axpên kukja nê axpên mã:

—Kwa pêr pry kamã ãhwỹr o hkrĩ xwỹnhhta na nã? Aně.

⁹ Hãmri nhũm kamã mẽ hkwyjaja mẽ kãm:

—Tỹ. Tãm na. Aně.

Nhũm kamã mẽ hkwyjaja mẽ kãm:

—Nã tãm kêt. Axtem mẽhõ na. Te kot urãk nom tãm kêt. Aně.

Anhỹr o ri axpên mã harê. Tã nhũm tãm mẽ kãm amnhĩ jarê nê mẽ kãm:

—Tỹ pa kênã. Pa na pa pre hte inhno hkre nê ri ixpa htã ra ixrĩt mex. Aně.

¹⁰ Hãmri nhũm mẽ tee ri kuma nê kãm:

—Kwa no tanhmã na ka we amnhĩ to nê ra arĩt mex?

¹¹ Aně nhũm mẽ kãm:

—Nã mẽ kot kãm “Jejus” anhỹr xwỹnhhta na ixwỹr tẽ nê ixkaxyw gyw kwỹ kagõ nê ho inhno kukõ. Hãmri nê mẽ kot gõ mã: “Siroe” anhỹr xwỹnhhta kamã ixte amnhĩ no kuhõnh kaxyw hwỹr inhmã aně pa ma hwỹr tẽ nê kamã amnhĩ no kuhõ nê ixrĩt mex kurê kumrêx. Aně.

¹² Hãmri nhũm mẽ kuma nê kãm:

—No nhỹhỹm na ato mex xwỹnhja ma tẽ? Aně.

Hãmri nhũm mẽ kãm:

—Konên. Ixte nhỹhỹm htêm xà hkõt omunhre hã. Aně.

¹³ Hãmri nhũm mẽ kuma nê ma Parijew nhõ xwỹnhjê hwỹr o mõi nê mẽ kãm harê. ¹⁴ Nê mẽ kãm:

—E ot pa mẽ awỹr jahti ho tẽ. Na xep Jejusja jarãhã akupỹm kãm no ho mex. Mẽ panhõ arĩgromnu htã nhũm hã no ho mex. Aně.

¹⁵ Hãmri nhũm mẽ tee ri mẽ kuma nê myta pumu nê kãm:

—E mẽ inhmã amnhĩ jarê. Tanhmã na ka pre we amnhĩ to nê anohkre nê akrĩ htã ra ano mex nê? Aně.

Hãmri nhũm mẽ kãm:

—Nã na pre Jejus gyw o inhno kukõ nê inhmã aně pa gõ ho amnhĩ no kuhõ nê ixrĩt kurê kumrêx. Aně.

¹⁶ Hãmri nhũm mẽ kuma nê tee ri Jejus ã axpên kukjêr o kuhê nê axpên mã harênh o:

—Kwa mẽ panhõ arĩgromnu hã kot ho mex jakamã kêp Tirtũm rũm mẽ pahwỹr wrỹk xwỹnh kêt. ãm kot amnhĩ tomnuj xwỹnh kênã. Aně.

Nhũm mẽ hkwyjaja harênh o:

—Kwa nà. Kot amnhĩ tomnuj xwýnh ronhỹx àhpumunh tỳx kòt no ho mex kêt nê. Anê.

¹⁷ Hāmri nê hpānhã no mex xwýnhhta mã kām:

—No ka? Ate kot ano ho mex xwýnh ã amnhĩ tã harēnh jakamã mēhō hã na ka hkamnhĩx? Mēhō na wehe? Anê.

Hāmri nhũm mē kām:

—Konēn. Mān kēp Tĩrtũm kapēr jarēnh o ri mē pa xwýnh mǎn. Hã na ã inhno ho mex anê. Anê.

¹⁸ Hāmri nhũm mē tee ri kuma nê axpēn mã:

—Kwa pēr aa nohkre hkêt kēnã. Na pre âm amnhĩ to hêx o pa. E kwa pu mē amnhĩ wýr katorxà nê hipêêxà wa hã karō kê wa man tē nê tanhmã mē pamã harēnh to. Anê.

Hāmri nê wa hã karō ¹⁹ nhũm wa mē hwýr tēn axà nhũm mē wa kām:

—Pa. E mē inhmã mēmoj jarē. Xà we wa akrata na âm ja nà? Xà tām na ka hte wa nohkre nê kator ã harē? Kwa tanhmã na we amnhĩ to nê ra rĩt mex? Anê.

²⁰ Hāmri nhũm wa mē kām:

—Yỹ wa ixkra kēnã. Na pre wa ixpê nohkre nê kato. ²¹ Tã ra tanhmã amnhĩ to nê ra rĩt mex. No wa ixte kot ho mex xwýnhhta pumunh kêt. Kwa mē tām mǎn hkukja nê ama. Ra àptār kēnã. Kê tām mǎn mē amã tanhmã amnhĩ jarēnh to ka mē ama.

²² Anhýr o mē kām wa hkrata jarē. No âm wa kām mē uma nê ã mē kām kapēr anê nê mē kām Jejus nhĩxi jarēnh kêt nê. Na pre Parijew nhō xwýnhjaja ra Jejus nê mē kām kapēr nê mē kām:

—Ka mē atō Tĩrtũm kot mē pakaxyw Jejus xām ã harē hāmri nê axte Tĩrtũm kapēr o mē ahkre xà hã ixkreja wýr agjêx kêt kumrêx nê rĩ amnhĩ pumu.

²³ Anhýr o nê mē hkurê jakamã nhũm wa mē umaj ã mē kām hkra jarēnh anê nê kot ho mex xwýnh nhĩxi jarēnh kêt nê. ²⁴ Hāmri

nhũm mē axte amnhĩ wýr no mex xwýnhhta ã karō nê kām:

—Kwa akatāt kòt mē inhmã amnhĩ jarē. Ate kot ano ho mex ã harēnh xwýnhhta na kot amnhĩ tomnuj pix o pa xwýnh kēnã kot kêt ano ho mex. Jakamã kwa Tĩrtũm noo mã akatāt kòt mē inhmã amnhĩ jarē nê axêx kêt nê. Anê.

²⁵ Hāmri nhũm mē kām:

—Ko ixte ja hã omunh kêt. Âm ja pix na ixte omunh. Na pa pre inhno hkre nê ri ixpa htã ra ixrĩt mex nê. Anê.

²⁶ Hāmri nhũm mē tee ri kot amnhĩ jarēnhja ã kuma nê kām:

—No tanhmã na we mytita amnhĩ to nê amã ano ho mex? Anê.

²⁷ Hāmri nhũm tee ri axte mē kot hã hkukjêr ã mē kuma nê mē kām:

—Kwa ra ixte mē amã âm hāmri amnhĩ jarēnh griã. Tã ka mē inhma nê âm inhma nê arĩ hã ixkukja. Mǎn ka mē amã hkòt amnhĩ xunhwýr prām hã na ka mē aprĩ hã ixkukja nà? Mē ate kot amnhĩ nhĩpêx ã aprĩ hã harēnh mar nê hkòt amnhĩ xunhwýr prām xà na ka mē aprĩ hã amã harēnh prām nê. Anê.

²⁸ Hāmri nhũm mē tee ri kuma nê kamã gryk nê. Nê hã kām akir nê kām:

—Tk. Ka na ka hte kapēr kòt amnhĩ nhĩpêx. No kêt mē pajaja na pa htem finat Mojes kapēr kòt pix mã amnhĩ nhĩpêx. ²⁹ Mojes mã na pre hte Tĩrtũm kapēr o pa. Jakamã pa htem âm hkòt pix mã amnhĩ nhĩpêx o ri ixpa. No ate kot ano ho mex ã harēnh xwýnhhta mē ixte omunh kêt. Nê mēhō nhỹ hã kot tanhmã amnhĩ nhĩpêx to ho pa xwýnhja mē ixte omunh kêt. Anê.

³⁰ Hāmri nhũm tee ri mē kuma nê mē kām:

—Kwa kot inhmã inhno ho mex nhũm ra ixrĩt mex tã ka mē tee ri hkukamã ajamaxpēr nê mēhō nhỹ hã kot ã amnhĩ nhĩpêx anhýr o pa hã omunh kêt ã amnhĩ jarē. ³¹ Mē pahte Tĩrtũm kot amnhĩ nhĩpêx ã omunh mex. Kojã mēhō kot

amnhĩ tomnuj xwýnh mẽmoj tă kuwý nhũm kuma nê ãm kuma. No kêt mẽ kot hkôt ri amnhĩ nhĩpêx xwýnhjaja. Nê mẽ kot kãm mex o mex ã harênh xwýnhjaja na htem mẽmoj tă kuwý nhũm mẽ kuma nê mẽ kãm tanhmã mẽmoj nhĩpêx to rý mẽ kãm mẽmoj gô. ³² Tã aa mẽ pahte mēhō kot mẽ no ho mex ã harênh mar kêt tă nhũm ã Jejus inhmã inhno ho mex anê. ³³ Kêp Tirtũm kwý hkêt ronhỹx pre inhno ho mex kêt nê. Anê.

³⁴ Hãmri nhũm mẽ kuma hãmri nê kãm:

—Tk. Kwa pēr ãm akator kôt ate amnhĩ tomnuj o ri apa htã na ka ã mẽ inhmã akapēr anê. Kwa ixkreja rũm akato nê ma atēm kurê kumrêx.

Anhỹr o kãm kapēr hãmri nê mẽ amnhĩ nê hano nhũm kato nê ma tē.

³⁵ Tã nhũm Jejus ra mẽ kot amnhĩ nê hanor ã harênh ma nê ma hapēr o tē nê nhỹri omu. Hãmri nê amnhĩ tă hkukja nom te nhãm mēhō hã hkukjêr pyrã nê kãm:

—Pa? Xàn ka ra Tirtũm kot mẽ awýr mẽnh xwýnhhta amnhĩ kaxyw hkôt ajamaxpēr nã? Anê.

³⁶ Hãmri nhũm kormã kot no ho omunh kêt jakamã kêp Jejus ã omunh kêt nê. Na pre kormã no hkre nê ãm kapēr pix ma. Tã ra akupým rít mex nom kormã no ho omunh kêt nê. Jakamã nhũm Jejus hwýr tē nê ã kãm kapēr anê nhũm omu nê kormã kêp Jejus ã omunh kêt nê kãm:

—Tỳ kot kaj inhmã ahkre pa omu nê hkôt amnhĩ xãm kurê kumrêx. Anê.

³⁷ Hãmri nhũm kãm:

—Kwa paa. Ixte amã ixkapēr xwýnhhta pa na pa. Anê.

³⁸ Hãmri nhũm kãm:

—Kwa xôwehe Pahihti? Nã kot paj amnhĩ kaxyw akôt pix mã ijaxpēr nê akôt pix mã amnhĩ nhĩpêx o ri ixpa. Anê.

Hãmri nê kutã hkôn krã ho tēm nê nhỹ nê kãm mex o mex ã harênh o nhỹ. ³⁹ Hãmri nhũm Jejus kãm:

—Nã ixte mẽ apiitã tanhmã mẽ ajarênh to kaxyw na pa pre kaxkwa rũm man mẽ awýr wrý. Ahpýnhã mẽ amã ixprãm xwýnhjê jarênh nê ahpýnhã mẽ kãm ixprãm kêt xwýnhjê jarênh kaxyw. Mẽ kãm ixprãm kêt xwýnhjaja kot hpri hã Tirtũm kapēr mar mex kêt tă na htem htýx ri kot mar mex ã amnhĩ jarênh o pa. Jakamã te mẽ nohkre xwýnhjaja kot amnhĩ nhĩpêx pyrãk. Nom koja mẽ Tirtũm kapēr ma nê ixkôt amnhĩ xunhwýr japêr. Hãmri nê te ra rít mex pyrãk o amnhĩ nhĩpêx. Jao ra hpri hã Tirtũm kapēr mar mex o pa. Anê.

⁴⁰ Nhũm pre ã Jejus kãm kapēr anê. Nhũm Parijew nhō xwýnh kwýjaja kot kuri mar o kuhê xwýnhjaja ã kapēr anhỹr ã kuma nê amnhĩ tă kãm:

—Kwa nã. Xà we mẽ pajaja na ka ã mẽ inhnokre hã mẽ ijarênh anê? Xà mẽ ixte ixpri hã Tirtũm kapēr mar mex kêt ã na ka mẽ ijarê nã? Anê.

⁴¹ Hãmri nhũm mẽ kãm:

—Ýy kop apu mẽ ate aprĩ hã kapēr mar mex kêt ã amnhĩ jarênh ronhỹx ja mẽ amã mex nê. Tã mẽ ate aprĩ hã mar mex ã amnhĩ to axêx o apa jakamã na ka mẽ ra amnhĩ tomnuj tỳx nê. Na hte Tirtũm ja hã mẽ apumu nê amnhĩm mẽ ate amnhĩ tomnuj xwýnh ã mẽ ajarê. Anê.

10

ôwêhti jarênh

Matêwre 9.36, 12.11-12; Rukre 15.3-7

¹ Nhũm Jejus arĩ Ijaew mã kapēr nê mẽ kãm:

—E pa mẽ amã awjarê ka mẽ inhma nê amnhĩ krã him haxàr tỳx nê ho apa. Mẽ hkrit ôwêhti kot paj mẽ amã harê ka mẽ inhma. Na hte ôwêhti jamãr o pa xwýnhjaja

ôwêhti apkur kaxyw mẽ o pa hãmri nhũm kamàt nhũm akupỹm kahê hwỳr mẽ o pa. Kahê jakwakreja àm pixii. Tã koja mẽhõ kahê xà hkôt hwỳr àr kêt nê axtem nê tẽ nê nhỹhỹnh kahê hã api nê ôwêhti hwỳr àr japêr nhũm mẽ omu nê kot hkwy ho àhkĩnh ã omunh kurê kumrêx.

²—No ôwêhti jamãr o pa xwỳnhja na hte mẽ kurom katàt kôt kahê jakwakre rũm ôwêhti hwỳr agjê.

³ Nhũm kahê xà jamãr xwỳnhja amnhĩ wỳr omu nê kãm kahê xà rênh kurê kumrêx nhũm axà. Na hte apkati mẽ ma nhỹhỹm apkur kaxyw mẽ o pa. Nê nojarêt nê mẽ kãm akir. Ahpỹnhã tanhmã mẽ hixi kute hã mẽ omunh xà hkôt mẽ kãm àkjêr o pa. Hãmri nhũm mẽ kuma nê hwỳr mra nê hã pikuprõnh pa nhũm mẽ ho hapõj nê ma nhỹhỹm ri mẽ apkur kaxyw mẽ o pa. ⁴ Ma mẽ apkur kaxyw nhỹhỹm mẽ o pa. Nhũm ôwêhti ra kot kapêr mar mex jakamã ma àmnhĩx ri hkôt apkur o pa.

⁵—Na hte hamãr o pa xwỳnh pix kapêr ma nê hkôt pa nê nhãm mẽhõ hkôt ri pa hkêt nê. Kot kapêr mar kêt jakamã tee ri kuma nê umaj axkahkũm nê hprõt nê ma mra. Na hte ôwêhti ã amnhĩ nhĩpêx anê. Anê.

Jejus te kêp ôwêhti gjênh xà hã hakwakre pyrãk

⁶ Nhũm pre ã Jejus mẽ kãm ujarênh anê. Nê ujarênhja kamã amnhĩ kwjýe jarê nê mãânên tãm amnhĩ jarê. Nom mẽ amnhĩ tã kuxi nê mẽ kãm amnhĩ jarênh o te ho ôwêhti jarênh pyrãk nhũm mẽ tee ri kuma nê mar mex kêt nê. ⁷ Jakamã nhũm axte mẽ kãm awjarê nê mẽ kãm:

—E pa ixprĩ hã mẽ amã ixu-jarênhta jarê ka mẽ inhma. Te ixpê ôwêhti jagjênh xà hã hakwakre pyrãk. Kwa mẽ ja ma nê amnhĩ krã him haxàr týx nê. ⁸ Na pre ra ixkukamã mẽ ohtõ nê te ãm hãmri

mẽ amã Tirtũm kapêr jarênh pyrãk o mẽ akõt ri pa. Nom mẽ amã hêx o pa. Te mẽ kot ôwêhti o àhkĩnh xwỳnhhta kot amnhĩ nhĩpêx pyrãk. Nom na hte ôwêhtija àm hamãr xwỳnh pix kapêr ma nê nhãm mẽhõ kapêr mar kêt nê. Ja pyrã nê mẽ kot ixkõt amnhĩ xunhwỳr xwỳnhjaja na htem Tirtũm kapêr o hêx o mẽ pa xwỳnhjê ma nê ãm mẽ kuma nê mẽ hkôt amnhĩ nhĩpêx kêt nê. Na htem ãm ixkapêr pix ma nê ixkõt pix mã amnhĩ nhĩpêx o pa.

⁹⁻¹⁰ —Te ixpê ôwêhti gjênh xà hã hakwakre pyrãk. Na hte ôwêhti mẽmoj punuj pymaj kahê hwỳr agjê nê kamã mex nê kuhê. Nê kurũm hapõj nê ma apkur o pa. Ja pyrã nê mẽ kot ixkõt amnhĩ xunhwỳr xwỳnhjaja koja mẽ ixkukwak ri hkĩnh nê mex nê hamakêtkati nê pa ho pa. Nê nhỹrmã Tirtũm mẽ wa ixri htĩr tũm nê pa ho pa. Ja kaxyw na pa pre man mẽ awỳr pika hwỳr wrý.

—No ôwêhti ho àhkĩnh xwỳnhjaja na htem amnhĩm ho ahkĩ nê kupa nê ma amnhĩm o pa. Tã mẽ kot Tirtũm kapêr o hêx o mẽ pa xwỳnhjaja te mẽ kot jajaja kot amnhĩ nhĩpêx pyrãk. Anê.

Jejus te kêp ôwêhti jamãr xwỳnh pyrãk

Eprêw 13.20; Apokarip 7.17

¹¹ —Nê ôwêhti jamãr mex xwỳnhja koja nhỹri mẽhõ kêp ôwêhti hõxpĩr kaxyw hwỳr htêm ã omu nê wa hã axpu. Nhũm ho àhkĩnh mã xwỳnhhta ôwêhti jamãr xwỳnh pĩ nhũm ôwêhti nê ty. Tã ixkwjýjaja hamakêtkati nê mex nê pa kaxyw na pa pre amnhĩ grõnh kôt mẽ hwỳr wrý. Jakamã kot paj te ôwêhti jamãr xwỳnh kot amnhĩ nhĩpêx pyrãk o amnhĩ nhĩpêx.

¹²⁻¹³ —Nê na htem tõhã ôwêhti jamãr xwỳnh nhỹhỹm pa kaxyw nê mẽhõ mã amnhĩre nhũm wakre kamã kãm hkrit jamãr o pa. Kàxpore pix prãm xaj kãm hamãr

o pa. Jakamã koja nhÿhÿnh mry xoprê ra hwÿr kato nhÿm amnhÿ wÿr omu nê umaj ôwêhti re nê ma hprôt nê tê. Kãm ôwêhti japê hkêt ãm kãm htÿr pix prãm xàj ôwêhti mã hamaxpêr kêt nê rer pa nê ma tê. Nhÿm mry xoprêta ôwêhti hwÿr hprôt nê hkwy pynê nhÿm hkwy umaj axkahkÿm nê hprôt nê ma mra. No kêt pa na te ixte ôwêhti mã hamaxpêr kêt nê kot rer nê ma hprôt nê htêm xwÿnhhta pyrãk kêt. Kot paj aa ixkwÿjê rer kêt nê. Kot paj mẽ hkôt ixpa ho ixpa rãhã nê.

¹⁴⁻¹⁵ —Te ixte ôwêhti jamãr xwÿnh mex pyrãk jakamã na pa hte urãk nê ahpÿnhã mẽ kot ixkôt amnhÿ xunhwÿr xwÿnhjê pumunh mex o ri mẽ hkôt ixpa. Te mẽ kêp ixkrit ôwêhti pyrãk nhÿm te ixpê mẽ hamãr mex o ri mẽ hkôt ixpa nê aa mẽ rer kêt xwÿnhhta pyrãk.

—Nê mẽ kot ixkôt amnhÿ xunhwÿr xwÿnhjaja ra mẽ ixte amnhÿ nhÿpêx kôt axpên pumunh mex. Nê mẽ inhmã axpên japêê. Te Inhÿpêxã mẽ wa inhmã axpên japê pyrãk. Tã kot paj nhÿrmã mẽ nê tanhmã amnhÿ nhÿpêx to.

¹⁶ —Mê kot ixkôt amnhÿ xunhwÿr xwÿnhjaja piitã kêp Ijaew pix kêt. Koja Ijaew kêt xwÿnh kwÿjaja mãânên ixkapêr ma nê ixkôt amnhÿ xunhwÿr nê ixkôt amnhÿ nhÿpêx. Jao ra te kêp ixkrit ôwêhti pyrãk. Tã kot paj mẽ ho ixpimràa tã mẽ ho tipxi nê mẽ hamãr o ri mẽ hkôt ixpa.

¹⁷ —Nê mẽ kot ixkôt amnhÿ nhÿpêx o mẽ pa xwÿnhjaja mẽ mex kaxyw na pa pre amnhÿ grônh kôt mẽ hwÿr wrÿ. Jakamã kot paj nhÿrmã mẽ nê ty. Tã inhmã mẽ nê ixtyk puma hkêt jakamã na Inhÿpêxã kãm ijapêê. Koja akupÿm ixto ixtÿr. ¹⁸ Kop apu inhmã mẽ nê ixtyk prãm kêt ronhÿx mẽ kãm ixkurê xwÿnhjaja tee ri kãm ixpÿr prãm kaprÿ. Nom ixte mẽ kot ixkôt amnhÿ nhÿpêx xwÿnhjê nê amnhÿ grônh kôt mẽ

hwÿr ixwrÿk kênã. Jakamã kot paj arÿ mẽ kãm amnhÿ grônh kôt amnhÿ gô nê arÿ mẽ kãm xa nhÿm mẽ ixpÿ. Nom kot paj akupÿm ixtÿr. Mêhõ koja tanhmã ixto nê ixpÿr o ixpÿ? Nà koja mêhõ ixpÿr o ixpÿr kêt nê. Inhÿpêxã nhÿ hã kot paj nhÿrmã ã amnhÿ nhÿpêx anê nê akupÿm ixtÿr. Anê.

Nhÿm pre ã Jejus mẽ kãm amnhÿ jarênh anê. ¹⁹ Hãmri nhÿm Ijaew tee ri ã kot amnhÿ jarênh anhÿr ã kuma nê kê axte axpên kwÿm ri tanhmã harênh to ho kuhê. ²⁰ Nê kamã mẽ hkwyjaja harênh o:

—Tk. Kwa mẽ mar kêt nê. Satanasti nhÿ hã na hte htÿx ri ã mẽ pamã amnhÿ jarênh anhÿr o pa. Anê.

²¹ Hãmri nhÿm mẽ hkwyjaja mẽ kuma nê mẽ kãm:

—Nà kot anhÿr kêt. Xà na htem Satanasti nhÿ hã ã kapêr mex anê nê ã mẽ no hkre xwÿnhjê ho mex anê? Nà kot anhÿr kêt. Satanastija ukapÿre hã. Anê.

Ijaew nhõ pahijaja kot Jejus kaga hã mẽ harênh

Juãw 5.18, 8.59

²² Tã nhÿm ra amgrã hapêx pa mẽ ixpê Ijaew akupÿm krÿ pê Jerujarê kamã axpên wÿr akuprô. Axte mẽ ixte mẽ ixkÿnh kaxyw axpên wÿr akuprô. Amnepêm mẽ inhÿgêjtaja kot akupÿm Tÿrtÿm mã amnhÿ jarênh xà hã ixkre ho mex pa nê ho Tÿrtÿm wÿr mã hamaxpêr nê hã ixkÿnh ã arÿgroja ã pa mẽ hwÿr akuprô. ²³ Hãmri nhÿm Jejus ma mẽ ixkôt Tÿrtÿm mã amnhÿ jarênh xà hã ixkreta wÿr tê no ãm hwÿr àr kêt nê. ãm ixkre hpu hã kahê xà kape hã ri pa. Mê kot kãm: “Pahi finat Sarumãw pa xà” anhÿr xwÿnhhta kamã ri pa. ²⁴ Hãmri nhÿm kê ra mẽ inhõ pahijaja omu nê hã akuprô nê hêx rom kãm kapêr nê kãm:

—Kwa tokyx aprÿ hã mẽ inhmã amnhÿ jarê. Xà apê Tÿrtÿm Kra na ka nà? Xà ka na pre Tÿrtÿm

mē ixkaxyw axām? Kwa aprī hā mē inhmā amnhī jarē pa mē ama. Mon ka hte aprī hā mē inhmā amnhī jarēnh kēt nē? Na pa mē tee ri ate amnhī nhīpēx ā apumu nē akukamā ijamaxpēr rūnh kumrēx o ri ixpa. Xā ām hāmri apē Tīrtūm kot mē ixkaxyw axām xwýnhhta na ka? Anē.

²⁵ Hāmri nhūm mē kām:

—Tk. Ra ixte mē amā amnhī jarēnh xohtō htā ka mē inhma nē ām inhma. Na pa hte xatā Inhīpēēxā nhỹ hā mē amā mē ate aa mēmoj pumunh kēt kwý ho anhỹr o ri ixpa ka mē ja hā ixpumu nē ām ixpumu nē ixkōt ajamaxpēr kēt nē. ²⁶ Mē apē ixkwý hkēt jakamā na ka mē ixkōt ajamaxpēr kēt nē. Te mē apē ixkrit ōwēhti pyrāk kēt. ²⁷ Ixkwýjaja na te ho ōwēhti kot hamār xwýnh kapēr mar nē hkōt ri pata pyrā nē ixkapēr ma nē ixkōt amnhī nhīpēx o pa. Ixpē mē ō pahihti hā mē kot ixpumunh mex jakamā na htem ixkōt amnhī nhīpēx mex o pa. Ixte ja hā mē omunh mex nē. ²⁸ Koja mē nhỹrmā htyk tā no ām ixkukwak ri akupým htīr hāmri nē Tīrtūm mē wa ixri htīr tūm nē pa ho pa nē aa hapēx kēt nhūm mēhō ixpē mē utār kēt nē. Te inhīhkra hpo nhīpōk ri mē hkrī nhūm te mē hā inhīhkra pikamýr pyrāk nhūm mēmoj tee ri ixpē tanhmā mē ho hprām kaprý. ²⁹⁻³⁰ Inhīpēēxā tām kot inhmā mē ōr kēnā. Hihtýx o kot mē piitā mē hakrenh par jakamā koja mē inhīhkra po nhīpōk ri hkrī nē määnēn Inhīpēēxā nhīhkra hpo nhīpōk ri hkrī. Te ixpē Inhīpēēxā Tīrtūm pyrāk jakamā mēhō kot wa ixpē wa inhīhkra rūm mē utā? Nā amrakati kumrēx.

Anhỹr o mē kām amnhī jarē. ³¹ Hāmri nhūm mē te kēp Tīrtūm pyrāk ā amnhī jarēnh ā kuma nē kamā gryk týx nē. Hāmri nē kot kēn o htak kaxyw ra kaxyw hkwy

kawrà ho ri hprōt. ³² Hāmri nhūm amnhī tā mē omu nē mē kām:

—Kwa ra ixte Inhīpēēxā nhỹ hā mē amā aa mē ate mēmoj pumunh kēt kwý ho anhỹr rax o ixpa. Jao tanhmā mē ho mex to pix o ri ixpa. Tā ka mē axtem nē ā inhīpēx anhỹr kaxyw. Anē.

³³ Hāmri nhūm mē kām:

—Nā ā ate amnhī nhīpēx anhỹr ja mýrapē hkēt. Kēt apē mē inhīō htā ri axtem nē te apē Tīrtūm pyrāk ā amnhī jarēnhja mýrapē na pa mē kēn o atak kaxyw. Na pu htem ā amnhī jarēnh anhỹr o papa hkēt nē. Anē

³⁴ Hāmri nhūm mē kām:

—No ām hāmri ixte ā amnhī jarēnh anhỹr kēnā. Tanhmā na Tīrtūm kapēr ā kaga htūm kot ja jarēnh to wehe? Na pre Tīrtūm Ijaew nhō pahijē mā kapēr nē mē kām:

E mē ate inhỹ hā mē ho amnhīptār jakamā te mē apē pa ixpē Tīrtūm pyrāk.

Anhỹr o kot mē harēnh. ³⁵ Ām hāmri na Tīrtūm kapērja. Tām kot ā mē harēnh kot anhỹr. Mē kot ý hā mē kām kapēr jakamā te mē kēp urāk ā mē harēnh anhỹr kēnā.

³⁶ Tā tām kot ā mē harēnh anhỹr tā hpānhā mē akaxyw pa ixpē Kra hā ixām nē mē awýr inhmēnh nhūm ixwryk nē ixpē Kra hā amnhī jarēnh tā ka mē ja hā inhma nē ām inhma nē ixkōt ajamaxpēr kēt nē. Kwa mon ka mē ja hā ixpumunh nē ixkōt ajamaxpēr kēt nē? ³⁷ Kot paj Inhīpēēxā mē wa ixāhpumunh kōt mē amā aa mē ate mēmoj pumunh kēt kwý ho anhỹr kēt ka mē ja hā ixpumu nē mē rī kam nē māmri ixkōt ajamaxpēr kēt nē. ³⁸ Mē amā ixkapēr mar prām kēt tā kwa ixte Tīrtūm pyrā nē aa mē ate mēmoj pumunh kēt kwý ho anhỹr ā ixpumu nē Inhīpēēxā mē wa ixte amnhī nhīpēx tipxi hkōt ajamaxpēr. Anē.

³⁹Hãmri nhùm mē kuma nhùm ja mē kēp omnuj tỳx nē. Te kot Tĩrtũm pyrãk ã amnhĩ jarēnhja nhùm mē kēp omnuj nē. Jakamã nhùm mē ra kot unēnh nē ixkre rũm ho kator nē kapôt ã mēnh nē kēn ho htak kaxyw nhùm kē axte mē kēp akunok nē ma nhỹhỹm tē.

Jejus kot Jotãw nhĩhkjē hã ri pa hã harēnh

⁴⁰Tã nhùm Jejus ma tē nē pyhti pē Jotãw ã rē. Pa mē hkôt ri ixpa ho ixpa xwỹnhjaja ma hkôt mō. Finat Juãw Paxis kot Tĩrtũm mã wam mē hkrã kumrãr o pa xata wỳr. ⁴¹Hãmri nhùm mē ohtô nē mē ixwỳr mra nē Jejus kapēr ma nē kot tanhmã amnhĩ nhĩpēx to hã omunh o kuhê. Hãmri nē hã tanhmã axpēn mã kapēr to nē axpēn mã:

—Kwa ãm hãmri na pre finat Juãw Paxisja mē pamã Jejus jarēnh o pa. Aa kot mē pamã mē pahte mēmoj pumunh kēt kwỳ ho anhỹr kēt tã ãm xatã hkukamã mē pamã jarēnh o pa. Kēp Tĩrtũm Kra hã Juãw rom hihtỳx o hihtỳx ã harēnh o pa. Nē Tĩrtũm kot mē pakaxyw ãm xwỹnh ã nhùm mē pamã harēnh o pa. Nã ãm hãmri na pre ã mē pamã harēnh anē. Anē.

⁴²Hãmri nhùm mē ohtô nē amnhĩ kaxyw Jejus kôt hamaxpēr nē hkôt amnhĩ xunhwỳ.

11

*Rajare htyk jarēnh
Juãw 5.21-29, 6.40*

¹Rôm nhùm krĩ pē Petãn kamã mēhō my pē Rajareja ra à htỳx nē nō. Na pre htōx wa hamēxkrut. Hō kēp Matre nhùm hō kēp Marir. ²Marir na pre kormã arĩgro hō hã kot Jejus o mex kaxyw mē hkuxwaxà ho hkuxwa nē amnhĩ kĩ ho hpar pōnh kaxyw. Nom kormã. Jakamã nhùm wa hkamyja wa kēp à htỳx nē nō. ³Hãmri nhùm wa tee ri hkukamã hamaxpēr nē ma krĩ hō hwỳr Jejus wỳr mēhō mē nhùm

ma hwỳr tē. Nē hwỳr pōj nē omu nē kãm:

—Pa Pahihti. E ot pa awỳr tē. Na ra amã akrãmnhwỳ japē htỳx xwỹnhta à htỳx nē nō nhùm htōx wa tee ri hkukamã hamaxpēr nē awỳr inhmē pa tē. Kwa tokyx pu ma hwỳr tē ka akupỹm wa kãm ho mex nã? Anē.

⁴Hãmri nhùm kuma nē kãm:

—Nã à htỳx nē nōr tã koja akupỹm mex. Mē kot akupỹm mex ã harēnh mar hãmri nē Tĩrtũm mē wa ixtã hpijaam nē wa ixihitỳx o wa ixihitỳx ã wa ixpumunh kaxyw na ã à htỳx nē nōr anē. Nē pa ixpē Tĩrtũm Kra hã akupỹm ho mex ã ixpumunh nē ixkôt hamaxpēr kaxyw na ã à htỳx nē nōr anē. Anē.

⁵Na pre Jejus kãm Rajare mē htōx wa mē hapē nē. ⁶Tã à htỳx ã harēnh ma nē hwỳr mōr tokyx anhỹr kēt nē. Pa mē arĩ amnhĩm hikranh xà kamã ri ixpaja o ixtã axte apkati axkrut. ⁷Hãmri nhùm rĩ kormã hwỳr nojarēt nē mē inhmã:

—E ma pu mē jarãhã akupỹm Jutej kamã Rajare hwỳr mō nē omu. Anē.

⁸Hãmri pa mē tee ri ja hã kuma nē kãm:

—Kwa ham mē panhō pahijaja kot kēn o atak o apĩr mã tã ka ra akupỹm mē hwỳr akrã. Kwa pu mē hwỳr pamōr kēt nē nã? Anē.

⁹Hãmri nhùm mē inhmã:

—Nã koja mē kormã tanhmã ixto hkēt nē. Kormã ixte Tĩrtũm mã tanhmã amnhĩ nhĩpēx to jatur xãm mēnhre hã. Te ixte kormã arĩgro hã ixrĩt mex nē ixpa pyrã nē kormã Tĩrtũm kot mēmoj tã inhmã karō xà hkôt pix mã tanhmã amnhĩ nhĩpēx to ho ri ixpa. ¹⁰Tã kot paj hatur xãm kumē nhùm te myt àr nhùm ra kamãt kô pyrãk nhùm mē rĩ kormã tanhmã ixto nē ixpĩ. Jakamã e ma pu mē hwỳr. Koja mē tokyx tanhmã ixto hkēt nē. Anē.

¹¹Hãmri nē mē inhmã Rajare jarēnh o:

—Na mẽ pahkràmnhwỳ Rajareta ra gōr nē nō. Tā kot puj mẽ ma hwỳr mō pa kumra. Anē.

¹²⁻¹³ Ra htyk ã omunh tā ã mẽ inhmã harēnh anē. Pa mẽ kuma nē ixtỳx ho ãm ôt nē nōr ã hkamnhĩx nē kãm:

—Kwa mǎn ra akupỹm amnhĩ kãm hamak o mōr jakamã na ra amnhĩ krit nē gōr nē nō. Kwa pu mẽ awjanã nē hwỳr pamōr kêt nē nà? Anē.

¹⁴ Hāmri nhũm mẽ inhma nē hprĩ hã mẽ inhmã harē nē mẽ inhmã:

—Nà na pre ty. ¹⁵ Nom kormã à nē hikwỳta ã na pa hwỳr inhmōr kêt nē. Tā kot paj ma hwỳr mō nē hã mẽ amã ixàhpumunh tỳx ã amnhĩ to amnhĩrit. Ka mẽ ja hã ixpumu nē amnhĩ kaxyw ixkôt ajamaxpēr tỳx o ri apa. ã mẽ ate amnhĩ nhĩpêx anhỳr kaxyw na pa kormã à nē nōr ã hwỳr inhmōr kêt nē. E ma pu mẽ hwỳr. Anē.

¹⁶ Hāmri nhũm mẽ inhĩō pē Tomas pihpohti tee ri ã kapēr anhỳrja ã kuma nē mẽ inhmã:

—Tōe ma pu mẽ hkôt. Kê mẽ mamrĩ hkôt mẽ pahto hpimràatã mẽ panhĩmex pa ri. Anē.

¹⁷ Tã pa mẽ ma hkôt mẽ hwỳr mō nē ra Rajare nhō krĩ hwỳr ixpōx o mō hāmri nē harēnh ma. Ra htyk nhũm mẽ kot haxãr ã arĩgro pē kwat ã harēnh ma. ¹⁸⁻¹⁹ Nhũm Matre mẽ Marir wa hkamy ho hamak xàj arĩ mỳr o hkrĩ. Jakamã nhũm Ijaew kwỳjaja Jerujarē rũm ma wa hwỳr mra. Mẽ kot wa kãm kapēr nhũm tokyx akupỹm tãm wa hkrã kaxyw nhũm mẽ wa hwỳr mra. Wa ò krĩ pē Petãnja Jerujarē hwỳr ãm 3 kirōm pix jakamã nhũm mẽ ma wa hwỳr mra nē wa kuri wa kãm kapēr o hkrĩ. ²⁰ Rôm nhũm Matre Jesus hpōx o mōr ã harēnh ma nē kànhmã xa nē man mẽ ixkutã tē. Nō nhũm Marir arĩ mỳr o nhỹ nē hkôt htēm kêt nē. ²¹ Hāmri nhũm Matre mẽ ixkutã tē nē mẽ ixkaxpa nē Jesus pumu nē mỳr kamã kãm kapēr nē kãm:

—Hêxta gàa nē Pahihti. Na pre ra wa ixkamy wa ixpê ty. Kop apu jar mẽ ixkôt ri apa ronhỹx pre htyk kêt nē. Xê mon ka pre we tokyx mẽ ixwỳr atēmre hkêt nē? ²² Tã na pa arĩ akôt ijamaxpēr tỳx nē. Kot kaj mẽmoj tã tanhmã Tirtũm wỳr to nhũm ama nē tanhmã amã mẽmoj to. Ra ixte ja hã apumunh mex kênã. Anē.

²³ Hāmri nhũm Jejus kuma nē kãm:

—Kwa tee ri ajamaxpēr nē akapri hkêt nē. Koja akamy akupỹm war amã htĩr kãm ga. Anē.

²⁴ Hāmri nhũm kuma nē kãm:

—Ma koja anē. Nhỹrmã Tirtũm kot mẽ piitã akupỹm mẽ ho htĩr xà hã arĩgrota ã koja akupỹm htĩr. Anē.

Kamy akupỹm htĩr ã harēnh mar tã Jejus kot akupỹm ho htĩr tokyx anhỳr ã hkamnhĩx kêt nē ã kãm kapēr anē.

²⁵⁻²⁶ Jakamã nhũm kãm:

—Nà pa na ixpê akupỹm mẽ ho mẽ htĩr xwỳnh. Jakamã mẽ kot amnhĩ kaxyw ixkôt hamaxpēr nē ixkôt amnhĩ xunhwỳr xwỳnhjaja koja mẽ htyk tã koja mẽ hkarō Tirtũm mẽ wa ixri htĩr tũm nē mex nē pa ho pa. Xà ate ja kaxyw ixkôt ajamaxpēr tỳx nà? Anē.

²⁷ Hāmri nhũm Matre kuma nē kãm:

—Xê nhũm. Apê Tirtũm Kra hã na pre mẽ ixkaxyw axãm. Ka na pa htem amnhĩ wỳr akãm ijamak o ixpa. Anē.

Hāmri nhũm Jejus kãm:

—Nà ãm hāmri na ka ã ijarēnh anē. E ma akupỹm tē nē atōx mã anē kê tokyx man ixwỳr tē pa omu. Anē.

²⁸ Hāmri nhũm kuma nē ma akupỹm tē. Hāmri nē Marir wỳr axà nē kãm Jejus jarē. Kôt mẽ hkrĩ xwỳnhjê hkax ã kãm harē nē kãm:

—An xê hāmri amỳr kêt nē. Na ra mẽ pajahkre xwỳnhhta hpōx o mō nē mũtar nhỹ nē atã karō. Anē.

²⁹ Hāmri nhũm kuma nē kànhmã xa nē ma mẽ ixwỳr htēm kurē

kumrêx. ³⁰ Hâmri pa mê kormã krîm ixpôx kêt nê. Arî Matreja Jejus wÿr htêm xà kamã arî ixkrî. ³¹ Jakamã nhùm Matre ma tê nê Marir mã Jejus jarê nhùm kato nê man mê ixwÿr tê. Hâmri nhùm Jerujarê rûm wa hwÿr mê mrar xwÿnhjaja omu nê htÿx kot hkamy hã pika pumunh nê mÿr kaxyw htêm ã hkamnhîx nê man hkôt mra. ³² Hâmri nhùm Marir mê hkukamã mê ixwÿr tê nê Jejus pumu nê hpar pê tēm nê kãm kapêr pê hipô nê mÿr o nhÿ. Nê kãm:

—Hêxta gaa nê Pahihti. Na pre ra wa ixkamy wa ixpê ty. Kop apu jar mê ixkôt ri apa ronhÿx pre htyk kêt nê. Hô mon ka pre we tokyx man mê ixwÿr atēmre hkêt nê? Anê.

³³ Hâmri nhùm Jejus kuma nê mÿr ã omu. Nê hkôt mê mrar xwÿnhjaja mê mÿr ã mê omu nê kãm mê hkaprî nê. ³⁴ Hâmri nê mê kãm:

—Nhÿri na ka prem haxà? E mê hwÿr ixto tê pa omu. Anê.

Hâmri nhùm mê kuma nê ma hã pyka hwÿr mê ixto mô ³⁵ nhùm Jejus mê urak nê hwÿr mÿr o tê ³⁶ nhùm mê ja hã omu nê axpên mã:

—Kwa mân kãm hapê htÿx. Hã na ho ama nê hwÿr mÿr o tê. Anê.

³⁷ Nom nhùm mê hkwyjaja axtem nê mê kãm:

—Tk. Ra kot no hkre xwÿnhta o mex tâ mo na we tokyx man kormã htîr ri hwÿr htêm nê omunh nê akupÿm ho mex kêt nê? Anê.

Jejus kot akupÿm Rajare ho htîr ã harênh

³⁸ Tã pa mê ra kên kre kamã mê kot Rajare jaxàr xàta wÿr ixpôx o mô nhùm Jejus hkaprî nê hwÿr tê nê omu. Nhùm prem ra kên rax o hitom ³⁹ nhùm omu nê mê kãm:

—E mê akwyjaja nhãm inhmã nê kahê xà mê. Anê.

Hâmri nhùm Matre kuma nê tee ri hamaxpêr nê kãm:

—Xê ma Jejus. Mê ri ã anhÿr kêt nê. Ra htyk ã arîgro kêp 4 kênã. Mãn

ra hkatoê nê hkro htÿx kumrêx. Anê.

⁴⁰ Hâmri nhùm kuma nê kãm:
—Kwa ri ã ajamaxpêr anhÿr kêt nê Matre. Na pa ra amã ixkapêr nê amã ixkapêr o: “Kot kaj amnhî kaxyw ixkôt ajamaxpêr tÿx nê. Hã kot kaj Tirtûm mê wa ixihtÿx o wa ixihtÿx xàja pumu.” Anhÿr o amã ixkapêr. Jakamã kwa ja kaxyw Tirtûm mê wa ixkôt mân ajamaxpêr tÿx nê hkêt wehe. Anê.

Hâmri nhùm kuma nê kãm:
—Ma ãm hãmri na ka inhmã akapêr. Ma kot paj kaxyw war amã ijamaxpêr tÿx nê. Anê.

⁴¹ Rôm nhùm mê kãm nhãm kên jakwa kre kahê xà mê. Hâmri nhùm Jejus Tirtûm mã amnhî jarênh kaxyw kànhmã kaxkwa hwÿr rît nê kãm:

—Pa Papaj. Nà na pa hte tanhmã mêmoj tâ awÿr to ka inhma nê tanhmã inhmã mêmoj nhîpêx to. Amex o amex Papaj. ⁴² Na ka hte ã inhmã amnhî nhîpêx anê. Tã pa jajê noo mã ã amã ixkapêr anê. Ate inhmar nê tanhmã Rajare hto nhùm mê kot ja hã ixpumunh nê ixte anhÿ hã pix mã tanhmã amnhî nhîpêx to ho ri ixpa hã ixpumunh kaxyw. Nê ka ate mê hwÿr inhmênh ã apumunh kaxyw. Anê.

⁴³ Nhùm pre ã Tirtûm mã kapêr anê. Hâmri nê kÿx pê Rajare mã kapêr nê kãm:

—Pa Rajare. Kwa tokyx kànhmã nhÿ nê amnê mê ixwÿr tê nê akato. Anê.

⁴⁴ Puh nhùm akupÿm htîr nê hkupu xà rãhã tê nê mê ixwÿr kato nê xa. Arî hkuk nê ìhkra nê hpar kupu rãhã mê ixwÿr kato nê xa. Hâmri nhùm Jejus mê kãm:

—Kwa mê atô nê kupu xà hpôt kê ma akupÿm ôrkwÿ hwÿr tê. Anê.

⁴⁵ Hâmri nhùm mê kot Marir mê Matre wa hwÿr mrar xwÿnh kwÿjaja ã Jejus kot Rajare nhîpêx anhÿr ã omu nê amnhî kaxyw hkôt hamaxpêr nê hkôt amnhî xunhwÿr

kuré kumrēx. ⁴⁶ Nom nhūm mē hkwyjaja axtem nē omu nhūm ja mē kēp omnuj nē. Jakamā nhūm mē ma Parijew nhō xwýnhjê hwýr mra nē mē kām harē.

Mē kot Jejus pīr ā amnhī grōnh

Matēwre 26.1-5; Makre 14.1-2; Rukre 22.1-2

⁴⁷ Hāmri nhūm Parijew nhō xwýnhjaja tee ri Jejus kot akupým Rajare ho htīr ā harēnh ma hāmri nē patre krāhtūmjê mē amnhī wýr mē inhō juisti ho akuprō nē axpēn mā Jejus o kapēr punuj pē hā axpēn mar o hkri. Hāmri nhūm mēhō mē kām:

—Kwa tanhmā kot puj mē ho? Na ra mē kām mēmoj pumunh kēt kwý ho anhýr rax o pa. ⁴⁸ Kot puj mē ām omu nē tanhmā ho hkēt nhūm mē pahkwýjaja kot ā amnhī nhīpēx anhýr ā omu nē htýx ām hāmri ā kot amnhī nhīpēx anhýr ā hkamnhīx. Hāmri nē amnhī kaxyw hkôt hamaxpēr nē hkôt amnhī xunhwý. Jao ra amnhī kaxyw kēp mē ō pahihtī hā ām. Koja mē ā amnhī nhīpēx anē nhūm Rōm kamā pahihtija mē kot kator nē hpānhā Jejus xām ā harēnh ma. Hāmri nē gryk xāj mē pahwýr ō pôristi hkwy rē nhūm mē pahwýr mra nē mē panhīmex pa nē Tirtūm nhōrkwy grānh pa. Kwa tanhmā kot puj wem tokyx amnhī nē ho? Anē.

⁴⁹ Hāmri nhūm Kajpas mē kām kapēr. Kajpasja na pre angrāja kamā kēp mēō patre nhō pahi maati. Jakamā mē kām:

—Nā na pa ra ijamaxpēr. Kwa mē inhma. ⁵⁰ Nā kot puj mē hpīr tokyx anē kê tapxipix ty pu mē arī mýrpē pahpiitā pajamakétkati nē ri papa. Anē.

⁵¹ Nhūm pre ā mē kām kapēr anē. Nom amnhī krā hkôt ā mē kām kapēr anhýr kēt nē. Arī kēp mēō patre krāhtūmjê nhō pahi maati jakamā Tirtūm nhý hā Jejus kot Ijaew nē tykja kukamā ā harēnh anē. Nom ja hā amnhī pumunh

kēt nē. ⁵² Na pre Jejus mē ixpē Ijaew pix nē htyk kēt nē. Krī piitā hkôt Tirtūm krajē nē na pre ty. Mē piitā mē kot axpēn to hkwy nē ri axpēn to pa kaxyw na pre mē nē ty. ⁵³ Hāmri nhūm ā Kajpas mē kām kapēr anē nhūm mē inhō pahijaja kuma nhūm ja mē kām mex nē. Jakamā nhūm mē kot tanhmā Jejus ā āmnēnh to nhūm mē kot mē kām tanhmā hpīr to kaxyw ā axpēn mar anhýr o pa. ⁵⁴ Jakamā nhūm Jejus axte mē noo mā ri pa hkēt nē. Hāmri ma krī pē Epraī hwýr ma mō. Pa mē hkôt ixpa ho ixpa xwýnhjaja ma hkôt ixpa. Epraīja kapôt ā krī na pre. Jakamā pa mē ma hwýr mō hāmri nē kamā ri ixpa.

⁵⁵ Tā nhūm arīgro pē Pasja ra ahtēp o mō. Amnepēm finat Mojes kot Ejit rūm mē panhīgētjê kator mā hamaxpēr kaxyw na pa pre htem hā ixkīnh kaxyw Pas ā Jerujarē hwýr akuprō. Na pa pre htem hwýr pōj nē kamā Tirtūm noo mā mē inhmex kaxyw tanhmā amnhī nhīpēx to.

⁵⁶⁻⁵⁷ Jakamā nhūm ra Ijaew ohtō nē ma Jerujarē hwýr pa. Nē kām Jejus pumunh prām xāj Tirtūm mā amnhī jarēnh xā hā ixkre wýr mra nē hwýr agjē nē kamā hapēr nē axpēn mā:

—Kwa nok? Xā koja mē hpakīnh wýr mōr kēt nē nà? Anē.

Nhūm Parijew nhō xwýnhjê mē mē inhō patre krāhtūmjaja haxwýja hapēr o kuhē. Nom mē kot axtem nē unē nē haxār kaxyw. Jakamā mē kām hā karō nē mē kām:

—E kēr ka mē nhýri Jejus pumu nē man mē ixwýr mra nē mē inhmā harēnh kuré kumrēx. Anē.

12

Marir kot Jejus kuxwa hā harēnh
Matēwre 26.6-13; Makre 14.3-9; Rukre 7.36-50

¹ Tā nhūm ra Pas wýr apkati grēre. Ra hwýr apkati kēp 6. Jakamā pa mē ma akupým krī pē

Petān wŷr Jejus kōt mō. Jejus kot akupŷm Rajare ho htŷr xwŷnhŷta mē ō krŷ hwŷr pa mē akupŷm mō nē Rajare nhōrkwŷ hwŷr pōj nē mē hwŷr agjē. ² Hāmri nhŷm mē Jejus pumu nē hkŷnh nē. Nē mē inhmā mēmoj mex nhŷpēx pa mē ixàpkur o ixkrŷ. Nhŷm Rajare haxwŷja mē ixkutā apkur o nhŷ. Nhŷm htōx Ma-tre mē inhmā mēō ho pa nē mēsti hā unhwŷr o xa. ³ Hāmri nhŷm wa htōx Marir Jejus kukamā tanhmā hamaxpēr to nē hamaxpēr o:

—Ma kot paj tokyx mē kot mē ixpē hpŷr kukamā mē hkuxwaxà ho hkuxwa. Anē.

Hāmri nē kàx rax kām mē hkuxwaxàja py nē o tē. Ra rit kahti hkōt hitep xā nhŷm kupy nē hwŷr o tē. Mē kot mēmo htwŷm o mē hkuxwaxà mex nhŷpēxja na pre hā kàxpore xohtō rax kumrēx. Jakamā nhŷm kupy nē Jejus wŷr o tē nē hpar ā hkapŷr pa nē amnhŷ krā hkŷ ho hpar grā ho nhŷ nhŷm ra ixkre kuxwa htŷx kumrēx. ⁴ Hāmri nhŷm mē inhŷō pē Jut Kariotja. Kot kormā mē ĩhkram Jejus nhōr mā xwŷnhŷta tee ri ā kot amnhŷ nhŷpēx anhŷr ā omu nhŷm ja kēp omnuj nē ⁵ nhŷm mē inhmā:

—Tk. Kwa pēr mē hkuxwaxà hā kàxpore xohtō rax kumrēx tā nhŷm ri axtem nē Jejus par ā hkapŷr pa. Mo na ma o htēm nē ho wēnē nē hpānhā kàxpore ho rax nē hpyr nē ho mē kēp amrakati xwŷnhjē nhŷpēx kēt nē? Kot ho wēnē ronhŷx hpānhā kàxpore ho rax kumrēx nē kupy nē ho mēmoj japrōr rax o rax. Tā axtem nē amarŷ Jejus par ā hkapŷr pa. Anē.

⁶ Te kām mē kēp amrakati xwŷnhjē japē pyrāk tā kām mē hapē hkēt. Ām hēx rom ā kapēr anē. Na pre hte mē inhmā mē ixkàxpore jamŷ nē mē ixkōt mē inhmā hamār o pa. Nom tōhā axtem nē mē ixpē hkwy ho ahkŷ nē ho amnhŷm mēmoj japrō. Jakamā Marir kot mē hkuxwaxà ho hapēx par ā omu

nē tee ri hpānhā kàxpore rax mā hamaxpēr nē kamā gryk nē ā mē inhmā kapēr anē. ⁷ Hāmri nhŷm Jejus amnhŷ tā hamaxpēr ā omu nē kām:

—Tk. Kwa tanhmā kām akapēr to hkēt nē. Ixtyk nhŷm mē kot ixkuxwa hkukamā na ā inhŷpēx anē. ⁸ Na hte mē kēp amrakati xwŷnhjaja mē akōt pa rāhā nē. Ka mē amā mēmo arŷgro hā tanhmā mē ho ajuta hto hprām nē rŷ mē ho ajuta nē mē kām mēmoj gō. No kēt pa kot paj ri mē akōt ixpa ka mē ixto mex ry ho apa hkēt nē. Kot paj tokyx mē apiitā mē are. Jakamā ām hāmri na ā inhŷpēx anē. Anē.

Patre krāhtŷmjaja kot Rajare hā àmnēnh ā harēnh

⁹ Rōm nhŷm Jerujarē nhō xwŷnhjaja ra Jejus Petān wŷr hpōx ā harēnh ma nē kot omunh mā ma hwŷr mra. No ām tapxipix pumunh mā hwŷr mrar kēt nē. Māānēn kot akupŷm ho htŷr xwŷnhŷta pumunh mā nhŷm mē ma hwŷr mra. ¹⁰⁻¹¹ Na pre ra Ijaew ohtō nē Jejus kot akupŷm Rajare ho htŷr ā harēnh ma hāmri nē mē inhō patre kaga nē Jejus kōt amnhŷ xunhwŷ. Jakamā nhŷm patre krāhtŷmjaja tee ri ja hā mē omu nē axpēn mā:

—Nà kot puj mē Jejus pix pŷr kēt nē. Kot puj mē māānēn hkōt Rajare pŷ hāmri nhŷm wa hixi hamē mē kēp hapēx japēr. Anē.

Jejus kot Jerujarē hwŷr àr ā harēnh

Matēwre 21.1-11; Makre 11.1-11; Rukre 19.28-40

¹² Tā nhŷm apkati nhŷm Ijaew Jerujarē kamā mē hkŷnhja kryx nē Jejus ra mē hwŷr àhtēp o mōr ā harēnh ma. ¹³ Hāmri nē axpēn mā:

—Kwa ma pu mē mō nē pō hkwy jakā nē kutā ho mra. Anē.

Hāmri nē hkwy jakā nē hamŷ nē ma kutā ho mra. Hāmri nē ra hkaxpa nē omu nē hkŷnh nē. Nē kām:

Pa. Nà ām hāmri na ka mẽ ixwỳr mō. Tirtūm na pre mẽ ixwỳr amē ka ā amōr anē.

Tirtūmja mex o mex. Ām hāmri na pre mẽ ixwỳr amē.

Kot kaj mẽ inhō pahi hpānhā mẽ ixto amnhīptār o ri apa. Anē.

¹⁴ Hāmri nhūm Jejus nhỹri jumēnre pumu nē hwỳr tē nē hā nhỹ nhūm mẽ pimràatā ma akupỳm Jerujarē hwỳr mō. Tirtūm kapēr ā kagā htūm ra kot ja jarēnh kot:

¹⁵ Pa Jerujarē nhō xwỳnhjaja. Kwa mẽ tee ri amnhī kukamā ajamaxpēr ho amā ma hkēt nē.

Ota mẽ anhō pahi nyw ra mẽ awỳr jumēnre hā nhỹ nē hpōx o tē. Anē.

¹⁶ No Jejus kōt mẽ ixpa ho mẽ ixpa xwỳnhjaja pa mẽ ā kot amnhī nhīpēx anhỹrja ā omu nē tee ri hkukamā ijamaxpēr nē axpēn mā:

—Kwa mo na ri ā amnhī nhīpēx anē nē jumēnre hā nhỹ nē mẽ hkōt mō? Anē.

Tā nhūm arīgro hō hā ty nē akupỳm kaxkwa hwỳr api pa prem hā omu hāmri nē kormā Tirtūm kapēr ā kagā htūm kot hkukamā ā harēnh kot anhỹrja mā ijamaxpēr kurē kumrēx. Hāmri nē axpēn mā harēnh o:

—Kwa ām hāmri na Tirtūm kapēr ā kagā htūm kot ra ā Kraja jumēnre hā ỳr nē mẽ hkōt mōr ā hkukamā kot harēnh anhỹrta. Anē.

¹⁷ Hāmri nhūm Jejus kot Rajare mā kapēr pē akupỳm ho htūr ā omunh xwỳnhjaja arī nhām mẽ hkwỳjē mā ujarēnh o pa. ¹⁸ Nhūm mẽ kuma nē ma Jejus wỳr omunh mā mra. ¹⁹ Hāmri nhūm Parijew nhō xwỳnhjaja tee ri ja hā mẽ omu nē axpēn mā:

—Kwa na pu mẽ tee ri Jejus nē mẽ kām pakapēr kaprỳ nhūm mẽ pamar kēt nē ra piitā hkōt amnhī nhīpēx o pa. Kwa nà. Anē.

Ijaew kēt xwỳnhjē jarēnh

²⁰ Tā nhūm ra Gres kwỳjaja Ijaew kōt hkīnh kaxyw ma Jerujarē hwỳr

mē hkōt mra nē mẽ ĩhkō hā Tirtūm mā mex o mex ā harēnh o hkōt mra. ²¹ Jakamā nhūm mẽ nhỹri mẽ inhīō pē Firipti pumu nē hwỳr mra. Firipti kēp pyka pē Garirej kamā krī pē Pesēj nhō xwỳnh nhūm Gres nhō xwỳnhjaja omu nē hwỳr mra nē kām:

—Pa. Kwa na pa mẽ inhmā Jejus pumunh prām nē. Tanhmā kot pa wem amnhī to nē omu nē kām ixkapēr? Anē.

²² Hāmri nhūm mẽ kuma nē ma Andre hwỳr mẽ o mra nē kām mẽ harē. Hāmri nē wa ma Jejus wỳr mẽ o mra nē kām mẽ harē nē kām:

—Pa Pahihti. Ota Gres nhō xwỳnhjaja kām apumunh prām nē awỳr mō. Mē pahkīnhā mẽ kēp Ijaew kēt tā mẽ kām apumunh prām nē. Anē.

Jejus kot amnhī kukamā amnhī jarēnh

Matēwre 16.24-28; määnēn Apokarip 2.10, 12.11

²³ Hāmri nhūm Jejus mẽ omu nē mẽ kām tanhmā amnhī jarēnh to. Kot mẽ ohtō nē mẽ nē htyk nhūm mẽ kukwak ri Tirtūm wa kuri htūr tūm nē pa ho pa hā mẽ kām amnhī jarē nē mẽ kām:

—Nà na ra ixyk ā arīgro hwỳr apkati grēre. Ixpē Tirtūm kot mẽ akaxyw ixām xwỳnh jakamā kot paj mẽ apiitā mẽ anē ty hāmri nē akupỳm ixtūr nē ma kaxkwa hwỳr akupỳm api. ²⁴ Mē axohtō nē nhỹrmā Tirtūm mẽ wa ixri atūr tūm nē apa ho apa kaxyw kot paj ā amnhī nhīpēx anē. Kwa mẽ ā ixte amnhī jarēnh anhỹrja ma nē mẽ amnhī krām haxār tỳx nē ri hā apa. Te ixte mēmo hy kot amnhī nhīpēx pyrāk. Na htem pikap hagiē nhūm te htyk pyrā nē pika kaxwỳnh kām hikwỳ. Tā gaa nē higrōt nē hprēk nē ô. Nē ô rax kumrēx. Hyja pyxire nē hikwỳ htā kamā ô rax kumrēx. Nom koja mẽ hkre hkēt nē nhūm ô hkēt nē. Na hte ā mēmo hyja amnhī nhīpēx anē. Ja pyrā nē kot paj mẽ

anê ixyk kêt nê te mê kot mêmoy hy hkre hkêt nhũm hprêk nê ô hkêeta pyrak ka mê ixkukwak ri Tirtũm mê wa ixri atĩr tũm nê apa hkêt nê. Jakamã kot paj mê anê ty nhũm mê ijaxà. Hãmri pa akupỹm ixtĩr ka mê axohtô nê ixkukwak ri wa ixri atĩr tũm nê apa ho apa.

²⁵—Nê koja mê ixpĩ pa mê anê ty. Tã mê ate ixkôt amnhĩ nhĩpêx o apa xwỹnhjaja. Koja mê ixtã mê apar mã tã kwa kêt ka mê atyk pymaj ixkaga hkêt nê. Kwãr mê mãmri tanhmã ixtã mê ato ka mê nhỹrmã Tirtũm mê wa ixri axte amnhĩ xà kamã ajamak kêt kumrêx nê atĩr tũm nê amex nê apa ho apa. No kot kaj mê ixkĩnhã jar amã amex pix prãm hãmri nê nhỹrmã wa ixri atĩr tũm nê apa hkêt nê. ²⁶ Kot kaj mê ã ixkôt amnhĩ nhĩpêx anhỹr o ri apa hãmri nhũm mê kot inhĩpêx pyrak o mê anhĩpêx. Hãmri ka mê nhỹrmã ma ixkôt kaxkwa hwỹr api nê kamã ixri atĩr tũm nê apa ho apa. Hãmri nhũm Inhĩpêexà ixtã mê apumu nê mê ato mex kumrêx. Anê.

Tirtũm kot Jejus mã kapêr ã harênh

Matêwre 3.17, 17.5

²⁷ Tã nhũm Jejus tee ri amnhĩ kukamã htyk mã hamaxpêr nê hkaprĩ htỹx nê. Nê hkôt mê ixpa ho mê ixpa xwỹnhjê mã amnhĩ jarê nê mê inhmã:

—Hêxta waa nê. Na pa tee ri amnhĩ kukamã ijamaxpêr. Nê tee ri amnhĩ xà htỹx kamã ijamak kukamã ijamaxpêr pê ra amnhĩ kamã ixkahak nê. Nom ixte pika piitã hkôt mê kot ixkôt amnhĩ xunhwỹr xwỹnhjê nê ixyk kaxyw ixwryk kênã. Jakamã kot paj Inhĩpêexà kot mê kêp ixpytãr kaxyw tanhmã amnhĩ to hwỹr to hkêt nê. Anê.

²⁸ Hãmri nê hpãnhã Hipêexà mã kapêr nê kãm:

—Pa Papaj. ãm mêmoy pixi na inhmã hprãm. Kê mê piitã ixkukwak ri amex o amex ã apumu. Ja na kêt inhmã hprãm tỹx kumrêx.

Anhỹr o Tirtũm mã amnhĩ jarê. Hãmri nhũm kuma nê kaxkwa rũm kãm kapêr. Kỹxpê kãm kapêr nê kãm:

—Nà na pa pre ra ã mê kãm amnhĩ to amnhĩrit anê nhũm mê ja hã ixpumu. Tã kot paj axte akukwak ri amnhĩ to amnhĩrit nhũm mê piitã axte inhmex o inhmex ã ixpumu. Anê.

²⁹ Nhũm pre ã Tirtũm Jejus mã kapêr anê. Hãmri nhũm mê kot mê ixkuri mar o kuhê xwỹnhjaja kuma no ãm hprĩ hã kot kãm tanhmã kapêr toja mar mex kêt nê. Nê htỹx ho ãm mêmoy tã hkamnhĩx. Jakamã nhũm mê hkwỹjaja xypên mã:

—Kwa mo na wehe? Na mãn katôtøk nà? Anê.

Nhũm mê hkwỹjaja mê kãm:

—Nà na katôtøk kêt. Tirtũm kapêr o wryk xwỹnh mãn tanhmã kãm kapêr to. Anê.

³⁰ Hãmri nhũm Jejus mê kãm:

—Nà Tirtũm tãm na inhmã kapêr. Nom pa ixte mar kaxyw inhmã kapêr kêt nê. Mê kajaja mê ate ixtã mar kaxyw na kỹx pê ã inhmã kapêr anê. Anê.

Hãmri nê mê kãm:

³¹—E hãmri. Kot paj tokyx mê apiitã mê ate amnhĩ tomnuj pãnhã amnhĩrer kaxyw tanhmã amnhĩ nhĩpêx to. Jao mããnên Satanasti pê hihtỹx xà ho ijapêx. ³² Koja mê pĩ kahpa hã inhô pa kỹxpê ajêt. Tirtũm kot mê awyř inhmênh tã nhũm mê ã inhĩpêx anê pa ty. Jakamã koja pika piitã hkôt mê ohtô nê ixkôt amnhĩ xunhwỹ nê amnhĩ kaxyw inhmã hamaxpêr rãhã ho pa. Anê.

³³ Mê ixte tanhmã htyk to hã harênh mar kaxyw nhũm pre ã mê inhmã amnhĩ jarênh anê. ³⁴ Hãmri nhũm mê kot mê ixkuri mar o kuhê xwỹnhjaja tee ri kot htyk ã amnhĩ jarênhja ma nê kãm:

—Kwa mẽ ixte amnhĩ wỳr kamã ijamak o ixpa xwỳnhja htĩr tũm nẽ pa ho pa xwỳnh na. Tĩrtũm kapẽr ã kagà htũm kot ã harẽnh kot anhỳr tã ka ã ri mẽ kot apĩr nhũm atyk ã amnhĩ jarẽnh anẽ. Ate Tĩrtũm kot mẽ ixwỳr amẽnh xwỳnh ã amnhĩ jarẽnh tã ã ri atyk ã amnhĩ jarẽnh anẽ. Kwa xà apẽ mẽ ixte amnhĩ wỳr kamã ijamak o ixpa xwỳnh kêt? Anẽ.

³⁵ Hãmri nhũm mẽ kuma nẽ amnhĩ tã mẽ kãm:

—Tỳ ixpẽ tãm kẽnã. Tã kot paj tokyx mẽ are. Jakamã kër ka mẽ ixte arĩ mẽ akamã ixpa ri ixkõt amnhĩ xunhwỳ nẽ amnhĩ kaxyw ixkõt ajamaxpẽr o ri apa. Te ixpẽ kanẽ hpòk pyræk jakamã na pa hte mẽ kãm Tĩrtũm kapẽr o mẽ ahkre o ri ixpa. Nom kot paj kritpẽm mẽ akõt ixpa ry hkêt nẽ. Jakamã kwa kër ka mẽ tokyx te mẽ kot kanẽ hpòk nhĩrã kamã ri mẽ pa xwỳnh kot amnhĩ nhĩpẽx pyrã nẽ Tĩrtũm kõt amnhĩ nhĩpẽx o ri apa. Kormã mẽ akõt ixpa ri. Kot paj tokyx ma mỗ nhũm te ra kamàt kỏ pyræk. Na hte kamàt kỏ kamã mẽ pa xwỳnhjaja tee ri rĩt mex mã nom rĩt mex kêt nẽ. Nẽ mẽmoj pumunh mex kêt nẽ. ³⁶ Jakamã kwa ri tokyx ixte arĩ mẽ akamã ixpa ri amnhĩ kaxyw inhmã ajamaxpẽr nẽ ixkõt amnhĩ xunhwỳ. Te ixpẽ kanẽ hpòk nhũm kamã mẽ arĩt mex pyræk. Jao ixpyrã nẽ te mẽ apẽ kanẽ hpòk nhĩrã mex pyræk o amnhĩ nhĩpẽx. Nẽ ixpyrã nẽ tãm ri amnhĩ nhĩpẽx o apa. Anẽ.

Nhũm pre ã mẽ kãm kapẽr anẽ hãmri pa mẽ kęp ixkato nẽ ma nhãm mỗ.

Mẽ hkwỳjaja kot Jejus kõt hamaxpẽr kêt ã mẽ harẽnh

³⁷ Na pre hte Jejus mẽ noo mã mẽ kot aa mẽmoj pumunh kêt kwỳ ho anhỳr rax o pa. Tã nom nhũm mẽ ohtỏ nẽ hã omu nẽ ãm hã omu nẽ kęp Tĩrtũm kot mẽ pahwỳr mẽnh xwỳnh ã hkõt hamaxpẽr kêt nẽ.

³⁸ Nom ra mẽ hkukamã Tĩrtũm nhỹ hã kapẽr jarẽnh o pa xwỳnh pẽ finat Ijaisja mẽ hkukamã ja hã mẽ harẽ nẽ hã kagà. Nẽ hã kagàja o:

Pa Pahi Maati. Nà ra ixte mẽ kãm ajarẽnh o ixpa ryy htã no nhũm mẽ inhma nẽ ãm inhma.

Nẽ mẽ kot axihtỳx o axihtỳx ã ajarẽnh mar tã no ãm ajarẽnh ma nẽ amnhĩ kaxyw akõt hamaxpẽr kêt nẽ. Anẽ.

³⁹ Mẽ kãm Tĩrtũm kapẽr mar prãm kêt jakamã na prem mããnẽn Jejus kęp Tĩrtũm kot mẽ pahwỳr mẽnh xwỳnh hkõt hamaxpẽr kêt nẽ. Nhũm pre finat Ijaisja axte mẽ hkukamã ja hã mẽ harẽ nẽ mẽ hã kagà. Nẽ hã kagà ho:

⁴⁰ Na pre Tĩrtũmja tanhmã amnhĩ nẽ mẽ hkrã hto nhũm mẽ hkõt hamaxpẽr kêt nẽ.

Ra mẽ kot hihtỳx o hihtỳx ã omunh tã omu nẽ ãm omu.

Nẽ mẽ kot kapẽr mar tã amnhĩ tomnuj kaga hkêt nẽ.

Nẽ Tĩrtũm kot mẽ nẽ mẽ kot amnhĩ tomnuj o hapẽx prãm xaj hkõt amnhĩ xunhwỳr kêt nẽ. Anẽ.

⁴¹ Kormã Jejus mẽ hwỳr wrỳk kêt ri nhũm finat Ijaisja hpimtir kãm kot amnhĩ to rax kumrẽx ã omu nẽ hkukamã ã harẽnh nẽ hã kagà anẽ.

⁴² Hãmri nhũm Ijaew krãhtũm kwỳjaja hkwỳjẽ rom amnhĩ kaxyw Jejus kõt hamaxpẽr nẽ hkõt amnhĩ xunhwỳ. Tã Parijew nhỏ xwỳnhjaja kot ã mẽ kot amnhĩ nhĩpẽx anhỳr ã mẽ harẽnh mar pymaj ja hã amnhĩ to amnhĩrĩt kêt nẽ. Mẽ kot Tĩrtũm kapẽr o mẽ ahkre xà hã ixkreja nẽ mẽ kator pymaj nhũm mẽ kãm amnhĩ to amnhĩrĩt kêt nẽ. ⁴³ Na prem hamaxpẽr o:

—Nà kot paj ja hã amnhĩ to amnhĩrĩt nhũm mẽ amnhĩ nẽ ixtomnuj nẽ. Hãmri nẽ amnhĩ pyrã nẽ xpẽn mã inhmex ã ijarẽnh kêt nẽ.

Anhỳr o mẽ umaj amnhĩ kukamã hamaxpẽr o pa. Nom Tĩrtũm tãm

kot amnhĩm mẽ mex ã mẽ harẽnhja nhũm mẽ hkukamã hamaxpẽr kêt nẽ.

Jejus kot Hipêêxà nhỹ hã kapẽr ã harẽnh

⁴⁴ Nhũm Jejus axte mẽ kãm kapẽr nẽ kÿx pẽ kapẽr nẽ mẽ kãm:

—Nà koja mẽhõ amnhĩ kaxyw ixkõt hamaxpẽr hãmri nẽ ixkõt pix mã hamaxpẽr kêt nẽ. Mãânẽn amnhĩ kaxyw kot mẽ awÿr inhmẽnh xwÿnhja kõt hamaxpẽr. ⁴⁵ Wa ixte amnhĩ nhĩpêxja te típxi pyrãk jakamã koja mẽ tanhmã ixte amnhĩ nhĩpêx to hã ixpumu nẽ te kot Tĩrtũm kot amnhĩ nhĩpêx ã omunh pyrãk.

⁴⁶ —Nẽ te ixpê kanê hpõk nhũm inhĩrã kamã mẽ apa pyrãk kaxyw na pre Inhĩpêêxà mẽ awÿr inhmẽ pa mẽ awÿr wrÿ. Ixte kapẽr o mẽ ajahkre ho ri mẽ akõt ixpa kaxyw. Jakamã koja mẽhõ amnhĩ kaxyw ixkõt hamaxpẽr nẽ ixkõt amnhĩ xãm hãmri nẽ te kanê hpõk nhĩrã kamã rĩt mex o pa pyrãk o amnhĩ nhĩpêx. Jao amnhĩ nhĩpêx nyw o amnhĩ nhĩpêx o pa. ⁴⁷⁻⁴⁸ No mẽ kot ixkapẽr mar nẽ ãm mar xwÿnhjaja te mãânẽn Inhĩpêêxà kapẽr mar nẽ ãm mar pyrãk. Mÿrapê koja mẽ nhÿrmã ma kuwy hwÿr pa nẽ mẽ kot amnhĩ tomnuj mÿrapê kamã pa ho pa. Tã no ã mẽ ate amnhĩ nhĩpêx anhÿr o ri mẽ apa kaxyw na pa pre mẽ awÿr ixwrÿk kêt nẽ. Ixte mẽ ate amnhĩ tomnuj pãnhã amnhĩrer par kaxyw na pa pre mẽ awÿr wrÿ.

⁴⁹ —Nẽ na pa hte amnhĩ krã hkõt tanhmã ri mẽ amã ixkapẽr to ho ri ixpa hkêt nẽ. ãm kot mẽ awÿr inhmẽnh xwÿnhja nhỹ hã na pa hte tanhmã mẽ amã ixkapẽr to ho ri mẽ akõt ixpa. ⁵⁰ Tã mẽ kot Tĩrtũm kapẽr mar nẽ amnhĩ kaxyw hkõt hamaxpẽr xwÿnhjaja koja mẽ nhÿrmã wa ixri htĩr tũm nẽ mex nẽ pa ho pa. Jakamã na pa hte tanhmã kot inhmã karõ hto xà hkõt pix mã

tanhmã mẽ amã ixkapẽr to ho ri ixpa. Anẽ.

13

Jejus kot hkwyjê hpar kuhõnh ã harẽnh

Rukre 22.24-27

¹ Tã nhũm ra Pas ã mẽ ixkĩnhhta ahtêp. Pas ã na hte mẽ ixpê Ijaewjaja axpẽn wÿr akuprõ nẽ hã ôwêhti hkra nyw pa nẽ ho anẽ nẽ hkur o ixkrĩ. Amnepêm Tĩrtũm kot pika pẽ Ejit rũm mẽ inhĩgêxjê kator kaxyw nhũm mẽ nojarêt nẽ ã hkwy hpar nẽ ho anhÿr nẽ hkwy hkurta pyrãk. Na prem nojarêt nẽ mẽ hkra my kot wa mẽ kêp htyk pumaj ôwêhti hkra nyw kwÿ hpa nẽ ho anẽ nẽ ĩ hku. Jakamã nhũm arĩ mẽ ixpê mẽ hkanrêhã mẽ htãmnhwÿjaja ã mẽ kot amnhĩ nhĩpêx anhÿrja mã ijamaxpẽr nẽ hã ixkĩnh kaxyw mẽ urãk nẽ hkwy hpa nẽ kuku. Jakamã nhũm ra Pas ahtêp nhũm Jejus amnhĩ kukamã tanhmã hamaxpẽr to kurê kumrêx. Ra ma akupÿm Hipêêxà hwÿr àpir xà hã arĩgro hwÿr apkati grêre. Jakamã nhũm akupÿm nojarêt ã amnhĩ pumu nẽ kãm mẽ pahte hkõt amnhĩ xunhwÿr xwÿnhjê japê jakamã kãm mẽ pajapê rãhã mẽ panê htyk mã. ² Tã nhũm myt axà pa mẽ Pas ã ixãpkur o ixkrĩ. Nhũm Simãw Kariot kra Jut Kariotja mãânẽn mẽ ixkutã apkur o nhỹ. Kêp mẽ ixkwÿ htã nhũm pre Satanasti tanhmã hkrã hto nhũm ra axtem nẽ kot mẽ kãm Jejus kurê xwÿnhjê nhĩhkram haxàr kaxyw.

³⁻⁴ Tã pa mẽ kormã axpẽn kutã ixãpkur kaxyw ixkrĩ hpa nhũm Jejus kãnhmã xa nẽ hinõkà kapa nẽ toajti py nẽ ho amnhĩ krax pre. Kot amnhĩ to rax ã amnhĩ pumunh tã ja hã amnhĩ to jarkrar pẽ tanhmã ri mẽ inhnoo mã amnhĩ nhĩpêx to ho pa hkêt. Kêp mẽ inhõ pahĩ htã te kêp mẽ inhmã àpênh xwÿnh pyrãk o amnhĩ nhĩpêx o pa. ⁵ Jakamã toajti py nẽ ho amnhĩ krax pre nẽ pasiiti hõ py nẽ kamã gô hkwy ru nẽ ho

mē ixpar kuhō nē toajti o mē ixpar grā ho mō. ⁶ Ā mē inhīpēx anhÿr o mō. Pē ra hpānhā Simāw Pētre hpar kuhōnh kaxyw nhūm tee ri amnhī tā omu nē kām:

—Tk. Kwa apē inhmā axàpēnh xwÿnh kêt kēnā kot ka kêt ri axtem nē ixpar kuhō Pahihti. Apē mē inhō Pahi kēnā kot ka kêt ā mē inhīpēx anē. Anē.

⁷ Hāmri nhūm kām:

—Kwa nā. Kormā ate ja hā amnhī tā ixpumunh mex kêt. Nom kot kaj nhÿrmā aprī hā amnhī tā ixpumu. Anē.

⁸ Hāmri nhūm kām:

—Nā nom kot kaj ām ixpar kuhōnh kêt nē. Kwarī. Anē.

Hāmri nhūm Jejus kām:

—Tōe. Kot paj apar kuhōnh kêt nē ka te apē ixkwÿ hkêt pyrāk. Anē.

⁹ Hāmri nhūm tee ri kuma nē kām:

—Tōe mamrī ixpar kuhō. Nom ixpar pix kuhōnh kêt nē. Māānēn inhīhkra kuhō nē ixkuk kuhō. Inhmā ixte apyrāk prām tÿx kumrēx kēnā. Anē.

¹⁰ Hāmri nhūm Jejus kām:

—Nā amÿkry hkôt mē wÿr xwÿnhjaja na htem mex nē axte wÿr kêt rāhā hikwÿ. Na htem ām amnhī par pix kuhō nē hikwÿ. Ja pyrā nē Tirtūm kot mē anē mē ate amnhī tomnuj ho hapēx par xwÿnhjaja te amÿkry hwÿr mē axwÿr nē amex pyrāk. Ka mē te mē kot amnhī par pix kuhōnh ta pyrā nē axte tanhmā amnhī tomnuj to hāmri nē Tirtūm mā amnhī jarēnh kurē kumrēx kē anē amnhī katut kôt ate amnhī tomnujta mē nē ho hapēx. Na pre ra mē anē mē ate amnhī tomnuj o hapēx. No ām mē apiitā hkêt. Ota arī mē anhīōja pyxire nē arī amnhī tomnuj rāhā ri pa. Jakamā te wÿr kêt nē arī grā htyk rax kām ri pa pyrāk. Anē.

¹¹ Nhūm pre ā Jejus mē inhmā kapēr anē. Ra kot hprī hā mē kot kām hkurē xwÿnhjē mā ōr mā xwÿnhja pumunh jakamā te wÿr

kêt nē arī grā htyk rax kām ri pa pyrāk ā ā harēnh anē.

¹² Tā mē ixpar kuhōnh pa nē akupÿm hinōkà py nē haxà nē nhÿ hāmri nē mē inhmā:

—E mēmo kaxyw na pa we ā mē apar kuhōnh anē? Kot paj ixprī hā mē amā amnhī jarē ka mē inhma. ¹³⁻¹⁴ Na ka htem ixto “mē ijahkre xwÿnh” nē ixto “pahihti” anhÿr o ijarēnh o ri apa. Ām hāmri na ka htem ā axpēn mā ijarēnh anē. Ixpē mē ajahkre xwÿnh nē māānēn ixpē mē anhō pahihti htā inhmā mē ate tanhmā axpēn nhīpēx to ho apa hprām xāj na pa ā mē apar kuhōnh anē. Tā kēr ka mē ixpyrā nē tanhmā axpēn to mex to ho ri apa. ¹⁵ Jao amnhī kuxwar axpēn to mex pē mēmoj to axpēn kutā anojarēt rāhā ho ri apa. ¹⁶ Kwa mē ixkapēr ma nē kām amnhī krām haxàr tÿx rāhā ho ri apa. Mē ate amnhī to rax o ijakrenh kêt. Te ixpē mē anhō patrāw nhūm mē ate inhmā tanhmā amnhī nhīpēx to ho apa xwÿnh pyrāk. Nē te ixte mēmoj tā mē amā karō nhūm mē ate inhmar nē inhmā tanhmā mēmoj nhīpēx to pyrāk. Tā te ixpē mē anhō patrāw pyrāk tā pa ā mē apar kuhōnh anē. Ka mē amnhī tā ixpumu hāmri nē amnhī xwar tanhmā axpēn to ajuta hto ho ri apa. No ri axpēn pumu nē ajamaxpēr o: “Tk. Nā ixte amnhī to rax o hakrenh kēnā kot pa kêt ri tanhmā ho ajuta hto. Kē tām mǎn pa ixto ajuta.” Anhÿr o ajamaxpēr o ri apa hkêt nē.

¹⁷ —E na pa ā mē amā ixujarēnh anē. Kot kaj mē inhma nē ixujarēnh kôt ā axpēn nhīpēx anhÿr o ri apa. Hā kot kaj mē akīnh nē ri apa. Anē.

Jejus kot amnhī tā hā àmnēnh xwÿnh o amnhīrīt ā harēnh

Matēwre 26.20-25; Makre 14.17-21; Rukre 22.21-23

¹⁸ Nhūm Jejus arī mē inhmā kapēr nē mē inhmā:

—Kot kaj mẽ apiitã mẽ akĩnh nẽ apa hkêt nẽ. Ixte mẽ arẽnh xwýnhjaja mẽ apiitã mẽ apumunh mex. Jakamã na pa Tĩrtũm kot mẽ apiitã mẽ ate amnhĩ tomnuj o hapêx par kêt ã mẽ anhĩõja jarẽ. Tĩrtũm kapêr ã kagã htũm kot harẽnh kot:

Ixkutã apkur o ỹr xwýnhjê hõ koja axtẽm nẽ mẽ kot kãm ixkurê xwýnhjê nhĩhkram ijaxã. Kêp ixkõt pa ho pa xwýnh tã koja axtẽm nẽ ã inhĩpêx anẽ.

Anhỹr o kot harẽnh. Tã koja tokyx ã inhĩpêx anẽ. ¹⁹ Nom kormã kot ã inhĩpêx anhỹr kêt ri na pa hkukamã mẽ amã harẽ. Jakamã koja ã inhĩpêx anẽ ka mẽ ja hã ixpumu nẽ ra ixte amnhĩ kukamã mẽ amã amnhĩ jarẽnhta mã ajamaxpêr nẽ ixpê Tĩrtũm rũm mẽ awỹr ixwryk xwýnh kõt ajamaxpêr tỹx kurê kumrêx.

²⁰ —Kwa mẽ ixkapêr ma nẽ amnhĩ krã kamã kãm ajamaxpêr tỹx o ri apa. Koja mẽhõ ixte mẽ hwỹr mẽ arẽnh xwýnhjê hã tanhmã mẽ ato mex to. Hãmri nẽ te pa kot tanhmã ixto mex to pyrãk. Nẽ koja mẽhõ tanhmã pa ixto mex to nẽ mããnen te kot mẽ awỹr inhmẽnh xwýnhhta tanhmã ho mex to pyrãk. Anẽ.

²¹ Nhũm pre ã Jejus mẽ inhmã kapêr anẽ. Hãmri nẽ tee ri amnhĩ kukamã hamaxpêr nẽ hkaprĩ nẽ mẽ inhmã:

—Hẽxta waa nẽ. Nà kot kaj mẽ atõ mẽ kot kãm ixkurê xwýnhjê nhĩhkram ijaxã. Kwa mẽ amnhĩ krã kamã ixkapêrja mã ajamaxpêr tỹx nẽ. Anẽ.

²² Hãmri pa mẽ amnhĩ tã kuma nẽ tee ri axpẽn pumunh o ixkrĩ.

²³ Ixpê Juãw na pa pre ixpê Jejus krãmnhwý mex ã ãhkõ hã ixãpkur o inhỹr ²⁴ nhũm Simãw Pêtreja ixpumu nẽ inhmã nomgõr nẽ kawax pẽ inhmã:

—Kwa mẽ pahtõ nhĩxi hã hkukja nã? Anẽ.

²⁵ Hãmri pa kuma nẽ Jejus mã kãm:

—Kwa Pahihti. Mẽ ixtõ koja we ã anhĩpêx anẽ? Anẽ.

²⁶ Hãmri nhũm mẽ inhmã:

—Nà kot paj pãwti hõ py nẽ guhkrax kãm ho mry kagõ nhek nẽ kot mẽ ãhkram ijaxãr mã xwýnhhta mã kugõ ka mẽ hkõt omu. Anẽ.

Hãmri nẽ kupy nẽ ho mry kagõ nhek nẽ Simãw Kariot kra Jut Kariotja mã kugõ nhũm kupy. ²⁷ Pyrja kõt nhũm Satanasti tanhmã hkrã hto. Hãmri nhũm Jejus te kot kãm amnhĩ to nojarêt pyrãk o amnhĩ tã kãm kapêr nẽ kãm:

—E kwa tokyx nã. Anẽ.

²⁸⁻³⁰ Hãmri nhũm kuma nẽ kato nẽ ma kamãt kô kamã htẽm kurê kumrêx. Hãmri pa mẽ ixãpkur o ixkrĩ xwýnhjaja Jejus kot ã kãm kapêr anhỹrja ã kuma nẽ tee ri hkukamã ijamaxpêr. Hãmri nẽ kot ma mẽ hkĩnh ã mẽõ hkwy japrõr kaxyw ma htẽm ã hkamnhĩx. Nhũm mẽ ixkwýjaja axtẽm Jejus kot mẽ kêp amrakati xwýnhjê mã mẽmoj nhõr ã kãm karõ nhũm ma mẽ hwỹr htẽm ã hkamnhĩx. Kêp mẽ inhmã mẽ ixkãxpore jamãr o pa xwýnh jakamã pa mẽ ã ixtỹx mẽmoj tã hkamnhĩx anẽ.

Jejus akupỹm nojarêt nẽ mẽ kãm mẽmoj tã karõ hã harẽnh

Matêwre 22.39-40; mããnen Wam Juãw 3.11-24

³¹⁻³² Hãmri nhũm Jejus mẽ inhmã:

—Nà kot kaj mẽ tokyx mẽmoj pumu nẽ Tĩrtũm mã mex o mex ã harẽ nẽ ijaxwýja inhmã inhmex o inhmex ã ijarẽ. Kot kaj mẽ tokyx mẽmojta pumu kãm ga.

³³ —Te mẽ apê ixkra pyrãk tã kot paj arĩ ri mẽ akõt ixpa grire hãmri nẽ ma akupỹm api. Kot kaj mẽ tee ri jar ijapêr o ri apa nom nhỹri ixpumunh kêt nẽ. Nẽ kormã tokyx ma ixkõt apa hkêt nẽ.

³⁴ —E kot paj axte mẽ amã mẽmoj tã karõ. Kormã ixte mẽ amã ja hã karõ hkêt. Kêr ka mẽ amã axpẽn

kĩnh o ri apa. Te pa inhmã mẽ ajapê pyrâk o axpên nhĩpêx rãhã ho ri apa. ³⁵ Kot kaj mẽ ã amnhĩ nhĩpêx anê nhũm mẽ akwýjaja ja hã mẽ apumunh mẽ mẽ apê ixkwý hã mẽ apumunh kurê kumrêx. Anê.

Simãw Pêtre kot Jejus ã amnhĩ to hêx kukamã harênh

Matêwre 26.31-35; Makre 14.27-31; Rukre 22.31-34

³⁶ Nhũm Jejus ã kot mẽ ixrer mẽ ma nhỹhỹm môr ã amnhĩ jarênh anê hãmri nhũm Simãw Pêtre tee ri kot amnhĩ jarênh ma mẽ kãm:

—Kwa Pahihti. Nhỹhỹm kot kaj kêt mō pa mẽ akôt ixpa hkêt mẽ? Anê.

Hãmri nhũm kãm:

—Nã ma inhmôr xàta wýr kot kaj mẽ kormã ma ixkôt apa hkêt mẽ. Nom kot kaj mẽ nhỹrmã ma ixkôt apa. Anê.

³⁷ Hãmri nhũm Simãw Pêtre kãm:

—Kwa mo kot pa mẽ omu mẽ tokyx ma akôt inhmrar kêt mẽ? Inhmã akôt ixtyk pyma hkêt kênã. Kwãr mẽ mãmri atã ixpĩ. Inhmã ajapê htýx kumrêx kênã. Anê.

³⁸ Hãmri nhũm Jejus kãm:

—Xà ãm hãmri na ka ã inhmã amnhĩ jarênh anê Simãw Pêtre? Xà amã ixkôt atyk pyma hkêt? Kwa o kora. Koja apkati hkôt krãhyre hkãr kêt ri ka ra mẽ umaj ate ixkôt apa hkêt ã amnhĩ tã axãprãr o axkrunêpxi kãm ga. Kwa amnhĩ krã kamã ixkapêrja mã ajamaxpêr týx mẽ. Anê.

14

Jejus kot Tirtũm nhõ krĩ jarênh Eprêw 11.16

¹ Nhũm Jejus arĩ mẽ inhmã kapêr mẽ mẽ inhmã:

—Kwa ã ixte mẽ amã amnhĩ jarênh anhýrja ma mẽ tee ri amnhĩ kukamã ajamaxpêr mẽ akaprĩ hkêt mẽ. Arĩ amnhĩ kaxyw Tirtũm mẽ wa inhmã ajamaxpêr týx rãhã ho ri apa. ² Inhĩpêêxã nhõ krĩ kamã ixkre xohtôô. ãm hãmri na pa ã

mẽ amã harênh anê. Tã kot paj ma akupým hwýr api mẽ mẽ akutêp mã amã mẽ anhõrkwý ho mex. ³ Hãmri mẽ ho mex pa mẽ rĩ man akupým mẽ awýr wrý. Hãmri mẽ ma akupým amnhĩ kôt mẽ ato ixãpir pa ka mẽ Tirtũm mẽ wa ixkôt apa rãhã apa ho apa. Jakamã kwa mẽ ri akaprĩ mẽ apa hkêt mẽ. Anê.

Jejus te kêp Tirtũm wýr pry pyrâk Epes 2.18

⁴ —Nẽ ma nhỹhỹm inhmôr xàta ra mẽ ate harênh mar mex. Nẽ hwýr pryja mããnẽn mẽ ate harênh mar mex. Anê.

⁵ Hãmri nhũm Tomas tee ri kuma mẽ kãm:

—Kwa mẽ ixte nhỹhỹm amôr xàta pumunhre hã kot pa kêt mẽ hwýr pryja pumu. Anê.

⁶ Hãmri nhũm kãm:

—Kwa paa. Te ixpê Inhĩpêêxã hwýr pry pyrâk. Na htem amnhĩ kaxyw inhmã hamaxpêr mẽ ixkôt amnhĩ xunhwý hãmri mẽ nhỹrmã ixkukwak ri pix mã ma Inhĩpêêxã mẽ wa inhõ krĩ hwýr api. Ixkukwak ri pix mã na htem hprĩ hã Tirtũm kapêr ma. Nẽ ixkukwak ri pix mã na htem wa ixri htĩr tũm mẽ pa ho pa. ⁷ Kot kaj mẽ aprĩ hã ixpumũ mẽ mããnẽn te aprĩ hã Inhĩpêêxã pumunh pyrâk. Tã ra mẽ ate tanhmã ixte amnhĩ nhĩpêx to hã ixpumunh mex jakamã mããnẽn te ra mẽ ate Inhĩpêêxã kot amnhĩ nhĩpêx ã omunh mex pyrâk. Anê.

Jejus mẽ Tirtũm wa kot amnhĩ nhĩpêx tipxi hã wa harênh

Juāw 1.1, 10.30; Piripos 2.6; Korosê 2.9

⁸ Nhũm Jejus ã mẽ inhmã kapêr anê nhũm Firipti kuma mẽ mẽ kãm:

—Kwa nom mẽ inhmã inhno ho Anhĩpêêxã pumunh prãm. Kot pa mẽ omu mẽ ixkĩnh týx kumrêx. Anê.

⁹ Hãmri nhũm Jejus kãm:

—Kwa na pa pre ra mẽ akôt ri ixpa ryy mẽ. Ka mẽ aprĩ hã ixpumunh mex mẽ. Kêt ra mẽ kot ixpumunh mex xwýnhjaja te mẽ kot

māānēn Inhīpēēxàja no ho omunh mex pyrāk. ¹⁰ Wa ixte amnhī nhīpēxja ām tipxi. Xà ate kormā amnhī krā hi mā ixkapēr jaxr t̄yx kēt? Inhīpēēxà mè wa ixte amnhī nhīpēxja ām tipxi. Nē kot axpēn pyrāk. Jakamā na pa hte amnhī krā hkôt ri tanhmā amnhī nhīpēx to ho ri ixpa hkēt nē. Ām Inhīpēēxà nh̄y hā na pa hte ri tanhmā mè amā ixkapēr to ho ri ixpa. Nē hiht̄yx xà ho tanhmā amnhī nhīpēx to ho ri ixpa. Ka mè ja hā ixpumu nē te ano ho Inhīpēēxà pumunh pyrāk. ¹¹ Kwa mè ixkapēr ma nē hkôt ajamaxpēr t̄yx nē. Inhīpēēxà mè wa ixte amnhī nhīpēxja ām tipxi. Nē kot axpēn pyrāk. R̄y ka mè tee ri ja kukamā ajamaxpēr japēr hāmri nē ixte aa mè ate mēmoj pumunh kēt kw̄y ho anh̄r ā m̄n ixpumu nē ja hā wa ixte amnhī nhīpēx tipxi kôt ajamaxpēr.

¹² —Kwa mè ixkapēr ma nē amnhī krā kamā amnhī krām hax̄ar t̄yx nē. Mē ate amnhī kaxyw ixkôt ajamaxpēr xw̄ynhjaja kot kaj mè ixte tanhmā amnhī nhīpēx to ho ixpa hā ixpumu nē ixkôt ā amnhī nhīpēx anh̄r o ri apa. Kot paj akup̄ym Inhīpēēxà hw̄yr api nē kuri ixpa ho ixpa. Ka mè ixwakre kamā ixih̄t̄yx xà ho tanhmā mè akw̄ȳjē mā amnhī nhīpēx to ho ri apa.

¹³ —Nē kot kaj mè apē ixkw̄y hā tanhmā mēmoj tā ixw̄yr to pa mè ama nē mè amā tanhmā mēmoj nhīpēx to. Mē kot omunh nē Inhīpēēxà mex o mex ā omunh kurē kumrēx kaxyw. ¹⁴ Nà kot kaj mè apē ixkw̄y hā mēmoj tā ixw̄y pa mè ama nē mè amā tanhmā mēmoj to. Anē.

Jejus kot mè pahw̄yr Tirtūm mè wa Karō rēnh ā kot amnhī jarēnh

Juāw 7.37-39, 16.7-17; Atre 2.1-4; māānēn Rōmān 5.5; Wam Korīt 12.7-11; Epes 3.16; Wam Juāw 2.27

¹⁵ Nhūm Jejus arī mè inhmā kapēr nē mè inhmā:

—Nà kot kaj mè amā ixkīnh hā kot kaj mè ixkapēr kôt pix mā ri amnhī nhīpēx rāhā ho ri apa.

¹⁶ —Kot paj akup̄ym kaxkwa hw̄yr api hāmri nē mè ato Inhīpēēxà w̄y nhūm inhma nē mè aw̄yr kot mè ato ajuta xw̄ynh maatita rē nhūm man mè aw̄yr wr̄y nē mè akaxw̄ynh mā agjē. Hāmri nē mè akôt tanhmā mè ato ajuta hto ho pa rāhā ho pa. ¹⁷ Wa Ixkarō koja mè aw̄yr kurē nhūm mè amā agjē. Hāmri nē hprī hā mè amā Tirtūm kapēr o amnhīrīt o mè akôt pa ka mè aprī hā mar mex nē. No mè kēp Tirtūm kra hkēt xw̄ynhjaja koja hprī hā wa Ixkarō jarēnh mar kēt nē. Mē kot wa ixkôt amnhī xunhw̄yr kēt jakamā koja mè hkarō mā gjēx kēt nē. Ām mè ate ixkôt amnhī nhīpēx o apa xw̄ynhjē pix w̄yr koja wr̄y nē mè aw̄yr agjē nē mè akamā pa ho pa.

¹⁸ —Nē ixte mè arer nē ma inhmōr mā tā kot kaj mè te mè hā awrāre pyrā nē ahte at̄yx ri apa pyrāk kēt nē. Kot paj te pa akup̄yn mè aw̄yr ixwr̄yk pyrā nē mè aw̄yr wa Ixkarō rē nhūm mè akām agjē nē mè akamā pa ho pa.

¹⁹ —Nē koja tokyx mè kot amnhī kaxyw Tirtūm mā hamaxpēr kēt xw̄ynhjaja axte ixpumunh kēt nē. No mè papajaja kot puj mè tokyx axte nh̄yri axpēn pumu.

—Nē kot paj akup̄ym ixtīr hāmri nē ixtīr tūm nē ixpa ho ixpa ka mè ixkukwak ri ajaxw̄yja nh̄ymā Tirtūm mè wa ixri atīr tūm nē apa ho apa.

²⁰ —Tā koja wa Ixkarō mè aw̄yr wr̄y nē mè akarō mā agjē ka mè aprī hā Tirtūm mè wa ixte amnhī nhīpēx ā wa ixpumunh mex kurē kumrēx. Te wa ixte amnhī nhīpēx tipxi pyrāk o ka mè hā wa ixpumu. Nē māānēn mè papajaja te ra mè pah̄tipxi nē ri mè papa pyrāk ka

mē hā amnhī pumunh mex kurē kumrēx.

²¹ —Nē mē kām ixkīnh xwýnhjaja na htem ixkapēr ma nē hkôt amnhī nhīpêx o pa. Jakamā nhūm Tīrtūm ixtā mē omu nē kām mē hapê htýx nē. Pa māānēn amnhī tā mē omu nē inhmā mē hapê htýx nē. Jakamā kot paj mē kām amnhī to amnhīrīt nhūm te mē kot no ho ixpumunh pyrāk. Anē.

Nhūm pre ā Jejus hkôt mē ixpa ho mē ixpa xwýnhjê mā amnhī jarēnh anē. ²² Hāmri nhūm Jutre hōja. Jut Kariot kêt axtem Jutre hōja Jejus axte kot mē inhmā pix mā kot amnhī to amnhīrīt ā harēnhja ma nē kām:

—Kwa aprī hā mē inhmā mēmoj jarē mē ijahkre xwýnh. Mon ka mē kēp akwý hkêt xwýnhjê mā axte amnhī to amnhīrīt kêt ā amnhī jarē? Nē ām mē papxipix mā amnhī to amnhīrīt ā amnhī jarē? Anē.

²³ Hāmri nhūm kām:

—Nā mē amā ixkīnh xwýnhjaja na ka htem ixkapēr ma nē hkôt amnhī nhīpêx. Nhūm Inhīpêxà ja hā mē apumu nē ixtā kām mē ajapê htýx nē. Hāmri pa wa mē akôt ixpa ho ixpa. Jao mē amā amnhī to amnhīrīt mex o ixpa. ²⁴ Na pa hte amnhī krā hkôt ri mē kām ixkapēr o ixpa hkêt nē. Ām Inhīpêxà nhý hā na pa hte mē kām ixkapēr o ri ixpa. Kot mē awýr inhmēnh xwýnhhta nhý hā. Tā nhūm mē kām inhmar prām kêt jakamā na pa hte wa mē kām mē apyrā nē amnhī to amnhīrīt o ixpa hkêt nē.

²⁵ —E na pa kormā ixte mē akôt ri ixpa ri ā mē amā amnhī jarēnh anē. ²⁶ Tā koja Inhīpêxà ixpānhā mē awýr wa Ixkarō rē. Ixte hā mē amā ixàhwýr xà hkôt. Hāmri nhūm man mē awýr wrý nē mē akaxwýnh mā agjê nē mē akôt ri tanhmā mē ato ajuta hto ho pa. Nē ra ixte ā mē amā ixkapēr anhýrja koja hprī hā mē amā ho amnhīrīt

mex nē. Ka mē amnhī krā kamā kām ajamaxpēr nē hā ano htýx nē ho apa. Anē.

Jejus kēp mē pajamakêtkati nhōr xwýnh

Rōmān 5.1; Karatas 5.22; Piripos 4.7; Korosē 3.15

²⁷ Nhūm Jejus arī mē inhmā kapēr nē mē inhmā:

—Nē mē kēp ixkwý hkêt xwýnhjaja na htem tee ri amnhī kukamā hamaxpēr o ri pa. Jao hkaprī nē pa. No pa na pa hte mē kurom ijamakêtkati nē ixkīnh nē ri ixpa ho ixpa. Tā kot paj tanhmā mē ato ka mē ixpyrā nē ajamakêtkati nē axāmnhīx akīnh nē ri apa. Jakamā kwa mē ixte amnhī jarēnh ma nē tee ri amnhī kukamā ajamaxpēr o amā ma ho ri apa hkêt nē.

²⁸ —Na pa pre ra mē amā ma ixàpir nē nhýrmā man akupýn mē awýr ixwryk ā mē amā amnhī jarē. Tā na pa ra ma akupým Inhīpêxà hwýr ixàpir mā. Kot amnhī to rax o kot ijakrenh. Kot paj akupým hwýr api nē kuri inhmex nē ixpa ho ixpa. Tā ka mē amā ixkīnh hā kot kaj mē ma akupým hwýr ixàpir ā ijarēnh ma nē inhý hā akīnh nē.

²⁹ —Kormā ma akupým ixàpir kêt ri na pa ā mē amā amnhī kukamā amnhī jarēnh anē. Kēr pa mēmo arīgro hā ma akupým api ka mē ja hā ixpumu nē ajamaxpēr o: “Nā ām hāmri na pre mē inhmā amnhī kukamā akupým Hipêxà hwýr àpir ā amnhī jarē.” Anhýr o ajamaxpēr. Jao ixkôt ajamaxpēr týx rāhā ho ri apa.

³⁰ —Kot paj tokyx axte tanhmā mē amā ixkapēr to hkêt nē. Mē kēp ixkwý hkêt xwýnhjê nhō pahihtī Satanastija na ra kot tanhmā ixto kaxyw. Nom koja tee ri tanhmā kām ixto hprām kaprý. Kurom ixihtýx o ixihtýx o ixte hakrenh par jakamā koja tanhmā ixto hkêt nē.

³¹ Kwār kām tanhmā ixto hprām xà

hkôt tanhmã ixto pa omu. Inhmã Inhîpêêxà hkôt ixte amnhî nhîpêx prãm jakamã kot paj jahti mã arî xa nhũm te tanhmã kot ixto pyrãk o inhîpêx nom tanhmã ixto hkêt nê. Mê ate inhmã Inhîpêêxà japê htÿx ã ixpumunh kaxyw kot paj ã mê anoo mã amnhî nhîpêx anê. Nê mê ate ixte kãm tanhmã amnhî nhîpêx to ho ri ixpa rãhã mê kot xpir ã ixpumunh kaxyw. E hãmri. Ma pu mê mō nê amnhî to Tirtũm wÿ. Anê.

Nhũm pre ã Jejus hkôt mê ixpa ho mê ixpa xwÿnhjê mã kapêr anê. Pa mê kuma nê kãnhmã ixkuhê nê inhnojarẽt nhũm axte mê inhmã awjarê.

15

*Jejus te kêp mêmō krô pyrãk
Karatas 2.20; Wam Juāw 2.28*

¹ Nhũm Jejus arî mê inhmã kapêr nê mê inhmã:

—Nã te ixpê mêmō pî pê “uwa” anhÿr xwÿnhhta kakhô maati pyrãk. Nê Inhîpêêxaja te kot uwa hkre nê hamãr o pa xwÿnhhta pyrãk. ² Nê mê kot ixkôt amnhî xunhwÿr xwÿnhjaja te mê kot uwa kakhô rũm krô pyrãk. Na hte mê hkwÿjaja htÿx ri kêp ixkwÿ hã amnhî jarênh ã amnhî to hêx. Jao te kot krôja rã htã ô hkêt pyrãk. Koja rã htã ô hkêt nê nhũm kot hamãr xwÿnhja tee ri omu nê kakhô nê krãhta nê kumê. No koja ô mex nê nhũm omu nê hkînh nê. Hãmri nê rã nê ô rax kaxyw tanhmã ho mex to. Tã na hte Tirtũm uwa krô jamãr xwÿnhhta pyrã nê ã mê ate ixkôt amnhî xunhwÿr xwÿnhjê nhîpêx anê. ³ No mê kajaja na ka prem mê kot ixkwÿ hã amnhî to hêx xwÿnhjê rom ixkapêr mar tÿx nê. Nê amnhî kaxyw inhmã ajamaxpêr nê ixkôt amnhî nhîpêx mex o apa. Jao te mê ate krô rã nê ô rũnh pyrãk o amnhî nhîpêx.

⁴ —Na hte krôja amnhî krã hkôt ô hkêt nê. ãm kakhô pix kukwak ri na hte rã nê ô. Ja pyrã nê kot

kaj mê ixkukwak ri pix mã inhmã hprãm xã hkôt ri tanhmã amnhî nhîpêx to ho apa. Jakamã kwa kêr ka mê ixkapêr pix mãn mar o apa pa mê akôt ixpa ho ixpa. ⁵ Te ixpê kakhô nhũm te mê apê krô pyrãk jakamã kot kaj mê inhmã hprãm xã hkôt tanhmã amnhî nhîpêx to ho ri apa nê te krô rã nê ô rũnh pyrãk o amnhî nhîpêx. No kot kaj mê amnhî krã hkôt ri amnhî nhîpêx o ri apa nê te krô grã nê ô hkêt pyrãk o amnhî nhîpêx.

⁶ Na hte uwa krô nhõ dõnja nhÿri hã krô grã pumu hãmri nê kakhô nê hakã nê ma o mra nê kuwy kamã kurê nê ho hxêt pa. Ja pyrã nê mê kot htÿx ri ixkôt amnhî xunhwÿr ã amnhî jarênh xwÿnhjaja koja mê nhÿrmã amnhî xã htÿx kamã hamak rãhã ho pa.

⁷ —Tã no mê kajaja. Kêr ka mê ixkapêr kôt pix mã amnhî nhîpêx rãhã ho ri apa. Te mê pahtipxi nê ri papa pyrãk o amnhî nhîpêx. Hãmri nê mãmrî amã hprãm xã hkôt mêmōj tã Tirtũm wÿ nhũm ama nê amã mêmōj tã ate hwÿr xãta kôt kugõ. ⁸ Kot kaj mê Inhîpêêxã mê wa ixkapêr kôt amnhî nhîpêx o ri apa nhũm mê piitã ja hã mê apumu nê hamaxpêr o: “Hêxta waa nê. Jajaja na htem Tirtũm kot amnhî nhîpêx o amnhî nhîpêx o pa. Mãn Tirtũmja mex o mex.” Anhÿr o hamaxpêr.

⁹ —Nê na pa hte Inhîpêêxã kãm ijapê pyrãk o inhmã mê ajapê nê. Tã kêr ka mê amarî inhmã mê ajapê hã ri ixkôt amnhî nhîpêx mex o apa. ¹⁰ Na pa hte ãm Inhîpêêxã kapêr kôt pix mã ri amnhî nhîpêx o ri ixpa. Jakamã na pa hte kãm ijapê hã ixkînh nê ri ixpa. Tã kêr ka mê ixpyrà nê ixkapêr kôt pix mã tanhmã amnhî nhîpêx to ho ri apa. Nê ixpyrà nê inhmã mê ajapê hã amnhî pumu nê akînh nê ri apa.

¹¹ —E na pa ã mê amã ixkapêr anê. Mê ate inhmar nê ixpyrà nê

axàmnhĩx ajamakêtkati nê akĩnh nê ri apa kaxyw. Tã kêr ka mẽ ã amnhĩ nhĩpêx anê nê te pa ixte ã amnhĩ nhĩpêx anhÿr pyrãk. Anê.

Jejus kot mẽ pamã axpên kĩnh tÿx ã mẽ pamã karô

¹² Nhũm Jejus arĩ mẽ inhmã kapêr nê mẽ inhmã:

—E kêr ka mẽ te inhmã mẽ ajapê pyrãk o mẽ amã axpên japê ho mẽ amã axpên kĩnh o ri apa. Jao axpên to mex o ri axpên kôt apa. ¹³ Koja mēhō kãm hkrãmnhwÿ japê htÿx nê nhũm ra mēhō mẽmo mÿrapê kot kêp hpĩr mã nhũm tee ri hã omu nê nê kãm amnhĩ mẽ nhũm kupĩ. Hãmri nhũm mẽ ja hã omu nê kãm hkrãmnhwÿ japê htÿx ã nê htyk ã axpên mã harê.

¹⁴⁻¹⁵ —E kot paj axte mẽ apê inhmã mẽ axapênh xwÿnh ã mẽ ajarênh kêt nê. Na hte mẽ õ patrãwaja hpĩr hã kãm mẽ apênh xwÿnhjê mã amnhĩ jarênh kêt nê. Na htem ãm mẽ apênh pix ã mẽ kurê. Nom mẽ kajaja mẽ ate ixkapêr mar nê hkôt pix mã amnhĩ nhĩpêx jakamã kot paj hpãnhã mẽ apê ixkrãmnhwÿ hã mẽ ajarê. Na htem axpên to hkrãmnhwÿ nê ma nhÿhÿm pa kaxyw nê tanhmã amnhĩ kukamã hkrãmnhwÿ mã amnhĩ jarênh to. Tã mẽ apê ixkrãmnhwÿ jakamã na pa hte ã amnhĩ kukamã mẽ amã amnhĩ jarênh anê. Nom ja pix jarênh kêt nê. Na pa hte mãânên Inhĩpêêxã xô ri mẽ amã mẽmoj piitã ho amnhĩrĩt o mẽ akôt ixpa.

¹⁶ —Nê mẽ kajaja na ka prem ixpê mẽ akrãmnhwÿ kaxyw ixãm kêt nê. Pa na pa pre amnhĩ kaxyw inhmã mẽ aprãm. Ixkapêr kôt pix mã ri mẽ ate tanhmã amnhĩ nhĩpêx to ho apa kaxyw. Te uwa krô ô rũnh nê aa grã hkêeta pyrãk. Jakamã kot kaj mẽ mẽmoj tã Inhĩpêêxã wÿ nhũm mẽ ama nê mẽ ate mẽmoj tã hwÿr xã hkôt amã kugô.

¹⁷ —E. Kwa kêr ka mẽ amã axpên kĩnh nê tanhmã axpên to ajuta hto ho axpên mã mẽmoj kutã anojarêt pix o mãn kêt ri apa. Nã ja na kêt inhmã hprãm. Anê.

Mê kot Jejus kwÿjê kamã gryk xwÿnhjê jarênh

Matêwre 10.22; mãânên Juāw 7.7, 17.14; Wam Juāw 3.13

¹⁸ —Nê koja ixkwÿ hkêt xwÿnhjaja kãm mẽ aprãm nõkati. Tã kêr ka mẽ amnhĩ tã mẽ omu nê tee ri amnhĩ kukamã ajamaxpêr kêt nê. Ixkumrêx na prem kãm ixprãm nõkati. Tã koja mẽ mã ixtã mẽ ato anê nê kãm mẽ aprãm kêt nê. ¹⁹ Mẽ apê mẽ hkwy ronhÿx mẽ amnhĩ tã mẽ apumu nê kãm mẽ ajapê nê. Nom apê mẽ hkwy hkêt. Ra ixte amnhĩ kaxyw mẽ arênh jakamã na htem tee ixtã mẽ apumu nê kãm mẽ akĩnh kêt o kãm mẽ akurê nê. ²⁰ Koja mẽ ixtã hpijaam kêt nê nê mãânên mẽ atã hpijaam kêt nê. Nê mẽ anhĩpêx o te mẽ kot pa ixpê mẽ anhõ patrãw nhĩpêx pyrãk. Ka mẽ ixpyrã nê amnhĩ xã htÿx kãm ajamak o ri apa. Na pa pre ra mẽ amã ja jarê. Nom koja mẽ akwÿjaja jajê rom te ra mẽ kot ixkapêr mar nê hkôt amnhĩ nhĩpêxã pyrã nê mãânên mẽ akapêr ma nê hkôt amnhĩ nhĩpêx o pa. Kwa kêr ka mẽ ixkapêrja mã mãn ajamaxpêr tÿx rãhã ho ri apa.

²¹ —Koja mẽ ixtã tanhmã mẽ anhĩpêx to. Mẽ kot Tĩrtũm kapêr kôt amnhĩ nhĩpêx kêt jakamã koja mẽ ã ixtã mẽ anhĩpêx anê. Tĩrtũm kot mẽ awÿr inhmênh kôt hamaxpêr kêt nê ã mẽ anhĩpêx anê. ²² Ixwryk nê mẽ kãm Tĩrtũm kapêr jarênh o ri ixpa htã nhũm mẽ inhma nê ãm inhma nê ixkôt amnhĩ nhĩpêx kêt nê. Jakamã koja mẽ kot amnhĩ tomnuj xwÿnh ã amnhĩ to hpimxur kêt nê.

²³ —Nê koja mēhō kêp ixprãm nõkati nê mãânên te kêp Inhĩpêêxã prãm nõkati pyrãk. ²⁴ Na pa pre

mê piitã mê hkôt aa mê kot mëmoj pumunh kêt kwý ho anhÿr o ri mê hkôt ixpa nhùm mê hã ixpumu. Æm paxpìx na pa pre ã amnhì nhÿpêx anhÿr o ri mê hkôt ixpa nhùm mê hã ixpumu. Kêp ãm mê kot ja hã ixpumunh kêt ronhÿx prem axpên mã ijarênh o: “Tk. Mê pahte mëhõja nhÿhÿnh mê pahwÿr hpôx ã omunhre hã kot puj kêt mê ri hã pahpijaam o ri papa.” Anhÿr o nhÿx prem axpên mã ijarê. Tã ra mê kot ja hã ixpumunh mex tã axtem nê Inhÿpêêxã mê wa mê kãm wa ixkurê nê. Jao mê kot amnhì tomnuj xwÿnh ã amnhì to hpimxur kêt nê. ²⁵ No Tirtùm kapêr ã kagã htùm kot mê hkukamã mê harênh nê mê hã kagã nê kot mê hã kagã kot:

Mëmo tanhmã kute mÿrapê na htem kãm ixkurê? Nã ãm amarì na htem kãm ixkurê ho pa. Anê.

Tã ã ixtã kagã kot anhÿr xã hkôt na htem ã kãm ixkurê anê. Jakamã koja mê mãânên ixtã kãm mê akurê nê. Nom kêr ka mê arì mê kãm ixkapêr jarênh o ri mê hkôt apa nê tee ri amnhì kukamã ajamaxpêr kêt nê.

²⁶ —Nê tokyx ma akupÿm Inhÿpêêxã hwÿr ixàpir mã tã kot paj hwÿr pój nê aa mê ato ijamakêtkati hkêt nê. Kot paj amnhì pãnhã mê awÿr wa Ixkarõ rê. Mê kot kãm: “Mê kutã nojarêt xwÿnh maati” anhÿr xwÿnhnta kot paj mê awÿr kurê nhùm ixpãnhã mê awÿr wrÿ nê mê amã agjê nê hprì hã mê amã Tirtùm mê wa ixto amnhÿrìt o ri mê akôt pa. ²⁷ Kot kaj mê ama hãmri nê ma mê piitã mê hkôt ri mê kãm ixkapêr jarênh o ri apa. Na pa pre ra mê kãm Tirtùm kapêr jarênh ryy ho mê hkôt ri ixpa ka mê ixkôt ri inhmar o apa ry nê. Jakamã kêr ka mê ixwakre kamã arì mê kãm ixkapêr jarênh o ri mê hkôt ri apa. Anê.

16

¹ Nhùm Jejus arì mê inhmã kapêr nê mê inhmã:

—Nê mê kot nhÿrmã ixtã tanhmã mê anhÿpêx to nhùm mê ate tee ri amnhì kukamã ajamaxpêr nê mê umaj ixkaga pymaj na pa hte ã mê amã ixprì hã mëmoj jarênh ry anê. ² Kot kaj mê kãm ixkapêr jarênh o ri apa nhùm mê hkwÿjaja tee ri mê ama nhùm ja mê kêp omnuj nê. Nhùm mê Tirtùm kapêr o mê ahkre xã hã ixkreja rùm amnhì nê mê ajano nê mê akwÿjê hpar o pa. Hãmri nê hamaxpêr o: “E pu mê axte mê hkwÿjê pynê nê mê kupa. Tirtùm kãm ja mex kênã.” Anhÿr o htÿx hamaxpêr o pa. ³ Mê kot hprì hã Inhÿpêêxã mê wa ixkapêr mar mex kêt nê ã htÿx wa inhmã ja mex ã wa ijarênh anê. ⁴ Nom mê ate ixkôt amnhì xunhwÿrta krax kãm na pa pre ã mê amã mê harênh anhÿr kêt nê. Arì mê akôt ixpa kênã. Kot ka mê ixkôt apa rãhã amã mê uma hkêt nê. Tã pa ra akupÿm inhnojarêt nê ã mê amã mê harênh anê. Jakamã koja mê nhÿrmã ã mê anhÿpêx anê ka mê amnhì tã mê omu nê ra ixte mê akukamã ã mê harênh anhÿrja mã ajamaxpêr kurê kumrêx nê tee ri amnhì kukamã ajamaxpêr kêt nê. E kwa ixkapêrja mãn mê amnhì krã him haxàr tÿx nê ri hã apa. Anê.

Jejus mê Tirtùm wa hkarõ jarênh

⁵⁻⁶ Nhùm Jejus arì mê inhmã kapêr nê mê inhmã:

—E na pa ra kot mê awÿr inhmênh xwÿnhnta wÿr ra akupÿm inhnojarêt ka mê ixte amnhì jarênh ã inhma nê akaprì nê. Nê tee ri amnhì kukamã ajamaxpêr tã mê atõ aprì hã ma inhmõr xã ã ixkukjêr kêt nê. Rÿ inhmã: “Kwa mo kaxyw kot kaj kêt mê ixre nê ma akupÿm mõ? Xã we ja amã mex?” Anhÿr o mê atõ ixkukjêr kêt nê. ⁷ Kêt ma akupÿm ixàpirja mê amã mex kumrêx. Kop ãm akupÿm

ixàpir kêt ronhỹx mẽ amã mẽmoj kutã nojarêt xwýnhta ixpãnhã mẽ awýr wrýk kêt nê. Tã kot paj ma akupỹm api nê amnhĩ pãnhã mẽ awýr kurê. Jakamã kwa mẽ ja ma nê tãm ajamaxpêr o ri apa. ⁸ Koja ixpãnhã mẽ awýr wrý hãmri nê mẽ kêp ixkwý hkêt xwýnhjê mã mẽmoj to axkrunêpxi nê ho amnhĩrít. Koja mẽ kãm mẽ kot tanhmã amnhĩ tomnuj to xà ho amnhĩrít. Nê mãânên mẽ kãm tanhmã mẽ kot amnhĩ to mex to xà ho amnhĩrít. Nê mãânên Tirtũm kot nhỹrmã mẽ kot amnhĩ tomnuj mýrapê tanhmã mẽ homnuj to xàta nhũm mãânên mẽ kãm ho amnhĩrít. Koja mẽ kãm ja piitã ho amnhĩrít.

⁹ —Jakamã koja mẽ ja kukamã tanhmã hamaxpêr to nê hamaxpêr o: “Kwa kot paj xep amnhĩ tomnuj kaga nê amnhĩ kaxyw Tirtũm Kra Jejus mã ijamaxpêr nê hkôt amnhĩ xãm kêt nhũm Tirtũm nhỹrmã ixte amnhĩ tomnuj mýrapê tanhmã ixto. ¹⁰ Nã kot paj hkôt amnhĩ xãm hãmri nê ra urak nê Tirtũm kapêr kôt tãm ri amnhĩ nhĩpêx o ixpa. Na pre Jejus tãm ri amnhĩ nhĩpêx o pa nhũm Tirtũm amnhĩ wýr ho api pa mẽ axte jar nhỹri omunh kêt nê. ¹¹ Na xep Tirtũm nhỹrmã kot ma kuwy hwýr mẽ kêp Jejus kwý hkêt xwýnhjê nhõ pahi maatija mẽnh ã ra amnhĩ kukamã hã amnhĩ jarê. Jakamã kwa arĩ ixpê hkwy jakamã kot paj tokyx Jejus kôt amnhĩ xãm kêt nhũm hkôt kuwy hwýr inhmê.” Anhỹr o hamaxpêr. Koja ã wa Ixkarõja mẽ kêp ixkwý hkêt xwýnhjê mã mẽmoj to amnhĩrít mex anê.

¹² —Nê na pa kormã mẽ amã mẽmoj piitã ho amnhĩrít kêt nê. Kormã mẽ ate aprĩ hã mẽmoj pumunh nê mar mã tãm kêt. ¹³ Tã koja ixpãnhã wa Ixkarõ mẽ awýr wrý nê mẽ akarõ mã agjê hãmri nê hprĩ hã mẽ amã Tirtũm kot amnhĩ nhĩpêx o amnhĩrít o mẽ akôt pa ho pa. Nom koja amnhĩ krã hkôt tanhmã mẽ

amã ho amnhĩrít to hkêt nê. Koja ãm Tirtũm pix xõ ri mẽ amã ho amnhĩrít o mẽ akôt pa. Jao hprĩ hã mẽ amã ixkôt mẽ ate amnhĩ nhĩpêx nyw o mẽ amã amnhĩrít o mẽ akôt pa. ã koja hprĩ hã ra ixte mẽ amã ixujarênh xà hkôt axte mẽ amã mẽmoj to amnhĩrít mex o pa anê.

¹⁴ —Nê koja hprĩ hã mẽ amã pa ixto amnhĩrít o pa. Jao mẽ amã inhmex o inhmex ã ixto amnhĩrít o mẽ akôt pa. ¹⁵ Inhipeêxã mẽ wa ixkapêrja ãm htipxi. Tã koja wa Ixkarõ ixkapêr xõ ri ã mẽ amã mẽmoj to amnhĩrít anê. Jao ra wa ijamê wa ixkapêr o amnhĩrít mex o pa. Koja ã wa mẽ apê ixkwý hã mẽ ato mex o pa anê. Anê.

Mê kot akupỹm Jejus tĩr ã omunh ã mẽ harênh

¹⁶ Nhũm Jejus arĩ mẽ inhmã kapêr nê mẽ inhmã:

—Nê kot paj tokyx mẽ ano pê akunok ka mẽ axte amnhĩ kaêx ã ixpumunh kêt nê. Nom kwa kêt ka mẽ tee ri ixkapêrja kukamã ajamaxpêr kêt nê. Kot paj ixtã apkati grêre ka mẽ axte ixpumu. Anê.

¹⁷⁻¹⁸ Nhũm pre ã Jejus hkôt mẽ ixpa ho mẽ ixpa xwýnhjê mã kapêr anê. Pa mẽ tee ri ã kapêr anhỹr ã kuma nê axpên mã:

—Kwa mo na ri ã amnhĩ jarênh anê? Nê tokyx mẽ pano pê pikunor tã hã apkati grêre nhũm axte mẽ pahte omunh ã amnhĩ jarê nê akupỹm Hipêêxã hwýr àpir ã amnhĩ jarê. Pêr kapêrja ãm ri katii. Anê.

¹⁹ Nhũm amnhĩ tã mẽ inhma nê mẽ inhmã:

—Kwa xà na ka mẽ kormã aprĩ hã ixkapêr ã inhmar kêt nê? ²⁰ Kot paj ty nhũm mẽ kêp ixkwý hkêt xwýnhjaja ijarênh ma nê hkĩnh nê. No mẽ kajaja kot kaj mẽ akaprĩ nê amýr o apa. Nê gaa nê akupỹm akĩnh nê. Kwa mẽ ixkapêrja ma nê kãm ajamaxpêr tỳx o apa. ²¹ Te mẽ ate mẽ hpijagri xwýnh kot amnhĩ nhĩpêx pyrak. Na htem õhy xà nê

gaa nē ra ōhy xà htỳx nē. Nē hkĩnh kêt nē tee ri amnhĩ nhĩpêx o hikwỳ. Tā gaa nē hpijagri nhũm hkrare kato nhũm omu nē akupỳm hkĩnh nē axte ōhy xà htỳx mã hamaxpēr kêt nē. ²² Tā ã mē ate amnhĩ nhĩpêx anhỹr kaxyw. Kot kaj mē akĩnh kêt nē ri apa. Tā kot paj akupỳm tokyx ixtĩr nē axte mē awỳr ixkato ka mē ixpumu nē akĩnh nē. Hāmri nē akĩnh rāhã ri apa ho apa. Nhũm mēhō mē apumu nē tee ri tanhmã mē akĩnh nē mē ato kaprỳ ka mē arĩ akĩnh rāhã ri apa ho apa.

²³ —Nē ixte akupỳm kaxkwa hwỳr ixàpir nē amnhĩ pānhã mē awỳr wa Ixkarō rēnh nhũm mē awỳr wrỳk nē hprĩ hã mē amã mēmoj piitã ho amnhĩrĩt jakamã kot kaj mē axte amã mēmoj tã ixkukjēr prām kêt nē. Anē.

Jejus kwỳjaja kot àmnhĩx mēmoj tã Tĩrtũm wỳr

Matêwre 18.19-20; Juāw 14.13-14

Nhũm Jejus arĩ mē inhmã kapēr nē mē inhmã:

—E kwa mē ã ixkapēr anhỹrja ma nē amnhĩ krã kamã kãm ajamaxpēr tỳx nē ho apa. Kot kaj mē apê ixkwỳ hã mēmoj tã Inhĩpêêxà wỳ nhũm mē ama nē mē ate hã axàhwỳr xà hkôt mē amã mēmoj tanhmã ho rỳ mē amã mēmoj gō. ²⁴ Na ka mē kormã apê ixkwỳ hã mēmoj tã axàhwỳr kêt nē. Tã kēr ka mē amã mēmoj tã hwỳr prām nē māmri mēmoj tã hwỳr o apa. Kê mē ama hāmri nē tanhmã mē amã mēmoj nhĩpêx to ka mē amnhĩ tã omu nē akĩnh nē.

²⁵ —Nē na pa pre mē amã mēmoj jarēnh kaxyw nē mēmoj tã haxwỳ nē mē amã ixujarēnh rax nē. Nom kot paj axte ã mē amã ri ixujarēnh anhỹr kêt nē. Kot paj tã ixprĩ hã mē amã tanhmã Inhĩpêêxà jarēnh to ka mē aprĩ hã mar mex kurê kumrêx. ²⁶ Hāmri nē mē kamjaja mē apê ixkwỳ hã tanhmã amnhĩ to hwỳr to ho apa. Jakamã mo nē kaxyw kot pa

kêt axte tanhmã mē ato hwỳr to? Kot kaj mē kamjaja amnhĩ to hwỳr jakamã arĩ ixte mē ato hwỳr kaxyw ixto presija hkêt nē.

²⁷ —Na ka mē ra amã ijapê nē. Nē ixte Inhĩpêêxà rũm mē awỳr ixwrỳk ã ixpumu. Jakamã nhũm Inhĩpêêxàja ixtã mãânēn kãm mē ajapê nē. Tã kot kaj mē kamjaja mēmoj tã amnhĩ to hwỳr o apa nhũm mē ama nē kãm mē ajapê htỳx kãm mē amã mēmoj gō.

²⁸ —Na pa pre Inhĩpêêxà rũm amnē mē awỳr wrỳ. Hāmri nē kãm hprām xà hkôt tanhmã amnhĩ nhĩpêx to hpar o mō nē ra akupỳm hwỳr inhojarêt kaxyw. Anē.

Nhũm pre ã Jejus mē inhmã amnhĩ jarēnh anē. ²⁹ Pa mē tã ixprĩ hã mar mex nē. Hāmri nē kãm:

—Tỳ. Nà na pa mē tã ixprĩ hã ate amnhĩ jarēnh ma. Ka amnhĩ tã haxwỳr nē axujarēnh kêt jakamã pa mē tã ixprĩ hã amar mex nē.

³⁰ Pēr ãm ate mēmoj piitã omunh par xwỳnh na ka. Jakamã ate mē ijamaxpēr piitã hkôt aprĩ hã mē ixpumunh par kumrêx kênã kot ka tanhmã mē ijamaxpēr to hã mē ixkukja. ãm hāmri na ka Tĩrtũm rũm awrỳk ã amnhĩ jarē. Anē.

³¹ Hāmri nhũm mē inhma nē mē inhmã:

—Xà ãm hāmri na ka mē ixkôt ajamaxpēr tỳx nē? ³² Kwa mē o kora. Kot kaj mē tokyx mē umaj ixre nē angrã nē ma ahpỳnhã mē anhō krĩ hwỳr mra. Mē kot ixkôt tanhmã mē anhĩmex to pymaj kot kaj mē ã amnhĩ nhĩpêx anē kãm ga. Kot paj ahte mē kãm ixãm pyrãk o amnhĩ nhĩpêx nom ahte ixãm kêt nē. Inhĩpêêxà aa kot ixrere hã.

³³ —E ixkukwak ri mē ajamakêtkati nē axàmnhĩx mē apa kaxyw na pa ã mē amã ixkapēr anē. Nom mē kēp ixkwỳ hkêt xwỳnhjaja koja nhỹrmã ixtã mē atomnuj tỳx o pa. Tã kēr ka mē amã mē uma nē tee ri amnhĩ kukamã ajamaxpēr o ri apa hkêt nē. Nhỹrmã ixte mēmoj

punuj piitā ho ijpapêx par ā arīgrota
ā kot paj mē atā mē ho ijpapêx par
kumrêx. Anê.

17

*Jejus kot amnhī to Tirtūm wūr ā
harēnh*

Rōmān 8.34; Eprêw 7.25

¹ Tā nhūm Jejus mē inhmā kapēr
pa nē hpānhā kaxkwa hwūr rīt nē
Tirtūm mā amnhī jarē nē kām:

“Pa Papaj. E na pa ra amā
hprām xā hkôt tanhmā amā
amnhī nhīpêx to hpar o mō nē
akupŷm awūr inhnojarêt kaxyw.
Jakamā kot kaj ixpê Akra hā
ma akupŷm amnhī wūr ixto api.
Mē kot ja hā ixpumunh nē amā
amex o amex ā ajarēnh o pa
kaxyw. ² Na ra pyka piitā hkôt
ri mē pa xwŷnh kwŷjaja amnhī
kaxyw ixkôt hamaxpēr nē ixkôt
amnhī xunhwŷ nom ka na ka pre
inhmā mē agō. Ixte mē htūr tūm
nē mē pa mā xwŷnh ā mē harēnh
kaxyw. Jakamā koja mē nhŷrmā
ixkukwak ri pakuri htūr tūm nē
pa ho pa. ³ Na mē ra ixkapēr mar
mex nē. Nē ixpê Jejus Kris pē
ate mē hwūr inhmēnh xwŷnhja
kôt hamaxpēr mex nē. Nē apē
Tirtūm ā ām apyxi mex ā mǎānēn
akôt hamaxpēr mex nē. Nē amex
o amex ā akôt hamaxpēr nē
kām akīnh nē. Jakamā koja mē
nhŷrmā pakuri htūr tūm nē pa ho
pa. Nā koja mē anē.

⁴ Amnepēm amnē pyka ja hwūr
inhnojarêt nhūm ate tanhmā
ixte amnhī nhīpêx to hā inhmā
karōta na pa ra hatur xām mēnh
kaxyw. Na pa xatā mē kām
akapēr jarēnh o ri mē hkôt
ixpa. Jao ra mē kām apē Pahi
Maati hā apixi mex ā ajarē nē
amex o amex nē axāhpumunh o
axāhpumunh ā mē kām ajarēnh o
ri ixpa. ⁵ Jakamā e Papaj. Kēr ka
tokyx ixpê akra hā ma akupŷm
amnhī wūr ixto api. Pa akupŷm

awūr pōj nē te amnepēm akuri
ixpaja pyrā nē axte akuri ixpa
ho ixpa.” Anê.

*Jejus kot hkwŷjê ho Tirtūm wūr ā
harēnh*

Nhūm Jejus arī Tirtūm mā kapēr
nē kām:

⁶ “E Papaj. Nā ra ate pyka hkôt
inhmā mē ōr xwŷnhjaja na pa ra
mē kām akapēr jarēnh ryy ho ri
mē hkôt ixpa nhūm mē akapēr
kôt pix mā amnhī nhīpêx o pa.
⁷ Tā ixte anhŷ hā tanhmā amnhī
nhīpêx to ho ri ixpaja ra mē kot ja
hā ixpumunh mex. ⁸ Na pa pre
hte axō ri mē ahkre ho ri ixpa
nhūm mē amnhī kaxyw ixkôt
hamaxpēr mex nē. Nē ate mē
hwūr inhmēnh nhūm mē hwūr
ixwŷrkja ā mē kot ixpumunh
mex.

⁹⁻¹⁰ Tā ot pa mē ho awūr o xa.
Nom na pa mē kēp ixkwŷ hkêt
xwŷnhjê ho awūr kêt nē. Ām ate
inhmā mē ōr xwŷnhjê pix o na
pa awŷ. Mē kēp akra jakamā
mǎānēn mē kēp ixkraa. Jakamā
na htem pamā pamex o pamex ā
pajarēnh o ri pa.

¹¹ Axihŷtŷx o axihŷtŷx jakamā na
ka pre amnhī xwar inhmā axi-
htŷx xā hkwŷ gō pa te ixte axi-
htŷx pyrāk. Tā na pa ra akupŷm
awūr inhnojarêt kaxyw. Kot paj
jar pyka hkôt ri ixpa ry hkêt nē.
Nom ixkwŷjaja koja mē arī kamā
pa jakamā kwa Papaj. Kēr ka
inhmā mē omunh mex nē kē mē
inhŷ hā tām ri amnhī nhīpêx o
pa. Nē pahpyrā nē te ixkre tipxi
kamā mē htixpi nē mē pa pyrāk o
axpēn kôt pa.

¹² Kormā mē kamā ixpata ā ate
inhmā axihŷtŷx xā hkwŷ nhōrta
o pa mē htānopxar mex o ri mē
hkôt ixpa. Jakamā nhūm mē ri
ixkôt amnhī nhīpêx o pa. Ām
Jut Kariot pix koja mē hkīnhā
tanhmā amnhī tomnuj to nē
hapêx. No ām ra akapēr ā kagā

kot hkukamã ã kot amnhĩ nhĩpêx anhÿr ã harênh xàja kôt koja ã amnhĩ nhĩpêx anê nê hapêx.

¹³ Tã na pa ra akupÿm awÿr inhnojarêt kaxyw jakamã na pa ixte tokyx mē rer mã xwÿnhjê ho awÿr o xa. Kormã mē hkôt ri ixpa ri. Mē kot inhmar nê ixpyrà nê hkĩnh nê hamakêtkati nê ri pa kaxyw. ¹⁴ Na pa pre ra mē kãm akapêr jarênh ry nê nhũm mē ixpyrà nê akôt pix mã amnhĩ nhĩpêx o ri pa. Jakamã nhũm hte mē kêp ixkwÿ hkêt xwÿnhjaja tee ri ja hã mē omu nê axtem nê kãm mē hkurê nê. Nom mē kêp mē hkwÿ hkêt jakamã na htem ã mē kamã gryk anê.

¹⁵ Tã na pa ã mē ho awÿr anhÿr o xa. Nom mē kot amnhĩ tomnuj xwÿnhjê hkãx ã mē pa kaxyw na pa mē ho awÿr kêt nê. Koja mē arĩ mē hkôt ri pa. Nom mē urak nê amnhĩ tomnuj o pa pumaj na pa ã mē ho awÿr anê. ¹⁶ Mē kêp mē hkwy hkêt. Axtem mē kot amnhĩ nhĩpêx. Te mē kot mē pahte amnhĩ nhĩpêx pyrãk jakamã kē mē amarĩ mē hkôt pa htã mē kot amnhĩ nhĩpêx kôt amnhĩ nhĩpêx o pa hkêt nê. ãm pahkôt pix mã amnhĩ nhĩpêx o pa. ¹⁷ Akapêr pix na mex o mex jakamã koja mē hkôt amnhĩ nhĩpêx o pa nê gaa nê te pahte amnhĩ nhĩpêx pyrãk o amnhĩ nhĩpêx.

¹⁸ Na ka pre amnê mē hwÿr inhmê pa pre ixte mē kãm akapêr jarênh o ri ixpa kaxyw mē hwÿr wrÿ. Nê amnhĩ pyrã nê mē kot akapêr jarênh o mē hkôt pa kaxyw pa mē kurê nê ma mē hwÿr mē kurê. ¹⁹ Inhmã mē hapê jakamã kot paj amnhĩ grônh kôt nhãm mē kot axpên mã ri inhgrônh o pa xwÿnhjê mã amnhĩ gô. Amã hprãm xà hkôt. Ixkwÿjaja kot ja hã xipumunh nê ixpyrà nê amã hprãm xà hkôt pix

mã tanhmã amnhĩ nhĩpêx to ho pa kaxyw.” Anê.

Jejus kot hkrajê pütã ho Tirtũm wÿr

²⁰ Nhũm Jejus arĩ Tirtũm mã amnhĩ jarê nê kãm:

“Tã na pa ã jajê ho awÿr anê Papaj. Nom ixkôt mē pa ho mē pa xwÿnhjê pix o na pa awÿr kêt nê. Mããnen mē ô ri nhÿrmã mē kot ixkôt amnhĩ xunhwÿr mã xwÿnhjaja na pa mē ho xipimràã tã mē ho awÿ. ²¹ Kê mē pahpyrà nê te hamaxpêr tipxi pyrã nê ri axpên to pa. Nê pahte amnhĩ nhĩpêx kôt pix mã amnhĩ nhĩpêx o pa. Koja mē ã amnhĩ nhĩpêx anhÿr o pa nhũm mē kêp pahkwÿ hkêt xwÿnhjaja pahtã mē omu nê ate mē hwÿr inhmênh ã apumunh kurê kumrêx.

²² Nê koja mē ixkukwak ri panhÿ hã te pahpyrà nê hamaxpêr tipxi nê ri pa pyrãk o amnhĩ nhĩpêx o pa. ²³ Na pa htem te ixkre tipxi kamã mē ixtipxi pyrãk o axpên nhĩpêx o ri ixpa. Te pahte axpên nhĩpêxta pyrãk. Tã koja mē ixwakre kamã ã axpên nhĩpêx anhÿr o pa nhũm mē kêp pahkwÿ hkêt xwÿnhjaja ja hã mē omu nê hamaxpêr o: ‘Nã pêr ãm hãmri na pre Tirtũm tãm mē pahwÿr Jejus mē. Kãm hapê htÿx tã mē pahwÿr kumê nhũm wrÿ nê amnhĩ xwar kãm hkwyjê japê nê.’ Anhÿr o koja axpên mã pajarênh o pa.

²⁴ Amnepêm amrakati ri pa pre amã ijapê hã ri ixpa. Tã ot pa jajê ho awÿ. Ka na ka pre inhmã mē agô. Tã ma awÿr inhmôr mã xàta wÿr na pa inhmã mē àpir prãm nê. Koja mē nhÿrmã ma pahwÿr api pu mē pahpiitã pahpimràãtã pamã axpên japê hã ri papa ho papa.

²⁵ E Papaj. Amex o amex tã mē kêp ixkwÿ hkêt xwÿnhjaja na kormã ate mē hwÿr inhmênh

xwýnh ã ixkôt hamaxpêr kêt nê. Nom mê kot ixkôt amnhĩ xunhwýr xwýnhjaja na mê kurom ja hã ixkôt hamaxpêr mex nê.

²⁶ Na pa ra ixprĩ hã mê kãm akapêr o amnhĩrĩt o ri ixpa. Tã kot paj axte mê kãm akapêr kwý jarê. Amã ijapêta pyrã nê mê kãm axpên kĩnh ã axpên to pa kaxyw na pa mê kãm hã karõ. Kot paj inhĩ hã mê hkôt ixpa hkêt tã koja Pahkarõja mê hwýr wrý nê mê hkarõ mã agiê nê te pa mê hkôt ixpa pyrãk o mê hipêx. Ja na pa inhãmã hprãm. Tã koja anê. Jakamã na pa ã mê ho awýr anê. Tã ãm ja pix Papaj.” Anê.

Nhũm pre ã Jejus õ Papaj mã mê inhnoo mã amnhĩ jarênh anê pa mê ixpiitã hã kuma.

18

Mê kot Jejus pynênh ã mê harênh Matêwre 26.47-56; Makre 14.43-50; Rukre 22.47-53

¹ Tã nhũm Jejus mê ixto Hipêêxã hwýr pa. Hãmri nê ixkreja rũm ma tẽ nê Jerujarê rũm kato nê ma gô pê Kirõ hwýr tẽ pa mê hkôt ixpa ho ixpa xwýnhjaja ma hkôt mra. Nê gô hã rê nê hikjê hã mê kot mêmopĩ hkô hkre xwýnhja wýr mra nê parpê ixkrĩ hpa. ² Na pre hte Jejus xatã hwýr amnhĩ kôt mê ixto pa ho kuhê. Jakamã nhũm Jut Kariot kot mê kãm õr mã xwýnhta ra kot hwýr mê ixpa ho ixkuhê xàta pumunh mex. ³ Jakamã pa mê hwýr pøj nê ixkrĩ hpa nhũm mê mê ixwýr mra. Jut Kariot mê pôristijaja. Rõm nhõ xwýnhjê nhõ pôristijê mê patre nhõ pôristijaja nhũm mê mê ixwýr Jut Kariot kôt mra. Ijaew nhõ pahijê nhý hã mê ixwýr mra. Piitã wapohti jamý nê pô hpòk nê kanê jamý nê mê ixwýr hpòk o kato. ⁴⁻⁵ Hãmri nhũm Jejus amnhĩ wýr mê omu nê kãnhmã xa nê ma mê kutã tẽ. Jut Kariot kot mê kãm õr kaxyw nhũm amnhĩ tã omunh

mex jakamã amnhĩ wýr mê omu nê ma mê kutã tẽ. Hãmri nê mê hkaxpa nê mê omunh o xa nhũm Jut Kariot mê kuri xa nhũm Jejus mê omu nê mê kãm:

—Pa. Mêmoj japêr na ka mê pô hpòk o ri apa? Anê.

Hãmri nhũm mê kãm:

—Nã Jejus pê Najare nhõ xwýnh japêr o na pa mê ri ixpa. Anê.

Hãmri nhũm mê kãm:

—Tý ot pa xa. Pa na ixpê Jejus. Anê.

⁶ Hãmri nhũm mê kuma nê tee ri axpên pumu nê umaj katê ho axkamêh nê kuhê. Nom katê ho pikamênh o ra rôròk pa nê hikwý.

⁷ Hãmri nê kãnhmã kuhê hpa nhũm Jejus axte mê kãm:

—Kwa mê inhãmã amnhĩ jarê. Mêhõ japêr o na ka mê apa? Anê.

Hãmri nhũm mê kãm:

—Jejus pê Najare nhõ xwýnhta japêr o na mê ri ixpa kênã. Anê.

⁸ Hãmri nhũm mê kãm:

—Kwa ra ixte mê amã amnhĩ jarênh kênã. Paa. Ijapêr o na ka mê ri apa. Jakamã kwa kêr ka mê ixkôt ri mê pa xwýnhtaja tanhmã mê ho hkêt nê. Kê mê mãmrĩ anhgrã nê ma mra.

⁹ Anhýr o mê inhnê mê kãm kapêr. Na pre ra ham Hipêêxã mã mê ixtã kãm amnhĩ jarê nê kãm:

—Kormã mê kamã ixpa ri ate inhãmã ixih Týx xã nhõrta o na pa mê htãnopxar mex o ri mê hkôt ixpa.

Anhýr o mê ixtã kãm amnhĩ jarênh jakamã nhũm ã mê inhnê mê kot unênh mã xwýnhjê mã kapêr anê.

Simãw Pêtre kot mêhõ pê hamak krãhyr ã harênh

Matêwre 26.51-54; Makre 14.47; Rukre 22.49-51

¹⁰ Hãmri nhũm Simãw Pêtre tee ri Jejus ã mê omu hãmri nê õ wapo kapa nê jam ho apê nê ho hamak nhĩkjê krãhta. Mawti jamak krãhta. Mawtija mêõ patre mã apênh xwýnhjê hõ na pre nhũm Simãw Pêtre hamak krãhta.

11 HãMRI nhũM JeJus ja hã omu nê nê kãm kapêr nê kãm:

—Tk. Kwa nã amarĩ xa nê akupÿm awapota hkãm haxã. Ixte mẽ anê amnhĩ xã htÿx kamã ija-mak kaxyw na pa pre Inhĩpêêxã rũm amnê mẽ awÿr pika hwÿr wrÿ. KêT inhMã kãm hprãm xã hkôt pix mã na inhMã tanhmã amnhĩ nhĩpêx to ho ixpa hprãm. Jakamã kwãr mẽ mãmrĩ tanhmã kãm ixto hprãm xã hkôt mãmrĩ tanhmã ixto. Anê.

Mẽ kot Anas wÿr JeJus o htêm ã mẽ harênh

Matêwre 26.57-58; Makre 14.53-54; Rukre 22.54

12 Tã nhũM pôristi mẽ mẽ hkrãhtũm nê mẽõ patre nhõ pôristijaja JeJus pynê nê hpa hpre hpa 13 nê ma Anas wÿr o tẽ. Anasja Kajpas piinhõ na pre. NhũM Kajpas kormã amgrãja ã Anas pyrã nê kêp mẽõ patre maati. 14 Jakamã na pre ra Ijaew nhõ pahijê mã JeJus jarênh o:

—Nã kot puj mẽ JeJus pĩr tokyx anê. Kê tapxipix ty pu mẽ arĩ mÿrpê pahpiitã pajamakêtkati nê ri papa. Anê.

Jakamã nhũM mẽ JeJus pynê nê kormã ma patre maati hwÿr o tẽ.

Simãw Pêtre kot JeJus kôt pa hkêt ã kot amnhĩ jarênh

Matêwre 26.69-75; Makre 14.66-72; Rukre 22.54-62

15 HãMRI pa ixpê Juãw mẽ ixkrãmnhwÿ Simãw Pêtre mẽ pa wa ma mẽ hkôt wa tẽ. NhũM mẽ ra mẽ inhõ patre maati nhõrkwÿ hwÿr JeJus o axã. NhũM patre maati kot ixpumunh jakamã nhũM kãm ápênh xwÿnhja ixpumu nê inhMã anê pa mẽ hkôt axã. 16 Nom nhũM Simãw Pêtre arĩ kapôt ã hakwa krem xa. HãMRI pa omu nê akupÿm hwÿr tẽ nê mẽõ niti kot hakwa kre jamãr o ãm xwÿnhja mã anê nhũM kãm kahê xã mẽ nhũM mẽ ixkôt axã. 17 HãMRI nhũM nita hprĩ hã omu nê kãm:

—Xêê. Pêr apê mẽ kot unênh nê o môr mũj kôt ri mẽ pa xwÿnhjê hõ na ka mẽ? Anê.

HãMRI nhũM kuma nê kãm:

—Tk. Nã ixte mẽõ myti ata pumunhre hã. Anê.

18 HãMRI nhũM ra kôt ã kamãt nê ra kryy nê nhũM mẽ ápênh xwÿnh kwÿ mẽ mẽõ patre nhõ pôristi hkwÿjaja amnhũM kuto nê hã ànhunh o kuhê. NhũM Simãw Pêtre mẽ omu nê mẽ hwÿr tẽ nê mẽ ìhkô hã ànhunh o xa.

Patre maati kot JeJus kukjêr ã harênh

Matêwre 26.59-66; Makre 14.55-64; Rukre 22.66-71

19 Rôm nhũM Anasja hêx rom tanhmã JeJus kukjêr to nê kãm:

—E kwa inhMã amnhĩ jarê. Tanhmã na ka hte we akôt mẽ pa ho mẽ pa xwÿnhjê jahkre hto ho apa wehe? Anê.

20 HãMRI nhũM amnhĩ tã kãm:

—Nã na pa hte mẽ piitã mẽ noo mã ri mẽ kãm ixkapêr o ixpa. Tĩrtũm kapêr o mẽ ahkre xã hã ixkre kamã nê Tĩrtũm mã amnhĩ jarênh xã hã ixkre kamã pa hte mẽ piitã mẽ noo mã ri mẽ kãm tanhmã ixkapêr to ho ri ixpa. Na pa hte nhÿri ixpimxur pê ri mẽ kãm tanhmã ixkapêr to ho ri ixpa hkêt nê. 21 Tã ka ixtã mẽ kot inhmar o kuhê xwÿnhjaja tanhmã ixtã mẽ hkukjêr to hkêt nê. ãm papxipix ri ixkukja. Kwa ixtã mẽ hkukja kê mẽ kot tanhmã ixkapêr mar to xã hkôt tanhmã amã ijarênh to nã? Anê.

22 HãMRI nhũM patre nhõ pôristi hõja kuma nê hwÿr tẽ nê kãm:

—Tk. Kwa na htem ã patre maati mã kapêr anhÿr kêt nê. Na htem hã hpijaãm o kãm kapêr. Tã na ka axtem nê ri ã kãm akapêr anê. Anê.

HãMRI nê hinep hkura.

23 HãMRI nhũM JeJus amnhĩ tã omu nê kãm:

—Kwa kot pa tanhmã mẽ amã amnhĩ to ixêx to ka mẽ hã inhma nê ri kormã tanhmã axpên mã ixto akapêr to rÿ hã ixtak. Nom ãm

hãmri ixte mẽ amã amnhĩ jarẽnh tã ka axtem nẽ ri inhĩnep ixtak. Anẽ.

²⁴ Hãmri nhũm Anas tanhmã mar to hpa hãmri nẽ umre Kajpas wýr kumẽ. Na pre Kajpasja kormã hitom kãm ri tanhmã amnhĩ nhĩpêx to ho nhỹ nhũm Anas mẽ kãm anẽ nhũm mẽ kuma nẽ hwýr Jejus o tẽ nẽ ho axà. Arĩ hpa hpre rãhã hwýr o tẽ nẽ ho axà nhũm xa nẽ kãm amnhĩ jarẽ.

Simãw Pêtre kot axte Jejus kôt pa hkêt ã amnhĩ tã aprãr ã harẽnh

Matêwre 26.71-75; Makre 14.69-72; Rukre 22.58-62

²⁵ Nhũm Simãw Pêtre arĩ mẽ ìhkô hã ànhunh o xa nhũm mẽhõja kãm kapêr nẽ kãm:

—Kwa pêr apê Jejus kôt ri mẽ pa xwýnhjê hõ na ka. Anẽ.

Hãmri nhũm kuma nẽ kãm:

—Tk. Kokỹ ixte mẽhõ nẽj pumunhre hã. Anẽ.

²⁶ Hãmri nhũm hpãnhã mẽõ patre maati mã àpênh xwýnhja mãânẽn omu. Simãw Pêtre kot kêp hamak krãhyr xwýnhhta kwý na pre. Jakamã nhũm hprĩ hã omunh mex kurê kumrêx nẽ kãm:

—Kwa nã ka na ka mũtar pĩ hkôta kamã mẽ ìhkô hã xa pa apumu. Anẽ.

²⁷ Hãmri nhũm tee ri kuma nẽ axte mẽ kãm amnhĩ tã aprãr kãm hihtýx nẽ. Jao ra mẽ kãm amnhĩ tã aprãr o axkrunêpxija mẽ nhũm krãhyre hkâr kurê kumrêx. Ra Jejus kot hkukamã harẽnh xà hkôt kêp hkwy hkêt ã amnhĩ tã aprãr o axkrunêpxi.

Jejus kot Pirat mã amnhĩ jarẽnh

Matêwre 27.1-2, 27.11-31; Makre 15.1-20; Rukre 23.1-5, 23.13-25

²⁸ Hãmri nhũm mẽ ixpê Ijaew hkrãhtũmjaja ra Kajpas rũm Jejus o kato nẽ ma Pirat wýr o tẽ. Piratja na pre te Rômjê nhõ pahi pê Sesti mã mẽ ixpê Ijaew jamãr o pa nhũm mẽ ma hwýr o tẽ. Nhũm ra myt kator grire nhũm mẽ hwýr o tẽ nẽ òrkwý kapem o xa. Pirat kêp Ijaew

kêt jakamã nhũm mẽ òrkwý hwýr gjêx kêt nẽ kapôt ã kuhê. Na hte Ijaew kormã Pas ã hkĩnh hãmri nẽ nhãm mẽ kêp Ijaew kêt xwýnhjê nhõrkwý hwýr gjêx kêt nẽ. Kojã mẽ hwýr agjê nẽ amnhĩ tomnu nẽ Pas ã apkur kêt nẽ. Jakamã nhũm mẽ Pirat wýr Jejus o tẽ no ãm hwýr o àr kêt nẽ. ãm ixkre kapem o xa. ²⁹ Hãmri nhũm Pirat mẽ hwýr kato nẽ omu nẽ hã mẽ hkukja nẽ mẽ kãm:

—Kwa tanhmã na we amnhĩ tomnuj to ka mẽ ixwýr o tẽ? Anẽ.

³⁰ Hãmri nhũm mẽ kãm:

—Nã kot amnhĩ tomnuj o pa xwýnh kênã. Jakamã na pa mẽ awýr o tẽ. Ate tanhmã kot amnhĩ tomnuj to hã harẽnh mar nẽ mýrapê tanhmã ho kaxyw. Anẽ.

³¹ Hãmri nhũm mẽ kuma nẽ mẽ kãm:

—Tk. Kwa mẽ kamjaja ma amnhĩ kôt o tẽ nẽ amnhĩ krã hkôt tanhmã ho. Mẽ ate tanhmã kot amnhĩ nhĩpêx to hã omunh xà hkôt. Anẽ.

Hãmri nhũm mẽ tee ri kuma nẽ kãm:

—Kwa amnepêm mẽ ixpê Ijaewjaja na pa pre htem kên o mẽ kot amnhĩ tomnuj xwýnhjê tak o mẽ kupa. Tã na ra Rôm nhõ pahĩtija mẽ pamjaja mẽ ixte mẽ hpar nẽ mẽ ixkurê. Tapxipix kãm mẽ hpar ã àmnênh prãm. Jakamã kot kaj ý hã mẽ inhmã tanhmã hã axãmnenh to kẽ mẽ kupi. Ra ja kaxyw mẽ kot mẽ ixkaxyw axãm kênã. Anẽ.

³² Rôm nhõ xwýnhjaja na htem mẽ kot amnhĩ tomnuj xwýnhjê hpar kaxyw nẽ pĩ kahpa hã mẽ hanhõ nẽ mẽ kupa. Nhũm Jejus amnhĩ kukamã tanhmã mẽ kot hpir to hã mẽ omunh mex jakamã ra hprĩ hã mẽ inhmã mẽ kot tanhmã hipêx to hã mẽ harẽ. Jakamã nhũm pre ã Ijaew Pirat kot mẽ kãm hpir prãm xãj ã kãm kapêr kãm xihtýx anẽ. ³³ Hãmri nhũm mẽ kuma nẽ akupým òrkwý hwýr axà

nē amnhī wÿr Jejus ā karō nhūm hwÿr axā nhūm kām:

—E kwa inhmā amnhī jarē. Xà apē Ijaew nhō pahi na ka? Xà ka na htem amnhī wÿr akām hamak o pa? Anē.

³⁴⁻³⁶ Hāmri nhūm kām:

—Tÿ ām hāmri na ka ā ijarēnh anē. Nom jar pika ja kamā ixpē mēō pahi hkēt. Axtem ixpē mēō pahi na pa. Mo kaxyw na ka ā ixkukjēr anē? Xà na pre mēhō ixte mē anhō pahi Sesti kutā ixām ā amā ijarē ka ama nē tee ri ixkukamā ajamaxpēr? Nà xà ām hāmri amā Tirtūm kot Ijaew wÿr inhmēnh ā ixpumunh prām? Mo kaxyw na ka ā ixkukjēr anē? Anē.

Hāmri nhūm tee ri kuma nē kām:

—Tk. Mo kot pa kēt ri axtem nē Tirtūm kot Ijaew wÿr amēnh ā akukja? Mē apyrā nē ixpē Ijaew kēt kēnā. Mē kot ixwÿr ato htēm xwÿnhjaja na mē ā ate amnhī jarēnh anhÿr ā ajarēnh anē. Nà mē akwÿjē mē mē anhō patre krāhtūmjaja na mē ā inhmā ajarēnh anē. Jakamā e aprī hā inhmā amnhī jarē. Tanhmā na ka we amnhī tomnuj to nhūm mē ixwÿr ato tē? Anē.

Hāmri nhūm kuma nē kē axte kām:

—Nà ixpē pyka ja kamā mē ō pahi hkēt. Kop ām ixpē pyka ja kōt mē ō pahi ronhÿx ra ixkōt ri mē pa xwÿnhjaja tanhmā ixtā mē ato. Nom jar ixpē mē ō pahi hkēt. Ām axtem ixpē mē ō pahi na pa. Ām hāmri na pa ā amā amnhī jarēnh anē. Anē.

³⁷ Nhūm ā kām amnhī jarēnh anē hāmri nhūm tee ri kuma nē kām:

—Xà apē mē ō pahi hō na ka? Anē.

Hāmri nhūm kām:

—Tÿ. Nà ām hāmri na ka ā ijarēnh anē. Na pa pre amnē pikaja wÿr wrÿ nē jar mē akamā ixkato nē mē akamā ixāptār. Ixte tanhmā mē kām ixkapēr to ho ri ixpa kaxyw na pa pre wrÿ nē mē akamā ixpa nē

ām hāmri mē kām ixkapēr o ri ixpa. Na pa hte tām ixkapēr o ri ixpa. Tā mē kot ixkapēr mar nē ixkōt ri amnhī nhīpēx o mē pa xwÿnhjaja na htem ixpē mē ō pahihti hā ijarēnh o pa. Anē.

³⁸ Hāmri nhūm Pirat kot tām kām kapēr ā amnhī jarēnhja ā kuma nē kām:

—Tk. Aa ixte pika ja kamā mēhō pumunh nhūm tām kapēr o pare hā. Anē.

Hāmri nē kapēr ā kuma nē tee ri hkukamā hamaxpēr. Hāmri nē akupÿm Ijaew wÿr ho kato nē mē kutā o xa nē mē kām:

—Kwa tanhmā kot amnhī tomnuj tore hā. ³⁹ E mē inhma. Na pa hte amgrā mē arīgro pē Pas kām mē amā mē hagjēnh xā rūm mē akwÿjē ho hpÿnh nē mē hapōj nhūm mē hamakētkati nē amnhīx ri pa. Ka mē ja hā omu nē Pas ā akīnh nē. Jakamā e. Pa mē amā mē anhō “pahihti” jarēnhja mā inhūre. E na pa ra kām inhūre. Anē.

⁴⁰ Hāmri nhūm mē tee ri ā kapēr anhÿr ā kuma nhūm ja mē kēp omnuj tÿx nē. Nhūm mē hā kax pé gryk kamā kām kapēr kām hihtÿx nē kām:

—Tk. Kwa nà kām anhūrer kēt nē. Kēt Parapas mā mǎn anhūre. Anē.

Parapasja na pre hte tanhmā amnhī tomnuj tÿx to ho ri pa nhūm prem mÿrapē unē nē haxā. Tā nhūm mē axtem nē Pirat kot kām urer prām xāj Jejus kaga.

19

Mē kot Jejus tak ā mē harēnh

Matêwre 27.27-31; Makre 15.16-21; Rukre 23.20-25

¹ Tā nhūm Pirat akupÿm ōrkwÿ hwÿr Jejus o axā nē ō pōristijē mā hā amÿnē nhūm mē hwÿr mra nē htak o kuhē. ² Hāmri nē kēp pahi hā hpēr o pikēnh kaxyw kām pahi hā mē ahkà nhīpēx nē hkrām haxā. Nom axtem mēmo mrōnhī te kot ronh kanēre pyrāk xwÿnhja nhūm

mē hikāx nē hkrām haxà. Nē kēp pahi hā mē ê kamrêk py nē kām haxà. ³Hāmri nē xatà hwÿr mra nē hinep htak nē hā hpēr o pikēnh o xa nē kām:

—E apê Ijaew nhō pahi punuti na ka. Anē.

⁴Hāmri nhūm Piratja akupÿm Ijaew wÿr kato nē mē kām:

—E koja inhō pōristi akupÿm mē awÿr ho kato ka mē omu. Na pa tee ri kot tanhmā amnhī tomnuj to hā hkukja. Pēr tanhmā kot amnhī tomnuj to hkêt kēnā. Anē.

⁵Hāmri nhūm Jejus kato nē arī pahi hā àhkà tu nē ê kamrêk jaxà nē o xa nhūm Pirat mē kām:

—E kwa mē omu nē kamā axukapri hkêt wehe. Anē.

⁶Hāmri nhūm patre krāhtūmjē mē mēō pōristijaja tee ri ja hā kuma nhūm ja mē kēp omnuj nē. Hāmri nē hā kām kapēr kām hihtÿx nē kām:

—Tk. Kwa nà pī kahpa hā mǎn anhō. Kē pī kahpa hā mǎn ajēt nē ty. Anē.

Hāmri nhūm tee ri hā mē kuma nē mē kām:

—Nà mē kam nē ma amnhīm o tē nē mē kam amnhīm ho anē. No pa kot paj ho anhÿr kêt nē. Mo mÿrapê kot pa kêt hā amÿnē nhūm mē kupi? Nà kwarī kot pa ho anhÿr kêt nē. Anē.

⁷Hāmri nhūm mē tee ri kuma nē kām:

—Kwa kēp Tirtūm Kra hā amnhī jarēnh kēnā. Mē inhīgētjaja na prem ā mē ixte amnhī jarēnh anhÿrja nē mē inhmā kapēr pa htem ā amnhī jarēnh anhÿr kêt nē. Koja mēhō ā ri amnhī jarēnh anē nhūm mē ja mÿrapê kupi. Anē.

⁸Hāmri nhūm Pirat tee ri Jejus kēp Tirtūm Kra hā amnhī jarēnhja ma nē kām uma nē kām tanhmā ho hprām kêt nē. ⁹Hāmri nē akupÿm ōrkwÿ hwÿr ho axà nē axte hkukja nē kām:

—Kwa aprī hā inhmā amnhī jarē. Nhÿhÿnh na ka pre mē ixwÿr mō? Anē.

Nom nhūm axte tanhmā kām nē hkêt nē. Am arī akryk mar o xa.

¹⁰Nhūm tee ri omu hāmri nē kām:

—Kwa xà ate ixpumunh kêt? Inhÿ hā na htem mē kupa nē inhÿ hā akupÿm mē hapôj. Tā ka pēr aprī hā inhmā tanhmā amnhī jarēnh to hkêt nē ri akryk akuhē. Anē.

¹¹Hāmri nhūm Jejus kām:

—Nom Tirtūm nhÿ hā pix mā na ka hte ā amnhī nhīpêx anē. Kēp am Tirtūm kām ja prām kêt ronhÿx ka tee ri tanhmā amā ixto hprām hkaprÿ. Tām kot mē ixkaxyw axām kēnā. Tā mē kot awÿr inhmēnh nē ri ixtyk ā ijarēnh xwÿnh pē Ijaew nhō pahijaja. Ra mē kot ixkaga jakamā na mē ā amā ijarēnh anē. Jakamā mē kot amnhī tomnuj tÿx o ajakrenh. Anē.

¹²Hāmri nhūm Piratja tee ri ā kapēr anhÿr ā kuma nē kot kām urer prām nē. Hāmri nē akupÿm Ijaew wÿr kato nē hā mē kām kapēr nhūm mē tee ri kot kām urer kaxyw ā amnhī jarēnhja ma nē kām ja prām kêt kumrêx. Jakamā kàxpê nē kām kapēr nē kām:

—Kwa nà ra kēp mē inhō pahi hā kot amnhī to hēx kēnā. Kot mēhō ā ri amnhī jarēnh anē nhūm Rōm kamā mē panhō pahi Sestija ja hā harēnh ma nē kamā gryk tÿx nē. Tā kot kaj kām anhÿre nhūm ajarēnh ma nē akamā gryk nē. Anē.

¹³Hāmri nhūm tee ri mē kuma hāmri nē ma pahi kot tanhmā mē harēnh to xà hā kēn pota wÿr ma tē nē hā nhÿ. Mē ixpê Ijaew kapēr kām mē ixte kām: “Kapata” jarēnh xwÿnhnta wÿr kot tanhmā Jejus jarēnh to kaxyw ma hwÿr tē nē hā nhÿ nhūm mē hwÿr o tē.

¹⁴Hāmri nhūm ra arīgro pē sēsta. Mē ixpê Ijaewjaja mē ixte Pas ā amnhī tomnuj mÿrapê mry hkwy hpar nē Tirtūm kôt pix mā amnhī nhīpêx ā amnhī jarēnh xà hā arīgroja kato. Jakamā nhūm kaxkwa nhīpòk ri myt nhÿ nhūm

Piratja mẽ kot Jejus kator ã harēnh prām xàj arĩ mẽ kām ho mẽ õ pahi hã harē nē mẽ kām:

—E ota mẽ anhõ Pahihtita. Anē.
¹⁵ Hāmri nhũm mẽ tee ri ã harēnh anhỹrja ã kuma nē kām:

—Kwa apĩ ri. Ma o tē nē pĩ kahpa hã anhõ kē tokyx ty.

Anē nhũm tee ri mẽ kuma nē mẽ kām:

—Kwa nà. Kêp mẽ anhõ pahi kēnã kot paj kêt ri axtem nē mẽ apē kupĩ. Anē.

Hāmri nhũm mẽ kām:

—Nà kēp mẽ inhõ pahi hkêt. Pahi Sesti pix na kēp mẽ inhõ pahi. Anē.

Mẽ kām Sesti hkĩnh kêt tã ã kām Jejus htyk prām xàj ri harēnh anē.

¹⁶ Hāmri nhũm Pirat tee ri ja hã mẽ kuma nē tã Jejus ã pōristi mã karõ nē mẽ kām:

—E mẽ māmri ma o tē nē pĩ kahpa hã anhõ kē ty. Anē.

Hāmri nhũm mẽ kuma nē ma o tē.

Mẽ kot pĩ kahpa hã Jejus nhõ ã mẽ harēnh

Matêwre 27.32-44; Makre 15.21-32; Rukre 23.26-43

¹⁷ Hāmri nhũm pōristija Jejus mã õ pĩ kahpa gõ nhũm kutu nē ma mẽ hkôt hkjēnh o mō. Nhũm mẽ krĩ rũm ho kato nē ma hixêt prêk wýr o tē. Hixêt prêkja mẽ kot harēnh o: “Korkot” anē. No mẽ ixpê Ijaewjê kapêr kām na pa pre htem harēnh o “Mẽ hkrã hi xà” anhỹr xwýnhnta wýr nhũm mẽ ma o tē nē hã ho api. ¹⁸ Hāmri nē pikap pĩ kahpa xi nē hã Jejus xi nhũm hã nõ nhũm mẽ prek o ãkra ho htýx nē hpar o htýx. Hāmri nē kaxyw hkakwý nē hkakwýnh pa nē kamã pĩ kahpata xãm nē hity hpa nhũm Jejus kýx pē ajêt. Hāmri nhũm mẽ mãânēn wa ho hamêxkrut nē pĩ kahpa hã wa kunhõ nhũm wa kuri ajêt. Wa kot tanhmã amnhĩ tomnuj to xwýnhja wa ho akutã Jejus nhijê nhũm wa urak nē kýxpê ajêt.

¹⁹ Hāmri nhũm Piratja õ pōristi mã anē nhũm mẽ tap õ py nē hã tanhmã kagã hto nē kagã ho:

IJAEW NHÕ PAHI JEJUS NA JA

KÊP NAJARE NHÕ XWÝNH

²⁰ Nom mẽ ixpê Ijaew kapêr pix kām hã kagã hkêt nē. Mãânēn Gresjê kapêr kām nē Raxijê kapêr kām nhũm mẽ mãânēn hã kagã nē Jejus mýri kunhõ. Hāmri nhũm Ijaew kwýjaja Jerujarē rũm hwýr mra nē mẽ kot ã hã kagã nhípêx anhỹrta pumu nē kamã harē. Jerujarēja hixêt prêeta wýr jawý jakamã nhũm mẽ kurũm ohtõ nē hwýr mra nē omunh o kuhê.
²¹ Hāmri nhũm patre hkrãhtũmjaja tee ri ã Jejus jarēnh anhỹr ã kagãta pumu nhũm ja mẽ kēp omnuj nē. Jakamã nhũm mẽ ma Pirat wýr mra nē kām:

—Kwa mon ka ri hã mẽ kām anē nhũm mẽ axtem nē ã ri kagã nhípêx anē? Kwa nà kēp mẽ inhõ pahi hkêt. ãm htýx ri kot ã kot amnhĩ jarēnh anhỹr o pa kēnã. Kwa hã kagãja o anhĩpa nē hpãnhã hã kagã ho: “Kêp Ijaew nhõ pahi hã kot amnhĩ to hêx xwýnh.” Anhỹr o hpãnhã hã hipêx nē anhõ nà? Anē.

²² Hāmri nhũm mẽ kuma nē mẽ kām:

—Tk. Nà pa ho ixpinhpanh kêt nē. Ra ixte hã kagã hpar kēnã. Anē.

Pōristijaja kot axpēn mã Jejus xê ho pigrãnh

Matêwre 27.35-36, 27.55-56; Makre 15.24; Rukre 23.34

²³ Hāmri nhũm pōristijaja kot axpēn mã Jejus xê o pigrãnh kaxyw amnhĩ tã haxwýr o tē. Mẽ kēp 4 no nhũm Jejus xê kēp 5 jakamã nhũm mẽ amnhĩ kôt ho 4 nē haxwý nhũm pyxi nē hprã. ê rytita. Na pre hipêx muxre. Nhỹhỹnh hkayr xã pumunh kêt kumrêx.

²⁴ Jakamã nhũm mẽ omu nē kām hkĩnh nē. Hāmri nhũm hõ kot amnhĩm hpyr nē ho arĩk kaxyw nhũm mẽ hã kēnre ho jõka. Na pre ra Tirtũm kapêr ã kagã htũm kot mẽ hkukamã ja hã mẽ harēnh nē mẽ harēnh kot:

Na prem axpēn mā ixē o anhrà nē
hā kēne ho jōka ho hkrī.
Anhÿr o kot mē hkukamā mē
harēnh. Tā nhūm mē ra hkōt ā
amnhī nhīpēx anhÿr o hkrī.

*Jejus kot Juāw nhīhkram katorxà
jaxâr ā harēnh*

²⁵ Nhūm Jejus par pē katorxà xa.
Nē htōx nē Kropti hprō Marir nē
Marir Matarēn mē nhūm mē Jejus
katorxà nhīhkō hā Jejus pumunh
o kuhē. Nhūm amnhī tā mē omu
²⁶ nē mē kuri pa ixpē Juāw pumu.
Hāmri nē kēp ixkrāmnhwÿ mex ā
ixtā katorxà mā kapēr nē kām:

—E ota Juāwta. Koja ixpānhā
te kēp akra pyrāk o anhīpēx nē
tanhmā ato ajuta hto ho pa. Anē.

²⁷ Hāmri nē hpānhā pa inhmā
kapēr nē inhmā:

—E Juāw. Kēr ka te kēp akatorxà
pyrāk o inhmā hipēx mex o ri apa.

Anhÿr jakamā pa kuma nē kot
inhmā hā karō xà hkōt inhōrkwÿ
hwÿr haxà nē amnhī kōt ri ho ixpa.

Jejus htyk ā harēnh

*Matêwre 27.45-56; Makre 15.33-
41; Rukre 23.44-49*

²⁸ Tā nhūm Jejus ra amnhī pumu
hāmri nē hamaxpēr o:

—Nā Inhīpēxà kot mēmoj tā
inhmā karōta na pa ra kām ho
anhÿr o hitēp xà xir kaxyw. Anē.

Hāmri nē kām kōr ā amnhī jarē.
Nom ra hkukamā Tīrtūm kapēr ā
kagà htūm kot htyk kaxyw nē kām
kōr kukamā harēnh jakamā nhūm
ā amnhī jarēnh anē nē kapēr o:
Nā na pa ra inhmā kōr nē. Anē.

²⁹ Nhūm hpar pē guhkrax kām wīhti
punureta ām jakamā nhūm mē ā
kot amnhī jarēnh anhÿrja ma nē
kaxyw mēmo rerek py nē o tē nē
kaxyw pī ryti hō py nē ho hkan-
hwÿ. Nē akupÿn o tē nē ho wīhti mā
haxà nē kām kupē. ³⁰ Nhūm hkaō
nē hkaōr pa hāmri nē kapēr o:

E nā hāmri na pa ra mē piitā
mē kot amnhī tomnuj
pānhā amnhīrer pa. Jao ra

Inhīpēxà kām hprām xà
hkōt kām tanhmā amnhī
nhīpēx to jatur xām kumē.

Anhÿr o amnhī jarēnhja kōt ahpar
mā hkrā nē ty.

*Mē kot kō xwa ho Jejus kamn-
hwÿr ā harēnh*

Wam Juāw 5.6-8

³¹ Nhūm ra sēsta nhūm apkati
nhūm mē inhō arīgromnu pē sap
kaxyw. Sapja ā na hte mē ixpē
Ijaew mē ixkīnh pē Pas ā ixkīnh
rūnh o ixpa. Nhūm mē kām sap ā
arī mē htyk nē mē harir xwÿnhjē
pumunh prām kēt jakamā nhūm
Ijaew krāhtūmjaja ma Pirat wÿr
mra nē kām:

—Kwa pōristi mā anē kē mē
tokyx mē hte hi kukē kē mē htyk
tokyx anē. Kē mē tokyx mē o wrÿ
nē ma mē o mra nē mē haggē. Ko-
rmā sap kēt ri. Anē.

³² Hāmri nhūm mē kuma nē ō
pōristijē mā anē nhūm mē ma mē
hwÿr mra nē akutā wa kot Jejus
nhījē nē jēt xwÿnhata wa kumrēx wa
hte hi hkwÿr. ³³ Hāmri nē hpānhā
Jejus wÿr tē nē omu nhūm ra htyk
mex nē ajēt nhūm mē ja hā omu nē
kēp hte hi hkwÿnh kēt nē. ³⁴ Nhūm
pōristi hōja kō xwa py nē ho ihkjē
rūm hkanhwÿ nhūm hkamrō mē
ī kagō ahkà nē hprōt nhūm mē
hkwÿja omunh o kuhē. ³⁵ Nē ixpē
Juāw na pa pre ijaxwÿja mē ihkō
hā xa nē ja hā omunh jakamā pa
ā mē amā hā kagà anē. Ām hāmri
na pa mē amā harē nē hā kagà.
Mē ate kamā harēnh nē harēnh mar
nē hkōt ajamaxpēr kaxyw. ³⁶ Na
pre ra Tīrtūm kapēr ā kagà htūm
kamā ra hkukamā tanhmā kot mē
pahwÿr mēnh xwÿnhata jarēnh to nē
hā kagà. Nē hā kagà kot:

Koja mē nhÿhÿnh hi hkwÿnh kēt nē.
Anē.

Tā nhūm mē ra hā kagàja kōt ā
hipēx anē nē kēp hi hkwÿnh kēt nē.

³⁷ Nē Tīrtūm kapēr ā kagà htūmja
māānēn ja hā harēnh kot:

Mě kot hpīr nē hkanhwȳr xwȳnhja
koja mẽ hpar pē omunh o
kuhē. Anē.

Tirtūm kapēr ā kaga htūm kamā ā
Jejus tyk kukamā harēnh kot anhȳr.

Mě kot Jejus jaxàr ā mẽ harēnh

*Matêwre 27.57-61; Makre 15.42-
47; Rukre 23.50-56*

³⁸ Tā nhūm Juje pē Arimatej nhō
xwȳnhja Jejus ra htyk ā omu nē ma
Pirat wȳr tē nē hā kām kapēr. Kot
ma o mōr nē tokyx haxàr kaxyw.
Na pre ra Jejus kōt amnhī xām nom
Ijaew krāhtūmjē pymaj mẽ kām
amnhī to amnhīrit kēt nē. Jakamā
nhūm ma Pirat wȳr tē nē hā kām
kapēr nē kām:

—Pa e ot pa awȳr tē. Ixte mẽmoj
tā amā ixkapēr kaxyw. Kot kaj apu
inhmā “y” anhȳr japēr. Kwa xà kot
pa ma Jejus o mō nē haxà? Anē.

Hāmri nhūm kuma nē kām: “Nà
māmri ho anē.” Anē hāmri nhūm
ma hwȳr tē nē ho wrȳ nē kumȳ
nē ma haxàr mā o mō. ³⁹ Nhūm
Nīkotēja ma hkōt tē. Amnepē mā
kot kamāt kām Jejus wȳr htēm nē
wa xapēn mā kapēr o ȳr xwȳnhja.
Jakamā ma Juje hkōt tē. Nē amnhī
kōt mẽ hkuxwa xà hkwy ho mō.
Ām ho mōr rax kumrēx. Ho 34
kir nē kutu nē o mō. Mě hkuxwa
xàja na pre mẽ kot mẽmo kuxwa xà
mā “mīra” nē “aroe” anhȳr jarēnhja
nhūm kaxyw hkwy jakà nē ho
ahkà nē ho mẽ hkuxwa xà nhīpēx.
Hāmri nē kutu nē ma Juje kot Jejus
jaxàr nhūm kot ho hkuxwa kaxyw
hkōt o mō. ⁴⁰ Hāmri nhūm wa
ho kupēxē kukōnh pa nē ho Jejus
kupu. Mě ixpē Ijaew mẽ ixte mẽ
htykjē jagjēnh kaxyw ā mẽ hipēx
anhȳr xà hkōt nhūm wa ā hipēx
anē nē haxà. ⁴¹ Nhūm ra mẽ kot pī
kahpa hā nhōr xà tā mẽ kot mẽmo
pī ho pa nē hkre xwȳnh kwȳ kuhē.
Nē kamā kēn kre nyw. Kormā mẽ
kot kamā mẽ htykjē hō jaxàr kēt
xwȳnhja. ⁴² Jakamā nhūm wa omu
nē xapēn mā:

—E kwa pu hwȳr Jejus o tē nē
kamā mǎn tokyx haxà. Kēr pu ko-
rmā sap kēt ri ra tanhmā amnhī to
hpa. Anē.

Hāmri nē hwȳr kumȳ nē o tē nē
kamā haxà nē hā hitom pa hāmri
nē ma akupȳm krīm wa tē.

20

Jejus akupȳm htīr ā harēnh

*Matêwre 28.1-10; Makre 16.1-8;
Rukre 24.1-12*

¹ Tā nhūm sap tē nē hapēx nē
hpānhā semān nyw krax xà pē
tōmĭk. Hāmri nhūm Marir Matarēn
kwȳhtā kànhmā nhȳ. Kormā myt
kator kēt ri kànhmā nhȳ nē ma
kēn kreta wȳr tē. Nē hwȳr pōj nē
tee ri hitom xà hā kēn rax pumu.
Nhūm ra nhām hakwa kre kuhpa
hā ri hikwȳ nhūm omu nē tee ri
hkukamā hamaxpēr pē omunh o
xa. ² Hāmri nē awjanā nē ma
akupȳm hprōt nē nhȳri Simāw Pētre
nē pa ixpē Jejus krāmnhwȳ mex ā
wa ixpumu nē hkaprī kamā wa
inhmā harē nē wa inhmā:

—Xē na pēr mẽ pahpē mẽ panhō
Pahihti kapa nē nhȳhȳm ma o tē. Xē
nhȳhȳm mǎn pre wem o tē? Anē.

³ Hāmri pa wa kuma nē hwȳr
ixprōt kurē kumrēx. ⁴ Hāmri pa
Simāw Pētre mā wa nē ixkumrēx
hwȳr pōj. ⁵ Nom kormā kēn kre
hwȳr ixàr kēt ri kormā hakwa
krem inhīkōt nē kaxwȳnh kām nōr
xà kamā Jejus japēr ixrīt o xa.
Nhūm kupēxē nhīré pix nō pa omu.
⁶ Hāmri nhūm Simāw Pētre ixkōt tē
nē ixrom krem ār kurē kumrēx nē
kupēxē nhīréta pumu. ⁷ Nē hkrā
kupu xà pumu nhūm axtem hkrā
muxre nē ahte nō. ⁸ Hāmri pa hkōt
axà nē nōr xà kaprȳ pumu nē ija-
maxpēr o:

—Hēxta waa nē. Nà mǎn akupȳm
htīr. Hā na nōr xà hkaprȳ mex nē.
Nà mǎn akupȳm htīr kām ga. Anē.

⁹ Ra Tirtūm kapēr ā kaga htūm kot
ja kukamā akupȳm htīr ā harēnh tā
pa wa kormā ixprī hā ja hā omunh

kêt nê. Tã kên kre kaprÿ pumu nê kãm ijamaxpêr kurê kumrêx. ¹⁰Hãmri nê wa ixkato nê awjanã nê ma akupÿm wa ixkwÿjê hwÿr wa tê.

Jejus kot Marir Matarên wÿr kator ã harênh

Makre 16.9-11

¹¹No nhũm Marir Matarênja arĩ kên kre kapem hkaprĩ nê mÿr o xa. Nê mÿr pê hikôt nê kên kre kamu ¹²nê kamã Tĩrtũm kapêr o wrÿk xwÿnh wa ho axkrut nê wa omu. Nhũm wa ê jakajre kamã wa nhÿ. Nhũm hõja hkrãm nhÿ nhũm hõja htem nhÿ. ¹³Hãmri nê wa Marir Matarên mã kapêr nê kãm:

—Kwa mon ka ri omu nê amÿr o xa? Anê.

Nhũm kãm:

—Xê nhũm. Na prem ma nhÿhÿm mẽ ixpê mẽ inhõ Pahihtija mÿ nê ma o tẽ nê hpãnã nhÿri kuxi. Anê.

¹⁴Rôm nhũm Jejus tãm tẽ nê hkatut kôt xa nhũm Marir Matarên ho hakêx nê omu nom hprĩ hã omunh kêt nê. Omu nê htÿx ho axtem mẽhõ hã hkamnhÿx. ¹⁵Hãmri nhũm kãm:

—Kwa mon ka ri amÿr o xa? Mẽhõ na ka ri hapêr arit pê amÿr o xa? Anê.

Hãmri nhũm kuma nê htÿx ho pĩ hkre jamãr xwÿnh ã hkamnhÿx nê kãm:

—Xê xà ka na ka mẽ ixpê mẽ inhõ Pahihti ho ahkĩ nê ma o tẽ nê nhÿri axi mê? Xê ka japêr nê akatãt kôt inhmã harê. Nhÿri inhmã nõr xà jarê pa ma hwÿr tẽ nê kumÿ nê man akupÿn o tẽ nê akupÿm kên kre kamã kuxi. Anê.

¹⁶Hãmri nhũm Jejus kãm hixi jarê nê kãm:

—Kwa Marir Matarên. Amnê ixpumu nê arĩ ã akapêr anê nã. Anê.

Hãmri nhũm jatã hprĩ hã kuma nê ho hakêx nê amnhĩ jaêr pê hprĩ hã omu nê kãm:

—Xê Pahihti. Xep ka na ka. Hêxta gãa nê. Anê.

Nom mẽ ixpê Ijaew kapêr kãm Pahita jarênh o: “Raponĩ” anê. Nhũm ã kãm kapêr anê hãmri nê axte ma nhÿhÿm kêp htem pymaj hpa hã kupy. ¹⁷Hãmri nhũm kãm:

—Kwa inhmã anhũre. Na pa kormã ma akupÿm Inhĩpêêxã hwÿr ixãpir kêt nê. E tokyx ma akupÿm tẽ nê ixtõ nê ixtõxjê mã ijarê. Na ka prem apê ixkrãmnhwÿ pix tã ra mẽ apê ixtõ nê ixtõx na ka mẽ. Jakamã ma akupÿm mẽ hwÿr tẽ nê mẽ kãm ijarê. Nê mẽ kãm: “Na Jejus mẽ awÿr pêr mênh o: ‘Kot paj tokyx ma akupÿm Inhĩpêêxã Tĩrtũm wÿr api. Nom kêp pa Inhĩpêêxã pix kêt mããnên kêp mẽ Anhĩpêêxã na. Nê mããnên kêp mẽ anhõ Tĩrtũm na.’ Anhÿr o mẽ awÿr pêr mẽ.” Anê. E ma akupÿm mẽ hwÿr tẽ nê tokyx ã mẽ kãm ijarênh anê. Anê.

¹⁸Hãmri nhũm kuma nê ma akupÿm mẽ ixwÿr tẽ nê mẽ inhmã awjarê nê mẽ inhmã:

—Xê na pa ham mẽ panhõ Pahihtita pumu. Na akupÿm mẽ pamã htĩr. Anê.

Hãmri nê mẽ inhmã kot tanhmã kãm kapêr to hã harê pa mẽ kuma nê tee ri hkukamã ijamaxpêr.

Jejus kot hkwyjê hwÿr kator ã harênh

Rukre 24.36-43

¹⁹Tã nhũm tãmĩk nê kamãt pa mẽ Jejus kôt ixpa ho ixpa xwÿnhjaja axpên wÿr akuprõ hãmri nê Ijaew krãntũmjê pymaj hakwakre kahê hpa nê axpên mã ixkapêr o ixkrĩ. Nhũm Jejus mẽ ijaêr pê nhÿhÿnh mẽ ixwÿr axã nê mẽ ixkuri xa nê mẽ inhmã:

—Pa. Xà kormã mẽ anhõt kêt? Anê.

²⁰Hãmri nê mẽ inhmã amnhĩ nhĩhkra kamã prek tatak xã jahkre nê hakÿx kôt mẽ kot hkanhwÿr xãja nhũm mẽ inhmã hahkre. Pa mẽ akupÿm htĩr kãm omu nê ixkũnh tÿx kumrêx. ²¹Hãmri nhũm mẽ inhmã:

—E kwa kêr ka mẽ tee ri amnhĩ kukamã ajamaxpêr o amã ma ho ri apa hkêt nê. Na pre Inhĩpêêxãja mẽ

awÿr inhmē pa pre wrÿ. Tā kot paj amnhī pyrā nē mē piitā mē hwÿr mē arē. Anē.

²² Hāmri nē mē ixkaxyw htyyxā mē nē mē inhmā Tīrtūm mē wa Karō jarē nē mē inhmā:

—E koja Tīrtūm mē wa Ixkarōja wrÿ nē mē akarō mā gjēx pa. ²³ Ka mē ŷ hā ma mē piitā mē hwÿr apa nē mē kām Tīrtūm kapēr jarēnh o ri mē hkōt apa. Nē nhÿri mēhō pumu nē inhÿ hā kām: “Kot kaj Tīrtūm kōt amnhī xām nhūm amnhī tā apumu nē anē ate amnhī tomnuj rēnh pa.” Anē. Ka mē ā kām akapēr anē nhūm mē ama nē hkōt amnhī xām nhūm Tīrtūm amnhī tā omu nē nē kot amnhī tomnuj rēnh pa. Nom koja mē ama nē ām mē ama nē hkōt amnhī xām kēt japēr ka mē inhÿ hā kām: “Nā kot kaj Tīrtūm kōt amnhī xām kēt nē nhūm anē ate amnhī tomnuj rēnh kēt nē.” Anhÿr o kām akapēr nhūm Tīrtūm ho anē nē nē rēnh kēt nē. E kēr ka mē ā inhÿ hā amnhī nhīpēx anhÿr o ri apa. Anē.

Nhūm pre ā Jejus mē inhmā kapēr anē hāmri nē kato nē ma nhÿhÿm tē.

Jejus kot Tomas mā kapēr ā harēnh

Matēwre 28.17

²⁴ No nhūm mē inhīō pē Tomas pihpohtita kormā mē ixkīnhā akupÿm Jejus htīr kām omunh kēt nē. Na pre ma kape hā tē nhūm wakre kamā mē ixwÿr axā nē mē inhmā kapēr hāmri nē ma nhÿhÿm tē. Jakamā nhūm Tomas akupÿn mē ixwÿr tē nē axā pa mē kām harē nhūm tee ri mē inhma nē mē ixkōt hamaxpēr kēt nē. ²⁵ Nē mē inhmā:

—Nā kot pa ĩhkra kamā prek tatak xā pumu nē kamā inhīhkra hkrā jaxā. Nē hakÿx kōt hkanhwÿr xāta pa mā ho anē nē omu nē kamā inhīhkra hkrā jaxā nē rī kormā akupÿm htīr kōt ĩjamaxpēr. Anē.

²⁶ Tā nhūm semān pyxi nē hapēx pa mē axte axpēn wÿr akuprō nē axte ĩjaew krāhtūmjē pymaj amnhī

tā kahē htÿx nē ixkrī. Nhūm Tomas tā mē ixkuri nhÿ. Hāmri nhūm Jejus axte nhÿhÿnh mē ixwÿr axā nē mē inhmā:

—Pa. Na ka mē rī akrī. Anē.

²⁷ Hāmri nē Tomas pumu nē hwÿr tē nē kām ĩhkra pē nē kām:

—E ota inhīhkra kamā prek tatak xāta. Māmri kamā anhīhkra hkrā jaxā. Nē hpānhā ĩjakÿx kōt mē kot ixkanhwÿr xā kamā mā ho anē nē haxā nē akupÿm ĩxtīr kōt ĩpumunh kurē kumrēx. Anē.

²⁸ Hāmri nhūm kuma nē kām:

—Nā pēr ām hāmri apē inhō Pahihti Tīrtūm na ka. Anē.

²⁹ Hāmri nhūm kām:

—Tÿ. Ām ano ho ĩpumunh kōt pix mā na ka ĩxkōt ajamaxpēr. Tā no ām koja mē nhÿrmā mē amÿr pē mē pa xwÿnhjaja mē akīnhā mē no ho ĩpumunh kēt tā akupÿm ĩxtīr ā ĩjarēnh mar pix tā ĩxkōt hamaxpēr. Ja na mex kumrēx. Anē.

Juāw kot tanhmā amnhī jarēnh to hā harēnh

Rōmān 15.4; Wam Juāw 5.13

³⁰ Na pre Jejus kormā mē ixto pa ri mē inhnoo mā mēmoj tanhmā hipēx to rax nē nom kot paj kagāja kamā piitā hā kagā hpar kēt nē.

³¹ Ām hkwy pix na pa mē amā hā kagā. Mē ate mē ĩxpyrā nē omunh nē kēp Tīrtūm Kra hā kot mē pakaxyw ām xwÿnh ā omunh nē hkōt amnhī xunhwÿr kaxyw na pa ā mē amā harēnh nē hā kagā anē. Tā kot kaj mē amnhī kaxyw hkōt ajamaxpēr nē hkōt amnhī xunhwÿ hāmri nē nhÿrmā atyk tā nhūm akupÿm mē ato mē atīr ka mē ĩxpyrā nē kuri amex nē atīr tūm nē apa ho apa. Tā pa ā mē amā mēmoj piitā harēnh nē hā kagā anē.

21

Jejus kot hkwyjē hwÿr kator ā harēnh

Matēwre 26.32, 28.7, 28.10

¹ Tā nhūm Jejus axte hkōt mē ĩxpa ho mē ĩxpa xwÿnh kwÿjē hwÿr

kato. Himô pê Tipeja mÿri. ² Pa mē ixpê 7 nê axpên wÿr akuprô. Na pre Simāw Pêtre nê Tomas pihpohti nê Natânaew. Natânaewja Garirej kamā krī pê Kanā nhô xwÿnh na pre. Nê wa pa wa ixpê Jepetew krata wa nê wa inhîo wa pijakru-uta wa. Pa prem wa mē nhÿri axpên wÿr akuprô. ³ Hāmri nhūm Simāw Pêtre mē inhmā:

—E pa jarāhā ma tep wÿr tē nê hkwȳmnê. Anê.

Pa mē kuma nê kām:

—Tôe. Nā pa mē ijaxwÿja ma akôt mō. Anê.

Hāmri nê mē ma himô rax pê Tipeja wÿr mō nê kanôre mā agjê nê gôx kām kryhti rēnh o ixkuhê. Nom tee ri ho tep ômnênh kaxyw rēnh o ixkuhê nê hōmnênh kêt nê ixtā apkati nhūm tep amrakati kumrêx.

⁴ Tā nhūm myt kato nhūm Jejus gô mÿri xa. Pa mē ixpiitā omu no âm ixprī hā kêp Jejus ā omunh kêt nê. Tā no nhūm tām xa. ⁵ Hāmri nê mē inhmā kapêr nê mē inhmā:

—Pa. E măn ka mē ra tep kwÿmnênh rax nê nà? Anê.

Hāmri pa mē kām:

—Tk. Nā mo tep? Amrakati kumrêx kênā. Anê.

⁶ Hāmri nhūm mē inhmā;

—Xô wehe? Tôe. Axtē mē axupôk rūm kryhti mē nê omu. Anê.

Hāmri pa mē mar xà hkôt ho anê nê kumê. Hāmri nhūm kamā tep hipu rax kumrêx nhūm utī rax nê. Pa mē tee ri ixte ho ixāpir kaxyw ri hkukjê. ⁷ Hāmri pa kêp Jejus ā omunh kurê kumrêx nê Simāw Pêtre mā kām:

—Kwa pêr mē panhō Pahihtita na. Anê.

Hāmri nhūm inhma nê hkÿnh tÿx nê akupÿm hinôkà jaxà nê gôx kām mrô nê ma hwÿr ho nana ho tē. ⁸ Hāmri pa mē hkôt kanôre kamā kryhti kjênh o mō. Ra amgrā hwÿr amgrire. Wÿr 100 met pix jakamā pa mē hwÿr ixpôx tokyx anê. ⁹ Nê pâr o hkre kura nê kuxi nê ijapôx

pa nê Jejus wÿr ixprôt nê mra. Nhūm ra mē ixkutêp kuto nê par nhÿpêx nê nhÿhÿnh tep kwÿ par kām haxwÿ nê ho àr o nhÿ. Nê kaxyw pāwti nê amnhÿ ri haxwÿ nê o nhÿ. ¹⁰ Hāmri nê mē ixpumu nê mē inhmā:

—E mē amnê anhô tep o mra pu mē hkuxôt nê kuku. Anê.

¹¹ Hāmri nhūm Simāw Pêtre akupÿm pâr wÿr tē nê kryhti ho htÿx xà hpôt nê amgrā hwÿr hkjênh o mō. Kamā tep rûnh pix. Nê ohtô nê. Kamā kêp 153 nê hikwÿ htā nhūm nhÿhÿnh kryhti hkwȳ pikaxôn h kêt nê. ¹² Hāmri nhūm Jejus mē inhmā:

—E kwa mē tokyx mra pu mē apku. Anê.

Hāmri pa mē kuma nê hwÿr mra nê ixkrī pa. Hāmri nê tee ri omunh o ixkrī. Mē ixprī hā omunh mex kêt tā kot ā mē inhmā amnhÿ nhÿpêx anhÿr ā omu nê kêp mē inhô Pahihti hkôt omunh kurê kumrêx jakamā hixi hā hkukjêr kêt nê. Âm akryk omunh o ixkrī. ¹³ Hāmri nhūm mē inhmā pāwti ho hkry pa. Nê hpānhā tep jamÿ nê mā ho anê nê ho hkry pa nê ho mē inhÿpêx pa pa mē ixāpkur o ixkrī.

¹⁴ Nhūm Jejus akupÿm htÿr kām ra ahpÿnhā mē ixwÿr hapôx o axkrunêpxi.

Jejus kot akupÿm tām Simāw Pêtre xām

Atre 20.28-31; Wam Pêtre 5.1-4

¹⁵ Tā pa mē ra ixāpkur pa nê kànhmā ixkuhê nê gô mÿ ri mra. Hāmri nhūm Jejus Juāw hkra Simāw Pêtre mā tanhmā kapêr to. Nom ixpê Juāw nhūm kêp ixkra hkêt axtem Juāw ô hkra na pre. Jakamā nhūm Jejus kām kapêr nê kām:

—Kwa Simāw. Xà we amā ijapê ho ate pika hkôt mēmoj piitā hakrenh par nà? Anê.

Hāmri nhūm kuma nê kām:

—Tÿ inhmā ajapê htÿx kênā Pahihti. Ra ate ja hā amnhÿ tā

ixpumunh mex. Inhmã ajapêê.
Anê.

Hãmri nhũm kuma nê kãm:

—Tôe. Nà kër ka inhmã mẽ kot ixkôt amnhĩ xunhwýr xwýnhjê jahkre mex o ri mẽ hkôt apa. Te ho ôwêhti hkrare jamãr xwýnh kot hamãr mex o ri hkôt pata pyrãk.
Anê.

Hãmri nhũm kãm:

—Tôe. Nà kot paj amã mẽ ho anê.
Anê.

¹⁶ Tã nhũm hã ahtũmre nhũm kê axte kãm:

—Kwa Simãw. Xà we ãm hãmri na ka inhmã amnhĩ jarê. Xà we amã ijapêê nà? Anê.

Hãmri nhũm kãm:

—Tý. Ra ate inhmã ajapê hã ixpumunh kênã. Anê.

Hãmri nhũm kê axte kãm:

—Tôe. Kër ka inhmã mẽ kot ixkôt amnhĩ xunhwýr mã xwýnhjê jahkre mex o ri mẽ hkôt apa. Te ho ôwêhti jamãr xwýnh kot ôwêhti jamãr mex o hkôt pa xwýnh kot amnhĩ nhípêx pyrãk. Anê.

Hãmri nhũm kãm:

—Nà kot paj amã mẽ ahkre mex o ri mẽ hkôt ixpa. Anê.

¹⁷ Tã hãmri nhũm hã ahtũmre nhũm kê axte kãm:

—Kwa Simãw. Xà we ãm hãmri na ka inhmã amnhĩ jarê? Xà we amã ijapêê htýx kumrêx nà? Anê.

Hãmri nhũm tee ri amnhĩ tã kuma nê hkaprĩ nê. Ra kot amnhĩ tã hkukjêr o axkrunêpxi jakamã nhũm hkaprĩ nê tee ri hamaxpêr. Hãmri nê kãm:

—Kwa Pahihti. Ate mẽmoj piitã omunh par. Nê ate inhmã ajapê htýx ã ixpumunh par kênã. Anê.

Hãmri nhũm kê axte kãm:

—Tôe. Kër ka inhmã mẽ kot ixkôt amnhĩ xunhwýr mã xwýnhjê jahkre mex o ri mẽ hkôt apa. Te ho ôwêhti jamãr xwýnh kot hamãr mex o ri pata pyrãk. Anê.

Hãmri nhũm kãm:

—Nà kot paj amã mẽ ho anê Pahihti. Anê.

Simãw Pêtre tanhmã htyk to hkukamã harênh

¹⁸ Nhũm Jejus arĩ Simãw Pêtre mã kapêr nê kãm tanhmã htyk to hkukamã harênh to nê kãm:

—Kwa ixkapêr ma nê amnhĩ krã him haxàr týt nê hã apa Simãw Pêtre. Nà kormã anyw ri na ka pre hte ma nhýhým apa kaxyw nê anojarêt hãmri nê anhĩnôhkã mex jagjê nê ma nhýhým amã apa hprãm xà hkôt ri apa. Tã kot kaj apigêt nhũm mẽ apynê nê akahti hpre nê apa hpre nê ma nhýhým ato mō ka mẽ kãm amnhĩ gō nê amnhĩ nê tanhmã mẽ kãm nê hkêt nê. Amã mẽ hkôt amōr prãm kêt tã mãmrĩ mẽ kãm amnhĩ gō kê mẽ ma nhýhým ato mō. ¹⁹ Tã kër ka arĩ ixkôt amnhĩ xãm týt nê atír prãm xàj mẽ umaj axte ixkaga hkêt nê. Hãmri nhũm mẽ apĩ nê tanhmã atyk to hã apumu nê amã Tirtũm Kĩnh ã apumunh mex kurê kumrêx. Hãmri nê atã Pahi Maati Tirtũm mex o mex ã harê. Anê.

Nhũm pre ã Jejus Simãw Pêtre tyk kukamã kãm ujarênh anê. Hãmri nê kãm:

—E kër ka ixte amnhĩ to htýt nê amarĩ mẽ kãm ixãm nhũm mẽ kot ixpírja pyrã nê ã amnhĩ nhípêx anê.
Anê.

Hãmri nhũm kuma nê kãm:

—Tôe. Nà kot paj hãmri tã ã amnhĩ nhípêx anê Pahihti. Anê.

Juãw tyk kukamã tanhmã harênh to hkêt ã harênh

²⁰ Nhũm pre ã Jejus Simãw Pêtre mã tanhmã htyk to hkukamã harênh anê. Hãmri nhũm kuma nê ixpê Juãw ã ixto hakêx nê ixpê Jejus krãmnhwý mex ã ixpumu. Kormã Jejus htyk kêt ri kamàt kãm mẽ ixàpkur o ixkrĩta ã na pa pre ãhkô hã ixàpkur o nhý nê kot mẽ kãm òr mã xwýnhnta nhĩxi hã hkukja. ²¹ Jakamã nhũm Simãw Pêtre ixto hakêx nê ixpumu nê ixtã Jejus kukja nê kãm:

—Kwa no pêr pahkôt mōr mũj? Tanhmã koja we htyk to? Anê.

Hãmri nhũm kãm:

22 —Nà kot paj amã tanhmã htyk to hkukamã harênh hkêt nê. Kot pa inhmã arĩ kritpêm pa rãhã pa akupÿn ixwryk prãm nhũm arĩ pa nê htyk kêt rãhã pa akupÿn wry. Kêr ka ri htyk kukamã tee ri tanhmã ajamxpêr to hkêt nê. Âm ixkôt pix mã ate amnhĩ nhĩpêx tÿx pix kukamã mãn ajamxpêr o ri apa.

23 Anhÿr o kãm ijarênh jakamã nhũm mẽ ixkwÿjaja kot ã ijarênh anhÿrja ã kuma ma nê htÿx nhÿrmã ixtyk kêt ã ixkamnhix. Nê gaa nê rĩ piitã axpên mã ã ijarênh anhÿr o pa. Nom na pre ã ijarênh anhÿr kêt nê. Na kêt pre ijarênh o:

—Kot pa inhmã arĩ ri kritpêm pa rãhã pa akupÿn ixwryk prãm nhũm arĩ pa nê htyk kêt rãhã pa akupÿn wry.

Anhÿr o ijarê. Nom âm hãmri ixtyk kêt rãhã nhũm akupÿn wryk ã ijarênh kêt nê.

Juãw kot Jejus kot tanhmã amnhĩ to hã kagà hpar kêt ã kot amnhĩ jarênh

Juãw 20.30-31

24 E na pa mẽ amã Jejus kot tanhmã amnhĩ nhĩpêx to ho pa hã harê nê hã kagà. Ixpê hkôt ri ixpa ho ixpa xwÿnhjê hõ na pa âm hãmri ã hã kagà anê. Ka mẽ kamã harê nê ama nê âm hãmri ixte kagà nhĩpêx kôt ixpumunh mex kurê kumrêx.

25 No na pre Jejus âm ja pix o anhÿr o pa hkêt nê. Na pa âm mẽ amã hkwy pix jarê nê hã kagà. Na pre tanhmã ri mẽmoj to rax kumrêx o ri pa. Nom kêp âm ixte kot tanhmã ri amnhĩ nhĩpêx to piitã hã kagà hpar ronhÿx hã kagàja katutxô rax kumrêx. Jao te ra kaxkwa htêp o mõi pyràk.

Tã âm ja pix. Na hapêx.

Atre

Jejus nhỹ hã mẽ ahkre ho mẽ pa xwýnhjaja kot tanhmã amnhĩ nhĩpêx to ho pa hã mẽ harênh

Rukre na pre kagàja nhĩpêx. Na pre kêp tôtô nê hkwýjê kane ho pa. Nê Jejus nhỹ hã mẽ ahkre ho pa xwýnh pê Pawre kôt pa ho pa. Hâmri nê hamaxpêr nê hkràmnhwý Teopre mã kagàja nhĩpêx nê hwýr kumê. Nê kagàja kamã Jejus nhỹ hã mẽ ahkre ho mẽ pa xwýnh maati-jaja kot Jejus mýr pê tanhmã amnhĩ nhĩpêx to ho pa hã mẽ harê.

Nê Ijaew nhõ patrejaja nê mẽ hkwý pê Parijew nhõ xwýnhjaja nê mẽ hkwý pê Satusew nhõ xwýnhjaja kot Tirtùm kapêr ã kagà htùm kamã harênh nê mar nê hkôt amnhĩ nhĩpêx tã Tirtùm Kra Jejus kôt amnhĩ nhĩpêx kêt ã mẽ harê. Mẽ kot kêp Tirtùm Kra hkêt ã hkamnhix jakamã na prem kãm mẽ kot hkôt amnhĩ xunhwýr xwýnhjê kurê nê. Tã nhùm Simãw Pêtre mẽ Pawre mẽ Jejus nhỹ hã mẽ ahkre ho mẽ pa xwýnh kwýjaja mẽ urak nê kêp Ijaew tã mẽ kurom Jejus hkôt amnhĩ xunhwý nhùm mẽ tee ri ja hã mẽ omu mẽ kamã gryk tỳx nê tanhmã mẽ hipêx to ho pa. Tã nom nhùm mẽ tee ri amnhĩ kukamã hamaxpêr nê Jejus kaga hkêt nê. Mẽ kot mẽ hipêx kati htã na prem arĩ Tirtùm Karõ nhỹ hã mẽ piitã mẽ kãm tanhmã Jejus kot mẽ panê amnhĩ nhĩpêx to hã harênh o pa. Kam nê kapit 1 kamã wesik 8 japêr nê kamã harê. Hâmri nhùm Rukre ã mẽ kot amnhĩ nhĩpêx anhýrja piitã hã kagà nê Teopre hwýr kumê. Nê kãm mẽ harênh o:

Tirtùm Karõ jarênh

*Matêwre 28.16; Makre 16.14;
Rukre 24.36; Juãw 20.19*

¹ Pa Teopre? Xà amex? E ot pa axte awýr kagà nhĩpêx nê kumê. Nà wam ixte awýr kagà nhĩpêx nê mênhta kamã na pa pre amã Jejus kot tanhmã amnhĩ nhĩpêx to hã harê nê hã kagà. Kot tanhmã amnhĩ nhĩpêx to ho pa nê tanhmã mẽ ahkre hto ho paja krax rùm pa pre piitã hã kagà hpa nê awýr kumê. ²⁻⁴ Kormã akupým kaxkwa hwýr àpir xwýj ri na pre ý hã mẽ ahkre ho pa kaxyw hkôt mẽ pa xwýnh kwýjê rê. Tã nhùm mẽ kãm hkurê xwýnhjaja kupĩ nhùm amnhĩ xà htỳx kãm hamak rax kãm ty. Hâmri nhùm Tirtùm akupým ho htír. Nom nhùm ma akupým kaxkwa hwýr àpir kurê kumrêx kêt nê. Na pre xatã mẽ kot ý hã mẽ ahkre ho mẽ pa xwýnh maati-jê hwýr hapôj nhùm mẽ akupým htír kãm omu. Na pre hte nhýri mẽ hwýr hapôj nê tanhmã mẽ ahkre hto nê mẽ kãm:

—Na pre Tirtùm mẽ ato hkra nê tãm mẽ ate amnhĩ nhĩpêx o apa kaxyw mẽ axunhwý.

Anhýr o mẽ ahkre hã arĩgro ho 40. Hâmri nê kormã mẽ kamã pa ri axte tanhmã mẽ kãm kapêr to. Tirtùm Karõ nhỹ hã mẽ kãm kapêr nê mẽ kãm:

—E kêr ka mẽ krĩ ja kamã ri apa nê tokyx ma nhỹhým apa hkêt nê. Kê Inhĩpêxã Tirtùm mẽ awýr amnhĩ Karõ rê măn. Ra ixte mẽ amã harênh xà hkôt koja mẽ awýr kurê nhùm mẽ awýr wrý nê mẽ akarõ mã agjê ka mẽ rĩ kormã angrã nê ma nhỹhým krĩ hkôt ri mẽ kãm kapêr jarênh o ri mẽ hkôt apa.

⁵—Juãw Paxis na pre hte Tirtùm mã gôx kãm mẽ hkrã kumrãr o pa. Tã koja Tirtùm tokyx mẽ awýr amnhĩ Karõ rê. Kot ixpãnhã amnhĩ kaxyw mẽ ato mẽ amã ma hkêt kaxyw mẽ awýr kurê. Koja hã apkati grêre nhùm mẽ awýr kurê nhùm ixpãnhã mẽ awýr wrý nê mẽ amã agjê nê mẽ akamã mẽ akôt pa ho pa. Ka mẽ rĩ kormã Jerujarê rùm

ajapôj nê ma mē kām Tirtūm kapēr jarēnh o ri mē hkôt apa. Anê.

Jejus akupÿm kaxkwa hwÿr àpir ã harēnh

Makre 16.19; Rukre 24.50

⁶ Tã nhūm mē axte akuprō. Jejus nê ÿ hã mē ahkre ho mē pa xwÿnh maatijaja nhūm mē hixêt pē Oriwēhti nhūmōk ã axte axpēn wÿr akuprō. Hāmri nhūm mē amnhī tā Jejus kukja nê kām:

—Kwa Pahihti mē inhmã mēmoj jarē. Xà kot kaj tokyx apē Tirtūm kot mē ixwÿr amēnh xwÿnh ã amnhī jarē nê Rōm nhō xwÿnhjê nê mē pahpē Ijaew kator nà? Hāmri pa mē pamjaja amnhī to amnhīptār o ri ixpa. Anê.

⁷ Hāmri nhūm mē kām:

—Nà Inhīpēêxà pix na ã mēmoj kot anhÿrja kukamã àhpumunh. Tapxipix na kot mēmoj tanhmã ho hã arīgro nê mēmoj tanhmã ho hã mytwrÿ pumunh mex. No mē kajaja mo kaxyw kot ka mē amnhī katorta kukamã amnhī jarēnh ma? ⁸ Nà kot paj ãm mē amã mēmoj to pyxire nê hkukamã harē. Kojã Tirtūm tokyx mē awÿr amnhī Karō rē nhūm ixpānhã kot mē ato amnhīptār kaxyw mē akarō mã agjê. Hāmri ka mē ma pyka piitã hkôt anhrã nê ma mē kām ixkapēr jarēnh o ri mē hkôt apa. Jar Jerujarē kamã nê pika pē Jutej kôt nê nhām pika pē Samar kamã nê pika piitã hkôt mē kām ijarēnh o ri mē hkôt apa. ã mē ate amnhī nhīpêx anhÿr pix kukamã kot paj mē amã harē. Anê.

⁹ Nhūm pre ã Jejus mē kām kapēr anê hāmri nê mē kēp kãnhmã àpir o tē nê mē noo mã ma kaxkwa hwÿr àpir o tē nê kakrãm axà nê mē kēp akunok. ¹⁰ Hāmri nhūm mē tee ri hapēr o kuhē rãhã nhūm mēhō myja wa axkrut nê mē hwÿr wrÿ nê mē kutã wa xa. Wa ê hakaj nê wa xa. ¹¹ Hāmri nê mē kām:

—Pa Garirej nhō xwÿnhjaja? Kwa mo kaxyw na ka mē tee ri

kaxkwa pumunh o akuhê? Tirtūm na akupÿm amnhī wÿr Kra Jejus o api ka mē àpir kām omu. E mē tee ri hkukamã ajamaxpēr kêt nê. Kojã nhÿrmã man akupÿn mē awÿr wrÿ. Te mē arūm kaxkwa hwÿr àpirja pyrã nê akupÿn mē awÿr wrÿ ka mē omu. Anê.

Akupÿm Jerujarē hwÿr mē mrar ã mē harēnh

Rukre 24.52

¹² Tã nhūm Jejus nhÿ hã mē ahkre ho mē pa xwÿnh maatijaja wa kuma nê awjanã nê ma akupÿm krīm mra. Hixêt pē Oriwēhti rūm ma akupÿm Jerujarē hwÿr mra. Wÿr jawÿ nhūm mē akupÿm hpōx tokyx anê. ¹³ Hāmri nê akupÿm kÿx pē ixkreja wÿr api nê agjê. Na pre

Simãw Pêtre nê

Juãw nê

Xiakre nê

Andrehti nê

Firipti nê

Tomas nê

Patoromew nê

Matêwre nê

Xiakre hō pē Apew kraja nê

Simãw Jerox nê

Jut pē Xiakre hkraja.

Mē piitã Jejus nhÿ hã mē ahkre ho mē pa xwÿnh maatijaja na pre mē. ¹⁴ Nê mãânēn mē hkôt mē hkwyjaja. Jejus katorxã Marir nê Jejus tōjaja nê Jejus kot tanhmã mēni ho mex to xwÿnh kwÿjaja nhūm prem kÿx pē ixkreja wÿr Jejus nhÿ hã mē ahkre ho mē pa xwÿnh maatijê hkôt gjêx pa. Hāmri nê xatã axpēn wÿr akuprō nê Tirtūm mã amnhī jarēnh o hkrī.

Tirtūm kot Jut Kariot pãnhã mēhō xãm ã harēnh

Matêwre 27.3-10; Juãw 15.27

¹⁵⁻¹⁹ Tã nhūm mē kot Jejus kôt amnhī xunhwÿr xwÿnhjaja ra kēp 120. Jakamã nhūm mēmo arīgro hã axpēn wÿr akuprō nê hkrī. Nhūm Simãw Pêtre kãnhmã xa nê tanhmã mē kām Jut Kariot jarēnh to nê mē kām:

—E Jejus kôt ixtô nê ixtôxjaja. Pa mē amā tanhmā finat Jut Kariot jarēnh to ka mē inhma. Na pre axtem nê mē pahkwýjê mā Jejus ā amýnê nê hpānhā kaxpore hkwy jamý nê o tē nê ho amnhīm pyka hkwy japrô. Tā tanhmā amnhī to nê nhýri ô pyka kamā tēm nê amnhī tu katôk nê hkrêx kato nê ty nê hkamrô ho ô pyka xy hpa. Jakamā nhūm Jerujarē nhô xwýnhjaja harēnh ma nê pykaja ā hixi mē nhūm kêp “pyka kamrôhti.” No mē pahpê Ijaew kapêr kām kêp “Ajetām.” Annepê mē na pre Tirtūm Karô finat Tawi mā Jut Kariot kukamā tanhmā harēnh to. Kormā kator nê kot tanhmā amnhī to hkêt tā nhūm ra hkukamā omu nê Tawi mā harê. Kot axtem nê mē kām Jejus ā amnênhja nhūm hkukamā omu nê Tawi mā harê nhūm kuma nê ô ri hā kagā. Tā nhūm kot hkukamā hā kagā hkôt nhūm ā Jejus nhīpêx anê. Jut Kariotja mē panhīo na pre. Na pre Jejus mē pahpyrā nê amnhīm kuta. Mē pahpyrā nê ý hā kapêr jarēnh o pa kaxyw. Tā nhūm axtem nê ā hipêx anê.

²⁰ Nom na pre Tawi kot Tirtūm mex ā grer ā kagā kot ra hkukamā tanhmā harēnh to. Kagā hkwy pē Sam kamā kot harēnh kot:

Kot amnhī tomnuj xwýnhnta nhôrkwy koja hkaprýn kuhê ho kuhê nhūm mēhōj mýr pē kamā pa hkêt kumrêx. Kojā ām arī hkaprýn kuhê ho kuhê.

Nom kot Jejus mā tanhmā amnhī nhīpêx to ho paja kē mēhō mýr pē ho amnhīptā nê hpānhā Jejus nhý hā mē ahkre ho pa. Anê.

Ā Tirtūm kapêr ā kagā htūm kot Jut Kariot kukamā harēnh kot anhýr.

²¹ Jakamā e ixkwýjaja. Kot puj mē hpānhā mē atô xām ka Jut mýr pē mē pahpê Jejus nhý hā mē ahkre ho ixpa xwýnhjê hkôt Jejus akupým htír ā harēnh o apa. ²² E mē atô na

ka pre mē ixpyràn finat Juāw Paxis kot Jejus hkrā kumrār ā omu? Nê Jejus kot ri tanhmā amnhī nhīpêx to ho pa xā hkrax rūm ka mē ixkôt ri omunh o ri apa? Nê htyk kām omu nê akupým htír kām omu nê ma akupým kaxkwa hwýr àpir kām omu? E mē atô na ka pre mē ixpyràn ā kot amnhī nhīpêx anhýr ā omunh par o ri hkôt apa? ā mē ate kot amnhī nhīpêx anhýr ā omunh o apa xwýnhjê hō kot paj mē ata ka Jut Kariot mýr pē mē ixpyràn ma mē kām Jejus akupým htír ā harēnh o ri apa. Anê.

²³ Nhūm pre ā Simāw Pêtre mē kām kapêr anê. Hāmri nhūm mē kuma nê axpên pumunh o hkrī hāmri nê Maxitre mē Jujere wa kām hamaxpêr. Jujere na pre hixi axkrunêpxi. Na pre kêp Jujere nê kêp Pasapas nê kêp Justi. ²⁴⁻²⁵ Hāmri nhūm mē wa hā Tirtūm kukja nê kām:

—Pa Tirtūm? Nà na pre finat Jut Kariotja Jejus kaga nê ty nê kot amnhī tomnuj mýrapê ma mē kot amnhī xā htýx kamā hamak tūm xāta wýr ma mō. Tā ot pa mē ixte mēhō kot mýr pē mē ixpyrā nê Jejus nhý hā mē ahkre ho pa kaxyw mēhō hā akukjêr kaxyw akuprô. Ate mē ixpiitā tanhmā mē ixte amnhī nhīpêx to ho ixpa hā mē ixpumunh par Tirtūm. Ate mē ijamaxpêr kôt mē ixpumunh par nê mē ixte tanhmā amnhī nhīpêx to hā mē ixpumunh par. Jakamā e. Ota Maxitre mē Jujereja wa nhý. Nhý kot kaj amnhīm ata? Kot paj mē kên pijakrutja ā wa hixi xi nê ho àk nê hō py. Hāmri ka amā hprām xwýnhnta ta. Kêr pa mē kên pumunh kêt rāhā hō py nê hā hixi pumu nê amā hprām xwýnh kôt omunh kurê kumrêx. Anê.

²⁶ Nhūm prem ā Tirtūm mā kapêr anê hāmri nê kênja o axkamur nê ho àk nê omunh kêt rāhā ja py nê omu nhūm hā Maxitre nhīxi nô. Jakamā nhūm Jejus nhý hā mē

ahkre ho mẽ pa xwỳnh maatijaja amnhĩ kôt kumẽ nhũm mẽ akupỳm kệp 12.

2

Tĩrtũm Karõ kot mẽ hwỳr wrỳk ã harẽnh
Rukre 24.49; Atre 4.31, 8.15, 10.44, 19.2

¹ Tã nhũm mẽ hkĩnh pẽ Pêtekos kato nhũm mẽ kot Jejus kôt amnhĩ xunhwỳr xwỳnhjaja nhỹri axpẽn wỳr akuprõ nẽ hã hkĩnh. Pêtekosja ã na pre hte Ijaew mẽ hpur kãm mẽõ rũnh ã hkĩnh kaxyw axpẽn wỳr akuprõ nẽ hã hkĩnh. Jakamã nhũm mẽ kot Jejus kôt amnhĩ xunhwỳr xwỳnhjaja haxwỳja axpẽn wỳr akuprõ. ² Hãmri nẽ kaxkwa kamã mẽmoj ma. Nhũm mẽmoj te kôk xàpêr tỳx krihkrit pyrak o mẽ hwỳr wrỳk o mỗ nẽ mẽ pikuprõnh xà hã ixkreja wỳr axà nhũm mẽ pitã kuma. ³ Hãmri nhũm mẽmoj te kuwy jakrax pyrækja ahpỳnhã mẽ hwỳr anhrã nẽ mẽ hkrã nhĩmõk ã hikwỳ. ⁴⁻¹³ Tĩrtũm Karõ na pre. Tãm mẽ hwỳr wrỳk jakamã ã ri mẽ hipêx anẽ. Hãmri nẽ kot mẽ ho amnhĩptar kaxyw mẽ hkarõm gjêx pa nhũm mẽ ỹ hã tanhmã kapêr to ho kuhê. Nom mẽ kapêr o kapêr kêt nẽ. Axtem mẽ kapêr kwỳ ho kapêr. Tĩrtũm Karõ kot tanhmã mẽ ho jakamã nhũm mẽ axtem mẽ kapêr kwỳ ho kapêr. Jao ahpỳnhã mẽ kapêr kwỳ ho Tĩrtũm mã mex o mex ã harẽ. Na pre Ijaew kwỳjaja ahpỳnhã pyka hõ kamã ri mẽ hkôt pa nẽ mẽ kapêr ma nẽ ho kapêr o pa. Tã akupỳm Jerujarẽ hwỳr pan pøj nẽ kamã ri pa ho pa. Hãmri nẽ mẽmojta ma nẽ ma Jejus kwỳjê hwỳr hprõt nẽ ahpỳnhã mẽ kapêr ã mẽ kuma nẽ tee ri mẽ omunh o kuhê. Amnhĩ jaêr pẽ mẽ kuma nẽ tanhmã axpẽn mã mẽ harẽnh to ho:

—Kokỳỹ. Garirej nhõ xwỳnhjaja kot mẽ pakapêr mar kêt tã ra tanhmã amnhĩ to nẽ ahpỳnhã ri mẽ pakapêr o kapêr. Ahpỳnhã

mẽ pakapêr nẽ ahpỳnhã mẽ panhõ pyka htã nhũm mẽ ã ri mẽ pakapêr o kapêr anẽ.

Na pika pẽ Pat

nẽ Met

nẽ Erãw

nẽ Mêsopotãm

nẽ Jutej

nẽ Kapatos

nẽ Põt

nẽ As

nẽ Prik

nẽ Pãpir

nẽ Ejit

nẽ Sirẽn wỳr Ripja

nẽ krĩ pẽ Rõm

nẽ gô hipòk pẽ Kret

nẽ Arap.

Nẽ mẽ pahkwỳjaja mẽ pahpê Ijaew kumrêx

nẽ mẽ pahkwỳjaja amarĩ ri amnhĩ to Ijaew.

Ãm ahpỳnhã mẽ panhõ pyka nẽ ahpỳnhã ri mẽ pakapêr.

—Tã pu mẽ ahpỳnhã mẽ pakapêr kãm mẽ kapêr ma. Tĩrtũm mex ã mẽ kot axpẽn mã harẽnhja pu mẽ hã mẽ mar mex nẽ. Anẽ.

Nhũm prem ã axpẽn mã mẽ harẽnh anẽ nẽ tee ri mẽ omunh o kuhê. Amnhĩ jaêr pẽ amnhĩ kapêr kãm mẽ kapêr ma nẽ tee ri hamaxpêr nẽ axpẽn mã:

—Kokỳỹ. Tanhmã mãn pre wem amnhĩ to nẽ ra mẽ pakapêr ma nẽ mẽ pakapêr o kapêr? Anẽ.

Nhũm mẽ hkwỳjaja axtem nẽ ri mẽ hã hpêr o axkê nẽ axpẽn mã:

—Tk. Ãm mẽ pipãnh ã ã ri mẽ kot amnhĩ nhĩpêx anhỹr kênã. Anẽ.

Simãw Pêtre kot mẽ kãm ujarẽnh
Atre 3.12-26

¹⁴ Hãmri nhũm Simãw Pêtre ã mẽ kapêr anhỹrja ma hãmri nẽ kỳx pẽ mẽ kãm kapêr nẽ mẽ kãm:

—E Jerujarẽ nhõ xwỳnhjaja nẽ mẽ apê ixkwỳ Ijaew. Pa mẽ amã mẽmoj jarẽ ka mẽ inhma nẽ inhmar tỳx nẽ. ¹⁵ Na ka mẽ atỳx ri mẽ ixpipãnh ã mẽ ixkamnhĩx. Mẽ ixkrã pipãnh kêt. Kormã myt

kaxkwa nhîpôk wÿr htêm kênâ. Na hte Ijaew kwÿhtâ kagôxÿhti ho hkôm kêt nê. ¹⁶ Ja na pre Tîrtûm amnepê mâ â mê ixte amnhî nhîpêx anhÿrja kukamâ mê ijarê nhûm ÿ hâ kapêr o pa xwÿnh finat Joew mê ixkukamâ hâ kagâ. Nê hâ kagâ ho:

¹⁷ Koja nhÿrmâ mêmoj piitâ hapêx kaxyw pa mê piitâ mê hwÿr Ixkarô rê nhûm ma mê hwÿr wrÿ nê mê hkarô mâ agjê. Hâmri nhûm mê hkanrêhâ mê hkra xàptâr nywjaja ma mê kâm ixkapêr jarênh o ri mê hkôt pa. Koja mê hpimtir kâm amnhî kukamâ mêmoj pumu. Nê mêhpigêtjaja haxwÿja. Kot paj mê hpimtir kâm tanhmâ mê kâm ixkapêr to.

¹⁸ Nê kot paj mê kot ixkôt ri tanhmâ amnhî nhîpêx to ho mê pa xwÿnhjê hwÿr Ixkarô rê nhûm mê ÿ hâ ma mê kâm tanhmâ ixkapêr jarênh to ho ri mê hkôt pa.

¹⁹ Kot paj kaxkwa kamâ nê pyka kamâ aa mê kot mêmoj pumunh kêt kwÿ ho anê nhûm mê amnhî jaêr pê omu. Jao nhÿri mê hkamrô pumu nê kuwy pumu nê kuwy hkûm pumu hâmri nê tee ri amnhî kukamâ hamaxpêr.

²⁰ Nê koja myyti ahtyk nhûm mytwrÿre haxwÿja te mry kamrô pyrâk. Pahihti Jejus akupÿn hpôx xâ hâ arÿgro xwÿj ri koja mêmoj â amnhî nhîpêx anê. Akupÿn hpôx xâ hâ arÿgro koja mex kumrêx.

²¹ Tâ koja mêhõ mêmoj kot â amnhî nhîpêx anhÿr â omu nê amnhî kaxyw inhmâ hamaxpêr nê amnhî to ixwÿ pa kuma nê ho ixkra nê mêmoj punujta pê utâ. Anê.

Na pre â Tîrtûm kapêr anê nhûm finat Joewja mê pamâ hâ kagâ. ²² E pa mê amâ tanhmâ Jejus jarênh to ka mê inhma. Nà Najare nhô xwÿnh na pre. Mê pahte Tîrtûm nhÿ hâ kot tanhmâ amnhî nhîpêx to ho pa hâ omunh kaxyw na pre Tîrtûm mê pahwÿr kumê nhûm ÿ hâ mê panoo mâ tanhmâ amnhî nhîpêx to ho pa. Nê aa mê pahte mêmoj pumunh kêt kwÿ ho anhÿr o pa pu prem hâ omu.

²³ —Tâ ka prem tanhmâ kaxyw ajamaxpêr punuj to nê apî. Tîrtûm ra kot amnepê mâ ja kukamâ ja hâ mê apumunh mex tâ mê pahwÿr kumê ka mê axtem nê apî. Jao mê kot htÿx ri amnhî nhîpêx o mê pa xwÿnhjê mâ agô nhûm mê kupî. Pî kahpa hâ kunhõ nhûm ty. No âm mê kajaja na ka prem mê kâm hâ amÿnê nhûm mê â mê amâ hprâm xâ hkôt hipêx anê nê mê amâ kupî.

²⁴ —Tâ nhûm Tîrtûm akupÿm ho htîr nhûm akupÿm htîr o htîr nhûm mê htykja tee ri kot amnhî kôt mênh prâm kaprÿ. ²⁵ Amnepêm na pre finat Tawîja Jejus akupÿm htîr kukamâ harê. Te Jejus tãm kapêr pyrâk o kapêr nê kapêr o:

Na hte Pahi Maati ixkôt pa ho pa râhâ nê. Kot inhîhkô hâ ixtânopxar o pa jakamâ kot paj inhmâ ma hkêt nê ri ixâmnhîx ijamakêtkati nê ri ixpa.

²⁶⁻²⁷ Pa Tîrtûm? Nà kot paj nhÿrmâ ixytk tâ arÿ amnhî wÿr akâm ama. Kot kaj mê htykjê kamâ ixkarô rer kêt nê. Ixte akapêr kôt amnhî nhîpêx mex o ri ixpa jakamâ koja inhî kormâ omnu nê hkro hkêt ri ka akupÿm ixto ixtîr. Jakamâ na pa inhmâ ixytk pyma hkêt nê ixkînh nê ijamakêtkati nê ri ixpa. Nê amnhî kînh jarênh râhâ ho ri ixpa.

²⁸ Na ka pre akupÿm ixto ixtîr â amnhî jarê pa ixtîr tûm nê

ixpa ho ixpa kaxyw. Tã ate ixkôt ri apa rãhã jakamã pa ixkĩnh nê ri ixpa. Anê.

²⁹ Æ na pre mē panhīgēt finat Pahi Tawija Jejus htyk nē akupỹm htĩr kukamã harēnh anê. No tãm amnhĩ jarēnh kêt nê. Tawija na pre ty nhũm mē haxà nhũm htem arĩ haxàr xà hã pika ho mex o pa. Tã tãm ã kot amnhĩ jarēnh anhỹr ro nhỹx akupỹm htĩr nhũm mē arĩ haxàr xà kaprỹ ho mex o pa hkêt nê. ³⁰ Pahi Tawi kēp Tĩrtũm nhỹ hã kapēr jarēnh o pa xwỹnh jakamã nhũm Tĩrtũm kãm hkanrēhã htãmnhwỹ Jejusja kukamã harē nê kãm:

Koja nhỹrmã akanrēhã atãmnhwỹjê hõ amỹr pē apyrà nê mē ho amnhĩptār o pa. Æm hãmri na pa amã ja jarē. Anê.

³¹ Nhũm pre ã Tĩrtũm Tawi mã mē pakaxyw ãm mã xwỹnhhta jarēnh anê nhũm kuma. Nê mar tỳx jakamã hkukamã htyk nê akupỹm htĩr ã harē nê hã kagà. Nê hã kagà ho:

Koja Tĩrtũm mē htykjê kamã hkarō rer kêt nê nhũm aa ĩ omnu nê hkro kêt. Anê.

Æ na pre finat Tawija Jejus Kris kukamã harē nê hã kagà anê. ³² Kot harēnh xwỹnh Jejusja tãm na pre Tĩrtũm akupỹm ho htĩr pa mē pamjaja akupỹm htĩr kãm omu. Hãmri nê mē ixte omunh xà hkôt ã mē amã harēnh anê. Anê.

Nhũm pre ã Simãw Pêtre mē kãm Jejus jarēnh anê. Hãmri nê mē kãm:

³³ —Na pre Tĩrtũm akupỹm amnhĩ wỹr Kra Jejus o api. Hãmri nê kãm anê nhũm ĩhkô hã mēmoj piitã ho amnhĩptār o hkrĩ. Hãmri nhũm Tĩrtũm kot kãm amnhĩ jarēnh xà hkôt kãm amnhĩ Karō gō. Tã nhũm ra amnhĩ pyrà nê mē ixwỹr kurē nhũm jarãhã mē ixwỹr te kuwy jakrax pyrà nê mē ixwỹr wrỹ nê mē ixkarō hwỹr gjêx pa. Hãmri pa mē ý hã ahpỹnhã mē akapēr o ixkapēr ka mē inhma. Tã mē

akwỹjaja axtem nê mē xpipãnh ã mē ixkamnhĩx. ³⁴ No finat Tawija na pre tãm kaxkwa hwỹr àpir ã amnhĩ jarēnh kêt nê. Jejus kot ĩ ho kaxkwa hwỹr àpirja na pre harē nê harēnh o:

Na pre Tĩrtũm inhō Pahihti mã kapēr nê kãm:

³⁵ “E jar inhĩhkô hã nhỹ.

Pa amã mē kãm akurē xwỹnhjê gō ka mē ho amnhĩptār o akrĩ.” Anê.

Æ na pre finat Tawija Tĩrtũm kapēr jarēnh anê. Nom tãm ĩ rãhã kaxkwa hwỹr àpir ã amnhĩ jarēnh kêt nê. Pahihti Jejus na pre ã hã harēnh anê. ³⁶ Jakamã kwa ixkwỹ Ijaew. Mē inhma nê inhmar tỳx nê. Mē ate Jejus ã axãmnhēnh nhũm mē kot mē amã pĩ kahpa hã hpĩr xwỹnhhta. Tãm na pre Tĩrtũmja kēp mē panhō Pahihti kaxyw ãm. Nê kēp mē papytār xwỹnh kaxyw mē pakaxyw ãm. Anê.

³⁷ Nhũm pre ã Simãw Pêtre mē kãm ujarēnh anhỹr o xa. Hãmri nhũm mē tee ri ujarēnhja ma nê hkaprĩ nê. Nê tee ri amnhĩ kukamã hamaxpēr nê hamaxpēr o:

—Hêxta waa nê. Pēr ãm hãmri na pre Jejus mē pamã amnhĩ jarēnh tã pu prem amnhĩ kaxyw hkôt pajamaxpēr kêt nê axtem nê kupĩ. Anê.

Hãmri nê amnhĩ tã mē hkukja nê Simãw Pêtre mã:

—Kwa ã kot anhỹr jakamã tanhmã kot paj mē amnhĩ nhĩpêx to? Anê.

³⁸ Hãmri nhũm mē kãm:

—Nã kēr ka mē tee ri ate amnhĩ tomnuj mã ajamaxpēr nê akaprĩ nê. Hãmri nê Jejus Kris kôt amnhĩ xunhwỹ. Pa mē ja hã mē apumu nê Jejus nhỹ hã mē akrã kumrã. Hãmri nhũm Tĩrtũm ja hã mē apumu nê te amnhĩ katut kôt mē ate amnhĩ tomnuj piitã rēnh par pyrà nê axte kãm hamaxpēr kêt nê. Hãmri nê mē ixkuxwar mē awỹr amnhĩ Karō rē. ³⁹ Kãm mē awỹr rēnh prãm. Mē amã nê mē akanrēhã mē akra nê

mê atâmnhwÿjê mã nê mê kot ko-
rmã Tirtûm kapêr mar kêt xwÿnhjê
mã. Âm mê kot amnhî to hwÿr
xwÿnh piitã nhûm kãm mê hwÿr
rênh prãm. Anê.

⁴⁰ Nhûm pre ã Simãw Pêtre mê
kãm ujarênh anê. Mê kãm kapêr
xihtÿx o kapêr ry nê. Hãmri nê mê
kãm:

—Koja nhÿrmã Tirtûm mê kot
tanhmã amnhî tomnuj to ho mê pa
xwÿnhjaja tanhmã mê homnuj tÿx
to. Jakamã kwa mê tokyx mê ate
amnhî tomnuj kaga kê tanhmã mê
ato hkêt nê. Anê.

⁴¹ Hãmri nhûm mê hkwyÿjaja
kapêr mar tÿx nê amnhî kaxyw
Jejus kôt hamaxpêr nê hkôt amnhî
xunhwÿ. Mê ohtô rax nê hkôt
amnhî xunhwÿ. Mê kêp 3.000 nê
hkôt amnhî xunhwÿ. Hãmri nhûm
mê kot Jejus nhÿ hã kapêr jarênh o
mê pa xwÿnhjaja mê hkrã kumrãr
pa. Mê kêp Jejus kwÿ hã amnhî to
amnhîrit kaxyw mê hkrã kumrãr
pa. ⁴² Hãmri nhûm mê ra mê kot
Jejus kôt amnhî nhîpêx xwÿnhjê
hkôt amnhî nhîpêx o pa nhûm Jejus
nhÿ hã mê ahkre xwÿnh maatiijaja
apkati mê Jejus kapêr o mê ahkre
nhûm mê mar tÿx nê ra Jejus kôt
amnhî nhîpêx mex o mō. Nê gaa nê
hkôt amnhî nhîpêx mex o pa. Mê
kãm kapêr mar prãm tÿx jakamã
na pre htem axpên wÿr akuprō
nê axpên kutã apku nê Tirtûm mã
amnhî jarênh o hkrî. Nê mê kãm
axpên to mex pix prãm o axpên kôt
pa ho pa.

*Jejus kwÿ kot tanhmã amnhî
nhîpêx to hã mê harênh*

Atre 4.32-35

⁴³ Tã nhûm Jejus nhÿ hã mê
ahkre ho mê pa xwÿnh maatiijaja
xatã Tirtûm nhÿ hã aa mê kot
mêmoj pumunh kêt kwÿ ho anhÿr
o ri krî nhō xwÿnhjê hkôt pa nhûm
mê piitã ja hã mê omu. Amnhî
jaêr pê mê omu nê mê kamã no
pyma ho tee ri tanhmã Tirtûm mã

hamaxpêr to. ⁴⁴ Nhûm mê kot Je-
jus kôt amnhî xunhwÿr xwÿnh pi-
itã mêmoj to axpên kutã nojarêt
o pa. Jao axpên pê ri mêmoj to
ōxy hkêt nê pa. ⁴⁵ Jakamã nhûm
mêhō kêp amrakati nhûm mê ja
hã omu hãmri nê ò pyka hkwyÿ
ho wênê rÿ mê hikukrêx kwÿ ho
wênê nê kãxpore jamÿ nê ma o mra
nê mê kãm kugō. Na pre hte ã
mê kot Jejus kôt amnhî xunhwÿr
xwÿnhjaja axpên nhîpêx anhÿr o pa.
⁴⁶ Hãmri nê apkati mê Tirtûm mã
amnhî jarênh xà hã ixkre hwÿr
mra nê kãm mex o mex ã harê.
Nê hamakêtkati nê àmnhîx ri hkînh
kãm axpên nhōrkwyÿ hkôt ri apkur
o pa. ⁴⁷ Pê Tirtûm mã mex o mex
ã harênh o ri axpên kôt pa. Æ
mê kot amnhî nhîpêx anhÿr o pa
jakamã nhûm krî nhō xwÿnh piitã
kãm mê hkînh nê. Nê mê hkwyÿjaja
apkati mê mê hwÿr mra nê mê hkôt
axkamê nê mê urak nê Jejus kôt
amnhî xunhwÿ nhûm Tirtûm ja hã
mê omu nê mê ho hkra. Jakamã
nhûm mê ra ohtô rax kumrêx o mō.

3

Te grã xwÿnh jarênh

Juãw 14.12-14; Atre 14.8-10

¹ Tã nhûm apkati hō hã nhûm
Simãw Pêtre mê Juãw wa ma Tirtûm
mã amnhî jarênh xà hã ixkre hwÿr
wa tē. Na pre hte myt àhpanh
grire nhûm mê piitã kot Tirtûm mã
amnhî jarênh kaxyw hwÿr mra.
Jakamã nhûm Simãw Pêtre mê Juãw
wa haxwÿja ma hwÿr wa mra.
² Nhûm mêhōja hakwakrem hkrî.
Katorxà nhōxà hkre rûm hte grã
nê kator xwÿnhnta. Nê arî hkrî ho
hkrî nê aa kãnhmã âm nê ri pa hkêt
nê. Nhûm hte hkrãmnhwÿjaja ap-
kati mê hamÿ nê ma o pa nê Tirtûm
mã amnhî jarênh xà hã ixkre jak-
wakrem hkrî nhûm mê hwÿr o
hkrî. Hakwakreja mê kot kãm: “Mê
gjêx xà mex” anhÿr xwÿnhnta kapem
hwÿr mê mrar xwÿnhjê hwÿr o

hkrī. ³ Tã nhũm Simãw Pêtre mẽ Juãw wa tê nê ixkreja wÿr wa àr o tê nhũm hte grà xwÿnhhta wa omu nê kàxpore hã wa kuwÿ ⁴ nhũm Simãw Pêtre omu nê kãm:

—E amnê wa ixpumu. Anê.

⁵ Hãmri nhũm kuma nê htÿx ho wa kot kãm kàxpore hkwÿ nhôr ã wa hkamnhix nê wa omu ⁶ nhũm Simãw Pêtre kãm:

—Nà ixkàxpore hkêt. Nom kot paj Jejus Kris xàhpumunh xà ho tanhmã anhîpêx to. E pa Jejus Kris pê Najare nhõ xwÿnhhta nhÿ hã amã ixkapêr jakamã tokyx kãnhmã xa nê ri mra. Anê.

⁷ Hãmri nê upòk rũm hpa hã kupy nê kãnhmã ãm nhũm hte mex nê kãnhmã xa nê amnhî te karo ho ri mra. ⁸ Hãmri nê hte mex ã amnhî pumu nê hkĩnh tÿx nê. Nê hkĩnh xàj ma wa hkôt harĩ ho tê nê wa hkôt ixkrem axà. Tirtũm mã mex o mex ã harênh pê harĩ ho wa hkôt tẽn axà. ⁹ Hãmri nhũm mẽ piitã amnhî jaêr pê akupÿm mex ã omu nê kamã no puma nê. ¹⁰ Nê axpên mã:

—Kokÿÿ mÿjti na pre hte mẽ gjêx xà mex kamã mẽ hwÿr rãhã ho hkrī htã nhũm Tirtũm tanhmã ho nhũm kãnhmã xa nê ri mra mex kurê kumrêx. Hêxta waa nê. Anê.

Simãw Pêtre kot mẽ kãm ujarênh Rukre 24.46-47; Atre 2.14-36

¹¹ Hãmri nhũm hte mex xwÿnhja Simãw Pêtre mẽ Juãw wa hkôt ixkre hwÿr axà nê wa kuri xa. Nhũm mẽ piitã amnhî jaêr pê harênh ma nê hwÿr hprôt nê agjê nê omu. Mẽ kot ixkre nhĩkjê jarênh o: “Pahi Sarumãw nhõ” anhÿr xwÿnh jarênhja wÿr nhũm mẽ hprôt nê hte mex xwÿnhhta kamã no puma ho kuhê. Nê kuri Simãw Pêtre mẽ Juãw wa omu nê axpên mã wa harênh o:

—Hêxta waa nê. Tanhmã na we wa amnhî to nê akupÿm kãm hte ho mex nhũm ri mra?

Anê nê wa kamã no puma nê. ¹² Hãmri nhũm Simãw Pêtre mẽ kuma nê mẽ kãm:

—Pa ixkwÿjaja. Kwa mẽmo na ka mẽ ri mẽ ixkamã ano puma ho akuhê? Xà wa ixàhpumunh tÿx xà ho na pa wa ho mex? Nà ja kot anhÿr kêt. Rÿ xà wa ixte Tirtũm kôt amnhî nhîpêx mex o ixpaja o na pa wa ho mex? Nà mãânên ja kot anhÿr kêt. ¹³⁻¹⁷ Mẽ ate omunh xwÿnhhta Jejus tãm kot ho mex kênã. Kot amnhî kaxyw kãm hamaxpêr tÿx jakamã nhũm akupÿm ho mex ka mẽ omu.

—Finat Apraãw nê Ijak nê Jako mẽ hkwÿjaja kot hkôt amnhî nhîpêx o pa xwÿnh pê Tirtũmja. Tãm na pre akupÿm Kra Jejus o htÿr nê mex o mex ã harê. Mẽ ate hã axàmnên nhũm mẽ kot hpîr xwÿnhhta. Pahihti Pirat kot kãm urer kaxyw tã ka mẽ nê kãm akapêr kãm axihtÿx nê. Nom Jejus tãm kot amnhî nhîpêx o pa xwÿnh na pre. Na pre hte amnhî nhîpêx mex rãhã ho pa htã ka mẽ axtem nê hkaga. Nhũm pahihti Pirat mẽ ate kot kãm urer kêt ã axihtÿx nhũm kãm urer kêt nê ò pôristi mã kugõ nhũm mẽ amã kupî. Mẽ kajaja mẽ amã hprãm xà hkôt mẽ amã kupî. Tirtũm kot mẽ pahwÿr mênh tã ka mẽ axtem nê apî.

—Nom mẽ ate kêp Tirtũm Kra hã omunh kêt jakamã na ka prem ã hipêx anê. Mẽ kot mẽ ato amnhîptàr xwÿnhjê mẽ na ka prem amarĩ apî. Na prem mẽ axàmnên xà hkôt mẽ amã pî kahpa hã kunhõ nê ã hpîr anê. Kêp akupÿm mẽ pahto mẽ pahÿr xwÿnh tã ka prem axtem nê apî. No nhũm Tirtũm akupÿm ho htÿr pa prem akupÿm htÿr kãm omu.

¹⁸ —Amnepêm Tirtũm nhÿ hã kapêr jarênh o mẽ pa xwÿnhjaja na prem Tirtũm kot mẽ pakaxyw ãm xwÿnhja kukamã tanhmã harênh to nê hã kagà nê mẽ kãm harênh o pa. Kot amnhî xà htÿx kãm hamak kãm htykja kukamã nhũm pre htem harênh o pa. Tã ã Tirtũm kot kukamã harênh anhÿr xàja kôt ka mẽ ã hipêx anê nê apî.

19 —Jakamã kwa mẽ tee ri mẽ ate amnhĩ tomnuj ã amnhĩ pumu mẽ tokyx hkaga. Hãmri mẽ amnhĩ to Tĩrtũm wý kè mẽ anè mẽ ate amnhĩ tomnuj piitã amnhĩ katut kòt rēnh pa. 20 Hãmri mẽ mẽ ato mex mẽ ka mẽ kukwak ri akĩnh mẽ ajamakētkati mẽ axãmnhĩx ri apa. Koja nhỹrmã akupỹn mẽ pahwýr Jejus mẽ. Ra kot mẽ pakaxyw ãm kēnã.

21 —Nom koja tokyx akupỹn wrýk kēt nē. Koja kormã kaxkwa kamã pa rãhã nhũm Tĩrtũm akupỹm kot mẽmoj piitã ho mex par mẽ nhũm rĩ kormã akupỹn mẽ pahwýr wrý. Amnepēm Tĩrtũm nhỹ hã kapēr jarēnh o pa xwýnhjaja kot ja kukamã harēnh nē hã kagã xà hkòt.

22 —Na pre finat Mojes haxwýja Tĩrtũm nhỹ hã mẽ pahpãmjē mã tanhmã ja jarēnh to nē harēnh o:

Koja nhỹrmã mẽ panhõ Pahi Maati Tĩrtũmja te kot ra mẽ akaxyw pa ixãmja pyrã nē axte mẽ panhĩõ xãm. Mē panhĩõ koja. Koja nhỹrmã inhmýr pē mōn pōj mẽ mẽ amã Tĩrtũm kapēr jarēnh o pa. Ka mẽ kapēr ma mẽ mar týx mẽ kapēr kòt amnhĩ nhĩpēx o ri apa.

23 Koja mẽhõ kuma mẽ ãm kuma mẽ hkòt amnhĩ nhĩpēx kēt mẽ nhũm Tĩrtũm tee ri ja hã omu mẽ kēp hkra hkēt ã harēnh kurē kumrēx. Anē.

24 ã na pre finat Mojesja mẽ kãm Jejus kukamã ujarēnh anē. No ãm tapxipix na pre ã harēnh anhýr kēt nē. Tĩrtũm nhỹ hã mẽ kapēr o mẽ pa xwýnh piitã na prem ã mẽ kãm harēnh anhýr o pa. Kot harēnh o pa xwýnh kot wa finat Sãmuewja mẽ hkòt mẽ hkwýjē piitã ã Jejus kukamã hkwýjē mã harēnh anhýr o pa.

25 —Tã mẽ pahpē mẽ hkamrõ hkwy na pu mẽ. Mē pahpē mẽ hkanrēhã mẽ htãmnhwýy. Mē

pakaxyw na pre Tĩrtũm ã mẽ kãm kapēr anē. Nē Kraja kukamã finat Apraãw mã kãm:

Koja nhỹrmã akanrēhã atãmnhwýjē hõ pyka piitã hkòt mẽ piitã mẽ ho mex o pa nhũm mẽ kukwak ri mex kumrēx mẽ ri pa. Anē.

26 ã kot Kra hkukamã harēnh anhýr tã mẽ pakumrēxjē hwýr na pre kumē. Kot mẽ pahto mex nhũm mẽ pahte amnhĩ tomnuj kaga kaxyw nhũm mẽ pahpē Ijaew kumrēxjē hwýr kumē. Anē.

Nhũm pre ã Simãw Pētreja hte grã xwýnh pumunh o mẽ kuhē xwýnhjē mã ujarēnh anē.

4

Simãw Pētre mẽ Juãw wa kot mẽ aptàr tũmjē mã kapēr ã wa harēnh

Rukre 21.12-13

1-4 Nhũm Simãw Pētre mẽ Juãw wa arĩ mẽ kãm Tĩrtũm kapēr jarēnh o wa xa mẽ mẽ kãm:

—Nã na pre Jejus ty nhũm Tĩrtũm akupỹm hõ htĩr. Tã kot akupỹm ho htĩr jakamã koja nhỹrmã urak mẽ akupỹm mẽ htyk xwýnh piitã mẽ ho htĩr pa. Anē.

Hãmri nhũm mẽ kot wa mar o kuhē xwýnh kwýjaja wa kuma mẽ wa hkòt hamaxpēr mẽ wa urã mẽ Jejus kòt amnhĩ xunhwý. Jakamã nhũm ra mẽ kot Jejus kòt amnhĩ xunhwýr xwýnhjaja ohtõ rax kumrēx. Ra mẽ kēp 5.000.

Hãmri nhũm axtem mẽ hkwyjaja wa hwýr mra mẽ wa mar o kuhē. Mē õ patre nhõ pōristũm mẽ Satusew nhõ xwýnh kwýjē mẽ nhũm mẽ ma Simãw Pētre mẽ Juãw wa hwýr mra mẽ tee ri wa kot mẽ ahkre hã wa mar o kuhē. Nē mẽ kãm akupỹm mẽ htĩr jarēnhja ma mẽ wa kamã gryk mẽ. Satusew nhõ xwýnhjaja na pre htem akupỹm mẽ htĩr kòt hamaxpēr kēt jakamã nhũm wa akupỹm mẽ htĩr jarē nhũm mẽ tee ri wa kuma mẽ hamaxpēr punuj mẽ wa kamã gryk

kato. Hāmri nē wa hā amýnē nhūm mē wa unē nē ma wa o tē nē mē hagjēnh xà kamā wa haxà. Ra myt grire nhūm mē wa haxà. Wa kot mē hagjēnh xà kamā hā apkati nhūm rī kormā mē kot ujarēnh ā tanhmā wa ho kaxyw.

⁵⁻⁶ Tā nhūm apkati nhūm mē ohtô nē wa ujarēnh ā wa mar kaxyw Jerujarē kamā axpēn wýr akuprô. Ijaew pigêtjaja nē mē àptâr tūm kwýjaja. Nē mē kot finat Mojes kapēr o mē ahkre ho mē pa xwýnhjaja. Nē mē ô patre maati Anas mē hkwýja. Nē Ijaew nhô juisti Kajpas mē Juāw ô mē Aresānja. Nhūm mē kot Simāw Pêtre mē Juāw wa mar kaxyw axpēn wýr akuprô. ⁷ Hāmri nē wa hā karô nhūm pôristi wa hwýr tē nē wa haprô nē ma mē hwýr wa o tē nē wa ho axà nē mē kutā wa ýr nhūm wa nhý. Hāmri nhūm mē wa omu nē wa kām:

—E mē inhmā amnhī jarē. Mēhō xàhpumunh xà ho na ka pre wa hte grà xwýnhhta ho mex? Mēhō na pre hwýr war amē ka wa ho mex? Anē.

⁸ Hāmri nhūm Simāw Pêtre mē kām awjarē. Tirtūm Karô kot kām hamaxpēr o hihtýx jakamā nhūm ý hā Ijaew pigêtjē mē mē àptâr tūmjē mã awjarē nē mē kām:

⁹—Tôe mēhō kot ho mex xwýnhja ā mē ate wa ixkukjêr ¹⁰ jakamā kot paj mē amā harē ka mē ixte harēnhja ma. Wa ixpyrà nē mē apē Ijaew kēr ka mē wa ixkapēr mar týx nē. Jejus Kris pé Najare nhô xwýnhhta. Mē ate hpír nhūm Tirtūm kot akupým ho hür xwýnhhta. Tām na pre àhpumunh týx o akupým hte grà xwýnhhta o mex. ý hā ixte kaxyw kām ixkapēr nhūm tām akupým ho mex. ¹¹ Tirtūm kot mex o mex ā harēnh nē mē pakaxyw ām tā ka prem axtem nē hkaga. Nom Tirtūm kapēr ā kagà htūm kot ra mē akukamā ā mē ate amnhī nhípêx anhýr ā mē ajarēnh nē mē ajarēnh kot:

Mē kot kēn o amnhīm ôrkwý nhípêx kaxyw nē nhýri kēn maati pumu nē htýx omnuj ā hkamnhix nē hkaga. Mē kot hkaga htā nhūm Tirtūm mē kurom mex o kot kēn piitā hakrenh par ā omunh kurē kumrêx.

Anhýr o kot mē ajarēnh. Te mē ate kēn maati kaga xwýnh ā mē ajarēnh pyrāk. Tā ka mē ā mē kot mē akukamā mē ajarēnh anhýrja kôt te mē ate kēn maati kaga pyrā nē Jejus kaga nē apī. Tirtūm kot amnhīm mex o mex ā omunh nē harēnh tā ka prem axtem nē hkaga. ¹² Tapxipix na hte mē panē mē pahte amnhī tomnuj ré. Mēhō koja urāk nē àhpumunh týx o mē panē kurē? Mēhō koja ahpýnhā pyka piitā hkôt urāk nē ā mē panhípêx mex anē? Nā ām amrakati kumrêx. Ām Jejus pix. Tapxipix na pre Tirtūm ja kaxyw ām jakamā tapxipix na kēp mē pahkaprī xwýnh maati. Anē.

¹³ Nhūm pre ā Simāw Pêtreja mē kām kapēr anē. Hāmri nhūm mē amnhī jaér pé kuma nē axpēn mã:

—Kwa wa kām mē pahpyma wa hā hkwy jêt kêt kumrêx. Te ri wa htýx ri wa pa pyrāk tā wa hamaxpēr týx kumrêx. Mān wa kēp Jejus kôt mē pa ho mē pa xwýnh kwý jakamā na wa ā kapēr anē nā? Anē.

¹⁴ Hāmri nē tee ri kot tanhmā mēmoj tā wa kām àkjêr to hkukamā hamaxpēr. No nhūm hte grà xwýnh ra kot mē hwýr àr nē Simāw Pêtre wa kuri mex nē ām nhūm mē kot no ho omunh jakamā wa kām àkjêr kêt nē. ¹⁵ Hāmri nē wa kām anē nhūm wa mē kēp kato nē kapôt ā xa nhūm mē tanhmā wa kām nē kaxyw wa hā axpēn ma nē axpēn mã:

¹⁶—Kwa tanhmā kot puj mē wa ho? Ra jar Jerujarē kamā mē piitā mē kot akupým hte grà xwýnhhta mex ā wa omunh kēnā kot puj kêt mē kām wa kot ho mex hkêt ā wa harē. ¹⁷ Tā mē kot harēnh o hprôt pymaj kot puj mē axte Jejus jarēnh

o pa nê wa hkurê. Kê hte grà xwÿnh jarênhja âm jar mẽ pakamã hapêx. Nà kot puj mẽ ã wa kãm karô anê. Anê.

¹⁸ Nhũm mẽ wa hã axpên mar pa hãmri nê akupÿn wa hã karô nhũm wa akupÿn mẽ hwÿr axà nhũm mẽ wa kãm:

—E Simãw Pêtre mẽ Juãw wa. Wa mãmri ma tẽ. Nom kêr ka wa mẽ ixkapêr mar kumrêx. Kêr ka wa axte ri tanhmã mẽ kãm Jejus jarênh to ho ri apa hkêt nê. Âm kwarĩ ho kwarĩ. Anê.

¹⁹ Hãmri nhũm wa tee ri mẽ kuma nê mẽ kãm:

—Nà Tirtũm tãm kot ja hã wa inhmã karô kênã kot pa kêt wa mẽ akapêr ma nê harênh o ixpa hkêt nê. ²⁰ Na pa pre wa Jejus kôt ri ixpa nê xatã kot tanhmã amnhĩ nhĩpêx to hã omunh o hkôt ixpa. Nê xatã tanhmã mẽ ahkre htô hã mar o hkôt ixpa. Nê akupÿm htĩr kãm omu. Jakamã tanhmã kot pa wa amnhĩ to nê mẽ kãm ja jarênh kêt nê? Nà kot pa wa mẽ akapêr mar xà hkôt ã amnhĩ nhĩpêx anhÿr hkêt nê. Anê.

²¹⁻²² Hãmri nhũm mẽ kuma nê tee ri mẽ kot tanhmã wa ho kaxyw. Te grà xwÿnhhta hte grà nê hkrĩ ho hã amgrã pê 40 tã ra akupÿm mex nhũm mẽ piitã ja hã omu nê hã axpên mã Tirtũm mex o mex ã harênh o ri pa. Jakamã nhũm mẽ utãr xwÿnhjaja mẽ kuma nê kãm mẽ uma nê. Hãmri nê mẽ umaj tanhmã Simãw Pêtre mẽ Juãw wa ho hkêt nê. Âm axte wa kot Jejus jarênh o pa nê wa kãm kapêr kãm hihtÿx nê wa hano nhũm wa ma tẽ.

Mẽ kot amnhĩ to Tirtũm wÿr ã mẽ harênh

Matêwre 18.19-20

²³ Tã nhũm Simãw Pêtre mẽ Juãw wa ma akupÿm Jejus kôt htô nê htôxjê hwÿr wa tẽ nê mẽ kãm amnhĩ jarê. Nê patre krãhtũmjê mẽ mẽ ãptãr tũmjaja kot Jejus kapêr jarênh nê wa hkurê kamã hihtÿxja nhũm amnhĩ tã mẽ kãm mẽ harê.

²⁴ Hãmri nhũm mẽ wa kuma nê amnhĩ to Tirtũm wÿr kurê kumrêx nê kãm:

—Pa Pahi Maati? Nà mẽmoj piitã ho akator xwÿnhhta na ka. Na ka pre kaxkwa ho akato nê pyka ho akato nê gô xujanãr o akato. Hãmri nê kamã mẽmoj piitã ho akator pa. ²⁵⁻²⁶ Amnepêm na pre mẽ inhĩgêt Tawija amã tanhmã amnhĩ nhĩpêx to ho pa. Nê Akarô nhÿ hã akapêr kwÿ jarê nê hã kagã. Nê kagãja kamã mẽ kot Pahihti Jejus kutã amnhĩ xunhwÿr xwÿnhjê jarê nê mẽ hã kagã. Mẽ hkukamã mẽ hã kagã nê mẽ hã kagã ho:

Mẽmo mÿrapê na prem Ijaew kêt xwÿnhjaja Tirtũm kutã amnhĩ xunhwÿ?

Nê Ijaew haxwÿja. Mẽmo mÿrapê na prem htÿx ri hamaxpêr o ri pa?

Nê pyka piitã hkôt pahijaja na prem Pahi Maati kutã amnhĩ xunhwÿr pa.

Nê kot mẽ pakaxyw âm xwÿnh Jejus Krisja nhũm mẽ mããnên kutã amnhĩ xunhwÿr pa.

Nê mẽ kot hpĩr kaxyw mẽ kãm hã amÿnê.

Kwa mẽmo mÿrapê na prem axtem nê ã amnhĩ nhĩpêx anê? Anê.

Ã na pre finat Tawija Akarô nhÿ hã mẽ harê nê hã kagã anê Tirtũm.

²⁷ Âm hãmri na pre mẽ hkukamã mẽ hã kagã. Ra mẽ kot ã amnhĩ nhĩpêx anhÿr kênã. Krĩ ja kamã na prem ã amnhĩ nhĩpêx anhÿr kaxyw axpên wÿr akuprô. Pahi Erox nê pahi Pôn Pirat nê mẽ ixkwÿjaja nê mẽ kêp Ijaew kêt xwÿnhjaja axpên wÿr akuprô nê Akra Jejus kutã amnhĩ xunhwÿ nê mẽ kot hpĩr kaxyw hã amÿnê. Kot tãm amnhĩ nhĩpêx o pa nhũm ate mẽ ixkaxyw âm xwÿnhja nhũm mẽ axtem nê kutã amnhĩ xunhwÿ.

²⁸ —Nom amnepêm kormã mẽ ixkêt ri na ka pre mẽ hkukamã ã mẽ kot amnhĩ nhĩpêx anhÿr ã mẽ

omu. Mě kot tanhmã apê Akra Jejus to nê hpîrta kukamã ka pre hã mẽ omu. Tã mẽ ixwÿr amê nhùm prem kupî. No âm ajamaxpêr xã hkôt.

²⁹—Tã ka mẽ omu. Na mẽ Jejus ã mẽ ixkamã gryk tÿx nê tanhmã hã mẽ ixto kaxyw. Jakamã kot kaj mẽ ixpê amã tanhmã amnhî nhîpêx to ho ixpa xwÿnhjaja ka tanhmã mẽ ixkrã hto pa mẽ inhmã mẽ uma hkêt nê mẽ hkôt ixpa ho ixpa. Mě kot tanhmã mẽ ixto hã mẽ ixka-grônã tã pa mẽ inhmã mẽ uma hkêt nê ixàmnhîx ri ixkînh nê ri ixpa. Nê anhÿ hã mẽ kutã amnhî to htÿx nê arî mẽ kãm akapêr jarênh o ri mẽ hkôt ixpa. Mě kot Jejus ã tanhmã mẽ ixto htãã.

³⁰—Akra Jejus mex o mex jakamã kot paj mẽ àhpumunh tÿx xã ho tanhmã mẽ piitã mẽ ho mex to ho ri mẽ hkôt ixpa. Mě à xwÿnhjaja akupÿm mẽ o mex. Nê mẽ kot aa mẽmoj pumunh kêt kwÿ ho anê. Kê mẽ omu nê axàhpumunh o axàhpumunh ã apumunh mex kurê kumrêx. E âm ja pix na ra hapêx. Anê.

³¹Nhùm prem ã amnhî to Tîrtùm wÿr anê. Puh nhùm ixkreja mẽ kãm htertet tÿx nê nhùm Tîrtùm Karô axte tanhmã mẽ hkrã hto nhùm mẽ ÿ hã kãm mẽ uma hkêt nê. Âm amnhî to htÿx nê mẽ kãm Tîrtùm kapêr jarênh rãhã ho ri mẽ hkôt pa.

Jejus kwÿjaja tanhmã kot axpên nhîpêx to hã mẽ harênh

Atre 2.42-47

³²⁻³³Nhùm Jejus nhÿ hã mẽ ahkre ho mẽ pa xwÿnh maatiijaja. Na pre Tîrtùmja mẽ ho mẽ kãm ma hkêt jakamã nhùm pre htem akupÿm Jejus htîr kôt mẽ kãm harênh o ri mẽ hkôt pa. Nhùm Tîrtùm mẽ kot Jejus kôt amnhî xunhwÿr xwÿnh piitã mẽ kutã nojarêr rãhã ho pa nhùm mẽ ra ohtô rax nê. Nê mẽ kãm axpên to mex pix prãm o ri axpên kôt pa. Mě ohtô htã te mẽ tipxi pyrãk. Nê axpên pê mẽmoj to

õxÿ hkêt nê. Na pre htem axpên mã mẽ hikukrêx nê mẽ apkur xã jarênh o: “Inhõ pix kêt mẽ pah-piitã mẽ panhõ na.” Anhÿr o ri mẽmoj tã axpên kutã nojarêr o ri pa. No kêt axpên mã mẽmoj jarênh o: “Tk. Nà âm inhõ pix na.” Anhÿr o harênh kêt nê. ³⁴⁻³⁵Na pre htem tõhã õ ixkre hõ ho wênê. Rÿ õ pyka hkwÿ ho wênê nê kàxpore jamÿ nê ma o mra nê Jejus nhÿ hã mẽ ahkre ho mẽ pa xwÿnhjê mã kugõ nhùm mẽ hamÿ nê mẽ kêp amrakati xwÿnhjê mã ho anhgrã. Hãmri nhùm mẽ amnhîm hamÿ nê ho amnhîm awjaprô. Jakamã na pre hte mẽ hkwÿjaja kãm prãm nê ri pa rÿ ê hkêt nê ri pa hkêt nê.

³⁶⁻³⁷Jujere na pre ã amnhî nhîpêx anê nê mẽ kaxyw õ pika hkwÿ ho wênê. Hãmri nê kàxpore py nê o tẽ nê Jejus nhÿ hã mẽ ahkre xwÿnh maatiijê mã kugõ. Jujereja ljaew nhõ patre ho ajuta xwÿnh na pre. Gô hipôk pê Sipre kamã na pre kato. Kêp Jujere htã no nhùm Jejus nhÿ hã mẽ ahkre ho mẽ pa xwÿnhjaja na prem kãm: “Panãpe” Anê. Mě kapêr kãm Panãpeja te kêp “mê hamaxpêr o mẽ hihtÿx o pa xwÿnh” anhÿr pyrãk. Jakamã nhùm õ pika hkwÿ ho wênê nê kàxpore py nê o tẽ nê Jejus nhÿ hã mẽ ahkre xwÿnhjê mã kugõ nhùm mẽ kupy nê mẽ kêp amrakati xwÿnhjê mã ho anhgrã.

5

Ananîs mẽ Sapire wa kot amnhî to hêx ã wa harênh

Karatas 6.7; Eprêw 10.26-31

¹Tã nhùm Ananîs mẽ hprô Sapire wa Jujere jarênh ma nê urãk nê õ pyka hkwÿ ho wênê. ²Hãmri nê kàxpore py. Nom na pre wa ra hã axpên ma. Jakamã nhùm Ananîs Jujere kînhã kàxpore hkwÿ pix py nê o tẽ nê Jejus nhÿ hã mẽ ahkre xwÿnh maatiijê mã kugõ. Nom katàt kôt mẽ kãm ôr ã amnhî

jarēnh kêt nē. Kot kàxpore ho pikjēr nē amnhīm hkwý ho àrik ā amnhī jarēnh kêt nē. Ām mẽ kām amnhī jarēnh o hēx. Te piitā ōr par pyrāk o amnhī nhīpēx nē mẽ kām:

—E ota ixkàxporeta. Na pa wa inhō pika hkwý ho wēnē nē kàxpore hpy nē hpānhā Jujere pyrā nē man mẽ awýr piitā o tē. Anē.

³ Hāmri nhūm Simāw Pētre ra ā kot amnhī nhīpēx anhýr ā omu hāmri nē kām:

—Tk. Kwa mon ka axtem nē Satanasti kapēr ma nē hkôt amnhī nhīpēx nē te akàxpore piitā ōr pyrāk ā amnhī to axēx anē? Te ate piitā ōr pyrāk tā no ām hkwý pix gō. Hēxta waa nē. Na ka axtem nē Tirtūm Karō mā akàxpore nhōr par o axēx. ⁴ Anhō pyka kēnā. Nē hpānhā kàxporeja anhō kēnā. Kot kaj amā tanhmā ho hprām xā hkôt māmri tanhmā ho. Amā piitā ho axārīk prām nē māmri piitā ho arīk. Rý amā hkwý hpix nhōr prām nē māmri hkwý pix gō. No ri ate ōr par pyrāk o amnhī to axēx kêt nē. Te ate mẽ inhmā pix mā axēx pyrāk nom mẽ inhmā pix mā hkêt. Na ka mǎānēn te Tirtūm mā axēx pyrāk. Anē.

⁵⁻⁶ Nhūm pre ā Simāw Pētre Ananīs mā kapēr anē nhūm kuma nē pykap tēm nē htyk kurē kumrēx. Hāmri nhūm mẽ àptār nywjaja hwýr tē nē kupēxē ho hkupu nē kumý nē ma o tē nē haxà. Hāmri nhūm mẽ kot ā kot amnhī nhīpēx anhýr ā harēnh mar xwýnhjaja tee ri harēnh ma nē kām ma htýx nē.

⁷ Tā nhūm ra hā ahtūm nē. Ra hā 3 ore nē hapēx nhūm Ananīs prō Sapireja htýx hamakētkati nē mẽ hwýr tē nē axà. Kormā mjēn htyk ā harēnh mar kêt nē hamakētkati nē hkīnh nē mẽ hwýr tē nē axà. ⁸ Hāmri nhūm Simāw Pētre omu nē hēx rom hkukja nē kām:

—Pa? E kwa inhmā mẽmoj jarē. Tanhmā na prem war anhō pykaja pānhā war amā amnhīrer to? Xā ām

hāmri na amjēn mẽ inhmā harē nà? Anē.

Hāmri nhūm kuma nē mjēn pyrā nē kām ho hēx nē kām:

—Ýý. Ām hāmri kot amā harēnh kēnā. Anē.

⁹ Hāmri nhūm Simāw Pētre tee ri kuma nē kām:

—Tk. Hēxta waa nē. Kwa mon ka war ajamē war akàxpore ho te Tirtūm mā axēx pyrāk? Mān ka wa ajamaxpēr o: “Koja Tirtūm ja hā wa ixpumu nē ām hā wa ixpumu nē tanhmā hā wa ixto hkêt nē.” Anhýr o mān ka wa ajamaxpēr nà? Nom na ka wa ām kām axēx kapry. Onēj ra mẽ kot amjēn jaxār xwýnhjaja akupýn hpōx o mra. Koja mẽ anhīpēx o te hipēx pyrā nē mǎānēn ato tē nē ajaxà ka rī amnhī pumu.

¹⁰ Anē nhūm kuma nē mjēn pyrā nē pykap tēm nē htyk kurē kumrēx. Hāmri nhūm mẽ kot mjēn jaxār xwýnhjaja mra nē mẽ hwýr agjē nē omu nhūm ra htyk mex nē nō nhūm mẽ kumý nē ma o tē nē mjēn nhīhkō hā haxà. ¹¹ Hāmri nhūm mẽ piitā wa harēnh ma nē kām ma htýx nē. Mē kot Jejus kôt amnhī xunhwýr xwýnhjē mẽ amarī ri mẽ pa xwýnhjaja nhūm mẽ tee ri wa hkukamā hamaxpēr o kām ma htýx kumrēx.

Mē kot aa mẽmoj pumunh kêt kwý ho anhýr ā mẽ harēnh

Makre 16.17-20; Atre 19.11-12

¹²⁻¹⁴ Na pre hte Jejus kôt mẽ kot amnhī xunhwýr xwýnhjaja xatā Tirtūm mā amnhī jarēnh xā hā ixkre hwýr akuprō. Mē kot ixkre nhīkjē mā: “Pahi Sarumāw nhō” anhýr xwýnh jarēnhja wýr nhūm pre htem akuprō. Nhūm mẽ piitā kām mẽ hkīnh nē mẽ ohtō nē mẽ hkôt akuprō nē mẽ urāk nē Jejus kôt amnhī xunhwý. Mēnijaja nē mẽmyjaja. No nhūm mẽ hkwýja Ananīs mẽ Sapire wa kot amnhī nhīpēxja mā hamaxpēr nē kām mẽ hkôt mrar pyma nē. Kām mẽ hkīnh tā kām mẽ hkôt mrar pyma nē.

Nhũm pre hte Jejus nhỹ hã mẽ ahkre ho mẽ pa xwỹnhjaja aa mẽ kot mẽmoj pumunh kêt kwỹ ho anhỹr o ri mẽ piitã mẽ hkôt pa. ¹⁵ Jakamã nhũm pre htem mẽ à xwỹnhjê jamỹ nẽ ma mẽ hwỹr mẽ o mra nẽ Simãw Pêtre kutêp pry kamã mẽ haxwỹ nẽ mẽ kãm:

—E mẽ jar anhĩkwỹ. Kê Simãw Pêtre ja kôt mẽ ajãnh tẽ nẽ mẽ akupênh o akupỹm mẽ ato mex rỹ nhũm hkarô pix mẽ atã harir ka mẽ akupỹm amex japêr.

Anhỹr o mẽ kãm kapêr hãmri nhũm mẽ kupĩp kãm kutêp hikwỹ. ¹⁶ Nẽ Jerujarẽ pu hã krĩ hkwy kamã. Mẽ à xwỹnhjaja nẽ mẽkarômnuti kot tanhmã mẽ ho xwỹnhjaja nhũm pre htem mẽ hamỹ nẽ ma mẽ ìhkrep mẽ o mra nhũm mẽ piitã akupỹm mex pa.

Mẽ kot Jejus kwỹjê jagjênh ã mẽ harênh

Rukre 21.12-15; Juãw 15.26-27; Atre 4.1-22

¹⁷ Tã nhũm mẽ õ patre maati mẽ hkrãmnhwỹ Satusew nhõ xwỹnhjaja tee ri akupỹm mẽ mex ã mẽ harênh ma nẽ axpênh mã:

—Tk. Kwa na mẽ ra ohtô nẽ Jejus gryk ã mẽ pahte mẽ ahkre kaga nẽ ãm hkôt pix mã ri amnhĩ nhĩpêx o pa. Anẽ.

Hãmri nẽ Jejus nhỹ hã mẽ ahkre maati xwỹnhjê kamã gryk nẽ ra tanhmã mẽ ho kaxyw. ¹⁸ Hãmri mẽ unê nẽ mẽ hagjê nhũm mẽ hagjênh xà kamã hkrĩ hpa.

¹⁹ Tã nhũm kamãt nhũm Tĩrtũm kapêr o mẽ wrỹk xwỹnhja ma mẽ hagjênh xà hwỹr mẽ hwỹr wrỹ nẽ mẽ hwỹr axà nẽ mẽ kãm hakwakre kahê xà mẽ nẽ mẽ kator pa. Hãmri nẽ mẽ kãm:

²⁰ —E mẽ ma akupỹm Tĩrtũm mã amnhĩ jarênh xà hã ixkre hwỹr mra nẽ axte mẽ kãm awjarê. Tanhmã mẽ kot amnhĩ nhĩpêx to nẽ Jejus kôt amnhĩ nhĩpêx nyw o amnhĩ nhĩpêx ã mẽ kãm hã karô kê mẽ ama. Anẽ.

²¹ Hãmri nhũm mẽ kuma nẽ ma akupỹm hwỹr hapêx kurê kumrêx. Nhũm myt kator o mõi mẽ nhũm mẽ hwỹr agjê nẽ mẽ kãm Tĩrtũm kapêr jarênh o kuhê.

Tã nhũm mẽõ patre maati mẽ hkôt ri mẽ pa xwỹnhjaja amnhĩ wỹr mẽ ãptâr tũm xwỹnhjê hwỹ nhũm mẽ piitã axpênh wỹr pikuprõnh pa. Hãmri nẽ htỹx arĩ Jejus kwỹjaja mẽ hagjênh xà kamã mẽ hkrĩ hã mẽ hkamnhĩx nẽ amnhĩ wỹr mẽ hã karô. ²² Nhũm põiристijaja ma kot mẽ haprôr kaxyw mẽ hagjênh xà hã ixkre hwỹr mra nẽ tee ri kamã mẽ hapêr nhũm mẽ kamã amrakati. Hãmri nhũm mẽ akupỹm mẽ pikuprõnh xwỹnhjê hwỹr hprôt nẽ mẽ kãm:

²³ —Nà na põiристи hkwyjaja arĩ hakwakrem ixkre jamãr mex nhũm hakwakre arĩ kahê htỹx nẽ xa. Tã pa mẽ hwỹr agjê nẽ tee ri hkre kamã mẽ hapêr nhũm mẽ kamã amrakati kumrêx. Anẽ.

²⁴ Hãmri nhũm mẽ kuma nẽ tee ri hamaxpêr. ²⁵ Rôm nhũm ja mẽ hwỹr tẽn axàn mẽ kãm:

—Kwa jãã mẽ ate mẽ hagjênh xwỹnhjaja na mẽ axte Tĩrtũm mã amnhĩ jarênh xà hã ixkre kamã mẽ ahkre ho kuhê pa ham mẽ omu nẽ mẽ kurũm tẽ. Anẽ.

²⁶ Hãmri nhũm patre nhõ põiристи krãhtũmja kuma nẽ mẽ hwỹr põiристи hkwy rê nhũm mẽ ma mẽ hwỹr mra nẽ mẽ hwỹr agjê nẽ kê axte mẽ unê nẽ akupỹm mẽ o mra. Nom tanhmã mẽ ho hkêt nẽ. Mẽ kot hkôt ri mẽ pikamênh xwỹnhjê pymaj mẽ ho mex nẽ mẽ o mõi. Nẽ mẽ hã axpênh mã:

—Nà kot puj mẽ tanhmã mẽ ho nhũm mẽ ja hã mẽ pahpumu nẽ kên o mẽ pahkapê nẽ tanhmã amnhĩ to nẽ hã mẽ panhĩmex. Anẽ.

²⁷ Hãmri nẽ mẽ ho mex nẽ akupỹm mẽ o mõi mẽ hwỹr mẽ ho agjê nẽ mẽ pikuprõnh xwỹnhjê kutã mẽ hkrĩ. Hãmri nhũm mẽõ patre maatija mẽ kãm:

28 —Kwa ra mẽ ixte Jejus kapër jarênh nê mẽ akurê htâ ka xep mẽ âm mẽ inhma nê arĩ mẽ kãm harênh o ri apa. Nê jar Jerujarê kamã mẽ piitã mẽ kãm harê. Nê mẽ pajaja mẽ ixte Jejus pĩr ã ka mẽ ri mẽ kãm mẽ ijarênh o apa. Anê.

29 Hãmri nhũm Simãw Pêtre mẽ kuma nê mẽ amnhĩ tã mẽ kãm kapër nê mẽ kãm:

—Tỳ kot kaj mẽ Tĩrtũm kapër kuhpa hã mẽ inhmã mẽmoj tã karõ pa mẽ ama nê âm mẽ ama nê âm Tĩrtũm kapër pix ma nê hkõt ri amnhĩ nhĩpêx. 30 Amnepêm mẽ panhĩgêjtaja na prem Tĩrtũm kõt pix mã amnhĩ nhĩpêx o pa. Tã ka prem axtem nê kêp mẽ kãm Kra Jejus ã amýnê nhũm mẽ pĩ kahpa hã kunhõ nê kupĩ. Nom nhũm Tĩrtũm akupým ho htĩr 31 nê kêp mẽ panhõ Pahihti hã harê. Nê kêp mẽ pahkaprĩ xwýnh mex ã harê. Hãmri nê ra amnhĩ ri ýr nhũm ìhkõ hã mẽmoj piitã ho amnhĩptãr o hkrĩ. Nhũm kãm: “Koja Ijaew mẽ kot amnhĩ tomnuj kaga nê akõt amnhĩ xunhwý pa ja hã mẽ omu nê amnhĩ katut kõt mẽ kot amnhĩ tomnuj rênh pa nê mẽ ho ixkra.” Anê. 32 Tã mẽ pajaja mẽ ixte Jejus htyk nê akupým htĩr ã omunh mex jakamã na pa hte Tĩrtũm Karõ nhỹ hã ã mẽ amã harênh anê. Karõja na pre Tĩrtũm mẽ ixte hkõt amnhĩ nhĩpêx xwýnhjê hwýr kurê nhũm mẽ ixwýr wrý nê mẽ ixkarõ mã agjê. Tã ý hã na pa htem ri ã harênh anhýr o ri mẽ akõt ixa. Anê.

33 Hãmri nhũm mẽ kuma nê mẽ kamã gryk týt nê. Nê mẽ kãm mẽ himex prãm nê mẽ kãm mẽ hã amýnê. 34 Hãmri nhũm Kamariewtija tee ri ja hã mẽ omu hãmri nê kãnhmã xa nê Jejus nhỹ hã mẽ ahkre xwýnh maatijê xyr pê hkwýjê mã kapër. Parijew nhõ xwýnh na pre. Nê kêp Tĩrtũm kapër ã kagã htũm o mẽ ahkre ho pa xwýnhjê hõ na pre. Nhũm mẽ piitã kãm hkĩnh nê. Jakamã

nhũm kãnhmã xa nê pòristi mã anê nhũm mẽ amnhĩ nê Jejus nhỹ hã mẽ ahkre ho mẽ pa xwýnhjê kator nhũm mẽ kapõt ã kuhê. 35 Hãmri nhũm Kamariewtija mẽ nê tanhmã mẽ kãm kapër to nê mẽ kãm:

—E ixkwýjaja. Kwa kêr pu mẽ tanhmã mẽ ho hkukamã pajamaxpêr mex nê. 36 Mãn arĩ mẽ ate finat Tetastija jarênh ã anohtýt nê ho apa japêr. Mytwrý hõ hã na pre mẽ kãm amnhĩ to rax ã amnhĩ jarênh o pa. Hãmri nhũm hkõt ri mẽ pa xwýnhjaja ohtõ nê. Mẽ kêp 400. Tã nhũm prem mẽ kêp Tetasti pĩ nhũm hkõt ri mẽ pa xwýnhjaja axpên pê anhrã nê ma hapêx.

37 —Tã nhũm mẽ kot mẽ piitã mẽ ho kõta xã hã arĩgroja ã nhũm Garirej nhõ xwýnh pê finat Jut haxwýja hkõt mẽ pa xwýnhjaja ohtõ nê. Tã nhũm mẽ mãănên mẽ kêp kupĩ nhũm hkõt ri mẽ pa xwýnhjaja haxwýja axpên pê anhrã nê ma hapêx.

38 —Jakamã kwa pu mẽ tanhmã jajê ho hkêt nê. Pu mẽ âm mẽ omu. Koja mẽ amnhĩ krã hkõt ã ujarênh anhýr o pa japêr hã koja Tetasti mẽ Jut wa hkõt pa xwýnhjê pyrã nê tokyx axpên pê anhrã nhũm Jejus jarênh o paja hapêx o hapêx. 39 Nom koja mẽ âm hãmri Tĩrtũm nhỹ hã ã mẽ ahkre ho pa anhýr japêr hã kot puj mẽ tee ri ja ho pajapêx mã. Jakamã kwarĩ. Kot puj mẽ tanhmã mẽ ho nê te mẽ pahte Tĩrtũm kutã amnhĩ xunhwýr pyrãk. Anê.

Nhũm pre ã Kamariewti Jejus nhỹ hã mẽ ahkre ho mẽ pa xwýnh maatijê xyr pê hkwýjê mã kapër anê. 40 Hãmri nhũm mẽ kuma nê kãm:

—Tỳ nã âm hãmri na ka ã akapêr anê. Kot puj xep mẽ tanhmã mẽ ho hkêt nê. Anê.

Hãmri nê akupýn mẽ hã karõ nhũm mẽ akupýn mẽ hwýr agjê. Hãmri nhũm mẽ pòristi mã mẽ hã

amÿnê nhÿm mẽ htak. Hãmri nhÿm mẽ àptàr tÿmrejaja mẽ kãm:

—E mẽ mãmri ma akupÿm mra. Nom kêr ka mẽ axte mẽ kãm Jejus kapêr jarênh o ri apa hkêt kumrêx. Anê.

⁴¹ Hãmri nhÿm mẽ kãm ure nhÿm mẽ ma mra. Kĩnh nê ma mra nê axpên mã:

—Nà kwâr mẽ Jejus ã mẽ pahtak nê tanhmã hã mẽ pahto. Kwâr mẽ mãmri ã hã mẽ pahto anê. Kot pu mẽ hkaga hkêt nê. Ra Tirtÿm kot ja hã mẽ pahpumunh mex kênã.

Anhÿr o axpên mã kapêr o axpên jamaxpêr o hihtÿx mex o pa.

⁴² Hãmri nê arĩ apkati mẽ hkwÿjê mã Jejus kapêr jarênh o mẽ ahkre ho mẽ hkôt pa. Tirtÿm mã amnhĩ jarênh xà hã ixkre kamã nê nhãm mẽ òrkwÿ kamã ri mẽ ahkre ho pa. Tirtÿm kot mẽ pakaxyw Jejus xãm ã mẽ kãm harênh o ri mẽ hkôt pa.

6

Mê kêp mẽ mjên htyk xwÿnhjê jarênh

Wam Ximotre 3.8-9

¹ Tã nhÿm mẽ kot Jejus kôt amnhĩ xunhwÿr xwÿnhjaja ohtô rax kumrêx o mō. Mẽ piitã kêp Ijaew no nhÿm mẽ hkwÿjaja axtem Gres kapêr o kapêr nhÿm mẽ hkwÿjaja Ijaew kapêr o kapêr. Na pre hte Ijaew kapêr o kapêr xwÿnhjaja apkati mẽ mẽ kêp mẽ mjên htyk xwÿnhjê mã mẽō ho pa. No ãm mẽ piitã mẽ hipêx o axpên pyrãk kêt jakamã nhÿm Gres kapêr o mẽ kapêr xwÿnhjaja tee ri ã mẽ kot amnhĩ nhĩpêx anhÿr ã mẽ omu nê mẽ kamã gryk nê. Hãmri nê mẽ kãm:

—Kwa na ka htem amnhĩ kamã mẽ kêp mẽ mjên htyk xwÿnhjê mã mẽō ho rÿnh nê agō. No mẽ ixkamã jajê mã na ka htem ãm ho hkryre nê agō. Kwa mẽ ri ã mẽ hipêx anhÿr kêt nê. Mẽ hipêx o axpên pyrãk nã. Anê.

² Hãmri nhÿm Jejus nhÿ hã mẽ ahkre xwÿnh maatijaja mẽ hã mẽ kapêr ma hãmri nê mẽ piitã mẽ ho akuprō nê mẽ kãm:

—Kwa kêr ka mẽ ja hã axpên mã axàkjêr kêt nê. E pu mẽ kot mẽ kêp mẽ mjên htyk xwÿnhjê mã ò ho pa kaxyw mẽ akwÿjê rê. No mẽ pajaja kot paj ja ho anhÿr o ri ixpa hkêt nê. Kot pa mẽ anê nê Jejus kapêr o ri mẽ ajahkre hkêt nê nhÿm ja mex kêt nê. Jakamã mẽ atō kot kaj mẽ akatàt kôt mẽ kãm mẽ ò ho apa? ³ E mẽ amnhĩ kamã mẽ ho 7 nê mẽ arê pu mẽ kêp mẽ mjên tyk xwÿnhjê mã ò ho pa kaxyw mẽ unhwÿ.

Tãm mẽ hamaxpêr xwÿnhjaja.

Nê mẽ ate axpên mã mẽ mex ã mẽ harênh xwÿnhjaja.

Nê Tirtÿm Karō nhÿ hã mẽ kot amnhĩ nhĩpêx o mẽ pa xwÿnhjaja.

Ã mẽ kot amnhĩ nhĩpêx anhÿr xwÿnhjaja ka mẽ ho 7 nê arê pu mẽ kaxyw mẽ unhwÿ. ⁴ Nom mẽ pajaja kot paj mẽ akôt arĩ mẽ amã Tirtÿm kapêr jarênh o ri mẽ ajahkre pix tânopxar o ri ixpa. Anê.

⁵ Hãmri nhÿm mẽ kuma nhÿm ja mẽ kãm mex nê. Nhÿm mẽ ma mra nê axpên mã hkwÿjê nhĩxi jarê hãmri nê mẽ ho 7 nê mẽ kurê. ã mẽ hixi kot anhÿr.

Estewãw. Estewãwja na pre Jejus kôt amnhĩ nhĩpêx mex o pa.

Tirtÿm Karō kaxwÿnh mã àr nê ho amnhĩptàr jakamã nhÿm pre hte tãm ri amnhĩ nhĩpêx o pa.

Nê kaxyw Firipti

nê Prokot

nê Nìkanō

nê Timã

nê Parmènti

nê Nìkoraw. Nìkorawja krĩ pè ãxiok nhō xwÿnh na pre. Kêp Ijaew kêt tã kãm Tirtÿm kĩnh o pa. Tã ra mãânên Kra Jejus kôt amnhĩ xãm.

⁶ Jakamã nhÿm mẽ mẽ kêp 7tajê rê nê Jejus nhÿ hã mẽ ahkre xwÿnh maatijê hwÿr mẽ o mra. Hãmri

nhũm mẽ omu nẽ mẽ àpênh ã mẽ unhwÿr kaxyw mẽ hã ìhkra jaxwÿ nẽ mẽ ho Tirtũm wÿ. Hãmri nhũm mẽ kệp mẽ mjên htyk xwÿnhjê mã mẽ õ ho pa nẽ mẽ piitã mẽ hipêx o axpên pyræk.

⁷ Tã nhũm mẽ ra ohtô rax nẽ Tirtũm kapêr ma nẽ hkôt amnhĩ nhĩpêx o pa. Jakamã nhũm Jerujarê kamã mẽ kot Jejus kôt amnhĩ xunhwÿr xwÿnhjaja ra ohtô rax kumrêx. Nẽ mẽ õ patre hkwÿ haxwÿja ohtô nẽ mẽ uræk nẽ amnhĩ kaxyw hkôt hamaxpêr nẽ hkôt amnhĩ xunhwÿ.

Mẽ kot Estewãw pynênh ã mẽ harênh

Rukre 21.14-15

⁸ Tã nhũm Estewãwja. Kot mẽ kệp mẽ mjên htyk xwÿnhjê mã mẽ õ ho pa xwÿnhjê hõja. Tirtũm kot kutã nojarêr mex jakamã na pre hte ÿ hã àhpumunh tÿx o aa mẽmoj pumunh kêt kwÿ ho anhÿr o ri mẽ hkôt pa. ⁹ Hãmri nhũm Ijaew kwÿjaja tee ri ja hã omu nhũm ja mẽ kệp omnuj tÿx nẽ nhũm mẽ hã kãm akir. Uræk nẽ mẽ kệp Ijaew nẽ Jerujarê kamã ri mẽ hkôt pa htã ahpÿnhã mẽ õ pyka. Mẽ kot kãm “Ripetat” xwÿnh kwÿ na pre mẽ. Nẽ ahpÿnhã mẽ õ krĩ.

Mẽ hkwÿjaja kệp Sirên nhõ xwÿnh.

Nẽ mẽ hkwÿjaja kệp Aresãn nhõ xwÿnh.

Nẽ mẽ hkwÿjaja kệp Siris nhõ xwÿnh.

Nẽ mẽ hkwÿjaja kệp As nhõ xwÿnh.

Ahpÿnhã mẽõ pika nẽ mẽ õ krĩ htã na prem Jerujarê kamã ri axpên kôt pa ho pa. Tã Estewãw kot ã amnhĩ nhĩpêx anhÿr o pa hã omu nhũm ja mẽ kệp omnuj tÿx nẽ nhũm mẽ hã kãm akir. ¹⁰ No nhũm Tirtũm Karõ nhÿ hã hamaxpêr tÿx o mẽ kãm kapêr nhũm mẽ kuma nẽ tee ri kutã tanhmã kãm nẽ hprãm kaprÿ.

¹¹ Hãmri nẽ ma mra nẽ tanhmã ho hêx to kaxyw amnhĩ kwÿjê rê nẽ mẽ kãm hã amÿnê nẽ mẽ kãm:

—E kêr ka mẽ krĩ nhõ xwÿnhjê mã Estewãw o axêx nẽ tanhmã mẽ kãm ho akapêr punuj to ho ri mẽ hkôt apa. Kê mẽ ama nẽ kamã gryk kato. Kot kaj mẽ ã amnhĩ nhĩpêx anê pa mẽ hpãnhã mẽ amã amnhĩre. Anê.

Hãmri nhũm mẽ kuma nẽ ma mra nẽ hapôj nẽ ma krĩ nhõ xwÿnhjê mã tanhmã ho hêx to ho ri mẽ hkôt pa nẽ mẽ kãm:

—E mẽ amnê akuprõ nẽ mẽ inhma. Kwa kêr ka mẽ Estewãwti kapêr mar kêt nẽ. Na hte finat Mojes mẽ Tirtũm wa ho kapêr punuj pix o ri pa. Pa mẽ ra kot wa ho kapêr punuj ã kuma. Anê.

¹² Hãmri nhũm mẽ kuma. Krĩ nhõ xwÿnhjê mẽ nẽ mẽ àptâr tũmrejê mẽ Tirtũm kapêr tũm o mẽ ahkre ho mẽ pa xwÿnhjaja nhũm mẽ tee ri mẽ kot Estewãw o hêxja ma nẽ kamã gryk nẽ. Hãmri nẽ ma hwÿr mra nẽ unê nẽ ma mẽ õ juisti hwÿr o tẽ. ¹³ Hãmri nhũm mẽ kãm ho hêx xwÿnhjaja mẽ hkôt mra nẽ juisti mã tanhmã ho hêx to nẽ mẽ kãm:

—E jahti na hte finat Mojes kot Tirtũm nhÿ hã mẽ pahte tanhmã amnhĩ nhĩpêx to hã karõ ho hêx rãhã ho pa. Nẽ Tirtũm mã amnhĩ jarênh xã hã ixkreja nhũm tanhmã ho hêx to pa mẽ kuma. ¹⁴ Na hte mẽ kãm: “Koja nhÿrmã Jejus pê Najare nhõ xwÿnh Tirtũm mã amnhĩ jarênh xã hã ixkreja grành pa kãm ga.” Anhÿr o mẽ kãm hêx o pa. Nẽ Mojes kot mẽ pahte amnhĩ nhĩpêx ã karõ nẽ mẽ pahkurê pa prem kuma. Anê.

¹⁵ Nhũm prem ã mẽõ juisti mã Estewãw o hêx anê. Hãmri nhũm mẽ kuma nẽ Estewãw wÿr rít nẽ hkuk pumu nhũm te kot Tirtũm kapêr o mẽ wrÿk xwÿnhjê kuk nhĩrã rax pyrã nẽ xa nhũm mẽ tee ri omu nẽ kamã no pyma nẽ.

7

Estewãw kot juistijê mã ujarênh

¹ Hãmri nhũm mẽ õ patre maatija Estewãw mã kapêr nẽ kãm:

—E mẽ inhmã amnhĩ jarẽ. Xà ãm hãmri na mẽ ri ã ajarẽnh anẽ nà? Anẽ.

² Hãmri nhũm kuma nẽ mẽ piitã mẽ kãm kapër. Mẽ kãm kapër ryy nẽ mẽ kãm:

—Tõe kot paj mẽ amã mẽ panhĩgêt finat Apraãw tanhmã harẽnh to ka mẽ inhma. Amnepêm na pre Tirtũm maatija Apraãw wỳr kato. Kormã pyka pẽ Mēsopotãm kamã pa ri. Kormã kot ma krĩ pẽ Arã hwỳr mõi kêt ri nhũm hwỳr kato nẽ kãm: ³ “E kêt ka mẽ anhõ krĩ pẽ akato nẽ akwỳjê re nẽ ma mõi. Kot paj ma nhỹhỹm hpãnhã pyka hõ hwỳr mẽ ato mõi.” Anẽ.

⁴ —Hãmri nhũm kuma nẽ amnhĩ to akuprõ nẽ ma mõi. Õ pyka pẽ Katej pẽ kato nẽ ma krĩ pẽ Arã hwỳr mõi nẽ hpãnhã kamã pa. Tã nhũm hipêêxã Terahti kệp ty nhũm Tirtũm amnẽ jar mẽ panhõ pyka hwỳr kumẽ. Jar mẽ papapxã hwỳr kumẽ.

⁵ —Nom nhũm kormã kãm pykaja nhõi kêt nẽ. Kormã kãm hkwy ho grire nẽ õr kêt nẽ. Na pre ãm kãm:

E kot paj nhỹrmã amã pykaja gõ. Amã nẽ akanrêhã akra nẽ atãmnhwỳjê mã kugõ ka mẽ kamã ri apa ho apa.

Anhỹr o kãm mẽ panhõ pika pẽ Kanaãja jarẽ. Apraãw kormã hkra hkêt ri nhũm ã kãm kapër anẽ.

⁶ Hãmri nẽ kãm:

Koja akanrêhã atãmnhwỳjaja nhỹrmã ma nhỹhỹm pyka hõ hwỳr pa nẽ hpãnhã kamã pa. Mẽ õ pyka kamã pa hkêt tã nhãm pyka hõ kamã pa hãmri nẽ pika nhõ xwỳnhjê mã àpênh rũnh o pa nhũm pyka nhõ xwỳnhjaja mẽ hipêx kati rũnh o pa. Nẽ mẽ àpênh ã mẽ kãm amnhĩrer kêt nẽ. ãm mẽ homnuj o pa hã amgrã xohtõ rax kumrêx. Nhũm mẽ hã amgrã pẽ 400.

⁷ Nom kot paj mẽ hã mẽ homnuj tỳx nẽ. Akanrêhã atãmnhwỳjê hã

mẽ homnuj tỳx nẽ nhũm mẽ rĩ kormã mẽ kurũm kato nẽ man akupỳn pa nẽ jar põi. Hãmri nẽ jar inhmã inhmex o inhmex ã ijarẽnh rãhã ho pa. Anẽ.

⁸ Hãmri nẽ kãm:

E pu axpên ma. Koja ka nẽ akanrêhã akra nẽ atãmnhwỳjaja ka mẽ ixkõt ri amnhĩ nhĩpêx o apa hã kot paj mẽ ato ixkra. Tã koja ja amã mex japêr hã kêt ka mẽ amnhĩ my kwỳt kã hkwy jakã. Nẽ koja mẽ akrajaja hapõi nẽ my ka mẽ mã mẽ ho anẽ nẽ mẽ kệp mẽmy kwỳt kã hkwy jakã. Mẽ piitã mẽ kot mẽ apê ixkra hã mẽ apumunh kaxyw kot kaj mẽ ã amnhĩ nhĩpêx anẽ.

Anhỹr o Apraãw mã kapër nhũm kuma nẽ mar xã hkõt hkra Ijak my kwỳt kã hkwy krãhta. Kormã hkarare ri. Kormã hã arĩgro pẽ 8 pix ri nhũm kệp hkwy krãhta.

—Tã nhũm Ijak hprêk nẽ hprõ nẽ hkra. Hãmri nẽ mã hkra Jako ho anẽ nẽ. Nhũm Jako hprêk nẽ mã hkra pẽ 12jê ho anẽ nẽ mẽ piitã mẽmy kwỳt kã hkwy jakar pa. Æ na pre mẽ pahpãr kraxjaja amnhĩ nhĩpêx anhỹr o pa.

⁹ —Jako hkrajê hõ na pre kệp Juje. Nhũm Juje htõjaja hipêêxã hkõt kamã gryk nẽ axtem nẽ mẽ urojê mã ho wênê nhũm mẽ kệp haprõ nẽ ma pyka pẽ Ejit wỳr o mõi. Amarĩ Ejit nhõ xwỳnhjê mã àpênh o pa kaxyw. Tã no nhũm Tirtũm arĩ tãnopxar rãhã ho hkõt pa. ¹⁰ Hãmri nẽ Ejit kãm mẽ kot homnuj xwỳnhjê nhĩhkra rũm hkapa nẽ tanhmã hkrã hto nhũm àhpumunh tỳx nẽ hamaxpêr mex nẽ. Jakamã nhũm Ejit nhõ xwỳnhjê nhõ pahĩ Paraohtija omu nẽ kãm hkĩnh nẽ. Kot tãm amnhĩ nhĩpêx nẽ àhpumunh tỳx kõt omu nẽ kãm hkĩnh nẽ. Hãmri nẽ amnhĩ ri kumẽ nhũm ãhkõ hã àpênh o pa. Kãm õrkwy pumu nẽ

Ejit nhõ xwýnhjê ho amnhĩptàr o pa.

11 —Rôm nhũm mē hpur kām mēmoj nhĩgrõt mex kêt nē nhũm mē kēp mē apkur xà hã mē òja ra ri mē kēp kryre. Ejit kamã nē jar Kanaã kamã nhũm mē apkur xà hã mē òja mē kēp hapêx par o mō. Nhũm mē piitã prãm xaj ra hiire nē kām prãm tỳx o pa nhũm mē panhĩgêjtaja hãmri prãm xaj tee ri amnhĩ xapkur xà hã mēmoj japêr.

12 —Tã nhũm Jakoja Ejit kām arĩ mē apkur xà hã mē ò rax ã harênh ma nē ma hwýr hkra hkwýjê rē. Mē panhĩgêjtaja nhũm ma mē hwýr mē kurē nhũm mē ma mē hwýr mra. Hãmri nē mē hwýr pøj nē mē kēp mēmo hy hkwý japrô nē ma akupým o mra. Wam mē mörta ã mē kēp mēmoj japrô nē ma akupým o mra.

13 —Tã nhũm mē kēp mēmo hy japrôr xwýnhja hapêx nhũm mē axte akupým mē hwýr mra. Hãmri nhũm mē htõ Juje mē kām amnhĩ to amnhĩrit nē kēp mē htõ hã mē kām amnhĩ jarē. Mē kot ra htyk ã hkamnhix tã nhũm mē kām amnhĩ jarē. Hãmri nhũm Paraohti mē kēp Juje htõ hã mē harênh ma.

14 —Tã nhũm Juje amnhĩ wýr hipêêxà Jako mē htãmnhwýjaja mē hã karõ nhũm mē piitã ma Ejit wýr hapêx. Mē kēp 75 nē ma Ejit kamã Juje hwýr hapêx hãmri nē kamã pa ho pa.

15 —Ã kot anhyr jakamã nhũm Jakoja ma Ejit wýr mō nē hpãnhã kamã pa ho pa. Tã hãmri kamã ty. Nhũm hkrajê piitã Ejit kām pa hãmri nē gaa nē htyk pa. 16 Hãmri nhũm mē hkanrêhã mē hkrajaja mē hamý nē ma akupým Kanaã hwýr krĩ pē Sikê hwýr mē o pa nē kamã mē hãgê. Na pre mē hkukamã finat Apraãw kot Amõr krajê pē kēnkre japrô nē kamã hprõ jaxà. Jakamã nhũm prem mýr pē ma hwýr mē o pa nē kamã mē

hãgê hãmri nē ma akupým Ejit wýr pa.

17 —Tã gaa nē rĩ ohtõ rax kumrêx o mō. Mē panhĩgêjtaja ohtõ rax kumrêx o mō. Hãmri nhũm Tirtũm kot Apraãw mã mē ò pyka jarênh xwýnhja nhũm kot mē kām òr kaxyw. 18 No nhũm Ejit nhõ pahi kot Juje ho mex xwýnhnta na pre ra ty nhũm axtem hpãnhã hõja mē ho amnhĩptàr o pa. Nē aa Juje jarênh mar kêt nē. Kormã pahi xar nyw kêt ri htyk jakamã nhũm mýr pē harênh mar kêt nē. 19 Hãmri nē hkwýjê homnuj o pa. Tanhmã mē panhĩgêjtê nhĩpêx to ho pa. Nē mē kām mē hkra my hapõx xwýnhjê hã amýnê. Mē hapõx nhũm mē kot pikap mē rēnh nhũm mē htyk kaxyw nhũm mē kām mē hã amýnê.

20 —Rôm nhũm finat Mojesja kato. Nē mexre. Hãmri nhũm katorxà Ejit nhõ xwýnhjê kot kēp hpĩr pymaj òrkwý kamã ri mē kēp ho hpimxur o pa hã mytwrý axkrunêpxi.

21 —Tã nhũm ra htýxre nhũm katorxà mē hipêêxà wa tee ri hkukamã hamaxpêr hãmri nē mē kot wa kēp hpĩr pymaj kumý nē ma o tē nē kaxyw à nhĩpêx nē nhýri gô nhĩpõk ri põ kamã ho amũxu. Tã nhũm Paraohti hkra nija ra gõx mã wýr mã tē nē ra omu hãmri nē amnhĩm kumý nē ma o tē nē ho hkra. 22 Jakamã nhũm Mojes Ejit nhõ xwýnhjê kamã hprêk. Hãmri nē mē àhpumunh xà hã kagà pumunh pa. Nē hihtýx nē mē kām kapêr kām hihtýx mex o pa.

23 —Tã hãmri ra hã amgrà pē 40 nē hapêx nhũm Mojes hamaxpêr nē ra kām amnhĩ kwý pē Ijaewjê pumunh prãm nē ma mē hwýr tē. 24-25 Hãmri nē htēm kôt ja wa omu. Nhũm Ejit nhõ xwýnhja Ijaewja homnuj o xa nhũm Mojes tēn tee ri hã omu nē hamaxpêr o: “E pa ma wa hwýr tē nē ixkwý müj ã Ejit nhõ xwýnhnta pĩ kē ixkwýjaja ja hã ixpumu nē Tirtũm kot mē hwýr

inhmēnh ã ixpumu. Ixte Ejit nhõ xwýnhjê nê mē kator kaxyw mē ja hã ixpumunh kurê kumrêx.”

—Anhÿr o hamaxpēr hãmri nê wa hwÿr tē nē amnhĩõja nê Ejit nhõ xwýnh pĩ. Tã no nhũm hkwyjaja kot hpĩr ã harēnh mar tã tanhmã amnhĩ kaxyw kãm hamaxpēr to hkêt nê. ²⁶ Nhũm apkati nhũm mēhõja war axkrut nê axte pijapu ho wa xa. Hamē wa kēp Ijaew. Jakamã nhũm Mojes akupÿm mē hwÿr tē nē tee ri axpēn tã wa omu nhũm ja kēp omnuj nê. Hãmri nhũm wa hwÿr tē nē axpēn nê wa kãm kapēr nê wa kãm: “Pa? Kwa war ajamē war apē Ijaew kēnã na ka wa ri axtem nê ã axpēn nhĩpēx anē.” Anē. ²⁷ Hãmri nhũm kot amnhĩ kaxyw hkryx xwýnhja kuma nê nhãm amnhĩ nê hkujate nê kãm: “Tk. Kwa xà apē mē inhõ pahi hã na ka ã wa inhmã akapēr anē? Nà apē mē inhõ pahi hkêt kēnã. ²⁸ Kot kaj inhĩpēx o te ate Ejit nhõ xwýnhnta nhĩpēx pyrã nê wa ixtõ hpĩr kêt nê.” Anē.

²⁹ —Hãmri nhũm tee ri kuma nê ra kãm ma nê Ejit rũm kator kurê kumrêx nê ma pyka pē Mijiã hwÿr mō nê kamã hpãnhã pa. Kamã hprõ nê hkra. Nhũm hkra myja wa hamēxkrut.

³⁰ —Tã nhũm Mijiã kamã pa hã axte hã amgrã pē 40. Hãmri nê mēmo arĩgro hã kapôt ã krã hakÿx pē Sinai kape hã ri pa nhũm Tĩrtũm kãm kapēr. Nom nhũm Mojes omunh kêt nê. ãm utĩ kaõk kamã kuwy hpõk pix pumu. ³¹ Amnhĩ jaēr pē ã kot amnhĩ nhĩpēx anhÿr ã omu hãmri nê amnhĩ tã hprĩ hã omunh kaxyw hwÿr tē nhũm Tĩrtũm kãm:

³² Pa Mojes? E ixpē Tĩrtũm na pa. Ixpē akukamã anhĩgēt Apraãw nhõ Tĩrtũm na pa. Nê ixpē Apraãw kra Ijak mē htãmnhwÿ jako wa õ Tĩrtũm na pa. Anē.

Hãmri nhũm tee ri kuma nê kãm ma xaj httertet tÿx nê. Hãmri nê umaj axte pĩ hpõkja wÿr rĩt kêt nê. ãm nhãm hkrã nê rĩt o xa. ³³ Hãmri nhũm Tĩrtũm kãm:

E kwa ixpē Tĩrtũm maati hã ixtã apijaãm ã aparkã kapa nê apar kēnh nê xa.

³⁴ Na pa ra ixkra Ijaewjaja Ejit kãm mē omu. Na ra Ejit nhõ xwýnhjaja ixpē mē homnuj tÿx kumrêx rãhã ho pa nhũm mē amnhĩ xà hã maj tee ri amnhĩ nhĩpēx. Pa ja hã mē omu nê inhmã mē hkaprĩ nê. Jakamã kot paj Ejit nhõ xwýnhjê nhĩhkra rũm mē kator pa. E ka kot paj mē hwÿr amē ka ma akupÿm mē hwÿr mō nê mē kurũm mē kator.

Anhÿr o kãm mē kaxyw karõ. ³⁵ Ra Ijaew kot Mojes hkaga tã nhũm mē kaxyw ãm nê ma akupÿm kot mē hwÿr mēnh kaxyw. Na prem ra omu nê hkaga. Te mē ate Jėjus kagaja pyrã nê hkaga. Jakamã nhũm pijapu xwýnhnta tee ri amnhĩ tã omu nê kamã gryk nê amnhĩ nê kãm kapēr nê kãm: “Tk. Kwa xà apē mē inhõ pahi hã na ka ã wa inhmã akapēr anē? Nà apē mē inhõ pahi kêt.” Anhÿr tã nhũm Tĩrtũm mē kaxyw tãm xãm. Kot mē ho amnhĩptar nê Ejit nhõ xwýnhjê rũm mē kator kaxyw. Ja kaxyw na pre pĩ hpõk kamã kãm kapēr nê mē kaxyw ãm.

³⁶ —Jakamã nhũm Mojes ma akupÿm Ejit wÿr mō nê mē kurũm hkwyjê kator nê ma mē o pa. Na pre mē ho mex nê Tĩrtũm nhÿ hã mē kãm aa mē kot mēmoj pumunh kêt kwÿ ho anhÿr o ri mē o pa. Ejit kamã nê mããnēn mē kot gõ xujanãr mã: “Gõ kamrêk” anhÿr xwýnhnta kamã. Nê kapôt ã mē kãm ã amnhĩ nhĩpēx anhÿr o mē o pa. Nê kapôt ã ri mē o pa ho ra hã amgrã pē 40.

³⁷ —Tã tãm na pre mē panhĩgētjê mã mēhõ hkukamã mē kãm tanhmã harēnh to nê mē kãm

harēnh o: “Koja Tirtūm nhǎrmã te ra mẽ akaxyw pa ixãm pyrã nẽ inhmǎr pẽ mẽ panhĩõ xãm. ý hã mẽ amã kapēr jarēnh o pa kaxyw nhũm nhǎrmã mẽ akaxyw ãm ka mẽ omu.”

—Anhǎr o ã Jejus kukamã harēnh anẽ. ³⁸ Na pre Mojes kapõt ã mẽ panhĩgêjtjẽ ho pa nhũm mẽ krã hakýx pẽ Sinaia wýr pa. Mẽ panhĩgêjtjaja hãmri hwýr pa nhũm Tirtūm kapēr o mẽ wrýk xwýnhja mẽ kaxyw Mojes mã kapēr nhũm ô ri mẽ kãm awjarẽ nẽ hã kagã. Mẽ kot mar nẽ hkõt amnhĩ nhĩpêx nyw o amnhĩ nhĩpêx o pa kaxyw nhũm mẽ kãm Tirtūm kapēr jarēnh o pa. Nẽ mẽ pajaxwýja. Mẽ pahte hkõt amnhĩ nhĩpêx nyw o amnhĩ nhĩpêx o papa kaxyw na pre mẽ pamã hã kagã. ³⁹ Tã no nhũm mẽ panhĩgêjtjaja Mojes ma nẽ ãm kuma nẽ hkaga kumrêx nẽ akupým Ejit wýr hkrã. ⁴⁰ Jakamã nhũm Mojes kormã nhýri mẽ kaxyw Tirtūm mã kapēr o ãm rôm nhũm mẽ wakre kamã htõ Arãw wýr mra nẽ kãm; “Kwa Mojes ra kot tanhmã amnhĩ to kãnã. Kot Ejit rũm mẽ pakator nẽ mẽ pahto mõr tã ra nhýri arĩk nẽ tanhmã amnhĩ to. Jakamã e. Kwa hpãnhã mẽ inhmã mẽmo karõ nhĩpêx pu mẽ ho panhõ sãnti kẽ tãm ma akupým Ejit wýr mẽ pahto pa.” Anẽ.

⁴¹ —Hãmri nhũm mẽ kuma nẽ mẽ kãm kãx o mõx krare karõ ho sãnti nhĩpêx nẽ mẽ kãm ãm. Hãmri nhũm mẽ axtem nẽ te ho Tirtūm nhĩpêx pyrãk o hipêx nẽ kãm ôwêhti hkwy pa nẽ kãm haxwý nẽ hã apku. Hãmri nẽ ã amnhĩ nhĩpêx anhýr ã amnhĩ pumu nẽ hkĩnh nẽ. ⁴² Hãmri nhũm Tirtūm tee ri ja hã mẽ omu nhũm ja kęp omnuj týt nẽ nhũm mẽ hkaga hpa. Jakamã nhũm prem amnhĩ krã hkõt ri myyti nẽ mytwrýre nẽ kanhêti karõ nhĩpêx nẽ te mẽ kot Tirtūm nhĩpêx pyrãk o hipêx o pa. Hãmri nẽ amnhĩ kaxyw kumã pix mã hamaxpēr o

pa hã amgrã xohtõ nẽ. Tã nhũm Tirtūm nhý hã kapēr jarēnh o mẽ pa xwýnhjaja tanhmã mẽ kãm kapēr to nẽ mẽ hã kagã. Te Tirtūm tãm mẽ kãm kapēr pyrãk o mẽ kãm kapēr nẽ hã kagã kot:

Pa mẽ apẽ Ijaewjaja? E mẽ inhma. Amnepẽm mẽ ate kapõt ã ri mẽ apa hã amgrã pẽ 40ta ã. Xà we inhmã na ka prem akrit kwý hpar o apa?

⁴³ Nã inhmã hkêt. Na ka prem axtem nẽ ri amnhĩ krã hkõt amnhĩm mẽmo karõ nhĩpêx nẽ hipêx o te mẽ ate pa inhĩpêx pyrãk. Pẽ kãm akrit kwý hpar nẽ ör o ri apa.

Mẽ anhõ mẽmo karõ nhĩpêxta mẽ ate amnhĩm hã hixi pẽ Mõrok mẽnh xwýnhja ka pre htem à kamã amnhĩ kõt ho apa.

Nẽ amnhĩm kanhêti karõ nhĩpêx nẽ hã hixi mẽ nhũm kęp Repã. Ka mẽ ixkuhpa hã wa kęp mẽ apãm ã harēnh o ri apa.

Tã ã mẽ ate amnhĩ nhĩpêx anhýrja myrapẽ kot paj pãnhã nhýhým mẽ arẽ.

Koja mẽ akutã amnhĩ xunhwýr xwýnhjaja mẽ apynẽ nẽ ma pyka pẽ Papirõn rũm hamũ mẽ ato hapêx ka mẽ amarĩ mẽ kãm axãpênh rũnh o ri apa kãm ga. Anẽ.

Ã na pre Tirtūm mẽ panhĩgêjtjẽ mã kapēr anẽ nhũm ý hã kapēr jarēnh o pa xwýnhja mẽ kãm hã kagã.

⁴⁴ —Tã nhũm mẽ panhĩgêjtjaja kormã kapõt ã ri pa ri amnhĩ kõt mry kã ho ixkre ho pa. Tirtūm mã kapēr xã hã ixkreja nhũm prem amnhĩ kõt ri o pa. Mẽ kot kãm “Tirtūm nhõrkwy kaàkre” anhýr xwýnhja. Tirtūm kot mẽ kãm hã karõ xã hkõt nhũm mẽ hipêx nẽ amnhĩ kõt ri o pa. Na pre Tirtūm hprĩ hã Mojes mã tanhmã kot hipêx to hã karõ nhũm mẽ hkõt hipêx nẽ amnhĩ kõt ri o pa.

⁴⁵ —Tã nhũm Mojes ty nhũm hpãnhã Jojueja amnhĩ kõt mẽ o

pa. Ma Tirtûm kot mē kām pyka mex nhôrta wÿr Mojes mÿr pē mē o pa. Hāmri nē hwÿr mē o pōj nhûm Tirtûm mē nē mē kot ra kamā mē pa ho mē pa xwÿnhjê japôj nhûm mē pānhā kamā pa ho pa. Nē amnhī kôt Tirtûm nhôrkwÿ kaākreta o pa. Rāhā nhûm finat Tawija mē hpānhā mē ho amnhīptā. ⁴⁶ Na pre Tirtûm Tawi kot tanhmā amnhī nhîpêx to ho pa hā omu nē kām hapê nē. Jakamā nhûm Tawi kām kapêr nē kām: “Pa Tirtûm? Kwa xà kot paj amā ixkre mex ô nhîpêx nà? Mē ixpê Ijaewjaja mē ixte kamā amā amex o amex ã ajarênh o ixkrī kaxyw pa hipêx. Xà kot paj amā hipêx?” Anhÿr tā no nhûm Tirtûm kormā kām ja prām kêt nē. ⁴⁷ Jakamā nhûm Tawi hkra Sarumāwja hipêêxà mÿr pē hpānhā kēp mē ô pahi nē kām hipêx. ⁴⁸ Nom xà na hte Tirtûm maatija mē pahte kām panhīhkra ho ixkre nhîpêx xwÿnh kamā hkrī? Nà kaxkwa kamā na hkrī xà. Na pre ra Tirtûm nhÿ hā kapêr jarênh o pa xwÿnhja Tirtûm kot tanhmā mē pajamār to ho pa hā kagà nē hā kagà ho:

⁴⁹ Na pa hte kaxkwa rûm pyka hkôt mē piitā mē hamār mex o ixkrī.

Tā tanhmā kot paj amnhī to nē mē ïhkra ho mē kot inhmā ixkre nhîpêxta wÿr axà nē kamā ixpa ho ixpa?

⁵⁰ Nà ixte mēmoj piitā ho ixkator xwÿnh kēnā kot pa kêt ã amnhī nhîpêx anē. Anē.

Nhûm pre ã Tirtûm amnhī tā mē kām kapêr anē nhûm ÿ hā kapêr jarênh xwÿnhja ô ri mē pamā hā kagà.

⁵¹ —E kwa mē inhma ixkwÿjaja. Mē akrā hihtÿx kumrêx jakamā mē amā Tirtûm kapêr mar prām kêt. Na ka htem mē panhîgêjtê pyrà nē amnhī nē Tirtûm Karô kaga nē kapêr mar kêt nē. ⁵² Na pre hte Tirtûm nhÿ hā kapêr o mē pa

xwÿnhjaja mē panhîgêjtê hwÿr mra nē mē kām kapêr jarênh o ri mē hkôt pa. Tā nhûm mē hkaga nē mē hipêx kati ho pa. Na pre htem Jejus wÿr k kukamā mē kām: “E koja nhÿrmā kot Tirtûm kapêr mar nē hkôt amnhī nhîpêx mex rāhā xwÿnh maatija mē pahwÿr wÿr.” Anhÿr o mē kām harênh o pa. Tā no nhûm mē kām ja mar prām kêt jakamā axtem nē hā mē hpar o pa. Mē kot mē kām Jejus jarênh o mē pa xwÿnhjê hpar o pa. Tā nhûm tam mē pahwÿr wÿr ka mē omu nē mē kot amnhī nhîpêxta pyrà nē hā amÿnê nhûm prem mē amā kupi.

⁵³ —Tirtûm kapêr o mē wÿr k xwÿnhjaja kot Tirtûm nhÿ hā tanhmā mē pahte amnhī nhîpêx to ho papa hā mē pamā karô nhûm mē ate mar tā mē apê hprām nōkati. Nē ama nē ãm ama nē hkôt amnhī nhîpêx o ri apa hkêt nē. Anē.

Mē kot Estewāw pîr ã mē harênh Rukre 21.16-19, 23.34; Atre 22.20

⁵⁴ Hāmri nhûm juistijaja tee ri Estewāw xujarênh ma nē kamā gryk tÿx nē kām kapêr punuj nē. ⁵⁵ Nom nhûm Tirtûm Karôja tanhmā hkrā hto nhûm kām mē uma hkêt nē. Hāmri nē kânhmā rît nē kaxkwa pumunh o xa nē kamā Tirtûm rûm hirā rax pumu. Nhûm Jejus Tirtûm nhîhkô hā xa nhûm omu nē hkînh nē mē kām:

⁵⁶ —Kokÿÿ. Na kaxkwa axkjê nhûm kamā Tirtûm nhÿ pa omu. Nhûm kuri kot mē pahwÿr mēnh xwÿnh Jejusja xa. Hêxta waa nē. Nà na pa jarāh wa omu nē ixkînh tÿx kumrêx. Anē.

⁵⁷ Hāmri nhûm mē kumā nē kamā gryk tÿx nē. Hāmri nē kām mar prām kêt nē kēp amnhī jamak pro. Hāmri nē gryk xàj àmra htÿx nē hwÿr hprôt ⁵⁸ nē unē nē krī pē ho kato nē ma o tē nē nhÿri o xa. Hāmri nē kēn o htak o hpîr kaxyw amnhī nhînôkà hkwrÿ nē mēhō my pē Sawti mā kugô nhûm mē kām hamÿ. Hāmri nhûm mē kēn rûnh

kwÿ jamÿnẽ o mra nẽ Estewãw wÿr rẽnh prẽprẽk o kuhẽ. Nẽ ho ì kamã htak nẽ hkrãx pẽ htak. ⁵⁹ Hãmri nhũm ra htyk kaxyw nẽ Jejus mã amnhĩ jarẽ nẽ kãm:

—Pa Pahihti Jejus? E koja ixkarõ awÿr api ka ixto amnhĩptã. Anẽ.

⁶⁰ Hãmri nẽ hkõn krã ho tẽm nẽ nhÿ nẽ axte kãm amnhĩ jarẽ nẽ mẽ kot hpĩr xwÿnhjẽ nẽ kãm kapẽr nẽ kãm:

—Kwa Pahihti. Mẽ kot ixpĩr tã kwa tanhmã ixtã mẽ ho hkêt nẽ.

Anhÿr o mẽ nẽ Jejus mã kapẽrja kõt ra ty.

8

Mẽ kot Estewãw jaxàr ã mẽ harẽnh

Atre 22.4, 26.9-11

¹⁻² Hãmri nhũm mẽ kot Jejus kõt amnhĩ nhĩpẽx xwÿnhjaja Estewãw wÿr mra nẽ htyk kãm omu nẽ hkaprì nẽ. Nẽ mur nẽ kumÿ nẽ ma o mõi nẽ haxã. Nom nhũm Sawtija mẽ kot hpĩr ã omu nhũm ja kãm mex nẽ.

Sawti kot Jejus kwÿjẽ nhĩpẽx kati ho pa hã harẽnh

Atre 1.8

Tã nhũm Jerujarẽ kamã Ijaew-jaja mẽ kot Jejus kõt amnhĩ xunhwÿr xwÿnhjẽ homnuj tÿx o pa. Hãmri nhũm mẽ tee ri amnhĩ kukamã hamaxpẽr nẽ mẽ hkwyjaja mẽ umaj hapõj nẽ ma pika hkwy hkõt hpigrãnh pa. Mẽ hkwyjaja Jutej wÿr ma pa nhũm mẽ hkwyjaja Samar hwÿr ma pa. ã na prem mẽ umaj nhÿhÿm hpigrãnh par anẽ. ãm Jejus nhÿ hã mẽ ahkre xwÿnh maati pixjaja na prem Jerujarẽ kamã arĩk nẽ nhÿhÿm mõi kêt nẽ. Simãw Pẽtre nẽ Juãw nẽ Xiakre nẽ Andre nẽ Firipti nẽ Patoromew nẽ Matẽwre nẽ Makre nẽ Tomas nẽ Xiakre hõja nẽ Simãw õ nẽ Maxitreja. ãm jajaja pix na prem arĩk.

³ Nhũm Sawti haxwÿja Jejus kõt mẽ kot amnhĩ xunhwÿr xwÿnhjẽ

homnuj o pa. Mẽ kot Jejus kaga hprãm xaj tanhmã mẽ hipẽx to ho pa. Na pre hte mẽ õrkwÿ hwÿr agjẽ nẽ mẽ unẽ. Mẽmyjẽ pynẽ nẽ mënijẽ pynẽ nẽ ma mẽ o mra nẽ mẽ hagiẽnh xã kamã mẽ hagiẽ. Mẽ urak nẽ kęp Ijaew tã ã mẽ hipẽx anhÿr o pa.

⁴ Tã nhũm mẽ umaj Jerujarẽ rũm pika hõ hwÿr mẽ hpigrãnh xwÿnhjtaja amarĩ pika hkwy hkõt ri pa hkêt nẽ. Na prem ma mẽ piitã mẽ kãm Jejus kapẽr jarẽnh o ri mẽ hkõt pa. Kęp Tirtũm kot mẽ pakaxyw ãm xwÿnh ã harẽnh rãhã ho ri mẽ hkõt pa.

Wajaga kot amnhĩ tã Firipti mar ã harẽnh

Juãw 2.23-24

⁵⁻¹² Tã nhũm Firipti haxwÿja ma mõi. Ma krĩ pẽ Samar hwÿr mõi nẽ kamã mẽ kãm Tirtũm kot mẽ pakaxyw ãm xwÿnhjtaja jarẽnh o pa. Samar kamã na pre wajaga Simãwti ri Samar nhõ xwÿnhjẽ hkõt mẽ no kupyrrãhã ho ri mẽ hkõt pa. Nẽ àhpumunh tÿx ã amnhĩ to jarkrar o ri pa. Jakamã nhũm mẽ kot amnhĩ nhĩpẽx ã omu nẽ kamã no pyma nẽ. Nẽ htÿx ho ãm hãmri kot amnhĩ jarẽnh ã hkamnhĩx. Jakamã nhũm pre mẽ kãm tanhmã ri amnhĩ to hẽx to ho pa pẽ mẽ no kupyrrãhã ho ri pa nhũm mẽ amnhĩ jaer pẽ omu. Mẽ kot amnhĩ to hkryre xwÿnhjaja nẽ mẽ kot amnhĩ to rũnh xwÿnhjaja nhũm mẽ amnhĩ jaer pẽ kot tanhmã amnhĩ nhĩpẽx to hã omunh o hkõt pa. Nẽ ri axpẽn mã harẽnh o:

—Kokÿÿ. Wajagaja àhpumunh tÿx kumrẽx. Tirtũm nhÿ hã mãn te ã amnhĩ nhĩpẽx anhÿr o pa nã? Mãn pre Tirtũm kãm àhpumunh xã hkwy gõ nhũm ÿ hã ã amnhĩ nhĩpẽx anhÿr o pa. Anẽ.

Hãmri nẽ hkõt hamaxpẽr o ri hkõt amnhĩ nhĩpẽx o pa.

Tā nhūm Firipti mē ō krī hwÿr mō nē mē kām Jejus Kris jarēnh o ri mē hkôt pa nē mē kām:

—Jesuw kēp Tirtūm kot mē pahwÿr mēnh xwÿnh jakamā kot kaj mē amnhī kaxyw hkôt ajamaxpēr nē hkôt amnhī xunhwÿ nhūm Tirtūm hā mē apumu nē mē ato hkra. Anē.

Hāmri nē Tirtūm nhÿ hā akupÿm tanhmā mē kute xwÿnhjē ho mex to ho pa. Mē ī kamā mē htyk xwÿnhjaja nē mē hyk o mē pa xwÿnhjaja nhūm mē ohtō nē akupÿm mē ho mex o pa. Nē mē hkwyjē nē mēkarōmnuti hkwy jano nhūm mē àmra htÿx o mē hkaga nē ma mē kurūm hapōx nē mra. Ā Firiptija Jejus nhÿ hā mē ho mex o pa anē nhūm mē piitā ja hā omu nē kapēr ma nē hkīnh nē. Nē kapēr mar tÿx nē hkôt hamaxpēr. Jao wajaga Simāwti kaga nē hpānhā amnhī kaxyw Jejus kôt pix mā hamaxpēr nē hkôt amnhī xunhwÿ. Hāmri nhūm Firipti ja hā mē omu nē mē hkrā kumrā. Mēmyjaja nē mēnijaja nē mē piitā mē hkrā kumrā. Ra mē kot Jejus kôt amnhī xunhwÿr ā mē piitā mē kām amnhī to amnhīrīt kaxyw nhūm mē hkrā kumrār pa.

¹³ Hāmri nhūm wajaga Simāwti haxwÿja Jejus kapēr ma nē mē urāk nē amnhī kaxyw hkôt hamaxpēr nē hkôt amnhī xām nhūm Firipti hkrā kumrā. Hāmri nhūm hkīnh nē Firipti hkôt ri pa. Nē aa mē kot mēmoj pumunh kēt kwÿ ho anhÿr o ri pa hā omu nē kamā no puma ho hkôt ri pa. Nē kot Tirtūm nhÿ hā akupÿm mē ho mex ā omu nē tee ri hamaxpēr.

¹⁴ Tā hāmri nhūm Jerujarē kamā Jejus nhÿ hā mē ahkre xwÿnh maatijaja Samar nhō xwÿnhjē jarēnh ma. Ra mē kot Tirtūm kapēr kôt amnhī nhīpēx ā mē harēnh ma nē hkīnh nē. Hāmri nē ma mē hwÿr Simāw Pētre mē Juāw wa kumē. ¹⁵⁻¹⁷ Hāmri nhūm wa ma mē

hwÿr wa mō nē pōj. Hāmri nhūm Firipti wa omu nē wa kām krī nhō xwÿnhjē jarē nē wa kām:

—Nā na pa pre mē kām Jejus kapēr jarē nhūm mē inhma nē hkôt amnhī xunhwÿ. Jakamā pa pre mē hkrā kumrā. Nom na kormā Tirtūm Karōja mē hkarō mā gjēx kēt nē. Anē.

Hāmri nhūm wa mē harēnh ma nē mē himōk ā wa ihkra jaxwÿr o ri mē hkôt mra. Ja kôt nhūm Tirtūm Karō mē hwÿr wry nē mē hkarō mā gjēx pa. ¹⁸⁻¹⁹ Hāmri nhūm wajaga Simāwja mē amnhī tā wa omunh o xa nē hamaxpēr o:

—Kokÿÿ. Kwa wa kot mē hā ihkra jaxwÿrja kôt na hte Tirtūm Karō mē hkarō mā agjē. Hēxta waa nē. Inhmā ā mē hipēx anhÿr o ri ixpa hprām tÿx. E pa ixkăxpore hkwy jamÿ o tē nē wa kām kugō kē wa tanhmā ixto pa wa urāk nē ā mē hipēx anhÿr o ri ixpa. Nā kot paj anē. Anē.

Hāmri nē wa hwÿr tē nē wa kām:

—E ota ixkăxporeta. Kwa amnhīm apy nē hpānhā tanhmā ixto pa war apyrā nē mē hā inhīhkra jaxwÿr o ri mē hkôt ixpa kē Tirtūm Karōja mē hkarō mā agjē. Inhmā ja ho anhÿr prām tÿx. Anē.

²⁰⁻²³ Hāmri nhūm wa tee ri ā kapēr anhÿrja ā omu nhūm Pētre kām:

—Tk. Kwa ajamaxpērja mex kēt. Xā na htem kăxpore ho Tirtūm mā amnhīrer pē ŷ hā mē ho hwÿr o pa nhūm Karō mē hwÿr agjē? Nā na htem kăxpore ho Tirtūm Karō japrōr kēt nē. Kot kaj wa ixpyrā nē ā mē hipēx anhÿr kēt nē. Ajamaxpērja mexre hā. Kormā ate Tirtūm kôt amnhī xām tÿx kēt jakamā na ka atÿx ā ri ajamaxpēr anē.

—Nā ka ā wa ixte Tirtūm nhÿ hā mē hipēx anhÿr ā wa ixpumu nē amā wa ixpyrā nē ā mē hipēx anhÿr o ri apa hprām xāj ajamaxpēr punuj nē. Nhūm ajamaxpēr punuj te kot apa hā apyr ka

tee ate kêp amnhî kjênh pyrâk. Kwa tokyx ajamxpêr punuj ã amnhî pumu nê akaprî nê tokyx hkaga. Hâmri nê amnhî to Tirtûm wý kê amnhî katut kôt ajamxpêr punujja mē ka axte ã ajamxpêr anhÿr kêt nê. ã mē hamxpêr punuj anhÿr xwÿnhjaja koja mē nhÿrmã ma kuwy hwÿr pa. Anê.

²⁴ Hâmri nhûm tee ri amnhî tâ kuma nê hkaprî nê wa kãm:

—Kwa xà wehe? Tô tokyx ixto Tirtûm wý kê ã ijamxpêr anhÿrja mÿrapê hwÿr inhmēnh kêt nê. Anê.

²⁵ Tã nhûm Simãw Pêtre mē Juãw wa Samar nhõ xwÿnhjê mã Pahihti Jejus kapêr jarēnh pê ho mē ahkre hãmri nê ma akupÿm Jerujarē hwÿr mō. Ma pyka pê Samar hkôt mē kãm Jejus kapêr jarēnh o ma akupÿm mō.

Firipti mē Exiop nhõ xwÿnh wa harēnh

Ijais 53.7-8

²⁶ Hâmri nhûm Firipti arî Samar kamã arîk. Hâmri nhûm Tirtûm kapêr o mē wrÿk xwÿnhja hwÿr wrÿ nê kãm:

—Pa? E ot pa awÿr wrÿ nê tē. Nã kēr ka tokyx akato nê ma mō nê Jerujarē rûm kãnhmã Kas wÿr pry kahpêr ta nê hã juk nê ma hã mō. Kapôt ã pry nōrta kahpêr ta nê hã mō. E kwa tokyj.

Anhÿr o kãm kapêr hãmri nê ma akupÿm tē nê kaxkwa hwÿr api.

²⁷ Hâmri nhûm Firipti kuma nê kato nê ma hwÿr mōr kurê kumrêx. Mōõ hãmri nê pryja kahpêr ta nê hã mō.

Hâmri nhûm ra mēhõ myja mō. Exiop nhõ xwÿnh na pre. Exiop kamã mēõ pahi na pre niti. Hixi pê na pre Kãtatre. Nhûm pry hã mōr xwÿnhja kêp kãm kãxpore jamãr o pa xwÿnh. Exiop kamã te kêp mē õ kōwenatõ pyrâk. Tã kot Tirtûm mã mex o mex ã harēnh kaxyw ma Jerujarē hwÿr mō. ²⁸ Hâmri nê akupÿm Exiop wÿr kormã mō. Õ

pãr kãm nhÿ nê Tirtûm kapêr ã kagã htûm kamã kapêr o mō. Tirtûm nhÿ hã kapêr o pa xwÿnh pê Ijais kot Tirtûm kapêr ã kagã htûmja nhûm kamã kapêr o mō. ²⁹ Hâmri nhûm Tirtûm Karõ Firipti mã harē nê kãm:

—E mēhõ mÿj wÿr aprõt nê tē nê hã ajêt nê ma hkôt tē. Anê.

³⁰ Hâmri nhûm kuma nê ma hwÿr hprõt nê hã ajêt nê kot kagã kamã kapêr ã kuma. Ijais kot Tirtûm kapêr ã kagã htûm kamã kapêr ã kuma nê kãm:

—Pa? Mãn ka aprî hã ate kamã akapêr xwÿnhnta ma nã? Anê.

³¹ Hâmri nhûm kãm:

—Nã ixte maare hã. Mēhõ kot hprî hã inhmã harē pa ixprî hã kuma? Xãt ka ixwÿr api nê ixri nhÿ nê aprî hã inhmã harēnh o ixkôt mō nã? Anê.

Hâmri nhûm kuma nê hwÿr api nê ìhkõ hã nhÿ nê kagãta pumunh o nhÿ. ³² Nhûm hã kagã kot:

Na htem ôwēhti par kaxyw nhûm amarî mē kãm akryk kuhê.

Nê mē kot kêp hkî jakãr kaxyw nhûm ma anê nê amarî mē kãm akryk kuhê.

Tã na pre mēhõja ôwēhti kot amnhî nhîpêx pyrâk o amnhî nhîpêx.

Jakamã nhûm mē kot tanhmã hipêx to htã no nhûm arî mē kãm akryk xa. Amnhî nê tanhmã mē kãm kapêr punuj to hkêt nê. ãm arî mē kãm xa.

³³ Na prem homnuj tÿx nê ri hipêx kati rax nê.

Aa kot tanhmã amnhî tomnuj to hkêt kumrêx tã nhûm mē ã hipêx anê nhûm mēhõ yr pê tanhmã nê mē kãm kapêr to hkêt nhûm prem kupî.

Nhûm amnhî kanrêhã hkra hkêt rãhã ty. Jakamã kot puj mē hkrajê nhîi mar kêt nê. Kra hkêt rãhã htyk kênã. Anê.

³⁴ Nhûm pre ã Exiop nhõ xwÿnh Tirtûm kapêr ã kagã htûm kamã

harēnh anē. Hāmri nē tee ri ā kot mēhō jarēnh anhÿrja kukamā hamaxpēr nē hā Firipti kukja nē kām:

—Kwa aprī hā inhmā mēhōja jarē. Mēhō na prem ā hipêx rax anē? Xà kot kagā xwÿnhnta na prem ā hipêx anē nà xà nhām mēhō na prem ā hipêx anē? E kwa aprī hā inhmā harē pa ā mē kot hipêx anhÿr xwÿnh kôt omu. Anē.

³⁵ Hāmri nhūm kām:

—Tōe kot paj amā harē. Nà Jejus na prem ā hipêx anē nhūm prem hā kagā. Anē.

Hāmri nē hprī hā kām kot kamā harēnh xwÿnhnta jarē. Jejus kot tanhmā mē panē amnhī nhīpêx toja nhūm hprī hā kām harēnh o hkôt mō.

³⁶ Hāmri nhūm wa kormā mō nē pry htā himō hānh mō nhūm Exiop nhō xwÿnh omu nē Firipti mā kām:

—E mÿj gō mÿj nō. Xà kot kaj kamā ixkrā kumrā nà? Anē.

³⁷ Nhūm kām:

—Nà kot kaj amnhī kaxyw Jejus Kris kôt ajamxpēr nē hkôt amnhī xām hā kot paj akrā kumrār kurē kumrēx. Anē.

Hāmri nhūm kām:

—Tÿ. Kēp Tirtūm Kra kēnā kot paj kēt amnhī kaxyw hkôt ijamxpēr kēt. Anē.

³⁸ Hāmri nē pàr o mrar xwÿnh mā anē nhūm pàr o nō nhūm wa kato nē himō hwÿr wrÿ nhūm Firipti hkrā kumrā. Kot Jejus kôt amnhī xām ā hkrā kumrā. ³⁹ Hāmri nē wa akupÿm api nhūm Tirtūm Karō Firipti mÿ nē ma nhÿhÿm o mō nhūm Exiop nhō xwÿnhja axte omunh kēt nē. Hāmri nē ma akupÿm papxā hwÿr mō. Ra kot Jejus kôt amnhī xām jakamā hkñnh nē ma akupÿm mō.

⁴⁰ Rôm nhūm Firipti krī pē Ajôt kamā pōj. Tirtūm Karō kot Exiop nhō xwÿnh pē kator nē tanhmā ho nē Ajôt wÿr o mō hāmri nē kamā kumē. Hāmri nhūm mē kām Jejus kot tanhmā mē panē amnhī nhīpêx

to hā harēnh pē ma krī hō hwÿr mē kām ujarēnh anhÿr o pa rāhā krī pē Sejurej wÿr mō nē pōj.

9

Sawti kot Jejus kôt amnhī xām ā harēnh

Atre 22.6-11, 26.12-18

¹ Rôm nhūm Sawtija xatā Jeru-jarē kamā Pahihti Jejus kôt mē kot amnhī xunhwÿr xwÿnhjaja tanhmā mē homnuj tÿx to ho ri mē hkôt pa. Kām mē himex par prām jakamā na pre hte ā amnhī nhīpêx anhÿr pix o pa. Tā ra hamaxpēr nē ma patre maati hwÿr tē nē mē hā amnhī jarē nē kām:

² —E ot pa awÿr tē. Kwa inhmā kagā nhīpêx pa kupy nē ma krī pē Tamas kām mē pahpē Ijaew xàptār tūmrejē hwÿr o mō nē mē kām kugō. Kē mē kamā harē nē omu hāmri nē hkôt inhīhkra kamā Jejus kôt mē kot amnhī nhīpêx xwÿnhjē jagjē. Mēnijaja nē mēmyjaja. Hāmri pa mē unē nē man akupÿn awÿr mē o mō ka mē omu nē kam tanhmā mē hipêx to. Anē.

Hāmri nhūm kuma nhūm ja kām mex nē. Hāmri nhūm kām kagā nhīpêx nē kugō nhūm kupy nē hkôt mē pa xwÿnhjē mē ro hā ma Tamas wÿr mē hwÿr mōr kurē kumrēx.

³ Mōō mē ra hpōx o mōr mē nhūm puh kaxkwa rūm hirā rax kumrēx wrÿ nē hā ajēt nhūm hipôk ri xa. ⁴ Hāmri nē tee ri omu nē kām ma xāj pykap tēm nē akryk nō. Hāmri nhūm kaxkwa rūm mēhō kām kapēr nē kām:

—Pa Sawti? Hēxta waa nē. Kwa mon ka hte ixtomnuj tÿx o ri apa? Anē.

⁵ Hāmri nhūm amnhī jaēr pē kuma nē kām:

—Kwa mē atō na ka ā inhmā akapēr anē pahihti? Anē.

Hāmri nhūm kām:

—Kwa nhūm ixpē Jejus ixte amā ixkapēr kēnā. Pa na ka hte ixpē ixkôt mē kot amnhī xunhwÿr xwÿnhjē nhīpêx kati ho apa. Jao te

pa ate ixtomnuj tỳx pyrək. ⁶ Nom kot kaj axte ā amnhī nhīpēx anhỳr kēt kumrēx. E kànhmā xa nē māmri ma krī hwỳr tē. Kot kaj hwỳr pōj nhūm mēhō awỳr tē nē mēmoj tã amā karō ka ama nē hkôt amnhī nhīpēx. Anē.

⁷ Nhūm pre ā Jejus Sawti mã kapēr anē. Nhūm hkôt mē pa xwỳnhjaja mēmoja ma no âm hpri mar nē mēmoj pumunh kēt nē. Hāmri nē tee ri hamaxpēr nē kãm ma xàj akryk kapēr kēt kumrēx nē kuhē. ⁸ Hāmri nhūm Sawti kànhmā xa nom rīt kēt nē tee ri rīt mã nhūm mē hpa hã kupy nē ma krīm o mō. ⁹ Nē Tamas wỳr o pōj nē nhỳri mēhō nhōrkwỳ hwỳr ho axà nhūm kamã nohkre nē arī hkrī. Tee ri amnhī kukamã hamaxpēr o hkrī. Nē apkur kēt nē hkôm kēt o ra hã apkati axkrunēpxi.

¹⁰ Tamas kamã na pre mēhō my pē Ananīsja pa. Kot Jejus kôt amnhī xunhwỳr xwỳnhjē hō na pre. Jakamã nhūm Jejus hwỳr kato nē kãm kapēr. Te hpimtir kãm hwỳr kator nē kãm kapēr pyrà nē kãm:

—Pa Ananīs? Anē.

Nhūm kãm:

—Ỗ? Ot pa xa. Mo na Pahihti? Anē.

¹¹ Nhūm Jejus kãm:

—E kēr ka akato nē ma mē kot kãm: “Pry katāt” anhỳr xwỳnhnta wỳr tē. Hāmri nē kamã jut nhōrkwỳ japēr. Kamã na Tas nhō xwỳnh pē Sawtija hkrī. Na no hkre nē inhmã amnhī jarēnh o hkrī. Ka hwỳr axà nē omu. ¹² Ate hwỳr atēm nē inhỳ hã hã anhīhkra xir nhūm akupỳm rīt mex kaxyw na ato amỳti. Jakamã e ma hwỳr tē nē ā hipēx anē. Anē.

¹³ Hāmri nhūm Ananīs tee ri kuma nē kãm Sawti puma ho amnhī kamã kahak nē. Hāmri nē kãm:

—Kwa nà Pahihti. Tãm na xep hte Jerujarē kamã mē kot amnhī kaxyw akôt mē hamaxpēr xwỳnhjē nhīpēx kati ho pa. Pa ra mē hã

harēnh ma. ¹⁴ Tã na xep ra jar Tamas wỳr pōj. Patre krãhtũm kapēr nhỳ hã kot mē ixpē akôt amnhī xunhwỳr xwỳnhjē pynēnh nē ma akupỳm hwỳr mē ixto mōr kaxyw. Tãn ka ri hwỳr ijano. Kwa nà ri ixto anhỳr kēt nē Pahihti. Anē.

¹⁵ Nhūm Jejus kãm:

—Nà māmri ma hwỳr tē. Ra ixte amnhī kaxyw âm kēnã. Jakamã koja ā mē anhīpēx anhỳrta hpãnhã ma mē piitã mē kãm ixkapēr jarēnh o pa. Mē apē Ijaew mã nē mē anhō pahi hkwỳjē mã nē mē kēp Ijaew kēt xwỳnhjē mã. Koja mē piitã mē kãm ixkapēr jarēnh mex o ri mē hkôt pa. ¹⁶ Koja mē ixtã homnuj tỳx nē nhūm amnhī xà htỳx kamã hamak o pa. Nom kot paj ixpri hã mē kot tanhmã ixtã hipēx to hkukamã kãm ixujarēnh pa nhūm amnhī kukamã amnhī jarēnh ma. E tokyx māmri ma axãmnhix hwỳr tē. Anē.

¹⁷ Hāmri nhūm kuma nē kato nē ma Sawti hwỳr htēm kurē kumrēx. Hāmri nē ixkre hwỳr axà nē omu nē hkrã hã ihkra xi nē kãm:

—Pa Jejus kôt ixtō Sawti? E na Pahihti Jejus awỳr inhmē pa awỳr tē. Pry kahti ri kot awỳr kator xwỳnhnta. Tã akupỳm arit nhūm Tirtũm Karō kot akarō mã àr kaxyw na awỳr inhmē pa tē. Anē.

¹⁸ Hāmri nhūm mēmoj te tep kà pyrækja Sawti no rũm hapōj nē rōrōk nhūm akupỳm rīt mex kurē kumrēx. Hāmri nē kànhmā xa nhūm Ananīs hkrã kumrã. Ra amnhī kaxyw Jejus kôt hamaxpēr ā hkrã kumrã. ¹⁹ Hāmri nhūm nhỳ nē apku nē akupỳm hihtỳx.

Sawti kot Tamas kamã Jejus kapēr jarēnh

Sikũn Korīt 11.22-23

Nhūm Sawti Tamas kãm mē kot Jejus kôt amnhī xunhwỳr xwỳnhjē hkôt amnhī xãm nē mē hkôt ri pa nē tokyx ma akupỳm mōr kēt nē. ²⁰ Kormã mē hkôt ri pa nē Ijaew nhō Tirtũm kapēr o mē ahkre xà hã

ixkre hwÿr mra nê kamã mê kãm Jejus kapêr jarê. Kêp Tirtûm Kra hã harênh o kuhê. ²¹ Hãmri nhùm mê amnhĩ jaêr pê â harênh anhÿrja ma nê tee ri hamaxpêr nê axpên mã:

—Kokÿÿ. Kwa tãm na xep pre Jerujarê kamã amnhĩ kaxyw Jejus kôt mê kot amnhĩ xunhwÿr xwÿnhjê homnuj tÿx o pa. Tã xep jar kot mê hkwÿjê pynênh nê ma mê o môr nê Jerujarê kamã patre krãhtûmjê mã mê ôr kaxyw na pre man mê pahwÿr mô. Tã ra tanhmã hamaxpêr to nê axtem nê mê pamã Jejus kapêr jarênh o mê pajahkre ho pa. Anê.

²² Hãmri nhùm Sawti arĩ Tamas kãm Ijaew mã tanhmã Jejus jarênh to kamã hihtÿx o mê hkôt pa nê mê kãm:

—Nã Jejus Krisja na pre Tirtûm mê pakaxyw âm nê mê pahwÿr kumê. Âm hãmri na pa mê amã ja jarê. Anê.

Hãmri nhùm mê kuma nê tee ri kutã tanhmã kapêr to hkukamã hamaxpêr.

²³ Tã ra hã apkati sohtô nê nhùm Tamas kãm Ijaew kwÿjaja kot Sawti pÿr kaxyw hã axpên ma. ²⁴ Hãmri nhùm mêhõja hã ama nê Sawti hwÿr tẽ nê kãm mê harê nê kãm:

—Kwa Sawti kêr ka axkãm ajamak rom. Na mê pahkwÿjaja atã amÿnê. Na mê ra krĩ puhã kahê xã hã hakwakre piitã hamãr ho kuhê. Kot kaj nhÿhÿm akato nhùm mê apumu nê apynê nê apĩ. Anê.

²⁵ Jakamã nhùm kamãt nhùm Sawti hkôt ri mê pa xwÿnhjaja kawã rax ô mÿ nê hwÿr o tẽ nê kãm âm nhùm hwÿr axã nê nhÿ. Hãmri nhùm mê hkagrĩ nê kên o krĩ puhã kahêja nhĩrô pê ho wrÿ nhùm mê kêp kato nê ma mô.

Sawti kot Jejus kwÿjê hkôt pikamênh â harênh

Karatas 1.15-24

²⁶ Tã nhùm Sawti krĩ pê Tamas rûm kato nê ma akupÿm Jerujarê hwÿr mô hãmri nê hwÿr pøj. Hãmri

nê mê kot Jejus kôt amnhĩ xunhwÿr xwÿnhjê hkôt amnhĩ jarênh kaxyw mê hwÿr tẽ. Hãmri nhùm mê tee ri amnhĩ wÿr omu nê kot Jejus kôt amnhĩ xãm â amnhĩ to hêx â hkamnhĩx hãmri nê amnhĩ kamã kahak o amnhĩ nê hkurê nê mê piitã kãm uma nê. ²⁷ Âm Panãpe pix âm hãmri kot Jejus kôt amnhĩ xãm kôt hamaxpêr. Hãmri nê ma hwÿr tẽ nê hapró nê ma Jejus nhÿ hã mê ahkre xwÿnh maatijê hwÿr o tẽ nê yr pê mê kãm kapêr nê mê kãm:

—Kwa âm hãmri na Sawti amnhĩ jarê. Na ra mê pahpyrà nê Jejus kôt amnhĩ xãm. Na xep pre Tamas wÿr pry hã kormã mô nhùm xep Pahihti Jejus hwÿr kato nê kaxkwa rûm kãm kapêr nhùm kuma nê hkôt amnhĩ xãm. Jakamã nhùm xep ra axtem kot amnhĩ nhĩpêx nyw o Tamas nhõ xwÿnhjê mã Jejus kapêr jarênh o ri mê hkôt pa. Ra amnhĩ kamã kãm mê uma hkêt nê âmnhĩx ri mê kãm harênh o ri mê hkôt pa. Anê.

²⁸ Hãmri nhùm mê kuma nê amnhĩ kôt Sawti mê nhùm mê hkôt ri pa. Hãmri nê Jerujarê kamã mê piitã mê kãm Jejus kapêr jarênh o pa. Kãm Jejus kôt amnhĩ xunhwÿr kêt xwÿnhjê puma hkêt nê âmnhĩx ri mê kãm kapêr jarênh o ri mê hkôt pa. ²⁹ Nê Ijaew kwÿjê pê Gresjê kapêr o mê kapêr xwÿnhjê mã nhùm xatã mê kãm Jejus jarênh o ri mê hkôt pa. Kêp Tirtûm kot mê pakaxyw âm xwÿnh â harênh rãhã ho ri mê hkôt pa. No nhùm mê kãm mar prãm kêt nê ra kot Jejus â hpÿr mã. ³⁰ Hãmri nhùm mê kot Jejus kôt amnhĩ xunhwÿr xwÿnh kwÿjaja mê harênh ma nê mê kêp ho kato nê ma krĩ pê Sejurej wÿr o mô. Hãmri nê kurûm ma akupÿm ô krĩ pê Tas wÿr kumê nhùm ma akupÿm mô.

³¹ Tã ra Sawti kot Jejus kôt amnhĩ xãm jakamã nhùm mê kãm mê hkurê xwÿnhjaja axte Jejus â tanhmã hkwÿjê hto hkêt nhùm mê piitã hamakêtkati nê âmnhĩx ri pa.

Pika pê Jutej kamã në Garirej kamã në Samar kamã nhùm më piitã hamakêtkati në àmnhĩx ri pa. Hãmri në Tirtùm mã mex o mex ã harênh o ri pa. Nhùm Tirtùm Karõ tanhmã më hkrã hto nhùm më ra kapêr kôt amnhĩ nhĩpêx mex o mō. Hãmri nhùm më ohtō rax në më urak në Jejus kôt amnhĩ xunhwý në hkwyjê hkôt axkamê.

Enejti akupým mex ã harênh

Atre 3.1-10

³² Tã nhùm Simãw Pêtreja ma më kot Jejus kôt amnhĩ xunhwýr xwýnhjê mã Tirtùm kapêr jarênh o më ahkre kaxyw ma krĩ piitã hkôt pa. Jakamã krĩ pê Rit wýr mō ³³ në hwýr pōj në kamã Enejti pumu. Nhùm i kamã htyk pa në kupip kãm hikwý rãhã hã amgrã pê 8. ³⁴ Hãmri nhùm Simãw Pêtre omu në Jejus nhỹ hã kãm kapêr në kãm:

—Pa Enejti? E na Jejus Kris akupým ato mex. Jakamã e kãnhmã xa në akupipta py. Anê.

Hãmri nhùm akupým mex në kãnhmã xa në amnhĩ pumu në hkĩnh o hkĩnh. ³⁵ Hãmri nhùm krĩja kamã në krĩ hō pê Sarō kamã më piitã harênh ma në më kot amnhĩ tomnuj kaga hpa në hpãnhã Jejus kôt amnhĩ xunhwý në hkôt amnhĩ nhĩpêx o pa.

Tapitre akupým htĩr ã harênh

Rukre 8.49-56; Atre 20.7-12

³⁶ Nhùm Tapitreja krĩ pê Jope kamã na pre pa. Gres kapêr kãm hixi pê Nokre. Më kapêr kãm Nokreja te kêp “karà” anhýr jarênh pyrak. Na pre ra Tapitre pê Nokreja Jejus kôt amnhĩ xãm në më piitã më ho mex o ri më hkôt pa. Nê më kêp amrakati xwýnhjê kamã ukapri ho ri mëmoj to më kutã nojarêt o ri më hkôt pa. ³⁷ Tã ra à htyx në hãmri ty. Hãmri nhùm më tee ri omu në hkapri në mýr rax në. Nê kumý në kuhō hãmri në kormã haxàr kêt ri kýx pê ixkre kamã kuxi në kuri mýr o hkrĩ.

³⁸ Nhùm Simãw Pêtre kormã krĩ hō pê Rit kamã ri pa. Rit rùm Jope hwýr jawý jakamã nhùm Jope kamã më kot Jejus kôt amnhĩ xunhwýr xwýnhjaja Simãw Pêtre jarênh ma hãmri në hwýr ja wa ho hamêxkrut në wa kumê. Nhùm wa ma hwýr tẽ në hwýr pōj në omu në kãm:

—Pa? E jar na pa wa awýr tẽ. Na Jejus kôt më pahtōx Tapitre ham më pahpê ty. Kwa tokyx kormã më kot haxàr kêt ri ma wa ixkôt hwýr tẽn omu nã? Anê.

³⁹ Hãmri nhùm wa kuma në ma wa hkôt htẽm kurê kumrêx. Hãmri në Jope hwýr pōj në më hwýr tẽ nhùm më kýx pê htyk në nōr xwýnhja wýr ho api nhùm hwýr axà. Nhùm kuri më kêp më mjên htyk xwýnhjaja hkapri në mýr o hkrĩ. Hãmri nhùm Simãw Pêtre më hwýr axà nhùm më omu në kãm Tapitre kormã htĩr ri kot tanhmã më ho mex to hã harê. Nê më ê hkwy jamý në kãm kupê në kãm:

—Ga ja pumu. Tyk xwýnhta na pre më inhmã hkay në kugō. Na pre hte më ixto mex o pa. Tã më ixpê ty. Hêxta gãa në. Na pa më ixkapri htyx kumrêx. Anê.

⁴⁰ Hãmri nhùm më kuma në më kator pa hãmri në htyk xwýnhta ri hkõn krã ho nhỹ në ho Tirtùm wý. Hãmri në htyk xwýnhta mã kapêr në kãm:

—Pa Tapitre? E kwa kãnhmã nhỹ. Anê.

Pu nhùm no amra në Simãw Pêtre pumu në kãnhmã nhỹ. ⁴¹ Hãmri nhùm hpa hã kupy në kãnhmã ãm në kapôt ã më kuhê xwýnhjê mã anê nhùm më akupým wa hwýr agjê nhùm më kãm:

—E ota. Na Tirtùm akupým më amã ho htĩr. Anê.

Hãmri nhùm më amnhĩ jaêr pê omu në hkĩnh týx në. ⁴² Hãmri nhùm Jope kamã më piitã harênh ma në më ohtō në amnhĩ kaxyw Jejus kôt hamaxpêr në hkôt amnhĩ xunhwý. ⁴³ Hãmri nhùm Simãw Pêtre Jope kamã ri pa hã apkati

xohtë nê tokyx mẽ kurũm kato nê ma krĩ hõ hwÿr mör kêt nê. Na pre mry kà ho mẽmoj nhĩpêx o pa xwÿnh pê Simãw ri pøj nê kuri pa hã apkati xohtë nê.

10

Konêre kot Simãw Pêtre hã karõ hã harênh

Rukre 7.1-10

¹ Tã nhũm Ijaew kêt xwÿnh Konêre. Kêp Rõmjê nhõ pôristi krãhtũm na pre. Õ pôristija pika pê Itar nhõ xwÿnh na pre mẽ nhũm Konêre kêp mẽ hkrãhtũm. Krĩ pê Sejarej kamã. ² Konêreja kot amnhĩ to mex o pa xwÿnh na pre. Kêp Ijaew kêt tã na pre hte òrkwÿ kamã hkwyjê mẽ Tĩrtũm ã hpijaàm nê kãm mex o mex ã harênh o pa. Apkati mẽ kãm amnhĩ jarê. Nê mẽ kêp amrakati xwÿnhjê mã kãxpore hkwy nhõr o pa. ³ Jakamã nhũm mẽmo arĩgro hã ra myt japanh grire nhũm mẽmoj pumu. Te hpimtir kãm kot omunh pyrà nê kaxkwa kamã Tĩrtũm kapêr o wrÿk xwÿnh pumu. Nhũm hwÿr wrÿ nê tanhmã kãm kapêr to nê kãm:

—Pa Konêre? Anê.

⁴ Nhũm tee ri omu nê kãm ma htÿx kumrêx. Hãmri nê kãm:

—Mo na? Anê.

Hãmri nhũm kãm:

—Nà ate amnhĩ to Tĩrtũm wÿr o apaja nhũm ra amnhĩ tã ama nhũm ja kãm mex nê. Nê ate mẽ kêp amrakati xwÿnhjê mã kãxpore hkwy nhõr o apaja nhũm ja mãânên kãm mex nê.

⁵ —Jakamã e inhma. Kêr ka ma Jope hwÿr amã mẽ ãpênh xwÿnh kwÿ rê kê mẽ ma hwÿr mra nê kamã mẽhõ pê Simãw Pêtre japró nê man akupÿn awÿr o mõ. ⁶ Simãw kot mry kà ho mẽmoj nhĩpêx o pa xwÿnhhta nhõrkwÿ kamã na hte pa. Òrkwÿja gô mÿ ri na. E hwÿr mẽ arê kê mẽ ma hwÿr mõ nê hapró nê man awÿr o mõ kê amã mẽmoj mex jarê ka ama. Anê.

⁷ Nhũm pre ã Tĩrtũm kapêr o wrÿk xwÿnhja Konêre mã kapêr anê hãmri nê kato nê ma akupÿm api. Hãmri nhũm kot mar xà hkõt jajê rê nê Simãw Pêtre hwÿr mẽ kurê. Kãm ãpênh xwÿnhjê ho hamêxkrut nê kaxyw ò pôristi hõ. Pôristija na pre hte Konêre pyrà nê Tĩrtũm ã hpijaàm o pa. ⁸ Jakamã nhũm mẽ kurê nê mẽ kãm kapêr hãmri nê ma Jope hwÿr Simãw Pêtre hwÿr mẽ kurê nhũm mẽ kato nê ma hwÿr mõ. ⁹ Hãmri nhũm apkati nhũm kaxkwa nhĩpøk ri myt nhÿ nhũm mẽ hwÿr hpõx o mõ.

Simãw Pêtre tanhmã hpimtir to hã harênh

Atre 11.5; Karatas 2.11-21

Rôm nhũm Simãw Pêtre kot Tĩrtũm mã amnhĩ jarênh kaxyw ixkre nhĩmøk ã api nê himøk po hã kãm amnhĩ jarênh o nhÿ. ¹⁰ Hãmri nê ra kãm prãm nê nom nhũm mẽ kormã kãm ò hã ãpênh jakamã nhũm arĩ ixkre nhĩmøk ã Tĩrtũm mã amnhĩ jarê.

Hãmri nê Konêre pyrà nê te hpimtir kãm kot mẽmoj pumunh pyrà nê mẽmoj pumu nhũm Tĩrtũm Konêre hkukamã tanhmã kãm mẽmoj to amnhĩrit to. No ãm hã kuxi nê kãm harênh jakamã nhũm Simãw Pêtre te hpimtir kãm kot mẽmoj pumunh pyrà nê mẽmoj pumu. ¹¹ Nhũm kaxkwa katêr nhũm kurũm mẽmoj te kot mẽ hpiipro xà pyràk xwÿnhja pyka hwÿr wrÿk o mõ. Nê hatur xà piitã axpên tã akupró nê ajêt nê wrÿk o mõ nhũm omu. ¹² Mẽ hpiipro xàta kamã mẽmo mry piitã hikwÿ. Mẽmo mry hpar o ri pa xwÿnhjaja nê htu mÿr pê ri pa xwÿnhjaja nê mẽmo ãk kÿx pê htor o ri mrar xwÿnh piitã mẽ hpiipro xàja kamã hikwÿ nhũm omu. ¹³ Hãmri nhũm Tĩrtũm kãm:

—Pa Simãw Pêtre? Mãn ka ra amã prãm nê nà? E kãnhmã xa nê axãmnhĩx mãmrĩ mryta ò kapi nê

apī nē ho anē nē aku. Piitā mẽ ate hkur mã mex. Anē.

¹⁴ Hāmri nhũm tee ri kuma nē kãm:

—Kwa nà Pahi Maati. Mẽ xipê Ijaew mẽ ixte mry piitā hkur kêt. Âm hkwỳ pix na pa htem kuku. No mry jaja aa mẽ ixte hõ hkwỳ hkrêr kêt. Anē.

¹⁵ Hāmri nhũm Tirtũm kãm:

—Nà kot anhÿr tã kot paj pam amã mẽmoj jarẽ ka kamã anhõkre kahak kêt nē. Mãmri amnhĩm hõ kapi nē apī nē ho anē nē axãmnhĩx hkwỳ hkre. Anē.

¹⁶ Nhũm pre ã kãm mry hã karõ anhÿr o axkrunẽpxi. Simãw Pêtre kot mãmri Ijaew kêt xwÿnhjê hkõt pa nē amnhĩx ri mẽ kutã apkur nhũm Tirtũm kãm ja mex nhũm kot hã amnhĩ pumunh kaxyw nhũm ã kãm harẽnh anhÿr o axkrunẽpxi. Hāmri nhũm mẽ hpiro xãja ma akupÿm kaxkwa hwÿr àpir o mõi nē akunok. ¹⁷ Hāmri nhũm Pêtre te hkrãkator pyrãk jao tee ri hpimtir kukamã hamaxpêr o nhÿ nē hamaxpêr o:

—Kwa mo kaxyw na Tirtũm ã inhãm ja hã karõ anē? Anē.

Rôm nhũm Konẽre kot hwÿr mẽ rẽnh xwÿnhjaja ra hwÿr hpõx o mõi. Ijaew kêt xwÿnhtaja Simãw nhõrkwÿ hã mẽ hkukjêr o mõi nē hwÿr pøj nē hakwakrem kuhê. ¹⁸ Hāmri nē õrkwÿ nhõ xwÿnhjê mã kãm:

—Pa na ka mẽ arĩ akrĩ? E Simãw Pêtre hwÿr na pa mẽ mõi. Xã jar na hte pa nà? Anē.

Hāmri nhũm mẽ kãm: —Tỳ. Omũj kÿx pẽ ixkre nhĩmõk ã na nhÿ. Anē.

¹⁹ Nhũm Simãw Pêtre arĩ kot mẽmoj pumunhta kukamã hamaxpêr o nhÿ nhũm Tirtũm Karõ kãm mẽ hpõx xwÿnhjê jarẽ nē kãm:

—E Simãw Pêtre. Ota Ijaew kêt xwÿnhjaja axkrunẽpxi nē ajapêr o mõi nē ra anhõrkwÿ hwÿr pøj. ²⁰ Mẽ hwÿr wrÿ nē mẽ kot amã mẽmoj jarẽnh ma nē mãmri axãmnhĩx ma mẽ hkõt mõi. Tanhmã ajamxpêr to

hkêt nē. Pa na pa awÿr mẽ kumẽ nhũm mẽ mõi. Anē.

²¹ Hāmri nhũm kuma nē mẽ hwÿr wrÿ nē mẽ omu nē mẽ kãm:

—Pa? Xã pa na ka mẽ ijapêr o mõi? E ot pa xa. Kam nē mẽ inhãm mẽmoj jarẽ pa mẽ ama. Mẽmo kaxyw na ka mẽ ixwÿr mõi? Anē.

²² Hāmri nhũm mẽ kãm:

—Nã mẽ inhõ patrãw Konẽre na awÿr mẽ inhãm pa mẽ mõi. Na hte tãm amnhĩ nhĩpêx o pa. Nẽ Tirtũm ã hpijaãm nē kãm mex o mex ã harẽnh o pa. Nhũm mẽ inhõ krĩ kamã Ijaew kãm hkĩnh nē. Tã na Tirtũm kapêr o wrÿk xwÿnhja ham hwÿr wrÿ nē kãm ajarẽ. Kot amnhĩ wÿr atã karõ nhũm ate hwÿr amõr nē kãm axu-jarẽnh kaxyw kãm ajarẽnh jakamã nhũm mẽ ixte ajaprõr kaxyw awÿr mẽ inhãm pa mẽ man awÿr mõi. Anē.

²³ Hāmri nhũm mẽ kuma nē mẽ kãm:

—Tõe nã na pa mẽ ama. E mẽ agjê nē akrĩ nē jar mẽ ixri nõ kê apkati pu mẽ rĩ ma akupÿm mõi. Anē.

Hāmri nhũm mẽ kuma nē mẽ hwÿr agjê.

Tã nhũm apkati nhũm mẽ akupÿm nojarêr nhũm Simãw Pêtre ma mẽ hkõt mõi. Nhũm Jope kamã mẽ kot Jejus kõt amnhĩ xunhwÿr xwÿnh kwÿjaja ma mẽ hkõt mõi. Nhũm mẽ mõi o kamãt.

²⁴ Hāmri nhũm apkati nhũm mẽ Sejarej wÿr hpõx o mõi. Nhũm ra Konẽre mẽ kutêp amnhĩ wÿr hkwÿjê ho akuprõ nhũm mẽ Simãw Pêtre kutêp õrkwÿ kamã akuprõ nē hkrĩ. ²⁵ Hāmri nhũm mẽ hwÿr pøj nē mẽ hwÿr àr kaxyw nhũm Konẽre amnhĩ wÿr omu nē kãnhãm xa nē kutã tẽ nē hpar pẽ hkõnkrã ho tẽm nē nhÿ. ²⁶ Hāmri nhũm tee ri ja hã omu nē pa hã kupy nē kãnhãm ãm nē kãm:

—Kwa kãnhãm xa. Ixpê Tirtũm kêt tã ka ri ã inhĩpêx anē. Anē.

²⁷ Hāmri nē hkôt ōrkwỹ hwýr axà nē kutēp mē pikuprōnh xwýnhjē pumu nē mē kām:

²⁸ —Pa na ka mē arĩ akrĩ? E mǎn ra mē ate mē ixpē Ijaew kot amnhĩ nhĩpēx ā mē ixpumunh mex. Na pa htem mē apē axtem nhō xwýnhjē hkôt ri ixpa hkēt nē. Nē mē anhōrkwỹ hwýr inhgjēx kēt nē. Tā ham Tĩrtũm inhmā mē ixte ā amnhĩ nhĩpēx anhýr o ixpaja nē ixkurē nē inhmā: “Kot paj pam mē hkwjaja mex ā mē harē ka mē kamā anhōkre kahak kēt nē.”

²⁹ —Anhýr jakamā ka xep pre ixtā karō pa inhītōt kēt nē man mē awýr inhmōr kurē kumrēx. E mē inhmā mēmoj jarē pa mē ama. Mēmo kaxyw na ka mē ixtā karō? Anē.

³⁰ Hāmri nhũm Konēre kām:

—Nà jǎa na pa pre jar inhōrkwỹ kamā Tĩrtũm mǎ amnhĩ jarēnh o nhỹ. Ra myt xàpanh grire pa kām amnhĩ jarē. Hāmri nhũm Tĩrtũm kapēr o wrýk xwýnh ixwýr wrý nē hirā rax kām xa. ³¹ Hāmri nē inhmā: “Pa Konēre? E na hte Tĩrtũm ate kām amnhĩ jarēnh ta mar o hkrĩ. Nē ate mē kēp amrakati xwýnhjē ho mex o apaja nhũm hǎ apumu.

³² Jakamā e ma Jope hwýr amǎ mē àpēnh xwýnh kwý rē kē mē ma hwýr mō nē kamā Simāw Pētre japrō nē man akupýn awýr o mō. Mry kà ho mēmoj nhĩpēx o pa xwýnh Simāw nhōrkwỹ kamā na hte pa. Ōrkwỹja gō mý ri na.” Anē.

³³ —Ā kot inhmā kapēr anhýr jakamā na pa kuma hāmri nē awýr jajē rēnh kurē kumrēx. Tā ka mē hkôt man mē ixwýr mō nē ā apōx anē. Ām hāmri na ka mē hkôt mō. Mē apē Ijaew kot amnhĩ nhĩpēx kuhpa hǎ amnhĩ nhĩpēx nē axāmnhix man mē ixwýr mō. Tā ot pa mē Tĩrtũm noo mǎ ixkrĩ. Kam nē mǎmrĩ ý hǎ mē inhmā mēmoj jarē pa mē ama. Anē.

Simāw Pētre kot Konēre mǎ ujarēnh

³⁴ Hāmri nhũm Simāw Pētre Konēre kot kām amnhĩ jarēnhja ma nē mē kām awjarē nē mē kām:

—Nà ām hāmri na Tĩrtũm mē akukamā tanhmā inhmā kapēr to. Xep kām mē ixpē Ijaew pix japē hkēt. Kām mē pahpiitā mē pajapē nē mē panhĩpēx o axpēn pyrāk. ³⁵ Kojā ahpýnhā pyka piitā hkôt mēhō mē ixpyrà nē kēp Ijaew kēt tǎā hkôt amnhĩ xām nē hǎ hpijaam pē kām mex o mex ā harē nē tām amnhĩ nhĩpēx. Hāmri nhũm Tĩrtũm ja hǎ omu nhũm ja kām mex nē.

³⁶ —Na pre ra mē ixpē Ijaew mǎ tanhmā Kra Jejus Kris jarēnh to. Jejus kot mē panē htyk kukwak ri na hte mē ixte hkôt amnhĩ xunhwýr xwýnhjē ho hkra. Tā ra mǎānēn ā mē apē Ijaew kēt xwýnhjē mǎ ā amnhĩ jarēnh anē nē Jejus htyk kukwak ri mē ate mē ixpyrà nē hkôt amnhĩ xunhwýr xwýnhjē ho hkra. Jakamā Jejus Krisja kēp mē pahpiitā mē panhō Pahiiti.

³⁷⁻³⁸ —Mǎn ka prem ra harēnh ma. Mē ixpē Ijaew nhō pika pē Jutej kumrēx kām na pre Juāw Paxisja Jejus kukamā mē kām harē nē mē hkrā kumrār o pa. Mē piitā mē kot amnhĩ tomnuj kaga nē Tĩrtũm kōt amnhĩ xunhwýr ā mē omunh xà hkôt mē hkrā kumrā. Jejusja krĩ pē Najare kamā na pre hprēk. Tā hwýr na pre Tĩrtũm amnhĩ Karō mē nhũm wrý nē hkarō mǎ axà nē hkôt pa ho pa. Jakamā nhũm àhpumunh o àhpumunh nē ma krĩ piitā hkôt tanhmā mē ho mex to ho ri mē hkôt pa. Pika pē Garirej kumrēx kamā mē piitā ri mē kām Tĩrtũm kapēr jarēnh o pa. Nē mēkarōmnuti kot Satanasti nhỹ hǎ tanhmā mē ho xwýnhjaja nhũm mē nē mēkarōmnuti japōx o pa. Ā na pre Tĩrtũm nhỹ hǎ amnhĩ nhĩpēx anhýr o pa.

³⁹ —Tā Jejus nhỹ hǎ hkrajē jahkre ho mē ixpa xwýnhjaja na pa prem kot ri tanhmā amnhĩ to ho

pa hã omunh par o ri hkôt ixpa. Mě ixpê Ijaew nhô pyka kamã nê mẽ inhô krĩ pê Jerujarê kamã kot ri tanhmã amnhĩ nhĩpêx to ho paja pa prem piitã omunh o hkôt ri ixpa. Tã nhũm prem axtem nê mẽ ixpê pĩ kahpa hã kunhõ nê kupĩ. ⁴⁰ Hãmri nhũm htyk o apkati axkrunêpxi nhũm Tirtũm akupỹm ho htĩr nê akupỹm mẽ ixwỳr kumê pa prem akupỹm htĩr kãm omu. ⁴¹ No nhũm mẽ piitã akupỹm htĩr kãm omunh kêt nê. ãm mẽ ixwỳr pix na pre kato nê mẽ ixkutã apku pa mẽ papxipixjaja akupỹm htĩr ã omu. Hãmri nhũm Tirtũm mẽ ixte ma mẽ piitã mẽ kãm akupỹm htĩr ã harênh o ri ixpa kaxyw mẽ ixrê. ⁴²⁻⁴³ Amnepê m Tirtũm nhỹ hã kapêr jarênh o mẽ pa xwỳnhjaja na prem Jejus kukamã tanhmã hã kagã hto nê mẽ kãm harênh o pa. Nê mẽ kãm: Koja nhỹrmã mẽhõja man mẽ pahwỳr wrỳ nê mẽ panê tanhmã amnhĩ nhĩpêx to. Ka mẽ atõ amnhĩ kaxyw hkôt ajamaxpêr nê hkôt amnhĩ xãm hã koja Tirtũm ja hã apumu nê mẽhõ kot tanhmã mẽ panê amnhĩ nhĩpêx to xwỳnhta kukwak ri amnhĩ katut kôt ate amnhĩ tomnuj rênh pa nê axte kãm hamaxpêr kêt nê. Anê.

Na pre Tirtũm nhỹ hã kapêr jarênh o mẽ pa xwỳnhjaja Jejus kukamã ã harênh nê hã kagã anê. Tã koja Jejus nhỹrmã akupỹn wrỳ hãmri nê mẽ htyk xwỳnhjê nê arĩ mẽ htĩr xwỳnhjê mẽ pahto pimràatã tanhmã mẽ pajarênh to. Mě pahte tanhmã amnhĩ nhĩpêx to ho papa hã mẽ pahpumunh kôt tanhmã mẽ pajarênh to. Hãmri nê Tirtũm mẽ wa kuri mẽ pahtĩr tũm nê mẽ papa ho papa mã xwỳnhjê jarê nê mããnên wa kuri mẽ htĩr tũm kêt xwỳnhjê jarê. Mě pahpita tanhmã mẽ pajarênh to kaxyw na pre Tirtũm mẽ pakaxyw Jejus xãm. Tã ã kot mẽ pajarênh anhỹrja

kukamã na pre mẽ ixte mẽ amã tanhmã harênh to ho ixpa kaxyw mẽ awỳr mẽ ixrê. Mě ate kapêr mar nê tokyx Jejus kôt amnhĩ xunhwỳr kaxyw. Anê.

⁴⁴ Nhũm Simãw Pêtre ã mẽ kãm ujarênh anhỹr rôm nhũm Tirtũm mẽ kot mar o hkrĩ xwỳnhjê hwỳr amnhĩ Karõ rê nhũm mẽ hwỳr wrỳ nê mẽ hkarõ mã gjêx pa. ⁴⁵⁻⁴⁶ Hãmri nhũm mẽ Tirtũm mã mex o mex ã harênh o hkrĩ. No ãm mẽ kapêr kãm harênh kêt nê. Mě kapêr kwỳ hõ ho kãm mex o mex ã harê. Aa mẽ kot mẽ kapêr mar kêt tã ra ho kapêr mex nê. Jakamã nhũm Jope rũm mẽ kot Simãw Pêtre hkôt mẽ mõi xwỳnhjaja. Ijaew kwỳ kot ra Jejus kôt amnhĩ xunhwỳr xwỳnhjaja amnhĩ jaêr pê ja hã mẽ omu nê axpên mã:

—Hêxta waa nê. Mě kêp Ijaew kêt tã nhũm Tirtũm kot mẽ panhĩpêx pahpyrà nê mẽ hwỳr amnhĩ Karõ rê nhũm mẽ hwỳr wrỳ nê mẽ kãm agjê. Nã ãm hãmri na mẽ pahpyrà nê ã mẽ hipêx anê. Anê.

Hãmri nhũm Simãw Pêtre mẽ kuma nê mẽ kãm:

⁴⁷ —Kwa pu mẽ hkrã kumrãr kurê kumrêx. Ra Tirtũm Karõ kot mẽ pahpyrà nê mẽ hkarõ mã gjêx kênã kot kêt mẽhõ mẽ nê tanhmã mẽ pahpê ãnnar to. Ra mẽ kot mẽ pahpyrà nê Jejus kôt amnhĩ xunhwỳr kênã. Anê.

⁴⁸ Hãmri nê Konêre mẽ hkwyjê mã kãm:

—E kot paj mẽ ate Jejus Kris kôt amnhĩ xunhwỳr ã mẽ akrã kumrã. Anê.

Hãmri nê mẽ hkrã kumrãr pa nhũm mẽ Simãw Pêtre mã kãm:

—Kwa kormã anojarêt kêt nê. Kritpê m ri mẽ ixkôt ri apa hã atã apkati grêre nê kormã ma akupỹm mõi. Anê.

Hãmri nhũm mẽ kuma nê mẽ hkôt ri pa hã apkati grêre hãmri nê nojarêt nê ma akupỹm mõi.

11

*Simāw Pêtre kot hkwýjê mã
Konêre jarênh*

Atre 10.1-48

¹⁻² Hāmri nhũm Simāw Pêtre ma akupÿm mō. Jutej kamā krī pē Jeru-jarê wÿr ma akupÿm mō hāmri nê pōj. Hāmri nhũm Jutej kamā Jejus nhÿ hã mẽ ahkre xwÿnh maatijê mẽ mẽ kot Jejus kôt amnhĩ xun-hwÿr xwÿnhjaja Ijaew kêt xwÿnhjê jarênh ma. Konêre mẽ hkwý kot mẽ urak nê Jejus kôt amnhĩ xunhwÿr ã mẽ harênh ma. Jakamã nhũm Simāw Pêtre akupÿm mẽ hwÿr pōj nhũm mẽ omu nê mẽ hã àhkukjêr kurê kumrêx. Hāmri nhũm mẽ hkwýjaja mẽ hã kãm akir nê kãm:

³—Kwa mẽ pahpê Ijaew pyrã nê mẽ kot amnhĩ my kwrÿt kã jakàr kêt tã ka mẽmo hwÿr mẽ hwÿr mō mẽ kuri pōj nê mẽ kutã apku. Anê.

⁴ Hāmri nhũm Pêtre tee ri mẽ kuma hāmri nê hprī hã mẽ kãm amnhĩ jarê. Nê tanhmã Tirtũm kot kãm Ijaew kêt xwÿnhjê jarênh to hã mẽ kãm harê nê mẽ kãm:

⁵—Kwa mẽ ã ri ajamaxpêr anhÿr kêt nê. E pa mẽ amã amnhĩ jarê ka mẽ inhma mãn. Nà na pa pre jãã Jope kamã Tirtũm mã amnhĩ jarênh o nhÿ nê te xipimtir kãm mẽmoj pumunh pyrãk. Nhũm mẽmojja te mẽ hpiro xã pyrã nê kaxkwa rũm ixwÿr wrÿk o mō pa ixprī hã omu. ⁶ Nhũm kamã mry piitãã. Mry xoprê nê mry xuwapô nê mry hpar o ri pa xwÿnhjaja nê mry htu mÿr pē ri pa xwÿnhjaja nê àk. Nê mẽ pahte hkur xwÿnhjaja nê mẽ pahte hkur kêt xwÿnhjaja. ⁷ Kamã mry piitã pa omu. Hāmri nhũm Tirtũm inhãmã: “Pa Simāw Pêtre? Mãn ka ra amã prãm nê nã? E kãnhãm xa nê axãmnhix mãmri mryta ò kapi nê apī nê ho anê nê aku. Piitã mẽ ate hkur mã mex.” Anê.

⁸—Pa tee ri kuma nê kãm: “Kwa Pahi Maati. Mẽ ixpê Ijaewjaja mẽ ixte mryja piitã hkur kêt. ãm hkwý hpix na pa htem kuku. No ja hkwý

aa mẽ ixte hō hkwý hkrê kêt.” Anê. ⁹ Nhũm inhãmã: “Nà nom kot anhÿr tãã. Kot paj pam amã mẽmoj jarê ka kamã anhõkre kahak kêt nê. Jakamã e mãmri amnhĩm hō kapi nê apī nê ho anê nê axãmnhix hkwý hkrê.” Anê.

¹⁰—Na pre ã Ijaew kêt xwÿnhjê hwÿr inhmõr kukamã inhãmã karõ ho axkrunêpxi anê. Nom hã kuxi nê inhãmã mẽ pahte mry kur kêeta jarê. Hāmri nhũm mẽ hpiro xãja ma akupÿm kaxkwa hwÿr api nê kakrãm axã nê akunok. ¹¹ Hāmri nhũm Ijaew kêt xwÿnhjaja mẽ ixwÿr axkrunêpxi nê mra nê pōj. Konêreja Sejarej rũm ixwÿr mẽ rênh xwÿnhjaja nhũm mẽ mra nê ixwÿr pōj. ¹² Hāmri nhũm Tirtũm Karõ ma mẽ hkôt inhãmê. Mẽ kêp Ijaew kêt tã nhũm ixãmnhix ma mẽ hkôt ixpa kaxyw mẽ hkôt inhãmê pa ma mẽ hkôt mō. Nhũm Jope kamã mẽ kot Jejus kôt amnhĩ xunhwÿr xwÿnh kwýjaja kêp ója ma mẽ ixkôt mō. Pa mẽ mō nê Sejarej kamã Konêreja wÿr pōj. ¹³ Hāmri nhũm mẽ ixpumu nê mẽ inhãmã amnhĩ jarê. Tirtũm kapêr o wrÿk xwÿnh kot hwÿr wrÿk nê òrkwÿ hwÿr àr nê tanhmã kãm kapêr toja nhũm inhãmã harê. Na xep pre kãm: “E kêr ka ma Jope hwÿr amã mẽ àpênh xwÿnh kwýjê rē kê mẽ ma hwÿr mō. Hāmri nê kamã Simāw Pêtre japrô nê man akupÿn awÿr o mō kê tanhmã mẽ amã ujarênh to. ¹⁴ Koja mẽ amã tanhmã mẽ apê Tirtũm kra hprãm xài tanhmã mẽ ate amnhĩ nhĩpêx to hã mẽ amã karõ ka mẽ ama nê mar tÿx nê hkôt amnhĩ nhĩpêx. Ka mẽ anhõrkwÿ kamã akwýjê mẽ apimràatã ama nê mar tÿx nê. Hāmri nê kot mẽ amã hã karõ xã hkôt amnhĩ nhĩpêx nhũm Jejus mẽ ate amnhĩ tomnuj pē mẽ apytãr pa.” Anê.

—Na xep pre ã Tirtũm kapêr o wrÿk xwÿnhja kãm ijarênh anê. Jakamã nhũm ixwÿr jajê rē pa ma mẽ hkôt mō. ¹⁵ Hāmri nê

kormã mẽ kãm tanhmã Jejus jarënh to. Tanhmã kot mẽ panê amnhĩ nhĩpêx to hã harê. Nê kormã mẽ kãm ixujarënh o ixãm rôm nhũm Tirtũm Karõ te wam kot mẽ panhĩpêxta pyrà nê mẽ hwỳr wrỳ nê mẽ hkarõ mã gjêx pa. ¹⁶ Pa ja hã mẽ omu nê Pahihti Jejus kot akupỹm kaxkwa hwỳr nojarêt nê tanhmã mẽ pamã kapêr tota mã ijamaxpêr kurê kumrêx. Na pre mẽ pamã: “Finat Juãw Paxis na pre hte gô ho mẽ hkrã kumrãr o pa. Tã koja Tirtũm ta hpãnhã mẽ awỳr amnhĩ Karõ rê nhũm mẽ akarõ mã agjê.” Anê.

—Á na pre Pahihti Jejus akupỹm nojarêt nê mẽ pamã kapêr anê. Jakamã pa ã kot mẽ hipêx anhỳr ã mẽ omu nê ã kapêr anhỳrja mã ijamaxpêr kurê kumrêx. ¹⁷ Na pu prem Pahihti Jejus Kris kôt amnhĩ xunhwỳ nhũm Tirtũm ja hã mẽ pahpumu nê mẽ pahwỳr amnhĩ Karõ rê. Tã te kot mẽ panhĩpêxta pyrà nê mããnên Ijaew kêt xwỳnhtajê hwỳr kurê nhũm mẽ hkarõ mã agjê. Mẽ kêp Ijaew kêt tã nhũm mẽ pahpyrà nê mẽ hwỳr kurê nhũm mẽ hkarõ mã agjê. Tirtũm tãm kot amnhĩ krã hkôt mẽ hwỳr rênh kênã kot pa kêt mẽ nê tanhmã kêp ixãmnrã to. Anê.

¹⁸ Nhũm pre ã Simãw Pêtre mẽ kãm amnhĩ jarënh anê nhũm mẽ kuma nê tãm hamaxpêr nê hkĩnh nê. Nê axte mẽ hã tanhmã kãm nê hkêt nê. Ám mẽ hã Tirtũm mã mex o mex ã harê. Hãmri nê axpên mã:

—Nã ãm hãmri. Mẽ kêp Ijaew kêt tã na prem Jejus kôt amnhĩ xunhwỳ nhũm Tirtũm kot mẽ panhĩpêxta pyrà nê amnhĩ katut kôt mẽ kot amnhĩ tomnuj rênh pa. Nhỹrmã wa hkuri mẽ pahpyrà nê hũr tũm nê pa ho pa kaxyw nhũm ã mẽ hipêx anê. Nã ãm hãmri na ã kot mẽ panhĩpêx pyrà nê mẽ hipêx anê. Anê.

*ãxiok kamã Jejus kwỳ jarënh
Atre 4.36-37*

¹⁹ Tã ra mẽ kot kên o Estewãw kapêr o hpĩr xwỳj ri mẽ kot ã hipêx anhỳrta pyrà nê mẽ kot Jejus kôt amnhĩ xunhwỳr xwỳnhjaja omnuj tỳx o pa. Jakamã nhũm mẽ hkwỳjaja mẽ umaj ma ahpỹnhã krĩ hkwỳ hkôt pigrãnh pa. Wênĩs wỳr nê Sipre hwỳr nê ãxiok hwỳr nhũm mẽ ma ahpỹnhã krĩ hkwỳ hkôt angrã nê kamã pa ho pa. Nê mẽ kãm tanhmã Pahihti Jejus kot mẽ panê amnhĩ nhĩpêx to hã harënh o ri mẽ hkôt pa. No ãm kormã Ijaew pix mã harënh o pa.

²⁰ Tã hãmri nhũm mẽ hkwỳjaja Sipre mẽ Sirên rũm ãxiok hwỳr pan pøj. Hãmri nê kamã mẽ kêp Ijaew kêt xwỳnhjê mã Pahihti Jejus kot amnhĩ nhĩpêx jarënh o pa. Á mẽ kot amnhĩ nhĩpêx anhỳr jakamã na mẽ ra ahpỹnhã ri mẽ kãm harënh o ri pa. Ijaew mã nê mããnên Ijaew kêt xwỳnhjê mã ²¹ nhũm mẽ ma mẽ hkôt ri Pahihti Jejus nhỹ hã mẽ kãm kapêr jarënh o ri mẽ hkôt pa. Hãmri nhũm mẽ ohtô nê amnhĩ nhĩpêx tũm kaga hpa nê hpãnhã amnhĩ kaxyw Jejus kôt hamaxpêr nê hkôt amnhĩ xunhwỳ.

²² Hãmri nhũm Jerujarê kamã Jejus kwỳjaja mẽ harënh ma nê mẽ hwỳr Panãpe mẽ. ãxiok hwỳr mẽ hwỳr kumê. Ma mẽ hwỳr mör nê Jejus kôt mẽ hamaxpêr o hihtỳx kaxyw. ²³ Hãmri nhũm ma mẽ hwỳr mō nê mẽ hwỳr pøj nê mẽ omu. Tirtũm kot mẽ ho mex ã mẽ omu hãmri nê mẽ ý hã hkĩnh nê. Nê mẽ kãm:

—Nã ãm hãmri na ka mẽ ra Jejus kôt amnhĩ xunhwỳ nê hkôt amnhĩ nhĩpêx mex o ri apa. Tã kêt ka mẽ ãm kapêr kôt pix mã ri amnhĩ nhĩpêx rãhã ho ri apa nê aa hkaga hkêt nê. Anê.

²⁴ Panãpeja na pre tãm amnhĩ nhĩpêx o pa. Nê amnhĩ kaxyw Jejus kôt pix mã hamaxpêr mex o pa. Nê Tirtũm Karõ hkôt amnhĩ nhĩpêx rãhã jakamã na pre hte ý hã mẽ kãm Pahihti Jejus kot mẽ panê

tanhmã amnhĩ nhĩpêx to hã harênh o ri mẽ hkôt pa. Hãmri nhũm mẽ kuma nê ohtô nê Jesus kôt amnhĩ xunhwý.

²⁵ Tã nhũm Panãpe ãxiok rũm kato nê kot Sawti japrôr kaxyw ma krĩ pê Tas hwýr mō. ²⁶ Hãmri nê hwýr pōj nê Sawti pumu nê haprô nê ma akupỹm amnhĩ kôt ãxiok hwýr o mō. Hãmri nê kamã mẽ kot Jesus kôt amnhĩ xunhwýr xwýnhjê hkôt wa ri pa hã amgrã pyxi nê hapêx. Nê mẽ ho ohtô nê ri mẽ kãm Jesus kapêr o mẽ ahkre ho ri mẽ hkôt pa. Jakamã nhũm krĩ nhõ xwýnhjaja mẽ kot Jesus kôt amnhĩ nhĩpêx xwýnhjê pumu nê mẽ hã mẽ hixi rê nê mẽ harênh o: “Kris tō nê htōxjaja” anhýr o mẽ harê. ãxiok kumrêx kãm na prem ã mẽ kot Jesus kôt amnhĩ xunhwýr xwýnhjê jarênh anê. Jakamã nhũm mẽ piitã ã mẽ harênh anhýr o pa.

²⁷ Tã nhũm Panãpe mẽ Sawti wa kormã ãxiok kamã paja rôm nhũm Tirtũm nhỹ hã kapêr jarênh xwýnh kwýjaja mẽ hwýr mran pōj. Jerujarê rũm mẽ hwýr mran pōj. ²⁸ Hãmri nhũm mẽ piitã mẽ kot mẽ kapêr mar kaxyw mẽ hwýr akuprô. Jakamã nhũm hõ pê Akapôja kãnhmã xa nê tanhmã mẽ kãm ujarênh to. Tirtũm Karō nhỹ hã mẽmoj kukamã mẽ kãm awjarê nê mẽ kãm:

—Kwa okora kër ka mẽ axkãm ajamak rom. Kojã tokyx pika piitã hkôt mẽ apkur xã hã mẽõja mẽ kêp hkryre nê mẽ piitã mẽ hipêx kêt nê. Anê.

Tã nhũm gaa nê ujarênh xàja kôt mẽmoj ã amnhĩ nhĩpêx anê. Kormã Pahihti Krawti kot mẽ ho amnhĩptar ri nhũm mẽmoj ã amnhĩ nhĩpêx anê. No nhũm kormã ã amnhĩ nhĩpêx anhýr kêt ri nhũm Akapôja kukamã ã mẽ kãm ujarênh anê. ²⁹ Hãmri nhũm mẽ kuma nê tee ri Jutej kamã Jesus kôt mẽ hkwyjê hkukamã hamaxpêr nê axpên mã:

—E kwa pu mẽ Jutej kamã Jesus kôt mẽ pahtō nê pahtōxjê mã pahkãxpore hkwy gō kê mẽ ho amnhĩm awjaprō nê hkur o pa. Anê.

Hãmri nê mẽ kaxyw kãxpore hkwy ho akuprô. Nhũm mẽ hikãxpore hkryre xwýnhjaja ãm mẽ kãm ho hkryre nê kugō nhũm mẽ hikãxpore rũnh xwýnhjaja mẽ kãm ho rũnh nê kugō. ³⁰ Jakamã nhũm mẽ ho hpikuprõnh pa nê Panãpe mẽ Sawti wa kot mẽ hwýr o mōr nê mẽ kãm ôr kaxyw wa kãm kugō. Hãmri nhũm wa hamý nê ma Jutej kamã Jerujarê hwýr mẽ hwýr o mō. Hãmri nê hwýr pōj nê mẽ kot Jesus kapêr o mẽ ahkre xwýnhjê mã kugō. Hãmri nhũm mẽ kãm Jesus kôt mẽ htō nê htōxjê mã o anhgrã nhũm mẽ hamý nê hkĩnh nê ho amnhĩm awjaprô.

12

Mê kot Simãw Pêtre pynênh nê haxã ã mẽ harênh

Matêwre 18.19-20

¹ Tã nhũm mẽ õ pahi Eroxxa õ pōristi mã Kris kwýjê hã amýnê nhũm mẽ mẽ hipêx kati nê nhũm mẽ amnhĩ xã htýx kamã hamak o pa. ² Juãw tō Xiakreja nhũm mẽ pahi Eroxx nhỹ hã unê nê hkanhwýr o kupĩ. ³ Hãmri nhũm Ijaew kãm ja mex jakamã nhũm pahi Eroxx hpãnhã mẽ kãm Simãw Pêtre hã amýnê nhũm unê nê haxã. Mẽ kot pãwti kaxkrit kêt kur ã mẽ hkĩnh xã hã arĩgro pê Pasja ã nhũm prem unê. ⁴ Na pre Eroxx Simãw Pêtre hkukamã hamaxpêr o:

—Nã koja mẽ hkĩnh hapêx pa Ijaew nom kupĩ nhũm rĩ amnhĩ pumu. Anê.

Hãmri nhũm pōristi kot Simãw Pêtre jamãr xwýnhjaja kêp 16. Nhũm mẽ axpên pãnhã kêp 4 kapên nê hamãr rãhã ho kuhê. ⁵ Nhũm arĩ mẽ hagjênh xã kamã hkrĩ ho hkrĩ. Hãmri nhũm Kris kôt htō nê htōxjaja harênh ma nê tee ri hkukamã

hamaxpêr hāmri nê axpên wÿr akuprô nê ho Tirtûm wÿr rāhā ho hkrī.

Tirtûm kapêr o wrÿk xwÿnh kot Simāw Pêtre kator ā harēnh

⁶ Tā nhûm ra mē hkīnh hapêx nhûm kamāt. Hāmri nhûm pahi Erox kot tanhmā Simāw Pêtre ho xā hā arigroja wÿr nhûm kamāt nhûm pôristijaja arī mē hagjênh xā kamā hamār mex o kuhê. Nhûm kuri wa hamêxkrut nê akutā hijê nê hamār o nō. Kàx o akutā kām ê nê wa ho nō nhûm wa hkaêx kām htÿx gôr nê nō. Nhûm ja wa hakwa krem māānēn hamār o xa. ⁷ Puh nhûm Tirtûm kapêr o wrÿk xwÿnhjê hōja mē hwÿr axā nê wrÿhtak rax kām xa. Hāmri nê Simāw Pêtre grêk nê kumra nê kām:

—Pa Simāw Pêtre? E kwa tokyj kànhmā xa pu mō. Anê.

Hāmri nhûm hkrākato nê omu nê kànhmā âm kurê kumrêx nhûm kaxprexā hā kàxja axrê nê pykap rôrôk nê hikwÿ. No nhûm kuri pôristi wa nôr xwÿnhhta wa mar kêt nê. Wa arī ôt tÿx nê nō. ⁸ Hāmri nhûm Tirtûm kapêr o wrÿk xwÿnhja Simāw Pêtre mā:

—E tokyx anhō kamīs jaxā nê amnê ixkôt tē pu pakato nê ma tē. Anê.

⁹ Hāmri nhûm kamīs nê hparkā jaxā nê ma hkôt tē. No âm kormā amnhī pumunh mex kêt nê. Te hpimtir kām ā kot amnhī nhîpêx anhÿr pyrāk ā amnhī kamnhîx.

¹⁰ Hāmri nhûm wa hakwakrem pôristi wa kot hamār o wa âm xwÿnhja hānh wa tē nê wa hakre nê hpānhā ihōja wa hānh wa tē no nhûm mē ôt tÿx nê hkrī nê wa omunh kêt nê. Nhûm wa hakwakre nhîtep xā hkôt wa tēn kato nê hpānhā krī nê kahê xā hā hakwakreja wÿr wa tē. Hāmri nhûm tām wa kām amnhī kahê xā mē nhûm wa kato nê pry hā tē. Ja kôt nhûm Tirtûm kapêr o wrÿk xwÿnhja akunok nhûm Simāw Pêtre axte omunh kêt nê. ¹¹ Hāmri

nê hprī hā amnhī pumunh kurê kumrêx nê hamaxpêr o:

—Kwa te ixpimtir kām ā ixte amnhī nhîpêx anhÿr pyrāk tā xep ixpimtir kêt. Tirtûm na ixwÿr kapêr o wrÿk xwÿnhja mē nhûm ixwÿr wrÿ nê mē kêp ixkator. Pahi Erox ra kot ixpîr nhûm ixkwÿ Ijaew kām ja prām tā nhûm mē kêp ixkator. Nà âm hāmri na Tirtûm ā mē kêp ixkator anê. Anê.

¹² Hāmri nê Marir nhôrkwÿ hwÿr htēm kurê kumrêx. Juāw Makre katorxā Marirja nhûm ôrkwÿ hwÿr tē nhûm mē ra kamā hpikuprôn h rax nê ho Tirtûm wÿr o hkrī nhûm tām mē hwÿr tē. ¹³ Hāmri nê kormā kapôt ā hakwa krem mē kām kahê xā tatak o xa nhûm ixkre kamā mē kām âpênh xwÿnh Rotreja kuma nê hwÿr tē. ¹⁴ Hāmri nhûm kām kapêr nhûm amnhī jaêr pê kuma nê hkīnh nê. Nê kormā kām kahê xā mēnh kêt ri ma akupÿm tē nê mē kot ho Tirtûm wÿr xwÿnhjê hwÿr axā nê mē kām:

—Xê pêr Simāw Pêtre na tē nê kapôt ā hakwakrem xa nê inhmā kapêr.

¹⁵ Hāmri nhûm mē tee ri kuma nê kām:

—Kwa arī mē hagjênh xā kamā hkrī kênā. Mān ka tanhmā amnhī krā amnhī to hā na ka ri atÿx ā akapêr anê. Anê.

Hāmri nhûm mē kām:

—Ma tanhmā kot pa kêt ri ixkrā amnhī to? âm hāmri na pa mē amā harê. Mē kam nê mra nê omu. Anê.

Nom nhûm mē kuma nê âm kuma nê kām:

—Nà tām kêt. Kaxkwa rûm Tirtûm mā hamār o pa xwÿnh mân amā kapêr nom tām kêt. Anê.

¹⁶ Rôm nhûm Simāw Pêtre arī hakwakre tatak o xa. Hāmri nhûm mē jatā hwÿr mra nê kām kahê xā mē nê amnhī jaêr pê omu nê hkīnh nê. ¹⁷ Hāmri nhûm kànhmā mē kām îhkra hpê nê mē ho hpinhkrênh pa nê mē kām:

—Nà Tirtùm na ixwỳr kapēr o wryk xwỳnhja mē nhũm ixwỳr wry nē pōristi pē ixkator. Anē.

Hāmri nē mē kām:

—E kêr ka mē Xiakre nē Jejus kôt mē pahtō nē pahtōxjê mǎ ijarē kê mē ijarēnh mar kurē kumrēx. Nom kot paj ixkato nē ma krī hō hwỳr mō. Anē.

Hāmri nē mē kêp kato nē ma mō.

¹⁸ Tǎ nhũm apkati nhũm pōristi kot hamār o hkrī xwỳnhjaja hkrā hapōj nē tee hapēr nē nhỹri omunh kêt nē. Hāmri nē tee ri amnhĩ kukamā hamaxpēr o kām ma htỳx kumrēx nē axpēn mǎ:

—Kwa tanhmā na pre we amnhĩ to nē mē pahpē akunok? Tanhmā koja we pahi Erox hǎ mē pahkukja pu mē harēnh to? Anē.

¹⁹ Hāmri nhũm pahi Erox hpikunor ā harēnh ma nē axtem pōristi hkwyjê mǎ anē nhũm mē mra nē tee ri mē hagjēnh xǎ kamā hapēr nom nhỹri omunh kêt nē. Hāmri nhũm Erox mē kot hamār xwỳnhjê kamā gryk tỳx kumrēx nē amnhĩ wỳr mē hǎ karō nē mē kām:

—Kwa nok? Mē ate hamār rǎhǎ ho akuhê hǎ ixte mē amǎ karō htǎ nhũm tanhmā amnhĩ to nē akunok. Nǎ kot paj mē anhmex ka mē rĩ amnhĩ pumu. Anē.

Hāmri nhũm mē tee ri kām amnhĩ tǎ aprǎr kaprỳ nhũm mē hǎ amỳnê nhũm mē ho kator nē ma mē o mra nē mē himex. Hāmri nhũm pahi Erox Jutej rũm kato nē ma Sejarej wỳr mō nē hpǎnhǎ kamā pa ho pa.

Pahi Erox tanhmā htyk to hǎ harēnh

Wam Pêtre 1.24-25

²⁰ Krī pē Xir mē Sito wa kamā mē pa xwỳnhjaja na pre htem pahi Erox nhō pyka hwỳr pa nē mē kêp amnhĩm apkur xǎ hǎ mēō japrōr o pa. Tǎ nhũm Erox kot mēmoj mỳrapê mē kamā gryk jakamā nhũm mē tee ri mē kêp ujaprōr kaxyw mē hwỳr mra nom nhũm mē kām mēmoj kwỳ ho wēnê hkêt nē. Hāmri nhũm mē tee ri amnhĩ

kukamā hamaxpēr nē pahi Erox nhō kōwenatō Pratōja wỳr mra nē kām:

—E awỳr na pa mē mra. Kwa mē ixyr pē pahi Erox mǎ tanhmā akapēr to kê ama nē mē ixkamā gryk kêt nē. Pa mē axte mē awỳr mra nē mē apê mēmoj kwỳ japrōr o ri ixpa. Anē.

²¹ Hāmri nhũm mē kuma nē hwỳr tē nē mē yr pē tanhmā kām kapēr to nhũm kuma hāmri nē kot tanhmā mē kām kapēr to kaxyw mē kām arĩgro hta.

Tǎ nhũm ra kot arĩgro hyr xwỳnhta kato nhũm Erox kêp pahi hǎ ê mex jaxà nē tē nē kêp pahi hǎ mē hkrī xǎ kamā nhỹ nē tanhmā mē kām kapēr to. ²² Mē kām kapēr ryy nē. Hāmri nhũm mē kuma nē hēx rom kām mex o mex ā harē. Nē kỳx pēê axpēn mǎ harē nē harēnh o:

—Kwa pahi Erox kêp mē panhĩō hkêt. Pēr kaxkwa rũm Mēpahpām na pre mē pahwỳr wry nē ā mē pamā kapēr mex anē. Anē.

Hāmri nē te kêp Tirtùm pyrǎk o hipêx nē kām mex o mex ā harē. Nom hēx rom ā harēnh anē. Kot mē mar nē kām mē hkĩnh nē akupỳm mē kām mēmoj to wēnê hprām xǎj nhũm mē hēx rom ā axpēn mǎ mex ā harēnh anē. ²³ Hāmri nhũm mē kuma nhũm ja kām mex nē nhũm hkĩnh nē mē mar o nhỹ nē kêp Tirtùm pyrǎk ā harēnhja nē tanhmā mē kām nē hkêt nē. Jakamā nhũm tee ri amnhĩ tǎ omu nē hwỳr kapēr o wryk xwỳnhjê hō mē nhũm hwỳr wry nē tanhmā ho nhũm ôhy kamā kutōj rax nē htyk tokyx anē.

Panāpe mē Sawti wa akupỳm āxiok hwỳr mōr ā wa harēnh

Atre 11.27-30

²⁴ Tǎ nhũm mē ra ohtō nē Tirtùm Kra Jejus kot tanhmā mē panē amnhĩ nhĩpêx to hǎ harēnh ma nē hkôt amnhĩ xunhwỳ.

²⁵ Hāmri nhũm Panāpe mē Sawti wa ra Kris kôt htō nē htōxjê mǎ

kàxporeta jamý nê ma Jerujarê hwýr o mô nê mê kãm kugô. Hãmri nê ma akupým âxiok hwýr nojarêt nê war amnhî kôt Juãw Makre o mô. Hãmri nê mê ma mô nê akupým mê hwýr pôj.

13

Tîrtûm kot Panãpe mê Sawti wa hyr

Atre 9.15-16; Rômãn 1.1

¹ Âxiok kamã Kris kôt mê kot axpên to htôjaja kot Tîrtûm nhý hã kapêr o mê ahkre ho pa xwýnhjê nhîxi ã kot anhýr. Na pre Panãpe nê Sawti nê Simeãw kã htykre nê Rusti pê Sirên nhô xwýnh nê pahi Eroxkràmnhwý Mãnahêja. ²Jakamã nhùm prem mêmemo arîgro hã axpên wýr akuprô nê Tîrtûm mã mex o mex ã harênh kaxyw apkur kêt rãhã kãm amnhî jarênh o hkrî. Hãmri nhùm Tîrtûm Karô mê kãm tanhmã kapêr o amnhîrit to nê mê kãm:

—E kêr ka mê Panãpe mê Sawti war ata nê wa kot inhmã tanhmã amnhî nhîpêx to ho pa kaxyw wa ãm. Anê.

³ Hãmri nhùm mê kuma nê wa hyr kurê kumrêx nê wa himók ã mê ðkra jaxwý nê wa ho Tîrtûm wý. Hãmri nê wa kot Tîrtûm mã tanhmã amnhî nhîpêx to ho pa kaxyw wa kumê nhùm wa ma mô.

Wajaga kot Jejus nê hkràmnhwý kurê hã harênh
Atre 8.9-24

⁴⁻⁵ Tã nhùm Tîrtûm Karô krî pê Serêw wýr Panãpe mê Sawti wa kumê nhùm wa ma hwýr mô. Nê amnhî kôt Juãw Makre ho mô. Kot tanhmã wa ho ajuta hto ho wa hkôt pa kaxyw. Hãmri nê wa mê mô nê Serêw wýr pôj nê pãr krem axà nê ma gô hipók pê Sipre hwýr mô. Hãmri nê gô hipók ã krî pê Saramîn wýr pôj nê Ijaew nhô Tîrtûm kapêr o mê ahkre xà hã ixkre hwýr tê nê kamã Jejus kot mê panê tanhmã amnhî nhîpêx to hã mê kãm harênh o wa xa.

⁶⁻⁸ Tã nhùm mê krîja rûm kato nê hpãnhã gô hipók kôt mô nê hatur xà kamã krî pê Papos wýr pôj. Hãmri nê kamã wajaga Pajejus pumu. Gresjê kapêr kãm hixi pê Erîm. Erîm haxwýja kêp Ijaew. Na pre hte hêx rom te kêp Tîrtûm nhý hã kapêr jarênh o pa xwýnh pyrãk o amnhî nhîpêx nê ma mê kãm ujarênh o ri mê hkôt pa. No ãm mê kãm amnhî to hêx o pa. Gô hipókja ã pahi Sejupaw hkràmnhwý na pre. Pahi Sejupawja àhpumunh týtjakamã na pre Panãpe mê Sawti wa harênh ma nê kãm wa kapêr mar prãm nê wa kot kãm Tîrtûm kapêr jarênh kaxyw amnhî wýr wa kuwý. Nom nhùm hkràmnhwý wajaga Erîmja kãm wa hkînh kêt nê wa nê kãm kapêr kãm hihtýt nê kãm:

—Kwa nà wa kapêr mar kêt nê. Kot kaj war ama nê wa urãk nê amnhî kaxyw Jejus kôt ajamaxpêr nê hkôt amnhî xãm. Kwarî wa kapêr mar kêt nê. Anê.

⁹ Hãmri nhùm Sawti ra axtem pãnhã hixi. Ra hpãnhã kêp Pawre. Nhùm Tîrtûm Karô ra hkarô mã àr jakamã nhùm ý hã wajagata pumu nê wa nê hkràmnhwý mã kapêr ã kãm akir nê kãm:

¹⁰ —Tk. Kwa pêr apê Satanasti hkwy hã na ka ã wa inhnê kãm akapêr anê. Na ka hte mêmjoj punuj pix kukamã ajamaxpêr nê mêmjoj mex nê mê no kupyw o apa. Tîrtûm kapêr mex kumrêx tã ka axtem nê nê mê hkurê ho ri apa. ¹¹ Æ ate amnhî nhîpêx anhýrja myrapê koja Tîrtûm tanhmã ato ka ano hkre nê arît kêt o atã apkati xohtô nê kãm ga. Anê.

Hãmri nhùm no hkre kurê kumrêx nê tee ri rît kaxyw no pikrar pýnh o xa nom mêmjoj pumunh kêt nê. Hãmri nê mêmhõ kot hpa hã hpyr nê ôrkwý hwýr ho môr kaxyw ri amnhî pu hã mê hapêr pênh o xa. ¹² Hãmri nhùm hkràmnhwý pahîhtija tee ri ja hã omu nê amnhî kaxyw Jejus kôt

hamaxpêr nê hkôt amnhî xâm kurê kumrêx. Hâmri nê Pawre mē Panāpe wa kot tanhmā Tirtūm kapêr jarênh to hā wa kuma nê hamaxpêr o:

—Hêxta waa nê. Aa ixte ā mēhō kapêr kot anhÿr mar kêt tā pa jarāhā kuma. Nā ām hāmri na Jejus jarênhja. Anê.

Pawre mē Panāpe āxiok ō hwÿr wa mōr ā wa harênh

Atre 15:38

¹³ Tā nhūm Pawre mē Panāpe mē Juāw Makre wa mē krī pē Papos rūm kato nê hpānhā ma pyka hō hwÿr mō. Pār kām ma pyka pē Pāpir wÿr mō nê kamā krī pē Perke hwÿr pōj. Hāmri nhūm Juāw Makre tanhmā hamaxpêr to nê tee ri axte wa hkôt mōr kukamā hamaxpêr hāmri nê wa hkaga nê awjanā nê ma akupÿm Jerujarē hwÿr ahte mō. ¹⁴ Jakamā nhūm Pawre mē Panāpe wa ahte Perke rūm kato nê hamū pika pē Pisit kām krī pē āxiok wÿr mō nê hwÿr pōj. Nhūm Ijaew nhō arīgromnu pē sap kato nhūm wa Tirtūm kapêr o mē ahkre xā hā ixkre hwÿr wa tē nê hwÿr axā nê nhÿ. ¹⁵ Hāmri nhūm mēhō mē kām Tirtūm kapêr ā kaga htūm kwÿ kamā harênh o xa. Mojes mē Tirtūm nhÿ hā kapêr o mē pa xwÿnhj kot kapêr ā kaga hkwy kamā nhūm mē kām kamā harênh o xa. Hāmri nê kamā harênh pa nhūm mē ahkre xwÿnhjaja Pawreja wa omu nê wa hwÿr mēhō mē nhūm wa hwÿr tē nê wa kām:

—E na mē ijahkre xwÿnhjaja war ate mē inhmā axujarênh prām nê māmri mē inhmā mēmoj jarênh kaxyw nhūm mē war atā anê. Anê.

¹⁶ Hāmri nhūm wa kuma nhūm Pawre kānhmā xa nê mē hpinhkrênh kaxyw mē kām kānhmā ĩhkra nhūm mē omu nê hpinhkrênh pa nhūm mē kām awjarē. Amnhî kwÿ pē Ijaewjē mē mē kēp Ijaew kêt xwÿnhjē kām Tirtūm kĭnh xwÿnhjē mā nhūm mē kām awjarē. Nê mē kām kapêr

ryy nê. Tirtūm kot tanhmā mē hkukamā Ijaew nhĭgêt nê pāmjē nhĭpêx to hā mē kām awjarē nê mē kām:

—E kot paj mē amā awjarē ka mē inhma. ¹⁷ Nā mē ixpê Ijaew nhō Tirtūmja amnepēm na pre mē ixpê Ijaew pāmjē rē. Kormā Ejit kām mē pa ri nhūm amnhî kaxyw mē kurê nê mē ho ohtō rax kumrêx. Hāmri nê mē kaxyw hihtÿx jakamā Ejit rūm mē kator pa. ¹⁸ Hāmri nê mē ho mex ryy ho mē hkôt pa. Mē kot kapôt ā ri pa hā amgrā pē 40 kamā mē kot htÿx ri tanhmā amnhî nhĭpêx to ho pa htā nhūm mē kamā ukapri ryy ho mē hkôt pa. ¹⁹⁻²⁰ Na pre mē kām pyka pē Kanaā kamā mē pa xwÿnhjē nhĭmex pa. Kanaā kamā mē pa xwÿnhjaja ahpÿnhā xpēn kaxyw mēō krī pē 7ja nhūm mē kām mē ho hapêx pa. Hāmri nê hpānhā mē inhĭgêtjē mā pykaja o hpigrānh pa. Mē ixpê Ijaew nhĭgêtjē mā ho hpigrānh pa nhūm mē kamā pa hā amgrā xohtō nê. Hā amgrā pē 450. Tā nhūm Tirtūm hpānhā mē kām juisti hkwy rē nê mē kaxyw mē unhwÿ nhūm mē ho pa. Tā nhūm hpānhā Sāmuew mē ho amnhĭptā nê mē o pa. Kēp Tirtūm nhÿ hā kapêr jarênh o pa xwÿnhjē hō nhūm Tirtūm mē kaxyw ām.

²¹ —Tā nhūm mē ixpāmjaja xpēn ma nê ra te krī hkwy kamā mē urāk nê mēō pahi kot Sāmuew pānhā mē ho amnhĭptār o pa hprām xāj amnhî to Tirtūm wÿ nê kām: “Pa Tirtūm. Kwa mē ixkaxyw pahi hō xām kē mē ixto amnhĭptār o pa nā. Ja na mē inhmā hprām tÿx kumrêx.”

—Anhÿr o amnhî to hwÿr jakamā nhūm mē kuma nê mē kaxyw Sawti xām. Kisti hkra na pre. Nê mē inhĭgêt Pējamī kanrēhā htāmnhwÿ na pre. Hāmri nhūm Tirtūm mē kaxyw ām nhūm kēp mēō pahi nê mē ho amnhĭptār o pa hā amgrā pē 40. ²² Tā nhūm Tirtūm kator nê hpānhā mē kaxyw Tawi

xām. Hāmri nē harēnh o: “Nà Jese hkra Tawija na hte inhmā hprām xà hkôt amnhī nhīpēx mex o pa.” Anē.

²³—Tā Jejus kēp Tawi hkanrēhā htāmnhwý na pre. Kukamā na pre Tirtūm mē ixpē Ijaew nhīgētjē mā harē nē harēnh o: “Koja nhýrmā Tawi hkanrēhā htāmnhwýjē hō mē ate amnhī tomnuj pē mē apytā.” Anhýr o hkukamā mē kām harē. ²⁴No nhūm kormā Jejus kot mē ixpē Ijaewjē mā amnhī to amnhīrīt kēt ri nhūm Juāw Paxis kumrēx hkukamā mē ixwýr mō nē mē inhmā Tirtūm kapēr jarēnh o ri mē ixkôt pa. Nē mē ixte amnhī tomnuj kaga nē hpānhā tām amnhī nhīpēx o ixpa hā mē ixpumunh kôt mē ixkrā kumrār ā mē inhmā karō ho pa.

²⁵—Tā mē kām kapēr o pa ryy nē ra hatur xām mēnh kaxyw nē amnhī tā tanhmā mē inhmā kapēr to nē mē inhmā: “Na ka mē ixpumu nē atýx Tirtūm kot mē akaxyw pa ixām ā ixkamnhīx nom pa hkēt. Kot mē pakaxyw ām mā xwýnhta kukamā na pa pre mō. Tām kot amnhī to rax o ijakrenh. Nē kot amnhī to mex o kot ijakrenh. Jakamā na pa hte ām kukwak ri ixpa nē amnhī tā hā xpijaām o ixpa.” Anē.

—Na pre ā Juāw Paxisja mē inhmā Jejus jarēnh anhýr o pa.

²⁶—Tā kwa mē inhma mē apē Apraāw kanrēhā htāmnhwýjaja nē mē apē Ijaew kēt xwýnh kām Tirtūm kīnh xwýnhjaja. E mē apiitā ixkapēr ma nē kām ajamaxpēr týx rāhā ho ri apa. Nà mē pahpiitā mē pakaxyw na Tirtūm kapērja. Kot mē pahte amnhī tomnuj pē mē papytār ā amnhī jarēnhja mē ixpē Ijaew pix kaxyw kēt. Mē pahpiitā mē pakaxyw na. Mē pahpiitā mē pahte ja mar nē hkôt amnhī nhīpēxja na Tirtūm kām hprām. ²⁷Nom Jerujarē nhō xwýnhjē mē mē àptār tūmrejaja na prem

Jejus kēp Tirtūm kot mē pakaxyw ām xwýnh ā harēnh mar tā hkôt hamaxpēr kēt nē. Na pre htem mē inhō arīgromnu pē sap ā akuprō nē xpēn mā Tirtūm kapēr ā kagā htūm kamā ujarēnh o hkrī. Kagāja kamā Tirtūm nhý hā mē kapēr o mē pa xwýnhjaja kot hprī hā Jejus jarēnh nē hā kagā nhūm mē kot mar tā hprī hā mar týx kēt nē. Jakamā na prem axtem nē mē kām hā amýnē. Tirtūm nhý hā kapēr jarēnh xwýnhjaja kot mē hkukamā mē harēnh xāja kôt nhūm mē kot hpīr kaxyw mē kām hā amýnē.

²⁸⁻²⁹Kot tanhmā amnhī tomnuj to hkēt tā nhūm mē amarī hā pahī Pirat wý. Kot mē kām hā àmnēnh nhūm ō pōristijaja kot hpīr kaxyw nhūm mē hā kuwý nhūm mē kām kupī. Ra Tirtūm kapēr ā kagā htūm kot mē hkukamā mē harēnh xà hkôt. Hāmri nhūm mē kot hkôt pa ho pa xwýnhjaja pī kahpa nē ho wrý nē ma o tē nē kēn kre kamā haxà. ³⁰Tā nhūm Tirtūm akupým ho htūr ³¹nhūm xatā hkôt mē pa ho pa xwýnhjē hwýr hapōj. Kormā htyk kēt ri ra Garirej rüm Jerujarē hwýr hkôt mē pa ho mē pa xwýnhjē hwýr xatā mē hwýr hapōx o pa. Jao hā arīgro xohtō nē nhūm prem piitā omu. Tā mē tāmjaja na htem mē ixpē Ijaew mā harēnh o pa.

³²⁻³³—Amnepēm Tirtūm na pre mē ixpē Ijaew nhīgētjē mā tanhmā Kra Jejus jarēnh to. Kormā mē pahwýr wrýk kēt ri tanhmā mē kām harēnh to. Jakamā ra kot hkukamā harēnh xà hkôt nhūm pre mē pahwýr wrý nē tanhmā mē panē amnhī nhīpēx to. Tā mē ate harēnh mar kaxyw na pa wa man mē awýr mō. Amnepēm finat Tawi na pre Tirtūm kapēr kwý hā kagā. Tirtūm mex ā mē grer xà pē Sam 2ja kamā hā kagā. Te Tirtūm tām Jejus mā kapēr pyrāk o hā kagā nē hā kagā ho:

Apē Ixkra na ka.

Tã mẽ piitã mẽ kot apê Ixkra
hã apumunh kurê kumrêx
kaxyw na pa jarãhã mẽ kãm
ato amnhĩrĩt. Anê.

Nhũm pre ã Tĩrtũm Jejus mã kapêr
anê nhũm Tawi ô ri mẽ pamã hã
kagà.

³⁴ —Amnepê m na pre Tĩrtũm
tanhmã Kra Jejus kukamã harênh
to. Mẽ kot hpĩr nhũm kot akupỹm
ho htĩr kukamã hã amnhĩ jarê.
ĩ hkro pymaj kot mẽ htykjê pê
hkaxàr nê akupỹm ho htĩr ã nhũm
hkukamã hã amnhĩ jarê. Te Kraja
mã amnhĩ jarênh pyrà nê amnhĩ
jarênh o:

E kot paj ato mex rax nê. Ixte Tawi
mã amnhĩ jarênh xà hkôt.

Anhỹr o hkukamã harênh xà hkôt
akupỹm ho htĩr nhũm axte htyk kêt
ã harê.

³⁵ —Nê kagàja nhãm hô hõ kot
tanhmã Jejus jarênh kute. Te Je-
jus tãm Tĩrtũm mã kapêr pyrà nê
harênh o:

Ixpê Akra hã ixte akapêr kôt ri
amnhĩ nhĩpêx rãhã ho ixpa
jakamã kot kaj ixpumunh
mex pa inhĩ hkro hkêt nê.
Anê.

Tĩrtũm kapêr ã kagà htũm kot ã
Jejus jarênh kot anhỹr. ³⁶ Nom ã
Tawi jarênh anhỹr kêt nê. Tawi
na pre Tĩrtũm kapêr kôt amnhĩ
nhĩpêx mex o pa hãmri nê ty nhũm
prem mẽ panhĩgêjtjê nhĩhkô hã
haxã hãmri nhũm ĩ hkro nê hapêx.

³⁷ —Tã no Jejusja Tĩrtũm kot
akupỹm ho htĩr jakamã nhũm Tawi
pyrà ĩ hkro nê hapêx kêt nê.

³⁸ —E mẽ inhmar tỳx nê
ixkwỳjaja. Kra Jejus pix kukwak
na hte Tĩrtũm amnhĩ katut kôt mẽ
pahte amnhĩ tomnuj rê. ³⁹ Jakamã
kot kaj mẽ ãm Mojes kapêr kôt pix
mã ri amnhĩ nhĩpêx nhũm Tĩrtũm
tee ri ja hã mẽ apumu nê amnhĩ
katut kôt mẽ ate amnhĩ tomnuj
rênh kêt nê. Jejusja tapxipix na pre
htyk o Tĩrtũm mã mẽ pahte amnhĩ
tomnuj piitã hpãnhã amnhĩrer pa.

⁴⁰⁻⁴¹ Amnepê m na pre Tĩrtũm kapêr
nhỹ hã kapêr xwỳnhjê hõja mẽ kãm
Tĩrtũm kapêr jarê nê hã kagà. Te
Tĩrtũm tãm mẽ kot kapêr ã hpêr o
pikênh xwỳnhjê mã kapêr pyrà nê
mẽ kãm:

E kot paj aa mẽ ate mẽmoj pumunh
kêt ô ho anê.

Nhũm mẽhõ mẽ amã harê ka mẽ
harênh ma nê ãm ama.

Nhũm mẽ kot omunh mex xwỳnhjê
hõ kot hprĩ hã mẽ amã
harênh tã ka mẽ ãm ama nê
hkôt ajamaxpêr kêt nê.

Hãmri nê tee ri tanhmã kãm aja-
maxpêr to ho ri apa. Anê.

Ã Tĩrtũm mẽ kãm kapêr anhỹr
jakamã kwa mẽ o kora. Apu mẽ
kajaja na pre ã mẽ ajarênh anê rỳ
ko. Anê.

⁴² Nhũm pre ã Pawre mẽ kãm
ujarênh ryy anê. Hãmri nê Panãpe
mẽ wa ixkreta rũm kator kaxyw
nhũm mẽ kot mar o hkrĩ xwỳnhjaja
tee ri ma wa mõi ã wa omu nê ma
wa hkôt mra nê wa kãm:

—Kwa war axujarênhja na mex
kumrêx. Mẽ inhmã axte mar prãm.
Xà koja axte sap kato ka wa akupỹn
mẽ ixwỳr wa tẽ nê axte mẽ inhmã
awjarê? Anê.

Hãmri nhũm wa mẽ kãm:

—Tõe. Nà kot paj war anê. Anê.

⁴³ Hãmri nê wa ma tẽ nhũm mẽ
hkwỳja ma wa hkôt mra. Ijaew
kwỳjaja nê Ijaew kêt xwỳnh kãm
Tĩrtũm kĩnh xwỳnhjaja nhũm mẽ ma
wa hkôt mra. Hãmri nhũm wa pry
hã mẽ kãm kapêr o mõi. Tĩrtũm kot
mẽ kutã nojarêr rãhã ho pa nhũm
mẽ kot amnhĩ tã omunh nê hkôt
amnhĩ nhĩpêx tỳx rãhã ho pa nê
hkaga hkêt ã mẽ kãm kapêr o mõi.

⁴⁴ Tã nhũm axte sap nhũm krĩ
nhõ xwỳnh piitã axte Tĩrtũm kapêr
mar kaxyw ixkre wỳr akuprõ.
Ijaewjaja nê Ijaew kêt xwỳnhjaja.
⁴⁵ Hãmri nhũm Ijaew kwỳjaja tee ri
mẽ amnhĩ wỳr Ijaew kêt xwỳnhjê
pumu nê mẽ hã Pawre mẽ Panãpe
wa kamã gryk nê. Mẽ kãm Ijaew
kêt xwỳnhjaja kot Tĩrtũm kapêr mar

prām kêt jakamā mẽ hã wa kamã gryk nê. Hãmri nê Pawre kapêr ma nê xatã kãm kapêr punuj nê kãm:

—Tk. Kwa na ka Tirtüm kapêr jarênh o axêx. Ja kot anhÿr kêt. Anê.

⁴⁶ Nom nhùm wa kãm mẽ uma hkêt nê. Wa âm Tirtüm Karô nhÿ hã amnhĩ to htÿx nê wa mẽ kãm kapêr. Nê amnhĩ tã tanhmã mẽ kãm kapêr to nê mẽ kãm:

—Nã wa ixpyrà nê mẽ apê Ijaew jakamã na pa mẽ akumrêxjê mã Tirtüm kot mẽ pakaxyw Jejus xãm ã harê. Tã ka mẽ ama nê âm ama nê te mẽ ate hkaga pyrà nê ã wa inhmã akapêr anê nê wa ixte kapêr o ixêx ã wa ijarê. Pêr âm mẽ ate mẽ amã Tirtüm mẽ Kra wa kuri mẽ atir tùm nê mẽ apa hprãm kêt. Jakamã kot paj wa mẽ apê ixkato nê hpãnhã ma Ijaew kêt xwÿnhjê mã Jejus kapêr jarênh o ri mẽ hkôt ixpa. ⁴⁷ Tirtüm kapêr ã kagã htüm ã kot mẽ ixte amnhĩ nhípêx anhÿrja kukamã mẽ ijarê nê mẽ ijarênh o: Mẽ ate Ijaew kêt xwÿnhjê mã ixkapêr jarênh o ri apa kaxyw na pa pre mẽ kaxyw mẽ arê.

Jakamã koja pyka piitã hkôt mẽ pa xwÿnhjaja ohtô nê mẽ akapêr ma nê ixkra hkôt amnhĩ xunhwÿ.

Koja mẽ ã amnhĩ nhípêx anê pa ja hã mẽ omu nê mẽ ho ixkra. Anê.

Tirtüm kot ã ja kukamã mẽ ijarênh anhÿr jakamã kot paj wa mẽ apê ixkato nê mẽ apãnhã ma Ijaew kêt xwÿnhjê mã Tirtüm kapêr jarênh o ri mẽ hkôt ixpa. Anê.

⁴⁸ Hãmri nhùm Ijaew kêt xwÿnhjaja amnhĩ tã wa kapêrja ma nê hkĩnh nê Tirtüm kapêr mex o mex ã harê. Hãmri nhùm ra Tirtüm kot nhÿrmã amnhĩ ri mẽ htir tùm nê mẽ pa ho mẽ pa kaxyw mẽ rênh xwÿnhjaja amnhĩ kaxyw Pahihti Jejus kôt hamaxpêr nê hkôt amnhĩ xunhwÿ.

⁴⁹ Tã nhùm pika pê ãxiok kamã mẽ piitã Tirtüm kapêr jarênh ma.

⁵⁰ Nom nhùm Ijaew xaptàr tùmrejaja kãm Pawre mẽ Panãpe wa hkĩnh kêt jakamã na prem krĩ hkôt mẽ kot amnhĩ to rũnh xwÿnhjê mã wa ho kapêr punuj o pa. Mẽ ô pahi mẽ mênĩ kot amnhĩ to rũnh xwÿnhjaja nhùm mẽ kãm tanhmã wa ho kapêr to nhùm mẽ kuma nê mẽ hkôt hamaxpêr. Mênijaja kãm Tirtüm prãm tã amnhĩ kaxyw Jejus kôt hamaxpêr kêt jakamã tanhmã mẽ kot Pawre mẽ Panãpe wa ho hêx toja ma nê hkôt hamaxpêr nê wa kamã gryk nê. Jakamã nhùm mẽ ohtô nê tanhmã wa hipêx to nê amnhĩ nê wa hano. ⁵¹ Hãmri nhùm wa mẽ kêp kato nê xa nê mẽ kot Tirtüm kapêr kaga hã amnhĩ pumunh kaxyw mẽ noo mã wa hparkã kapa nê nê awjagrô kapĩ nê ma wa tẽ. Hãmri nê ma krĩ pê Ikõn wÿr hpãnhã wa mō. ⁵² Hãmri nhùm ãxiok kamã mẽ kot Jejus kôt amnhĩ xunhwÿr xwÿnhjaja hkĩnh nê ri pa. Tirtüm Karô kot mẽ hkarô mã gjêx jakamã nhùm mẽ hkĩnh nê ri pa ho pa.

14

Pawre mẽ Panãpe wa kot Ikõn wÿr mōr ã wa harênh

Matêwre 10.34-35

¹ Hãmri nhùm Pawre mẽ Panãpeja wa ãxiok rùm kato nê hpãnhã ma krĩ pê Ikõn wÿr wa mō. Hãmri nê hwÿr pøj nê Ijaew nhô Tirtüm kapêr o mẽ ahkre xà hã ixkre hwÿr wa tẽ nê kamã mẽ kãm Jejus jarênh o nhÿ. Mẽ kãm harênh kãm hihtÿx jakamã nhùm mẽ hkwyjaja wa kuma nê amnhĩ kaxyw hkôt hamaxpêr nê hkôt amnhĩ xunhwÿ. Ijaew kwÿjaja nê mẽ kêp Ijaew kêt xwÿnh kwÿjaja nhùm mẽ ohtô nê Jejus kôt amnhĩ xunhwÿ.

² Tã nhùm mẽ hkwyjaja kãm Jejus jarênh mar prãm kêt nê. Hãmri nê kato nê ma Ijaew kêt xwÿnh kwÿjê hwÿr mra nê tanhmã mẽ kãm Pawre mẽ Panãpe wa ho hêx

to nê wa ho kapêr punuj nê nhùm mē mar xà hkôt wa kamã gryk nê. ³ Nom nhùm wa tokyx kator nê ma mōr kêt nê arī Tirtūm Karō nhỹ hã amnhĩ to htỹx nê mē kãm Tirtūm kapêr jarēnh o ri mē hkôt pa. Nê kēp mē kutã nojarêt xwỹnh ã harēnh o pa. Nê ý hã mē kãm aa mē kot mēmoj pumunh kêt kwỹ ho anhỹr o ri mē hkôt pa. Jakamã nhùm mē hkwyjaja ja hã wa omu nê wa kapêr ma nê hamaxpêr o:

—Kwa ãm hãmri na wa Tirtūm kēp mē pakamã ukapri xwỹnh ã harē. Pêr ý hã wa kot ã amnhĩ nhĩpêx anhỹr o pa kēnã. Anê.

⁴ Hãmri nhùm Ijaew kêt xwỹnh kwỹjaja wa hkôt hamaxpêr nê wa hkôt amnhĩ xunhwỹ. No nhùm mē hkwyjaja wa hkôt hamaxpêr kêt nê. Ra mē kot Ijaew kwỹ kot tanhmã wa ho kapêr punuj toja ma nê mē hkôt hamaxpêr jakamã nhùm krĩ nhō xwỹnhjaja axpēn kwỹm ri tanhmã wa hkôt hamaxpêr to ho pa. Jao axpēn kwỹm ri wa hkôt hamaxpêr o pa.

⁵ Tã nhùm wa hkôt hamaxpêr kêt xwỹnhjaja axpēn wỹr akuprō nê wa hã amỹnê. Ijaew kwỹjaja nê Ijaew kêt xwỹnh kwỹjaja nê mē ô pahijaja nhùm mē kot kēn o wa htak o wa hpĩr kaxyw wa hã amỹnê. ⁶ Hãmri nhùm wa amnhĩ tã ama nê mē kēp kato nê hpãnhã ma pika hō hwỹr mō. Ma Rikōn kãm krĩ hkwy hwỹr hpãnhã mō. Risti wỹr nê Tepe wỹr nê pu hã krĩ hkwy hwỹr wa mō. ⁷ Wa mō nê pōj nê ma mē kãm Jejus kot tanhmã mē panē amnhĩ nhĩpêx to hã harēnh o ri mē hkôt pa.

*Te grã xwỹnh jarēnh
Atre 3.1-10*

⁸ Nhùm Risti kamã mēhō my hte grã nê hkrĩ xwỹnhja. Katorxã nhōxã kre rūm hte grã nê kator jakamã ri pa hkêt nê arī hkrĩ xà kamã hkrĩ ho hkrĩ. ⁹ Jakamã nhùm Pawre mē kãm ujarēnh o xa nhùm kuri mar o nhỹ. Hãmri nê hamaxpêr o:

—Nà pêr Tirtūm àhpumunh o àhpumunh. Mãn kot ixto mex kaxyw àhpumunh tỹx. Nà koja ixto mex. Anê.

Hãmri nhùm Pawre ã hamaxpêr anhỹr ã omu ¹⁰ nê kàx pē kãm kapêr nê kãm:

—E kwa kãnhmã xa. Anê.

Hãmri nhùm kuma nê kãnhmã ãm kurē kumrêx nê ri mra. Nê amnhĩ te kamã hamak o ri mra nê hkĩnh tỹx kumrêx. ¹¹ Hãmri nhùm kuri mē kuhê xwỹnhjaja Pawre kot ã hipêx anhỹrja ã omu nê htỹx wa kēp kaxkwa kamã mēhpãm ã wa hkamnhĩx nê hkĩnh nê axpēn mã:

—Kwa pêr mēpahpãm na wa. Mēpahpãm Jupti mē Mēkurtija na wa panhĩ hã amnhĩ jahkre nê mē pahwỹr wrỹ. Nà ãm hãmri na wa mē pahwỹr wrỹ. Anê.

Nom mē kapêr pē Rikaôn o axpēn mã kapêr jakamã nhùm Pawre mē Panãpe wa mē mar kêt nê. Wa kot mē kapêr mar kêt jakamã ã mē kot wa harēnh anhỹrja mar kêt nê htỹx wa xa. ¹² Nhùm mē ã wa kēp mēhpãm ã wa harēnh anê nê hkĩnh tỹx nê. Panãpeja nhùm prem kēp mē hpãm Jupti hã hkamnhĩx no Pawreja nhùm prem kēp mēhpãm Mēkurti hã hkamnhĩx. Pawreja Mēkurti pyrã nê kapêr japjê rũnh jakamã nhùm mē kēp hã hkamnhĩx. ¹³ Na prem krĩ htã mēhpãm Juptija mã amnhĩ jarēnh xà hã ixkre nhĩpêx nê hkarō nhĩpêx. Hãmri nê hwỹr akuprō nê kãm mex o mex ã harē nê amnhĩ to hwỹr o pa. Jakamã nhùm Jupti nhō patrejaja Pawre mē Panãpe wa kēp mēhpãm ã wa harēnh ma hãmri nê wa hã hkwyjê mã kãm:

—Kwa pu mē wa kãm mōx kwỹ hpa nê pixorã hkwy rê. Hãmri nê wa kãm wa mex o wa mex ã wa harē nê wa kēp mēpahpãm ã amnhĩ to wa kuwỹ. Wa kēp mēpahpãm kēnã. Anê.

Hãmri nê ra ã wa hipêx anhỹr kaxyw ¹⁴ nhùm wa tee ri mē kot amnhĩ nhĩpêx ã mē omu nhùm ja

wa kêp omnuj tỳx nê. Jakamã nhũm wa amnhĩ pê hinòkà kaxònh pa nê mẽ kutã hpròt nê ã mẽ kot wa hipêx anhỳrja nê mẽ kãm kapêr kãm hihtỳx nê. ¹⁵ Nê mẽ kãm:

—Kwa mẽ ri ã wa inhĩpêx anhỳr kêt nê. Wa ixpê mẽapãm kêt kênã kot ka kêt mẽ ã wa inhĩpêx anê. Nom mẽapãmja na ka htem ãm amnhĩ to hwỳr kaprỳ nê kãm mex o mex ã harênh kaprỳ o ri apa. Tã mẽ ate ã amnhĩ nhĩpêx anhỳr kaga nê hpãnhã Tirtũm kòt amnhĩ xunhwỳr nê amnhĩ to pix wỳr o apa kaxyw na pa pre wa mẽ awỳr mỗ nê pỏj. Tirtũmja mẽ ate mẽ apãm jarênh ta rom hũr o htũr. Na pre mẽmoj piitã ho kato. Kaxkwa ho kato nê pyka ho kato nê gỏ xujanãr o kato. Nê kamã ri mẽmoj piitã ho kator pa.

¹⁶ —Amnepêm mẽ pa xwỳnhjaja na pre htem amnhĩ krã hkòt pix mã tanhmã ri amnhĩ nhĩpêx to ho pa nhũm Tirtũm ja hã mẽ omu nê ãm mẽ omu nê tanhmã mẽ ho hkêt nê. ¹⁷ Mẽ pahte amnhĩ tã omunh kaxyw na hte amarĩ tanhmã mẽ pahto mex to ho pa. Na hte mẽ pahwỳr na rê nhũm mẽ pahpur go mex nê. Nhũm mẽ pamã tanhmã mẽ pahpur kãm mẽmo hyja to nhũm ra mẽ pamã ô rũnh nê. Pu htem hamỳ nê ho paxàpkur mex nê pahkĩnh nê ri papa. Tirtũm pix kukwak ri na pu htem ã amnhĩ nhĩpêx anhỳr o ri papa. Anê.

¹⁸ Nhũm pre ã Pawre mẽ kot wa kãm mỗx parja nê mẽ kãm kapêr kãm hihtỳx anê. No nhũm mẽ kuma nê ãm kuma nê wa kãm mry hkwy hpar kaxyw wa hã hihtỳx nê. Jakamã kritpêm nhỹx prem wa kãm hkwy pa. Tã tanhmã hamaxpêr to nê hkaga nê wa kãm hpar kêt nê.

Mẽ kot Pawre pũr ã àmnênh ã mẽ harênh

Sikũn Ximotre 3.10-11

¹⁹ Tã nhũm Ijaew kwỳjaja mẽ hwỳr mran pỏj. Krĩ pê ãxiok mẽ

Ikõn rũm ma mẽ hwỳr mran pỏj nê mẽ kãm Pawre ho hêx o mẽ hkòt pa nhũm mẽ kuma nê axtem nê Pawre kamã gryk kato. Hãmri nê mẽ kot hpĩr kaxyw kên runh kwỳ jamỳ nê ho htak prêprêk o kuhê. Hãmri nhũm amnhĩ xà htỳx kamã ama nê tẽm nê akryk nỏ nhũm mẽ omu nê htỳx ho ra htyk ã hkamnhĩx. Hãmri nê hwỳr tẽ nê hpa hã kupy nê ma hkjênh o mỗ nê krĩ pum kumê nê ma akupỳm mra. ²⁰ Hãmri nhũm Jesus kòt mẽ kot axpẽn to htỏjaja tee ri ã mẽ kot hipêx anhỳr ã omu nê hkaprĩ htỳx nê hwỳr hpròt nê omu nê mỳr o kuhê. Hãmri nhũm te htyk pyrà nê nỏr tã Jesus nhỹ hã akupỳm hihtỳx mex nê kànhmã nhỹ hãmri nê ma akupỳm mẽ hkòt krĩm tẽ.

Tã nhũm apkati nhũm Panãpe mẽ wa krĩja rũm kato nê ma wa mỗ. Pãnhã ma krĩ pê Tepe hwỳr wa mỗ.

Pawre mẽ Panãpe akupỳm ãxiok wỳr wa mỗr ã wa harênh

²¹⁻²² Tã nhũm wa ma Tepe hwỳr mỗ nê pỏj. Hãmri nê kamã mẽ kãm Jesus tanhmã kot mẽ panê amnhĩ nhĩpêx to hã harênh o ri mẽ hkòt wa pa nhũm mẽ wa kuma nê ohtỏ nê Jesus kòt amnhĩ xunhwỳ.

Tã nhũm wa kato nê awjanã nê ma akupỳm pika pê Pisit wỳr wa mỗ. Nê kamã krĩ hkwy hkòt ri ra mẽ kot Jesus kòt amnhĩ xunhwỳr xwỳnhjê jahkre ho ri mẽ hkòt pa. Krĩ pê Risti nê Ikõn nê ãxiokja kòt. Nê mẽ ahkre kamã Jesus kòt mẽ ho mẽ hihtỳx o wa pa nê mẽ kãm:

—E ra mẽ ate Jesus kòt amnhĩ xunhwỳr jakamã koja mẽ kãm Jesus kurê xwỳnhjaja tee ri ja hã mẽ apumu nê hã tanhmã mẽ anhĩpêx tỏ. Tã kêr ka mẽ ãm amnhĩ tã mẽ omu nê ãm mẽ omu nê Jesus kaga hkêt nê. Nê arĩ hkòt amnhĩ nhĩpêx mex o ri apa rãhã nhỹrmã ma ô krĩ hwỳr api nê Tirtũm wa kuri amex kumrêx nê atũr tũm nê apa ho apa. Anê.

23 Hāmri nē ahpÿnhā krī piitā hkôt ri mē kot pastô nhÿ hā mē ahkre kaxyw mē hkwÿjê rê nē mē kaxyw mē unhwÿ nē mē ho Tirtûm wÿ. àpkur kêt rāhā mē ho kuwÿ nē kām:

—Pa Tirtûm? E jajê pumu. Mē kot krī ja kamā pastô nhÿ hā akrajê jahkre ho pa kaxyw na pa wa mē unhwÿ. Jakamā e kêr ka mē kutā anojarêt rāhā ho ri mē hkôt apa. Anē.

Hāmri nē wa mē kēp kato nē ma hpānhā nhÿhÿm wa mō. 24 Pyka pē Pisit kamā mō nē hpānhā nhām pyka pē Pāpir kôt mō. Wa ma mē kām tanhmā Jesus kapēr jarēnh to ho mē hkôt mō. 25 Hāmri nē krī pē Perke hwÿr wa pōj nē kamā mē kām Jesus kot tanhmā amnhÿ nhÿpêx to hā harē hāmri nē mē kurûm kato nē axte mō. Pānhā ma krī pē Atari hwÿr wa mō. 26 Hāmri nē hwÿr pōj nē hpānhā kurûm akupÿm āxiok wÿr wa mō. Pār rax kām ma akupÿm mō. Āxiokja kamā na pre wa nojarêt nhÿm Jesus kôt wa htō nē wa htōxjaja wa ho Tirtûm wÿ nē ma krī hkwÿ hwÿr wa kumē. Wa kot ma mē hkôt tanhmā Jesus kot mē panē amnhÿ nhÿpêx to hā harēnh o wa pa kaxyw wa kumē. Jakamā nhÿm wa ra ja ho anhÿr pa nē akupÿm mē hwÿr wa mō. 27 Hāmri nē wa akupÿm pōj nē Jesus kôt mē kot axpēn to htō nē htōxjê ho akuprō nē mē kām amnhÿ jarē nē mē kām:

—Nà ãm hāmri na pa wa ra ixkàhkĭnh pē akupÿm mē awÿr pōj. Na pre Tirtûm wa ixkutā nojarêt rāhā ho wa inhĭhkô hā pa. Jakamā pa pre wa ma ÿ hā Ijaew kêt xwÿnhjê mā Jesus jarēnh o ixpa nhÿm mē hkwÿjaja wa inhma nē hkôt amnhÿ xunhwÿ.

28 Anhÿr o wa mē kām kapēr hāmri nē wa tokyx ma nhÿhÿm krī hō hwÿr axte mōr kêt nē. War arĭ āxiok kamā Jesus kôt wa htō nē htōxjê hkôt ri pa.

15

Jerujarē kamā Jesus kwÿ hpikuprōnh ā mē harēnh

Matêwre 23.1-4; Karatas 2.1-5, 5.1-16

1 Tā hāmri nhÿm Ijaew kwÿjaja āxiok wÿr Jesus kwÿ pē Ijaew kêt xwÿnhjê hwÿr mōn pōj. Pika pē Jutej rûm mē hwÿr pōj nē tanhmā mē ahkre hto ho pa. Nom axtem nē Tirtûm kapēr kuhpa hā mē ahkre nē mē kām:

—Kot ka mē amā Jesus kôt amnhÿ xunhwÿr prām hāmri nē mē ixpyrà nē finat Mojes kot mē pamā karō xà hkôt amnhÿ my kwÿrÿt kà kwÿ jakà nē rĭ kormā hkôt amnhÿ xunhwÿ. Kot kaj mē ā amnhÿ nhÿpêx anhÿr kêt nē nhÿm Tirtûm tee ri ja hā mē apumu nē amnhÿ katut kôt mē ate amnhÿ tomnuj rēnh nē mē ato hkra hkêt nē. Anē.

2 Hāmri nhÿm Pawre mē Panāpe tee ri mē kapēr anhÿrja ma nhÿm wa kēp ja omnuj tÿx nē. Hāmri nhÿm wa mē kām:

—Tk. Kwa kot anhÿr kêt. Na hte Tirtûm mē pahte amnhÿ my kwÿrÿt kà jakàr ā mē pahpumunh kôt mē pahto hkra hkêt nē. Anē.

Hāmri nē tee ri mē kapērja nē mē kām kapēr no nhÿm mē ãm wa kuma nē wa hkôt hamaxpēr kêt nē. Nē arĭ ā mē ahkre anhÿr o mē hkôt pa. Jakamā nhÿm mē ja hā axpēn mā kapēr rax nē. Hāmri nhÿm Jesus kwÿ pē Ijaew kêt xwÿnhjaja amnhÿ tā Pawre mē Panāpe wa hkukja nē wa kām:

—Kwa xà kot paj mē apyrà nē amnhÿ my kwÿrÿt kà jakà nhÿm Tirtûm kām ja mex nē nà? Kwa wa ma akupÿm Jerujarē hwÿr mō nē ja hā Jesus nhÿ hā mē ahkre xwÿnh maatijê mē mē kot Jesus kwÿ jahkre xwÿnhjê kukja nē hā mē ama. Nē ota mē ixkwÿjaja koja ma war akôt mra. Kê mē tanhmā mē amā ja jarēnh to ka mē ama nē man akupÿn mē ixwÿr mra nē

tanhmã mẽ inhmã mẽ kapër jarënh to. Anë.

Hãmri nhùm wa mẽ kãm: “Tõe. Nà kot paj mẽ anë.” Anë. ³ Hãmri nẽ wa mẽ ma Jerujarẽ hwỳr mō. Ma pyka pê Wẽnĩs mẽ Samar hkõt ma hwỳr mō. Hãmri nẽ nhỳri Jejus kõt mẽ htō nẽ htōxjê pumu nẽ mẽ kãm Ijaew kêt xwỳnhjê jarẽ. Mẽ hkwỳjaja mẽ urak nẽ Jejus kõt amnhĩ xunhwỳr ã mẽ harënh o mō. Hãmri nhùm mẽ harënh ma nẽ mẽ ý hã hkĩnh nẽ. ⁴ Hãmri nhùm mẽ ra Jerujarẽ hwỳr Jejus kõt mẽ htōjê hwỳr mōn pōj. Hãmri nẽ mẽ ahkre xwỳnhjê mẽ Jejus nhỹ hã mẽ ahkre xwỳnh maatijê pumu nhùm mẽ haxwỳja amnhĩ wỳr mẽ omu nẽ hkĩnh nẽ. Nẽ tanhmã mẽ ho mex to nẽ mẽ kãm kapër mex nẽ. Hãmri nhùm Pawre mẽ Panãpe wa mẽ kãm amnhĩ jarẽ. Tĩrtũm kot wa ìhkō hã wa hkõt pa nhùm wa ý hã kot Ijaew kêt xwỳnhjê mã kapër o pa nhùm mẽ hkwỳja kot wa mar nẽ Jejus kõt amnhĩ xunhwỳr ã nhùm wa mẽ kãm amnhĩ jarẽ. ⁵ Nhùm Jejus kwỳjê kamã mẽ kệp Parijew nhō xwỳnh kwỳjaja. Mẽ kệp Parijew tã hkwỳjê rom Jejus kõt amnhĩ xunhwỳ. Jakamã nhùm mẽ tee ri Pawre mẽ Panãpe wa kot Ijaew kêt xwỳnhjê jarënh ma nẽ kànhmã kuhẽ nẽ wa kãm:

—Kwa kê mẽ pahpyrà nẽ amnhĩ my kwỳt kà jakà nẽ finat Mojes kot Tĩrtũm nhỹ hã mẽ pamã mẽmoj tã karō hkõt amnhĩ nhĩpêx o pa. No kot mẽ ã amnhĩ nhĩpêx anhỹr kêt nhùm ja mẽ pahpê omnuy nẽ. Anë.

⁶ Hãmri nhùm Jejus nhỹ hã mẽ ahkre xwỳnh maatijê mẽ mẽ hkwỳjê jahkre xwỳnhjaja mẽ kuma nẽ hapōj nẽ nhỳri akuprō. Ijaew kêt xwỳnh kot Jejus kõt amnhĩ xunhwỳr xwỳnhjaja kot tanhmã amnhĩ nhĩpêx to hã axpẽn mar kaxyw nhỹri akuprō. ⁷ Hãmri nẽ mẽ hã axpẽn mar ryy nẽ. Hãmri nhùm Simãw Pêtre tã kànhmã xa nẽ mẽ kãm:

—Nà na pre Tĩrtũm mẽ pahkapi nẽ Ijaew kêt xwỳnhjê kaxyw pa ixta. Ixte mẽ kãm Jejus kot tanhmã mẽ panẽ amnhĩ nhĩpêx to hã harënh o ri mẽ hkõt ixpa nhùm mẽ kot inhmar nẽ hkõt amnhĩ xunhwỳr kaxyw nhùm mẽ kaxyw ixta. Ra mẽ ate ja hã ixpumunh mex. ⁸⁻⁹ Tĩrtũm kot tanhmã ri mẽ pakute hkõt mẽ pahpumunh par jakamã te kot ra mẽ panhĩpêxta pyrà nẽ mãnẽn Ijaew kêt xwỳnhjê nhĩpêx. Mẽ kot mẽ pahpyrà nẽ amnhĩ kaxyw Jejus kõt hamaxpër jakamã nhùm Tĩrtũm te ra mẽ panhĩpêx pyrà nẽ amnhĩ katut kõt mẽ kot amnhĩ tomnuj rẽ nẽ mẽ ho hkra. Hãmri nẽ mẽ hwỳr amnhĩ Karō rẽ nhùm mẽ hkarō mã agjê. Tĩrtũm tãm kot amnhĩm mẽ rënh kënã.

¹⁰—Tã xà mẽ pahpê Ijaew na pu htem wam Tĩrtũm kot finat Mojes mã kapër kõt amnhĩ nhĩpêx mex o papa? Nà na pu htem hkõt amnhĩ nhĩpêx mex kêt nẽ. Nẽ mẽ panhĩgêjtaja na xep prem haxwỳja hkõt amnhĩ nhĩpêx mex o pa hkêt nẽ. Mẽ pahpiitã mẽ pahpê hihtỳx kënã. Tã Ijaew kêt xwỳnhjaja kot hkõt amnhĩ nhĩpêx o pa hã ka mẽ ra mẽ kãm karō kaxyw. Kwa kot kaj mẽ anẽ nhùm Tĩrtũm tee ri ja hã mẽ apumu nhùm ja kệp omnuy nẽ. Kãm ja prãm kêt. ¹¹ Kwa mẽ ã mẽ kãm hã karō anhỹr kêt nẽ. Mẽ panhō pahihtĩ Jejus na hte mẽ pahpiitã mẽ pakutã nojarêt o axpẽn pyràk. Jakamã Ijaew kêt xwỳnhjaja nẽ mẽ pahpê Ijaewjaja kot puj mẽ amnhĩ kaxyw hkõt pajamaxpër nẽ hkõt amnhĩ xunhwỳ. Hãmri nhùm Tĩrtũm ja hã mẽ pahpumu nẽ mẽ panhĩpêx o axpẽn pyrà nẽ Jejus kukwak ri amnhĩ katut kõt mẽ pahte amnhĩ tomnuj rẽ nẽ mẽ pahto hkra. No na hte mẽ pahte amnhĩ my kwỳt kà jakà rỳ finat Mojes kapër kõt amnhĩ nhĩpêx ã mẽ pahpumunh kõt mẽ pahto hkra hkêt nẽ. Anë.

¹² Nhũm pre ã Simãw Pêtre mẽ kãm kapêr anê. Hãmri nhũm hpãnhã Panãpe mẽ Pawreja mẽ kãm amnhĩ jarê. Tĩrtũm kot tanhmã wa ho nhũm wa kot Ijaew kêt xwỳnhjê hwỳr wa mõi ã amnhĩ jarê. Nê Tĩrtũm nhỹ hã mẽ kãm aa mẽ kot mẽmoj pumunh kêt kwỳ ho anhỹr o ri mẽ hkõt pa hã mẽ kãm amnhĩ jarê nhũm mẽ piitã akryk wa mar o hkrĩ nê wa ujarēnhta hkukamã hamaxpêr. ¹³ Hãmri nhũm Simãw Pêtre mẽ Panãpe wa mẽ kãm ujarēnh pa hãmri nhũm Xiakre wa hpãnhã kãnhmã xa nê mẽ kãm kãnhmã ãhkra pê nê mẽ kãm:

¹⁴ —E pa ijaxwỳja mẽ amã ixkapêr ka mẽ inhma. Nà na pu mẽ ra Simãw Pêtre kapêr ma. Tĩrtũm kot wam amnhĩ kaxyw Ijaew kêt xwỳnh kwỳjê rēnh ã mẽ harēnhja pu mẽ ra kuma. ¹⁵ ãm hãmri na ã mẽ harēnh anê. Amnepê m Tĩrtũm kapêr nhỹ hã mẽ kapêr o mẽ pa xwỳnhjaja na prem ra ja kukamã Tĩrtũm kot tanhmã mẽ hipêx to hã amnhĩ jarēnh kukamã hã kagã. Te ho tãm kot kãm kapêr pyrà nê hã kagã ho:

¹⁶ Amnepê m finat Tawija na pre hte inhmã amnhĩ kwỳjê ho amnhĩptar o pa.

Mẽ kêp Ijaewjaja nhũm pre inhmã mẽ ho amnhĩptar o pa.

Hãmri nhũm mẽ gaa nê axpên pê anhgrã nê ahpỹnhã ri pa.

Tã ixpê Tĩrtũm kot paj nhỹrmã ma mẽ hwỳr wrỳ nê axte mẽ ho akuprõ nê tãm mẽ unhwỳr pa.

¹⁷ Jakamã Ijaewjê kukwak ri koja Ijaew kêt xwỳnh kwỳjaja mããnēn ixkõt amnhĩ xunhwỳ.

Pa te ixte Ijaewjê nhĩpêx pyrà nê mẽ ho ãhkra.

¹⁸ ã mẽ hkukamã ijamaxpêr anhỹr xã hkõt.

¹⁹ Anhỹr o mẽ harēnh jakamã nhũm ra mẽ hkwỳjaja mẽ higêt kot amnhĩ

nhĩpêx kaga hpa nê hpãnhã Tĩrtũm kõt amnhĩ xunhwỳ. Jakamã kwa kêr pu mẽ axte ja nhĩjuk ri mẽ kãm mẽmoj tã karõ hkêt nê. Ja pix na mex. ²⁰ ãm ja pix kot puj mẽ kãm hã karõ nê hã kagã nê mẽ hwỳr kumê:

Mẽ kot sãnti hã mẽ õ hkur nê kot puj mẽ hkurê.

Nê mẽ kot mẽmo mry hpar nê hkamrõ runh kêt rãhã hkur nê mẽ hkurê.

Nê mẽ kot mẽmo mry kamrõ kur nê mããnēn mẽ hkurê.

Nê mẽmyjaja kot amnhĩ prõ pix tânopxar ã mẽ kãm karõ.

Nê mẽnijaja haxwỳja kot amnhĩ mjên pix tânopxar ã mẽ kãm karõ.

—ãm ja pix kot puj mẽ kãm hã kagã nê mẽ kãm hã karõ. ²¹ Mẽ panhigêtjê mã finat Mojes kot ã mẽ kãm karõ anhỹrja na htem arĩ krĩ piitã hkõt ã mẽ kãm hã karõ anê. Mẽ panhõ arĩgromnu pê sap ã na htem arĩ ri Tĩrtũm kapêr o mẽ ahkre xã hã ãhkra kamã ã mẽ kãm hã karõ anê. Anê.

Mẽ kot Ijaew kêt xwỳnhjê hwỳr kagã mẽnh ã mẽ harēnh

Karatas 5.1

²² Hãmri nhũm mẽ Xiakre kapêr mar o hkrĩ. Jejus nhỹ hã mẽ ahkre ho mẽ pa xwỳnh maatijaja nê mẽ kot hkwỳjê jahkre xwỳnhjaja nê Kris kwỳjê piitã Xiakre kapêr ma nhũm ja mẽ kãm mex nê. Jakamã nhũm mẽ axpên mã:

—Tõe. Nã ãm hãmri na Xiakre ã Ijaew kêt xwỳnhjê jarēnh anê. Nã ja mex. Pu mẽ ã ãxiok nhõ xwỳnhjê mã ja hã kagã anê hãmri nê mẽ hwỳr kumê. Kojã Pawre mẽ Panãpeja wa kupy nê ma akupỹm mẽ hwỳr o mõi nê mẽ kãm kugõ. E mẽ pahtõ kot puj mẽ ma wa hkõt mẽ hwỳr mõi? Anê.

Hãmri nhũm mẽ kuma nê Siras mẽ Jut Pasapas wa kuta. Jejus kõt mẽ kot axpên to htõ nê htõxjaja kot axpên mã hamê wa kot amnhĩ to mex xwỳnh ã wa harēnh jakamã nhũm mẽ ma Pawre mẽ Panãpe wa

hkôt mör kaxyw wa kuta. ²³ Hämri nê äxiok kamā Kris kwÿ pē Ijaew kêt xwÿnhjê kaxyw kagā nhîpêx nê kamā ā mē kām kapêr anê nê mē kām:

Pa? äxiok mē Sir mē Siris kamā Ijaew kêt xwÿnhjaja? Xā mē amex? Mē ixpê Jesus kôt mē atōjaja na pa mē awÿr kagāja nhîpêx nê mē awÿr kumê. Mē ixpê Jesus kôt mē kot amnhî xunhwÿr xwÿnhjê jahkre ho ixpa xwÿnhjaja nê Jejus nhÿ hā mē ahkre ho mē pa xwÿnh maatiijaja pa mē awÿr kumê.

²⁴ Na xep ra ja rüm mē ixkwÿjaja ma mē awÿr mō nê mēmoj tā tanhmā mē amā karō hto. Mē ate amnhî my kwÿrÿt kà jakār nê amnepê mē inhîgêt Mojes kapêr kôt amnhî nhîpêx o apa hā mē amā karō. Ka xep mē tee ri ja kukamā ajamaxpêr. No mē pajaja na pa prem mē awÿr mē rēnh kêt nê. Am amnhî krā hkôt na prem mē awÿr mō nê ā mē amā ja hā karō anê.

²⁵ Tā pa tee ri mē harēnh ma nhūm ja mē ixpê omnuj tÿx nê. Jakamā na pa mē jar akuprō nê mē akaxyw mē inhîōja wa kuta. Wa kot ma Panāpe mē Pawre wa hkôt mē awÿr wa mör nê mē amā mē ixkapêr jarēnh kaxyw. Panāpe mē Pawreja mē inhmā wa hapê htÿx. ²⁶ Na hte mē amā Pahihtî Jejus Kris kapêr jarēnh o pa kaxyw wa amnhî grōnh kôt mē amā harēnh o pa.

²⁷ Tā pa mē akupÿm mē awÿr wa kumê nê wa hkôt mē pahō Jut mē Siras wa kumê. Mē ixte mē amā kagā kamā mē ixkapêrja nhūm wa kot hprî hā mē amā harēnh kaxyw pa mē wa hkôt mē awÿr wa kumê.

²⁸⁻²⁹ E ja pix nê kot paj mē akurê:

Kêr ka mē sānti hā mē ō hkur kêt nê.

Nê mēmo mry kamrō kur

kêt nê. Jao mēmo mry pa nê hkamrō runh kêt rāhā hkur kêt nê. Kamrō runh pa nê ri kormā tanhmā ho nê aku.

Nê kêr ka mē amyjaja amnhî prō pix tånopxar o apa.

Nê mē anijaja ajaxwÿja amnhî mjên pix tånopxar o apa.

E am ja pix kot paj mē amā hā karō. Tirtüm Karō kām ja mex. Nê mē inhmā māānēn ja mex. Kot kaj mē ā amnhî nhîpêx anhÿr o ri apa nê amex nê apa.

Tā am ja pix. Mē ixpê Jejus kwÿjê jahkre xwÿnhjê mē Jejus nhÿ hā mē ahkre xwÿnh maatiijê mē pa mē mē awÿr kagāja nhîpêx nê kumê. E kêr ka mē amex nê akînh nê ri axpēn kôt apa. Am ja pix na hapêx. Anê.

Nhūm prem ā kagā kamā mē kām mēmoj tā karō anê. ³⁰ Hämri nê Jut wa mē kām kugō nê ma äxiok wÿr wa mē kumê nhūm wa mē ma akupÿm hwÿr o mō. Jut nê Siras nê Pawre nê Panāpeja nhūm wa mē ma akupÿm mē hwÿr o mē mō. Mōō hāmri nê mē hwÿr pōj. Hāmri nê Jejus kwÿjê ho akuprō nê mē kām kagāja gō ³¹ nhūm mē kupy nê kamā harē nê kuma. Kamā mē kot mē kām mēmoj tā karō kamā harē nê kuma nê ŷ hā hkînh nê akupÿm tām hamaxpêr.

³² Jut mē Siras wa kēp Tirtüm nhÿ hā kapêr o pa xwÿnh na pre wa. Jakamā na prem mē hwÿr mōn pōj hāmri mē kām tanhmā ujarēnh to ho pa. Mē kot Jejus kôt pix mā hamaxpêr o pa kaxyw mē kām ujarēnh o pa nê mē kām:

—E kêr ka mē māmri Jejus kôt amnhî nhîpêx mex rāhā ho ri apa nê aa hkaga hkêt nê. Anê.

³³ Hāmri nê mē hkôt ri pa hā apkati xohtō nê. Hāmri nê wa akupÿm Jerujarē hwÿr nojarêt nê mē kām amnhî jarē nhūm mē wa kuma nê wa kām:

—Tōe. Nà wa māmri ma akupÿm mō. Koja Tirtüm war apumunh

mex nê ka wa ma akupÿm amex nê akã hkĩnh pê akwÿjê hwÿr akato. Anê.

³⁴ Hãmri nhũm wa nojarêť tã nhũm Siras tanhmã hamaxpêr to nê hitôt nê mẽ kuri arĩk nhũm Jut Pasapas pix ma akupÿm hkwyjê kot mẽ hwÿr wa mênh xwÿnhjê hwÿr mō.

³⁵ Hãmri nhũm Pawre mẽ Panãpe wa Siras pyrà nê kormã äxiok kamã pa. Hãmri nê Jejus kôt mẽ htō hkwyjê mẽ pimràatã mẽ ahkre ho pa. Tirtũm kapêr o mẽ hkôt mẽ ahkre ho pa.

Pawre mẽ Panãpe wa kot axpên pê pikjêr ã wa harênh

Atre 13.13; Korosê 4.10

³⁶ Hãmri nhũm Pawre mẽ Panãpe war arĩ mẽ hkôt ri pa hã apkati xohťo nê. Tã nhũm Pawre hamaxpêr nê Panãpe mã:

—Kwa ma pu ma akupÿm ra pahte krĩ hkwy hkôt mẽ kãm Jejus jarênh o papa xwÿnhjê hkôt akupÿm mō. Pu ma mẽ hwÿr mō nê Jejus kôt pahtō nê pahtōxjê kot tanhmã ri amnhĩ nhĩpêx to hã mẽ omu. Anê.

³⁷ Hãmri nhũm kuma nê kãm:

—Tõe. Nã pu ma mō. Nom kêr pu ma amnhĩ kôt Juãw Makre ho mō kê axte pahto ajuta ho pahkôt mō. Anê.

³⁸ Hãmri nhũm Pawre tee ri kuma nhũm ja kêp omnuj nê nhũm kãm:

—Tk. Kwa na pre pahkôt pa htã Pãpir kamã tanhmã hamaxpêr to nê pahkaga nê ma akupÿm Jeru-jarê hwÿr mō. Jakamã kwarĩ koja axte pahkôt mōr kêt nê. Anê.

³⁹ Hãmri nhũm Panãpe tee ri hã hihtÿx no nhũm kêp hkaga kumrêx. Jakamã nhũm wa ja hã axpên pê axkjê nê ma ahpÿnhã mō. Nhũm Panãpe amnhĩ kôt Juãw Makre ho mō nê wa ma pãr kãm gō hipôk pê Sipre hwÿr wa mō. ⁴⁰ Nhũm Pawre axtem amnhĩ kôt Siras wÿ nê ma wa mō. Hãmri nê wa nojarêť nhũm

Jejus kôt wa htōjaja wa ho Tirtũm wÿ nê kãm:

—Pa Tirtũm. E koja Pawre mẽ Siras wa ma krĩ hkwy hkôt mẽ kãm akapêr jarênh o ri wa pa. Jakamã kêr ka wa htãnopxar o ri wa hkôt apa. Anê.

Hãmri nhũm wa kato nê ma krĩ hkôt ri Jejus kapêr o mẽ ahkre ho wa pa. ⁴¹ Wa ma pyka pê Sir mẽ Siris kôt Jejus kôt mẽ htō nê mẽ htōxjê pumunh nê Jejus kôt mẽ ho mẽ hihtÿx o wa pa kaxyw.

16

Ximotre kot Pawre mẽ Siras wa hkôt ri pa hã harênh

Wam Ximotre 1.1-2; Sikũn Ximotre 1.5; Piripos 2.19-22

¹⁻³ Tã nhũm Pawre mẽ Siras wa ma akupÿm krĩ pê Tepe hwÿr wa mō nê hwÿr pōj nê hpãnhã kurũm ma Risti hwÿr mō. Hãmri nê wa hwÿr pōj nê kamã Ximotre pumu. Ximotre na pre ra katorxã pyrà nê Jejus kôt amnhĩ xãm nhũm mẽ kot Jejus kôt axpên to htō xwÿnhjaja kãm hapê nê. Nê kot Jejus kapêr kôt amnhĩ nhĩpêx mex o pa hã axpên mã harê.

Krĩ pê Risti mẽ Ikõn kamã nhũm prem ã axpên mã Ximotre jarênh anhÿr o pa. Jakamã nhũm Pawre mẽ Siras wa mō nê mẽ hwÿr pōj nê Ximotre kot amnhĩ nhĩpêx ã omu nhũm Pawre kãm war amnhĩ kôt o mōr prãm nê. Nom Ximotre hkamrō pihkãr na pre. Katorxã kêp Ijaew nhũm hipêêxã kêp Gres jakamã nhũm ã Ximotre hkamrō pihkãr anê. Nhũm Ijaew kot katorxã hkôt kêp Ijaew ã omunh jakamã nhũm Pawre hamaxpêr nê mẽ kaxyw kêp my kwÿrýt kã krãhta nê arĩ kormã mẽ hwÿr amnhĩ kôt o mō. ⁴ Hãmri nê mẽ ma krĩ hkwy hkôt mō. Mōõ nê Ijaew kêt xwÿnhjaja ra kot amnhĩ kaxyw Jejus kôt hamaxpêr xwÿnhjê jahkre ho mẽ hkôt pa. Ra Jerujarê kãm mẽ kot Jejus kwÿjê jahkre ho pa

xwÿnhjê mē Jejus nhÿ hã mē ahkre xwÿnh maatiſaja mē kot mē kãm mēmōj tâ karōta nhÿm mē ma mē kãm harēnh o ri mē hkôt pa. ⁵Hãmri nhÿm mē kuma nē ra Jejus kôt amnhÿ nhÿpêx mex o mō. Hãmri nhÿm apkati mē krÿ nhō xwÿnh kwÿjaja mē urak nē Jejus kôt amnhÿ xunhwÿ. Jakamã nhÿm mē ra ohtô rax o mō.

Pawre tanhmã hpimtir to hã harēnh

Rômãn 15.18-21

⁶Tã nhÿm Pawre mē Siras mē Ximotre mē ma pyka pē As wÿr no-jarēt. Mē kot mē kãm tanhmã Jejus jarēnh to ho pa kaxyw mē hwÿr no-jarēt tâ nhÿm Tirtÿm Karō kormã mē nē mē hkurê. Jakamã nhÿm mē hpãnhã ma pyka hkwy pē Prik mē Karatas wa hkôt pa. Ixpê Rukre na pa pre mē hã ajêt nē ma mē hkôt ixpa ho ixpa. ⁷Hãmri nē mē pyka pē Mÿs ã mō nē hpãnhã ma Pitÿn wÿr inhmôr mã tâ no nhÿm Tirtÿm Karō axte kê mē nē mē ixkurê. ⁸Jakamã pa mē arÿ Mÿs jakar ã mō nē gō xujanâr mÿ ri krÿ pē Tôx wÿr pōj.

⁹Tã nhÿm kamât pa mē ixpitã gōr nē inhÿkwÿ nhÿm Pawre tanhmã hpimtir to. Nhÿm xep pika pē Masetôn nhō xwÿnhja mē amnhÿ wÿr hwÿr kãm hihtÿx o xa nhÿm hprÿ hã omu nē kapêr ma. Nhÿm xep pre kãm:

—Pa Pawre? Kwa amnē Masetôn wÿr mē ixwÿr mō nē tanhmã mē ijahkre hto. Anē.

¹⁰Hãmri nhÿm Pawre hkrãkato nē mē inhmã hpimtir jarê. Pa mē kuma nē axpên mã:

—Tô kwa tokyx pu mē hwÿr. Tirtÿm kot mē hwÿr mē parēnh kênã. E pu mē ma mē hwÿr mō nē mē kãm Jejus jarēnh o mē ahkre. Anē.

Hãmri nē amnhÿ to akuprō nē mē hwÿr inhnojarēt kurê kumrêx.

Ritre kot Jejus kôt amnhÿ xãm ã harēnh

Piripos 1.1

¹¹Hãmri pa mē ma Masetôn wÿr mō. Tôx rÿm ma pâr kãm hwÿr mō. Hãmri nē gō nhÿpök pē Samōtas wÿr pōj nhÿm mē hã pâr nhō. Hãmri nhÿm apkati pa mē axte mō nē Masetôn kamã krÿ pē Nēap wÿr pōj. ¹²Hãmri nē pâr rÿm iſapōj nē hpãnhã kurÿm hamÿ krÿ pē Piri-pos wÿr ixpar o mō. Piriposja Masetôn kamã krÿ maati na. Rôm nhō xwÿnhjaja na prem ho kato. Jakamã pa prem ma hwÿr mō nē pōj nē tokyx axte kurÿm nhÿhÿm inhmôr kêt nē. ¹³Hãmri nhÿm sap kato pa mē axpên mã:

—Kwa pyhti mÿri mân hte Ijaew-jaja axpên wÿr akuprō nē Tirtÿm mã amnhÿ jarēnh o hkrÿ nã. E kwa pu mē hwÿr nē gō mÿri mē hapêr o ri papa. Anē.

Hãmri nē ma hwÿr mra nē mē hapêr o ri ixpa nhÿm ãm mēni pix-jaja axpên wÿr akuprō. Pa mē omu nē mē kuri ixkrÿ nē mē kãm Jejus kapêr jarēnh o mē ahkre o ixkrÿ. ¹⁴Nhÿm mē kot mē inhmã o hkrÿ xwÿnhjê hō pē Ritreja. Krÿ pē Xijaxir nhō xwÿnh na pre. Nē kēp kupêxê mex o wēnê xwÿnh. Na pre hte kãm Tirtÿm prãm o pa. Jakamã nhÿm Pawre kot mē ahkre ho ÿrja rôm nhÿm Pahihti Jejus tanhmã Ritre hkrã hto nhÿm hprÿ hã Pawre kapêr mar tÿx nē. ¹⁵Hãmri nē amnhÿ kaxyw Jejus kôt hamaxpêr nē hkôt amnhÿ xãm kurê kumrêx. Ōrkwÿ kamã hkwyjê mē nhÿm mē hkôt amnhÿ xunhwÿr pa. Jakamã pa mē kēp Jejus kwÿ hã mē hkrã kumrã. Mē piitã mē kot mē kēp Tirtÿm kra hã mē omunh kaxyw. Hãmri nhÿm Ritre amnhÿ kôt mē ixwÿ nē mē inhmã:

—An kot kaj mē ixte Jejus kôt amnhÿ xãm tÿx ã ixpumu hã kot kaj mē ma ixkôt mō nē hpãnhã inhōrkwÿ kamã pōj nē apa. Anē.

Pa mē kuma nē ma hkôt mō.

Mē kot Pawre mē Siras wa haxar ã mē harēnh

Makre 1.23-26, 1.34

16 Tã nhũm arĩgro hõ hã pa mẽ Tĩrtũm mã amnhĩ jarẽnh kaxyw axte pyhti mỳri mẽ pikuprõnh xãja wỳr mõ. Hãmri nẽ pry kamã mẽ kãm àpẽn xwỳnh nija pumu. Ra mẽkarõmnuti kot tanhmã hkrã hto nhũm ỹ hã àhpumunh tỳx xwỳnhja. Nhũm hte mẽkarõmnuti nhỹ hã mẽ kãm mẽmo hkukamã tanhmã ujarẽnh to ho pa. Jakamã nhũm õ patrãwjaja kukwak ri ujamỳnh rũnh pẽ hkĩnh nẽ pa. 17 Jakamã pa mẽ mõ nhũm nija mẽ xipumu nẽ mẽ ixtã ajẽt nẽ ma mẽ ixkõt mõ. Hãmri nẽ mẽ kãm mẽ ijarẽnh o mẽ ixkõt mõ nẽ mẽ kãm:

—Xẽ mẽ mran jajẽ pumu. Na htem Tĩrtũm maati mã tanhmã amnhĩ nhĩpẽx mex to ho pa. Tĩrtũm kot mẽ ate amnhĩ tomnuj pẽ tanhmã mẽ apytãr to hã mẽ amã ujarẽnh kaxyw na mẽ awỳr mra. Anẽ.

18 Nẽ ãm xatã mẽ kãm mẽ ijarẽnh o mẽ ixkõt paja o ra hã apkati xohtõ nẽ. Tã nhũm Pawre ra kãm mar kaga nẽ nẽ mẽkarõmnuti mã kapẽr nẽ kãm:

—Tk. Kwa kệp akato nẽ ma tẽ. Pa Jejus Kris nhỹ hã amã ixkapẽr ka inhma nẽ kệp akato nẽ ma atẽm kurẽ kumrẽx. Anẽ.

Hãmri nhũm kuma nẽ kệp kato nhũm akupỳm tãm hkrã. 19 Jakamã nhũm õ patrãwjaja tee ri ja hã omu nẽ gryk tỳx nẽ axpẽn mã:

—Kwa ra mẽkarõmnutijaja kệp kator jakamã koja axte mẽmoj kukamã tanhmã ujarẽnh to hkết nẽ. Pu mẽ kukwak ri axte paxu-jamỳnh kêt nẽ. Anẽ.

Hãmri nẽ Pawre mẽ Siras wa kamã gryk tỳx nẽ. Hãmri nẽ wa unẽ nẽ ma mẽ kot axpẽn mar xã hã ixkre hwỳr wa hkjẽnh o tẽ 20 nẽ mẽ kot mẽ ho amnhĩptãr xwỳnhjẽ mã tanhmã wa ho hẽx to nẽ mẽ kãm:

—Kwa mẽ amnẽ Ijaewja wa omu. Na hte wa mẽ panhõ krĩ kamã hẽx pix o pa nhũm mẽ tee ri wa kapẽr ma nẽ wa kamã gryk tỳx nẽ. 21 Mẽ ixte amnhĩ nhĩpẽx te

kot axpẽn pyrãk kêt tã nhũm wa mẽ kot amnhĩ nhĩpẽx o mẽ pajahkre kaxyw nhỹhỹnh mẽ pahwỳr mõ. Nom mẽ pahpẽ Rõm nhõ xwỳnhjaja axtem mẽ pahte amnhĩ nhĩpẽx kẽnã kot pu kêt wa kuma nẽ wa kapẽr kôt amnhĩ nhĩpẽx. Anẽ.

22 Hãmri nhũm mẽ kuma nẽ piitã wa kamã gryk tỳx nẽ. Hãmri nhũm mẽ ho amnhĩptãr xwỳnhjaja wa kệp wa ê kaxõnh o hkapa nẽ wa hã mẽ õ põristi mã amỳnẽ nẽ mẽ kãm:

—E mẽ ma wa o tẽ nẽ mẽ htak xã ho wa htak. Anẽ.

23 Hãmri nhũm mẽ kuma nẽ ma wa o tẽ nẽ wa htak rax nẽ. Hãmri nẽ wa haxã nẽ mẽ hagjẽnh xã jamãr xwỳnh mã kãm:

—E kêt ka ja wa omunh mex nẽ kẽ wa kator kêt nẽ. Anẽ.

24 Hãmri nhũm mẽ kuma nẽ wa o tẽ nẽ ixkre jatur xã kamã wa haxã nẽ wa kator pymaj hamẽ wa htem pĩjaxã nẽ ho htỳx nhũm wa arĩ hte tỳx nẽ nhỹ.

25 Tã nhũm kamãt. Nẽ kôt ã kamãt nhũm wa Tĩrtũm mã amnhĩ jarẽ nẽ mex o mex ã wa grer o wa nhỹ nhũm wa urãk nẽ mẽ hagjẽnh xwỳnhjaja wa mar o hkrĩ. 26 Puh nhũm pyka mẽ kãm htertet tỳx nẽ nhũm mẽ hã ixkreja amnhĩ to àpẽr tỳx nẽ amnhĩ kahẽ xã rẽnh pa. Nhũm mẽ hagjẽnh xwỳnhjẽ kaxpre xã piitã mẽ nẽ pirẽnh pa. 27 Hãmri nhũm mẽ hamãr o kuhẽ xwỳnhja pika tertet kamã ama nẽ hkrãkato. Hãmri nẽ mẽ hã ixkre jakwakre kahẽ xã rẽnh parja pumu nẽ mẽ hagjẽnh xwỳnhjaja hapõx par ã mẽ hkamnhĩx nẽ tee ri amnhĩ kukamã hamaxpẽr. Hãmri nẽ pahĩ kot mẽ hã hpĩr pymaj õ wapo kapa nẽ ra tãm kot ho amnhĩ pĩr kaxyw. 28 Hãmri nhũm Pawre tee ri ja hã omu nẽ kax pẽ kãm amỳra nẽ kãm:

—Kwa amnhĩ pĩr kêt nẽ. Ot pa mẽ arĩ ixpiitã ixkuhẽ. Na pa mẽ ixtõ ixkator nẽ ixprõt kêt nẽ. Anẽ.

29 Hãmri nhũm kuma nẽ kanẽ hã ahwỳn nẽ kuwy nẽ mẽ hwỳr axã nẽ mẽ piitã mẽ omu. Hãmri nẽ Pawre

mě Sirasja wa omu ně wa hwýr kām ma ho htertet o tē. Hāmri ně wa hā hpijaām kaxyw wa kutā tēm ně hkōnkrā ho nhý. ³⁰ Hāmri ně kånhmā xa ně wa ho kato ně ixkre kapem wa o xa ně wa kām:

—Kwa tanhmā kot pa amnhī nhīpēx to kê Tirtūm war apyrā ně ixte amnhī tomnuj pē ixpytā? Anē.

³¹ Hāmri nhūm wa kām:

—Nā kot kaj amnhī kaxyw Jejus Kris kōt ajamaxpēr ně hkōt amnhī xām nhūm Tirtūm ja hā apumu ně amnhī katut kōt ate amnhī tomnuj piitā rēnh pa. Nhūm anhōrkwý kamā akwýjaja apyrā ně Jejus kōt amnhī xunhwý nhūm ā mě hipēx anē. Anē.

³² Hāmri ně wa ma hkōt ōrkwý hwýr tē ně hprī hā mě kām Tirtūm kapēr jarē nhūm mě wa mar o hkrī. ³³ Hāmri nhūm mě hagjēnh xā jamār xwýnhja wa kām wa htak xā kuhō. Kormā kamāt kō hkwy kamā wa kām kuhō ně hkane. Hāmri nhūm wa mě kot Jejus kōt amnhī xunhwýr par ā mě omu ně mě hkrā kumrā. Mě hamār xwýnh mě hkwyjē mě hkrā kumrār pa. ³⁴ Hāmri nhūm mě kot amnhī kaxyw Tirtūm kōt hamaxpēr jakamā piitā hkīnh ně. Hāmri nhūm mě hamār xwýnhja ōrkwý hwýr Pawre mě Siras wa o tē ně wa kām ō nhūm wa apku nhūm ma akupým mě hagjēnh xā hwýr wa o tē ně akupým wa haxā.

Mě kot Pawre mě Siras wa kām urer ā mě harēnh
Atre 22.25-29

³⁵ Hāmri nhūm apkati nhūm krī pytār xwýnhja mě ō pōristi mā anē nhūm mě hagjēnh jamār xwýnh wýr tē ně kām:

—E na mě papytār xwýnhja ate Pawre mě Siras wa kām anhūrer nhūm wa māmri ma akupým htēm kaxyw hā karō. Anē.

³⁶ Hāmri nhūm mě kuma ně wa hwýr axā ně wa kām:

—E na krī pytār xwýnhja ixte war akator kaxyw war atā

inhmā karō. Jakamā e wa māmri axāmnhīx ma mō. Anē.

³⁷ Hāmri nhūm Pawre kām:

—Nā wa ixte tanhmā amnhī tomnuj to hkēt tā nhūm mě kot wa ixpynēnh ně wa ixtak. Wa ijaxwýja wa ixpē Rōm nhō xwýnh tā nhūm prem axtem ně mě piitā mě noo mā wa ixtak ně wa ijaxā. Mě kot amarī Rōm nhō xwýnh tak ně mě hagjēnh kēt tā nhūm mě ā mě noo mā ā wa inhīpēx anē. Kormā wa ixte tanhmā amnhī tā ixāprār to hkēt tā nhūm mě ā wa inhīpēx anē. Jakamā kwarī kot kaj mě no hkāx ā wa ixkator kēt ně. Kē mě kot wa ijaxār xwýnhja tām man mra ně wa ixkator pa war arī ma mō. Anē.

³⁸ Hāmri nhūm pōristija kuma ně ma akupým mě hwýr mra ně mě kām wa kapēr jarē. Hāmri nhūm mě tee ri mě urān wa kēp Rōm nhō xwýnh ā wa harēnh ma ně kām ma htýx ně. ³⁹ Hāmri ně ma wa hwýr tē ně wa hwýr axā ně wa kām:

—Pa? E māmri war akato ně axāmnhīx ma mō. Na pa prem war anhīpēx kati rax ně. Tā kêr ka wa axte ja mā ajamaxpēr hkēt ně. Kē ja ām jar mě pakamā hapēx. Anē.

Hāmri ně wa kator ně wa kām:

—E kwa wa mě inhō krī pē akato ně ma nhýhým mō. Anē.

⁴⁰ Hāmri nhūm wa kuma ně kačo ně ma akupým Ritre nhōrkwý hwýr wa tē. Hāmri ně Jejus kōt wa mě htōjē pumu ně wa mě kām amnhī jarē ně mě kām:

—E kot paj hāmri wa mā mō. Nom kêr ka mě arī Jejus Kris kōt amnhī nhīpēx mex rāhā ho ri apa ně aa hkaga hkēt ně. Anē.

Hāmri ně wa mě kurūm kato ně ma krī hō hwýr wa mō.

17

Tesarōn kamā mě kot wa kamā gryk ā mě harēnh

Wam Tesarōn 1.1, 2.13-14

1-2 Tā nhūm Pawre mě Sirasja wa ma krī hkwy hkōt pa. Piriapos rūm ma Apiporip mě Apōrōn kōt wa mō

hāmri nē ra Tesarōn wỳr wa pōj. Na pre hte Pawre nhỳri pōj nē Ijaew nhō Tirtūm kapēr o mē ahkre xà hā ixkre hwỳr agjē nē kamā mē kām Jejus kapēr jarēnh o kuhê. Jakamā nhūm wa mō nē Tesarōn wỳr pōj nē ixkre hwỳr mē hwỳr tē nē mē kām ujarēnh o xa. Nē mē kām ujarēnh o hā arīgromnu pē sap o axkrunēpxi. ³Nē hprī hā mē kām tanhmā Tirtūm kapēr jarēnh to nē mē kām:

—Nà Tirtūm kapēr ā kagā htūm kot mē pakaxyw ām xwỳnh jarēnh. Amnhī xà htỳx kamā hamak kām htyk hāmri nē akupỳm htīr ā nhūm kot hkukamā harēnh. Tā na pre Jejusja ā amnhī nhīpēx anē. Tām kēp Krisja. Tirtūm kot mē pakaxyw ām xwỳnh ta na. Anē.

⁴Hāmri nhūm mē hkwỳja kuma nē wa hkôt hamaxpēr nē wa urāk nē Jejus kôt amnhī xunhwỳ. Ijaew kwỳjē nē Ijaew kêt xwỳnh kwỳjaja nē mēni kot amnhī to rūnh xwỳnh kwỳjaja nhūm mē ohtō nē amnhī kaxyw Jejus kôt hamaxpēr nē hkôt amnhī xunhwỳ. ⁵Tā nhūm Ijaew kwỳjaja tee ri hkwỳ kot wa hkôt amnhī xunhwỳr ā mē omu nē mē hā Pawre mē Siras wa kamā gryk tỳx nē. Hāmri nē ma mra nē wa kaxyw mē kot amnhī tomnuj tỳx xwỳnh kwỳjē ho akuprō nē mē kām wa hā amỳnē. Jakamā nhūm mē ma kapēr punuj pē wa hapēr o ri mra nhūm mē piitā mē omu nē mē kuma. Hāmri nhūm mē wa hapēr o ra Jasāw nhōrkwỳ hwỳr mra. Nē mē kot Pawre mē Siras pynēnh nē ma mē utār xwỳnhjē hwỳr wa o htēm kaxyw mē kēp kahē xà mē nē mē hwỳr agjē. ⁶Hāmri nē tee ri ōrkwỳ kamā wa hapēr nhūm wa kamā amrakati. Jakamā nhūm mē Jasāw mē kot Jejus kôt axpēn to htō xwỳnh kwỳjē pynē nē ma mē kot mē ho amnhīptār xwỳnhjē hwỳr mē o mra. Hāmri nē mē kām tanhmā Pawre mē Siras wa ho hēx to. Ām kapēr punuj kām kax pē mē kām wa

harē nē mē kām:

—Kwa na hte Pawre mē Siras wa pyka piitā hkôt mē kām ri mēmoj to hēx o pa. Tā wa ra mē panhō krī hwỳr pōj nē jar mē pamā ri tanhmā hēx to ho ri mē pahkôt pa. ⁷Jasāw nhōrkwỳ kamā na pre wa pōj nhūm amnhī wỳr wa kuwỳ. Na hte wa hkôt mē hamaxpēr xwỳnhjaja pahihiti Sesti kapēr kwỳm ri kuhpa hā kapēr o pa nē axtem nē mēō pahī pē “Jejus” anhỳr xwỳnhja kapēr kôt amnhī nhīpēx o pa. Anē.

⁸Hāmri nhūm mē kot mē ho amnhīptār xwỳnhjē mē krī nhō xwỳnhjaja mē kuma nē gryk tỳx kumrēx. ⁹Hāmri nē Jasāw mā kām:

—E kot paj mē apē mē akàxpore hkwỳ jamỳ. Ka mē ajapōj nē ma mē panē Pawre mē Siras wa hano nhūm wa kato nē ma mō pa rī akupỳm mē amā kugō. Anē.

Hāmri nē mē kēp mē hikàxpore hkwỳ jamỳ.

Pawre mē Siras kot Perej wỳr mōr ā wa harēnh

¹⁰Tā nhūm ra kamāt nhūm mē kot Jejus kôt axpēn to htōjaja hāmri Pawre mē Sirasja wa ma krī pē Perej wỳr wa kumē. Hāmri nhūm wa kato nē ma hwỳr mō nē hwỳr pōj. Hāmri nē Ijaew nhō Tirtūm kapēr o mē ahkre xà hā ixkre hwỳr htēm kurē kumrēx nē wa axà. ¹¹Perej kamā Ijaew na pre te mē kot Tesarōn kamā Ijaew pyrāk kêt nē. Mē kurom mē kām Tirtūm kapēr mar prām nē. Jakamā nhūm pre Pawre mē Siras Tirtūm kapēr o mē ahkre ho pa. Apkati mē mē ahkre mex o pa nhūm mē wa kuma nē hkīnh nē. Nē Tirtūm kapēr ā kagā htūm kamā wa kot mē ahkreta japēr nē kamā omu nē axpēn mā wa harēnh o:

—Nà ām hāmri na wa ā Tirtūm kapēr o mē pajahkre anē. Tirtūm kapēr ā kagā htūm hkôt na hte wa mē pajahkre. Anē.

¹²Hāmri nē ohtō nē Jejus kôt amnhī xunhwỳ. Ijaew kwỳ nē

Ijaew kêt xwýnh kwý nê mēni kot amnhî to rûnh xwýnhjaja nhûm mē ohtô nê Jejus kôt amnhî xunhwý.

¹³ Tã nhûm Tesarôn kãm Ijaew-jaja Pawre jarēnh ma. Kot Perej nhô xwýnhjê mã Tirtûm kapēr jarēnh o pa hã harēnh ma. Hãmri nê ma mē hwýr mra nê mē kãm tanhmã ho hêx to nhûm krî nhô xwýnhjaja mē kuma nê ra Pawre kamã gryk tỳx nê. ¹⁴ Jakamã nhûm Jejus kôt mē htôjaja mē harēnh ma nê mē umaj Pawre kator nê ma gô xujanâr wýr o mō. No nhûm Siras mē Ximotre wa Perej kamã mē kuri arîk. ¹⁵ Hãmri nhûm mē hkwýjaja ma Pawre o mō. Ma krî pê Atenas wýr o mō. Hãmri nê hwýr o pôj nê kamã kure. Hãmri nê ra akupým Perej wýr nojarêt nhûm Pawre mē kãm:

—E kēr ka mē ma akupým mō nê Siras mē Ximotre wa kãm ijarê kê war amnhîm nojarêt nê tokyx man ixkôt wa mō. Anê.

Pawre kot Atenas nhô xwýnhjê mã kapēr ã harēnh

Rômãn 1.18-20

¹⁶ Tã nhûm Pawreja kormã Atenas kamã pa. Siras mē Ximotre wa kamã hamak o ri kormã kamã mē kot amnhî nhîpêx ã mē omunh o pa. Na pre Atenas nhô xwýnhjaja sãnti ho ohtô rax nê mē ô krî kamã unhwý nhûm Pawre ri omunh o ri kuhê ho pa. Na pre htem ahpýnhã mēmo karô nhîpêxja o te Tirtûm nhîpêx pyrã nê kutã hkôn krã ho rôrôk nê hkrî nê kãm mex o mex ã harēnh o pa. Hãmri nhûm Pawre tee ri ja hã mē omunh o ri mē hkôt pa nê hkaprî nê. ¹⁷ Hãmri nê ma amnhî kwýjê nhô Tirtûm kapēr o mē ahkre xã hã ixkre hwýr pa nê kamã mē ahkre ho kuhê. Ijaewjê mē Ijaew kêt xwýnh kot Tirtûm ã hpijaãm xwýnhjê mã nhûm Tirtûm kapēr jarēnh o kuhê. Nê apkati mē mē kot mēmoj to wēnê xã hwýr mra nê mē ujaarprô xwýnhjê mã Tirtûm kapēr jarēnh o kuhê. ¹⁸ Hãmri nhûm

mē mar o pa. Atenas nhô xwýnhjaja na prem axpēn kôt amnhî nhîpêx o pa hkêt nê. Mē hkwýjaja kēp Epikure hkôt amnhî nhîpêx xwýnh. Nê mē hkwýjaja axtem kēp Etok kôt amnhî nhîpêx xwýnh. Hãmri nhûm Pawre mē kãm Jejus kot tanhmã mē panê amnhî nhîpêx to hã harēnh o pa nê akupým htîr ã harēnh o pa. Hãmri nhûm mē tee ri kuma nê hã axpēn kujjêr o kuhê nê axpēn mã:

—Tk. Kwa mo na hte myti ata harēnh o pa? Anê.

Nhûm mē hkwýjaja mē kãm:

—Ko. Axtem mēpahpãm ô na hte tanhmã harēnh to. Anê.

¹⁹⁻²¹ Atenas nhô xwýnhjê mē axtem krî hõ nhô xwýnhjaja na prem kãm mē ujarēnh nyw mar prãm nê. Jakamã nhûm prem mēmoj jarēnh nyw ma hãmri nê ãm axpēn mã harēnh pix o ri pa. Tã ra Pawre xujarēnh nyw ma nê ma amnhî kôt mē kot axpēn mar xã hã ixkre hwýr o tē. Ixkre pê Areopja wýr nhûm prem amnhî kôt o tē nê kãm:

—E kwa aprî hã mē inhmã ate mēmo jarēnh nywta jarē pa mē ama. Mē inhmã mar prãm. Anê.

²² Hãmri nhûm mē kuma nê mē kãm ujarēnh o xa. Mē kot axpēn mar xã hã ixkre kamã Atenas nhô xwýnhjê mã awjarê nê mē kãm:

—E nã na ka htem anhô mēmo karô nhîpêx xohtôta ã apijaãm pê kãm amnhî jagrer o ri apa. Pa hte ja hã mē apumunh o mē akôt ixpa. ²³ Na pa ra mē anhô sãnti piitã hkôt omunh o ri ixpa nê o mûj hõ kuhê xã kaprýja wýr ixkato. Nhûm himök ã mēmo karô nhîpêx amrakati nom ã hã kagã kot:

MĚPAHPĀM PUMUNH KĚT KUHĚ
XĀ NA JA

Ã mē ate hã kagã kot anhýr. Mē ate omunh kêt tã ka htem arî hã apijaãm o ri apa. No pa na ixte mēhõja jarēnh mar mex. Tã kot paj mē amã harê ka mē inhma.

24 —Měpahpām mẽ ate omunh kêt ā amnhī jarēnhta Tirtūm na. Tām na pre pyka ho kato nē kamā mẽmoj piitā ho kator pa. Gō ho kato nē mry ho kato nē panhī ho kato. Ām mẽmoj piitā ho kator par kumrēx. Na hte pika kamā nē kaxkwa kamā mẽmoj piitā ho amnhīptār mex rāhā ho pa. Jakamā mẽmo kaxyw kot puj mẽ jar kām ōrkwý nhīpēx? Tām kēp mẽmoj piitā ho kator xwýnh jakamā kot mẽmoj to presija hkêt. 25 Kēp mẽmoj piitā hpām jakamā mẽmoj piitā ō na. Jakamā tanhmā kot pu wem amnhī to nē kām mẽmoj gō? Tām kot mẽmoj piitā ho kator nē ho htír nē kot mẽmoj piitā ōr kēnā kot puj kêt mẽ amnhī pyrà nē kām mẽmoj gō. 26 Na pre mẽ pahkukamā ahpýnhā mẽ pahpiitā mẽ papapxà jarē nē mẽ pakator hā arīgro jarē. Na pre mẽ pahpām kot wa Atāwja nhīpēx. Jakamā nhūm Atāw kēp mẽ pahpiitā mẽ pahpār krax.

27 —Tā mẽmo kaxyw na pre ā Tirtūm mẽ panhīpēx mex anē? Nā ām mẽ pahte amnhī kaxyw hkôt pajamxpēr nē hkôt amnhī xunhwýr kaxyw na pre mẽ panhīpēx. Ja mẽ pahpē hihtýx kêt. Koja mēhō kām Tirtūm prām nhūm amnhī tā omunh kurē kumrēx.

28 —Nē Tirtūm pix kukwak ri na pu htem pahtír nē tanhmā amnhī nhīpēx to ho ri papa. Mě akwý kot kagà jahkre xwýnhja na pre ja hā kagà nē hā kagà ho: “Mě pahpē mẽpahpām kra na pu htem papa.” Anē. Ā hā kagà kot anhýr.

29 —Tā ka prem amnhīm mẽmo karō nhīpēx. ōr o hkwy nhīpēx nē prat o hkwy nhīpēx nē kēn o hkwy nhīpēx. Hāmri nē hipēx pa nē ho mẽpahpām ā harē nē ri hā apijaam o apa. No mẽ ām amnhī krā hkôt mẽ ate hipēx. Tirtūm te kot ja pyràk kêt.

30 —Amnepēm mẽ pa xwýnhjaja na prem mẽ apyrà nē ā mẽmoj nhīpēx anhýr o pa nhūm Tirtūm ja

hā mẽ omu nē ām mẽ omu nē hā tanhmā mẽ hipēx to hkêt nē. Kormā mẽ kot kapēr mar kêt jakamā nhūm pre ja hā mẽ omu nē ām mẽ omu. Tā na ra mẽ pahte mẽmo karō nhīpēx o mẽpahpām nē mẽ pamā kapēr. Mě pahte hpānhā amnhī kaxyw ām kôt pix mā pajamxpēr o papaja na kām hprām. 31 Koja nhýrmā tanhmā mẽ pahte amnhī nhīpēx to ho papa hā mẽ pahpumunh kôt tanhmā mẽ pajarēnh to. Nē amnhī ri mẽ htír tūm nē mẽ pa ho pa xwýnhjē jarē nē amnhī ri mẽ pa hkêt xwýnhjē jarē. Na pre ra ā mẽ harēnh anhýr kaxyw arīgro hta. Arīgrota ā kot hprī hā kām tanhmā mẽ pajarēnh to kaxyw na pre ra Jejusja xām. Kaxyw na pre akupým ho htír. Nē akupým ho htír jao kot nhýrmā kām tanhmā mẽ pajarēnh to xwýnh ā ho amnhīrit. Anē.

32 Nhūm pre ā Pawre mẽ kām Tirtūm kapēr jarēnh anē nhūm mẽ mar o kuhē. Kot mẽ kām Jejus tyk nē akupým htír ā harē nhūm mẽ mar o kuhē. Nhūm mẽ hkwyjaja kuma nē ām kuma nē axtem nē ri hā akunha. Nom nhūm mẽ hkwyjaja mẽ kurom mar týx nē Pawre mā kām:

—E kwa mẽ inhmā ja mar prām. Apkati hō hā ka axte mẽ inhmā ja jarē pa mẽ ixprī hā mar mex nē. Anē.

33 Hāmri nhūm Pawre akupým nhýri hpōx xà hā ixkre hwýr ma tē. 34 Hāmri nhūm Xiónīs pē Areop kām mẽ kām kapēr xwýnh nē mēhō ni pē Tāmaris nē mẽ hkwyjaja kapēr mar týx nē amnhī kaxyw Jejus kôt hamaxpēr nē hkôt amnhī xunhwý. Hāmri nē Pawre kôt pa.

18

*Pawre Korīt wýr mōr ā harēnh
Wam Korīt 1.1-3*

¹ Tā nhūm Pawre krī pē Atenas rūm kato nē ma krī pē Korīt wýr mō nē pōj. ² Hāmri nē nhýri Akirti pumu. Haxwýja kēp Ijaew. Krī pē

Põt kamã na pre kato. Tã ma pyka pë Itar wÿr mõ nê Itar kamã krï pë Rôm kamã hpãnhã pa. Pa ho pa htã nhũm mẽ õ pahïhti Krawti tanhmã hamaxpër to hãmri nê mẽ amnhĩ nê Ijaew piitã mẽ hanor pa. Jakamã nhũm Akirti kato nê hprõ Prisire mẽ wa ma Korït wÿr mõ. Hãmri nê hwÿr pøj nê kamã pa ho pa. Jakamã nhũm Pawre Korït wÿr pøj nê wa omu ³ nê wa kuri pøj nê wa hkõt ri pa. Nê Siras mẽ Ximotre wa kamã hamak pë wa ïhkõ hã àpênh o pa. Wa uràk nê kupêxé pyti ho ixkre nhïpêx nê ho wênê ho ri wa hkõt pa. ⁴ Hãmri nhũm sap kato nhũm ma Tirtũm kapër o mẽ ahkre xà hã ixkre hwÿr pa nê kamã mẽ kãm Tirtũm kapër jarênh o hkrï. Ijaew mẽ Ijaew kêt xwÿnhjê mã nhũm mẽ kãm ujarênh o hkrï. Nê mẽ kãm Jejus kot mẽ panê tanhmã amnhĩ nhïpêx to hã harê.

⁵ Tã nhũm Siras mẽ Ximotre wa ma Masetõn rũm Pawre wÿr mõn pøj. Jakamã nhũm Pawre axte ixkre nhïpêx ã àpênh kêt nê. Pãnhã apkati mẽ Ijaewjê jahkre ho pa. Mẽ kãm tanhmã Jejus jarênh to ho ri mẽ hkõt pa. Kêp Tirtũm kot mẽ pakaxyw ãm xwÿnh ã harênh o ri mẽ hkõt pa. Xatã mẽ kãm ujarênh o pa. ⁶ Nom nhũm mẽ kãm mar prãm kêt nê kamã gryk kato nê kãm kapër punuj nê. Nhũm Pawre tee ri amnhĩ tã mẽ kuma nê mẽ kãm:

—E ixte mẽ amã Jejus kot mẽ panê tanhmã amnhĩ nhïpêx to hã harênh tã ka mẽ amã mar prãm kêt nê. Nã mẽ kam nê mẽ mãmrï ate amnhĩ tomnuj kãm ty nê arï kam amnhĩ pumu no ãm amnhĩ tã tanhmã inhmã nê hkêt nê. Ra mẽ ate Tirtũm kapër kaga kênã. Nã kot paj mẽ akaga nê ma hpãnhã Ijaew kêt xwÿnhjê hkõt ri mẽ kãm ja jarênh o ri ixpa. Anê.

Hãmri nê kãnhmã xa nê hinõkà kapa nê ho apê. Mẽ kot hkaga hã amnhĩ pumunh kaxyw nhũm mẽ noo mã ã amnhĩ nhïpêx anê.

⁷ Hãmri nê ixkre rũm kato nê hijuk ri Ijaew kêt xwÿnh pë Xijutre nhõrkwÿ hwÿr tẽ nê hpãnhã Xijutre hkõt pa ho pa. Xijutre kêp Ijaew kêt tã amnhĩ kaxyw Tirtũm mã hamaxpër rãhã ho pa.

⁸ Tã nhũm Ijaew õ pë Kriptija hkwyjê rom amnhĩ kaxyw Pahïhti Jejus kêt hamaxpër nê hkõt amnhĩ xãm. Kêp Ijaew nhõ Tirtũm kapër o mẽ ahkre xà hã ixkre kamã mẽ ahkre xwÿnh na pre. Jakamã õrkwÿ kamã hkwyjê mẽ mẽ hpim-rãatã Pahïhti Jejus kêt amnhĩ xunhwÿr pa. Nê krïja kamã ra Ijaew kêt xwÿnh ohtõ nê Kripti pyrà nê amnhĩ kaxyw Jejus kêt hamaxpër nê hkõt amnhĩ xunhwÿ. Jakamã nhũm Pawre mẽ kêp Jejus kwÿ hã mẽ piitã mẽ hkrã kumrà.

⁹ Tã nhũm kamàt nhũm Pawre gõr nê nõ nê amÿti nhũm kêwe Pahïhti Jejus axte hwÿr kato nê kãm kapër nê kãm:

—Pa Pawre? E kwã kêr ka mãmrï axãmnhix ri atar mẽ kãm ijarênh rãhã ho ri apa nê amnhĩ kamã akahak o ri mẽ hkõt apa hkêt nê. ¹⁰ Kot paj atãnopxa nhũm mēhõ tanhmã ato hkêt nê. Krï ja kamã koja mẽ ohtõ nê ixkõt amnhĩ xunhwÿ. Anê.

¹¹ Nhũm pre ã Pahïhti Jejus Pawre hpimtir kãm kãm kapër anê. Jakamã nhũm Korït kãm arï ri mẽ hkõt pa ryy nê. Arï mẽ hkõt pa hã amgrã pyxi nê hkõt mytwryê kêp 6. Jao Tirtũm kapër o mẽ ahkre ho ri mẽ hkõt pa.

¹² Tã nhũm Korït nhõ xwÿnhjê nhõ pika pë Gres kamã mẽ ho amnhĩptãr xwÿnh nyw Gartija. Korït kãm pa jakamã nhũm Ijaew xãptãr tũmrejaja Pawre pynê nê ma hwÿr o tẽ nê kãm tanhmã ho hêx to. ¹³ Jakamã nhũm Ijaew pikuprõnh xà hã ixkre kamã mẽ kãm kapër xwÿnh Sostenesja Garti mã Pawre o hêx nê kãm:

—Kwa jahti na hte mẽ ixpê Ijaew kot amnhĩ nhïpêx kwÿm ri mẽ ahkre ho pa. Jao mẽ ixte axtem nê

tanhmã Tirtũm kôt ri amnhĩ nhĩpêx to ho ri ixa kaxyw mẽ inhmã karô ho pa. Nom mẽ ixe amnhĩ nhĩpêx kuhpa hã mẽ inhmã karô. Anê.

¹⁴ Hãmri nhũm ra Pawre kot Garti mã amnhĩ jarênh mã tâ nhũm Garti amnhĩ to wa nê hã mẽ kãm kapêr nê mẽ kãm:

—Tk, Kwa kot tanhmã amnhĩ tomnuj tore hã. Kot tanhmã amnhĩ tomnuj to nhũm mẽ ate inhmã harênh ronhỹx pa arĩ mẽ ama nê tanhmã mẽ amã hipêx to. ¹⁵ No xep ãm kot mẽ axaptãr tũmrejaja kot amnhĩ nhĩpêx kuhpa hã pix mã kot amnhĩ nhĩpêx o pa kênã. Nê mẽ ate mẽ ahkre kuhpa hã kot ri mẽ ahkreja pix mýrapê na ka mẽ kamã agryk nê ã inhmã ho akapêr anê. Nã kot paj ja hã tanhmã ho hkêt nê. Ka mẽ kam nê amnhĩ krã hkôt tanhmã ho hprãm xã hkôt tanhmã ho. Anê.

¹⁶ Hãmri nê amnhĩ nê mẽ hano. ¹⁷ Hãmri nhũm mẽ tee ri kuma nê ra Sostenes kamã gryk nê. Kot Garti mã tanhmã Pawre jarênh to htã nhũm kuma nê ãm mar jakamã nhũm mẽ hã Sostenes kamã gryk. Hãmri nê unê nê Garti noo mã htak o xa. Nê htak rax nê. Nom nhũm hã mẽ omu nê ãm mẽ omu nê nê tanhmã mẽ kãm nê hkêt nê.

Pawre kot akupỹm ãxiok wýr mōr ã harênh

¹⁸ Tã nhũm Pawre arĩ Korĩt kamã mẽ hkôt pa nê gaa nê nojarêt nê Jejus kôt htôjê mã amnhĩ jarê nê mẽ kãm:

—E kot paj ma akupỹm pika pê Sir wýr mō. Anê.

Hãmri nê mẽ kêp kato nê ma hwýr mō. Nê ma amnhĩ kôt Akirti mẽ hprō Prisire wa o mō. Mōō nê krĩ pê Sênkrej wýr pōj. Nhũm Pawre amnhĩ kukamã mẽmoj tâ tanhmã Tirtũm mã amnhĩ jarênh to nê amnhĩ jarênh xã hkôt amnhĩ krã hkênh pa. Ijaew kot amnhĩ nhĩpêx xã hkôt ã amnhĩ nhĩpêx anê. Hãmri nê mẽ pãr wýr agjê nê Sênkrej rũm kato nê ma Sir wýr mō. ¹⁹⁻²¹ Mōō

nê krĩ pê Epes wýr pōj. Hãmri nhũm Pawre mẽ hkwýjjaja pãr rũm hapōj nê krĩ hwýr agjê nê Ijaew nhō Tirtũm kapêr o mẽ ahkre xã hã ixkre hwýr mra nê hwýr agjê nhũm Pawre mẽ kãm Tirtũm kapêr jarênh o nhỹ. Hãmri nhũm mẽ kuma nê kãm mar prãm nê. Nê kãm:

—Kwa anojarêt kêt nê. Kritpêm mẽ ixkôt ri apa ryre nê Tirtũm kapêr o mẽ ijahkre. Mẽ inhmã ja mar prãm.

Anhýr tâ no nhũm mẽ kãm:

—Nã kot paj ma mō. Nom koja Tirtũm nhỹrmã akupỹn mẽ awýr inhmẽ pa man akupỹn mẽ awýr mō nê axte kapêr o mẽ ajahkre. Anê.

Hãmri nê ma mō. Ma Epes rũm pãr kãm mō. Nom nhũm Akirti mẽ Prisireja wa Epes kamã arĩk nê hpãnhã kamã pa ho pa.

²² Tã nhũm Pawre krĩ pê Sejarej wýr pōj. Hãmri nê hpãnhã kurũm ma akupỹm Jerujarê hwýr mō. Kot Jejus kôt htôjê pumunh mã ma mẽ hwýr mō. Hãmri nê mẽ hwýr pōj nê mẽ omu nê tanhmã mẽ kãm amnhĩ jarênh to nê mẽ kêp kato nê ma akupỹm ãxiok wýr mō. ²³ Hãmri nê hwýr pōj nê mã mẽ hkôt ri pa ryy nê mẽ kurũm kato nê hpãnhã ma akupỹm pyka pê Prik mẽ Karatas wa hwýr mō. Nê kamã mẽ kot Jejus kôt amnhĩ xunhwýr xwýnhjê jahkre ho pa. Mẽ kot Jejus kôt amnhĩ nhĩpêx tỹx rãhã ho pa kaxyw mẽ hkôt mẽ ahkre mex o ri mẽ hkôt pa.

Apor kot Epes kãm Tirtũm kapêr jarênh

Epes 1.1-2; Wam Korĩt 3.6-9

²⁴ Tã nhũm Epes wýr Ijaew ò pê Aporja mō nê hwýr pōj. Krĩ pê Aresãn kamã na pre kato. Na pre hte amnhĩ kaxyw Tirtũm kôt pix mã hamaxpêr nê kapêr ã kagã htũm mar tỹx nê. Jakamã mẽ kãm harênh mex o pa nhũm mẽ piitã kãm mar prãm nê. ²⁵ Nom kormã Jejus jarênh natur xã mar

kêt jakamã ãm mẽ kãm hkrax pix jarênh o pa. Juãw Paxis kot tanhmã mẽ ahkre htoja nhũm mar tỳx nê. Nê tanhmã kot mẽ hkrã kumrãr to ho paja nhũm mãânên mar tỳx nê. Jakamã na pre hte mẽ kãm ja pix jarênh o pa. No Jejus kêp Tirtũm kot mẽ pahwỳr mẽnh xwỳnh ã harênhja nhũm kormã mar kêt nê. Tã Epes wỳr mỗ nê pỏj. ²⁶ Hãmri nê Ijaew nhỗ Tirtũm kapêr o mẽ ahkre xà hã ixkre hwỳr axà nê kamã mẽ kãm ujarênh o nhỹ. Amnhĩ kamã kahak kêt nê ãmnhĩx ri mẽ kãm ujarênh mex nê. Hãmri nhũm Prisire mẽ Akirti wa kot mẽ kãm ujarênh ã kuma nê war axpên mã:

—Kwa mãn kormã Jejus jarênh piitã mar kêt. E pu amnhĩ kôt panhỏrkwỹ hwỳr o tẻ nê pahprĩ hã kãm harênh jatur xàm kumẽ kê hprĩ hã mar pa. Anê.

Hãmri nê war amnhĩ kôt kuwỳ nê hprĩ hã kãm ujarênh jatur xàm kumẽ nhũm hprĩ hã harênh piitã mar tỳx nê.

²⁷ Tã ra pyka pẻ Gres wỳr nojarêt nê Jejus kôt htỏjẻ mã amnhĩ jarẻ nhũm mẽ kuma nhũm ja mẽ kãm mex nê. Hãmri nê Gres kamã Jejus kôt mẽ htỏjẻ mã kaga nhĩpẻx. Apor kot mẽ hwỳr amnhĩ kôt o mỗr nê mẽ kãm ỏr nhũm mẽ kot omunh nê kamã harênh nê ho mex kaxyw mẽ kãm hipẻx. Hãmri nê hipẻx pa nê kãm kugỏ nhũm kupy nê mẽ kurũm kato nê mã mẽ hwỳr mỗ. Hãmri nê mẽ hwỳr pỏj. Gres nhỗ xwỳnh kwỳjaja na prem ra Jejus kôt amnhĩ xunhwỹ. Tirtũm kot mẽ kutã nojarẻt jakamã nhũm mẽ ra hkôt amnhĩ xunhwỹ. Jakamã nhũm Apor mẽ hwỳr pỏj hãmri nê mẽ ỉhkỏ hã tanhmã mẽ ho ajuta hto ho pa. ²⁸ Nẻ xatã Ijaew mã tanhmã Jejus jarênh to kamã hihtỳx o mẽ hkôt pa nẻ mẽ kãm:

—Nà Jejusja tãm na pre Tirtũm mẽ pakaxyw ãm. Tirtũm kapẻr ã kaga htũm kamã ã harênh kot anhỳr. Anê.

19

Pawre akupỳm Epes wỳr mỗr ã harênh

Rukre 3.15-16

¹ Tã nhũm Apor kormã Korĩt kãm pa ri nhũm Pawre ma akupỳm Epes wỳr mỗ. Ma krãhakỳx kôt akupỳm hwỳr mỗ. Hãmri nẻ hwỳr pỏj nẻ mẽ kot Jejus kôt amnhĩ nhĩpẻx o mẽ pa xwỳnhjẻ pumu. Nhũm mẽ kormã Jejus jarênh jatur xà mar kêt nê. ² Jakamã nhũm Pawre mẽ hwỳr mỗ nẻ mẽ omu nẻ Tirtũm Karỏ hã mẽ hkukja nẻ mẽ kãm:

—Kwa mẽ ate Jejus kôt amnhĩ xunhwỳr xà hã arỉgrota ã xà na pre Tirtũm Karỏ mẽ akarỏ mã agjẻ? Anẻ.

Hãmri nhũm mẽ kuma nẻ kãm:

—Nà mẽ ixte Tirtũm Karỏ jarênh mar kêt. Anẻ.

³ Hãmri nhũm mẽ kãm:

—No mẽmỏj kôt na prem mẽ akrã kumrã? Anẻ.

Nhũm mẽ kãm:

—Nà Juãw Paxis kot mẽ hkrã kumrãr o paja kôt na prem mẽ ixkrã kumrã. Anẻ.

⁴ Hãmri nhũm Pawre mẽ kãm:

—Nà Juãw Paxis na pre Ijaew mã kapẻr o: “Kot kaj mẽ mẽ ate amnhĩ tomnuj kaga nẻ hpãnhã tãm amnhĩ nhĩpẻx pa hã mẽ akrã kumrã.” Anhỳr o mẽ kãm kapẻr o pa. Nẻ mẽ kãm Jejus jarênh o: “Koja tokyx mẽhỏ ixkôt hapu hã mẽ pahwỳr kato nẻ tanhmã amnhĩ nhĩpẻx to ho pa. Ka mẽ omu nẻ amnhĩ kaxyw hkôt ajamaxpẻr nẻ hkôt amnhĩ xunhwỹ.” Anẻ. Tã Jejusja na pre ã mẽ kãm harênh anhỳr o pa. Anẻ.

⁵ Nhũm pre ã Pawre mẽ kãm Juãw Paxis mẽ Jejus wa harênh anẻ nẻ hpãnhã Jejus nhỹ hã mẽ hkrã kumrã. ⁶ Hãmri nẻ hpãnhã mẽ hã ỉhkra jaxwỳ nhũm Tirtũm Karỏ mẽ hwỳr wrỳ nẻ mẽ hkarỏ mã gjẻx pa. Hãmri nhũm mẽ ỹ hã ahpỳnhã axtem mẽ kapẻr kwỳ ho kapẻr nẻ ỹ hã Tirtũm mex o mex ã harênh

o kuhê. ⁷ Ā mẽ kot amnhĩ nhĩpêx anhÿr xwÿnhjaja kêp 12.

⁸ Tã nhũm Pawre Epes kãm Ijaew nhõ Tĩrtũm kapêr o mẽ ahkre xà hã ixkre hwÿr m̄rar ã mytwrÿ axkrunêpxi. Amnhĩ kamã kahak kêt nê hprĩ hã Ijaew mã hprĩ hã Jejus jarê nê mẽ kãm:

—E pa mẽ amã Jejus jarê ka mẽ inhma. Nà Tĩrtũm kot mẽ pahwÿr mênh xwÿnhhta na. Nê mẽ pahte kamã pajamak o papa xwÿnhhta na. Jakamã kot ka mẽ amnhĩ kaxyw hkôt ajamaxpêr nê hkôt amnhĩ xunhwÿ nhũm Tĩrtũm ja hã mẽ apumu nê mẽ ato hkra. Anê.

Hãmri nhũm mẽ hkwyjaja kuma nê hkôt hamaxpêr kurê kumrêx. ⁹ Nom nhũm mẽ hkwyjaja kuma nê ãm kuma nê Jejus o kapêr punuj nê. Mẽ piitã mẽ noo mã kuhê nê ho kapêr punuj tÿx nê. Nhũm Pawre tee ri ja mẽ omu hãmri nê mẽ kurũm kato. Mẽ pikuprõnh xà hã ixkreta rũm kato nê hpãnhã nhãm mẽ kot kãm “Xirãn kot mẽ ahkre xà hã ixkre” anhÿr xwÿnhjaja wÿr hpãnhã mō. Nê amnhĩ kôt mẽ kot Jejus kôt amnhĩ xunhwÿr xwÿnhjê ho pa nê hpãnhã ixkreta kamã mẽ ahkre ho pa. Apkati mẽ hwÿr mra nê mẽ ahkre. ¹⁰ Jao hã amgrã axkrut. Jakamã nhũm pyka pê As kamã mẽ piitã Pahihti Jejus jarênh ma. Ijaew nê Ijaew kêt xwÿnhjaja nhũm mẽ piitã harênh ma.

Wajaga hkwy jarênh

¹¹ Tã nhũm Pawre Tĩrtũm nhÿ hã mẽ kãm aa mẽ kot mẽmoj pumunh kêt kwÿ ho anhÿr o ri mẽ hkôt pa. ¹² Jakamã nhũm pre htem hwÿr mra nê kêp ê hkwy jamy nê ma mẽ à xwÿnhjê hwÿr o mra nê mẽ hã haxwÿ nhũm mẽ akupÿm mex. Nê mẽkarõmnuti kot tanhmã mẽ ho ho pa xwÿnhjê hã nhũm prem mããnênh mẽ hã ê kwÿ jaxwÿ nhũm mẽkarõmnutija mẽ kurũm hapôj nê ma m̄rar kurê kumrêx nhũm mẽ akupÿm tãm hkrã.

¹³⁻¹⁴ Tã nhũm mẽõ patre maati Sewahtija hkra my kêp 7 nê piitã kêp wajaga. Hãmri nê mẽ kãm Pawre pyrã nê mẽ nê mẽkarõmnuti japôx o pa hprãm nê. Jakamã kormã Jejus kôt amnhĩ xunhwÿr kêt tã mẽ kot ÿ hã Pawre pyrã nê mẽhõ nê hkwy janor kaxyw nê kãm:

—E Pawre kot Jejus jarênh o ri pa xwÿnhhta nhÿ hã kot paj amã ixkapêr. Jakamã e kwa tokyx myta rũm akato nê ma tẽ. Anê.

¹⁵ Hãmri nhũm mẽkarõmnutija mẽ kuma nê ãm mẽ kuma nê mẽ kãm:

—Tk. Mẽ apê Jejus mẽ Pawre wa hkwy hkêt tã mẽ nê ã mẽ inhmã akapêr anhÿr o apa. Nà Jejus mẽ hkwy pixjaja na htem Tĩrtũm nhÿ hã mẽ kêp mẽ ijapôx o pa. Mẽ apê mẽ hkwy hkêt kênã. Nà pa ixkatoore kaxyw ã. Anê.

¹⁶ Hãmri nhũm mẽkarõmnuti kot tanhmã ho xwÿnhhta mẽkarõmnuti nhÿ hã wajagajê pynê nê mẽ htak rax o kêp mẽ ê kaxõnh pa nhũm mẽ tee ri amnhĩ nhĩpêx. Hãmri nê hkênh nê õrkwy rũm hapôj nê ma umaj hprõt nê mra. ¹⁷ Hãmri nhũm Epes kamã mẽ piitã ã kot mẽ hipêx anhÿr ã mẽ harênh ma nê tee ri hamaxpêr nê kãm ma nê. Ijaew nê Ijaew kêt xwÿnhjaja nhũm mẽ piitã tee ri kãm hamaxpêr o pa. Nê Pahihti Jejus mã mex o mex ã harê. ¹⁸ Jakamã nhũm mẽ kot Jejus kôt amnhĩ xunhwÿr nyw xwÿnhjaja piitã tanhmã amnhĩ jarênh to. Nê mẽ hkwyjaja amnhĩ jarênh o:

—Nà kormã ixte Jejus kôt amnhĩ xãm kêt ri na pa pre ã amnhĩ tomnuj anhÿr o ri ixpa. Tã Jejus kôt amnhĩ xãm hãmri nê axte ã amnhĩ nhĩpêx anhÿr kêt nê. Anê.

Nhũm mẽ hkwyjaja kêp wajaga htã mẽ urak nê Jejus kôt amnhĩ xunhwÿ hãmri nê amnhĩ jarênh o:

—Nà ijaxwÿja kormã Jejus kôt amnhĩ xãm kêt ri na pa pre hte nê mẽ no kupyre nê mẽ y pix o ri mẽ hkôt ixpa. Tã Jejus kôt amnhĩ xãm hãmri nê axte ã amnhĩ nhĩpêx

anhÿr kêt nê. Pãnhã axtem amnhĩ nhĩpêx nyw o amnhĩ nhĩpêx o ri xpa. Anê.

¹⁹ Hãmri mē õ wajaga xàhpumunh xà hã kagà jamý nê ma o mra nê kaxyw kuto nê kamã rēnh pa nê mē piitã mē noo mã ho xêt pa. Wajaga xàhpumunh xà hã kagàja ã kàxpore xohtô rax kumrêx tã nhũm mē Jesus gryk ã hamý nê o mra nê ho hxêt pa nhũm hapêx. ²⁰ Hãmri nhũm krĩ nhõ xwýnhjaja ã mē kot amnhĩ nhĩpêx anhÿr ã mē omu nê ohtô rax nê mē uràk nê Jesus kôt amnhĩ xunhwý.

Pawre kot Rôm wýr hkrà hã harēnh

Rômãn 1.13-15, 15.22-29

²¹ Tã nhũm Pawre ra akupÿm Jerujarê hwýr nojarêt nê hamaxpêr o:

—E kot paj ixkato nê hpãnhã ma Masetõn mē Gres wa hkôt ma akupÿm Jerujarê hwýr mō. Ma mē kot Jesus kôt amnhĩ xunhwýr xwýnhjê pumunh o mē hkôt mō. Hãmri nê Jerujarê hwýr pøj nê kamã tanhmã amnhĩ to hpa hãmri nê hpãnhã ma Rôm wýr mō. Anê.

²² Hãmri nê hkôt ho ajuta ho wa pa xwýnh Ximotre mē Eras wa kãm amnhĩ jarê nê wa kãm:

—E kêr ka wa ma ixkukamã Masetõn wýr wa mō. Kot paj kormã jar As kamã ixpa grire hãmri nê ma war akôt mō pu mē hamũ ma Jerujarê hwýr mō. Anê.

Hãmri nhũm wa kuma nê kato nê ma hkukamã Masetõn wýr mō.

Mê kot sãnti hã Pawre mã àkjêr ã mē harēnh

Sikũn Korĩt 1.8-9

²³ Rôm nhũm Epes nhõ xwýnhjaja tee ri Pawre kot tanhmã Pahihti Jesus jarēnh to hã kuma nhũm ja mē kêp omnuj nê. Nhũm mē Jesus ã kamã gryk tÿx nê. ²⁴ Na prem amnhĩ kaxyw Tirtũm kôt hamaxpêr kêt nê. Na prem axtem sãnti ho mē hpãm nê amnhĩ to hwýr pê hã hpijaàm nê kãm mex o mex ã

harēnh o pa. Mē õ sãntija ni Xiãnre na pre. Nhũm mē kãm ixkre nhĩpêx nê kamã hkarõ nhĩpêx xãm. Hãmri nê hwýr akuprõ nê hã hkĩnh nê hkarõ hã hpijaàm nê kãm mex o mex ã harê. Nhũm pre hte Temêtja Xiãnre nhõrkwý karõ hkryre hkwy nhĩpêx nê mē kãm ho wēnê ho pa. Prat o hipêx nê ho wēnê ho pa. Jao ra hã mē àpēnh xwýnhjê mē nhũm mē kot haprõr xwýnhjê kukwak ri kàxpore jamýnh rũnh o pa.

²⁵ —Jakamã nhũm Pawre mē hwýr mō nê pøj nê mē kãm Mēpahpãm Tirtũm jarēnh o ri mē hkôt pa nhũm Temêt tee ri kuma nhũm ja kêp omnuj nê. Hãmri nhũm hamaxpêr nê mē kot uràk nê Xiãnre nhõrkwý karõ hkryre nhĩpêx nê ho wēnê ho pa xwýnhjê ho akuprõ nê mē kãm:

—E kwa mē inhma. Na pu htem mēpanã Xiãnre nhõrkwý karõ hkryre pãnhã kàxpore jamýnh rũnh o papa. ²⁶ Tã mãn ka mē ra ham hpõx xwýnh Pawreja pumu nê kapêr ma. Na hte jar mē panhõ krĩ kamã nê As piitã hkôt mē kãm mēpanã Xiãnre karõ nê mē kãm kapêr o pa. Xep mē pahte mē hkarõ nhĩpêxja kêp mēpanã kumrêx kêt ã mē kãm harēnh o pa nhũm xep mē ohtô nê kuma nê ra hkôt hamaxpêr.

²⁷ —Kwa ja mex kêt. Koja mē kapêr ma nê hkôt amnhĩ nhĩpêx hãmri nê axte mē pahte ixkre karõ hkryre nhĩpêx xwýnhnta japrõr kêt nê. Hãmri nê mē paxàpēnh o kapêr punuj nê. No ãm ja pix omnuj kêt. Koja mēpanã Xiãnre mã amnhĩ jarēnh xà hã ixkreja kaga hpa. Nê haxwýja karõja kaga. Mē piitã kãm hapê kēnã. As kamã nê pyka piitã hkôt mē piitã kãm hapê nê hwýr mra nê amnhĩ to hwýr o pa. Kêp mēpanã mex kumrêx tã koja mē Pawre kapêr gryk ã hk-aga hpa nê axte kãm hamaxpêr kêt nê. Hãmri pu mē axte mē kukwak ri pakàxpore rax nê papa hkêt

ně. Kwa tanhmã kot puj mẽ amnhĩ nhĩpêx to? Aně.

²⁸ Hãmri nhũm mẽ tee ri ã kapêr anhÿr ã kuma nê Pawre kamã gryk tÿx kumrêx. Nê gryk xàj kàx pèê kapêr nê xatã kapêr tÿx kãm kapêr punuj nê. Nê kapêr o:

—Xiãnre na mex kumrêx. Kêp mẽ pahpê Epes nhõ xwÿnhjê nã maati na.

Anhÿr o kàxpêê kapêr o kuhê. ²⁹ Hãmri nhũm krĩ nhõ xwÿnh piitã mẽ kuma nê mẽ hwÿr hprôt nê haxwÿja gryk nê kàxpêê mẽ hkôt ã harênh anhÿr o kuhê. Hãmri nê gryk xàj Pawre hkôt ri wa pa xwÿnhja wa unê nê ma mẽ kot axpên mar xà hã ixkre hwÿr wa hkjênh o tẽ. Masetôn nhõ xwÿnh wa kêp Gajore mẽ Aristakja nhũm mẽ wa unê. ³⁰ Hãmri nhũm Pawre mẽ kot wa unênh ã mẽ omu nê tee ri wa hkukamã hamaxpêr nê mẽ hkôt hprôt nê mẽ kãm tanhmã kapêr to kaxyw nom nhũm mẽ kot Jejus kôt amnhĩ xunhwÿr xwÿnhjaja ja nê kãm kapêr kãm hihtÿx nê. ³¹ Hãmri nhũm As kamã mẽ kot mẽ ho amnhĩptãr xwÿnh kwÿjaja ã mẽ kot amnhĩ nhĩpêx anhÿr ã mẽ omu nê Pawre hwÿr hpêr mẽ. Mẽ kãm hkĩnh jakamã kot mẽ hkôt htêm nhũm mẽ kot hpĩr pymaj hwÿr hpêr mẽ nê mẽ hkôt htêm nê hkurê kamã hihtÿx nê.

³² Rôm nhũm mẽ piitã mẽ kot axpên mar xà hã ixkre hwÿr pikuprõnh pa nê kàx pè kapêr punuj o kuhê. Nom axpên kôt kapêr kêt nê. ãm axpên kwÿm ri kàx pè tanhmã kapêr punuj to ho. Nhũm mẽ hkwyjaja hprĩ hã mẽ mar kêt tã amarĩ amnhĩ krã hkôt kàx pè kapêr punuj nê. ³³ Nhũm Ijaew kwÿjaja tee ri ja hã mẽ omu nê axpên mã:

—Tk. Kwa okora. Koja mẽ nã Xiãnre hã gryk hãmri nê tanhmã mẽ pahpê Ijaew to nã? Aně.

Hãmri nê hamaxpêr nê mẽ hwÿr amnhĩõ pè Aresãnja mẽ nê kãm:

—Kwa ma mẽ hwÿr tẽ nê mẽ kãm tanhmã mẽ pahpê axãprãr to. Pawre kêp mẽ pahkwÿ htã tãm na mẽ kãm mẽ gryk jaxã. No mẽ papajaja na pu mẽ kãm mẽ gryk jaxãr kêt nê. Aně.

Hãmri nhũm mẽ kuma nê mẽ hwÿr tẽ nê xa nê tee ri kot mẽ ho hpinhkrênh kaxyw kãnhmã mẽ kãm ãkra pêr kaprÿ. ³⁴ Nhũm mẽ omu nom hpinhkrênh kêt nê arĩ kàx pèê kapêr punuj ã 2 or. Nê kàx pè kapêr o:

—Mêpanã Xiãnreja mex o mex. Kêp mẽ pahpê Epes nhõ xwÿnhjê nã mex na. Aně.

³⁵ Tã nhũm mẽ õ pahi nhõ kôwenatô jatã tanhmã Epes nhõ xwÿnhjê ho hpinhkrênh to hãmri nê ja nê mẽ kãm kapêr nê mẽ kãm:

—Kwa mẽ anhĩkrê. Mẽ piitã kot Xiãnre mex o mex ã omunh kênã. Nê mẽ pahpê kãm amnhĩ jarênh xà hã ixkre jamãr xwÿnh ã mẽ kot mẽ pahpumunh mex. Nê kaxkwa rùm karõ kot mẽ pahwÿr tẽm nhũm mẽ pahpê hamãr o papa xwÿnh ã nhũm mẽ kot mẽ pahpumunh mex. ³⁶ Jakamã mēhõ kot kêt we mẽ pahpê hamãr xwÿnh kêt ã mẽ pajarê? Ra mẽ piitã mẽ kot ja hã mẽ pahpumunh jakamã kwa mẽ anhĩkrê nê ri ã akapêr anhÿr kêt nê. ³⁷ No mẽ ate wa unênh nê amnhĩ kôt wa ho atêm xwÿnhhta wa. Wa kot tanhmã mẽpanã Xiãnre ho kapêr punuj to rÿ kêp õ ixkre kamã ãhkĩnh kêt tã ka mẽ amarĩ wa unê nê amnê amnhĩ kôt wa o tẽ.

³⁸ —Kwa kê Temêt mẽ hkwyjaja kãm tanhmã wa ho kapêr to hprãm nê ma pahihiti hwÿr wa o tẽ nê kumã mãn tanhmã wa ho kapêr to. Měmoj tã axpên mã mẽ kapêr xà hã arĩgrota ãã. ³⁹ Rÿ ka mẽ amã mẽmoj jarênh prãm nê arĩgroja ã mãn rĩ kormã mẽmoj jarê. ⁴⁰ No jarãhã mẽ ate amnhĩ nhĩpêxja te mẽ ate pahihiti kutã amnhĩ xunhwÿr nê ho akapêr punuj pyrãk. Koja Rôm nhõ xwÿnhjê nhõ pahi mẽ ajarênh

ma hāmri nē mē ate kamā agryk ā amnhī kamnhīx. Hāmri nē mē atā ixkukja pa tanhmā kām mē ajarēnh to? Mēhō nhỹ hã na ka mē ā apikuprōnh nē amnhī nhīpēx anē? Nà amnhī krā hkôt na ka mē akuprō nē ā amnhī nhīpēx anē. Anē.

⁴¹ Hāmri nē mē kām kapēr pa nē mē hano nhūm mē anhrà nē ma akupym ōrkwỹ hwyr hapēx.

20

Pawre ma Masetōn mē Gres wa hwyr mōr ā harēnh

¹ Hāmri nhūm Pawre ra nojarēt. Jerujarē hwyr mōr mā nom kormā pika pē Masetōn kumrēx wyr mōr nē kurūm ma akupym Jerujarē hwyr mōr mā. Hāmri nē nojarēt nē mē kot Jejus kôt amnhī xunhwyr xwýnhjē ho akuprō nē mē kām amnhī jarē nē mē kām:

—E kot paj ma mō. Nom kêr ka mē arĩ ixwakre kamā Tirtūm kapēr kôt amnhī nhīpēx mex rāhã ho ri apa nē aa hkaga hkēt nē. Anē.

Hāmri nē mē kām:

—E mē māmri ixwa kre kamā axamnhīx ajamakētkati nē ri apa. Anē.

Hāmri nē kato nē ma Masetōn wyr mō. ² Nē hwyr pōj nē kamā krĩ hkwy hkôt mō nē nhỹri mē kot Jejus kôt amnhī xunhwyr xwýnhjē pumu nē Tirtūm kapēr o mē ahkre. Mē kot hkôt amnhī nhīpēx mex nē kām hprām xà hkôt pix mā amnhī nhīpēx kaxyw mē kām kapēr o ri mē hkôt pa. Hāmri nē kato nē ma mō nē pyka pē Gres wyr pōj. ³ Nē kamā mē hkôt pa hã mytwry axkrunēpxi hāmri nē akupym pyka pē Sir wyr nojarēt. Nē ma pàr kām hwyr mōr kaxyw nē amnhī tã Sir kamā Ijaew kwý kot tanhmã harēnh to hã amnhī jarēnh ma. Na prem ra hã axpēn mā amýnē nē axpēn mā:

—E koja amnē mē pahwyr mō pu mē nhỹri omu nē hpĩr kurē kumrēx. Anē.

Hāmri nhūm Pawre amnhī tã mē kapēr ma nē pàr kaga nē mē hwyr mōr kēt nē. Hāmri nē awjanã nē Jerujarē hwyr Masetōn kamã pa. ⁴ Nhūm Jejus kôt htō hkwyjaja ma hkôt mō. Ā mē hixi kot anhyr.

Perej nhō xwýnh Sopatōja. Piro hkra na pre.

Nē Tesarōn nhō xwýnh Aristak mē Sikūn wa.

Nē Tepe nhō xwýnh Gajoreja.

Nē As nhō xwýnh Xikitre mē Torow wa.

Nē Ximotreja.

Jajaja na prem ma Pawre hkôt Jerujarē hwyr mō. ⁵ Nē pa ixpē Rukre ixte mē amã ja jarēnh nē hã kagã xwýnhja na pa axte Pawre hã ajēt nē hkôt mō. Jakamã nhūm jajaja piitã ma wa ixkukamã Tōx wyr mō nē kamã wa ixkām hamak o pa.

⁶ Tã pa wa ma krĩ pē Piripos rūm ixkato nē pàr kām ma mē hkôt mō. Arĩgro pē Pas jakành mē ma mē hkôt mō.

Tã wa ixtã arĩgro pē 5 nē mē hkôt Tōx wyr pōj nē kamã mē omu nē mē hkôt ixpa hã ixtã ũ semãn.

Pawre kot akupym Exik o htĩr ā harēnh

Juãw 5.21; Atre 9.36-43

⁷ Tã nhūm sap nē kamãt pa mē kot Jejus kôt amnhī xunhwyr xwýnhjē hkôt akuprō nē axpēn kutã apku nhūm Pawre mē kām kapēr. Ra apkati hkôt mē inhnojarēt kaxyw jakamã nhūm mē kām Tirtūm kapēr jarēnh ryy nē. Ra kôt ā kamãt nhūm arĩ mē kām harēnh o nhỹ. ⁸⁻⁹ Ixkre hprēk axpēn nhīpy axkrunēpxi nhītep xà kamã na pa prem akuprō nē mar o ixkrĩ. Ixkreja kamã kanē ohtō nē hpōk o harir. Jakamã nhūm Pawre arĩ mē kām ujarēnh o nhỹ nhūm mēhō xaptar nyw Exikja ra õtxwa htýx nē mē ixkuri õt o nhỹ. Janere hã õt o nhỹ. Tã ra gōr nē janere pē kato nē ahparmã tē nē pykap tēm. Pa mē tee ri omu nē ahparmã hwyr

ixprôt nê wrý nê omu nhùm htyk mex nê nõ. Kÿj rùm ahpar mã htêm ryy jakamã htyk mex nê nõ. Hãmri nhùm hkwyjaja tee ri omu nê hkaprî htýx nê kumý nê mÿr o hkrî. ¹⁰ Hãmri nhùm Pawre mẽ ixkôt wrý nê hwÿr tẽ nê htyk ã omu nê kumý nê mẽ kãm:

—E mẽ amÿr kêt nê. Ra htyk tâ koja Tirtùm akupÿm mẽ pamã ho htír.

Anhÿrja kôt nhùm akupÿm htír. ¹¹⁻¹² Hãmri nhùm mẽ akupÿm htír ã omu nê hkính tÿx kumrêx. Hãmri pa mẽ akupÿm kÿx pê ixkre hwÿr api nhùm Pawre mẽ inhmã pãwti hkwy nhîrê nê mẽ inhmã kugô pa mẽ Jejus kot mẽ panê htyk mã ijamaxpêr pê kuku. Hãmri nhùm Pawre axte mẽ kãm kapêr o ÿr rãhã nhùm myt kato pa mẽ kêp anhgrã nê ma ixa.

Pawre Mîrêt wÿr môr ã harênh

¹³ Hãmri pa mẽ inhnojarêt nhùm Pawre mẽ ixte hkôt mẽ inhmôr xwÿnhjê mã:

—E kêr ka mẽ ma pàr kãm ixkukamã mō. Kot paj ahte ma kÿx pê mẽ akôt ixpar o Asôt wÿr mō. Hãmri nê hwÿr pōj nê mẽ anhō pàr mã axà pu mẽ ma pahpimràatã ma hamũ mō. Anê.

¹⁴ Hãmri pa mẽ kuma nê ma mō nê mẽmo arîgro mã Asôt kamã axpên wÿr pōj. Hãmri nhùm Pawre mẽ ixkôt pàr wÿr axà pa mẽ ma krî pê Mîtirên wÿr mō. ¹⁵ Nê hwÿr pōj nê kurùm kormã mō nhùm apkati pa mẽ gô hipôk pê Kiw jakrenh o mō. Nê hakre nê mō nhùm apkati pa mẽ gô hipôk pê Sãm wÿr pōj nê mã pàr nhô. Hãmri nhùm apkati pa mẽ axte mō nê Mîrêt wÿr pōj. ¹⁶ Nom nhùm ra Pawre nojarêt nê. Kãm tokyx As rùm kator nê Jerujarê hwÿr môr nê tokyx hpôx prãm nê. Kãm mẽ hkính pê Pêtekos xwÿj ri hwÿr hpôx prãm jakamã nojarêt tÿx pa mẽ Epes wÿr inhmôr kêt nê.

Pawre kot Epes kamã Kris kwÿjê mã amnhî jarênh

¹⁷ Tã pa mẽ Mîrêt wÿr pōj nhùm Pawre amnhî wÿr Epes wÿr Jejus kwÿ jahkre ho mẽ pa xwÿnhjê mã karô. ¹⁸ Hãmri nhùm mẽ man mẽ ixwÿr mō nhùm Pawre mẽ omu nê mẽ kãm amnhî jarê nê mẽ kãm:

—Nã ixte mẽ amã amnhî jarênh kaxyw na pa mẽ atã karô. Ra mẽ ate tanhmã ixte amnhî nhîpêx to mã ixpumunh mex. Wam mẽ awÿr As wÿr ixpôxta ã ka prem aprî mã ixpumunh mex nê. ¹⁹ Na pa pre mẽ akôt ri mẽ amã tanhmã amnhî nhîpêx to ho ri ixa. Te ixpê mẽ amã ixapênh xwÿnh pyrãk. Nê Pahihti Jejus mã tanhmã amnhî nhîpêx to ho ri mẽ akôt ixa. Nê ixkwÿ Ijaew kwÿ kot Jejus kapêr kaga mã mẽ omu nê ixkaprî nê inhmÿr o ixa. Nhùm prem Jejus ã ixtomnuj pa amnhî xã htýx kamã ijamak o ri mẽ hkôt ixa. ²⁰ Nom arî ri Tirtùm kapêr o mẽ ajahkre ho ri mẽ akôt ixa rãhã nê aa hkaga hkêt nê. Mẽ anhôrkwÿ kamã nê mẽ ahkre xã mã ixkre kamã. Mẽ ate tãm amnhî nhîpêx prãm xàj pa pre ã mẽ ajahkre mex anhÿr rãhã ho ri mẽ akôt ixa.

²¹ —Nê mẽ ixpê Ijaewjê mẽ mẽ apê Ijaew kêt xwÿnhjê mẽ pa pre mẽ ajahkre ho axpên pyrãk. Mẽ apiitã mẽ ate amnhî tomnuj kaga nê hpãnhã Tirtùm kôt amnhî nhîpêx kaxyw. Nê amnhî kaxyw mẽ panhō Pahihti Jejus Kris kôt ajamaxpêr kaxyw na pa pre mẽ akôt ri mẽ ajahkre rãhã ho ri ixa.

²² —Tã ra Tirtùm Karô kot akupÿm Jerujarê hwÿr inhmênh jakamã pa kormã hwÿr mō. Kot paj hwÿr pōj nhùm krî nhô xwÿnhjaja Jejus ã ixtomnuj nê nom tanhmã mẽ kot ixtoja kukamã ixte ixprî mã ixãhpumunh kêt. ²³ Ja pix na ixte omunh. Na pa hte nhÿri pōj nhùm htem Jejus ã ixpynê nê mẽ hagjênh xã kamã ijagjê nê tanhmã inhîpêx to. Tirtùm Karô na pre ra ã mẽ kot

inhîpêx anhÿrja kukamã inhmã mẽ harê. Jakamã ixte amnhî kukamã amnhî tâ ixâhpumunh mex. Kot paj xep akupÿm Jerujarê hwÿr pøj nhÿm mẽ ixpumu nê Jejus ã tanhmã inhîpêx to. ²⁴ Tã no pa amnhî kamã ixkahak kêt o inhmã mẽ uma hkêt nê. Koja mẽ kãm ixpÿr prãm nê mãmrî ixpÿ. Inhmã ixtyk puma hkêt. Æm mẽmoj pixi na inhmã hprãm. Ra Pahihti Jejus kot mẽmoj tâ inhmã karõ xaja na inhmã kormã ixtÿr ri hatur xãm mẽnh prãm. Tÿrtÿm kãm mẽ pajapê hã kot mẽ pahto mex prãm xaj mẽ pahwÿr Kra Jejus mẽnh nhÿm mẽ panê tanhmã amnhî nhîpêx to hã harênhja na inhmã mẽ piitã mẽ kãm harênh jatur xãm mẽnh prãm.

²⁵ —Tã e ixkràmnhwÿjaja. Na pa pre mẽ akôt mẽ ajahkre rãhã ho ri ixpa. Mẽ ate Jejus kôt amnhî nhîpêx mex rãhã ho ri apa kaxyw. Tã kot puj pêr mẽ axte xepën pumunh kêt nê.

²⁶⁻²⁷ —Na pa pre ra mẽ amã Tÿrtÿm kapêr piitã harênh pa. Mẽ ate mar tÿx nê hkôt pix mã amnhî nhîpêx o apa kaxyw. Jakamã koja mẽ anhõ krî nhõ xwÿnhjê hõ amnhî kaxyw Jejus kôt hamaxpêr prãm kêt nê rî tãm. Kwãr mãmrî kot amnhî tomnuj kamã ty nê arî tãm amnhî pumu no ãm kê amnhî tâ tanhmã inhmã nê hkêt nê.

²⁸ —E mẽ ate Kris kwÿ jahkre ho apa xwÿnhjaja. Kêr ka mẽ amnhî pumunh mex o ri apa. Nê mẽ kot Jejus kôt amnhî xunhwÿr xwÿnhjê jamãr mex o ri apa. Ja kaxyw na pre Tÿrtÿm Karõ mẽ kaxyw mẽ ax-unhwÿ. Tÿrtÿm Kra Jejus kot htyk o Tÿrtÿm mã mẽ pahte amnhî tomnuj piitã hpãnhã amnhîrer pa jakamã kêr ka mẽ kãm mẽ omunh mex o ri mẽ hkôt apa. Te ôwêhti jamãr xwÿnh kot ôwêhti jamãr mex o ri pata pyrãk.

²⁹ —Kot paj ma mõ nhÿm mẽmojjaja ixpãnhã mẽ awÿr pøj nê mẽ ate Jejus kaga hprãm xaj

tanhmã mẽ amã hêx to ho ri mẽ akôt pa. ³⁰ Nê mẽ akwÿjaja mẽ urã nê tanhmã hamaxpêr punuj to nê mẽ ate Jejus kaga hprãm xaj hêx rom tanhmã mẽ amã kapêr to ho ri mẽ akôt pa. ³¹ Jakamã kwa mẽ o kora. Kêr ka mẽ axkãm ajamak rom nê ri apa. Kê jajaja nhÿrmã ã mẽ amã kapêr anê ka mẽ ama nê mẽ hkôt ajamaxpêr kêt nê. Mẽ ate mẽ mar nê mẽ hkôt ajamaxpêr pymaj na pa pre mẽ akôt ri mẽ ajahkre ho ri ixpa hã ixtã amgrã axkrunêpxi. Arîgro hã nê kamãt kãm mẽ ajahkre rÿnh o ri ixpa. Nê mẽ ate mẽ amã mẽ hêx xwÿnhjê hkôt amnhî xunhwÿr pymaj mẽ ajahkre pê te inhmÿr pyrãk o ri mẽ akôt ixpa.

³² —E kot paj Tÿrtÿm nhîhkram mẽ ajagjênh pa. Koja mẽ atãnopxar o ri mẽ akôt pa nê mẽ akutã no-jarêr rãhã ho pa. Hãmri ka mẽ ãm hkôt pix mã amnhî nhîpêx. Jao Jejus kaga hkêt nê. Hãmri nhÿm nhÿrmã Tÿrtÿm mẽ pahpê hkrajê piitã tanhmã mẽ pahto mex to.

³³ —Na pa pre mẽ akôt ixpa ry htã no ãm aa mẽmoj tâ mẽ awÿr kêt nê. Mẽ axê hkwy hã mẽ awÿ rÿ mẽ akãxpore hã mẽ awÿr o ri ixpa hkêt nê. ³⁴ Na pa pre amnhî pa kukwak ri amnhîm ixujaprôr pê ixãpkur o ri mẽ akôt ixpa. Nê ixkôt mẽ pa xwÿnhjê mã ixujaprôr o ri ixpa. Ra mẽ ate ja hã ixpumunh mex.

³⁵ —Tã mẽmo kaxyw na pa pre ã mẽ akôt amnhî nhîpêx anhÿr o ri ixpa? Nê mẽ ate ja hã ixpumunh nê ixpyrà nê ã amnhî nhîpêx anhÿr o ri apa kaxyw. Nê ixpyrà nê tanhmã mẽ kute xwÿnhjê ho ajuta hto ho ri mẽ apa kaxyw. Na pre Pahihti Jejus ja jarênh o: “Koja mẽhõ amã mẽmoj gõ ka amnhîm apy nê akînh nê. Nom kot kaj kam nhãm mẽhõ mã mẽmoj gõ hãmri nê akînh tÿx o ate mẽhõ mã mẽmoj nhõrta jakre.” Anê.

³⁶ Na pre ã Pawre mẽ kãm ujarênh anhÿr pa hãmri pa mẽ ra

inhnojarêt. Hâmri nhùm mē piitā hkônkrā ho hkrī pa nhùm Pawre mē ho Tirtūm wý. ³⁷⁻³⁸ Hâmri nhùm mē piitā kām Pawre hkīnh týx jakamā mýr rax o kuhê. Tee ri kot axte mē kot axpēn pumunh kêt ā mē kām amnhī jarēnhja ma nē hkaprī htýx nē. Nē hkaprī xāj kahti hkôt hamý nē mur. Hâmri nē ma Jerujarē hwýr hkujaêk kaxyw mē ixkôt pàr wýr hkaprī nē mē ixkôt mýr o mō.

21

Pawre kot Jerujarē hwýr hpôx ā harēnh

¹ Tā pa mē gô mýri Jejus kôt mē ixtôjê re nē pàr krem agjê nē axte mō. Ma gô hipôk pē Kosti hwýr ixkatāt kôt mō nē hā ajêt. Hâmri nhùm apkati pa mē axte hamū mō nē hpānhā gô hipôk pē Roxti hwýr mō nē hwýr pôj nē hā pàr xi. Hâmri nē hpānhā axte krī pē Patar wýr mō. ² Hâmri nē hwýr pôj nē pàr rūm ijapôj nē pàr õ pumu. Nhùm ra pyka pē Wēnīs wýr nojarêt pa mē hwýr agjê nē ma kamā axte mō. ³ Mōō nē amým amnhī kukamā gô hipôk pē Sipre pumu. Hâmri nē upôk rūm hakrenh mā mō nē pyka pē Sir wýr mō nē kamā Xir hwýr pôj nē hā pàr nhô. Pàr pām kot krī kamā pàr kukrêx rer kaxyw pa mē kormā hā ajêt nē tokyx axte nhām inhmōr kêt nē. ⁴ Hâmri pa mē kutêp api nē krī kamā mē kot Jejus kôt axpēn to htō nē htōx xwýnhjê japêr o mō. Hâmri nē nhýri mē omu nē mē hkôt ri ixpa ho ixtā ũ semān. Nhùm prem Tirtūm Karō nhý hā Pawre mā kapêr nē kām:

—Kwa Pawre mē inhma. Kot ka Jerujarē hwýr pôj nhùm xep mē kām akurê xwýnhjaja tanhmā anhīpêx to. Tirtūm Karō na ā akukamā mē inhmā ajarēnh anê. Jakamā kwa hwýr amōr kêt nē. Na pa mē tee ri akukamā ijamaxpêr. Anê.

⁵ Hâmri nhùm amnhī tā mē kuma nē âm mē kuma nē Jerujarē wýr hkrā kamā hihtýx nē. Jakamā nhùm semān hapêx pa mē axte inhnojarêt. Axte Jerujarē hwýr kormā inhmōr kaxyw inhnojarêt. Nhùm Jejus kôt mē ixtôjaja mē kot mē ixkujaêk kaxyw piitā pàr wýr mē ixkôt mō. Mē hprô nē mē hkrajê mē nhùm mē pimràatā mē ixkôt mō. Hâmri pa mē pàr wýr pôj nē gô mý ri ixpiitā ixkônkrā ho ixkrī hpa nē amnhī to Tirtūm wý. ⁶ Hâmri nē mē kām amnhī jarēnh pa nē mē noo mā pàr krem agjê nē ma axte mō nhùm mē awjanā nē ma akupým òrkwý hwýr hapêx. Hâmri pa mē kurūm kormā ma Jerujarē hwýr mō. ⁷ Mōō nē krī pē Poremax wýr pôj nē hā ajêt. Hâmri nē pàr rūm ijapôj nē axte krī kamā Jejus kôt mē ixtô nē mē ixtôxjê japêr o mō nē nhýri mē omu nē mē kuri amnhīm hikra.

⁸ Tā nhùm apkati pa mē axte mō. Pānhā ma krī pē Sejarej wýr mō. Hâmri nē hwýr pôj nē Firipti kuri pôj. Firiptija kormā nyw ri mē kot Jerujarē kamā mē mjên htyk xwýnhjê mā mē apkur xā nhōr ho pa kaxyw mē ho 7 nē mē unhwýr xwýnhjê hō na pre. Tā hpānhā kēp Tirtūm kapêr jarēnh o pa xwýnh. ⁹ Nhùm hkra nijaja kēp kwat. Piitā mjên kêt nē hkukrit rāhā pa. Mē kēp Tirtūm nhý hā kapêr o mē pa xwýnh na pre mē. Jakamā pa mē mē kuri pôj. ¹⁰ Hâmri nē mē hkôt ri ixpa hā ixtā apkati grêre nhùm Akapô Jutej rūm man mē ixwýr mōn pôj. Kēp Tirtūm nhý hā kapêr jarēnh o pa xwýnh na pre. ¹¹ Hâmri nē mē ixwýr pôj nē Pawre pumu nē hkukamā kot tanhmā harēnh to kaxyw hwýr tēn kēp hprexā kapa nē ho amnhī te hpre nē ho amnhī pa hpre nē xa. Hâmri nē mē inhnoo mā Tirtūm Karō nhý hā mē kot tanhmā hipêx to hkukamā kām awjarē nē kām:

—E kot kaj Jerujarē hwýr pôj

nhũm Ijaew xàptàr tũmjaja apumu nê ã anhîpêx anê nê apa hpre nê ate hpre hãmri nê Ijaew kêt xwýnhjê nhĩhkram ajaxà. Kojà mē ã anhîpêx anê. Anê.

¹² Hãmri pa mē tee ri ã ujarênh anhÿrja ma nê Pawre kamã ixkahak tÿx nê ixkaprĩ nê inhmÿr o ixkrĩ. Nê xatã kot mē hwÿr mōr nê kãm ixkapêr kãm ixihitÿx nê kãm:

—Kwa mē ixkapêr ma Pawre. Mē hwÿr amōr kêt o mē hwÿr amōr kêt. Anê.

¹³ Hãmri nhũm mē inhmã:

—Tk. Kwa mē amÿr kêt nê. Na pa mē apumu nê ixkaprĩ nê. Nà kot paj ma mē hwÿr mō. Kwãr mē mãmri Pahihti Jejus ã tanhmã ixto rÿ hã ixpĩ. Ixte amnhĩ kamã ixkahak kêt. Anê.

¹⁴ Hãmri pa mē tee ri mē hwÿr mōr nê hkurê kaprÿ nê kãm:

—Tōe. Nà kam nê Tirtũm kãm hprãm xà hkôt mãmri mē hwÿr mō rÿ mē hwÿr amōr kêt nê. Anê.

¹⁵ Tã pa mē ra inhnojarêt nê amnhĩ to ixpikuprõnh pa nê ma Pawre hkôt Jerujarê hwÿr tã ma mō. ¹⁶ Hãmri nhũm Sejarej kamã Jejus kôt mē ixtõ hkwyjaja ma mē ixkôt mō. Pa mē mōõ nê Jerujarê hwÿr pōj. Hãmri nhũm mē ixkôt mē mōr xwýnhjaja mē ixto mō nê Mēnasõ nhõrkwÿ hwÿr mē ixto pōj. Mēnasõja Sipre kamã na pre kato. Tã hpãnhã Jerujarê hwÿr ahpã nê kamã ri pa ho pa. Na pre ra Jejus kôt amnhĩ xãm ã hã amgrã xohtõ nê. Tã pa mē kuri pōj.

Pawre mē Xiakre wa harênh

Atre 15.3-21; Wam Korit 9.19-22, 10.32-33

¹⁷ Tã pa mē Jerujarê hwÿr pōj nhũm Jejus kôt mē ixtõjaja mē ixpumu nê hkĩnh nê. ¹⁸ Hãmri nhũm apkati pa mē ma Pawre hkôt Xiakre hwÿr mō. Nhũm mē kot Tirtũm kapêr o mē ahkre xwýnh piitã ra kuri akuprõ nê mē ixkutêp hkrĩ. ¹⁹ Jakamã nhũm Pawre mē hwÿr axã nê mē kãm tanhmã

amnhĩ nhîpêx to ho pa hã amnhĩ jarê nê mē kãm:

—Pa na ka mē rĩ akrĩ. E ot pa axte mē apumunh mã mō. Ixte mē amã amnhĩ jarênh ã amnhĩ jarênh kaxyw. Nà na pa pre ma Ijaew kêt xwýnhjê hkôt ixpa nê mē kãm Jejus kot mē panê tanhmã amnhĩ nhîpêx to jarênh o ri mē hkôt ixpa. Nhũm Tirtũm inhĩhkõ hã ixkutã nojarêt mex jakamã nhũm prem inhma nê ohtõ rax nê mē pahpyrà nê Jejus kôt amnhĩ xunhwÿ. Anê.

²⁰⁻²⁵ Hãmri nhũm mē Ijaew kêt xwýnh kwÿjaja kot Jejus kôt amnhĩ xunhwÿr ã mē harênh ma nê mē ÿ hã hkĩnh nê mē hã Tirtũm mã mex o mex ã harê. Hãmri nê Pawre mã kãm:

—Nà na pa prem ra mē harênh ma. Hãmri nê mē kãm kagã nhîpêx nê mēmoj tã mē kãm karõ nê mē hwÿr kumê. Mē kot omunh nê kamã harênh nê hkôt amnhĩ nhîpêx o pa kaxyw.

Na pa prem kagãja kamã mē kot sãnti nhõ hkur nê mē hkurê. Nê mry kamrõ hkur nê mē hkurê. Nê mēmo mry hpar nê hkamrõ runh kêt rãhã hkur nê mē hkurê.

Nê mē kot amnhĩ prõ pix tânopxar kaxyw mē kãm hã karõ.

Nê mēnijaja kot amnhĩ mjên pix tânopxar kaxyw mē kãm hã karõ.

Nê nhãm mē kot axpên to amnhĩkati nê mē hkurê.

Ã na pa prem ja hã kagã nê mē hwÿr mēnh anê. Jakamã e mē inhma. Na ra mē pahpê Ijaew kwÿjaja ohtõ rax kumrêx nê mē pahpyrà nê Jejus kôt amnhĩ xunhwÿ. Mãn ka pre mē harênh ma. Na htem Jejus kôt amnhĩ nhîpêx o pa jao mãânên Tirtũm nhÿ hã Mojes kapêr kôt amnhĩ nhîpêx mex o pa. Tã nhÿri mē kot tanhmã ato hêx to hã ajarênh ma. Na ka xep hte Ijaew kêt xwýnhjê nhõ krĩ kamã pōj hãmri nê mē õ krĩ kamã Ijaew kwÿjê pumu nê mēmoj nê tanhmã

mē kām akapēr to ho ri apa. Nom Ijaew kêt xwÿnhjê mã ka xep hte ã mēmoj nê akapēr anhÿr kêt nê. Âm Ijaew mã pix mã ka xep hte mē kot finat Mojes kapēr kôt amnhĩ nhĩpêx nê mē hkurê ho ri apa. Nê mē panhĩgêt kot amnhĩ nhĩpêx kuhpa hã mē kot mē hkra my kwÿt kà jakâr nê ka xep hte mē hkurê ho ri apa. Nê mē kot mē panhĩgêt kôt amnhĩ nhĩpêx nê ka xep hte mãânên mē hkurê ho ri apa. Mē kêp Ijaew tâ ka xep pre hte ã mēmoj nê mē hkurê anhÿr ho ri apa. Na prem jar ã Ijaewjê mã ato hêx o pa anê nhũm mē kuma nê mē hkôt hamaxpêr kurê kumrêx. Jao ra ate mē pahpê Ijaew kot amnhĩ nhĩpêx kôt amnhĩ nhĩpêx kêt ã akamnhĩx.

—Tã ra mē kot apôx ã ajarênh mar jakamã tanhmã kot kaj we mē kām amnhĩ tâ axàprâr to? Nê tanhmã kot kaj we mē noo mã amnhĩ nhĩpêx to kê mē arĩ mē pahte amnhĩ nhĩpêx kôt ate amnhĩ nhĩpêx o apa hã apumu? E na pa mē ra ijamaxpêr. Kot ka ã amnhĩ nhĩpêx anê. Na ra jar mē pahkwÿjaja kêp kwat nê Tirtũm mã tanhmã amnhĩ jarênh to jatur xàm mênh kaxyw amnhĩ krã hkênh mã. Jakamã e kêr ka ma mē hkôt tê nê mē uràk nê amnhĩ krã hkênh nê kam nê mē ate amnhĩ krã kênhta pãnhã amnhĩre. Kot kaj ã mē hkôt amnhĩ nhĩpêx anê hãmri nhũm mē pahkwÿjaja arĩ mē pahte amnhĩ nhĩpêx o ate amnhĩ nhĩpêx o apa hã apumu nê mē kot ato hêx ã apumunh kurê kumrêx. Nê arĩ ate finat Mojes kapēr kôt amnhĩ nhĩpêx o ri apa hã apumu. Anê.

²⁶ Hãmri nhũm Pawre mē kuma nê mē kām:

—Tôe. Nã ãm hãmri na ka mē inhmã awjarê. Nã kot paj ã amnhĩ nhĩpêx anê. Anê.

Jakamã nhũm apkati nhũm ma mē kêp 4tajê o mō nê mē mex kaxyw tanhmã amnhĩ nhĩpêx to. Hãmri nê Tirtũm mã amnhĩ jarênh

xà hã ixkre hwÿr mra nê agjê nê mē ò patre mã mē amnhĩ jarê nê kām:

—E ot pa mē awÿr mra. Na pa prem ra mēmoj tâ tanhmã Tirtũm mã amnhĩ jarênh to. Tã kot paj mē axte ixtã ù semãn hãmri nê hatur xàm mênh kaxyw akupÿn awÿr mra nê amã mēmoj gō ka mē inhmã Tirtũm mã agō nê hkôt kām mē ijarê. Nê pa kot paj mē ixpiitã hpãnhã amã amnhĩre. Anê.

Mē kot Pawre pynênh ã mē harênh

Atre 24.12

²⁷ Tã nhũm semãnja hapêx kaxyw nhũm pika pê As rũm Ijaew kwÿjaja ma mra nê Tirtũm mã amnhĩ jarênh xà hã ixkre hwÿr agjê. Hãmri nê kamã Pawre pumu nê kamã gryk tÿx nê hwÿr hprôt nê unê nê tanhmã hkwyjê mã ho hêx to nê ho kapêr punuj nê. Nê mē kām:

²⁸ —E mē amnê mra nê jahti pumu. Na hte krĩ piitã hkôt ri mē pahkwÿjê mã tanhmã ri hêx to ho pa. Tirtũm nhÿ hã finat Mojes kapêr nhũm mē kām ho kapêr punuj o pa. Nê mē pahte Tirtũm mã amnhĩ jarênh xà hã ixkreja nhũm hte mãânên tanhmã mē kām ho kapêr punuj to. Mē pahpyrà nê kêp Ijaew tâ mē pahpê hkwy ho kapêr o pa. Tã ra axtem nê amnhĩ kôt Tirtũm nhõ ixkre hwÿr Ijaew kêt xwÿnh kwÿjê ho agjê. Mē kot hwÿr gjêx kêt kumrêx tâ nhũm axtem nê amnhĩ kôt mē ho agjê. Anê.

²⁹ Na pre krĩja kamã Ijaew kêt xwÿnh Topĩja Pawre hkôt pa nhũm mē omu. Kêp Epes nhõ xwÿnh nhũm mē kot pry ã Pawre hkôt pa hã omu. Tã hã ahtũm nê Tirtũm mã amnhĩ jarênh xà hã ixkre kamã Pawre pumu nê htÿx amnhĩ kôt Topĩ ho àr ã hkamnhĩx nê ã mē kām harênh anê. ³⁰ Hãmri nhũm mē kuma nê Pawre kamã gryk tÿx nê. Nê hwÿr hprôt nê unê nê ixkre rũm ho kato nê kêp hakwa kre kahê. ³¹⁻³² Hãmri nê ma o tê nê htak rax nê. Ra mē kot htak o hpĩr mã tâ

nhũm mēhōja pōristi krāhtũm wỳr hprōt nē kām awjarē nē kām:

—Kwa o mũj mē ra kot axpēn nhĩmex kaxyw pijapu ho kuhē. Anē.

Hāmri nhũm tee ri kuma nē pōristi hkwỳjē mã anē nē mē ma mē hwỳr hprōt kurē kumrēx. Nhũm mē arĩ Pawre htak tã amnhĩ wỳr mē omu nē mē umaj kām ure.³³ Hāmri nhũm pōristi krāhtũm Pawre hã amỳnē nhũm pōristijaja unē nē kàx o mē hkaxprexã ho axkrut nē ho hkaxpre pa. Hāmri nhũm mē hkrāhtũm Pawre hã mē hkukja nē mē kām:

—Kwa mē atō inhmã jahti jarē. Tanhmã na hixi te? Tanhmã na we amnhĩ tomnuj to hã na ka mē ã hipēx anē? Anē.

³⁴ Hāmri nhũm mē kuma nē piitã anhĩpē kàxpē kām tanhmã harēnh to. Nom axpēn kwỳm tanhmã ri kām harēnh to. Hāmri nhũm tee ri hprĩ hã kot mē mar kaxyw hāmri nē pōristi mã anē nhũm mē kēp Pawre ho kato nē ma mē àpēnh xã hã ixkre hwỳr o tē. ³⁵⁻³⁶ Hāmri nhũm Ijaew kwỳ ohtō nē pry hã axpēn nhĩgãnh o hkôt mra. Nē gryk xaj kapēr punuj tỳx o mē hkôt mō nē kàx pē pōristi mã kapēr nē mē kām:

—Kwa mē apĩhti ri. Mexti hã. Mēmo kaxyw na ka mē ri amã hapē ho apahti? Anē.

Jakamã nhũm pōristija tee ri mē kuma hāmri nē mē kot tanhmã ho pymaj kumỳ nē kỳx pē mē kēp kupē nē o mō. Jao ixkreja wỳr mē àpir xã hã ho àpir o mō. ³⁷ Nē kot ho ãr kaxyw tã nhũm Pawre mē hkrāhtũm mã kām:

—E pa amã mēmoj jarē ka inhma. Anē.

Mē kapēr o kām kapēr hāmri nhũm amnhĩ jaēr pē kuma nē kām:

—Kwa xã na ka mē ixpyrà nē Gresjē kapēr o akapēr? ³⁸ Na pa ixtỳx apē Ejit nhō xwỳnh pē mē hpar o apa xwỳnhã ã akamnhĩx. Ham na pre mē inhō pahihiti kutã amnhĩ xãm nē kot hkurē kaxàr

kaxyw mē ho ajuta xwỳnhjē ho 4.000 nē mē hkurē nē ma kapôt ã mē o pa. Nom tãm na xep Gresjē kapēr o kapēr kēt nē. Anē.

³⁹ Hāmri nhũm Pawre kām:

—Nã ixpē Ejit nhō xwỳnhã kēt. Ixpē Ijaew na pa. Pyka pē Siris kamã krĩ rax pē Tas kamã na pa pre ixkato. E xã kot paj ixkôt mē mōr xwỳnh nēj mã ixkapēr nã? Anē.

⁴⁰ Hāmri nhũm kām:

—Tōe. Kam nē māmri tanhmã mē kām akapēr to. Anē.

Hāmri nhũm mē àpir xãta ã kỳx pē mē mỳri xa nē kànhmã mē kām ĩhkra pē nhũm mē omu nē hpinhkrēnh pa nhũm mē kām amnhĩ jarē.

22

Pawre kot kām hkurē xwỳnhjē mã amnhĩ jarēnh

Atre 9.1-19, 26.1-23

¹⁻² Nhũm Pawre amnhĩ kwỳ Ijaew kapēr o mē kām kapēr nē mē kām:

—E ixkwỳjaja. Pa mē amã amnhĩ jarē ka mē inhma. Anē.

Hāmri nhũm kot mē kapēr o kapēr ma nē hpinhkrēnh pa nē akryk mar o kuhē nhũm mē kām:

³ —Nã ixpē mē anhĩō na pa. Ijaxwỳja ixpē Ijaew. Pyka pē Siris kamã krĩ pē Tas kamã na pa pre ixkato no ãm jar Jerujarē kamã na pa pre ixaptãr. Kamariew na pre hte ijahkre ho pa. Finat Mojes kot Tĩrtũm nhỹ hã mē panhĩgētjē mã kapērja nhũm pre hprĩ hã ho ijahkre ho pa. Na pa pre mē apyrã nē inhmã Tĩrtũm kôt amnhĩ nhĩpēx prãm nē.

⁴ —Jakamã na pa pre mē pahkwỳ kot Jesus kôt amnhĩ xunhwỳr xwỳnhjē japēr o ixpa nē nhỹri mē kām ixkato nē mē unē. Mēmyjē pynē nē mēnijē pynē. Hāmri nē mē kot mē hpar kaxyw mē hagjēnh o ri ixpa. ⁵ Na pa pre ã mē hipēx o ri ixpa anē. Mē panhō patre maati nē mē àptãr tũmrejaja ra mē kot ja hã ixpumunh mex. Mē

tāmja na prem krī pē Tamas kām mē pahkwýjê kaxyw kagà nhîpêx nê inhmâ kugô pa kupy nê ma mē hwýr o mô. Ixte mē ô krī kamâ Jejus kwýjê pynênh par nê man akupÿn Jerujarê hwýr mē ho inhmôr nhûm mē kot tanhmâ mē ho kaxyw.

6 —Tâ ra myt apha pa mē hwýr ixâhtêp o mô. Puh nhûm kaxkwa rûm hirâ rax kumrêxja ixwýr wrý nê ixtâ ajêt pa hipôk ri xa. ⁷Hâmri nê umaj pykap têm nhûm mēhō kapêr nê inhmâ: “Pa Sawti? Hêxta waa nê. Kwa mon ka hte axtem nê ixtomnuj tÿx o ri apa?” Anê. ⁸Hâmri pa kām: “Kwa mē atô na ka ri ã inhmâ akapêr anê pahihtî?” Anê nhûm inhmâ: “Ixpê Najare nhô xwýnh Jejus. Pa na ka hte ixpê ixkôt mē kot amnhî xunhwýr xwýnhjê homnuj tÿx o ri apa. Jao te pa ixtomnuj pyrâk.”

9 —Anhÿr o inhmâ kapêr nhûm ixkôt mē pa xwýnhjaja kuma no âm hprî hâ mar mex kêt nê. Âm hirâ raxta pix pumu. ¹⁰Tâ pa kām: “No tanhmâ kot pa we amnhî to Pahihti?” Anê nhûm inhmâ: “E kânhmâ xa nê māmri ma Tamas wýr mô. Kot kaj hwýr pôj nhûm mēhō awýr tē nê mēmoj tâ amâ karô ka ama nê hkôt amnhî nhîpêx.” Anê.

11 —Nhûm pre ã inhmâ kapêr anê. Hâmri pa hirâ rax pumunh o ixâm kurê ra inhno hkre nê ixrît kêt nhûm ixkôt mē pa xwýnhjaja ixpa hâ ixpy nê ma Tamas wýr ixto mô nê ixto pôj.

12 —Tâ nhûm Tamas nhô xwýnh pē ânâñisti ixwýr tē. Na pre hte Tirtûm kapêr ã kagà htûm kôt amnhî nhîpêx mex nhûm Tamas kamâ Ijaew piitâ kām hkînh nê axpên mã mex ã harê. ¹³Jakamâ nhûm ixwýr tē nê inhmâ: “Pa Jejus kôt ixtô Sawti? E akupÿm rît.” Anhÿrja kôt pa akupÿm ixrît mex kurê kumrêx nê omu. ¹⁴Hâmri nhûm inhmâ: “Nâ mē panhîgêjtjê nhô Tirtûm na amnhî kaxyw ata.

Ate kapêr mar nê hkôt tanhmâ amnhî nhîpêx to ho apa kaxyw. Nê ate kaxkwa kamâ Kra mex pumunh nê kapêr mar kaxyw. Tâ ka xep ham hirâ rax kamâ omu nê kapêr ma. ¹⁵Jakamâ kêr ka ma mē piitâ mē kām ate omunh xwýnhja jarênh o ari mē hkôt apa. Nê mē kām kapêr jarênh o mē ahkre ho ri apa. ¹⁶E tokyx kânhmâ xa nê Jejus mã amnhî jarê nê hkôt amnhî xâm kê anê ate amnhî tomnuj rênh pa. Hâmri pa apê hkwý hâ akrâ kumrâ ka ma mē kām kapêr jarênh o ri apa.” Anê.

—Nhûm pre ã ânâñisti inhmâ kapêr anê.

17 —Tâ pa man akupÿn jar Jerujarê hwýr mē awýr mô. Hâmri nê jar Tirtûm mã amnhî jarênh xâ hâ ixkre kamâ kām amnhî jarênh o ixâm rôm axte mēmoj pumu. ¹⁸Nhûm Jejus axte ixwýr kato nê xa nê inhmâ kapêr nê inhmâ: “E inhma. Jerujarê nhô xwýnhjaja kām ixkapêr mar prâm kêt jakamâ kot kaj mē kām ixkapêr jarê nhûm mē amar kêt nê. Jakamâ kwa tokyx akato nê hpânhâ ma nhÿhÿm mô.” Anê.

—Hâmri pa tee ri ã kapêr anhÿrja ã kuma nê kām: ¹⁹“Kwa nâ koja mē inhma Pahihti. Ra mē kot ixte amnhî nhîpêx ã ixpumunh mex. Ixte amnhî nhîpêx tûmta kôt mē kot ixpumunh mex. Na pa pre hte krī piitâ hkôt mra nê Tirtûm kapêr o mē ahkre xâ hâ ixkre kamâ mē kot akôt amnhî kaxyw hamaxpêr xwýnhjê pynê nê mē htak nê mē hagiênh xâ kamâ mē hagiê nhûm mē kot ja hâ ixpumunh mex. ²⁰Nhûm mē kot akapêr jarênh o pa xwýnh Estewâw pîrta pa pre hâ mē omu nhûm ja inhmâ mex pa mē kām mē hinôkâ jamÿnh o hâ mē omunh o xa. Na pa pre ã amnhî nhîpêx anhÿr o ri ixpa. Tâ hpânhâ akôt amnhî xâm hāmri nê akôt amnhî nhîpêx o ri ixpa. Jakamâ koja mē ixte amnhî nhîpêx

nyw ã ijarênh ma nê kãm ixkapêr mar prãm nê.” Anê.

21 —Pa pre ã Jejus mã amnhĩ jarênh anê nhũm inhmã: “Nà. Kêr ka mãmrĩ krĩja rũm akato nê ma nhỹhỹm mō. Kot paj hpãnhã ma Ijaew kêt xwỹnhjê hwỹr amê ka hpãnhã ma mẽ hwỹr mō nê mẽ hkôt mẽ kãm ixkapêr jarênh o ri apa.” Anê.

22 Nhũm pre Pawre ã amnhĩ hkwyjê mã amnhĩ jarênh anê nhũm mẽ arĩ mar o kuhê rãhã Ijaew kêt xwỹnhjê jarênh ma nê kamã gryk tỳx nê. Ijaew kêt xwỹnhjaja kot mẽ urak nê Tirtũm kapêr marja nhũm mẽ kãm hprãm kêt jakamã nhũm Pawre ã mẽ harênh anê nhũm mẽ kuma nê kamã gryk tỳx kumrêx. Nê gryk xaj kapêr punuj nê kapêr o:

—Kwa mẽ mãmrĩ apĩhti ri. ãm hpĩr mã htãmti kênã. Anê.

23 Hãmri nê gryk xaj amnhĩ nhĩnôkã hkwrỹ nê ho apê nê pyka jamỹ nê kãnhmã ri ho ahkapê.

Pawre kot pôristi krãhtũm mã amnhĩ jarênh

Atre 16.35-39

24 Hãmri nhũm pôristi krãhtũmja tee ri ã mẽ kot amnhĩ nhĩpêx anhỹr ã mẽ omu nê mẽ kapêr ma nê pôristijê mã kapêr nê mẽ kãm:

—Kwa tanhmã na we jahti amnhĩ tomnuj to nhũm mẽ ã kamã gryk tỳx anê? E mẽ tokyx ixkre hwỹr ho axà nê mẽ htak xà ho htak kê mẽ pamã tanhmã amnhĩ jarênh to. Anê.

25 Hãmri nhũm mẽ kuma nê ho axà nê htak kaxyw kormã hpre ho xa. Hãmri nhũm pôristi krãhtũm nhõ kôwenatôja mẽ hkôt axà nê hã mẽ omunh o xa nhũm Pawre omu nê amnhĩ tã kãm kapêr nê kãm:

—Kwa kormã ixte tanhmã mẽ amã amnhĩ jarênh to hkêt tã ka mẽ ixtak kaxyw. Ixpê Ijaew tã mããnên ixpê Rõm nhõ xwỹnhjê kênã. Xà na htem ã Rõm nhõ xwỹnhjê nhĩpêx anê? Anê.

26 Hãmri nhũm tee ri ã amnhĩ jarênh anhỹrja ã kuma nê pôristi krãhtũmja wỹr hprõt nê kãm:

—Kwa taxy pu mẽ tanhmã ho hkêt nê. Xep kêp Rõm nhõ xwỹnhjê kênã. Anê.

27 Hãmri nhũm tee ri kuma nê Pawre hwỹr axà nê kãm:

—Kwa xà ãm hãmri na ka amnhĩ jarê? Xà apê Rõm nhõ xwỹnhjê na ka? Anê.

Hãmri nhũm kãm:

—Tỳ. ãm hãmri ixte mẽ amã amnhĩ jarênh kênã. Ixpê Rõm nhõ xwỹnhjê na pa. Anê.

28 Hãmri nhũm kãm:

—Kwa pa na pa pre amnhĩ to Rõm nhõ xwỹnhjê prãm xaj amnhĩ pãnhã mẽ kãm amnhĩrer rax nê. Anê.

Nhũm Pawre kãm:

—Tỳ nom pa na pa pre amnhĩ pãnhã mẽ kãm amnhĩrer kêt nê. Inhĩpêxã hkôt ixpê Rõm nhõ xwỹnhjê na pa. Anê.

29 Hãmri nhũm mẽ kuma nê tee ri hamaxpêr o kãm ma nê. Nê kãm ma ho hkaga kurê kumrêx. Nhũm mẽ hkrãhtũm nhõ pahija mããnên kãm ma nê. Kêp Rõm nhõ xwỹnhjê tã nhũm mẽ axtem nê kot unênh nê kax o hkaxpreja mã hamaxpêr nê kãm ma nê. Na htem ã Rõm nhõ xwỹnhjê nhĩpêx anhỹr kêt nê. Na htem tanhmã mẽ hkukjêr to nê hprĩ hã mẽ kuma nê rĩ kormã tanhmã mẽ hipêx to.

Pawre kot Ijaew xaptar tũmrejê mã amnhĩ jarênh

Matêwre 23.27-28

30 Tã nhũm apkati nhũm pôristi krãhtũmja Ijaew kwỹ ho akuprõ. Mẽo patre maati nê patre krãhtũmjaja nê mẽ aptar tũmrejaja nhũm kot mẽ kãm tanhmã Pawre jarênh to kaxyw mẽ ho hpikuprõnh pa. Hãmri nê Pawre pê hkaxpre xà rê nê ma mẽ hwỹr o tẽ nê mẽ kutã ýr.

23

¹Hãmri nhũm mẽ omu nê mẽ kãm amnhĩ jarê nê mẽ kãm:

—E ixkwýjaja. Pa mẽ amã amnhĩ jarê ka mẽ inhma. Na pa hte Tirtũm nom tãm amnhĩ nhĩpêx o ixpa nẽ mẽ pahpê Ijaew mẽ pahte amnhĩ nhĩpêx kwým ri tanhmã amnhĩ nhĩpêx to hkêt nẽ. Anẽ.

² Hãmri nhũm mẽ õ patre maati ânãništi kuma nẽ kamã gryk nẽ. Axtem ânãništi hõ na pre. Hãmri nẽ ã Pawre kot amnhĩ jarênh anhýrja ã kuma nẽ kamã gryk nẽ. Hãmri nẽ mẽ kot mar o kuhê xwýnhjê mã kãm:

—Kwa mẽ atõ hakwap hkurahti ri. Tãm kot amnhĩ nhĩpêxti hã. Na ãm mẽ pamã amnhĩ to hêx o xa. Anẽ.

³ Hãmri nhũm Pawre kuma nẽ hwýr rít nẽ omu nẽ kãm:

—Nã ka koja Tirtũm akura kãm ga. Te ate finat Mojes kot ýhã kapêr kôt amnhĩ nhĩpêx pyrãk tã ri axtem nẽ ri mẽ kot ijakwap ixkuranh kaxyw ri mẽ kãm ixtã amýnẽ. Anẽ.

⁴ Hãmri nhũm kuri mẽ kuhê xwýnhja tee ri ã kãm kapêr anhýrja ã kuma nẽ kãm:

—Kwa kêp patre maati kênã kot ka kêt ri ã kãm akapêr anẽ. Anẽ.

⁵ Hãmri nhũm amnhĩ jaêr pê ja hã kuma nẽ kãm:

—Kwa ixte ja hã omunh kêt jakamã na pa ã ixtýx kãm ixkapêr anẽ. Ixte kêp patre maati hã omunh ronhýx pa ã kãm ixkapêr anhýr kêt nẽ. Tirtũm kapêr ã kagã htũm kot ja nẽ mẽ pamã kapêr kênã. Mẽ pahte tanhmã mẽ panhõ pahi ho pakapêr punuj to nẽ mẽ pamã kapêr. Tã pa ãm ixtýx ã kãm ixkapêr anẽ. Anẽ.

⁶⁻⁸ Hãmri nẽ hprĩ hã mẽ kot mar o hkrĩ xwýnhjê pumu. Nhũm mẽ kamã Satusew nhõ xwýnh kwý nẽ Parijew nhõ xwýnh kwý. Satusew mẽ Parijew nhõ xwýnhjaja na htem axpên kwým ri tanhmã mẽ htykjê jarênh to. Satusew nhõ xwýnhjaja na htem mẽ htyk nẽ mẽ hkarõ mẽ ro hã mẽ hapêx o mẽ hapêx ã mẽ hkamnhĩx. Nẽ Tirtũm kapêr o

mẽ wrýk xwýnh kêt ã mẽ harênh o pa. No Parijewjaja na hte mẽ kurom mẽ htyk nẽ akupým mẽ htír ã mẽ hkamnhĩx nẽ Tirtũm kapêr o mẽ wrýk xwýnh ã mẽ hkamnhĩx. Nhũm Pawre kot ja hã mẽ omunh jakamã tanhmã hamaxpêr to hãmri nẽ mẽ kãm kapêr. Na pre Parijew nhõ xwýnhjê pyrã nẽ mẽ htyk nẽ akupým mẽ htír kôt hamaxpêr nẽ Tirtũm kapêr o mẽ wrýk xwýnh kôt hamaxpêr. Jakamã mẽ omu nẽ kãx pê mẽ kãm kapêr nẽ mẽ kãm:

—Nã ijaxwýja ixpê Parijew nhõ xwýnh. Nhũm inhĩpêêxã haxwýja kêp Parijew nhõ xwýnh. Jakamã na pa hte mẽ apê Parijew nhõ xwýnhjê pyrã nẽ mẽ htyk nẽ akupým mẽ htír kôt ijamaxpêr. Tã ãm ja pix mýrapê na ka mẽ ixpynê nẽ ã inhĩpêx anẽ. Anẽ.

Hãmri nhũm Parijew mẽ Satusew nhõ xwýnhjaja kuma nẽ ja hã axpên kãm gryk nẽ. Nẽ hã axpên mã akir. ⁹ Hãmri nẽ ra axpên mã àkjêr rax nẽ. Hãmri nhũm Parijew kwý pê Mojes kapêr o mẽ ahkre ho mẽ pa xwýnhjaja kãnhmã kuhê nẽ mẽ kãm Pawre hã àprãr kãm hihtýx nẽ mẽ kãm:

—Kwa pêr tanhmã kot amnhĩ tomnuj tore hã. Mãn ãm hpimtir kãm na pre ã ri kaxkwa kamã mẽmoj mar anẽ. Rý apu Tirtũm kapêr o wrýk xwýnh kãm tanhmã kapêr to nhũm pre Tamas wýr pry kamã mar o xa rý ko. Anẽ.

¹⁰ Hãmri nhũm Satusew nhõ xwýnhjaja tee ri Tirtũm kapêr o mẽ wrýk xwýnh kot kãm kapêr ã harênhja ma nẽ hã axpên mã àkjêr rax nẽ. Hãmri nhũm pôristi krãhtũmja tee ri mẽ kot axpên mã àkjêr ã mẽ omu hãmri nẽ pôristi mã kãm:

—Kwa mẽ Pawre hwýr tẽ nẽ mẽ kêp utã nẽ ma akupým o tẽ nẽ haxã. Kot ka mẽ ho anhýr kêt nhũm mẽ tanhmã hamaxpêr to nẽ gryk xaj axpên nhĩhkra kamã hkaxõnh pa. Anẽ.

Hāmri nhūm mē kuma nē hwÿr tē nē mē kēp utà nē akupÿm o tē nē ixkre hwÿr ho axà.

Jejus kot Pawre jamaxpēr o hitÿx ā harēnh

Atre 18.9-10

¹¹ Tā nhūm kamàt nhūm Jejus tām Pawre hwÿr kato nē kām:

—Pa Pawre? Kwa tee ri amnhī kukamā ajamaxpēr o amnhī kamā akahak kēt nē. Kot kaj te ra ate jar Jerujarē kamā mē kām ijarēnh ta pyrà nē ma krī pē Rōm wÿr mō nē krī nhō xwÿnhjē mā ijarē. Anē.

Mē kot Pawre hā àmnēnh ā mē harēnh

Sikūn Ximotre 4.18

¹²⁻¹³ Tā nhūm apkati nhūm Ijaew kwÿjaja axpēn wÿr akuprō. Mēmyjaja kēp 40 nē axte hkōt mē hkwyjaja axpēn wÿr akuprō. Mē kot Pawre pīr kaxyw hā axpēn mar kaxyw hā akuprō nē hā axpēn mā amÿnē nē axpēn mā:

—Tōe. Nà kot puj mē hpīr kaxyw amnhī jagri htÿx o paxàpkur kēt rāhā kupī nē ri kormā apku nē ixkō. Nà kot puj mē ho anē. Ra Tīrtūm noo mā mē pahte ja hā amnhī jarēnh kēnā. Anē.

¹⁴ Hāmri nē mē ma mē ō pa-tre krāhtūmjē mē mē àptār tūmrejē hwÿr mra nē mē kām hā amnhī jarē nē mē kām:

—Ot pa mē amā amnhī jarēnh mā mra. Nà kot paj mē tā Pawre pī. Kot paj mē kormā hpīr kēt ri ixàpkur kēt rāhā kupī. Ra mē ixte Tīrtūm noo mā ja hā amnhī jarēnh xà hkōt. ¹⁵ Jakamā e mē inhma. Kēr ka mē axēx rom pōristi krāhtūm mā anē kē apkati kē man mē awÿr Pawre ho tē. Te mē ate aprī hā hkukjēr kaxyw pyràk o kām axēx. Koja mē kormā mē awÿr ho hpōx kēt ri pa mē unēn kupī. Anē.

¹⁶ Hāmri nhūm Pawre tāmnhwÿ mē kot ā hā amnhī jarēnh anhÿrja ma hāmri nē ma pōristi xāpēnh xà hā ixkrej wÿr Pawre hwÿr hprōt nē kām mē harē. ¹⁷ Hāmri nhūm kuma

nē amnhī wÿr pōristi krāhtūm nhÿ hā mē hamār xwÿnh ā karō nē kām:

—Kwa ma mē akrāhtūm wÿr ixtāmnhwÿta o tē kē kām mēmoj jarē nà? Anē.

¹⁸ Hāmri nhūm kuma nē ma hwÿr o tē nē kām:

—E Pawre na inhmā anē pa awÿr htāmnhwÿ ho tē. Kot tanhmā amā ujarēnh to kaxyw. Anē.

¹⁹ Hāmri nhūm omu nē hpa hā kupy nē o tē nē ahte mē hkàx ā o xa nē kām:

—E māmri inhmā mēmoj jarē pa ama. Mēmo na ka te inhmā harēnh kaxyw? Anē.

²⁰⁻²¹ Hāmri nhūm kām:

—Nà Ijaew xàptār tūmrejaja na mē kot inhīgēt Pawre pīr kaxyw hā amnhī jarē pa amā harēnh o tē. Koja xep mē hā awÿ. Xep apkati nhūm ate ma mē hwÿr mē hkukjēr xà hā ixkre hwÿr ho amōr nhūm mē kot hprī hā kot amnhī nhīpēx ā hkukjēr kaxyw. Nom koja mē àm amā amnhī to hēx. Koja xep mē kēp 40 nē pry kamā kutēp amūxu nē kuhē. Na mē ra hā axpēn mar pa nē axpēn mā: “Kot puj mē paxàpkur kēt rāhā Pawre pī nē ri kormā apku nē ixkō.” Anhÿr o amnhī jarē pa mē kuma. Jakamā na mē kormā ate mē hwÿr mēnh kaxyw akām ama. Kwa mē hwÿr ho amōr kēt nē. Anē.

²² Hāmri nhūm kuma nē kām:

—Tōe. Nà na pa ra ama. Māmri ma akupÿm tē. Nom kēr ka inhmar kumrēx. Kēr ka nhām mēhō mā ja jarēnh kēt kumrēx. Àm kwarī ho kwarī. Anē.

Hāmri nhūm kuma nē kato nē ma akupÿm tē.

Mē kot Ijaew pymaj nhÿhÿm Pawre mēnh ā mē harēnh

²³⁻²⁴ Tā nhūm pōristi krāhtūmja amnhī wÿr ÿ hā pōristi jamār o mē pa xwÿnh wa ho hamēxkrut nē wa hā karō nē wa kām:

—E wa inhma. Koja kōt ā kamàt ka wa ma krī pē Sejarēj wÿr Pawre ho mō kē hkà hkīnh pé pahilhi Peris wÿr pōj.

Nē amnhī kôt pôristi ho 200 nē o mō.

Nē kē mē kēp 70 nē kawar ā hkrī nē mē akôt mō.

Nē kē mē kēp 200 nē wapo jamý nē mē akôt o mō.

Kē mē ā ohtô rax anē.

Nē Pawre kot kawar ā ýr nē mōr kaxyw ka mē kām hō ho mō.

E kēr ka mē ā axohtô nē hkôt amōr anē kē hkā hkīnh pē pahihiti Peris wýr pōj. Anē.

²⁵ Hāmri nē pahihiti Peris mā kagā nhīpēx nē kamā kām Pawre jarē nē kām:

²⁶ Pa pahihiti Peris? Xà amex? Ixpē Kraw Risas na pa awýr kagā mē.

²⁷ E ot pa awýr Ijaew pē Pawre mē. Na pre hkwyja kot hpīr kaxyw unēnh tā pa mǎānēn kēp Rōm nhō xwýnh ā harēnh ma hāmri nē hwýr inhō pôristi rē nhūm mē hwýr hprôt nē mē kēp utā. ²⁸ Hāmri nē Ijaew xaptār tūmrejē hwýr o tē. Mē kot inhmā tanhmā kot amnhī tomnuj to hā harēnh kaxyw. ²⁹ Tanhmā kot amnhī tomnuj to nhūm mē kot haxār rý hpīr ronhýx ja mex nē. No xep ām kot mē higētjē kot amnhī nhīpēx kôt amnhī nhīpēx kēt pix mýrapē na mē kamā gryk.

³⁰ Tā pa mē kot hpīr kaxyw hā mē harēnh ma nē mē umaj awýr kumē. Hāmri nē kamā mē gryk xwýnhjē mā ajarē. Jakamā koja mē mēmo arīgro hā awýr pōj nē tanhmā kot amnhī nhīpēx to hā amā harē ka kam ja hā mē ama nē tanhmā ho.

Tā ām ja pix na pa amā harē. Ixpē Kraw Risas na pa awýr kagāja mē. Tā mǎn ka arī ixte amā harēnhja ma. Anē.

³¹ Tā nhūm kamāt nhūm mē hkrāhtūm kot mē kām karō xà hkôt nhūm pôristijaja ma Pawre o mō. Hāmri nē krī pē āxipat wýr pōj nē kamā amnhūm hikra.

³² Nhūm apkati nhūm mē kot mē hkôt pykap mōr xwýnhjaja mē ō

pahi kot mē kām hā karō xà hkôt awjanā nē ma akupým mō nhūm kawar ā mē mōr xwýnh pixjaja ma Pawre ho mō. ³³ Hāmri nē mō nē Sejarej wýr pōj nē pahihiti Peris nhīhkram Pawre jaxà nē kām kagāja gō nē awjanā nē ma akupým hapēx. ³⁴ Hāmri nhūm Perisa kagāja py nē omu. Nē omunh pa nē Pawre mā kām:

—E inhmā amnhī jarē. Tanhmā na anhō pyka hixi te? Anē.

Nhūm kām:

—Kēp Siris. Anē.

³⁵ Nhūm kām:

—Tōe. Kē mē kot ato kapēr xwýnhjaja pōj pa kormā ixprī hā mē kot tanhmā ajarēnh to ma mǎn. Anē.

Hāmri nē ō pôristi mā anē nhūm mē ma Pawre o tē. Ma pahi Erox htyk xwýnh nhōrkwý hwýr o tē nē kamā haxà nhūm hkrī ho hkrī.

24

Ijaew kot tanhmā Pawre ho kapēr punuj to hā mē harēnh

Rukre 21.12-13; Atre 25.7

¹ Tā nhūm arīgro kēp 5 nē hapēx nhūm Ijaew kwýjaja Sejarej wýr pōj. Mē ō patre maati ānānīsti nē Tetur nē kaxyw mē aptār tūmrejaja nhūm mē ma hwýr mō nē pōj. Tetur kēp axiwōkat ā mē yr pē kapēr xwýnh jakamā nhūm mē kot tanhmā Pawre o kapēr punuj to kaxyw pahi Peris wýr amnhī kôt o mō. ² Hāmri nhūm mē amnhī wýr Pawre hā karō nhūm pôristi haprô nē mē hwýr o tēn ho axà. Hāmri nhūm Teturja pahihiti Peris mā Pawre kot tanhmā amnhī tomnuj to hā harē nē kām:

—E pahihiti inhma. Nà na ka hte tām mē inhīpēx nē mē ixto mex o apa. Jakamā nhūm hte nhām pika hkwy nhō xwýnhjaja mē ixkurē kaxār kaxyw mē ixwýr hprôt kēt nē. Pa htem ixpiitā akukwak ri ijamakētkati nē ixāmnhix inhmex nē ixpa. ³ Nē mē ixkīnh rāhā ho

ixpa. Hêxta waa në. Mě ixpi-itã inhmã akĩnh. ⁴ E kot paj amã awjarê ka inhma. Kot paj ixu-jarênh o hakotere ka inhma në tokyx ma akupÿm tẽ. ⁵ Nã Pawre na hte amnhĩ tomnuj pix o pa. Kêp Jejus pê Najare nhõ xwÿnhnta kôt amnhĩ nhĩpêx o mẽ pa xwÿnhjê nhõ pahi na. Jakamã na hte pyka piitã hkôt mẽ ixpê Ijaew tanhmã axpên kaxyw mẽ ixkryx to ho pa. ⁶ Jãã na pre Tirtũm mã amnhĩ jarênh xà hã ixkre hwÿr amnhĩ kôt mẽ kêp Ijaew kêt xwÿnh kwÿjê ho agjê në mẽ ixpê ixkreja omnu kaxyw mã tã pa mẽ omu në unê. ⁷ Tã nhũm pôristi krãhtũm Risasja mẽ ixpê utã ⁸ në awÿr mẽ ixte tanhmã amã harênh to xwÿnhjê rẽ. Tã ot pa mẽ ixkrĩ. Nẽ ota Pawre nhÿ. Kam kot amnhĩ nhĩpêx ã hkukja kê tanhmã amã amnhĩ jarênh to ka ama në ixte amã harênh xà hkôt tanhmã mar to. Anê.

⁹ Hãmri nhũm Ijaew hkwÿ haxwÿja kãm:

—Nã ãm hãmri na ã amã harênh anê pahihiti. Anê.

Pawre kot pahihiti mã amnhĩ jarênh

Rukre 21.14-19

¹⁰ Hãmri nhũm pahihiti Peris Pawre mã anê nhũm kot kãm amnhĩ tã aprãr kaxyw kãnhmã xa në kãm:

—Nã na ka ra inhõ pyka kamã mẽ ixto amnhĩptãr mex o atã amgrã sohtõ në pahihiti. Jakamã na pa pre ate ixkapêr mar kaxyw ã ajarênh ma në ixkĩnh në.

¹¹ —E kot paj amã amnhĩ jarê ka inhma. Ham na pa pre Jeru-jarê hwÿr mõ në pøj. Na pa hwÿr ixpõx ã ixtã arĩgro pê 12 pix. Kam mẽ ixtã ixkwÿjê kukja mẽ mẽ ama. Ixte Tirtũm mã amnhĩ jarênh xà hã ixkre kamã Tirtũm mã mex o mex ã harênh kaxyw na pa pre hwÿr mõ. ¹² No na pa pre nhÿri axpên kaxyw tanhmã ri mẽ hkryx to hkêt në. Nẽ mẽ ixte Tirtũm mã

amnhĩ jarênh xà hã ixkre kamã rÿ kapêr o mẽ ahkre xà hã ixkre kamã rÿ nhÿri pry kamã tanhmã axpên kaxyw ri mẽ hkryx to hkêt në. ãm amrakati ho amrakati. ¹³ Mẽ kot ã ri ijarênh anhÿrja amrakati kumrêx. Mẽhõ kot ã ixte amnhĩ nhĩpêx anhÿr ã ixpumunh kêt tã na htem amnhĩ krã hkôt amã ijarênh o hêx. ¹⁴ Na htem mẽ ixte Jejus kôt amnhĩ nhĩpêx xwÿnhjaja mẽ ixte amnhĩ nhĩpêx mex kêt ã mẽ ijarê nom kot anhÿr kêt. ãm mẽ inhĩgêjtê nhõ Tirtũm kapêr nywja kôt na pa hte amnhĩ nhĩpêx mex o ri ixpa rãhã në. Nhũm ixkwÿjaja htÿx axtem kapêr õ hkôt ixte amnhĩ nhĩpêx o ixpa hã ixkamnhĩx no ãm kapêr õ hkêt. Ijaxwÿja na pa hte mẽ urãk mẽ finat Mojes kapêr ã kagã mar o ixpa. Nẽ Tirtũm nhÿ hã mẽ kapêr o mẽ pa xwÿnh kot kapêr ã kagãja pa hte mẽ urãk mẽ hkôt amnhĩ nhĩpêx mex o ri ixpa. ¹⁵ Nẽ mẽ urãk mẽ Tirtũm kot nhÿrmã akupÿm mẽ ho hÿir kôt pa hte ijaxwÿja ijamaxpêr tÿx në. Mẽ htyk xwÿnh piitã. Mẽ kot amnhĩ to mex xwÿnhjê mẽ mẽ kot amnhĩ tomnuj xwÿnhjê mẽ mẽ ho hpimràatã akupÿm mẽ ho hÿirja kôt pa hte mẽ urãk mẽ ijamaxpêr tÿx o ri ixpa. ¹⁶ Jakamã na pa hte tãm amnhĩ nhĩpêx rãhã në. Tirtũm noo mã mẽ mẽ piitã mẽ noo mã tãm ri amnhĩ nhĩpêx mex rãhã në.

¹⁷ —Tã na pa pre pyka hkwÿ hkôt ri ixpa hã ixtã amgrã sohtõ në. Hãmri në ma akupÿm Jerujarê hwÿr ixkwÿjê hwÿr mõ. Amarĩ ixte mẽ kãm kãxpore hkwÿ nhõr kaxyw pa akupÿm mẽ hwÿr mõ. Nẽ mãânên Tirtũm mã mẽmoj nhõr kaxyw. ¹⁸ Hãmri në mẽ ixte amnhĩ nhĩpêx xà hkôt pa mẽ amnhĩ to mex pa mẽ ma tẽn Tirtũm mã amnhĩ jarênh xà hã ixkre hwÿr axà nhũm mẽ kamã ixpumu. Nom na pa pre ri ixkreja kamã tanhmã amnhĩ tomnuj to hkêt në. Rÿ tanhmã ixkapêr punuj to hkêt në. Na pa

prem ãm inhgrêre nê akryk ixkuhê nhũm mē ixpumu. ¹⁹ Pika pē As rũm Ijaew kwýjaja na prem ixkre kamã ixpumu. Nar mē tãmjaja mãn awýr mra nê tanhmã amã ijarênh to.

²⁰ —Nê jar mē kot ixto kapêr xwýnhjaja. Na pa pre mē àptàr tũmrejê mã amnhĩ jarênh pa nhũm mē inhma nê tanhmã inhmã nê hkêt nê. Kam nê ja hã mē hkukja nê mē ama. ²¹ Rý ko. Koja apu mē amã ãm ja pix ã ijarênh japêr. Na pa pre mē kãm ixkapêr nê mē kãm: “Na pa hte mē htyk nê akupým mē htĩr kôt ijampêr týt nê. Tã ja pix mýrapê na ka prem ixpynê nê ã inhĩpêx anê.” Anhýr o mē kãm ixujarênh jakamã nhũm apu mē hkwyjaja kêp ja omnuj nê. Jakamã koja apu mē amã ja hã ijarênh japêr. Nom ja pix jarê. Anê.

Ã na pre Pawreja pahi Peris mã amnhĩ jarênh anê.

Peris mē hprõ wa kot Pawre mar ã wa harênh

²² Tã nhũm pahihiti Peris kot mē kot Jejus kôt amnhĩ xunhwýr xwýnhjê kot amnhĩ nhĩpêx ã mē omunh mex jakamã hãmri Pawre mar pa nê ho kapêr xwýnhjê mã kãm:

—Nã hãmri. Na pa ra mē ama. E mē mamrĩ ma mra. Kê pôristi krãhtũm Risasja mō nê pōj pa wa ixprĩ hã mē ate tanhmã harênh toja ma nê rĩ kormã tanhmã Pawre jarênh to. Anê.

²³ Hãmri nê hpãnhã pôristi pytãr xwýnh mã Pawre jarê nê kãm:

—E mē ma akupým ixkre hwýr o tē nê kamã hamãr o apa. No ãm kwãr mãmrĩ àmhĩx ri ixkre kamã tanhmã amnhĩ to ho ri pa. Nê kê hkrãmnhwýjaja mãmrĩ hwýr mēmoj to mra kê kuku. Anê.

Hãmri nhũm mē kuma nê ma o tē nê akupým ixkre hwýr ho axã nhũm kamã pa ho pa.

²⁴ Tã ra hã apkati grêre nhũm Peris mē hprõ wa ma Pawre hwýr

tê. Prõ haxwýja kêp Ijaew. Hixi pē na pre Turujire. Jakamã nhũm wa ma Pawre nhõrkwy hwýr wa tē. Nhũm Peris Pawre hã karõ nhũm kato nê wa hwýr tē nê wa kãm awjarê. Tanhmã wa kot amnhĩ to nê amnhĩ kaxyw Jejus Kris kôt hamaxpêr nê hkôt amnhĩ xãm prãm xàj hprĩ hã wa kãm harê. ²⁵ Nê wa kãm:

—Nã na htem Jejus Kris kôt amnhĩ nhĩpêx nê tãm ri amnhĩ nhĩpêx o pa. Kãm tanhmã amnhĩ tomnuj to hprãm tã ho anhýr kêt nê. Nê arĩ Jejus kot amnhĩ nhĩpêx kôt amnhĩ nhĩpêx o pa. Koja Tĩrtũm nhýrmã mē pahpiitã mē pahte tanhmã amnhĩ nhĩpêx to ho papa hã mē pahpumunh xã hkôt tanhmã mē pajarênh to. Mē pahte tãm amnhĩ nhĩpêx xwýnh ã mē pajarê rý mē pahte amnhĩ tomnuj xwýnh ã mē pajarê. Anê.

Nhũm pre ã Pawre Peris mē Turujire wa kãm kapêr anê. Hãmri nhũm Peris tee ri ujarênhja ma nê kãm ma nê. Kot amnhĩ tomnuj o pa xwýnh ã amnhĩ pumu nê ã kãm kapêr anhýrja mar puma nê. Hãmri nê Pawre mã kãm:

—E hãmri. Nã na pa wa ra ama. Mamrĩ ma akupým tẽn axã. Kot paj mēmo arĩgro hã mēmoj to anhýr kêt nê axte amnhĩ wýr atã karõ ka axte tanhmã wa inhmã axujarênh to. Anê.

²⁶ Nê htýt hamaxpêr o:

—Nã kot paj mēmo arĩgro hã axte amnhĩ wýr hã karõ kê ixwýr tē nê ixte kator prãm xàj inhmã amnhĩrer japêr. Anê.

Hãmri nê xatã amnhĩ wýr hã karõ htã no nhũm aa kot kator kaxyw tanhmã kãm nê hkêt nê.

²⁷ Tã nhũm amgrã axkrut nê hapêx nhũm Pos Pesti pahi Peristi hpãnhã kêp mē õ pahi nê mē ho amnhĩptã. Jakamã nhũm Peris akupým õ krĩ hwýr nojarêr nê Pawre mã ãhkra karõ hkêt rãhã ma mō. Na pre hamaxpêr o:

—Nà kot paj Pawre kator nhùm Ijaew ja hã ijarënh ma nê ixkamã gryk nê. Nà kwâr mê hãgjênh xà hã ixkre kamã hkrî ho hkrî. Kot paj kator kêt nê. Anê.

Hãmri nê kãm ìhkra karô hkêt rãhã ma akupÿm ô krî hwÿr mō. Jakamã nhùm Pawre arî ixkre kamã kêp prês nê hkrî ho hkrî.

25

Pawre Rôm wÿr hkrà ã harënh

¹ Tã nhùm pahi nyw Pos Pesti krî pê Sejarej wÿr mōn pōj. Hãmri nê kamã ri pa hã apkati axkrunëpxi pix nê ma Jerujarë hwÿr mō. ² Hãmri nê hwÿr pōj nhùm Ijaew kwÿjaja omu nê hwÿr mra nê kãm Pawre ho kapër nê hã hwÿr kurë kumrëx. Mëõ patre krãhtümjê mê Ijaew xàptâr tùmrejaja nhùm mê hwÿr mra nê kãm:

³ —Pa pahihti? E ot pa mê awÿr mra. Kwa xà kot ka Pawre hã karō kê man awÿr mō ka jar kot tanhmã amnhî tomnuj to hã hkukja nê ama? Anê.

No ãm hêx rom ã hã kãm kapër anê. Kot hã karō nhùm mê kot pry hã hpîr kaxyw nhùm mê hêx rom ã kãm kapër anê. ⁴ Hãmri nhùm mê kuma nê mê kãm:

—Tk. Kwa ra Sejarej kamã kêp prês nê hkrî kênã kot pa kêt amnhî wÿr hã karō. Kot pa tokyx ma akupÿm hwÿr mō. ⁵ Jakamã kêr ka mê axàptâr tùmjaja ma ixkôt mra. Hãmri nê Sejarej kamã inhmã tanhmã kot amnhî tomnuj to hã harënh to pa mê ama nê rî kormã tanhmã harënh to. Anê.

⁶ Hãmri nê mê kamã pa hã apkati grêre nê ma akupÿm Sejarej wÿr mō. Hãmri nê hwÿr pōj nhùm apkati nhùm mê hkukjêr xà hã ixkre hwÿr tē nê mê kot mê mar xà hã mê hkrî xà kamã nhÿ nê amnhî wÿr Pawre hã karō. ⁷ Nhùm mê hwÿr o tē nê ÿr nhùm hkwy kot Jerujarë rùm mê mōr xwÿnhjaja kãm hipòk nê pahi Pos Pesti mã tanhmã ho

kapër to nê ho kapër punuj tÿx nê. Kot tanhmã amnhî tomnuj to ho pa hã ho kapër o kuhê. Nom mê kot ã kot amnhî nhîpëx anhÿr ã omunh kêt tã ãm amnhî hkrã hkôt ri tanhmã ho hêx to. ⁸ Jakamã nhùm Pawre tee ri amnhî tã mê kot ho hêxja ma nê kãnhmã xa nê Pos Pesti mã amnhî tã aprã nê mê kãm:

—Nà aa ixte ã amnhî nhîpëx anhÿr kêt. Na pa finat Mojes kot Tirtüm nhÿ hã kapër nhîròp ixãm nê hkwy mri tanhmã amnhî nhîpëx to hkêt nê. Nê mê ixte Tirtüm mã amnhî jarënh xà hã ixkre kamã ri tanhmã ixtÿx ri amnhî nhîpëx to hkêt. Nê pahihti Sesti kapërja pa pre hiròp ixãm nê tanhmã amnhî tomnuj to hkêt nê. Aa ixte ã amnhî nhîpëx anhÿr kêt kumrëx. Anê.

⁹ Hãmri nhùm Pos Pesti kuma nê tanhmã hkukamã hamaxpër to nê hamaxpër o:

—Kwa nhÿ krî kamã kot pa we Pawre kot inhmã tanhmã amnhî jarënh toja ma nhùm Ijaew ja hã kãm ixkînh japêr? Nà mëõ krî pê Jerujarë hwÿr kot paj akupÿm mê hwÿr o mō nê kamã mãn hkukja nê kuma. Nà ja na mex. Nà kot paj anê. Anê.

Hãmri nê Pawre mã kãm:

—E xà kot puj ma akupÿm Jerujarë hwÿr mō pa kamã axte mê kot ajarënh ma nê tanhmã ajarënh to nà? Anê.

¹⁰ Hãmri nhùm kãm:

—Nà jar ixte pahihti Sesti nhÿ hã mê kot mê hkukjêr xà hã ixkre kamã inhÿr nê amnhî jarënh kênã. Jar na htem mê hkukja nê tanhmã ri mê mar to. Na pa pre tanhmã ixkwÿjê ho hkêt nê. Mëmo kaxyw kot pa akupÿm mê hwÿr mō nê axte mê kãm amnhî jarê? ¹¹ Kop apu pa tanhmã ixte amnhî tomnuj to ronhÿx mê mãmrî ja hã xipî pa mê kêp tanhmã ri amnhî to hkêt nê. Nom mê kot ixto hêx pix o ã ijarënh anhÿr kênã. Jakamã mëmo mÿrapê kot kaj mê ìhkram ijaxà? E Rôm kãm

pahi maati Sesti hwÿr mǎn inhmě pa kumǎ mǎn amnhĩ jarě. Aně.

Pahi Sesti kěp pyka piitǎ hkôt mě ho amnhĩptǎr xwÿnh maati jakamǎ nhũm Pawre kot mar kaxyw hwÿr hkrǎ. ¹² Hǎmri nhũm Pos Pesti kuma ně ma tě ně hǎ ō kōwenatōjě ma. Hǎmri ně hǎ axpēn mar pa ně akupÿm hwÿr tě ně kǎm:

—Tōe. Nǎ kot paj pahi maati Sesti wÿr amě. Ra hwÿr akrǎ kēnǎ. Aně.

Pos Pesti kot Akrip mǎ Pawre jarěnh

¹³ Tǎ nhũm apkati grěre ně hapěx nhũm pahi hō pē Akripja ma Pos Pesti hwÿr mō. Tōx Perēnīs mě wa mō. ¹⁴ Hǎmri ně wa hwÿr pōj ně kuri wa pa hǎ apkati grěre nhũm Pos Pesti wa kǎm Pawre jarě ně wa kǎm:

—E pa war amǎ mēhō jarě. Na pre pahi Perisja mě hǎgjěnh xǎ kamǎ mēhō jaxǎ ně kormǎ kator kēt ri nhũm mě àpěnh nē kator pa hpǎnhǎ àpěnh o amnhĩptǎ. ¹⁵ Tǎ ra ma Jerujarě hwÿr mō nhũm Ijaew nhō patre krǎhtũmjě mě mē àptǎr tũmrejaja inhmǎ ho kapěr punuj rax ně. Ně ixte mě kǎm hpěr kaxyw inhmǎ hǎ àmněnh kǎm hihtÿx ně. ¹⁶ Nom pa mě kěp ja kaga ně mě kǎm: “Nǎ mě ixpē Rōm nhō xwÿnhjaja na pa htem ǎ mē hipěx anhÿr kēt ně. Na pa htem mě kot ho kapěr xwÿnh noo mǎ tanhmǎ hkukjēr to nhũm tanhmǎ amnhĩ tǎ àprǎr to pa htem kuma ně rĩ kormǎ tanhmǎ mě ho. No na pa htem kormǎ mě kot tanhmǎ amnhĩ jarěnh to hkēt ri tanhmǎ mě ho hkēt ně.” Aně.

¹⁷ —Jakamǎ nhũm prem kaxyw Sejarej wÿr pōj nhũm apkati pa hǎ mě hkukjēr kurē kumrěx. Ně mě kot mě hkukjēr xǎ hǎ mě hkrĩ xǎ kamǎ nhÿ ně ixte hkukjēr kaxyw amnhĩ wÿr Pawre hǎ karō. ¹⁸ Na pa pre ijamaxpēr o: “Mǎn pre tanhmǎ amnhĩ tomnuj tÿx to hǎ na mě inhmǎ harěnh kaxyw.” ¹⁹ Anhÿr ǎ

hkamnhix tǎ te kot amnhĩ to mex xwÿnh pyrǎk. ǎm kot mě hkôt amnhĩ nhĩpěx kēt pix ǎ nhũm mě inhmǎ harě. Ně kaxyw mēhō htyk xwÿnh jarě. Mě kot kǎm “Jejus” anhÿr xwÿnhja na xep hte mě kǎm akupÿm htír ǎ harěnh o pa. ǎm ja pix na prem inhmǎ harě. ²⁰ Pa tee ri ixte nhÿri ixprĩ hǎ tanhmǎ mě kot harěnh to hǎ mě mar kaxyw hkukamǎ ijamaxpēr. Hǎmri ně hǎ Pawre kukja ně kǎm: “Xǎ kot puj ma akupÿm Jerujarě hwÿr mō pa axte akwÿ kot tanhmǎ ajarěnh to ma ně rĩ kormǎ tanhmǎ ajarěnh to nǎ?” ²¹ Anhÿr tǎ no nhũm akupÿm Jerujarě hwÿr mōr kaga kumrěx ně amnhĩm Rōm kǎm pahi maati Sesti jarě. Ixte ma hwÿr mēnh nhũm kot kǎm amnhĩ jarěnh nhũm kot mar ně tǎm tanhmǎ harěnh to kaxyw. Jakamǎ pa kormǎ ixte hwÿr mēnh kaxyw amnhĩ xa hǎ akupÿm mě hǎgjěnh xǎ kamǎ haxǎ nhũm arĩ hkrĩ ho hkrĩ. Aně.

²² Hǎmri nhũm Akrip kuma ně kǎm:

—Xōwehe? Kwa na pa inhmǎ tanhmǎ kapěr to mar prǎm ně. Aně.

Hǎmri nhũm kǎm:

—Tōe. Nǎ kē apkati pa hǎ karō ka tanhmǎ kapěr mar to. Aně.

²³ Jakamǎ nhũm apkati nhũm Akrip mě htōx Perēnīs wa pahi hǎ mě é mex jagjě ně ma mě hkukjēr xǎ hǎ ixkre hwÿr wa tě. Pōristi krǎhtũm kwÿjě mě Sejarej kamǎ mě kot amnhĩ to rũnh xwÿnh kwÿjě mě nhũm mě hwÿr akuprō. Nhũm mě piitǎ Akrip mě htōx wa kěp pahi hǎ wa é mex ǎ wa omu ně wa kamǎ no puma ně. Hǎmri nhũm Pos Pesti Pawre hǎ karō nhũm mě haprō ně ma mě hwÿr o tě. ²⁴ Hǎmri nhũm Pos Pesti omu ně Akrip mě htōx mě mě kot mar o hkrĩ xwÿnhjě mǎ kǎm:

—E pahihti Akrip mě mě apikuprōnh xwÿnhjaja. Ota Pawre xa. Jerujarě kamǎ ně jar Sejarej kamǎ na pre hkwÿjaja inhmǎ ho

kapêr rax nê. Hâmri nê ixte hpîr kaxyw inhmã hã àmnênh kãm hihtýx nê. ²⁵ Nom mëmoj mýrapê kot pa kêt kupî? Tã nhùm amnhîm pahi maati Sesti jarê pa ma hwýr mênh kaxyw. ²⁶⁻²⁷ Nom na htem amarî pahi maati Sesti hwýr më rênh kêt nê. Na htem kãm më kot tanhmã amnhî tomnuj to hã kagã nê hwýr kagã më ro hã më kurê. No jahti kot tanhmã amnhî tomnuj toja na ixte omunh kêt. Te inhmã tanhmã kot amnhî tomnuj to hkêt pyrãk. Jakamã na pa më awýr o tẽ. Më ate kapêr mar nê kot tanhmã amnhî tomnuj to hã inhmã harênh nhùm ixte hã kagã nê pahi Sesti hwýr mênh kaxyw. Jakamã e më kam nê hkukja nê ama nê tanhmã mar to. Anê.

26

Pawre kot pahihtî Akrip mã amnhî jarênh

Atre 8.3, 9.1-19, 22.1-21

¹ Hâmri nhùm Akrip Pos Pesti kot tanhmã Pawre jarênh toja ma nê Pawre mã kãm:

—E mãmrî më inhmã amnhî jarê pa më ama. Anê.

Hâmri nhùm kuma nê kãm amnhî jarênh kaxyw kànhmã kãm îhkra pẽ nê kãm:

²⁻³ —Hêxta waa nê. Nã na pa amã amnhî jarênh kaxyw nê ixkînh nê pahi Akrip. Ra ate më ixpê Ijaew kot amnhî nhîpêx ã më ixpumunh mex. Nê më ixte tanhmã amnhî nhîpêx to hã më ixte axpên kukjêrta ate hã më ixpumunh mex. Jakamã na pa amã amnhî jarênh kaxyw nê ixkînh nê. E tokyx anojarêt kêt nê inhma. Pa amã ixujarênh jatur xãm kumê ka aprî hã inhma. ⁴ Nã ixkwýjaja ra më kot ixte amnhî nhîpêx ã ixpumunh mex. Ixprîre rûm ixpapxã kamã nê mãânên Jerujarê kamã ixte tanhmã amnhî nhîpêx to ho ixpaja më kot hã ixpumunh mex. ⁵ Ixpê më hkwyê pẽ Parijew nhõ xwýnh kwýjê hã më

kot ixpumunh. Koja më apu ja hã amã ijarênh japêr rý ko. Më ixpê Parijew nhõ xwýnhjaja na pa htem amnepêm finat Mojes kot Tirtûm nhý hã më inhîgêjtjê mã mëmoj tã karõ xà hkôt amnhî nhîpêx mex o ixkwýjê jakre.

⁶ —Amnepêm na pre Tirtûm më inhîgêjtjê mã tanhmã amnhî jarênh to. Kot nhýrmã më piitã akupým më ho htîr ã amnhî jarê. Tã ixte ja kôt ijamaxpêr pix mýrapê na prem kot hã amã ixto kapêr kaxyw awýr ixto mõ. ⁷ Më ixpê Ijaew nhîgêjtjê piitã na prem Tirtûm kapêr kôt hamaxpêr o ri pa. Kot nhýrmã akupým më ho htîr ã amnhî jarênh kôt hamaxpêr týx o pa. Amnepêm finat Jako më hkra pê 12jaja na prem hkôt hamaxpêr. Nê ixpê më hkanrêhã më htãmnhwý na pa hte ijaxwýja ja kôt ijamaxpêr týx rãhã ho ri ixpa. Tã ãm mëmoj pixi mýrapê na ixkwýjaja ã amã ixto kapêr punuj anê. ⁸ Më kot ixpyrà nê ja kôt hamaxpêr ã amnhî jarênh tã nhùm pre Tirtûm akupým Kra Jejus o htîr nom nhùm më ixkînhã ja kôt hamaxpêr kêt. Nom Tirtûm kêp akupým më pahto pahtîr xwýnh kênã.

⁹ —Amnepêm kormã Jejus kôt ijamaxpêr kêt ri na pa pre ijaxwýja më urãk nê akupým htîr kôt ijamaxpêr kêt nê. Nê ixtýx ijamaxpêr o: “Kot paj Jejus pê Najare nhõ xwýnh kôt më kot amnhî xunhwýr xwýnhjê nhîpêx kati ho ixpa nhùm Tirtûm ja hã ixpumu nhùm ja kãm mex nê.”

¹⁰ —Anhýr jakamã pa pre hte tanhmã më homnuj týx to ho ri ixpa. Jao Jerujarê kamã më inhõ patre krãhtúmjê nhý hã më unê nê më hagjênh xã kamã më hagjênh o ixpa nhùm më kot më himex kaxyw më hã inhmã amnhî jarê nhùm ja inhmã mex nê. Pa më harênh ma nê ixkînh nê. ¹¹ Pa pre hte xatã tanhmã më hipêx to nê më kot Jejus kaga hprãm xàj më hipêx

kati rûnh nê. Tîrtûm kapêr o mē ahkre xà hā ixkre piitā kamā pa pre hte ā mē hipêx anê. Nê mē kamā inhgryk tÿx jakamā ma krî hkwy hkôt mē hapêr o ri ixpa. Ā na pa pre mē hipêx anhÿr o ri ixpa.

12 —Tā axte ixte mē hkwyjê pynênh nê mē hagjênh kaxyw ma Tamas wÿr mō. Mē inhō patre krāhtÿmjê nhÿ hā ma mē hwÿr mō. 13 Hāmri nhÿm ra kaxkwa nhîpôk ri myt nhÿ pa kormā pry hā inhmōr ri kaxkwa rÿm mēmo nhîrāja pumu. Nhÿm hirā htÿx o myt jakre nê ixtā ajêt pa ixkôt ri mē pa xwÿnhjê mē hipôk ri ixkuhê. 14 Hāmri nê mē inhmā ma xà pykap ixrôrôk pa nhÿm kaxkwa rÿm mēhōj inhmā kapêr. Mē ixpê Ijaew kapêr o kapêr nê inhmā: “Pa Sawti? Hêxta waa nê. Kwa mon ka hte axtem nê ixtomnuj tÿx o ri apa? Nom na ka tee ri ā amnhî nhîpêx anhÿr kaprÿ.” Anê. 15 Hāmri pa tee ri kuma nê kām: “Kwa mē atō na ka ā inhmā akapêr anê?” Anê.

—Hāmri nhÿm inhmā: “Ixpê Je-
jus na pa amā ixkapêr. Pa na ka hte
ixpê ixkôt mē kot amnhî xunhwÿr
xwÿnhjê homnuj tÿx o apa ho te pa
ixtomnuj tÿx pyrāk. 16 E kânhmā xa.
Ate inhmā tanhmā amnhî nhîpêx
to ho apa kaxyw na pa amā amnhî
to amnhîrît. Jarāhā ate ixpumunh
xà hkôt ate mē kām ma ijarênh nê
mē kām ixkapêr jarênh o mē ahkre
ho ri mē hkôt apa kaxyw na pa
amnhî kaxyw ata. Kot paj nhÿrmā
axte awÿr ixkato nê tanhmā amā
ixkapêr to ka inhma nê ma mē
kām ixkapêr jarênh o ri mē hkôt
apa. Ja kaxyw na pa amnhîm ata.”
Anhÿr o inhmā kapêr. 17 Hāmri nê
inhmā: “E kot paj Ijaew mē Ijaew
kêt xwÿnhjê hwÿr amē nê anê mē
omunh mex nê nhÿm mēhō apîr kêt
nê. 18 Kêr ka ma mē hkôt mē kām
ixkapêr jarênh o ri apa kê mēhpri
hā kuma. Mē kot amnhî tom-
nuj kaga nê amnhî kaxyw ixkôt
hamaxpêr nê ixkôt amnhî xun-

hwÿr kaxyw. Hāmri nhÿm Tîrtûm ja
hā mē omu nê ixkukwak ri amnhî
katut kôt mē kot amnhî tomnuj pi-
itā rênh pa nê axte kām hamaxpêr
kêt nê. Hāmri nê mē ho hkra.
Koja mē ā amnhî nhîpêx anê hāmri
nê axte Satanasti nhÿ hā tanhmā
amnhî nhîpêx to hkêt nê. Pānhā
Tîrtûm kôt pix mā amnhî nhîpêx o
pa.” Anê.

19 —Ā na pre Pahihti Jejus inhmā
kapêr anê. Tā kot kaxkwa rÿm
inhmā ixâpênh jarênh ā karōja
pa pre mar tÿx nê hkôt amnhî
nhîpêx rāhā ho ri ixpa pahi Akrip.
20 Jakamā na pa pre ma mē hkôt
mē kām kapêr jarênh o ri ixpa.
Tamas kumrêx hwÿr nê hpānhā
Jerujarê hwÿr nê hpānhā pika pê
Jutej piitā hkôt Ijaew mā kapêr
jarênh o ri ixpa. Tā hpānhā Ijaew
kêt xwÿnhjê mā harê. Na pa hte mē
kām ixkapêr o: “Kwa mē ate amnhî
tomnuj kaga nê hpānhā Tîrtûm kôt
amnhî xunhwÿ. Hāmri nê hkôt pix
mā amnhî nhîpêx o ri apa. Mē piitā
mē kot apê hkwy hā mē apumunh
kaxyw.” Anê.

21 —Ām ja pix mÿrapê na pre
ixkwÿjaja ixpynê. Tîrtûm mā amnhî
jarênh xà hā ixkre kamā ixpynê nê
ra mē kot ixpîr kaxyw. 22-23 Nom
na hte Tîrtûm ixtānopxa nê ixto ix-
ihtÿx mex rāhā ho pa pa arî mē
kām harênh o ri ixpa. Mē kot
amnhî to rûnh xwÿnhjê mā nê mē
kêp amrakati xwÿnhjê mā nê mē
piitā mē kām harênh o ri ixpa. Fi-
nat Mojes mē Tîrtûm nhÿ hā kapêr
jarênh o mē pa xwÿnhjaja kot ra
hkukamā tanhmā harênh to xà
hkôt pa hte mē kām harênh o ri
ixpa. Nê mē kām: “Tîrtûm kot
mē pakaxyw ām xwÿnhhta na pre
amnhî xà htÿx kamā hamak kām
ty. Tā nhÿm Tîrtûm akupÿm ho
htîr. Kumrêx na pre akupÿm ho
htîr jakamā kumrêx na pre tanhmā
mē kām kapêr to ho ri mē hkôt
pa. Mē kot amnhî kaxyw hkôt
hamaxpêr nê hkôt amnhî xunhwÿr

xwýnh piitã urak nê nhÿrmã Tirtùm mē wa ò krī kamã htír tùm nē pa ho pa hprãm xaj mē harēnh o pa. Mē ixpē Ijaew nē määnēn mē apē Ijaew kêt xwýnhjaja nhÿm pre ã mē pajarēnh anē.” Anhÿr o pa hte mē kãm harēnh o ri mē hkôt ixpa pahi Akrip. Anē.

²⁴ Nhÿm Pawre kormã kot mē kãm amnhĩ jarēnh par kêt ri nhÿm Pos Pesti tee ri tanhmã Jejus jarēnh to hã kuma nē kax pē kãm kapēr nē kãm:

—Kwa na ka akrã axpã nà? Pēr ate kagã pumunh tÿx kurē akrã pipānh pyrãk o ri atÿx ã ri mē inhmã axujarēnh anē. Anē.

²⁵ Hãmri nhÿm kãm:

—Nã ixkrã pipānh kêt. ãm hãmri na pa mē amã awjarē. ²⁶ Jerujarē kamã na prem Jejus pĩ nhÿm mē piitã omu. Tã nhÿm akupÿm htír hãmri nē hpimxur pē ri pa hkêt nē. Na pre mē ohtô nē akupÿm htír kãm omu. Pahi Akrip ra kot ja mar mex jakamã na pa ixãmnhix ã mē amã harēnh anē.

²⁷ Anhÿr o kãm kapēr hãmri nē pahi Akrip wÿr rīt nē kãm:

—Kwa pahi Akrip. Xã Tirtùm nhÿ hã kapēr jarēnh o mē pa xwýnhjaja kot Jejus kukamã tanhmã harēnh toja kôt na ka hte ajamaxpēr? Nã ra hkôt ajamaxpēr kênã. Ra ixte ajamaxpēr kôt apumunh mex. Anē.

²⁸ Hãmri nhÿm tee ri kuma nē kãm:

—Tk. Kwa xà kot kaj ã inhmã akapēr anē pa ama nē apyrã nē amnhĩ kaxyw Jejus kôt ijamaxpēr? Nã na ka ixte ã ate Jejus jarēnh anhÿrja kôt ijamaxpēr ã ixkamnhix kaprÿ. Anē.

²⁹ Hãmri nhÿm Pawre kãm:

—Ko. Kot kaj ixpyrà nē amnhĩ kaxyw hkôt ajamaxpēr pa ixkĩnh nē. Nom kaxipix kêt. Mē apiitã mē ate inhmar o akrī xwýnhjaja määnēn. Mē ate mē ixpyrà nē Jejus kôt amnhĩ xunhwÿr na inhmã

hprãm. ãm ixpyrà nē mē apē prēs pix na inhmã hprãm kêt. Anē.

³⁰ Hãmri nhÿm pahi Akrip nē htõx Perēnĩs nē pahi Pox Pesti nē mē hkôt mē mör xwýnhjaja kãnhmã kuhê nē ma mrar kaxyw. ³¹ Nē nojarêt nē Pawre hã axpēn mã:

—Kwa tanhmã kot amnhĩ tom-nuj to hkêt kênã kot kêt mē haxà rÿ kupĩ. Anē.

³² Hãmri nhÿm Akripja Pos Pesti mã kãm:

—Kwa kop apu kot amnhĩ kaxyw pahi maati Sesti hwÿr hkrã hkêt ronhÿx pu mē ra kator. Anē.

27

Mē kot Röm wÿr Pawre mēnh ã mē harēnh

Atre 23.11, 25.12

¹ Tã nhÿm mē pyka pē Itar wÿr pahi maati Sesti hwÿr Pawre mēnh kaxyw. Itar kamã mē ò krī maati na pre kēp Röm. Jakamã nhÿm Pawre mē mē kot mē hagjēnh xà kamã mē hkrī xwýnh mē ho hpimràatã ma mē o mra nē pôristi krãhtùm Jurti nhÿhkram mē haxàr pa. Kot ma Röm wÿr mē o mör kaxyw. Jurtija kēp Itar kamã mē ò pahi maati hã pôristi krãhtùm nhÿm prem ma mē kãm mē o mör kaxyw ïhkram mē hagjēnh pa. Ixpē Rukre na pa pre inhmã Pawre hkôt inhmör prãm nē mē hã ajêt nē mē hkôt mō.

² Tã pa mē ra inhnojarêt nhÿm Aristak haxwÿja ma mē ixkôt mō. Pyka pē Masetõn nhõ xwýnh na pre. Ò krī pē na pre Tesarõn. Jakamã nhÿm ma wa ixkôt mō. Hãmri nhÿm pãrja nojarêt. Atamix rùm pãr nhÿm ra As wÿr nojarêt pa mē hwÿr inhgêx pa nē ma kamã mō. ³ Hãmri nhÿm apkati pa mē krī pē Sito hwÿr pøj nē hã pãr xi. Nhÿm pôristi krãhtùm Jurtija Pawre ho mex jakamã pa mē Sito hwÿr pøj nhÿm Pawre mã anē pa mē ixkato nē ma ixkrãmnhwÿjê hwÿr mra nē

mê kutã apku nê ma akupÿm pãr wÿr mra.

⁴ Tã pa mê axte mô. Nom nhũm kôk mê ixkutã àpêr tÿx jakamã pa mê umaj juk nê gô hipôk kupu ho mô. Gô hipôk pê Sipreja pa mê upôk rũm ma hkupu ho mô nhũm mê inhnê kôk pê àmnàr mex nê. ⁵ Hãmri pa mê môô nê pyka pê Siris mê Pãpir wa hakrenh o mô nê pyka pê Ris kamã Mira hwÿr pøj nê hã pãr xi nê ijapôx pa. ⁶ Hãmri nhũm pôristi krãhtũmja Aresãnrir rũm pãr pumu nhũm ra Itar wÿr nojarê. Pa mê hwÿr inhgjêx kurê kumrêx hãmri nê ma kamã axte mô. ⁷ Hãmri nhũm pãrja kôk kutã tee ri môr prêprêk kaxyw nê ãm amnhĩm hprĩ nê môr ã apkati xohtô nê pa mê tokyx ixpôx kêt nê. Tã Sito hwÿr ixãhtêp o mô nom nhũm kôk mê ixkutã hihtÿx rax kumrêx. Jakamã pa mê juk nê gô hipôk pê Kret jatur xã jahpa nê ma kape hã mô nhũm mê inhnê kôk pê àmnàr mex nê. Hãmri pa mê ma Sarmôn jakrenh o mô ⁸ nhũm pãr kôk kutã amnhĩm hprĩ nê kape hã mô. Pa mê mô nê jatã Rasej tã pãr nhĩkwÿ xã mex wÿr pøj nê kamã pãr xi. ⁹ Nom pãr kot amnhĩm hprĩ nê môr jakamã nhũm ra kôk xãpêr tÿx nê kamã kry htÿx ã mytwrÿy mê ixtã kato. Mytwrÿya ã mê kot kôk xãpêr tÿx pymaj nhÿhÿm pãr kãm mrar kêt. Jakamã nhũm Pawre tokyx mê inhmôr nê pãr nhõ xwÿnhjê mã kapêr kãm hihtÿx nê mê kãm:

¹⁰ —Kwa pu mê jar kôk xãpêr tÿx jamãr o ri papa nã. Kê kôk mê kry htÿxja hapêx pu mê rĩ kormã axte mô. Kot puj mê anhÿr kêt nê kôk xãpêr tÿx kãm mô nhũm nhÿri pãrja mê pahpê axã nhũm gô mê apê mê akukrêx o hapêx pa. Pu mê pajaxwÿya axkaprã.

¹¹ Anhÿr o mê kãm kapêr tã no nhũm mê kuma nê ãm kuma. Pãr pãm mê pãr o mrar xwÿnh wa nojarê tÿx nê kapêr ma nê ãm kuma. Nhũm pôristi krãhtũm wa nojarê ã

wa kuma nê haxwÿya Pawre mar kêt nê. ¹² Nhũm mê kot pãr nhĩkwÿ xã mex jarênhja mê kot mex ã harênh tã mê kêp omnuj nê. Hã na wrÿk nê kôk xãpêr tÿx nhũm mê kêp omnuj tÿx nê. Jakamã nhũm mê piitã Pawre rom ra nojarê nê. Mê kãm tokyx krĩ pê Wênĩs wÿr hpôx prãm jakamã nojarê tÿx nê. Gô hipôk pê Kret kamã na Wênĩsja. Nê kamã kôk xãpêr tÿx kêt jakamã nhũm mê hwÿr nojarê nê axpên mã:

—E kwa pu mê tokyx Wênĩs wÿr mô nê kamã mãn kôk xãpêr tÿx japêx jamãr o papa. Anê.

Hãmri nê piitã hwÿr nojarê.

Kôk kot pãr o àpêr tÿx ã harênh

¹³ Tã nhũm kahpa hkôt kôk xãpêrja katat kôt kawax pê apê nhũm mê kamã ama nê axpên mã:

—E hãmri. Tokyx pu mê mô. Anê.

Jakamã pa mê pãr o htÿx xã ho api nê axte mô. Ma gô hipôk pê Kret jakãr ã mô. ¹⁴ Puh nhũm na wrÿ nê kôk àpêr tÿx kumrêx. Mê kot kãm “kôk xãpêr tÿx maati” anhÿr xwÿnhja gô hipôk rũm mê ixto àpêr tÿx kumrêx o mô. ¹⁵ Hãmri nê mê ixkutã àpêr tÿx nhũm pãr tee ri kutã hkarôt. Pa mê kormã Wênĩs wÿr ixpôx kêt ri ra ho awjanã nhũm amnhĩ krã hkôt kôk kôt mô. ¹⁶⁻¹⁷ Hãmri nê mô nê gô hipôk pê Krawti jahpa nê hakãr ã mô nhũm mê inhnê kôk pê amyãta nhũm amnhĩm hprĩ nê kawax pê apê. Hãmri pa mê pãr krare kot mê ixkôt môr xwÿnhja pa mê kumÿ nê pãr rax kãm kumê. Ra kamã gô rax tã pa mê ixkarôt tÿx nê nê hkapĩr pa nê ho api nê pãr rax kãm kumê nê ho htÿx. Hãmri nê hpãnhã kôk xãpêr tÿx pymaj pãr rax kaxpre hpa. Hãmri nê kôk kot pykahti grã maati pê Sirteja wÿr pãr mênh nhũm kot amnhĩ to pykahti xãm o htêm pymaj nhũm mê kot ho mrar xã hã kupêxê rax o wrÿ nhũm pãr amnhĩ krã hkôt ma kôk kôt mô.

¹⁸ Tã nhũm apkati nhũm kôk arĩ mẽ ixpê pàr o àpêr tỳx nê arĩ na wrỳk rax rãhã nê. Jakamã pa mẽ pàr àr pymaj nê mẽ hikukrêx kwỳ gôx kãm rênh pa. Kaxkritre nê àr kêt kaxyw.

¹⁹ Tã nhũm apkati pa mẽ hpãnhã pàr kre kamã ri nê hikukrêx kwỳ rê nê gôx kãm kurê. ²⁰ Nhũm kôk arĩ àpêr tỳx kumrêx ã apkati xohtô nê. Nê na wrỳk rax rãhã jakamã pa mẽ kanhêti pumunh kêt nê myt pumunh kêt o mẽ ixtã apkati xohtô rax kumrêx. Hãmri nê tee ri ahkapi nê tee ri amnhĩ kukamã ijamaxpêr. Nê ixtyk par pix kukamã ijamaxpêr o ixkaprĩ nê ixkrĩ.

²¹ Hãmri nê mẽ inhmã ma xàj ixàpkur kêt ryy nê. Hãmri nhũm Pawre tee ri ja hã mẽ ixpumu nê pàr nhõ xwỳnh wa kãm kapêr nê wa kãm:

—Kwa na pa pre tee ri Kret kãm man mẽ pamôr nê war amã ixkapêr. Kop apu mũtar mãn mẽ kuri arĩ ri mẽ hkôt mẽ papa ronhỹx pu mẽ pajamakêtkati nê paxãmnhĩx ri papa. Tã nhỹx pu mẽ ri mẽ hikukrêxja gôx kãm rênh par kêt nê. ²² Nom kwa kêr ka mẽ tee ri amnhĩ kukamã ajamaxpêr kêt nê. Kot puj mẽ pahtô pahtyk kêt nê. Æm pàrja pix koja axà nê hapêx. ²³ Ixpê Tĩrtũm krajê hõ na pa. Na pa hte kãm tanhmã amnhĩ nhĩpêx to ho ri ixpa. Jakamã na pre kamàt ja kamã ixwỳr kapêr o wrỳk xwỳnhjê hõ mẽ nhũm ixwỳr wrỳ nê inhmã awjarê ²⁴ nê inhmã: “Pa Pawre? Kwa tee ri amnhĩ kukamã ajamaxpêr o amã ma hkêt nê. Kot kaj akã hkĩnh pê ma Itar kamã Rõm wỳr mõi nê põi nê pahi maati Sesti pumu nê kãm amnhĩ jarê. Jakamã koja Tĩrtũm akôt mẽ mõi xwỳnh piitã omunh mex nê ka mẽ atõ tanhmã amnhĩ to hkêt nê.” Anê.

²⁵ —Æ kot inhmã kapêr anhỹr jakamã kwa mẽ amnhĩ to htỳx nê tee ri amnhĩ kukamã ajamaxpêr kêt nê. Tĩrtũm kapêr o wrỳk xwỳnh

kot inhmã ujarênh xà hkôt koja Tĩrtũm ã mẽ panhĩpêx anê. Ixte ja hã omunh mex kênã. ²⁶ Koja xep kôkja nhỹri gô hipôk ã pàr krakrak pa. Nom mẽ papajaja kot puj mẽ pahkã hkĩnh pê hwỳr pahpôx pa. Anê.

²⁷ Tã pa mẽ mõi nê ã inhmôr anhỹrja ã ixtã semãn axkrut nê ra gô rax pê Ariax kôt axà. Kamàt kãm hkôt axà nhũm kôkja arĩ pàr o apêr tỳx rãhã ho mõi. Hãmri nhũm kôt ã kamàt nhũm pàr o mrrar xwỳnhja ra pàr kot pykahti grã htêp ã hkamnhĩx. ²⁸ Jakamã nhũm mẽ gô xupỳm pumunh xà ho gô pumu nhũm upỳm kêp 36 met. Hãmri nhũm hã ahtũmre nê axte omu nhũm ra hpãnhã kêp 27 met pix. Jao ra pàr kot gô kokwe htêp o mõi ã omu. ²⁹ Hãmri nê kot kên kuranh nê hã pikrakrak pymaj katê rũm ho htỳx xà ho 4 nê gôx kãm kurê nhũm arĩ ajêt. Hãmri nhũm mẽ tokyx kãm arĩgro hprãm o arĩgro mã nojarêt o hkrĩ. ³⁰ Hãmri nhũm pàr kãm mẽ àpênh xwỳnhjaja tanhmã hamaxpêr to nê hêx rom pàr krare ho wrỳk o tẽ. Mẽ kot mẽ ixrer nê ahte xarmã mõi nê rêr nê tokyx gô hipôk wỳr hpôx kaxyw. No ãm hêx rom te mẽ kot axte pàr krã rũm ho htỳx xà hõ mênh kaxyw pyrãk o amnhĩ nhĩpêx nê kaxyw ho wrỳk o tẽ. ³¹ Nom nhũm Pawre mẽ hamaxpêr ã mẽ omu hãmri nê pôristi mẽ mẽ hkrãhtũm mã mẽ harê nê mẽ kãm:

—Kwa koja mũjjaja mẽ pare nê ahte pàr krare kamã xarmã mõi nê ka mẽ apikaprãr pa kãm ga. Anê.

³² Hãmri nhũm mẽ tee ri kuma nê mẽ hwỳr hprôt nê mẽ kêp pàr krare pê hkaxpre xà jakã nhũm gôx kãm tẽm nê ma gô hkôt hkaprỳn mõi.

³³ Tã hãmri nhũm ra myt kator o mõi nhũm Pawre akupỳm mẽ piitã mẽ ho mẽ hamaxpêr o hihtỳx kaxyw mẽ kãm:

—Kwa na ka mẽ tee ri amnhĩ kukamã ajamaxpêr o akaprĩ nê axàpkur kêt o atã semãn axkrut.

³⁴ E pu mē mēmoj krē nē ho amnhī xihťýx. Kot puj mē pahtō pahtyk kēt nē. Ām hāmri na pa mē amā ixkapēr. Anē.

³⁵ Hāmri nē mēmoj py nē mē noo mā Tirtūm mā harē nē hkur o xa ³⁶ nhūm mē ja hā omunh xā hkôt akupŷm tām hamaxpēr o mō. Hāmri nē amnhīm mēō hkwŷ jamŷ nē kumē kuku. ³⁷ Pār kām mē inhmōr xwŷnhjaja na pa prem ixpē 276. ³⁸ Tā pa mē ra ixāpkur pa. Hāmri nē pār kaxkrit kaxyw mē apkur xā hā mēmoj y jakrēxja gōx kām hkapīr pa.

Pār mē kēp pikrakrak ā harēnh

³⁹ Tā nhūm ra myt kator mex nē nhūm mē amnhī kukamā gō hipōk pumu nē xapēn mā:

—Kwa nhŷ pika na mŷj wehe? Anē.

Hāmri nē nhŷri hakàx ā amnhīm nōr xā mex pumu nē hwŷr pār o mōr kaxyw hā xapēn ma. ⁴⁰ Hāmri nē kaxyw pār o htŷx xā jakā nhūm axrē nē gōx kām rôrōk pa. Nē pī ho pār o juk xā nhō xē xāja nhūm mē määñēn krāhta. Hāmri nē akupŷm mrrar xā hā kupēxē nhō nhūm kōk ho hikot nē ma gō jakàx wŷr o mō. ⁴¹ Nom nhūm pār kormā hakàx pē awry hā mōr ri amnhī to kokwe kura nē pyka nhīmōk ā nō nhūm mē tee ri kot hkaxàr nē akupŷm gō xupŷm mā mēnh kaxyw. Nom nhūm gō kot pār nhīxō htak tŷx kurē nhūm mē ixpē pikrakrak par o mō. ⁴² Jakamā nhūm pōristijaja tee ri omu hāmri nē ra mē kēp prēsŷē nhūmex kaxyw. Mē kot gōx kām rôrōk nē gō hipōk wŷr hpa ho nana nē mē kēp pikunor pymaj kot mē himex kaxyw. ⁴³ Nom nhūm mē hkrāhtūmja kām Pawre pīr prām kēt jakamā ja nē mē hkurē nē mē inhmā:

—E mē ate apa ho gō rēnh mex xwŷnhjaja. Akumrēx mra nē mrō nē ho nana ho mra nē rē. ⁴⁴ No mē ate apa ho nana punuj xwŷnhjaja

kēr ka mē tapti rŷ pār kukrēx ō mŷ nē hā ajēt nē hā ma mōn rē. Anē.

Hāmri pa mē ā amnhī nhūpēx anē nē ixpiitā ixkà hkīnh pē ixrēr pa.

28

Gō hipōk pē Maw kamā mē pa hā mē harēnh

Makre 16,17-18

¹ Tā pa mē ixpiitā ixkà hkīnh pē ixrēr pa. Nhūm gō hipōk ā mē pa xwŷnhjaja mē inhmā gō hipōk nhīxi jarē nhūm xep kēp Maw. ² Nhūm Maw nhō xwŷnhjaja mē ixto mex nē. Nhūm axte na wrŷk rax nē nhūm kry htŷx kumrēx nhūm mē ixkamā ukapīr nē mē inhmā kuto nē mē inhmā kapēr mex nē.

³ Hāmri nhūm Pawre kuwy kaxyw ri pī kawrà ho mra nē kuwy hwŷr o tē nē hā haxwŷr o xa. Hāmri nhūm kagā xoprē ō wēnēn xihťýxja kuwy kagro pymaj pī rūm kato nē ĩhkra hā kunha nē hā àpēr o ajēt. ⁴⁻⁵ Hāmri nhūm Pawre omu nē amnhī nē ho apē nē kuwy kamā kumē nhūm kamā tēm nē xēt pa. Hāmri nhūm gō hipōk nhō xwŷnhjaja tee ri ja hā omu nē xapēn mā:

—Kwa ga mēmyti mŷj pumu. Mān kēp mē hpar o pa xwŷnh na. Hā na kagā ō wēnēn xihťýxta kunha. Nā koja ty nē rī amnhī pumu. Ra hkà hkīnh pē gō rūm mē pahwŷr rēr tā koja tā ty kām ga. Anē.

⁶ Hāmri nhūm mē tee ri kot tanhmā amnhī to hā hkamnhīx nē hamār o kuhē. ā htŷx nē ĩhkra hikot rŷ htyk kurē kumrēx ā hkamnhīx tā nhūm tanhmā amnhī kamā hamak to hkēt nē. Ām htŷx ri hkīnh nē kapēr nē hpikunhar o ri mra. Hāmri nhūm mē tee ri omu nē xapēn mā:

—Kwa tanhmā kot amnhī tore hā. Kēp mē hpar o pa xwŷnh kēt. Mān kēp kaxkwa kamā mēpahpāmŷē hō nà? Hā na kagā kunha nhūm tanhī to hkēt nē. Anē.

⁷ Nhūm gō hipōk ā mē ō pahĩhti pē Puptija. Ōrkwŷ hā jawŷ jakamā

nhũm amnhĩ kôt mẽ ixwỳ pa mẽ ma hkôt mō nē kuri hkôt ixpa ho ixtā apkati axkrunēpxi nhũm mẽ ixtō mex nē. ⁸ Nhũm ra Pupti nhĩpēêxà kēp à nē nō. Kà kagro htỳx nē haôk. Hāmri nhũm Pawre hwỳr tē nē omu nē hā ìhkra xi nē ho Tirtũm wỳ nhũm akupỳm ho mex kurē kumrēx. ⁹ Hāmri nhũm gô hipôk nhō xwỳnhja harēnh ma nē Pawre hwỳr mẽ à xwỳnh piitā o mra nhũm mẽ omu nē Tirtũm nhỹ hā akupỳm mẽ ho mex pa. ¹⁰⁻¹¹ Hāmri nhũm gô hipôk nhō xwỳnhjaja mẽ ixtō mex rax nē.

Pawre axte Rôm wỳr nojarēt ã harēnh

Rômãn 1.10-12, 15.30-32

Tā pa mẽ gô hipôôta kamā ixpa hā mytwrỳ axkrunēpxi. Hāmri nhũm kôk xàpēr tỳxta hapēx pa mẽ axte inhnojarēt nē ma mō. Pār ò kamā hpānhā mō. Aresānrir rũm pàrja pa mẽ hpānhā kamā mō. Mē kot kām “sānti pihpo” anhỹr xwỳnhja kamā. Na pre gô hipôk kamā haxwỳja kôk xàpēr tỳx hapēx jamār xa hā hikwỳ htā ra axte nojarēt. Hāmri nhũm gô hipôk nhō xwỳnhja ma mẽ inhmōr xà hā mẽ inhmā mẽ ixàpkur xà hkwỳ nhōr rax nē. Hāmri pa mẽ pār wỳr inhgjēx pa nē ma kamā mō. ¹² Mōō nē Sirakus wỳr pôj nē hā pār xi. Hāmri nē krĩa kamā mẽ ixtā apkati axkrunēpxi nē axte mō. ¹³ Mōō hāmri nē Rekre hwỳr pôj nē hā pār xi. Hāmri nē kamā mẽ ixtā apkati. Nhũm ra kahpa hkôt kôkja kawax pē àpēr mex jakamā pa mẽ ma hkôt mō. Nē mẽ ixtā apkati axkrut nē Potew wỳr pôj nē hā pār xi. ¹⁴ Hāmri nē pār rũm ijapôj nē krĩa kamā Jejus kôt mẽ ixtō nē htōx kwỳjē pumu nhũm mẽ amnhĩ wỳr mẽ ixwỳ. Pa mẽ ma mẽ hkôt mra nē mẽ hkôt ri ixpa hā ixtā ù semān. Hāmri nē ma Rôm wỳr hpānhā ixpar o mō. ¹⁵ Hāmri nē kormā amỳm inhmōr ri nhũm Rôm kām Jejus kôt mẽ ixtō nē ixtōxjaja mẽ ijarēnh ma nē man

mẽ ixkutā mra. Ma krĩa pē Prasxi Apja mẽ “Wēn Pijakrunēpxi” anhỹr xwỳnh jarēnhja wa hwỳr mẽ ixkutā mra. Hāmri pa mẽ axpēn kaxpa nhũm Pawre mẽ omu nē hkĩnh nē. Nē mẽ hā Tirtũm mā amnhĩ jarē nē kām:

—Pa Tirtũm? Nà ãm hāmri na ka mẽ ixkutā jajē rē. Na pa mẽ omu nē ixkĩnh nē. Nà amex o amex Tirtũm. Anē.

¹⁶ Hāmri pa mẽ ma mẽ hkôt Rôm wỳr mō nē pôj. Jatā Itar kām Rôm wỳr pôj. Hāmri nhũm pôristi krāhtũm Pawre mē:

—E kot paj mẽ haggēnh xà kamā ajaxār kēt nē. Kot kaj amā nhỹri ixkre kamā apa hprām nē mamrĩ kamā apa. Nom koja pôristi hō akôt pa ho pa.

Anhỹr jakamā nhũm nhỹri ixkre kamā pahihtti Sesti kot mar kaxyw kamā hamak o pa.

Pawre kot Rôm kamā tanhmā amnhĩ nhĩpēx to hā harēnh

Atre 17.5-6

¹⁷ Tā nhũm Pawre Rôm kamā hā apkati axkrunēpxi nē amnhĩ wỳr Ijaew xàptār tũmrejē hwỳ nhũm mẽ hā akuprō nhũm mẽ kām amnhĩ jarē nē mẽ kām:

—E ixkwỳjaja. Pa mẽ amā amnhĩ jarē ka mẽ inhma. Nà na pa pre mẽ panhīgētjē kapēr nhĩrôp tanhmā ixām to hkēt nē rỳ ixte tanhmā mẽ pahkwỳjē hō hto hkēt tā nhũm mẽ pahkwỳjaja amarĩ ixpynē. Jerujarē kamā ixpynē nē Rôm nhō xwỳnhjē nhĩhkram ijaxà. ¹⁸ Hāmri nhũm mẽ ixte amnhĩ nhĩpēx ã ixkukja nē tee ri mẽ kot mẽmoj mỳrapē ixpĩr kaxyw tanhmā ixkukjēr to kaprỳ. Jakamā nhũm mẽ kām ixkator prām nē. ¹⁹ Nom nhũm mẽ pahkwỳjaja kām ja mex kēt jakamā pa pre jar pahi maati Sesti kot ixte kām amnhĩ jarēnh ã inhmar kaxyw amnhĩm harē nē man hwỳr mō. Kot paj tanhmā kām mẽ pahkwỳjē ho ixkapēr punuj to hkēt nē. ãm

ixte amnhĩ tã tanhmã mar to hpix kaxyw na pa hwÿr mō.

²⁰ —Tã pa amnhĩ wÿr mẽ awÿ. Ixte mẽ amã amnhĩ jarēnh kaxyw. Mẽ pahkaprĩ xwÿnhhta. Mẽ pahte kormã kamã pajamak o papa xwÿnh Jejusta. Ām ixte amnhĩ kaxyw hkōt ijamaxpēr pix mÿrapē na prem ã kàx o ixkaxpre anē. Anē.

²¹ Hāmri nhũm mẽ kuma nē kām: —Nà jar tanhmã ajarēnh kute hkēt. Na pre Jutej kamã mẽ pahkwÿjaja tanhmã ajarēnh to hã kagã nē mẽ ixwÿr mēnh kēt nē. Nē ham mẽ kurūm mẽ hpōx xwÿnhjaja na prem tanhmã mẽ inhmã ajarēnh to hkēt nē. ²² No na xep hte pyka piitã hkōt mẽ kām mẽ ate Jejus kōt amnhĩ xunhwÿr xwÿnhjē kurē nē. Na pa pre mẽ ajarēnh ma nē mẽ inhmã axujarēnh mar prām nē. Anē.

²³ Hāmri nhũm mẽ kot mar kaxyw arĩgro hta.

Tã nhũm mẽ kot arĩgro hyr kato nhũm mẽ Pawre nhōrkwÿ hwÿr pikuprōnh rax nē nhũm mẽ kām awjarē. Mẽ kām ujarēnh ry nē. Nē ho kamāt. Nē mẽ kām:

—Nà mẽ pahte amnhĩ wÿr kamã pajamak o papa xwÿnh Jejusta. Kot kaj mẽ atō amnhĩ kaxyw hkōt ajamaxpēr nē hkōt amnhĩ xām nhũm Tĩrtūm ja hã apumu nē ato hkra. Anē.

Nhũm pre ã mẽ kām kapēr anē. Nē finat Mojes kot Tĩrtūm nhÿ hã Jejus kukamã tanhmã hã kagã htoja nhũm mẽ kām harē. Nē Tĩrtūm nhÿ hã kapēr jarēnh o mẽ pa xwÿnhjaja kot tanhmã hã kagã htoja nhũm mẽ kām harē. ²⁴ Hāmri nhũm mẽ hkwÿjaja kuma nē hkōt hamaxpēr nē amnhĩ kaxyw Jejus kōt hamaxpēr nē hkōt amnhĩ xunhwÿ. No nhũm mẽ hkwÿjaja kuma nē ãm kuma nē kām axte mar prām kēt nē.

²⁵⁻²⁹ Jakamã kànhmã kuhē nē nojarēt nhũm Pawre mẽ kām:

—Nà amnepēm na pre Tĩrtūm finat Ijaisti mã tanhmã kapēr to. ŷ hã kot mẽ panhīgētjē mã tanhmã kapēr jarēnh to kaxyw. Tĩrtūm Karō nhÿ hã kot mẽ kām kapēr nē tanhmã mẽ harēnh to kaxyw. Te Tĩrtūm tām mẽ kām kapēr pyrāk mẽ kām kapēr. Nē ãm hāmri tanhmã mẽ pahkwÿjē jarēnh to. Na pre mẽ kām:

E Ijaisti. Kēr ka ma akwÿjē hkōt ri mẽ kām tanhmã ixkapēr jarēnh to ho ri apa.

Nē mẽ kām: “Kot kaj mẽ ajamak o axumar tÿx tã aprĩ hã ixkapēr mar kēt nē.

Nē mẽ ano ho arīt tÿx tã aprĩ hã ixte amnhĩ nhĩpēx ã ixpumunh kēt nē.

Mẽ amã ixkapēr mar prām kēt jakamã te mẽ ate mar pymaj amnhĩ jamak pro pyrāk o amnhĩ nhĩpēx o ri apa.

Nē mẽ amã ixte amnhĩ nhĩpēx ã ixpumunh prām kēt jakamã te mẽ ate ixte amnhĩ nhĩpēx ã ixpumunh pymaj te mẽ anomnhōt pyrāk o amnhĩ nhĩpēx o ri apa.

Jao amnhĩ kaxyw ixkōt ajamaxpēr kēt nē.

Kop mẽ amã ixkapēr mar prām ronhÿx ka mẽ aprĩ hã inhmar tÿx nē.

Nē aprĩ hã ixte amnhĩ nhĩpēx ã ixpumunh mex nē.

Jao amnhĩ tomnuj kaga hpa nē ixkōt amnhĩ xunhwÿ.

Pa ja hã mẽ apumu nē mẽ ato mex nē.

Tã ka mẽ ã amnhĩ nhĩpēx anhÿr kēt nē.” Anhÿr o kēr ka mẽ kām ixkapēr jarēnh o ri mẽ hkōt apa Ijaisti. Anē.

Na pre ã Tĩrtūm mẽ panhīgētjē kaxyw Ijaisti mã kapēr anē nhũm ô ri mẽ kām ujarēnh o pa nē mẽ pamã hã kagã. Jakamã kwa mẽ okora. Kēr ka mẽ jajē pyrã nē ã amnhĩ nhĩpēx anhÿr hkēt nē. Kwa mẽ inhma nē inhmar tÿx nē. Ijaew

kêt xwÿnhjaja kot kapër marja na ra Tirtûm kãm hprãm nê. Jakamã koja mẽ hwÿr mẽ kot kapër jarênh o mẽ pa xwÿnh kwÿjê rê nhũm mẽ hkôt mẽ kãm ujarênh o pa nhũm mẽ kuma nê mẽ akurom kãm mar prãm nê. Anê.

Hãmri nhũm mẽ kuma nê hapôx pa nê ma akupÿm expên mã tanhmã kapër jarênh to ho mra.
³⁰ Hãmri nhũm pahi maati Sesti tokyx amnhĩ wÿr Pawre hwÿ nê tanhmã mar to hkêt nhũm ôrkwÿ kamã kêp prês nê pa ho hã amgrã axkrut. Nê tãm ôrkwÿ pãnhã mẽ kãm amnhĩre. Nhũm pre krĩ nhõ xwÿnhjaja ohtô nê hwÿr mra nhũm amnhĩ wÿr mẽ omu nê hkĩnh nê.

³¹ Na pre hte amnhĩ wÿr mẽ kuwÿ nê mẽ kãm Tirtûm kapër jarênh o hkrĩ. Mẽ kot Tirtûm Kra Pahihti Jejus Kris kôt amnhĩ xunhwÿr nhũm Tirtûm kot ja hã mẽ omunh nê amnhĩ katut kôt mẽ kot amnhĩ tomnuj rênh par nê mẽ ho hkra hã mẽ kãm ujarênh o hkrĩ. Nê mẽ kot hkôt amnhĩ xunhwÿr xwÿnhjê jahkre. Tanhmã mẽ kot Jejus kôt amnhĩ nhĩpêx mex to ho pa hã mẽ kãm karõ ho hkrĩ. Hãmri nhũm mēhõ ja nê tanhmã kãm kapër to hkêt nê.

Tã ãm ja pix Teopre. Ixpê Rukre na pa awÿr kagàja nhĩpêx nê kumê. Nê kamã amã tanhmã mẽ pahkwÿjê jarênh to. Tã ãm ja pix na hapêx.

Römân Pawre kot Rôm kãm Jejus kôt hkwyjê hwÿr kagà nê mênh

Kagà ja na pre Pawre hipêx. Kêp Jejus nhÿ hã mē ahkre ho pa xwÿnh na pre. Na pre hte mry kà ho ixkre nhÿpêx nê mē kãm ho wēnê ho mē hkôt pa pē mē piitã mē kãm Tirtûm kapêr jarênh o pa. Tã krî pē Rôm kamã mē kot Jejus kôt amnhÿ xunhwÿr xwÿnhjê hwÿr kagàja nhÿpêx nê mē hwÿr kumê. Kormã ma mē hwÿr mör nê mē omunh kêt ri.

Nê Jejus kêp Tirtûm mã tanhmã mē pajarênh to xwÿnh ã nhÿm pre mē kãm harê nê hã kagà. Jejus kot mē pahte amnhÿ tomnuj pãnhã mē panê htyk jakamã na hte Tirtûm mē pahte hkôt amnhÿ xunhwÿr ã mē pahpumu nê Jejus kukwak ri mē pahte amnhÿ to mex xwÿnh ã mē pajarê.

Nê Tirtûm Karô nhÿ hã mē kot amnhÿ nhÿpêx nyw nê hamaxpêr nyw o pa hã nhÿm Pawre mē kãm karô nê hã kagà. Æ na pre mē kãm mēmoj jarê nê hã kagà anê. Nê hã kagà ho:

¹ Pa Rôm nhö xwÿnhjaja? Xà mē amex? E ot pa mē awÿr kagà nhÿpêx nê kumê. Tirtûm na pre mē akaxyw ixãm. Ixte mē amã Jejus kot tanhmã mē panê amnhÿ nhÿpêx to hã harênh o ri ixpa kaxyw. Na pre ixpê Pawre hã ixpumu nê ixãm. Jakamã na pa ã mē awÿr kagà nhÿpêx nê mênh anê. Ixte Jejus nhÿ hã mē ahkre ho ri ixpa xwÿnh na pa. Na pa hte kãm tanhmã amnhÿ nhÿpêx to ho ri ixpa. Tã ã mē awÿr kagà nhÿpêx nê mênh anê.

² Amnepê m na pre Tirtûm nhÿ hã kapêr jarênh o ri mē pa xwÿnhjaja mē pakukamã mē panhÿgêttjê mã Jejus kukamã tanhmã harênh to ho

ri pa. Nê mē kãm kapêr jarênh o mē hkôt pa nê mē kãm:

—Koja nhÿrmã Tirtûm mē pah-piitã mē panê tanhmã kot amnhÿ nhÿpêx to mã xwÿnh mē nhÿm mē hpiitã hprÿ hã harênh ma nê omu. Anê.

Nhÿm prem ã Jejus kukamã mē kãm harênh anhÿr o ri mē hkôt pa. Tirtûm kapêr ã kagà htûm kamã harênh xà hkôt tanhmã mē kãm harênh to. ³ Tirtûm Kra Jejus Krisja na pre mē kãm harênh o ri mē hkôt pa. Mē panhö Pahihti na. Kêp Tirtûm Kra htã na pre mē pahpyrà nê ï ho amnhÿ nhÿpêx nê wrÿ nê katorxà nhöxà hkre rûm kato. Jakamã kêp Tirtûm Kra pix kêt mãânên katorxà hkôt kêp higêt Tawi hkanrêhã htãmnhwÿ.

⁴ Kêp Tirtûm Kra htã nhÿm prem axtem nê tanhmã hamaxpêr to nê kupÿ. Nom nhÿm Tirtûm kêp amnhÿ Kra hã akupÿm ho htÿr. Jakamã na pu htem harênh ma nê kãm pajamaxpêr o:

—Jesús kêp Tirtûm Kraa. Mē kot kêp hpÿr tã nhÿm akupÿm ho htÿr. Jakamã nhÿm Tirtûm pyrà nê hihtÿx o hihtÿx. Anê.

⁵ Tã ã Tirtûm kot Kra nhÿpêx anhÿrja ri na mãânên pa ixto mex nê mē akaxyw ixãm. Jakamã na pa hte ma krî piitã hkôt mē kãm tanhmã Jejus Kris jarênh to ho ri mē hkôt ixpa. Ijaew mã nê Ijaew kêt xwÿnhjê mã. Mē kot harênh mar nê amnhÿ kaxyw kãm hamaxpêr nê kapêr kôt pix mã amnhÿ nhÿpêx mex kaxyw. ⁶⁻⁷ Nê mē apê Rôm nhö xwÿnhjaja. Na ka prem Jejus kôt amnhÿ xunhwÿ nhÿm Tirtûm ja hã mē apumu nê mē ato hkra nê mē apê Jejus mē wa hkwy hã mē ajarê. Mē ate hkôt amnhÿ nhÿpêx kaxyw nhÿm pre ã mē ajarênh anê.

Tã ot pa kagà nhÿpêx nê mē awÿr mênh kaxyw. Tirtûm kot mē ato hkra xwÿnhjê hwÿr. Tirtûm kãm mē ajapêê.

Na pa hte mẽ ato mẽ panhîpêêxã maati Tîrtũm mẽ Pahihti Jejus Kris wa hwÿr rãhã ri ixa. Nê mẽ ato wa hwÿr o:

—Kwa kêr ka wa Rôm kamã war akrajê pumunh mex nê mẽ kutã anojarêt rãhã nê. Kê mẽ hamakêtkati nê amnhîx ri tanhmã amnhî nhîpêx to ho ri pa. Anê.

Pawre kot Rôm nhõ xwÿnhjê pumunh prãm ã amnhî jarênh

Atre 28.15-16; Rômân 15.22-29

⁸ Nê na ka prem amnhî kaxyw Jejus Kris mã ajamaxpêr nê hkôt amnhî xunhwÿ nhũm krî piitã hkôt mẽ pa xwÿnhjaja mẽ ajarênh ma. Nê mẽ ate amnhî nhîpêx nyw ã mẽ ajarênh ma nê axpên mã tanhmã mẽ ajarênh to ho pa. Nê mẽ ajarênh o:

—Kwa na xep Rôm kãm mẽ hkwÿjaja amnhî kaxyw Jejus mã hamaxpêr tÿx nê. Nê hkôt amnhî nhîpêx mex rãhã ho ri pa. Anê.

Pa ã mẽ kot mẽ ajarênh anhÿrja ma nê ixkînh tÿx nê. Nê Tîrtũm mã mẽ anhÿ hã ixkînh ã amnhî jarênh o ri ixa. ⁹ Na pa hte mẽ ato hwÿr rãhã ho ri ixa. Nê nhÿri mẽ kãm Tîrtũm Kra Jejus kapêr jarênh o ri ixa nê mẽ amã ijamaxpêr nê mẽ ato kuwÿ. Nê tanhmã Tîrtũm mã amnhî nhîpêx to ho ixa pê mẽ amã ijamaxpêr nê mẽ ato kuwÿ. Tîrtũm kot ja hã ixpumunh mex. ¹⁰ Na pa hte tanhmã kãm amnhî jarênh to kaxyw nê mẽ akaxyw amnhî to kuma nê kãm:

—Pa Tîrtũm? Na pa ra inhmã ma Rôm wÿr inhmõr nê kamã akôt ixkwÿjê pumunh prãm tÿx kumrêx. Xà kot ka tokyx mẽ hwÿr inhmê nà? Anê.

¹¹ Na pa ra inhmã mẽ awÿr inhmõr prãm tÿx nê. Na pre Tîrtũm Karõ tanhmã ixkrã hto pa ÿ hã kapêr ã kagã mar tÿx nê. Nê hkôt mẽmoj mex pumunh rax nê. Tã ra inhmã ma mẽ awÿr inhmõr nê amnhî xô ri mẽ amã harênh prãm

nê. Mẽ ate inhmar nê aprî hã Jejus Kris kôt amnhî xunhwÿr tÿx nê hkôt amnhî nhîpêx mex rãhã ho ri apa kaxyw. ¹² Kot paj nhÿrmã ma mẽ awÿr mõi. Nê mẽ awÿr pøj pu mẽ axpên pumu nê pahkînh nê. Mẽ pahte amnhî kaxyw Jejus Kris mã pajamaxpêr mex o papa hã axpên pumu nê pahkînh nê. Nê mẽ pahpiitã hkôt amnhî nhîpêx mex o ri papa.

¹³ E ixkwÿjaja. Xatã ixte mẽ awÿr ixkrã htã nhũm mẽmoj xatã tanhmã ixpê amtàr to pa kormã jar ixa. Nom kot paj nhÿrmã ma mẽ awÿr mõi. Mẽ ate ja hã inhmar kaxyw na pa ã Tîrtũm noo mã mẽ amã amnhî jarênh anê. Na pa pre krî hkwÿ kamã mẽ apê Ijaew kêt xwÿnh kwÿjê hwÿr ixa. Nê mẽ kãm Jejus kot mẽ panê tanhmã amnhî nhîpêx to hã harênh o ri mẽ hkôt ixa. Nhũm mẽ hkwÿjaja inhma nê hkôt amnhî xunhwÿ. Ja kaxyw na pa inhmã ma mẽ anhõ krî hwÿr inhmõr prãm nê. Mẽ akwÿjaja kot ixkapêr mar nê mẽ apyrã nê Jejus kôt amnhî xunhwÿr kaxyw. ¹⁴ Na pre ra Tîrtũm ixte kapêr o mẽ ajahkre ho ixa kaxyw mẽ piitã mẽ kaxyw ixãm. Tanhmã ri mẽ kute xwÿnhjê kaxyw. Mẽ kãm ma ho mẽ pa xwÿnhjê mẽ mẽ kãm ma hkêt o mẽ pa xwÿnhjê mã. Nê mẽ kot kagã pumunh xwÿnhjê mẽ mẽ kot kagã pumunh kêt xwÿnhjê mã. Mẽ piitã mẽ kaxyw na pre ixãm. Ixte mẽ kãm Jejus kot tanhmã mẽ panê amnhî nhîpêx to hã harênh o ri mẽ hkôt ixa kaxyw. ¹⁵ Jakamã na pa ra inhmã mẽ apê Rôm nhõ xwÿnhjê hwÿr inhmõr prãm nê. Ixte mẽ anhõ krî kamã mẽ piitã mẽ mẽ kãm ja jarênh o ri ixa nhũm mẽ kot inhmar nê mẽ pahpyrã nê Jejus kôt amnhî xunhwÿr kaxyw.

Jejus kot mẽ panê htyk ã harênh Sikũn Ximotre 1.6-12

16 Nê Jejus kot mē panê htyk ã harênhja ãm hãmri na. Harênhja mex o mex. Na htem kuma nê kãm hamaxpêr nê amnhĩ kaxyw hkôt hamaxpêr nê hkôt amnhĩ xunhwý. Hãmri nhũm Tirtũm ja hã mē omu nê mē nê mē kot amnhĩ tomnuj o hapêx pa nê mē ho hkra. Nom mē ixpê Ijaew nhõ xwýnhjê pix kêt. Mããñên mē apê Ijaew kêt xwýnhjaja nhũm kãm mē pajapê ho axpên pyrãk. Jakamã na pu htem Jejus kôt amnhĩ xunhwý nhũm Tirtũm ja hã mē pahpumu nê mē pahto hkra. Ja kaxyw àhpumunh tỳx o àhpumunh tỳx. 17 ãm mē kot amnhĩ kaxyw Jejus mã hamaxpêr xwýnh pixjaja na hte mē ho hkra. Kapêr ã kagà htũm kot tanhmã ja jarênh to nê harênh kot:

Na hte Tirtũm mē kot amnhĩ kaxyw Kra mã hamaxpêr ã mē omunh xà hkôt mē ho hkra nhũm mē amnhĩ kaxyw kãm hamaxpêr rãhã ho pa. Jao ra ô ri tãm amnhĩ nhĩpêx o pa. Anê.

Mê pahpiitã mē pahte amnhĩ tomnuj xwýnh ã mē pajarênh

Atre 14.15, 17.22-29; Apokarip 9.20-21

18 Nê mē kot amnhĩ tomnuj o ri mē pa xwýnhjaja na hte Tirtũm axtem tanhmã mē harênh to. Na htem Tirtũm kapêr ma nom amnhĩ tomnuj gryk ã ãm kuma. Nê mē hkwyjaja kot kapêr mar pymaj kapêr õ ho mē kêp ãmnar rãhã ho ri pa nhũm Tirtũm ja hã mē omu nhũm ja kêp omnuj nê. 19-20 Te mē kot Tirtũm kot amnhĩ nhĩpêx ã omunh kêt pyrãk o amnhĩ nhĩpêx tã mē kot omunh mex. Tirtũm kot mēmoj to kator krax rũm ra kot mē pamã amnhĩ to amnhĩrit mex. Pu mē pano ho omunh kêt tã no ãm kot amnhĩ nhĩpêx kôt ra kêp Tirtũm ã omunh mex nê. Nê kêp mēmoj piitã ho kator xwýnh ã omunh mex nê. Nê mex o mex ã omu nê hihtỳx o hihtỳx hã omu. Tirtũm kot

amnhĩ nhĩpêx kot amnhĩrit mex nhũm mē kot omunh mex tã hkôt amnhĩ xunhwýr kêt nê. Nê axtem nê hamaxpêr o:

—Tk. Tirtũm kot inhmã amnhĩ to amnhĩritre hã kot pa kêt ri hkôt amnhĩ nhĩpêx. Kot pa inhno ho omu nê rĩ kormã hkôt amnhĩ nhĩpêx japêr. Anê.

Ra mē kot amnhĩ nhĩpêx ã omunh mex tã ri ã hamaxpêr anê. Jakamã nhũm Tirtũm tee ri ja hã mē omu nhũm ja kêp omnuj tỳx nê. 21 Mē kot amnhĩ nhĩpêx ã omunh mex tã amnhĩ kaxyw tanhmã kãm hamaxpêr hto hkêt. Rỳ arĩ hamaxpêr japêr nê kãm:

—Nà Tirtũm. ãm hãmri amex kumrêx. ãm amex o amex. Apê Tirtũm ã ãm apixi mex kumrêx na ka. ãm hãmri na ka hte mē ixto mex o apa.

Anhỳr o amnhĩ kaxyw kãm kapêr kêt nê. Nê ãm htỳx tanhmã hamaxpêr punuj to pix o ri pa. Te kamãt kô kamã ri mē pa xwýnhjê kot amnhĩ nhĩpêx pyrã nê mēmoj mex pumunh kêt nê.

22 Mē kot àhpumunh tỳx ã amnhĩ to jarkrar o ri pa htã no ãm te mē hkrã kanhĩn kêt nê mē hamaxpêr kêt pyrãk o amnhĩ nhĩpêx. 23 Jakamã na htem amnhĩm mēmo karõ nhĩpêx. Mēmo htyk mã xwýnhjê hõ karõ nhĩpêx. Tanhmãn panhĩ karõ rỳ mēmo mry karõ rỳ mēmo kuwênh karõ. Rỳ mēmo kagã karõ nhĩpêx. Hãmri nê ho õ sãnti nê te ri ho Tirtũm nhĩpêx pyrãk o hipêx. Jao hpar pê hkõn krã ho rôrõk nê amnhĩ to kuwý nê kãm amnhĩ jagrer pê kãm mex o mex ã harê. Tirtũmja sãnti rom htĩr o htĩr tã nhũm mē axtem nê sãnti gryk ã hkaga nê ã amnhĩ nhĩpêx o pa anê. 24 Jakamã nhũm tee ri ã mē kot amnhĩ nhĩpêx anhỳr ã mē omu nê amnhĩ pyrã nê mē hkaga nê ãm mē omu. Jakamã nhũm mē ãm amnhĩ krã hkôt tanhmã ri amnhĩ tomnuj to ho pa. Nê axpên kãm ri tanhmã

hpijaàm kêt to. Ǻ na htem htÿx ri amnhĩ tomnuj anhÿr o pa.

²⁵ Tirtũm kapërja Ǻm hāmri htǺ nhũm mẽ axtem nē te amnhĩ pum rēnh pyrāk o hipēx nē kām hamaxpēr kêt nē. Nē hpānhā ri mẽ hēx xwÿnhjē kapēr pix ma nhũm ja te mẽ kām mex pyrāk. Na htem Ǻ amnhĩ nhĩpēx anē hāmri nē axtem nē Tirtũm kot mẽmoj nhĩpēx pix parpē rōrōk nē amnhĩm mex o mex Ǻ harē. Nom kot hipēx xwÿnh Tirtũm parpē mǺn Ǻ amnhĩ nhĩpēx anhÿr kêt nē. Nom kot mẽmoj nhĩpēx xwÿnhnta mex o mex jakamǺ koja mẽ kot hkōt amnhĩ nhĩpēx xwÿnhjaja jajē rom kām mex o mex Ǻ harēnh tũm rāhā ho ri pa. ²⁶ No mẽ kot amnhĩ tomnuj xwÿnhjaja na hte Tirtũm amnhĩ pyrǺ nē mẽ hkaga nhũm mẽ htÿx amnhĩ krǺ hkōt ri tanhmǺ amnhĩ tomnuj to ho ri pa. Jao mẽni hkwyjaja axtem nē axpēn gryk Ǻ mjēn kaga nē axpēn nhĩō ho mjēn. ²⁷ Nhũm mẽmy hkwyjaja mǺānēn axtem nē amnhĩ kwjē my gryk Ǻ hprō kaga nē axpēn nhĩō ho hprō. Na htem Ǻ axpēn kamǺ hpijaàm kêt o pa anē. Mÿrapē koja mẽ Ǻ pix kām amnhĩ xǺ htÿx kamǺ hamak o pa. ²⁸ Na htem amnhĩ tomnuj gryk Ǻ Tirtũm mǺ hamaxpēr kêt nhũm tee ri amnhĩ tǺ mẽ omu nē hamaxpēr o:

—Mē kām amnhĩ tomnuj pix prām jakamǺ kwār mẽ mǺmrĩ Ǻ amnhĩ nhĩpēx anē. Kot paj axte ja nē tanhmǺ mẽ kām ixkapēr to hkēt nē. Anē.

JakamǺ nhũm mẽ arĩ htÿx ri amnhĩ krǺ hkōt tanhmǺ amnhĩ tomnuj to ho ri pa rāhā nē.

²⁹ Hāmri nē mẽmoj punuj pix mǺ hamaxpēr.

Nē kām amnhĩ mex pix prām mǺ hamaxpēr.

Nē kām axpēn tomnuj pix prām.

Nē mẽmoj tǺ axpēn kām gryk pix prām.

Nē mẽ kām axpēn par pix prām.

Nē mẽmoj tǺ ri kām axpēn mǺ àkjēr prām.

Nē mẽmoj tǺ kām axpēn mǺ hēx prām.

Nē kām axpēn kaxyw tanhmǺ hamaxpēr punuj to pix prām.

Nē kām tanhmǺ axpēn to kapēr punuj to pix prām.

³⁰ Nē kām mẽmoj tǺ axpēn to hēx pix prām.

Nē kām Tirtũm prām kêt o ri pa.

Nē mẽmoj tǺ axpēn mǺ àkjēr o ri pa.

Nē mẽmoj tǺ amnhĩ to jarkrar rāhā ho ri pa.

Nē tanhmǺ amnhĩ tomnuj to pix kukamǺ hamaxpēr. Nhũm mẽ katorxǺ nē mẽ hipēxǺ tee ri ja nē tanhmǺ mẽ kām kapēr to no nhũm mẽ mar kêt kumrēx.

³¹ Ǻ mẽ kot amnhĩ nhĩpēx anhÿr o ri mẽ pa xwÿnhjaja na hte Tirtũm kām mẽmoj mex nhũm mẽ kēp omnuj nē nhũm Tirtũm kēp mẽmoj omnuj nhũm mẽ kām mex nē. Nē axpēn mǺ mẽmoj tanhmǺ ho hǺ amnhĩ jarēnh tǺ ho anhÿr kêt nē. Nē axpēn kām ukaprĩ ho ri pa hkēt nē.

³² Tirtũm kapēr Ǻ kagǺ htũm kot tanhmǺ mẽ hkukamǺ mẽ harēnh to nē mẽ harēnh kot:

Ǻ mẽ kot amnhĩ nhĩpēx anhÿr o ri mẽ pa xwÿnhjaja koja mẽ nhÿrmǺ ty hāmri nē amnhĩ xǺ htÿx kamǺ hamak rāhā ho ri pa ho pa. Anē.

Nhũm mẽ kot amnhĩ tǺ ja mar tÿx tǺ aa amnhĩ tomnuj kaga hkēt nē. Arĩ Ǻ amnhĩ nhĩpēx anhÿr o pa rāhā nē. Nhũm mẽ hkwyjaja mẽ kot amnhĩ tomnuj Ǻ mẽ omu nē mẽ urāk nē Ǻ amnhĩ nhĩpēx anhÿr o ri mẽ hkōt pa nhũm mẽ amnhĩ pyrǺ nē mẽ omu nē hkĩnh nē. Na htem Ǻ amnhĩ nhĩpēx anhÿrja gryk Ǻ Tirtũm kaga nhũm tee ri amnhĩ tǺ mẽ omu nē amnhĩ pyrǺ nē mẽ hkaga nē Ǻm mẽ omu. JakamǺ nhũm mẽ amnhĩ tomnuj tÿx pix rāhā ho pa.

Mē kot amnhī tomnuj xwýnhjê hkukamã mē harēnh

Matēwre 7.1-5; Sikūn Tesarōn 1.6; Eprēw 9.27; Sikūn Pētre 2.4, 3.7; Jutre 6-14; Apokarip 6.15, 20.11

¹ Nē kot ka mē atō ã mē kot amnhī tomnuj anhÿr xwýnhjê kot amnhī nhīpēx ã mē harēnh ma nē ã ajamaxpēr anē nē ajamaxpēr o:

—Tk. Mē kot amnhī tomnuj pix o ri pa xwýnh kēnã. No pa na ã ixte amnhī nhīpēx anhÿr o ri ixpa hkēt. Mē kurom ixte tãm amnhī nhīpēx o ri ixpa xwýnh na pa.

Anhÿr o amnhī jarē. Kwa nã mē ã ajamaxpēr anhÿr kēt nē. Mē pajaxwýja na pu htem tōhã mē urāk nē tanhmã amnhī tomnuj to. Tã ka mē ã mē kot amnhī tomnuj ã mē harēnh anē nē te ka ate amnhī jarēnh pyrāk. ² Tirtūm kapēr ã kagã htūm kot mē kot amnhī tomnuj o ri mē pa xwýnhjê jarēnh kot:

Mē kot amnhī tomnuj mÿrapê koja mē nhÿrmã amnhī xã htÿx kamã hamak rãhã ho ri pa. Anē.

Ãm hãmri ã mē harēnh kot anhÿr. ³ Mãn ka mē atō tanhmã amnhī kukamã ajamaxpēr to nē ajamaxpēr o:

—Nã koja Tirtūm nhÿrmã amnhī nē kuwy hwÿr mē kot amnhī tomnuj xwýnhjê rē. No pa koja hwÿr inhmēnh kēt nē. Anē.

Kwa mē ã ajamaxpēr anhÿr kēt nē. Kot ka mē ã amnhī kukamã ajamaxpēr anhÿr tã tōhã mē urāk nē tanhmã amnhī tomnuj to. Jakamã koja Tirtūm mē urāk nē hã tanhmã mē ato. ⁴ Kot kaj mē atō tanhmã amnhī tomnuj to hãmri nē ãm ja hã amnhī pumu nē ajamaxpēr o:

—Ixte amnhī tomnuj xwýnh tã na hte Tirtūm ja hã ixpumu nē ãm ixpumu nē hã tanhmã ixto hkēt nē. Kēp mē ixkamã ukaprī xwýnh jakamã na hte gryk tokyx anhÿr kēt nē. Jakamã kot paj arī tanhmã amnhī tomnuj to ho ri ixpa nē aa

jam inhÿrer kēt nē. Tirtūm kot ja hã tanhmã ixtore kaxyw hã.

Anhÿr o ajamaxpēr. No ãm ja kot anhÿr kēt. Na hte Tirtūm kormã amnhī tã mē pajamã. Mē pahte amnhī tomnuj kaga nē hpãnhã hkôt amnhī xunhwÿr kaxyw na hte kormã amnhī tã mē pajamã. Jakamã na kormã tanhmã ate amnhī tomnuj tota ã tanhmã ato hkēt nē.

⁵ Mē akrã hihtÿx jakamã mē amã hkôt amnhī xunhwÿr prãm kēt. Na ka htem tanhmã amnhī tomnuj to pix kukamã ajamaxpēr o ri apa. Nē gaa nē ra anhÿr kumrēx. Nhūm Tirtūm tee ri ja hã mē apumu nhūm ja kēp omnuj tÿx o mō. Jakamã koja nhÿrmã tanhmã mē ajarēnh to nē gryk tÿx kãm tanhmã mē atomnuj tÿx to. ãm hãmri na hte mē pahte amnhī nhīpēx ã mē pahpumunh xã hkôt ahpÿnhã tanhmã mē panhīpēx to.

⁶ Koja nhÿrmã mē pahpiitã kormã mē pahÿr ri mē pahte amnhī nhīpēx ã mē pahpumunh xã hkôt tanhmã mē panhīpēx to. Mē kot amnhī to mex o ri mē pa xwýnhjaja nhūm mē ho mex nē. Nē mē kot amnhī tomnuj o ri mē pa xwýnhjaja nhūm mē homnuj nē. Koja nhÿrmã mē pahpiitã mē pahto hpimràatã ã mē panhīpēx anē. ⁷ Mē kot hkôt tãm ri amnhī nhīpēx o pa pé kãm Tirtūm kot amnhīm mē mex ã mē harēnh prãm xwýnhjaja koja nhÿrmã amnhīm mē mex ã mē harē. Hãmri nhūm mē kuri htÿr tūm nē hkīnh nē mex kumrēx nē pa ho pa. ⁸ Nom mē kot amnhī mã pix mã ri hamaxpēr o ri mē pa xwýnhjaja. Nē mē kot tanhmã amnhī tomnuj to gryk ã Tirtūm kapēr kaga xwýnhjaja koja kãm mē hkīnh kēt nē tanhmã mē homnuj tÿx to. ⁹ Mē kot amnhī tomnuj xwýnh piitã koja mē nhÿrmã amnhī xã htÿx kamã hamak rãhã nē pa ho pa. Ijaew kumrēxjaja nē hpãnhã Ijaew kēt xwýnhjaja nhūm mē amnhī xã htÿx

kamã hamak rãhã nê pa ho pa. Mê kot amnhĩ tomnuj tÿx o paja mÿrapê.

¹⁰ No kêt tãm mẽ kot amnhĩ nhĩpêx xwÿnhjaja koja Tirtũm mẽ ho mex rax rãhã ho pa ho pa. Nê amnhĩm mẽ kot amnhĩ to mex xwÿnhjê hã mẽ harê. Nê tanhmã mẽ ho mex to nhũm mẽ kamã amnhĩ kriet nê pa ho pa. Hamakêtkati nê hkĩnh nê àmnhix ri pa ho pa. Ijaew kwÿ kumrêxjaja nê mãânên Ijaew kêt xwÿnh kwÿjaja nhũm mẽ mex nê hamakêtkati nê hkĩnh nê àmnhix ri pa ho pa. ¹¹ Koja Tirtũm nhÿrmã ahpÿnhã mẽ pahte amnhĩ nhĩpêx ã mẽ pahpumunh xà hkôt tanhmã mẽ pajarênh to pê tanhmã mẽ panhĩpêx to. Mẽ ixpê Ijaewjaja nê mẽ apê Ijaew kêt xwÿnhjaja nhũm ã mẽ pahpiitã mẽ panhĩpêx anê.

¹² Amnepêm na pre finat Mojes mã tanhmã kapêr to nhũm kuma nê ô ri hã kagã hpa. Mẽ ixpê Ijaew ri na kapêr ã kagãja. Ra mẽ ixte mar tÿx jakamã koja mẽ ixtõ ra kapêr mar tÿx tã hkôt amnhĩ nhĩpêx kêt hãmri nhũm Tirtũm tee ri amnhĩ tã omu nê ã amnhĩ nhĩpêx anhÿrja mÿrapê nhÿrmã ma mẽ kot amnhĩ xà htÿx kamã hamak tũm xàta wÿr kumê. Kot kapêr mar tÿx tã hkôt amnhĩ nhĩpêx kêt mÿrapê nhũm ã hipêx anê. No kêt mẽ apê Ijaew kêt xwÿnhjaja mẽ ixkĩnhã mẽ ari Tirtũm kapêr ã kagã hkêt jakamã koja mẽ ate kapêr nhĩrõp mẽ akuhê hã mẽ apumunh kôt tanhmã mẽ anhĩpêx to hkêt nê. Koja hpãnhã mẽ ate tanhmã amnhĩ tomnuj to ho apa mÿrapê mẽ kot amnhĩ xà htÿx kamã hamak o pa tũm xàta wÿr mẽ arê.

¹³ Na hte mẽ kot kapêr mar ã mẽ omunh xà hkôt amnhĩm mẽ kot amnhĩ to mex xwÿnh ã mẽ harênh kêt nê. ãm mẽ kot kapêr kôt amnhĩ nhĩpêx ã mẽ omunh xà hkôt pix mã na hte amnhĩm mẽ kot amnhĩ to mex xwÿnh ã mẽ harê. ¹⁴ No mẽ hkwÿjaja kormã kot kapêr mar kêt tã te ra mẽ kot mar mex pyrãk o

amnhĩ nhĩpêx. Jao amnhĩ krã hkôt tãm ri amnhĩ nhĩpêx kurê kumrêx. Te kot Ijaew pyrã nê Tirtũm kapêr mar tÿx nê hkôt amnhĩ nhĩpêx o ri pata pyrãk. ¹⁵ Na htem amnhĩ krã hkôt tanhmã amnhĩ nhĩpêx mex to. Te Tirtũm kapêr kot mẽ hkrãm gjêx pyrãk o amnhĩ nhĩpêx o pa. Jakamã tee ri tanhmã amnhĩ tomnuj to hã amnhĩ pumu nê hkaprĩ nê. Nê tãm amnhĩ nhĩpêx ã amnhĩ pumu nê hkĩnh nê.

¹⁶ Tã koja nhÿrmã Tirtũm Jejus Kris mã anê nhũm kuma hãmri nê mẽ piitã kormã mẽ htir ri tanhmã mẽ kot amnhĩ nhĩpêx to hã mẽ omunh xà hkôt tanhmã mẽ harênh to. Nê mẽ hamaxpêr kôt mẽ omunh mex xà hkôt tanhmã mẽ harênh to. Mẽ papajaja mẽ pahte axpên jamaxpêr kôt axpên pumunh kêt tã Jejus kot mẽ pajamaxpêr kôt mẽ pahpumunh par.

Tã na pa hte mẽ kãm Jejus kot tanhmã amnhĩ nhĩpêx to hã harênh o ixpa pê ã mẽ kãm ixujarênh anhÿr o ri ixpa.

*Pawre kot hkwÿjê mã kapêr
Römân 3.19-20*

¹⁷ Nê ixpyrà nê mẽ apê Ijaew kwÿjaja na ka mẽ axtem nê Ijaew kêt xwÿnhjê mã tanhmã amnhĩ to jarkrar o ri apa nê mẽ kãm:

—Nã mẽ ixpê Ijaew ri Tirtũm kapêr ã kagã jakamã ãm mẽ papxipixjaja na hte Tirtũm amnhĩm mẽ inhmex ã mẽ ijarê. Nê ãm mẽ papxipixjaja na hte mẽ ixto hkra. ¹⁸ Nê mẽ papxipixjaja na mẽ ixte Tirtũm kãm hprãm xà hkôt mẽmoj pumunh par nê mẽ kot amnhĩ to mex xà pumunh par nê mẽ kot amnhĩ tomnuj xà pumunh par. Mẽ apê Ijaew kêt xwÿnhjê rom mẽ ixte mẽmoj piitã omunh par kumrêx. Anê.

¹⁹⁻²⁰ Nê amnhĩ jarênh o:

—Nã te mẽ ixpê mẽ nohkre xwÿnhjê pa hã mẽ hamÿnh nê ri mẽ ho ixpa xwÿnh pyrãk. Jakamã Ijaew kêt xwÿnh pê htÿx ri mẽ

pa xwÿnhjaja na pa htem mē kām Tirtūm kapēr tūm o mē ahkre mex o ri ixpa. Kormā mē kot hprī hā mar kêt jakamā na pa htem ho mē ahkre ho ri mē hkôt ixpa. Mē kurom mē ixte mar par kēnā.

²¹ Anhÿr ā amnhī jarēnh nē mē ate kapēr o mē ahkre ho apa htā hkôt amnhī nhīpêx kêt nē.

Nē mē ate mē kot axpēn pē àhkīnh nē mē hkurē htā no ām mē kamjaja axpēn pē axàhkīnh o ri apa.

²² Nē mē amā sānti hkīnh kêt ā amnhī jarēnh tā axtem nē hwÿr agjē nē hpar pē kàxpore nhīkwÿ xwÿnh o axàhkīnh o ri apa.

Nē mē kot axpēn prō ho amnhīkati nē mē hkurē ho apa htā mē kamjaja ā ri amnhī nhīpêx anhÿr o ri apa.

²³ Nē mē ate Tirtūm kapēr ā kagà mex o mex ā harēnh tā hkôt amnhī nhīpêx hkêt nē. Jakamā nhūm mē akwÿjaja ja hā mē apumu nē mē apyrā nē Tirtūm ā hpijaàm kêt o pa.

²⁴ Tirtūm kapēr ā kagà htūm kot tanhmā mē ate amnhī nhīpêx ā mē ajarēnh to nē mē ajarēnh kot:

Mē kēp Ijaew kêt xwÿnhjaja na htem Ijaew kot htÿx ri amnhī nhīpêx o ri mē pa hā mē omu nē mē ŷ hā tanhmā Tirtūm o kapēr punuj to ho ri pa. Anē.

²⁵ Mē pahpē Ijaew na pu htem mē pahkrajaja mē hapôx kôt kormā mē hkryre ri pu htem mē kēp mēmy kwrÿt kà jakà. Finat Mojes kot Tirtūm nhÿ hā mē panhīgétjē mā hā karō xà hkôt na pu htem ā mē hipêx anē. Mē pahte Tirtūm mā mē pahkrajē nhōr ā amnhī to amnhīrīt kaxyw. Jakamā na pu htem arī Mojes kapēr kôt ā mē hipêx anē nhūm Tirtūm kām ja mex nē. Nom kot pu mē kapēr kwÿm ri tanhmā amnhī nhīpêx to ho papa nhūm ja kēp omnuj tÿx nē hāmri pu mē

tee ri mē pahkrajē my kwrÿt kà jakàr kaprÿ. Na hte Tirtūm ā mē pahkrajē nhīpêx anhÿr ā mē pahpumunh kôt amnhīm mē pamex ā mē pajarēnh kêt nē. Nom mē pahte kapēr kôt amnhī nhīpêx mex o papa pē mēmy kwrÿt kà jakàrja nhūm kām mex nē. ²⁶ Ijaew kêt xwÿnhjaja kot ā mē hkrajē nhīpêx anhÿr kêt tā ra mē hkwÿjaja Tirtūm kapēr ma nē hkôt amnhī nhīpêx o ri pa. Jao te mē kot amnhī my kwrÿt kà jakàr pyrāk o amnhī nhīpêx. Jakamā nhūm Tirtūm ja hā mē omu nē mē kām:

—Nā ām hāmri. Mē ate amnhī my kwrÿt kà jakàr kêt tā mē apē ixkra na ka mē. Anē.

²⁷ Mē kot amnhī jakàr kêt tā Tirtūm kapēr kôt amnhī nhīpêx mex o ri pa nhūm amnhī tā mē omu nē mē arom amnhīm mē kot amnhī to mex xwÿnh ā mē harē. Mē kot amnhī jakàr kêt tāā.

No mē kajaja mē ate Tirtūm nhÿ hā Mojes kapēr ā kagà mar tÿx tā hkôt amnhī nhīpêx kêt nē. Ja mÿrapē koja ja hā mē apumu nē Ijaew kêt xwÿnhjē kīnhā mē ate amnhī tomnuj xwÿnh ā mē ajarē. Ra mē ate amnhī jakàr tā mē ate amnhī tomnuj xwÿnh ā mē ajarē.

²⁸ Nē kot ka mē atō tanhmā amnhī to jarkrar to nē amnhī jarēnh o:

—Nā ixpē Ijaew jakamā na hte Tirtūm mē kot inhmy kwrÿt kà krāhyr kôt ixto kraa. Anē.

Nom xà na hte Tirtūm ā mē pahte amnhī nhīpêx anhÿr ā mē pahpumunh kôt mē pahto hkra? Nā kot anhÿr kêt. Na htem ām htÿx ā amnhī to jarkrar anhÿr kaprÿ ho pa.

²⁹ Nē Tirtūm Karō kot mē hkarō mā gjêx xwÿnhjaja kēp Tirtūm kra jakamā na htem Tirtūm kām hprām xà hkôt amnhī nhīpêx. Nom ri amnhī krā hkôt tanhmā amnhī nhīpêx to ho pa hkêt nē. Rÿ htÿx hamaxpēr o:

—Nà kot paj Mojes kapēr ā kagà hkôt amnhī nhīpēx nhūm Tīrtūm ja hā ixpumu nē amnhīm inhmex ā ijarē nē ixto hkra.

Anh̄r o hamaxpēr kēt nē. Na htem hamaxpēr o:

—Nà ra Tīrtūm Karō kot ixkarōm àr jakamā ixpē hkra nhūm amnhīm inhmex ā ijarē. Jakamā kot paj ām kôt pix mā ri amnhī nhīpēx o ri ixpa rāhā ty. Kwār māmri ixkwýjaja amnhīm inhmex kēt ā ijarē. Anē.

Kēr ka mē ā ajamaxpēr anh̄r o ri pa. Ā mē hamaxpēr anh̄r na mex o mex.

3

¹ Nē mán ka mē ra tee ri tanhmā amnhī kukamā ajamaxpēr to nē ajamaxpēr o:

—Kwa mo kaxyw na pa ixpē Ijaew? Mon pa pre we ixpē Ijaew kētre hkēt nē? Mē kēp Ijaew kēt xwýnhjaja kot amnhī jakār kēt tā nhūm Tīrtūm mē pahpyrà nē mē ho hkra. Anē.

Kwa mē ā ri ajamaxpēr anh̄r kēt nē. ² Mē pahpē Ijaew na pre Tīrtūm Ijaew kēt xwýnhjē rom mē pahto mex rax nē. Na pre amnepē mā mē panhīgēt mā tanhmā kapēr to. Mē pahpiitā mē pahte mar nē hkôt amnhī nhīpēx kaxyw. Nom Ijaew kēt xwýnhjē nhīgēt mā ā kapēr anh̄r kēt nē. Ām mē pahpē Ijaew nhīgēt pix mā kapēr. Jakamā mē pahpē Ijaew mā ja mex kumrēx. ³ Nom kot kaj mē atō ja ma nē ajamaxpēr o:

—Nà Tīrtūm kot mē ixto mex mā mē ixtā amnhī jarēnh tā no nhūm xep mē inhīgēt kwýjaja hkôt amnhī nhīpēx kēt nē. Na xep prem kapēr kwým ri amnhī tomnuj o pa. Jakamā ko. Koja Tīrtūm mē ixpē mē hkanrēhā mē htāmnhwýjaja tanhmā mē ixto mex to japēr ko. Anē.

⁴ Kwa mē ri ā ajamaxpēr anh̄r kēt nē. Tīrtūm na hte mē pahpiitā mē pakurom mēmoj tā amnhī jarēnh o hēx kēt nē. Tā ra kot

tanhmā mē pahtā amnhī jarēnh to xà hkôt koja ā mē pahto mex anē. Kapēr ā kagà htūm kot mēhō tanhmā Tīrtūm mā kapēr to nē harēnh kot:

Pa Tīrtūm. Nà ām kapxipix na ka hte mēmoj tā amnhī jarēnh xà hkôt amnhī nhīpēx o ri apa.

Jakamā na htem ām axpēn mā axēx ā akapēr ā ajarēnh kaprý. Anh̄r o harē.

⁵ No kot ka mē atō atýx ajamaxpēr nē ajamaxpēr o:

—Xà koja Tīrtūm tanhmā mē ixte amnhī tomnuj to hā mē ixpumu nē gryk? Nà koja gryk kēt nē. Jakamā kot paj arī amnhī tomnuj o ri ixpa. Kē mē piitā ja hā ixpumu nē ixrom Tīrtūm tapxipix kot amnhī to mex o pa xwýnh ā harēnh o pa. Nà ja mex. Jakamā kot paj arī amnhī tomnuj rāhā ho ri ixpa nhūm mē Tīrtūm pix mā mán kot tām amnhī nhīpēx xwýnh ā harē. Hāmri nhūm Tīrtūm amnhī tā ixpumu nē tanhmā ixto hkēt nē. Koja tanhmā ixto japēr hāmri nē ixpyrà nē amnhī tomnuj nē. Anē.

Kot kaj mē ā ajamaxpēr anē nē ām amnhī krā hkôt ā ajamaxpēr anh̄r kaprý. Nom ā ajamaxpēr anh̄rja Tīrtūm jamaxpēr kôt kēt. ⁶ Kwa mē ri ā ajamaxpēr punuj anh̄r kēt nē. Tīrtūm kot mē pahpyrà nē aa kot amnhī tomnujre hā. Kop ām mē pahpyrà nē tanhmā kot amnhī tomnuj to ronhýx tanhmā kot we amnhī to nē mē pahte amnhī tomnuj xwýnh ā mē pajarē? Nhýx mē pahpyrà nē ā amnhī jarēnh anē. Nà ā mē ajamaxpēr anh̄rja mex kēt.

⁷⁻⁸ E pa ixprī hā mē amā ja jarē ka mē inhma. Kot kaj mē atō amnhī kukamā ajamaxpēr o:

—E kot paj māmri ri mēmoj tā ixēx o ri ixpa kē mē ixēx nhi hā ixpumu nē ixrom Tīrtūm pix mā mán kot amnhī to mex ā harē. Nē ām pix mā mán hēx kēt xwýnh ā

harê. Hâmri nhùm Tirtùm amnhî tâ ixpumu nê mê â mê kot harênh anhÿrja ma nhùm ja kãm mex nê nhùm hkînh nê. Jakamã ixêx o ri ixpaja â tanhmã ixto hkêt nê. Ra mê kot ixrom tâm kot amnhî nhîpêx o pa xwÿnh â harênh jakamã nhùm ixêx nhita â tanhmã ixto hkêt japêr. Jakamã kot paj ixte amnhî tomnuj o ri ixpaja mã inhûrer kêt nê. Kêr kê mê ja hã ixpumu nê ixrom Tirtùm tapxipix kot amnhî to mex xwÿnh â harê.

Anhÿr o ajamaxpêr nom mê ajamaxpêrja kot anhÿr kêt. Na hte akwÿjaja pa ixpê Pawre ixêx o ixpa hã ri axpên mã ijarê no na pa hte ixêx o ri ixpa hkêt nê. Â mê ajamaxpêr anhÿr o ri apa xwÿnhjaja koja Tirtùm mê atomnuj tÿx nê kãm ga.

Mê mê pahte amnhî tomnuj xwÿnh â mê pajarênh

Wam Korît 6.9; Karatas 3.22; Xitre 3.3

⁹ Tã tanhmã kot puj mê pahpê Ijaew amnhî jarênh to? Xà kot pu mê pahte amnhî to mex o Ijaew kêt xwÿnhjê jakrenh â amnhî jarê? Nã mê pahte â amnhî nhîpêx anhÿÿre hã. Mê pahpê Ijaew nê Ijaew kêt xwÿnhjaja. Mê pahpiitã mê pahte amnhî tomnuj o axpên pyrâk. Na pa pre ra mê amã ja jarê. ¹⁰ Tirtùm kapêr â kagã htüm kot ja jarênh kot: Mêhõ na we aa kot amnhî tomnuj kêt kumrêx nê pa?

¹¹ Nê mêhõ na we kot mëmoj mex piitã omunh par?

Nê mêhõ na kãm Tirtùm prãm?

¹² Nã amrakati kumrêx. Na mê ra piitã hkaga hpa.

Nê kapêr kwÿm ri tanhmã amnhî tomnuj to ho pa.

Âm mêhõ pyxire nê amnhî to mex o ri pa hkêt kumrêx.

¹³ Na htem kapêr punuj pix o ri pa. Jakamã Tirtùm noo mã mê kot amnhî nhîpêxja te kot mëmoj tyk nê hkro punuj pyrâk.

Na htem âm ri hêx pix kukamã ri hamaxpêr o pa. Tanhmã mê hêx to xàja te kêp kagã xoprê nhõ wenên xihÿtÿx pyrâk.

¹⁴ Nê na htem mê piitã mëmoj nhÿxi ho ri axpên mã mê hixi jarênh o pa. Nê ri tanhmã axpên japrÿ hto ho pa.

¹⁵ Nê tanhmã kapêr mã gêt kãm mê kãm kapêr to.

¹⁶ Nê tanhmã mê hkwyÿjê homnuj to. Jakamã nhùm mê piitã ri hkaprÿ nê mex kêt nê pa.

¹⁷ Nhùm htem âm axpên mã mê gryk xà pix o kapêr o pa.

¹⁸ Nê Tirtùm â hpijaàm kêt o pa. Na htem kapêr ma nê âm kuma nê kãm hkînh kêt o pa.

Â na htem amnhî nhîpêx anhÿr rãhã ho pa. Anê.

Â Tirtùm kapêr â kagã htüm kot mê pajarênh anhÿr. ¹⁹ Mê pahpê Ijaew ra mê pahte ja jarênh mar tÿx. Tirtùm kapêr â kagã htüm kwÿ na. Na hte â mê kot amnhî tomnuj xwÿnhjê jarênh anê. Nê mãânên mê papajaja. Mê pahpê Ijaew na hte â mê pajarênh anê. No âm mê papapxipix hkêt. Krÿ piitã hkôt ri mê pa xwÿnhjaja nhùm â mê harênh kot anhÿr. Ijaew kêt xwÿnhjaja nê mê pahpê Ijaew. Mê pahpiitã mê pahte amnhî tomnuj xwÿnh jakamã mëmo kaxyw kot pu mê pahte amnhî tomnuj kêt â ri amnhî to jarkrar o papa? Kot puj mê â amnhî jarênh anhÿr kaprÿ. Jakamã koja Tirtùm mê pahpiitã mê pahte amnhî tomnuj mÿrapê tanhmã mê panhîpêx to. ²⁰ Mê pahpê koja mê pahte kapêr kôt pix mã amnhî nhîpêx o papa hã mê pajarê? Nê mê pahpê mã koja mê pamã kapêr nê mê pamã:

—Nã na ka hte akatãt kôt ixkapêr kôt pix mã amnhî nhîpêx mex nê. Âm hãmri na ka hte â amnhî nhîpêx anhÿr o apa.

Anhÿr o mê pahpê mã kot we â kapêr anê? Nã aa kot mê pahpê mã

kapêr anhÿr kêt. Na pu htem âm kapêr ma nê tee ri amnhî kukamâ pajamaxpêr. Mê pahte amnhî tomnuj â amnhî pumunh kaxyw na pre mê pamâ kapêr â kagà htÿmja gô. Mê pahtô mê pahte kapêr â kagà hkôt amnhî nhîpêx mex o papa hkêt kênâ kot kêt ri amnhîm mê pahte amnhî to mex xwÿnh â mê pajarê.

Tanhmâ Tîrtÿm kot mê pahto hkra to hâ harênh

Atre 17.30-31; Karatas 2.16-21; Piripos 3.7-9; Xitre 3.5; Xiakre 2.10

²¹ Nê na hte Tîrtÿm mê pahte kapêr kôt amnhî nhîpêx â mê pahpumunh kôt amnhîm mê pahte amnhî to mex xwÿnh â mê pajarênh kêt nê. Jakamâ mêhō kukwak ri koja we â mê pajarênh anê? Nâ nhâm mêhō kot tām amnhî nhîpêx rāhā ho pa hā omunh pix kukwak ri koja â mê pajarênh anê. Tā mêhō kukwak ri kot â mê pajarênh anhÿr xwÿnh ta na pre ra mê pamâ ho amnhîrit. Amnepê m Tîrtÿm kapêr â kagà htÿm kāmā na pre mêhō hkukamā tanhmā harênh to. Nê Tîrtÿm nhÿ hā mê kapêr jarênh o pa xwÿnhjaja haxwÿja kukamā tanhmā harênh to ho pa. ²² Jejus Krisja na prem hkukamā harênh o pa. Tām na pu htem hkôt amnhî xunhwÿ nê amnhî kaxyw kām pajamaxpêr rāhā ho papa nhÿm Tîrtÿm ja pix â mê pahpumunh kôt amnhîm mê pahte amnhî to mex xwÿnh â mê pajarê. Mê kot Jejus kôt amnhî xunhwÿr xwÿnh piitāā. Mê ixpê Ijaew nê mê apê Ijaew kêt xwÿnhjaja. Mê pahpiitā mê pahte axpên pyrāk jakamā kot puj mê pahtô Jejus kôt amnhî xām nhÿm Tîrtÿm Kra Jejus kot amnhî to mex pix o pa kukwak ri mê pahpumu nê amnhîm pajarênh o:

—Nâ âm hāmri. Ra kot ixkra Jejus kôt amnhî xām jakamā ra inhmā te Jejus kot amnhî nhîpêx pyrā nê amnhî to mex o pa. Anê.

²³ No mê pahtô na mê pahte Tîrtÿm mê Jejus wa urāk nê amnhî nhîpêx mex rāhā ho ri papa? Nâ amrakati kumrêx. Mê pahpiitā mê pahte amnhî tomnuj xwÿnh kênā. ²⁴ Tā Tîrtÿm kot mēmoj tā mê pakutā nojarêt rāhā jakamā na hte Jejus Kris kukwak ri amarî amnhîm mê pahte amnhî to mex xwÿnh â mê pajarênh o pa. Mê pahte Jejus kôt amnhî xunhwÿr xwÿnh piitāā nhÿm â mê pajarênh anê. Ra Jejus kot htyk o mê pahte amnhî tomnuj piitā hpānhā amnhîrer par jakamā na hte Tîrtÿm Jejus kukwak ri amarî mê pahte amnhî to mex xwÿnhjê hā mê pajarê. Te mê pahte amnhî tomnuj kêt kumrêx pyrāk mê pajarê. ²⁵⁻²⁶ Na pre mê pahwÿr Jejus mê nhÿm mê pahwÿr wrÿ nê mê panê ty nê htyk o mê pahte amnhî tomnuj piitā hpānhā amnhîrer pa. Jakamā kot pu mê pahtô amnhî kaxyw hkôt pajamaxpêr nhÿm Tîrtÿm ja hā mê pahpumu nê Kra kukwak ri amnhî katut kôt mê pahte amnhî tomnuj piitā rēnh pa. Jao te aa mê pahte amnhî tomnuj kêt kumrêx pyrāk â mê pahpumu.

No kêt amnepê m kormā Jejus wrÿk nê mê panê htyk kêt ri mê pa xwÿnhjaja. Tanhmā na pre Tîrtÿm mê kot hkôt amnhî xunhwÿr xwÿnhjê nhîpêx to? Kormā Jejus mê panê htyk kêt ri mê pa xwÿnhjaja tanhmā na pre mê hipêx to? Nâ na pre mê hkwyjaja amnhî kaxyw Tîrtÿm kôt hamaxpêr nê hkôt amnhî xunhwÿr nhÿm amnhî tā mê omu nê amnhîm mê harênh o:

—Nâ âm hāmri. Kojā nhÿrmā Ixkra ma mê hwÿr wrÿ nê mê nê ty nê htyk o mê kot amnhî tomnuj pānhā amnhîrer pa. Jakamā koja mê tāmjaja amnhî tomnuj pānhā amnhîrer kêt nê. Anê.

Tā nhÿm Jejus tām mê pahwÿr wrÿ nê mê pahpiitā mê panê ty. Jakamā nhÿm Tîrtÿm ra mê pahte

hkôt amnhī xunhwÿr xwÿnhjaja Kra kukwak ri amnhī kaŧut kôt mẽ pahte amnhī tonnuj piitã rēnh pa. No na hte amarī ã mẽ panhīpêx anhÿr kêt nē. Æm Jeŷus tyk pix kukwak ri na hte ã mẽ panhīpêx anē. Æm hāmri na hte ã mẽ panhīpêx mex anē. Na hte tãm mẽ panhīpêx rãhã ho pa. ²⁷Jakamã kot puj mẽ ã pajamexpêr anē nē pajamexpêr o:

—Nà na pa hte amnhī to mex rãhã o ri ixpa. Amnhī to mex o mẽ piitã mẽ hakrenh pa.

Anhÿr o pajamexpêr kêt nē. Koja mēhō ã hamexpêr anē nē ãm amnhī jarēnh o hêx. Na hte Tirtüm mẽ pahte amnhī to mex ã mẽ pahpumunh kôt amnhīm mẽ pahte amnhī to mex xwÿnh ã mẽ pajarēnh kêt nē. Mē pahte amnhī to mex rãhãre hã. Nom na pu htem amnhī kaxyw Jeŷus mã pajamexpêr nē hkôt amnhī xunhwÿ nhūm ja hã mẽ pahpumu nē rī kormã amnhīm mẽ pamex ã mẽ pajarē.

²⁸E pa axte tanhmã mẽ amã ja jarēnh to ka mẽ aprī hã inhma. Mēmoj pumunh kôt na hte Tirtüm mẽ pahte amnhī to mex xwÿnh ã mẽ pajarēnh wehe? Xà mẽ pahte kapêr tüm kôt amnhī nhīpêx o ri papa hã mẽ pahpumunh kôt? Nà na hte ja hã mẽ pahpumunh kôt ã mẽ pajarēnh anhÿr kêt nē. Mē pahte hkôt amnhī nhīpêx rãhã ho papare hã. Æm mẽ pahte amnhī kaxyw Kra Jeŷus kôt pajamexpêr nē hkôt amnhī xunhwÿr ã mẽ pahpumunh kôt pix mã na hte mẽ pahte amnhī to mex xwÿnh ã mẽ pajarē. Ja pix ã mẽ pahpumunh kôt na hte ã mẽ pajarēnh anē.

²⁹Nē xà Tirtüm kēp mẽ ixpê Ijaew pix nhō Tirtüm pix na? Nà kēp mẽ ixpix nhō Tirtüm kêt. Kēp mẽ ixpê Ijaew nhō Tirtüm nē määnēn kēp mẽ apê Ijaew kêt xwÿnhjê nhō Tirtüm.

³⁰Nē Tirtüm ãm pyxi mex. Axtem hō kêt. Na hte mẽ pahpiitã mẽ panhīpêx o axpēn pyrãk. Jakamã na hte mẽ kot amnhī kaxyw Jeŷus kôt hamexpêr o mẽ pa xwÿnhjê pumu nē mẽ kot amnhī to mex xwÿnh ã mẽ harē. Mē ixpê Ijaew nē määnēn mẽ apê Ijaew kêt xwÿnhjaja.

³¹Tã koja mēhō htÿx hamexpêr o: —Nà ixte amnhī kaxyw Jeŷus kôt ijamexpêr mex o ixpa nhūm Tirtüm kot amnhīm inhmex ã ijarēnh jakamã kot paj axte kapêr kôt amnhī nhīpêx kêt nē. Kot paj ãm amnhī krã hkôt amnhī nhīpêx o ri ixpa. Ra Tirtüm kot ixto hkra kēnã.

Anhÿr o ajamexpêr japêr. Kwa mẽ ã ri ajamexpêr anhÿr kêt nē. Na htem amnhī kaxyw Jeŷus kôt hamexpêr hāmri nē kãm hkôt amnhī nhīpêx prãm rãhã nē pa ho pa.

4

Apraãw kot amnhī kaxyw Tirtüm kôt hamaxpêr

Karatas 3.6-18; Xiakre 2.23

¹Nē mẽ panhīgêŧ finat Apraãwja kēp mẽ pahpê Ijaew pãr krax. Tã mēmoj tã na pre Tirtüm omu nē kot amnhī to mex xwÿnh ã harē? ²Xà kot kãm tanhmã amnhī nhīpêx to hã karō xà hkôt amnhī nhīpêx mex ã omunh xà hkôt nhūm pre ã harēnh anē? Nà ja kôt kêt. Kop apu ja kôt ã kot harēnh anhÿr ronhÿx Apraãw amnhī tã omu nē Tirtüm mã amnhī to jarkrar nē kãm:

—Pa Tirtüm? E mãn ka ixpumu. Na pa hte akapêr kôt amnhī nhīpêx mex o ri ixpa.

Anhÿr o nhÿx pre kãm amnhī to jarkrar. No na pre tanhmã kãm amnhī to jarkrar to hkêt nē. ³Tã mēmoj tã omunh xà hkôt na pre Tirtüm amnhīm mex ã harē? Nà Tirtüm kapêr ã kagã htüm kot tanhmã Apraãw jarēnh to kot:

Na pre Apraâw amnhî kaxyw Tîrtûm kôt hamaxpêr nê hkôt amnhî xâm nhûm amnhî tâ omu nê amnhîm mex â harê. Anê.

⁴ Mê õ patrâwjaja na htem kâm mê âpênh xwýnhjaja âpênh mex â mê omunh xâ hkôt mê kâm amnhîre. ⁵ No Tîrtûm na hte â mê panhîpêx anhÿr kêt nê. Na hte mê pahte tãm amnhî nhîpêx â mê pahpumunh kôt amnhîm mê pahte amnhî to mex xwýnh â mê pajarênh kêt nê. Âm mê pahte amnhî kaxyw Kra Jejus kôt pajamaxpêr nê hkôt amnhî xunhwÿr â mê pahpumunh kôt pix mã na hte amnhîm â mê pajarênh anê. Ra mê pahte amnhî tomnuj o ri papa htâ hpânhâ amnhî kaxyw Jejus kôt pajamaxpêr xwýnh pixjaja na hte â mê pajarênh anê.

⁶ Jakamâ na hte mê pamâ amnhî jarênh o:

—Ixte mê amex â mê ajarênh tâ no âm mê ate amnhî to mex kôt mê apumunh kôt na pa â mê ajarênh anhÿr kêt nê. Âm mê ate amnhî kaxyw Ixkra mê wa ixkôt ajamaxpêr nê wa ixkôt amnhî xunhwÿr â mê apumunh kôt na pa hte â mê ajarênh anê. Anê.

Pu mê â kot pamâ kapêr anhÿr â amnhî tâ kuma nê pahkînh nê. Pahi finat Tawi na pre haxwÿjaja jarênh o:

⁷ Na hte Tîrtûm amnhî katut kôt mê pahte amnhî tomnuj piitâ rênh pa nê axte kâm hamaxpêr kêt nê.

Jakamâ pu mê ja hâ amnhî pumu nê pahkînh nê.

⁸ Nê amnhî kukamâ pajamaxpêr o: “Hêxta waa nê. Na pa pre amnhî tomnuj o ixpa nê tee ri ja hâ amnhî pumu nê ixkaprî nê.

Hâmri nê amnhî to Tîrtûm wÿnhûm inhma nê ixte amnhî tomnuj o hapêx pa nê axte kâm hamaxpêr kêt nê.

Nâ âm hâmri. Ja mex kumrêx.” Anê.

⁹ Tâ mê kot ja hâ amnhî pumunh nê hkînh xwýnhjaja mêmojaja na mê? Xâ mê kot amnhî my kwÿrÿt kâ jakâr xwýnh pix kwÿjaja na pre pahi Tawija â mê harênh anê nâ? Nâ mê tapxipixjaja kêt. Mâânên mê kot amnhî jakâr kêt xwýnh kwÿjaja. Tanhmâ na pre ra Tîrtûm kapêr â kagâ htûm kot finat Apraâw jarênh to? Na pre harênh o:

Na pre Apraâw amnhî kaxyw Tîrtûm kôt hamaxpêr nê hkôt amnhî xâm nhûm amnhî tâ omu nê amnhîm mex â harê. Anê.

¹⁰ Xâ Apraâw ra kot amnhî my kwÿrÿt kâ krâhyr nhîrô pê na pre Tîrtûm amnhîm mex â harê? Nâ kormâ kot amnhî krâhyr kêt ri na pre â harênh anê. ¹¹ Kormâ kot amnhî krâhyr kêt ri kâm kapêr nê kâm:

—E ate amnhî kaxyw inhmâ ajamaxpêr nê ixkôt amnhî xâm â ixte apumunh kôt na pa amnhîm amex â ajarê.

Anhÿr o kâm kapêr hâmri nê rî kormâ kâm tanhmâ amnhî krâhyr to hâ kâm karô nhûm kuma nê mar xâ hkôt amnhî my kwÿrÿt kâ hkwy krâhta. Kot Tîrtûm mã amnhî nhôr â amnhî to amnhîrit kaxyw â amnhî nhîpêx anê.

Nom kormâ amnhî krâhyr kêt ri na pre Tîrtûm amnhîm mex â harê. Tâ Ijaew kêt xwýnhjaja kot amnhî jakâr kêt tâ mê hkwyjaja Apraâw pyrà nê amnhî kaxyw Tîrtûm mã hamaxpêr nê kâm amnhî nhôr jakamâ Apraâw te kêp mê hpâr krax maati pyràk. ¹² Nê mâânên mê pahpê Ijaew. Kot puj mê pahô amnhî kaxyw Tîrtûm kôt pajamaxpêr nhûm amnhî tâ mê pahpumu nê mê pamex â mê pajarê. No âm mê pahte amnhî jakâr â mê pahpumunh kôt â mê pajarênh anhÿr kêt nê. Âm Apraâw pyrà nê amnhî kaxyw Tîrtûm kôt pajamaxpêr pix â mê pahpumunh kôt na hte mê pamex

ã mẽ pajarê. Kormã Apraãw kot amnhĩ my kwryt kã krãhyr kêt ri ra kot amnhĩ kaxyw Tĩrtũm mã hamaxpêr jakamã kêp mẽ pahpê Ijaew mẽ pahte urãk nê amnhĩ kaxyw Tĩrtũm mã pajamaxpêr xwýnhjê hpãr krax maati. Ijaew kêt xwýnhjê pyrà nê kêp mẽ pahpãr krax maati.

Tĩrtũm kot Apraãw mã mẽmoj mexjarênh

Karatas 3.22

¹³ Amnepêm na pre Tĩrtũm Apraãw mã tanhmã kapêr to nê kãm:

—E koja nhỹrmã akanrêhã akra nê atãmnhwýjaja amýrpê apyrã nê krĩ piitã hkôt mẽ kêp mẽ õ pahi. Anê.

Tã tanhmã Apraãw kot amnhĩ nhĩpêx to hã omunh xã hkôt na pre ã kãm kapêr anê? Xã kot kãm tanhmã amnhĩ nhĩpêx to hã karõ nhũm kot hkôt amnhĩ nhĩpêx mex ã omunh xã hkôt na pre hkĩnh nê ã kãm kapêr anê? Nã kot anhỹr kêt. Mẽ pahtõ kot pu we Tĩrtũm kapêr xã hkôt pix mã amnhĩ nhĩpêx mex rãhã ho ri papa? Mẽ pahpê hihtýx kênã. ãm kot amnhĩ kaxyw Tĩrtũm kôt hamaxpêr nhũm kot amnhĩ tã omunh nê amnhĩm mex ã harênh kôt pix mã na pre ã kãm kapêr anê. ¹⁴ Kop apu kot kãm tanhmã kapêr to nê kãm:

—E Apraãw. Kot kaj ixkapêr piitã ama nê hkôt amnhĩ nhĩpêx mex rãhã ho ri apa. Hã koja nhỹrmã akanrêhã akra nê atãmnhwýjaja kêp krĩ piitã hkôt mẽõ pahihti.

Anhỹr o kãm kapêr ronhỹx ãm kãm ã kapêr anhỹr kaprý. Apraãw aa kot kapêr piitã hkôt amnhĩ nhĩpêx mex o pare hã. Kop apu ã kãm kapêr anhỹr ronhỹx pre kuma nê tee ri amnhĩ kukamã hamaxpêr nê hamaxpêr o:

—Kwa nã. Ra ixte Tĩrtũm kôt amnhĩ xãm tã tanhmã kôt pa amnhĩ to nê kapêr piitã hkôt amnhĩ nhĩpêx mex rãhã ho ri ixpa? Kot

paj tee ri inhmã ã amnhĩ nhĩpêx anhỹr o ixpa hprãm kaprý. Jakamã koja nhỹrmã ixkanrêhã ixkra nê ixtãmnhwýjaja kêp mẽ õ pahi hkêt nê pa. Hêxta waa nê. ¹⁵ Kojã Tĩrtũm ixte kapêr kwým ri tanhmã ixte amnhĩ tomnuj to hã ixpumu nê tanhmã ixtomnuj to. No mẽhõ kot we kapêr piitã hkôt amnhĩ nhĩpêx mex rãhã ho pa? Nã amrakati kumrêx.

Anhỹr o nhỹx pre hamaxpêr. ¹⁶ No na pre Tĩrtũm ã kãm kapêr anhỹr kêt nê. Ra kot hprĩ hã mẽ pahte amnhĩ nhĩpêx ã mẽ pahpumunh mex kênã. Na pre ãm kãm:

—E ate amnhĩ kaxyw ixkôt ajamaxpêr nê ixkôt amnhĩ xãm jakamã kot paj amarĩ ato mex nê. Anê.

Tĩrtũm na hte mẽmoj tã amnhĩ jarênh o amnhĩ to hêx kêt nê. Na hte mẽmoj tã amnhĩ jarênh xã hkôt tanhmã mẽmoj nhĩpêx to ho ri pa. Jakamã koja mẽ pahte Apraãw pyrà nê amnhĩ kaxyw hkôt pajamaxpêr xwýnh piitã mẽ pahto mex nê.

Nê xã na pre ã mẽ pamã kapêr anê nê mẽ pamã:

—E kot kaj mẽ ixkapêr kôt pix mã ri amnhĩ nhĩpêx o ri apa hã kot paj mẽ ato mex rax nê.

Anhỹr o mẽ pamã kapêr? Nã na pre ã mẽ pamã kapêr anhỹr kêt nê. Na pre mẽ pamã:

—Kot kaj mẽ finat Apraãw pyrà nê amnhĩ kaxyw ixkôt ajamaxpêr nê ixkôt amnhĩ xunhwý hã kot paj mẽ ato mex nê.

Anhỹr o mẽ pamã kapêr. Tã Apraãw kumrêx kot mẽ pakukamã amnhĩ kaxyw hkôt hamaxpêr jakamã te kêp mẽ pahpiitã mẽ pahte urãk nê ã amnhĩ nhĩpêx anhỹr xwýnhjê pãr krax maati pyràk.

¹⁷ Amnepêm na pre Tĩrtũm tanhmã Apraãw mã kapêr to. Kot tanhmã kãm kapêr toja Tĩrtũm

kapêr ã kagà htùm kamã na. Na pre kãm:

Kot kaj apê ahpÿnhã ri mẽ urojê hpàr krax. Anê.

Kormã Apraãw kra hkêt tâ nhùm hkra hkukamã ã kãm kapêr anê. Hãmri nhùm kuma nê hkôt hamaxpêr kurê kumrêx nê hamaxpêr o:

—Hêxta waa nê. Ra ixprô mẽ wa ijamê wa ixpigêt tÿx nê wa ixkra hkêt kumrêx. Kot paj wa tanhmã amnhĩ to nê tokyx ty. Tã ra Tirtùm kot ixkra nê ixtãmnhwÿjê hkukamã ã inhmã mẽ harênh anhÿr kênã. Jakamã kot pa xep wa ixpigêt tÿx tâ tanhmã amnhĩ to nê ixkra. Nã kot pa xep wa anê. Nê koja ixkraja tanhmã amnhĩ to nê ixpê htyk japêr tâ koja Tirtùm akupÿm inhmã ho htír. Nã koja inhmã ho anê. Ra kot inhmã ixkra nê ixkanrêhã ixtãmnhwÿ xohtô jarênh kênã. Anê.

¹⁸⁻¹⁹ Na pre ra hpigêt tÿx nê. Ra hã amgrã pê 100 nê hkurê kêt nê pa. Nhùm hprô mãânên hpigêx tÿx nê. Nê ôhy kamã hkra hkêt kumrêx. Kormã wa hkra hkêt tâ nhùm Tirtùm Apraãw mã hkra nê htãmnhwÿ xohtô hã harê. Nê kêp mẽ urojê xohtôjê pàr krax ã kãm harê. Hãmri nhùm kuma nê amnhĩ kaxyw hkôt hamaxpêr tÿx kurê kumrêx. ²⁰ Nê ã amnhĩ nhípêx anhÿr rãhã ho pa. Na pre war amnhĩ kra hã amnhĩ jarênh ma nê tee ri amnhĩkukamã hamaxpêr kêt nê. Æm Tirtùm tãm kot wa kãm wa hkra jarênh pix mã hamaxpêr pê amnhĩ kaxyw kãm hamaxpêr tÿx o ri wa pa. Nê hamaxpêr o:

—Nã ra wa ixpigêt tÿx kumrêx tâ koja xep Tirtùm wa inhmã wa ixkra hõ gõ. Nã koja wa inhmã kugõ. Hêxta waa nê. Æm hãmri Tirtùmja mex o mex. ²¹ Nã kot wa inhmã wa ixkra jarênh xã hkôt koja wa inhmã kugõ. Ja kaxyw ahpumunh o ahpumunh. Tirtùmja hêx kêt. Anê.

²² Hãmri nhùm Tirtùm ã hamaxpêr anhÿr ã omu nê amnhĩm

mex ã harê. Nê kot kãm amnhĩ jarênh xã hkôt wa kãm wa hkraja gõ.

²³ Nom na pre amnhĩm Apraãwja pix mex ã harênh kêt nê. ²⁴ Kot puj mẽ pahtõ uràk nê amnhĩ kaxyw hkôt pajamxpêr nhùm amnhĩ tâ mẽ pahpumu nê ra kot Apraãw jarênhã pyrà nê amnhĩm mẽ pamex ã mẽ pajarê. Na pre mẽ panhõ Pahihti Jejus ty nhùm Tirtùm akupÿm ho htír. Tã mẽ papajaja na pu prem amnhĩ kaxyw Jejus kôt pajamxpêr nhùm Tirtùm ja hã mẽ pahpumunh kôt mẽ pahte amnhĩ to mex xwÿnh ã mẽ pajarê. ²⁵ Na pre mẽ pahwÿr Kra Jejus mẽ nhùm mẽ pahwÿr wrÿ. Tã nhùm mẽ axtem nê kupĩ nom nhùm amarĩ htyk kêt nê. Na pre htyk o mẽ pahte amnhĩ tomnuj pãnhã amnhĩrer pa. Ja kaxyw na pre Tirtùm mẽ pahwÿr kumê. Jakamã nhùm prem kupĩ nhùm akupÿm ho htír. Tã mẽmo kaxyw na pre Tirtùm ã mẽ pahwÿr Kraja mênh nhùm mẽ panê htyk anê nhùm akupÿm ho htír? Æm kot kukwak ri amnhĩm mẽ pahte amnhĩ kaxyw hkôt pajamxpêr xwÿnhjaja mẽ pahte amnhĩ to mex xwÿnh ã mẽ pajarênh pix kaxyw.

5

Tirtùm kot mẽ pahto hkwÿ hã harênh

Matêwre 5.12; Sikün Korît 4.8, 5.18-21; Xiakre 1.2-4; Wam Pêtre 4.12, 5.9

¹ Nê na pu prem amnhĩ tomnuj o ri papa nhùm Tirtùm ja hã mẽ pahpumu nhùm ja kêp omnuj nê. Jakamã nhùm Jejus amnhĩ grõnh kôt wrÿ nê mẽ panê ty. Nhùm Tirtùm htykja kukwak ri mẽ pahto hkwÿ. Mẽ pahte amnhĩ kaxyw hkôt pajamxpêr nê hkôt amnhĩ xunhwÿr ã mẽ pahpumu hãmri nê ã mẽ panhípêx anê pu mẽ ra pahpê hkwÿ hã papa. ² Na pre Jejus Tirtùm mã mẽ pajarênh o:

—E jajê pumu. Na mê ra amnhî kaxyw pamâ hamaxpêr nê pahkôt amnhî xunhwÿ. Anê.

Hâmri nhûm kuma nê mê pahto mex nê mê pakutâ nojarêr râhâ ho pa. Tâ kot puj mê pahpê hkra-jaja nhÿrmâ pano ho Tîrtûm mex o mex xwÿnhja pumu. Jakamâ na pu htem amnhî kukamâ â pajamaxpêr anhÿr o pahkînh nê papa nê pajamaxpêr o:

—Hêxta waa nê. Kot paj nhÿrmâ inhno ho Tîrtûm mex o mex â omu nê kuri ixpa ho ixpa. Nâ âm hâmri. Inhmâ omunh prâm tÿx kumrêx. Anê.

³⁻⁴ Nê na htem Jesus â mê pah-tomnuj nê pu mê pahpunuj nê ri papa. Pamex kêt nê tâ tee ri amnhî kukamâ pajamaxpêr o ri pahkaprî nê papa hkêt nê. Kwâr mê mâmrî â mê panhîpêx anê. Pu mê pahpunuj kurê Jesus kôt amnhî xunhwÿr tÿx o kormâ mō. Nê mê umaj hkaga hkêt nê. Arî amnhî wÿr kamâ pajamak o papa. Jao amnhî kaxyw kumâ pix mâ kâm pajamaxpêr tÿx râhâ pahkînh nê ri papa.

Kot puj mê â amnhî nhîpêx anhÿr o ri papa nhûm Tîrtûm ja hâ mê pahpumu nhûm ja kâm mex nê. Hâmri nhûm ja kaxyw tanhmâ mê pahto paxihtÿx to pu mê pahpunuj tâ hkôt pajamaxpêr tÿx râhâ nê.

⁵ Nê ra mê kot Jesus â tanhmâ mê panhîpêx to htâ pu mê amnhî kaxyw tee ri kâm pajamaxpêr kaprÿ hkêt nê. Ra kot mê pamâ amnhî Karō nhôr nhûm kot mê pahkarō mâ gjêx kênâ kot pu kêt mê ri tee ri amnhî kaxyw kâm pajamaxpêr kaprÿ. Na hte Karōja mê pahkarō kamâ mê pamâ Tîrtûm kapêr jarênh o amnhîrît nê kâm mê pajapê htÿx â harênh o amnhîrît râhâ nê.

⁶ Amnepê mâ na pre mê piitâ amnhî tomnuj o ri pa nê tee ri kâm amnhî to mex râhâ hprâm kaprÿ. Mêhō kot we ja kaxyw tanhmâ mê hkrâ hto? Jakamâ nhûm Tîrtûm ja

hâ mê omu hâmri nê mê kaxyw Kra Jejus mâ kâm:

—E inhma. Ka kot kaj mê kot tanhmâ amnhî tomnuj to ho paja â ma mê hwÿr wrÿ. Ixte mê nê atyk kaxyw agrônkh kôt mê hwÿr amênh jakamâ kot kaj wrÿ nê mê kâm ixkapêr jarênh o ri mê hkôt apa. Râhâ nhûm mê hkwyjajaja apîka mê piitâ mê nê ty. Anê.

Hâmri nhûm kuma nê kâm:

—Tôe. Nâ kot paj amâ hprâm xâ hkôt â amnhî nhîpêx anê. Anê.

Hâmri nê man amnhî grônkh kôt mê pahwÿr wrÿ. ⁷⁻⁸ Xâ koja mêhō kâm axpên japê xâj axpên nê ty na? Xâ kot mêhō tām kot amnhî nhîpêx xwÿnh tâ nhûm mê kot hpîr kaxyw nhûm hkrâmnhwÿja kâm hapê nê. Nê nê amnhî grônkh kôt mê kâm xa nhûm mê kupî nhûm nê ty? Nâ kot apu nê htyk japêr ko. No mê papajaja. Na pu htem mêhō hkrâmnhwÿta kînhâ arî amnhî tomnuj râhâ ho ri papa htâ nhûm Tîrtûmja arî kâm mê pajapê nê. Nê kâm mê pajapê xâj mê pahwÿr Kris mê nhûm mê panê ty. Arî mê pahte amnhî tomnuj râhâ ho papa tää. Na pre â Tîrtûmja kâm mê pajapê hâ â mê pahwÿr mênh anê. ⁹ Na pre ty nhûm hkamrô hkwy axkapî nhûm Tîrtûm ja hâ omunh xâ hkôt tām amnhîm mê paxunhwÿ. Tâ Jejus kukwak ri koja ma mê kot amnhî xâ htÿx kamâ hamak tûm xâta wÿr mê parênh kêt nê. Mê pahpê hkwy kênâ kot kêt hwÿr mê parê.

¹⁰ Nom kormâ mê pahpê hkwy hkêt ri na pu prem te ra kutâ amnhî xunhwÿr pyrâk o amnhî nhîpêx. Tâ nhûm Kra mê panê ty pu mê hkôt amnhî xunhwÿ. Jakamâ nhûm Tîrtûm Jejus tyk kukwak ri mê pahto hkwy. Nê ra akupÿm Kra ho htîr jakamâ kot puj mê pahte hkôt amnhî xunhwÿr xwÿnhjaja nhÿrmâ wa urâk nê wa kuri pahtrî tûm nê pamex kumrêx nê papa ho papa.

¹¹Ně mẽ pahpê kuwy rax wÿr mẽ papa mã xwÿnh kêt jakamã na pu htem pahkĩnh nê pajamakêtkati nê ri papa. Nom ja pix ã na pu htem ã amnhĩ nhĩpêx anhÿr kêt nê. Mẽ pahpê Tirtũm krãmnhwÿ jakamã na pu htem mãânên pahkĩnh nê ri papa. Pahihti Jejus Kris kot mẽ panê htyk ã omunh xà hkôt na pre Tirtũm mẽ pahte hkôt amnhĩ xunhwÿr xwÿnhjê ho hkwy jakamã na pu htem pahkĩnh nê pajamakêtkati nê ri papa.

*Atãw mẽ Kris wa harênh
Wam Korît 15.20-22, 45-49*

¹²⁻¹³Ně amnepêm na pre Tirtũm finat Mojes mã tanhmã kapêr to. Hãmri nhũm kuma nê Ijaew kot tanhmã amnhĩ nhĩpêx to ho pa kaxyw mẽ kãm mẽmoja ã karõ nê mẽ kãm hã hkagã. Mẽ kot kamã harênh nê mar nê Tirtũm kôt amnhĩ nhĩpêx kaxyw. Hãmri nhũm mẽ tee ri ã kot mẽ kãm mẽmoj tã karõja ma nê tanhmã axpên mã kapêr to nê axpên mã:

—Kwa na pu htem ã amnhĩ nhĩpêx anhÿr kêt nê. Na pu htem ãm amnhĩ tomnuj tÿx kumrêx o ri papa nê amnhĩ to mex kêt kumrêx. Anê.

Ãm hãmri na prem ã amnhĩ jarênh anê. Mẽ pahpiitã mẽ pahte amnhĩ tomnuj xwÿnh kênã. My kot wa pê finat Atãwja kumrêx na pre tanhmã mẽ pahte amnhĩ tomnuj to ho hkrax. Mÿrapê na pre htĩr tũm nê ri pa ho pa hkêt nê. Na pre ri pa nê gaa nê rĩ hpigêt tÿx nê ty. Tã mÿr pê ri mẽ papa xwÿnhjaja na pu htem urak nê tanhmã amnhĩ tomnuj to ho ri papa. Mÿrapê na pu htem ri papa nê gaa nê Atãw pyrã nê pahtyk pa. Tirtũm kot mẽ pahtã Atãw mã kapêr xà hkôt. ¹⁴⁻¹⁹Jakamã na prem kormã Mojes kator xwÿj ri pika piitã hkôt ri pa nê gaa nê haxwÿja htyk pa. Mẽ kot amnhĩ tomnuj mÿrapê ty. Atãw pyrã nê Tirtũm kot mẽmo xõ nê

hkurê xwÿnhhta krêr kêt tã urak nê tanhmã amnhĩ tomnuj to ho ri pa. Hãmri nê mÿrapê ty.

Na pre ã Atãwja mẽ pahpiitã mẽ pamã Tirtũm kapêr nhĩrôp ãm nê amnhĩ tomnuj o hkrax anê nê mẽmo xõta krê. Jao te mẽ pahpiitã mẽ pahte urak nê kumê hkur pyrãk o mẽ panhĩpêx. Mÿrapê nhũm htem arĩ pika piitã hkôt hapôj nê kormã hprĩre htã ra Atãw pyrã nê tanhmã amnhĩ tomnuj to ho ri pa. Jakamã nhũm Tirtũm Atãw kot tanhmã amnhĩ tomnuj to hã omunh xà hkôt mẽ pakukamã hamaxpêr o:

—Nã koja mẽ Atãw pyrã nê amnhĩ tomnuj o ri pa. Mÿrapê kot paj ma mẽ kot amnhĩ xà htÿx kamã hamak tũm xãta wÿr mẽ rênh pa. Anê.

Tã Jejus Kris mẽ Atãw wa harênhja kot axpên pyrãk jakamã na hte Atãw kanrêhã hkra nê htãmnhwÿjaja Atãw kot amnhĩ nhĩpêx kôt amnhĩ nhĩpêx o ri pa rãhã nê. Urak nê amnhĩ tomnuj rãhã ho ri pa. Nhũm axtem Jejus kôt mẽ kot amnhĩ xunhwÿr xwÿnhjaja Jejus kôt amnhĩ nhĩpêx rãhã ho ri pa. Te mẽ kêp hkanrêhã hkra nê htãmnhwÿjê pyrã nê urak nê tãm amnhĩ nhĩpêx. Na htem ã ahpÿnhã amnhĩ nhĩpêx anhÿr o ri pa. Na pre Jejus mẽ pahte amnhĩ tomnuj pãnhã amnhĩrer par kaxyw mẽ panê ty. Jakamã mẽ pahte hkôt amnhĩ xunhwÿr xwÿnhjaja na hte Tirtũm ja hã mẽ pahpumunh kôt mẽ pahto hkra. Kot puj mẽ nhÿrmã pahtyk tã nhũm akupÿm mẽ pahto mẽ pahpũr pu mẽ wa kuri pahpũr tũm nê papa ho papa.

Atãw kot Tirtũm kapêr nhĩrôp ãm jakamã na hte Tirtũm mẽ pahpiitã mẽ pahte amnhĩ tomnuj xwÿnh ã mẽ pajarê. Nom nhũm Jejus Atãw rom kot Tirtũm kapêr mar nê hkôt amnhĩ nhĩpêx rãhã jakamã na hte Tirtũm mẽ pahte hkôt amnhĩ xun-

hwÿr xwÿnhjaja amnhîm mẽ pahte amnhî to mex xwÿnh ã mẽ pajarê.

Nhùm Atãw kot Jejus kînhã Tîrtùm kapêr nhîrôp ãm mÿrapê na hte mÿr pê mẽ pa xwÿnhjaja ohtô nê pa nê gaa nê Atãw pyrà nê htyk pa. Hãmri nê kormã htîr ri amnhî to mex o pa hkêt mÿrapê ma mẽ kot amnhî xà htÿx kamã hamak tùm xàta wÿr ma hapêx. Tã nhùm Tîrtùmja mex o mex jakamã na hte Jejus Kris mẽ wa mẽ pakamã ukaprî nê. Jakamã na pre mẽ pahwÿr Jejus mẽ nhùm mẽ pahwÿr wrÿ hãmri nê htyk o mẽ pahte amnhî tomnuj pãnhã amnhîre. Nhùm Tîrtùm ã kot amnhî nhîpêx anhÿr kukwak ri mẽ pahte hkôt amnhî xunhwÿr xwÿnhjaja amarî tanhmã mẽ pahto mex to ho ri pa. Atãw kot amnhî tomnuj pix pumunh kôt na pre Tîrtùm mẽ pahpiitã mẽ pahte amnhî tomnuj xwÿnh ã mẽ pajarê. Tã nhùm Jejus mẽ pakamã ukaprî nê mẽ panê ty nhùm Tîrtùm ja hã omunh xà hkôt ra mẽ pahte amnhî kaxyw hkôt pajamxpêr xwÿnhjaja te mẽ pahte aa tanhmã amnhî tomnuj to hkêt pyràk o mẽ panhîpêx. Na hte amarî ã mẽ panhîpêx anê.

Nê Atãw kot amnhî tomnuj mÿrapê na htem piitã ri pa nê tanhmã amnhî to nê ty rÿ ri pa nê gaa nê wejre nê ty. No na pre Jejus Krisja aa kot amnhî tomnuj kêt kumrêx tã amarî mẽ panê ty. Jakamã nhùm Tîrtùm ra kukwak ri mẽ pahte hkôt amnhî xunhwÿr xwÿnhjê kutã nojarêt rãhã nê mẽ pakukamã hamaxpêr o:

—Nà mẽ kot Ixkra hkôt amnhî xunhwÿr xwÿnhjaja na pa mẽ omunh pa. Tã kot paj Ixkrata kukwak ri tãm mẽ unhwÿ nhùm mẽ nhÿrmã wa ixri mex nê htîr tùm nê pa ho pa. Anê.

20-21 Nê na pre Tîrtùm tanhmã finat Mojes mã kapêr to. Mẽ piitã mẽ kot amnhî tomnuj o ri mẽ pa hã

amnhî pumunh kaxyw. Hãmri nê mẽ kot kapêr mar nê hkôt amnhî nhîpêx o pa kaxyw tanhmã mẽ kaxyw Mojes mã kapêr to. Nhùm kuma nê amnhî xô ri mẽ kãm hã kagà nê mẽ kãm harênh o ri mẽ hkôt pa. No nhùm prem kapêr ma nê ãm kuma nê hkwyòm pix mã ri tanhmã amnhî tomnuj to ho pa. Nê pika piitã hkôt ja arî rãhãã. Ja mÿrapê koja mẽ nhÿrmã ty nê ma mẽ kot amnhî xà htÿx kamã hamak tùm xàta wÿr ma pa. Nom Tîrtùm arî kãm pika piitã hkôt mẽ papa xwÿnhjê japê nê. Mẽ pahte amnhî tomnuj o papa tã nhùm kãm mẽ pahto mex prãm nê. Jakamã na pre mẽ pahwÿr Kra Jejus Kris mẽ nhùm mẽ pahwÿr wrÿ. Mẽ panê htyk o kot mẽ pahte amnhî tomnuj pãnhã amnhîrer kaxyw. Tã kukwak ri kot puj mẽ pahte amnhî kaxyw hkôt pajamxpêr xwÿnhjaja nhÿrmã Tîrtùm mẽ wa kuri pahtîr tùm nê pa mex nê papa ho papa.

6

Mẽ kot mẽ pahkrã kumrâr ã mẽ harênh

Sikÿn Korît 5.17; Karatas 2.19-20, 5.24, 6.14; Epes 4.17-24; Korosê 3.1-11; Wam Pêtre 4.1-6

¹ Nê mẽ pahte arî tôhã tanhmã amnhî tomnuj to htã nhùm Tîrtùm arî kãm nê pajapê nê. Nê arî mẽ pakutã nojarêt rãhã nê. Jakamã xà kot kaj mẽ atô ã harênh anhÿrja ma nê atÿx ri ã ajamxpêr anê nê ajamxpêr o:

—Nà Tîrtùm kãm ijapê nê kot ixkutã nojarêt rãhã ho ri pa jakamã mo kaxyw kot pa Jejus kôt amnhî nhîpêx o ri ixpa? Nà kot paj ho anhÿr kêt nê. Anê.

Ka ã mẽ atô atÿx ri ajamxpêr anhÿr japêr. Kwa xà ajamxpêrja mex? Nà mex kêt. ² ã ajamxpêr anhÿrja mẽ hamaxpêr mex xà hkôt kêt. Ra mẽ pahte Jejus kôt amnhî xunhwÿr nê mẽ pahte amnhî tomnuj kaga jakamã nhùm mẽ pahte

amnhî tomnujja te ra mẽ pahpê hapêx pyrâk. Jakamã kot puj mẽ arî tanhmã amnhî tomnuj to ho ri papa hkêt nê. ³ Mẽmo kaxyw na htem Tirtũm mã mẽ pahkrã kumrã? Nã mẽ pahte ra Jejus kôt amnhî xunhwÿr ã amnhî to amnhîrît kaxyw. Te Jejus htyk nhũm mẽ pahte amnhî tomnujja haxwÿja hkôt htyk nê hapêx par pyrâk o amnhîrît kaxyw. Jakamã na pu htem pajamexpêr o:

—Nã kot paj axte tanhmã amnhî tomnuj to ho ri ixpa hkêt nê. Anê.

⁴ Na htem Tirtũm mã gôx kãm mẽ pahkrã kumrã nhũm mẽ pahte amnhî nhîpêx tũmja te mẽ kot Jejus kôt haxwÿja haxâr pyrâk. Hãmri nhũm mẽ akupÿm mẽ pahto api. Te Tirtũm hihtÿx o hihtÿx o kot akupÿm Kra Jejus ho htîr pyrâk. Te mẽ pahtyk tã nhũm akupÿm kot mẽ pahto mẽ pahtîr pyrâk. Pãnhã mẽ pahte amnhî nhîpêx nyw o amnhî nhîpêx kaxyw. ⁵ Nhũm mẽ pahte amnhî nhîpêx tũmja te Jejus kôt htyk nê hapêx par pyrâk. Nê mẽ pahte amnhî nhîpêx nywja te Jejus akupÿm htîr pyrâk o amnhî nhîpêx.

⁶ Amnepêm na pu pre htem amnhî tomnuj rãhã ho ri papa. Te mẽ kãm mẽ ãpênh xwÿnhjaja kot mẽ õ patrãw mã ãpênh rãhãta pyrâk. Tã nhũm Kris mẽ panê ty. Kot mẽ panê mẽ pahte amnhî tomnuj pãnhã amnhîrer nê ho hapêx par kaxyw mẽ panê ty. Jakamã te mẽ pahte amnhî tomnuj mẽ pajamexpêr punujja te pî kahpa hã Jejus kôt harir nê htyk nê hapêx par pyrâk. Pãnhã mẽ pahte amnhî nhîpêx nyw pix o amnhî nhîpêx kaxyw. Nê mẽ pajamexpêr nyw pix o pajamexpêr papa kaxyw. ⁷ Na hte mẽ htyk xwÿnhjaja axte tanhmã amnhî tomnuj to hkêt nê. Tã kêr pu mẽ urâk nê axte ã amnhî nhîpêx anhÿr kêt nê. ⁸ Na pu prem Jejus kot mẽ panê htyk ã harênh ma nê pajamexpêr o:

—Nã ra Jejus kot mẽ panê htyk jakamã kot paj ixte amnhî nhîpêx tũm kaga hpa nê hpãnhã kot amnhî nhîpêx kôt pix mã ri amnhî nhîpêx o ri ixpa. Te ra ixtyk nê axte tanhmã ixte amnhî tomnuj to ho ri ixpa hkêt pyrâk. Jao amnhî nhîpêx nyw pix o amnhî nhîpêx o ri ixpa. Anê.

⁹ Nê Jejus htyk nhũm Tirtũm akupÿm ho htîr jakamã koja axte htyk kêt nê. Ra mẽ pahte ja mar mex. ¹⁰ Na pre ãm htyk tipxi htã htykja o mẽ pahpiitã mẽ pahte amnhî tomnuj pãnhã amnhîre. Tã ra akupÿm htîr o htîr nê kaxkwa kamã Tirtũm mã tanhmã amnhî nhîpêx to ho ri pa. ¹¹ Tã mẽ papa-jaja kot puj mẽ ã kot amnhî nhîpêx anhÿrja ma nê ã pajamexpêr anê nê pajamexpêr o:

—Nã ãm hãmri. Te ixte Jejus pyrã nê ra ixtyk pyrâk jakamã kot paj axte amnhî tomnuj o ri ixpa hkêt nê. Te ixte Jejus pyrã nê akupÿm ixtîr nê ãm Tirtũm kôt pix mã amnhî nhîpêx o ri ixpata pyrâk o kot paj hpãnhã amnhî nhîpêx o ri ixpa. Anê.

¹² Jakamã kot ka mẽ atõ nhÿrmã tanhmã amnhî kukamã ajamexpêr punuj to japêr hãmri nê ajamexpêr o:

—Nã inhmã ã amnhî tomnuj anhÿr prãm nê. Omnuj tã kot paj ho anê. Nã ixte ho anhÿr mã kênã.

Anhÿr o ajamexpêr japêr tã kwa mẽ ã ajamexpêr anhÿr kêt nê.

¹³ Kêt Tirtũm mã mãn amnhî gõ nê hkôt amnhî nhîpêx o ri apa. Hãmri nê amnhî krã kamã mẽmoj mex pix mã ajamexpêr nê tãm akapêr. Nê mẽ kot amnhî to mex xwÿnhjê kôt pix mã mãn ri apa.

Na ka pre htem akapêr punuj nê.

Nê ajamexpêr punuj nê.

Nê mẽ kot amnhî tomnuj o mẽ pa xwÿnhjê hkôt ri apa.

Nê kagôxyhti japrô nê ho akõm o ri mẽ hkôt apa.

Tā ra hpānhā Tīrtūm mā amnhī gō nē axte ā amnhī nhīpēx anhÿr kêt nē.

¹⁴ Amnepēm na pu prem tanhmā mẽ pahte amnhī nhīpēx to ho papa hkukamā pajamaxpēr nē pajamaxpēr o:

—Nà kot paj Tīrtūm kapēr kôt pix mã măn ri amnhī nhīpēx o ri ixpa nē amnhī to mex o ri ixpa nhūm Tīrtūm ja hā ixpumu nē amnhīm inhmex ā ijarē. Nà kot paj anē.

Anhÿr tā no ām tee ri mẽ pamā hkôt amnhī nhīpēx o ri papa hprām kaprÿ nē arī ri kapēr kwÿm tanhmā amnhī nhīpēx to ho ri papa. Tā ra hpānhā axtem pajamaxpēr o:

—Nà Tīrtūm kot ixkutā nojarēt rāhā ho pa xwÿnh. Tā ra ixte hkôt amnhī xām jakamā koja tanhmā ixto pa hkôt amnhī nhīpēx mex o ri ixpa. Nà koja ixto anē.

Anhÿr jakamā ra amnhī kaxyw kām pajamaxpēr tÿx o mẽmoj punuj kutā amnhī to htÿx nē.

Mē pahte Tīrtūm mã tanhmā amnhī nhīpēx to hā mẽ pajarēnh

Juāw 8.34

¹⁵ Tā ā kot anhÿr jakamā tanhmā kot puj wem pajamaxpēr to? Xà kot pu mẽ ā pajamaxpēr anē nē pajamaxpēr o:

—Nà na hte Tīrtūmja ixte kapēr kôt amnhī nhīpēx o ixpa hā ixpumunh kôt amnhīm inhmex ā ijarēnh kêt nē. Ām kēp ixkutā nojarēt rāhā nē amarī amnhīm inhmex ā ijarēnh xwÿnh jakamā kot paj arī amnhī tomnuj rāhā nē aa ja kaga hkêt nē.

Anhÿr o kot puj mẽ pajamaxpēr? Nà kot puj mẽ ā pajamaxpēr anhÿr kêt nē. Ā mẽ pajamaxpēr anhÿrja mex kêt. ¹⁶ Koja mẽhō nhÿri kot amnhī tomnuj tÿx xwÿnhjē hō pumu nē kām amnhī jarēnh japēr nē kām:

—E inhma. Kot paj ām akôt pix mã tanhmā amnhī nhīpēx to ho ri ixpa. Jakamā e inhmā mẽmoj tā

karō pa ama nē amā tanhmā ho ho ri ixpa.

Anhÿr o kām kapēr japēr. Hāmri nē ā amnhī nhīpēx anhÿr tā amnhī tomnuj pix o ri pa. Tā ā mẽ kot amnhī nhīpēx anhÿr o mẽ pa xwÿnhjaja koja nhÿrmā ty hāmri mẽ kot amnhī xà htÿx kamā hamak tūm xàta wÿr ma hapēx.

No koja mẽhō Tīrtūm mã amnhī jarēnh nē kām:

—Pa Tīrtūm. E kot paj ām akapēr kôt pix mã ri amnhī nhīpēx o ri ixpa.

Anhÿr o kām amnhī jarē nē hkôt amnhī nhīpēx mex o pa. Nē tām amnhī nhīpēx o ri pa. Hāmri nē nhÿrmā ty nē ma ō krī hwÿr api nē Jejus mẽ Tīrtūm wa kuri htūr tūm nē mex rāhā nē pa ho pa.

¹⁷ Tā mẽ kajaja na ka xep prem tee ri mẽ amā mẽ ate amnhī tomnuj mã anhÿrer prām tā nhūm te tām kot amnhī tā mẽ ato htÿx pyrāk o mẽ anhīpēx ka mẽ tee ri kām anhÿrer prām kaprÿ. Tā nhūm Tīrtūm tanhmā mẽ akrā hto ka mẽ kapēr ma nē amnhī kaxyw hkôt ajamaxpēr tÿx nē ām hkôt pix mã amnhī nhīpēx. Pa ja hā mẽ ajarēnh ma nē mẽ anhÿ hā ixkīnh nē. Nē Tīrtūm mã ixte mẽ ajarēnh mar nē mẽ anhÿ hā ixkīnh ā amnhī jarē. ¹⁸ Na pre Tīrtūm tanhmā mẽ akrā hto ka mẽ amnhī tomnuj mã anhÿrer pa nē hpānhā hkôt pix mã amnhī nhīpēx.

¹⁹ E kot paj ixprī hā tanhmā mẽ amā ja jarēnh to. Te ixte ixkrajē jahkre pyrāk o kot paj mẽ amā awjarē. Nà amnepēm na ka prem ajamaxpēr punuj kôt amnhī tomnuj o ri apa. Nē gaa nē ra amnhī tomnuj pix kukamā ajamaxpēr. Tā kêt ka mẽ arī ā amnhī nhīpēx anhÿr kêt nē. Pānhā tām ri ajamaxpēr o ri apa. Jao gaa nē ra Tīrtūm kām hprām xà hkôt tām amnhī nhīpēx mex nē. ²⁰ Na ka prem tee ri amā amnhī tomnuj mã anhÿrer prām kaprÿ. Te tām kot amnhī tā

mê ato htÿx nê amnhî kôt mê ato pa pyrâk o mê anhîpêx. ²¹ Xân ka prem â amnhî tomnuj anhÿr o apa nê akînh nê ajamakêtkati nê ri apa? Nâ na ka prem akînh nê apa hkêt nê. Tâ na ka prem Jejus kôt amnhî xunhwÿ nê tee ri ate tanhmâ amnhî tomnuj to hâ amnhî pumu nê akaprî nê apijaam nê. Â mê kot amnhî tomnuj anhÿr o pa xwÿnhjaja na htem ja mÿrapê ty nê ma mê kot amnhî xâ htÿx kamâ hamak tûm xâta wÿr pa. ²² No na pre ra Tîrtûm tanhmâ mê akrâ hto ka mê amnhî tomnuj kaga hpa. Te Tîrtûm tãm kot hpânhâ amnhî tâ mê ato htÿx nê amnhî kôt mê ato pa pyrâk ka mê ra âm hkôt pix mã amnhî nhîpêx mex o ri apa. Nê hpânhâ amâ kapêr kôt pix mã amnhî nhîpêx mex prâm. Nê hkôt pix mã amnhî nhîpêx hprâm. Jakamâ kot kaj mê nhÿrmâ kuri amex kumrêx nê atîr tûm nê ri apa ho apa.

²³ Na hte mê kâm âpênh o ri mê pa xwÿnhjaja mê kâm mêmoj tâ apê nê âpênh pa nê hpânhâ amnhîrer xâ jamÿ. Ja pyrâ nê koja mê kot amnhî tomnuj xwÿnhjaja nhÿrmâ ty hâmri nê ma mê kot amnhî xâ htÿx kamâ hamak tûm xâta wÿr ma pa.

No mê pahte amnhî kaxyw Jejus Kris kôt pajamexpêr xwÿnhjaja na hte Tîrtûm ja hâ mê pahpumu nê mê pajarênh o:

—Nâ âm hâmri. Jajaja koja nhÿrmâ Ixkra mê wa Ixkuri mex kumrêx nê htîr tûm nê pa ho pa. Hêxta waa nê. Nâ âm hâmri koja mê anê. Anê.

Xâ tãm mê pahte amnhî nhîpêx â mê pahpumunh kôt na hte â mê pajarênh anê? Nâ âm mê pahte Kra Jejus Kris kôt amnhî xunhwÿr â mê pahpumunh kôt pix mã na hte â mê pajarênh anê.

7

Mê pahte amnhî tomnuj kot axte

amnhî tâ mê pahto htÿx kêt â harênh Rômân 8.2, 10.4; Karatas 4.1; Epes 2.2; Korosê 3.7

¹ E Jejus kôt ixkwÿjaja. Nâ Tîrtûm kot mê pakaxyw tanhmâ Mojes mã kapêr tota na ka mê ra mar tÿx nê. Na pu htem kormâ pahtîr ri hkôt amnhî nhîpêx o ri papa. Tâ ty hâmri nê axte hkôt amnhî nhîpêx kêt nê. Ra mê ate ja mar tÿx. E pa mê amâ ja hâ ejêp jarê ka mê inhma.

² Nâ finat Mojes kot Tîrtûm nhÿ hâ mênijaja kot tanhmâ amnhî nhîpêx to ho pa hâ mê kâm karôja. Koja mêhō ho mjên hâmri nê âm kôt pix mã ri pa ho pa nê aa hkaga hkêt nê. No koja nhÿrmâ mjên kêp ty nhûm ahte ri pa. Hâmri nê kâm axte mêhō ho mjên prâm nê māmri axte mêhō ho mjên. Ja tanhmâ kute hkêt.

³ Nom koja wam mjên arî htîr japêr nhûm hprō tanhmâ hamaxpêr to nê hkaga nê hpânhâ nhâm mêhō ho mjên. Hâ koja Tîrtûm pê ja homnuj nê. Nom koja mjên ra kêp ty nhûm mÿrpê axte kâm mêhō ho mjên prâm nê māmri ho mjên. Ja na Tîrtûm pê homnuj kêt. Ra wam mjênja htyk kênâ. Â Tîrtûm kot Mojes mã mê pakaxyw mêmoj tâ karō kot anhÿr.

⁴ Tâ ja pyrâ nê na pu prem anepêp pajamexpêr o:

—Ixte Tîrtûm kapêr kôt pix mã amnhî nhîpêx o ri ixpa jakamâ nhûm Tîrtûm ja hâ ixpumu nê amnhîm inhmx â ijarê. Anê.

Tâ pu mê ra tanhmâ pajamexpêr to nê hpânhâ pajamexpêr ô ho pajamexpêr o:

—Nâ na xep hte Tîrtûm mê ixte kapêr kôt amnhî nhîpêx â mê ixpumunh kôt amnhîm mê inhmx xwÿnh â mê ijarênh kêt nê. Mê ixte hkôt amnhî nhîpêx mex o ri ixpare hâ. Kêt âm Kris kot mê inhnê htyk nhûm mê ixte amnhî kaxyw hkôt ijampêr nê hkôt amnhî xunhwÿr pix â mê ixpumunh kôt na hte mê inhmx â mê ijarê. Âm ja pix â

mê ixpumunh kôt na hte mê ixto hkra nê mê ixkutâ nojarêt o pa. Kra Jejus pix kukwak ri na hte â mê nhîpêx anhÿr o pa. Anê.

Â mê pajamaxpêr nyw kot anhÿr. Jakamâ te mê pahte mēhō kot mjên nyw xwÿnh gryk â axte mjên htyk xwÿnh mâ hamaxpêr kêêta pyrâk o na pu htem amnhî nhîpêx o papa. Jao Kris kapêr kôt pix mâ amnhî nhîpêx o ri papa. Nê Tîrtûm noo mâ tām ri amnhî nhîpêx. Nê axte mê pahte amnhî tomnuj kukamâ tanhmâ pajamaxpêr to hkêt nê.

⁵ Nê amnepê mâ mê pahte amnhî krâ hkôt tanhmâ mê pahte amnhî nhîpêx to ho ri papata â na pu prem amnhî tomnuj pix o ri papa. Ra mê pahte Tîrtûm kapêr mar tÿx tâ kuma nê âm kuma nê ri papa nê ri hkôt amnhî nhîpêx kêt nê. Mÿrapê nhûm Tîrtûm tee ri ja hâ mê pahpumu nê mê pahtyk nê ma mê kot amnhî xâ htÿx kamâ hamak tûm xâ hwÿr papa mâ xwÿnhjê hâ mê pajarê.

⁶ Nê amnepê m na pu pre htem â pajamaxpêr anhÿr o:

—Nâ kot paj Tîrtûm kapêr kôt pix mâ amnhî nhîpêx o ri ixpa nhûm amnhî tâ ixpumu nê ixte amnhî tomnuj kêt xwÿnh â ijarê.

Anhÿr o pajamaxpêr no âm tee ri â pajamaxpêr anhÿr kaprÿ. Nê arî tanhmâ amnhî tomnuj to ho ri papa. Tâ hpānhâ te Jejus Kris kôt pahtyk pyrâk o amnhî nhîpêx nê hpānhâ Karō nhÿ hâ tām amnhî nhîpêx. Jao ra tee ri mê pamâ Tîrtûm kapêr kôt amnhî nhîpêx prām kaprÿ hkêt nê. Ra Tîrtûm Karō nhÿ hâ amnhî nhîpêx nyw o amnhî nhîpêx mex o ri papa.

Tîrtûm kapêr â kagâ htûm kot tanhmâ mê pajarênh to

Römân 3.20, 5.20; Karatas 3.23-24

⁷ Tâ Tîrtûm mê pahte kapêr kôt ri amnhî nhîpêx â mê pahpumunh

kôt amnhîm mê pamex â mê pajarênh kêt jakamâ mēmo kaxyw na kapêr â kagâ htûmja? Nâ mê pahte mar nê pahprî hâ Tîrtûm noo mâ mê kot amnhî tomnuj xâ jarênh mar nê omunh mex kaxyw na. Na hte mê pahkwÿjê kukrêx kînh o pamâ ho panhō hprām nê mê pamâ karō. Â kot mēmoj punuj piitâ nê mê pamâ karō kot anhÿr. Tâ mê pahte ja mar kêt ronhÿx pu mê Tîrtûm kêp ja homnuj â harênh mar kêt nê. ⁸ Tâ ra mê pahte harênh mar nê kêp ja homnuj â harênh ma. Mē pamâ axpên kukrêx kînh o ho pamâ panhō hprāmja mēânên kêp ja homnuj â harênh mar tâ nom aa hkaga hkêt nê arî pamâ axpên kukrêx kînh o pamâ ho panhō hprām tÿx rāhâ ho ri papa. Kop âm Tîrtûm kapêr kêt ronhÿx pu mê kot amnhî tomnuj xâja aa mar kêt kumrêx nhûm te mê pamâ amrakati pyrâk. ⁹ Amnepê mâ ixte Tîrtûm kapêr mar kêt ri na pa pre ixtÿx ri amnhî kukamâ ijamaxpêr o ri ixpa nê ijamaxpêr o:

—E kot paj nhÿrmâ Tîrtûm ri ixtîr tûm nê inhmex nê ixpa ho ixpa.

Anhÿr tâ hpānhâ pamâ axpên kukrêx kînh o ho pamâ panhō hprām nê kapêrta ma nê ja hâ amnhî pumunh kurê kumrêx. Hāmri nê tee ri amnhî kukamâ ijamaxpêr nê ijamaxpêr o:

—Hêxta waa nê. Nâ â ixte amnhî nhîpêx anhÿr o ixpa jakamâ kot paj nhÿrmâ ty nhûm Tîrtûm akupÿm ixto ixtîr pa kuri ixtîr tûm nê ixpa ho ixpa hkêt nê. Hêxta waa nê. Ixte amnhî tomnuj xwÿnh na pa. Kot paj nhÿrmâ ty nhûm Tîrtûm ma mê kot amnhî xâ htÿx kamâ hamak tûm xâta wÿr amnhî nê inhmê. Anê.

Hāmri nê ixkaprî nê tee ri amnhî kukamâ ijamaxpêr o ri ixpa. ¹⁰ Tâ hpānhâ axtem ijamaxpêr o:

—Nâ kot paj Tîrtûm kapêr kôt pix mâ mân ri amnhî nhîpêx o ri ixpa hāmri nê nhÿrmâ ixtyk tâ hwÿr api

nê kuri ixtîr tûm nê inhmex nê ixpa ho ixpa. Nà kot paj anê.

Anhÿr ã ijamaxpêr tâ no ãm tee ri inhmã hkôt amnhî nhîpêx o ixpa hprãm kaprÿ. Na pa pre xatã kapêr nhîrôp ixkuhê nê tee ri ja hã amnhî pumu nê ijamaxpêr o:

—Kwa tanhmã kot pa amnhî nhîpêx to nê ãm Tîrtûm kôt pix mã ri amnhî nhîpêx? Na pa hte tee ri inhmã ã amnhî nhîpêx anhÿr prãm tÿx kaprÿ. ãm ixte amnhî tomnuj pix o ri ixpa xwÿnh jakamã ãm hãmri koja amnhî nê kuwyta wÿr inhmê. Nà koja ixto anê. Hêxta waa nê. Tanhmã kot paj we ja nê kãm ixkapêr to? Anê.

¹¹ No mêhõ koja Tîrtûm kapêr kôt amnhî nhîpêx mex o ri pa? Na pu htem pahpiitã tee ri pamã ho anhÿr prãm kaprÿ. Mê pahpê hihtÿx kumrêx jakamã na pa pre ixtÿx ixte Tîrtûm kuri ixtîr tûm nê ri ixpa hã amnhî kukamã amnhî jarênh kaprÿ. ãm xatã kapêr nhîrôp ixkuhê nê amnhî tomnuj pix o ri ixpaja mÿrapê koja mẽ kot amnhî xã htÿx kamã hamak tûm xãta wÿr amnhî nê inhmê. ¹² Kot anhÿr tâ tanhmã kot puj mẽ Tîrtûm kapêr ã kagã htûmta jarênh to? Nà kot mẽ pamã mẽ pahte amnhî nhîpêx ã karõta mex kumrêx. Mex o mex. ¹³ Mex kumrêx tâ na htem kuma nê tee ri kãm hkôt amnhî nhîpêx hprãm kaprÿ. Jao nhÿrmã ty nê ma kuwy hwÿr pa. Kêt pa na pa pre ra mar nê omunh mex tâ hkôt amnhî nhîpêx mex kêt nê. Jao ra ixte amnhî tomnuj xwÿnh ã amnhî pumu. Na pa pre tee ri inhmã hkôt amnhî nhîpêx o ri ixpa hprãm tâ no ãm xatã kapêr nhîrôp ixkuhê nê hkwyãm ri amnhî nhîpêx rãhã ho ri ixpa. Tã ra tee ri ja hã amnhî pumu nê amnhî kukamã ijamaxpêr o:

—Nà na pa hte ãm tee ri inhmã Tîrtûm kôt amnhî nhîpêx prãm kaprÿ no ãm ho anhÿr kêt nê. ãm ixte amnhî tomnuj pix o ixpa

xwÿnh na pa. Ja mÿrapê koja Tîrtûm amnhî nê ma kuwy hwÿr inhmê. Nà koja ixto anê. Anê.

Mê pahte mẽ pamã amnhî tomnuj kaga hprãm kaprÿ hã mẽ pa-jarênh

Karatas 5.17

¹⁴ Nê Tîrtûm kapêr ã kagã htûmta Tîrtûm kapêr na. Nê Tîrtûm kînhã ãm inhî pix na pa ri ixpa jakamã tanhmã kot pa amnhî to nê kapêr kôt ri amnhî nhîpêx mex o ri ixpa? ¹⁵ Inhmã tãm ixte amnhî nhîpêx prãm tâ no ãm amnhî tomnuj pix o ri ixpa. Mêmoj ixpê omnuj tâ pa hte ra hkôt tanhmã amnhî tomnuj to ho ri ixpa. Hãmri nê ja hã amnhî pumu nê tee ri amnhî kukamã ijamaxpêr o:

—Hêxta waa nê. Mon pa hte axtem nê ã amnhî nhîpêx anhÿr o ri ixpa? Mêmoj ixpê omnuj nhûm inhmã ho anhÿr prãm kêt tâ ra ho anê. Nhûm mẽmoj mex nhûm inhmã ho anhÿr prãm tâ ho anhÿr kêt nê. Mon pa hte axtem nê ã amnhî nhîpêx anhÿr o ri ixpa? Anê.

¹⁶ ã ixte amnhî nhîpêx anhÿr o ri ixpa htã ra Tîrtûm kapêr mexta ma hãmri nê ra ijamaxpêr o:

—Nà Tîrtûm kapêrja mex kumrêx tâ pa tee ri inhmã hkôt amnhî nhîpêx mex hprãm kaprÿ ho ri ixpa. Hêxta waa nê. Anê.

¹⁷ Inhmã amnhî tomnuj prãm kêt tâ arî ixkaxwÿnh kãm ijamaxpêr punuj nhÿ hã ã amnhî nhîpêx anhÿr o ri ixpa. ¹⁸ Nê inhmã tãm amnhî nhîpêx prãm tâ no ãm tee ri ã inhmã amnhî nhîpêx anhÿr prãm kaprÿ. Tanhmã kot pa amnhî to nê tãm amnhî nhîpêx o ri ixpa? Na pa tee ri inhmã ja ho anhÿr prãm kaprÿ. Ixte amnhî tomnuj xwÿnh na pa. Nê aa ixte amnhî to mex kêt kumrêx xwÿnh. ¹⁹ Inhmã mẽmoj mex kôt pix mã amnhî nhîpêx prãm tâ no ãm ã amnhî nhîpêx anhÿr kêt nê. Nê ãm hkwyãm ri tanhmã amnhî tomnuj to ho ri ixpa. Mêmoj ixpê

8

omnuj tä pa hkôt amnhĩ nhĩpêx o ri ixpa. ²⁰ Ixte Tĩrtũm kapêr kôt amnhĩ nhĩpêx kêt jakamã na pa hte ã amnhĩ tomnuj anhÿr o ri ixpa. Mẽmoj ixpê omnuj pa inhmã ho anhÿr prãm kêt tä ra hkôt amnhĩ nhĩpêx. Ixte Tĩrtũm kapêr kôt amnhĩ nhĩpêx kêt jakamã ã amnhĩ nhĩpêx anhÿr o ri ixpa. ²¹ Nẽ mẽmoj mex nhũm inhmã hkôt amnhĩ nhĩpêx prãm tä ra hkwým ri amnhĩ nhĩpêx. ã ixte amnhĩ nhĩpêx anhÿr xwýnh na pa. ²² Nẽ inhmã Tĩrtũm kapêr mar nẽ hkôt ri amnhĩ nhĩpêx prãm tä ²³ nom ixte amnhĩ tomnuj xwýnh jakamã hkôt amnhĩ nhĩpêx kêt nẽ. Na pa tee ri ja hã amnhĩ pumu nẽ amnhĩ kukamã ijamaxpêr o:

—Nà kot paj axte amnhĩ tomnuj kêt nẽ. Kot paj ãm amnhĩ to mex pix kukamã ijamaxpêr o ri ixpa.

Anhÿr tä no ãm arĩ amnhĩ tomnuj o ri ixpa nẽ amnhĩ to mex kêt. Ixte amnhĩ tomnuj xwýnh jakamã na pa hte ã amnhĩ nhĩpêx anhÿr rãhã ho ri ixpa nẽ tee ri inhmã amnhĩ tomnuj kaga hprãm kaprÿ. ²⁴ Hêxta waa nẽ. Na pa ixkaprĩ htÿx nẽ ri ixpa. ã ixte amnhĩ nhĩpêx anhÿr o ri ixpaja mÿrapê kot paj nhÿrmã ty nẽ ma mẽ kot amnhĩ xà htÿx kamã hamak tũm xàta wÿr ma mō. Mẽhō kot tanhmã ixkrã hto pa ã amnhĩ nhĩpêx anhÿrja kaga? ²⁵ Nã mẽ panhō Pahihti Jejus Krisja pix. Tãm koja ixte amnhĩ tomnuj kutã tanhmã ixto ixihtÿx to. Jakamã na pa axte tee ri amnhĩ kukamã ijamaxpêr kêt nẽ. Pãnhã ixkĩnh nẽ ri ixpa nẽ Tĩrtũm mã kãm:

—Pa Tĩrtũm. Nã ãm hãmri amex o amex. Anẽ.

Tã ra ixte Jejus Kris kôt amnhĩ xãm jakamã koja tãm tanhmã ixto ixihtÿx to pa rĩ kormã Tĩrtũm kapêr kôt amnhĩ nhĩpêx mex o ri ixpa. No kot pa pam amnhĩ krã hkôt amnhĩ tomnuj rãhã ho ri ixpa. ã ixte anhÿr xwýnh na pa.

Tĩrtũm Karō kot mẽ pahto tãm mẽ pahte amnhĩ nhĩpêx xwýnh ã harēnh Karatas 5.16-26

¹ Nẽ Jejus Kris kêp mẽmoj punuj kutã mẽ pahto mẽ paxihtÿx xwýnh jakamã mẽ pahte hkôt amnhĩ xunhwÿr xwýnhjaja na pu htem ÿ hã amnhĩ tomnuj o ri papa hkêt nẽ. Jao mẽ pahte kuwy hwÿr papa mã xwýnh kêt. ² Te ra mẽ pahtÿk nhũm Tĩrtũm kot akupÿm mẽ pahto mẽ pahtĩr pyrãk jakamã nhũm Karōja mẽ pahkarō mã agjê pu mẽ ÿ hã tãm amnhĩ nhĩpêx o ri papa. Te tãm kot amnhĩ nhĩpêx pyrãk o amnhĩ nhĩpêx nhũm Karō mẽmoj punuj piitã kutã mẽ pahto mẽ paxihtÿx. Kêp mẽ pajamaxpêr punuj kutã mẽ pahto mẽ paxihtÿx xwýnh jakamã kot puj mẽ nhÿrmã mẽ kot amnhĩ xà htÿx kamã hamak tũm xàta wÿr papa hkêt nẽ.

³ Nom kormã mẽ pahte Jejus kôt amnhĩ xunhwÿr kêt ri na pu prem tee ri pamã Tĩrtũm kapêr piitã hkôt amnhĩ nhĩpêx prãm kaprÿ nhũm mẽ pahpê hihtÿx kumrêx. Jakamã tanhmã koja Tĩrtũm amnhĩ to nẽ amnhĩ mã mẽ pamex xwýnh ã mẽ pajarê? Na pre tee ri amnhĩ tä mẽ pajamã hãmri nẽ mẽ pahwÿr Kraja mẽ nhũm man mẽ pahwÿr wrÿ nẽ mẽ pahpyrà nẽ ï ho mẽ pakamã kato. Nom mẽ parom aa tanhmã amnhĩ tomnuj to hkêt kumrêx nẽ ri pa. Tã mẽ kot hpĩr tä nhũm amarĩ htyk kêt nẽ. Na pre htyk o mẽ pahte amnhĩ tomnuj piitã hpãnhã amnhĩrer pa. Jakamã tãm kêp mẽ pajamaxpêr punuj kutã mẽ pahto paxihtÿx xwýnh. Na pu htem hkôt amnhĩ xunhwÿ hãmri nẽ kukwak ri amnhĩ tomnuj o ri papa hkêt nẽ. ⁴ Pãnhã Tĩrtũm kot amnhĩ nhĩpêx kôt amnhĩ nhĩpêx o ri papa nẽ axte mẽ pahte amnhĩ nhĩpêx tũm kôt amnhĩ nhĩpêx kêt nẽ. Hãmri hpãnhã Tĩrtũm Karō kot amnhĩ nhĩpêx kôt pix mã amnhĩ

nhîpêx. Nê hamaxpêr kôt pix mã pajamaxpêr. Ja kaxyw na pre Tîrtûm mẽ pahwÿr Kraja mẽ nhũm wrÿ nê mẽ pahpiitã mẽ panê ty.

⁵ Nê mẽ kot amnhî krã hkôt tanhmã amnhî nhîpêx to ho ri mẽ pa xwÿnhjaja na htem htÿx ri tanhmã hamaxpêr to xã hkôt amnhî nhîpêx o ri pa. No kêt Tîrtûm Karô kot mẽ pahkarô mã gjêx xwÿnhjaja na pu htem mẽ kurom te Jejus jamaxpêr pyrãk o pajamaxpêr o papa.

⁶ Nê mẽ kot amnhî krã hkôt amnhî nhîpêx xwÿnhjaja koja mẽ nhÿrmã ty nê ma kuwy hwÿr pa nê kamã pa ho pa. No mẽ pahte Tîrtûm Karô hkôt amnhî nhîpêx xwÿnhjaja kot puj mẽ pajamaxpêr nyw o pajamaxpêr nê amnhî nhîpêx nyw o amnhî nhîpêx. Jao paxãmnhîx ri pajamakêtkati nê ri papa. Nê nhÿrmã ty hãmri nê Tîrtûm mẽ Jejus wa kuri akupÿm pahthîr tũm nê pamex kumrêx nê papa ho papa.

⁷ Nê mẽ kot amnhî krã hkôt ri amnhî nhîpêx xwÿnhjaja kãm Tîrtûm kînh kêt. Nê kãm kapêr mar prãm kêt jakamã tanhmã kot mẽ amnhî to nê hkôt amnhî nhîpêx? ⁸ Koja mēhō amnhî krã hkôt kãm hprãm xã hkôt pix mã amnhî nhîpêx hãmri nhũm Tîrtûm tee ri ja hã omu nê hkînh kêt nê. ⁹ No mẽ papajaja na pu htem mẽ urãk nê ã amnhî nhîpêx anhÿr kêt nê. Ra Tîrtûm Karô kot mẽ pahkarô mã gjêx jakamã na pu htem hkôt pix mã amnhî nhîpêx hprãm. No koja Tîrtûm Karô mēhō kaxwÿnh mã àr kêt nê nhũm kêp hkra hkêt nê.

¹⁰⁻¹¹ Tã mẽ papajaja. Mẽ pahte amnhî tomnuj mÿrapê koja mẽ pakrãhkaja nhÿrmã ty. No nhũm Tîrtûm ra kot amnhîm mẽ pahte amnhî to mex xwÿnh ã mẽ pajarênh nhũm Kris Karô kot mẽ pahkarô mã gjêx jakamã koja mẽ pahkarôja htyk kêt nê. Mẽ pakrãhkã pix koja ty nhũm mẽ

pahkarôja ma kaxkwa hwÿr àpir kurê kumrêx. Tã nhũm nhÿrmã Tîrtûm akupÿm mẽ pakrãhkã ho htîr nê akupÿm mẽ pahkarôja mẽ pakrãhkãm hagjê pu mẽ wa kuri pahthîr tũm nê papa ho papa. ¹² Jakamã e kwa ixkwÿjaja. Kêr pu mẽ axte ri mẽ pajamaxpêr tũm kôt amnhî nhîpêx o ri papa hkêt nê. ¹³ Kot puj mẽ arî ã amnhî nhîpêx anhÿr o ri papa hãmri nê nhÿrmã ty nê ma mẽ kot amnhî xã htÿx kamã hamak tũm xãta wÿr papa. Jakamã kêr pu mẽ mẽmo arîgro hã pamã tanhmã amnhî tomnuj to hprãm hãmri nê amnhî kukamã pajamaxpêr o:

—Nã inhmã ã amnhî nhîpêx anhÿr prãm tã kot paj Tîrtûm Karô nhÿ hã ja kutã amnhî to htÿx nê ho anhÿr kêt nê. Anê.

Kot puj mẽ ã pajamaxpêr anê hãmri nê nhÿrmã kuwy wÿr papa hkêt nê. Pãnhã Tîrtûm mẽ Jejus wa kuri pamex nê pahthîr tũm nê ri papa ho papa. ¹⁴ Mẽ kot Tîrtûm Karô hkôt amnhî nhîpêx xwÿnhjaja kêp Tîrtûm kraa.

¹⁵ Nom amnepêem kormã mẽ pahte hkôt amnhî xunhwÿr kêt ri. Nê kormã mẽ pamã kapêr mar prãm kêt ri nhũm kot amnhî tã mẽ pahpumunh nê tanhmã mẽ pahte pumaj na pu prem pamã uma ho ri papa. Tã hkôt amnhî xunhwÿ nhũm Karôja mẽ pahkarô mã gjêx jakamã na pu htem ra pamã uma hkêt nê ri papa. Karô kot mẽ pahpê Tîrtûm kra hã mẽ pajarênh jakamã pu mẽ amnhî kamã kot tanhmã mẽ panhîpêx to puma hkêt nê ri papa. Nê paxãmnhîx pajamakêtkati nê kãm amnhî jarê nê kãm amnhî jarênh o:

—Pa Inhîpêêxã maati? Ot pa ixpê akra hã amã amnhî jarênh kaxyw amnhî kaxyw amã ijamaxpêr. Anê.

Jao ra mẽ pamã uma hkêt nê ri papa. ¹⁶ Karô kot mẽ pahkarô mã gjêx nhũm mẽ pahte amnhî tã

omunh jakamã na pu htem paja-maxpêr o:

—Nà Tirtûm Karô kot ixkarô mã àr jakamã ixpê hkra na pa. Anê.

Nhÿrmã mêmôj piitã akupÿm mex par ã harênh

Sikûn Korût 4.16-18; Korosê 3.4; Wam Pêtre 4.13

¹⁷ Nê mê kãm Tirtûm prãm kêt xwÿnhjaja na htem te mê kot Tirtûm Kra Jejus nhÿpêx pyrãk o mê panhÿpêx pu mê pahpunuj nê ri papa. Nom kot puj mê nhÿrmã Tirtûm mex o mex xwÿnhja kuri pamex kumrêx nê papa. Mê pahpê hkra jakamã kot puj mê Kra Jejus pyrã nê ô krÿ kamã kuri pamex kumrêx nê ri papa ho papa. ¹⁸ Jar Jejus ã mê pahpunuj nê ri papa htã kot puj mê nhÿrmã kuri pamex kumrêx nê papa ho papa. Hãmri nê mê pamex o pamex ã amnhÿ pumu nê jar pika ja kamã tanhmã mê pahpunuj toja mã axte pajamaxpêr kêt kumrêx.

¹⁹ Nê pika hkôt Tirtûm kot mêmôj ho kator xwÿnhjaja na htem Tirtûm kot mê pahto mex par jatur xãm mênh ã arÿgro jamãr rãhã ho pa. àk nê mry nê pÿ nê gô nê mêmôj piitã mê pajamãr o pa. Te kot mê pakukamã hamaxpêr o:

—Kwa mêmô arÿgro hã koja Tirtûm hkrajê piitã ho amnhÿrÿt nê mê ho mex par jatur xãm kumê pu mê ja hã mê omu? Hêxta waa nê. Inhmã tokyx ja hã mê omunh prãm tÿx. Koja tokyx ã mê hipêx anê pa ixkÿnh tÿx kumrêx.

Anhÿr o hamaxpêr pyrãk. ²⁰ Mêmô kaxyw na hte mryja ã mê pakukamã hamaxpêr anê? Nà amnepê mã Tirtûm kot mêmôj piitã ho katorta ã nhÿm pre piitã mex o mex. Pÿ nê mry nê gô. Mêmôj piitã mex kumrêx rãhã nê. Aa grã nê htyk kêt kumrêx. Tã Atãw kot amnhÿ tomnuj mÿrapê nhÿm ra ÿ hã mêmôj piitã homnu par jakamã na hte mêmôj htÿr nê pa nê gaa nê ty nê hapêx. Nê mê pahpur

kãm ahkagrôt punuj hapôj. Atãw kot amnhÿ tomnuj mÿrapê nhÿm Tirtûm kapêr xã hkôt ã mêmôj omnu hpar anê. ²¹ Nom koja arÿ rãhã ho rãhã hkêt nê. Koja nhÿrmã Tirtûm akupÿm mêmôj piitã ho mex pa nhÿm mex o mex nê axte grã rÿ axte htyk nê hapêx kêt nê. Nê axte omnu nê hikwÿ hkêt nê. Koja mê pahpyrã nê mex o mex. Jakamã na htem Tirtûm kot mê pahto mex par jatur xãm mênh xã hã arÿgro jamãr rãhã ho pa. ²² Te mêhõ ni hpijagri kaxyw ôhy xã htÿx nê tokyx kãm hpijagri hprãm xãj ãmra ho nôr pyrãk o amnhÿ nhÿpêx pê mê pahto mex jatur xãm mênh ã arÿgrota jamãr o pa.

²³ Nê mê papajaja na pu htem tanhmã pahpunuj to nê jajê pyrã nê te amnhÿ kamnhêr o ri papa pyrãk. Rÿ tanhmã paxà kute nê ri papa. Rÿ pamã prãm nê paxàà nê ri papa. Nê tanhmã mê pahpunuj to nê ri papa. Jao te pÿ nê gô nê mryja pyrã nê amnhÿ tã Tirtûm kot mê pahto mex par jatur xãm mênh ã arÿgro jamãr rãhã ho ri papa.

Na pre Tirtûm mê pahwÿr Karô rê nhÿm mê pahkarô mã agjê nê mê pakukamã Tirtûm tanhmã kot mê pahto mex to hã mê pamã ho amnhÿrÿt nê mê pamã ho amnhÿrÿt o:

—Koja nhÿrmã Tirtûm mê ato mex par jatur xãm kumê nê mê piitã mê kãm mê apê hkra hã mê ato amnhÿrÿt. Hãmri nê mê amã mê anhÿ nyw gô ka mê axte axà nê ri apa nê atyk kêt nê. Hãmri nê Tirtûm ri amex kumrêx nê ri apa ho apa. Nà kot kaj mê nhÿrmã ã amnhÿ nhÿpêx anê. Anê.

Ã Tirtûm Karô kot mê pakukamã mê pajarênh anhÿr jakamã na pu htem amnhÿ tã kot mê pahto mex jatur xãm mênh pix jamãr o ri papa. ²⁴ Nom na kormã ã mê pahto mex anhÿr kêt nê. Kormã mê pamã mê panhÿ nyw nhôr kêt nê. Nom ra kot

mê pahto hkra jakamã pu mê ja hã amnhĩ pumu nê pajamexpêr o:

—Nã ra Tirtũm kot ixto hkra jakamã koja nhỹrmã mããnên inhmã inhĩ nyw gõ. Nã koja inhmã kugõ.

²⁵ Anhỹr o pajamexpêr tã kormã. Na pu htem kormã amnhĩ tã hamãr rãhã ho ri papa nê aa hkaga hkêt nê papa.

Mê pahte Tirtũm Karõ nhỹ hã Tirtũm mã amnhĩ jarênh

²⁶ Nê na pu htem Tirtũm mã amnhĩ jarênh kaxyw nhũm hte Karõja mê pahto ajuta pu mê ý hã pakatãt kôt kãm tanhmã amnhĩ jarênh to. No kot puj mê amnhĩ krã hkôt kãm amnhĩ jarênh mex kêt nê. Na pu htem ja kaxyw tee ri amnhĩ kukamã pajamexpêr o:

—Kwa tanhmã kot pa Tirtũm mã amnhĩ jarênh to? Tanhmã kot pa mêmoy tã ixãhwýr to rý amnhĩ to hwýr to? Nã kot paj amnhĩ krã hkôt ja ho anhỹr mex kêt nê. Hêxta waa nê. Anê.

No nhũm Tirtũm Karõ ra kot mê pahkarõ mã gjêx jakamã na hte tanhmã mê pahkrã hto pu mê ý hã kãm amnhĩ jarênh mex nê pakatãt kôt mêmoy tã kuwý. Te Karõja tanhmã mê pakute hã mê pahpumunh nê mê pakamã ukapri xãj tãm mê pahto hwýr pyrãk.

²⁷ Jakamã pu mê ý hã tanhmã Tirtũm mã amnhĩ jarênh to nhũm mê pamar kurê kumrêx. Ra kot mê pajamexpêr kôt mê pahpumunh par kênã. Nhũm ra Karõ kot mê pahkarõ mã gjêx jakamã na pu htem kãm hprãm xã hkôt kãm amnhĩ jarê nê tanhmã amnhĩ to paxãhwýr to.

Tirtũm kot mê pamã mêmoy piitã ho mex ã harênh

Rômân 8.37; Piripos 1.12; Wam Pêtre 5.10

²⁸ Nê mê pamã Tirtũm kĩnh xwýnhjaja. Tirtũm kot mê pahto hkra xwýnhjaja. Koja mêmoy mê pakamã tanhmã amnhĩ to htã kër

pu mê ãm ja hã amnhĩ pumu nê tee ri amnhĩ kukamã pajamexpêr kêt nê. Koja te mê pahpê omnuj pyrãk tã koja nhỹrmã hpãnhã mê pamã mex nê. Koja Tirtũm nhỹrmã tanhmã mê pamã mêmoyta o mex to. ²⁹ Amnepê mã mêmoy piitã hkêt ri na pre Tirtũm mê pakukamã tanhmã mê pajarênh to nê mê pajarênh o:

—E kot paj nhỹrmã mê kot Ixkra Jejus kôt amnhĩ xunhwýr xwýnhjê ho ixkra jakamã nhũm mê Jejus pyrã nê kêp ixkraa. Nê urãk nê ixkapêr kôt amnhĩ nhĩpêx o pa. Jao pa ra ixkra xohtõ nê. Nã ja na inhmã hprãm. Anê.

³⁰ Tã pu htem pajapõj nê ri papa. Hãmri nê kapêr ma nê amnhĩ kaxyw Kra Jejus kôt pajamexpêr nê hkôt amnhĩ xunhwý. Hãmri nhũm Tirtũm ja hã mê pahpumu nê pahto hkra nê amnhĩm mê pamex xwýnh ã mê pajarê nê mê pahto mex nê. Nê te ho Kra Jejus nhĩpêx pyrãk o mê panhĩpêx. Jao nhỹrmã wa kuri mê pahpũm nê papa ho papa mã xwýnh ã mê pajarê.

Mêhõ kot Tirtũm pê aa mê papypýtãr kêt ã harênh

Rômân 5.1

³¹ Tã ã Tirtũm kãm mê pajapê nê mê pahto mex kot anhỹr. ã kot mê panhĩpêx mex anhỹr jakamã ra mê pahkôt pa ho pa rãhãã. Jakamã mêhõ koja ãhkra pê mê pahpytã? Nê mêhõ koja tanhmã ri kêp mê pahto? Nã koja kêp mê papypýtãr rý tanhmã kêp mê pahto hkêt nê.

³² Tirtũm kãm Kra Jejus japê htýx tã na pre mê pahpê nê hkêt nê mê pahwýr kumê. Te kot mê pamã ôr pyrãk o hipêx nhũm mê pahwýr wrý nê mê panê ty. Tã ra Tirtũm kot mê pamã ôr jakamã koja mããnên kãm mê pahte Kra hkôt amnhĩ xunhwýr xwýnhjê japê nê mê pahto mex rãhã ho ri pa. Nã koja ã mê pahto mex anê.

33 Jakamã mēhō koja kãm mē pahte amnhī tomnuj xwÿnh ã mē pajarē? Ra tãm kot mē pahto hkra nē mē pahte amnhī to mex xwÿnh ã mē pajarēnh kēnã kot kêt mēhō kãm tanhmã mē pahto kapër punuj to nhũm mē kuma. Koja mē tee ri kãm tanhmã mē pahto kapër to kaprÿ. ³⁴ Na pre ra Jesus Kris mē pahte amnhī tomnuj pãnhã amnhīrer kaxyw mē panē ty nhũm Tirtũm akupÿm ho htĩr. Hãmri nhũm ma akupÿm kaxkwa hwÿr api nē Pahi Maati krĩ xã kamã Tirtũm nhĩhkô hã hkrĩ ho hkrĩ. Nē Tirtũm mã mē pakutã nojarêt rãhã ho kuri hkrĩ ho hkrĩ. Jakamã mēhō koja kēp mē kot amnhī xã htÿx kamã hamak tũm xãta wÿr mē pajano? Nã amrakati kumrēx.

³⁵ Nē Krisja kaxkwa kamã Tirtũm nhĩhkô hã hkrĩ ho hkrĩ htã mããnēn jar mē pahkôt pa ho pa. Kãm mē pajapē htÿx jakamã kot puj mē tanhmã pahpunuj to htã nhũm arĩ kãm mē pajapē nē mē pahkôt pa ho pa.

Rÿ nhũm mē kot hkôt amnhī xunhwÿr kêt xwÿnhjaja tanhmã hã mē pahto htã nhũm arĩ kãm mē pajapē kamã mē pahkôt pa ho pa.

Rÿ mē pamã prãm nē ri papa. Rÿ mē paxê hkêt nē pamã kry nē ri papa htã nhũm arĩ kãm mē pajapē kamã mē pahkôt pa ho pa.

Rÿ ra mē kot hã mē panhĩmex kaxyw rÿ hã mē pahpar kumrēx. Tã nhũm arĩ kãm mē pajapē kamã mē pahkôt pa ho pa rãhã nē.

Kãm mē pajapē kamã mē pahkôt pa ho pa rãhã jakamã pu mē tee ri amnhī kukamã pajamexpēr kêt nē. ãm hkôt paxãmnhĩx ri pajamakêtkati nē ri papa ho papa.

³⁶ Tirtũm kapër ã kagã htũm te mē papajaja mē pahte kãm tanhmã amnhī jarēnh to pyrã nē mē pajarēnh kot:

Pa Tirtũm. Na htem atã mē ixtomnuj tÿx o pa.

Nē ra mē kot mē inhĩmex kaxyw.

Nē mē inhĩpêx o te mē kot ôwēhti ho mōr nē hpar kaxyw tanhmã hipêx to pyrãk.

Jakamã na pa mē ra ixtyk kaxyw.

Anhÿr o kot mē pajarēnh. ³⁷ Tã kwār mē ã mē panhĩpêx anē. Arĩ Kris kãm mē pajapē kamã mē pahkôt pa ho pa rãhã jakamã mē kot tanhmã mē pahto htã pu mē arĩ amnhī kaxyw kãm pajamexpēr tÿx rãhã ho ri papa. Nhũm arĩ mē kutã mē pahto paxihtÿx pu mē arĩ mē kãm pakuhē.

³⁸ Mēmoj koja tanhmã mē pahto nhũm Tirtũm tee ri ja hã mē pahpumu nē kãm mē pajapē hkêt nē? Nã amrakati kumrēx. Koja mēhō rÿ mēmoj mē pahpē ãmnãr kêt nē. Na hte jar pika ja kamã Kris kãm mē pajapē kamã mē pahkôt pa ho pa. Nē kot puj mē nhÿrmã ty nhũm arĩ kãm mē pajapē kamã mē pahkôt pa ho pa rãhã nē. Jakamã koja mēkarō rÿ mēkarōmnuti rÿ jar pika ja kamã mē kãm Tirtũm prãm kêt xwÿnhjaja mē pahpē ãmnãr kêt nē. Rÿ mēmoj tanhmã kute. Rÿ kormã hapu hã mēmoj tanhmã kute. Koja mēmoj piitã tee ri tanhmã kēp mē pahto htã nhũm Kris arĩ kãm mē pajapē kamã mē pahkôt pa ho pa rãhã nē nhũm mēmoj tee ri mē pahpē ãmnãr kaprÿ. ³⁹ Nē koja kÿj rũm mēmoj wrÿ nē tanhmã kēp mē pahto japēr. Rÿ pyka rũm mēmoj kato nē tanhmã kēp mē pahto japēr. Rÿ kuwy rÿ kók xãpēr tÿx tanhmã kēp mē pahto. Tã nhũm mē panhō Pahihti Jesus Kris arĩ kãm mē pajapē kamã mē pahkôt pa ho pa rãhã nē. Te Tirtũm kãm mē pajapē pyrãk o kãm mē pajapē htÿx kãm mē pahkôt pa ho pa rãhã jakamã nhũm mēmoj tee ri mē pahpē ãmnãr kaprÿ.

9

Ijaew jarēnh

Atre 3.25; Römān 3.1-2

¹⁻² Nē na pa tee ri ixkwý Ijaew kot tanhmā amnhī nhīpēx to ho pa hā mē omu nē ixkaprī nē. Ixpyrà nē mē kēp Ijaew tā ixkīnhā amnhī kaxyw Kris kôt hamaxpēr kêt jakamā nhūm Kris tee ri kām mē hamakêtkati nē àmnhīx ri mē pa hprām kaprý. Pa tee ri mē hkukamā ijamaxpēr nē ixkaprī nē ri ixpa. Nē aa ixkaprī ixpêkator kêt kumrēx. Mē kot inhmā mē hkīnh kêt ā amnhī tā ijarēnh tā inhmā mē hkīnh kēnā. Ām hāmri na pa ā amnhī jarēnh anē. Tirtūm Karō kot ja hā ixpumunh mex nē inhmā:

—Nā ām hāmri na ka amā mē hkīnh ā amnhī jarē. Anē.

³ Mē kēp ixkwý na mē. Mē ixpār kraxja ām pixi mex. Tā nhūm mē ixkīnhā amnhī kaxyw Kris kôt hamaxpēr kêt jakamā kop ām Tirtūm kot mē nē kuwy hwýr pa inhmēnh ronhýx ja inhmā mex. Nhýx pa kām:

—Kwa Tirtūm. Amnhī nē kuwy hwýr ixkwýjē rēnh kêt nē. Inhmā mē hapē htýx kumrēx. Mē hpānhā pa mǎn mē nē hwýr inhmē nā.

Anhýr o nhýx pa kām ixkapēr. Nom kot paj amnhī to ā ixàhwýr anhýr kaprý. Tirtūm kot mē kamā ukaprī htā no nhūm mē amnhī kaxyw Kris mā hamaxpēr kêt jakamā tanhmā koja amnhī to nē mē hpānhā pa mē nē kuwy wýr inhmē nhūm mē ixrom kuri htír tūm nē pa ho pa? Mē kot hkôt amnhī xunhwýýre hā. ⁴ Mē ixpê Ijaew nhīgétjaja na pre Tirtūm amnepē mā mē ho mex rax nē. Nē kām mē ho hkra hprām nē. Nhūm prem tanhmā kot amnhī nhīpēx mex to hā no ho omunh o pa. Nē hirā htýx kām ri pa hā omu nhūm mē kām:

—E kot kaj mē ixkapēr ma nē ixkôt amnhī nhīpēx o ri apa. Hā kot paj mē akôt ixpa ho ixpa nē mē

ato mex nē ka mē axpēn kanrēhā axāmnār rax nē. Hāmri pa mē amā pika mex gō ka mē kamā ajamakêtkati nē axāmnhīx ri apa ho apa.

Anhýr o mē kām kapēr. Hāmri nē mē kaxyw Mojes mā tanhmā kapēr to nē mē kaxyw kām mēmoj piitā hā karō. Mē kot tanhmā amnhī tomnuj to hāmri nē tee ri ja hā amnhī pumunh nē tanhmā amnhī to Tirtūm wýr to nhūm kot mē mar nē mē nē ja ho hapēx par kaxyw. Finat Mojes kot amnhī xō ri mē kām ujarēnh nhūm mē kot mar nē hkôt amnhī nhīpēx mex o ri pa kaxyw. ⁵ Mē ixkukamā mē ixpāmjaja. Apraāw nē Ijak nē Jako kanrēhā mē hkra nē mē htāmnhwýjaja na pre mē. Mē hwýr na pre Tirtūmja Kra Jejus Kris mē nhūm mē hwýr wrý nē mē kamā ī ho ī ho kator jakamā haxwýja kēp Ijaew na pre. Kēp Mēpahpām nē mex o mex nē hihtýx o hihtýx tā Ijaew wýr wrý nē mē kamā kato. Hāmri nhūm Ijaew kêt xwýnhjaja harēnh ma nē tee ri hamaxpēr nē hamaxpēr o:

—Héxta waa nē. Kēp ām Jejus mē papa kamā mǎn kator ronhýx mē pamā mex kumrēx. Anē.

⁶ No nhūm kormā Ijaew hwýr wrýk kêt ri nhūm Tirtūm ra kot mē ho hkra kaxyw mē hā amnhī jarē nhūm mē hkwýja kām ja prām kêt nē hkaga. Tā xà na pre Tirtūm kot mē ho hkra hā amnhī jarēnh ā amnhī to hēx? Nā aa hēx kêt kēnā kot kêt ri mēmoj tā amnhī jarē nē hā amnhī to hēx. Jakamā na pre mē hkwýjaja hkwýjē rom hkaga hkêt nē nhūm amnhī tā mē omu nē mē ho hkra. Nom mē piitā mē ho hkra hkêt nē. Mē hkwýjaja kot hkaga jakamā nhūm ām mē hkwýjē pix o hkra.

⁷ Nē finat Apraāwja na pre hkanrēhā hkra nē htāmnhwý sohtō nē. Tā xà na pre Tirtūm htāmnhwý piitā mē ho hkra hā amnhī jarē?

Nà mẽ piitã ã mẽ harēnh anhÿr kêt nē. Ām mẽ hkwÿjê pix na pre mẽ ho hkra hã mẽ harē. Apraãw kra Ijak kôt hkanrēhã htãmnhwÿ pixjaja nhũm kot mẽ ho hkra hã mẽ harē.

⁸⁻⁹ Nē Apraãw kormã hprō kamã hkra hkêt ri na pre kãm àpēnh xwÿnh kamã hkra nhũm kato nē myre nē hixi pē Ismael. Nom kēp Apraãw prō kumrēx kamã hkra hkêt. Prō kuprÿ kamã hkra na pre. Tã nhũm Tirtũm kãm hkra kumrēx kukamã harē nē kãm:

—E kot paj ma tē hãmri nē mẽmo arĩgro hã akupÿn awÿr tē nhũm ra aprō hpigagri nhũm war akra myre. Anē.

Tã nhũm hprō Saraja htujarō. Nē gaa nē hpigagri nhũm hkraja myre. Hixi pē Ijak. Kēp Apraãw prō kamã hkra jakamã Tirtũm nom kēp Apraãw kra kumrēx. Jakamã hkra Ijak kanrēhã htãmnhwÿjaja na pre Tirtũm kot mẽ ho hkra hã mẽ harē. Ra kot Apraãw mã ja hã amnhĩ jarēnh xà hkôt.

¹⁰ Tã nhũm Ijakja hprēk nē Repek o hprō. Nē gaa nē ra haxwÿja wa hkra nhũm hkraja wa ahpo nē kato nē wa hamē my. Kot wa pē Ejau nhũm kot hapu pē Jako. ¹¹⁻¹² Nom nhũm kormã wa kator kêt ri nhũm Tirtũm wa hkukamã tanhmã wa harēnh to. àhpumunh xà hkôt wa katorxà mã wa harē nē kãm:

—E kot paj amã war akra wa hkukamã tanhmã wa harēnh to ka inhma. Nã koja wa kato nē gaa nē hprēk hãmri nhũm kot haputa amnhĩ to rax o kot wa jakre. Anē.

Kot wata koja kot hapu kĩnhã amnhĩ to grire nē ri pa nhũm ã wa hkukamã wa harēnh anē. Kãm wa kot tanhmã amnhĩ nhĩpēx to hprãm xà hkôt ã wa harēnh anē. Kormã wa kot tanhmã amnhĩ tomnuj to rÿ tanhmã amnhĩ to mex to hã kot wa omunh kêt tã kãm hprãm xà hkôt ã wa hkukamã wa harēnh anē. ¹³ Tirtũm kapēr ã kagã htũm kot wa harēnh nē wa hã kagã kot:

Ejau rom Jako kanrēhã hkra nē htãmnhwÿ pixjaja na pre Tirtũm amnhĩm mẽ ho hkra. Anē.

¹⁴ Mãn ka mẽ Tirtũm kot ã wa harēnh anhÿrja ma nē ajamexpēr o:

—Tk. Kwa ja mexti hã. Mo na pre hamē wa hkanrēhã wa hkra nē wa htãmnhwÿ piitã ho hkra hkêt nē? Anē.

Kwa mẽ ã ajamexpēr anhÿr kêt nē. Tirtũm na hte kãm hprãm xà hkôt tanhmã mẽ panhĩpēx to ho pa pu mẽ kot tanhmã mẽ panhĩpēx to hã omu nē ãm omu nē amnhĩ tã tanhmã kãm nē hkêt nē. ¹⁵ Na pre finat Mojes mã amnhĩ jarēnh o:

Inhmã hprãm xà hkôt na pa hte mẽ omu nē tanhmã mẽ kamã ixukapri hto ho ri ixpa.

Nē inhmã hprãm xà hkôt na pa hte ahpÿnhã tanhmã mẽ hipēx to ho ri ixpa.

Anhÿr o kãm amnhĩ jarē. ¹⁶ Nom tanhmã mẽ pahte amnhĩ nhĩpēx to hã mẽ pahpumunh kôt na hte mẽ pakamã ukapri hkêt nē. Ām tãm kãm hprãm xà hkôt na hte tanhmã mẽ pakamã ukapri hto ho pa. ¹⁷ Amnepē mã Ejit kãm mẽ õ pahihiti Paraohti hwÿr na pre Mojes mẽ nhũm ma hwÿr mō nē kãm tanhmã Tirtũm kapēr jarēnh to nē kãm:

—E Tirtũm na awÿr inhmē pa mō. Tãm na pre apē Ejit nhõ xwÿnhjē nhõ pahĩ kaxyw axãm. Akrã hihtÿx tã nhũm mẽ kaxyw axãm. Tã ra xatã àhpumunh tÿx o tanhmã anhĩpēx to. Kri piitã hkôt ri mẽ pa xwÿnhjaja kot atã harēnh mar nē àhpumunh o àhpumunh ã omunh kaxyw. Tã ixte amã ja jarēnh kaxyw na pre awÿr inhmē pa man awÿr mō. Anē.

¹⁸ Ā na hte Tirtũm kãm hprãm xà hkôt tanhmã mẽ panhĩpēx anhÿr to ho pa. Jao mẽ hkwÿjê kamã ukapri ho pa. No mẽ hkwÿjaja nhũm tee ri mẽ hkrã hihtÿx ã mẽ omu nē ãm mẽ omu nhũm mẽ amnhĩ krã hkôt ri tanhmã amnhĩ tomnuj to ho ri pa.

Tîrtûm kêp mē pakamā ukapřĩ xwýnh ā harēnh

¹⁹ Nē kot kaj mē atō Tîrtûm kot ā mē hipêx anhÿrja ā harēnh ma nē tanhmā hā ixkukjêr to nē inhmā:

—Kwa na xep hte Tîrtûm ahpÿnhā tanhmā mē hipêx to. Nē mē hkwyjê kamā ukapřĩ ho pa nē mē hkwyjaja mē hkrā hihtýx ā mē omu nē ām mē omu nē mē kamā ukapřĩ hkêt nē. Jakamā kwa mo na hte mē kot amnhĩ tomnuj xwýnh ā mē harē? Tām kot ā mē hipêx anhÿr kēnā kot kêt mē kot amnhĩ tomnuj xwýnh ā mē harē.

Anhÿr o ajamexpêr japêr. ²⁰ Kwa mē ri ā atýx Tîrtûm jarēnh anhÿr kêt nē. E pa mē amā ejêw jarē ka mē inhma. Xà kot mēhō gyw kwý ho amnhĩm poti nhĩpêx nhũm tee ri amnhĩ tā omu nē amnhĩ tā tanhmā kām kapêr to nē kām: “Tk. Kwa mon ka ri ā inhĩpêx anē?” Anhÿr o amnhĩ tā kām kapêr? Nà koja kām tanhmā nē hkêt nē. ²¹ Hipêx xwýnh kām hprām xà hkôt kot ā hipêx anhÿr kēnā kot kêt amnhĩ tā kām akir. Koja amnhĩm gyw kwý kakwý nē ho poti ho axkrut nē hipêx. Nē hō ho muxre. Ho mex kumrêx nhũm xa. Nhũm ihōja mē ho anē nē hipêx no ām wamta kĩnhā ho hanhàjti nhũm omnajti nē xa. No ām tām kot hamē wa hipêx prām xà hkôt wa hipêx kēnā.

²² Tā na hte ā Tîrtûm mē panhĩpêx anē. Te poti pynajre pyrā nē mē pahkwýjê nhĩpêx nhũm mē kām kapêr mar prām kêt nē htýx ri tanhmā amnhĩ tomnuj to ho ri pa. Hāmri nhũm amnhĩ tā mē omu nē te amnhĩ nē mē rēnh kaxyw pyrāk o mē hipêx no ām kormā hamaxpêr o:

—Nà kot paj nhÿrmā mē kot amnhĩ tomnuj mÿrapê mē ho ijapêx pa nhũm mē piitā ja hā ixpumu nē inhmā ixāhpumunh o ixāhpumunh ā ijarē. Nē inhmā mēmoj punuj piitā hkĩnh kêt kumrêx ā axpên mā ijarē. Anē.

²³ Nom na hte jajê rom mē pahkwýjê nhĩpêx o te poti mexta nhĩpêx pyrā nē amnhĩ kaxyw mē paxunhwý nē mē pahto hkra kaxyw. Nē mē pajarēnh o:

—Nà koja mē amnhĩ kaxyw Ixkra Jejus mā hamaxpêr nē hkôt amnhĩ xunhwý pa ja hā mē omu nē mē kamā ixukapřĩ ho ri ixpa. Nē mē ho mex pē mē kutā inhnojarêt rāhā ho ri ixpa. Hāmri nhũm mē nhÿrmā Ixkra mē wa ixri htír tûm nē mex nē pa ho pa. Kot paj ā mē ho mex anē nhũm mē amnhĩ tā ixpumu nē inhmā inhmex o inhmex ā ijarēnh o pa. Anē.

Ā na hte Tîrtûm ahpÿnhā mē pahpiitā mē panhĩpêx anē.

²⁴ Nē na hte mē ixpê Ijaew pix o hkra hkêt nē. Na hte mǎānēn mē apê Ijaew kêt xwýnhjê ho hkra. ²⁵ Amnepê mā mē kām kapêr jarēnh o ri mē pa xwýnhjê hō pē finat Ojejja na pre te Tîrtûm tām kot Ijaew kêt xwýnhjê jarēnh pyrā nē mē harēnh o:

Amnepêm na pa pre mē ho ixkra hkêt tā kot paj mē hkwyjê ho ixkra.

Na pa pre mē kamā ixukapřĩ hkêt tā pa ra inhmā mē hapê nē.

²⁶ Nē ixte mē kêp ixkra hkêt ā mē harēnh tā kot paj ra mē kêp ixkra hā mē harē.

Ixpê mēō Tîrtûm kot paj ā mē harēnh anē. Anē.

²⁷ Hāmri nhũm finat Ijais Ojej pānhā tanhmā Ijaew jarēnh to. Ijaisja Tîrtûm nhÿ hā kapêr jarēnh o ri pa xwýnhjê hō na pre. Jakamā nhũm Tîrtûm kām tanhmā mē ijarēnh to nhũm kuma nē ô ri mē ixkukamā mē inhĩgêxjê mā ujarēnh o pa nē hā kagā. Nē hā kagā ho:

Ijaew na mē ohtō rax kumrêx.

Te gō xujanār mÿri pykahti grā hkryre xohtō pyrāk.

Tā koja mē piitā ixkôt amnhĩ xunhwýr kêt nē.

Koja mẽ ãm grêre nê amnhî kaxyw inhmã hamaxpêr nê ixkôt amnhî xunhwý.

Jakamã mẽ tapxipixjaja koja hkwýjê rom nhÿrmã inhô krî hwÿr api.

²⁸ No mẽ kot amnhî kaxyw inhmã mẽ hamaxpêr kêt xwÿnhjaja kot paj tokyx tanhmã mẽ harênh to.

Mẽ kot amnhî tomnuj mÿrapê tanhmã mẽ harênh to nhÿm mẽ ma mẽ kot amnhî xà htÿx kamã hamak tÿm xàta wÿr ma pa.

Nà kot paj tokyx ã mẽ hipêx anê.

Anhÿr o mẽ harê. ²⁹ Nom nhÿm kormã ã mẽ harênh anhÿr kêt ri nhÿm ra waŋ tanhmã mẽ harênh to nê mẽ harênh o:

Amnepêm Sotô mẽ Komo kamã mẽ pa xwÿnhjaja na prem amnhî tomnuj tÿx rãhã ho ri pa.

Mÿrapê nhÿm Tirtÿm xàhpumunh o àhpumunh xwÿnhja tee ri ja hã mẽ omu hãmri nê kaxkwa rÿm mẽ ô krî wa hipy mẽmoj pôôta rê.

Nhÿm mẽ hã rôrôk nê mẽ ho hkaxàr pa nhÿm mẽ hapêx.

Tã na pu htem mẽ uràk nê amnhî tomnuj o ri papa.

Jakamã kop ãm Tirtÿm kot mẽ pahkwýjê kamã ukaprí kêt ronhÿx pu mẽ ra mẽ uràk nê pahpiitã pajapêx pa. Anê.

Ijaew kwý kot Jejus kôt amnhî xunhwÿr kêt ã mẽ harênh

Römân 10.1-4

³⁰ Nê Ijaew kêt xwÿnhjaja na prem Ijaew pyrã nê kãm Tirtÿm prãm kêt tã Jejus jarênh ma nê Ijaew rom amnhî kaxyw hkôt hamaxpêr nê hkôt amnhî xunhwý. Hãmri nhÿm Tirtÿm ja hã mẽ omu nê mẽ ho hkra nê mẽ kot amnhî to mex xwÿnhjê hã mẽ harê.

³¹⁻³² Hãmri nhÿm Ijaew tee ri mẽ kot Jejus kôt amnhî xunhwÿr ã mẽ omu nhÿm ja mẽ kãm mex kêt nê. Hãmri nhÿm mẽ hamaxpêr o:

—Tk. Kwa ra mẽ ixte finat Mojes kapêr kôt amnhî nhípêx mex o ri mẽ ixpa xwÿnh jakamã koja Tirtÿm ja hã mẽ ixpumu nê mẽ ixte amnhî to mex xwÿnhjê hã mẽ ijarê nê mẽ inhnê mẽ ixte amnhî tomnuj rênh pa. No kot paj mẽ Ijaew kêt xwÿnhjê pyrã nê Jejus kôt amnhî xunhwÿr kêt nê. ãm kwarí ho kwarí.

Anhÿr ã amnhî jarê. No ãm ã mẽ hamaxpêr anhÿrja mex kêt. Na prem htÿx Tirtÿm noo mã kot amnhî to mex ã amnhî jarênh kaprÿ nê arí ri tanhmã amnhî tomnuj to ho ri pa. Te pry kamã kên nôr nhÿm mẽ kot nhãm nê mẽnh kaxyw hkamnâr nê ho amnhî par krã hi kukênh pyrãk o na htem amnhî nhípêx. Jao amnhî krã hkôt tanhmã amnhî nhípêx to ho pa hprãm xàj te Jejus kapêrja nhãm amnhî nê rênh pyrãk o hipêx. Jakamã koja mẽ Tirtÿm nhô krî hwÿr àpir kêt nê. ³³ Tirtÿm kapêr ã kagã htÿm kot ja jarênh kot:

E mẽ inhma. Kot paj nhÿrmã Ijaewjê hwÿr mēhō mẽ nhÿm mẽ hkôt kapêr o pa.

Nom koja mẽ kapêr mar kêt nê. Koja mẽ kuma nê ãm kuma.

Te pry kamã kên nôr nhÿm mẽ kot nhãm pry nê mẽnh kaxyw hkamnâr nê ho amnhî par krã hi kukênh pyrãk o koja mẽ amnhî nhípêx.

No te mẽ kot nhãm pry nê mẽnh kaxyw hkamnâr kêt pyrãk xwÿnhjaja koja mẽ kurom nhÿrmã ma Tirtÿm nhô krî hwÿr api.

Hãmri nê hkĩnh nê pa ho pa. Anê. Nom kên kumrêx jarênh kêt nê. Na prem Jejus ã kuxi nê ã harênh anê. Ijaew te mẽ kot kên nhípêx pyrãk o Jejus nhípêx nê amnhî kaxyw hkôt hamaxpêr kêt nê axtem nê hkaga nê ãm kamã gryk pix o ri pata ã nhÿm mẽ harê. No mẽ kot amnhî kaxyw hkôt hamaxpêr ronhÿx Jejus te kên kot mẽ kēp àmnâr pyrãk

kêt nê. Jakamã ã mẽ harênh kot anhÿr.

10

¹ Hêxta waa nê. Ijaxwÿja ixpê Ijaew. Mẽ kêp ixkwÿ jakamã kêp apu mẽ kot amnhĩ kaxyw Jejus mã hamaxpêr nê hkôt amnhĩ xunhwÿr ronhÿx pa ixkĩnh tÿx kumrêx. Inhmã mẽ kêp Tirtûm kra hprãm tÿx kumrêx kênã. Inhmã ja prãm xà na pa hte mẽ ho Tirtûm wÿr rãhã ho ri ixpa. ² Ra ixte mẽ omunh mex. Mẽ kãm Tirtûm mã tanhmã amnhĩ nhĩpêx to hprãm tã no ãm mẽ kot hprĩ hã kapêr mar kêt. Jakamã na htem tee ri tanhmã kãm amnhĩ nhĩpêx to ho ri pa hprãm kaprÿ. ³ Nhũm pre Tirtûm tee ri amnhĩ tã mẽ omu nê hamaxpêr o:

—Koja mẽhõ amnhĩ kaxyw Ixkra Kris kôt hamaxpêr nê hkôt amnhĩ xãm pa ja hã omu nê kot amnhĩ to mex xwÿnh ã harê nê ho ixkra kurê kumrêx. Nom na hte Ijaew ohtõ nê ã amnhĩ nhĩpêx anhÿr kêt nê.

Anhÿr o mẽ harê. ãm hãmri na ã mẽ harênh anê. Na htem ãm axtem nê hamaxpêr o:

—Tk. Kot paj amnhĩ kaxyw Kris kôt ijamaxpêr nê hkôt amnhĩ xãm kêt nê. Kot paj ãm pam amnhĩ krã hkôt tãm ri amnhĩ nhĩpêx o ri ixpa. Mẽ ixpê Ijaewjê mẽ ixte amnhĩ nhĩpêx xã hkôt. Hãmri nhũm Tirtûm ja hã ixpumu nê amnhĩm inhmex ã ijarê. Nom kot paj Kris kôt amnhĩ xãm kêt nê. ãm kwarĩ ho kwarĩ.

Anhÿr ã amnhĩ jarê. ⁴ Nom na htem ãm htÿx ri amnhĩ krã hkôt amnhĩ to mex o pa hã amnhĩ kamnhix kaprÿ. Koja mẽ tee ri kãm finat Mojes kapêr kôt amnhĩ nhĩpêx o ri pa hprãm kaprÿ. Jejus tapxipix na pre tãm amnhĩ nhĩpêx mex rãhã ho pa. Na pre Tirtûm kapêr kôt amnhĩ nhĩpêx mex o ri pa nê aa kapêr õ nhĩrõp ãm nê hkwÿm ri tanhmã amnhĩ tomnuj to hkêt nê. Kot amnhĩ tomnuj kêt xwÿnh ã

ãm pixi mex na. Jakamã tapxipix kukwak ri na hte Tirtûm amnhĩm mẽ pahte amnhĩ to mex xwÿnh ã mẽ pajarê.

Tirtûm kãm mẽ pahpiitã mẽ pahto hkra hprãm ã harênh

⁵ Nê amnepêm na pre finat Mojes Tirtûm nhÿ hã Ijaew mã tanhmã ujarênh to nê hã kagã. Nê mẽ kãm ujarênh o:

—E kot kaj mẽ atõ Tirtûm nhÿ hã ixujarênh ma nê hkôt amnhĩ nhĩpêx mex o ri apa nê hkwÿm ri tanhmã amnhĩ nhĩpêx to hkêt nê. Hã koja Tirtûm hã apumu nê amnhĩm ate amnhĩ to mex xwÿnh ã ajarê ka nhÿrmã kuri atĩr tũm nê amex nê apa ho apa. Anê.

⁶ ã mẽ kãm kapêr anhÿr tã mẽ pahte Mojes kapêr xã hkôt amnhĩ nhĩpêx o papaja na mẽ pahpê hitÿx kumrêx. Tirtûm kapêr tũm na. Kapêr ã kagã kamã kot mẽ pamã mẽ pahte tanhmã amnhĩ nhĩpêx to hã karõja ohtõ rax kumrêx jakamã pu mẽ tee ri pamã piitã hkôt amnhĩ nhĩpêx prãm kaprÿ. Nhũm Tirtûm tee ri amnhĩ tã mẽ pajamã hãmri nê mẽ pahwÿr Kra Jejus mẽ. Jakamã na pu htem amnhĩ kaxyw hkôt pajamaxpêr nê hkôt amnhĩ xunhwÿ nhũm Tirtûm hã mẽ pahpumu nê kukwak ri mẽ pahto hkra kurê kumrêx. Kra kukwak ri kot mẽ pahto hkra kaxyw kot mẽ pahwÿr mênh nhũm mẽ kot hpĩr nhũm akupÿm ho htĩr jakamã na pu htem harênhja ma nê pajamaxpêr o:

—Nã na xep pre Jejus ixto ixpê Tirtûm kra. Anê.

Nom xã na hte Tirtûmja ã mẽ pamã kapêr anê nê mẽ pamã:

—E kot kaj mẽ ma kaxkwa hwÿr api nê Kris japrõ nê man amnhĩ kôt akupÿn o wrÿ pa ja hã mẽ apumu nê mẽ ato ixkra.

Anhÿr o mẽ pamã kapêr? Nã na hte ã mẽ pamã kapêr anhÿr kêt nê. Tanhmã kot puj mẽ amnhĩ to nê ã amnhĩ nhĩpêx anê? ⁷ Rÿ xã na hte ã mẽ pamã kapêr anê nê mẽ pamã:

—E na pre Krisja ty. Jakamã më kam në ma hwÿr mra në akupÿm amnhim ho htir. Hãmri pa ja hã më apumu në më ato ixkra.

Anhÿr o më pamã kapër? Na na hte ã më pamã kapër anhÿr kêt në. Tanhmã kot pu më amnhĩ to në akupÿm ho htir? Ja pyrã në na hte Tirtum më pamã mëmoj tã karõ pu më kãm ho anhÿr nhum ja hã më pahpumunh kôt më pahto hkra hkêt në. ⁸ Æm më pahte amnhĩ kaxyw Jejus kôt pajamxpër në hkôt amnhĩ xunhwÿr ã më pahpumunh kôt pix mã na hte më pahto hkra. Hãmri në më pahwÿr Karõ rë nhum më pahkarõ mã gjëx jakamã më pahte Tirtum kãm hprãm xã hkôt amnhĩ nhípëx o papaja na më pahpë hihtÿx kêt. Te kapër ra më pahkrã hi kaxwÿnh kãm hikwÿ pyrãk o pu më piitã më kãm harënh o ri më hkôt papa. Jakamã na pa hte më piitã më kot amnhĩ kaxyw Jejus kôt hamaxpër kaxyw tanhmã më kãm harënh to ho ri më hkôt ixpa në më kãm:

⁹ —Kot ka më atõ Jejus kęp anhõ Pahihti hã harë në Tirtum kot akupÿm ho htir kôt ajamaxpër. Hã koja Tirtum ja hã apumu në anë ate amnhĩ tomnuj o hapëx në ato hkra. Æm ja pix ã më pahpumunh kôt na hte më pahto hkra. Anë.

¹⁰ Në na pu htem më pahkrãhi kaxwÿnh kãm amnhĩ kaxyw Jejus mã pajamaxpër. Në më pajakwa ho kęp më panhõ Pahihti hã harë. Hãmri nhum Tirtum ja hã më pahpumu në amnhim më pahte amnhĩ to mex xwÿnh ã më pajarë në më pahto hkra. ¹¹⁻¹³ Tã më pahte amnhĩ kaxyw Jejus kôt pajamaxpër në hkôt amnhĩ xunhwÿr xwÿnhjaja kot puj më pahkĩnh në papa ho papa. Më pahpiitãã. Ijaew në Ijaew kêt xwÿnhjaja. Më pahpiitã më panhõ Pahi Maatija ãm pyxi mex na. Jakamã koja Ijaewjê hõ rÿ Ijaew kêt xwÿnhjê hõ amnhĩ

to kuwÿ nhum kuma në ho hkra. Kapër ã kagã htum kot ja jarënh kot: Më kãm kęp Tirtum kra hprãm xwÿnhjaja koja më amnhĩ to Tirtum wÿ nhum më kuma në Jejus kot më në htyk kukwak ri më në më kot amnhĩ tomnuj o hapëx në më ho hkra nhum më hkĩnh në pa. Anë.

¹⁴⁻¹⁵ Xã na htem kormã amnhĩ kaxyw Kris mã hamaxpër kêt rãhã amnhĩ to Tirtum wÿ nhum më kuma në më ho hkra? Nã tanhmã kot wem amnhĩ to në amnhĩ kaxyw kãm hamaxpër kêt rãhã amnhĩ to kuwÿ? Na hte Tirtum ma më hwÿr më hkwÿjê rë nhum më ma më hwÿr mra në Tirtum kapër o më ahkre ho ri më hkôt pa. Nhum më hkwÿjaja më kuma në amnhĩ kaxyw Jejus kôt hamaxpër në amnhĩ to Tirtum wÿ. Kapër ã kagã htum kot ja jarënh kot:

Koja mëmoj mex jarënh xwÿnhjaja ma më hwÿr mra.

Në më hwÿr hpõx o mõ nhum më amÿm amnhĩ wÿr më omu në hkĩnh në. Anë.

¹⁶ Tã ra më piitã kot kapër mar tã piitã amnhĩ kaxyw hkôt hamaxpër kêt në. Jakamã nhum finat Ijais tee ri ja hã më omu në Tirtum mã më harënh o:

Pa Pahi Maati. Kwa ra më kot akapër mar tÿx tã akôt amnhĩ nhípëx kêt në. Më kãm akapër kôt amnhĩ nhípëx o pa hprãm kêt. Na htem ãm grêre në akôt amnhĩ xunhwÿr në akôt amnhĩ nhípëx o ri pa. Anë.

¹⁷ Kot anhÿr tã ãm më kot Kris kapër jarënh mar kôt pix mã na htem amnhĩ kaxyw hkôt hamaxpër. Koja më harënh mar kêt tã tanhmã koja wem amnhĩ to në amnhĩ kaxyw hkôt hamaxpër në hkôt amnhĩ xunhwÿr? ¹⁸ Mãn ka më atõ atÿx ã ajamaxpër anhÿr o:

—Ko mãn Ijaew kormã Jejus kot më panë tanhmã amnhĩ nhípëx to

hã harênh mar kêt jakamã na mẽ kormã hkôt amnhĩ xunhwÿr kêt nê.

Anhÿr o ajamaxpêr. Nom ja kot anhÿr kêt. Ijaew piitã ra mẽ kot harênh mar kênã. Tirtũm kapêr ã kagã htũm kot ja hã mẽ harênh kot: Na prem ma mẽ piitã mẽ kãm ja jarênh o ri mẽ hkôt pa nhũm mẽ piitã kuma. Anê.

¹⁹ Tã mãn ka prem ra ja ma nê atÿx ajamaxpêr o:

—Kot anhÿr tã no mãn kormã hprĩ hã Jejus jarênh mar kêt jakamã mẽ hkôt amnhĩ xunhwÿr kêt nê. Anê.

Nom ja haxwÿja kot anhÿr kêt. Ra mẽ kot hprĩ hã harênh mar mex tã kuma nê ãm kuma nê amnhĩ kaxyw kãm hamaxpêr kêt nê. No mẽ apê Ijaew kêt xwÿnh kwÿjaja na ka mẽ kurom harênh ma nê amnhĩ kaxyw hkôt ajamaxpêr nê hkôt amnhĩ xunhwÿr kurê kumrêx. Hãmri nhũm Ijaew tee ri ja hã mẽ apumu nê mẽ akamã gryk tÿx nê. Nom ra Tirtũm kot ã mẽ hkukamã mẽ kot amnhĩ nhĩpêx anhÿr ã mẽ omunh nê mẽ harênh kot anhÿr kênã. Na pre finat Mojes mẽ kãm tanhmã hã kagã hto. Te Tirtũm tãm kot mẽ hã kagã pyrà nê kapêr ã kagã htũm kamã kot mẽ harênh kot:

Mê ate mẽ kamã mẽ akahak o apa xwÿnhjaja.

Mê kot htÿx ri amnhĩ nhĩpêx o mẽ pa hã mẽ ate mẽ harênh tã no kot paj mẽ arom amnhĩm mẽ kot amnhĩ to mex xwÿnhjê hã mẽ harê.

Kot kaj mẽ tee ri ja hã mẽ omu nê mẽ kamã agryk tÿx kumrêx. Nê mãânên pa ixte mẽ ho mex ã ixpumu nê mẽ hã ixkamã agryk nê. Anê.

²⁰ Nê finat Ijais na pre haxwÿja ã mẽ harênh anê. Na pre kãm amnhĩ kwÿ pê Ijaew pyma hkêt nê xatã Tirtũm nhÿ hã tanhmã mẽ kãm Ijaew kêt xwÿnhjê jarênh to ho pa.

Te Tirtũm tãm kot mẽ harênh pyràk o mẽ kãm:

Nã Ijaew kêt xwÿnhjaja kot Tirtũm japêr kêt tã koja tãm mẽ kãm amnhĩ to amnhĩrit nhũm mẽ hkôt amnhĩ xunhwÿ.

Mê kot kormã amnhĩ kaxyw kãm hamaxpêr kêt tã koja tãm mẽ kãm amnhĩ to amnhĩrit. Anê.

²¹ ã Ijaew kêt xwÿnhjê jarênh kot anhÿr. Nê axte mã tanhmã Ijaewjê jarênh to kot:

Te mẽ katorxã kot tanhmã hkrajê ho mex to kaxyw tee ri amnhĩ wÿr mẽ kãm ãkjêr pyràk o na hte Tirtũm Ijaewjê nhĩpêx o pa.

Jao tee ri kãm tanhmã mẽ ho mẽ mex to hprãm tã no nhũm mẽ amnhĩ tã kuma nê ãm kuma nê hkôt amnhĩ nhĩpêx kêt nê. Anê.

11

Tirtũm kot Ijaew kamã ukapri hã harênh

Matêwre 13.10-17

¹ Tã ra Ijaew kot Tirtũm kaga jakamã mãn ka mẽ atõ mẽ harênh ma nê ajamaxpêr o:

—Mãn pre Tirtũm tee ri amnhĩ tã mẽ omu nê amnhĩ pyrà nê mẽ hkaga.

Anhÿr o ajamaxpêr. Nom na pre mẽ hkaga hkêt nê. Ijaxwÿja ixpê Ijaew na pa. Mẽ uràk nê ixpê Ijaew pàr krax pê finat Apraãw kanrêhã htãmnhwÿ Pêjamĩ kanrêhã hõ na pa. Tã xà na pre Tirtũm ixkaga? Nã kot ixkaga hkêt. ² Amnepêm kormã mẽmoj piitã hkêt ri na pre mẽ ixpê Ijaew hkukamã mẽ ixto hkra hã amnhĩ jarê. Tã nhũm amgrã xohtô nê hapêx nhũm mẽ hapôj hãmri nê Tirtũm kôt amnhĩ nhĩpêx o pa hkêt nê. Hãmri nhũm finat Erisja tee ri mẽ kot amnhĩ nhĩpêx ã mẽ omunh o pa nê Tirtũm mã tanhmã mẽ harênh to nê mẽ hã kagã. Nê hã kagã ho:

³ Kwa Tirtũm. Mẽ ixte amã amnhĩ jarênh xã hã mẽsti hkwy na

prem ra hkrakrak pa. Nē anhÿ hā akapēr jarēnh o ri mē pa xwÿnh kwÿ nhīmex rax nē. Ām papxipix na pa arī ixtīr nē ri iſpa nom nhūm mē ra kot ixpīr kaxyw ixtā amnhī jarē. Anē.

⁴ Tā tanhmā na Tīrtūm kutā kām kapēr to? Na pre kām:

Nā kapxipix na ka arī atīr kēt nē. Arī mē ohtō nē apyrā nē amnhī kaxyw ixkōt hamaxpēr. Mē ohtōō. Arī mē kēp 7.000 nē akwÿjē rom ri sānti Paaw kutā hkōnkrā ho hkrī nē kām mex ā harēnh kēt nē. Anē.

⁵ Tā arī ā jarāhā mē kot ā amnhī nhīpēx anhÿr kēnā. Tīrtūm kām Ijaew japē jakamā mē kamā ukaprīi. Jakamā nhūm ra mē hkwyjaja mē pahpyrā nē amnhī kaxyw Kris kōt hamaxpēr nhūm Tīrtūm mē ho hkra. ⁶ Nom mē kot amnhī to mex ā mē omunh xā hkōt mē ho hkra hkēt nē. Amarī kām mē hapē htūm xā hkōt na hte mē ho hkra. Kop apu mē kot amnhī to mex ā mē omunh xā hkōt kot mē ho hkra ronhyx amarī mē ho hkra hkēt nē. Nhÿx mē kot tanhmā amnhī nhīpēx to ho pa hā mē omunh xā hkōt pix mā mē ho hkra.

⁷ Ijaew piitā Tīrtūm kot amnhīm mē mex ā mē harēnh prām tā no ām mē grēre nē hamaxpēr xā hkōt Jejus kōt amnhī xunhwÿ. Na htem ohtō rax nē kapēr ma nē ām kuma nē tee ri kot amnhīm mē mex ā mē harēnh prām xāj amnhī krā hkōt tanhmā amnhī nhīpēx to ho ri pa. Nom ra mē kot Jejus kaga jakamā ā amnhī nhīpēx anhÿr kaprÿ. Mē kot hkaga jakamā te ri mē hamak kro nē Tīrtūm kapēr mar kēt pyrā nē pa. ⁸ Tīrtūm kapēr ā kaga htūm kot mē harēnh kot:

Tīrtūm na hte mē kām kapēr mar prām kēt xwÿnhjē pumu nē ām mē omu nhūm htem htÿx ri pa ho pa. Nē Tīrtūm mā

hamaxpēr kēt o ri pa. Mē kot kapēr mar tā hprī hā mar tÿx kēt nē. Nē mē kot kapēr ā kaga kamā harēnh tā hprī hā mar tÿx kēt nē. Jakamā na htem amnhī kaxyw hkōt hamaxpēr kēt o pa.

Tā na htem arī jarāhā ā amnhī nhīpēx anhÿr o ri pa. Te mē nohkre nē mē hamak kro xwÿnh kot amnhī nhīpēx pyrāk. Anē.

⁹ Nē amnepēm na pre pahi finat Tawija amnhī kwÿ Ijaew jarēnh o: Na htem htÿx ri hkīnh kām apkur o pa.

Te tutre kām prām nē kot rapuuti hwÿr ar nē tee ri kām kator prām kaprÿ pyrāk.

Ja pyrā nē mē kot Tīrtūm kapēr mar kēt mÿrapē koja Tīrtūm tanhmā mē ho nhūm mē tee ri kām mex prām kaprÿ.

¹⁰ Te mē nohkre xwÿnhjaja tee ri mē hpa nhīpēx o pa pyrāk.

Nē omnuj nē ā nē ho gjēx o ri pa pyrāk o amnhī nhīpēx o ri pa.

Anhÿr o mē harē. ¹¹ Tā arī Ijaew Jejus kaga nē kām kapēr mar prām kēt jakamā xā na Tīrtūm tee ri ja hā mē omu nē mē hkaga kumrēx? Nā kot mē hkaga hkēt. Ām mē tāmjaja kēp Jejus prām nōkati jakamā nhūm tee ri ja hā mē omu nē mē hpānhā Ijaew kēt xwÿnhjē mā amnhī to amnhīrit nē mē hkwyjē ho hkra. Jakamā koja Ijaew kwÿjaja ja hā mē omu nē tee ri hamaxpēr nē hamaxpēr o:

—Kwa na xep Ijaew kēt xwÿnh kwÿjaja Jejus kōt amnhī xunhwÿ nhūm Tīrtūm ja hā mē omu nē mē ho hkra. Kwa mon pu prem axtem nē ri Jejus kaga? E pu mē kuxwar amnhī kaxyw hkōt mǎn pajamaxpēr nē hkōt amnhī xunhwÿ kē Tīrtūm ja hā mē pahpumu nē Ijaew kēt xwÿnhjē pyrā nē mē pahto hkra. Hāmri nē amnhī mā mē pahte amnhī to mex xwÿnh ā mē pajarē. Anē.

Ã Ijaewjaja hamaxpêr anhÿr kaxyw na pre Tirtûm Ijaew kêt xwÿnhjê mã amnhî to amnhîrit. ¹² Hâmri nhûm mẽ amnhî tâ omu nê hkîn h nê pa. No nhûm Ijaew kwÿjaja. Mẽ kãm Jejus prãm nõkati ho mẽ pa xwÿnhjaja mẽ hkîn hã hkaprî nê pa. Tã koja mẽ nhÿrmã amnhî kaprî hã amnhî pumu nê amnhî kîn h kêt ã amnhî pumu hãmri nê Tirtûm kôt amnhî xunhwÿr nê amnhî kaxyw Kra Jejus Kris mã hamaxpêr japêr. Koja mẽ ã amnhî nhîpêx anê hãmri nê Ijaew kêt xwÿnhjê pyrã nê hkîn h nê ri pa. Hãmri nhûm Tirtûm ja hã mẽ omu nê Ijaew kêt xwÿnhjê mẽ mẽ ho hpimràatã mẽ ho mex rax nê nhûm mẽ hkîn h nê hamakêtkati nê pa ho pa.

Tirtûm kot Ijaew kêt xwÿnhjê ho hkra hã harênh

¹³ E kot paj hpãnhã mẽ apê Ijaew kêt xwÿnhjê mã ixkapêr nê mẽ atã kagã. Na pre Jejus ma mẽ awÿr inhmẽ. ÿ hã ixte mẽ ajahkre ho ri mẽ akôt ixpa kaxyw. Pa pre ma krî hkwy kamã mẽ akwÿjê hwÿr mō nê ixkîn h kãm mẽ kãm kapêr jarênh o ri mẽ hkôt ixpa. Nhûm mẽ hkwyjaja inhma nê amnhî kaxyw Jejus kôt hamaxpêr nê hkôt amnhî xunhwÿ. ¹⁴ Tã koja apu ixkwÿjaja mẽ harênh mar japêr. Ijaew tee ri mẽ apê Ijaew kêt xwÿnhjê jarênhja ma hãmri nê ra amnhî kamã gryk japêr. Jao mẽ apyrã nê Jejus kôt amnhî xunhwÿ nê nhÿrmã kuri htîr tûm nê mex nê pa ho pa. ¹⁵ Kormã mẽ kot amnhî kaxyw kãm hamaxpêr kêt jakamã na pre Tirtûm hpãnhã mẽ apê Ijaew kêt xwÿnhjê mã amnhî to amnhîrit. Ka mẽ ra krî piitã hkôt axohtô nê hkôt amnhî xunhwÿ nê hkôt amnhî nhîpêx mex o ri apa. Tã koja Ijaewjaja nhÿrmã amnhî kaxyw Tirtûm mã hamaxpêr nê mẽ apyrã nê Jejus kôt amnhî xunhwÿr japêr. Hãmri nê te mẽhō hkra kêp htyk nhûm hkaprî htã nhûm hkraja

tanhmã amnhî to nê akupÿm kãm htîr nhûm kot omunh nê hkîn h tÿx kumrêxta pyrãk o amnhî nhîpêx. Jao Tirtûm mẽ kot hkôt amnhî xunhwÿr ã mẽ omu nê hkîn h nê. Pu mẽ pahpimràatã urãk nê pahkîn h nê ri papa.

¹⁶ E pa mẽ amã mẽ ujarênhja ã ejêp kwÿ jarê. Koja mẽmo pî hpãr jarê mex nê hã koja pãr mex nê xa. Ja pyrã nê Ijaew pãr krax finat Apraãwja kumrêx na pre amnhî kaxyw Tirtûm mã hamaxpêr nhûm ho hkra. Jakamã koja nhÿrmã hkanrêhã htãmnhwÿjaja urãk nê amnhî kaxyw kãm hamaxpêr nhûm mã mẽ ho anê nê mããñen mẽ ho hkra nhûm mẽ mex nê pa. Te kot mẽmo pî hpãr jarê mexja nhÿ hã pãr mexta pyrãk.

¹⁷ Nê na htem akunî kamã mẽmo pî hpa jakã nê hamÿ nê ma amnhî kôt o mra. Nê ixkre kapem ra mẽ kot mẽmo pî hkreja hpa jakãr nê rên h xwÿnh xwakre kamã wam pî hpa jakãr xwÿnhnta nhô nê axpên tã hkaxpre nê gaa nê axpên jamÿnh mex nê grã hkêt nê. Nê arî htîr mex nê. Te kêp hpa kumrêx pyrãk. Tã Ijaew kwÿ kot amnhî kaxyw Jejus kôt hamaxpêr xwÿnhjaja te mẽ kêp ixkre kapem pî hpãrta pyrãk. No mẽ hkwyjaja mẽ kot Jejus kaga xwÿnhjaja te mẽ kêp mẽ kot kêp hpa jakãr nê rênhta pyrãk. Jakamã nhûm Tirtûm te mẽ kot pãr pê hpa jakãr nê rênhta pyrãk o mẽ hipêx nê mẽ hkaga. Nê axtem te mẽ kot mẽmoj pãr pa jakãr nê hpãnhã kamã axtem pî hpa janhôr nê hã hkaxpreta pyrãk o mẽ apê Ijaew kêt xwÿnhjê nhîpêx nê mẽ amã amnhî to amnhîrit. Ka mẽ ra amnhî kaxyw Jejus mã aja-maxpêr nê hkôt amnhî xunhwÿ nhûm Tirtûm mẽ ato mex nê.

¹⁸ Tã kêr ka mẽ arî Ijaew o mex o ri apa. Tanhmã ri mẽ hipêx to mã ajamaxpêr to hkêt nê. Rÿ aja-maxpêr o:

—Nà ãm hãmri na Tirtùm mẽ hkaga nê ãm kãm mẽ papxipixjê japê.

Anhÿr o ajamaxpêr kêt nê. Ijaew te ixkre kapem pĩ hpàr mexta pyràk. No mẽ kajaja te mẽ ate akunĩ rùm pĩ hpa kot ixkre kapem pàr mex pix kukwak ri htĩr nê hã harirta pyràk. Kêt akunĩ rùm pĩ hpa jakàr kukwak ri na hte ixkre kapem pàrta htĩr nê kuhê hkêt nê. Kop apu pàrta mex kêt ronhÿx ra akunĩ rùm hpaja grà pa. Ja pyrà nê Ijaew kukwak ri kot kaj mẽ nhÿrmã Tirtùm ri atĩr tùm nê apa ho apa. Jakamã kwa kêt ka mẽ ate amnhĩ to rũnh o mẽ hakrenh ã amnhĩ to jarkrar kêt nê. ¹⁹ Mãn ka mẽ atõ ajamaxpêr o:

—Ra Tirtùm kot Ijaew kaga nê hpãnhã mẽ pajaja mẽ ixto hkra jakamã mãn kãm mẽ ijapê ho mẽ hakre. Ra mẽ hpãnhã mẽ ixto hkra kênã. Anê.

²⁰ Nà ãm hãmri na pre Tirtùm Ijaew kwÿ kaga. Mẽ kot Jejus kôt amnhĩ xunhwÿr kêt mÿrapê na pre te mẽmo pĩ hpa jakàr nê rênhta pyràk o mẽ hipêx. Ka mẽ ra mẽ kurom amnhĩ kaxyw hkôt ajamaxpêr jakamã nhùm Tirtùm te kot akunĩ kamã pĩ hpa jakàr nê ho htêm nê ixkre kapem pĩ hpàr mex ã hanhôr nê hã hkaxpre pyràk o mẽ anhîpêx. Nom kwa kêt ka mẽ ja hã amnhĩ pumu nê ri hã Ijaewjê mã amnhĩ to jarkrar kêt nê. ãm amnhĩ to mex nê Tirtùm kapêr kôt amnhĩ nhîpêx mex o ri apa. No kot kaj mẽ ã amnhĩ nhîpêx anhÿr kêt nhùm amnhĩ tã mẽ apumu nê ra kot Ijaew kwÿ nhîpêxta pyrà nê tanhmã mẽ ato nê mẽ akaga.

²¹ ã Ijaew jarênh kot anhÿr. Te mẽ kêt pàr mex pyràk. Tã nhùm mẽ kot Jejus kôt amnhĩ xunhwÿr kêt jakamã nhùm Tirtùm te kot pĩ hpa jakàr nê rênhta pyràk o mẽ hipêx nê mẽ homnuj nê. Kot kaj mẽ uràk nê ã amnhĩ nhîpêx anê nhùm mã mẽ ato anê nê. ²² Ijaew kot Jejus kôt amnhĩ xunhwÿr kêt jakamã nhùm

Tirtùm mẽ hpãnhã mẽ apê Ijaew kêt xwÿnhjê mã amnhĩ to amnhîrit. Tã ka mẽ Ijaew rom amã Jejus prãm nhùm Tirtùm ja hã mẽ apumu nê amnhĩ pyrà nê kãm mẽ aprãm nê mẽ akamã ukapri rãhã nê pa ho pa. Tã kwa mẽ okora. Kêt ka mẽ hkôt pix mã amnhĩ nhîpêx o ri apa rãhã ty. Kot kaj mẽ hkaga nhùm amnhĩ tã mẽ apumu nê te Ijaew kot hkaga xwÿnhjê nhîpêx pyràk o mẽ anhîpêx nê mẽ akaga.

²³ Koja Ijaew nhÿrmã Jejus kôt amnhĩ xunhwÿr japêr nhùm Tirtùm ja hã mẽ omu nê mẽ ho hkra. Te mẽ kot pàr pa jakàr nê rênh nhùm grà par xwÿnh nhùm kot akupÿm amnhim hamÿnh nê ixkre kapem pàr wÿr o htêm nê akupÿm hã hanhôr nê hã hkaxpre ho htÿx nhùm kukwak ri akupÿm htirta pyràk. Ja kêt tanhmã kute hkêt. Kot ã hipêx anhÿr kaxyw àhpumunh tÿx. ²⁴ Mẽ apê Ijaew kêt xwÿnhjaja te mẽ ate akunĩ kamã pĩ hpa jakàr nê ixkre kapem pàr ã hanhôr nê hã kaxpreta pyràk. Jao Jejus kôt amnhĩ xunhwÿr nhùm mẽ ato hkra kurê kumrêx. No Ijaew te mẽ kêt ixkre kapem pàrta pyràk jakamã Tirtùm kot akupÿm hanhôrta tanhmã kêt kute hkêt. Kêt Tirtùm kênã kot tanhmã kêt kute. Jakamã koja mẽ hkôt amnhĩ xunhwÿr nhùm amnhĩ tã mẽ omu nê mẽ ho hkra kurê kumrêx.

Tirtùm kot mẽ piitã mẽ kamã ukapri hã harênh

Matêwre 23.37-39; Rukre 21.24; Juãw 10.16

²⁵ E kot paj mẽ amã mẽmoj to amnhîrit ka mẽ inhma. Nà na pa ra mẽ amã Ijaew krã xihitÿx xwÿnhjê jarê ka mẽ harênh ma. Ra mẽ kot Jejus kaga hã mẽ harênhja. Tã koja mẽ ã amnhĩ nhîpêx anhÿr o pa rãhã hkêt nê. Na hte Tirtùm kormã amnhĩ tã mẽ apê Ijaew kêt xwÿnhjê jamãr o pa. Amnepêm na pre amnhĩ kaxyw mẽ akukamã

tanhmã mê akwýjê jarênh to. Tã kot kaj mê kot tanhmã mê ajarênh to xwýnh piitã Jejus kôt amnhî xunhwýr pa nhùm rî Ijaew amnhî to hapu nê kormã hkôt amnhî xunhwý. Æ mê kot amnhî nhîpêx anhýr kaxyw. Jakamã kwa kêr ka mê ri ja hã amnhî to jarkrar o ri mê hkôt apa hkêt nê. Mê pahpyrà nê mê kot Jejus kôt amnhî xunhwýr mã xwýnh kênã. ²⁶ Koja Tirtüm nhýrmã Ijaew piitã ho hkra. Kapêr ã kagã htüm kot mê harênh kot:

Nhýrmã kot mê ate amnhî tomnuj pê mê apytãr mã xwýnhja Ijaew ô koja.

Jako hkanrêhã htãmnhwýjê hõ koja. Koja nhýrmã wrý nê mê ate amnhî tomnuj pê mê apytã nê mê ate amnhî tomnuj o hapêx pa. Anê.

Anhýr o kot harênh. ²⁷ Nê mãänën ja:

Kot paj mê nê mê kot amnhî tomnuj o ijapêx pa.

Amnepê mã ixte mê hkukamã mê hã amnhî jarênh xà hkôt. Anê.

²⁸ Nom arî mê kãm Jejus mar prãm kêt jakamã te mê kot kutã amnhî xunhwýr pyrãk o amnhî nhîpêx. Tã ã mê kot amnhî nhîpêx anhýrja ri ka mê kamjaja mê hpãnhã mê apê Tirtüm kra. Nom nhùm Tirtüm arî kãm mê hapêê. Na pre amnepê mã kot tanhmã mê ho mex to hkukamã tanhmã mê hã amnhî jarênh to. Mê hpãr kraxjê mã tanhmã mê hã amnhî jarênh to. Finat Apraãw mê Ijak mê Jakoja mã mê hkanrêhã mê htãmnhwýjê hã tanhmã amnhî jarênh to.

²⁹ Na hte Tirtüm mëmoj tã tanhmã amnhî jarênh to nê ãm hãmri hã amnhî jarê nê amnhî jarênh xà hkôt tanhmã hipêx to. No na hte mëmoj tã amnhî jarênh tã gaa nê ho hamakêtkati hkêt nê. Rý hpãnhã axtem tanhmã hipêx to hkêt nê. Na hte mëmoj tã amnhî jarênh xà hkôt tanhmã hipêx to. Tã

ra amnepê mã kot Ijaew o mex ã amnhî jarênh jakamã koja nhýrmã mê ho mex rax nê ã mê hipêx anhýrja o hamakêtkati hkêt nê.

³⁰ No mê kajaja mê apê Ijaew kêt xwýnhjaja. Amnepêm na ka prem ajaxwýja Tirtüm kôt amnhî nhîpêx kêt nê. Tã nhùm mê akamã ukapri nê kãm mê ajapê nê. Ka mê ra harênh ma nê hkôt amnhî xunhwý nê hkôt amnhî nhîpêx mex nê. No ãm Ijaew kukwak ri. Mê kot kapêr kôt amnhî nhîpêx o pa hkêt jakamã nhùm Tirtüm mê hpãnhã nhãm mê amã amnhî to amnhîrit nê mê ato mex rax nê. Jakamã te Ijaew kukwak ri mê amex nê ri mê apa pyrãk. ³¹ Tã koja nhýrmã kot mê anhîpêxta pyrã nê Ijaew ho hkra. Nê mê apyrã nê mê kamã ukapri nê. Mê kot mê apyrã nê amnhî kaxyw Kra hkôt hamaxpêr xwýnhjaja nhùm mê apyrã nê mê ho hkra nê mê ho mex nê. ³² Mê apê Ijaew kêt xwýnhjaja nê mê ixpê Ijaew mê pahte axpên pyrãk. Na pu htem pahpiitã Tirtüm kapêr piitã hkôt amnhî nhîpêx rãhã ho ri papa hkêt nê. Tã kot puj mê tee ri ja hã amnhî pumu nê amnhî to kuwý nhùm mê pama nê amarî mê pakamã ukapri nê mê pahto mex nê.

Pawre kot Tirtüm mex o mex ã harênh

Epes 3.20; Korosê 1.16; Wam Korît 2.9, 2.16

³³ Tirtümja àhpumunh týx o àhpumunh týx. Nê ukapri ho ukapri nê mex o mex. Mê pahtõ na pu urãk nê ã amnhî nhîpêx anhýr o papa? Nã amrakati kumrêx. Nê mê pahtõ na pahte Tirtüm jamaxpêr kôt omunh? Nã mê pahte hamaxpêr kôt omunh kêt. ³⁴ Kapêr ã kagã htüm kot ja jarênh kot:

Mê pahte Tirtüm jamaxpêr kôt omunh kêt.

Nê kot pu mê pahtõ mëmoj tã hakre hkêt nê.

Mê parom àhpumunh o àhpumunh xwÿnh kênâ.

³⁵ Nê mê pahto kot puj we kãm pakapêr nê kãm: “Kwa Tirtûm. Ra ixte amâ mêmoj nhôrta pânâhâ kwa amnhî xwar inhmâ mêmoj gô.” Anê.

Nà mêmoj piitâ õ kênâ kot puj kêt ri â kãm mêmoj nhôr â amnhî jarênh anê. Anê.

³⁶ Tãm na pre amnhî kaxyw mêmoj piitâ ho kator pa. Nê âm pix kukwak ri na mêmoj piitâ htîr nê pa. Jakamâ kwa pu mê kãm mex o mex â mân harênh rãhã ho ri papa.

12

Mê pahte Tirtûm mã amnhî nhôr ã mê pajarênh

Wam Korît 6.20; Epes 4.1; Piriþos 4.8-9; Korosê 1.10; Wam Tesarõn 4.1-3; Wam Pêtre 2.11

¹ Kwa Jeþus kôt ixkwÿjaja. Tirtûm na hte mê pahto mex nê mê pakamã ukapri rãhã jakamã na pa ã mê amã ixkapêr anê. Kwa mê tokyx kãm amnhî jarê nê kãm amnhî gô. Te mê ate kãm hkînh xà nhôr pyrãk o amnhî nhîpêx nê kãm amnhî gô. Jao mê amã kapêr kôt pix mã amnhî nhîpêx o ri apa hprãm ã kãm amnhî jarê. Nê kãm hprãm xà hkôt pix mã tanhmã amã amnhî nhîpêx to ho ri apa hprãm ã kãm amnhî jarê. Kot kaj mê ã kãm amnhî jarênh anê nhũm amnhî tã mê ama nê hkînh nê. ã mê pahte kãm amnhî jarênh anhÿrja na kãm mar prãm.

² Nê kêr ka mê kãm Tirtûm prãm kêt xwÿnhjaja kot amnhî nhîpêx o ri amnhî nhîpêx o ri apa hkêt nê. Nê mê amnhî to Tirtûm mãn wÿ kê mê amã mê ajamaxpêr mex jagjê. Koja mê ama nê mê amã hagjê ka mê ra aprî hã hamaxpêr xà hkôt mê pahte amnhî to mex xà pumunh mex nê. Na pu htem hkôt amnhî nhîpêx o ri papa nhũm amnhî tã

mê pahpumu nê hkînh nê. Pu mê pajaxwÿja ÿ hã pahkînh nê ri papa.

Kris kwÿjaja kot tanhmã axpên nhîpêx to hã mê kãm karõ

Römân 12.1-11; Epes 4.11-16;

Wam Pêtre 4.10-11

³ Nê na pre Tirtûm ixto mex nê. Nê mê akaxyw ixãm. Ixte mê amã Kra Jeþus kot tanhmã mê panê amnhî nhîpêx to hã harênh o ri mê akôt ixpa kaxyw. Tã na pa ã kagàja kamã mê amã harênh anê.

Jakamã kwa kêr ka mê amnhî to jarkrar o ri mê kãm apa hkêt nê. Âm kwarî ho kwarî. Rÿ atÿx ri ajamaxpêr o:

—Nà pa na ixte amnhî to mex o ixte ixkwÿjê piitã mê hakrenh par.

Anhÿr ã amnhî to jarkrar o ri mê hkôt apa hkêt nê. Kêt mê âm amnhî jarênh o:

—Na pa pre amnhî kaxyw Jeþus kôt ijamaxpêr nhũm Tirtûm ixpumu nê ixto hkra. Jakamã na pa hte Jeþus Kris pix kukwak ri tãm amnhî nhîpêx o ri ixpa. No amnhî krã hkôt ã amnhî nhîpêx anhÿr kêt nê. Anê.

⁴ E pa mê amã mêmoj jarê ka mê inhma. Nà mê panhija pyxi htã kamã mêmoj xohtõ. Na kamã mê pano nê mê pajakwa. Nê kamã mê pajamak nê mê pahte. Na pu htem mê pano ho rît nê mê pajakwa ho pakapêr. Nê mê pajamak o ri ama nê mê pahte ho ri mra. ⁵ Ja pyrã nê Kris kôt mê pahte amnhî xunhwÿr xwÿnhja âm pyxi tã hkôt mê pahte amnhî xunhwÿr xwÿnhjaja mê paxohtõ. Jakamã na pu htem ahpÿnhã tanhmã axpên to mex to ho ri papa. Jao Kris kôt axpên to pahto nê pahtõx o papa.

⁶ Tirtûm na hte mê pahpê hkwy hã ahpÿnhã mê pamã tanhmã mêmoj tã karõ to nê kaxyw mê pahto mê paxihtÿx. Tã kêr pu mê ra kot mê pamã mêmoj tã karõ xà hkôt kãm amnhî nhîpêx rãhã ho ri papa. Jakamã koja mêhõ ate Tirtûm

kapêr jarênh o ri apa kaxyw axâm nê amâ anê ka Tîrtûm kamnâr rom mê kâm kapêr jarênh mex o ri mê hkôt apa.

⁷ Rỳ ate akwỳjê mã tanhmã axàpênh to ho ri apa kaxyw axâm ka mê kâm axàpênh mex o ri mê hkôt apa.

Rỳ ate Tîrtûm kapêr ho mê ahkre ho ri apa kaxyw axâm ka ho mê ahkre mex o ri apa.

⁸ Rỳ ate Tîrtûm kapêr o ri Jejus kôt mê akwỳjê jamaxpêr o hihtỳx o ri apa kaxyw axâm ka mê kâm kapêr jarênh pê mê ho mê hihtỳx mex o ri mê hkôt apa.

Rỳ ka mê atô akukrêx rax japêr nê ate mê kêp amrakati xwỳnhjê mã mêmoy nhôr o ri apa kaxyw axâm ka axàmnhix ri mê kâm mêmoy nhôr o ri mê hkôt apa.

Rỳ ate akwỳjê ho amnhiptâr kaxyw axâm ka mê ho amnhiptâr mex o ri apa.

Rỳ ate tanhmã mê akwỳjê ho mex to nê mêmoy to mê kutã anojarêto o ri apa kaxyw axâm ka akĩnh kãm ã mê hipêx anhỹr rãhã ho ri apa nê tanhmã akapêr punuj to hkukamã ri ajamaxpêr o ri mê hkôt apa hkêt nê.

⁹ Nê kêr ka mê apiitã amã axpên kĩnh kãm axpên to mex rãhã ho ri apa nê ri axêx rom amã axpên kĩnh ã amnhĩ jarênh o ri apa hkêt nê. Nê mê kot amnhĩ tomnuj xà piitã hkaga hpa nê hpãnhã mê kot amnhĩ to mex xà pix pyr tỳx nê hkôt amnhĩ nhĩpêx rãhã ho ri apa. ¹⁰ Nê mê apê Kris kwỳ hã amã axpên kĩnh kãm tãm axpên nhĩpêx o ri apa. Nê mê akwỳjaja mê kot amnhĩ to mex xwỳnh ã mê harênh o ri mê hkôt apa. No mê ri atỳx ajamaxpêr o:

—Nà koja mêmoy ixkumrêx ixte tãm amnhĩ nhĩpêx xwỳnh ã ijarê pa rĩ kormã amnhĩ xwar tãm kot amnhĩ nhĩpêx xwỳnh ã harê.

Anhỹr o ajamaxpêr kêt nê. Kêr ka akumrêx tãm kot amnhĩ nhĩpêx xwỳnh ã harê.

¹¹ Nê kêr ka mê Tîrtûm mã mêmoy to anhỹr kaxyw nê kamã amã kaga hkêt kãm tanhmã kãm mêmoy to ho ri apa. Jao akĩnh kamã kãm ho anhỹr mex nê. ¹² Nê mê nhỹrmã Tîrtûm kot kaxkwa kamã mê ato mex rax kukamã ajamaxpêr nê akĩnh rãhã kãm mêmoy to anhỹr o ri apa.

Nê kêr ka mê tanhmã amnhĩ to rỳ nhũm mêmoy tanhmã mê ato ka mê akaprĩ nê ri apa htã no ãm tee ri amnhĩ kukamã ajamaxpêr o Tîrtûm kaga hkêt nê. Arĩ amnhĩ to hwỳr rãhã ho ri apa. ¹³ Nê koja Kris kôt atôjê hõ kêp amrakati ka mê ja hã omu nê anhõ mêmoy japêr nê mãmri kãm hkwy gõ. Nê amnhĩ wỳr awỳ nê tanhmã ho mex to.

¹⁴ Nê mê kot tanhmã mê atomnuj to xwỳnhjaja kêr ka mê amnhĩ tã mê omu nê agryk nê wajaga kot tanhmã amã ho kaxyw hwỳr atêm nê kãm tanhmã hã axàmnênh to hkêt nê. Kêt ãm ho Tîrtûm pix wỳ nê kãm:

—Pa mê ijamâr mex xwỳnh maati. Nà na ixkwỳjê hõja ã inhĩpêx anê. Tã nom kêr ka ixtã tanhmã homnuj to hkêt nê. ãm tanhmã ho mex to.

Anhỹr o mãn mê ho awỳ.

¹⁵ Nê koja akwỳjê hõ mêmoy tã hkĩnh nê. Ka omu nê urak nê ý hã akĩnh nê. No koja mêmoy tã hkaprĩ nê mỳr o nhỹ ka omu nê ra urak nê ý hã akaprĩ nê.

¹⁶ Nê kêr ka mê piitã mê hipêx o axpên pyrak o ri apa. Te mê ate amnhĩ to rax o akwỳjê jakrenh o te mêmoy kamã akahak o amnhĩ nhĩpêx pyrak kêt nê. Nê axàhpumunh tỳx o ate mê piitã mê hakrenh par pyrak o ri amnhĩ nhĩpêx o ri apa hkêt nê.

¹⁷ Nê koja mêmoy tanhmã ato htã ka ãm amnhĩ tã omu nê tanhmã amnhĩ tã ho hkêt nê. Nê mê piitã

mê noo mã tãm ri amnhĩ nhĩpêx o ri apa.

18-19 Nê kêr ka mê tãm ri axpên mã akapêr rãhã ho ri apa.

Nê kot kaj akrãmnhwý mẽ wa tanhmã axpên nhĩpêx to. Hãmri ka wa akupým tãm axpên xãm kaxyw kãm akapêr tã nhũm ama nê ãm ama nê akaga. Ka ãm amnhĩ tã omu nê kamã agryk kêt nê. Koja Tirtũm tãm tanhmã atã ho. Kapêr ã kagã htũm kot ja jarênh kot:

Kêr ka mẽ amnhĩ tã tanhmã kot ato xwýnh to hkêt nê. Pa kot paj mẽ atã tanhmã ho. Anê.

Nê harênh kot:

²⁰ Kêr ka mẽ amã mẽ kãm mẽ akurê xwýnhjê o mex pix o ri apa.

Kê mẽ kãm prãm ka ja hã mẽ omu nê mẽ kamã axukapri nê mẽ kãm mêmoj kwý gô kê mẽ kuku.

Rý nhũm mẽ kãm kôr ka mẽ kãm gô hkwy kê mẽ ho ixkô.

Kot kaj mẽ ã amnhĩ tã mẽ hipêx mex anê nhũm mẽ tee ri amnhĩ tã mẽ apumu nê amnhĩ kamã hpijaãm jao mẽ atã amnhĩ kamã gryk nê. Anê.

²¹ Nom kot kaj mẽ amnhĩ tã tanhmã mẽ homnuj to hãmri nê ajaxwýja urãk nê amnhĩ tomnuj nê. Ja pymaj kêr ka mẽ amnhĩ rom tãm mẽ hipêx. Hãmri nhũm mẽ amnhĩ tã mẽ apumu nê mẽ apyrã nê tãm mẽ anhĩpêx japêr.

E kêr ka mẽ ã axpên nhĩpêx o ri apa anê.

13

Mê pahto amnhĩptâr xwýnhjê jarênh

Matêwre 22.21; Xitre 3.1; Wam Pêtre 2.13-17

¹ Nê kêr ka mẽ kot mẽ ato amnhĩptâr xwýnhjê kapêr ma nê kapêr kôt ri amnhĩ nhĩpêx rãhã ho ri apa. Tirtũm kot mẽ pakaxyw mẽ unhwýr kênã. Mẽ kot mẽ pahto amnhĩptâr o pa kaxyw na hte mẽ unhwý. ² Jakamã koja mêmõ mẽ

kapêr ma nê ãm kuma nê hkôt amnhĩ nhĩpêx kêt nê hãmri nê te kot Tirtũm kapêr mar nê ãm mar pyrãk o amnhĩ nhĩpêx. Hãmri nhũm Tirtũm tee ri ja hã omu nê nhýrmã tanhmã hã ho.

³ Xã na hte tãm mẽ kot amnhĩ nhĩpêx xwýnhjaja kãm mẽ kot mẽ ho amnhĩptâr xwýnhjê pyma ho pa? Nã na htem kãm mẽ uma hkêt kãm ri pa. ãm mẽ kot amnhĩ tomnuj xwýnh pixjaja na amnhĩ kamã kãm mẽ uma ho pa. Tã ka mẽ amã mẽ kot mẽ ato amnhĩptâr xwýnhjê pyma hprãm kêt xwýnhjaja kêr ka mẽ kapêr ma nê hkôt amnhĩ nhĩpêx kê amnhĩ tã mẽ apumu nê hkĩnh nê. Nê amnhĩm mẽ ate amnhĩ to mex xwýnh ã mẽ ajarê. ⁴ Tirtũm nhý hã mẽ panhõ pahi kot mẽ pahto amnhĩptâr jakamã na htem mẽ kãm mẽ pahto mex prãm nê. Nê kot pu mẽ pahtõ axtem nê tanhmã amnhĩ tomnuj to hãmri nhũm tee ri ja hã pajarênh ma nê tanhmã hã mẽ pahto. ãm hãmri na hte ã mẽ pahto amnhĩptâr xwýnhjaja mẽ panhĩpêx anê. Tirtũm kãm hprãm xã hkôt. ⁵ Jakamã kwa mẽ kapêr ma nê hkôt ri amnhĩ nhĩpêx mex rãhã ho ri apa. Nom amã kot tanhmã ato pix pymaj hkôt ri amnhĩ nhĩpêx kêt nê. Mããnen ã amnhĩ kukamã ajamaxpêr anê nê ajamaxpêr o:

—Nã Tirtũm kot mẽ ixkaxyw unhwýr jakamã na pa hte kapêr ma nê hkôt amnhĩ nhĩpêx mex o ri ixpa.

Anhýr o ajamaxpêr.

⁶ Nê mẽ pahto amnhĩptâr xwýnhjaja kot Tirtũm nhý hã tanhmã mẽ panhĩpêx to ho pa jakamã na pu htem mẽ àpênh pãnhã mẽ kãm amnhĩre. Mẽ pahpiitã axpên kaxyw kãm kãxpore ho hkryre nê kugô. Tanhmã kot ho mẽ pamã mêmoj to mex to kaxyw. ⁷ Jakamã kêr ka mẽ hã apijaãm o ri apa kamã mãmrĩ mẽ kãm kãxpore

hkwȳ ho hkryre nê ôr o ri apa. Mê kot hã àhwÿr xà hkôt.

Mê pahte tanhmã axpên nhîpêx to hã mê pamã karô

Matêwre 22.39-40; Karatas 5.13-15; Wam Juãw 3.11-24

⁸ Nê kër ka mēhō ho tewēn japêr nê tokyx kãm amnhîre. Nê mê amã axpên kînh o aa ho ajamakêtkati hkêt nê. Jao mēmoj to axpên kutã anojarêt rãhã ho ri apa. Kot kaj mê ã axpên nhîpêx anê nê Tîrtüm kapêr piitã hkôt amnhî nhîpêx mex o ri apa.

⁹ Amnepê mã na pre finat Mojesja Tîrtüm nhÿ hã Ijaew mã mēmoj tã karô nê mê kãm:

Kêr ka mê aprô pix tânopxa nê nhãm mēnijê hō kamã ri akurê ho apijaàm kêt o apa hkêt nê.

Nê mê anijaja mê amjên pix tânopxa nê nhãm ri mēmyjê hō kamã akurê ho apijaàm kêt o ri apa hkêt nê.

Nê mê ri axpên par kêt nê.

Nê mê ri axpên pê axàhkînh o ri apa hkêt nê.

Nê mê amã ri axpên kukrêx kînh o ri amã ho anhō hprãm o ri apa hkêt nê. Anê.

Nê mãânên ja:

Kêr ka mê nhãm mê axpên nhîpêx o te ka amã amnhî tã ma pyrãk. Jao tãm axpên nhîpêx o ri apa. Anê.

Ã kot mê kãm hã karô kot anhÿr. Kot puj mê ã pamã pahkwÿjê kînh anê nê mãânên wam finat Mojes kot mēmoj tã mê panhîgêjtê mã karô hkôt amnhî nhîpêx o ri papa rãhã nê. Jao axpên par kêt nê. Nê axpên pê paxàhkînh kêt nê. Nê axpên kutã panojarêt rãhã nê. ¹⁰ Kojã mēhō kãm amnhî tã ma pyrãk o hkwȳjê nhîpêx nê mê ho mex pix o pa. Jakamã kot kaj mê amã ri axpên kînh nê mēmoj to axpên kutã anojarêt pix nê. Jao Tîrtüm kapêr piitã hkôt amnhî nhîpêx mex o ri apa.

¹¹ Amnepê mã mê pahte amnhî kaxyw Jejus kôt pajamaxpêr xà hã arîgrota ã na pre kormã akupÿn mê pahwÿr hpôx xà hã arîgro kormã hwÿr awry rax nê. Tã ra hwÿr ahtêp o mō. Kojã tokyx akupÿn mê pahwÿr wrÿ nê ma akupÿm kaxkwa hwÿr mê pahto api. Jakamã kwa kër pu mê arî hamâr rãhã ho ri apa. Jao tanhmã amnhî tomnuj to kaxyw nê pajamaxpêr o:

—Kwa kojã Jejus tanhmã amnhî to nê jarãhã akupÿn wrÿk japêr. Tã kot pa ri ã amnhî nhîpêx anê nhüm wrÿ nê tee ri ja hã xpumu pa amnhî kamã ixpijaàm tÿx nê. Nã kot paj ã amnhî tomnuj anhÿr kêt nê. Anê.

Hãmri nê Jejus kamã ajamak pê kutêp Tîrtüm kapêr kôt pix mã ri amnhî nhîpêx mex rãhã ho ri papa.

¹² Na pu htem kamãt kãm gôr nê arîgro jamâr pê kamã pajamak o panhîkwÿ. Arîgro te kêp Jejus akupÿn wrÿk pyrãk. Jakamã kwa pu mê kamã pajamak pê kãm panojarêt rãhã ho ri papa nê amnhî nê tanhmã mê omnu xà kute pumunh mex o ri papa. Te ho pôristi kot amnhî nê mê kot kãm mê hkurê xwÿnhjê pumunh mex pyrãk o Jejus kutêp tãm amnhî nhîpêx o ri papa. Na pre tanhmã mê pahkrã hto pu mê ÿ hã tãm ri amnhî nhîpêx. Tã kër pu mê arî ã amnhî nhîpêx anhÿr o ri papa nê te mê pahte arîgro hã mê pa xwÿnhjê kot amnhî nhîpêx pyrãk o amnhî nhîpêx. ¹³ Kot puj mê ã amnhî nhîpêx anê nê mê piitã mê noo mã tee ri tanhmã mê pahte amnhî tomnuj to mã pajamaxpêr kêt nê. Jao amnhî kamã pahpijaàm nê ri papa hkêt nê. Nê pajamakêtkati nê paxãmnhîx ri papa. Te ho hirã kamã ri mê pa xwÿnhjê kot amnhî nhîpêx pyrã nê ãm ri paxãmnhîx tãm amnhî nhîpêx o ri papa.

Nê mê pahprô pix tânopxar o ri papa.

Nē mẽ pahpipānh nē ri papijapu ho ri papa hkēt nē.

Nē mẽmoj tā axpēn mā paxàkjēr hkēt nē.

Nē mẽmoj tā axpēn kām pagryk kēt nē.

¹⁴ Nom kot puj mẽ axtem nē ā amnhī tomnuj anē nē mẽ pahte amnhī nhīpēx tūm kôt pix mā amnhī nhīpēx. Tā kēr pu mẽ ā amnhī nhīpēx anhÿr pumaj hpānhā amnhī to Pahihti Jejus Kris wÿ nē kām:

—Pa Jejus. Nà kormā jar apa ri na ka pre mẽ kot tanhmā amnhī tomnuj to kutā axihtÿx o axihtÿx nē aa tanhmā amnhī tomnuj to hkēt nē. Tā inhmā apyrā nē ixte amnhī tomnuj kutā ixihtÿx o ixihtÿx o ixpa hprām. Anē.

Jaο mẽ pajamaxpēr tūmja te ra kot amnhī tā mẽ pahto htÿx kēt pyràk o pu mẽ amnhī nhīpēx o ri papa.

14

Mē pahte Kris kôt pahkwÿjē mā paxàkjēr kēt ā mẽ pamā karō

Matêwre 7.1-5; Römän 2.1; Wam Korit 10.23-33; Xiakre 4.11

¹ Nē koja mēhō kormā Jejus kôt amnhī xām nyw ri kormā hkôt hamaxpēr tohtuj anē. Hāmri nē htÿx tanhmā hamaxpēr to nē mẽmoj mex kaga. Ka mẽ ja hā omu nē ām omu nē hā tanhmā kām nē hkēt nē. Kwār māmri ā amnhī nhīpēx anē. Koja gaa nē rī hprī hā Tirtūm kapēr mar tÿx nē hāmri nē hkôt mẽmoja pumunh mex nē. ² Jakamā koja Jejus kôt akwÿjē hō mẽ apkur xà piitā hkur pymaj tanhmā hō kute hā harē nē hkaga nē hamaxpēr o:

—Nà kot pa ja hkur kēt nē. Kot pa apu kuku nē hkur o amnhī tomnuj nē. Anē.

Kwār māmri ā hamaxpēr anē nē hkur kēt nē. Nom mẽ pahte Jejus kôt amnhī xunhwÿr tÿx xwÿnhjaja na pu htem paxāmnhix Jejus karnār rom mẽmoj piitā

kuku. Nom mẽ pahkīnhā ham mẽ kot hkôt amnhī xunhwÿr xwÿnhjaja kormā kapēr piitā mar kēt jakamā kwār mẽ māmri anē nē mẽmoj kur kēt nē. ³ Nom kēr ka mẽ ri tanhmā hā mẽ kām akapēr to hkēt nē. Rÿ mẽ kām:

—Kwa mẽ ixpyrà nē mẽmoj piitā aku.

Anhÿr o mẽ kām akapēr kēt nē. Ano ho ām hā mẽ omu.

Nē mẽ ate mẽmoj piitā hkur kēt xwÿnhjaja kēr ka mẽ ajaxwÿja mẽ ixte mẽmoj piitā hkur ā tanhmā mẽ inhmā axàkjēr to hkēt nē. Mē ixte mẽmoj piitā hkur o ixpa hā mẽ ixpumu nē ām hā mẽ ixpumu nē hā tanhmā mẽ inhmā axàkjēr to hkēt nē. Rÿ hā mẽ inhmā:

—Kwa nà kot kaj mẽ ja kur o amnhī tomnuj nē.

Anhÿr o hā mẽ inhmā akapēr kēt nē. Ano ho ām ja hā mẽ ixpumu. Mē pahte ahpÿnhā tanhmā paxàpkur to htā Tirtūm kot mẽ pahte Kra Jejus kôt amnhī xunhwÿr xwÿnh piitā mẽ pahto hkra kēnā. ⁴ Jakamā kwa mẽmoj tā tanhmā axpēn mā axàkjēr to ho ri apa hkēt nē. Koja Kris kôt atōjē hō axtem tanhmā hamaxpēr to ka mẽ tee ri ja hā omu nē tanhmā hā kām nē hkēt nē. Rÿ ajamaxpēr o:

—Tk. Na hte ā ri amnhī nhīpēx anhÿr o pa. Ja omnuj. Pa na pa hte ā amnhī nhīpēx anhÿr kēt nē.

Anhÿr o ri axpēn kukamā ajamaxpēr hkēt nē. Mē pahpē Tirtūm kēt kēnā kot pu kēt mẽ ā ri axpēn kukamā pajamaxpēr anē. Tirtūm pix na hte tanhmā mẽ pajarēnh to xwÿnh. àhpumunh o àhpumunh xwÿnh jakamā koja tanhmā mẽ hkrā hto nhūm mẽ rī kormā tām hamaxpēr pē àmnhix ri tanhmā amnhī nhīpēx to ho pa.

⁵ Nē koja Jejus kôt atōjē hō mẽmo arīgromnu jarē nē hā àpēnh kēt nē. Ka mẽ apē hkwÿjaja tee ri ja hā omu nē ajamaxpēr o:

—Nà arıgro piitã mē pamã mex kēnã. Kot paj māmri arıgro piitã hã apē.

Anhÿr o ajamaxpēr japēr. Nom kēr ka mē ja hã axpēn mã tanhmã axàkjēr to hkêt nē. Na pu htem ahpÿnhã pamã tanhmã mē pahte amnhĩ nhĩpêx to hprãm xà hkôt tanhmã amnhĩ nhĩpêx to. No tanhmã ri hã axpēn mã paxàkjēr to ho ri papa hkêt nē. ⁶ Kêt mē kot arıgromnu jarēnh xwÿnhjê mē mē pahte arıgro piitã mex ã harēnh xwÿnhjaja mē pahpiitã mē pahpê Tirtüm kraa. Jakamã mē pahpiitã na pu htem pajamaxpēr o:

—Na pa hte Tirtüm kãm hprãm xà hkôt ã amnhĩ nhĩpêx anhÿr o ri ixpa. Anē.

Nē mē pahte mēmoj piitã hkur xwÿnhjaja nē mē kot mēmoj kwÿ hkur kêt xwÿnh piitã mē pahpê Tirtüm kraa. Mē pahpiitã mē pamã kãm hprãm xà hkôt amnhĩ nhĩpêx prãm jakamã na pu htem paxàpkur kaxyw nē Tirtüm mã amnhĩ jarē nē kãm:

—Pa mē ijamār mex xwÿnh maati. Nà ãm hãmri na ka hte apkati mē mē inhmã mē inhõ ho apa. Amex o amex Tirtüm.

Anhÿr o kãm amnhĩ jarē. Hãmri nē kormã hkamnār rom paxàmnhix ri tanhmã mēõ kuteta ku. ⁷⁻⁸ Mē pahpê Tirtüm kra jakamã na pre ra mē pakukamã tanhmã mē pajarēnh to. Mē pakukamã pahtyk ã arıgro jarē nē mē pahte pahtır ri tanhmã ri amnhĩ nhĩpêx to ho papa hkukamã hamaxpēr. No mē papajaja na pu htem amnhĩ krã hkôt tanhmã mē pahte amnhĩ nhĩpêx to kukamã paxàhpumunh kêt. ⁹ Jakamã na pre Kris ja hã mē pahpumu nē tãm mē pakaxyw amnhĩ to kēp mē panhõ Pahihti nē mē panē ty. Hãmri nē akupÿm htír. Kēp mē panhõ Pahihti hã akupÿm htír. Kēp mē pahte hkôt amnhĩ xunhwÿr xwÿnhjê nhõ Pahihti kaxyw. Jakamã kēp ra

mē pahkwÿ htyk xwÿnhjê nhõ Pahihti nē mãânēn kēp arı mē pahtır xwÿnhjê nhõ Pahihti. ¹⁰ No mē papajaja mē pahpê Kris kôt mē pahkwÿjê nhõ pahi hkêt jakamã kēr mē Kris kôt akwÿjê hõ tanhmã amnhĩ nhĩpêx to hã omu hãmri nē tanhmã ho akapēr to hkêt nē. Rÿ ajamaxpēr o:

—Kwa na ã amnhĩ nhĩpêx anē. Inhmã ja mex kêt.

Anhÿr o ajamaxpēr kêt nē. Koja nhÿrmã Tirtüm tãm mē pahpiitã tanhmã mē pahte amnhĩ nhĩpêx to hã mē pahpumunh xà hkôt tanhmã mē pajarēnh to. Nom kēr pu mē papajaja amnhĩ hkrã hkôt ã axpēn jarēnh anhÿr kêt nē. ¹¹⁻¹² Kot puj mē nhÿrmã pahpiitã Tirtüm kutã pahkrĩ nē kãm tanhmã amnhĩ jarēnh to. Kormã mē pahtır ri tanhmã mē pahte amnhĩ nhĩpêx to ho papa hã kãm pahprĩ hã amnhĩ jarē. Kē mē pama nē tanhmã mē pajarēnh to. Kapēr ã kaga htüm kot mē pakukamã mē pajarēnh kot:

Koja nhÿrmã mē piitã ixpê mē õ pahi hã ixkutã hkõn krã ho rôrôk nē hkrĩ nē inhmã inhmex ã ijarē.

Nē mē piitã ixpê Tirtüm ã ixpyxi mex ã ijarē. ãm hãmri na pa ã mē hkukamã mē harēnh anē. Anē.

Mē pahte Kris kôt pahkwÿjê ho mex ã mē pamã karõ

Wam Korıt 8.9-13

¹³ Nē kwa kēr ka mē akwÿ kot Jejus kôt amnhĩ xunhwÿr tohtuj anhÿr xwÿnhjaja tanhmã mē kot amnhĩ nhĩpêx to ho pa hã mē omu nē ja nē tanhmã mē kãm akapēr to hkêt nē. ãm mē noo mã tãm ri amnhĩ nhĩpêx rãhã ho ri apa. Mē kot ja hã mē apumunh nē mē akôt amnhĩ nhĩpêx kaxyw. No kot ka mē kot tanhmã amnhĩ nhĩpêx toja ã kãm akapēr nhüm ama nē tee ri amnhĩ kukamã hamaxpēr nē hkaprĩ nē.

14 E kot pa hpānhā mẽ paxàpkur xà hā tanhmā mẽ panhō jarēnh to. Ixte Pahihti Jejus jamaxpēr xà hkôt tanhmā ijamaxpēr to ho ri ixpa jakamā kot paj ixkatàt kôt mẽ amā tanhmā mẽ panhō jarēnh to nē ām hāmri harē. Nà mẽ paxàpkur xàja ām pixi nē omnu hkêt. Piitā mex o mex. Nom koja mēhō tee ri mẽmo mẽ apkur xà hō pumu nē hamaxpēr o:

—Nà kot paj ja hkur kêt nē. Kot paj apu kuku nē ho amnhī tomnuj nē. Anē.

Hāmri nē hkur kêt nē. Tā kwār māmri ā hamaxpēr anē nē hkur kêt nē. Nom na ām amnhī krā hkôt Tirtüm kēp ja omnuj ā hkamnhīx. Kēp omnuj kêt. Ra kot mẽmo mẽ paxàpkur xà piitā mex ā harēnh. 15 Tā kot kaj mẽ kot mẽmoj kur kêt xwýnhnta py nē o tē nē kot hkaga xwýnh noo mã hkur o xa nhüm apumu nē tee ri hamaxpēr nē hkapri nē. Jakamā kot ka mẽ ā noo mã amnhī nhīpēx anhýrja o ho mex kêt nē. Kwa mẽ ā ri axpēn nhīpēx anhýr hkêt nē. Kot ka mẽ ā axpēn nhīpēx anē nē te amnhī pix kukamā ajamaxpēr pyrāk o amnhī nhīpēx. Jao akwýjē ho mex kukamā ajamaxpēr kêt nē. Kris kām mẽ hapē htýx kôt mẽ kot amnhī tomnuj pānhā amnhīrer kaxyw ra nē htyk kēnā kot ka kêt mẽ axtem nē ri ā mẽ noo mã mẽ kot mẽmoj kur kēeta kur anē. Rý koja apu tee ri kot mẽmoj kur kēeta kur ā mẽ apumu nē tanhmā amnhī tomnuj to. Jao Kris kaga japēr. Jakamā kwa mẽ ā mẽ noo mã mẽmojta kur kêt nē. 16 Mēmo mẽ apkur xàja mex tā nhüm mẽ akwýjē hō kām mex kêt japēr ka mẽ noo mã hkur kêt nē. Nē tanhmā hā kām nē hkêt nē. Kot kaj mẽ anē nhüm Kris kra hkêt xwýnhjaja tee ri ja hā mẽ apumu nē tanhmā axpēn mã mẽ apē Kris kwýjē ho kapēr punuj to. 17 Mē pahpē Tirtüm krajaja na pu htem paxàpkur xà nē pahkôm

xà pix kukamā pajamaxpēr o ri papa hkêt nē. Na pu htem amnhī mẽ pahkwýjē mex kukamā pajamaxpēr. Nē mẽ pahte tām amnhī nhīpēx kukamā pajamaxpēr. Nē tām axpēn nhīpēx kukamā pajamaxpēr. Kot puj mẽ ā amnhī nhīpēx anē nhüm Tirtüm Karō ja hā mẽ pahpumu nē mẽ pahto mẽ pahkính nē. Pu mẽ pahkính nē pajamakētkati nē ri axpēn kôt papa. 18 Tā kot puj mẽ ā Kris mã tanhmā amnhī nhīpēx to ho ri papa anē nhüm Tirtüm ja hā mẽ pahpumu nhüm ja kām mex nē. Nē Kris kôt mẽ pahkwýjē mã haxwýja ja mex nē.

19 Jakamā kēr pu mẽ tām axpēn mã pakapēr o ri papa. Nē pajamakētkati nē axpēn kôt ri pajapōj. Nē Kris kôt tanhmā axpēn to paxihtýx to ho ri papa. 20 No kot ka mẽ axàpkur xà gryk ā akwý hkukamā ajamaxpēr kêt nē atýx ri mēhō noo mã mẽmoj kur japēr. Kēp omnuj tā ka mẽ ām amnhī pix kukamā ajamaxpēr nē noo mã hkur japēr. Hāmri nhüm ja hā mẽ apumu nē ra kot Tirtüm kaga mã. Ra kēp hkra jakamā kwa mẽ noo mã mẽ kot mẽmoj punuj ā harēnh xwýnhnta kur kêt nē. Nom mẽ paxàpkur xàja piitā mex. Tirtüm kot mẽ pamā ōr jakamā piitā mẽ panhō. Tā koja akwýjē hō Tirtüm kēp mẽmoj omnuj ā hkamnhīx tā ka mẽ noo mã aku nē ho amnhī tomnuj nē. 21 Kēr pu mẽ pahkwýjaja tanhmā kot amnhī tomnuj to pymaj pu mẽ pahte amnhī nhīpēx kukamā pajamaxpēr mex o papa. Mēmo mẽō nē mẽmo kagō pē wíhtija. Tirtüm kot mẽ pamā mẽmoj piitā ōr tā no nhüm mẽ pahkwýjaja kēp ja omnuj nē pu mẽ noo mã hkur rý ho pahkôm kêt nē. Mēmo mry nē mẽmo wíhti pu mẽ noo mã hkur rý ho pahkôm kêt nē.

22 Nē kēr ka mẽ atō mẽmoj krēr kaxyw nē hkukamā ajamaxpēr o:

—Nà kot paj ja krê. Tîrtûm kâm ja mex kênâ. Anê.

Hâmri nê māmri Tîrtûm kamnâr rom axâmnhîx akrê. Kâm ja mex kênâ kot ka kêt ri tee ri hkrêr kaxyw hkukamâ ajamaxpêr nê hk-aga. ²³ No kot kaj mê atô mêmôj to anhÿr kaxyw nê tee ri amnhî kukamâ ajamaxpêr nê ajamaxpêr o:

—Ko kot paj apu ja ho anê nhÿm Tîrtûm hâ ixpumu nhÿm ja kêp omnuj nê rÿ ko. Anê.

Hâmri nê tee ri amnhî kukamâ ajamaxpêr. Tâ ra â amnhî nhîpêx anê nê akrê rÿ mêmôj to anê. Hâmri nhÿm Tîrtûm tee ri â ate amnhî nhîpêx anhÿr â apumu nhÿm ja kêp omnuj nê. Ate hkamnâr rom mêmôj to anhÿr kêt nê amarî amnhî krâ hkôt ho anhÿr jakamâ ho amnhî tomnuj nê.

15

Mê pahte amnhî pix kukamâ pajamaxpêr kêt â mê pamâ karô

Makre 10.45; Wam Korî 10.24; Piriapos 2.3-5

¹ Nê kêr pu mê pahte ra Jejus kôt amnhî xunhwÿr tÿx xwÿnhjaja amnhî kôt kormâ mê kot Jejus kôt amnhî xunhwÿr totuj janhÿr xwÿnhjê jamâr mex nê. Jao mê kamâ pagryk tokyx anhÿr kêt nê. Âm mê kutâ panojarêt pix o papa. Jao ra amnhî pix kukamâ pajamaxpêr kêt nê. ² Mâânên amnhî mê Kris kôt mê pahkwÿjê hkukamâ mân mê pajamaxpêr. Jao mê kot tãm amnhî nhîpêx kaxyw mê ho mex o ri papa. ³ Kris na pre jar pa ri amnhî pix kukamâ hamaxpêr kêt nê. Na pre mâânên ô Papaj kukamâ hamaxpêr. Jakamâ Tîrtûm kapêr â kagâ htûm kot kâm kapêr jarênh kot:

Pa Papaj. Na hte mê pahkurê xwÿnhjaja ixto kapêr punuj nê. Nom mâânên â ato kapêr o pa anê. Anê.

⁴ Mê pakaxyw na Tîrtûm kapêr â kagâja. Mê pahte kamâ harênh

nê mar nê amnhî kaxyw hkôt pajamaxpêr tÿx o ri papa kaxyw. Jakamâ na pu htem tanhmâ pahpunuj to htâ kapêr kwÿ ma nê pahkÿnh nê. Jao tee ri amnhî kukamâ pajamaxpêr o ri pahkaprî hkêt nê. Âm nhÿrmâ Tîrtûm kot mê pahto mex kukamâ pajamaxpêr o akupÿm paxihtÿx nê pahkÿnh nê ri papa. Mê pahkÿnh nê ri papa kaxyw na Tîrtûm kapêr â kagâja. ⁵⁻⁶ Na pu htem Tîrtûm kamnâr rom pahkÿnh nê. Nê axpên kamâ paxukaprî ho ri papa. Jakamâ na pa hte tanhmâ mê ato Tîrtûm wÿr to nê kâm:

—Pa Tîrtûm. Apê mê ijamâr xwÿnh maati na ka. Nê apê mê inhô Pahihti Jejus Kris nhô Papaj na ka. Nà xep ra Rôm nhô xwÿnh kwÿjaja kâm akapêr kôt amnhî nhîpêx prâm jakamâ kwa tanhmâ mê hkrâ ho mex to kê mê hamakêtkati nê ajamaxpêr kôt hamaxpêr râhâ ho ri akôt pa. Hâmri nhÿm mê amnhî tâ apumu nê piitâ amex o amex â ajarê.

Anhÿr o pa hte mê ato kuwÿ.

Ijaew kêt xwÿnhjê jarênh

Atre 10.34; Rômân 9.24; Karatas 3.28

⁷ Nê kwa kêr ka mê amâ axpên tâ ma ho ri apa. Te ho Kris kâm mê pahtâ mata pyrâk. Jao axpên to mex pix o apa. Kot kaj mê â axpên nhîpêx anê nhÿm mê piitâ axpên tâ mê apumu nê mê anhÿ hâ Tîrtûm mâ mex o mex â harê.

⁸ Amnepêm Tîrtûm Ijaew mâ tanhmâ Kris jarênh to. Kormâ pika hwÿr wrÿk kêt ri nhÿm hkukamâ nhÿrmâ mê hwÿr wrÿk nê mê kamâ kator â harê.

Tâ nhÿm mê hwÿr wrÿ nê mê kamâ kato. Ijaew hkanrêhâ htâmnhwÿjê kamâ kato nê mê ho mex o ri mê hkôt pa. Mê kot amnhî tâ omunh nê â hamaxpêr anhÿr kaxyw. Nê hamaxpêr o:

—Amnepêm Tîrtûm kot mê panhîgêt mâ hkukamâ harênh xâ

hkôt na mẽ ixwỳr Kraja mẽ nhũm wry nê mẽ ixto mex o ri pa. Nà ãm hãmri na pre mẽ ixwỳr kumê.

Anhỳr o hamaxpêr kaxyw. ⁹ Nê mẽ apê Ijaew kêt xwỳnhjaja mẽ ajaxwỳja mẽ ate tanhmã kot amnhĩ nhĩpêx to hã harênh mar nê Tĩrtũm mã mex o mex ã harênh kaxyw. Nê Tĩrtũm kot mẽ akamã ukapĩ hã mẽ ate amnhĩ tã omunh nê mex o mex ã harênh kaxyw na pre wry. Tĩrtũm kapêr ã kagà htũm kot tanhmã mẽ ixpê Ijaew jarênh to nê mããnênh tanhmã mẽ apê Ijaew kêt xwỳnhjê jarênh to nê mẽ pajarênh kot:

Kot paj Ijaew kêt xwỳnhjê jamak mã amã amex ã ajarênh o ri mẽ hkôt ixpa.

Nê amex ã inhgrer o ri mẽ hkôt ixpa. Anê.

¹⁰ Nê ja:

Kwa mẽ apê Ijaew kêt xwỳnh mẽ mẽ apê Ijaew. Kêr ka mẽ apiitã Tĩrtũm nhỹ hã akĩnh nê ri apa. Anê.

¹¹ Nê mããnênh ja:

E kêr ka mẽ apê Ijaew kêt xwỳnhjaja nê krĩ piitã hkôt mẽ apa xwỳnhjaja mẽ apiitã Tĩrtũm mã mex o mex ã harênh o ri apa.

Anhỳr o kot harênh. ¹² Nê Tĩrtũm nhỹ hã kapêr o pa xwỳnh finat Ijais haxwỳja Ijaew mã Jesus jarênh o:

Koja nhỹrmã Jese kanrêhã htãmnhwỳjê hõja mẽ pahwỳr kato.

Hãmri nê mẽ pahpê Ijaew mẽ Ijaew kêt xwỳnhjê ho amnhĩptàr o pa.

Jakamã nhũm mẽ amnhĩ kaxyw hkôt hamaxpêr o pa. Anê.

¹³ Nê na pa hte tanhmã mẽ ato Tĩrtũm wỳr to ho ri ixpa nê kãm:

—Pa Tĩrtũm. Kwa kêr ka Rôm nhõ xwỳnhjê ho mex kê mẽ amnhĩ kaxyw Akra hkôt hamaxpêr mex o ri pa. Jao hkôt hkĩnh nê hamakêtkati nê ri axpên to pa. Nê kê Akarõ mẽ ho mẽ hihtỳx o pa

kê mẽ amnhĩ kaxyw amã mãn hamaxpêr tỳx rãhã ho ri pa. Anê.

Pawre kot hpri hã amnhĩ jarênh Sikũn Pêtre 1.12-13

¹⁴ E Kris kôt ixkwỳjaja. Nà ra ixte mẽ ajarênh mar mex. Na ka xep htem amnhĩ to mex o ri apa. Nê mẽmoj to axpên kutã anojarêt rãhã ho ri apa. Nê mẽ kot tanhmã Tĩrtũm kapêr kôt amnhĩ nhĩpêx to xàja ka mẽ omunh mex nê ho axpên jahkre ho ri apa. ¹⁵ Tã ot pa kagà ja kamã mẽ amã ixujarênh kãm ixihỳx nê. Tĩrtũm nhỹ hã. Ra mẽ ate mẽmoj mar mex tã pa axte mẽ amã harê. Mẽ ate mar tỳx nê hã anohtỳx kaxyw. Nà ã ixte amnhĩ nhĩpêx anhỳr kaxyw na pre Tĩrtũm mẽ akaxyw ixãm. ¹⁶ Ixte Jesus Kris mã mẽ apê Ijaew kêt xwỳnhjê mã kapêr jarênh o ri mẽ akôt ixpa kaxyw. Nê mẽ ato hwỳr o ri ixpa kaxyw. Tã pa hte krĩ hkwy kamã ã mẽ akwỳjê mã harênh anhỳr o ri mẽ hkôt ixpa. Nê Jesus jarênhja pa hte mẽ hkôt mẽ kãm harênh o ri ixpa. Mẽ kot mar nê hkĩnh kãm hkôt amnhĩ nhĩpêx mex kaxyw. Hãmri nhũm Tĩrtũm Karõ mẽ kãm mẽ hamaxpêr nyw jagjê nhũm Tĩrtũm hã mẽ omu nhũm ja kãm mex nê nhũm hkĩnh nê hamaxpêr o:

—Nà ãm hãmri. Koja mẽ nhỹrmã wa ixri htũr tũm nê mex nê pa ho pa. Anê.

¹⁷ Tã na pa ixte Jesus Kris nhỹ hã Tĩrtũm mã tanhmã amnhĩ nhĩpêx to ho ixpa hã amnhĩ pumu nê ixkĩnh nê. ¹⁸⁻¹⁹ Na pa hte y hã mẽ apê Ijaew kêt xwỳnhjê mã Tĩrtũm kapêr jarênh o ri mẽ akôt ixpa. Nê mẽ anoo mã tanhmã ri Kris kot mẽ amã amnhĩ nhĩpêx to hã harê. Nê mẽ amã aa mẽ kot mẽmoj pumunh kêt kwỳ ho anhỳr o ri mẽ akôt ixpa. Tĩrtũm Karõ nhỹ hã. Nhũm hte mẽ akwỳjaja amnhĩ jaêr pê omu nê kamã no pyma nê. Hãmri nê mẽ pahpyrà nê Jesus kôt amnhĩ xunhwỳ. Nom pa hte ã amnhĩ nhĩpêx anhỳr ã amnhĩ pumu nê ri

hã amnhî to jarkrar kêt nê. Âm ixte Kris pix nhÿ hã mē kām ixkapēr ā mē kām amnhî jarēnh o ri mē hkôt ixpa. Tã pa ra Jerujarē rûm Irir wÿr krî piitã hkôt mē kām Kris kapēr jarē. Tirtûm Karō kot tanhmã ixto hihtÿx to jakamã pa mē piitã mē kām harēnh mex nê. ²⁰ Na pa hte mē hwÿr inhnojarēt nê ā ija-maxpēr anê nê ijamaxpēr o:

—Kormã mē kot Kris jarēnh mar kêt xwÿnhjê hwÿr kot paj mō. Nom ra mē kot harēnh mar xwÿnhjê nhō krî hwÿr inhmōrja inhmã prām kêt. Anê.

²¹ Tirtûm kapēr ā kagã htûm kot kapēr mar kêt xwÿnhjê jarēnh kot: Kormã mē kot Tirtûm kapēr mar kêt xwÿnhjaja koja mē kuma nê hprî hã mar tÿx nê. Anê.

Pawre kot Rôm wÿr hkrã hã amnhî jarēnh

Römân 1.8-15

²² Hêxta waa nê. Inhmã mē apumunh prām tÿx nê Rôm kām Jesus kôt ixkwÿjaja. Na pa hte xatã mē awÿr ixkrã nom kormã mē awÿr inhmōr kêt nê. Kormã ixte krî hkwÿ kamã mē kām Kris jarēnh o ri ixpa jakamã kormã mē awÿr inhmōr kêt nê. ²³ Na pa ra xatã mē awÿr ixkrã hã ixtã amgrã sohtō nê. Tã ra jar mē kām Kris kot mē panê tanhmã amnhî nhîpêx toja jarēnh pa. ²⁴ Jakamã kot paj tokyx ma mē awÿr mō. Hãmri nê mē awÿr pōj pu mē axpēn pumu nê pahkînh nê axpēn mã pakapēr o papa. Pa mē akôt ri ixpa tãmtã hamũ pyka pê Espãnhã wÿr ma mō. Nê kot paj inhnojarēt ka mē ixto Tirtûm wÿ nê inhmã ixãpkur xã hkwÿ gō pa ma mē hwÿr pry hã hkur o mō.

²⁵⁻²⁶ No na pa kormã mē awÿr inhnojarēt kêt nê. Kot paj ja rûm awjanã nê akupÿm Jerujarē hwÿr mō. Kamã Kris kôt mē pahkwÿjaja kēp amrakati nê ri pa nhûm pika pê Gres mē Masetôn kamã Kris kôt mē pahkwÿjaja mē harēnh ma nê mē kām kãxpore hkwÿ ho akuprō

nê mē kaxyw inhmã kugō. Tã kot paj ma mē hwÿr o mō nê mē kām kure nê rî kormã ma mē awÿr mō. ²⁷ Jerujarē kamã Kris kôt mē pahkwÿjaja Ijaew na mē. Mē kumrêx na prem Kris kôt amnhî xunhwÿ. Hãmri nhûm mē hkwÿjaja ma mē apê Ijaew kêt xwÿnhjê mã kapēr jarēnh o ri mē akwÿ hkôt pa. Hãmri nhûm pika pê Gres kamã mē pa xwÿnhjaja mē kapēr ma nê mē urak nê Kris kôt amnhî xunhwÿr kurê kumrêx. Jakamã amnhî xwar kām nhãm krî hō kamã Kris kôt mē pahkwÿjê ho mex prām nê. Hãmri mē kām kãxpore hkwÿ ho akuprō nê mē kaxyw inhmã kugō.

²⁸⁻²⁹ Tã kot paj ma Jerujarē hwÿr mē kām o mō nê mē kām kure hãmri nê awjanã nê rî kormã ma Rôm wÿr mē awÿr mō. Hãmri nê mē awÿr pōj pu mē axpēn pumu nê pahkînh nê. Nê axpēn mã Jesus Kris mex o mex ā harê nê kām tanhmã amnhî jarēnh to ho papa. Jao pahkînh nê papa. Tã pa hpãnhã hamũ ma Espãnhã wÿr mō.

³⁰ Nê na pu prem Jesus Kris o panhō Pahihti. Jao te mē pahpê hkôt axpēn to pahtō nê pahtōx pyrak o axpēn nhîpêx. Nê Karō nhÿ hã pamã axpēn kînh nê. Jakamã kwa Jesus kôt ixkwÿjaja. Kêr ka mē ixpê mē atō hã ixto Tirtûm wÿr kām axihtÿx nê. ³¹ Kêr pa ma pyka pê Jutej kamã Jerujarē kamã Kris kôt mē pahkwÿjê hwÿr mō nê mē kām kãxporeta gō nhûm mē omu nê Ijaew kêt xwÿnhjê kot mē kām ôr ā mē omunh tã tee ri hamaxpēr kêt nê. Âm hkînh kām mãmrî àmnhîx hamÿ nê ho amnhûm awjaprō.

Nê kêr ka mē ixto awÿ kē inhnê mē kēp mē pahkwÿ hkêt xwÿnhjê pumunh mex nê.

³² E kêr ka mē ā ixto Tirtûm wÿr anê. Kê ixte ma Jerujarē rûm ma Rôm wÿr pâr kām inhmōrta ā kê ix-pumunh mex nê. Pa inhmex pê mē kurûm ma mē awÿr mōn pōj pu mē tokyx axpēn pumu nê pahkînh nê.

Pa mẽ ate tanhmã amnhĩ nhĩpêx to ho ri apa hã mẽ apumunh o mẽ akôt ri ixpa nê ixkĩnh nê. ³³ Tã ãm ja pix. Kê Tĩrtũm mẽ akôt pa ho pa. Tãm na hte tanhmã mẽ pahto pu mẽ ỹ hã pajamakêtkati paxãmnhĩx ri pahkĩnh nê ri papa.

16

Pawre kot ahpyñhã hkrãmnhwýjê mã kapêr

¹ Ku nê mããnên ja. Ot pa mẽ awýr Kris kôt pahtõx Pepreja mẽ awýr kumê. Na hte krĩ pê Sênkrej kamã Kris kôt mẽ pahkwýjê tanhmã mẽ ho mex to ho ri mẽ hkôt pa. ² Nê mããnên pa na hte tanhmã ixto mex to. Tã kê mẽmo arĩgro hã mẽ awýr pøj ka mẽ kêp Kris kôt mẽ pahtõx ã omu nê ho mex nê tanhmã ho ajuta hto.

³ Nê kêr ka mẽ atar Kris kôt ixkrãmnhwýjê mã ijarê. Na pa hte mẽ kãm ijamaxpêr rãhã ho ri ixpa. Nê Akirti mẽ hprõ Prisireta ka mẽ wa kãm ijarê. Na pre hte wa inhĩhkô hã Jejus Kris mã tanhmã amnhĩ nhĩpêx mex to ho wa pa. ⁴ Jao wa amnhĩ grõnh kôt mẽ kãm ixkurê xwýnhjê pê ixpyta. Pa amnhĩ tã wa omu nê inhmã wa hkĩnh nê. No ãm papxipix inhmã wa hkĩnh kêt nê. Na pre Ijaew kêt xwýnh kwý pê Kris kwýjaja ixtã wa harênh ma nê haxwýja kãm wa hkĩnh nê.

⁵ Nê na hte Kris kwýjaja wa òrkwý kamã axpên wýr akuprõ. Mẽ kot Tĩrtũm mã amnhĩ jarênh nê kapêr ã kagã hkwy mar kaxyw axpên wýr akuprõ. Tã kêr ka mẽ mẽ kãm ijarê.

Nê Kris kôt mẽ pahtõ Epênre mã ijarê. Kêp ixkrãmnhwý mex na. Inhmã hkĩnh. Kumrêx na pre jar pika pê As kamã amnhĩ kaxyw Kris kôt hamaxpêr nê hkôt amnhĩ xãm.

⁶ Nê Kris kôt mẽ pahtõx Marir ka mẽ kãm ijarê. Na xep hte tanhmã mẽ ato mex to rũnh o pa.

⁷ Nê Kris kôt mẽ pahtõ ãrõhti mẽ Jũhti wa kãm ijarê. Ixpyrà nê wa

kêp Ijaew na wa. Kormã ixte Kris kôt amnhĩ xãm kêt ri na pre wa kumrêx hkôt amnhĩ xãm. Na hte Jejus nhỹ hã mẽ ahkre ho mẽ pa xwýnhjaja wa kot Kris kapêr jarênh mex ã wa harê. Tã ã amnhĩ nhĩpêx anhýrja mýrapê na pre mẽ hkwýjaja wa unê nê wa haxã pa prem ixpim-ràatã ixpê prês nê mẽ hãgênh xã kamã ixkrĩ.

⁸ Nê Kris kôt mẽ pahtõ ãpritre mã ka mẽ ijarê. Kêp Kris kôt ixkrãmnhwý mex na.

⁹ Nê Kris kôt mẽ pahtõ Upãnre mã ijarê. Na hte ixpyrà nê Kris mã tanhmã amnhĩ nhĩpêx to ho ri pa.

Nê Kris kôt mẽ pahtõ Etaki mẽ ijarê. Kêp ixkrãmnhwý mex na.

¹⁰ Nê Kris kôt mẽ pahtõ Apes ka mẽ kãm ijarê. Na prem ra Kris ã hipêx punuj nê no nhũm mẽ kutã amnhĩ to htýx nê Kris kaga hkêt nê.

Nê Aristopti nhõrkwý kamã hkwýjê mã ijarê.

¹¹ Nê Kris kôt mẽ pahtõ Erojãwti mã ijarê. Ixpyrà nê kêp Ijaew na.

Nê Nasisti nhõrkwý kamã Kris kwýjaja ka mẽ kãm ijarê.

¹² Nê Kris kôt mẽ pahtõx Xiripêre mẽ Xiripos wa kãm ijarê. Wa kêp Pahihti Jejus mã tanhmã amnhĩ nhĩpêx mex to xwýnh na wa.

Nê Kris kôt mẽ pahtõx Pesixti mã ijarê. Haxwýja kêp ixkrãmnhwý na. Na hte Pahihti Jejus mã tanhmã amnhĩ nhĩpêx mex to ho ri pa.

¹³ Nê Kris kôt mẽ pahtõ Rupti mã ijarê. Na hte Kris kôt amnhĩ nhĩpêx mex o ri pa. Nê katorxã mã ijarê. Na pre te ixpê hkra nhĩpêx pyrãk o inhĩpêx.

¹⁴ Nê Kris kôt mẽ pahtõ Asĩnre mã nê Prekõxti nê Emes nê Patopas nê Emas mẽ. Jajê piitã mẽ pahkwý kot mẽ hwýr pikuprõnh xwýnhjê mẽ mẽ ho apimràatã mẽ kãm ijarê.

¹⁵ Nê Kris kôt mẽ pahtõ Pirorti mã nê mẽ pahtõx Juure mẽ Nêrew wa nê htõxja nê mẽ pahtõ Orĩpti wa mẽ kãm ijarê. Nê mẽ pahkwý kot

mê hwÿr pikuprôn h xwÿnhjê mê
mê ho apimràâtâ mê kâm ijarê.

E kêr ka mê jajê piitâ mê kâm
ijarê. Na pa hte mê kâm ijamaxpêr
râhâ ho ri ixpa.

¹⁶ Nom mê tapxipixjaja kêt. Â mê
apiitâ mâ na pa hte ijamaxpêr râhâ
ho ixpa.

Nê ota jar Kris kwÿjaja mê awÿr
hpêr mê.

¹⁷ Kwa ixkràmnhwÿjaja. Na ka
mê ra aprî hâ Tîrtûm kapêr mar
tÿx nê. Tâ kêr ka mê amnhî nê
mê kot Tîrtûm kapêr o hêx xwÿnhjê
pumunh mex o apa. Mê kâm axpên
nê mê ato hpigrânh par prâm. Nê
mê ate Kris kaga nê hpânhâ mê kot
amnhî nhîpêx o amnhî nhîpêxja mê
kâm hprâm jakamâ kwa mê amnhî
nê mê omunh mex nê axkâm aja-
mak rom. ¹⁸ Na htem â amnhî
nhîpêx anhÿr o Pahihti Kris mâ
tanhmâ amnhî nhîpêx to ho pa
hkêt nê. Âm amnhî hkrâ hkôt
tanhmâ ri hkwÿjê jahkre hto ho pa.
Kot mê no kupyw kaxyw tanhmâ
mê kâm hêx to ho ri mê hkôt pa. Te
mê ahkre mex pyrâk tâ mê ahkre
mex kêt nê. Jakamâ nhûm htÿx ri
mê pa xwÿnhjaja mê kot mê ahkreja
ma nhûm te mê kâm mex pyrâk.
Jakamâ kwa mê okora mê amnhî
nê mê omunh mex nê. ¹⁹ Na ka
htem mê kurom Kris kôt amnhî
nhîpêx mex nê nhûm xep mê piitâ
mê apumu nê axpên mâ ja hâ mê
ajarênh o ri pa. Pa mê ajarênh ma
nê ixkînh nê. Tâ kêr ka mê arî aja-
maxpêr mex râhâ ho ri ajamaxpêr
o apa. Nê amnhî nhîpêx mex râhâ
nê. No tanhmâ ajamaxpêr punuj to
ho ri amnhî tomnuj o ri apa hkêt
nê. Â mê ate amnhî nhîpêx anhÿrja
na inhmâ hprâm.

²⁰ Nê na hte Satanasti mê
hkwÿjaja mê ate Jejus kaga hprâm
xàj mê akôt tanhmâ ri mê anhîpêx
to ho ri pa htâ kêr ka mê amnhî tâ
mê omu nê tee ri amnhî kukamâ
ajamaxpêr kêt nê. Koja gaa nhûm
Tîrtûm mê hipêx o te mê kot kagâ

xoprê hkrâ xôm nê hpîr pyrâk o mê
hipêx. Jakamâ â mê kot mê anhîpêx
anhÿr tâ koja Tîrtûm mê amâ mê
ajamakêtkati xâja gô. Tapxipix
na kot mê pajamakêtkati xâ nhôr
kaxyw âhpumunh tÿx.

Nê na pa hte mê ato Pahihti Jejus
wÿ nê kâm:

—Pa Pahihti. Kwa kêr ka Rôm
kâm akwÿjê pumu nê mê ho mex
nê mêmôj to mê kutâ anojarêt râhâ
ho ri apa. Anê.

²¹ Nê ota mê pahtô Ximotreja mê
awÿr hpêr mê. Na hte inhîhkô hâ
Kris mâ tanhmâ amnhî nhîpêx to
ho ri pa. Nê ixtô Rusti mê Jasâwti
mê Sosipa wa mê haxwÿja mê awÿr
hpêr mê.

²² Nê kot inhmâ ixkapêr â kaga
xwÿnh Testi haxwÿja mê awÿr hpêr
mê. Kêp Kris kôt mê pahtô na. ²³ Nê
Kris kôt mê pahtô Gajre haxwÿja
mê awÿr hpêr mê. Ôrkwÿ kamâ na
hte Kris kwÿjaja axpên wÿr akuprô
nê kamâ Tîrtûm mâ amnhî jarê nê
kapêr â kaga kamâ harê nê mar o
hkrî. Ôrkwÿ kamâ na pa pre pøj.

Nê mê pahtô Eras haxwÿja mê
awÿr pêr mê. Na hte jar krî ja kamâ
Rôm nhô pahihti mâ ô kâxpore
jamâr pê ho mêmôj to anhÿr o pa.

Nê Kris kôt pahtô Kwatre
haxwÿja mê awÿr hpêr mê. E jajaja
piitâ na mê awÿr hpêr rê.

²⁴ E kê Pahihti Jejus Krisja mê
akutâ nojarêt râhâ ho pa.

*Pawre kot Tîrtûm mex o mex ã
harênh*

*Epês 1.3, 3.20-21; Wam Ximotre
1.17; Eprêw 13.20; Jutre 24-25*

²⁵ Nê kwa kêr pu mê Tîrtûm mâ
mex ã harênh râhâ ho ri papa.

Nê ixte mê amâ Jejus Kris
jarênhata ã ka prem ama nê hkôt
amnhî xunhwÿ. Tâ koja mê ato
mê axihtÿx ka mê hkôt axihtÿx kâm
hkôt ri amnhî nhîpêx mex o ri apa.
Amnepêm na pre Tîrtûm mê apê
Ijaew kêt xwÿnhjê ho hkra kaxyw
hâ amnhî jarênh kêt nê. Kormâ

ja ho hpimxur ryy në. ²⁶ Tã ã mẽ anhĩpêx anhÿrja o amnhĩrĩt në ŷ hã mẽ kapêr jarênh o ri pa xwÿnhjê mã kapêr në mẽ kãm:

—E Jejus kot tanhmã amnhĩ nhĩpêx to ho pata kêr ka mẽ piitã mẽ kãm hã kagà kê mẽ pyka piitã hkôt kamã harê në kuma. Nom kê Ijaew pixjaja mar kêt në. Kê pika piitã hkôt kamã harê në kuma. Panhĩ në kupê në kupê hkà htykre në mẽ hkà haka në mẽ hkà kamrêkjaja. Kê mẽ piitã Jejus jarênh ma në amnhĩ kaxyw hkôt hamaxpêr në hkôt amnhĩ xunhwÿ. Hãmri në hkôt amnhĩ nhĩpêx mex o ri pa. Anê.

Nhũm pre ã mẽ pakaxyw mẽ kãm kapêr anê nhũm prem kuma në hã kagà.

²⁷ Nà Tĩrtũmja tapxipix na àhpumunh tÿx xwÿnh ã ãm pyxi mex. Nê tapxipix kêp mẽ pahpiitã Mêpahpãm. Tã kêr pu mẽ Jejus Kris kot mẽ panê htyk ã omunh xà hkôt Tĩrtũm pix mã mex o mex ã mãn harênh rãhã ho papa.

Tã ãm ja pix. Ixpê Pawre na pa ã mẽ awÿr ixpêr mẽnh anê. Na hapêx.

Wam Korît Pawre kot Korît kãm Jejus kôt hkwyjê hwÿr kagà nê mênh

Pawre na pre kagàja nhîpêx. Jejus nhÿ hã kapêr jarênh o pa xwÿnhjê hô na pre. Na pre hipêx nê ma krî pê Korît kãm Jejus krajê hwÿr kumê. Nê kagàja kamã mê kãm tanhmã mêmoy tâ karô hto. Na pre mê kot àhpumunh tÿx ã amnhî to jarkrar o pa nê mê kãm kapêr. Nê tanhmã amnhî tomnuj to nê mê kãm kapêr. Nê mê hprô nê mê mjên xwÿnhjaja tanhmã wa kot axpên nhîpêx to hã mê kãm karô. Nê mê kot Tirtûm mã mex o mex ã harênh kaxyw axpên wÿr mê pikuprônh nê tanhmã amnhî nhîpêx to hã nhûm mê kãm karô. Æ na pre Pawre mê kãm mêmoy tâ karô nê hã kagà anê. Nê mê kãm:

¹ Pa Korît kãm Jejus kôt ixkwÿjaja. Xà mê amex? Ot pa mê awÿr kagàja nhîpêx nê kumê. Ixpê Pawre na pa Kris kôt mê pahto Sostenes mê wa awÿr ixpêr mê. Tã kagàja nhîpêx nê mê awÿr kumê. Tirtûm na pre ixte Jejus Kris nhÿ hã mê ajahkre ho ri ixpa kaxyw ixãm. ² Tã ot pa mê awÿr kagà nhîpêx nê mênh mã. Korît kãm ixpyrà nê mê apê Tirtûm krajê hwÿr.

Tirtûm kot amnhî kaxyw mê axunhwÿr jakamã na ka prem amnhî tomnuj kaga nê Kris kôt amnhî xunhwÿ nê hkôt amnhî nhîpêx mex o ri apa. Krî piitã hkôt mê kot amnhî to Jejus Kris wÿr o mê pa xwÿnhjê pyrà nê. Mê panhõ Pahihti Jejus Krisja ãm pixi mex na.

³ Nê Tirtûm kêp Mêpahpãm maati nê Jejus Kris kêp mê panhõ Pahihti jakamã na pa hte mê ato wa hwÿr rãhã o ri ixpa nê mê ato wa hwÿr o:

—Kwa Tirtûm mê Jejus wa. Kêr ka wa Korît nhõ xwÿnhjê kutã anojarêt rãhã ho wa ri apa. Nê mê ho mex rãhã nê. Kê mê amnhî tâ war apumunh kôt ri hamakêtkati nê hkînh nê àmnhîx tanhmã ri amnhî nhîpêx to ho ri pa. Anê.

Tirtûm kot Jejus Kris kukwak ri mê pahto mex ã harênh

Sikûn Pêtre 1.2; Wam Tesarôn 5.23-24

⁴ Nê mê ate amnhî kaxyw Jejus Kris kôt ajamaxpêr o ri apa jakamã na hte Tirtûm mê ato mex nê. Tã pa hte kãm amnhî jarênh kaxyw nê kãm mê ajarênh o:

—Pa Tirtûm. Æm hãmri na ka pre Korît nhõ xwÿnh kwÿjê ho akra. Nã ja mex o mex. Anê.

⁵ Nê ra mê ate Kris kôt amnhî xunhwÿr jakamã na ka mê ra amex kumrêx nê ri apa. Nê aprî hã Kris kot amnhî nhîpêx pumunh mex nê aprî hã akwÿjê mã harênh o ri mê hkôt apa. ⁶ Na pa pre mê awÿr mô nê mê amã Kris kot amnhî nhîpêx ã harênh o ri mê akôt ixpa. Ka prem inhma nê hkôt amnhî xunhwÿr tÿx kurê kumrêx. ⁷ Jakamã nhûm Tirtûm mê ate kãm tanhmã amnhî nhîpêx to ho apa kaxyw mê ato mê axihtÿx. Nê kaxyw mê amã mê ate axpên to mex xà piitã mê amã kugô. Mê ate Jejus kot akupÿn mê pahwÿr wrÿk jamãr pê hapêr arît o apa pê tanhmã kãm axpên nhîpêx to ho apa kaxyw. ⁸ Koja Tirtûm tanhmã mê akrà hto ka mê hkôt pix mã ri amnhî nhîpêx rãhã nhûm Pahihti Jejus Krisja akupÿn mê pahwÿr wrÿ. Hãmri nê mê ate amnhî nhîpêx ã mê apumu nê mê ajarênh o:

—Nã ãm hãmri na hte jajaja amnhî to mex pix o ri pa. Anê.

⁹ Nê koja Tirtûm ra kot amnhî jarênh xà hkôt mê ato mex nê. Ra kot mê ate Pahihti Jejus Kris kôt apa kaxyw amnhîm mê axunhwÿr jakamã koja ra kot amnhî jarênh xà hkôt mê ato mex rãhã nê.

Mê pahte mëmoj tâ axpên pê pah-pigrânh kêt ã më pamã karõ

Rômân 15.5-6; Sikûn Korîit 13.11; Epes 4.1-6; Piriapos 2.1-4; Wam Pêtre 3.8

¹⁰⁻¹¹ E Kris kôt ixkwýjaja. Na ka xep htem mëmoj tâ axpên mã axàkjêr pix o ri apa nhùm pre Krojre hkwýjaja amnê ixwýr pøj nê inhmã më ajarê. Kwa nã më ã amnhî nhîpêx anhýr kêt nê. Kêr ka më axpên kôt ri amnhî nhîpêx rãhã ho ri apa. Nê axpên kôt ri ajamaxpêr rãhã nê. Te ixkre tipxi kamã më ri apa pyrãk o mãn kêt më axpên nhîpêx o ri axpên kôt apa. Nê më axpên kutã anojarêt rãhã ho ri apa. No mëmoj tâ axpên mã axàkjêr pê axpên pê apigrânh kêt nê. Na pa Pahihti Jejus Kris nhý hã më amã ã ja hã karõ anê.

¹² Nê na ka xep htem ahpýnhã ri më apê më ixkwý hã amnhî jarênh o ri apa. Jao më akwýjaja pa ixkôt ri amnhî nhîpêx xwýnh ã amnhî jarê. Nê më akwýjaja axtem Apor kôt ri amnhî nhîpêx xwýnh ã amnhî jarê. Nê më akwýjaja axtem Simãw Pêtre hkôt amnhî nhîpêx xwýnh ã amnhî jarê. Nê më akwýjaja axtem Kris kôt amnhî nhîpêx o ri apa xwýnh ã amnhî jarê. Æ na ka xep htem ahpýnhã amnhî jarênh anhýr o ri pa.

¹³ Kwa nã ka më ã ahpýnhã amnhî jarênh anê nê te më ate Kris o apigrânh pyrãk o hipêx. Kwa mon ka hte më akwýjaja apê ixkwý hã amnhî jarê? Xã pa na pa pre pî kahpa hã ajêt nê më anê ty? Nã Kris pix na pre më panê hã ajêt nê ty. Xã më apê pa ixkwý hã amnhî jarênh kaxyw na prem më akrã kumrã? Nã më apê Kris kwý hã amnhî jarênh kaxyw na prem ã më anhîpêx anê. Mê kot ja hã më apumunh xwýnhjaja kot më apê Kris kwý hã më apumunh kaxyw. Tã na ka xep htem axtem nê ã ri ahpýnhã më kãm amnhî jarênh anhýr o ri apa.

¹⁴⁻¹⁵ Kop ãm ixte amnhî kôt më axunhwýr prãm ronhýx pa më ato më axohtõ nê më akrã kumrã nê më amã: “E ra më apê ixkwý na ka më.” Anê. Nom na pa pre ã më amã ixkapêr anhýr kêt nê. Æm hãmri na pa pre ãm më ato grêre nê më akrã kumrã. Æm Kripti më Gajre wa pix. ¹⁶ Ku nê xep mãânên Estepti nê kaxyw më hkwýjaja. Æm jajê pixjaja. Nom ko apu axte më hkwý ko. Ixte më hkrã kumrãr xwýnhjê mã ijamaxpêr týx kêt. ¹⁷ Na pre Kris ixte më hkrã kumrãr o ri ixpa kaxyw ixãm kêt nê. Æm ixte më kãm kapêr jarênh o ri më hkôt ixpa pix kaxyw na pre ixãm.

Nê na pa hte amnhî krã hkôt ri ixujarênh o ri më akôt ixpa hkêt nê. Kot pa ã amnhî nhîpêx anê nhùm më ixkapêr mex ã inhma nê pa ixkôt amnhî xunhwý. Ja pymaj na pa hte amnhî krã hkôt ri tanhmã ixujarênh to ho ri ixpa hkêt nê. Na pa hte ãm ixprî hã Kris kot tanhmã më panê amnhî nhîpêx to hã harênh o ri më hkôt ixpa. Mê pahpiitã më panê htyk ã harênhja pa hte më kãm harê. Mê kot hprî hã mar nê hkôt amnhî xunhwýr kaxyw. Jao amnhî krãm më ujarênh mexta jagjênh nê hã no htýx kaxyw. Pa ja hã më omu nê ixkînh nê ijamaxpêr o:

—Na htem ixkapêr ma nê Jejus kôt amnhî xunhwýr kurê kumrêx. Nã ãm hãmri na pa hte më kãm ixkapêr kaprý ho ri ixpa hkêt nê. Anê.

¹⁸ No kêt më pahte Tirtüm kot më pahto hkra xwýnhjaja ra më pahte Kris pî kahpa hã më panê htyk ã harênh mar nê pahkînh nê papa xwýnh na pu më. Jakamã na pu htem pajamaxpêr o:

—Nã ãm hãmri na Tirtüm Kraja htyk kukwak ri më ixto mex nê më ixto hkra. Mê ujarênhja mex kumrêx. Anê.

No kêt mẽ kêp hkra hkêt xwỳnhjaja na htem tee ri Kris tyk ã harênh ma nê hamaxpêr o:

—Tk. Tanhmã kot kêt we amnhĩ to nê mẽ panê ty? ãm amari mẽ kot amnhĩ krã hkôt pĩ kahpa hã nhôr nê hpĩr kênã. Anê.

Tĩrtũm kra hkêt xwỳnhjê jarênh

Matêwre 11.25-26; Wam Korĩt 3.19

¹⁹ Nê Tĩrtũm kapêr ã kagã htũm kot mẽ kêp hkra hkêt xwỳnhjê jarênh kot:

Mẽ kot htỳx ri àhpumunh tỳx ã amnhĩ to jarkrar o pa htã kot paj mẽ kêp ja ho ijpêx pa nhũm mẽ ã amnhĩ jarênh anhỹr kaprỳ. Anê.

²⁰ Jakamã mẽ àhpumunh tỳx ã mẽ kot amnhĩ to jarkrar xwỳnhjaja nê mẽ kot Mojes kapêr o mẽ ahkre ho ri mẽ pa xwỳnhjaja nê mẽ kapêr rũnh xwỳnhjaja. Mẽ kot Tĩrtũm Kra hkôt amnhĩ xunhwỳr kêt jakamã te mẽ àhpumunh kêt pyrãk. Tĩrtũm kra hkêt xwỳnhjaja kot mẽ àhpumunh tỳx ã mẽ harênh tã no ãm Tĩrtũm noo mã te mẽ àhpumunh kêt pyrãk. Nê te htỳx ri mẽ kot amnhĩ nhĩpêx o pa pyrãk. ²¹ Tĩrtũm àhpumunh o àhpumunh jakamã na pre ra mẽ hkukamã hamaxpêr o:

—Nà kot paj mẽ àhpumunh tỳx ã mẽ omunh xà hkôt mẽ ho ixkra hkêt nê. ãm mẽ kot ixkra Jejus kot mẽ nê htyk ã harênh mar nê amnhĩ kaxyw hkôt hamaxpêr pix ã mẽ omunh xà hkôt kot paj mẽ ho ixkra. Anê.

²²⁻²⁴ No Ijaewjaja kãm amnhĩ krã hkôt pix mã amnhĩ nhĩpêx prãm jakamã na pa hte mẽ ixpê Jejus kwỳjaja mẽ hwỳr mra nê mẽ kãm Kris kapêr jarênh o ri ixpa nhũm mẽ inhma nê ãm mẽ inhma. Nê te mẽ kot mẽ inhmar kêt pyrã nê mẽ inhmã:

—Tk. Nà kot paj mẽ tokyx axujarênh kôt amnhĩ nhĩpêx kêt nê. Kot kaj mẽ inhmã mẽ ixte aa mẽmoj pumunh kêt õ ho anê pa mẽ ja hã

apumu nê axihtỳx ã apumu nê rĩ kormã hkôt amnhĩ nhĩpêx.

Anhỹr o inhmã kapêr. Tã no pa mẽ kãm ã amnhĩ nhĩpêx anhỹr kêt nê. ãm Kris kot mẽ panê pĩ kahpa hã htykja pix pa htem mẽ kãm harênh o ri ixpa. Ja kamã nhũm mẽ hkwỳjaja mẽ inhma nê ãm mẽ inhma nê Kris xihtỳx kêt ã ãm amari htyk ã harê. No mẽ hkwỳjaja. Tĩrtũm kot amnhĩ kaxyw mẽ unhwỳr xwỳnhjaja na htem mẽ kurom mẽ inhma nê ra mẽ inhmar tỳx kurê kumrêx. Nê mẽ inhmã kapêr o:

—Nà ãm hãmri na Krisja Tĩrtũm pyrã nê hihtỳx o hihtỳx. ãm hãmri na ka ã harênh anê. Anê.

No Ijaew kêt xwỳnhjaja na Ijaew pyrã nê kãm amnhĩ krã hkôt amnhĩ nhĩpêx o pa hprãm kêt nê. Nê mẽ kãm mẽ àhpumunh tỳx pix prãm o pa. Jakamã na pa htem mẽ kãm Kris kapêr jarênh o ri mẽ hkôt ixpa nhũm mẽ hkwỳjaja mẽ inhma nê Ijaew kwỳjê pyrã nê ãm mẽ inhma nê mẽ inhmã:

—Tk. Nà na ka htem ãm ri axêx o ri apa. Kot pa mẽ akapêr mar kêt nê. Kot paj mẽ axàhpumunh tỳx ã mẽ apumu nê rĩ kormã mẽ ama nê mẽ akôt amnhĩ nhĩpêx.

Anhỹr tã pa mẽ ãm arĩ Kris kot mẽ panê htykja pix pa mẽ kãm harênh o ri mẽ hkôt ixpa. Nhũm mẽ hkwỳjaja mẽ inhma nê mẽ inhmã:

—Nà mẽ axàhpumunh kêt jakamã na ka htem atỳx ri ã ja jarênh anê.

Anhỹr tã no nhũm mẽ hkwỳjaja. Tĩrtũm kot amnhĩ kaxyw mẽ unhwỳr xwỳnhjaja na htem mẽ inhma nê mẽ inhmã kapêr o:

—Nà ãm hãmri na ka mẽ ã Krisja jarênh anê. Tĩrtũm pyrã nê àhpumunh o àhpumunh kênã. Anê.

²⁵ Tĩrtũm mẽ Jejus wa mẽ pakurom àhpumunh o àhpumunh nê hihtỳx o hihtỳx.

*Tîrtûm mē parom hihtýx o hihtýx
ã harēnh*

Matēwre 11.25; Sikûn Korîit 12.7-10; Xiakre 2.5

²⁶ E Kris kôt ixtō nē ixtōxjaja. Amnepê mã Tîrtûm kot amnhîm mē axunhwýrta ã tanhmã na ka prem amnhî nhîpêx to ho ri apa? Nã na ka prem axohtô nē jar mē noo mã axâhpumunh kêt nē ri apa. Nē mē apê pahi hkêt nē ri apa. Mē axohtô nē amnhî to hkryre nē ri apa. ²⁷ Tã nhûm Tîrtûm amnhî kôt mē ate amnhî to hkryre xwýnhjê xunhwý. Koja nhýrmã kot tanhmã mē pahpiitã mē pajarēnh to xã hã arîgrota kato hãmri nhûm mē âhpumunh týx ã amnhî to jarkrar xwýnhjaja Tîrtûm kot mē kurom mē pahto hkra hã mē pahpumu hãmri nē tee ri amnhî kukamã hamaxpêr nē amnhî kamã hpijaam týx nē. Nē mē hihtýx ã amnhî to jarkrar xwýnhjaja haxwýja. Nhûm Tîrtûm kot mē kurom mē pahto hkra hã mē pahpumu nē tee ri amnhî kukamã hamaxpêr nē amnhî kamã hpijaam týx nē.

²⁸ Na hte Tîrtûm amnhî kaxyw mē kot amnhî to hkryre xwýnhjê xunhwý. Nē mē kot mē kamã kahak o pa xwýnhjê xunhwý. Jar pyka ja kamã mē hkwy kot mē hkaga htã nhûm Tîrtûm amnhî mã mē unhwý. Mēmo kaxyw na hte ã amnhîm mē unhwýr anê? Nã mē kot nhýrmã tee ri mē âhpumunh týx ã amnhî jarēnh xwýnhjê pumunh nē axpēn mã mē harēnh o:

—Kwa mē pahte mē âhpumunh týx ã mē harēnh tã nhûm Tîrtûm mē pahpyrà nē amnhî kaxyw mē unhwýr kêt nē. Nã te mē âhpumunh kêt pyràk.

Anhýr o axpēn mã mē harēnh kaxyw na pre Tîrtûm amnhîm mē kot amnhî to hkryre xwýnhjê xunhwý. ²⁹ Jakamã kot puj mē nhýrmã Tîrtûm mã amnhî to jarkrar pē tanhmã kãm amnhî jarēnh to hkêt nē. Rý kãm:

—Kwa ga ixpumu Tîrtûm. Na pa hte ã amnhî nhîpêx anê nē ã amnhî nhîpêx anê. Kwa ja hã ixpumu nē ixtō akra nã?

Anhýr o amnhî to hwýr kêt nē. ³⁰ Æm Jejus pix kukwak ri na hte Tîrtûm mē pahto hkra. Tãm na pre Tîrtûm noo mã amnhîm mē paxunhwý. Mē pahte uràk nē pahpê hkra kaxyw. Jakamã na pu htem ãm pix kukwak ri amnhî nhîpêx mex o ri papa. Nhûm mē pamã âhpumunh týx xã hkwy gõ. Tã ra kot mē pahte amnhî tomnuj pē mē papytãr jakamã kot puj mē nhýrmã pahtyk tã no ãm akupým pahfür nē Tîrtûm mē wa kuri pahfür tûm nē pamex kumrêx nē papa ho papa. ³¹ Tã ã Jejus kot mē panhîpêx kot anhýr jakamã Tîrtûm kapêr ã kagã htûm kot ja jarēnh kot:

Kot ka mē amã mēmoj tã jarkrar prãm nom kêr ka mē kamjaja amnhî to jarkrar kêt nē. Mē panhõ Pahihti ra kot mē panê tanhmã amnhî nhîpêx toja pix ã tanhmã ho jarkrar to ho ri apa. Anê.

2

*Pawre kot tanhmã Kris jarēnh to
hã harēnh*

Sikûn Korîit 4.1-7; Wam Pêtre 3.15

¹⁻² E Kris kôt ixtō nē ixtōxjaja. Amnepê mã ixte mē awýr inhmôrta ã na pa pre inhnojarêr nē ijamaxpêr o:

—Kot paj ma mē hwýr mō nē mē kãm Kris kapêr jarê. Kot amnhî grõnh kôt mē inhnê htykja pa mē kãm harê. Æm ja pix jarēnh o ri mē hkôt ixpa. Nom kot paj mē kapêr japjê xwýnhjê pyrà nē mē kãm ixkapêr japjê hkêt nē. Rý mē uràk nē te ixâhpumunh týx o ri ixkapêr japjê pyràk o ri mē kãm ixkapêr japjê hkêt nē. Kot paj ãm ixkatãt kôt ri mē kãm tanhmã Jejus jarēnh to pix o ri mē hkôt ixpa.

Anhýr o mē akukamã ijamaxpêr. Hãmri nē ma mē awýr mō nē mē

awÿr pøj në mẽ amã Jejus kot mẽ panê htyk në akupÿm htĩrja pix jarênh rãhã ho ri ixpa. ³ Na pa pre tee ri amnhĩ kukamã ijamaxpêr në ijamaxpêr o:

—Hêxta waa në. Tanhmã kot pa we mẽ kãm Tĩrtũm kapêr jarênh to nhũm mẽ inhmar tÿx në hkôt amnhĩ xunhwÿr kurê kumrêx wehe? Kot paj amnhĩ krã hkôt mẽ kãm harênh kêt në. Ja kaxyw ijamaxpêr tÿx kêt kênã. Kot paj amnhĩ krã hkôt mẽ kãm harê nhũm mẽ ãm inhma në hkôt amnhĩ xunhwÿr kêt në. Nã kot paj Tĩrtũm nhÿ hã mẽ kãm tanhmã ixkapêr to kê tãm tanhmã mẽ hkrã hto kê mẽ inhma në hkôt amnhĩ xunhwÿr japêr.

Anhÿr o ijamaxpêr. ⁴ Nê mẽ ate inhmar kaxyw na pa pre ixêx rom tanhmã mẽ ano kupyr to ho ri ixpa hkêt në. Rÿ mẽ pajaja mẽ ixãhpumunh xã hkôt tanhmã mẽ amã ixkapêr to hkêt në. Na pa pre ãm Tĩrtũm Karõ nhÿ hã mẽ amã awjarê. Mẽ ate mar në hihtÿx o hihtÿx ã omunh kaxyw. ⁵ Jakamã na ka prem Tĩrtũm xihtÿx ã omu në amnhĩ kaxyw hkôt ajamaxpêr kurê kumrêx. No pa ixãhpumunh tÿx ã ixpumunh kôt ixkôt ajamaxpêr kêt në. Na ka prem ixkapêr ma në ajamaxpêr o:

—Nã Tĩrtũm na mẽ parom ãhpumunh o ãhpumunh në hihtÿx o hihtÿx.

Anhÿr o ajamaxpêr kôt ajamaxpêr kurê kumrêx.

Tĩrtũm Karõ kot mẽ pamã ãhpumunh xã nhõr ã harênh

Matêwre 7.6; Juãw 14.22, 16.13-15; Xiakre 3.13-18

⁶ Nê na hte Tĩrtũm kra hkwyjaja Tĩrtũm kot amnhĩ nhĩpêx ã omunh mex. Nê hamaxpêr ã omunh mex. Jakamã na pa hte mẽ ahkre japjê ho mẽ hkôt ixpa. Nom jar pika ja kamã mẽ pajamaxpêr tÿx xã ho mẽ ahkre hkêt në. Rÿ pika piitã hkôt

mẽ utar xwÿnhjê jamaxpêr tÿx xã ho ri mẽ ahkre ho ri ixpa hkêt në. Kojã nhÿrmã mẽ ãhpumunh xãja mẽ kêp hapêx pa. ⁷ Jakamã na pa hte ãm Tĩrtũm xãhpumunh xã pix o mẽ ahkre o ri ixpa.

Amnepê mã kormã mẽmoj piitã hkêt ri na pre Tĩrtũm amnhĩ kukamã amnhĩ jarênh o:

—Mẽ kot amnhĩ kaxyw Ixkra hkôt mẽ hamaxpêr o mẽ pa xwÿnhjaja kot paj mẽ ho ixkra nhũm mẽ mex kumrêx në pa ho pa.

Anhÿr o mẽ harê. Nom mẽ kot hkôt amnhĩ xunhwÿr kêt xwÿnhjaja nhũm kormã mẽ kãm ja ho amnhĩrit kêt në. Tã ja na pa hte ra mẽ kãm harênh rãhã ho ri mẽ hkôt ixpa nhũm mẽ Tĩrtũm kãm mẽ pahto hkra hprãm hã harênh ma. ⁸ Nom pika piitã hkôt mẽ ho amnhĩptar xwÿnhjaja na mẽ kormã ja mar kêt në. Kêp apu mẽ kot mar ronhÿx prem pĩ kahpa hã mẽ panhõ Pahihti nhõr në hpĩr kêt në. Mex o mex tã nhũm prem axtem në ã hipêx anê. ⁹ Mẽ kot mẽmoj mex pumunh kêt tã Tĩrtũm kapêr ã kagã htũm kot mẽmoj mex jarênh kot:

Na pre Tĩrtũm mẽ kãm hkĩnh xwÿnhjê kutêp mẽmoj mex kwÿ jaxwÿ nhũm mex o mex në mẽ ahã hikwÿ.

Aa mēhõ kot mẽmoj mex o mexja pumunh kêt.

Nê aa mēhõ kot ã mẽmoj kot anhÿr pumunh kêt.

Nê aa ã mẽmoj mex kot anhÿr kukamã hamaxpêr kêt.

Tã nhũm Tĩrtũm mẽ kutêp hkwy jaxwÿ.

Anhÿr o kot harênh tã no nhũm mẽ kot hkôt amnhĩ xunhwÿr kêt xwÿnhjaja ã kapêr anhÿrja mar kêt në. ¹⁰ Mẽ pamã na pre Tĩrtũm ja ho amnhĩrit. Na pre ra mẽ pamã Karõ gõ nhũm mẽ pamã gjêx o mẽ pamã mẽmoj to amnhĩrit mex në. Tĩrtũm Karõja ãhpumunh tÿx o ãhpumunh

tÿx. Nê kot hprî hã Tîrtûm jamaxpêr pumunh par. ¹¹ No mê papajaja na pu htem axpên jamaxpêr kôt axpên pumunh kêt nê. Na pu htem papam amnhî jamaxpêr ã amnhî pumu. Ja pyrã nê Tîrtûm Karô pix na hte Tîrtûm jamaxpêr pumunh. ¹² No mê pahpê hkra-jaja na hte mê pahkarôja pix mê pakamã pa hkêt nê. Na hte mâânên Tîrtûm Karôja mê pakamã pa nê mê pamã tanhmã mëmoj to amnhîrit to ho mê pahkôt pa. Nê Tîrtûm kot mê pakutêp mëmoj mex jaxwÿrja nhûm ja kukamã mê pamã harênh o amnhîrit.

¹³ Jakamã na pa htem amnhî krã hkôt ri mê kãm ixujarênh kêt nê. ãm Tîrtûm Karô nhÿ hã na pa hte ixprî hã mê kãm kapêr jarênh o ri mê hkôt ixpa. Ra Tîrtûm Karô kot mê amã gjêx xwÿnhjê mã pa ŷ hã ixkapêr. ¹⁴ No mê kãm Tîrtûm Karô kapêr mar prãm kêt xwÿnhjaja na htem Tîrtûm kot amnhî nhîpêx pumu nê hprî hã omunh kêt nê. Mê kãm kapêr mar prãm kêt jakamã na htem ri kot tanhmã mê pahto mex to hã harênh ma nê hamaxpêr o:

—Tk. Kwa mo kaxyw na htem ri ã Tîrtûm jarênh anê? Tanhmã kot we amnhî to nê mê pahto mex? Nã kot anhÿr kêt. Anê.

¹⁵ Nom mê pahpê Tîrtûm kra hkwy hã mê pahte Karô kapêr mar mex xwÿnhjaja na pu hte mê kurom Tîrtûm kot amnhî nhîpêx ã omunh mex nê. Nê Karô xô ri mar mex nê nhûm mê kot Karô kapêr mar kêt xwÿnhjaja tee ri ã mê pahte amnhî nhîpêx anhÿr ã mê pahpumu. Nom hprî hã mê pahte Tîrtûm kôt amnhî nhîpêx pumunh kêt nê. ¹⁶ Tîrtûm kapêr ã kagã htûm kot ja jarênh kot: Mêhõ na kot Tîrtûm jamaxpêr pumunh?

Nê mêhõ na pre we kãm hamaxpêr gõ?

Nã amrakati kumrêx. Tapxipix na àhpumunh tÿx o àhpumunh

tÿx. Anê.

Tã mê papajaja mê pahte Tîrtûm Karô kapêr mar tÿx xwÿnhjaja na pu htem Kris xô ri pahprî hã hamaxpêr kôt omunh mex nê.

3

Mê kot Tîrtûm mã tanhmã amnhî nhîpêx to xwÿnhjê jarênh

Wam Korîit 14.20; Karatas 5.16-21; Epes 4.14; Eprêw 5.11

¹ E Kris kôt ixtõ nê ixtõxjaja. Pa mê amã mëmoj jarê ka mê inhma nê kãm ajamaxpêr. Nã amnepê mã kormã mê ate Kris kôt amnhî nhîpêx tohtuj anhÿrta ã tanhmã na ka prem amnhî nhîpêx to ho ri apa wehe? Na ka prem arî ajamaxpêr tûm kôt pix mã amnhî nhîpêx. Kormã mê ate Tîrtûm Karô hkôt amnhî nhîpêx mex kêt jakamã na ka pre htem mëhprîre kot amnhî nhîpêx pyrãk o amnhî nhîpêx. Nê mê urãk nê kormã mëmoj piitã omunh kêt nê. Jakamã na pa pre mê amã ixujarênh kaxyw nê te mê ate kormã Tîrtûm kapêr mar kêt xwÿnhjê pyrãk o mê anhîpêx nê mê amã tanhmã ixujarênh to. ² Mê hkarare na htem mê hkã kagô pix kaõ nê kormã mê apkur xà mex kur kêt nê. Ja pyrã nê na pa pre te ixte mê ato hpîjaõr pyrã nê mê amã Tîrtûm kapêr piitã harênh par kurê kumrêx kêt nê. ãm mê amã hkwy pix jarê ka pre amã nê Jejus kôt amnhî xunhwÿ. Tã na pa hte arî mê amã hkwy pix jarênh o ri ixpa nê kormã piitã ho mê ajahkre jatur xàm mênh kêt nê. ³ Na ka htem arî te mê apê Kris kwÿ hkêt pyrãk o amnhî nhîpêx o apa. Nê mëmoj kôt axpên kãm agryk axpên mã axãkjêr o apa. ã amnhî nhîpêx anhÿr jao arî mê ate amnhî nhîpêx tûm kôt amnhî nhîpêx rãhã nê.

⁴ Na hte mê akwÿjjaja amnhî jarênh o: “Ixpê Pawre hkwy na pa.” Anê. Nê mê akwÿjjaja amnhî jarênh o: “Pa na ixpê Apor kwÿ na

pa.” Anē. Kwa na ka htem ā amnhī jarēnh anhūr o te mē apē Kris kwý hkēt pyrāk. ⁵ Apor mē pa ām wa ixte Tirtūm kapēr o mē ajahkre xwýnh pix na pa wa. Wa ixpē mē anhō pahihiti hkēt kēnā kot ka kēt mē axtem nē mē apē ahpýnhā wa ixkwý hā amnhī jarē. Na pa pre wa mē amā Tirtūm kapēr jarēnh o ri mē akôt ixpa ka prem wa inhma nē amnhī kaxyw hkôt ajamaxpēr tỳx nē. Nē hkôt amnhī xunhwý nom wa pa wa ixkôt amnhī xunhwýr kēt nē. Na pa wa ām Tirtūm kapēr o mē ajahkre nom amnhī kôt mē axunhwýr kēt nē.

⁶⁻⁹ E pa ixprī hā mē amā war amnhī jarē ka mē inhma. Te wa ixpē Tirtūm pur kām wa ixápēnh xwýnh pyrāk no mē kajaja te mē apē hpur pyrāk. Na htem hpur karē nhūm hirā nhūm mē kamā ahkre ho pa. Ja pyrā nē na pa pre ixkumrēx mē awýr ixpa nē mē amā Tirtūm kapēr jarēnh o ri mē akôt ixpa. Te mē kot pur kām ahkre ho ri pata pyrāk. Tā nhūm Apor ixpānhā ma mē awýr pa nē te mē kot pur karēta pyrāk o mē anhīpēx nē mē amā Tirtūm kapēr o mē ajahkre mex o ri pa. Xà na hte pur karēr xwýnhja rý kamā ahkre xwýnhja tām tanhmā mēmo hy hto nhūm ra higrôt nē hprēk nē ô? Nà na htem ām ahkre hpa nhūm arī hikwý. Nhūm Tirtūm tām tanhmā hyta to nhūm higrôt nē hprēk nē ô. Ja pyrā nē na hte Tirtūm mē ho hkra nē tanhmā mē ho nhūm mē amnhī kaxyw hkôt hamaxpēr tỳx nē hkôt amnhī nhīpēx mex o pa. Nom mē kām harēnh o pa xwýnhnta kôt amnhī xunhwýr kēt nē.

Nē na hte pur karēr xwýnh rý kamā ahkre xwýnhja tām tanhmā hyta to nē ho htír kēt nē. Tirtūm pix na hte tanhmā ho nhūm higrôt. Ja pyrā nē na pa hte Tirtūm kapēr o mē ajahkre o ri mē akôt ixpa nom pa tanhmā mē ato ka mē apē Tirtūm kra nē ri apa hkēt nē.

Tanhmā kot pa mē ato ka mē apē hkra? Tapxipix na kot mē pahto hkra kaxyw āhpumunh. Nē tapxipix na hte tanhmā mē pahkrā hto pu mē kām hprām xà hkôt amnhī nhīpēx mex o ri papa.

Nē pur karēr xwýnh mē pur kām ahkre xwýnhja wa. Hamē wa ápēnh mex jakamā koja hamē wa kot pur kām ápēnh pānhā amnhīm ujamýnh rax nē. Ja pyrā nē kot paj mē ixte Tirtūm kapēr o mē ajahkre ho ri mē akôt ixpa xwýnhjaja nhūm Tirtūm nhýrmā mē ixápēnh pānhā mē inhmā amnhīrer mex nē.

Nē te mē ate Tirtūm nhō ixkre pyrāk. ¹⁰ Nē pa te ixpē Tirtūm mā ixkre hā ixápēnh xwýnh pyrāk jakamā na pre Tirtūm mē akaxyw tanhmā ixto pa mē amā tanhmā kot amnhī nhīpēx to hā harēnh o ri mē akôt ixpa. Te ixte ô ixkre kaxyw ām xà maati xām pyrāk o mē anhīpēx. Jao mē amā kapēr jarēnh o ri mē akôt ixpa. Mē ate amnhī kaxyw hkôt ajamaxpēr nē hkôt amnhī xunhwýr kaxyw. Tā na ka prem hkôt amnhī xunhwý nhūm ixpānhā Tirtūm kapēr o mē ahkre ho mē pa xwýnh kwýjaja mē awýr mra nē mē amā kapēr jarēnh jatur xām kurē. Nē hprī hā ho mē ajahkre ho ri mē akôt pa. Te ho mē kot ixkre krax nhīpēx pyrāk o mē anhīpēx.

Nē kwa mē ate mē ahkre o mē apa xwýnhjaja kēr ka mē akatāt kôt mē ahkre mex rāhā ho ri mē hkôt apa.

¹¹ Nē Jejus Kris tapxipix na pu htem hkôt amnhī xunhwý nhūm mē panē mē pahte amnhī tomnuj o hapēx. Jakamā te kēp kýxpē ixkre nhīmōk ā nōr xà maatita pyrāk.

¹² Nē na htem tōhā ixkre nhīpēx kaxyw nē pī htỳx jakā nē ho hipēx nhūm kritpēm mē kām mex ry nē kuhē. No na htem tōhā nojarēt kām ixkre hā apē nē pī rerek o hipēx nhūm mē kām mex ry hkēt nē. Koja rôr nhyre hwýr mra nē mē kēp

hapôk nê homnu. Ja pyrâ nê na hte Tîrtûm kapêr o mê ahkre ho ri mê pa xwýnh kwýjaja te mê kot katât kôt pî htýx o ixkre nhîpêxta pyrâ nê katât kôt mê ahkre ho ri mê hkôt pa. No nhûm mê hkwýjaja axtem nê te mê kot pî rerek o ixkre nhîpêxta pyrâk o amnhî nhîpêx nê htýx ri Tîrtûm kapêr kwým ri tanhmâ mê ahkre hto ho pa. Jao hkwým ri amnhî nhîpêx râhâ ho ri pa.

¹³ Nê koja mêhõ pî htýx pix o amnhîm ôrkwý nhîpêx hâMRI nhûm mêmo arîgro hâ tanhmâ amnhî to nê kêp pôr. No âm hâ pôja pix xêt pa nhûm kâm hikwý xâ nê ôkwa êja arî piitâ mex nhûm ixkre hpâm axte hâ pô janhôr o nyw. No koja pî rerek o hipêx nhûm mêmo arîgro hâ kêp pôr hâMRI nê piitâ kêp kaxâr pa. Ja pyrâ nê koja nhýrmâ Krisja akupýn mê pahwýr wry hâMRI nê mê pahte kâm tanhmâ amnhî nhîpêx to ho papaja piitâ hâ mê pahpumunh kôt tanhmâ mê pajarênh to. Koja mê pahkwýjaja mê pahte mê kot pî htýx o ixkre nhîpêxta pyrâ nê Tîrtûm mâ mê pahte amnhî nhîpêx mex o mê papa xwýnhjê xâpênh pumu nê mê pahte amnhî to mex xwýnh â mê pajarê. HâMRI nê hpânhâ mê kot pî rerek o ixkre nhîpêxta pyrâ nê mê kot kâm amnhî nhîpêx mex kêt xwýnhjê pumu nê mê kot amnhî to mex kêt xwýnh hâ mê harê.

¹⁴ Nê pî htýxja na hte tanhmâ amnhî to nê hpôr no âm arî mex nê kuhê nhûm mê piitâ arî mex â omu. Ja pyrâ nê koja Krisja mê kot kâm tanhmâ amnhî nhîpêx mex to ho mê pa xwýnhjê pumu nê mê kot tanhmâ kâm amnhî nhîpêx to hpânhâ mê kâm amnhîre nhûm mê piitâ mê kot amnhî to mex â mê omu. ¹⁵ No pî rerekja na hte pôr nê kaxâr pa. Ja pyrâ nê mê kot Kris mâ amnhî nhîpêx mex hkêt xwýnhjaja koja Tîrtûm mê kâm amnhîrer kêt nê. Nom arî mê kêp hkra jakamâ koja mê arî kuri htîr tûm nê pa. No

âm mê kot Tîrtûm mâ amnhî nhîpêx mex kêt jakamâ koja mê hkwýjê hkînh â amnhîm mêmoj mex kwý jamýnh kêt nê. Te mêhõ nhôrkwý kêp hpôr nhûm mê hkukrêx kwý jamýnh kêt nê ý kamâ kurûm hapôx pyrâk.

¹⁶⁻¹⁷ E pa mê amâ mêmoj jarê. Ra mê ate mar tâ mân ka mê ra tanhmâ amnhî to nê hâ ano hkêt rý ko. Nà te mê pahpê Tîrtûm nhôrkwý pyrâk. Tîrtûm nhôrkwýja ô na. Tâ mê pahpê hkra nhûm Karô kot mê pakaxwýnh mâ gjêx jakamâ te mê pahpê ôrkwý pyrâk. Jakamâ mê kot kapêr kwým ri mê ajahkre o ri mê pa xwýnhjaja te mê kot Tîrtûm nhôrkwý grânh xwýnh pyrâk. Koja mê nhýrmâ amnhî xâ htýx kamâ hamak o pa.

Mê pahte amnhî to jarkrar kêt â mê pamâ karõ

Wam Korîit 1.10-25

¹⁸ Nê kot kaj mê atõ axâhpumunh týx o amnhî to jarkrar o ri apa japêr. Kwa mê jam anhûre nê axte ri â amnhî nhîpêx anhýr kêt nê. Nê te mê ate amnhî nê axâhpumunh týx xâja nhâm rênh par pyrâk o amnhî nhîpêx. Mê paxâhpumunh xâja pika kamâ mê âhpumunh pix jakamâ kêt ka mê te amnhî nê nhâm rênh pyrâ nê hpânhâ Tîrtûm xâhpumunh xâ hkôt pix mâ amnhî nhîpêx o ri apa. ¹⁹ No pika kamâ mê âhpumunh xwýnhjaja Tîrtûm noo mâ te mê hkrâ pipânh nê htýx ri pata pyrâk. Tîrtûm kapêr â kagâ htûm kot mê harênh kot:

Pika ja kamâ mê âhpumunh týx â mê kot amnhî to jarkrar xwýnhjaja Tîrtûm noo mâ te mê kot amnhî to hêx o pa pyrâk. Anê.

²⁰ Nê mãânên mê harênh kot:

Mê kot amnhî xâhpumunh týx â amnhî to jarkrar o ri mê pa xwýnhjaja na hte Tîrtûm mê omu nê mê kot â amnhî jarênh anhýr kaprý hâ mê harê. Anê.

21-22 Jakamã kwa kêr ka mẽ axte mẽ apê ixkwý rý mẽ apê Apor kwý hã amnhĩ jarênh o ri apa hkêt nê. Mẽ apê wa ixkwý hkêt kênã. Nẽ mẽ apê nhãm mẽhõ hkwy hkêt. Mẽ pahpiitã mẽ pahpê Kris kwý na pu mẽ.

Nẽ kot puj mẽ nhÿrmã pahtyk tã akupÿm pahťir nẽ Tirtũm mẽ Jejus wa kuri pamex nẽ pahťir tũm nẽ ri papa. Jakamã kwa mẽ tee ri amnhĩ kukamã ajamaxpêr kêt nê.

Nẽ jarãhã mẽmoj piitã mẽ panhõ. Nẽ kormã mẽmoj kot amnhĩrit kêt xwÿnhjaja haxwýja mẽ panhõ na. Æm mẽmoj piitã mẽ panhõ jakamã te mẽ pahpê mẽmoj piitã mẽõ pahi pyrãk. ²³ No mẽ papajaja axtem Kris kêp mẽ panhõ Pahihti. Nẽ Tirtũm kêp Kris nhõ Pahihti.

4

*Tirtũm pix kot tanhmã mẽ pajarênh to xwÿnh ã harênh
Eprêw 13.17*

¹ Nẽ mẽ pajaja mẽ ixpê mẽ anhõ pahi hkêt. Æm mẽ ixte Kris mã tanhmã amnhĩ nhĩpêx to ho ixpa xwÿnh pix jakamã Tirtũm kormã kapêr kwý ho amnhĩrit kêtja na pa htem mẽ amã ho amnhĩrit o ri mẽ akôt ixpa. Ja kaxyw na pre mẽ ixunhwý. ² Na pre Kris tanhmã mẽ inhmã kapêr to nẽ mẽ inhmã:

—E kêr ka mẽ ixkapêr pix o mãn mẽ ahkre ho ri mẽ hkôt apa. Anê.

³⁻⁴ Kumã pix mã ixte amnhĩ nhĩpêx o ri ixpa jakamã koja tapxipix ixte kãm amnhĩ nhĩpêx ã ixpumunh kôt tanhmã ijarênh to. Ixte kãm amnhĩ nhĩpêx mex ã ijarê rý ixte kãm amnhĩ nhĩpêx mex kêt ã ijarê. Æm tapxipix koja tanhmã ijarênh to. No koja nhãm mẽhõ rý mẽ atõ ã ijarênh anê pa ama nẽ ãm ama. Rý papam tanhmã kãm ixte amnhĩ nhĩpêx mex to hã kãm amnhĩ jarênh japêr hãmri nẽ ãm ixtÿx kãm ã amnhĩ nhĩpêx anhÿr ã amnhĩ jarênh kaprý. Pahihti Kris

pix kot hprĩ hã mẽ pahte amnhĩ nhĩpêx kôt pahpumunh jakamã tapxipix koja tanhmã mẽ pajarênh to.

⁵ Jakamã kwa kêr ka mẽ ri mẽ kot Tirtũm mã tanhmã amnhĩ nhĩpêx to hã mẽ omunh xã hkôt tanhmã mẽ harênh to hkêt nê. Koja nhÿrmã Pahihti Krisja akupÿn mẽ pahwÿr wrý nẽ rĩ tãm tanhmã mẽ pahte amnhĩ nhĩpêx to hã mẽ pahpumunh xã hkôt tanhmã mẽ pajarênh to. Nẽ mẽ kot hpimxur pê tanhmã amnhĩ tomnuj to ho mẽ pa xwÿnhjaja nhũm mẽ piitã mẽ noo mã mẽ kãm ja ho amnhĩrit nhũm mẽ ja hã mẽ omu. Nẽ mẽ pahpiitã mẽ pajamaxpêr xã ho amnhĩrit nhũm mẽ piitã hprĩ hã ja hã axpên pumu. Hãmri nhũm Tirtũm rĩ kormã mẽ pahte kãm tanhmã amnhĩ nhĩpêx mex to ho pa xwÿnhjê jarê.

⁶ E Jejus kôt ixkwýjaja. Nã na pa ã mẽ amã Apor mẽ wa amnhĩ jarênh anê. Mẽ ate inhar nẽ Tirtũm kapêr ã kagã hkôt tanhmã wa ijarênh to kaxyw. Kot kaj mẽ ã amnhĩ nhĩpêx anê hãmri nẽ ahpÿnhã tanhmã mẽ ixte Kris kapêr jarênh xwÿnhjê jarênh to hkêt nê. Nẽ axpên mã mẽ ijarênh o:

—Nã tãm kot Kris kapêr jarênh mex o kot hkwýjê jakrenh jakamã kot paj hkôt pix mã mãn ri ixpa.

Anhÿr o axpên mã mẽ ixtõ jarênh kêt nê. Kot kaj mẽ ã mẽ ixtõ jarênh anê nê te mẽ ixtõ jarkrar pyrãk o amnhĩ nhĩpêx. ⁷ Kwa mẽhõ na pre mẽ amã tanhmã ri mẽ ijarênh to ka mẽ mar xã hkôt ã mẽ ijarênh anê? Nẽ mẽ ixkapêr mex ã mẽ ixkwýjê jarê nẽ mẽ ixkapêr mex kêt ã mẽ ixkwýjê jarê. Nã na ka mẽ ãm amnhĩ krã hkôt ã mẽ ijarênh anê nom Kris xãhpumunh xã ho ã mẽ ijarênh anhÿr kêt nê. Æm mẽ ixte Tirtũm kapêr o mẽ ajahkre xwÿnhjaja na pa prem mẽ amã mẽmoj jarê ka mẽ ama nẽ mẽ

inhÿ hã hkôt axàhpumunh mex nê. No amnhî krã hkôt mê axàhpumunh kêt kênã kot ka kêt mê ã ahpÿnhã tanhmã mê ixto jarkrar anhÿr to ho ri apa.

⁸ Te mê ate Apor mê wa ixrom Tîrtûm kapêr mar par nê hkôt amnhî nhîpêx mex pyrãk. Te wa ixrom mê ate Jejus nhîhkô hã mê ho amnhîptâr pyrãk. Hêxta waa nê. Kop apu âm hãmri mê ate îhkô hã mê ho amnhîptâr ronhÿx pa ijaxwÿja mê apyrã nê ã amnhî nhîpêx anê. Hãmri nê ixkînh tÿx kumrêx. ⁹ Nom ja kot anhÿr kêt.

Jejus nhÿ hã mê ahkre xwÿnhjê jarênh

Sikûn Korîit 4.8-10; Eprêw 12.1

Nê mê ixpê Jejus nhÿ hã mê ajahkre ho mê ixpa xwÿnhjaja te Tîrtûmja axtem tanhmã mê inhîpêx to pyrãk pa mê inhmex kêt nê ixpa. Te mê ixte gyw kãm amnhî rênh nhûm mê kot mê ixkamã ôkre kahak pyrãk o na htem mê inhîpêx. Jakamã na hte mê hkwÿjaja mê ixpumu nê mê ixkapêr ma nê âm mê inhma nê axpên mã mê ijarênh o:

—Tk. Kot mê ahkreja mexti hã. Kwa pu mê himex ri.

Anhÿr jakamã te ra mê ixtyk nê mê inhîkwÿ nhûm mê piitã mê ixtã htu nê mê ixpumunh nê ma pa pyrãk o amnhî nhîpêx. Jakamã na htem mê ixte mê ahkre ma nê âm kuma nê ma pa. Nom Tîrtûm kapêr o mê wrÿk xwÿnhjaja na htem ja hã mê pahpumu nê axpên mã mê pajarênh o:

—Kwa mê kot Jejus ã mê hipêx kati htã nhûm mê arî hkôt amnhî nhîpêx mex nê aa hkaga hkêt nê. Hêxta waa nê. Nã âm hãmri na htem ã amnhî nhîpêx anhÿr o pa. Anê.

¹⁰ Na hte mê kot mê ixkapêr mar xwÿnh kwÿjaja kãm mê ixkînh kêt nê tanhmã mê ixto kapêr punuj to. No mê kajaja nhûm mê ã mê ato kapêr anhÿr kêt nê. Na htem mê ixkrã pipãnh ã mê ijarê no mê kajaja nhûm mê Kris nhÿ hã mê

axàhpumunh tÿx ã mê ajarê. Nê mê ixte Tîrtûm kapêr kôt amnhî nhîpêx mex kêt ã mê ijarê no mê kajaja na htem Tîrtûm kôt mê ate amnhî nhîpêx mex ã mê ajarê. Nê mê kot mê ixkamã ôkre kahak tÿx tã mê akamã ôkre kahak kêt nê mê kãm mê akapêr mar prãm nê. ¹¹ Na pa htem arî Kris ã ixpunuj nê ixpa. Nê mê inhmã prãm nê mê inhmã kôr nê ri ixpa. Nê mê ixê pikaxônhre nê ri ixpa. Nhûm htem Kris ã mê ixtak rûnh nê. Pa mê inhôrkwÿ hkêt nê nhãm ri ixpa nê nhãm ri ixpa. Na pa htem arî ã amnhî nhîpêx anhÿr o ri ixpa. ¹²⁻¹³ Nê ixàpkur xà kaxyw ixàpênh rûnh o ri ixpa. Nhûm hte mê kãm Jejus prãm kêt xwÿnhjaja mê ijaarÿ ho pa htã pa mê amnhî kurom mê kãm ixkapêr mex nê mê kãm:

—E kê Tîrtûm mê ato mex nê ka mê amex nê apa. Anê.

Nê mê kot mê inhîpêx kati htã pa htem mê kutã amnhî to htÿx nê arî mê hkôt ixpa. Na htem te mê kot ahpunuj nhîpêx pyrãk o mê inhîpêx nê mê ixwÿr mrar kêt nê. Æ na htem mê ixte Jejus nhÿ hã mê ahkre o mê ixpa xwÿnhjê nhîpêx anê.

Pawre te kêp mê hpãm pyrãk ã kot amnhîjarênh

Wam Tesarôn 2.11-12

¹⁴⁻¹⁵ E Kris kôt ixkwÿjaja. Na pa ã mê amã kagã nê mênh anê. Nom mê ate inhmar nê amnhî kamã apijaàm kaxyw kêt. Inhmã mê ajapê jakamã na pa ã mê amã ixkapêr nê hã kagã nê mênh anê. Na mê ra ohtô nê ixpãnhã mê awÿr pa nê mê amã Tîrtûm kapêr o mê ajahkre. Nom ixkumrêx na pa pre mê amã kapêr jarê ka prem inhma nê Kris hkôt amnhî xunhwÿ nê amnhî kaxyw hkôt ajamaxpêr tÿx nê. Jakamã paxipix te ixpê mê apãm nhûm te mê apê ixkra pyrãk. ¹⁶ Jakamã kwa mê ixte amnhî nhîpêx kôt ixpumu nê ixkôt mãnh kêt mê amnhî nhîpêx o ri apa.

17 ã mẽ ate amnhĩ nhĩpêx anhÿr kaxyw na pa pre ijamaxpêr nê ma mẽ awÿr Ximotre mẽ. Haxwÿja Kris kôt te kêp ixkra pyræk. Nê inhmã hapêê. Na hte jar Kris mã tanhmã amnhĩ nhĩpêx mex to ho pa. Tã pa pre mẽ awÿr kumê. Kojã ma mẽ awÿr mō nê pōj nê mẽ amã Kris kapêr jarênh o ri mẽ akôt pa. Nê mẽ amã tanhmã ijarênh to nê mẽ amã:

—Nã Pawre na hte Jejus Kris jamaxpêr kôt hamaxpêr o pa. Nê kot amnhĩ nhĩpêx kôt amnhĩ nhĩpêx o pa. Nê krĩ piitã hkôt mẽ kot uræk nê ã amnhĩ nhĩpêx o pa anhÿr kaxyw mẽ ahkre mex o pa. Anê.

18 Nê na xep mẽ akwÿjaja te ra àhpumunh tÿx pyrã nê tanhmã ijarênh to nê ijarênh o:

—Pawreja akupÿn mẽ pahwÿr mōr ã amnhĩ jarênh tã kojã akupÿn mōr kêt nê kãm ga. ãm kapêr kati xwÿnh na.

19 Anhÿr ã ijarênh tã kojã Tirtũm kãm tokyx ma mẽ awÿr inhmōr prãm hã kot pa ma mẽ awÿr inhmōr kurê kumrêx. Hãmri nê pōj nê ixprĩ hã ã mẽ kot ixto kapêr anhÿr xwÿnhajê pumu. Nê mẽhō kot ã mẽ kãm ijarênh anhÿr xwÿnhata ã ahkukja. 20 Tirtũm krajaja na htem hkôt pix mã amnhĩ nhĩpêx jakamã na htem hkôt tanhmã amnhĩ nhĩpêx to hã mẽ omu nê rĩ kormã kêp hkra hã mẽ harê. Tã kot paj nhÿrmã mẽ awÿr pōj nê ã ixto kapêr anhÿr xwÿnhjê pumu nê ixprĩ hã mẽ kot amnhĩ nhĩpêx ã mẽ omu nê rĩ kormã tanhmã mẽ harênh to. Jao Tirtũm nhÿ hã mẽ kot mẽ ajahkre hã mẽ omu rÿ amnhĩ krã hkôt mẽ kot mẽ ajahkre hã mẽ omu nê rĩ kormã tanhmã mẽ harênh to. 21 Jakamã kwa mẽ tokyx ixkutêp tãm amnhĩ nhĩpêx o ri apa. Kêr pa mō nê mẽ awÿr pōj nê mẽ ate tãm amnhĩ nhĩpêx ã mẽ apumu nê ixkĩnh nê. Nê mẽmoj tã mẽ amã ixækjêr kêt nê. Nê mẽ amã ixkapêr mex pix o ri mẽ amã ixkapêr. Te

mê hipêêxã kot hkrajê mã kapêr mex pyræk o mẽ amã ixkapêr mex nê. Hãmri pu mẽ axpên pumu nê pahkĩnh nê.

5

Mêhō kot tanhmã amnhĩ tomnuj to hã harênh

Sikũn Korit 2.5-11

1 Nê kwa na pa pre tee ri mẽ anhĩōja jarênh ma nê ixkaprĩ htÿx nê. Na xep hte amnhĩ tomnuj tÿx pē nã puro hã hpijaàm kêt o pa. Kwa mẽ pahpê Kris kwÿjaja mẽ pahte ã amnhĩ nhĩpêx anhÿr kêt nhũm mẽ kot Kris kôt amnhĩ xunhwÿr kêt xwÿnhjaja haxwÿja ã amnhĩ nhĩpêx anhÿr kêt tã nhũm ra mẽ anhĩōja kot Kris kôt amnhĩ xãm tã ã amnhĩ nhĩpêx anê. Kwa ja omnuj tÿx kumrêx. 2 Na xep ri ã amnhĩ nhĩpêx anhÿr o pa ka mẽ ja hã omu nê ãm omu nê nê tanhmã kãm nê hkêt nê. Amarĩ hã omunh o ri hkôt apa. Mẽ ate Tirtũm kôt axàhpumunh tÿx ã amnhĩ jarênh tã no ãm ja hã omu nê ãm hã omu nê nê tanhmã kãm nê hkêt nê. Kwa nã. Mẽ tee ri kot ã amnhĩ nhĩpêx anhÿrja ã omu nê akaprĩ nê hkêt wehe. Nê mẽ tokyx amnhĩ nê hano kê mẽ akôt Tirtũm mã amnhĩ jarênh xã hã ixkre hwÿr axte mrrar kêt nê.

3-5 Ixte mẽ apê awry htã ã kot amnhĩ nhĩpêx anhÿr ã harênh ma nê hkukamã tanhmã ijamaxpêr to. Nã ra ixte mẽ awÿr ixpōx ronhÿx pa mẽ ato akuprō. Pahihti Jejus nhÿ hã mẽ ato akuprō nê mẽ amã kot amnhĩ tomnuj xwÿnhata jarê nê mẽ anê hanor kurê kumrêx. Jakamã e kêr ka mẽ mãmri ã amnhĩ nê hipêx anê. Mẽ panhō Pahihti Jejus nhÿ hã amnhĩ nê hano nê te Satanasti mã rer pyræk kê tee ri ja hã amnhĩ pumu nê tokyx kãm urer japêr. Hãmri nê akupÿm tãm amnhĩ nhĩpêx. Kê nhÿrmã Pahihti akupÿn mẽ pahwÿr wrÿ nhũm ma mẽ pahkôt ò krĩ hwÿr api.

6 Mē ate Tirtūm kapēr jarēnh mar mex ā amnhī jarēnh tā kormā amnhī nē ā kot amnhī nhīpēx anhÿr xwÿnhhta janor kêt nē. Kwa mē tokyx amnhī nē hano. Na htem pāwti nhīpēx kaxyw nē kamā kot ho hikot xà ho hkryre nē kamā kurē nē gaa nē rī ho piitā hikot pa. Ja pyrā nē kot ka mē amnhī nē kot amnhī tomnuj xwÿnhhta janor kêt nē hāmri nē gaa nē ra urāk nē apiitā ā amnhī nhīpēx anhÿr o ri apa.

7 Kwa mē tokyx amnhī nē hano. Kēr ka mē arī amnhī to mex pix o ri axpēn kôt apa nē tām ri amnhī nhīpēx o ri axpēn kôt apa. Na pre ra Jesus Kris mē pahte amnhī to mex o papa kaxyw mē panē ty. Mē pahpiitā mē panē ty. ⁸ Jakamā na pu htem ām amnhī to mex pix o ri papa. Nē tām amnhī nhīpēx o ri papa. Jao tanhmā amnhī tomnuj to ho ri papa hkêt nē.

⁹ Nē wam ixte mē awÿr kagā nē mēnhhta kamā na pa pre mē amā:

—Kēr ka mē nhām mē kot mēnijē kamā hpijaām kêt o mē pa xwÿnhjê hkôt ri apa hkêt nē. Ām ri mē hkàx ā apa.

Anhÿr o mē amā hā karō. ¹⁰⁻¹¹ Nom na pa pre mē piitā ā mē nē mē akurē anhÿr kêt nē. Ām mē kēp Kris kwÿ hā amnhī jarēnh tā ā ri amnhī tomnuj anhÿr xwÿnh pixjaja na pa pre mē nē mē akurē. Kojā mēhō kēp Kris kôt mē pahtō rÿ mē pahtōx ā amnhī jarēnh tā mē kamā hpijaām kêt o ri pa ka mē ja hā omu nē hkôt ri apa hkêt kurē kumrēx.

Nē mē kām nhām mē hkukrēx kīnh o kām ho ō hprām o ri mē pa xwÿnhjaja.

Nē sānti kutā hkōn krā ho rôrōk nē hkrī nē kām mex ā harēnh o ri mē pa xwÿnhjaja.

Nē mē kot axpēn to kapēr punuj o ri mē pa xwÿnhjaja.

Nē mē pipānh o ri mē pa xwÿnhjaja.

Nē axpēn pē ri mē àhkīnh o mē pa xwÿnhjaja.

Kojā mēhō kēp Kris kwÿ hā amnhī jarēnh tā ā amnhī nhīpēx anhÿr o ri pa ka mē ja hā mē omu nē hkôt ri apa hkêt kumrēx. Nē mē kutā axàpkur kêt nē. Ām mē hkàx ā ri mra.

No mē kēp Kris kwÿ hkêt xwÿnhjê nē na pa pre ā mē akurē anhÿr kêt nē. Mē piitā ā mē kot amnhī nhīpēx anhÿr o pa kēnā. Na htem axpēn kām hpijaām kêt o ri pa.

Nē mē kām axpēn kukrēx kīnh o kām ho ō hprām o ri pa.

Nē sānti kutā hkōn krā ho rôrōk nē hkrī nē kām amnhī jagerer pē amnhī to hwÿr o pa.

Nē mē axpēn pē àhkīnh pix o pa. Kris kwÿ hkêt xwÿnhjaja na htem ā amnhī nhīpēx anhÿr o pa. Tā tanhmā kot ka wem amnhī to nē mē hkàx ā ri apa? Mē piitā ā mē kot amnhī nhīpēx anhÿr kēnā. Kot puj mē nhÿrmā Tirtūm nhō krī mex wÿr api nē rī kormā mē hkàx ā ri papa.

¹²⁻¹³ Nē mē kēp Kris kwÿ hkêt xwÿnhjaja na pa hte mē kot amnhī tomnuj ā mē omu nē ām mē omu nē tanhmā hā mē kām nē hkêt nē. Tirtūm tām kojā nhÿrmā ja hā tanhmā mē hipēx to. No kojā Kris kôt mē pahtō rÿ mē pahtōxjê hō tanhmā amnhī tomnuj to ho pa pu mē pahtō ja hā omu nē nē tanhmā kām pakapēr to kurē kumrēx. Tirtūm kapēr ā kagā htūm kot ja jarēnh kot:

Kēr ka mē amnhī nē Kris kôt akwÿjê hō kot tanhmā amnhī tomnuj to ho pa xwÿnhjê jano. Ā harēnh kot anhÿr.

6

Mē pahte Kris kwÿjê ho pakapēr kêt

Matêwre 5.38-40

¹ Nē na ka xep htem Kris kôt atō rÿ atōxjê hō mē ka wa tanhmā axpēn tomnuj to nē axtem nē juisti

hwÿr axpën to mra. Më apyrã nê kÛp Kris kwÿ hkÛt tã ka htem ma hwÿr amnhÿ to mra nhÿm war axpën tã war ama nê tanhmã war ajarÛnh to. Kwa mon ka htem axtem nê ã Kris kwÿ hkÛt xwÿnhjê hwÿr më amnhÿ to amrar anê? KÛt më Kris kôat anhÿo hwÿr mãn kÛt më amnhÿ to mra nê kumã mãn amnhÿ jarê kÛt axpën tã war ama nê axpën tã tanhmã war amã kapÛr to.

² Ra më ate ja mar tÿx tã hkôat amnhÿ nhÿpÛx kÛt nê. Mëmoj ãm grire htã ka wa tokyx akupÿm hã tãm axpën xãm kÛt nê. Rÿ Kris kôat war atôjê hõ hwÿr wa amnhÿ to atëm nhÿm akupÿm tãm axpën tã war axãm kÛt nê. ãm axtem nê më kÛp Kris kôat më atô hkÛt xwÿnhjê hwÿr amnhÿ to mra. Kwa më ã amnhÿ nhÿpÛx anhÿr kÛt nê. Më pahpê Kris kwÿjaja kot puj më nhÿrmã Kris nhÿhkô hã më kÛp hkÿwÿ hkÛt xwÿnhjê tanhmã më harÛnh to. ³ Nê Tÿrtÿm kapÛr o më wrÿk xwÿnhjaja kot puj më mãânÛn nhÿrmã tanhmã më harÛnh to ho pahkrÿ. Jakamã kwa mãmrÿ ã më pahpÛ amnhÿ nhÿpÛx anhÿrja kukamã akupÿm tanhmã axpën xunhwÿr to ho apa. Mëmoj tã më atôjê hõ wa kot tanhmã axpën to hã wa omu nê tokyx akupÿm axpën tã wa kãm akapÛr kÛt wa tokyx akupÿm tãm axpën nhÿpÛx. ã më kot axpën nhÿpÛx anhÿr o paja na kÛt mex. ⁴ No na ka xep htem arÿ Kris kôat më akÿwÿ hkÛt xwÿnhjê hwÿr axpën to mra nê më kãm amnhÿ jarê. Kwa më ri ã amnhÿ nhÿpÛx anhÿr kÛt nê. ⁵ Më tokyx tee ri ja hã amnhÿ pumu nê amnhÿ kamã apijaãm kÛt wehe. Xà më akamã Kris kôat më atôjê hõ pixire nê kot tãm akupÿm më axunhwÿr kaxyw amrakati kumrÛx? ⁶ Na ka xep htem mëmoj tã axpu. Kris kôat më atôjê hõ më mëmoj tã axpu nê ra më kÛp Kris kwÿ hkÛt xwÿnhjê hwÿr amnhÿ to mra. Kot

tãm akupÿm më unhwÿr xwÿnhjê hwÿr amnhÿ to mra.

⁷ Më apijapu ho apa jakamã na ka më amnhÿ tomnuj tÿx nê. Hãmri nê te më apê Kris kwÿ hkÛt xwÿnhjê pyrã nê më hwÿr amnhÿ to mra. Kwa kwãr Kris kôat anhÿo mãmrÿ apê ahkÿ rÿ tanhmã anhÿpÛx to. Ka më ãm amnhÿ tã omu kÛt tapxipix tanhmã amnhÿ tomnuj to. ⁸ Ja mex tã më ate ã amnhÿ nhÿpÛx anhÿr kÛt. Na ka htem axpën pÛ ahkÿ. Më ate Kris kôat axpën to atô nê atôx tã axtem nê ã axpën nhÿpÛx anê. Te më apijaãm kÛt pyrãk o amnhÿ nhÿpÛx o ri apa. ⁹⁻¹⁰ Më kot tanhmã amnhÿ tomnuj to xwÿnhjaja koja më nhÿrmã ma Tÿrtÿm nhõ krÿ mex wÿr àpir kÛt nê. Ra më ate ja jarÛnh mar tÿx.

Mëmyjê hõ kot nhãm mënijê hõ ho amnhÿ kati xwÿnhjaja.

Nê mënijê hõ kot nhãm mëmyjê hõ ho amnhÿ kati xwÿnhjaja.

Nê mënijaja axtem nê më kot amnhÿo ho mjÛn o ri më pa xwÿnhjaja.

Nê mëmyjaja haxwÿja axtem nê amnhÿo ho hprô ho ri më pa xwÿnhjaja.

Nê më àhkÿnh o ri më pa xwÿnhjaja.

Nê më kãm nhãm më hkukrÛx kÿnh o kãm ho ô hprãm o ri më pa xwÿnhjaja.

Nê ri më pipãnh o më pa xwÿnhjaja.

Nê ri axpën to kapÛr punuj o më pa xwÿnhjaja.

Nê më kot amnhÿ to sãnti hwÿr o më pa xwÿnhjaja.

ã më kot amnhÿ nhÿpÛx anhÿr xwÿnhjê piitã koja më Tÿrtÿm nhõ krÿ hwÿr àpir kÛt nê.

¹¹ Kormã më ate Kris kôat amnhÿ xunhwÿr kÛt ri na ka pre më akÿwÿjaja ã amnhÿ nhÿpÛx anhÿr o ri apa. Tã amnhÿ kaxyw Jejus kôat ajamaxpÛr nê hkôat amnhÿ xunhwÿ. Hãmri nhÿm Tÿrtÿm Karô më Pahÿhti Jejus Krisja wa më

anê mẽ ate amnhî tomnuj piitã rênh pa nê mẽ apê Tîrtûm kra hã mẽ axunhwý nê amnhîm mẽ ate amnhî to mex xwýnh ã mẽ ajarê.

Mẽ pahte tãm amnhî nhîpêx o papa hã mẽ pamã karõ

Matêwre 5.27; Rõmãn 12.1-2; Epes 5.3; Korosê 3.5; Wam Tesarõn 4.1-8

¹² Nê na ka hte mẽ akwýjaja amnhî jarênh o:

—Nà na pa hte pa inhmã tanhmã amnhî nhîpêx to hprãm xà hkõt amnhî krã hkõt amnhî nhîpêx o ri ipxa. Anê.

Mẽ ate ã amnhî jarênh anhýr tã no ãm mẽ ate amnhî jarênhja mex kêt. Mêmioj piitã mẽ pamã mex kêt. Na pu htem pamã hprãm xà hkõt mẽmoj to anê nê gaa nê ra ho amnhî pyrà nê ho anhýr pix o papa. Nê gaa nê kãm panhürer kêt kumrêx. Jao ra pahpipãnh pix o ri papa. Rý paxêx pix o ri papa. Rý paxàhkính pix o ri papa. Jakamã kêr pu mẽ pamã tanhmã amnhî nhîpêx to hprãm xà hkõt tanhmã amnhî nhîpêx to ho papa hkêt nê. ãm amnhî mẽ amnhî kaxyw Jejus mã pajamaxpêr pix nê.

¹³ Nê na htem amnhî jarênh o:

—Nà kot paj inhmã prãm nê mãmrî mẽmoj ku. Nê inhmã nhãm mēhõ kamã ixpijaãm kêt prãm nê mãmrî ã amnhî nhîpêx anê. Ja tanhmã inhmã kute hkêt. Anê.

Tã koja nhýrmã Tîrtûm mẽ panhîja o hapêx pa. Na pre mẽ pahte nhãm mẽ kamã pahpijaãm kêt o papa kaxyw mẽ panhîpêx kêt nê. ãm mẽ pahte mẽ panhîpêx xwýnh maatija mã tanhmã amnhî nhîpêx mex to ho papa pix kaxyw na pre mẽ panhîpêx.

¹⁴ Nê na pre Pahihtija ty nhũm Tîrtûm akupým ho htír. Ja pyrà nê kot puj mẽ nhýrmã mẽ pajaxwýja ty nhũm akupým mẽ pahto mẽ pahhtír. Ja kaxyw tapxipix pix na àhpumunh týt x o àhpumunh týt. ¹⁵ Na pu

htem Kris kõt amnhî xunhwýr kõt pahpê hkwý nê te pahpê í pyràk. Jakamã kwa mẽ ja hã anohtýt nê axte nhãm mẽ hkuprýjê hwýr amrar nê mẽ ho amnhîkati hkêt nê. Tîrtûm kêp ja omnuj. Te mẽ pahte Kris nhî pyràk jakamã kot kaj mẽ ã amnhî nhîpêx anhýr jao te Kris tãm kot ã amnhî nhîpêx anhýr o pa pyràk. Kwa ja mex kêt. Xà kot we Krisja ã amnhî nhîpêx anê? Nà koja ã amnhî nhîpêx anhýr kêt nê. ¹⁶ Tîrtûm kapêr ã kagã htũm kot ja jarênh kot:

Kot ka mẽ atõ mēnijê hõ ho aprõ nhũm kêp aprõ kumrêx. Hãmri nê te ra war atipxi pyràk o axpēn nhîpêx. Anê.

ã kot aprõ mẽ wa ajarênh anhýr jakamã kwa kêr ka mẽ atýt ri nhãm mẽ hkuprýjê hwýr apa hkêt nê. Kot kaj mẽ ã amnhî nhîpêx anê nê Tîrtûm noo mã te ate aprõ kuhpa hã hkuprýta o aprõ pyràk. Te wam aprõta kuhpa hã war atipxi pyràk. ¹⁷ Na pu htem Pahihti Jejus Kris kõt amnhî xunhwý nhũm amnhî tã mẽ pahpumu nê mẽ pamã Karõ gõ nhũm mẽ pamã agjê. Pu mẽ ra Karõja kõt te ra Jejus mẽ wa pahtipxi nê ri papa pyràk o axpēn nhîpêx. Jao Kris jamaxpêr mẽ mẽ pajamaxpêrja te wa kot axpēn pyràk. Nê Kris kot amnhî nhîpêx mẽ mẽ pahte amnhî nhîpêxja te kot axpēn pyràk.

¹⁸ Jakamã kwa kêr ka mẽ amnhî prõ pix tãnopxar o ri apa. Nê mẽ anijaja amjên pix tãnopxar o ri apa. No mẽ nhãm mẽmyjê ho amnhîkati ho ri apa hkêt nê. Nê mẽ amyjaja nhãm mēnijê ho amnhîkati ho ri apa hkêt nê. Kot ka mẽ nhãm mẽmoj tanhmã omnuj kute ho anê no ãm amnhî nhî homnu hkêt nê. Nom kot kaj mẽ nhãm mēnijê ho amnhîkati rý nhãm mẽmyjê ho amnhîkati hãmri nê ra amnhî nhî homnu hpa. ¹⁹ Mẽ panhî kamã na hte Tîrtûm Karõ agjê nê kamã hkrî. Tîrtûm na pre mẽ pahwýr

kurê nhùm mē pahkarō mā agiê pu mē te mē pahpê ôrkwÿ pyrâk. Jakamâ na pu htem amnhî krâ hkôt pahṭÿx ri mēmoj tanhmâ ho ho papa hkêt nê. ãm Tîrtûm jamaxpêr xâ hkôt pix mâ na pu htem tanhmâ mēmoj nhîpêx to ho papa. ²⁰ Na pre ra Jejus mē pahte amnhî tomnuj pânâ amnhîrer kaxyw mē pahpitiâ mē panê ty. Te htyk o amnhîm mē pajaprôr pyrâk o mē panhîpêx. Jakamâ kwa kêr pu mē ãm hkôt pix mâ mân ri amnhî nhîpêx râhâ ho ri papa. Kê mē pahkwÿjaja ja hâ mē pahpumunh kôt Tîrtûm mâ mex o mex ã harênh o ri pa.

7

Mê mjên mê mē hprô wa kot axpên to mex ã mē pamâ karô

Epes 5.22; Korosê 3.18; Eprêw 13.4

¹ Nê ota mē ate ixwÿr kagâ nê mênhta na pre ixwÿr pôj pa omu. Nê kamâ mē ate mē aprô hâ ixkukjêr xwÿnhṭa pa kamâ harê nê omu. Tâ kot paj mē amâ tanhmâ harênh to ka mē inhma.

Nâ kot ka mē amyjê hō amâ aprô hkêt nê ahte ri apa hprâm nê kam nê aprô hkêt apa. Ja tanhmâ kute hkêt. Nom kêr ka mē hkuprÿjê ho presija ho ri apa hkêt nê. ² Na htem tôhâ kâam hprô hprâm kêt nê ri pa nê gaa nê mē hkuprÿjê hō pumu rÿ mē kêp mē hprôjê hō pumu nê kamâ hpijaâm kêt o ri pa. Ja pymaj kêr ka mē amyjaja māmri aprô nê mē anijaja māmri amjên.

³ Nê mē anijaja. Koja mē amjên akamâ hkurê ka mē māmri kâam amnhî gô kê mē anî. Nê mē amyjaja määnên. Koja mē aprô mē akamâ hkurê ka mē māmri mē anî.

⁴ ãm ka amâ tanhmâ amnhî nhîpêx to hprâm xâ hkôt pix mâ amnhî nhîpêx kêt nê. Määnên amâ aprô kot kâam tanhmâ amnhî nhîpêx to hprâm xâ hkôt määnên hkôt kâam amnhî nhîpêx.

⁵ Nê kot kaj mē mēmo arîgro hâ amâ Tîrtûm mâ amnhî jarênh rÿy hprâm japêr. Hāmri nê aprô mâ:

—E kot puj jarâhâ axpên to amnhîkati hkêt nê. Kot puj ãm Tîrtûm pix mâ amnhî jarênh o amÿkry. Anê.

Hāmri nê māmri ã amnhî nhîpêx anê. No kwa kêr ka mē ãm ja ho anhÿr o apkati pixi nê kâam anhÿre. Nhùm jââ ka mē amâ axpên to amnhîkati hprâm nê māmri tanhmâ axpên nhîpêx to. No kot kaj mē ã amnhî nhîpêx anhÿr kêt o hâ atâ apkati xohtô nê gaa nê ra akurê xâj axtem nê Satanasti jamaxpêr o ajamaxpêr. Jao nhâm mēhō ni hwÿr mra nê aprô kuhpa hâ kamâ akurê ho kamâ apijaâm kêt. Rÿ nhùm mēnijaja nhâm mēmyjê hō hwÿr mra nê mjên kuhpa hâ kamâ hkurê ho war axpên kamâ hpijaâm kêt.

⁶ E mē ate ja hâ ixkukjêr jakamâ na pa ã ixprî hâ mē amâ ja jarênh anê. Ka mē akwÿjaja amâ aprô hprâm nê māmri aprô nê ri apa. Nê mē akwÿjaja amâ aprô hprâm kêt nê māmri aprô hkêt nê ri apa. Nom kot pa paa mē amâ mē aprô hâ ixâmnên kêt nê. Ka mē kam amnhî krâ hkôt ajamaxpêr xâ hkôt tanhmâ amnhî nhîpêx to. ⁷ Na pa hte ixprô hkêt nê ri ixpa nom inhmâ ja mex pa hte ahte ixpa.

Mê mjên kêt nê mē hprô kêt xwÿnhjê jarênh

Nê kormâ mē aprô hkêt xwÿnhjaja. Ka mē ixpyrà nê aprô hkêt nê ri apa ronhÿx inhmâ ja mex nê. Na hte mēmy hkwÿjaja hprô kêt nê ri pa nhùm Tîrtûm ja hâ mē omu nê tanhmâ mē ho nhùm mē mex nê ri pa nê mēnijê kamâ hkurê ho mē kamâ hpijaâm kêt o ri pa hkêt nê. No na hte mē hkwÿjaja hprô hkêt nê ri pa nê gaa nê ra hkurê xâj mēnijê kamâ hpijaâm kêt. ã mē ate amnhî nhîpêx anhÿr pymaj kêr ka mē amâ

aprô hprâm nê māmri aprô. Tirtûm mā ja mex kênã.

⁸ E mē aprô hkêt nê mē amjên kêt xwýnhjaja. Nê ra mē apê mē aprô htyk rý mē amjên htyk xwýnhjaja. Pa mē amã mēmoj jarê. Nà kot kaj mē ixpyrà nê mē aprô hkêt nê ri apa rý mē amjên kêt nê ri apa nhũm ja inhmã mex nê. ⁹ No kot ka mē atô ra akurê japêr nê māmri aprô rý māmri amjên. Ja määnên tanhmã kute hkêt.

Mê pahte axpên kaga hkêt ã mē pamã karô

Matêwre 5.31, 19.3-9; Makre 10.2

¹⁰ E kot paj hpãnhã ra mē ate axpên to amjên nê axpên to aprô xwýnhjê mã ixkapêr. Nom kot paj amnhĩ krã hkôt tanhmã ixkapêr to hkêt nê. Pahihti Jejus Kris kapêr xã hkôt kot paj mē amã ixkapêr. Jakamã e kêr ka mē anijaja mē amjên kaga hkêt nê. ¹¹ Nom kot kaj mē tanhmã ajamaxpêr to nê hkaga japêr hãmri nê ahte ri apa nê axte nhãm mēhõ ho amjên kêt nê. Rý tee ri amnhĩ kukamã ajamaxpêr nê māmri akupým amjênta wýr tē nê akupým hkôt ri apa. No kêr ka mē axte nhãm mēhõ ho amjên kêt nê.

Nê ra mē amyjaja kêr ka mē ajaxwýja ã amnhĩ nhĩpêx anê nê mē aprô kaga hkêt nê. E kêr ka mē ã amnhĩ nhĩpêx anhýr o ri apa.

¹² Nê mē ate ixwýr kagã mēnh kamã axpên mã ixkukjêrta kot paj hpãnhã mē amã harê. Na Pahihti Jejusja ja hã tanhmã inhmã nê hkêt nê. ãm amnhĩ krã hkôt kot paj mē amã tanhmã harênh to ka mē inhma.

Ka mē amyjê hõ ra Kris kôt amnhĩ xãm nom nhũm aprô kormã hkôt amnhĩ xãm kêt japêr. Nom koja kãm arĩ ri akôt pa hprãm ka hkaga hkêt nê. Kê arĩ ri akôt pa. ¹³ Nê mē anijaja. Ka mē ajaxwýja ra apê Kris kwý hã ri apa nhũm amjên kêt hkwy hkêt tã arĩ ri akôt pa hprãm nê arĩ ri akôt pa ka hkaga hkêt

nê. ¹⁴ Kêp Kris kwý hkêt tã koja akôt Kris kwýjê hkôt ri pa. Rý mē aprô kêp Kris kwý hkêt tã koja akôt Kris kwýjê hkôt ri pa. Jao Tirtûm kapêr mar o pa nê gaa nê apyrã nê hkôt amnhĩ xãm japêr. Nê mē akra kêp Kris kwý hkêt xwýnhjaja haxwýja mē akôt Kris kwýjê hkôt ri pa nê Tirtûm kapêr mar o pa nê gaa nê akôt Jejus kôt amnhĩ xunhwýr japêr.

¹⁵ Nom koja aprô kêp Kris kwý hkêt ã kãm akaga hprãm nê rĩ tãm māmri akaga. Rý amjên kêp Kris kwý hkêt ã kãm akaga hprãm nê rĩ tãm māmri akaga. Kêr ka mē kot akaga nê tee ri kãm tanhmã akapêr to hkêt nê. Kwâr māmri akaga ka ahte ajamakêtkati nê axãmnhix ri apa. Mē pajamakêtkati nê mē pamex nê ri papaja na Tirtûm kãm hprãm.

¹⁶ No koja amjên kêp Kris kwý hkêt tã kãm mē akaga hprãm kêt nê ka mē hkaga hkêt nê. Rý aprô kêp Kris kwý hkêt tã ka mē kam hkaga hkêt nê. Koja arĩ ate amnhĩ nhĩpêx ã apumunh o ri akôt pa nê gaa nê rĩ apyrã nê Kris kôt amnhĩ xãm japêr. ¹⁷ Jakamã kot ka mē aprô rý amjên ra Kris kôt ahte amnhĩ xãm. Hãmri nê wa arĩ ri axpên kôt ri apa ho apa. Na pa hte krĩ piitã hkôt Jejus kôt mē pahkwýjê mã ã ixujarênh anhýr o ri ípa. Tã kêr ka mē ã amnhĩ nhĩpêx anhýr o ri apa.

Kris kôt amnhĩ xunhwýr kêt ri tanhmã mē pakute hã mē pajarênh

¹⁸ Ja pyrà nê kot kaj mē ra amy kwýrt kã jakâr japêr. Tã ra Kris kôt amnhĩ xãm nê arĩ arãhã ri apa. Rý amnhĩ jakâr kêt rãhã hkôt amnhĩ xãm japêr nê arĩ arãhã ri apa. Mo kaxyw kot ka kêt amnhĩ jakã? ¹⁹ Tirtûm na hte mē pahte amnhĩ my kwýrt kã jakâr ã mē pahpumunh kôt tanhmã mē pajarênh to hkêt nê. Rý mē pahte amnhĩ jakâr kêt ã mē pahpumunh kôt määnên tanhmã mē pajarênh to hkêt nê. ãm mē pahte hkôt amnhĩ

nhîpêx pix ã mẽ pahpumunh kôt na hte tanhmã mẽ pajarênh to. ²⁰ Jakamã kêr pu mẽ pahte Kris kôt amnhî xunhwÿr kêt ri tanhmã mẽ pakuteja arî rãhã ri papa. ²¹ Ka mẽ akwÿjaja ate nhãm mẽ kãm mẽ axàpênh o apa htã Jejus kôt amnhî xunhwÿ. Tã kêr ka mẽ mãmri mẽ kãm axàpênh o ri apa. Nom koja anhõ patrãwja amnhî nê mẽ ajano ka mẽ mãmri ma mra nê amnhî mã tanhmã axàpênh to ho ri apa.

²² Nê koja mēhõ Kris kôt amnhî xãm. Tanhmãn kêp mẽ õ patrãw rÿ kot mẽ kãm mẽ àpênh xwÿnhjê hõ. Tã Kris kôt amnhî xãm hãmri nê arî amnhî nhîpêx tũm kôt ri amnhî nhîpêx o pa hkêt nê. Ra Kris kôt amnhî nhîpêx nyw o amnhî nhîpêx o pa. Jao ra tanhmã amnhî tomnuj to hkêt nê. Te kot õ patrãw punuj kaga nê hpãnhã õ patrãw mex kapêr kôt amnhî nhîpêx pix o pa pyrãk.

²³ Na pre Jejus mẽ pahte amnhî tomnuj piitã hpãnhã amnhîrer kaxyw mẽ panê ty. Te htyk o kot amnhîm mẽ pajaprõr pyrãk o mẽ panhîpêx. Jakamã kwa kêr ka mẽ jar mẽ anhõ patrãw kôt pix mã amnhî nhîpêx o ri apa hkêt nê. Mẽ mãânên Tirtũm kapêr kôt amnhî nhîpêx o ri apa. ²⁴ Jakamã kêr pu mẽ pahte Kris kôt amnhî xunhwÿr kêt ri tanhmã mẽ pakuteta pu mẽ arî rãhã ri hã papa.

Ra mẽ pahte amnhî jakà rÿ mẽ pahte amnhî jakàr kêt.

Rÿ ra mẽ pahte nhãm mēhõ mã paxàpênh o papa rÿ amnhî mã paxàpênh o papa.

Rÿ ra mẽ pahprõ nê ri papa rÿ mẽ pahprõ hkêt nê ri papa.

Pu mẽ pahte Kris kôt amnhî xunhwÿr kêt ri tanhmã mẽ pakuteta ãm arî rãhã hã ri papa. Jao Tirtũm kãm hprãm xà kôt pix mã amnhî nhîpêx o ri papa.

Mẽ hprõ nê mẽ mjên kêt xwÿnhjê jarênh

Matêwre 19.10-12

²⁵ Nê mẽ ate ixwÿr kaga mēnhta kamã na ka mẽ mãânên kormã mẽ hprõ hkêt xwÿnhjê hã ixkukja. Tã kot paj mẽ amã tanhmã mẽ harênh to. Nom Pahihti Jejus Kris na pre ja hã tanhmã inhmã nê hkêt nê. ãm pa kot paj ãm amnhî krã hkôt tanhmã hã mẽ amã ixkapêr to. Na pre Pahihti mẽ akaxyw tanhmã ixkrã hto pa hte ÿ hã tanhmã mẽ amã mẽmoj tã karõ hto ho ri ixpa. Jakamã e mẽ inhma nê inhmar tÿx nê.

²⁶⁻²⁷ Nà ra mẽ kãm mẽ pahkurê xwÿnhjaja Kris ã mẽ pahptomnuj o pa jakamã koja ixpyrà nê mẽ hprõ hkêt rãhã mẽ pa xwÿnhjaja ahte ri pa nhũm ja mex nê. Nhũm mẽ umaj amnhî pix tânopxar o ri pa. Nê mẽ aprõ xwÿnhjaja kêr ka mẽ kãm mẽ pahkurê xwÿnhjê pymaj mẽ aprõ kaga hkêt nê. ãm pix tânopxar o ri apa.

²⁸ Tã kot ka mẽ atõ amã aprõ hprãm nê mãmri aprõ. Ja mãânên tanhmã ixpê kute hkêt. Nê mẽ ani-jaja mẽ amã amjên prãm nê mãmri amjên. Ja tanhmã ixpê kute hkêt. Nom kot ka mẽ akwÿjê pyrã nê aprõ rÿ amjên. Nê gaa nê akra. Hãmri nê tanhmã mẽmoj kute kamã ka tee ri wa mẽ amnhî kukamã ri ajamaxpêr o ri apa. Ja pymaj na pa hte mẽ amjên kêt nê mẽ aprõ hkêt ã mẽ amã awjarê.

²⁹ Nê Kris tokyx akupÿn mẽ pahwÿr wrÿk kaxyw jakamã kwa ra mẽ aprõ nê apa xwÿnhjaja. Kêr ka mẽ amnhî prõ nê amnhî kra pix kukamã ajamaxpêr o ri apa hkêt nê. Te ho mẽ hprõ hkêt nê mẽ pa xwÿnhjaja kot amnhî nhîpêx pyrã nê Kris kutêp kumrêx mã ajamaxpêr pê tanhmã amnhî nhîpêx to ho apa nê arî kormã aprõ nê akrájê ho hapu nê tanhmã mẽ kutã anojarê to ho apa.

30 Kris kot tokyx akupÿn mẽ pahwÿr wrÿk jakamã kwa mẽ ri amÿr o ri mẽ apa xwÿnhjaja. Kêr ka mẽ kutêp tee ri amnhĩ kaprĩ pix mã ajamaxpêr o akaprĩ nê ri apa hkêt nê. Nê mẽ akĩnh nê ri apikunhar o ri mẽ apa xwÿnhjaja kêr ka mẽ Kris kutêp amnhĩ kĩnh xà pix mã ajamaxpêr o ri apa hkêt nê. Nê ri mẽ axujaprôr o ri mẽ apa xwÿnhjaja kêr ka mẽ Kris kutêp tanhmã axujaprôr to pix kukamã ri ajamaxpêr kêt nê. 31 Nê mẽ apê mẽ ate mẽmoj to wênê ho ri mẽ apa xwÿnhjaja Kris kutêp ãm ri mẽ akukrêx pix kukamã ajamaxpêr kêt nê. Koja mẽ panhõ pika piitã hkôt mẽ pakukrêxja nê mẽmoj piitã arĩ rãhã hkêt nê. 32 Jakamã kot kaj mẽ akukrêx pix kukamã ajamaxpêr nê amnhĩ pix kukamã ajamaxpêr nhũm ja apê omnuj nê. Kris kwÿ pê mẽ hprõ hkêt xwÿnhjaja na htem Pahihti Jejus Kris kãm hprãm xà hkôt pix mã kãm tanhmã amnhĩ nhĩpêx to ho ri pa hprãm. Jao ãm pix kutã tanhmã nojarêt to rãhã ho ri pa. 33 No kêt ra mẽ hprõ nê mẽ pa xwÿnhjaja na htem hprõ pix kukamã kãm tanhmã amnhĩ nhĩpêx to ho pa hprãm. Jao pix kukamã amnhĩ nhĩpêx o pa. 34 Mẽ kãm Tirtũm kapêr kôt amnhĩ nhĩpêx prãm tã no ãm mãânên kãm hprõ kapêr mar nê hkôt kãm tanhmã amnhĩ nhĩpêx to ho ri pa hprãm.

Nê mẽnijaja kot Jejus kôt amnhĩ nhĩpêx nê kormã mẽ mjên kêt xwÿnhjaja na htem kãm Pahihti Jejus kãm hprãm xà hkôt pix mã kãm tanhmã amnhĩ nhĩpêx to ho pa hprãm. Nê ãm pix mã hamaxpêr o pa. Nê ãm hkôt pix mã amnhĩ nhĩpêx o pa. No ra mẽ mjên nê mẽ pa xwÿnhjaja na htem arĩ ri mẽ hikukrêx tânopxar o pa. Nê mjên mã hprãm xà hkôt tanhmã kãm amnhĩ nhĩpêx to ho pa. Jakamã tanhmã kot wem amnhĩ to nê Jejus

kãm prãm xà hkôt pix mã amnhĩ nhĩpêx o pa?

35 E ixte mẽ ato ajuta kaxyw na pa ã mẽ amã ixkapêr anê. Jakamã na pa mẽ ate mẽhõ ho aprõ nê mẽ akurê hkêt nê. ãm mẽ ate Tirtũm kapêr kôt pix mã amnhĩ nhĩpêx o apa hã na pa mẽ amã karõ. Mẽ ate kumã pix mã ajamaxpêr o ri apa pix kaxyw. Nê kumã pix mã tanhmã ri amnhĩ nhĩpêx to ho apa kaxyw na pa mẽ amã tanhmã mẽmoj tã karõ hto.

Mẽ kot mẽ hprõ mã xwÿnhjê jarênh

36 E kot paj hpãnhã mẽ ate mẽhõ ho aprõ mã xwÿnhjê mã ixkapêr ka mẽ ixkapêr ma. Nã kot kaj mẽ atõ ate ho aprõ mã xwÿnhhta kukamã ajamaxpêr o:

—Nã kot paj ho ixprõ hkêt nê. Inhmã hkĩnh tÿx tã kot paj ho ixprõ hkêt nê. Kot paj ãm ixprõ hkêt nê ahte ri ixpa. Anê.

Hãmri nê ahte ri apa. Tã ra tee amnhĩ kurê kamã ama nê ajamaxpêr o:

—Hêxta waa nê. Mon pa pre ho ixprõ hkêt nê ahte ri ixpa? Anê.

Hãmri nê mãmrĩ ma hwÿr tẽ nê kãm amnhĩ jarê nê ho aprõ. Ra ate aprõ hkêt nê ahte ri apa hã amnhĩ jarênh tã no ãm mãmrĩ ho aprõ. Ja tanhmã kute hkêt kênã. 37 Nom kot kaj ho aprõ hkêt ã amnhĩ jarê nê mãânên akurê hkêt nê ri apa. Hãmri nê mãmrĩ ho aprõ hkêt nê ri ahte ri apa. Ja mãânên tanhmã kute hkêt. 38 Kot ka ho aprõ nê war amex nê apa. Rÿ kot ka ho aprõ kêt nê mãânên amex kumrêx nê ri apa. Ja na mex o ate mẽhõ ho aprõ nê ho apata jakrenh.

Mẽ kêp mẽ mjên tyk xwÿnhjê jarênh

39 E kot paj hpãnhã mẽ apê mẽ amjên tyk xwÿnhjê mã ixkapêr. Nã koja amjên arĩ htĩr ri ka ãm hkôt pix mã axkamê nê hkaga hkêt nê. No koja nhÿrmã apê ty hãmri ka

tee ri amnhĩ kukamã ajamaxpēr hāmri nē amã axte amjēn prām nē māmri axte amjēn. Nom kwa kēr ka mē amnhĩ pyrã nē Kris kōt akwýjē hō pix o amjēn. No mamri nhām mēhō ho amjēn kēt nē. ⁴⁰ No kot ka mē axte amjēn kēt nē ahte ri apa hāmri nē axāmnhĩx ri ajamakētkati nē apa. No na pa am amnhĩ krã hkōt mē amã ā ja jarēnh anē. Mān Tirtūm Karō mā määnēn ja mex nē.

8

Sānti hã mē apkur xà jarēnh

Rōmān 14.13-23; Wam Korit̄ 10.14-22, 13.2; Karatas 5.13; Wam Pētre 4.8; Wam Juāw 3.18

¹ Nē mē ate ixwýr kagã mēnhta kamã na ka prem määnēn sānti hã mē apkur xà hã ixkukja. Tã kot paj mē amã tanhmã ja jarēnh to ka mē inhma.

Nà na hte Kris kōt pahkwý hkēt xwýnhjaja mēmo karō ho sānti nhĩpēx mã mēō hkwy nhĩpēx nē hwýr o mra. Hāmri nē hpar pē haxwý nē kutã hkōn krã ho rōrōk nē hkrĩ nē kām mex o mex ā harē nē kām amnhĩ jagrer pē amnhĩ to kuwý. Hāmri nē kām amnhĩ jagrer pa nē akupým amnhĩm mēōta jamý nē ma o mra nē hkwyjē mã ho wēnē. Na htem ā amnhĩ nhĩpēx anhýr o pa. Tã na ka prem kagãta kamã mē ate mē kēp mēō japrōr nē hkur ā ixkukja. Na ra mē ate sānti pumunh mex. Am mē kot ihkra pix o hipēx ā omunh mex jakamã na pu htem hã pamã mē apkur xàta hkur prām nē māmri paxāmnhĩx ri kuku. Ja tanhmã Tirtūm pē kute hkēt. Ra mē pahte ja pumunh mex. Tã nom kwa kēr pu mē ja hã Kris kōt mē pahkwýjē mã amnhĩ to jarkrar o ri papa hkēt nē. Nē ja hã mē kurom paxāhpumunh týx ā mē kām amnhĩ to jarkrar hkēt nē. Kot pu mē ā amnhĩ nhĩpēx anhýr o mē hamaxpēr o hihtýx hkēt nē. Kēr pu mē am mē kamã paxukapri pē tanhmã mē ho mex to ho papa. Nē

Kris kōt mē hamaxpēr o hihtýx o papa. Ā mē pa hte amnhĩ nhĩpēxja na Tirtūm kām hprām. ² No koja mēhō mēmoj pumunh týx ā amnhĩ to jarkrar o ri pa nē am tee ri ā amnhĩ jarēnh anhýr kaprý. ³ No koja mēhō āhpumunh týx kēt tã kām Tirtūm kīnh nhūm amnhĩ tã omu nē kām hapē nē ho hkra. Kēt ja na mex o mex.

⁴ E kot paj ixpri hã mē amã tanhmã sānti hã mē apkur xàta jarēnh to ka mē inhma. Nà Mēpahpāmja pixii. Axtem hō hkēt. Nom mē kot sānti nhĩpēxta am mē kot ihkra o hipēx jakamã htir kēt. Ra mē pahte ja jarēnh mar týx nē omunh mex. ⁵ Na htem ohtō nē ri sānti kēp Mēpahpām ā hkamnhĩx o pa. Kaxkwa kamã mēmo karō nhĩpēxja nē pika kamã mēmo karō nhĩpēxja nhūm htem kēp Mēpahpām ā harēnh ho pa. Nom ja kot anhýr kēt. ⁶ Mēpahpāmja am pixi ho pixi mex. Mē panhō Tirtūmja. Tām na pre mēmoj piitã ho kator pa. Jakamã na pu htem kapēr kōt pix mã amnhĩ nhĩpēx o ri papa.

Nē mē panhō Pahihti haxwýja pixii. Pahihti Jesus Krisja. Na pre Tirtūm nhĩhkō hã mēmoj piitã ho kator pa. Na pu htem ja hã omunh xà hkōt ri pamex nē ri papa. Ra mē pahte ja jarēnh mar týx nē omunh mex. Jakamã na pu htem paxāmnhĩx ri mēmoj piitã hkur o papa. Tirtūm kot mēmoj piitã ho kator par kēnã. ⁷ Tã no am ham mē kot Kris kōt amnhĩ xunhwýr xwýnhjaja na htem mē pahkīnhã kām sānti hã mē apkur xà hkur puma nē. Ham mē kot sānti kaga nē amnhĩ kaxyw Kris kōt amnhĩ xunhwýr jakamã kormã Tirtūm kōt amnhĩ nhĩpēx tohtuj anē. Jakamã na htem tee ri sānti hã mē apkur xàja pumu nē hamaxpēr o:

—Nà kot paj ja kur kēt nē. Kot paj anē nhūm apu Tirtūmja pē ja omnuj nē. Anē.

⁸ Nom na kêt hte Tîrtûm mē paxàpkur xà hà mē pahpumunh kôt mē pahte amnhî to mex xwýnh ã mē pajarēnh kêt nē. Kot puj mē mēmoj ku rý mēmoj kur kêt nē nhûm ja hà mē pahpumunh kôt tanhmã mē pamex ã pajarēnh to hkêt nē. Jakamã na pu htem māmri paxàmnhîx ri mēmoj tâ mē apkur xà hkur o papa nē tanhmã amnhî to hkêt nē. ⁹⁻¹⁰ Nom kwa mē okora. Kêr ka mē sânti mã amnhî jarēnh xà hà ixkre hwýr agjêx nē kamã axàpkur hkêt nē. Kot kaj mē atô ã amnhî nhîpêx anê nhûm mēhō kormã kot Kris kôt amnhî xãm tohtuj anhÿr xwýnhja ja hà mē apumu nē tee ri hamaxpêr. Axàhpumunh tÿx ã ate amnhî jarēnh tâ sânti nhōrkwÿ kamã axàpkur o nhÿ nhûm ja hà apumu nē tanhmã amnhî nhîpêx to wehe? Koja ja kêp omnuj tâ apyrã nē tē nē axã nē mē kutã apku. Hāmri nē apkur pa nē tee ri amnhî kukamã hamaxpêr o:

—Hêxta waa nē. Kwa mon pa axtem nē ri ã mēmojja kur anê? Nã na pa anê nē ra amnhî tomnuj tÿx nē. Anê.

Hāmri nē hkaprî nē pa. ¹¹ Ate axàhpumunh tÿx ã amnhî jarēnh tâ amnhî kôt atōja mex kukamã ajamaxpêr kêt nē. Kris ra mÿrapê htyk tâ nhûm ã ate sânti hà mēō hkur ã apumu nē tee ri hamaxpêr o Jesus hkôt amnhî nhîpêx mex kêt nē. ¹² Kormã kot Kris kôt amnhî xãm tÿx kêt tâ tee ri ja hà mē apumu nē hamaxpêr mex kêt nē. Jakamã ka Kris noo mã amnhî tomnuj nē. ¹³ Tã ã ixte Kris kôt ixkwÿjê nhîpêx anhÿr pymaj koja ixtōjê hō kãm mēmoj kur puma nē. Nē htÿx ho Tîrtûm kêp omnuj ã hkamnhîx. Pa ja hà omu nē ijaxwÿja axte hkur kêt nē. Ixte mex ã omunh tâ no ãm kot tee ri ja hà ixpumunh nē hamaxpêr o:

—Kwa Tîrtûm kêp ja mex kêt tâ nhûm Pawreja ri kuku. Jakamã kot paj ijaxwÿja urak nē kuku. Omnuj tãã.

Anhÿr o hamaxpêr pymaj kot paj urak nē mēmota kur kêt nē. Na pa hte ã Kris kôt ixtōjê mex kukamã ri ijamaxpêr anhÿr o ixpa.

9

Pawre kot amarî Tîrtûm kapêr o mē ahkre hà amnhî jarēnh

Atre 9.1-18, 20.33-35; Sikûn Korîit 11.7-9

¹ Nē ixte Jesus nhÿ hà mē ahkre ho mē pa xwýnhjê hō jakamã na pa hte Tîrtûm kapêr o mē ajahkre ho ri ixpa. Na pa pre inhno ho mē panhō Pahihti Jesus pumu nē mē amã harēnh o ri mē akôt ixpa ka prem inhma nē hkôt amnhî xunhwÿ. ² Mē hkwÿjaja kot axpên mã ixpê Jesus nhÿ hà mē ahkre xwýnh kêt ã ijarēnh tâ mē kajaja mē ate ja hà ixpumunh mex. Ixte mē amã mē ujarēnh mexja jarēnh nhûm mē ate mar nē hkôt amnhî xunhwÿrja kukwak ri na ka mē apê Jesus kwÿjê. ³ Jakamã koja mē atã ixto kapêr japêr kot paj ã mē kãm mē ajarēnh anê. ⁴ Nē ixte Jesus nhÿ hà kapêr jahkre o ixpa xwýnh jakamã kot paj inhmã Kris kwÿjê kutã amarî ixàpkur prãm nē māmri mē kutã apku. Ja tanhmã kute hkêt tâ kot paj ã amnhî nhîpêx anhÿr kêt nē. Kot paj ixàpkur kaxyw nē amnhî pãnhã amnhîre nē rî kormã apku. Na pa hte ã amnhî nhîpêx anhÿr o ri mē akôt ixpa. ⁵ Rÿ kot pa ixkwÿjê pyrã nē inhmã Kris kôt ixkwÿjê hō ho ixprō hprãm nē māmri ho ixprō. Nē wa ma krî piitã hkôt Kris kwÿjê kukwak ri ixàpkur o ixpa hprãm nē wa māmri ã amnhî nhîpêx anhÿr o ixpa. Ja mex kênã. Na hte ã Simãw Pêtre mē Jesus tō kot hapujaja amnhî nhîpêx anhÿr o pa nhûm ja tanhmã kêp kute hkêt. No ãm mē hkînhã ixprō hkêt na pa hte ri ixpa.

⁶ Nē ixkwÿjaja na htem apkur xà hpãnhã àpēnh o pa hkêt nē. Na htem Jesus nhÿ hà kapêr jarēnh o ri pa nhûm hte Jesus kwÿjaja mē

kām mē apkur xà gō nhūm mē amarī hkur o pa. Tā no pa na pa hte Panāpe mē wa ā amnhī nhīpēx anhūr kēt nē. Na pa hte wa mry kà ho ixkre nhīpēx nē mē kām ho wēnē nē hpānhā amnhīm awjaprō. Na pa hte wa ā amnhī pa kukwak ri ixujaprōr nē ho ixāpkur o ri ixpa anē.

⁷ Mē kām pur kām harōj jamūnh o mē pa xwūnhjaja na htem amarī hkwy jamū nē ho apkur o pa. Nē motre jamār o mē pa xwūnhjaja haxwūja amarī hkà kagō janē nē ho hkōm o pa. Nē pōristijaja na hte mē ō pahija mē àpēnh pānhā mē kām amnhīrer o pa. Jajē pitā na htem mē àpēnh pānhā mē kām amnhīrer o pa. Ja pyrā nē te ixpē mē amā ixāpēnh o ixpa xwūnh pyrāk jakamā ixte mē ajahkreta pānhā kot ka mē inhmā inhō ho apa nhūm ja määnēn mex nē. ⁸ No ām papxipix na pa hte ja mex ā harēnh kēt nē. Tirtūm kapēr ā kagā htūm haxwūja kot ja mex ā harēnh. ⁹ Kamā na pre finat Mojesja Tirtūm nhū hā harēnh kot:

Koja akrit amā àpēnh o pa ka omu nē ho mex nē. Kām ō mex nē. Anhūr o kot harēnh. Xà na pre Tirtūmja ām mē pahkrit pix kukamā ukapri nē ā harēnh anē nà? Nà kot anhūr kēt. ¹⁰ Määnēn mē pahpē panhī kaxyw na pre ā ja jarēnh anē. Mē pahte mē hpur kām paxāhkre xwūnhjaja nē mē pahte kamā paxujamūnh o papa xwūnhjaja. Jajē kaxyw mē pahte pur kukwak ri amarī paxāpkur o ri papa kaxyw ā pre ā ja jarēnh anē. ¹¹ Tā ja pyrā nē na pa hte mē awūr mō nē mē amā Tirtūm kapēr jarēnh o ri mē akōt ixpa. Nē mē akōt ho mē ajahkre ho ri ixpa ka htem inhmā ixāpēnhta pānhā amnhīrer kēt nē. Ixkwūjaja kot Tirtūm kapēr o mē ajahkre hpānhā mē ate mē kām amnhīrer tā pa inhmā amnhīrer kēt nē. Na pa pre mē ajahkreta pānhā

mēmoj tā mē awūr kēt nē. Ām nhām ixāpēnh ōta kukwak ri na pa hte ixāpkur o ri ixpa.

¹² Nē na hte mē ixkwūjaja mē awūr mra nē Tirtūm kapēr o mē ajahkre o ri mē akōt pa. Hāmri nē hpānhā mē apkur xà hā mē awū ka mē kām mēmoj gō. No kēt pa na pa hte mē urāk nē ixāpkur xà hā mē awūr kēt nē. Kot pa apu hā mē awū ka mē tanhmā ixto akapēr to nē axpēn mā ijarēnh o:

—Pēr ām mē pahte kām amnhīrer pix kaxyw na hte Pawre mē pahwūr mra nē mē pamā Jejus Kris kot tanhmā mē panē amnhī nhīpēx to hā harēnh o pa. Pēr ām apkur xà pix prām xāj ā kot mē pamā ujarēnh anhūr o pa. Jakamā kot puj mē kuma nē ām kuma.

Anhūr o axpēn mā ijarēnh py-maj na pa hte mē ajahkre hpānhā mēmoj tā mē awūr kēt nē. Na pa hte ām mry kà ho ixkre nhīpēx nē ho wēnē nē ja pix kukwak ri ixāpkur o ri ixpa. Nē amarī ri mē ajahkre ho ri mē akōt ixpa.

¹³ Nē Tirtūm mā amnhī jarēnh xà hā ixkre kamā mē àpēnh xwūnhjaja na htem hwūr mē mrrar xwūnhjaja mē àpēnh pānhā mē kām amnhīre. Nē mē kot mē kām Tirtūm mā mēmoj nhōr o kuhē xwūnhjaja na htem määnēn mē àpēnh pānhā mē kām amnhīre. ¹⁴ Nē Pahihti Krisja na pre ja hā mē pakukamā pahtā karō kot:

—Kēr ka mē kot tanhmā mē amā ijarēnh to ho ri mē pa xwūnhjē mā amnhīrer o ri apa. Anē.

¹⁵ Tā no na pa hte aa mēmoj tā ixāhwūr kēt nē. Nē mē ate inhmā amnhīrer kaxyw pa mē amā ja jarēnh kēt nē. Aa ixte mēmoj tā mē awūr kēt. Kot paj apu anē nē ixpi-jaam nē. Rū kot pa apu anē nē mē akukwak ri ixāpkur o ri ixpa hāmri nhūm mē akwūjaja ja hā ixpumu nē hā ijarēnh o:

—Tk. Na hte amarī mē pajahkre o ri pa hkēt nē. Ām mē apkur xà pix

prâm xàj na hte ã mẽ pajahkre ho pa anê. Anê.

Jakamã na pa hte mẽmoj tâ mẽ awÿr kêt nê. ¹⁶ Ixte mẽ amã mẽ ujarênh mexja jarênh o ri ixpa htã na pa hte ja hã amnhĩ to jarkrar o ri ixpa hkêt nê. Pahihti Jejus na pre ja hã inhmã karõ pa hte kãm ho anhÿr o ri ixpa. Kot paj kãm ho anhÿr kêt nê ixpunuj nê ri ixpa. ¹⁷ Kêp ãm amnhĩ krã hkôt mân tanhmã mẽ amã ixujarênh to ho mẽ akôt ri ixpa ronhÿx pa hpãnhã ixãmnhĩx kãxpore hã mẽ awÿ. No ãm ã ixte amnhĩ nhĩpêx anhÿr kêt. Tĩrtũm tãm kot inhmã ja hã karõ jakamã na pa hte amarĩ ixãmnhĩx ri mẽ amã kapêr jarênh o mẽ ajahkre ho ri mẽ akôt ixpa nê mẽmoj tâ ixãhwÿr o ri ixpa hkêt nê. ¹⁸ Ixte amarĩ ri mẽ amã mẽ ujarênh mexta jarênh o ri ixpaja na inhmã hprãm. Ja na inhmã mex. Na pa hte ã amnhĩ nhĩpêx anhÿr o ri ixpa nhũm ja inhmã mex pa ixkĩnh nê ri ixpa. Jakamã na pa hte hpãnhã ixãhwÿr kêt nê. Nê inhmã mẽmoj prãm o ri ixpa hkêt nê. ¹⁹ Nê nhãm mẽ kãm tanhmã ixapênh to ho ixpa hkêt tâ pa hte mẽ piitã tanhmã mẽ kãm amnhĩ nhĩpêx to ho ri ixpa. Pê mẽ kãm Jejus kapêr jarênh o ri ixpa. Jakamã na mẽ ra ohtõ nê ixujarênh ma nê amnhĩ kaxyw Jejus kôt hamaxpêr nê hkôt amnhĩ xunhwÿ.

Pawre kot tãm mẽ piitã mẽ hipêx o pa hã amnhĩ jarênh

Wam Korîit 10.33

²⁰ Nê na pa hte Ijaewjê hwÿr ixpa nê mẽ kot amnhĩ nhĩpêx kôt amnhĩ nhĩpêx o ri mẽ hkôt ixpa. Ixte mẽ kurom Tĩrtũm kot finat Mojes mã mẽmoj tâ karõ hkôt amnhĩ nhĩpêx o ixpa hkêt tâ mẽ hkôt ri ixpa nê mẽ urãk nê hkôt amnhĩ nhĩpêx o ri ixpa. Mẽ kot ja hã ixpumunh nê ixte mẽ kãm Jejus jarênh mar nê ixpyrà nê amnhĩ kaxyw hkôt hamaxpêr kaxyw.

²¹ Tã pa hpãnhã mẽ kêp Ijaew kêt xwÿnhjê hwÿr ixpa nê mẽ kot amnhĩ nhĩpêx kôt amnhĩ nhĩpêx o ri mẽ hkôt ixpa. Mẽ kot ja hã ixpumunh nê ixkapêr mar nê ixpyrà nê amnhĩ kaxyw Jejus kôt hamaxpêr kaxyw. Tĩrtũm mẽ Kris wa hamaxpêr xã hkôt na pa hte ahpÿnhã mẽ kot amnhĩ nhĩpêx xwÿnhjê hwÿr mra nê ã amnhĩ nhĩpêx anhÿr o ri mẽ hkôt ixpa.

²² Nê na pa hte kormã mẽ kot Kris kôt amnhĩ xunhwÿr tohtuj anhÿr xwÿnhjê hkôt ri ixpa nê te ixte ho mẽ urãk nê kormã hkôt amnhĩ xãm nyw pyràk o amnhĩ nhĩpêx o ri mẽ hkôt ixpa. Mẽ kot ja hã ixpumunh nê ixkapêr mar nê hkôt amnhĩ nhĩpêx mex kaxyw. ã na pa hte mẽ piitã mẽ hkôt ri ixpa nê mẽ hkôt amnhĩ nhĩpêx o ri ixpa anê. Mẽ kot ja hã ixpumunh nê inhmar nê ixpyrà nê Kris kôt amnhĩ nhĩpêx tÿx kaxyw. ²³ Mẽ kot mẽ ujarênh mex mar kaxyw na pa hte mẽ piitã mẽ hkôt ã amnhĩ nhĩpêx anhÿr o ri ixpa. Tĩrtũm kot mẽ ho hkra nê mẽ ho mex kaxyw. Nê mããnen pa kot mẽ hã ixto mex kaxyw.

Pawre kot htÿx ri amnhĩ nhĩpêx kêt ã kot amnhĩ jarênh

Sikũn Ximotre 4.7; Eprêw 12.1-3

²⁴ Mẽ hprõt xwÿnhjaja na htem hprõt tÿx no nhũm mẽhõ pixi nê wam hkwyjê re nê wam tẽn pøj nhũm htem ja hã omu nê kãm mẽ hkĩnhxã gã. Ja pyrà nê kêr ka mẽ apiitã tãm amnhĩ nhĩpêx mex rãhã ho ri apa kê Tĩrtũm mẽ apumu nê nhÿrmã ja pãnhã mẽ amã mẽmoj mex gã.

²⁵ Nê mẽ hprõt xwÿnhjaja na htem mẽ hkĩnhxã hpyr prãm xàj mẽ hprõt xã hã arĩgro hwÿr apkati mẽ hprõt o kuhê. Prõt tÿx prãm xàj. Tã mẽ hprõt xã hã arĩgrota ã nhũm hkwyjê pê amnhĩ to wa nê amnhĩm hkĩnhxã py. Nom koja hkĩnhxãja kripêem kãm mex ry hkêt nê. Koja gaa nê hapêx tokyx anê. Tã nom

kot puj më Tirtüm kapër kôt amnhî nhîpêx mex o ri papa. Nê më hprôt xwÿnhjê kot hkînhxà hpyr prâm xàj apkati më hprôt o kuhêta pyrà nê apkati më hkôt amnhî nhîpêx mex o ri papa. Hâmri nhùm amnhî tâ më pahpumu nê nhÿrmã më pamã hkînhxà mex õ gõ. No âm jar hkînhxà kurom koja aa më pahpê hapêx kêt nê. Koja më pamã mex rãhã ho rãhã.

²⁶ Nê na hte më hprôt xwÿnhjaja htÿx ri tanhmã hprôt to ho pa hkêt nê. Na htem hkwyjê pê amnhî to wa kaxyw hprôt nê nhÿri më àhuk xàta pix pumunh pê hwÿr hprôt nê mra hãmri nê kamã ahtwÿ. Nê kamã àhuk pix kukamã hamaxpêr o hprôt tÿx nê mra. Ja pyrà nê na pa hte apkati më Tirtüm kôt pix mã amnhî nhîpêx o ri ixpa. Nhÿrmã kot inhmã mëmoj mex nhôr kaxyw.

Nê më pijapu mex xwÿnhjaja na htem htÿx ri nhÿhÿnh axpên tak kêt nê. Na htem nhÿhÿnh kot më htak o më rênh xà pix kamã më htak o më rênh kukamã hamaxpêr pê kamã më htak. Ja pyrà nê na pa hte ixtÿx ri tanhmã amnhî nhîpêx to ho ri ixpa hkêt nê. Na pa hte Tirtüm mã ijamaxpêr pê tanhmã amnhî nhîpêx to rãhã ho ixpa. Kot nhÿrmã inhmã mëmoj mex nhôr kaxyw. ²⁷ No na pa hte ixtÿx ri amnhî jamaxpêr xà hkôt tanhmã amnhî nhîpêx to ho ri ixpa hkêt nê. Kot pa ã amnhî nhîpêx anê nê ixte më kãm Jejus kapêr jarênh o ri ixpa htã âm ri ixtÿx ri ã amnhî nhîpêx anhÿr kaprÿ nhùm Tirtümja tee ri ja hã ixpumu nê inhmã mëmoj mex nhôr kêt nê.

10

Ijaew kot amnhî nhîpêx

Rômân 15.4; Eprêw 3.8-11; Jutre 5

¹ E Kris kôt ixkwÿjaja. Kot paj më amã amnepê mã më ixpê Ijaew hkukamã më inhîgêjtaja tanhmã më harênh to ka më inhma. Më kot pahî finat Mojes kôt ri më pa

xwÿnhjaja kot paj më amã harê. Më pahte më urak nê pahtÿx ri amnhî nhîpêx pymaj kot paj më amã tanhmã më harênh to ka më inhma. Mãn ka më arî më harênh ã anohtÿx japêr. Na prem piitã pika pê Ejit kamã pa htã kurüm kator pa. Hâmri nê ma kapôt ã kakrã pumunh o hkôt pa ho pa. Pry hkêt jakamã nhùm pre Tirtüm tanhmã kakrã hto nhùm ma më hkukamã pa nhùm më omu nê hkôt pa. Hâmri nê ra gõ xujanâr më kot kãm: “Gô kamrêk” anhÿr xwÿnhjaja wÿr pøj nê tee ri rêr prâm xàj amnhî kukamã hamaxpêr. Hâmri nhùm Tirtüm më kãm hkôt ã ho angrà nhùm më hkôt mex pê rêr pa nê axte kakrã hkôt pa ho pa. ² Finat Mojes kot më o pa jakamã nhùm prem kêp hkwy hã amnhî jarê nê kãm amnhî jarênh o:

—Nà kot paj më akapêr ma nê akôt ri amnhî nhîpêx o ixpa. Anê.

Te më pahpê Kris kwÿ hã amnhî jarênh kaxyw më kot gôx kãm më pahkrã kumrâr nhùm më pahte Kris mã amnhî jarênhhta pyràk. ³ Na prem kapôt ã ri pa nhùm Tirtüm tãm kaxkwa rùm më hwÿr më apkur xà rê nhùm më hkawrà nê ho apkur o pa. ⁴ Tã ra kôr xàj hirôt nhùm Tirtüm tanhmã më kãm kên prêkja to nhùm kurüm më kãm gõ axkapî nhùm më ho ixkô nê akupÿm hihtÿx. Æ Krisja më hkôt më ho më hihtÿx o pa anê. Më kot no ho omunh kêt tâ nhùm më hkôt më ho më hihtÿx o pa.

⁵ Tã no nhùm më ohtô nê Tirtüm kôt amnhî nhîpêx kêt nê. Kot më ho mex kumrêx tâ nhùm më âm amnhî tâ omu nê âm omu nê kapêr kôt amnhî nhîpêx kêt nê. Âm kapêr kwÿm ri tanhmã amnhî tomnuj to ho pa nhùm tee ri amnhî tâ më omu nê tanhmã më ho nhùm më hkwyja hpikaprâr pa. Hâmri nhùm arî më htîr xwÿnhjaja kapôt ã më hagiênh pa nê axte ma pa.

⁶ Jakamã kwa kêr pu më kot ã

amnhî nhîpêx anhÿr ã më harênh ma nê hã pano htÿx nê ho papa hãmri nê ho më uràk kêt nê. Më uràk nê pahtÿx ri tanhmã amnhî nhîpêx to ho ri papa hkêt nê.

⁷ Nê na pre më hkwÿjaja sânti kutã hkôn krã ho rôrôk nê hkrî nê kãm amnhî jagrer pé amnhî to kuwÿ. Tirtûm kapêr ã kagã htûm kot më kot amnhî nhîpêx anhÿr ã më harênh kot:

Na prem sânti kutã apkur o hkrî
nê kãm amnhî jagrer o hkrî
nê gaa nê pipãnh pix o pa.
Jao axpên kamã hpijaàm kêt
o pa.

Anhÿr jakamã kwa kêr pu më ã më kot amnhî nhîpêx anhÿrja ã pano htÿx nê ho më uràk hkêt nê.

⁸ Nê na pre më hkwÿjaja htÿx ri mjên nê hprô kuhpa hã nhãm ri më kamã hpijaàm kêt o pa. Mÿrapê nhûm arÿgro pixi hã më ohtô rax kumrêx nê axkaprã. Më kêp 23.000 nê pikaprãr pa. Tã ã Tirtûm kot më panhîpêx anhÿr pymaj kêr pu më ja hã pano htÿx nê ho më uràk kêt nê. Æm kwarî ho kwarî.

⁹ Nê na pre më hkwÿjaja axtem nê htÿx ri tanhmã axpên mã Tirtûm jarênh to nê harênh o:

—Nã Tirtûmja gryk tokyx anhÿr kêt jakamã kwa pu më ã amnhî tomnuj anhÿr o papa. Kojã më pahpumu nê tanhmã më pahto hkêt nê.

Anhÿr tã nhûm tee ri ja hã më kuma nê më omu nhûm ja kãm mex kêt nê nhûm më hwÿr kagã xoprê nhô wenên xihtÿx kwÿrê nhûm më hwÿr mra nê më hkamnhar o më hkwÿjê pa. Tã ã kot më panhîpêx anhÿr pymaj kwa kêr pu më ja hã pano htÿx nê më uràk nê amnhî tã Tirtûm kamã pajamak o papa hkêt nê. Kwarî ho kwarî.

¹⁰ Nê na pre më hkwÿjaja axtem nê Tirtûm o kapêr punuj nê nhûm tee ri amnhî tã më kuma nê më hwÿr kapêr o wrÿk xwÿnh më nhûm ma më hwÿr wrÿy nê ý hã më hkwÿjê nhîmex. Tã ã kot më

panhîpêx anhÿr pymaj kwa kêr pu më ja hã pano htÿx nê ho më uràk nê Tirtûm o pakapêr punuj kêt nê.

¹¹ Na pre më ixpê Ijaew nhîgêjtjaja ã htÿx ri amnhî nhîpêx o pa anê. Tirtûm kapêr ã kagã htûm kot ã më kot amnhî nhîpêx anhÿr pi-itã harênh par. Më panhõ ejêp kaxyw. Më pahte kamã harênh nê më harênh mar tÿx nê më uràk nê ã amnhî nhîpêx anhÿr kêt kaxyw. Ra Jejus akupÿn më pahwÿr wrÿk xã hã arÿgro hkukamã grêre jakamã kwa kêr pu më kutêp më kurom kapêr kôt pix mã ri amnhî nhîpêx mex rãhã ho ri papa.

Më pahte mëmoj punuj nê amnhî to htÿx ã më pamã karô

Matêwre 4.1, 6.9-13; Wam Korîit 1.8; Sikûn Pêtre 2.9; Jutre 24

¹² Tã kêr ka më ã Ijaew kot amnhî nhîpêx anhÿr ã më harênhja ma nê ã ajamaxpêr anhÿr kêt nê. Rÿ më ajamaxpêr o:

—Nã mëmoj piitã kutã ixihÿtÿx kênã kot pa hkêt më uràk nê ã amnhî nhîpêx anhÿr o ri ixpa.

Anhÿr o më ajamaxpêr kêt nê. Kot kaj më ã amnhî jarênh anê nê ra më uràk nê tanhmã amnhî tomnuj to.

¹³ Nê na prem kapôt ã pare ri omnuj nê ri pa. Nhûm mëkarômnuti tanhmã më hkrã hto nhûm më tanhmã amnhî tomnuj to ho pa. Ja pyrã nê na hte arÿ më pahte amnhî tomnuj hprãm xãj tanhmã më pahkrã hto ho pa. Më pahpiitã ã më pahto anhÿr o ri më pahkôt pa. Nom nhûm Tirtûm ra kot më pamã amnhî jarênh xã hkôt më panê omunh mex rãhã ho pa. Jakamã na pu htem tanhmã amnhî tomnuj to hkukamã pajamaxpêr nhûm ja hã më pahpumu nê më panê mëkarômnuti mã kapêr. Nê kutã më pahto paxihÿtÿx nê pu më ý hã amnhî tomnuj kêt nê. Nê Æm kôt pix mã amnhî nhîpêx mex o ri papa.

Mê kot sânti mā mẽmoj nhõr xwýnhjê jarênh

Wam Korîṭ 8.1-13; Karatas 4.8; Apokarip 9.20

¹⁴ Jakamã e Kris kôt ixkwýjaja. Kêr ka mẽ amnhî kaxyw sânti hkôt ajamaxpêr o ri apa hkêt nê. Nê amnhî to hwýr kêt nê. Âm kwarî ho kwarî.

¹⁵ E mẽ axàhpumunh týx ã amnhî jarênh jakamã kot paj mẽ amã mẽmoj jarê ka mẽ aprî hã inhmar týx japêr. ¹⁶ Nà na pu htem tõhã Jejus kot mẽ panê htyk mã paja-maxpêr kaxyw axpên wýr akuprô. Hãmri nê mẽmo kagô hkwý ru nê Tirtüm mã mex ã harê nê mẽmoj o pahkôm pê Jejus kot mẽ panê hkamrô pikapîr mã pajamaxpêr. Nê hpãnhã pãwti hõ py nê axpên mã ho hkry nê mẽ kot Kris pîr nê ï kamã hkamnhwýr nhùm mẽ panê htykja mã pajamaxpêr pê kuku. ¹⁷ Pãwtita âm pixire htã pu htem axpên mã ho hkry nê pahp-itã kuku. Mẽ pahpê Kris kwý hã mẽ pahte amnhî jarênh nhùm mẽ pahkwý kot ja hã mẽ pahpumunh kaxyw. Te mẽ pahtipxi nê ri mẽ papa pyrãk nê pãwti pixire htã pu mẽ pahpiitã kuku.

¹⁸ E kot paj hpãnhã mẽ amã am-nepê mã Ijaew kot tanhmã amnhî nhîpêx to jarê ka mẽ inhma. Na pre htem Tirtüm mã mex ã harênh nê kãm amnhî nhõr ã kot amnhî tã mẽ omunh kaxyw nhùm prem tanhmã amnhî nhîpêx to. Jao kãm mẽ apkur xà hkwý gõ nê kãm mex o mex ã harê. Hãmri nê amnhî mã mẽmojta kwý xà nê hkur o hkrî. Jao ra Tirtüm mã mex o mex ã harê nê kãm kêp hkra hã amnhî jarê.

¹⁹ Nom mẽ kot sânti mã mẽmoj nhõr xwýnhjaja na htem kãm mẽmo mẽ apkur xà hkwý gõ nom âm kãm ôr kaprý. Tanhmã kot we amnhî to nê amnhî tã mẽ omu? Mo rît kaxyw no? Âm mẽ ïhkra ho mẽ kot amnhîm hipêx kênã.

Jakamã na htem âm kãm mẽ ap-kur xà hkwý nhõr kaprý. ²⁰ Mẽ kot sânti mã mẽmoj nhõr xwýnhjaja na htem Tirtüm mã ôr kêt nê. Mêkarõmnuti mã na htem kugô. Jakamã kot kaj mẽ urãk nê sânti mã mẽmoj gõ nê apê mêkarõmnuti hkwý hã amnhî to amnhîrît nê apê hkwý hã ri apa. Jakamã mẽ ate sânti mã mẽmoj nhõrta na inhmã hprãm kêt kumrêx. ²¹ Kot kaj mẽ panhõ Pahihti Jejus kot mẽ panê htyk ã mẽmoj kagô hkwý ho ixkô hãmri nê ma mra nê hpãnhã sânti pê mêkarõmnuti hã mẽmoj to ixkô. Hãmri nhùm Tirtümja tee ri ja hã mẽ apumu nhùm ja kêp omnuj týx nê. Rý ka mẽ Pahihti Jejus kot mẽ panê htyk ã pãwti hkwý hku nê hpãnhã ma mra nê sânti pê mêkarõmnuti hã mẽmoj hku. Hãmri nhùm Tirtüm kêp ja omnuj týx nê. Mẽ pahte ã amnhî nhîpêx anhýrja na axpên kuhpa hã. ²² Jakamã kot ka mẽ ã amnhî nhîpêx anê nê te ra mẽ amã mêkarõmnuti hkînh nê mãânên amã Tirtüm kînh pyrãk o amnhî nhîpêx. Nê te Tirtüm kurom mẽ kajaja mẽ axàhpumunh týx pyrãk o amnhî nhîpêx. Nhùm tee ri amnhî tã mẽ apumu nê mẽ akamã gryk týx nê. Kwa mẽ okora. Koja Tirtüm akamã gryk ka amex kêt kumrêx.

Mẽ pamã Kris kôt mẽ pahkwýjê hkînh pê mẽ ho mex ã mẽ pamã karô

Matêwre 20.28; Römãn 14.1-15.7; Piripos 2.1-4

²³ Nê na htem tõhã amnhî jarênh o:

—Nà kot pa inhmã mẽmoj to anhýr prãm nê ixãmnhîx ã amnhî nhîpêx anhýr o ri ixpa. Anê.

Tã no âm mẽmoj piitã mẽ pamã mex kêt. Na htem kãm mẽmoj to anhýr prãm xà hkôt mẽmoj piitã tanhmã ho ho ri pa nê tanhmã amnhî tomnuj to. Hãmri nhùm mẽ hkwýjaja ja hã mẽ omu nê mẽ urãk nê tanhmã ri amnhî tomnuj to. Jao Kris kôt amnhî xunhwýr týx kêt nê. ²⁴ Jakamã kwa kêt nê mẽ

amnhî pix kukamã pajamaxpêr pê tanhmã amnhî nhîpêx to ho papa hkêt nê. Mâânên amnhî kwýjê hkukamã pajamaxpêr pê tanhmã mê ho mex to ho ri papa pê tãm ri amnhî nhîpêx o papa.

²⁵ Nê kot kaj mê amnhî xàpkur xà japrôr kaxyw ma nhÿhÿm mra nê mãmri axàmnhîx ri amã mëmoj prãm xà hkôt mëmoj japrô. Nom kêr ka mê axujaprôrja kêp sânti xàpkur xà hã mê hkukjêr kêt nê. Æm axàmnhîx ri mê kêp mëmoj japrôr o ri apa. ²⁶ Tirtûm kapêr ã kagã htûm kot ja jarênh kot:

Pika piitã hkôt mëmoj piitã kêp

Tirtûm nhô na. Anê.

Jakamã mê mãmri axàmnhîx ri mëmoj piitã haprô nê mëmoj piitã hkur o apa.

²⁷ Tã koja mê kêp Kris kwý hkêt xwÿnhjê hõ ate kutã axàpkur kaxyw amnhî wÿr awý ka amã hwÿr amôr prãm nê mãmri ma hwÿr mô. Nhûm mëmoj to amã anhô ka axàmnhîx ri mãmri aku. No ri tee ri amnhî kukamã ajamaxpêr nê tanhmã hã hkukjêr to hkêt nê. Rÿ kãm:

—Kwa xà we mryja sânti hã mê apkur xà na nà?

Anhÿr o hã mê hkukjêr kêt nê. Æm mãmri axàmnhîx hkur o akrî. ²⁸⁻²⁹ Nom koja Kris kôt mê kot amnhî xãm tohtuj anhÿr xwÿnhjê hõ mê awÿr axà nê tee ri ja hã apumu nê amã:

—Kwa sânti hã mê apkur xà na ka ri mê kutã hkur o akrî.

Anhÿr o amã kapêr ka ama nê hkaga kurê kumrêx nê hkur kêt nê. Amã mex tã Kris kôt atôja kêp omnuj jakamã ka hkaga nê hkur kêt nê. No kot ka ãm ama nê arî hkur o anhÿr japêr. Kot amã harênh xwÿnhÿta kêp omnuj tã ka arî noo mã hkur japêr. Nhûm ja hã apumu nê tee ri Tirtûm kapêr kukamã tanhmã hamaxpêr to. Hãmri nê apyrã nê kuku nê gaa nê tee ri amnhî kukamã hamaxpêr nê amnhî mã:

—Hêxta waa nê. Sânti nhôja mex kêt tã pa ri kuku. Kwa na pa pêr hkurja o amnhî tomnuj nê. Hêxta waa nê. Anê.

Hãmri nê tee ri amnhî kukamã hamaxpêr o hkapri nê. Æ kot amnhî nhîpêx anhÿr pymaj koja mëhõ ã mëmo më apkur xà nê amã kapêr anê ka ama nê hkaga kurê kumrêx. Jao amnhî pix kukamã ajamaxpêr kêt nê. Mâânên Kris kôt atô nê atôxjê mex kukamã ajamaxpêr. Nom koja amã kêp sânti hã mê apkur xà hã harê ka ama nê ã ajamaxpêr anhÿr japêr nê ajamaxpêr o:

—Nà kêp omnuj tã kot paj mamri kuku. Ja inhmã mex kêna. ³⁰ Ra ixte Tirtûm mã harênh nê ixàmnhîx hkur o inhÿr kêna kot kêt ã nê inhmã kapêr anê. Anê.

Kwa mê ã ajamaxpêr anhÿr kêt. Kot kaj mê ã ajamaxpêr anê hãmri nê Kris kôt atô rÿ atôx mex kukamã ajamaxpêr kêt nê.

³¹ Jakamã kêr ka mê tãm tanhmã amnhî nhîpêx to ho ri apa. Nê axapênh mex nê. Kêr kê mê piitã ja hã mê apumu nê mê apumunh kôt amnhîm Tirtûm mex ã harê. ³² Nê kêr ka mê piitã mê noo mã tãm ri amnhî nhîpêx o apa. Ijaew noo mã nê Ijaew kêt xwÿnhjê noo mã. Nê Jejus kwýjê noo mã. Mê piitã mê noo mã tãm ri amnhî nhîpêx rãhã ho ri apa. Mê kot tee ri mëmoj tã mê apumunh nê hpijaam pymaj ka mê tãm ri mê piitã mê noo mã tanhmã amnhî nhîpêx mex to ho ri apa. ³³ Na pa hte ã amnhî nhîpêx anhÿr o ri ixpa. No na pa hte pa amnhî pix kukamã ijamaxpêr kêt nê. Mê piitã mê mex kukamã na pa hte ijamaxpêr o ri ixpa. Pê tanhmã amnhî nhîpêx to ho ri ixpa. Mê kot ja hã ixpumunh nê ixpyrà nê Jejus kôt amnhî xunhwÿr nê ãm kôt pix mã ri amnhî nhîpêx o pa kaxyw.

11

¹ Na pre hte Kris ã ã amnhî

nhîpêx anê nê mē piitā mē mex kukamā hamaxpēr rāhā ho ri pa. Tā na pa hte urāk nê ā amnhî nhîpêx anê. Jakamā kwa kēr ka mē ixpyrā nê ā amnhî nhîpêx anhÿr o mǎn ri apa.

Mēnijaja mē mjên ā hpijaām ā mē kām karō

Epes 5.22; Wam Pêtre 3.1-6

² Nê na ka xep htem arî ra ixte tanhmā mē amā ixkapēr toja mǎ ajamaxpēr tÿx o ri apa. Na pa pre Kris kôt mē pahō nê mē pahōxjaja axpēn wÿr pikuprōnh nê tanhmā amnhî nhîpêx to hā mē amā karō ka prem inhma nê mē urāk nê ā amnhî nhîpêx anê. Ām hāmri na ka htem ā amnhî nhîpêx anhÿr o apa. Ja na inhmā mex.

³ Na pa pre krî hō kamā mēnijaja kot amnhî krā hpro hā mē amā mē harē. Ka prem inhma nhūm mē akwÿjaja kām ja mex nê nhūm mē akwÿjaja tee ri ja kukamā ajamaxpēr. No mēmo kaxyw na hte mēnijaja amnhî krā hpro? E kot paj ixprî hā mē amā ja jarē ka mē inhma. Nā Tirtūm kēp Kris jamār xwÿnh nhūm Kris kēp Tirtūm mǎ mē inhmyjē jamār xwÿnh. No mē anijaja mē amjên kēp Kris mǎ mē ajamār xwÿnh. Na hte mēnijaja ohtō nê ra mē mjên ā amnhî to amnhîrit kaxyw amnhî krā hpro nê ri pa. No mē inhmyjaja na pa htem ā amnhî nhîpêx anhÿr kêt nê. Na pa htem amarî ixkrā hkênh nê ixpa. ⁴ Jakamā na pa htem Tirtūm kapēr mar xā hā ixkre hwÿr axpēn wÿr akuprō nê Tirtūm nhÿ hā mē anijē mǎ kapēr jarēnh o ixkuhē. Rÿ Tirtūm mǎ tanhmā mē pajarēnh to. No ām amnhî krā hpro hkêt rāhā kām mē ajahkre rÿ kām mē pajarē. Kot pa mē amnhî krā hpro nê te mē apē ixprōjaja mē apē mē ijamār xwÿnh ā mē ajarēnh pyrāk. Jao te mē ixte mē ijamār xwÿnh Kris ā ixpijaām kêt pyrāk o amnhî nhîpêx. ⁵ No mē anijaja mē ixte Kris

mǎ mē ajamār xwÿnh jakamā na ka htem Tirtūm nhÿ hā mē inhmā kapēr jarēnh rÿ kām mē pajarēnh kaxyw nê amnhî krā hpro. Mē ixte Kris mǎ mē ajamār xwÿnhjē hā apijaām kaxyw ā amnhî nhîpêx anê nê mē amnhî krā hpro. Kot ka mē ā amnhî nhîpêx anhÿr kêt nê te mē ate mē ixtā apijaām kêt pyrāk o amnhî nhîpêx nhūm mē amjên tee ri ja hā apumu nê hpijaām nê. Te ate amnhî krā hkênh nê ri apa nhūm tee ri apumunh nê hpijaām pyrāk. ⁶ Kot kaj mē amnhî krā hkênh nê ri apa nê amnhî kamā apijaām nê ri apa. Mē anijaja na ka htem akrā hkî japjē nê kamā amex nê ri apa. No kot ka mē amnhîm akrā hkênh nê apunuj nê amnhî kamā apijaām nê ri apa. Jakamā kēr ka mē Tirtūm mǎ amnhî jarēnh kaxyw nê amnhî krā hpro. Nom kot ka mē amjên ā apijaām kêt nê ri apa hprām japēr nê mamrî amnhîm akrā hkênh nê ri amnhî kuk ā apijaām kêt nê ri apa.

⁷ No mē inhmyjaja na pa htem amnhî krā hpro hkêt nê. Te mē ixpē Tirtūm pyrāk nhūm mē anijaja te mē apē Tirtūm kra pyrāk o na pu htem axpēn nhîpêx. Tirtūm krajaja na htem mēmoj tā Tirtūm mǎ karō hkêt nê. Ja pyrā nê mē anijaja na ka htem mē inhmyjē mǎ mēmoj tā karō kamā axihtÿx o apa hkêt nê. Na ka htem mē ixtā apijaām kām mēmoj tā mē ixwÿ.

⁸ Amnepē mǎ Tirtūm kot mēmoj to kator krax rūm na pre myja kumrēx nhîpêx hāmri nê kēp ōkwa i hō kapa nê ho kām hprō nhîpêx. No na pre nija kumrēx nhîpêx nê ōkwa i ho kām mjên nhîpêx kêt nê. ⁹ Myja mǎ na pre hprō nhîpêx. No nija mǎ mjên nhîpêx kêt nê. ¹⁰ Jakamā kēr ka mē anijaja amjên ā apijaām ā amnhî to amnhîrit kaxyw hāmri nê mē inhmā Tirtūm nhÿ hā tanhmā akapēr jarēnh to kaxyw rÿ kām amnhî jarēnh kaxyw hāmri nê

amnhî krâ hpro nê akuhê. Hâmri nhûm Tîrtûm kapêr o mē wryk xwÿnhjaja ja hã mē apumu nê hkînh nê tee ri mē akukamã hamaxpêr kêt nê.

11-12 Nê wam ni kator xwÿnhnta na pre myja rûm kato. Tã na pa htem jarãhã mē inhmyjaja hpãnhã mē anijê rûm ijapôj. Tîrtûm jamaxpêr xã hkôt. Tãm na pre ã mē pahte amnhî nhîpêx anhÿr kaxyw ã mē panhîpêx anê. Tã mē ixpê Pahihti Kris kwÿ hã mē inhmyjaja nê mē anijaja na pu htem ri ahte papa hkêt nê. Na pu htem axpên kutã pamã axpên hkînh o papa nê mēmoj to axpên kutã panojarêt o ri papa. Nê axpên to presija ho papa. Na hte mē anijaja mē amjên o presija ho apa. Nê mē amyjaja na ka htem mē aprô ho presija ho apa. Tã kêr ka mē anijaja mē amjên ã apijaãm o ri hkôt apa. ¹³ Jakamã kwa mē kot amnhî krâ hproja kukamã ajamaxpêr tÿx nê. Xã mē anhô krî kamã mēnijaja mē mjên ã hpijaãm ã amnhî to amnhîrit kaxyw amnhî krâ hpro nã? Koja mē ja kaxyw ã amnhî nhîpêx anhÿr japêr kê mē rî mē anoo mã Tîrtûm mã amnhî jarênh kaxyw nê kupê xê hkwy ho amnhî krâ hprô nê rî kãm amnhî jarê. Nom koja mē ã amnhî nhîpêx anhÿr kêt nhûm mēmyjaja tee ri ja hã mē omunh nê ho kapêr hkêt japêr hãmri kê mē rî amnhî krâ hpro hkêt nê ri pa.

¹⁴ Mē kot mē pahte amnhî nhîpêx ã mē pahpumunh nê hkînh kaxyw na pu htem tanhmã amnhî nhîpêx to ho ri papa. Na htem mē pahkrã hkî jarênh o: “Koja mēmyjaja hkrã hkî japjê nê ri pa nê ra kamã omnaji.” Anhÿr jakamã na pa htem amnhî krâ hkênh nê ri ixpa. ¹⁵ No mē anijaja na htem mē ajarênh o: “Mēnijaja na htem hkrã hkî japjê nê ri pa nê kamã muxti.” Anhÿr jakamã na ka htem akrã hkî japjê nê ri apa. Mē akî te kêp mē akrã

hpro xã pyrãk. Na ka htem ã amnhî nhîpêx anhÿr o apa.

¹⁶ E na pa ra mē amã krî hkwy kamã Kris kwÿ nijaja kot mjên ã hpijaãm ã amnhî to amnhîrit kaxyw tanhmã amnhî nhîpêx to hã mē harê. Tã koja mēhõ nija tee ri ja ma nhûm ja kêp omnuj japêr. Nhûm amnhî jarênh o:

—Kêt. Kot paj tanhmã inhmã amnhî nhîpêx to hprãm xã hkôt tanhmã ri amnhî nhîpêx to ho ri ixpa. Koja inhmyjaja ja hã ixpumu nê hpijaãm nê rî tãm.

Anhÿr ã amnhî jarê ka mē tee ri ã kot amnhî jarênh anhÿrja ã ama nê kãm:

—Kwa nã ã ri ajamaxpêr anhÿr kêt nê. Na hte Kris kwÿjaja ã hamaxpêr anhÿr kêt nê. Anê.

Jejus tyk mã mē pajamaxpêr pê tanhmã mē pahte amnhî to hã mē pajarênh

Matêwre 26.26-30; Makre 14.22-26; Rukre 22.19-20

¹⁷ Nê na ka xep htem Tîrtûm mã amnhî jarênh xã hã ixkre hwÿr axpên wÿr akuprô nê kamã amnhî to mex kêt nê. Na ka htem tanhmã amnhî tomnuj to pa tee ri mē ajarênh ma nê ixkaprî nê. Nê amnhûm mē amex ã mē ajarênh kêt nê. ¹⁸ Na ka xep htem axpên wÿr akuprô nê mēmoj tã axpên mã akir nê axpên pê anhgrã. Nê ahpÿnhã mēmoj mã ajamaxpêr jao ra mē amã axpên kînh kêt nê. Na pa tee ri ã mē ajarênh anhÿrja ma nê ixkaprî htÿx nê. ¹⁹ Xã na hte Tîrtûm ahpÿnhã tanhmã mē pahte amnhî anhîpêx to hã mē pahpumunh kôt kãm mē pajapê hkêt ã amnhî jarê? Nã na hte ã amnhî nhîpêx anhÿr kêt nê. Kãm mē pajapê ho axpên pyrãk kênã.

²⁰ Nê na hte Kris kwÿjê piitã tãhã axpên wÿr akuprô nê Jejus tyk mã hamaxpêr kaxyw pãwti hkwy hku. Tã mē kajaja na ka xep htem ja kaxyw axpên wÿr akuprô nom axtem nê Jejus tyk

mã ajamaxpēr pē axàpkur kêt nē. Ām mẽ axàpkur pix kukamã ajamaxpēr nē axtem nē axàpkur rũnh o akrī. ²¹ Jao amnhī pix kukamã ajamaxpēr. Mē akwýjaja wam mñar nē hpòx nē mẽ apkur xà hã mẽ hkrī xwýnhjaja na xep htem hkwyjé rom mẽõta pinh pa. Nē wĩhtija nhũm mẽ mãânēn hpenh pa nē axtem nē ho axpã. Jakamã nhũm mẽ akwýjaja kot amnhī to hapu nē hpòx xwýnhjaja mẽmojta ã hprār pa. ²² Kwa mon ka mẽ amã hprãm nē anhõrkwý kamã axàpkur kêt nē? Mē kot Tĩrtũm mã amnhī jarēnh xà hã ixkre kamã na htem apkur rũnh hkêt nē. Ka mẽ ã amnhī nhĩpêx anē nhũm mẽõ hkêt xwýnhjaja amnhī to hapu nē mra nē mẽõ hã prã nē amnhī kamã hpijaam nē. Kwa xà kot pa ã mẽ ate amnhī nhĩpêx anhỹr ã mẽ ajarēnh ma nē ixkĩnh nē mẽ ate amnhī nhĩpêx mex ã mẽ ajarē? Nã kot paj ã mẽ ajarēnh anhỹr kêt nē.

²³ Pahihti Jejus na pre ja hã tanhmã inhmã kapēr to nē inhmã:

—Kêr ka mẽ tõhã axpēn wýr akuprõ nē axàpkur pē ixtyk mã mãn mẽ ajamaxpēr pē ã amnhī nhĩpêx anē nē ã amnhī nhĩpêx anē. Anē.

Jakamã kot paj ixprī hã amnhī xõ ri mẽ amã kot tanhmã inhmã kapēr tota jarē ka mẽ inhma. Nã Jejus kormã htyk kêt ri Jut Kariot ra kot põristi mã hã àmnēnh kaxyw nhũm kamã nhũm Jejus mẽ ý hã mẽ ahkre xwýnhjē mẽ apkur kaxyw hkrī hpa. Hãmri nhũm Jejus pãwti hõ py nē o xa ²⁴ nē Tĩrtũm mã harē nē kãm:

—Pa Papaj. Nã ãm hãmri na ka hte mẽ inhmã mẽ inhõ mex o apa. Anē.

Nē hpãnhã pãwja o hkry pa nē ho mẽ kot ý hã mẽ ahkre ho mẽ pa xwýnhjē nhĩpêx pa nē mẽ kãm:

—E na pa ã pãwti ho hkry nē mẽ amã õr anē. Koja mẽ ã inhĩpêx anē nē te mẽ kot ixto hkry hpar pyrãk

o inhĩpêx pa amnhī xà htýx kamã ijamak kãm ty. Nom mẽ anē kot paj ty. Jakamã e kêr ka mẽ ixwakre kamã tõhã axpēn wýr akuprõ nē ixte mẽ ate amnhī tomnuj pãnhã amnhĩrer kaxyw mẽ anē ixtyk mã ajamaxpēr pē akĩnh nē pãwta kur o akrī. E mẽ mãmri axãmnhĩx aku. Anē.

²⁵ Hãmri nē hpãnhã kop kãm wĩhtita py nē o xa nē mẽ kãm:

—E kop kãm wĩhtija te kêp Tĩrtũm kot mẽ atã amnhī jarēnh nyw xà jarēnh pyrãk. Ixtyk kukwak ri koja mẽ ato hkra. Kot paj ty nhũm ixkamrõ mẽ anē axkapĩ. Jakamã e. Mē kopja kamã wĩhti ho akõm o axpēn nhĩpêx. Nē ho akõm pē ixte mẽ anē ixtyk mã ajamaxpēr. Anē.

²⁶ Tã ã kot amnhī jarēnh anhỹr jakamã na pu htem axpēn wýr akuprõ nē pãwti hkwy hku nē mẽmo kagõ hkwy o ixkõ. Nē ho pahkõm pē axpēn mã Jejus tyk jarēnh o pahkrī. Tã kêr pu mẽ arĩ ã amnhī nhĩpêx anhỹr o ri papa rãhã nhũm Jejus akupýn mẽ pahwýr wrý. ²⁷ Jakamã kot kaj mẽ tõhã mẽmo arĩgro hã kot mẽ panē htykja mã ajamaxpēr kaxyw axpēn wýr akuprõ. Hãmri nhũm mẽ anhĩõ mẽ awýr axà nē nhỹ. Nom axtem nē Jejus tyk mã hamaxpēr kêt japēr. Nē htýx pãwti kur o nhỹ. Nē hkõt amarĩ mẽmo kagõ ho hkõm o nhỹ. Koja ã htyk mã hamaxpēr kêt rãhã amnhī nhĩpêx anē nē te Jejus o kapēr pyrãk o amnhī nhĩpêx. Te ho kapēr o:

—Nã Jejus amarĩ htyk nhũm hkamrõ amarĩ hpikapĩr kēnã. Na pre mẽ panē htyk kêt nē.

Anhỹr o ho kapēr pyrãk. ²⁸ Jakamã kwa kêr ka mẽ ate pãwta kur kaxyw nē taxy kormã tanhmã ate amnhī nhĩpêx to mã ajamaxpēr nē ajamaxpēr o:

—Kwa mãn pa Tĩrtũm kapēr kõt amnhī nhĩpêx mex rãhã ho ri ixpa nã?

Anhÿr o mǎn ajamaxpêr. Hāmri nê ate hkôt amnhî nhîpêx mex ã amnhî pumu nê amarî axàmnhîx aku. No kot ka mē kormã mēmoj punuj kaga hkêt nê arî ri ho anhÿr o pa hāmri nê kām ajamaxpêr nê hkur kêt nê. Rÿ tanhmǎn tee ri tanhmǎ ate amnhî tomnuj tota mǎ ajamaxpêr nê akaprî nê. Hāmri nê tokyx Tirtûm mǎ amnhî jarê nê amnhî to mex prǎm xàj amnhî to awÿ hāmri nê arî kormã axàmnhîx pǎwtita ku. ²⁹ Kojã mēhō mē akôt axà nê mēmoj kukamã hamaxpêr pē htÿx pǎwti nhîrēnhata ò py hkur o nhÿ. Hāmri nhûm Tirtûm tee ri ja hǎ omu nê hǎ tanhmǎ ho. ³⁰ Na ka mē ra axohtō nê ã amnhî nhîpêx anê nê atÿx ri mēmoj kukamã ajamaxpêr pē pǎwta ku. Jejus kot mē panê htykja mǎ ajamaxpêr kêt pē atÿx tanhmǎ ajamaxpêr to pē hkwÿ hkur o akrî. Mÿrapê na ka mē ra ja hǎ axà nê ri apa. Nê mē akwÿjaja ra htyk rax nê. ³¹ Nom kot ka mē xepên wÿr akuprō hāmri nê akupÿm tām xepên kôt ajamaxpêr nê xepên kôt amnhî nhîpêx nê rî kormã pǎwtita ku. Hāmri nhûm Tirtûm ja hǎ mē apumu nê tanhmǎ mē ato hkêt nê. ³² Na hte mē pahte tanhmǎ amnhî tomnuj to hǎ mē pahpumu nê hǎ tanhmǎ mē pahto. Mē pahte ja hǎ amnhî pumunh nê axte ã amnhî nhîpêx anhÿr kêt kaxyw na hte ã mē pahpê hkrajê nhîpêx anê. Jakamã kot puj mē nhÿrmã mē kēp hkra hkêt xwÿnhjê hkôt kuwyta wÿr ma papa hkêt nê. ³³ Jakamã e Kris kôt ixtō nê ixtōxjaja. Kêr ka mē axte Pahihti Jejus tyk mǎ ajamaxpêr kaxyw xepên wÿr akuprō. Hāmri nê ra xepên wÿr apikuprōnh pa hǎ xepên pumu nê rî kormã pǎwti hkwÿ hku nê hkur pē Jejus kot mē panê htyk mǎ ajamaxpêr o akrî. ³⁴ Nê ka mē atō ra amã prǎm japêr nê anhōrkwÿ kamã apku nê rî kormã mē hkôt tē. Jao ra anhōhy htu nê ajamakêtkati

nê akwÿjê jamār o nhÿ. Kê mē hpôx pa ka mē atipxi nê Pahihti Jejus tyk mǎ ajamaxpêr pē hkur o akrî. Hāmri nhûm Tirtûm ja hǎ mē apumu nê hkînh nê tanhmǎ mē ato hkêt nê.

Na ka prem mē ate inhmã kaga nê mēnhata kamã mēmoj tã ixkukjêr rax nê. Tã na pa ra kagã ja kamã mē amã hkwÿ jarēnh rax nê. Nom kot paj piitã harēnh par kêt nê. Kot paj ãm mē amã hkwÿ pix jarê. Hāmri nê nhÿrmã ma mē awÿr mō nê mē apumu nê kormã axte mē amã harēnh jatyr xàm kumê.

12

Mē kot Tirtûm kapêr o hêx xwÿnhjê jarēnh

Rômǎn 12.6-8; Wam Korîit 14.29; Wam Pêtre 4.10-11; Wam Juǎw 4.1-2

¹ Nê kot paj hpānhã mē amã tanhmǎ Tirtûm Karō jarēnh to ka mē inhma. Tanhmǎ kot mē pahkrã hto nhûm mē pahte ahpÿnhã tanhmǎ kām amnhî nhîpêx to ho papaja kot paj mē amã harê. ² Amnepê mǎ kormã mē ate Kris kôt amnhî xunhwÿr kêt ri na ka prem sǎnti hkôt ri amnhî nhîpêx o ri apa. Kapêr kêt tã ka prem hkôt ri amnhî nhîpêx rǎhã ho ri apa. Te kot mē ano kupyrr pyrāk ka mē kām mex o mex ã harēnh o ri apa. Nê kām amnhî jagrer pē amnhî to hwÿr o ri apa. Á na ka prem amnhî nhîpêx anhÿr o ri apa. ³ Tã ra hpānhã Tirtûm kôt amnhî xunhwÿ.

Na htem ohtō nê Tirtûm nhÿ hǎ kapêr jarēnh o pa hǎ amnhî jarēnh tã no ãm mē hkwÿjaja ja hǎ amnhî to hêx. Tã kot paj îxpri hǎ mē amã tanhmǎ mē harēnh to. Kojã mēhō mē kām Tirtûm nhÿ hǎ kapêr jarēnh o pa hǎ amnhî jarê hǎ kojã Jejus o kapêr punuj o pa hkêt nê. Kojã harēnh o:

—Jesús kēp mē panhō Pahihti jakamã kwa pu mē hkôt amnhî

xunhwÿ nê hkôt amnhĩ nhĩpêx o ri papa.

Anhÿr o harê. Koja mêhõ ã mê amã kapêr anê ka mê ama nê mê kot Tirtûm nhÿ hã kapêr jarênh o pa xwÿnh ã omunh kurê kumrêx. No koja mê amã ã kapêr anhÿr kêt nê ka mê ama nê Tirtûm kapêr o hêx o pa hã omunh kurê kumrêx.

Tirtûm Karõ kãm mê pahte axpên to mex prãm ã harênh

Rômãn 12.6; Epes 4.7; Wam Pêtre 4.10

⁴ Nê ahpÿnhã kot tanhmã mê panhĩpêx to xwÿnhja ãm pixii. Kêp Tirtûm Karõ. Na hte mê pahkarõ mã agjê nê ahpÿnhã tanhmã mê pahte axpên to mex kaxyw tanhmã mê panhĩpêx to. Kot tanhmã mê panhĩpêx to xàja ohtô. Mê pahte ahpÿnhã ri tanhmã kãm amnhĩ nhĩpêx to nê tanhmã axpên to mex to ho ri papa kaxyw na. Tirtûm Karõ na hte ja kaxyw tanhmã mê pahkrã hto.

⁵ Nê mê pahte kãm tanhmã amnhĩ nhĩpêx to ho papa xwÿnhja haxwÿja ãm pixii. Kêp Pahihti Jejus. Tã na pu htem ahpÿnhã kãm tanhmã amnhĩ nhĩpêx to ho ri papa.

⁶ Nê kot mê pahto ajuta nhũm mê pahte ahpÿnhã tanhmã axpên to mex to ho papa xwÿnhja haxwÿja ãm pyxii. Kêp Tirtûm. Na pu htem ahpÿnhã tanhmã hkôt axpên xunhwÿr tÿx to kaxyw tanhmã axpên to mex to ho papa.

⁷ Nê Karõja na hte ahpÿnhã tanhmã axpên kaxyw mê panhĩpêx to pu mê axpên to ajuta mex o ri papa.

⁸ Jakamã na pu hte mê pahkwÿjaja Tirtûm Karõ nhÿ hã ma mê pahkwÿjê mã Tirtûm kapêr jarênh o ri mê hkôt papa. Nê mê pahkwÿjaja ma ÿ hã paxãhpumunh mex pê ma ri kapêr o mê ahkre ho mê hkôt papa.

⁹ Nê mê pahkwÿjaja Karõ nhÿ hã Tirtûm kot tanhmã mê pahto ajuta hto kaxyw hkôt paja-maxpêr tÿx nê.

Nê mê pahkwÿjaja akupÿm mê à xwÿnhjê ho mex o papa nhũm mê akupÿm mex nê pa.

¹⁰ Nê mê pahkwÿjaja aa mê kot mêmoj pumunh kêt kwÿ ho anhÿr o ri mê hkôt papa.

Nê mê pahkwÿjaja Tirtûm kapêr mar tÿx nê ô ri mê kãm harênh o mê hkôt ri papa.

Nê mê pahkwÿjaja Tirtûm Karõ nhÿ hã tanhmã mê kot amnhĩ nhĩpêx to hã mê omunh o papa. Rÿ pahprĩ hã mêkarõmnuti nhÿ hã mê kot amnhĩ nhĩpêx ã mê omunh o papa.

Nê mê pahkwÿjaja nhãm mê kapêr mar kêt tã ra mê kapêr o pakapêr.

Nê mê pahkwÿjaja mê kapêr o pakapêrja ma nê mê kot mar kêt xwÿnhjê mã harê. Kormã aa pahte mar kêt tã ra pahprĩ hã mar mex nê mê kãm harê.

¹¹ Æ na hte Tirtûm Karõ kãm hprãm xà hkôt tanhmã mê panhĩpêx to pu mê ahpÿnhã ÿ hã ã axpên nhĩpêx anhÿr o ri axpên kôt papa.

Te mê pahpê Kris nhĩ pyrãk ã mê pajarênh

Rômãn 12.3-8; Epes 1.22-23, 4.11-16; Korosê 3.15

¹² E pa hpãnhã mê amã mê panhĩ kamã tanhmã mêmoj jarênh to ka mê inhma nê hã anohtÿx nê. Mê panhÿja ãm pixi htã no ãm kamã mêmoj xohtô. Kamã mê pahte nê kamã mê pahpa nê kamã mê pajakwa. Nê mê panhĩnhu nê mê pano. Æ mê panhĩ kamã mêmoj xohtô kot anhÿr. Ja pyrã nê Kris nhÿja ãm pixi htã te mê pahpê ï kamã mêmoj xohtôta pyrãk. Mê pahkwÿjaja te mê pahpê hte pyrãk. Nê mê pahkwÿjaja te mê pahpê

İhkra pyræk. Nê mê pahkwÿjaja te mê pahpê no pyræk.

¹³ Mê pahpê Kris kwÿjaja axpên kaxyw mê paxohtôo. Mê ixpê Ijaewjaja nê mê apê Ijaew kêt xwÿnhjaja. Nê amari ri mê kâm mê axâpênh o mê apa xwÿnhjaja nê amnhî mã ri mê axâpênh o mê apa xwÿnhjaja. ã ahpÿnhã mê paxohtô kot anhÿr tâ nhÿm Tirtÿm Karô te mê pahpê Kris nhî pixi pyræk o mê panhîpêx. Nhÿm Krisja mê pahpiitã mê pamã Karô gô nhÿm mê pahkarô mã agjê. Pixi htã mê pahpiitã mê pahkarô mã agjê.

¹⁴ Nê mê panhîja pixi tâ kamã tanhmã mê pakute xàja ohtôo. Tã Kris nhîja te kot mê panhîja pyræk. Uræk nê kamã mê paxohtôo. Jakamã na pu htem ahpÿnhã tanhmã kâm amnhî nhîpêx to ho ri papa. Karô kot tanhmã amnhî kaxyw mê panhîpêx to xà hkôt.

¹⁵ Nê kop ãm mê pahparja kapêr ronhÿx tee ri mê panhîhkra pumu nê amnhî mã:

—Hêxta waa nê. Kêp ãm ixpê mê İhkra ronhÿx pa inhmex nê ijarir. No ãm ixpê mê hpar pix jakamã pêr ãm mê hkînhã ixpê mê hkwy hkêt ãm ixpê mê hatur xà pix na pa.

Anhÿr o amnhî jarênh japêr. Nom ja kot anhÿr kêt. Axtem nhÿhÿm kot mê pahto pa kaxyw na mê pahparja. Nê axtem mêmoj tâ mê paxâpênh rÿ mêmoj jamÿnh kaxyw na mê panhîhkraja. Na pu htem hamê wa ho presija râhã ho papa. Ja pyrã nê kot puj mê pahkwÿjê hõ mê parom Tirtÿm Karô nhÿ hã mêmoj tâ âpênh tÿx ã omu nê hkînhã mê pahte amnhî to warê hkêt ã amnhî jarênh o papa hkêt nê.

¹⁶ Nê mê pajamakja kapêr ronhÿx kapêr o:

—Hêxta waa nê. Kêp apu ixpê mê no ronhÿx pa inhmex nê ijarir. No ãm ixpê mê umar xà pix jakamã pêr ãm ixte ho warê hkêt kumrêx.

Anhÿr o amnhî jarênh japêr. Nom ja kot anhÿr kêt. Hamê wa mex kênã. Axtem ho mê paxumar kaxyw na mê pajamakja. Nê axtem ho mê parit kaxyw na mê panoja. ¹⁷ Kêp ãm mê pano pix ronhÿx pu mê parit pix nê paxumar kêt nê ri papa. Rÿ kêp ãm pajamak pix ronhÿx pu mê paxumar pix nê parit kêt nê mê paxupâr kêt nê ri papa. ¹⁸ Mê panhîja pixi htã kamã hikukrêx xohtôo. Na pre Tirtÿm amnhî krã hkôt kamã mêmoj piitã hipêx nê hanhõ. ¹⁹ Kêp ãm mê panhîja kamã ãm mêmoj pixi ronhÿx pu mê pamex kêt nê papa. ²⁰ Tã no ãm kot anhÿr kêt. Mê panhîja ãm pixi htã kamã hikukrêx xohtôo. ²¹ Jakamã na hte mê panoja amnhî nê mê panhîhkra mã kâm:

—Tk kwa ma tẽ. Ixte ato presi-jare hã.

Anhÿr o kãm kapêr kêt nê. Rÿ mê pahkrãja amnhî nê mê pahpar mã kãm:

—Tk kwa ma tẽ. Na pa ato presija hkêt nê.

Anhÿr o kãm kapêr kêt nê. Ja pyrã nê kot puj mê nhÿri Kris kôt panhîo pumu nê pamex o pahte hakrenh ã amnhî jarênh kêt nê. ²² Nê mê panhî kamã mêmoj kwÿ te hirerek pyræk tâ no pu mê arî pamã hapê nê. Ja pyrã nê kêr pu mê kormã mê kot Kris kôt amnhî xunhwÿr tohtuj anhÿr xwÿnhjaja pu mê pamã mê hkînh kãm tanhmã mê kutã pano-jarêt to ho ri papa.

²³⁻²⁴ Nê na pu htem mê panhî kamã mê pakukrêx kwÿ hã pahpi-jaam nê hpro nê ri ho papa. Nê hkwy hã pahpijaam kêt nê hpro hkêt nê ho ri papa. Nê hkwy mê pahpê omnajti htã pu mê ho mex nê ri ho papa. Tirtÿm kot ã mê panhîpêx anhÿr jakamã na pu htem mê pakamã mê pakukrêx kwÿ mê pahpê omnajti htã pu mê ho mex nê ri ho papa. Ja pyrã nê kêr pu mê Tirtÿm kôt mê pahtõ nê

mě pahťōx piitā ho mex o ri papa. Ně tām mẽ hipêx. Mě pahkwýjaja muxre ně mẽ pahkwýjaja omnajti htāā. Tanhmā mẽ kute htā pu mẽ kêp mẽ Jejus kôt mẽ pahťō ně mẽ pahťōx ā mẽ ho mex o ri papa.

²⁵ Ně na hte mẽ panhī kamā mẽ pahpar ně mẽ panhīhkra ně piitā axpēn kôt àpēnh mex o pa. No na hte mẽ pahparja nhýhým ma mra nhūm ihōja hkwým nhýhým ma mrar kêt ně. Na hte wa axpēn kôt àpēnh mex o pa. Ja pyrā ně kêr pu mẽ pahpê Tirtūm krajaja axpēn kôt amnhī nhīpêx rāhā ho ri papa. Ně axpēn to mex rāhā ho ri papa. No ri axpēn kwým ri tanhmā amnhī nhīpêx to ho ri papa hkêt ně.

²⁶ Na pu htem tōhā nhýhýnh panhī kamā paxā ně ri papa. Pahkrā tātāk rý pakatut gêk. Jao te mẽ panhī piitā kamā mẽ paxā pyrāk. Ně nhýhýnh akupým pamex ně te panhī piitā hkôt akupým pamex pyrāk. Ja pyrā ně koja Kris kôt panhīō nhýhýnh à ně ri pa. Rý tanhmā amnhī to ně ra hkaprī ně ri pa pu mẽ ja hā omu ně ý hā pahkaprī ně papa. No koja mẽmoj tā hkīnh ně pa pu mẽ ja hā omu ně ý hā pahkīnh ně papa.

Te mẽ pahpê Kris nhī pixi pyrāk ā mẽ pa jarēnh

²⁷ Ně mẽ pahpê Kris kwýjaja te mẽ pahpê Kris nhī pixi pyrāk. Ahpýnhā mẽ pahte tanhmā amnhī nhīpêx to ho papa htā mẽ pahpê Kris kwý jakamā te mẽ pahpê ī pixi pyrāk.

²⁸ Ně mẽ pahte Kris kôt tanhmā pahkwýjê ho ajuta hto ho papa kaxyw na pre Kris ahpýnhā tanhmā mẽ paxunhwýr to.

Mě pahkwýjaja mẽ pahte ý hā nhām mẽ kām kapêr jarēnh o papa kaxyw mẽ paxunhwý.

Ně mẽ pahkwýjaja mẽ pahte ý hā tanhmā kapêr jarēnh to ho ri papa kaxyw mẽ paxunhwý.

Ně mẽ pahkwýjaja Tirtūm kapêr jarēnh o mẽ ahkre ho ri mẽ papa kaxyw mẽ paxunhwý.

Ně mẽ pahkwýjaja mẽ pahte aa mẽ kot mẽmoj pumunh kêt kwý ho anhýr o ri papa kaxyw mẽ pa xunhwý.

Ně mẽ pahkwýjaja akupým mẽ à xwýnhjê ho mex o mẽ papa kaxyw mẽ pa xunhwý.

Ně mẽ pahkwýjaja mẽ kapêr o mẽ hihtýx o mẽ papa kaxyw mẽ pa xunhwý.

Ně mẽ pahkwýjaja mẽ pahte tanhmā mẽ ho ajuta ho ho ri papa kaxyw mẽ pa xunhwý.

Ně mẽ pahkwýjaja nhām mẽ kapêr ō ho mẽ pakapêr o mẽ papa kaxyw mẽ pa xunhwý.

Ā na pre ahpýnhā mẽ pahpê hkwýjê piitā mẽ paxunhwýr anê. ²⁹ No na pu htem pahpiitā axpēn kôt Tirtūm kapêr o mẽ ahkre ho ri papa hkêt ně.

Ně mẽ pahpiitā ý hā tanhmā pakapêr to ho ri papa hkêt ně.

Ně mẽ pahpiitā kapêr jarēnh o ri papa hkêt ně.

Ně mẽ pahpiitā aa mẽ kot mẽmoj pumunh kêt kwý ho anhýr o ri papa hkêt ně.

³⁰ Ně mẽ pahpiitā akupým mẽ à xwýnhjê ho mex o ri papa hkêt ně.

Ně mẽ pahpiitā mẽ kapêr ō ho ri pakapêr o ri papa hkêt ně.

Ně mẽ pahpiitā ri mẽ kapêrja ma ně pakapêr kām pahkwýjê mǎ harēnh o ri papa hkêt ně.

Na pu htem ahpýnhā tanhmā Kris kôt mẽ pahkwýjê ho ajuta hto ho ri papa. ³¹ Tā kêr pu mẽ pahpiitā pamā axpēn kīnh pê tanhmā axpēn to mex to ho ri papa. Ja na mex o kot mẽmoj piitā hakrenh par. E kot paj ixprī hā tanhmā mẽ amā ja jarēnh to ka mẽ inhma.

13

*Mê pahte axpên kamã paxukapri
ho papa hã mê pamã karõ
Juãw 13.31-35; Karatas 5.13-15;
Korosê 3.12-14*

¹ Kot pa ma mê piitã ahpÿnhã mê kapêr kãm mê kãm Tirtûm kapêr jarênh o ri ixpa japêr. Âm mê piitã mê kapêr o ixkapêr mex o mê kãm harênh o ri ixpa japêr. Nê Tirtûm kapêr o mê wrÿk xwÿnhjê kapêr o mê ahkre ho ri ixkwÿjê hkôt ixpa japêr. Tã inhmã mê hkÿnh kêt kãm ixte mê ahkre ho ri ixpa ronhÿx mê inhma nê âm inhma. Nhûm ixkapêrja te ixte rat tatak pyrãk o pa tee ri Tirtûm kapêr o mê ahkre kaprÿ ho ri mê hkôt ixpa nhûm Tirtûm tee ri inhmã mê hkÿnh kêt ã ixpumu nê inhmã:

—Nà amã mê hkÿnh kêt jakamã na ka tee ri ixkapêr o mê ahkre kaprÿ. Anê.

² Rÿ kot paj Tirtûm xàhpumunh tÿx o mê kãm kapêr pimxur kwÿ jarênh o ri ixpa japêr. Rÿ Tirtûm mê kurom inhmã mêmoj to amnhÿrit pa omu nê mê kãm harênh o ri ixpa japêr. Rÿ pa Tirtûm kot amnhÿ nhÿpêx piitã omunh par japêr. Rÿ ixte amnhÿ kaxyw hkôt ijamaxpêr tÿx kôt ÿ hã kên krã hprêk õ mã ixkapêr nhûm kot inhmar nê inhmar xà hkôt nhâm pikamênh japêr. Tã inhmã ixkwÿjê hkÿnh kêt kãm ã amnhÿ nhÿpêx anê nhûm Tirtûm tee ri ja hã ixpumu nê inhmã:

—Nà amã mê hkÿnh kêt jakamã te axàhpumunh tÿx kêt kumrêx pyrãk. Na ka tee ri ã mê kãm ixkapêr jarênh anhÿr o ri apa kaprÿ. Anê.

³ Rÿ pa mê kêp amrakati xwÿnhjê mã ixkukrêx nhõr par japêr. Rÿ Kris ã mê kãm amnhÿ grõnh kôt mê kãm xa nhûm mê hã ixpÿr japêr. Tã inhmã mê hkÿnh kêt kãm ã amnhÿ nhÿpêx anê nhûm Tirtûm tee ri ja hã ixpumu nê inhmã:

—Nà ã ate mê kãm amnhÿ nhÿpêx anhÿr o ri apa htã amã mê hkÿnh

kêt jakamã na ka tee ri ã mê kãm amnhÿ nhÿpêx anhÿr kaprÿ. Anê.

⁴ Kot puj mê pamã axpên kÿnh hã kot puj mê kritpêm mê piitã mê kãm pahprÿ ho papa.

Jao axpên kãm pagryk tokyx anhÿr kêt nê.

Nê pamã axpên to mex pix prãm.

Nê mêmoj tã axpên kamã pagryk kurê kumrêx kêt nê.

Nê mêmoj tã amnhÿ to jarkrar o ri papa hkêt nê.

Kot puj mê pamã axpên kÿnh hã kot puj mê ã amnhÿ nhÿpêx anhÿr o ri papa hkêt nê.

⁵ Nê kot puj mê axpên kamã paxukapri ho papa hã kot puj mê tãm axpên nhÿpêx rãhã ho papa. Jao amnhÿ pix kukamã pajamaxpêr o ri papa hkêt nê. Nê mê pagryk tokyx anhÿr kêt nê. Rÿ axpên kãm pagryk tokyx anhÿr hkêt nê. Rÿ koja mēhõ tanhmã mê panhÿpêx kati hto pu mê âm amnhÿ tã omu nê axte kot tanhmã mê panhÿpêx tota mã pajamaxpêr kêt nê.

⁶ Nê kot puj mê pamã axpên kÿnh o papa hã kot puj mê tee ri mēhõ kot tanhmã amnhÿ tomnuj to hã omu nê pahkapri nê. Rÿ tanhmã kot amnhÿ to mex to hã omu nê pahkÿnh nê.

⁷ Nê kot puj mê pamã axpên kÿnh o papa hã kot puj mê arÿ Tirtûm kot mê pahto mex par jatur xà mēnh xà hã arÿgro jamãr rãhã ho ri papa. Nê mê kot Kris ã tanhmã mê pahto htã pu mê tee ri amnhÿ kukamã tanhmã pajamaxpêr to hkêt nê. Âm mê kutã amnhÿ to htÿx nê mê kãm pakuhê nê arÿ amnhÿ kaxyw Tirtûm mã pajamaxpêr tÿx rãhã nê.

⁸ Nê kot puj mê pamã axpên kÿnh o papa hãmri nê aa mê pahte ã amnhÿ nhÿpêx anhÿrja mã panhÿrer kêt nê. Nê arÿ mê pamã axpên kÿnh rãhã ho papa ho papa. Jar pika ja kamã mê pahte Tirtûm nhÿ hã mê kãm kapêr jarênh o ri papa htã kot puj mê nhÿrmã ma õ krÿ hwÿr api hãmri nê kuri axte ã kãm amnhÿ

nhîpêx anhÿr kêt nê. Mo kaxyw kot puj mê axte ri mêhō mā kapêr jarê? Kot puj mê ô krî hwÿr api nê ra mê pahpiitā paxâhpumunh o axpên pyrâk.

Nê na pu htem tōhā mê kapêr ô ho pakapêr o ri papa. Nom kot puj mê nhÿrmā Tirtûm nhō krî hwÿr api hāmri nê kuri axte nhām ri mê kapêr o pakapêr kêt nê.

Nê na pu htem jar mê pahkwÿjaja mê paxâhpumunh mex kôt Tirtûm kapêr jarênh o ri papa. Tā kot puj mê nhÿrmā ô krî hwÿr api hāmri nê axte ā amnhî nhîpêx anhÿr kêt nê. Ām mê pamā axpên kînh pixja kot puj mê arî ô krî kamā mê pamā axpên kînh tûm rāhā papa ho papa. ⁹ Jar mê pahpiitā mê paxâhpumunh tohtuj anhÿr o pakapêr jakamā na pu htem kormā Tirtûm kapêr jarênh tohtuj anhÿr o ri papa. ¹⁰ Tā kot puj mê nhÿrmā ô krî hwÿr api nê kuri paxâhpumunh jatur xām mēnh pa. Jakamā nhûm jar mê paxâhpumunh tohtuj anhÿr xwÿnhhta mê pahpê hapêx.

¹¹ E pa mê amā ja hā ejêp jarê ka mê inhma. Nā amnepé mā ix-prîre ri na pa pre ixtÿx ri mēhprîjê kot amnhî nhîpêx o amnhî nhîpêx nê mê hamaxpêr o ijamaxpêr. Nê mê kapêr mex kêt o ixkapêr o ri ixa. Tā ra ixaptâr hāmri nê mê aptârjê jamaxpêr o ijamaxpêr o ri ixa. Te ra mê pahte kaxkwa kamā mê paxâhpumunh jatur xām mēnh parta pyrâk mê aptârjê jamaxpêr o ijamaxpêr o ri ixa.

¹² Ja pyrā nê na pu htem kormā Tirtûm kot amnhî nhîpêx ā omunh tohtuj anhÿr. Te mê pahte amnhî pumunh xā pynajre kamā pahprî hā amnhî pumunh mex kēeta pyrâk. Nom kot puj mê nhÿrmā ô krî hwÿr api hāmri nê pahprî hā paxâhpumunh jatur xām kumê. Te Tirtûm kot hprî hā tanhmā mê pakute hā mê pahpumunh parja pyrâk.

¹³ E arî mê pahte Tirtûm kôt amnhî nhîpêx o papa xāja na axkrunêpxi. Mē pahte hkôt amnhî nhîpêx o papa rāhā ho papa kaxyw. Wamta na ja: Kêr pu mê arî amnhî kaxyw Tirtûm mā pajamaxpêr mex rāhā ho ri papa. Nê hkôt ja: Kêr pu mê arî Tirtûm kot mê pahto mex par jatur xā mēnh xā hā arîgro jamâr rāhā ho papa. Nê hkôt ja: Kêr pu mê arî pamā axpên kînh pê tanhmā axpên to mex to rāhā ho papa. Ja na mex o kot wamta wa hakrenh. E kêr pu mê ā amnhî nhîpêx anhÿr rāhā ho ri papa.

14

Tirtûm Karō kot mê pahto mê paxihtÿx ā harênh

Wam Korit 12.7-11, 12.27-31

¹ E kêr ka mê arî amā axpên kînh pê axpên to mex rāhā ho ri apa nê aa jam anhÿrer nê ho ajamakêtkati hkêt nê. Nê amnhî to Tirtûm Karō mân amnhî to awÿ kê mê amā tanhmā mê ajamaxpêr to ka mê ahpÿnhā tanhmā axpên to mex to ho ri axpên kôt apa. Nê kêr ka mê ā ajamaxpêr anê nê ajamaxpêr o:

—Inhmā mê hkînh o ri ixpa hprâm tÿx. Nê Tirtûm Karō kot tanhmā ixto nhûm ixte ahpÿnhā tanhmā mê ho ajuta hto ho ixpaja pa määnên inhmā ho anhÿr prâm. Nê kot tanhmā ijakwa hto nhûm ixte ahpÿnhā mê kapêr ô ho ixkapêrja pa määnên inhmā ho anhÿr hprâm. No kêt ixte Tirtûm nhÿ hā mê kām kapêr jarênhja na inhmā ho anhÿr prâm tÿx kumrêx. Anê.

²⁻⁴ Mē pakamā mê kapêr ô ho Tirtûm mā kapêr xwÿnhjaja na htem Tirtûm Karō nhÿ hā ām kumā pix mā kapêr ôta o kām kapêr nhûm tapxipix mê kuma. No mê papajaja na pu htem tee ri mar o pahkrî nom mar kêt nê. Ām kapêr xwÿnhhta pix koja mê pakurom amnhî ma. Nom koja mê pakapêr kām Tirtûm mā amnhî jarê pu mê mar mex

nê. Nhũm mẽ pakapêr kãm Tĩrtũm nhỹ hã mẽ pamã kapêr jarê pu mẽ pahprĩ hã kuma. Jao mẽ pamã kapêr kôt amnhĩ nhĩpêx prãm nê. Nê mẽmoj tã pahkaprĩ nê ri papa htã mẽ kuma nê amnhĩ kaxwýnh kãm amnhĩ to paxihtýx.

⁵ Mẽ apiitã mẽ ate nhãm mẽ kapêr õ ho Tĩrtũm mã amnhĩ jarênhja na mex. Nom mẽ ate mẽ akapêr o mẽ akwýjê mã Tĩrtũm kapêr jarênh o ri mẽ apaja na mex o wamta jakre. Kot ka mẽ nhãm mẽ kapêr õ ho Tĩrtũm mã amnhĩ jarê nhũm mẽ akwýjaja mẽ amar kêt jakamã ka mẽ ã akapêr anhýrja o Kris kôt mẽ ho mẽ hamaxpêr o hihtýx kêt nê. Æm kapxipix amnhĩ ma. Rý koja kapêr õja mar mex xwýnhjê hõ amar japêr nê mẽ akapêr kãm akwýjê mã harê. Hã koja ja mex nê. Nom kot kaj mẽ apiitã ma mẽ kapêr kãm mẽ kãm Tĩrtũm kapêr jarênh o ri apa nhũm mẽ piitã hprĩ hã amar mex nê. Nê amar xã hkôt Tĩrtũm kapêr kôt amnhĩ nhĩpêx mex nê. ⁶ Jakamã e Kris kôt ixtõ nê ixtõxjaja. Kot paj apu nhýrmã ma mẽ awýr mõ hãmri nê nhãm mẽ kapêr õ ho mẽ amã ixkapêr japêr ka mẽ inhmar kêt nê. Nom kot paj mẽ akapêr o mẽ amã ixkapêr ka mẽ apiitã aprĩ hã inhmar mex nê. Pa Tĩrtũm nhỹ hã mẽ amã mẽmoj jarê rý tanhmã kot amnhĩ nhĩpêx toja pa mẽ amã harê. Rý Karõ nhỹ hã mẽ amã mẽmoj jarênh o ã mẽ amã Tĩrtũm kapêr jarênh anê ka mẽ aprĩ hã inhmar mex nê. ⁷ Nom mẽ kapêr õ ho mẽ kapêr o mẽ akôt ri mẽ pa xwýnhjaja te mẽhõ kot htýx ri wiorãwti kakrênh xwýnh pyrãk. Koja htýx ri hkakrênh o xa nhũm mẽ tee ri kot grer mar mã. Rý nhũm mẽhõ htýx ri pifti kakôr o xa nhũm mẽ tee ri mẽmo mẽ grer mar mã.

⁸ Põristijaja na htem amarĩ ri tanhmã amnhĩ nhĩpêx to ho pa nhũm mẽ hkrãhtũmja mẽ kãm pifti

kakõ nhũm mẽ kuma nê mẽ pi-japu mã hamaxpêr kurê kumrêx nê hwýr hprõt. Nom koja kawax pê hkakõ rý htýx ri tanhmã hkakôr to nhũm mẽ kuma nê ãm kuma. ⁹ Ja pyrã nê kot kaj mẽ kapêr õ ho akwýjê mã akapêr nhũm mẽ ama nê ãm mẽ ama. Ka te ãm mẽ kãm ajakwa momok pyrãk o axãm o amnhĩ nhĩpêx.

¹⁰ Nê ahpýnhã mẽ pakapêr xohtõ. Na htem ahpýnhã mẽ kapêr o amnhĩ kwýjê mã kapêr nê xpêmar mex nê. ¹¹ Nom koja mẽhõ nhỹhýnh pika hõ rũm ixwýr mõ nê mẽ kapêr o inhãm kapêr pa mar kêt nê. Nê amnhĩ xwar kutã ixkapêr o kãm ixkapêr nhũm ixpyrã nê inhmar kêt nê. ¹² Jakamã kot kaj mẽ amã Tĩrtũm Karõ xihtýx xã ho amã tanhmã kãm amnhĩ nhĩpêx to ho apa hprãm hã kot kaj mẽ amnhĩ to awý nê kãm:

—Kwa amnhĩ kôt ijamaxpêr o axihtýx Tĩrtũm. Pa anhý hã ixkapêr o ma Kris kôt ixkwýjê ho mẽ hamaxpêr o ixihtýx o ri mẽ hkôt ixpa. Kê mẽ akapêr ma nê Kris kôt amnhĩ xunhwýr týx nê. Nê hkôt amnhĩ nhĩpêx mex o ri pa. Anê.

¹³ Nê kêr ka mẽ nhãm mẽ kapêr õ ho Tĩrtũm mã amnhĩ jarênh xwýnhjaja amnhĩ to Tĩrtũm Karõ wý nê kãm:

—Ixte mẽ kapêr õ ho ixkapêr tã ixte amnhĩ mar kêt. Jakamã kwa tanhmã ixto ijamaxpêr mex to pa amnhĩ mar mex nê ixkapêr kãm ixprĩ hã Kris kôt ixkwýjê mã ja jarê kê mẽ inhmar týx nê. Anê.

¹⁴ Nom kot paj nhãm mẽ kapêr õ ho Tĩrtũm mã mẽ ã harênh tã amnhĩ mar kêt nê. Te ixpimtir kãm ixkarõ pix kapêr pyrãk. No kot paj pam amnhĩ krã hkôt ixkapêr o kãm mẽ ã harê hãmri nê ra amnhĩ mar mex nê. ¹⁵ Nã ja na inhãm mex jakamã kot paj nhãm mẽ kapêr õ ho Tĩrtũm mã mẽ ã harê nê kãm gre. Nê mãânên ijamaxpêr xã hkôt ixkapêr o mãânên

kām mex ā harē nē kām gre. Nà ja na inhmā mex. ¹⁶ Nom kot paj mē ma mē kot Tirtūm kapēr mar xà hā ixkre hwȳr mra nē kamā Tirtūm mā mex ā harē. Tā pa nhām mē kapēr ō ho kām ixkapēr japēr. Ka mē ate inhmar o akrī xwȳnhjaja tee ri inhma. Jakamā tee ri inhma nē ixkōt Tirtūm mā akapēr kēt nē. Rȳ kām:

—Nà ām hāmri na ā amex ā ajarēnh anē Tirtūm.

Anhȳr o kām akapēr kēt nē. Mē ate inhmaare hā kot ka mē ā kām akapēr anē. Jakamā kot paj ri mē akamā mē kapēr ō ho ixkapēr kēt nē. Ām mē akapēr pix o mē anom Tirtūm mā mex ā harē. ¹⁷ Kot paj mē kapēr ō ho Tirtūm mā mex o mex ā harēnh mex tā ka mē mēmo mē kapērja aprī hā mar kēt jakamā inhmar pē Tirtūm kōt amnhī xunhwȳr tȳx kēt nē.

¹⁸ Na pa hte tōhā mē arom nhām mē kapēr ō ho Tirtūm mā amnhī jarē. Nom nhȳri ahte nhȳ nē ā kām amnhī jarēnh anē. Ām hāmri na pre Tirtūm ja kaxyw tanhmā ixto pa hte ā amnhī nhīpēx anhȳr o ri ixpa.

¹⁹ Tā na pu htem Tirtūm mā mex o mex ā harēnh kaxyw nē ma mē kot kām amnhī jarēnh xà hā ixkreta wȳr xepēn wȳr mra pa mē pikuprōnh xwȳnhjē kapēr o mē kām ixkapēr. Nom kot paj nhām mē kapēr ō ho mē kām ixkapēr ry rax kumrēx tā no nhūm mē inhmar kēt nē. Nom kot paj mē kapēr o ām ixkapēr krānre htā no nhūm mē inhmar mex kurē kumrēx. Ja na inhmā mex. ²⁰ Kwa mē ixkapēr ma nē mar tȳx nē. Nē mēhprīrejē jamaxpēr o ajamaxpēr kēt nē. Ām Kris kōt mē àptār tūmjē jamaxpēr o mǎn kēt mē ajamaxpēr o ri apa. Ām mēmoj pixire hkōt kot kaj mē ām hāmri te mēhprījē jamaxpēr pyrāk o ajamaxpēr. Mēhprījaja na htem mēmoj punuj kukamā hamaxpēr kēt nē. Na htem ām htȳx pa. Tā kēr ka mē urāk nē mēmoj punuj

kukamā ajamaxpēr o ri apa hkēt nē.

²¹ Amnepēm na pre Tirtūm tanhmā Ijaewjē mā kapēr to. Mē kapēr o mē kām kapēr tā no nhūm mē kuma nē ām kuma. Jakamā nhūm tee ri ja hā mē omu nē amnhī tā tanhmā mē harēnh to. Tanhmā mē harēnh toja Tirtūm kapēr ā kagā htūm kamā na. Kot mē harēnh kot: E kot paj ma mē hwȳr axtem pika hō rūm pōristi hkwȳr rē kē mē ma mē hwȳr mra nē mē unē. Hāmri nē amnhī kapēr o mē kām kapēr nhūm mē tee ri mē kuma no ām hkōt mēmoj pumunh kēt nē.

Koja mē ā mē hipēx anhȳr tā nhūm mē arī kām ixkapēr mar nē amnhī kaxyw ixkōt hamaxpēr prām kēt nē. Anē.

Tirtūm kapēr ā kagā htūm kot ā mē harēnh kot anhȳr. ²² Jakamā kot kaj mē Tirtūm mā amnhī jarēnh xà hā ixkre hwȳr akuprō nē mē kapēr ō ho Tirtūm mā amnhī jarēnh japēr. Nhūm Kris kōt amnhī xunhwȳr kēt xwȳnhjaja mē akōt agjē nē hkrī nē tee ri mē akapēr ma nē Kris kōt amnhī xunhwȳr kēt nē. Tanhmā kot mē amnhī to nē hkōt amnhī xunhwȳ? Mē kot akapērta maare hā. No kot ka mē akapēr o Tirtūm nhȳ hā mē kām akapēr nhūm mēhprī hā amar mex nē. Jao tanhmā hamaxpēr to nē mē apyrā nē Kris kōt amnhī xunhwȳr japēr. ²³ Nom kot ka mē apiitā nhām mē kapēr ō ho Tirtūm mā mex ā harē nhūm amarī ri mē pa xwȳnhjaja mē awȳr agjē nē mē akapēr ā mē ama nē hā mē apumu. Hāmri nē tee ri hamaxpēr nē mē akrā pipānh ā xepēn mā mē ajarē. ²⁴ Nom koja mē awȳr agjē ka mē akatāt kōt mē amnhī kapēr o Tirtūm kapēr jarēnh o akuhē nhūm mēhprī hā mē amar mex nē. Hāmri nē amnhī kapēr o akapēr ma nē hamaxpēr o:

—Hēxta waa nē. Xep ixte amnhī tomnuj xwȳnh na pa. Nà ām hāmri

na mẽ Tirtũm kapêr jarê. Nà ãm hãmri na kêt ja. Anê.

²⁵ Hãmri nê mẽ amã tanhmã kot amnhĩ tomnuj to hã amnhĩ jarênh pa hãmri nê hkaga nê Jejus kôt amnhĩ xunhwý. Nê hkônkrã ho htêm nê hkrĩ nê Tirtũm mã mex o mex ã harê. Hãmri nê mẽ amã:

—Nà ãm hãmri na hte Tirtũm mẽ akamã pa ho pa. Anê.

Tirtũm nhõrkwý kamã mẽ pahte tanhmã amnhĩ nhĩpêx to hã mẽ pamã karõ

Atre 2.42, 5.12-13; Eprêw 10.25

²⁶ E Jejus kôt ixkwýjaja. Kot paj hpãnhã axtem mẽ amã mẽmoj tã karõ. Mẽ kot Tirtũm mã amnhĩ jarênh xã hã ixkre kamã tanhmã mẽ ate amnhĩ nhĩpêx to hã karõ ka mẽ inhma.

Nà kêr ka mẽ axpên wýr akuprõ nê akrĩ ka mẽ atõ amã Tirtũm mã mex ã harênh ã mẽ grer o agrer prãm hãmri nê mãmri kãm ho gre. Hãmri nê agrer pa kê apãnhã mẽhõ kãnhmã xa nê Tirtũm kapêr kwý ho mẽ ajahkre. Nê ho anhýr pa nhũm hpãnhã mẽhõ kãnhmã xa nê Tirtũm kot tanhmã ho mex to hã mẽ amã amnhĩ jarê. Nê amnhĩ jarênh pa hãmri nhũm mẽhõ nhãm mẽ kapêr õ ho mẽ amã ujarênh japêr. Hãmri nê ujarênh pa kê mẽhõ hpãnhã mẽ akapêr o hprĩ hã mẽ amã kapêrta jarê.

E kêr ka mẽ axpên wýr akuprõ nê Kris kôt axpên to axihtýx kaxyw ã axpên pãnhã amnhĩ nhĩpêx anê.

²⁷ Nê ka mẽ atõ amã nhãm mẽ kapêr õ ho mẽ kãm akapêr prãm japêr. Nom kêr ka mẽ axohtõ nê ã mẽ kãm amnhĩ nhĩpêx anhýr kêt nê. ãm mẽ atõ wa axkrutre rý axkrunêpxire nê mẽ kapêr õ ho mẽ kãm akapêr. Hãmri nê axpên pãnhã akapêr pa kê mẽhõ kot hprĩ hã mẽ kapêr õta mar japêr nê mẽ apãnhã xa nê mẽ akapêr o mẽ kãm harê kê mẽhprĩ hã mar mex nê. ²⁸ Nom koja ja kaxyw mẽhõ amrakati japêr ka mẽ kapêr õ ho akapêr kêt nê.

ãm kapxipix nhýri ahte Tirtũm mã akapêr.

²⁹ Nê kê Tirtũm nhý hã kapêr jarênh xwýnhjê hõ wa axkrut rý axkrunêpxi nê mẽ ajahkre ka mẽ aprĩ hã mar o akrĩ. Hãmri nê mar pa nê tanhmã mẽ harênh to. ãm hãmri Tirtũm nhý hã kapêr ã mẽ harê rý ho hêx ã mẽ harê.

³⁰ Nê koja mẽhõ Tirtũm nhý hã mẽmoj jarênh o xa. Rõm nhũm Tirtũm mẽ kaxyw mẽ atõ mã ajamaxpêr kwý gõ. Ka kapêr o ãm xwýnhta mã kãnhmã anhĩhkra pẽ kê apumu nê anhĩkrê. Hãmri ka hpãnhã xa nê mẽ kãm tanhmã ajamaxpêr tota jarê. ³¹ Nom kêr ka mẽ anhĩpê mẽ kãm akapêr hkêt nê. ãm axpên pãnhã Tirtũm kapêr o axpên jahkre nê ho axpên jamaxpêr o axihtýx. Ja mex. ³²⁻³⁴ Nom kêr ka mẽ axpên wýr akuprõ nê apiitã anhĩpê atýx ri akapêr kêt nê. Ja na Tirtũm kêp hprãm nõkati. Mẽ ate axpên pãnhã axpên mã akapêrja na kãm hprãm. Jakamã kê mẽ kot Tirtũm nhý hã mẽ kapêr jarênh o pa xwýnhjaja taxy axpên jahkre hã axpên jamã. Nhũm mẽhõ kumrêx kapêr pa hãmri ka hpãnhã mẽ kãm akapêr.

Nê kê mẽnijaja amarĩ mẽ ahkreja mar o hkrĩ. Ijaew kot amnhĩ nhĩpêx xã hkôt. Jakamã kwa mẽ anijaja. Kêr ka mẽ amarĩ akryk mẽ mar o akrĩ nê axpên mã akapêr o akrĩ hkêt nê. ³⁵ No kot kaj mẽ tee ri mẽmoj ma nê mar mex kêt japêr tã hã axpên kukjêr kêt nê. ãm akryk arĩ mar o akrĩ. Hãmri nê akupým anhõrkwý hwýr tẽ nê rĩ kormã hã amjên kukja. Nom kot ka mẽ apikuprõnh xã hã ixkre kamã axpên mã akapêr o akrĩ nhũm mẽ amjênjaja tee ri ja hã mẽ apumu nê hpijaam nê.

³⁶ E na pa ã Tirtũm mã amnhĩ jarênh xã hã ixkre kamã tanhmã mẽ pahte amnhĩ nhĩpêx to hã mẽ amã karõ anê. Tã te mẽ apê ja mex

kêt pyrâk. Kwa mon ka wem ja ma nhùm mē apê omnuj nē? Xà mē ate Tirtùm kapêr mar mex o ijakrenh kôt na ka mē â ajamaxpêr anê? Xà na pre Tirtùm mē akumrêx mã kapêr? Hã na ka mē â ajamaxpêr anê? Rỳ xà mē kapxipix mã na pre kapêr? Hã na ka mē ixkapêr ma nhùm mē apê omnuj nē? Nà ixkumrêx na pa pre mē awỳr inhmôr nē mē amã Tirtùm kapêr jarênh kênã kot ka kêt mē axtem nē â ajamaxpêr anê. ³⁷ Kot kaj mē atô â ajamaxpêr anhỳr japêr nē ajamaxpêr o:

—Nà na pre Tirtùm tanhmã inhmã kapêr to pa ô ri mē kãm ixujarênh mex o ri ixpa.

Anhỳr o ajamaxpêr. Rỳ ajamaxpêr o:

—Nà na pre Tirtùm Karô mē kaxyw tanhmã ixto pa ýhã tanhmã mē ho mex to ho ri ixpa.

Anhỳr o ajamaxpêr. Kot kaj mē â ajamaxpêr anê hãmri nē mãânên pa â ixte amnhĩ nhĩpêx anhỳr â ixpumunh mex kurê kumrêx. Amnhĩ pyrã nē ixte Tirtùm nhỹ hã mē kãm ixkapêr xwỳnh â ixpumunh nē hã ijarênh kurê kumrêx. ³⁸ Nom koja ja hã ijarênh kêt ka mē ja hã omu hãmri nē tanhmã kot mē amã kapêr toja ma nē amã.

³⁹ E Kris kôt ixtô nē ixtôxjaja. Kêr ka mē amnhĩ to Tirtùm Karô wỳ kê ma mē ate mē kãm Tirtùm kapêr jarênh o ri apa kaxyw mē ato mē axihtỳx.

Nê koja mēhõ kãm nhãm mē kapêr õ ho kapêr prãm ka mē ja nê kãm akapêr kêt nê. Kwâr mãmrĩ â amnhĩ nhĩpêx anê. ⁴⁰ Nom kêr ka mē ate Tirtùm mã amnhĩ jarênh xà hã ixkre kamã axpên pãnhã axpên mã akapêr nom anhĩpê kãm akapêr hkêt nê.

15

Kris akupỳm htĩr kumrêx ã harênh

Atre 2.23-36, 10.39-41; Wam Korit 6.14

¹ E Kris kôt ixkwỳjaja. Kot paj axte mē amã Jesus kot mē panê tanhmã amnhĩ nhĩpêx to hã harê ka mē inhma. Na pa pre ra mē amã ja jarê ka mē ama nê hkôt amnhĩ xunhwỳ. Nê hkôt amnhĩ nhĩpêx mex o ri apa. ² Na pa pre mē amã harê ka mē amnhĩ kaxyw kãm ajamaxpêr tỳx nê nhùm Tirtùm mē ato hkra. Tã ka htem arĩ kapêr kôt amnhĩ nhĩpêx mex o ri apa. Koja mēhõ kot Tirtùm kapêr mar tã amnhĩ kaxyw hkôt hamaxpêr kêt nê nhùm Tirtùm tee ri amnhĩ tã omu nê ho hkra hkêt nê.

³ Na pa pre amnhĩ krã hkôt mē amã tanhmã Kris jarênh to hkêt nê. Ixte kapêr mar xà hkôt na pa hte amnhĩ xô ri mē amã tanhmã harênh to ho ri ixpa. Jesus jarênhja na mex o kot mē ujarênh piitã hakrenh par kumrêx. Tã tãm kot paj mē amã harê. Na pre Krisja mē pahte amnhĩ tomnuj pãnhã amnhĩrer kaxyw mē panê ty. Tirtùm kapêr ã kagã htùm kot hkukamã harênh xà hkôt. ⁴ Hãmri nhùm mē kên kre kamã haxã nhùm kamã nôr o apkati. Nê axte hã apkati. Hãmri nhùm Tirtùm akupỳm ho htĩr. Kapêr ã kagã htùm kot hkukamã harênh xà hkôt. ⁵ Tã nhùm Simãw Pêtre kumrêx akupỳm htĩr ã omu nhùm hpãnhã Jesus nhỹ hã mē ahkre ho mē pa xwỳnh maatijaja haxwỳja omu. ⁶ Hãmri nhùm mē kot hkôt mē pa xwỳnh pê 500 jakrenh xwỳnh piitã anhĩpê haxwỳja akupỳm htĩr kãm omu. Na pre ra mē hkwỳjaja ty nhùm mē hkwỳjaja arĩ htĩr nê pa. ⁷ Jakamã nhùm prem ra akupỳm htĩr kãm omu. Hãmri nhùm hpãnhã Xiakreja omu. Nhùm hpãnhã ýhã mē ahkre o mē pa xwỳnh piitã omu. Akupỳm htĩr kãm omu. ⁸ Tã pa

na pa pre ijaxwýja amnhĩ to hapu nē akupým htĩr kām omu. Te ixpē mē hkra kot hapu pyrà nē amnhĩ to hapu nē omu. Na pre kaxkwa kamā inhmā kapēr o xa pa ixprĩ hā omu. ⁹ No mē kot ixpyrà nē Kris nhỹ hā mē ahkre ho mē pa xwýnh maati hkwýjaja na mē mex o kot ijakrenh. Na pa pre hte mē hkĩnhā amnhĩ tomnuj tỳx nē. Jao Kris pē hkrajē homnuj tỳx o ri ixpa. Tā hkôt amnhĩ xām hāmri nē tee ri ā amnhĩ nhĩpēx anhỹr ā amnhĩ pumu nē amnhĩ kamā ixpijaàm tỳx nē. Jakamā na pa hte Kris nhỹ hā kapēr jarēnh o ixpa hā amnhĩ pumu nē ixte hkôt amnhĩ xām kêt ri tanhmā ixte amnhĩ nhĩpēx toja mā ijamaxpēr nē ixpijaàm nē. ¹⁰ Na pa pre amnhĩ tomnuj tỳx o ixpa htā nhũm Tĩrtũm arĩ kām ijapē nē. Nē ixkamā ukaprĩ nē. Pa pre hkôt amnhĩ xām nhũm ixto hkra pa ra kām tanhmā amnhĩ nhĩpēx to mex rāhā ho ixpa. Jakamā na hte tee ri amnhĩ tā ixpumu nē tanhmā hamaxpēr to hkêt nē. Rỳ hamaxpēr o:

—Hêxta waa nē. Inhmā Pawre japē nē ixte ho mex tā nhũm ixkôt amnhĩ nhĩpēx kêt kumrēx.

Anhỹr o tee ri hamaxpēr kêt nē. Na pa hte kām tanhmā amnhĩ nhĩpēx to ho ixpa rũnh o ý hā mē kapēr o pa xwýnh kwýjē jakre ho ixpa. Nom amnhĩ krā hkôt mē ahkre hkêt nē. Ja kaxyw na pre Tĩrtũmja ixto ixihtỳx pa ý hā kām tanhmā amnhĩ nhĩpēx to ho ri ixpa nhũm ja hā ixpumu nē hkĩnh nē.

¹¹ Nē Jejus jarēnhja ām pixii. Axtem hō hkêt. Nē ý hā mē ahkre ho mē pa xwýnhjē kapērja nē pa ixte mē amā harēnhja kot axpēn pyràk. Harēnh tipxi. Kris kot mē pahte amnhĩ tomnuj mỳrapē mē panē htyk nhũm Tĩrtũm kot akupým ho htĩr ā wa harēnhja na pa hte pix jarēnh o ri mē akôt ixpa. Ka prem inhma nē amnhĩ kaxyw hkôt ajamaxpēr tỳx nē.

Tĩrtũm kot akupým mē pahto mē pahťĩr ā harēnh

Rukre 20.37

¹² Nē kwa ra ixte mē amā Kris htyk nē akupým htĩr ā harēnh tā ka xep mē akwýjaja axtem nē mē htyk nē akupým mē htĩr kêt ā mē hkamnhĩx o ri apa. ¹³ Kwa mē ajamaxpērja mex kêt. Kêp apu ām hāmri mē ate ā mē harēnh anhỹr ronhỹx pre Kris haxwýja akupým htĩr kêt nē. Nhỹx pre htyk o ty.

¹⁴ Nē kêp apu Kris akupým htĩr kêt ronhỹx pa mē ām mē amā kapēr jarēnh o ixpa kaprỳ. Ka mē ajaxwýja amnhĩ kaxyw hkôt ajamaxpēr kaprỳ.

¹⁵ Nē kêp ām akupým mē htĩr kêt ronhỹx pa mē ixte mē amā Tĩrtũm kapēr jarēnh o ri ixpa xwýnhjaja mē amā ho ixēx o ri ixpa. Na pa htem mē amā Tĩrtũm ra kot akupým Jejus o htĩr ā harēnh o mē akôt ixpa. Tā kêp apu akupým mē htĩr kêt ronhỹx pa mē ām mē amā harēnh o ixēx.

¹⁶ Nē kêp apu akupým mē htĩr kêt ronhỹx pre Kris haxwýja akupým htĩr kêt nē. Nhỹx pre ām amarĩ tyn hapēx.

¹⁷ Nē Kris amarĩ htyk nē hapēx ronhỹx kot pu mē ri amnhĩ kaxyw hkôt pajamaxpēr nē hkôt amnhĩ xunhwýr kaprỳ.

Nē Kris amarĩ htyk nē hapēx ronhỹx pre Tĩrtũm Jejus kukwak ri mē panē mē pahte amnhĩ tomnuj o hapēx kêt nē. Nhỹx pu mē pahpiitā nhỹrmā ma kuwy hwýr pajapēx pa.

¹⁸ Nē kêp apu Kris htyk nē hapēx ronhỹx ra mē kot amnhĩ kaxyw hkôt hamaxpēr tā ra htyk xwýnhjaja ma mē kot amnhĩ tomnuj mỳrapē kuwyta wýr hapēx.

¹⁹ Nē kêp apu Kris htyk kumrēx nē hapēx ronhỹx pu mē kormā

pahtyk kêt xwÿnhjaja tee ri amnhî wÿr kamâ pajamak o ri papa kaprÿ. Nê pahpê hkra hâ amnhî jarênh kaprÿ. Jao pahkaprî htÿx o mêmoy piitâ hakrenh par kumrêx nê ri papa.

Kris kumrêx akupÿm htîr â harênh

Atre 26.23; Sikûn Korîṭ 4.14; Piri-pos 3.10-11; Wam Tesarôn 4.15-18; Apokarip 20.1-15

²⁰ Nâ mē htyk nê nhÿrmâ akupÿm mē htîr kêt â mē harênhja kot anhÿr kêt. Ra Tîrtûm kot akupÿm Kris o htîr jakamâ koja määnen hkra htyk xwÿnhjaja nhÿm mē piitâ Jesus pyrâ nê nhÿrmâ akupÿm mē ho htîr pa. Jakamâ na pu htem Kris akupÿm htîrja mâ pajamxpêr nê amnhî kukamâ pajamxpêr o:

—Nâ ra Tîrtûm kot akupÿm Jesus o htîr jakamâ koja urâk nê nhÿrmâ akupÿm mē pahte hkôt amnhî xunhwÿr xwÿnh piitâ mē pahto mē pahtîr. Nâ koja â mē panhîpêx anê. Ja kaxyw âhpumunh tÿx kumrêx xwÿnh kênâ. Anê.

²¹ Nê amnepêem na pre Tîrtûm my kot waja nhîpêx. Hâmri nhÿm kot tanhmâ amnhî tomnuj to ho ra mē htykja o hkrax. Tâ nhÿm wamta kôt my hōta wamta rom amnhî to mex o mē htyk tâ akupÿm mē ho htîr o hkrax. ²²⁻²³ Tâ mē pahpê wam my pê Atâw kanrêhâ tâmnhwÿ jakamâ kot puj mē urâk nê nhÿrmâ ty. No âm määnen mē pahpê Kris kraa. Kris kumrêx na pre akupÿm htîr. Tâ koja nhÿrmâ akupÿn mē pahwÿr wrÿy hāmri nhÿm Tîrtûmja kot hipêx pyrâ nê akupÿm mē pahto mē pahtîr. Mē pahte hkôt amnhî xunhwÿr â mē pahpumunh kôt akupÿm mē pahto mē pahtîr pa. No âm kormâ.

Kris nhÿrmâ kot mē htyk o hapêx â harênh

Juâw 11.25; Rômân 6.23; Wam Korîṭ 15.54; Sikûn Ximotre 1.10;

Eprêw 2.14; Apokarip 20.14

²⁴⁻²⁸ Nê koja Kris arî mē ho amnhîptâr rāhâ nhÿm Tîrtûm mē kot kutâ amnhî xunhwÿr xwÿnhjê pê mē hihtÿx xâ ho hapêx pa. Kapêr â kagâ htûm kot ja jarênh kot:

Koja nhÿrmâ Tîrtûm Kris kot kām mē ho amnhîptâr kaxyw âm. Anê.

Jakamâ Jesus tapxipix koja mē ho amnhîptâr o pa. Kojja Tîrtûm pix mē ho amnhîptâr kêt nê. Nom koja pahi hkwyjê hō axte nhām mē ho amnhîptâr kêt kumrêx.

Tâ mē kot mêkarômnuti hkôt kām tanhmâ amnhî to ho mē pa xwÿnhjaja koja Tîrtûm ma amnhî nê kuwy hwÿr mē rēnh pa. Nê mēhtykja o hapêx nhÿm mēhō axte htyk kêt kumrêx. Jakamâ koja Jesus Kris mêmoy punuj piitâ ho hapêx nê Mēpahpām Tîrtûm nhîhkram akupÿm mêmoy piitâ haxâr pa. Tîrtûm jamaxpêr xâ hkôt â mêmoy to anhÿr par anê hāmri nê ihkram mêmoy jaxâr pa. Nê määnen tām kām amnhî gō. Jakamâ nhÿm Tîrtûm tapxipix mêmoy piitâ ho amnhîptâr pa.

Mē htyk xwÿnhjê jarênh

²⁹ Nê na hte mē pahkwÿjaja kormâ kêp Tîrtûm kra hkêt tâ Jesus kôt mē kot amnhî xunhwÿr nê mē htyk xwÿnhjê mâ hamaxpêr o pa. Hâmri nê mē kām nhÿrmâ axte mē omunh prām xâj mē urâk nê Jesus kôt amnhî xunhwÿr nhÿm mē hkrâ kumrâ. Tâ akupÿm mē htîr kêt ronhÿx mē âm â pajamxpêr anhÿr kaprÿ. ³⁰ Nê paa. Na pa hte ma mē kām Tîrtûm kapêr jarênh o ri mē hkôt ixpa. Nhÿm mē hkwyjaja ja hâ inhma nê ixkamâ gryk nê ixtâ amÿnê pa mē mÿrapê ixpunuj nê ri ixpa. No âm amnhî to htÿx nê arî ri mē kām Kris kapêr jarênh o ri mē hkôt ixpa. Tâ kêp âm nhÿrmâ akupÿm ixtîr mâ kêt ronhÿx pa tee ri â amnhî nhîpêx anhÿr o ri ixpa kaprÿ. ³¹ Na htem apkati mē ixtâ

tanhmã àmnênh to ho ri pa. Æm hãmri na pa mẽ amã ã mẽ harênh anê. Nom na pa hte tee ri amnhĩ kukamã ijamaxpêr o ri ixkaprĩ nê ixpa hkêt nê. Mẽ kot ixpîr mã tâ pa hte mẽ ate Pahihti Jejus Kris kôt amnhĩ nhĩpêx mex ã mẽ apumunh kôt ixkĩnh nê ri ixpa. Nhũm te ixkamã mẽmoj kêt pyrãk pa hte ri ixpa. ³²Na pa hte jar Epes kamã mẽ oprê xwýnhjê kutã amnhĩ to htýx pê mẽ kãm Jejus kapêr jarênh o ri mẽ hkôt ixpa nhũm mẽ kãm mar prãm kêt jakamã hã ixtomnuj týt nê. No nhỹrmã ixyk nê akupým ixtîr mã kêt ronhýt pa mẽ kêp Kris kwý hkêt xwýnhjê jamaxpêr o ijamaxpêr nê mẽ urãk nê ijamaxpêr o: Ixte ixyk ã arĩgro pumunh kêt jakamã kot paj mãmrĩ mẽmoj piitã hkur o ri ixpa.

Nê mãmrĩ mẽmoj piitã ho ixkõm o ri ixpa.

Nê mãmrĩ mẽmoj piitã ri tanhmã ho ho ri ixpa.

Ixyk nê axte ixte ã amnhĩ nhĩpêx anhýt o ixpare kaxyw ã.

Anhýt o nhýt pa ijamaxpêr o ixpa. Kêp ãm Tirtũm kot akupým mẽ pahto mẽ pahťîr mã kêt ronhýt pu mẽ ã mẽ kêp Kris kwý hkêt xwýnhjê jamaxpêr anhýtja kôt pajamaxpêr pix o ri papa. No ãm ja kot anhýt kêt.

³³Na htem mẽmoj jarênh o:

—Mẽ kot htýx ri amnhĩ tomnuj xwýnhjê hkôt ri mẽ pa xwýnhjaja koja mẽ gaa nê mẽ kot amnhĩ nhĩpêx kôt amnhĩ nhĩpêx o ri pa. Anê.

Æm hãmri na ã mẽ harênh anhýtja. Jakamã kwa mẽ okora. Kêr ka mẽ ã amnhĩ nê mẽ kot amnhĩ nhĩpêx anhýt o mẽ pa xwýnhjê pumunh mex o ri apa.

³⁴Kwa mẽ tokyx mẽ ate tanhmã amnhĩ tomnuj to hã amnhĩ pumu nê axte ã amnhĩ nhĩpêx anhýt kêt nê. Nê mẽ ate Tirtũm kot akupým mẽ ho htîr kêt ã harênh xwýnhjaja. Te mẽ ate Tirtũm kot amnhĩ nhĩpêx

ã omunh kêt pyrãk. Tã mẽ ate tokyx ja hã amnhĩ pumunh nê amnhĩ kamã apijaãm kaxyw na pa ã mẽ amã ixkapêr anê.

Mẽ panhĩ nyw jarênh

Rukre 20.34-36; Rõmãn 8.10-11; Sikũn Korîit 5.1; Piripos 3.20-21

³⁵Nê mãn ka mẽ atõ akupým mẽ htîr ã mẽ harênh ma nê tee ri mẽ hkukamã ajamaxpêr nê hã ri tanhmã axpên kukjêr to nê axpên mã:

—Kwa tanhmã koja we Tirtũm akupým hkra htyk xwýnhjê ho htîr to? Ra mẽ htyk nê mẽ ĩ katõk nê hapêx par mã kênã. Tanhmã kot wem amnhĩ to nê akupým htîr? Nê tanhmã koja we mẽ ĩ nywja kute wehe? Anê.

³⁶Nã na ka mẽ atýt ri ã ajamaxpêr anê nê tee ri mẽ hkukamã ajamaxpêr. E kot paj ixprĩ hã ja hã ejêp jarê ka mẽ inhma. Nã na htem mẽmo y hkre. Te mẽ kot mẽ htyk jaxãr pyrãk o hipêx nê hkre nhũm hikwýt nê gaa nê higrõt hapõj. Nom te kêp mẽmo yta pyrãk kêt. ³⁷Æm hy pix na htem hkre. No higrõt kre hkêt nê. Rýt tanhmãn pãr nywja kre hkêt nê. Æm hy pix na htem hkre. Tã nhũm higrõt hapõj nê hprêk nê gaa nê ô. ³⁸Tirtũm na hte hamaxpêr xã hkôt tanhmã ho nhũm higrõt hapõj nê hprêk nê ô. Tã ja pyrã nê kot puj mẽ Tirtũm jamaxpêr xã hkôt pahtyk tã koja akupým mẽ pahto mẽ pahťîr nê mẽ pamã mẽ panhĩ nyw gõ.

³⁹Nê mẽmo hy piitã te kot axpên pyrãk kêt. Ahpýnhã na. Ja pyrã nê ahpýnhã ri mẽmoj piitã ĩ. Na axtem mẽ panhĩ nê axtem mry nhĩ nê axtem àk nhĩ nê axtem tep nhĩ. Mẽmoj piitã ahpýnhã ri ĩ.

⁴⁰⁻⁴¹Nê kaxkwa kamã haxwýtja mẽmoj piitã ahpýnhã no ãm muxre. Myytija mex. Nê mytwrýtja axte mã no ãm haxwýtja mex. Nê kanhêti haxwýtja mex. Haxwýtja axte mã.

Kamā hkwý hpôk kryre nē kamā hkwý hpôk rünhti no âm piitā mex.

Nē jar pika ja kamā haxwýja mēmoj piitā mex. No âm te kot kaxkwa kamā mēmoj jarir xwýnhja mex pyrāk kêt. Axtem na raa.

⁴² Tā koja mē panhī nywja haxwýja axte mā. Te kot panhī htüm pyrāk kêt. Na htem ty nhüm mē ma mē o mra nē mē haggē. Nhüm mē hikwý nē gaa nē i rerek nē hapêx. Tā koja Tirtüm akupým tanhmā mē pahto mē pahťir to pu mē hpānhā pamex kumrêx. Hāmri nē axte mā mē panhī nyw mex o mex jakamā koja axte htyk nē i rerek kêt nē.

⁴³ Na htem ty nhüm mē haggē nhüm htyk xwýnhja tanhmā amnhī to hkêt nē amarī hikwý. Omnuj nē i nhenhek nē hikwý. Tā koja Tirtüm akupým mē ho mē htír nē mē kām mē i nyw gō nhüm mē hpānhā mex kumrêx nē hihtýx nē Tirtüm nhō krī kamā pa ho pa.

⁴⁴ Mē htyk nhüm mē kot mē haggēnh xwýnhja na htem arī i htüm ā hikwý. Âm jar pika ja pix kām ri mē papa kaxyw na mē panhī htümja. No mē panhī nywja axtem Tirtüm nhō krī kamā ri mē papa kaxyw jakamā koja mē panhī nywja axte mā. Tirtüm Karō koja mē pamā kugō.

Mē panhī nyw te kot Kris nhī pyrāk ā harēnh

Rukre 20.34-36

⁴⁵⁻⁴⁶ Nē Tirtüm kapēr ā kagā htüm kot Atāw jarēnh kot:

Na pre Tirtüm my kot wa Atāwja nhīpêx. Jakamā Atāw kēp pika nhō xwýnh na pre. Anē. Ā Atāw jarēnh kot anhyr. Ja pyrā nē na pu htem pakatorxā nhōhy rüm pajapōj nē Atāw pyrā nē pahpê pika nhō xwýnh. Tā nhüm Atāwja pa nē gaa nē hpigēt nē ty. Jakamā kot puj mē urāk nē papa nē gaa nē ty. Nom nhüm Krisja Atāw kurōm kēp akupým mē ho mē htír xwýnh

jakamā kot puj mē pahpê hkwýjaja Atāw pyrā nē nhýrmā mē pahtyk tā nhüm Kris akupým mē pahto mē pahťir. Hāmri nhüm Tirtüm Karō mē pamā mē panhī nyw gō pu mē axte pahtyk kêt nē. Pānhā axte mā mē pahpê kaxkwa nhō xwýnh.

⁴⁷ Nē Atāw na pre Tirtüm pika ho hipêx nē ho htír nhüm ri pa. Nom Kris na pre Atāw rom kaxkwa rüm mē pahwýr wrý. ⁴⁸ Tā mē pahpê pika nhō xwýnhjaja te mē pahpê Tirtüm kot wam my nhīpêx xwýnhja pyrāk. No mē pahte kaxkwa hwýr ma papa mā xwýnhjaja te mē pahte kaxkwa rüm my kot mē pahwýr wrýk xwýnh Krista pyrāk. ⁴⁹ Tā kormā mē pahpê pika nhō xwýnh jakamā te mē pahpê my pika ho hipêx xwýnhja nhī pyrāk. Nom kot puj mē nhýrmā ty hāmri nē hpānhā te pahpê kaxkwa rüm my kot mē pahwýr wrýk xwýnhja nhī pyrāk.

Axte mē pahtyk kêt kumrêx ā mē pajarēnh

Juāw 11.25; Sikün Korit 5.4; Wam Tesarōn 4.13-18

⁵⁰ Nē kot puj mē panhī htüm rāhā Tirtüm nhō krī hwýr paxāpir kêt nē. Panhī htüm na hte ty nē rerek nē hapêx. Jakamā koja Tirtüm Karō mē pamā mē panhī nyw gō pu mē rī kormā ma ō krī hwýr pajapêx pa nē kamā papa ho papa.

⁵¹⁻⁵² E mē inhma. Na pre kormā Tirtüm mē amā mēmoj to amnhīrīt kêt tā ra inhma ho amnhīrīt. Jakamā kot paj ý hā mē amā harē ka mē inhma. Nā kot puj mē pahpiitā mē pahtyk kêt nē. Koja nhýrmā Tirtüm kapēr o mē wrýk xwýnhjē hōja mē pamā pifti kakō. Mē pajaêr pē hkakō. Hāmri nhüm Tirtüm kra ra mē htyk nē mē hikwý xwýnhja akupým i nyw o htír kurē kumrêx. Nē kormā mē pahtyk kêt xwýnhja kot pu mē mē pahpê kêt ri mē urāk nē panhī nyw kurē kumrêx. Hāmri

pu mẽ pahpiitã pahtĩr o pahtĩr tũm nẽ papa. ⁵³ Koja Tĩrtũm mẽ panhĩpẽx o te mẽ pahte paxẽ htũm o papinhĩpanh nẽ hpãnhã paxẽ nyw jagjẽnh pyrãk. Jao mẽ panhĩ htũm o hapẽx nẽ hpãnhã mẽ pamã mẽ panhĩ nyw gõ pu mẽ axte pahtyk kêt kumrẽx nẽ ri papa ho papa. ⁵⁴ Tĩrtũm kapẽr ã kagã htũm kot ja jarẽnh kot:

Na ra Tĩrtũmja mẽhtyk ho hapẽx pa. Anẽ.

Te ra kot ho hapẽx par pyrãk o ã harẽnh kot anhỹr. No ãm kormã. Jakamã kot puj mẽ nhỹrmã panhĩ nyw nẽ ri papa nẽ mẽ pahtõ axte pahtyk kêt kumrẽx. ⁵⁵ Mẽ pahtykja te mẽ kot makre par nhũm axte kot mẽ hkamnhwỹr kêtja pyrãk. Urã nẽ koja Tĩrtũm akupỹm mẽ pahto mẽ pahtĩr pu mẽ axte pahtyk kêt nẽ. Nẽ axte ri pamã ma hkêt nẽ papa. Nẽ axte paxã hkêt nẽ. ⁵⁶ Tĩrtũm kapẽr ã kagã htũmja ã mẽ pakukamã mẽ pajarẽnh kot anhỹr. Mẽ pahte amnhĩ tomnuj xwỹnh jakamã kot puj mẽ nhỹrmã ty. ⁵⁷ Nom nhũm Tĩrtũm ãhpumunh tỹx o ãhpumunh tỹx jakamã na hte Pahihti Jejus Kris kunkwak ri mẽ pahte hkõt amnhĩ xunhwỹr xwỹnhjẽ nẽ mẽ pahte amnhĩ tomnuj rẽnh pa. Pu mẽ nhỹrmã mẽ pahtyk tã nhũm akupỹm mẽ pahto pahtĩr.

Mẽ pahte Jejus mã tanhmã amnhĩ nhĩpẽx mex to hã mẽ pamã karõ

Karatas 6.9; Korosẽ 1.10

⁵⁸ Jakamã e kwa Jejus kõt ixkwỹjaja. Kẽr ka mẽ arĩ Pahihti Jejus kõt mãn amnhĩ xunhwỹr tỹx rãhã ho ri apa. Nẽ kapẽr kõt pix mã ri amnhĩ nhĩpẽx rãhã nẽ kãm tanhmã amnhĩ nhĩpẽx mex to ho ri apa. Kot kaj mẽ ã amnhĩ nhĩpẽx anẽ hãmri nẽ kãm tanhmã amnhĩ nhĩpẽx to kaprỹ ho ri apa hkêt nẽ. ãm hãmri kãm mẽmoj to anhỹr mex rãhã ho ri apa.

16

Mẽ kęp amrakati xwỹnhjẽ jarẽnh Atre 11.27-30; Rõmãn 15.25-27; Sikũn Korīt 8.1-24, 9.1-5; Wam Ximotre 6.18

¹ Nẽ na pa pre krĩ pẽ Karatas kamã tanhmã Jerujarẽ kamã Kris kwỹjẽ jarẽnh to. Ijaew kwỹ kot mẽ pahpyrã nẽ Jejus kõt amnhĩ xunhwỹr ã mẽ harẽ nẽ mẽ kęp amrakati hã mẽ harẽ hãmri nẽ mẽ kãm; —E. Kwa kęp ka mẽ kãm mẽ akãxpore hkwy ho akuprõ nẽ ma mẽ hwỹr amẽ.

Anhỹr o mẽ kãm ixkapẽr. Jakamã kwa kęp ka mẽ urãk nẽ mẽ kaxyw mẽ kãm kãxpore hkwy ho akuprõ. ² Mẽ panhõ arĩgromnu pẽ sap ã hkwy ho akuprõ. Kot kaj mẽ akãxpore rax japẽr nẽ mẽ kaxyw hkwy ho rax nẽ axi. Nom kot kaj akãxpore grire japẽr nẽ mẽ kaxyw mẽ kãm ho grire nẽ agõ. Kẽr pa mẽmo arĩgro hã ma mẽ awỹr mõ ka mẽ ra mẽ kaxyw ho apikuprõnh rax nẽ.

³ Nẽ ma mẽ kot mẽ kãm ho mõr mã xwỹnhjaja ka mẽ ixkutẽp mẽ akwỹjẽ rẽ. Kẽr pa põj nẽ mẽ omu hãmri nẽ mẽ kaxyw kagã nhĩpẽx nẽ kamã mẽ harẽ. Nẽ mẽ kãm kugõ nhũm mẽ ma Jerujarẽ hwỹr kãxpore mẽ ro hã amnhĩ kõt o mõ nẽ mẽ kãm kugõ. Mẽ kot kamã harẽnh nẽ mar hãmri nẽ mẽ kamjaja mẽ ate mẽ kaxyw mẽ rẽnh ã mẽ ajarẽnh ma. ⁴ Rỹ kot ka mẽ amã mẽ hkõt inhmẽnh prãm nẽ mãmrĩ mẽ hkõt inhmẽ pa ma mẽ hkõt mõ.

Pawre kot amnhĩ kukamã amnhĩ jarẽnh

Atre 19.21-22

⁵ Nom kot paj tokyx mẽ awỹr inhmõr kêt nẽ. Kot paj ja rũm ixkato nẽ hpãnhã ma pika pẽ Masetõn wỹr mõ. Hãmri nẽ mẽ hkõt ixpa grire nẽ ma kormã mẽ awỹr Korīt wỹr mõ. ⁶ Hãmri nẽ põj nẽ mẽ akõt ri ixpa ryy nẽ. Nẽ ixtã amgrã pixi nẽ hapẽx nẽ rĩ kormã ma axte nhãm krĩ hõ hwỹr mõ. Nẽ inhnojarẽt ka mẽ ixto Tĩrtũm wỹ

nē inhmā ixàpkur xà hkwý gō pa ma mē hwýr pry hā hkur o mō. ⁷ No ixte mē awýr ixpōx nē tokyx mē akurūm ixkator nē hpānhā ma nhām krī hō hwýr inhmōrja na inhmā hprām kêt. Jakamā koja Tirtūm kām ja mex pa arī ri mē akôt ri ixpa hā ixtā mytwrý xohtō nē tokyx ma nhām inhmōr kêt nē. ⁸ Kot paj kormā jar Epes kamā ri ixpa rāhā nhūm mē hkīnh pē Pētekos kato nē hapêx pa rī kormā ma Masetōn wýr mō. ⁹ Na pa hte jar kormā mē kām Jejus kapēr jarēnh o ri mē hkôt ixpa nhūm mē ohtō nē inhmar o pa. Mē kām mar prām. Tā no nhūm mē hkwýjaja ohtō nē mē kēp ja omnuj nē nhūm mē hā ixkamā gryk nē ixtomnu o pa.

Mē kot Ximotre ho mex ā mē harēnh

Hapuhā Juāw 5

¹⁰ Nē kwa koja Ximotre mēmo arīgro hā mē awýr pōj ka mē omu nē ho mex nē. Nē mē amnhī nhōrkwý hwýr awý kē mē akutā apkur o pa. Na hte ixpyrā nē Pahihti Jejus mā tanhmā amnhī nhīpêx to mex o pa. ¹¹ Kormā mē pahkīnhā nyw tā kēr ka mē tee ri ja hā omu nē ri axpēn mā tanhmā harēnh to hkêt nē. Mē ām akapēr mex pix o kām akapēr. Nē koja akupýn nojarēt ka mē pry hā kām apkur xà hkwý gō kē mex pē man akupýn ixwýr mō pa tokyx omu. Kot paj jar mē pahkwýjê mē akupýn hpōx kamā ijamak o ixpa.

¹² Nē na pa hte xatā jar mē pahtō Aporja ma mē awýr mōr kaxyw mē awýr hano. Kot jar mē pahtō hkwýjê mē ma mē awýr mōr kaxyw. Nom kormā. Koja xep mē jar tanhmā amnhī to hpa nē rī kormā ma mē awýr mō.

Kagà jatur xà kamā Pawre kot mēmoj tā karō

Epes 6.10-12; Sikūn Ximotre 1.7; Wam Pêtre 5.8-9

¹³ E kwa kēr ka mē arī amnhī wýr Jejus kamā ajamak rāhā ho ri apa. Nē hamār pē kutêp tām amnhī nhīpêx o ri apa. Nē amnhī kaxyw hkôt ajamaxpēr týx rāhā nē.

¹⁴ Nē mē amā axpēn kīnh pē tanhmā axpēn to mex to.

¹⁵ Mān ka mē ra Estepti mē hkwýjê jarēnh ma. Mē hkumrêxjaja na prem pika pē Gres kamā Kris kôt amnhī xunhwý. Tā xep mē ra Kris kôt hkwýjê ho mex o ri mē hkôt pa. ¹⁶ Kēr ka mē ā mē kot amnhī nhīpêx anhýr xwýnhjê kapēr ma nē hkôt ri amnhī nhīpêx o ri apa. Mē kot Kris mā mē ajamār xwýnh piitā kēr ka mē kapēr ma nē mē hkôt ri amnhī nhīpêx mex nē.

¹⁷ Nē ota Estepti nē Akajkre nē Putunatreto na mē ra jar pōj. Pa mē Sostenes mē wa mē omu nē wa ixkīnh nē. Te ixte mē apumunh nē ixkīnh týxta pyrāk. ¹⁸ Na xep prem ma mē awýr mō nē tanhmā mē amā kapēr to ka prem mē ama nē akīnh nē. Tā mē ra amnē ixwýr mō nē tanhmā inhmā kapēr mex to pa mē kuma nē ijaxwýja ixkīnh nē. Kwa kēr pu mē ā mē kot mē panhīpêx anhýr xwýnhjê ho mex o papa.

¹⁹⁻²⁰ Nē ota jar pika pē As kamā Kris kôt mē pahkwýjaja piitā mē awýr hpēr mē. Nē Akir mē hprō Prisireja wa. Nē wa ōrkwý kamā mē kot Tirtūm mā amnhī jarēnh kaxyw mē pikuprōnh xwýnh piitā mē awýr hpēr mē.

Nē kēr ka mē nhýri axpēn pumu nē mē apē Kris kôt mē ate axpēn to atō nē atōx ā axpēn mā akapēr mex nē akīnh nē.

²¹ E kot paj kagà jatur xà kamā inhīhkra ho mē amā amnhī nhīxi nhīpêx ka mē omu. Koja inhmā ixkapēr ā kagà xwýnhhta ja hā kagà hkêt nē. Pa kot paj hipêx. Ixpē Pawre na pa ā amnhī nhīxi nhīpêx anē ka mē omu.

²² Nē kwa kēr ka mē arī amā Pahihti Jejus kīnh o ri apa. Koja

mēhō kām hkĩnh kêt hã koja Tĩrtũm
ja hã homnuj tỳx kumrēx.

E “maranat.” Mē pakapēr kām
na htem maranat jarēnh o: “Kwa
tokyx akupỹn mē ixwỳr wrỳ Pahi-
hti.” Anē.

²³E kê Pahihti Jejus Krisja mē ato
mex nē mē akutã nojarêt rãhã ho
pa. ²⁴Ixpyrà nē mē apê Jejus Kris
kwỳ jakamã na pa hte inhmã mē
akĩnh nē.

Tã ãm ja pix. Ixpê Pawre na pa ã
mē awỳr kagà nhĩpêx nē mēnh anē.

Sikūn Korīt Pawre wam Korīt kām Jejus kôt hkwýjé hwýr kagà nē mēnh kôt kagà hō mēnh

Pawre na pre kagàja nhīpēx. Kēp mry hkà ho ixkre nhīpēx nē ho wēnē ho pa xwýnh na pre. Tā hpānhā kēp Jejus nhỹ hā hkrajé jahkre ho pa xwýnh. Jakamā na pre kagàja nhīpēx nē Korīt kām mē kot Jejus kôt amnhī xunhwýr xwýnhjé hwýr kumē. Na pre ra mē hwýr wamta nhīpēx nē kumē. Wam kagà nhīxi pē Wam Korīt. Tā axte hkôt ja nhīpēx nē mē hwýr mēnh jakamā kagà nhīxi pē Sikūn Korīt.

Na pre Korīt kām Jejus kôt mē htōjé hō axtem nē nā puro kamā hpījaam kēt o pa nhūm Pawre tee ri harēnh ma nē mē hwýr wam kagàta mē nē kamā tanhmā mē kot hipēx to hā mē kām karō. Tā kagà ja kamā axte tanhmā hā mē kām karō hto.

Na pre ra Korīt wýr mē kēp Kris nhỹ hā mē ahkre hā amnhī to hēx xwýnhjaja mē hwýr pōj nē tanhmā mē kām kapēr jarēnh to ho mē hkôt pa. Nē tanhmā mē kām Pawre ho hēx to. Jakamā nhūm kagàja kamā tanhmā mē kām amnhī tā àprār to nē kām mē hkīnh tỳx ā amnhī jarē. Ā na pre Pawre mē kām mēmoj jarēnh nē hā kagà anē. Nē mē kām hā kagà ho:

¹ Pa Korīt kām Tirtūm krajaja. Xà mē apiitā mē amex na ka mē apa? E ot pa mē awýr kagà nhīpēx nē kumē. Mē amā nē mē anhō pika pē Gres kamā Tirtūm krajé mē mē ato ixpimràatā mē awýr hipēx nē kumē. Ixpē Pawre na pa hte Tirtūm jamaxpēr xà hkôt ma Jejus Kris nhỹ hā krī piitā hkôt hkrajé jahkre ho ri xpa. Tā Kris kôt mē pahtō Ximotre mē wa mē awýr hipēx nē kumē.

² E kē Mēpahpām Tirtūm mē Pahihti Jejus Kris wa mē ato mex rāhā ho pa. Nē mēmoj to mē akutā nojarēt rāhā ho pa. Ka mē wa kukwak ri ajamakētkati nē amex nē ri akīnh nē apa ho apa.

Pawre kām amnhī xà htỳx kamā hamak pyma hkēt ā harēnh

Rōmān 1.11-12; Korosē 1.11; Sikūn Tesarōn 2.16

³⁻⁴ Nā Tirtūm kēp mē panhō Pahihti Jejus Kris nhīpēxà na. Nē kēp Mēpahpām maati jakamā na hte mē pakamā ukapri nē tanhmā mē pahto mex to ho pa. Kot puj mē mēmoj tā tanhmā amnhī to nē pahkapri nē ri papa nhūm ja hā mē pahpumu hāmri nē hamaxpēr pix o akupým mē pahto mē paxihtỳx. Mēmo kaxyw na hte ā mē pahto mex anē? Nā mē pahte amnhī tā omunh nē amnhī pyràk mē hkapri nē ri mē pa xwýnhjé jamaxpēr o hihtỳx o mē hkôt papa kaxyw. Ja kaxyw na hte mē pajamaxpēr o hihtỳx. Jakamā kwa pu mē kām mex o mex ā mán harēnh rāhā ho pa.

⁵ Na htem tōhā ixto Kris nhīpēx pyrà nē tanhmā ixto pa amnhī xà htỳx kamā ijamak o ri xpa. Tā nhūm Tirtūm inhīpēx o te Kris nhīpēx pyrà nē hamaxpēr pix o tanhmā ixkrā hto pa mē kutā amnhī to htỳx nē arī mē hkôt xpa. ⁶⁻⁷ Na pa hte mē amā Kris kapēr jarēnh o xpa. Mē ate inhar nē hkôt amnhī nhīpēx kaxyw. Jakamā na hte mē kām Tirtūm kapēr mar prām kēt xwýnhjaja tōhā mē atā ixtomnuj nē pa amnhī xà htỳx kamā ijamak o ri xpa. Tā kwār mē māmri ā inhīpēx anē. Mē ate Jejus kôt amnhī xunhwýr tỳxja na inhmā hprām. Na htem tanhmā Kris ā inhīpēx to nhūm Tirtūm mē hā ixpumu nē tanhmā ixkrā hto pa inhmā amnhī xà htỳx kamā ijamak pyma hkēt nē xpa. Nē arī mē hkôt mē kām kapēr jarēnh rāhā ho ri xpa. Na hte Tirtūm amarī ā inhīpēx

anhÿr kêt nê. Mê ate ã kot inhîpêx anhÿr ã ixpumunh nê ixpyrà nê amnhî kaxyw kãm ajamaxpêr tÿx kaxyw na hte ã inhîpêx anê. Mê ate ja hã ixpumunh nê ã ajamaxpêr anhÿr kaxyw nê mê ajamaxpêr o:

—Nà kot pa nhÿrmã Pawre pyrà nê tōhã mê mÿrapê amnhî xà htÿx kamã ijamak o ixpa. Hãmri nhÿm Tîrtÿm ja hã ixpumu nê te ho Pawre nhîpêx pyrà nê tanhmã ixto pa inhmã amnhî xà htÿx kamã ijamak pyma hkêt nê ixpa. Nà koja ã inhîpêx anê.

Anhÿr o mê ajamaxpêr kaxyw na hte Tîrtÿm mê kutã ixto ixihtÿx. Mê ate ja hã ixpumunh nê akupÿm tãm ajamaxpêr pê Karō nhÿ hã amnhî to axihtÿx kaxyw. Jakamã na pa tee ri mê akukamã ijamaxpêr kêt nê.

Tîrtÿm kêp mê papytâr xwÿnh ã harênh

⁸ E Kris kôt ixkwÿjaja. Kot paj ixprî hã mê amã tanhmã amnhî jarênh to ka mê inhma. Na pa pre ma pika pê As wÿr mō nê mê kãm Jesus kapêr jarênh o ri mê hkôt ixpa. Hãmri nhÿm mê hkwÿjaja ja hã ixtomnuj tÿx nê pa amnhî xà htÿx kamã ijamak pê mê hkôt ixpa. Kironhÿx pa pre mê kamã ty. ⁹ Na pa pre tee ri amnhî kukamã ijamaxpêr o:

—Koja pêr mê ixpî. Tanhmã kot pa we amnhî to nê tokyx mê kêp amnhî pytà? Kot paj tee ri inhmã mê kêp amnhîptâr prãm. Tîrtÿm pix na ja kaxyw mê kutã àhpumunh tÿx. Rÿ nhÿm mê kot ixpîr tã nhÿm kot akupÿm ixto ixtîr kaxyw tapxîpîx na àhpumunh tÿx. Nà kot paj amnhî kaxyw tapxîpîx mã mãn ijamaxpêr o ri ixpa nhÿm amnhî tã ixpumu nê hkînh nê. ã ixte amnhî nhîpêx anhÿr o ixpaja na kãm hprãm. Anê.

¹⁰ Tã nhÿm pre ã inhîpêx anê nê xatã mê kêp ixpytâr o ixkôt pa. Koja ã mê kêp inhîpêx anhÿr rãhã ho pa. Nã ã kot inhîpêx anhÿr mã kênã.

¹¹ Nom kwa kêr ka mê apiitã arî ixto Tîrtÿm wÿr rãhã ho ri apa kê mê ama nê mê kãm ixkurê xwÿnhjê kutã ixto ixihtÿx rãhã ho pa. Nê ixto mex rãhã nê. Hãmri nhÿm mê ohtō nê kot mê kêp tanhmã ixpytâr to hã ixtã omu nê ixtã kãm mex o mex ã harê.

Pawre kot mê kãm amnhî tã aprâr ã harênh

Wam Korît 2.1-5

¹² Nê na xep pre atar Kris kôt mê pahkwÿjaja tanhmã ixto kapêr punuj to nê Jesus kot mê awÿr inhmênh kêt ã mê amã ixto hêx. Nê ijakwa nhîkjê ho inhmã mê akînh nê ijakwa nhîkjê ho mê ato ixkapêr punuj ã ijarênh o ri pa. Nom ixte ã amnhî nhîpêx anhÿr kêt. Aa ixte tanhmã mê ano kupyr to hkêt. ãm hãmri na pa mê amã amnhî jarê nê tãm mê amã ixkapêr o ri ixpa nê tãm ri mê anhîpêx o ri ixpa. No ijamaxpêr tÿm kôt tanhmã mê anhîpêx to hkêt nê. ãm Tîrtÿm kot mêmoj to mê pakutã nojarêt ã omunh xà hkôt pix mã na pa hte ÿ hã mê ato mex o ri ixpa. Ijamaxpêr nyw o. Na pa hte Tîrtÿm pyrà nê mê piitã mê ho mex nê. No mê kajaja ixpyràn mê apê hkra jakamã na pa hte mê ato mex kumrêx o ri ixpa. ¹³ Na pa hte mê amã kagã hkwy nhîpêx nê ixprî hã mê amã tanhmã mêmoj jarênh to. Mê ate kamã harênh nê mar mex kurê kumrêx kaxyw. No na pa hte mê amã tanhmã ixêx to rÿ tanhmã mê ano kupyr to hkêt nê. ¹⁴ ã ixte amnhî nhîpêx anhÿr o ri ixpa htã kormã mê apiitã ja hã ixpumunh mex kêt nê. Nê Jesus kot mê awÿr inhmênh ã ixpumunh mex kêt nê. Jakamã na hte mê akwÿjaja ixto akapêr punuj o pa. Tã kot kaj mê nhÿrmã ãm hãmri Jesus kot mê awÿr inhmênh ã axpên mã ijarê pa mê ama nê ixkînh nê. Hãmri nhÿm nhÿrmã mê panhō Pahihiti Jesus mê pahwÿr akupÿn wrÿ pa kãm mê ajarê nê kãm:

—E Pahihti. Jajê mã na pa pre akapêr jarênh o ixpa nhûm mê inhma nê akôt amnhî xunhwÿr kurê kumrêx nê tãm amnhî nhîpêx mex o pa.

Anhÿr o kãm mê ajarê. Hâmri nê ã mê ate amnhî nhîpêx anhÿr ã mê apumunh kôt ixkînh nê. Ka mê ajaxwÿja akînh pê tanhmã kãm ijarênh to ho akuhê.

*Pawre hêx kêt ã kot amnhî jarênh
Wam Korîit 16.5-6*

¹⁵⁻¹⁶ Nê na pa pre ra mê awÿr ixkrã. Ixte ma mê awÿr inhmôr nhûm mê ate ixpumunh nê akînh ã mê akamnhîx nê mê awÿr ixkrã nê ijamaxpêr o:

—Nã ma Masetôn wÿr inhmôr xwÿj ri kot paj ma Korîit kumrêx wÿr mô. Hâmri nê Kris kôt ixkwÿjê pumu nê rî kormã hamû Masetôn wÿr mô. Nê mê kamã ri ixpa tãmtã awjanã nê akupÿn Korîit wÿr mô nê axte mê omu. Jao Tîrtûm kapêr o mê ahkre ho axkrut nhûm mê amnhî tã ixpumu nê hkînh nê. Hâmri pa akupÿm Jutej wÿr inhno-jarêt nhûm mê pry hã ixãpkur xã hã inhmã mêmoy kwÿ nhôr japêr.

Anhÿr o ijamaxpêr. ¹⁷ Tã kormã jar tanhmã amnhî nhîpêx to ho ixpa ka xep mê tee ri amnhî wÿr ixkãm ama nê axpên mã ijarênh o:

—Kwa Pawre kot ra mê pahwÿr nojarêt ã amnhî jarênh tã amnhîm nojarêt kêt kumrêx. Mãn pre ãm mê pamã amnhî to hêx nã? Ra kot mê pamã amnhî jarênh tã tokyx hpôx kêtne hã. Anê.

¹⁸ Kwa mê ri ã inhmã ajamaxpêr anhÿr kêt nê. Na pa pre mê amã ixêx kêt nê. Na pa hte Tîrtûm noo mã ãm hãmri mêmoy jarênh o ri ixpa nê mê amã mêmoy jarênh o ixêx kêt nê. Nã ãm hãmri na pa pre ma mê awÿr inhmôr ã amnhî jarê.

¹⁹ Na pa pre ra Ximotre mê Siras mê wa mê amã Jejus Kris jarênh o ri mê akôt ixpa. Jejus kêp Tîrtûm Kra hã harê nê kot amnhî nhîpêx te

kot Tîrtûm kot amnhî nhîpêx pyrãk ã harênh o ri ixpa. Jejus haxwÿja amnhî to hêx kêt. Kot mêmoy tã amnhî jarênh xã hkôt na hte ãm hãmri tanhmã amnhî nhîpêx to. Tã ã kot amnhî nhîpêx anhÿrja kôt na pa inhmã ixte amnhî nhîpêx o ixpa hprãm nê. ²⁰ Ra Tîrtûm Jejus Kris kukwak ri kot mê pahto mex ã amnhî jarênh jakamã na pu htem axpên mã harênh o:

—Koja Tîrtûm Jejus kukwak ri mê pahto mex rax nê. Ra kot mê pahtã amnhî jarênh xã hkôt. Nã Tîrtûm mex o mex. Anê.

*Tîrtûm kot mê pa hwÿr Karô rênh
ã harênh*

Rômãn 8.14; Epes 1.13

²¹ Nã Tîrtûmja mex o mex. Kot mê pahpê hkra kaxyw amnhîm mê paxunhwÿr jakamã na hte tanhmã mê pahkrã hto pu mê Kris kôt amnhî nhîpêx mex o papa.

²² Na pu htem Kris kôt amnhî xunhwÿ nhûm Tîrtûm ja hã mê pahpumu nê mê pahwÿr Karô rê nhûm mê pahwÿr agjê. Mê piitã mê kot mê pahpê hkra hã mê pahpumunh kaxyw. Te mê kot tanhmã mê hikukrêx kagã hto nhûm mê kot kêp ô dôn ã omunhta pyrãk. Tã koja Tîrtûm Karô mê pakamã hkrî pu mê ja hã amnhî pumunh kôt Tîrtûm kot nhÿrmã mê pahto mex rax ã amnhî tã omunh kurê kumrêx. Ra kot mê pahto mex tã koja nhÿrmã mê pahto mex rax o wam kot mê pahto mex raxta jakre.

*Pawre kãm mê kãm ãkjêr prãm kêt
ã kot amnhî jarênh*

Wam Korîit 4.21; Sikûn Korîit 10.1-2

²³ E Kris kôt ixtô nê ixtôxjaja. Kot paj kormã ma mê awÿr inhmôr kêt ri ixprî hã mê amã tanhmã amnhî jarênh to ka mê ixte amnhî jarênh ma. Tîrtûm tãm mê arom kot ijamaxpêr kôt ixpumunh mex jakamã kot paj noo mã ixprî hã mê

amā tanhmā amnhī jarēnh to ka mē inhma.

Na pa pre ra mē awyr inhnojarēt tā no ām tee ri amnhī kukamā ijamaxpēr nē ijamaxpēr o:

—Nā kot paj taxy kormā ma mē hwyr inhmōr kēt nē. Kot paj tokyx mē hwyr mōn pōj nē kot amnhī tomnuj xwŷnh̄ta ā mē kām akir nē nē tanhmā mē kām ixkapēr to. Hāmri nhūm mē amnhī tā inhma nē hkaprī nē tee ri amnhī kukamā hamaxpēr. Ā mē kot amnhī nhīpēx anhŷr pymaj kot paj kormā mē hwyr inhmōr kēt nē.

Anhŷr o ijamaxpēr. ²⁴ Inhmā ma mē awyr inhmōr nē tanhmā mē ate amnhī nhīpēx to hā axte mē amā karō kamā ixih̄tŷx prām kēt. Mē akwŷjē rom ra mē ate Kris hkōt amnhī xunhwŷr tŷx kēnā. Tā mē ate hkōt amnhī nhīpēx mex o akīnh nē apaja na inhmā hprām.

2

¹ Na pa pre ma mē awyr mō nē mēmoj tā mē amā akir nē nē tanhmā mē amā ixkapēr to ka prem inhma nē akaprī nē ri apa. Tā inhmā akupŷm mē awyr inhmōr nē axte mē amā ixākjēr prām kēt jakamā na pa kormā mē awyr inhmōr kēt nē. ² Kot kaj mē akīnh nē apa pa ijaxwŷja ixkīnh nē ixpa. No kot paj ma mē awyr mō nē mēmoj tā mē amā akir ka mē tee ri inhma nē akaprī nē. Pa mē apumu nē ijaxwŷja ixkaprī nē.

³ Ja pymaj na pa pre wam ixte mē awyr kagā mēnh̄ta kamā mēmoj nē tanhmā mē amā ixākjēr to. Mē ate kamā harēnh nē mar nē tokyx kormā mē awyr inhmōr xwŷj ri tanhmā mē ate amnhī tomnuj tota kaga nē tām amnhī nhīpēx kaxyw. Kēr pa mēmo arīgro hā ma mē awyr mōn pōj nē mē ate tām amnhī nhīpēx o apa hā mē apumu nē ixkaprī hkēt nē ixkīnh nē. Ka mē ajaxwŷja ixpumu nē akīnh nē. ⁴ Jakamā na pa pre ā mē amā

kagāta nhīpēx nē mē awyr mēnh̄ anē. Nē kamā mēmojta nē tanhmā mē amā ixākjēr to. Na pa pre ixkaprī htŷx nē tee ri mē akukamā ijamaxpēr o inhmyr rax pē mē amā mēmojta ā kagā. No ām mē akaprī kaxyw na pa pre mē amā hipēx kēt nē. Ām mē ate kamā harēnh nē inhmar nē ajamaxpēr o:

—Hēxta waa nē. Nā Pawre na kām mē pahkīnh tŷx kumrēx. Hā na pre mē pahte tanhmā amnhī tomnuj to hā mē pajarēnh ma nē tee ri mē pakukamā hamaxpēr pē kagāja kamā hā mē pamā akir nē mē pahwŷr kumē. Nā kām mē pahkīnh tŷx kām na ā mē pamā kapēr kām hihtŷx anē.

Anhŷr o ajamaxpēr kaxyw na pa pre hipēx nē mē awyr kumē.

Mē kot axte amnhī tomnuj mā hamaxpēr kēt ā mē kām karō

Rukre 17.3-4; Wam Korīt 5.1-13; Karatas 6.1-2

⁵⁻⁹ Nē wam kagāta kamā na pa pre mē amā mē akwŷjē hō kot nā kaakre kamā hpijaam kēeta pa mē amā tanhmā hā karō hto. Ra mē ate harēnh mar tā nē kām akapēr kēt nē. Tā mē ate inhmar nē nē tanhmā kām akapēr to nē amnhī nē hanor kaxyw na pa pre mē awyr kagāja mē. Hāmri nē ijamaxpēr o:

—Ko. Koja mē ixkapēr mar xā hkōt amnhī nē hanor japēr. Anē.

Tā ka xep prem kamā harē nē ama nē tee ri ja hā amnhī pumu nē akaprī nē. Nē ixpyrā nē apijaam nē. Hāmri nē ijamaxpēr xā hkōt amnhī nē hanor kām axih̄tŷx nē. Ām hāmri na ka prem ā hipēx anē. Nhūm xep tee ri ja hā amnhī pumu nē hkaprī nē hkaprī xāj ri myr o pa. Jao ra ā amnhī nhīpēx anhŷrta kaga nē akupŷm tām amnhī nhīpēx. Tā ra ā kot amnhī nhīpēx anhŷr jakamā kwa mē tokyx akupŷm amnhī wŷr awŷ kē axte mē awyr mra nē mē akōt pa. Ra kot amnhī tomnujta kaga jakamā kēr ka mē axte kām ajamaxpēr kēt nē. Akupŷm tām

kām akapēr kē tokyx akupŷm tām hamaxpēr nē hkīnh nē pa. Kot kaj mē tokyx ā hipēx anhŷr kēt nē nhūm tee ri amnhī kukamā hamaxpēr nē hkaprī nē pa. Ja pymaj kwa mē amā hkīnh ā kām amnhī jarē nē akupŷm tām kām akapēr pē tām hipēx o ri apa. Kē amnhī tā mē apumu nē akupŷm hkīnh nē tām hamaxpēr. ¹⁰ E kēr ka mē axte kot tanhmā amnhī tomnuj tota mā ajamaxpēr kēt nē. Kwarī ho kwarī. Kot kaj mē ā hipēx anē pa ijaxwŷja ma hipēx anē. No pa na pre tanhmā ixtomnuj to hkēt nē. Ām Jejus kapēr kwŷm na pre ri ā amnhī nhīpēx anē. Tā ra kot amnhī tomnujta kaga jakamā kot paj Jejus nhŷ hā akupŷm tām hipēx nē kot amnhī tomnujta o ijamakētkati tokyx anē nē axte kām ijamaxpēr kēt nē. Mē apiitā mē amex nē ri mē apa kaxyw. Jakamā kēr ka mē ajaxwŷja mē amex nē apa kaxyw ā amnhī nhīpēx anē nē axte kām ajamaxpēr kēt nē. ¹¹ Kwa mē tokyx ja ho ajamakētkati. Kē Satanasti tee ri ja hā mē apumu nē mē amā mē ate tanhmā amnhī tomnuj to hprām xàj tee ri tanhmā ri mē ato ho pa kaprŷ. Kēr pu mē Satanasti kot amnhī nhīpēx kōt amnhī nhīpēx o ri papa hkēt nē. Ra mē pahte Tirtūm kapēr kuhpa hā tanhmā kot amnhī nhīpēx to ho pa hā omunh mex kēnā.

Pawre kot Xitre japēr o pa hā harēnh

¹² Nē na pa pre ja rūm ixkato nē ma Tōx wŷr mō. Ixte mē kām Kris jarēnh o mē hkōt ixpa kaxyw ma mē hwŷr mō. Nhūm Pahihti Kris ixkukamā tanhmā mē hkrā hto jakamā pa pre mē hwŷr pōj nhūm mē piitā kām ixujarēnh mar prām nē. Pa pre mē kām Tirtūm kapēr jarēnh ryy ho mē hkōt ixpa. ¹³ Na pa pre Xitre ra mē hwŷr ixkukamā hpōx ā hkamnhix tā nhŷri omunh kēt nē. Hāmri nē ijamaxpēr o:

—Hēxta waa nē. Inhmā Korīt kām Jejus kwŷjē jarēnh mar prām. Na pa tee ri mē hkukamā ijamaxpēr o ixpa. Nom kormā Xitre mē kurūm akupŷn hpōx kēt. Mān kormā Masetōn kamā pa.

Anhŷr o ijamaxpēr hāmri nē mē kām amnhī jarē nē ixkato nē ma Masetōn wŷr krī hkwȳ hkōt hapēr o mō. Tā ra hwŷr ixkato nē omu.

Te mē pahpē mēhkuxwa xà pyrāk ā mē pajarēnh

Epes 5.2; Piripos 4.18

¹⁴⁻¹⁶ Nā Tirtūmja mex o mex. Na hte mē pahto mex rāhā ho pa. Nē mē kot mē panē àmnar xwŷnhjaja nhūm hte tanhmā mē ho pu mē ma paxàmnhix ri mē hkōt mē kām Kris kapēr jarēnh o ri papa. Te mē pahte mē hkuxwa xà ho ri mē hkuxwa ho papa pyrāk. Mē pahte Kris kōt amnhī nhīpēx jakamā Tirtūm mā te mē pahkuxware nē ri mē papa pyrāk. Nē te mē kām Kris jarēnh o ri papa pē te mē hkuxwa xà ho mē hkuxwa ho ri mē hkōt papa pyrāk. Nhūm hte mē hkwȳjaja mē pama nē kām mar prām nē. Nē mē paxujarēnhja haxwŷja te kot mē hkuxwa xà kuxwa mex nhūm htem hpār nē kām ho amnhī kuxwa hprām pyrāk. Jao kām mē pamar prām nē Kris kōt amnhī xunhwŷ. No nhūm mē hkwȳjaja axtem nē mē kēp mē pamar prām nōkati. Mē kumā Tirtūm kapērja te kēp wenēn kuxŷ htŷx nhūm mē kot hpār nē htyk pymaj amŷm kuhē pyrāk. Jao kapēr kaga nē kēp amŷm amnhī xunhwŷ.

Nē na pu htem amnhī krā hkōt mē kām Kris kapēr jarēnh o ri papa hkēt nē. Ām Tirtūm nhŷ hā pix mā tanhmā harēnh to ho papa.

Pawre kot katāt kōt Tirtūm kapēr o mē ahkre hā harēnh

¹⁷ Na hte mē kot mē kēp Kris nhŷ hā mē ahkre hā amnhī to hēx xwŷnhjaja te Tirtūm kapēr o wēnē pyrāk o mē hkōt pa. Jao kàxpore hprām xàj amnhī krā hkōt

tanhmā mē kām harēnh to nhūm htem mē kuma nē hpānhā tanhmā mē kām amnhīrer to. Nom pa na pa hte ā amnhī nhīpēx anhūr kēt nē. Nē mē urāk nē amnhī krā hkôt Tirtūm kapēr jahkre ho ixpa hkēt nē. Tirtūm kot mē akaxyw ixām jakamā na pa hte ixkatāt kôt Kris nhūr hā amarī mē amā kapēr jarēnh o ri mē akôt ixpa. No mē urāk nē kāxpore prām xāj mē amā harēnh kēt nē. Tirtūm kot ja hā ixpumunh mex.

3

¹ Mē kēp Kris nhūr hā mē ahkre hā amnhī to hēx xwūnhjaja na htem nhūhūm nojarēt nē mē kot mar xwūnhjē mā:

—E kot paj ma nhām krī hō hwūr mō nē Tirtūm kapēr o mē ahkre. Jakamā kwa mē kaxyw inhmā kagā nhīpēx nē kamā ixte Tirtūm kapēr o mē ajahkre mex xwūnh ā ijarē nē hā kagā. Hāmri nē inhmā agō pa ma amnhī kôt o mō nē mē kot inhmar mā xwūnhjē mā kugō kē mē kamā harē nē ijarēnh ma nē kām ixkapēr mar prām nē.

Anhūr o na htem amnhī to mē hwūr o pa. No pa na inhmā ā amnhī nhīpēx anhūr prām kēt. Inhmā nhām mē kām amnhī to jarkrar prām kēt. Mē ate ja hā ixpumunh mex. Ra mē piitā mē kot ixkatāt kôt ixte Tirtūm kapēr jarēnh mex ā ixpumunh mex jakamā mo kaxyw kot pa ri amnhī kôt kagā jamū nē ho ixpa? Nā kot pa amnhī kôt hō ho inhmōr kaxyw hā ixāhwūr kēt nē. ²⁻³ Mē kajaja te mē apē inhō kagā pyrāk. Na ka prem ixte mē ajahkre ma nē Jejus kôt amnhī xunhwūr kurē kumrēx. Hāmri nhūm Tirtūm mē amā amnhī Karō rē nhūm mē amā agjē ka mē ŷ hā amnhī nhīpēx nyw o amnhī nhīpēx o apa. Hāmri nhūm mē akwūjaja amnhī jaēr pē mē ate amnhī nhīpēx nyw ā mē apumu nē mē atā xapēn mā ijarēnh o:

—Hēxta waa nē. Pēr ām hāmri na pre Kris mē hwūr Pawre mē. Na pre ma mē hwūr mō nē mē kām Tirtūm kapēr o mē ahkre nhūm mē kuma nē amnhī tomnuj kaga hpa nē hpānhā Tirtūm kapēr kôt amnhī nhīpēx nē tām ri amnhī nhīpēx o pa. Ām hāmri na hte Pawre mē ahkre mex o pa. Hēxta waa nē.

Anhūr o mē atā ijarēnh jakamā mo kaxyw kot pa kagā hkwy jamū nē amnhī kôt ho ixpa? Nā mē kajaja te mē apē inhō kagā pyrāk.

⁴ Na pa pre Jejus kôt amnhī xām nhūm Tirtūm ja hā ixpumu nē tanhmā inhmā kapēr o amnhīrit to nē inhmā:

—E Pawre. Kēr ka ma mē kām ixkapēr jarēnh o ri mē hkôt apa.

Anhūr jakamā na pa hte Tirtūm kamnār rom ā amnhī nhīpēx anhūr o ri mē hkôt ixpa. ⁵ Nom amnhī krā hkôt mē ahkre hkēt nē. Tanhmā kot pa we amnhī to nē amnhī krā hkôt mē kām kapēr o mē ahkre mex nē? Nā Tirtūm pix na hte ja kaxyw tanhmā ixkrā hto pa ô ri mē ahkre ho ri ixpa.

Tirtūm kapēr nyw jarēnh

⁶ Nē Tirtūm na hte tanhmā ixkrā hto pa Karō nhūr hā mē piitā mē kām kapēr nyw jarēnh o ri ixpa. Amnepēm Tirtūm kot Ijaew mā mēmoj tā karō xwūnhhta. Mojes kot kapēr tūm jarēnh o pa xwūnhhta mex tā no nhūm mē tee ri hkôt kām amnhī nhīpēx prām o pa. Nē xatā kamā harē nē omunh tā tee ri kot hkôt kām amnhī nhīpēx prām. Tā mē kot hkôt amnhī nhīpēx kēt mūrāpē na prem pikaprār pan hapēx. No kēt Tirtūm kapēr nywja. Jejus jarēnhja. Na hte Tirtūm Karō tanhmā mē pahkrā hto pu mē Jejus kôt amnhī nhīpēx o ri papa. Jao mē pahpē pahūr tūm nē papa mā xwūnh. No na hte nhām mē hkwyjaja kām harēnhja mar prām kēt nē amnhī jarēnh o:

—Nā kot paj amnhī krā hkôt ā amnhī nhīpēx anē nē ā amnhī

nhîpêx anê nhûm Tîrtûm ja hã ixpumu nê ixtîr tûm nê ixpa mã xwÿnh ã ijarê.

Anhÿr tâ no ãm ã amnhî jarênh anhÿr kaprÿ. Tîrtûm Karô nhÿ hã mê kot amnhî to mex o mê pa xwÿnh pixjaja koja mê htîr tûm nê pa ho pa.

⁷ Nê Tîrtûm kapêr tûmta na pre Mojes mê kãm harênh kaxyw nhûm mêmôj tanhmã amnhî nhîpêx to rax kumrêx. Naja hkrakrak nê haxênh nê kamã kamât kô htyk. Hãmri nhûm Tîrtûm mê kot hkôt amnhî nhîpêx kaxyw kên po hã mê kãm mêmôj tâ karô nhûm Mojes kumÿ nê mê hwÿr o wrÿ nê mê kãm kamã harê. Tîrtûm kot hirã htÿx kamã kãm kapêr nhûm kuri mar o ãm jakamã urak nê ÿ hã hkuk nhîrã htÿx kumrêx nê mê kãm kapêr jarênh o xa. Jakamã nhûm mê tee ri kot hprî hã omunh mex kaxyw no ãm nom gêk tÿx nê. Tã gaa nhûm hkuk kãm hirãja amnhîm hprî nê hapêx o mô. Na pre ã Tîrtûm Ijaewjê mã kapêr tûm nhôr anê. Hãmri nhûm Mojesja ô ri mê kãm kamã harê nê harênh pa hãmri nê mê kãm:

—E kêr ka mê Tîrtûm kapêr mar tÿx nê hkôt amnhî nhîpêx mex rãhã ho ri apa. Kêr ka mê nhÿrmã atyk tâ kê akupÿm mê ato mê atîr ka mê ô krî kamã kuri atîr tûm nê amex nê apa ho apa. Anê.

Hãmri nhûm mê kuma nê kãm:

—Tôe. Nà kot paj mê hkôt pix mã ri amnhî nhîpêx mex rãhã ho ri ixpa.

Anhÿr ã amnhî jarênh tâ no ãm hkôt amnhî nhîpêx kêt nê nhûm Mojes tee ri mê kot amnhî nhîpêx ã mê omu nê mê kãm:

—Nà mê ate Tîrtûm kapêr kôt amnhî nhîpêx kêt jakamã kot kaj mê nhÿrmã ty nê Tîrtûm pê awry rax kumrêx nê ri apa. Anê.

⁸ Tã na hte Tîrtûm jarãhã axtem tanhmã mê pamã kapêr to. Pãnhã kapêr nyw o kapêr nê mê pamã:

—Kot kaj mê Ixkra Jejus kôt amnhî xunhwÿ pa hã mê apumu nê mê ato ixkra. Hãmri nhûm Ixkarô mê amã agjê. Anê.

Kapêr ja na mex kumrêx o kot kapêr tûm jakrenh. ⁹ Kapêr tûmja mex tâ nhûm htem hkôt amnhî nhîpêx kêt nê. Jakamã na htem ty nê Tîrtûm pê awry rax ã ri pa. No kapêr nywja na tûmta rom mex o mex. Na hte Tîrtûm mê pamã kapêr nywja jarênh o:

—Kot paj tanhmã mê akrã hto ka mê amnhî to mex pix o ri apa. Jao ixkôt ri amnhî nhîpêx mex o ri apa. Anê.

¹⁰ Nê kapêr tûmja te kot kanê hpôk kryre pyrãk. No kapêr nywja mex o kot tûm jakrenh jakamã te kot mêmô hpôk rûnh o kanê hpôk kryre jakrenh pyrãk. Jakamã nhûm mê kot hirã rax kãm ri mrar gryk ã hpôk grire nhîrã kamã mrar kêt pyrãk. ¹¹ Tîrtûm kapêr tûm te kot Mojes kuk pyrãk. Na pre kamã hirã rax tâ gaa nê amnhîm hprî nê kamã hirã hapêx o mô. Nê gaa nê hapêx. No kêt Tîrtûm kapêr nywja te kot Tîrtûm nhîrã htÿx rãhã ho rãhãta pyrãk. Koja urak nê aa hapêx kêt kumrêx.

Ijaewjê jarênh

Rômân 11.7-10

¹² Nê Tîrtûm kapêr nywja mex o mex jakamã na pa hte ixãmnhîx mê kãm harênh o ri ixpa. ¹³ Te ixte Mojes kot amnhî nhîpêx pyrãk kêt. Na pre hte Mojes ixkînhã ãmnhîx Ijaewjê mã Tîrtûm kapêr jarênh o ri pa hkêt nê. Mê kot hkuk kãm hirãta ra hapêx o mô ã omunh nhûm hpijaam pymaj na pre kupêxê puroore ho amnhî kuk pro nê ri mê hkôt pa.

¹⁴ Jakamã nhûm prem hprî hã hkuk kãm hirã pumunh mex kêt nê. Nê Tîrtûm kapêr ã kagã htûmja nhûm prem mãânên hprî hã mar mex kêt nê. Mê hkrã hihtÿx jakamã te mê kot amnhî jamak pro nê mêmôj mar mex kêt pyrãk jakamã mê kot mar tâ hprî hã mar kêt nê. Nê

hkôt ri amnhî nhîpêx mex kêt nê. No mê kot Kris kôt amnhî xunhwÿr xwÿnhjaja na hte Tirtüm amnhî tâ mê omu nê te mê nê mê hamak hpro xàta rênh par nê rênh pyrâk o mê hipêx nhüm mēhprî hã kapêr mar tÿx nê.

¹⁵ Tã na hte Ijaewjaja arî jarãhã Mojes kot Tirtüm kapêr ã kagã htüm kamã harênh o pa. Nom arî mê hkrã hihtÿx jakamã te mê kot amnhî jamak pro nê kamã harênh o pa pyrâk o amnhî nhîpêx jakamã kormã hprî hã mar kêt nê. ¹⁶ Tã koja mê hkwÿjaja Pahihti Jejus Kris kôt amnhî xunhwÿr nhüm amnhî tâ omu nê te kot mê hamak nê hpro xà hpyr nê mēnh pyrâk o mê hipêx nhüm mēhprî hã kapêr nyw mar tÿx nê. ¹⁷ Pahihti mê Karôja wa htÿpxi jakamã na hte mê pakamã agjê nê hprî hã mê pamã kapêr o amnhîrît o pa. ¹⁸ Ra mê pahte Pahihti Kris kôt amnhî xunhwÿr jakamã te mê pahte mê kot amnhî jamak pro xwÿnh kot amnhî nhîpêx pyrâk kêt. Nhüm Pahihti Karôja tanhmã mê panhîpêx to pu mê ra hkôt amnhî nhîpêx mex o mõ. Jakamã na htem mê pahte amnhî nhîpêx nyw pumunh kôt Tirtüm kot tãm amnhî nhîpêx ã omunh kurê kumrêx. Kormã mê pahte hkôt amnhî nhîpêx mex kumrêx kêt tâ ra hkôt amnhî nhîpêx mex o mõ. Jao te tãm kot amnhî nhîpêx pyrâk o amnhî nhîpêx o mõ.

4

Jejus kapêr te kêp kanê pyrâk ã harênh

Wam Korit 2.1-5; Sikün Korit 1.12; Wam Tesarôn 2.1

¹ Nê na pre Tirtüm ixto mex nê tanhmã kãm ixapênh to hã inhmã karô. Ixte ma mê kãm kapêr jarênh o ri mê hkôt ixpa kaxyw. Jakamã na pa hte ixãmnhîx mê hkôt mê kãm harênh o ri ixpa. ² Nhüm mê hkwÿjaja axtem nê ixêx o ri ixpa hã ijarênh tâ ixte ã amnhî nhîpêx

anhÿr kêt. Na pa hte amnhî tomnuj o ri ixpa hkêt nê. Mê hkwÿjaja kot mê no kupyr kaxyw mê kãm Tirtüm kapêr o hêx o pa htã pa na pa hte ã amnhî nhîpêx anhÿr kêt nê. Ixprî hã mê kãm harênh o ixpaja na inhmã hprãm jakamã na pa hte ixkatat kôt harênh o ri mê hkôt ixpa. Mê piitã mê kot ixêx kêt kôt ixpumunh mex kaxyw. Tirtüm kot ixêx kêt kôt ixpumunh mex. ³ No nhÿrmã mê htyk nê ma kuwy hwÿr mê pa mã xwÿnh pixjaja na htem hprî hã ixkapêr mar mex kêt nê. ⁴⁻⁶ Satanasti tãm kêp mê hpãm. Kêp mê kãm Tirtüm kapêr mar prãm kêt xwÿnh piitã mê hpãm. Jakamã na pa hte mê kãm tanhmã Jejus jarênh to. Kêp Tirtüm Kra hã harê nê te kot Tirtüm kot amnhî nhîpêx pyrâk ã harênh o ri ixpa. Hãmri nhüm Satanasti tee ri ja hã ixpumu nhüm ja kêp omnuj nê. Jakamã nhüm tanhmã Tirtüm nê mê hkrã hto nê te mê hamak pro pyrâk o mê hipêx. Mê kot hprî hã Jejus jarênh mar nê hkôt amnhî xunhwÿr pymaj nhüm ã nê mê hipêx anê. Jejus jarênh te kêp kanê hpôk mex pyrâk jakamã mê kot mar kêt xwÿnhjaja te kamãt kô kamã ri mê pa pyrâk. No nhüm Satanasti tãm kot nê mê no kupyr jakamã nhüm htem ã ri kamãt kô kamã mê pa pyrâk o amnhî nhîpêx anê.

Amnepê mã kormã mēmoj kêt ri nhüm kamãt kô pix. Tã nhüm Tirtüm tanhmã kapêr to nê kapêr o:

—E kê hirã kato. Anê.

Hãmri nhüm ra kapêr xà hkôt hirã kator kurê kumrêx. Tã ja pyrã nê na pa pre kamãt kô kamã ixtÿx ri ixpa pyrâk nhüm Tirtüm te kot inhmã kanê hpôk nhüm hirã pyrâk o inhîpêx pa mex o mex ã omunh kurê kumrêx. Hãmri nê Jejus Kris kot amnhî nhîpêx ã omu nê te Tirtüm kot amnhî nhîpêx ã omunh pyrâk. Wa kot amnhî nhîpêx te kot axpên pyrâk.

Nē na pa hte pam tanhmā amnhī jarēnh to ho ri ixpa hkēt nē. Ām Jejus Krisja pix na pa hte harē. Tapxipix na kēp mē panhō Pahihti. Jakamā hkīnhā te ixpē mē amā ixāpēnh xwŷnh pyrāk o na pa hte mē amā kapēr jarēnh o ri mē akôt ixpa.

Pawre te kēp poti grāre nhīpēx pyrāk ā harēnh

Wam Korīt 2.4-5; Sikūn Korīt 11.23, 12.9

⁷ Nē Tīrtūm ixrom hihtŷx o hihtŷx. No pa na hkīnhā ixihtŷx kēt. Te ixpē poti grāre nhīpēx pyrāk jakamā na pa hte Tīrtūm xihtŷx xwŷnh pix nhŷ hā mē kām kapēr jarēnh o ri mē hkôt ixpa. Nhūm htem inhma nē ām hāmri ixte ŷ hā ixkapēr ā ixpumunh kurē kumrēx. No pa ixte amnhī krā hkôt ixkapēr ā ijarēnh kēt nē.

⁸ Na pa hte mē hkôt mē kām Jejus jarēnh o ri ixpa nhūm mē hkwyjja tōhā inhma nē ja hā inhīpēx kati nē pa amnhī xā htŷx kamā ama. Nom nhūm Tīrtūm mē kutā tanhmā ixkrā hto pa inhmā amnhī xā kamā ijamak pyma hkēt nē arī mē kām kapēr jarēnh o ri mē hkôt ixpa. Nē amnhī kaxyw Jejus kôt pix mā ijamaxpēr tŷx rāhā pē tee ri amnhī kukamā ijamaxpēr o ri ixpa hkēt nē.

⁹ Nē mē kām ixkurē xwŷnhjaja ohtōō. Na htem xatā Jejus ā tanhmā ixtomnuj to htā pa kormā ixytk kēt nē. Na pa hte Tīrtūm kamnār rom arī mē hkôt ixpa nhūm Tīrtūm ixkôt pa ho pa. ¹⁰ Na htem Jejus pyrā nē ixpīr kaxyw tanhmā inhīpēx to. No ām ko. Koja mē nhŷrmā ixpī rŷ ko. Ixte amnhī kukamā ixāhpumunh kēt. Kot paj ām arī ixtīr ri mē kām Jejus jarēnh o ri mē hkôt ixpa. Kēr kē mē hkwyjja ixkapēr ma nē axpēn mā tanhmā Jejus jarēnh to nē harēnh o:

—Nā pēr ām hāmri na pre Jejus akupŷm htīr nē tanhmā hkwyjē ho

mex to. Ām hāmri na hte Pawre ja hā harē. Anē.

¹¹ Mē kot Jejus ā ixpīr mā tā pa arī mē kām akupŷm htīr ā harē. Tīrtūm na hte ja kaxyw tanhmā ixkrā hto pa arī mē kām harēnh o ri mē hkôt ixpa. ¹² Na pa pre ra mē amā harē ka prem inhma nē Jejus kôt amnhī xunhwŷr kurē kumrēx nē amnhī nhīpēx nyw o amnhī nhīpēx o ri apa. Jakamā ixpyrā nē mē apē atīr tūm nē apa mā xwŷnh. Nhūm htem piitā mē ate Jejus kôt amnhī xunhwŷr ā mē apumu. Tā nhūm mē kot Jejus ā ixpīr kaxyw. Nom kwār mē māmri ixpī. Ja inhmā tanhmā kute hkēt. Mē kot ixpīr mā tā kot paj arī Jejus kapēr jarēnh o ri ixpa rāhā ty. Ra mē kot ixkapēr mar nē Jejus kôt amnhī xunhwŷr xwŷnhjaja mē pahpyrā nē kēp htīr tūm nē pa ho pa mā xwŷnh kēnā. ¹³ Jakamā kwār mē māmri ixpī. Na pa hte arī amnhī kaxyw Tīrtūm kôt ijamaxpēr mex rāhā nē. Amnepē mā na pre Pahi finat Tawija tanhmā Tīrtūm kapēr jarēnh to nē harēnh o:

Ām hāmri na Tīrtūm kapērja. Hēx kēt jakamā na pa hte mē kām harēnh rāhā ho ri ixpa. Anē. Tā pa hte Tawi pyrā nē mē piitā mē kām Tīrtūm kapēr jarēnh o ri ixpa. Tīrtūm kot mē pamā tanhmā mēmoj to hēx to hkēt. ¹⁴ Ra kot amnhī jarēnh xā hkôt akupŷm Pahihti Jejus o htīr jakamā kot puj mē nhŷrmā urāk nē ty nhūm akupŷm mē pahto mē pahŷr nē ma war amnhī wŷr mē pahto api.

¹⁵ Amnepēm na pa pre ma mē awŷr mō nē mē akôt mē amā Tīrtūm kapēr jarēnh o ri ixpa. Ka prem inhma nē Jejus kôt amnhī xunhwŷ nē ixpyrā nē Tīrtūm mā mex o mex ā harē. Jakamā kwār mē māmri Jejus ā tanhmā inhīpēx to. Koja mē gaa nē rī mē hkwyjja mē pahpyrā nē Jejus kôt amnhī xunhwŷ nē Tīrtūm mā mex o mex ā harē.

Pawre tee ri amnhī kukamā hamaxpēr kêt ā kot amnhī jarēnh

Rōmān 8.17; Sikūn Korīt 1.7; Wam Pētre 1.3-9, 4.12-16, 5.10

¹⁶ Jakamā na pa tee ri amnhī kukamā ijamaxpēr o ixkaprī nē ixpa hkêt nē. Mē kot Jejus ā tanhmā ixtomnuj to htāā pa hte ixāmnhīx kapēr jarēnh o ri ixpa. Ra ixpigêt nē ixirerek o inhmōr tā inhōpinh xā kaxwŷnh kām ijamaxpēr o Jejus kôt amnhī nhīpēx mex o mō. ¹⁷ Mē kām ixkurē xwŷnhjaja na htem Jejus ā inhīpēx kati htā ā inhīpēx anhŷr japijē hkêt nē. Nom kot paj nhŷrmā ty nhūm Jejus akupŷm ixto ixtīr pa Tīrtūm mē wa kuri inhmex kumrēx nē ixpa ho ixpa. Mē kot ixtomnujja na mē ho apkati grēre no kot paj nhŷrmā Tīrtūm mē Krata wa kuri inhmex kumrēx nē ixtīr tūm nē ri ixpa ho ixpa. Jao rāhā ho rāhā.

¹⁸ Jakamā na pa tee ri mē kot tanhmā ixtomnuj tota kukamā ijamaxpēr o ri ixpa hkêt nē. Ja koja tokyx hapēx. Na pa hte ām nhŷrmā Tīrtūm nhō krī kamā inhmex nē ixkīnh rāhā ri ixpaja pix kukamā ijamaxpēr o ri ixpa.

5

Mē panhī nyw jarēnh

Piripos 3.21; Sikūn Pētre 1.13-14

¹ Nē mē panhīja te kot tyrti hō ho ixkre pyrāk. Na htem tyrti hō ho ixkre nhīpēx nhūm gaa nē hapēx. Tā mē panhīja na hte urāk nē hapēx tokyx anē. Na pu htem ri papa nē gaa nē pawej nē ty. Tā nhūm Tīrtūm hpānhā mē pahpē hkrajē mā mē panhī nyw gō pu mē kuri ō krī kamā pamex kumrēx nē pahťir tūm nē papa ho papa. ²⁻³ Na pu htem jar pahpunuj nē papa. Nē mē paxā nhi nē mē pahkaprī nē. Mē panhī htūmja te kot mē paxē htūm pyrāk jakamā na pu htem ty nē te paxē htūm kwŷnh nē hpānhā nyw jagjēnh pyrāk o amnhī nhīpēx. Tā na pu htem amnhī kukamā panhī nywja mā pajamaxpēr o ri papa.

Kot pu mē kaxkwa kamā pahkarō pix nē ri papa hkêt nē. Mē panhī nyw ā kot puj mē ri papa ho papa.

⁴ Nē na pu htem jar pahpunuj nē pamex kêt nē ri papa. Nē tokyx mē pahtyk nē panhī htūm o pajapēx nē hpānhā panhī nyw ā mē papa hprām. Tā koja Jejus tokyx akupŷn wrŷk japēr pu mē pahtyk kêt rāhā tokyx panhī nywta o panhī nyw. Nom koja tokyx akupŷn wrŷk kêt japēr pu mē nhŷrmā ty nhūm Tīrtūm akupŷm mē pahto mē pahťir nē mē pamā mē panhī nyw gō pu mē ho panhī nyw. ⁵⁻⁶ Na pre ra Tīrtūm mē panhī nyw kukamā hamaxpēr nē mē pahťā tanhmā amnhī jarēnh to. Nē mē pahwŷr Karō rē nhūm mē pahkarō mā agjē pu mē ja hā amnhī pumu nē pahkīnh nē pajamaxpēr o:

—Na ra Tīrtūm kot ixwŷr amnhī Karō mēnh nhūm ixkarō mā àr jakamā koja määnēn nhŷrmā inhmā inhī nyw gō. Kormā inhī htūm kamā ixpa nē Pahihti Jejus mē wa ō krī kamā ixpa hkêt tā koja nhŷrmā inhmā inhī nywja gō pa inhī nyw o wa kuri ixpa ho ixpa. Nā koja ā inhīpēx anē.

Anhŷr o pajamaxpēr pē pahkīnh nē papa.

⁷ Nē mē pahte jar pano ho nhŷri Jejus pumunh kêt tā no ām panhōpinh xā kaxwŷnh kām kām pajamaxpēr mex nē. ⁸ Jakamā na pu mē tee ri amnhī kukamā pajamaxpēr o papa hkêt nē. Na pu htem ām tokyx mē pahtyk nē ma Pahihti Jejus nhō krī hwŷr paxāpir jamār o papa. Ō krīja kēp mē papapxā kumrēx jakamā na pu htem ma hwŷr paxāpir pix kukamā pajamaxpēr rāhā nē. ⁹ No ām mē pamā ja pix prām kêt. Na pu htem määnēn pamā Jejus mā hprām xā hkôt nhŷri tanhmā kām amnhī nhīpēx to ho ri papa hprām o papa. Jar mē panhī htūm rāhā rŷ mŷtar kuri ō krī mex kām mē panhī nyw

ã tanhmã kãm amnhĩ nhĩpêx to ho ri papaja na mẽ pamã hprãm.

¹⁰ Nê na hte Krisja jar mẽ pahte tanhmã amnhĩ nhĩpêx to hã mẽ pahpumunh o hkrĩ. Mẽ pahte tãm amnhĩ nhĩpêxja nê mẽ pahte amnhĩ tomnujja nhũm hte hã mẽ pahpumunh rãhã ho hkrĩ. Tã koja nhỹrmã kot mẽ pahte tanhmã amnhĩ nhĩpêx to hã mẽ pahpumunh kôt tanhmã mẽ panhĩpêx to. Mẽ pahte tãm amnhĩ nhĩpêx o ri papa xwýnhjaja koja ra mẽ panê htyk kukwak ri mẽ pahto mex nê. No mẽ kot amnhĩ tomnuj o mẽ pa xwýnhjaja koja mẽ homnuj tỳx nê. Jakamã na pa inhmã kãm hprãm xà hkôt pix mã amnhĩ nhĩpêx o ixpa hprãm nê.

Mẽ pajamaxpêr nyw jarênh

Rômãn 6.4-6; Sikûn Korîit 4.2; Epes 4.22-24; Korosê 3.9-10

¹¹ Nê Tirtũm kot hprĩ hã mẽ pahpumunh rãhã ho hkrĩ jakamã inhmã kãm hprãm xà hkôt pix mã amnhĩ nhĩpêx o ri ixpa hprãm. Mãn ka mẽ ra ja hã ixpumunh mex nê rỳ ko. Mẽ piitã mẽ kot hkôt amnhĩ xunhwýr prãm xãy na pa hte mẽ kãm kapêr jarênh o ri ixpa. ¹² Nom ixte ja hã amnhĩ to jarkrar o ri ixpa hkêt. ãm mẽ ate inhmar nê mẽ kêp Kris nhỹ hã mẽ ahkre hã amnhĩ to hêx xwýnhjê mã tanhmã ijarênh to kaxyw na pa ã mẽ amã amnhĩ jarênh anê. Mẽ kot Tirtũm kapêr jahkre mex kumrêx ã amnhĩ to jarkrar tã na htem hkôt amnhĩ nhĩpêx kêt nê. Tã mẽ ate aprĩ hã ixte Tirtũm kapêr kôt amnhĩ nhĩpêx mex ã ixpumunh nê tanhmã mẽ kãm ijarênh to kaxyw na pa ã te ixte amnhĩ to jarkrar pyrãk o mẽ amã amnhĩ jarênh anê. ¹³⁻¹⁴ Mẽ kot ixkrã pipãnh ã ijarênh tã Tirtũm na mẽ akaxyw ixãm pa hte mẽ amã kapêr jarênh o ri mẽ akôt ixpa. Ixkrã pipãnh kêt. Ixte Tirtũm kãm hprãm xà hkôt tanhmã amnhĩ nhĩpêx to xwýnh na pa. Tã mẽmo

kaxyw na pa hte ã kapêr jarênh rũnh anhỹr o ri mẽ akôt ixpa? Nà inhmã mẽ akĩnh kênã. Mẽ ate Tirtũm kôt tãm amnhĩ nhĩpêx prãm xãy na pa hte ã mẽ amã kapêr jarênh anhỹr rãhã nê. Kris na pre tanhmã ixto pa inhmã mẽ akĩnh nê. Te tãm kãm mẽ ajapê pyrãk. Na pre Kris amnhĩ grõnh kôt mẽ pahpiitã mẽ nê ty. Tirtũm kot mẽ pahte amnhĩ tomnuj mýrapê tanhmã mẽ pahto pymaj nhũm mẽ pahpiitã mẽ panê ty. Jakamã te mẽ pahpiitã Jesus kôt mẽ pahtyk pyrãk o na pu htem amnhĩ nhĩpêx. Jao te mẽ pahte amnhĩ nhĩpêx tũmjja mẽ pahpê hapêx par pyrãk o pu mẽ amnhĩ nhĩpêx nyw o amnhĩ nhĩpêx o ri papa. ¹⁵ Mẽ pajamaxpêr nyw o tãm mẽ pahte amnhĩ nhĩpêx o papa kaxyw na pre Jesus mẽ panê ty. Jakamã na pu htem axte amnhĩ pix kukamã ri pamã mẽmoj prãm o ri papa hkêt nê. Na pu htem mããnên Tirtũm kãm hprãm xà hkôt tanhmã kãm amnhĩ nhĩpêx to ho ri papa. Ja kaxyw na pre Tirtũm akupým Kris o htir pu mẽ kukwak ri pajamaxpêr nyw o amnhĩ nhĩpêx o papa. ¹⁶ Jao mẽ piitã mẽ hkrã hkà hã mẽ omunh xà hkôt pix mã tanhmã mẽ harênh to hkêt nê. Mẽ kot amnhĩ tomnuj ã mẽ harênh rỳ mẽ kot amnhĩ to mex ã mẽ harênh kêt nê. Amnepê mã na pa pre ã Kris jarênh anê nê harênh o:

—Nà Krisja na hte mẽ pahte amnhĩ nhĩpêx kôt amnhĩ nhĩpêx kêt nê. ãm ri kot mẽ pahte amnhĩ nhĩpêx kwým ri amnhĩ nhĩpêx jakamã kot amnhĩ tomnuj tỳx xwýnh na.

Anhỹr ã harênh o ixpa. Tã axte ã harênh anhỹr hkêt nê. Kot amnhĩ tomnuj xwýnh kêt jakamã na pa hte hpãnhã hkôt pix mã tanhmã kãm amnhĩ nhĩpêx to ho ri ixpa.

Mẽ pahpê Tirtũm krãmnhwý hã mẽ pajarênh

Rômãn 5.1, 5.10; Epes 6.20; Ko-

rosē 1.20

¹⁷ Nē koja mēhō Kris kōt amnhī xām nhūm kot amnhī nhīpēx tūmja kēp hapēx nhūm hpānhā kot amnhī nhīpēx nyw pix o amnhī nhīpēx nē hamaxpēr nyw pix o hamaxpēr. ¹⁸ Tirtūm na hte tanhmā mē pahto pu mē ā amnhī nhīpēx anhūr o ri papa. Na pu prem pamā hkurē htā nhūm Kris kukwak ri mē pahte hkōt amnhī nhīpēx xwýnhjē ho hkrāmnhwý. Hāmri nē tanhmā mē pahte amnhī nhīpēx to hā mē pamā karō nē mē pamā:

—E kēr ka mē ma krī piitā hkōt ri mē kām ixkapēr jarēnh o ri apa kē mē ama nē mē apyrā nē Kris kōt amnhī xunhwý. Pa ja hā mē omu nē ixte mē anhīpēx pyrā nē mē ho ixkrāmnhwý. Anē.

¹⁹ Jakamā na pa hte ma mē kām kapēr jarēnh o ri mē hkōt ixpa nē mē kām:

—E pa mē amā mēmoj mex jarē ka mē inhma. Nā na pre Krisja mē pahte amnhī tomnuj mýrapē mē panē ty. Nē htyk o Tirtūm mā mē pahpānhā amnhīrer par kumrēx. Jakamā na ra Tirtūmja Kris kukwak ri kām mē pahpiitā mē pahto hkrāmnhwý prām. Kōja kukwak ri mē pahte amnhī tomnuj piitā ho hamakētkati nē axte kām hamaxpēr kēt kumrēx. Kām mē pahto hkrāmnhwý hprām jakamā koja ā mē panhīpēx anē. Jakamā e kwa mē tokyx Kris kōt amnhī xunhwý kē Tirtūm kot inhīpēx pyrā nē mē ato hkra nē mē ato hkrāmnhwý.

Anhūr o mē kām harēnh o ri mē hkōt ixpa. ²⁰ Kris kot mē apiitā mē awýr inhmēnh jakamā na pa hte ý hā mē amā kapēr jarēnh o ri mē akōt ixpa nē mē amā:

—E Tirtūm kām mē ajapē jakamā na mē awýr inhmē pa mō. Jakamā kwa mē tokyx amnhī tomnuj kaga nē hkōt amnhī xunhwý. Kē amnhī tā mē apumu nē mē ato hkrāmnhwý. Anē.

²¹ Krisja aa kot tanhmā amnhī tomnuj to hkēt kumrēx tā nhūm pre Tirtūmja te mē kot amnhī tomnuj týx kumrēx xwýnh pyrāk o hipēx. Tā mēmo kaxyw na pre ā hipēx anē? Nā mē panē kēnā. Mē pahte hkōt amnhī xunhwýr nhūm kot mē panhīpēx o te aa mē pahte amnhī tomnuj kēt kumrēx xwýnh pyrāk o mē panhīpēx kaxyw na pre ā mē panē Krata nhīpēx anē.

6

¹ Tā kot ā Kra nhīpēx anhūr jakamā kwa mē ixkapēr ma nē mar týx nē. No mē ama nē ām mar kēt nē. Tirtūm kām mē pajapē htýx jakamā mē pakutā nojarēt rāhā ho pa. Kumā na pa hte ā mē amā kapēr jarēnh anhūr o ri mē akōt ixpa. ² Amnepē mā na pre Ijaew mā kapēr nē mē kām:

Na ka prem amex kēt nē ri apa nē amnhī to ixwý pa pre mē ama nē mēmojta pé mē apytā nē mē ato mex nē. Anē.

Jakamā kwa mē inhma. Tirtūm kām mē ate amnhī tomnuj pé mē apytār prām týx jakamā kwa mē tokyx amnhī to awý kē ā kēp mē apytār anē.

Mē kot Kris ā tanhmā Pawre nhīpēx to hā mē harēnh

Sikün Korit 4.7, 11.23-33; Korosē 1.10

³⁻⁴ Nē mē kot Tirtūm kapēr mar nē hā ixtomnuj tā pa hte amnhī katut kōt mē kot tanhmā ixtomnuj toja rē nē ho ijamakētkati tokyx anē. Nē arī mē kām kapēr jarēnh rāhā ho ri mē hkōt ixpa. Mē kot mar nē ām mar nē hkaga pymaj na pa hte ā amnhī nhīpēx anhūr rāhā nē. Mē kot ja hā inhīpēx punuj tā pa arī mē kām harēnh o ri mē hkōt ixpa. ⁵ Mē kot Kris ā ixtak nē ijagjēnh nē tanhmā ixto kaxyw ixtā htu htā pa hte mē kutā amnhī to htýx nē ixkuhē. Na pa pre hte Tirtūm mā mē kām kapēr jarēnh rax nē. Jao tōhā inhōt kēt nē inhōtxwa

ho ri mē hkôt ixpa. Nē tōhā inhmā prām t̄yx nē ri ixpa. Tā no ām arī mē kām kapēr jarēnh rāhā nē. ⁶ Inhmā tanhmā ixte amnhī tomnuj to hprām kêt. Inhmā Tirtūm kot amnhī nhīpēx kôt pix mā amnhī nhīpēx prām. Nē inhmā inhgryk tokyx anh̄yr prām kêt. Ām inhmā mē piitā mē hkīnh kām mē ho mex pix prām. Ā na pa hte Tirtūm Karō nh̄y hā amnhī nhīpēx anh̄yr o ri mē hkôt ixpa. Mē kot ja hā ixpumunh nē ra Tirtūm kapēr ma nē hkôt amnhī xunhw̄yr kaxyw. ⁷ Na pa hte ixkatāt kôt mē kām ixkapēr mex pix nē. Tirtūm xiht̄yx xw̄yñhja nh̄y hā ri mē kām kapēr jarēnh jao tām amnhī nhīpēx nē tām ri ijamaxpēr o ri mē hkôt ixpa. Jakamā na htem ja hā ixpumu nē ixte Tirtūm kapēr jarēnh ma nē hkôt amnhī xunhw̄y. ⁸ Na hte mē hkw̄ȳjaja kām ixkīnh nē nh̄um mē hkw̄ȳjaja axtem kām ixkurē nē. Nē mē hkw̄ȳjaja amnhīm inhmex ā ijarē nh̄um mē hkw̄ȳjaja axtem axpēn mā tanhmā ixto kapēr punuj to. Mē kot ixēx nhi hā ijarēnh tā pa hte ixkatāt kôt mē kām ixkapēr o ri ixpa. Nom kw̄ār mē mām̄rī tanhmā ri ixto kapēr to. Ja tanhmā inhmā kute hkêt. ⁹ Na hte mē hkw̄ȳjaja ixkamā ōkre kahak nē pika piitā hkôt axpēn mā tanhmā ijarēnh to ho pa. Mē kām ixp̄ir prām tā no pa arī ixt̄ir nē ixpa. Mē kot Jejus ā ixtomnuj t̄yx tā kormā ixp̄ir kêt nē pa ri ixt̄ir nē ixpa. ¹⁰ Ixte Kris ā amnhī xā ht̄yx kamā ijamak o ri ixpa htā arī ixkīnh nē ixpa. Nē ixkāxpore hkêt tā nh̄um mē ohtō nē ixte mē kām Jejus kapēr jarēnh kukwak ri mex nē pa. Nē ixkukrēx rax kêt tā nh̄um Tirtūm ixto mex nē pa inhmex nē ixpa. Tā kot paj nh̄yrmā ō krī kamā kuri inhmex kumrēx nē ixt̄ir tūm nē ixpa ho ixpa. Jakamā na pa hte arī mē kām Jejus kapēr jarēnh o ri mē hkôt ixpa. ¹¹ E Korîit kām ixkrāmnhw̄ȳjaja. Na pa ixprī hā

mē amā amnhī nhīpēx jarēnh par kumrēx. ¹² Inhmā mē akīnh t̄yx tā te mē amā ixkīnh kêt pyrāk. ¹³ Kwa te mē ate ixto mē akatut nē akuhē pyrāk o inhīpēx kêt nē. Amnhī pyrā nē amā ixkīnh nē hkêt wehe. Te mē apē ixkra pyrāk o na pa ā mē amā ixkapēr anē.

Te mē pahpē Tirtūm nhōrkw̄y pyrāk ā mē pajarēnh

Wam Korîit 10.20-22, 15.33; Epes 5.3-14; Sikûn Ximotre 2.4; Xiakre 4.4-5; Wam Pêtre 2.11, 4.1-6

¹⁴ Nē kēr ka mē kot Kris kôt amnhī xunhw̄yr kêt xw̄yñh̄jē mē mēmoj tā tanhmā axpēn mar to hkêt nē. R̄y mēhō ho amjēn r̄y mēhō ho aprō hkêt nē. Ahp̄yñhā mē pajamaxpēr kēnā. Tanhmā kot we mē hamaxpēr nyw xw̄yñh̄jaja nē mē hamaxpēr tūm xw̄yñh̄jaja amnhī to nē axpēn kôt hamaxpēr nē ri axpēn kôt pa? Nā koja mē ā amnhī nhīpēx anh̄yr kêt nē. Ahp̄yñhā mē pajamaxpēr. Na hte hirā ht̄yxja kamāt kō mē pihkār kêt nē. ¹⁵ Xā na hte Kris mē Satanasti wa axpēn kôt hamaxpēr? Nā wa kot axpēn kôt hamaxpēr kêt. Ahp̄yñhā wa hamaxpēr nē ahp̄yñhā wa kot amnhī nhīpēx. Nē ahp̄yñhā hirā nē ahp̄yñhā kamāt kō. Nē mē pahpē Kris kw̄ȳjaja nē mē kēp hkw̄ȳ hkêt xw̄yñh̄jaja ahp̄yñhā mē pajamaxpēr nē ahp̄yñhā mē pahte amnhī nhīpēx. ¹⁶ Na pu htem Tirtūm mā amnhī jarēnh xā hā ixkre kamā sānti xunhw̄yr nē amnhī to hw̄yr pē kām mex o mex ā harēnh kêt nē. Axtem na sāntija. Mē panhō Tirtūmja sānti rom ht̄ir tūm rāhā nē pa ho pa xw̄yñh. Nē mē papajaja te mē pahpē Tirtūm nhōrkw̄y pyrāk. Kapēr ā kagā htūm kot ja jarēnh kot:

Ixkrajaja te kēp inhōrkw̄y nh̄um ixpē ō dōn pyrāk. Te ixpē inhōrkw̄y kamā ixpa xw̄yñh pyrāk jakamā kot paj ixkrajē kamā ri ixpa ho ixpa. Ixpē Mēhpām na pa. Anē.

17-18 ā Tirtūm xih̄t̄ȳx xw̄ȳnh̄ja kot amnh̄i jarēnh̄ anh̄ȳr jakamā na hte mē kot amnh̄i tomnuj xw̄ȳnh̄jē nē mē pahkurē ho:

Kēr ka mē hkôt ri apa hkêt nē.

Kwarī ho kwarī.

Nē mē hkôt ri amnh̄i nh̄ip̄êx o apa hkêt nē.

Kot kaj mē ixkapēr ma nē ixkôt amnh̄i nh̄ip̄êx hā kot paj amnh̄i w̄ȳr mē aw̄ȳ nē mē ato ixkra.

Nē pa kot paj ixpê Mēapām maati. Anē.

7

¹ Tā ā Tirtūm kot mē pahto hkra nē mē pahkôt pa ho pa hā amnh̄i jarēnh̄ kot anh̄ȳr jakamā kwa ixkrāmnh̄w̄ȳjaja. Kēr pu mē kapēr ma nē tanhmā amnh̄i tomnuj to hkêt nē. Nē mēmoj punuj kukamā pajamaxpēr kêt nē. Nē ām kapēr kôt pix mā amnh̄i nh̄ip̄êx mex rāhā nē.

Pawre kot Korīt nhō xw̄ȳnh̄jē nh̄y hā hk̄inh̄ ā harēnh̄

² Nē kwa Kris kôt ixtō nē ixtōxjaja. Kēr ka mē tee ri amnh̄i tā tanhmā inhmā ajamaxpēr to hkêt nē. Na pa pre tanhmā mē atō hto hkêt nē. R̄ȳ tanhmā mē atō hto ka mē ja hā ixpumu nē ixkôt tanhmā amnh̄i tomnuj to hkêt nē. R̄ȳ pa pre ixêx rom tanhmā mē anokupyr to ho ri ixpa hkêt nē. Kwa mē amā ixk̄inh̄ nē tokyx ixkôt ajamaxpēr kêt wehe. ³ Mē ate inhmar nē amnh̄i tā apijaām kaxyw na pa ā mē amā ixkapēr anh̄ȳr kêt nē. Inhmā mē ak̄inh̄ kēnā. Na pa pre inhmā mē ak̄inh̄ ā amnh̄i jarēnh̄ rax nē. Inhmā ri mē akôt ixpa rāhā ho ixpa hprām. R̄ȳ ka mē nh̄ȳrmā apiitā apikaprār par japēr pa inhmā mē akôt ixyk prām nē.

⁴ Na pa hte ra mē amā ijamaxpēr pē ixk̄inh̄ nē ixpa. Nā kot kaj mē ixkapēr ma nē Jejus kôt amnh̄i nh̄ip̄êx mex nē. Tā kēr ka mē ā amnh̄i nh̄ip̄êx anh̄ȳr rāhā nē. Na pa hte jar ra amnh̄i xā ht̄ȳx kamā

ijamak o ri ixpa htā no ām mē amā ijamaxpēr nē ixk̄inh̄ nē.

⁵ Nē na pa pre amnē Masetōn w̄ȳr kormā Xitre japēr o mō. Hāmri nē Masetōnja w̄ȳr pōj nē hapēr pē mē kām Jejus kapēr jarēnh̄ o ri mē hkôt ixpa. Hāmri nh̄um mē kām ixkurē xw̄ȳnh̄jaja Kris ā inh̄ip̄êx punuj nē hā inhmā ākjēr pix o pa. Hāmri nē ma Masetōn kamā krī piitā hkôt ri mē kām ixto kapēr punuj nē pa amnh̄i tā mē mar o ri mē hkôt ixpa. Nē mē kajaja mē ate Kris kaga nē nhām mē hamaxpēr kôt amnh̄i nh̄ip̄êx pymaj na pa pre tee ri mē akukamā ijamaxpēr o ri mē hkôt ixkaprī nē ixpa. ⁶ Tā Tirtūm kēp mē hkaprī xw̄ȳnh̄jē pumunh nē akup̄ym mē ho mē hk̄inh̄ xw̄ȳnh̄ jakamā na pre ixkaprī hā ixpumu nē ixw̄ȳr Xitre mē. Pa pre omu nē akup̄ym ixk̄inh̄ nē tām ijamaxpēr. ⁷ No ām Xitre pumunh kôt pix mā ixk̄inh̄ kêt. Na pre ixw̄ȳr pōj nē tanhmā inhmā mē ajarēnh̄ to nē mē ate tanhmā ho mex to hā mē ajarē. Nē mē amā ixpumunh prām t̄ȳx ā mē ajarē. Nē Kris kôt mē atōta hpijaām kêt o pa nh̄um ixte kagā kamā hā mē amā ixākjēr nh̄um mē ate ja hā omunh nē ra amnh̄i kamā apijaām o akaprī ht̄ȳx ā mē ajarē. Nh̄um Tirtūm kot inhnē mē kām ixkurē xw̄ȳnh̄jē pumunh mex kaxyw mē ate ixto hw̄ȳr ā mē ajarē. Na pre ā inhmā mē ajarēnh̄ anē pa kuma nē mē anh̄ȳ hā ixk̄inh̄ t̄ȳx kumrêx.

⁸⁻⁹ Nē wam ixte mē amā kagāta nh̄ip̄êx kêt ri na pa pre tee ri mē ate amnh̄i nh̄ip̄êx ā mē ajarēnh̄ ma nē mē akaxyw hip̄êx. Nē kamā mē ate hpijaām kêt xw̄ȳnh̄ta kot tanhmā amnh̄i nh̄ip̄êx to hā omunh nē ām omunh o arī hkôt apa hā kagāta kamā mē amā akir hāmri nē Xitre mā kugō nh̄um kupy nē ma mē aw̄ȳr o mō. Tā ka xep prem kamā harē nē ama nē amnh̄i kamā apijaām nē. Nē akaprī nē ajamaxpēr o:

—Hêxta waa nē. Ām hāmri na

Pawre ă mē ijarēnh anē. Na pa mē ă amnhī nhīpēx anē nē amnhī tomnuj tŷx nē. Anē.

Tă nhŭm Xitre akupŷn ixwŷr pōj nē inhmă mē ajarē. Pa mē ajarēnh ma nē tee ri ijamaxpēr nē ijamaxpēr o:

—Hēxta waa nē. Mon pa pre axtem nē ă ri mē kām ixăkjēr anē? Nă na xep prem kagăta kamă harē nē kuma nē hkaprī htŷx nē. Anē.

Tă ăm hămri na pa pre ă mē akaxyw hipēx nē mēmojta ă mē amă ixăkjēr anē. Na ka xep prem kamă harē nē ama nē tee ri ajamaxpēr o ra akaprī nē. Nom Tirtŭm kām hprām xă hkôt na ka prem ja hă amnhī pumu nē ă akaprī anē. Tă xep ra akupŷm tām amnhī nhīpēx nē akupŷm Tirtŭm kôt amnhī nhīpēx mex nē. Jao akupŷm akŭnh nē ri apa. Jakamă ăm hămri na pa pre mē awŷr wam kagăta mēnh nē mēmoj tă ă mē amă ixăkjēr anē.

¹⁰ Koja Tirtŭm krajê hō tanhmă amnhī tomnuj to. Hămri nē tee ri ja hă amnhī pumu nē amnhī kamă hpijaam nē akupŷm Tirtŭm kôt tām amnhī nhīpēx. Hămri nē akupŷm mex nē tām hamaxpēr pē hkŭnh nē ri pa. Nē axte tee ri amnhī kukamă hamaxpēr hkêt nē. Ja na Tirtŭm kām hprām. Tă koja mē kēp hkra hkêt xwŷnhjê pyră nē tanhmă amnhī tomnuj to nē ra hpijaam japēr. Nom hkwyjaja kot ja hă omunh pix mŷrapê hpijaam nē arī Tirtŭm kôt amnhī nhīpēx kêt japēr. Hă koja nhŷrmă ty nē Tirtŭm kra kot akupŷm hkôt tām amnhī nhīpēx xwŷnhjê kŭnhă Tirtŭm pē awry rax kumrēx nē ri pa.

¹¹ Mē pahte Tirtŭm kapēr kwŷm ri tanhmă amnhī nhīpēx to hă tee ri amnhī pumunh nē amnhī kamă hpijaam nē akupŷm tām amnhī nhīpēxja na Tirtŭm kām hprām. Tă na ka xep ă amnhī nhīpēx anē. Wam ixte mē awŷr kagă mēnhta na

ka xep prem kamă tanhmă ixte nă puro kamă hpijaam kêt xwŷnhta ă mē amă ixăkjēr tota kamă akapēr nē ama. Hămri nē tee ri mē ate kormă kot amnhī tomnuj ă kām axăkjēr kêt ă amnhī kukamă ajamaxpēr nē amnhī kamă apijaam nē. Nom Tirtŭm kām hprām xă hkôt. Mē ate jam ajamaxpēr pē amnhī kamă apijaamja na kām hprām. Tă ka mē hpijaam xwŷnhta kamă agryk nē kām akapēr o:

—Kwa mē pahpê Jejus kwŷjaja mē pahte ă amnhī nhīpēx anhŷr kêt tă ka ă amnhī nhīpēx anē. Nă na ka amnhī tomnuj tŷx kumrēx. Kot kaj ă amnhī nhīpēx anē pa mē hă apumu nē gaa nē apyră nē ă amnhī tomnuj anē. Kwa ja kaga nē axte ă amnhī nhīpēx anhŷr kêt nē. Nē akupŷm Tirtŭm kôt amnhī xăm tŷx nē hkôt amnhī nhīpēx răhă ho ri apa. Anē.

Hămri nhŭm krī nhō xwŷnhjaja ja hă mē ajarēnh ma nē mē apê jamnuj ă mē apumunh kurê kumrēx. Ăm hămri na ka prem ă kām akapēr anē.

¹² Nē ixte mē awŷr kagă nē mēnhta kamă na pa pre nă puro kamă hpijaam kêt xwŷnhta mă tanhmă ixăkjēr to hkêt nē. Rŷ nă purota mă tanhmă ixăkjēr to hkêt nē. Na pa pre mē apê Kris kwŷjê hwŷr kagă nhīpēx nē kamă tanhmă mē amă hpijaam xwŷnhta ă karō hto. Mē ate kamă harēnh hămri nē inhŷ hă amnhī nē hanor nhŭm Korŭt nhō xwŷnh piită kot ă mē ate amnhī nhīpēx anhŷr ă mē apumunh kaxyw. Nē mē ate Tirtŭm nom ă hipēx anhŷr jao mē amă ixkŭnh pē ixkapēr kôt ă hipēx anhŷr ă amnhī pumunh kaxyw.

¹³ Tă nhŭm Xitre ixwŷr pōj nē tanhmă inhmă mē ajarēnh to. Na xep pre mē awŷr nojarêt nē tee ri amnhī kukamă hamaxpēr. Mē ate kagăta kamă harēnh nē ijarēnh mar nē kamă agryk pymaj tee ri amnhī kukamă hamaxpēr. Tă ma

mê awÿr mōn pōj nē mā amā kugō. Ka xep prem kamā harē nē ama nē hkōt amnhī nhīpēx kurē kumrēx nhūm mê ate amnhī nhīpēx ā mê apumu nē hkīnh nē. Hāmri nē tām hamaxpēr. Tā ra akupÿn ixwÿr mō nē inhmā mê ajarē pa mê ajarēnh ma nē ijaxwÿja ixkīnh nē. ¹⁴ Na pre kormā mê awÿr nojarēt pa kām tanhmā mê amex ā mê ajarēnh to. Tā nhūm xep ma mê awÿr mōn pōj nē mê apumu nē hamaxpēr o:

—Nà pēr ām hāmri na pre Pawre inhmā mê mex ā harē. Mē mex kēnā. Anē.

¹⁵ Tā nhūm pre mê arūm kato nē ra man akupÿn ixwÿr mōn pōj nē inhmā mê ajarēnh o:

—Na pa pre ma mê hwÿr mō nē mê kām ixkapēr o ri mê hkōt ixpa nhūm mê ixkapēr ma nē ixkōt amnhī nhīpēx kurē kumrēx nē ixto mex nē. Kormā ixte mê hwÿr inhmōr kēt tā mê harēnh ma nē inhmā mê hkīnh nē. Tā pa ma mê hwÿr mō nhūm mê ixto mex rax nē pa ra inhmā mê hkīnh tÿx kumrēx. Anē.

¹⁶ Ā inhmā mê ajarēnh anē pa mê ajarēnh ma nē ixkīnh tÿx nē. Ām hāmri na ka htem mēmoj tā amnhī jarēnh xā hkōt tanhmā amnhī nhīpēx to ho apa.

8

Mē kot Kris kōt mê hkwÿjê pē õxÿ hkēt ā mê kām karō

Atre 11.27-30; Rōmān 15.25-27; Wam Korît 16.1-4

¹ E Kris kōt ixkwÿjaja. Kot paj hpānhā mê amā jar Masetōn kamā tanhmā Jejus kwÿjaja kot amnhī nhīpēx to hā mê harē ka mê harēnh ma. Na hte Tirtūm mê kutā nojarēt nhūm mê mex nē pa. ² Mē hkwÿjaja kot Kris ā mê hipēx kati nhūm mê kot amnhī xā htÿx kām hamak o pa htā hkīnh nē hamakētkati nē ri pa. Nē mê hkāxpore hkryre htā ho õxÿ hkēt nē pa. Na htem āmnhīx ri

mē kēp amrakati xwÿnhjê mā hkwÿ nhōr o pa.

³⁻⁴ Tā na prem Jerujarē kamā Kris kōt mê pahkwÿjê jarēnh ma. Mē kēp amrakati hā mê harēnh ma nē kām mê hkaprī nē. Nē mê kām mê hwÿr mēmoj rēnh nē mê ho ajuta hprām nē. No ām pa ixte mê kām hā karō xā hkōt kēt. Mē tāmjaja mê hamaxpēr xā hkōt na prem ā hamaxpēr anē nē mê kaxyw kàxpore ho pikuprōnh rax nē. Hāmri nē inhmā kugō nē inhmā:

—Kwa na pa prem Jerujarē kamā Kris kōt mê pahkwÿjê jarēnh ma nē mê inhmā mê hkaprī nē mê kām mê ixkàxpore hkwÿ ho akuprō. Jakamā e amy nē ma mê hwÿr o mō nē mê kām agō kê mê tokyw ho amnhīm awjaprō nē kuku. Anē.

⁵ Pa mê kuma nē itÿx ho ām kàxpore grire hā hkamnhīx nē ijamaxpēr o:

—Kwa mo mê hikàxpore rax koja mê ri ho akuprō nē mê kām kugō? ām mê hikàxpore hkryre kēnā.

Anhÿr o ijamaxpēr tā no nhūm mê kaxyw ho rax nē ho akuprō. Mē hikàxpore hkryre htā mê kām ōr rax nē. Hāmri nē inhmā amnhī jarēnh o:

—Na pa mê ra Pahihti Jejus Kris mā amnhī gō. Mē ixte tanhmā kām amnhī nhīpēx to ho ri ixpa kaxyw. Jakamā e tanhmā mê inhmā mēmoj tā karō hto. Kot pa mê ama nē akapēr kōt amnhī nhīpēx. Ja na pa mê inhmā hprām nhūm Tirtūm haxwÿja kām ja prām. Anē.

⁶ Na pa pre ā mê kot amnhī nhīpēx anhÿr ā mê omu nē mê apē Korît nhō xwÿnhjê mā ijamaxpēr kurē kumrēx. Hāmri nē Xitre mā mê ajarē. Na pre mê awÿr mō nē mê amā Jerujarē nhō xwÿnhjê jarē. Mē ate mê kām kàxpore hkwÿ ho apikuprōnh kaxyw. Tā pa pre jam ijamaxpēr nē ra akupÿm mê awÿr mēnh mā nē kām:

—Kwa ma akupÿm Korîit wÿr mō nē mē kām anē kē mē ra kot amnhî jarēnh xà hkôt Jerujarē nhō xwÿnhjê kaxyw kàxpore hkwȳ ho akuprō nē tokyx mē hwÿr kumē. Ra mē kām Kris kôt mē hkwȳjê hkīnh ā amnhî jarēnh kēnā. E kwa tokyj. Anē.

⁷ Na ka htem amnhî to mex o ri apa. Nē amnhî kaxyw Kris hkôt ajamaxpēr tÿx nē. Nē ma mē kām Tirtûm kapēr jarēnh mex o ri mē hkôt apa. Nē mē ajamaxpēr mex nē. Nē mē piitā mē ho mex o ri apa. Nē mē amā ixkīnh o ri apa. Jakamā kwa kēr ka mē axāmnhīx mē kēp amrakati xwÿnhjê mā mē akàxpore hkwȳ nhōr o apa. Jao mē amā Tirtûm kīnh tÿx ā amnhî to amnhîrīt. ⁸ Ixte ā mē amā ja hā karō anhÿr tā hā mē atā ixihtÿx kêt nē. Ām mē kamā axukaprī hkôt mē ate mē kām axāmnhōr o apa kaxyw na pa ā mē amā ixkapēr anē. Masetōn kamā mē pahkwÿjaja kot amnhî nhīpēxta pyrā nē. ⁹ Ra mē ate Jejus Kris kām mē pajapē hā kot tanhmā amnhî nhīpēx to hā mar mex. Amnepēm na pre kaxkwa kamā mex kumrēx nē ri pa ho pa nhūm mēmoj piitā kēp ō htā nhūm rer pa nē mē pahwÿr wrȳ nē mē pakamā kēp amrakati nē ri pa. Hikàxpore hkêt nē ri pa. Tā mēmo kaxyw na pre ā mēmoj mex piitā rer par nē mē pahwÿr wrȳk anē? ām kot mē pahto mex pix kaxyw. Kot mē pahto mex nhūm mē pahte kukwak ri mē paxāmnhīx ri mē pajamakētkati nē mē papa kaxyw na pre ā amnhî nhīpēx anē. Mē pahte nhÿrmā urāk nē kaxkwa kamā pamex kumrēx nē ri papa ho papa kaxyw.

¹⁰ E kwa kēr ka mē tokyx kàxpore hkwȳ ho apikuprōnh pa nē Jerujarē nhō xwÿnhjê hwÿr amē. Mē akumrēxjaja na ka prem ham amgrā hapēxta kamā ra mē kaxyw ho apikuprōnhja krax. Mē amā mē ho mex prām xāj ham ho hkrax

tā no ām kormā hatur xām mēnh nē mē hwÿr mēnh kêt nē. ¹¹ Kwa mē tokyx ja ho ajapēx nā. Na ka prem ate ho anhÿr krax ā akīnh pē kàxpore hkwȳ ho apikuprōnh o apa. Tā kēr ka mē arī akīnh rāhā ho apikuprōnh par jatur xām amē. No mē ri atÿx tanhmā ajamaxpēr to hkêt nē. Rÿ mē ajamaxpēr o:

—Nā kormā. Kot paj nhÿrmā ixkàxpore rax nē rī kormā mē hwÿr hkwȳ mē.

Anhÿr o mē ri ajamaxpēr hkêt nē. Mē ate tanhmā akàxpore hkre kamā kute hā omunh xā hkôt mē kām hkwȳ pix gō. ¹² Kēr ka mē axāmnhīx akīnh kām mē kām ho akuprō. Ate amnhî kàxpore pumunh xā hkôt. Ka mē akàxpore rax nē mē kām ho rax nē agō. Rÿ mē akàxpore grire nē mē kām ho grire nē agō. Ja na kêt mex. ¹³ No mē ate mē kām ōr par nhūm mē arom mē hikàxpore rax nē ri paja mex kêt. ¹⁴ Nom ra mē akàxpore rūnh jakamā kwa mē amnhî kutā mē kām hkwȳ ho hkryre nē ho akuprō kē mē apyrā nē hikàxpore nē ri pa. Kēr ka mē nhÿrmā tanhmā amnhî to nē axā nē nhūm akàxpore apē hapēx nhūm mē ajarēnh ma nē amnhî kuxwar mē ato ajuta nē mē amā hkwȳ ho akuprō nē mē awÿr kumē. Ka mē akàxpore ho axpēn pyrā nē ri apa. ¹⁵ Amnepēm Tirtûm kot kaxkwa rūm Ijaewjē hwÿr mēō rēnh nhūm mē kot apkati mē amnhīm hkawrà nē ho apkur o pata ā na pre Tirtûm kapēr ā kagā htūmja ā mē harēnh anē nē mē harēnh kot:

Na pre mē hkra xohtō xwÿnhjaja mē apkur xā hkawrà rūnh nē. Nē gōj kām unhwÿ nē kuku nē piitā ho ōhy htū. Nhūm mē hkra grēre xwÿnhjaja haxwÿja hkwȳ kawrà no ām ho hkryre nē hkawrà. Nē gōj kām unhwÿ nē kuku nē haxwÿja ho ōhy htū hpa. Na pre htem apkati

mē ā amnhī nhīpēx anhÿr o pa. Anē.
Ja pyrā nē kēr ka mē akàxpore ho axpēn pyrāk o ri ho apa.

Xitre mē hkràmnhwÿjé jarēnh

¹⁶ Nē Xitre na pre ixpyrà nē kām mē ato ajuta hprām nē. Na pre inhmā mē atā amnhī jarē pa pre kuma nhūm ja inhmā mex nē pa ixkīnh nē. Nē ijamaxpēr o:

—Nā ām hāmri na Tirtūm tanhmā Xitre hkrā hto nhūm ā hamaxpēr mex anē. Anē.

¹⁷ Tā pa ma akupÿm mē awÿr mōr ā hkukja nhūm inhma nē hkīnh nē mē awÿr nojarēt kurē kumrēx. Nom kormā ixte kām mē ajarēnh kēt ri nhūm tām amnhī kukamā hamaxpēr nē mē awÿr hkrā. ¹⁸ Tā na ra nojarēt kaxyw. Kot paj ma hkôt Kris kôt mē pahtōjē hō mē kē ma hkôt mō. Kôt ixte mēnh xwÿnhhta na hte mē kām Tirtūm kapēr jarēnh mex nē nhūm htem amnhīm mex ā harē. ¹⁹ Na pre jar Jejus kwÿjaja kot ma ixkôt Jerujarē hwÿr kàxpore hkwÿ ho mōr kaxyw nhūm prem amnhīm mē kurē. Tā koja Xitre mē wa mē awÿr mōn pōj ka mē kām kàxporeta gō nhūm man akupÿn o mō pa wa rī kormā ma Jerujarē hwÿr mē kām o mō. Mē kot hamÿnh nē mē pamā mē hkīnh ā kot amnhī tā mē pahpumunh kaxyw. Nē Tirtūm mā mex o mex ā harēnh kaxyw. ²⁰⁻²¹ Nom kàxpore rax nhūm ixte mē hwÿr o inhmōr nhūm mē kot hā ixkamnhīx pymaj kot paj ma amnhī kôt Kris kôt mē pahtōta o mō. Ixte Xitre hkôt mē awÿr mēnh xwÿnhhta pa ma amnhī kôt o mō. Nom ixàhkīnh o ixpare hā. Tirtūm kot ja kôt ixpumunh mex tā kot paj ma amnhī kôt o mō.

²² Nē ot pa ma Xitre wa hkôt axte mē awÿr ja mē. Kēr kē mē axkrunēpxi nē ma ixkukamā mē awÿr mō. Ixte wa hkôt mēnh xwÿnhhta ixte kot amnhī nhīpēx ā omunh mex. Na hte kām mē piitā

mē ho ajuta ho pa hprām nē. Tā mē ajarēnh ma nē inhmā mē ajarēnh o:
—Nā koja mē Jerujarē nhō xwÿnhjē mā kàxpore nhōr rax nē kām ga. Mē kot amnhī to mex kēnā. Anē.

Jakamā ra mē awÿr hkrā. Tā koja ma Xitre wa hkôt mō nē mē ato ajuta ka mē tokyx kàxpore ho apikuprōnh pa.

²³ Nē koja mēhō tanhmā Xitre hā mē akukjēr to ka mē kēp ixkràmnhwÿ mex ā harē. Nē kot inhīhkō hā mē ho ajuta mex o pa hā harē. Na pre ra jar Kris kwÿjaja mē akaxyw kuta nē ma mē awÿr kumē. Jakamā koja ma mē awÿr mō nhūm Kris kôt mē pahtōjē hō wa pijakrutja wa ma hkôt mō. Na hte wa haxwÿja Kris kôt amnhī nhīpēx mex o pa. ²⁴ Koja mē awÿr pōj ka mē omu nē mē ho mex nē. Nē mē amā mē hkīnh nē. Kē krī piitā hkôt Kris kôt mē pahkwÿjē piitā mē hā mē ajarēnh ma nē axpēn mā mē amex ā mē ajarē. Nē mē ajarēnh o:

—Pēr ām hāmri na pre Pawreja mē pamā Korīt kām mē pahkwÿjē jarē. Na xep pre Xitre mē hkwÿta ma mē hwÿr mō nhūm mē ho mex rax nē. Ra Pawre kot mē pamā mē harēnh xà hkôt. Anē.

9

Mē kot kàxpore ho pikuprōnh ā mē harēnh

¹⁻² Kwa ixkràmnhwÿjaja. Kot paj Jerujarē nhō xwÿnhjē kaxyw mē atā ixihÿtx kēt nē. Ra mē amā mē ho ajuta hprām jakamā na pa pre Masetōn kamā Kris kôt mē pahkwÿjē mā mē ajarēnh o:

—Pika pē Gres kamā Kris kôt mē pahkwÿjaja na prem ham amgrā hapēxta kamā Jerujarē kamā mē pahkwÿjē jarēnh ma nē kām mē ho ajuta hprām. Anē.

Hāmri nhūm mē ajarēnh ma nē mē apyrā nē kām tanhmā mē ho ajuta hto hprām. ³⁻⁴ Tā ot pa mē

awÿr Xitre mē hōta wa mē ho ix-pimràatā wa mē kumē. Mē kot kàxpore hā mē akukjêr kaxyw. Kêr pa mytwrÿ hō hā ma Masetôn nhō xwÿnh kwÿjê mē mē awÿr mō nē ra ixte mē kām kàxpore hkwy ho mē apikuprōnh ā mē ajarēnh kōt mē ate ho apikuprōnh rax ā mē apumu nē ixkīnh nē. Nom kot pa mō nē tee ri hapêr nē te ixte Masetôn nhō xwÿnhjê mā mē ato ixêx pyrā nē ix-pijaam nē. Ka mē ajaxwÿja amnhī kamā apijaam nē. ⁵ Ā mē pahte amnhī nhīpêx anhÿr pymaj na pa ā mē amā kagāja nhīpêx nē Xitre mā ōr nē ma amnhī kukamā mē awÿr mēnh anē. Nē hkōt wa mōr mā xwÿnhnta mē ho ixpimràatāā amnhī kukamā wa mē kumē. Tā kê mē awÿr pōj nē mē amā kagāja gō ka mē kamā harē nē ama nē tokyx kàxpore ho apikuprōnh jatur xām amē. Kêr pa mē hapu hā mē awÿr mō ka mē ra mē ixkutêp ho apikuprōnh pa nē mē kām agō nē ajamakêtkati nē apa. No pa ixte mē amā mē ate ho apikuprōnh kaxyw mē atā ixihitÿx kêt. ⁶ Na htem piitā ā hamaxpêr anhÿr o pa nē hamaxpêr o:

—Kot ka apur rax nē kamā anhō rax nē. Nom kot ka apur grire nē kamā anhō grire.

Anhÿr o hamaxpêr jakamā kêr ka mē apiitā ajamakêtkati nē Jerujarē nhō xwÿnhjê mā kàxpore nhōr mex nē. Kêr ka mē ho apikuprōnh pa nhūm rax nē. Te mēhō ihpur rax nē kamā ō raxta pyrāk. Kê Tirtūm ā mē ate amnhī nhīpêx anhÿr ā mē apumu nē nhÿrmā mē ato mex nē. ⁷ Nom kêr ka mē anhōxy kamā mē kām ōr kêt nē. Mē pahte pahkīnh kām panhōxy hkêt kām mē kēp amrakati xwÿnhjê mā mēmoj nhōr o papaja na Tirtūm kām hprām. ⁸⁻⁹ Koja mē hā mē apumu hāmri nē amnhīm mē amex ā mē ajarēnh rāhā ho pa. Mē kām Tirtūm kīnh xwÿnhjaja na htem àmnhīx ri mē kēp amrakati xwÿnhjê mā mēmoj

nhōr o pa. Te Tirtūm kot amnhī nhīpêx pyrāk. Na hte àmnhīx ri mē pamā mēmoj nhōr o pa. Mē pahwÿr na rē nhūm wrÿ. Nhūm mē pamā mē paxàpkur xā nhōr o pa. Nē tanhmā mē pahto pu mē paxà hkêt nē pajamakêtkati nē paxàpēnh o papa. Nē pamex nē ri papa. Panhō rūnh nē ri papa. Jakamā kwa pu mē urāk nē paxàmnhīx ri mē kēp amrakati xwÿnhjê mā mēmoj nhōr o papa.

¹⁰ E pa ixprī hā mē amā ja jarē ka mē inhma. Nā na hte ā Tirtūm mē pamā mē paxàpkur xā nhōr o pa anē. Kot kaj apur kām ahkre nhūm tanhmā amā mēmo hyta nhīpêx to nhūm amā hapōx mex nē amā ō rūnh nē ka anhō rax nē. Nē hkwy ho axàpkur o apa nē axte hkwy hkre. Tā kêr ka mē ā Tirtūm kot mē ato mex anhÿr ā amnhī pumu hāmri nē urāk nē axàmnhīx ri mē kēp amrakati xwÿnhjê mā axàmnhōr pē mē ho mex o ri apa. Nhūm Tirtūm mē hā mē apumu nē mē amā mēmoj nhōr rāhā nē. Ka mē amnhī pyrā nē mē kēp amrakati xwÿnhjê mā hkwy nhōr o apa. ¹¹ Koja Tirtūm mē ato mex rax nē ka mē anhō mēmoj rax nē. Ja o amnhī xwar mē kēp amrakati xwÿnhjê kaxyw kàxpore hkwy jaxwÿ. Kêr pa mē amā hkwy jamÿ nē ma Tirtūm kōt mē pahkwÿjê mā o mō nē mē kām kugō kê mē omu nē hkīnh nē. Nē mē atā Tirtūm mā mex o mex ā harē. ¹² Hāmri nē mē akukwak ri mex nē ri pa. Nē axpēn mā Tirtūm mex o mex ā harēnh o ri pa. ¹³ Koja mē amnhī tā mē apumu nē hkīnh nē. Hāmri nē Tirtūm mā amnhī tā tanhmā mē ajarēnh to nē kām:

—Pa Tirtūm. Nā àm hāmri na pre Korîit kām akōt mē ixkwÿjaja amnhī jarē. Na htem akōt pix mā amnhī nhīpêx mex o ri pa. Jao mē ixpê ōxy hkêt nē mē inhmā kàxpore hkwy nhōr rax nē. àmnhīx ri hamakêtkati nē mē inhmā hkwy nhōr rax nē. No àm mē papxipix na htem ā mē

inhīpêx anhÿr kêt nê. Na htem mē kēp amrakati xwÿnh piitā ā mē hipêx anhÿr o pa. Ām hāmri na ka pre tanhmā mē hkrā hto nhūm mē anhÿ hā ā amnhī nhīpêx anhÿr o pa. Amex o amex Tirtūm. Anē.

¹⁴ Hāmri nê mē ato hwÿr o:

—Pa Tirtūm. Ām hāmri na hte Korīt nhō xwÿnhjaja amnhī pyrā nê mēmoj to mē ixkutā nojarēt o pa. Jakamā aa mē ixte amnhī tā mē inhno ho mē omunh kêt tā mē inhmā mē hkīnh nê. Kwa kēr ka mē ixtā mēmoj to mē kutā anojarēt rāhā ho apa Tirtūm.

Anhÿr o mē ato kuwÿ. ¹⁵ Tirtūmja mex o mex. Nom na hte mē pahto mex pē mē pamā kăxpore nhōr kêt nê. Kra Jejusja na pre mē pamā kugō. Kām mē pajapē ho mē pahwÿr kumē nhūm mē pahwÿr wÿr nê mē pahpiitā mē pahte amnhī tomnuj pānhā amnhīrer kaxyw mē panē ty. Ja na mex o kot mē pamā kăxpore nhōr jakrenh. Mēhō koja urāk nê ā mē panē htyk anē? Nā amrakati ho amrakati. Ām Jejus pix na pre ā amnhī nhīpêx anē.

10

Pawre kēp Tirtūm Karō nhÿ hā kapēr xwÿnh ā harēnh

Epes 6.10-20; Wam Tesarōn 5.8

¹ E Kris kôt ixkwÿjaja. Nā ixpē Pawre kot paj mē akwÿ kot tanhmā ixto kapēr to xwÿnhjē mā amnhī jarē ka mē apiitā inhma. Nā na hte Kris mē pakamā gryk tokyx anhÿr kêt nê. Na hte mē pahto mex japjē nê. Tā inhmā urāk nê ā mē anhīpêx anhÿr prām nê. No na hte mē akwÿjaja axpēn mā tanhmā ixto kapēr punuj to nē ri axpēn mā:

—Pawre na hte nhÿri krī kamā pa nē mē pamā kagā nhīpêx nē mē pahwÿr kurē nē kamā mēmoj tā mē pamā kapēr kām hiltÿx nē hā mē pamā akir. Tā amnē mē pahwÿr mō hāmri nē te kām mē pahpyma pyrāk o mē pamā kapēr o pa.

Anhÿr o ijarē. ² Nom inhmā mē awÿr inhmōr nē mēmoj tā mē amā ixākjēr prām kêt tā kot paj nhÿrmā mē awÿr mō ka mē tanhmā amnhī tomnuj to ho apa japēr. Pa ja hā mē apumu nē hā mē amā akir kām ga. ³ Na pa htem jar pika ja kamā Tirtūm kwÿ hkēt xwÿnhjē kaēx ā ri ixpa nom mē urāk nē amnhī krā hkôt tanhmā amnhī nhīpêx to ho ixpa hkēt nê. Nē mē urāk nē amnhī krā hkôt tanhmā ijamaxpēr to ho ixpa hkēt nê. Na pa htem Tirtūm Karō nhÿ hā àhpumunh xà ho amnhī nhīpêx o ri ixpa. ⁴ Nē Tirtūm xàhpumunh tÿx xà ho mē kām kapēr jarēnh o ri ixpa. Mē kot mar nē hkôt amnhī nhīpêx kaxyw. Nē àhpumunh tÿx o na pa htem mē kot Tirtūm kôt amnhī xunhwÿr pymaj mē kēp àmnār xwÿnhjaja tanhmā mē nē mē ho. ⁵ Na htem htÿx ri tanhmā Tirtūm nē hkwÿjē mā kapēr to ho pa. Amnhī kaxyw hkôt mē hamaxpēr kêt kaxyw tanhmā nē mē kām kapēr to. Na pa htem ja hā mē omu nē Tirtūm xàhpumunh tÿx xà ho tanhmā mē kām ixkapēr to nhūm mē tee ri inhma nē axte mē kēp àmnār kêt nê. Pa mē kām Tirtūm kapēr jarē nhūm mē ohtō nē kuma nē Kris kôt amnhī xunhwÿ nē hkôt amnhī nhīpêx o pa. ⁶ Tā mē kajaja kot kaj mē Tirtūm kôt amnhī nhīpêx mex tā mē atō ra kapēr nhīrōp xa nē tanhmā amnhī tomnuj to. Pa ja hā apumu rÿ hā ajarēnh ma nē hā amā akir. ⁷ Mē ate Tirtūm kot mē awÿr inhmēnh kêt ā axpēn mā ijarēnh tā kot kaj mē atō ām hāmri apē Kris kwÿ hā amnhī pumu nē ra määnēn pa ixpē hkwÿ hā ixpumunh kurē kumrēx. Mē apyrā nē ixpē hkwÿ kēnā. ⁸ Na pa pre ma mē awÿr mō nē tanhmā mē amā amnhī jarēnh to nē mē amā:

—Tirtūm na pre mē awÿr inhmē pa mō. Ixte ŷ hā mē amā kapēr jarēnh o ri mē akôt ixpa kaxyw. Anē.

Tâ pa hte arî ã amnhî jarênh anhÿr o ri ixpa. Âm hãmri na pre Tîrtûm mê awÿr inhmê pa hte âm hãmri mê amâ kapêr jarênh o ri mê akôt ixpa. Na pa hte Tîrtûm nhÿ hã mê amâ ixkapêr nê kapêr o ixêx o amnhî to jarkrar kêt nê. Ixte tanhmã mê atomnuj to ho ri ixpa kaxyw na pre Tîrtûm mê awÿr inhmênh kêt. Mê amâ ixkapêr mex nhûm mê ate inhmar nê Kris kapêr kôt amnhî nhîpêx mex o apa kaxyw na pre mê awÿr inhmê. ⁹ E kwa Kris kôt ixkwÿjaja. Na pa hte mê amâ ixpuma kaxyw mê awÿr kagà rênh kêt nê. Mê ate kamã harênh nê tee ri amnhî kukamã ajamaxpêr o amnhî kamã amâ ma kaxyw kêt. ¹⁰ Mê akamã mê kãm ixkînh kêt xwÿnhjaja na htem ijarênh o:

—Pawre na hte awry hã pa nê mê pahwÿr kagà rênh nê kamã te kêp pahî ho amnhî nhîpêx pyrã nê mêmoy tâ mê pamã kapêr kãm hihtÿx nê. Tã mê pahwÿr pøj hãmri nê kapêr kaxyw nom kapêr kãm hihtÿx o kapêr kêt nê. Jakamã mo kaxyw kot puj mê hwÿr mra nê kapêr ma?

Anhÿr o ijarê. ¹¹ Nom ã ixte anhÿr kêt. Kwa mê inhma. Kot paj nhÿrmã ma mê awÿr mô hãmri nê te kagà ja kamã mê amâ ixkapêr pyrãk o mê amâ ixkapêr nê ixkapêr xihtÿx o mê amâ ixkapêr kãm ga.

¹² Na hte mê akwÿjaja kot amnhî to mex o mê ajakrenh ã amnhî to jarkrar o ri pa. No âm amnhî krã hkôt pix mã na htem ã ri amnhî jarênh anê. Na hte Tîrtûm ã mê harênh anhÿr kêt nê. ¹³ Tã inhmã mê urãk nê ã amnhî jarênh anhÿr prãm kêt. Âm ixte Tîrtûm kot tanhmã inhmã karô hto xà hkôt amnhî nhîpêx o ixpaja na inhmã hprãm. Tã mê kajaja mê awÿr na pre inhmê. ¹⁴ Ra kot mê awÿr inhmênh jakamã ixkumrêx na pa pre mê awÿr mô nê mê akôt ri mê amâ tanhmã Kris jarênh to ho

ri ixpa. Tîrtûm kãm nhÿhÿm ixpa hprãm xà pix wÿr na inhmã ixpa hprãm.

¹⁵ No kêt mê kot amnhî krã hkôt htÿx ri Tîrtûm kapêr jahkre o mê pa xwÿnhjaja na htem nhÿri krî kamã mê kot Kris kôt amnhî xunhwÿr ã mê harênh ma nê mê hã amnhî to jarkrar o ri pa. Te tãm kot mê hwÿr mör nê mê kãm ujarênh nhûm mê kot mê mar xà hkôt Kris kôt amnhî xunhwÿr pyrãk. Nê mê hã amnhî to jarkrar o:

—E na pa pre ma mê hwÿr mô nê mê kãm Tîrtûm kapêr jarê nhûm mê inhma nê hkôt amnhî xunhwÿr kurê kumrêx. Ixkukwak ri na prem ã amnhî nhîpêx anê. Anê.

Nom ã amnhî nhîpêx anhÿrja ã amnhî to hêx. No pa na pa hte ho mê urãk kêt nê. Koja Tîrtûm ma nhÿri krî hwÿr ixkwÿjê hô mê nhûm ma hwÿr mô nê mê kãm Kris kapêr jarê. Hãmri nhûm nê kuma nê Kris kôt amnhî xunhwÿ. Pa mê harênh ma nê mê ÿ hã ixkînh nê nom pa ixkukwak ri mê kot hkôt amnhî xunhwÿr ã amnhî to jarkrar kêt nê. Ixte mê hwÿr ixpa nê mê kãm ixujarênhre hã kot pa hkêt mê hã amnhî to jarkrar. Âm Tîrtûm kãm nhÿhÿm ixpa hprãm xà pix wÿr na pa hte ixpa nê mê kãm kapêr jarê. Jakamã kot kaj mê nhÿrmã Kris kôt amnhî nhîpêx mex o ri apa pa ja hã mê apumu nê mê are nê hpãnhã ma krî hô hwÿr Kris kot mê hwÿr inhmênh xà hô hwÿr mô. Ka mê ja hã ixto Tîrtûm wÿr o apa. ¹⁶ Kot paj mê anhö krî kamã mê piitã mê kãm Jejus kapêr jarênh pa hãmri nê hpãnhã ma krî hkwÿ hkôt ijapôx o ri ixpa nê kamã mê kãm harênh o ri mê hkôt ixpa. Kormã aa mê kot mar kêt kumrêx xwÿnhjê mã harênh o ri mê hkôt ixpa. Na pa hte ã mê hwÿr ixpa nê mê kãm ixujarênh anê. Jakamã nhûm mê ja hã ixpumu nê mê kot Tîrtûm kapêr mar xwÿnhjê pix wÿr ixpa hã ijarênh kêt nê.

17 Nē Tirtūm kapēr ā kagā htūm kot mēmoj tā mē kot amnhī to jarkrar ā harēnh kot:

Kēr ka mē kamjaja amnhī mex ā amnhī to jarkrar kēt nē. Ām Tirtūm pix mā mān mex o mex ā harēnh o ri ho jarkrar o ri apa. Anē.

18 Kot pu mē Tirtūm noo mā amnhī to mex ā amnhī to jarkrar nē ām amnhī to jarkrar kaprý. Nom koja Tirtūm tām ja hā mē pahto jarkrar nē ām hāmri mē pahte amnhī to mex xwýnh ā pahto jarkrar.

11

Jejus kot mē hwýr mē rēnh ā amnhī to hēx xwýnhjē jarēnh

Matēwre 7.15; Rōmān 16.17; Karatas 1.6-9; Korosē 2.8; Sikün Pētre 2.1

¹ E kot paj te mē hkrā pipānh xwýnh kot htýx ri amnhī jarēnh pyrāk o tanhmā mē amā amnhī to jarkrar to. Kwa mē inhma nē ixkamā agryk kēt nē. No mē ixkapēr kumrēx mān ma. ² Inh mā mē akīnh. Te ho Mēpahpām Tirtūm kām mē akīnh ta pyrāk. Te mē apē mēhō kukrit kām my hkīnh nē kot ho mjēn prām xwýnh ta pyrāk. Kām mēmyjē piitā mē hkīnh kēt ām kām pix kīnh. Ja pyrā nē kēr ka mē amā Kris kīnh o nhām amā mē hkīnh xwýnhjē jakre. Te ho mēhō ni kot kām myta pix kīnh nē kām ho mjēn prām xwýnh ta pyrāk. Ja na pa inh mā hprām. ³ Ra mē amā Kris kīnh týx o apa nē hkōt amnhī nhīpēx mex o ri apa htā nhūm mē kot amnhī krā hkōt htýx ri Tirtūm kapēr jahkre ho mē pa xwýnhjaja tee ri ja hā mē ajarēnh ma nē axpēn mā mē ajarēnh o:

—Kwa nā ja mex kēt. Koja mē Pawre kapēr ma nē ām kuma nhūm ja mex nē. No mē pahkōt mē kot amnhī nhīpēxja na mē pamā mex. Ja na kēt mē pamā mex o mex. Anē. Hāmri nē ra kot Kris nē tanhmā mē amā hēx to kaxyw. Te amnepē

mā kagā kot mē panā kot wa pē Ewa mā hēx nhūm kot mar nē hkōt amnhī nhīpēx ta pyrāk. ⁴ Na pa pre ra mē awýr mō nē mē amā tanhmā Jejus jarēnh to. Nē tanhmā mē amā Tirtūm Karō jarēnh to. Nē tanhmā wa kot mē pahto hkra hto hā mē amā wa harē ka prem inhma nē mar týx nē. Tā nhūm ra mē kot htýx ri Tirtūm kapēr jahkre xwýnhjaja ixpānhā mē awýr mō nē Jejus kapēr kwým ri tanhmā mē amā ujarēnh to nē mē amā harēnh o hēx rāhā ho pa. Nē Tirtūm Karōja nhūm mē amā tanhmā ho hēx to. Nē ixte mē amā Tirtūm kapēr jarēnh kwým ri ixpānhā tanhmā mē amā harēnh to ho pa. Na ka prem mē ama nē ām hāmri harēnh ā hkamnhīx. Kwa kēr ka mē ri mē ujarēnh piitā mar nē hkōt amnhī nhīpēx kēt nē. Mē kot Jejus jarēnh tā no ām katāt kōt harēnh kēt nē. Ām ri ho hēx o pa. Ka htem ama nē ām hāmri harēnh ā hkamnhīx nē mē amā mē mar prām nē. Mē kot mē amā harēnh o hēx o pa htā ka mē ama nē ra mē hkōt amnhī nhīpēx kaxyw. Kwa mē ri ā amnhī nhīpēx anhýr hkēt nē. ⁵ Kris kot mē awýr mē rēnh ā mē kot amnhī jarēnh tā amnhī to hēx. Ka prem ama nē ām hāmri mē kot mē amā harēnh ā mē hkamnhīx. Nom na pre Krisja mē awýr mē rēnh kēt nē. Kēt pa na pre mē awýr inh mē. ⁶ Mē hkīnhā ixkapēr krór pyrāk tā no ām ixte Tirtūm kapēr mar týx. Nē kot amnhī nhīpēxja na ixte omunh par. Ra mē ate ja hā ixpumunh mex.

⁷ Na pa pre mē akōt ri mē amā Jejus jarēnh o ri ixpa no ām hpānhā mēmoj tā mē awýr o ri ixpa hkēt nē. Xā amarī ixte mē amā harēnh nē hpānhā mēmoj tā mē awýr kētja mē apē omnuj? ⁸⁻⁹ Kormā ixte mē amā Tirtūm kapēr jarēnh o ri ixpata ā na pa pre hte tōhā kaxpore ho presija no ām aa hā mē awýr kēt nē. Jar Masetōn kamā Kris kōt mē pahkwýjaja na prem ixwýr hkwy rēnh o pa pa ho ixàpkur xā japrór

o ri mē akôt ixpa. Mē kumā ixte Tirtŭm kapēr jarēnh o ri ixpa hkēt tā pa hte mē kukwak ri mē akôt ho ixapkur o ri ixpa. Tā kot paj arī ā mē akôt ixpa nē ā amnhī nhīpēx anē nē mēmoj tā mē awŷr o ri ixpa hkēt nē. ¹⁰ Ja inhmā mex. Jakamā kot paj amarī mē anhō pika pē Gres kām ā mē amā Tirtŭm kapēr jarēnh o ixpa anē nē mēmoj tā mē awŷr kēt nē. Ām hāmri na pa ā mē amā amnhī jarēnh anē. Kris pyrā nē ixēx kēt kēnā. ¹¹ Xà we inhmā mē akīnh kēt kôt na pa hte ā mē amā Tirtŭm kapēr jarēnh pānhā mē awŷr kēt anē? Nā inhmā mē akīnh jakamā na pa hte kapēr jarēnh pānhā mē awŷr o ri ixpa hkēt nē. Inhmā mē akīnh tŷx kēnā. Tirtŭm kot ja hā ixpumunh mex. ¹² No mē kot amnhī krā hkôt htŷx ri Tirtŭm kapēr jahkre xwŷnhjaja na htem mē ajahkre hpānhā kàxpore hā mē awŷr pix o pa. Nē mē amā tanhmā amnhī to hēx to nē mē amā:

—Nā mē ixte Pawre kot amnhī nhīpēx pyrāk. Mē ixte amnhī nhīpēxja kot axpēn pyrāk.

Anhŷr o mē amā amnhī to hēx. Nom ixte ho mē urāk kēt kumrēx. Mē ixte amnhī nhīpēx kot axpēn pyrāk ronhŷx pa mē urāk nē kàxpore hā mē awŷr o ri ixpa. Nom ixte ā amnhī nhīpēx anhŷr kēt. Kot paj aa ā amnhī nhīpēx anhŷr o ixpa hkēt nē. ¹³ Ā mē kot amnhī nhīpēx anhŷr xwŷnhjaja na pre Tirtŭm mē awŷr mē rēnh kēt nē. Mē kot Kris nhŷ hā mē ahkre xwŷnh ā amnhī jarēnh tā ām amnhī to hēx. ¹⁴ Mē ō pahi Satanastija te mēmoj mex jarēnh pyrāk tā no ām na hte mē pano kupyri pē mē pamā tanhmā hēx to ho mē pahkôt pa. Te kot mēmoj mex ā ām hāmri kot harēnh pyrāk tā no ām ho hēx. ¹⁵ Tā hkôt mē kot amnhī nhīpēx xwŷnhjaja na htem urāk nē te tām mē kot amnhī nhīpēx xwŷnhjē pyrā nē mē pahwŷr mra nē tanhmā mē pamā

hēx to. Satanasti pyrā nē mē pano kupyri kaxyw tanhmā mē pamā hēx to. Nom koja Tirtŭm nhŷrmā mē pahatā mē homnuj tŷx kumrēx nhŷm mē rī amnhī pumu.

*Tanhmā mē kot Kris ā Pawre nhīpēx to ā mē harēnh
Atre 9.23-25*

¹⁶ E kot paj axte te ixtŷx ri amnhī to jarkrar pyrāk o mē amā tanhmā amnhī jarēnh to ka mē inhma nē ixkamā agryk kēt nē. ¹⁷ Pahihti Kris nhŷ hā kot paj mē amā amnhī jarēnh kēt ām amnhī krā hkôt kot paj mē amā amnhī jarē. ¹⁸ Na htem ohtō nē mē ate mē hā apijaam kaxyw tanhmā mē amā amnhī to jarkrar to ho pa. Tā kot paj mē urāk nē amnhī krā hkôt mē amā amnhī to jarkrar ka mē inhma. ¹⁹ Mē ate amnhī xāhpumunh tŷx ā amnhī jarēnh tā ka htem htŷx ri mē kot amnhī to jarkrar o ri mē pa xwŷnhjē kapēr ma nē mē hkôt ajamaxpēr nē mē hkôt amnhī nhīpēx kurē kumrēx. ²⁰ Mē kot Kris nhŷ hā mē ahkre hā amnhī to hēx xwŷnhjaja mē pakurom mē kot amnhī to rax xwŷnh ā amnhī jarēnh jakamā na htem mēmoj tā mē amā karō ho pa.

Nē mē kām hprām xà hkôt nhŷhŷm mē arē nē nhŷhŷm mē arē.

Nē mē apa pix kukwak ri apkur o pa.

Nē mēmoj tā mē ajakwap mē atak o pa.

Ā mē kot mē anhīpēx anhŷr tā ka te mē ate atŭm kēt pyrā nē atŷx ri mē kapēr ma nē mē hkôt amnhī nhīpēx o ri apa. ²¹ Tā ixte mē urāk nē ā mē anhīpēx anhŷr kēt tā kot paj mē urāk nē mē amā tanhmā amnhī to jarkrar to ka mē inhmar japēr. Te ixtŷx ri amnhī jarēnh pyrāk o kot paj mē amā amnhī jarē nom ām hāmri mē amā amnhī jarē. ²² Mē kot Jejus nhŷ hā mē ahkre hā amnhī to mē hēx xwŷnhjaja na

htem mẽ amã tanhmã amnhĩ to jarkrar to nẽ mẽ amã:

—E mẽ inhma. Mẽ ixpê Ijaew na pa mẽ. Mẽ arom mẽ ixpê finat Apraãw kanrêhã htãmnhwỳ jakamã kwa mẽ ixkapêr ma nẽ mẽ ixkôt amnhĩ nhĩpêx. Anê.

Nom ijaxwỳja ixpê Ijaew tã pa hte mẽ urak nẽ ja hã amnhĩ to jarkrar hkêt nẽ. ²³ Nẽ mẽ kot Kris kapêr jarênh mex o pa hã amnhĩ jarênh tã pa na pa hte harênh mex o mẽ hakre. Te ixkrã pipãnh pyrak o ã mẽ amã amnhĩ jarênh anhỹr tãã.

E pa mẽ amã tanhmã amnhĩ jarênh to ka mẽ inhma. Na na pre Kris ã mẽ kãm ixkurê xwỳnhjaja mẽ kot amnhĩ to jarkrar xwỳnhjê hkĩnhã Kris ã ixpynênh nẽ ijagjênh xohtô nẽ. Nẽ mẽ hkĩnhã tõiã ixtak rũnh kumrêx. Pa mẽ hkĩnhã xatã mẽ kot tanhmã ixto hã kritpêm ronhỹx pa pre ty. ²⁴ Na pre Ijaew krãhtũmjaja Kris ã ixkatut kãm ixtak rũnh nẽ. Nẽ ixtak xàja pĩ hã mry kã janhô o ixtak. Nẽ ixtak kaxyw nẽ ixtak xà jatur xà kamã kàx xwa gixre janhô nẽ ho ixtak rũnh o ixkatut kã rê. Ixtak o 39 hãmri nẽ rĩ kormã mẽ kot ixpĩr pymaj inhmã ure. Na pre htem nhỹri ixpynê nẽ ã inhĩpêx anê. Na prem ã inhĩpêx anhỹr o 5 wês.

²⁵ Nẽ na prem ra mẽ kot ixpĩr kaxyw nẽ kên rũnh kwỳ jamỳ nẽ ho ixtak o kuhê. Nẽ Rôm nhõ xwỳnhjaja haxwỳja pĩ ho ixtak rax kumrêx. ã inhĩpêx anhỹr o axkrunêpxi.

Nẽ na pa pre hte gô xujanãr kãm nhỹhỹm Jejus jarênh o ri ixpa kaxyw pãr kãm mẽ hwỳr ixpa nhũm pãrja tanhmã amnhĩ to nẽ agjê. Kritpêm nhỹx pre hte gôja ixpĩ. Pa pre ã amnhĩ nhĩpêx anhỹr o axkrut. Tã arĩgro hõ hã kê axte pãr õ mã axà nẽ ma axte krĩ hõ hwỳr mõi. Nhũm kê pãrta axte mẽ ixpê axà nhũm gôja nhỹx kê axte ixpĩ. Pa pãr jakã hã kumỳ nẽ hã ijêt o amỹkry. Nẽ ho apkati. Tã nhũm

nhỹhỹnh pãr õja mõi nhũm kamã mẽ mõi xwỳnhjaja ixpumũ nẽ ixwỳr pãr o mõi nẽ amnhĩ wỳr ixto api nẽ ma amnhĩ kôt ixto mõi.

²⁶ Na pa pre amnhĩ xà htỳx kamã ijamak o ri ã mẽ kãm Kris kapêr jarênh o ri ixpa anê. Kironhỹx pre gô tãmja ixpĩ. Nhũm mẽ àhkĩnh nhi xwỳnhjaja kironhỹx prem mããnen ixpĩ. Nẽ Ijaew nẽ Ijaew kêt xwỳnhjaja tõiã tanhmã ixtomnuj to ho pa. Pa pre krĩ hkwy hwỳr ixpa rỳ kapôt ã ixpa nhũm mẽ ixtã amỹnê. Pa pre gô xujanãr kãm pãr kãm ri ixpa nẽ nhỹx kamã ty. Nhũm mẽ kêp Kris kwỳ hã amnhĩ to hêx xwỳnhjaja haxwỳja tanhmã ixtomnuj to pa mẽ ÿ hã amnhĩ xà htỳx kamã ijamak o ri ixpa. ã na prem Kris ã inhĩpêx anhỹr o pa.

²⁷ Nẽ na pa Jejus kapêr jarênh o ri ixpa kurê ixkêngrã nẽ ri ixpa. Nẽ tõiã inhõt kêt ã ixtã apkati. Nẽ tõiã inhmã prãm nẽ inhmã kôr nẽ ri ixpa. Nẽ tõiã ixê mex kêt nẽ inhmã kry nẽ ri ixpa. ²⁸ Na pa hte Kris kapêr jarênh o ri ixpa pê ã amnhĩ nhĩpêx anê. Nom ja pix kêt. Na pa hte krĩ piitã hkôt Kris kwỳjê hkukamã tee ri ijamaxpêr nẽ ijamaxpêr o:

—Hêxta waa nẽ. Mãn mẽ arĩ Kris kôt amnhĩ nhĩpêx mex japêr rỳ ko. Mãn mẽ ra kapêr kwỳm ri tanhmã amnhĩ tomnuj to rỳ ra hkaga.

Anhỹr o ijamaxpêr o ixpa.

²⁹ Nẽ na hte mõi Tĩrtũm kapêr nhĩrõp xa nẽ tanhmã amnhĩ tomnuj to pa tee ri omũ nẽ ixkaprĩ htỳx kumrêx. Kõja mõi tanhmã Tĩrtũm nẽ mõi mã kapêr to nhũm kuma nẽ Tĩrtũm kôt amnhĩ nhĩpêx kêt pa tee ri ja hã omũ nẽ nẽ kêp àmnãr xwỳnhhta kamã inhgryk tỳx kumrêx.

³⁰ E Kris kôt ixkwỳjaja. Na pa ã mẽ amã amnhĩ jarênh anê. Te ixte amnhĩ to ijarkrar pyrak no ãm mẽ ate ixirerek xwỳnh ã ixpumũnh pix kaxyw. ³¹ ãm hãmri na pa ã mẽ amã amnhĩ jarênh anê. Ixêx kêt.

Pahihti Jejus nhîpêêxà Tirtüm kot ja hã ixpumunh mex. Tirtümja mex o mex. Koja mex o mex tüm në pa rãhã ho pa. Tãm kot ixirerek â ixpumunh mex. ³² Kormã krî pê Tamas kãm ixpare ri na pre mẽ õ pahi Arêtja mẽ kãm ixtã amÿnê nhùm pòristijaja krî hpu hã kahê xà nhõ hakwakre piitã kãm hipòk pa në ixkãm hamak o kuhê. Pa tee inhmã nhÿhÿnh ixkator në ma mẽ umaj ixpròt në ixtêm prãm në ixirerek xwÿnh ã amnhî pumunh kurê kumrêx. ³³ Tã nhùm Kris kòt mẽ pahkwÿjaja hamaxpêr në kawà rax mÿ në o tẽ në inhmã ãm pa hwÿr axà në kamã nhÿ. Hãmri nhùm mẽ pàr nhõr o kahê nhîrò pê ixto wrÿ pa ixkato në mẽ kêp amÿxu në amnhùm ixprî në ma tẽ në mẽ kêp akunok. Æ na pre Tirtüm ixirerek xwÿnh ã inhmã ixto amnhîrit anê.

12

Tirtüm kot Pawre mã mẽmoj to amnhîrit ã harênh

¹ E Kris kòt ixkwÿjaja. Nã inhmã amnhî to jarkrar hprãm kêt tã kot paj tanhmã mẽ amã amnhî jarênh to ka mẽ inhma në hã ixtã apijaãm japêr. Na hte Tirtüm tõiã inhõt kãm ixkarõ mã tanhmã kapêr to. ²⁻³ Amnepê mã amgrã hõ hã na pre tanhmã ixkrã hto në õ krî hwÿr amnhî wÿr ixto api. Na pre ra hã amgrã pê 14 ãn. Apu inhî rãhã ixto api rÿ apu ãm ixkarõ pix o api rÿ ko. Ixte ja hã amnhî pumunh mex kêt. Tirtüm pix kot ja hã ixpumunh. ⁴ Na pre ixto api pa pøj në õ krî kamã axtem tanhmã mẽ kapêr to hã mẽ kuma. Na prem mẽmoj mex kumrêx jarê pa kuma në ixkính në. Nê inhmã mar prãm në. Hãmri në ijamaxpêr o:

—Hêxta waa në. Mẽmoj jarênhja mex kumrêx. Nã kot paj akupÿm wrÿ në ixkwÿjê mã harê kê mẽ ixpyrà në kuma. Nã kot paj anê.

Anhÿr tã nhùm Tirtüm Karõ ja në ixkuré në inhmã:

—Nã kêr ka mẽ kãm ja jarênh kêt në. Æm kapxipix kot kaj ama në ri hã apa.

⁵ Anhÿr jakamã pa pre paxipix mẽ arom mẽmojja pumu në kuma nom kot paj ri hã amnhî to jarkrar kêt në. Kòt paj ãm Jejus pix tanhmã harênh to ho ri ixpa. Jao ixrom mex o mex ã harê. Nê ixrom hihtÿx o hihtÿx në ãhpumunh o ãhpumunh ã harênh o ri ixpa.

⁶ Nê ixte Tirtüm nhõ krî hwÿr ixàpirja ãm hãmri ixte hã amnhî jarênh tã kot paj ja hã amnhî to jarkrar o ri ixpa hkêt në. Mẽ ate ja hã inhmar kòt inhmex ã ijarênhja na inhmã hprãm kêt. Nom kot ka mẽ ixte tãm amnhî nhîpêx ã ixpumu në tãm ixkapêr ã inhma hãmri në rÿ kormã inhmã inhmex ã ijarê. Æ mẽ ate amnhî nhîpêx anhÿrja na inhmã hprãm. ⁷ Na pre Tirtüm inhõt kãm inhmã mẽmoj mex kwÿ jarênh rax në. Hãmri në hpãnhã inhmã:

—E na ka akwÿjê rom inhõ krî hwÿr api në mẽ kurom mẽmoj mex pumunh rax në. Tã ate ja hã amnhî pumunh në ma mẽ kãm hã amnhî to jarkrar o ri apa pymaj kot paj Satanasti mã anê nhùm inhma në tanhmã atomnuj to ho pa. Nom ijamaxpêr xà hkòt koja ã anhîpêx anê.

Anhÿr jakamã nhùm tanhmã inhîpêx to pa inhmex kêt në ixpa. Te mrõnhî rax nhÿhÿnh kot ixkamnhwÿr nhùm inhmã tee ri hkaxàr prãm kaprÿ në ÿ hã ho inhgêx rãhã në ixpaja pyràk. ⁸ Tã pa tee ri ja hã amnhî pumu në amnhî to Jejus wÿr në kãm:

—Kwa Pahihti. Na pa ra mẽmojta nhÿ hã ixpunuj në ixirerek në ixpa. Kwa inhnê ata pa akupÿm ixihtÿx në ijamakêtkati në ri ixpa nã?

Anhÿr o amnhî to hwÿr o axkrunêpxi. ⁹ Hãmri nhùm inhmã:

—Nà kot paj anê hyr kêt nê. Kot paj âm akutâ inhnojarêt rāhā ho ri akôt ixpa. Ka axirerek nê apa htā ixihtýx xwýnh ā xpumunh kôt ixkamnār rom tanhmā inhý hā amnhī nhīpêx to ho ri apa. Anê.

Ā inhmā kapêr anhýr jakamā na pa ixpunuj nê ri inhīrot nê ixpa htā ixrom hihtýx xwýnhhta nhý hā ixkīnh nê ixpa. Nê kurom ixirerek xwýnh pix ā amnhī to jarkrar o ri ixpa. ¹⁰ Jakamā kot paj Kris ā ixpunuj nê ri ixpa htā ixkīnh nê ijamakêtkati nê ri ixpa. Kwār mē māmri hā tanhmā ixto kapêr to nê tanhmā hā inhīpêx to pa amnhī xā htýx kamā ijamak o ri ixpa. Nê ixpê amrakati nê inhīrot nê ri ixpa htā Kris nhý hā tanhmā kām amnhī nhīpêx mex to rāhā ho ri ixpa.

Pawre kot tee ri mē hkukamā hamaxpêr ā harēnh

¹¹ Tā mēmo kaxyw na pa ā mē amā amnhī jarēnh anê? Nā mē ate ixtā apijaàm kêt jakamā na pa ā mē amā amnhī jarēnh anê. Mē kēp Kris nhý hā mē ajahkre xwýnh ā amnhī to hēx xwýnhjaja na ka htem ixrom kot amnhī to rūnh xwýnh ā mē harē nê mē hā apijaàm o ri apa. Nom ixte amnhī to grire xwýnh tā mē kot amnhī to rūnh o ijakrenh kêt. ¹² Na pa pre mē akamā ri ixpa nê Tirtūm nhý hā aa mē ate mēmoj pumunh kêt kwý ho anhýr rax o ri mē akôt ixpa. Nê ý hā akupým mē à xwýnhjê ho mex. Nê mē nohkre xwýnhjê no ho mex. Na pa pre hte ā mē amā mēmoj nhīpêx anhýr o ri mē akôt ixpa. Amnhī xā htýx kamā ijamak o ri ixpa htā Tirtūm xihtýx xā ho amnhī to htýx nê ā mē amā mēmoj to anhýr o ri mē akôt ixpa. Mē ate omunh nê Tirtūm àhpumunh týx ā omunh kurê kumrêx kaxyw. Nê ixpê Kris nhý hā mē ajahkre hā xpumunh kurê kumrêx kaxyw na pa pre ā mē amā amnhī nhīpêx anhýr o ri mē akôt ixpa. ¹³ Xān pa pre nhām krī hkwy kamā Kris

kôt mē pahkwýjê ho mex tā mē kajaja tanhmā mē ato mex to hkêt nê? Nā na pa pre hte mē anhīpêx o axpēn pyrāk. Ām mēmoj pixire na pa pre mē urāk nê mē awýr kêt nê. Nhām krī hkwy kamā ixpata ā na pa pre mēmoj to presija nhūm prem inhmā ōr o pa. Tā pa pre mē mō nê mē akôt ixpa nê mēmoj to presija htā hā mē awýr kêt nê. Kwa mē ā ixte amnhī jarēnh anhýrja ma nê ixkamā agryk kêt nê.

¹⁴ Tā ot pa ra akupým mē awýr inhnojarêt kaxyw. Na pa pre ra mē awýr inhmōr o axkrut. Tā ra axte mē awýr inhnojarêt kaxyw. Kot paj mē awýr mō nê mē akôt ixpa nom te wam ixtēmta pyrā nê mēmoj tā ri mē awýr kêt nê. Ām mē amā ixkīnh pix na inhmā hprām. Mē apiitā te mē apē ixkra pyrāk. Na hte mē hkrarejaja mē katorxā nê mē hipêêxā mā ujaaprōr o pa hkêt nê. Mē hipêêxā nê mē katorxā na hte hkrare mā kot mēmoj to presija xā hkôt kām haprōr o pa nom mēmoj tā hwýr kêt nê. Ja pyrā nê kot paj mē apē ixkra pyrāk ā mēmoj tā mē awýr kêt nê. ¹⁵ Kot kaj mē mēmoj to presija japêr nê inhmā harē pa ixāmnhīx ixkīnh kām mē amā ixkāxpore piitā ōr par pyrāk o amnhī nhīpêx. Nê mē amā tanhmā amnhī nhīpêx to ho ixpa rāhā ixtykja na inhmā hprām. Inhmā mē akīnh týx kumrêx tā mē kajaja mē amā ixkīnhja mē atā hkwy jêt kêt kumrêx. ¹⁶ Ixte amnhī mā mēmoj tā mē awýr kêt tā na hte mē akwýjaja ixêx rom ixte nhām mē kēp amrakati xwýnhjê mā kāxpore hā mē awýr o ixpa hā ixkamnhīx.

¹⁷ Kwa tanhmā na pa pre ri mē ano kupyw to? Xā ja kaxyw na pa pre mē awýr ixkrāmnhwýta wa kumê? ¹⁸ Na pa pre Xitre hā ixihtýx nê mē awýr kumê. Nê Kris kôt mē pahtōja pa Xitre hkôt kumê nhūm wa ma mē awýr mō. Tā xā na pa pre Xitre tanhmā mē ano kupyw to? Nā

na pre ā mẽ anhīpêx anhÿr kêt nê. Tã wa ixte amnhī nhīpêx nê wa ijamaxpêrja kot axpên pyrãk. Nã na pa hte urãk nê mẽ ano kupyř o ri ixpa hkêt nê. ¹⁹ Mãn ka mẽ axpên mã mẽ ijarênh o:

—Nã Pawre mẽ hkwyjaja mẽ kãm amnhī to rũnh xwÿnh prãm jakamã na ã Pawre kagàja kamã mẽ pamã amnhī tã àprãr anê.

Anhÿr o mẽ ijarênh japêr nom mẽ inhmã amnhī tã tanhmã ixàprãr to hprãm kêt. Æm mẽ inhmã mẽ akĩnh nê mẽ ato mex prãm jakamã na pa htem tanhmã mẽ amã amnhī nhīpêx to ho ri ixpa. Na pa Tĩrtũm noo mã Kris nhÿ hã ã mẽ amã mẽ amnhī jarênh anê.

²⁰ Tã kot paj jatã ma mẽ awÿr mō ka mẽ akwyjaja tanhmã amnhī tomnuj to japêr.

Mẽmoj tã axpên mã axãkjêr o apa.

Rÿ mẽmoj tã axpên kãm agryk.

Rÿ axpên kãm agryk tokyx anhÿr o apa.

Rÿ axpên pê anhōxÿ.

Rÿ axpên to akapêr punuj o apa.

Rÿ mẽ ajakwa kamã nhãm mẽ hixi ho rêr o ri apa.

Rÿ amnhī to rũnh prãm xaj anhmã amnhī nhīpêx to ho apa.

Kot kaj mẽ ã amnhī nhīpêx anhÿr o ri apa pa ja hã mẽ apumu nê ixkaprĩ htÿx kumrêx ka mẽ tee ri amnhī tã ixpumu. ²¹ Xã kot paj mẽ awÿr mō nê mẽ apumu ka mẽ akwyjaja arĩ mẽ aprō kuhpa hã nhãm mênijê ho amnhĩkati ho ri apa? Rÿ arĩ tanhmã ajamaxpêr punuj to ho apa? Rÿ atÿx ri apijaãm kêt o apa? Kot ka mẽ arĩ ã amnhī nhīpêx anê pa ja hã mẽ apumu nê ixkaprĩ xaj inhmÿr rax nê. Nê mẽ anhÿ hã Tĩrtũm noo mã ixpijaãm tÿx kumrêx.

13

Pawre kot tanhmã amnhī kukamã mẽ kãm karō hto

¹ Tĩrtũm kapêr ã kagà htũm tanhmã mẽ kot amnhī tomnuj to xwÿnhjê jarênh kot:

Koja mẽhō tanhmã amnhī tomnuj to nhũm mẽhō pyxi nê ã amnhī nhīpêx anhÿr ã omu nê awÿr tẽ nê amã harê ka mẽ ama nê ãm ama nê hkôt ajamaxpêr kêt nê. No koja mẽmojaja axkrut rÿ axkrunêpxi nê hã omu nê awÿr mra nê axpên kôt amã harê ka mẽ ama nê mẽ hkôt ajamaxpêr kurê kumrêx. Anê.

Tã ra mẽ awÿr inhmōr o axkrut tã kot paj akupÿm mẽ awÿr mō nê mẽ apumu. ² Hapu hã mẽ awÿr inhmōrta ã na pa pre mẽ akwÿ kot tanhmã amnhī tomnuj to hã mẽ omu nê hã mẽ kãm akir nê mẽ kãm:

—Kot kaj mẽ amnhī tomnuj kaga nê tãm amnhī nhīpêx kêt kot paj nhÿrmã akupÿn mẽ awÿr mō nê ã mẽ ate amnhī nhīpêx anhÿr ã mẽ apumu nê hã mẽ atomnuj tÿx kumrêx kãm ga. Anê.

Jakamã kot paj mẽ ma mẽ awÿr mō nhũm mẽ akwyjaja arĩ mẽ ate amnhī tomnuj o apa hã inhmã mẽ ajarê pa mẽ atã mẽ kuma nê tanhmã mẽ ato htÿx nê. ³ Kot kaj mẽ ja hã ixpumu nê aprĩ hã ixte Kris nhÿ hã ixkapêr xwÿnh ã ixpumunh tÿx kurê kumrêx. Kris ixrom hihtÿx o hihtÿx. Na pre ra mẽ ate amnhī tomnuj o apata mÿrapê tanhmã mẽ anhīpêx to. Tã kot kaj mẽ kormã ã ate amnhī nhīpêx anhÿrja kaga hkêt hã koja tee ri ja hã mẽ apumu nê mẽ anhīpêx kati nê. ⁴ Amnepêm na pre Krisja te hihtÿx kêt pyrã nê ãm arĩ mẽ kãm xa nhũm mẽ unê nê pĩ kahpa ã kunhō nê kupĩ. Tã nhũm Tĩrtũmja àhpumunh tÿx o akupÿm ho htĩr nhũm akupÿm htĩr o htĩr nê Tĩrtũm nhÿ hã hihtÿx o hihtÿx ã amnhī to amnhĩrĩt. Ja pyrã nê wam mẽ awÿr inhmōrta ã na pa pre hte mẽ akamã te Kris kormã htÿk kêt ri

hihtýx kêêta pyrã nê mē akôt ixpa. Tã kot paj ma akupým mē awýr mō hãmri nê te Kris ra akupým htír nê hihtýx o hihtýxta pyrã nê Tirtüm xihhtýx xà ho tanhmã mē kot amnhĩ tomnuj xwýnhjê nhĩpêx to. Hãmri nhũm mē amnhĩ tã ixpumu nê Tirtüm nhỹ hã ijamaxpêr týx ã ixpumunh kurê kumrêx.

⁵ Kwa mē aprĩ hã tanhmã mē ate amnhĩ nhĩpêx to hã amnhĩ pumu. Xàn ka htem ãm hãmri amnhĩ kaxyw Jejus Kris kôt ajamaxpêr o ri apa nã? Kot kaj mē apê hkwy hã koja mē akaxwýnh kãm mē akamã hkrĩ rãhã nê. Nom koja mē akaxwýnh kãm mē akamã hkrĩ hkêt ka mē ãm apê hkwy hã amnhĩ jarênh kaprý. ⁶ No pa na ixte ja hã amnhĩ pumunh mex. Ixpê Jejus kwý na pa. Ra ixkamã hkrĩ nê ixkôt pa ho pa jakamã ixpê hkwy na pa. Tã mē ate ja hã ixpumunh mexja na inhmã hprãm. Na pa hte ixpê Jejus kwý hã amnhĩ jarênh kaprý hkêt nê.

⁷ Nê na pa hte mē ato tanhmã Tirtüm wýr to ho ri ixpa nê mē ato hwýr o:

—Pa Tirtüm. Kwa tanhmã Korīt nhõ xwýnhjê hkrã hto kê mē tanhmã amnhĩ tomnuj to ho pa hkêt nê.

Anhýr o mē ato kuwý. Měmo kaxyw na pa hte ã mē ato hwýr anê? Ixte mē ajahkre mex ã amnhĩ to amnhĩrĩt kaxyw kêt. ãm mē ate amnhĩ to mex rãhã ho ri apa kaxyw. Kot kaj mē ã amnhĩ nhĩpêx anhýr o ri apa hãmri nhũm axtem mēhõ mē awýr mōn pōj nê tanhmã mē amã mē ijarênh to nê mē ijarênh o:

—Kwa Pawre mē hkwyjaja na htem Tirtüm kapêr kwým ri Korīt nhõ xwýnhjê jahkre ho pa.

Anhýr tã pa amnhĩ tã mē kuma nê ãm mē kuma. ⁸ Na pa hte Tirtüm kapêr kutã amnhĩ xunhwýr kêt nê. Na pa hte ãm mē ate hkôt amnhĩ nhĩpêx o ri apa hã mē amã karõ

kamã ixihhtýx rãhã ho ri mē akôt ixpa. ⁹ Jakamã kot kaj mē hkôt amnhĩ nhĩpêx mex o apa pa ja hã mē apumu nê ixkĩnh nê. Mē kot axpên mã ixirerek ã ijarênh o pa htãã. ã mē ate amnhĩ nhĩpêx anhýr o apa kaxyw na pa hte mē ato Tirtüm wýr o ri ixpa nê kãm:

—Pa Tirtüm. Kwa tanhmã Korīt nhõ xwýnhjê hkrã hto kê mē kot amnhĩ tomnuj kaga hpa nê hpãnhã akapêr kôt pix mã mãn amnhĩ nhĩpêx rãhã nê. Anê.

¹⁰ Tã pa kormã mē awýr inhmõr xwýj ri ã amnhĩ kukamã kaga nhĩpêx nê mēnh anê. Mē ate kamã harênh nê mar nê tokyx akupým tãm amnhĩ nhĩpêx kaxyw. Kot pa mē awýr mō nê Pahihti nhỹ hã mē ate amnhĩ tomnuj ã mē amã akir. Nom inhmã ã mēmoj tã mē amã ixãkjêr anhýr prãm kêt. ãm ý hã kapêr o mē ajahkre mex nhũm mē ate inhmar nê hkôt amnhĩ nhĩpêx rãhã ho apaja na inhmã hprãm.

¹¹ E Kris kôt ixkwýjaja. ãm ja pix. Kwa kêr ka mē ixkapêr mar týx nê hkôt amnhĩ nhĩpêx mex nê. Nê Tirtüm kôt pix mã ri tanhmã amnhĩ nhĩpêx to ho apa rãhã ho apa. Nê tãm ri amnhĩ nhĩpêx. Nê axpên kôt ajamakêtkati nê akĩnh nê axãmnhĩx ri apa. Kot kaj mē ã amnhĩ nhĩpêx anhýr o apa nhũm Tirtüm mē akôt pa ho pa. Kãm mē pajapê htýx kumrêx. Kêp mē pamã mē pahkĩnh nê mē pajamakêtkati jagjênh xwýnh.

¹²⁻¹⁴ Nê ota jar Kris kôt mē pahkwýjaja pa mē ixpimrãatã mē awýr ixpêr mē. Mē ixpiitã mē inhmã mē akĩnh týx jakamã na pa mē awýr ixpêr mē.

Nê kê Pahihti Jejus Kris mēmoj to mē akutã nojarêr rãhã ho pa. Nhũm Tirtüm arĩ kãm mē ajapê rãhã ho pa. Nhũm Karõ tanhmã mē akrã hto ka mē axpên to mex pix kukamã mãn ajamaxpêr o apa.

Tã e ixkwỳjaja. ãm ja pix. Ixpê
Pawre na pa mẽ awỳr kagàja
nhĩpêx nê ã mẽnh anê.

Karatas Pawre kot Karatas kamã Jejus kôt hkwÿjê hwÿr kagã në mēnh

Pawre na pre kagàja nhîpêx në pika pê Karatas kamã Kris kwÿjê hwÿr kumê. Na pre ra Ijaew kwÿjaja më hwÿr mra në Tîrtûm kapêr kwÿm ri më ahkre ho pa në më kãm:

—Kot kaj më amnhî kaxyw Jejus Kris kôt ajamaxpêr hãmri në määnên më ixpê Ijaew nhîgêt kot amnhî nhîpêx kôt amnhî nhîpêx. Kê Tîrtûm ja hã më apumu në më ato hkra. Anê.

Nom ã më kapêr anhÿrja kot anhÿr kêt. Mē pahte amnhî kaxyw Jejus Kris kôt pajamaxpêr në hkôt amnhî xunhwÿr pix ã më pah-pumunh kôt na hte Tîrtûm më pahto hkra. Tã nhûm prem ã më kãm ho hêx anhÿr o pa nhûm Pawre tee ri ã më kapêr anhÿrja ã më harênh ma nhûm ja kêp om-nuj në. Jakamã nhûm Karatas nhô xwÿnhjê mã kagàja nhîpêx në më hwÿr kumê. Nê kamã hprî hã Tîrtûm kot më ho hkra kaxyw tanhmã amnhî nhîpêx to hã më kãm harê në hã kagã. Nê më kãm:

1-2 Pa Karatas nhô xwÿnhjaja? Xà më amex? Ixpê Pawre na pa më awÿr ixpêr më në mëmoj tã më amã karô.

Mêpahpãm Tîrtûm më Jejus Kris na pre wa më akaxyw ixãm. Ixte wa ÿ hã ma ri më akôt më ajahkre o ri ixpa kaxyw. Na pre Jejus ty nhûm Tîrtûm akupÿm ho hÿr. Hãmri nhûm wa më akaxyw ixãm. Pyka ja kamã na pre mēhō më akaxyw ixãm kêt në. Tîrtûm më Jejus Kris na pre wa ixãm. Jakamã na pa ã më awÿr kagã nhîpêx në mēnh anê. Mē apê Tîrtûm krajê hwÿr.

Nê ota jar krî ja kamã ixpyrà në Kris kôt më pahkwÿjaja më awÿr hpêr më.

³ E kê Mēpahpãm Tîrtûm më Pahihti Jejus Kris wa mëmoj to më akutã nojarêr rãhã ho pa. Nê më ato mex rãhã në. Ka më wa ÿ hã akînh në ajamakêtkati në axãmnhîx ri apa.

⁴ Nã na pre Krisja amnhî grônh kôt më pahwÿr wrÿ në më panê ty. Mē pahte amnhî tomnuj pãnhã amnhîrer kaxyw më panê ty. Mēpahpãm Tîrtûm kãm hprãm xà hkôt. Tã mëmo kaxyw na pre ã më panê amnhî nhîpêx anê? Nã pika ja kamã më kot amnhî nhîpêxja omnuj tÿx jakamã nhûm amnhî grônh kôt te më kot amnhî tomnuj pê më papytãr pyrãk o më panhîpêx në ã më panê htyk anê. ⁵ Jakamã kwa kêr pu më Tîrtûm mã mex o mex ã mãn harênh o ri papa. Nã kot puj më ã amnhî nhîpêx anhÿr rãhã ho ri papa.

Mē ujarênh pixi ãm hãmri hã harênh

Rômãn 16.17; Sikûn Korût 11.3-4; Epes 4.14; Korosê 2.8; Sikûn Pêtre 2.1-3

⁶ Kwa ixkrãmnhwÿjaja. Na pa pre më ate tanhmã amnhî nhîpêx to hã më ajarênh ma në ixkaprî në tee ri më akukamã ijamaxpêr. Na pre Tîrtûmja Kris kukwak ri më ato mex në. Nê më ate hkôt amnhî nhîpêx o apa hprãm xaj te kot amnhî wÿr më awÿr pyrãk o më anhîpêx ka më hkôt amnhî xunhwÿ. Tã xep tanhmã më ajamaxpêr to në ra hkaga kaxyw. Ra axtem më ujarênh ôja ma në gryk ã Tîrtûm kaga kaxyw. Pa tee ri më ajarênh ma në ixkaprî në. Kwa moñ ka më axtem në ri ã amnhî nhîpêx anhÿr mã? ⁷ Jejus jarênh pix na ãm hãmri. Mo më ujarênh mex ô kot ka kêt më ama në hkôt amnhî nhîpêx? Nã amrakati kumrêx. Æ më amã ujarênh anhÿr xwÿnhjaja na htem Kris kapêr o pihkãr rûnh kumrêx o pa në katãt kôt harênh

kêt nê. Ka xep mê ama nê aja-maxpêr kati rûnh nê.

⁸ Na pa pre ma mê awÿr mô nê âm hāmri mê amā Jejus kot tanhmā mê panê amnhī nhīpêx to hā harê ka prem inhma. Tā koja mēhō mê awÿr mô nê mê amā nhām mê ujarēnh ō jarē nhūm Tirtūm ja hā omu nê nhÿrmā ma mê kot amnhī xā htÿx kamā hamak tūm xā hwÿr kumê nhūm ma hwÿr mô nê aa kator kêt nê. Mē pahtō rÿ Tirtūm kapêr o wrÿk xwÿnhjê hō koja ā amnhī nhīpêx anê nhūm ja hā omu nê ma kuwy pē himōta wÿr amnhī nê kumê. ⁹ E kot paj axte mê amā ja jarê ka mê aprī hā inhma. Koja mēhō mê awÿr mô nê mê ate hkôt amnhī xunhwÿr xwÿnhhta kwÿm ri tanhmā mê amā ujarēnh to. Hā koja Tirtūm omu nê nhÿrmā ma mê kot amnhī xā htÿx kamā hamak tūm xā hwÿr kumê nhūm ma hwÿr mô nê kamā pa ho pa nê aa kator kêt kumrêx.

Tirtūm pix kām Pawre hkīnh hprām ā kot jarēnh

Juāw 5.44; Atre 26.9-20; Karatas 2.6

¹⁰ Nê koja mēmojaja ixkapêr ma nê kām mar prām kêt o kām ixkīnh kêt japêr nê māmri kām ixkīnh kêt. Tirtūm kām ixkīnhja pix na inhmā hprām. Kop apu mê piitā kām ixkīnhja mān inhmā hprām ronhÿx pa Kris nhÿ hā kapêr jarēnh o ri ixpa hkêt nê.

Tirtūm kot Pawre mā Kra Jejus o amnhīrīt ā harēnh

Sikūn Korīt 1.12; Wam Tesarōn 2.4

¹¹⁻¹² E Jejus kôt ixkrāmnhwÿjaja. Nā ixte mê ujarēnh mex jarēnh o ix-paja na pre jar pika ja kamā mēhō amnhī krā hkôt inhmā harēnh rÿ inhmā ahkre hkêt nê. Jejus Kris tām na pre ixwÿr kato nê inhmā ho amnhīrīt. Jakamā mex o kot pika jakamā mê ujarēnh piitā hakrenh par. ¹³⁻¹⁵ E kot paj ixprī hā mē

amā tanhmā amnhī jarēnh to ka mê inhma. Tanhmā Tirtūm kot amnhī kaxyw ixām to hā pa mê amā amnhī jarē. Nā na pre kormā ixkêt ri ixkukamā hamaxpêr nê amnhīm ixta nê amnhī kaxyw ixām nê kot ixto mex ā ixtā amnhī jarē. Tā pa pre ixkato nê gaa nê ixaptār nom kormā Jejus Kris kôt amnhī xām kêt nê. Na pa pre axtem nê inhmā mê ixpê Ijaew kot amnhī nhīpêx kôt pix mā amnhī nhīpêx o ri ixpa hprām nê. Nhūm pre ixpyrā nê arī mê nywjaja haxwÿja kām mê hkôt pix mā ri amnhī nhīpêx o pa hprām nê. No inhmā mê hkôt amnhī nhīpêx mex o mê hakrenh par prām jakamā na pa pre mê inhīgēt kôt amnhī nhīpêx mex kumrêx o ri ixpa. Mē kapêr piitā hkôt amnhī nhīpêx mex nê. Tā ā amnhī nhīpêx anhÿr o ixpa kaprÿ. Na pa pre axtem nê mê kot Tirtūm Kra Jejus Kris kôt amnhī xunhwÿr xwÿnhjê nhīpêx kati ho ri mê hkôt ixpa nê inhmā mê himex prām tÿx kumrêx. Ā na pa pre amnhī nhīpêx anhÿr o ri ixpa. Ra mê ate ja hā ixpumunh mex.

¹⁶⁻¹⁷ Tā pa pre ma Tamas wÿr mô. Kamā tanhmā Kris kwÿjê nhīpêx to kaxyw ma mê hwÿr mô. Hāmri nê kormā mê hwÿr ixāhtêp o inhmōr mê nhūm Tirtūm tanhmā ixto nê inhmā Kra Jejus o amnhīrīt pa jatā omu. Kêp Tirtūm Kra hā pa ixprī hā omu. Nhūm inhmā kapêr nê ixte kām tanhmā amnhī nhīpêx to ho ri ixpa kaxyw ixapênh ā inhmā karō nê Ijaew kêt xwÿnhjê hwÿr inhmê. Ixkwÿ Ijaew wÿr inhmēnh kêt nê. Na pre inhmā:

—E kêr ka ma Ijaew kêt xwÿnhjê hkôt ri mê kām ixkapêr jarēnh o ri apa.

Anhÿr jakamā pa pre kuma nê hkôt amnhī xām kurê kumrêx nê ā amnhī nhīpêx anhÿr o ri ixpa. Jao tanhmā ixte kêp hkwÿjê nhīpêx tota kaga nê ma pyka pē Arap wÿr mô. Nom tanhmā amnhī

tã Jejus kwÿjê kukjêr to hkêt nê. Nê Jerujarê hwÿr inhmôr nê Jejus nhÿ hã mê ahkre xwÿnh maati-jaja tanhmã amnhî tâ mê kukjêr to hkêt nê. ãm Tirtûm kot inhmã hã karô xã hkôt ma Arap wÿr mô nê kamã kapôt ã ri ixpa. Kamã na pre Tirtûmja inhmã Jejus Kris kot tanhmã amnhî nhîpêx to ho amnhîrit o pa. Hãmri nê inhmã kapêr pa amnhî tâ kuma hãmri nê ma akupÿm Tamas wÿr mô.

¹⁸ Tã nhûm ra amgrã axkrunêpxi nê hapêx pa Tamas rûm ixkato nê ma Jerujarê hwÿr Simãw Pêtre hwÿr mô. Hãmri nê kuri pøj nê hkôt ixpikamênh ã ixtã semãn axkrut. ¹⁹ Nom mê kot Jejus nhÿ hã hkwyjê jahkre ho mê pa xwÿnh maati hkwyjê hõ pumunh kêt kumrêx. ãm Simãw Pêtre mê Pahihti Jejus tõ Xiakreja pix wa omu. ²⁰ ãm hãmri na pa ã amnhî jarênh anê. Tirtûm kot ja hã ixpumunh mex. ²¹ Tã pa pre mê kurûm ixkato nê hpãnhã ma pika hkwyjê hkôt ijapôx o mê hkôt ixpa. Ma pika pê Sir mê Sirisja wa hwÿr mô.

Mê kot amnhî jaêr pê Pawre kot amnhî nhîpêx nyw ã omunh ã mê harênh

²² Nom Jutej kamã Kris kwÿjjaja na prem kormã ixpumunh kêt nê. ãm Simãw Pêtre mê Xiakreja pix na pre wa ixpumu. ²³ Na pre ra mê hkwyjjaja tanhmã hkwyjê kot axpên mã ijarênh toja ma. Na prem ijarênh o:

—Kwa Jejus ã mê panhîpêx kati htÿx o pa xwÿnhnta na pre tanhmã hamaxpêr to nê hpãnhã mê kãm Jejus kapêr jarênh o ri mê hkôt pa. Mê kot amnhî kaxyw hkôt hamaxpêr kaxyw. Ra kot Jejus nê mê pahkurê htã hpãnhã mê kãm kapêr jarênh o ri mê hkôt pa. Anê.

²⁴ Hãmri nhûm Kris kwÿjjaja amnhî jaêr pê ijarênh ma nê inhÿ hã hkÿnh nê. Nê ixtã Tirtûm mã mex o mex ã harê.

2

Pawre kot Kris kwÿ hkrãhtûmjê mã amnhî jarênh

Atre 15.1-11

¹⁻² Tã nhûm amgrã pê 14 nê hapêx nhûm Tirtûm akupÿm Jerujarê hwÿr inhmê pa ma akupÿm mô. Panãpe nê Xitre mê pa mê mô nê mê hwÿr pøj. Hãmri nê Kris kwÿ hkrãhtûmjê hwÿr mra nê mê kãm amnhî jarê. Mê tapxipixjê mã amnhî jarê nê ixte Ijaew kêt xwÿnhjê mã Jejus kapêr jarênh o ixpa hã amnhî jarê. Na pa pre ra amnhî kukamã ijamaxpêr o:

—Koonên. Kot pa apu mê kãm amnhî jarê nhûm mê inhma nê ixte Tirtûm kapêr kwÿm ri mê ahkre ho ixpa hã ixkamnhîx rÿ hã inhmã akir. Na pa hte Ijaew kêt xwÿnhjê mã Kris jarênh o ixpa no ãm mê ixpê Ijaew pyrà nê finat Mojes kapêr kôt mê kot amnhî my kwrÿt kã jakàr ã mê kãm karô hkêt nê. ãm mê kot Kris kôt amnhî xunhwÿr pix kaxyw na pa hte mê kãm hã karô ho ixpa. Tã kot paj Kris kôt mê ixkrãhtûmjê mã ja hã amnhî jarê nhûm mê inhma nê tanhmã hamaxpêr to nhûm ja mê kêp omnuj japêr nhûm mê tanhmã amnhî to nê ixte Kris kapêr jarênh o ixpaja nê ixkurê. Jakamã nhûm ra ixte mê kãm Kris kapêr jarênh o ixpa nhûm mê kot inhmar xwÿnhjaja ijarênh ma nê tee amnhî kukamã hamaxpêr o ra hkaprî nê pa.

Anhÿr o ijamaxpêr. ³ Tã na prem ixte amnhî jarênhja ma nê ja nê tanhmã inhmã nê hkêt nê. Pa mê kãm amnhî jarênh pa nhûm mê inhma nhûm Ijaew kêt xwÿnhjaja kot amnhî jakàr kêtja nhûm mê kãm mex nê. Mê kêp tanhmã kute hkêt nê. Nhûm Ijaew kêt xwÿnh Xitre ixkôt pa nhûm mê kot omunh tâ kot mê ixpyrà nê amnhî my kwrÿt kã krãhyr ã kãm karô hkêt nê.

⁴ Tã nhûm mê kêp Jejus kwÿ hã amnhî jarênh o hêx xwÿnhjaja mê

ixtā akuprō. Nom hêx rom mē ixte Kris kôt amnhî nhîpêx ā mē ixpumunh pix kaxyw. Hāmri nē ixkapêr ma nē Xitre hā inhmā akir nē inhmā:

—Kwa na pre Xitre Jejus kôt pix mā amnhî xām nom finat Mojes kot mē pahpê Ijaew kot amnhî nhîpêx ā karō hkôt amnhî nhîpêx kêt nē. Kwa ja mex kêt. Na htem Jejus kôt amnhî xunhwÿ nē mǎānēn finat Mojes kapêr kôt amnhî nhîpêx. Jakamā kwa kām anē kē amnhî my kwryt kà krāhta. Finat Mojes kot mē panhîgêjtjē mā hā karō xā hkôt.

⁵ Anhÿr tā pa prem mē kuma nē ām mē kuma. Kot pa ri mē kām ja hā karō hkêt nē. Ām Jejus kapêr kôt pix mā kot puj mē amnhî nhîpêx o papa nē finat Mojes kapêr mē Jejus kapêr o papihkār kêt nē. Kot puj mē anhÿr o Jejus kapêr o ahkà nhūm ja mex kêt nē. Jejus kapêr kām mo mē kot mēmy kwryt kà jakār ā mē kām karō? Amrakati. Jakamā na pa pre ām mē pano kupyr o mē pa xwÿnhtajê kapêr ma nē ām mē kuma.

⁶ Tā pa pre ra Ijaew kwÿ pē Jejus kôt ixkwÿ hkrāhtūmjē mā amnhî jarēnh pa. Tanhmā ixte Ijaew kêt xwÿnhjê mā Jejus kapêr jarēnh to hā mē kām amnhî jarē nhūm mē inhma nhūm ja mē kām mex nē. Jakamā Ijaew kêt xwÿnhjaja kot mē ixpê Ijaew pyrā nē finat Mojes kapêr kôt amnhî nhîpêxja nhūm mē tanhmā mē kaxyw inhmā hā karō hto hkêt nē. Tirtūm na hte mē kēp mē hkrāhtūm ā mē omunh xā hkôt mē hkwyjê rom tanhmā mē ho mex to hkêt nē. Na hte mē pahpiitā mē panhîpêx o xapēn pyrāk. Jakamā na pa hte ijaxwÿja Jejus kôt mē ixkrāhtūmjaja kot amnhî to rax o ijakrenh ā tanhmā ijamaxpêr to hkêt nē. ⁷ Na pa pre mē kām amnhî jarēnh pa nhūm mē inhma nē xapēn mā:

—Nā ām hāmri na pre Tirtūm ahpÿnhā Pawre mē Simāw Pêtre wa

kām wa àpēnh ā karō nē Ijaewjê hwÿr Simāw Pêtre mē nē axtem Ijaew kêt xwÿnhjê hwÿr Pawre mē. Wa kot ahpÿnhā mē hkôt mē kām Jejus kapêr jarēnh o ri pa kaxyw. Nā ām hāmri na hte wa ā amnhî nhîpêx anhÿr o pa. Nā ja mex. Anē.

⁸ Ra Tirtūm kot Ijaew wÿr Simāw Pêtre mēnh tā hpānhā Ijaew kêt xwÿnhjê kaxyw pa ixām. ŷ hā wa ixte mē kām Jejus kapêr jarēnh o ri mē hkôt wa ixpa kaxyw. ⁹ Jakamā nhūm mē ixkrāhtūm Xiakre mē Simāw Pêtre mē Juāwja ixte mē kām amnhî jarēnh ma nē hkīnh nē. Tirtūm kot ixto mex nē Ijaew kêt xwÿnhjê hwÿr inhmēnh ā ixte amnhî jarēnhja ma nē hkīnh nē. Hāmri nē Panāpe mē wa inhmā kapêr nē wa inhmā:

—Nā ām hāmri. Kot puj xep mē anē. Ka mē Panāpe wa kot kaj wa ma Ijaew kêt xwÿnhjê hkôt mē kām Jejus kapêr jarēnh o ri apa. No mē pajaja kot paj mē axtem mē pahkwÿ Ijaew kôt harēnh o ri ixpa. Ā kot puj mē ahpÿnhā mē hwÿr papa anē. ¹⁰ Nom kêr ka wa inhmar kumrêx. Kêr ka wa mē ixpyrā nē Kris kôt mē pahkwÿjê pē amrakati xwÿnhjê ho mex o ri apa. Mēmoj to mē kutā anojarêt rāhā ho ri apa.

Anhÿr o wa inhmā kapêr pa wa mē kuma nē mē kām:

—Tôe. Nā kot paj wa anē. Ra ā wa ixte amnhî nhîpêx anhÿr kaxyw kēnā. Anē.

Pawre kot Simāw Pêtre mā àkjêr ā harēnh

Atre 10; Rômān 3.21-31, 6.1-14

¹¹⁻¹⁴ Tā nhūm Simāw Pêtreja man mē ixwÿr krī pē āxiok wÿr mō. Nē jar mē ixkôt ri pa. Ixpyrā nē kēp Ijaew tā Kris kôt Ijaew kêt xwÿnhjê hkôt pa nē mē kutā apkur o pa. Ixpyrā nē àmnhix ri mē kutā apkur o ri mē hkôt pa. Ijaew kêt xwÿnhjaja kot amnhî my kwryt kà jakār kêt jakamā na pa htem mē kutā ixāpkur kêt nē. Tā ra mē ixte Kris kôt amnhî xunhwÿr jakamā

ja mē ixpē tanhmā kute hkēt. Na pa htem ixàmnhīx mē hkôt ixpa nē mē kutā apku. Ra mē ixte Kris kôt amnhī xunhwÿr kēnā kot pa hkēt ri mē hkôt ixpa hkēt. Na pa htem ixàmnhīx mē hkôt tanhmā amnhī nhīpēx to ho ri ixpa.

Tā nhūm Xiakre kot mē ixwÿr mē rēnh xwÿnhjaja haxwÿja mē ixwÿr mō. Mē ixpyrà nē mē kēp Ijaew tā mē ixpyrà nē Kris kôt amnhī xunhwÿ. Jakamā ra mō nē mē ixwÿr pōj. Hāmri nhūm Simāw Pētre mē omu nē mē umaj axte Ijaew kēt xwÿnhjē kutā apkur kēt nē. Axtem nē ōja py nē o tē nē mē hkàx ā ahte apkur o nhÿ. Hāmri nhūm ra mē ixri Ijaew kwÿ pē Kris kôt mē pahkwÿjaja ja hā omu nē piitā urāk nē ā amnhī nhīpēx anē nē Simāw Pētre ri Ijaew kēt xwÿnhjē hkàx ā apkur o hkrī. Nhūm ixkôt pa xwÿnh Panāpeja haxwÿja ja hā mē omu nē mē urāk nē ā amnhī nhīpēx anē nē mē hkàx ā apku. Hāmri pa tee ri ja hā mē omu nhūm ja inh mā mex kēt nē. Na prem ā amnhī nhīpēx anhÿr o Tirtūm kapēr ā kagā htūm kamā mē ujarēnh mex kwÿm ri amnhī nhīpēx. Jakamā pa ā mē kot amnhī nhīpēx anhÿrja nē Simāw Pētre mā ixkapēr. Mē piitā mē noo mā xa nē ā kot amnhī nhīpēx anhÿrja nē kām ixkapēr nē kām:

—Tk. Kwa nā Simāw Pētre. Ri ā amnhī nhīpēx anhÿr kēt nē. Pahpē Ijaew tā kormā pahkwÿjaja hpōx kēt ri ka hte ixpyrà nē axàmnhīx Ijaew kēt xwÿnhjē kutā axàpkur o ri apa. Tā amnhī wÿr mē pahkwÿjē pumu nē axtem nē mē hkàx ā axàpkur o akrī. Kwa nā na ka ā amnhī nhīpēx anē nē ra axtem amnhī nhīpēx. Te ate mē kām akapēr nē mē kām: “Kot kaj mē ixpyrà nē amnhī my kwÿrīt kā jakā pa rī mē akôt ri ixpa nē mē akutā ixàpkur o ixpa.” Anhÿr pyrāk. Kwa ja mex kēt.

15 —Mē pahpē Ijaew na pu htem mē kēp Ijaew kēt xwÿnhjē jarēnh

o: “Mē kot mē pahte amnhī nhīpēx kôt amnhī nhīpēx kēt xwÿnhjaja.” Anē. 16 Tā mē pahpē Ijaew tā na hte Tirtūmja mē pahte mē panhīgēt kot amnhī nhīpēx kôt mē pahte amnhī nhīpēx ā mē pahpumunh kôt mē pahto hkra hkēt nē. Ra mē pahte ja pumunh mex. Ām mē pahte amnhī kaxyw Jejus Kris kôt pajamxpēr ā mē pahpumunh kôt pix mā na hte mē pahto hkra. Kot pu mē amnhī kaxyw hkôt pajamxpēr nhūm ja hā mē pahpumunh kôt pix mā mē pahto hkra.

17 —Mē pahpē Kris kwÿ jakamā na hte Tirtūm amnhīm mē pamex ā mē pajarē nē mē pahte amnhī tomnuj xwÿnh kēt ā mē pajarē. Jakamā na pu htem paxàmnhīx ri Ijaew kēt xwÿnhjē kot Kris kôt amnhī xunhwÿr xwÿnhjē hkôt ri papa ho papa. Ra Tirtūm kot mē pahpyrà nē amnhīm mē mex ā mē harēnh kēnā. Tā koja mēhō kormā ja mar kēt nē tanhmā hā mē pajarēnh to nē mē pajarēnh o: “Tk. Ra mē kot amnhī kaxyw Kris kôt hamxpēr tā axtem nē Ijaew kēt xwÿnhjē hkôt ri pa. Jakamā arī mē kot amnhī tomnuj xwÿnh kēnā.” Anhÿr o mē pajarēnh japēr. Nom ām mē pahte amnhī tomnuj xwÿnh ā mē pajarēnh kaprÿ. Na pu htem Kris kôt amnhī nhīpēx nē ra tām amnhī nhīpēx mex o papa. 18 No kot pu mē hkôt ri amnhī nhīpēx o papa htā tanhmā pajamxpēr to nē pahte amnhī nhīpēx tūm o awjanā hāmri nē amnhī tomnuj tÿx kumrēx.

19 —Tā tanhmā kot puj wem amnhī to nē mē panhīgēt kot amnhī nhīpēx piitā hkôt amnhī nhīpēx mex o ri papa? Na pu htem pajamxpēr o: “Kot paj ā amnhī nhīpēx anē nē ā amnhī nhīpēx anē nhūm Tirtūm ja hā ixpumu nē amnhīm inh mex ā ijarē.” Anhÿr o pajamxpēr. Hāmri nē finat Mojtes kot mē panhīgētjē mā kapēr piitā hkôt ri mnhī nhīpēx o papa

nom tōhā hkwým ri tanhmā amnhī tomnuj to. Jakamā nhūm Tirtūm ja hā mẽ pahpumunh kôt mẽ pamex ā mẽ pajarēnh kêt nē. Kapēr ā kagā htūm kot ā ja jarēnh kot anhÿr. Nom kot puj mẽ amnhī kaxyw Kris kôt pajamaxpēr nhūm ja hā mẽ pahpumunh kôt amnhīm mẽ pamex ā mẽ pajarē. Hāmri pu mẽ Tirtūm kôt amnhī nhīpēx o ri papa nē axte mẽ pahpē Ijaew nhīgētjē kot amnhī nhīpēx kôt amnhī nhīpēx hkêt nē. Te ra mẽ pahtyk nē axte hkôt amnhī nhīpēx kêt pyrā nē pānhā Tirtūm kapēr kôt pix mā ri amnhī nhīpēx o ri papa.

²⁰ —Nē na prem pī kahpa hā Kris nhō nē kupī nhūm mẽ pahte amnhī tomnuj te ĩhkō hā jēt nē haxwÿja htyk pyrāk. Jakamā na pu htem amnhī tomnuj kaga nē Kris kôt amnhī xunhwÿ nhūm Karō mẽ pahkarōm agjē pu mẽ te Jējus Kris kot amnhī nhīpēx pyrāk o amnhī nhīpēx o papa. Jao hpānhā mẽ pahte amnhī nhīpēx nyw pix o amnhī nhīpēx o ri papa. Kris kām hprām xā hkôt pix mā tanhmā ri amnhī nhīpēx to ho papa. Kris kēp Tirtūm Kra htā kām mẽ pajapē kamā mẽ panē htyk jakamā na pu htem amnhī kaxyw kôt pix mā pajamaxpēr rāhā ho papa.

²¹ —Ām hāmri na pre Tirtūm mẽ pahto mex kumrēx nē mẽ pahwÿr Krisja mẽ nhūm mẽ pahwÿr wrÿ nē mẽ panē ty. Tā na pa pre kapērja ma nē mar tÿx nē hā ri ixpa nē ho ijamakētkati hkêt nē. Tā kop apu Tirtūm kot mẽ pahte mẽ panhīgētjē kot amnhī nhīpēx o amnhī nhīpēx ā mẽ pahpumunh kôt mẽ pamex ā mẽ pajarēnh ronhÿx pre Krisja ām mẽ panē htyk kaprÿ. Mo kaxyw nhÿx pre mẽ panē ty? Anē.

Ā na pa Simāw Pētre mā ixkapēr anē nhūm mẽ piitā apkur pē hā inhmar o hkrī.

3

Mē pahte amnhī krā hkôt pahpē Tirtūm kra hkêt ā mẽ pajarēnh

Karatas 5.16-23; Epes 2.8; Piri-pos 3.9; Sikūn Ximotre 1.9; Xitre 3.4-7

¹ Kwa Karatas nhō xwÿnhjaja. Te ri mẽ ajamaxpēr kêt kumrēx pyrāk. Amnepē mā mẽ awÿr inhmōrta ā na pa pre mẽ amā tanhmā Kris htykja jarēnh to. Pī kahpa hā mẽ panē htyk ā harē ka mẽ aprī hā inhma. Tā nhūm Tirtūm kapēr jarēnh o mẽ hēx xwÿnhjaja ixpānhā mẽ awÿr mra nē tanhmā mẽ amā ujarēnh to ka mẽ ama nē mẽ ajamaxpēr o apihkār rax nē. Jao axte Kris tyk mā ajamaxpēr kêt nē. ² E mẽ inhmā mẽmoj jarē. Mēmoj tā mẽ apumunh kôt na pre Tirtūm mẽ awÿr amnhī Karō rē nhūm mẽ awÿr agjē? Xā mẽ anhīgēt kot amnhī nhīpēx kôt mẽ ate amnhī nhīpēx ā mẽ apumunh kôt? Nā na pre ja hā mẽ apumunh kôt mẽ awÿr rēnh kêt nē. Na ka prem Kris jarēnh ma nē amnhī kaxyw hkôt ajamaxpēr nhūm ja hā mẽ apumunh kôt mẽ awÿr kurē nhūm mẽ awÿr agjē.

³ Na pu htem amnhī krā hkôt tanhmā amnhī nhīpēx to ho pahpē Tirtūm kra hkêt nē. Tirtūm Karō pix kukwak ri na pu htem pahpē hkra. Tā ka mẽ axtem nē ajamaxpēr o:

—Nā Tirtūm ra kot ixto hkra jakamā kot paj arī ri mẽ inhīgēt kot amnhī nhīpēx kôt amnhī nhīpēx o ixpa rāhā nē inhmex kumrēx nē ri ixpa. Anē.

Kwa ā mẽ ajamaxpēr anhÿrja mex kêt. ⁴ Mē akwÿ kot Kris ā mẽ atomnuj tā ka mẽ amnhī xā htÿx kamā ajamak o ri apa htā Kris kaga hkêt nē. Tā ra axtem nē mẽ kapēr o mẽ hēx xwÿnhjē jamaxpēr kôt ajamaxpēr o te Kris ā amnhī xā kamā ajamak kaprÿ pyrāk. Kwa nā mẽ ri mẽ hkôt ajamaxpēr kêt nē. ⁵ Na pre Tirtūm mẽ awÿr amnhī Karō rē nhūm mẽ awÿr agjē nē mẽ amā aa mẽ ate mẽmoj pumunh kêt

kwý ho anhÿr o ri mẽ akamã pa ho pa. Xà mẽ anhÿgêť kot amnhĩ nhĩpêx kôt mẽ ate amnhĩ nhĩpêx ã mẽ apumunh kôt na pre ã mẽ amã amnhĩ nhĩpêx anê? Nà ja kôt kêt. Æm mẽ ate Kris kapêr mar mẽ amnhĩ kaxyw hkôt ajamaxpêr ã mẽ apumunh kôt pix mã na pre ã mẽ amã amnhĩ nhĩpêx anê.

Tĩrtũm kot amnhĩ tã finat Apraãw pumunh kôt mex ã harênh

Rômãn 4.1-25; Xiakre 2.23

⁶ Nê mẽ ixpê Ijaew pãr krax finat Apraãw na pre amnhĩ kaxyw Tĩrtũm kôt hamaxpêr nhũm amnhĩ tã omu mẽ kãm:

Nà ate amnhĩ kaxyw inhmã ajamaxpêr tÿx jakamã na pa amnhĩm amex ã ajarê. Amex kumrêx Apraãw.

⁷ Anhÿr o kãm kapêr jakamã mẽ pahte urak mẽ amnhĩ kaxyw hkôt pajamaxpêr xwÿnhjaja te mẽ pahpê Apraãw tãmnhwÿ pyrak. ⁸ Nê mẽ apê Ijaew kêt xwÿnhjaja. Na hte Tĩrtũm mẽ pahto hpimrãk tã mẽ pahte amnhĩ kaxyw kãm pajamaxpêr ã mẽ pahpumunh kôt amnhĩm mẽ pamex ã mẽ pajarê mẽ mẽ pahto hkra. Amnepêm na pre Apraãw mã kapêr mẽ kãm:

E ate amnhĩ kaxyw ixkôt ajamaxpêr jakamã kot paj akukwak ri pyka piitã hkôt mẽ piitã mẽ ho mex mẽ.

Anhÿr o kãm kapêr jao mããnên mẽ apê Ijaew kêt xwÿnhjê jarê.

⁹ Jakamã mẽ pahte Apraãw pyrã mẽ amnhĩ kaxyw Tĩrtũm kôt pajamaxpêr xwÿnhjaja kot puj mẽ pahpiitã urak mẽ pamex kumrêx mẽ mẽ papa ho papa.

Tanhmã Tĩrtũm kot mẽ panê pĩ kahpa hã jêt xwÿnh nhĩpêx to hã harênh

Rômãn 4.14, 7.10; Wam Korĩt 15.56

¹⁰ Nê koja mẽhõ hamaxpêr o:

—E kot paj finat Mojes kapêr kôt ri amnhĩ nhĩpêx o ri ixpa nhũm

Tĩrtũm ja hã ixpumu mẽ amnhĩm inhmex ã ijarê mẽ ixto hkra. Anê.

No ãm ja kot anhÿr kêt. Tĩrtũm kapêr ã kagã htũm kot ja jarênh kot: Ixte amnhĩm mẽ mex ã mẽ harênh kaxyw mẽ kot Mojes kapêr kôt amnhĩ nhĩpêx xwÿnhjaja koja mẽ ãm mẽmoj pixire mẽ hirõp kuhê. Rÿ mẽmoj pixire mẽ hkôt amnhĩ nhĩpêx kêt pa ja hã mẽ omu mẽ hã mẽ homnunj tÿx kumrêx.

Anhÿr jakamã tanhmã kot pu mẽ amnhĩ to mẽ Mojes kapêr piitã hkôt amnhĩ nhĩpêx mẽ aa ho pixi mẽ hirõp pakuhê hkêť? Nà kot puj mẽ ho anhÿr kêt mẽ. Kot puj mẽ tee ri pamã ja ho anhÿr prãm kaprÿ. Jakamã Tĩrtũm kot amnhĩm mẽ mex ã mẽ harênh kaxyw mẽ kot ã amnhĩ nhĩpêx anhÿr mã xwÿnhjaja koja mẽ mex kêt mẽ.

¹¹ Na hte Tĩrtũm mẽ kot finat Mojes kapêr kôt amnhĩ nhĩpêx o mẽ pa hã mẽ omunh xà hkôt mẽ mex ã mẽ harênh kêt mẽ. Æm mẽ kot amnhĩ kaxyw hkôt hamaxpêr xwÿnhjaja na hte ã mẽ harênh anê. Kapêr ã kagã htũm kot mẽ harênh kot:

Mẽ kot amnhĩ kaxyw ixkôt hamaxpêr xwÿnhjaja na pa hte mẽ mex ã mẽ harênh o ixpa. Mẽ tapxipixjaja koja mẽ nhÿrmã Ixkra mẽ wa ixri mex kumrêx mẽ htĩr tũm mẽ pa ho pa. Anê.

¹² Nom na htem amnhĩ kaxyw Tĩrtũm mã hamaxpêr pê finat Mojes kapêr kôt amnhĩ nhĩpêx o pa hkêť mẽ. Mojes kapêr ã kagã kot ja jarênh kot:

Mẽ kot ixkapêr piitã hkôt amnhĩ nhĩpêx mex o mẽ pa xwÿnh pixjaja koja mẽ htĩr tũm mẽ pa ho pa. Anê.

¹³ Tã kot pu mẽ ãm kapêr o pixire mẽ hirõp pakuhê hãmri mẽ mÿrapê pahtĩr tũm mẽ papa hkêť mẽ. Nê hpãnhã mẽ kot amnhĩ xà htÿx kamã hamak tũm xata hwÿr ma papa. Ja pymaj na pre Krisja

ĩ ho mẽ pahwÿr wrÿ nẽ mẽ pahte amnhĩ tomnuj mÿrapẽ mẽ panẽ ty. Tirtũm kot mẽ pahte amnhĩ tomnuj mÿrapẽ tanhmã mẽ pahto pymaj ã mẽ panẽ htyk anẽ. Jakamã nhũm Tirtũm mẽ pahte amnhĩ tomnuj ã mẽ pahpumunh kõt mẽ pakuhpa hã Kraja homnuj nẽ. Kapër ã kagã htũm kot ja jarẽnh kot:

Pĩ kahpa hã jêt xwÿnhhta na pre Tirtũm homnuj tÿx kumrẽx. Anẽ.

Mẽ kot amnhĩ kaxyw Kris kõt mẽ hamaxpër xwÿnhjẽ jarẽnh

¹⁴ Tã ã Jejus Kris kot mẽ panẽ amnhĩ nhĩpẽx anhÿr kukwak ri na pre Tirtũm kot Apraãw nhĩpẽx pyrà nẽ mẽ ixpẽ Ijaew pix o mex kêt nẽ. Mããnen mẽ apẽ Ijaew kêt xwÿnhjẽ ho mex nẽ. Jakamã koja mẽhõ. Ijaew õ rÿ Ijaew kêt xwÿnhjẽ hõ amnhĩ kaxyw Kris kõt hamaxpër nhũm Tirtũm hã omu nẽ ho hkra nẽ hwÿr Karõ mẽ nhũm kãm axã.

Tirtũm kot finat Mojes kukamã mẽ pahto mex ã harẽnh

Rõmãn 3.19-20, 5.20-21, 11.32; Eprẽw 6.13-18

¹⁵ E ixkrãmnhwÿjaja. Kot paj ixprĩ hã mẽ amã ja jarẽ ka mẽ inhma. Nã koja mẽhõ wa hamẽxkrut nẽ mẽmoj tã axpẽn ma. Pika hã war axpẽn ma rÿ mẽmoj tã war axpẽn ma. Hãmri nẽ wa hã axpẽn mar pa nhũm ja ãm hãmri nẽ ãm rãhãã. Koja nhãm mẽhõ tẽ nẽ axtem tanhmã harẽnh to hkêt nẽ. ¹⁶ Ja pyrà nẽ na hte ã Tirtũm mẽmoj tã amnhĩ jarẽnh anẽ. Na hte mẽmoj jarẽ nhũm arĩ rãhãã. Na hte jarãhã mẽmoj jarẽ nhũm jãã nhũm axtem hijuk ri mẽmoj jarẽnh kêt nẽ. Na hte ãm kapër pÿnh nẽ. Tã na pre Apraãw mã hkanrẽhã htãmnhwÿjẽ hõ kukwak ri Apraãw o mex ã amnhĩ jarẽ. Tãmnhwÿ piitã kukwak ri ho mex ã amnhĩ jarẽnh kêt nẽ. ãm kanrẽhã htãmnhwÿ Krisja pix kukwak ri ã Apraãw o mex ã kãm amnhĩ jarẽnh anẽ.

¹⁷ E kot paj hpãnhã axtem tanhmã mẽ amã harẽnh to. Na hte Tirtũm kot mẽmoj tã amnhĩ jarẽnh xã hkõt tanhmã mẽmoj to ho pa rãhã nẽ. ã na pre finat Apraãw mã kot ho mex ã amnhĩ jarẽnh anẽ. Tã ra hã amgrã pẽ 430 nẽ hapẽx nhũm hpãnhã finat Mojes mã kapër. Kot mar nẽ amnhĩ xõ ri Ijaew mã harẽnh o ri mẽ hkõt pa kaxyw. Tã no nhũm ra kot Apraãw mã mẽmoj jarẽnhhta arĩ hã no htÿx rãhã nẽ aa ho hamakêtcati hkêt nẽ. Nẽ kot Mojes mã tanhmã kapër toja nẽ Apraãw mã tanhmã kapër toja nhũm hamẽ wa ho hamakêtcati hkêt nẽ. Nhũm wa hamẽ arĩ rãhã ho rãhã. ¹⁸ Tã mẽ ano kupyr o ri mẽ pa xwÿnhjaja na htem htÿx tanhmã mẽ amã harẽnh to nẽ mẽ amã harẽnh o:

—Kwa kot puj mẽ Mojes kapër kõt amnhĩ nhĩpẽx o papa hkêt nẽ nhũm Tirtũm tee ri ja hã mẽ pahpumu nẽ mẽ pahto mex kêt nẽ. Anẽ.

Nom ja kot anhÿr kêt. Kop apu ã kot anhÿr ronhÿx Tirtũm ra wam kot tanhmã Apraãw mã kapër tota ra ho hamakêtcati. Nom na hte arĩ kãm hamaxpër rãhã nẽ ho pigrãnh nẽ ho hapẽx kêt nẽ. Na pre Apraãw mã kãm:

Kot kaj amnhĩ kaxyw ixkõt ajamaxpër hã kot paj ato mex kumrẽx. Anẽ.

Tã kot ho mex ã amnhĩ jarẽnhja arĩ rãhãã. Na hte arĩ mẽ kot amnhĩ kaxyw hkõt hamaxpër xwÿnhjẽ ho mex nẽ. Nom mẽ kot Mojes kapër kõt amnhĩ nhĩpẽx o pa hã mẽ omunh xã hkõt mẽ ho mex kêt nẽ. ãm mẽ kot amnhĩ kaxyw hkõt hamaxpër xwÿnh pixjaja na hte mẽ ho mex.

Mo kaxyw na Mojes kapër ã kagã?

Rõmãn 3.20, 5.20, 7.7

¹⁹⁻²⁰ Tã mo kaxyw na Mojes kapër ã kagãja? Nã mẽ pahte tanhmã amnhĩ tomnuj to ho papa hã amnhĩ pumunh nhũm Tirtũm

kot ã më pahte amnhĩ nhĩpêx anhÿrja nê më pahkurê kaxyw. Na pre Mojes Tirtùm nhÿ hã mëmoj nê më pahkurê. Më pahte axpên pê paxàhkĩnh nê më pahkurê. Nê më pahte axpên mã paxêx o ri papa nê më pahkurê. Æ mëmoj nê më pahkurê anê. Më pahprĩ hã kapêr mar nê tãm amnhĩ nhĩpêx o papa kaxyw. Ja kaxyw na pre Tirtùm Ijaew kaxyw Mojes mã kapêr gô. Na pre kaxkwa rùm kapêr o wrÿk xwÿnhjaja kumrêx kãm harê nhùm kuma nê Ijaew mã hã kagà. Jakamã na htem harênh o: “Mojes kapêr” anhÿr o harê.

Tã Apraãw kanrêhã htãmnhwÿ Krisja kormã kator kêt ri nhùm Ijaew Mojes kapêr ma nê hkôt ri amnhĩ nhĩpêx o pa. Tã nhùm Krisja kator o Mojes kapêr o hapêx. Ra Tirtùm kot Kris kukamã ho mex ã amnhĩ jarênh xà hã arĩgrota kator më nhùm Mojes kapêr hapêx.

No na pre Tirtùm Ijaew mã ujarênh kaxyw tãm më kãm ujarênh kêt nê. Kapêr o wrÿk xwÿnhjê mã na pre harê nhùm më amnhĩ xô ri Mojes mã më kaxyw kãm awjarê. Kot më ô ri më kãm harênh kaxyw. No Apraãw mã na pre Tirtùm tãm kapêr. Na pre hwÿr kapêr o wrÿk xwÿnhjê hõ mênh kêt nê. Tãm kot kãm kapêr jakamã kapêrja na mex o Ijaew kaxyw Mojes mã kapêr jakrenh.

²¹ Nê na pre Tirtùm tanhmã më pamã kapêr o amnhĩrit to nê më pamã:

—E kot paj amnhĩ kaxyw ixkôt më ajamaxpêr ã më apumunh kôt pix mã më amex ã më ajarê.

Anhÿr o më pamã kapêr. Tã xà na pre kapêrja nhĩjuk ri axte amnhĩ jarê nê amnhĩ jarênh o:

—E kot paj më ate Mojes kapêr kôt amnhĩ nhĩpêx mex o apa hã më apumunh kôt më amex ã më ajarê.

Anhÿr o më pamã kapêr? Xà na hte mëmoj jarê nhùm jãã nhùm

ra hijuk ri axtem mëmoj jarê? Nà Tirtùm kapêr ãm hpÿnh kênã. Kop ãm më pahte Mojes kapêr kôt amnhĩ nhĩpêx o papa hã më pahpumunh kôt më pamex ã më pajarênh ronhÿx më pamã:

—Æm ja pix ã më apumunh kôt kot paj më amex ã më ajarê. Anê.

²² Nom na pre ã kapêr anhÿr kêt nê. Kapêr ã kagà htùm kot ja jarênh o:

Më apiitã më ate amnhĩ tomnuj o më apa xwÿnh na ka më.

Anhÿr jakamã tanhmã kot puj më amnhĩ to nê Mojes kapêr kôt amnhĩ nhĩpêx mex o papa? Më pahpiitã më pahte amnhĩ tomnuj xwÿnh kênã. Më pahte kapêr piitã hkôt amnhĩ nhĩpêx kêt jakamã koja Tirtùm ja hã më pahpumunh kôt më pamex ã më pajarênh kêt nê. Kojã ãm më pamã kapêr o:

—Kot kaj më amnhĩ kaxyw Jejus Kris mã ajamaxpêr pa ja hã më apumunh kôt më amex ã më ajarê nê më ato ixkra nê më ato mex o ri ixpa. Anê.

Mojes kapêr te kêp Kris xwÿj ri më hamãr xwÿnh pyrãk ã harênh

Rômãn 10.4; Karatas 4.1

²³ Nê kormã Kris kot më pahwÿr wrÿk nê më panê htyk xwÿj ri na pre Ijaew Mojes kapêr ma nê hkôt amnhĩ nhĩpêx o ri pa. Nhùm kapêrja te kot amnhĩm më unênh nhùm më kot hkôt pix mã amnhĩ nhĩpêx o ri pa pyrãk. Na prem Tirtùm kot më mex ã më harênh prãm xaj ãm pix ma nê hkôt amnhĩ nhĩpêx o pa. Nom kapêr piitã hkôt amnhĩ nhĩpêx mex kêt nê. ²⁴ Te mëhprĩre nhùm Mojes kapêr te kêp më hamãr xwÿnh pyrãk. Mëhprĩ jamãr xwÿnhjaja na htem mëhprĩjê pumu nê tãm më kot amnhĩ nhĩpêx kaxyw tanhmã më ahkre hto ho më hkôt pa. Ja pyrã nê na pre Ijaew tãm amnhĩ nhĩpêx o pa kaxyw Mojes kapêr ma nê hkôt amnhĩ nhĩpêx o ri pa. Jejus Kris kutêp ã amnhĩ nhĩpêx anhÿr o ri pa. Tã

nhùm Jejus tãm kaxkwa rùm wrý pa mē ixkwý pixjaja mē ixkwýjé rom amnhí kaxyw hkôt ijamaxpēr. Hāmri nhùm Tirtùm ja hã mē ix-pumunh kôt mē inhmex ã mē ijarēnh kurê kumrēx.

Jejus kukwak ri mē pahpê Tirtùm kra ã mē pajarēnh

Juãw 1.12; Rômãn 8.14; Epes 1.5

²⁵⁻²⁶ Tã ra mē ixte amnhí kaxyw Kris kôt ijamaxpēr jakamã na pre Tirtùm mē ixto hkra pa mē ra te ixpê hkra xàptår pyræk o amnhí nhípêx nē kapēr kôt amnhí nhípêx mex o ri ixpa. Jao Mojes kapēr kaga. Te mēhprîre ra mē ahkre kamã mē àptår nē kot mē ahkre xwýnh kaga pyræk. Hāmri pa mē ixpê Tirtùm kra xàptårjaja hāmri axte Mojes kapēr kôt amnhí nhípêx hkêt nē.

²⁷ Tã mē kajaja na ka pre mē ix-pyrã nē amnhí kaxyw Kris kôt ajamaxpēr nhùm mē akwý kot mē apê Jejus kwý hã mē apumunh kaxyw nhùm mē akrã kumrã. Hāmri ka mē Jejus kot amnhí nhípêx kôt pix mã amnhí nhípêx o ri apa. ²⁸ Tã ra mē pahpê Jejus Kris kôt amnhí xunhwýr xwýnh jakamã na hte Tirtùm ahpyñhã ri tanhmã mē pakute hkôt mē pahpumunh kêt nē. Mē pahpê Ijaew rý mē pahpê Ijaew kêt xwýnhjaja. Rý mē pahpê nhãm mē kãm paxâpênh xwýnh rý amnhí mã mē paxâpênh xwýnh nhùm hte ja hã mē pahpumunh kôt tanhmã mē pajarēnh to hkêt nē. Rý mē anijê hkôt rý mē inhmyjê hkôt mē pahpumunh kôt tanhmã mē pajarēnh to kêt nē. ãm mē pahte Jejus Kris kôt amnhí xunhwýr ã mē pahpumunh kôt pix mã na hte ã mē pahpumunh o pa anê.

²⁹ Nē na pre Tirtùm Apraãw mã hkanrêhã htãmnhwý Jejus Kris o mex ã amnhí jarê. Tã Kris kēp mē panhõ Pahihti jakamã pu mē Tirtùm noo mã uræk nē te mē pahpê Apraãw tãmnhwý pyræk. Jakamã

koja Apraãw nhípêxta pyrã nē mē pahto mex rax nē.

4

Mojes kapēr te axte mē pah-pynênh kêt pyræk ã harēnh

Rômãn 7.1, 8.14-17; Karatas 3.23

¹ E kot paj axte mē amã tanhmã mēhprîjê jarēnh to ka mē inhma. Koja mēhõ ra hkra mã mēmo hikukrêx nhõr kaxyw. Hikukrêx nē õ pika. Õ mēmoj piitã õr kaxyw. No nhùm hkraja kormã hprîre nē hamaxpēr mex kêt jakamã nhùm kormã hprêk jamãr o pa. Nhùm hkraja arî te kãm àpênh o pa xwýnh kot amnhí nhípêx pyrã nē amnhí krã hkôt ri amnhí nhípêx o pa hkêt nē. Kormã hipêêxã kapēr kôt ri amnhí nhípêx o pa. Nhùm hipêêxãja kot kãm õ mēmoj piitã õr kaxyw no ãm kormã hprêk jamã. ² Tã kormã hkraja hprîre ri nhùm hipêêxã tanhmã amnhí to nē ty. Nom nhùm hkraja mýr pē kormã õ mēmoj o amnhíptår kêt nē. Kormã hprîre jakamã nhùm hipêêxã mýr pē kot kãm hamãr o pa xwýnhja kormã kãm hamãr o pa. Tã nhùm hipêêxã kot kãm amgrã jarēnh xwýnhhta kato nhùm tãm mēmoj piitã ho amnhíptã. Ra àptår mex nē hamaxpēr mex nē amnhim ho amnhíptår pa. ³ Tã Ijaew na prem ã amnhí nhípêx anê. Amnepêm kormã mē kot Mojes kapēr kôt ri amnhí nhípêx o pata ã na prem te mēhprîre hamaxpēr kēêta pyræk. Te kormã mē àptår kêt pyrã nē jar pika ja kamã mē kot amnhí nhípêx tùm kôt pix mã amnhí nhípêx o pa. Mē kot amnhí nhípêx tùm te kot amnhim mē unênh nē mē kãm ê pyræk o mē hipêx nhùm mē hkôt pix mã amnhí nhípêx o ri pa. ⁴ Tã nhùm Tirtùm kot Kra hkukamã mē pahwýr mēnh xã hã arîgrota kato hāmri nhùm mē pahwýr kumê nhùm mē pahwýr wrý nē mē pahpyrã nē mēhõ nhõhy

rũm kato. Nẽ mẽ pahpyrà nẽ gaa nẽ hprêk nẽ mẽ ixpê Ijaew rom Mojes kapêr piitã hkôt amnhĩ nhĩpêx mex kumrêx o ri pa. ⁵ Jao te kot Mojes kapêr pê mẽ papytãr pyrãk o mẽ panhĩpêx pu mẽ hpãnhã pahpê Tĩrtũm kra kaxyw. ⁶ Tã mẽ ixpê Ijaew kwỳjaja nẽ mẽ apê Ijaew kêt xwỳnh kwỳjaja ra mẽ pahpê Tĩrtũm kra jakamã na pre mẽ pahwỳr Kra Jejus Karõja rẽ nhũm mẽ pamã agjê. Hãmri nẽ mẽ pamã kapêr o:

—Ra mẽ apê Tĩrtũm kra jakamã kêt ka mẽ kãm amnhĩ jarênh kaxyw nẽ kãm: “Pa Papaj” anê. Kêt ka mẽ ã kãm akapêr anê. Anê.

⁷ Jakamã na pu mẽ ra te pahpê mẽ kãm paxãpênh xwỳnh pyrãk kêt nẽ. Ra mẽ pahpê Tĩrtũm kra jakamã na hte mẽ panhĩpêx o te Kra Jejus nhĩpêx pyrã nẽ mẽ pahto mex nẽ.

Mojes kapêr kôt mẽ kot amnhĩ nhĩpêx xwỳnhjê jarênh

Sikũn Korĩt 11.3-4; Korosê 2.16-19; Eprêw 6.1; Wam Pêtre 1.14

⁸ Nẽ amnepê mã kormã mẽ ate amnhĩ kaxyw Jejus kôt ajamaxpêr kêt ri na ka prem Tĩrtũm jarênh mar kêt nẽ. ãm atỳx ri sãnti mã mex ã harê nẽ kãm amnhĩ jagrer o ri apa. Nẽ amã mẽmoj kĩnh nẽ amã hprãm xàj tanhmã amnhĩ to hwỳr to ho ri apa. Te mẽ kãm mẽ ãpênh o mẽ pa xwỳnhjaja kot amnhĩ nhĩpêx pyrã nẽ sãnti mã tanhmã amnhĩ nhĩpêx to ho ri apa. Nom sãntija kêp Tĩrtũm kêt.

⁹ Tã ka prem Tĩrtũm jarênh ma nẽ hkôt amnhĩ xunhwỳ nhũm amnhĩ tã mẽ apumu. Tã tãm kot amnhĩ kaxyw mẽ paxunhwỳr jakamã kwa mon ka mẽ ra axtem nẽ akupỳm sãnti hkôt amnhĩ nhĩpêx kaxyw? Nã mẽ ajamaxpêja mex kêt. Sãnti nhĩpêxta tanhmã koja amnhĩ to nẽ mẽ ato ajuta? ãm mẽ kot ãhkra ho hipêx pix jakamã hihtỳxti hã. Amari kuhê xã kamã kuhê ho kuhê xwỳnh kênã. Tã te kot akupỳm

amnhĩ kôt mẽ arênh kaxyw pyrãk o mẽ anhiĩpêx ka mẽ ra axtem nẽ akupỳm hkôt amnhĩ nhĩpêx kaxyw. Kwa nã mẽ ã ri amnhĩ nhĩpêx anhỳr kêt nẽ.

¹⁰ Nẽ na ka htem amnhĩ kukamã ajamaxpêr o:

—Na pre hte Ijaewjaja Mojes kapêr xã hkôt arĩgro hkwy hã axtem tanhmã amnhĩ nhĩpêx to nẽ mẽmo mytwrỳ hã tanhmã amnhĩ nhĩpêx to nẽ mẽmo amgrã hã tanhmã amnhĩ nhĩpêx to. Tã kot paj mẽ urãk nẽ ã amnhĩ nhĩpêx anhỳr o ixpa. Kê Tĩrtũm ja hã ixpumu nẽ inhmex ã ijarê. Anê.

Kwa mẽ ã ajamaxpêr anhỳr kêt nẽ. Mon ka htem axtem nẽ ri ã ajamaxpêr anê? Na hte Tĩrtũm ã mẽ pahte amnhĩ nhĩpêx anhỳr ã mẽ pahpumunh kôt mẽ pamex ã mẽ pajarênh kêt nẽ. ¹¹ Na pa ja hã mẽ ajarênh ma nẽ tee ri mẽ akukamã ijamaxpêr. Te ixte Tĩrtũm kapêr o mẽ ajahkre kaprỳ ho ri ixpa pyrãk.

Karatas nhõ xwỳnhjaja kot Pawre ho mex ã mẽ harênh

Wam Korĩt 9.21-23

¹² Kwa ixkrãmnhwỳjaja. Ixpê Ijaew tã te ixpê Ijaew kêt pyrãk o amnhĩ nhĩpêx o ri mẽ apê Ijaew kêt xwỳnhjê hkôt ri ixpa. Jao Kris kapêr gryk ã mẽ inhĩgêtjaja kot amnhĩ nhĩpêx kaga nẽ axte hkôt amnhĩ nhĩpêx kêt nẽ. Tã kwa mẽ ixpyrã nẽ ã amnhĩ nhĩpêx anê. Wem ma amnhĩ to amõr gri kêt wehe. Wam ixte mẽ awỳr inhmõrta ã na pa pre mẽ amã Tĩrtũm kapêr jarênh o ri mẽ akõt ixpa ka prem inhma nhũm ja mẽ amã mex nẽ ka mẽ ja hã tanhmã ixto hkêt nẽ. ¹³ Na pa pre ixãa nẽ mẽ awỳr mõ nhũm ixãja ixto htỳx nẽ pa tokyx ixkator nẽ ma akupỳm mẽ arũm inhmõr kêt nẽ arĩ mẽ amã Tĩrtũm kapêr jarênh o ixpa. ¹⁴ Kormã ixã nẽ tanhmã ixkute htã ka prem ja hã ixpumu nẽ ixto mex nẽ ixkamã anhõkre kahak kêt nẽ. Na ka prem te ixto Jejus Kris nhĩpêx pyrãk o inhĩpêx. Nẽ te ixto Tĩrtũm

kapêr o wrÿk xwÿnh nhÿpêx pyrâk o inhÿpêx. ¹⁵ Jao mẽ amâ ixkÿnh nê ã inhÿpêx anê nê mẽ amâ ixto mex pix prâm. Nê nhÿri ixpumu nê ixkamâ axukaprÿ nê inhmâ akapêr o:

—Hêxta waa nê. Anopxâà. Inhmâ amnhÿ no kaxâr nê amâ ôr prâm nom tanhmâ kot pa mẽ amnhÿ to nê hkapa nê amâ kugô? Anê.

Nê mẽ amâ inhmâ mẽmoj mex pix nhôr prâm. Tã ra tanhmâ ajamaxpêr to nê axtem nê te mẽ amâ ixkÿnh kêt pyrâk o inhÿpêx.

Mê no kupyw xwÿnhjaja kot mẽ hamaxpêr o pihkâr ã mẽ harênh

¹⁶ Nê na pa pre ãm hãmri mẽ amâ Tÿrtùm kapêr jarênh o ri mẽ akôt ixpa. Nom ra mẽ amâ mar prâm kêt jakamâ na ka mẽ axtem nê inhÿpêx o te ixte mẽ akutã amnhÿ xãm pyrâk. ¹⁷ Mẽ amâ Tÿrtùm kapêr o mẽ hêx xwÿnhjaja te mẽ kãm mẽ akÿnh pyrâk o mẽ anhÿpêx no ãm mẽ kãm akÿnh kêt. Na htem mẽ amex kaxyw tanhmâ mẽ amâ kapêr to hkêt nê. ãm mẽ ate mẽ mar nê mẽ gryk ã ixkaga nê mẽ hkôt ri amnhÿ nhÿpêx o apa pix prâm xaj na htem mẽ akôt tanhmâ mẽ amâ hêx to ho pa. ¹⁸ Pa mẽ harênh ma hãmri nê mẽ kamâ inhgryk o ã mẽ amâ mẽ harênh anhÿr kêt nê. Koja mẽhõ mẽ awÿr mra nê ixwakre kamã rÿ inhnoo mã mẽ amâ mẽmoj mex jarê nhÿm ja inhmã mex nê. No nhÿm mẽ amâ mẽ hêx xwÿnhjaja axtem nê mẽ ajamaxpêr o pihkâr pix kaxyw na htem mẽ awÿr mrar nê mẽ amâ ã ujarênh o pa anê.

Pawre kot tee ri mẽ hkukamã hamaxpêr ã harênh

¹⁹ Te mẽ apê ixkra pyrâk jakamã na pa hte mẽ ate amnhÿ nhÿpêx ã mẽ apumu nê tee ri ijamaxpêr nê ixkaprÿ htÿx nê. Te nhÿhÿnh ixà htÿx nê ixte amnhÿ xà htÿx kamã ijamak o ri ixpaja pyrâk. Rÿ te mẽ hpÿjagri ho mẽ hikwÿ xwÿnh ôhy xà htÿxta pyrâk. Mẽ ate Kris kôt

amnhÿ nhÿpêx mex o apa hprãm xaj na pa hte ã amnhÿ nhÿpêx anhÿr o ri ixpa. ²⁰ Hêxta waa nê. Kop apu ra mẽ awÿr ixpôx nê mẽ akôt ixpa ronhÿx pa ixkÿnh tÿx kumrêx. Nhÿx pa ra ixprÿ hã mẽ amâ ixkapêr ka mẽ inhma. Nê amnhÿ tã inhmã mẽ akÿnh tÿx ã mẽ akamã inhgryk kêt ã ixpumunh kurê kumrêx. No kaga pix kãm ixkapêrja ka mẽ kamã harê nom aprÿ hã inhmar mex kêt nê. Na pa tee ri mẽ akukamã ijamaxpêr o ixkaprÿ htÿx nê ixpa.

Mojes kapêr kôt mẽ kot amnhÿ nhÿpêx xwÿnhjê jarênh

Eprêw 12.18-29

²¹ Kwa mẽ amâ arÿ Mojes kapêr kôt amnhÿ nhÿpêx o ri mẽ apa hprãm xwÿnhjaja. Mãn ka mẽ kormã aprÿ hã Mojes kapêr piitã mar par kêt jakamã na ka mẽ amâ hkôt amnhÿ nhÿpêx prâm. E pa ixprÿ hã mẽ amâ tanhmã harênh to ka mẽ inhma. ²² Nã Tÿrtùm kapêr ã kaga htÿm kot finat Apraãw jarênhja. Na pre hkra myja wa hamêkrut. Prõ Sara kamã ja nê kot amnhÿm haprôr nhÿm ri kãm àpênh o pa xwÿnh Aga kamã ja. ²³ Kãm àpênh xwÿnh kamã ja na pre mẽ pahpiitã mẽ pahpyrà nê amarÿ kato. No hprõ Sara kamã ja. Sara na pre ra hpigêx tÿx nê. Ra hkamrõ hkêt rÿy nê pa htã nhÿm Tÿrtùm kot wa hkra hkukamã wa kãm ujarênh xà hkôt nhÿm Apraãwja htu nhÿm wa hkrata kato. Tÿrtùm kot hkukamã wa kãm harênh xà hkôt nhÿm kamã hkra nhÿm kato.

²⁴⁻²⁵ Tã wa nita ã wa harênh kot anhÿr. Na pre Tÿrtùm mẽmoj jarê. Te ho wa urâk o wa harê no ãm hã kuxi nê ã wa harênh anê. Jakamã ni wa harênhja te kot Tÿrtùm kapêr pijakruuta pyrâk. Wam ni Agata te kot hixêt prêk pê Sinai nhÿmôk ã Tÿrtùm kot Mojes mã kapêrta pyrâk. Hixêtja pika pê Arap kamã na pre. Jakamã nhÿm Tÿrtùm Ijaew kaxyw Mojes mã kapêr nhÿm kuma nê amnhÿ xô ri mẽ kãm hã

kagà. Tã na hte arĩ jarãhã mẽ hkwyjaja hamaxpēr o:

—E kot paj mẽ panhĩgēt finat Mojes kapēr kōt amnhĩ nhĩpēx o ri i xpa nhũm Tĩrtũm ja hã i xpumu mẽ amnhĩm inhmex ã ijarē mẽ ixtu hkra.

Anhỹr o hamaxpēr no ãm ã hamaxpēr anhỹr kaprỹ. Æ mẽ hamaxpēr anhỹr xwỹnhjaja te mẽ kēp Apraãw mã ãpēnh xwỹnh Aga hkrata pyrãk. Nē krĩ pē Jerujarē kēp Ijaew nhõ krĩ jakamã haxwỹja te kēp Agata pyrãk. Nhũm krĩ nhõ xwỹnhjaja haxwỹja te mẽ kēp Aga hkrata pyrãk. Na htem htỹx Tĩrtũm kot mẽ omunh mẽ mẽ ho hkra hprãm xaj Mojes kapēr kōt amnhĩ nhĩpēx o pa hã amnhĩ jarēnh kaprỹ. Jakamã haxwỹja te mẽ kēp mẽ kãm mẽ ãpēnh o pa xwỹnh pyrãk.

Jejus kōt mẽ kot amnhĩ kaxyw hamaxpēr xwỹnhjē jarēnh

²⁶ Nē hapu hã Tĩrtũm kapērta. Apraãw prõ kumrēx Saraja te kēp kaxkwa kamã Jerujarē òja pyrãk. Krĩ ja kamã mẽ pa mã xwỹnhjaja te mẽ kēp mẽ kãm mẽ ãpēnh xwỹnhjē pyrãk kēt. Ra mẽ kot amnhĩ kaxyw Kris mã hamaxpēr mẽ hkōt amnhĩ xunhwỹr jakamã na htem hamaxpēr o:

—Ixte amnhĩ kaxyw Kris mã ijamaxpēr mẽ hkōt amnhĩ xãm jakamã na Tĩrtũm i xpumu mẽ amnhĩm inhmex ã ijarē mẽ ixtu hkra. Anē.

ãm hãmri na mẽ ã wamtajē rom hamaxpēr anē. Tã ã mẽ hamaxpēr anhỹr xwỹnhjaja te mẽ kēp Sara hkra pyrãk.

²⁷ Tĩrtũm kapēr ã kagà htũm kot ja jarēnh kot:

E kormã akra hkēt mẽ apa htã kēr ka mãmrĩ akĩnh mẽ ri apa.

Nē kormã apijagri hkēt tã kēr ka akĩnh tỹx mẽ ri apa.

Kormã amjēn kot akamã hkra hkēt mẽ te kot akaga pyrãk tã

kot kaj akra mẽ akanrēhã atãmnhwỹ xohtō rax nē.

Mē ohtō rax o ra amjēn kot nhãm hprō hõ kamã hkrata jakre. Anē.

Æ kapēr kot anhỹr o mẽ kot amnhĩ kaxyw Kris kōt hamaxpēr xwỹnhjē hkukamã mẽ ohtō hã mẽ harē.

²⁸ E ixkrãmnhwỹjaja. Te mẽ apē Ijak kanrēhã htãmnhwỹ pyrãk. Kojã mēhõ amnhĩ kaxyw Kris kōt hamaxpēr hãmri mẽ te kēp Apraãw mẽ hprō Sara wa hkra Ijak kanrēhã htãmnhwỹ pyrãk. Na pre Tĩrtũm amnepē mã kormã Ijak kator kēt ri ra hkukamã hamaxpēr mẽ Apraãw mã harē. Nē mẽ papajaja nhũm Tĩrtũm Ijak pyrã mẽ mẽ pakukamã mẽ pamã hamaxpēr mẽ amnhĩm mẽ paxunhwỹr ã amnhĩ jarē. Tã ra mẽ ate amnhĩ kaxyw Kris kōt ajamaxpēr jakamã te mẽ apē Ijak kanrēhã htãmnhwỹ pyrãk.

²⁹ Nhũm Apraãw kot Aga kamã hkra Ismaewja na pre hprō kumrēx kamã hkrata pumu mẽ kãm hkĩnh kēt mẽ kamã gryk pix o pa. Nē tanhmã hipēx to pē ri haprỹ ho ri hkōt pa. Tã mẽ kot amnhĩ krã hkōt amnhĩ to Tĩrtũm kra hprãm xwỹnhjaja na htem ã mẽ pahte Kris kōt amnhĩ xunhwỹr xwỹnhjē nhĩpēx anhỹr o pa. Na htem Tĩrtũm kot mẽ pahto hkra hã mẽ pahpumu mẽ Ismaew kot Ijak nhĩpēx pyrã mẽ mẽ pakamã gryk pix o pa. Nē tanhmã mẽ pahtomnuj to pē mẽ pahto kapēr o ri pa. ³⁰ Tã no ãm kwār mẽ mãmrĩ ã mẽ panhĩpēx anē. Kojã mẽ pahpyrã mẽ nhỹrmã Tĩrtũm nhõ krĩ hwỹr ãpir kēt nē. Tĩrtũm kapēr ã kagà htũm kot mẽ harēnh kot:

Na pre Tĩrtũm Apraãw mã kapēr mẽ kãm: “E kēr ka amnhĩ nē ate haprōr nhũm kot amã ãpēnh o ri pa xwỹnh mẽ hkrata wa hano. Kojã hkrata amỹr pē amnhĩm mẽmoj to ãrĩk kēt mẽ. Ate aprō kumrēx kamã akrata pix kojã hõja rom amỹr pē

mëmoj piitã ho amnhĩptãr pa.” Anë.

³¹ Tã te më pahpê àpênh xwýnh kamã hkrata pyrãk kêt. Te më pahpê Apraãw prõ kumrëx kamã hkrata pyrãk. Te Tirtũm kot Ijak kukamã hamaxpër pyrãk o na pre më pakukamã hamaxpër.

5

¹ Në Kris kot më pahte amnhĩ nhĩpëx tũm pë më papytãr jakamã kwa ixkrãmnhwýjaja. Kër ka më arĩ ate amnhĩ nhĩpëx tũm kôt amnhĩ nhĩpëx kêt nê. Ra Kris kot ja pë më papytãr nhũm më paxãmnhĩx ri papa kênã.

Më pahpê Tirtũm kra hprãm xãj tanhmã më pahte amnhĩ nhĩpëx to Juãw 8.32, 8.36; Korosë 2.20

² E më inhma. Kot kaj më atõ Tirtũm kot ato hkra hprãm xãj amnhĩ my kwryt kã krãhta hã kot kaj më ãm amarĩ ã amnhĩ nhĩpëx anhÿr kaprý. Na hte Tirtũm ja hã më omu nê ãm hã më omu. Kot kaj ã amnhĩ nhĩpëx anë nhũm Krisja ãm ate amnhĩ tomnuj mýrapê anë htyk kaprý pyrãk o amnhĩ nhĩpëx. ³ Hãmri nhũm Tirtũm tee ri ja hã më apumu nê te kot ã më amã kapër anhÿr pyrã nê më amã kapër o:

—E ra amã apê Kris kwý hprãm xãj amnhĩ my kwryt kã krãhyr jakamã kot kaj mããnën Mojes kapër piitã hkôt amnhĩ nhĩpëx o ri apa.

Anhÿr o më amã kapër pyrãk.

⁴ Nom kot kaj më atõ amnhĩ kukamã ajamaxpër o:

—Nã kot paj Mojes kapër piitã hkôt amnhĩ nhĩpëx o ri ixpa nhũm Tirtũm ja hã ixpumu nê inhmex ã ijarë nê ixto hkra kãm ga. Anë.

No ãm ja kot anhÿr kêt. Na hte Tirtũm ã më pahte amnhĩ nhĩpëx anhÿr ã më pahpumunh kôt më pahto hkra hkêt nê. Jakamã kot kaj më ã amnhĩ nhĩpëx anë nê te ate Kris kutã amnhĩ xãm pyrãk nhũm

Tirtũm ato mex kêt nê. ⁵ Nom kot ka më axtem ajamaxpër o:

—Ra ixte amnhĩ kaxyw Kris kôt ijamaxpër nê hkôt amnhĩ xãm jakamã koja Tirtũm hã ixpumu nê inhmex ã ijarë. Karõ ra kot ã inhmã ja ho amnhĩrĩt anhÿr kênã.

Anhÿr o ajamaxpër. ãm hãmri ã më ajamaxpër anhÿrja. ⁶ Jakamã më pahpê Kris kôt amnhĩ xunhwýr xwýnhjê kamã ra më kot amnhĩ my kwryt kã jakãr xwýnhjaja nhũm më pahkwýjaja ã amnhĩ nhĩpëx anhÿr kêt nê. Tã nhũm Tirtũm ja hã më pahpumu nhũm ja tanhmã kęp kute hkêt. Na hte më pahte amnhĩ my kwryt kã jakãr ã më pahpumu nê ãm hã më pahpumu. No kot pu më Jejus Kris kôt amnhĩ nhĩpëx mex o ri papa. Në amnhĩ kaxyw hkôt pajamaxpër tÿx o ri papa. Në më pamã axpën kĩnh pë tãm ri axpën nhĩpëx o ri papa. Ja na kêt Tirtũm kãm hprãm.

⁷ Ra më ate Kris kôt amnhĩ nhĩpëx mex o ri apa htã nhũm më hëx xwýnhjaja më awýr mra nê tee ri ã më ate amnhĩ nhĩpëx anhÿr ã më apumu nê tanhmã më amã Tirtũm kapër o hëx to. Ka më ama nê axte Tirtũm kôt amnhĩ nhĩpëx mex hkêt nê. ⁸ No ãm ã më kot më amã më ujarënh anhÿr xwýnhjaja na pre Tirtũm më awýr më rënh kêt nê. Tirtũm kot amnhĩ wýr më awýr xwýnh kênã kot kêt axtem nê më awýr kapër o më amã hëx o më pa xwýnhjê rë.

⁹ Në koja mëhõ pixi nê tanhmã amnhĩ tomnuj to nhũm më piitã ja hã omu nê urãk nê kãm tanhmã amnhĩ tomnuj to hprãm. ¹⁰ No kêt më apê Kris kwý na ka më. Ixte ja hã më apumunh mex. Kot kaj më axte ixkapër ma nê akupým Kris kôt amnhĩ nhĩpëx mex o ri apa. Nã kot kaj më ã amnhĩ nhĩpëx anë nê axte më kot më apê ãmnãr xwýnhjê kapër mar nê më hkôt amnhĩ nhĩpëx kêt nê. Koja Kris më

atã mē homnuj tỳx kumrēx nhũm mē rĩ amnhĩ pumu.

Pawre kot mē kot amnhĩ jakàr ã mē kãm karõ hkêt ã harēnh

¹¹ Nē na hte Tirtũm kapēr o mē hēx xwỳnhjaja tanhmã mē amã ixto hēx to ho pa. Ixte mē kãm Tirtũm kot mē ho hkra kaxyw mē kot amnhĩ my kwryt kà jakàr ã mē kãm karõ hã ixto ri hēx o pa. Nom ixte anhỹr kêt ixkrãmnhwỳjaja. Kop apu ixte mē kãm ja hã karõ ho ixpa ronhỹx Ijaew krãhtũmjaja ja hã ijarēnh ma nhũm ja mē kãm mex nē nhũm mē axte Kris ã tanhmã inhĩpēx to hkêt nē. Nom ixte ja hã mē kãm karõ hkêt. ãm ixte mē kãm Kris kot mē panē pĩ kahpa hã htyk jarēnh pix mỳrapē na htem ixkamã gryk nē.

¹² Hēxta waa nē. Mē kot mē amã hēx o pa pē mē ajamaxpēr o pihkàr xwỳnhjaja kop mē ãm mē anhõ krĩ rũm hapõx nē ma nhỹhỹm hapēx ronhỹx pa ixkĩnh tỳx kumrēx.

Mē pahte axpēn to mex o papa hã mē pamã karõ

Wam Korõt 13; Eprêw 13.3, 13.16; Wam Pêtre 1.22; Wam Juãw 3.11

¹³⁻¹⁴ Kwa ixkrãmnhwỳjaja. Nà na pre Kris amnhĩ kaxyw mē parē. Axte mē pahte amnhĩ nhĩpēx tũm kôt amnhĩ nhĩpēx kêt kaxyw. Ra kot ã mē pahte amnhĩ nhĩpēx anhỹr pē mē papytãr jakamã kēr ka mē amnhĩ tã ja ma nē axte atỳx ri amã hprãm xà hkôt tanhmã amnhĩ nhĩpēx to ho ri apa hkêt nē. Mē ãm amã axpēn kĩnh pix o ri axpēn kôt apa. Nē nhãm mē hipēx o te ka amã amnhĩ tã ma pyrãk o mē hipēx. Jao mē piitã tãm mē hipēx o ri apa. Kot kaj mē ã amnhĩ nhĩpēx anē nē te mē ate wam Tirtũm kapēr piitã hkôt amnhĩ nhĩpēx pyrãk. ¹⁵ No kot kaj mē axtem nē axpēn kãm axoprē ho ri apa hãmri nē te ra mē ate axpēn to ajapēx par o amõr pyrãk o amnhĩ nhĩpēx. Te mry xoprē kot axpēn par o pata pyrãk. Kwa mē ã

amnhĩ nhĩpēx anhỹr hkêt nē. Mē ãm axpēn to mex pix nē mē axpēn kãm axukaprĩ ho ri axpēn kôt apa.

Mē pahte amnhĩ nhĩpēx nyw jarēnh

Matêwre 26.41; Rõmãn 8.1-11

¹⁶ Nē kwa kēr ka mē amnhĩ to Tirtũm Karõ wỳ kē mē amã mē ate amnhĩ nhĩpēx nyw jagjē ka mē axte ate amnhĩ nhĩpēx tũm kôt amnhĩ nhĩpēx hkêt nē. ãm mē ate amnhĩ nhĩpēx nyw kôt pix mã mãm amnhĩ nhĩpēx o ri apa. ¹⁷ Tirtũm Karõ kot amnhĩ nhĩpēxja nē mē pahte amnhĩ nhĩpēx tũmja wa kot axpēn pyrãk kêt. Te wa kot axpēn kutã amnhĩ xãm nē wa pijapu pyrãk. Jakamã kot puj mē pahte amnhĩ nhĩpēx tũm o amnhĩ nhĩpēx nē Tirtũm Karõ mã hprãm xà hkôt amnhĩ nhĩpēx hkêt nē. ¹⁸ No kot puj mē Tirtũm Karõ hkôt amnhĩ nhĩpēx nē ra jar pika ja kamã mē kot amnhĩ nhĩpēx kôt ri amnhĩ nhĩpēx kêt nē. Ra axtem mē pahte amnhĩ nhĩpēx nyw o amnhĩ nhĩpēx. ¹⁹ Jar mē kot amnhĩ nhĩpēx tũmta mex kêt. Ra mē piitã mē kot ja pumunh mex.

Na htem htỳx ri hkwỳjē kamã hpijaãm kêt o pa.

Jao mēmyjaja hprõ kuhpa hã nhãm mēnijē ho amnhĩkati.

Nhũm mē hprõjaja mē mjēn kuhpa hã nhãm mēmyjē ho amnhĩkati.

Nē mēmy hkwỳjaja axtem nē mēmyjē hkwỳ ho amnhĩkati.

Nē mēni hkwỳ haxwỳja axtem nē mēnijē hkwỳ ho amnhĩkati.

²⁰ Nē mē kãm mēmoj mē hikukrēx japē htỳx o kãm Tirtũm kĩnh jakre.

Nē mēmoj kaxyw ma wajaga hwỳr amnhĩ to pa.

Nē hkwỳjē kamã oprē ho ri pa.

Nē mēmoj tã axpēn kãm gryk pix nē.

Nē mēmoj to axpēn pē õxỳ nē.

Nē mēmo mỳrapē axpēn pē angrã nē amỳm ahpỳnhã ri pa.

21 Nē mēmoj tā axpēn kamnhīx rāhā ho ri pa.

Nē axpā nē mē grer kām ri axpēn kām hpijaam kēt o ri pa.

Ā na htem mē kot amnhī nhīpēx tūm kōt amnhī nhīpēx o ri mē pa xwýnhjaja amnhī nhīpēx anē. Ā mē kot amnhī nhīpēx anhýr xwýnhjaja koja mē Tirtūm nhō krī hwýr gjēx kēt nē. Ra ixte mē amā ja jarēnh tā pa axte mē amā harē. Mē ate hā ano htýx rāhā ho ri apa kaxyw. 22 No mē kot amnhī nhīpēx nywja axtem na.

Tirtūm Karō hkōt mē kot amnhī nhīpēx nyw o amnhī nhīpēx xwýnhjaja na htem axtem kām axpēn kīnh nē.

Nē hkīnh nē ri hamakētkati nē àmnhīx ri axpēn kōt pa.

Nē gryk tokyx anhýr hkēt nē. Ām axpēn to mex pix o ri axpēn kōt pa.

Nē tām axpēn nhīpēx.

Nē kot mēmoj tā amnhī jarēnh xā hkōt tanhmā mēmoj to.

23 Nē axpēn mā kapēr mā hprī ho ri axpēn mā kapēr.

Nē mēmoj punuj piitā nē amnhī to htýx o ri pa.

Ā na hte mē kot Tirtūm Karō hkōt amnhī nhīpēx o mē pa xwýnhjaja Karō nhý hā amnhī nhīpēx nyw o amnhī nhīpēx anhýr o pa. Jao māānēn Mojes kapēr kwým ri amnhī nhīpēx hkēt nē. Jakamā koja mēhō mē pahte amnhī nhīpēx nyw nē tanhmā mē pahkurē hto hkēt nē. 24 Tā mē pahpē Jejus Kris kwý jakamā na pu mē pahte amnhī nhīpēx tūmja nhīpēx o te mē pahte amnhī nē hpir pyrā nē axte hkōt amnhī nhīpēx kēt nē.

Tirtūm Karō hkōt mē pahte amnhī nhīpēx ā mē pamā karō
Epes 4.23-24; Korosē 3.10

25 Tā ra Tirtūm Karō kot mē pahto hkra jakamā kwa kēr pu mē ām kōt pix mā amnhī nhīpēx nyw o amnhī nhīpēx o ri papa. 26 Kot puj

mē ā amnhī nhīpēx anē hāmri nē mēmoj tā mē pahkwýjē mā amnhī to jarkrar o ri papa hkēt nē. Kot puj mē ā amnhī nhīpēx anē nhūm mē pakamā gryk nē. Jakamā kēr pu mē ā amnhī nhīpēx anhýr o ri papa hkēt nē.

6

Mē pahte tanhmā axpēn to ajuta hto hā mē pamā karō

Matēwre 18.15-17; Rukre 17.3-4; Sikūn Tesarōn 3.14-15; Xiakre 5.19-20

1-3 Kwa ixkràmnhwýjaja. Mē apē Tirtūm Karō hkōt amnhī nhīpēx o ri mē apa xwýnhjaja. Koja Kris kōt akwýjē hō tanhmā amnhī tomnuj to ka mē ja hā omu nē ā amnhī nhīpēx anhýrja nē kām akapēr. Nom kēr ka mē kamā agryk kamā kām tanhmā nē hkēt nē. Ām kām akapēr mā aprī ho kām akapēr nē akupým tām ām. Nom kwa kēr ka mē amnhī pumunh mex nē urāk nē ā amnhī tomnuj anhýr kēt nē.

Kot ka mē atō ā kot amnhī nhīpēx anhýr ā omu nē ām omu nē nē tanhmā kām akapēr to hkēt nē. Nē ajamaxpēr o:

—Tk. Kwār māmri ā amnhī nhīpēx anē. Pa ja nē tanhmā kām ixkapēr to hkēt nē. Kurom ixte amnhī nhīpēx mex o ri ixpa kēnā.

Anhýr o ajamaxpēr japēr. Kwa mē ā ajamaxpēr anhýr kēt nē. Kot kaj mē ā ajamaxpēr anē nē nē kām akapēr kēt nē hāmri nē te ate amnhī to mex ā amnhī jarēnh kaprý pyrāk.

Nē kēr ka mē axpēn to ajuta mex o ri axpēn kōt apa. Jao Kris kōt amnhī nhīpēx mex nē.

4-5 Nē na htem piitā amnhīm àpēnh pix tånopxar o pa. Jakamā kēr ka mē amnhī tånopxar pē tām amnhī nhīpēx rāhā ho ri apa. Hāmri nē ja hā amnhī pumu nē akīnh nē. Nom kwa kēr ka mē ate amnhī nhīpēx mex o akwýjē jakrenh ā mē kām amnhī to jarkrar o ri apa hkēt nē.

6 Nê kêr ka mê kot Tirtûm kapêr o mê ajahkre xwÿnhjê ho mex nê mê kâm mêmoj nhôr o ri apa.

7 Koja Tirtûm nhÿrmã mê pahtÿr ri mê pahte amnhÿ nhÿpêx ã mê pahpumunh kôt tanhmã mê pajarênh to. Hâmri pu mê tee ri amnhÿ kukamã pajamaxpêr nom amnhÿ nê tanhmã kâm paxêx to hkêt nê. Koja mêhõ kâm amnhÿ to hêx nê te tãm kot amnhÿ mã hêx pyrãk nom kot puj mê Tirtûm mã amnhÿ nê tanhmã paxêx to hkêt nê. ⁸ Jakamã kot kaj mê amnhÿ krã hkôt tanhmã ri amnhÿ nhÿpêx to rãhã ho apa hãmri nê nhÿrmã ty nê Tirtûm pê awry rax ã ri apa. Nom kot kaj mê Tirtûm Karõ mã hprãm xà hkôt pix mã amnhÿ nhÿpêx nê nhÿrmã ty nhÿm Tirtûm akupÿm ato atÿr ka kuri amex nê ajamakêtkati atÿr tûm nê ri apa ho apa.

Mê pahte axpên to mex rãhã hã mê pamã karõ

Atre 20.35; Wam Korÿt 15.58; Xitre 3.14; Eprêw 13.3, 13.16; Xiakre 1.27

⁹ Jakamã kwa kêr ka mê arÿ tãm ri amnhÿ nhÿpêx nê tãm axpên nhÿpêx o ri axpên kôt apa nê jam anhÿrer kêt nê. Mê ã amnhÿ nhÿpêx o ri apa anhÿr rãhã ty nhÿm Tirtûm nhÿrmã ja hã mê ato mex rax nê. ¹⁰ Tã kêr pu mê arÿ Kris kôt pahtõjê ho mex rãhã ho ri papa. Nom mê tapxip-ixjê ho mex kêt nê. Pu mê mê piitã mê ho mex o axpên pyrãk.

¹¹ E ixte mê amã kagã nhÿpêx nê mênh nhÿm mê ate ja hã ixpumunh kaxyw kot paj pam kagã jatur xà hã inhÿkra ho inhÿxi nhÿpêx ka mê ixte inhÿxi hã kagã rÿnhtita pumu.

Jejus kot mê panê htyk ã Pawre kãm harênh prãm ã harênh

Wam Korÿt 1.22-24, 2.1-2

¹² Nê mê amã Tirtûm kapêr o mê hêx xwÿnhjaja na htem hamaxpêr o:

—Nà kot paj Karatas nhõ xwÿnhjê mã Kris pÿ kahpa hã htyk

ã harênh o ri ixpa hkêt nê. Kot pa anê nhÿm mê ixpê Ijaew kwÿjjaja ja hã inhma nê hã tanhmã inhÿpêx to. Ja pymaj kot paj mê kãm tanhmã harênh to hkêt nê. Kot paj ãm mê kot amnhÿ my kwÿrÿt kã jakàr pix ã mê kãm karõ kê mê ixkapêr xà hkôt ã amnhÿ nhÿpêx anê. Pa hã mê omu nê ma ixkwÿjê mã mê hã amnhÿ to jarkrar o ri ixpa. Anê.

¹³ Te mê kot finat Mojes kapêr kôt ri amnhÿ nhÿpêx pyrãk tã no na htem ã amnhÿ nhÿpêx anhÿr kêt nê. Ra mê kot amnhÿ jakàr tã no ãm Mojes kapêr piitã hkôt amnhÿ nhÿpêx hkêt nê. Æm hkwy hkôt pix mã amnhÿ nhÿpêx o pa. Nom kot kaj mê ama nê mê urãk nê amnhÿ jakã nhÿm mê ja hã mê apumu nê hkÿnh nê. Nê ma ri mê hkwyjê mã mê atã amnhÿ to jarkrar o ri pa nê mê kãm:

—E Karatas nhõ xwÿnhjaja na pa prem mê kot amnhÿ my kwÿrÿt kã jakàr ã mê kãm karõ nhÿm mê inhma nê mê pahpyrã nê ã amnhÿ nhÿpêx anê. Anê.

¹⁴ No pa na pa hte ã mê kãm mêmoj tã karõ anhÿr o ri ixpa hkêt nê. Æm Tirtûm kot mê pahto hkra kaxyw mê panhõ Pahihti Jejus Kris kot mê nê htykja pix na pa hte mê kãm harê. Ra kot inhne htyk jakamã te pa ixte kuri ijê nê ixytyk pyrãk. Jakamã ra jar pika ja kamã mê kot amnhÿ nhÿpêxja te ixpê htyk nê hapêx pyrãk pa axte hkôt amnhÿ nhÿpêx kêt pyrãk.

¹⁵ No mê kot amnhÿ my kwÿrÿt kã jakàr xwÿnhjaja nê mê kot amnhÿ jakàr kêt xwÿnhjaja na hte Tirtûm ja hã mê omu nê ãm mê omu. Æm mê pahte amnhÿ nhÿpêx nyw o amnhÿ nhÿpêx o ri papaja pix na kãm hprãm. ¹⁶ Kot kaj mê ã amnhÿ nhÿpêx anhÿr o ri apa nê apê Tirtûm kra mex nhÿm mê ato mex rax nê. Nê mêmoj to mê akutã nojarêr rãhã nê. Ka mê axãmnhÿx ajamakêtkati nê ri apa ho apa.

¹⁷ Nē na prem Kris ã ixtak rax nē nhũm ixkatut ã ixtak xà arĩ rãhã nē pa hte hã ixpa. Ixte Jejus Kris mã tanhmã amnhĩ nhĩpêx to xwỳnh ã ixto amnhĩrĩt xà na. Jakamã kê mēhõ axte Jejus kot mē awỳr inhmēnh ã tee ri ixpumu nē tanhmã hã ixkukjêr to hkêt nē.

¹⁸ E ixkràmnhwỳjaja. Kê Pahihti Jejus Kris mēmoj to mē akutã nojarêt nē mē ato mex rãhã ho pa. Nà koja mē ato anē.

Ãm ja pix na hapêx. Ixpê Pawre na pa ã mē amã kagà nhĩpêx nē mē awỳr mēnh anē.

Epes

Pawre kot Epes kām Jejus kôt hkwyjê hwÿr kagà nê mēnh

Pawre na pre kagàja nhîpêx. Jejus nhÿ hã hkrajê jahkre o pa xwÿnhjê hõ na pre. Jakamã na pre krî pē Epes kām Kris kwÿjê hwÿr hipêx nê kumê. Epes nhõ xwÿnhjaja Ijaew kêt xwÿnh na pre mē. Nhūm pre ra Pawre ma mē hwÿr mō nē mē kām Tirtūm kapēr jarēnh o ri mē hkôt pa nhūm mē hkwyjaja kuma nē Jejus kôt amnhî xunhwÿ.

Na pre hte Pawre ma krî piitã hkôt ri Tirtūm kapēr jarēnh o ri mē hkôt pa. Hāmri nhūm mē hkwyjaja Jejus ã unê nē krî pē Rōm wÿr kumê nē kamã haxà nhūm arî hkrî ho hkrî. Nom amarî hkrî hkêt nē. Na pre hte mē kot hwÿr mmar xwÿnhjê mã Tirtūm kapēr jarē. Nē krî hkwyjê hkôt Jejus kôt hkwyjê mã kagà nhîpêx nē mē hwÿr kurē. Jakamã na pre Epes kamã hkwyjê hwÿr kagàja nhîpêx nē mē hwÿr kumê.

Nē kagàja kamã hprî hã mē kot Jejus kôt amnhî xunhwÿr xwÿnhjê kot tanhmã amnhî nhîpêx to ho pa hã mē kām karō. Ra mē kot hkôt amnhî xunhwÿr jakamã te mē htipxi nē ri mē pa xwÿnh kot amnhî nhîpêx pyrāk o amnhî nhîpêx o pa hã mē kām hã karō. Nē jar pika hkôt te mē kēp Kris nhî pyrā nē pa hã mē harē. Ā na pre Pawre mē kām mēmojar jarē nē hã kagà anē nē mē kām:

¹ Pa Epes kām Kris kôt ixkwÿjaja. Xà mē amex na ka mē apa? E ot pa mē awÿr kagà nhîpêx nē kumê. Ixpê Pawre na pa hipêx nē mē awÿr kumê. Ixpê Jejus Kris nhÿ hã mē ahkre ho mē ixpa xwÿnh na pa. Tirtūm kām hprām xà hkôt. Tã pa ã mē awÿr kagà nhîpêx nē mē awÿr mēnh anē. Mē apē Tirtūm krajê

hwÿr. Na ka xep htem Jejus Kris kôt amnhî nhîpêx mex o ri apa. Ām hāmri na ka htem ã amnhî nhîpêx anē.

² E kē Mēpahpām Tirtūm mē Pahihti Jejus Kris wa mē ato mex nē mēmojar to mē akutã nojarēt rāhã ho pa. Ka mē wa ŷ hã axāmnhîx ajamakêtkati nē akînh pē tanhmã amnhî nhîpêx to ho ri apa.

Tirtūm kot mē pakukamã amnhūm mē parēnh ã harēnh

Rōmān 8.28-30; Wam Korîť 1.21-22; Wam Tesarōn 1.4; Sikūn Tesarōn 2.13; Wam Pētre 1.2

³ Na hte mē panhõ Pahihti Jejus Kris nhîpêxã Tirtūmja mē pahto mex rāhã ho pa. Mē pahpē Kra Kris kwÿ hã mē pahpumunh kôt tanhmã mē pahto mex to ho pa. Ra wa Karōja mē pahkarō mã gjêx jakamã te ra mē pahte kaxkwa kamã wa kuri mē pamex nē mē papa pyrāk. Tã ra mē pahte jar pika ja kamã paxāmnhîx pajamakêtkati mē pamex nē ri papa jakamã kwa kēr pu mē amnhîm ãm mex o mex ã harēnh rāhã nē.

^{4,5} Annepē mã kormã mēmojar kêt ri na pre Tirtūm mē pakukamã amnhîm mē parē. Kris kukwak ri amnhîm mē parē. Tã mēmo kaxyw na pre ã mē pakukamã mē parēnh anē? ãm mē pahte kapēr kôt pix mã amnhî nhîpêx o ri papa kaxyw. Jao tãm kot amnhî nhîpêx pyrā nē noo mã tãm amnhî nhîpêx o ri papa. Kām mē pajapē jakamã na pre mē pakukamã tanhmã hamaxpēr to nē hamaxpēr o:

—Nà Ixkra Jejus Kris koja nhÿrmã ma mē hwÿr wrÿ nē mē nē ty. Tã mē kot mē nē htyk ã harēnh mar nē amnhî kaxyw hkôt hamaxpēr xwÿnhjaja kot paj mē ho ixkra. Nà kot paj ã mē hipêx anē. Anē.

⁶ No mē papajaja tanhmã mē pahte amnhî nhîpêx mex to hã mē pahpumunh kôt na pre ã mē pahto hkra hã mē pajarēnh anhÿr kêt nē.

Ām Kra Kris pix kukwak ri na pre ā mē pajarēnh anē. Kām Kra japē jakamā na hte mēmoj to mē pahpē hkwāy hā mē pakutā nojarēt rāhā ho pa. Jakamā na pu htem amnhī tā kām mex o mex ā harēnh o papa.

⁷⁻⁸ Na pre Krisja mē panē htyk o Tirtūm mā mē pahte amnhī tomnuj pānhā amnhīre. Nhūm Tirtūm ā kot amnhī nhīpēx anhūr ā omunh xā hkōt mē pahte hkōt amnhī xunhwūr xwūnhjē nē mē pahte amnhī tomnuj rēnh pa. Koja aa tanhmā hā mē pahto hkēt nē. Pu mē axte amnhī amnhī tomnuj o papa hkēt nē. Hēxta waa nē. Kām mē pajapē htyx kumrēx jakamā na pre ā mē pahto mex rax anē. Ām mex o mex nē āhpumunh o āhpumunh.

⁹⁻¹⁰ Amnepēm na pre hamaxpēr o:

—Nā na pa ra kaxkwa ho ixkato nē kamā mēmoj piitā ho ixkato. Nē pika ho ixkato nē kamā mēmoj piitā ho ixkato. Tā koja nhūr mā Ixkra Kris mēmoj piitā ho amnhīptār o pa. Kaxkwa kamā nē pika piitā hkōt mēmoj piitā ho amnhīptā nē tapxipix inhūr hā kēp mēō Pahihti. Koja ā amnhī nhīpēx anhūr xā hā arīgro kato nhūm ā amnhī nhīpēx o pa anē. Nā ja na inhā hprām. Anē.

Ā Tirtūm amnhī kukamā hamaxpēr anhūrja kōt na pre Kris kēp mē panhō Pahihti hā harē. Tā nhūr mā mē pahto amnhīptār kaxyw koja mē pakaxyw ām. Amnepēm ri mē pa xwūnhjē mā kot kormā ja ho amnhīrīt kēt tā ra jarāhā mē pamā ho amnhīrīt.

¹¹ Kris kukwak ri na pre amnhīm mē parē. Ra kot mē pakukamā mē pahtā amnhī jarēnh xā hkōt. ¹² Tā mē ixpē Ijaew kwū kumrēx mē ixte Kris kōt amnhī xunhwūr jakamā koja mē piitā mē inhūr hā Tirtūm mā mex o mex ā harēnh o ri pa.

¹³ Nē mē kajaja na ka prem mē ixpyrā nē Tirtūm kapēr ma nē ajaxwūja hkōt amnhī xunhwūr. Ām

hāmri na Tirtūm kapērja. Tā ka prem ama nē hkōt amnhī xunhwūr. Hāmri nhūm amnhī tā mē apumu nē kot inhīpēx pyrā nē mē anē mē ate amnhī tomnuj piitā rēnh pa nē mē ato hkra. Hāmri nē mē awūr Karō rē nhūm mē awūr wrū nē mē akarō mā agjē nē mē akamā pa ho pa. Kris kukwak ri na pre mē awūr kurē. Amnepē mā na pre mē pakukamā hamaxpēr o:

—Koja mē Ixkra hkōt amnhī xunhwūr pa ja hā mē omu nē mē ho ixkra nē mē hwūr Ixkarō rē. Hāmri nhūm mē hkarō mā agjē nē mē kamā hkrī ho hkrī.

¹⁴ Anhūr jakamā na pre mē pahwūr kurē nhūm mē pahwūr wrū nē mē pahwūr agjē nē mē pakamā hkrī ho hkrī. Pu mē ja hā amnhī pumu nē pajamaxpēr o:

—Nā ra Tirtūm kot ixwūr Karō mēnh jakamā na ixkarō hwūr axā nē kamā hkrī ho hkrī. Tā koja ra kot mē ixtā amnhī jarēnh xā hkōt ja hā ixto mex nē. Ra kot ixto hkra kēnā. Jakamā koja nhūr mā ma amnhī wūr ixto api pa kuri inhmex kumrēx nē ixpa ho ixpa. Hāmri nē kukwak ri axte tanhmā amnhī tomnuj to ho ri ixpa hkēt nē. Anē.

Jakamā koja mē piitā ā kot mē ho mex anhūr ā amnhī tā kamā ama nē amnhī tā omu nē kamā mex o mex ā harēnh rāhā ho pa.

Pawre kot Epes nhō xwūnhjē ho Tirtūm wūr ā harēnh

Piripos 1.9; Korosē 1.9-12; Wam Tesarōn 5.23; Sikūn Tesarōn 1.11, 2.16; Eprēw 13.20

¹⁵ Nē na ka xep htem amnhī kaxyw Kris kōt ajamaxpēr tūx pē amā Tirtūm krajē piitā mē hkīnh o mē ho mex o apa. Na pa pre mē ajarēnh ma nē ixkīnh tūx nē. ¹⁶⁻¹⁸ Nē xatā mē ato Tirtūm wūr o ri ixpa nē mē ato hwūr o:

—Pa Mēinhīpēēxā maati Tirtūm. Nā amex o amex. Ka na ka pre mē ixwūr mē inhō Pahihti Jejus Krisja mē nhūm mē ixwūr wrū nē hprī

hã mẽ inhmã ate tanhmã amnhĩ nhĩpêx to ho apa hã ato amnhĩrit. Tã Epes kãm akrajaja na xep htem akôt pix mã ri amnhĩ nhĩpêx rãhã ho ri pa. ãm hãmri na htem ã amnhĩ nhĩpêx anê.

—Nê kwa Tirtũm. Kê Akarõ tanhmã mẽ hkrã hto kê mẽhprĩ hã akapêr mar tỳx rãhã ho pa. Jao ra ate mẽ ixkukamã mẽ ixtã tanhmã mẽ ixto mex to hã amnhĩ jarênhja kê mẽ kãm hamaxpêr tỳx rãhã ho pa. Nê ate nhỹrmã mẽ ixpê akrajaja mẽ ixpiitã tanhmã mẽ ixto mex to jarênhja kê mẽ kãm hamaxpêr tỳx pê hkĩnh rãhã ho pa ho pa.

19-20 —Nê kê mẽ axãhpumunh o axãhpumunh ã ate akupỹm Akra Kris o htĩr ã apumunh mex nê Tirtũm. Na ka pre axãhpumunh xã ho akupỹm ho htĩr nê ma akupỹm anhõ krĩ hwỹr ho api nê amnhĩ nhĩkõ hã yr nhũm arĩ hkrĩ ho hkrĩ. Apyrã nê kot mẽ ixto amnhĩptãr kaxyw. ã axãhpumunh xã htỳx kot anhỹr. Tã kê akrajê piitã ja hã apumu nê axãhpumunh tỳx o ate tanhmã mẽ ixto ajuta hto ho apa hã apumu.

Anhỹr o na pa hte mẽ ato hwỹr o ri xpa.

21 Nê Krisja ãhpumunh tỳx o mẽkarõmnuti piitã hakrenh. Nê hihtỳx o mẽ hakrenh jakamã krĩ nhõ xwỹnhjê mã te mẽ ãhpumunh tỳx kêt pyrãk o na htem htỳx ri amnhĩ nhĩpêx o pa pyrãk. Nê Krisja hihtỳx o pika piitã hkôt pahi piitã mẽ hakrenh par kumrêx. Nê hihtỳx o kot pika piitã hkôt mẽmoj piitã mẽ hakrenh par. Jakamã mẽhõ koja we tanhmã kot amnhĩ nhĩpêx to hã kãm karõ rỳ kãm hamaxpêr gõ? Nã amrakati kumrêx. Ra kot ã amnhĩ nhĩpêx anhỹr rãhã nê pa ho pa xwỹnh kênã. Nê hihtỳx o hihtỳx rãhã nê pa ho pa xwỹnh. Nê ãhpumunh o ãhpumunh rãhã nê pa ho pa xwỹnh. Nê hihtỳx o kot jar pika ja kôt mẽ pajakrenh par nê hihtỳx o Tirtũm nhõ krĩ

kamã mẽ mẽmoj piitã hakrenh par. Tã koja mẽmoj piitã ho amnhĩptãr rãhã htĩr tũm nê pa ho pa.

Kris te kêp mẽ pahkrã pyrãk ã harênh

Rõmãn 12.4; Wam Korõt 12.12; Epes 4.16; Korosê 3.25

22 Na pre Tirtũmja Kra Kris nhĩhkram mẽmoj piitã haxãr pa. y hã kot nhỹrmã ho amnhĩptãr o pa kaxyw. Jakamã kot mẽ pahto amnhĩptãr xwỹnh ã kêp mẽ panhõ Pahihti. Nê te kêp mẽ pahkrã pyrãk. Nê mẽ papajaja te mẽ pahpê i pyrãk jakamã na pu htem hkôt ri amnhĩ nhĩpêx o papa. 23 Na hte mẽ panhĩja mẽ pahkrã kamã mẽ pajamaxpêr xã hkôt tanhmã amnhĩ nhĩpêx to. Ja pyrã nê na pu htem mẽ pahkrã pyrãk xwỹnh Krisja kapêr ma nê hkôt tanhmã ri amnhĩ nhĩpêx to ho ri papa.

Koja mẽhõ ãm hkrã pix nê i hkêt nê pa hãmri nê mex kêt nê. Na htem hkrã nê mããnên i nê pa nê mex nê. Ja pyrã nê na hte Kris mẽ pahte hkôt amnhĩ nhĩpêx o papa hã mẽ pahpumu nê hkĩnh nê mex nê pa. Pu mẽ pajaxwỹja hkôt ri amnhĩ nhĩpêx ã amnhĩ pumu nê pahkĩnh nê pamex nê papa ho papa.

2

Tanhmã Tirtũm kot mẽ pahto hkra hto ã harênh

Wam Korõt 6.11; Xitre 2.11–3.7

1 Nê amnepê mã na pu pre htem Tirtũm kãx ã tanhmã amnhĩ tomnuj to ho ri papa. 2 Nê jar mẽ kot amnhĩ nhĩpêx o amnhĩ nhĩpêx. Jao amnhĩ tomnuj pix o ri papa. Nê mẽkarõmnuti nhõ pahi Satanasti kapêr kôt pix mã ri amnhĩ nhĩpêx rãhã nê. Na pre hte tanhmã mẽ pahkôt mẽ pahto ho pa. Mẽ pahte tanhmã amnhĩ tomnuj to kaxyw mẽ pamã mẽ pajamaxpêr punuj jagjê. Pu mẽ amnhĩ tã omunh kêt tã y hã amnhĩ tomnuj o papa. Satanastija kêp mẽ kot Tirtũm kapêr kwỹm ri amnhĩ nhĩpêx o mẽ pa

xwÿnhjê nhô pahiht na. Tã pu pre htem pahtÿx ri hkôt amnhî nhîpêx pix o ri papa. ³Mê pahpiitã tanhmã amnhî tomnuj to hprãm xà hkôt pix mã tanhmã amnhî nhîpêx to. Nê mẽmoj punuj kukamã pajamaxpêr nê ra hkôt ã amnhî tomnuj anê. Æ na pu prem mnhî nhîpêx anê nhùm Tirtüm ja hã mẽ pahpumu nhùm ja kãm mex kêt nê. Jakamã nhùm tee ri mẽ pakukamã hamaxpêr nê hamaxpêr o:

—Hêxta waa nê. Na htem ixkapêr kwÿm ri tanhmã amnhî tomnuj to rãhã ho pa. Æ mẽ kot amnhî nhîpêx anhÿr o mẽ pa xwÿnhjaja koja mẽ nhÿrmã ixri htír tùm nê mex nê pa ho pa hkêt nê. Ixkínhã mẽ kot amnhî tomnuj xwÿnh jakamã tanhmã kot mẽ amnhî to nê ixri htír tùm nê pa ho pa? Nà mẽ kot amnhî tomnuj mÿrapê koja mẽ nhÿrmã ma amnhî xà htÿx kamã hamak tùm xàta wÿr ma hapêx pa. Nà koja mẽ anê. Hêxta waa nê. Inhmã ma hwÿr mẽ pa prãm kêt tã ra ma hwÿr mẽ pa kaxyw.

Anhÿr o hamaxpêr. ⁴⁻⁵Nê amnepêm kormã mẽ pahte amnhî tomnuj o papata ã te mẽ pahte amnhî xà htÿx kamã pajamak tùm xà hwÿr pryta ã mẽ papa pyræk. Nom Tirtüm kãm mẽ pajapê nê mẽ pakamã ukaprî jakamã na pre mẽ pahto mex rax nê. Nê akupÿm Kris o htírja ri te ra mẽ pahte amnhî xà htÿx kamã pajamak tùm xà hwÿr pryta nê mẽ pahto ujanãr pyræk o mẽ panhîpêx. Mẽ pakamã ukaprî nê kãm mẽ pajapê ho ã mẽ panhîpêx anê. Amarî ã mẽ panhîpêx anê nê mẽ panê mẽ pahte amnhî tomnuj rênh pa. Jakamã kot puj mẽ pahte Kra hkôt amnhî xunhwÿr xwÿnhjaja nhÿrmã amnhî xà htÿx kamã mẽ hamak tùm xàta wÿr papa hkêt nê. ⁶Ra Tirtüm akupÿm Jejus Kris o htír jakamã te ra Jejus kôt akupÿm mẽ pahpê hkwyjê ho

mẽ pahtír pyræk. Jakamã te ra ô krî kamã ðhkô hã mẽ pamex kumrêx nê pahkrî pyræk. ⁷Mẽmo kaxyw na pre Tirtüm kãm mẽ pajapê hkôt ã mẽ pahwÿr Jejus Kris mẽnh nhùm mẽ panê htyk anê? Nà kãm mẽ pajapê htÿx ã mẽ pahte pahprî hã amnhî tã omunh kaxyw na pre ã mẽ pahwÿr mẽnh anê. Tã kot puj mẽ nhÿrmã kaxkwa kamã hwÿr pøj nhùm mẽ pamã amnhî jarênh o:

—E mẽ amnê ixpumu. Inhmã mẽ ajapê htÿx jakamã na pa pre mẽ akamã ixukaprî xàj ma mẽ awÿr Ixkra Jejus Krisja mẽ nhùm amnhî grõnh kôt mẽ awÿr wrÿ nê mẽ anê ty. Inhmã mẽ ajapê htÿx jakamã na pa pre ã mẽ awÿr mẽnh nhùm mẽ anê htyk anê. Inhmã mẽ apê ixkrajê japê xàj na pa pre ã mẽ ato mex rax anê.

Anhÿr o mẽ pamã kapêr hãmri nê mẽ pahto mex rãhã ho pa. ⁸⁻⁹Xà na pu prem pahpê hkra hprãm xàj amnhî krã hkôt mẽ papamjaja kãm tanhmã amnhî to mex to nê kãm:

—E kwa Tirtüm. Na pa ã amnhî to mex anê nê ã amnhî to mex anê. Jakamã kwa ja hã ixpumu nê ixto akra nã?

Anhÿr o na pu prem amnhî to kuwÿ? Nà na pu prem ã amnhî to hwÿr anhÿr kêt nê. Na pu prem amnhî kaxyw hkôt pajamaxpêr nê hkôt amnhî xunhwÿ nhùm ja pix ã mẽ pahpumunh kôt mẽ panê mẽ pahte amnhî tomnuj rê nê mẽ pahto hkra. Kãm mẽ pajapê nê mẽmoj to mẽ pakutã nojarêt rãhã ho pa jakamã na hte ã mẽ panhîpêx mex anê. Jakamã na pu htem amnhî tã omu nê pajamaxpêr o:

—Nà na xep hte Tirtümja mẽ pahte tanhmã amnhî nhîpêx to ho papa hã mẽ pahpumunh kôt mẽ pahto hkra hkêt nê. Æm mẽ pahte amnhî kaxyw kãm pajamaxpêr ã mẽ pahpumunh kôt pix mã na hte mẽ pahto hkra. Anê.

¹⁰Nê Tirtüm tapxipix na hte tanhmã mẽ pahto pu mẽ amnhî to

mex rāhā ho papa. Nom kormā kot mē pahto hkra hkēt ri na pu prem ā amnhī nhīpēx anhūr kēt nē. Tā Jejus Kris kōt amnhī xunhwū nhūm Tīrtūm ja hā mē pahpumu nē mē pamā mē pahte amnhī nhīpēx nyw jagjē pu mē ŷ hā tām amnhī nhīpēx o ri papa. Amnepēm tanhmā kot mē pakukamā hamaxpēr to xā hkōt. No na hte tanhmā mē pahte amnhī krā hkōt amnhī nhīpēx to hā mē pahpumunh kōt mē pahto hkra hkēt nē.

Tīrtūm krajaja te kot axpēn to htō nē htōx pyrāk

Karatas 3.28; Korosē 1.21-23

¹¹ E mē apē Ijaew kēt xwūnhjaja. Na ka htem mē akatorxā nhōhy rūm ajapōj hāmri nē mē ixpē Ijaew pyrā nē amnhī my kwryt kà jakār kēt nē. Jakamā na pre ixkwūjaja mē akurom amnhī jakār ā amnhī to jarkrar o ri pa nē amnhī jarēnh o:

—Ra mē ixte amnhī my kwryt kà jakār ā mē xpumunh kōt na hte Tīrtūm mē ixto hkra. Tā Ijaew kēt xwūnhjaja kot mē ixkīnhā amnhī jakār kēt jakamā mē kēp hkra hkēt. Nē māānēn mē kēp mē pahkwū hkēt.

Anhūr o mē ajarēnh o pa. ¹² ām hāmri na prem mē apē mē ixkwū hkēt ā mē ajarē. Na pa prem mē akurom amnhī my kwryt kà jakā nē mē akurom Kris kamā ijamak o ri ixpa. Jakamā nhūm Tīrtūm kot mē ixto mex ā amnhī jarē pa mē mē apyrā nē tee ri amnhī kukamā ijamaxpēr o ri ixpa hkēt nē. Nē mē akurom amnhī kaxyw Tīrtūm mā ijamaxpēr. Nā ām hāmri na prem mē apē mē ixkwū hkēt ā mē ajarē. ¹³ Te Tīrtūm kax ā ri mē apa pyrāk tā ka mē arī ā amnhī nhīpēx anhūr kēt nē. Jejus Kris kot mē panē htyk nhūm mē ate hkōt amnhī xunhwūr jakamā ra mē apē hkwyū. Jao arī hkax ā ri apa hkēt nē. Te mē ixpē Ijaew kwū pyrā nē hpānhā kuri ra ri apa pyrāk.

¹⁴ Jakamā na pu htem Kris kukwak ri ra axpēn nhīpēx nyw o axpēn nhīpēx o ri papa. Mē ixpē Ijaew-jaja nē mē apē Ijaew kēt xwūnhjaja na pu htem te ra ixkre tipxi kamā ri papa pyrāk. Nom amnepēm na pu prem ā axpēn nhīpēx anhūr kēt nē. Mē pahte amnhī nhīpēx tūmja ahpūnhā na pre. Na pu prem pamā axpēn kurē nē axpēn kax ā ri papa. Nē nhūri axpēn pumu nē te pahte axpēn pumunh kēt pyrā nē nhām parit o ri mra. Tā nhūm Kris mē panē htyk o mē pahte amnhī tom-nuj piitā hpānhā amnhīrer pa. Mē ixpē Ijaew nē mē apē Ijaew kēt xwūnhjaja. Nē htyk o te ra kot mē pahte axpēn nhōrkwū hwūr axpēn wūr o papa pyrāk. Jao mē pamā axpēn kurē ho hapēx nē hpānhā tām axpēn kaxyw mē paxunhwū pu mē hpānhā axpēn to mex rāhā ho ri papa. ¹⁵ Amnepēm Mojes kot Tīrtūm nhū hā mē ixpē Ijaew mē ixte tanhmā amnhī nhīpēx to ho ixpa hā karōja. Na pa prem mē apē Ijaew kēt xwūnhjaja mē ate Tīrtūm kōt amnhī nhīpēx kēt ā mē apumu nē mē akamā inhgryk nē. Nē axpēn mā mē ajarēnh o:

—Nā mē pahkīnhā mē kot Mojes kapēr kōt amnhī nhīpēx kēt jakamā koja Tīrtūm mē ho hkra hkēt nē.

Anhūr tā nhūm Kris mē pahwūr wrū nē mē pahpiitā mē panē htyk o mē pahte hkōt amnhī xunhwūr ā mē pahpumunh kōt pix mā mē pahto Tīrtūm kra. Jakamā pa mē axte mē ate Mojes kapēr kōt amnhī nhīpēx kēt ā mē apumunh kōt mē apē Tīrtūm kra hkēt ā mē ajarēnh kēt nē. Hāmri nē mē ixpē Ijaew nē mē apē Ijaew kēt xwūnhjaja pu mē axte axpēn kām pagryk o ri papa hkēt nē. Ra te ixkre tipxi kamā mē pahte axpēn kōt ri papa pyrāk.

¹⁶ Kris na pre pī kahpa hā mē panē htyk o ā mē panhīpēx anē nē mē pahte axpēn kōt amnhī nhīpēx o papa kaxyw mē paxunhwū. Nom

Tirtüm jamaxpër xà hkôt ã mẽ panhîpêx anê. Jakamã na pu htem arî pamã axpên kurê ho papa hkêt nê. ¹⁷ Na pre Kris mẽ pahwÿr wrÿ nê ã mẽ panhîpêx anê. Mẽ apê Ijaew kêt xwÿnhjaja mẽ ate kormã Tirtüm kapêr mar kêt xwÿnhjaja nê mãânên mẽ ixpê Ijaew mẽ ixte kapêr mar mex xwÿnhjaja nhùm pre akupÿm tãm mẽ pahte axpên kôt amnhî nhîpêx o papa kaxyw mẽ paxunhwÿ. ¹⁸ Hãmri nhùm Tirtüm mẽ pahwÿr amnhî Karô rê nhùm mẽ pahkarô mã agjê. Kris kukwak ri pix mã mẽ pahwÿr kurê pu mẽ ý hã paxàmnhîx ri kãm tanhmã amnhî jarênh to ho ri papa. ¹⁹ Hãmri nê te mẽ pahpê nhãm axpên kaxyw mẽ urojê pyrã nê axpên kàx ã ri papa hkêt nê.

Te mẽ pahpê Tirtüm nhôrkwÿ pyrãk ã mẽ pajarênh

Wam Korît 3.16; Sikün Korît 6.16; Wam Pêtre 2.5

²⁰ Nê mẽ pahpê Jejus kwÿ jakamã te mẽ pahte ixkre tipxikamã ri papa pyrãk. Nê te mẽ pahpê ixkre nhîpêx mex pyrãk. Nê Kris te kêp ixkre hkrax mã kuhê xà nê kÿxpê kãm nôr xà maatiya pyrãk. Nê mẽ kot Jejus nhÿ hã mẽ ahkre xwÿnhjaja nê mẽ kot Tirtüm nhÿ hã kapêr o ri mẽ pa xwÿnhjaja te mẽ kêp ixkre nhôkwa êja pyrãk. Nê mẽ papajaja te mẽ pahpê ixkre nhîmök ã pôja pyrãk. ²¹ Ixkre mã kuhê xà nê kÿxpê kãm nôr xà maati kukwak ri pix mã na hte ôkwa ê nê hã pôja kÿxpê mex nê axpên tã harir. Ja pyrã nê ãm Kris kukwak ri pix mã na pu htem te ixkre tipxi kamã ri papa pyrãk o axpên nhîpêx mex o ri papa. Te mẽ pahpê mẽ kot ixkre rax kumrêx nhîpêx o môr nhùm muxre nê ãm xwÿnhnta pyrãk.

²² Na htem amnhîm ôrkwÿ nhîpêx nê hipêx pa nê hwÿr agjê nê kamã pa ho pa. Ja pyrã nê na hte Tirtüm Karôja mẽ pahpê hkrajê karô mã agjê nê mẽ pakamã pa ho pa. Te

mẽ pahpê Tirtüm nhôrkwÿ pyrãk. Mẽ ixpê Ijaew nê mẽ apê Ijaew kêt xwÿnhjaja Tirtüm mã te mẽ pahpê ôrkwÿ pyrãk.

3

Pawre kot Ijaew kêt xwÿnhjê mã mẽmoj to amnhîrît ã harênh

Rômãn 15.14-21; Korosê 1.24-29

¹ Tã te mẽ pahpê Tirtüm nhôrkwÿ pyrãk jakamã na pa hte jar mẽ hagiênh xà kamã mẽ ato hwÿr rãhã ho ixkrî. Na pa pre hte ma mẽ apê Ijaew kêt xwÿnhjê hwÿr ixpa nê ixprî hã mẽ amã Jejus kapêr jarênh o ri mẽ akôt ixpa. Mÿrapê na prem ixpynê nê ijaxã pa arî jar ixkrî ho ixkrî. Nom arî amnhî kaxyw Tirtüm mã ijamaxpêr tÿx pê mẽ ato hwÿr rãhã ho ixkrî. ² Na pre kãm ijapê hã mẽ apê Ijaew kêt xwÿnhjê kaxyw ixãm. Ma ixte ri mẽ akôt ixpa nê mẽ amã kapêr jarênh o ri mẽ akôt ixpa kaxyw. Ra mẽ ate ja hã ijarênh mar mex. ³ Na pre mẽ pahto hpimràatã tanhmã mẽ pahto mex to hã inhmã amnhî to amnhîrît pa pre omu. Mẽ kajaja nê mẽ pajaja. Pika piitã hkôt mẽ piitãã tanhmã mẽ ho mex to. Na pre kormã kot mēhō mã ja jarênh kêt tã inhmã ho amnhîrît pa pre omu. Tã kagã ja kamã kot paj mẽ amã hkwÿ ho grêre nê ho amnhîrît nê mẽ amã hã kagã ka mẽ ixpyrà nê kamã harê nê ama. ⁴ Ja aprî hã mar mex nê. ⁵ Amnepêm mẽ pahkêr ri mẽ pa xwÿnhjê mã Tirtüm kot ja ho amnhîrît kêt tã nhùm Karô mẽ ixkwÿjê kumrêx mã ho amnhîrît. ý hã kapêr o ri mẽ pa xwÿnh mẽ mẽ ixpê Jejus nhÿ hã mẽ ajahkre o mẽ ixpa xwÿnhjê kumrêx mã ho amnhîrît. Mẽ ixte kãm tanhmã amnhî nhîpêx to ho ixpa xwÿnhjê mã ho amnhîrît pa prem omu. ⁶ Na pre mẽ inhmã tanhmã mẽ ato amnhîrît to pa prem ja hã mẽ apumu nê mẽ akukamã ijamaxpêr o:

—Nà ãm hãmri koja xep Ijaew kêt xwÿnhjaja mẽ ixpê Ijaew pyrà nê Tirtùm kapêr ma nê Jejus Kris kôt amnhĩ xunhwÿ nhũm Tirtùm ã mẽ kot amnhĩ nhĩpêx anhÿr ã mẽ omu nê mẽ ixpyrà nê mẽ ho hkra nê mẽ ho mex o pa. Anê.

⁷ Tã nhũm Tirtũmja mẽ awÿr inhmê. Ixte mẽ amã ja jarênh o ri mẽ akôt ixpa nhũm tokyx mẽ ate mar kaxyw. Na pre ixto mex nê kãm hprãm xà hkôt mẽ akaxyw ixãm nê ixte ÿ hã kãm tanhmã amnhĩ nhĩpêx to ho ixpa kaxyw ixto ixihtÿx nê mẽ awÿr inhmê. ⁸ Tã mo kaxyw na pre mẽ akaxyw ixãm? Te ixte ja kaxyw inhmex kêt pyràk. Ixkwÿjaja ja kaxyw mex o kot ijakrenh tã nhũm pre ixpumu nê tanhmã hamaxpêr to nê mẽ akaxyw ixãm nê mẽ awÿr inhmê. Ixte mẽ amã mẽmoj mex kumrêx jarênh o ri mẽ akôt ixpa kaxyw. Na pre inhmã:

—Kêr ka ma Ijaew kêt xwÿnhjê hwÿr mō nê mẽ kãm Jejus Kris kapêr jarênh o ri mẽ hkôt apa. Nê mẽ kãm: “Kot kaj mẽ Jejus Kris kôt amnhĩ xunhwÿ hãmri nê kukwak ri amex nê apa.” Anê. ⁹ Koja mẽ apê Ijaew kwÿjê pyrà nê amnhĩ kaxyw Ixkra Kris kôt hamaxpêr nê hkôt amnhĩ xunhwÿ pa hã mẽ omu nê mẽ ho ixkra. Kormã aa ixte mẽ kãm ja hã amnhĩ to amnhĩrît kêt tã pa akumrêx mã harê. E ma mẽ hkôt ri mẽ kãm ã ijarênh anhÿr o ri apa kê mẽ ijarênh ma.

Anhÿr o mẽ pahto kator xwÿnhj maati ja inhmã kapêr. ¹⁰ Tã mẽmo kaxyw na hte mẽ pahto hpimràatã mẽ pahto hkra? Nà kaxkwa kamã kapêr o mẽ wryk xwÿnh pytâr xwÿnhjaja nê mẽkarõmnuti kot mẽ pahte amnhĩ nhĩpêx nyw o papa hã mẽ pahpumunh kôt axpên mã tanhmã Tirtùm jarênh to kaxyw. Nê harênh o:

—Kokÿÿ. Tirtùm àhpumunh tÿx o àhpumunh tÿx jakamã na hte tanhmã mẽ hipêx to nhũm mẽ tãm

amnhĩ nhĩpêx mex o pa. Nà Tirtùm àhpumunh o àhpumunh nê hihtÿx o hihtÿx. Anê.

Koja mẽ ate amnhĩ to mex o apa hã mẽ apumu nê ã axpên mã Tirtùm jarênh anê.

¹¹ Amnepêm kormã mẽmoj kêt ri na pre Tirtùm mẽ pakukamã mẽ pahtã tanhmã amnhĩ jarênh to hãmri nê Jejus kukwak ri ã mẽ panhĩpêx anê. Jao mẽ piitã mẽ kãm àhpumunh o àhpumunh ã amnhĩ to amnhĩrît. ¹² Tã pu mẽ ra Jejus kukwak ri amnhĩ kamã pamã Tirtùm pyra hkêt nê. Kãm mẽ pajapê kênã kot pu kêt mẽ ri amnhĩ kamã pamã uma ho papa. Kot puj mẽ paxãmnhix ri kãm amnhĩ jarênh rãhã ho ri papa. Te ra pahte hwÿr paxapir nê pano ho omunh nê kãm pakapêr o pakuhê pyràk. ¹³ Jakamã kwa kêr ka mẽ kot mẽ atã tanhmã ixtomnuj to hã ijarênhja ma nê tee ri ixkukamã ajamaxpêr hkêt nê. Kwâr mẽ mãmri tanhmã inhihêx to. ãm ixte mẽ amã amnhĩ jarênh ma nê axpên mã ijarênh o:

—Hêxta waa nê. Mãn Pawre kãm mẽ pajapê hã na pre amnhĩ grõnh kôt mẽ pamek kaxyw mẽ pahwÿr mra nê mẽ pamã Tirtùm kapêr jarênh o pa. Mê kot ja hã tanhmã hipêx kati hto htã nhũm jam urer kêt nê. Anê.

*Kris kãm mẽ pajapê kamã tanhmã mẽ panê amnhĩ nhĩpêx to
Juãw 3.16; Wam Juãw 3.1*

¹⁴ Nê na pa hte mẽ ato Mëpanhĩpêxã maati hwÿr kãm ixihtÿx o ixpa. ¹⁵ Kêp mẽ pahte hkôt amnhĩ xunhwÿr xwÿnhjê nhõ Pahi Maati mex kumrêx na. Kra hkwyjaja ra kaxkwa kamã kuri hÿr tũm nê pa ho pa nê arĩ pyka ja kamã mẽ pahpê hkwyjaja kormã jar papa. Nom te mẽ pahpiitã mẽ pahte ixkre tipxi kamã Tirtùm kôt ri papa pyràk. ¹⁶ Jakamã na pa hte mẽ ato hwÿr o:

—Pa Tirtùm. Nà amex o amex. E ot pa Epes nhô xwýnhjê ho awýr o ixkrî. Kwa kê Akarô mẽ kãm axâhpumunh xà hkwy gô kê mẽ akôt ri amnhî nhîpêx rãhã ho pa.

¹⁷—Nê kê mẽ amnhî kaxyw Kris kôt hamaxpêr tỳx o pa. Te mẽmo pĩ hpàr jarê kot pika kaxwýnh kãm pimãnh nê pika jamýnh tỳxta pyrâk. Nhũm kôk xàpêr tỳx tã tee kot kãm mẽnh prãmta pyrâk. Kê mẽ pĩ hpàr jarê kot pika jamýnh pyrã nê kãm axpên kĩnh o pa. Jao mẽmoj to axpên kutã nojarêr rãhã ho pa.

¹⁸⁻¹⁹—Nê kê krî piitã hkôt mẽ akrajê pyrã nê amnhî tã Kris kãm mẽ hapê htỳx o mẽ hapê htỳx ã amnhî pumu. Jao uràk nê mẽ kãm axpên kĩnh tỳx o pa. Nê kê mẽ ate amnhî nhîpêx pix o amnhî nhîpêx rãhã ho pa. Nê ajamaxpêr pix o hamaxpêr rãhã ho pa. Jao te mẽmo pĩ hpàrta pyrã nê akôt hihtỳx nê. Anê.

²⁰Kot puj mẽ ã amnhî to Tirtùm wýr anê nhũm mẽ pama nê ra àhpumunh tỳx xà ho ã mẽ panhîpêx anê. Ra kot mẽ pakamã pa ho pa kênã. ²¹ã Tirtùm Jejus Kris kukwak ri mẽ pahpê hkrajê nhîpêx anhýr jakamã kwa pu mẽ pahpê hkra xwýnhjaja kêr pu mẽ kãm mex o mex ã harênh rãhã ho papa. Nà kot puj mẽ ã kãm anhýr o papa.

4

Te ixkre tipxi kamã axpên kôt ri mẽ papa pyrâk

Rômãn 15.5; Piripos 2.1-4; Korosê 3.12-17; Wam Pêtre 3.8

¹Nê ra mẽ kot Kris ã ijaxàr nhũm ixkrî htã pa ã inhmã mẽ akĩnh xàj mẽ amã ixkapêr nê hã kagà anhýr o ixkrî. Kwa kêr ka mẽ Tirtùm kot amnhî nhîpêx kôt amnhî nhîpêx mex rãhã ho ri apa. Ja kaxyw na pre amnhî kôt mẽ awý ka prem hkôt amnhî xunhwý.

²Nê kêr ka mẽ amã amnhî to rax o akwýjê jakrenh prãm o ri apa hkêt nê. Nê mẽ agryk tokyx anhýr

kêt nê. ãm axpên kãm axukapri pix o mãn ri axpên kôt apa. Kê mẽhõ tee tanhmã ri mẽ ato htã ka mẽ kamã agryk tokyx anhýr kêt nê. ãm mẽ amã ri axpên hkĩnh pix o mãn ri axpên kôt apa. ³Ra Tirtùm Karô kot mẽ pahkarô mã gjêx par jakamã te mẽ pahte ixkre tipxi kamã axpên kôt ri mẽ papa pyrâk. Jakamã kêr ka mẽ axpên to mex pix kukamã mãn kêt ajamaxpêr o ri axpên kôt apa. Nê tãm axpên nhîpêx. Jao ajamakêtkati nê axãmnhix ri axpên kôt ri apa ho apa. ⁴Te mẽ pahte ixkre tipxi kamã ri axpên kôt papa pyrâk jakamã mẽ pahpiitã mẽ pahkarô kamã Tirtùm Karôja hkrî ho hkrî. Jakamã kot puj mẽ nhýrmã ma ô krî hwýr api nê kamã mẽ pamex rãhã papa ho papa.

⁵Nê mẽ panhõ Pahihtija ãm pixii. Na pu prem pahpiitã amnhî kaxyw hkôt pajamaxpêr jao ra mẽ pahpê hkraa. Tã mẽ pahpê Kris kwý hã amnhî to amnhîrit kaxyw na prem Tirtùm mã mẽ pahkrã kumrã. ã mẽ panhîpêx anhýr o axpên pyrâk o mẽ panhîpêx o pa anê.

⁶Nê Tirtùm haxwýja ãm pixii. Kêp mẽ pahpiitã mẽ panhîpêxã maati na. Na hte mẽ pahpê hkrajê mã àhpumunh xà hkwy gô pu mẽ ý hã kãm tanhmã amnhî nhîpêx to ho papa. Nhũm hte mẽ pahkarô kamã pa ho pa. Jakamã te mẽ pahte ixkre tipxi kamã ri axpên kôt papa pyrâk.

Kris kot ahpýnhã tanhmã mẽ pahto mex to hã harênh

Rômãn 12.3-8; Wam Korüt 12.1-12; Wam Pêtre 4.10-11

⁷⁻⁸Nê Tirtùm kapêr ã kagà htũm kot Kris jarênh kot:

Na pre mẽ kot kutã amnhî xunhwýr xwýnhjê pytãr pa nê ma akupým kaxkwa hwýr api.

Tã arî jar pika hkôt mẽ pahpê hkwyjê mã tanhmã mẽ pahto paxihtỳx to ho pa.

Na hte Krisja tanhmã mẽ pahte ahpÿnhã kãm amnhĩ nhĩpêx to ho papa kaxyw tanhmã mẽ pahto paxãhpumunh to. Kãm hprãm xà hkôt. ⁹ Tĩrtũm kapêr ã kagà htũm kot akupÿm kaxkwa hwÿr àpir ã harênh. Âm tapxipix na pre ã pika hwÿr wrÿk nê akupÿm kaxkwa hwÿr àpir anê. Na pre ty nhũm mẽ haxà. Hãmri nhũm akupÿm htĩr nê kato nê ma akupÿm api. Tapxipix na pre ã amnhĩ nhĩpêx anê. ¹⁰ Tã akupÿm kaxkwa hwÿr àpir xwÿnhnta na hte kaxkwa kamã nê pika hkôt amnhĩm mẽmoj piitã tanhmã ho ho hkrĩ. ¹¹ Na pre ahpÿnhã tanhmã mẽ pahto mex to. Ahpÿnhã mẽ pahte tanhmã kãm amnhĩ nhĩpêx to ho papa kaxyw na pre mẽ paxunhwÿ.

Nê mẽ pahkwÿjaja mẽ pahte krĩ piitã hwÿr pamrar nê ÿ hã hkrajê mã kapêr jarênh o papa kaxyw mẽ paxunhwÿ.

Nê mẽ pahkwÿjaja mẽ pahte krĩ pixi kamã Tĩrtũm nhÿ hã hkrajê jahkre ho ri mẽ hkôt papa kaxyw mẽ paxunhwÿ.

Nê mẽ pahkwÿjaja mẽ pahte pahprĩ hã mẽ piitã mẽ kãm tanhmã mẽ kot amnhĩ nhĩpêx to nê Jesus kôt amnhĩ xunhwÿr ã mẽ kãm harênh o papa kaxyw mẽ paxunhwÿ.

Nê mẽ pahkwÿjaja mẽ pahpê pastô kaxyw mẽ paxunhwÿ.

Nê mẽ pahkwÿjaja mẽ pahte mẽ kãm Tĩrtũm kapêr ã kagà jarênh o mẽ ahkre ho papa kaxyw mẽ paxunhwÿ.

¹² ã kot puj mẽ pahpiitã ahpÿnhã Kris mã tanhmã amnhĩ nhĩpêx to ho ri papa anê. Kot puj mẽ ã mẽ hipêx anhÿr o ri papa nhũm mẽ pamar tÿx nê. Nê gaa nê mẽ pahpyrà nê Tĩrtũm mã amnhĩ nhĩpêx mex o pa. Pu mẽ pahpiitã hkôt amnhĩ nhĩpêx mex o papa. ¹³ Nê gaa nê mẽ pahpiitã mẽ pahpê Tĩrtũm kra hã Jesus kot amnhĩ nhĩpêx kôt omunh mex nê. Nê amnhĩ kaxyw hkôt

pajamaxpêr tÿx nê. Jao te ra hkôt mẽ paxãptàr mex pyràk. Nê te kot amnhĩ nhĩpêx pyràk o amnhĩ nhĩpêx.

¹⁴ Mèhprĩrejaja na htem nhãm hamaxpêr nê nhãm hamaxpêr o pa. Te kôk xàpêr nê nhãm mẽmoj to mrar nê nhãm mẽmoj to mrar pyràk. Nom kêr pu mẽ ho mẽ uràk kêt nê. Âm Kris kôt pix mã pajamaxpêr tÿx o papa. Jakamã nhũm mẽ tee ri mẽ pahte hkwÿm ri tanhmã amnhĩ tomnuj to hprãm xà tanhmã mẽ pahto kaprÿ. Nom kêr pu mẽ mẽ mar kêt nê. Âm pakatãt kôt mẽ àptàr kot amnhĩ nhĩpêx o amnhĩ nhĩpêx o papa. Jao Kris kôt axpên to paxihtÿx o papa. ¹⁵ Tãm axpên mã pakapêr nê pamã axpên kĩnh o axpên mã paxêx kêt nê. Kwa kêr pu mẽ ã amnhĩ nhĩpêx anhÿr o mãn papa. Jao te mẽ pahkrã Kris kot amnhĩ nhĩpêx pyràk o amnhĩ nhĩpêx mex o mō.

¹⁶ Nê mẽ panhĩ kamã tanhmã mẽ pakuteja piitã na hte mẽ pahkrã kamã mẽ pajamaxpêr xà hkôt axpên kôt ahpÿnhã tanhmã axpên to ajuta hto. Te ixkre pixi kamã mẽ pahte axpên kôt tanhmã axpên to ajuta hto ho ri papa pyràk.

Kris kôt mẽ pahte amnhĩ nhĩpêx nyw ã mẽ pamã karō

Korosê 3.5-11; Wam Pêtre 4.7

¹⁷ E kot paj Pahihti nhÿ hã mẽ amã mẽmoj jarê nê nê mẽ amã ixkapêr kãm ixihtÿx nê ka mẽ inhma. Nà kêr ka mẽ axte mẽ kêp Tĩrtũm kra hkêt xwÿnhjê kot amnhĩ nhĩpêx o amnhĩ nhĩpêx o ri apa hkêt nê. Na htem htÿx ri tanhmã hamaxpêr punuj to ho ri amnhĩ tomnuj o pa. ¹⁸ Jao Tĩrtũm mã hamaxpêr kêt nê pa. Kãm hamaxpêr prãm kêt kumrêx nê pa. Te mẽ kot omunh nê nhãm hkrã pyràk o amnhĩ nhĩpêx. Rÿ te mèhō wa kot axpên kãm gryk kãm axpên nhĩpêx pyràk o hipêx. Jao te kamãt kô kamã ri pa pyrà nê

Tirtüm kot amnhĩ nhĩpêx pumunh kêt nê pa. Jakamã koja mẽ nhỹrmã kuri htĩr tũm nê pa hkêt nê. ¹⁹ Na htem tanhmã amnhĩ tomnuj to htã amnhĩ kamã hpijaãm kêt nê pa. Nê axpên kamã hpijaãm kêt rãhã ho pa. ãm amnhĩ pix kukamã hamaxpêr nê tanhmã amnhĩ tomnuj to ho ri pa. ²⁰⁻²¹ Nom Jejus Krisja ã kot amnhĩ nhĩpêx anhỹr kêt. Mẽ kurom tãm kot amnhĩ nhĩpêx mex o pa xwỹnh nê tãm kapêr o pa xwỹnh na. Na pa pre ma mẽ awỹr mõi nê ixprĩ hã mẽ amã ja hã harê ka prem inhma nê inhmar tỹx nê. ²² Na pa pre mẽ amã:

—Kwa mẽ ri axte amnhĩ nhĩpêx tũm kôt amnhĩ nhĩpêx o ri apa hkêt nê. Ja na omnuj tỹx. Na ka prem ã amnhĩ nhĩpêx anê nê ajamaxpêr punuj pix o ri apa. Jao amnhĩ tomnuj rãhã nê. Tã kêt ka mẽ amnhĩ nê awry hã mẽnh pyrã nê axte ã amnhĩ tomnuj anhỹr o ri apa hkêt nê.

²³ —Nê kêt ka mẽ axte mẽ ajamaxpêr tũm nê mẽ ate amnhĩ nhĩpêx tũm kôt ri amnhĩ nhĩpêx kêt nê. Nê mẽ ajamaxpêr nyw nê mẽ ate amnhĩ nhĩpêx nyw kôt pix mã ri amnhĩ nhĩpêx o ri apa. Te mẽ kot mẽ ê htũm kwryñh nê rênh nê hpãnhã nyw jagjêx nê ri hã pata pyrã nê ãm amnhĩ nhĩpêx nyw kôt pix mã amnhĩ nhĩpêx o ri apa. ²⁴ Mẽ ajamaxpêr nyw nê mẽ ate amnhĩ nhĩpêx nywja axtem na. Te Tirtüm jamaxpêr nê kot amnhĩ nhĩpêxta pyrãk. Jakamã kwa kêt ka mẽ kãm hprãm xã hkôt pix mã tanhmã amnhĩ nhĩpêx to ho ri apa. Jao kãm amnhĩ nhĩpêx mex o ri apa. Nê kapêr kôt ri amnhĩ nhĩpêx. Anê.

Na pa pre ã mẽ amã ixkapêr anê. Tã kêt ka mẽ arĩ ixkapêr kôt pix mã amnhĩ nhĩpêx. ²⁵ Mẽ pahpê Kris nhĩ jakamã te pahte ixkre htĩpxi kamã axpên kôt amnhĩ nhĩpêx pyrãk jakamã kwa mẽ axte axpên mã mẽmoj to axêx kêt nê. Nê

amarĩ axpên xõ ri axpên mã mẽmoj to axêx kêt nê. ãm tãm axpên mã mẽmoj jarênh o ri apa.

²⁶ Nê kot kaj mẽ mẽmoj tã agryk japêr. Rỹ mēhõ kamã agryk rỹ amarĩ agryk japêr. Tã kêt ka ho ajapêx tokyx anê agryk japjê hkêt nê. Kêr kê kormã kamãt kêt ri ka akupỹm tãm akrã nhũm ja amã mex nê. ²⁷ Nom kot ka mẽ arĩ kamã agryk o ri apa nhũm mẽkarõmnuti nhõ pahi Satanastija ja hã mẽ apumu nê te mẽ ate amnhĩ tomnujta ã mẽ apynênh pyrãk o mẽ anhĩpêx. Ka mẽ ra hkôt tanhmã amnhĩ tomnuj to. Ja pymaj kêt ka mẽ agryk japjê hkêt nê. Satanasti kãm hprãm xã hkôt ã amnhĩ nhĩpêx anhỹr kêt nê.

²⁸ Nê mẽ axãhkĩnh o mẽ apa xwỹnhjaja kêt ka mẽ axte mẽ kêt axãhkĩnh hkêt nê. Mẽmoj tã apê nê hpãnhã kãxpore jamỹ nê ho amnhĩm awjaprõ. Nê mẽ kêt amrakati xwỹnhjê mã mẽmoj japrõ o ri apa. Kêt ka mẽ ate amnhĩ nhĩpêx tũmta pãnhã ã amnhĩ nhĩpêx nyw o amnhĩ nhĩpêx anhỹr o ri apa.

²⁹ Nê kêt ka mẽ amã axpên kĩnh kamã tãm axpên mã akapêr o ri apa. Nê akapêr mã agêt kãm ri axpên mã akapêr kêt nê. ãm axpên mã akapêr mã aprĩ ho axpên mã akapêr. Nê mẽ amã axpên kĩnh nê mẽ amã axpên to mex pix prãm xãj tãm axpên mã ri akapêr o ri apa.

³⁰ Tirtüm na pre mẽ pahwỹr amnhĩ Karõ rē nhũm mẽ pahpê hkra hã mẽ pahkarõ mã agjê nê mẽ pakamã hkrĩ ho hkrĩ. Koja mẽ pakamã hkrĩ ho hkrĩ rãhã nhũm nhỹrmã Tirtüm amnhĩ wỹr mẽ pahto api pu mẽ kuri pahĩr tũm nê papa ho papa. Jakamã kwa kêt ka mẽ tanhmã amnhĩ tomnuj to ho amnhĩ kamã Tirtüm Karõ mã hkaprĩ jagjênh kêt nê. Nê kãm hpijaãm jagjênh kêt nê. Koja mẽ pahte amnhĩ tomnuj ã mẽ pahpumu nê mẽ pahkaga hkêt tã

tee ri ja hã mẽ pahpumu nẽ hkaprĩ nẽ. Jakamã kër pu mẽ ãm kãm hprãm xà hkõt pix mã tanhmã ri amnhĩ nhĩpêx to ho ri papa.

³¹ Nẽ kër ka mẽ axte ri axàhkurê ho ri apa hkêt nẽ. Nẽ agryk kãm axpẽn mã tanhmã akapër punuj to hkêt nẽ. Rỳ axpẽn japrỳ ho ri apa hkêt nẽ. Nẽ atỳx ri axpẽn tâ apër o apikênh kêt nẽ. Nẽ ri axpẽn tâ mẽ kãm axàmnhênh kêt nẽ. ³² Kêt mẽ ãm xpẽn to mex pix nẽ axpẽn kãm axukaprĩ ho ri apa. Nhũm mẽhõ tanhmã mẽ ato ka mẽ ãm amnhĩ tâ omu nẽ tanhmã ho hkêt nẽ tanhmã kot atoja ho ajamakêtkati kurê kumrêx. Tĩrtũm na pre Kris kukwak ri mẽ pahte amnhĩ tomnuj grành pa nẽ axte kãm hamaxpër kêt nẽ. Tã kër ka mẽ uràk nẽ mẽhõ kot tanhmã atomnuj tota tokyx ho ajamakêtkati nẽ axte kãm ajamaxpër kêt nẽ.

5

¹ Nẽ koja mẽhõ kãm hkra japê nhũm amnhĩ tâ omu nẽ hkĩnh nẽ. Hãmri nẽ nhỹrmã hkra nẽ amnhĩ pyrã nẽ kãm hapê nẽ. Ja pyrã nẽ Tĩrtũm kãm mẽ pahpê hkwyjê japê jakamã kër pu mẽ amnhĩ pyrã nẽ pamã pahkwjê hkĩnh tỳx o papa. ² Kris haxwỳja kãm mẽ pajapê jakamã na pre htyk o mẽ panê mẽ pahte amnhĩ tomnuj pãnhã amnhĩrer pa. Kêp Tĩrtũm Kra htã amnhĩ mex pix kukamã hamaxpër kêt nẽ ã mẽ panê amnhĩ nhĩpêx anẽ. Tã ã kãm mẽ pajapê anhỹr jakamã nhũm Tĩrtũm ja hã omu nhũm ja kãm mex nẽ. Te ho mẽ hkuxwa xà mex kuxwa pyrãk. Jakamã kër pu mẽ amnhĩ tâ omu nẽ uràk nẽ pamã axpẽn kĩnh o axpẽn to mex o mãn ri papa.

Mẽ pahte amnhĩ tomnuj kaga hã kot mẽ pamã karõ

Sikũn Korõt 6.14-7.1; Korosê 3.16-17; Wam Juãw 1.5-10, 2.15

³ Nẽ mẽ pahpê Tĩrtũm kra jakamã kër pu mẽ pahprõ pix tãnopxar o

ri papa nẽ nhãm mênijê hõ kamã pahpijaam kêt o ri papa hkêt nẽ.

Nẽ kër pu mẽ amnhĩ pix kukamã pajamaxpër kêt nẽ. ãm ja ho anhỹr hkêt kumrêx. Mẽ pahpê Tĩrtũm kra kênã kot pu kêt axtem nẽ ã amnhĩ nhĩpêx anhỹr o ri papa. Tĩrtũm krajaja na htem ã amnhĩ nhĩpêx anhỹr kêt nẽ.

⁴ Nẽ mãănên mẽ pakapërja. Kër pu mẽ ri tanhmã axpẽn mã pakapër punuj to hkêt nẽ. Nẽ ri axpẽn japrỳ hkêt nẽ. Nẽ amnhĩ krã hkõt pahtỳx ri tanhmã pakapër to hkêt nẽ. ãm tãm axpẽn mã pakapër mex nẽ axpẽn mã Tĩrtũm mex o mẽ ã harênh o ri papa.

⁵ Nẽ Tĩrtũm kapër kõt amnhĩ nhĩpêx kêt xwỳnhjaja nẽ axpẽn kãm mẽ hpijaam kêt xwỳnhjaja nẽ amnhĩ pix kukamã mẽ hamaxpër o pa xwỳnhjaja. ã mẽ kot amnhĩ nhĩpêx anhỹr xwỳnhjaja kêp Tĩrtũm mẽ Kris wa hkra hkêt. Na htem ã amnhĩ nhĩpêx anhỹrja gryk ã wa kãm hamaxpër kêt nẽ.

⁶ Nẽ koja nhỹrmã mẽhõ mẽ awỳr mõi nẽ mẽ ate tanhmã amnhĩ tomnuj to prãm xà hêx rom amã kapër nẽ mẽ amã:

—Kwa mon ka hte mẽ ixpyrà nẽ ã amnhĩ nhĩpêx anhỹr kêt nẽ? Ja mex kênã. Anẽ.

Koja ã mẽ amã kapër anẽ ka mẽ ama nẽ ãm ama. ã mẽ kot amnhĩ nhĩpêx anhỹr xwỳnhjaja koja Tĩrtũm nhỹrmã ja hã mẽ homnuj tỳx kumrêx. ⁷ Jakamã kwa kër ka mẽ ate ho mẽ kot amnhĩ nhĩpêx pyrãk pymaj mẽ hkõt ri apa hkêt nẽ. Kwarĩ ho kwarĩ.

Mẽ pahte amnhĩ nhĩpêx nyw jarênh

Juãw 1.4, 3.19, 8.12, 12.35; Rõmãn 13.12; Wam Tesarõn 5.5; Wam Juãw 1.5

⁸ Amnepêm kormã mẽ ate Tĩrtũm kõt amnhĩ xunhwỳr kêt ri na ka prem te kamã kõi kamã ri apa pyrã nẽ atỳx ri tanhmã amnhĩ tomnuj to ho ri apa. Tã ra Jejus kõt amnhĩ

xunhwý hāmri nē te hirā kamā mē apa xwýnh pyrāk. Jakamā kwa kêr ka mē hpānhā Tirtūm kām hprām xā hkôt pix mē mām ri amnhī nhīpêx o apa. Ra mē apê hirā kamā mē apa xwýnh kēnā. ⁹ Kot kaj mē ã amnhī nhīpêx anē nē tām amnhī nhīpêx mex nē tām akapēr o apa. ¹⁰ Jao Tirtūm kām hprām xā hkôt pix mē amnhī nhīpêx o ri apa ¹¹⁻¹² nē te kamāt kô kamā ri mē pa xwýnhjaja kot amnhī nhīpêx pyrāk o amnhī nhīpêx kêt nē. ã mē kot amnhī nhīpêx anhÿr xwýnhjaja na htem hpimxur pê tanhmā amnhī tomnuj tÿx to ho pa. Nom kot paj ixprī hā mē amā tanhmā mē kot amnhī tomnuj to hā mē harēnh kêt nē. Kot pa mē amā harē nē ixpijaàm tÿx nē. Ixte harēnh mē xwýnhja omnuju. Tā kêr ka mē urāk nē ã amnhī nhīpêx anhÿr kêt nē. ãm mē noo mē tām ri amnhī nhīpêx o ri apa. ¹³ Mē kot ja hā mē apumunh nē tee ri tanhmā kot amnhī tomnuj to hkukamā hamaxpēr kaxyw. Jao amnhī tomnuj kaga japêr. ¹⁴ Te mē kot kanē hpôk rax kām mēmoj piitā omunh mexta pyrāk. Tirtūm kapêr ã kagā htūm kot ja jarēnh kot:

Mē amā Tirtūm prām kêt xwýnhjaja te ra mē atyk nē mē anhīkwý pyrāk.

Nē te kamāt kô kamā mē anhôt nē mē anhīkwý pyrāk.

Jakamā kwa te mē akrā hapôx nē kånhmā mē akrī pyrāk o amnhī nhīpêx nē Tirtūm kôt amnhī xunhwý.

Kê Kris tanhmā mē akrā hto ka mē te myt kato nhūm mē ate arīgro hā ri apa pyrāk o amnhī nhīpêx. Anē.

Tirtūm krajaja kot tanhmā amnhī nhīpêx to hā mē kām karō Korosé 4.5; Sikūn Ximotre 4.2

¹⁵ Nē kwa kêr ka mē amnhī pumunh mex o ri apa. Nē mē ri htÿx ri mē kot amnhī nhīpêx xwýnhjê hkôt amnhī nhīpêx kêt nē.

Nē ãm amnhī to mex pix o ri apa. ¹⁶ Na htem ra Kris ã mē pahtomnuj o pa pu mē pamex kêt nē ri papa. Tā nom kêr pu mē apkati mē arī Tirtūm mē tanhmā amnhī nhīpêx to ho papa mē panhūrer kêt nē.

¹⁷ Nē ãm Tirtūm pix mē amnhī jarēnh o ri papa nē kām:

—Pa Tirtūm. Inhmā akôt pix mē amnhī nhīpêx prām jakamā kwa ixte amā mēmoj to anhÿr kaxyw ixkrām ijamaxpēr mex jagjê nē ho amnhīrit mex pa tanhmā amā amnhī nhīpêx to ho ri ipxa.

Anhÿr o amnhī to kuwý. Nom kêr pu mē pahtÿx ri pajamaxpēr kôt tanhmā kām amnhī nhīpêx to hkêt nē.

¹⁸ Nē kêr pu mē ri pahpipānh o papa hkêt nē. Kwarī ho kwarī. Kot puj mē ã amnhī nhīpêx anē nē te kagôxyhti kot amnhī tã mē pahkaxpre pyrāk o mē panhīpêx pu mē tee ri pamā hkaga hprām kaprÿ. Te kot amnhīm mē pahto arīk pyrāk o mē panhīpêx nhūm ja mex kêt nē. Na htem pipānh kām hamaxpēr mex kêt nē ãm htÿx ri tanhmā amnhī nhīpêx to ho pa. Tā kêr pu mē ã amnhī nhīpêx anhÿr hkêt nē ãm Tirtūm Karō pix hkôt mām ri amnhī nhīpêx o ri papa.

¹⁹ Nē kêr pu mē axpēn wÿr akuprō nē pahkīnh kām Tirtūm mē mex o mex ã harēnh pê ho pagrer o pahkrī. ²⁰ Nē mē pamex nē ri papa rÿ pahpunuj nē ri papa htā arī kām mex o mex ã harēnh rāhā ho ri papa. Kêp Mēpanhīpêxā maati jakamā mē pahpê Pahihti Jejus Kris kwý hā pu mē kām mex ã harēnh rāhā ho papa nē aa ho pajamakêtkati hkêt nē.

²¹ Nē kêr ka mē Kris ã apijaàm rāhā o ri apa. Jao axpēn kôt ajamaxpēr nē axpēn kôt ri amnhī nhīpêx mex o ri apa.

*Tanhmã mẽ hprõ nẽ mẽ mjên kot
axpën nhĩpêx to hã mẽ kãm karõ*

*Wam Korõt 11.3; Korosẽ 3.18-19;
Wam Pẽtre 3.1-7*

²² Nẽ kêr ka mẽ anijaja mẽ amjên ã apijaam o ri apa. Nẽ mẽ hamaxpêr mex ã mẽ omu nẽ mẽ hkõt ri amnhĩ nhĩpêx o ri apa. Te mẽ ate Pahihti Kris kapêr kõt amnhĩ nhĩpêx o ri apata pyræk.

²³ Kris kêp mẽ pakamã ukapri xwýnh nẽ kêp mẽ papytâr xwýnh jakamã te kêp mẽ pahpiitã mẽ pahkrã pyræk. Nẽ mẽ papajaja te mẽ pahpê i pyræk. Jakamã na pu htem pahpê ija te mẽ pahkrã kot tanhmã hamaxpêr to xà hkõt amnhĩ nhĩpêx o papaja pyræk. Ja pyrã nẽ kêr ka mẽ anijaja mẽ amjên jamaxpêr mex ã mẽ omu nẽ mẽ hkõt amnhĩ nhĩpêx mex nẽ. ²⁴ Mẽ pahpê Kris kwý jakamã na pu htem hkõt amnhĩ nhĩpêx mex o ri papa. Ja pyrã nẽ kêr ka mẽ amjên kõt amnhĩ nhĩpêx mex o ri apa.

²⁵ Nẽ mẽ amyjaja. Kêr ka mẽ amã aprõ hã ma ho ri apa. Te ho Kris kot mẽ pahtã ma ho pata pyræk. Na pre kãm mẽ pajapê xàj amnhĩ grõnh kõt mẽ pahwýr wrý nẽ mẽ panê ty. Tã kêr ka mẽ uræk nẽ ã amã aprõ hã ma ho apa anê. ²⁶ Na pre Kris kãm mẽ pajapê xàj mẽ pahte amnhĩ tomnuj pẽ mẽ pahpytã. Te mẽhõ my kãm mẽhõ ni hkĩnh nẽ mẽmoj punuj pẽ utâr nẽ ho hprõta pyræk. Nhũm te mẽ kot axpën mã wa rer kaxyw nhũm nija ma gõx mã htem nẽ wýr nẽ amnhĩ to mex nhũm mẽ kot axpën kaxyw wa ho mexta pyræk. Hãmri nẽ te ra axpën mã wa rer nhũm wa kot axpën kõt pa ho pata pyræk.

Ja pyrã nẽ na pre Jejus kãm mẽ pajapê nẽ kãm amnhĩ kuri mẽ papa ho mẽ papa hprãm xàj mẽ pahwýr wrý nẽ mẽ pahte amnhĩ tomnuj pẽ mẽ pahpytã nẽ mẽ pamã Tĩrtũm kapêr jarẽnh o pa. Tã mẽ pahpê hkrajaja na pu htem kapêr ma

nẽ hkõt amnhĩ nhĩpêx o papa ho amnhĩ tomnuj kaga. Te gõx kãm mẽ paxwýr nẽ mẽ pahte amnhĩ nẽ amnhĩ grã htyk kuhõnh par pyræk. Jao Tĩrtũm kapêr kõt pix mã amnhĩ nhĩpêx o ri papa. Te ra paxwýr nẽ amnhĩ nẽ tanhmã mẽ pahte amnhĩ tomnuj to grãnh par pyræk. Nẽ te mjên mã xwýnh wýr nẽ amnhĩ to mex pyræk.

²⁷ ã mẽ pahte amnhĩ nhĩpêx anhýr jakamã te mẽ pamex nẽ ri papa pyræk. Hãmri nhũm Krisja ja hã mẽ pahpumu nẽ kãm mẽ pajapê htýx nẽ. Jakamã koja nhýrmã akupýn wrý nẽ ma akupým amnhĩ kõt mẽ pahto api pu mẽ kuri pa htĩrtũm nẽ papa ho papa.

²⁸ Nẽ xà mẽ amyjaja mẽ amã amnhĩ japêê? Nã mẽ amã amnhĩ japê ho na ka htem amã amnhĩ tã ma ho apa. Tã kêr ka mẽ aprõ nhĩpêx o te ka amã amnhĩ tã mata pyræk. Jao tãm mẽ hipêx o ri apa. Te war apixire nẽ war apa pyræk o wa axpën nhĩpêx. Kot kaj mẽ tanhmã hipêx to nẽ te ate amnhĩ nhĩ tanhmã hipêx to pyræk. ²⁹⁻³⁰ Na htem amnhĩ nhĩ ho mex pix o pa nẽ kamã gryk kêt nẽ. Nẽ kãm prãm nẽ apku. Nẽ kãm kôr nẽ ixkõ. Nẽ nhýhýnh à nẽ amnhĩ kane. Na pu htem ã amnhĩ to mex o ri papa anê. Ja pyrã nẽ te mẽ pahpê Kris nhĩ pyræk jakamã na hte mẽ pahto mex o pa. Te mẽ pamã mẽ papa mẽ pahte amnhĩ nhĩ hã mata pyræk. ³¹ Tĩrtũm kapêr ã kagã htũm kot ja jarẽnh kot:

Koja mẽmyjê hõ hprõ kaxyw hãmri nẽ hipêêxà nẽ katorxà wa òrkwý kaga nẽ ãm hprõ kõt pix mã hpãnhã ri pa ho pa. Te wa tipxi nẽ ri pa pyræk o wa axpën nhĩpêx o pa. Anê.

³² Na pre Tĩrtũm ã ja jarẽnh anê. Kapêrja mex tã amnepê mã mẽ pa xwýnhjaja na prem hprĩ hã mar týx kêt nẽ. Na prem htýx mẽ mjên kot tanhmã mẽ hprõ nhĩpêx to pix ã

hkamnhix no ãm ja pix kêt. Määnên te mẽ pahpê Kris nhĩ pyrã nê tãm mẽ pahte amnhĩ nhĩpêx nê axpên nhĩpêx o papa hã ã mẽ pajarênh kot anhÿr. Te ixkre tipxi kamã mẽ pahte Kris kôt mẽ papa pyrãk o ã mẽ pajarênh anê.

³³ Jakamã kwa kêr ka mẽ amyjaja mẽ amã mẽ aprõ japê ho ri apa. Te ka amã amnhĩ tã ma pyrãk o mẽ hipêx. Jao tãm mẽ hipêx. Nê mẽ anijaja kêr ka mẽ ajaxwÿja mẽ amjên ã apijaam o ri apa.

6

Mẽ hkrajaja kot tanhmã hipêêxã nê katorxã nhĩpêx to hã mẽ kãm karõ Korosê 3.20-21

¹ Nê mẽ apê mẽ hkrajaja kêr ka mẽ anhĩpêêxã nê mẽ akatorxã wa kapêr ma nê hã ano htÿx nê wa hkôt ri amnhĩ nhĩpêx rãhã ho ri apa. Mẽ amã Pahihti Kris kôt amnhĩ nhĩpêx prãm xaj ã amnhĩ nhĩpêx anhÿr o ri apa. Kot kaj mẽ ã amnhĩ nhĩpêx anhÿrja o amnhĩ nhĩpêx mex o ri apa. ²⁻³ Tirtũm kapêr ã kagã htũm kot ja jarênh kot: Kêr ka mẽ anhĩpêêxã nê mẽ akatorxã wa kapêr ma nê wa hkôt ri amnhĩ nhĩpêx. Kot kaj mẽ ã amnhĩ nhĩpêx anê nê amex nê kritpêm atĩr nê ri apa ry nê.

Anhÿr jakamã kot kaj mẽ amã kritpêm atĩr nê ri apa hprãm hã kêr ka mẽ ã amnhĩ nhĩpêx anhÿr o ri apa. Kormã mẽ aprĩre htã ã amnhĩ nhĩpêx anê. E kêr ka mẽ ã mẽ anhĩpêêxã nê mẽ akatorxã nhĩpêx anhÿr o ri apa.

⁴ Nê mẽ apê mẽ hipêêxã nê mẽ katorxã kêr ka mẽ akrajê gryk kaxyw mẽ kãm apê o apikênh hkêt nê. Tãm mẽ kãm akapêr nê Pahihti Jeus kapêr o mẽ ahkre ho ri apa. E kêr ka mẽ ã akrajê nhĩpêx anhÿr o ri apa.

Mẽ pahte mẽ panhõ patrãw kapêr kôt amnhĩ nhĩpêx ã mẽ pamã karõ

Korosê 3.22-4.1; Wam Ximotre 6.1-2; Xitre 2.9-10; Wam Pêtre 2.18-25

⁵ Nê mẽ ate mẽ kãm mẽ axapênh o mẽ apa xwÿnhjaja kêr ka mẽ anhõ patrãw kapêr ma nê hkôt amnhĩ nhĩpêx mex o ri apa. Te mẽ ate Kris kapêr mar nê hkôt amnhĩ nhĩpêx pyrãk. Jao mẽ hã apijaam rãhã nê. ⁶ Nom kêr ka mẽ ãm mẽ noo mã pix mã ri mẽ kãm axapênh mex kêt nê. Määnên mẽ wa kre kamã mẽ kãm axapênh mex rãhã nê. Ja na Tirtũm kãm hprãm. Mẽ apê Tirtũm Kra Kris mã tanhmã amnhĩ nhĩpêx to ho apa xwÿnh jakamã kêr ka mẽ anhõ patrãw mã axapênh mex o ri apa.

⁷ Nê mẽ akĩnh kãm mẽ kãm axapênh mex nê. Te mẽ ate Pahihti mã akĩnh kãm tanhmã kãm amnhĩ nhĩpêx to pyrã nê mẽ mẽ kãm tãm amnhĩ nhĩpêx pê axapênh mex o ri apa. ⁸ Kot puj mẽ amnhĩ kaxyw Tirtũm mã pajamaxpêr pê pahkĩnh kãm tãm amnhĩ nhĩpêx o ri papa nhũm Pahihti ja hã mẽ pahpumu nê nhÿrmã ja hã mẽ pahto mex rax nê. Mẽ pahpê hkrajê piitãã. Mẽ pahte mẽ kãm paxapênh xwÿnhjaja nê amnhĩ mã mẽ paxapênh xwÿnhjaja nhũm nhÿrmã mẽ pahpiitã mẽ pahte tãm amnhĩ nhĩpêx xwÿnhjê ho mex rax nê.

Mẽõ patrãwjaja kot tanhmã kãm mẽ ãpênh xwÿnhjê nhĩpêx to

Korosê 4.1

⁹ Nê mẽ apê mẽ õ patrãwjaja kêr ka mẽ amã mẽ ãpênh xwÿnhjê ho mex nê mẽ ãpênh ã mẽ kãm axàkjêr o ri apa hkêt nê. Tãm mẽ hipêx. Kaxkwa kamã mẽ panhõ Pahi Maatija mãânên kêp mẽ õ Pahi Maati jakamã ã mẽ hipêx mex anhÿr o apa. Tãm na kãm mẽ pahpiitã mẽ pajapê ho axpên pyrãk. E kêr ka mẽ ã mẽ hipêx anhÿr o ri apa.

Tanhmã mẽ pahte Satanasti kutã amnhĩ to htỳx to hã mẽ pamã karõ

Rõmãn 16.20; Sikũn Korõt 10.3-5; Wam Tesarõn 5.8-11; Xiakre 4.7; Wam Pêtre 5.8-11

¹⁰ E kot paj hpãnhã tanhmã mẽ pahte mẽkarõmnuti nhõ pahi Satanasti kutã amnhĩ to htỳx to jarẽ ka mẽ inhma. Kêr ka mẽ Pahihti nhỹ hã kutã amnhĩ to htỳx rãhã nẽ apa. Ate tanhmã amnhĩ tomnuy to hprãm xàj tanhmã kot ato htã ka Tirtũm xihtỳx o anhõpinh xà kaxwỳnh kãm kutã amnhĩ to htỳx nẽ. Rỳ koja ate mẽmoj mex o anhỹr nẽ tanhmã ato ka mẽ amnhĩ tã hamaxpêr ã omu nẽ ãm omu nẽ arĩ Tirtũm xihtỳx nhỹ hã tãm ajamaxpêr mex rãhã ho ri apa. ¹¹ Na hte põristijaja pijapu kaxyw hãmri nẽ amnhĩ nẽ kàx o mẽ ê jagjê nhũm mẽ tee ri kãm mẽ hkamnhwỳr prãm hkapyrỳ. Tã ja pyrã nẽ koja Satanasti mẽ ate kapêr kõt tanhmã amnhĩ nhĩpêx to hprãm xàj tanhmã mẽ ato ka mẽ amnhĩ tã hamaxpêr ã omu hãmri nẽ Tirtũm xihtỳx nhỹ hã kutã amnhĩ to htỳx nẽ. Jao mẽ ate amnhĩ nhĩpêx nyw pix o amnhĩ nhĩpêx nẽ mẽ ajamaxpêr nyw pix o ajamaxpêr. Kot kaj mẽ ã amnhĩ nhĩpêx anẽ nhũm Satanasti tee ri tanhmã kãm mẽ ato hprãm hkapyrỳ.

¹² Mẽ pahpê Tirtũm kra jakamã mẽ kot mẽ pakutã amnhĩ xunhwỳr xwỳnh maatiijaja axtem na mẽ. Mẽ kêp mẽkarõmnuti jakamã mẽ pahkĩnhã mẽ ì hkêt. ãm mẽ hkarõ kaxkrit pix na mẽ. Na htem kõt kõt tanhmã amnhĩ tomnuy tỳx to ho pa. Nẽ mẽ hihtỳx. Na htem arĩ jar pika ja kamã mẽ kêp Tirtũm kra hkêt xwỳnhjê ho amnhĩptã nhũm htem mẽ hkõt ri htỳx tanhmã ri amnhĩ tomnuy tỳx to ho pa. Nom amnhĩ tã mẽ omunh kêt nẽ. ¹³ Jakamã kwa kêr ka mẽ Tirtũm kot mẽ akarõ mã amnhĩ Karõ jagjênh xwỳnhnta kõt pix mã amnhĩ nhĩpêx o apa. Jao mẽ ate amnhĩ nhĩpêx nyw kõt pix mã

mãn ri mẽ amnhĩ nhĩpêx. Kêr kê mẽkarõmnuti tee ri kãm tanhmã mẽ ato hprãm kaprỳ ka mẽ arĩ Tirtũm Karõ xihtỳx nhỹ hã kutã amnhĩ to htỳx rãhã ho apa.

¹⁴ Jakamã kwa kêr ka mẽ axkãm ajamak rom nẽ te ho sõrdat kot pijapu kaxyw ê jagjênh pyrãk o amnhĩ nhĩpêx. Na htem amnhĩ nẽ moux kà ho mẽ ê jagjê nẽ mẽ hpre xà ho amnhĩ pre hpa. Nẽ hipy kàx o mẽ hinõ kà jagjê. Hãmri nẽ rĩ kormã ma mẽ kãm mẽ hkurê xwỳnhjê kutã mra nẽ axpu. No mẽ kajaja kêr ka mẽ kurom amnhĩ krãm Tirtũm kapêr jaxàr tỳx nẽ hkõt pix mã ri ajamaxpêr rãhã ho ri apa. Nẽ hkõt ri amnhĩ nhĩpêx mex nẽ. Jao te sõrdat pijapu kaxyw kot amnhĩ nhĩpêxta pyrãk.

¹⁵ Na hte sõrdatjaja hpar kà jagjê nẽ aa hopoux kêt nẽ. ãm rãhã gõr nẽ hikwỳ. Jao ra mẽ kutã pijapu kaxyw amnhĩ grõnh rãhã gõr nẽ hikwỳ. Tã kêr ka mẽ ma mẽ kãm Jejus kot tanhmã mẽ panẽ amnhĩ nhĩpêx to hã harênh o apa kaxyw nẽ sõrdat pyrã nẽ amnhĩ grõnh kõt ma mẽ hwỳr apa nẽ amnhĩ kamã akahak kêt nẽ.

¹⁶ Nẽ sõrdatjaja na htem amnhĩ nẽ amnàr xà hã kàx po jamỳ nẽ ho kuhê nhũm mẽ tee ri kãm mẽ hkamnhwỳr prãm kaprỳ. Ja pyrã nẽ koja Satanasti tanhmã mẽ ato ka mẽ Tirtũm kêp mẽ anhõ pahi hã hihtỳx o kot Satanasti jakrenhja mã ajamaxpêr kurê kumrêx nẽ ãm hkõt pix mã amnhĩ nhĩpêx. Na hte Satanasti te kot mẽ pahwỳr krur rênh pyrãk o mẽ panhĩpêx. Jao xatã mẽ pahte Tirtũm kaga hprãm xàj tanhmã mẽ pahto. Nẽ mẽ pahte Tirtũm mã tanhmã amnhĩ nhĩpêx to pymaj xatã tanhmã mẽ pahto kaprỳ. Pu mẽ amnhĩ tã omu hãmri nẽ Tirtũm Karõ xihtỳx nhỹ hã Tirtũm kõt pix mã amnhĩ nhĩpêx.

¹⁷ Nẽ na hte sõrdatjaja kàx o mẽ hkrãjapap jagjê nẽ pijapu kaxyw mẽ kutã mra nhũm mẽ tee ri mẽ

hkrā jayr prām kaprý. Ja pyrā nē kēr ka mē amnhī kaxyw Tirtūm kôt pix mā ajamaxpēr rāhā ho ri apa. Nē ra kot mē ato hkra mā ajamaxpēr rāhā nē. Kē Satanasti tee ri kām mē akrā kamā mē amā mē ajamaxpēr punuj jagjēnh prām hkapyrý.

Nē sōrdatjaja na htem mē kutā wapo jamý nē ho kuhê. Nom mē papajaja mē panhō wapoja na axtem kêp Tirtūm kapēr. Na hte Tirtūm Karō mē pahkrā kamā kapēr o amnhīrit pu htem pix mā pajamaxpēr o papa nhūm Satanasti tee ri kām mē pahkrām mē pajamaxpēr punuj jagjēnh prām kaprý. Te mē papijapu nhūm mē pahte amnhī nē ho pakrihkrit pyrāk o hipêx.

¹⁸ ā Satanasti pē mē pahte amnhī nē amnhī nhīpêx kot anhÿr. Jakamā kēr pu mē amnhī to Tirtūm pix wÿr o ri papa kê Satanasti kutā mē pahto paxihtýx pu mē hkôt tanhmā amnhī tomnuj to hkêt nē.

Nē kēr pu mē mēmoj to anhÿr kaxyw nē ra Tirtūm Karō nhÿ hā amnhī to Tirtūm wÿ. Nē kām amnhī jarēnh rāhā ho papa nē aa ja ho pajamakêtkati hkêt nē. Nē Tirtūm krajē piitā mē ho hwÿr rāhā ho ri papa.

¹⁹ Nē kwa kēr ka mē määnēn ixto Tirtūm wÿr rāhā nē. Kot tanhmā ixto nhūm ixāmnhīx ixte mē kām kapēr jarēnh mex o ri mē hkôt ixpa kaxyw. Mē kot ja hā tanhmā ixto htā pa arī ixāmnhīx mē kām harēnh mex o ri mē hkôt ixpa. Nē ixprī hā mē kām Jesus kot tanhmā mē panē amnhī nhīpêx to hā harē. Kormā mē kot hprī hā ja mar mex kêt. ²⁰ Tā ixte mē kām ja jarēnh kaxyw na pre Tirtūm mē hwÿr inhmē nhūm prem hā ijaxā pa arī mē hagjēnh xā kamā ixkrī ho ixkrī. Jakamā kwa mē ixto Tirtūm wÿ kē tanhmā ixto ixihtýx to pa arī mē kām kapēr jarēnh o ixkrī. Ja na Tirtūm kām hprām nē ijaxwÿja inhmā ja prām.

Kagà jatur xà

Korosē 4.7-8

²¹ Nē ot pa mē awÿr Xikitre mē. Kot paj mē amā kagàja nhīpêx pa nē kām kugō nhūm kupy nē ma mē awÿr o mō. Hāmri nē mē awÿr o pōj nē mē amā kugō nē mē amā tanhmā ijarēnh to ka mē ijarēnh ma nē akīnh nē. Xikitre na hte Pahihti mā tanhmā amnhī nhīpêx mex to o pa. Kris kôt mē pahto na. Nē inhmā hapêê. ²² Tā ot pa mē awÿr kumē. Kē mē awÿr pōj nē mē amā ijarē ka mē kam ama nē akupÿm tām akrā nē tee ri ixkukamā ajamaxpēr kêt nē. ²³ E ixkrāmnhwÿjjaja. Kē Mēpahpām Tirtūm mē Pahihti Jesus Krisja wa tanhmā mē akrā hto ka mē ajamakêtkati nē axāmnhīx ri apa. Nē mē amā axpēn kīnh o ri axpēn kôt apa. Nē mē apiitā wa hkôt ajamaxpēr mex o ri apa. ²⁴ E mē amā mē panhō Pahihti Jesus Kris kīnh rāhā ho apa xwÿnhjaja. Kē Tirtūm mē ato mex nē mēmoj to mē akutā nojarêt rāhā ho pa.

Tā ām ja pix na hapêx. Ixpē Pawre na pa mē awÿr kagàja nhīpêx nē kumē.

Piripos

Pawre kot Piripos kamã Jejus kôt hkwýjê hwýr kagà nê mênh

Pawre na pre kagàja nhîpêx. Jejus nhý hã mẽ ahkre o mẽ pa xwýnhjê hô na pre. Na pre Jejus ã mẽ kãm hkuré xwýnhjaja unê nê ma krî pê Rôm wýr kumê nê kamã haxà nhùm mẽ haghênh xà kamã hkrî ho hkrî. Tã nhùm arî hkrî rãhã Piripos kamã Jejus kôt hkwýjê hwýr kagàja nhîpêx nê kumê. Na prem Pawre jarênh ma nê kãm ukapri nê. Jakamã axpên kaxyw kàxpore hkwý ho akuprô nê hwýr kumê. Hãmri nhùm omu nê hkînh nê amnhî tã kagàja nhîpêx nê kamã mẽ kãm amnhî jarê nê mẽ hwýr kumê. Kot amnhî xà htýx kamã hamak o hkrî htã arî hwýr mẽ mrar xwýnhjê mã Tirtùm kapêr jarênh rãhã ho hkrî hã amnhî jarê. Nê kãm Jejus kot amnhî nhîpêx kôt pix mã amnhî nhîpêx o pa hprãm ã amnhî jarê. Nê kãm Jejus jamaxpêr kôt pix mã hamaxpêr prãm ã amnhî jarê. ã na pre Pawre kagàja kamã mẽ kãm amnhî jarênh anê. Nê mẽ kãm:

¹ Pa Piripos kamã Jejus Kris kôt ixkwýjaja. Xà mẽ amex na ka mẽ apa? E ixpê Pawre na pa mẽ amã kagàja nhîpêx nê kamã mẽ amã amnhî jarê nê mẽ awýr kumê. Nhùm Ximotre haxwýja kãm ja mex nê. Wa ixpê Jejus mã tanhmã amnhî nhîpêx to ho wa ixpa xwýnh jakamã na pa wa mẽ awýr hipêx nê kumê. Mẽ ate Tirtùm kapêr o mẽ ajahkre xwýnhjê hwýr nê mẽ kãm mẽ ate tanhmã amnhî to xwýnhjê hwýr nê mẽ ate mẽ mar o akrî xwýnhjê hwýr. Mẽ apê Kris kôt wa ixtô nê wa ixtôxjê ho ixpimràatã mẽ awýr hipêx nê kumê. ² E kê Mëpanhîpêxã maati Tirtùm mẽ Pahihtî Jejus Kris wa mẽmoj to

mẽ akutã nojarêt rãhã nê ka mẽ axàmnhîx ri ajamakêtkati nê ri apa ho apa.

Pawre kot Piripos nhõ xwýnhjê ho Tirtùm wýr ã harênh

Epes 1.15-19; Korosê 1.9-12

³ Na pa hte xatã mẽ amã ijamaxpêr o ixkrî nê mẽ panhõ Tirtùm kot tanhmã mẽ ato mex toja pa kãm ijamaxpêr nê ixkînh nê ixkrî. ⁴ Nê Tirtùm mã mẽ ajarênh nê mẽ ato kuwý. Ixkînh kãm mẽ ato kuwý.

⁵ Wam ixte mẽ awýr inhmõrta ã na pa pre mẽ amã Jejus kot mẽ panê tanhmã amnhî nhîpêx to hã harênh o ri mẽ akôt ixpa. Ka prem inhma nê hkôt amnhî xunhwýr týx nê hkôt amnhî nhîpêx o ri apa. Jakamã inhmã axpên kaxyw ri kàxpore hkwý nhõr o apa. Te ham mẽ ate ixwýr mênhta pyrãk pa pre mẽ akukwak ri amnhîm ho ixujaprôr o ri ixpa pê nhãm ri mẽ kãm Jejus jarênh o ri mẽ hkôt ixpa. Na pa hte arî jam ijamaxpêr rãhã ho ixkînh nê ixkrî. Nê Tirtùm mã mẽ ate ixto mex ã kãm mẽ ajarênh o ixkrî.

⁶ Nê na pa pre ma mẽ awýr mō nê mẽ amã Jejus jarê ka prem inhma nê hkôt amnhî xunhwý nhùm Tirtùm ja hã mẽ apumunh mex nê. Hãmri nê mẽ ate hkôt amnhî to htýx kaxyw tanhmã mẽ ato mẽ axihtýx to. Tã koja arî mẽ ato mẽ axihtýx rãhã nhùm Jejus Kris nhýrmã akupýn mẽ pahwýr wrý. Koja ã mẽ ato mex anê. ⁷ Na hte tanhmã ixto mex tota pyrã nê tanhmã mẽ ato mex to ho pa nê mẽ akutã nojarêt rãhã ho pa.

Nê kormã mẽ kot ijaxàr kêt ri pa pre ma mẽ piitã mẽ kãm Jejus jarênh o ri ixpa. Nê ãm hãmri mẽ kãm harê. Mẽ kot mar nê hkôt amnhî xunhwýr týx kaxyw pa pre mẽ hkôt harênh rãhã ho ri ixpa. Ka prem ja kaxyw inhmã kàxpore hkwý gō pa pre ho amnhîm ixujaprôr pê mẽ hkôt ri mẽ kãm harênh o ri ixpa. Tã nhùm prem jar Rôm

kamã ijaxà pa arĩ ixkrĩ htã ka mẽ axte ixwÿr hkwȳ mẽ. Jakamã na pa hte mẽ amã ijamaxpër rãhã ho ixkrĩ nẽ inhmã mẽ akĩnh tÿx nẽ. ⁸Te Jejus Kris kãm mẽ ajapê htÿx pyrãk. Tĩrtũm kot ja hã ixpumunh mex.

⁹⁻¹⁰ Na pa hte mẽ ato kuwÿ nẽ kãm:

—Pa Tĩrtũm. E Piripos nhõ xwÿnhjê pumu. Na mẽ ra kãm axpën kĩnh o axpën kõt pa. Kwa tanhmã mẽ hipêx to kê mẽ arĩ kãm axpën kĩnh tÿx pix nẽ. Jao axpën to mex rãhã ho pa. Nẽ tanhmã mẽ hkrã hto kê mẽ amnhĩ krãm akapër jaxàr tÿx nẽ. Jao tãm amnhĩ nhĩpêx mex nẽ hamaxpër mex o ri pa. Nom kormã mẽ kot ja pumunh tohtuj anhÿr. Tã kêr ka tanhmã mẽ ho kê mẽ ã amnhĩ nhĩpêx anhÿr rãhã Jejus Kris akupÿn mẽ ixwÿr wrÿ.

Anhÿr pa hte mẽ ato hwÿr o ixpa. ¹¹ Nã koja Jejus Kris mẽ akaxwÿnh kãm mẽ ato mẽ axihtÿx ka mẽ ÿ hã axihtÿx pẽ tãm ri amnhĩ nhĩpêx nẽ tãm axpën nhĩpêx o ri axpën kõt apa. Nhũm mẽ piitã ja hã mẽ apumu nẽ axpën mã Tĩrtũm mex o mex ã harê.

Pawre kãm Kris kõt amnhĩ nhĩpêx prãm ã harênh

Atre 28.30-31; Epes 6.19-20; Sikũn Xĩmotre 2.9

¹² E Kris kõt ixtõ nẽ ixtõxjaja. Kot paj mẽ amã tanhmã amnhĩ jarênh to ka mẽ inhma. Na prem ra Jejus ã ixtomnuj tÿx nẽ hã ijaxà pa amnhĩ xà htÿx kamã ijamak o ixkrĩ. Nom mẽ kot ã nhĩpêx anhÿr tã pa hte arĩ ixkrĩ xà kamã mẽ kãm Jejus jarênh o ixkrĩ. Jakamã na mẽ ra ohtõ nẽ tanhmã kot mẽ panê amnhĩ nhĩpêx to hã harênh ma. ¹³ Põristi kot inhĩhkõ hã ixtãnopxar xwÿnhjê mẽ ixwÿr mẽ mrar xwÿnh piitã ixte Kris kapër jahkre ho ixpa pix ã mẽ kot ijaxà ã ijarênh ma. ¹⁴ Nẽ jar Kris kõt mẽ pahtõ nẽ mẽ pahtõxjaja haxwÿja ijarênh ma nẽ ohtõ nẽ ixpyrà nẽ Kris nhÿ hã amnhĩ to htÿx

nẽ arĩ hkwȳjê mã kapër jarênh rãhã ho pa. Ixpyrà nẽ kãm mẽ uma hkêt nẽ mẽ kutã amnhĩ to htÿx pẽ mẽ kãm harênh rãhã ho pa.

¹⁵⁻¹⁸ Nẽ na pre mẽ hkwȳjaja ixte mẽ amã Kris jarênh o ixpa hã ijarênh ma nẽ hã ixkamã gryk nẽ axtem hamaxpër nẽ ixwakre kamã gryk kãm mẽ kãm Kris kapër jarênh o pa. Na htem hamaxpër o:

—E kot paj ma Pawre kot ra mẽ hwÿr mõr xwÿnhjê hwÿr mõ nẽ kot ra mẽ kãm Jejus kapër jarênh nhĩpy axte mẽ kãm harênh o ri mẽ hkõt ixpa. Hãmri nhũm mẽ inhma nẽ inhgryk ã Pawre kaga. Hãmri nhũm mẽ hagjênh xà kamã arĩ hkrĩ tã tee ri mẽ hã ijarênh ma nẽ hkaprĩ nẽ rĩ amnhĩ pumu. Nã kot paj anẽ.

Anhÿr o hamaxpër tã pa mẽ harênh ma nẽ ixkaprĩ hkêt nẽ. Mẽ kot mẽ amã hprĩ hã Kris kapër jarênh kênã kot pa kêt tee ri mẽ harênh ma nẽ ixkaprĩ. Kwãr mẽ mãmri ri ixkamã gryk kãm kapër jarênh o ri pa. Pa mẽ harênh ma nẽ ixkĩnh nẽ. Nom na hte mẽ hkwȳjaja jajê rom kãm ixkĩnh kãm mẽ kãm Kris kapër jarênh o pa. Nẽ tãm hamaxpër pẽ mẽ kãm harênh o pa. Ra mẽ kot ixpumunh mex jakamã nhũm Tĩrtũm kot jar mẽ hwÿr inhmênh nhũm ixte ãm hãmri mẽ kãm kapër mex jarênh o ri ixkrĩ hã ixpumunh mex. Jakamã kwãr mẽ mãmri tanhmã inhmã hamaxpër to xà hkõt mẽ ujarênh mexja jarênh o pa. Mẽ kãm ixkĩnh kãm harê rÿ ixkamã gryk kãm ri harênh o pa. ãm hãmri Kris kapër jarênh o pa jakamã pa mẽ harênh ma nẽ ixkĩnh nẽ.

¹⁹ Nẽ ra mẽ ate ixto Tĩrtũm wÿr o apa jakamã koja Karõja ixkaxyw tanhmã jar Rõm kamã pahĩhti nhĩpêx to nhũm tokyx ixkator japêr. Pa ixãmnhĩx ijamakêtkati nẽ ri ma mẽ akõt ixpa. ²⁰ Nom inhmã Jejus kãm hprãm xà hkõt pix mã tanhmã amnhĩ nhĩpêx to ho ixpa hprãm. Jakamã koja mẽ ixkator pa ixkĩnh

ně arī kām tanhmā amnhī nhīpêx to ho ri ixa. Nom koja mẽ tanhmā hamaxpêr to nê ixpī pa mẽ kutā mẽ kām amnhī to htýx nê ixām rāhā nhūm mẽ ixpī pa ijamakêtkati nê ty. Kê mẽ ja hā ixpumu nê ixtā Kris mex o mex ā harē. Ām Jejus kām hprām xā hkôt pix mā na inhmā amnhī nhīpêx prām. ²¹ Tā kot paj tanhmā amnhī to nê arī ixtīr japêr hā kot paj ām kôt pix mā amnhī nhīpêx rāhā ho ixa. Nom koja mẽ tanhmā hamaxpêr to nê hā ixpī pa ty nhūm Tīrtūm ma kaxkwa hwýr ixkarō ho āpir kurē kumrêx. Pa Tīrtūm mẽ Krata wa kuri inhmex o inhmex nê wa kuri ixa ho ixa. ²²⁻²³ Tā nhý na we inhmā mex o hō jakrenh wehe? Na pa tee ri amnhī kukamā ijamaxpêr. Inhmā tokyx ixyk nê Kris kuri ixa hprām. Ja na inhmā hprām o inhmā hprām. Nom ko. Kot pa arī ixtīr nê arī mẽ kām Jejus kot tanhmā mẽ panê amnhī nhīpêx to hā harēnh rāhā ho ri ixa. Ko. Ja määnēn inhmā mex. ²⁴ No mẽ amā na arī ixtīr nê ixpaja mẽ amā hprām ²⁵ jakamā kot paj pêr tokyx ixyk kêt nê. Kot paj arī ri mẽ amā Kris kôt mẽ ato mẽ axihtýx o ri mẽ akôt ixa. Jao ām ho hkrānre ka mẽ ra amnhī kaxyw kām ajamaxpêr nê hkôt amnhī xunhwýr týx nê. Jao akīnh nê apa. ²⁶ Tā kot paj nhýrmā akupým ixtīr rāhā mẽ awýr mō ka mẽ ixpumu nê akīnh nê. Jejus Kris kot akupým ixkator ā akīnh nê. Hāmri nê ixtā Jejus mā mex o mex ā harē.

Mě pahte Jejus ā pahpunuj tā mẽ pahte amnhī to htýx ā mẽ pamā karō Rukre 6.22; Sikūn Korīt 2.14-16; Xiakre 1.12; Jutre 3

²⁷ Jakamā e kêr ka mẽ Jejus Kris kapêr kôt pix mā amnhī nhīpêx. Nê axpēn kôt axpēn to axihtýx pē mẽ kām Jejus kot tanhmā mẽ panê amnhī nhīpêx to hā harēnh o ri apa kê mẽ ama nê mẽ pahpyrà nê hkôt amnhī xunhwý. E kêr ka mẽ ā amnhī nhīpêx anhýr o ri

apa. Kêr pa nhýrmā mẽ hagiēnh xāja rūm ixkator japêr nê nhýri ja hā mẽ ajarēnh ma rý ma mẽ anhō krī hwýr mō nê ja hā mẽ apumu nê ixkīnh nê. ²⁸ Nom kwa kêr ka mẽ amā mẽ kot Kris ā tanhmā mẽ ato xwýnhjê pyma hkêt nê. Mẽ kot tanhmā mẽ anhīpêx kati hto htā kêr ka mẽ kutā amnhī to htýx nê mẽ hkôt apa. Kêr kê mẽ amnhī tā mẽ apumu nê tee ri hamaxpêr hāmri nê axpēn mã:

—Kwa mẽ pahte Kris ā tanhmā mẽ hipêx to htā na htem amnhī to htýx nê arī mẽ pamā harēnh o ri pa. Pêr mẽ kām mẽ pahpyma hkêt. Mān hte Tīrtūm tanhmā mẽ ho nhūm mẽ ý hā kām mẽ pahpyma hkêt nà? Kwa tanhmā kot puj mẽ ho nhūm mẽ Jejus kapêr jarēnh o pata kaga? Nà kot puj mẽ ām tee ri hā tanhmā mẽ ho kaprý. Mān ām hāmri na htem nhýrmā Tīrtūm kuri htīr tūm nê pa ho pa hā amnhī jarēnh o pa nà? Anê.

Koja mẽ ā mẽ ajarēnh anê. Tīrtūm kot mẽ ato mẽ axihtýx ā mẽ apumunh kôt. ²⁹ Na pre tanhmā mẽ ato ka mẽ Kris kôt amnhī xunhwý. Tā mẽ kot tanhmā hā mẽ anhīpêx to htā na hte Tīrtūm mẽ kutā tanhmā mẽ ato ka mẽ ý hā amnhī to htýx nê apa. ³⁰ Ijaxwýja na pa hte amnhī xā htýx kamā ijamak o ixkrī. Na pre htem Jejus ā ixtomnuj o pa ka prem ja hā ijarēnh ma nê hā ixpumu. Tā ota kê mẽ ra axte tanhmā hā inhīpêx to. Pa kê amnhī xā htýx kām ijamak o ixkrī ka mẽ ijarēnh ma. Tā xep mẽ ixpyrà nê Kris ā amnhī xā htýx kamā ajamak o apa. Nom kwa kêr ka mẽ tee ri amnhī kukamā ajamaxpêr o akapri nê apa hkêt nê.

2

Jejus kām mẽ pajapê xàj tanhmā kot amnhī nhīpêx to hā harēnh Rōmān 15.5-6; Epes 4.1-6; Piripos 2.18

¹ Nē ra mē pahte Jejus kôt amnhī xunhwÿr jakamā pu mē tee ri amnhī kukamā pajamāxpēr o pahkaprī nē ri papa hkēt nē. Ām kām mē pajapēja mā pajamāxpēr rāhā ho pahkīnh nē pajamakētkati nē ri papa. Nhūm Karō mē pahkarō mā agjē nē mē pahto mex nē mēmoj to mē pakutā nojarēt o ri mē pakamā pa. ² Tā kēr ka mē axpēn mar mex nē mēmoj tā axpēn mā axàkjēr o ri apa hkēt nē. Te ri ixkre pixi kamā mē atipxi nē axpēn kôt amnhī nhīpēx pyrāk. Nē Tirtūm kām hprām xā hkôt pix mā ajamāxpēr o ri apa. Nē mē amā axpēn kīnh o ri apa. Kot kaj mē ā amnhī nhīpēx anē pa ja hā mē apumu rÿ hā mē ajarēnh ma nē ixkīnh tÿx kumrēx.

³ Nē kwa kēr ka mē axpēn pumu nē ā ajamāxpēr anhÿr kēt nē. Mē ajamāxpēr o:

—Tk. Kot pa ri tanhmā jahti ho ajuta hto ho ixpa hkēt nē. Ixte amnhī to rax o hakrenh kēnā kot pa hkēt ri ho ajuta. Kē tām mān tanhmā ixto ajuta hto.

Anhÿr o ajamāxpēr kēt nē. Kēt nhÿri mēhō pumu nhūm tanhmā kute ka hā omu nē ajamāxpēr o:

—Hēxta waa nē. Kwa tanhmā kot pa we ho ajuta htooo?

Anhÿr o ajamāxpēr hāmri nē ajamāxpēr xā hkôt tanhmā ho ajuta hto.

⁴ Jao Jejus pyrā nē mēmoj to axpēn kutā anojarēt o ri apa. No ri amnhī pix kukamā ajamāxpēr o apa hkēt nē. ⁵ Kēr pu mē te Jejus tanhmā hamāxpēr toja pyrāk o pajamāxpēr o ri papa.

⁶ Kēp Tirtūm Kra kumrēx jakamā te urāk tā xā na pre ja hā amnhī pumu nē amnhī pix kukamā ā hamāxpēr anē nē hamāxpēr o:

Te ixte Tirtūm pyrāk jakamā mēmoj piitā inhō na. Jakamā kot paj jar kaxkwa kamā inhmex nē ixkīnh nē ixpa ho ixpa nē

aa rer nē nhÿhÿm inhmōr kēt kumrēx. Anhÿr o na pre hamāxpēr? Nā na pre ā hamāxpēr anhÿr kēt nē.

⁷⁻⁸ Kām mē pajapē xāj na pre kaxkwa kamā mēmoj mex piitā rer pa nē man mē pahwÿr wrÿ nē mē pahpyrā nē ī ho katorxā nhōhy rūm kato.

Kēp mē panhō Pahihti htā te kēp mē panhō nē te kot amnhī to grire pyrāk o amnhī nhīpēx o ri pa.

Nē Tirtūm kām hprām xā hkôt pix mā amnhī nhīpēx o pa.

Nē ām kôt pix mā amnhī nhīpēx o pa rāhā nhūm prem kupī nhūm arī mē kām xa nē tanhmā amnhī tā mēhō hto hkēt nē.

Na prem hipēx kati nē. Te kēp mē kot amnhī tomnuj tÿx xwÿnhjē nhīpēx pyrāk o hipēx nē pī kahpa hā kunhō nē kupī.

Tā no nhūm mē kēp tanhmā amnhīmnuj to hkēt nē arī mē kām xa. Mē panē na pre ā amnhī nhīpēx anē.

⁹ Hāmri nhūm Tirtūm ā kot amnhī nhīpēx anhÿr ā omu nē akupÿm ho htīr nē akupÿm amnhī wÿr ho api.

Nē mex o mex ā harē.

Nē kot nhÿrmā mē pahpiitā mē pahto amnhīptār kaxyw mē pakaxyw ām.

¹⁰ Jakamā kot puj mē nhÿrmā pahpiitā Jejus kutā pahkōnkrā ho rōrōk nē pahkrī hpa nē kax pēē kām mex o mex ā harē.

Mē pahpiitāā. Kaxkwa kamā mē pa xwÿnhjaja nē pika piitā hkôt mē papa xwÿnhjaja.

Nē mē htyk xwÿnh piitā koja mē akupÿn htīr pu mē pahpimrāatā Jejus kutā pahkōnkrā ho parōrōk nē pahkrī hpa nē kām mex o mex ā harē.

¹¹ Nē kām:

Pa Pahihti Jejus. Nà ãm hãmri na apê mê inhô Pahi Maati hã apyxi mex na ka.

Jakamã mê ixtô kot paj mẽmoj tâ tanhmã amã karô hto? Nà kot paj mẽ ixtô ã amnhĩ nhĩpêx anhÿr kêt nê. Anê.

Kot puj mẽ nhÿrmã ã Jejus mã pakapêr anê.

Jao mããñen Tirtũm hihtÿx o hihtÿx nê àhpumunh o àhpumunh ã omu. Nê mex o mex ã omu.

Te mẽ pahpê kanhêti pyrãk ã mẽ pajarênh

Matêwre 5.14-16

¹²⁻¹³ Tã kwa ixkrãmnhwÿjaja. Inhmã mẽ akĩnh. Kwa kër ka mẽ arĩ Tirtũm kôt amnhĩ nhĩpêx mex rãhã nê. Te ixte mẽ akamã ixpare ri mẽ ate amnhĩ nhĩpêx mexta pyrãk o ixwakre kamã amnhĩ nhĩpêx mex o ri apa. Na pre ra Tirtũm mẽ panê mẽ pahte amnhĩ tomnuj rê nê tanhmã mẽ pahto pu mẽ ý hã kapêr kôt amnhĩ nhĩpêx o ri papa. Jakamã kwa kër pu mẽ axte tanhmã amnhĩ tomnuj to ho papa hkêt nê. Nê mẽ pahte Tirtũm kapêr kwÿm ri amnhĩ nhĩpêx pymaj ãm hkôt pix mã amnhĩ nhĩpêx o ri papa.

¹⁴ Nê kër ka mẽ mẽmoj to anhÿr kaxyw nê agryk kãm tanhmã ri ho hkêt nê. Nê mẽmoj tâ axapênh kaxyw nê ri hã axpên mã akapêr kati kamã ho anhÿr kêt nê. ¹⁵⁻¹⁶ Mẽ kot amnhĩ tomnuj xwÿnhjaja na htem ã amnhĩ nhĩpêx anhÿr o pa. No kêt mẽ kajaja. Mẽ ate mẽ hkôt apa htã kër ka mẽ hkôt amnhĩ nhĩpêx kêt nê. Mẽ kurom mẽ apê Tirtũm kra jakamã kër ka mẽ hkôt pix mã amnhĩ nhĩpêx o ri apa. Nê tanhmã amnhĩ tomnuj to rÿ tanhmã ajamaxpêr punuj to hkêt nê. Mẽ kot amnhĩ tomnuj xwÿnhjaja te ri kamãt kô kamã ri mẽ kêp àhkĩnh o ri mẽ pa xwÿnhjê kot amnhĩ nhĩpêx pyrãk. Tã kot kaj mẽ hkôt tãm ri amnhĩ nhĩpêx o apa nê te ate kanhêtiija kamãt kô

kamã hirã ho harir pyrãk o amnhĩ nhĩpêx. Jao mẽ kãm Tirtũm kapêr jarênh o ri mẽ hkôt apa. Mẽ kot amar nê apyrã nê nhÿrmã kuri htĩr tũm nê pa ho pa kaxyw. Kot kaj mẽ ã amnhĩ nhĩpêx anê nhũm nhÿrmã Jejus Kris akupÿn mẽ pahwÿr wrÿk ã arĩgrota ã pa mẽ apumu nê ixkĩnh nê. Nê ixkĩnh kãm Jejus mã mẽ ajarê nê kãm mẽ ajarênh o:

—Kwa Pahihti. E jajê pumu. Na pa pre mẽ kãm akapêr jarênh o ri mẽ hkôt ixpa nhũm mẽ inhmar tÿx nê nê akapêr kôt amnhĩ nhĩpêx o ri pa. Jakamã na pa pre mẽ kãm akapêr jarênh kaprÿ hkêt nê.

Anhÿr o kãm mẽ ajarê. ¹⁷ Na pa pre mẽ akôt mẽ amã Tirtũm kapêr jarênh o ri ixpa ka prem inhma nê hkôt amnhĩ xunhwÿ. Jakamã te ixte Tirtũm mã mẽ ato ixkĩnh xà nê kãm mẽ anhôr pyrãk.

Nê koja jar Rôm nhô pahihtiija tanhmã ixto hkêt japêr. Rÿ tanhmã ixto. Nom kwãr mẽ mãmri tanhmã kãm ixto hprãm xà hkôt tanhmã ixto rÿ xpi. Koja mẽ ã ixte mẽ anhĩpêx anhÿr ã xpi pa ixkĩnh nê. Nê tanhmã ijamaxpêr to hkêt kãm ty. Jakamã na pa ra ã mẽ kot inhĩpêx anhÿrja kukamã mẽ amã amnhĩ kĩnh ã amnhĩ jarê ka mẽ inhma. ¹⁸ Tã kër ka mẽ ixpyrà nê ajaxwÿja ixtã akĩnh nê apa.

Ximotre mẽ Eparoxit wa harênh

¹⁹ Nê koja Pahihti Jejus kãm ja prãm hã kot paj ma mẽ awÿr Ximotre mẽ nhũm ma mẽ awÿr mō nê ri mẽ akôt pa nê tanhmã mẽ ate amnhĩ nhĩpêx to hã mẽ apumu. Hãmri nê man akupÿn ixwÿr mō nê inhmã mẽ ajarê pa mẽ ajarênh ma nê ixkĩnh nê tee ri mẽ akukamã ijamaxpêr o ixkrĩ hkêt nê. ãm tãm mẽ akukamã ijamaxpêr o ixkrĩ. ²⁰ Ximotre tapxipix na ixpyrà nê kãm mẽ akĩnh nê kãm mẽ ato ajuta hprãm. Na hte mẽ ajarênh rãhã ho pa. ²¹ Nom jar mẽ pi-itã Ximotre kĩnhã amnhĩ mex pix

kukamā hamaxpēr o pa nē kām Je-
jus Kris kôt tanhmā amnhī nhīpêx
to ho pa hprām kêt nē.

²² Ximotre te kêp ixkra pyrāk. Na
hte ixkôt pa nē ixpyrà nē Jejus mā
tanhmā amnhī nhīpêx mex to ho
pa. Pa pre wa ijamē mē kām mē
ujarēnh mex jarēnh o wa ri mē hkôt
ixpa. ²³ Tā koja mē tanhmā ixtā
axpēn mar to. Apu mē kot ixpīr ā
amnhī jarē rý ixkator ā amnhī jarē.
Pa tanhmā amnhī tā mē mar to
nē rī kormā ma mē awýr Ximotre
mē kê ma mē awýr mō nē mē amā
tanhmā ijarēnh to.

²⁴ Nē koja Pahihti Jejus kām ja
mex pa ijaxwýja ma mē awýr mō
pu mē axte axpēn pumu.

²⁵ Nē kot paj tokyx ma akupým
mē awýr Kris kôt mē pahtō
Eparoxit mē. Na ka prem kām
kàxpore gō nhūm man ixwýr o
mō nē inhmā kugō. Hāmri nē jar
inhmā àpēnh rax nē ixpyrà nē mē
ujarēnh mexja jarēnh o pa. ²⁶⁻²⁷ Tā
ra à htýx nē. Kironhýx pre mē
pahpê ty. Tā nhūm Tirtūm omu
nē kamā ukaprī nē. Nē määnēn
pa ixkamā ukaprī nē. Nē tee ri
ixte à htýx ā omunh nē ixkaprī
htýx pymaj akupým inhmā ho mex
nhūm ra akupým mex nē ri pa.
Hāmri nē kām mē apumunh prām
nē. Mē ate à htýx ā harēnh mar nē
akaprī hā mē ajarēnh ma nē tee ri
mē akukamā hamaxpēr. ²⁸ Jakamā
inhmā akupým tokyx mē awýr
mēnh prām. Tā koja mēmo arīgro
hā mē awýr pōj ka mē omu nē akīnh
nē tām ajamaxpēr. Pa ijaxwýja jar
ixkīnh nē tām ijamaxpēr. ²⁹⁻³⁰ Na ka
prem ixwýr amē nhūm man ixwýr
mō nē jar ixri mē kām Kris kapēr
jarēnh o ri mē hkôt pa rāhā nhýx hā
ty nom kot amnhī kamā kahak kêt.
Jakamā kê akupým mē awýr pōj ka
mē omu nē akīnh nē. Nē kahti hkôt
amý nē ho mex nē. Kêp Kris kôt mē
pahtō mex kēnā. Ā na htem Kris
mā mē kot tanhmā amnhī nhīpêx

to ho mē pa xwýnhjē nhīpêx mex
anhýr o pa.

3

*Mēmoj tā mē pahpumunh kôt
Tirtūm kot tām mē paxunhwýr ā
harēnh*

Piripos 2.18, 4.4

¹ E Kris kôt ixtō nē ixtōxjaja. Kris
kêp mē panhō Pahihti jakamā kwa
mē jam ajamaxpēr nē akīnh rāhā
ho ri apa.

Na ra ra mē amā mēmoj jarēnh
rax nē. Nē hā kagā rax tā ko-
rmā inhmā ja ho anhýr kaga hkêt
nē. Kot paj axte mē amā hkwy hā
kagā. Mē ate hā ano htýx nē ho apa
kaxyw. ² Jakamā e kwa mē okora.
Kêr ka mē amnhī nē mē kot Tirtūm
kapēr o hêx xwýnhjē pumunh mex
o ri apa. Na htem tanhmā mē amā
kapēr ho pa nē mē amā:

—Kot kaj mē ixpê Ijaewjê pyrà
nē amnhī my kwryt kà jakā hāmri
nē apê Tirtūm kra. Anē.

³ Nom ja kot anhýr kêt. Mē pahte
amnhī jakār kôt mē pahpê Tirtūm
kra hkêt. Ā kot anhýr ronhýx pu
mē amnhī krā hkôt tanhmā amnhī
nhīpêx to ho pahpê hkra. Nom ja
kot anhýr kêt. Mē ate amnhī jakār
kêt tā mē ixpyrà nē amnhī kaxyw
Jejus Kris mā ajamaxpēr jakamā
mē ixpyrà nē mē apê Tirtūm kra
na ka mē. Na ka htem mē ixpyrà
nē Karō nhý hā kām mex o mex ā
harēnh o ri apa nē mē ixpyrà nē Je-
jus kukwak ri akīnh nē ri apa. Nom
na pu htem pahpê hkra kaxyw
amnhī jakār kêt nē. ⁴ Kop ām amnhī
krā hkôt mē pahte amnhī to Tirtūm
kra ronhýx pa ra amnepēm amnhī
to hkra nē ri ixpa. Na pa pre ixpê
hkra hprām xāj amnhī krā hkôt
tanhmā ri amnhī nhīpêx to rax o
ixpa nom ā amnhī nhīpêx anhýr
kaprý. E pa ja hā mē amā amnhī
jarē ka mē ijarēnh ma.

⁵ Na pa pre ixkato nē kormā
ixtā semān pixire nhūm mē ixpê

Ijaew ā inhmy kwrýt kà krāhta. Nom pa ā mẽ kot inhîpêx anhÿr kôt ixpê Tirtûm kra hkêt nê. Nê inhîpêxà hkôt ixpê finat Pêjamî kanrêhâ htâmhwy jakamâ ixpê Ijaew mex na pa. Nê Ijaew kapêr o ixkapêr o ri ixpa. Nom ja kôt ixpê Tirtûm kra hkêt. Nê määnên ixpê Parijew nhô xwÿnh jakamâ na pa pre Tirtûm kot finat Mojes mâ mẽ pakaxyw mẽmoj tâ karô kôt pix mâ amnhî nhîpêx o ixpa hprâm. ⁶ Jao tee ri mẽ kot Jejus kôt amnhî nhîpêx xwÿnhjê pumu nê mẽ homnuj tÿx o ri ixpa. Na pa pre ijamaxpêr o: “Nà müjjaja na htem mẽ ixkwÿm ri amnhî nhîpêx o pa.” Anê nê mẽ hipêx kati ho ri ixpa. Nê ijamaxpêr o: “Ra ixte finat Mojes kot Tirtûm nhÿ hâ kapêr piitâ hkôt amnhî nhîpêx mex jakamâ na pa hte tanhmâ ri amnhî tomnuj to ho ri ixpa hkêt nê.” Anê.

⁷ ā na pa pre ixpê Tirtûm kra hprâm xâj amnhî nhîpêx anhÿr o ixpa. Tâ nom âm ā amnhî nhîpêx anhÿr hkapyrÿ. Na htem ā ri amnhî nhîpêx anhÿr kôt kêp Tirtûm kra hkêt nê. Tâ pa hpânâ amnhî kaxyw Kris kôt ijamaxpêr nhûm ixto hkra kurê kumrêx.

⁸ Ra ixte Jejus Kris kôt amnhî xâm jakamâ Jejus kêp inhô Pahihti pa inhmâ kapêr kôt pix mâ amnhî nhîpêx o ri prâm. No hkrax rûm ixte amnhî nhîpêx tûmja na pa ra Jejus gryk ā hkaga hpa. Te ixte mẽmoj punuj pyr nê amnhî katut kôt mênh nê axte kâm ijamaxpêr kêt pyrâk. Jao amnhî kaxyw Jejus kôt pix mâ ijamaxpêr o ri ixpa. ⁹ Nom kormâ ā ijamaxpêr anhÿr kêt ri na pa pre ixtÿx ri ijamaxpêr o:

—Nà ixte Mojes kot Tirtûm nhÿ hâ kapêr kôt amnhî nhîpêx o ixpa jakamâ koja Tirtûm ja hâ xpumu nê ixto hkra.

Anhÿr tâ nom ja kot anhÿr kêt. Na htem amnhî krâ hkôt tanhmâ ri amnhî nhîpêx to ho pa nhûm Tirtûm âm ja hâ mẽ omu nê âm

hâ mẽ omu nê mẽ ho hkra hkêt nê. Nom koja mẽ Kris kôt amnhî xunhwÿ nhûm ja hâ mẽ omu nê mẽ ho hkra kurê kumrêx. Jakamâ ixte Kris kôt amnhî xâm ā xpumunh kôt pix mâ na pre ixto hkra nê inhmex ā ijarê. ¹⁰ Hâmri pa ra inhmâ Kris kôt pix mâ amnhî nhîpêx o ri ixpa hprâm. Na pre ty tâ akupÿm htÿr nê hihtÿx nê âhpumunh tÿx o tanhmâ amnhî nhîpêx to ho pa. Tâ ijaxwÿja inhmâ urân ā amnhî nhîpêx anhÿr prâm. Nê inhmâ urâk nê amnhî xâ htÿx kutâ amnhî to htÿx nê ixpa hprâm. Mê kot hâ ixpÿr mâ tâ pa urâk nê Tirtûm kapêr kaga hkêt nê âm kôt pix mâ amnhî nhîpêx o ri ixpa rāhâ urâk nê hâ ty. Ja na inhmâ ho anhÿr prâm. ¹¹ Kê Tirtûm kot hipêxta pyrâ nê akupÿm ixto ixtÿr pa wa kuri ixtÿr tûm nê ixpa ho ixpa. ¹² Inh mâ Kris kôt pix mâ amnhî nhîpêx o ixpa hprâm tÿx kumrêx. Kormâ ixte hkôt amnhî nhîpêx o inhmôr nê kormâ hatur xâm mênh kêt tâ inhmâ tokyx hatur xâm mênh prâm. Na pa ā inhmâ amnhî nhîpêx anhÿr prâm tÿx kumrêx.

Nê na pa hte ixte amnhî tomnuj kêt ā amnhî to jarkrar o ri ixpa hkêt nê. Na pa hte arî tōhâ tanhmâ amnhî tomnuj to nom inhmâ ā amnhî nhîpêx anhÿr prâm kêt. Nê na pa kormâ ixprî hâ Kris kot amnhî nhîpêx mar o inhmôr nê hatur xâm mênh kêt tâ inhmâ hkôt amnhî nhîpêx o inhmôr nê tokyx hatur xâm mênh prâm. Ja kaxyw na pre Jejus Kris amnhî kaxyw ixta. ¹³ Na pa hte mẽ akurom papxipix ixte Jejus kâm hprâm xâ hkôt amnhî nhîpêx o ixpa hâ amnhî to jarkrar kêt nê. Nom ra ixte tanhmâ amnhî tomnuj to ho xpata pa axte kâm ijamaxpêr kêt nê. Te amnhî katut kôt ixte rênh par pyrâk o hipêx nê axte kâm ijamaxpêr kêt nê. Nê Jejus kâm hprâm xâ hkôt pix mâ amnhî nhîpêx prâm xâj amnhî kaxyw kâm ijamaxpêr o ri ixpa.

¹⁴ Koja nhÿrmã Tirtüm ixpê Kris kwÿ hã amnhÿ wÿr ixwÿ në inhmã:

—E amnê ixwÿr api Pawre. Kot kaj jarãhã amnê më ixwÿr api.

Anhÿr o nhÿrmã inhmã kapêr jakamã na pa hte amnhÿ tã ãm pix jamãr rãhã ho ixpa. Pê ra Jejus kot amnhÿ nhÿpêx piitã omunh par o mō. Nã kot paj gaa në hkôt pix mã amnhÿ nhÿpêx mex o ri ixpa. ¹⁵ Kwa kêr pu më pahpiitã ã pajamaxpêr anê. Jao amnhÿ wÿr hamãr pê hkôt pix mã amnhÿ nhÿpêx o ri papa. Më pahpiitã më pahpê Kris kwÿ kênã. Nom kot ka më atō ja kaxyw tee ri amnhÿ kukamã ajamaxpêr në ajamaxpêr o:

—Nã tanhmã kot paj we amnhÿ to në Jejus kôt amnhÿ nhÿpêx mex rãhã o ri ixpa? Ja kaxyw ixãhpumunh tÿxre hã. Anê.

Hãmri në ã ajamaxpêr anhÿr o apaja apê hihtÿx japêr. Hã koja Tirtüm hprÿ hã tanhmã amã ja kukamã harênh to në kaxyw ato axihtÿx ka ixpyrà në hkôt pix mã ri amnhÿ nhÿpêx o opa. ¹⁶ Jakamã kêr pu më ãm Tirtüm kãm hprãm xà hkôt pix mã tanhmã kãm amnhÿ nhÿpêx to ho papa. Ra më pahte hkôt amnhÿ nhÿpêx o papa xãja kôt pix mã arÿ amnhÿ nhÿpêx rãhã ho papa.

¹⁷ E Kris kôt ixtō në ixtōxjaja. Na pa ra më anoo mã Jejus kôt tãm ri amnhÿ nhÿpêx o ri ixpa. Tã kêr ka më ja hã ixpumu në ixpyrà në hkôt amnhÿ nhÿpêx o ri apa. Hãmri në nhÿri më kot ixpyrà në ã amnhÿ nhÿpêx anhÿr xwÿnhjê hō pumu në urãk në ã amnhÿ nhÿpêx anê. ¹⁸⁻¹⁹ Jejus kot më pamã më pahte amnhÿ tomnuj mÿrapê pÿ kahpa hã më panê htykja nhÿm më ra ohtō në hprÿ hã mar tã hkôt amnhÿ xunhwÿr kêt në. Më kãm ã kot amnhÿ nhÿpêx anhÿrja ã mar prãm nōkati. Jakamã te më kãm Jejus kurê xwÿnh pyràk. Na htem hã hpijaam kêt kãm tanhmã

ri amnhÿ tomnuj to ho pa. Nê kãm amnhÿ mex pix prãm. Nê tanhmã amnhÿ tomnuj to në ja hã amnhÿ pumu në hkÿnh në. Nom tee ri ja hã amnhÿ pumu në hkaprÿ në ri pa hkêt në. Tã ã më kot amnhÿ nhÿpêx anhÿr jakamã koja më nhÿrmã ma më kot amnhÿ xà htÿx kamã hamak o pa tÿm xãta wÿr hapêx. Nã koja më ã amnhÿ nhÿpêx anê. Ra ixte më amã ja hã më harênh rax tã pa axte më amã më harê. Inhmã më hkaprÿ hkôt na pa hte xatã më amã ja hã më harê. ²⁰ Kêt më papajaja më kurom më pahpê kaxkwa nhō xwÿnh nom kormã. Koja nhÿrmã Jejus Kris akupÿn më pahwÿr kaxkwa rÿm wÿr. Më papytãr xwÿnh maati Pahihtija akupÿn wÿr hãmri në ma akupÿm amnhÿ kôt më pahto api. Jakamã na pu htem arÿ pahkÿnh pê amnhÿ wÿr kamã pajamak rãhã ho ri papa. ²¹ Na pu htem jar pyka ja kamã Jejus kÿnhã paxirerek në pahpunuj në ri papa. Nom koja nhÿrmã akupÿn më pahwÿr wÿr hãmri në amnhÿ pyrà në më pamã më panhÿ nyw gō pu më urãk në paxihtÿx kãm pahtrÿ tÿm në papa ho papa. ã kot më panhÿpêx anhÿr kaxyw ãhpumunh o ãhpumunh. Tã koja ãhpumunh tÿx kãm mëmoj piitã ho amnhÿptãr pa. Pu më pahpiitã hkôt amnhÿ nhÿpêx mex rãhã ho ri papa.

4

*Pawre kot mëmoj tã më kãm karō
Epes 4.3; Piripos 2.2; Korosê 3.15*

¹ E Kris kôt ixtō në ixtōxjaja. Inhmã më ajapêê. Na pa hte më ato ijamak o iÿkrÿ në më amã ijamaxpêr në iÿkÿnh në. Nê jar më pahkwÿjê mã më ajarênh o ri iÿkrÿ. E kwa kêr ka më arÿ Pahihti kapêr kôt pix mã mãn amnhÿ nhÿpêx mex rãhã ho ri apa.

² Nê wa ka Ewox më Sÿxika wa. Na ka xep hte wa mëmoj tã axpên

kamā agryk rāhā ho ri apa. Kwa wa ā amnhī nhīpêx anhÿrja mā anhÿre nē tām axpēn nhīpêx. Pahihti Kris kôt war ate axpēn to war atōx kēnā kot ka kêt wa axtem nē mēmoj tā axpēn kamā agryk o ri apa.

³ Nē ka Xikitre. Apê ixkràmnhwÿ mex jakamā kêt ka axpēn tā wa nita wa kām akapēr kām axihtÿx nē kē war ama nē akupÿm tām axpēn nhīpêx. Na pre wa ra Kremēn mē hkwyjē mē hpimràatā ixpyrà nē Jejus kot tanhmā mē panē amnhī nhīpêx to hā harēnh o ri pa. Tirtūm nhō kagā kamā mē hixi piitā hikwÿ. Mē pahÿr tūm nē mē papa mā xwÿnhjaja ra Tirtūm nhō kagā kamā mē panhīxi jaxwÿr par.

⁴ Nē kêt ka mē apê Pahihti hkwy hā akīnh nē ri apa. Mē ate ā amnhī nhīpêx anhÿr o apaja na pa inhmā hprām tÿx jakamā kot paj axte mē amā harē. Kwa kêt ka mē akīnh nē ri axpēn kôt apa.

⁵ Pahihti Jejus ra akupÿn mē pahwÿr nojarēt jakamā kêt ka mē kutêp mē piitā ri mē ho mex o ri mē hkôt apa.

⁶ Nē kêt ka mē tee ri amnhī kukamā ajamaxpēr o ri apa hkêt nē. Arī amnhī to Tirtūm wÿr rāhā nē. Kot ka mē mēmo arīgro hā apê amrakati japēr nē tee ri ja hā amnhī pumu nē amnhī to awÿ kē mē ama nē mē amā mēmoj gō. Rÿ mē ate mēmoj tā hwÿr xwÿnhnta tanhmā mē amā hipêx to ka mē amnhī tā omu nē kām:

—Nā ām hāmri na ka ā inhīpêx anē nē inhmā ja gō Tirtūm. Amex o amex.

Anhÿr o kām amnhī jarē. ⁷ Kot kaj mē ā amnhī to hwÿr anhÿr o ri apa nhūm tanhmā mē akrā hto ka mē mē apê Jejus Kris kwÿ hā ajamakêtkati nē axāmnhīx ri apa. Hāmri nē mēmoj tā tee ri amnhī kukamā ajamaxpēr o ri akapri nē apa hkêt nē. Ām akīnh rāhā ri apa. Tirtūm kot tanhmā mē pahto nhūm mē pajamakêtkati nē ri mē papaja

mē pahte amnhī tā omunh kêt. Ām tapxipix kot ā mē panhīpêx anhÿr kukamā āhpumunh tÿx.

⁸ E Kris kôt ixtō nē ixtōxjaja. Nā ixkapēr ā kagā jatur xā na ja. Kwa kêt ka mē ixujarēnh mar tÿx nē hkôt amnhī nhīpêx o apa.

Nē kêt ka mē axapēnh mex pix kukamā ri ajamaxpēr o apa.

Nē mēmoj mex pix kukamā ri ajamaxpēr.

Nē axpēn mā akapēr mex pix kukamā ri ajamaxpēr.

Nē akatāt kôt akapēr xaptār pix o axpēn mā akapēr hkukamā ri ajamaxpēr o ri apa.

Nē tām ri amnhī nhīpêx hkukamā mām ajamaxpēr o ri apa.

Nē mē piitā ri mē ho mex o apa hkukamā ajamaxpēr.

Nē mē akapēr mex pix kukamā mām ajamaxpēr o ri apa.

E kêt ka mē ā amnhī nhīpêx anhÿrja kukamā ajamaxpēr rāhā ho ri apa.

⁹ Nē mē akôt ixpare ri na pa pre Kris kôt amnhī to mex pix nē tām ixkapēr o ri ixpa. Tā kêt ka mē ixpyrà nē ā amnhī nhīpêx anē. Koja Tirtūm ja hā mē apumu nē mē akôt ri pa ho pa. Kêp mē pamā mē paxāmnhīx pajamakêtkati xā nhōr xwÿnh na.

Mē kot Pawre hwÿr mēmoj mēnh nhūm kot omunh nē hkīnh ā harēnh Sīkūn Korīt 11.7-9; Piripos 1.5

¹⁰ Nē amnepēm na ka prem xatā tanhmā ixto mex to ho ri apa. Tā axte ā inhīpêx anhÿr prām nom mē apê awry nē ixpa jakamā ka xep prem tee ri tanhmā ixto mex to hkukamā ajamaxpēr kaprÿ. Tā jar mē kot ijaxār ā ijarēnh ma nē ixwÿr Eparoxit mē nhūm man ixwÿr mō nē inhmā kaxporeta gō. Mē amā ijapē hā ixwÿr amē pa omu nē ixkīnh tÿx nē. Nē ixkīnh kām Tirtūm mā mē ajarē. Ām hāmri na ka prem ixwÿr amē.

11-12 Nē na pa hte tanhmā ixkute htā arī ixkīnh nē ijamakētkati nē ri xpa. Jakamā kot pa mēmo arīgro hā xipē amrakati nē inhmā prām japēr tā no ām tee ri amnhī kukamā ijamaxpēr o ri ixkaprī hkēt nē. Arī ixkīnh rāhā ixāmnhīx ri xpa. Rỳ pa inhō mēmoj rax japēr nē määnēn ixkīnh nē ixāmnhīx ri xpa. Na pa pre tōhā inhō rax nē xpa. Nē tōhā inhō hkēt nē xpa. Tā arī ixkīnh rāhā nē xpa ho xpa. ¹³ Na hte Kris mēmoj piitā hkukamā ixto ixihtỳx pa ỳ hā mēmoj kutā ixihtỳx nē xpa. Jao mēmo arīgro hā inhmā prām tỳx nē ri xpa htā ỳ hā kutā ixihtỳx nē ixāmnhīx ri xpa. ¹⁴ Tā jar ixpunuj nē ixkrī ka mē ijarēnh ma nē ixwỳr kàxpore hkwỳ rē. Ām hāmri na ka prem ixwỳr arē. ¹⁵ Amnepēm na pa pre mē anhō pika pē Masetōn rùm ixkato nē mē piitā mē kām Jejus kot tanhmā mē panē amnhī nhīpēx to hā harēnh o ri xpa ka mē xatā ixwỳr kàxpore hkwỳ rē pa ho amnhīm ixujaprōr o ri mē hkōt xpa. Mē apē Piripos kamā Kris kōt ixtō nē ixtōx pixjaja na ka prem ā inhīpēx anē. Krī hkwỳ kamā Kris kōt mē pahkwỳjaja na mē akīnhā ā inhīpēx anhỳr kēt nē. Ām mē kapxipix na ka pre ā ixto mex anē. ¹⁶ Tesarōn kamā ixpare ri na pa pre xipē amrakati kumrēx nē ri mē hkōt xpa ka mē xatā ixwỳr kàxpore hkwỳ rē pa pre ho amnhīm ixujaprōr rāhā ho ri mē hkōt xpa. ¹⁷ Nom mē ate ixwỳr hkwỳ rēnh kaxyw mē akamā ijamak o ri xpa hkēt nē. Rỳ ijamaxpēr o:

—Ko. Koja Piripos nhō xwỳnhjaja ijarēnh ma nē kām ixkaprī nē ixwỳr kàxpore hkwỳ rēnh japēr.

Anhỳr o mē akukamā ijamaxpēr kēt nē. Nom ra mē ate ixwỳr hkwỳ rēnh jakamā koja Tirtūm ja hā mē apumu nē mē ato mex nē. Ā mē pahte axpēn kutā panojarēt anhỳrja na kām hprām.

¹⁸ Tā nhūm Eparoxitja ham mē

arūm kato nē man ixwỳr mō nē inhmā kàxporeta gō. Kwa na ka mē inhmā ōr rax nē. Koja tokyx xipē hapēx kēt pa kritpēm ho ixàpkur o ixkrī. Tā ot pa ho kōta nē tanhmā hkre kamā kute pumunh xà hkōt hā kagà nē mē awỳr kumē. Nà mē ate ixwỳr axāmnhōrta na Tirtūm omu nē ixtā mē apumu nhūm ja kām mex kumrēx. Te mē kot mē hkuxwaxà hpār nhūm mē kām mexta pyrāk nhūm ja kām mex nē. ¹⁹ Nà koja Tirtūm mē apē Jejus Kris kwỳ hā mē amā mē ate mēmoj to presija xà nhōr rāhā ho pa. Mēmoj piitā kēp ō kēnā.

²⁰ E kēr pu mē Mēpanhīpēēxà maati Tirtūm mā mex o mex ā harēnh rāhā o papa. Ja na inhmā hprām.

²¹⁻²² Nē ot pa mē jar ixpiitā mē apē Jejus Kris kōt mē ixkwỳjē hwỳr kagàja kamā mē xipēr mē. Mē xpyrà nē mē apē Tirtūm kra hā. Pa nē Kris kōt mē pahtō nē mē pahtōxjaja. Nē Rōm nhō pahi mā mē àpēnh xwỳnh kot Kris kōt amnhī xunhwỳr xwỳnhjaja määnēn. Ām jar mē xipē Tirtūm krajē piitā pa mē awỳr xipēr mē.

²³ E kē Pahihti Jejus Kris mēmoj to mē akutā nojarēt rāhā nē. Jao mē ato mex o pa.

Tā ām ja pix. Xipē Pawre na pa mē awỳr kagàja nhīpēx nē kumē.

Korosê Pawre kot Koros kamã Jejus kôt hkwyjê hwÿr kagà nê mênh

Pawre na pre kagàja nhîpêx. Jejus nhÿ hã hkrajê jahkre o mē pa xwÿnhjê hō na pre. Tã nhūm mē kēp Jejus kra hkêt xwÿnh kwÿjjaja Jejus ā unē nē haxà nhūm arî hkrî ho hkrî. Hāmri nē krî pē Koros kamã Jejus krajê mã kagà nhîpêx nē mē hwÿr kumē. Koros kamã Jejus kwÿjê kamã Ijaew kwÿ nē kamã Ijaew kêt xwÿnh kwÿ nhūm Pawre mē ho hpimràatã mē hwÿr kumē. Kormã mē hwÿr mōr nē mē omunh kêt tãã. Nē kagàja kamã mē kot tanhmã Jejus o hêx to ho pa xwÿnhjê jarēnh to. Jejus kēp Tirtūm Kra hkêt ā mē kot ho hêx xwÿnhjê jarē nē mē nē mē kām kapēr. Mē kot mē hkôt amnhî nhîpêx kêt kaxyw mē kām kapēr nē hã kagà nē mē hwÿr kumē nē mē kām:

¹ Pa Koros kamã Kris kôt ixkwÿjjaja. Xã mē amex na ka mē apa? Ixpê Pawre na pa mē awÿr kagàja nhîpêx nē mē awÿr kumē. Kris kôt mē pahtō Ximotre mē wa kumē. Ixte Jejus Kris nhÿ hã mē ahkre ho mē ixpa xwÿnhjê hō na pa. Tirtūm kām hprãm xã hkôt. ² Tã pa mē awÿr kagà nhîpêx nē kumē. Mē apê Kris kôt mē ixtō nē ixtōx na ka mē. Na ka xep htem Kris kapēr kôt amnhî nhîpêx mex o ri apa. E kê Tirtūm mē apê hkra hã mē akutã nojarêt rãhã nē. Ka mē amex nē ajamakêtkati nē axãmnhîx ri tanhmã amnhî nhîpêx ho ri apa.

*Koros nhō xwÿnh kwÿjjaja kot Je-
jus kôt amnhî xunhwÿr ā mē harēnh
Wam Tesarōn 1.2-5*

³⁻⁴ Na pa ra Ximotre mē wa mē ajarēnh ma. Mē ate amnhî kaxyw Jejus Kris kôt ajamxpēr tÿx nē

hkôt amnhî nhîpêx mex o apa hã mē ajarēnhja ma. Nē mē kot Tirtūm kôt amnhî xunhwÿr xwÿnh piitã mē amã mē hkînh ā mē ho mex o apa hã mē ajarēnhja ma nē wa ixkînh nē. Jakamã na pa wa Pahihti Jejus Nhîpêxã Tirtūm mã amnhî jarēnh kaxyw nē kām mē anhy hã wa ixkînh ā amnhî jarē. ⁵ Na pre Epas ma mē awÿr mō nē mē amã Jejus kot tanhmã mē panē amnhî nhîpêx to hã harēnh o mē akôt pa. Ām hāmri kot mē amã harēnhja. Tã ka xep prem ama nē amnhî kaxyw hkôt ajamxpēr nē hkôt amnhî xunhwÿ. Hāmri nē amnhî wÿr Jejus jamār o ri apa. Kojã nhÿrmã akupÿn mē pahwÿr wrÿ nē amnhî pyrã nē ma akupÿm kaxkwa hwÿr mē pahto api nē mē pahto mex kumrêx o mē pahkôt pa ho pa. Tã ka xep htem amnhî kaxyw hkôt ajamxpēr tÿx nē ā kot amnhî nhîpêx anhyr kutêp amnhî wÿr kamã ajamak rãhã nē. Nē mē amã mē kot Tirtūm kôt amnhî xunhwÿr xwÿnhjê hkînh tÿx nē.

⁶ Na hte Tirtūm ām hāmri mē pahto mex pix rãhã ho pa. Nē mēmoj to mē pakutã nojarêt rãhã nē. Tã wam mē ate harēnh marta ā ka mē hkôt amnhî xunhwÿr kurê kumrêx nē ri kapēr kôt axpēn kôt amnhî nhîpêx mex pix o ri apa. Jao hkôt pix mã amnhî nhîpêx mex nē. Tã na hte pika piitã hkôt ri mē pa xwÿnh kwÿjjaja mē apyrã nē Jejus jarēnh ma nē hkôt amnhî xunhwÿ. Nē mē apyrã nē axtem hkôt pix mã amnhî nhîpêx nē kapēr kôt amnhî nhîpêx mex o ri pa.

⁷ Nē mē awÿr mōrta ā na pre Epasja mē amã Tirtūm kapēr jarēnh o ri mē akôt pa ka prem ama nē amnhî kaxyw hkôt ajamxpēr nē hkôt amnhî xunhwÿ. Epasja wa ixpyrã nē kot Kris mã tanhmã amnhî nhîpêx to ho pa xwÿnh. Nē wa inhã hapêê. Na pre katã kôt mē amã Tirtūm kapēr jarēnh pa. Kot mēmoj to mē pakutã nojarêt rãhã

hã harênh o ri mẽ akôt pa. ⁸ Tã man akupÿn wa ixwÿr môn pôj nê wa inhmã tanhmã mẽ ajarênh to. Tirtûm Karô nhÿ hã mẽ amã Kris kôt atô nê atôx piitã mẽ hkĩnh o ri apa hã mẽ ajarê. Pa wa mẽ ajarênh ma nê wa ixkĩnh tÿx kumrêx.

Pawre mẽ Ximotre wa kot Koros kãm hkwÿjê ho Tirtûm wÿr ã wa harênh

Epes 1.15-23, 3.14-21; Piripos 1.9; Wam Tesarôn 5.23-24; Sikûn Tesarôn 1.11, 2.16

⁹ Nê na pre Epas akupÿn wa ixwÿr pôj nê wa inhmã tanhmã mẽ ajarênh to. Mê ate amnhĩ kaxyw Jejus kôt ajamaxpêr o apa nê mẽ amã Kris kôt akwÿjê piitã mẽ hkĩnh o ri apaja nhũm wa inhmã mẽ ajarê. Pa wa mẽ ajarênh ma nê mẽ ato Tirtûm wÿr rãhã o jar mẽ hagiênh xà kamã ixkrĩ. Nê arĩ mẽ ato hwÿr rãhã ho ixkrĩ. Nê mẽ ato hwÿr o:

—Pa Tirtûm. Ot pa Ximotre mẽ wa Korosê nhô xwÿnhjê ho awÿr kaxyw amã mẽ harê. Kwa tanhmã mẽ hamaxpêr to kêm mẽ amã hprãm xà hkôt pix mã amã tanhmã amnhĩ nhĩpêx to ho pa. Nê Akarô nhÿ hã hprĩ hã akapêr ma nê ãm hkôt pix mã tanhmã amnhĩ nhĩpêx to ho pa. Anê.

¹⁰ Na pa hte wa ã mẽ ato Tirtûm wÿr anhÿr rãhã ho ixkrĩ. Kot kaj mẽ ã amnhĩ nhĩpêx anhÿr o ri apa nê Jejus kot amnhĩ nhĩpêx o amnhĩ nhĩpêx mex o ri apa. Nê aprĩ hã Tirtûm kot amnhĩ nhĩpêx ã omunh mex o mō. Jao mẽmoj to axpên kutã anojarêt pix o ri apa hprãm. Hãmri nhũm Tirtûm ja hã mẽ apumu nê hkĩnh nê. ¹¹ Tirtûmja mẽ pakurom mẽmoj piitã kaxyw àhpumunh o àhpumunh. Nê mẽmoj piitã kaxyw hihtÿx o hihtÿx. Jakamã na pa hte wa mẽ ato hwÿr o:

—Pa Tirtûm. Kwa tanhmã Koros nhô xwÿnhjê ho kêm mẽ axihtÿx nhÿ hã mẽmoj punuj kutã amnhĩ to htÿx nê. Mê kot Jejus ã tanhmã mẽ ho nhũm mẽ kot amnhĩ xà

kamã hamak tã kêm mẽ tee ri amnhĩ kukamã hamaxpêr o hkaprĩ nê ri pa hkêt nê. ãm anhÿ hã mẽ hkurê xwÿnhjê kutã amnhĩ to htÿx nê hkĩnh kãm ri pa ho pa. Anê.

Na pa hte wa ã mẽ ato hwÿr anê.

¹² Na pre ra Tirtûm amnhĩ ri mẽ pakutêp mẽmoj mex kwÿ jaxwÿ. Mê pahpê hkrajê mã haxwÿ. Tã ka mẽ ÿ hã tãm amnhĩ nhĩpêx o apa jao mẽ ate mẽmoj mex jamÿnh mã tãm. Ô krĩ nhĩrã rax kumrêx kamãã. Jakamã kwa mẽ kot Jejus ã tanhmã mẽ pahto htã kêr pu mẽ arĩ Tirtûm mã mex o mex ã harênh rãhã ho ri papa.

¹³ Nê Satanasti kêp kamãt kô kamã mẽ kot amnhĩ tomnuj ho mẽ pa xwÿnhjê pãm. Tãm na hte mẽ ho amnhĩptâr o pa nê hkôt na pu prem amnhĩ nhĩpêx o papa rãhã nhũm Tirtûm tee ri ja hã mẽ pahpumu. Hãmri nê kãm kêp mẽ papÿtâr prãm xaj mẽ pahwÿr Kra japê htÿx kumrêx xwÿnhja mẽ. Nhũm mẽ pahwÿr wrÿ nê mẽ panê htyk o mẽ pahte amnhĩ tomnuj pãnhã kãm amnhĩre. Tã pu prem hkôt amnhĩ xunhwÿ nhũm Tirtûm hã mẽ pahpumu nê mẽ panê mẽ pahte amnhĩ tomnuj o hapêx pa. Te kot amnhĩ katut kôt rênh par pyrãk. Jao Satanasti pê mẽ pahpytã nhũm hpãnhã Jejusja tãm kêp mẽ pahto amnhĩptâr o pa xwÿnh.

¹⁴ Ra htyk o mẽ pahte amnhĩ tomnuj piitã hpãnhã amnhĩrer jakamã na pu htem hkôt amnhĩ xunhwÿ nhũm mẽ pahte amnhĩ tomnuj o hapêx pu mẽ axte Satanasti hkôt ri amnhĩ nhĩpêx kêt nê. ãm Jejus kôt pix mã amnhĩ nhĩpêx o ri papa.

Kris mẽ Tirtûm wa kot amnhĩ nhĩpêx te wa kot axpên pyrãk ã harênh

Juãw 1.1-5; Korosê 2.9; Eprêw 1.1-

14

¹⁵ Nê Krisja te kot Tirtûm pyrãk. Mê pahte pano ho Tirtûm pumunh kêt tã Kra Kris kot amnhĩ nhĩpêx ã harênh mar kôt mãânên Tirtûm

kot amnhî nhîpêx â omunh mex nê. Amnepê mã kormã mëmoj kêt ri nhũm Jejus pa ho pa rãhã nê. Jakamã kot amnhî to rax o Tirtũm kot mëmoj to katorja piitã hakrenh par kumrêx. ¹⁶ Na pre hipêêxã Tirtũm nhỹ hã mëmoj piitã ho kator pa. Kaxkwa kamã nê pika hkôt mëmoj piitã ho kator pa. Nê kaxkwa kamã mẽ pahte pano ho mëmoj pumunh par xwýnhjaja nhũm pre ho kato. Nê kamã mẽ pahte pano ho mëmoj pumunh kêt xwýnhjaja nhũm pre mãânên ho kato. Nê kapêr o wrýk xwýnhjaja nê mẽ hkrãhtũmjaja nhũm pre mẽ ho kato. Nê pika kamã mẽ ho amnhĩptàr xwýnhjaja nhũm pre mẽ piitã mẽ ho kator pa. Kãm hprãm xã hkôt Tirtũm nhỹ hã mëmoj piitã ho kator pa.

¹⁷ Tã na hte arĩ kaxkwa kamã nê pika hkôt mëmoj piitã hamãr rãhã ho pa. Kêp apu kot hamãr kêt ronhỹx mëmoj piitã akupým hapêx pa.

¹⁸ Nê tãm na hte mẽ pahpê hkrajê ho amnhĩptàr o pa. Te kêp mẽ pahkrã nhũm te mẽ pahpê ã pyrãk jakamã na pu htem kapêr kôt pix mã amnhî nhîpêx o papa. Kumrêx na pre akupým htĩr o htĩr jakamã kot amnhî to rax o mëmoj piitã hakrenh par.

¹⁹ Nê na pre Tirtũm ã hamaxpêr anê nê hamaxpêr o: “Nà Ixkra mẽ wa ixte amnhî nhîpêxja te kot axpên pyrãk. Nê wa ixihtýx mãânên te kot axpên pyrãk. Nê wa inhmex xã mẽ wa ixãhpumunhja te kot axpên pyrãk. Æ wa ixte amnhî nhîpêx kot anhýr. Wa ixte amnhî nhîpêxja na mex kumrêx.” Anê.

²⁰ Tã Jejus kot pĩ kahpa hã mẽ panê tyk nê hkamrô pikapĩr kukwak ri na hte Tirtũm mẽ kot hkôt amnhî xunhwýr xwýnh piitã mẽ ho hkra nhũm mẽ hamakêtkati nê ãmnhĩx pa ho pa. Kaxkwa kamã nê pika piitã hkôt mẽ kot Jejus kôt amnhî xunhwýr xwýnhjaja na

htem ã amnhî nhîpêx mex anhýr o pa. Æ Jejus kot mẽ panê htyk anhýr jakamã kot amnhî to rax o kot mëmoj piitã hakrenh par.

Jejus kêp tãm mẽ paxunhwýr xwýnh ã harênh

²¹ Nê mẽ papajaja na pu prem pamã Tirtũm prãm kêt o ri papa. Te hkàx ã ri papa pyrã nê kutã amnhî xunhwý nê pajamaxpêr punuj nê tanhmã amnhî tomnuj to pix o ri papa. ²² Tã Jejus kôt amnhî xunhwý nhũm amnhî tã mẽ pahpumu. Hãmri nê ra mẽ panê htyk jakamã amnhî tã mẽ pahpumu nê Tirtũm noo mã tãm mẽ paxunhwý. Te aa mẽ pahte tanhmã amnhî tomnuj to hkêt pyrãk o mẽ panhîpêx nê tãm mẽ paxunhwý. Pu mẽ arĩ pahpê Tirtũm kutã amnhî xunhwýr xwýnh kêt nê hpãnhã pahpê hkrãmnhwýy. ²³ Na pre Tirtũm mẽ pahte amnhî kaxyw Kra Kris kôt pajamaxpêr nê hkôt amnhî xunhwýr ã mẽ pahpumunh kôt ã mẽ pahto mex anê. Tã kêr pu mẽ arĩ hkôt amnhî nhîpêx o ri papa nê aa hkaga hkêt nê. Mẽ kot Kris ã tanhmã mẽ pahto htã pu mẽ arĩ hkôt amnhî nhîpêx mex rãhã ho ri papa.

Kormã mẽ kot jar ijaxàr kêt ri na pa pre hte mẽ kãm ã harênh anhýr o ri mẽ hkôt ixpa. Tã ka prem Jejus jarênh ma nê hkôt amnhî xunhwýr kurê kumrêx. Nhũm krĩ piitã hkôt ri mẽ pa xwýnh kwýjaja mẽ apyrã nê harênh ma nê hkôt amnhî xunhwý nê hkôt amnhî nhîpêx o pa.

Pawre kêp Ijaew kêt xwýnhjê mã Jejus jarênh xwýnh ã harênh

Epes 3.1-13

²⁴ Nê ixte mẽ amã Kris kot tanhmã mẽ panê amnhî nhîpêx to hã harênh o ixpaja ã na prem tanhmã ixto htýx nê pa amnhî xã htýx kãm ijamak o ri ixpa. Tã arĩ Tirtũm kãm hprãm xã hkôt ã amnhî nhîpêx anhýr jakamã na pa ixkĩnh nê jar ixkrĩ. Ixte Kris kwýjê kaxyw

amnhî xà kamã ijamak tỳx o ixkrî. Te mê apê Kris nhî pyràk xwỳnhjê mãã. Tã pa te ixpê Kris kot amnhî nhîpêx pyràk o mê akaxyw amnhî xà htỳx kãm ijamak o ixkrî.

²⁵ Na pre Tirtùm mê apê Ijaew kêt xwỳnhjê kaxyw ixãm. Ixte mê amã kapêr piitã harênh par nhũm mê ate mar nê hkôt amnhî nhîpêx mex o ri apa kaxyw. ²⁶ Na pre kormã mēhō mê awỳr mōr nē mê amã harênh kêt nē. Tã ra Tirtùm kãm mê ate mar prãm nē. Kãm mê apê Ijaew kêt xwỳnhjê mê mê pahpê Ijaew xwỳnhjê japê o axpên pyràk. Nom na pre amnepêm ri mê pa xwỳnhjê mã kormã ja hã amnhî to amnhîrît kêt nē. Tã ra jarãhã mê pahpê Kris kwỳjê mã ja ho amnhîrît. Mãânên kãm mê apê Ijaew kêt xwỳnhjê japê hã amnhî to amnhîrît. ²⁷ Mê apê Ijaew kêt tã na ka prem Kris kôt amnhî xunhwỳ nhũm Tirtùm Karō mê akarō mã agjê nē mê akamã pa ho pa. Ka mê ra hkôt amnhî nhîpêx jakamã kot kaj mê ixpyrà nē nhỹrmã kuri atĩr tũm nē amex rãhã ho apa ho apa. Ja na mex kumrêx. Tã ja na Tirtùm kãm mê ate mar prãm nē mê akaxyw ixãm. ²⁸ Jakamã na pa pre Ximotre mê wa mê apiitã mê amã Kris kot mê panê tanhmã amnhî nhîpêx to hã harênh kãm ixihitỳx o ri mê akôt ixpa. Nê kapêr o mê ajahkre ho ri mê akôt wa ixpa. Nê jar mê hagjênh xà kamã krĩ piitã hwỳr kagã nhîpêx nê mê hwỳr kurê. Mê kot kamã harênh nê mar nê amnhî tomnuj kaga nê hpãnhã Kris kôt amnhî xunhwỳr nê âm kôt pix mã amnhî nhîpêx o pa kaxyw. Kêr pa nhỹrmã kãm mê ate inhmar nê hkôt amnhî xunhwỳr xwỳnhjê jahkre nê kãm:

—E Pahiiti. Ota akwỳjaja. Na htem akôt amnhî nhîpêx mex rãhã ho ri pa. Anê.

²⁹ ã ixte kãm mê piitã mê harênh anhỹrja na inhmã hprãm. Ja kaxyw na pre Jejus ixto ixihitỳx. Jakamã na

pa hte Tirtùm nhỹ hã tanhmã kapêr o mê ahkre hto ho ri mê hkôt ixpa. Jao mê ho Tirtùm wỳr o ri ixpa nê mê kãm kagã nhîpêx nê mê hwỳr kurê nê kamã kapêr o mê ahkre o ri ixpa.

2

*Pawre kot Jejus kapêr o Koros nhō xwỳnhjê o hihitỳx ã harênh
Epes 3.14-19; Piripos 1.9*

¹ E kot paj mê amã tanhmã amnhî jarênh to ka mê inhma. Na pa hte mê ato Tirtùm wỳr rãhã ho ixkrî. Mê kajaja nê krĩ pê Ratisej kamã Jejus kôt mê pahkwỳjaja. Kormã ixte mê apumunh kêt tã pa hte mê ato Tirtùm wỳr kãm ixihitỳx ãhã ho ixkrî. ² Mēmo kaxyw na pa hte ã mê ato hwỳr anê? Nê mēmo kaxyw na pa hte mê amã kagã nhîpêx nê mê awỳr kurê? Nã âm mê ate kamã harênh nê mar nê Jejus kapêr kôt axpên to axihitỳx o ri apa kaxyw. Nê mê amã axpên kĩnh o ri apa kaxyw. Pê te mê ate ixkre tipxi kamã axpên kôt amnhî nhîpêx o ri apa pyràk. Jao aprĩ hã Tirtùm kot amnhî nhîpêx pumunh mex nê amnhî kaxyw hkôt ajamaxpêr tỳx nê. Kot kaj mê ã amnhî nhîpêx anê nê Kris kot amnhî nhîpêxta pumunh pa. Na pre Tirtùm tokyx mê kãm Kris o amnhîrît kêt tã ra mê pamã ho amnhîrît. ³ Tirtùm kot amnhî nhîpêx nê kapêrja na pu htem Kris nhỹ hã pahprĩ hã omunh nê mar mex nê. ⁴ Jakamã koja mēmojaja mê awỳr mra hãmri nê hêx rom Tirtùm kapêr kwỳm ri tanhmã mê amã mēmoj jarênh to. Te mê ãhpumunh tỳx pyràk o mê amã harê no âm mê ãhpumunh kêt. Ka mê ama nê âm mê ama nê Kris kaga hkêt nê.

⁵ Nê kormã arĩ Jejus ã ijaxàr nê ixkrî nê kormã mê akôt ixpa hkêt tã ot pa hte mê amã ijamaxpêr rãhã ho ixkrî. Nê ra tanhmã mê ajarênh mar to. Na ka xep htem Kris kôt

amnhî nhîpêx tỳx o ri apa. Te ahkrô pè kukryt mut kuxêeti kot pĩ kupu htỳxta pyrâk. Nê ka xep htem arĩ amnhĩ kaxyw Kris mã ajamaxpêr tỳx o ri apa. Pa mẽ ajarênh ma nê ixkĩnh tỳx nê.

⁶ Na ka prem Pahihti Jejus Kris kôt amnhĩ xunhwỳr pa. Tã kêr ka mẽ arĩ hkôt amnhĩ nhîpêx mex rãhã ho apa. Kêp mẽ panhõ Pahihti kênã. ⁷ Jakamã mẽ ãm kôt pix mã amnhĩ xunhwỳr tỳx nê aa hkaga hkêt nê. Te mẽmo pĩ hpâr jarêja pika kaxwỳnh kãm pimãnh nê kot pika jamỳnh tỳxta pyrâk. Nhũm kôk xàpêr tỳx tã tee kot mẽnh kaxyw pyrâk. Tã kêr ka mẽ pĩ hpãrta pyrã nê hkôt amnhĩ xunhwỳr tỳx nê hkôt amnhĩ nhîpêx mex o ri apa. Ra Epas kot mẽ ajahkre ho pa xà hkôt. Nê amnhĩ krãm Kris kapêr jaxâr tỳx nê aa ho ajamakêtkati hkêt nê. Pê akĩnh kãm Tĩrtũm mã mex o mex ã harênh rãhã ho ri apa.

⁸ Nê kwa kêr ka mẽ kot hêx rom mẽ amã tanhmã kapêr to ho mẽ pa xwỳnhjaja ka mẽ amnhĩ nê mẽ omunh mex nê. Nê mẽ kapêr mar hkêt nê. Mẽ ate Kris kaga hprãm xài na htem tanhmã mẽ amã hêx to ho ri mẽ akôt pa. Te amnepêm mẽ kot Tĩrtũm kapêr kwỳm ri tanhmã mẽ ahkre hto xwỳnhjê pyrâk. Hinhu hikôoti kapêr kôt na htem tanhmã mẽ amã hêx to nom Kris nhỹ hã mẽ amã kapêr kêt nê. Jakamã kwa mẽ amnhĩ nê mẽ omunh mex nê.

⁹ Nê Kris mẽ Tĩrtũm wa kot amnhĩ nhîpêx kot axpên pyrâk. Nê wa hamaxpêr kot axpên pyrâk. ¹⁰ Tã kêr pu mẽ pajaxwỳja wa hamaxpêr o pajamaxpêr nê wa kot amnhĩ nhîpêx o amnhĩ nhîpêx. Jakamã kwa mẽ kot Tĩrtũm kapêr kwỳm ri tanhmã mẽ kapêr to xwỳnhjê kot amnhĩ nhîpêx o amnhĩ nhîpêx kêt nê. Nê mẽ kapêr ma nê ãm mẽ ama. Kris na hihtỳx o hihtỳx o kot mẽkarõmnuti nhõ pahi piitã mẽ hakrenh par. Nê hihtỳx o hihtỳx o kot Tĩrtũm kapêr o mẽ

wrỳk xwỳnhjê piitã mẽ hakrenh par. Nê ãhpumunh o ãhpumunh o kot mẽmoj piitã hakrenh par jakamã kêr ka mẽ kapêr kôt pix ma nê hkôt pix mã ri amnhĩ nhîpêx o ri apa.

Mẽ pahte amnhĩ nhîpêx nyw jarênh

Rõmãn 6.3; Karatas 5.24

¹¹ Nê na hte ixkwỳ Ijaewjaja mẽ hkra nhỹrmã hprêk nê Tĩrtũm kôt amnhĩ nhîpêx ã mẽ harênh kaxyw mẽ kêp mẽmy kwrýt kà jakã. Tã mẽ kajaja. Mẽ apê Ijaew kêt xwỳnhjaja na pre Kris mẽ anhîpêx o te mẽ kot amnhĩ jakãrta pyrâk. Jao te kot mẽ anê mẽ ate amnhĩ nhîpêx tũm jakãr par pyrâk o mẽ anhîpêx ka mẽ ra amnhĩ nhîpêx nyw o amnhĩ nhîpêx o apa. Nhũm htem mẽ ate amnhĩ nhîpêx nyw ã mẽ apumu nê mẽ ate Jejus kapêr kôt amnhĩ nhîpêx ã mẽ apumunh kurê kumrêx. ¹² Tã na pu htem jarãhã mẽ pahte Tĩrtũm kôt amnhĩ nhîpêx o papa hã amnhĩ jarênh kaxyw amnhĩ jakãr kêt nê. Na pu htem hpãnhã amnhĩ kaxyw Tĩrtũm xihtỳx o hihtỳx xwỳnhja kôt pajamaxpêr. Kot mẽ panê pahte amnhĩ tomnuj rênh par kôt pajamaxpêr hãmri nhũm mẽ gôx kãm mẽ pahkrã kumrã. Te mẽ pahte gôx kãm mẽ pahte amnhĩ nhîpêx tũm rer par pyrâk o amnhĩ nhîpêx. Te Jejus htyk nhũm mẽ kot haxâr nhũm nõr nhũm mẽ pahte amnhĩ tomnuja ãhkô hã nõr nê hapêx par pyrâk. Tã pu htem ra gôj rũm pahkrã hapôj. Te Tĩrtũm kot akupỳm Kris o htĩr pyrâk. Jao ra mẽ pahte Kris kôt amnhĩ nhîpêx nyw o amnhĩ nhîpêx o papa hkrax ã amnhĩ to amnhĩrit. ¹³ Amnepêm kormã mẽ pahte Jejus kôt amnhĩ xunhwỳr kêt ri na pu prem ri amnhĩ tomnuj to nê tanhmã pajamaxpêr punuj to ho ri papa. Tĩrtũm noo mã te ra mẽ pahtyk pyrâk. Tã Tĩrtũm te akupỳm Kris kôt mẽ pahto pahtĩr pyrâk o mẽ panhîpêx nê mẽ panê mẽ pahte

amnhî tomnuj piitâ ho hapêx nê axte kâm hamaxpêr kêt kumrêx. ¹⁴Te mê pahte tanhmâ amnhî tomnuj to ho papa nhûm Tirtûm kot ja hã mê pahpumunh nê mê pahte amnhî tomnuj piitâ hã kagà hpar pyrâk. Nê kot kagàja pyr nê Kris nhîhkô hã pî kahpa hã nhôr pyrâk. Jao te kot mê pahte amnhî tomnuj â kagàta hkaxônh nê rênh par pyrâk o hipêx. ¹⁵Hâmri nhûm Krisja pî kahpa hã htykja o mêkarômnuti mê mê õ pahi Satanasti wa mê ho hirerek pa. Jao hihtÿx o kot mê hakrenh par â amnhî to amnhîrit. Te mê kot kutâ amnhî xunhwÿr xwÿnh piitâ mê noo mã mê ho krihkrit par nê ma akupÿm õ krî hwÿr hkînh nê grer o môrta pyrâk.

¹⁶Nê koja mëmojaja mê awÿr mra nê tee ri mê ate mëmoj kur o akrî hã mê apumu nê mê amâ:

—Kwa na hte Tirtûm kôt mê kot amnhî xunhwÿr xwÿnhjaja ja kur kêt nê. Nê ja ho hkôm kêt nê. Nê mê panhõ arîgromnu pê sap â ri mëmoj tâ âpênh kêt nê. Nê mytwrÿ nyw â mëmoj tâ âpênh kêt nê. Na htem â Tirtûm â hkînh o pa anê. Tâ â mê ate mê ixkôt amnhî nhîpêx anhÿr kêt jakamâ mãn mê apê Tirtûm kra hkêt nà. Anê.

Tâ nom kêr ka mê kapêr ma nê âm ama. ¹⁷Amnepêm kormâ mê pahte Kris kôt amnhî xunhwÿr kêt ri na pu prem â amnhî nhîpêx anhÿr o papa. Tâ Jesus kôt amnhî xunhwÿr hãmri nê axte â amnhî nhîpêx anhÿr kêt nê. Pânã kapêr pix ma nê hkôt pix mã amnhî nhîpêx o ri papa.

Mê pahte mê kot Tirtûm kapêr o mê hêx xwÿnhjê mar kêt â mê pamã karõ

¹⁸Nê koja mëmojaja mê awÿr mra nê hêx rom tanhmâ mê amâ amnhî jarênh to nê mê amâ:

—Na pre Tirtûm âm mê papxipix mê inhmâ amnhî to amnhîrit. Jakamâ kwa mê ixkapêr ma. Kot

kaj mê inhmar kêt nê hãmri nê mê amex kêt nê apa.

Anhÿr o mê amâ kapêr japêr ka mê ama nê âm mê ma. Rÿ nhûm mê amâ:

—Tirtûm mê parom kot amnhî to rax o kot mê pahpiitâ mê pajakrenh par jakamâ kwa mê tanhmâ amnhî to hwÿr to hkêt nê. Kot ka mê anê nhûm mê ama nê mê akamâ gryk nê. No kêt mê amnhî to kapêr o wrÿk xwÿnhjê mãn wÿ. Koja mê ama nê mê akamâ gryk kêt nê tanhmâ mê amâ mëmoj nhîpêx to. Anê.

Koja mê â mê amâ kapêr anê ka mê ama nê âm mê ama. Te ho mê âhpumunh tÿx kâm mê kot â mê amâ kapêr anhÿr pyrâk no âm mê kapêrja mex kêt. Na htem amnhî krâ hkôt te amnhî to rax pyrâk o â mê amâ kapêr jao mê hamaxpêr tûm o hamaxpêr o ri pa. No mê apyrâ nê mê hamaxpêr nyw o hamaxpêr kêt nê. ¹⁹âm mê kot Tirtûm kapêr kwÿm ri mê ahkre jakamâ mê kêp Jesus kwÿ hkêt. No mê papajaja mê pahpê Jesus kwÿ na pu mê. Nhûm Jesus kêp mê panhõ Pahihti jakamâ na hte tanhmâ mê pahto paxihtÿx to pu htem kukwak ri tanhmâ axpên to ajuta hto ho ri papa. Nê hkôt axpên to paxihtÿx o ri papa. Mê pahpiitâ mê pahte hkôt amnhî nhîpêx mex o ri papa kaxyw. Tirtûm kâm hprâm xà hkôt.

Mê pahte amnhî krâ hkôt tãm amnhî nhîpêx kêt â mê pajarênh

Karatas 3.1-5, 5.1-9; Epes 2.8; Piripos 3.9

²⁰⁻²¹Nê wam mê pahte amnhî nhîpêx tûm nê mê pajamaxpêr tûmta te kot Kris kôt htyk nê mê pahpê hapêx par pyrâk jakamâ na pu htem arî hkôt amnhî nhîpêx kêt nê. Nê mêkarômnuti hkôt amnhî nhîpêx kêt nê. Tâ no nhûm xep ra mëhõja mê awÿr mō nê hêx rom mëmoj nê tanhmâ mê amâ kapêr to nê mê amâ:

—Kwa mẽ ja jamýnh kêt nê. Nê ja hkur kêt nê. Nê ja kupênh kêt nê.

Anhÿr o mẽmoj nê mẽ akurê ho pa. Xep mẽ ã mẽmoj nê mẽ akurê anê ka xep mẽ ama nê mẽ hkôt amnhĩ nhĩpêx. Kwa nà mon ka mẽ ri axtem nê mẽ hkôt amnhĩ nhĩpêx? ²² Tĩrtũm kot mẽmojja nê tanhmã mẽ pahkurê htore hã. ãm mẽ kot amnhĩ krã hkôt mẽmoj nê mẽ akurê ka mẽ ama nê mẽ hkôt amnhĩ nhĩpêx. Mẽmoj kur nê mẽ akurê xwýnhnta na htem kuku nhũm hapêx kurê kumrêx. Mo koja we Tĩrtũm omu nhũm kêp omnuj? Nà ja kot anhÿr kêt kênã. Mẽ ãm amnhĩ krã hkôt mẽ kot ja nê mẽ akurê. ²³ Tã ã mẽmoj nê mẽ akurê anhÿr xwýnhjaja na ka htem nhÿri mẽ omu nê mẽ kapêr ma nê atýx ajamaxpêr o:

—Nà te Tĩrtũm kôt amnhĩ nhĩpêx mex o pa pyrãk. Te mẽ àhpumunh týx pyrãk o ã mẽ inhmã mẽmoj jarênh anê. Anê.

No ãm mẽ kot mẽmoj jarênhja kot anhÿr kêt. ã mẽ kot amnhĩ nhĩpêx anhÿr xwýnhjaja kêp Tĩrtũm kra hkêt. Na htem ãm amnhĩ krã hkôt mẽmoj nê mẽ akurê ho pa. Nê hã amnhĩ to jarkrar o ri pa. Mẽ ate ja hã mẽ mar nê mẽ kot amnhĩ to rũnh ã mẽ hkamnhĩx kaxyw. Na htem kot amnhĩ tomnuj pymaj tanhmã amnhĩ nhĩ hto ho pa. No ãm ri ã amnhĩ nhĩpêx anhÿr kaprý. Nê ãm htýx Tĩrtũm kapêr o mẽ wrýk xwýnhjê hwÿr kaprý ho pa.

3

Mẽ pajamaxpêr nyw nê mẽ pahte amnhĩ nhĩpêx nyw jarênh

Rômãn 6.4-11

¹ Nê na pre Tĩrtũm akupým Kris o htĩr nhũm mẽ pahte hkôt amnhĩ xunhwÿr jakamã te Tĩrtũm kot Kris nhĩpêx pyrã nê akupým mẽ pahto mẽ pahĩr pyrãk o mẽ panhĩpêx. Jakamã kwa kêr pu mẽ axte pahte amnhĩ nhĩpêx tũm kôt amnhĩ nhĩpêx kêt nê. Te Kris pyrã nê ra

kaxkwa hwÿr paxàpir nê kamã ri papa pyrãk o amnhĩ nhĩpêx. Jao pajamaxpêr nyw pix o pajamaxpêr nê pahte amnhĩ nhĩpêx nyw pix o amnhĩ nhĩpêx o ri papa. Te Kris kot amnhĩ nhĩpêx pyrãk. Na pre akupým kaxkwa hwÿr api nê Tĩrtũm nhĩkhó hã mẽ ho amnhĩptãr xà kamã hkrĩ ho hkrĩ.

²⁻³ Nê ra mẽ pahte Kris kôt amnhĩ xunhwÿr jakamã te jar pika hkôt pajapêx par nê Tĩrtũm wa kuri kaxkwa kamã pamex nê papa ho papa pyrãk. Jakamã kwa kêr pu mẽ pahte amnhĩ nhĩpêx nyw mã mãn pajamaxpêr rãhã ho papa. Nê axte mẽ pahte amnhĩ nhĩpêx tũm mã pajamaxpêr kêt nê.

⁴ Kris kêp akupým mẽ pahto mẽ pahĩr xwýnh. Koja nhÿrmã akupýn mẽ pahwÿr wrý hãmri nhũm Tĩrtũm te ho mex raxta pyrãk o mẽ panhĩpêx nê mẽ pahto mex rax kumrêx.

Mẽ pahte akupým amnhĩ nhĩpêx tũm o paxujanãr kêt ã mẽ pamã karõ Epes 4.17-5.2

⁵ Jakamã kwa kêr ka mẽ axte ate amnhĩ nhĩpêx tũm kôt amnhĩ nhĩpêx kêt nê. Te ra mẽ apê htyk nê hapêx par pyrã nê axte kãm ajamaxpêr kêt nê.

Jakamã axte ri axpên mjên rý axpên prõ ho amnhĩkati hkêt nê.

Nê nhãm ri mẽmyjê hõ rý mẽnijê hõ ho amnhĩkati hkêt nê.

Nê mẽ amã tanhmã amnhĩ tomnuj to hprãm kêt nê.

Nê mẽ amã akukrêx rax prãm kêt nê. Kot ka mẽ ã amnhĩ nhĩpêx anê nê gaa nê akukrêx rax gryk ã axte Tĩrtũm mã ajamaxpêr kêt nê.

⁶ ã mẽ kot amnhĩ nhĩpêx anhÿr xwýnhjaja Tĩrtũm kãm mẽ hprãm kêt. Koja nhÿrmã tanhmã ja hã mẽ homnuj týx to. ⁷ Amnepêm kormã mẽ ate Kris kôt amnhĩ xunhwÿr kêt ri na ka prem ã amnhĩ nhĩpêx

anhÿr o ri apa. ⁸⁻⁹Tā kēr ka mē axte
ã amnhĩ nhĩpêx anhÿr kêt nē.

Nē mē ri axpên kām agryk o ano
hkā karôt o axpên pumunh kêt
nē.

Nē mē axpên kamā axàhkurê
hkêt nē. Ri tanhmā axpên tom-
nuj to ho apa hkêt nē.

Rÿ axpên jakwa kamā mẽmoj ma
nē ri axpên xô ri tanhmā ri
axpên mã ho axêx to ho ri apa
hkêt nē.

Nē mē akapêr mã agêt o ri mẽ
kām akapêr kêt nē.

Nē mẽ ri mẽmoj to axpên mã axêx
hkêt nē.

Ã mẽ ate amnhĩ nhĩpêx anhÿr tũmta
ra mẽ apê hapêx par kênā.

*Mē pahte amnhĩ nhĩpêx nyw kôt
amnhĩ nhĩpêx ã mẽ pamā karô*

*Rômān 12.2; Epes 4.23; Wam
Pêtre 2.11*

¹⁰Nē na ka mẽ ra mẽ ate amnhĩ
nhĩpêx nyw o amnhĩ nhĩpêx o ri
apa. Jao ra mẽ pahto kator xwÿnh
maatija kôt amnhĩ nhĩpêx mex o
mō. Kot kaj mẽ gaa nē rĩ hkôt
amnhĩ nhĩpêx mex kumrêx o ri apa.
Kām hprām xà hkôt.

¹¹Nē mẽ pahpê Kris kwÿjaja
ahpÿnhā na pu mẽ. Na mẽ pakamā
Ijaew nē Ijaew kêt xwÿnhjaja. Nē
mē pakamā panhĩ nē kupê. Nē
mē kām àpênh xwÿnhjaja nē mẽ kot
amnhĩ mã ri àpênh xwÿnhjaja. ãm
ahpÿnhā mẽ pahpê Kris kwÿjaja
mē pahte anhÿr tã na hte Tĩrtũm
tanhmā mẽ pakute hkôt mẽ
pahpumunh kêt nē. Na hte mẽ
panhĩpêx o axpên pyrā nē mẽ
pahpiitā mẽ pakamā pa ho pa pu
htem pahpimràatā hkôt ri amnhĩ
nhĩpêx o papa.

¹²Nē Tĩrtũm kām mẽ pajapê nē
kām mẽ pajapê xāj mẽ pakukamā
amnhĩm mẽ parê. Mē pahte kām
tanhmā amnhĩ nhĩpêx to ho ri papa
kaxyw mẽ pakukamā mẽ parê.

Jakamā kēr ka mẽ axpên kamā
axukaprĩ ho ri axpên kôt apa.

Nē axpên to mex pix o ri axpên
kôt apa.

Nē mẽ amā amnhĩ to rax o axpên
jakrenh prām kêt nē.

Nē mẽ ãm amnhĩ pix kukamā ri
ajamaxpêr kêt nē. Amnhĩ mẽ
nhām mẽ hkukamā ajamaxpêr
o ri apa.

Nē mẽ ri agryk tokyx anhÿr kêt
nē.

¹³Nē koja mẽhō tanhmā mẽ
ato ka mẽ amnhĩ tã omu nē
tanhmā amnhĩ tã ho hkêt
nē. ãm ja ho ajamakêtkati
kurê kumrêx nē axte kām
ajamaxpêr o ri apa hkêt nē.
Ra Jejus kot mẽ panê mẽ pahte
amnhĩ tomnuj piitā rênh par
kênā kot pu kêt mẽ amnhĩ tã
tanhmā mẽhō hto. Tã kēr ka
mē axpên to mex o ri apa nē
amnhĩ tã tanhmā axpên to ho
ri apa hkêt nē.

¹⁴E kēr ka mẽ ã axpên nhĩpêx anhÿr
o ri apa. No ãm ja pix kêt. Nē mẽ
mãânên amā axpên kĩnh pê axpên
kutā anojarêt rāhā nē. Kot kaj mẽ
ã amnhĩ nhĩpêx anē nē mãânên ra
ixte mẽmoj tã mẽ amā karôta ka mẽ
ho anhÿr mex kurê kumrêx. Mē
pamā axpên kĩnhja na mex kumrêx
o kot mẽmoj piitā hakrenh par.

¹⁵Nē kēr ka mẽ Kris kukwak
ri anhōxàhkre kaxwÿnh kām akĩnh
nē ajamakêtkati nē tãm ri axpên
nhĩpêx o ri axpên kôt apa. Te
ixkre tipxi kamā mẽ ate axpên
kôt ri amnhĩ nhĩpêx pyrāk. ã mẽ
pahte amnhĩ nhĩpêx anhÿr o papa
kaxyw na pre Tĩrtũm amnhĩ wÿr
mē pahwÿ. Mē pahte hkôt amnhĩ
xunhwÿr kaxyw.

Nē kēr ka mẽ Tĩrtũm mã amnhĩ
jarênh kaxyw nē kām Kra Jejus ã
akĩnh ã amnhĩ jarênh o ri apa.

*Mē pahte Tĩrtũm mã mex ã pa-
grer ã mẽ pamā karô*

Epes 5.19

¹⁶Nē kēr ka mẽ Kris kapêr piitā
hkôt amnhĩ nhĩpêx mex nē. Nē
kapêr o axpên jahkre mex o ri

axpên kôt apa. Tirtûm kot amnhî nhîpêx o axpên jahkre ho ri axpên kôt apa. Nê kâm agrer o ri apa. Kâm mex o mex â agrer o ri axpên kôt apa. Nê kâm kukwak ri akînh â amnhî jarênh o kâm gre.

¹⁷ Nê kêr ka mê Mêpahpâm Tirtûm mã amnhî jarênh o:

—Pa Tirtûm. Nà âm hāmri na ka pre mê ixwÿr Akra Jejus mê nhûm mê ixwÿr wrÿ nê mê inhnê ty.

Anhÿr o kâm amnhî jarê. Hāmri nê âm Pahihti Jejus kot amnhî nhîpêx kôt pix mã tanhmã ri amnhî nhîpêx to rÿ âm kôt pix mã tanhmã akapêr to ho ri apa.

Tanhmã mê pahte axpên nhîpêx to hã mê pamã karô
Epes 5.22–6.9

¹⁸ Nê mê anijaja. Tirtûm kot myja kumrêx nhîpêx nê hkôt kâm hprô nhîpêx jakamã kêr ka mê amjên â apijaam o apa. Nê mê hamaxpêr mex â mê omu nê mê hkôt ri amnhî nhîpêx mex nê. Â mê ate amnhî nhîpêxja na Tirtûm kâm hprâm.

¹⁹ Nê mê amyjaja kêr ka mê amã mê aprô japê nê. Te amã amnhî tâ ma pyrâk o mê hipêx o ri apa. Jao tanhmã mê homnuj to hkêt nê.

²⁰ Nê mê apê mê hkrajaja kêr ka mê anhîpêxâ nê akatorxâ wa hã apijaam nê wa kapêr ma nê wa hkôt ri amnhî nhîpêx. Â mê ate amnhî nhîpêx anhÿrja na Tirtûm kâm hprâm. Koja â mê ate amnhî nhîpêx anhÿr â mê apumu nê hkînh nê.

²¹ Nê kêr ka mê apê mê hipêxâ nê mê katorxâ mê akra gryk kaxyw mê kâm apêr o apikênh kêt nê. Kot kaj mê â mê hipêx anê nhûm mê tee ri amnhî tâ mê ama nê hkaprî nê.

²² Nê mê ate mê kâm tanhmã amnhî nhîpêx to ho ri mê apa xwÿnhjaja kêr ka mê anhô patrâw kapêr ma nê hkôt amnhî nhîpêx. Nê mê noo mã mê kâm tanhmã amnhî nhîpêx mex to nê mãânên mê wa kre kamã mê kâm tanhmã amnhî nhîpêx mex to. Nom mê

kot axapênh â apumunh nê hã kâm akînh pix kaxyw axapênh mex kêt nê. Mãânên mê amã Pahihti Kris kînh â akatât kôt mê kâm mêmoj tâ axapênh mex nê. Mê noo mã nê mãânên mê wakre kamã. ²³ Nê mê akînh kâm mê kâm axapênh mex o ri apa. Te mê ate Pahihti mã akînh kâm tanhmã kâm amnhî nhîpêx to pyrâ nê tâm amnhî nhîpêx o tâm mê kâm axapênh mex o ri apa. ²⁴ Te mê anhô patrâw pix mã axapênh pyrâk nom kumã pix mã hkêt. Mãânên mê panhõ Pahihti Krisja mã. Jakamã kot kaj mê â amnhî kaxyw Tirtûm mã ajamaxpêr pê akînh kâm anhô patrâw mã mêmoj tâ apê nhûm Pahihtija ja hã mê apumu nê nhÿrmã mê ato mex rax nê. ²⁵ E kêr ka mê â mê anhô patrâw mã axapênh mex o ri apa anê. No kot kaj mê kapêr kwÿm amnhî krã hkôt ri tanhmã amnhî nhîpêx to nhûm Tirtûm tee ri ja hã mê apumu hāmri nê nhÿrmã tanhmã hã mê anhîpêx to. Na hte â mê kot amnhî tomnuj xwÿnhjê piitã mê hipêx anê nê mê hipêx o axpên pyrâk. Jakamã kwa kêr ka mê anhô patrâw mã axapênh mex rãhã ho ri apa.

4

¹ Nê mê apê mê ô patrâw kêr ka mê kot mê amã mê âpênh xwÿnhjê ho mex nê tanhmã mê homnuj to hkêt nê. Mê urâk nê kaxkwa kamã mê anhô Patrâw maatija hkrî. Kot mê pahte tanhmã amnhî nhîpêx to nê tanhmã mê pajamaxpêr to hã mê pahpumunh rãhã jakamã kêr ka mê noo mã mê ho mex rãhã ho ri apa.

E kêr ka mê apiitã â axpên to mex anhÿr o ri apa.

Mê pahte Tirtûm mã amnhî jarênh rãhã hã mê pamã karô

Matêwre 7.7; Rukre 11.1-8; Atre 1.14; Epes 6.18

² Nê kêr ka mê xatã Tirtûm mã amnhî jarênh rãhã ho ri apa. Nê tanhmã mêhõ kot amnhî nhîpêx to

hã harênh ma nê ho Tirtûm wÿ. Nê mē ate kām amnhĩ jarênh kamã kām mex o mex ã harê. ³⁻⁴ Nê mãânên ixto awÿ kê mē tokyx ixkator japêr. Pa ixãmnhĩx mē kot kormã Kris jarênh mar kêt xwÿnhjê mã harênh o ri mē hkôt ixpa. Á ixte amnhĩ nhĩpêx anhÿrta ã na prem ixpynê nê ijaxã pa kormã jar ixkrĩ. Jakamã kwa mē mãmrĩ ja hã ixto Tirtûm wÿr o apa.

Mē pahte apkati mē mē pahkwÿjê mã Jejus jarênh ã mē pamã karô

Epes 5.16

⁵ Nê kêr ka mē kêp Kris kwÿ hkêt xwÿnhjê hkôt nhÿhÿm ri apa nê tãm ri Tirtûm kapêr kôt amnhĩ nhĩpêx o mē hkôt ri apa.

⁶ Nê kê mēhō awÿr tē nê tanhmã Jejus ã akukjêr to ka amã hkĩnh ã aprĩ hã kãm awjarê. Ahpÿnhã tanhmã mē kot hã akukjêr to xã hkôt tanhmã mē kãm harênh to kê mēhprĩ hã mar mex nê.

Pawre kot Koros wÿr Xikitre mē Ones wa mēnh ã harênh

Epes 6.21-22

⁷⁻⁸ Nê ot pa mē awÿr mē pahtō Xikitre mēnh mã. Kot ma mē awÿr ixte mē amã ixkapêr ã kagã nhĩpêx o mōr kaxyw. Na hte ixkôt Tirtûm mã amnhĩ nhĩpêx o ri pa. Inhmã hapêê. Tã kot paj mē awÿr kumê kê ma mē awÿr mō nê hprĩ hã mē amã ijarê. Mē ate ijarênh mar nê tãm ajamaxpêr nê akĩnh kaxyw. ⁹ Mē akwÿ Onesti hkôt koja ma mē awÿr mō. Mãânên Kris kôt kêp mē pahtō hã mē pamã hapê xwÿnh na. Na hte Tirtûm kapêr kôt amnhĩ nhĩpêx mex rãhã ho ri pa. Tã Xikitre mē koja wa ma mē awÿr mō. Hãmri nê mē awÿr pōj nê jar tanhmã mē ixte amnhĩ nhĩpêx to hã mē ijarê ka mē ama.

Kris kôt mē hkwy kot mē hwÿr hpêr mēnh ã mē harênh

¹⁰ Nê ota Aristakja ixpyrà nê kêp prês nê hkrĩ. Tã mē awÿr hpêr

mē. Nê Panãpe htō Juãw Makreja mãânên mē awÿr hpêr mē. Na pa pre ra mē amã Juãw Makre jarê. Tã koja mēmo arĩgro hã akupÿn mē awÿr mōr japêr ka mē omu nê ho mex nê.

¹¹ Nê Jejus Justija mãânên mē awÿr hpêr mē. Jajaja mē ixpyrà nê kêp Ijaew. Tã mē tapxipixjaja na htem ixpyrà nê mē ixpê Ijaew kwÿjê rom mē kãm Tirtûm kapêr nyw o mē ahkre ho ri mē hkôt pa. Tirtûm kot Kra Kris kôt mē kot amnhĩ xunhwÿr xwÿnhjê ho hkra hã harênh nywja na htem mē kãm harênh o ri mē hkôt pa. Pa ja hã mē omu nê ixkĩnh nê. ¹² Nê mē anhĩō Epasja mãânên mē awÿr hpêr mē. Na hte Jejus Kris mã tanhmã amnhĩ nhĩpêx mex to ho pa. Nê mē ato Tirtûm wÿr rãhã ho pa nê mē ato hwÿr o:

—Pa Tirtûm. E kwa tanhmã Koros kamã akrajê ho kê mē akôt amnhĩ xunhwÿr tÿx nê. Nê amã hprãm xã hkôt pix mã amnhĩ nhĩpêx o ri pa. Nê amnhĩ kaxyw Kris kôt pix mã hamaxpêr tÿx rãhã nê. Anê.

¹³ ãm hãmri na hte mē ato hwÿr o pa. Nom mē kapxipix o hwÿr kêt nê. Mãânên krĩ pê Ratisej kamã nê krĩ pê Jerop kamã Kris kôt mē pahtōjê ho hwÿr o ri pa. Mē ate Tirtûm kôt amnhĩ nhĩpêx mex o apa kaxyw. Ixte ja hã omunh mex.

¹⁴ Nê jar mē pahtō tōtō Rukre mē Tēmtija wa mãânên mē awÿr hpêr mē. Tōtō Rukreja kêp ixkrãmnhwÿ mex na.

¹⁵ Nê kêr ka mē krĩ pê Ratisej kamã Kris kôt mē pahkwÿjê mã ijarê. Nê Nĩpare mã nê òrkwÿ hwÿr mē pikuprõnh nê Tirtûm mã mex o mex ã harênh o mē hkrĩ xwÿnhjê mã mãânên ijarê.

¹⁶ Nê e kêr ka mē ixte mē awÿr kagã mēnhja kamã harênh pa nê hpãnhã krĩ pê Ratisej kamã Kris kôt mē pahkwÿjê hwÿr amê kê mē apyà nê kamã harê nê piitã kuma.

Nê mē kām anē kê ra ixte mē hwÿr kagà mēnh xwÿnhhta kê mē amā kugō ka mē kuxwar kamā harē nē amā.

¹⁷ Nê kêr ka mē Akip mā ijarē kê ra Tirtûm kot kām mēmoj tâ karō xwÿnhhta kê ho anhÿr jatur xàm kumē. Kêp hkra hã kê tãm kām àpênh jatur xàm kumē.

¹⁸ Tã ãm ja pix. E paj pam amnhĩ nhĩhkra ho hatur xà hã kagà. Mē ate ixte mēmoj tâ kagà pumunh nē hkôt inhmã ajamaxpêr kaxyw. Nê ixte mē awÿr mēnh ã ijarēnh mar kaxyw. Kwa kêr ka mē arĩ ixpê prês ã ixto Tirtûm wÿr rãhã ho ri apa.

E kê Tirtûmja mēmoj to mē akutã nojarêt nê mē ato mex nê ka mē amex nê ajamakêtkati nê apa ho apa. Tã ãm ja pix. Ixpê Pawre na pa mē awÿr kagàja nhĩpêx nê ã mē awÿr mēnh anē.

Wam Tesarõn Pawre kot Tesarõn kamã Jesus kõt hkwyjê hwÿr kagã nê mênh

Pawre na pre kagàja nhîpêx. Kêp Jesus nhÿ hã mē ahkre ho pa xwÿnhjê hõ na pre. Jakamã na pre kagàja nhîpêx nê ma krî pê Tesarõn kamã Jesus kõt hkwyjê hwÿr kumê. Tesarõn kamã Jesus ã kãm mē hkurê xwÿnhjaja na prem Jesus ã mē homnuj o pa nhũm mē amnhî xà htÿx kamã hamak o pa. Hãmri nhũm Pawre mē harênh ma nê kagàja nhîpêx nê mē hwÿr kumê. Kot mē kãm mē hamaxpêr o hihtÿx kaxyw mē kot arî Jesus kõt amnhî nhîpêx mex o pa nê aa hkaga hkêt ã mē kãm karõ. Nê nhÿrmã Jesus akupÿn kaxkwa rũm mē pahpê hkwyjê hwÿr wrÿk nê ma akupÿm amnhî kõt mē pahto àpirja nhũm mē kãm harê. Æ na pre mē kãm mêmõj jarê nê hã kagã anê nê mē kãm:

¹ Pa mē apê Tesarõn kamã Jesus kwÿ hã axpên wÿr mē apikuprõnh xwÿnhjaja? Xà mē amex na ka mē apa? Ixpê Pawre na pa mē awÿr kagàja nhîpêx nê mē awÿr kumê. Siras mē Ximotre mē pa mē awÿr kumê. Mē pahpê Mëpanhîpêêxà maati Tirtũm mē Pahihti Jesus Kris wa hkwy jakamã na pa htem mē ato Tirtũm wÿr rãhã ho ri ixpa. Kot mē akutã nojarêt rãhã nhũm mē ajamakêtkati nê axãmnhîx mē apa kaxyw.

²⁻³ Nà mêmõj kêt. Na pa htem mē amã ijamaxpêr nê mē anhÿ hã ixkĩnh nê ixpa hãmri nê mē awÿr kagàja mē. Na pa htem mē ato Tirtũm wÿr rãhã ho ri ixpa nê kãm mē ajarênh o:

—Pa Tirtũm. E mãn ka Tesarõn kamã akrajê pumu. Æm hãmri na ka pre tanhmã mē hkrã hto

nhũm mē akõt amnhî nhîpêx mex o pa. Na htem amnhî kaxyw akõt hamaxpêr tÿx nê. Jao mē piitã mē kamã ukapri kamã tanhmã mē ho ajuta hto ho pa. Nhũm mē kãm mē ixkurê xwÿnhjaja Pahihti Jesus Kris ã tanhmã mē ho ho pa htã nhũm mē tee ri amnhî kukamã hamaxpêr o hkapri nê Jesus mē war akaga hkêt nê. Arî war anhÿ hã amnhî to htÿx nê Pahihti Jesus kutêp tanhmã kãm amnhî nhîpêx to ho pa. Æm hãmri na htem ã amnhî nhîpêx anê Tirtũm. Na pa htem mē kot ã amnhî nhîpêx anhÿrja mã ijamaxpêr nê ixkĩnh nê.

Anhÿr o pa htem mē ato kuwÿ. ⁴ E Kris kõt ixkwÿjaja. Nà Tirtũm kãm mē ajapê jakamã na pre amnhîm mē arê. Kot mē ato hkra nhũm nhÿrmã kuri mē amex nê atir tũm nê apa ho apa kaxyw. Ra mē ixte ja hã mē ajarênh mar mex.

*Mê piitã mē kot Tesarõn nhõ
xwÿnhjê jarênh mar ã mē harênh*

⁵ Nê na pa prem ma mē awÿr mõ nê mē amã Jesus jarênh o mē akõt ixpa. Kot mē panê tanhmã amnhî nhîpêx to hã harênh o ri mē akõt ixpa. Nom pa mē amnhî krã hkõt mē amã ixujarênh kêt nê. Æm Tirtũm Karõ nhÿ hã na pa prem hihtÿx xà ho tanhmã mē amã ixkapêr to ka prem mē inhma nê mē ixkõt ajamaxpêr kurê kumrêx. Na pa prem tãm amnhî nhîpêx o ri ixpa ka mē ja hã mē ixpununh o ri mē ixkõt apa. ⁶ Tã Jesus kõt amnhî xunhwÿ nê hkõt amnhî nhîpêx mex nê. Nê mē ixkõt amnhî nhîpêx mex nê. Mē kot Jesus ã tanhmã mē ato htã ka htem Tirtũm Karõ nhÿ hã akĩnh nê hkõt amnhî nhîpêx mex rãhã ho ri apa. ⁷ Tã nhũm pika pê Masetõn mē Gres wa kamã Jesus kõt mē pahkwÿjaja ã mē ate amnhî nhîpêx anhÿr ã mē ajarênh ma nê mē apyrã nê ã amnhî nhîpêx anhÿr o pa. ⁸ Na ka prem tanhmã Jesus kot mē panê amnhî nhîpêx to hã

harēnh o ri mē hkôt apa nhūm mē piitā mē akapēr ma. Nom mē tapx-
ipixjaja mar kêt nē. Na mē ra ohtō
nē mē ajarēnh ma nē mē apyrā nē
ma mē kām Jejus jarēnh o pa. Ra
mē ate Jejus kôt amnhī xunhwÿr ā
amnhī jarēnh o ri apa nhūm mē pi-
itā kot mē amar jakamā mē pajaja
na pa htem mē kām ā mē ajarēnh
anhÿr kêt nē. Mo kaxyw? Ra mē kot
mē ajarēnh mar mex kēnā. ⁹ Na pa
htem nhÿri krī hō hwÿr pōj nhūm
mē xpumu nē ra mē tāmjaja mē
inhmā mē ajarēnh kurē kumrēx.
Nē mē ajarēnh o:

—Kwa Tesarōn kamā Kris kôt
mē pahkwÿjaja na xep kām mē
akīnh nē. Amnepēm na pre
htem amnhīm sānti nhīpēx nē kēp
mēhpām ā harē nē amnhī to hwÿr
o pa. Tā ka xep prem ma mē hwÿr
mō nē mē kām Tirtūm kapēr jarē
nhūm mē ama nē Tirtūmja sānti
rom ām hāmri hā omunh kurē
kumrēx. Hāmri nē gryk ā sānti kaga
hpa nē Tirtūm kôt amnhī xunhwÿ
nē hkôt pix mā amnhī nhīpēx mex
o pa. ¹⁰ Nē amnhī wÿr Tirtūm Kra
kamā hamak rāhā ho ri pa. Anē.

Ām hāmri na ka htem amnhī wÿr
kamā hamak rāhā ho apa. Na pre
ty nhūm Hipēēxā Tirtūm akupÿm
ho htīr. Tā koja nhÿrmā akupÿn
mē pahwÿr kumē nhūm akupÿn mē
pahwÿr wrÿ. Hāmri pu mē ām pix
kukwak ri mē kot amnhī xā htÿx
kām hamak o pa htūm xāta wÿr
papa hkêt nē.

2

Pawre kot amnhī jarēnh

Sikūn Korīt 1.12, 4.1-6

¹⁻² Nē kormā mē awÿr mē inhmōr
kêt ri na pa prem kormā Piri-
pos nhō xwÿnhjē mā Tirtūm kapēr
jarēnh o ri mē hkôt ixpa. Nom
nhūm mē hkwÿjaja kām mē inhmar
prām kêt nē. Na prem Jejus ā mē
inhmā kapēr punuj nē mē inhīpēx
kati pa prem amnhī xā htÿx kamā

ijamak o mē hkôt ixpa. Na ka prem
ja hā mē ijarēnh ma. Ā mē kot mē
inhīpēx anhÿr tā pa mē tee ri amnhī
kukamā ijamaxpēr pē Tirtūm kapēr
jarēnh kaga hkêt nē. Na pa prem
arī mē kām Jejus kot tanhmā mē
panē amnhī nhīpēx to hā harēnh o
ri mē hkôt ixpa. Tā mē awÿr inhno-
jarēt nē Tirtūm nhÿ hā amnhī to
htÿx nē ma mē awÿr mō. Hāmri nē
mē amā tanhmā Jejus jarēnh to ho
ri ixpa. Ka prem mē inhma hāmri
nē axohtō nē hkôt amnhī xunhwÿ.
³ Nom pa prem ixēx rom tanhmā
mē amā ixkapēr to hkêt nē. Rÿ
mē inhmā mēmoj prām xāj mē ano
kupyrr pē mē amā ixkapēr kêt nē.
⁴ Rÿ mē ate mē ixkapēr mar nē
mē inhmex ā mē ijarēnh kaxyw pa
tanhmā mē amā ixkapēr to hkêt nē.
Ām Tirtūm kot mē inhmar nē tapx-
ipix mē inhmex ā mē ijarēnh pix
prām xāj na pa prem mē amā kapēr
jarēnh o ri mē akôt ixpa. Tirtūm
tapxipix na hte tanhmā mē pakute
hkôt mē pahpumunh rāhā ho pa.
Tām na pre mē ixte kapēr jarēnh o
ri ixpa kaxyw mē ixunhwÿ.

⁵ Xàn pa prem mē ijakwa nhīkjē
ho mē ate tām amnhī nhīpēx ā mē
ajarē hāmri nē mē ijakwa nhīkjē ho
mē ato ixkapēr punuj nē? Nā na
pa prem ā amnhī nhīpēx anhÿr kêt
nē. Na pa prem ixkatāt kôt mē ate
amnhī nhīpēx ā mē apumunh kôt
tanhmā mē ajarēnh to ho ri ixpa.

Nē xā mē ate mē ixkapēr mar
nē akīnh nē hpānhā mē inhmā
amnhūrer kaxyw na pa prem mē
awÿr mō nē mē amā Jejus kapēr
o mē ajahkre? Nā na pa prem
kàxpore prām xāj mē amā ixkapēr
kêt nē. Tirtūm kot ja kôt mē ix-
pumunh mex.

⁶ Rÿ xā mē ate mē inhmex ā mē
ixto jarkrar kaxyw na pa prem mē
awÿr mō? Nā māānēn ja kaxyw kêt.
Ā mē ate mē ijarēnh anhÿr prām
xāj na pa htem Tirtūm kapēr o mē
ajahkre ho ri ixpa hkêt nē.

⁷ Rỳ xàn pa pre mẽ awỳr mō mẽ nẽ mẽ amã amnhĩ jarēnh o:

—E mẽ ixte Jejus nhỹ hã ixkapēr o ixpa xwỳnh jakamã kot paj mẽ amã tanhmã ixkapēr to ka mẽ inhma nẽ hpãnhã mẽ inhmã amnhĩre.

Anhỹr o mẽ amã ixkapēr? Nà na pa pre ã mẽ amã ixkapēr anhỹr kêt nẽ. Na pa prem te mẽ katorxà kot hkrajê nhĩpêx pyràk o mẽ anhĩpêx nẽ amarĩ mẽ ajahkre ho ixpa nẽ mẽmoj tã mẽ awỳr kêt nẽ.

⁸ Mẽ inhmã mẽ akĩnh jakamã na pa prem mẽ amã ixprĩ hã Tirtũm kapēr piitã harēnh par o mẽ akõt ixpa nẽ mẽ kot ja hã tanhmã mẽ ixto pymaj tee ri amnhĩ kukamã ijamaxpēr o ri ixkaprĩ hkêt nẽ. ãm ixãmnhĩx ri tanhmã Jejus kot mẽ panẽ amnhĩ nhĩpêx to hã harēnh o mẽ akõt ixpa. ⁹ Mẽ apẽ mẽ ixkwỳ jakamã na pa prem tanhmã mẽ amã ixkapēr to hpãnhã mẽ ixàpkur xà rỳ mẽmoj tã mẽ awỳr kêt nẽ. Na pa prem mẽ pamjaja mẽmoj tã ixàpēnh pẽ mẽ amã ixkapēr o ri ixpa. Nẽ ixàpēnh rũnh kumrêx. Arĩgro hã nẽ kamãt kãm. Mãn arĩ mẽ ate ã mẽ ixte amnhĩ nhĩpêx anhỹrja ã anohtỳx japēr ko. ¹⁰ Na pa prem tãm amnhĩ nhĩpêx o mẽ akõt ixpa. Tirtũm kãm hprãm xà hkõt. Jao tanhmã amnhĩ to mex to rãhã ho ri ixpa ka prem amnhĩ tã mẽ ixpumu. Nhũm Tirtũm haxwỳja ja hã mẽ ixpumu. ¹¹ Na pa pre mẽ apẽ mẽ ixkra pyràk mẽ anhĩpêx o ri mẽ akõt ixpa. ¹² Jao mẽ amã ixkapēr mex nẽ. Nẽ mẽ akaprĩ nẽ apa xwỳnhjaja pa prem akupỳm mẽ ajamaxpēr o mẽ axihtỳx hãmri nẽ mẽ apiitã mẽ amã ixkapēr nẽ mẽ amã:

—Kwa kêt ka mẽ Tirtũm kõt amnhĩ nhĩpêx mex rãhã ho ri apa nẽ aa hkaga hkêt nẽ. Anẽ.

Tirtũm tãm na pre amnhĩ wỳr mẽ pahwỳ pu prem hkõt amnhĩ xunhwỳ. Tã koja nhỹrmã amnhĩ wỳr

mẽ pahto api pu mẽ Kra Jejus kukwak ri wa kuri pamex kumrêx nẽ ri papa ho papa. Jakamã kwa kêt ka mẽ hkõt amnhĩ nhĩpêx mex rãhã ho ri apa.

Jejus kwỳjaja kãm Jejus kõt amnhĩ xunhwỳr hkêt xwỳnhjê pyma hkêt

Atre 17.1-9

¹³ Nẽ ma mẽ awỳr mẽ inhmõrta ã na pa prem mẽ amã Tirtũm kapēr jarēnh o ri mẽ akõt ixpa ka prem mẽ inhma nẽ mẽ ixte amnhĩ krã hkõt mẽ ixkapēr ã mẽ ixkamnhĩx kêt nẽ. Na ka prem ãm hãmri mẽ ixte Tirtũm kapēr jarēnh ã mẽ ixpumunh kurê kumrêx nẽ amnhĩ kaxyw hkõt ajamaxpēr nẽ Jejus mẽ Hipêêxà wa hkõt amnhĩ xunhwỳ. Jakamã na pa hte mẽ amã ijamaxpēr nẽ mẽ anhỹ hã ixkĩnh nẽ. Hãmri nẽ Tirtũm mã mẽ anhỹ hã ixkĩnh jarēnh o ri ixpa. Nà na ka htem arĩ Tirtũm kapēr kõt amnhĩ nhĩpêx mex nẽ. ¹⁴ Nhũm hte mẽ akwỳjaja tee ri ja hã mẽ apumu nẽ Jejus ã mẽ atomnuj nẽ. Nom mẽ kapxipixjaja ã mẽ anhĩpêx anhỹr kêt nẽ. Jutej kamã Ijaew kwỳjaja na prem mẽ apyrã nẽ Jejus kõt amnhĩ xunhwỳ nhũm mẽ hkwỳjaja tee ri ja hã mẽ omu nẽ hã mẽ hipêx kati ho pa.

¹⁵ Amnepēm Ijaew na prem Tirtũm nhỹ hã mẽ kãm kapēr o mẽ pa xwỳnhjê homnuj nẽ mẽ hkwỳjê hpar o pa. Hãmri nhũm hpãnhã mẽ hkanrêhã mẽ htãmnhwỳjaja mẽ uràk nẽ Pahihti Jejusja pĩ. Tã jarãhã mããnēn ã Jejus ã mẽ panhĩpêx anẽ nhũm Tirtũm tee ri mẽ pahta mẽ omu nhũm ja kęp omnuj tỳx kumrêx nhũm mẽ pahta mẽ kamã gryk nẽ.

Na hte mẽ apẽ Ijaew kêt xwỳnhjê ho hkra nhũm Ijaew kãm ja prãm kêt ¹⁶ jakamã na htem mẽ akwỳ kot Tirtũm kõt amnhĩ xunhwỳr pymaj mẽ anẽ mẽ ixkurê nẽ mẽ inhmã:

—Kwa Ijaew kêt xwỳnhjê mã Tirtũm kapēr jarēnh kêt nẽ. Ja mex kêt. Anẽ.

Mē ate Jejus kōt amnhī xunhwȳr nē nhȳrmā Tīrtūm wa kuri atīr tūm nē apaja mē kām hprām kēt jakamā na htem ā mē anē amnār o pa anhȳrja o amnhī tomnuj nē. Mē kot amnhī tomnuj tȳx o mē pa xwȳnh jakamā na Tīrtūm mē kamā gryk nē. Koja nhȳrmā mē kot amnhī xā htȳx kamā hamak tūm xā hwȳr mē rēnh pa.

Pawre akupȳm Tesarōn nhō xwȳnhjē hwȳr hkrā hā harēnh

Atre 17.10-13

¹⁷ Nē ma mē awȳr mē inhmōr tā mē anhō krī kamā mē kēp Kris kwȳ hkēt xwȳnhjaja na pre mē ixpumu nē mē anē mē ijano pa prem ijapōj nē hpānhā ma nhȳhȳm krī hō hwȳr ixpa. Nom arī mē amā ijamaxpēr rāhā nē mē ato ijamak o ri ixpa nē xatā akupȳm mē awȳr ixkrā. ¹⁸ Na pa prem inhmā akupȳm mē awȳr inhmōr prām tȳx nē. Ixpē Pawre na pa pre xatā mē awȳr ixkrā htā nhūm Satanasti tanhmā mē anē ixpē amnār to pa kormā mē awȳr inhmōr kēt nē. Am tee ri inhmōr prām kaprȳ. ¹⁹⁻²⁰ Mē inhmā mē akīnh tȳx. Mē ate Tīrtūm kōt amnhī nhīpēx mex jakamā koja nhȳrmā Pahihti Jejus akupȳn mē pahwȳr wrȳ pa mē akuri xa nē kām mē ajarēnh o:

—Pa Pahihti. E Tesarōn nhō xwȳnhjē pumu. Na ka pre mē hwȳr inhmē pa mē hwȳr mō nē mē kām ajarē nhūm prem inhma nē amnhī kaxyw akōt hamaxpēr tȳx nē akōt amnhī xunhwȳ. Tā na htem akōt tām amnhī nhīpēx rāhā ho pa.

Anhȳr o kām mē ajarē nē mē anhȳ hā ixkīnh tȳx kumrēx.

3

Pawre kot Tesarōn wȳr Ximotre mēnh ā harēnh

Atre 17.14-15, 18.5

¹⁻⁵ Nē kormā mē akōt ixpa ri na pa pre Kris kwȳ hkēt xwȳnhjaja kot Kris ā tanhmā mē atomnuj to hkukamā mē amā mē harē ka

prem mē inhma. Na htem ā Kris ā mē pahkurē xwȳnhjaja mē panhīpēx anhȳr o pa. Tā nhūm prem ā mē anhīpēx anē pa mē ajarēnh ma nē tee ri mē akukamā ijamaxpēr nē axpēn mā mē ajarēnh o:

—Hēxta waa nē. Kwa mē kot Jejus ā tanhmā mē homnuj toja mȳrapē mān mē tee ri amnhī kukamā hamaxpēr nē Jejus kaga rȳ ko. Mān ra Satanasti tanhmā mē kām Jejus o hēx to nhūm mē kuma nē tanhmā hamaxpēr to nē hkaga. Kwa mān pu prem am mē kām Tīrtūm kapēr jarēnh kaprȳ nā? Anē.

Hāmri nē tee ri mē akukamā ijamaxpēr nē mē awȳr Ximotre mēnh kaxyw nē kām:

—Mān ra Tesarōn nhō xwȳnhjaja Jejus ā tanhmā mē homnuj to nhūm mē amnhī xā htȳx kamā hamak o ra tee ri amnhī kukamā hamaxpēr. Kwa ma mē hwȳr mō nē ja hā mē omu. Hāmri nē mē kot Kris kōt amnhī xunhwȳr tȳx kaxyw mē hamaxpēr o axihtȳx. Hāmri nē akupȳn wa ixwȳr mō nē wa inhmā tanhmā mē harēnh to. Kot paj Siras mē wa akutēp jar Atenas kamā wa arīk. Anē.

Hāmri nē mē awȳr kumē. Ximotre na hte Siras mē wa inhīhkō hā mē kām Tīrtūm kapēr jarēnh o pa. Nē Kris kot tanhmā mē panē amnhī nhīpēx toja nhūm wa inhīhkō hā mē kām harēnh o pa. Tā pa pre mē awȳr kumē nhūm ma mē awȳr mō pa Siras mē wa Atenas kamā kutēp arīk.

Ximotre akupȳn mōr nē Pawre mā mē harēnh

⁶ Tā nhūm ra ham akupȳn mē arūm wa ixwȳr mō nē wa inhmā tanhmā mē ajarēnh to pa wa mē ajarēnh ma nē ixkīnh nē. Na ka xep htem arī amnhī kaxyw Kris kōt ajamaxpēr tȳx rāhā nē. Jao mē amā mē piitā mē hkīnh nē tanhmā mē ho mex to ho ri apa. Nē arī

mê inhmâ ajamaxpêr nê ixpyrà nê mê amâ mê ixpumunh prâm o ri apa. ⁷ Nâ âm hāmri na ka htem â amnhî nhîpêx anê. Na pa wa ra jar ixpunuj nê ixpa nê Kris â amnhî xâ htýx kamâ ijamak tâ mê ajarênh ma nê tām ijamaxpêr. ⁸ Tesarôn nhô xwýnhjaja kot Kris â tanhmâ mê anhîpêx to htâ ka mê arî hkôt amnhî xunhwýr týx rāhā nê. Pa wa mê ajarênh ma nê mê anhý hā ixkīnh pê tanhmâ Pahihti Jejus mā amnhî nhîpêx to ho ri ixpa. ⁹ Nâ na pa hte wa mê anhý hā ixkīnh nê. Nê xatâ Tirtūm mā mê ajarê nê kām:

—Pa Tirtūm, Nâ âm hāmri na ka pre amnhî kôt Tesarôn kām akwýjê xunhwýr týx nê nhūm htem akôt amnhî nhîpêx mex rāhā ho pa. Âm hāmri na ka hte â mê hipêx anê. Na pa hte mê kot amnhî nhîpêx mā ijamaxpêr o ri ixpa nê ixkīnh nê.

Anhýr o kām mê ajarê. ¹⁰⁻¹¹ Nom kām ja pix jarênh kêt nê. Na pa hte wa määnēn arīgro hā nê kamāt kām amnhî to Mēpanhîpêexâ Tirtūm mê Pahihti Jejus Kris wa hwýr kām ixihtýx rāhā ho ixpa nê wa kām:

—Kwa Tirtūm mê Jejus wa. Na pa wa ra inhmâ Tesarôn wýr inhmōr nê mê pahkwýjê pumunh prām týx nê. Kormâ mê kot akapêr jatur xâ mar kêt. Tâ wa inhmâ akupým mê hwýr wa inhmōr nê mê kām akapêr jatur xām mēnh prām. Mê kot mar nê akôt amnhî nhîpêx mex o pa kaxyw. Kwa xat ka wa akupým mê hwýr wa inhmê nâ? Anê.

Na pa hte wa â amnhî to wa hwýr rāhā ho ixpa anê. Tâ koja wa akupým mê awýr wa inhmê pa wa ma mê awýr inhmōr kurê kumrêx. ¹² Koja Tirtūm tanhmâ mê akrā hto ka mê amâ xepēn kīnh pê tanhmâ xepēn to ajuta hto ho ri apa. Nê mê amâ akwýjê hā ma ho te mê kam amâ amnhî tâ ma pyrāk o ri apa. Â kot kaj mê apiitâ xepēn nhîpêx anê. Te wa inhmâ mê akīnh pê tanhmâ mê ato mex to pyrāk.

¹³ Koja Tirtūm ja kaxyw tanhmâ mê akrā hto ka mê tām ajamaxpêr mex nê. Kêr kê Jejus nhýrmâ akupým wrý. Mê kot hkôt amnhî xunhwýr xwýnhjê mê ro hā akupým wrý. Hāmri ka mê Mēpanhîpêexâ Tirtūm kutâ amnhî kukamâ ajamaxpêr nê tām mê ate amnhî nhîpêx â amnhî pumunh kôt akīnh nê apikunhar o kuri akuhê. No ri tee ri amnhî kamâ ajamaxpêr nê ajakwamnaire nê akuhê hkêt nê.

4

Tirtūm kām mēmoj prām ā harēnh Rōmān 13.11-14; Epes 5.3-14

¹ E Jejus kôt ixkwýjaja. Na pa prem ma mê awýr mō nê Tirtūm kapêr o mê ajahkre ho ri mê akôt ixpa. Mê ate mar nê Tirtūm kām hprām xâ hkôt tanhmâ amnhî nhîpêx to kaxyw. Ka prem mê inhma nê hkôt amnhî nhîpêx mex o ri apa. Tâ kot paj axte ja hā tanhmâ mê amâ karō hto. Pahihti Jejus nhý hā axte mēmoj tâ mê amâ karō. Jakamâ kwa kêr ka mê arî Tirtūm kapêr kôt pix mā ri amnhî nhîpêx mex nê ý hā amnhî to htýx pê â amnhî nhîpêx anhýr o ri apa. ² Na pa prem ra Jejus nhý hā mê amâ mēmoj tâ karō. Mê ate hkôt amnhî nhîpêx prām xâj mê amâ hā karō ka prem mê inhma. ³ Nâ mê pahte tām amnhî nhîpêx o papaja na Tirtūm kām hprām. No kêt mê pahtýx ri nhām mēnijê ho amnhîkati o papaja na kām hprām kêt. ⁴ Jakamâ kwa kêr ka mê amyjaja aprō pix tănopxar o ri apa. No mê ri nhām mēnijê ho amnhîkati ho ri apa hkêt nê. Nê mê anijaja kêr ka mê amjên pix tănopxar o ri apa. No mê ri nhām mēmyjê ho amnhîkati ho ri apa hkêt nê. ⁵ Jejus kwý hkêt xwýnhjaja kot htýx ri kām hprām xâ hkôt mēnijê hwýr mrar nê mê ho amnhîkati htâ kêr ka mê ho mê urāk kêt nê. Kwarî ho kwarî. ⁶ â mê kot amnhî nhîpêx anhýr xwýnhjaja koja Tirtūm

nhÿrmã mẽ homnuj tÿx kumrëx. Na pa prem ra mẽ amã ja jarë ka prem mẽ inhma. Jakamã kwa kër ka mẽ ã amnhĩ nhĩpëx anhÿr o ri apa hkêt nê. ⁷ Xà na pre Tirtüm ã mẽ pahte amnhĩ nhĩpëx anhÿr kaxyw amnhĩ wÿr mẽ pahwÿ nê mẽ pahto hkra? Nà ja kaxyw na pre mẽ pahto hkra hkêt nê. ãm mẽ pahte tãm amnhĩ nhĩpëx o ri papa kaxyw nê tãm ri axpën nhĩpëx o ri papa kaxyw na pre mẽ pahto hkra. ⁸ Jakamã kot kaj mẽ atō ja hã mẽ inhma nê ãm mẽ inhma nê arĩ ã amnhĩ nhĩpëx anê. Hãmri nê mẽ pajaja mẽ ixkapër nhĩrōp axãm kêt nê. Tirtüm kapër nhĩrōp kot kaj xa. Nê mãänën kot mẽ pahwÿr Karō mënň xwÿnhja kapër nhĩrōp kot kaj xa.

⁹ Nê mẽ amã axpën kĩnh pë axpën to mex o apa hprãm xàj na pre Tirtüm tanhmã mẽ amã kapër o amnhĩrit to ka htem ã axpën nhĩpëx anhÿr o ri apa. Jakamã kot paj mẽ axte ja hã tanhmã mẽ amã nê hkêt nê. ¹⁰ Na ka mẽ ra amã axpën kĩnh pë te mẽ kam amã amnhĩ tã ma pyrak o axpën nhĩpëx o ri apa. Nê pika pë Masetōn kamã Kris kôt mẽ akwÿjaja ka mẽ mãänën amã mẽ hkĩnh pë ã mẽ hipëx anê. Tã kër ka mẽ arĩ ã amnhĩ nhĩpëx anhÿr rãhã nê. ¹¹ Kot kaj mẽ ã amnhĩ nhĩpëx anê hãmri nê ajamakëtkati nê axãmnhĩx axapënh pix tãnopxar o ri apa. Jao mẽ hakwa kamã nhãm tanhmã mẽ hixi jarënh to ho ri apa hkêt nê. Nê ãm amnhĩ pix tãnopxar o ri apa. Nê amnhĩ pa kukwak ri axàpkur kaxyw amnhĩm axapënh mex o ri apa. Na pa prem ra ã ja hã mẽ amã karō anê. ¹² Kot kaj mẽ ã amnhĩ nhĩpëx anê hãmri nê amã prãm xàj axahwÿr o ri apa hkêt nê. Nhũm Kris kwÿ hkêt xwÿnhjaja mẽ ate amnhĩ nhĩpëx ã mẽ apumu nê axpën mã mẽ ate tãm amnhĩ nhĩpëx xwÿnhjê hã mẽ ajarënh kurë kumrëx.

Kris kwÿ htyk xwÿnhjê jarënh

Matêwre 24.29-31; Wam Korit 15.51-58

¹³ E Kris kôt ixkwÿjaja. Na ka xep mẽ tee ri Kris kôt akwÿ htyk xwÿnhjê hkukamã ajamaxpër. Jakamã kot paj ixprĩ hã tanhmã mẽ amã mẽ harënh to ka mẽ inhma. Nà Kris kwÿ hkêt xwÿnhjaja na htem ty nhũm mẽ hkwÿjaja tee ri mẽ hkukamã hamaxpër o hkaprĩ nê. Mẽ htyk nê ma Jejus wÿr àpir kêt jakamã na htem mẽ mÿr pë hkaprĩ htÿx nê pa. No mẽ papajaja na pu htem ho mẽ urak kêt nê. ¹⁴ Jejus na pre ty nhũm Tirtüm akupÿm ho htĩr. Tã ra ã kot hipëx anhÿr jakamã koja nhÿrmã Jejus akupÿn wrÿ nê mẽ kot hkôt amnhĩ xunhwÿr nê htyk xwÿnhjê karō nhũm man amnhĩ kôt kaxkwa rũm mẽ o wrÿ. Na pu htem ã ja kôt pajamaxpër anê. ¹⁵⁻¹⁶ Na pre Pahihti Jejus inhmã hkôt mẽ pahkwÿ htyk xwÿnhjê jarënh o:

—Kot paj nhÿrmã akupÿn mẽ awÿr wrÿ ka mẽ ate ixkôt amnhĩ nhĩpëx xwÿnh piitã ma ixkutã axàpir o mō. Nom kot kaj mẽ arĩ atĩr nê apa xwÿnhjaja akumrëx axàpir kêt nê. Kormã. Koja Tirtüm kapër o mẽ wrÿk xwÿnh krãhtũmja Tirtüm mã pifti kakō. Kakōr tÿx pa ixkwÿ htyk nê hikwÿ xwÿnhjê mã ixkapër nê ixàmra kamã mẽ kumra. Nhũm mẽ hkarō akupÿn mẽ hwÿr wrÿ nê mẽ kãm gjëx pa. Hãmri nhũm mẽ akupÿm htĩr nê kãnhmã hkrĩ hpa nê ma kumrëx ixkutã àpir o mō. ¹⁷ Hãmri ka mẽ ate ixkôt amnhĩ xunhwÿr xwÿnh arĩ mẽ atĩr nê apa xwÿnhjaja ka mẽ hã ajët nê mẽ atipxi nê ma ixkutã axàpir o mō pu mẽ kakrã kamã axpën kaxpa. Hãmri nê mẽ pahpimràatã ma kaxkwam api nê inhō krĩ hwÿr pōj. Kaj mẽ Tirtüm mẽ wa ixkuri amex kumrëx nê atĩr tũm nê apa ho apa. Anê.

¹⁸ ã Pahihti Jejus inhmã mẽ pakukamã mẽ pajarënh anê.

Jakamã kwa kêr ka mẽ tee ri mẽ pahkwý htyk xwýnhjê hkukamã ajamaxpêr hkêt nê. Æ ixujarênh anhÿrta ã anohtýx pê axpên jamaxpêr o axihtýx o ri axpên kôt apa.

5

Mê pahte akupÿn Jejus wrýk xà hã arıgro pumunh kêt ã harênh

Matêwre 24.32–25.13; Wam Pêtre 3.8-13

¹⁻² Nê mẽ pahte Jejus akupÿm wrýk xà hã arıgro pumunh kêt jakamã kot paj mẽ amã tanhmã hã kagà hto hkêt nê. Koja nhÿrmã akupÿn mẽ pahwÿr nojarêt hãmri nê te kot mẽ ahkĩnh xwýnh kot amnhĩ nhĩpêx pyrã nê mẽ pajaêr pê mẽ pahwÿr wrý. ³ Jakamã koja kormã wrýk kêt ri nhũm Kris kwý hkêt xwýnh kot amnhĩ wÿr kamã hamak kêt xwýnhjaja hãmri mex nê pa hã amnhĩ pumu nê hkĩnh nê pa. Nê axpên mã kapêr o:

—Nà koja Tirtũm tanhmã mẽ pahto hkêt nê. Arĩ mẽ pamex nê ri mẽ papa kênã. Nà kot puj mẽ paxamnhĩx ri pajamakêtkati nê ri papa ho papa.

Anhÿr o axpên mã kapêr rôm nhũm puh Jejus mẽ haêr pê akupÿn wrý. Hãmri nê ma mẽ kot amnhĩ xà htýx kamã hamak o pa htũm xà hwÿr mẽ rênh pa nhũm mẽ tee ri kêp hpimxur prãm kaprÿ. Te mẽ htujarô xwýnh kot amnhĩ nhĩpêx pyrãk. Na htem mex nê pa htã hpi-jagri kaxyw ôhy xà htýx kumrêx nê tee ri kãm ôhy xà hkêt prãm kaprÿ ho hikwÿ. ⁴ Nom mẽ kajaja kot kaj mẽ urã nê amnhĩ jaêr pê akupÿm wrýk kãm omu nê tee ri amnhĩ kukamã ajamaxpêr o akaprĩ hkêt nê. ⁵ Mẽ pahpê Jejus kwý jakamã na pu htem kapêr kôt ri tãm amnhĩ nhĩpêx o ri papa. Jao te mẽ pahte mẽ kêp Jejus kwý hkêt xwýnhjê kot amnhĩ nhĩpêx pyrãk kêt. ⁶ Na htem mẽ pahkĩnhã akupÿn wrýk

kukamã hamaxpêr kêt nê. Te htýx ri mẽ ôt rãhã ho hikwÿ pyrãk. Nom mẽ papajaja na pu htem akupÿn wrýk kamã pajamak o papa pê kãm tanhmã amnhĩ nhĩpêx mex to rãhã ho ri papa. ⁷ Te kot ja pyrãk. Na htem kamãt kãm gõr nê mẽmoj mã hamaxpêr kêt nê htýx hikwÿ. Nê mẽ hkwyjaja kamãt kãm axpã nê htýx ri tanhmã amnhĩ tomnuj to ho pa. Jao hamaxpêr mex kêt nê. Tã mẽ kêp Jejus kwý hkêt xwýnhjaja hte mẽ urãk nê htýx ri tanhmã amnhĩ tomnuj to ho pa nê akupÿn Jejus wrýk mã hamaxpêr kêt nê. ⁸ No kêt mẽ papajaja. Mẽ pahte hkôt amnhĩ xunhwÿr xwýnhjaja. Kêr pu mẽ ho mẽ urãk kêt nê. Satanasti kãm mẽ pahte amnhĩ tomnuj prãm tã mẽ pahte kãm hprãm xà hkôt amnhĩ nhĩpêx pymaj kêr pu mẽ mẽmoj punuj pê amnhĩ to htýx rãhã ho ri papa.

Nê amnhĩ kaxyw Jejus kôt pajamaxpêr tÿx rãhã nê.

Nê mẽ pamã mẽ piitã mẽ hkĩnh pê mẽ kutã panojarêt rãhã ho ri papa.

Nê nhÿrmã Tirtũm mẽ hkra Jejus wa kuri pahtĩr tũm nê papa ho papa hkukamã mãn pajamaxpêr rãhã o ri papa.

Kot puj mẽ ã amnhĩ nhĩpêx anê hãmri nhũm Satanasti tee ri mẽ pahte amnhĩ tomnuj prãm xaj mẽ pahkrãm pajamaxpêr punuj jagjênh kaprÿ.

⁹ Xà na pre Tirtũm mẽ pakamã gryk kãm mẽ kot amnhĩ xà htýx kamã hamak tũm xà hwÿr mẽ pajanor kaxyw mẽ parê? Nà na pre ja kaxyw mẽ parênh kêt nê. Æm Pahihti Jejus Kris kukwak ri kot amnhĩ katut kôt mẽ pahte amnhĩ tomnuj rênh par nê mẽ pahto hkra kaxyw na pre mẽ parê.

¹⁰ Tã mẽmo kaxyw na pre Krisja mẽ panê ty? Nà nhÿrmã Tirtũm mẽ wa kuri mẽ pamek kumrêx nê pahtĩr tũm nê papa ho papa hprãm

xàj na pre mẽ panê ty. Jakamã koja nhÿrmã akupÿm amnhÿ kôt ma mẽ pahto àpir kaxyw akupÿn mẽ pahwÿr wrÿ pu mẽ amnhÿ kaxyw hkôt pajamaxpêr xwÿnh piitã ma hkôt kaxkwa hwÿr api hãmri nê Tÿrtÿm wa kuri pamex nê pahÿtÿr tÿm nê papa ho papa. Kormã mẽ pahÿtÿr ri mẽ papa xwÿnhjaja nê ra mẽ htyk nê hikwÿ xwÿnhjaja nhÿm akupÿm mẽ ho htÿr. Hãmri nê mẽ pahto hpimràatã amnhÿ kôt mẽ pahto àpir pa. Mẽ pahte hkôt amnhÿ xunhwÿr xwÿnh piitã koja Jejus nhÿrmã akupÿn wrÿ nê ã mẽ panhÿpêx mex anê.

¹¹ Tã ã kot anhÿr jakamã kwa kêr ka mẽ jam ajamaxpêr o apa pê axpên jamaxpêr o hihtÿx o ri axpên kôt apa. Nê Jejus kôt axpên jamaxpêr o hihtÿx o ri axpên kôt apa. Ra ã mẽ ate axpên nhÿpêx anhÿr tã kêr ka mẽ arÿ ho anhÿr rãhã ho ri apa nê aa hkaga hkêt nê.

Tÿrtÿm kapêr o mẽ pajahkre xwÿnhjê jarênh

Karatas 6.6; Wam Ximotre 5.17-19

¹² Nê kwa Kris kôt ixkwÿjaja. Na hte mẽ kot Tÿrtÿm kapêr o mẽ ajahkre xwÿnhjaja mẽ ajahkre mex pê Tÿrtÿm mã mẽ ajamãr mex o pa. Na htem ã mẽ anhÿpêx mex anhÿr rãhã ho ri mẽ akôt pa. Tã kwa kêr ka mẽ amnhÿ tã mẽ omu nê mẽ kapêr mar tÿx nê. ¹³ Nê mẽ hã apijaãm pê tanhmã mẽ ho mex to ho apa.

Nê kwa kêr ka mẽ tãm axpên nhÿpêx nê axãmnhÿx ri ajamakêtkati nê axpên kôt ri apa ho apa.

Mẽ pahte tanhmã Kris kôt mẽ pahkwÿjê nhÿpêx to hã mẽ pamã karō

Epes 4.1-6

¹⁴ Nê koja Kris kôt mẽ anhÿo kãm kaga nê pa ka mẽ ja hã omu nê kãm anê kê ã amnhÿ nhÿpêx anhÿr kêt nê. Kê hpãnhã amnhÿ xàpkur xà kaxyw àpênh o pa.

Nê mẽ kãm ma ho mẽ pa xwÿnhjaja ka mẽ kãm mẽ hamaxpêr o axihtÿx o ri mẽ hkôt apa.

Nê kormã amnhÿ kaxyw Jejus kôt mẽ hamaxpêr tohtuj anhÿr xwÿnhjaja ka mẽ tanhmã Jejus kôt mẽ ho mẽ axihtÿx to kê mẽ hkôt amnhÿ nhÿpêx mex o pa.

E kêr ka mẽ ã mẽ axpên nhÿpêx anhÿr o ri apa nê axpên kamã agryk tokyx anhÿr kêt nê.

¹⁵ Nê koja mēhō tanhmã atom-nuj to ka mẽ ãm omu nê amnhÿ tã tanhmã ho hkêt nê. ãm ho mex o ri apa. Nê mẽ piitã tanhmã mẽ ho mex to hpix kukamã ajamaxpêr rãhã nê.

¹⁶ Æ mẽ pahte amnhÿ nhÿpêx anhÿr o papaja na Tÿrtÿm kãm hprãm.

Mẽ pahpê hkra hã pahkÿnh rãhã papaja na kãm hprãm.

¹⁷ Nê mẽ pahte Tÿrtÿm mã amnhÿ jarênh rãhã ho papaja na mãânên kãm hprãm.

¹⁸ Nê tanhmã mẽ pakute htã arÿ Tÿrtÿm mã mex o mex ã harênh o papaja na mãânên kãm hprãm. Mẽ pahkÿnh nê papa kamã kãm mex o mex ã harê. Rÿ mẽ pahpunuj nê papa htã arÿ kãm mex o mex ã harê. Rÿ nhÿm mēhō tanhmã mẽ panhÿpêx to htã pu mẽ arÿ kãm mex o mex ã harê.

Æ mẽ pahte amnhÿ nhÿpêx anhÿr o papaja na Tÿrtÿm kãm hprãm.

Mẽ pahte tanhmã Tÿrtÿm Karō nhÿpêx to hã mẽ pamã karō

¹⁹ Nê koja Tÿrtÿm Karō mẽ amã mēmoj tã tanhmã kapêr o amnhÿrÿt to ka mẽ ama nê hkôt amnhÿ nhÿpêx kurê kumrêx. Rÿ mēhō mã tanhmã akapêr to kurê kumrêx. No kêr ka mẽ ama nê ãm ama nê atÿx ri hã apa hkêt nê. ²⁰ Rÿ nhÿm mēhō Tÿrtÿm Karō nhÿ hã tanhmã mẽ amã kapêr to ka mẽ ama nê agryk nê tanhmã ho akapêr punuj to hkêt nê. ²¹ Kojã Tÿrtÿm kapêr

kôt tanhmã mẽ amã mẽmoj jarēnh to nē ãm hãmri Tĩrtũm Karō nhỹ hã harēnh ã amnhĩ jarē. Ka mẽ ama nē hkôt amnhĩ nhĩpêx. ²² No koja Tĩrtũm kapêr kwỳm ri tanhmã mẽmoj jarēnh to hãmri nē Tĩrtũm Karō nhỹ hã ja jarēnh kêt nē. ãm amnhĩ krã hkôt harē. Ka mẽ tee ri ama nē amnhĩ krã kamã kapêr xĩr tỳx kêt nē. Jao hkôt amnhĩ nhĩpêx kêt nē.

Tanhmã Pawre kot mẽ ho Tĩrtũm wỳr to hã harēnh

Wam Tesarōn 3.3, 16

²³ Nē na pa hte mẽ ato Tĩrtũm wỳr o ri ixpa nē kãm:

—Pa Tĩrtũm. Nà ate mẽ inhmã mẽ ijamakêtkati xà nhõr jakamã na pa htem anhỹ hã ixãmnhĩx ijamakêtkati nē ri ixpa. Jakamã kwa kêr ka tanhmã Tesarōn kamã akwỳjê ho kê mẽ amnhĩ to mex rãhã ri pa. Jao tãm amnhĩ nhĩpêx nē tãm ri hamaxpêr rãhã nhũm Pahihti Jejus Kris akupỳn mẽ ixwỳr wrỳ.

Anhỹr o mẽ ato kuwỳ. ²⁴ Tã koja ã mẽ anhĩpêx anē. Ra kot amnhĩ jarēnh xà hkôt. ã mẽ anhĩpêx anhỹr kaxyw na pre amnhĩm mẽ arē.

Kagà jatur xà

²⁵ E Kris kôt ixkwỳjaja. Kwa kêr ka mẽ amnhĩ xwar ixto Tĩrtũm wỳr o apa.

²⁶ Nē kêr ka mẽ atar Kris kôt mẽ pahkwỳjê piitã mẽ kãm mẽ ijarē.

²⁷⁻²⁸ Nē kê Pahihti Jejus Kris mẽ akutã nojarêt rãhã ho pa. Ixte Pahihti nhỹ hã ã mẽ amã ixkapêr nē hã kagà anhỹr jakamã kêr ka mẽ atar Kris kwỳjê piitã mẽ kãm kamã harē kê mẽ piitã ixkapêr ma.

Tã ãm ja pix na hapêx. Ixpê Pawre na pa ã mẽ amã kagà nhĩpêx nē mẽ awỳr mẽnh anē.

Sikūn Tesarōn
Pawre kot Tesarōn
kamā Jejus kôt kwỳjê
hwỳr wam kagà nê mēnh
kôt hō kagà nê mēnh

Pawre na pre kagàja nhīpêx nê ma Tesarōn kamā Jejus kôt hkwyjê hwỳr kumê. Na pre hte Tesarōn kamā mē kām Jejus ā mē hkurê xwỳnhjaja Jejus ā tanhmā mē homnuj to nhūm mē amnhī xà htỳx kamā hamak o pa. Hāmri nhūm Pawre mē harēnh ma nê kagàja nhīpêx nê mē hwỳr kumê. Nê kamā mē kām mē hamaxpêr o hihtỳx. Nê mē kot arī Tirtūm kôt amnhī nhīpêx mex o pa nê hamaxpêr kôt hamaxpêr o pa hā mē kām karō. Nê nhỹrmā Jejus akupỳn kaxkwa rūm mē pahpê hkrajê hwỳr wrỳk nê pika ho hapêx par ā mē kām harê. Ā na pre Pawre mē kām kagàja kamā mē kām ujarēnh anê. Nê mē kām:

¹ Pa Tesarōn nhō xwỳnh kot Tirtūm kapêr mar kaxyw axpên wỳr mē apikuprōnh xwỳnhjaja? Xà mē amex na ka mē apa? Ixpê Pawre na pa axte mē awỳr kagà nhīpêx nê kumê. Siras mē Ximotre mē pa mē awỳr kumê. Na mē pahpê Mēpanhīpêxà maati Tirtūm mē Kra Jejus Kris kwỳ na pu mē. ² Jakamā na pa htem mē ato wa hwỳr rāhā ho ri ixpa. Wa kot mē akutā nojarêt rāhā ka mē ajamakêtkati nê apa kaxyw. Nê mēmoj to mē akutā wa nojarêt rāhā ho pa kaxyw.

Tirtūm kot nhỹrmā hkrajê nhīpêx kati xwỳnhjê homnuj tỳx ā harēnh

Wam Pêtre 4.12-19

³ Nê na ka htem amnhī kaxyw Tirtūm mā ajamaxpêr tỳx mex o ri apa. Nê axpên kutā anojarêt rāhā nê. Na pa htem ā mē ate amnhī nhīpêx anhỹrja mā ijamaxpêr nê mē anhỹ hā ixkīnh nê Tirtūm

mā mē anhỹ hā ixkīnh ā amnhī jarê. ⁴ Nê nhỹhỹm ixpa nê nhỹri krīm agjê nê kamā Tirtūm kôt mē pahkwỳjê mā mē ato amỹra nê mē kām:

—E pa mē amā Tesarōn kamā Kris kwỳjê jarê ka mē inhma. Nà mē ō krī kamā mē hkwyjaja na htem Kris ā mē hipêx kati ho pa nhūm htem amnhī xà htỳx kamā hamak pê mex kêt nê pa. Tā nom tee ri amnhī kukamā hamaxpêr o Jejus kaga hkêt nê. Na htem arī hkôt amnhī nhīpêx mex rāhā ho pa. Anê.

⁵ ā mē ate mē kutā amnhī nhīpêx anhỹr o apaja na hte Tirtūm hā mē apumu nê hkīnh nê pa. Nê mē akukamā hamaxpêr o:

—Mê kot Ixkra Jejus ā tanhmā mē hipêx to ho pa htā ām hāmri na htem mē kutā amnhī to htỳx o pa nê mē umaj wa ixkaga hkêt nê. Na htem ā amnhī nhīpêx anê nê mē kēp ixkra hā amnhī to amnhīrīt mex nê. Nà koja mē nhỹrmā wa ixri mex kumrêx nê htīr tūm nê pa ho pa.

Anhỹr o hamaxpêr. ⁶ Nê mē kot Kris ā mē anhīpêx punuj xwỳnhjaja koja Tirtūm nhỹrmā mē atā mē homnuj tỳx nê nhūm mē amnhī xà htỳx kamā hamak rāhā ho pa. Ām hāmri koja ā mē atā mē hipêx anê. ⁷⁻¹⁰ Koja Pahihti Jejusja nhỹrmā man akupỳn pika hwỳr hirā htỳx kām wrỳ nhūm Tirtūm kapêr o mē wrỳk xwỳnh xihtỳx xwỳnhjaja man hkôt wrỳ. Koja mē wrỳ hāmri nê mē kot amnhī tomnuj xwỳnhjê homnuj tỳx kumrêx. Jao ma mē kot amnhī xà htỳx kamā hamak tūm xàta wỳr mē rēnh pa nhūm mē kamā htīr tūm nê amnhī xà htỳx kamā hamak rāhā ho pa ho pa. Koja ā Pahihtija amnhī nê mē kot hkôt amnhī xunhwỳr kêt xwỳnhjê rēnh anê nhūm mē pahkīnhā Tirtūm mē Krata wa kuri mex nê pa hkêt nê. Nê mē pahkīnh ā wa mex o wa mex nê wa hihtỳx o

wa hihtÿx ã wa omunh kêt nê. Koja Pahihtî Jejus nhÿrmã akupÿn wrÿ nê ã mê panê mê hipêx anê. Koja wrÿ pu mê amnhî kaxyw hkôt paja-maxpêr xwÿnhjaja amnhî wÿr omu nê pahkînh nê. Hâmri nê amnhî nhî nyw ã amnhî pumu nê kãm:

—Hêxta waa nê. Amex o amex Pahihtî. Na ka pre mê inhnê ty hãmri nê mê inhmã mê inhî nyw gô. Kot paj mê Tirtûm mê war ari inhmex kumrêx nê ixtîr tûm nê ixpa ho ixpa. Âm hãmri na ka ã mê ixto mex anê. Nà amex kumrêx o amex kumrêx Pahihtî. Anê.

À kot puj mê pahpê hkwyÿjaja amnhî tâ kãm mex o mex ã harênh anê. Ra mê ate mê ixkapêr mar nê hkôt amnhî xunhwÿr jakamã kot kaj mê ixpyrà nê ã kãm mex o mex ã harênh anê.

Pawre kot Tesarôn nhô xwÿnhjê ho Tirtûm wÿr ã harênh

¹¹⁻¹² Nê na pa htem mê ato Tirtûm wÿr rãhã ho ixpa nê kãm:

—Pa Tirtûm? E Tesarôn kãm akrajaja na pa mê ho awÿ. Na ka hte Akra Pahihtî Jejus Kris mê wa mê ho mex rax o apa. Jao amnhîm mê arê nhûm mê ra kãm amnhî to mex prãm nê. Na htem amnhî kaxyw Jejus mã hamaxpêr rãhã pê mêmoy to axpên kutã nojarêt o pa. Jakamã kwa tanhmã mê hkrã hto kê mê akôt ã amnhî nhîpêx anhÿr rãhã ho pa. Kêr ka mê kot akôt amnhî nhîpêx o pa hã mê omu nê akînh nê mê kãm mê mex ã mê harê. Nhûm mê ate tanhmã mê ho mex to hã amnhî tâ apumu hãmri nê mê amnhî pyrà nê amã amex o amex ã ajarênh rãhã ho pa. Anê.

2

Kot amnhî tomnuj tÿx kumrêx xwÿnh maati jarênh

Matêwre 24.23-25; Makre 13.14-23; Rukre 21.20-24; Wam Juãw 2.18-19; Apokarip 13.1-18

¹ Nê koja nhÿrmã mê panhõ Pahihtî Jejus Kris akupÿn wrÿ pu mê ma

kutã api nê kakrã kamã hkaxpa. Jakamã kwa Jejus kôt ixkwÿjaja. ² Koja mêhõ mê awÿr mô nê mê amã Jejus ra akupÿn wrÿk ã harênh japêr. Rÿ tanhmã mê amã Jejus hpôx xà hã arîgro jarênh o hêx to nê mê amã:

—Kwa na ra Jejus akupÿn nojarêt. Koja tokyx akupÿn mê pahwÿr wrÿ. Semãn ja kamã rÿ ko. Apu hõ hã koja apu wrÿ rÿ ko.

Anhÿr o harê. Nê Tirtûm Karô nhÿ hã ã kot mê amã harênh anhÿr ã amnhî jarê rÿ nhãm mêhõ kot ã kãm harênh anhÿr ã harê. Rÿ pa ixte harênh nê hã kagã hã ijarê. Nom kwa kêr ka mê kapêr ma nê âm ama nê hkôt ajamaxpêr kêt nê. Rÿ ama nê tee ri amnhî kukamã ajamaxpêr kêt nê. Koja mêhõ ã mê amã Jejus tokyx wrÿk ã harênh anê nê âm amnhî krã hkôt ã harênh anhÿr o hêx. Nom Tirtûm Karô nhÿ hã rÿ pa inhÿ hã rÿ nhãm Kris kôt mê panhîõ nhÿ hã ã harênh anhÿr kêt nê. ³⁻⁴ Jakamã kêr ka mê âm mê kot harênh o hêxja ma nê hkôt ajamaxpêr kêt nê. Kormã Pahihtî Jejusja akupÿn nojarêt kêt. E kot paj ixprî hã mê amã ja jarê ka mê inhma. Nà kormã Pahihtî akupÿn nojarêt kêt ri koja mê ohtó rax kumrêx nê Tirtûm kutã amnhî xunhwÿ nê kãm hkurê ho pa. Nê amnhî tomnuj tÿx o pa. Hãmri nhûm ra kot amnhî tomnuj tÿx kumrêx xwÿnh maati amnhî to amnhîrît. Nom na pre ra Tirtûm tanhmã kot hipêx to hkukamã hã amnhî jarê. Koja xep gaa nê ma mê kot amnhî xà htÿx kamã hamak tûm xàta wÿr kumê nhûm kamã amnhî xà htÿx kamã hamak o pa rãhã nê pa ho pa.

Tã nom kormã Pahihtija akupÿn wrÿk nê ma hwÿr mênh kêt ri koja mê piitã omu nê kêp Mêhpãm maati pixi hã harênh kaxyw mê kêp mê õ sãnti piitã hkrakrak pa. Nê mê kot mêmoy karô ho amnhî pãm ã harênh xwÿnhja nhûm piitã hkrakrak pa. Hãmri nê axtem

nē Tirtūm mā amnhī jarēnh xà hā ixkre jatur xà kamā hitom wūr axà nē kamā nhỹ nē hēx rom mē piitā mē kām kēp Tirtūm ā amnhī to hēx nē mē kām:

—E mē amnē ixpumu. Ixpē mē anhō Tirtūm na pa. Pa kot kaj mē inhmā inhmex o inhmex ā ijarē. No kēr ka mē anhō sānti ho apām o apa hkēt nē. Kwarī ho kwarī. Ām paxipix ixpē Mēapām maati nē paxipix ixpē mē anhō Tirtūm.

Anhỹr o amnhī to hēx. ⁵ Na pa pre arī mē akōt ixpa ri ā mē amā harēnh anē. Mān arī mē ate ja hā anoht̄x r̄y ko. ⁶ Nom kormā ā kot amnhī nhīpēx anhỹr xà hā arīgrota kormā kator kēt. Mēhō kormā kot kēp àmnār jakamā nhūm kormā kator kēt nē. Ra mē ate kēp àmnār xwýnhja jarēnh mar. Tā koja hpōx xà hā arīgro kato nhūm kēp àmnār xwýnhhta kām pry kaprā nhūm rī kormā mō. ⁷ Nom na hte ra hpimxur pē Tirtūm nē mē piitā mē hkurē ho pa. Mē kot Tirtūm kōt amnhī xunhwūr pymaj tanhmā nē mē ho ho pa. Nom kormā kēp àmnār xwýnhja kēp àmnār jakamā nhūm hte mē noo mā tanhmā mē ho hkēt nē. Tā koja Tirtūm nhỹrmā kēp àmnār xwýnhja mā anē nhūm kuma nē kām ure nhūm rī kormā amnhī to amnhīrit nē mē piitā mē noo mā mō nē Tirtūm nē tanhmā mē kām hēx to ho pa. ⁸⁻¹² Koja kato nē Satanasti mē wa mē piitā tanhmā mē nokupyr to ho ri mē hkōt pa. Nē hēx rom mē kām aa mē kot mēmoj pumunh kēt kw̄y ho anhỹr o ri pa. Koja wa hēx rom te Tirtūm kot amnhī nhīpēx pyrāk o ā amnhī nhīpēx anē. Hāmri nhūm mē kot Jejus kōt amnhī xunhwūr kēt xwýnhjaja ja hā wa omu nē wa hkōt hamaxpēr kurē kumrēx. Nē ām hāmri wa kapēr ā wa hkamnhīx. Kop apu ra mē kot Tirtūm kapēr mar nē hkōt amnhī xunhwūr ronhỹx ra Tirtūm amnhī tā mē omu nē mē ho hkra. Nom koja mē kām kapēr mar prām kēt

nē. Ām wa kot amnhī to hēx o wa pa xwýnhhta kōt pix mā koja mē kām amnhī nhīpēx prām.

Ja m̄yrapē koja Tirtūm tee ri ja hā mē omu hāmri nē mē nē wa kot amnhī tomnuj t̄yx xwýnhhta wa omunh kēt nhūm wa tanhmā mē kām amnhī nhīpēx to nhūm mē wa omu nē wa hkōt hamaxpēr kurē kumrēx. Hāmri nē wa gryk ā Tirtūm kaga jakamā nhūm nhỹrmā mē kot amnhī xà ht̄yx kamā hamak tūm xàja wūr mē rēnh pa.

Koja Satanasti mē kot amnhī tomnuj t̄yx kumrēx xwýnh maatita ā hēx rom tanhmā mē no kupyr to anhỹr o pa rāhā nhūm Pahihti Jejusja hirā rax kām akup̄yn mē pahwūr wr̄y. Hāmri nē kot amnhī tomnuj t̄yx kumrēx xwýnh maatita ā am̄ynē nhūm mē kām hp̄ir kurē kumrēx nhūm hapēx. Koja ā amnhī nhīpēx anē.

Tirtūm kot tanhmā mē pahto mex to hā harēnh

Rōmān 8.28-30; Wam Tesarōn 2.13, 5.23-24

¹³ Nē amnepēm kormā mēmoj kēt ri na pre Tirtūm amnhīm mē arē. Mē ate kapēr mar nē hkōt amnhī xunhwūr nhūm kot mē ato hkra kaxyw mē arē. Kām mē ajapēē. Na pre mē awūr amnhī Karō rē nhūm mē akarō mā agjē nē tanhmā mē ajamxpēr to ka mē ŷ hā tām amnhī nhīpēx rāhā ho ri apa. Na pa htem ja hā mē amā ijamxpēr nē mē anhỹ hā ixkīnh kām Tirtūm mā mē ajarēnh o ri ixpa. ¹⁴ Na pre mē awūr mē ixrē. Mē ixte mē awūr ixpa nē mē amā tanhmā Jejus kot mē panē amnhī nhīpēx to hā harēnh o ixpa kaxyw. Mē ate mē inhmar nē Jejus kōt amnhī xunhwūr nhūm Tirtūm kot Pahihti Jejus Kris o mex pyrā nē tanhmā mē ato mex to kaxyw. ¹⁵ Jakamā kwa kēr ka mē ra mē ixte wam mē awūr kagā mēnhhta kamā harē nē mar t̄yx nē. Nē mē akōt mē ixpa ri tanhmā mē ixte mē ajahkre htoja mā ajamxpēr mex nē hā ano

htỳx nē hkôt amnhĩ nhĩpêx rāhā ho ri apa. Jao Jejus kôt amnhĩ nhĩpêx mex o ri apa Kris kôt ixkwỳjaja.

¹⁶ Mēpanhĩpêxà maati mē Pahihiti Jejus Kris wa kām mē pajapê htỳx kumrêx. Na hte wa tanhmā mē pajamexpêr o hihtỳx to ho pa pu mē wa ý hā tām pajamexpêr o ri papa. Nē wa ý hā nhỹrmā wa kuri pamex nē pahfir tùm nē papa hkukamā pajamexpêr kaprỳ ho papa hkêt nē. ¹⁷ Na pa htem mē ato wa hwỳr o ixpa nē wa kām:

—Pa Tirtùm mē Jejus wa? Kwa kēr ka wa tanhmā Tesarōn kamā akrājê mā mē hamaxpêr o hihtỳx to ké mē war anhỹ hā tām amnhĩ nhĩpêx nē tām hamaxpêr. Jao kapêr mex rāhā nē pa ho pa. Anē.

3

Tanhmā mē pahte xpên to Tirtùm wỳr to hā kot mē pamā karō Korosê 4.2-4

¹ Nē kwa Kris kôt mē ixtō nē ixtōxjaja. Kēr ka mē amnhĩ xwar mē ixtō Tirtùm wỳr rāhā ho ri apa. Mē ixte krĩ piitā hkôt mē kām Jejus jarēnh o ri mē hkôt ixpa nhũm mē kot mē inhmar nē amnhĩ kaxyw Jejus kôt hamaxpêr kaxyw. Jao mē apyrā nē hkôt amnhĩ nhĩpêx mex o pa kaxyw. ² Nom koja mē piitā ā amnhĩ nhĩpêx anhỹr kêt nē. Mē hkwỳjaja kām Jejus jarēnh mar prām kêt jakamā kwa mē ixtō Tirtùm wỳ kē mē inhnē mē omunh mex nē nhũm mē Jejus ā tanhmā mē ixtō hkêt nē.

³ Nē koja Pahihiti tanhmā mē akrā hto ka mē ajamexpêr mex nē ý hā hkôt amnhĩ xunhwỳr tỳx o ri apa. Jakamā nhũm Satanasti mē ate amnhĩ tomnuj hprām xāj tee ri tanhmā mē anhĩpêx to kaprỳ nhũm Pahihiti mē anē omunh mex nē. Ra kot mē atā amnhĩ jarēnh xà hkôt. ⁴ Koja ā mē anē hipêx anē ka mē ý hā tanhmā mē ixte mēmoj tām mē amā karō xà hkôt amnhĩ nhĩpêx mex o ri apa. ⁵ Tā ké

Pahihiti tanhmā mē akrā hto ka mē Tirtùm pyrā nē mē piitā mē kamā axukaprĩ ho ri apa. Nē Pahihiti Kris pyrā nē mēmoj punuj kutā amnhĩ to htỳx nē. Jao hkôt amnhĩ nhĩpêx mex rāhā ho ri apa.

Mē kām kaga xwỳnhjê jarēnh

Wam Korît 4.12; Epes 4.28; Wam Tesarōn 4.9-12

⁶ E kot paj hpānhā Kris kôt mē pahkwỳ kām kaga xwỳnhjê jarē ka mē inhma. Pahihiti Jejus nhỹ hā kot paj mē amā tanhmā mē harēnh to. Nā koja mē akwỳjaja kām kaga nē amnhĩm mēmoj tām àpēnh kêt japêr. Nē mē ixte mē axàpēnh mex o apa hā mē amā karōja kuhpa hā amnhĩm mēmoj tām àpēnh kêt japêr. Koja mē ā amnhĩ nhĩpêx anē ka mē ja hā mē omu hāmri nē mē hkôt ri apa hkêt nē. ⁷⁻⁸ Xà mē pajaja na pa prem ma mē awỳr mō nē mē akôt inhmā kaga nē mēmoj tām ixàpēnh kêt nē ri ixpa? Nā na pa prem mē apa kukwak ri ixàpkur py-maj ixàpēnh rũnh nē amnhĩ pa pix kukwak ri ixàpkur o ri ixpa. Na ka prem mē inhmā mēmo mē apkur xà ho mra pa prem amarĩ amnhĩm hamỳnh nē hkur kêt nē. Na pa prem hpānhā mē amā amnhĩre nē kormā kuku. Tā kēr ka mē ā amnhĩ nhĩpêx anhỹr o ri xpên kôt apa nē amnhĩ pa pix kukwak ri apku. Nē mē amā kaga hā nhām akwỳjê hpa kukwak ri axàpkur o ri apa kêt nē. ⁹ Na pa prem amnhĩ pa pix kukwak ri ixàpkur o ri mē akôt ixpa. Mē ate ja hā mē ixpumunh nē mē ixpyrā nē ā amnhĩ nhĩpêx anhỹr kaxyw. Nom mē ixte Jejus mā tanhmā mē ajahkre hto nhũm mē ate mē inhmar nē hpānhā mē inhmā mē ixàpkur xà nhōrja Jejus mā tanhmā kute hkêt tām pa prem ā amnhĩ nhĩpêx anhỹr kêt nē. Mē ate ja hā mē ixpumunh nē mē ixpyrā nē ā amnhĩ nhĩpêx anhỹr kaxyw na pa prem amnhĩ pa pix kukwak ri

ixàpkur o ri mẽ akôt ixpa. ¹⁰ Na pa prem mẽ amã ja hã karō ho:

—Koja mẽhō kãm kaga nẽ àpênh kêt nẽ ka mẽ ja hã omu nẽ kãm ô hkêt nẽ. Kwār māmri apkur kêt nẽ kãm prãm nẽ ri pa nẽ amnhĩ pumu. Anẽ.

¹¹ Tã xep ra mẽ akwýjaja ã amnhĩ nhĩpêx anẽ nẽ kãm kaga nẽ àpênh kêt nẽ amarĩ ri pa. Nẽ xep htýx ri axpên jakwa kamã nhãm mẽ hixi ho rër o ri pa. ¹² Kwa mẽ inhma Jejus kôt ixkwýjaja. Kot paj Pahihti Jejus nhỹ hã mẽ amã mẽ kot ã amnhĩ nhĩpêx xwýnhjê jarẽ ka mẽ inhma nẽ mẽ inhmar týx nẽ. Kêr ka mẽ kãm kaga xwýnhjê mã anẽ kê mẽ jam ure nẽ hpãnhã àpênh mex o pa. Jao mẽ apyrã nẽ amnhĩ pa kukwak ri apkur o pa. Kêr ka mẽ ã mẽ kãm ixkapêr jarênh anẽ.

¹³ Nẽ kwa kêr ka mẽ axpên to mex o apata kaga hkêt nẽ.

¹⁴ E na pa mẽ ã Tirtúm nhỹ hã mẽmoj tâ mẽ amã karō nẽ hã kagã anẽ. Tã koja mẽhō kamã harẽ nẽ kuma nẽ ãm kuma nẽ hkôt amnhĩ nhĩpêx kêt ka mẽ ja hã omu nẽ hkôt ri apa hkêt nẽ. Tokyx kot ja hã amnhĩ pumunh nẽ amnhĩ tâ hpi-jaãm kaxyw. ¹⁵ Nom arĩ Kris kôt kêp mẽ akwý jakamã kêr ka mẽ arĩ kêp mẽ atō rý atōx ã tãm hipêx nẽ kãm akapêr mex o ri apa. Nom te ho kêp mẽ akwý hkêt pyrãk o kãm akapêr kêt nẽ.

Tanhmã Pawre kot mẽ ho Jejus wýr to hã harênh

¹⁶⁻¹⁸ Nẽ na pa hte mẽ ato Pahihti Jejus wýr rãhã ho ixpa. Kot mẽ pamã mẽ pajamakêtkati xã nhõr jakamã na pa htem mẽ ato kuwý nẽ kãm:

—Pa Pahihti? Kwa kêr ka Tesarōn kamã akwýjê pumu nẽ mẽmoj to mẽ kutã anojarêt rãhã ho ri mẽ hkôt apa. Kê mẽ hamakêtkati nẽ àmnhix pa ho pa. Anẽ.

Tã ãm ja pix. Ixpê Pawre na pa kagã jatur xã kamã inhĩkra ho amnhĩ nhĩxi nhĩpêx. Na hte

kagã nhĩpêx xwýnh inhmã ixkapêr ã kagã. Nẽ hã kagã hpa pa hpãnhã hatur xã kamã pam inhĩxi nhĩpêx. Tã na hapêx.

Wam Ximotre Pawre kot Ximotre hwÿr kagà nê mênh

Pawre na pre kagàja nhîpêx. Kêp Jejus nhÿ hã hkrajê jahkre ho pa xwÿnhjê hô na pre. Nê Ximotre kêp Pawre ho ajuta ho hkôt pa xwÿnh na pre. Tã hpãnhã krî pê Epes kamã arîk nê Tirtûm kapêr o Jejus kôt hkwÿjê jahkre ho pa. Hãmri nhûm Pawre krî hô kamã pa nê kagàja nhîpêx nê hwÿr kumê. Nê kamã kãm mêmoj tã karô. Na pre ra Epes kamã mê hkwÿjaja Tirtûm kapêr o hêx o mê ahkre ho pa nhûm Pawre mê harênh ma nê kagàja kamã Ximotre mã tanhmã mê harênh to. Nê kot Tirtûm kapêr o Jejus kwÿjê jahkre mex xwÿnhjê xunhwÿr kaxyw kãm karô. Nê Tirtûm kãm hprãm xà hkôt pix mã mê ahkre ho pa hã kãm karô nê hwÿr kagà nê kumê. Nê kãm:

¹ Pa Ximotre? Xà amex? Ixpê Pawre na pa awÿr kagà nhîpêx nê kumê. Ixte Jejus Kris nhÿ hã mê ahkre ho ixpa kaxyw na pre Mëpapytâr xwÿnh Tirtûm mê Jejus Kris wa ixta nê ixãm. Jejus kamã na pu htem pajamak rãhã ho ri papa.

² Nà ra ate ixkapêr mar xà hkôt Jejus kôt amnhî xãm jakamã te apê ixkra pyrâk Ximotre. Jakamã na pa hte ato Mëpanhîpêxã maati Tirtûm mê panhõ Pahihti Jejus Kris wa hwÿr o ixpa nê ato wa hwÿr o:

—Pa Tirtûm mê Pahihti wa. E Ximotre ho na pa war awÿr kaxyw. Kwa kêr ka wa kamã axukaprî nê kutã war anojarêr rãhã ho wa ri apa. Kot kaj wa ã ho mex anê nhûm war anhÿ hã hamakêtkati nê amnhîx pa ho pa.

Anhÿr o na pa hte war ato kuwÿ

Tirtûm kapêr o mê ahkre xwÿnhjê jarênh

Rômãn 16.17; Wam Ximotre 6.3; Sikûn Ximotre 2.23; Xitre 1.5-16

³ Nê na pu pre wa Epes kamã papa tã pika pê Masetôn wÿr panojarêr nê tee ri Epes kamã Tirtûm kapêr ho hêx o mê ahkre xwÿnhjê kapêr ma. Jakamã na pa pre amã:

—E Ximotre kêr ka Masetôn wÿr ixkôt amôr kêt nê. Âm jar Epes kamã arîk nê ixwakre kamã Tirtûm kapêr o mê hêx xwÿnhjê mã akapêr nê ã mê hêx anhÿrja nê mê hkurê ho ri mê hkôt apa.

Anhÿr o amã harê hãmri nê Epes kamã are nê ma Masetôn wÿr ahte mō. ⁴ Mê hêx xwÿnhjaja amnepêm panhîgêtjaja kot tanhmã amnhî nhîpêx to nê tanhmã ujarênh toja nhûm htem mê kãm harênh pix o pa. Nê mê hixi piitã harênh o pa. Na htem ã amnhî krã hkôt hkwÿjê mã ujarênh anhÿr o pa. Jao axpên kwÿm ri mê ahkre nê mê hã axpên mã àkjêr o pa. Â mê kot amnhî nhîpêx anhÿr jao Tirtûm nhÿ hã kãm hprãm xà hkôt mê ahkre hkêt nê. Koja mēhõ Tirtûm nhÿ hã kapêr o mê ahkre hãmri nê amnhî kaxyw kãm hamaxpêr tÿx pê tanhmã mê ahkre hto. Nom ixte amã mê harênh xwÿnhjaja Tirtûm nhÿ hã mê ahkre hkêt jakamã na pa pre inhnojarêr nê ã amã mê harênh anê nê mê kuri Epes kamã are.

⁵ Tã kêr ka arî mê ahkre ho ri mê hkôt apa Ximotre. Nê Kris kôt mê pahkwÿjê mã anê kê mê amnhî kaxyw Jejus kôt hamaxpêr tÿx pê hamaxpêr mex o pa. Jao tanhmã hamaxpêr punuj to hkôt amnhî nhîpêx kêt nê. Nê mê kãm anê kê mê te kãm amnhî tã ma pyrâk o nhãm kãm mê hã ma ho pa. ⁶ Ixte amã mê hêx xwÿnh jarênh xwÿnhjaja na htem ã mê ahkre anhÿr kêt nê. Na htem htÿx ri amnhî krã hkôt tanhmã mê ahkre hto. ⁷ Tirtûm kot finat Mojes mã

měmoj tã karõja mẽ kot mar tỳx ã amnhĩ kãmhĩx nẽ ho mẽ ahkre hprãm tã no ãm hprĩ hã mar kêt nẽ htỳx ri ho mẽ ahkre ho pa. ⁸ Tĩrtũm kot Mojes mã mẽmoj tã karõja mex. Mẽ kot mar nẽ hkõt amnhĩ nhĩpêx o pa kaxyw na pre. ⁹ No na pre mẽ kot tãm amnhĩ nhĩpêx xwỳnhjê mã ã hã karõ anhỳr kêt nẽ. ãm mẽ kot amnhĩ tomnuj xwỳnhjê mã na pre hã karõ.

Mẽ kot mẽ õ pahi kapêr mar kêt xwỳnhjê mã.

Nẽ mẽ kot Tĩrtũm kapêr nhĩrõp kuhê ho mẽ pa xwỳnhjê mã.

Nẽ Tĩrtũm ã mẽ hpiaaam kêt xwỳnhjê mã.

Nẽ mẽ kot mẽ hipêexà nẽ mẽ katorxà hpar xwỳnhjê mã.

¹⁰ Nẽ mẽ hprõ kuhpa hã nhãm mẽnijê ho amnhĩkati xwỳnhjê mã.

Nẽ mẽ mjên kuhpa hã nhãm mẽmyjê ho amnhĩkati xwỳnhjê mã.

Nẽ mẽmyjaja kot mẽnijê kuhpa hã kãm amnhĩ kwỳ myjê hkĩnh nẽ mẽ ho amnhĩkati xwỳnhjê mã.

Nẽ mẽnijaja kot mẽmyjê kuhpa hã kãm amnhĩ kwỳ nijê hkĩnh nẽ mẽ ho amnhĩkati xwỳnhjê mã.

Nẽ mẽ kot mẽmoj to ãhkĩnh nẽ nhãm mẽ kãm ho wênê o mẽ pa xwỳnhjê mã.

Nẽ ri mẽ hêx o mẽ pa xwỳnhjê mã.

ã mẽ kot Tĩrtũm kapêr kwỳm ri amnhĩ nhĩpêx anhỳr o mẽ pa xwỳnh piitã mẽ kaxyw na pre Mojes mã mẽmojta ã karõ. Mẽ kãm Jejus prãm kêt xwỳnhjê mã. Mẽ kot mar nẽ tãm amnhĩ nhĩpêx kaxyw. ¹¹ Tã pa na pa hte Pahihti kot tanhmã mẽ panê amnhĩ nhĩpêx to hã harênh o ri mẽ hkõt ixa. Ja kaxyw na pre Tĩrtũm ixãm. Tĩrtũnja mex o mex. Tãm na pre ja kaxyw ixãm.

Tanhmã Pahihti Jejus Kris kot Pawre ho mex to hã harênh Atre 26.9-18

¹² Nẽ Pahihti Jejus Kris na hte ixto mex rãhã ho pa. Na hte tanhmã ixto pa ý hã mẽ piitã mẽ kãm tanhmã kot mẽ panê amnhĩ nhĩpêx to hã harênh o ri mẽ hkõt ixa. Na pre ixte ã amnhĩ nhĩpêx anhỳrja kukamã inhmã ixàpênh ã karõ nẽ inhmã:

—E ate amnhĩ kaxyw ixkõt ajamaxpêr mex jakamã kêr ka ma mẽ piitã mẽ hkõt ri mẽ kãm ixkapêr jarênh o ri apa. Anê.

¹³ Nom amnepêm na pa pre hkõt ijamaxpêr kêt nẽ. ãm axtem nẽ haprý rũnh nẽ ho ixkapêr punuj o ri ixa. Nẽ hkwỳjê ho ixkrihkrit nẽ mẽ haprý nẽ mẽ htak. Nom kormã amnhĩ kaxyw Kris kõt ijaxmaxpêr kêt jakamã ixtỳx ã mẽ hipêx anhỳr o ixa nhũm Pahihti ja hã ixpumu nẽ ixkamã ukapri nẽ mẽ hã tanhmã ixto hkêt nẽ. ¹⁴ Nẽ kãm ijapê xaj mẽmoj to ixkutã nojarêr rãhã ho pa nẽ tanhmã ixkrã hto pa ra amnhĩ kaxyw hkõt ijaxmaxpêr nẽ hkõt amnhĩ xãm. Hãmri nẽ kukwak ri ra inhmã hkwỳjê hkĩnh nẽ hpãnhã mẽ ho mex o ri mẽ hkõt ixa.

¹⁵ Nẽ Jejus Kris ra wrỳk nẽ mẽ pahte amnhĩ tomnuj piitã hpãnhã amnhĩrer kaxyw mẽ panê htyk ã harênhja na pa hte harênh o ri ixa. ã kot amnhĩ nhĩpêx anhỳrja na mex o mex. Kê mẽ piitã kuma nẽ hã nohtỳx rãhã ho pa.

Kormã ixte hkõt amnhĩ xãm kêt ri na pa pre amnhĩ tomnuj tỳx kumrêx o mẽ piitã mẽ hakrenh ¹⁶ nhũm Tĩrtũm ixpumu nẽ ixkamã ukapri nẽ. Hãmri nẽ amnhĩ kaxyw ixãm. Mẽ piitã mẽ kot ja hã ixpumunh nẽ axpên mã ã ijarênh anhỳr kaxyw. Nẽ ijarênh o:

—Kwa Pawre na pre amnhĩ tomnuj tỳx kumrêx o pa nhũm Jejus Kris ja hã omu nẽ kamã gryk tokyx anhỳr kêt nẽ. Na pre tanhmã hkrã hto nhũm ra tãm amnhĩ nhĩpêx o pa. Kwa pu mẽ urak nẽ amnhĩ kaxyw Jejus kõt pajamaxpêr nẽ

hkôt amnhî xunhwÿ. Kêr pu mē Pawre pyrā nē nhÿrmā Tirtūm mē Kraja wa kuri pamex nē pahŧir tūm nē papa ho papa.

Anhÿr o axpēn mā ijarēnh nē ix-pyrā nē Jejus kôt amnhî xunhwÿr kaxyw na pre Tirtūm ā ixto mex anē. ¹⁷ Jakamā na pa hte kām amnhî jarēnh kaxyw nē kām:

—Pa Tirtūm? Nā kapxipix apē Pahi Maati. Nē arāhā ho arāhā nē amex o amex. Mē ixte inhno ho aa apumunh kêt tā kapxipix apē Mēinhîpēxā maati. Tā koja nhÿrmā mē piitā ā amā amex o amex ā ajarēnh anhÿr o pa. Anē.

Ximotre kot tanhmā Epes nhō xwÿnhjē jahkre hto hā kām karō

Wam Korīt 5.1-5

¹⁸ Nē te apē ixkra pyrāk Ximotre. Tā kot paj mēmoj tā amā karō ka inhma nē inhmar tÿx nē. Nā Pahihti Jejus mā ate tanhmā amnhî nhîpēx to ho apa kaxyw na pa prem axām nhūm Tirtūm nhÿ hā kapēr o mē pa xwÿnhjaja axāpēnh kukamā amā kapēr nē amā:

—E ate ma mē kām Pahihti Jejus jarēnh o apa kaxyw Tirtūm kot axām jakamā kêr ka ā amnhî nhîpēx anhÿr o ri mē hkôt apa. Anē.

Tā kot paj ijaxwÿja kagāja kamā amā ixkapēr nē mēmoj tā amā karō. Ka mar tÿx nē hkôt amnhî nhîpēx mex pē Tirtūm mā amnhî nhîpēx mex o ri apa. Jao aprī hā mē kām tanhmā Jejus jarēnh to ho ri mē hkôt apa. ¹⁹ Nē amnhî kaxyw Jejus mā ajamaxpēr mex nē. Nē mēmoj punuj pumu nē amā ho anhÿr prām tā Jejus nhÿ hā nē amnhî to htÿx nē ho anhÿr kêt nē. Jao tām amnhî nhîpēx ā amnhî pumunh mex o ri apa. Nom kot kaj ja nē amnhî to htÿx kêt nē tanhmā amnhî tomnuj to hāmri nē te ate Pahihti Jejus kaga pyrāk. Na pre pahkwÿjaja ā amnhî nhîpēx anhÿr o hkaga nē axte kām hamaxpēr kêt nē. ²⁰ Imēnew mē Aresānja na pre wa ā amnhî nhîpēx

anē nē tanhmā Tirtūm o kapēr punuj to. Mÿrapē na pa pre Sa-tanasti nhîhkram wa haxā. Kot tanhmā wa ho nhūm wa kot tee ri amnhî tomnujta ā amnhî pumunh nē tokyx tām amnhî nhîpēx nē axte ā amnhî nhîpēx anhÿr kêt kaxyw.

2

Tanhmā mē pahte Tirtūm mā amnhî jarēnh to hā mē pamā karō

Rukre 11.2-4; Atre 10.34-35; Epes 6.18

¹ E kot paj hpānhā tanhmā mē pahte Tirtūm mā amnhî jarēnh to hā amā karō Ximotre. Ka inhma nē ixō ri ho mē pahkwÿjē jahkre ho ri mē hkôt apa. E ja kumrēx kot paj mē kaxyw amā hā karō. Kêr ka mē piitā mē ho Tirtūm wÿr ho ri pa. Nē kām mē harē nē mē kaxyw mēmoj tā axāhwÿr o ri apa. Kêr kê ama nē tanhmā mē ho mex to. Kê mē amnhî tā omu nē ā kām kapēr anē nē kām:

—Pa Tirtūm? Nā ām hāmri na ka ā mē ixto mex anē. Amex o amex. Anē.

² Nē mē kām anē kê mē ō pahi nē mē ho amnhîptār xwÿnh piitā mē ho ahwÿr o pa ho:

—Pa Tirtūm? Kwa kêr ka mē inhō pahi mē mē kot mē ixto amnhîptār xwÿnh piitā tanhmā mē ho kê mē ixto mex o pa. Kêr pa mē ija-makêtkati nē ixāmnhîx ixpa pē amā tanhmā amnhî nhîpēx to ho ri ixpa. Nē ixāmnhîx mē hkôt tām amnhî nhîpēx. Anē.

³ Kot puj mē ā mē ho mē pa-pytār xwÿnh Tirtūmja wÿr o papa anē nhūm mē pama nhūm ja kām mex nē.

E kêr ka ā mē kām ja hā karō anē Ximotre.

Tirtūm kām mēmoj prām ā harēnh Sikūn Pētre 3.9

⁴ Nē mē piitā mē kot kapēr mar nē amnhî kaxyw Jejus kôt hamaxpēr nē hkôt amnhî xunhwÿrja na Tirtūm kām hprām.

⁵ Ja kaxyw na pre mẽ pahwÿr Kra Jeus mẽ nhũm man mẽ pahwÿr wrÿ. Tÿrtũmja tapxipix na kęp Měpahpãm. Nẽ Kra Jeusja tapxipix na kot Tÿrtũm mã tãm mẽ paxunhwÿr mã xwÿnh. Ja kaxyw na pre amnhĩ grõnh kõt wrÿ mẽ pahpyrà nẽ ĩ ho ĩ nẽ kato.

⁶ Hãmri nẽ gaa nẽ àptàr hãmri nẽ mẽ pahpiitã mẽ panẽ ty. Jao Tÿrtũm mã mẽ pahte amnhĩ tomnuj piitã hpãnhã amnhĩrer pa. Tã mẽ pahpiitã mẽ pahte kot ã amnhĩ nhĩpêx anhÿr ã harẽnh mar nẽ tokyx hkõt amnhĩ xunhwÿrja na Tÿrtũm kãm hprãm.

⁷ Ja kaxyw na pre ixãm. Ixte Ijaew kêt xwÿnhjê mã Tÿrtũm kapër jarẽnh o ri mẽ hkõt ixpa kaxyw. Nẽ Jeus nhÿ mã tanhmã mẽ kãm ixkapër to ho ri ixpa kaxyw. Nẽ tanhmã kot mẽ panẽ amnhĩ nhĩpêx to mã harẽnh kaxyw. ãm hãmri na pa ã amnhĩ jarẽnh anẽ. Ixêx kêt. Na pa hte Ijaew kêt xwÿnhjê hkõt ixpa nẽ ã mẽ kãm ixkapër anẽ nẽ mẽ kãm:

—E mẽ ate Tÿrtũm Kra Jeus kõt amnhĩ xunhwÿrja na Tÿrtũm kãm hprãm. Jakamã kwa mẽ tokyx amnhĩ kaxyw hkõt ajamaxpër nẽ hkõt amnhĩ xunhwÿ. Anẽ.

Ikrêsti kamã tanhmã mẽ pahte amnhĩ nhĩpêx to mã mẽ pamã karõ

⁸ Nẽ kot kaj mẽ tõhã Tÿrtũm kapër mar kaxyw axpën wÿr akuprõ. Hãmri nẽ Tÿrtũm mã amnhĩ jarẽ nom kër ka mẽ mẽmoj tã axpën kamã agryk kamã kãm amnhĩ jarẽnh kêt nẽ. Rÿ mẽmoj tã axpën mã axàkjêr kamã kãm amnhĩ jarẽnh kêt nẽ. ãm tãm mẽ ajamaxpër pix o kãm amnhĩ jarẽ. Nẽ tãm amnhĩ nhĩpêx kamã kãm amnhĩ jarẽ. Ja na inhãm hprãm. Tã kër ka ã Epes nhõ xwÿnhjê mã ja mã akarõ anẽ Ximotre.

Měnijaja kot tanhmã amnhĩ nhĩpêx to kaxyw mẽ mã kãm karõ

Wam Korõt 14.34; Epes 5.22; Xitre 2.3; Wam Pêtre 3.1-7

⁹ Nẽ kot paj hpãnhã Kris kõt mẽ pahtõxjaja tanhmã kot amnhĩ nhĩpêx to mã mẽ kaxyw amã karõ ka inhma. Nã mẽmyjaja kot mẽ omunh nẽ kãm mẽ hkĩnh prãm xàj kê mẽ htÿx ri mẽ noo mã tanhmã amnhĩ nhĩpêx to hkêt nẽ. Nẽ ja prãm xàj tanhmã ê jagiẽnh to hkêt nẽ rÿ tanhmã ri mrar to hkêt nẽ. Rÿ mẽ kãm mẽ hkĩnh prãm xàj õkrexê mex jagiẽnh rÿ mẽ ĩhkra kamã kàx mex jagiẽnh nẽ ri mã mẽ hkõt pa kêt nẽ. Rÿ ja kaxyw tanhmã ri amnhĩ kĭjaxwÿr to nẽ ri mã mẽ hkõt pa kêt nẽ. Rÿ mẽ ê mex jagiẽ nẽ mẽ noo mã htÿx ri hpĭjaam kêt o pa hkêt nẽ. Kẽ mẽmyjaja kãm mẽ hkĩnh prãm xàj ã htÿx ri amnhĩ nhĩpêx anhÿr o pa hkêt nẽ. ¹⁰ Mẽ kãm anẽ kê mẽ kãm Tÿrtũm mãn kĩnh xàj mẽ piitã mẽ kutã mẽmoj to nojarêt o pa.

¹¹ Nẽ mẽ kãm anẽ kê mẽ Tÿrtũm kapër mar kaxyw mẽ pikuprõnh xà hwÿr agjê nẽ akryk Tÿrtũm kapër mar o hkrĭ nẽ htÿx ri axpën mã kapër o hkrĭ kêt nẽ.

¹² Nẽ kê mẽ ikrêsti kamã Tÿrtũm kapër o mẽmyjê jahkre hkêt nẽ. Rÿ kamã mẽmoj tã tanhmã mẽ kãm karõ hto hkêt nẽ. ãm akryk Tÿrtũm kapër mar o hkrĭ. ¹³ Mẽmo mÿrapê koja mẽ ã amnhĩ nhĩpêx anẽ? Nã na pre Tÿrtũm my kot wa finat Atãwja kumrêx nhĩpêx nẽ kormã hprõ Ewa o hapu nẽ hipêx. ¹⁴ Nẽ Atãwja na pre kagã kapër mar nẽ hkõt amnhĩ nhĩpêx kêt nẽ. Prõ na pre mar xà hkõt Tÿrtũm kapër nhĩrõp xa nẽ tanhmã amnhĩ tomnuj to. ¹⁵ Mÿrapê na htem mẽnijaja hpĭjagri ho hikwÿ nhũm mẽ hkrajaja à htÿx kãm hapõj. Tã nom koja mẽ Jeus kõt amnhĩ xunhwÿ nẽ ã ixte mẽ kaxyw amã mẽmoj tã karõ xà hkõt amnhĩ nhĩpêx hãmri nẽ nhÿrmã mex kumrêx nẽ htĭr tũm nẽ

pa ho pa. E kêr ka ã mēnijê mã mēmoj tâ karô anê Ximotre.

3

Pastô kot tanhmã amnhĩ nhĩpêx to kaxyw mē hã kãm karô

Xitre 1.5-9

¹ E kot paj hpãnhã tanhmã pastô jarēnh to. Koja mēhō kãm kêp Kris kwýjê nhō pastô nê Tirtũm kapēr o mē ahkre hprãm nê ãm hãmri ã hamaxpēr anê. Ja mex. ² Jakamã koja mēhō kãm kêp pastô hprãm hãmri nê ã amnhĩ nhĩpêx anhỹr o apa.

Koja mē piitã mē noo mã tãm ri amnhĩ nhĩpêx.

Nê hprō pix tânopxar o pa.

Nê mēmoj punuj kutã amnhĩ to htýx nê.

Nê tãm hamaxpēr.

Nê àmnhĩx amnhĩ wýr mē piitã mē kuwý.

Nê Tirtũm kapēr o mē ahkre mex nê.

³ No kê mē kagôxýhti japrôr nê ho pipãnh o pa hkêt nê.

Nê àhkurê ho pa hkêt nê.

Nê mē piitã mē kamã ukaprĩ ho ri mē hkôt pa. Jao mē kutã nojarêt rãhã ho pa.

Nê amnhĩm kãxpore rax o pikuprõnh prãm xaj tanhmã amnhĩ nhĩpêx to hkêt nê.

⁴⁻⁵ Nê hkrajê jahkre mex o pa nhũm mē kapēr ma nê hkôt amnhĩ nhĩpêx. Nê hã hpijaãm kãm tãm amnhĩ nhĩpêx.

Koja mē hkrajê jahkre mex kêt nê hãmri nê mãânēn Kris kwýjê jahkre mex kêt nê. Jakamã nhũm hkrajê mē Kris kwýjaja tãm amnhĩ nhĩpêx kêt nê.

⁶⁻⁷ Nê kê mē kot Jejus kôt amnhĩ xunhwýr kêt xwýnhjê noo mã tãm amnhĩ nhĩpêx rãhã ho pa.

Mê kot ja hã mē omunh nê mē hã hpijaãm o pa kaxyw. Nom koja mē tanhmã amnhĩ tomnuj to nhũm mē tee ri ja

hã mē omu nê mē ho kapēr punuj nê. Satanasti kãm hprãm xà hkôt.

Nê kê mē kot Kris kôt amnhĩ xunhwýr nyw xwýnhjaja kêp pastô hkêt nê.

Koja mē kêp pastô hãmri nê mēmo arĩgro hã tanhmã hamaxpēr to nê amnhĩ to rax prãm xaj tanhmã amnhĩ to jarkrar to ho pa. Hãmri nhũm Tirtũm tee ri ja hã omu nê te kot Satanasti nhĩpêx pyrãk o hipêx nê tanhmã homnuj to. Ja pymaj kê mē kot Kris kôt amnhĩ xunhwýr nyw xwýnhjaja kêp pastô hkêt nê.

E pastô na hte ã amnhĩ nhĩpêx anhỹr o pa kamã Jejus kwýjê jahkre nê tanhmã mē ho ajuta hto ho mē hkôt pa Ximotre.

Mê kot Kris kôt hkwyjê ho ajuta xwýnhjê kaxyw mē hã kãm karô

Atre 6.1

⁸ Nê kot paj hpãnhã amã mē kot Kris kôt hkwyjê ho ajuta xwýnhjê jarē ka inhma Ximotre. Nã koja mēhō kãm Kris kôt hkwyjê ho ajuta hprãm hã koja ã amnhĩ nhĩpêx anhỹr o pa.

Koja mē htýx ri mēmoj tâ mē kãm hpēr o pikēnh o pa hkêt nê.

Nê tanhmã mēmoj to hêx to ho pa hkêt nê.

Nê kagôxýhti japrôr nê ho pipãnh o pa hkêt nê.

Nê amnhĩm kãxpore ho pikuprõnh nê ho rax prãm xaj tanhmã amnhĩ nhĩpêx to hkêt nê.

⁹ Nê kê Tirtũm kapēr piitã hkôt hamaxpēr o pa. Ra Tirtũm kot mē pamã kapēr piitã ho amnhĩrĩt jakamã koja Kris kôt hkwyjê ho ajuta xwýnhjaja kapēr piitã hkôt hamaxpēr pē hkôt amnhĩ nhĩpêx mex rãhã ho pa.

¹⁰⁻¹³ Nê kê mē amnhĩ prō pix tânopxar o pa.

Nē pastô pyrà nē mē hkrajê jahkre mex nhũm mē hkôt ri amnhĩ nhĩpêx mex o pa.

Nē kē mē hprōjaja mjên pyrà nē mē piitã mē noo mã tãm ri amnhĩ nhĩpêx.

Nē hkwỳjê ho kapêr rỳ mē axpên jakwa kamã ri axpên mã mē hixi ho rêr o pa hkêt nê.

Nē mjên pyrà nē mēmoj punuj kutã amnhĩ to htỳx o ri pa. Nē amnhĩ to mex rãhã nê.

E koja mēhō kãm Kris kwỳjê ho ajuta ho pa hprãm hã koja ã amnhĩ nhĩpêx anhỳr o pa. Nom kêr ka mē kot mē ho ajuta kaxyw mē unhwỳr tokyx anhỳr kêt nê Ximotre. Taxy mē kamã ama nê aprĩ hã mē kot ri tanhmã amnhĩ nhĩpêx to hã mē omu mãn. Hãmri nhũm mē piitã mē mex ã mē harê ka mē hã mē ama nê rĩ kormã mē kot mē ho ajuta ho pa kaxyw mē unhwỳ. Hãmri nhũm mē amnhĩ tã omu nê axpên mã mex ã harê. Nē amnhĩ kaxyw Jejus Kris mã hamaxpêr mex o pa hã mē omu nê mē hã hpijaàm o pa.

Pawre kot Ximotre mã amnhĩ jarênh

¹⁴ Nē inhmã awỳr inhmör nê apumunh prãm Ximotre. Nom kot pa amnhĩ kukamã ã mēmoj tã amã karō nê hã kagã anê. ¹⁵ Kêr pa tokyx awỳr inhmör kêt japêr ka ixte amã mēmoj ã kagãta kamã harê nê ixkutêp ho mē ahkre ho ri apa. Mē kot mar nê hprĩ hã mē õ pastô nê mē kot mē ho ajuta ho mē pa xwỳnhjaja kot tanhmã amnhĩ nhĩpêx to hã mē harênh mar kaxyw.

Mē pahpê Kris kwỳjaja mē pahpê Tirtũm kra jakamã na pu htem kapêr kôt ri amnhĩ nhĩpêx nê pakatãt kôt mē piitã mē kãm pakapêr o papa. Jao tanhmã mē kãm Jejus Kris jarênh to ho ri papa.

Pawre kot Jejus mex o mex ã mē grer jarênh

¹⁶ Nē Jejusja mex o mex. Amnepêm kormã mē pahte harênh mar kêt tã pu prem harênh ma hãmri nê mex o mex ã pagrer o papa. Nē pagrer o:

Kris kêp Mēpahpãm tã na pre mē pahwỳr wrỳ nê mē pahpyrà nê ĩ ho ĩ nê kato.

Nhũm pre Tirtũm Karōja mex o mex ã harê.

Nhũm Tirtũm kapêr o mē wrỳk xwỳnhjaja omunh o pa.

Nhũm ahpỳnhã pika piitã hwỳr tanhmã kot mē panê amnhĩ nhĩpêx to hã harênhja angrã.

Nhũm hte mē hkwỳjaja harênh ma nê amnhĩ kaxyw hkôt hamaxpêr nê hkôt amnhĩ xunhwỳ.

Tã nhũm pika kamã àpênh jatur xãm kumê nhũm Tirtũm akupỳm amnhĩ wỳr ho api.

Na pu htem ã Jejus mex o mex ã pagrer anê.

4

Mê kot Tirtũm kapêr kwỳm ri tanhmã Kris kwỳjê jahkre hto xwỳnhjê jarênh

Matêwre 24.4-13; Korosê 2.16-19; Sikũn Ximotre 3.1-9; Sikũn Pêtre 2.1-3; Jutre 3-16

¹ Nē nhỹrmã Jejus akupỳn mē pahwỳr wrỳk kaxyw koja pika nhõ xwỳnh kwỳjaja ma hkwỳjê mã tanhmã Tirtũm kapêr o hêx to ho pa. Na pre Tirtũm Karō hprĩ hã mē hkukamã tanhmã mē harênh to. Kojã xep Satanasti hkwỳjaja Jejus kwỳjê hwỳr mra nê hêx rom tanhmã mē kãm kapêr to. Satanasti nhỹ hã mē kãm hêx o pa nhũm mē hkwỳjaja mē kuma nê mē hkôt hamaxpêr nê Jejus kaga. ã koja mē Jejus akupỳn mē pahwỳr wrỳk kukamã amnhĩ nhĩpêx anê.

² Nê Satanasti nhỹ hã mē kãm mēmoj to hêx xwỳnhjaja ãm Satanasti pix mar o pa jakamã koja mē hamaxpêr mex kêt nê. Kojã mē

měmoj punuj pumu nê htÿx mex ã hkamnhÿx. ³ Tã koja mẽ Tÿrtÿm kapêr kwÿm ri ã Jejus kwÿjê mã hêx ho pa anê nê mẽ kãm:

—Kwa kêr ka mẽ axpên mã ri mẽ rer o apa hkêt nê. Tÿrtÿm kãm ja prãm kêt. ãmhte ri mẽ papaja na kãm hprãm. Anê.

Nê mẽ kot mẽmoj mex kur ã mẽ omu nê nê mẽ kãm kapêr nê mẽ kãm:

—Kwa na htem ata hkur kêt nê. Tÿrtÿm pê omnuj kênã kot ka kêt ri aku.

Anhÿr o koja mẽ kãm kapêr o pa. ⁴ Nom Tÿrtÿm na pre mẽ pamã mẽ apkur xã piitã ho kato. Mẽ paxãmnhÿx mẽ pahte piitã hkur o papa kaxyw. Jakamã mẽ pahpê hkrajaja na pu htem mẽmoj kaga hkêt nê. Na pu htem mẽmoj kur kaxyw nê Tÿrtÿm mã harê hãmri nê paxãmnhÿx kuku. ⁵ Tÿrtÿm kot mẽ paxãpkur xã piitã mex ã harênh jakamã na pu htem kãm harênh pê paxãmnhÿx piitã hkur o papa.

Pawre kot mẽmoj tã Ximotre mã karõ

Sikÿn Ximotre 1.6-14; Xitre 2.1-8

⁶ E Ximotre. Ixte mẽmoj tã amã karõta kêr ka ho Kris kôt pahkwÿjê jahkre mex o ri mẽ hkôt apa. Kot kaj ã mẽ ahkre anhÿr jao ra Jejus Kris mã axapênh mex nê. Na ka pre harênh ma nê hkôt amnhÿ xãm hãmri nê hkôt amnhÿ nhÿpêx mex nê. Tã kêr ka arÿ hkôt amnhÿ nhÿpêx mex rãhã kê mẽ piitã ja hã apumu.

⁷ Nê mẽ ujarênhja kot paj tanhmã amã hã karõ hto. Mẽ panhÿgêt xujarênh kamã mo Tÿrtÿm jarênh? Amrakati kumrêx. Jakamã kêr ka mẽ hkôt ajamaxpêr o ri apa hkêt nê. ãm Tÿrtÿm kapêr kôt pix mã ajamaxpêr tÿx rãhã ho ri apa. Tÿrtÿm kapêrja ãm hãmri na.

⁸ Nê na htem amnhÿ karo hprãm xaj tanhmã amnhÿ karo hto ho pa. Ja mex. Tanhmã kute hkêt. Na htem tanhmã amnhÿ karo hto nê gaa nê ra hkarore nê pa. No kêt

mẽ kot Tÿrtÿm kapêr kôt ri amnhÿ nhÿpêx o paja na mex o mẽ hkarota jakre. Na htem Tÿrtÿm kapêr kôt ri amnhÿ nhÿpêx hãmri nê mex nê hkÿnh nê pa ho pa. Hãmri nê nhÿrmã kaxkwa kamã Tÿrtÿm mẽ Kra Jejus wa kuri mex nê htÿr tÿm nê pa ho pa. Ja na mex o mex. ⁹ ãm hãmri ixte amã ja jarênh jakamã kwa kêr ka ja hã anohtÿx nê ri ho apa Ximotre.

¹⁰ Nê Tÿrtÿmja rãhã ho rãhã. Tã na pu pre amnhÿ kaxyw Kra Jejus kôt pajamaxpêr nê hkôt amnhÿ xãm nhÿm Tÿrtÿm pahto hkra. Kãm mẽ piitã mẽ ho hkra hprãm jakamã na htem pahpyrà nê amnhÿ kaxyw Kra hkôt hamaxpêr nê hkôt amnhÿ xunhwÿ nhÿm amnhÿ tã mẽ omunh xã hkôt mẽ ho hkra. Ja kaxyw na pu htem mẽ piitã mẽ kãm Jejus kot tanhmã mẽ panê amnhÿ nhÿpêx to hã harênh rãhã o ri mẽ hkôt papa. Jao Tÿrtÿm mã paxapênh mex nê.

¹¹ E kêr ka ã ja ho pahkwÿjê jahkre anhÿr ho ri mẽ hkôt apa. Mẽ kot amar nê akapêr kôt amnhÿ nhÿpêx mex ho pa kaxyw.

¹² Nê kormã anyw tã kêr ka mẽ piitã mẽ noo mã tãm ri akapêr nê tãm amnhÿ nhÿpêx o apa. Mẽ kot Jejus ã tanhmã ato htã arÿ amnhÿ kaxyw kãm ajamaxpêr tÿx nê. Nê mẽ piitã mẽ kutã anojarêt nê ajamaxpêr mex pix o ri apa. Kot kaj kormã anyw tã ã mẽ noo mã amnhÿ nhÿpêx anê nhÿm mẽ hã apumu nê kãm akapêr mar prãm nê. Anyw ã apumunh tã kãm akapêr mar prãm nê.

¹³ Nê kêr ka mẽ ate Tÿrtÿm kapêr mar kaxyw axpên wÿr akuprõ ka arÿ ixkutêp mẽ kãm Tÿrtÿm kapêr tÿm ã kagã kamã akapêr rãhã ho apa. Nê aprÿ hã tanhmã ho mẽ ahkre hto nê ho mẽ ahkre mex nê Ximotre.

¹⁴⁻¹⁵ E kêr ka ã amnhÿ nhÿpêx anhÿr o ri mẽ hkôt apa nê amã ho anhÿr kaga hkêt nê. Mẽ piitã

mě kot ate Jejus mā amnhī nhīpêx mex o amōr ā apumunh kaxyw. Kormā ate mẽ kām Jejus jarēnh o apa hkêt ri na pre pastō nhý há mẽ kapêr xwýnhjaja ate Jejus mā tanhmā amnhī nhīpêx to ho apa kaxyw axām. Hāmri nê anhīmōk ā mẽ ĩhkra jaxwý nê axápênh kukamā tanhmā ajarēnh to nê ato Tirtüm wý. Hāmri nhüm ate mẽ kām kapêr jarēnh o ri apa kaxyw amā ajamaxpêr o hihtýx. Tā kêr ka ý há ā kām amnhī nhīpêx anhýr rāhā ho ri apa.

¹⁶ Nê kwa kêr ka amnhī pumunh mex nê Ximotre. Jao tām ri amnhī nhīpêx nê akatàt kôt Tirtüm kapêr o mẽ ahkre ho ri mẽ hkôt apa. Kot kaj ā amnhī nhīpêx anê hāmri nhüm mẽ ama nê apyrà nê Jejus kôt amnhī xunhwý. Hāmri nê pahpyrà nê nhýrmā Tirtüm wa kuri htír tùm nê pa ho pa.

5

Tanhmā mẽ pahte Kris kôt mẽ pahkwýjê nhīpêx to kaxyw mẽ pamā karō

Sikün Ximotre 2.24-25

¹⁻² E kot paj hpānhā Kris kôt pahkwýjê hō kot tanhmā amnhī tomnuj to nhüm ate tanhmā ja nê kām akapêr to há amā karō.

Nā koja mēhō tanhmā ri amnhī tomnuj to ka harēnh ma hāmri nê ma hwýr tē nê ja nê tanhmā kām akapêr to. Nom kêr ka kām akapêr mǎ agêt kêt nê.

Koja mẽwejjê õ tanhmā amnhī tomnuj to ka te kêp anhīpêxà rý akatorxà pyrāk o kām akapêr. Jao há apijaàm o tanhmā kām akapêr to.

Rý koja apyrà nê mẽ nywjê hō tanhmā amnhī tomnuj to ka te kêp atō pyrāk o kām akapêr.

Rý mẽnijê nyw õ amnhī tomnuj japêr ka te kêp atōx pyrāk

o kām akapêr. Jao há apijaàm o kot amnhī tomnujja nê tanhmā kām akapêr to.

E kêr ka mẽ kot amnhī tomnuj nê ā mẽ pahkwýjê mã akapêr anhýr o apa Ximotre.

Mě kêp mẽ mjên htyk xwýnhjê jarēnh

Xiakre 1.27

³ Nê kot paj hpānhā Kris kôt pahkwýjê mẽ mẽ mjên htyk xwýnhjê jarē. Nā koja mēhō nija hkra hkêt nê htāmnhwý hkêt nê pa nhüm mjên kêp ty ka mẽ apê Kris kôt hkwyjaja ja há omu nê mẽmoj to kutā anojarêt rāhā ho ri apa. ⁴ Nom koja ra hkra rý ra htāmnhwý japêr kê mẽ tāmjaja tanhmā ho ajuta hto ho pa. Kām õ nê kām mẽmoj nhōr o pa. Kormā mẽhprīre ri na pre mẽ õ wôwô nê mẽ katorxà nê mẽ hipêxà mẽ hamār mex pē mẽ kām õ ho pa. Tā ra mẽ àptār jakamā kê mẽ amnhī pyrà nê mẽ hamār mex pē mẽmoj to mẽ kutā nojarêt rāhā ho pa. Ja na Tirtüm kām hprām. Ā mẽ kot hkwyjê kamā ukapri ho pa jakamā te mẽ kot Tirtüm mã àpênh pyrāk.

⁵ No koja mēhō ni ra wejre nê ahte ri pa. Nê hkra nê htāmnhwý hkêt nê ri pa. Tā kê ja há amnhī pumu nê Tirtüm kamnār rom amnhī to hwýr o pa. Nê mẽ piitā mẽ ho hwýr o pa. Jao tām hamaxpêr. Ka mẽ apê Kris kôt hkwyjaja ja há omu hāmri nê mẽ kam nê tanhmā kutā anojarêt to ho ri apa. ⁶ No koja mẽ ā amnhī nhīpêx anhýr kêt nê. Nê htýx ri mẽ grer wýr mra nê hpijaàm kêt o ri mra ka mẽ ja há mẽ omu nê mẽ ho ajuta hkêt nê. Na htem ā amnhī nhīpêx anhýr o pa nê arí htír tā te ra htyk nê hikwý pyrāk.

⁷ E kêr ka ā ja há Kris kôt pahkwýjê mã karō anê. Kê mẽ ama nê ā mẽ mjên htyk xwýnhjê nhīpêx anhýr o pa. ⁸ Nom koja mēhō amnhī kwýjê ho mex kêt japêr.

Ně ōrkwý kamā hprō ně hkrajaja ně hipéêxā ně katorxā nhūm mẽ kām mẽ apkur xā nhōr kêt japêr. Koja mẽ ā amnhī nhīpêx anhÿr jao Jejus kaga ně te mẽ kot hkôt amnhī xunhwÿr kêt xwÿnhjaja kot amnhī nhīpêx pyrāk o amnhī nhīpêx nom amnhī tomnuj tÿx o mẽ hakre.

⁹ Ně mẽ mjên htyk ně mẽ hkra ně mẽ htāmnhwÿ hkêt xwÿnhjaja kêt ka mẽ tanhmā mẽ ho ajuta hto kaxyw hāmri ně mẽ hixi piitā hā kagā. Nom kwa kêt ka aprī hā tanhmā mẽ amnhī nhīpêx to hā mẽ omu ně rī kormā mẽ hixi hā kagā.

Koja mēhō kormā mjên htīr ri tām hipêx ně nhām mẽmyjê ho amnhīkati hkêt ně.

Ně ra hā amgrā pē 60 rÿ ra hā 60 jakre.

¹⁰⁻¹¹ Ně tām mẽ piitā mẽ hipêx o pa.

Ně hkrajaja kormā htīr ri nhūm mẽ hāmār mex ně mẽ ahkre mex o pa.

Ně nhām krī hō nhō xwÿnhjaja ō krī hwÿr pōj nhūm mẽ omu ně amnhī nhōrkwÿ hwÿr mẽ kuwÿ.

Ně mẽ kēp amrakati xwÿnhjê ho mex o pa.

Koja mẽ ā amnhī nhīpêx anē ka ja hā mẽ omu ně rī kormā mẽ ho ajuta kaxyw mẽ hixi hā kagā. Nom mẽ hixi hā kagā kaxyw ně mẽmoj tā mẽ hkukja ně mẽ kām:

—E kot kaj ā amnhī nhīpêx anhÿr o apa hā inhmā amnhī jarē pa ama ně rī kormā anhīxi hā kagā.

Kot kaj axte amjên kêt ně.

Ně tanhmā Kris kôt akwÿjê ho mex to ho ri apa.

Nhūm mēhō mẽmo mÿrapê hkaprī ně pa ka ja hā omu ně tanhmā ho ajuta hto.

E kot kaj ā amnhī nhīpêx anhÿr o apa hā amnhī jarē pa ama ně anhīxi hā kagā. Hāmri nhūm Kris kôt akwÿjaja amā axāpkur xā nhōr o pa. Anē.

Ā mẽ kām akapêr anē nhūm mẽ ama ně amā:

—ÿ. Ma kot paj ā amnhī nhīpêx anē.

Anhÿr ā amnhī jarē ka mẽ ama ně mẽ hixi hā kagā. No kormā mẽ hā amgrā pē 60 kêt xwÿnhjaja kêt ka kormā mẽ hixi hā kagā hkêt ně. Koja mẽ tanhmā mẽ kot amnhī nhīpêx to ho pa hā mẽ kām karōja ma ně wam tajê pyrā ně amā:

—ÿ. Ma kot paj ā amnhī nhīpêx anē. Na pa Jejus Kris noo mā ā amnhī jarēnh anē.

Anhÿr ā amnhī jarēnh tā gaa ně ra hkurē hapōj ně ra kot amnhī jarēnh ta kwÿm ri tanhmā amnhī nhīpêx to ně axte mjên. ¹² Ra amnhī jarēnh o:

—Ma kot paj ām Jejus mā pix mā tanhmā amnhī nhīpêx to ho ri ixpa ně axte inhmjên kêt ně.

Anhÿr tā tanhmā hamaxpêr to ně kot amnhī jarēnh kwÿm ri axte mjên. Jao te Jejus mā amnhī to hēx pyrāk nhūm Tirtūm pē jamnuj. Ja pymaj kêt ka mẽ kormā mẽ hā amgrā pē 60 kêt xwÿnhjê nhīxi hā kagā hkêt ně. Kormā mẽ hā amgrā pē 60 kêt xwÿnhjaja arī mẽ hkīnh tÿx ¹³ jakamā kot kaj mẽ kām mẽ apkur xā nhōr o apa nhūm mẽ ja hā amnhī tā mẽ apumu ně axte amnhīm āpēnh kêt ně. Ām kām kaga ně htÿx rī nhām mẽ hwÿr mra ně nhām mẽ hwÿr mra. Ně amnhī pumunh mex kêt ně htÿx ri axpēn jakwa kamā ri mẽ hixi ho rēr o pa. Ně nhÿri mẽmoj pumu rÿ tanhmā mẽmoj jarēnh mar to hāmri ně ma htÿx ri hkwÿjê mā harēnh o mra. Koja mẽ ā amnhī nhīpêx anhÿr o pa hāmri nhūm mẽ kēp Kris kwÿ hkêt xwÿnhjaja ja hā mẽ omu ně mẽ hkôt mẽ pahpé Kris kôt pahkwÿjê ho kapêr punuj ně. ¹⁴ ā mẽ kot amnhī nhīpêx anhÿr o pa pymaj kêt ka kormā mẽ nyw xwÿnhjê mā anē kē mẽ māmri axte mjên ně o pa. Hāmri ně hkra ně hkrajê jamār o

pa. Ja na inhmã hprãm. Koja mẽ ã amnhĩ nhĩpêx anê hãmri nhũm mẽ kêp Kris kôt pahkwý hkêt xwýnhjaja mẽ hkôt tanhmã mẽ pahto kapêr punuj to hkêt nê. ¹⁵ Mãn ka ra Kris kôt pahkwýjê nyw pê mẽ mjên htyk xwýnh kwýjaja tanhmã amnhĩ tomnuj to hã mẽ harênh ma. Na prem Jejus kaga nê Satanasti hkôt amnhĩ nhĩpêx o pa.

¹⁶ E kêr ka mẽ ã Kris kwý pê mjên htyk xwýnhjê nhĩpêx o apa anê Ximotre. Nom koja mẽ akwý kamã mēhõ nhõ wôwô mjên rý katorxã mjên kêp ty kê tãm kãm ô ho pa. Kêr kê Kris kôt pahkwýjaja ãm mẽ kêp mẽ mjên htyk xwýnh pê mẽ hkra nê mẽ htãmnhwý hkêt nê ahte ri mẽ pa xwýnh pixjaja tanhmã mẽ ho ajuta hto ho pa.

Mê pahpê Kris kôt pahkwýjê hkrãhtũm kaxyw mẽ pahtã kãm karõ

Atre 14.23; Wam Korĩt 9.7-14; Karatas 6.6; Wam Tesarõn 5.12; Wam Pêtre 5.1-4

¹⁷⁻¹⁸ Nê kot paj hpãnhã amã Kris kôt mẽ pahkrãhtũmjê jarê. Tĩrtũm kapêr ã kaga htũm kot mẽ harênh kot:

Kêr ka Tĩrtũm kapêr o mẽ ajahkre xwýnhjaja mẽ ahkre pãnhã mẽ kãm amnhĩre. Anê.

Nê mããnen mẽ harênh ã kuxi nê mẽ harênh o:

Koja akrit amã àpênh o pa ka ho mex nê kãm ô mex o apa.

Anê.

Ã ja jarênh kot anhỹr jakamã koja Kris kôt mẽ akrãhtũmja Kris mã tanhmã mẽ ato mex to ho pa ka mẽ amnhĩ tã kãm amnhĩrer mex o ri apa. Kot Tĩrtũm kapêr o mẽ ajahkre mex jakamã ka mẽ amnhĩ tã kãm amnhĩrer mex nê.

¹⁹ Nê koja mēhõ pixi nê mẽ awýr tē nê amã Kris kôt mẽ akrãhtũm kot tanhmã amnhĩ tomnuj to hã harênh to ka ama nê ãm ama. Nom koja wa hamêxkrut rý mẽ axkrunêpxi nê mẽ awýr mra nê axpên kôt tanhmã harênh to ka mẽ ama nê ãm hãmri mẽ kot tanhmã

kot amnhĩ tomnuj tota kôt aja-maxpêr. ²⁰ Hãmri nê Kris kwýjê piitã mẽ noo mã kot amnhĩ tomnuj xwýnhnta mã tanhmã kot amnhĩ tomnuj to nê kãm akapêr kê axte ã amnhĩ nhĩpêx anhỹr kêt nê. Mẽ piitã mẽ kot hã amar nê nhỹrmã tanhmã amnhĩ tomnuj to nhũm ate urak nê hã tanhmã mẽ kãm axakjêr to pymaj tanhmã amnhĩ tomnuj to hkêt nê.

²¹ E Tĩrtũm noo mã na pa ã amã mẽ kaxyw mẽmoj tã karõ anê Ximotre. Nê Jejus Kris mẽ Tĩrtũm kapêr o mẽ wrýk xwýnhjê noo mã pa ã amã karõ anê. Jakamã kêr ka inhmar týx nê hkôt amnhĩ nhĩpêx o ri apa. Jao mẽ piitã mẽ hipêx o axpên pyrãk. Nom kêr ka akrãmnhwý kot tanhmã amnhĩ tomnuj to hã omu nê axtem nê ãm omu nê ajamaxpêr o:

—Nà kêp ixkrãmnhwý kênã kot paj kêt ja nê tanhmã kãm ixkapêr to. Pa ho anhỹr kêt nê.

Anhỹr o ajamaxpêr kêt nê. Mẽ piitã mẽ hipêx o axpên pyrãk.

²² Nê kêr ka anojarêt kãm mẽ kot Tĩrtũm mã tanhmã amnhĩ nhĩpêx to ho mẽ pa kaxyw mẽ unhwýr kêt nê. Aprĩ hã tanhmã mẽ kot amnhĩ nhĩpêx ã hã mẽ omu nê mẽ hkapi nê rĩ kormã mẽ unhwý rý tee ri mẽmoj tã mẽ omu nê mẽ hkaga.

Nê koja mēhõ tanhmã amnhĩ tomnuj to ka ja hã omu rý harênh ma hãmri nê urak nê ã amnhĩ nhĩpêx anhỹr kêt nê. Arĩ Tĩrtũm kôt amnhĩ nhĩpêx pê tãm ri amnhĩ nhĩpêx pix o apa. ²³⁻²⁵ Na htem tōhã tanhmã amnhĩ tomnuj to nhũm mēhõ ja hã mẽ omu nê mẽ harênh kurê kumrêx. Kris kôt mẽ hkrãhtũm kormã kot tanhmã hã kãm nê hkêt ri nhũm mẽ ja hã mẽ omu nê tanhmã mẽ harênh to. Nom na htem tōhã hpimxur pê tanhmã amnhĩ tomnuj to nhũm Tĩrtũm pix ja hã mẽ omu. Tã koja nhỹrmã mẽ piitã mẽ kãm ja ho

amnhîrit nhûm mẽ piitâ harênh ma nê hkôt omu.

Nê mẽ kot amnhî to mex xwýnhjaja haxwýja. Na htem tōhã mẽ noo mã tanhmã mẽhō ho mex to nhûm hkwýjaja ja hã omu nê axpên mã mex ã mẽ harê. Nê tōhã hpimxur pê tanhmã mẽhō ho mex to nhûm mẽhō ja hã omunh kêt nê. ãm Tirtûm pix ã kot amnhî nhîpêx anhÿr ã omu. Tã koja nhÿrmã mẽ piitâ mẽ kãm ja ho amnhîrit nhûm mẽ piitâ harênh ma nê hkôt omu.

Nê kwa Ximotre. Axà nê anhōhymnuj nê ri apa jakamã kwa kër ka gō pix o akôm o apa hkêt nê. Mãânên wîhti hkwy ho ixkō kër ka anhōhy mex japêr.

6

Mẽ kãm mẽ àpênh xwýnhjê kaxyw mẽ hã kãm karō

Epes 6.5-9; Korosê 3.22-4.1; Xitre 2.9-10; Wam Pêtre 2.18-25

¹ E kot paj mẽ akwýjaja mẽ kãm mẽ àpênh o mẽ pa xwýnhjê kaxyw mẽmoj tâ amã karō. Mẽ kãm anê kê mẽ õ patrãw ã hpijaam o ri pa. Jao mẽ kapêr ma nê hkôt kãm àpênh mex nê. Koja mẽ ã amnhî nhîpêx anê nhûm amnhî tâ mẽ omu nê hamaxpêr o:

—Kwa pêr Tirtûm kapêr na mex kumrêx. Inhmã àpênh xwýnhja na hte hkôt amnhî nhîpêx pê amnhî to mex o pa. Pêr ãm hãmri na hte Pawre ho mẽ ahkre ho pa.

Anhÿr o hamaxpêr. ² Nê koja mẽ õ patrãw ra Kris kôt amnhî xãm japêr ka kãm mẽ àpênh xwýnhjê mã anê kê Kris kôt mẽ kêp mẽ htō hã mẽ kãm àpênh mex o ri pa. Nom kê mẽ urak nê kêp Kris kôt hkwy hã mẽ omu nê hamaxpêr o:

—Nà Kris kôt ixtō kênã kot paj kêt ri kapêr kôt amnhî nhîpêx nê kãm ixàpênh mex o ri ixpa.

Anhÿr o hamaxpêr kêt nê. Kê kêp Kris kôt htō hã kãm ho mex prãm xàj kãm àpênh mex o pa.

E kër ka mẽ kãm mẽ àpênh o mẽ pa xwýnhjê mã ã tanhmã mẽ àpênh to ho pa hã karō anê Ximotre.

Tirtûm kapêr kwým ri mẽ ahkre xwýnhjê jarênh

Rukre 12.13-21; Xiakre 5.1-6

³ Nê na hte Kris kwý hkêt xwýnhjê kwýjaja Kris kwýjê mã Tirtûm kapêr o hêx o pa. Nê htýx ri Jejus kapêr kwým ri tanhmã harênh to ho pa. ãm hãmri na Tirtûm mẽ Pahihti Jejus Kris wa kapêr tâ nhûm htem htýx ri tanhmã ho hêx to ho ri mẽ hkôt pa. ⁴ Mẽ kot amnhî to rûnh xwýnh ã amnhî to jarkrar tâ mẽ àhpumunh týx kêt. Na htem tanhmã Tirtûm kapêr kute hã axpên mã akir nê mẽmoj tâ axpên kãm gryk o pa. Nê axpên mã kapêr punuj nê mẽmoj tâ axpên kamnhix o pa. ⁵ Nê hamaxpêr mex kêt jakamã mẽmoj tâ axpên mã àkjêr pix o pa. Na htem ã amnhî nhîpêx anhÿr o Tirtûm kapêr mar týx kêt nê. Hãmri nê htýx ri hamaxpêr nê hamaxpêr o:

—Kot paj Tirtûm kapêr o mẽ ahkre ho ixpa nhûm mẽ inhma nê inhmã amnhîrer mex nê pa ixkàxpore rax nê ri ixpa. Nà kot paj ã amnhî nhîpêx anhÿr o ri ixpa. Ja inhmã mex.

Anhÿrja o kãm hikàxpore rûnh prãm o amnhî to amnhîrit o pa.

Kàxpore jarênh

⁶⁻⁸ E kot paj hpãnhã amã tanhmã kàxpore jarênh to ka inhma Ximotre. Xà na pu htem pakatorxã nhōhy rûm pajapôj nê amnhî kôt kàxpore hkwy jamý nê ho pajapôj? Nà na pu htem pahkênh nê panhÿ kamã pajapôj. Tã kot puj mẽ ja pyrà nê nhÿrmã ty nê mã ho anê nê panhÿ kamã ma papa. Jakamã kër pu mẽ kormã pika ja kamã pahÿr nê papa ri paxàpkur xà nê mẽ paxê pix tânopxar pê pahkînh nê ri papa. Pakàxpore rûnh kêt tâ na pu htem Tirtûm kamnàr rom

pahkĩnh nê pajamakêtkati nê papa. Jao pajamaxpêr o:

—Nà ixkàxpore rax kêt nê ixkukrêx rax kêt tâ na hte Jejus ixkôt pa ho pa nê mëmoj to ixkutâ nojarêr rãhã ho pa. Jakamã ixkàxpore rax kêt tâ ixkĩnh nê ijamakêtkati nê ixàmnhĩx ixpa.

Anhÿr o pajamaxpêr o papa.

⁹⁻¹⁰ Mě kot amnhĩm kàxpore o pikuprõnh rũnh xwÿnhjaja na htem kàxpore pix kukamã hamaxpêr o pa nê gaa nê kàxpore rũnh gryk ã amnhĩ tomnuj o pa. Na pre mẽ pahkwÿjaja kàxpore rũnh prãm xàj Jejus kaga. Tã ra mẽ hikàxpore rũnh tâ hkĩnh nê hamakêtkati nê pa hkêt nê. Na htem omnuj nê hkaprĩ nê pa. ã na htem mẽ hikàxpore rũnh xwÿnh kwÿjaja amnhĩ nhĩpêx anhÿr o pa. Jao kàxpore pix kukamã hamaxpêr nê gaa nê ra gryk ã mẽ kot amnhĩ to mex xà kaga hpa nê htÿx ri tanhmã amnhĩ tomnuj to ho pa. Nê tanhmã hkwyjê nhĩpêx punuj to. Te tutre kot harõj xành ã htÿx rapuuti hwÿr gjêx nê tee ri kãm kator prãm kaprÿ pyrãk. ã mẽ kot amnhĩ nhĩpêx anhÿr o pa jakamã koja nhÿrmã Tirtũm ma mẽ kot amnhĩ xà htÿx kamã hamak tũm xà hwÿr mẽ kurê.

Pawre kot Ximotre mã mẽmoj tâ karõ

Korosê 4.17; Wam Ximotre 4.14; Sikũn Ximotre 2.1-7

¹¹ Nê kwa Ximotre kêr ka mẽ urãk nê kàxpore rax prãm xàj amnhĩ tomnuj o apa hkêt nê. Ate Tirtũm mã tanhmã amnhĩ nhĩpêx to ho apa xwÿnh jakamã kêr ka kãm hprãm xà hkôt pix mã amnhĩ nhĩpêx o ri apa. Jao Tirtũm pyrã nê ate amnhĩ jarênh xà hkôt amnhĩ nhĩpêx o ri apa. Nê amã Kris kôt akwÿjê hkĩnh pê mẽmoj to mẽ kutã anojarêr o ri apa. Nê Kris kôt mẽ hkwyjê hkêt xwÿnhjaja kot Kris ã tanhmã ato htã ka arĩ hkôt amnhĩ nhĩpêx mex nê mẽ piitã mẽ ho mex

o ri mẽ hkôt apa. ¹² Na ka pre Kris kôt mẽ pahkwÿjê noo mã tanhmã amnhĩ jarênh to. Tirtũm kot amnhĩ wÿr awÿr nhũm ate Jejus kôt amnhĩ xãm nê amã kãm tanhmã amnhĩ nhĩpêx to ho apa hprãm ã amnhĩ jarê nhũm ikrêsti kamã mẽ piitã ja hã ama. Jakamã kwa kêr ka arĩ Jejus kôt amnhĩ nhĩpêx mex rãhã ho ri apa. Hãmri nê nhÿrmã Tirtũm mẽ Kra wa kuri amex kumrêx nê atĩr tũm nê apa ho apa.

¹³⁻¹⁴ E na pa mẽmoj tâ amã karõ rax ka piitã kamã harê nê mar pa. Tã kêr ka inhmã ja hã tanhmã amnhĩ jarênh to. Mẽmoj piitã ho htĩr xwÿnh Tirtũm mẽ Jejus Kris wa noo mã tanhmã ja hã inhmã amnhĩ jarênh to. Jejus htyk kaxyw nê àmnhĩx kot Pahi Põn Pirat mã amnhĩ jarênh xwÿnhhta noo mã amnhĩ jarê nê inhmã amnhĩ jarênh o:

—Nà kot paj ate mẽmoj tâ inhmã karõ piitã hkôt amnhĩ nhĩpêx rãhã nhũm Pahihti Jejus Kris akupÿn mẽ pahwÿr wrÿ. ãm hãmri na pa ã amã amnhĩ jarênh anê Pawre.

Anhÿr o inhmã amnhĩ jarê.

Tirtũm mex o mex ã mẽ grer

¹⁵ Nê koja Tirtũm akupÿn mẽ pahwÿr Jejus mẽnh xà hã arĩgro jarê hãmri nhũm kot harênh xàta wÿr pøj nhũm akupÿn mẽ pahwÿr kumê. Tirtũmja mex o mex. Tapxipix kêp mẽmoj piitã ho amnhĩptãr xwÿnh maati. Nê kêp jar mẽ ho amnhĩptãr xwÿnh piitã mẽ õ Pahi Maati.

¹⁶ Nê tapxipix na rãhã ho rãhã nê mex o mex jakamã puhã hirã rax kumrêx. Tã hkĩnhã mẽ pahte amnhĩ tomnuj xwÿnh jakamã kot puj mẽ puhã hirã raxja kutã hkêt nê. Jao hwÿr mẽ pamrar kêt nê.

Nê aa mẽhõ kot no ho Tirtũm pumunh kêt tâ kwa kêr pu mẽ pahpiitã kãm mex o mex

ně hihtỳx o hihtỳx ā harēnh
rāhā ho papa.

*Axte mē hikàxpore rūnh xwỳnhjē
jarēnh*

Rukre 16.9

¹⁷ Nē kēr ka Kris kwỳjē kamā
mē hikàxpore rūnh xwỳnhjē mā
anē kē mē kot amnhī to rūnh kōt
amnhī to àmra ho pa hkēt nē. Nē
amnhī kaxyw mē hikàxpore rūnh
kōt hamaxpēr o pa hkēt nē. Kàxpore
na hte hapēx tokyx anē. Mē kām
anē kē mē hpānhā amnhī kaxyw
Tirtūm kōt mǎn hamaxpēr tỳx rāhā
ho pa. Na hte àmnhīx tanhmā mē
pahto mex to ho pa nē mē pahpē
ōxỳ hkēt nē. Jao mē pahwỳr na
rē nhūm mē pahpur go mex nē
pu mē kamā panhō rūnh o papa.
Nē mē pamā myyti ho hirā pu
mē kukwak ri parīt mex pē mēmoj
tā paxàpēnh o papa. Ā Tirtūm
kot mē pahto mex kot anhỳr pu
mē kukwak ri pahkīnh nē paja-
makētkati nē ri papa. Tā kēr ka
mē hikàxpore rūnh xwỳnhjē mā anē
kē mē amnhī kaxyw kumā pix mā
mǎn hamaxpēr rāhā ho pa. ¹⁸ Nē
mē kām anē kē mē hikàxpore ho
hkwỳjē pē ōxỳ hkēt nē ho tanhmā
mē ho mex to ho pa. Nē àmnhīx ho
tanhmā mē kēp amrakati xwỳnhjē
ho ajuta hto ho pa. ¹⁹ Koja mē
ā amnhī nhīpēx anē nhūm Tirtūm
ja hā mē omu nē hkīnh nē ō krī
kamā mē kutēp mē kām mēmoj mex
o akuprō. Jakamā nhūm mē ko-
rmā jar htīr nē pa ri mex nē pa
nē mǎānēn nhỳrmā kaxkwa kamā
mex kumrēx o jar pika ja kamā
mex nē pata jakre. E kēr ka ā mē
hikàxpore rūnh xwỳnhjē mā ja hā
karō anē Ximotre.

*Pawre kot Ximotre mā mēmoj tā
karō jatur xà*

*Korosē 4.17; Wam Ximotre 6.14;
Sikūn Ximotre 1.13, 4.5*

²⁰ Nē ra Tirtūm kot ate kapēr o mē
ahkre ho apa kaxyw axām jakamā
kēr ka tām amnhī nhīpēx pē mē

ahkre mex rāhā ho ri apa. Jao
Tirtūm kapēr o hēx o ri mē ahkre
xwỳnhjē hkōt apa hkēt nē. Na htem
mē kuma nē mē kapēr mex ā mē
hkamnhīx nom mē kapēr mex kēt.
Jakamā kwa kēr ka mē kot tanhmā
mē ahkre hto hā mē ama nē ām mē
ama. ²¹ Na pre ra mē pahkwỳjaja
mē kuma nē mē kapēr gryk ā Jejus
kaga.

E ām ja pix. Kē Tirtūm mē apiitā
mē akutā nojarēt rāhā ho pa. Ixpē
Pawre na pa ā amā ixkapēr ā kagā
anē.

Sikūn Ximotre Pawre kot Ximotre hwÿr wam kagà nē mēnh kôt hō mēnh

Pawre na pre kagàja nhîpêx. Na pre Jejus kwÿ hkêt xwÿnhjaja Jejus ã unê nē krî pê Rôm kamã haxà nhùm arî hkrî ho hkrî. Tã ra mē kot hpîr kaxyw nhùm Ximotre mã kagàja nhîpêx nē hwÿr kumê. Na pre Ximotre Pawre hkôt pa ho pa hã mytwrÿ xohtô nē. Tã hpãnhã krî pê Epes kamã arîk nē Tîrtûm kapêr o Jejus kôt hkwÿjê jahkre ho ri mē hkôt pa. Jakamã nhùm Pawre kagàja nhîpêx nē kamã kãm mēmoj tã karô nē hwÿr kumê. Nē nhÿrmã mē kot Pawre pyrã nē Jejus ã hpîr mã htã tee ri amnhî kukamã hamaxpêr kêt ã kãm karô.

Nē mē hkwÿjaja kêp Tîrtûm kra hã amnhî jarênh tã nhùm Pawre Tîrtûm kãm hprãm xà kuhpa hã mē kot tanhmã amnhî nhîpêx to ho pa hã Ximotre mã mē harê. Kot mē harênh mar nē Jejus kwÿjê nē mē omunh mex o pa kaxyw. Nē Ximotre kot Tîrtûm kãm hprãm xà kot pix mã amnhî nhîpêx o pa hã kãm karô. ã na pre Pawreja Ximotre mã mēmoj tã karô kamã hihtÿx nē hã kagà nē hwÿr mēnh anê. Nē kãm:

¹ Pa Ximotre? Xà amex? Ixpê Pawre na pa amã ixkapêr nē hã kagà nē awÿr kumê. Ixpê Jejus nhÿ hã hkwÿjê jahkre ho ixpa xwÿnh na pa. Tîrtûm na pre ja kaxyw ixãm. Tîrtûm Kra Jejus Krisja kot puj mē pahpê hkwÿjaja nhÿrmã kukwak ri pamex kumrêx nē pahfîr tûm nē ri papa ho papa.

Pawre kot Ximotre ho Tîrtûm mē Jejus wa hwÿr ã harênh

Atre 16.1-2

²⁻³ Te apê ixkra pyrãk Ximotre. Jakamã na pa hte ato Mēpanhîpêêxã maati Tîrtûm mē Pahihiti Jejus Kris wa hwÿr rãhã ho

ri ixpa. Na pa hte mē pakukamã mē panhîgêt pyrã nē tãm ijamaxpêr o ixpa pê Tîrtûm mã tanhmã amnhî nhîpêx to ho ri ixpa. Jakamã na pa hte ato Kra Jejus mē wa hwÿr rãhã ho ri ixpa. Arîgro hã nē kamãt kãm amã ijamaxpêr nē ato wa kuwÿ nē wa kãm:

—Pa Tîrtûm mē Pahihiti wa. E ixte ixkra puro Ximotre ho war awÿr kaxyw war amã ijamaxpêr. Na ka hte wa ho mex nhùm war akôt amnhî nhîpêx mex o pa. Te ò wôwô mē katorxã wa kot amnhî nhîpêx pyrãk. Na pa hte kot amnhî nhîpêx o paja mã ijamaxpêr nē ÿ hã ixkînh nē. War ate kamã axukapri ho ri apa kaxyw na pa ho war awÿ. War ate kutã war anojarêt rãhã ho ri war apa nhùm hamakêtkati nē amnhîx ri pa ho pa kaxyw. Anê.

Pawre kot Ximotre nhÿ hã hkînh ã harênh

⁴ Nē na ka pre hte ixkôt ixto ajuta ho ri ixkôt apa htã pa pre nhÿhÿm inhnojarêt nē axtem axapênh ò hã amã karô hãmri nē Epes kamã are nē ma mô. Ka amã ijpapê xaj tee ri ma inhmôr ã ixpumu nē amÿr rax nē. Na pa hte arîja hã inhnohtÿx nē ri ho ixpa Ximotre. Jao ra ato ama nē. Tã kot puj nhÿrmã axte axpên pumu nē pahkînh tÿx nē.

⁵ Nē na pa hte akatorxã Enître mē anhô wôwôre Rojti wa kãm ijamaxpêr rãhã ho ri ixpa. Na pre wa kumrêx amnhî kaxyw Jejus kôt hamaxpêr nē hkôt amnhî xãm. Tã ka wa hkanrêhã wa urãk nē ã amnhî nhîpêx anê. Ixte ja hã apumunh mex. ⁶ Na pa pre ate tanhmã Jejus mã amnhî nhîpêx to ho ri apa kaxyw axãm kaxyw anhîmök ã inhîhkra xi nē ato Tîrtûm wÿ. Kot tanhmã akrã hto nhùm ate Karô nhÿ hã tanhmã amnhî nhîpêx to ho apa kaxyw. Tã kêr ka arî ã kãm amnhî nhîpêx anhÿr rãhã ho ri apa. ⁷ Na pu htem Tîrtûm Karô nhÿ hã pamã ma ho papa hkêt nē. Na pu htem ÿ hã pamã mē piitã

mě hkīnh pē paxāmnhīx tanhmā mẽ ho ajuta hto ho papa. Nē ŷ hā kapēr o mẽ ahkre htýx o ri mẽ hkôt papa. Nē mẽmoj punuj kutā amnhī to htýx rāhā nē. Jao amnhī to mex pix nē.

⁸ Jakamā kwa kēr ka amā mẽ kām Jejus jarēnh o apa pymaj tee ri amnhī kukamā ajamaxpēr kēt nē. Nē mẽ kot Jejus ā ijaxār nhūm arī ixkrī hā ijarēnh ma nē mẽ kot ixkuxwar ajaxār pymaj mẽ kām Tirtūm kapēr o mẽ ahkre hkukamā tee ri ajamaxpēr kēt nē. Mē kot ā anhīpēx anhýr mā tā kēr ka amnhī kamā akahak kēt nē. Ām Tirtūm nhý hā hihtýx xā ho amnhī to htýx nē ixpyrā nē ma mẽ kām Jejus kot mẽ panē tanhmā amnhī nhīpēx to hā harēnh to rāhā ho ri mẽ hkôt apa. Mē kot tanhmā hā anhīpēx to htāā. ⁹ Na pu htem Jejus kôt amnhī xunhwý nhūm Tirtūm ja hā mẽ pahpumu nē Jejus kukwak ri amnhī katut kôt mẽ pahte amnhī tomnuj piitā rēnh pa nē mẽ pahto hkra. Hāmri nē mẽ pahte hkôt pix mā amnhī nhīpēx o papa kaxyw mẽ paxunhwý. Ām Jejus pix kukwak ri na hte mẽ pahto hkra nē ā mẽmoj to mẽ pakutā nojarēt rāhā ho pa anē. No na hte mẽ pahte amnhī to mex ā mẽ pahpumunh kôt mẽ pahto hkra hkēt nē. Amnepēm kormā mẽmoj piitā hkēt ri na pre mẽ pakukamā hamaxpēr o:

—Koja mẽ nhýrmā Ixkra Jejus Kris kôt amnhī xunhwý pa ja hā mẽ omu nē Ixkra kukwak ri mẽ ho mex nē. Anē.

¹⁰ Tā kormā mẽ pahte amnhī tā ā kot mẽ pajarēnh anhýrja mar kēt jakamā na pre Jejus mẽ pahwýr wrý nē tanhmā mẽ pahto mex to. Na pre ty nhūm Tirtūm akupým ho htír. Jakamā na pu htem ra amnhī kaxyw hkôt pajamaxpēr nē hkôt amnhī xunhwý hāmri nē nhýrmā mẽ pahtýk tā nhūm Tirtūm kot Kra Jejus nhīpēx pyrā nē akupým mẽ

pahto mẽ pahtír pu mẽ Jejus kukwak ri wa kuri pamex nē pahtír tūm nē papa ho papa. Jakamā na pu htem mẽ pamā pahtýk pyma ho papa hkēt nē.

¹¹ Amnepēm na pre Tirtūm ixām nē tanhmā inhmā ixāpēnh ā karō hto nē inhmā:

—E Pawre kēr ka Jejus nhý hā ma hkwyjē jahkre ho ri mẽ hkôt apa. Nē ixkapēr o mẽ ahkre mex nē. Kēr ka ā amnhī nhīpēx anhýr rāhā ho ri mẽ hkôt apa. Anē.

¹² Tā ā kot inhmā kapēr anhýr nhūm ixte kapēr kôt amnhī nhīpēx o ixpaja mýrapē na htem Jejus ā tanhmā inhīpēx kati hto ho pa. Pa hte ixpunuj nē amnhī xā htýx kamā ijamak o ri Jejus mā tanhmā amnhī nhīpēx to ho ri mẽ hkôt ixpa. Tā nom tee ri ja hā amnhī pumu nē amnhī kamā ixpijaām nē ixkaprī hkēt nē. Ixte amnhī kaxyw hkôt ijamaxpēr xwýnhja na ixte tanhmā kot amnhī nhīpēx to hā omunh mex jakamā kot paj ty nhūm mẽ arī inhmýr pē Tirtūm kapēr mar o pa. Mē kot ja hā ixpír tā koja mẽ apē Kris kôt ixkwýjaja inhmýr pē arī mẽ kām harēnh o apa. Koja mẽ ā xapēn mýr pē amnhī nhīpēx anhýr o pa rāhā nhūm Pahihtí Jejus akupým mẽ pahwýr wrý.

¹³ Kwa Ximotre. Ra ixte amā mẽmoj tā karō rax jakamā kēr ka mar týx nē hkôt amnhī nhīpēx rāhā o ri apa. Jao Jejus Kris nhý hā mẽ piitā mẽ noo mā amnhī kaxyw kām ajamaxpēr týx rāhā nē. Nē mẽ piitā mẽ ho mex o ri apa. ¹⁴ Ate mẽ kām tanhmā Jejus jarēnh to ho ri apaja ām hāmri na. Tā koja mēhō htýx ri tanhmā ho kapēr punuj to rý axtem nē tanhmā harēnh to ka ja hā ama nē nē kām akapēr kām axihtýx nē. Tirtūm Karō ra kot akarō hwýr ar jakamā kēr ka ŷ hā ā Jejus jarēnhja jamār mex o ri apa anē.

*Pawre kot tanhmā amnhī jarēnh to
Sikūn Ximotre 4.16-18*

15 Nē mǎn ka pre ra pika pē As kamā Kris kwý kot ixkaga hā mē harēnh ma. Na pre Pijerti mē Emosti mē mē ohtō nē tanhmā hamaxpēr to nē ixto ajuta hkēt nē. 16-18 ām Onēsipti pix na pre mē kurom ijarēnh ma nē man ixwýr Rōm wýr mō nē ijpær o ri mē hkôt mra nē ixwýr kato. Hāmri nē xatā ixwýr mra nē tanhmā ixto mex to. Jao akupým ijamaxpēr o hihtýx. Ixpē prēs nē ixkrī htā kēp ixkrāmnhwý hā amnhī jarēnh ā hpi-jaâm kēt nē. Nē annepēm kormā krī pē Epes kamā ixpa ri na pre mǎānēn tanhmā ixto mex to ho pa. Tā ā kot inhīpēx mex anhýr o pa jakamā na pa hte ho Pahihti Jejus wý nē kām:

—Pa Pahihti? Onēsipti o na pa awý. Kot ixto mex rāhā ho pa jakamā kwa kēr ka ixtā omu nē kutā anojarēt rāhā ho apa. Nē ōrkwý kamā hkwýjaja mǎānēn tanhmā mē ho mex to. Hāmri nē nhýrmā akupým mē ixwýr wrý nē ixtā kamā axukaprī hā tanhmā ho mex to. Anē.

2

*Mē pahte Jejus kôt amnhī nhīpēx
pix prām ā mē pamā karō*

Wam Ximotre 6.11-16

1 E Ximotre. Jejus Kris kot mēmoj to mē pakutā nojarēt rāhā jakamā kwa kēr ka ý hā amnhī to htýx nē kām tanhmā amnhī nhīpēx to ho apa hā amnhī kamā akahak o ri apa hkēt nē. 2 Ra ate pa tanhmā Tirtüm kapēr o mē ahkre htoja mar jakamā kēr ka amnhī xō ri ā Jejus kôt mē pahkwýjē jahkre ho apa anē. Mē kot amar nē pahpyrān axpēn xō ri ho axpēn jahkre ho pa kaxyw.

3-4 Sōrdat na htem mē hkrāhtüm kām prām xā hkôt tanhmā amnhī nhīpēx to. Jao tanhmā kute htā kapēr ma nē hkôt amnhī nhīpēx. Tanhmān à rý kām prām rý tanhmā omnuy to htā kutā amnhī to htýx

nē mē hkrāhtüm kôt amnhī nhīpēx. Na htem amnhī xāpēnh kukamā tee ri hamaxpēr o pa hkēt nē. Ām mē hkrāhtüm kapēr kôt pix mā amnhī nhīpēx o pa hprām. Tā kēr ka mē urāk nē Pahihti Jejus kôt amnhī nhīpēx rāhā ho ri apa hprām. Mē kot hā tanhmā atomnuy to htāā.

5 Nē mē hprōt týx xwýnhjaja na htem hkwýjē pē amnhī to wa hprām xāj ām ja pix kukamā hamaxpēr. Hāmri nē hprōt týx prām xāj mēmoj kot mē ho hirerek kēt nē amnhī jagri htýx nē. Hāmri nē hprōt týx o hkwýjē jakre nē amnhī to wa nē pōj nē kot amnhī to wa hā mēmoj to kǎnja. Tā kēr ka mē urāk nē amā Pahihti Jejus kot amnhī nhīpēx kôt pix mā amā amnhī nhīpēx prām.

6 Nē pur kām mē àpēnh xwýnhjaja na htem mē hpur kām àpēnh pix tǎnopxar o pa nē àpēnh rūnh nē. Kām kaga hkēt kām àpēnh o pa. Tā àpēnh rūnhja kukwak ri ihpur kām ō rūnh nē ho apkur mex o pa. Nom koja mē kām kaga nē àpēnh mex kēt nē hāmri nē ō grire nē apkur mex kēt nē. Tā kēr ka pur kām mē àpēnh rūnh xwýnhjē pyrà nē Pahihti Jejus mā amnhī nhīpēx mex o apa. Nē mē urāk nē amā kaga hkēt kām axàpēnh pix tǎnopxar o ri apa.

7 E na pa ā ajahkre anē Ximotre. Tā kēr ka ixte ajahkreja ma nē kām ajamaxpēr rāhā nē. Koja Pahihti tanhmā akrā hto ka aprī hā mar týx nē.

8 Nē kēr ka Pahihti Jejus Kris mā ajamaxpēr rāhā ho ri apa. Na pre katorxā hkôt kēp Pahi finat Tawi kanrēhā htāmnhwý hā mē pahpyrà nē ĩ ho ĩ nē kato nē panhō pika kamā pa ho pa. Tā nhūm prem kupī nhūm amnhī xā htýx kamā hamak kām ty. Hāmri nhūm Tirtüm akupým ho htír nhūm akupým htír o htír. Á na pre hte harēnh anhýr rāhā ho ri mē hkôt ixpa. 9 Mýrapē na prem ijaxā pa arī jar ixkrī ho

ixkrī. Na htem ixte amnhī tom-
nuj xwýnh pyrāk o inhīpêx nê axte
ixte Jejus kapêr jarênh o ixpa py-
maj ijaxà. Tã ã mẽ kot inhīpêx
anhÿr tã na hte Kris kôt pahtôjaja
arī ixpãnhã mẽ kãm harênh o ri
pa. Koja mẽ tee ri kãm Jejus jarênh
o hapêx prãm kaprÿ. ¹⁰ Jakamã
kwâr mẽ mãmrī ã inhīpêx anê. Koja
mê arī Jejus kot tanhmã mẽ panê
amnhī nhīpêx toja mar o pa nhũm
mê hkwýjaja hkôt amnhī xunhwý
nê nhÿrmã pahpyrà nê kêp Jejus
Kris kwý hã Tirtũm mẽ wa kuri
mex nê htír tũm nê pa ho pa.

*Kris kwý kot tanhmã amnhī tã
grer to hã mẽ harênh*

¹¹ Na pu htem mẽ pahpê Kris
kwý hã ã amnhī tã pagrer anê:

Mê kot Kris ã mẽ panhīmex tã kot
puj mẽ akupÿm pahtír nê
kuri pamex nê pahtír tũm nê
papa ho papa.

¹² Mẽ kot tanhmã Kris ã mẽ pah-
tomnuj to htã kot puj mẽ arī
hkôt amnhī nhīpêx o papa
rãhã ty nê nhÿrmã ìhkô hã
mê ho amnhīptar o papa.

Nom kot puj mẽ amnhī kamã paka-
hak pê mẽ pahpê Jejus kwý
hkêt ã amnhī jarê hã koja
Jejus amnhī xwar mẽ pahpê
hkwý hkêt ã mẽ pajarê.

¹³ Nê mẽ pahte amnhī kaxyw Je-
jus kôt pajamaxpêr kêê tã
tanhmã amnhī jarênh to xà
hkôt tanhmã amnhī nhīpêx
to.

Aa kot mẽmoj tã amnhī jarênh
kuhpa hã ri tanhmã amnhī
nhīpêx to hkêt. Anê.

*Mẽ kot Tirtũm kapêr o mẽ ahkre
mex xwýnhjê jarênh*

Wam Pétre 3.15-16

¹⁴E Ximotre. Ixte ã mẽmoj tã amã
karô anhÿrja kêr ka ho mẽ ahkre
rãhã ho ri mẽ hkôt apa. Kê mẽ ama
nê kãm hamaxpêr rãhã nê.

Nê mẽ kãm anê kê mẽ Tirtũm
kapêr o mẽ ahkre mex o ri pa nê

kapêr ã tanhmã axpên mã ãkêr to
hkêt nê. Koja mẽ hã axpên mã
akir hãmri nê amnhī to mex kêt
nê. Hãmri nhũm mẽ kot mẽ kapêr
mar xwýnhjaja ja hã mẽ omu nê tee
ri Tirtũm kapêr kukamã hamaxpêr
nê hkôt amnhī nhīpêx mex kêt nê.

¹⁵ Nê na htem mẽ kãm mẽ àpênh
mex xwýnhjaja mẽ ô patrãw kapêr
ma nê hkôt mẽmoj tã àpênh mex
nê. Nhũm ô patrãwja hwÿr mra
nê àpênh ã omu. Hãmri nhũm
amnhī wÿr omu nê àmnhīx noo
mã apê. Kãm àpênh mex jakamã
amnhī kamã kãm uma hkêt nê. Ja
pyrà nê kêr ka Tirtũm noo mã kãm
amnhī nhīpêx mex rãhã nê aprī hã
kapêr o mẽ ahkre mex o ri mẽ hkôt
apa. Kê ã ate amnhī nhīpêx anhÿr
ã apumu nê anhÿ hã hkĩnh nê.
Ka àpênh xwýnhhta pyrà nê amnhī
kamã amã uma hkêt nê noo mã
kãm amnhī nhīpêx mex o ri apa.

¹⁶ No mẽ kot Tirtũm kapêr o hêx o
mê pa xwýnhjaja kêr ka mẽ hkôt ri
apa hkêt nê. Nê mẽ kapêr mar nê ri
mê hkôt axãm hkêt nê. Na htem mẽ
kapêr ma nê mẽ hkôt amnhī nhīpêx
o pa nê kãm Tirtũm kapêr mar prãm
kêt nê. Nê gaa nê te kêp mar pumaj
amnhī jamak pro pyrāk o amnhī
nhīpêx. ¹⁷ Týx ri tanhmã mẽ ahkre
hto xàja te kot mẽ hkànhy aa mex
kêt nê ra omnuj týx o mörja pyrāk.
Jao mẽ kot mẽ kapêr mar o mẽ pa
xwýnhjaja mẽ mar pê ra mẽ hkôt
amnhī tomnuj týx o mō. Na hte
ra Imēnew mẽ Pijertija wa ã htýx ri
amnhī krã hkôt mẽ ahkre anhÿr o
pa. ¹⁸ Nê Tirtũm o hêx o mẽ hkôt pa
nê nhÿrmã akupÿm mẽ pahto mẽ
pahtír kêt ã harênh o pa. Hãmri
nhũm mẽ amnhī tã wa kuma nê tee
ri amnhī kukamã hamaxpêr pê Je-
jus kaga nê axte amnhī kaxyw hkôt
hamaxpêr kêt nê. Nom wa kapêrja
kot anhÿr kêt. ¹⁹ Kêt Tirtũm kapêrja
ãm hãmri na. Kot mẽmoj to hêx kêt
jakamã na pu htem amnhī kaxyw
hkôt pajamaxpêr kaprÿ hkêt nê.
Kapêr ã kagã htũm kot tanhmã mẽ

pahpê hkrajê jarēnh to nê harēnh kot:

Tirtūm na kot hkrajê piitā omunh mex rāhā ho pa xwŷnh.

Anhŷr o mē pajarēnh. Nē mē pamā mēmoj tā karō kot:

Kē mē kot Jejus kôt amnhī xunhwŷr xwŷnhjaja amnhī tomnuj o pa hkêt nē. Anē.

Tirtūm krajaja te kēp prat mex pyrāk ā mē harēnh

²⁰ Nē mē hikāxpore rūnh xwŷnhjaja mē ō xijere nē mē ō prat xohtōō. Prat kwŷ muxre nē hkwy omnajre. Prat pynajre na htem māmri kamā apku no prat muxreja ām mēmoj mex pix kaxyw na htem mēsti hā haxwŷ nē kamā apku. Kasamēt ā rŷ mē hkra krā hkēnh ā mē hkīnh nhūm htem mēsti hā haxwŷ nē kamā apku. ²¹ Tā mē kot Tirtūm kapēr o hēx o mē pa xwŷnhjē hkôt hamaxpēr kêt nē mē hkôt amnhī tomnuj kêt xwŷnhjaja te mē kot prat muxre pyrāk. Na htem tām amnhī nhīpēx nē tanhmā hamaxpēr punuj to ho pa hkêt nē. Hāmri nhūm Tirtūm ja hā mē omu nē mē ŷ hā hkīnh nē. Hāmri nē te mē kot prat muxre jaxwŷr nē kamā apkur pyrā nē mē kot kām tanhmā amnhī nhīpēx to ho pa kaxyw mē unhwŷ.

Mē pahte tām amnhī nhīpēx ā mē pamā karō

²² Nē mē àptār nyw jamaxpēr punujja kēr ka te ate hamŷnh nē amnhī katut kôt rēnh par pyrāk o hipēx Ximotre. Jao axte ho ajamaxpēr o ri apa hkêt nē. Nom mē hamaxpēr mexja kēr ka hamŷ nē amnhī krā him hagjē nē ho ajamaxpēr rāhā ho ri apa. Jao tām amnhī nhīpēx nē amnhī kaxyw Tirtūm kôt ajamaxpēr rāhā nē. Nē amā mē kēp Kris kôt akwŷjē hkīnh pē tanhmā mē ho ajuta hto ho ri mē hkôt apa. Jao mēmoj to mē kutā anojarēt rāhā nē. Na hte ā Pahiht

Jejus kôt amnhī nhīpēx xwŷnhjaja amnhī nhīpēx anhŷr o pa.

²³ Nē kēr ka mē kot htŷx ri amnhī krā hkôt mē ahkre ho mē pa xwŷnhjē hkôt apa hkêt nē. Te ate mē kēp awry hā ri apa pyrā nē mē kapēr ma nē ām ama. Na htem mē kapēr mar o pa nē ra hā axpēn mā tanhmā àkjēr to ho pa. Jakamā kwarī mē hkôt ri apa hkêt nē. ²⁴ Mē pahte Tirtūm mā amnhī nhīpēx o papa xwŷnhjaja na pu htem mē kurom mēmoj tā axpēn mā paxàkjēr o ri papa hkêt nē. Na pu htem ām mē piitā mē kamā paxukaprī pē mē ho mex nē mē kamā pagryk tokyx anhŷr kêt nē. Nē Tirtūm kapēr o mē ahkre mex nē. Na hte ā mē pahte Tirtūm mā tanhmā amnhī nhīpēx to xwŷnhjaja amnhī nhīpēx o papa anē.

²⁵⁻²⁶ Jakamā koja mēhō ate Tirtūm kapēr o mē ahkreja ma nē tanhmā ho amā kapēr to ka ama nē amnhī tā tanhmā kām akapēr punuj to hkêt nē. Ām kamā axukaprī ho tanhmā hā kām akapēr mex to. Na hte Satanasti te kot amnhīm mē unēnh pyrāk o mē hipēx nē tanhmā mē kām Tirtūm kapēr o hēx to nhūm mē kuma nē hkôt hamaxpēr nē kapēr kôt amnhī nhīpēx. Tā kot kaj mē kamā axukaprī ho mē kām akapēr mex nē nhūm Tirtūm tanhmā mē hkrā hto nhūm mē ama nē hkôt amnhī xunhwŷr japēr. Te Tirtūm kot Satanasti pē amnhīm mē utār pyrāk. Jakamā nhūm mē hpānhā Tirtūm kapēr mex ā harē nē harēnh o:

—Nà pēr ām hāmri na Tirtūm kapērja. Ām mex o mex. Anē.

3

Jejus akupŷn wrŷk kukamā mē kot amnhī tomnuj xwŷnhjē jarēnh

Matēwre 24.4-13; Korosē 2.16-19; Wam Ximotre 4.1-5; Sikūn Pētre 2.1-3; Jutre 3-16

¹ Nē Jejus akupŷn mē pahwŷr wrŷk xwŷj ri mē kot tanhmā amnhī nhīpēx toja kot paj hpānhā ixprī hā amā harē ka inhmar tŷx nē Ximotre. Koja Jejus akupŷn mē pahwŷr nojarēt pu mē pahpē hkwyjaja pahpunuj nē papa. ² Nē Kris kwŷ hkēt xwŷnhjaja koja mē amnhī pix kukamā hamaxpēr o pa.

Jao hikāxpore rax o pikuprōnh pix kukamā hamaxpēr pē hkwyjē pē ōxŷ htŷx o pa.

Nē mēmoj tā amnhī to jarkrar o pa.

Nē tanhmā hkwyjē japry hto ho pa.

Nē mē hipēxà nē mē katorxà hā hpiaam kēt o pa.

Nē Tirtūm ā hpiaam kēt o pa.

Nhūm mēhō tanhmā mē ho mex to nhūm mē amnhī tā mē omu nē am mē omu nē amnhī tā tanhmā mē kām nē hkēt nē. Rŷ mē kām: “Nā am hāmri na ka ā ixto mex anē. Nā ja mex.” Anhŷr o mē kām kapēr kēt nē.

³ Mē ukapri hkēt jakamā koja mēhō tanhmā mē homnuj to nhūm amnhī tā mē omu nē kamā gryk kurē kumrēx nē aa gryk o hapēx kēt nē.

Nē amnhī tā tanhmā hkwyjē ho hēx to ho pa.

Nē htŷx ri kām hprām xà hkōt tanhmā amnhī tomnuj to.

Nē oprē ho pijapu pix kukamā hamaxpēr.

Nē axtem nē kām mēmoj mex pumunh prām rŷ mēmoj mex mar prām kēt nē.

⁴ Nē mēhō ho hkrāmnhwŷ htā axtem nē mē kām mē hkurē xwŷnhjē nhīhkram haxā.

Nē hamaxpēr mex kēt o tanhmā amnhī tomnuj to rāhā ho ri pa.

Nē amnhī to rūnh o mē piitā mē hakrenh par ā amnhī to jarkrar o ri pa.

Nē amnhī krā hkōt kām amnhī nhīpēx prām xà hkōt amnhī nhīpēx o pa nē kām Tirtūm kām

prām xà hkōt amnhī nhīpēx prām kēt nē.

⁵ Hāmri nē mē kēp hkra hā amnhī jarēnh o pa htā aa hkōt amnhī nhīpēx kēt. Ā Tirtūm kra hkēt xwŷnhjaja amnhī nhīpēx kot anhŷr jakamā kwa kēr ka ā mē hkōt apa hkēt nē Ximotre.

⁶⁻⁷ Na htem hēx rom hkwyjē nhōrkwŷ hwŷr agjē nē kamā tanhmā mēnijē mā hēx to. Mē kot mē mar nē tanhmā amnhī tomnuj to hāmri nē ja hā amnhī pumu nē tee ri amnhī kukamā hamaxpēr kaxyw. Nē mē kām mē kapēr nyw mar prām tā nhām mē kapēr ma nē nhām mē kapēr mar nē aa Tirtūm kapēr mar nē amnhī kaxyw hkōt hamaxpēr kēt nē. Jakamā nhūm mē kot amnhī tomnuj xwŷnhjaja hēx rom mē hwŷr mra nē mē ōrkwŷ hwŷr agjē nē tanhmā mē kām mēmoj to hēx to. ⁸ Te kot amnepēm finat Jānre mē finat Jāmtija wa kot amnhī nhīpēxta pyrāk. Na pre finat Mojestija Tirtūm nhŷ hā tanhmā mē ahkre hto ho pa nhūm Jānre mē Jāmti wa kām mar prām kēt nē. Nē tanhmā ja nē hkwyjē mā kapēr to ho pa. Tā ā mē kot amnhī tomnuj anhŷr o mē pa xwŷnhjaja na htem wa urāk nē kām Tirtūm kapēr mar prām kēt nē kapēr nē tanhmā hkwyjē mā kapēr to ho pa. Nhūm mē hamaxpēr mex kēt jakamā am mēmoj punuj pix kukamā hamaxpēr nē mē kuma nē amnhī kaxyw Jejus kōt hamaxpēr kēt nē. ⁹ Tā nom koja mē hkwyjaja tokyx hprī hā mē kot mēmoj to hēx ā mē omu hāmri nē axte mē hkōt hamaxpēr kēt nē nhūm mē rī amnhī pumu. Te amnepēm mē kot hprī hā Jānre mē Jāmti wa kot tanhmā amnhī tomnuj to hā wa omunhta pyrāk.

*Mē pahte Jejus ā pahpunuj tā hka-
aga hkēt ā mē pamā karō
Atre 13.50–14.7, 14.19–22*

10 E Ximotre. Ate ixkôt apa ryy jakamā ra ate tanhmā ixte amnhī nhīpêx ho ixpa hā ixpumunh mex.

Ixte tanhmā Tirtūm kapēr o mē ahkre hto ho ixpaja.

Nē inhmā mēmoj to anhÿr prām xwÿnhja.

Nē ixte amnhī kaxyw Kris kôt ijamaxpērja.

Nē inhgryk tokyx anhÿr kêtja.

Nē ixte tanhmā Kris kôt ixkwÿjê ho mex to ho ri ixpaja.

Nē ixpunuj nē ixpa htā arī Kris kôt amnhī nhīpêx mex o ixpaja.

Ā ixte amnhī nhīpêx anhÿr o ixpaja ate ixpumunh mex.

11 Na pa pre krī pē āxiok nē Ikōn nē Ristija kamā mē kām Jejus jarēnh o ixpa nhūm mē hkwyjaja Jejus ā tanhmā inhīpêx to pa amnhī xā htÿx kamā ijamak o ri mē hkôt ixpa. Tā nhūm Pahihti Kris xatā mē kēp ixpytā pa itÿr pē mē ĩhkra rūm ijapōx o ixpa. 12 Na hte Kris kwÿ hkēt xwÿnhjaja mē pahte Kris kôt amnhī nhīpêx o papa hā mē pahtomnuj o pa.

13 Nē mē kot Tirtūm kapēr o hêx o mē pa xwÿnhjaja koja arī mē kēp Kris kwÿ hā amnhī to hêx pē mē nokupyr. Nē mē kām Tirtūm kapēr o hêx o pa. Jao ra mē tāmjaja amnhī nokupyr o pa nē amnhī tomnuj tÿx kumrêx.

Pawre kot tanhmā Tirtūm kapēr ā kagā jarēnh to

Rōmān 15.4; Sikūn Pêtre 1.19-21

14-15 No ka Ximotre. Amnepēm aprīre rūm na pa pre mē ixohtō nē Tirtūm kapēr o ajahkre ho ixpa. Akatorxā nē anhō wōwōre nē pa nē Kris kwÿjaja pa prem ho ajahkre rāhā ho akôt ixpa ka mē inhmar tÿx nē amnhī kaxyw Jejus kôt ajamaxpēr. Jakamā kwa kēp ka arī hkôt ajamaxpēr mex rāhā ho ri apa. Tirtūm kapērja na htem mar pē amnhī kaxyw Jejus Kris kôt hamaxpēr nē hkôt amnhī xunhwÿ

nhūm Tirtūm ja hā mē omunh xā hkôt mē ho hkra. 16 Tirtūm kapēr ā kagāja Tirtūm kapēr na. Na htem ho mē ahkre ho pa. Koja mēhō hkwȳm ri tanhmā amnhī tomnuj to nē kapēr ma nē tee ri amnhī tomnujja kukamā hamaxpēr o ra hkaprī nē. Rÿ tanhmā amnhī tomnuj to htā kapēr ā kagā kamā kapēr nē Tirtūm kot ā kot amnhī tomnuj anhÿrja nē mē pamā kapēr ā harēnh ma nē amnhī tomnujta kaga kurē kumrêx. Rÿ kamā kapēr nē Tirtūm kot tanhmā mē pahte amnhī to mex to hā mē pamā karō kamā harē nē kuma. Hāmri nē ŷ hā hkôt amnhī nhīpêx mex rāhā nē. Ā na hte Tirtūm kapēr kagāja mē kot mar nē hkôt amnhī nhīpêx xwÿnhjê ho mex anē. 17 Na hte mē kot Tirtūm mā amnhī nhīpêx o mē pa xwÿnhjaja kamā harē nē hkôt amnhī nhīpêx mex pē mē piitā mē ho mex nē ho mē ahkre mex rāhā ho pa.

4

Pawre kot mēmoj tā Ximotre mā karō

Korosē 4.5-6

1 Nē koja nhÿrmā Jejus Krisja akupÿn mē pahwÿr wrÿ hāmri nē mē pahpiitā tanhmā mē pajarēnh to. Ra mē htyk xwÿnhjaja nē arī mē pahÿr xwÿnhjaja nhūm tanhmā mē pahte amnhī nhīpêx to ho papa hā mē pahpumunh kôt tanhmā mē pajarēnh to. Jao Tirtūm mē wa kuri mē pahÿr tūm nē papa ho papa hā mē pajarē rÿ wa kuri pahÿr tūm nē papa hkēt ā mē pajarē. Jakamā kwa Ximotre kot paj Tirtūm mē Jejus Krisja wa noo mā mēmoj tā amā karō ka inhmar tÿx nē. 2-4 Koja nhÿrmā mē kēp Tirtūm kra hkēt xwÿnhjaja axte kām Tirtūm kapēr mar prām kēt nē nhām mē kapēr pix mar prām o ri pa. Jao amnhī kukamā hamaxpēr o:

—Nā inhmā Tirtūm kapēr mar prām kēt. Kot mēmoj piitā nē

mē hkurē kēnā. Kot paj hpānhā mēhō kot mēmoj nē mē hkurē hkēt xwýnhjē kapēr pix mar o ri ixpa. Nā kot paj anē. Ja na inhmā hprām. Nom kot paj axte Tirtūm kapēr mar kēt nē.

Anhūr jao kapēr kaga nē hpānhā htýx ri nhām mē ujarēnh pix ma nē hkôt hamaxpēr. Koja mē ā amnhī nhīpēx anhūr o pa. Jakamā kwa kēr ka arī mē kām Jejus kot tanhmā mē panē amnhī nhīpēx to hā harēnh rāhā ho ri mē hkôt apa Ximotre. Mē kām mar prām kēt tā māmri ri mē kām harē. Nē nhūrī mēhō pumu nē kām harē. Mē kām mar prām xwýnhjē mā harē nē mē kām mar prām kēt xwýnhjaja ka māānēn mē kām harē. Nhūm mēhō tanhmā amnhī tomnuj to ka hā omu nē tanhmā nē kām akapēr to kē hkaga tokyx anē nē akupým tām amnhī nhīpēx. Rý nhūm mēhō tām amnhī nhīpēx o pa ka ja hā omu nē hā kām akapēr nē kām:

—Ām hāmri na ka hte Tirtūm kôt amnhī nhīpēx mex nē. Anē.

Hāmri nē anojarēt kēt kām mē kām Tirtūm kapēr o mē ahkre rāhā ho ri apa. ⁵ Nē tām ri amnhī nhīpēx rāhā nē. Mē kot Jejus ā tanhmā anhīpēx to htā kēr ka ŷ hā amnhī to htýx nē arī mē kām kapēr jarēnh o ri mē hkôt apa. Jao Tirtūm mā amnhī nhīpēx mex rāhā nē. Kēr ka ā mē hkôt amnhī nhīpēx anhūr o ri apa Ximotre.

Pawre kot ra htyk kaxyw ā amnhī jarēnh

Atre 20.17-35

⁶ Nē mē kot ixpīr xā hā arīgroja ra hwūr ahtēp o mō. Kot paj pēr tokyx ty. Amnepēm na prem Tirtūm mā mēmoj nhōr kaxyw nē mē hkōm xā kamā mēmo kagōja py nē mē kot Tirtūm mā mēmoj nhōr xā hā mēstija ā hkapīr pa nhūm hapēx. Tā te ixpē mē hkōm xā kamā mēmo kagō pikapīrta pyrāk. Kot paj tokyx ty nē jar ijapēx. ⁷ Na pa ra Pahihti Jejus mā amnhī nhīpēx mex o ri

ixpa. Mē kot tanhmā hā ixtomnuj to htā pa hkaga hkēt nē arī hkôt amnhī nhīpēx mex rāhā ra ixtyk kaxyw. ⁸ Ixte Pahihti kām hprām xā hkôt amnhī nhīpēx mex o ri ixpa jakamā koja amnhī tā tanhmā ixto mex to. Nom papxpix ixto mex kēt nē. Na hte ām hāmri tām mē pahpiitā mē panhīpēx. Jakamā nhūr mā kot mē piitā tanhmā mē harēnh to xā hā arīgrota ā koja mē pahkīnh pē mē pahte amnhī wūr kamā pajamak o papa xwýnh piitā mē pamā mā mēmoj mex gō.

Pawre kot amnhī wūr Ximotre hwūr

⁹ Kwa na pa ra ato ijamak týx nē Ximotre. Kwa kēr ka amnhīm anojarēt nē tokyx tanhmā amnhī to hpa nē man ixwūr mō.

¹⁰ Na pre ra Kresēx ma Karatas wūr mō nhūm Xitre ma pika pē Tawmas wūr mō. Nhūm Tēnti ra tanhmā hamaxpēr to nē àpēnh gryk ā ixkaga nē ma akupým Tesarōn wūr mō. ¹¹ ām Rukre pix na arī ixkôt pa jakamā kēr ka anojarēt hāmri nē ahte amōr kēt nē. Makre mā anē kē man akôt ixwūr mō nē tanhmā ixto ajuta hto ho pa.

¹² Nē Xikitre na pa pre ra Epes wūr kumē.

¹³ Nē Torôt kām Kapti nhōrkwý kamā ixte kry pē inhō kamīs pa hkā ryti rer jakamā kēr ka anojarēt nē inhmā apy nē man inhmā o mō. Nē inhō kagāta ka māānēn inhmā amý nē o mō. Nē mēmo mry kà hā ixte mēmoj tā kagāta ka māānēn apy nē mán inhmā o mō. E kēr ka anojarēt nē ixkukrēxja jamý nē ixwūr ho mō.

Tanhmā Aresānti kot Pawre nhīpēx to hā harēnh

¹⁴⁻¹⁵ Nē na pre kàx o mēmoj nhīpēx xwýnh Aresāntija ixtomnuj nē. Pa pre mē kām Tirtūm kapēr o mē ahkre ho ri mē hkôt ixpa nhūm tee ri inhma nē kām mar prām kēt nē. Hāmri nē ixkutā amnhī xām nē inhīpēx kati nē. Nom koja Pahihti

Jejus ixtā tanhmā ho. Kwa kêr ka amnhĩ nê omunh mex nê Ximotre.

Pahihti Jejus kot Pawre mǎ hamaxpêr o hihtỳx ǎ harênh

¹⁶Nê pahi kot mē mar xà hǎ ixkre kamǎ wam ixte mē kām amnhĩ jarênh̄ta ǎ na pre mēhō ixyr pē mē kām tanhmā ijarênh̄ to hkêt nê. Na prem piitǎ mē umaj ixkaga hpa. Nom kwār mē mām̄rĩ ǎ amnhĩ nhĩpêx anê. Tirtūm kot ixtā tanhmā mē hoja na inhmā hprām kêt. ¹⁷ ǎm Pahihti Jejusja pix na pre mē kurom ixkaga hkêt nê. Na pre ixto ixihtỳx nê pa ỳ hǎ mē kām tanhmā mē panê kot amnhĩ nhĩpêx to hǎ harênh̄ pa. Nhūm Ijaew kêt xwỳnh̄ kot inhmar o hkrĩ xwỳnh̄jaja ixujarênh̄ mar o hkrĩ nhūm Tirtūm inhnê tanhmā mē ho nhūm mē xip̄r kêt nê. ¹⁸Koja Pahihti mē kutǎ ixto ixihtỳx rǎhǎ nê mēmo arĩgro hǎ amnhĩ wỳr ixto api. Pa Tirtūm mē wa kuri inhmex kumrêx nê ixtĩr tūm nê ixpa ho ixpa. Pahihti mex o mex jakamǎ kêr pu mē kām mex o mex ǎ harênh̄ rǎhǎ ho papa nê aa jam panhūrer kêt nê.

Pawre kot tanhmā hkrǎmnhwỳjê jarênh̄ to

¹⁹Nê kêr ka Prisire mē mjên Akir wa kām ijarê. Nê Onēsipti hprō nê hkrajaja ka mǎǎnēn mē kām ijarê.

²⁰No Eras kormǎ Korīt kām pa. Nê Toropti na pre à nê pa Mĩrêt kām kure nhūm ixkôt mōr kêt nê.

²¹Kwa kêr ka amnhĩm anojarêt nê amgrà pē man tokyx ixwỳr mō Ximotre.

Nê ota Epti mē Prutēhti mē Rĩnre mē Krawreja awỳr hpêr mē. Nê jar Kris kôt pahkwỳjê piitǎ awỳr hpêr mē.

²²E kê Pahihti Jejus ato mex rǎhǎ nê mē apiitǎ mē akutǎ nojarêt rǎhǎ ho pa.

Tǎ ǎm ja pix. Ixpê Pawre na pa awỳr kagàja nhĩpêx nê kumê.

Xitre Pawre kot Xitre hwÿr kagà nê mēnh

Pawre na pre kagàja nhîpêx. Kêp Jejus nhÿ hã hkrajê jahkre ho pa xwÿnhjê hô na pre. Nhÿm pre Xitre Pawre hkôt pa hã mytwrÿ sohtô nê. Tã kêp Jejus kôt hkwyjê nhô pastô kaxyw gô hipôk pê Kret ã arîk nê Tirtûm kapêr o mē ahkre ho mē hkôt pa. Jakamã nhÿm Pawre kãm kagàja nhîpêx nê kamã kãm mēmoj tã karô. Tirtûm kapêr o mē hêx xwÿnhjaja tanhmã kot ja nê mē hkurê to hã kãm karô. Nê mē kot Tirtûm kapêr o mē ahkre mex pix xwÿnhjaja Jejus kwÿjê kaxyw kot mē rēnh ã kãm karô. Nê Jejus kwÿjaja kot axpēn to mex o pa hã kot mē kãm karô kaxyw kagàja kamã mē kaxyw kãm hã kagà. Á na pre Pawre Xitre mã mēmoj tã karô nê hã kagà nê hwÿr mēnh anê. Nê kãm:

¹ Pa Xitre? Xà amex? Ixpê Pawre na pa awÿr kagà nhîpêx nê kumê. Na pa hte Tirtûm mã tanhmã amnhî nhîpêx to ho ixpa. Nê ixpê Jejus Kris nhÿ hã hkrajê jahkre o ixpa xwÿnh jakamã na pa hte mē kot amnhî kaxyw hkôt hamaxpêr tÿx kaxyw tanhmã mē kãm ixkapêr to ho ri ixpa. Nê mē kot hprî hã mar kaxyw Tirtûm kapêr o mē ahkre mex nê. ² Mē kot inhmar nê nhÿrmã htyk nê ma Tirtûm mē Jejus wa hwÿr àpir nê wa kuri htîr tûm nê pa ho pa hã amnhî kukamã hamaxpêr kaxyw. Amnepê m na pre Tirtûm ã mē pahpê hkrajê hkukamã mē pajarēnh anê. Nê ãm hãmri ã mē pajarēnh anê. Na hte mēmoj tã amnhî to hêx kêt nê. ³ Tã ra mē pakukamã mē pamã mēmoj to amnhîrit nê inhmã kapêr o:

—E Pawre kêr ka ma mē hpi-itã mē hkôt ri apa nê mē kãm

ixkapêr jarē nê mē kãm: “Kot kaj mē amnhî kaxyw Tirtûm Kra hkôt ajamaxpêr nê hkôt amnhî xunhwÿ nhÿm Tirtûm ja hã mē apumu nê mē ato hkra. Ka mē nhÿrmã atyk tã nhÿm amnhî wÿr mē ato api ka mē wa kuri amex kumrêx nê atîr tûm nê apa ho apa.” Anhÿr o mē kãm ixkapêr jarēnh o ri mē hkôt apa Pawre.

⁴ Anhÿr o inhmã kapêr tã pa ã amã ixkapêr nê hã kagà anê Xitre. Pajamê pahte amnhî kaxyw Jejus kôt pajamaxpêr nê hkôt amnhî xãm jakamã te apê ixkra pyrãk. Jakamã na pa hte ato Mēpanhîpêêxã maati Tirtûm mē mē papytâr xwÿnh Jejus Krisja wa hwÿr rãhã ho ri ixpa nê wa kãm:

—Pa Tirtûm mē Pahihti wa. Nà Xitre ho na pa wa awÿ. Kwa kêr ka wa kutã anojarêt rãhã ho ri apa. Kê wa akukwak ri hamakêtkati nê ãmnhîx pa ho pa. Anê.

Kris kwÿ hkrãhtûmjaja kot tanhmã amnhî nhîpêx to kaxyw mē hã kãm karô

Wam Ximotre 3.1-13

⁵ Nê na pa pre Kret rûm inhnojarêt hãmri nê amã axapēnh ã karô nê Kret kãm are nê man mō. Na pa pre amã:

—E kêr ka jar arîk nê mē kãm ixkapêr jarēnh jatur xãm mēnh o mē hkôt apa. Nê Kris kôt pahkwÿjê mã mē hkrãhtûmjê xunhwÿ. Kret kãm krî piitã hkôt. Na pa pre ixprî hã tanhmã amã mē harēnh to. Tã kêr ka ate inhmar xã hkôt mē hkwyjê kapi nê mē unhwÿ. Koja mē ã amnhî nhîpêx anhÿr o pa ka ja hã mē omu nê mē unhwÿ.

⁶ Koja mē tãm amnhî nhîpêx o pa nhÿm mē piitã axpēn mã mē mex ã mē harê.

Nê mē hprô pix tânopxar o pa nê kuhpa hã nhãm mēnijê ho amnhîkati hkêt nê.

Nê kê mē hkrajaja hipêêxã pyrã nê amnhî kaxyw Jejus kôt hamaxpêr o pa. Jao hipêêxã nê katorxã wa kapêr ma nê wa

hkôt amnhĩ nhĩpêx. No ri htỳx ri amnhĩ tomnuj o pa hkêt nê.
 Anhỳr o na pa pre mẽ hã amã karõ.
⁷ Jeus kôt pahkwỳjê hkrãhtũmjaja kot Tĩrtũm nhỹ hã hkrajê mã kapêr mex o pa jakamã na htem tãm amnhĩ nhĩpêx o pa.

Nê amnhĩ pix kukamã hamaxpêr o pa hkêt nê.

Nê gryk tokyx anhỳr kêt nê.

Nê kagõxyhti japrõr nê ho pipãnh o pa hkêt nê.

Nê oprê ho pa hkêt nê.

Nê kàxpore rũnh prãm xàj hêx rom tanhmã amnhĩ nhĩpêx to hkêt nê.

Na htem ã amnhĩ nhĩpêx anhỳr hkêt nê.

⁸ ãm àmnhĩx amnhĩ nhõrkwỳ hwỳr mẽ hwỳr o pa.

Nê mẽ piitã mẽ kutã nojarêr rãhã nê.

Nê tãm hamaxpêr nê tãm mẽ piitã mẽ hipêx o pa.

Nê amnhĩ tomnuj pymaj amnhĩ to htỳx pê Tĩrtũm kôt amnhĩ nhĩpêx mex rãhã ho pa.

⁹ Nê mẽ kot Tĩrtũm kapêr mar tỳx jakamã kê mẽ arĩ hã nohtỳx nê mar tỳx xà hkôt amnhĩ xô ri ho hkwỳjê jahkre mex o pa.

Nê ho mẽ piitã mẽ hamaxpêr o hihtỳx o pa.

Nhũm mễhõ Tĩrtũm kapêr kwỳm ri tanhmã ujarênh to nhũm hã kuma nê hprĩ hã kãm tanhmã harênh to kê mar mex nê.

E Xitre. Na hte ã Jeus kwỳjê hkrãhtũmjaja amnhĩ nhĩpêx anhỳr o pa. Jakamã kêr ka aprĩ hã Kret kãm Jeus kôt pahkwỳjê kapi nê mẽ kot tanhmã amnhĩ nhĩpêx to ho pa hã mẽ omu. Nhũm mễhõ ã amnhĩ nhĩpêx anê ka ja hã omu hãmri nê kêp Jeus kwỳjê hkrãhtũm kaxyw ãm.

Kret nhõ xwỳnhjaja kot tanhmã amnhĩ tomnuj to hã mẽ harênh

Xitre 3.9-11

¹⁰ Nê atar Kret kãm na hte mẽ ohtõ nê kãm mẽ õ pahi kapêr mar

prãm kêt nê htỳx ri tanhmã Kris kwỳjê mã kapêr to ho pa. Na hte Ijaew kwỳjaja ã amnhĩ nhĩpêx anhỳr o pa. Jao Ijaew kêt xwỳnh kot Jeus kôt amnhĩ xunhwỳr xwỳnhjê mã kãm:

—Kwa mẽ ixpyrà nê mẽ ixpê Ijaewjê kot amnhĩ nhĩpêx kôt mãn amnhĩ nhĩpêx kêt wehe.

¹¹ Anhỳr o mẽ kãm kapêr jakamã kwa kêr ka ã mẽ kapêr anhỳrja nê mẽ kãm akapêr kãm axihtỳx nê. Na htem hpijaam kêt o hikàxpore hprãm xàj ã mẽ kãm kapêr anhỳr o pa. Jao mẽ hamaxpêr o ahkã nhũm mẽ kuma nê tee ri hamaxpêr. ¹² Na pre ra mẽ hkwỳjê hõ tanhmã mẽ harênh to. Mễ ahkre xwỳnhjê hõja mẽ harênh o:

—Kret nhõ xwỳnhjaja na htem hêx pix o pa. Nê oprê nê kãm kaga nê apkur xà pix kukamã hamaxpêr o pa. Anê.

¹³ ãm hãmri ã mẽ harênh kot anhỳr. ã mẽ kot amnhĩ nhĩpêx anhỳr jakamã kwa mẽ kot amnhĩ nhĩpêxja nê mẽ kãm akapêr kãm axihtỳx o ri mẽ hkôt apa Xitre. Kê mẽ ã amnhĩ nhĩpêx anhỳr kêt nê. Nê mẽ kãm anê kê mẽ amnhĩ kaxyw Tĩrtũm kôt mãn hamaxpêr tỳx nê. ¹⁴ Nê kê mẽ axte Ijaewjê xujarênh nê mẽ kot amnhĩ nhĩpêx kôt amnhĩ nhĩpêx kêt nê. ã mẽ kot amnhĩ nhĩpêx o pa hã mẽ kãm karõ xwỳnhjaja na prem Tĩrtũm kapêr kaga hpa. ¹⁵ Mễ kot Jeus kôt amnhĩ xunhwỳr xwỳnhjaja tãm mẽ hamaxpêr o pa jakamã na htem Tĩrtũm kot mẽmoj piitã ho kator xwỳnh pumu nê piitã mex ã harê. No mẽ kêp Jeus kwỳ hêt xwỳnhjaja na htem hamaxpêr punuj pix o pa. Nê mẽmoj mex pumu nê mex kêt ã harê. Mex tã nhũm mex kêt ã harênh o pa. ¹⁶ Nê mẽ kêp Tĩrtũm kra hã amnhĩ jarênh tã amnhĩ tomnuj pix o pa. Jao kêp hkra hã amnhĩ jarênh o hêx nê kapêr kwỳm ri amnhĩ nhĩpêx pix o pa. Nhũm Tĩrtũm tee ri ja hã mẽ omu nê kãm

mě hkĭnh kêt nē. Tĭrtŭm mā mẽ kot amnhĭ to mex kwÿ mẽ hā jêt kêt kumrĕx.

2

¹ E Xitre kot paj tanhmā ate mẽ ahkre hto hā amā karō ka inhma nē amnhĭ xō ri mẽ kām hā karō ho ri apa.

Mĕmy wejjaja kot tanhmā amnhĭ nhĭpĕx to kaxyw mẽ hā kām karō

² Nē kĕr ka mĕmy wejjĕ mā anĕ kĕ mẽ amnhĭ to àptār mex nē pa.

Nē pipānh nē ri pa hkĕt nē.

Nē mẽ gryk kaxyw htÿx ri hkwyjĕ hā hpĕr o pikĕnh kêt nē.

Kĕ mẽ tām hamaxpĕr nē tām amnhĭ nhĭpĕx o pa.

Nē amnhĭ kaxyw Jejus kôt hamaxpĕr tÿx rāhā nē.

Nhŭm mẽ hkwyjaja kot mĕmoj tā tanhmā mẽ homnuj to htā kĕ mẽ arĭ tām amnhĭ nhĭpĕx o pa nē amnhĭ tā tanhmā mẽ ho hkĕt nē.

E kĕr ka ā mĕmy wejjĕ mā ja hā akarō anĕ.

Mĕni wejjaja kot tanhmā amnhĭ nhĭpĕx to kaxyw mẽ hā kām karō

Wam Korĭt 14.34-35; Wam Ximotre 2.9-15, 3.11; Wam Pĕtre 3.1-6

³⁻⁴ Nē mẽni wejjĕ mā anĕ kĕ mẽ kām Jejus kĭnh xāj tām ri amnhĭ nhĭpĕx o pa.

Ja axpĕn jakwa kamā nhām mẽ hixi ho rĕr o pa hkĕt nē.

Nē kagôxyhti ho pipānh o pa hkĕt nē.

Nē mẽ kām anĕ kĕ mẽni xàptār nywjĕ jahkre mex o pa. Mĕ kot mẽ mar nē mẽ urāk nē tām amnhĭ nhĭpĕx kaxyw. Jao mẽ kām mẽ mjĕn nē mẽ hkrajĕ japĕ hā mẽ kām mẽmoj to anhÿr o mẽ kutā nojarĕt rāhā ho pa.

Kĕr ka ā mẽni wejjĕ mā akapĕr anĕ.

Mĕni xàptār nywjaja kot tanhmā amnhĭ nhĭpĕx to kaxyw mẽ hā kām karō

⁵ Nē mẽni xàptār nywjĕ mā anĕ kĕ mẽ tām hamaxpĕr pĕ tām amnhĭ nhĭpĕx o pa.

Nē mẽ òrkwÿ kamā àpĕnh mex o pa.

Nē mẽ mjĕn kapĕr ma nē hkôt amnhĭ nhĭpĕx.

E. Ā mẽni xàptār nywjĕ mā karō anĕ. Koja mẽ ā amnhĭ nhĭpĕx anhÿr o pa hāmri nhŭm mẽ piitā mẽ kot amnhĭ nhĭpĕx ā mẽ omu nē mẽ harĕnh o:

—Tĭrtŭm kapĕrja mex kumrĕx. Mĕ kot hkôt amnhĭ nhĭpĕx o mẽ pa xwÿnhjaja na htem tām amnhĭ nhĭpĕx mex o pa. Anĕ.

Mĕmy xàptār nywjaja kot tanhmā amnhĭ nhĭpĕx to kaxyw mẽ hā kām karō

Wam Ximotre 4.12; Sikŭn Ximotre 2.22; Wam Pĕtre 5.5

⁶ Nē kĕr ka mĕmy xàptār nywjĕ mā anĕ kĕ mẽ mẽmoj punuj pĕ amnhĭ to htÿx o pa. Mĕ hamaxpĕr punuj nē mẽ kot tanhmā amnhĭ tomnuj to pĕ amnhĭ to htÿx o pa.

⁷ Nē kĕr ka ajaxwÿja tām amnhĭ nhĭpĕx rāhā ho ri mẽ hkôt apa Xitre. Mĕ kot ja hā apumunh nē akôt amnhĭ nhĭpĕx o pa kaxyw. Nom kĕr ka tanhmā mẽ ahkre hto hkwyĕm ri tanhmā amnhĭ nhĭpĕx to hkĕt nē. Ām Tĭrtŭm ā apijaàm o akatāt kôt mẽ kām kapĕr o mẽ ahkre pĕ tām amnhĭ nhĭpĕx o ri apa.

⁸ Nē kĕr ka tām akapĕr rāhā ho ri apa. Kĕr kĕ mẽ kām mẽ pahkurĕ xwÿnhjaja ja hā ama nē amnhĭ kamā hpĭjaàm hāmri nē apĕ Kris kwÿ hā tanhmā ato kapĕr punuj to hkĕt japĕr.

Mĕ kām mẽ àpĕnh xwÿnhjaja kot tanhmā amnhĭ nhĭpĕx to kaxyw mẽ hā kām karō

Epes 6.5-8; Korosĕ 3.22-25; Wam Ximotre 6.1-2; Wam Pĕtre 2.18-25

⁹ Nē kĕr ka mẽ kām mẽ àpĕnh o mẽ pa xwÿnhjĕ mā anĕ kĕ mẽ ò

patrāw kām hprām xà hkôt amnhĩ nhĩpêx o pa.

Jao mẽ kapêr ma nê hkôt amnhĩ nhĩpêx mex nê.

Nê amnhĩ tã tanhmã mẽ kām kapêr punuj to hkêt nê.

¹⁰ Nê kê mẽ kêp mẽmoj to àhkĩnh kêt nê.

Nê tãm mẽ hipêx rãhã nê.

Nê kām hkukrêx jamār mex o pa.

Koja mẽ ã amnhĩ nhĩpêx anhÿr o pa nhũm mẽ õ patrāw amnhĩ tã mẽ omu nê mẽ ý hã hkĩnh nê pa. Hāmri nê hamaxpêr o:

—Hêxta waa nê. Inhmã àpênh xwÿnhnta na hte inhmã àpênh mex o pa. Na hte ixkukrêx nê ixkrit jamār mex nê ixpê mẽmoj to àhkĩnh kêt nê. Nà mẽ kot Tĩrtũm kapêr kôt amnhĩ nhĩpêx o mẽ pa xwÿnhjaja na htem tãm amnhĩ nhĩpêx o pa. Pêr Tĩrtũm kapêr ãm hāmri na. ãm mex o mex. Anê.

E Xitre kêr ka mẽ kām mẽ àpênh xwÿnhjê mã ã mẽ kot amnhĩ nhĩpêx anhÿr ã karõ.

Tanhmã Jejus kām mẽ pajapê xàj amnhĩ nhĩpêx to hã harênh

Epes 2.8-10; Wam Tesarõn 1.9-10

¹¹ Nê Tĩrtũm kot mẽmoj to mẽ pakutã nojarêr rãhã ho pa jakamã na hte mẽ pahte Kra hkôt amnhĩ xunhwÿr xwÿnhjê ho hkra pu mẽ nhÿrmã wa kuri pahtĩr tũm nê papa ho papa. ¹² Na hte ã mẽ pamã kapêr o amnhĩrit anê nê mẽ pamã:

—E kêr ka mẽ apê ixkra hã tãm amnhĩ nhĩpêx rãhã ho ri apa nê axte tanhmã amnhĩ tomnuj to nê tanhmã ajamaxpêr punuj to hkêt nê. Mẽ ate amnhĩ tomnuj pê amnhĩ to htÿx nê ixkapêr kôt pix mã ri amnhĩ nhĩpêx rãhã nê. Anê.

¹³ Na pu htem ã amnhĩ nhĩpêx anhÿr o papa jao pahkĩnh nê mẽ papytār xwÿnh Jejus Kris jamār o papa. Koja nhÿrmã mẽ panhõ Tĩrtũm xihtÿx xwÿnhja akupÿn mẽ pahwÿr kumê pu mẽ mex o mex ã omu.

¹⁴ Na pre Jejus amnhĩ grõnh kôt mẽ pahwÿr wrÿ nê mẽ pahpiitã mẽ pahte amnhĩ tomnuj pãnhã amnhĩrer kaxyw htyk o Tĩrtũm mã amnhĩrer pa. Mẽmo kaxyw na pre ã mẽ panê amnhĩ nhĩpêx anê? Nà mẽ pahpê hkwyjja na kām hprām. Nê mẽ pahte tãm ri Tĩrtũm kapêr kôt amnhĩ nhĩpêx o papaja na kām hprām. Nê mẽ pahte urāk nê mẽ piitã mẽ kutã panojarêr rãhã ho papaja na kām hprām. Jakamã na pre ã mẽ panê amnhĩ nhĩpêx anê.

¹⁵ E Xitre. Ixte mẽmoj tã amã karõja kêr ka ho Kris kwÿjê jahkre mex o apa kê mẽ ama nê kapêr kôt amnhĩ nhĩpêx o pa. Nhũm mẽhõ tanhmã amnhĩ tomnuj to ka hã omu nê Tĩrtũm nhÿ hã tanhmã nê kām akapêr to kê axte hkêt nê. Tã mãn ka inhma. Kêr ka ã Kris kwÿjê jahkre mex o apa anê.

3

Tanhmã Kris kwÿ kot amnhĩ nhĩpêx to hã mẽ kām karõ

Rõmãn 13.1-10; Epes 2.1-10

¹ Nê kêr ka Kris kôt akwÿjê mã anê kê mẽ ho amnhĩptār xwÿnhjê kapêr ma nê mẽ hkôt amnhĩ nhĩpêx o pa. Nê mẽmoj to mẽ kutã nojarêr rãhã ho pa.

² Nê mẽ kām anê kê mẽ tanhmã hkwyjê mã kapêr punuj to ho pa hkêt nê. Rÿ mẽmoj tã mẽ kām àkjêr kêt nê. Kê mẽ tãm mẽ hipêx nê mẽ kamã ukapri pê mẽ ho mex rãhã ho pa. Na hte ã Kris kwÿjaja axpên nhĩpêx o pa anê. ³ Kormã mẽ pahte hkôt amnhĩ xunhwÿr kêt ri na pu prem ã amnhĩ nhĩpêx anhÿr kêt nê. Na pu prem Tĩrtũm mã pajamaxpêr kêt nê kapêr kôt ri amnhĩ nhĩpêx hkêt nê. Nê amnhĩ tomnuj pix kukamã pajamaxpêr o ri papa. Nê amnhĩ pix kukamã pajamaxpêr. Jao mẽ pamã pam amnhĩ nhĩpêx prãm xà kôt pix mã tanhmã amnhĩ nhĩpêx to ho ri papa. Nê axpên tomnuj nê. Nê axpên kām pagryk rãhã

ho papa. Ā mẽ pahte amnhĩ nhĩpêx anhÿr ho papa jakamã nhũm pre mẽ piitã kãm mẽ pahkĩnh kêt nê. Pu mẽ pajaxwÿja pamã mẽ hkĩnh kêt nê.

*Tanhmã Tĩrtũm kot mẽ pahto mex to hã harênh
Rômãn 5.6-8; Epes 2.4-10*

⁴ Tã pu prem Tĩrtũm kêp mẽ papytãr xwÿnh ã harênh ma. Kot tanhmã mẽ panê amnhĩ nhĩpêx to hã harênh ma nê mex o mex nê mẽ pakamã ukaprĩ hã harênh ma. ⁵⁻⁶ Hãmri nê amnhĩ kaxyw hkôt pajamaxpêr nê hkôt amnhĩ xunhwÿ nhũm amnhĩ tã mẽ pahpumu nê mẽ pahto hkra. Nom mẽ pahte tanhmã amnhĩ to mex to hã mẽ pahpumunh kôt mẽ pahto hkra hkêt nê. Mẽ pahte tanhmã amnhĩ to mex tore hã. Na pre mẽ pakamã ukaprĩ nê ã mẽ papytãr anê. Tã tanhmã na pre mẽ papytãr to wehe? Nã na pre Jejus Kris kukwak ri te kot mẽ pane mẽ pahte amnhĩ tomnuj piitã kuhõnh par pyrãk o mẽ panhĩpêx. Hãmri nê mẽ pahwÿr amnhĩ Karõ rê nhũm mẽ pahwÿr agiê nê mẽ pamã mẽ pahte amnhĩ nhĩpêx nyw gõ. Ā na pre Tĩrtũm Jejus Kris kot mẽ panê htyk kukwak ri mẽ pahto mex rax anê hãmri nê mẽ pahwÿr amnhĩ Karõ rênh anê. ⁷ Tã mẽmo kaxyw na pre ã mẽ pahto mex anê? Nã kãm mẽ pajapê jakamã na pre ã mẽ panhĩpêx anê. Mẽ pahte amnhĩ tomnuj xwÿnh tã kãm mẽ pajapê htyx nê kãm tanhmã mẽ pahto hprãm kêt nê. Nê mẽ pahwÿr Kra Jejus mẽ nhũm wrÿ nê mẽ pahte amnhĩ tomnuj pãnhã mẽ panê ty. Jakamã mẽ pahte amnhĩ kaxyw hkôt pajamaxpêr nê hkôt amnhĩ xunhwÿr xwÿnhjaja Jejus kukwak ri mẽ pahpê Tĩrtũm kraa. Ā na pre Jejus mẽ pahto mex anê. Jakamã kot puj mẽ nhÿrmã Tĩrtũm mẽ wa kuri pahtĩr tũm nê pamex nê papa

ho papa. Koja wa nhÿrmã ã mẽ pahto mex anê.

⁸ Ām hãmri na pa amã ã ja jarênh anê Xitre. Jakamã kwa kêr ka inhma nê inhmar tÿx nê. Nê ho amnhĩ kaxyw Tĩrtũm kôt mẽ hamaxpêr xwÿnhjê jahkre mex o ri apa. Kê mẽ amar xã hkôt tãm ri amnhĩ nhĩpêx o pa.

⁹ Nê mẽ kot htÿx ri mẽmoj tã axpên mã àkjêr o mẽ pa xwÿnhjaja kêr ka mẽ hkôt apa hkêt nê. Nê mẽ hkukamã mẽ higêt kôt apa hkêt nê. Rÿ finat Mojes kot Tĩrtũm nhÿ hã kapêr ã axpên mã mẽ àkjêr xwÿnhjê hkôt apa hkêt nê. Na htem ã ri axpên mã àkjêr anhÿr o pa nê tãm amnhĩ nhĩpêx kêt nê.

¹⁰ Nê koja mẽ akwÿjê hõ amnhĩ krã hkôt tanhmã hkwÿjê mã kapêr to nhũm mẽ kuma nê hã axpên mã akir nê axpên pê pikjêr kaxyw. Ka ja hã omu nê ã kapêr anhÿrja nê kãm akapêr kê axte hkêt nê. Hãmri nhũm ama nê ãm ama nê arĩ ã mẽ kãm kapêr anhÿr japêr ka axte nê kãm akapêr. Tã ra ate nê kãm akapêr o axkrut tã nhũm arĩ ã kapêr anhÿr o axkrunêpxi japêr ka ja hã omu hãmri nê mẽ amnhĩ nê hano kê axte mẽ apê Kris kwÿjê hkôt ri pa hkêt nê. ¹¹ Ā mẽ kot amnhĩ nhĩpêx anhÿr o mẽ pa xwÿnhjaja na mẽ ra Jejus wÿr pry kaga nê htÿx ri tanhmã amnhĩ tomnuj to ho pa. Nê ã amnhĩ nhĩpêx anhÿr o pa jao kêp Kris kwÿ hkêt ã amnhĩ to amnhĩrĩt.

Pawre kot kagã jatur xã kamã tanhmã Xitre mã kapêr to

¹² Nê kot paj tokyx ma Nĩkop wÿr mō. Kêr pa tokyx hwÿr pōj nê amgrã pê krĩ nhõ xwÿnhjê hkôt ixpa. Jakamã kot paj tokyx ma awÿr Atêmti rÿ Xikitre mẽ. Kê mō nê awÿr pōj ka tokyx tanhmã amnhĩ to hpa nê man ixwÿr mō pu mẽ Nĩkop kamã axpên pumu.

¹³ Nê ota mẽ akuri Apor mẽ axiwōkat Jêntija. Koja wa mẽmo

arĩgro hã ma krĩ hõ hwỳr nojarêt ka
wa kãm mẽ apkur xà hkwỳ gõ kê
wa ma ÿ kamã mõr kêt nẽ.

¹⁴ Nẽ kêt ka Kris kwỳjê mã anẽ
kê mẽ arĩ õrkwỳ pix kãm hkrĩ ho
hkrĩ hkêt nẽ. Kê mẽ tanhmã axpẽn
to mex to ho axpẽn kôt pa. Nhũm
mẽhõ kêp amrakati kê mẽ tanhmã
ho ajuta hto. Mẽ kãm anẽ kê mẽ ã
axpẽn nhĩpêx anhỳr o pa.

¹⁵ Nẽ ota jar Kris kôt pahkwỳjê
piitã awỳr hpěr mẽ Xitre. Nẽ kêt
ka atar Kris kôt mẽ pahkràmnhwỳjê
mã mẽ ijarẽ.

E ãm ja pix. Kê Pahihti Jejus
mẽ akutã nojarêt rãhã ho pa. Ixpê
Pawre na pa amã ã ixkapěr nẽ hã
kagà nẽ awỳr mẽnh anẽ.

Piremō Pawre kot Piremō hwÿr kagà nē mēnh

Pawre na pre kagàja nhîpêx nē hkràmnhwÿ Piremō hwÿr kumē. Na pre Piremōja amnhîm kām àpēnh xwÿnh Onesti japrō. Kàxpore ho haprō nhûm amarî kām àpēnh o pa. Tā tanhmā hamaxpêr to nē hkaga nē ma umaj krî hō hwÿr hprōt nē tēn amûxu nē kamā pa ho pa. Hāmri nē Pawre pumu nē kām amnhî jarē. Pawre arî kēp prēs nē hkrî ho hkrî nhûm Onesti omu nē kām amnhî jarē. Hāmri nhûm Pawre kām Jejus jarē nhûm kuma nē hkôt amnhî xām kurē kumrêx. Hāmri nhûm Pawre ja hā omu nē hkràmnhwÿ Piremō mā kagà nhîpêx nē kamā Onesti xyr pē kām kapêr. Hāmri nē hipêx pa nē Onesti mā kugō nē ma akupÿm ò patrāw Piremō wÿr kumē nhûm ma mō. Nhûm Pawre kagàja kamā kām kapêr nē kām:

¹ Pa ixkràmnhwÿ Piremō? Xà amex? Ixpê Pawre na pa awÿr kagà nhîpêx nē kumē. Apê Kris kôt ixtō hā inhmā akînh. Na ka hte ixpyrà nē Kris mā tanhmā amnhî nhîpêx to ho apa. Ta ot pa awÿr kagàja kamā ixpêr mē. ² Amā nē anhōrkwÿ kamā Tîrtûm kapêr mar kaxyw mē kēp Jejus kwÿ hā mē pikuprōnh xwÿnhjê hwÿr. Nē Kris kôt pahtōx Apti mē Akip wa hwÿr kumē. Akipja na hte mē pahpyrà nē Pahihti Jejus mā tanhmā amnhî nhîpêx to ho pa.

³ Na pa hte mē ato Mēpanhîpêêxà maati Tîrtûm mē Pahihti Jejus Kris wa hwÿr rāhā ho ri ixpa. Kot mēmoj to mē akutā nojarêt rāhā nhûm wa ÿ hā mē ajamakêtkati nē axāmnhîx apa ho apa kaxyw.

Pawre kot Piremō nhÿ hā hkînh ā harēnh

⁴⁻⁵ Na pa pre ajarēnh ma Piremō. Na htem xatā tanhmā inhmā ajarēnh to nē ajarēnh o:

—Hêxta waa nē. Piremō na hte amnhî kaxyw Pahihti Jejus Kris kôt hamaxpêr tÿx nē kām mē ixpê Kris kôt hkwyjê piitā hkînh pē tanhmā mē ixto mex to ho ri mē ixkôt pa.

Anhÿr o inhmā ajarē pa mē kuma nē anhÿ hā ixkînh nē ato Tîrtûm wÿr rāhā ho ixpa nē ato hwÿr o:

—Pa Tîrtûm. Na xep hte Piremō kām akînh tÿx nē akwyjê ho mex rāhā ho pa. ām hāmri na hte ā mē hipêx anhÿr o pa. ⁶ Na xep mē piitā mē kām tanhmā Jejus kot mē inhnē amnhî nhîpêx to hā harēnh o ri mē hkôt pa. Jakamā kēr ka tanhmā mē kot mar xwÿnhjê hkrā hto kē mēhprî hā mar tÿx nē Kris kot tanhmā mē ho mex to hā amnhî tā omu.

Anhÿr o ato kuwÿ. ⁷ Ate Kris kwÿjê ho mex o apa jakamā te ate pa ixto mex pyrāk Piremō. Na htem anhÿ hā hkînh nē pa. Pa ijaxwÿja ajarēnh ma nē anhÿ hā ixkînh tÿx nē jar mē hagdênh xà kamā ixkrî.

Piremō kot Onesti kamā ukapri hā Pawre kot kām karō Rômân 15.7; Epes 4.31

⁸ Nà ixte amā mēmoj jarēnhja tanhmā kute hkêt. Kot paj ām amā mēmoj jarē nē hā awÿ. Nom kot paj Kris nhÿ hā amā tanhmā hā karō hto hkêt nē. ⁹ Kot paj ām pahte axpēn to pahkràmnhwÿ hā hā awÿ. Ra ixwej tÿx nē Kris ā arî mē hagdênh xà kamā ixkrî htā mēmoj tā awÿ ka inhma nē inhmā ho anhÿr japêr ko.

¹⁰ E amā àpēnh xwÿnh Onestija na ixte amā harēnh kaxyw. Na pre man ixwÿr mō. Ixpê prēs nē ixkrî nhûm ixwÿr mō. Pa omu nē kām Jejus jarē nhûm inhma nē pahpyrà nē amnhî kaxyw hkôt hamaxpêr nē hkôt amnhî xām. Jakamā te kēp ixkra pyrāk. Hāmri nē ixto ajuta mex o pa. ¹¹ Xep kormā Jejus kôt

amnhĩ xãm kêr ri na pre amã àpênh mex kêr nê. Nê kãm kaga nê htỳx ri tanhmã àpênh to ho pa. Tã ra Jejus kôt amnhĩ xãm hãmri nê katàt kôt inhmã àpênh mex o pa. Nê ixto ajuta mex nê. Koja akupỳm amã apê hãmri nê amã àpênh mex nê.

¹² Jakamã ot pa akupỳm awỳr kumê ixkràmnhwỳ. Nom inhmã hapê jakamã koja ma akupỳm mō pa ho ama nê. Tã kot paj akupỳm awỳr kumê. ¹³ Kot jar ixri arĩk nê apãnhã tanhmã ixto ajuta hto ho paja na inhmã hprãm. ¹⁴ Jakamã kot kaj amã akupỳn ixwỳr mênh prãm nê mãmri ixwỳr amê. Nom ixte ja pumunh kêr. Kam nê amã hprãm xã hkôt tanhmã kãm akapêr to. Kãm anê kê akuri arĩk nê amã àpênh o pa rỳ akupỳn ixwỳr amê. ¹⁵ Nom konên. Mãn akupỳm awỳr mōr nê kêp Kris kôt akwỳ hã amã àpênh mex kaxyw na pre Tĩrtũm ixwỳr kumê nhũm ixwỳr mō nê ixri Jejus kôt amnhĩ xãm nê ixri pa hã mytwrỳ hkwy hapêx pa akupỳm awỳr kumê. ¹⁶ Nom ra kêp amã àpênh xwỳnh pix kêr määnên kêp Kris kôt atōō. Jakamã kot kaj wa atar axpên kôt Pahihti Jejus kôt tãm amnhĩ nhĩpêx o ri apa. Nom määnên kêp ixkràmnhwỳ mex ã inhmã hapêê. ¹⁷ Jakamã kot kaj ixpê Kris kôt akràmnhwỳ hã ijarê hã kot kaj määnên inhmã ho mex o apa.

¹⁸ Nê wam amã àpênh o pata ã mãn pre apê mêmōj to ahkĩ rỳ akàxpore hkwy ho ahkĩnh japêr. Tã pa kot paj hpãnhã amã amnhĩre. Ka inhmã tanhmã kàxpore jarênh to pa amã amnhĩre. ¹⁹ Ixpê Pawre kot paj tanhmã kot ato tewên toja pãnhã amã amnhĩre. E pa amnhĩ nhĩhkra ho ã amã amnhĩ jarênh ã kagã anê. Nom ajaxwỳja na ka tanhmã ixto tewên to Piremô. Na pa pre amã Jejus kot mē panê htyk ã harê ka pre inhmar xã hkôt hkôt amnhĩ xãm. Jao ixpyrà nê atĩr tũm nê apa ho apa mã xwỳnhta pãnhã te ate ixto tewên

pyràk.

²⁰ E kwa ixkràmnhwỳ. Ixpyrà nê apê Kris kwỳ jakamã kêr ka ixkamã axukapri hã inhmã Onesti ho mex nê. Kêr pa ja hã ajarênh ma nê ixkĩnh nê tãm ijamaxpêr. ²¹ Nã ra ixte apumunh mex kênã. Kot kaj ixte hã awỳrta kôt hipêx. Ja kaxyw na pa amã kagãja nhĩpêx nê awỳr kumê. Nom kot kaj ãm ja pix ho anhỳr kêr nê. Kot kaj ixte hã awỳrja kôt amnhĩ krã hkôt tanhmã ho mex to. Nã kot kaj ho anê.

Pawre kãm Piremô hwỳr mōr nê omunh prãm ã harênh

²² Nê Tĩrtũm kot mē awỳr inhmênh kaxyw mē ate ixto hwỳr o apa jakamã koja apu tokyx ma mē awỳr inhmê. Jakamã kwa kêr ka ixkutêp tanhmã mêmōj to mex to. Kêr pa mêmō arĩgro hã mōn awỳr pōj ka ra ixkutêp tanhmã amnhĩ to hpa nê ãm ixpix kãm ajamak o apa.

²³ Nê ota Epasja awỳr hpêr mē. Na hte ixpyrà nê Jejus Kris ã mē hagjênh xã kamã kêp prês nê hkrĩ ho hkrĩ. ²⁴ Nê Makre nê Aristak nê Têm̄ti nê Rukre mē awỳr hpêr mē. Na htem ixpyrà nê Kris mã tanhmã amnhĩ nhĩpêx to ho pa nom ixrom mē kêp prês kêr.

²⁵ E kê Pahihti Jejus Krisja akutã nojarêr rãhã ho pa. Ta ãm ja pix. Ixpê Pawre na pa amã kagã nê awỳr kumê.

Eprêw Ijaew hwÿr kagà

Kagà ja na pre Ijaew ò amnhĩ kwÿjê mã hipêx nom mẽ pahte hipêx xwÿnh nhĩxi mar kêt. Na pre tanhmã hamaxpêr to nê amnhĩ nhĩxi hã kagà hkêt nê. Apu Pawre rÿ apu axtem mēhōja na pre hipêx. Ijaew kwÿjaja uràk nê Jejus kôt amnhĩ xunhwÿr xwÿnhjê mã na pre hipêx nê mẽ hwÿr kumê. Ijaewjaja mẽ hixi hō pē Eprêw. Jakamã nhũm kagà nhĩpêx xwÿnhja mẽ hwÿr hipêx nê kumê. Nê kamã mẽ kãm mẽmoj jarênh rax nê tanhmã Jejus jarênh to.

Nê mẽ kwÿjaja kwÿjê hkĩnhã kãm Jejus prãm kêt jakamã na prem hkaga nê mẽ kot amnhĩ nhĩpêx tũm o ujanâr prãm xàj tanhmã mẽ homnuj to ho pa. Jakamã nhũm kagà nhĩpêx xwÿnhja tanhmã ja hã mẽ kãm kapêr to.

Nê na pre tanhmã Tĩrtũm nhõrkwÿ kaàkre hã kagà hto. Nê kaxkwa kamã òrkwÿ mexja nhũm tanhmã hã kagà hto nê mex o òrkwÿ kaàkre jakrenh ã harê.

Nê mẽ kot Jejus ã amnhĩ xà htÿx kamã hamak o pa htã mẽ kot tee ri ja hã amnhĩ pumunh nê Jejus kaga nê mẽ hkurê kamã hihtÿx nê. ã mēhōja mẽ kãm kapêr anê nê hã kagà nê mẽ hwÿr kumê. Nê mẽ kãm kapêr o:

¹ Pa Kris kôt ixkwÿjaja? Xà mẽ amex? E ot pa mẽ amã kagà nhĩpêx nê mẽ awÿr kumê. Amnepêm Tĩrtũm na pre mẽ panhĩgêtjê hwÿr ÿ hã kapêr jarênh o ri mẽ pa xwÿnhjê rē nhũm mẽ xatã mẽ kãm kapêr jarênh o ri mẽ hkôt pa. Ahpÿnhã tanhmã mẽ kãm kapêr to ho amnhĩrīt o mẽ hkôt pa. Nhũm Tĩrtũm xatã mẽ hkanrēhã mẽ hkra nê mẽ htãmnhwÿjê hwÿr mẽ kwÿjê rē nhũm mẽ kãm kapêr

jarênh o ri mẽ hkôt pa. Nom mẽ kãm kapêr piitã harênh kurê kumrêx kêt nê. Na prem ãm kwÿ pix jarê. Tã nhũm hpãnhã mẽ kwÿjaja wamtajê mÿr pē mẽ hwÿr mra nê axte mẽ kãm kwÿ jarênh o ri pa. Jao ra mẽ kãm harênh jatur xãm mēnh o mō, ²⁻³ Tã nhũm Tĩrtũm Kraja mẽ pahwÿr wrÿ nê mẽ pamã kapêr jarênh jatur xãm kumê. Kêp Tĩrtũm Kra jakamã te kot amnhĩ nhĩpêx pyrã nê pa. Uràk nê mex o mex. Nê wa hihtÿx xàja tipxi. Nê wa ahpumunh tÿxja mãânēn tipxi. Jakamã mẽ pahte pano ho Tĩrtũm pumunh kêt tã Jejus pumunh pē te mẽ pahte Tĩrtũm pumunh pyrãk. Uràk nê kot amnhĩ to rax o mẽ pahpiitã mẽ pajakrenh par. Amnepêm kormã mẽmoj kêt ri nhũm Jejus Tĩrtũm kukwak ri mẽmoj piitã ho kator pa. Tã koja Tĩrtũm nhÿrmã kãm mẽmoj piitã òr pa. Kaxkwa kamã mẽmoj piitã nê jar pika piitã hkôt nhũm kãm piitã òr pa.

Nê Jejus xàhpumunh xà pix kukwak ri na mẽmoja arĩ rãhãã. Na pre mẽ panê mẽ pahte amnhĩ tomnuj piitã hpãnhã amnhĩrer par kaxyw mẽ panê ty. Hãmri akupÿm htĩr hãmri nê ma akupÿm kaxkwa hwÿr api. Tĩrtũm xihtÿx o hihtÿx xwÿnhja wÿr akupÿm api. Nê ò krĩ kamã upôk rũm pahĩ maati hkrĩ xà hã kuri hkrĩ ho hkrĩ. Nê ìhkô hã mẽ pahto amnhĩptâr rãhã ho hkrĩ.

Jejus mẽ Tĩrtũm kapêr o mẽ wrÿk xwÿnhjê jarênh

⁴⁻⁵ Nê Jejus kot amnhĩ to rax o Tĩrtũm kapêr o mẽ wrÿk xwÿnhjê jakrenh jakamã na pre ã Tĩrtũm kãm kapêr anê nê kãm:

Na ka amnhĩ to rax o mẽ kot ixkapêr o mẽ wrÿk xwÿnhjê jakre.

Mê kot ìnhmã tanhmã amnhĩ nhĩpêx to ho mẽ pa xwÿnh na mẽ.

No mẽ kurom apê Ixkra kumrêx jakamã amex o ate mẽmoj piitã hakrenh par.

Nê apê pika nhô xwÿnhjê hwÿr ixte amênh mã xwÿnh na ka. Nà apê Ixkra kumrêx.

Kot paj jarâhâ ixpê anhîpêêxà hã mē piitã mē kãm amnhî to amnhîrît. Pa na ixpê anhîpêêxà.

Anhÿr o Kra Jejus mã kapêr. Na pre kapêr o mē wrÿk xwÿnhjê mã ã kapêr anhÿr kêt nê. Jejus mã pix mã ã kapêr anê.

⁶ Nê koja nhÿrmã akupÿn mē pahwÿr Kra mēnh kaxyw hãmri nê kapêr o mē wrÿk xwÿnhjê mã kãm: E ota Ixkrata. Ixkra kumrêx na. Kot amnhî to rax o mē piitã mē hakrenh par.

Jakamã kêr ka mē apiitã kutã arôrôk nê kãm mex o mex ã harê.

Anhÿr o mē kãm kapêr. ⁷ Nê kapêr o mē wrÿk xwÿnhjê na pre axtem tanhmã mē harênh to nê mē harênh o:

Ixkapêr o mē wrÿk xwÿnhjaja na pa hte nhÿhÿm mē kurê nhÿm htem inhmar xà hkôt ma nhÿhÿm mra nê inhmã tanhmã amnhî nhîpêx to.

Te ixte ma nhÿhÿm kôk nê kuwyja mēnh nhÿm ixkapêr kôt nhÿhÿm môrja pyrâk.

Anhÿr o mē harê. ⁸ No ã Krata jarênh anhÿr kêt nê. Na pre tanhmã kãm kapêr to nê amnhî pyrâ nê kêp Tîrtûm ã harê nê kãm: Pa Tîrtûm? E ka kot kaj mē ho amnhîptâr rãhã ho akrî. Nê akatât kôt mē ho amnhîptã.

⁹ Koja mē tãm amnhî nhîpêx ka ja hã mē omu nhÿm ja amã mex nê.

No koja mē tanhmã amnhî tomnuj to ka ja hã mē omu nhÿm ja apê omnuj nê. Mē kot tanhmã amnhî tomnuj to ho paja na omnuj tÿx.

Tã ate inhmã hprãm xà hkôt amnhî nhîpêx jakamã na pa mē kaxyw axãm ka akînh kãm mē ho amnhîptã.

Ixpê anhô Tîrtûm na pa ã amã ixkapêr anê. Anê.

¹⁰ Hãmri nê kãm:

Pa Pahihti. Nã amnepêm kormã mêmoj kêt ri na ka pre ixkukwak ri pika nê kaxkwa ho akato. ãm hãmri na ka pre ã amnhî nhîpêx anê.

¹¹ Tã nom koja nhÿrmã hamê wa hapêx pa. ãm kaxipix kot kaj kurom arî arãhãã nê aa ajapêx kêt nê.

Kaxkwa nê pika koja wa nhÿrmã te ixkre hã pô htûm kot amnhî nhîpêx pyrâk.

¹² Kot kaj wa hipêx o te mē kot ixkre nê pô htûm mã hikranh par nê hpãnhã hã nyw janhôr pyrâk.

Jao pika nê kaxkwa htûm o ajapêx pa nê hpãnhã nyw nhîpêx. Kaxkwa nyw nhîpêx nê pika nyw nhîpêx.

Nom kot kaj pika nê kaxkwa tûmta pyrâ nê aa awej nê axirerek kêt nê.

Kot kaj arî anyw nê axihtÿx rãhã apa ho apa nê aa ajapêx kêt nê. Arãhã atÿr tûm nê apa ho apa xwÿnh na ka.

¹³ E jar inhîhkô hã nhÿ nê inhmã mē ho amnhîptâr o akrî.

Kot paj mē kãm akurê xwÿnhjê pynênh pa nê man awÿr mē o mra nê anhîhkram mē haxâr pa. Anê.

ã na pre Tîrtûmja Kra Jejus mã kapêr anê. No kapêr o mē wrÿk xwÿnhjê mã ã kapêr anhÿr kêt nê.

¹⁴ E kot paj hpãnhã ixprî hã mē amã Tîrtûm kapêr o mē wrÿk xwÿnhjê jarê ka mē inhma. Tîrtûm mã na htem tanhmã amnhî nhîpêx to ho pa. Na hte nhÿrmã kuri mē htÿr tûm nê mē pa mã xwÿnhjê hwÿr mē kurê nhÿm mē ma mē hwÿr wrÿ nê tanhmã mē ho ajuta hto ho pa. Na htem ã amnhî nhîpêx anhÿr o pa.

2

Mê pahte Jejus kaga hkêt ã mê pamã karõ

¹ Tã ã Tirtümja Kra kot amnhĩ to rax o kapër o mê wrýk xwýnhjê jakrenh ã harênh kot anhÿr jakamã kwa kêr pu mê kapër mar tÿx rãhã nê hkôt pix mã amnhĩ nhĩpêx o papa. Kot pu mê ho anhÿr kêt hãmri nê gaa nê hkaga. ² Na pre Tirtüm kapër o mê wrýk xwýnhjaja amnepê mã mê panhígêjtjê hwÿr wrý nê Tirtüm nhÿ hã mê kot tanhmã amnhĩ nhĩpêx to ho pa hã mê kãm karõ nê ma akupÿm api. Nê katát kôt ri mê kãm Tirtüm kapër jarênh o pa. Hãmri nhũm mê kot hkôt amnhĩ nhĩpêx nê mar mex xwýnhjaja nhũm mëmoj mê kãm mex nê. No nhũm mê kot mar nê ãm mar xwýnhjaja koja mëmoj mê kêp omnuj nê. ³ Koja nhÿrmã mëmoj mê kêp omnuj tÿx kumrêx nhũm mê tee ri amnhĩ tã omu nê tee ri kêp amnhĩptâr prãm kaprÿ nê mex kêt nê pa. Nom mê kot Tirtüm kapër mar tÿx xwýnhjaja koja mëmoj mê kãm mex o mex. Koja Tirtüm amnhĩ katut kôt mê kot amnhĩ tomnuj rênh pa nê axte kãm hamaxpêr kêt nhũm mê kuri htír tũm nê mex rãhã nê pa ho pa. Na pre Pahihti Jejus mê kot kapër mar o kuhê xwýnhjê kumrêx mã ã ja jarênh anê nê mê kãm:

—Nà kot kaj mê amnhĩ kaxyw inhmã ajamaxpêr nhũm Tirtüm ixtã mê apumu nê mê anê mê ate amnhĩ tomnuj piitã ho hapêx pa nê axte kãm hamaxpêr kêt nê. Anê.

Hãmri nhũm mê kot kapër mar nê hkôt mê pa ho mê pa nê xwýnhjaja mar tÿx nê amnhĩ xô ri mê pamã harênh o ri pa. Nê mê pamã:

—Nà ãm hãmri. Nà ã ja jarênh kot anhÿr. Anê.

⁴ Hãmri nê mê pamã aa mê pahte mëmoj pumunh kêt kwÿ ho anhÿr o ri mê pahkôt pa. Tirtüm Karõ kot ja kaxyw mê ho mê àhpumunh

tÿx jakamã nhũm mê ÿ hã ahpÿnhã tanhmã mê pamã amnhĩ nhĩpêx to ho pa. Mê pahte ja hã mê omunh nê kamã pano pyma kaxyw. Nê ã mê pajamaxpêr anê nê pajamaxpêr o:

—Nà ãm hãmri na mê pamã ã Jejus jarênh anê nê ÿ hã ã amnhĩ nhĩpêx anhÿr o pa.

Anhÿr o pajamaxpêr kaxyw na prem ã mê pahkôt amnhĩ nhĩpêx anhÿr o pa.

Mê pahpê Jejus tã nê htõx ã mê pajarênh

Juãw 1.14; Rõmãn 8.3-4; Piripos 2.5-11; Korosê 2.9; Wam Juãw 4.2

⁵ Nê na pre Tirtüm amnhĩ kukamã tanhmã amnhĩ jarênh to nê nhÿrmã kot akupÿm mëmoj piitã ho nyw nê tãm mëmoj piitã ho amnhĩptâr o pa hã amnhĩ jarê. No na pre kapër o mê wrýk xwýnhjê mã ã mê kot amnhĩ nhĩpêx anhÿr ã mê kãm karõ hkêt nê. Koja jajaja mê pahto amnhĩptâr o pa hkêt nê. ⁶ Tirtüm kapër ã kaga htũm kot ja jarênh kot:

Kwa Tirtüm. Nà ãm hãmri na ka hte pika ja kamã ri mê ixpa xwýnhjê jamãr mex rãhã ho apa.

Akĩnhã amarĩ ri mê ixpa xwýnh tã amã mê ijapêê.

Nê mê ixkutã anojarêt rãhã ho apa.

⁷ Na ka hte tanhmã mê inhĩpêx to pa mê te mê ixpê akapêr o mê wrýk xwýnhjê pyrãk.

Jao mê urãk nê akukwak ri mê inhmex nê ixpa ho ixpa.

Mê urãn mê ixãhpumunh nê ixihitÿx kêt tã mê inhmex nê ixpa.

⁸ Na ka pre ra ate mëmoj to akator xwýnh piitã mê inhĩhkram haxã.

Nà ãm hãmri na ka pre ã mê inhĩpêx anê Tirtüm. Amex o amex. Anê.

Na pre ra mëmoj piitã mê panhĩhkram haxã. Pika nê kaxkwa nê kapêr o mê wrýk xwýnhjaja nê mëkarõmnuti nê kot mëmoj piitã

hipêxa nhùm mē panhĩhkram haxàr pa. Mē pahte ìhkô hã ho amnhĩptàr o papa kaxyw. No na pu mē kormã piitã ho amnhĩptàr kêt nē. ⁹ No kêt Jejusja na Tirtùm mē pakurom ìhkram mēmoj piitã haxàr par kumrêx. Kormã pika ja kamã ri pare ri na pre tanhmã amnhĩ nhĩpêx to nē Tirtùm kapêr o mē wrÿk xwÿnhjê hkĩnhã te amnhĩ to grire pyrã nē amnhĩ xà htÿx kamã hamak kãm ty. Tirtùm kãm mē pahto mex prãm xaj ã mē pahpiitã mē panê htyk anê. Tã nhùm Tirtùm akupÿm ho htÿr nē akupÿm amnhĩ wÿr ho api nē kêp Pahi Maati mex o mex ã harê. Na pre ã Jejusja mē panê amnhĩ nhĩpêx anê nhùm Tirtùm ja hã omu nē kukwak ri mē pahto mex nē.

¹⁰ Nē Tirtùm kot mēmoj piitã ho kator jakamã mēmoj piitã õ na. Na pre mē pakukamã hamaxpêr o:

—Inhmã ixkra xohtõ hprãm. Kot paj nhÿrmã man amnhĩ wÿr mē ho api kê mē ixri mex rãhã nē pa ho pa. Nã kot paj ã mē hipêx anê. Nē Ixkra Jejus koja kêp mē õ Pahihti. Koja mē urãk nē mēmoj punuj pumunh o pa hãmri nē à htÿx kamã hamak o kêp mē õ Pahihti mã tãm. Anê.

¹¹ Na hte Jejus mē panê mē pahte amnhĩ tomnuj rê nē hpãnhã mē pamã mē pahte amnhĩ nhĩpêx nyw jagjê nhùm Tirtùm ja hã mē pahpumunh kôt mē pahto hkra. Kêp Jejus Nhĩpêêxã nē kêp Mēpanhĩpêêxã maati jakamã nhùm Jejusja mē pahpê htõ nē mē pahpê htõx ã mē pajarê nē mē panhÿ hã hkĩnh nē.

¹² Tirtùm kapêr ã kagã htÿm ã mē pajarênh kot anhÿr. Kamã Jejusja Mēpanhĩpêêxã maati mã mē pajarênh kot:

Koja ixtõ nē ixtõxjaja akapêr mar kaxyw axpên wÿr akuprõ pa ma mē hkôt mra nē mē kãm akapêr jarê nē mē ìhkô hã amex ã gre. Anê.

¹³ Hãmri nē kãm:

Kot paj amnhĩ kaxyw akôt pix mã ijamaxpêr mex o ri ixpa. Anê.

Hãmri nē hpãnhã kãm:

Ot pa akrajê hkôt ri ixpa ho ixpa.

Ka na ka pre mē kêp ixtõ nē ixtõx kaxyw inhmã mē agõ.

Koja mē ixpyrà nē amnhĩ kaxyw amã hamaxpêr rãhã ho pa Tirtùm. Anê.

¹⁴ Nē mē pahpê pika nhõ xwÿnhjaja na pu htem ãm ri panhĩ pix ã papa. Nē panhĩ kamã pahkamrõ hã ri papa. Jakamã na pre Jejus kot mē panê htyk kaxyw mē pahwÿr wrÿ nē mē pahpyrà nē ì ho mē pakamã kato. Tã mēmo kaxyw na pre ì ho ì nē mē pahkôt pa? Nã ì ho htyk o Satanasti pê hihtÿx xà ho hapêx par kaxyw na pre ã amnhĩ nhĩpêx anê. Satanasti kêp mē kot amnhĩ tomnuj xwÿnhjê hpãm nē kêp mē htyk xwÿnhjê hpãm.

¹⁵ Jakamã na hte kot mē pahpê ìhkra pikamÿr pyrãk o mē panhĩpêx pu mē ÿ hã pamã pahpyk pyma nē ri papa. Tã ra Jejus kot mē pahwÿr wrÿk nē te kêp mē papytãr pyrãk o mē panhĩpêx jakamã pu mē tee ri pahpyk kukamã pajamaxpêr o ri pamã ma ho papa hkêt nē.

¹⁶ Nē Tirtùm kapêr o mē wrÿk xwÿnhjê ho mex kaxyw na pre Jejus pika hwÿr wrÿk kêt nē. Mē panhĩgêt finat Apraãw pyrã nē mē panhĩ ho panhĩ xwÿnhjê ho mex kaxyw na pre wrÿ. ¹⁷ Ijaew nhõ pãtrejaja na pre htem mē kot amnhĩ tomnuj mÿrapê mē hpãnhã Tirtùm mã mry hkwy pa nē hkamrõ kapÿ nē mē ho Tirtùm wÿ. Kot hã mē omunh nē mē mex ã mē harênh kaxyw. Tã nhùm Jejus wrÿ nē mēmo mryta pyrã nē ã mē panê hkamrõ pikapÿr anê. Kaxyw na pre mē pahpê maati mē pahwÿr ì ho ì nē wrÿ nē mē pahpyrà nē ni nhõhy rùm kato. Jao kêp mē pahto Tirtùm wÿr xwÿnh maati. Na pre Tirtùm kãm hprãm xà hkôt mē panê mē pahte amnhĩ tomnuj

pãnhã amnhîrer pa. Tã kot mẽ pahpyrà nê mẽmoj punuj pumunh nê amnhî xà htỳx kamã hamak o pa jakamã kêp mẽ pakamã ukaprí xwỳnh ã pixi mex na. ¹⁸ Kormã htỳk kêt ri na pre mẽ pahpyrà nê omnuj nê ri pa. Nhũm mẽkarõmnuti nhõ pahi kot tanhmã amnhî tomnuj to hprãm xàj tee ri hkôt kãm ahkrox o pa hkapyrỳ nhũm hkôt amnhî nhĩpêx kêt nê amnhî nê ho axtem nê. Jakamã koja Satanas-tija urak nê tanhmã mẽ panhĩpêx to nhũm Jejus mẽ pahtã omu nê amnhĩ pyrà nê tanhmã kêp mẽ panhĩpêx to pu mẽ ý hã kutã amnhĩ to htỳx nê papa.

3

Jejus kot amnhĩ to rax o Mojes jakrenh ã harênh

Juãw 1.17-18

¹ E ixkrãmnhwỳjaja. Ra Tĩrtũm kot mẽ pahte kapêr mar nê tãm amnhĩ nhĩpêx o ri papa kaxyw mẽ pahto hkra jakamã kwa kêr ka mẽ Jejus kot tanhmã mẽ pamã amnhĩ nhĩpêx toja mã ajamaxpêr rãhã ho ri apa. Na pre Tĩrtũm mẽ pahwỳr kumê nhũm mẽ pahwỳr wrỳ nê Tĩrtũm kapêr o mẽ pajahkre ho ri mẽ pahkôt pa. Nê te kêp mẽ panhõ patre pyrà nê mẽ pahto Tĩrtũm wỳr o pa. ² Na pre Tĩrtũm finat Mojes kwỳ kaxyw Mojesja xãm nhũm kãm hprãm xà hkôt tanhmã mẽ hipêx to ho pa. Tã nhũm hpãnhã mẽ pakaxyw Kra Jejusja xãm nhũm Mojes pyrà nê Tĩrtũm kãm hprãm xà hkôt pix mã tanhmã mẽ panhĩpêx to ho pa. Hamê na pre wa Tĩrtũm jamaxpêr xà hkôt tanhmã kãm mẽ panhĩpêx to ho pa.

³ Koja mẽhõ amnhĩm ixkre mex nhĩpêx nê hipêx pa nhũm hkwỳjaja hwỳr mra nê omu nê mex kumrêx ã harê. Nom kot hipêx xwỳnhnta àhpumunh xà hkôt hipêx jakamã tãm na mex o kot ixkreta jakrenh. Ja pyrà nê finat Mojes kot amnhĩ to

rax tã nhũm Jejus kot amnhĩ to rax o kot hakrenh. Mojes te kêp ixkre nhĩpêxta pyràk no Jejus te kêp ixkre nhĩpêx xwỳnhnta pyràk jakamã kot amnhĩ to rax o kot Mojes jakrenh.

⁴ Nê mẽ kot ahpỳnhã amnhĩ krã hkôt tanhmã ixkre nhĩpêx to jakamã kot hipêx xwỳnhnta na mex o ixkreja jakrenh. Tã ja pyrà nê Tĩrtũm kot mẽmoj piitã ho kator jakamã kot amnhĩ to rax o kot mẽmoj piitã ho kator xwỳnh jakrenh par.

⁵ Nê finat Mojes na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nê ma kãm hkwỳjê piitã hkôt mẽ kãm kapêr jarênh o ri pa. Tĩrtũm tanhmã kot mẽ kãm kapêr tota kukamã nhũm mẽ kãm harênh o mẽ hkôt pa. No ãm Tĩrtũm mã tanhmã amnhĩ nhĩpêx to ho hpa xwỳnh pix na pre.

⁶ Nê Kris haxwỳja na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nom Mojes rom kêp Tĩrtũm Kra kumrêx jakamã kurom kêp mẽ panhõ Pahihti kumrêx. Tã kwa kêr pu mẽ kãm hprãm xà hkôt pix mã tanhmã kãm amnhĩ nhĩpêx to ho ri papa. Mẽ kot hã tanhmã mẽ panhĩpêx to htã pu mẽ ý hã mẽ kutã amnhĩ to htỳx nê papa nê pajamaxpêr o:

—Nà ixpunuj nê ixpa htã kot paj ixpunuj rãhã ixpa ho ixpa hkêt nê. Koja nhỹrmã Tĩrtũm ixto mex kumrêx pa axte tanhmã ixpunuj to nê ixpa hkêt nê. Hêxta waa nê. Nà ja inhmã hprãm tỳx kumrêx.

Anhỹr o amnhĩ kukamã pajamaxpêr o papa.

Mẽ pahte Tĩrtũm kaga hkêt ã mẽ pamã karõ

Wam Korõt 10.1-11; Jutre 5

⁷⁻⁸ Amnepêm na pre mẽhõja tanhmã Tĩrtũm Karõ nhỹ hã kapêr to nê kapêr o:

E kêr ka mẽ Tĩrtũm kapêr mar tỳx o apa.

No ama nê âm ama nê ri hã apa hkêt nê. Rỳ kapêr pê akra hihtỳx o apa hkêt nê.

Mê akukamã mê anhigêjtaja na prem ã amnhĩ nhĩpêx anê nê Tirtũm kapêr pê hkrã hihtỳx o pa. Kapôt ã Mojes kôt mê pata ã na prem kãm Tirtũm kapêr mar prãm kêt nê. Nê tee ri amnhĩ kukamã hamaxpêr nê akupỹm Ejit wỳr hkrã nê axpên mã: “Kwa na pu mê ra pahpunuj tỳx nê papa nhũm Tirtũm âm ja hã mê pahpumu nê tanhmã mê pahto mex to hkêt nê. Mãn ra mê pahkaga nà? E kwa pu mê awjanã nê ma akupỹm Ejit wỳr mãn papa.” Anê.

⁹⁻¹⁰ Na prem ã axpên mã kapêr anhỳr o ri pa hã amgrã pê 40.

Tirtũm xatã kot tanhmã mê ho mex to nhũm mê kot amnhĩ tã omunh tã âm omu nê htỳx ri amnhĩ hkrã hkôt pa.

Nhũm tee ri amnhĩ tã mê omu nê mê kamã gryk nê.

Hãmri nê hamaxpêr o: “Nà pêr mê hamaxpêr kot mê hã hkwỳ jêt kêt kumrêx. Te mê hamak kre hkêt pyrã nê ixkapêr mar kêt nê.” Anhỳr o hamaxpêr.

¹¹ Hãmri nê mê kãm: “E mê inhma. Æ mê ate amnhĩ nhĩpêx anhỳrja mỳrapê kot kaj mê ma ixte mê amã pika mex nhôr mã xwỳnhta wỳr apa hkêt nê.” Anhỳr o mê kãm kapêr. Anê.

Æ mễhõja Tirtũm Karõ nhỹ hã te Tirtũm tãm kot mê kãm kapêr pyrãk o mê harênh anê. ¹² Jakamã kwa mê okora ixkrãmnhwỳjaja. Kêr ka mê amnhĩ to mex o apa. Tirtũm kêp Mêpahpãm ã pixi mex tã kot kaj mê tanhmã ajamaxpêr punuj to rỳ amnhĩ kaxyw hkôt ajamaxpêr kêt hãmri nê te ate amnhĩ katut kôt âm pyrãk o hipêx nê hkaga. Kwa mê ã amnhĩ nhĩpêx anhỳr kêt nê. ¹³ Kêt

mê Kris kôt axpên to axihtỳx o ri apa. Nê apkati mê ã axpên nhĩpêx anhỳr rãhã nê. Kot kaj mê anhỳr kêt hãmri nê mê amã Tirtũm kapêr mar prãm kêt ã amnhĩ to amnhĩrit. Jao tanhmã amnhĩ tomnuj to ho ri apa nê atỳx ajamaxpêr o: —Nà ixte ã amnhĩ tomnuj anhỳr tã nhũm Tirtũm ja hã ixpumu nê âm hã ixpumu.

Anhỳr o ajamaxpêr japêr. Rỳ mê ajamaxpêr o:

—Nà na pa hte ã amnhĩ tomnuj anê nhũm Tirtũm ja hã ixpumu nhũm ja kãm mex nê.

Anhỳr o ajamaxpêr japêr. ¹⁴ Kwa mê ri ã ajamaxpêr anhỳr kêt nê. Amnepê mã mê pahte Kris kôt amnhĩ xunhwỳr nhũm kot mê pahto hkrata ã na pu prem amnhĩ kaxyw hkôt pajamaxpêr o papa. Tã kêr pu mê arĩ ã amnhĩ nhĩpêx anhỳr tỳx o papa rãhã ty. ¹⁵ Tirtũm kapêr ã kagã htũm kot ja jarênh kot:

E kêr ka mê Tirtũm kapêr ma nê mar tỳx nê.

No ama nê âm mar nê ri hã apa hkêt nê.

Rỳ mê kot hkaga xwỳnhjê pyrã nê kêp akra hihtỳx kêt nê. Anê.

¹⁶ Mê panhigêjtaja na prem Mojes kôt pika pê Ejit rũm kato nê hkĩnh nê ma kapôt ã kormã pika mex wỳr pa. Nom Tirtũm kapêr mar nê hkôt amnhĩ nhĩpêx rãhã hkêt nê. Na prem kuma nê hkôt amnhĩ nhĩpêx o hã apkati grêre htã ra mễmoj nhỹ hã omnuj nê pa hã amnhĩ pumu nê tee ri amnhĩ kukamã hamaxpêr.

¹⁷ Jao xatã kapêr nhĩrôp kuhê nê amnhĩ hkrã hkôt pix mã amnhĩ nhĩpêx o pa ho ra hã amgrã pê 40. Hãmri nhũm tee ri amnhĩ tã mê omu nhũm ja kêp omnuj nê. Jakamã nhũm mê piitã kapôt ã ri pa nê gaa nê pikaprãr pa. ¹⁸ Mê kot kapêr mar kêt jakamã nhũm mê kãm:

—Nà ã mê ate amnhĩ nhĩpêx anhỳr o ri apaja mỳrapê kot kaj mê

ixte mē amā mē amex nhōr mā xwýnh̄ta wýr apa hkêt nē. Anē.

¹⁹Tā mē kot amnhī kaxyw Tīrtūm kôt hamaxpēr o pa hkêt jakamā na prem pika mexta wýr hpôx kêt rāhā pikaprār pa. Nhūm mē hkra nē mē htāmnhwýjē pixjaja na prem mē mýr pē hwýr pōj nē kamā pa.

4

Mē pahte Tīrtūm kukwak ri paja-makêtkati nē ri papa hā mē pajarēnh

¹Mē pahte Tīrtūm kukwak ri pajamakêtkati nē ri papa ho papaja Tīrtūm kām hprām jakamā kwa kēr pu mē amnhī pumunh mex o papa. Nē wam mē panhīgēt rom Tīrtūm kapēr mar tỳx nē hkôt mán kêt ri amnhī nhīpēx mex rāhā nē. Kēr pu mē kurom mē pajamak kām amnhī krit xā hā pika mexta wýr pōj. ²Mē kot mē pahpyrà nē Tīrtūm kapēr mar mex tā na htem amnhī kaxyw hkôt hamaxpēr kêt nē. Te mē kot mar kêt pyrāk. ³ām mē kot amnhī kaxyw Kris mā hamaxpēr xwýnh̄ pixjaja na htem kukwak ri hamakêtkati nē ri pa ho pa. Amnepē mā mēmoj piitā hkêt ri na pre Tīrtūm mēmoj piitā ho kator pa hāmri nhūm apkati nhūm axte mēmoj tā àpēnh kêt nē. Ām ō krī kamā arī hamakêtkati nē hkôkôt o hkrī. Tā mē pahte urāk nē pajamakêtkati nē papa ho papaja na kām hprām. No wam ri mē pa xwýnh̄jaja mē kot amnhī tomnuj mýrapē na pre Tīrtūm mē kot urā nē hamakêtkati nē paja nē mē hkurē. Kapēr ā kagā htūm kot harēnh kot: Na pre Tīrtūm tee ri amnhī tā mē kot hipēx ā mē omu nhūm ja kēp omnuy nē. Hāmri nhūm mē kām: “Nà kot kaj mē ixkukwak ri axāmnhīx ajamakêtkati nē apa hkêt nē.” Anē.

⁴Nē kot harēnh kot:

Na pre Tīrtūm àpēnh ā arīgro kēp
6 hāmri nhūm arīgro pē 7ta
ā nhūm axte mēmoj tā àpēnh

kêt nē. Na pre arī hkôkôt o nhỹ.

Arīgro pē 7 ā arī hamakêtkati nē hkôkôt o nhỹ. Anē.

⁵Nē mē kot kapēr mar nē ām mar xwýnh̄jē jarēnh kot:

Kot kaj mē aa ixkukwak ri axāmnhīx nē ajamakêtkati nē apa hkêt nē. Anē.

⁶Mē panhīgētjaja kot amnhī kaxyw Tīrtūm kôt hamaxpēr kêt jakamā na prem hamakêtkati nē ri pa hkêt nē. Tā mē papajaja na Tīrtūm arī kām mē paxāmnhīx nē pajamakêtkati nē papa hprām.

⁷Amnepēm Ijaew Tīrtūm kôt hamaxpēr kêt jakamā na prem kapôt ā pikaprār pa. Hāmri nhūm amgrā xohtō nē hapēx nhūm Tīrtūm mē hkanrēhā mē htāmnhwýjē hō pē finat Tawija mā kapēr nhūm kuma nē mē pamā tanhmā kapēr tota ā kagā nē hā kagā kot:

Kwa kēr ka ixkapēr ma nē mar tỳx nē.

No mē anhīgētjē pyrā nē akrā hitỳx ho inhma nē ām inhmar kêt nē. Anē.

Na pa pre ra mē amā ā ja jarēnh anē. ⁸Na pre finat Jojueja finat Mojes mýr pē ma pika pē Kanaā hwýr mē hkanrēhā mē hkrajē o pa nē hwýr mē o pōj. Tā nhūm prem Jojue kukwak ri hamakêtkati nē pa ho pa hkêt nē. Kēp ām kukwak ri ā amnhī nhīpēx anhýr ronhỹx Tīrtūm axte mē kām mē hamakêtkati nē mē hamak kām amnhī krit nē mē pata hkukamā harēnh kêt nē. ⁹Nom mē pahte kukwak ri pajamakêtkati nē pajamak kām amnhī krit nē ri papa ho papaja na Tīrtūm arī kām hprām. ¹⁰Na pre arīgro pē 6ja ā mēmoj piitā ho kator pa nhūm apkati nhūm hamakêtkati nē hkôkôt o nhỹ. Tā kot puj mē pahpē hkrajaja amnhī to kuwý nhūm tanhmā mē pahkrā hto pu mē kukwak ri urāk nē paxāmnhīx nē pajamakêtkati nē papa ho papa. Te Tīrtūm àpēnh

pa nhùm apkati nhùm hamakêtkati nê hkôkôt o ýrta pyrâk. ¹¹ Jakamã kwa kêr pu mẽ amnhĩ to kuwý kê ã mẽ panhĩpêx anê pu mẽ urâk nê ã amnhĩ nhĩpêx anhÿr rãhã ho papa. Nom kot pu mẽ pahkwý Ijaewjê pyrã nê kapêr kwým amnhĩ nhĩpêx o papa hãmri nê mẽ urã nê paxãmnhĩx pajamakêtkati nê papa hkêr nê.

Tĩrtũm kapêr te kot wapo xwa gix pyrãk ã harênh

¹² Nê Tĩrtũm kapêrja te ĩ ho tanhmã kot mẽmoj to kaxyw hihtýx pyrãk. Nê te wapo xwa gix pyrãk. Koja mẽhõ õ wapo xwa mex nê ho mẽmoj jakàr mex nê. Ho mry hi jakàr mex pê kaxwýnh kãm hi kanhĩn o amnhĩrĩt. Ja pyrã nê na hte Tĩrtũm kapêr mẽ pajamaxpêr o amnhĩrĩt nê mex ã harê rý omnuj ã harê.

¹³ Nê na htem Tĩrtũm pê mẽmoj to pimxur kêt nê. Na hte hprĩ hã mẽmoj piitã omunh pa. Nê mẽ pajamaxpêr kôt mẽ pahpumunh pa. Na pu htem ã kot mẽmoj piitã omunh par anhÿr xwýnhja noo mã tanhmã amnhĩ nhĩpêx to rãhã ho papa.

Jejus kêp mẽ panhõ patre maati hã harênh

Eprêw 10.19-25; Wam Juãw 2.1-2

¹⁴ Nê Ijaew nhõ patrejaja na pre htem Tĩrtũm mã amnhĩ jarênh xã hã ixkre hwýr agjê nê kamã mẽ ho Tĩrtũm wýr o pa. Ja pyrã nê na pre ra Jesus Tĩrtũm nhõ krĩ hwýr api nê kamã mẽ pahto hwýr o hkrĩ. Kêp Kra kumrêx jakamã kêp mẽ pahto Tĩrtũm wýr xwýnh maati. Jakamã kwa kêr pu mẽ amnhĩ kaxyw hkôt pajamaxpêr týx rãhã ho papa. ¹⁵ Satanasti na pre te kot mẽ panhĩpêx pyrãk o Jesus nhĩpêx. Nê tee ri kot tanhmã kãm kapêr to nhùm kot mar nê tanhmã amnhĩ tomnuj to hprãm xãj ãm ri kãm ahkrox kaprý nhùm kutã amnhĩ to htýx nê hkôt amnhĩ nhĩpêx kêt nê. Tã kot Satanasti

kot amnhĩ nhĩpêx ã omunh mex jakamã na hte kêp mẽ pahpãmopxar mex o pa. Kot mẽ paxirerek kôt mẽ pahpumunh mex. ¹⁶ Jakamã kwa kêr pu mẽ amnhĩ tã kamã pahpijaãm kêt kãm paxãmnhĩx ri amnhĩ to hwýr o papa. Kêp mẽ pakutã nojarêt xwýnh nê kêp mẽ pakamã ukaprĩ xwýnh jakamã kêr pu mẽ tee ri mẽmoj tã amnhĩ pumu nê amnhĩ to hwýr kurê kumrêx. Hãmri nê ý hã paxãmnhĩx nê pajamakêtkati nê ri papa.

5

¹ Nê mẽ panhõ patre maati Jejusja Tĩrtũm na pre mẽ pakaxyw ãm. Kêp mẽ pahkwý hã mẽ pakaxyw ãm nhùm hte mẽ pahto Tĩrtũm wýr o pa. Nê kãm mẽ pahkĩnh xã nhõr o pa. Kot ja hã mẽ pahpumunh nê mẽ pahte kapêr kwým tanhmã amnhĩ nhĩpêx to ho papa hã mẽ pakamã gryk o hapêx tokyx anhÿr kaxyw.

² Mẽ panhĩgêjtaja na pre htem mẽ õ patre maati hwýr mra nê kãm tanhmã amnhĩ tomnuj to hã amnhĩ jarê nhùm mẽ kuma nê mẽ kamã ukaprĩ nê. Mẽ urã nê kormã kot Tĩrtũm kôt amnhĩ nhĩpêx totuj anhÿr jakamã na pre mẽ kot tanhmã amnhĩ jarênh toja ma nê mẽ kamã ukaprĩ nê. ³ Hãmri nê mẽ hpãnhã Tĩrtũm mã mẽmoj gõ nê mããnhên amnhĩ pãnhã kãm mẽmoj gõ. Mẽ urãk nê kot amnhĩ tomnuj o paja mýrapê amnhĩ pãnhã kãm mẽmoj gõ. ⁴ No na pre hte patrejaja amnhĩ krã hkôt kêp patre maati kaxyw amnhĩ xunhwýr kêt nê. Tĩrtũm kot mẽ kaxyw mẽ unhwýr jakamã na pre mẽ kaxyw finat Arãwja xãm nhùm kêp mẽ õ patre maati hã mẽ ho Tĩrtũm wýr o pa.

⁵ Nê Kris haxwýja kêp mẽ panhõ pahi maati hã tãm kot amnhĩ xãm kêt. Tĩrtũm na pre mẽ pakaxyw ãm nê tanhmã kãm kapêr to nê kãm: Nã apê Ixkra na ka.

Kot paj jarähâ ixpê Anhîpêêxâ hä më kãm amnhî jarê. Anê.

⁶ Nê hpãnhâ kãm:

Kot kaj Mekijetek pyrã në apê patre maati hä më ho ixwÿr rãhã ho ri apa. Anê.

⁷ Jejus kormã pika ja kamã pa ri na pre amnhî to Tirtûm wÿr rãhã ho pa. Tôhã hkaprî në tee ri mëmoj tâ amnhî pumu në amnhî to kuwÿ. Nê tee ri më kot hpîrta kukamã hamaxpêr në mÿr kãm amnhî to kuwÿ. Kop apu Tirtûm kãm më kot kêp hpîr prãm kêt ronhÿx pre tanhmã në më kãm hkurê xwÿnhjê ho nhûm më hpîr kêt në. Jakamã nhûm pre ã amnhî to hwÿr anê. No ãm Tirtûm kãm prãm xã hkôt kãm amnhî nhîpêx prãm jakamã nhûm kuma no ãm tanhmã në më ho hkêt nhûm prem kupî. ⁸ Kêp Tirtûm Kra kumrêx tâ amnhî xã htÿx kãm hamak kãm ty. Jao Tirtûm kãm hprãm xã hkôt amnhî nhîpêx ã amnhî pumunh mex në. ⁹ Na pre amnhî xã htÿx kãm hamak o amnhî mex o amnhî mex ã më kãm amnhî to amnhîrît. Jakamã na hte më kot kapêr kôt ri amnhî nhîpêx o më pa xwÿnhjê mã më kot amnhî nhîpêx nyw jagjê në nhÿrmã Tirtûm më wa kuri më htîr tûm në më pa mã xwÿnhjê hä më harê. ¹⁰ Jakamã na pre Tirtûm Mekijetek pyrã në kêp patre maati kaxyw ãm.

Më pahte Kris kaga në më pahkurê

Wam Korîť 3.1-2, 13.11, 14.20; Epes 4.11-16

¹¹ Nê Jejus kêp më pahto Tirtûm wÿr xwÿnh maati hä harênhja inhmã ixprî hä më amã harênh par prãm tâ ka më kormã inhmar tÿx kêt në. Pa tee ri ixprî hä më amã harênh kaprÿ. Te më amã mar prãm kêt o amôr pyrãk. ¹² Amnepê mã më ate Kris kôt amnhî xunhwÿr në kapêr mar tÿx tâ kormã nhãm amnhî xô ri ho amnhî kwÿjê jahkre ho ri apa hkêt në. Te më ate hä ano

hkêt pyrãk jakamã na pa hte arî më amã kapêr kot amnhîrît mex xwÿnh kwÿ ho më ajahkre ho pa. No kot amnhîrît mex kêt xwÿnh o më ajahkre hkêt në. Te më hkarãre kot amnhî nhîpêx pyrãk o na ka htem amnhî nhîpêx o apa. Na hte më hkarãre mëo mex kur kêt në. ãm kormã katorxã hkã pix kaô. Ja pyrã në ãm Tirtûm kapêr kot amnhîrît mex xwÿnhnta pix na ka më mar tÿx o apa nom kapêr kot amnhîrît mex kêt xwÿnhja ka më mar mex kêt në.

¹³ Nê më hkarãre kormã Tirtûm kapêr mar kêt jakamã na htem kormã mëmoj mex në mëmoj punuj pumunh kêt në. Tã te më ate më kot amnhî nhîpêx pyrãk.

¹⁴ Më kot Tirtûm kapêr mar mex xwÿnhjaja na htem hprî hä kapêr piitã mar tÿx në. Kot amnhîrît mex xwÿnhnta mar tÿx në mãânên kot amnhîrît mex kêt xwÿnhja nhûm mëhprî hä piitã mar tÿx në. Te ho më aptãr kot mëo mex kur o pata pyrãk. Jao ra më aptãr jamaxpêr o hamaxpêr o ri pa në hamaxpêr o:

—Kot paj tãm amnhî nhîpêx o ri ixpa nhûm ja inhmã mex në. Nom kot paj axtem tanhmã amnhî tomnuj to nhûm ja ixpê omnuj në. Jakamã kot paj tãm amnhî nhîpêx pix o ri ixpa nhûm Tirtûm mã ja mex në. Anê.

6

¹⁻² Na pu prem ra Tirtûm kapêr kot amnhîrît mex xwÿnhnta kwÿ ma. Tãm na ja:

Kris kot më panê tanhmã amnhî nhîpêx to hä harênhja.

Nê më pahte amnhî tomnuj kaga hä kot më pamã karôja.

Nê amnhî kaxyw Tirtûm kôt më pajamaxpêr ã më pamã karôja.

Nê më pahpê Tirtûm kra hä amnhî to amnhîrît kaxyw më kot më pahkrã kumrãr ã pamã karôja.

Nê mē pahte Tirtūm mā tanhmā amnhī nhīpêx to ho papa hkukamā mē kot mē pahkrā hā ihkra jaxwÿr nê mē pahto Tirtūm wÿr ā mē pamā karōja. Nê mē pahtyk nê akupÿm mē pahťir ā mē pajarēnhja.

Nê Tirtūm kot nhÿrmā mē kot amnhī xā htÿx kām hamak tūm xā hwÿr mē kēp hkra hkēt xwÿnhjê janorja.

Mēmoja piitā pu mē ra harēnh mar tÿx nē. Prī hā kot amnhīrit mex. Tā kwa kêr pu mē hpānhā hijuk ri kot amnhīrit mex kēt xwÿnh kwÿ ma. Jao mē pahpê Tirtūm kra xāptār mex nē ri papa. ³ Jakamā kwa kêr pu mē kot amnhīrit mex xwÿnh kumrêx kwÿ ma nē hpānhā hijuk ri kot amnhīrit mex kēt xwÿnh kwÿ ma. Nē axpēn mā harēnh rāhā ho ri papa. Nā koja Tirtūm kām ja prām pu mē ā amnhī nhīpêx anhÿr rāhā o ri papa.

⁴⁻⁶ Na pre ra mē pahkwÿjaja Kris kaga nē htÿx ri amnhī nhīpêx o pa. Mē kot kapêr mar tÿx tā axtem nē hkaga jakamā koja mē axte kapêr mar kēt nē. Ra mē kām mar prām kēt. Kot puj mē tee ri axte mē kām harēnh o papa kaprÿ. Na prem hprī hā kuma. Tirtūm kām mē ho hkra hprām ā harēnhja nhūm prem hprī hā kuma nē kām mar prām nē hkôt amnhī xunhwÿ. Hāmri nhūm Tirtūm Karō te mē panhīpêx pyrā nē mē hkarō mā agjê nē mē kot amnhī to mex o pa kaxyw tanhmā mē hkrā hto nhūm prem ŷ hā tanhmā kām amnhī nhīpêx to ho pa. Nē kām Tirtūm kapêr mar prām nē. Nē axpēn mā mex o mex ā harēnh o pa. Nē aa mē kot mēmoj pumunh kēt kwÿ pumu nē axpēn mā harēnh o:

—Nā Krisja ām hāmri āhpumunh tÿx o āhpumunh tÿx. Koja nhÿrmā akupÿn mē pahwÿr wrÿ nē axte mē pamā āhpumunh tÿx o amnhīrit pu mē omu.

Anhÿr o kapêr tā tanhmā hamaxpêr to nē hkaga. Jakamā te mē kot axte Tirtūm pē Krata pī hā nhôr nē hpir pyrāk. Nē te mē piitā mē noo mā tanhmā haprÿ hto nē tanhmā kām kapêr punuj to pyrāk. Jakamā kot pu mē tee ri akupÿm tām mē unhwÿr prām kaprÿ.

⁷ Na hte Tirtūm mē pahto mex rāhā ho pa. Jao mē pamā mē pahpur ā na rē pu mē kamā panhō rūnh nē. Jakamā mē kot amnhī kaxyw Kris kôt hamaxpêr nē hkôt amnhī xunhwÿr prām xwÿnhjaja te mē hpur mex nē kamā mēmoj ô rūnh pyrāk. Nē urāk nē amnhī to mex o pa. ⁸ Nom koja mē hpur kām mēmoj nhīgrôt mex kēt japêr. Kamā mrônhi nē kahpare nē mēmoj punuj pix hapôj nhūm mē tee ri omu nē hkaga kurê kumrêx. Tā mē kot Kris kaga xwÿnhjaja te pur punuj kot amnhī nhīpêxta pyrāk nhūm Tirtūm te kēp pur nhō dôn pyrāk. Jao tee ri amnhī tā mē kot amnhī nhīpêx ā mē omu nē mē hkaga kurê kumrêx nē ma mē kot amnhī xā htÿx kām hamak tūm xā pē kuwyta wÿr mē rēnh pa.

⁹ E ixkrāmnhwÿjaja. Inhmā mē akīnh jakamā na pa ā mē amā mē kot Kris kaga xwÿnhjê jarēnh anē. Nom te mē ate mē urāk kēt. Kris kôt mē ate amnhī xunhwÿr xwÿnh mex na ka mē. Ra mē ate hkôt amnhī xunhwÿr tÿx jakamā te mē apê pur mexta pyrāk. ¹⁰ Na ka htem Kris kôt mē akwÿjê ho mex o ri apa. Te mē amā amnhī tā ma pyrāk o axpēn nhīpêx o ri apa nhūm Tirtūm ja hā mē apumu. Tā koja tanhmā ja hā mē ato mex to. Kot tām mē panhīpêx o pa jakamā koja tanhmā mē ate axpēn nhīpêx mex tota ā tanhmā mē ato mex to.

¹¹ Tā kêr ka mē arī ā axpēn nhīpêx anhÿr o ri apa rāhā ty kê nhÿrmā ja hā mē ato mex nē. Ā mē ate amnhī nhīpêx anhÿr o apaja na inhmā hprām tÿx kumrêx. ¹² Kot kaj mē ā amnhī nhīpêx anē hāmri nē amā

kaga nê apa hkêt nê. Nê amnhî nhîpêx o te Tirtûm kra hkwy htyk xwýnhjaja kormã htîr ri kot amnhî nhîpêxta pyrãk. Na prem amnhî kaxyw Tirtûm mã hamaxpêr tÿx rãhã ho pa. Kot mē ho mex ã mē hã amnhî jarēnhja nhũm prem amnhî tã kamã hamak rãhã ho pa. Tã amnhî tã kamã hamak o pa ry rax rãhã ty nhũm Tirtûm ra kot mē hã amnhî jarēnh xà hkôt mē ho mex nê. Tã kêr ka mē uràk nê ã amnhî nhîpêx anhÿr o ri apa rãhã ty. 13-15 ã na pre finat Apraãwja amnhî nhîpêx anê. Kormã hkra hkêt tã nhũm Tirtûm kãm hkra nê kanrêhã htãmnhwÿjê hkukamã tanhmã mē harēnh to nê kãm:

—Pa Apraãw. E inhma. Kot paj aprô mē war ato mex nê. Kot kaj war akra hãmri nê gaa nhũm akanrêhã war atãmnhwÿjaja ohtô rax kumrêx. ãm hãmri na pa ã mē hkukamã amã mē harēnh anê. Kot paj amã amnhî jarēnh xà hkôt ã anhîpêx anê. Ixpê mē anhîpêx xwýnh na pa ã amã amnhî jarēnh anê. Anê.

Tã ã kãm wa hkra jarēnh anhÿr tã nhũm wa tokyx hkra hkêt nê. Nom tee ri ja hã amnhî pumu nê Tirtûm kot wa kãm hêx ã hkamnhîx kêt nê. ãm hkamnâr rom ã hamaxpêr anê nê hamaxpêr o:

—Nà kot paj wa nhÿrmã ixkra. Tirtûm tãm kot wa inhã wa ixkra jarēnh kênã. Anê.

Tã nhũm amgrã xohtô rax kumrêx nê hapêx nhũm wa hkra. Nhũm axte amgrã hkwy hapêx nhũm wa hkanrêhã htãmnhwÿ hkwy. Ra Tirtûm kot mē hkukamã Apraãw mã mē harēnh xà hkôt. Tirtûmjaja hihtÿx o hihtÿx nê ãhpumunh o ãhpumunh jakamã na pre amnhî jarēnh xà hkôt ã wa kãm wa hkra nê wa htãmnhwÿjê nhôr anê. Kot ra wa kãm hã amnhî jarēnh xà hkôt. No ri nhãm mēhõ nhîxi jarēnh kôt wa kãm wa hkra jarēnh kêt nê. Mēhõ kot we hihtÿx o hihtÿx o Tirtûm jakre nhũm we ri

hixi jarēnh kôt ã wa kãm mē harēnh anê? Amrakati kumrêx. Jakamã na pre wa kãm amnhî jarēnh o:

—Nà ixãhpumunh xà hkôt na pa ã war amã war akra jarēnh anê. Anê.

¹⁶ No pika ja kamã na htem ã amnhî jarēnh anhÿr kêt nê. Na htem mēhõ mã tanhmã mēmoj tã amnhî jarēnh to kaxyw nê mēhõ hihtÿx o kot hakrenh xwýnh nhîxi jarēnh kôt amnhî jarê. Nê amnhî jarēnh o:

—Nà ixte jahti noo mã ã amã amnhî jarēnh anhÿr jakamã ãm hãmri na pa ã amnhî jarēnh anê. Anê.

Kot hã amnhî to hêx nhũm hihtÿx o kot hakrenh xwýnhhta kot hã harēnh mar nê hã tanhmã homnuj to pymaj na htem ã mē hixi jarēnh kôt mēmoj tã amnhî jarēnh anê. Hãmri nê kot tanhmã hã ho pymaj ra kot amnhî jarēnh xà hkôt tanhmã mēmoj nhîpêx to. ¹⁷ Nom Tirtûm na hte uràk nê nhãm mēhõ nhîxi jarēnh kôt ri mēmoj tã amnhî jarēnh kêt nê. Na hte tãm amnhî jarēnh xà hkôt mēmoj to anê nê aa hã amnhî to hêx kêt nê. Na pre mē pahpê hkrajê mã kãm:

—Kot paj nhÿrmã mē ato mex rax nê. ãm hãmri na pa mē amã amnhî jarê. Ixte amnhî pumunh xà hkôt na pa ã mē amã amnhî jarēnh anê. Anê.

Mē pahte ãm hãmri kot amnhî jarēnhja mar nê amnhî to hêx kêt ã omunh kurê kumrêx kaxyw. Koja Tirtûm mēmoj tã ã amnhî jarēnh anê hãmri nê hijuk ri axtem hpãnhã tanhmã amnhî jarēnh to hkêt nê. ¹⁸ Jakamã koja nhÿrmã ma amnhî wÿr mē pahto àpir ã amnhî jarê hãmri nê ãm hãmri amnhî jarê nê amnhî jarēnh o:

—Nà ãm hãmri ixte amnhî pumunh xà hkôt na pa mē amã ja hã amnhî jarê. Anê.

Koja ã amnhî jarēnh anê hãmri nê hijuk ri axte hpãnhã tanhmã mēmoj jarēnh to hkêt nê. Ra kot ã

amnhî jarênh anhÿrja koja arî râhã nê. Jakamã e kwa kêr ka mê tee ri amnhî kukamã ajamaxpêr o ri apa hkêt nê. Ra mê pamex nê ri papa kaxyw Tîrtûm kôt amnhî xunhwÿr jakamã kêr pu mê arî kot mê pahto mex rax xà hã arîgrota jamâr râhã ho ri papa.

¹⁹ Na hte kanôre ho htÿx xàja kanôre ho htÿx nhûm ma gô hkôt pa hkêt nê. Ja pyrã nê kot puj mê Tîrtûm kot mê pahto mex xà kamã pajamak o papa hãmri nê hkaga hkêt nê.

Amnepê mã na pre hte mê panhõ patre maatija Tîrtûm mã amnhî jarênh xà hã ixkre hwÿr agjê nê hkôt ã kupêxê ho hitom maati hwÿr agjê nê kamã mê ho Tîrtûm wÿr o kuhê. Tã nhûm Jesus akupÿm kaxkwa hwÿr api nê Tîrtûm ri hkrî hãmri nê patre maatita pânã tãm mê pahto hwÿr o hkrî. ²⁰ Na pre ra mê pakukamã kaxkwa hwÿr api nê kamã pa ho pa nê finat Mekijetekja pyrã nê kêp mê panhõ patre maati. Tã koja mê pahto Tîrtûm wÿr râhã nê pa ho pa.

7

Patre Mekijetek jarênh

¹⁻³ E kot paj ixprî hã mê amã tanhmã finat Mekijetekja jarênh to ka mê inhma. Krî pê Sarê kamã na pre kêp mê ô pahî nê mãânên kêp mêõ patre. Sarêja mê pakapêr kãm kêp: “Mê hamakêtkati nê ri mê pa xwÿnhjê nhõ krî.” Jakamã Mekijetekja mê pakapêr kãm kêp: “Mê hamakêtkati nê ri mê pa xwÿnhjê nhõ pahî.” Nê mãânên kêp: “Pahî kot tãm amnhî nhîpêx o pa xwÿnh.” Nê Mekijetek nhîpêêxã nê katorxã nê higêt nhîxija mê pahte harênh mar kêt. Nê kator ã arîgro nê htyk ã arîgroja mãânên mê pahte harênh mar kêt. Tîrtûm kapêr ã kagã htûm kot tanhmã ja jarênh to hkêt. Æm Jesus pyrã nê kêp patre hã mê ho Tîrtûm wÿr râhã ho pa xwÿnh pix

ã kot harênh. Æm ja pix na mê pahte harênh mar. Nê kot amnhî to rax xwÿnh jakamã na pre Apraãw nhÿri omu nê hã hpijaam kaxyw kãm hikukrêx kwÿ gô. Na pre hkwyjê mê ra mê urojê kutã amnhî xunhwÿ nê pijapu nê mê kêp mê ô pahî ho 4 nê mê himex. Nê mê kêp mê hikukrêx kwÿptã nê hamÿ nê ma ô krî hwÿr o mô. Nê kormã pry hã môr ri Mekijetek kaxpa nhûm amnhî wÿr omu nê kãm:

—Pa Apraãw? E kê Tîrtûm ato mex nê ka amex nê apa. Anê.

Nhûm amnhî tã kuma nê hkînh nê. Hãmri nê kãm mê hikukrêx kwÿptãr xwÿnhãta hkwy gô nhûm hamÿ nê ma amnhîm o mô. ⁴ Na pre Apraãw kot amnhî to rax ã omu nê kãm mêmota kwÿ gô. Kêp mê pahpê Ijaew pãr krax jakamã mãânên kot amnhî to rax tã Mekijetekja urãk nê kot amnhî to rax ã omu nê kãm mêmota kwÿ gô. ⁵ Finat Mojes kot Ijaew mã Tîrtûm kapêr jarênh xà hkôt kãm kugô. Na pre mê kãm:

—Mê akwÿ pê finat Rewi hkanrêhã htãmnhwÿjaja kêp mê anhõ patre jakamã kêr ka mê kãm mê akukrêx kwÿ nhõr o ri apa. Kot kaj mê akrit kêp 10 nê kãm ho pixi nê agô. Nê mê akàxpore kêp 10 nê kãm hõ gô. Kêr ka mê ã mê kãm mê akukrêx nê mê akrit kwÿ nhõr o apa anê. Nê kêr ka mê kãm mêmoj mex pix gô. Mê kêp mê akwÿ na mê. Mê apiitã mê apê Apraãw kanrêhã htãmnhwÿ jakamã kêr ka mê ã mê hipêx anhÿr o apa. Anê.

⁶ Tã Mekijetekja kêp Rewi hkwy hkêt tã nhûm Apraãw amarî ã hipêx anê nê kãm pahî htyk xwÿnhjê kukrêxta kwÿ gô. Jao hikukrêxta kamã mêmoj kêp 10 nhûm omu nê kamã kãm ho hpÿnh nê kugô. Na pre ã kãm mêmoj nhõr anê. Hãmri nhûm amnhîm hamÿ nê kãm:

—Nã ãm hãmri koja Tîrtûm ato mex rax nê. Anê.

Ra Tirtûm kot Apraãw kanrêhã kãm htãmnhwý ho ohtô nê mê hkukamã mê harênh jakamã nhûm Mekijetekja ã kãm Tirtûm kot ho mex ã harênh anê. ⁷Mê kot amnhî to rûnh o mê hakrenh xwýnh pixjaja Tirtûm kot mê ho mex kaxyw mê ho ãhwýr o pa jakamã na pre Apraãw o Tirtûm wý. Jao kot amnhî to rax o kot hakrenh ã amnhî to amnhîrit. ⁸Hãmri nê Rewi hkanrêhã htãmnhwý kot amnhî nhîpêx pyrã nê Apraãw o Tirtûm wý nê kêp mêmojta jamý. Mê urák nê mêmoj kamã kêp 10ja rûm ho hpýnh nê amnhîm hamý. Nom kot amnhî to rax o Rewi hkanrêhã htãmnhwýjê jakrenh. Tirtûm kapêr ã kagã htûm kot Rewi hkanrêhã htãmnhwýjê htyk par ã mê harênh tã tanhmã Mekijetek htyk ã harênh to hkêt jakamã kot amnhî to rax o kot Rewi hkwyjê jakrenh.

⁹⁻¹⁰Nê kot pry kamã Apraãw kaxparta ã kormã Rewi kator kêt tã kêp Apraãw kanrêhã htãmnhwý mã xwýnh. Jakamã nhûm Apraãwja Mekijetek mã mê hikukrêxta kwý nhôr jao te Rewi mã ôr pyrãk. Tã nhûm amgrã xohtô nê hapêx nhûm Rewi hkanrêhã htãmnhwýjajaja hapôj nê kêp mê ô patre nê ri pa. Jao Mekijetek pyrã nê mê kêp mê hikukrêx kwý jamýnh o ri pa.

¹¹Nê finat Mojes na pre Ijaewjê mã tanhmã Rewi hkanrêhã htãmnhwýjê jarênh to. Kormã mê hapôx kêt ri nhûm hkwyjê mã tanhmã mê harênh to. Mê kêp patre hã mê harê. Tã nhûm mê hapôj nê hprêk nê mê ho Tirtûm wýr o ri mê hkôt pa. Nom mê kot tãm amnhî nhîpêx o pa kaxyw na prem tanhmã mê hkrã hto hkêt nê. Tanhmã kot mê amnhî to nê ã mê hipêx anê? Jakamã nhûm Tirtûm mê hpãnhã mê pahwýr kýj rûm mêhõja mê nhûm mê pahwýr wrý. Nom kêp Rewi hkanrêhã htãmnhwý hkêt. Nê mãânên kêp Rewi hpãm Arãw kanrêhã htãmnhwý hkêt.

Axtem te Mekijetek kot amnhî nhîpêx pyrãk xwýnh na pre. Jejus Krisja. Tãm na pre mê pahwýr wrý hãmri nê tanhmã mê pahkrã hto pu mê ý hã tãm amnhî nhîpêx o papa. ¹²No Mojes kapêr kot Rewi hkanrêhã htãmnhwý pixjaja kêp mê ho Tirtûm wýr xwýnh ã mê harênh. Tã nhûm Krisja mê pahwýr wrý nê mê hpãnhã kêp mê pahto ãhwýr o pa xwýnh. Jakamã na pu htem axte Mojes kapêr kôt amnhî nhîpêx kêt nê. Pãnhã Jejus kapêr kôt pix mã amnhî nhîpêx o papa.

¹³⁻¹⁴Nê Jejus kêp Rewi hkanrêhã htãmnhwý hkêt. Katorxã hkôt kêp Apraãw tãmnhwý Juta hkanrêhã htãmnhwý na pre. Ra mê pahte ja mar mex. Aa Juta hkanrêhã htãmnhwýjajaja kêp patre hkêt. Na pre Tirtûm jajê mã mê kot mêmoj nhôr xã hã mêsti kunîhtita ã kãm mêmoj nhôr nê hkwyjê ho hwýr ã mê kãm karõ hkêt nê. ãm Apraãw tãmnhwý Rewi hkanrêhã htãmnhwýjê mã pix mã na pre ã mê kãm ja hã karõ anê. Tã nhûm Jejus wrý nê mê hpãnhã mê pahto hwýr o pa. Mê urák nê kêp Rewi hkanrêhã htãmnhwý hkêt axtem kêp Juta hkanrêhã htãmnhwý htã Rewi hkwyjê hpãnhã mê pahto Tirtûm wýr o pa.

Mekijetek pyrã nê mê pahto Tirtûm wýr xwýnh jarênh

¹⁵⁻¹⁹Nê Ijaewja na prem Mojes kapêr mar týx nê hkôt amnhî nhîpêx tã aa amnhî to mex kêt nhûm Tirtûm tee ri ja hã mê omu nê hamaxpêr o:

—Nã Rewi hkanrêhã htãmnhwýjajaja kêp mê ô patre nê mê ho ixwýr o pa htã nhûm mê arî htýx ri amnhî tomnuj pix o pa. Jakamã koja mê axte ri mê ho ixwýr o pa hkêt nê. Anê.

Hãmri nê mê pakaxyw mê pahto ãhwýr xwýnhja ta nê ãm. Kra Jejusja nhûm kuta nê ãm. Tãm na hte Rewi hkwyjê rom tanhmã mê

pahkrâ hto pu mê kukwak ri tām amnhî nhîpêx nê Tirtûm kôt amnhî nhîpêx mex nê. Jao nhÿrmâ ma mê pahte Tirtûm nhô krî hwÿr paxâpirja jamâr o papa.

Jejus na hte Mekijetek pyrâ nê kêp mê panhõ patre maati nê mê pahto Tirtûm wÿr râhâ ho pa. Kêp Rewi hkanrêhâ htâmnhwÿ hkêt tâ Tirtûm pyrâ nê kêp htîr tûm nê pa ho pa xwÿnh jakamâ na pre Tirtûmja mê pakaxyw kuta nê mê pahwÿr kumê. Kapêr â kagâ htûm kot harênh kot:

Kot kaj Mekijetek pyrâ nê mê ho ixwÿr râhâ ho ri apa. Anê.

20-21 No Rewi hkwÿjê mã na pre â kapêr anhÿr kêt nê. Âm Jejus pix mã â kapêr anê nê kâm:

E kot kaj apê mê ho ixwÿr râhâ o apa xwÿnh. Kot paj nhÿrmâ apânhâ axtem mêhõ xâm kêt nê. Âm kapxipix kot kaj mê ho ixwÿr o apa râhâ ho râhâ. Âm hãmri na pa amâ â ixkapêr anê. Ixpê Pahi Maati hâ â ajarênh anê.

22 Anhÿr jao Jejus kot amnhî to rax o Rewi hkwÿjê jakrenh par â ho amnhîrît. Mê kot Ijaew mã Tirtûm kapêr jarênh nhûm mê kot mar nom hkôt amnhî nhîpêx kêt jakamâ nhûm Tirtûm mê hpânhâ Jejus xâm. Tapxipix na hte tanhmâ mê pahkrâ hto pu mê tām amnhî nhîpêx mex o ri papa. ²³ Rewi hkwÿjêjaja na prem axpên mÿr pê kêp mêõ patre nê ri pa htâ htyk pa nê hapêx. ²⁴ Nom Jejusja htîr tûm nê pa ho pa xwÿnh jakamâ koja mê urâk nê aa hapêx kêt. Koja mê pahto Tirtûm wÿr râhâ ho pa nê aa jam urer kêt nê. ²⁵ â Jejus kot amnhî nhîpêx anhÿr jakamâ te kêp Tirtûm wÿr mê panhõ pry pyrâk. Na pu htem hkôt amnhî xunhwÿ nhûm mê panê mê pahte amnhî tomnuj piitâ rênh pa nê mê pahpê Tirtûm kra hâ mê pajarê.

²⁶ Nê âm hãmri kêp mê pahto Tirtûm wÿr xwÿnh maati mex na. Mê pakurom tām kot amnhî nhîpêx mex o pa nê aa kot tanhmâ amnhî tomnuj to hkêt. Tâ ra Tirtûm kot amnhî wÿr ho àpir jakamâ nhûm ra kuri mê pahto hwÿr râhâ ho pa. ²⁷ Nê kot amnhî to rax o wam mêõ patre maati jê jakrenh. Wamtaja na prem hkwÿjê pyrâ nê amnhî tomnuj o pa. Jakamâ na prem apkati mê amnhî tomnuj pânâ Tirtûm mã mêmoy gô nê kâm amnhî jarê nê amnhî to kuwÿ. Hãmri nê rî kormâ kot nhâm mê hwÿr mê mrrar xwÿnhjê mã mê ho anê nê mê hpânhâ Tirtûm mã mêmoy nhôr pê mê ho kuwÿ. No kêt Jejusja wam patre maati rom aa kot amnhî tomnuj kêt jakamâ na pre hte mê urâk nê amnhî tomnuj pânâ Tirtûm mã mêmoy nhôr o pa hkêt nê. Âm mê papajaja na pre mê pahte amnhî tomnuj pânâ htyk o kâm amnhîre. Âm htyk tipxi htâ mê pahpiitâ mê pahpânâ amnhîrer pa. Jakamâ koja axte â amnhî nhîpêx anhÿr kêt nê. Mo kaxyw kot kêt axte mê panê ty?

²⁸ Mojes kapêr kôt na pre Ijaew amnhîm Rewi hkwÿjê xunhwÿ nhûm mê kêp mê õ patre nê ri pa. Tâ no nhûm mê urâk nê arî amnhî tomnuj o pa nhûm Tirtûm tee ri mê omu nê mê hpânhâ mê pakaxyw Krata xâm nê kâm:

—Nâ kapxipix mê kurom ate tām amnhî nhîpêx o apa jakamâ kapxipix kot kaj mê hpânhâ mê ho ixwÿr o apa râhâ ho râhâ. Anê.

8

Jejus kêp mê pahto Tirtûm wÿr xwÿnh maati hâ harênh

Rukre 22.20; Sikûn Korî 3.6-11

¹ E kot paj axtem tanhmâ mê amâ mê pahto Tirtûm wÿr xwÿnh maatita jarênh to ka mê inhma. Na hte kaxkwa kamâ Tirtûm nhîhkô hâ hkrî. Îhkô hâ kêp Pahi Maati hâ hkrî xâ hâ upôk rûm hkrî ho hkrî.

² Wam patre maatiyaja na prem Tirtûm nhôrkwÿ kaàkre wÿr mra nê kamã hitom maati kamã mê ho Tirtûm wÿr o pa. Nom nhûm Jejus na hte mê kurom kaxkwa kamã Tirtûm nhôrkwÿ mex kãm mê pahto àhwÿr o hkrî. Ôrkwÿ kaàkreja na prem ïhkra ho hipêx nom kaxkwa kamã ôrkwÿ mexja na pre mêhõ ïhkra ho hipêx kêt nê. Tirtûm na pre tanhmã hipêx to nhûm kamã Jejusja mê pahto hwÿr o hkrî.

³ Nê mê pahpê Ijaew nhõ patre maatiyaja na prem mê ho hwÿr kaxyw nê mê kot amnhî tomnuj pãnhã Tirtûm mã mêmôj nhôr kôt mê ho kuwÿ. No Kris na hte ã amnhî nhîpêx anhÿr kêt nê. Ra htyk o kot kãm amnhî nhî nhôr jakamã na hte wam patre maati pyrà nê xatã kãm mêmôj nhôr kêt nê.

⁴ Tã na hte arî Ijaew Mojes kapêr kôt amnhîm Rewi hkwÿ kêp mê õ patre kaxyw mê unhwÿ nhûm mê ho Tirtûm wÿr o pa. No Jejus kêp Rewi hkanrêhã htãmnhwÿ hkêt. Katorxã hkôt kêp Juta hkanrêhã htãmnhwÿ jakamã kop apu arî jar pika ja kamã htîr nê pa ronhÿx Ijaew nhõ patre pyrà nê kêp mê ho Tirtûm wÿr o pa xwÿnh kêt. Æm Rewi hkanrêhã htãmnhwÿ pixjaja na htem mê kaxyw kãm mêmôj gõ nê hkôt mê ho kuwÿ. ⁵ Jar na htem arî ã amnhî nhîpêx anhÿr o pa nom kaxkwa kamã na htem ã amnhî nhîpêx anhÿr hkêt nê.

Nê jar Tirtûm nhôrkwÿ kaàkreja te kot kaxkwa kamã ôrkwÿ mexta pyràk. Na pre Mojes ôrkwÿ kaàkre nhîpêx kaxyw nhûm Tirtûm tanhmã kãm hã karõ hto nê kãm:

—E jãã hixêt prêk nhîmõk ã axãmta ã na pa pre amã ixkreta kukamã ixprî hã tanhmã mê ate hipêx to hã amã karõ. Tã kêr ka ã hipêx anê. Anê.

Hãmri nhûm kuma nê kot kãm hã karõ xã hkôt hipêx. Hãmri nhûm mê õ patre maati ixkreja kamã mê

ho Tirtûm wÿr o pa. Na prem ã amnhî nhîpêx anhÿr o pa.

⁶ Tã nhûm ra Tirtûm axtem mê hpãnhã mê pakaxyw Kris xãm nhûm hte mê pahto hwÿr mex o wamtajê jakre. Na hte kaxkwa kamã mê pahpiitã mê pahpumunh mex rãhã ho hkrî nê wamtajê rom tanhmã mê pahkrã hto pu mê tãm amnhî nhîpêx o ri papa. Tirtûm kot finat Mojes mã kapêrja mex nê nom axtem na pre. Tã kapêr nyw na mex o kot wam kapêr jakrenh. Kapêr nyw kôt kot puj mê pahtyk tã akupÿm pahtîr nê nhÿrmã Tirtûm mê Jejus wa kuri pamex nê pahtîr tûm nê papa ho papa nê axte pahtyk kêt nê. ⁷ Kêp apu Tirtûm kot Mojes mã kapêr kôt mê kot tãm amnhî nhîpêx o pa ronhÿx pre Tirtûm axte kapêr nyw ã kagã hkêt nê. ⁸ Nom wam kapêr tûmta na pre mê mar tÿx htã arî amnhî tomnuj rãhã ho pa nhûm tee ri ja hã mê omu nê mê kãm:

Nà kot paj axte nhÿrmã mê apê Ijaew mã axtem tanhmã ixkapêr to.

⁹ Amnepê mê anhîgêtjê mã na pa pre ixkapêr.

Na pa pre Ejit pê mê kator nê mê kot tanhmã amnhî nhîpêx to ho pa kaxyw tanhmã hã mê kãm karõ hto.

Nom na prem ixkapêr ma nê ãm kuma nê ixkôt amnhî nhîpêx kêt nê. Pa tee ri ja hã mê omu hãmri nê mê hkaga.

¹⁰ Tã kot paj mê apê mê hkanrêhã mê htãmnhwÿ nywjë mã axtem ixkapêr ka mê ixkapêr nywja ma.

Kot paj nhÿrmã tanhmã mê akrã hto ka mê ixkapêr nyw mar tÿx nê hã ano htÿx nê ho apa.

Nê akînh nê apa.

Nê ixkôt ri amnhî nhîpêx mex o apa.

Nê axpên mã ijarênh o: “Nà ãm hãmri Tirtûm kêp mê panhõ

Tirtûm na.” Anhÿr o ri axpên mã ijarênh o apa.

Pa amnhî tâ mê ama nê mê apumu nê amnhî xwar mê apê ixkra hã amnhîm mê ajarê.

11 Kot kaj mê apiitã ixte amnhî nhîpêx kôt ixpumunh mex o ri apa. Mê akàxpore rûnh xwÿnhjaja nê mê akàxpore hkryre xwÿnhjaja mê apiitã ixpumunh mex jakamã kot kaj mê ri axte ixtã tanhmã axpên kujêr to ho ri apa hkêt nê.

12 Nê kot paj mê ato mex rax o ixpa. Nê axte tanhmã mê ate amnhî tomnu hto ho apaja mã ija-maxpêr kêt nê. Anê.

13 Nê koja mëmoj ra htûm hãmri nê hapêx tokyx anê. Ja pyrã nê na pre Tirtûm mê pamã kapêr tûmta jarênh o:

—E kêr ka mê axte ixkapêr tûm mar kêt nê. Pãnhã ixkapêr nyw pix mãn mar o apa nê âm kôt pix mã mãn amnhî nhîpêx rãhã ho ri apa. Anê.

9

Tirtûm nhõrkwÿ kaàkre jarênh

1 Nê amnepê m na pre finat Mojesja mê panhîgêt nê mê pahpãmjê mã tanhmã Tirtûm nhõrkwÿ kaàkre jarênh to. Tanhmã mê kot hipêx to nê kamã tanhmã amnhî nhîpêx to hã mê kãm karõ. Nê kamã tanhmã mê kot amnhî to Tirtûm wÿr to hã mê kãm karõ. Nê tanhmã mê hkwÿjê ho hwÿr toja nhûm pre mãânên mê kãm hã karõ. No Tirtûm nhõrkwÿ kaàkreja kêp õrkwÿ kumrêx kêt. Âm mê kot omunh nê kaxkwa kamã õrkwÿ kumrêx mã hamaxpêr kaxyw na pre. 2 Jakamã nhûm prem Mojes kapêr ma nê hipêx. Kamã hitom hamêxkrut. Wam hitom kamã na pre kanê hprêeti xãm nê kutã mêsti xãm. Nê mêsti nhîmõk ã Tirtûm mã õ pãwti jaxwÿ. Mê panhõ patre na pre htem Tirtûm mã kugõ nê mêsti ã

kãm haxwÿ hãmri nê hkwÿjê ho kuwÿ. Tã hitom ja na prem kêp Tirtûm nhõ hitom mex ã harê.

3-4 Nê hitom wa hkaêx kãm na pre kupêxê ho hakwakre kahê xãja ajêt. Haturxã kamã hitomja na prem Tirtûm nhõ hitom maati hã harê. Tirtûm na pre te hirã htÿx kãm hwÿr wrÿ nê te kamã hkrî pyrãk. Nê kamã na pre Tirtûm mã mëhkuxwã xã ho xêt xã hã mê kunîhtija kuhê. Na prem õr o hipêx nê kamã âm nhûm kuhê. Nhûm pre hte mëõ patre hwÿr agjê nê kutã kuhê nê mê ho Tirtûm wÿ. Nê mê kunîhti haxwÿja hitom maati kamã kuhê. Na prem pÿ ho hipêx nê õr o hpro nê kamã âm. Mêstija kaxwÿnh kãm na pre htem mëmoj jagjê.

Tirtûm kot Ijaew mã tanhmã mê kot amnhî nhîpêx to ho pa hã karõ nê kên po hã mê kãm hã kagãja nhûm prem kamã kuxã nhûm hikwÿ.

Nê mãânên õr o xijereja xã nhûm hikwÿ. Nê xijere kamã amnepê mã Tirtûm kot kaxkwa rûm mê hwÿr mëõ rênh kwÿ hikwÿ. Mêõja mê kot kãm: “Manã” anhÿr xwÿnhja na prem hkwÿ hkawrà nê xijere kamã kugjê hãmri nê mêsti kamã kuxã.

Nê finat Arãw nhõ kô kot ho amnhî kaxpar xã htûmta nhûm prem kamã kuxã. Tirtûm kot tanhmã ho nhûm kurûm pixõrã muxre hapõx xwÿnhnta nhûm prem mãânên mê kunîhti kamã kuxã nhûm hikwÿ.

5 Nê himõk ã Tirtûm kapêr o wrÿk xwÿnh wa hkarõ nhîpêxja wa hamêxkrut nê axpên kutã wa hkõn krã ho hkrî. Axpên wÿr hara koror nê wa hkrî. Patre maati kot omunh nê Tirtûm kot mê hkôt pa ho paja mã hamaxpêr kaxyw. Nê wa hkaêx kãm ahkaprÿja Tirtûm kot mê nê mê kot amnhî tomnuj rênh mã hamaxpêr xã na pre.

Ã Tirtûm nhõrkwÿ kaàkre kot

anhÿr. No kot paj ixprî hã mẽ amã piitã harênh par kêt nê. ⁶Na pre hte mẽõ patre apkati mẽ wam hitom wÿr agjê nê kamã Ijaew ho Tirtûm wÿr o pa. ⁷No hitom maatiã am mẽ õ patre maati pix na pre hwÿr agjê. Nom apkati mẽ hwÿr pa nê gjêx kêt am amgrã pÿnh kãm hwÿr gjêx pÿnh nê. Nê hwÿr gjêx kaxyw nê mẽmo mry pa nê hkamrô ru nê o pa nê hitom maati hwÿr ho agjê. Hãmri nê ho mês kunÿhti nhîmök kamî nê Tirtûm mã kãm:

—Pa Tirtûm. E ota mry kamrôta. Mẽ ixpê akwÿyaja mẽ ixte amnhî tomnuj jakamã na pa mẽ amnhî pãnhã mẽmo mry nhökre jakã nê kupî nê hkamrô ru nê man awÿr o mra. Te kot mẽ ixte amnhî tomnuj mÿrapê htyk pyrãk. Jakamã kwa ã mẽ ixte amnhî nhîpêx anhÿrja ã mẽ ixpumunh hkôt mẽ inhnê mẽ ixte amnhî tomnuj rê.

Anhÿr o mẽ amnhî to kuwÿ. ⁸Nê patre maati pix na pre hitom maatiã wÿr agjê nê mẽ ho Tirtûm wÿ. Ijaew na prem ixkre kapem hamãr o kuhê nê hwÿr gjêx kêt nê. Tirtûm Karô kot hã mẽ kãm karô xã hkôt. Te Tirtûm pê amÿm kuhê pyrãk. Tã na htem jarãhã arî Ijaew kanrêhã mẽ hkra nê mẽ htãmnhwÿyaja ã amnhî nhîpêx anhÿr o pa. Jao mẽ higêtjê pyrã nê Tirtûm pê amÿm kuhê.

⁹Mẽ kot arî Tirtûm mã mry hpar nê hkamrô ho mẽmoj kamîr nê amnhî to hwÿr o pa htã na htem arî hamaxpêr punuj pix o pa.

¹⁰Tirtûm kapêr tûm kot tanhmã mẽmoj tã mẽ kãm karô hto.

Na pre tanhmã mẽ apkur xã hã mẽ kãm karô hto nhûm htem pix kur o pa.

Nê tanhmã mẽ hkôm xã hã mẽ kãm karô hto nhûm htem pix o hkôm o pa.

Nê tanhmã amnhîmnuj to hã tanhmã mẽ kot amnhî kuhônho to hã karôja nhûm htem hkôt

pix mã tanhmã amnhî kuhônho to ho pa.

Nê tanhmã mẽ kot ri mẽ hikukrêx kuhônho to hã mẽ kãm karôja nhûm htem kôt pix mã tanhmã kuhônho to ho pa.

Ã na pre Tirtûm Kris kukamã mẽ kãm mẽmoj tã karô rax anê. Kris kutêp pix mã ã mẽ kot amnhî nhîpêx anhÿr kaxyw. No mẽ pahte arî ã amnhî nhîpêx anhÿr kaxyw kêt. Na pre ra Kris mẽ pahwÿr wrÿ nê Tirtûm kapêr tûm o hapêx nê hpãnhã mẽ pamã kapêr nyw jarê pu mẽ hpãnhã nywta kôt pix mã amnhî nhîpêx o papa. Kapêr nywja mex o mex. Nê mex o wamta jakrenh.

Kris htyk o mẽ pahte amnhî tomnuj pãnhã amnhîrer ã harênh

¹¹Tã na pre Krisja tãm mẽ pahwÿr wrÿ nê kêp mẽ pahto Tirtûm wÿr xwÿnh maati nê patre hpãnhã mẽ pahto hwÿr o pa. Nom jar pika ja kamã mẽ kot mẽ ïhkra ho Tirtûm nhôrkwÿ kaàkre nhîpêxta wÿr àr nê kamã mẽ pahto hwÿr kaxyw na pre wrÿk kêt nê. Na pre ra akupÿm kaxkwa hwÿr api nê kamã ôrkwÿ mex wÿr axà nê kamã tanhmã mẽ pahto mex to nê tanhmã mẽ pahto Tirtûm wÿr to rãhã ho hkrî. ¹²ã kaxkwa kamã Tirtûm nhô hitom maatiã wÿr àr tipxi htã mẽ pahpiitã mẽ pahte amnhî tomnuj pãnhã amnhîrer pa. Nom mẽmo mry kamrô ho mẽ pahpãnhã amnhîrer kêt nê. Móx kamrô rÿ motre kamrô ho mẽ pahpãnhã amnhîrer kêt nê. Amnhî kamrô ho na pre mẽ pahpãnhã amnhîre. Tyk nê hkamrô pikapîrta o mẽ pahpiitã mẽ pahpãnhã amnhîrer pa.

¹³Nê amnepêm Ijaew kot Tirtûm kapêr tûm kôt amnhî nhîpêx mex o pa hkêt jakamã nhûm tee ri mẽ omu nê mẽ kot amnhî tomnuj o mẽ pa xwÿnh ã mẽ harê. Jakamã na pre mẽõ patre xatã mry kamrô

ho mē hkamī. Mōx kamrō nē motre kamrō ho mē hkamī. Na pre mōx krare hkwȳ hpa nē ho hxēt nē hprà ho hkwȳjē kamī. Ā na prem xatā mē hipêx anhÿr o pa. Tirtūm kot ja hā mē omunh nē mē mex ā mē harēnh kaxyw. Nom te mē krāhkā pix mex pyrā nē mē hkrā kaxwÿnh kām arī hamaxpēr punuj o pa. ¹⁴ ā na prem amnhī nhīpêx anhÿr o pa. Nom Krisja mē kurom aa tanhmā amnhī tomnuj to hkēt jakamā na pre mē pahte amnhī tomnuj xwÿnhjē nē ty. Te mē kot amnhī nē mōx rÿ motre hpar nē hkamrō runhta pyrāk o amnhī nhīpêx nē mē panē Tirtūm mā amnhī gō nhūm pre mē kām hkurē xwÿnhjaja kupī. Na pre Tirtūm Karōja ā kot mē panē htyk anhÿr kaxyw tanhmā ho hihtÿx to. Karōja aa hapêx kēt kumrêx rāhā nē pa ho pa xwÿnh jakamā na pre Kris tykja kukamā tanhmā ho hihtÿx to nhūm mē panē ty. Tapxipix na mē pahte tām amnhī nhīpêx o papa kaxyw kēp tanhmā mē pahkrā hto xwÿnh. Jakamā na pu htem ra pajamaxpēr nyw o pajamaxpēr o papa nē pajamaxpēr o:

—Na pa pre tee ri inhmā amnhī krā hkōt tām amnhī nhīpêx o ixpa hprām kaprÿ nē ām amnhī tomnuj pix o ri ixpa. Tā Kris kot inhnē htyk o hkamrō pikapīr ā harēnh ma nē amnhī kaxyw hkōt ijamaxpēr tÿx nē nhūm amnhī tā ixpumu nē ixte tām amnhī nhīpêx o ixpa kaxyw ixām. Jakamā kot paj ām Tirtūm pix mā kām tanhmā amnhī nhīpêx to ho ri ixpa. Tīr rāhā nē pa ho pa xwÿnh jakamā kot paj nhÿrmā kuri urāk nē ixtīr tūm nē ixpa ho ixpa. Anē.

¹⁵ Nē amnepē mā na prem piitā Tirtūm kapēr tūm kōt amnhī nhīpêx mex o pa hkēt nē. Mē kot xatā hkōt amnhī nhīpêx o pa hā amnhī jarēnh tā hkōt amnhī nhīpêx kēt nē. Jakamā na pre Kris wrÿ nē mē pahte hkōt amnhī xunhwÿr mā

xwÿnhjē mā Tirtūm kapēr nyw jarē nē mē pamā:

—Kot paj mē anē ty nhūm Tirtūm ā ixte amnhī nhīpêx anhÿrja kukwak ri mē ato mex rāhā ho pa. Anē.

Hāmri nē amnhī jarēnh xā hkōt mē pahte amnhī tomnuj piitā hpānhā amnhīrer kaxyw mē panē ty. ¹⁶⁻¹⁷ Te jar pika ja kamā mēhō htyk kukamā hkrajē mā tanhmā amnhī jarēnh to pyrāk. Na htem htyk kaxyw nē hkrajē mā:

—Nā kot paj mēmo arīgro hā ty ka mē inhmÿr pé ixpē ixkukrêx kwÿ o arīk.

Anhÿr o na htem amnhī jarē. Hāmri nē ty nhūm hkrajaja amnhīm ō mēmoj to arīk pa. Mē hipêxā kukwak ri mē hikukrêx mex nē mÿr pé o pa. No kormā htīr ri nhūm mē kormā kēp hamÿnh kēt nē. Ja pyrā nē na pre Tirtūmja Jejus htyk kukwak ri tanhmā mē pahto mex to pu mē kukwak ri mē pamex nē pahkīnh nē ri papa.

¹⁸ Nē Tirtūm kapēr tūm kōt na pre hte mē ō patre mry pa nē ām hkamrō runh kōt pix mā mē ho Tirtūm wÿr o pa nhūm amnhī tā mē omunh xā hkōt mē kuma nē tanhmā mē ho mex to.

¹⁹ Na pre finat Mojesja Ijaew mā Tirtūm kapēr tūm piitā harē nē harēnh pa hāmri nē mōx ōxpī nē kaxyw motre hōxpī. Hāmri nē xijere kamā hamē wa hkamrō runh pa nē kamā gō hkwȳ ru. Hāmri nē kaxyw mēmo pī hpa hkryre pé “isop” jarēnhja kwÿ kukē. Nē kaxyw ōwēhti hkī kamrêkre hkwȳ hpy nē isop mē ho pihkār pa nē mry kamrō o go. Hāmri nē ho hkwȳjē kamī. Nē ho Tirtūm kapēr ā kagā tūmta kamī. ²⁰⁻²² Hāmri nē ho anhÿr pa nē mē kām:

—Nā na Tirtūmja ixte mry kamrō ho mē akamīr pumunh kōt mē pamā kapēr o: “E kot kaj mē ixkapēr kōt amnhī nhīpêx o ri apa hā kot paj tanhmā mē ato mex to rāhā ho ri ixpa ka mē amex nē

akĩnh nê ajamakêtkati nê ri apa. Jakamã kêr ka mê mry kamrô ho mêmôj piitã hkamĩr pa. Nê ho amnhĩ kamĩ. Kêr pa ja hã mê apumu hãmri nê axte tanhmã mê ate amnhĩ tomnuj tota mã ija-maxpêr kêt nê.” Anê. ã na Tĩrtũm mê pamã kapêr anê. Anê.

Hãmri nê hpãnhã mry kamrôta o ôrkwỹ kaàkre kamĩ. Nê hkre kamã mêmôj kuhê xwỹnh piitã nhũm ho hkamĩr pa. ã na pre mê ô patre mê mex kaxyw mê hipêx anhỹr o pa. Mê kot tōhã mêmôj to hpỹnhre nê ho hkamĩr kêt jakamã kironhỹx pre mêmôj piitã ã hipêx anhỹr o pa. Kop apu mê kot mry hpar nê hkamrô runh kêt ronhỹx pre Tĩrtũm arĩ mê kot amnhĩ tomnuj mã hamaxpêr rãhã ho pa.

²³ Na prem ã Tĩrtũm nhõrkwỹ kaàkre kamã mêmôj kuhê xwỹnh piitã mex kaxyw hipêx anê. Te Tĩrtũm kot mê pahto mex nhũm mê pahte nhỹrmã ma kaxkwa hwỹr ô krĩ hwỹr paxàpirta pyrã nê. Nom mê kot mry hpar nê hkamrô runhta kukwak ri mê pamex nê papa hkêt. ãm mēhō kamrō kukwak ri mê pamex xwỹnhhta pix kukwak ri na mê pahpê pahtĩr tũm nê papa mã xwỹnh. Ja na mex o mry kamrô piitã hakrenh pa. ²⁴ Jejus Krisja pix kukwak ri. Tãm na pre patre pyrã nê mê pahto Tĩrtũm wỹr kaxyw mê ĩhkra ho Tĩrtũm nhõrkwỹ kaàkre nhĩpêxta wỹr gjêx kêt nê. ãm ixkre kaàkre pix na pre. Na pre kaxkwa kamã Tĩrtũm nhõ krĩ hwỹr axã. Tã arĩ kamã Tĩrtũm nhĩhkô hã mê pahto hwỹr rãhã ho hkrĩ.

²⁵ Nê Ijaew nhõ patre maati na hte amgrã mê ôrkwỹ kaàkre kamã hitom maati hwỹr gjêx tipxi. Nê amnhĩ kôt mry kamrô ru nê ho agjê. Tĩrtũm kot hã omunh nê axte mê kot amnhĩ tomnuj mã hamaxpêr hkêt kaxyw. Nom Kris na pre mê urak nê mêmô mry pa nê Tĩrtũm mã hkamrô kapĩr kêt

nê. Kamrô na pre mê panê axkapĩ. Nom patre pyrã nê amgrã mê ã amnhĩ nhĩpêx anhỹr kêt nê. Na pre htyk o Tĩrtũm mã amnhĩ nhõr tipxi. ²⁶ Kêp apu patre pyrã nê amgrã mê mê panê htyk o pa ronhỹx ra mê panê htyk xohtô rax kumrêx. Nhỹx pre amnepê mã Tĩrtũm kot mêmôj piitã ho katorta rũm amgrã mê mê panê htyk o pa ho hkrax. Jao xatã htyk o amgrã xohtô rax kumrêx. Nom ja kot anhỹr kêt. Na pre mê pahwỹr wrỹ nê mê panê htyk tipxi htã htykja o mê pahte amnhĩ tomnuj piitã hpãnhã amnhĩrer par kumrêx. Jakamã mo kaxyw koja axte ty?

²⁷ ãm pahtyk tipxi htã koja Tĩrtũm nhỹrmã akupỹm mê pahpiitã mê pahto pahtĩr nê ahpỹnhã tanhmã mê pajarēnh to nê ahpỹnhã tanhmã mê panhĩpêx to. Kormã mê pahtĩr ri mê pahte amnhĩ nhĩpêx ã mê pahpumunh xã hkôt tanhmã mê panhĩpêx to. ²⁸ Ja pyrã nê na pre Krisja ãm mê panê htyk tipxi htã mê pahto ohtô nê mê panê mê pahte amnhĩ tomnuj piitã rēnh pa. Hãmri nhũm Tĩrtũm akupỹm ho htĩr nê akupỹm amnhĩ wỹr ho api. Tã koja nhỹrmã akupỹn mê pahwỹr wrỹ. Nom axte mê pahte amnhĩ tomnuj pãnhã amnhĩ rer kaxyw mê panê htyk kaxyw wrỹk kêt nê. Ra kot mê pahte amnhĩ tomnuj pãnhã amnhĩrer kēnã. Koja akupỹn wrỹ nê mê pahte amnhĩ wỹr kamã pajamak o papa xwỹnhjaja ma akupỹm amnhĩ kôt kaxkwa hwỹr mê pahto àpir pa. Ra mê pahtyk tã nhũm akupỹm mê pahto mê pahtĩr nê ma amnhĩ kôt mê pahto àpir pa pu mê kuri pamex nê pahtĩr tũm nê papa ho papa.

10

Kris kot mê panê htyk tipxi hã harēnh

¹ Nê arĩ mê kot Tĩrtũm kapêr tũm kôt amnhĩ nhĩpêx o mê pa

xwýnhjaja kormã hprĩ hã Tĩrtũm kot tanhmã mẽ pahto mex to hã harênh mar tỳx kêt. Na prem kormã hkwy pix ma. Na hte mẽ õ patreja amgrã mẽ kãnhmã kaxkwa hwỳr mry kamrõta pẽ nẽ mẽ amnhĩ to Tĩrtũm wỳ. Kot ja hã mẽ omunh nẽ axte mẽ kot amnhĩ tomnuj mã hamaxpêr hkêt kaxyw. Tã ã mẽ kot amnhĩ nhĩpêx anhỳr tã arĩ Tĩrtũm kapêr kwým amnhĩ nhĩpêx rãhã ² jakamã na prem xatã kãm mẽmo mry kamrõ runh o pa. Kêp apu tãm amnhĩ nhĩpêx nẽ tãm ri hamaxpêr ronhỳx arĩ ã amnhĩ nhĩpêx anhỳr o pa hkêt nẽ. Nẽ xatã amnhĩ pãnhã mry hpar nẽ hkamrõ ho Tĩrtũm nhõrkwỹ kaàkre kamã mẽmoj kamĩr kêt nẽ. ³ Nom na prem tãm amnhĩ nhĩpêx o pa hkêt nẽ. Mẽ kot amgrã mẽ Tĩrtũm kot mẽ nẽ mẽ kot amnhĩ tomnuj rênh kaxyw mẽ kot kãm mẽmo mry hpar o pa htã no ãm hkôt amnhĩ nhĩpêx xwýnh ã amnhĩ jarênh kêt nẽ. Arĩ mẽ kot amnhĩ tomnuj o pa jakamã na prem mry hparta ã amnhĩ pumax nẽ tee ri amnhĩ kukamã hamaxpêr o hkaprĩ nẽ pa. ⁴ Nom na hte mõx kamrõ rỳ motre kamrõja mẽ panê mẽ pahte amnhĩ tomnuj rênh kêt nẽ. ⁵⁻⁸ Jakamã na pre Krisja mẽ pahwỳr nojarêt nẽ Tĩrtũm mã amnhĩ jarênh o:

Pa Tĩrtũm? E kot paj ma mẽ hwỳr wrỳ.

Mẽ kot amnhĩ pãnhã amã mry hparta apê hprãm nõkati nẽ amã hkĩnh kêt.

Ate mẽ nẽ mẽ kot amnhĩ tomnuj rênh kaxyw mẽ kot amã mẽmo mry hparta amã hprãm kêt. ãm ixkukamã na ka pre ã mẽ kot amnhĩ nhĩpêx anhỳr kaxyw mẽ kãm ja hã karõ.

Mẽ kot mry nhĩpêx o te pa ixte mẽ nẽ ixtyk nẽ ixkamrõ pikapĩr pyrãk o na prem ixkukamã ã amnhĩ nhĩpêx anê.

Jakamã na ka ra mẽ kaxyw inhmã inhĩ gõ pa mẽ urãk nẽ inhĩ ho inhĩ.

Tã kot paj ma mẽ hwỳr wrỳ. Ixte amã hprãm xã hkôt pix mã ixte tanhmã amã mnhĩ nhĩpêx to ho ixpa kaxyw. Akapêr ã kagã htũm kot tanhmã ixkukamã ijarênh to xã hkôt kot wrỳ nẽ ã amã amnhĩ nhĩpêx anê. Anê.

Hãmri nẽ man mẽ pahwỳr wrỳ. ⁹ Kot Tĩrtũm kapêr tũm o hapêx par nẽ hpãnhã tãm mẽ panê htyk kaxyw wrỳ. Jakamã na pre nojarêt nẽ Tĩrtũm mã amnhĩ jarênh o:

—E ixte amã hprãm xã hkôt amnhĩ nhĩpêx kaxyw kot paj ma mẽ hwỳr wrỳ.

¹⁰ Anhỳr jakamã wrỳ nẽ Tĩrtũm kãm hprãm xã hkôt mẽ panê ty. Na pre nhãm mẽhõ mẽ kãm hkurê xwýnhjê mã õr nhũm mẽ kot hpĩr nhũm amarĩ htyk kêt nẽ. Na pre amnhĩ grõnh kôt mẽ kãm amnhĩ gõ nhũm prem kupĩ. Hãmri nhũm htyk o mẽ pahte hkôt amnhĩ xunhwỳr xwýnhjê o Tĩrtũm kra. Mẽ kot xatã mry hparta rom htyk tipxi tã mẽ pahpiitã mẽ pahte amnhĩ tomnuj pãnhã amnhĩrer pa.

¹¹ Nẽ mẽ õ patrejaja na htem apkati mẽ Tĩrtũm nhõrkwỹ kaàkre kamã kãm tanhmã amnhĩ nhĩpêx to. Nẽ apkati mẽ hkwyjê hpãnhã mry hkwy hpa nẽ hkamrõ ru nẽ mẽ ho Tĩrtũm wỳ. Tã nom ja hã mẽ omunh xã hkôt mẽ nẽ mẽ kot amnhĩ tomnuj rênh kêt nẽ.

¹² No kêt Kris na pre mẽ kot xatã mry hpar xwýnhnta rom ãm htyk tipxi htã mẽ pahte amnhĩ tomnuj piitã hpãnhã amnhĩre. Hãmri nẽ ma akupỹm kaxkwa hwỳr api nẽ Tĩrtũm nhĩhkõ hã Pahĩ Maati hkrĩ xã kamã upõk rũm hkrĩ ho hkrĩ. ¹³ Kojã kuri hkrĩ rãhã nhũm Tĩrtũmja ihkram mẽ kot kutã amnhĩ xunhwỳr xwýnhjê jaxãr pa. Ja kaxyw na kormã kuri hamãr o hkrĩ. ¹⁴ ãm htyk tipxi htã htykja

o mẽ pahte hkôt amnhĩ xunhwÿr xwÿnhjê ho Tirtũm kra pu mẽ ra hpãnhã tãm amnhĩ nhĩpêx rãhã ho papa. Nê pajamaxpêr mex o ri papa. Tirtũm kãm hprãm xà hkôt.

¹⁵ Amnepêm mẽ kot Tirtũm nhÿ hã kapêr jarênh o mẽ pa xwÿnhjaja na prem mẽ panhĩgêjtê mã kapêr o pa. Tirtũm Karô nhÿ hã mẽ kãm kapêr nê mẽ kãm:

¹⁶—E na Tirtũm mẽ pamã amnhĩ jarê nê amnhĩ jarênh o:

Kot paj nhÿrmã axtem ixkapêr nyw o mẽ amã ixkapêr.

Nê mẽ akrãm hajê ka mẽ mar tÿx pê hã ano htÿx nê ho apa.

Ixkapêr tũm na pa pre mẽ amã kên pota ã hã kagã.

Nom ixkapêr nyw kot paj axtem mẽ akrãm hajê.

¹⁷ Nê kot paj axte mẽ ate amnhĩ tomnuj mã ijamaxpêr kêt nê.

Anhÿr o mẽ pamã amnhĩ jarênh. Anê.

¹⁸ Tã ra axte mẽ pahte amnhĩ tomnuj mã hamaxpêr kêt ã kot amnhĩ jarênh jakamã mo kaxyw kot pu mẽ arĩ amnhĩ pãnhã kãm mẽmo mry hpar nê hkamrô runh o papa? Tã mẽ pahkwÿjaja na hte arĩ kãm ja ho anhÿr prãm o pa. E kwa mẽ axte ã amnhĩ nhĩpêx anhÿr kêt nê ixkwÿjaja.

Akupÿm mẽ pahte amnhĩ nhĩpêx tũm o paxujanãr kêt ã mẽ pamã karô

Matêwre 27.51; Rukre 23.45; Rômãn 5.1-2; Epes 3.12; Eprêw 4.14-16

¹⁹⁻²⁰ E ixkrãmnhwÿjaja. Ra Jejus kot mẽ panê htyk o hkamrô pikapÿr jakamã na pu htem arĩ tee ri amnhĩ kukamã pajamaxpêr hkêt nê. Tirtũm axte kot mẽ pahte amnhĩ tomnuj mã hamaxpêr kêt jakamã na pu htem paxãmnhĩx amnhĩ to hwÿr o papa. Te paxãmnhĩx ôrkwÿ kaãkre kamã hitom maati hwÿr pagjêx nê kamã amnhĩ to hwÿrta pyrãk. Jao ra mẽ papamjaja amnhĩ to hwÿr o papa nhũm patre axte

mẽ pahto hwÿr kêt nê. Jejus na pre htyk o mẽ pamã hitom maati wÿr hakwakre kahêxã hã kupêxêja kôt ã ho axkjê. Jao mẽ paxãmnhĩx hwÿr mẽ pagjêx kaxyw mẽ pamã kahê xà mẽ. ²¹ Tã ra kêp Tirtũm nhô krĩ kamã mẽ pahto hwÿr xwÿnh maati na. Nê mex kumrêx o jar pika ja kamã patre kot mẽ ho hwÿr o pa xwÿnhnta jakrenh. ²² Jakamã e kwa kêr pu mẽ mãmri paxãmnhĩx amnhĩ to Tirtũm wÿr o papa. Ra Jejus kot mẽ panê htyk nhũm mẽ pahte amnhĩ kaxyw hkôt pajamaxpêr rãhã ho papa jakamã kêr pu mẽ axte mẽ pahpê amnhĩ tomnuj xwÿnh ã amnhĩ jarênh kêt nê. Kêr pu mẽ nhÿrmã tanhmã pajamaxpêr punuj to rÿ tanhmã amnhĩ tomnuj to hãmri nê tee ri ja hã amnhĩ pumu nê pahkaprĩ kamã amnhĩ to Tirtũm wÿr kurê kumrêx. Jejus ra kot mẽ pahte amnhĩ tomnuj pãnhã amnhĩrer par jakamã kot puj mẽ Tirtũm mã tanhmã mẽ pahte amnhĩ tomnuj to hã amnhĩ jarê nhũm mẽ pama nê axte kãm hamaxpêr kêt nê. Pu mẽ te paxwÿr nê pahte amnhĩ nê pagrã htyk kuhõnh par nê akupÿm pamex pyrãk. Nê axte paxãmnhĩx amnhĩ to Tirtũm wÿr o papa.

²³ Nê mẽ kot Kris ã tanhmã mẽ pahto htã kwa kêr pu mẽ tee ri amnhĩ kukamã pajamaxpêr kêt nê. Rÿ pajamaxpêr o:

—Konên. Koja mẽ tanhmã hamaxpêr to nê Kris ã ixpĩ rÿ ko. Pa apu mẽ kot ixpĩr pymaj akupÿm ixte amnhĩ nhĩpêx tũm o awjanã nê akupÿm hkôt amnhĩ nhĩpêx japêr rÿ ko. Anê.

Kwa pu mẽ tee ri ã pajamaxpêr anhÿr hkêt nê. Pu kêt mẽ pajamaxpêr o:

—Nã mẽ kot Kris ã tanhmã ixto htã kot paj aa hkaga hkêt nê. Mẽ kot hã ixpĩr mã tã kot paj hkaga hkêt kumrêx.

Anhÿr ã amnhĩ jarê. ²⁴ Nê kêr ka mẽ akwÿjê mã anê kê mẽ mẽmoj

to axpên kutâ nojarêt rāhā ho ri axpên kôt pa. Jao tanhmā axpên to mex to o ri axpên kôt pa.

²⁵ Na pre ra mẽ pahkwýjaja tanhmā hamaxpêr to nê axte mẽ pahkôt pikuprõnh nê Tirtûm kapêr mar o hkrî hkêt nê. No kêr pu mẽ ho mẽ urāk kêt nê. Kêr pu mẽ arî xatā axpên wýr akuprõ nê mẽ pahte tee ri amnhî kukamā pajamaxpêr nê axpên mã pakapêr o papa. Kêt mẽ panhõ Pahihtija ra akupýn mẽ pahwýr wryk kaxyw jakamā kwa kêr pu mẽ kutêp arî axpên mã pajamaxpêr mex nhõr pê tām axpên nhîpêx mex rāhā ho i papa.

²⁶ Mẽ pahkwýjaja kot Tirtûm kapêr mar mex tã na htem kuma nê âm kuma. Kwa kêr ka mẽ ho mẽ urāk kêt nê. Kris kot mẽ panê htyk ã harênhja mẽ kot mar mex tã na htem kuma nê âm kuma nê hkaga kumrêx. Jakamā mẽhõ koja Kris pyrà nê htyk o mẽ kot amnhî tomnuj pānhā amnhîre? Nà amrakati kumrêx. Âm Jejus pix na pre Tirtûm ja kaxyw âm. Tapxipix na pre ã mẽ panê amnhî nhîpêx anê. Tã nhũm mẽ kot hkagaja mýrapê koja mẽ nhýrmā mẽ tāmjjaja mẽ kot amnhî tomnuj pānhā amnhîre. ²⁷ Mẽ kot Tirtûm kutā amnhî xunhwýr xwýnh na mẽ. Amnepêm na pre Tirtûm mẽ kot kutā amnhî xunhwýr xwýnhjê kaxyw mẽ kot amnhî xā htýx kamā hamak tũm xāta nhîpêx. Tã ra mẽ kot Jejus kaga jakamā koja nhýrmā ma hwýr mẽ rênh pa nhũm mẽ tee ri kām hwýr pa hprām kêt kaprý.

²⁸ Amnepêm finat Mojesja kormā htír ri na pre hte mẽhõ pixi nê kapêr kaga nê akupým kot amnhî nhîpêx tũm o awjanā nê tanhmā amnhî tomnuj to nhũm hkwyjaja ja hā omu. Tanhmān axkrut rý axkrunêpxi nê ja hā omu. Hāmri nê ma Mojes wýr mra nê axpên kôt kām tanhmā kot amnhî tomnuj to hā harê. Hāmri nhũm harênh ma

nê mẽ kām hā amýnê nhũm tee ri kām htír prām kaprý. Mẽ kot akupým amnhî nhîpêx tũm o ujanār nê amnhî tomnuj o paja mýrapê na prem mẽ kupa. Á na pre htem mẽ hipêx anhýr o pa.

²⁹ Nê koja mẽhõ tanhmā Tirtûm Kra Jejus o kapêr punuj to. Tirtûm kapêr ã kagā htũm kot ra mẽ kot kêp Tirtûm Kra hā harênh mar mex tã axtem nê tanhmā ho kapêr punuj to ho pa. Kot mẽ panê htyk nê hkamrõ pikapír kôt kot mẽ pahte amnhî tomnuj pānhā amnhîrer ã harênh mar tã kuma nê âm kuma nê harênh o:

—Nà mẽ pahpyrà nê kot amnhî tomnuj xwýnh nhũm mẽ kot hā hpír kênā. Na pre mẽ panê htyk kêt nê.

Anhýr ã harê. Nê Tirtûm Karõja nhũm mãānên tanhmā ho kapêr punuj to. Kêp mẽ pakutā nojarêt xwýnh tã nhũm axtem nê tanhmā ho kapêr punuj to. Mýrapê koja nhýrmā Tirtûm tanhmā homnuj týx to. Homnuj týx o mẽ kot Mojes kapêr kaga nhũm mýrapê kot mẽ hparta jakre. Jakamā kwa kêr ka mẽ ã amnhî nhîpêx anhýr hkêt nê. ³⁰ Tirtûm kapêr ã kagā htũm kot ja jarênh kot:

Ixpê Tirtûm kot paj mẽ kot amnhî tomnuj xwýnhjê homnuj týx nê. Anê.

Nê mẽ kot tām amnhî nhîpêx xwýnhjê jarênh kot:

Mẽ kot amnhî to mex o mẽ pa xwýnhjaja kot paj nhýrmā mẽ ho mex rax nê. No mẽ kot amnhî tomnuj o mẽ pa xwýnhjaja kot paj nhýrmā mẽ homnuj týx nê. Anê.

Ra mẽ pahte ã kapêr anhýr xwýnhja kot amnhî nhîpêx ã omunh mex.

³¹ Jakamā kwa mẽ okora. Kêr ka mẽ amnhî to mex rāhā ho ri apa. Tirtûm rāhā ho rāhā nê hihtýx o hihtýx jakamā koja mẽmoj tã akamā gryk ka amex kêt o amex kêt.

³² Nê amnepê mē ate Jejus kôt amnhî xunhwÿr krax kām na prem Jejus ā mē atomnuj tÿx tā ka prem mē umaj hkaga hkêt nê. Tā kêr ka mē arî ā amnhî nhîpêx anhÿrja kukamā mǎn ajamaxpêr nê hā anohtÿx rāhā ho apa. Jao arî ā amnhî nhîpêx anê nê mē umaj Jejus kaga hkêt nê. ³³ Na prem mē piitā mē noo mǎ tanhmā mē amā kapêr punuj to nê tanhmā mē anhîpêx to. Nê tōhā tanhmā mē akwÿjê homnuj tÿx to ka mē tee ri ja hā mē omu nê mē kamā axukaprî nê. Nê mē hkôt axkamê nhûm prem mǎ mē ato anê nê. ³⁴ Na prem mē akwÿjê jagjê ka prem ja hā mē omu nê ma mē hagiênh xā hā ixkre hwÿr mē hwÿr mra nê tanhmā mē ho mex to. Nhûm prem mē apê mē akukrêx kwÿptā nê ma amnhîm o pa ka mē am amnhî tā mē omu nê ajamaxpêr o:

—Kwār mē māmri ma amnhîm hamÿn o pa. Koja nhÿrmā Tirtûm inhmā ixkukrêx mex o kot ja jakrenhta kwÿ nhôr rax nê pa amnhîm hamÿ nhûm aa ixpê hapêx kêt nê. Hāmri nhûm axte mēhō aa ixpê utār kêt nê. Jar mē ixkukrêxta mexti hā. Anê.

Jao mē kot mē apê utār tā ka mē akaprî nā apa hkêt nê. Ā amnhî kukamā ajamaxpêr anhÿr pē akînh nê apa. Ām hāmri na ka prem ā amnhî kukamā ajamaxpêr anê. ³⁵ Na ka prem mē kutā amnhî to htÿx kām ā apa anê. Tā kwa kêr ka mē arî ā amnhî nhîpêx anhÿr o ri apa. Kêr kê nhÿrmā Tirtûm ja hā mē ato mex rax nê.

³⁶ Nê kêr ka mē arî amnhî kaxyw Tirtûm mǎ ajamaxpêr rāhā ho ri apa. Mē kot Jejus ā tanhmā mē ato htā ka mē hkaga hkêt nê. Kot kaj mē ā amnhî nhîpêx anhÿr o apa nhûm Tirtûm ja hā mē apumu nhûm ja kām mex nê. Hāmri nhûm ra kot amnhî jarênh xā hkôt nhÿrmā amā mēmoj mex nhôr rax

nê. Jakamā kwa mē kot tanhmā mē anhîpêx to hā amnhî pumu nê tee ri amnhî kukamā ajamaxpêr o ri akaprî hkêt nê. Kot kaj mē Kris ā apunuj rāhā apa hkêt nê. ³⁷ Tirtûm kapêr ā kaga htûm kot Jejus jarênh kot:

Koja mē pahwÿr wrÿk mǎ xwÿnhhta tokyx wrÿ. Na ra wrÿk kaxyw nojarêt. Anê.

³⁸ Nê harênh kot:

Ixkôt mē kot amnhî nhîpêx mex o mē pa xwÿnhjaja koja mē amnhî kaxyw ixkôt hamaxpêr tÿx rāhā nê. Jao nhÿrmā ixri htîr tûm nê mex rāhā nê pa ho pa.

Nê koja mēhō ixkaga pa tee ri kām ixkînh kêt ā omu. Anê.

³⁹ No mē papajaja te mē pahte mē kot Jejus kaga nhûm kot amnhî tā mē homnuj mǎ xwÿnhjê pyrāk kêt. Arî mē pahte amnhî kaxyw hkôt pajamaxpêr rāhā jakamā koja nhÿrmā amnhî wÿr mē pahto api.

11

Amnhî kaxyw Tirtûm kôt mē hamaxpêr mex xwÿnhjê jarênh

Sikûn Pêtre 3.5-7

¹ Nê na htem Kris ā mē panhîpêx kati ho pa pu mē pahpunuj rāhā nê ri papa. Te Kris kot mē pahto mex kêt pyrāk pu htem mēmoj punuj pix kām ri papa nê kormā Tirtûm kot mē pahto mex ā amnhî tā omunh kêt nê. Tā ā mē pahte anhÿr tā kwa kêr pu mē arî kapêr kôt amnhî nhîpêx rāhā ho papa. Mē pahte pano ho Tirtûm pumunh kêt tā kot mē pahkôt pa ho pa hā amnhî kaxyw kām pajamaxpêr tÿx rāhā ho papa. Jakamā na pu htem am kapêr kôt pix mǎ amnhî nhîpêx o papa. ² Amnepê mǎ mē pakukamā mē panhîgêjtaja na prem no ho Tirtûm pumunh kêt tā amnhî kaxyw kām hamaxpêr nê kapêr kôt amnhî nhîpêx o pa nhûm amnhî tā mē omu nhûm ja kām mex nê.

³ Nê mē papajaja na pu htem pajwýja mē pano ho omunh kêt tâ amnhîm harênh o:

—Nà amnepêm kormã mēmoj pitã amrakati ri nhûm Tirtûm ãm kapêr pix o mēmoj piitã ho kato. Ixte inhno ho ja hã omunh kêt tâ kot ã amnhî nhîpêx anhÿr ã amnhî jarênhja jakamã kot paj hkôt ijamaxpêr tÿx rãhã ho ri ixpa. Anê.

⁴ Na pre finat Atãw nhîpêx nê kaxyw hprô Ewa nhîpêx. Hãmri nhûm wa hkra Apewja htô Kaï rom amnhî kaxyw Tirtûm kôt hamaxpêr tÿx o pa. Jakamã nhûm wa Tirtûm mã mēmoj gô. Nhûm Apew kot Kaï rom Tirtûm kãm hprãm xà hkôt kãm mēmoj nhôr jakamã nhûm amnhî tâ omu nê kot amnhî to mex xwÿnh ã harê nê kot kãm ôr xwÿnhnta nhûm mex ã harê. Tã Apew amnepêm htyk tâ pu htem arî harênh mar rãhã ho papa nê kãm pajamaxpêr o:

—Apew na pre hte amnhî kaxyw Tirtûm kôt hamaxpêr tÿx rãhã ho pa.

Anhÿr ã kãm pajamaxpêr.

⁵ Nê Atãw kanrêhã htãmnhwÿ Enojja na pre haxwÿja amnhî kaxyw Tirtûm mã hamaxpêr tÿx o pa. Jao hkamnâr rom kãm hprãm xà hkôt pix mã tanhmã kãm amnhî nhîpêx to ho pa nhûm amnhî tâ omu nê amnhîm mex ã harê. Jakamã na pre htyk kêt nê. Na pre Tirtûm htîr rãhã ma amnhî wÿr ho api nhûm hkwyjaja tee ri hapêr o pa. Jakamã na pu htem arî axpên mã Enok kot amnhî kaxyw Tirtûm kôt hamaxpêr mex o pa hã harênh o papa. ⁶ Mē kot amnhî kaxyw Tirtûm mã mē hamaxpêr kêt xwÿnhjaja na hte Tirtûm mē mex ã mē harênh kêt nê. Tã mē papajaja kêr pu mē Enok pyrã nê amnhî kaxyw kãm pajamaxpêr tÿx rãhã ho papa. Nê pajamaxpêr o:

—Tirtûmja htîr rãhã ho rãhã. Koja nhÿrmã mē ixte amnhî kaxyw hkôt

ijamaxpêr xwÿnhjê ho mex rax nê. Nã koja mē ixto anê.

Anhÿr o mē pajamaxpêr nhûm Tirtûm amnhî tâ mē pajamaxpêr ã mē pahpumu nê mē pahte amnhî to mex ã mē pajarê. No mē kot amnhî kaxyw kãm hamaxpêr kêt xwÿnhjaja na hte ã mē harênh anhÿr kêt nê.

⁷ Nê Enok kanrêhã htãmnhwÿ Noehtija na pre haxwÿja amnhî kaxyw Tirtûm mã hamaxpêr tÿx o pa. Jao hkamnâr rom amnhîm pâr raxja nhîpêx. Na pre ra Tirtûm na rax kukamã tanhmã kãm ujarênh to. Kormã aa na wrÿk nhûm Noehiti kot omunh kêt tâ Tirtûm kapêr ma nê mar xà hkôt amnhîm pâr rax kumrêxta nhîpêx. Ôrkwÿ kamã hkwyjê mē mē amnhîm hipêx. No mē kot Tirtûm kapêr mar nê ãm mar xwÿnhjaja na pre Tirtûm gô tam o mē hanhi nê mē himex pa. Nom Noehtija nhûm kot amnhî to mex xwÿnh ã harê. Kot amnhî kaxyw hkôt hamaxpêr rãhã ho pa jakamã nhûm pre ã mex ã harênh anê.

⁸ Nê Noehiti kanrêhã htãmnhwÿ Apraãwja na pre haxwÿja amnhî kaxyw Tirtûm mã hamaxpêr tÿx o pa. Na pre Tirtûm kot kãm pika nhôr ã kãm amnhî jarê nê ra kot ma hwÿr mênh kaxyw. Hãmri nhûm Apraãw kuma nê hkamnâr rom ô pika kaga nê ma pika hõja wÿr pa. Aa kot ma hwÿr môr nê omunh kêt tâ Tirtûm kapêr mar xà hkôt ô pika kaga nê ma hwÿr pa ho pa. ⁹ Hãmri nê hwÿr pøj nê omu nhûm Tirtûm kãm:

—E pika ja kot paj nhÿrmã akanrêhã akra nê atãmnhwÿjê mã kugô. Anê.

Hãmri nhûm kuma nê pikaja kamã pa ho pa. Ra kamã axtem mē uro hkwyjaja ri pa nhûm Tirtûm kormã mē kator kêt ri nhûm mē ô pika hwÿr pøj nê mē kamã pa ho pa. Nom amnhîm ôrkwÿ mex nhîpêx kêt nê. Kormã kêp ô pika

kumrêx kêt ã hkamnhîx jakamã ãm mry kà o ixkre nhîpêx nê kamã pa ho pa. Nê nhÿhÿm pa kaxyw nê kugrà nê ma amnhî kôt o pa. Amnhî kaxyw Tîrtûm mã hamaxpêr rãhã jakamã ã amnhî nhîpêx anhÿr o pa.

Nê Apraãw kra Ijak nê htãmnhwÿ Jakoja wa Apraãw pyrã nê mry kà ho òrkwÿ nê ma amnhî kôt o pa. Nhÿm Tîrtûm kot Apraãw mã kapêr pyrã nê wa kãm wa hkanrêhã wa hkra nê wa htãmnhwÿjê mã pika nhôr ã amnhî kukamã wa kãm amnhî jarê. ¹⁰ Jakamã nhÿm Apraãw kormã Tîrtûm nhô krî hwÿr àpir xa hã amnhî tã hamãr pê kot ho ò pika mã xwÿnhjê kamã pa ho pa. Kaxkwa hwÿr àpir mã xwÿnhta mex kumrêx. Tîrtûm kot hipêx jakamã koja mry kà ho ixkre nhîpêxta rom aa hapêx kêt nê. Jakamã nhÿm Apraãw mẽ pahpyrà nê ma kot hwÿr àpir xa hã amnhî tã Tîrtûm jamãr rãhã ho pa. ¹¹⁻¹² Tã ra hpigêt tÿx nê hkurê hkêt nê pa. Te ra ri htyk kaxyw pa pyrãk. Nhÿm hprô Sara haxwÿja hpigêx tÿx nê. Kamrô hkêt ã amgrã xohtô rax kumrêx. Nhÿm wa aa hkra hkêt nê pa htã nhÿm Tîrtûm nhÿrmã wa hkra hã wa kãm awjarê nhÿm wa kuma nê amnhî kaxyw hkôt hamaxpêr kurê kumrêx. Nom amnhî tã kuma nê tee ri amnhî kukamã hamaxpêr hkêt nê. Na pre wa kuma nê axpên mã:

—Nã kot puj xep hãmri tã pahkra. Tîrtûm kot hã ã pajarênh anhÿr kênã. Anê.

Tã ã wa kot hkra kaxyw Tîrtûm mã hamaxpêr anhÿr jakamã na pre Apraãwja hprô htu. Ra wa hamê hpigêt tÿx kumrêx tã nhÿm htu. Nhÿm wa hkra Ijakja gaa nê wa kãm kato. Jakamã nhÿm wa gaa nê rî wa hkanrêhã wa htãmnhwÿ xohtô rax o ohtô rax. Ohtô ho kaxkwa kamã kanhêti xohtô jakre. Nê ohtô ho gô xujanãr mÿri pikahti grã hkryre jakre. Jakamã nhÿm mẽ

tee ri mẽ ho kôta hpar mã. Nhÿm Apraãw kêp mẽ hpar krax. ¹³ Tã nhÿm Apraãw nê Ijak nê Jakoja mẽ ri pa tãmtã nê htyk pa nê hapêx. Tîrtûm kormã kot mẽ kãm pika jarênhta nhôr xwÿj ri ra htyk pa. Nom kormã mẽ htÿr ri tanhmã kãm hamaxpêr to nê hamaxpêr o:

—Nã kormã Tîrtûm kot mẽ inhmã pika jarênhja nhôr kêt tã koja nhÿrmã inhmÿr pê ixkanrêhã ixkra nê ixtãmnhwÿjê mã kugô. Nã koja mẽ kãm kugô. Ra kot hã inhmã amnhî jarênh kênã kot kêt mẽ kãm òr kêt.

Anhÿr o kaxyw kãm hamaxpêr rãhã ho pa. Jao hkÿnh nê hamaxpêr o:

—Nã inhô krîja axtem na. Na pa hte jar pika ja kamã ri mẽ hkôt ri ixpa. Te ixpê mẽ uro pyrã nê ri mẽ hkôt ixpa nom jar inhô krî hkêt. Inhô krî na kêt axte mã. Anê.

¹⁴⁻¹⁵ Na prem ã ò krî hõ hkukamã hamaxpêr anhÿr o pa. No ò krî htÿmta mẽ kot hkaga nê pika hõ hwÿr môr xwÿnhta na prem ã harênh anhÿr kêt nê. Kop apu mẽ kot amnhîm tãm mãn jarênh ronhÿx prem awjanã nê ma akupÿm hwÿr pa. Na prem axtem krî hõ jarê nê kormã hwÿr môr kêt ã amnhî jarênh o pa. ¹⁶ Tã nhÿ krî na prem ã harênh anê? Nã kaxkwa kamã Tîrtûm nhô krîja. Tãm na mex kumrêx jakamã nhÿm prem kormã hwÿr ma àpir xa hã mẽ pahpyrà nê amnhî tã Tîrtûm jamãr rãhã ho pa nhÿm amnhî tã mẽ omu nê hkÿnh nê. Nê mẽ kot tãm amnhî nhîpêx ã mẽ omu nê mẽ kêp hkra hã mẽ harênh ã hpijaãm kêt nê. Hãmri nê mẽ kutêp tanhmã ò krî ho mex to ho pa.

¹⁷⁻¹⁸ Na pre ra tanhmã Apraãw mã hkra Ijakja jarênh to nê kãm:

—Akra Ijak kanrêhã hkra nê htãmnhwÿjaja koja mẽ kêp ixkra. Anê.

Tã ra kot amnhî tã Apraãw kamã hamak kaxyw hkukamã hamaxpêr nê hamaxpêr o:

—Xà we Apraãw kãm ixkĩnh tỳx kumrêx nê kãm ixkôt amnhĩ nhĩpêx rãhã ho pa hprãm nà? Xà we kãm ixkĩnh tỳx o hkraata jakrenh? E pa kop we ja hã amnhĩ tã kamã ama nê omu mãn. Anê.

Hãmri nê kot hkra hpĩr nê kãm òr ã kãm karõ. Hãmri nhũm kuma nê ra kot kãm hpĩr kaxyw. Kot Tĩrtũm kot amnhĩ nhĩpêx ã omunh mex jakamã hkamnãr rom kot kãm hpĩr kaxyw. ¹⁹ Nê hamaxpêr o:

—Nà Tĩrtũm akupỹm kot mē ho htĩr xwỹnh kēnã.

Anhỹr jakamã kãm hkra hpĩr pyma hkêt nê ra kot kãm hpĩr mã tã nhũm Tĩrtũm amnhĩ tã omu nê nê kãm kapêr nhũm kuma nê hpĩr kêt nê wa ma akupỹm òrkwỹ hwỹr mō. Tã ã kot hkra nhĩpêx anhỹr jakamã Apraãw mã te Ijak htyk nê akupỹm htĩr pyrãk.

²⁰ Nê Ijakja na pre haxwỹja amnhĩ kaxyw Tĩrtũm mã hamaxpêr tỳx o pa. Jao hkamnãr rom amnhĩ kra wa kãm Tĩrtũm kot wa ho mex kukamã wa kãm harê. Kra Jako mē Ejauta wa kãm harê nê wa kãm:

—E koja nhỹrmã Tĩrtũm inhmỹr pē war ato mex rãhã ho pa. Anê.

²¹ Nê Jakoja na pre haxwỹja amnhĩ kaxyw Tĩrtũm mã hamaxpêr tỳx o pa. Jao hkamnãr rom hkra Juje mã Tĩrtũm kot mē ho mex kukamã harê. Na pre Jakoja hkra nê htãmnhwỹ mē hpimràatã hprãm xà ma Ejit wỹr pa nê kamã pa ho pa. Tã nhũm Jako hpigêt tỳx nê ra htyk kaxyw. Hãmri nê hkra Juje mē hkra wa mē kãm kapêr nê mē kãm:

—E na pa tee amnhĩ kamã ama. Na pa ra ixyk kaxyw. Nom koja Tĩrtũm nhỹrmã inhmỹr pē mē ato mex rax nê. Anê.

Hãmri nê amnhĩ kaxpar xà hã pĩ hã amnhĩ kaxpa nê kãnhmã xa nê Tĩrtũm mã mex o mex ã harê. Hãmri nê akupỹm nōr xà kamã nōn ty.

²² Nê Jujeja na pre haxwỹja amnhĩ kaxyw Tĩrtũm mã hamaxpêr tỳx o pa. Jao htyk kaxyw nê hkamnãr rom hkwyjê mã tanhmã amnhĩ jarēnh to. Ra hpigêt nê htyk kaxyw nê hkwyjê mã tanhmã amnhĩ tã karõ hto nê mē kãm:

—E na pa ra ixyk kaxyw. Tã koja Tĩrtũm inhmỹr pē nhỹrmã Ejit rũm mē akator nê ma akupỹm mē panhõ pika hwỹr mē ato pa. Ra kot mē panhigêt Apraãw mã amnhĩ jarēnh xà hkôt. Jakamã kwa mē inhma. Kêr ka mē akupỹm ano-jarêt nê ma amnhĩ kôt ixtã kasãwja mỹ nê amnhĩ kôt ixto mō. Hãmri nê mũtar mē panhõ pika kamã mē anhõ krĩ htã ijaxã pa jawỹ mē akuri ixtã pyka. Anê.

²³ Nê Mojes katorxã mē hipêêxãja na pre wa haxwỹja jajê pyrã nê amnhĩ kaxyw Tĩrtũm mã hamaxpêr tỳx o pa. Juje hkanrêhã htãmnhwỹ na pre wa. Jakamã nhũm Ejit nhõ pahija tee ri Ijaew xohtõ rax kumrêx ã mē omu nhũm ja kēp omnuj nê. Hãmri nhũm mē hkra myjaja mē hapõx kôt mē hamỹnh xwỹnhjaja kot mē hpar ã mē kãm karõ. Tã nhũm Mojes kato nhũm hipêêxã mē katorxãja wa omu nhũm muxre nhũm wa tee ri hkukamã hamaxpêr. Hãmri nê pahi Paraohti mã mē hkra jamỹnh xwỹnh kot wa kēp hpĩr pymaj ho pimxur o hã mytwrỹ axkrunêpxi. Tĩrtũm kamnãr rom wa amnhĩ tã kãm uma hkêt nê ã kēp hkra ho hpimxur anê.

²⁴ Nê Mojes na pre haxwỹja amnhĩ kaxyw Tĩrtũm mã hamaxpêr tỳx o pa. Kormã karãre ri na pre Paraohti hkra nija omu nê amnhĩm kumỹ nê ho hkra nê amnhĩ kôt o pa. Rãhã nhũm aptãr nhũm Ejit nhõ xwỹnhjaja kēp pahi Paraohti htãmnhwỹ hã axpēn mã harê. Hãmri nhũm tee ri amnhĩ tã mē kuma nê amnhĩ tã mē kãm aprã nê mē kãm:

—Kwa mē ã ijarēnh anhÿr kêt nē. Ixpē mē akwÿ hkêt. Anē.

²⁵ ãm kãm Tirtūm kwÿjē kôt pix mǎ ri pa ho pa hprām. Nē kãm Ejit nhō pahi hkôt amnhī tomnuj prām kêt nē. ãm mē kot amnhī tomnuj pix o paja na mē kãm hprām nhūm ja hǎ mē omu nē tee ri mē hkukamǎ hamaxpēr nē hamaxpēr o:

—Nà kot paj mē hkôt ri ixpa hkêt kumrēx. Mē hkīnh nē pa htǎ koja mē gaa nē ty nhūm mē hkīnhja mē kēp hapēx. Nà kot paj Tirtūm kwÿjē hkôt mǎn ri ixpa ho ixpa. Mē kot Tirtūm ã mē inhīpēx kati htǎ pa arī mē hkôt ixpa ho ixpa. ²⁶ Inhmǎ Ejit nhō xwÿnhjē hkôt ixkukrēx rax nē ri ixpa hprām kêt. Kwār mē māmri Tirtūm ã tanhmǎ inhīpēx to. Koja mē ã inhīpēx anē pa ixpunuj nē ri ixpa htǎ koja Tirtūm nhÿrmǎ ixto mex rax nē. Nà kot paj Ejit nhō pahihiti hkôt ri ixpa hkêt nē.

Anhÿr jao ra mē pahpyrà nē Kris gryk ã mē hkaga. ²⁷ Tǎ akupÿm mēō pika hwÿr Ijaewjja ho mōr kaxyw nhūm Ejit nhō pahihitija tee ri ja hǎ omu nē kamǎ gryk tÿx nē. No nhūm Mojesja amnhī kaxyw Tirtūm kôt hamaxpēr tÿx o hkamnār rom kãm mē uma hkêt nē. Nē mē kēp hkwyjē kator pa nē ma akupÿm mēō pika hwÿr amnhī kôt mē o pa. Tirtūm kamnār rom ã mē kēp mē ho kator anē. Aa kot no ho omunh kêt tǎ amnhī kaxyw kãm hamaxpēr tÿx nē hkamnār rom mē kator nē hamakētkati nē mē o pa. ²⁸ Nē hkamnār rom mē hkīnh ã arġgro mē kot kãm “Pas” anhÿr xwÿnhhta ho hkra. Kormǎ Ejit rūm kator kêt ri. Nē kaxyw amnhī kwÿjē mǎ hǎ karō nē mē kãm:

—E pa mē amǎ Tirtūm kapēr jarē ka mē inhma. Nà kot puj xep mē jarǎhǎ ôwēhti hkwy pa nē hkamrō ru. Nē hkamrō ho panhōrkwÿ jakwakre hǎ pī kukō. Hāmri nē ĩ kuxōt nē kuku. Koja kamāt nhūm mē kot amnhī tomnuj xwÿnhjē pē mē

hkra my kot wa piitǎ mē hpar mǎ xwÿnhja mō. Hāmri nē mē pamÿ ri mō nē ã mē pahte mē panhōrkwÿ nhīpēx anhÿrja ã omu nē tanhmǎ mē pahkrajē ho hkêt nē. Tirtūmja ã mē pahte amnhī nhīpēx anhÿr kaxyw ã inhmǎ karō anē. Jakamǎ e pu mē hkamnār rom ã amnhī nhīpēx anē kē mē pahkrajaja mē pahpē htyk kêt nē. Anē.

Hāmri nē ã mē kot Ejit rūm kator xǎ hǎ arġgrotǎ ã mē hkīnh o kator kra. Anē. Mē hkīnhja na htem kãm “Pas” anē.

²⁹ Nē Ijaewjaja na prem haxwÿja Ejit rūm kormǎ Mojes kôt mē pa ri urāk nē amnhī kaxyw Tirtūm mǎ hamaxpēr. Jakamǎ na prem ra gō xujanār pē “Gō Kamrēk” anhÿr xwÿnhja mÿ ri kuhē nhūm Tirtūm mē kãm ho axkjē. Nē mē kãm hkôt ã ho amgrǎ nhūm mē hǎ hkamnār rom mex nē rēr pa. No nhūm mē hkôt mē kot mē himex kaxyw mē mra xwÿnhjaja. Ejit nhō pōristijaja nhūm gōja akupÿm mē hǎ axkamur nē mē himex pa.

³⁰⁻³¹ Nē Ijaew kot Mojes mÿr pē Jojue hkôt pa ri mē urāk nē amnhī kaxyw Tirtūm kôt hamaxpēr o pa. Na prem ra Tirtūm kot mē kãm pika nhōr xwÿnhhta wÿr pōj nhūm Tirtūm krī pē Jeriko hwÿr mē kurē. Mē kot kamǎ mē pa xwÿnh pē utār kaxyw mē hwÿr mē kurē. Mēō krī pu hǎ kahēja kēn tÿx pix o na pre. Nē hprēk rax kumrēx. Nē krī nhō xwÿnhjaja kãm Tirtūm kapēr mar prām kêt. Hāmri nhūm Tirtūm mē hǎ Ijaewjē mǎ amÿnē nē mē kãm:

—E mēō krīja kot paj mē amǎ kugō nom kēr ka mē inhmar kumrēx. Kēr ka mē apkati mē mē ō krī hwÿr mra nē kupu hpÿnh o atǎ apkati kēp 7 nē rī ma akupÿm mra. Anē.

Hāmri nhūm mē kuma nē mar xǎ hkôt ma Jeriko hwÿr mra. Hāmri nē hwÿr pōj nē Tirtūm kamnār rom krī puhǎ kahēja kupu hpÿnh o hǎ apkati kēp 7. Hāmri nhūm apkati

pê 7ta ã nhũm kên tỳx o kahêja mẽ kêp amnhĩ krakrak nê rôrôk pa. Nhũm mẽ mra nê hkôt krĩ hwỳr agjê nê krĩ nhô xwỳnhjê nhĩmex pa. Nom krĩ kamã kuprỳpê Raapja Ijaew pyrà nê amnhĩ kaxyw Tĩrtũm mã hamaxpêr o pa jakamã nhũm mẽ kormã mẽ himex kaxyw mẽ hwỳr môr kêt ri amnhĩ kukamã mẽ hkwyjaja kot mẽ hã ukapi ho pa kaxyw mẽ hwỳr mẽ kurê. Hãmri nhũm Raapja mẽ kêp amnhĩ pyrà nê Tĩrtũm kôt hamaxpêr ã mẽ omu nê hkwy kot mẽ himex pymaj amnhĩ nhôrkwy kamã mẽ kêp mẽ ho amũxu nhũm mẽ hkã hkĩnh pê ma akupỹm hkwyjê wỳr mō. Jakamã nhũm mẽ kot mẽ himex kaxyw mẽ hwỳr mra hãmri nê amnhĩ pyrà nê tanhmã Raap mẽ ô fãmii ho hkêt nhũm mẽ arĩ htĩr nê pa. Mẽ urak nê amnhĩ kaxyw Tĩrtũm kôt hamaxpêr o pa hã omunh xà hkôt tanhmã mẽ ho hkêt nê.

³² ã na pre mẽ kot amnhĩ kaxyw Tĩrtũm kôt mẽ hamaxpêr xwỳnhjaja Tĩrtũm kamnàr rom amnhĩ nhĩpêx anhỹr o pa. Nom jajê pixjaja na prem ã amnhĩ nhĩpêx anhỹr hkêt nê. Mãănên Giteaw nê Parak nê Sãsō nê Jepte nê Tawi nê Sãmuew nê Tĩrtũm nhỹ hã mẽ kapêr o pa xwỳnhjaja. Jajê piitã na prem wamtajê pyrà nê amnhĩ kaxyw Tĩrtũm kôt hamaxpêr tỳx rãhã ho pa. Nom kot paj ixprĩ hã tanhmã mẽ kot hkamnàr rom amnhĩ nhĩpêx to hã mẽ harênh kêt nê. Kot pa anê nê tokyx harênh par kêt nê. Mẽ ohtô rax kumrêx jakamã na pa ãm hkwy pix jarê nê hã kagà.

³³ Na prem hkwyjaja Tĩrtũm kamnàr rom ma mẽ kot amnhĩ tomnuj xwỳnhjê nhô krĩ hwỳr mra nê mẽ kêp mẽ ô pika pytà. Nê mẽ hkwyjaja Tĩrtũm kamnàr rom mẽ ho amnhĩptàr mex o pa. Nhũm prem kãm Tĩrtũm kurê xwỳnhjaja mẽ hkwyjê pynê nê ahkrehti

kamã mry xoprê hkwy nhĩpy mẽ kurê. Nhũm prem amnhĩ tã mẽ omu nê amnhĩ kaxyw Tĩrtũm mã hamaxpêr kurê kumrêx nhũm amnhĩ tã mẽ omu mẽ nê te mry jakwa ho pikamỳr tỳx pyràk o mẽ hipêx nhũm ãm mẽ omunh o kuhê nê tanhmã mẽ ho hkêt nê. ã na prem Tĩrtũm kamnàr rom amnhĩ nhĩpêx anhỹr o pa.

³⁴ Nhũm mẽ kot kuwy rax kãm mẽ hkwyjê rênh tã nhũm mẽ kot amnhĩ kaxyw Tĩrtũm mã hamaxpêr tỳx nhũm amnhĩ tã mẽ omu nê mẽ nê tanhmã kuwy ho nhũm mẽ hxêt kêt nê. Nhũm pre mẽ hkwyjaja wapo ho mẽ hkamnawỳr o mẽ hkwyjê hpar kaxyw nhũm mẽ amnhĩ kaxyw Tĩrtũm mã hamaxpêr nhũm amnhĩ tã mẽ omu nê mẽ nê tanhmã mẽ ho nhũm mẽ amnhĩ rê nê mẽ umaj hprôt nê ma mra. Mẽ hihtỳx kêt tã Tĩrtũm kamnàr rom y hã hihtỳx nê mẽ kãm mẽ hkurê xwỳnhjê ho krihkrit pa nhũm mẽ ma akupỹm hapêx.

³⁵ Nê mẽni hkwyjaja na prem haxwỳja amnhĩ kaxyw Tĩrtũm mã hamaxpêr tỳx o pa. Jao mẽ hkrajaja mẽ kêp htyk tã nhũm prem Tĩrtũm kamnàr rom mẽ ho kuwy nhũm mẽ kuma nê akupỹm mẽ kãm mẽ ho htĩr.

ã na prem amnhĩ kaxyw Tĩrtũm mã hamaxpêr pê mex nê pa anê. No na pre mẽ hkwyjaja mẽ urak nê amnhĩ kaxyw kãm hamaxpêr tỳx tã nhũm Tĩrtũm tokyx mẽ ho mex kêt nê. Na pre mẽ kãm mẽ hkurê xwỳnhjaja Tĩrtũm ã mẽ par kaxyw. Nê mẽ hkwyjaja Tĩrtũm ã mẽ hipêx kati ho pa nhũm mẽ amnhĩ xà htỳx kãm hamak kãm ty. Nhũm mẽ himex kaxyw nê mẽ kãm:

—Kwa mẽ Tĩrtũm kaga. Kot kaj mẽ hkaga pa mẽ amã inhũre nê mẽ anhĩmex kêt nê. Anê.

No nhũm mẽ kuma nê ãm mẽ kuma nê amnhĩ kaxyw kãm hamaxpêr tỳx pê mẽ kãm:

—Nà mẽ kam nê māmri ixpĩ. Inhmã ixtyk pyma hkêt. Kot paj ty nhũm Tĩrtũm akupỹm ixto ixťĩr pa kuri inhmex kumrêx nê ri ixťĩr tũm nê ixpa ho ixpa.

Anhỹr o mẽ kãm amnhĩ jarênh jakamã hãmri Tĩrtũm kaga hkêt rãhã nhũm mẽ himex.

³⁶ Nê mẽ kãm mẽ hkurê xwỹnhjaja na prem Kris ã mẽ hkwyjê mã hpêr o pikênh pê mẽ htak xà ho mẽ htak rũnh o pa. Nê kàx o mẽ hkwyjê hpa hpre nê mẽ hte hpre nhũm mẽ kêp prês nê hkrĩ ho hkrĩ.

³⁷⁻³⁸ Nhũm prem kên rũnh o mẽ hkwyjê htak o mẽ kupa. Nê mẽ hayr o mẽ hkwyjê pa. Nê mẽ hkamnhwỳr o mẽ hkwyjê pa. ã na prem Kris kôt mẽ hamaxpêr ã mẽ omunh xà hkôt mẽ hipêx anhỹr o pa. Jakamã na pre mẽ hkwyjaja mẽ umaj mẽõ krĩ rũm hapôj nê ma hprôt nê mra. Nê te mẽ õ krĩ hkêt pyrà nê kapôt ã kêp amrakati nê ri pa. Mẽ ê hkêt nê ôwêhti hkà ho ê nê ri hã pa. Nê motre kà ho amnhĩ pre nê ri hã pa. Nê kên prêk ã api nê kre kamã hpimxur o pa. Nê pika hkre kamã hpimxur o pa. Nhũm mẽ kãm mẽ hkurê xwỹnhjaja te mẽ kêp ahpunu nê mẽ kêp ahkro pyràk o mẽ hipêx nê axpên mã mẽ harênh o:

—Nà mẽ mexti hã. Kwa pu mẽ piitã mẽ himex paa ri.

Anhỹr o mẽ harênh tã nhũm Tĩrtũm mẽ uràk nê ã mẽ harênh anhỹr kêt nê. Na pre mẽ mex kumrêx ã mẽ harê. Nê nhỹrmã kuri mẽ mex nê pa ho pa hkukamã mẽ harê.

³⁹ ã na prem Tĩrtũm kamnàr rom mẽ kãm mẽ hkurê xwỹnhjê kutã amnhĩ to htỹx kãm htyk o pa anê. Nhũm Tĩrtũm ja hã mẽ omu nê hkĩnh nê kãm mẽ hapê htỹx nê. No nhũm mẽ kormã htĩr ri amnhĩm Tĩrtũm kot mẽ ho mex xà jamỹnh kêt rãhã ty. ⁴⁰ Tã mo na pre Tĩrtũm kormã mẽ htĩr ri hkwyjê pyrà nê

mẽ ho mex kêt nê? Nà na pre kormã mẽ hkukamã hamaxpêr o:

—Nà kot paj kormã mẽ ho mex kêt nê. Kot pa mẽ mỳr pê mẽ kot ixkôt amnhĩ xunhwỳr mã xwỹnhjê jamãr grire mãn. Kêr pa inhõ krĩ kamã mẽ ho ixpimràatã mẽ ho mex rax kumrêx. Nà kot paj ã mẽ ho mex anê. Ja na kêt inhmã mex o kormã mẽ htĩr ri ixte mẽ ho mexta jakrenh. Anê.

Ja ra ã mẽ papajaja mẽ pakukamã hamaxpêr anê.

12

Mẽ pahte Jejus pyrà nê mẽmoj kutã amnhĩ to htỹx ã mẽ pamã karõ Pĩripõs 3.12-21

¹ Na pre mẽ pakukamã mẽ panhĩgêt kwỹjaja amnhĩ kaxyw Tĩrtũm mã hamaxpêr pê ã amnhĩ xà htỹx kamã hamak o pa anê. Tã te ra mẽ kot kỹj rũm kaxkwa rũm mẽ pahpumunh nê tanhmã mẽ pamã kapêr to pyrà nê mẽ pamã kapêr o:

—E mẽ inhma mẽ ixkanrêhã mẽ ixtãmnhwỹjaja. Na pa prem ã Tĩrtũm kamnàr rom amnhĩ nhĩpêx o ixpa anê. Mẽ kot ja hã mẽ inhĩpêx kati htã pa prem Jejus kaga hkêt nê. Tã kêr ka mẽ ixpyrà nê ã mẽ kãm mẽ akurê xwỹnhjê kutã amnhĩ to htỹx anê. Nê mẽ ixpyrà nê amnhĩ kaxyw Tĩrtũm kôt pix mã ajamaxpêr tỹx rãhã ho ri apa. Anê.

Jakamã kwa kêr pu mẽ uràk nê ã amnhĩ nhĩpêx anhỹr rãhã ho mãn ri papa. Te mẽ hprôt xwỹnhjaja kot amnhĩ nhĩpêx pyràk o amnhĩ nhĩpêx. Na htem hprôt tỹx kaxyw mẽmoj pyťĩ jamỹnh nê ho hprôt hkêt nê. Na htem ý kamã hprôt o hprôt tỹx nê wam hkwyjê mã wa nê mra. Ja pyrà nê kêr pu mẽ pahte Tĩrtũm kapêr kôt amnhĩ nhĩpêx mex o papa kaxyw tanhmã mẽ pahte amnhĩ tomnuj to hã amnhĩ pumu nê hkaga kurê kumrêx. Mẽ pahte amnhĩ tomnuj o papa xãja te mex pyràk no ãm mex kêt. Te

ho mē hprôt xwÿnh kot axtem nē mēmoj pytī mÿnh nē tee ri ho hprôt tÿxta pyrāk. Kot puj mē tanhmā amnhī tomnuj to ho papa nē Tirtūm kapēr kôt amnhī nhīpêx mex kêt nē. Jakamā kwa kêr pu mē Tirtūm kapēr gryk ā amnhī tomnuj nē amnhī to htÿx rāhā ho papa. Te ho mē hprôt nē nhÿri mē āhuk xā pix kukamā hamaxpēr rāhā hprôt tÿx xwÿnhhta pyrā nē ām Jejus mā pajamaxpēr tÿx rāhā ho papa.

² E kot paj mē amā Jejus kot tanhmā mē panē amnhī nhīpêx toja jarē ka mē inhma. Nā kot mē panē mē pahte amnhī tomnuj pānhā amnhīrer kaxyw htyk nhūm mē pahte hkôt amnhī xunhwÿr jakamā na hte mē pamā pajamaxpēr nyw gō pu mē amnhī kaxyw hkôt pajamaxpēr ho ri papa. Na pre mē kām hkurē xwÿnhjaja kot pī kahpa hā nhôr nē hpīr mā nhūm mē kutā mē kām amnhī to htÿx nē arī mē kām xa nhūm prem kupī. Tā tee ri amnhī kukamā hamaxpēr o Tirtūm kaga hkêt nē. Na pre hamaxpēr o:

—Nā kwār mē māmri ixpī. Kot paj ty nhūm Inhīpêxā akupÿm ixto ixtīr pa kuri inhmex kumrêx nē ixtīr tūm nē ixpa ho ixpa. Anē.

Tā na ra kaxkwa kamā Tirtūm xupōk rūm mex nē hkrī ho hkrī. ³ Jakamā kwa kêr pu mē kot ā mē panē amnhī nhīpêx anhÿrja mā pajamaxpēr rāhā ho ri papa. Mē kot hipêx kati htā nhūm mē kutā amnhī to htÿx nē xa. Tā kêr pu mē urāk nē mē kām mē pahkurē xwÿnhjê kutā amnhī to htÿx rāhā ri papa. Jao tee ri amnhī kukamā pajamaxpēr o mē umaj Tirtūm kaga hkêt nē.

⁴ Na ka htem ma mē kot amnhī tomnuj xwÿnhjê hwÿr mra nē mē kot amnhī tomnuj kaga kaxyw tanhmā mē kām akapēr to nhūm mē ja hā mē ama nhūm ja mē kêp omnuj nhūm mē amnhī tā tanhmā mē atomnuj to. Nom wam mē kot

mē pahkwÿjê nhīpêxta pyrā nē kor mā mē atōxpīr kêt nē.

Tirtūm kot tanhmā hkrajê nhīpêx to hā harênh

Juāw 15.1-2; Eprêw 5.7-8; Xiakre 1.2-4

⁵ Nē mǎn ka mē arī Tirtūm kapēr ā kagā htūm kwÿ hā ano htÿx japêr. Mē pahpê Tirtūm krajê mā kapēr jarênh kot:

Koja Pahi Maati tanhmā mē ate amnhī tomnuj to nē mē amā kapēr ka mē ama nē mar tÿx nē mēmojta kaga kurē kumrêx. No mē ama nē tee ri kot nē akurē xwÿnhhta kukamā ajamaxpēr o ri akapri o axtem nē Tirtūm kaga hkêt nē. Ama nē kot amā mēmoj nē kapēr xwÿnhhta kaga kurē kumrêx.

⁶ Na hte Tirtūm kām mē pajapê hā tanhmā mē pahte amnhī tomnuj to hā mē pahpumu nē hā tanhmā mē panhipêx to. Tām mē pahte amnhī nhīpêx o papa kaxyw. Kot mē pahpê hkra hā mē pajarênh jakamā na hte ā mē pahte tām amnhī nhīpêx o papa kaxyw mē panhipêx anē. Anē.

⁷ Jakamā kot kaj mē tanhmā amnhī tomnuj toja mÿrapê tanhmā apunuj kute nē ri apa htā no ām tee ri amnhī kukamā ajamaxpēr hkêt nē. Kêt mē ām ajamaxpēr o:

—Nā ixte tām amnhī nhīpêx kaxyw na Tirtūm ā inhīpêx anē. Ixpê hkra hā ixte amnhī to mex o ixpa prām xā ā inhīpêx anē.

Anhÿr o mǎn kêt ajamaxpēr. Na hte mē hipêxā mē hkra kot amnhī to mex kaxyw ā mē hipêx anē. Tā Tirtūm na hte mē urāk nē ā mē panhipêx anē. ⁸ No koja mēhō hkra kot tanhmā amnhī tomnuj to hā omu nē ām omu nē hā tanhmā ho hkêt nē. Hā koja hkraja te hipêxā hkêt nē hā awrāre nē ri pa pyrāk. Tā mē pahpê Tirtūm krajaja kot puj

mê tanhmã amnhî tomnuj to nhûm ja hã mê pahpumu nê hã tanhmã mê pahto. Nom mê kêp hkra hkêt xwýnhjaja nhûm hte ja hã mê omu nê ãm hã mê omu nê hã kormã tanhmã mê hipêx to hkêt nê.

⁹ Nê na hte mê panhîpêêxã mêmôj tâ mê pamã karô pu htem kuma nê hkôt amnhî nhîpêx. Ja mex. Nom kaxkwa kamã Mëpahpãm maatija mê pahte mar nê hkôt amnhî nhîpêxja na kêt mex kumrêx. Kot puj mê ã amnhî nhîpêx anê nê nhÿrmã kuri pamex nê pahtîr tûm nê papa ho papa.

¹⁰ Nê mëhprîre na htem hamaakro nhûm mê hipêêxã tanhmã hã mê ho. Hã mê hkaprêprêk rÿ hã mê kãm akîr. Amnhî krã hkôt tanhmã mê hipêx to. Mê kot ja hã amnhî pumunh nê axte hkêt kaxyw. Ja mex. Tã mê papajaja. Më pahpê Tîrtûm kra na pu htem tôhã tanhmã amnhî tomnuj to nhûm mê pahpumu nê tanhmã hã mê pahto. Më pahte amnhî pumunh nê axte hkêt kaxyw. Uràk nê amnhî to mex pix o papa kaxyw. ¹¹ Na hte mêmôj tâ tanhmã mê panhîpêx to pu mê tee ri amnhî pumu nê pahkaprî nê pahkînh kêt nê ri papa. Nom kot puj mê tokyx tanhmã amnhî tomnuj tota kaga nê akupÿm Tîrtûm kôt tãm amnhî nhîpêx o papa nê akupÿm pahkînh nê pajamakêtkati nê ri papa.

Mê pahte Tîrtûm kaga hkêt ã mê pamã karô

¹² Jakamã e kwa kêr ka mê amnhî to htÿx nê apa. Mê kot Kris ã tanhmã mê anhîpêx to htãã. ãm Tîrtûm kôt pix mã amnhî nhîpêx mex pê akînh nê apa. ¹³ Kêr kê Kris kôt atôjê hõ tee ri mêmôj tâ amnhî pumunh kôt ra Tîrtûm kaga kaxyw tâ ã mê ate amnhî nhîpêx anhÿr ã mê apumu nê mê apyrã nê akupÿm hkôt amnhî xãm tÿx nê hkaga hkêt nê.

¹⁴ Nê kêr ka mê tãm ri axpên nhîpêx o ri apa. Jao axpên kôt ajamakêtkati nê ri apa nê amnhî to mex pix kukamã ajamaxpêr. No kot kaj mê anhÿr kêt nê nhÿrmã mê panhõ Pahi Maati hwÿr axàpir nê kuri amex nê apa hkêt nê.

¹⁵ Na hte Tîrtûm mê pahto mex nê mêmôj to mê pakutã nojarêt rãhã o pa. Jakamã kwa kêr ka mê hkaga hkêt nê. Nê tanhmã ri ajamaxpêr punuj to ho ri apa hkêt nê. Kot ka mê ã amnhî nhîpêx anê nhûm Kris kôt mê pahkwÿjaja ja hã mê apumu nê mê apyrã nê tanhmã amnhî tomnuj.

¹⁶ Nê kêr ka mê axpên kãm apijaãm kêt o ri apa hkêt nê. Nê te finat Ejau kot amnhî nhîpêx pyrãk o ri apa hkêt nê. Na pre Tîrtûm ã hpijaãm kêt nê hkwyjê kamã hpijaãm kêt o pa. Nê Tîrtûm mã hamaxpêr kêt kumrêx. Kêp Ijak kra kot wa jakamã koja nhÿrmã hipêêxã mÿr pê kêp hikukrêx nê ô pika piitã ho àrîk pa. Hãmri nhûm hipêêxã kot ho Tîrtûm wÿr nhûm kot ho mex kaxyw mã tâ nhûm axtem nê mêmô arîgro hã kãm prãm xàj kot kêp mêmôj to àrîk mã xwÿnhhta htõ Jako mã hkaga hpa. Mãnkwÿrtre gôj kãm ãm prãm xàj kãm hkaga hpa. Jakamã nhûm Jako hpãnhã te kêp Ijak kra kot wa pyrã nê mÿr pê ô mêmôj piitã ho àrîk mã. ¹⁷ Gaa nhûm Ejau tee ri ã amnhî nhîpêx anhÿrja mã hamaxpêr o hkaprî nê. Nê tee ri kãm Jako kot akupÿm kãm mêmôjta nhõr prãm kaprÿ. Nê mur nê hã hipêêxã wÿ no nhûm axte kãm mêmôj nhõr kêt nê. Nhûm kot ho Tîrtûm wÿr kaxyw tee ri amnhî to kuwÿ no nhûm kuma nê ãm kuma nê kãm ho anhÿr kêt nê.

¹⁸ Nê amnepê mã Tîrtûm kot mê panhîgêxjê mã kapêr kaxyw na prem hixêt prêk pê Sinai jarênhja wÿr akuprô nê hparpê kuhê. Hãmri nhûm hixêt nhîmök ã kuwÿ hpök rax kumrêx. Nê kuwÿ mÿr ri kraã

htyk ajêt. Nê kôk àpêr tỳx nê. Nhũm Ijaewjaja hixêt krax ã omu nê kãm maa ho htertet o kuhê. ¹⁹⁻²¹ Hãmri nhũm mēhō pifti kakō nhũm Tirtũm hixêt nê mē kãm kapêr nê mē kãm:

—E mē inhma. Kêr ka mē hixêt ã axàpir kêt nê. Kot kaj mē atō hã api rỳ mē akrit ò hã api ka mē ja hã omu nê kaxyw kên rũnh kwỳ jamỳ nê ho htak o apĩ. Anê.

Hãmri nhũm mē piitã tee ri kuma nê kãm ma htỳx kumrêx nê amnhĩ nê kãm:

—Kwa hãmri Tirtũm. Axte mē inhmã mēmoj jarênh kêt nê. Mojes pix mã mãn mē ixkaxyw tanhmã kãm akapêr to. Anê.

Jakamã nhũm Mojes Tirtũm mã amnhĩ jarênh nê kapêr mar kaxyw hixêta ã api. Kãm ma nê htertet rãhã mō nê hã api. ²² Nom mē kãm ma ho Tirtũm mã amnhĩ jarênh tã mē papajaja na pu htem mē kurom paxãmnhĩx kãm amnhĩ jarênh o papa. Na pu htem kãm amnhĩ jarênh kaxyw nê hixêt prêk ã paxàpir kêt nê. Te ra mē pahte ma kaxkwa hwỳr ò krĩ hwỳr paxàpir nê pano ho omunh pê kãm amnhĩ jarênh pyrãk. Ò krĩja mex o mex. Kamã kapêr o mē wrỳk xwỳnhjaja ohtō o ohtō. Na htem kamã hkĩnh rãhã ho pa ho pa.

²³ Nê ò krĩ hwỳr na hte hkra xàpir xwỳnhjaja ri pa. Nê mē papajaja na pu htem kãm amnhĩ jarênh kaxyw nê te kaxkwa kamã kuri pakuhê nê kãm amnhĩ jarênh pyrãk o amnhĩ nhĩpêx. Te mē pahpê hkra kot wa pyrãk jakamã mē pamã uma hkêt. Nhũm pre Tirtũm ra ò kagã kamã mē pakutêp amnhĩm mē panhĩxi hã kagã hpa. Na hte mēmoj piitã hamãr o hkrĩ. Nê krĩja kamã amnepê m kormã Kris kot mē pahwỳr wrỳk kêt ri nhũm ra amnhĩ kaxyw Tirtũm kôt hamaxpêr mex xwỳnhjaja haxwỳja ra kamã ri pa. Ra Tirtũm kot mē ho hkra jakamã nhũm mē kuri ri pa ho pa. ²⁴ Nê Jesus haxwỳja kamã pa ho pa. Na pre

mê panê htyk nê hkamrô pikapĩrja o mē pahte amnhĩ tomnuj pãnhã amnhĩre. Jakamã na pu htem hkôt amnhĩ xunhwỳr nhũm mē pahto hkra pu mē paxãmnhĩx ri Tirtũm mã amnhĩ jarênh nê amnhĩ to hwỳr o papa.

Amnepê m na pre Tirtũm tee ri Kaĩ kot htō Apew pĩr nê hkamrô pikapĩrja ã omu nê hamaxpêr o:

—Nã ã kot amnhĩ nhĩpêx anhỳr jakamã kot paj hã homnuj tỳx nê. Anê.

Tã ra hpãnhã Jesus kot mē panê htyk nê hkamrô pikapĩrja ã omu nê ra axtem hamaxpêr o:

—Nã ãm hãmri na Ixkraja mē nê ty. Jakamã mē kot hkôt amnhĩ xunhwỳr xwỳnhjaja kot pa Ixkra kukwak ri mē kot amnhĩ tomnuj mỳrapê tanhmã mē ho hkêt nê.

Anhỳr o mē pakukamã hamaxpêr. ã hamaxpêr anhỳrja mex o mex.

²⁵ Na pre Mojes Tirtũm nhỹ hã mē panhĩgêxjê mã xatã mē kãm Tirtũm kapêr jarênh o ri pa nhũm mē kuma nê hkôt amnhĩ nhĩpêx o pa. Tã gaa nê ra hã nohkêt pa nê akupỳm mē kot amnhĩ nhĩpêx tũm o awjanã nhũm Tirtũm tee ri ja hã mē omu nê mỳrapê tanhmã mē hipêx to. Tã nhũm Kraja kaxkwa rũm mē pahwỳr wrỳ nê mē pamã kapêr. Jakamã kwa mē okora kêr pu mē panhĩgêtjê pyrã nê mē pahte amnhĩ nhĩpêx tũm o paxujanãr kêt nê. Kot puj mē anê nhũm Tirtũm ja hã mē pahpumu nê mē urak nê ja hã tanhmã mē panhĩpêx to.

²⁶ Amnepê m Tirtũm kot hixêt prêk pê Sinai kamã mē kãm kapêrja. Na pre kapêr tỳx o pika ho ãk nhũm htertet tỳx nê. Tã koja nhỹrmã axte pika ho ãk nê kaxkwa ho ãk nhũm wa hamê htertet tỳx kumrêx. Koja axte ho anhỳr ho pixi nê axte ho anhỳr kêt nê. ²⁷ Tã nhỹrmã axte mēmoj to ãk ã amnhĩ jarênh jakamã koja mēmoj to kator xwỳnhhta piitã ho

àk. Nê mē pahte panhîhkra ho mēmoj nhîpêx xwÿnhja nhûm ho àk nhûm htetert tÿx kãm hpigràn pa nê hapêx. Nhûm mēmoj htetert nê hpigràn kêt xwÿnh pixjaja arî rãhã ho rãhã. ²⁸ No Tîrtûm nhõ krî koja htetert nê hapêx kêt nê. Nê mē papajaja mē pahpê hkra jakamã te ra kuri ô krî kamã ri mē papa pyrãk. Jakamã kot puj mē mē urãk nê pajapêx kêt nê. Jakamã e kwa kêr pu mē amnhî tã Tîrtûm mã mex o mex ã harênh nê hã pahpijaãm rãhã ho papa. Nê tanhmã amnhî tomnuj to hã amnhî pumu nê Tîrtûm pumaj mēmojta kaga kurê kumrêx. ã mē pahte amnhî nhîpêx anhÿr o papaja na Tîrtûm kãm hprãm. ²⁹ Hihtÿx o hihtÿx jakamã koja mēmoj tã akamã gryk kot kaj amex kêt o amex kêt.

13

Mê pahte Tîrtûm kãm hprãm xã hkôt amnhî nhîpêx ã mē pamã karõ Rômãn 12.1-2; Epes 4.1-3; Korosê 1.10-11; Wam Tesarôn 4.1-12; Wam Pêtre 2.11-12; Wam Juãw 3.17-18

¹ Nê e kwa Kris kôt ixtõ nê ixtõxjaja. Kêr pu mē arî Kris kôt pahkwÿjê ho mex o mãn axpên kôt ri papa. Nê kêr pu mē tanhmã pahpunuj to hã amnhî pumunh tã axpên to mex mã panhûrer kêt nê. ã axpên nhîpêx anhÿr rãhã ho papa.

² Nê amnepê mã na pre mēmojaja nhÿhÿnh mra nê mē panhîgêjtê hõ hwÿr pøj. Hãmri nhûm mē omu nê htÿx axtem krî hõ nhõ xwÿnh ã mē hkamnhîx tã no nhûm mē kêp Tîrtûm kapêr o mē wrÿk xwÿnh kwÿ na prem. Hãmri nhûm amnhî nhõrkwÿ hwÿr mē kuwÿ nhûm mē ma hkôt mra nê kuri pøj nê kutã apku. Jakamã kwa koja nhÿhÿnh krî hõ rûm mēmojaja ma mē awÿr mõ ka mē omu nê axãmnhîx amnhî nhõrkwÿ hwÿr mē hwÿr kurê kumrêx kê mē ari pøj. ã mē hipêx anhÿr o apa hãmri

nê nhÿrmã mē panhîgêjtja pyrã nê amnhî wÿr Tîrtûm kapêr o mē wrÿk xwÿnhjê hõ hwÿr japêr. Mē urãk nê ja hã mē omunh kêt tã atÿx amnhî wÿr mē awÿ nhûm ja mē amã mex o mex.

³ Nê kêr ka mē ra mē kot Jejus ã mē akwÿjê pynênh nê mē hagiênh xwÿnhjê mã ajamaxpêr rãhã ho ri apa nê mē ho ajamakêtkati hkêt nê. Te mē kajaja mē ìhkõ hã mē hagiênh xã kamã apunuj nê akri pyrãk o mē kãm ajamaxpêr o ri apa. Jao mē kamã axukapri ho mē hwÿr mra nê mē kãm mēmoj nhõr o ri apa.

⁴ Nê mē kot axpên to hprõja na mex. Nom kêr ka mē amyjaja ãm aprõ pix tânopxar o ri apa. Nê mē anijaja mē ajaxwÿja amjên pix tânopxar o ri apa. No mē hkuprÿjê hwÿr mē mrar xwÿnhjaja nê nhãm mē kêp mē hprõ ho amnhîkati xwÿnhjaja nê nhãm mē kêp mē mjên o amnhîkati xwÿnhjaja koja Tîrtûm ja hã mē omu nê mē homnuj tÿx kumrêx.

⁵⁻⁶ Nê kêr ka mē akàxpore rûnh kêt ã amnhî pumu nê tee ri amnhî kukamã ajamaxpêr o akapri hkêt nê. Na pre Tîrtûm mē pamã kapêr o: Kot paj akôt ri ixpa rãhã ho ixpa nê aa arer rÿ akaga hkêt kumrêx.

Anhÿr jakamã kot kaj mē akàxpore grire htã akapri nê apa hkêt nê. Aa Tîrtûm kot mē pahkaga hkêt ã amnhî jarênh jakamã mēmoj kot pu wem omu nê pamã nhãm ri mē uma ho papa? Tîrtûm kot mē pahkôt pa ho pa kênã. Jakamã na pu htem pajamaxpêr o:

Nã Pahi Maatija ra kot ixkôt pa ho pa xwÿnh jakamã mēmo kot pa hkêt ri inhmã uma ho ixpa?

Mēmo kot kêt ri tanhmã kêp ixto? Anhÿr o pajamaxpêr o papa. ⁷ Nê mē kot Kris mã mē ajamãr o mē pa xwÿnh ra mē htyk xwÿnhjaja ka mē arî mē kot tanhmã amnhî nhîpêx

to ho paja mã ajamaxpêr rãhã ho ri apa. Na prem Tirtûm kapêr o mẽ ajahkre mex nê. Nê tãm ri amnhĩ nhĩpêx o ri mẽ akôt pa. Nê amnhĩ kaxyw Tirtûm kôt pix mã hamaxpêr rãhã ty. Tã kêr ka mẽ urak nê ã amnhĩ nhĩpêx anhÿr o ri apa rãhã ty.

⁸ Nê Jejus Krisja arĩ rãhãã. Nê amnepê mã kot amnhĩ nhĩpêxja mããñn arĩ rãhãã. Aa kot amnhĩ nhĩpêxja nhĩjuk ri axtem tanhmã amnhĩ nhĩpêx to hkêt.

⁹ Nê kwa kêr ka mẽ Tirtûm kôt amnhĩ nhĩpêx rãhã ho ri apa. Na hte kapêr o hêx xwÿnhjaja mẽ awÿr mra nê mẽ amã:

—Amnepêm mẽ ate Tirtûm kot mẽ amex ã mẽ ajarênh kaxyw mẽ ate kãm mẽmo mry nhôr nê akupÿm hamÿnh nê hkur o apa htã ra ja ho anhÿr kaga. Kwa mẽ ja ho awjanã nê axte ã amnhĩ nhĩpêx anhÿr o ri apa. Kê Tirtûm ja hã mẽ apumunh kôt mẽ amex ã mẽ ajarê.

Anhÿr o mẽ amã kapêr. Nom xã na hte Tirtûm ã mẽ pahte amnhĩ nhĩpêx anhÿr ã mẽ pahpumunh kôt mẽ pamex ã mẽ pajarê? Xã na htem mẽmo mẽ apkur xã hkur pê amnhĩ kaxyw Jejus kôt hamaxpêr tÿx o pa? Nã na htem anhÿr kêt nê. Na pu htem mẽmoj kur kôt pamã Tirtûm kĩnh kêt nê. Kêt mẽ paxàpkur xãja mẽ panhĩ pix o hihtÿx kaxyw na. Na hte Jejus kôt mẽ pahto paxihtÿx kêt nê. ãm Tirtûm kot amarĩ kãm mẽ pajapê nê mẽmoj to mẽ pakutã nojarêť jakamã na pu htem ja hã amnhĩ pumu nê amnhĩ kaxyw hkôt pajamaxpêr tÿx o papa.

¹⁰ Tirtûmjaja Jejus kot mẽ panê htyk ã omunh xã hkôt ra kot mẽ pamex ã mẽ pajarênh jakamã mo kaxyw kot pu mẽ axte kot mẽ pamex ã mẽ pajarênh kaxyw kãm mẽmo mry gô nê hkwy hku? Kojaja mẽhõ akupÿm Tirtûm kapêr tûm o ujanãr jao Jejus kot nê htyk nê hkamrô pikapĩrja kaga.

¹¹ Amnepêm na pre patre maatijaja tõiã mẽ kãm mẽmo mry hpar xwÿnh hkamrô ru nê guhkra xãm kuru nê hamÿ nê ma o mra nê Tirtûm nhõrkwÿ kaàkre hwÿr hitom maati hwÿr ho agjê. Tirtûm kot mẽ omunh nê axte mẽ kot amnhĩ tomnuj mã hamaxpêr kêt kaxyw. Hãmri nhũm hpãnhã ĩ mÿ nê krĩ pê ho kato nê ma o mra nê nhÿri amÿm hkwyjê hkax ã ho hxêt pa. Tirtûm kapêr tûm kôt na prem ã amnhĩ nhĩpêx anhÿr o pa. ¹² Tã ja pyrà nê na prem ma krĩ pê amÿm Jejus o tẽ nê kupĩ nhũm hkamrô axkapĩ. Kot mẽ pahte amnhĩ tomnuj pãnhã amnhĩrer nê mẽ pahto mẽ pahpê Tirtûm kra kaxyw ã htyk nê hkamrô pikapĩr anê. ¹³ Na prem Tirtûm kapêr tûm gryk ã Jejus kaga nê põiřtijê mã anê nhũm mẽ ma krĩ pê ho kato nê o tẽ nê kupĩ. Tã kêr pu mẽ jajê rom Jejus gryk ã mãn Tirtûm kapêr tûm kaga. Kwãr mẽ mãmrĩ Jejus pyrà nê Tirtûm ã tanhmã mẽ pahto nê amnhĩ nê nhÿhÿm mẽ pajano. ¹⁴ Kêt jar mẽ papapxãja kêp mẽ papapxã kumrêx kêt. Nê jar mẽ panhõ krĩja kêp mẽ panhõ krĩ kumrêx kêt. Mẽ pamã te kot pô nhĩrõnh o ixkre pix pyràk. No kêt mẽ panhõ krĩ kumrêx koja jar mẽ panhõ krĩ rom aa hapêx kêt nê. Tã tãm na pu mẽ kormã ma hwÿr papa kaxyw arĩ amnhĩ tã Tirtûm jamãr o papa.

¹⁵ Nê na htem Ijaew arĩ ohtõ nê amnhĩ pãnhã Tirtûm mã mry hpar ho pa. Nom mẽ papajaja kot puj mẽ axte ã amnhĩ nhĩpêx anhÿr hkêt nê. Kot puj mẽ ãm Jejus kukwak ri Tirtûm mã mex o mex ã harênh rãhã ho mãn papa. Jao te mẽ pahte kãm hkĩnh xã nhõr pyràk o amnhĩ nhĩpêx.

¹⁶ Nê kêr pu mẽ arĩ axpên to mex o ri axpên kôt papa. Nê kê mẽhõ kêp amrakati japêr ka ja hã omu nê amnhĩ kutã kãm anhõ mẽmoj kwÿ. ã kot puj mẽ axpên nhĩpêx anhÿr

râhâ ho ri axpên kôt papa. Kot puj mê anê nê te mê pahte Tîrtûm mã hkînâ xâ nhôr pyrâk o amnhî nhîpêx. Â mê pahte amnhî nhîpêx anhÿrja na mex o mex.

¹⁷ Nê kêr ka mê Kris kôt mê akrâhtûmjê kapêr ma nê mê hkôt amnhî nhîpêx mex nê. Na htem Tîrtûm mã mê ajamâr o ri mê akôt pa. Kojâ mê nhÿrmâ mê kot tanhmâ mê anhîpêx to hã Tîrtûm mã amnhî jarê. Jakamâ mê kãm mê ato ajuta prâm. Tã kêr ka mê kapêr ma nê mê hkôt ri amnhî nhîpêx mex o ri apa. Kêr kê mê amnhî tã mê apumu nê hkînâ nê. No kot kaj mê ama nê ãm mê ama nhÿm mê tee ri amnhî tã mê apumu nê hkaprî nê. Jao tee ri kot tanhmâ mê ato ajuta mex to hkukamâ hamaxpêr.

¹⁸ Nê kwa kêr ka mê ixto Tîrtûm wÿr râhâ ho apa. Inhmâ Tîrtûm noo mã tanhmâ amnhî tomnuj to hprâm kêt. ãm inhmâ amnhî to mex pix o ri ixpa hprâm.

¹⁹ Nê kêr ka mê ixto awÿ kê tokyx akupÿm mê awÿr inhmê. Na pa ra inhmâ mê apumunh prâm tÿx nê.

Kagà nhîpêx xwÿnh kot tanhmâ mê ho Tîrtûm wÿr to hã harênh

Epes 3.14-19; Piripos 1.0-11; Wam Tesarôn 3.9-13, 5.23; Sikûn Tesarôn 1.11-12, 2.16-17

²⁰ Nê mê panhõ Pahihti Jejus Krisja na hte mê panhîpêx o te ôwêhti jamâr xwÿnh kot hkrit jamâr pyrâk o pa. Jakamâ kêp mê pajamâr xwÿnh maati mex na. Na pre mê panê ty nhÿm Tîrtûm akupÿm mê pamâ ho htîr nê mê pamâ harênh o:

—E ra Ixkra kot mê anê htyk jakamâ kêr ka mê ãm ixkapêr nyw kôt pix mã ri amnhî nhîpêx o ri apa. Kot kaj mê ã amnhî nhîpêx anê hãmri nê nhÿrmâ ty pa akupÿm mê ato mê atîr ka mê ixri atîr tûm nê apa ho apa. Anê.

Tîrtûm kêp mê pahto mê paja-makêtkati nê ri mê papa xwÿnh na.

²¹ Tã na pa hte tanhmâ mê ato hwÿr to ho ixpa nê mê ato hwÿr o:

—Pa Tîrtûm. E kwa tanhmâ ixkwÿjê ho mex to kê mê kãm akapêr kôt pix mã amnhî nhîpêx o pa hprâm. Nê mê kãm tãm amnhî nhîpêx o pa hprâm. Nê kê Jejus haxwÿja tanhmâ mê ho mex to kê mê war amã hprâm xâ hkôt pix mã war amã tanhmâ ri amnhî nhîpêx to ho pa. Anê.

E kêr pu mê arî Jejus Kris mã mex o mex ã harênh râhâ ho papa.

Kagà jatur xâ kamã mêmojarênh

²² E Kris kôt ixkrâmnhwÿjjaja. Nã na pa ã mê amã kagà nhîpêx anê. Jejus kôt mê ato mê axihtÿx kaxyw. No na pa ho ry nê hipêx kêt nê. Ixte ho grire nê hipêx jakamã kwa kêr ka mê kamã harê nê mar tÿx nê hkôt amnhî nhîpêx mex o ri apa.

²³ Nê mãn ka mê ra Ximotre jarênh mar japêr. Na pre Kris ã mê hagiênh xâ kamã hkri hã apkati xohtô nê. Tã nhÿm xep mê ra kator. Tã kojâ kormã mê awÿr inhmôr xwÿj ri man ixwÿr mō nê hpôx japêr kot paj ma amnhî kôt mê awÿr o mō ka mê omu.

²⁴ Nê kêr ka mê kot Kris mã mê ajamâr xwÿnhjê mã ijarê. Nê atar Tîrtûm krajê piitã mê kãm ijarê.

Nê ota jar Tîrtûm kra hkwÿja piitã mê awÿr hpêr mê.

²⁵ E kê Tîrtûm mê apiitã mê ato mex o pa. Tã ãm ja pix. Na pa ã mê amã hã kagà ho anê. Na hapêx.

Xiakre Xiakre kot Jejus kôt hkwýjê piitâ hwýr kagà nê mēnh

Xiakre na pre kagàja nhîpêx. Kêp Jejus tō nê kêp Jerujarê kamâ mē kot Jejus kôt amnhî xunhwýr xwýnhjê nhô pastô na pre. Nê kêp Ijaew. Jakamâ na pre hkwýjê mã kagàja nhîpêx nê krî piitâ hkôt urâk nê Jejus kôt mē kot amnhî xunhwýr xwýnhjê hwýr kurê. Jejus ã mē kãm mē hkurê xwýnhjaja na prem mē hipêx kati nhùm mē amnhî xà htýx kamâ hamak o pa. Jakamâ nhùm Xiakre kot mē hamaxpêr o mē hihtýx kaxyw kagàja nhîpêx nê mē hwýr kurê nê mē kãm:

¹ Pa ixkwýjaja. Xà mē amex? E ixpê Xiakre na pa. Ixte Tirtùm mē Pahihti Jejus Kris wa kãm tanhmâ amnhî nhîpêx to xwýnh na pa. Jakamâ kot paj kagàja nhîpêx nê pika piitâ hkôt mē apiitâ mē awýr kurê. Mē apê Tirtùm krajê hwýr.

Mē pahpunuj tâ mē pahte amnhî kaxyw Tirtùm kôt pajamaxpêr

Rukre 6.20-23; Rômân 5.3-5; Korosê 1.11; Wam Pêtre 4.12-19

²⁻³ E ixkwýjaja. Kêr ka mē atô tanhmâ amnhî to rý tanhmâ apunuj to. Rý mēhō tanhmâ Jejus ã mē anhîpêx to. Tã kêr ka mē ja hã amnhî pumu nê tee ri amnhî kukamâ ajamaxpêr o ri akaprî hkêt nê. Arî akînh kãm amnhî kaxyw Tirtùm kôt ajamaxpêr týx rãhã ho ri apa. Kot kaj mē ã amnhî nhîpêx anê nê gaa nê rî mēmoj punuj pê Jejus kôt amnhî xunhwýr týx nê. Jakamâ kwa kêr ka mē tanhmâ apunuj to hã amnhî pumu nê ã mē ate amnhî nhîpêx anhýrja kukamâ ajamaxpêr pê akînh nê ri apa. ⁴ Nom kêr ka mē tee ri tanhmâ apunuj to hã amnhî pumu nê akaprî xàj Tirtùm kaga hkêt nê.

Ãm amnhî kaxyw hkôt ajamaxpêr týx rãhã ho ri apa. Kot kaj mē ã amnhî nhîpêx anê nê gaa nê Tirtùm noo mã tãm amnhî nhîpêx mex o ri apa. Nê kãm hprãm xà hkôt pix mã amnhî nhîpêx o apa.

Mē pahte tanhmâ amnhî kute hã amnhî pumunh kôt amnhî to Tirtùm wýr ã mē pamâ karô

Matêwre 21.18-22

⁵ Nê kêr ka mē mēmoj mýrapê tanhmâ apunuj to hãmri nê tee ri ja hã amâ Tirtùm mã ajamaxpêr týx prãm nhùm apê ja hihtýx japêr. Rý mēmoj tanhmâ apê amnhî nhîpêx to ka tee ri hkukamâ ajamaxpêr japêr. Kêr ka mē ã ajamaxpêr anhýr japêr hãmri nê amnhî to Tirtùm wýr kurê kumrêx. Kot amâ ajamaxpêr mex nhôr nhùm ate ý hã tãm ajamaxpêr kaxyw amnhî to awý. Kot kaj mē ã amnhî to hwýr anê nhùm amnhî tã mē ama nê mēmojta kutã tanhmâ ato axihtýx to kurê kumrêx ka ý hã hkôt ajamaxpêr týx mex o ri apa. Jao tanhmâ akute htã akînh nê ajamakêtkati nê ri apa. Koja Tirtùm tee ri amâ mēmoj kôt ajamaxpêr týx prãm kapry hã apumu nê hã amâ àkjêr kêt nê. Koja ate amnhî to hwýrta ma nê tanhmâ ato mex to. ⁶ Nom kêr ka mē amnhî to hwýr kãm tee ri amnhî kukamâ ajamaxpêr kati hkêt nê. Rý ajamaxpêr o:

—Koonên. Koja apu Tirtùm inhmã ja ho anhýr japêr.

Anhýr o tee ri amnhî kukamâ ajamaxpêr kati hkêt nê. Ãm akînh kãm tanhmâ ate amnhî to hwýr toja kukamâ ajamaxpêr o:

—Nã koja inhmã ho anê. Ixte amnhî kaxyw kãm ijamaxpêr nê amnhî to hwýr xà hkôt koja inhmã tanhmâ amnhî nhîpêx to.

Anhýr o hkamnâr rom ã amnhî kukamâ ajamaxpêr anê.

Nom kot kaj mē tanhmâ amnhî to hwýr to nê tee ri amnhî kukamâ ajamaxpêr kati nê hkôt ajamaxpêr

tỳx kêt nê. Nê te kôk nhâm àpêr nê nhâm àpêrta pyrà nê nhâm ri ajamaxpêrja o hkôt ajamaxpêr kêt nê. Kot kaj mê ã amnhĩ nhĩpêx anê nhũm Tĩrtũm tee ri ja hã mẽ apumu nhũm ja kãm mex kêt nê. ⁷⁻⁸ ã mẽ hamaxpêr anhỹr xwỳnhjaja na htem nhâm hamaxpêr nê nhâm hamaxpêr jao hamaxpêr mex kêt nê. Jakamã kot kaj mẽ ã ajamaxpêr anhỹr o amnhĩ to Tĩrtũm wỳ hãmri nê ãm amnhĩ to hwỳr kaprỳ. Koja ama nê ãm ama. Nom kot kaj mẽ tanhmã akute hã amnhĩ kaxyw hkôt ajamaxpêr tỳx pê amnhĩ to awỳ. Nê tee ri amnhĩ kukamã ajamaxpêr kati hkêt kãm tanhmã amnhĩ to hwỳr to nhũm amnhĩ tã ama nê hkĩnh nê tanhmã amã mẽmoj nhĩpêx to. Mẽ ate hã axàhwỳr xà hkôt tanhmã mẽ amã mẽmoj nhĩpêx to.

Mẽ kêp amrakati xwỳnh mẽ mẽ kot amnhĩ to rũnh xwỳnhjê jarênh

Eprêw 13.5-6; Wam Pêtre 1.24-25

⁹ Nê kwa mẽ akàxpore hkêt xwỳnhjaja. Jar mẽ apê amrakati htã mẽ apê Tĩrtũm kra na ka mẽ. Jakamã kêr ka mẽ akàxpore rũnh kêt tã mẽ apê Tĩrtũm kra hã amnhĩ pumunh kôt ajamakêtkati nê nê akĩnh nê apa.

¹⁰⁻¹¹ Nê mẽ akàxpore rũnh xwỳnhjaja. Mẽ akàxpore rũnh nê mẽ akukrêx rũnh tã kot kaj mẽ nhỹrmã ty nê piitã rer pa nê mẽ kêp amrakati xwỳnhjê pyrà nê anhỹ kamã Tĩrtũm kuri akrĩ nhũm tanhmã mẽ ajarênh to. Te mẽ apê mẽmo pixôrà kot amnhĩ nhĩpêx pyràk. Na hte kwỳhtã axpên pê axpôt nê muxre nê mex nê harir. Tã gaa nê rĩ hã myt xàhpanh mẽ nhũm ra nhôôre. Nê gaa nê ra grà pa nê rôrôk nê hapêx. Tã kot kaj mẽ nhỹrmã uràk nê ty nê akukrêx rer pa. Jakamã kwa kêr ka mẽ akàxpore rũnh pumunh kôt akĩnh nê ri apa hkêt nê. Kêt ãm mẽ apê Tĩrtũm kra

hã măn amnhĩ pumunh kôt akĩnh nê apa.

Mẽ pahpunuj kôt pagryk nê mẽ pahkurê

¹² Nê kot kaj mẽ atô tanhmã apunuj to htã arĩ amnhĩ kaxyw Tĩrtũm mã ajamaxpêr tỳx rãhã ho ri apa. No tanhmã apunuj to hã amnhĩ pumu nê hkaga hkêt nê. Rỳ kot tanhmã ato xwỳnhhta kêr ka mẽ amnhĩ tã kamã agryk nê tanhmã ho hkêt nê. ãm Jejus kôt pix mã amnhĩ nhĩpêx rãhã ho ri apa. Kêr kê Tĩrtũm amã hkĩnh ã amnhĩ tã apumu nê amex ã ajarê. Ka nhỹrmã kuri amex kumrêx nê atĩr tũm nê apa ho apa. Ra kot mẽ pakukamã mẽ pahtã amnhĩ jarênh xà hkôt. Jakamã kêr ka mẽ tanhmã apunuj to htã ã amnhĩ kukamã ajamaxpêr anhỹr pê akĩnh nê apa.

¹³ Nê Tĩrtũm aa kãm tanhmã amnhĩ tomnuj to hprãm kêt. Nê mẽ papajaja mẽ pahte tanhmã amnhĩ tomnuj to kaxyw na hte mẽ pamã tanhmã àmnênh to rỳ mẽ pamã mẽ pajamaxpêr punuj jagjênh kêt nê. Jakamã kot ka mẽ atô amã tanhmã amnhĩ tomnuj to hprãm tã kwa kêr ka Tĩrtũm tãm kot ja kaxyw mẽ akrãm mẽ ajamaxpêr punuj jagjênh to hã hkamnhĩx kêt nê. ¹⁴⁻¹⁵ Mẽ papamjaja na pu htem pajamaxpêr punuj xà hkôt tanhmã amnhĩ tomnuj to. No Tĩrtũm Karô na hte mẽ pamã mẽ pajamaxpêr punuj jagjênh kêt nê. Mẽ papamjaja na pu htem pajamaxpêr punuj nê gaa nê ra hkôt tanhmã amnhĩ tomnuj to. Hãmri nê gaa nê ã amnhĩ nhĩpêx anhỹr rãhã ho ri papa. Mẽ kot amnhĩ tomnuj o mẽ pa xwỳnhjaja koja mẽ nhỹrmã ty hãmri nê Tĩrtũm mẽ Kra wa kuri htĩr tũm nê pa ho pa hkêt nê.

Tĩrtũm kot tanhmã mẽ pahto mex to hã harênh

Xiakre 3.17-18; Sikũn Pêtre 1.3-4

¹⁶ Nê e ixkwỳjaja. Tĩrtũm kot mẽ pahte amnhĩ tomnuj prãm xàj

mē pamā mē pajamaxpēr punuj jagjēnh kêt jakamā kwa kēr ka mē ā ajamaxpēr anhÿr kêt nē. ¹⁷ Na hte mē pahto mex pix o pa. Na pre myyti ho kato. Kapēr pix o ho kato. Nē mytwrÿre ho kato. Nē kanhêti ho kato. Ja piitā ho kato nhūm mē pamā hirā mex o harir. Na hte mytwrÿre tōhā hirā mex o pa. Nē gaa nē nyw kaxyw nē kamāt kō. Nē gaa nē nyw mē nhūm akupÿm hirā. Ā na hte amnhī nhīpêx anhÿr o pa. No Tirtūmja ā kot anhÿr kêt. Kot amnhī nhīpêxja ām rāhā ho rāhā. Na hte mē pahto mex pix o pa. No tōhā tanhmā mē pahto mex to nhūm jāā nhūm tanhmā mē pah-tomnuj to hkêt nē. ¹⁸ Tā kapēr pix o kot ā mēmoj to kator kot anhÿr. Nē mē pamā kapēr o amnhīrīt. Kām mē pahto hkra hprām xāj mē pamā Jejus kot tanhmā mē panē amnhī nhīpêx toja nhūm pre mē pamā ho amnhīrīt. Na pu prem kuma nē hkôt amnhī xunhwÿ nhūm amnhī tā mē pahpumu nē mē pahto hkra. Mē pahpē Ijaew kumrēxjaja na pre mē pahto hkra.

Mē pagryk o papa nē mē pahkurē Rōmān 12.17-21; Epes 4.25-5.2

¹⁹ E ixkwÿjaja. Kwa mē ixkapēr ma nē hā anohtÿx nē ho apa. Koja mēhō Tirtūm kapēr o mē ajahkre kaxyw mē awÿr mō nē mē amā kapēr jarē ka mē mar tÿx nē. Koja mē ate tanhmā amnhī tomnuj to nē mē amā kapēr ka mē amnhī tā ama nē kamā agryk kêt nē. ²⁰ Mē gryk o mē pa xwÿnhjaja na htem Tirtūm kapēr kôt ri amnhī nhīpêx kêt nē. ²¹ Jakamā kwa kēr ka mē axte amnhī tomnuj rÿ ajamaxpēr punuj o ri apa hkêt nē. Na htem ohtō nē ā amnhī nhīpêx anhÿr o pa nom kēr ka mē kurom Tirtūm kapēr mǎn amnhī krā him haxār tÿx nē. Kapēr o mē ajahkre xwÿnhjaja na htem ho mē ajahkre mex o pa. Tā kēr ka mē ama nē amā hkôt amnhī nhīpêx prām rāhā ho ri apa.

Na pu htem Tirtūm kapēr ma nē hkôt amnhī nhīpêx o papa hāmri nē nhÿrmā Tirtūm mē Kra wa kuri pahÿr tūm nē pa mex nē papa ho papa.

Mē pahte Tirtūm kapēr kôt amnhī nhīpêx ā mē pamā karō

Matêwre 7.24-27; Wam Juāw 2.3-6

²² Nē kwa mē okora. Kēr ka mē ām Tirtūm kapēr ma nē ām mar kêt nē. Mǎānēn hkôt amnhī nhīpêx rāhā ho ri apa. Kot kaj mē ama nē ām ama nē hkôt amnhī nhīpêx kêt nē hāmri nē apē Tirtūm kra hā amnhī jarēnh kaprÿ. Jao nhÿrmā Tirtūm mē Kra wa kuri atÿr tūm nē apa hkêt nē. ²³⁻²⁴ Te ho mēhō kot amnhī pumunh xā hpyr nē kamā amnhī pumunh nē amnhī krā hkī jaē rÿ amnhī kuk tyk pumunh pyrāk. Tā te kot ām ja hā amnhī pumunh nē kot amnhī to mex kêt rāhā akupÿm amnhī pumunh xā xir nē ma htēm nē axte amnhī kuk tyk rÿ amnhī krā kī jaērta mā hamaxpēr kêt pyrāk. Mē kot Tirtūm kapēr mar nē ām mar nē hkôt amnhī nhīpêx kêt xwÿnhjaja te kot ja jarēnh pyrāk. ²⁵ Tā kēr ka mē ā amnhī nhīpêx anhÿr kêt nē. Mē ate Tirtūm kapēr kôt amnhī nhīpêx o apa kaxyw xatā kamā harē nē mar tÿx o apa. Jao hkôt amnhī nhīpêx mex o apa. Tirtūm kot mē pahte tanhmā amnhī nhīpêx to ho papa hā mē pamā karō xāja ām hāmri na. Na htem hkôt amnhī nhīpêx nhūm Tirtūm ja hā mē omu nē mē ho mex nē nhūm mē àmnhīx hamakētcati nē hkôt amnhī nhīpêx o pa. ²⁶ Nom koja mēhō kēp Tirtūm kra hā amnhī jarēnh tā htÿx ri kapēr punuj o ri pa hāmri nē ām kēp hkra hā amnhī jarēnh kaprÿ. Mē pahpē Tirtūm krajaja na pu htem ā pakapēr anhÿr kêt nē. ²⁷ Axtem mē pahte amnhī nhīpêx. Na pu htem mē hā awrā rÿ mē kēp mē mjēn tyk xwÿnhjē ho mex nē mē hā pahpēr o pahpikēnh o papa hkêt

ně. Ně tanhmã mě kute hã mě omu ně mě ho ajuta ho papa. Á na pu htem pahpê Tirtũm krajaja amnhĩ nhĩpêx anhÿr o papa nhũm Měpanhĩpêêxà Maati Tirtũm ja hã mě pahpumu ně hkĩnh ně. No na pu htem mě kot amnhĩ tomnuj o mě pa xwÿnhjê hkôt ri amnhĩ nhĩpêx kêt ně âm Tirtũm kapêr xà kôt pix mã amnhĩ nhĩpêx nhũm amnhĩ tã mě pahpumu ně hkĩnh ně.

2

Mě pahte mě piitã mě hipêx o axpên pyrãk ã mě pamã karõ

Rõmãn 2.11; Korosê 3.25

¹ E ixkwÿjaja. Pahihti Jejus Krisja mex o mex. Tã ra mě ate hkôt amnhĩ xunhwÿr jakamã kwa kêr ka mě apê hkwÿ hã mě piitã tãm mě hipêx o apa. Ně mě hipêx o axpên pyrãk. ² Jakamã kot kaj mě nhÿrmã Tirtũm kapêr mar kaxyw axpên wÿr akuprõ nhũm hikàxpore rax xwÿnhta mě akôt axà. ê mex ně ôr o ïhkra kamã kàx hãmri ně mě akôt axà. Nhũm hkôt mēhõ pē amrakati xwÿnhja tē ně axà. Nom wamta kĩnhã kêp amrakati ně ê omnajti ně pikaxônhti. Hãmri ně hikàxpore rax xwÿnhta hkôt mě awÿr tēn axà. ³ Tã tanhmã kot kaj wem ri wa hipêx to? Xà kot kaj mě wa hipêx o axpên pyrãk nà? Nà xà kot kaj mě ã wa hipêx aně ně wam àr xwÿnhta ê mex ã omunh xà hkôt kãm kadêre hõ gõ ně kãm:

—E ota kadêre. Mãmri hã nhÿ. Aně.

Hãmri ně ê pynajti xwÿnhta pumu ně axtem ně kãm:

—E atar pikap nhÿ.

Anhÿr o ahpÿnhã wa kãm akapêr? ⁴ Kot kaj mě ahpÿnhã ã wa hipêx aně ně amnhĩ tomnuj ně. Wam àr xwÿnhta ka kãm akapêr mex ně tanhmã ho mex to. No hkôt hõta omnajti hã omunh xà hkôt te kamã anhõkre kahak pyrãk o hipêx. Kot kaj mě ã ahpÿnhã wa

hipêx aně nhũm Tirtũm tee ri ja hã mě apumu nhũm ja kêp omnuj ně. ⁵ Kwa mě inhma ixkwÿjaja. Mě kêp amrakati xwÿnhja mě hikàxpore hkêt tã na hte mě hkwÿjaja amnhĩ kaxyw Tirtũm kôt hamaxpêr ně hkôt amnhĩ xunhwÿ nhũm amnhĩ tã mě omu ně kot mě panhĩpêx pyrãk ně mě ho hkra. Jakamã jar mě kêp amrakati htã na htem amnhĩ kaxyw Tirtũm kôt hamaxpêr tÿx rãhã ho pa. Jakamã koja mě nhÿrmã kuri htÿr tũm ně mex kumrêx ně pa ho pa. Mě kãm Tirtũm kĩnh o mě pa xwÿnh piitã koja mě nhÿrmã ã mex ně ri pa aně. ⁶ Nom kot kaj mě ahpÿnhã mě hipêx ně amnhĩ tomnuj ně. E pa mēmoj tã mě akukja. Mēmojaja na htem tanhmã mě ato hêx to? Ně mēmojaja na htem juisti mã tanhmã mě ato kapêr punuj to? Xà mě kêp amrakati xwÿnhja? Nà mě tãm kêt. Mě hikàxpore rũnh xwÿnhja na htem ã mě anhĩpêx anhÿr o pa. ⁷ Ně ra mě ate hkôt amnhĩ xunhwÿr xwÿnhja nhũm mě axtem ně tanhmã mě apê ho kapêr to ho pa. Tã ka htem mě kêp amrakati xwÿnhjê rom mě kãm akapêr mex ně mě kãm kadêre mex gõ nhũm mě hã hkrĩ. ⁸ Tirtũm kapêr ã kagà htũm kot ja jarēnh kot:

Kêr ka mě piitã mě hipêx o te ka amã amnhĩ tã ma pyrãk. Aně.

Ã kot mě pamã karõ kot anhÿr. Kapêrja mex kumrêx. Kot puj mě ã axpên nhĩpêx anhÿr jao Tirtũm kãm hprãm xà hkôt amnhĩ nhĩpêx mex ně. ⁹ Nom kot puj mě ã amnhĩ nhĩpêx anhÿr kêt ně ahpÿnhã tanhmã mě hikàxpore rũnh xwÿnhjê ho mex to ně ahpÿnhã tanhmã mě kêp amrakati xwÿnhjê nhĩpêx to japêr. Hã kot puj mě Tirtũm kapêr htũmta nhĩrõp pakuhê ně amnhĩ tomnuj ně. ¹⁰ Kot pu mě kapêr tũm piitã hkôt ri amnhĩ nhĩpêx mex o ri papa htã

ãm pixire në hirôp pakuhê. Jao te pahte kapër piitã hirôp pakuhê pyrãk. ¹¹ Na pre Tirtûm mẽ pahte mẽ pahprô pix tânopxar o papa hã mẽ pamã karô. Nê mẽ pamjên pix tânopxar o papa hã mẽ pamã karô. Nê mẽ pahte axpên par në mẽ pahkurê. Jakamã kot puj mẽ pahprô pix tânopxar mex o ri papa japêr. Nê mẽ pamjên pix tânopxar mex o ri papa japêr tã tanhmã pajamxpêr to në pahkwýjê hõxpĩ. Jao te Tirtûm kapêr tûm piitã hirôp pakuhê hpar pyrãk o amnhĩ nhĩpêx.

¹²⁻¹³ Koja nhỹrmã Tirtûm mẽ pahtir ri tanhmã axpên nhĩpêx to ho papa hã mẽ pahpumunh kôt tanhmã mẽ pajarênh to. Mẽ pamã axpên kĩnh ã axpên to mex o papa hã mẽ pahpumunh kôt mẽ pajarê rý mẽ pamã axpên kĩnh kêt ã axpên nhĩpêx o papa hã mẽ pahpumunh kôt mẽ pajarê. Jakamã mẽ kamã mẽ ukapri kêt xwýnhjaja koja nhỹrmã ja hã mẽ omu në mẽ urãk në mẽ kamã ukapri hkêt në. Nom mẽ kamã mẽ ukapri ho mẽ pa xwýnhjaja koja ja hã mẽ omu në mẽ urãk në mẽ kamã ukapri në mẽ në mẽ kot amnhĩ tomnuj piitã rênh pa. Jakamã kwa kêr ka mẽ amnhĩ to mex në tãm axpên nhĩpêx o ri axpên kôt apa. Nê axpên mã akapêr mex në axpên kamã axukapri pix kukamã ajamxpêr o apa.

Amnhĩ kaxyw Tirtûm kôt mẽ hamaxpêr xwýnhjê jarênh

Rukre 3.8-14

¹⁴ Nê kwa ixkwýjaja. Koja mēhō kot amnhĩ kaxyw Jejus kôt hamaxpêr në hkôt amnhĩ xãm ã amnhĩ jarênh tã hkôt ri amnhĩ nhĩpêx kêt në. Hã koja nhỹrmã ty hãmri në tanhmã kot we amnhĩ to në Tirtûm mẽ Jejus wa kuri htir tûm në pa ho pa? Nã koja anhỹr kêt në. Kêp hkra hã amnhĩ jarênh tã hkôt amnhĩ nhĩpêx kêt jakamã koja nhỹrmã wa hwýr àpir kêt në.

¹⁵ Nê xà koja mēhō kēp amrakati në ri pa. Nê é pynajre pix jagjê në ri hã pa. Nê ò hkêt në ri kãm prãm në pa. ¹⁶ Ka mẽ ja hã omu në tanhmã kãm akapêr to në kãm:

—Kwa ã amnhĩ nhĩpêx anhỹr kêt në. Anhõrkwý hwýr tèn axé mex japêr në axà në amnhĩm mẽmoj japêr në aku. Koja Tirtûm ato mex rax në.

Anhỹr o kãm akapêr tã kãm mẽmoj nhõr kêt në. Tã xà koja we ama në amar xà hkôt é mex jagjê në apkur mex o ri pa? Nã kot ka mẽ ã kãm akapêr anê në ho ajuta hkêt në nhũm arĩ kãm prãm në é hkêt në omnuj në ri pa. Na htem mẽ kapêr pix o mẽ ho mex kêt në. Kot kaj mẽ ã kãm akapêr anê në ãm kãm mẽmoj tã karô kaprý. ¹⁷ Ja pyrã në koja mēhō ra amnhĩ kaxyw Jejus kôt hamaxpêr në hkôt amnhĩ xãm ã amnhĩ jarênh tã kapêr kôt ri amnhĩ nhĩpêx kêt japêr. Hã koja ãm kēp hkra hã amnhĩ jarênh kaprý.

¹⁸ Nê kot kaj mẽ atõ ã ajamxpêr anê në ajamxpêr o:

—Nã Jejus kwýjaja na htem ahpýnhã tanhmã amnhĩ nhĩpêx to ho pa. Na hte mẽ hkwýjaja amnhĩ kaxyw Jejus kôt hamaxpêr tỳx pix o ri pa. Nê mẽ hkwýjaja tanhmã hkwýjê ho mex to ho ri pa. ã na htem ahpýnhã tanhmã amnhĩ nhĩpêx anhỹr to ho pa. Anê.

Kwa mẽ ri ã ajamxpêr anhỹr kêt në. Mẽ hkwýjê ho mex o mẽ pa xwýnhjaja na htem Tirtûm hkôt hamaxpêr pē mãânên hkôt amnhĩ nhĩpêx në hkwýjê ho mex o pa. Koja mēhō amnhĩ kaxyw Jejus kôt hamaxpêr hã koja mãânên hkôt amnhĩ nhĩpêx pē tanhmã hkwýjê ho mex to ho pa. Na htem amnhĩ kaxyw hkôt hamaxpêr pix o pa hkêt në. Na htem mãânên hkôt mẽ piitã mẽ ho mex o ri pa.

¹⁹ Na ka hte mẽ akwýjaja ã ajamxpêr anê në ajamxpêr o:

—Nà Tirtùmja pyxi mex o pyxi mex. Tã kot paj jam ijamaxpër rãhã ho ri ixpa nê ra ixpê hkra hã ri ixpa. Nom kot paj kapêr kôt amnhĩ nhĩpêx o ri ixpa hkêt nê.

Anhÿr o ajamaxpër nê ã ajamaxpër anhÿr kaprÿ.

Nê ãm hãmri na ka htem Tirtùm pyxi mex o pyxi mex ã harê. Nom na htem jam hamaxpër kôt pix mã kêp hkra hkêt nê. Mêkarõmnutijaja na htem haxwÿja Tirtùm pyxi mex o pyxi mex kôt hamaxpër tã mẽ kêp hkra hkêt. Na htem ã hamaxpër anhÿr pê kãm uma ho pa. ²⁰ ã mẽ ajamaxpër anhÿrja mex kêt. Kojã mẽhõ amnhĩ kaxyw Tirtùm kôt hamaxpër ã amnhĩ jarênh tã hkôt amnhĩ nhĩpêx o pa hkêt japêr. Hãmri nê ãm amnhĩ kaxyw hkôt hamaxpër ã amnhĩ jarênh hkaprÿ. E kot paj ixprĩ hã mẽ amã ja jarê ka mẽ inhma. ²¹ Mẽ panhĩgêt finat Apraãw na pre amnhĩ kaxyw Tirtùm mã hamaxpër nê hkôt ri amnhĩ nhĩpêx mex o pa. Tã nhũm amnhĩ tã kamã hamak kaxyw hkra Ijak ã kuwÿ nhũm kuma nê ra kot kãm hpĩr nê òr kaxyw nhũm Tirtùm amnhĩ tã omu nê amnhĩm mex ã harê. Hãmri nê kot hkra hpĩr nê kãm kapêr. ²² Ra kot amnhĩ kaxyw hkôt hamaxpër nê hkôt amnhĩ xãm jakamã mããnen hkôt amnhĩ nhĩpêx nê ra kot kãm hkra nhõr kaxyw Tirtùm amnhĩ tã omu nê amnhĩm mex ã harê. Na pre ã finat Apraãw Tirtùm kapêr kôt amnhĩ nhĩpêx mex anhÿr o pa. Jao amnhĩ kaxyw hkôt hamaxpër mex ã amnhĩ to amnhĩrĩt.

²³ Nê kormã Apraãw wa hkra hkêt ri nhũm Tirtùm wa kãm hkra jarê nhũm kuma nê hkra hkukamã amnhĩ kaxyw Tirtùm kôt hamaxpër tÿx o pa nhũm amnhĩ tã omu nê mex ã harê. Nê kêp hkrãmnhwÿ hã harê. Kapêr ã kagã htũm kot ja jarênh kot:

Na pre Apraãw hkra hkukamã amnhĩ kaxyw Tirtùm kôt

hamaxpër tÿx nhũm amnhĩ tã omu nê amnhĩm mex ã harê. Anê.

²⁴ ã na pre finat Apraãwja hkra kaxyw Tirtùm kôt hamaxpër anhÿrja o ra hkôt amnhĩ nhĩpêx nê ra kot kãm hpĩr kaxyw. Nom kop apu amnhĩ kaxyw hkôt hamaxpër pix nê hkôt amnhĩ nhĩpêx kêt ronhÿx pre Tirtùm tee ri amnhĩ tã omu nê amnhĩm mex ã harênh kêt nê. Na htem amnhĩ kaxyw Tirtùm mã hamaxpër nê mããnen hkôt ri amnhĩ nhĩpêx mex o pa nhũm amnhĩ tã mẽ omu nê amnhĩm mẽ mex ã mẽ harê. ²⁵ Mẽhõ ni kuprÿ finat Raapja na pre ã amnhĩ nhĩpêx anê nê amnhĩ kaxyw Tirtùm kôt hamaxpër pê tanhmã hkôt amnhĩ nhĩpêx to ho pa. Na pre Ijaew myja wa hamêxkrut nê ma Raap nhõ krĩ hwÿr wa tẽ. Mẽ hã ukapi nê kot mẽ hkurê kaxàr kaxyw mẽ hwÿr wa tẽ. Hãmri nhũm Raap Tirtùm kot wa mẽnh ã wa omunh kurê kumrêx nê pòristi kot tanhmã wa ho pymaj amnhĩ nhõrkwÿ kamã mẽ kêp wa ho amũxu nê wa nê mẽ kãm tanhmã hêx to. Nê hpãnhã nhãm pry hõ hkôt akupÿm wa kumê nhũm wa hkà hkĩnh pê ma akupÿm mex nê tẽ. Hãmri nhũm Tirtùm wa hã Raap pumu nê amnhĩm mex ã harê.

²⁶ Tã kot kaj mẽ atõ amnhĩ kaxyw Tirtùm kôt ajamaxpër ã amnhĩ jarênh tã hkôt amnhĩ nhĩpêx kêt japêr. Hãmri nê apê hkra hã amnhĩ jarênh kaprÿ. Te ra mẽhõ htyk nê nõr tã nhũm mẽ kot arĩ htĩr ã harênh kaprÿta pyràk.

3

Mẽ kot Tirtùm kapêr o mẽ ahkre xwÿnhjê jarênh

¹ Nê kwa Kris kôt ixkwÿjaja. Mẽ axohtõ nê mẽ amã Tirtùm kapêr o mẽ ahkre hprãm tã kormã ja kaxyw mẽ apiitã mẽ amex kêt. Mẽ ixte Tirtùm kapêr o mẽ ajahkre xwÿnhjaja kot paj mẽ tanhmã amnhĩ tomnuj to japêr nhũm

Tĩrtũm ja hã mẽ ixpumu nhũm ja kęp omnuj nẽ. Mẽ ixte kapěr o mẽ ajahkre ho mẽ ixpa kẽnã kot pa hkêt mẽ ri tanhmã amnhĩ tomnuj to ho ri ixpa. Jakamã kot kaj mẽ Tĩrtũm kapěr piitã hkôt ri amnhĩ nhĩpêx mex nẽ rĩ kormã ho akwỳjê jahkre ho ri apa.

² Nẽ mẽ pahpiitã na pu htem tũhã mẽ pajakwa ho tanhmã amnhĩ tomnuj to. Mẽmoj tã axpẽn kãm pagryk nẽ tanhmã mẽ kãm pakapěr punuj to. Nom koja mẽhũ tanhmã kapěr punuj toja nẽ amnhĩ to htỳx nẽ hãmri nẽ tãm amnhĩ nhĩpêx o pa.

Mẽ pajakwa jarẽnh
Epes 4.29

³ Na htem nhỹhỹm kawar o juk kaxyw hakwam kax jagjê nẽ kãm nhỹhỹm o htẽm prãm xã hkôt ma nhỹhỹm ho juk o tẽ. Kaxja hkryre nhũm kawar rũnh tã no nhũm kãm ma nhỹhỹm ho mrar prãm xã hkôt ho juk o mra.

⁴ Nẽ gũ xujanãr kãm pãr rũnhhta rũnh tã na hte kũk àpêr tỳx nẽ ma nhỹhỹm o pa. Nẽ pĩ ho pãr o juk xãta hkryre htã ma nhỹhỹm ho juk o mũ. Nhỹhỹm pãr o mrar xwỳnh kãm o mũr prãm xã hkôt o mũ.

⁵ Ja pyrà nẽ mẽ pajakwaja hkryre htã na htem ho kapěr o tanhmã mẽ hipêx to ho pa. Tũhã ho kapěr mex nẽ nhũm mẽ kuma nẽ hkĩnh nẽ. Nẽ tũhã ho kapěr punuj nẽ nhũm mẽ tee ri mẽ kapěr ã mẽ kuma nẽ hkaprĩ nẽ rỳ kapěr xwỳnhhta kamã gryk nẽ. Mẽ pajakwa hkryreja te kot kuwy jakrax kryre pyràk. Kot ka kuwy jakrax grire ho tẽ nẽ nhỹri pũti kamã amẽ nhũm kũk ho apê nhũm hpũk rax tokyx anẽ. Hãmri nẽ ma pã ho hkaxàr par o mũ nẽ ho hkaxàr pa. ⁶ Mẽ pajakwaja mã kot anhỹr. Kot kaj atỳx ri tanhmã ho akapěr punuj to nhũm mẽ ama nẽ axpẽn mã anhĩxi ho krĩ nhĩpêx ka amex kêt nẽ apa. Rỳ ka atỳx ri ajakwa ho tanhmã akwỳjê ho akapěr to nhũm mẽ tee ri amnhĩ tã

ama nẽ hkaprĩ nẽ rỳ akamã gryk nẽ. Satanasti nhỹ hã na htem ã mẽ hakwa ho kapěr punuj anẽ.

⁷ Na htem tũhã mẽmo mry xoprê pynê nẽ tanhmã ho nẽ ra ho kãm ma hkêt. Kagã rỳ hagrũre rỳ àati rỳ gũx kãm mẽmo mryja nhũm htem unê nẽ tanhmã ho nhũm kãm ma hkêt nẽ mẽ hkôt pa ho pa. Nom na htem mry piitã ã hipêx anhỹr kêt nẽ. ⁸ Tã mẽ pajakwa te mẽ kot tee ri mẽmo mry ho kãm ma hkêt kaprỳ xwỳnhhta pyràk. Na pu htem amnhĩ krã hkôt pajakwa ho pakapěr mex pix kêt nẽ. Tanhmã kot puj mẽ pakapěr punuj kêt kaxyw amnhĩ jakwa hto? Mẽ pakapěr punuj te kot kagã xoprê kot mẽ hkamnhar nẽ ò wenẽn o mẽ hparta pyràk. ⁹⁻¹⁰ Na pu htem tũhã pajakwa ho tãm pakapěr nẽ tũhã pakapěr punuj nẽ. Nẽ tũhã Pahi Maati Tĩrtũm mã mex o mex ã harẽnh tã ra axtem nẽ tanhmã mẽhũ japrỳ hto. Tĩrtũm kot mẽ pahto amnhĩ pyrà nẽ mẽ panhĩpêx tã pu htem axtem nẽ tanhmã axpẽn japrỳ hto ho ri papa. Jao te pahte Tĩrtũm japrỳ pyràk. Kwa ixkwỳjaja. Kêr pu mẽ pahpê Tĩrtũm krajaja ã pakapěr punuj anhỹr hkêt nẽ. ãm mẽ pajakwa ho mẽmoj mex pix jarẽnh o ri papa.

¹¹⁻¹² Xã koja pã kamã hinore pyxi htã kamã gũ xãnh nẽ mããnẽn kamã gũ xenh nũkati? Nã koja anhỹr kêt nẽ. Na hte kamã gũ mex pix nẽ rỳ kamã gũ xenh nũkati pix nẽ.

Nẽ xã koja jãxũ hpãr ã rãrãj harir? Rỳ ahkrũ xũ hã mãnkwrỳtre harir? Nã na hte ahpỳnhã hpãr ã harir. Ja pyrà nẽ kêr pu mẽ pahpê Tĩrtũm krajaja pajakwa ho pakapěr punuj pẽ ho papikamỳr tỳx nẽ. Nẽ te hinore kamã gũ mex pixta pyrà nẽ ãmoj mex pix jarẽnh o ri papa. No mẽ pajakwa nhĩkê ho tãm pakapěr nẽ hikjê ho pakapěr punuj kêt nẽ. ãm pakapěr mex pix o pakapěr o ri papa. Kwa kêr pu

mê ã amnhĩ nhĩpêx anhÿr rãhã ho papa.

Tĩrtũm kõt mẽ àhpumunh xwÿnhjê jarênh

Wam Korĩt 2.6-16

¹³ Nê kwa mẽ axàhpumunh tÿx xwÿnhjaja kêr ka mẽ amnhĩ to mex o ri apa. Nê mẽ piitã tãm mẽ hipêx mex nê mẽ amã axpên japê hã axpên to ajuta mex o ri apa. Tĩrtũm kapêr xà hkôt. Kot kaj mẽ ã amnhĩ nhĩpêx anê nê axàhpumunh mex ã amnhĩ to amnhĩrit. ¹⁴ Nom kot ka mẽ mẽmoj tã axpên kamã agryk o ri apa. Rÿ amnhĩ pix kukamã ajamaxpêr o ri apa hãmri nê ãm ate Tĩrtũm kapêr kõt amnhĩ nhĩpêx ã amnhĩ jarênh kaprÿ. ¹⁵ ã mẽ kot amnhĩ nhĩpêx anhÿr xwÿnhjaja na htem Tĩrtũm kõt amnhĩ nhĩpêx kêt nê. Mẽ kêp Tĩrtũm kra hkêt xwÿnh pixjaja na htem ã amnhĩ nhĩpêx anhÿr o pa. Jao mẽkarõmnuti kot amnhĩ nhĩpêx kõt pix mã amnhĩ nhĩpêx o pa. ¹⁶ Axpên kamã mẽ gryk o mẽ pa xwÿnhjaja na htem amnhĩ pix kukamã hamaxpêr jao tanhmã amnhĩ tomnuj to ho pa. Nê amnhĩ tã mẽ kamã mẽ gryk xwÿnhjê homnuj o pa. Tã ã mẽ pahte amnhĩ nhĩpêx anhÿr pumaj kwa kêr pu mẽ mẽmoj tã axpên kamã pagryk o ri papa hkêt nê. ¹⁷ Mẽ kot Tĩrtũm kõt amnhĩ nhĩpêx xwÿnhjaja na htem jajê rom tãm axpên nhĩpêx rãhã o pa.

Nê axpên kamã ukapri pix o ri axpên kõt pa.

Nê tãm hamaxpêr o pa.

Nê mẽ piitã mẽ hipêx o axpên pyrãk.

Nê axpên tã hpijaam o ri pa.

Nê tanhmã ri axpên no kupyr to hkêt nê.

Nê ri oprê ho pa hkêt nê.

Nê mẽ axpên kamã òkre kahak kêt nê.

Nê mẽ piitã mẽ ho mex o axpên pyrãk.

Nê tãm mẽ piitã mẽ hipêx rãhã nê.

Ã na htem Tĩrtũm kõt mẽ kot amnhĩ nhĩpêx xwÿnhjaja amnhĩ nhĩpêx anhÿr o pa. ¹⁸ Kot puj mẽ ã amnhĩ nhĩpêx anê nê pajamakêtkati nê paxamnhix pahkĩnh nê ri papa. Nhũm nhÿri mẽhõ wa axpên kãm gryk pu mẽ wa omu rÿ wa harênh ma hãmri nê mẽ pahtõ ma wa hwÿr tẽ nê wa kãm pakapêr nê tãm akupÿm wa ãm. Hãmri nhũm wa ra mẽ pahpyrà nê tãm amnhĩ nhĩpêx pê hamakêtkati nê wa ri pa. amnhix ri hkĩnh nê wa ri pa.

4

Mẽ kot amnhĩ pix kukamã mẽ hamaxpêr xwÿnhjê jarênh

Matêwre 20.20-28; Juãw 16.24

¹ Nê kwa mon ka hte mẽ akwÿjaja axpên mã akapêr mã agêt o axpên kãm agryk pix o apa? Na ka htem ã amnhĩ nhĩpêx anhÿr o amnhĩ pix kukamã ajamaxpêr. Nê mẽ amã amnhĩ jamaxpêr kõt pix mã ri amnhĩ nhĩpêx prãm. No Tĩrtũm kãm hprãm xà hkôt amnhĩ nhĩpêx prãm kêt nê. ² Na ka htem nhÿri mẽmoj pumu nê tee ri ho amã anhõ hprãm kaprÿ. Nê amã ho anhõ hprãm xaj õ xwÿnhhta pĩr nê kêp utar mã.

Nê na ka htem tanhmã axpên kukrêx kute hã omu nê amã ho anhõ hprãm nê hã õ xwÿnhhta mẽ wa axpu. No mẽ amã hprãm xwÿnhhta mẽ ate hõ hã Tĩrtũm wÿr ronhÿx ra mẽ ama nê mẽ amã hõ gõ. Tã mẽ ate hã axàhwÿr kêt jakamã nhũm mẽ amã òr kêt nê.

³ Rÿ ka mẽ tõhã mẽmoj tã awÿ nhũm kot mẽ amar tã mẽ amã òr kêt nê. Kot mẽ amã òr nhũm mẽ ate ho anhõxÿ ho apa pymaj na hte tõhã mẽ amã mẽ ate hã axàhwÿr xwÿnhhta nhõr kêt nê.

⁴ Kormã mẽ ate hkôt amnhĩ nhĩpêx mex kêt. Te mẽni hõ ra mjên tã nhãm kot mẽhõ my ho amnhĩkati pyrãk o na ka htem amnhĩ nhĩpêx o apa. Jao mẽ amã mẽ apê Tĩrtũm kra hprãm tã axtem nê mẽ kãm hprãm kêt xwÿnhjê hkôt amnhĩ nhĩpêx

o ri apa nē mē uràk nē tanhmā amnhī tomnuj to ho ri apa. Nē mē ate amnhī tomnuj gryk ā mē amā Tirtūm prām kêt ā amnhī to amnhīrīt.

⁵ Tirtūm kapēr ā kagà htūm kot tanhmā Karō jarēnh to nē harēnh kot:

Na pre Tirtūm mē pahwūr amnhī Karō rē nhūm mē pahwūr wrū nē mē pakamā agjē nē mē pahkôt pa ho pa. Mē pahte hkôt pix mā amnhī nhīpêx o papaja na kām hprām. Anē.

Ām hāmri ā harēnh kot anhūr jakamā kwa kêt ka mē harēnh ma nē kām ajamaxpēr tỳx rāhā ho ri apa.

⁶ Na hte Tirtūm mēmoj to mē pakutā nojarēt rāhā pu mē ŷ hā tām amnhī nhīpêx o ri papa. Kapēr ā kagà kot ja jarēnh kot:

Mē kām Tirtūm kôt amnhī nhīpêx prām kêt xwỳnhjaja na hte Tirtūm amnhī tām mē omu nē mē kutā amnhī xunhwỳ.

No mē kām hkôt ri amnhī nhīpêx prām xwỳnhjaja na hte amnhī tām mē omu nē mē ho mex o pa nhūm htem hihtỳx xà nhỹ hā mē kām hprām kêt xwỳnhjē hkôt ri amnhī nhīpêx kêt nē. Anē.

⁷ Jakamā kwa kêt ka mē Tirtūm kapēr kôt pix mā mǎn ri amnhī nhīpêx o ri apa. Kêt kē Satanasti tanhmā mē ate amnhī tomnuj to hprām xāj tanhmā mē ato ka mē Tirtūm Karō nhỹ hā ām ama nē hkôt amnhī nhīpêx kêt nē. Nhūm tee ri amā àhkrox kaprỳ nē akaga nē ma tē.

⁸ Nē kot kaj mē Tirtūm kapēr kôt pix mā ri amnhī nhīpêx o apa nhūm amnhī tām mē apumu nē te kot mē apa hā mē ajamỳnh nē mē ato pa pyrāk o mē anhīpêx. Jao mē ato mex o ri mē akôt pa ho pa. Nē mē atānopxar rāhā ka mē ajamakêtkati nē akīnh nē ri apa.

Nē kêt ka mē tanhmā amnhī tomnuj to hāmri nē tee ri ja hā amnhī pumu nē hkaga kuré kumrêx nē axte ā amnhī nhīpêx anhūr kêt nē. Rỳ ka mē tanhmā ajamaxpēr punuj to hāmri nē ja hā amnhī pumu nē hkaga nē hpānhā tām ajamaxpēr pix o ri apa. Mē apē Tirtūm kra hā kêt ka mē ām hkôt pix mā ri tām amnhī nhīpêx o ri apa.

Mē pahte amnhī tomnuj ā tanhmā amnhī nhīpêx to hā mē pamā karō

Wam Juāw 1.5-10

⁹ Nē kêt ka mē tee ri ate tanhmā amnhī tomnuj to hā amnhī pumu nē akapri xāj mur nē akīnh kêt nē. Nē akapri xāj amūr rax nē. ¹⁰ Hāmri nē Tirtūm mā amnhī jarēnh o:

—Pa Tirtūm. Na pa ā amnhī tomnuj anē. Nom kot paj axte hkêt nē. Ām inhmā akapēr kôt pix mā ri amnhī nhīpêx prām.

Anhūr o kām akapēr kē mē ama nē mē ate amnhī tomnujta ā tanhmā mē ato hkêt nē. Ām mē ato mex nē ka mē akupỳm ajamakêtkati nē axāmnhīx akīnh nē ri apa.

Mē pahte axpēn to pakapēr nē mē pahkurē

Matēwre 7.1-5; Rōmān 2.1-3, 14.10-13; Wam Korīt 4.5

¹¹ E ixkwỳjaja. Kwa kêt ka mē anhīō kot tanhmā amnhī tomnuj to hā omu nē tanhmā ho akapēr punuj to hkêt nē. Tirtūm kapēr ā kagà htūm kot ja nē mē pahkurē kamā hihtỳx jakamā kot ka mē ri ā amnhī nhīpêx anē nē te ate Tirtūm kapēr tūm kwỳ omnuj ā harēnh pyrāk. Rỳ te axāhpumunh tỳx o ate Tirtūm jakrenh ā amnhī to jarkrar pyrāk. Jao kapēr kôt amnhī nhīpêx kêt nē. Na htem Tirtūm kapēr ā kagà htūm kwỳ mex ā harē nē hkwy omnuj ā harēnh kêt nē. Piitā mex kēnā.

¹² Nē Tirtūmja tapxipix na kēp mē pahto amnhīptār xwỳnh maati.

Ně tapxipix na hte mẽ pahte tanhmã amnhĩ nhĩpêx to hã mẽ pahpumunh hkôt tanhmã mẽ pajarênh to. Mẽ pahte amnhĩ to mex xwỳnh ã mẽ pajarẽ rỳ mẽ pahte amnhĩ tomnuj xwỳnh ã mẽ pajarẽ. ãm tapxipix kot ã mẽ pajarênh kot anhỹr xwỳnh. Tã ka mẽ axtem nẽ kapêr kwỳm ri tanhmã akwỳjê ho akapêr punuj to ho ri apa.

Mẽ pahte Tĩrtũm mã pajamaxpêr pê kãm amnhĩ jarênh ã mẽ pamã karõ

Rukre 12.13-21

¹³E kwa mẽ inhma ixkwỳjaja. Na ka hte mẽ akwỳjaja tanhmã amnhĩ kukamã ajamaxpêr to nẽ akwỳjê mã amnhĩ jarênh o:

—Koja apkati pa ma krĩ hõ hwỳr mõ nẽ kamã mẽ kãm ixàpênh o ixpa hã ixtã amgrã pyxi nẽ hpãnhã kàxpore jamỳnh rax nẽ man akupỳn mõ.

Anhỹr o amnhĩ jarê. ¹⁴Kwa mẽ ã amnhĩ kukamã amnhĩ jarênh anhỹr kêt nẽ. Mẽ pahtõ mẽ pahte amnhĩ kukamã paxàhpumunh mex? Amrakati kênã. Kot ka mẽ ã amnhĩ kukamã amnhĩ jarênh anhỹr tã kormã ã amnhĩ nhĩpêx anhỹr kêt ri tanhmã amnhĩ to nẽ ty. Rỳ tanhmã amnhĩ to nẽ axà hãmri nẽ nhỹhỹm amõr kêt nẽ. Te mẽ pahpê namê pyrãk na pu htem ri papa nẽ tanhmã amnhĩ to nẽ ty nẽ pajapêx tokyx anẽ. ¹⁵Jakamã mẽ ã amnhĩ kukamã amnhĩ jarênh anhỹr kêt nẽ. Kêt amnhĩ jarênh o:

—Koja Tĩrtũm kãm ja prãm koja apkati pa ã amnhĩ nhĩpêx anẽ nẽ ã amnhĩ nhĩpêx anẽ.

Anhỹr o Tĩrtũm kamnàr o tanhmã amnhĩ kukamã amnhĩ jarênh to. ¹⁶No mẽ ate amnhĩ krã hkôt amnhĩ kukamã amnhĩ jarênh ta Tĩrtũm jamaxpêr xà hkôt kêt. ãm amnhĩ krã hkôt mẽ ate amnhĩ kukamã amnhĩ jarênh kênã. ã mẽ ate amnhĩ jarênh anhỹrja mex kêt.

¹⁷Ně mẽ kot tãm amnhĩ nhĩpêxja kot kaj mẽ ate mar mex tã hkôt amnhĩ nhĩpêx kêt japêr hãmri nẽ amnhĩ tomnuj o apa.

5

Mẽ hikàxpore rũnh xwỳnhjê jarênh Rukre 12.13-21; Wam Ximotre 6.9-10; Apokarip 18.14

¹Ně kwa mẽ akàxpore rũnh xwỳnhjaja. Mẽ inhma nẽ inhmar tỳx nẽ. Nhỹrmã mẽ amex kêt jakamã kwa mẽ tee ri amnhĩ kukamã ajamaxpêr o ra akapřĩ nẽ amỳr o apa kurê kumrêx. ²Tĩrtũm noo mã mẽ akàxpore te ra mẽ apê hapêx par pyrãk. Te ra mẽ anhỹ kamã mẽ ate amnhĩ tomnuj xwỳnh ã kutã akrĩ pyrãk. ³Mẽ ate mẽ akukrêx nẽ mẽ akàxpore ho apikuprõnh rũnh tã ka htem mẽ akwỳjê pê ho anhõxỳ ho ri apa. Mỳrapê koja nhỹrmã tanhmã mẽ apê amnhĩ to nẽ omnu pa ka mẽ ho apikuprõnh rax kaprỳ. Hãmri nẽ mẽ ate amnhĩ tomnuj mỳrapê Tĩrtũm mẽ Kra wa kuri atĩr tũm nẽ apa ho apa hkêt nẽ. ãm kuwy kamã mẽ amnhĩ xà htỳx kamã ajamak rãhã ho ri apa. ⁴Na ka htem apur kãm mẽ àpênh xwỳnhjê mã amnhĩrer kêt nẽ. Nhũm mẽ tee ri amnhĩ tã mẽ ajamã hãmri nẽ mẽ atã amnhĩ to Pahi Maati Tĩrtũm xihtỳx xwỳnh ta wỳr o pa nhũm mẽ atã mẽ kuma. ⁵Mẽ akĩnhã mẽ kêp amrakati htã ka htem ãm ja hã mẽ omu nẽ mẽ àpênh pãnhã mẽ kãm amnhĩrer kêt nẽ amnhĩ pix kukamã ajamaxpêr. Nẽ amã prãm xà hpix kukamã amnhĩm mẽmoj japrõr pê akĩnh o ri apa. Jao te mẽ apê mõx htwỳm nhũm mẽ kot hpĩr nẽ hkrêr mã mex ã harênh xwỳnh ta pyrãk. Mỳrapê kot kaj mẽ mõxta pyrã nẽ nhỹrmã ty hãmri nẽ Tĩrtũm mẽ Kra wa kuri atĩr tũm nẽ apa ho apa hkêt nẽ. ⁶Nom ja pix kêt. Na ka htem mẽ anhõ krĩ kamã mẽ anhõ pahi mã tanhmã akwỳjê ho axêx to ho ri apa. Mẽ kot tanhmã atomnuj to

hkêt tâ ka mê kãm mê ho axêx rûnh nê. Tã koja nhÿrmã Tirtûm mê hã tanhmã mê ato rax kumrêx ka mê ri amnhÿ pumu.

Mê pahte Jejus kutêp amnhÿ kaxyw kãm pajamaxpêr o papa hã mê pamã karô

Sikûn Pêtre 3.1-13

⁷ E ixkwÿjaja. Koja mêmhõ tanhmã mê atomnuj to htã ka mê arÿ amnhÿ kaxyw Jejus mã ajamaxpêr rãhã ho ri apa. Pê akupÿn hpôx xã hã arÿgro jamãr rãhã nê. Te pur nhõ dõn kot amnhÿ nhÿpêx pyrãk. Koja hpur kãm ahkre nê ahkre hpa hãmri nê arÿ hamãr o pa nê kãm nojarêt kêt nê hã na wrÿk jamãr o pa. Jao hamakêtkati nê ô jamãr rãhã ho pa. ⁸ Tã kêr ka mê uràk nê arÿ Pahihti akupÿn hpôx xã hã arÿgro jamãr rãhã ho ri apa. Koja tokyx akupÿn mê pahwÿr wrÿ. Jakamã kêr ka mê kutêp mê kot mê atomnuj xwÿnhjê kutã amnhÿ to htÿx nê ri apa. Nom tee ri amnhÿ kukamã ajamaxpêr o Jejus kaga hkêt nê. Arÿ hamãr pê akÿnh nê ajamakêtkati nê ri apa. Koja akupÿn mê pahwÿr wrÿ nê mê pahto mex rax kumrêx.

⁹ Nê kêr ka mê axpên to akapêr o ri apa hkêt nê. Kot ka mê ã amnhÿ nhÿpêx anê nhÿm Tirtûm mê ama nê tanhmã mê ajarênh to. Kot mê pahpumunh xã hkôt tanhmã mê pajarênh to xwÿnh na. Tã ra tanhmã kot mê pahpiitã mê pajarênh to xã hã arÿgroja ra ahtêp o mõ.

¹⁰ E ixkwÿjaja. Kêr ka mê wam mê kot Tirtûm nhÿ hã kapêr jarênh xwÿnhjaja kot amnhÿ nhÿpêx mã ajamaxpêr rãhã nê. Na prem Tirtûm nhÿ hã mê kãm kapêr o ri mê hkôt pa nhÿm mê hkwÿjaja ja hã tanhmã mê hipêx to nhÿm mê amnhÿ xã htÿx kamã hamak rãhã ho pa. Tã tee ri amnhÿ kukamã hamaxpêr pê Tirtûm kaga hkêt nê. Na prem arÿ ÿ hã kapêr jarênh rãhã ho ri mê hkôt pa. Tã kêr ka mê kot amnhÿ nhÿpêx pyrãk o amnhÿ

nhÿpêx nê Tirtûm kaga hkêt nê. ¹¹ Na prem amnhÿ xã htÿx kamã hamak o pa rãhã ty hãmri nê Tirtûm kuri mex nê hkÿnh nê pa ho pa. Ra mê ate finat Johti jarênh mar mex. Na pre omnuj tÿx nê pa htã amnhÿ tã Pahi Maati Tirtûm kamã gryk nê hkaga hkêt nê. Hãmri nhÿm amnhÿ tã omu nê gaa nê ho mex rax nê nhÿm akupÿm mex kumrêx nê pa. Pahi Maati ja ukaprÿ ho ukaprÿ nê mex o mex jakamã na pre ã Johti ho mex anê. Tã koja ho mexta pyrã nê ã mê pahto mex anê.

Mê pahte tanhmã amnhÿ nhÿpêx to hã mê pamã karô

Matêwre 5.33-37, 18.15; Rômãn 12.15; Karatas 6.1-2; Jutre 22-23

¹² E ixkwÿjaja. Pa mê amã mêmjoj jarê ka mê inhma nê inhmar tÿx nê. Kêr ka mê mêmjoj tã amnhÿ jarênh kaxyw hãmri nê akatàt kôt amnhÿ jarênh kurê kumrêx. Nê amnhÿ jarênh o: “Nà kot paj ja ho anê.” Anê. Rÿ amnhÿ jarênh o: “Nà kwarÿ pa ja ho anhÿr kêt nê.” Anhÿr o amnhÿ jarênh kurê kumrêx. Kê mê akwÿjaja ãm hãmri mê ate amnhÿ jarênh ã mê apumunh kurê kumrêx nê axêx ã mê akamnhÿx kêt nê. Mê apê Tirtûm kra kênã kot ka kêt mê ri axtem nê amnhÿ jarênh o axêx.

¹³ Nê koja mê anhÿõ mêmjoj tã tanhmã amnhÿ to nê omnuj nê. Ka mê ja hã omu nê kãm anê kê amnhÿ kaxyw Tirtûm mã hamaxpêr pê amnhÿ to hwÿr rãhã ho pa. Rÿ koja hkÿnh nê ri pa ka mê ja hã omu nê kãm anê kê hkÿnh kãm mex o mex ã grer o pa. ¹⁴ Rÿ koja ã nê nõ ka mê ja hã omu nê kãm anê kê amnhÿ wÿr pastõ nhÿ hã mê kapêr xwÿnh kwÿjê hã karô. Kê mê hwÿr mra nê Jejus nhÿ hã mêmjo twÿm kwÿ ho hkukõ nê ho Tirtûm wÿ. ¹⁵ Kê mê ã mê ã xwÿnhjê hwÿr mrar nê mê ho Tirtûm wÿr o pa anê. Koja mê ho kuwÿ nhÿm mê kuma nê akupÿm mê ho mex. Nhÿm mê tanhmã amnhÿ tomnuj

to japêr kê mẽ ja hã amnhĩ jarê kê Tĩrtũm mẽ kuma nê ja hã tanhmã mẽ ho hkêt nê. ¹⁶ Jakamã kêr ka mẽ atõ tanhmã amnhĩ tomnuj to nê tee ri ja hã amnhĩ pumu hãmri nê tokyx akwỳjê mã amnhĩ jarê kê mẽ tokyx ato Tĩrtũm wỳ. Kê atã mẽ kuma nê tanhmã akrã hto ka axte ã amnhĩ nhĩpêx anhỳr kêt nê. Nê ra amex nê apa.

Nê koja mẽhõ Tĩrtũm kõt pix mã amnhĩ nhĩpêx mex rãhã ho pa. Hãmri nê mẽmoj tã kuwỳ nhũm kuma nê kãm tanhmã mẽmoj to. ¹⁷ Te finat Eris kot mẽmoj tã hwỳr nhũm kot mar nê kãm ho anhỳrta pyrãk. Erisja kêp mẽ panhĩõ na pre. Tã na pre hkwỳjaja amnhĩ tomnuj pix o pa nhũm tee ri mẽ omu nê mẽ hã na wrỳk kêt kaxyw ho Tĩrtũm wỳr kãm hihtỳx nê. Hãmri nhũm kuma nê kãm ho anê nhũm na wrỳk kêt ry rax kumrêx. Hã amgrã axkrunẽpxi nê hkõt mytwrỳ kêp 6. Mẽ kot amnhĩ tomnuj tỳx o paja mỳrapê. ¹⁸ Tã nhũm Eris axte mẽ ho kuwỳ nhũm axte mẽ hwỳr na rê nhũm akupỳm katat kõt wrỳk mex nê. Nhũm akupỳm mẽ hpur kãm mẽ õja mẽ kãm mex nê akupỳm mẽ kãm ô rũnh nê. Tã ã Tĩrtũm kot Eris mar nê kãm mẽmoj nhĩpêx anhỳrja pyrã nê koja mẽ pama nê mẽ pamã mẽmoj tanhmã ho.

¹⁹ Nê e mẽ inhma ixkwỳjaja. Koja mẽhõ Tĩrtũm kapêr mar tỳx nê te kêp hkra pyrãk o amnhĩ nhĩpêx. Tã tanhmã hamaxpêr to nê kapêr kaga nê htỳx ri amnhĩ tomnuj pix o pa. Ka mẽ ja hã omu nê hwỳr mra nê kot amnhĩ tomnuj nê kãm akapêr kãm axihtỳx kê tokyx hkaga nê akupỳm Tĩrtũm kõt amnhĩ xãm tỳx nê ãm hkõt pix mã amnhĩ nhĩpêx. ²⁰ Koja amnhĩ tã mẽ ama nê Tĩrtũm kõt amnhĩ xãm tỳx nhũm amnhĩ tã omu nê kot tanhmã amnhĩ tomnuj tota ho hamakêtkati nê amnhĩ katut kõt kurê nhũm nhỹrmã kuri hĩr tũm nê mex nê pa ho pa. Koja amnhĩ tomnuj tỳx o pa

htã hkaga hpa nhũm Tĩrtũm ja hã omu nê hã tanhmã ho hkêt nê axte tanhmã kot amnhĩ tomnuj tota mã hamaxpêr kêt nê.

Tã ãm ja pix. Ixpê Xiakre na pa ã mẽ awỳr kaga nhĩpêx nê mẽnh anê.

Wam Pêtre Simãw Pêtre kot Jejus kôt hkwyjê hwyr kagà nê mēnh

Simãw Pêtre na pre kagàja nhîpêx. Kêp tep pynênh o pa xwýnh tâ hpânâ kêp Jejus nhÿ hã hkrajê jahkre ho pa xwýnh. Nê krî pê Jerujarê kamã kêp Jejus krajê nhô pastô. Na pre krî piitã hkôt Jejus ã mē kãm mē hkurê xwýnhjaja tanhmã hã mē hipêx to nhÿm Pêtre mē harênh ma nê mē hamaxpêr o hihtÿx kaxyw mē kãm kagàja nhîpêx nê krî piitã hkôt mē hwyr kurê. Mē kot kamã harênh nê mar nê amnhî kamã kahak kêt nê arî Tirtûm kôt amnhî nhîpêx mex o pa kaxyw. Nê Jejus ã mē kot amnhî xà htÿx kamã hamak tâ nhÿrmã kaxkwa kamã mex nê pa ho pa hã mē kãm awjarê. Æ mē kãm mēmoj jarê nê hã kagà anê. Nê mē kãm:

¹ Pa mē ate Jejus kôt amnhî xunhwyr nhÿm Tirtûm kot mē ato hkra xwýnhjaja. Xà mē amex? Ot pa mē awyr kagà nhîpêx nê kumê. Ixpê Simãw Pêtre na pa. Ixte Jejus nhÿ hã hkrajê jahkre ho mē ixpa xwýnhjê hõ na pa mē awyr kagà nê kumê.

Na xep pre Kris ã mē kãm mē pahkurê xwýnhjaja tanhmã mē anhîpêx to ka mē panhõ pika rûm mē umaj anhrã nê ma ahpÿnhã krî hkôt ri apa.

Jao mē akwýjaja ma pika pê Pôt kamã krî hkwyjê hkôt apa.

Nê mē akwýjaja pika pê Karatas wÿr apa.

Nê mē akwýjaja pika pê Kapatos wÿr apa.

Nê mē akwýjaja pika pê As wÿr apa.

Nê mē akwýjaja Pitîn wÿr apa.

Æ ahpÿnhã pika hkôt mē apigrãnh par anê. Tã ot pa mē awyr kagà nhîpêx nê mē apiitã mē awyr

kurê. Mē apÿnh nê mē ate kamã harênh nê ixkapêr mar kaxyw. ² Na pre Mēpahpãm Tirtûmja amnhîm mē pahte amnhî kaxyw kãm pajamaxpêr xwýnhjê ré nê mē pahtã amnhî jarênh o:

—Kot paj jajê ho ixkra. Na pre ra Ixkra Jejus Kris ixpê mē nê ty nê htyk o hkamrô axkapî nhÿm mē harênh ma nê hkôt amnhî xunhwÿ. Tã nhÿm Ixkarô mē hkarô mã agjê nhÿm mē ra inhmã hprãm xà kôt pix mã ri inhmã tanhmã amnhî nhîpêx to ho pa.

Anhÿr o mē pahtã amnhî jarênh. Tã kê mē akutã nojarêr rãhã ho ri mē akôt pa ka mē ÿ hã axãmnhix ajamakêtkati nê akînh nê ri apa.

Mê pahte amnhî kukamã pajamaxpêr pê pahkînh o papa hã mē pamã karô

Rukre 12.32-34; Rômãn 8.18-25; Sikûn Korît 4.16-18

³ Nê na pre mē panhõ Pahihti Jejus Krisja ty nhÿm Hipêêxã Tirtûm akupÿm ho htîr. Tã kot mē pakutã nojarêr rãhã ho pa jakamã na pre mē pahpê hkrajê mã mē pajamaxpêr nyw jagjê pu mē ÿ hã pahte amnhî nhîpêx nyw o amnhî nhîpêx o papa. Hãmri nê Jejus akupÿm htîrja mã pajamaxpêr nê amnhî kukamã pajamaxpêr o:

—Kot paj nhÿrmã ty nhÿm Tirtûm kot Jejus nhîpêx pyrà nê akupÿm ixto ixtîr pa wa kuri ixtîr tûm nê inhmex kumrêx rãhã ixpa ho ixpa. Nã koja ã inhîpêx anê.

Anhÿr o pajamaxpêr jakamã kwa kêr pu mē Tirtûm mã mex o mex ã mãn harênh rãhã ho papa. ⁴ Na ra mē pakutêp ô krî kamã mēmoj piitã ho mex nê. Ô krî kamã mēmoj kot omnu nê hapêx kêt jakamã na pu htem amnhî tâ hamãr rãhã ho papa.

⁵ Nê mē kot Kris ã mē atomnuj mÿrapê na ka mē amnhî xà htÿx kamã ajamak o ri apa nom arî

amnhî kaxyw Tîrtûm mã aja-
maxpêr rãhã ho ri apa. Hihtÿx o
hihtÿx jakamã koja mẽ pahkôt pa
ho pa nê mẽ pamã pajamaxpêr o
hihtÿx rãhã nhũm nhÿrmã Jejus
akupÿm mẽ pahwÿr wrÿ. Hãmri
pu mẽ hkôt ri amnhî nhîpêx mex
rãhã ho ri papa. Ra Tîrtûm kot
mẽ pakukamã mẽ pajarênh xà
hkôt. ⁶ Jar mẽ pahte arî amnhî
xà htÿx kãm pajamak o papa htã
na pu htem Tîrtûm nhÿrmã kot mẽ
pahto mexta kukamã pajamaxpêr
hãmri nê tee ri amnhî kukamã
pajamaxpêr kêt nê. Mẽ pahpê mẽ
pahpunuj tũm nê ri papa ho papa
mã xwÿnh kêt. ⁷ Na hte Tîrtûm
mẽ panhîpêx o te mẽ kot ôr nhîpêx
pyrãk. Na htem hprî hã tanhmã ôr
kute hã omu. Kêp ôr kumrêx ã omu
rÿ mẽmoj mẽ ho pihkâr ã omunh
kaxyw kuwy kamã kurê. Nhũm
piitã ôr nê pigãnh pa japêr nhũm
mê omu nê harênh o:

—Nã ãm hãmri. Kêp ôr kumrêx nê
mẽmoj mẽ ho pihkâr kêt. Anê.

Na hte Tîrtûm ã mẽ panhîpêx
anê. Jakamã mẽ pahpê Jejus kôt
amnhî nhîpêx o mẽ papa xwÿnhjaja
mẽ pahte tãhã tanhmã pahpunuj to
htã no nhũm mẽ panê ja rênh kêt
nê. Na hte amnhî tã mẽ pahpumu
nê hamaxpêr o:

—Kot paj kormã ja hã mẽ hamã
nê tokyx akupÿm mẽ ho mex kêt
nê. Koja mẽ omnuj nê pa htã
tee ri amnhî kukamã hamaxpêr nê
ixkaga hkêt nê arî amnhî kaxyw
ixkôt hamaxpêr rãhã ho pa. Hãmri
nhũm mẽ hkwyjaja ja hã mẽ omu
nê mẽ kêp ixkra hã mẽ omunh
kurê kumrêx. Te mẽ kot hprî hã
ôr pumunh nê kêp ôr kumrêx ã
omunhta pyrãk. Anê.

Jakamã kêr pu mẽ arî amnhî
kaxyw hkôt pajamaxpêr rãhã ho
papa. Mẽmo myrapê mẽ pahpunuj
nê ri papa htã arî hkôt pajamaxpêr
rãhã nhũm Jejus nhÿrmã akupÿn
mẽ pahwÿr wrÿ. Hãmri nhũm
Tîrtûm mẽ pahpumu nê mẽ pamã:

—Nã ãm hãmri na ka prem
amnhî kaxyw ixpîx mã ajamaxpêr
rãhã ho ri apa. Mẽ kot ixtã tanhmã
mẽ atomnuj to nhũm mẽ ate amnhî
xà htÿx kamã ajamak o apa htã aa
ixkaga hkêt nê arî amnhî kaxyw
inhmã ajamaxpêr rãhã ho ri apa.
Nã ãm hãmri mẽ ate amnhî to mex
kumrêx xwÿnh na ka mẽ. Kot paj
mẽ piitã mẽ kãm ja hã mẽ ajarê.

Anhÿr o mẽ pamã kapêr.

Nê ôr o mẽ hikukrêxja mex tã
koja arî mex rãhã hkêt nê. Koja
mêhõ kãm tanhmã homnu hto
hprãm nê homnu hpa. No mẽ
papajaja kot puj mẽ arî amnhî
kaxyw Tîrtûm mã pajamaxpêr rãhã
ho papa hãmri nê ôrta pyrã nê
pajapêx kêt nê. Kurom mẽ pamex
tũm nê aa pajapêx kêt nê papa ho
papa.

⁸⁻⁹ Nê Jejusja aa mẽ ate ano ho
omunh kêt tã na ka htem kãm mẽ
ajapê htÿx nê kot mẽ panê tanhmã
amnhî nhîpêx to hã harênh ma nê
mẽ amã hkînh nê. Nê amnhî kaxyw
hkôt ajamaxpêr mex rãhã ho ri apa.
Jakamã na pre Tîrtûm ja hã mẽ
apumu nê mẽ ato hkra nê mẽ apê
ô krî kamã wa kuri amex nê apa
mã xwÿnh ã mẽ ajarê. Ja kaxyw
na pu prem amnhî kaxyw hkôt pa-
jamaxpêr rãhã jao pahkînh nê ri
papa. Nê tee ri tanhmã amnhî kînh
tÿx ã amnhî jarênh to hkukamã pa-
jamaxpêr. Kormã aa ã mẽ pahkînh
anhÿr kêt tã mẽ pahkînh tÿx nê ri
papa.

¹⁰ Nê Tîrtûm kot mẽ pahto mex
pê mẽ panê mẽ pahte amnhî tom-
nuj rênh par nhũm kuri mẽ pahpêr
tũm nê mẽ papa hã mẽ pajarênhja.
Amnepê mã Tîrtûm nhÿ hã kapêr
jarênh o ri mẽ pa xwÿnhjaja na
pre mẽ pakukamã ã mẽ pajarênh
anhÿrja ma nê tee ri hamaxpêr nê
tee ri hã axpên kukjê o ri axpên kôt
pa. Nom hprî hã mar mex kêt nê.
Tã arî ri mẽ pakukamã hkwyjê mã
ja hã mẽ pajarênh o ri pa.

11 Na pre Tirtûm Karôja Kris tyk kukamã mê kãm ã mê pajarênh anhÿr o amnhîrit. Kormã Kris kaxkwa kamã pa ri. Kormã wrÿk nê katorxã nhôxàhkre rûm kator kêt ri nhûm pre hkukamã mê kãm tanhmã ho amnhîrit to. Mê kot hpîr nhûm kot amnhî xà htÿx kãm hamak kãm mê panê htykja ã hkukamã mê kãm harênh o amnhîrit. Nhûm Tirtûm kot akupÿm ho htîr nê kãm mex o mex ã harênhja nhûm hkukamã mê kãm harênh o amnhîrit. No ãm hprî hã mê kãm mēhō nhîxi hkôt harênh kêt jakamã nhûm prem harênh ma nê tee ri hkukamã ri hamaxpêr nê tee ri hã axpên kukjêr o ri axpên kôt pa. Nê hã axpên kukjêr o:

—Kwa mēhō koja we ã amnhî nhîpêx anê? Xà koja tokyx ã amnhî nhîpêx anê nã kormã?

Anhÿr o hã axpên kukjêr o ri pa. 12 Hãmri nhûm Tirtûm axte mê kãm Jejus jarênh kwÿ ho amnhîrit nê mê kãm:

—Nã mê anoo mã koja ã amnhî nhîpêx anhÿr hkêt nê. Mê amÿr pē mê akanrēhã mê akra nê mê atãmnhwÿjê noo mã koja kato nê mê hkôt ã amnhî nhîpêx anhÿr o pa. Anê.

Mê papamjaja mê panoo mã kator nê ã kot amnhî nhîpêx anhÿr o paja o ã mê kãm ho amnhîrit anê.

Amnepēm Tirtûm nhÿ hã kapêr o ri mê pa xwÿnhjaja nê jarãhã mê ixte Jejus nhÿ hã mê ahkre ho ri ixpa xwÿnhjaja mê ixkapêr ãm pixii. Na pa htem wamtajê pyrã nê Tirtûm Karô nhÿ hã àhpumunh tÿx xà ho mê amã tanhmã Jejus jarênh to ho ri mê akôt ixpa. Nhûm hte Tirtûm kapêr o mê wrÿk xwÿnhjaja mê ixkapêr ma nê tee ri hamaxpêr o mê pahpyrã nê kãm hprî hã harênh mar par prãm nê.

Mê pahte Tirtûm pyrã nê tãm amnhî nhîpêx ã mê pamã karô

Epes 4.1-3; Korosê 1.10-12; Sikûn Pêtre 3.10-13; Wam Juãw 3.1-6

13 E kwa Kris kôt ixtō nê ixtōxjaja. Kêr ka mê Jejus kutêp mēmoj punuj kutã amnhî to htÿx rãhã ho ri apa. Nê Tirtûm mã amnhî nhîpêx mex rãhã nê. Pê tãm ajamaxpêr nê tãm amnhî nhîpêx o apa. Nê mê ã ajamaxpêr anhÿr o:

—Nã koja nhÿrmã Jejus akupÿn mê ixwÿr wrÿ hãmri nhûm Tirtûm ixto mex rax nê. Nã koja ã inhîpêx anê. Anê.

14 Nê kêr ka mê Tirtûm kapêr kôt pix mã mãn ri amnhî nhîpêx mex rãhã ho ri apa. Te mēhprîre kot mê hipêexã kapêr mar nê hkôt amnhî nhîpêx pyrãk. Kormã mê ate Kris kôt amnhî xunhwÿr kêt ri na ka prem ate amnhî nhîpêx tùm kôt ri tanhmã amnhî tomnuj to ho ri apa. 15 Tã kêr ka mê hpãnhã amnhî to mex o mãm ajamaxpêr o apa nê Tirtûm pyrã nê amnhî tomnuj o apa hkêt nê. Tirtûmja kot amnhî to mex pix o pa xwÿnh na. 16 Kapêr ã kagã htûm kot ja jarênh kot:

Kêr ka mê ixpyrã nê amnhî to mex pix o ri apa. Anê.

17 Tã koja nhÿrmã kêp Mēpahpãm maati hã hprî hã mê pahte amnhî nhîpêx ã mê pahpumunh hkôt tanhmã mê pajarênh to. Tãm mê pahte amnhî nhîpêx kôt mê pajarê rÿ mê pahte amnhî tomnuj kôt mê pajarê. Hãmri nê ahpÿnhã mê panhîpêx. Mê pahto mex nê rÿ mê pahtomnuj nê. Jakamã kwa pu mê nhÿrmã kot tanhmã mê pahtomnuj to pymaj hkôt pix mã amnhî nhîpêx o ri papa rãhã nê.

18 Nê kormã mê pahte Jejus kôt amnhî xunhwÿr kêt ri na pu prem mê panhîgêt pyrã nê pahtÿx ri amnhî tomnuj o ri papa. Tã nhûm Krisja te amnhîm mê pajaprôr pyrãk o mê panhîpêx. Mê pahte hpãnhã kapêr kôt pix mã amnhî nhîpêx o papa kaxyw. No mēmoj to na pre mê pahpãnhã amnhîre? Nã ra mê pahte ja jarênh mar tÿx. Nã pre kãxpore ho mê pahpãnhã

amnhîrer kêt nê. Rÿ ôr o mē hikukrêx ā ohtô ho mē pahpānhā amnhîrer kêt nê. Rÿ prat o mē hikukrêx ā ohtô ho mē pahpānhā amnhîrer kêt nê. Jajaja hapêx tokyx anhÿr mā xwÿnh na. ¹⁹ Na pre ā mē hpānhā amnhîrer anê nê tām mē panê ty nê htyk o amnhî nhî ho mē pahpānhā amnhîrer pa. Nhûm hkamrô axkapî. Te amnepê mā mē panhîgêt kot amnhî pānhā Tîrtûm mā ôwêhti hkrare hpar nhûm hkamrô pikapîrta pyrāk. ôwêhti krare mexre pix na prem kām kupa. Mex nê tanhmā kute hkêt xwÿnh pix. Tā Krisja aa tanhmā amnhî tomnuj to hkêt kumrêx nê mē panê ty nê htyk o Tîrtûm mā mē pahte amnhî tomnuj piitā hpānhā amnhîrer pa. ²⁰ Amnepê mā kormā mēmoj kêt ri na pre Tîrtûm kot ā mē pahpānhā amnhîrer anhÿr kaxyw mē pakukamā kuta nê âm. Tā nhûm amgrā ohtô nê hapêx nhûm mē pahwÿr kumê nhûm man mē pahwÿr wrÿ. Kot ā mē pahpānhā amnhî nhîpêx anhÿr kaxyw. ²¹ Tā nhûm prem kupî nhûm Tîrtûm akupÿm ho hÿr nê mex o mex ā harê. Mē pahte ja hā harênh mar kôt amnhî kaxyw Tîrtûm pix mā pajamexpêr o ri papa kaxyw. Nê mē pahte amnhî wÿr Jejus jamār rāhā ho ri papa kaxyw.

²² Tā pu prem ra kot ā mē panê amnhî nhîpêx anhÿr ā harênh ma nê mē pahte amnhî tomnuj kaga nê hkôt amnhî xunhwÿ. Jao amnhî to mex pix o ri papa. Nê mē pamā Kris kôt mē pahkwÿjê hkînh o papa. Tā kwa kêr pu mē arî pamā axpên kînh tÿx rāhā ho papa.

Te mē pakatorxà rûm mē pajapôx pyrāk o axte mē pajapôx ā mē pajarênh

Juāw 3.1-21

²³ Nê na pu prem mē pakatorxà nhôxâhkre rûm mē pajapôx pyrā nê axte mē pajapôx pyrāk o amnhî nhîpêx. Jao ra mē pahpê Tîrtûm

kra nê ri papa. Na hte mē pakatorxà nê mē panhîpêxàja wa ri pa nê gaa nê mē pahpê ty. No kêt Mēpanhîpêxà maati Tîrtûmja wa kurom rāhā ho rāhā. Tā ra mē pahte amnhî kaxyw kapêr kôt pajamexpêr o pahpê hkra jakamā kot puj mē urāk nê nhÿrmā pahÿr tûm nê papa rāhā ho papa.

Nê Tîrtûm kapêrja Tîrtûm pyrā nê rāhā. Koja aa hapêx kêt nê. ²⁴ Kapêr ā kaga htûm kot ja jarênh kot:

Pika piitā hkôt mē pa xwÿnhjaja te mē kot pōti grā pyrāk.

Nê mē kot amnhî to mex xàja te kot kapôt ā pixôrā pyrāk.

Na hte pōti tokyx grā nê hapêx.

Nê pixôrāja haxwÿja arîgro htÿx mē nhûm grā tokyx anê nê rarak pa nê hapêx.

²⁵ No Tîrtûm kapêr koja pōti mē pixôrāta wa kurom aa hapêx kêt nê. Koja arî rāhā ho rāhā. Anê.

Tā kapêrja tām na htem mē pamā kamā harê pu mē pahpiitā mar o papa.

2

Mē pahte Tîrtûm kot amnhî nhîpêx kôt amnhî nhîpêx ā mē pamā karô

Rômân 12.2; Wam Korît 3.16-17; Epes 2.19-22

¹ Nê kwa kêr pu mē axte tanhmā amnhî tomnuj to ho ri papa hkêt nê.

Rÿ tanhmā axpên mā paxêx to hkêt nê.

Nê paxêx rom tanhmā ri axpên nokupyr to hkêt nê.

Nê mēmoj tā axpên kām pagryk kêt nê.

Nê tanhmā axpên japrÿ hto hkêt nê.

Kêr pu mē ā amnhî nhîpêx anhÿr o papa hkêt kumrêx.

² Mē hkaràre na htem âm kām pijaôr pix prām. Nê gaa nê htÿxre nê ra hprêk o mô. Tā kêr ka mē pijaôr pix prām xwÿnhjê pyrā nê

amã Tirtûm kapêr mar nê hkôt pix mã amnhî nhîpêx o apa hprâm. Jao mar tÿx pê ra hkôt amnhî nhîpêx mex o mô nê gaa nê hkôt amnhî nhîpêx mex o apa. Te mê karàre pijaôr nê gaa nê ra hprêk o môrta pyrâk. ³ Ra mê ate Jejus kot mê pahto mex ã omunh mex kênã.

⁴ Nê na htem kên o ixkre nhîpêx kaxyw hãmri nê hkwy kawrà nê ri hkapi. Nhùm hô mex kêt nhùm mê teÿ ri omu nê nhãm kumê. Tã ja pyrã nê na pre mê pahkwÿjaja tee ri Kris pumu nê htÿx mex kêt ã hkamnhîx nê te mê kot kên mênhta pyrâk o hipêx nê hkaga. No nhùm Tirtûmjaja amnhîm Kris mex o mex ã harê. Te ho mênhô kot kên mex kêt ã hkamnhîx nê mênh nhùm mênhô kot mex ã omunh nê amnhîm mÿnhta pyrâk. Nom Krisja kên rom kêp htÿr tûm nê pa xwÿnh jakamã nhùm pre Tirtûm mê pakaxyw ãm pu prem hkôt amnhî xunhwÿ.

⁵ Nê Tirtûm na hte nhÿrmã mê pahtÿr tûm nê wa kuri mê papa mã xwÿnh ã mê pajarê. Te mê pahpê kên nhùm Tirtûm te kot amnhî Karô mã mê pahto ixkre nhîpêx pyrâk. Jakamã na hte Jejus Kris tanhmã mê pahkrã hto pu mê Tirtûm kôt amnhî nhîpêx mex rãhã ho ri papa. Nê tanhmã kãm amnhî nhîpêx mex to nhùm ja hã mê pahpumu nê hkÿnh nê.

⁶ Tirtûm kapêr ã kagã htûm kot tanhmã Kris jarênh to. Nê hã kuxi nê tanhmã harênh to. Te kêp kên pyrâk ã harê nê harênh kot:

Kot paj nhÿrmã Ijaew wÿr mênhô mê nhùm mê hkôt pa ho pa.

Koja te kêp kên o inhörkwÿ nhîpêx kaxyw kên maati mex kumrêxta pyrâk.

Koja amnhî kaxyw hkôt mê hamaxpêr xwÿnhjaja nhÿrmã ma inhô krÿ hwÿr apÿ nê hkÿnh nê mex rãhã nê pa ho pa. Anê.

⁷ Tã ra amnhî kaxyw hkôt mê pajamaxpêr xwÿnhjaja. Kên pyrâk

xwÿnh pê Jejusja na mê pamã mex o mex. No mê kot hkaga xwÿnhjaja na htem hamaxpêr punuj xwÿnh ã hkamnhîx nê hkaga nê kãm hkÿnh kêt nê. Tirtûm kapêr ã kagã htûm kot mê harênh kot:

Na prem kên o amnhîm örkwÿ nhîpêx kaxyw hkawrà ho pa nê kên maati ja pumu nê htÿx omnuj ã hkamnhîx nê hkaga.

Mê kot hkaga htã nhùm Tirtûm mê kurom mex o kot kên piitã hakrenh par ã omunh kurê kumrêx. Anê.

⁸ Nê mãânên harênh kot:

Koja mê kapêr mar kêt kumrêx.

Te pry kamã kên nör nhùm mê kot nhãm pry nê mênh kaxyw hkamnär o amnhî par krã hi kukênh pyrâk o koja mê amnhî nhîpêx. Anê.

Mê kot Kris kapêr mar tã hkôt amnhî xunhwÿr kêt jakamã te ho mê kot amnhî nê kên kamnär o amnhî par krã hi kukênh pyrâk o koja mê amnhî nhîpêx. Jakamã koja nhÿrmã Tirtûmjaja ja hã tanhmã mê ho htÿx kumrêx. Ra kot amnhî kukamã mê kãm amnhî jarênh xã hkôt. ⁹ No mê papajaja na pre Tirtûm jajê rom amnhî kôt mê pax-unhwÿ. Nhÿrmã ô krÿ kamã mê papa ho papa kaxyw. Nê mê pahte mex o mex ã harênh kaxyw. Na pu htem Ijaew nhô patre pyrã nê Pahi Maati Tirtûm mã tanhmã amnhî nhîpêx to ho papa. Nom korrmã mê pahte Kris kôt amnhî xunhwÿr kêt ri te mê pahpê kamãt kô kamã mê pahtÿx ri mê papa xwÿnh pyrâk. Tã Jejus kôt amnhî xunhwÿ nê hpãnhã te mê pahpê hirã mex kãm ri mê papa xwÿnh pyrã nê tãm amnhî nhîpêx rãhã ho papa. Ra mê pahpê Tirtûm kra jakamã na pu htem amnhî to mex rãhã ho ri papa. Nê Mëpahpãm maati Tirtûm mã tanhmã amnhî nhîpêx to ho ri papa. Te mê kot mê ho àhwÿr xwÿnhjaja kot kãm amnhî nhîpêx o

pata pyrâk. Ā na pre Tirtûm mē pahte amnhî nhîpêx anhÿr o papa kaxyw mē panhîpêx.

¹⁰ Annepêm kormã mē pahpê hkra hkêt ri na pre mēhō mē pakamã ukaprî hkêt kumrêx pu htem pahpunuj nē ri papa. Tã Jejus kôt amnhî xunhwÿ nhûm Tirtûm mē pahto hkra pu mē pahpê hkra hã ri papa nhûm mē pakamã ukaprî rãhã ho mē pahkôt pa.

Mē pahpê Tirtûm mã tanhmã amnhî nhîpêx to xwÿnh ã mē pajarênh

Rômãn 13.1-7; Xitre 3.1

¹¹ E ixkrãmnhwÿjaja. Ra mē pahpê Tirtûm kra jakamã mē pahpê ô krî nhō xwÿnh. Te mē pahpê jar pika nhō xwÿnh kêt pyrâk jakamã kwa kër pu mē arî mē pahte amnhî nhîpêx tûm o amnhî nhîpêx kêt nē. Nē mē pajamaxpêr tûm o pajamaxpêr kêt nē. Ra axtem mē pajamaxpêr nyw nē axtem mē pahte amnhî nhîpêx nyw kênã. Mē pahte amnhî nhîpêx tûmja te kãm akupÿm mē pahte hkôt amnhî to paxujanâr prãm pyrâk. Mē pahte axte hkôt amnhî nhîpêx o ri papa kaxyw. Tã nom kër pu mē anhÿr kêt nē. ¹² E kwa kër ka mē anhō krî kamã akwÿ kot Kris kôt amnhî xunhwÿr kêt xwÿnhjê noo mã tãm ri amnhî nhîpêx o ri apa. Mē kot Kris ã tanhmã mē anhîpêx to rÿ tanhmã hã mē ato kapêr punuj to htãã. Kot kaj mē ã mē hkôt amnhî nhîpêx anhÿr o ri apa hãmri nhûm mē tee ri mē apumu nē hamaxpêr o:

—Kwa mē ixte mē kot amnhî tomnuj xwÿnh ã mē harênh tã mē kot amnhî to mex pix xwÿnh na mē. Anê.

Hãmri nē nhÿrmã mē pahpyrà nē Tirtûm kôt amnhî xunhwÿ nē kãm mex o mex ã harê nē kãm:

—Kwa Tirtûm. Na pre hte akra-jaja anhÿ hã amnhî to mex rãhã nē pa ho pa pa ja hã mē omu. Nã xep amex o amex Tirtûm. Anê.

¹³ Nē mē apê Pahihti Jejus Kris kôt amnhî nhîpêx xwÿnh jakamã kër ka mē anhō krî kamã mē anhō pahihti kapêr ma nē kapêr kôt mân amnhî nhîpêx mex o ri apa. Nē mē anhō pika kamã mē anhō prêjitênja ka mē kapêr ma nē hkôt amnhî nhîpêx. Mē kot mē ato amnhîptâr xwÿnhjaja ka mē piitã mē kapêr ma nē mē kapêr kôt pix mã amnhî nhîpêx rãhã ho ri apa. ¹⁴ Nē mē anhō pahi nhÿ hã mē kapêr o mē pa xwÿnhjaja na htem mē akaxyw mē unhwÿ. Mē kot amnhî tomnuj xwÿnhjaja nhûm tanhmã mē kot mē ho kaxyw. Nē tãm mē kot amnhî nhîpêx o ri mē pa xwÿnhjaja nhûm mē kot mē ô pahi mã mex ã mē harênh kaxyw. ¹⁵ Tã kër ka mē kapêr ma nē mē hkôt tãm amnhî nhîpêx rãhã ho ri apa. Hãmri nhûm mē ato kapêr punuj xwÿnhjaja ja hã mē apumu nē axte tanhmã mē ato kapêr to hkêt nē. Ā mē ate amnhî nhîpêx anhÿr o apaja na Tirtûm kãm hprãm.

¹⁶ Nē mē pahpê Tirtûm kra jakamã na pu htem paxãmnhîx kãm tanhmã amnhî nhîpêx to ho ri papa. Nom kër pu mē pahpê hkra hã pahtÿx ri amnhî nhîpêx kêt nē.

¹⁷ Nē kër ka mē piitã mē ho mex o ri apa.

Nē mē ato amnhîptâr xwÿnhjê ho mex nē mē hã apijaãm rãhã ho ri apa.

Nē mē apê Kris kôt mē ate axpên to mē atō nē mē atōxjê hã amã axpên kînh pê axpên to mex nē. Nē Tirtûm ã apijaãm rãhã nē.

Mē kãm mē apênh xwÿnhjaja kot tanhmã amnhî nhîpêx to hã mē kãm karō

Epês 6.5-8; Korosê 3.22-25; Wam Ximotre 6.1-2; Xitre 2.9-10

¹⁸ Nē mē apê mē kãm mē axapênh xwÿnhjaja kër ka mē anhō patrãw kapêr ma nē hkôt ri amnhî nhîpêx. Kot mē ato mex o pa rÿ mē atomnuj o pa htã ka mē arî mē hã apijaãm pē

hkôt ri amnhî nhîpêx. ¹⁹ Tanhmã kot mē anhîpêx punuj to htã ka mē arî kãm axâpênh mex rãhã nê. Kêr kê Tirtûm ja hã mē apumu nê mē ato mex nê ka mē ajamakêtkati nê axãmnhîx ri kãm axâpênh o apa. ²⁰ Nom kot kaj tanhmã amnhî tomnuj to nhûm anhõ patrãw ja hã apumu nê hã atak ka amnhî xà htýx kamã ama nê ri amnhî pumu. No kot kaj akatãt kôt kãm axâpênh mex tã nhûm amarî atak japêr tã kêr ka amnhî tã kamã agryk kêt nê. Arî kãm amnhî to htýx kamã kãm xa nê amnhî tã tanhmã ho hkêt nê. Hãmri nhûm Tirtûm ja hã apumu nê ato mex nê. ²¹ Amnepê m na pre mē pahte hkôt amnhî xunhwýr xwýnhjaja Kris pyrã nê mē paxã htýx kamã pajamak o papa hkukamã ja hã mē pahpumunh mex. Na pre Kris mē pakaxyw amnhî xà htýx kãm hamak týx tã amnhî to htýx nê mē kãm xa. Tã kêr pu amnhî xà htýx kamã pajamak tã ý hã urãk nê amnhî to htýx nê papa. ²² Krisja aa tanhmã amnhî tomnuj to hkêt nê pa ho pa. Nê aa mēmoj tã amnhî to hêx o pa hkêt. ²³ Mē kot kãm kapêr punuj tã nhûm amnhî tã tanhmã mē kãm nê hkêt nê. Nê mē kãm kapêr punuj kêt nê. Nhûm prem homnuj týx kumrêx nhûm amnhî xà htýx kamã hamak tã amnhî tã mē kãm ãkjêr nê tanhmã mē haprý hto hkêt nê. Na pre ãm hamaxpêr o: “Nã Tirtûm kot ixtã mē omunh mex kênã. Koja nhýrmã mē piitã tanhmã mē kot amnhî nhîpêx to hã mē omunh xà hkôt tanhmã mē hipêx to. Tãm koja ãhpumunh týx xà hkôt tanhmã ixtã mē harênh to. Mē kurom ãhpumunh týx o ãhpumunh týx xwýnh kênã.” Anê.

²⁴ Kris na pre te kawã kamã mē pahte amnhî tomnuj piitã gjênh nê ho nýt nê htur rãhã pî kahpa hã mē panê htyk pyrãk o amnhî nhîpêx. Mē pahte axte tanhmã amnhî tomnuj to hkêt prãm xaj. Pãnhã mē

pahte amnhî to mex pix o ri papa kaxyw. Tã ã kot amnhî xà htýx kãm hamak anhýr o jêt jakamã kot puj mē pahte hkôt amnhî xunhwýr xwýnhjaja aa mē pahte amnhî tomnuj pãnhã amnhîrer kêt nê. Ra Jejus htyk o kot mē panê amnhîrer par kênã.

²⁵ Na pu pre te mē pahpê ôwêhti pikunor pyrã nê pahtýx ri papa. Tanhmã amnhî tomnuj to rãhã ho ri papa. Tã nhûm Kris te kot ôwêhti jamãr xwýnh kot ôwêhti pikunor mã katorta pyrãk o mē panhîpêx. Pu mē hkôt amnhî xunhwý nê hkôt amnhî nhîpêx mex o ri papa. Jao hkôt papa ho papa.

3

Mē mjên mē mē hprõ kot tanhmã axpên nhîpêx to hã mē kãm karõ

Wam Korît 7; Epes 5.22-25; Korosê 3.18-19; Wam Ximotre 2.9-15

¹ Nê kêr ka mē anijaja mē amjên kapêr ma nê hkôt amnhî nhîpêx. Akînhã kormã kot Tirtûm kôt amnhî nhîpêx kêt japêr tã arî kapêr ma nê hkôt amnhî nhîpêx mex o ri apa. Kê mē ate amnhî nhîpêx ã mē apumu nê mē apyrã nê Kris kôt amnhî xunhwýr japêr. Mē kãm Tirtûm kapêr mar prãm kêt tã koja mē ã mē ate amnhî nhîpêx anhýr ã mē apumunh kôt mē apyrã nê amnhî kaxyw hkôt hamaxpêr japêr. ² Na htem mē ate Tirtûm kapêr kôt tãm ri amnhî nhîpêx o apa hã mē apumunh o ri mē akôt pã.

³ Jakamã kêr ka mē anijaja amnhî mex pix kukamã ajamaxpêr o ri apa hkêt nê. Rý ajamaxpêr o:

—Ma kot paj mē hkuxwaxã ho amnhî krã hkî kuxwa mex nê inhökrexê mex jagjê nê ri hã mra. Nê kupêxê mex kwý japrõ nê ho amnhîm ixê mex nhîpêx hãmri nê hagjê nê ri hã mra. Kot paj ã amnhî nhîpêx anê nhûm mē piitã ja hã ixpumu nê kãm ixkînh nê inhmex

ã ijarê. Ma kot paj ã amnhĩ nhĩpêx anê.

Anhÿr o ri amnhĩ kukamã ajamaxpêr kêt nê. ⁴ Tĩrtũm na hte ã mẽ pahte amnhĩ nhĩpêx anhÿr ã mẽ pahpumu nê ãm hã mẽ pahpumu. Mẽ ôkrexê nê mẽ ê mex na hte hapêx tokyx anê. No mẽ panhõpinhxã kaxwÿnh kãm tãm ri mẽ pajamaxpêr nê pakamã amnhĩkrit nê papaja. Kot kaj mẽ ã amnhĩ nhĩpêx anhÿr o ri apa hãmri nhũm Tĩrtũm ja hã mẽ apumu nhũm ja kãm mex nê. ⁵ Amnepê mã mẽ pakukamã mẽ panhõ wówô nê mẽ panãjaja. Mẽ hkwy kot Tĩrtũm kôt amnhĩ nhĩpêx xwÿnhjaja na prem ã amnhĩ nhĩpêx anhÿr o pa. Mẽ kot mjên kôt amnhĩ nhĩpêx o pa jakamã na prem amnhĩ tã mẽ omu nê mẽ ho mex nê kãm mẽ hapê nê. ⁶ Mẽ panhõ wówô finat Saraja na pre ã amnhĩ nhĩpêx anhÿr o pa. Jao mjên Apraãw kapêr ma nê hkôt amnhĩ nhĩpêx. Nê kêp ô pahi hã harê nê hkôt pix mã amnhĩ nhĩpêx o ri pa. Tã kot kaj mẽ urãk nê amnhĩ to htÿx nê ã amnhĩ nhĩpêx anhÿr o apa. Hãmri nê amnhĩ tã amã amjên puma hkêt nê apa nê te apê Sara hkra pyràk.

⁷ Nê mẽ amyjaja kêr ka mẽ tãm mẽ aprõ nhĩpêx o ri mẽ hkôt apa. Mẽ akĩnhã mẽ hihtÿx kêt jakamã mẽ kamã axukapřĩ rãhã ho ri mẽ hkôt apa. War ajamê war apê Jejus kukwak ri war atĩr tũm nê apa mã xwÿnh jakamã kêr ka mẽ ho mex rãhã ho ri mẽ hkôt apa. Tĩrtũm kãm war ajamê war ajapê jakamã kot kaj mẽ ã mẽ hipêx anhÿr o ri apa hãmri nê ra axãmnhĩx mẽmoj tã amnhĩ to Tĩrtũm wÿ nhũm mẽ amar kurê kumrêx.

Tĩrtũm krajaja kot amnhĩ xã htÿx kamã hamak ã mẽ harênh

Rômãn 12.9-21; Korosê 1.10; Wam Tesarôn 5.14-15

⁸ E Kris kôt ixkrãmnhwÿjaja. Nã ixkapêr jatur xã na ja. Kêr ka mẽ ri axpên kôt ajamaxpêr mex pê axpên

to mex rãhã ho ri apa. Nê mẽ ate Kris kôt axpên to atõ nê atõx ã amã axpên kĩnh o ri apa. Jao axpên kamã axukapřĩ nê mẽmoj to axpên kutã anojarêr rãhã nê. ⁹ Na pu prem Jejus kôt amnhĩ xunhwÿ nhũm Tĩrtũm mẽ pahto hkra nê mẽ pahto mex ã amnhĩ jarê. Tã koja mẽhõ tanhmã mẽ anhĩpêx to rÿ tanhmã mẽ ato kapêr punuj to. Nom kêr ka mẽ ama nê amnhĩ tã tanhmã ho rÿ tanhmã ho akapêr punuj to hkêt nê. ãm te Tĩrtũm kot mẽ panhĩpêx pyràk o mẽ hipêx nê mẽ ho mex pix o ri mẽ hkôt apa. Ja na Tĩrtũm kãm hprãm. ¹⁰ Kapêr ã kagã htũm kot ja jarênh kot:

Kot kaj mẽ amã amex nê akĩnh nê
ri apa hprãm hã kot kaj mẽ ã
amnhĩ nhĩpêx anê:

Kot kaj mẽ ri akapêr punuj o ri apa
hkêt nê.

Nê mẽmoj tã amnhĩ to axêx o ri apa
hkêt nê.

¹¹ Nê te mẽ ate amnhĩ katut kôt
ate amnhĩ tomnuj rênh o apa
pyrà nê hpãnhã amnhĩ to
mex pix o ri apa.

Nê mẽ amã tãm axpên nhĩpêx pix
prãm o ri axpên kôt apa.

Nê mẽ amã ajamakêtkati nê axpên
kôt apa hprãm rãhã ho ri
apa.

¹² Na hte Tĩrtũmja ã mẽ kot amnhĩ
nhĩpêx anhÿr o pa xwÿnhjê
jamãr mex rãhã ho pa.

Nhũm mẽ tanhmã amnhĩ to hwÿr
to nhũm mẽ mar kurê
kumrêx.

No mẽ kot amnhĩ tomnuj o mẽ
pa xwÿnhjaja na hte mẽ kutã
amnhĩ xãm nê ãm mẽ omu
nê mẽ ho mex kêt nê. Anê.

Tĩrtũm kapêr ã kagã htũm kot ã mẽ
harênh kot anhÿr.

¹³ Nê kot kaj mẽ amã amnhĩ to
mex pix o apa hprãm nhũm mẽhõ ja
hã tanhmã mẽ atomnuj to hkêt nê.

¹⁴ No kot kaj mẽ amnhĩ to mex pix
o apa htã nhũm mẽhõ ja hã apumu
nê tanhmã hamaxpêr to mẽ atom-
nuj ka amnhĩ xã htÿx kamã ajamak

japêr. Tã koja Tĩrtũm nhỹrmã ja hã tanhmã mẽ ato mex to. Jakamã kwa kêr ka mẽ tee ri mēhõ kot tanhmã mẽ atomnuj to hkukamã ajamexpêr pê amã mẽ uma ho ri apa hkêt nê. Nê tee ri amnhĩ kukamã ajamexpêr o akaprĩ nê ri apa hkêt nê. ¹⁵ ãm amnhĩ kaxyw Kris mã mãn ajamexpêr tỳx rãhã nê mẽ panhõ Pahihti hã apijaãm rãhã ho ri apa. Nhũm mēhõ ja hã mẽ apumu nê tanhmã hã mẽ akukjêr to nê mẽ amã:

—Kwa mēmo kaxyw na ka pre Kris kôt amnhĩ xãm nê hkôt ri amnhĩ nhĩpêx o apa? Anê.

Ka mẽ ama hãmri nê aprĩ hã kãm amnhĩ jarênh kurê kumrêx. ¹⁶ Nom kêr ka mẽ akapêr mã aprĩ kamã kãm amnhĩ jarê. Tĩrtũm kapêr kôt amnhĩ nhĩpêx o apa hã mẽ kãm amnhĩ jarê. Koja mẽ Kris ã mẽ ato kapêr punuj rỳ hã mẽ atã hpêr o axkê nê pikunhar japêr ka mẽ ãm amnhĩ tã mẽ ama nê ãm mẽ ama. Kwãr mẽ mãmri ã mẽ anhĩpêx anê. Kêr ka mẽ amnhĩ tã mẽ omu nê arĩ amnhĩ to mex rãhã ho ri apa. Kêr kê mẽ tee ri amnhĩ tã mẽ apumu nê hpijaãm nê.

¹⁷ Nê koja mẽ akwỹjaja mẽ ate Tĩrtũm kapêr kôt amnhĩ nhĩpêx mex o apa hã mẽ apumu nê hã tanhmã mẽ anhĩpêx to htã kêr ka mẽ arĩ Tĩrtũm kôt amnhĩ nhĩpêx o ri apa. Ja na kãm hprãm. Nom kot kaj mẽ tanhmã amnhĩ tomnuj to nhũm mẽ ja hã mẽ apumu nê pahihti mã mẽ ajarê nhũm kuma nê ja hã tanhmã mẽ amã ãkjêr to ka mẽ ra apijaãm nê.

¹⁸ Nê Krisja na pre mẽ panê ty. ãm htyk tipxi tã mẽ pahpiitã mẽ pahpãnhã amnhĩre. Mẽ pakurom aa kot tanhmã amnhĩ tomnuj to hkêt tã mẽ pahte amnhĩ tomnuj pitã hpãnhã amnhĩrer pa. Mẽ pahte hkôt amnhĩ xunhwỳr nê nhỹrmã ma Tĩrtũm nhõ krĩ hwỳr paxãpir nê kamã pahĩr tũm nê papa ho papa kaxyw. Mẽ kot hpĩr tã nhũm

Tĩrtũm akupỹm ho htĩr nhũm htĩr o htĩr. ¹⁹⁻²⁰ Nom kormã akupỹm htĩr kêt ri na pre hkarõ pix o mẽ htyk xwỹnhjê hwỳr mō. Ahpunu kamã mẽ hkarõ kêp prês nê hkrĩ xwỹnhjê hwỳr mō nê mẽ kot Noehti kapêr mar nê hkôt amnhĩ nhĩpêx kêt nhũm gō htãm kot mẽ hanhir par xwỹnhjê mã kapêr. Tĩrtũm kot nhỹrmã mẽ kot amnhĩ tomnuj mỳrapê kuwy maati wỳr mẽ rênh ã mẽ hkukamã mẽ kãm awjarê. Amnepêr kormã Noehti kot pãr raxta nhĩpêx o kuhê ri na prem kãm Tĩrtũm kapêr mar prãm kêt nê. Nhũm amnhĩ tã mẽ omu nê mẽ kamã gryk tokyx anhỹr kêt nê. Arĩ amnhĩ tã mẽ hamãr o pa. Mẽ kot hkôt amnhĩ xunhwỳr nê hkôt amnhĩ nhĩpêx prãm xãj arĩ mẽ hamãr ry ho pa. No ãm tee ri mẽ hamãr kaprỳ nhũm mẽ amnhĩ kaxyw hkôt hamaxpêr kêt nê htỳx ri amnhĩ tomnuj o pa. Mẽ ãm grêre nê Noehti kapêr ma nê gō htãm pymaj hkôt pãr raxta wỳr agjê. ãm mẽ kêp 8 pix nê hwỳr agjê nhũm gō htãm mẽ hanhir kêt nê. Tĩrtũm na pre mẽ nê omunh mex nê. No mẽ kot amnhĩ tomnuj xwỹnhjaja nhũm gō htãmja mẽ hanhir o mẽ himex pa. Nhũm mẽ kêp 8ja pix arĩ htĩr nê mex nê pãr raxta kamã gō krãhkã hã mex rãhã pa.

²¹ Gō tãmja kêp hprĩ hã mẽ pahte Jejus kôt amnhĩ xunhwỳr ã mẽ pahto amnhĩrit xã na. Mẽ pahte amnhĩ nhĩpêx tũm kaga nê hpãnhã amnhĩ nhĩpêx nyw o amnhĩ nhĩpêx o papa hã mẽ pahto amnhĩrit xã. Jakamã na htem mẽ pahkrã kumrã. Nom mẽ kot mẽ panê mẽ pagrã kugrãnh kaxyw kêt ra mẽ pahte Jejus kôt amnhĩ xunhwỳr ã amnhĩ to amnhĩrit kaxyw na htem mẽ pahkrã kumrã. Ra mẽ pahte Tĩrtũm kapêr kôt amnhĩ nhĩpêx o papa hã amnhĩ to amnhĩrit kaxyw. Pu mẽ ra mẽ pahte amnhĩ nhĩpêx nyw o amnhĩ nhĩpêx ã amnhĩ to

amnhîrît. Te mê pahte gôx kām mê pahte amnhî tomnuj rer par pyrà nê hpânâ amnhî nhîpêx nyw o amnhî nhîpêx o papa.

²² Nê na pre Jejus akupÿm htîr nê ma akupÿm Tîrtûm nhô krî hwÿr api nê Tîrtûm nhîhkô hâ pahihti hâ mê hkrî xà kamâ hkrî ho hkrî. Hâmri nê ra Tîrtûm kapêr o mê wrÿk xwÿnh nê pahi piitâ mê ho amnhîptâr o hkrî.

4

Mê pahte amnhî nhîpêx nyw o amnhî nhîpêx â mê pamâ karô

Epes 4.17-24; Korosê 3.1-11

¹ Nê na prem Kris pînhûm amnhî xà htÿx kām hamak kām htyk kaxyw tâ arî mê kām xa. Ra kot amnhî xà hkukamâ amnhî tâ mê omunh tâ tee ri amnhî kukamâ hamaxpêr o amnhî tâ tanhmâ ri mê kot hpîr mǎ xwÿnhjê homnuj to hkêt nê. Arî mê kām xa nhûm prem kupî. Tâ kêr pu mê urâk nê â amnhî nhîpêx anhÿr o ri papa. Mê kot hâ tanhmâ mê panhîpêx to htâ pu mê urâk nê amnhî xà htÿx kām pajamak tâ tanhmâ amnhî tâ mê ho hkêt nê. Na hte ra mê htyk nê mê hikwÿ xwÿnhjaja axte amnhî tomnuj kêt nê. Tâ kêr pu mê urâk nê axte tanhmâ amnhî tomnuj to ho ri papa hkêt nê. ² Jakamâ kêr pu mê axte mê pahte amnhî nhîpêx tûm kôt amnhî nhîpêx o papa hkêt nê. Nê mê pajamxpêr tûm kôt axte pajamxpêr o papa hkêt nê. Âm Tîrtûm kām hprâm xà hkôt pix mǎ tanhmâ amnhî nhîpêx to ho papa rāhâ ty.

³ Amnepêm kormâ mê pahte Jejus kôt amnhî xunhwÿr kêt ri na pu prem mê kêp Tîrtûm kra hkêt xwÿnhjê hkôt amnhî nhîpêx.

Jaο nhām mēnijê pumu nê mê kamâ pahpijaam kêt hprâm.

Nê pahpipānh o ri papa.

Nê mê pahpipānh kaxyw axpēn wÿr akuprô nê mēnijê kamâ pahpijaam kêt.

Nê sānti hwÿr pahkōnkrā ho pahkrî nê kām amnhî jagrer.

⁴ Tâ Kris kôt amnhî xunhwÿ hāmri nê mê pahte amnhî nhîpêx nyw o amnhî nhîpêx o papa. Hāmri nhûm arî mê kot amnhî nhîpêx tûm o amnhî nhîpêx xwÿnhjaja tee ri ja hâ mê pahpumu nê hêx rom amnhî kôt mê pamâ tanhmâ ri àhkrox to ho pa. Pu mê axte mê hkôt amnhî nhîpêx kêt nhûm mê tee ri ja hâ mê pahpumu nê mê pakamâ gryk kato nê tanhmâ mê pahto kapêr punuj to. ⁵ Tâ koja Tîrtûm nhÿrmâ amnhî wÿr mê hâ karô nhûm mê ma hwÿr mra nê kutâ hkrî. Nê kormâ mê htîr ri tanhmâ mê kot amnhî nhîpêx to ho pa hâ kām amnhî jarēnh pa. Hāmri nhûm mê kot amnhî nhîpêx â tanhmâ mê hipêx to. Kojā mê pahpiitâ tanhmâ mê pajarēnh to. Mê htyk xwÿnhjaja nê kormâ mê pahÿr nê mê papa xwÿnhjaja nhûm mê pahpiitâ tanhmâ mê pajarēnh to.

⁶ Na pre Jejus ty hāmri nê kormâ akupÿm htîr kêt rāhâ hkarô pix o mā amex wÿr tē nē kamâ mê htîr ri amnhî kaxyw Tîrtûm mā hamaxpêr xwÿnhjê mǎ awjarē. Na prem mê kot amnhî tomnuj mÿrapê ra wej nê ty nê arî amex kām ri pa. Jakamâ nhûm Jejusja hkarô ho ma mê hwÿr tē nē mê kām:

—E na pa ra mê ate amnhî tomnuj pānhâ amnhîrer pa. Tâ kormâ mê atîr ri mê ate amnhî kaxyw Tîrtûm kôt ajamaxpêr jakamâ kot kaj mê ma hwÿr api nê wa ixkuri wa ixpyrà nê atîr tûm nê amex nê apa ho apa. Anê.

Mê pahpê Kris kwÿ hâ tanhmâ mê pahte axpēn nhîpêx to hâ mê pamâ karô

Rômān 12.6-8; Wam Korût 12.1-11

⁷ Nê koja tokyx mê panhō pikaja mê pahpê hapêx nê kamâ mēmoj piitâ hapêx pa. Jakamâ kwa kêr

ka mẽ ate amnhĩ nhĩpêx ã amnhĩ pumunh mex o apa.

Nẽ mẽ atỳx ri ajamaxpêr ri apa hkêt nê.

Nẽ mẽmoj punuj nê amnhĩ to htỳx o ri apa ho ajamaxpêr nyw pix o amnhĩ to Tĩrtũm wỳr rãhã ho ri apa.

⁸ Nẽ kwa kêr ka mẽ amã axpên kĩnh o ri axpên kôt apa. Ja na mex o mex. Kot kaj mẽ ã axpên nhĩpêx anê nhũm Kris kôt atô rỳ atôxjê hõ tanhmã atomnuj to japêr ka amnhĩ tã omu nê ãm omu. Amã hkĩnh o ãm amnhĩ tã omu. Jao axte kot tanhmã atoja mã ajamaxpêr kêt nê.

⁹ Nẽ kêr ka mẽ axãmnhĩx ajamakêtkati nê amnhĩ nhõrkwỳ hwỳr axpên wỳ nê axpên to mex o ri apa. Nom kêr ka mẽ agryk kãm amnhĩ wỳr mẽ hwỳr kêt nê. ¹⁰ Na pre ra Tĩrtũm mẽ pahpê hkra hã ahpỹnhã tanhmã mẽ pamã mẽmoj tã karõ hto nê ã mẽ pahte amnhĩ nhĩpêx anhỳr o papa kaxyw mẽ pahto mẽ paxihtỳx. Mẽ pahte ahpỹnhã tanhmã axpên to mex to ho ri axpên kôt papa kaxyw. Tã kêr ka mẽ ra kot mẽmoj tã mẽ amã karõ hkôt axpên nhĩpêx o ri axpên kôt apa. ¹¹ Kojã ma mẽ ate akwỳjê mã kapêr jarênh o ri apa kaxyw mẽ amã karõ ka mẽ ama nê akatãt kôt ỳ hã mẽ kãm harênh mex o ri mẽ hkôt apa. Rỳ tanhmã axpên to ajuta hto ho ri apa kaxyw mẽ axunhwỳr japêr ka mẽ amnhĩ tã omu nê hkamnàr rom mẽ ho ajuta mex rãhã ho ri apa. Mẽ apiitã Jejus nhỹ hã ã amnhĩ nhĩpêx anhỳr o ri apa. Kêr kê Jejus kôt mẽ akwỳjaja amnhĩ tã mẽ apumu nê mẽ anhỹ hã Tĩrtũm mã mex o mex ã harê.

Jejus kwỳjaja kot amnhĩ xà htỳx kamã hamak o pa hã mẽ harênh

Rukre 6.20-23; Juãw 16.1-4; Sikũn Tesarõn 1.3-12; Sikũn Ximotre 3.13; Eprêw 12.3; Xiakre 1.2-4

¹² E Kris kôt ixkrãmnhwỳjaja. Kojã Kris kwỳ kêt xwỳnhjaja Kris ã tanhmã mẽ anhĩpêx to nom kwa

kêr ka mẽ tee ri amnhĩ kukamã ajamaxpêr o akapri nê apa hkêt nê. Kêt mẽ akĩnh rãhã axpên kôt ri apa. Na htem ã mẽ pahpê Kris kwỳjê nhĩpêx anhỳr o pa. Jakamã kwa mẽ amnhĩ tã mẽ omu nê tee ri amnhĩ kukamã ajamaxpêr kêt nê.

¹³ Mẽ arĩ akĩnh nê ri apa. Mẽ kot Kris pyrà nê mẽ panhĩpêx punuj tãã. Kêr kê Jejus nhỹrmã akupỹn mẽ pahwỳr wỳr pu mẽ omu nê pahkĩnh tỳx o pahkĩnh tỳx. ¹⁴ Kwãr mẽ mãmrĩ mẽ pahpê Kris kwỳ hã tanhmã mẽ panhĩpêx to. Na htem ã Tĩrtũm Karõ kot mẽ pahkarõ mã gjêx xwỳnhjê nhĩpêx o pa anê.

¹⁵ Nẽ mẽ apê Kris kwỳ jakamã kwa kêr ka mẽ amnhĩ to mex rãhã o ri apa.

Jao mẽ hpar o ri apa hkêt nê.

Nê ri axãhkĩnh o ri apa hkêt nê.

Nê nhãm mẽ hkaêx mã agjêx o ri apa hkêt nê.

Nê tanhmã mẽ homnuj to ho ri apa hkêt nê.

Kot kaj mẽ ã amnhĩ nhĩpêx anhỳr o ri apa nhũm mẽ anhõ pahihti ja hã tanhmã mẽ ato ka mẽ amnhĩ kamã apijaãm tỳx nê. ¹⁶ Nom kojã mẽ apê Kris kwỳ hã tanhmã mẽ anhĩpêx to ka mẽ ja hã amnhĩ tã mẽ omu nê amnhĩ kamã apijaãm kêt nê. ãm Tĩrtũm pix mã amnhĩ jarê nê kãm:

—Pa Tĩrtũm. Ixpê akra Kris kwỳ hã na mẽ ã ixtomnuj anê. Nom ixpê akra jakamã kwãr mẽ mãmrĩ tanhmã inhĩpêx to. Amex o amex o ate ixto akra jakamã kwãr mẽ mãmrĩ ã inhĩpêx anhỳr o pa. Anê.

¹⁷ Nẽ kojã Tĩrtũm tokyx mẽ pahpiitã tanhmã mẽ pahte amnhĩ nhĩpêx to hã mẽ pahpumu nê tanhmã mẽ panhĩpêx to. Mẽ pahpê hkrajaja kojã tanhmã mẽ pahte amnhĩ nhĩpêx to hã tanhmã mẽ pahto mex to. Hãmri nê hpãnhã mẽ kêp hkra hkêt xwỳnhjê ho hapu nê tanhmã mẽ hipêx to. Mẽ kot amnhĩ kaxyw hkôt hamaxpêr kêt jakamã nhũm mẽ pahkĩnhã tanhmã mẽ

homnuj tÿx to. ¹⁸ Kapêr ã kagà htùm kot ja hã mẽ pajarênh kot:

Mẽ kot Tirtùm kapêr kôt amnhĩ to mex xwÿnhjaja na htem àmnhĩx amnhĩ xà htÿx kamã hamak o pa kamã ty nhùm Tirtùm ma õ krĩ hwÿr amnhĩ wÿr mẽ ho àpir kuré kumrêx.

Nom mẽ kot amnhĩ tomnuj xwÿnhjaja koja mẽ hkĩnhã amnhĩ xà htÿx kamã hamak rãhã nê pa ho pa nê aa mex kêt nê. Anê.

¹⁹ Tã koja Tirtùm kãm ja prãm japêr kwâr mẽ mãmrĩ Kris ã tanhmã mẽ pahomnuj to. Nom kêt pu mẽ Tirtùm kamnâr rom amnhĩ to mex pix o ri papa. Kêp mẽ panhĩpêx xwÿnh maati jakamã ra kot amnhĩ jarênh xà hkôt koja tanhmã ri mẽ pamã amnhĩ nhĩpêx to ho pa.

5

Tirtùm krajaja kot tanhmã amnhĩ nhĩpêx to hã mẽ kãm karõ

Atre 20.28-31

¹ E kot paj hpãnhã mẽ apê Kris kwÿ hkrãhtùmjê mã ixkapêr ka mẽ inhma. Ijaxwÿja ixpê mẽ akrãhtùmjê hõ na pa. Na pa pre mẽ akurom Kris htyk kãm omu. Nom kot puj mẽ nhÿrmã pahpimràatã mex o mex ã omu nê urãk nê mẽ pamex nê ri papa ho papa. ²⁻³ Jakamã e Kris kôt mẽ hkrãhtùmjaja kêt ka mẽ atar Kris kôt pahkwÿjê jamâr mex nê. Ra Tirtùm kot mẽ ate kãm hkwÿjê jamâr kaxyw mẽ axunhwÿr jakamã kêt ka mẽ omunh mex rãhã ho mẽ hkôt ri apa. Te ho ôwêhti jamâr xwÿnh kot ôwêhti jamâr mexta pyrãk. Te mẽ kêp Tirtùm krit ôwêhti nhùm mẽ ate kãm mẽ hamâr o apa xwÿnh pyrã nê kãm mẽ omunh mex rãhã ho ri mẽ hkôt apa. Nê akĩnh pê tanhmã ri mẽ ho ajuta hto ho ri mẽ hkôt apa. Ja na Tirtùm kãm hprãm. Nom kêt ka mẽ ano hkà karôt kãm mẽ ho ajuta hkêt nê. Rÿ kãxpore hprãm xãj mẽ kãm tanhmã amnhĩ nhĩpêx to

hkêt nê. ãm amarĩ tanhmã mẽ kutã anojarêt to pix kukamã ajamaxpêr o ri mẽ hkôt apa.

Nê kêt ka mẽ kãm mẽmoj tã karõ kamã axihtÿx kêt nê. Mẽ akapêr mã aprĩ kamã mẽ kãm mẽmoj jarê kêt mẽ amnhĩ tã mẽ apumu nê mẽ apyrã nê ã axpên nhĩpêx anhÿr o pa.

⁴ E kêt ka mẽ ã Kris kôt mẽ akwÿjê jamâr mex pê mẽ hipêx o apa anê. Hãmri nhùm mẽ pajamâr xwÿnh maati ja hã mẽ apumu nê nhÿrmã akupÿn mẽ pahwÿr wrÿ nê mẽ ato mex rax nê.

⁵ Nê e mẽ amy xãptâr nywjaja. Kêt ka mẽ Kris kôt mẽ akrãhtùmjê kapêr ma nê mẽ hkôt ri amnhĩ nhĩpêx mex o ri apa.

Nê kwa kêt ka mẽ apiitã axpên nhĩpêx o te anhĩõ kot amnhĩ to rax o ajakrenh pyrãk. Tirtùm kapêr ã kagà htùm kot ja jarênh kot:

Mẽ kot amnhĩ to jarkrar o ri mẽ pa xwÿnhjaja na hte Tirtùm mẽ kutã amnhĩ xunhwÿ.

No mẽ kot amnhĩ to hkryre nê axpên tã hpijaàm o mẽ pa xwÿnhjaja na hte mẽ ho mex o pa.

⁶ Anhÿr ã mẽ harênh jakamã kwa kêt ka mẽ Tirtùm ã apijaàm rãhã ho ri apa ixkwÿjaja. Nê axpên mã ri amnhĩ to jarkrar o ri apa hkêt nê. Kêt kêt Tirtùm xihtÿx xwÿnhja ja hã mẽ apumu hãmri nê nhÿrmã kot mẽ pahto mex xà hã arĩgroja kato nhùm mẽ ate amnhĩ to mex xwÿnh ã mẽ ajarê nê mẽ ato mex rax nê.

⁷ Nê kêt ka mẽ tee ri amnhĩ kukamã ajamaxpêr pê akaprĩ ho ri apa hkêt nê. ãm te mẽ ate Tirtùm mã akaprĩ nhõr pyrãk o amnhĩ nhĩpêx nê axãmnhĩx akĩnh nê akaprĩ hkêt nê apa. Tirtùm kêp mẽ pajamâr xwÿnh maati kênã kot ka kêt mẽ ri akaprĩ nê ri apa.

⁸ Nê kwa mẽ okora. Kêt ka mẽ amnhĩ nê kot mẽ pakutã amnhĩ xunhwÿr xwÿnh maati Satanastija pumunh mex rãhã ho ri apa. Na

hte mẽ panhîpêx o te ropkror kot akunî kamã mry ho krihkrit o ri mrar pyrãk o mẽ panhîpêx. Jao mẽ pahte Kris kaga hprãm xaj apkati mẽ tanhmã nê mẽ pahto ho ri mẽ pahkôt pa. ⁹ Na hte ã pika piitã hkôt Kris kôt mẽ pahtõ nê mẽ pahtõxjê nhîpêx anhÿr o pa nhũm mẽ pahpyrà nê amnhî xà htÿx kamã hamak o pa pè omnuj nê pa. Jakamã kwa kêr ka mẽ Kris kôt amnhî xunhwÿr tÿx nê kutã amnhî to htÿx rãhã ho ri apa. ¹⁰ Tirtũm kãm mẽ pajapê jakamã na hte mẽmoj to mẽ pakutã nojarêt rãhã ho ri pa. Na pre mẽ pamex nê nhÿrmã mẽ pahte kuri tãm amnhî nhîpêx o papa mã xwÿnh ã mẽ pajarê. Kris kukwak ri ã mẽ pajarênh anhÿr jakamã mẽ ate jar Kris ã apunuj nê ri apa htã kot kaj mẽ kritpêm ã amnhî nhîpêx anhÿr ry hkêt nê. Koja Tirtũm mẽ akrã kamã mẽ ajamaxpêr xihtÿx jagjê ka mẽ akupÿm amex nê axihtÿx pè ate amnhî nhîpêx nyw o amnhî nhîpêx rãhã ho ri apa.

¹¹ Tirtũmja hihtÿx o hihtÿx nê àhpumunh o àhpumunh. Nê hihtÿx xà nê àhpumunh xà koja aa kêp hirerek nê hapêx kêt kumrêx. Æm hãmri na mẽ kot harênh kot anhÿrja.

Pêtre kapêr jatur xà

¹² Nê ota Kris kôt mẽ pahtõ Sirastija na inhmã mẽ akaxyw kagàja nhîpêx pa mẽ awÿr mẽnh kaxyw. Na pa hte kãm ixkapêr nhũm inhma nê inhmã hã kagà. Na hte Kris kapêr kôt amnhî nhîpêx rãhã ho ri pa. Tã inhmã kagàja nhîpêx. Mẽ ate kamã harênh nê mar nê tãm ajamaxpêr kaxyw. Nê Tirtũm kãm mẽ ajapê nê kot mẽmoj to mẽ akutã nojarêt ã mẽ ate kamã harênh kaxyw. Tã kêr ka mẽ kãm mẽ ajapê hã amnhî tã harênh ma nê kapêr kôt pix mã amnhî nhîpêx mex rãhã ho ri apa. Mẽ akwÿjjaja kot tanhmã hã mẽ ato htãã.

¹³ Nê ota jar Papirõn kamã Kris kôt mẽ pahtõ nê mẽ pahtõxjaja mẽ awÿr hpêr mẽ. Tirtũm kot mẽ pahpyrà nê mẽ ho hkra jakamã mẽ kêp mẽ atõ nê mẽ atõx ã mẽ awÿr hpêr mẽ. Nê Xiakre mãänênh mẽ awÿr hpêr mẽ. Te kêp ixkra pyrãk.

¹⁴ Nê kêr ka mẽ nhÿri apê Kris kwÿ hã axpên pumu nê mẽ axpên to atõ nê atõx ã axpên mã akapêr mex kurê kumrêx.

E kê Tirtũm mẽ apê Kris kwÿ hã mẽ amã mẽ ajamakêtkati nê mẽ apa xà gõ ka mẽ axãmnhîx ajamakêtkati nê amex nê ri apa ho apa.

Tã ãm ja pix. Ixpê Simãw Pêtre na pa ã mẽ awÿr kagà nê mẽnh anê.

Sikûn Pêtre
Simãw Pêtre kot Jejus
kôt hkwýjê hwýr wam
kagà nê mēnh kôt hō
mēnh

Simãw Pêtre na pre kagàja nhîpêx. Jejus nhÿ hã hkrajê jahkre ho mē pa xwýnhjê hō na pre. Mē kēp Jejus kra hkēt xwýnhjaja ra kot Jejus ã hpîr kaxyw nhūm pre kagàja nhîpêx nê krî piitã hkôt Jejus kwýjê hwýr kurê nê kamã hpri hã mē kãm mēmoj tâ karō. Mē kot arî Tirtūm kot amnhî nhîpêx kôt amnhî nhîpêx rãhã ho pa hã mē kãm karō. Nê hamaxpēr o mē hamaxpēr rãhã ho pa hã mē kãm karō.

Nê mē hkwý kot Tirtūm kôt amnhî nhîpêx ã amnhî jarēnh tâ hkôt amnhî nhîpêx kēt xwýnhjaja nhūm pre tanhmã mē harēnh to. Æ na pre mē kãm mēmoj jarēnh nê hã kagà nê krî piitã hkôt mē hwýr rēnh anē. Nê mē kãm:

¹ Pa Kris kôt ixtō nê ixtōxjaja. Xà mē amex? Ot pa mē awýr kagà nhîpêx nê krî piitã hkôt mē awýr kurê. Ixpê Simãw Pêtre na pa wam ixte kagà nhîpêx nê mē awýr mēnh tâ axte hō nhîpêx. Ixte Jejus Kris nhÿ hã mē ajahkre ho ixpa xwýnh ã mē amã hipêx nê kumē. Na pa hte Jejus mã amnhî nhîpêx mex o ri ixpa.

Nê mē papytâr xwýnh Jejus Krisja Tirtūm pyrã nê mex o mex. Nê wa kot amnhî nhîpêxja mex o mex. Jakamã na pre wa tanhmã mē pahkrã hto pu mē amnhî kaxyw wa hkôt pajamaxpēr tÿx rãhã ho ri papa. Na ka htem ixpyrà nê ã amnhî nhîpêx anē. Tã pa mē amã kagàja nhîpêx.

² Nà Tirtūm mē mē panhō Pahihti Jejus wa kot amnhî nhîpêxja na ka mē ra harēnh mar tÿx nê. Wa kot tanhmã amnhî nhîpêx to nê

tanhmã wa hamaxpēr toja ka mē mar tÿx nê wa hkôt pix mã amnhî nhîpêx. Tã kēr ka mē arî ã amnhî nhîpêx anhÿr rãhã ho ri apa. Jao axãmnhix ajamakêtkati nê akñnh nê apa ho apa. Na pa hte ã mē ato Tirtūm mē Pahihti Jejus Kris wa hwýr o ri ixpa anē. Na hte Tirtūm mē ato mex nê mē akutã nojarēt rãhã ho pa.

Tirtūm kot mē pahto mex o pa hã harēnh

Epes 2.12-13; Wam Tesarôn 1.2-4; Sikûn Pêtre 3.18

³ Nê Tirtūmja àhpumunh tÿx o àhpumunh tÿx jakamã na pu htem hkôt amnhî xunhwý nhūm amnhî tâ mē pahpumu nê mē pamã àhpumunh tÿx xà hkwý gō. Hãmri pu mē ra urak nê amnhî to mex nê tãm amnhî nhîpêx o ri papa. Tã kot puj mē nhÿrmã ma ò krî hwýr api. ⁴ Na pre mē pakukamã amnhî jarēnh o:

—Kot paj nhÿrmã ixkrajê mã ixte amnhî nhîpêx mex kwý gō nhūm mē inhÿ hã ho tãm ri amnhî nhîpêx mex o pa. Nê ixpyrà nê hamaxpēr mex o pa.

Anhÿr jao te ra mē pamã hkñnh xà mex kwý nhōr pyrãk o mē panhîpêx. Nê te ra kot mē pahkrãm hamaxpēr mex jagjēnh nê mē pamã kot amnhî nhîpêx mex jagjēnh pyrãk. Mēmo kaxyw na pre ã mē panhîpêx mex anē? Nà urak nê tãm mē pahte amnhî nhîpêx mex rãhã o ri papa kaxyw. Jao mē pahte mē kēp hkwý hkēt xwýnhjê hkôt amnhî nhîpêx kēt nê. Nê mē hamaxpēr punuj o pajamaxpēr kēt nê. Nê hpãnhã mē pahte Tirtūm kôt pix mã amnhî nhîpêx rãhã ho papa. Æ mē pahte amnhî nhîpêx anhÿrja na mex o mex. ⁵ Tã ã Tirtūm kot mē panhîpêx mex anhÿr jakamã kwa kēr ka mē kapēr mar tÿx nê hkôt pix mã amnhî nhîpêx mex o ri apa. Jao amnhî kaxyw hkôt ajamaxpēr rãhã nê. Kot kaj mē ã amã amnhî

nhîpêx anhÿr o apa hprâm hã kot kaj mê mãânên amã tãm amnhî nhîpêx o apa hprâm. Nê mê amã Tirtûm kapêr piitã mar prâm o ri apa. ⁶ Hãmri nê piitã mar pa nê mêmôj punuj piitã nê amnhî to htÿx nê. Nhûm mê kêp Kris kwÿ hkêt xwÿnhjaja Kris ã tanhmã mê anhîpêx to htã ka mê ãm amnhî tã mê omu nê mê umaj mê amã Kris kaga hprâm kêt nê.

Nê mê amã Tirtûm mã amnhî jarênh rãhã ho apa hprâm.

Nê mê amã kapêr mar rãhã ho apa hprâm.

⁷ Nê mê amã Kris kôt mê atõ nê mê atõxjê ho mex pix o ri apa hprâm. Jao te mê amã amnhî tã ma pyrãk o mê piitã mê hipêx o ri mê hkôt apa.

⁸ E kêr ka mê ã amnhî nhîpêx anhÿr o ri apa. Kot ka mê ã amnhî nhîpêx anê nê mê panhõ Pahihti Jejus Kris kôt amnhî nhîpêx mex o mõ. Hãmri nhûm mê akwÿjjaja mê apumu nê mê apê Kris kwÿ hã mê ajarênh kurê kumrêx. ⁹ No kot ka mê atõ ixkapêr mar tã hkôt amnhî nhîpêx kêt nê hãmri te Tirtûm kot anê ate amnhî tomnuj rênh par mã ajamaxpêr kêt pyrãk. ¹⁰⁻¹¹ No na ka htem ã amnhî nhîpêx anhÿr kêt nê. Ra mê ate Pahihti Jejus Kris kôt amnhî nhîpêx mex jakamã na htem ja hã mê apumu nê Tirtûm kot mê ato hkra hã mê ajarênh kurê kumrêx. Kot kaj mê ã hkôt amnhî nhîpêx anhÿr o apa nê mêmô arîgro hã apunuj nê apa htã Jejus kaga hkêt nê. Hãmri nê nhÿrmã ma Tirtûm nhõ krî hwÿr api nhûm mê apumu nê mê ato mex rax nê. Hãmri ka mê õ krî kamã mê panhõ Pahihti Jejus Kris wa kuri atîr tûm nê amex nê apa ho apa.

¹² Nê na ka mê ra Tirtûm kot amnhî nhîpêx mar tÿx nê amnhî krã kamã kot amnhî nhîpêx mã ajamaxpêr tÿx o ri apa. Tã nom kot paj arî mê amã ja jarênh rãhã ho ri ixpa. ¹³ Kormã ixtîr ri kot paj

xatã mê amã harênh o amnhîrît. Ja na kêt inhmã hprâm. Mê ate nhÿrmã tanhmã ri ajamaxpêr to nê hkaga pumaj. ¹⁴ Na pre mê panhõ Pahihti Jejus Krisja inhmã tokÿx ixtÿk ã ijarê. Kot paj xep kritpêr ri ixtîr nê ixpa hkêt nê. ¹⁵ Jakamã na pa kormã ixtîr ri ã mê amã kagã nhîpêx anê. Mê ate inhmÿr pê arî omunh nê kamã harênh nê Tirtûm kot amnhî nhîpêx mã ajamaxpêr tÿx rãhã ho ri apa kaxyw.

Pêtre kot no ho Jejus pumunh ã amnhî jarênh

Matêwre 17.1-5; Makre 9.1-8; Sikün Ximotre 3.16-17

¹⁶ Nê na pa pre ra tanhmã mê amã mê panhõ Pahihti Jejus Krisja jarênh to. Hihtÿx o hihtÿx ã harê nê àhpumunh tÿx o àhpumunh tÿx ã harê. Nê nhÿrmã akupÿn mê pahwÿr wrÿk ã harê. No na pa pre amnhî krã hkôt ã harênh anhÿr kêt nê. Na pa pre inhno ho Jejus hihtÿx o hihtÿx ã omunh o hkôt ixpa nê ixte omunh xà hkôt ã mê amã harênh anê. ¹⁷⁻¹⁸ Amnepê mã kormã ixkwÿjê mê mê ixte arî hkôt ixpa ri pa prem hkôt hixêt prêk nhîmõk wÿr api. Pa nê kaxyw Xiakre nê Juãw mê pa mê hkôt ixpimràatã hixêt ã api nê himõk ã ixkuhê. Hãmri nhûm Tirtûm tanhmã Jejus to nhûm hirã htÿx kãm xa. Hãmri nhûm Mëpahpãm Tirtûmja mê inhmã kapêr. Kaxkwa kamã hirã htÿx rax rûm mê inhmã kapêr o:

—E ota Ixkrata xa. Inhmã hapê ho inhmã hapê. Anê.

Tã ra ixte mar xà hkôt pa amnhî xõ ri mê amã harê nê hã kagã. ¹⁹ Na pa prem ã hixêt prêk nhîmõk ã Jejus pumunh nê Tirtûm kot tanhmã harênh to hã mar anê. Hãmri nê ijamaxpêr o:

—Nã ãm hãmri na pre amnepêr Tirtûm nhÿ hã kapêr jarênh o mê pa xwÿnhjaja Jejus kukamã ã harênh anhÿr o pa. Anê.

Mê kot tanhmã Jejus kukamã harênh toja te kot kamãt kô kamã kanê hpók nhîrã hkryre pyrãk. Tã koja nhÿrmã akupÿn wrÿ hãmri nê te myt kator nê hirã mex nhÿm mẽ pahte mẽmoj pumunh mex pyrãk. Jakamã kwa kêr pu mẽ kot tanhmã Jejus kukamã harênh toja mar tÿx rãhã nhÿm nhÿrmã te myt kator pyrã nê akupÿn mẽ pahwÿr wrÿ. ²⁰ Tÿrtÿm kapêr ã kagã htÿm kot tanhmã ÿ hã kapêr jarênh xwÿnhjê jarênh to. Mẽ kot mẽmoj kukamã ujarênh ã mẽ harê. Nê Jejus kukamã tanhmã ujarênh to hã mẽ harê. Æ mẽ kot mẽmoj kukamã harênh kot anhÿr. Nom na pu htem amnhÿ krã hkôt ã mẽ ujarênh anhÿrja mar tÿx kêt nê. Koja Tÿrtÿm Karô hprÿ hã mẽ pamã ho amnhÿrÿt pu mẽ rÿ kormã pahprÿ hã mar tÿx nê. ²¹ Na pre ÿ hã kapêr jarênh o mẽ pa xwÿnhjaja amnhÿ krã hkôt hkwyjê mã ujarênh o pa hkêt nê. Tÿrtÿm Karô na pre tanhmã mẽ hkrã hto nhÿm mẽ ÿ hã hkwyjê mã tanhmã harênh to ho pa nê ÿ hã mẽ pamã hã kagã.

2

Tÿrtÿm kapêr jarênh o hêx xwÿnhjê jarênh

Korosê 2.16-17; Wam Ximotre 4.1-5; Sikün Ximotre 3.1-9; Jutre 3-16

¹ Nê amnepêm na pre Ijaew kwÿjaja te mẽ kêp Tÿrtÿm nhÿ hã kapêr jarênh xwÿnh pyrãk. Nom Tÿrtÿm kapêr kwÿm ri hkwyjê mã tanhmã ho hêx to ho pa. Tã koja nhÿrmã mẽmojaja mẽ urãk nê mẽ awÿr mra nê ã mẽ amã Tÿrtÿm kapêr o hêx o pa anê. Nê kapêr kwÿm ri tanhmã mẽ ajahkre hto ho mẽ amã hêx o mẽ akôt pa. Mẽ ate mẽ mar nê amnhÿ nhÿpêx nyw kaga nê hpãnhã mẽ kot amnhÿ tomnuj kôt apa hprãm xãj nhÿm mẽ hêx rom tanhmã mẽ ajahkre hto ho pa. Pahihti Jejus kot mẽ nê htyk

tã nhÿm mẽ hkôt amnhÿ nhÿpêx kêt nê axtem nê ri kapêr o hêx o pa. Mÿrapê koja Tÿrtÿm tokyx mẽ kot amnhÿ xã htÿx kamã hamak tÿm xã hwÿr mẽ rênh pa.

² Koja mẽ ohtô nê mẽ kapêr ma nê kãm mẽ mar prãm nê. Nê mẽ hkôt hamaxpêr nê mẽ hkôt amnhÿ nhÿpêx o pa. Jao ra hpi-jaãm kêt nê mẽ hkôt htÿx ri tanhmã amnhÿ tomnuj to ho ri pa. Tã ã mẽ kot Tÿrtÿm kapêr o mẽ hêx xwÿnhjê mar nê mẽ hkôt amnhÿ nhÿpêx anhÿr jakamã koja mẽ kãm Tÿrtÿm kapêr mar prãm xwÿnhjaja mẽ kot amnhÿ nhÿpêx ã mẽ omu nê Tÿrtÿm kapêrja mex kêt ã harênh japêr. ³ Tÿrtÿm kapêr o mẽ hêx o mẽ pa xwÿnhjaja na htem kãxpore pix prãm xãj mẽ awÿr mra nê tanhmã mẽ amã kapêr jarênh o hêx to ho pa nhÿm Tÿrtÿm ja hã mẽ omunh rãhã ho hkrÿ. Na hte nhÿhÿm mrar kêt nê rÿ htÿx ôt o hikwÿ hkêt nê. Na hte arÿ mẽ kot amnhÿ nhÿpêx ã mẽ omunh rãhã ho hkrÿ. Tã koja nhÿrmã ma mẽ kot amnhÿ xã htÿx kamã hamak tÿm xãta hwÿr mẽ kurê nhÿm mẽ ma hwÿr hapêx pa.

⁴ Nê amnepê mã kaxkwa kamã Tÿrtÿm kapêr o mẽ wrÿk xwÿnh kwÿjaja na prem axtem nê Tÿrtÿm kapêr nhÿrôp kuhê nhÿm tee ri amnhÿ tã mẽ omu hãmri nê amnhÿ nê mẽ kator pa. Mẽ kamã ukapri hkêt nê amnhÿ nê mẽ kator pa hãmri nê mẽ kot amnhÿ xã htÿx kamã hamak tÿm xãta wÿr mẽ hano. Nhÿm prem ma hwÿr pa nê ahkre xupÿm kãm kamãt kô kamã arÿ hkrÿ ho hkrÿ. Tÿrtÿm kot mẽ piitã tanhmã mẽ harênh to xã hã arÿgroja jamãr o hkrÿ. Nê tee ri kãm hapôx prãm kaprÿ ho hkrÿ.

⁵ Nê amnepêm pika kamã ri mẽ pa xwÿnhjaja na prem haxwÿja pi-itã amnhÿ tomnuj pix o ri pa. Jakamã nhÿm Tÿrtÿm ja hã mẽ omu nê mẽ kamã ukapri hkêt nê. Nê mẽ hwÿr na rax mẽ. Mẽ kãm kapêr mar

prām kêt jakamā nhūm mē hwÿr kumē nhūm wrÿk rax kumrēx nē mē hanhir pa nē mē himex. Ām Noehti mē hkwȳ pē 7 pixjaja nhūm mē kurom htīr nē hkā hkīnh nē mex nē pa. Noehti kormā na xwÿj ri kot mē kām Tirtūm kapēr jarēnh o ri mē hkôt pa htā nhūm mē kuma nē ām kuma. Mÿrapē na prem piitā pikaprār pa.

⁶ Nē Sotō mē Gomo wa kamā mē pa xwÿnhjaja haxwÿja na prem amnhī tomnuj tÿx kumrēx o pa nhūm Tirtūm wamtajē pyrā nē mē kamā ukaprī hkēt nē. Na pre kaxkwa rūm mē hipy mēmo hpōk kwÿ rē nē ho mē ho hapēx pa. Tā mēmo kaxyw na pre ā mē hipēx anē? Nā mē piitā mē kot mē harēnh mar nē hamaxpēr o:

—Na hte ā Tirtūm mē kot amnhī tomnuj xwÿnhjē nhīpēx anē.

Anhÿr o hamaxpēr kaxyw na pre ā mē hipēx anē. ⁷⁻⁸ Nom Rohtija na pre Tirtūm Sotō nē kator jakamā nhūm htyk kêt nē. Na pre hkwȳjē rom tām amnhī nhīpēx tā mē kot amnhī tomnuj tÿx xwÿnhjē nhō krī kamā ōrkwȳ nē ri pa. Nē apkati mē tee ri mē kot amnhī nhīpēx ā mē omu nē mē ŷ hā hkaprī nē tee ri mē hkukamā hamaxpēr o pa. No nhūm mē amnhī tomnuj ā amnhī pumunh nē tokyx tām amnhī nhīpēx kêt nē. Nē apkati mē tanhmā amnhī tomnuj to nē kapēr punuj o pa nhūm Rohti tee ri mē omu nē hkaprī htÿx nē pa. ⁹ Tā nhūm Tirtūm mē himex kaxyw nē mē nē kator nē mē himex pa. Na hte ā Tirtūm mēmoj punuj pē mē kot amnhī kaxyw kām hamaxpēr nē hkôt amnhī nhīpēx xwÿnhjē pytār anē. No mē kot amnhī tomnuj xwÿnhjaja na hte axtem mē hipēx. Tā koja nhÿrmā mē pahpi-itā tanhmā mē pajarēnh to xā hā arīgro kato nhūm ma mē kot amnhī xā htÿx kamā hamak tūm xā wÿr mē rēnh pa. Ām tapxipix kot ā mē hipēx anhÿr kaxyw āhpumunh tÿx.

¹⁰ Tā mē hpijaam kêt kām amnhī tomnuj o mē pa xwÿnhjaja nē mē kot Tirtūm kapēr mar nē ām mar xwÿnhjaja koja nhÿrmā mē homnuj tÿx nē.

Nē Tirtūm kapēr o hēx o ri mē pa xwÿnhjaja na htem amnhī to jarkrar pix o pa. Nē Tirtūm kapēr o mē wrÿk xwÿnhjē hā hpijaam kêt nē. Nē axtem nē mē ho kapēr punuj pē tanhmā mē haprÿ hto ho pa. ¹¹ Tā nhūm htem amnhī tā mē kuma nē ām mē kuma. Mē kurom mē hihtÿx kumrēx tā no ām amnhī tā Tirtūm mā tanhmā mē ho kapēr to hkēt nē.

¹² Nē mry xoprē na hte htÿx ri pa ho pa. Tā Tirtūm kapēr o mē hēx o mē pa xwÿnhjaja htem mry xoprēta pyrā nē htÿx ri hamaxpēr mex kêt o pa. Jao hprī hā mēmoj mar kêt tā htÿx ri hijuk ri tanhmā mēmoj jarēnh to.

Nē mry xoprēja htÿx pa nhūm mē kot hparja pyrā nē mē kot Tirtūm kapēr o hēx o mē pa xwÿnhjaja koja Tirtūm nhÿrmā kuwy hwÿr mē ho hapēx nē kamā mē rēnh pa.

¹³ Nē koja nhÿrmā Tirtūm mē kot tanhmā mē ama hēx to ho pa hā mē omunh xā hkôt mē homnuj tÿx nē. Na htem hpijaam kêt nē mē piitā mē noo mā tanhmā amnhī tomnuj to ho pa. Kamāt kām nē arīgro hā. Nē mē kām tanhmā amnhī nhīpēx to hprām xā hkôt pix mā amnhī tomnuj o pa.

Na htem te mē kēp Kris kôt mē atōjē pyrā nē mē akôt Tirtūm kapēr mar xā hā ixkre hwÿr agjē nē mē anhīhkō hā mē kot Jesus tyk mā hamaxpēr kaxyw pāwti hkwȳ hku. Nom htÿx hkur o hkrī nē htyk mā hamaxpēr kêt nē. Kām Jesus kīnh kêt tā hēx rom hpijaam kêt kām mē anhīhkō hā htÿx ri hkur o hkrī.

¹⁴ Nē nhÿri krī hwÿr pōj nē mēnijē pumu nē kām mē hkīnh nē. Ra mē mjēn ri pa htā nhūm mē kām mē ho amnhīkati hprām nē mē kamā hpijaam kêt o ri pa.

Nē kormā mẽ kot Kris kôt amnhĩ xunhwÿr tohtuj anhyr xwÿnhjê hwÿr mra nê hêx rom tanhmã mẽ kãm kapêr to pê mẽ no kupyri o ri mẽ hkôt pa. Mẽ kot mẽ mar nê Kris kaga nê mẽ hkôt ri amnhĩ nhĩpêx prãm xaj ã mẽ hipêx anhyr o pa.

Na htem hikàxpore rûnh o pikuprõnh pix kukamã hamaxpêr o ra ho õxÿ nê.

Ã na htem amnhĩ nhĩpêx anhyr o pa. Tã ra Tirtũm kot mẽ homnuj tÿx kaxyw mẽ hã amnhĩ jarê. ¹⁵⁻¹⁶ Te mẽ kot kamãt kô kamã pry juk ã hpikunor nê htÿx ri pa pyrãk o na htem amnhĩ nhĩpêx nê kãm Tirtũm kapêr mar prãm kêt nê amnhĩ tomnuj pix o pa.

Amnepê m Peo hkra Paraãwta kêp Tirtũm nhÿ hã kapêr jarênh o pa xwÿnh tã axtem nê kàxpore rax prãm xaj tanhmã amnhĩ tomnuj to kaxyw. Nhũm Tirtũm tee ri ja hã omu nê Paraãw krit jumênreja tanhmã hakwa hto nhũm kãm kapêr. Jumênre kapêr kêt tã nhũm Tirtũm tanhmã hakwa hto nhũm kãm kapêr nê tanhmã kot amnhĩ tomnuj to kaxywta ã kãm akir nhũm amnhĩ tã kuma hãmri nê ã amnhĩ nhĩpêx anhyr kêt nê. Tã mẽ kot Tirtũm kapêr o mẽ hêx ho mẽ pa xwÿnhjaja na htem Paraãw pyrã nê kàxpore rax prãm xaj tanhmã amnhĩ tomnuj to pix prãm. ¹⁷ Te hino ra grã nhũm mẽ tee ri kamã gô japêr pyrãk o na htem amnhĩ nhĩpêx. Rÿ te kakrã hapôx nhũm mẽ kot omunh nê na wrÿk ã hkamnhĩx kaprÿ pyrãk. Tã ra Tirtũm mẽ kaxyw kamãt kô htÿx pê mẽ kot amnhĩ xã htÿx kamã hamak tũm xata o mẽ nê. ¹⁸ Na htem htÿx ri amnhĩ tomnuj o pa hã mẽ amã amnhĩ to jarkrar o ri pa. Jakamã nhũm mẽhõ ra amnhĩ tomnuj kaga kaxyw nhũm mẽ tee ri ja hã omu nê kot ã amnhĩ nhĩpêx anhyr pymaj tanhmã nê kãm kapêr to nê mẽ kãm:

—Kwa ixte amnhĩ tomnuj o ixpa htã nhũm Tirtũm ja hã ixpumu nê ãm ixpumu nê arĩ inhmex ã ijarê. Na pa hte mẽ hkuprÿjê hwÿr mra nhũm ja hã ixpumu nê ãm ixpumu nê hã tanhmã ixto hkêt nê. Jakamã kwa mẽ ixpyrà nê arĩ ã amnhĩ nhĩpêx anhyr o ri apa. Koja Tirtũm tanhmã hã ato hkêt nê. Anê.

Hãmri nhũm mẽ tee ri kuma nê ra hamaxpêr kati nê. ¹⁹ Na htem mẽ kãm kapêr o:

—Kwa mẽ ixpyrà nê mãmrĩ amã tanhmã amnhĩ tomnuj to hprãm xã hkôt amnhĩ nhĩpêx o ri apa. Mẽhõ kot kêt ja nê tanhmã amã kapêr to? Anê.

Mẽ kot amnhĩ tomnuj xaja te kêp mẽ õ patrãw pyrãk jakamã na htem ãm kôt pix mã amnhĩ nhĩpêx o pa. Jakamã kot pu mẽ tanhmã amnhĩ tomnuj to. Nê gaa nê axte. Nê gaa nê ra ho amnhĩ pyrãk. Hãmri nê tee ri pamã hkaga hprãm kaprÿ nhũm te kêp mẽ panhõ patrãw pyrãk o mẽ panhĩpêx pu mẽ ãm kôt pix mã ri amnhĩ nhĩpêx o ri papa.

²⁰ Nê koja mẽhõ ra Tirtũm kapêr ma. Nê mẽ panhõ Pahihti Jejus Kris jarênhja nhũm hprĩ hã kuma. Kêp mẽ pahte amnhĩ tomnuj pê mẽ papytãr xwÿnh ã harênh ma. Tã nhũm mẽ kot Tirtũm kapêr o mẽ hêx xwÿnhjaja hwÿr mra nê tanhmã kãm ho hêx to nhũm mẽ kuma nê kot amnhĩ nhĩpêx tũm o awjanã. Jao amnhĩ tomnuj tÿx o kormã kot Tirtũm kapêr mar kêt ri kot amnhĩ tomnujta jakre. ²¹ Kêp ãm aa kot Tirtũm kapêr mar kêt rãhã htyk ronhÿx ja kãm mex nê. Nom ra kot mar mex tã ãm kuma nê hkaga jakamã koja mex kêt kumrêx. ²² Mẽ kot ã mẽ kot amnhĩ nhĩpêx anhyr ã mẽ harênh kot:

Rop na hte õjaïr nê akupÿm õjaïrta ku.

Nê hagrõ na htem unê nê hkumrã nhũm muxre. Tã nhũm mẽ kãm ure nhũm akupÿm hprõt nê mra nê akupÿm gyw o amnhĩ tomnu pa. Anê.

Tã mẽ kot Tirtūm kapēr o mẽ hêx xwýnhjê mar nê mẽ hkôt amnhĩ nhĩpêx xwýnhjaja te mẽ kot rop mẽ hagrô wa kot amnhĩ nhĩpêxta pyrà nê Tirtūm kapēr kaga nê akupým mẽ kot amnhĩ nhĩpêx tūm o awjanã nê htýx ri amnhĩ nhĩpêx o pa.

3

Tirtūm kot pika ho hapêx kaxyw kormã amnhĩ tã mẽ pajamãr ã harênh

Matêwre 24.29-31; Xiakre 5.7-11; Apokarip 19.11-16, 21.1-8

¹ E Kris kôt ixkrãmnhwýjaja. Na pa pre ra wam kagata nhĩpêx nê mẽ awýr kurê. Tã ra axte hkôt ja nhĩpêx. Hamê wa kamã na pa mẽ amã Tirtūm kot tanhmã amnhĩ nhĩpêx to hã harê. Nê Jesus Kris nhỹrmã akupýn mẽ pahwýr wrýk ã harê. Mẽ ate mar nê tãm amnhĩ nhĩpêx nê tãm ajamxpêr o kutêp mẽ apa kaxyw.

² Amnepê mã Tirtūm nhỹ hã kapēr jarênh o ri mẽ pa xwýnhjaja na prem Tirtūm kot nhỹrmã mẽ pahwýr mēhō mēnh mã xwýnhhta jarênh o pa. Kot nhỹrmã mẽ pahwýr wrýk nê mẽ pahto amnhĩptar o pa hã harênh o pa. Tã kêr ka mẽ kapēr ma nê hã ano htýx nê hkôt ajamxpêr týx rãhã ho ri apa. Nê Jesus kot mẽ awýr mẽ rênh xwýnhjaja ka mẽ kapēr ma. Mẽ kot mẽ amã mẽmoj jarênh o mẽ pa xwýnhjaja na htem tanhmã mẽ amã Pahihti Kris jarênh to ho ri mẽ akôt pa. Nê tanhmã kot mẽ panê amnhĩ nhĩpêx to hã harê. Tã kêr ka mẽ kapēr ma nê hã ano htýx nê kãm ajamxpêr týx rãhã ho ri apa.

³ Nê kwa mẽ inhma. Nhỹrmã Kris akupýn mẽ pahwýr wrýk xwýj ri koja mẽ kot amnhĩ tomnuj týx xwýnhjaja mẽ awýr mra. Mẽ hpi-jaam kêt o pa xwýnh jakamã koja mẽ tanhmã mẽ akamã amnhĩ tomnuj to ho pa. Nê mẽ apê Kris kwý hã mẽ apumu nê mẽ atã hpêr o pikênh

o pa. ⁴ Nê htýx ri Kris ã mẽ akukja nê mẽ amã:

—Kwa no Krisja? Amnepêm akupýn wrýk nê mẽmoj piitã tanhmã hipêx to hã amnhĩ jarênh tã arĩ Tirtūm kot mẽmoj to kator krax rŭm mẽmoj amarĩ rãhãã. Ra mẽ panhigêtjaja pikaprãr par tã nhŭm kormã akupýn wrýk kêt nê. Kot mẽ pamã amnhĩ to hêx kênã. Mo kaxyw koja kêt akupýn mẽ pahwýr wrý? Kot mẽ pamã amnhĩ to hêx kênã. Anê.

⁵⁻⁶ Nom ã mẽ kot harênh anhỹrja kot anhỹr kêt. Tirtūm kot mẽmoj to kator krax rŭm mẽmoj amarĩ rãhã hã mẽ kot harênhja kot anhỹr kêt. Na pre Tirtūm kapēr pix o kaxkwa nê pika ho kato. Nhŭm gô hkwýja kapēr mar xà hkôt pika hã amnhĩ jahkre. Nhŭm hpãnhã panhĩ nhĩpêx. Tã no nhŭm mẽ kapēr mar kêt kumrêx. Nê mẽ kot amnhĩ tomnuj týx mýrapê na pre Tirtūm gô ho mẽ himex pa. Jao mẽ hwýr na rax mẽ nhŭm mẽ hanhir o mẽ ho hapêx. No nhŭm mẽ kot Jesus wrýk ã hpêr o pikênh xwýnhhtaja kãm ã mẽ harênh anhỹrja mar prãm kêt. Ra mẽ kot mar tã kãm mar prãm kêt nê arĩ mẽmoj piitã rãhã hã ri harênh o pa. ⁷ Pika nê kaxkwaja arĩ rãhã htã koja Tirtūm nhỹrmã mẽ pahpiitã mẽ pahte tanhmã amnhĩ nhĩpêx to hã mẽ pahpumunh kôt tanhmã mẽ pajarênh to. Nê mẽ kot amnhĩ xà htýx kamã hamak tŭm xà hwýr mẽ kot amnhĩ tomnuj xwýnhjê rênh pa. Hãmri nhŭm rĩ kormã kaxkwa nê pikaja wa pôr nhŭm himök ã mẽmoj piitã hkaxàr pa nê hapêx.

⁸ Nê amgrã pê 1.000ja mẽ pamã amgrã xohtô rax kumrêx no Tirtūm mã te arĩgro pixire pyræk. ⁹ Tã ra kot mẽ pamã tokyx Jesus akupýn wrýk ã harênh tã nhŭm kormã wrýk kêt jakamã nhŭm htem tōhã tee ri hamãr o pa nê hamaxpêr o:

—Hêxta waa nê. Tirtūm kot tokyx akupýn mẽ pahwýr Jesus mẽnh ã amnhĩ jarênh tã tokyx mẽnh kêt nê.

Anhÿr o harēnh tā no ām kot anhÿr kêt. Na kormā amnhī tā mē kot amnhī tomnuj xwÿnhjē jamār o pa. Mē kot amnhī tomnuj kaga nē hkôt amnhī xunhwÿr prām xàj kormā amnhī tā mē hamā. Kām mē kot amnhī xà htÿx kamā hamak tūm xàta wÿr mēhō ho pixire nē mōr prām kêt jakamā na kormā amnhī tā mē hamā. ¹⁰ Tā koja nhÿrmā mē panhō Pahihtija akupÿn mē pahwÿr wrÿ. Te mē àhkĭnh xwÿnh kot amnhī nhĭpēx pyrāk o mē pajaer pē akupÿn wrÿ. Pu mē pahÿtÿx ri tanhmā paxàpēnh to ho ri papa nē akupÿn wrÿk ā hkamnhĭx kêt rāhā nhūm mē pajaer pē akupÿn wrÿ. Hāmri nē ma akupÿm amnhī kôt mē pahte hkôt amnhī xunhwÿr xwÿnhjē ho àpir par kurē kumrēx. Hāmri nhūm rĭ kormā kaxkwa kaxār o hkrihkrit tÿx kām hapēx pa. Nē kanhēti mē myt nē mytwÿre kaxār pa. Nē pikaja nē määnēn kamā mēmoj piitā kaxār pa. ¹¹⁻¹² Koja nhÿrmā ā mēmoj hapēx par anē. Jakamā kwa kēr pu mē Jejus kutēp tām ri amnhī nhĭpēx rāhā ho ri papa. Nē Tirtūm kapēr kôt pix mā amnhī nhĭpēx rāhā nē. Nē kām hprām xà hkôt tanhmā kām amnhī nhĭpēx to ho ri papa. Kēr kē Jejus akupÿn wrÿ nē ā mē pahte amnhī nhĭpēx anhÿr ā mē pahpumu. Koja wrÿ nhūm rĭ kormā kaxkwa nē pikaja wa kaxār pa. Nhūm kuwy mÿri kaxkwa kamā mēmoj harir xwÿnhja xēr nē ôr pa nē hapēx. ¹³ Tā kwār māmri mēmoj ā amnhī nhĭpēx anē. Koja Tirtūm axte mēmoj mex nhĭpēx. Na pre amnhī kukamā ja jarēnh o:

Kot paj axte pika nē kaxkwa hō nhĭpēx nhūm mex o mex. Nhūm mē kot amnhī kaxyw Jejus mā hamaxpēr nē hkôt amnhī xunhwÿr nhūm ixte mē mex ā mē harēnh xwÿnh pixjaja koja mē pika nywja kamā mex nē pa ho pa. Anē.

¹⁴ Jakamā kwa ixkràmnhwÿjaja. Kēr

ka mē Kris kutēp kapēr kôt amnhī nhĭpēx mex rāhā ho ri apa. Jao kutēp ajamakētkati nē axàmnhĭx axpēn kôt apa. Kēr ka mē nhÿrmā amnhī wÿr omu nē tee ri amnhī kukamā ajamaxpēr kêt nē. Ate tām amnhī nhĭpēx o apa hā amnhī pumu nē akĭnh nē amnhī wÿr omunh o akuhē.

¹⁵ Nom arĭ Jejus kām mē pahkwÿjē ho hkra hprām jakamā na kormā amnhī tā mē hamā nē tokyx akupÿn wrÿk kêt nē. Na pre Jejus kôt mē pahÿtō Pawre Tirtūm nhÿ hā ā mē pamā ja hā kaga anē. Pawreja ixkràmnhwÿ mex na. ¹⁶ Na hte mē pakaxyw kaga nhĭpēx nē kamā mē pahte Jejus kutēp tām amnhī nhĭpēx o papa hā mē pamā karō. Na hte tōhā mēmoj tā kaga pu mē kamā harē nē tee ri pahpĭrĭ hā mar mā no ām mar mex kêt nē. Hāmri nhūm Tirtūm kapēr o mē hēx o mē pa xwÿnhtaja haxwÿja kuma hāmri nē amnhī krā hkôt hijuk ri tanhmā ho hēx to. Te mē kot hprĭ hā mar nē harēnh pyrāk nom hprĭ hā mar kêt nē. Ā na htem Tirtūm kapēr ā kaga piitā ho hēx o pa anē. Mÿrapē koja mē nhÿrmā amnhī xà kamā hamak tÿx kumrēx.

¹⁷ Tā e Kris kôt ixkràmnhwÿjaja. Ra mē ate mē harēnh mar jakamā kwa mē okora. Mē amnhī nē mē omunh mex nē mē hkôt amnhī nhĭpēx kêt nē. Kot kaj mē anē nē Tirtūm kôt amnhī nhĭpēx mex kêt nē. ¹⁸ Na ka htem mē papytār xwÿnh Pahihti Jejus Kris kôt ri amnhī nhĭpēx o apa. Tā kēr ka mē arĭ hkôt amnhī nhĭpēx mex rāhā ho ri apa. Nē hkôt amnhī xunhwÿr tÿx nē. Kēr kē amnhī tā mē apumu nē mēmoj to mē akutā nojarēt nē. Krisja mex o mex nē hihtÿx o hihtÿx. Tā kēr pu mē kām mex o mex ā mām harēnh rāhā ho ri papa.

Tā ām ja pix. Ixpē Simāw Pêtre na pa ā mē amā ja hā kaga nē mē awÿr mēnh anē.

Wam Juāw Juāw kot Jejus kôt hkwÿjê hwÿr kagà nê mênh

Juāw na pre kagàja nhîpêx. Na pre kagà hkwÿ nhîpêx rax nê. Na pre määnên Juāw kot tanhmã Jejus kot amnhî nhîpêx to ho pa ã kagà nê Apokarip nê Sikün Juāw nê Hapuhã Juāw nhüm pre ja piitã Tirtüm nhÿ hã hã kagà.

Juāwja Jejus nhÿ hã hkrajê jahkre ho mê pa xwÿnhjê hõ na pre. Nê kêp Xiakre htõ na pre. Tã ra hpigêt tÿx nê kagàja nhîpêx. Urak nê mê kot Tirtüm kôt amnhî xunhwÿr xwÿnhjê mã hipêx. Mê kot kamã harênh nê mar nê kãm axpên kÿnh o pa kaxyw. Nê mê kot amnhî tomnuj ã amnhî pumunh kôt tanhmã amnhî nhîpêx to hã mê kãm karõ nê hã kagà. ã na pre Juāw mê kãm mêmoy jarênh nê hã kagà anê nê mê hwÿr kumê. Nê mê kãm:

Jejus kêp Tirtüm kapêr o amnhîrît xwÿnh ã harênh

Juāw 1.1-4; Eprêw 1.1-4

¹ Pa ixpyrà nê mê ate Jejus kôt amnhî xunhwÿr xwÿnhjaja? Xà mê amex? E ot pa mê amã kagàja nhîpêx nê mê awÿr kumê. Ixte mê amã Tirtüm kapêr o amnhîrît xwÿnh jarênh kaxyw. Amnepê mã kormã mêmoy amrakati ri nhüm pre ra rãhã ri pa ho pa. ãm kukwak ri pix mã na pu htem Tirtüm mê wa kuri pahÿr tùm nê papa ho papa mã xwÿnh. Tã ÿ hã mê ixte kapêr o mê ajahkre ho ri mê ixpa xwÿnhjaja na pa prem ixpiitã kormã akupÿm kaxkwa hwÿr àpir kêt ri inhno ho omunh o ri hkôt ixpa. Nê mê ijamak o kapêr mar o ri hkôt ixpa. Nê mê inhîkra ho hkupênh o ri hkôt ixpa. ² Na pre kaxkwa kamã Hipêxã hkôt ri pa ho pa htã

amne pika hwÿr mê pahwÿr wrÿ. Hãmri nê jar mê pakamã kato pa pre mê ixkwÿjaja omu. Tã mê ixte omunh xà hkôt na pa htem amnhî xõ ri tanhmã mê amã harênh to. Kojã nhÿrmã akupÿm mê pahÿto mê pahÿr pu mê kuri pahÿr tùm nê pamex nê papa ho papa. ³ Na pa prem tanhmã kapêr to hã mar o ri hkôt ixpa. Nê kot tanhmã mê kãm amnhî nhîpêx to hã omunh o ri hkôt ixpa. Ta kagàja kamã amnhî xõ ri ixprî hã mê amã harê nê hã kagà. Mê ate ixpyrà nê aprî hã kot tanhmã amnhî nhîpêx to ho pa hã harênh mar kaxyw. Jao mê pahpiitã te ixkre tipxi kamã mê papa pyrak o amnhî nhîpêx o papa nê axpên kôt pajamaxpêr o ri papa. Jao Mëpanhîpêxã Maati mê Kra Jejus Kris wa hkôt amnhî nhîpêx mex o ri papa. ⁴ Tã pa mê amã kagàja nhîpêx nê mê awÿr kumê. Mê ate kamã harênh nê mar hãmri nê mê ixpyrà nê ajamakêtkati nê akÿnh nê ri apa kaxyw.

Tirtüm mex o mex ã harênh

Juāw 8.12; Epes 5.3-21; Wam Tesarõn 5.5; Eprêw 4.14-16, 9.11-14

⁵ Nê Jejus kot tanhmã mê inhmã Tirtüm jarênh toja kot paj amnhî xõ ri mê amã hã kagà. Nã Tirtüm kot amnhî nhîpêxja mex o mex. Aa kot tanhmã amnhî tomnuj to hkêt. Mex o mex jakamã na hte tanhmã mê kot amnhî tomnuj to mã amnhî jagjênh kêt. ãm kot amnhî to mex o kot amnhî to mex rãhã nê pa ho pa xwÿnh na. ⁶ Kot mê pahte amnhî tomnuj kêt ã mê pamã karõ jakamã kot puj mê pahpê hkra hã amnhî jarênh tã amnhî tomnuj pix o ri papa nê ãm pahpê hkra hã amnhî jarênh kaprÿ nê amnhî to paxêx. Tirtüm krajaja na htem amnhî tomnuj o pa hkêt nê. ⁷ Nom kot puj mê hkôt amnhî nhîpêx nê urak nê tãm ri amnhî nhîpêx o papa. Nê kapêr kôt ri amnhî nhîpêx. Hãmri nê te ixkre tipxi kamã ri Tirtüm

mě Kra Jejus Kris wa hkôt axpěn to papa pyrãk o amnhĩ nhĩpêx. Na pre Jejus mẽ panê ty nê hkamrô axkapĩ. Jao mẽ pahte hkôt amnhĩ xunhwýr xwýnhjaja mẽ panê mẽ pahte amnhĩ tomnuj piitã hpãnhã amnhĩrer pa. Jakamã ãm kukwak ri pix mã na pu htem tãm amnhĩ nhĩpêx o ri papa.

Mě pahpiitã mẽ pahte amnhĩ tomnuj xwýnh ã mẽ pajarênh

⁸ Nê mẽ pahte tōhã tanhmã amnhĩ tomnuj to jakamã kot puj mẽ aa pahte amnhĩ tomnuj kêt ã amnhĩ jarê hãmri nê ã amnhĩ jarênh anhýr o paxêx. Tĩrtũm kot mẽ pahpiitã mẽ pahte amnhĩ tomnuj ã mẽ pahpumunh xwýnh kênã.

Mě pahte amnhĩ tomnuj nê tanhmã amnhĩ nhĩpêx to hã mẽ pamã karõ

Xiakre 4.9-10

⁹ Nê mẽ pahpê Tĩrtũm krajaja na pu htem tanhmã amnhĩ tomnuj to hãmri nê tee ri ja hã amnhĩ pumu nê pahkaprĩ nê. Nê tokyx amnhĩ to Tĩrtũm wý. Hãmri nhũm mẽ pama nê Jejus kukwak ri tanhmã hã mẽ pahto hkêt nê. ãm amnhĩ katut kôt tanhmã mẽ pahte amnhĩ tomnuj tota rê nê axte kãm hamaxpêr kêt nê. Ra kot mẽ pahtã amnhĩ jarênh xà hkôt. Na hte Tĩrtũm amnhĩ jarênh xà hkôt tanhmã amnhĩ nhĩpêx to. Tã ra kot mẽ pahpê hkrajaja mẽ pahte amnhĩ tomnuj piitã amnhĩ katut kôt rênh par ã amnhĩ jarênh jakamã na pre ã mẽ panhĩpêx anê. Na hte mẽmoj tã tanhmã amnhĩ jarênh to hãmri nhũm apkati nhũm ihkjê ho kumê nê axtem tanhmã mẽmoj jarênh to hkêt nê. ¹⁰ Ra kot mẽ pahpiitã mẽ pahte amnhĩ tomnuj xwýnh ã mẽ pajarênh jakamã kot puj mẽ pahtõ ã mẽ pajarênh anhýrja ma nê hkôt pajamaxpêr kêt japêr. Rý kuma nê ãm kuma nê pajamaxpêr o:

—Nã ixte tanhmã amnhĩ tomnuj tore hã.

Anhýr o amnhĩ jarê. Hãmri nê te ate Tĩrtũm hêx xwýnh ã harênh pyrãk. Jao amã kapêr mar prãm kêt ã amnhĩ to amnhĩrĩt.

2

Jejus kêp mẽ paxyr pê Tĩrtũm mã kapêr xwýnh ã harênh

Wam Ximotre 2.5; Eprêw 9.11-14

¹⁻² E mẽ ate amnhĩ tomnuj o apa hkêt kaxyw na pa ã mẽ amã ixkapêr nê hã kagã anê. Mě ate kamã harênh nê mar hãmri nê tanhmã amnhĩ tomnuj to hkêt kaxyw. Jejus Kris na pre mẽ pahpiitã mẽ pahte amnhĩ tomnuj pãnhã amnhĩrer kaxyw mẽ panê ty. Jakamã kot puj mẽ pahpê hkrajaja tanhmã amnhĩ tomnuj to nhũm ja hã mẽ pahpumu nê te kêp mẽ paxyr pê Tĩrtũm mã kapêr xwýnh pyrãk o amnhĩ nhĩpêx. Mě pakurom aa kot amnhĩ tomnuj kêt jakamã na hte mẽ paxyr pê Tĩrtũm mã kapêr nhũm kuma. Hãmri nê kukwak ri pix mã mẽ pahte tanhmã amnhĩ tomnuj to piitã amnhĩ katut kôt rênh pa nê axte kãm hamaxpêr kêt nê.

Tĩrtũm krajaja kot Tĩrtũm kôt amnhĩ nhĩpêx ã mẽ kãm karõ

³ Nê na pu htem Tĩrtũm kôt ri amnhĩ nhĩpêx o papa hã amnhĩ pumunh kôt pahpê hkra hã amnhĩ pumunh mex nê. ⁴ Nom koja mẽhõ kêp hkra hã amnhĩ jarênh tã hkôt amnhĩ nhĩpêx kêt nê ãm kêp hkra hã amnhĩ to hêx. ⁵ Na htem Tĩrtũm kapêr kôt amnhĩ nhĩpêx o pa pê kãm hkĩnh tỳx ã amnhĩ to amnhĩrĩt. Nê kêp hkra hã amnhĩ to amnhĩrĩt mex o pa. ⁶ Jakamã kêr ka mẽ apê Jejus Kris kwý hã amnhĩ jarênh xwýnhjaja hkôt pix mã amnhĩ nhĩpêx mex o ri apa.

Mē pamā axpēn kīnh ā mē pamā karō
Juāw 13.34-35; Wam Juāw 3.14-18

⁷ E Kris kôt ixkràmnhwỳjaja. Inhmā mē akīnh jakamā na pa ā mē amā mēmoj jarēnh nē hā kagā anē. Kot paj mē amā mēmoj nyw jarēnh kêt nē. Ra mē ate mēmoj mar xwỳnhhta kot paj axte mē amā harē. Mē pamā axpēn kīnh nē tām axpēn nhīpēx o papa hā Tīrtūm kot mē pamā karōta. Ra mē ate mar tā kot paj axte mē amā harē nē hā kagā. ⁸ Wam Tīrtūm kot mē pamā axpēn kīnh ā mē pamā karōja kormā Jejus kot mē panē htyk hkêt ri kot mē pamā hā karōta na. Tā ra Jejus kām mē pajapē xàj mē panē htyk jakamā na pa axte ā mē ate axpēn nhīpēx anhỳr o apa hā mē amā karō nē hā kagā. Mē ate Kris pyrà nē amā axpēn kīnh xàj tanhmā axpēn kutā anojarēt to ho ri apa kaxyw. Nom kormā mē pahte Jejus kôt amnhī xunhwỳr kêt ri na pu prem ā axpēn nhīpēx anhỳr kêt nē. Tā hkôt amnhī xunhwỳ hāmri nē ā axpēn to mex o papa anē. ⁹⁻¹¹ Tā koja mēhō kot Jejus kôt amnhī nhīpēx ā amnhī jarēnh tā kām hkwỳjē hkīnh kām àmnhīx ri mē kutā nojarēt o pa hkêt nē. Hāmri nē kot Jejus kôt amnhī nhīpēx ā amnhī jarēnh ā amnhī to hēx. Jao te htỳx ri kamāt kō kamā pa pyràk. No koja mēhō kām hkwỳjē hkīnh kām mē kutā nojarēt o pa nē määnēn Jejus kôt amnhī nhīpēx mex o pa. Jao te hirā kamā ri pa pyràk. Jakamā tanhmā hkwỳjē homnuj to ho pa hkêt nē mē piitā mē ho mex o axpēn pyràk o pa.

Juāw kot mē piitā ahpỳnhā tanhmā mē kām kapēr to

¹²⁻¹⁴ E kot pa ahpỳnhā tanhmā mē amā ixkapēr to nē hā kagā. Mē apiitā te mē apē ixkra pyràk. Na ka prem Jejus kôt amnhī xunhwỳ nhūm Tīrtūm ja hā mē apumu

nē Kra kukwak ri mē ate amnhī tomnuj piitā amnhī katut kôt rēnh pa nē axte kām hamaxpēr kêt nē. Jakamā ra mē ate Tīrtūm kēp Mēpanhīpēèxà Maati hā omunh mex.

Nē mē ate Jejus kôt amnhī xunhwỳr ā amgrā xohtō xwỳnhjaja. Amnepēm amrakati ri Jejus ra rāhā ri pa ho pa xwỳnhja kôt mē ate amnhī xunhwỳr xwỳnhjaja kot paj mē amā tanhmā ixkapēr to nē hā kagā.

Nē mē akwỳjaja ham Jejus kôt mē ate amnhī xunhwỳr xwỳnhjaja ra mē ate Tīrtūm kapēr mā ajamaxpēr rāhā ho ri apa. Jakamā na hte Satanasti mē ate amnhī tomnuj prām xàj tee ri tanhmā mē akrā hto ka mē Jejus nhỳ hā kutā amnhī to htỳx pē hkôt amnhī nhīpēx kêt nē.

Mē kot amnhī tomnuj xwỳnhjaja tanhmā kot amnhī nhīpēx to

Matêwre 6.24; Eprēw 11.24-26; Xiakre 4.4

¹⁵ Nē kēr ka mē amā Tīrtūm kôt amnhī nhīpēx prām xàj mē kot amnhī tomnuj xwỳnhjē hkôt amnhī nhīpēx kêt nē. Nē mē hamaxpēr punuj xwỳnhjē hkôt ri amnhī nhīpēx kêt nē. Kot kaj mē hkôt amnhī nhīpēx hāmri nē amā Tīrtūm kīnh kêt ā amnhī to amnhīrit. ¹⁶ Mē kot amnhī tomnuj xwỳnhjaja na htem mēmoj punuj mā hamaxpēr nē hkôt tanhmā amnhī tomnuj to. Nē mēmoj pumu nē ra kām ho ō hprām nom Tīrtūm pē ja omnuj ā hkamnhīx kêt nē. Rỳ tanhmā mēhō kot amnhī tomnuj to hā omu nē hkôt kām amnhī nhīpēx prām. Nē tanhmā amnhī to jarkrar to ho ri pa. Ā na hte mē kot amnhī tomnuj xwỳnhjaja amnhī nhīpēx anhỳr o pa. Mē kot amnhī nhīpēxja Mēpanhīpēèxà Tīrtūm kām hprām kêt. ¹⁷ Koja nhỳrmā mē kot tanhmā amnhī tomnuj toja piitā hapēx pa. Nē mē hamaxpēr punujja määnēn nhỳrmā hapēx pa. Nē mē kot amnhī tomnuj o mē pa xwỳnhjaja koja mē

amnhĩ xà htỳx kamā hamak rāhā ho pa ho pa. No Tirtūm kôt mē kot amnhĩ nhĩpêx o mē pa xwỳnhjaja koja mē kuroom kuri htĩr tūm nē mex nē hkĩnh nē pa ho pa.

Kām Kris kurê xwỳnh maati jarēnh

Wam Juāw 4.1-6; Sikūn Juāw 7-11

¹⁸ E Kris kôt ixkwỳjaja. Kris akupỳn mē pahwỳr wrỳk kukamā koja mēmoj tanhmā amnhĩ nhĩpêx to. Na pre ra Kris kôt mē panhĩoja mē pamā ā harēnh anē nē harēnh o:

—Koja mē panhō Pahihiti Kris akupỳn mē pahwỳr wrỳk kaxyw hāmri nhūm kēp Kris ā amnhĩ to hêx xwỳnh maati kumrêx nhỹhỹnh kato. Hāmri nē hêx rom te Kris pyrā nē tanhmā mē kām kapêr to nē tanhmā mē hipêx to ho pa nhūm rĩ kormā Kris akupỳn mē pahwỳr wrỳ. Anē.

Na pre hkukamā ā harēnh anē ka mē harēnh ma. Tā ra mē kēp Kris ā amnhĩ to hêx xwỳnhjaja ohtō nē mra nē kām hkurê xwỳnh maatita kukamā tanhmā amnhĩ nhĩpêx to pē mē kām amnhĩ to hêx o pa. Jakamā na pa ixprĩ hā mē amā tanhmā mē harēnh to. Koja tokyx kēp Kris ā amnhĩ to hêx xwỳnh maatita nhỹhỹnh mē pahwỳr kato. ¹⁹ Na pre hkwỳjaja mē pahpê Kris kwỳjê hkôt ri pa htā mē pahkĩnhā kēp Kris kwỳ hkêt. Kēp hkwỳ ronhỹx arĩ mē pahkôt Kris kôt amnhĩ nhĩpêx o pa. Nom axtem nē āhpumunh tỳx pyrā nē mē pahkaga nē htỳx tanhmā amnhĩ tomnuj to ho pa. Jao kēp Jejus kwỳ hkêt ā amnhĩ to amnhĩrīt.

²⁰ No kêt mē pahpê Tirtūm krajaja na pre Jejus mē pahwỳr Karō rē nhūm mē pahkarō mā agjê nē mē pahkrām kapêr mex jagjê. Jakamā na pu mē mē kēp Kris kwỳ hkêt xwỳnhjê rom Tirtūm kapêr mar mex nē.

²¹ Xà mē ate Tirtūm kapêr ā kaga pumunh kêt kôt na pa ā mē amā

ixkapêr nē hā kaga anē? Nà ra mē ate omunh nē mar mex kēnā. Tā mē ate mē kot tanhmā Jejus o hêx to xwỳnhjê pumunh mex nē mē harēnh mar mex kaxyw na pa ā mē awỳr kaga nhĩpêx nē mēnh anē. Kêr kē mē mēmo arĩgro hā mē awỳr agjê nē tanhmā mē amā Jejus o hêx to ka mē aprĩ hā mē omunh mex kurê kumrêx. ²² Tanhmā na htem Jejus o hêx to? E kot paj ixprĩ hā mē amā tanhmā mē harēnh to ka mē inhma. Nà koja mēhō mē amā tanhmā harēnh to nē harēnh o:

—Nà Jejus kēp Tirtūm Kra hkêt. Tirtūm kot mē pahwỳr mēnh kêt tā ka htem atỳx kapêr kôt ri amnhĩ nhĩpêx o ri apa. Kwa kêt mē ixkapêr kôt mām ri amnhĩ nhĩpêx o ri apa.

Anhỹr o mē amā kapêr ka mē ama nē kām Kris mē Tirtūm wa hkĩnh kêt xwỳnh ā omunh kurê kumrêx. ²³ Koja mēhō Tirtūm Kra Jejus kaga nē määnēn Hipêêxà kaga. No koja mēhō Tirtūm Kra hkôt amnhĩ xām nē määnēn Hipêêxà hkôt amnhĩ xām.

Mē pahte Kris kaga pymaj tanhmā amnhĩ nhĩpêx to hā mē pamā karō

²⁴ Annepê mē ate Jejus kôt amnhĩ xunhwỳrta ā na ka prem kēp Tirtūm Kra hā Tirtūm kot mē pahwỳr mēnh xwỳnh ā harēnh ma. Tā kēr ka mē arĩ amnhĩ kaxyw hkôt ajamaxpêr nē hkôt pix mā amnhĩ nhĩpêx o ri apa. Kot kaj mē anē nē Mēpanhĩpêêxà Maati mē Kra wa hkôt amnhĩ nhĩpêx mex o apa rāhā ty. ²⁵ Hāmri nē wa kuri atĩr tūm nē amex kumrêx nē apa ho apa. Ra Jejus kot ja jarēnh xà hkôt.

²⁶ Na pa ā mē amā ixkapêr nē hā kaga anē. Mē aprĩ hā mē amā Jejus o hêx xwỳnhjê kapêr mar nē mē kot mē amā hêx kôt mē omunh mex kaxyw. ²⁷ Tirtūm Karō na pre mē akarō mā gjêx pa nē mē amā Tirtūm kapêr piitā o amnhĩrīt mex o mē akôt pa. Jakamā mēmo

kaxyw kot kaj mẽ Tĩrtũm kapēr o hêx xwỹnhjaja kot tanhmā harēnh toja ma? Ra Tĩrtũm Karō kot mẽ amā ho amnhĩrĩt o mẽ ajahkre mex o pa kēnā kot ka kêt mẽ nhām mẽ kapēr ma. Na hte Tĩrtũm Karōja mẽ urā mẽ Tĩrtũm kapēr ho hêx kêt mẽ. Ām katāt kôt kot ho amnhĩrĩt mex jakamā kwa kēr ka mẽ mar tỳx mẽ hkôt ri amnhĩ nhĩpêx mex rāhā ho ri apa.

Mẽ pahte tām ri amnhĩ nhĩpêx ā mẽ pamā karō

Juāw 14.25-26, 15.1-8

²⁸ E Jejus kôt ixkrajaja. Kēr ka mẽ arĩ Kris kôt amnhĩ nhĩpêx mex rāhā ho ri apa. Kê nhỹrmā akupỹn mẽ pahwỳr wrỳk o tē ka mẽ amnhĩ wỳr omu mẽ akĩnh nē. Nē akĩnh kām axāmnhĩx kutā mra mẽ hkaxpa mẽ amnhĩ kamā amā uma hkêt mẽ. Rỳ mẽmoj tām amnhĩ tām apijaam kêt mẽ. Ām axāmnhĩx akĩnh mẽ ma kutā mra. ²⁹ Krisja mex o mex jakamā na pu htem urāk mẽ amnhĩ to mex o ri papa. Mẽ pahte amnhĩ to mex o papa xwỹnhjaja urāk mẽ mẽ pahpê Tĩrtũm kra na pu mẽ.

3

Tĩrtũm krajê hkukamā tanhmā mẽ harēnh to

Rōmān 8.18; Sikũn Korĩt 3.18; Sikũn Pētre 3.11-14

¹ Nē Mēpanhĩpēxā Maati kām mẽ pajapê htỳx kumrêx jakamā na pre mẽ pahte hkôt amnhĩ xunhwỳr ā mẽ pahpumunh kôt mẽ pahpê hkra hā mẽ pajarē pu mẽ pahpê hkra mẽ ri papa. Ja na mẽ pamā mex o mex. Nom mẽ kot hkôt amnhĩ xunhwỳr kêt xwỹnhjaja kot hprĩ hā ja hā mẽ pahpumunh kêt jakamā na htem mẽ pahte tām amnhĩ nhĩpêx ā mẽ pahpumu mẽ tee ri hamaxpēr.

² E Kris kôt ixkwỳjaja. Ra mẽ pahpê Tĩrtũm kra htā kormā mẽ pahte amnhĩ kukamā mẽ pahprĩ hā ja hā amnhĩ pumunh mex kêt. Kojā nhỹrmā Jejus akupỹn

mẽ pahwỳr wrỳ pu mẽ pano ho tanhmā kute hā omunh mex mẽ. Hāmri mẽ tām te kot amnhĩ nhĩpêx pyrāk o amnhĩ nhĩpêx mex o papa. Ra mẽ pahte ja mar mex. ³ Ā mẽ pahte amnhĩ kukamā pajamaxpēr anhỳr o papa xwỹnhjaja na pu htem kormā amnhĩ wỳr Jejus kamā pajamak o papa. Pê urāk mẽ mẽmoj punuj mẽ pajamaxpēr kêt o papa. Nē urāk mẽ tanhmā amnhĩ tomnuj to hkêt mẽ.

Tĩrtũm krajaja kot amnhĩ tomnuj o pa hkêt ā mẽ kām karō

⁴ Nē mẽ kot amnhĩ tomnuj o mẽ pa xwỹnhjaja na htem Tĩrtũm kapēr kwỳm ri amnhĩ nhĩpêx o pa. Tām kot puj mẽ tanhmā amnhĩ tomnuj to hāmri mẽ mẽ urāk mẽ kapēr kwỳm ri amnhĩ nhĩpêx. ⁵ No Jejus na pre mẽ pahte amnhĩ tomnuj pānhā amnhĩrer kaxyw mẽ pahwỳr wrỳ. Aa kot amnhĩ tomnuj kêt jakamā tapxipix kot mẽ pahpānhā amnhĩrer mām. Ra mẽ pahte ja jarēnh mar mex. ⁶ Jakamā mẽ pahpê hkwỳjaja na pu htem ri pahtỳx tanhmā amnhĩ tomnuj to ho papa hkêt mẽ. Ā mẽ kot amnhĩ nhĩpêx anhỳr xwỹnhjaja kēp hkwy hêt. ⁷ Nom koja mẽhō Kris pyrā mẽ tām amnhĩ nhĩpêx o pa hāmri mẽ kēp Tĩrtũm kraa. Jakamā kwa koja mẽhō Tĩrtũm kapēr kwỳm ri tanhmā mẽ amā kapēr to ka mẽ ama mẽ ām ama. ⁸ Mẽ kot amnhĩ tomnuj o mẽ pa xwỹnhjaja na htem Satanasti hkôt ā amnhĩ nhĩpêx anhỳr o pa. Satanastija Tĩrtũm kot mẽmoj to kator krax rũm nhũm ā kot amnhĩ tomnuj anhỳr o pa xwỹnh na. Tām ā kot amnhĩ nhĩpêx anhỳr o paja o hapêx par kaxyw na pre Tĩrtũm Kra Jejusja amnē pika hwỳr wrỳ.

⁹ Nom mẽ papajaja mẽ pahpê Tĩrtũm kra na pu mẽ. Na pre mẽ pahwỳr amnhĩ Karō rē nhũm mẽ pahkarō mām gjêx pa mẽ mẽ pahkôt pa ho pa. Jakamā tanhmā kot

puj wem amnhī to nē Satanasti pyrā nē pahtýx ri amnhī tomnuj o papa? Nā kot puj mē ā amnhī nhīpēx anhýr kēt nē. ¹⁰ Koja mēhō tām amnhī nhīpēx kēt nē hāmri nē määnēn hkwyjē kamā ukapří hkēt nē. Hāmri nē ā amnhī nhīpēx anhýr o kēp Tirtūm kra hkēt ā amnhī to amnhīrit. Ām kēp Satanasti hkra hā amnhī to amnhīrit kurē kumrēx.

Mē pamā axpēn kīnh o te Jejus kām mē pahkīnh pyrāk ā mē pamā karō

Matēwre 22.39; Rukre 10.25-37; Juāw 13.31-35

¹¹ Nē kēr ka mē arī amā axpēn kīnh pē tām axpēn nhīpēx o ri apa rāhā nē. Te amnepē mā mē ate Jejus kōt amnhī xunhwýr ā arīgrota ā mē kot mē amā ja hā karō pyrā nē. ¹² No mē ri finat Kaī kot amnhī nhīpēx pyrāk o amnhī nhīpēx kēt nē. Kēp Satanasti hkra jakamā na pre htōja pī. Kurom kot tām amnhī nhīpēx ā omu nē kamā gryk nē kupī. ¹³ Tā koja mē kēp Tirtūm kra hkēt xwýnhjaja Kaī pyrā nē kēp mē aprām nōkati nom kēr ka mē amnhī tā mē omu nē tee ri amnhī kukamā ajamaxpēr kēt nē. ¹⁴ Kormā mē pahte Jejus kōt amnhī xunhwýr kēt ri na pu prem mē urāk nē amnhī tomnuj o papa. Jao mē pahpē kuwy hwýr papa mā xwýnh. Tā mē pahte Jejus kōt amnhī xunhwýr jakamā ra pahpē Tirtūm mē Kra wa kuri pahtír tūm nē papa mā xwýnh. Jakamā na pu htem mē kēp hkra hkēt xwýnhjē kurom pamā mē piitā mē hkīnh o tanhmā mē ho mex to ho papa. Mē kām amnhī kwýjē hkīnh kēt xwýnhjaja arī mē kēp kuwy hwýr mē pa mā xwýnh na mē. Ra mē pahte ja jarēnh mar mex. ¹⁵ Mē kām mē hpar prām o mē pa xwýnhjaja koja nhýrmā Tirtūm mē Kra wa kuri htír tūm nē pa ho pa hkēt nē. Ra mē pahte määnēn ja mar mex. Jakamā kwa mē amā akwýjē hprām nōkati ho ri mē apa xwýnhjaja. Tirtūm noo mā te ra mē

ate mē hpar pyrāk jakamā kot kaj mē arī ā amnhī nhīpēx anhýr o ri apa hāmri nē nhýrmā Tirtūm nhō krī hwýr axàpir kēt nē.

¹⁶⁻¹⁸ E ixkwýjaja. Kwa kēr pu mē pajakwa pix o pamā axpēn kīnh ā amnhī jarēnh kēt nē. Määnēn axpēn kutā panojarēt o ri papa. Nē tanhmā axpēn to mex to. Tanhmā na pre Jejus kām mē pajapē hā amnhī nhīpēx to? Nā na pre kām mē pamex prām xāj mē panē ty. Kām amnhī tā ma hkēt kām mē pakamā ukapří xāj mē panē ty. Tā kēr pu mē urāk nē pahkwýjē kamā paxukapří ho mē kutā panojarēt rāhā ho papa. Jao mē paxàpkur xā hā panhō pumu nē nhýri pahkwýjē hō pumu nhūm kēp amrakati. Pu mē tee ri ja hā omu hāmri nē kām mē panhōta kwý gō. Kot pu mē ā amnhī nhīpēx anhýr kēt nē hāmri nē pamā Tirtūm kīnh ā amnhī jarēnh kapry. ¹⁹ Nē kot puj mē ā axpēn to mex o papa anē nē ra pahte Tirtūm kōt amnhī nhīpēx mex ā amnhī to amnhīrit. Hāmri nē ra paxàmnhīx kām tanhmā amnhī jarēnh to ho papa. Amnhī kamā pamā uma hkēt nē paxàmnhīx pajamakētkati nē kām tanhmā amnhī jarēnh to.

Mē paxàmnhīx amnhī to Tirtūm wýr ā mē pamā karō

²⁰ Nē kot puj mē mēmo arīgro hā tanhmā amnhī tomnuj to hāmri nē tee ri ja hā amnhī pumu nē amnhī kamā pagryk nē. Na hte Tirtūm tanhmā mē pahte amnhī tomnuj to hā mē pahpumu nom arī kām mē pajapēē. Mē parom àhpumunh o àhpumunh jakamā kot mē pahte amnhī tomnuj prām kēt ā mē pahpumunh mex. ²¹ Jakamā puj mē ā kām pajamaxpēr anē nē amnhī kamā pamā uma hkēt kām paxàmnhīx tanhmā ri amnhī to hwýr to ho ri papa. ²² Kot puj mē hkōt amnhī nhīpēx o papa rāhā nē mēmoj tā kuwý. Nē kām

hprām xà hkôt amnhĩ nhĩpêx o papa hã amnhĩ pumunh kôt mẽmoj tâ kuwỳ. Hãmri nhũm mẽ pama nẽ tanhmã mẽ panã mẽmoj to rỳ mẽ panã mẽmoj gõ.

Te ixkre pixi kamã mẽ pahtipxi pyrāk ã mẽ panã karõ

²³ Nẽ tanhmã mẽ pahte amnhĩ nhĩpêx to ho papa hã na hte Tĩrtũm mẽ panã karõ? Nã mẽ pahte amnhĩ kaxyw Kra Jejus Kris kôt pajamaxpêr nẽ hkôt amnhĩ nhĩpêx o papa hã na hte mẽ panã karõ. Nẽ kapêr xà hkôt panã axpên kĩnh o mẽmoj to axpên kutã panojarêt o papa hã na hte mẽ panã karõ. Na hte ã mẽ pahte amnhĩ nhĩpêx anhỹr ã mẽ panã karõ anẽ. ²⁴ Jakamã kot puj mẽ kapêr xà hkôt axpên nhĩpêx o papa nẽ te ixkre tipxi kamã mẽ pahte axpên kôt Tĩrtũm kôt ri papa pyrāk. Ra kot mẽ pahwỳr Karõ rênh nhũm kot mẽ pahkarõ mã gjêx jakamã na hte mẽ pahkôt pa ho pa hã amnhĩ to amnhĩrit.

4

Mẽ kot Kris kapêr jarênh ã amnhĩ to hêx xwỳnhjê jarênh

Wam Korõt 12.1-3; Wam Juāw 2.18-26; Sikũn Juāw 7-11

¹⁻³ Nẽ koja mẽhõ Tĩrtũm kapêr o mẽ ajahkre kaxyw mẽ amã tanhmã Jejus Kris jarênh to nẽ ãm hãmri harẽ nẽ harênh o:

—Na pre Tĩrtũm Kra Jejus mẽ pahwỳr wrỳ nẽ í ho í ho mẽ pakamã kato. Tĩrtũm tãm na pre mẽ pahwỳr kumê nhũm wrỳ.

Anhỹr o mẽ amã harẽ ka mẽ ama nẽ kapêr kôt ajamaxpêr kurê kumrêx. ãm hãmri na hte Tĩrtũm Karõ nhỹ ã harênh anẽ. No koja Jejus kêp Tĩrtũm Kra hkêt ã harẽ ka mẽ ama nẽ ãm ama nẽ hkôt ajamaxpêr kêt nẽ. Kãm Kris kurê xwỳnh maati nhỹ hã kapêr xwỳnhjaja na hte ã harênh anhỹr o pa. Na ka pre ra kãm Kris kurê xwỳnh maati tokyx hpôx ã

harênh ma. Tã na ra ý hã kapêr xwỳnhjaja ohtõ nẽ pika piitã hkôt mẽ hkôt pa nẽ te Tĩrtũm Karõ nhỹ hã mẽ kãm kapêr pyrāk o amnhĩ nhĩpêx o pa. Nom ãm amnhĩ to hêx o pa. Jakamã e kwa ixkwỳjaja. Koja mẽhõ mẽ awỳr mra nẽ tanhmã mẽ amã Tĩrtũm kapêr jarênh to ka mẽ aprĩ hã ama nẽ rĩ kormã kêp Tĩrtũm nhỹ hã kapêr jarênh xwỳnh ã harẽ rỳ kot amnhĩ to hêx xwỳnh ã harẽ.

⁴ Kêt mẽ papajaja jajê rom mẽ pahpê Tĩrtũm kra na pu mẽ. Nẽ Tĩrtũm Karõ kot ra mẽ pahkarõ mã gjêx xwỳnhhta hihtỳx o jajê piitã mẽ hakrenh. Jakamã na pu htem ý hã mẽ kutã amnhĩ to htỳx o papa nhũm mẽ tee ri tanhmã mẽ panã Jejus o hêx to kaprỳ. Pu mẽ kuma nẽ ãm mẽ kuma. ⁵ Mẽ kêp Tĩrtũm kra hkêt jakamã na htem hkôt amnhĩ nhĩpêx kêt nẽ. Mẽ kot amnhĩ nhĩpêxja axtem na. Jakamã na htem Tĩrtũm kapêr kwỳm ri tanhmã hkra hkêt xwỳnhjê mã kapêr to ho pa nhũm mẽ kuma nẽ kãm mẽ mar prãm nẽ. ⁶ Nom mẽ ixte Tĩrtũm kapêr o mẽ ajahkre xwỳnhjaja na pa htem mẽ kurom Tĩrtũm nhỹ hã ixkatat kôt ãm hãmri mẽ amã kapêr jarênh o ri ixpa. Jakamã ka mẽ apê hkra hã mẽ amã mẽ inhmar prãm nẽ. No mẽ kêp hkra hkêt xwỳnhjaja kãm mẽ inhmar prãm kêt.

Na pu htem pahprĩ hã mẽ kapêr ã mẽ kuma nẽ rĩ kormã tanhmã mẽ harênh to. Tĩrtũm nhỹ hã kapêr ã mẽ harẽ rỳ kãm hkurê xwỳnh maati nhỹ hã kapêr ã mẽ harẽ.

Tĩrtũm kãm mẽ pajapê hã tanhmã amnhĩ nhĩpêx to hã harênh

Juāw 3.16-21; Rõmãn 5.5-9, 8.35-37

⁷ E ixkwỳjaja. Na hte Tĩrtũm tanhmã mẽ pahpê hkrajê ho pu mẽ panã axpên kĩnh nẽ. Jakamã kêr pu mẽ ã axpên nhĩpêx anhỹr jao axpên to mex pix nẽ. ã Tĩrtũm kot mẽ panhĩpêx anhỹr jakamã kêr pu

mē pahpê hkrajaja ŷ hã ã axpēn nhīpêx anhÿr o ri papa.

⁸ Koja mēhō Tirtūm kīnhã kām mē hkwyjê hkīnh kêt hāmri nē mē kamã ukapri hkêt o pa. Hāmri nē kēp Tirtūm kra hkêt ã amnhī to amnhīrit mex nē.

⁹⁻¹⁰ Tirtūm kām mē pajapê htÿx kumrêx. Kormã mē pamã hkīnh kêt ri nhūm kumrêx amnhī rom kām mē pajapê ho pa. Nē kām mē pajapê xaj mē pahwÿr Kra pyxita mē. Mē pahte amnhī tomnuj pānhã kot mē panê htyk kaxyw. Mē pahte kukwak ri amnhī nhīpêx nyw o amnhī nhīpêx nē nhÿrmã wa kuri pahtir tūm nē pamex nē papa ho papa kaxyw. Å na pre Tirtūm mē pahwÿr Kra mēnh anhÿr o kām mē pajapê hã amnhī to amnhīrit.

¹¹ E ixkwÿjaja. Tirtūm kām mē pajapê htÿx jakamã kwa kēr pu mē urak nē pamã axpēn kīnh o papa. Nē axpēn kamã paxukapri nē. ¹² Aa mē pahtō pahte pano ho Tirtūm pumunh kêt tā na hte mē pakamã pa ho pa. Pu mē kām mē pajapêta pyrà nē ŷ hã pamã axpēn kīnh o papa. ¹³ Na pre mē pahwÿr Karō rē nhūm mē pahkarō mã agjê pu mē ŷ hã kot amnhī nhīpêx o amnhī nhīpêx o papa.

¹⁴ Nē mē ixpê Jejus nhÿ hã mē ajahkre xwÿnhjaja. Mē ixte kot amnhī nhīpêx nē kot mēmoj tanhmã ho hã omunh o ri hkôt ixpa jakamã na pa htem ma mē piitã mē kām harēnh o ri mē hkôt ixpa. Nē mē kām harēnh o:

—Tirtūm na pre mē pahwÿr Kraja mē. Kot mē pahpiitã mē panê htyk kaxyw mē pahwÿr kumê. Anê.

¹⁵ Mē kot Jejus kēp Tirtūm Kra hã harēnh o pa xwÿnhjaja na hte Tirtūm mē kamã pa ho pa nhūm htem ŷ hã ã Kra jarēnh anhÿr o pa.

¹⁶ Na pu mē ra pahpri hã Tirtūm kām mē pajapê hã amnhī tā omu. Kām mē pajapê htÿx kumrêx ã amnhī tā omu. Jakamã kot puj

mē urak nē ŷ hã pamã mē piitã mē hkīnh o papa. Tirtūm mē mē pahtixi nē ri papa kēnã.

Mē kām axpēn kīnh xwÿnhjaja kām Tirtūm puma hkêt ã mē harēnh

¹⁷ Nē kot puj mē pamã axpēn kīnh o papa nē määnēn Kris kôt amnhī nhīpêx ho papa. Hāmri nhūm nhÿrmã Tirtūm kot Kra mē wa kuri mē htir tūm nē mē pa ho mē pa mã xwÿnhjê nhixi jarēnh kaxyw pu mē tee ri amnhī kukamã pajamexpēr kêt nē. Ra amnhī nhixi jarēnh ma nē pahkīnh nē.

¹⁸ Nē koja mēhō kām hkwyjê hkīnh kêt nē tanhmã hō homnuj to. Hāmri nē kot amnhī tā tanhmã ho pymaj kām uma ho hwÿr mrar kêt nē. No koja kām hkwyjê hkīnh nē tanhmã mē ho mex to ho pa nē kām mē uma hkêt nē. ¹⁹ Tirtūm kumrêx na pre kām mē pajapê nē mē pakukamã tanhmã mē pahto mex to. Tā pu mē ra amnhī pyrà nē pamã hkīnh o papa. Nē pamã mē piitã mē hkīnh o papa.

²⁰ Nē koja mēhō kām Tirtūm kīnh ã amnhī jarēnh tā kām hkwyjê hō hprām nōkati hāmri nē ra kām Tirtūm prām kêt ã amnhī to amnhīrit. Kot kaj mē ano ho akwyjê pumunh o apa xwÿnhhta amã hkīnh kēê tā tanhmã kot ka we amnhī to nē ate ano ho Tirtūm pumunh kēêta amã hkīnh ã amnhī jarê? Nã ka ã amnhī jarēnh anhÿr o amnhī to axêx. ²¹ Na pre Tirtūm mē pamã kapēr o amnhīrit o:

Kot kaj mē amã ixkīnh hã kot kaj mē määnēn amã akwyjê hkīnh o mē ho mex o ri apa. Anê.

5

Tirtūm nhÿ hã mē pamã axpēn kīnh ã mē pamã karō

¹ Nē Tirtūm kot mē pahwÿr Jejus mēnh ã harēnhja. Koja mēhō kuma nē amnhī kaxyw hkôt hamaxpēr nē Jejus kôt amnhī xãm hã koja Tirtūm ja hã omu nē ho hkra.

Nē koja mėhō kām Tirtūm kīnh hā koja määnēn kām hkwýjê hkīnh o pa. ² Ja pyrà nē kot puj mẽ pamā Tirtūm kīnh nē kapēr kôt amnhī nhīpêx. Hāmri nē määnēn pamā krajê piitā mẽ hkīnh ho papa.

³ Nē kot puj mẽ pamā Tirtūm kīnh nē nhūm kapērja mẽ pahpê hihtýx kêt nē. Pu mẽ pamā Tirtūm kīnh ā kapēr kôt amnhī nhīpêx mex o ri papa.

⁴⁻⁵ Na pu prem amnhī kaxyw Tirtūm Kra Jejus kôt pajamaxpēr nē hkôt amnhī xunhwý nhūm Tirtūm ja hā mẽ pahpumu nē mẽ pahto hkra pu mẽ ý hā amnhī nhīpêx nyw o amnhī nhīpêx o papa. No ri tanhmā amnhī tomnuj to ho ri papa hkêt nē.

Měmoj axkrunêpxi nē kot Jejus kêp Tirtūm Kra hā ho amnhīrīt Juāw 1.32-34, 3.36, 5.31, 15.26

⁶ Nē Jejus pix na pre Tirtūm mẽ pakaxyw ām nhūm kêp Kra hā mẽ pahwýr wrý. Hāmri nhūm Juāw Paxisja pyhti kamā hkrā kumrā. Kêp Tirtūm Kra hā hkrā kumrā. Tā nhūm Tirtūm kapēr kôt ma tanhmā amnhī nhīpêx to ho pa. Nē ri hkwýjê mā kapēr jarēnh o ri mẽ hkôt pa. Tā nhūm mẽ kupī nhūm kêp Tirtūm Kra hā pī kahpa hā ajêt nē ty nē hkamrô axkapī. Ā mẽ panê amnhī nhīpêx anē nhūm Tirtūm Karōja kêp Kra hā mẽ pamā ho amnhīrīt. Ām hāmri na hte ā tanhmā mẽmoj to amnhīrīt to anē. Měmoj to hêx kêt jakamā na pre Jejus kêp Tirtūm Kra hā mẽ pamā ho amnhīrīt.

⁷ Nē kêp Tirtūm Kra hā mẽ pamā mẽmoj to axkrunêpxi nē ho amnhīrīt. ⁸ Tirtūm Karō na pre kêp Kra hā mẽ pamā ho amnhīrīt pu prem kêp Kra hā omu. Nē Juāw Paxis kot hkrā kumrārta ā pu mẽ määnēn kêp Tirtūm Kra hā kot ho amnhīrītja ā omu. Nē määnēn kêp Tirtūm Kra hā pī kahpa hā jêt nē htyk nē hkamrô pikapīrta ā mẽ

pamā ho amnhīrīt pu mẽ kêp Kra hā omu. E mẽ pamā mẽmoj to axkrunêpxi nē Jejus kêp Tirtūm Kra hā kot ho amnhīrīt xwýnh na jajaja.

⁹ Nē na pu htem jar pahkwýjaja kot axpēn mar xà hā íxkre kamā mẽ kapēr ma nē mẽ hkôt pajamaxpēr. Tā koja Tirtūm tanhmā mẽ pamā mẽmoj to amnhīrīt to pu mẽ hkôt pajamaxpēr kurê kumrêx. Kêp Tirtūm kēnā kot pu kêt mẽ kapēr prā nē hkôt pajamaxpēr kêt. Tām na pre mẽ pamā Jejus kêp Kra hā ā ho amnhīrīt anē. ¹⁰ Jakamā mẽ pahte Tirtūm Kra hkôt amnhī xunhwýr xwýnhjaja na pu prem Jejus kêp Kra hā harēnh ma nē hkôt pajamaxpēr kurê kumrêx. No mẽ kêp hkra hkêt xwýnhjaja na htem Tirtūm kot kêp Kra hā harēnh ma nē ām kuma nē amnhī kaxyw hkôt hamaxpēr kêt nē. Jao te Tirtūm kêp Hipéêxà hā amnhī to hêx pyràk ā harē.

¹¹ E kot paj ixprī hā mẽ amā tanhmā ja jarēnh to ka mẽ inhma. Nā na pre Tirtūm Krata mẽ pahpiitā panê ty. Jakamā kot puj mẽ pahte hkôt amnhī xunhwýr xwýnhjaja nhýrmā ty nhūm Tirtūm akupým mẽ pahto mẽ pahtír. Pu mẽ wa kuri pamex nē pahtír tūm nē papa ho papa. ¹² Mě pahpê Jejus kwýjaja kot puj mẽ ā pahtír tūm nē papa anē. No mẽ kêp hkwý hkêt xwýnhjaja koja mẽ nhýrmā ty nē mẽ pahpyrà nē wa hwýr àpir kêt nē.

¹³ Na ka prem ixpyrà nē amnhī kaxyw Tirtūm Kra hkôt ajamaxpēr nē hkôt amnhī xunhwý. Tā pa ā mẽ amā kagàja nhīpêx anē. Mě ate kamā harēnh nē mẽ pahte nhýrmā Tirtūm mẽ Kra wa hwýr mẽ paxàpir ā mẽ pajarēnhja mar nē amnhī kaxyw hkôt ajamaxpēr o ri apa kaxyw nē kapēr prār o ri apa hkêt nē.

Mě pahte paxàmnhīx mẽmoj tā Tirtūm wýr ā mẽ pajarēnh Juāw 14.13-14

¹⁴ Nē mē pahpê Tirtūm krajaja na pu htem paxāmnhīx pajamakêtkati nē mēmoj tā tanhmā hwÿr to ho papa. Kot puj mē kām hprām xà hkôt mēmoj tā kuwÿ nhūm mē pama. ¹⁵ Na pu htem mēmoj tā kuwÿ nhūm mē pamar mex nē mē pahte mēmoj tā hwÿr xà hkôt tanhmā mē pamā mēmoj nhōr to rÿ tanhmā mēmoj to. Ra mē pahte ja mar mex.

Tirtūm kot tanhmā hkra hkêt xwÿnhjê nhīpêx to hā harêh

Rukre 22.31-32

¹⁶⁻¹⁷ Nē koja Kris kôt mē anhīō tanhmā amnhī tomnuj to ka mē atō tee ri ja hā omu nē ho Tirtūm wÿ. Ho awÿ kê nē tanhmā kot amnhī tomnuj tota o hapêx nē ja nē ho htÿx kê axte ā amnhī nhīpêx anhÿr kêt nē. Kot puj mē pahtō tanhmā amnhī tomnuj to nhūm Tirtūm tee ri ja hā mē pahpumu nhūm ja kêp omnuj nē. Tā kot puj mē amnhī tomnujta kaga nhūm ja hā mē pahpumunh kôt tanhmā hā mē pahto hkêt nē. Ām mē kot amnhī nhīpêx pixi koja ho hamakêtkati hkêt nē. Kojā mēhō Tirtūm kaga ho hkaga nē aa hkôt amnhī xām kêt nē. Hāmri nhūm tee ri amnhī tā omu nhūm ja kêp omnuj tÿx kumrêx. Jakamā koja aa ho hkra hkêt nē. Nē aa kot hkaga ho hamakêtkati hkêt nē pa ho pa. Jakamā koja hkaga xwÿnhnta nhÿrmā ty nē kuri htīr tūm nē pa ho pa hkêt nē.

¹⁸ Nē mē pahpê Tirtūm krajaja na pu htem amnhī tomnuj o papa hkêt nē. Tirtūm Kra Jejus kot ja pymaj mē panê Satanasti pumunh mex jakamā nhūm tee ri mē pahte tanhmā amnhī tomnuj to hprām xà mē pano kupyrr kaprÿ ho ri pa. Ra mē pahte ja mar mex. ¹⁹ Mē pahpê Tirtūm kra na pu mē. No mē kêp hkra hkêt xwÿnhjaja Satanasti kot amnhī tā mē ho htÿx pyrāk o mē hipêx jakamā nhūm htem tanhmā amnhī tomnuj to ho pa. Mē pahte ja mar mex.

²⁰ Nē määnēn ja mē pahte mar mex. Na pre Tirtūm Kra mē pahwÿr wrÿ nē mē pamā tanhmā Tirtūm o amnhīrīt to ho pa. Tapxipix kêp Mēpahpām ā mē pamā ho amnhīrīt. Tā Jejus kukwak ri mē pahpê Tirtūm kra jakamā kot puj mē nhÿrmā wa kuri pahtīr tūm nē pa mex nē papa ho papa.

²¹ E Kris kôt ixkwÿjaja. Kêr ka mē Tirtūm kapêr kôt pix mā mān ri amnhī nhīpêx o ri apa rāhā nē. No nhām mē kot Tirtūm kapêr kwÿm ri mē amā kapêr o hêx xwÿnhjê kapêr ma nē ām mē ama nē mē hkôt amnhī nhīpêx hkêt nē.

Tā ām ja pix. Ixpê Juāw na pa krī piitā hkôt mē amā kaga nhīpêx nē kurê.

Sikūn Juāw
Juāw kot Jejus kôt
hkwýjê hwýr wam kagà
ně mēnh kôt hō mēnh

Juāw na pre kagàja nhīpēx. Je-
 jus nhý hā hkrájê jahkre ho ri pa
 xwýnhjê hō na pre. Jakamā na
 pre hkrī hō kamā Kris kôt htōx mē
 ō fāmii mā kagàja nhīpēx ně mē
 hwýr kumē. Na pre hte Tirtūm
 kapēr o mē hēx o pa xwýnhjê hō
 mē ō krī hwýr mra nhūm Juāw
 kràmnhwý nita omu ně htýx kot mē
 ahkre mex ā hkamnhīx. Hāmri ně
 kot Tirtūm kapēr o hkwýjê jahkre
 kaxyw amnhī nhōrkwý hwýr kuwý.
 Hāmri nhūm Juāw tee ri harēnh
 ma ně kām kagàja nhīpēx ně kamā
 kot amnhī wýr hwýr ně kām kapēr
 ně hprī hā kām tanhmā mē kot
 Tirtūm o hēx to ho pa hā tanhmā
 mē harēnh to. Kot kamā harēnh
 ně mē harēnh mar hāmri ně mē
 axkām hamak rom ně ri pa kaxyw.
 ā na pre Juāwja hkràmnhwý ni mē
 hkwýjê mā mēmoj jarēnh ně hā
 kagà ně mē hwýr mēnh anē. Ně mē
 kām:

¹ Pa Jejus kôt ixtōx. Xà mē amex?
 E ot pa mē amā kagà nhīpēx ně mē
 awýr kumē. Akrajaja ně apē mē
 hkatorxà mē mē ato ixpimràatā mē
 awýr kumē. Ixpē Juāw pigētre na
 pa. Inhmā mē akīnh nom papxipix
 inhmā mē akīnh kêt. Mē pahpyrà
 ně mē kot Tirtūm kôt amnhī xun-
 hwýr xwýnhjaja haxwýja kām mē
 akīnh. ² Mē pahte Tirtūm kapēr kôt
 ri amnhī nhīpēx rāhā ho ri papa
 jakamā na pu htem pamā axpēn
 kīnh o ri papa.

³ Na pa hte mē pahto
 Mēpanhīpēxà maati Tirtūm wýr o
 ixpa ně kām:

—Pa Tirtūm. Ot pa mē amnhī
 to awý. Akra Jejus Kris mē mē
 amnhī to war awý. Kêr ka wa mē
 ixkamā axukaprī ně mē ixkutā war

anojarêt rāhā ho ri apa. Ně tanhmā
 mē ixkrā hto pa mē ixàmnhīx ija-
 makêtkati ně ixkīnh ně mē inhmā
 axpēn kīnh ně axpēn to mex o ri
 axpēn kôt ixpa. Ně tām ri amnhī
 nhīpēx. Anē.

*Mē pamā axpēn kīnh kām axpēn
 to mex ā mē pamā karō*

*Juāw 13.34-35; Wam Juāw 2.7-9,
 3.14-18*

⁴ Ně na pa pre akra hkwýjê pumu
 nhūm mē inhmā amnhī jarē pa mē
 kuma ně mē ý hā ixkīnh ně. Na xep
 prem Tirtūm kôt amnhī xunhwý ně
 hkôt ri amnhī nhīpēx mex o pa.
 Mē kot Mēpanhīpēxà Maati Tirtūm
 kapēr ā kagà hkôt amnhī nhīpēx ā
 inhmā amnhī jarē pa mē kuma ně
 ixkīnh ně. ⁵⁻⁶ Jakamā na pa ā amā
 ixkapēr ně hā kagà anē. E kwa
 Kris kôt ixtōx. Kêr pu mē pamā
 axpēn kīnh o ri papa hā mēmoj to
 axpēn kutā panojarêt rāhā ho ri
 papa. ā ixujarēnh anhýrja nyw kêt.
 Amnepē mā mē ate Jejus kôt amnhī
 xunhwýr ā arīgrota ā na prem ā mē
 amā karō anē. Tā kêr pu mē arī
 pamā axpēn kīnh pê Tirtūm kapēr
 piitā hkôt amnhī nhīpēx mex o ri
 papa. Kapēr ā kagà kot ā mē pahte
 amnhī nhīpēx anhýr ā mē pamā
 karō.

*Tirtūm kapēr o mē hēx xwýnhjê
 jarēnh*

*Rōmān 16.17-18; Wam Ximotre
 5.22; Wam Juāw 2.18-26, 4.1*

⁷ Ně mē kot Tirtūm kapēr o hēx o
 ri mē pa xwýnhjaja na mē ra ma krī
 piitā hkôt mē kām tanhmā ho hēx
 to ho pa ně mē kām:

—Jesús kêp Tirtūm Kra hkêt ām
 mē panhīō na pre. Na pre Tirtūm
 mē pahwýr mēnh kêt ně. ām mē
 panhīō rūm na pre kato.

Anhýr o mē kām ho hēx o pa.
 Kām Kris kurē xwýnh maati ja nhý
 hā na htem ā ri ho hēx o pa anē.
⁸ Jakamā kwa mē amnhī ně mē
 omunh mex ně mē ama ně ām mē
 ama. Kot kaj mē kapēr ma ně mē

hkôt ajamexpēr hāmri nē mē ixte Tirtūm kapēr o mē ajahkreta kaga. Kwa mē arī mē ate amnhī nhīpêx nyw pix o mân amnhī nhīpêx rāhā o ri apa. Nē arī mē amā axpēn kīnh kām tanhmā axpēn to ajuta hto rāhā ho ri apa. Kêr kê Tirtūm ja hā mē apumu nē nhỹrmā mē ato mex nē. ⁹ Nom kot kaj mē nhām mē kapēr punujja kôt amnhī nhīpêx nē Kris kôt amnhī nhīpêx kêt nē nhūm Tirtūm mē akôt pa hkêt nē. Nom kot ka mē arī Kris kôt amnhī nhīpêx mex nē hāmri nhūm Tirtūm mē Kra Jejusja wa mē akôt ri pa ho pa rāhā nē. ¹⁰ Jakamā koja ā Tirtūm kapēr ā kagà kuhpa hā Jejus o hêx xwỹnhjaja mēmo arīgro hā mē anhō krī hwýr pōj ka mē omu nē amnhī nhōrkwy hwýr mē hwýr kêt nē. Nē tanhmā mē kām akapēr to hkêt nē. ām ri mē hkàx ā ri mra. ¹¹ No kot kaj mē ā mē hipêx anhỹr kêt nē mē hwýr mra nē mē mar o akuhē hāmri nē te mē ate mē hkôt amnhī nhīpêx o amnhī nhīpêx pyrāk. Ja pumaj kêr ka mē nhỹri mē omu nē mē htêp kêt kumrêx.

Kagà jatur xà

Hapuhā Juāw 13-15

¹² E Kris kôt ixtōx. Ixkapēr jatur xà na ja. Ixkapēr ā kagàja ām hakotre nom inhmā mē amā ixkapēr ry hprām. Jakamā kot paj mēmo arīgro hā ma mē awýr mō pu mē axpēn pumu nē pahkīnh nē. Pa rīkormā mē amā ixkapēr jatur xām kumē ka mē aprī hā inhma.

¹³ Nē ota jar Kris kôt atōx krajaja awýr hpēr mē.

E ixpê Juāw pigêtre na pa ā awýr kagàja nhīpêx nē mēnh anē.

Hapuhã Juãw Juãw kot Jejus kôt hkwýjê hwýr kagà nê mênh o axkrut kôt hõ mênh

Juãw na pre mãânên kagàja nhípêx. Jejus nhỹ hà hkrajê jahkre ho mẽ pa xwýnhjê hõ na pre. Tã hkràmnhwý Gajore mã kagàja nhípêx nê hwýr kumê. Na pre Jejus kwýjaja ma krĩ piitã hkôt mẽ kãm Jejus kapêr jarênh o ri mẽ hkôt pa. Jao Gajore nhõ krĩ hwýr pøj nhũm Gajore mẽ hpôx ã mẽ harênh ma nê amnhĩ nhõrkwý hwýr mẽ kuwý. Jakamã nhũm pre htem ma õ krĩ hwýr pa hãmri nê kuri pøj. Nhũm Juãw ã Gajore kot amnhĩ nhípêx anhýr ã harênh ma nê hkĩnh nê hwýr kagàja nhípêx nê kumê. Nê kamã kãm mẽhõ pê Xotre kot tanhmã amnhĩ tomnuj to ho pa hã harê. ã na pre Juãwja Gajore mã mẽmoj jarênh nê hà kagà nê hwýr mẽnh anê. Nê kãm:

¹ Pa ixkràmnhwý Gajore? Xà amex? E ot pa awýr kagàja nhípêx nê kumê. Apê ixkràmnhwý mex na ka. Inhmã akĩnh.

²⁻³ Na pre ra Kris kôt pahtõ hkwýjaja ixwýr pøj nê tanhmã inhmã ajarênh to. Na ka xep hte Tĩrtũm kôt amnhĩ nhípêx mex rãhã ho ri apa. Pa ajarênh ma nê anhỹ hà ixkĩnh nê. Nê ato Tĩrtũm wýr o ixpa. Kot ato mex nhũm amex nê ajamakêtkati nê apa ho apa kaxyw. Nê axã hkêt nê amex nê ri apa kaxyw.

⁴ Ixte Tĩrtũm kapêr o mẽ ajahkre o ri ixpa jakamã te mẽ apê ixkra pyrãk. Tã pa tanhmã ate mẽ pahkwýjê nhípêx to ho apa hã ajarênh ma nê ixkĩnh nê.

*Gajore kot tanhmã Jejus kôt
hkwýjê ho mex to hã harênh
Wam Korĩt 16.10-11*

⁵ E ixkràmnhwý. Na ka xep hte Jejus kôt pahtõjê ho mex o ri apa. Aa ate mẽ omunh kêt tã nhũm htem ma anhõ krĩ hwýr pa ka mẽ omu nê apê Jejus kôt mẽ htõ hà mẽ ho mex nê. ãm hãmri na ka hte ã mẽ hipêx anhýr o ri apa Gajore. ⁶ Na pre ra mẽ hkwýjaja akupýn ixwýr pøj nê mẽ ixpê Kris kwýjê mã amnhĩ tã ajarê. Amã mẽ hkĩnh nê ate tanhmã mẽ ho mex to hã ajarê. Nhũm prem nojarêt ka xep pre mẽ kãm pry hà mẽ apkur xã hã mẽmoj gõ nhũm mẽ inhmã ajarê. Na ãm hãmri na ka hte ã mẽ ho mex o apa anê. ã ate mẽ hipêx anhýr o apata ã na hte Tĩrtũm apumu nê hkĩnh nê. ⁷ Na htem krĩ piitã hkôt mẽ kãm Kris kot tanhmã mẽ panê amnhĩ nhípêx to hã harênh kaxyw ma mẽ hwýr pa. Nom mẽ apkur xã hprãm xàj mẽ kot Kris kôt amnhĩ xunhwýr kêt xwýnhjê hwýr pa hkêt nê. ⁸ Jakamã kwa kêr pu mẽ papajaja mẽ pahpê Jejus kôt mẽ htõ hà mẽ kãm mẽõ hkwý nhõr o papa. Kot puj mẽ ã mẽ ho ajuta anê nê te mẽ pajaxwýja mẽ ãhkõ hà ri mẽ kãm Kris jarênh o ri papa pyrãk.

*Xotre kãm Juãw kapêr mar prãm
kêt ã harênh*

Matêwre 20.25-28, 23.1-12

⁹ Nê ra ixte anhõ krĩ kamã mẽ apê Kris kwýjê mã kagà nê mẽnh nhũm mẽ ate kamã harênhnta. Na xep pre Xotreja kuma nê ãm kuma. Kêp mẽ akrãhtũm prãm xàj kãm ixkapêr mar prãm kêt nê. ¹⁰ Na xep hte tanhmã ixto hêx to ho pa. Nom papxipix ixto hêx kêt nê. Mãânên Kris kôt mẽ pahtõjaja nhỹhýnh krĩ hõ rũm mẽ awýr pan pøj nhũm xep tanhmã mẽ amã mẽ ho hêx to. Nê mẽ hpôx ã mẽ omu nom amnhĩ nhõrkwý hwýr mẽ hwýr kêt nê. Tã ka mẽ kurom amnhĩ nhõrkwý hwýr mẽ awý nhũm xep tee ri ja hã mẽ apumu nê mẽ akamã gryk nê mẽ hã mẽ amã akir nê Tĩrtũm mã amnhĩ jarênh xã hã ixkre nê mẽ ajano. Na xep hte ã amnhĩ nhípêx

anhÿr o pa. Jakamā kot paj nhÿrmā
ma mẽ awÿr mō hāmri nē mẽ apiitā
mē anoo mā hā kām akir. Tanhmā
kot mẽ ixto hêx to nē tanhmā kot
amnhī tomnuj to hā kām akir ka mẽ
apiitā hā inhma.

*Mē pahte mẽ kot amnhī tomnuj
xwÿnhjê hkôt amnhī nhÿpêx kêt ã mẽ
pamā karō*

Rukre 6.45; Rōmān 12.9

¹¹ E kwa ixkrāmnhwÿ. Kêr ka
ã Xotre kot amnhī tomnuj o pa
anhÿrja kôt amnhī nhÿpêx kêt nē.
Mē kot amnhī tomnuj o mẽ pa
xwÿnhjaja na htem Tirtūm kôt
amnhī nhÿpêx kêt nē. No kêt mẽ kot
amnhī to mex o ri mẽ pa xwÿnhjaja
na mẽ kêp Tirtūm kra jakamā kêr ka
mē ã mẽ kot amnhī nhÿpêx anhÿr
xwÿnhjê kôt pix mā amnhī nhÿpêx.

Temētre jarēnh

¹² Nē Temētre na hte tām ri amnhī
nhÿpêx nē âm hāmri Tirtūm kapêr
o mẽ ahkre mex nē nhūm mẽ pi-
itā axpēn mā mex ã harē. Pa hte
ijaxwÿja mẽ kām mex ã harēnh o ri
mē hkôt ixpa ka htem inhma. âm
hāmri na pa hte tanhmā harēnh to
ho ri ixpa.

Kagà jatur xà

Sikūn Juāw 12-13

¹³ E kagàja kamā na pa âm ja
pix jarē nē hā kagà nē awÿr kumē
Gajore. Na pa kormā harēnh jatur
xà mēnh kêt nē. ¹⁴ Nom kot paj
tokyx ma awÿr mō hāmri nē rī ko-
rmā amā hatur xàm kumē.

E kê Tirtūm akutā nojarêt rāhā ho
pa.

Nē ota jar Kris kôt akrāmnhwÿjaja
awÿr hpêr mẽ. Nē kêr ka atar Kris
kôt ixkrāmnhwÿjê mā ijarē.

Tā âm ja pix. Ixpê Juāw pigêtre
na pa ã awÿr kagà nhÿpêx nē mēnh
anē.

Jutre Jutre kot Jejus kôt hkwÿjê piitã hwÿr kagã nê mênh

Jutre na pre kagãja nhÿpêx. Xi-akre pyrà nê kêp Jejus tō na pre. Tã kagãja nhÿpêx nê krÿ piitã hkôt Jejus kôt hkwÿjê hwÿr kurê. Na pre mē hkwÿjaja kêp Jejus kwÿ hã amnhÿ jarênh tã axtem nê tanhmã amnhÿ tomnuj to ho pa. Jakamã nhÿm Jutre kagãja kamã Jejus kwÿjê mã hprÿ hã tanhmã mē harênh to nê mē kot mē hkôt amnhÿ nhÿpêx nê mē kãm kapêr kãm hihtÿx nê. Nê mē kãm:

¹ Pa Jejus kôt ixtō nê ixtōxjaja. Xà mē amex? E ot pa mē amã kagã nhÿpêx nê mē awÿr kurê. Tÿrtÿm kot ixpyrà nê amnhÿ kaxyw mē axunhwÿr xwÿnhjê hwÿr. Mēpanhÿpêêxã Maati Tÿrtÿm kãm mē pahpiitã mē pajapê jakamã na hte Kra Jejus Kris mē wa mē pahânopxar mex rãhã ho pa.

Ixpê Jutre na pa hte Jejus Kris mã tanhmã amnhÿ nhÿpêx to ho ri ixpa. Nê ixpê Xiakre htō na pa.

² Na pa hte mē ato Tÿrtÿm wÿr ho ixpa nê kãm:

—Pa Tÿrtÿm. Kwa mē kot Akra Jejus kôt amnhÿ xunhwÿr xwÿnhjê pumu nê amã mē hapê hã mē kamã axukaprÿ rãhã ho apa. Kê mē kamã amnhÿ krit nê amnhÿx hamakêtkati nê ri tanhmã amnhÿ nhÿpêx to ho pa. Nê mē kãm axpên kÿnh o ri axpên kôt pa. Anê.

Mê kot Tÿrtÿm kapêr o hêx xwÿnhjê jarênh

Wam Ximotre 1.18-20, 6.12

³ E ixkrãmnhwÿjaja. Nã inhãmã mē akÿnh. Na pa pre jãã mē amã kagã hkwÿ nhÿpêx kaxyw. Mē pahte Jejus Kris kukwak ri amnhÿ nhÿpêx nyw ã tanhmã mē pajarênh to nê hã kagã kaxyw tã kormã harênh

kêt nê. Kot paj axtem mēmoj jarê. Na pre Tÿrtÿm mē pamã kot amnhÿ nhÿpêx o amnhÿrit pa. Nê kapêr o amnhÿrit pa. Mē pahte mar nê hkôt amnhÿ nhÿpêx kaxyw. Jakamã kêr pu mē kapêr mar tÿx nê amnhÿ krã hi kamã haxãr tÿx nê hã papa. Nom koja mēhō kapêr kuhpa hã tanhmã mē amã kapêr o hêx to ka mē ama nê amã.

⁴ Na xep ra kapêr o mē hêx xwÿnhjaja mē akôt pa nê mē apyrã nê Jejus kôt amnhÿ xunhwÿr ã amnhÿ jarê nom amnhÿ to hêx. Ka xep mē aprÿ hã mē hêx ã mē omunh kêt nê mē kêp Jejus kôt mē atō hã mē hkamnhÿx nê atÿx amnhÿ nhôrkwÿ hwÿr mē awÿ. Nom mē kot Tÿrtÿm kapêr o hêx pix kaxyw na htem mē akôt pa nê mē amã kapêr o:

—Tÿrtÿm kãm mē pajapê htÿx kumrêx nê mē pakutã nojarêt ho pa jakamã kwa kêr pu mē mãmrÿ nhãm mênijê ho amnhÿkati ho papa. Koja ja hã mē pahpumu nê tanhmã hã mē pahto hkêt nê. Kãm mē pajapê kênã kot kêt hã tanhmã mē pahto. No kêt Jejus Krisja mē ate kêp mē panhō Pahihti hã harê nom kêp mē panhō patrãw rÿ kêp mē panhō Pahihti hkêt. Anê.

Ã Tÿrtÿm kapêr kuhpa hã mē amã harênh anhÿr o pa. Tÿrtÿm kapêr ã kagã htÿm kot amnepê mē hkukamã tanhmã mē harênh to nê mē harênh kot:

Ã mē kapêr anhÿr o paja mÿrapê koja mē mex kêt nê pa.

Koja Tÿrtÿm mē homnuj tÿx kumrêx.

Anhÿr o kot mē harênh. Tã pa mē amã ixprÿ hã mē harê nê hã kagã. Mē ate inhmar nê amnhÿ nê mē omunh mex kaxyw.

Tÿrtÿm kot tanhmã mē kot amnhÿ tomnuj xwÿnhjê nhÿpêx to hã harênh
Sikÿn Pêtre 2.1-17; Sikÿn Ximotre 3.1-9

⁵ Nê amnepê mã mē panhÿgêttjaja kormã Ejit kamã mē pa ri nhÿm

Tirtüm Ejit nhõ xwýnhjê rüm mẽ kator pa. Hãmri nhùm mẽ hkwyjaja tanhmã hamaxpêr to nê axtem nê amnhĩ kaxyw hkõt hamaxpêr kêt nê. Nhùm tee ri amnhĩ tã mẽ omu nê ã mẽ kot amnhĩ nhĩpêx anhÿr xwýnhjê nhĩmex pa. Ra mẽ ate mẽ harênh mar mex tã pa axte mẽ amã mẽ harê.

⁶ Nê Tirtüm kapêr o mẽ wrÿk xwýnh kwýjaja. Na prem Tirtüm nhÿ hã kapêr o pa htã tanhmã hamaxpêr punuj to nê ra kãm ja ho anhÿr prãm nõkati nê Tirtüm kaga. Jakamã nhùm mẽ hã amÿné nhùm mẽ unê nê kàx o mẽ hkaxpre pa. Nê nhÿri pika kaxwýnh kãm kamàt kô htyk kãm mẽ kurê nhùm mẽ arĩ kamã hkrĩ ho hkrĩ. Nom koja nhÿrmã Tirtüm kot tanhmã mẽ pah-piitã mẽ pajarênh to xà hã arĩgro kato nhùm mẽ rĩ kormã hapôx pa. Hãmri nê kot amnhĩ tomnuj mÿrapê ma mẽ kot amnhĩ xà htÿx kamã hamak tùm xàta wÿr ma hapêx.

⁷ Nê krĩ pê Sotõ nê Komo nhõ xwýnhjaja na prem haxwýja kãm Tirtüm kapêr kõt amnhĩ nhĩpêx prãm kêt nê. Nê krĩa wa hpuhã krĩ hkwy kamã ri mẽ pa xwýnhjaja haxwýja mẽ uràk nê nê kãm kapêr mar prãm kêt nê. Na prem amnhĩ tomnuj tÿx rãhã ho pa. Nê axtem nê axpên pê ri mẽ hprõ ho amnhĩkati ho pa. Nê mẽmy hkwyjaja ri axtem nê axpên to amnhĩkati ho pa. Hãmri nhùm Tirtüm tee ri mẽ kot amnhĩ nhĩpêxja ã omu nê mẽ hipy kuwy hpòk kwý rê nhùm mẽ amnhĩ wÿr omu nê kãm ma xàj tee ri hprõt kaprÿ. Nê hprõt kaxyw òrkwÿ rüm hapôj nê hxêt pa nê hapêx. Na hte ã Tirtüm mẽ kot amnhĩ tomnuj o mẽ pa xwýnhjê nhĩpêx anê. Jakamã koja nhÿrmã kuwy hpòk rãhã xwýnhnta wÿr mẽ piitã mẽ rênh pa nhùm mẽ kamã amnhĩ xà htÿx kamã hamak rãhã ho pa ho pa nê aa à hapêx kêt nê. Nê à htÿx rãhã papa ho pa. Tã mẽ pahte Sotõ mẽ Komo nhõ xwýnhjê jarênh mar nê

mẽ pahte amnhĩ tomnuj kaga kurê kumrêx kaxyw na pre Tirtüm ã mẽ pamã mẽ harênh o amnhĩrit anê.

Mẽ hpijaàm kêt xwýnhjê jarênh

Sikùn Pêtre 2.10

⁸ Nê mẽ kot Tirtüm kapêr o pihkàr xwýnhjaja na htem ã mẽ kot amnhĩ nhĩpêx anhÿr xwýnhjê pyrã nê amnhĩ tomnuj tÿx pix o ri pa. Jakamã na htem tanhmã hpimtir punuj to hãmri nê hkrã hapôj nê hpimtir xà hkõt tanhmã amnhĩ tomnuj to. Jao hkwyjê kamã hpijaàm kêt o pa. Rÿ mênijê hõ rÿ mẽmyjê hõ nhùm mẽ axpên kãm hpijaàm kêt o pa. Rÿ Tirtüm kapêr o mẽ wrÿk xwýnhjê ho kapêr punuj nê. Kapêr mã gêt o tanhmã mẽ ho kapêr punuj to. ã na htem hpimtir punuj xà hkõt amnhĩ tomnuj o pa anê. ⁹ Tirtüm kapêr o mẽ wrÿk xwýnh krãhtüm Mikewja. Kêp mẽ hkrãhtüm tã aa mẽ kãm kapêr mã gêt kêt nê. Na pre Mojes ty nhùm Mikew ra ma hwÿr tèn wrÿ. Nê kuri Satanasti pumu hãmri nê Mojes nhĩ nê tanhmã kãm kapêr to. Nom kapêr mã gêt o kãm kapêr kêt nê. ãm kapêr mã hprĩ ho kãm kapêr nê kãm:

—Kwa ãm omu kê nõ. Kot kaj tanhmã ho nhùm Tirtüm apumu nê hã tanhmã hã ato. Anê.

¹⁰⁻¹¹ Nom ixte mẽ amã mẽ hpimtir punuj jarênh xwýnhjaja. Mẽ kot Tirtüm kapêr o pihkàr xwýnhjaja kot hprĩ hã Tirtüm kot amnhĩ nhĩpêx ã harênh mar kêt jakamã na htem htÿx ri ho kapêr o haprÿ ho pa. Te ho mry xoprêja hamaxpêr kêt nê htÿx ri amnhĩ nhĩpêx o pa pyrãk. Nom koja nhÿrmã Tirtüm mẽ homnuj tÿx nê.

Te mẽ kot finat Kaĩ kot amnhĩ tõ hprĩ xwýnh kot amnhĩ nhĩpêxta pyrãk. Nê te mẽ kot finat Paraãw kot amnhĩ nhĩpêx pyrã nê kàxpore rũnh prãm xàj Tirtüm kapêr kuhpa hã tanhmã amnhĩ nhĩpêx to ho pa. Nê te mẽ kot finat Kore kot amnhĩ nhĩpêx pyrã nê Tirtüm kot

mê kaxyw mẽ õ pahi xãm xwỳnhnta kutã amnhĩ xunhwỳ. Mỳrapê koja mẽ jaje pyrã nê kuwy hpòk rãhã xwỳnhnta wỳr ma hapêx pa.

¹² Na ka htem apê Jejus kwỳ hã axpẽn wỳr akuprõ. Nê tõhã mẽ apê hkwy hã amã axpẽn kĩnh ã axàpkur kaxyw axpẽn wỳr akuprõ. Nhũm ixte mẽ amã mẽ harẽn xwỳnhjaja mẽ akõt agjê nê mẽ akutã apku. Jakamã kwa mẽ o kora mẽ amnhĩ nê mẽ omunh mex nê. Mẽ hipêx o te mẽ ate mẽ axàpkur xà hã mẽ anhõ kamã kẽnre pumunh nê hanhir nê rẽn pyrã nê amnhĩ nhĩhkõ hã mẽ pumu nê amnhĩ nê hanor kurẽ kumrêx. Na htem hpijaam kêt kãm amnhĩ pix kukamã hamaxpêr pê apkur rũnh o pa.

Te na wrỳk kaxyw htyk rax nê mõi nhũm mẽ kot omunh nê wrỳk ã hkamnhĩx tã nhũm kòk kot nhãm mẽn nhũm wrỳk kêeta pyrãk o na htem amnhĩ nhĩpêx. Jao te mẽ kot ãm hãmri mẽ amã Tĩrtũm kapêr jarẽn mex pyrãk tã mẽ amã ho hêx.

Nê te mẽ kêp mẽmo pĩ hpàr ra õ mã tãm tã ãm htỳx rã nê aa õ hkêt nhũm mẽ kot krãhyr nê mẽn nhũm grã parta pyrãk.

¹³ Nê te mẽ kêp gõ xujanãr kot amnhĩ nhĩpêx pyrãk. Na hte gõ xujanãrja hakax wỳr kapê nê mra nhũm hamrõ kỳxpê amgrã kamã arĩk nhũm gõ awjanã nê ma akupỹm hipòk wỳr mra. Ja pyrãk na htem ma nhỹhỹm mra nê mẽ kãm mẽmoj jarẽ nê nhãm mra nê mẽ kãm mẽmoj jarẽ nê ma akupỹm mẽ kurũm mra. Nhũm mẽ mar xà hkõt amnhĩ tomnuj rãhã ho pa.

Nê te mẽ kot kaxkwa hã kanhêre nhỹhỹm htêm nhũm mẽ kot nhỹhỹm htêm xà hkõt omunh kêeta pyrãk. Jakamã koja Tĩrtũm nhỹrmã kamãt kò kamã mẽ rẽn pa nhũm mẽ aa hapõx kêt nê.

*Mẽ kot amnhĩ tomnuj xwỳnhjê hkukamã mẽ harẽn
Apokarip 20.11-15*

¹⁴ Nê na pre finat Enokja anepê mã ã mẽ kot amnhĩ tomnuj anhỹr xwỳnhjê hkukamã tanhmã mẽ harẽn to. Mẽ kot Tĩrtũm kapêr o pihkàr o ri mẽ pa xwỳnhjaja nhũm mẽ hkukamã mẽ harẽ. Enokja finat Atãw kanrêhã htãmnhwỳ na pre. Tã ã mẽ kot amnhĩ tomnuj anhỹr xwỳnhjê hkukamã mẽ harẽn o:

Koja nhỹrmã Pahihtija man pika hwỳr akupỹn wrỳ. Kapêr o mẽ wrỳk xwỳnh xohtõ rax mẽ mẽ hpimràatã akupỹn wrỳ.

¹⁵ Hãmri nê mẽ pahpiitã kormã mẽ pahtır ri mẽ pahte tanhmã amnhĩ nhĩpêx to ho papa hã mẽ pahpumunh xà hkõt tanhmã mẽ pajarẽn to. Hãmri nê mẽ kot Tĩrtũm kapêr o hêx o pa xwỳnhjê pumu nê tanhmã mẽ harẽn to nê mẽ harẽn o: “Jajaja na pre mẽ kãm Inhĩpêexã Tĩrtũm prãm kêt nê ri kapêr kwỳm pix mã amnhĩ nhĩpêx o pa. Nê kapêr punuj o pa. Æ na prem amnhĩ nhĩpêx anhỹr rãhã ho pa.” Anhỹr o mẽ harẽ nê amnhĩ nê kuwy hwỳr mẽ kurẽ nhũm mẽ amnhĩ xà htỳx kãm hamak o pa rãhã nê pa ho pa. Anê.

Æ na pre finat Enokja mẽ hkukamã mẽ harẽn anê. ¹⁶ Æm hãmri na mẽ harẽ. Tã na hte arĩ mẽ hkwỳjaja ã amnhĩ nhĩpêx anê. Nê hamaxpêr mex kêt nê. Na htem nhãm tanhmã mẽ ho kapêr punuj to pix kukamã hamaxpêr. Nê amnhĩ krã hkõt htỳx ri tanhmã amnhĩ tomnuj to ho pa. Nê amnhĩ to jarkrar rãhã nê. Nê hêx rom mẽ kêp mẽmoj jamỳnh kaxyw tanhmã mẽ kãm hêx to.

¹⁷ E Kris kõt ixkrãmnhwỳjaja. Koja mẽ ã mẽ amã Tĩrtũm kapêr o hêx anhỹr o mẽ akõt pa ka mẽ ama nê ãm mẽ ama nê mẽ kapêr mar kêt nê. ãm mẽ panhõ Pahihti Jejus Kris nhỹ hã mẽ ajahkre o mẽ pa xwỳnhjaja kot tanhmã mẽ amã mẽ harẽn toja mã mãn kêt ajamaxpêr

týx rāhā o ri apa. ¹⁸ Na prem mē amā mē harēnh o:

—Jejus akupŷn wrŷk xwŷj ri koja mēmojaja mē awŷr mran pōj. Nom mē kot Jejus kapēr kwŷm amnhī krā hkōt tanhmā amnhī nhīpēx to xwŷnhjaja koja mē. Hāmri nē mē apē Jejus kwŷ hā mē apumu nē mē atā akunha nē mē atā hpēr o axkē nē Tirtūm ā hpēr o axkē nē kapēr ā kagā hā hpēr o axkē. Anē.

¹⁹ Ā mē kot amnhī nhīpēx anhŷr xwŷnhjaja mē pahpē Jejus kwŷjaja mē pahte expēn kutā amnhī xunhwŷrja na mē kām hprām. Mē kamā Tirtūm Karō gjēx kēt jakamā mē kām amnhī krā hkōt pix mā tanhmā amnhī tomnuj to ho pa hprām.

Mē pahte Kris akupŷn wrŷk jamār pē tanhmā amnhī nhīpēx to hā mē pamā karō

Matēwre 24.45-51; Rukre 12.25-40; Karatas 6.1-2; Xiakre 5.19-20; Siktūn Pētre 3.12-15

²⁰ Kwa mē apē Jejus kōt ixtō nē ixtōxjaja kēr ka mē ā mē kot amnhī nhīpēx anhŷr o mē pa xwŷnhjē rom apkati mē amnhī kaxyw Jejus pix mā mān ajamaxpēr rāhā ho ri apa. Te mē kot mē hakre hā ra āptār nē amnhī krām mē hakre xā jagjēnh tŷxta pyrāk.

Jao Tirtūm kapēr mar tŷx nē hkōt amnhī nhīpēx mex o ri apa.

Nē Karō nhŷ hā amnhī to hwŷr rāhā nē.

²¹ Nē Tirtūm kām mē pajapē hā kām ajamaxpēr rāhā ho ri apa. Nē Pahihti Jejus Kris kām mē pajapē hā kām ajamaxpēr tŷx rāhā ho apa.

Koja nhŷrmā kām mē pajapē hā akupŷn mē pahwŷr wrŷ nē tanhmā mē pahto mex to pu mē kuri pahŷtŷr tūm nē pahkīnh nē papa ho papa. Tā kēr pu mē arī akupŷn mē pahwŷr wrŷk xā hā arīgro jamār rāhā ho papa.

²² Nē mē pahkwŷjaja kormā mē kot Jejus kōt amnhī xunhwŷr tŷx kēt xwŷnhjaja kēr ka mē kamā axukapri nē aprī hā mē kām Tirtūm kapēr jarēnh o ri mē hkōt apa. ²³ Na pre ra mē hkwŷjaja mē kot Tirtūm kapēr o pihkār xwŷnhjē kapēr ma nē mē hkōt amnhī nhīpēx. Jakamā kēr ka mē ja hā mē omu nē te mē ate kuwy hpōk rūnh nē mē hpa hā mē hamŷnh nē nhām mē rēnh pyrāk o mē hipēx. Jao mē kot nhŷrmā Tirtūm kapēr o pihkār xwŷnhjē hkōt kuwy hpōk rūnhta wŷr pa pymaj mē nē mē kām akapēr kām axihtŷx o ri mē hkōt apa. Kē mē ama nē mē hkaga nē mē hkōt ri amnhī nhīpēx kēt nē.

Nē htŷx ri mē kot amnhī tomnuj o mē pa xwŷnhjaja kēr ka mē kamā axukapri ho ri apa nē mē kamā agryk tokyx anhŷr kēt nē. Xatā mē kām Tirtūm kapēr jarēnh rāhā ho ri mē hkōt apa. Nom kwa mē okora kēr ka mē kot amnhī nhīpēx o amnhī nhīpēx o ri apa hkēt nē. Kwarī ho kwarī.

Jutre kot Tirtūm mā mex o mex ā harēnh

Wam Pētre 1.5-7

²⁴ Nē kēr pu mē Tirtūm mā amnhī jarēnh kaxyw nē ā kām amnhī jarēnh anē nē kām:

—Pa Tirtūm. Nā ām hāmri na ka hte amnhī kōt mē ixunhwŷr tŷx nē pa mē akaga hkēt nē akōt amnhī nhīpēx rāhā ho ri ixpa. Kot kaj nhŷrmā amnhī wŷr mē ixtō api pa mē Akra mē war akuri axte tanhmā amnhī tomnuj to hkēt nē. Nē amnhī to mex pē anhīrā htŷx rax kām ixpa. Jao ixkīnh tŷx nē ixpa ho ixpa.

²⁵ —Apē mē inhō Tirtūm ā apyxi mex kumrēx na ka. Na ka pre Pahihti Jejus Kris kukwak ri mē xpiitā mē ixte amnhī tomnuj pē mē ixpytā. Nē na ka hte anhīrā htŷx rax rāhā ri apa. Nē amex o amex nē axihtŷx o axihtŷx nē axāhpumunh o axāhpumunh. Nē apē mē inhō Pahi

Maati hã apyxi mex na ka. Amnepê
 mã kormã mêmoj kêt ri ka pre ã
 amnhĩ nhĩpêx anhỹr o apa rãhã nê.
 Tã arĩ ã ate amnhĩ nhĩpêx anhỹr ho
 apa ho rãhãã. Nê kot kaj apkati mẽ
 ã ate amnhĩ nhĩpêx anhỹr ho rãhãã.
 ã ate amnhĩ nhĩpêx anhỹr o apa ho
 rãhã ho rãhã. Tã ãm ja pix na hapêx.
 Anê.

E kêr pu mẽ ã Tĩrtũm mã mex o
 mex ã harênh anhỹr o papa.

Ãm ja pix. Ixpê Jutre na pa mẽ
 awỹr kagãja nhĩpêx nê kumê.

Apokarip

Juãw kot Jejus nhỹ hã mẽmoj kukamã harẽnh

Juãw na pre mẽ pamã kagàja nhĩpêx. Juãw Paxis kêt axtem Jejus nhỹ hã hkrajê jahkre ho mẽ pa xwýnhjê hõ pè Juãw na pre hipêx. Na pre Jejus ã mẽ kãm hkurê xwýnhjaja uné nẽ ma gô hipòk pè Patos wýr kumẽ nhũm kęp prês nẽ gô hipòk kãm pa ho pa nẽ aa kurũm kator kêt rãhã ty.

Jakamã kormã htĩr ri nhũm Tĩrtũm kapêr o wrýk xwýnhjê hõ gô hipòkja wýr wrý nẽ kãm mẽmoj kukamã awjarẽ nhũm kuma nẽ hkôt mẽmoj pumu. Te hpimtir kãm mẽmoj pumunh pyrãk. Hãmri nẽ omu nẽ kuma nẽ amnhĩ xô ri mẽ pamã hã kagà. Na pre mẽmoj to axkrunêpxi nẽ hã kagà. Mẽ kot Jejus kutã amnhĩ xunhwýr xwýnhjaja kot Jejus ã tanhmã kęp hkwyjê to ho pa nhũm mẽ hkwyjaja pikaprãr ã kagà. Nẽ Jejus kęp Pahi Maati hã kot nhỹrmã mẽ kot Tĩrtũm kutã amnhĩ xunhwýr xwýnh piitã ma mẽ kot amnhĩ xà htýx kamã hamak tũm xà hwýr mẽ rẽnh par ã kagà. Nẽ Tĩrtũm kot nhỹrmã hkrajê ho mex kumrêx ã nhũm mããnẽnh hã kagà. Hãmri nẽ mẽ pamã hã kagà o:

¹⁻² E kot paj mẽ amã awjarẽ nẽ hã kagà. Ixpê Juãw ixte Tĩrtũm mã tanhmã amnhĩ anhĩpêx to ho ixpa xwýnh kot paj mẽmoj jarẽ nẽ hã kagà. Na pre Tĩrtũmja Jejus mã mẽmoj kukamã tanhmã ujarẽnh to ho ra kãm ho amnhĩrĩt pa. Kot amnhĩ xô ri mẽ pahte hkôt amnhĩ xunhwýr xwýnhjê mã harẽnh kaxyw. Hãmri nhũm kuma nẽ kot amnhĩ xô ri inhmã ujarẽnh kaxyw man ixwýr kapêr o wrýk xwýnh mẽ nhũm man ixwýr wrý nẽ ô ri inhmã mẽmoj to amnhĩrĩt

pa. Æm hãmri ã inhmã mẽmoj to amnhĩrĩt anẽ. Tã kot paj amnhĩ xwar mẽ apê Jejus kot ri mẽ apa xwýnhjê mã harẽ nẽ hã kagà. Mẽ ate mar nẽ axkãm ajamak rom nẽ ri apa kaxyw. Nà ixte hã kagà mã xwýnhja koja tanhmã amnhĩ to nẽ tokyx mẽ pahwýr wrý. ³ Jakamã kwa kêr ka mẽ aprĩ hã kagàja kamã harẽ nẽ ama nẽ hkôt pix mã amnhĩ nhĩpêx nẽ mẽ piitã mẽ kãm kamã harẽnh o ri mẽ hkôt apa. Kot kaj mẽ ã amnhĩ nhĩpêx anẽ nhũm Tĩrtũm ja hã mẽ ato mex ka mẽ akĩnh nẽ apa ho apa. Nẽ mẽ kot mẽ axjarẽnh mar nẽ hkôt amnhĩ nhĩpêx xwýnhjaja koja Tĩrtũm ja hã mẽ omu nẽ mẽ ho mex nẽ nhũm mẽ apyrã nẽ hkĩnh nẽ pa ho pa.

Juãw kot krĩ pè 7 kôt Jejus kwýjê hwýr kagà rẽnh

⁴ E ixpê Juãw kot paj atar pika pè As kamã krĩ pè 7 piitã hkôt mẽ apê Jejus kwý hã axpẽn wýr mẽ apikuprõnh xwýnhjê hwýr kagà nẽ kurê ka mẽ kamã harẽ nẽ ama.

Na pa hte mẽ ato Tĩrtũm wýr rãhã ho ri ixpa. Nẽ mẽ ato hwýr o:

—Pa Tĩrtũm. Kwa kêr ka pika pè As kamã akrajê ho mex nẽ mẽmoj to mẽ kutã anojarêt rãhã ho apa. Kẽ mẽ hamakêtkati nẽ amnhĩx ri pa ho pa. Ja na inhmã hprãm. Anẽ.

Tĩrtũmja rãhã ho rãhã. Amnepêm kormã mẽmoj kêt ri nhũm pre ra rãhã ho rãhã. Nẽ koja nhỹrmã mẽmoj akupým hapêx par tã nhũm Tĩrtũm aa hapêx kêt kumrêx. Koja arĩ rãhã ho rãhã. Na hte kaxkwa kamã kot mẽ pahto amnhĩptãr ã hkrĩ xà kamã mẽ papytãr rãhã ho hkrĩ.

Nẽ Tĩrtũm Karõ te kot Tĩrtũm kot mẽ pahto amnhĩptãr xà hã hkrĩ xà kapem kanê maati pixi kamã kwryt pè 7 xãm xwýnhhta pyrãk. Na hte Tĩrtũm nhĩhkõ hã hkrĩ ho hkrĩ. Tã kẽ mẽ ato mex rãhã ho pa.

⁵ Nẽ Jejusja na pre hte Tĩrtũm kapêr o mẽ ahkre mex o pa nẽ aa

hkaga hkêt nê. Tã nhũm prem axtem nê kupĩ. Hãmri nhũm Tĩrtũm akupỹm ho htĩr. Jejus kumrêx ho htĩr nhũm htĩr o htĩr. Nê kêp pika piitã hkôt pahi piitã nhõ Pahihti. Kãm mē pajapê htỹx jakamã na pre mē panê ty nê hkamrõja te mē panê hpikapĩr pyrãk o amnhĩ nhĩpêx. Nê htyk o mē pahte amnhĩ tomnuj pãnhã amnhĩre. Jao te mē pahte amnhĩ tomnuj pē mē papytãr par pyrãk o mē panhĩpêx. ⁶ Nê na pre mē pahpê patre nê mē piitã mē ho Hipêêxã Tĩrtũm wỹr o papa kaxyw mē paxunhwỹ. Nê kêp mē panhõ Pahi Maati hã kãm hprãm xã hkôt mē pahte kãm tanhmã amnhĩ nhĩpêx to ho papa kaxyw mē paxunhwỹ. Jakamã kwa kēr pu mē kãm mex o mex nê hihtỹx o hihtỹx ã mãn harēnh rãhã ho papa.

⁷ Nê koja tokyx akupỹn mē pahwỹr kakrã kamã wrỹ pu mē pahpiitã wrỹk kãm omu. Nhũm mē kot hpĩr xwỹnhjaja tee ri amnhĩ wỹr omu. Nê pika piitã hkôt ri mē pa xwỹnhjaja omu nê mē kot amnhĩ tomnuj jakamã tee ri amnhĩ kukamã hamxpēr o kãm ma htỹx kumrêx. Hãmri nê kãm ma xaj mur nê htertet o kuhê. Koja nhỹrmã Jejus akupỹn wrỹ nhũm mē amnhĩ wỹr omu nê ã amnhĩ nhĩpêx anê.

⁸ Nê Tĩrtũm na hihtỹx o hihtỹx nê ãhpumunh o ãhpumunh. Nê aa kot mēhõ ni rũm kator kêt. Na hte amnhĩ jarēnh o:

—Ixrãhã ixpa xwỹnh na pa. Amnepê mã kormã mēmoj piitã hkêt ri pa pre ra ixrãhã ri ixpa ho ixpa. Nê koja nhỹrmã mēmoj akupỹm hapêx tã pa arĩ ixrãhãã. Anê.

Juãw kot Jejus akupỹm htĩr ã omunh

⁹ Nê ixpê Jejus kôt mē atõ Juãw na pa hte mē apyrã nê Jejus kôt amnhĩ nhĩpêx nhũm hte mē kãm Jejus kurê xwỹnhjaja mē apyrã nê hã inhĩpêx kati ho pa. Mē pahte hkôt ri amnhĩ nhĩpêx o papa jakamã na

htem hã mē pahtomnuj tỹx rãhã ho pa. Tã pu htem ý hã mē kutã amnhĩ to htỹx nê arĩ hkôt amnhĩ nhĩpêx. Jakamã na pa pre Tĩrtũm kapēr o mē ajahkre rãhã ho ri mē akôt ixpa. Nê Jejus kêp mē panhõ Pahihti hã mē amã harē. Mỹrapê na prem hã ixpynê nê man amnê ixto tē nê jar gõ hipõk pē Patos kãm inhmē pa kamã ixpê prēs nê ixpa ho ixpa.

¹⁰ Tã nhũm tãmik pa Tĩrtũm mã amnhĩ jarēnh o nhỹ. Hãmri nhũm Karõ tanhmã ixkrã hto pa te ixpimtir kãm mēmoj pumunh pyrã nê amnhĩ katut kôt mēhõ kapēr ma. Te kot pifti kakõr tỹx pyrãk pa kuma. ¹¹ Hãmri nhũm inhmã kapēr nê inhmã:

—Pa Juãw? E kot paj amã mēmoj to amnhĩrit ka omu nê akwỹjê mã hã kagã. Nê hã kagã hpa hãmri nê ahpỹnhã krĩ hkwy hkôt mē kêp ixkwỹ hã axpēn wỹr mē pikuprõnh xwỹnhjê hwỹr arē. Mē kot kamã harēnh nê mar nê axkãm hamak rom nê ri pa kaxyw. Epes wỹr nê Emĩnã hwỹr nê Pekamõ hwỹr nê Xijaxir wỹr nê Satre hwỹr nê Pirate hwỹr nê Raxisej wỹr. Krĩ pē 7ja piitã hwỹr ixkapēr ã kagã nê mē hwỹr arē kē mē apyrã nê mēmoj jarēnhja ma. Anê.

¹² Hãmri pa ixte mēhõja pumunh kaxyw ho ijakêx nê kanê hkwy pumu. Kanê kêp 7 nê piitã ôr o.

¹³ Nê kanê nhĩpõk ri mēhõja te panhĩ pyrã nê pahi hã ê mex kãm xa. êja hpar kõn kôt hitep nhũm xa. Nê pahi hã mē hinõ hpre xã ho amnhĩ nhĩnõ hpre nê xa. Hinõ pre xãja ôr pix o. ¹⁴ Nê hkrã hkĩ te kaxãt nhĩ jaka pyrã nê hakaajre. Nê no te kuwy hpõk pyrã nê hkarỹr tỹx nê. ¹⁵ Nê hpar te mēmo kãx karỹr tỹx pyrãk. Nê kapēr te gõ hprõt tỹx koko pyrãk. ¹⁶ Na pre upõk rũm kanhêti ho 7 nê hamỹ nê o xa. Nê hakwa rũm wapo põm kato nê akutã wa gixre nê ajêt. Nê hkuk kamã hirã htỹx kumrêx. Te myt

kot mē pano hã harir nhũm gêk tỳx pyràk. Ā mēhōja kot anhỳr.

¹⁷ Pa tee ri tanhmã kute hã omu nē inhmã ma htỳx kumrêx nē umaj tēm nē hpar pē te ixytk pyrà nē nō. Hãmri nhũm ixtã upòk rũm ìhkraja xi nē inhmã kapēr nē inhmã:

—Kwa amã ixpuma hkêt nē. Pa na pa. Amnepê mã kormã mēmoj kator kêt ri pa pre raa. Nē ixrãhãã. Koja nhỹrmã mēmoj akupỹm hapêx pa arĩ ixrãhã ixpa ho ixpa.

¹⁸ —Na pa pre ty tã akupỹm ixtĩr. Nē ixtĩr o ixtĩr. Kam ixpumu. Kot paj axte ixytk kêt nē. Ixpê mēhtykjê hpãm jakamã papxpix na pa hte mē htyk ã arĩgro jarê nhũm mē hã ty nē ma mēhtykjê papxã hwỳr ma pa.

¹⁹ —E kêr ka ate mēmoj pumunh xwỳnhnta pumunh tỳx nē akwỳjê mã hã kagà. Nē mēmoj kormã kot amnhĩ nhĩpêx kêt nhũm ate omunh mã xwỳnhnta ka inhỹ hã mē kãm hã kagà. Mē kot kamã harēnh nē mar tỳx kaxyw.

²⁰ —Nē kot paj axte ixprĩ hã ate mēmoj pumunh xwỳnhnta jarê ka inhma. Nã kanê pē 7ta te mē kot krĩ hkwỳ pē 7 kamã mē kêp ixkwỳ hã axpên wỳr mē pikuprõnh xwỳnhjê pyràk. Nē inhĩkra kamã kanhêti pē 7ta te kêp inhmã mē kot mē hamãr xwỳnhjê pyràk. Anê.

2

Epes kamã Jesus kwỳjê hwỳr kagà

¹ Nhũm Jesus arĩ inhmã kapēr nē inhmã:

—E kêr ka krĩ pē Epes kamã ixkwỳjê jamãr xwỳnh wỳr kagà nē amê. Nē kagàja kamã mē kãm ixkapēr jarê nē mē kãm:

Pa Epes kamã ixkapēr mar kaxyw axpên wỳr apikuprõnh xwỳnhjaja. Ot pa mē awỳr ixpêr mē. Ixpê ixupòk o kanhêti ho 7 nē hamỳnh nē ho ixãm xwỳnhnta na pa. Nē ixpê ôr o kanê pē 7

nhĩpòk ri ixpa xwỳnhnta na pa ã mē awỳr ixpêr mēnh anê.

² Na pa hte tanhmã mē ate amnhĩ nhĩpêx to ho apa hã mē apumunh mex o ixpa. Na ka htem inhmã amnhĩ nhĩpêx mex nē pa ja hã mē apumu. Mē kot ixtã mē anhĩpêx kati htã ka mē kutã amnhĩ to htỳx nē ixkaga hkêt nē. Nē mē kot amnhĩ tomnuj xwỳnhjê hkôt amnhĩ nhĩpêx o ri apa hkêt nē. Nhũm ixte mē awỳr mē rēnh ã amnhĩ to hêx xwỳnhjaja mē awỳr pan pøj ka mē aprĩ hã mē kot amnhĩ to hêx ã mē omu. Hãmri nē tee ri mē kot amnhĩ nhĩpêx ã mē omu nē amnhĩ nē mē hanor kurê kumrêx. Ām hãmri na ka htem ã mē hipêx anê.

³ Nē mē kãm ixkurê xwỳnhjaja kot tanhmã ixtã mē atomnuj tỳx to htã ka mē kutã amnhĩ to htỳx nē aa ixkaga hkêt nē. Nē ixkôt amnhĩ nhĩpêx mex rãhã ho ri apa. Ām hãmri na ka htem ã amnhĩ nhĩpêx anhỳr o ri apa.

⁴ Ām mēmoj pixi na ixpê omnuj. Amnepê mã kormã mē ate ixkôt amnhĩ xunhwỳr nyw ri na ka prem amã axpên kĩnh nē axpên to mex o ri apa. Nē mē amã axpên tã ma ho te mē amã amnhĩ tã ma pyràk o axpên nhĩpêx. Tã tanhmã ajamaxpêr to nē axte ã axpên nhĩpêx anhỳr kêt nē. Jao te mē amã ixkĩnh kêt pyràk o amnhĩ nhĩpêx. Pa tee ri ja hã mē apumu nhũm ja inhmã mex kêt nē.

⁵ Kwa mē tokyx ja hã amnhĩ pumu nē akupỹm mē ate ixkôt amnhĩ xunhwỳr nyw ri mē ate axpên nhĩpêxta o akupỹm axpên nhĩpêx o apa. Kot kaj mē anhỳr kêt kot paj te mē apê mē anhō kanê hpyr nē kapôt ã mēnh pyràk o mē anhĩpêx ka mē ri apa nē gaa nē apikaprãr pa. Tã mēhō koja mē amỳr pē mē anhō krĩ kamã mē kãm ijarēnh o pa?

⁶ Nē mē kêp Nikoraw nhō

xwýnhjaja na ka htem mē kot tanhmā amnhī tomnuj to hā mē omu nē ixpyrā nē apē ja hprām nōkati nē mē hkôt ri amnhī nhīpēx kêt nē. Pa ja hā mē apumu nē ixkīnh nē.

⁷ Tā ixte mē amā ixkapēr jatur xà na ja. Kot kaj mē amā ixkapēr mar prām hā kot kaj mē ā Tirtūm mē wa Ixkarō nhý hā ixte mē amā ixkapēr anhýrja ma nē kām ajamaxpēr tỳx rāhā ho ri apa.

Tirtūm nhō krī kamā mēmo pī hpār kuhē xwýnh. Mē kot ô hkur nē axte htyk kêt nē pa ho pa mā xwýnhhta. Kot kaj mē ate amnhī tomnuj nē amnhī to htỳx nē arī inhmā hprām xà hkôt amnhī nhīpēx rāhā ty pa akupým mē ato mē atīr nē ma pī hpārta wýr mē arē. Ka mē ma hwýr mra nē ô hō hta nē akrē nē axte atyk kêt kumrēx nē apa ho apa.

E ām ja pix na hapēx. Anē.

—E Juāw. Kēr ka Epes kamā ixkwýjē jamār o pa xwýnhhta wýr ā ixkapēr ā kagā anē nē mē hwýr amē. Anē.

Hāmri pa kuma nē ô ri mē kām hā kagā hpa.

Emīnā kamā Jejus kwýjē hwýr kagā

⁸ Hāmri nhūm hpānhā Emīnā nhō xwýnhjē kaxyw inhmā kapēr nē inhmā:

—Nē hpānhā Emīnā kamā ixkwýjē jamār xwýnh wýr kagā nē mē hwýr amē. Nē mē kām ixkapēr jarē nē nē mē kām:

Pa Emīnā kamā ixkapēr mar kaxyw axpēn wýr mē apikuprōnh xwýnhjaja. Ot pa mē awýr ixpēr mē. Ixrāhā ho ixrāhā ixpa xwýnhhta na pa. Amnepēm kormā mēmoj piitā hkêt ri na pa pre ixrāhā nē ri ixpa. Koja nhýrmā mēmoj akupým hapēx pa arī ixrāhā ho ixrāhā nē ri ixpa. Na pa pre ty no ām akupým ixtīr

o ixtīr. Tā pa ā mē awýr ixpēr mēnh anē.

⁹ Nā na pa hte mē ate tanhmā amnhī nhīpēx to ho apa hā mē apumunh rāhā ho ixpa. Na hte mē kām ixkurē xwýnhjaja ixtā mē atomnuj to ka mē apē amrakati nē ri apa. Nom mē ate tām amnhī nhīpēx jakamā te mē apē mē hikukrēx rūnh kumrēx xwýnhjē kot amnhī nhīpēx pyrā nē ixkukwak ri akīnh rāhā ri apa. Na hte mē kēp Ijaew ā amnhī to hēx xwýnhjaja mē ato kapēr punuj rūnh o pa. Mē kot Tirtūm kôt amnhī nhīpēx ā amnhī jarēnh tā no ām hkôt amnhī nhīpēx kêt nē. Ām Satanasti kôt pix mā na htem amnhī nhīpēx o pa.

¹⁰ Tā mē kām ixkurē xwýnhjaja kot ixtā mē atomnuj tỳx o pa htā kēr ka mē amnhī tā mē omu nē tee ri amnhī kukamā ajamaxpēr kêt nē. Nē arī mē kutā amnhī to htỳx nē. Koja Satanasti mē akwýjē pynē nē mē ajagjē. Hāmri nē mē ate ixkaga hprām xà tanhmā mē anhīpēx kati hto ka mē hagjēnh xà kamā amnhī xà htỳx kamā ajamak o atā arīgro pé 10. Nom kēr ka mē kutā amnhī to htỳx nē ixkaga hkêt nē. Mē kot mē apar mā tā ka mē kutā amnhī to htỳx nē. Kot kaj mē aa ixkaga hkêt nē ixkôt ri amnhī nhīpēx rāhā ty pa akupým mē ato mē atīr nē ma amnhī wýr mē ato api. Hāmri ka mē Tirtūm mē wa ixri amex nē atīr tūm nē apa ho apa nē axte atyk kêt nē apa.

¹¹ E ixkrajaja. Kot kaj mē amā ixkapēr mar prām hā kot kaj mē ā Tirtūm mē wa Ixkarō nhý hā ixte mē amā ixkapērja anhýr ma nē kām ajamaxpēr tỳx rāhā ho ri apa. Kot kaj mē ate amnhī tomnuj nē amnhī to htỳx nē inhmā hprām xà hkôt pix mā amnhī nhīpēx rāhā ty. Hā kot paj akupým mē ato mē atīr ka mē ma kuwyta wýr apa hkêt nē.

E. Ām ja pix. Na hapêx. Anê.
—E Juāw. Kêr ka Emīnā kamā
ā ixkrajê mā ixkapêr ā kagā anê.
Anê.

Hāmri pa kuma nê ô ri mē kām hā
kagā.

*Pekamō kamā Jejus kwỳjê hwỳr
kagā*

Sikūn Korīt 6.14–7.1

¹² Nhūm Jejus arī inhmā kapêr nê
hpānhā inhmā:

—E hpānhā Pekamō kamā
ixkrajê jamār o pa xwỳnhja wỳr
kagā nê mē hwỳr amê. Nê mē kām
ixkapêr jarê nê mē kām:

Pa Pekamō kamā ixkapêr
mar kaxyw axpên wỳr mē
apikuprōnh xwỳnhjaja. Ot pa mē
awỳr ixpêr mē. Ixpê ijakwa rūm
pōm wapo akutā wa gix nê kator
nê ām xwỳnhta na pa mē awỳr
ixpêr mē.

¹³ Na pa hte mē anhō krī nhō
xwỳnhjaja kot tanhmā amnhī
tomnuj to ho pa hā mē omunh
mex nê. Mē kot Satanasti kôt pix
mā ri amnhī nhīpêx o pa jakamā
mē anhō krī te kēp Satanasti nhō
krī pyrāk. Āxipas kot mē hkôt mē
kām ixkapêr o mē ahkre ho pa
nê aa hkaga hkêt tâ nhūm prem
axtem nê ixtā kupī. Ka mē ja hā
mē omunh tâ mē umaj ixkaga
hkêt nê arī ixkôt amnhī nhīpêx
rāhā ho ri apa. Ām hāmri na ka
htem ā amnhī nhīpêx anê.

¹⁴ Mēmoj pixi na ixpê omnuj.
Na hte mē akwỳjaja axtem nê
Paraāw kapêr kôt amnhī nhīpêx
o pa. Na pre Paraāwja Parak mā
tanhmā kapêr to nhūm kuma nê
amnhī xō ri tanhmā mē anhīgêt
mā kapêr to ho pa. Nom ixkapêr
kôt kêt ixkapêr kuhpa hā tanhmā
mē kām kapêr to nê mē kām:
“Mē māmri ma sānti hā mē hkīnh
mā xwỳnhjê hkôt mra nê sānti
hā apku nê hā akīnh. Nê mē
urāk nê axpên pê axpên prō ho
amnhīkati nê axpên pê ri axpên

mjên o amnhīkati nê mē ā ri
amnhī nhīpêx anhỳr o ri apa. Ja
mex kēnā.” Anhỳr o mē anhīgêt
mā kapêr o pa nhūm mē kuma
nê mē hkôt amnhī nhīpêx. Tā ka
mē akwỳjaja mē urāk nê ā amnhī
nhīpêx anhỳr o apa. Kwa ja mex
kêt.

¹⁵ Na hte mē akwỳjaja Niko-
rawjê kapêr kôt ixkapêr kuhpa
hā tanhmā amnhī nhīpêx to ho
pa. Ja mēānēn mex kêt. ¹⁶ Tā
ra mē akwỳjaja ā amnhī tomnuj
anhỳr o pa ka mē ja hā mē omu
nê ām mē omu nê nê tanhmā
mē kām akapêr to hkêt nê. Kwa
mē ate ā amnhī nhīpêx anhỳr
xwỳnhjaja. Kêr ka mē tokyx ja
kaga nê akupỳm ixkôt ri amnhī
nhīpêx mex nê. Kot kaj mē anhỳr
kêt kot paj tokyx mē awỳr wrỳ
nê te ijakwa rūm pōm wapo kator
xwỳnhta o mē hkanhwỳr pyrāk o
mē anhīpêx. Nom ixkapêr xihtỳx
pix o tanhmā mē anhīpêx to.

¹⁷ E kot kaj mē amā ixkapêr
mar prām hā kot kaj mē ā Tirtūm
mē wa Ixkarō nhỹ hā ixte mē
amā ixkapêr anhỳrja ma nê kām
ajamaxpêr tỳx rāhā ho ri apa.

Nê kot kaj mē ate amnhī tom-
nuj nê amnhī to htỳx nê inhmā
hprām xā hkôt amnhī nhīpêx
rāhā ty. Hā kot paj akupỳm
mē ato mē atīr hāmri nê ra pam
mē amā mē anhō ka mē hkur o
apa. Te amnepēm Ijaew kapôt ā
pa nhūm ixte mē hwỳr “manā”
anhỳr xwỳnhta rēnh nhūm mē kot
hkur o pata pyrāk. Nom ixte mē
amā mē anhōja na hpimxur. Ām
papxipix na pa hte mē kām ôr o
ixpa.

Nê kot paj mē atā mē anhīxi
nyw rē. Jao kēn jakare hkwỳ hā
ahpỳnhā mē anhīxi nyw jaxwỳ
nê mē amā kugō. Ka mē hamỳ
nê kapxipix amnhī nhīxi nyw
pumunh o apa.

E ām ja pix. Na hapêx. Anê.

—E Juāw. Kêr ka Pekamō kamā

ixkrajê hwÿr ã ixkapêr anhÿr ã kagà nê mê hwÿr amê. Anê.

Hãmri pa kuma nê ô ri mê kãm hã kagà.

Xijaxir kamã Jesus kwÿjê hwÿr kagà

Jutre 3-23

¹⁸ Nhũm Jesus arĩ inhmã kapêr nê inhmã:

—E hpãnhã Xijaxir kamã ixkwÿjê jamãr xwÿnh wÿr kagà nê amê nê mê kãm ixkapêr jarê nê mê kãm:

Pa Xijaxir kamã ixkapêr mar kaxyw mê apikuprõnh xwÿnhjaja. E ot pa mê awÿr ixpêr mê. Ixpê Tirtũm Kra na pa. Ixpê inhno te kot kuwy hpõk karÿr tÿx pyrãk xwÿnhhta na pa. Nê ixpê ixpar te kot kãx karÿr tÿx pyrãk xwÿnhhta na pa mê awÿr ixpêr mê.

¹⁹ Na pa hte mê ate amnhĩ nhĩpêx kõt mê apumunh mex o ri xpa. Na ka htem amnhĩ kaxyw inhmã ajamaxpêr pê inhmã amnhĩ to mex o ri apa. Mê akwÿ kot ixtã tanhmã mê anhĩpêx to htã ka mê umaj aa ixkaga hkêt nê. Nê arĩ amã ixkĩnh tÿx kãm tanhmã amnhĩ nhĩpêx to ho ri apa. Nê xapên to mex nê ixkõt pix mã amnhĩ nhĩpêx o ri apa. Jao ra ixkõt amnhĩ nhĩpêx mex o wam mê ate ixkõt amnhĩ nhĩpêxta jakre. Nã ja inhmã mex kumrêx.

²⁰ ãm mêmõj pixi na ixpê omnuj. Mê akõt niti ri pa xwÿnh Jejapewtita. Kêp Tirtũm nhÿ hã kapêr jarênh o pa xwÿnh ã amnhĩ to hêx xwÿnhhta. Na hte ixkapêr kupa hã tanhmã mê ajahkre hto ka htem ama nê nê tanhmã kãm nê hkêt nê. Na hte mê amã: “Xê mê mãmrĩ ri mê hkuprÿjê hwÿr mra nê mê ho amnhĩkati. Nê xapên pê mê aprõ nê mê amjên o amnhĩkati. Nê mê kot sãnti hã mê hkĩnh nê hã apkur xwÿnhjê hkõt mra nê mê hkõt amnhĩ nhĩpêx. Tirtũm kãm ja mex kênã.” Anhÿr

o mê amã kapêr o pa. Nê inhmã ja mex ã ijarê nom inhmã ja mex kêt. Tã ra mê akwÿjaja kapêr ma nê hkõt amnhĩ nhĩpêx ka mê ja hã mê omunh tã amnhĩ nê nitita janor kêt nê nhũm arĩ ri mê amã hêx o ri mê akõt pa. ²¹ Ra kot ã amnhĩ nhĩpêx anhÿr o mê akõt pa ry rax kumrêx tã pa kormã ja hã tanhmã ho hkêt nê kormã amnhĩ tã hamã. Kot ã amnhĩ nhĩpêx anhÿr kaga kaxyw na pa kormã hamãr o ri ixpa. No nhũm aa hkaga hkêt nê.

²² Mÿrapê kot paj tokyx tanhmã ho nhũm amnhĩ xà htÿx kamã hamak o hikwÿ. Tã mê kot kapêr mar nê hkõt amnhĩ nhĩpêx xwÿnhjaja kot amnhĩ tomnuj ã amnhĩ pumu nê hkaga hkêt hã kot paj mã mê ho anê nê. Mãänên tanhmã mê homnuj to nhũm mê nitita pyrã nê amnhĩ xà htÿx kamã hamak o hikwÿ.

²³ Nê nitita kot paj kêp hkrajê nhĩmex pa. Ka mê apê ixkrajaja ja hã ixpumu nê ixte mê apiitã ahpÿnhã tanhmã mê ajamaxpêr to hkõt mê apumunh ã ixpumu. Nê ixte ahpÿnhã mê apiitã tanhmã mê ate amnhĩ nhĩpêx to ho apa hã mê apumunh xà hkõt tanhmã mê anhĩpêx to hã ixpumu.

²⁴ Na hte mê akwÿjaja akwÿjê rom nita kapêr ma nê ãm kuma nê hkõt amnhĩ nhĩpêx kêt nê. Nê mê kapêrja mê kot kãm: “Satanasti kapêr pimxur” anhÿr xwÿnhhta kõt nhũm mê amnhĩ nhĩpêx kêt nê. Na htem ixkõt pix mã amnhĩ nhĩpêx mex o ri pa. Tã ã mê ate ixkõt amnhĩ nhĩpêx anhÿr o apa xwÿnhjaja kot paj mê amã ja pix ã karõ ka mê inhma. ²⁵ Kêr ka mê arĩ ixkõt pix mã amnhĩ nhĩpêx o ri apa rãhã pa akupÿn mê awÿr wrÿ. ãm ja pix ã kot paj mê amã karõ.

²⁶ Nê kot kaj mê ate amnhĩ

tomnuj nê amnhĩ to htỳx nê arĩ inhmã hprãm xà hkôt amnhĩ nhĩpêx rãhã ty. Hãmri pa ja hã mẽ apumu nê nhỹrmã mẽ ate krĩ hkwỳ hkôt mẽ pa xwỳnhjê ho amnhĩptàr o apa kaxyw mẽ axunhwỳ. Ka mẽ apê mẽ õ pahihti nê inhmã mẽ ho amnhĩptàr o ri apa.

²⁷ Na pre Inhĩpêêxà ixte pika piitã hkôt ri mẽ pa xwỳnhjê ho amnhĩptàr kaxyw ixãm.

Tã kot paj nhỹrmã amnhĩ pyrã nê mẽ kaxyw mẽ axunhwỳ ka mẽ inhmã mẽ hamãr o apa.

Nhũm mẽhõ ixkapêr kwỳm ri tanhmã amnhĩ nhĩpêx to ka mẽ ja hã omu nê hã tanhmã ho. Te mẽ kot poti punuj mỳnh nê mẽnh nê hkrakrak pyrãk.

²⁸ Kot paj ã mẽ ate mẽ hipêx anhỹr o apa kaxyw mẽ axunhwỳ. No ãm ja pix kêt. Kot paj te ixte mẽ amã kanhêti hõ nhõr pyrãk o mẽ anhĩpêx. Arĩgro hkôt kanhêti no hpók rax japõx xwỳnhta kot paj te ixte mẽ amã õr pyrãk ka mẽ ixri atĩr tũm nê apa ho apa.

²⁹ E ixkrajaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêr anhỹrja ma nê kãm ajamaxpêr tỳx rãhã ho ri apa. Anê.

—E Juãw. Kêr ka ã Xijaxir kamã ixkrajê kaxyw ixkapêr ã kagã nê mẽ hwỳr mẽnh anê. Anê.

Hãmri pa kuma nê õ ri mẽ kãm hipêx nê mẽ hwỳr kumê.

3

Satre kamã Jejus kwỳjê hwỳr kagã

Rukre 12.35-40

¹ Nhũm Jejus arĩ inhmã kapêr nê inhmã:

—E hpãnhã Satre kamã ixkwỳjê jamãr xwỳnh wỳr kagã nê mẽ kãm ixkapêr jarê nê mẽ kãm:

Pa Satre kamã ixkrajaja. E ot pa mẽ awỳr ixpêr mẽ. Ixpê

inhĩhkra ho kanhêti pê 7 jamỳnh nê xãm xwỳnhta na pa. Nê ixpê inhĩhkra ho Tĩrtũm Karõ ãm pyxi htã te kamã kêp 7 jamỳnh nê ho ixãm xwỳnhta na pa mẽ amã ixkapêr.

Na pa hte mẽ ate tanhmã ri amnhĩ nhĩpêx to hã mẽ apumunh rãhã ho ixpa. Mẽ piitã kot axpên mã mẽ ate ixkôt amnhĩ nhĩpêx ã mẽ ajarênh tã ã mẽ ate amnhĩ nhĩpêx anhỹr kêt. Na ka htem ixkuhpa hã pix mã amnhĩ nhĩpêx o apa. Jakamã te inhmã ra mẽ atyk nê mẽ anhĩkwỳ pyrãk.

² Na ka htem ãm akrãnh mã ixkôt ri amnhĩ nhĩpêx nom Tĩrtũm mẽ wa ixkôt amnhĩ nhĩpêx mex kêt nê. Ra Tĩrtũm mẽ wa ixte ja hã mẽ apumunh mex. Mẽ ate kormã wa inhnoo mã tãm ri amnhĩ nhĩpêx kêt jakamã kwa mẽ tokyx ja hã amnhĩ pumu nê ate amnhĩ tomnuj mã anhũre nê wa ixkôt amnhĩ xunhwỳr tỳx nê.

³ Kêr ka mẽ amnepê mã kormã mẽ ate ixkôt amnhĩ nhĩpêx nyw ri mẽ kot ixkapêr o tanhmã mẽ ajahkre htoja mã ajamaxpêr nê amnhĩ tomnuj mã anhũre. Nê ixkapêr kôt pix mã mãn amnhĩ nhĩpêx o ri apa. Kot kaj mẽ anhỹr kêt kot paj nhỹrmã mẽ ajaêr pê akupỳn mẽ awỳr wrỳ nê ja hã tanhmã mẽ ato.

⁴ ãm mẽ agrêre nê amã ixkôt amnhĩ nhĩpêx prãm. Jao tãm ri amnhĩ nhĩpêx nê mẽ kot amnhĩ tomnuj xwỳnhjê hkôt amnhĩ nhĩpêx kêt nê. Te mẽ axê jakare kamã apa nê tanhmã amnhĩ pê htyk to hkêt pyrãk. Tã kot kaj mẽ nhỹrmã ixri mẽ axê jakare kamã apa ho apa. Ra mẽ ate ja ho anhỹr mã tãm kênã. Ja na Tĩrtũm kãm hprãm.

⁵ Nê krĩ piitã hkôt mẽ ate amnhĩ tomnuj nê amnhĩ to htỳx nê inhmã hprãm xà hkôt amnhĩ nhĩpêx rãhã atyk xwỳnh piitã kot ka mẽ nhỹrmã Tĩrtũm mẽ wa ixri

amex nê atîr tûm nê apa ho apa. Ra mē hixija Mēpahpām Maati nhō kagàja kamā na. Kamā mē atîr o mē atîr mā xwýnhjê nhîxi piitā hā kagà. Kot paj kagàta kamā aa mē anhîxi grānh kêt nê. Hāmri nê Inhîpêêxā mē kapêr o mē wrýk xwýnhjê mā mē ajarēnh o: “E mē jajê pumu. Ixkwý na mē.” Anhýr o mē kām mē ajarê.

⁶ E ixkwýjaja. Kot kaj mē amā ixkapêr mar prām hā kot kaj mē ā Tirtûm mē wa Ixkarō nhý hā ixte mē amā ixkapêr anhýrja ma nê kām ajamaxpêr týt rāhā ho ri apa.

Tā ām ja pix. Na hapêx. Anê.
—E Juāw. Kêr ka ā Satrejê mā ixkapêr ā kagà nê mē hwýr mēnh anê. Anê.

Hāmri pa kuma nê ô ri mē kām hā kagà.

Pirate kamā Jejus kwýjê hwýr kagà

Wam Tesarōn 2.13-16

⁷ Nhûm Jejus arî inhmā kapêr nê inhmā:

—E hpānhā Pirate kamā ixkwýjê jamār xwýnh hwýr kagà nhîpêx nê amē nê mē kām ixkapêr jarê nê mē kām kām:

Pa Pirate kamā mē ate ixkapêr mar kaxyw mē apikuprōnh xwýnhjaja. E ot pa mē awýr ixpêr mē. Inhmex o inhmex xwýnh na pa. Aa ixêx kêt nê ixpa xwýnh. Amnepê mā na pre mēhōja pahi Tawî mā ôrkwý mex ā saf jamār o pa. Tā pa hte urāk nê Inhîpêêxā Tirtûm nhō krî hwýr mē gjêx xā hā saf jamý nê ho ixpa. Ām papxipix inhō saf jakamā papxipix na pa hte mē ate ixkôt amnhî xunhwýr xwýnhjaja mē agjêx kaxyw mē amā kahê xā rê nê ixkra hkêt xwýnhjê pê kahê. Kot paj mē apê ixkrajê mā kahê xā rê ka mē hwýr agjê. Hāmri pa mē atā kahê nhûm ixkra hkêt xwýnhjaja tee ri kām mē akôt gjêx prām kaprý.

⁸ Na pa hte tanhmā mē ate amnhî nhîpêx to ho apa hā mē apumunh mex o ri ixpa. Mē agrêre htā na ka htem ixkapêr kôt amnhî nhîpêx mex nê aa ixk-aga hkêt nê. Jakamā kot paj te ixte mē amā Tirtûm nhō hakwakre kahê xā mēnh pyrāk o mē anhîpêx ka mē axāmnhîx ajamakêtkati nê ma mē kām Tirtûm kapêr o mē ahkre ho ri mē hkôt apa. Nhûm mē hkwyjaja tee ri ā mē ate amnhî nhîpêx anhýrja nê mē amā kapêr kaprý ka mē arî ho mē ahkre ho ri mē hkôt apa.

⁹ Nê mē anhō krî kamā mē akwýjaja na prem ra Satanasti hkôt amnhî xunhwý nê hêx rom mē amā amnhî to hêx nê mē amā: “E mē ixpê Ijaew mex jakamā kwa mē ixkapêr ma nê mē ixkôt amnhî nhîpêx.” Anhýr o mē amā karō htā nō ām mē kot Satanasti hkôt amnhî nhîpêx xwýnh na mē. Tā kot paj nhýrmā tanhmā mē homnuj to nhûm mē tee ri amnhî pumu nê akupým mē awýr mra nê mē akutā hkônkrā ho rōrōk nê hkrî nê mē amā: “Nā mē kajaja na ka pêr mē ixrom Jejus kôt amnhî nhîpêx. Mān kām mē ajapêê.” Anê.

¹⁰ Mē kot ixtā mē atomnuj týt nhûm mē ate amnhî xā htýt kamā ajamak tā aa mē umaj ixk-aga hkêt nê. Nê arî ixte mē amā mēmoj tā karō xā hkôt mē kutā amnhî to htýt rāhā arî ixkôt ri amnhî nhîpêx o apa. Jakamā mē kot nhýrmā mē kām ixkurê xwýnhjaja pika piitā hkôt tanhmā mē homnuj týt to nhûm mē amnhî xā htýt kamā ama. Tā kot paj mē anê mē omunh mex nê nhûm mē tanhmā mē ato hkêt nê ka mē amex nê ri apa ho apa.

¹¹ E kot paj tokyx akupýn mē awýr wrý nê mē ate ixkôt pix mā amnhî nhîpêx ā mē ato mex rax kumrêx. Jakamā kwa mē māmri ā amnhî nhîpêx anhýr o inhmā hprām xā hkôt pix mā amnhî

nhîpêx rāhā ty. Kot ka mẽ anhÿr kêt kot pa mẽ amā mẽmoj mex nhôr kêt nê.

¹² Nê kot kaj mẽ kot amnhî tomnuj xwÿnhjê kutā amnhî to htÿx nê inhmā hprām xā hkôt pix mā amnhî nhîpêx rāhā ty. Hā kot paj amnhî kôt mẽ ato mẽ axihtÿx nê ka mẽ aa ixkaga hkêt nê. Nê kot paj nhÿhÿnh mẽ atā mẽ inhîxi ho axkrunêpxi nê haxwÿ. Inhîpêxā nhîxi nê inhîxi nyw nê Inhîpêxā nhô krî nhîxija kot paj nhÿhÿnh mẽ atā haxwÿ. Tirtûm nhô krî mẽ kot kām: “Jeru-jarê nyw” anhÿr xwÿnhhta koja nhÿrmā tanhmā amnhî to nê ra kaxkwa rûm pika wÿr wrÿ.

¹³ E ixkwÿjaja. Kot kaj mẽ amā ixkapêr mar prām hā kot kaj mẽ ā Tirtûm mẽ wa Ixkarô nhÿ hā ixte mẽ amā ixkapêr anhÿrja ma nê kām ajamaxpêr tÿx rāhā ho ri apa.

Tā ãm ja pix. Na ra hapêx. Anê. —E Juāw. Kêr ka ā Pirate kamā ixkrajê mã ixkapêr ā kagā anê. Anê.

Hāmri pa kuma nê ô ri mẽ kām hā kagā.

Raxisej kamā Jejus kwÿjê hwÿr kagā

¹⁴ Nhûm pre Jejus arî inhmā kapêr nê inhmā:

—E hpānhā krî pê Raxisej kamā ixkrajê jamār xwÿnh wÿr kagā nhîpêx nê amê. Nê mẽ kām ixkapêr jarênh o:

Pa Raxisej kamā ixkrajaja. Ot pa mẽ awÿr ixpêr mẽ. Ām hāmri ixkapêr o ixpa nê aa ixêx kêt xwÿnhhta na pa. Jakamā ãm hāmri na pa hte Tirtûm kapêr o mẽ ajahkre o ixpa nê aa ja kaga hkêt nê. Pa na ixpê mẽmoj piitā hpār krax.

¹⁵⁻¹⁶ Na pa hte mẽ ate tanhmā amnhî nhîpêx to ho apa hā mẽ apumunh rāhā ho ixpa. Kop apu mẽ ate ixkôt amnhî nhîpêx mex

ronhÿx pa ja hā mẽ apumu nê ixkînh nê. Nom mẽ ate ā amnhî nhîpêx anhÿr kêt. No mãânên aa ixkaga hkêt nê. Na ka htem ri atÿx amnhî krā hkôt pix mã tanhmā amnhî nhîpêx to ho apa nhûm ja ixpê omnuj nê. Kot kaj mẽ arî ā amnhî nhîpêx anhÿr o apa pa hpānhā amnhî nê mẽ akurê. Te mẽ kot gô xenh nôkati janhir nê tee hkakinh nê akupÿm hkapîr pyrāk.

¹⁷ Mê ate inhmā hprām xā hkôt amnhî nhîpêx ā amnhî jarênh tā ā amnhî nhîpêx anhÿr kêt nê. Nê ixkapêr mar tÿx nê amnhî kaxyw inhmā ajamaxpêr mex kêt nê.

¹⁸ Kwa mẽ tokyx ja hā amnhî pumu nê akupÿm ixkôt amnhî xunhwÿr tÿx nê. Kêr pa ja hā mẽ apumu nê amnhî katut kôt mẽ ate amnhî tomnuj rê nê tanhmā mẽ akrā hto ka mẽ inhnoo mã tām amnhî nhîpêx mex o ri apa. Hāmri pa mẽ amā tanhmā amnhî to amnhîrît to ka mẽ aprî hā ixte amnhî nhîpêx ā ixpumunh mex nê ixkôt amnhî nhîpêx mex rāhā o ri apa.

¹⁹ Xā inhmā mẽ ajapê hkêt ā na pa ā mẽ amā ixkapêr anê? Nā inhmā mẽ apiitā mẽ ajapê htÿx kênā. Nom inhmā mẽ ajapê htā ka htem ixkôt amnhî nhîpêx kêt nê. Na pa tee ri amnhî tā mẽ apumu nê ja hā tanhmā mẽ atomnuj tÿx to. Tokyx mẽ ate amnhî tomnuj mã anhÿrer nê hpānhā tām amnhî nhîpêx kaxyw. Jakamā kwa mẽ tokyx ate amnhî tomnuj kaga nê akupÿm amnhî kaxyw inhmā ajamaxpêr ho ri apa.

²⁰ Na htem hkwÿjê nhôrkwÿ hwÿr gjêx kaxyw hakwa krem kām àkêr o kuhê nhûm mẽ kuma nê mẽ kām anê nhûm mẽ hwÿr agjê. Nê mẽ ixkre hkre kamā axpên mã kapêr o hkrî rÿ axpên mã kapêr pê mẽmoj to hkôm o hkrî. Ja pyrā nê ot pa mẽ ajamār

o ixpa. Mē ate inhmā anhÿr nhūm ixte mē akôt ixpa ho ixpa nhūm mē pahte axpēn to mex o papa kaxyw.

²¹ Kormā mē kot ixpīr kēt ri na pa pre mē kot amnhī tomnuj xwÿnhjê kutā amnhī to htÿx o ixpa. Amnhī to htÿx nē ri ixpa kamā ixtyk jakamā nhūm Inhīpēēxā akupÿm ixto ixtīr nē akupÿm amnhī wÿr ixto api. Hāmri nē amnhī nhīhkô hā mē ho amnhīptār ā hkrī xā kamā inhÿr pa ixkrī ho ixkrī nē ĩhkô hā mē piitā mē ho amnhīptār o ixkrī. Tā kot kaj mē atō ixpyrā nē ate amnhī tomnuj nē amnhī to htÿx nē. Nē inhmā hprām xā hkôt pix mā amnhī nhīpēx rāhā ty. Hā kot paj amnhī pyrā nē wa ixte mē ato amnhīptār ā ixkrī xāja kamā amnhī nhīhkô hā mē akrī ka mē wa inhīhkô hā wa inhmā mē ho amnhīptār o akrī.

²² E ixkwÿjaja. Kot kaj mē amā ixkapēr mar prām hā kot kaj mē ā Tīrtūm mē wa Ixkarō nhÿ hā ixte mē amā ixkapēr anhÿrja ma nē kām ajamxpēr tÿx rāhā ho ri apa.

Tā ām ja pix. Na hapēx. Anē.

—E Juāw. Kēr ka Raxisej kamā ixkrajē mā ixkapēr ā kagā nē mē hwÿr amē. Nē kagāja piitā krī hkwy kamā ahpÿnhā ixkwÿjê hwÿr arē kē mē kamā harē nē ixkapēr ma. Anē.

Nhūm pre ā Jejus inhmā kapēr anē. Pa kuma nē ô ri mē piitā mē kām hā kagā hpa.

4

Tīrtūm kot mē ho amnhīptār ā hkrī xā jarēnh

¹ Tā pa axte mēmoj pumu nhūm kaxkwa hwÿr mē gjêx xā hā hakwakreja amnhī kahē xā mē pa omu. Hāmri nhūm axte mēhō kapēr tÿx xwÿnhta. Te kot pifti kakōr tÿx pyrāk xwÿnhta axte inhmā kapēr nē inhmā:

—E amnē ixwÿr api pa mēmoj nhÿrmā kot tanhmā amnhī nhīpēx to hkukamā amā ho amnhīrīt ka omu. Anē.

² Hāmri nhūm Tīrtūm Karō tanhmā ixto nē ixto api pa kaxkwa kamā mēmoj pumunh o xa. Tīrtūm kot mē ho amnhīptār ā hkrī xā maatita pa pre omu. Nhūm kamā mēhōja nhÿ. ³ Kuk kamā hirā htÿx kumrēx. Te mēmo kēn kamrēk karÿr jaxēnh tÿx pyrāk. Nē kot mē ho amnhīptār ā hkrī xā puhā mǎxwÿxti grāgrāreja kām hipōk nē harir pa omunh o xa.

⁴ Nhūm hkrī xā maati puhā mē ho amnhīptār o hkrī xā kēp 24. Kamā mē aptār tūmjaja hkrī. Mē piitā ôr o mē ahkà htu nē ē jakare nē hkrī.

⁵ Nē Tīrtūm hkrī xā maati rūm na katōtōk nē hkrakrak nē haxēnh japā nē hikwÿ. Nē hkrī xā kapem kanē maati pixi kamā kwryt pē 7ja pōk rāhā ho kuhē. Kanēja te Tīrtūm Karō pyrāk.

⁶ Nē hkrī xā kapem mēmo te gō rax pyrākja hkarÿr jaxēnh tÿx kumrēx nē nō. Te ho kax karÿr jaxēnh tÿx pyrā nē hkarÿÿre. Nē hkrī xā puhā mēmoj tīr nē kuhē pē kwat kuhē. Nē ôkwa nē katut piitā hkôt no. Ām no xohtō rax kumrēx. Na pre ā mēmoj kēp kwatja no xohtō anē pa omu.

⁷ Wamta te kot mry pē rēawti pyrāk. Nē hkôt ja te kot mōx myti pyrāk. Nē hapu hā hkuk te panhī hkuk pyrāk. No hapu hā ja te kot àanhāhti htor kaxyw hara koror pyrāk.

⁸ Nē piitā hara kēp 6. Nē ĩ piitā kamā no. Nhūm prem Tīrtūm mā mex o mex ā grer rāhā ho kuhē nē aa pinhkrēnh kēt nē. Nē kām grer o:

Amex o amex Tīrtūm.

Nē axihtÿx o axihtÿx.

Nē aa ate amnhī tomnuj kēt kumrēx.

Amnepē mā kormā mēmoj kēt ri ka ra arāhā ri apa. Tā arī arāhā ri

apa xwýnh na ka. Kot kaj aa ajapêx
kêt nê.

ãm hãmri na ka hte mê ixto mex
râhã ho apa.

Nê amex o amex Tirtûm. Anê.

9-10 Nhũm prem xatã mê ho
amnhĩptâr hkrĩ xã kamã hkrĩ
xwýnhja mê kot kãm “Rãhã pa
xwýnh” anhÿr xwýnhhta mã ã grer
anhÿr o kuhê. Kãm mex o mex ã
grer pê tanhmã kot mê ho mex
to hã harê. Hãmri nhũm mê àptâr
tùm pê 24jaja mãânên kutã hkõn
krã ho rôrôk nê hipô hpa nê hkrĩ.
Nê amnhĩ krã rûm ôr o mê ahkãja
kwrÿ nê hpar pê haxwÿ. Kêp mê ô
Pahi Maati hã hã hpijaãm kaxyw
wamtajê pyrã nê mex o mex ã
harênh o hkrĩ nê kãm:

11 ãm hãmri na pa htem amex o
amex ã ajarê Tirtûm

Apê mê inhô Pahi Maati na ka.

Nê apê mê inhô Tirtûm na ka.

Na ka pre mêmoj piitã ho akato.
Axãhpumunh tÿx nê aja-
maxpêr tÿx o mêmoj piitã
amã hprãm xã hkôt ho
akator pa.

Jakamã na pa htem ã amex o amex
ã ajarênh anê. Mê ixrom ax-
ihtÿx mex kumrêx na ka hte
apa Tirtûm. Anê.

5

*Mê pahte amnhĩ tomnuj pãnhã
amnhÿrer xwýnh jarênh*

Juãw 1.29; Piriapos 2.5-11

1 Tã pa pre arĩ te kaxkwa kamã
mêmoj pumu. Mê ho amnhĩptâr ã
hkrĩ xã maatita kamã hkrĩ xwýnh
nhĩhkra kamã kagã pa omunh o xa.
Upôk rûm omu. No ãm axtem kagã
kaxkep na pre. Nê akutã hã kagã
nê menh ê ho ho htÿx xãja kêp 7.

2 Hãmri nhũm Tirtûm kapêr o
wryk xwýnh xihtÿx xwýnhja kapêr
tÿx kãm kapêr o:

—E mê atô na ate kagã mÿj pyr
nê ho htÿx xã hpôt mã tãm? Anê.

3 Hãmri nê tee ri mê piitã
mê hkapi nom nhũm ja kaxyw

mêhõ amrakati kumrêx. Kaxkwa
kamã amrakati nê pika kamã
mãânên amrakati nê pika hkrak
ri amrakati. Nhÿri mêhõ kot kagã
kaxkepta pyr nê hpôt nê omunh
mã tãm xwýnhja amrakati ho
amrakati.

4 Nhũm tee ri mêhõ japêr nom
mêhõ pumunh kêt nê. Pa tee ri ja
hã omu nê ixkaprĩ htÿx nê inhmÿr
o xa.

5 Hãmri nhũm pahi hõja ixpumu
nê inhmã:

—Kwa amÿr kêt nê. E mêhõ mÿj
pumu. Juta kanrêhã htãmnhwÿ xi-
htÿx xwýnhhta. Pahi Tawi kanrêhã
htãmnhwÿ te kêp mry pê rêãw xi-
htÿx pyrãk o hihtÿx xwýnh mÿj
pumu. Kot mê kãm hkurê xwýnhjê
kutã amnhĩ to htÿx nê mêmoj punuj
piitã ho hapêx kaxyw mã xwýnh
jakamã tapxipix na kot kagãta hpyr
nê ho htÿx xã hpôt par mã tãm. E ka
omu. Anê.

6 Hãmri pa kuma nê hwÿr rĩt nê
Jejusja pumu. Kot mê pahte amnhĩ
tomnuj pãnhã amnhÿrer xwýnhhta
mê ho amnhĩptâr o hkrĩ xã maati
kapem xa. Mêmoj htĩr pê kwat
mê àptâr tùm pê 24jê nhĩpôk ri xa.
Mê kãm hkurê xwýnhhaja kot hpĩr
nhũm ra akupÿm htĩr nê xa. Nom
ra axtem nê xa. àhpumunh tÿxja te
kot pahi xãhpumunh pyrãk. Nê hpàr
kêp 7. Nê no mãânên kêp 7. Noja te
Tirtûm Karô pyrã nê kêp pika piitã
hkôt pa xwýnh. ã Jesusja axtem nê
ãm anê pa omu.

7 Hãmri nhũm mê pahto
amnhĩptâr o hkrĩ xwýnhhta wÿr tẽ
nê ïhkra kamã kêp kagã kaxkepta
py.

8 Hãmri nhũm mê htĩr pê kwat mê
mê àptâr tùmjaja hpar pê hkõn krã
ho rôrôk nê hkrĩ hpa nê hipô nê
hkrĩ. Piitã wiorãwti jamÿ nê ôr o
xijere kamã mêhkuxwa xã jamÿ nê
o hkrĩ. Nhũm Tirtûm krajaja Tirtûm
mã tanhmã amnhĩ jarênh to nhũm
mê mar o hkrĩ. Te xijere kamã

mêhkuxwa xà hpâr o hkrî pyrâ nê mē kuma.

⁹⁻¹⁰ Jakamâ nhûm mē hkôn krâ ho hkrî xwÿnhjaja mē pahte amnhî tomnuj pânâ amnhîrer xwÿnhnta kutâ kâm grer o hkrî. Mē grer nyw o kâm gre nê kâm:

Na prem apî ka atyk o mē piitâ mē kot amnhî tomnuj pânâ amnhîrer pa.

Ahpÿnhâ pika piitâ hkôt mē urojê piitâ hpânâ amnhîrer pa.

Nê ahpÿnhâ ri mē kapêr xwÿnh kwÿjê piitâ mē hpânâ amnhîrer pa. Atyk o mē kot amnhî tomnuj piitâ hpânâ amnhîrer pa.

Jakamâ nhûm mē kot akôt amnhî xunhwÿr xwÿnhjaja kêp Tîrtûm kra nê ri pa.

Ka ra mē panhō Tîrtûm mǎ mē kêp patre kaxyw mē unhwÿ nhûm htem pika piitâ hkôt mē ho amnhîptâr o pa.

Tâ atyk o ate pika piitâ hkôt mē hpânâ amnhîrer jakamâ kapxipix na ate kagâta pyr nê ho htÿx xà hpôt mǎ tām. Anê.

¹¹ Hāmri nhûm Tîrtûm kapêr o mē wrÿk xwÿnhjaja nhÿhÿnh hapôj nê kuhê. Mē ohtô rax o ohtô rax. Ohtô rax o mē pajamexpêr jakrenh. Hāmri nê Tîrtûm kot mē ho amnhîptâr â hkrî xà maatija wÿr mra nê kâm hipôk pa. Nê mēmoj tîr nê kuhê xwÿnhjê mē mē âptâr tûmjê mǎ hipôk pa nê mē pahte amnhî tomnuj pânâ amnhîrer xwÿnhnta mǎ kapêr.

¹² Kàx pē kām kapêr nē kām:

Âm hāmri na pa htem amex o amex â inhgrer o ixkuhê.

Mē ixrom axihtÿx o axihtÿx.

Nê mēmoj piitâ anhō.

Nê ate mēmoj piitâ hkukamâ axâhpumunh par.

Nê amex o amex jakamâ na pa htem amâ amex pix â inhgrer o ri ixpa. Anê.

¹³ Tâ nhûm mēmoj piitâ Tîrtûm mē Jejus wa kām wa mex o wa mex â harê. Pika hkôt panhî nê mry nê àk nê mēmoj piitâ. Nê pika hkrak ri nê gô hkrak ri mēmoj piitâ. Nê mē htÿkjaja. Nhûm mē piitâ wa kām wa mex o wa mex â wa harê nê wa kām:

E ate mē ixto amnhîptâr â akrî xà kamâ akrî xwÿnh mē kot mē ixte amnhî tomnuj pânâ amnhîrer xwÿnh mē war amex o wa amex.

Nê war axihtÿx o war axihtÿx.

Nê war axâhpumunh o war axâhpumunh.

Na pa htem â war ajarēnh anhÿr rāhâ ixpa ho ixpa. Anê.

¹⁴ Hāmri nhûm mēmoj tîr pē kwatjaja mē kuma nê mē kām:

—Nâ âm hāmri na ka mē â wa harēnh anê.

Wa mex o wa mex kumrêx. Anê.

Hāmri nhûm mē âptâr tûmjaja Tîrtûm mē Jejus wa hpar pē hkôn krâ ho rôrôk nê hkrî hpa nê haxwÿja wa kām wa mex o wa mex â wa harê.

6

Kagâ ho htÿx xà pē 7 jarēnh

Matêwre 24.3-14; Sikûn Tesarôn 2.3; Wam Juâw 2.18

¹ Tâ pa arî kaxkwa kamâ mē pahte amnhî tomnuj pânâ amnhîrer xwÿnh kot tanhmâ amnhî nhîpêx to hâ omunh o xa. Nhûm kagâ kaxkepta py nê wam ho htÿx xà pô. Hāmri nhûm mēmoj tîr pē kwatjê hōja kapêr tÿx kumrêx. Te na katôtôk tÿx pyrâk o mēhōj mǎ kapêr nê kām:

—E amnê mē ixwÿr tē. Anê.

² Hāmri nhûm kawar jakajre nhÿhÿnh hwÿr hpôx o tē. Nhûm mēhōja ô kuxê mÿ nê hâ nhÿ nê tē. Hāmri nhûm nhām mēhōja hwÿr tē nê kām pahi hâ mē ahkâ htū. Hāmri nê kām tanhmâ kapêr to nhûm kuma nê mē kot kām Tîrtûm mē Jejus wa kurê xwÿnhjê nhîmex

par kaxyw hakêx nê ma pika hwÿr tèn wrÿ.

³ Hâmri nhÿm mē pahte amnhî tomnuj pānhā amnhîrer xwÿnhja wam kagā ho htÿx xāta kôt axte ja pôt. Hâmri nhÿm mēmoj tîr pê kwatjê hōja axtem mēhōj mā kapêr nê kām:

—E amnê mē ixwÿr tē. Anê.

⁴ Hâmri nhÿm kawar kamrêk mē hwÿr hpôx o tē. Nhÿm mēhō hā nhÿ nê tē. Nhÿm nhām mēhōja kām wapo gō nê ma pika hwÿr htēm nê wrÿk kaxyw hano. Kot hwÿr wrÿk nê pikap mē pa xwÿnhjê kurê huk kaxyw. Mē kot axpên par kaxyw ma mē hwÿr kumê. Hâmri nhÿm kuma nê wapota py nê hakêx nê ma mē hwÿr tèn wrÿ.

⁵ Hâmri nhÿm mē pahte amnhî tomnuj pānhā amnhîrer xwÿnhja kagā ho htÿx xā hō pôt. Na pre ra ho axkrut nê hpôt tā hpānhā axte hkôt ja pôt. Hâmri nhÿm mēmoj tîr pê 4jê hōta mēhōj mā kapêr nê kām:

—E amnê mē ixwÿr tē. Anê

Hâmri nhÿm kawar tykre mē hwÿr hpôx o tē. Nhÿm hā ÿr xwÿnhja mēmoj to peja xā hā parās mÿ nê o tē.

⁶ Hâmri nhÿm mē htîr pê kwatjê rÿm mēhōja kām kapêr nê kām:

—E kêr ka ma pika hwÿr mē hwÿr tèn wrÿ nê mē kām myt pyxi kamā mē apênh pānhā mē kām mēmoj to hkryre nê anhō parāsta kamā ho peja nê mē kām ôr o apa. Nom mē apkur xā hā orti nê wîhti ka mē kēp tanhmā ho hkêt nê. Anê.

Hâmri nhÿm kuma nê hakêx nê ma tèn mē hwÿr wrÿ.

⁷ Tā nhÿm mē pahte amnhî tomnuj pānhā amnhîrer xwÿnhja axte kagā ho htÿx xā hō hpôt. Na pre ra ho axkrunêpxi nê hpôt tā hpānhā axte hkôt ja pôt. Hâmri nhÿm mēmoj tîr pê kwat kot hitep xwÿnhja mēhōj mā kām:

—E amnê mē ixwÿr tē. Anê.

⁸ Hâmri nhÿm kawar rārāare mē hwÿr hpôx o tē. Nhÿm mēhō hā nhÿ

nê tē. Hā ÿr xwÿnh nhÿxi na pre kēp “Mēhtyk” anê. Hâmri nhÿm mēhōja kām kapêr nê kām:

—E ma pika hwÿr wrÿ nê tanhmā mē ho kê mē ohtô nê tanhmā amnhî to nê axkaprā. Kê mē hkwyjaja pijapu kamā axpên pa nê mē hkwyjaja prām xāj ty nê mē hkwyjaja tanhmā à htÿx kute kamā ty. Nê mēmo mry xoprêja mē hkwyjê pa. E ma mē hwÿr wrÿ nê tanhmā mē ho ho apa. Anê.

Hâmri nhÿm kuma nê hakêx nê ma pika hwÿr tèn wrÿ. Hâmri nhÿm mē htykjê papxāja tanhmā amnhî to nê te kot hā jêt nê ma hkôt mōr nê pika hwÿr wrÿk pyrāk pa pre arî omunh o xa.

⁹ Hâmri nhÿm mē pahte amnhî tomnuj pānhā amnhîrer xwÿnhja axte kagā ho htÿx xā hō hpôt. Na pre ra ho kwat nê hpôt tā hpānhā axte ja pôt. Hâmri nê hpôtja kôt pa ra mē kot Tîrtÿm mā mēmoj nhōr xā hā mēsti pumu. Nê hkrak ri mē hkarōjê pumu. Mē kot hkwyjê hkôt ri mē kām Tîrtÿm kapêr jarênh nê Jejus kēp mē ô Pahihti hā harênh o pa nhÿm mē kot hā mē hpar xwÿnhjê karōja pa pre mē omu. Nhÿm mē mēsti hkrak ri amnhî to Tîrtÿm wÿr o hkrî. ¹⁰ Kÿx pê kām kapêr nê kām:

—Ām hāmri amex o amex Pahi Maati. Aa ate mēmoj tā tanhmā amnhî to axêx to hkêt kumrêx. Kwa xā kot kaj tokyx pika hkôt mē kot mē inhîmex xwÿnhjaja tanhmā mē ixtā mē ho nā? Anê.

¹¹ Hâmri nhÿm mēhōja mē hwÿr tē nê mē kām mē ê jakajre gō nhÿm mē hagjê. Hâmri nhÿm mē kām:

—E mē mamrî atar akôkôt o akrî. Koja Tîrtÿm kormā tanhmā mē kot mē atomnuj xwÿnhjê ho hkêt nê. Kê mē axte mē apyrā nê mē akwyjê nhîmex măn. Koja mē Tîrtÿm jamaxpêr xā hkôt axte mē akwyjê pa nhÿm rî kormā mē ato hpim-rāatā tanhmā mē atā mē hipêx to. Jakamā e mē atar kutêp māmri akôkôt o akrî. Anê.

¹² Hāmri nhūm mē pahte amnhī tomnuj pānhā amnhīrer xwýnhhta axte kagà ho htýx xà hō hpôt pa omu. Na pre ra ho 5 nē hpôt tā hpānhā hkôt axte ja pôt. Hāmri nhūm pika htertēt týx kumrēx. Nē myyti ahtyk nē mytwryre te kēp mē hkamrō kamrēk týx pyrà nē ajēt.

¹³ Nē kanhēti tanhmā amnhī to nē axrē nē pikap rōrōk pa. Te kōk xāpēr týx nē kot pàrerekre kormā ràx tā kot kām hikranh par pyrà nē piitā rēnh pa nhūm rōrōk.

¹⁴ Hāmri nhūm kaxkwaja te kagà kaxkep pyrà nē amnhī to kaxkep o tē. Nē pika piitā hkôt kēn prēk nē hixēt prēk maati piitā te hkrī xà rūm hapôx nē mrar nē nhām hkrī pyràk. Nhūm gō hipôk piitā haxwýja te hikwý xà rūm hapôx nē mrar nē nhām hikwý pyràk. Pika htertēt týx nhý hā ã mēmoj amnhī nhīpēx anē. ¹⁵ Hāmri nhūm pika hkôt mē piitā tee ri mēmoj ã amnhī nhīpēx anhýr ã omu nē kām ma nē htertēt týx kumrēx. Mē ho amnhīptār xwýnhjaja nē pōristi krāhtūmjaja nē mē kot amnhī to rūnh xwýnhjaja nē mē hihtýx xwýnhjaja nē mē kām mē àpēnh xwýnhjaja nē amnhī mā mē àpēnh xwýnhjaja. ãm piitā mēmoj ã kot amnhī nhīpēx anhýr ã omu nē tee ri amnhī kukamā hamaxpēr nē kām ma ho kām ma. Hāmri nē hpimxur kaxyw ma kēn prēk kre japēr o hprôt nē mra. ¹⁶⁻¹⁷ Hāmri nē amnhī to kēn prēk wý nē kām:

—Kwa na ra mē ixto amnhīptār ã hkrī xà maati kamā hkrī xwýnh mē kot mē ixte amnhī tomnuj pānhā amnhīrer xwýnhhta wa mē íxkamā gryk týx kumrēx. Ra wa kot tanhmā mē ixtomnuj to xà hā arīgrota kato. Koja wa mē ixtomnuj týx nē pa mē kutā hkēt nē. Kwa tokyx mē inhīpy arōrōk nē wa kēp mē ixto amūxu. Anē.

7

Mē kot Tirtūm mā hkrajē kagà Apokarip 9.4

¹ Tā pa arī kaxkwa kamā mēmoj pumu. Nhūm Tirtūm kapēr o mē wrýk xwýnh pē kwatja piitā ahpýnhā pika nhītep xà hkôt kōk jatúr xà hā hamý nē ho kuhē. Pika piitā hkôt kōk hpinhkrēnh par nē àpēr kēt nē gō xujanār kōt àpēr kēt kaxyw hatur xà hā hamý nē ho kuhē. Nē pā piitā hkôt àpēr nē tanhmā pī hkwy ho pymaj nhūm mē ã amnhī nhīpēx anē nē hatur xà hā hamý nē ho kuhē. ² Na pre ra Tirtūm ja hā mē kām karō nē mē kām:

—E kēr ka mē ma pika hwýr wrý nē pika nē gō xujanārja tanhmā wa homnu hto. Anē.

Hāmri nhūm mē kuma nē hwýr wrý nē kormā nē kōk ho htýx. Hāmri nhūm Tirtūm kapēr o wrýk xwýnhjē hōja myt japôx xà rūm mē hwýr hpôx o tē. Nē íhkra kamā mē kot Tirtūm kra hā mē hixi jarēnh xà hā kagàta py nē o tē. Hāmri nē kax pē mē kot pika mē gō xujanār homnu mā xwýnhjē mā kapēr nē mē kām:

³ —Kwa taxy pa Tirtūm krajē nhōkrā kagà hpa mán. Kēr ka mē omu nē mē tapxipixjaja tanhmā mē ho hkēt nē. Anē.

⁴⁻⁸ Hāmri nē mē hkagà pa. Ahpýnhā Ijaew pigrānh xwýnhjaja mē ho ohtō rax kumrēx nē tanhmā mē hkagà hto. Pa tanhmā mē kute hā mē harēnh ma nhūm xep mē ohtō rax kumrēx.

Juta kamā mē kēp 12.000.

Nē Rupē kamā mē kēp 12.000.

Nē Gax kamā mē kēp 12.000.

Nē As kamā mē kēp 12.000.

Nē Natari kamā mē kēp 12.000.

Nē Manase kamā mē kēp 12.000.

Nē Simeāw kamā mē kēp 12.000.

Nē Rewi kamā mē kēp 12.000.

Nē Isaka kamā mē kēp 12.000.

Nē Jepurō kamā mē kēp 12.000.

Nē Juje kamā mē kēp 12.000.

Nē Pējami kamā mē kēp 12.000.

Ã mē ohtô rax kot anhÿr. Hāmri nē mē piitā mē pikamÿr par kām mē kēp 144.000. Piitā kēp Apraāw kanrēhā htāmnhwÿ na pre mē. Tā ā axpēn kaxyw mē ohtô rax kumrēx kot anhÿr tā nhūm mē hkagā pa.

*Tirtūm kra hkwÿjê jarēnh
Apokarip 14.1-5*

⁹ Tā pa axtem mēmoj pumu. Nhūm mē ohtô rax nē Tirtūm nhō krī kamā kuhê. Ahpÿnhā ri pika piitā hkôt mē urojaja. Nē ahpÿnhā ri mē kapēr xwÿnhjaja nhūm prem pika piitā kurūm kot mē ho amnhīptār ā hkrī xā maati ja kamā hkrī xwÿnh pē Tirtūm mē mē pahte amnhī tomnuj pānhā amnhīrer xwÿnhja wa kutā kuhê. Mē ohtô rax kumrēx jakamā pa tee ri mē piitā mē ho kōta hpar prām kaprÿ. Nē piitā ē jakare kamā kuhê. Nē hkīnh nē hkīnh xàj pô hkwÿ jamÿ nē ho àpēr o kuhê.

¹⁰ Hāmri nē kÿx pēê Tirtūm mē Jejus wa kām kapēr nē wa kām:
Héxta waa nē. War amex o war amex Pahi Maati.
Na ka pre Akra Jejus kukwak ri mē ixte amnhī tomnuj ā tanhmā mē ixto hkēt nē.
War ajamē mē ixkamā axukapri rāhā ho apa xwÿnh na ka wa.
Jakamā pa mē inhmex nē war awÿr api nē war akuri inhmex nē ijamakētkati nē ixpa ho ixpa.

Ãm hāmri na ka hte wa mē ixto mex rax kumrēx o apa. War amex o war amex. Anē.

¹¹ Hāmri nhūm Tirtūm kapēr o mē wrÿk xwÿnhjaja Tirtūm krī xā mā hipôk nē hkōn krā ho rôrôk nē hkrī hpa. Nē mē àptār tūmjê mē mē htīr nē kuhê xwÿnhjaja mē ĩhkô hā kām hipôk nē wam tajê pyrāk nē hkōn krā ho rôrôk nē hkrī. Hāmri nē mē ohtô kot Tirtūm mē Jejus wa kām kapēr ā mē kuma hāmri nē Tirtūm ā hpijaām kaxyw hpar pē htu mÿr pē hikwÿ hpa nē kām mex o mex ā harē nē kām:

¹² “Ãm hāmri na mē ā ajarēnh anē Tirtūm. Amex o amex.

Na ka hte mē ixto mex o apa.
Mē ixrom axàhpumunh o axàhpumunh.

Nē mē ixrom axihtÿx o axihtÿx.
Jakamā na ka hte mē ixpiitā mē ixto mex kumrēx rāhā ho apa.

Ã ate anhÿr rāhā o rāhā jakamā na pa htem amā amex o amex ā ajarēnh rāhā ho ixpa.” Anē.

¹³ Hāmri pa mē omunh o ixām rôm nhūm mē àptār tūmjê hōja ixwÿr tē nē mē ē jaka kamā mē hkīnh xàj pô jamÿnh nē ho kuhê xwÿnhjê hā ixkukja nē inhmā:

—E mǎn ate mē ē jakare kamā mē kuhê xwÿnh mÿjê pumunh nà?
Tanhmā na prem amnhī nhīpēx to nē amnē api? Xà ate mē omunh? Anē.

¹⁴ Hāmri pa kuma nē kām:
—Nà ixte mē omunh kēt. Kēt ka na ixrom ate mē omunh. Anē.

Hāmri nhūm inhmā mē harēnh o:
—Nà na pre mē hkwÿjaja Jejus ā mē homnuj tÿx kumrēx nē mē kupa. Tā mē kēp Jejus kwÿ jakamā na pre mē nē mē kot amnhī tomnuj o hapēx nē te amnhī kamrô ho mē nē mē kot amnhī tomnuj piitā kuhōnh par pyrāk o mē hipēx. Jakamā nhūm mē ē jaka kamā mex nē hkīnh tÿx nē pa.

¹⁵ Nē Tirtūm kot mē pahto amnhīptār ā hkrī xā maati kutā kām mex o mex ā harēnh rāhā ho kuhê.

Na hte mē ho mex rāhā ho pa. Mē hkôt pa ho pa jakamā koja mēmoj tanhmā kēp mē ho hkēt nē.

¹⁶⁻¹⁷ Nē mē pahte amnhī tomnuj pānhā amnhīrer xwÿnh kot Tirtūm krī xā maati kamā ām xwÿnhhta na hte mē hamār mex rāhā ho mē hkôt pa.

Te mē kot mē hkrit jamār mex pyrāk.

Nē te mē kot mē hkrit kōm o pa nhūm htīr nē pa pyrāk.

Koja mẽ kuri htĩr tũm nẽ hkõt pa ho pa.

Nẽ axte kãm prãm kêt nẽ.

Nẽ axte kãm kôr kêt nẽ.

Nhũm arĩgro htỳxja axte mẽ hkà ho hxêt kêt nẽ.

Koja Tĩrtũm te mẽ kot mẽ hkra no kagô nhĩnhĩnh par pyræk o mẽ hipêx nhũm mẽ axte hkaprĩ nẽ mỳr o pa hkêt nẽ.

Pãnhã hkĩnh nẽ mex rãhã kuri pa ho pa. Anẽ.

8

Kagà kaxkep o htỳx xà kot hitep jarẽnh

¹ Tã pa arĩ kaxkwa kamã mẽmoj pumu nhũm mẽ pahte amnhĩ tom-nuj pãnhã amnhĩrer xwỳnhja kagà kaxkep o htỳx xà kot hitepta põt. Hãmri nhũm kaxkwa kamã mẽmoj piitã hpinhkrẽnh pa nhũm mẽhõ kapër kêt kumrêx. Nẽ hpinhkrẽnh par o ra hã ahtũm ry mex nẽ.

² Hãmri nhũm Tĩrtũm kutã kapër o wrỳk xwỳnh pẽ 7 nẽ mẽ kuhẽ xwỳnhja. Nhũm kapër o wrỳk xwỳnhjẽ hõja mẽ hwỳr tẽ nẽ mẽ piitã mẽ kãm pifti gõ.

³⁻⁴ Hãmri nhũm kapër o wrỳk xwỳnhjẽ hõja ôr o xijere py nẽ Tĩrtũm mã mẽhkuxwa xà ho xêt xà hã mės kunĩhti hwỳr o tẽ. Mẽ ho amnhĩptar ã hkrĩ xà maati kutã ôr o mēstija wỳr o tẽ nẽ kuri o xa. Hãmri nhũm mẽ kãm kamã mẽhkuxwa xà hkwy runh rax nẽ nhũm mēsti hã ho xêt o xa. Rôm nhũm Tĩrtũm krajaja Tĩrtũm mã tanhmã amnhĩ jarẽnh to. Jakamã nhũm mẽhkuxwa xà xêt kũm mẽ mẽ kot Tĩrtũm mã amnhĩ jarẽnh xaja mẽ nhũm ahkà nẽ Tĩrtũm kapër o wrỳk xwỳnh nhĩhkra kamã xijere rũm Tĩrtũm kutã kàx mã àpir o pa.

⁵ Hãmri nhũm kapër o wrỳk xwỳnhja xijere kamã kuwy hpøk kwỳ ho nyt nẽ ahtar mã pika hwỳr kumẽ nhũm ma tẽ nẽ pikap tẽm nhũm pika htertet tỳx nẽ kamã na katõtõk nẽ haxênh nẽ hkrakrak.

Mẽ kot pifti kakôr ã mẽ harẽnh

⁶ Hãmri nhũm Tĩrtũm kapër o wrỳk xwỳnh pẽ 7 kot pifti jamỳnh xwỳnhja ra kot pifti kakôr mã.

⁷ Jakamã nhũm wamta õ pifti kakô nhũm na mẽ te kot jêr krã jakot pyræk xwỳnh mẽ kuwy te kot mẽmo kamrô kamrêk pyræk xwỳnhhta pikap rôrøk pa. Nẽ nhỹhỹnh pika hkwy ho rax nẽ ho kaxàr pa. Nẽ põtĩ nẽ akunĩ hkwy ho rax kumrêx nẽ ho kaxàr pa. ⁸ Hãmri nhũm wam ãm xwỳnh nhĩjuk ri ãm xwỳnhja õ pifti kakô nhũm mẽmoj te kẽn krã hprêk pøk pyrã nẽ kaxkwa rũm ahtar mã tẽ nẽ gõ xujanãr nhĩkjẽ kamã hpøk rãhã tẽn mrõ. Hãmri nhũm gõ nhĩkjẽ kamã gõja mẽmo hkamrô hã amnhĩ jahkre hpa. ⁹ Jakamã nhũm gõx kãm mẽmoj htĩr nẽ ri mrar xwỳnhja pikaprãr pa. Nẽ gõx kãm pãr gõ krãhkã hã pa xwỳnhja haxwỳja gjêx pa. Nẽ pãr kãm mẽ pa xwỳnhja haxwỳja hagjẽ nẽ pikaprãr pa. No nhũm gõ mex kãm pãr kãm mẽ pa xwỳnhja mẽ kurom arĩ htĩr nẽ.

¹⁰ Tã nhũm wam ãm xwỳnhta wa hijuk ri ãm xwỳnhja õ pifti kakô. Hãmri nhũm kanhêti rax kumrêxja axta nẽ hpøk o ma ahtar mã tẽn pikap tẽm nẽ pyhti nẽ hino hkwy ho ohtõ nẽ homnu hpa. ¹¹ Kanhêti nhĩxi pẽ na pre “mẽmoj xỳ xà” anhỹr jakamã nhũm tẽm nẽ pyhti nẽ hino hkwy ho ohtõ nẽ homnu pa. Nhũm prem hwỳr mra nẽ hkwy janhi nẽ ho ixkõ nhũm ý nẽ nhũm mẽ ohtõ nẽ ho ixkõ nẽ axkaprã.

¹² Hãmri nhũm hpãnhã Tĩrtũm kapër o wrỳk xwỳnhjẽ hõja õ pifti kakô. Na pre ra ho axkrunẽpxi nẽ hkakôr tã hpãnhã ra axte hõ ja kakô. Hãmri nhũm mẽhõja tẽ nẽ myyti kura nhũm hkwy ahtyk nẽ hirã hkêt nẽ. Nhũm mytwrỹre nẽ kanhêti mã ho anẽ nẽ myyti pyrã nẽ hkwy ahtyk nẽ hirã hkêt nẽ harir. Jakamã nhũm kamãt kãm

hirã mex kêt nê. Nê arĩgro hã myytija haxwýja hirã mex kêt nê.

¹³ Hãmri pa kaxkwa kamã àanhãhti pumu nhũm kýx pê ri htor o pa pê tanhmã kapêr to nê kapêr o:

—Hêxta waa nê. Kormã kot pifti kakôr xwýnhjaja axkrunêpxi nê kormã hkakôr kêt nê. Koja mẽ tokyx hkakô nhũm pika hkôt ri mẽ pa xwýnhjaja amnhĩ xà htýx kamã hamak týx o pa. Na pa tee ri mẽ hkukamã ijamaxpêr nê inhmã mẽ hkaprĩ htýx nê. Hêxta waa nê. Koja mẽ omnuj týx kumrêx. Anê.

9

¹ Tã pa axte mẽmoj pumu. Nhũm Tirtũm kapêr o wrýk xwýnhjê hõ õ pifti kakô. Na prem ra ho kwat nê hkakôr tã hpãnhã axte hõja ja kakô. Hãmri nhũm kanhêti hõ axta nê pikap tẽm kurê kumrêx nhũm mẽhõja omu nê hwýr tẽ nê kãm mẽmoj tã saf gõ. Satanasti jagjênh xà hã ahkre xupým o htýx xà hã safja nhũm kanhêti mã kugõ.

² Hãmri nhũm kupy nê ahkrehtita wýr o tẽ nê kahê xà mẽ nhũm kurũm kuwy hkũm hapõx rax nê. Nê ma kãx mã àpir o pa nê myyti hpro hpa nhũm kamãt kó rax kumrêx.

³⁻¹¹ Nê kuwy hkũmja rũm mẽmoj te krit pyrãk xwýnh kwýjaja pikap rôrôk nê kuhê. Te kot krit pyrãk tã mẽ hkuk te panhĩ hkuk pyrãk. Nê mẽ hkrã hkĩ te mẽnijê hkrã hkĩ japjê pyrãk. Nê ôr o mẽ ahkã jagjê. Nê mẽ wa japjê htýx kumrêx. Te rêãwti xwa japjê pyrãk. Nê kãx o mẽ hinô hkã. Nhũm mẽ htor o hara hkoko htýx o mra. Te ho kawar xohtô pijapu kaxyw kot mẽ hkjênh xà kamã mẽ htur nê mẽ hkjênh o hprõt nhũm hkoko htýx pyrãk. Nê mẽ hkamnhwýr o pa kaxyw mẽ hanhyja te kot makre janhy pyrãk. ã kriitija kot anhýr. Nê te nhýhým oprê kaxyw nojarêt nê mẽ hkrit kawar hã hikukrêx mex rênh pyrãk. Mẽõ pahija ahkre

xupýmta kamã kêp mẽ hkrãhtũm. Ijaew kapêr kãm hixi pê “Apatõ.” No Gres kapêr kãm kêp “Aporiãw.” No mẽ pakapêr kãm kêp “mê hpar o pa xwýnh.” Hãmri nhũm Tirtũm kriiti mã kapêr nê mẽ kãm:

—E kêr ka mẽ ma pika piitã hkôt te makre kot amnhĩ nhĩpêx pyrã nê ri mẽ hkôt mẽ hkamnhwýr o apa. ã amnhĩ nhĩpêx anhýr o mẽ atã mytwrý pê sĩk. No ãm kêr ka mẽ hpar kumrêx kêt nê. ãm mẽ kot amnhĩ xà htýx kãm hamak pix kaxyw tanhmã mẽ ho ho apa. Te makre kot mẽ hkamnhwýr nhũm à htýx kumrêxta pyrãk. No mẽ ate mẽ hkamnhwýr nhũm mẽ hkamnhwýr xãja koja à htýx o makre kot mẽ hkamnhwýr jakre. Nom ra mẽ kot Tirtũm kra hã mẽ hkagã xwýnhjaja kêr ka mẽ omu nê ãm mẽ omu nê tanhmã mẽ ho hkêt nê. Mẽ kêp ixkwý na mẽ. Nê pô nê prãt ka mẽ ãm omu nê tanhmã ho hkêt nê. ãm mẽ kot panhĩ nhõkrã kagã hkêt xwýnh pixjaja ka ã mẽ hipêx anhýr o ri mẽ hkôt apa. Nom kêr ka mẽ hpar kêt nê. Kê mẽ tee ri amnhĩ xà hã maj kãm tokyx htyk nê hapêx prãm hkaprý ho pa. E ma mẽ hwýr mra nê ã mẽ hipêx anhýr o ri apa. Anê.

Hãmri nhũm mẽ kuma nê ma mẽ hwýr mra.

¹² Na ra pika hkôt wam mẽ homnu xà pyxi nê hapêx. No ãm arĩ hamêxkrut.

¹³ Jakamã nhũm Tirtũm kapêr o wrýk xwýnhjê hõja axte õ pifti kakô. Na prem ra ho sĩk nê hkakôr tã axte hkôt hõja hkakô. Nhũm Tirtũm kutã ôr o mẽsti rũm mẽhõja tanhmã kapêr to. Mẽsti janhã rũm kapêr. ¹⁴ Pifti kakôr xwýnhhta mã kapêr nê kãm:

—E na ra mẽ kot mẽ hkwyjê nhĩmex ã arĩgrota kato. Jakamã kêr ka ma pyhti pê Erax wýr wrý nê gõ mý ri Satanasti mã mẽ àpênh xwýnh pê kwatja pumu. Na prem ra mẽ hpa hpre nhũm mẽ gõ mýr ri

arī hkrī ho hkrī. Ka mẽ omu nẽ mẽ kãm mẽ hpa hpre xà hpôt pa kẽ mẽ ma mẽ hkôt ri mẽ hpar o pa. Anẽ.

¹⁵ Na pre ra Tirtũm mẽ kot mẽ hkwyjẽ nhĩmex o pa kaxyw mẽ kurẽ nẽ gô mỳ ri mẽ unhwỳ nhũm mẽ kormã mẽ hpar xà hã arĩgro jamãr o hkrī. Jakamã nhũm ã pifti kakôr xwỳnhhta mã mẽ harẽnh anẽ nhũm kuma nẽ ma tẽ nẽ mẽ hwỳr wrỳ nẽ mẽ kãm mẽ hpa hpre xà hpôt pa. Hãmri nhũm mẽ ma pika piitã hkôt ri mẽ hpar o mẽ hkôt pa. Nẽ mẽ ho ohtô rax kumrẽx nẽ mẽ himex. ¹⁶ Nẽ ma amnhĩ kôt põristi ho ohtô rax nẽ o pa. Piitã kawar ã hkrī nẽ mẽ hkôt hprôt nẽ hkoko ho mra. Mẽ kęp 200.000.000 hã mẽ harẽ pa mẽ harẽnh ma. Mẽ ohtô rax o mẽ ohtô rax.

¹⁷ Na pa pre arĩ te ixpimtir kãm mẽ omunh pyrãk. Nhũm kawar ã mẽ hkrī xwỳnhjaja. Mẽ hinô kàja axtem kàx o. Nẽ hkamrẽkja te kuwy hpôk kamrẽk pyrãk. Nẽ rãrãrja te mẽ hkurôt kane xà pẽ ẽsôf rãrãr pyrãk. Nẽ kakrã htyk. Æ kàx o mẽ hinô hkã kot anhỹr. Nẽ mẽ hkrit kawarti hkrãja te rããwti krã pyrãk. Nẽ mẽ hakwa rũm kuwy hpôk mẽ ẽsôfti mẽ kuwy hkũm axpẽn kôt hapôx o pa. ¹⁸⁻¹⁹ Nẽ kawarti jamy axtem te kęp kagã xoprẽ hkrã pyrãk nhũm mẽ hamy ho mẽ hkamnhar o mẽ kupa. Nẽ mẽ hakwa rũm kuwy hkũm mẽ kuwy hpôk mẽ ẽsôfti hapôx xwỳnhhta mã mẽ ho anẽ nẽ. Jakamã nhũm kawartijaja mẽ hkôt ri hamy mẽ hakwa ho mẽ hpar o pa nẽ mẽ ohtô rax kumrẽx nẽ mẽ himex.

²⁰⁻²¹ Tã nom nhũm arĩ mẽ htĩr nẽ ri mẽ pa xwỳnhjaja. Mẽ kot mẽ hkwyjẽ hpar kêt xwỳnhjaja hãmri ja hã mẽ omunh tã arĩ amnhĩ tomnuj o pa nẽ kãm urer kêt nẽ. Arĩ tanhmã amnhĩ tomnuj to ho pa. Axpẽn pẽ hprõ nẽ mjẽn o amnhĩkati nẽ axpẽn pẽ ahkĩ. Nẽ axpẽn par o ri pa nẽ tanhmã axpẽn xyhto ho pa. Æ htỳx ri amnhĩ nhĩpẽx anhỹr o pa nẽ

kãm urer kêt nẽ. Æm Satanasti hkôt pix mã ri amnhĩ nhĩpẽx o pa. Nẽ amnhũm sãnti hkwy nhĩpẽx. Pĩ ho hipẽx nẽ kàx o hipẽx nẽ kẽn o hipẽx. Nẽ hipẽx pa nẽ amnhĩ to hwỳr o pa. Nom mo kot mẽ mar kaxyw sãnti jamak kre? Nẽ kot mẽ omunh kaxyw mo no? Nẽ ri mrrar nẽ mẽ ho utar kaxyw mo hte? Na htem arĩ ã amnhĩ to hwỳr kaprỳ anhỹr o pa.

10

Kagã kaxkep grire jarẽnh

¹ Tã pa arĩ mẽmoj pumu. Nhũm axte Tirtũm kapër o wrỳk xwỳnh xihtỳxjẽ hõja pika hwỳr wrỳk o tẽ. Nẽ ẽja kakrã ho na pre. Nẽ hkrã mỳ ri mãxwỳxti ajêt. Nẽ hkuk te myt no kamã hirã htỳx pyrãk. Nẽ akutã hte kamã te kuwy hpôk pyrãk. ² Nẽ ãhkra kamã kagã kaxkep grire ra pipôt nhũm ma o tẽ nẽ o wrỳ nẽ o xa. Nẽ gô xujanãr kãm upôk rũm hte xãm nẽ kỳx pẽ amgrã kamã apke rũm hte xãm nẽ o xa pa ixprĩ hã omu.

³ Hãmri nhũm kàx pẽẽ amỹra. Te rããw hkãr tỳx pyrãk. Nhũm hpãnhã kaxkwa kamã mẽhõja kãm kapër. Te na katõtõk o 7 wẽs pyrãk pa ixprĩ hã tanhmã kapër to hã kuma. ⁴ Hãmri nẽ ra mẽ amã ã kagã kaxyw nhũm mẽ ja nẽ inhmã kapër nẽ inhmã:

—Kwa nã kwarĩ ja kot kaj hã kagã hkêt nẽ. Æm ja pix kot kaj akwỳjẽ mã hã kagã hkêt nẽ. Æm kapxipix mãn ama nẽ ri hã apa.

Anhỹr jakamã pa mẽ amã hã kagã hkêt nẽ. Æm papxipix kuma nẽ ri hã ipxa.

⁵ Tã nhũm Tirtũm kapër o wrỳk xwỳnh kot gô xujanãr kãm upôk rũm hte xãm nẽ apke amgrã kamã ãm xwỳnhhta hãmri Tirtũm nhỹ hã kapër kaxyw nẽ kãnhmã ãhkra pẽ. ⁶⁻⁷ Tirtũm pẽ kaxkwa nẽ pika nẽ gô xujanãr o kator nẽ kamã kot mẽmoj piitã ho kator xwỳnhja. Nẽ htĩr rãhã

nê pa ho pa xwÿnhja. Nhÿm ÿ hã kapêr nê kapêr o:

—E hãmri. Amnepê mã na pre Tirtÿm ÿ hã mē kãm kapêr o ri mē pa xwÿnhjê mã tanhmã amnhĩ kukamã amnhĩ jarênh to. Tanhmã kot pika piitã hkôt mē pa xwÿnhjê nhĩpêx to hã amnhĩ jarê. Nê mēmo arĩgro hã mē kot amnhĩ tomnuj mÿrapê tanhmã kot mē hipêx to hã mē hkukamã mē hã amnhĩ jarê. Tã ra ã mē hipêx anhÿr xà hã arĩgro kato. Jakamã koja kapêr o wrÿk xwÿnh kot hitepta õ pifti kakô hãmri nhÿm mēmojja ã amnhĩ nhĩpêx anhÿr kurê kumrêx. ãm hãmri na pa mē amã ja jarê. Anê.

⁸ Pa mar o ixãm rôm nhÿm wam inhmã kapêr xwÿnhhta axte inhmã kapêr nê inhmã:

—E ma pika hwÿr wrÿ nê gô xujanãr kãm upók rÿm hte xãm nê amgrã kamã apke rÿm hte xãm xwÿnhhta wÿr tē nê kēp kagã kaxkep grire pipôt xwÿnhhta py. Anê.

⁹ Hãmri pa kuma nê ma hwÿr wrÿ nê hã kuwÿ nhÿm inhmã kugõ nê inhmã:

—E mĩ. Apy nê akrê. ànhre. Te kot menh xành pyrãk. Nom kot kaj akrê nê anhõhy xà. Nom mãmrĩ apy nê akrê. E mĩ. Anê.

¹⁰ Hãmri pa kēp kupy nê hkaki nhÿm ànhre. Pa hkrêr pa hãmri nê inhõhy xà kurê kumrêx.

¹¹ Hãmri nhÿm kot inhmã õr xwÿnhhta inhmã:

—Nã ãm hãmri na ka apy nê akrê. Jakamã kêr ka ano ho ate mēmoj piitã omunh xwÿnhja nê ajamak o ate mēmoj mar xwÿnhja nê ate tanhmã Tirtÿm kapêr mar toja ka piitã hã kagã hpa. Hãmri nê ate omunh xà hkôt akwÿjê mã piitã harênh o apa. Mē kot nhÿrmã Tirtÿm kot tanhmã mē piitã mē hipêx to hã harênh mar kaxyw. Ahpÿnhã ri pika piitã hkôt mē urojê piitã koja nhÿrmã ã mē hipêx anê. Ahpÿnhã ri mē kapêr xwÿnh piitã. Nê mē õ pahijaja. ãm

mē piitã koja nhÿrmã ã mē hipêx anê. Anê.

11

Tirtÿm nhÿ hã kapêr xwÿnh pi-jakrut wa harênh

¹ Tã nhÿm mēhõj inhmã mēmoj to mĩdi xà hã pĩ ryre gõ nê inhmã:

—E ja py nê Jerujarê hwÿr wrÿ nê kamã Tirtÿm mã amnhĩ jarênh xà hã ixkreja o mĩdi. Nê ixkre kamã amnepê mē kot amnhĩ tomnuj pãnhã Tirtÿm mã õwêhti nhõr xà hã mēstita mã ho anê nê ho mĩdi. Nê ixkre kamã mē kot Tirtÿm mã amnhĩ jarênh o mē hkrĩ xwÿnhjaja ka aprĩ hã mē ho kõta.

² —No ixkre kapem pikaja ka ho mĩdi hkêt nê. Ra Tirtÿm kot mē kot amnhĩ tomnuj xwÿnhjê mã hkaga jakamã koja mē htÿx ri kãm hprãm xà hkôt tanhmã homnu hto ho pa. Nê Jerujarê piitã hkôt ri homnu ho paja ã hã amgrã axkrunêpxi nê hkôt mytwrÿ kēp 6.

³ —Koja Tirtÿm ma ÿ hã kapêr xwÿnh ho hamêxkrut nê mē hwÿr wa kumê nhÿm wa ma mē hwÿr wrÿ nê mē kãm Tirtÿm kapêr jarênh o ri mē hkôt pa. Hãmri nê tee ri mē kot tanhmã amnhĩ tomnuj to hã mē omu nê hkaprĩ nê. Hãmri nê wa hkaprĩ xàx xak punure kaxô nê haxà nê mē kãm Tirtÿm kapêr jarênh o ri wa pa hã amgrã axkrunêpxi nê hkôt mytwrÿ kēp 6. Jakamã e. Pÿja py nê ma mē hwÿr wrÿ nê ixkreta o mĩdi. Anê.

⁴ Wa pijakrut wa kot Tirtÿm nhÿ hã kapêr jarênh o wa pa xwÿnhhta wa. Na htem wa kot amnhĩ nhĩpêx ã wa harênh ma nê mēmo pĩ hpàr pē oriwêhti kot tanhmã amnhĩ nhĩpêx toja mã hamaxpêr kurê kumrêx. Nê amnepê mē Tirtÿm nhÿ hã kapêr o pa xwÿnh pē Jakaris kot kanê hpók xãmta mã mãânên hamaxpêr. Oriwêhti xõja htwÿm rax kumrêx nhÿm htem htwÿm opõj nê ho kanê ho nÿt nê hpók nê kÿx pē unhwÿ nhÿm mē piitã hirã kamã rĩt mex

o ri mra. Nē kanē hpōk mexja te kot Tirtūm kapēr pyrāk. Nē kanē xām xāja te kot Tirtūm nh̄y hā kapēr jarēnh o wa pa xw̄ynhta wa urāk. Nē oriwēhtija haxw̄yja te kot wa urāk. Ra Tirtūm Karō kot wa hkarō mā ar jakamā na hte wa hprī hā mē kām Tirtūm kapēr jarēnh o pa nh̄um mē kot mar xw̄ynhjaja te kanē nh̄rā kamā ri rīt mex nē ri pa pyrā nē hprī hā mar t̄yx nē.

⁵ Tā koja mēhō tanhmā wa hipēx to kaxyw wa hw̄yr tē nh̄um wa hakwa rūm kuwy hpōk kato nē kot tanhmā wa ho mā xw̄ynhta o hxēt o kupī.

⁶ Nē koja wa Tirtūm xāhpumunh t̄yx xā ho tanhmā ri mē hā mēmoj nh̄ipēx to pē mē kām kapēr jarēnh o ri mē hkōt pa. Jao tanhmā na hto nh̄um mē hā wr̄yk kēt ry nē. R̄y tanhmā mē kēp gō hto nh̄um mē hkamrō hā mē kēp amnhī jahkre. Koja wa ā Tirtūm nh̄y hā mē kēp mēmoj nh̄ipēx anh̄yr ho wa pa. Nē xatā wa kām hprām xā hkōt tanhmā mēmoj tomnu hto. ⁷ Nē mē kām kapēr o pa pē ā mē hipēx anh̄yr o wa hā amgrā axkrunēpxi nē hkōt mytwr̄y kēp 6 nē rī kormā ho hapēx. Hāmri nh̄um ahkre xup̄ym rūm Satanasti nhō kōwenatōja kato nē ma wa hw̄yr tē nē nh̄yri pry kahti ri wa unē nē wa kupī nh̄um wa pry kamā ty nē nō. ⁸ Hāmri nh̄um mē wa haxār kēt nē nh̄um wa arī pry kamā nō. Krī kapem na prem pī kahpa hā Jejus nhō nē kupī. Krī nhō xw̄ynhjaja mē kot amnhī tomnuj t̄yx xw̄ynh na mē. Te ho amnepēm krī pē Sotō mē pika pē Ejit kamā mē kot amnhī tomnuj xw̄ynhjē kot amnhī nh̄ipēx pyrāk. ⁹ Jakamā nh̄um mē kot wa haxār nē axpēn kurē nh̄um wa pry kamā arī ty nē nō nh̄um mē piitā wa hw̄yr mra nē wa omu. Nē ahp̄ynhā krī piitā hkōt mē pa xw̄ynhjaja tanhmā amnhī to nē ja hā wa omu. Ahp̄ynhā ri pika pi-

itā hkōt mē urojaja. Nē ahp̄ynhā ri mē kapēr xw̄ynh piitā. Hāmri arī ahp̄ynhā mē ō krī kamā pa htā tanhmā amnhī to nē wa htyk ā wa omunh ā hā apkati axkrunēpxi nē hkōt hā myt ahpa. ¹⁰ Koja mē wa htyk ā wa omu hāmri nē hk̄inh nē. Nē hk̄inh xāj axpēn mā hk̄inh xā nhōr o pa. Wa kot kormā ht̄ir ri tanhmā mē homnuj to ho ri mē hkōt paja mā hamaxpēr nē wa htyk ā wa omu nē hk̄inh t̄yx nē.

¹¹ Tā koja wa htyk ā apkati axkrunēpxi nē hkōt hā myt ahpa hāmri nh̄um Tirtūm wa kamā htyxā rē nē akup̄ym wa ho wa ht̄ir nh̄um wa k̄anhmā xa nē ri mra. Hāmri nh̄um mē kot wa omunh xw̄ynhjaja tee ri hā wa omu nē kām wa uma ht̄yx kumrēx. Ām kām wa uma ho kām wa uma.

¹² Hāmri nh̄um kaxkwa kamā mēhōja wa kām kapēr nē wa kām:

—E war amnē mē ixw̄yr war api. Anē.

Hāmri nh̄um wa kuma nē ma kakrā kamā āpir o mō. Nh̄um mē kām wa hkurē xw̄ynhjaja tee ri wa āpir ā wa omu.

¹³ Hāmri nh̄um pika ht̄ertet t̄yx nē. Nē krī kamā ixkre ohtō nē grānh pa nē mē hk̄w̄y nh̄imex rax nē nh̄um mē ohtō rax kumrēx nē axkaprā. Mē kēp 7.000 nē pikaprār pa. Hāmri nh̄um arī mē ht̄ir nē ri mē pa xw̄ynhjaja tee ri mē omu nē kām ma xāj ht̄ertet t̄yx nē axpēn mā:

—Kwa Tirtūm m̄an ā mē panh̄ipēx anē. Hiht̄yx o hiht̄yx jakamā kaxkwa rūm ā mē panh̄ipēx anē pu mē pahpiitā pano ho ixkre pigrānh ā omu. Anē.

¹⁴ E na ra amnhī xā ht̄yx kamā hamak xāja hamēxkrut nē hapēx. Tā no ām arī mē kaxyw pyxi nē arīk.

Mē kot pifti kot hitep kakōr ā harēnh

Apokarip 4,8, 5.9-14, 7.9-12, 14.2-5, 15.3-4, 19.1-2

¹⁵ Tā nh̄um Tirtūm kapēr o wr̄yk xw̄ynh kot hitepja ō pifti

kakô nhũm kaxkwa kamã mẽ pa xwýnhjaja kàx pè kapèr o:

E ãm hãmri. Na ra Mèpahpãm Maati mẽ Jesus Krisja wa kèp krĩ pi-itã hkôt mẽ piitã mẽ ô Pahihti na wa.

Koja Mèpahpãm Maatija kèp Pahi Maati rãhã nẽ pa ho pa xwýnh. Anẽ.

¹⁶ Hãmri nhũm mẽ àptàr tũm pè 24jaja. Tirtũm kot mẽ pahto amnhĩptàr o hkrĩ xà mã hipòk nẽ mẽ hkrĩ xwýnhjaja. Hãmri ã mẽ kapèr anhýrja ma nẽ Tirtũm ã hpijaàm kaxyw hpar pè ròròk pa nẽ htu mýr pè hikwý. Hãmri nẽ kãm mex o mex ã harẽ nẽ kãm:

¹⁷ Pa Pahi Maati Tirtũm. Nà ãm hãmri mẽ ixrom axàhpumunh o axàhpumunh nẽ axihtýx o axihtýx.

Amnepè mã kormã mẽmoj kêt ri na ka pre arãhã apa ho apa.

Tã arĩ arãhã apa ho apa.

Ãm hãmri apè mẽ ixpiitã mẽ ixto amnhĩptàr xwýnh. Nà ãm hãmri amex o amex.

¹⁸ Kot kaj tokyx mẽ piitã tanhmã mẽ kot amnhĩ nhĩpèx to ho pa mã mẽ omunh xà hkôt tanhmã mẽ harènh to.

Nẽ ra mẽ htyk xwýnhjaja kot kaj mẽ piitã akupým mẽ ho mẽ htír pa nhũm mẽ pika rũm hapòx pa nẽ ma mra nẽ arĩ mẽ htír xwýnhjè nhĩhkò mã akutã hkrĩ pa.

Ka mẽ piitã mẽ omu nẽ tanhmã mẽ kot amnhĩ nhĩpèx to ho pa mã mẽ omunh hkôt tanhmã mẽ harènh to.

Mẽ kot amnhĩ tomnuj xwýnhjaja kot kaj ma mẽ kot amnhĩ xà htýx kamã hamak o pa htũm xà hwýr amnhĩ nẽ mẽ arẽ nhũm mẽ ma hwýr hapèx. Hãmri nẽ tee ri amnhĩ kukamã hamaxpèr nẽ gryk týx kumrèx.

Ka hpãnhã mẽ kot akòt amnhĩ xunhwýr nẽ akapèr kòt amnhĩ

nhĩpèx o mẽ pa xwýnh piitã mẽ omu nẽ tanhmã mẽ ho mex to.

Mẽ kot amnhĩ to rũnh xwýnhjaja nẽ mẽ kot amnhĩ to hkryre xwýnhjaja.

Nẽ amnepèm mẽ kot anhý mã mẽ kapèr o mẽ pa xwýnhjaja.

Akrajà piitã kot atã hpijaàm xwýnhjaja kot kaj kormã mẽ htír ri tanhmã amnhĩ to mex mã mẽ omunh xà hkôt tanhmã mẽ ho mex to.

Ã kot kaj tokyx mẽ piitã ahpýnhã mẽ omunh xà hkôt mẽ hipèx anẽ. Anẽ.

¹⁹ Hãmri nhũm kaxkwa kamã Tirtũm nhòrkwy mã hakwakre kahè xà amnhĩ mẽ pa kamã ôr o mès kunĩhtita pumu. Pu nhũm na hkatòtòk nẽ haxènh nẽ hkrakrak nẽ na mẽ te kot jèr krã hakotre pyrãk xwýnhja pikap ròròk rax nẽ. Nẽ pika htertèt týx o htertèt týx pa arĩ omunh o xa.

12

Mèhõ ni mẽ kagãmnuti wa harènh

¹ Tã pa axte mẽmoj pumu. Kaxkwa kamã aa mẽ pahte mẽmoj pumunh kêt xwýnhja pa omu. Nhũm mèhõ nija xè te myt no mã hirã htýx pyrãk. Nẽ hpar nhòkwa kamã mytwryre ajèt. Nẽ kanhèti ho 12 o mẽ ahkà tu nẽ o xa. ² Na ra htujarò nẽ hpijagri kaxyw ôhy xà nẽ amnhĩ kamnhèr o xa.

³ Tã pa axte mẽmoj pumu. Aa mẽ pahte mẽmoj ã kot anhýr pumunh kêt xwýnh ôja pa omu. Kagãmnuti nom ãm axtem hkà kamrèk týx kumrèx. Nẽ rax kumrèx. Nẽ hkrã kèp 7. Nẽ hkrã piitã kamã ôr o pahi mã mẽ ahkà htu nẽ o nõ. Nẽ hkrã kamã pàr kèp 10.

⁴ Tã nhũm hamy ho apèr o kaxkwa kamã kanhèti ho ohtò nẽ pikap kurè. Hãmri nẽ ôhy xà nẽ amnhĩ kamnhèr o ãm xwýnhhta wýr tẽ nẽ hkra kator nhũm kot kèp krèr kaxyw kutã hamãr o nõ.

⁵ Hãmri nhũm hkra kato nẽ myre. Hihtýx o hihtýx ã kot pika piitã

hkôt mē piitā mē ho amnhīptār mā xwýnh na pre. Nhūm kagāmnutija kot kēp utār nē hkrēr mā tā nhūm Tirtūm kapēr o wrýk xwýnhjē hōja hwýr wrý nē kēp kumý nē ma Tirtūm wýr kaxkwa kamā kot mē pahto amnhīptār ā hkrī xà maatija wýr ho api.

⁶ Hāmri nhūm kagāmnuti tee ri ma kot kēp o mōr ā omu nē hpānhā nita o apkjē nē kot tanhmā ho kaxyw nhūm amnhī tā omu nē umaj hprōt nē ma tē nē nhýri kapōt ā amūxu. Ra Tirtūm kot hkukamā kām hpimxur xà nhīpēx xà hwýr hprōt nē ma tē nē kamā kēp amūxu. Nhūm Tirtūmja nē kagā pumunh mex nhūm kēp hpimxur mex ā amgrā axkrunēpxi nē hkôt hā mytwrý kēp 6.

Mē kot kaxkwa kamā mēkarōmnuti kurē kaxār ā mē harēnh

⁷ Tā nhūm mē ra kaxkwa kamā kurē kaxār kaxyw. Kagāmnuti mē hkwyjaja nhūm mē ra Tirtūm kurē kaxār kaxyw kutā amnhī xunhwý. Jakamā nhūm Tirtūm kapēr o mē wrýk xwýnhjē hkrāhtūm Mikewja ma mē hwýr amnhī kôt hkwyjē o mra nē mē pijapu ho kuhē.

⁸ Hāmri nhūm kagāmnuti tee mē kutā amnhī to htýx kaprý nhūm Tirtūm kapēr o mē wrýk xwýnhjaja amnhī nē mē ho axtem nē kaxkwa rūm mē kator o mē kator.

⁹ Satanasti pē kagāmnutita kagā kot ni kator ewa mā hēx xwýnh na pre. Nē hēx rom tanhmā hēx to ho pa xwýnh. Jakamā nhūm Mikew mē hkwyjaja hkwyjē mē mē ho hpimrāatā amnhī nē pikap mē rēnh pa.

¹⁰ Hāmri nhūm kaxkwa kamā mēhōja axte kàxpē kapēr nē kapēr o:

E ām hāmri. Na ra Tirtūm hihtýx o hihtýx o mē panē mēmoj punuj piitā ho hapēx par kumrēx.

Na pre hte Satanasti pē mēkarōmnutija xatā hwýr mra nē kām

tanhmā Jejus kwýjē ho kapēr punuj to ho pa.

Tā koja axte mē ho kapēr kēt kumrēx. Ra Tirtūm kot amnhī nē kator o kator nhūm ra ma mōr o mōr kēnā.

Koja Tirtūm pika piitā hkôt mē ho amnhīptār xwýnhjē japōx pa nē hpānhā mē kaxyw Kra Krisja xām nhūm pika piitā hkôt mē ho amnhīptār rāhā ho pa.

Nā ām hāmri. Ja mex o mex.

¹¹ Na pre Jejus kôt mē pahtō nē mē pahtōxjaja mēkarōmnuti kutā amnhī to htýx nē pa. No ām amnhī nhý hā ā kutā amnhī nhīpēx anhýr kēt.

Mē pahte amnhī tomnuj pānhā amnhīrer xwýnhnta na pre ty nē hkamrō ho mē kuhō nē mē nē mē kot amnhī tomnuj o hapēx.

Jakamā nhūm prem kukwak ri Satanasti kutā amnhī to htýx rāhā pa.

Nhūm mē kot Jejus ā mē himex par kaxyw tā nhūm mē kām htyk pyma hkēt nē. Ām Jejus kôt arī amnhī to htýx nē mē hkôt pa rāhā nē.

Jao arī mē kām Jejus kot mē panē tanhmā amnhī nhīpēx to hā harēnh o ri mē hkôt pa.

¹² Tā Tirtūm ra kot mē panē mēmoj punuj o hapēx par jakamā kwa kaxkwa kamā mē apa xwýnhjaja kēr ka mē akīnh nē apa.

Nom gō ujanār kām nē pika kamā mē pa xwýnhjaja hēxta waa nē. Koja mē mex kēt nē.

Nē ra Mikew mē hkwyjaja kot amnhī nē kaxkwa rūm mēkarōmnuti mē hkwyjē kator nē pikap mē rēnh par jakamā nhūm Satanastija gryk týx kumrēx.

Tirtūm kot ma mē kot amnhī xà htýx kamā hamak o pa tūm xàta wýr mēnh xà hā arīgro

hwÿr amgrà grêre nhÿm tee
ri amnhÿ kukamã hamaxpêr
nê gryk tÿx o gryk tÿx. Anê.

¹³ Hãmri nhÿm kagãmnutija mê kot
amnhÿ nê kaxkwa rÿm kator ã
amnhÿ pumu nê gryk tÿx nê. Nê
gryk xàj ma akupÿm ni kot hkra
myre ho pijagri xwÿnhÿta wÿr tê nê
tanhmã ho kaxyw hkôt ho krihkrit.

¹⁴⁻¹⁶ Hãmri nhÿm Tÿrtÿm kapêr o
mê wrÿk xwÿnhÿjê hõja omu nê nija
mã àanhãhti jara gõ. Kot kagãmnuti
pê ho htor nê ma nhÿri hpimxur
xà wÿr htêm kaxyw. Nê kormã
htor kaxyw nhÿm kagãmnuti omu
nê kot gõ ho hanhir kaxyw hkôt
hakwa rÿm gô kapÿ nhÿm hpikapÿr
rax kumrêx. Te pyhti hprôt tÿx
pyràk. Hãmri nhÿm Tÿrtÿm omu
nê nija nê tanhmã pika hto nhÿm
kãm axkjê nhÿm gô hprôt nê kamã
pikapÿr pa. Jakamã nhÿm mex pê
àanhãhti jara ho to nê ma kapôt ã
pimxur xà hwÿr ma tê. Nê kamã
pa hã amgrà axkrunêpxi nê hkôt
mytwrÿ kêp 6 nhÿm prem hamãr
mex rãhã ho pa.

¹⁷ Hãmri nhÿm kagãmnuti tee ri
kãm hpÿr prãm kaprÿ nê gryk tÿx
kumrêx. Hãmri nê ma ni hkwyjê
hwÿr mõ. Mê kot Tÿrtÿm mê Je-
jus wa hkôt amnhÿ nhÿpêx o mê pa
xwÿnhÿjê hwÿr tanhmã mê homnuj
to kaxyw ma mê hwÿr mõ. Hãmri
nê tanhmã kot mê ho kaxyw gô
xujanãr mÿ ri nõ.

13

*Satanasti nhõ kôwenatô wa kot
gô xujanãr rÿm kator ã wa harênh
Sikÿn Tesarôn 2.3-5*

¹ Tã pa axte mêmoj pumu. Nhÿm
gô xujanãr rÿm Satanasti nhõ
kôwenatôjê hõja te mrymnuti pyrà
nê àpir o mõ. Kagãmnuti pyrà nê
hkrã kêp 7. Nê uràk nê hpàr kêp
10. Nê hpàr piitã kamã pahi hã
mê ahkã. Nê ahkã piitã hã axtem
tanhmã Tÿrtÿm o kapêr punuj to nê
tanhmã haprÿ hto hã kagãja hikwÿ.

² Nê hkã te kêp ropkrorti kã
pyràk. Nê hakwa te kot rëãwti
jakwa pyràk. Nê ìhkra te kot pãati
nhÿhkra pyràk. Jakamã na pre
kagãmnuti nhÿ hã hihtÿx o kêp pahi
hã pika nhõ xwÿnhÿjê ho amnhÿptàr
o pã.

³ Nê hkrã hõ te mê kot hayr o hpÿr
nhÿm ra akupÿm htÿr nê arÿ hayr xà
wakre rà nyw pyràk. Jakamã nhÿm
pika kamã mê pa xwÿnhÿjaja amnhÿ
jaêr pê omu nê kamã no puma nê.
Hãmri nê hkôt amnhÿ nhÿpêx o pa.

⁴ Hãmri nê kagãmnuti kot tanhmã
mrymnuti ho nhÿm ÿ hã mê ho
amnhÿptàr jakamã nhÿm mê piitã
hamê wa hã hpijaãm kaxyw wa
kãm wa mex o wa mex ã wa harênh
o pa. Nê mrymnuti hã axpên mã:

—Hêxta waa nê. Mê pahtô na
mê pahte mrymnutita pyrà nê ã mê
pahte amnhÿ nhÿpêx kot anhÿr? Mê
pahtô kot pu kutã xa nê paxihtÿx o
hkurê kapa? Nã amrakati kumrêx.
Anê.

⁵⁻⁶ Hãmri nhÿm Satanasti tanhmã
mrymnuti ho nhÿm kapêr o ri mê
hkôt pa nê mê ho amnhÿptàr o hã
amgrà axkrunêpxi nê hkôt mytwrÿ
kêp 6. No ãm axtem nê Tÿrtÿm o
kapêr punuj o ri mê hkôt pa. Nê ri
tanhmã haprÿ hto nê ô krÿja mex
kêt ã harênh o ri mê hkôt pa.

⁷ Hãmri nhÿm Satanasti ra kot
mê hkurê kaxãr kaxyw kãm anê
nhÿm axtem nê Tÿrtÿm pê hkrajê
kutã amnhÿ xãm nê mê hwÿr hprôt
nê tanhmã hpijapu hto ho pa nê
mê ho axtem nê mê ho krihkrit pa
nê ahpÿnhã ri pika piitã hkôt mê
uro hkwyjê ho amnhÿptàr o pa. Nê
ahpÿnhã mê kapêr xwÿnhÿ piitã mê
ho amnhÿptã.

⁸ Jakamã nhÿm mê ohtô rax
kumrêx nê mrymnuti hkôt amnhÿ
nhÿpêx. Nê kutã hkôn krã ho
rôrök nê hkrÿ nê kãm mex o
mex ã harê. No ãm mê piitã
hkêt. Kot mê pahte amnhÿ tomnuj
pãnhã amnhÿre xwÿnhÿ kôt ra mê
kot amnhÿ xunhwÿr xwÿnhÿjaja

tapxipixjaja na prem hkôt amnhĩ xunhwÿr kêt nê. Amnepê mã kormã amrakati ri Tirtũm mẽ Jesus wa ô kagã kamã mẽ htĩr tũm nê mẽ pa mã xwÿnh nhĩxi xwÿnh pixjaja na prem mrymnuti pumu nê hkwyjê rom hprĩ hã kot amnhĩ nhĩpêx ã omunh kurê kumrêx nê hkôt amnhĩ nhĩpêx kêt nê.

⁹ E ka mẽ atô axumar kaxyw ajamak kre hã kot kaj ixujarênh piitã ama nê kãm ajamaxpêr tÿx rãhã ho apa.

¹⁰ Jakamã kwa Tirtũm kôt ixkwÿjaja. Kwãr mẽ mãmrĩ mẽ apynê nê mẽ ajagjê.

Nê kwãr mẽ mãmrĩ wapo ho mẽ ajayr o mẽ apa.

Nom kêr ka mẽ umaj ixkaga hkêt nê. Ixkaga hkêt o ixkaga hkêt.

Mẽ ãm ixkôt pix mã amnhĩ nhĩpêx o ri apa rãhã ty.

Pika rũm mrymnuti hõ kator ã harênh

Makre 13.22

¹¹ Tã pa mrymnuti hõ pumu. Nom wamta pyrã nê gô xujanãr rũm kator kêt axtem pika rũm kato. Nê ôwêhti hkrare pyrã nê hpãr pijakrutre. Nê te ho kagãmnuti kapêr tÿx pyrã nê kapêr tÿx kumrêx o pa.

¹² Gô xujanãr rũm mrymnuti xãpir xwÿnhhta nhÿ hã pika nhõ xwÿnhjê mã kapêr tÿx nê mẽ kãm:

—E pika piitã hkôt mẽ apa xwÿnhjaja mẽ inhma. Kêr ka mẽ kot hkrã hõ jayr o hpĩr nhũm akupÿm htĩr xwÿnhhta kôt pix mã amnhĩ nhĩpêx rãhã ho ri apa. Nê kãm mex o mex ã harênh rãhã nê.

Anhÿr o mẽ kãm kapêr. ¹³ Hãmri nê Satanasti nhÿ hã mẽ kãm aa mẽ kot mẽmoj pumunh kêt kwÿ ho anhÿr o pa. Jao kaxkwa rũm tanhmã mẽ kãm kuwy ho wrÿk to nhũm pikap rôrok nhũm mẽ amnhĩ jaêr pê omu nê kamã no puma nê. ¹⁴ ã ri mẽ noo mã mẽ kãm amnhĩ nhĩpêx anhÿr o ri mẽ hkôt pa. Gô xujanãr rũm mrymnutija noo mã

ã hêx rom amnhĩ nhĩpêx anhÿr o mẽ no kupyro pa nhũm mẽ omu nê hkôt amnhĩ nhĩpêx. Hãmri nhũm mẽ kãm mẽmoj tã karô nê mẽ kãm:

—E wam mrymnutita. Mẽ kot hkrã hõ jayr o hpĩr nhũm akupÿm htĩr xwÿnhhta kêr ka mẽ kãm hkarô nhĩpêx nê ho mẽ anhõ sãnti. Kê mẽ piitã hwÿr mra nê kutã hkôn krã ho rôrok nê hkrĩ nê amnhĩ to kuwy nê kãm mex o mex ã harê.

Anhÿr o mẽ kãm hã karô. ¹⁵ Hãmri nhũm mẽ kuma nê mar xã hkôt hipêx nê ãm nhũm xa. Hãmri nhũm mrymnuti kot hitepta omu nê hwÿr tẽ nê tanhmã ho nhũm ra kapêr nê mẽ kãm:

—E kêr ka mẽ kot inhmex ã ijarênh kêt xwÿnhjê pynê nê mẽ himex pa. Anê.

¹⁶ Hãmri nhũm pika rũm mrymnuti kator xwÿnhhta haxwÿja mẽ kãm kapêr nê mẽ kãm:

—E koja ixkwÿjaja inhÿ hã mẽ apiitã mẽ apê ixkwÿ hã mẽ akagã. Mẽ ate amnhĩ to rũnh xwÿnhjaja nê mẽ ate amnhĩ to hkryre xwÿnhjaja. Nê amarĩ mẽ kãm mẽ axãpênh xwÿnhjaja nê amnhĩ mã mẽ axãpênh xwÿnhjaja. Nê mẽ akãxpore rũnh xwÿnhjaja nê mẽ apê amrakati xwÿnhjaja. Koja mẽ apiitã mẽ akagã hpa. Mẽ akwÿ nhõkrã kagã nê mẽ akwÿ xupôk rũm mẽ anhĩhkra katut kagã.

¹⁷—Gô xujanãr rũm mrymnutita nhĩxi kot paj mẽ atã hipêx. Rÿ hixi hã nũm nhĩpêx. Hãmri ka mẽ axãpkur xã japrôr kaxyw nhÿhÿm mra nhũm mẽ atã hixita pumu nê ri kormã mẽ amã mẽmoj kwÿ ho wênê ka mẽ amnhĩm haprô nê ho axãpkur o ri apa. Nê mẽ ate mẽmoj to wênê xwÿnhjaja koja mẽ apê mẽmoj japrôr kaxyw mẽ awÿr mra ka mẽ tee ri nhÿhÿnh mẽ hã hixi japêr hãmri nê mẽ kãm mẽmoj to wênê hkêt nê. ãm nhÿhÿnh mẽ atã hixi hã kagãta pumunh pix kukwak ri kot kaj mẽ awjaprô rÿ mẽmoj to wênê. Anê.

¹⁸ E kwa kêr ka mê ixte mêmoj pumunh nê mê amâ hâ kagâta pumu nê ama nê kâm ajamaxpêr tÿx o apa. Mrymnutita nhîxi na kêp nÿm. Nÿmja kêp 666. E kaj mê akrâ hi mex xwÿnhjaja kot kaj mê aprî hâ ja mar tÿx kurê kumrêx.

14

*Tÿrtÿm mex ã mê grer
Apokarip 7.1-8*

¹ Tã pa axte mêmoj pumu. Nhÿm mê pahte amnhî tomnuj pãnhã amnhîrer xwÿnhja hixêt pê Siãwja nhîmök ã xa. Nê puhã mê ohtô rax kumrêx nê kuhê. Mê ohtô ho mê ohtô. Piitã kamã mê kêp 144.000. Nê piitã ôkrã hã mê pahte amnhî tomnuj pãnhã amnhîrer xwÿnh mê Hipêêxã wa hixi jaxwÿr pa mê omu.

² Nhÿm mê kaxkwa kamã grer o kuhê. Mê grerja mex o mex. Te kot gô hprôt tÿx hkoko htÿx pyrãk. Nê te na katôtök tÿx pyrãk. Nê te wiorãw môr xwÿnhjaja kot hkakrênh mex pyrãk pa mê mar o xa.

³ Nê mê grer xwÿnhjaja. Jejus puhã mê ohtô rax kumrêx nê mê kuhê xwÿnhjaja na prem Tÿrtÿm kot mê ho amnhîptâr ã hkrî xãta kuri grer o kuhê. Nê mêmoj tÿr pê kwat xwÿnhjê mê mê ãptâr tÿm pê 24jê kuri grer o kuhê. Mê grer nyw o gre. ãm mê tapxipixjaja mê kot mê grer nywja mar. Ra mê kêp Tÿrtÿm kra hã mê kot mê ôkrã hã Tÿrtÿm mê Kra Jejus wa hixi ã kagã nhÿm Tÿrtÿm kot ra mrymnuti mê hõta wa kêp mê utâr nê amnhî wÿr mê ho ãpir xwÿnh na pre mê. ãm mê tapxipixjaja mê grer nywja ma nê wa kãm ho grer o kuhê.

⁴⁻⁵ Na prem tãm amnhî nhîpêx nê Tÿrtÿm kôt amnhî nhîpêx rãhã ho pa. Te mê kot amnhî prô pix tânopxar rãhã ho pata pyrãk. Nê ri tanhmã hêx to rÿ tanhmã ri amnhî tomnuj to ho pa hkêt nê. ãm tãm ri amnhî nhîpêx mex o pa. Mê kêp

Tÿrtÿm mê mê pahte amnhî tomnuj pãnhã amnhîrer xwÿnh kwÿ jakamã na prem mê pahte amnhî tomnuj pãnhã amnhîrer xwÿnhhta kôt pix mã amnhî nhîpêx o pa. Jakamã na prem mrymnuti kutã rôrök nê kãm mex o mex ã harênh kêt nê. Tã mê kumrêxjaja Tÿrtÿm mê Kra wa kuri wa kãm grer o kuhê.

*Tÿrtÿm kapêr o wrÿk xwÿnh pi-
jakrunêpxi jarênh*

⁶ Tã pa axte Tÿrtÿm kapêr o wrÿk xwÿnhjê hõ pumu nhÿm kÿx pê ri htor o pa. Ahpÿnhã ri pika piitã hkôt mê uro hkwyjê hkôt. Na ahpÿnhã ri mê kapêr xwÿnhjê piitã mê hkôt mê kãm Tÿrtÿm kot tanhmã mê hipêx to hã harênh kaxyw. Ahpÿnhã mê kapêr xwÿnh piitã mê kãm harênh o pa. Nê htor o pa pê kÿx pê mê kãm kapêr nê mê kãm:

⁷ “E na ra Tÿrtÿm mê ate amnhî tomnuj mÿrapê tanhmã mê ato kaxyw. Jakamã kwa mê tokyx hã apijaãm kaxyw akôn krã ho arôrök nê akrî nê kãm mex o mex ã harê. Kêp mêmoj piitã ho kator xwÿnh na. Na pre kaxkwa ho kato nê pika ho kato nê gô xujanâr o kato nê hino ho kato nê mêmoj piitã ho kator pa. Jakamã kwa kêr ka mê tapxipix ã mân apijaãm nê kãm mex o mex hã harênh rãhã ho apa.”

Anhÿr o mê kãm kapêr. ⁸ Hãmri nhÿm hõja wamta kôt tê nê uräk nê kÿx pê mê kãm kapêr o:

—Koja Tÿrtÿm tokyx Papirôn grãnh pa. Na hte krî nhõ xwÿnhjaja amnhî tomnuj pix rãhã ho pa. Mê kot amnhî nhîpêx te mê kot kagôxyhti ho hkôm nê amnhî mê mê piitã mê kãm ôr nê ho mê ho pipãnh pyrãk. Na htem mênijê piitã ho amnhîkati o pa. Nê amnhî kwÿjê pê mê hprô ho amnhîkati. Nê amnhî mê pika piitã hkôt mê pa xwÿnhjê mã anhÿr o pa. Mê kot mê uräk nê ã amnhî nhîpêx anhÿr o pa kaxyw mê kãm anhÿr o pa. Ja mÿrapê na ra Tÿrtÿm kot tanhmã

mê ho kaxyw mê hã amnhĩ jarê. Anê.

⁹ Tã nhũm wa hkôt hõja tẽ nê wa urak nê kax pê pika nhõ xwýnhjê mã kapêr nê mê kãm:

—E mê ate mrymnuti kutã akõn krã ho arõrõk nê akri nê kãm mex ã harênh xwýnhjaja. Nê mê ate karõ nhĩpêx nê kutã akõn krã ho akri nê kãm mex ã harênh xwýnhjaja. Nê mê anhõkrã nê mê anhĩkra hã hixi hã kagã xwýnhjaja.

¹⁰⁻¹¹ —Tirtũm na tee ja hã mê apumu nê mê akamã gryk tỳx kumrêx. Mê ate kapêr kuhpa hã mrymnuti hkôt amnhĩ xunhwýr jakamã nhũm mê akamã gryk tỳx o mê akamã gryk tỳx. Jakamã koja kuwy hpõk rãhã ho rãhã xwýnhhta kamã mê arênh pa ka mê amnhĩ xà htỳx kamã ajamak rãhã apa ho apa. Koja kuwy hpõkja aa hapêx kêt nê kurũm kax mã hkũm àpir o pa rãhã nê. Koja ã mê ate amnhĩ tomnuj o mê apa xwýnhjê nhĩpêx anê ka mê kamã apa ho apa nê aa kurũm ajapõx kêt nê kamã amnhĩ xà htỳx kãm ajamak rãhã apa ho apa. Arĩgro hãn kamàt kãm arĩ ã amnhĩ nhĩpêx anhỹr rãhã apa ho apa. Mê ate gõj rũm mrymnuti mê hkarõ ho sãnti wa kutã akõn krã ho arõrõk nê akri nê wa kãm wa mex ã wa harênhja mýrapê kot kaj mê ã amnhĩ nhĩpêx anê. Kot mê pahte amnhĩ tomnuj pãnhã amnhĩrer xwýnhjê mê Tirtũm kapêr o mê wrỳk xwýnhjê noo mã kot kaj mê ã amnhĩ nhĩpêx anhỹr o apa.

¹² Anhỹr o mê kãm kapêr jakamã kwa kêr pu mê pahte Tirtũm kôt amnhĩ xunhwýr xwýnhjaja mê hkukamã mê harênhja ma nê Tirtũm kapêr kôt pix mã amnhĩ nhĩpêx rãhã ho ri papa. Mê kot tanhmã hã mê pahto htã pu mê hkaga hkêt nê amnhĩ kaxyw Jejus kôt pajamaxpêr tỳx rãhã nê. Hãmri nê nhỹrmã mê kurom ma õ kri hwýr api nê kamã pamex kumrêx nê papa ho papa.

Mê kêp Jejus kwý hã mê htyk xwýnhjê jarênh

Wam Tesarõn 4.16

¹³ Tã nhũm kaxkwa kamã mêhõja axte inhmã kapêr nê inhmã:

E Juãw. Kêr ka ã akwýjê mã mẽmoj tã kagã anê nê mê kãm hã kagã ho: “E mê ate Tirtũm kôt ri amnhĩ nhĩpêx xwýnhjaja. Mê kot Tirtũm ã mê apar nhũm mê atyk tã koja amnhĩ tã mê ato mex rax kumrêx.” Anhỹr o mê kãm hã kagã.

Anhỹr o inhmã kapêr. Hãmri nhũm Tirtũm Karõja kuma nê kãm:

—Nã ãm hãmri na ka ã mê harênh anê. Ra Tirtũm kot amnhĩ tã mẽ omunh rãhã ho pa. Mê kot kôt pix mã amnhĩ nhĩpêx o pa pê mê kãm mẽ hkurê xwýnhjê kutã amnhĩ to htỳx rãhã htykja nhũm Tirtũm kot amnhĩ tã mẽ omunh mex. Koja mẽ ho mex kumrêx. Mê kot Jejus ã mẽ hpar tã koja mẽ ho mex rax nê nhũm mẽ kuri mex rãhã nê pa ho pa nhũm mẽhõ axte tanhmã mẽ ho hkêt nê. Anê.

Tirtũm kot tanhmã mê kãm hkĩnh xwýnhjê nhĩpêx to

¹⁴ Tã pa axte mẽmoj pumu. Kaxkwa kamã kakrã jakajre pumu. Nê kamã mẽhõj te panhi pyrà nê nhỹ. Nhũm õr o pahi hã mẽ ahkã htu nê kuteere xwagixre py nê o nhỹ.

¹⁵ Hãmri nhũm kaxkwa kamã Tirtũm kapêr o mê wrỳk xwýnhjê hõja Tirtũm mã amnhĩ jarênh xà hã ixkre rũm kato nê kakrã jaka kamã ýr xwýnhhta mã kapêr. Kax pê kãm kapêr nê kãm:

—E pika nhõ xwýnhjaja te mẽ hpur kãm mẽmo hy ra hkamrêk nê hikênh mã mex pyrãk. Jakamã anhõ kuteere ata py nê ma mẽ hkôt tanhmã ri mẽ ho ho ri mẽ hkôt apa. Te mẽ kot mẽmo hy nhĩkênh o ri pa pyrãk o mẽ hipêx nê ma ho mẽ himex o ri apa. Anê.

¹⁶ Hāmri nhūm kuma nē pika pi-itā m̄yri ō kuteere ho apē nē te mēmo hy jakār pyrāk o mē hipēx.

¹⁷ Hāmri nhūm axte Tirtūm mā amnhī jarēnh xā hā ixkre rūm kapēr o mē wr̄yjkē hōja kato. ĩhkra kamā kuteere xwa gixre py nē o xa. ¹⁸ Hāmri nhūm axte hōja ixkre rūm kē hkôt kato nē hkukamā kator xw̄ynhta mā kapēr. Kāx pē kām kapēr nē kām:

—E na ra Tirtūm tanhmā mē kot amnhī tomnuj to hā tanhmā mē hipēx to kaxyw. Te mē kēp mē hpur kām mēmo xō pē uwa ra hkamrēk nē rēnh mā tām pyrāk. Jakamā ma pika hw̄yr mē hw̄yr wr̄y nē mē hkôt ri anhō kuteere ho mē himex o ri apa. Anē.

¹⁹ Hāmri nhūm kuma nē ma pika hw̄yr wr̄y nē mē hipēx o te mē kot uwa xō rēnh nē prēs kām hkapīr nē kagō janēnh pyrā nē mē hkôt ri kuteere ho mē hpar o pa. Tirtūm ra mē kamā gryk t̄yx o mē kamā gryk t̄yx jakamā nhūm ā mē hkôt mē hipēx anh̄yr o ri pa.

²⁰ Jakamā nhūm mē hkamrō hpikapīr rax kumrēx o uwa kagō jakre. Te ho pyhti hprōt o nōr pyrāk. Jao up̄ym o 2 met nē hkôt ho mēj met. Nom hprōt xā hkôt ry rax o ry rax. Ho 300 kirōm. Nhūm ā mē kamrō hprōt rax anē.

15

Tirtūm mex ā mē grer

¹ Tā pa axte kaxkwa kamā mēmoj pumu. Hāmri nē amnhī jaēr pē omu nē tee ri hkukamā ijamaxpēr. Aa mē pahte mēmoj ā kot anh̄yr pumunh kēt xw̄ynh pa pre omu. Nhūm Tirtūm kapēr o mē wr̄yk xw̄ynh pē 7jaja ahp̄ynhā pika hkôt mē kot amnhī tomnuj xw̄ynhjē homnuj kaxyw akuprō nē kuhē. Ām jajē pixjaja koja Tirtūm nh̄y hā axte tanhmā mē homnuj to nē ho anh̄yr pa hāmri nhūm ra ja hapēx o hapēx.

² Jakamā pa axte Tirtūm kapem gō rax pumu. Te kot kāk kar̄yr jaxēnh mē kuwy hpōk o pihkār pyrāk xw̄ynhja hprōt o nō. Nhūm Tirtūm kra hkwȳjaja gō m̄y ri ohtō rax kumrēx nē kuhē. Na pre ra mrymnutija tee ri amnhī kôt mē rēnh mā nē tee ri mē hā amnhī nh̄ixi hā kagā hprām kapry nom nhūm mē hkaga nē Jejus kôt amnhī nh̄ipēx rāhā ho pa. Nē mrymnuti karō ho sānti mā mex ā harēnh kēt rāhā ty nē kaxkwa hw̄yr api. Jakamā nhūm Tirtūm amnhī tā mē omu nē mē kām wiorāwti hkwȳ gō nhūm mē piitā ham̄y nē gō rax m̄y ri ho kuhē.

³ Hāmri nē Tirtūm mā tanhmā amnhī to ho pa xw̄ynh pē Mojes mē mē pahte amnhī tomnuj pānhā amnh̄irer xw̄ynhta wa kot Tirtūm mā gerta nhūm mē Tirtūm mā ho grer o kuhē nē grer o:

E Pahi Maati Tirtūm. Na pa mē ra inhmex pē aw̄yr ixāpir pa.

Ām hāmri na ka hte tanhmā amnhī nh̄ipēx to ho ri apa.

Aa tanhmā axēx to hkēt.

Nē mē ixrom axiht̄yx o axiht̄yx.

Nē mē ixrom axāhpumunh o axāhpumunh.

Jakamā na ka hte mē inhmā aa mē ixte mēmoj pumunh kēt kw̄y ho anh̄yr o apa.

Pika piitā hkôt ahp̄ynhā mē ho amnh̄iptār xw̄ynhjē nhō Pahi Maati na ka.

Nē ate tām amnhī nh̄ipēx xw̄ynh na ka.

⁴ Jakamā na htem piitā atā hpijaām o pa.

Nē amā mē kapēr xāptār pix o amā kapēr.

Nē amā amex o amex ā ajarēnh rāhā nē. Ām hāmri mē ixrom kapxipix amex o amex.

Jakamā koja ahp̄ynhā pika piitā hkôt akrajē piitā ate tām amnhī nh̄ipēx nē tām mē piitā tanhmā mē harēnh to hā ajarēnh ma nē aw̄yr mra nē akutā hkōn krā ho rôrōk

ně hkrī ně amā amex o amex
ā ajarē. Anē.

*Mě homnu xà hā xijere jamýnh
xwýnh jarēnh*

⁵ Tā na pa axte mēmoj pumu.
Kaxkwa kamā Tirtūm nhōrkwý hā
hitom xà piitā amnhī kahē xà rē
ně kuhē pa omu. Ně ixkre kamā
ō hitom mex maati haxwýja amnhī
kahē xà mě ně xa.

⁶ Hāmri nhūm ixkreja rūm Tirtūm
kapēr o mě wrýk xwýnh pē 7jaja
hapōj ně kuhē. Mě é hakajre ně
hirā htýx kumrēx. Ně mě hinō pre
xàja ōr pix o. Ně piitā Tirtūm mā
tanhmā kot mě homnuj to xà hā
xijere pē 7ta jamýnh kaxyw kuhē.

⁷ Hāmri nhūm mēmoj tír pē
kwatjē ōja mě kām xijere hkwy
jamý ně mě hwýr o tē. Xijere kēp
7 ně piitā ōr o. Nhūm hamý ně
Tirtūm kapēr o mě wrýk xwýnhhtajē
hwýr o tē ně ho mě hipēx nhūm mě
ahpýnhā hamý. Xijere kamā Tirtūm
gryk xà jamý ně o kuhē.

⁸ Pu nhūm Tirtūm rūm kuwy
hkūm hapōj. Tirtūm mex ně hihtýx
xwýnhhta rūm hapōx rax o ixkreta
kunor pa nhūm mě tee ri hwýr gjēx
prām kapry.

16

*Xijere kamā mě homnu xà pē 7
jarēnh*

¹ Tā pa arī mēmoj pumu nhūm
Tirtūm nhōrkwý kamā mēhōja
kapēr o wrýk xwýnh pē 7jē mā kax
pē kapēr ně mě kām:

—E na pa ra mě kot ixkapēr
kwým ri amnhī nhīpēx xwýnhjē
pumu nhūm ixpē ja omnuj týx o
ixpē omnuj týx. Jakamā e mě anhō
xijereta jamý ně ma pika hwýr mě
hwýr wrý ně axpēn pānhā mě hā
xijere kamā mě homnu xà kapī. E
mě tokyx ma mě hwýr wrý. Anē.

² Hāmri nhūm mě kuma ně axpēn
pānhā mě hwýr wrý. Nhūm wamta
kumrēx pika piitā hkôt mě homnu

xàta kapī. Pu nhūm mě kot mrym-
nuti mě ō sānti wa kām mex ā
harēnh ně amnhī tā wa hixi jaxwýr
xwýnh piitā hkānhy hpa ně à htýx
kumrēx ně ri pa.

³ Hāmri nhūm wamta kôt hōja ō
xijere py ně gō xujanār kām hkapīr
pa nhūm gō te mě htykjē kamrō
pyrà ně kamā mēmo mry htýyxā
rēnh xwýnh piitā pikaprār pa.

⁴ Tā ra xijere kapīr xwýnh o
axkrut ně ō xijere kapī hāmri nhūm
hkôt hōta ō xijere py ně hpānhā gō
hkryre piitā hkôt hkapīr pa. Py-
hti ně ri hino piitā hkôt hkapīr pa
nhūm piitā gō xujanār pyrà ně mě
hkamrō hā amnhī jahkre hpa.

⁵ Hāmri nhūm axtem Tirtūm
kapēr o mě wrýk xwýnhjē hō kot
kām gō piitā hamār xwýnhhta ja hā
omu ně Tirtūm mā kām:

Pa amex rāhā apa ho apa xwýnh.
Ně arāhā apa ho apa xwýnh.
Nà ām hāmri na ka ā mě kēp gōta
nhīpēx anē.

⁶ Na prem mě kot akôt amnhī
nhīpēx xwýnhjē mě mě kām
ri akapēr jarēnh xwýnhjē
hpar o pa nhūm mě hkamrō
hpikapīr rax ně.

Tā ka ra mě hā mě kēp mě hkōm
xà homnu hpa nhūm mě kēp
mě hkamrō ā amnhī jahkre
nhūm mě tee ri ho hkōm mā.
Nà ām hāmri na ka ā mě kēp
gō nhīpēx anē Tirtūm. Anē.

⁷ Hāmri nhūm mě kot Tirtūm mā
mēmoj nhōr xà hā mēsti hpar pē
hkrī xwýnhjē hōja kuma ně kām:

Nà ām hāmri na ā ajarēnh anē
Tirtūm.

Ām hāmri na ka ā akrajē hā mě
hipēx anē.

Ra ate mě hā amnhī jarēnh xà hkôt
na ka hte tanhmā mě hipēx
to.

Nà apē mě inhō Tirtūm Maati na
ka. Mě ixrom axihtýx o
axihtýx ně axāhpumunh o
axāhpumunh. Anē.

⁸ Tā ra axkrunēpxi ně ō xijere kapī.
Jakamā nhūm mě hpānhā hōja ō

xijere o tē nē myyti hā hkapīr pa nhūm hkagro ht̄ȳx nē pika hkôt mē pa xw̄ynh̄jē hkà ho hxēt o pa.

⁹ Kagro ht̄ȳx o hkagro ht̄ȳx jakamā mē hkà ho hxēt nhūm mē kamā hkà kajē hpa. Hāmri nē tee ri amnhī pumu nē hamaxpēr o:

—Nā Tīrtūmtija na ā mē pahtomnuy t̄ȳx anē. Anē.

Hāmri nē kamā gryk t̄ȳx nē hapry nē tanhmā ho kapēr punuj to ho pa. Nom mē kot amnhī tomnuy kaga nē kām mex o mex ā harēnh kēt nē arī tanhmā amnhī tomnuy to ho pa.

¹⁰ Nhūm ra kēp kwat nē ō xijere kamā mēmojja kapī. Jakamā nhūm ra hpānhā hōja ō xijere o tē nē gōj rūm mrymnuti kot mē ho amnhīptār xà hā hkrī xà hā hkapīr pa. Jakamā nhūm ra kot mē ho amnhīptār xà hā pikaja kamā kamàt kô htyk par kumrēx. Hāmri nhūm mrymnuti mē hkôt mē kot amnhī nhīpēx xw̄ynh̄jē hā kamàt kô hpa nhūm mē amnhī xà ht̄ȳx ā maj amnhī nham o axpēn kamnhar t̄ȳx kumrēx. ¹¹ Nē ā Tīrtūm kot mē hipēx anh̄ȳr ā amnhī tā omu nē kamā gryk t̄ȳx nē tanhmā ho kapēr punuj to ho pa. No ām kot amnhī tomnuy xw̄ynh̄ ā amnhī pumunh nē kot amnhī tomnuy kaga hkēt nē.

¹² Nhūm prem ra kēp sīk nē ō xijere kamā mēmoj kapī. Jakamā nhūm hpānhā hōja ō xijere kamā mēmojta o tē nē pyhti pē Erax kamā hkapīr pa nhūm gōja grà pa nē te kēp pry pyrā nē nō. Jakamā nhūm myt japōx xà rūm mē ho amnhīptār xw̄ynh̄jaja nē pōristijaja hāmri pijapu kaxyw Jerujarē hw̄ȳr nojarēt nē hā hw̄ȳr pa.

¹³ Tā nhūm kagāmnuti mē ŷ hā mē kām hēx o pa xw̄ynh̄ mē mrymnutita wa mē hakwa rūm mēmoj te priti pyrā nē hapōx o pa. No ām priti hkēt mē kēp Satanasti mā mē āpēnh xw̄ynh̄ kw̄ȳy.

¹⁴ Jakamā na prem pika piitā hkôt mē kot aa mēmoj pumunh kēt

kw̄ȳ ho anh̄ȳr o hēx rom mē no kupyro o mē hkôt pa. Tā pika piitā hkôt mē ho amnhīptār xw̄ynh̄jē mē ho pikuprōnh kaxyw mē hapēr o pa. Mē kot Tīrtūm xiht̄ȳx o hiht̄ȳx kurē kaxàr kaxyw mē pijapu xà hā arīgro kukamā mē ho pikuprōnh o pa.

Jejus kot amnhī kw̄ȳjē mā kapēr ā harēnh

¹⁵ Tā nhūm Jejus pika hkôt hkrajaja arī mē ht̄ir nē pa xw̄ynh̄jē mā kapēr nē mē kām:

E mē inhma ixkw̄ȳjaja. Akup̄ym ixte mē aw̄ȳr ixwryk xà hā arīgroja ā kot paj te mē àhkīnh xw̄ynh̄ kot amnhī nhīpēx pyrā nē mē ajaēr pē mē aw̄ȳr wry. Jakamā kēr ka mē amnhī w̄ȳr ijamār rāhā ho apa. Kēr pa akup̄yn wry ka mē amnhī w̄ȳr ixpumu nē akīnh nē amnhī kamā amā ixpuma hkēt nē. Anē.

Mē kot axpēn kurē kaxàr kaxyw mē pikuprōnh ā mē harēnh

¹⁶ Tā nhūm Satanasti hkwȳjaja pika piitā hkôt mē ho amnhīptār xw̄ynh̄jē ho pikuprōnh pa nē mē hkurē kaxàr kaxyw ma Ijaew kot kām “Amaketō” jarēnhja w̄ȳr mra.

¹⁷ Hāmri nhūm Tīrtūm kapēr o mē wryk xw̄ynh̄ pē 7 kot hitepta ō xijere py nē kàx mā kamā mēmoj kapīr pa. Jakamā nhūm Tīrtūm nhōrkw̄ȳ kamā mē ho amnhīptār ā hkrī xà rūm Tīrtūm kàx pē kapēr o:

—E hāmri. Na pa ra mē kot amnhī tomnuy m̄yrapē tanhmā mē ho jatur xàm mēnh kaxyw. Anē.

¹⁸ Pu nhūm na hkatōtōk nē hkrakrak nē haxēnh nhūm pika htertēt t̄ȳx nē. Aa mē kot pika htertēt t̄ȳx kot anh̄ȳr ā omunh kēt kumrēx.

¹⁹ Jakamā nhūm Papirōnja kajē axkrunēpxi. Papirōn nhō xw̄ynh̄jaja kot amnhī tomnuy t̄ȳx o paja m̄yrapē nhūm Tīrtūm ā mē hipēx anē. Nē pika htertēt o pika piitā

hkôt krī grānh pa. ²⁰ Nhũm gô hipôk piitā gôja hã axkamur nhũm hapêx pa. Nê kên prêk nê hkrā hixêr rôrôk nê hpigrānh pa. Pika htetert tỳx kumrêx jakamã ã mêmoj amnhĩ nhĩpêx anê. ²¹ Nê na mê pê jêr krā jakootija mê piitā mê hipy rôrôk. No ãm hkrā hkryre hkêr hkrā rũnh kumrêx. ãm hpỹnh nê kamã kêp 40 kir nê mê hã rôrôk nhũm mê tee ri amnhĩ tã ã omu nê Tirtũm kamã gryk tỳx nê haprỳ nê ho kapêr punuj nê.

17

Tirtũm kra hkêr xwỹnhjê jarênh

¹ Tã pa pre kê axte mêmoj pumu. Nhũm kot xijere jamỹnh xwỹnhjê hõja ixwỳr tẽ nê inhmã:

—E ma ixkôt tẽ nê mêmoj pumu. Anê.

Hãmri pa kuma nê ma hkôt tẽ nhũm inhmã:

—Nã ahpỹnhã gô rax mỳri krī nhõ xwỹnhjaja te ho ni hkuprỳ gô mỳ ri ỳr nê kãm mêmjê piitã hkĩnh o ỳr xwỹnhhta pyrãk. Na htem urãk nê Tirtũm kapêr kôt ri amnhĩ nhĩpêx kêt nê. ãm htỳx ri tanhmã amnhĩ tomnuj to ho pa. Jakamã koja Tirtũm tanhmã mê homnuj tỳx to nê mê ho hapêx. ² Krī piitã hkôt mê ho amnhĩptar xwỹnhjaja na hte ma mê õ krī hwỳr mra nê te mê kot mê hkuprỳjê ho amnhĩkati pyrãk o amnhĩ nhĩpêx. Nê te pipãnh nê htỳx ri amnhĩ nhĩpêx pyrãk o amnhĩ nhĩpêx o pa. Nhũm krī nhõ xwỹnhjaja mê urãk nê amnhĩ krã hkôt pix mã tanhmã amnhĩ tomnuj to ho ri pa. E ma ixkôt tẽ nê ja hã mê omu. Anê.

³⁻⁴ Hãmri nhũm Tirtũm Karõ tanhmã ixto nhũm kapêr o wrỳk xwỹnhja ma kapôt wỳr ixto mõ pa kapôt ã mrymnuti hkrã kêp 7 nê kamã hpàr kêp 10 xwỹnhhta pumu nhũm hkamrêeti nê xa. Nê ã piitã hã tanhmã Tirtũm o kapêr punuj to hã kagã. Nhũm katut ã mēhõ ni kuprỳta nhỹ. Mê ho

amnhĩptar xwỹnh ã mê ê kakrã htyk nê hkamrêk o hkukar jaxã nê hã nhỹ. Nê õr o õkrexê. Nê õr o hinwỳyêxê nê ãhkra kamã kãx. ãm õr pix o hikukrêx. Nê kên mex karỳr pix o amnhĩ jamrêx. Nê õr o kopti hõ py nê hã nhỹ. Kopti kamã ni kuprỳ kot amnhĩ tomnuj xã. ãm kot mê kêp mê mjên o amnhĩkati ho pa xã pix nhũm kupy nê o nhỹ.

⁵ Nê õkrã hã amnhĩ nhĩxi hã kagã kot:

Inhĩxi pimxur pê PAPIRÕN RAXTI. Nê ixpê mê kêp mê mjênjê ho amnhĩkati ho mê pa xwỹnhjê nã na pa.

Nê ixpê mê kot axpên prõ ho amnhĩkati o mê pa xwỹnhjê nã na pa.

Nê ixpê mê kot Tirtũm nê mê kãm hêx o ri mê pa xwỹnhjê nã na pa.

Nê ixpê mê kot Tirtũm kapêr kôt amnhĩ nhĩpêx o pa hkêr xwỹnhjê nã na pa.

Anhỳr o õkrã hã amnhĩ nhĩxi hã kagã kot anhỳr. ⁶ Nhũm axpã nê nhỹ pa omu. No ãm kagõxyhti ho hpipãnh kêt. Mê kot Jejus kôt amnhĩ xunhwỳr nê ri mê kãm Jejus kêp mê õ pahшти hã harênh xwỹnhjê kamnhwỳr o mê hpar nhũm mê hkamrô pikapĩr xwỹnhjê kamrô ho na pre axpã nê nhỹ. Pa ã kot amnhĩ nhĩpêx anhỳr ã omu nê tee ri ijamaxpêr.

⁷ Hãmri nhũm Tirtũm kapêr o wrỳk xwỹnhja inhmã:

—Kwa mon ka ri ja pumu nê tee ri ajamaxpêr? E kot paj ixprĩ hã amã harê ka inhma. Nitĩ mê hã ỳr xwỹnh pê mrymnutita. Krã pê 7 nê kamã hpàr pê 10 xwỹnhhta kot paj ixprĩ hã amã hamê wa harê ka wa harênh ma.

⁸—Nã mrymnutija na pre htĩr nê ri pa tã ty nê ahkre xupỹmti kamã hikwỹ. Nom koja akupỹm htĩr nê kurũm kato nhũm mê piitã omu nê ahpỹnhã tanhmã hamaxpêr to. Amnepêm kormã amrakati ri

Tirtüm kot õ kagà kamã mẽ htír tùm nê mẽ pa mã xwýnhjê nhíxi jaxwýr xwýnhjaja koja kator ã omu nê ãm omu nê tanhmã hamaxpêr to hkêt nê. No mẽ kot Jejus kôt amnhĩ xunhwýr kêt xwýnhjaja koja mẽ amnhĩ jaêr pê akupým kator ã omu nê tee ri hkukamã hamaxpêr. Hãmri nê axpên mã: “Kwa amnepêm htyk tâ ra tanhmã amnhĩ to nê akupým htír nê api nê mõi.” Anhýr o axpên mã harê. Hãmri nhùm kato nê ma tê nhùm Tirtüm tâ ho hapêx kumrêx nhùm hapêx o hapêx.

⁹ —Kwa inhma nê jam ajamaxpêr týx nê. Mrymnuti krã pê 7ta te kêp hixêt prêk pê 7 pyrà nê hã ýr xwýnh ni kupryta te hixêt prêk pê 7ta ã ýr pyràk.

¹⁰ —Nê mrymnuti hkrã pê 7ja te kêp mẽ ho amnhĩptâr xwýnh pê 7 pyràk. Nhùm mẽ ho amnhĩptâr xwýnhjaja te mẽ kêp 5 nê ra htyk pyràk nhùm hkôt hõja arĩ mẽ ho amnhĩptâr o pa. No kot hitepta kormã. Nom koja mẽ ho amnhĩptâr ry hkêt nê.

¹¹ —Mrymnuti htír nê pa htã htyk nê ra akupým htír nê àpir xwýnhta koja hkrã hitepta pãnhã mẽ ho amnhĩptâr o pa. Jakamã te mẽ ho amnhĩptâr xwýnh pê 7jê hõ pyràk. Koja hkrã pê 7ja mẽ ho amnhĩptã nê gaa nê htyk mẽ nhùm hpãnhã mrymnutita hpãnhã mẽ ho amnhĩptã. Hãmri nhùm rĩ kormã Tirtüm tâ mẽ ho hapêx par kumrêx.

¹² —Nê ate mrymnuti hkrã kamã pâr pê 10 pumunh xwýnhta te mẽ kêp mẽ ho amnhĩptâr xwýnh pê 10 pyràk. No ãm jaja na kormã mẽ ho amnhĩptâr kêt nê. Koja mẽ nhýrmã anhĩpê mrymnuti nhý hã ahpýnhã ri mẽ ho amnhĩptâr o pa nom mẽ ho amnhĩptâr japijê hkêt nê. ¹³ Koja mẽ tanhmã ja hã axpên mar to hãmri nê mrymnuti mã anê nhùm mẽ hpãnhã mẽ piitã mẽ ho amnhĩptã.

¹⁴ —Nê mẽ ho amnhĩptâr xwýnh pê 10jaja koja mẽ pahte amnhĩ

tomnuj pãnhã amnhírer xwýnh kurê kaxàr kaxyw hwýr mra nê kutã pijapu ho kuhê. No ãm tee ri kãm tanhmã ho hprãm hkapry nhùm mẽ ho axtem nê amnhĩ tâ mẽ himex pa. Hihtýx o hihtýx o kot mẽ ho hpimràatã mẽ hakrenh par. Nê kêp pika piitã hkôt mẽ ho amnhĩptâr xwýnhjê nhõ Pahihti. Tãm na pre amnhĩ wýr mẽ kot hkôt amnhĩ nhípêx o mẽ pa xwýnhjê wý nhùm htem amnhĩ kaxyw hkôt hamaxpêr mex rãhã ho pa. ¹⁵ — Nê krĩ pê Papirõn kapem gõ xohtõ mý ri ni kupry hkrĩ xwýnhta. Gõ xohtõja te kêp ahpýnhã ri pika piitã hkôt mẽ uro hkwy pyràk. Nê te ahpýnhã ri mẽ kapêr xwýnh kwý pyràk.

¹⁶ —Nê mrymnuti hpâr pê 10ta kêp mẽ ho amnhĩptâr xwýnh pê 10 pyràk. Jakamã koja mẽ kãm ni kupryta prãm nõkati nê kamã gryk týx kumrêx. Hãmri nê hwýr mra nê kêp hikukrêx piitã utã nê kêp ê hkwrýnh pa nhùm hkênh mex nê xa. Hãmri nhùm mẽ kupĩ nê ï hkrêr pa nê kuwy kamã hi rê nhùm kaxàr pa nê hapêx.

¹⁷ —Na pre pahi pê 10jaja mrymnuti hkôt amnhĩ xunhwý nhùm Tirtüm ãm ja hã mẽ omu nê tanhmã nê mẽ kãm nê hkêt nê. Jakamã koja mẽ ãm hkôt pix mã amnhĩ nhípêx o pa rãhã nhùm Tirtüm mẽ ho hapêx. Nê mẽ õ krĩ mẽ mẽ ho hpimràatã mẽ ho hapêx pa. Hãmri nê mẽ ho hapêx o mẽ ho hapêx.

¹⁸ —Nê ate mēhõ ni kupry pumunh xwýnhta te kêp krĩ rax pê Papirõn nhõ xwýnhjê pyràk. Nê mẽ ho amnhĩptâr xwýnhja pika piitã hkôt mẽ ho amnhĩptâr xwýnhjê hkrãhtüm na. Anê.

Ã Tirtüm kapêr o mẽ wryk xwýnhja inhã mẽ harênh anê. Pa kuma nê õ ri mẽ amã hã kagà. Mê ate kamã harênh nê aprĩ hã mar týx kaxyw.

18

Tirtūm kot Papirōn grành par ā harēnh

¹ Tā pa kê axte mēmoj pumu. Nhūm axte Tirtūm kapēr o mē wrýk xwýnhjê hōja kaxkwa rūm ahpār mā wrýk o tē. Tirtūm nhý hā hihtýx nē kamā hirā rax kumrēx o pika piitā hkôt mē kām hirā pa. ² Nē ahpār mā tēn wrý nē kàx pê kapēr o:

E koja Papirōnja pigrành pa nē hpānhā kēp Satanasti mā mē àpēnh xwýnhjê papxà nē kēp nhōnhti papxà. Hāmri nē aa kamā mēmoj mex kêt kumrēx.

³ Krī nhō xwýnhjaja na htem Tirtūm kapēr kôt amnhī nhīpēx kêt nē amnhī krā hkôt kām prām xà hkôt pix mā tanhmā amnhī tomnuj to ho pa. Te mēhō pipānh nē htýx ri amnhī nhīpēx o pa pyrāk.

Nhūm krī piitā hkôt mē ho amnhīptār xwýnhjaja mē hwýr mra nē mēnijē ho amnhīkati ho pa.

Nē krī nhō xwýnhjaja mēmoj pumu nē kām hkīnh nē haprōr kurē kumrēx o pa nē aa uaprōr o hapēx kêt nē.

Jakamā na hte krī hkwy nhō xwýnhjaja mē hwýr mēmoj to pa nē xatā mē kām ho wēnē nē mē kukwak ri mē hikāxpore rūnh nē pa.

Anhýr o kapēr. ⁴ Hāmri nhūm Tirtūm Papirōn kamā hkrajê mā kapēr nē mē kām:

E mē tokyx mē kot ri htýx amnhī nhīpēx xwýnhjê nhō krīta rūm ajapōj ixkrajaja.

Kot kaj mē anhýr kêt nē ra mē hkôt amnhī nhīpēx pa mē ato apimràtā mē ate amnhī tomnuj ā mē atomnuj týx nē.

⁵ Krī nhō xwýnhjaja na htem amnhī tomnuj rūnh o pa.

Mē kot amnhī tomnuj xà te mē kot kēn katutxō nhūm hprēk

rax o kot kaxkwa kanhwýr kaxyw pyrāk.

Na pa hte ā mē kot amnhī nhīpēx anhýr ā mē omunh rāhā ho ri ixpa. Jakamā kwa ixkrajaja mē tokyx mē kurūm ajapōj.

Anhýr o hkrajê mā kapēr. Hāmri nē kapēr o mē wrýk xwýnhjê mā kām:

⁶ E kwa mē ma mē hwýr wrý nē tanhmā ixkrajê hā mē ho.

No ām kēr ka mē tanhmā mē ho htýx o mē kot ra tanhmā ixpē ixkrajê nhīpēx tota jakre.

Kê mē tanhmā ixpē mē ho grire htā ka mē hā tanhmā mē ho htýx kumrēx o mē kot mē hipēxta jakre.

⁷ Krī nhō xwýnhjaja na prem mex nē pa.

Nē mē hikukrēx rūnh nē hkīnh nē pa.

Nē tanhmā amnhī to jarkrar to ho ri pa nē amnhī jarēnh o:

“Ot pa mē te pahi ni kot amnhī nhīpēxta pyrā nē ixkrī xà mex pix kām ixkrī pyrāk.

Nē te Tirtūm kot amnhī nhīpēx pyrāk o na pa htem amnhī nhīpēx o ri ixpa.

Nē mē ixkīnh nē mē inhmex rāhā ri ixpa.

Ā mē ixte amnhī nhīpēx anhýr xwýnh na pa mē.”

Anhýr ā amnhī to jarkrar o pa.

Tā kēr ka mē tanhmā mē homnuj to kê mē mexta pānhā omnuj týx nē pa.

Nē kê mē hkaprī nē amnhī xà htýx kām hamak rāhā nē pa ho pa.

⁸ E kê mē ā amnhī nhīpēx anhýr o pa.

Jakamā koja mē arīgro hpýnh kām mē hkwyjaja hpikaprar rūnh nē nhūm arī mē htír xwýnhjaja omnuj nē pa.

Nē tee ri amnhī pumu nē hkaprī xàj mýr o pa.

Nē amnhī xà htýx kām hamak o pa. Nē tee ri amnhī nhīpēx o pa.

Nē kām prām nē pa rāhā ty nhūm
kuwy mē ho hkaxàr pa.

Ixpê Pahi Maati Tirtūm kot paj ix-
ihtȳx kām ā mē hipêx anē.
Anē.

⁹ Hāmri nhūm krī piitā kurūm mē
ho amnhīptār xwýnhjaja. Mē kot
mē hwýr mrar nē mē hkuprýjê ho
amnhīkati nē mē uràk nē mēmoj
pumunh nē haprôr rāhā ho pa
xwýnhjaja tee ri krī kaxàr nē kàx mā
kuwy hkūm àpir o paja pumu nē
hkaprī nē mýr o kuhê.

¹⁰ Nē Tirtūm kot mē ho hapêx
par ā mē omu nē kām ma htýx
kumrêx. Amým mē omunh o kuhê
nē tee ri amnhī kukamā hamaxpêr
nē htertèt týx nē. Nē mýr kām kapêr
o:
Hêxta waa nē Papirôn nhō
xwýnhjaja.

Mē amex nē axihtýx mex nē
apa htā nhūm Tirtūm mē
anhīmex pa. Hêxta waa nē.
Anē.

¹¹ Nē mē hwýr mrar nē mē kām
mēmoj to wēnê ho mē pa xwýnhjaja
haxwýja krī pumu nē tee ri amnhī
kukamā hamaxpêr nē hkaprī nē
mýr o kuhê. Nhýri koja mē tokyx
axte mēmoj to wēnê? Mē kêp mēmoj
japrôr rūnh xwýnhjaja hkaxàr par
kumrêx kēnā.

¹² Na prem mēmoj piitā ho pa
nē mē kām ho wēnê. Mēmoj mex
piitā. ôr o mē hkukrêx nē prat o mē
hkukrêx nē kēn jaxênh ā kàxpore
xohtô. Nē kupêxê mex. Kakrā
htyk nē hkamrêk nē hkroore nē
hā hapjê. Nē mēmo pī kuxware
nē pī htýx nē kēn jakār nē kàx o
ri mēmo nhīpêxja nhūm prem mē
kām ho wēnê ho pa. ¹³ Nē mēmo
htwým nē mē hkuxwa xà. Nē mē
ô ho ành xà nē mē ô kuxwa xà nē
xwýgrā nē harôj. Nē môx nē ôwêhti
nē kawar nē kaxyw kawarti hkjênh
xà hā karrotre. Nē nhýhýnh krī
hō kamā panhī hkwy pynê nē mē
hwýr mē o pa nē mē kām mē ho
wēnê nhūm mē amarī mē hkôt ri
ápênh rūnh o pa. Na prem ā mē

kām mēmoj to wēnê anhýr o pa. Tā
ra mē kot mē haprôr xwýnh mē mē
pimràatā hapêx pa.

¹⁴ Jakamā nhūm mē tee ri mē
hkukamā hamaxpêr nē te kot mē
kām kapêr pyrā nē mē kām:

Hêxta waa nē. Mē amā mēmoj
prām nē amnhīm haprôr
xwýnhhta na mē apê hapêx
par kumrêx.

Nē mē akàxpore rūnh nē mē
akukrêx rūnhhta mē mē
apimràatā ajapêx pa. Kot
kaj mē axte tanhmā amnhī
nhīpêx to ho apa hkêt nē.
Anē.

¹⁵ Hāmri nē amým ri Tirtūm kot
tanhmā mē hipêx to hā mē omu nē
kām ma xàj mur nē htertèt o kuhê.

¹⁶ Nē mýr kām kapêr o:

Hêxta waa nē. Na pre htem ê mex
pix jagjê nē ri hā mra. Kakrā
htykre nē hkamrêkre.

Nē mē hikukrêx mex o amnhī
jamrêx nē ri hā mra.

Nē ôr nē kēn mex ā ohtô xwýnh o
amnhī jamrêx nē ri hā mra.

¹⁷ Tā ra hapêx par kumrêx. Anē.

Hāmri nhūm gô xujanār kām pàr
nhō dôn nē mē kot mē kām pàr o ri
mrar xwýnhjaja nē mē kot kamā tep
pynênh xà ho tep pynênh o ri mē
pa xwýnhjaja nē pàr kām amarī mē
pa xwýnhjaja hāmri mē hwýr mra
nē wantajê pyrā nē tee ri amým
ri mē ô krī pumu nē mýr o kuhê.

¹⁸ Nē kurūm kuwy hkūm xàpir o
pa hā omu nē tee ri mē hkukamā
hamaxpêr nē axpên mā:

Hêxta waa nē. Krī mýj na pre
mex o mex. Mex o krī piitā
hakrenh par htā hapêx pa.
Anē.

¹⁹ Hāmri nē mur nē hkaprī xàj pika
hkwy jamý nē ho amnhī kamī nē
mýr kām kapêr o:

Hêxta waa nē. Krī mýj na pre rax o
rax.

Nhūm pre nhýhýnh pàr kām mēmoj
to wēnê ho pa xwýnhjaja mē
hwýr mēmoj to pa nē mē kām

ho wēnē nē mē hkukwak ri
hikāxpore rūnh nē ri pa.

Tā hāmri mē hapêx pa. Anē.

²⁰ Hāmri nhūm Tirtūmja krajē pi-
itā mē kām kapēr nē mē kām:

E ixpê Tirtūm na pa ā mē hipêx anē.
Mē kot mē apē ixkrajaja tanhmā
mē atomnuj to ho paja
mýrapê na pa mē atā ā mē
hipêx anē.

Jakamā e kaxkwa kamā mē apē
ixri mē apa xwýnhjaja.

Nē mē ate inhỹ hā ri mē kām
ixkapēr jarēnh o mē apa
xwýnhjaja.

Nē Jejus nhỹ hā mē akapēr o ri mē
apa xwýnhjaja. Mē apiitā mē
apē ixkra na ka mē.

E mē amnhĩ tā ja pumu nē akĩnh
nē axpēn mā apikunhar o
akuhê. Pa na pa mē atā ā mē
ho ijapêx anē. Anē.

²¹ Tā nhūm kapēr o mē wrýk
xwýnhjê hōja hihtýx o kēn rax
kumrêxja mý nē o tē nē gō xujanār
kamā kām gēt nē kumē nhūm mrō
nē akunok. Hāmri nhūm kapēr o:

E krīta koja Tirtūm te ho ixte gōx
kām kēn mēnh nhūm mrōr
nē hpikunor pyrāk o hipêx
nhūm hapêx par kumrêx.

²²⁻²⁴ Na pre hte krīja kamā mē kot
ri mē kām mēmoj to wēnē
xwýnhjaja amnhĩ to rūnh o
krī piitā hkôt mē hakrenh
pa.

Nē krī nhō xwýnhjaja na prem
pika piitā hkôt hêx rom
tanhmā mē no kupyr to ho
ri pa. Jakamā ra mēmoj to
wēnē xwýnhjê pyrā nē mē
hikukrêx rūnh gryk ā Tirtūm
kaga.

No ām ja pix kêt. Tirtūm krajē
mē Tirtūm nhỹ hā kapēr o
mē pa xwýnhjaja na prem
mē himex rax nē. Hāmri
nhūm krī piitā kamā mē pa
xwýnhjaja mē kot mē hipêx ā
mē omu nē mē urāk nē ā mē
hipêx anhýr o pa.

Tā Papirōn nhō xwýnhjaja kot
mē hipêx anhýrja mýrapê
koja Tirtūm mē himex par
kumrêx.

Jakamā koja mē axte hkĩnh nē
hkĩnh xāj ri grer kêt nē.

Nē axte hkĩnh nē grer kām hakwa
kôr o ri pa kêt nē.

Nē axte ri wiorāw kakrēnh hkêt nē.
Nē axte ri amnhūm kawā hyr o hkrī
hkêt nē.

Nē axte harōj kahuk o kuhê hkêt
nē.

Nē axte mē ōrkwỹ kamā kanê hpōk
kêt nē.

Nē axte axpēn mā ri hkrajē rer o ri
pa hkêt nē. Koja ā mēmoj kot
anhýr piitā hapêx pa. Anē.

19

Mē kot Tirtūm mex ā mē harēnh

¹ Tā pa kē axte mēmoj pumu. Nē
kaxkwa kamā mē kapēr ma nhūm
mē ohtō rax kumrêx nē tanhmā
axpēn mā kapēr to. Nē anhîpê kāk
pē kapēr týx nē kapēr o:

E pu mē pahpiitā Tirtūm mā mex o
mex ā harē.

Tapxipix na hihtýx o hihtýx.

Nē tapxipix na àhpumunh o
àhpumunh.

Nē tapxipix na mex o mex.

Tapxipix na mex o kot mēmoj piitā
hakrenh par.

Ra kot mēmoj punuj pē mē papytār
par jakamā kēp mē papytār
xwýnh ā pixi mex na.

² Na hte amnhĩ jarēnh xā hkôt
tanhmā mēmoj to ho pa.

Nē amnhĩ to hêx kêt nē.

Tā ām hāmri na ā Papirōn nhō
xwýnhjê nhîpêx anē.

Na prem mē kām Tirtūm kapēr
jarēnh o mē pa xwýnhjê
nhîmex rax kumrêx.

Nē krī piitā hkôt ri pa nē amnhĩ kôt
mē kurē nhūm mē kuma nē
mē hkôt amnhĩ tomnuj o pa.

Nhūm Tirtūm tee ri hā mē omu nē ā
hkrajē hā mē hipêx kati anē.
Ām hāmri na ā mē hipêx anē.

Anhÿr o axpën mã harë. ³Hãmri nê xatã axpën mã:

Nã ãm hãmri na ã mẽ panhõ
Tĩrtũmja mẽ hipêx anê nhũm
mẽ kurũm kuwy hkũm kãx
mã àpir o pa.

Koja krĩ nhõ xwÿnhjaja amnhĩ xà
htÿx kamã hamak rãhã ho
pa nê aa à htÿx hapêx kêt.

E pu mẽ hã Tĩrtũm mã mex o mex ã
harë. Anê.

⁴Hãmri nhũm mẽ àptàr tũm pê 24
mẽ mẽmoj tĩr pê kwatjaja hãmri
Tĩrtũm kot mẽ ho amnhĩptàr ã hkrĩ
xà maati kutã rôrök nê kãm hipõ
hpa. Hãmri nê ã mẽ kapër anhÿr
xwÿnhjê mã kapër nê kãm:

Nã ãm hãmri na ka mẽ ã Tĩrtũm
mex ã harënh anê. E pu mẽ
pahpiitã kãm mex o mex ã
harë. Anê.

⁵Hãmri nhũm mẽhõja Tĩrtũm krĩ xà
maati kamã kapër o:

E mẽ axte Tĩrtũm mã mex o mex ã
harë.

Mẽ ate Měpahpãm kôt amnhĩ
nhĩpêx o mẽ apa xwÿnhjaja.

Nê mẽ apê mẽ ho amnhĩptàr
xwÿnhjaja nê amarĩ ri mẽ
apa xwÿnhjaja nê mẽ apiitã
mẽ ate Tĩrtũm ã apijaãm o
mẽ apa xwÿnhjaja kãm mex
o mex ã harë. Anê.

*Kot mẽ pahpãnhã amnhĩrer
xwÿnh mẽ hkwÿjê jarënh*

⁶Tã pa tanhmã mẽ kapër to hã
mẽ kuma nhũm mẽ kãx pê kapër
tÿx nê. Te mẽ ohtõ rax kumrêx
kapër pyrãk. Nê te gõ koko htÿx rÿ
na katõtök tÿx pyrãk. Hãmri nê mẽ
kapër o:

E na ra Tĩrtũm kêp mẽmoj piitã ho
amnhĩptàr xwÿnh.

Nê kêp mẽ panhõ Pahi Maati.

Nê hihtÿx o hihtÿx nê àhpumunh o
àhpumunh.

E pu mẽ kãm mex o mex ã mãn
harë.

⁷⁻⁸Nê hã pahkĩnh nê.

Nê kãm hihtÿx o hihtÿx ã harë.

Te mẽ kot axpën mã mẽ rer xwÿnh
kot amnhĩ nhĩpêx pyrãk.

Jao mẽ pahte amnhĩ tomnuj pãnhã
amnhĩrer xwÿnhhta te kêp
myja pyrãk.

Nê mẽ kot hkôt amnhĩ nhĩpêx
xwÿnh piitã te mẽ kêp nija
pyrãk.

Nê te mẽ kot axpën mã wa rer
nhũm wa kot axpën kôt pa
ho pa pyrãk o koja mẽ amnhĩ
nhĩpêx.

Nê te mẽ kot mjên mã xwÿnh mã
ê mex jakare nhõr nhũm kot
hagjênh pyrãk. Nê ê mexja te
mẽ kot tãm amnhĩ nhĩpêx xà
pyrãk. Anê.

⁹Hãmri nhũm Tĩrtũm kapër o wryk
xwÿnhja inhmã:

—E Juãw. Pa amã mẽmoj jarë
ka mar tÿx nê akwÿjê mã hã kagã.
Tĩrtũm kapër kwÿ kot paj amã harë.
Kêp Tĩrtũm kapër jakamã ãm hãmri
na. Na hte mẽmoj jarënh o hêx kêt
nê. E kapër ã kagã ho:

Na htem axpën mã mẽ rer kaxyw
nê amnhĩ wÿr hkwÿjê wÿ
nhũm mẽ hwÿr mra nê wa
hã hkĩnh nê apkur mex nê.

Ja pyrã nê Tĩrtũm kot amnhĩ wÿr
mẽ hwÿr xwÿnhjaja koja mẽ
nhÿrmã mẽ pahte amnhĩ
tomnuj pãnhã amnhĩrer
xwÿnhhta wÿr api nê ã amnhĩ
nhĩpêx anê nê hkĩnh nê
apkur mex nê.

Hãmri nhũm Tĩrtũm mẽ ho mex rax
kumrêx. Anê.

—E kêr ka ã akwÿjê mã ja hã kagã
anê Juãw. Anê.

Hãmri pa kuma nê kagã ja kamã
mẽ amã hã kagã. ¹⁰Hãmri nê hã
kagã hpa nê ra ixte kãm mex o mex
ã harënh kaxyw kutã ixkõn krã ho
têm nê nhÿ nhũm tee ri amnhĩ tã
ixpumu nê inhmã:

—Kwa ã ri inhĩpêx anhÿr kêt nê.
Apyrà nê ixte Jejus mã tanhmã
amnhĩ nhĩpêx to xwÿnh kênã. Je-
jusja apyrã nê kêp inhõ pahihiti
na. Jejus kapër na prem hkukamã

mê kot Tirtûm nhÿ hã kapêr o mê pa xwÿnhjaja hã kagà nê mê kãm harênh o pa. Jakamã kwa pu mê Tirtûm pix kutã mân pahkôn krã ho parôrok nê pahkrî nê kãm mex o mex ã harê. Anê.

Kawar jaka hã ÿr xwÿnh jarênh

11-16 Tã pa kê axte mêmoj pumu. Nhũm kaxkwa axkjê nhũm kamã kawar jakajre xa nhũm mêmhõja hã nhÿ. Hixi na pre kêp “Aa kot Tirtûm kaga hkêr xwÿnh.” Anê nê hixi hõ na pre kêp: “Tirtûm kôt pix mã amnhî nhîpêx o pa xwÿnh.” Anê. ã hixi kot anhÿr jakamã na hte katãt kôt ahpÿnhã mê kot amnhî nhîpêx ã mê omunh xã hkôt tanhmã mê harênh to. Mê kot amnhî to mex ã mê omunh xã hkôt tanhmã mê hkwyjê jarênh to nê mê kot amnhî tomnuj ã mê omunh xã hkôt ahpÿnhã tanhmã hkwyjê jarênh to. Na pre mê kot tanhmã hkwyjê nhîpêx to ho pa xwÿnhjê kutã amnhî xunhwÿ nê mê hã tanhmã mê ho. ã na pre kawar ã ÿr xwÿnhja amnhî nhîpêx anhÿr o pa.

Nê no te kot kuwy hpôk pyrãk jakamã hprî hã mêmoj piitã omu nhũm mêmoj kêp hpimxur kêt nê. Nê kêp pahi hã mê ahkã ho ohtô nê kutu. Nê nhÿhÿnh ï hã hixi hõ hã kagà nom ãm tapxipix kot amnhî tã amnhî nhîxija pumunh. Na pre ra amnhî kamrô ho ê xy hpa nê xa. Nê hixi hõ pê:

TIRTÛM KAPÊR O AMNHÎRÎT
XWÿNH

Nê ê ryti hã hixi hõ hã kagà. Nê ihkjê hã ãm tãm. Hã kagà jarênh kot:

Ixpê mê ho amnhîptãr xwÿnh piitã mê õ Pahi Maati na pa.

Nê hakwa rûm wapo xwa gixre pôm katon ajêt. Kot ho tanhmã mê kot Tirtûm mê wa kutã amnhî xunhwÿr xwÿnhjê nhîpêx to kaxyw. Jakamã ra mê piitã mê ho pikuprõnh pa nê mê hipêx o te mê kot prês kãm uwa xô kagô janênh

pyrãk nhũm mê hkamrô hpikapîr rax kumrêx. Tirtûm xihtÿx xwÿnh kot mê kamã gryk tÿx jakamã nhũm ã kãm mê hipêx anê. Mê kot amnhî tomnuj o paja mÿrapê.

Nhũm õ pôristi piitã urãk nê kawar jakare hã hkrî nê hkôt ri pa. Mê ê jaka muxre jagjê nê hã ma hkôt ri pa.

17-18 Tã pa axte Tirtûm kapêr o mê wrÿk xwÿnh õja pumu nhũm myyti kutã xa nê kãx pê nhônhti mã kapêr nê mê kãm:

—E mê amnê mê ixwÿr wrÿ nê Tirtûm ã akînh nê mê htyk nê mê hikwÿ xwÿnhjê hã atu nê aku. Mê ho amnhîptãr xwÿnhjaja nê pôristijaja nê mê hkrãhtûm nê kawar nê kawar ã mê hkrî nê ri mrrar xwÿnhjaja nê mê kot amnhî to rûnh xwÿnhjaja nê mê kot amnhî to hkryre xwÿnhjaja. Nê mê kãm mê àpênh xwÿnhjaja nê amnhî mã ri mê àpênh xwÿnhjaja. ãm mê htyk nê mê hikwÿ xwÿnh mÿj piitã mãmrî mê hwÿr wrÿ nê mê hã atu nê mê aku. E mê tokyx nhônhti. Anê.

19 Tã nhũm mrymnuti nê krî piitã hkôt mê õ pahi nê mê õ pôristijaja piitã axpên wÿr akuprô. Wam kawar jakare hã ÿr nê htêm xwÿnh mê õ pôristijê hwÿr hprôt nê mê hkurê kaxãr kaxyw axpên mar kaxyw akuprô.

20-21 Hãmri nê mê hwÿr mra nê mê hkurê kapa. No ãm tee ri amnhî nhîpêx nê tee ri kãm tanhmã mê ho hprãm hkapyr nhũm wam kawar jakare hã ÿr nê htêm xwÿnhhta hakwa rûm wapo xwagixre kator o mê himex pa. Hãmri nhũm mê hkwyjê pyrãn htyk pa nê hikwÿ. Nhũm nhônhti mê omu nê mê hwÿr wrÿk o mra nê mê kuku hãmri nê kãm mê hkur kaga nê mê hkaga. No nhũm mrymnuti nê ÿ hã mê kãm hêx o pa xwÿnhhta wa nhũm mê axtem nê htîr rãhã wa unê nê ma wa o tê nê êsôf o kuwy maati kamã wa kumê. Hãmri nhũm wa kamã

htír tũm nẽ hxêt rãhã nẽ pa ho pa
nẽ aa htyk kêt nẽ.

20

*Mẽ kot Satanasti hpa hpre hã mẽ
harẽnh*

Wam Korõt 15.20-28

¹ Tã pa kê axte mẽmoj pumu.
Nhũm Tirtũm kapẽr o mẽ wrýk
xwýnhjê hõja kaxkwa rũm wrý nẽ
ahkre xupýmti hpro xà ho htýx
xà hã safja py nẽ kàx pytĩhti ho
mẽ hpre xàja õ py. ²⁻³ Hãmri nẽ
kagãmnuti pẽ hẽx xwýnh maati Sa-
tanastija pynẽ. Amnepẽm Atãw mẽ
Ewa wa kãm hẽx xwýnhnta pynẽ nẽ
kàx pytĩ o hpa hpre nẽ hte hpre
hãmri nẽ ahkre xupýmti nhĩtom xà
mẽ nẽ kamã kumẽ. Hãmri nẽ
akupým hpro xà ho hpro nẽ saf o
hã ho htýx. Kot pika piitã hkõt mẽ
kãm hẽx o pa pymaj ã hipẽx anẽ.
Koja tokyx kator kêt ry rax kumrẽx.
Koja kamã arĩ hkrĩ hã amgrã xohtõ
nẽ. Hã amgrã pẽ 1.000 nhũm rĩ
kormã Tirtũm akupým kator nhũm
kato nẽ ri pa. Nom pa hkrãre.

⁴ Tã pa mẽ htyk nẽ akupým mẽ
htír xwýnh kwýjê pumu. Kormã
mẽ htír ri na prem Tirtũm kapẽr
kõt pix mã amnhĩ nhĩpẽx o pa. Nẽ
Jejus kęp mẽ õ pahihtĩ hã harẽnh
rãhã ho pa. Aa mẽ kot mrym-
nuti kutã hkõnkrã ho rôrõk nẽ kãm
mex ã harẽnh kêt. Nhũm prem
tee mẽ õkrã hã nẽ mẽ ãhkra katut
ã mrymnuti nhĩxi nhĩpẽx kaxyw
nom nhũm prem hkaga kamã hi-
htýx nhũm prem kãm mẽ hkurê
xwýnhjaja tee ri ja hã mẽ omu nẽ
mẽ mut jakar o mẽ kupa. Hãmri
nhũm Tirtũm akupým mẽ ho mẽ
htír nẽ mẽ kot mẽ ho amnhĩptar ã
hkrĩ xà kamã mẽ hkrĩ. Jejus nhĩhkõ
hã mẽ hkrĩ hã amgrã pẽ 1.000
kaxyw. ⁵ Mẽ kumrẽx na pre Tirtũm
akupým mẽ ho mẽ htír nhũm mẽ
hkwýjaja mẽ hkĩnh ã arĩ ty nẽ hikwý
hã amgrã pẽ 1.000 jakre nhũm rĩ
kormã akupým mẽ ho mẽ htír.

⁶ Wam akupým mẽ htír xwýnhjaja
kęp Tirtũm kra jakamã koja mẽ
Tirtũm kra hkêt xwýnhjê kurom
hkĩnh nẽ pa ho pa. Nẽ mẽ kurom
mẽ kot amnhĩ xà htýx kamã hamak
o pa htũm xà wýr pa hkêt nẽ. Nẽ
mẽ kurom Tirtũm mẽ Kra Jejus
Kris wa kuri mex kumrẽx nẽ wa
kãm tanhmã ri amnhĩ nhĩpẽx to
ho pa. Nẽ Jejus nhĩhkõ hã mẽ ho
amnhĩptar o pa hã amgrã pẽ 1.000.

*Tirtũm kot kuwy hwýr Satanasti
mẽnh ã harẽnh*

⁷ Tã koja amgrã pẽ 1.000 hapẽx
nhũm rĩ kormã Tirtũm kapẽr
o wrýk xwýnhjaja akupým ahkre
xupým wýr tẽ nẽ Satanasti mã
kahê xà mẽ nhũm kato. ⁸ Hãmri
nẽ kê axte pika piitã hkõt tanhmã
mẽ kãm hẽx to ho ri pa. Gorti
nhõ xwýnhjê mã nẽ Makok nhõ
xwýnhjê mã nẽ krĩ piitã hkõt Tirtũm
nẽ tanhmã mẽ kãm hẽx to ho mẽ
hkõt pa. Hãmri nẽ mẽ kot Tirtũm
krajê kutã amnhĩ xunhwýr nẽ mẽ
hkurê kaxar kaxyw amnhĩ kwýjê
ho akuprõ nhũm mẽ ohtõ rax
kumrẽx nẽ axpẽn wýr akuprõ. Te
pikahti grã xohtõ pyrãk.

⁹ Hãmri nẽ ma Tirtũm krajê
nhĩmex par kaxyw mẽ hwýr mra
nẽ mẽ õ krĩ mã hipõk pa nẽ kuhê.
Mẽ õ krĩa Tirtũm mã mex tã nhũm
mẽ kot kęp grãnh par kaxyw ma
hwýr mra. Hãmri nhũm kaxkwa
rũm kuwy hpõja mẽ haer pẽ mẽ
hã rôrõk nẽ mẽ ho hxêt pa.

¹⁰ No mẽ kãm hẽx xwýnh maati
Satanastita nhũm Tirtũm kapẽr o
wrýk xwýnhjaja axte unẽ nẽ ma esõf
o kuwy maatita wýr o tẽ nẽ kamã
kumẽ. Ra mẽ kot kamã mrymnuti
wa kot Tirtũm nẽ mẽ nokupyr o
pa xwýnh wa mẽnh tã wa hkõt Sa-
tanasti mã ho anẽ nẽ kamã kumẽ
nhũm kamã pa ho pa. Koja mẽ
aa kator kêt kumrẽx. Nẽ arĩ kamã
amnhĩ xà htýx kamã hamak rãhã
nẽ pa ho pa.

Tirtüm kot ahpÿnhã tanhmã më piitã më harënh to kaxyw

Matêwre 25.31-46; Juãw 5.25-29

¹¹ Tã pa axte mëmoj pumu nhùm kaxkwa më pikaja wa ra hapêx pa. Pa Tirtüm kot tanhmã më piitã më harënh to hã hkrĩ xà raxja pumu. Nhùm hakajre nhùm Tirtüm kamã nhÿ.

¹²⁻¹³ Hãmri nhùm ra më htyk nê më hikwÿ xwÿnh piitã akupÿm hapôx pa nê Tirtüm kot tanhmã më harënh to hã hkrĩ xàta kutã hkrĩ pa. Më piitãã. Më kot amnhĩ to rûnh xwÿnhjaja nê më kot amnhĩ to hkryre xwÿnhjaja nê më ho amnhĩptâr xwÿnhjaja nê gô xujanâr kãm më mrôr nê më htyk xwÿnhjaja. Ra më htyk nhùm më kot më hagjênh xwÿnhjaja piitã më htykjê papxà rûm hapôx pa nê Tirtüm kutã ohtô ho ohtô nê hkrĩ. Hãmri nhùm Tirtüm ô kagà py nê kamã më piitã më hixi japêr. Kagà kamã ra më hkukamã më htĩr tũm nê më pa ho më pa mã xwÿnhjê nhĩxi japêr. Nê kagà hõ kamã më htĩr ri tanhmã më kot amnhĩ nhĩpêx to ho pa hã më piitã më hã kagàja. Nhùm kupy nê kamã tanhmã më harënh to nê hkôt hprĩ hã më piitã më omunh pa nê rĩ kormã ahpÿnhã tanhmã më harënh to.

¹⁴⁻¹⁵ Hãmri nê më htĩr tũm nê më pa mã xwÿnhjê nhĩxi hã kagàja kamã tee ri më hkwyjê nhĩxi japêr nhùm kamã amrakati. Jakamã nhùm më ma kuwy maatita wÿr më o mra nê kamã më rênh pa. Te axte më htyk nhùm më kot kuwy kamã më hagjênh pyrãk nhùm më kamã rôrôk nê tee ri amnhĩ xà htÿx kamã hamak rãhã nê pa ho pa nê aa kator kêt kumrêx.

21

Pika më kaxkwa wa nyw jarënh

Sikũn Pêtre 3.8-13

¹ Tã pa axte mëmoj pumu. Nhùm Tirtüm ra pika më kaxkwa nyw wa ho kato. Ra pika nê kaxkwa nê

gô xujanâr tũmja hapêx pa nhùm kaxkwa më pika nyw wa ho kato. Nom axte gô xujanâr o kator kêt nê.

² Hãmri nhùm Tirtüm nhõ krĩ mex pê Jerujarê nywja tanhmã amnhĩ to nê pika nyw wÿr wrÿk o mō. Krĩja mex kumrêx. Mex o mex. Te mjên mã xwÿnh ê mex jaxàr nê amnhĩ to muxre nê mjên wÿr htêm pyrã nê pika nyw wÿr mex kumrêx nê wrÿk o mō.

³ Hãmri nhùm Tirtüm kot më ho amnhĩptâr ã hkrĩ xà maatija kamã mëhõja kapêr o:

—Nà ãm hãmri. Na ra Tirtüm hkrajê hkôt pa ho pa. Pika nyw kamã më hkôt pa ho pa nhùm më tã no ho omu nê hkôt pa ho pa rãhã nê. Nà ãm hãmri. Ja mex o mex.

⁴ —Koja hkrajaja hkôt pa ho pa nê axte htyk kêt kumrêx. Nhùm Tirtüm më nê më no kagô nhĩnhĩnh pa nhùm më axte hkaprĩ nê mÿr kêt nê. Nê ri axte amnhĩ xà kamã hamak kêt nê. Nê axte ri tanhmã omnu hto hkêt nê. Ra më hkaprĩ nê à nê mÿr o pata hapêx par kumrêx nhùm hpãnhã mëmoj nyw pix. Anê.

⁵ Hãmri nhùm Tirtüm tãm tanhmã inhmã kapêr to. Krĩ xà maati kamã ÿr xwÿnhhta tãm inhmã kapêr o:

—E na pa ra akupÿm mëmoj piitã ho nyw pa. Jakamã e Juãw. ãm hãmri na pa ã amnhĩ kukamã amã mëmoj jarënh anê. Ixêx kêt. Jakamã kêt ka akwyjê mã piitã hã kagà hpa. Kê më kamã harê nê tokyx kuma nê hkôt hamaxpêr rãhã ho pa.

⁶ —Ra ixte amnhĩ kukamã mëmoj mã ijamaxpêr xwÿnhja na pa ra ho anhÿr pa. Ixpê mëmoj piitã ho anhÿr o hkrax xwÿnh nê mãânên ixpê mëmoj piitã ho ijapêx par xwÿnh. Nê ixrãhã ixpa xwÿnh. Amnepêm kormã mëmoj kator kêt ri na pa pre ixrãhã ixpa. Nê ot pa arĩ ixrãhã ixpa. Tã më kãm kôr nê kãm gô hkwy ho hkôm hprãm xwÿnhjê pyrã nê më kãm ixpix prãm xwÿnhjaja kot paj te më kãm inhõ hino rûm gô hkwy nhõr nhùm

mě kot ho hkõm pyræk o mẽ hipêx. Hâmri nhũm mẽ htĩr tũm nẽ ixri pa ho pa nẽ axte htyk kêt nẽ. Kot paj ã mẽ hipêx mex anẽ.

7 —Mẽ ate tanhmã amnhĩ tomnuj to nẽ amnhĩ to htỳx nẽ ixkõt pix mã amnhĩ nhĩpêx o mẽ apa rãhã mẽ atyk xwỳnhjaja kot paj ã mẽ anhĩpêx mex anẽ. Ka mẽ apẽ ixkra hã amex nẽ ixkõt ri apa rãhã ho apa. Pa ixpẽ mẽ anhõ Tĩrtũm ã tanhmã mẽ ato mex to rãhã ho ixpa.

8—No mẽ kot amnhĩ kaxyw ixkõt hamaxpêr kêt xwỳnhjaja. Nẽ mẽ kot amnhĩ tomnuj xwỳnhjaja nẽ mẽ kot ri mẽ hpar prãm xwỳnhjaja. Nẽ mẽ kot nhãm ri mẽnĩjẽ ho amnhĩkati xwỳnhjaja. Nẽ wajagajaja. Nẽ mẽ kot amnhĩ to sãnti hwỳr o pa xwỳnhjaja. Nẽ ri mẽ hẽx nhi xwỳnhjaja. ã mẽ kot amnhĩ nhĩpêx anhỹr xwỳnh piitã koja mẽ apẽ ixkrajẽ hkĩnhã ma kuwy maati wỳr hapêx par kumrêx. Te axte mẽ htyk pyræk nom koja mẽ axte htyk kêt nẽ. Anẽ.

Jerujarẽ nyw jarẽnh

Sikũn Korĩt 6.16; Karatas 4.26; Eprẽw 12.22-24

9 Tã nhũm mẽ kot xijere pẽ 7 kamã Tĩrtũm gryk xà jamỳnh xwỳnhjẽ hõja hãmri ixwỳr tẽ nẽ inhmã:

—E ma ixkõt tẽ nẽ mẽmoj pumu. Na ra krĩ nywja pika nyw wỳr wrỳk o mẽ. Te mjên mã xwỳnh ẽ mex jaxàr nẽ amnhĩ to muxre nẽ mjên wỳr htẽm pyræk nẽ mex kumrêx nẽ kaxkwa rũm pika nyw wỳr wrỳk o mẽ. Nẽ kot ho mjên mã xwỳnhnta te mẽ pahte amnhĩ tomnuj pãnhã amnhĩrer xwỳnhnta pyræk. E tokyx tẽ nẽ omu. Anẽ.

10 Hãmri nhũm Tĩrtũm Karõ tanhmã ixto pa ma kot inhmã kapêr xwỳnhnta kõt tẽ nhũm ma ixto mẽ nẽ kẽn krã hprêeti hwỳr ixto api nẽ himõk ã ixãm. Pa Tĩrtũm nhõ krĩ mex pẽ Jerujarẽ nywja pumunh o xa. Nhũm mex o mex. ãm hãmri te mjên mã xwỳnh kot ẽ mex jaxàr nẽ

amnhĩ to muxre nẽ mjên wỳr htẽm pyræk nẽ ahpar mã wrỳk o mẽ pa ixprĩ hã omu.

11 Na pre rax o rax nẽ mex o mex. Tĩrtũm kamã pa ho pa jakamã nhũm kamã hirã htỳx kumrêx. Te kẽn mex ã kàxpore xohtõ jaxênh mex tỳx pyræk.

12-13 Nẽ krĩ puhã kahêja hprêk rax nẽ. Nẽ hwỳr mẽ gjêx xà kêp 12. Na pre myt japõx xà rũm axkrunêpxi. Nẽ myt gjêx xà rũm haxwỳja axkrunêpxi. Nẽ akutã kahpa hkõt haxwỳja axkrunêpxi. Nẽ ahpỳnhã hakwakre hã Tĩrtũm kapêr o wrỳk xwỳnhjaja hamãr o kuhẽ. Nẽ hakwa kre piitã hã Ijaew pẽ ahpỳnhã mẽ pikjêr kãm mẽ kêp 12jaja mẽ hixi hã kagã.

14 Nẽ kahẽ xunhwỳr xà hkukamã kẽn pytyrja ahpỳnhã kêp 12. Kẽn pytyrta ã na mẽ kot Jesus nhỹ hã mẽ ahkre o mẽ pa xwỳnh maati pẽ 12jẽ nhĩxi hikwỹ.

15 Tã nhũm kot ixto mõi nẽ inhmã mẽmoj jahkre xwỳnhnta õr o mẽmoj pĩ py nẽ kot ho krĩ ho mẽdi kaxyw xa. Nẽ ho kahẽ piitã ho mẽdi kaxyw. Nẽ mẽ gjêx xàja ho mẽdi kaxyw.

16-17 Hãmri nẽ ho mẽdi hpa. Krĩja ry nẽ kahpa piitã axpên pyræk. Nẽ hprêk piitã mããnên axpên pyræk. Kamã mẽmoj piitã ahpỳnhã kêp 2.200 kirõm. No puhã kahêja hprêk o 64 met pix nẽ.

18 Nẽ kahêja kẽn jaxênh pix o kot amnhĩ nhĩpêx jakamã mex o mex. Nẽ hkarỳr tỳx kumrêx. Nẽ kahẽ hkre kamã krĩ kamã ahpỳnhã ri ixkreja õr pix o kot amnhĩ nhĩpêx. Nẽ piitã hkarỳr tỳx.

19-20 Nẽ kahẽ xunhwỳr xà hkukamã kẽn pytyrta ahpỳnhã ri kẽn mex pix o kot amnhĩ nhĩpêx. Piitã mex kumrêx nẽ hkarỳrti.

Wamta kawax pẽ grãgrãre.

Nẽ hkõt ja kawax pẽ grãgrã kakrã htyk.

Nẽ hkõt ja kakrã htyk.

Nẽ hkõt hõja grãgrã karỳr.

Nē hkôt ja hkamrêk pihkàrti.
 Nē hkôt ja grāgrā kakrā htyk.
 Nē hkôt ja hkamrêk tỳx kumrêx.
 Nē hkôt ja ràrààre.
 Nē hkôt ja grāgrā mē pihkàr.
 Nē hkôt ja ràràr mē pihkàr.
 Nē hkôt ja grāgrā karỳyre.
 Nē hkôt ja kakrā htyk pihkàr.

Ā kēn pytyr mex kot anhyr.

²¹ Nē mē gjêx xà hā hakwakre kahê xà pē 12ja mēmo kēn jakooti rūnh kumrêx pix o. Nē krī kahti hkôt pry nhīkwỳ xwỳnhja ām ôr pix o. Nē hkarỳyre.

²² Pa pre tee ri krī kamā Tirtūm mā amnhī jarēnh xà hā ixkre japēr nhūm amrakati. Mo kaxyw koja mē axte ixkreja hwỳr mra? Ra Pahi Maati Tirtūm xihtỳx xwỳnh mē mē pahte amnhī tomnuj pānhā amnhīrer xwỳnhhta ra hkrajê kamā pa ho pa kēnā kot kêt mē axte ri ixkreta o presija. Koja mē kām wa mex ā wa kām harēnh prām nē nhỳri tām wa hwỳr mra nē ā wa kām kapēr anē. Te mē pahte pahi hwỳr pamrar nē kām pakapērta pyrà nē wa hwỳr mra nē wa kām kapēr.

²³ Nē koja krīja kamā myyti nē mytwrỳre hkêt. Mo kaxyw kot kêt myyti nē mytwrỳreja arī ri hirā ho pa? Krī kamā Tirtūm pa ho pa jakamā kamā hirā mex kumrêx. Nē mē pahte amnhī tomnuj pānhā amnhīrer xwỳnhhta haxwỳja kamā pa ho pa. Te kēp kanē hpôk rax kumrêx pyrà nē hirā mex o pa. Kot hirā mex o kot myyti jakrenh. Ā Tirtūm mē Kra wa krīja kamā pa ho pa jakamā nhūm mē axte myyti ho presija hkêt nē.

²⁴ Koja krī nhō xwỳnhjaja hirā mex pix kām ri pa ho pa nē tām ri amnhī nhīpêx o ri pa. Tā koja mē ho amnhīptār xwỳnhjaja Tirtūm wỳr mra nē amnhī rom kām mex o mex ā harē nē kām:

—Na pre mē ixkwỳjaja mē ixpê mē ho amnhīptār xwỳnh

ā axpēn mā mē inhmex nē mē ixàhpumunh ā ri axpēn mā mē ijarê. Nom mē ixrom amex o amex nē axàhpumunh o axàhpumunh. Jakamā ām hāmri na htem amā amex o amex ā ajarê Tirtūm. Anē.

²⁵ Nē krī hwỳr hakwakre koja amnhī kahê xà rēnh rāhā kuhê nē aa amnhī kahê hkêt nē. Jar mē panhō pika kamā na hte kamāt kaxyw nhūm htem amnhī tā hakwakre kahê hpa. No mo kaxyw koja mē axte pika nywja kamā ā amnhī nhīpêx anē? Koja kamāt kêt nē hirā rāhā ho rāhā jakamā nhūm mē amnhī tā kahê hkêt rāhā nē pa ho pa.

²⁶ Nē koja mē piitā Tirtūm wỳr mra nē kām mex o mex ā harē nē kām:

—Pa Tirtūm. Hêxta waa nē. Anhō krīja mex kumrêx. Mex o mex. Nē mē ixrom amex o amex nē axihtỳx o axihtỳx. Nē mē ixrom axàhpumunh o axàhpumunh. Ām hāmri na ka ra mē ixpê akrajê kamā apa ho apa Tirtūm. Anē.

²⁷ Nē koja mēmoj punuj krīja wỳr gjêx kêt kumrêx. Mē hpijaām kêt xwỳnhjaja nē ri mē hêx xwỳnhjaja hwỳr gjêx kêt nē. Ām mē pahte amnhī tomnuj pānhā amnhīrer xwỳnhhta nhō kagā kamā Tirtūm ri mē htīr tūm nē mē pa mā xwỳnhjê nhīxi nhīpêx xwỳnh pixjaja koja mē hwỳr agjê nē kamā pa ho pa.

22

¹⁻² Tā pa pre axte mēmoj pumu. Nhūm Tirtūm kapēr o wrỳk xwỳnhja axte inhmā mēmoj jahkre. Nhūm Tirtūm mē kot mē pahpānhā amnhīrer xwỳnhja wa kot mē ho amnhīptār ā hkrī xà maati rūm pyhti hprôt. Krī kahti hkôt pry pohti nōr xwỳnhhta kahti hkôt hprôt o nō. Pyhti kamā gōja na htem ho ixkō nē htīr tūm nē pa ho pa. Gō karyyre. Nhūm mēmo pī hpār muxre xwỳnhja akutā hijê nē xa. Pī

xôja na htem kuwô nê htîr tûm nê pa ho pa. Na hte apkati mê ô rãhã nê kuhê. Nê axtem hôja mê piitã mê mex nê à hkêt kaxyw na hôja.

³ Amnepêm na pre Tirtûm Atãw mã kapêr nê kãm:

—Ate amnhî tomnuj mÿrapê kot paj tanhmã pika homnu hto nhûm apê mex kêt nê. Ka kamã apur nê kamã axapênh rûnh o apa rãhã nê rî kormã kamã axâpkur o ri apa. Apê jamnuj tâ kot kaj mê ã amnhî nhîpêx anhÿr o apa rãhã ty. Anê.

Tã ra Tirtûm nhõ krî nyw kamã mê omnuj xãja amrakati kumrêx. Nê Tirtûm mê kot mê pahpãnhã amnhîrer xwÿnhta wa ô krî kamã pa ho pa jakamã mê pahte kamã mê papa xwÿnhjaja kot puj mê wa kãm tanhmã amnhî nhîpêx to ho ri papa.

⁴ Kot puj mê tâ pano ho Tirtûm pumunh o papa. Hãmri nhûm te mê pahpiitã mê panhõkrã hã amnhî nhîxi nhîpêx pyrãk o mê panhîpêx.

⁵ Nê kot puj mê Pahi Maati Tirtûm nhîrã kamã ri papa nê axte myyti nhîrã ho presija hkêt nê. Koja kamãt hapêx pa pu mê axte kanê ho presija hkêt nê. Nê Jejus nhîhkô hã hirã kamã mêmoj to amnhîptãr rãhã ho papa.

Jejus tokyx akupÿn wrÿk ã harênh Apokarip 1.1-3

⁶ Tã nhûm Tirtûm kapêr o mê wrÿk xwÿnh kot ixto mör xwÿnhta axte inhmã kapêr nê inhmã:

—E nã ãm hãmri na ixte amã mêmoj piitã harênh xwÿnhja. ãm hãmri na. Jakamã kwa kêr ka arî hã ano htÿx rãhã ho apa. Amnepêm Tirtûmja ÿ hã mê kapêr o pa xwÿnhjê mã tanhmã kapêr o amnhîrit to. Kot tanhmã amnhî nhîpêx to hkukamã mê kãm ho amnhîrit nhûm prem kuma nê ô ri ma hkwÿjê mã harênh o ri mê hkôt pa. Tã ra mê hpãnhã pa mê awÿr inhmê. Mê ate Tirtûm mã tanhmã amnhî to ho apa xwÿnhjê mã ixte ja

jarênh kaxyw Pahihti Tirtûmja mê awÿr inhmê pa wrÿ. Nã koja mêmoj tokyx ã amnhî nhîpêx anê. ⁷ Na pre Jejus mê amã amnhî jarênh o: “Kot paj tokyx akupÿm mê awÿr wrÿ. Tã mê ate ijarênh ã kagã kamã harênh nê mar nê amnhî kaxyw hkôt ajamaxpêr nê hkôt amnhî nhîpêx xwÿnhjaja kot kaj mê akînh nê ri apa.” Anhÿr o amnhî jarê. Anê.

⁸ Nã ixpê Juãw na pa pre ã inhno ho mêmoj pumunh anê. Hãmri nê omunh pa nê Tirtûm kapêr o wrÿk xwÿnh kot inhmã harênh xwÿnhta kutã ixkôn krã ho ixtêm nê inhÿr kaxyw. Nom nhûm amnhî nê inhmã kapêr kãm hihtÿx nê inhmã:

⁹ —Kwa nã ri ã inhîpêx anhÿr kêt nê. ãm Tirtûm pix kutã na pu htem ã amnhî nhîpêx anê. Apyrà nê ixpê Jejus kwÿ kênã. Na pa hte apyrã nê ÿ hã tanhmã amnhî nhîpêx to ho ixpa. Nê mê apyrã nê kapêr ã kagã hkôt pix mã amnhî nhîpêx. Na pu htem axpên kutã pahkôn krã ho parôrok kêt nê. ãm Tirtûm pix kutã na pu htem ã amnhî nhîpêx anê.

¹⁰ —E ã ate mêmoj pumunh nê mar anhÿr xwÿnhja koja tokyx ã amnhî nhîpêx anê. Jakamã kwa kêr ka akwÿjê pê ho apimxur kêt nê. Piitã hã kagã hpa kê mê kamã harê nê kuma nê mêmoj kot ã amnhî nhîpêx anhÿr mã xwÿnhta piitã hkukamã harênh ma. Koja tokyx mêmoj ã amnhî nhîpêx anê.

¹¹ —Jakamã kwãr mê mãmrî piitã tanhmã kãm amnhî nhîpêx to ho pa hprãm xã hkôt amnhî nhîpêx o pa. Kwãr mê mê kot amnhî tomnuj xwÿnhjaja ã amnhî anhîpêx anhÿr o pa. Nê kwãr mê kot tanhmã kapêr punuj to xwÿnhjaja mãmrî ã amnhî nhîpêx anhÿr o pa. Nê kwãr mê kot tãm amnhî nhîpêx o ri mê pa xwÿnhjaja mãmrî Tirtûm kôt pix mã ri tãm amnhî nhîpêx o pa. Anê.

Nhûm pre ã kaxkwa hwÿr ixto àpir xwÿnhta inhmã kapêr anê.

12 Hāmri nhūm hpānhā Jejus tām inhmā kapēr nē inhmā:

—E kot paj tokyx akupŷm mē awŷr wrŷ. Nē akupŷm pōj hāmri nē mē kot amnhī tomnuj o mē pa xwŷnhjaja pa ja mŷrapē ma mē kot amnhī xà htŷx kamā hamak tūm xàta wŷr mē rēnh pa. No mē kot ixkôt amnhī nhīpēx xwŷnhjaja kot paj akupŷn inhō krī hwŷr amnhī kôt mē ho api.

13 —Nē ixrāhāã xwŷnh na pa. Amnepē mā kormā mēmoj kêt ri na pa pre ra ixrāhāã. Nē koja nhŷrmā mēmoj piitā akupŷm hapēx pa arī ixrāhā nē ixpa ho ixpa.

14 —Nē Tirtūm kot mē anē mē ate amnhī tomnuj kuhōnh par xwŷnhjaja kot kaj mē amex kumrēx nē apa ho apa. Nē akīnh nē ajamakêtkati nē ri atŷx apa ho apa. Te ho mē kot amnhī xē kahōnh nē mex jagiēnh nē ri hā pata pyrāk. Koja Tirtūm mē amā anē ka mē ajamakêtkati nē ō krī hwŷr agjē nē kamā ri amex kumrēx nē ri apa ho apa. Nē kamā mēmo pī xō mē kot kur nē htŷr tūm nē pa mā xwŷnhhta wŷr mra nē amnhīm ō rē nē hkur o ri apa. Ra mē ate Jejus kôt amnhī xunhwŷr jakamā kot kaj mē axamnhīx hwŷr mra nē amnhīm hkwy rē nē hkur o ri apa. Kot kaj mē ã amnhī nhīpēx anē.

15 —Nom mē kot amnhī tomnuj o mē pa xwŷnhjaja koja mē akīnhā inhō krī hwŷr gjēx kêt nē. Mē kot ri mē y ho mē pa xwŷnhjaja. Nē mē kot nhām ri mēnijē ho amnhīkati ho mē pa xwŷnhjaja. Nē mē kot ri mē hpar o mē pa xwŷnhjaja. Nē mē kot ri sānti nhīpēx o te Tirtūm nhīpēx pyrāk o mē pa xwŷnhjaja. Nē mē kām ri hēx prām o ri mē pa xwŷnhjaja. Koja mē akīnhā inhō krī hwŷr pa hkêt nē.

16 —E Juāw. Nà ixpē Jejus na pa awŷr ixkapēr o mē wrŷk xwŷnhhta mē. Kot ixkwŷjē kaxyw amā ixkapēr jarēnh kaxyw. Ixpē Tawi pâr krax na pa. Te ixpē arīgro hkôt

kanhēti hpōk rax kot arīgro ho mōr ã ho amnhīrit xwŷnhhta pyrāk. Anē.

Nhūm pre ã Jejus inhmā kapēr anē. 17 Tirtūm Karō mē Jejus kwŷjaja na htem ã Jejus kot amnhī jarēnh anhŷrja ma nē hkīnh nē. Nē kām kapēr o:

—Hēxta waa nē. Kwa amnhīm anojarēt nē tokyx akupŷn mē ixwŷr wrŷ Pahihti. Pa mē tokyx ã amnhī nhīpēx anhŷr o ri war akôt ixpa. Anē.

Nē mē ate ja mar xwŷnhjaja kêt ka mē urāk nē ã kām akapēr anē.

Nē te mē amā kōr nē ri mē apa pyrāk xwŷnhjaja kêt ka mē te Jejus wŷr amrar nē ō gō ho akōm pyrā nē hkôt amnhī xunhwŷ. Te Jejus amarī mē pamā ō gō nhōr pyrāk o mē panhīpēx pu mē hkôt amnhī xunhwŷ nē ra pahpē pahŷr tūm nē papa mā xwŷnh. Hāmri nē amnhī pānhā tanhmā kām amnhīrer to hkêt nē.

Nhŷrmā mēmoj nyw par ã harēnh jatur xà

18 E ixpē Juāw na pa Jejus nhŷ hā mē amā mēmoj tanhmā kot amnhī nhīpēx to hkukamā ã mē amā hā kagā anē. Tā kwa mē o kora. Kêt ka mē atō amnhī krā hkôt ri ajamaxpēr o te ho ja pyrā nē hijuk ri axte mēmoj nhīpēx kêt nē. Am kwarī ho kwarī. Kot ka mē atō anē nhūm Tirtūm ja hā apumu nē kagāja kamā tanhmā mē hipēx kati hto xàta o tanhmā anhīpēx to ka arī amnhī pumu.

19 Rŷ ka mē atō kagā kamā harē nē ama nē tanhmā ajamaxpēr to nē ajamaxpēr o:

—Nà ja kot anhŷr kêt. Na mē ãm harēnh o hēx. Kot paj kuma nē ãm kuma.

Anhŷr o ajamaxpēr japēr. Hāmri nhūm Tirtūm amnhī tā ama nē kagā mexta kamā kot tanhmā mē ho mex toja o ato mex kêt nē. Ka ō krī hwŷr axāpir nē mēmo pī xō mē kot hkur nē htŷr tūm nē pa kaxyw mā xwŷnhhta ka amnhīm hō hyr nē

hkrēr kêt nē. Jakamā e kwa mē o kora. Kêr ka mē kagàta kamā ā mēmoj kot amnhĩ nhĩpêx anhỹr mā xwỳnh̄ta jarēnh̄ ma nē aprĩ hã piitã hkôt ajamaxpēr tỳx rãhã ho ri apa.

²⁰ E Jejus kot inhmã mēmoj kukamã tanhmã ujarēnh̄ to xwỳnh̄ta na pre inhmã amnhĩ jarēnh̄ o: “Kot paj tokyx akupỹn mē awỳr wrỳ.” Anē. Ām hãmri na pre ā amnhĩ jarēnh̄ anē. Koja tokyx akupỹn mē pahwỳr wrỳ hãmri nhũm mēmoj piitã mex o mex.

Jakamā kwa kêr ka amnhĩm anojarêt nē tokyx akupỹn mē ixwỳr wrỳ Pahihti Jejus.

²¹ Nē ixpyrà nē mē apê Tĩrtũm krajaja na pa hte mē ato Pahihti Jejus wỳr rãhã ho ri ixpa nē kãm:

—Kwa akwỳjê pumu nē mē kutã anojarêt rãhã ho ri apa Pahihti. Anē.

E mē ujarēnh̄ja na hapêx. Ixpê Juãw na pa Jejus kot inhmã tanhmã ujarēnh̄ toja pa amnhĩ xô ri mē amã hã kagà hpa. E na hapêx.